


Tnúhu ní cáhá<sup>n</sup> yă  
ndiöxí xito cùu uú



New Testament in Mixtec, Peñoles (MX:mil:Mixtec, Peñoles)

# Tnúhu ní cáhá<sup>n</sup> yă ndiõxí xito cùu uú

## New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

### Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files dated 29 Jan 2022  
872f7754-0986-5eccd-a059-925a708a6939

## Contents

SAN MATEO . . . . .	1
SAN MARCOS . . . . .	55
SAN LUCAS . . . . .	88
SAN JUAN . . . . .	140
LOS HECHOS . . . . .	175
ROMANOS . . . . .	222
1 CORINTIOS . . . . .	244
2 CORINTIOS . . . . .	266
GÁLATAS . . . . .	280
EFESIOS . . . . .	288
FILIPENSES . . . . .	296
COLOSENSES . . . . .	301
1 TESALONICENSES . . . . .	306
2 TESALONICENSES . . . . .	311
1 TIMOTEO . . . . .	314
2 TIMOTEO . . . . .	320
TITO . . . . .	324
FILEMÓN . . . . .	327
HEBREOS . . . . .	328
SANTIAGO . . . . .	345
1 PEDRO . . . . .	350
2 PEDRO . . . . .	356
1 JUAN . . . . .	360
2 JUAN . . . . .	365
3 JUAN . . . . .	366
JUDAS . . . . .	367
APOCALIPSIS . . . . .	369

## TNÚHU NÍ CHÍDÓ TNÙNÍ TÈ MÀTEÚ

*Nchaa cue tée ní xíndecu ndéé sanaha cùtnàhá vátá quixí-gá Xítohó Jesucristú (Lc. 3:23-38)*

<sup>1</sup> Te ñani tnàhá Xítohó Jesucristú ní cuu ndí Dàví ndihí ndí Àbrahám, cue tée ní xíndecu ndéé sanaha vihi-gá ñuyíú-a. Te duha ndùu cuendá dava-gá cue tée ní cuu ñani tnàhá-gá ní xíndecu ndéé sanaha.

<sup>2</sup> Ndí Àbrahám ní xóo ìª dehe ndí, te ndí-án ní xínani ndí Isàác. Te dehe ndí Isàác-án ní cuu ndí Jácób, te dehe ndí Jácób-án ní cuu ndí Jùdá, te ñu-ni ndí Jácób-án ní cuu tátá dava-gá cue ñani ndí Jùdá-án. <sup>3</sup> Te dehe ndí Jùdá-án ndihí ñadihí ndí, ndí Tàmár ní cuu ndí Fàrés ndihí ndí Zàrá. Te dehe ndí Fàrés-án ní cuu ndí Èsróm, te dehe ndí Èsróm-án ní cuu ndí Àrám. <sup>4</sup> Te dehe ndí Àrám-án ní cuu ndí Aminadáb, te dehe ndí Aminadáb-án ní cuu ndí Nàsón, te dehe ndí Nàsón-án ní cuu ndí Sàlmón. <sup>5</sup> Te ñadihí ndí Sàlmón-án ní xínani-a Ràháb, te ní xóo ìª dehe-yu ní xínani-dè Bòóz. Te ñadihí ndí Bòóz-án ní xínani-a Rùt, te ní xóo ìª dehe-yu ní xínani-dè Obéd, te dehe ndí Obéd-án ní cuu ndí Isàí. <sup>6</sup> Te dehe ndí Isàí-án ní cuu ndí Dàví tée ní xíndaha ñaha xii cue ñayiu isràèl. Te dehe ndí Dàví-án ndihí ñadihí ndí ní cuu ndí Salòmón. Te díhna-gá ndí Ùriás ní cándeca ndí ñadihí-án te dàtnùni ní naqueheª ñaha ndí Dàví-án.

<sup>7</sup> Te dehe ndí Salòmón ní cuu ndí Ròboám, te dehe ndí Ròboám-án ní cuu ndí Abiás, te dehe ndí Abiás-án ní cuu ndí Àsá. <sup>8</sup> Te dehe ndí Àsá-án ní cuu ndí Josáfát, te dehe ndí Josáfát-án ní cuu ndí Jòrám, te dehe ndí Jòrám-án ní cuu ndí Ùziás. <sup>9</sup> Te dehe ndí Ùziás-án ní cuu ndí Jótám, te dehe ndí Jótám-án ní cuu ndí Àcáz, te dehe ndí Àcáz-án ní cuu ndí Ezèquiás. <sup>10</sup> Te dehe ndí Ezèquiás-án ní cuu ndí Manásés, te dehe ndí Manásés-án ní cuu ndí Àmón, te dehe ndí Àmón-án ní cuu ndí Jòsiás. <sup>11</sup> Te dehe ndí Jòsiás-án ní cuu ndí Jecóniás. Te ñu-ni ndí Jòsiás-án ní cuu tátá nchaa dava-gá cue ñani ndí Jecóniás-án. Te dáva-án ní quide yica cue tée ñuú Babiloniá ndécá-güedè ñayiu isràèl cuáhánª ñuú-güedè cuendá yacª cundecú-yu.

<sup>12</sup> Te sáta ní yáha ducaª ní cuu, te ndí Jecóniás ní xóo ìª dehe ndí ndihí ñadihí ndí, te tée-án ní xínani-dè Salatiél. Te dehe ndí Salatiél-án ní cuu ndí Zorobàbél. <sup>13</sup> Te dehe ndí Zorobàbél-án ní cuu ndí Abiúd, te dehe ndí Abiúd-án ní cuu ndí Eliáquím, te dehe ndí Eliáquím-án ní cuu ndí Àzór. <sup>14</sup> Te dehe

ndí Àzór-án ní cuu ndí Sàdóc, te dehe ndí Sàdóc-án ní cuu ndí Àquím, te dehe ndí Àquím-án ní cuu ndí Èliúd. <sup>15</sup> Te dehe ndí Èliúd-án ní cuu ndí Eleázár, te dehe ndí Eleázár-án ní cuu ndí Mátán, te dehe ndí Mátán-án ní cuu ndí Jácób. <sup>16</sup> Te dehe ndí Jácób-án ní cuu ndí Chéè tée ní cuu yii tá Màriá xíchí ní cuu náná Jèsús Yáá ní tendaha Dütú Ndiòxí ní quixi ñuyíú-a.

<sup>17</sup> Te sa ní cuu úxúú tnàhá cue tée cùu ñani tnàhá ndí Àbrahám ndécú dáva-án, te dàtnùni ní cacu ndí Dàví ñu-ni ñani tnàhá ndí. Te núú tnàhá meé ndí Àbrahám ndihí ndí Dàví ní cuu úxícúmi tnàhá-güedè. Te ducaª te sa ní xínu úxícúmi-gá tucu-güedè ní cacu, te dàtnùni ní tñi ñaha cue tée ñuú Babiloniá xii ñayiu isràèl ndécá ñaha-güedè xii-yu cuáhánª ñuú-güedè cuendá yacª cundecú-yu. Te sáta ní yáha sá dúcª ní cuu, te ní cacu úxúni tucu cue tée ní cuu ñani tnàhá ndí Àbrahám ndihí ndí Dàví, te dàtnùni ní cacu Xítohó Jesucristú ñuyíú-a. Te núú tnàhá meé-gá ní cuu úxícúmi tnàhá-güedè.

*Ní cacu Jèsús (Lc. 2:1-7)*

<sup>18</sup> Te duha ní cuu cùtnàhá ní cacu Xítohó Jesucristú, chí dáva-án ní xíndecu ìª xíchí cuéchi ní xínani Màriá. Te xíchí-án sa ní cundáá tnúhu sá tnàndaha-xi ndihí ìª tée nani Cheé. Te cùmání-gá tnàndaha-xi ndihí tée-án te Espiritú Yá Ndiòxí ní quide ní ngúhuª dehe-xi. <sup>19</sup> Te té Chéè tée cuini candeca ñaha xii xíchí-án ní cutnùni iní-dé sá ñúhú dehe-xi. Te cùu-dé ìª tée quide ndáá, núu xiª duuª duuª ní sani iní-dé sá vª tnàndaha-gá-dé ndihí-xi, te dicó-ni sá ñà túú ní cáhánª-dé chí ní cuini-dé sá vª cáhánª cuèhé cáhánª duha ñayiu cuendá-xi. <sup>20</sup> Te sáta dúcª ní sani iní-dé te ní ngáva-dé ní xidí-dé, te núú sání-dé ní sáhánª ìª espíritú xínú cuèchi núu Yá Ndiòxí ní xáha-xi xii-dé:

–Yòhó té Chéè tée cùu ñani tnàhá ndí Dàví, yúhú cächí tnúhu-í xii-n sã ñà túú nã cani iní-n, tnàndaha nahi-ni-n ndihí tá Màriá cuèi ñúhu dehe-xi, chí mee Espiritú Yá Ndiòxí ní quide-xi ducaª ní ngúhuª dehe-xi. <sup>21</sup> Te na cacu dehe-xi-án te danani-n-dé Jèsús. Te ducaª cùnani-dé, chí tée-án cada-dé cuendá sá vª cundécú-gá cue ñani tnàhá-dé ñayiu isràèl ichi cuèhé ichi duha –duha ní xáhaª espíritú-án xii té Chéè-án núu sání-dé.

<sup>22</sup> Te ducaª ní cuu chí ní quee ndáá-xi nàcuáa ní xáhaª Yá Ndiòxí xii ìª tée ní cáhánª tnúhu-gá ndéé sanaha. Te tée-án ní chídó tnùn-dé núú tütú-gá nàcuáa ní xáhaª-gá xii-dé, te duha ní xáhaª-gá:

<sup>23</sup> Cundecu ìª xíchí cuéchi ndéè cuèè-gá. Te òré ndécú íi-xi vátá ñihí-gá yii-xi te ngúhuª dehe-xi.

Te òré nã cacú dehe-xi te danani ñahá-yu Emànuél.

Duha ní xáha<sup>n</sup>-gǎ xii téé-á<sup>n</sup> ní chídó tnùní-dé núú tütú-gǎ. Te tnúhu Emànuél-á<sup>n</sup> quée-xi: Yá Ndióxi ndécú ndihi-o. Núu xiá<sup>n</sup> duca<sup>n</sup> ní cuu vitna.

<sup>24</sup> Te òré ní ndiquíú iní té Chèé-á<sup>n</sup> te ní quide-dé nàcuáa ní xáha<sup>n</sup> espíritu-á<sup>n</sup> xii-dé chí ní tnándaha-dé ndihi tá Màriá. <sup>25</sup> Dico ndi díí<sup>n</sup> ní xíndecú-yu ndéé ní sáá nduu ní cacu déhe-xi. Te òré ní cacu déhe-xi-á<sup>n</sup> te ní dánání ñaha-dé Jèsús.

## 2

### *Cue téé cuángoto ñaha xii Jèsús*

<sup>1</sup> Te Jèsús ní cacu-gǎ íí<sup>n</sup> ñúú nání Bèlén, te ñúú-á<sup>n</sup> yíndèhu-xi distritú Júdeá. Te dàvǎ-á<sup>n</sup> cùnùu té Hèrodés yíndaha-dé ñáyíu. Te ñúú Jerusálén ní quexio cue téé véxi ndáa xio nacuaá quène nchíanchii, cue téé túha dàcuaha cuendá nchaa sá ndéé andiú. <sup>2</sup> Te ndücu tnúhu-güedé núú ñáyíu ñúú-á<sup>n</sup>, te xáha<sup>n</sup>-güedé:

—¿Vǎ cündèe iní-ndó cǎchí tnúhu-ndo ndéé ndécú téé quíndaha ñaha xii ñáyíu isràél-á<sup>n</sup>? Chi ní xiní-ndí ní quene chódíní-dé ndáa xio nacuaá quène nchíanchii, núu xiá<sup>n</sup> véxi-ndí chí cuini-ndí quini-ndí-dé te chíñuhu-ndí-dé —cǎchí-güedé xáha<sup>n</sup>-güedé xii-yu.

<sup>3</sup> Te òré ní níhí téé cùnùu nani Herodés tnúhu sá ndúcú tnúhu cue téé-á<sup>n</sup> ndéé ndécú téé quíndaha ñaha xii ñáyíu isràél, te ñá túú tnàhí ní cùu váha iní-dé, te diu-ní duca<sup>n</sup> ñá túú ní cùu váha iní tnàhá nchaa ñáyíu ñúú-á<sup>n</sup>. <sup>4</sup> Te ní cana-dé cue téé cùu dútú cùnùu, ndihi cue téé dàcuaha ñaha xii ñáyíu nchaa tnúhu ní chídó tnùní ndí Moisés, te ní xicá<sup>n</sup> tnúhú-dé núú-güedé núu xiní-güedé ndéé cacu Cristú téé tendaha Yá Ndióxi quixi ñuyíu-a. <sup>5</sup> Te ní xáha<sup>n</sup>-güedé xii-dé:

—Íí<sup>n</sup> ñúú yíndèhu distritú Júdeá cacu-dé, te ñúú-á<sup>n</sup> nání-xí Bèlén, chí quee ndáá-xi nàcuáa ní xáha<sup>n</sup> Yá Ndióxi xii íí<sup>n</sup> téé ní xóo cǎhá<sup>n</sup> tnúhu-gǎ ndéé sanaha. Te duha ndüu tnúhu ní chídó tnùní-dé núú tütú-gǎ:

<sup>6</sup> Núú Bèlén cúu-xí íí<sup>n</sup> ñúú líhí yíndèhu distritú Júdeá, te ío-gǎ cùnùu-xi dacúúxí dàva-gǎ ñúú cùnùu yíndèhu distritú-á<sup>n</sup>,

chí diu ñúú-á<sup>n</sup> quee íí<sup>n</sup> téé ío cùnùu.

Te téé cùnùu-á<sup>n</sup> quíndaha-dé ñáyíu cùu cuendá-í ñáyíu isràél.

Duha ní xáha<sup>n</sup>-gǎ xii téé ní xóo cǎhá<sup>n</sup> tnúhu-gǎ, te duca<sup>n</sup> ní chídó tnùní-dé núú tütú-gǎ —cǎchí-güedé xáha<sup>n</sup>-güedé xii téé Hèrodés.

<sup>7</sup> Te sǎtá dúcǎ<sup>n</sup> te téé Hèrodés dayuhu ní cana-dé cue téé ndücu tnúhu núu ndéé ní cacu téé quíndaha ñaha xii ñáyíu isràél, te ní xicá<sup>n</sup> tnúhú-dé núú-güedé ná nduu cùu-xi

nduu díhna nuu ní xiní-güedé chódíní. <sup>8</sup> Te sǎtá dúcǎ<sup>n</sup> te ní xáha<sup>n</sup>-dé xii-güedé:

—Chí cuáhá<sup>n</sup> ñúú Bèlén te nducu tnúhu váha-ndo núu ndéé ní cacu téé duca<sup>n</sup> quíndaha ñaha xii ñáyíu isràél. Te òré ná nàníhí-ndó-dé te quixi-ndo cǎchí tnúhu-ndo cuendá quíhí<sup>n</sup>-í tnàhá-í chíñuhu-í-dé —cǎchí-dé xáha<sup>n</sup>-dé xii-güedé.

<sup>9</sup> Te sǎtá dúcǎ<sup>n</sup> ní xáha<sup>n</sup> té Hèrodés-á<sup>n</sup> te ní xica-güedé cuáhá<sup>n</sup>-güedé. Te chódíní ní xiní-güedé ní quene ndáa xio nacuaá quène nchíanchii-á<sup>n</sup> yòdo nuu-di núú-güedé cuáhá<sup>n</sup>. Te ní ngúíñí chódíní-á<sup>n</sup>, te núú ní ngúíñí-di-á<sup>n</sup> yíndáá núú ndécú Jèsús. <sup>10</sup> Te òré ní xiní cue téé-á<sup>n</sup> ní ngúíñí chódíní-á<sup>n</sup> núú yíndáá ndécú-gǎ, te ní cudíí víhí iní-güedé. <sup>11</sup> Te duca<sup>n</sup> te ní quexio-güedé ndéé núú cǎá vèhe ndecu Jèsús. Te òré cuánguihu-güedé xití vèhe te ní xiní-güedé Jèsús ndécú-gǎ ndihi náná-gǎ Màriá. Te ní ngúíñí xití-güedé, te ní ngúíta-güedé ní cǎchí-güedé sǎ ío cǎhnu cuu Jèsús. Te dátñúni ní nacaá<sup>n</sup>-güedé cǎjá xínehe-güedé, te ní tava-güedé díhú<sup>n</sup> cuáá<sup>n</sup>, ndihi dusa sǎ ío váha sǎhá<sup>n</sup> tnámí nàni insiensú, ndihi yécú sǎ nání mirrá ní taxi ndecu-güedé núú Jèsús cuendá cuu-xi íí<sup>n</sup> táhú sǎ cúu-xí-gǎ. <sup>12</sup> Te Yá Ndióxi ní cǎhá<sup>n</sup>-gǎ núú sǎni-güedé, te xáha<sup>n</sup>-gǎ xii-güedé sǎ vá náyáha-gǎ-güedé cǎhá<sup>n</sup> ndihi-güedé té Hèrodés. Núu xiá<sup>n</sup> cue téé-á<sup>n</sup> cuánuhú-güedé ingǎ ichi, te ñá túú-gǎ ní náyáha-güedé núú ndécú téé Hèrodés.

### *Cuáhá<sup>n</sup>-yu ndihi Jèsús nàció<sup>n</sup> Ègíptú*

<sup>13</sup> Te sǎtá ní yáha cuánuhú cue téé ní sǎngoto ñaha xii Jèsús, te ní quexio íí<sup>n</sup> espíritu xínú cuèchi núú Yá Ndióxi núú sǎni té Chèé, te xáha<sup>n</sup>-xi xii-dé:

—Véxi-í cǎchí tnúhu-í xii-n sǎ ndácóo-n, te ndee-n ñúú-a ndihi Jèsús, ndihi náná-gǎ cunu-ndo quíhí<sup>n</sup>-ndó nàció<sup>n</sup> Ègíptú, chí té Hèrodés tendaha-dé cue téé quixi nanducu ñaha xii Jèsús cuendá cǎhni ñaha-güedé. Te yácá<sup>n</sup> cundecu-ndo ndéé cǎchí tnúhu-í xii-n ndüu ndixi-ndo —cǎchí espíritu-á<sup>n</sup> xáha<sup>n</sup>-xi xii té Chèé núú sǎni-dé.

<sup>14</sup> Te té Chèé-á<sup>n</sup> ní ndácóo-dé, te níu ní xica-dé ndihi tá Màriá ndécá-yu Jèsús cuáhá<sup>n</sup> nàció<sup>n</sup> Ègíptú. <sup>15</sup> Te nàció<sup>n</sup> Ègíptú-á<sup>n</sup> ndécú-yu ní xíhí té Hèrodés. Te duca<sup>n</sup> ní cuu chí ní quee ndáá-xi nàcuáa ní cǎchí íí<sup>n</sup> téé ní xóo cǎhá<sup>n</sup> tnúhu Yá Ndióxi ndéé sanaha ní quide-dé núú-gǎ ní cǎhá<sup>n</sup>-dé yuhu-gǎ, te duha ní xáha<sup>n</sup>-gǎ ní cǎhá<sup>n</sup>-dé: “Nàció<sup>n</sup> Ègíptú ndécú Dèhe-í ní cùu, te ní xáha<sup>n</sup>-í xii-dé sǎ ndéé-dé ñúú-á<sup>n</sup> vǎ cündècu-gǎ-dé”, duha ní xáha<sup>n</sup>-gǎ xii téé ní cǎhá<sup>n</sup> tnúhu-gǎ ní quide-dé núú-gǎ.

*Té Hèrodés ní táuchúú<sup>n</sup>-dé cǎhni-güedé cue landú*

<sup>16</sup> Te cue tée ní sángoto ñaha xii Jesús ní dándàhú-güedé té Hèrodés, chí ñá túú ní nàyáha-güedé cúnñaha-güedé sá ní naníhí-güedé Jèsús. Te sáta ní cutnùní iní té Hèrodés sá ní dándàhú ñáhá-güedé xii-dé te ní cudéé<sup>n</sup> víhí-dé, te ní tendaha-dé cue tée cuahá<sup>n</sup> ñuú Belén, ndihí nchaa dava-gá ñuú cáá yàtni xíá<sup>n</sup> cuendá cahni-güedé mee-ni cuè landú tée. Te ndéé cue landú íchí ní cacu, ndihí ndéé cue landú sa ní nútahá úú cuíá-xi nchaa-güexi cahni-güedé ní xáha<sup>n</sup>-dè. Te duca<sup>n</sup> ní quide-dé chí ní quide cuendá-dé nàcuáa ndùu tnúhu ní xáha<sup>n</sup> cuè tée ní sángoto ñaha xii Jesús nduu ní xiní-güedé chódíní, núu xíá<sup>n</sup> duca<sup>n</sup> ní táuchíú<sup>n</sup>-dè ní quide cue tée-á<sup>n</sup>. <sup>17</sup> Te duca<sup>n</sup> ní cuu chí ní quee ndáá-xi nàcuáa ní cachí ndí Jeremías tée ní xóo cáhá<sup>n</sup> tnúhu Yá Ndióxi ndéé sanaha, te duha ní cachí ndí:

<sup>18</sup> Ní tecú ndáhí víhí ñáyíu ñuú Rámá sá ndihú iní-yu,

te ñáyíu xindáhyú-á<sup>n</sup> cùú-yu ñaní tnáhá tá Ràquél, te ndáhyú-yu cuendá sá ní xíhí déhe-yu.

Te ñáyíu-á<sup>n</sup> ñà túú ní cuiní-yu dàñá-yu sá ndihú iní-yu cuendá sá ní xíhí déhe-yu.

Duha ní cachí ndí Jeremías.

<sup>19</sup> Te sáta ní xíhí té Hèrodés te ní sáhá<sup>n</sup> tucu espíritú xínú cuèchi núú Yá Ndióxi núú sání té Chèè òré ndécú-dé nàció<sup>n</sup> Ègíptú, te ní xáha<sup>n</sup>-xi xii-dé:

<sup>20</sup> —Véxi tucu-í càchí tnúhu-í xii-n sá ndácóo-n, te núhú-n ndihí Jesús ndihí náná-gá ñuú cue ñaní tnáhá-n ñáyíu isràél cundecu-ndo, chí sa ní xíhí cue tée cuiní cahni ñaha xii Jesús ní cùu —cachí espíritú-á<sup>n</sup> xáha<sup>n</sup>-xi xii té Chèè núú sání-dé.

<sup>21</sup> Te té Chèè-á<sup>n</sup> ní ndacóo-dé, te ní ndee-dé ndihí Jesús ndihí náná-gá cuánuhú-yu ñuú cue ñáyíu isràél ñáyíu cùu ñaní tnáhá-yu. <sup>22</sup> Te té Chèè ní níhí-dé tnúhu sá té Arquelaú ní nucúnutnii-dé núú tátá-dé té Hèrodés distritú Jùdeá yíndàha-dé ñáyíu. Te ní yùhú té Chèè-á<sup>n</sup>, te ñá túú ní cuiní-dé quíhí<sup>n</sup>-dé cundecu-dé distritú-á<sup>n</sup>. Te Yá Ndióxi ní cáhá<sup>n</sup>-gá núú sání-dé, te ní xáha<sup>n</sup>-gá xii-dé sá quíhí<sup>n</sup>-dé distritú Galileá, núu xíá<sup>n</sup> yá cá<sup>n</sup> cuahá<sup>n</sup>-yu. <sup>23</sup> Te òré ní quexió-yu distritú Galileá, te ní sáhá<sup>n</sup>-yu ñuú ñaní Nàzarét ní xíndecú-yu. Te duca<sup>n</sup> ní cuu chí ní quee ndáá-xi nàcuáa ní cachí cue tée ní xóo cáhá<sup>n</sup> tnúhu Yá Ndióxi ndéé sanaha sá Jèsús cuu-gá tée ñuú Nazarét.

### 3

*Té Juáá tée dàcuandute ñaha xii ñáyíu cáhá<sup>n</sup>-dé tnúhu Yá Ndióxi xití yucu*  
(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Te ní xica nduu sá dúcá<sup>n</sup> ní cuu, te tée nani Juaá tée dacuandute ñaha xii ñáyíu ní quexio-dé yucu distritú Jùdeá cáhá<sup>n</sup>-dé tnúhu Yá Ndióxi núú ñáyíu xití yucu-á<sup>n</sup>. <sup>2</sup> Te xáha<sup>n</sup>-dè xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo ncháa ichi cuehé ichi duha, chí sa ní cuyatni nduu ndihú ndaha ñaha Yá Ndióxi xii-ndo —càchí-dé xáha<sup>n</sup>-dè xii-yu.

<sup>3</sup> Te diu cuendá té Juáá-á<sup>n</sup> ní chídó tnùní ndí Chàíá tée ní xóo cáhá<sup>n</sup> tnúhu Yá Ndióxi ndéé sanaha, te duha nduu tnúhu ní chídó tnùní ndí cuendá-dé:

Tècú cáhá<sup>n</sup> níhí ñuú tée yíhí xití yucu, te càchí-dé:

“Chí dáñá ncháa ichi cuehé ichi duha ndècu-ndo, te tnii-ndo ichi váha,

Te duca<sup>n</sup> cáda-ndo cuendá cundecu túha-ndo chí véxi Yáá ío cùnuu”, duha quesaha tée-á<sup>n</sup>.

Duha nduu tnúhu ní chídó tnùní ndí Chàíá-á<sup>n</sup> cuendá té Juáá.

<sup>4</sup> Te té Juáá-á<sup>n</sup> ní xóo cuihnu-dé dóo idi caméyu, te ñuú ní cuu pàñú xití-dé, te ní xóo caxi-dé tíca lángóstá ndihí ndudi ñúñú cuéchi. <sup>5</sup> Te ñáyíu ñuú Jerusalén, ndihí ñáyíu nchaa ñuú yíndèhu distritú Jùdeá, ndihí ñáyíu nchaa ñuú cáá yàtni yúte Jórdán ní sáhá<sup>n</sup>-yu ní xíndedóho-yu nàcuáa ní cáhá<sup>n</sup> té Juáá. <sup>6</sup> Te ní nguíta-yu ní náhmá-yu nchaa cuéchi-yu núú Yá Ndióxi. Te òré duca<sup>n</sup> ní náhmá-yu te ní dacuandute ñaha té Juáá xii-yu yúte Jórdán.

<sup>7</sup> Te vai cue tée cùu fariséu ndihí cue tée cùu saducéu cuahá<sup>n</sup>-güedé núú ndécú té Juáá cuiní-güedé dacuandute ñaha-dé xii-güedé. Te òré ní quexio-güedé núú ndécú-dé, te ní xáha<sup>n</sup>-dè xii-güedé:

—¡Nchaa nchóhó cùu-ndó dàtná ñuú cóo déé<sup>n</sup> chí ío cuihna iní-ndó! ¿Te nása ní cuu núu tnáhá nchóhó ndúcú-ndó nàcuáa cada-ndo cácu nihnu-ndo núú tnúndòho cahnu víhí ta cuyatni ñaha xii-ndo véxi-í? <sup>8</sup> Te chí cáda váha vitna cundecu-ndo cuendá duca<sup>n</sup> cùtnuní sá ní dáñá-ndó ncháa ichi cuehé ichi duha ndècu-ndo. <sup>9</sup> Te vá càchí-ndó sá ío cahnu cuu-ndo cuendá sá cùú-ndó ñaní tnáhá ndí Ábrahám. Chí cuéi ndéé yúú te ndacu Yá Ndióxi ndada-gá ñáyíu te cuú-yu ñaní tnáhá ndí Ábrahám. <sup>10</sup> Te caá chí ndécú túha-xi sá quèhndé-xi nchaa yutnu sá dúcá<sup>n</sup> ñà túú càváha sávidí-xi-á<sup>n</sup>, chí nchaa yutnu-á<sup>n</sup> tèhndé-xi te cuángee-xi núú ñúhú cáyú-xi. Te duha sátnáhá-xi ndoho nchaa ñáyíu ñá túú quide váha-á<sup>n</sup> chí nchaa ñáyíu ñá túú quide váha cùu-yu dàtná nchaa yutnu sá ñà túú càváha sávidí-xi. <sup>11</sup> Te na càchí tnúhu ndáá-í xii-ndo sá yùhú dacuandute-í mee-ni ñáyíu ní dáñá ncháa ichi cuehé ichi duha. Dico nchicú<sup>n</sup> tucu ingá tée véxi, te

tée-án taxi-dé Espíritú Yá Ndióxi cundecu ndihi-ndo. Te cùu-xi datná ìᵀ ñuhú, chi ndada ndoo ndada nine-xi iní-ndó. Te tée-án ìo-gá cùnùu-dé dàcùúxi yùhú, chi yùhú cùu-í ìᵀ tée duuᵀ duuᵀ ñá túú tàú cuita nehe ni chàú-dé dico quide-í chiùu-dé. <sup>12</sup> Te tée-án sa véxi túha-dé sá cáda ìᵀ ñaha-dé xii-o datná quidé ñáyiú ndáda ndoo triú, chi ñáyiú-án sa nēhe túha-ná-yu yaxíᵀ-yu òré ñañani cuendá ndada ndoó-yu. Te òré ndadá ndóo-yu triú-án te dàquee ìᵀ-yu mihi-xi, te tàxúha-yu mee-ná triú-án te sáhmí-yu mihi-xi-án. Te datná quidé-yu mihi triú-án ducaᵀ sátnahá-xi cada ñaha tée-án xii nchaa ñáyiú ñá túú quide váha, chi daquihíᵀ ñahá-dé xii-yu núú ñuhú núú càyú, te ñuhú-án ñá túú tñahí ndàhvá — càchí-dé xáhaᵀ-dé xii-güedé.

### Sàndute Jesús

(Mr. 1:9-11; Lc. 3:21-22)

<sup>13</sup> Te Jèsús ní quee-gá distritú Galiléa cuáháᵀ-gá yúte Jordán núú ndécú tè Juáá cuendá dacuàndute ñaha-dé xii-gá. <sup>14</sup> Te òré ní quexio Jesús núú ndécú tè Juáá, te ñá cuini-dé dacuàndute ñaha-dé xii-gá ní cùu, te ní xáhaᵀ-dé xii-gá:

—Yúhu tàú-í sá dacuàndute ñaha-n xii-í, te ñá díú dà yúhu dacuàndute ñaha-í xii-n — càchí-dé xáhaᵀ-dé xii-gá.

<sup>15</sup> Te Jèsús ní xáhaᵀ-gá xii-dé:

—Queheᵀ daña, chi dacuití xini ñuhu-xi ducaᵀ cada-o nacuaá cundáá-ó núú Yá Ndióxi — càchí-gá xáhaᵀ-gá xii-dé.

Te tè Juáá-án ní sáháᵀ uuᵀ-dé tñuhu ní xáhaᵀ Jèsús xii-dé. <sup>16</sup> Te ní dacuàndute-dé Jèsús. Te òré ní nene-gá xití ndute te ní xini-gá nchi andiú, te ní quee Espíritú Yá Ndióxi véxi cuuᵀ-xi ngúndecu ndihi ñaha-xi xii-gá, te datná cáá ìᵀ lómá cáá Espíritú-án véxi cuuᵀ-xi. <sup>17</sup> Te òré-án ní tecú ní cáháᵀ Yá Ndióxi ndéé andiú, te xáhaᵀ-gá xii Jèsús:

—Yòhó cùu-n Dēhe-í tée ío cùu iní-í te ío cùú ìᵀ iní ñàhá-í xii-n — càchí-gá xáhaᵀ-gá xii Jèsús.

## 4

*Sácuíhná quidé yica-xi cada Jesús sá ñá túú tàú-gá cada-gá ní cùu*

(Mr. 1:12-13; Lc. 4:1-13)

<sup>1</sup> Te Espíritú Yá Ndióxi ndécá-xi Jèsús cuáháᵀ ìᵀ xití yucu cuendá yàcáᵀ cundecu tnaa-gá, te yàcáᵀ quexio sácuíhná coto ndéé ñahá-xi xii-gá te núu ndisa sá vā cáda-gá ìᵀ sá ñá túú tàú-gá cada-gá.

<sup>2</sup> Te Jèsús ñá ní xēxi-gá údico nduu údico niú, te ducaᵀ te dàtnùní ní xícáᵀ iní-gá caxi-gá. <sup>3</sup> Te sáta dúcáᵀ te ní quexio sácuíhná quidé yica-xi cada Jesús ìᵀ sá ñá túú tàú-gá cada-gá, te xáhaᵀ-xi xii-gá:

—Te núu ndisa sá cùu-n Dēhe Yá Ndióxi te cùñaha xii yúú-a na nduu-xi paá —càchí-xi xáhaᵀ-xi xii-gá.

<sup>4</sup> Te Jèsús ní xáhaᵀ-gá xii-xi:

—Núú tütú Yá Ndióxi càchí-xi: “Ñá díú mèe-ni paá candeca-xi iní ñáyiú ñuyú, chi tñahá nchaa tñuhu cáháᵀ Yá Ndióxi candeca-xi iní-yu”, duha càchí-xi núú tütú-gá — càchí-gá xáhaᵀ-gá xii-xi.

<sup>5</sup> Te dàtnùní sácuíhná-án ndécá ñaha-xi xii-gá cuáháᵀ ñuú Jerusalén, te yàcáᵀ ní xáhaᵀ-xi xii-gá cuásaaᵀ-gá díquí véñúhu càhnu sá ío cùnuu núú ñáyiú isràél, <sup>6</sup> te dàtnùní ní xáhaᵀ tucu-xi xii-gá:

—Te núu ndisa cùu-n Dēhe Yá Ndióxi te cuandé ndava núú ñuhú cuendá quee ndáá-xi nàcuáa cáháᵀ-xi núú tütú-gá núú càchí-xi: “Yá Ndióxi tendaha-gá cue espíritú xínú cuèchi núú-gá quixi-xi cuendá coto ñaha-xi xii-n, te núú ndáhá-xi cãundodo-n cuendá sá vā dãnícuehé yúú sáháᵀ-n”, duha càchí-xi núú tütú-gá —càchí sácuíhná-án xáhaᵀ-xi xii Jesús.

<sup>7</sup> Te Jèsús ní xáhaᵀ-gá xii-xi:

—Te càchí tucu-xi núú tütú Yá Ndióxi: “Vá cání iní-n coto ndeé-n Dütú Ndióxi Yáá cùú Ndióxi-n cuendá-ni sá cuini-n sá dácacu nihnu ñaha-gá xii-n ìᵀ sá sání iní-n cáda-n”, duha càchí-xi núú tütú-gá — càchí-gá xáhaᵀ-gá xii-xi.

<sup>8</sup> Te sácuíhná ndécá tucu-xi Jesús cuáháᵀ ìᵀ núú tñdúú dúcúᵀ, te uuᵀ-ni ní dánèhé núú ñahá-xi xii-gá nchaandi túhú nàcióᵀ cáá ñuyú, ndihi nchaa sá váha ío ìᵀ ìᵀ nàcióᵀ-án. <sup>9</sup> Te ní xáhaᵀ-xi xii-gá:

—Te núu yòhó nguñí xití-n núu-í chiñuhu ñaha-n xii-í ñá, te taxi cuendá-í nchaa sá ní dánèhé ñahá-í-a cuu cuendá-n —càchí-xi xáhaᵀ-xi xii-gá.

<sup>10</sup> Te Jèsús ní xáhaᵀ-gá xii-xi:

—Xocuñí yòhó sácuíhná núú ndécú-í-a, chi vā cùú cáda-í nàcuáa càchí-n, chi núú tütú Yá Ndióxi càchí-xi: “Chiñuhu-ndo Dütú Ndióxi Yáá cùú Ndióxi-ndó, te diu-ni-gá cada-ndo nchaa nacuaá cáháᵀ-gá”, duha càchí-xi núú tütú-gá —càchí-gá xáhaᵀ-gá xii-xi.

<sup>11</sup> Te dàtnùní sácuíhná ní dàñá-xi Jèsús ní xica-xi cuáháᵀ-xi. Te sáta dúcáᵀ te ní quexio cue espíritú xínú cuèchi núú Yá Ndióxi ní xinu cuèchi-xi núú Jèsús.

*Distritú Galiléa ní chisaha Jesús chiᵀ ní táhú Tátá-gá Dütú Ndióxi cada-gá*

(Mr. 1:14-15; Lc. 4:14-15)

<sup>12</sup> Te òré ní níhí Jèsús tñuhu sá ní ngava té Juáá tée dacuàndute ñaha xii ñáyiú vecaá, te ní xica-gá cuáháᵀ-gá distritú Galiléa. <sup>13</sup> Te ní ñá túú ní xindecu-gá ñuú Nazàrét, chi ní yáha-gá cuáháᵀ-gá ndéé ñuú Capèrnaúm yàcáᵀ ní xindecu-gá, te ñuú-án cáá yátni yuhu

lagúná, te yatni xiá<sup>n</sup> cáá ñuhu nani Zabulón, ndihi ñuhu nani Neftalí. <sup>14</sup> Te duca<sup>n</sup> ní cuu chi ní quee ndáá-xi nàcuáa ní chídó tñuní ndíi Chàia téé ní xóo cáhá<sup>n</sup> tñuhu Yá Ndióxi ndéé sanaha núú tütú-gá núú càchí-xi:

<sup>15</sup> Ñuhu nani Zabulón, ndihi ñuhu nani Neftalí, ñuhu-án yindèhu-xi distritú Galiléa,

te xiá<sup>n</sup> xindecu cue ñáyiú ñá túú cùu ñáyiú isràél,

te càa-xi yatni yuhu lagúná te ndàa ingá xio yúte Jòrdán cùú-xi.

<sup>16</sup> Te cue ñáyiú-án ndécú-yu ì<sup>n</sup> núú néé chi ndécú-yu ichi cuèhé ichi duha,

te sáá nduu te cada iní-ndó sá ñáyiú-án queé-yu núú ditó chi vá cùndècu-gá-yu ichi cuèhé ichi duha.

Te diu-ni ñáyiú-án cùú-yu ñáyiú ta xíta nihnu duu<sup>n</sup> cuáhán,

dico sáá nduu te vá cuíta nihnu-gá-yu.

Duha ní chídó tñuní ndíi núú tütú-gá.

<sup>17</sup> Te dàvá-án ní ngúíta Jèsús ní dánèhé-gá ñáyiú, te ní xáha<sup>n</sup>-gá xii-yu:

—Chí dándixi túu iní sá ñà túú quide váha-ndo ndècu-ndo te daña-ndo nchàa ichi cuèhé ichi duha, chi sa ní cuyatni nduu ndíhu ndaha ñaha Yá Ndióxi xii-ndo — càchí-gá xáha<sup>n</sup>-gá xii-yu.

*Jèsús càhá<sup>n</sup>-gá cúmi tñahá cue téé tñi chácá*

(Mr. 1:16-20; Lc. 5:1-11)

<sup>18</sup> Te Jèsús ñúhú-gá ichi cuáhán-gá tá yáha-gá yuhu lagúná Galiléa, te ní xini-gá úú tñahá cue téé xídáquèe-güedé ñunu-güedé xití ndute tñi-güedé chácá, chi quití tñahí-án cùú chiú<sup>n</sup>-güedé tñi-güedé-di. Te ì<sup>n</sup>-dé nání-dé Ximú, àdi Pelú chi úú diu-dé, te ñani-dé cùú ingá téé ndihi-dé te téé-án nání-dé Ndríxi.

<sup>19</sup> Te Jèsús ní xáha<sup>n</sup>-gá xii-güedé:

—Chí dáña chiú<sup>n</sup> quide-ndo-án te quixi-ndo chitnahá ñahá-ndó xii-í, te taxi-í ingá núú chiú<sup>n</sup> cada-ndo chi quihí<sup>n</sup>-ndó dácahá<sup>n</sup>-ndó ñáyiú cuèndá tuha ñahá-yu xii-í —càchí-gá xáha<sup>n</sup>-gá xii-güedé.

<sup>20</sup> Te òré-ni-án ní dáña cuè téé-án ñunu-güedé, te ní tuha-güedé Jèsús.

<sup>21</sup> Te ní xica tucu Jèsús cuáhán-gá luha-gá, te ní xini tucu-gá úú-gá tñahá cue téé tñi chácá. Te ì<sup>n</sup> téé-án nání-dé Jàcobó, te ñani-dé cùú ingá téé ndihi-dé te téé-án nání-dé Juáá, te ndi nduú-güedé cùú-güedé déhe té Zebèdeú. Te xixínucóo-güedé ndihi tátá-güedé xití bàrcú xinatícu-güedé ñunu-güedé, te Jèsús ní cana ñaha-gá xii-güedé.

<sup>22</sup> Te òré-ni-án ní dándóo-güedé bàrcú-güedé, ndihi tátá-güedé, te ní tuha ñaha-güedé xii-gá.

*Jèsús dánèhé-gá cuèhé víhi ñáyiú*  
(Lc. 6:17-19)

<sup>23</sup> Te Jèsús tá xica ndodo-gá ñihí distritú Galiléa cuáhán<sup>n</sup> tá dánèhé-gá ñáyiú tñuhu váha tñuhu sá sánú ichi ñaha xii-yu nàcuáa ndíhu ndaha ñaha Yá Ndióxi xii-yu. Te ndi tnahá ì<sup>n</sup> ì<sup>n</sup> ñuú sáá-gá te duca<sup>n</sup> cuànguihu-gá xití veñuhu dánèhé-gá ñáyiú tñuhu-án. Te ndi dí<sup>n</sup> ndí dí<sup>n</sup> núú cuèhé tñahá ì<sup>n</sup> ì<sup>n</sup> ñáyiú dico nchaa-ni-yu ta quide tátna-gá cuáhán.

<sup>24</sup> Te ndéé nchaa ñáyiú yindèhu distritú Siríá ní ñihí-yu tñuhu nchaa nàcuáa quide Jèsús. Te ní queé-yu ñuú-yu te ndécá-yu nchaa ñáyiú tñahá ndi dí<sup>n</sup> núú cuèhé cuáhán núú ndécú Jèsús. Te cuèi ñáyiú xiyihí, ndihi ñáyiú ñá túú-gá càndá nihnu, ndihi ñáyiú yihí ñaha espíritu cùndíhi yucu ñávaha ndécá-yu cuáhán núú-gá, te nchaa-yu ní quide tátna ñaha-gá xii-yu. <sup>25</sup> Te ío vài ñáyiú ní chinchícú<sup>n</sup> ñahá xii Jèsús, chi ní chinchícú<sup>n</sup> ñahá ñáyiú distritú Galiléa, ndihi ñáyiú nchaa ñuú xindáa Decápolis, ndihi ñáyiú ñuú Jerusàlén, ndihi cue ñáyiú nchaa ñuú yindèhu distritú Júdeá, ndihi ñáyiú xindecu yatni yúte Jòrdán ndàa xio quene nchícanhii.

## 5

*Jèsús núcòo-gá ì<sup>n</sup> núú tìndúú dánèhé-gá ñáyiú*

<sup>1</sup> Te sáta ní xini Jèsús sá cuèhé víhi ñáyiú nchicú<sup>n</sup> ñahá xii-gá, te ní xica-gá cuásaá-gá ì<sup>n</sup> núú tìndúú te xiá<sup>n</sup> ní ngóo-gá, te cue téé xica cuu ndihi-gá ní nadúcu<sup>n</sup> ndéè ñahá-güedé xii-gá. <sup>2</sup> Te ní ngúíta-gá dánèhé ñahá-gá xii-güedé ndihi cue ñáyiú-án, te xáha<sup>n</sup>-gá:

*Cuèndá ñáyiú ío váha táhú-xi*  
(Lc. 6:20-23)

<sup>3</sup> —Váha táhú nchaa ñáyiú cùtñuní iní-xi sá ío-gá cúmání-yu cudiú-yu núú Yá Ndióxi, chi ñáyiú-án nduu táhú-yu ndíhu ndaha ñaha-gá xii-yu.

<sup>4</sup> Váha táhú nchaa ñáyiú ndàhyú sá ndíhú iní-yu, chi Yá Ndióxi cuañaha-gá tñuhu ndee ìní cundecu ndihí-yu.

<sup>5</sup> Váha táhú nchaa ñáyiú ndàhú iní-xi, chi ñáyiú-án nduu táhú-yu cundecú-yu ì<sup>n</sup> xichi núú cuañaha Yá Ndióxi xii-yu.

<sup>6</sup> Váha táhú nchaa ñáyiú ío cuini cada nchaa nàcuáa càhá<sup>n</sup> Yá Ndióxi, chi ñáyiú-án ío nduu vétú iní-yu.

<sup>7</sup> Váha táhú nchaa ñáyiú cùndahú iní tñaha ñáyiú-xi, chi ñáyiú-án diu-ni duca<sup>n</sup> càda ñaha Yá Ndióxi xii-yu cundahú iní ñahá-gá.

<sup>8</sup> Váha táhú nchaa ñáyiú ní nduu ndoo ní nduu nine iní-xi, chi cue ñáyiú-án nduu táhú-yu cundecú-yu ndíhi Yá Ndióxi.



<sup>9</sup> Váha táhú nchaa ñáiyu càhá<sup>n</sup> dóho tnàha ñáiyu-xi nàcuáa cundecu ndíhi váha tnàhá-yu, chí cùtnuní sá ñáiyu-á<sup>n</sup> cuú-yu déhe Yá Ndióxi.

<sup>10</sup> Váha táhú nchaa ñáiyu ío ndòho ndecu ñuyú-a sá cuendá sá quidé-yu nàcuáa càhá<sup>n</sup> Yá Ndióxi, chí ñáiyu-á<sup>n</sup> nduu táhú-yu ndíhu ndaha ñàha-gá xii-yu.

<sup>11</sup> Te cùu-ndo ñáiyu ío váha táhú-xi te núu na cùcuèhé ñàhá ñáiyu, àdi cada úhú ñàhá-yu xii-ndo, àdi daciaa díquí ñàhá-yu nándi cuéchi neñúú xii-ndo sá cuendá-í.

<sup>12</sup> Te òré duca<sup>n</sup> na càda ñàhá-yu xii-ndo te cudí víhi-ní ìní-ndó cùndecu-ndo, chí ío váha càa sá ndécú àndiu nduu táhú-ndó cùndecu ndíhi-ndo nduu na saá-ndó yàcá<sup>n</sup> cundecu-ndo, chí ñu-ni duca<sup>n</sup> ní xóo cada ñàha cuè ñaní tnàhá-yu xii cue téé ní xóo càhá<sup>n</sup> tnúhu Yá Ndióxi ní xíndecu ndéé sanaha.

*Cuendá ñíi ndíhi cuendá ñuñú  
(Mr. 9:50; Lc. 14:34-35)*

<sup>13</sup> Te nchòhó cada ìní-ndó sá cuú-ndó dàtná ñíi cuendá ñuyú-a. Te ñíi chí nàndíhi-xi dico núu na nduu víxi<sup>n</sup>-xi, te ñá túú-gá nàndíhi-xi chí dāngoyo-ná-ó, te yàha ñáiyu xèniñú-yu. Te duca<sup>n</sup> sátnahá-xi cùu nchòhó chí cùu-ndo datná ñíi váha te núu na càda váha-ndo, te núu vá càdá váha-ndo te quee tíhú-ndó.

<sup>14</sup> Te nchòhó cada ìní-ndó sá cuú-ndó dàtná ñíi sá dayèhé ndécú ñuyúú-a, chí sànu ichi-ndo ñáiyu ichi váha. Te nchòhó xini-ndó sá núu ñíi ñúú cáá ñíi núú tíndúú te vá cuú càchí-ó sá nguivàha-xi. <sup>15</sup> Te ñá túú xini-ó ñíi ñáiyu teñuhú-yu ñíi ìntèrná te chiváha-yu xití ñíi càjá, chí táxi ndécú-yu núú ñíi cuendá cutnùní núú nchàa ñáiyu ndecu vehe. <sup>16</sup> Te duca<sup>n</sup> càda nchòhó cada váha-ndo dàtná quidé ñíi ñuhú dayèhe-xi núú ñáiyu, te duca<sup>n</sup> quini ñáiyu nàcuáa quide-ndo ndecu-ndo, te tnàhá-yu cachí-yu sá ío càhnu cuu Dútú Ndióxi Yáá cùú Tàtá-ndó ndecu àndiu chí quini-yu sá quidé váha-ndo ndecu-ndo.

*Cuendá tnúhu ní chidó tnùní ndíi Moisés*

<sup>17</sup> Te vá cání ìní-ndó sá yúhú véxi-í xocàni-í tnúhu ní chidó tnùní ndíi Moisés, te ní vá cání ìní-ndó sá véxi-í xocàni-í tnúhu ní chidó tnùní cue téé ní xóo càhá<sup>n</sup> tnúhu Yá Ndióxi ndéé sanaha, chí yúhú véxi-í sá càdá-í nàcuáa càhá<sup>n</sup> nchaa tnúhu-á<sup>n</sup>. <sup>18</sup> Te na càchí tnúhu ndáá-í xii-ndo sá tnúhu ní chidó tnùní ndíi Moisés ío ndáá càhá<sup>n</sup>-xi, chí dacutíí cùu nchaa nàcuáa càhá<sup>n</sup>-xi. Te yáchi-gá naa àndiu ndíhi ñuyúú dàcúúxi sá quee càva ñíi tnúhu-á<sup>n</sup>. <sup>19</sup> Núu xiá<sup>n</sup> nchaa ñáiyu na càchí sá dáva tnúhu ní chidó tnùní ndíi Moisés ñá túú xini ñuhú-xi chí ñá túú cùnuu-xi, te ñáiyu-á<sup>n</sup> ñu-ni duca<sup>n</sup> dànehé-yu nchaa dava-gá tnàha ñáiyú-yu, te sá dúcá<sup>n</sup>

quidé-yu te vá cùnùu víhi-yu núú ndécú Yá Ndióxi táxi tnùní-gá, chí cuú-yu dàtná ñíi ñáiyu nchicú<sup>n</sup> cuií-ná. Dico nchaa ñáiyu nchicú<sup>n</sup> nihnu quide nchaa nàcuáa càhá<sup>n</sup> nchaa tnúhu-á<sup>n</sup>, te ñu-ni duca<sup>n</sup> dànehé-yu nchaa dava-gá tnàha ñáiyú-yu, te ñáiyu-á<sup>n</sup> ío cùnùu-yu núú ndécú Yá Ndióxi táxi tnùní-gá. <sup>20</sup> Te na càchí tnúhu-í xii-ndo sá ío xini ñuhú-xi cada-ndo nchaa nàcuáa càhá<sup>n</sup> Yá Ndióxi, te vá càdá-ndó dàtná xiquide cue téé dànehé ñàhá xii ñáiyu nchaa tnúhu ní chidó tnùní ndíi Moisés, ndíhi dàtná xiquide cue téé cùu fariséu, chí núu na càda-ndo dàtná xiquide cue téé-á<sup>n</sup> ñá, te vá ndúú táhú-ndó ndíhu ndaha ñàha Yá Ndióxi xii-ndo.

*Jesús càhá<sup>n</sup>-gá cuendá ñáiyu cùdèé<sup>n</sup>  
(Lc. 12:57-59)*

<sup>21</sup> Te nchòhó sa xini-ndó sá ncháá ñáiyu ní cuu ñaní tnàhá-ndó ní xíndecu ndéé sanaha ní ñíhi-yu tnúhu sá vá cuú càhni-yu tnàha ñáiyú-yu, chí núu duca<sup>n</sup> na càdá-yu te nacháhu-yu cuéchi-yu. <sup>22</sup> Dico vitna na càchí tnúhu-í xii-ndo sá núu ndèdani càa-ndo na cudéé<sup>n</sup>-ndó núú tnàha ñáiyu-ndo, te nacháhu-ndo sá dúcá<sup>n</sup> quide-ndo, àdi núu na cùcuèhé-ndó-yu te núú chítú núú tàcá cundáá cuéchi-ndo te núu duca<sup>n</sup> na càda-ndo, àdi núu na cùu-ndo tnàha ñáiyu-ndo ñíi tnúhu véé víhi, te cucuéchi víhi xii-ndo chí quíhi<sup>n</sup>-ndó núú úhú núú ndàhú.

<sup>23</sup> Te xiá<sup>n</sup> núu nchòhó òré ndécú ndíhi-ndo ñíi sá cuini-ndó cuàha-ndo Yá Ndióxi nduu táhú-gá, te òré cuáhá<sup>n</sup>-ndó cuàñaha-ndo xii-gá, te òré ní quexio-ndo núú dúcá<sup>n</sup> cuàñaha-ndo xii-gá sá ndúú táhú-gá, te ní ndacu ìní-ndó sá ndécú ñáiyu ñá túú cùu váha ìní ñàhá xii-ndo cuendá ñíi sá ní cumání núú tnàhá-ndó. <sup>24</sup> Te dàndò-ndo sá dúcá<sup>n</sup> nèhe-ndo cuáhá<sup>n</sup> nduu táhú Yá Ndióxi, te díhna-gá quíhi<sup>n</sup>-ndó nacàhá<sup>n</sup> càhnú ìní tnàhá-ndó ndíhi ñáiyu ñá túú cùu váha ìní ñàhá xii-ndo-á<sup>n</sup>, te dàtnùní duca<sup>n</sup> te quíhi<sup>n</sup>-ndó cuàha-ndo Yá Ndióxi sá ndúú táhú-gá.

<sup>25</sup> Te núu ío ñíi-ndo ní sáhá<sup>n</sup> ñáiyu núú téé cùchiu<sup>n</sup> ní sacá<sup>n</sup> cuéchi-yu cuendá-ndó cuendá ñíi sá ní quide-ndo, te òré ní naníhi tnàhá-ndó ndíhi-yu cuáhá<sup>n</sup>-ndó núú téé cùchiu<sup>n</sup>-á<sup>n</sup>, te nacàhá<sup>n</sup> càhnú ìní tnàhá-ndó ndíhi-yu cuendá sá vá cuàha cuendá ñàhá-gá-yu xii-ndo núú téé cùchiu<sup>n</sup>, chí núu duca<sup>n</sup> na càdá-yu te téé cùchiu<sup>n</sup>-á<sup>n</sup> cuàha cuendá ñàhá-dè xii-ndo núú cuè téé cùu polecia, te cue téé-á<sup>n</sup> chíhi ñàha-güedè veaca xii-ndo. <sup>26</sup> Te na càchí tnúhu ndáá-í xii-ndo sá vá càcu-ndo te núu na ngàva-ndo veaca ndéé nacháhu-ndo nchàa sá tàú-ndó.

*Cuendá cue ñáiyu ñá túú quide váha*

<sup>27</sup> "Te nchòhó sa xini-ndo nàcuáa ndùu tñuhu ní cáhá" cue téé ní xindecu ndéé sanaha, te duha ní cachí-güedé: "Nchaa cue téé vá cúú cãhá" ndihi-güedé ñadhí te núu ñá díú ñadhí-güedé cúú-yu, te diu-ni duca" tùcu nchaa cue ñáiyu ñíhí vá cúú cãhá" ndihí-yu téé te núu ñá díú yíi-yu cùu-güedé", duha ní cachí-güedé. <sup>28</sup> Dico yúhú cãhí tñuhu-í xii-ndo sã ndéda-ni càa cue téé na cùndehe ñí ñadhí te núu na càni iní-güedé cundecu díi ñí-güedé ndihí-yu te cada iní-ndo sã dàtná sã sã ní cáhá" ndihí ñaha-güedé xii-yu sã dúcá" ní sani iní-güedé.

<sup>29</sup> "Te núu ñí xio tinùu-ndo quide-xi quide-ndo nãndi sã cuèhé sã dúhá te tava-ndo, chi váha-gá sã ná cuíta te ñá díú ñíhí ní ndúú yiqui cuñú-ndo quíhí-xi núú ùhú núú ndáhú. <sup>30</sup> Te núu ñí xio ndaha-ndo quide-xi quide-ndo nãndi sã cuèhé sã dúhá te quehendé-ndo, chi váha-gá sã ná cuíta ñí xio ndaha-ndo te ñá díú sã ñíhí ní ndúú yiqui cuñú-ndo quíhí-xi núú ùhú núú ndáhú.

*Jèsús càhá-gá cuendá cue ñáiyu ñáña tñaha*

(Mt. 19:9; Mr. 10:11-12; Lc. 16:18)

<sup>31</sup> "Te nchòhó sa ñaha tucu-ndo nacuáa ní cáhá" tucu cue téé ní xindecu ndéé sanaha, te duha ní cachí-güedé: "Te núu ñí téé na ñáña tñaha-dé ndihí ñadhí-dé, te xini ñuhu-xi cadúha-dé ñí tutú cuãñaha-dé núú càhá-xi sã ní dàñá ñaha-dé", duha ní cachí-güedé. <sup>32</sup> Dico yúhú cãhí tñuhu-í xii-ndo sã cúú ñáña ñí téé ñadhí-dé, te núu cutnuni ndáá iní-dé sã cáhá" ndihí-a" ingá téé. Dico núu ñá túú ñáña" quide-a" te ñá túú ndùu váha-xi ñáña ñaha-dé. Te núu ñá túú ñáña" quide ñadhí-dé, te cada iní-ó sã méé-dé ní sanu ichi ñaha-dé xii-a" cáhá" ndihí-a" ingá téé te núu na ñáña ñaha-dé. Te téé na ñaquehe" ñaha xii ñaha ní dàñá ñaha yíi-xi-á", te diu-ni ñá túú ní quide váha-dé sã dúcá" ní ñaquehe-dé ñaha-á".

*Ñáiyu càcunehe ñaha xii Yá Ndióxi cuendá cutnuni iní tñaha ñáiyú-yu sã ndáá cadá-yu ñí sã sáni iní-yu cadá-yu*

<sup>33</sup> "Te sa ñaha tucu-ndo nacuáa ní cáhá" tucu cue téé ní xindecu ndéé sanaha, chi cue téé-á" ní cachí-güedé: "Te núu càcunehe-ndo Yá Ndióxi núú tñaha ñáiyu-ndo nacuáa cutnuni iní-yu sã ndáa cada-ndo ñí sã sáni iní-ndo càda-ndo, te cada-ndo", duha ní cáhá" dóho tñaha-güedé. <sup>34</sup> Dico yúhú cãhí tñuhu-í xii-ndo sã ñá túú ná cacunehe-ndo sã ndáa cada-ndo ñí sã sáni iní-ndo càda-ndo. Te ní vá cãcú nèhe-ndo andiu chi yàcá" cúú-xí núú núcoo Yá Ndióxi táxi tñuni-gá. <sup>35</sup> Te ní vá cãcú nèhe-ndo ñuyú-a, chi tñaha ñuyú-a ndècu-gá, te ní vá cãcú nèhe-ndo ñuú Jerusalén chi

ñuú-á" cúú cuendá-gá, te diu-gá cúú-gá Yáa ío cùnuu. <sup>36</sup> Te ní vá cãcú nèhe-ndo díquí-ndo chi ñaha-ndo sã ní ñí" idi díquí-ndo ñá ndácú-ndo ndáda cuixí-ndo ádi ndada tñuu-ndo. <sup>37</sup> Te váha-gá sã núu ñí" sã sáni iní-ndo càda-ndo, te cachí-ni-ndo: "Cuu cada-ndí, ádi vá cúú càda-ndí", cachí-ni-ndo. Chi nchaa dava-gá sã chidó-ndo càhá-ndo òré duca" sáni iní-ndo càda-ndo ñí" sã cadá-ndo cùu-xi sã dácàhu iní ñáña yùcu ñávaha.

*Cuendá ñáiyu ñachinaa sã quidé ñaha tñaha ñáiyu-xi*

(Lc. 6:29-30)

<sup>38</sup> "Te sa ñaha tucu-ndo nacuáa ní cáhá" tucu cue téé ní xindecu ndéé sanaha, chi cue téé-á" ní cachí-güedé: "Ñáiyu na càda ñaha tñaha ñáiyu-xi ñí" sã ñá túú váha, te nanchócava-yu nachinaa-yu sã ní quide ñaha tñaha ñáiyú-yu", duha ní cachí-güedé. <sup>39</sup> Dico yúhú cãhí tñuhu-í xii-ndo sã ñá túú ná cada-ndo nchaa cue ñáiyu cuíhna ñí-xi te núu quide ñaha-yu ñí" sã ñá túú váha xii-ndo. Te núu ní canihá-yu ñí" xito te cuini tucú-yu canihá-yu ingá xito te ñáña-ndo na canihá-yu. <sup>40</sup> Ádi ní sacá" cuéchi-yu núú cué téé cùchiu" cuendá-ndo, te cuini-yu quendeé-yu dúhnú-ndo te ñáña-ndo na canehé-yu quíhí", te tñahá-ni dóo ndíxi ndódo-ndo ñáña-ndo na canehé-yu quíhí". <sup>41</sup> Te núu quide yicá-yu caca-ndo dàtná úú kilómetrú cuido-ndo ndáchíu"-yu ña, te chido-ndo úú-gá tucu kilómetrú cuido-ndo ndáchíu"-yu. <sup>42</sup> Te núu ío ñí" sã xicá"-yu núú-ndo te cuãñaha-ndo, ádi ío ñí" sã sánúu-yu núú-ndo te cuãñaha núu-ndo.

*Cuu iní-ó nchaa ñáiyu cùu úhú iní ñáña xii-ó*

(Lc. 6:27-28, 32-36)

<sup>43</sup> "Te sa ñaha tucu-ndo nacuáa ní cachí" tucu cue téé ní xindecu ndéé sanaha, chi cue téé-á" ní cachí-güedé: "Cuu iní-ndo cué ñáiyu ndècu ndihí váha-ndo, te cuu úhú iní-ndo cué ñáiyu cùu úhú iní ñáña xii-ndo", duha ní cachí-güedé. <sup>44</sup> Dico yúhú cãhí tñuhu-í xii-ndo sã cúú iní-ndo cué ñáiyu cùu úhú iní ñáña xii-ndo, te cáhá" váha-ndo cuendá cue ñáiyu cáhá" úhú ñáña xii-ndo, te cada-ndo sã váha sã cúú-xí cué ñáiyu cùu úhú iní ñáña xii-ndo, te cáhá" ndihí-ndo Yá Ndióxi cuendá cue ñáiyu xicuehé ñáña xii-ndo, ndihí cuendá cue ñáiyu quide úhú ñáña xii-ndo. <sup>45</sup> Te núu na càda-ndo nchaa nacuáa cáhá"-í-a, te duca" te cutnuni sã cúú-ndo ñéhe Tãtá-ndo Dùtú Ndióxi Yáa ndécú andiu. Te diu-gá cúú-gá Yáa quidé quène nchíanchii, te diu-ni-gá cúú-gá Yáa dácúu" dáú ñuyú-a, te duca" quide-gá cuendá cuu-xi sã váha sã cúú-xí cué ñáiyu quide váha, ndihí sã cúú-xí cué ñáiyu

ñá túú quide váha. <sup>46</sup> Te núu nchòhó ná cúú iní-ndó mée-ni ñáiyu na cùu iní ñáhá xii-ndo, te vá càchí-ndó sá Yá Ndiòxí taxi-gá sá ndúú tãhú-ndó sá dúcá<sup>n</sup> quide-ndo, chi cuèi cue tée cuihna iní-xi quide cobrá ñáhá xii cue ñáiyu cuendá impuéstú duca<sup>n</sup> xiquide-güedé. <sup>47</sup> Te núu mee-ni ñáiyu ndècu ndihí váha-ndo ïo váha cáhá<sup>n</sup> ndihí-ndó-yu, te vá càchí-ndó sá ïo váha quide-ndo sá dúcá<sup>n</sup> quide-ndo, chi cuèi ndéé nchaa ñáiyu ñá túú xiní dana cuendá Yá Ndiòxí duca<sup>n</sup> xiquide-yu. <sup>48</sup> Te duha ndúu tnúhu cáhá<sup>n</sup>-í cuendá sá nchòhó cada ndáá-ndó cùndecu-ndo datná quidé ndáá mée Tãtá-ndó Dütú Ndiòxí Yáá ndécú àndiu —duha ní dánèhé ñáhá Jèsús xii cue tée xica cuu ndihí-gá ndihí nchaa ñáiyu.

## 6

*Jèsús dánèhé-gá ñáiyu nàcuáa cadá-yu sá vãha*

<sup>1</sup> Te Jèsús ndécú-ní-gá dánèhé-gá cue tée xica cuu ndihí-gá ndihí nchaa ñáiyu, te xãha<sup>n</sup>-gá:

—Te òré quidé-ndó sá váha te vá cadá-ndó núú ñáiyu cuendá-ni sá cuiñí-ndó cáhá<sup>n</sup> váha-yu cuendá-ndó, chi núu núú ñáiyu duca<sup>n</sup> na cada-ndo te Dütú Ndiòxí Yáá cúú Tãtá-ndó vá táxi-gá sá ndúú tãhú-ndó. <sup>2</sup> Te xíã<sup>n</sup> núu nchòhó òré chindèe-ndo ñáiyu ndáhú, te vá cùñaha-ndo xii cue ñáiyu sá chindèe-ndo cue ñáiyu ndáhú-án<sup>n</sup> datná xiquide cue ñáiyu dandahú mée-xí sá quidé ndáá te ñá ndáá sá quidé ndáá-yu, chi ñáiyu-án<sup>n</sup> duca<sup>n</sup> xiquide-yu òré sãhá<sup>n</sup>-yu veñúhu, chi datécú tnúhu-yu nchaa ñáiyu òré duca<sup>n</sup> chindéé-yu ñáiyu ndáhú. Te diu-ni duca<sup>n</sup> quidé-yu xãhá<sup>n</sup>-yu xii cue ñáiyu sá chindèe-yu cue ñáiyu ndáhú-án<sup>n</sup> nchaa núú xicá cúu-yu, te duca<sup>n</sup> xiquide-yu cuendá cuiñí-yu cáhá<sup>n</sup> váha ñáiyu cuendá-yu. Te yúhú na càchí tnúhu ndáá-í xii-ndo sá ñá túú ná nduu tãhú ñáiyu-án<sup>n</sup> núú Yá Ndiòxí sá dúcá<sup>n</sup> quidé-yu chi mee-ni núú tnàha ñáiyú-yu cùdiú-yu. <sup>3</sup> Te nchòhó òré chindèe-ndo ñáiyu ndáhú, te cuèi ñáiyu ïo-gá váha ndècu ndihí-ndo dico vá cùñaha-ndo sá dúcá<sup>n</sup> chindèe-ndo cue ñáiyu ndáhú-án<sup>n</sup>, te ni cuèi dava-gá ñáiyu vá cùñaha-ndo. <sup>4</sup> Chi váha-gá sá iní mée-ní-ndó ná cùhu<sup>n</sup> sá dúcá<sup>n</sup> chindèe-ndo cue ñáiyu ndáhú-án<sup>n</sup>. Te núu duca<sup>n</sup> na cada-ndo ña, te Dütú Ndiòxí Yáá cúú Tãtá-ndó tàxi-gá sá ndúú tãhú-ndó chi diu-ni mee-gá ndéhé-gá nàcuáa quide-ndo ndecu-ndo.

*Jèsús dánèhé-gá ñáiyu nàcuáa cáhá<sup>n</sup> ndihí-yu Yá Ndiòxí*

*(Lc. 11:2-4)*

<sup>5</sup> Te nchòhó òré cáhá<sup>n</sup> ndihí-ndo Yá Ndiòxí, te vá cadá-ndó datná xiquide cue ñáiyu dandahú mée-xí càchí sá quidé ndáá te ñá ndáá sá quidé ndáá-yu, chi ñáiyu-án<sup>n</sup>

tnàhá iní-yu cunutñi-yu cáhá<sup>n</sup> ndihí-yu Yá Ndiòxí òré yíñi-yu veñúhu. Te diu-ni duca<sup>n</sup> xiquide-yu nchaa núú xicá cúu-yu, te duca<sup>n</sup> quidé-yu cuendá sá cuiñí-yu quini ñáiyu nàcuáa xiquide-yu. Te na càchí tnúhu ndáá-í xii-ndo sá ñá túú ná nduu tãhú ñáiyu-án<sup>n</sup> núú Yá Ndiòxí sá dúcá<sup>n</sup> quidé-yu chi mee-ni núú tnàha ñáiyú-yu cùdiú-yu. <sup>6</sup> Te nchòhó òré cuiñí-ndó cáhá<sup>n</sup> ndihí-ndo Yá Ndiòxí, te ndíhu ndedí nihnu-ndo xití vehe-ndo, chi diu-gá cúú Tãtá-ndó te ndècu ndihí ñaha-gá xii-ndo, te diu-ni mee-gá ndéhé ñaha-gá xii-ndo nàcuáa quide-ndo, te núu duca<sup>n</sup> na cada-ndo te taxi-gá sá ndúú tãhú-ndó.

<sup>7</sup> Te òré cáhá<sup>n</sup> ndihí-ndo Yá Ndiòxí te vá sùúni cuendá-ni dacáa-ndó tnúhu cáhá<sup>n</sup> ndihí-ndo-gá datná xiquide cue ñáiyu ñá túú xiní tnúhu-gá, chi ñáiyu-án<sup>n</sup> sání iní-yu sá tédòho ñaha vñi-gá Yá Ndiòxí xii-yu sá dúcá<sup>n</sup> sùúni dacáa-yu tnúhu cáhá<sup>n</sup> ndihí ñáhá-yu xii-gá dico ñáhá. <sup>8</sup> Dico nchòhó, vá cadá-ndó datná xiquide cue ñáiyu-án<sup>n</sup>, chi mee Tãtá-ndó Dütú Ndiòxí sa nàhu-gá ná cùu nchaa sá xiní ñúhu-ndo cuèi òré vátá càcá<sup>n</sup>-gá-ndó núú-gá. <sup>9</sup> Te duha cáhá<sup>n</sup>-ndó òré cáhá<sup>n</sup> ndihí-ndo Yá Ndiòxí:

Yòhó Tãtá-ndí Dütú Ndiòxí Yáá ndécú àndiu, nchaa ñáiyu na cáhá<sup>n</sup>-yu sá cúu-n Yáá ïo yíñúhu.

<sup>10</sup> Te xicá<sup>n</sup> tãhú-ndí núu-n sá ná saá nduu ndíhu ndáhá-n-yu.

Te cada-n datná càchí iní-n ñúyíu-a datná quidé-n àndiu.

<sup>11</sup> Te xicá<sup>n</sup> tãhú-ndí núu-n sá táxi-n sá cóhó-ndí sá cáxi-ndí ïi<sup>n</sup> nduu ïi<sup>n</sup> nduu.

<sup>12</sup> Te cada càhnu iní-n nchaa yicá cuèchi-ndí, chi tnàhá nchúhu quidé càhnu iní-ndí nchaa sá quidé ñaha tnaha ñáiyu-ndí.

<sup>13</sup> Te vá dáñá-n dàcãhá<sup>n</sup> ñáhá yùcu ñávãha xii-ndí cada-ndí sá ñá túú váha, chi coto ñaha-n xii-ndí cuendá sá vá dúcá<sup>n</sup> cada ñaha-xi.

Te diu-ni cùu-n Yáá ïo cùnuu nchaa nduu nchaa quiú, te ïo càhnu cuu-n, te diu-ni-n quindaha ñaha-n xii-ndí ni caa ni quiñí<sup>n</sup>. Te duca<sup>n</sup> na cùnduu.

Duha dãnèhé ñáhá-í xii-ndo cáhá<sup>n</sup> ndihí-ndo Yá Ndiòxí.

<sup>14</sup> Te núu nchòhó quidé càhnu iní-ndó nchaa sá quidé ñaha tnaha ñáiyu-ndo, te duca<sup>n</sup> te Tãtá-ndó Dütú Ndiòxí Yáá ndécú àndiu cada càhnu iní-gá nchaa sá ñá túú váha quide-ndo tucu. <sup>15</sup> Dico núu nchòhó vá cadá càhnu iní-ndó nchaa sá quidé ñaha tnaha ñáiyu-ndo ña, te ni Dütú Ndiòxí Yáá cúú Tãtá-ndó vá cadá càhnu iní-gá nchaa sá quidé-ndó tucu.

*Cuendá ñáiyu ñá túú tnàhá ná xéxi áma cáhá<sup>n</sup> ndihí-yu Yá Ndiòxí*

<sup>16</sup> Te nchòhó, nduu ñà túú tñàhí ná xéxí-ndó càhá<sup>n</sup> ndihí-ndo Yá Ndiòxí, te vá cùndìyí-ndó dàtná xíquide nchaa ñáyíu dàndahú méé-xí càchí sá quidé ndáá te ñà ndáá sá quidé ndáá-yu, chí ñáyíu-á<sup>n</sup> duca<sup>n</sup> xíquidé-yu cuèndá sá cuini-yu cutnùní iní ñáyíu sá ñà túú tñàhí ná xéxí-yu càhá<sup>n</sup> ndihí-yu Yá Ndiòxí. Te yúhú càchí tñúhu-í xii-ndo sá sá dúcá<sup>n</sup> quidé-yu te ñà túú ná chindee ñàha-xi xii-yu cuèndá níhí-yu ì<sup>n</sup> sá ndúú tãhú-yu núú Yá Ndiòxí. <sup>17</sup> Dico nchòhó, nduu duca<sup>n</sup> quide-ndo ñà túú tñàhí ná xéxí-ndó càhá<sup>n</sup> ndihí-ndo Yá Ndiòxí, te váha váha naquete-ndo núú-ndó, te váha váha chíhi-ndo cùcá <sup>18</sup> cuèndá sá vá cutnùní iní ñáyíu sá ñà túú ná xéxí-ndó ndúu duca<sup>n</sup> cahá<sup>n</sup> ndihí-ndo Yá Ndiòxí. Te Dútú Ndiòxí Yáá cùú Tátá-ndó ndècu ndihí-ndo diu-ni mee-gá ndéhé-gá nacuáa quide-ndo ndecu-ndo, te diu-gá taxi-gá sá ndúú tãhú-ndó.

*Cuèndá nchaa sá váha nduu tãhú-ó*  
(Lc. 12:33-34)

<sup>19</sup> Te vá cáni iní-ndó cùu-ndo ñáyíu cuica nãndí sá cùndècu ndihí-ndo ñuyíú-a chí vá cùdì-xi, chí dava quee tíquidi, te dava caxi cudi ñúhu, àdi quíhu ñadúhú vehe-ndo te duhu-güedé. <sup>20</sup> Te váha-gá chí ndúcú nacuáa cada-ndo cuèndá duca<sup>n</sup> ngùndecu sá ndúú tãhú-ndó àndiu, te xiá<sup>n</sup> cudí-xi ndècu ndihí-ndo nì caa nì quíhí<sup>n</sup>, chí yàcá<sup>n</sup> vá quèé-gá tíquidi, te ni vá caxí-gá cudi ñúhu, te ni vá quini-gá-ndó ñadúhú duhu-güedé ndachú<sup>n</sup>-ndo. <sup>21</sup> Te núu cùu-ndo ñáyíu cuica ndècu ñuyíú-a, te diu-ni nchaa sá ndécú ndihí-ndo ñuyíú-a ñúhu iní-ndó. Àdi cuu-ndo ñáyíu quide nacuáa ngùndecu sá ndúú tãhú-ndó àndiu, te diu-ni sá ndúú tãhú-ndó ndècu àndiu-á<sup>n</sup> ñúhú iní-ndó.

*Núú-ó cùu-xi datná ì<sup>n</sup> ñúhú*  
(Lc. 11:34-36)

<sup>22</sup> Te cada iní-ndó sá núú-ndó cùu-xi datná ì<sup>n</sup> ñúhú. Te núu núú-ndó càváha te cutnùní iní-ndó ná cùú sá ndécú núú-ndó. <sup>23</sup> Dico núu cùhú núú-ndó ñà túú cutnùní cundehe-ndo ñà, te ñà túú cutnùní iní-ndó ná cùú sá ndécú núú-ndó. Te sá dúcá<sup>n</sup> cùhú núú-ndó te cada iní-ndó sá ndécú-ndó dàtná ì<sup>n</sup> núú néé. Te duha ndúu tñúhu càhá<sup>n</sup>-í chí núu sàni váha iní-ndó cuèndá Yá Ndiòxí ñà, te cùu víi cuu váha iní-ndó ndècu-ndo. Á<sup>n</sup> te núu ñà túú sàni váha iní-ndó cuèndá-gá ñà, te ñà túú tñàhí cùu váha iní-ndó ndècu-ndo. Te sá dúcá<sup>n</sup> ñà túú sàni váha iní-ndó cuèndá-gá te cada iní-ndó sá ndécú-ndó dàtná ì<sup>n</sup> núú néé.

*Vá ndácú ì<sup>n</sup> téé cunu cuechi-dé núú úú patróó<sup>n</sup>*  
(Lc. 16:13)

<sup>24</sup> Te ni ì<sup>n</sup> téé xínu cuechi vá ndácú-dé cunu cuechi-dé núú úú patróó<sup>n</sup>, chí téé-á<sup>n</sup> cuu váha iní-dé núú ì<sup>n</sup> patróó<sup>n</sup>-dé te tñii-dé nchaa tñúhu càhá<sup>n</sup> patróó<sup>n</sup> téé cùu váha iní-dé núú-xi-á<sup>n</sup>. Te núú ñngá tucu patróó<sup>n</sup>-dé vá cùú váha iní-dé, te ni vá tñii-dé tñúhu càhá<sup>n</sup> ñngá téé-á<sup>n</sup>. Te duca<sup>n</sup> sãtnahá-xi cùu nchòhó chí vá ndácú-ndó cunu cuechi-ndo núú Yá Ndiòxí te cuhu<sup>n</sup> iní-ndó nchaa sá íó ñuyíú-a.

*Yá Ndiòxí xitó-gã nchaa ñáyíu cùu déhe-gá*  
(Lc. 12:22-31)

<sup>25</sup> Te na càchí tñúhu-í xii-ndo sá vá ío cani iní-ndó núu nása níhí-ndó sá cóhó sá caxí-ndó, te ni vá ío cani iní-ndó núu nása níhí-ndó dõó cuihnu-ndo, chí cùnuu-gá méé-ndó dàcúúxí sá nchító-ndó, te duca<sup>n</sup> cùnuu-gá yiqui cùñú-ndó dàcúúxí dõó sácùlhu-ndo. <sup>26</sup> Te chí cáda cuèndá sá ncháá quítì ndava ñà túú tñàhí ná xítú-güedé, te ni ñà túú ndéé cuáhá<sup>n</sup>-güedi nãtãhú-güedi, te ni ñà túú ná nãtãxúha-güedi, te ni ñà túú ndéé cáá yàcá-güedi, chí mee Tátá-ó Dútú Ndiòxí Yáá ndécú àndiu xito ñàha-gá xii-güedi níhí-güedi sá xéxí-güedi. Te núu cue quiti-á<sup>n</sup> duca<sup>n</sup> xito ñàha-gá xii-güedi, ìte uu<sup>n</sup>-gá xitó ñàha-gá xii nchòhó, chí nchòhó ío-gá cùnùu-ndo dacúúxí cuè quiti-á<sup>n</sup>! <sup>27</sup> Te cuèi nãndí sá sãní vilhí iní-ndó ndècu-ndo, dico ñà ndácú-ndó càda-ndo nacuáa cuehnu-ndo cuèdicó ì<sup>n</sup> yiqui-gã.

<sup>28</sup> Te vá ío cani iní-ndó núu nása níhí-ndó dõó cuihnu-ndo. Te chí cáda cuèndá nacuáa sãhnu nchaa itá íó yucu, chí nchaa itá-á<sup>n</sup> ñà túú quide chiuh-xi, te ni ñà túú quèhe-xi idi. <sup>29</sup> Te na càchí tñúhu-í xii-ndo sã ndii Salòmón cuèi ío víi ní xínduu dõó ní xõo cuihnu ndii, dico ñà túú nũtnahá-xi nacuáa càa nchaa itá, chí ío-gá víi càa nchaa itá. <sup>30</sup> Te nchaa itá íó yucu tnaa-ni cudí-xi, te yichí-xi te sãhmi ñáyíu. Te cuèi duca<sup>n</sup> dico mee Yá Ndiòxí quidé-gá ío víi sácùnduu-xi. Te núu nchaa itá-á<sup>n</sup> duca<sup>n</sup> quide-gá xitó-gã sácùnduu víi-xi, te xiá<sup>n</sup> cutnùní sá ío-gá coto ñàha-gá xii-ndo, dicó-ni sá ñà túú sãndáá váha iní-ndó-gã. <sup>31</sup> Te xiá<sup>n</sup> núu ñà túú xini ñúhu vilhí-xi cani iní-ndó núu nása níhí-ndó sá cóhó sá caxí-ndó, àdi nása níhí-ndó dõó cuihnu-ndo. <sup>32</sup> Chí nchaa ñáyíu ñà túú xini nacuáa càhá<sup>n</sup> tñúhu Yá Ndiòxí mee-ni nchaa xiá<sup>n</sup> ñúhú iní-yu. Dico nchòhó chí mee Tátá-ndó Dútú Ndiòxí sa náha-gá ná cùú sá xini ñúhu-ndo. <sup>33</sup> Te xiá<sup>n</sup> núu ío xini ñúhu-xi sá cùhú<sup>n</sup> iní-ndó sá Yá Ndiòxí yíndàha ñàha-gá xii-ndo, te duca<sup>n</sup> càda-ndo nchaa nacuáa cuini-gá, te duca<sup>n</sup> te taxi-gá nchaa sá xini ñúhu-ndo. <sup>34</sup> Núu xiá<sup>n</sup> vá ío cani iní-ndó nása cundece-ndo ndúu tneé, chí cani iní-ndó nacuáa cada-ndo cundece-ndo vitna, chí nduu tneé-á<sup>n</sup> te òré-nã te cutnùní núu nása cada-ndo cundece-ndo. Chí nchòhó na

naha-ndo sá lo titní núú sá quidé-xí ìᵀᵀ nduu ìᵀᵀ nduu —duha ní dánéhé ñáhá Jësús xii cue téé xica cuu ndihi-gá ndihi nchaa ñáyiú.

## 7

*Vá càhá<sup>n</sup> cuèhé-ó cuèndá tnàha ñáyiú-o*  
(*Lc. 6:37-38, 41-42*)

<sup>1</sup> Te Jësús ndècuu-ni-gá dánéhé-gá cue téé xica cuu ndihi-gá ndihi nchaa ñáyiú, te xáha<sup>n</sup>-gá:

—Vá càhá<sup>n</sup> cuèhé-ndó cuèndá tnàha ñáyiú-ndo, te duca<sup>n</sup> te Yá Ndióxi ñá túú ná tnúhu cuñaha-gá xii-ndo. <sup>2</sup> Chi núú na càhá<sup>n</sup> cuèhé-ndó cuèndá tnàha ñáyiú-ndo, te Yá Ndióxi íó ìᵀᵀ sá cádá ñaha-gá xii-ndo. Te núú nchòhó ná càhá<sup>n</sup> cuèhé víhi-ndó cuèndá tnàha ñáyiú-ndo te Yá Ndióxi ío-gá dandòho ñaha-gá xii-ndo. <sup>3</sup> Te ná cuèndá ndéhé-ndó ìᵀᵀ sá ñá túú vaha quide tnaha ñáyiú-ndo te mee-ndo víhi-gá quidé-ndó-í? Te sá dúcá<sup>n</sup> quide-ndo te cada iní-ndó sá ndéhé-ndó dátá ìᵀᵀ mihi líhli ñúhu núú tnàha ñáyiú-ndo te mee-ndo ñúhu ìᵀᵀ mihi cahnu-gá núú-ndó te ñá túú quide cuèndá-ndó. <sup>4</sup> Te núú na nàcanu ichi-ndo tnaha ñáyiú-ndo cuèndá sá ñá túú quide váha-yu ndècú-yu, te mee-ndo víhi-gá quidé-ndó ñá, te cada iní-ndó sá xáha<sup>n</sup>-ndo xii tnaha ñáyiú-ndo sá nátáva-ndo mihi líhli ñúhu núú-yu sá dúcá<sup>n</sup> quide-ndo, te mihi cahnu ñúhu núú meé-ndó ñá túú quide cuèndá-ndó. <sup>5</sup> Te sá dúcá<sup>n</sup> quide-ndo te ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó, te xini ñuhu-xi díhna-gá daña-ndo nchaa sá ñá túú vaha quide-ndo, te dátá ñúhu ìᵀᵀ quide te cuu nàcanu ichi-ndo tnàha ñáyiú-ndo cuèndá nchaa sá ñá túú vaha quidé-yu.

<sup>6</sup> Te nchaa ñáyiú ío sáá iní-xi, te vá cádá yica-ndó-yu cundéóho-yu tnúhu Yá Ndióxi, chi núú na cáda yica-ndó-yu te ngóo-yu cuu úhú iní ñáhá-yu xii-ndo. Te ñáyiú-án<sup>n</sup> cúu-yu dátá iná chi quiti-án<sup>n</sup> núu na cuñaha-o ìᵀᵀ sá cuñaha-o, te núú ñá túú cùtnuní iní-dí ná cúú xiá<sup>n</sup> te tñú ñaha-dí xii-o. Te cúu tucú-yu dátá cùchí chi quiti-án<sup>n</sup> núu na chùcu-o núú-dí yúú váha sá ío víi caa nani pérá, te dicó-ni cùnu sáhá-dí chi ñá túú cùtnuní iní-dí sá cúú-xí yúú váha.

*Cácá<sup>n</sup>-ó núú Yá Ndióxi núú ná cuini-ó*  
(*Lc. 11:9-13; 6:31*)

<sup>7</sup> Te na càchí tnúhu-í xii-ndo sá càcá<sup>n</sup>-ndó núú Yá Ndióxi te núú ná cuini-ndó te taxi-gá, te vá dáña ndéè-ndó càcá<sup>n</sup>-ndó núú-gá núú ná cuini-ndó te duca<sup>n</sup> te níhi-ndó. Te cada iní-ndó sá ní quexio-ndo vehe ìᵀᵀ tnaha ñáyiú-ndo te ní càhá<sup>n</sup>-ndó, te ñáyiú-án<sup>n</sup> ní tedóho ñaha-yu xii-ndo te ní nacaá<sup>n</sup>-yu yuyèhe. Te duca<sup>n</sup> cáda iní-ndó chi Yá Ndióxi tedóho ñaha-gá xii-ndo, te taxi-gá sá ná càcá<sup>n</sup>-ndó núú-gá. <sup>8</sup> Chi nchaa ñáyiú duca<sup>n</sup> xiquide, te Yá Ndióxi tedóho ñaha-gá xii-yu

te níhi-yu sá cuini-yu. Te diu-ni duca<sup>n</sup> tucu nchaa ñáyiú na càcá<sup>n</sup> núú-gá ìᵀᵀ sá cuini-yu, chi sáñaha-gá sá xicá<sup>n</sup>-yu núú-gá. Te diu-ni duca<sup>n</sup> tucu nchaa ñáyiú ñá túú dàña ndéé xicá<sup>n</sup> núú Yá Ndióxi sá cuini-yu chi níhi-yu.

<sup>9</sup> Te nchòhó cue téé cùu tátá, ñá túú cùndee iní-ndó cuñaha-ndo xii cue déhe-ndo ìᵀᵀ yúú caxi-güexi òré xicá<sup>n</sup>-güexi ìᵀᵀ páá núú-ndó càxi-güexi. <sup>10</sup> Te ni ñá túú cùndee iní-ndó cuñaha-ndo ìᵀᵀ cóo caxi-güexi òré xicá<sup>n</sup>-güexi ìᵀᵀ chácá<sup>n</sup> núú-ndó càxi-güexi. <sup>11</sup> Te nchòhó cuèi ndéè dau-na sáá iní-ndó dico sàha-ndo cuè déhe-ndo sá váha xèxi-güexi òré ná cúú sá xicá<sup>n</sup>-güexi núú-ndó càxi-güexi. Te núú nchòhó duca<sup>n</sup> quide-ndo, jte uu<sup>n</sup>-gá duca<sup>n</sup> quide Tátá-ndó Dútú Ndióxi Yáá ndécú àndiu, chi taxi-gá sá váha sá cúú-xí-ndó te núu na càcá<sup>n</sup>-ndó núú-gá!

<sup>12</sup> Te nchaa sá váha cuini-ndó cáda tnaha ñáyiú-ndo, te cada-ndo tnàhá-ndó ndíhi-yu, chi duca<sup>n</sup> sànu ichi ñaha tnúhu ní chidó tñúni ndíi Moisés, te diu-ni duca<sup>n</sup> sànu ichi ñaha tucu nchaa tnúhu ní chidó tñúni cue téé ní xóo càhá<sup>n</sup> tnúhu Yá Ndióxi ndéé sanaha.

*Yuyèhe cuiñi*  
(*Lc. 13:24*)

<sup>13-14</sup> Te xini ñuhu-xi nducu-ndo nacuáa cada-ndo tñú-ndo ichi Yá Ndióxi. Te ichi-gá-án<sup>n</sup> cúú-xí dátá ìᵀᵀ ichi cuiñi, àdi dátá ìᵀᵀ yuyèhe cuiñi. Te duha càhá<sup>n</sup>-í chi ío úhú xinu iní-ndó tñú-ndo ichi Yá Ndióxi, te sacú-ni nchòhó cue ñáyiú ndècu ñuyúú-a tñú-ndo ichi-gá. Te nchaa ñáyiú ndècu ichi cuehé ichi duha ta xita nihnú-yu cuáhá<sup>n</sup>. Te ichi ndécú-yu-án<sup>n</sup> cada iní-ndó sá cúú-xí ìᵀᵀ ichi cahnu ichi quehé<sup>n</sup>, àdi ìᵀᵀ yuyèhe quehé<sup>n</sup>. Te duha càhá<sup>n</sup>-í chi ío vai ñáyiú ndécú-yu ichi-án<sup>n</sup>.

*Ndi dñ<sup>n</sup> núú yutnu xini-ó ná yutnu cùu-xi*  
*cuèndá sá sávidí-xi*  
(*Lc. 6:43-44*)

<sup>15</sup> Te càchí tnúhu-í xii-ndo sá ío quíhi iní-ndó cùndee-ndo cuèndá sá vá dándahú ñáhá cuè téé càchí sá càhá<sup>n</sup> tnúhu Yá Ndióxi te ñá ndáá sá càhá<sup>n</sup>-güedé tnúhu-gá. Chi cue téé-án<sup>n</sup> sànu sá quidé-güedé dátá quidé mbéé quiti ío váha iní-xi, dico ñá ndáá chi ñá túú ñúhu váha iní-güedé, chi quide-güedé dátá quidé quiti déé<sup>n</sup> quiti nani yíhí. <sup>16</sup> Te òré quexio-güedé núú ndécú-ndó te cada cuèndá-ndó nacuáa quide-güedé cuèndá duca<sup>n</sup> cùtnuní iní-ndó ná ñáyiú cùu-güedé. Te nchòhó xini-ndó sá ñá túú cùu<sup>n</sup> ndéhé yoho yáha stilé tnu iñu, te ni ñá túú xini-ndó cùu<sup>n</sup> ngúxí ìᵀᵀ tnu iñu. <sup>17-18</sup> Te xini tucu-ndo sá ncháá yutnu váha cùu<sup>n</sup> sávidí váha, te nchaa yutnu váha-án<sup>n</sup> ñá túú cùu<sup>n</sup> sávidí sá ñá túú váha. Te nchaa yutnu sá ñá túú váha ñá túú cùu<sup>n</sup> sávidí váha, chi mee-ni sávidí sá ñá túú váha cùu<sup>n</sup>. <sup>19</sup> Te nchaa yutnu sá ñá túú cùu<sup>n</sup>

sávidí váha xèhndé-güedé, te cuánguee-xi núú ñùhú càyú-xi. Te duca<sup>n</sup> sàtnahá-xi yáha nchaa cue téé dándahú ñáhá càchí sá càhá<sup>n</sup> tnúhu Yá Ndiòxi te ñá ndáá sá càhá<sup>n</sup>-güedé tnúhu-gá, chí quíhí<sup>n</sup>-güedé núú ñùhú núú càyú. <sup>20</sup> Te nchóhó cutnùnì iní-ndó nã ñáyiu cùu cue téé-á<sup>n</sup> cuendá nchaa sá quidé-güedé.

*Ñá ncháá ñáyiu ngündecú-yu núú ndécú Yá Ndiòxi táxi tnùnì-gá*

(Lc. 13:25-27)

<sup>21</sup> Te na càchí tnúhu-í xii-ndo sã òo vai ñáyiu cachí-yu sá yùhú cùú-í Xitohó-yu, dico ñá ncháá-yu nduu táhú-yu cundecú-yu núú ndécú Tãtã-í Dútú Ndiòxi táxi tnùnì-gá, chí mee-ni ncháa ñáyiu na cada nchaa nacuaa càhá<sup>n</sup>-gá ñáyiu-á<sup>n</sup> nduu táhú-yu cundecú-yu núú ndécú-gá táxi tnùnì-gá. <sup>22</sup> Te na sáa nduu cada ndáá Yá Ndiòxi cuéchi nchaa ñáyiu, te vai-yu cùñhá-yu xii-í: “Yòhó Xitohó Jesucristú nchúhú cùú-ndí ñáyiu ní càhá<sup>n</sup> tnúhu-n nacuaa ní cachí-n, te ñiu-ni-n ní cacunehe-ndí te ní sándáá iní ñáhá ncháa espíritu cundíhi yucu ñávaha xii-ndí ní quee-xi yiqui cùñú ñáyiu, te ñiu-ni yòhó ní chindee ñaha-n xii-ndí ní ndacu-ndí ní quide-ndí titní núú sã vã yòo tnàhí ndacu cada”, duha cùñhá-yu xii-í dàvã-á<sup>n</sup>. <sup>23</sup> Dico yùhú cùñaha-í xii-yu: “Ñá túú tnàhí xiní ñáhá-í xii nchòhó núu ndéè ñáyiu cùu-ndo, te chí xócuiñí nchaa nchòhó ñáyiu quide nchaa sá cuéhé sá dúhá núú ndécú-í-a”, duha cùñaha-í xii-yu.

*Íñ vehe ndècu cimientú-xi ndíhi ññ vehe ñá túú cimientú-xi*

(Mr. 1:22; Lc. 6:47-49)

<sup>24</sup> Te nchaa ñáyiu sácúndedóhó tnúhu càhá<sup>n</sup>-í te núu na tníi-yu, te ñáyiu-á<sup>n</sup> cùú-yu dàtná ññ téé òo váha cùtnunì iní-xi. Chí téé-á<sup>n</sup> ní dácáá-dé ññ vehe, dico ñá túú ní ndacu-xi ndéè ní tnahá-dé yúú caxí<sup>n</sup> te dàtnunì ní tava-dé cimientú-xi. <sup>25</sup> Te òrè ní cuu<sup>n</sup> dáú te ní ndee ndute ñuhu, te ní dándáá-xi ndéè núú cáá vehe-á<sup>n</sup>, dico ñá túú ní ndacu-xi cuidu-xi. Te ní quene tucu táchí ñíhi dico ñá túú ní ndacu-xi cuidu-xi vehe-á<sup>n</sup>, te duca<sup>n</sup> chí téé ní dácáá vehe-á<sup>n</sup> ní tava-dé cimientú-xi núú yúú caxí<sup>n</sup>. Duha sàtnahá-xi cùu nchaa ñáyiu tníi tnúhu càhá<sup>n</sup>-í. <sup>26</sup> Dico nchaa ñáyiu sácúndedóhó tnúhu càhá<sup>n</sup>-í te ñá túú cùiní-yu tníi-yu, ñáyiu-á<sup>n</sup> cùú-yu dàtná ññ téé ñá túú tnàhí cùtnunì iní-xi. Chí téé-á<sup>n</sup> ní dácáá-dé ññ vehe núú yúú mee-ni ñuhu cùchí. <sup>27</sup> Te òrè ní cuu<sup>n</sup> dáú te ní ndee ndute ñuhu, te ní dándáá-xi ndéè núú cáá vehe-á<sup>n</sup>, te ní quene táchí ñíhi te íí-ni ní xido-xi vehe-á<sup>n</sup> cuendá sá núú ñuhu cùchí ní sáá. Duha sàtnahá-xi cùu nchaa ñáyiu sácúndedóhó tnúhu càhá<sup>n</sup>-í te ñá túú cùiní-yu

tníi-yu —duha ní dánhè ñáhá Jèsús xii cue téé xica cuu ndíhi-gá ndíhi nchaa ñáyiu.

<sup>28</sup> Te òrè ní ndíhi Jèsús sá dúcá<sup>n</sup> ní càhá<sup>n</sup>-gá, te nchaa ñáyiu ní xindedóhó nchaa tnúhu ní càhá<sup>n</sup>-gá òo ní cuñúhu-yu nacuaa ní dánhè ñáhá-gá xii-yu. <sup>29</sup> Chí ní càhá<sup>n</sup>-gá dàtná càhá<sup>n</sup> cue téé cùnuu, te cùnuu ndisa-gá, te ñá túú ní càhá<sup>n</sup>-gá dàtná càhá<sup>n</sup> nchaa cue téé dàcuaha ñaha xii ñáyiu nchaa tnúhu ní chídó tnùnì ndíi Moisés.

## 8

*Jèsús quidé tãtna-gá ññ téé tnàhá cuéhé sã dátèhyú nihnu-xi yiqui cùñú-ó*

(Mr. 1:40-45; Lc. 5:12-16)

<sup>1</sup> Te Jèsús ní xica-gá cuánuu-gá ññi tìndúú núú dúcá<sup>n</sup> ní xíndecu-gá ní dánhè-gá ñáyiu-á<sup>n</sup>, te cuéhé víhí ñáyiu nchícú<sup>n</sup> ñáhá xii-gá cuánuu. <sup>2</sup> Te ní quexio ññ téé tnàhá cuéhé sã dátèhyú nihnu-xi yiqui cùñú-ó núú Jèsús, te ní ngúiní xití-dé núú-gá, te xáha<sup>n</sup>-dè xii-gá:

—Mèstrú, véxi-í càhá<sup>n</sup> ndàhú-í núu-n núu vã cùndee iní-n cada tátna ñaha-n xii-í, chí cùtnunì iní-í sá ndácú-n —càchí-dé xáha<sup>n</sup>-dè xii-gá.

<sup>3</sup> Te Jèsús ní dácáá-gá ndaha-gá ní tendaha ñaha-gá xii-dé, te xáha<sup>n</sup>-gá:

—Cuu cada tátna ñaha-í xii-n, te vitna ndúha-n —càchí-gá xáha<sup>n</sup>-gá xii-dé.

Te òrè-ni-á<sup>n</sup> ní xócuiñí cuéhé tnàhá-dé. <sup>4</sup> Te Jèsús ní xáha<sup>n</sup> tucu-gá xii-dé:

—Te vitna cuanùhú te vã yòo ññ cùñaha-n sã yùhú ní quide tátna ñaha-í xii-n, núú dütü-ni cuahá<sup>n</sup> cuendá sã ná quiní ñáhá-dé xii-n sã ní ndúha-n, te cuñaha-n sã ndúú táhú Yá Ndiòxi dàtná ní cachí ndíi Moisés. Te duca<sup>n</sup> cada-n cuendá cutnùnì iní ñáyiu sã ní ndúha-n —càchí-gá xáha<sup>n</sup>-gá xii téé ní quide tátna-gá-á<sup>n</sup>.

*Jèsús quidé tãtna-gá ññ téé xinu cuechi núú ññ téé cùu capitá<sup>n</sup>*

(Lc. 7:1-10)

<sup>5</sup> Te Jèsús ní xica-gá cuahá<sup>n</sup>-gá ññu Capernaúm. Te òrè cuánguñu-gá ññu-á<sup>n</sup> te ní quexio ññ téé cùu capitá<sup>n</sup> càhá<sup>n</sup> ndàhú-dé núú-gá, <sup>6</sup> te xáha<sup>n</sup>-dè xii-gá:

—Mèstrú, véxi-í càhá<sup>n</sup> ndàhú-í núu-n núu vã cùndee iní-n cada tátna-n ññ téé xinu cuechi núú-í, chí cùhú-dé te càhú víhí tnàhá-dé, te òo ndòhó-dé te ní ñá cùndee-gá-dé candá nihnu-dé —càchí-dé xáha<sup>n</sup>-dè xii-gá.

<sup>7</sup> Te Jèsús ní xáha<sup>n</sup>-gá xii-dé:

—Te na quíhí<sup>n</sup>-ó cada tátna-í-dé —càchí-gá xáha<sup>n</sup>-gá xii-dé.

<sup>8</sup> Te téé cùu capitá<sup>n</sup>-á<sup>n</sup> ní xáha<sup>n</sup>-dè xii-gá:

—Mèstrú, ñá túú tàù-í sá quíhu-n ndéè xití vehe-í, chí cùu-í ññ téé cùtèxínu sá cùú-xi-n, te càhá<sup>n</sup>-ni sá ndúha téé xinu cuechi núú-í

te ndúha-dé. <sup>9</sup> Chi yúhú ndècu cue téé tàxi tñuní ñhá xii-í, te duca<sup>n</sup> yúhú tucu ndècu cue sandadú táxi tñuní-í. Te òré xáha<sup>n</sup>-í xii ì<sup>n</sup>-dé quíhí<sup>n</sup>-dé ì<sup>n</sup> chiú<sup>n</sup> te cuáhá<sup>n</sup>-dé, te òré xáha<sup>n</sup>-í xii ìngá-dé quixi-dé te véxi-dé, te òré xáha<sup>n</sup>-í xii ì<sup>n</sup> téé xinu cuechi nù-í cada-dé ì<sup>n</sup> chiú<sup>n</sup> te quide-dé. Núu xiá<sup>n</sup> yòhó cáhá<sup>n</sup>-ní sá ndúha téé xinu cuechi nù-í te ndúha-dé —càchí-dé xáha<sup>n</sup>-dè xii Jèsús.

<sup>10</sup> Te Jèsús ío ní cuñúhu-gá sá dúcá<sup>n</sup> ní cáhá<sup>n</sup> téé cùu capitá<sup>n</sup>-án, te ní xáha<sup>n</sup>-gá xii nchaa ñáiyu nchicú<sup>n</sup> ñhá xii-gá:

—Na càchí tñuhu ndáá-í xii-ndo sá vátá quini-gá-í ní ì<sup>n</sup> ñáiyu israhél, ñáiyu súnín ío váha sándáá iní ñhá xii Yá Ndiòxi dátá sándáá iní ñhá té-a xii-gá. <sup>11</sup> Te na càchí tñuhu ndáá tucu-í xii-ndo sá ío cuéhé ñáiyu quixi ndáa xio nacuaá quene nchicanchii, te ñu-ni duca<sup>n</sup> ío cuéhé tucú-yu quixi ndáa xio nacuaá quee tucu nchicanchii. Te nchaa ñáiyu-án naníhí tñáh-yu ndihi té Abrahám, ndihi té Isaac, ndihi té Jacob núu ndécú Yá Ndiòxi táxi tñuní-gá te yacá<sup>n</sup> cundecu ndihi ñhá-yu xii-güedé. <sup>12</sup> Te nchaa ñáiyu táu nduu táhu cundecu núu ndécú Yá Ndiòxi táxi tñuní-gá ní cùu, ñáiyu-án quee tñu-yu, chi quíhí<sup>n</sup>-yu ì<sup>n</sup> xichí núu néé núu ío ndohó-yu cundecu-yu, te yacá<sup>n</sup> ío ndáhí-yu, te dicó rúhñú-ná cuu núhu-yu sá sátú iní-yu cuendá sá ndóhó-yu —càchí-gá xáha<sup>n</sup>-gá xii-yu.

<sup>13</sup> Te Jèsús ní xáha<sup>n</sup> tucu-gá xii téé cùu capitá<sup>n</sup>-án:

—Yòhó téé ndècu ndihi téé cùhu cuanùhú vehe-n vitna chi ndúha-dé chi ní sándáá iní-n Yá Ndiòxi —càchí-gá xáha<sup>n</sup>-gá xii-dé.

Te ñu-ni òré duca<sup>n</sup> ní xáha<sup>n</sup> Jèsús xii téé cùu capitá<sup>n</sup>-án ní ndúha téé xinu cuechi núu-dé.

*Jèsús quidé tátna-gá náná ñadíhí té Pèlú*  
(Mr. 1:29-31; Lc. 4:38-39)

<sup>14</sup> Te Jèsús ní xica-gá cuáhá<sup>n</sup>-gá vehe té Pèlú, te òré ní quexio-gá vehe-dé te ní xiní-gá caá náná ñadíhí-dé cùhu-a<sup>n</sup> ñuhu vihi-a<sup>n</sup> cahni. <sup>15</sup> Te Jèsús ní tñi-gá ndaha ñaha cùhu-án, te òré-ni-án ní nchíco-a<sup>n</sup> cahni te ní ndacóo-a<sup>n</sup> ní xinu cuechi-a<sup>n</sup> núu-güedé ndihi-gá.

*Jèsús quidé tátna-gá vai ñáiyu cùhú*  
(Mr. 1:32-34; Lc. 4:40-41)

<sup>16</sup> Te òré ní dáhu nchicanchii te ní quexio ñáiyu núu ndécú Jèsús, te ndécá-yu vai ñáiyu yíhi ñaha espíritú cundíhi yucu ñávaha ní sáá núu-gá te ndéca tucú-yu vai ñáiyu tñáh dáva-gá núu cuéhé. Te ì<sup>n</sup>-ní tñuhu ní cáhá<sup>n</sup> Jèsús ní tenáa-gá nchaa espíritú cundíhi yucu ñávaha yíhi ñaha xii nchaa ñáiyu-án, te ní quee-xi yiqui cùñú-yu cuáhá<sup>n</sup>-xi. Te tñáh nchaa dáva-gá ñáiyu cùhú-án ní quide tátna-gá. <sup>17</sup> Te duca<sup>n</sup> ní cuu chi ní quee

ndáa-xi nàcuáa ní cáhá<sup>n</sup> ndí Chaiá téé ní xóo cáhá<sup>n</sup> tñuhu Yá Ndiòxi ndéé sanaha, te duha ní cachí ndí: “Mee-gá cada tátna ñaha-gá xii-o, chi ñu-gá xocani-gá nchaa sá quidé ùhú yiqui cùñú-ó”, duha ní cachí ndí.

*Ñáiyu cuini tuha ñaha xii Jèsús*  
(Lc. 9:57-62)

<sup>18</sup> Te òré ní xiní Jèsús sá ío cuéhé ñáiyu xixúcu núu ndécú-gá, te ní xáha<sup>n</sup>-gá xii cue téé xica cuu ndihi-gá sá quee-gá ndihi-güedé bàrcú cuendá téhndé-gá ndihi-güedé ndáa ìngá xio yuhu làgúná. <sup>19</sup> Te mei òré-án ní quexio ì<sup>n</sup> téé dàcuaha ñaha xii cue ñáiyu nchaa tñuhu ní chidó tñuní ndí Moisés, te xáha<sup>n</sup>-dè xii-gá:

—Mèstrú, cuini-í canchicú<sup>n</sup> ñáhà-í xii-n ndèni ní cuu na quíhí<sup>n</sup>-n —càchí-dé xáha<sup>n</sup>-dè xii-gá.

<sup>20</sup> Te Jèsús ní xáha<sup>n</sup>-gá xii-dé:

—Nchaa ñucuii chi ndècu yaú cùu vehe-güedi saquíhí-güedi, te nchaa cue quiti ndáva caa tacá-güedi diquí yutnu. Dico yúhú Téé cùu ñani tñáh-ndó nchaa-ndo chi ñá túu ndéé cáá vehe-í ñuyú-a ndetatú-í —càchí-gá xáha<sup>n</sup>-gá xii-dé.

<sup>21</sup> Te ì<sup>n</sup> téé ní chitnahá ñhá xii Jèsús ní xáha<sup>n</sup>-dè xii-gá:

—Jèsús, dána na nùhú-í cundetu-í cuú tátá-í te chindúxi-í-dé dátñuní quixi-í chitnahá ñhá dùca<sup>n</sup>-ná-í xii-n —càchí-dé xáha<sup>n</sup>-dè xii-gá.

<sup>22</sup> Te Jèsús ní xáha<sup>n</sup>-gá xii-dé:

—Dána ñáiyu ñá túu sándáá iní ñhá xii-í ná chindúxi tñaha meé-yu, chi ñáiyu-án cùu-yu dátá ñáiyu ní xíhí cuéí ndècu-ní-yu núu ñuyú-a, te yòhó canchicú<sup>n</sup> ñáhà-ní xii-í —càchí-gá xáha<sup>n</sup>-gá xii-dé.

*Jèsús ngáni-gá táchí ndíhi ndute làgúná*  
(Mr. 4:35-41; Lc. 8:22-25)

<sup>23</sup> Te sáta dúcá<sup>n</sup> te Jèsús cuánguee-gá bàrcú ndihi cue téé xica cuu ndihi-gá, te ní xica bàrcú-án cuáhá<sup>n</sup>-xi. <sup>24</sup> Te nini ñuhu bàrcú-án ichi cuáhá<sup>n</sup>-xi núu ndute ní xidí Jèsús, te ní ngúita-xi níhi vihi quene táchí, te ta nàdachitú-xi ndute xití bàrcú cuáhá<sup>n</sup>. <sup>25</sup> Te cue téé xica cuu ndihi-gá cuáhá<sup>n</sup>-güedé núu caá-gá xidí-gá, te xáha<sup>n</sup>-güedé xii-gá:

—¡Mèstrú, ndiquíú iní chi dàcácu ñaha-n xii-o chi quee naa-o cuini-xi! —càchí-güedé xáha<sup>n</sup>-güedé xii-gá.

<sup>26</sup> Te Jèsús ní xáha<sup>n</sup>-gá xii-güedé:

—¿Ná cuendá ndéé duca<sup>n</sup> ío yúhú-ndó? ¿Náa ñá túu sándáá iní ñhá ndisa-ndo xii-í-án? —càchí-gá xáha<sup>n</sup>-gá xii-güedé.

Te Jèsús ní ndacóo-gá te ní tenáa-gá táchí-án ndíhi ndute-án, te ní ngúini táchí-án te ní nucúndecu nahi-ná ndute làgúná-án.

<sup>27</sup> Te nchaa cue téé ñuhu xití bàrcú-án ní cuñúhu-güedé sá dúcá<sup>n</sup> ní quide-gá ní xiní-güedé, te ní xitnaha-güedé:

—¿Te ná tée cùu téa-a núu duha ní cáhá<sup>n</sup>-ni-dé te ní nguñí<sup>n</sup>í táchí te ní nucúndecu nahí-ni ndúte lagúná-a-í? —cáchi-güedé xitnáha-güedé.

*Cue tée ñuú Gàdará cue tée yíhi ñaha espíritú cúndíhi yucu ñávaha*

(Mr. 5:1-20; Lc. 8:26-39)

<sup>28</sup> Te òré ní quèxio Jesús ndàa ingá xio yuhu làgúná yucu cue tée ñuú Gàdará, te úu tñahá cue tée quide vehe núu yíndüxi ndíyí ní quee-güedé cuáhá<sup>n</sup>-güedé núu ndécú Jesús, te ndí ndüü-güedé yíhi ñaha espíritú cúndíhi yucu ñávaha xii-güedé, te ío màñá-güedé chí vá yò tñahí dañá-güedé yáha yatní núu ndécú-güedé. <sup>29</sup> Te cue espíritú yíhi ñaha xii-güedé-án ní quide-xi níhi ní cáhá<sup>n</sup>-güedé, te xáha<sup>n</sup>-güedé xii-gá:

—¿Ná cuèndá véxi-ò Jesús Déhe Dútú Ndióxi chidácá ñahá-n xii-ndí? ¿Án sàma véxi-n dándoho ñaha-n xii-ndí? Te vátá sàá-gá nduu dùca<sup>n</sup> cada-n —cáchi-güedé xáha<sup>n</sup>-güedé xii-gá.

<sup>30</sup> Te yatní xián xíxica cuu vai cuchí xixexi-güedi. <sup>31</sup> Te cue espíritú cúndíhi yucu ñávaha yíhi ñaha xii cue téa-án ní cáhá<sup>n</sup> ndáhú-xi núu Jesús, te xáha<sup>n</sup>-xi:

—Te núu vá dañá-gá-n quíhi-ndí yiqui cùñú cue téa-a, te càhá<sup>n</sup> ndáhú-ndí núu-n sá dañá-n na quíhi<sup>n</sup>-ndí quíhu-ndí yiqui cùñú nchaa cùchí-án —cáchi cue espíritú-án xáha<sup>n</sup>-xi xii-gá.

<sup>32</sup> Te Jesús ní xáha<sup>n</sup>-gá xii cue espíritú cúndíhi yucu ñávaha-án:

—Chí táquèe yiqui cùñú cue téa-án te quíhi<sup>n</sup>-ndó núu ndèe ichi quíhi<sup>n</sup>-ndó —cáchi-gá xáha<sup>n</sup>-gá xii nchaa espíritú-án.

Te cue espíritú cúndíhi yucu ñávaha-án ní quee-xi yiqui cùñú cue téa-án, te cuáhá<sup>n</sup>-xi cuánguñu-xi nchaa cùchí-án. Te cue quítí-án ní xinu-güedi duha ní quèe-güedi ndàa núu dhéva yuhu làgúná-án, te ní ngaunihnu-güedi xiti ndute, te ní ndíhi-güedi ní cáhá.

<sup>33</sup> Te cue xito ñaha xii nchaa cuchí-án ní yùhú-güedé te ní xinu-güedé, te ní sáhá<sup>n</sup>-güedé ní cani-güedé cuèndú núu cuè ñáyiu ndècu xití ñuú nchaa nàcuáa ní cuu cuèndá cue tée ní xíhi ñaha nchàa espíritú cúndíhi yucu ñávaha-án. <sup>34</sup> Te nchaa ñáyiu ñuú-án ní quee-yu cuáhá<sup>n</sup>-yu núu ndécú Jesús. Te òré ní quèxió-yu núu ndécú-gá te ní cáhá<sup>n</sup> ndáhú-yu núu-gá sá ná quèe-gá yucu ñuú-yu nùhú-gá.

## 9

*Jesús quidé tãma-gá ñn tée cùhú ñá cúu-gá candá nihnu*

(Mr. 2:1-12; Lc. 5:17-26)

<sup>1</sup> Te sáta dúcá<sup>n</sup> ní cuu te Jèsús cuàndee-gá bàrcú cuáhá<sup>n</sup>-gá ní natehndé-gá ndàa ingá xio yuhu làgúná. Te xián ní ndexio-gá ñuú núu quidé ñuú-gá. <sup>2</sup> Te xián ndécú-gá ní quexio cue tée nchido-güedé ñn tée cùhú ñá cúu-gá candá nihnu ñuhu-dé xito, te Jèsús ní cutnùní iní-gá sá sàndáá ndisa iní ñahá-güedé xii-gá núu ní xáha<sup>n</sup>-gá xii tée cùhú-án:

—Yòhó tée cùhú vá ndíhú-gá iní-n, chí sa ní quide càhnu iní-í nchaa cuèchi-n —cáchi-gá xáha<sup>n</sup>-gá xii-dé.

<sup>3</sup> Te sá dúcá<sup>n</sup> ní cáhá<sup>n</sup>-gá núu xián cue tée dàcuaha ñaha xii ñáyiu nchaa tnúhu ní chidó tnùní ndí Moisés ní sani iní-güedé: “Téa càhá<sup>n</sup> cuèhé-dé cuèndá Yá Ndióxi”, duha ní sani iní-güedé. <sup>4</sup> Te Jèsús ní cutnùní iní-gá nàcuáa sàni iní-güedé núu ní xáha<sup>n</sup>-gá xii-güedé:

—¿Ná cuèndá duca<sup>n</sup> sàni cuèhé sàni dùha iní-ndó? <sup>5</sup> Te sá dúhá ní xáha<sup>n</sup>-í xii tée cùhú-a sá ní quide càhnu iní-í nchaa yicá cuèchi-dé, te xián nchòhò ñá túu cutnùní iní-ndó núu ndáa càhá<sup>n</sup>-í àdi ñá ndàa. Dico núu cúu-í-dé sá ndacóo-dé te caca-dé, te cutnùní ndáa iní-ndó núu ndáa càhá<sup>n</sup>-í àdi ñá ndáa, chí cundehe núu-ndó nàcuáa cada-í. <sup>6</sup> Te vitna na càda-í nàcuáa cutnùní iní-ndó nchàa-ndo sá yùhú Téa cùu ñani tñahá-ndó nchàa-ndo ndecu ndíhi-í tnúhu ndee iní ñuyíú-a sá cádá càhnu iní-í nchaa cuèchi ñáyiu —cáchi-gá xáha<sup>n</sup>-gá xii-güedé.

Te sáta dúcá<sup>n</sup> te ní xáha<sup>n</sup>-gá xii té cùhú-án:

—Ndacóo, te ndocani-n xito ñuhu-n véxi-án te nùhú-n vehe-n —cáchi-gá xáha<sup>n</sup>-gá xii-dé.

<sup>7</sup> Te òré-ni-án ní ndúha tée cùhú-án te ní ndacóo-dé te ní ndocani-dé xito ñuhu-dé ní quexio-án te ní xica-dé cuánuhú-dé vehe-dé. <sup>8</sup> Te nchaa ñáyiu xíndecu-án ío ní cuñúhu-yu sá dúcá<sup>n</sup> ní quide Jesús ní xiní-yu, te ní cáchi-yu sá ío càhnu cuu Yá Ndióxi cuèndá sá ní sáñaha-gá xii Jesús tnúhu ndee iní cada-gá nchaa sá vá yò tñahí ndàcu cada.

*Jesús càhá<sup>n</sup>-gá ñn tée nàni Mateú chitnahá ñahá-dé xii-gá*

(Mr. 2:13-17; Lc. 5:27-32)

<sup>9</sup> Te Jesús ní nucúhu<sup>n</sup> tucu-gá ichi cuáhá<sup>n</sup>-gá, te ichi ñuhu-gá ní xiní-gá núcóo ñn tée nàni Mateú quidé còbrá-dé ñáyiu chí cobradór impuèstú cúu-dé, te ní xáha<sup>n</sup>-gá xii-dé:

—Màteú, néhé chitnahá ñahá-n xii-í —cáchi-gá xáha<sup>n</sup>-gá xii-dé.

Te té Màteú-án ní ndacuñí-dé ní chitnahá ñahá-dé xii-gá.

<sup>10</sup> Te ñn xito ndècu Jesús ñn vehe, te yíhi-gá mésá ndíhi cue tée xica cuu ndíhi-gá xéxi ndíhi ñaha-gá xii-güedé. Te tñahá cue tée cuihna iní-xi quide còbrá ñahá xii ñáyiu cuèndá impuèstú yíhi ndíhi-gá mésá, te tñahá tucu daga-gá cue tée ndècu ichi cuèhé ichi duha



yíhi ndihí-gá mèsá. <sup>11</sup> Te sá ní xini cue tée cùu fariséú xéxi Jèsús ndihí nchaa cue téé-án, te ní xicán tñuhú-güedé núú cuè téé xica cuu ndihí-gá, te xáha-güedé:

—¿Ná cuendá duca<sup>n</sup> quide téé cùu mestrú-ndó xèxi-dé ndihí cue téé cuihna iní-xi quide cobrá ñáhá xii ñáyiú cuendá impuèstú, ndihí nchaa dava-gá cue téé ndècu ichi cuehé ichi duha-í? —cächí-güedé xáha-güedé.

<sup>12-13</sup> Te Jèsús ní tecú dóho-gá nàcuáa ndùu tñuhu ní xáha-güedé xii cue téé xica cuu ndihí-gá, núú ní xáha-gá xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chí xini ñuhú-yu ñátátná. Te yúhú véxi-í cáhá-í ñáyiú cùtnuní iní-xi sá ndécú cuèchi-xi cuendá dañá-yu nchaa sá cuehé sá dúhá quidé-yu, te ñá túú véxi-í cáhá-í ñáyiú cächí sá ñá túú ndècu cuèchi-xi. Te chí cádá cuendá váha nàcuáa cáhá<sup>n</sup> Yá Ndióxi núú tütú-gá núú cächí-xi: “Yúhú cuini-í sá cündàhú iní-ndó cuè tñaha ñáyiú-ndo, te ñá díú mèe-ni sá cáhni-ndó quiti nduu táhú-í”, duha cächí-gá núú tütú-gá —cächí Jèsús xáha-gá xii-güedé.

*Cue téé ndècu tñuhu núú Jèsús cuendá ñáyiú ñá túú tñahí ná xéxi áma cáhá<sup>n</sup> ndihí-yu Yá Ndióxi*

(Mr. 2:18-22; Lc. 5:33-39)

<sup>14</sup> Te cue téé xica cuu ndihí té Juáá téé dàcuandute ñaha xii ñáyiú ní sáhán-güedé núú ndécú Jèsús, te xicán tñuhú-güedé núú-gá, te xáha-güedé:

—Cuini-ndí cächí tñuhu-n ná cuendá nchúhú, ndihí cue téé cùu fariséú ñá túú tñahí ná xéxi-ndí áma cáhá<sup>n</sup> ndihí-ndí Yá Ndióxi, te cue téé xica cuu ndihí-n ñá túú dúca<sup>n</sup> quide-güedé —cächí-güedé xáha-güedé xii-gá.

<sup>15</sup> Te Jèsús ní xáha-gá xii-güedé:

—Nchòhó xini-ndó sá vā cùú cññaha-o xii ñáyiú ñuhu vico tñándaha sá vā cùú caxi-yu nini ndècu ndihí ñaha té tñándaha xii-yu, dico sáá nduu vā cündècu ndihí ñaha-gá téé tñándaha-án xii-yu, te dáva-án te cahni iní-yu vā caxi-yu cuendá sá ndihú iní-yu.

<sup>16</sup> Te ni vā yōo dāndée luha dóo sáá ñ<sup>n</sup> dóo sa ní cuu tñuhú víhí, chí dóo sáá-án nāndiyi-xi te uu-gá ndata-xi dōó sá ní cuu tñuhú-án.

<sup>17</sup> Te ni vā yōo chíhi ndidí sáá xití ñ<sup>n</sup> lamba sa ní cuu tñuhú víhí, chí níu yoo duca<sup>n</sup> na cada te ndava lamba sa ní cuu tñuhú-án chí ío níhi yócó ndidí-án, te cuíta-ni ndidí-án te cuíta-ni lamba-án te núu duca<sup>n</sup> na cadá-yu, núu xíá<sup>n</sup> xini ñuhu-xi queé ndidí sáá-án xití ñ<sup>n</sup> lamba saa cuendá duca<sup>n</sup> ñá túú ná cuu cováha-xi —cächí-gá xáha-gá xii-güedé.

*Cuendá déhe yoco té Jairú ndihí cuendá ñ<sup>n</sup> ñaha ní tñandéé dóo Jèsús*

(Mr. 5:21-43; Lc. 8:40-56)

<sup>18</sup> Te cáhá<sup>n</sup> dúcá<sup>n</sup>-ní Jèsús ní quexio ñ<sup>n</sup> téé cùnuu núú ndécú-gá, ñ<sup>n</sup> téé táxi tñuní veñuhu, te ní nguññí xití-dé núú-gá cáhá<sup>n</sup> ndáhú-dé, te xáha-gá xii-gá:

—Véxi-í cáhá<sup>n</sup> ndáhú-í núú-n núu vā cündée iní-n quihí<sup>n</sup>-ó véhe-í dandòto-n déhe yoco-í chí ní xihí-xi tñaví, te yúhú cùtnuní iní-í sá núu quihí<sup>n</sup>-n tēndaha-n yiqui cuñú-xi te ndoto-xi —cächí-dé xáha-gá xii-gá.

<sup>19</sup> Te Jèsús ní xica-gá cuáhán-gá ndihí-dé ndihí cue téé xica cuu ndihí-gá. <sup>20</sup> Te ichi ñuhu-gá cuáhán-gá ní sáhán ñ<sup>n</sup> ñadhí ní tñandéé-án yuhu dóo-gá ndaa sáta-gá, te ñaha-án sa ní cuu úxúú cuía sá cùhú-a<sup>n</sup> ngoyo ñaha níñí xii-a<sup>n</sup>. <sup>21</sup> Te duca<sup>n</sup> ní quide-a<sup>n</sup> chí ní sani iní-a<sup>n</sup> sá núu ndacu-a<sup>n</sup> tñandéé-a<sup>n</sup> cuèdicó luha yuhu dóo Jèsús te ndúha-a<sup>n</sup> ní sani iní-a<sup>n</sup>. <sup>22</sup> Te Jèsús ní nchócótó-gá ndaa sáta-gá te ní xini-gá ñadhí-án, te ní xáha-gá:

—Yòhó ñaha cùhú, vā ndihú-gá iní-n vitna chí sa ní ndúha-n, chí ní sándáá iní ñáhán xii-í —cächí-gá xáha-gá xii-a<sup>n</sup>.

Te òré-ni-án ní ndúha ñaha cùhú-án.

<sup>23</sup> Te òré ní quexio Jèsús vehe téé cùnuu taxi tñuní veñuhu-án, te ní xini-gá xindáhí víhí ñáyiú, te xindècu músicú. <sup>24</sup> Te ní xáha-gá xii-yu:

—Chí táquèe xití vehe-a, chí xíchí-a ñá túú ní xihí-xi chí dicó xidí-xi —cächí-gá xáha-gá xii-yu.

Te ní sácú ndéé ñáhá-yu xii-gá sá dúcán ní cáhá<sup>n</sup>-gá, chí sá cuú-xi mèe-yu te ní xihí ndisa xíchí-án. <sup>25</sup> Te ñáyiú-án ní queé-yu te cuánguihu Jèsús núú cándòdo xíchí ní xihí-án, te ní tñii-gá ndaha-xi te òré-ni-án ní ndacóo-xi. <sup>26</sup> Te nchaa ñuu cáá yàtni xián ní níhi ñáyiú tñuhu nàcuáa ní quide Jèsús.

*Jèsús quidé tátna-gá núú úú tñahá cue téé cuáá*

<sup>27</sup> Te sáta dúcán ní cuu te ní xica Jèsús cuánuhú-gá, te ichi ñuhu-gá ní chinchícú<sup>n</sup> ñáhá úú tñahá cue téé cuáá xii-gá, te níhi cáhá<sup>n</sup>-güedé, te xáha-güedé xii-gá:

—Yòhó Jèsús, téé cùu ñani tñahá ndíi Dàvíi, cundáhú iní ñáhá xii-ndí —cächí-güedé xáha-güedé xii-gá.

<sup>28</sup> Te òré ní nasáá Jèsús núú quidé véhe-gá, te cue téé cuáá-án ní quexio-güedé ndéé núú-gá, te ní xicán tñuhú-gá núú-güedé, te xáha-gá:

—¿Sándáá iní-ndó sá yúhú ndacu-í cada tátna-í núú-ndó-án? —cächí-gá xáha-gá xii-güedé.

Te ní xáha-güedé xii-gá:

—Sándáá iní-ndí sá díú yòhó Jèsús ndacu-n cada tátna-n núú-ndí —cächí-güedé xáha-güedé xii-gá.

<sup>29</sup> Te Jèsús ní dácáá-gá ndaha-gá ní tendahaga-gá núú-güedé, te ní xáha<sup>n</sup>-gá xii-güedé: —Te vitna, ndúha núú-ndó chi ní sándáá iní-ndó sá díú yúhú ndacu-í cada tátna-í núú-ndó —càchí-gá xáha<sup>n</sup>-gá xii-güedé.

<sup>30</sup> Te òré-ni-á<sup>n</sup> ní ndúha núú-güedé, te Jèsús ní cáhá<sup>n</sup> víhí-gá dóho-güedé cuendá sá vâ cáhá<sup>n</sup>-güedé nâcuáa ní cuu ní ndúha núú-güedé.

<sup>31</sup> Te cue tée-á<sup>n</sup> òré ní ndee-güedé núú ndécú Jèsús, te ní ngúita-ni-güedé ní cani-güedé cuendú núú ñáiyu nâcuáa ní quide ñaha-gá xii-güedé. Te nchaa dava-gá ñuú cáa yàtni xíá<sup>n</sup> ní sáhá<sup>n</sup>-güedé ní cani-güedé cuendú núú ñáiyu nâcuáa ní quide ñaha Jèsús xii-güedé.

*Jèsús quidé tátna-gá ñ<sup>n</sup> tée ñíhí*

<sup>32</sup> Te íchí ní ndee cue tée ní ndúha núú-xi-á<sup>n</sup> núú ndécú Jèsús, te ní quexio ñ<sup>n</sup> úú ñáiyu ndécá-yu ñ<sup>n</sup> tée ñíhí yíhí ñaha espíritú cundíhi yucu ñáváha. <sup>33</sup> Te Jèsús ní queñuhu-gá espíritú cundíhi yucu ñáváha yíhí ñaha xii tée-á<sup>n</sup>, te òré-ni-á<sup>n</sup> ní cuu ní nacáhá<sup>n</sup>-dé. Te nchaa ñáiyu xíndecu-á<sup>n</sup> ío ní cuñúhu-yu, te ní xitnáhá-yu:

—Ñá túú tñahí xini-ó ñ<sup>n</sup> tée duha cada ñuú nchoo cué ñáiyu isráél ní cùu —cachí-yu xitnáhá-yu.

<sup>34</sup> Te cue tée cùu fariséú ní ngúita-güedé xitnáha-güedé:

—Tée-a chí sácúilná chindèe ñaha-xi xii-dé queñúhu-dé nchaa espíritú yíhí ñaha xii ñáiyu te díu-ni sácúilná-á<sup>n</sup> táxi tñuní-xi nchaa espíritú-á<sup>n</sup> —càchí-güedé xitnáha-güedé.

*Jèsús cundáhú iní-gá ñáiyu*

<sup>35</sup> Te Jèsús cuáhá<sup>n</sup>-gá nchaa ñuú náhnú ndíhi nchaa ñuú líhli, te ndi tñahá ñ<sup>n</sup> ñ<sup>n</sup> ñuú sáa-gá te duca<sup>n</sup> cuanguihu-gá ñ<sup>n</sup> ñ<sup>n</sup> veñúhu cáa nchaa ñuú-á<sup>n</sup> dánèhé-gá ñáiyu tñúhu váha, tñúhu sá sánú ichi ñaha xii-yu nâcuáa ndáhu ndaha ñaha Yá Ndióxi xii-yu. Te duca<sup>n</sup>-ni ta quide tátna-gá nchaa ñáiyu cùhú cuáhá<sup>n</sup> cuéi ndi díí<sup>n</sup> ndi díí<sup>n</sup> núú cuéhé tñahá-yu ñ<sup>n</sup> ñ<sup>n</sup>-yu. <sup>36</sup> Te sá ní xini Jèsús sá ío vai ñáiyu nchicú<sup>n</sup> ñahá xii-gá, te ní cundáhú iní ñahá-gá xii-yu chí ío ndíhú iní-yu, te vâ yóo nèhe cuendá ñahá xii-yu, te cùu-yu dátáa cue mbéé cue quiti ñá túú tóli-xi. <sup>37</sup> Te Jèsús ní xáha<sup>n</sup>-gá xii cue tée xica cuu ndíhi-gá:

—Nchòhó xini-ndó sá òré ná sáa nduu cùu nchaa sá xítú ñáiyu te ío vai cuu. Te na càchí tñúhu ndáá-í xii-ndo sá dátáa ío vai sá xítú ñáiyu cùu, duca<sup>n</sup> ío vai ñáiyu cùmání cundedóho tñúhu-í, te ío sacú ñáiyu dàcuaha ñaha xii-yu. <sup>38</sup> Núú xíá<sup>n</sup> xini ñúhu-xi cáca<sup>n</sup>-ndó núú Yá Ndióxi Yáa cùú Xitohó-ndó ndíhi-yu cuendá sá ná dàcahá<sup>n</sup>-gá iní-yu cáhá<sup>n</sup>-yu tñúhu-gá núú nchaa dava-gá tñaha

ñáiyu-yu cùmání cundedóho tñúhu-gá —càchí-gá xáha<sup>n</sup>-gá xii-güedé.

## 10

*Jèsús sáñaha-gá tñúhu ndee iní xii ndi ùxúú cue tée xica cuu ndíhi-gá*

(Mr. 3:13-19; Lc. 6:12-16)

<sup>1</sup> Te Jèsús ní cana-gá ndi ùxúú cue tée xica cuu ndíhi-gá, te ní sáñaha-gá xii-güedé tñúhu ndee iní cundecu ndíhi-güedé cuendá queñuhu-güedé nchaa espíritú cundíhi yucu ñáváha yíhí ñaha xii ñáiyu, ndíhi cuendá sá cáda tátna-güedé nchaa dava-gá ñáiyu cùhú cuéi nándi núú cuéhé tñahá-yu.

<sup>2</sup> Te duha xínani ndi ùxúú cue tée-á<sup>n</sup>: tée cùnuu-gá nání-dé Xímú, ádi Pelú chí úú díu-dé, te ñaní-dé cùú tē Ndríxi, te tñahá tée-á<sup>n</sup> cùú-dé tée xica cuu ndíhi Jèsús, ndíhi té Jácobó ndíhi ñaní té Jácobó-á<sup>n</sup> tée nani Juaá, te ndi ndúú cue tée-á<sup>n</sup> cùú-güedé déhe té Zebédéú. <sup>3</sup> Te tñahá té Lìpé xíca cùu ndíhi-gá, ndíhi té Bartolómé, ndíhi té Mǎxí, ndíhi té Mǎteú tée cùu cobradór impuéstú ní cùu, ndíhi té Jácobó déhe té Àlféú, ndíhi té Lèbeú tée dānani-güedé Tǎdeú, <sup>4</sup> ndíhi té Xímú tée ní cundíhi cue tée cananístá, ndíhi té Júdás Iscarioté tée ní sáa nduu ní sáha cuendá ñahá xii Jèsús núú cué tée cùu úhú iní ñahá xii-gá.

*Jèsús tэндàha-gá ndi ùxúú cue tée xica cuu ndíhi-gá quíhí<sup>n</sup>-güedé cáhá<sup>n</sup>-güedé tñúhu-gá núú ñáiyu*

(Mr. 6:7-13; Lc. 9:1-6)

<sup>5-6</sup> Te Jèsús ní xáha<sup>n</sup>-gá xii ndi ùxúú cue tée xica cuu ndíhi-gá sá quíhí<sup>n</sup>-güedé cáhá<sup>n</sup>-güedé tñúhu-gá núú ñáiyu, te cùmání-gá caca-güedé quíhí<sup>n</sup>-güedé, te ní xáha<sup>n</sup>-gá xii-güedé:

—Na càchí tñúhu-í xii-ndo sá mée-ní ñúú núú xíndecu cue ñáiyu isráél quíhí<sup>n</sup>-ndó cáhá<sup>n</sup>-ndó tñúhu-í, te vâ quíhí<sup>n</sup>-ndó ní ñ<sup>n</sup> ñuú yíndèhu distritú Sámariá, te ní vâ quíhí<sup>n</sup>-ndó dáva-gá ñuú núú xíndecu ñáiyu ñá túú cùu ñáiyu isráél. Te cue ñáiyu isráél-á<sup>n</sup> cùu-yu dátáa cue mbéé cue quiti ní xita chí ta xita nihnú-yu cuáhá<sup>n</sup>. <sup>7</sup> Te cùñaha-ndo xii-yu sá sá ní cuyatni nduu ndíhi ndaha ñaha Yá Ndióxi xii-yu. <sup>8</sup> Te cada tátna-ndo nchaa ñáiyu cùhú cuéi ñáiyu tñahá cuéhé sá dátèhyú nihnu-xi yiqui cùñú-yu, te queñuhu-ndo nchaa espíritú cundíhi yucu ñáváha yíhí ñaha xii ñáiyu, te dandòto-ndo cue ñáiyu sa ní xíhí, te vâ cáca<sup>n</sup>-ndó yáhu-ndo núú ñáiyu òré cada-ndo nchaa chiun-á<sup>n</sup>, chí sa ñaha-ndo sá dícò duca<sup>n</sup> ní taxi-í tñúhu ndee iní ndécú ndíhi-ndo.

<sup>9</sup> Te vâ cánèhe-ndo díhú<sup>n</sup> cuu ichi-ndo, <sup>10</sup> te ní vâ cánèhe-ndo ñunu cuhu<sup>n</sup> ndachiu<sup>n</sup>-ndo, te ní vâ cánèhe-ndo ingá ichi dóó-ndó nàdáma-ndo, te ní vâ cánèhe-ndo

úu-gá chàu-ndo chi diu-ni chàu yíhí-ndó-ã<sup>n</sup> xiã<sup>n</sup>-ni quíhi-ndo, te ni vâ cãnehè-ndo tatnu, te duca<sup>n</sup> càda-ndo chi nchòhó sa ñaha-ndo sá ncháá ñáyiú quide chiu<sup>n</sup> te diu-ni cuendá chiu<sup>n</sup> quidé-yu níhi-yu sá xéxi-yu.

<sup>11</sup> Te ndi tnahá ñuu ná quexio-ndo te nducuo-ndo ñáyiú cùtnuní iní-ndó sã cúu-yu ñáyiú váha, te vehe ñáyiú-á<sup>n</sup> cundecu-ndo ndèè sãá nduu ndèe-ndo ñuu-ã<sup>n</sup>. <sup>12</sup> Te òré quexio-ndo vehé-yu te cùñaha-ndo xii-yu: “Yá Ndiòxí chindèe chitúu ñaha-gã xii-ndo ndècu-ndo”, duha cùñaha-ndo xii-yu. <sup>13</sup> Te núu ní cáhá<sup>n</sup> váha ndihi ñáhá-yu xii-ndo, te cuu-xí sã váha sã cúu-xí-yu cuendá tñuhu ní xáha<sup>n</sup>-ndo-ã<sup>n</sup>, dico núu ñá túú ní cáhá<sup>n</sup> váha ndihi ñáhá-yu xii-ndo, te cùñaha-ndo xii-yu sã vâ cúu-xí sã váha xii-yu tñuhu ní xáha<sup>n</sup>-ndo-ã<sup>n</sup>. <sup>14</sup> Te núu ní sáá-ndó ñ<sup>n</sup> ñuu ádi ñ<sup>n</sup> vehe, te núu ñá túú ní cáhá<sup>n</sup> ndihi ñaha váha-yu xii-ndo te ni ñá túú ní cuini-yu cundedóho-yu tñuhu cáhá<sup>n</sup>-ndó te ndee-ndo ñuu-ã<sup>n</sup> ádi vehe-á<sup>n</sup>, te naquidi-ndo tica chùhmá ní tñii sáhá-ndó cuendá ná cùtnuní iní-yu sã ñá túú quide váha-yu. <sup>15</sup> Te na cãchí tñuhu ndáá-í xii-ndo sã sãá nduu te ío-gá dandòho ñaha Yá Ndiòxí xii ñáyiú duca<sup>n</sup> na càda ñaha xii-ndo-ã<sup>n</sup> dàcúxí ñáyiú ní xíndecu ñuu Sodomá ndihi ñuu Gòmorrá.

*Ndoho tnahá-ó cundecu-o ichi Xitohó Jesu- crístú*

<sup>16</sup> Te cada iní-ndó sã cúu-ndó dàtná cue mbéè cue quiti cuáhá<sup>n</sup> núú ió yíhí. Te duca<sup>n</sup> sãtnahá-xi cùu-ndo chi yúhú tendaha ñaha-í xii-ndo quíhí<sup>n</sup>-ndó núú xíndecu cue ñáyiú cuíhna iní-xi, te ío váha cuáhá-ndo cuendá nãcuáa cada-ndo dàtná quidé còó, dico cundu váha iní-ndó ñá túú ná cada-ndo dàtná quidé lómá. <sup>17</sup> Te quíhí iní-ndó chi cue ñáyiú na cùu úhú iní ñáhá xii-ndo, te cuáhá cuendá ñáhá-yu xii-ndo núú cuè téè cùchiu<sup>n</sup>, te caniha-güedé xii-ndo xití veñuhu-güedé. <sup>18</sup> Te dava tucu ñáyiú cuu úhú iní ñáhá xii-ndo candeca ñáhá-yu xii-ndo quíhí<sup>n</sup> núú cuè téè cùnuu yíndaha nació<sup>n</sup>, ádi núú dáva-gá cue téè cùnuu sã cuendá-í. Te nchòhó níhi-ndó nãcuáa cada-ndo cáhá<sup>n</sup> váha-ndo cuendá-í núú-güedé ndihi núú cuè ñáyiú ñá túú cùu ñáyiú isrâél. <sup>19-20</sup> Dico òré cuáhá cuendá ñáhá-yu xii-ndo núú ncháa cue téè-á<sup>n</sup>, te vâ cání iní-ndó núú nása cundu tñuhu cáhá<sup>n</sup>-ndó núú-güedé, chi òré-ná te níhi-ndó tñuhu cáhá<sup>n</sup>-ndó. Te ñá díú mèe-ndo cahu iní-ndó tñuhu cáhá<sup>n</sup>-ndó, chi mee Espíritú Yá Ndiòxí Yáá cúú Tãtã-ndó dàcahú iní ñáhá-xí xii-ndo nacuáa cundu tñuhu cáhá<sup>n</sup>-ndó.

<sup>21</sup> Te dava cue téè cuáhá cuendá-güedé ñaní-güedé núú cuè téè cùchiu<sup>n</sup> cuendá cahni ñaha-güedé, te dava cue téè cùu tãtã diu-ni duca<sup>n</sup> càda-güedé déhe-güedé, te diu-ni

duca<sup>n</sup> càda ñaha dava cue ñáyiú cùu déhe xii tãtã-yu ndihi nãhá-yu, chi cuáhá cuendá ñáhá-yu núú cuè téè cùchiu<sup>n</sup> cuendá cahni ñaha-güedé xii-yu. <sup>22</sup> Te nchòhó chi ncháa ñáyiú ngüíta-yu cuu úhú iní ñáhá-yu xii-ndo sã cuendá-í. Te núu na càda ndee-ni iní-ndó cãnchicú<sup>n</sup> nihnu-ni-ndo ichi-í cuèi nándi sã ná càda ñáhá-yu xii-ndo ndèè ná sãá nduu vâ cùndècu-gã-ndó ñuyúú-a ña, te nduu tãhú-ndó cùndecu-ndo ni caa ni quíhí<sup>n</sup> ndihi Yá Ndiòxí. <sup>23</sup> Te núu ñ<sup>n</sup> ñuu cùini-güedé tñii ñaha-güedé xii-ndo càda úhú ñáhá-güedé sã cuendá-í, te cunu-ndo núú-güedé quíhí<sup>n</sup>-ndó ñngá ñuu. Te na cãchí tñuhu ndáá-í xii-ndo sã cùmání-gã quíhí<sup>n</sup>-ndó ncháa dava-gá ñuu núú xíndecu ñáyiú isrâél cáhá<sup>n</sup>-ndó tñuhu-í, te sa quixi tucu yúhú, Téè cùu ñaní tnahá-ndó ncháa-ndo ñuyúú-a.

<sup>24-25</sup> Te nchòhó xini-ndó sã ní ñ<sup>n</sup> téè dàcuaha ñá túú cùnuu-dé dàcúxí mèstrú-dé, te núu mèstrú téè-á<sup>n</sup> nándi yãha-dé ndécú-dé te tàú-dé nduu vétú iní-dé te núu tnahá-dé yãha-dé dàtná yãha mèstrú-dé-á<sup>n</sup>. Te diu-ni duca<sup>n</sup> sãtnahá tucu-xi cùu ñ<sup>n</sup> téè xinu cuechi, chi ñá túú cùnuu-dé dàcúxí patróó<sup>n</sup>-dè, te ncháa sã yãha patróó<sup>n</sup>-dè-á<sup>n</sup> te tàú-dé nduu vétú iní-dé te núu tnahá-dé yãha-dé dàtná yãha patróó<sup>n</sup>-dè-á<sup>n</sup>. Te núu yúhú Yáá táxi tñuní ñáhá xii-ndo cãchí-yu sã cúu-í sãcúhñá, te uu<sup>n</sup>-gá duca<sup>n</sup> cùñáhá-yu xii nchòhó cue téè cùndihi-í.

*Vã yúhú-ó cuendá ncháa sã cáda ñaha ñáyiú xii-o*

(Lc. 12:2-7)

<sup>26</sup> Te nchòhó vã yúhú-ndó núú ñáyiú. Chi ncháa tñuhu sã cúu yúhu ni cuu vã cúu yúhu-gá, chi ncháa dacuítí sã quéè tñu-xi núú ñáyiú. <sup>27</sup> Te ncháa tñuhu sã cãchí tñuhu-í xii-ndo núú mèe núú ñ<sup>n</sup>-ó, cùu-xi tñuhu sã ndúú yúhu ni cuu datúu-ndo núú cuè ñáyiú cuèi núú chítú núú tàcá. <sup>28</sup> Te xini ñuhu-xi sã vã yúhú-ndó cuè ñáyiú cuèi na cahni ñáhá-yu xii-ndo, chi diu-ni yiqui cùñú-ndó ndácú-yu cahni-yu, dico ñá túú ñágá ndacú-yu cada ñáhá-yu xii-ndo. Te tàú-ndó sã Yá Ndiòxí yúhú-ndó chi Yáá-á<sup>n</sup> ndacu-gá danãa-gá yiqui cùñú-ndó, te ndacu-gá daquihí<sup>n</sup> ñáhá-gã xii-ndo núú úhú núú ndàhú.

<sup>29</sup> Te nchòhó xini-ndó sã ndèè úú tñahá tñáá cùyãhu-di núú ñ<sup>n</sup>-ní díhú, te ni ñ<sup>n</sup>-di ñá túú xihí cùtèxinu-di chi ndèè núu mee Yá Ndiòxí Yáá cúú Tãtã-ndó ná cãchí-gá te xihí-di. <sup>30</sup> Dico nchòhó chi ío-gã néhé cuendá ñáhá Yá Ndiòxí xii-ndo chi ndèè idi díqui-ndó yíndehú. <sup>31</sup> Núu xiã<sup>n</sup> cãchí-í sã vã yúhú-ndó chi cùnuu-gã-ndó dàcúxí tñáá cuèi vã víhi-güedi.

*Nchaa ñáyi dātúu núú tnàha ñáyi-xi sá ndécú ndíhi-yu Xítoho Jesucristú*  
(Lc. 12:8-9)

<sup>32</sup> Te na càchí tnúhu-í xii-ndo sã ncháá ñáyi na dātúu núú tnàha ñáyi-xi sá ndécú ndíhi ñahá-yu xii-í, te duca<sup>n</sup> te tnàhá yúhú dātúu-í núú Tàtá-í Dútú Ndióxi Yáá ndécú àndiu sá ndécú ndíhi-í-yu. <sup>33</sup> Dico nchaa ñáyi na cūñaha xii tnaha ñáyi-xi sã ñà túú ndècu ndíhi ñahá-yu xii-í, te diu-ni duca<sup>n</sup> càda yúhú tucu chí cūñaha-í xii Tàtá-í Dútú Ndióxi Yáá ndécú àndiu sã ñà túú ndècu ndíhi-í-yu.

*Ñà túú cūu ñáyi*  
(Lc. 12:51-53; 14:26-27)

<sup>34</sup> Te na càchí tnúhu-í xii-ndo sã vã caní iní-ndó sã yúhú véxi-í ñuyúú-a te cuu ñáyi-gá ñáyi cundecú-yu, chí da ngúita-yu vã cúú ñáyi-gá-yu cundecú-yu, te duca<sup>n</sup> chí nchaa ñáyi vã quindáá iní ñahá xii-í ñáyi-á<sup>n</sup> ngóo-yu cuu úhú iní-yu nchaa ñáyi quindáá iní ñahá xii-í. <sup>35</sup> Te dava cue téé xíndecu tātá-xi te ngóo-güedé cuu úhú iní-güedé tātá-güedé, te diu-ni duca<sup>n</sup> càda cue ñáyi dīhí xíndecu nānā-xi, chí ngóo-yu cuu úhú iní-yu nānā-yi-yu, te diu-ni duca<sup>n</sup> càda tucu cue ñáyi cūu sánu, chí ngóo-yu cuu úhú iní-yu nānā-yi-yu. <sup>36</sup> Te ndi mēe-yu vehé-yu ngóo-yu vã cúú ñáyi-gá-yu cundecú-yu.

<sup>37</sup> Te na càchí tnúhu tucu-í xii-ndo sã ncháá ñáyi ío-gá ná cūu iní tātá-xi àdi nānā-xi dācúúxi yúhú, te ñáyi-á<sup>n</sup> ñà túú tūu-yu cundecu ndíhi ñahá-yu xii-í, te nchaa ñáyi ío-gá ná cūu iní déhe ducu-xi, àdi déhe yoco-xi dācúúxi yúhú, te diu-ni duca<sup>n</sup> ñà túú tūu-yu cundecu ndíhi ñahá-yu xii-í. <sup>38</sup> Te nchaa ñáyi vã cānchícú<sup>n</sup> nihnu ñaha xii-í cuendá sá yúhú-yu ndohó-yu dātá ndoho-í ñáyi-á<sup>n</sup> ñà túú tūu-yu cundecu ndíhi ñahá-yu xii-í. <sup>39</sup> Te cue ñáyi na yúhú cuú sá cuendá-í te ñáyi-á<sup>n</sup> cuíta nihnú-yu, dico nchaa ñáyi vã yúhú cuú sá cuendá-í, te ñáyi-á<sup>n</sup> nduu táhú-yu cundecú-yu ni caa ni quíhí<sup>n</sup> ndíhi Yá Ndióxi.

*Cuendá sá ndúú táhú-ó*  
(Mr. 9:41)

<sup>40</sup> Te nchaa ñáyi na quèhe<sup>n</sup> cuendá ñahá xii-ndo te cada iní-yu sá tnàhá yúhú ní quehe<sup>n</sup> cuendá-yu. Te nchaa ñáyi na quèhe<sup>n</sup> cuendá ñahá xii-í, te cada iní-yu sá tnàhá Tàtá-í Dútú Ndióxi Yáá ní tendaha ñaha xii-í véxi-í ñuyúú-a ní quehe<sup>n</sup> cuendá-yu. <sup>41</sup> Te nchaa ñáyi na quèhe<sup>n</sup> cuendá ñáyi tée càhá<sup>n</sup> tnúhu Yá Ndióxi cuendá sá quidé-dé chiú<sup>n</sup>-gá, te dātá-ni càa táhú cuñaha-gá nduu táhú tée duca<sup>n</sup> càhá<sup>n</sup> tnúhu-gá-á<sup>n</sup>, diu-ni duca<sup>n</sup> cūnduu táhú cuñaha-gá nduu táhú ñáyi duca<sup>n</sup> na quèhe<sup>n</sup> cuendá ñahá xii-dé. Te nchaa ñáyi na

quèhe<sup>n</sup> cuendá ñáyi tée quide váha cuendá sá dúcá<sup>n</sup> quide váha-dé, te dātá-ni càa táhú nduu táhú tée-á<sup>n</sup> diu-ni duca<sup>n</sup> cūnduu táhú nduu táhú ñáyi na quèhe<sup>n</sup> cuendá ñahá xii-dé. <sup>42</sup> Te nchaa ñáyi na cuñaha ñáyi yaxi<sup>n</sup> ndute coho ñáyi cūu cuendá-í cuendá sá ní tuha ñahá-yu xii-í cuéí ñà túú cūnuu víhí-yu, te ñáyi duca<sup>n</sup> na cuñaha ndüte-á<sup>n</sup> níhi-yu sá ndúú táhú-yu núú Yá Ndióxi — càchí Jèsús xáha<sup>n</sup>-gá xii-güedé.

## 11

*Jèsús càhá<sup>n</sup> ndíhi-gá cue téé xica cuu ndíhi té Juáá*

(Lc. 7:18-35)

<sup>1</sup> Te sáta ní yáha duca<sup>n</sup> ní xáha<sup>n</sup> Jèsús xii ndi úxúú cue téé xica cuu ndíhi-gá, te ní xica-gá cuáhá<sup>n</sup>-gá nchaa ñúú cáa yàtni xiá<sup>n</sup> dānèhé-gá ñáyi tnúhu-gá.

<sup>2</sup> Te té Juáá yíhi-dé vecaá te ní níhi-dé tnúhu nchaa nācuáa quide Xítoho Jesucristú. Te sáta dúcá<sup>n</sup> te ní tendaha-dé ñáyi tūu cue téé xica cuu ndíhi-dé cuáhá<sup>n</sup>-güedé núú ndécú Jèsús. <sup>3</sup> Te òré ní quexio-güedé núú ndécú-gá, te xicá<sup>n</sup> tnúhú-güedé núú-gá nācuáa ní xáha<sup>n</sup> té Juáá xii-güedé, te xáha<sup>n</sup>-güedé xii-gá:

—Véxi-ndí xicá<sup>n</sup> tnúhú-ndí núú-n núu sá diú-n cūu-n Cristú Yáá ní tendaha Yá Ndióxi véxi ñuyúú-a, àdi sá cūndetu nahi-ni-ndí mei Yáá-á<sup>n</sup> —cāchí-güedé xáha<sup>n</sup>-güedé xii-gá.

<sup>4</sup> Te Jèsús ní xáha<sup>n</sup>-gá xii-güedé:

—Chí cuánuhú te cani-ndo cuendú núú té Juáá nchaa sá ní xini-ndó quide-í, ndíhi nchaa nācuáa ndúu tnúhu ní càhá<sup>n</sup>-í ní xíndehó-ndo. <sup>5</sup> Te cuñaha-ndo xii-dé sá quidé tātá-í núú cué ñáyi cuáá, te quide tātá-í cue ñáyi yacua, ndíhi cue ñáyi tnàhá cuéhé sá dátèhyú nihnu-xi yiqui cūhú-yu, ndíhi cue ñáyi doho, nchaa ñáyi-á<sup>n</sup> quidé tātá-í, te ndúha-yu, te ndéé tnàhá cue ñáyi sa ní xihí dāndoto-í cuñaha-ndo. Te cuñaha tūcu-ndo xii-dé sá ndécú-í dānèhé-í nchaa ñáyi ndáhú, tnúhu sá sánú ichi ñaha xii-yu nācuáa naníhí táhú-yu. <sup>6</sup> Te cuñaha tūcu-ndo xii-dé sá ío váha táhú nchaa ñáyi ñà túú quide sáá iní-xi nchaa tnúhu càhá<sup>n</sup>-í, duha cuñaha-ndo xii-dé —cāchí-gá xáha<sup>n</sup>-gá xii-güedé.

<sup>7</sup> Te sáta ní yáha-güedé cuánuhú-güedé te ní juáá Jèsús ní càhá<sup>n</sup>-gá núú ñáyi cuendá té Juáá, te xáha<sup>n</sup>-gá xii-yu:

—Nchòhó ní sáhá<sup>n</sup> ndéhé-ndó ñáyi tée ndècu xiti yucu, te tée-á<sup>n</sup> ñà túú sàni ñáyi sàni úú iní-dé, chí ñà túú quide-dé dātá quidé nchaa ité nāhnú cuáhá<sup>n</sup>-xi duha cuáhá<sup>n</sup>-xi dācá<sup>n</sup> òré quené tāchí. <sup>8</sup> Te ní ñà túú ní sáhá<sup>n</sup> ndéhé-ndó ñáyi tée nihnu dóó váha dóó víi càa. Te nchòhó xini-ndó sá ncháá ñáyi nihnu dóó váha dóó víi càa xíndecu-yu vehé cue téé cūnuu yíndaha ñáyi. <sup>9</sup> Dico nchòhó

chi ní sándéhé-ndó ìᵐ tée càháⁿ tnúhu Yá Ndiòxi, te ndáá sá díú ìᵐ tée càháⁿ tnúhu-gá cúú-dé, te cùnū-gá-dé dàcúúxí dàva-gá cue tée càháⁿ tnúhu-gá. <sup>10</sup> Te diu cuèndá té Juàá-án càháⁿ-xi núú tútú Yá Ndiòxi nàcuáa ní xáhaⁿ-gá xii Cristú, te duha ní xáhaⁿ-gá: Tendaha-í ìᵐ tée càháⁿ-dé tnúhu-í codonū-dé núú-n, cuèndá dàtúha-dé ñáyi cuèndá quíndáá iní-yu tnúhu-n.

Duha ní xáhaⁿ-gá, te ducaⁿ ní ngódó tnùn-í núú tútú-gá. <sup>11</sup> Te na càchí tnúhu ndáá-í xii-ndo sá ñí ìᵐ cue tée ñuyú-a ñá túú cùnū-güedé dàtná cúnúu té Juàá té dàcuandute ñaha xii ñáyi. Te nchaa ñáyi sa ta ndíhu ndaha ñaha Yá Ndiòxi vitna cuáháⁿ cúnū-gá-ni tucú-yu dàcúúxí té Juàá cuèi cúú-yu ñáyi ñá túú cùnūu dàcúúxí dàva-gá ñáyi yíndaha-gá.

<sup>12</sup> Te ndéé cútñhá ní ngúita té Juàá tée dàcuandute ñaha xii ñáyi càháⁿ-dé tnúhu Yá Ndiòxi ñuyú-a, ndéé dàv-áⁿ ní ngúita ñáyi cuíní-yu sá ndíhu ndaha ñaha Yá Ndiòxi xii-yu te ndūcu ndéé-yu quidé-yu nàcuáa ndíhu ndaha ñaha-gá xii-yu. <sup>13</sup> Te nchaa cue tée ní xóo càháⁿ tnúhu Yá Ndiòxi ndéé sanaha ní càháⁿ-güedé sá díú-gá ndíhu ndaha-gá cue ñáyi, te diu-ni ducaⁿ ní càháⁿ tucu ndí Moisés ní ngódó tnùn-í núú tútú ndí. Te diu-ni ducaⁿ cùnūu nchaa tnúhu-án càháⁿ-xi nàcuáa ndíhu ndaha Yá Ndiòxi ñáyi ndéé ní sáa nduu ní ngúita té Juàá càháⁿ-dé tnúhu-gá ñuyú-a. <sup>14</sup> Te na càchí tnúhu-í xii-ndo sá cáda cuèndá-ndó, chi núú tútú Yá Ndiòxi càchí-xi sá ndíxi té Eliás, te diu núú té Eliás-án ní quide té Juàá. <sup>15</sup> Te nchaa nchòhó ñáyi ndèdóhó nchaa tnúhu càháⁿ-í-a te ío váha chí cuáha cuèndá.

<sup>16</sup> Te na càchí tnúhu tucu-í xii-ndo nàcuáa sátnahá-xi cūú ñáyi ndècu vitna. Chí ñáyi-án cúú-yu dàtná cue landú sácóo núú yáhu dàdiqui-güexi te níhi càháⁿ-güexi, te xitnáha-güexi ndi mee landú-güexi: <sup>17</sup> “Ní tūú-ndí yaá ndíhi vílu te ñá tūú ní cuíní-ndó càta-ndo. Te ío yica iní ní xita yuhu-ndí te ñá tūú ní ndáhyú-ndó”, càchí-güexi xitnáha-güexi. Te ducaⁿ sátnahá-xi cūú ñáyi ndècu vitna, <sup>18</sup> chi té Juàá ío ndàhú ní xóo caxi-dé, te ní ñá tūú ní xóo coho-dé ndudí ndéhé yoho yáha stilé sá sá ní nduu-xi ndidí, te sá dúcáⁿ ní xóo cada-dé te ní càchí-yu sá ní xíndecu ndíhi-dé espíritú cundíhi yucu ñávaha. <sup>19</sup> Te sátná ní quexio yúhú Tée cūú ñani tnáhá-ndó ncháa-ndo, te xèxi-í xihí-í quidè-í, te càchí-yu sá yúhú cūú-í ìᵐ tée xèxi víhi te xihí víhi, te càchí tucú-yu sá cūú-í tée xica cuu ndíhi cue tée cuíhna iní-xi quide cobrá ñháá xii-yu cuèndá impuèstú ndíhi nchaa dàva-gá cue tée ndècu ichi cuehé ichi duha, duha càchí-yu. Te ñáyi ní tnahá tnúhu ndíhi Yá Ndiòxi, ñáyi-án quidé-yu

sá váha nàcuáa cutnùn-í sá meé-gá ío ndècu ndíhi-gá sá xini tnùn-í-gá —càchí-gá xáhaⁿ-gá xii-yu.

*Cuèndá ñáyi dàva ñuú ñá tūú sàndáá iní tnúhu Xitohó Jesucristú*

(Lc. 10:13-15)

<sup>20</sup> Te Jèsús ní ngúita-gá càháⁿ-gá dóho nchaa ñáyi ñuú núú ío-gá vai núú sá vā yóo tnàhí ndàcu cada ní quide-gá, chi nchaa ñáyi ñuú-án ñá tūú cuíní-yu ndixi tūú iní-yu sá ñá tūú quide váha-yu ndècu-yu, te xáhaⁿ-gá xii-yu:

<sup>21</sup> —¡Ndàhú nchòhó cue ñáyi ñuú Corazín! ¡Te ndàhú nchòhó cue ñáyi ñuú Betsaidá! Chí núú dicó ñuú Tirú ndíhi ñuú Sidón ní quide-í nchaa sá vā yóo tnàhí ndàcu cada datná ní quide-í ñuú-ndó-á ní xini-ndó ñá, te sá ndéé ama-gá cuíhnyú dóo ndàhú te cunu cóo-yu núú yáa cuèndá sá ndíxi cuèchi iní-yu sá ñá tūú quide váha-yu ní cūú. <sup>22</sup> Dico sáa nduu te ío-gá dandòho ñaha Yá Ndiòxi xii-ndo dàcúúxí ñáyi ñuú Tirú ndíhi ñáyi ñuú Sidón. <sup>23</sup> Te nchòhó cue ñáyi ñuú Capèrnaúm ío quide cahnu-ndo mee-ndo, te quide iní-ndó sá sá cuándaa-ná-ndó àndiu, dico ñháá chí núú úhú núú ndàhú nduu táhú-ndó cūndecu-ndo. Te núú dicó ñuú Sòdomá ní quide-í nchaa sá vā yóo tnàhí ndàcu cada datná ní quide-í ñuú-ndó ní xini-ndó ñá, te ñáyi-án vā nàa-yu chí cūndecu-ní-yu ndéé vitna ní cūú. <sup>24</sup> Te na càchí tnúhu-í xii-ndo sá sáa nduu te ío-gá dandòho ñaha Yá Ndiòxi xii-ndo dàcúúxí ñáyi ñuú Sòdomá —càchí-gá xáhaⁿ-gá xii nchaa ñáyi ñuú-án.

*Jèsús cuíní-gá sá tūhá ñaha ñáyi xii-gá*  
(Lc. 10:21-22)

<sup>25</sup> Te sátná xíáⁿ te Jèsús ní ngúita-gá càháⁿ ndíhi-gá Tàtá-gá Dútú Ndiòxi, te xáhaⁿ-gá:

—Yòhó Tàtá-í Dútú Ndiòxi, ío chíñūhu ñaha-í xii-n chi diu-ni tàxi tnun-í àndiu ndíhi ñuyú-a, te dànehé-n cuè ñáyi nchaa tnúhu váha, te diu-ni ñáyi-án cúú-yu ñáyi ñá tūú cútñun-í iní-xi nchaa tnúhu càháⁿ cue tée càchí sá ío tūha, te nchaa tnúhu váha-án ñá tūú dàtúu-n núú ñáyi càchí sá ío tūha te ío váha sáa díquí-xi. <sup>26</sup> Chí ducaⁿ cuíní-n cūnduu —càchí-gá xáhaⁿ-gá xii Tàtá-gá.

<sup>27</sup> Te xáhaⁿ-gá xii nchaa ñáyi xíndecu-án:

—Mee Tàtá-í Dútú Ndiòxi ní càchí-gá sá cúnū-í núú nchàandá tūhú sá ío. Te vā yóo ìᵐ-gá xini nàcuáa sàni iní yúhú Déhe Dútú Ndiòxi, chí ìᵐ-dii dí-í mee-gá xini-gá nàcuáa sàni iní-í, te mee-í xini-í nàcuáa sàni iní meé-gá. Te nchaa ñáyi càchí iní-í sá quini-yu nàcuáa sàni iní Tàtá-í Dútú Ndiòxi te xitnūhu-í-yu, te vā yóo ìᵐ-gá xini chí diu-ni ñáyi ducaⁿ xitnūhu-í-án xini-yu. <sup>28</sup> Te nchaa nchòhó ñáyi ñá tūú ndècu váha, ñáyi ñá tūú níhi nàcuáa cada cūndecu váha iní-xi quixi-ndo tūha ñaha-ndo xii-í nàcuáa ducaⁿ

cùndecu váha iní-ndó. <sup>29</sup> Te cuu vii cuu váha iní-ndó tñi-ndo nchaa tnúhu càhá-í, te ío dacuàha-ndo, te duca<sup>n</sup> càda-ndo chi yúhú ío càhnu iní-í, te ío ndàhú iní-í. Te núu duca<sup>n</sup> na càda-ndo te ío váha cuu iní-ndó cùndecu-ndo. <sup>30</sup> Te tñi-ndo nchaa tnúhu càhá-í chi ñá túú cùu-xi ì<sup>n</sup> sá vëe, chi cada iní-ndó sá cúu-xí dàtná ì<sup>n</sup> chiù<sup>n</sup> ñamá — càchí-gá xàha<sup>n</sup>-gá xii-yu.

## 12

*Cue téé xica cuu ndihi Jesús sàhnú-güedé yoco triú nduu ndetátú ñáyiú*

(Mr. 2:23-28; Lc. 6:1-5)

<sup>1</sup> Te ì<sup>n</sup> nduu cùu-xi nduu ndetátú ñáyiú ñúhu Jesús ichi ndihi cue téé xica cuu ndihi-gá, te ta yàha-gá ndihi-güedé ì<sup>n</sup> xichi núú cáá triú te xixíhí-güedé docó núu xiá<sup>n</sup> ní ngúíta-güedé sàhnú-güedé yoco triú-án, te ndihi ndaha-güedé quií<sup>n</sup>-güedé queé triú-án tá xexi-güedé cuáhá<sup>n</sup>. <sup>2</sup> Te cue téé cùu fariséú ní xiní-güedé nàcuáa quide cue téé xica cuu ndihi Jesús, núu ní xàha<sup>n</sup>-güedé xii-gá:

—¿Ná cuendá duca<sup>n</sup> quide cue téé xica cuu ndihi-n sàhnú-güedé yoco triú, te vitna cùu-xi nduu ndetátú-í? Te ñá túú tàú-güedé duca<sup>n</sup> càda-güedé —càchí-güedé xàha<sup>n</sup>-güedé xii-gá.

<sup>3</sup> Te Jèsús ní xàha<sup>n</sup>-gá xii-güedé:

—¿Náa ñá túú dàcuaha-ndo núu tütú Yá Ndióxi núú càhá<sup>n</sup>-xi nàcuáa ní quide ndíi Dàvií cùtnàhá ní xíhí ndíi docó ndihi cue téé ní xica cuu ndihi ndíi-án? <sup>4</sup> Chi ndíi-án ní quiúhu ndíi vehe Yá Ndióxi ní quehe<sup>n</sup> ndíi pàá ní cuu íí ndécú-án ní xexi ndíi ndihi cue téé ní xica cuu ndihi ndíi, te ñá túú tàú ndíi sá dúcá<sup>n</sup> càda ndíi ndihi cue téé-án ní cùu, chi mee-ní cuè dútú tàú-güedé caxi-güedé pàá-án ní cùu. <sup>5</sup> ¿Te náa ñá túú xiní-ndó nàcuáa càhá<sup>n</sup>-xi núu tütú ndíi Moisés sá ncháá cuè dútú vá ndetátú-güedé nduu cùu-xi nduu ndetátú-án? Te ñá díú ì<sup>n</sup> cuèchi cùu-xi sá dúcá<sup>n</sup> ñá túú ndetátú-güedé nduu cùu-xi nduu ndetátú. <sup>6</sup> Te na càchí tnúhu-í xii-ndo sá yúhú cùu-í téé ío-gá cùnunu ndecu ndihi-ndo dacúúxi veñúhu sá ío cùnunu. <sup>7</sup> Dico nchòhó chi ñá tècú tnùní-ndó nàcuáa càhá<sup>n</sup> Yá Ndióxi núu tütú-gá núú càchí-xi: “Yúhú cuiní-í sá cùndàhú iní-ndó cuè tnaha ñáyiú-ndo te ñá díú mee-ní sá càhni-ndó quiú nduu táhú-í”, duha càchí-gá núú tütú-gá. Te núu dicó nchòhó tècú tnùní-ndó ñá, te vá càhá<sup>n</sup> cuèhé-ndó cuendá nchaa ñáyiú ñá túú ndecu cuèchi-xi. <sup>8</sup> Te yúhú Téé cùu ñani tnáhá-ndó nchaa-ndo, tnáhá-í ndécú ndihi-í tnúhu ndee iní sá cùu-í nchaa ñáyiú nàcuáa cadá-yu nduu ndetátú-ó-á —càchí-gá xàha<sup>n</sup>-gá xii-güedé.

*Í<sup>n</sup> téé ní yíchi ì<sup>n</sup> xio ndaha-xi*  
(Mr. 3:1-6; Lc. 6:6-11)

<sup>9</sup> Te Jèsús ní xica-gá cuáhá<sup>n</sup>-gá, te cuánguihu-gá xití ì<sup>n</sup> veñúhu. <sup>10</sup> Te xía<sup>n</sup> ndécú ì<sup>n</sup> téé ní yíchi ì<sup>n</sup> xio ndaha-dé. Te dava cue téé xíndecu-án ndúcú-güedé nàcuáa cada-güedé cacá<sup>n</sup> cuèchi-güedé cuendá-gá núú cuè téé cùnunu, te ní xicá<sup>n</sup> tnúhú-güedé núú-gá, te xàha<sup>n</sup>-güedé:

—Cachí tnúhu xii-ndí núu cuu cada tátna-ó ì<sup>n</sup> téé cùhú nduu cùu-xi nduu ndetátú-ó-án ñáha —càchí-güedé xàha<sup>n</sup>-güedé xii-gá.

<sup>11</sup> Te Jèsús ní xàha<sup>n</sup>-gá xii-güedé:

—Te nchòhó òré ná ngàunihnu ì<sup>n</sup> mbéé-ndó ì<sup>n</sup> déhva cùnú te nàtava-ndo-di cuéi cùu-xi nduu ndetátú-ó. <sup>12</sup> Te ì<sup>n</sup> ñáyiú ío-gá cùnunu-yu dàcúúxi ì<sup>n</sup> mbéé, núu xía<sup>n</sup> tàú-ó sá càdá-ó sá váha sá cúu-xí-yu cuéi cùu-xi nduu ndetátú-ó —càchí-gá xàha<sup>n</sup>-gá xii-güedé.

<sup>13</sup> Te dàtnùní ní xàha<sup>n</sup>-gá xii téé cùhú ndaha-xi-án:

—Ndacani ndaha-n —càchí-gá xàha<sup>n</sup>-gá xii-dé.

Te téé-án ní ndacani-dé ndaha-dé, te òré-ni ní ndúha ní nduu-xi dàtná cáá ingá xio ndaha-dé. <sup>14</sup> Te cue téé cùu fariséú ní ndee-güedé xití veñúhu, te ní ngúíta-güedé ndátnúhu-güedé núu nása cada-güedé cahni-güedé Jèsús.

*Nàcuáa sa ndéé tnuní cuendá Jèsús*

<sup>15</sup> Te sátá ní cutnùní iní Jèsús nàcuáa cuiní-güedé cada ñaha-güedé xii-gá te ní xica-gá cuáhá<sup>n</sup>-gá, te ío vèi ñáyiú nchicú<sup>n</sup> ñáhá xii-gá cuáhá<sup>n</sup>, te tnáhá cue ñáyiú cùhú nchicú<sup>n</sup> ñáhá xii-gá cuáhá<sup>n</sup>, te ní quide tátna-gá cue ñáyiú-án. <sup>16</sup> Te ní xàha<sup>n</sup>-gá xii-yu sá vá càhá<sup>n</sup>-yu yoo cùu-gá. <sup>17</sup> Te duca<sup>n</sup> ní cuu chi ní quee ndáá-xi nàcuáa ní xàha<sup>n</sup> Yá Ndióxi xii ndíi Chàia téé ní xóo càhá<sup>n</sup> tnúhu-gá ndéé sanaha ní chidó tnùní ndíi núu tütú-gá, te duha nduu tnúhu ní xàha<sup>n</sup>-gá: <sup>18</sup> Té-a cùu-dé téé ní sani iní-í sá cùnú cuèchi-dé núu-í,

te ío cùu iní-í-dé, te cùdíí iní-í-dé.

Te yúhú cuñaha-í Espiritú-í cundecu ndihi-dé,

te diu-dé cuñaha-dé xii nchaa ñáyiú ñuyúú sá yúhú ío ndáá quidé-í.

<sup>19</sup> Te vá dacà-dé tnúhu càhá<sup>n</sup>-dé ndihi ñáyiú, te ní vá cáná sàa-dé òré càhá<sup>n</sup>-dé,

te ní vá yóo níhí tnúhu nása càhá<sup>n</sup>-dé cuhu<sup>n</sup>-dé ichi.

<sup>20</sup> Te ní ñá túú nã cada-dé cue ñáyiú cùu datná ì<sup>n</sup> tnu ndóó sá cuiní-xi tnáhnú, te diu-ní ñáyiú-án cúú tucú-yu dàtná ì<sup>n</sup> mèchá càndil sá ío quene ñúhmá te cuiní-xi ndahvá.

Te duca<sup>n</sup> sàtnahá-xi cùu ñáyiú-án chi ñá túú níhí ndéé-yu cundecu-yu sá cúu-xi-í, te mee-ni sá váha cada ñaha-dé xii-yu,

te diu-ni duca<sup>n</sup> càda-dé ndéé sáá nduu cùtnuní iní nchaa ñáyiú sá ïo ndáá quidé-dé.

<sup>21</sup> Te nchaa ñáyiú nihí ñuyúú ïo cundee cùu cahnu iní ñáhà-yu xii-dé.

Duha ní xáha<sup>n</sup>-gá xii ndíi Chàíá ní chídó tnùní ndíi nùú túú-gá.

*Càchí-güedé sá ndécú ndíhi Jesús espíritu cündíhi yucu ñávàha*

(Mr. 3:20-30; Lc. 11:14-23; 12:10)

<sup>22</sup> Te ní quexio ñ<sup>n</sup> úú cue téé núú ndécú Jèsús, te ndéca-güedé ñ<sup>n</sup> téé ñíhi te cuáá-dé, te yíhi ñaha espíritu cündíhi yucu ñávàha xii-dé, te Jèsús ní queñuhu-gá espíritu cündíhi yucu ñávàha yíhi ñaha xii-dé, te òré-ni-á<sup>n</sup> ní cuu ní nacáhá<sup>n</sup>-dé te ní ndúha núú-dé. <sup>23</sup> Te nchaa ñáyiú xíndecu-á<sup>n</sup> ïo ní cuñúhu-yu sá dúcá<sup>n</sup> ní quide-gá, te ní xítñáhà-yu:

—Váa téé-a cùu-dé ñaní tnáhá ndíi Dàvíí téé tendaha Yá Ndióxi quixi ñuyúú-a —càchí-yu xítñáhà-yu.

<sup>24</sup> Te cue téé cùu fariséú ní tecú dóho-güedé nàcuáa ndùu tnúhu xítñáhà-yu, núu xíá<sup>n</sup> ní xítñàha-güedé:

—Téé-a ndèñuhu-dé nchaa espíritu cündíhi sácúlnhá yíhi ñaha xii ñáyiú, chi diu-ni sácúlnhá-á<sup>n</sup> chíndée ñaha-xi xii-dé te diu-ni-xi tàxi tnuni-xi nchaa espíritu-á<sup>n</sup> —duha ní xítñàha-güedé.

<sup>25</sup> Te Jèsús ní cùtnuní iní-gá nàcuáa ndùu tnúhu ní xítñàha-güedé, núu ní xáha<sup>n</sup>-gá xii-güedé:

—Te nchòhó xini-ndó sá núu ñ<sup>n</sup> téé yíndaha ñ<sup>n</sup> nació<sup>n</sup> vá cùú ñ<sup>n</sup>nuu-dé ndíhi cue téé cündíhi-dé, te vá cùdíi-dé cunuu-dé. Te diu-ni duca<sup>n</sup> sátnahá tucu-xi cùu tucu cue téé cùchiu<sup>n</sup> ñ<sup>n</sup> ñuú, chi núu vá cùú ñ<sup>n</sup>nuu-güedé cundecu-güedé, te vá cùdíi-güedé cundecu-güedé taxi tnùní-güedé. Te diu-ni duca<sup>n</sup> sátnahá tucu-xi cùu cue ñáyiú xíndecu ñ<sup>n</sup>-ni véhe, chi núu vá cùú ñ<sup>n</sup>nuu-yu cundecu-yu te vá cùdíi-yu cundecu cahnú-yu. <sup>26</sup> Te núu sácúlnhá duca<sup>n</sup> quide-xi queñuhu-xi cue espíritu cündíhi-xi yíhi ñaha xii ñáyiú ña, te ñá túú cùu ñ<sup>n</sup>nuu-xi ndecu-xi te núu duca<sup>n</sup>, te vá cùdíi sácúlnhá-á<sup>n</sup> cundecu-xi taxi tnùní-xi te núu duca<sup>n</sup> quide-xi. <sup>27</sup> Te duha càhá<sup>n</sup>-í chi nchòhó càchí-ndó sá chíndée ñaha sácúlnhá xii-í queñuhu-í nchaa espíritu cündíhi-xi yíhi ñaha xii ñáyiú. Te núu yúhú quidé cuendá-ndó sá sácúlnhá chíndée ñaha-xi xii-í, te xini ñuhu-xi cada cuendá-ndó yòo chindee ñaha xii cue téé xica cuu ndíhi-ndo queñuhu-güedé nchaa espíritu cündíhi yucu ñávàha yíhi ñaha xii ñáyiú. Te mee-güedé càchí-güedé sá nchòhó ñá túú càhá<sup>n</sup> ndáá-ndó sá dúcá<sup>n</sup> càhá<sup>n</sup>-ndó. <sup>28</sup> Dico yúhú chi Espiritú Yá Ndióxi chíndée ñaha-xi xii-í queñuhu-í nchaa

espíritu cündíhi sácúlnhá yíhi ñaha xii ñáyiú, te sá dúcá<sup>n</sup> chíndee ñaha Espiritú-gá xii-í, xíá<sup>n</sup> cùtnuní sá sá ní sáá nduu cuini-gá ndíhu ndaha ñaha-gá xii-ndo.

<sup>29</sup> Te nchòhó xini-ndó sá cué ñadúhú chi vá ndácú-güedé cuendá-ni quíhu-güedé duhu-güedé vehe ñ<sup>n</sup> téé ïo ndee, chi díhna-gá xini ñuhu-xi tnii-güedé téé-á<sup>n</sup> dacùtu ñaha-güedé xii-dé dátñuní duca<sup>n</sup> te ndacu-güedé duhu-güedé nchaa sá ndécú ndíhi-dé.

<sup>30</sup> Te nchaa ñáyiú ñá túú cündíhi ñaha xii-í, te cùu úhú iní ñáhà-yu. Te nchaa ñáyiú ñá túú chindee ñaha xii-í, te dàquee tíhú-yu chùu<sup>n</sup> quide-í.

<sup>31</sup> Te na càchí tnúhu-í xii-ndo sá ncháá ñáyiú quide nchaa sá cuéhé sá dúhá cuu cada cahnú iní ñáhá Yá Ndióxi xii-yu, te diu-ni duca<sup>n</sup> cùu cada cahnú iní-gá nchaa tnúhu cuéhé tnúhu duha càhá<sup>n</sup>-yu. Dico cue ñáyiú na càhá<sup>n</sup> úhú cuendá Espiritú-gá, te ñáyiú-á<sup>n</sup> vá cadá cahnú iní ñáhá tnàhí-gá xii-yu. <sup>32</sup> Te nchaa ñáyiú na càhá<sup>n</sup> úhú cuendá yúhú Téé cùu ñaní tnáhà-yu nchaa-yu, te cuu cada cahnú iní ñáhá Yá Ndióxi xii-yu. Dico cue ñáyiú na càhá<sup>n</sup> úhú cuendá Espiritú-gá te vá cadá cahnú iní ñáhá tnàhí-gá xii-yu cuéi vitna ndècu vívú-yu, te cuéi na cùu-yu.

*Ndi ñ<sup>n</sup> núu yutnu xini-ó ná yutnu cùu-xi cuendá sá sávidí-xi*

(Lc. 6:43-45)

<sup>33</sup> Te nchòhó xini-ndó sá ndí ñ<sup>n</sup> núu yutnu xini-ó ná yutnu cùu-xi cuendá sá sávidí-xi, te xini-ó sá ncháá yutnu váha cùu<sup>n</sup> mee-ni sávidí váha, dico nchaa yutnu sá ñá túú váha te cùu<sup>n</sup> mee-ni sávidí sá ñá túú váha. Te duha càhá<sup>n</sup>-í cuendá cada cuendá váha-ndo nàcuáa ndùu chiu<sup>n</sup> quide-ndo ñ<sup>n</sup> ñ<sup>n</sup>-ndo cuendá duca<sup>n</sup> cùtnuní ná ñáyiú cùu-ndo. <sup>34</sup> Dico nchòhó cùu-ndó dátñá ñ<sup>n</sup> cóó déé<sup>n</sup> chi ïo cuihna iní-ndó, te vá cání iní-ndó sá ndácú-ndó càhá<sup>n</sup>-ndó ñ<sup>n</sup> tnúhu váha, chi ïo cuihna iní-ndó. Te nchòhó xini-ndó sá ncháá ñáyiú càhá<sup>n</sup>-yu nání véxi iní-yu. <sup>35</sup> Te nchaa ñáyiú váha iní-xi càhá<sup>n</sup>-yu tnúhu váha, chi diu-ni tnúhu váha-á<sup>n</sup> ñúhú iní-yu. Te nchaa ñáyiú cuihna iní-xi càhá<sup>n</sup>-yu tnúhu cuéhé tnúhu duha, chi diu-ni tnúhu cuéhé tnúhu duha-á<sup>n</sup> ñúhú iní-yu. <sup>36</sup> Te na càchí tnúhu-í xii-ndo sá ná sáá nduu càda ndáá Yá Ndióxi cuéchi nchaa nchòhó ñáyiú ndècu ñuyúú-a, te nchaa tnúhu cuéhé tnúhu duha càhá<sup>n</sup>-ndó càhá<sup>n</sup>-gá sá ñá túú ní quide váha-ndo sá dúcá<sup>n</sup> ní càhá<sup>n</sup>-ndó tnúhu-á<sup>n</sup>. <sup>37</sup> Te nàcuáa ndùu tnúhu ní càhá<sup>n</sup>-ndó ñ<sup>n</sup> ñ<sup>n</sup>-ndo, te duca<sup>n</sup> càhá<sup>n</sup> Yá Ndióxi te núu ndècu cuéchi-ndo ádi ñá túú ndècu cuéchi-ndo. Te núu ñá túú cuéchi-ndo te cácu-ndo, dico núu ndècu cuéchi-ndo te vá cácu-ndo —càchí-gá xáha<sup>n</sup>-gá xii cue téé cùu fariséú-á<sup>n</sup>.

*Cue tée cuini sá cada Jèsús ìn sá vǎ yǎo  
tnàhí ndàcu cada*

(Mr. 8:12; Lc. 11:29-32)

<sup>38</sup> Te cue tée cùu fariséu, ndihi cue tée dàcuaha ñaha xii ñáyu nchaa tnúhu ní chídó tnúhí ndíi Moisés xáha-güedé xii Jèsús:

—Mèstrú, cuini-ndí cada-n ìn sá vǎ yǎo tnàhí ndàcu cada cuendá duca<sup>n</sup> cùnnumí iní-ndí sá Yá Ndióxi chíndée ñaha-gá xii-n — cǎchí-güedé xáha<sup>n</sup>-güedé xii-gá.

<sup>39</sup> Te Jèsús ní xáha<sup>n</sup>-gá xii-güedé:

—Ñáyu ndècu ichi cuéhé ichi duha ñá túú cuini-yu tnúhí-yu tnúhu cǎhá<sup>n</sup> Yá Ndióxi, te ñáyu-án cuini-yu cada-í ìn sá vǎ yǎo tnàhí ndàcu cada nacuaá cutnùni iní-yu núu ndáá sá Yá Ndióxi chíndée ñaha-gá xii-í. Dico yúhú chí ñá túú nǎgá cada-í quini-yu, chí sa ñihí-yu tnúhu nǎcuáa ní yáha ndíi Jónás téé ní xóo cǎhá<sup>n</sup> tnúhu Yá Ndióxi ndéé sanaha, te diu-ni duca<sup>n</sup> yáha yúhú tucu. <sup>40</sup> Chi ndíi Jónás-án ní xúhu<sup>n</sup> ndíi únú nduu únú níu xití ìn chácá cǎhnú vihí nani ballená. Te diu-ni duca<sup>n</sup> yáha yúhú Tée cùu ñani tnáhá-ndo nchaa-ndo, chí únú nduu únú níu cuhu<sup>n</sup>-í xití ñuhu. <sup>41</sup> Te na sáá nduu càda ndáá Yá Ndióxi cuéchi nchaa ñáyu ndècu ñuyúú-a, te dàvǎ-án cǎchí nchaa ñáyu ñuu Nínivé sá ñá túú ní quide ndáá nchaa ñáyu ndècu vitna, te duca<sup>n</sup> cǎhá<sup>n</sup>-yu chí mèe-yu ní dàñá-yu ichi cuéhé ichi duha cùnñahá ní sáhá<sup>n</sup> ndíi Jónás ñuu-yu ní cǎhá<sup>n</sup> ndíi tnúhu Yá Ndióxi núu-yu. Dico vitna iha ndècu ndíi ñaha-ndo xii yúhú, te diu-í ío-gá cùnmu-í dàcúúxi ndíi Jónás. <sup>42</sup> Te nduu càda ndáá Yá Ndióxi cuéchi nchaa ñáyu, te dàvǎ-án quini-ndo ìn ñadíhí ñaha ní xíndaha ìn nació<sup>n</sup> cáá ndaa xio datni núú quené nchícanhii, te ñaha-án ío xica ní xíndecu-a<sup>n</sup> te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní cǎhá<sup>n</sup> ndíi Salómón, chí ndíi-án ío ní sáá sá xini tnúni ndíi. Te tnàhá ñaha-án cǎhá<sup>n</sup>-a<sup>n</sup> sá ñá túú ní quide ndáá nchaa ñáyu ndècu vitna. Dico vitna iha ndècu ndíi ñaha-ndo xii yúhú, te diu-í ío-gá cùnmu-í dàcúúxi ndíi Salómón.

*Espiritú cúndíhi yucu ñávãha sá  
nánchócvã xito cùu úú*

(Lc. 11:24-26)

<sup>43</sup> Te òré ná quée ñaha ìn espíritú cúndíhi yucu ñávãha xii ìn ñáyu, te cuáhá<sup>n</sup>-xi nducu-xi ìn xichí núú cùndècu-xi te ñá ñihí-xi te ní sani iní-xi: <sup>44</sup> “Váha-gá nùhú tucu-í núú ní xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xini-xi sá cáá iní ñáyu-án dàtná cáá-nǎ ìn vehe ní natíhú ní nduu vii-nǎ te vǎ yǎo-gá ndécú. <sup>45</sup> Te sátá dúcá<sup>n</sup> te ní xica-xi cuáhá<sup>n</sup>-xi cuándúcú-xi úsá tnàhá espíritú cúndíhi-xi sá nèhé víhí-gá xiquide. Te òré ní ñihí-xi cue espíritú-án te ndèca ñaha-xi cuáhá<sup>n</sup> cuendá ngúndecu ndíhi-xi ñáyu-án. Te ñáyu-án

uu<sup>n</sup>-gá nándi yáha-yu dàcúúxi ndéé díhna. Te diu-ni duca<sup>n</sup> sǎtnahá-xi yáha nchaa ñáyu cuihna iní-xi ndècu ñuyúú-a vitna —cǎchí-gá xáha<sup>n</sup>-gá xii-güedé.

*Cue ñani Jèsús ndíhi nǎnǎ-gǎ*

(Mr. 3:31-35; Lc. 8:19-21)

<sup>46</sup> Te cǎhá<sup>n</sup> dúcá<sup>n</sup>-ní Jèsús ní quexio náná-gá ndíhi cue ñani-gá cuini-yu cǎhá<sup>n</sup> ndíhi ñahá-yu xii-gá, te ní ngúnu tnúhí-yu ndaa quehé vehe núú ndécú-gá. <sup>47</sup> Te ìn cue ñáyu xíndecu-án ní xáhǎ<sup>n</sup>-yu xii-gá:

—Ní quexio náná-n ndíhi cue ñani-n xíntnúhí-yu quehé, te cuini-yu cǎhá<sup>n</sup> ndíhi ñahá-yu xii-n —cǎchí ñáyu-án xáhǎ<sup>n</sup>-yu xii-gá.

<sup>48</sup> Te ní xáha<sup>n</sup>-gá xii ñáyu duca<sup>n</sup> xáha<sup>n</sup> xii-gá-án:

—Te cǎchí tnúhu yóndi-gá ñáyu cùu datná náná-í ndíhi dàtná cue ñani-í —cǎchí-gá xáha<sup>n</sup>-gá xii ñáyu-án.

<sup>49</sup> Te ní dánèhé ñahá-gá nchaa cue téé xica cuu ndíhi-gá, te ní xáha<sup>n</sup>-gá xii ñáyu-án:

—Cue téé-a cùu-güedé dàtná náná-í, ndíhi dàtná cue ñani-í. <sup>50</sup> Te nchaa ñáyu na càda nchaa nacuaá cǎhá<sup>n</sup> Tátá-í Dútu Ndióxi Yáa ndécú àndiu, te ñáyu-án cùu-yu dàtná náná-í, ndíhi dàtná cue ñani-í, ndíhi dàtná cue cúha-í —cǎchí-gá xáha<sup>n</sup>-gá xii ñáyu duca<sup>n</sup> ní dáyáha tnúhu núu-gá-án.

## 13

*Nàcuáa quide téé cuángacá<sup>n</sup> triú*

(Mr. 4:1-9; Lc. 8:4-8)

<sup>1</sup> Te diu-ni nduu-án ní quee Jèsús vehe núú ndécú-gá, te ní xica-gá cuáhá<sup>n</sup>-gá ní ngóo-gá yuhu làgúná. <sup>2</sup> Te ío cuéhé ñáyu ní tacá núú ndécú-gá. Te sá dúcá<sup>n</sup> ío cuéhé ñáyu núu ní quee-gá xití ìn bàrcú nútní xití ndute làgúná-án, te núú xiǎ<sup>n</sup> ní ngóo-gá, te nchaa ñáyu-án xixúcu-yu yuhu làgúná-án. <sup>3</sup> Te Jèsús ní ngúita-gá ní caní-gá titní cuendú núu-yu nǎcuáa tecú tnúni-yu nchaa nǎcuáa ndúu tnúhu-gá, te xáha<sup>n</sup>-gá xií-yu:

—Ìn téé cuángacá<sup>n</sup>-dé triú, <sup>4</sup> te òré ní ngúita-dé dǎngoyo-dé triú-án, te dava ní quene ndava ní ngava ndéé ichi, te ní xini cue tílaá te ní nadatàcá-güedi. <sup>5</sup> Te dava ní ngava ñuhu yadi núú yíhí vihí yúu, te ndíhi-ni ní xínu-xi chí ñá túú cǎvihí ñuhu. <sup>6</sup> Dico òré ní nayehé te ñá túú ní cùndee iní-xi chí ní yichí-xi, chí ñá túú ní ñihí quíhí<sup>n</sup> cùnú yóho-xi. <sup>7</sup> Te dava ní ngava núu yúcu ndíquí<sup>n</sup> tnu ñu, te ìn nuu-ni ní xínu-xi ndíhi tnu ñu. Te tnu ñu-án ní sahnú-xi te ní dánáá-xi nchaa triú sá ní xínu-án. <sup>8</sup> Dico dava-gá triú ní ngava núú ndécú ñuhu coco<sup>n</sup> te xiǎ<sup>n</sup> ío váha ní cuu, chí núú ìn ní triú-án te dava yoco-xi ní nguíhi ócú úxí triú-xi, te dava yoco-xi ní nguíhi únídico triú-xi, te dava



yoco-xi ní nguíhi ìᵐ cièndú triú-xi. <sup>9</sup> Te vitna nchaa nchòhó ñáiyu ní xindedóho tnúhu ní cáhá<sup>n</sup>-í-a, te ío váha chí cuáha cuèndá – cächí-gá xáha<sup>n</sup>-gá xii-yu.

*Cue téé xica cuu ndihi Jesús ndúcu tnúhu-güedé núú-gá ná cuèndá cáni-gá cuèndú núú ñáiyu*

(Mr. 4:10-12; Lc. 8:9-10)

<sup>10</sup> Te cue téé xica cuu ndihi Jesús ní sáhá<sup>n</sup>-güedé ndéé núú-gá, te xáha<sup>n</sup>-güedé xii-gá:

–Ndúcu tnúhu-ndí núú-n núu ná cuèndá duca<sup>n</sup> mēe-ni cuèndú cáni-n núú ñáiyu – cächí-güedé xáha<sup>n</sup>-güedé xii-gá.

<sup>11</sup> Te ní xáha<sup>n</sup>-gá xii-güedé:

–Nchòhó chí sa cächí tnúhu Yá Ndióxi xii-ndo ìᵐ sá vátá quíni-gá-ndó, chí cächí tnúhu-gá nácuáa quide-gá ndíhu ndaha-gá ñáiyu, dico dava-gá ñáiyu chí ñá túú ná xáha<sup>n</sup>-gá xii-yu. <sup>12</sup> Te nchaa ñáiyu sa tēcú tnúni te uu<sup>n</sup>-gá cuita tecú tnúni-yu quíh<sup>n</sup>, te nchaa ñáiyu ñá túú tēcú tnúni te uu<sup>n</sup>-gá vá tēcú tnúni-yu. <sup>13</sup> Te xiá<sup>n</sup> núu duha cáni-í mee-ni cuèndú núú-yu, chí cuéi na quíni-yu nchaa nácuáa cuu dico ní vá cútñúni iní-yu ná cuèndá duca<sup>n</sup> cùu, te cuéi na cündedóho-yu dico ní vá tēcú tnúni-yu. <sup>14</sup> Te diu cuèndá ñáiyu-án ní xáha<sup>n</sup> Yá Ndióxi xii ndí Chàia téé ní xóo cáhá<sup>n</sup> tnúhu-gá ndéé sanaha ní chídó tnúni ndí núú tütú-gá núú cächí-xi:

Nchaa nchòhó cündedóho-ndo tnúhu cáhá<sup>n</sup>-í, dico ní vá tēcú tnúni-ndó,

te cuéi na quíni-ndó nchaa nácuáa cada-xi, dico ní vá cútñúni iní-ndó ná cuèndá duca<sup>n</sup> quide-xi.

<sup>15</sup> Te duca<sup>n</sup> chí cùu-ndo ñáiyu ío sàá iní-xi, te cùu-ndo ñáiyu ñá túú tēcú tnúni tnúhu cáhá<sup>n</sup>-í,

te cùu tucu-ndo datná cue ñáiyu cuáá chí ñá túú cuíni-ndó cada cuèndá-ndó tnúhu-í,

te ní ñá túú cuíni-ndó cündedóho-ndo,

te ní ñá túú cuíni-ndó tēcú tnúni-ndó,

te ní ñá túú cuíni-ndó ndáhu ñaha-ndo xii-í cuèndá cada càhnu iní-í nchaa yíca cuéchi-ndo nácuáa ío váha cuu iní-ndó cündecu-ndo.

Duha ní xáha<sup>n</sup> Yá Ndióxi xii ndí Chàia ní chídó tnúni ndí núú tütú-gá.

<sup>16</sup> Dico nchòhó chí ío váha táhú-ndó chí cútñúni iní-ndó nchaa nácuáa quide-í, te cútñúni tucu iní-ndó nchaa nácuáa ndúu tnúhu cáhá<sup>n</sup>-í. <sup>17</sup> Te na cächí tnúhu ndáá-í xii-ndo sá ío vài cue téé ní xóo cáhá<sup>n</sup> tnúhu Yá Ndióxi ndéé sanaha ndíhi nchaa dava-gá ñáiyu váha iní-xi ní cuíni-yu cundehé-yu nchaa sá ndéhé-ndó vitna quide-í dico ñá túú ní xini-yu, te ní cuíni tucú-yu cündedóho-yu nchaa tnúhu ndédóho-ndo vitna cáhá<sup>n</sup>-í te ñá túú ní xindedóho-yu.

*Jèsús cáhá<sup>n</sup>-gá nácuáa quèe-xi cuèndá téé cuángacá<sup>n</sup> triú*

(Mr. 4:13-20; Lc. 8:11-15)

<sup>18</sup> Te vitna cündedóho váha-ndo na cächí tnúhu-í xii-ndo nácuáa quèe-xi cuèndú téé cuángacá<sup>n</sup> triú ní caní-í núú-ndó. <sup>19</sup> Te triú sá ní quene ndava ní ngava ndéé ichi, xiá<sup>n</sup> cùu-xi dàtná ñáiyu ní xindedóho tnúhu sá cáhá<sup>n</sup> nácuáa ndíhu ndaha ñaha Yá Ndióxi xii-yu, dico ñá túú ní cuíni-yu tnú-yu, chí sácúlnhá cuáhá<sup>n</sup>-xi nádatuhú-xi iní-yu cuèndá sá vá cánchezú<sup>n</sup> nihnú-yu nácuáa cáhá<sup>n</sup> tnúhu-án. <sup>20</sup> Te triú sá ní ngava ñuhu yadi núú yíhi víhi yúú-á<sup>n</sup>, xiá<sup>n</sup> cùu-xi dàtná ñáiyu ní xindedóho tnúhu Yá Ndióxi te díí iní ní tnú-yu tnúhu-gá, <sup>21</sup> dico órè ná nguíta ñáiyu cúcuéhé ñáhá-yu xii-yu àdi nándí-gá sá yáha-yu sá cuèndá tnúhu-gá, te ñá cündèe iní-yu chí dàña-yu tnúhu-gá cuèndá sá ñá túú nihí ndéé-yu. <sup>22</sup> Te triú sá ní ngava núú yúcu ndíquí<sup>n</sup> tnu ñnu-án, xiá<sup>n</sup> cùu-xi dàtná ñáiyu ní tecú dóho-xi tnúhu Yá Ndióxi dico cuéè cuéè ní nacunaá-yu tnúhu-gá, chí cuèndá mee-ní sá ío ñuyúú-a ñuhu iní-yu, ndíhi cuèndá sá ío sàni iní-yu cuu cuicá-yu, te mee-ní nchaa xiá<sup>n</sup> ñuhú iní-yu te ñá túú ñuhu iní-yu tnúhu sá ní xindedóho-yu-án nácuáa cada váha-yu cundecú-yu. <sup>23</sup> Dico triú sá ní ngava núú ndécú ñuhu coco<sup>n</sup>-án, xiá<sup>n</sup> cùu-xi dàtná ñáiyu ní xindedóho tnúhu Yá Ndióxi te quide-yu nácuáa cáhá<sup>n</sup> tnúhu-gá. Te cada iní-ndó sá ñáiyu-án cùu-yu dàtná triú sá ní nguíhi yoco-xi ócò úxí triú-xi, ndíhi triú sá ní nguíhi yoco-xi únidico triú-xi, ndíhi triú sá ní nguíhi yoco-xi ìᵐ cièndú triú-xi. Duca<sup>n</sup> sátnahá-xi cùu-yu chí ío váha quide-yu – cächí-gá xáha<sup>n</sup>-gá xii-güedé.

*Cuèndá nchaa cùhú sá ñá túú váha xínu xití triú*

<sup>24</sup> Te Jèsús ní caní-gá ìᵐ cuèndú núú ñáiyu nácuáa tecú tnúni-yu tnúhu-gá, te xáha<sup>n</sup>-gá xii-yu:

–Te vitna na caní-í ìᵐ cuèndú núú-ndó nácuáa tecú tnúni-ndó nácuáa cada-xi órè ndíhu ndaha ñaha Yá Ndióxi xii ñáiyu. Ìᵐ téé ío váha triú ní sacá<sup>n</sup>-dé núú ñuhú-dé. <sup>25</sup> Dico xití níú ní sáhá<sup>n</sup> ìᵐ téé cùu úhú iní ñáhá xii-dé, te ní dangoyo-dé ndíquí<sup>n</sup> yúcu sá ñá túú váha núú ní sacá<sup>n</sup>-dé triú-án. <sup>26</sup> Te órè vitna váha váha ní nguíta-xi quèene yoco nchaa triú-án, te ní xínu coyo nchaa yúcu sá ñá túú váha-án. <sup>27</sup> Te cue téé xínu cuéchi núú téé ní sacá<sup>n</sup> triú-án ní xitnúhu ñaha-güedé xii-dé sá dúcá<sup>n</sup> ní xínu cùhú sá ñá túú váha-án núú triú-dé, te xáha<sup>n</sup>-güedé: “Patróo<sup>n</sup>, ¿nása ní cuu núu ní xínu cùhú sá ñá túú váha núú triú-n, te ío váha càa triú ní sacá<sup>n</sup>-n ní cùu?”, cachí-güedé xáha<sup>n</sup>-güedé. <sup>28</sup> Te téé cùu patróo<sup>n</sup>-güedé-án ní xáha<sup>n</sup>-dè xii-güedé: “Ìᵐ téé cùu úhú iní ñáhá nàhi xii-í duca<sup>n</sup> ní quide-dé ní sáhá<sup>n</sup>-dé

ní dǎngoyo-dé ndíquí<sup>n</sup> cǔhú sǎ ñà túú vǎha-á<sup>n</sup> núú triú-í núú duca<sup>n</sup> ní xínu coyo-xí", cǎchí-dé xǎha<sup>n</sup>-dǎ xii-güedé. Te cue tée xínu cuechi núú-dé ní xǎha<sup>n</sup>-güedé xii-dé: "Te núú cuini-n te quíhí<sup>n</sup>-ndí tnuhu-ndí nchaa cǔhú sǎ ñà túú vǎha ní xínu núú triú-n", cǎchí-güedé xǎha<sup>n</sup>-güedé xii-dé. <sup>29</sup> Te tée cùu xitohó triú-á<sup>n</sup> ní xǎha<sup>n</sup>-dǎ xii cue tée xínu cuechi núú-dé-á<sup>n</sup>: "Ñáhá, vá quíhí<sup>n</sup>-ndó tnuhu-ndo, chí òré tnuhu-ndo te tñáhá-ni triú quene chí cǎa vihi cǔhú-á<sup>n</sup>. <sup>30</sup> Vǎha-gǎ chí dáñá ná cuíhnu nahi ndéé ná cùu triú, te dátñúni nducu-í cue tée quíhí<sup>n</sup>-güedé tnuhu-güedé nchaa cǔhú sǎ ñà túú vǎha-á<sup>n</sup>, te dacùtu nuhní-güedé te cahmí-güedé, te dátñúni ñaquehndé-güedé triú nacani-güedé te nataxúha-güedé xití yacá-í", cǎchí-dé xǎha<sup>n</sup>-dǎ xii-güedé —duha ní cani Jèsús cuèndú núú-yu.

*Cuèndá ndíquí<sup>n</sup> yutnu ñani mostázá*  
(Mr. 4:30-32; Lc. 13:18-19)

<sup>31</sup> Te Jèsús ní cani tucu-gǎ ingá cuèndú núú ñáyiú nǎcuáa tecú tñúni-yu tñúhu-gǎ, te xǎha<sup>n</sup>-gǎ xii-yu:

—Na cǎni-í ì<sup>n</sup> cuèndú núú-ndó nǎcuáa tecú tñúni-ndó nǎcuáa cada-xi òré ndíhu ndaha ñaha Yá Ndióxi xii ñáyiú. Ì<sup>n</sup> tée ní quehe<sup>n</sup>-dé ndíquí<sup>n</sup> yutnu ñani mostázá te nèhe-dé cuáhá<sup>n</sup> ní sacá<sup>n</sup>-dé núú ñúhú-dé. <sup>32</sup> Te ndíquí<sup>n</sup> yutnu-á<sup>n</sup> ìo chǎhu, dico òré ná xínu-xi te sǎhnu-gǎ-xi dàcúúxi nchǎa cǔhú, te cue quití ndáva núú tàchí cǎdúha-güedé tacá-güedé núú dité-xi —cǎchí-gǎ xǎha<sup>n</sup>-gǎ xii-yu.

*Nǎcuáa quide levadurá*  
(Lc. 13:20-21)

<sup>33</sup> Te Jèsús ní xǎha<sup>n</sup> tucu-gǎ xii ñáyiú:

—Te na cǎchí tñúhu tucu-í xii-ndo nǎcuáa cada-xi òré ndíhu ndaha ñaha Yá Ndióxi xii ñáyiú. Ì<sup>n</sup> ñadíhí ní chíhí-a<sup>n</sup> levadurá úní arròbá yuchi triú, te levadurá-á<sup>n</sup> ní quide-xi ní ndaa nihí yusa<sup>n</sup>-á<sup>n</sup> —cǎchí-gǎ xǎha<sup>n</sup>-gǎ xii-yu.

*Mee-ni cuèndú ní cani Jèsús núú ñáyiú*  
(Mr. 4:33-34)

<sup>34</sup> Te mee-ni cuèndú ní cani Jèsús núú ñáyiú ndí tñáhá òré ní dánèhé ñáhá-gǎ xii-yu tñúhu-gǎ. <sup>35</sup> Te duca<sup>n</sup> ní quide-gǎ chí ní quee ndáá-xi nǎcuáa ní chídó tñúni ì<sup>n</sup> tée ní xóo cǎhá<sup>n</sup> tñúhu Yá Ndióxi ndéé sanaha núú tütú-gǎ núú cǎchí-xi:

Mee-ni cuèndú cani-í núú ñáyiú òré danèhé-í-yu tñúhu-í cuèndá tecú tñúni-yu,

te nchaa tñúhu sǎ vǎtá yóo-gǎ cundedóho danèhé-í-yu, te nchaa tñúhu-á<sup>n</sup> ndúú yùhu-xi ndéé cúnáhá ní ngáva ñuyúú. Duha ní chídó tñúni tée-á<sup>n</sup> núú tütú-gǎ.

*Jèsús cǎhá<sup>n</sup>-gǎ nǎcuáa quèe-xi cuendá cǔhú sǎ ñà túú vǎha cǎa xití triú*

<sup>36</sup> Te Jèsús ní dǎndácá-gǎ ñáyiú te cuánuhú-gǎ vehe, te cue tée xica cuu ndíhí-gǎ ní xǎha<sup>n</sup>-güedé xii-gǎ:

—Cǎchí tñúhu xii-ndí nǎsa quèe-xi cuendá cǔhú sǎ ñà túú vǎha cǎa xití triú —cǎchí-güedé xǎha<sup>n</sup>-güedé xii-gǎ.

<sup>37</sup> Te Jèsús ní xǎha<sup>n</sup>-gǎ xii-güedé:

—Tée cǎchí-í ní sacá<sup>n</sup> triú cǎvǎha-á<sup>n</sup> cùu yùhú Tée cùu ñani tñáhá-ndó nchǎa-ndo.

<sup>38</sup> Te nchaa núú ní sacá<sup>n</sup> tée-á<sup>n</sup> triú cùú-xi ñúyúú. Te tatá vǎha-á<sup>n</sup> cùú-xi cuè ñáyiú yindaha ñaha Yá Ndióxi. Te nchaa cǔhú sǎ ñà túú vǎha-á<sup>n</sup> cùú-xi ñáyiú yindaha ñaha sǎcuíhna. <sup>39</sup> Te tée ní dǎngoyo ndíquí<sup>n</sup> cǔhú sǎ ñà túú vǎha núú triú-á<sup>n</sup> cùú-dé mee sǎculhá. Te nduu nǎtehndé-nǎ triú-á<sup>n</sup> cùú-xi ndúu ndíhí nihnu-ná nchaa sǎ ío ñuyúú-a. Te nchaa ñáyiú ñaquehndé triú-á<sup>n</sup> cùú-yu mee-ni cuè espíritú xínu cuèchi núú Yá Ndióxi. <sup>40</sup> Te dátñá cada cue tée quíhí<sup>n</sup> tnuhu nchaa cǔhú sǎ ñà túú vǎha-á<sup>n</sup> dacùtu nuhní-güedé te cahmí-güedé, duca<sup>n</sup> sǎtnahá-xi yǎha nchaa ñáyiú cündihí yucu ñávǎha na sǎá nduu. <sup>41</sup> Te yùhú Tée cùu ñani tñáhá-ndó nchǎa-ndo tendaha-í nchaa espíritú xínu cuèchi núú-í quíhí<sup>n</sup>-xi nadatácá-xi nchaa ñáyiú sǎnu ichi cue tñaha ñáyiú-xi ichi cuèhé ichi duha, ndíhí nchaa dava-gǎ ñáyiú ñá túú quide vǎha, te nchaa ñáyiú-á<sup>n</sup> xǎndecú-yu nchaa núú ndécú cuè ñáyiú yindaha-í. <sup>42</sup> Te cue espíritú-á<sup>n</sup> daquihí<sup>n</sup>-xi cue ñáyiú-á<sup>n</sup> núú ñúhú núú cǎyú, te yàcá<sup>n</sup> ío ndáhyú-yu te dícó rúhñú-nǎ cuu núhu-yu sǎ sǎtú íni-yu sǎ ndóhó-yu. <sup>43</sup> Te nchaa ñáyiú quide nchaa nacúaa cuní Tǎtá-yu Dütú Ndióxi, ñáyiú-á<sup>n</sup> ío cunúú-yu cundecú-yu núú ndécú-gǎ táxi tñúni-gǎ, chí cuú-yu dátñá nchǎcanchii dayèhé-yu cundecú-yu núú ndécú-gǎ. Te nchaa nchóhó ñáyiú ndédóho nchaa tñúhu cǎhá<sup>n</sup>-í-a, te ío vǎha chí cuáha cuèndá —cǎchí-gǎ xǎha<sup>n</sup>-gǎ xii-güedé.

*Cuèndá ì<sup>n</sup> sǎ ìo ndèyáhu*

<sup>44</sup> Te Jèsús xǎha<sup>n</sup> tucu-gǎ xii-güedé:

—Na cǎni tucu-í ingá cuèndú núú-ndó nǎcuáa tecú tñúni-ndó nǎcuáa cada-xi òré ndíhu ndaha ñaha Yá Ndióxi xii ñáyiú. Ì<sup>n</sup> tée ní naníhí-dé ì<sup>n</sup> sǎ ìo ndèyáhu yindúxi ì<sup>n</sup> xichí, te ní nachindúxi tucu-dé diu-ni núú ní naníhí-dé-á<sup>n</sup>, te ío ní cudú íni-dé sǎ dúcá<sup>n</sup> ní naníhí-dé xǎá<sup>n</sup>. Te ní xica-dé cuánuhú-dé te ní nadico-dé nchaa sǎ ndécú ndíhí-dé, te ní nacúaa<sup>n</sup>-dé ñúhu núú dúcá<sup>n</sup> ní naníhí-dé xǎá<sup>n</sup>.

*Cuèndá ì<sup>n</sup> sǎ ìo ndèyáhu ñani pérlá*

<sup>45</sup> Te na cǎni tucu-í ingá cuèndú núú-ndó nǎcuáa tecú tñúni-ndó nǎcuáa cada-xi òré

ndihu ndaha ñaha Yá Ndiöxí xii ñáiyu. <sup>47</sup> Te tée quide ndáhu ndúcú-dé sá nání pèrlá sá ïo ndèyáhu. <sup>46</sup> Te ní naníhí-dé ñáiyu ndècu ndihi ïi<sup>n</sup> pèrlá sá ïo-gá ndèyáhu, te ní xica-dé cuánuhú-dé te ní nadico-dé nchaa sá ndécú ndihi-dé, te ní sáhá<sup>n</sup>-dé ní saa<sup>n</sup>-dé pèrlá sá ïo-gá ndèyáhu-án.

*Cuendá ñunu tñi-güedé chácá*

<sup>47</sup> Te na càni tucu-í ingá cuendú núu-ndó nàcuáa tecú tñuní-ndó nàcuáa cada-xi òré ndihu ndaha ñaha Yá Ndiöxí xii ñáiyu. Cue tée tñi chácá ní dàquèe-güedé ñunu-güedé xití ndute lámár tñi-güedé chácá, te dàcá nuu dàcá nihnu chácá cuànguee-güedi xití ñunu-án. <sup>48</sup> Te òré ní cutnùnì iní-güedé sá ní chítú ñunu-güedé, te ní natava-güedé ní nene yuhu lámár, te ní ngüita-güedé nácxi-güedé nchaa chácá-án. Te nchaa chácá vaha dàquèe-güedé-di xití tídihi, te nchaa chácá nèhé dāngoyo-güedé-di. <sup>49</sup> Te dàtná ní quide cue tée-án duca<sup>n</sup> càda cue espíritu xínú cuèchi núu Yá Ndiöxí ná sáa nduu vā cündècu-gá nchaa sá ïo ñuyú-a, chi cue espíritu-án dàquèe di<sup>n</sup>-xi nchaa ñáiyu ní quide vaha tnuu nchaa ñáiyu ñá túú ní quide vaha. <sup>50</sup> Te nchaa ñáiyu ñá túú ní quide vaha-án daquihí<sup>n</sup> ñahá-xí xii-yu núu ñùhú núu càyú, te yàcá<sup>n</sup> ïo ndáhyú-yu, te dicó rúhñú-ná cuu núhu-yu sá sātú iní-yu cuendá sá ndóhō-yu —cächí-gá xáha<sup>n</sup>-gá xii cue tée xica cuu ndihi-gá.

*Cuendá cue tée ndècu ndihi sá ní quee túu dñha ndihi sá ní quee túu saa*

<sup>51</sup> Te Jesús ní xicá<sup>n</sup> tñuhú-gá núu-güedé, te xáha<sup>n</sup>-gá xii-güedé:

—¿Ní tecú tñuní-ndó nàcuáa nduu nchaa tñuhu ní cáhá<sup>n</sup>-í-án? —cächí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Ní tecú tñuní-ndí —cächí-güedé xáha<sup>n</sup>-güedé xii-gá.

<sup>52</sup> Te ní xáha<sup>n</sup> tucu Jesús xii-güedé:

—Te núu ïi<sup>n</sup> tée dàcuaha ñaha xii ñáiyu nchaa tñuhu ní chídó tñuní ndíi Moisés ná cùtnuní iní-dé nàcuáa quide Yá Ndiöxí ndihu ndaha-gá ñáiyu, te tée-án cúú-dé dàtná ïi<sup>n</sup> tée cùu xitohó vehe. Te tée cùu xitohó vehe-án ní queñuhu-dé nchaa sá ní quee túu dñha ndècu ndihi-dé, ndihi nchaa sá ní quee túu saa. Te duca<sup>n</sup> sātñahá-xi cùu tée-án te núu na cùtnuní iní-dé nàcuáa quide Yá Ndiöxí ndihu ndaha-gá ñáiyu —cächí-gá xáha<sup>n</sup>-gá xii-güedé.

*Jesús ndécú-gá ñuu núu ní sañu-gá*

(Mr. 6:1-6; Lc. 4:16-30)

<sup>53</sup> Te sātá ní yáha duca<sup>n</sup> ní caní Jesús cuendú núu-güedé, te ní xica-gá cuánuhú-gá. <sup>54</sup> Te ní ndexio-gá ñuu núu cúú ñuu-gá, te cuánguihu-gá xití veñùhu càa ñuu-án te ní

ngüita-gá dánèhé-gá ñáiyu. Te nchaa ñáiyu ndédóho nchaa tñuhu cáhá<sup>n</sup>-gá xicuñuhu-yu, te xitñahá-yu:

—¿Nása ní cuu núu ïo vaha cùtnuní iní tée-a nàcuáa cunduu tñuhu cáhá<sup>n</sup>-dé, te quide-dé nchaa sá vā yōo tñahí ndàcu cada-í? <sup>55</sup> Te dicó dehe tée cùu carpinteru ndihi tá Màriá cúú-dé, te ñaní-dé cúú tē Jácobó, ndihi té Chéé, ndihi té Ximú, ndihi té Judás. <sup>56</sup> Te cue cùha-dé ndécú ndihi ñahá-yu xii-o ñuu-a. ¿Te nása ní quide-dé núu ndéé dàcá<sup>n</sup> ïo vaha cùtnuní iní-dé nàcuáa cunduu tñuhu cáhá<sup>n</sup>-dé-í? —cächí-yu xitñahá-yu.

<sup>57</sup> Te ñá túú ní cuiní-yu cáhá<sup>n</sup> ndihi vaha-yu Jesús, dico mee-gá ní xáha<sup>n</sup>-gá xii-yu:

—Te núu ïi<sup>n</sup> tée cáhá<sup>n</sup> tñuhu Yá Ndiöxí ná nāsáá-dé ñuu-dé, te nchaa ñáiyu ñuu-dé-án ndihi nchaa ñáiyu cùu ndimee-dé ñá túú nèhé-yu sá yñùhu núu-dé, dico cue ñáiyu nchaa dava-gá ñuu chi nèhé-yu sá yñùhu núu-dé —cächí-gá xáha<sup>n</sup>-gá xii-yu.

<sup>58</sup> Te ñá túú ní quide Jesús titní núu sá vā yōo tñahí ndàcu cada ñuu-án, chi ñá túú ní cuiní-yu quindáá iní ñahá-yu xii-gá.

## 14

*Nàcuáa ní cuu ní xihí té Juáá tée dàcuandute ñaha xii ñáiyu*

(Mr. 6:14-29; Lc. 9:7-9)

<sup>1</sup> Te diu-ní dàvá-án ní nihí tē Hèrodés tñuhu nchaa nàcuáa quide Jesús, te té Hèrodés-án cúú-dé tée tàxi tñuní districtú Galiléa. <sup>2</sup> Te ní xáha<sup>n</sup>-dè xii nchaa cue tée ndècu ndihi-dé:

—Tée dii cuendú-xi nihí-ó-án cúú-dé té Juáá tée dàcuandute ñaha xii ñáiyu, tée ní xihí ní cùu te ní ndoto-dé núu dàcá<sup>n</sup> ndácú-dé quide-dé nchaa sá vā yōo tñahí ndàcu cada —cächí-dé xáha<sup>n</sup>-dè xii-güedé.

<sup>3</sup> Te duca<sup>n</sup> ní cáhá<sup>n</sup> té Hèrodés chi mee-dé ní táuchíu<sup>n</sup>-dè ní tñi ñaha-güedé xii té Juáá, te ní dácútú ñaha-güedé xii-dé, te ní chíhi ñaha-güedé vecaá. Te duca<sup>n</sup> ní quide té Hèrodés-án sá cuendá ñaha nani Herodiás, ñaha ní cándeca ñaní-dé té Lipé, te ní naquehe<sup>n</sup> ñaha-dé xii-a<sup>n</sup> ndèca ñaha-dé. <sup>4</sup> Te té Juáá ní xáha<sup>n</sup>-dè xii té Hèrodés:

—Ñá túú ní quide vaha-n dùha ní naquehe<sup>n</sup>-n ñaha ní cándeca ñaní-n —duha ní xáha<sup>n</sup> tē Juáá xii té Hèrodés.

<sup>5</sup> Te sá dúcá<sup>n</sup> ní xáha<sup>n</sup> té Juáá-án xii té Hèrodés, te ní cuiní té Hèrodés-án cahní-dé té Juáá-án, dico ñá túú ní cùyi-dé chí ní yùhú-dé núu cue ñáiyu, chí nchaa-yu ní cutnùnì iní-yu sá té Juáá cúú-dé ïi<sup>n</sup> tée cáhá<sup>n</sup> tñuhu Yá Ndiöxí. <sup>6</sup> Te ïi<sup>n</sup> nduu ní quide té Hèrodés vico vehe-dé ní quide càhnu-dé nduu ní cacu-dé. Te ndècu ïi<sup>n</sup> déhe yoco ñaha nani Herodiás-án, te xíchí-án ní quihu-xi xití vehe núu cúú vico-án ní xita saha-xi. Te

nùcòo té Hèrodés ndihi cue téé ní cáhá<sup>n</sup>-dé ndéhé-güedé, te ío ní cudíí ìní-dé nàcuáa ní xita xíchí-án. <sup>7</sup> Te té Hèrodés-án ní cacunehé-dé ndéé Yá Ndiòxí nàcuáa cutnùní ìní xíchí-án sá ndàa cuañaha-dé núu ná cúú sá ná càcá<sup>n</sup>-xi núú-dé. <sup>8</sup> Te xíchí-án ní dácáhu ìní ñáhá náná-xi xii-xi ná cúú sá càcá<sup>n</sup>-xi núú té Hèrodés, núu xiá<sup>n</sup> ní xáha<sup>n</sup>-xi xii-dé:

—Cuíni-í quehndé-n díquí té Juáa tée dàcuandute ñaha xii ñáyi te taxi-n, dico na cùhu<sup>n</sup> ìn xití cóhó taxi-n —càchí-xi xáha<sup>n</sup>-xi xii-dé.

<sup>9</sup> Te sá dúcá<sup>n</sup> ní xáha<sup>n</sup>-xi, te ní cundiýí té Hèrodés, dico ñá túú ní ñíhí-dé nása cada-dé, chí ndèdóho ñáyi óré ní cacunehé-dé Yá Ndiòxí sá ndàa cuañaha-dé ìn sá ná càcá<sup>n</sup>-xi núú-dé. Te ní quide-dé nàcuáa ní xáha<sup>n</sup>-xi.

<sup>10</sup> Chí ní táuchíú<sup>n</sup>-dè ní sáhá<sup>n</sup> cue téé ní xehndé-güedé díquí té Juáa óré yíhí-dé ve-caá. <sup>11</sup> Te ní chihi-güedé díquí-dé ìn xití cóhó te nèhe-güedé cuánuhú ní sáñaha-güedé xii xíchí-án, te xíchí-án ní nacuañaha-xi xii náná-xi.

<sup>12</sup> Te cue téé xica cuu ndihi té Juáa-án ní sáhá<sup>n</sup>-güedé ní naquehe<sup>n</sup>-güedé yiqui cùñú-dé ní chinduxi-güedé, te dàtnùní ní sáhá<sup>n</sup>-güedé ní xáha<sup>n</sup>-güedé xii Jèsús nàcuáa ní cuu.

*Jèsús dácàxi-gá úhú<sup>n</sup> mìl cue téé te ìn ñáyi dñí ndihi landú*

(Mr. 6:30-44; Lc. 9:10-17; Jn. 6:1-14)

<sup>13</sup> Te Jèsús ní ñíhí-gá tnúhu nàcuáa ní cuu ní xihí té Juáa. Te sáta xiá<sup>n</sup> te cuánguee-gá ìn bàrcú cuáhá<sup>n</sup>-gá ìn xichi núú ñá túú ñáyi ndècu, dico nchaa ñáyi xindecu nchaa ñúú cáá yàtni xiá<sup>n</sup> ní ñíhí-yu tnúhu sá cuáhá<sup>n</sup>-gá, te ní queé-yu ñúú-yu xica sahá-yu cuáhá<sup>n</sup> núú quidè-yu cuèndá quexio Jèsús. <sup>14</sup> Te óré ní quexio Jèsús núú cuáhá<sup>n</sup>-gá, te ní quene-gá bàrcú, te ní xiní-gá cuéhé víhí ñáyi xixúcu-yu xiá<sup>n</sup>, te ní cundàhú ìní ñáhá-gá xii-yu, te ní quide tátna-gá nchaa ñáyi cùhú ndihí-yu. <sup>15</sup> Te sáta ní cuaa te ní sáhá<sup>n</sup> cue téé xica cuu ndihi Jèsús núú-gá, te xáha<sup>n</sup>-güedé xii-gá:

—Sa ní cuu dandàca-n nchaa ñáyi-a chi sa ní cuaa, te na quíhí<sup>n</sup>-yu nchaa ñúú cáá yàtni íha cuaá<sup>n</sup>-yu sá caxí-yu, chí núú ndécú-ó íha ñá túú tnàhí ná ío —càchí-güedé xáha<sup>n</sup>-güedé xii-gá.

<sup>16</sup> Te Jèsús ní xáha<sup>n</sup>-gá xii-güedé:

—Ñáhá, vá dándàca-í-yu, váha-gá mee-ndo chí cuañaha sá ná caxí-yu —càchí-gá xáha<sup>n</sup>-gá xii-güedé.

<sup>17</sup> Te ní xáha<sup>n</sup>-güedé xii-gá:

—Ñá túú nágá ndécú ndihi-ndí, chí úhú<sup>n</sup> duha-ná pàá ndihi úú-ná chácá ndécú ndihi-ndí —càchí-güedé xáha<sup>n</sup>-güedé xii-gá.

<sup>18</sup> Te Jèsús ní xáha<sup>n</sup>-gá xii-güedé:

—Chí cànèhe paá-á<sup>n</sup> ndihi chácá-án táquixi íha —cachí-gá xáha<sup>n</sup>-gá xii-güedé.

<sup>19</sup> Te Jèsús ní xáha<sup>n</sup>-gá xii nchaa ñáyi sá ná ngóo-yu nchaa-yu núú ité cuíí càa xiá<sup>n</sup>, te ní quehe<sup>n</sup>-gá ndi úhú<sup>n</sup> pàá-án ndihi ndi ndúú chácá-án te ní ndacoto-gá andiú, te ní ndacá<sup>n</sup> táhú-gá núú Yá Ndiòxí, te dàtnùní ní táhú cuèchi-gá pàá-án te ní sáñaha-gá xii cue téé xica cuu ndihi-gá ní dácàhñu-güedé cue ñáyi ní xexi-yu. <sup>20</sup> Te nchaa-yu ní xexi-yu ní ndahá xití-yu. Te sáta ní túhú cóhó-yu te ní nadatàcá-güedé nchaa sá ní quendóo, te ní chítú ùxúú tnàhá tídihi mee-ni sá ní quendóo. <sup>21</sup> Te nchaa ñáyi ní xexi-án ní xínu úhú<sup>n</sup> mìl mee-ni cuè téé chí mee-ni cuè téé-án ní quíundehú, te ìn cue ñáyi dñí ndihi cue landú.

*Jèsús xicá-gá núú ndute*

(Mr. 6:45-52; Jn. 6:16-21)

<sup>22</sup> Te óré-ni-án ní xáha<sup>n</sup> Jèsús xii cue téé xica cuu ndihi-gá sá queé-güedé bàrcú téhndé-güedé ndàa ingá xio yuhu làgúná, te mee-gá quendóo-gá cada ndee ìní tnàhá-gá ndihi cue ñáyi. <sup>23</sup> Te sáta ní yáha ní quide ndee ìní tnàhá-gá ndihi cue ñáyi, te medii-gá ní xica-gá cuasaá-gá ìn tìndúú cáá yàtni xiá<sup>n</sup> cuèndá cáhá<sup>n</sup> ndihi-gá Yá Ndiòxí, te ìn medii-gá ndécú xiá<sup>n</sup> ní cundiqui<sup>n</sup>. <sup>24</sup> Te bàrcú sá ñúhú cuè téé xica cuu ndihi-gá-án sa cuáhá<sup>n</sup>-xi ndéé cuádava xití làgúná-án, te ñíhí víhí quene táchí ndàa ichi cuáhá<sup>n</sup>-xi, te dàcandau ndeé-xi ndute nchaa dñí-xi. <sup>25</sup> Te tàcúhndá váhi-gá tá xica Jèsús núú ndute cuáhá<sup>n</sup> tá cùyatni-gá bàrcú-án. <sup>26</sup> Te cue téé xica cuu ndihi-gá ní xiní ñáhá-güedé xii-gá tá xica-gá núú ndute cuáhá<sup>n</sup>, te ní yùhú-güedé te ñíhí ní cáhá<sup>n</sup>-güedé te xitnàha-güedé:

—jì<sup>n</sup> àlmá! —càchí-güedé xitnàha-güedé.

<sup>27</sup> Te Jèsús ní cáhá<sup>n</sup>-gá, te xáha<sup>n</sup>-gá xii-güedé:

—Ñí cunduu-ndo vá yùhú-ndó, chí yùhú cùú-í —càchí-gá xáha<sup>n</sup>-gá xii-güedé.

<sup>28</sup> Te té Pèlú ní xáha<sup>n</sup>-dè xii-gá:

—Mèstrú, te núu ìn-yu te tauchíu<sup>n</sup> sá tnàhá-í ná càca-í núú ndute quixi tnàhá ñàhá-í xii-n —càchí-dé xáha<sup>n</sup>-dè xii-gá.

<sup>29</sup> Te Jèsús ní xáha<sup>n</sup>-gá xii-dé:

—Taquixi —cachí-gá xáha<sup>n</sup>-gá xii-dé.

Te té Pèlú ní nuu-dé núú bàrcú, te ní ngúita-dé tá xica-dé núú ndute cuáhá<sup>n</sup> cuátnahá ñáhá-dé xii-gá. <sup>30</sup> Te ní cutnùní ìní-dé sá ío ñíhí xico táchí, te ní ngúita-dé yùhú-dé. Te óré-ni-án tá queé naa-dé xití ndute cuáhá<sup>n</sup> ní cuu, te ñíhí ní cáhá<sup>n</sup>-dè xáha<sup>n</sup>-dè xii Jèsús:

—jìMèstrú, vá dáñá-n queé naa-í xití ndute! —càchí-dé xáha<sup>n</sup>-dè xii-gá.

<sup>31</sup> Te óré-ni-án ní tñí Jèsús ndaha-dé, te ní xáha<sup>n</sup>-gá xii-dé:

—¿Ná cuendá ñá túú sàndáá ndisa iní ñáhá-n xii-í sàni ñá sani úú iní-n-í? —càchí-gá xáha<sup>n</sup>-gá xii-dé.

<sup>32</sup> Te òré cuánguee Jèsús ndihi té Pèlù xití bàrcú, te òré-ni-á<sup>n</sup> ní ngüíñí táchí. <sup>33</sup> Te cue tée ñùhu xití bàrcú-á<sup>n</sup> ní ngüíñí xití-güedé núú-gá, te xáha<sup>n</sup>-güedé xii-gá:

—Sá ndáá sá cuítí sá díú yòhó cúú-n Dèhe Dútú Ndiòxí —càchí-güedé xáha<sup>n</sup>-güedé xii-gá.

*Jèsús quidé tãtna-gá ñáyiu cùhú ñá xichi núú nání Gènesarét*  
(Mr: 6:53-56)

<sup>34</sup> Te ní quexio Jèsús ndihi cue tée xica cuu ndihi-gá ndáa ingá xio yuhu làgúná, te núú ní quexio-gá ndihi-güedé-á<sup>n</sup> nání-xí Gènesarét. <sup>35</sup> Te nchaa ñáyiu xĩndecu xíá<sup>n</sup> ní cutnùní iní-yu sá díú-gá ní quexio, te ní dátécú tnùhu-yu nchaa dava-gá ñáyiu xĩndecu yatni xíá<sup>n</sup> sá ní quexio-gá. Te ndécá-yu nchaa ñáyiu cùhú ndécú ndihí-yu cuahá<sup>n</sup> núú ndécú Jèsús. <sup>36</sup> Te nchaa ñáyiu cùhú-á<sup>n</sup> ní ngüíta-yu càhá<sup>n</sup> ndàhú-yu núú Jèsús sá ná dáña-gá tnándeé-yu cuèdicó luha yuhu dõò-gá cuendá ndùha-yu, te cue ñáyiu cùhú, ñáyiu ní tnándeé yuhu dõò-gá ní ndùha-yu.

## 15

*Cuendá nchaa sá quidé-xí ngündecu cuéchi ñáyiu*

(Mr: 7:1-23)

<sup>1</sup> Te sáta dúcá<sup>n</sup> te ñá úú cue tée cùu fariséu ní quee-güedé ñúu Jerusálén, ndihi cue tée dàcuaha ñaha xii ñáyiu nchaa tnùhu ní chídó tnùní ndii Moisés ní quexio-güedé núú ndécú Jèsús, te xáha<sup>n</sup>-güedé xii-gá:

<sup>2</sup> —¿Ná cuendá cue tée xica cuu ndihi-n ñá túú nàquete-güedé ndaha-güedé òré caxi-güedé nàcuáa ní cachí cue ñani tnáhá-ó ní xĩndecu ndéé sanaha-í? —càchí-güedé xáha<sup>n</sup>-güedé xii-gá.

<sup>3</sup> Te Jèsús ní xáha<sup>n</sup>-gá xii-güedé:

—Te nchòhò tucu, ¿ná cuendá ñá túú quide-ndo nàcuáa ní cachí Yá Ndiòxí cada-ndo, núu da nàcuáa ta quide cue tée ñuyúú-a quide-ndo-í? <sup>4</sup> Te Yá Ndiòxí càchí-gá núú tütú-gá: “Canehe-ndo sá yĩñihu núú tãtã-ndó ndihí núú nãná-ndó”, càchí-gá. Te càchí tucu-gá ingá xichi núú tütú-gá: “Nchaa ñáyiu na càhá<sup>n</sup> úhú tãtã-xi àdi náná-xi te cahni ñaha-güedé xii-yu”, duha càchí-gá núú tütú-gá. <sup>5</sup> Dico nchòhò càchí-ndó sá cue ñáyiu chi cuu cùñaha-yu xii tãtã-yu àdi náná-yu: “Vá cúú chĩndee ñaha-ndí xii-n, chi sá táxi-ndí xii-n ní cùu, xíá<sup>n</sup> ní nduu cuendá Yá Ndiòxí”, cuu duha cùñaha ñáyiu xii tãtã-yu àdi náná-yu càchí-ndó. <sup>6</sup> Te càchí-ndó sá cue ñáyiu duca<sup>n</sup> na cùñaha

xii tãtã-xi àdi náná-xi te ñá túú-gá tãtã-yu chĩndee-yu ní tãtã-yu ní nãná-yu. Te duca<sup>n</sup> quide-ndo chi ní dáqueé tĩhú-ndó nàcuáa ní cachí Yá Ndiòxí cada-ndo, te mee-ni nàcuáa ta quide cue tée ñuyúú-a véxi nchicú<sup>n</sup> nihnu-ndo quide-ndo. <sup>7</sup> Te nchòhò cúú-ndó ñáyiu ío dàndahú méé-xí, chi càchí-ndó sá quidé ndáá-ndó te ñá ndáá sá quidé ndáá-ndó! Te ní quee ndáá-xi nàcuáa ní chídó tnùní ndii Chàia tée ní xóo càhá<sup>n</sup> tnùhu Yá Ndiòxí ndéé sanaha núú tütú-gá núú càhá<sup>n</sup>-xí nàcuáa ní càhá<sup>n</sup>-gá cuendá-ndó, te duha ní cachí-gá:

<sup>8</sup> Ñáyiu-a càchí-yu sá ío càhnu cuu-í dico dicó-ni yuhu càhá<sup>n</sup>-yu,

chi duu<sup>n</sup> duu<sup>n</sup> ñá túú ñùhu iní ñáhá-yu xii-í. <sup>9</sup> Te áú<sup>n</sup> nã cuu chĩñuhu ñahá-yu xii-í chi ñá tütú vèdana ndéé nãndihí-xi,

chi cue ñáyiu-a dàcuahá-yu cue tnàha ñáyiu-yu nàcuáa cundecú-yu, dico mee-ni tnùhu sá ní cahu iní cue ñáyiu ñuyúú-a càhá<sup>n</sup>-yu.

Duha ní chídó tnùní ndii Chàia núú tütú Yá Ndiòxí nàcuáa ní càhá<sup>n</sup>-gá cuendá-ndó —càchí-gá xáha<sup>n</sup>-gá xii-güedé.

<sup>10</sup> Te ní xáha<sup>n</sup>-gá xii cue ñáyiu:

—Chí tàquixi ndehe íha, te cundedóho vaha-ndo tnùhu na càhá<sup>n</sup>-í, te ío vaha cuáha-ndo cuendá. <sup>11</sup> Nchaa sá xéxi-ndó chi ñá túú nã quidé-xí iní-ndó, dico nchaa sá cuèhé sá dúhá sàni iní-ndó càhá<sup>n</sup>-ndó nchaa xíá<sup>n</sup> quidé-xí ndècu cuéchi-ndo —càchí-gá xáha<sup>n</sup>-gá xii-yu.

<sup>12</sup> Te cue tée xica cuu ndihi-gá ní sáhá<sup>n</sup>-güedé ndéé núú-gá, te xáha<sup>n</sup>-güedé xii-gá:

—Véxi-ndí càchí tnùhu-ndí xii-n sá cue tée cùu fariséu ñá túú cuu vaha iní-güedé cuendá tnùhu ní càhá<sup>n</sup>-n —càchí-güedé xáha<sup>n</sup>-güedé xii-gá.

<sup>13</sup> Te ní xáha<sup>n</sup>-gá xii-güedé:

—Nchaa ñáyiu ñá túú cùu cuendá Tãtã-í Dútú Ndiòxí cuíta nihnú-yu, chi ñáyiu-á<sup>n</sup> cúú-yu dàtná nchaa cùhú sá ñá túú nãndihí te tnùhu ñáyiu. <sup>14</sup> Te vá cáda cuendá-ndó nàcuáa càhá<sup>n</sup> cue tée-á<sup>n</sup>, chi cùu-güedé dàtná cue ñáyiu cuáá sácuíta nehe tnàha. Te nchòhò xini-ndó sá núu ñá ñáyiu cuáá ná cuítá nèhe tucú-yu ingá ñáyiu cuáá, te ndi ndúú-yu quee-yu déhvá —càchí-gá xáha<sup>n</sup>-gá xii-güedé.

<sup>15</sup> Te té Pèlù ní xáha<sup>n</sup>-dè xii-gá:

—Cachí tnùhu xii-ndí nàcuáa quèe-xi tnùhu ní càhá<sup>n</sup>-n-á<sup>n</sup> —càchí-dé xáha<sup>n</sup>-dè xii-gá.

<sup>16</sup> Te Jèsús ní xáha<sup>n</sup>-gá:

—¿Náa tnàha nchòhò ñá túú ní təcú tnùní-ndó nàcuáa nduu tnùhu ní càhá<sup>n</sup>-í núú ñáyiu-á<sup>n</sup> ñá? <sup>17</sup> Nchaa sá xéxi-yu cuánguee-xi xití-yu, te dàtnùní náyaha ñaha-xi xii-yu. <sup>18</sup> Dico nchaa tnùhu cuèhé tnùhu duha càhá<sup>n</sup>-yu xíá<sup>n</sup> véxi quene-xi iní-yu, te ñá

nchaa xíá<sup>n</sup> quidé-xí ndècu cuéchi-yu. <sup>19</sup> Te iní-yu-á<sup>n</sup> cácu nihnu nchaa sá cuéhé sá dúhá, chi sàni cuéhé sání dùha iní-yu, te sàhni-yu tnàha ñáyíu-yu, te cue tée càhá<sup>n</sup> ndihí-güedé ñáyíu dñí te ñá díú ñàdihí-güedé cúu-yu. Te díu-ni duca<sup>n</sup> quide cue ñáyíu dñí càhá<sup>n</sup> ndihí-yu cue tée te ñá díú yíi-yu cùu-güedé, te cuéi tée te cuéi ñàdihí mee-ni ìchi dñí iní cúdí iní-yu cundecú-yu, te dùhu ndachiu<sup>n</sup> tnahá-yu, te dàcuandehndé-yu, te càhá<sup>n</sup> cuéhé-yu cuendá tnàha ñáyíu-yu. <sup>20</sup> Te nchaa xíá<sup>n</sup> quidé-xí ndècu cuéchi-yu, dico ñá díú sá ñà túú ndàhá-yu dàtná ní cachí cue tée ndéé sanaha, chi xíá<sup>n</sup> ñá túú quide-xi cuendá ngúndecu cuéchi-yu —càchí-gá xàha<sup>n</sup>-gá xii-güedé.

*È<sup>n</sup> ñàdihí ñaha cùu ñani tnàhá ñáyíu canàneá ní sàndáá iní-a<sup>n</sup> Jèsús*  
(Mr. 7:24-30)

<sup>21</sup> Te Jèsús ní xica-gá cuáhá<sup>n</sup>-gá ní sáá-gá yucu cue tée ñúú Tirú, ndihí yucu cue tée ñúú Sidón. <sup>22</sup> Te è<sup>n</sup> ñàdihí ñaha cùu ñani tnàhá ñáyíu canàneá ndécú yàtni-a<sup>n</sup> xíá<sup>n</sup>, te níhi ta càhá<sup>n</sup>-a<sup>n</sup> ní quexìo núú ndécú Jèsús, te xàha<sup>n</sup>-a<sup>n</sup> xii-gá:

—jMèstrú, ñani tnàhá ndí Dàví, cundàhú iní ñàhá xii-í cada tátna-n dèhe yoco-ì! Chi yíhi ñaha espíritú cundíhi yucu ñávàha xii-xi te ío dàndoho ñaha-xi —cachí-a<sup>n</sup> xàha<sup>n</sup> xii-gá.

<sup>23</sup> Dico Jèsús ñá túú tnàhí ní càhá<sup>n</sup>-gá, te cue tée xica cuu ndihí-gá ní sàhá<sup>n</sup>-güedé núú-gá, te xàha<sup>n</sup>-güedé xii-gá:

—Cúñaha xii ñaha-á<sup>n</sup> ná nùhú-a<sup>n</sup>, chi ío níhi càhá<sup>n</sup>-a<sup>n</sup> nchicú<sup>n</sup> ñàhá-á<sup>n</sup> xii-o —cachí-güedé xàha<sup>n</sup>-güedé xii-gá.

<sup>24</sup> Te Jèsús ní xàha<sup>n</sup>-gá xii-güedé:

—Yá Ndióxi ní tendaha ñaha-gá xii-í véxi-í mee-ni ñúú núú xíndecu cue ñáyíu isràél, chi ñáyíu-á<sup>n</sup> cúu-yu dàtná cue mbéé cue quiti ní xita, chi ta xita nihnú-yu cuáhá<sup>n</sup> —càchí-gá xàha<sup>n</sup>-gá xii-güedé.

<sup>25</sup> Te ñàdihí-á<sup>n</sup> ní sàhá<sup>n</sup>-a<sup>n</sup> ndéé núú Jèsús ní ngúñí xítí-á<sup>n</sup>, te xàha<sup>n</sup>-a<sup>n</sup> xii-gá:

—jMèstrú, chindee ñaha xii-ì! —càchí-a<sup>n</sup> xàha<sup>n</sup>-a<sup>n</sup> xii-gá.

<sup>26</sup> Te Jèsús ní xàha<sup>n</sup>-gá xii-a<sup>n</sup>:

—Vá cúú chindee-í cue ñáyíu ñá túú cùu ñáyíu isràél, chi è<sup>n</sup>-ni cùu-xi núu na quèhe<sup>n</sup>-o paá cúú cuendá cue landú te cuàha-o ìnà caxi-di —càchí-gá xàha<sup>n</sup>-gá xii-a<sup>n</sup>.

<sup>27</sup> Dico ñaha-á<sup>n</sup> ní xàha<sup>n</sup>-a<sup>n</sup> xii-gá:

—Ndáá càhá<sup>n</sup>-n, dico cue iná chi nàdatacá-güedí sá ngóyo yùhu cóho xitohó-güedi —càchí-a<sup>n</sup> xàha<sup>n</sup>-a<sup>n</sup> xii-gá.

<sup>28</sup> Te Jèsús ní xàha<sup>n</sup>-gá xii-a<sup>n</sup>:

—jYohó ñaha cùhú dèhe-xi, ío váha sàndáá iní ñàhá-n xii-ì! Te na càda-í nàcuáa cuíni-n —càchí-gá xàha<sup>n</sup>-gá xii-a<sup>n</sup>.

Te òré-ni-á<sup>n</sup> ní ndúha dèhe-a<sup>n</sup>.

*Jèsús quidé tátna-gá vài ñáyíu cùhú*

<sup>29</sup> Te sáta dúcá<sup>n</sup> ní cuu te Jèsús ní xica-gá cuáhá<sup>n</sup>-gá ní yáha-gá yuhu làgúná distritú Galleá, te cuásaá-gá è<sup>n</sup> tindúú te xíá<sup>n</sup> ní ngóo-gá. <sup>30</sup> Te xíá<sup>n</sup> núcòo-gá ní quexìo cuéhé víhi ñáyíu, te ndécá-yu ñáyíu yacua, ndihí ñáyíu ní yíchi è<sup>n</sup> xio ndaha-xi, ndihí ñáyíu cuáa, ndihí ñáyíu ñihí, te vài dava-gá cue ñáyíu cùhú tnàhá dava-gá núú cuéhé ndécá-yu ní quexìo núú ndécú-gá. Te ní taxi ndecu ñàhá-yu núú Jèsús te ní quide tátna ñaha-gá xii-yu te ní ndúha-yu. <sup>31</sup> Te nchaa ñáyíu xíndecu-á<sup>n</sup> ío ní cuñuhu-yu sá dúcá<sup>n</sup> ní xini-yu ní cuu ní nacáhá<sup>n</sup> nchaa ñáyíu ñihí, ndihí cuendá sá ní ndúha nchaa cue ñáyíu yacua, ndihí cuendá sá ní ndúha cue ñáyíu ní yíchi è<sup>n</sup> xio ndaha-xi, ndihí cuendá sá ní ndúha núú cuè ñáyíu cuáa. Te nchaa-yu ní cachí-yu sá ío càhnu cuu Yá Ndióxi Yaa cúú Ndióxi cue ñáyíu isràél.

*Jèsús dácaxi-gá cúmi mìl cue tée te dè<sup>n</sup>*  
*ñáyíu dñí ndihí landú*  
(Mr. 8:1-10)

<sup>32</sup> Te Jèsús ní cana-gá cue tée xica cuu ndihí-gá, te ní xàha<sup>n</sup>-gá xii-güedé:

—Yúhú cundàhú iní-í nchaa ñáyíu-a, chi sa ní cuu únú ndecu ndihí ñàhá-yu xii-o ìha, te ñá túú tnàhí-gá sá caxi-yu, te ñá túú cuíni-í natendaha-í-yu núhú tnámá-yu vehé-yu, chi ná ndéé cuáhá<sup>n</sup> cuneé-yu docó ìchi —càchí-gá xàha<sup>n</sup>-gá xii-güedé.

<sup>33</sup> Te ní xàha<sup>n</sup>-güedé xii-gá:

—¿Te ndéé níhi-ó sá cuñaha-o càxi nchaa ñáyíu-a, te ío cuéhé-yu te ñá túú nã ío ìha chi cùu-xi xití yucu-i? —càchí-güedé xàha<sup>n</sup>-güedé xii-gá.

<sup>34</sup> Te Jèsús ní xícá<sup>n</sup> tnúhú-gá núú-güedé, te xàha<sup>n</sup>-gá:

—¿Ná daha-gá paá ndécú ndihí-ndo-i? —cachí-gá xàha<sup>n</sup>-gá xii-güedé.

Te ní xàha<sup>n</sup>-güedé xii-gá:

—Ndècu ndihí-ndí úsá-gá tnàhá paá ndihí è<sup>n</sup> úú-gá chácá —càchí-güedé xàha<sup>n</sup>-güedé xii-gá.

<sup>35</sup> Te Jèsús ní xàha<sup>n</sup>-gá xii nchaa ñáyíu sá ná ngóo-yu nchaa-yu, te ní ngóo-yu.

<sup>36</sup> Te ní quehe<sup>n</sup>-gá ndí úsá paá-á<sup>n</sup> ndí è<sup>n</sup> úú-gá chácá-á<sup>n</sup>, te ní ndacá<sup>n</sup> táhú-gá núú Yá Ndióxi, te dàtnùni ní táhú cuéchi-gá paá-á<sup>n</sup> ndihí chácá-á<sup>n</sup> te ní sánaha-gá xii cue tée xica cuu ndihí-gá ní dácàhñu-güedé nchaa ñáyíu-á<sup>n</sup>.

<sup>37</sup> Te nchaa-yu ní xexí-yu ní ndahá xití-yu. Te sáta ní túhú cóhó-yu te ní nadatácá-güedé nchaa sá ní quendóo, te ní chítú úsá tnàhá tidíhi mee-ni sá ní quendóo-á<sup>n</sup>. <sup>38</sup> Te núú ncháá ñáyíu ní xexi te ní xinu cúmi mìl mee-ni cuè tée chi díu-ni cue tée-á<sup>n</sup> ní quíundehu, te dè<sup>n</sup> cue ñáyíu dñí ndihí cue landú. <sup>39</sup> Te sáta dúcá<sup>n</sup> te Jèsús

ní dándácá ñàha-gá xii-yu, te cuánguee-gá bàrcú cuáhà<sup>n</sup>-gá yucu cue tée ñuú Mągdalá.

## 16

*Cue tée cùu fariséu ndihi cue tée cùu saducéu xàha<sup>n</sup>-güedé xii Jèsús cada-gá ñ<sup>n</sup> sá vǎ yǎo tñàhí ndàcu cada*

*(Mr. 8:11-13; Lc. 12:54-56)*

<sup>1</sup> Te cue tée cùu fariséu ndihi cue tée cùu saducéu ní sáa-güedé núu ndécú Jèsús xító ndéé ñàhá-güedé xii-gá, te xàha<sup>n</sup>-güedé sá ná cádá-gǎ ñ<sup>n</sup> sá vǎ yǎo tñàhí ndàcu cada cundehe-güedé nàcuáa cutnùní iní-güedé núu ndáá sá Yǎ Ndióxi ní tendaha ñàha-gá xii-gá véxi-gá ñuyúú-a. <sup>2</sup> Te Jèsús ní xàha<sup>n</sup>-gá xii-güedé:

—Nchòhó chi òré tá cuàa cuáhà<sup>n</sup> te ndàcoto-ndo andiu, te cǎchí-ndó: “Ío vǎha cada-xi tñéé chi cǎa vícǎ tìcuèhé andiu”, duha cǎchí-ndó. <sup>3</sup> Te òré dátneé ndàcoto tucu-ndo andiu, te cǎchí-ndó: “Vǎ cádá vǎha-xi nduu vitna chi tìcuèhé andiu, te cǎa vícǎ”, duha cǎchí-ndó. <sup>4</sup> Dico nchòhó cùú-gǎ ñǎyiu ío dándahú méé-xí sǎ quídé ndáá te ñǎ ndáá sǎ quídé ndáá-ndó! Te cutnuni iní-ndó nàcuáa quíde-xi andiu, dico ñǎ túú cutnuni iní-ndó nàcuáa quèe-xi nchaa sǎ quídé Yǎ Ndióxi vitna. <sup>4</sup> Dico nchaa nchòhó ñǎyiu ndéu ñuyúú vitna ío cuihna iní-ndó, te ñǎ túú cuíní-ndó càda ndáá-ndó núu Yǎ Ndióxi, te cuíní-ndó càda-í ñ<sup>n</sup> sǎ vǎ yǎo tñàhí ndàcu cada dico ñǎ túú nǎgǎ cada-í, chi diu-ni nàcuáa ní quíde Yǎ Ndióxi ndúí Jónás diu-ni duca<sup>n</sup> càda tucu-gǎ vitna —cǎchí-gǎ xàha<sup>n</sup>-gǎ xii-güedé.

Te duca<sup>n</sup> te ní xica-gǎ cuáhà<sup>n</sup>-gǎ ndihi cue tée xica cuu ndihi-gǎ.

*Cuèndá cue tée cùu fariséu ndihi cuèndá cue tée cùu saducéu*

*(Mr. 8:14-21)*

<sup>5</sup> Te òré ní quexio ndihi ñàha-gǎ xii-güedé ndáa ingǎ xio yuhu làgúná, te ní ndacu iní-güedé sǎ ní cunaa-güedé canehe-güedé pǎa quíhí<sup>n</sup> caxi-güedé. <sup>6</sup> Te Jèsús ní cǎhá<sup>n</sup>-gǎ dóho-güedé, te xàha<sup>n</sup>-gǎ xii-güedé:

—Na cǎchí tñuhu-í xii-ndo sǎ Ío quíhí iní-ndó cùndecu-ndo, te vǎ cádá cuèndá tñàhí-ndo lèvadurá cue tée cùu fariséu ndihi cue tée cùu saducéu —cǎchí-gǎ xàha<sup>n</sup>-gǎ xii-güedé.

<sup>7</sup> Te ní ngúíta-güedé xitnàha-güedé:

—Cuèndá sǎ ñǎ túú ní cǎnehe-o pǎa quixi xiǎ<sup>n</sup> duha cǎhá<sup>n</sup>-gǎ —cǎchí-güedé xitnàha-güedé.

<sup>8</sup> Te Jèsús ní cutnùní iní-gǎ nàcuáa nduu tñuhu xitnàha-güedé, núu ní xàha<sup>n</sup>-gǎ xii-güedé:

—Nchòhó chi ñǎ túú sàndáá iní ñàhá vǎha-ndo xii-í núu xiǎ<sup>n</sup> da sǎ ñǎ túú ní cǎnehe-ndo pǎa quixi cǎhá<sup>n</sup>-ndó. <sup>9</sup> Te náa ñǎ ndácú iní-ndó sǎ núu ùhú<sup>n</sup>-ní pǎá, te ní taxi-í

ní dǎcǎhñu-ndo ní xexi ùhú<sup>n</sup> mìl cue tée, chi diu-ni cue tée-á<sup>n</sup> ní quiúndehu, te sǎtá ní tǎhú cóhó-güedé te ní chítú tìtí tídihí mee-ni sǎ ní quendóo-ǎ<sup>n</sup>? Te ñǎ təcú tñuní-ndó nàcuáa quèe-xi nàcuáa ní quíde-í. <sup>10</sup> Te náa ñǎ ndácú tucu iní-ndó sǎ núu ùsá-ni pǎa te ní taxi-í ní dǎcǎhñu tucu-ndo ní xexi cùmí mìl cue tée, chi diu-ni cue tée-á<sup>n</sup> ní quiúndehu, te sǎtá ní tǎhú cóhó-güedé te ní nadatácá-ndó nchàa sǎ ní quendóo, te ní chítú tìtí tídihí mee-ni sǎ ní quendóo-ǎ<sup>n</sup>? <sup>11</sup> Dico nchòhó chi ñǎ túú ní quíde cuèndá-ndó nàcuáa nduu tñuhu cǎhá<sup>n</sup>-í òré ní cǎchí-í sǎ vǎ quèhé<sup>n</sup> cuèndá-ndó lèvadurá cue tée cùu fariséu ndihi cue tée cùu saducéu, chi ñǎ díú cuèndá pǎa ní cǎhá<sup>n</sup>-í —cǎchí-gǎ xàha<sup>n</sup>-gǎ xii-güedé.

<sup>12</sup> Te sǎtá dúcǎ<sup>n</sup> ní xàha<sup>n</sup> Jèsús xii cue tée xica cuu ndihi-gǎ, te ní tecú tñuní-güedé sǎ xàha<sup>n</sup>-gǎ xii-güedé sǎ vǎ tñíí-güedé tñuhu cǎhá<sup>n</sup> cue tée cùu fariséu ndihi cue tée cùu saducéu, te ñǎ díú cuèndá levadurá sǎ quihu yuchi cuàha pǎa ní cǎhá<sup>n</sup>-gǎ.

*Té Pelú xàha<sup>n</sup>-dè xii Jèsús sǎ díú-gǎ cùú-gǎ Cristú*

*(Mr. 8:27-30; Lc. 9:18-21)*

<sup>13</sup> Te Jèsús ní quexio-gǎ yucu cue tée ñuú Cèsareá Filipú, te ní xicǎ<sup>n</sup> tñuhú-gǎ núu cuè tée xica cuu ndihi-gǎ, te xàha<sup>n</sup>-gǎ xii-güedé:

—¿Yoo cùu yúhú Tée cùu ñǎní tñàhí-ndo nchàa-ndo cǎchí cue ñǎyiu-va? —cǎchí-gǎ xàha<sup>n</sup>-gǎ xii-güedé.

<sup>14</sup> Te ní xàha<sup>n</sup>-güedé xii-gǎ:

—Davá-yu cǎchí-yu sǎ cùú-n ndíí Juáá tée ní xóo dacuàndute ñàha xii ñǎyiu, te davá-yu cǎchí-yu sǎ cùú-n tǎ Èliás, te davá-yu cǎchí-yu sǎ cùú-n ndíí Jeremiás tée ní xóo cǎhá<sup>n</sup> tñuhu Yǎ Ndióxi ndéé sanaha, àdi cuu-n ingǎ tée ní xóo cǎhá<sup>n</sup> tñuhu-gǎ ndéé sanaha, duha cǎchí-yu —cǎchí-güedé xàha<sup>n</sup>-güedé xii-gǎ.

<sup>15</sup> Te Jèsús ní xicǎ<sup>n</sup> tñuhú tucu-gǎ núu-güedé, te xàha<sup>n</sup>-gǎ xii-güedé:

—Te nchòhó, ¿yoo sàni iní-ndó cùu-í-i? —cǎchí-gǎ xàha<sup>n</sup>-gǎ xii-güedé.

<sup>16</sup> Te té Ximú, àdi Pelú chi úú diu-dé, ní xàha<sup>n</sup>-dè xii-gǎ:

—Yòhó cùú-n Cristú Yáá ní tendaha Yǎ Ndióxi véxi ñuyúú-a, te diu Yǎ Ndióxi cùú-gǎ Yáá ndécú nchàa nduu nchaa quíú, te yòhó cùú-n Dèhe-gǎ —cǎchí-dé xàha<sup>n</sup>-dè xii-gǎ.

<sup>17</sup> Te Jèsús ní xàha<sup>n</sup>-gǎ xii-dé:

—Yòhó té Ximú dèhe té Jónás, ío vǎha tǎhú-n chi mee Tǎtá-í Dúrtú Ndióxi ní dǎcǎhú iní ñàhá-gǎ xii-n nàcuáa cunduu tñuhu cǎhá<sup>n</sup>-n, te ñǎ díú ñ<sup>n</sup> ñǎyiu ñuyúú-a duca<sup>n</sup> ní dǎcachu iní ñàhá-yu xii-n tñuhu-á<sup>n</sup>. <sup>18</sup> Te yúhú xàha<sup>n</sup>-í Pelú xii-n, te tñuhu-á<sup>n</sup> quèe-xí yúú, chi quèe ndáá-xi nàcuáa nàni-n, chi cuu-n ñ<sup>n</sup> tée vǎ cǎní ñ<sup>n</sup> caní úú iní-xi canu ichi-n cuè ñǎyiu nàcuáa cundecu ndihi ñàhá-yu xii-í.

Te nchaa ñáyiú cùu cuendá-í vá ndácú yùcu ñávaha dacuíta nihnu ñaha-xi xii-yu. <sup>19</sup> Te yúhú taxi-í tnúhu ndee ínì cundecu ndíhi-n cuendá cunuu-n núú cuè ñáyiú yindaha ñaha Yá Ndióxi, te nchaa sá ná cáhá<sup>n</sup>-n sá cúú-xi sá váha, te diu-ni duca<sup>n</sup> cáhá<sup>n</sup> Yá Ndióxi, te nchaa sá ná cáhá<sup>n</sup>-n sá ñà túú cùu-xi sá váha, te diu-ni duca<sup>n</sup> cáhá<sup>n</sup> tucu-gá, chí quide-n nacuaa cuini-gá —cáchi-gá xáha<sup>n</sup>-gá xii-dé.

<sup>20</sup> Te sátá dúcá<sup>n</sup> te ní xáha<sup>n</sup> Jèsús xii cue téé xica cuu ndíhi-gá sá vá yóo cùñaha-güedé sá díú-gá cúú-gá Cristú Yáá ní tendaha Yá Ndióxi véxi ñuyúú-a.

*Jèsús cáhá<sup>n</sup>-gá sá cáhni ñaha-güedé xii-gá (Mr 8:31-9:1; Lc 9:22-27)*

<sup>21</sup> Te ndéé dává-án ní ngüita Jèsús xáha<sup>n</sup>-gá xii cue téé xica cuu ndíhi-gá:

—Dacuití sá quíhí<sup>n</sup>-í ñúú Jerusalén, te yacá<sup>n</sup> cue téé cùu sacuéhé núú ñáyiú isràél, ndíhi cue dútú cúnúu, ndíhi cue téé dàcuaha ñaha xii ñáyiú nchaa tnúhu ní chídó tnúni ndí Moisés, nchaa cue téé-án ío dandòho ñaha-güedé xii-í, te cahni ñaha-güedé, dico nduu únì sá cúú-í te ndoto-í —cáchi-gá xáha<sup>n</sup>-gá xii-güedé.

<sup>22</sup> Te té Pèlú ní cana-dé Jèsús íi<sup>n</sup> xio, te ní ngüita-dé ténàà ñáhá-dé xii-gá, te xáha<sup>n</sup>-dé:

—Já vá cáchi Ndióxi sá dúcá<sup>n</sup> ndòho-n chí ñà túú tau-n sá dúcá<sup>n</sup> ndòho-n! —cachí-dé xáha<sup>n</sup>-dé xii-gá.

<sup>23</sup> Te ndàa sátá Jèsús núnñí té Pèlú òré duca<sup>n</sup> xáha<sup>n</sup>-dé xii-gá núu ní nchócuñhu-gá, te xáha<sup>n</sup>-gá xii-dé:

—Xocuíñí yóhó yucu ñávaha núú-í-a chí dicó quidé tnèñu-n! Chí ñà túú sàni ínì-ò dàtná sáni ínì Yá Ndióxi chí íi<sup>n</sup>-ni sàni ínì-ò ndíhi dava-gá cue ñáyiú ndècu ñuyúú-a —cáchi-gá xáha<sup>n</sup>-gá xii-dé.

<sup>24</sup> Te sátá dúcá<sup>n</sup> te ní xáha<sup>n</sup>-gá xii nchaa cue téé xica cuu ndíhi-gá:

—Nchaa ñáyiú cuini chitnahá ñáhá xii-í, te xini ñuhu-xi dañá-yu vá cáda-gá-yu sá sáni ínì méé-yu, te ío cada ndee ínì-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. <sup>25</sup> Te nchaa ñáyiú cuini sá ñà túú tnáhi ná yáha cundecu ñuyúú-a cuíta nihnú-yu, dico nchaa ñáyiú ñà túú tnáhi yúhú cuèi nándi sá ná yáha-yu cundecu-yu ñuyúú-a sá cuendá-í, te ñáyiú-án naníhi tãhú-yu. <sup>26</sup> Te cuèi nchaandi túhú sá ío ñuyúú-a na nihí ñáyiú cundecu ndíhi-yu, dico núu diu nchaa xíá<sup>n</sup> ná càda cuíta nihnú-yu te ñà túú védana nándíhi-xi sá dúcá<sup>n</sup> ndècu ndíhi-yu nchaa xíá<sup>n</sup>. Te ní íi<sup>n</sup> sá ío ñuyúú-a vá chindéé ñaha-xi xii-yu cuendá naníhi tãhú-yu. <sup>27</sup> Te ndáá quéé-xi tnúhu cáhá<sup>n</sup>-í, chí na quixi tucu yúhú Téé cùu ñani tnáhá-yu nchaá-yu, te dává-án quini-yu sá ío càhnu cuu-í dàtná càhnu cuu Tátà-í Dútú Ndióxi, te quixi-í ndíhi

cue espíritu xínú cuèchi núú-gá, te dává-án cuáha-í nchaa ñáyiú sá ndúú tãhú-yu nacuaa ndúu sá ní quidé-yu íi<sup>n</sup> íi<sup>n</sup>-yu. <sup>28</sup> Te na cáchi tnúhu ndáá-í xii-ndo sá ío dava nchòhó ñáyiú ndècu iha vitna vá cuú-ni-ndo, chí cundecu-ni-ndo ndéé quini-ndo quixi tucu yúhú Téé cùu ñani tnáhá-ndo nchaa-ndo taxi tnuni-í nchaa ñáyiú —cáchi-gá xáha<sup>n</sup>-gá xii-güedé.

## 17

*Ní nadáma dóo Jèsús ndíhi núú-gá (Mr 9:2-13; Lc 9:28-36)*

<sup>1</sup> Te núú íñú nduu sá dúcá<sup>n</sup> ní cáhá<sup>n</sup> Jèsús, te ní xica-gá cuásaá-gá íi<sup>n</sup> yucu dúcú<sup>n</sup>, te ndéca-gá té Pèlú, ndíhi té Jacobó, ndíhi té Juáá ñani té Jacobó-án cuásaá. Te únì tnáhi-ni cue téé-án ndécá-gá cuásaá. <sup>2</sup> Te yucu-án ndécú-gá ní nadáma núú-gá ndíhi dóo-gá, te núú-gá súúni dátása-xi dàtná quidé-xi núú nchicanchii, te dóo-gá súúni ní nduu cuixi<sup>n</sup> dàtná cáá ñùhú cuixi<sup>n</sup>. <sup>3</sup> Te òré-ni-án ní xini-güedé ndí Moisés ndíhi té Èliás núnñí-güedé ndíhi-gá ndátnúhu ndíhi ñaha-güedé xii-gá. <sup>4</sup> Te té Pèlú ní xáha<sup>n</sup>-dè xii Jèsús:

—Mèstrú, jváha ní cuu sá ndécú-ó iha vitna! Te núu cuini-n, te na dàcaa-ndí únì tnáhá vehe tnuxixi<sup>n</sup>, te íi<sup>n</sup> cuu cuendá-n, te íi<sup>n</sup> cuu cuendá té Moisés, te íi<sup>n</sup> cuu cuendá té Èliás —cáchi-dé xáha<sup>n</sup>-dè xii-gá.

<sup>5</sup> Te nini dúcá<sup>n</sup> cahá<sup>n</sup> té Pèlú ní quexío íi<sup>n</sup> vícío núú ndécú-güedé ní dadáhu ñaha-xi xii-güedé té súúni chàhchí. Te xití vícío-án ní tecú ní cáhá<sup>n</sup> Yá Ndióxi, te xáha<sup>n</sup>-gá xii-güedé:

—Téé-a cùu-dé Déhe-í téé ío cùu ínì-í, te ío cùúí-ínì-í-dé, te cundedóho-ndo nchaa tnúhu cáhá<sup>n</sup>-dé —duha ní xáha<sup>n</sup>-gá xii-güedé.

<sup>6</sup> Te sátá dúcá<sup>n</sup> ní cáhá<sup>n</sup> Yá Ndióxi ní tecú dóho cue téé xica cuu ndíhi Jèsús te ío ní yúhú-güedé, te ní ngüíñí xití-güedé te ní nuu núú-güedé ndàa núú ñùhú. <sup>7</sup> Te Jèsús cuáhá<sup>n</sup>-gá núú xíndecu cue téé xica cuu ndíhi-gá, te ní tendaha ñaha-gá, te xáha<sup>n</sup>-gá xii-güedé:

—Chí ndacuíñí, vá yúhú-ndo —cáchi-gá xáha<sup>n</sup>-gá xii-güedé.

<sup>8</sup> Te òré ní ndanehe núú-güedé, te ñà túú-gá ní xini-güedé cue téé úú-án chí mee-ná Jèsús. <sup>9</sup> Te òré cuánuu ndíhi ñaha Jèsús xii-güedé tindúú-án, te ní xáha<sup>n</sup>-gá xii-güedé:

—Vá yóo cùñaha-ndo ní íi<sup>n</sup> sá ní xini-ndo núu ní sátá-ó, te cuu cáhá<sup>n</sup>-ndó dico ndéé ná yáha ndoto yúhú Téé cùu ñani tnáhá-ndo nchaa-ndo sá cúú-í —cáchi-gá xáha<sup>n</sup>-gá xii-güedé.

<sup>10</sup> Te cue téé xica cuu ndíhi-gá ní xáha<sup>n</sup>-güedé xii-gá:



—Cuiñi-ndí cachí tnúhu-n ná cuèndá cue tée dàcuaha ñaha xii ñáiyu nchaa tnúhu ní chídó tnúni ndíi Moisés cächí-güedé sá dñhna-gá té Èliás quixi, te dàtnúni quixi Yaa tendaha Yá Ndióxi quixi ñuyíu-a — cächí-güedé xáha<sup>n</sup>-güedé xii-gá.

<sup>11</sup> Te Jesús ní xáha<sup>n</sup>-gá xii-güedé:

—Ndáá sá códo núu ñ<sup>n</sup> tée quixi-dé te cada-dé dàtná ní quide té Èliás te tée-á<sup>n</sup> cada ndáá-dé nchaa nàcuáa cùu. <sup>12</sup> Te na cächí tnúhu-í xii-ndo vitna sá sà ní quixi tée ní quide dàtná ní xóo cada té Èliás, te cue ñáiyu ñá túu ní cùtnumí iní-yu sá díu-dé, te ní quide ñhá-yu xii-dé nchaa nàcuáa ní quixi iní méé-yu, te díu-ni duca<sup>n</sup> càda ñaha tucú-yu xii yúhú Tée cùu ñani tnáhá-yu nchaá-yu, chí dandóho ñhá-yu xii-í —cächí-gá xáha<sup>n</sup>-gá xii-güedé.

<sup>13</sup> Te cue tée xica cuu ndíhi-gá ní cutnúni iní-güedé sá cuèndá ndíi Juáa tée ní xóo dacuàndute ñaha xii ñáiyu ní cáhá<sup>n</sup>-gá.

*Jesús quidé tátna-gá ñ<sup>n</sup> tée cuechi tnàhà cuéhé xiyíhi*

(Mr. 9:14-29; Lc. 9:37-43)

<sup>14</sup> Te Jesús ní nasáá-gá ndíhi cue tée ní sáa ndíhi-gá tindúú-á<sup>n</sup> núu xñdecu vai ñáiyu, te ní quexlo ñ<sup>n</sup> tée núu-gá ní ngúñí xití-dé, te xáha<sup>n</sup>-dè xii-gá:

<sup>15</sup> —Mèstrú, cundáhu iní déhe-í chí tnáhá-dé cuéhé xiyíhi, te ío dàndóho ñaha-xi xii-dé, te ní cuu vai xito daquée ñaha-xi núu ñúhú xii-dé, te ní cuu vai tucu xito dangaunihnu ñaha-xi ndute xii-dé. <sup>16</sup> Te sa ndéca-í-dé ní quixi núu cué tée xica cuu ndíhi-n dico ñá túu ní ndácu-güedé cada tátna ñaha-güedé xii-dé —cächí-dé xáha<sup>n</sup>-dè xii-gá.

<sup>17</sup> Te Jesús ní xáha<sup>n</sup>-gá xii nchaa ñáiyu xñdecu-á<sup>n</sup>:

—Nchaa nchòhó ñáiyu ndècu ñuyíu-a, ío sáa iní-ndó chí ñá túu cuiñi-ndó quindáa iní-ndó Yá Ndióxi, te ní cuu vai nduu quide ndee iní-í nchaa sá quidé-ndó. ¿Te ná ndéé ama vá dúcá<sup>n</sup>-gá cada-ndo-í? Te chí cándeca tée cùhú-á<sup>n</sup> táquixi iha —cachí-gá xáha<sup>n</sup>-gá xii-yu.

<sup>18</sup> Te Jesús ní tenáa-gá espíritú cundíhi yucu ñáváha yíhi ñaha xii tée-á<sup>n</sup>, te ní quee ñaha-xi xii-dé, te òré-ni-á<sup>n</sup> ní ndúha-dé.

<sup>19</sup> Te sáta dúcá<sup>n</sup> te òré ndécú mèe Jesús ndíhi cue tée xica cuu ndíhi-gá, te ní xicá<sup>n</sup> tnúhú-güedé núu-gá, te xáha<sup>n</sup>-güedé xii-gá:

—Cachí tnúhu xii-ndí ná cuèndá ñá túu ní ndácu-ndí queñuhu-ndí espíritú cundíhi yucu ñáváha yíhi ñaha xii tée-á<sup>n</sup> —cächí-güedé xáha<sup>n</sup>-güedé xii-gá.

<sup>20</sup> Te Jesús ní xáha<sup>n</sup>-gá xii-güedé:

—Te ñá túu ní ndácu-ndo, chí ñá túu sàndáa ndisa iní-ndó Yá Ndióxi. Te na cächí tnúhu ndáá-í xii-ndo sá núu nchòhó quindáa

ndisa iní-ndó Yá Ndióxi cuèdicó luha líí dàtná líhli ndíqui<sup>n</sup> yutnu ñani mostázá, te duca<sup>n</sup> te cuu cùñaha-ndo xii ñ<sup>n</sup> tindúú xocuñí-xi núu ndécú-xi te xocuñí-xi. Te nchaa núu sá váha ndacu-ndo càda-ndo te núu na quindáa iní ndisa-ndo Yá Ndióxi. <sup>21</sup> Te xini ñuhu-xi sá ío cáhá<sup>n</sup> ndíhi-ndo-gá te ñá túu tnáhí ná caxi-ndo cáhá<sup>n</sup> ndíhi-ndo-gá, te duca<sup>n</sup> te ndacu-ndo queñuhu-ndo espíritú cundíhi yucu ñáváha yíhi ñaha xii ñáiyu, dàtná cùu espíritú sá yíhi ñaha xii tée-á<sup>n</sup> ní cùu —cachí-gá xáha<sup>n</sup>-gá xii-güedé.

*Jesús cáhá<sup>n</sup> tucu-gá sá cáhni ñaha-güedé xii-gá*

(Mr. 9:30-32; Lc. 9:43-45)

<sup>22</sup> Te nini xica cuu Jesús ndíhi cue tée xica cuu ndíhi-gá distritú Galiléa, te ní xáha<sup>n</sup>-gá xii-güedé:

—Yúhú Tée cùu ñani tnáhá-ndó nchàa-ndo sáa ñ<sup>n</sup> nduu te cuáha cuèndá ñhá-güedé xii-í núu cué tée cùu úhú iní ñáhá, <sup>23</sup> te cahni ñaha-güedé xii-í dico nduu úní sá cùu-í te ndoto-í —cächí-gá xáha<sup>n</sup>-gá xii-güedé.

Te sá dúcá<sup>n</sup> ní xáha<sup>n</sup>-gá xii-güedé, te ío ní ndíhú iní-güedé.

*Díhú<sup>n</sup> cuèndá veñúhu*

<sup>24</sup> Te òré ní quexio Jesús ndíhi cue tée xica cuu ndíhi-gá ñúu Capernaúm, te cue tée quide cobrá díhú<sup>n</sup> cuèndá veñúhu ní sáhá<sup>n</sup>-güedé ní cáhá<sup>n</sup> ndíhi-güedé té Pèlú, te xáha<sup>n</sup>-güedé:

—¿Cháhu mèstrú-ndó úú díhú<sup>n</sup> sá nání drácmá cuèndá veñúhu á<sup>n</sup> ñáhá? —cächí-güedé xáha<sup>n</sup>-güedé xii-dé.

<sup>25</sup> Te té Pèlú ní xáha<sup>n</sup>-dè:

—Cháhu-dé —cächí-dé xáha<sup>n</sup>-dè xii-güedé.

Te té Pèlú cuánguihu-dé xití vehe núu ndécú Jesús, te díhna-gá ní cáhá<sup>n</sup>-gá, te xáha<sup>n</sup>-gá xii-dé:

—Xímú, ¿nása sàni iní-n, ná cùu ñáiyu quide cobrá ñáhá cué tée yindaha ñáiyu ndècu ñuyíu-a cuèndá nchaa sá ndúú yáhu ñúu-güedé ndíhi cuèndá nchaa díhú<sup>n</sup> sá ngáútnàha, cue ñáiyu ñúu-güedé á<sup>n</sup> cué ñáiyu véxi xica quide cobrá-güedé? —cächí-gá xáha<sup>n</sup>-gá xii-dé.

<sup>26</sup> Te té Pèlú ní xáha<sup>n</sup>-dè xii-gá:

—Cue ñáiyu véxi xica quide cobrá-güedé —cächí-dé xáha<sup>n</sup>-dè xii-gá.

Te Jesús ní xáha<sup>n</sup>-gá xii-dé:

—Te núu duca<sup>n</sup> te cue ñáiyu ñúu-güedé ñá túu ná cháhu-yu te núu duca<sup>n</sup>. <sup>27</sup> Dico cuèndá sá vá yóo dasátú-ó iní-xi, te cuáhá<sup>n</sup> lágúná te dàquée-n sá tñíi-n chácá xití ndute, te chácá díhnanuu na tàva-n te cundehe-n yúhu-di, chí yíhi ñ<sup>n</sup> díhú<sup>n</sup> cuixi<sup>n</sup>. Te díhú<sup>n</sup>-á<sup>n</sup> canehe-n quíhí<sup>n</sup> cháhu-n cuèndá-í ndíhi cuèndá-n, chí díhú<sup>n</sup>-á<sup>n</sup> sa tnahá quéyáhu cuèndá-ó ndí ndúú-ó —cächí-gá xáha<sup>n</sup>-gá xii-dé.

## 18

*Cue tée ndücu tnúhu núú Jèsús yoo ío-gá cúnúu*

(Mr. 9:33-37; Lc. 9:46-48)

<sup>1</sup> Te sáta dúcá<sup>n</sup> te cue tée xica cuu ndihi Jèsús ní sáhá<sup>n</sup>-güedé núú-gá, te xáha<sup>n</sup>-güedé xii-gá:

—Cachí tnúhu xii-ndí, yoo ío-gá cúnúu núú cué ñáyiú yindaha ñaha Yá Ndióxi —cächí-güedé xáha<sup>n</sup>-güedé xii-gá.

<sup>2</sup> Te Jèsús ní cana-gá ñ<sup>n</sup> té lihli te ní sanutñá ñaha-gá xii-dé cuádava tnuú-güedé. <sup>3</sup> Te xáha<sup>n</sup>-gá xii-güedé:

—Na cächí tnúhu ndáá-í xii-ndo sá núu vá dáñá-ndó ncháa sá ñá túú váha quide-ndo, te nduu ndáhú iní-ndó dátñá ndáhú iní té lihli-a, te vá ndúú táhú-ndó ndihu ndaha ñaha Yá Ndióxi xii-ndo. <sup>4</sup> Te ñáyiú quide datñá quidé té lihli-a ndáhú iní-yu, te ñá túú quide cahnú-yu mée-yu, ñáyiú-án ío cunúú-yu núú ndécú Yá Ndióxi táxi tnúni-gá. <sup>5</sup> Te nchaa ñáyiú na quèhe<sup>n</sup> cuendá ñ<sup>n</sup> landú dátñá té lihli-a cuendá sá cúú iní ñáhá-yu xii-í ñá, te cada iní-yu sá yúhú ní quehe<sup>n</sup> cuendá-yu —cächí-gá xáha<sup>n</sup>-gá xii-güedé.

*Quihi iní-ó vá cündècu-o ichi cuehé ichi duha*

(Mr. 9:42-48; Lc. 17:1-2)

<sup>6</sup> Te Jèsús xáha<sup>n</sup> tucu-gá xii-güedé:

—Te núu ñ<sup>n</sup> tée na dàcahá<sup>n</sup>-dé cue ñáyiú sándáá iní ñáhá xii-í cadá-yu nándi sá cuèhé sá dúhá, te váha-gá sá ná dàcútu ndeé-güedé ñ<sup>n</sup> yúú yódó dúcú<sup>n</sup>-dè, te dàquée ñaha-güedé xii-dé xití ndute làmár, te ñá díú sá cündècu-dé duca<sup>n</sup> càda-dé. <sup>7</sup> Te ndáhú ní cuu nchaa ñáyiú xñdècu ñuyíú-a, chí coo cue tée dacáhá<sup>n</sup> ñáhá xii-yu cadá-yu nándi sá cuèhé sá dúhá te dacutíí sá dúcá<sup>n</sup> càda-xi! Dico ndáhú ní cuu cue tée duca<sup>n</sup> na dàcahá<sup>n</sup> ñáhá xii-yu cadá-yu nándi sá cuèhé sá dúhá!

<sup>8</sup> Te núu ñ<sup>n</sup> xio ndaha-ndo àdi ñ<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehndé-ndó ná cuíta, chí váha-gá sá nánihí táhú-ndó cuéi na cuíta ñ<sup>n</sup> xio ndaha-ndo àdi ñ<sup>n</sup> xio sáhá-ndó, te ñá díú sá quíhí<sup>n</sup>-ndó nihíí ní ndúú-ndó núú ñùhú núú càyú. <sup>9</sup> Te núu ñ<sup>n</sup> xio tinúu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chí váha-gá sá nánihí táhú-ndó cuéi na cuíta ñ<sup>n</sup> xio tinúu-ndo, te ñá díú sá ndí ndúú xio núú-ndó quíhí<sup>n</sup>-ndó núú ñùhú núú càyú.

*Cuendá ñ<sup>n</sup> mbéé quiti ní xíta*

(Lc. 15:3-7)

<sup>10</sup> Te vá dàquée tihú-ndó cué ñáyiú cuu cuendá-í cuéi cúú-yu ñáyiú ío ndáhú iní-xi. Te na cächí tnúhu-í xii-ndo sá cué espíritu xínú cuèchi núú Yá Ndióxi, cue espíritu néhé cuendá ñáhá xii-yu ñuyíú-a, nchaa-ni

nduu nchaa-ni òré ndécú-xi núú Tàtá-í Dútu Ndióxi Yáa ndécú àndiu. <sup>11</sup> Te duca<sup>n</sup> chí yúhú Tée cùu ñaní tnáhá-ndó ncháa-ndo véxi-í ñuyíú-a dàcácu nihnu-í ñáyiú núú ùhú núú ndáhú, ñáyiú ta xíta nihnu cuáhá<sup>n</sup>.

<sup>12</sup> Te nása sàni iní-ndó cuendá ñ<sup>n</sup> tée ndècu ñ<sup>n</sup> ciendú mbéé-xi?, chí núu na cuíta ñ<sup>n</sup>-di te dándóo-dé cùmidíco sáhú<sup>n</sup> cùmi-di cundecu-di ñ<sup>n</sup> yucu te quíhí<sup>n</sup>-dé cúnúndúcú-dé quiti ní xíta-án. <sup>13</sup> Te núu na nánihí-dè-di, te nchòhó sa cùtnuní iní-ndó sá ío-gá cudíí iní-dé cuendá quiti ní xíta-án òré nánihí-dè-di dàcúxí cùmidíco sáhú<sup>n</sup> cùmi quiti ñá túú ní xíta-án. <sup>14</sup> Te duca<sup>n</sup> sátnahá-xi quide Tàtá-ó Dútu Ndióxi Yáa ndécú àndiu, chí cuini-gá sá vá cuíta ní ñ<sup>n</sup> cue ñáyiú cùu cuendá-gá.

*Cada càhmu iní-ó sá quidé ñaha tñaha ñáyiú-o*

(Lc. 17:3)

<sup>15</sup> Te núu ñ<sup>n</sup> ñáyiú ndècu ndihi-ndo ní quidé-yu ñ<sup>n</sup> sá ñá túú táu-yu cadá-yu sá cúú-xi-ndó, te cáhá<sup>n</sup>-ndó dòho-yu núú mée núú ñ<sup>n</sup>-ndó ndihí-yu cuendá sá ná ndixi cuèchi iní-yu sá ñá túú quide váha-yu. Te núu ní tnúu-yu tnúhu ní xáha<sup>n</sup>-ndo xii-yu, te ní ndacu-ndo ní nacanu ichi-ndó-yu. <sup>16</sup> Te núu ñá túú ní cuini-yu tnúu-yu tnúhu xáha<sup>n</sup>-ndo xii-yu, te nducu-ndo ñ<sup>n</sup> àdi úú tnáhá cue tée canehe núú-güedé cuendá cundèdòho-güedé nàcuáa ndúu tnúhu ndàtnúhu-ndo ndihí-yu. <sup>17</sup> Te tnáhá cue tée-án cáhá<sup>n</sup>-güedé dòho-yu, dico núu ní tnúhu cáhá<sup>n</sup> cue tée-án ñá túú ní cuini-yu tnúu-yu, te dàtúu-ndo núú dàva-gá ñáyiú ndècu ndihi-ndo ichi Xitohó Jesucristú cuendá cùtnuní iní-yu nàcuáa quide ñáyiú-án. Te núu ñáyiú ndècuèchi-án ñá túú ní cuini-yu tnúu-yu tnúhu sá ní xáha<sup>n</sup> dàva-gá cue ñáyiú ndècu ichi-gá, te cada-ná iní-ndó sá cúú-yu ñáyiú ñá túú ndècu ichi Yá Ndióxi dátñá cue tée cuina iní-xi quide cobrá ñáhá xii ñáyiú cuendá impuèstú.

<sup>18</sup> Te na cächí tnúhu ndáá-í xii-ndo sá núu nchòhó ná cächí-ndó sá ndécú cuèchi ñáyiú, te diu-ni duca<sup>n</sup> cáhá<sup>n</sup> Yá Ndióxi, àdi cächí-ndó sá ñá túú cuèchi-yu te diu-ni duca<sup>n</sup> cáhá<sup>n</sup> tucu-gá, te duca<sup>n</sup> chí nchòhó quidé-ndó nàcuáa cáhá<sup>n</sup>-gá.

<sup>19</sup> Te na cächí tnúhu-í xii-ndo sá núu úú tnáhá-ndó cùu ñ<sup>n</sup>nuu-ndo cáhá<sup>n</sup> ndihi-ndo Tàtá-í Dútu Ndióxi Yáa ndécú àndiu xicá<sup>n</sup>-ndó núú-gá núu ná cúú sá cuini-ndó, te taxi-gá núu ná cúú sá xicá<sup>n</sup>-ndó núú-gá. <sup>20</sup> Te núu úú tnáhá-ndó àdi úní tnáhá-ndó ní nataká-ndó ñ<sup>n</sup> xichi cuendá sá ñùhú iní ñáhá-ndó xii-í, te xía<sup>n</sup> ndécú ndihi ñaha-í xii-ndo —cächí-gá xáha<sup>n</sup>-gá xii-güedé.

<sup>21</sup> Te té Pelú ní sáhá<sup>n</sup> ndehe yatni-dé núú Jèsús, te xáha<sup>n</sup>-dè xii-gá:

—Mèstrú, cachí tñuhu xii-í ná daha xito cada càhnu iní-í tñaha ñáyiu-í te núu ìn sá ná càda ñahá-yu xii-í. ¿Cuèdicó úsá xito-ã? —cachí-dé xáha<sup>n</sup>-dè xii-gá.

<sup>22</sup> Te Jèsús ní xáha<sup>n</sup>-gá xii-dé:

—Yúhu cächí-í sá ñà díú-ní úsá xito cada càhnu iní-n-yu, chi únidico úxí xito ndihi úsá ndihi úsá xito cada càhnu iní-n-yu —cachí-gá xáha<sup>n</sup>-gá xii-dé.

*Cuèndá téé ñá túú quide cahnu iní tñaha ñáyiu-xi*

<sup>23</sup> Te xáha<sup>n</sup> tucu-gá xii-güedé:

—Na càni-í ìn cuèndú núu-ndó nàcuáa tecu tñini-ndó nàcuáa cada-xi òré ndihu ndaha ñaha Yá Ndióxi xii ñáyiu. Ìn téé yindaha ñaha xii ñáyiu ní sani iní-dé sá cáda ndáá-dé ndihi cue téé xinu cuechi núu-dé cuèndá nchaa sá tãú-güedé núu-dé. <sup>24</sup> Te òré sa ní ngúndecu túha-dé te ní quexio ìn téé xinu cuechi núu-dé. Te téé-án tãú-dé cuéhé víhí díhú<sup>n</sup> núu-dé, chi tãú-dé úxí míl díhú<sup>n</sup> sã nání tàlentú. <sup>25</sup> Te téé xinu cuechi-án ñà túú díhú<sup>n</sup> ndécú ndihi-dé nacháhu-dé sá tãú-dé núu patróón<sup>n</sup>-dè-án, núu xiã<sup>n</sup> ní táuchíú<sup>n</sup> téé cùu patróón<sup>n</sup>-dè-án dico ñaha-güedé xii-dé ndihi ñadihí-dé ndihi cue déhe-dé ndihi nchaa sá ndécú ndihi-dé cuèndá nchaa-yu cuú-yu ñáyiu ñá túú tñahí dàñá quee núu chíú<sup>n</sup> patróón<sup>n</sup>-xi, te duca<sup>n</sup> te ndéyáhu sá tãú-dé núu patróón<sup>n</sup>-dè. <sup>26</sup> Te téé xinu cuechi-án ní ngüñí xití-dé núu patróón<sup>n</sup>-dè, te xáha<sup>n</sup>-dè: “Patróón, cãhá<sup>n</sup> ndàhú-í núu-n sã ìo ndee ìo càhnu cada iní-n sã dúhá tãú-í núu-n, te ñá túú nã caní iní-n chi nacháhu-í nchaa sá tãú-í núu-n”, cächí-dé xáha<sup>n</sup>-dè xii patróón<sup>n</sup>-dè. <sup>27</sup> Te téé cùu patróón<sup>n</sup>-dè-án ní cundàhú iní ñahá-dè xii-dé, te ní quide càhnu iní ñahá-dè, te ní dàñá ñaha-dé cuánuhú-dé. <sup>28</sup> Te téé xinu cuechi-án ní nanihí-dè ìn téé xinu cuechi ndihi-dé ichi cuánuhú-dé, te téé ní nanihí-dè-án tãú-dé sacú-ni díhú<sup>n</sup> núu-dé chi ìn cièndú-ni díhú<sup>n</sup> denariú tãú-dé. Te ní tñi-dé téé tãú núu-dè-án dácüèhné ñahá-dè xii-dé, te xáha<sup>n</sup>-dè: “Nacháhu sá tãú-n núu-í”, cächí-dé xáha<sup>n</sup>-dè. <sup>29</sup> Te téé tãú-án ní ngüñí xití-dé núu téé dii núu-xi tãú-dè-án, te xáha<sup>n</sup>-dè: “Cãhá<sup>n</sup> ndàhú-í núu-n sã cáda càhnu iní ñahá-n xii-í sá tãú-í núu-n, te nacháhu cuè-í nchaa sá tãú-í núu-n”, cächí-dé xáha<sup>n</sup>-dè. <sup>30</sup> Dico téé dii núu-xi tãú-dè-án ñá túú ní cuiñí-dé cada ndee iní-dé cundetu-dé nacháhu cuèé téé-án sá tãú-dé, chi ní chili ñaha-dé veccá cuèndá yacá<sup>n</sup> quihi-dé ndéé nacháhu-dé nchaa sá tãú-dé. <sup>31</sup> Te daga-gá cue téé xinu cuechi ní xiní-güedé nàcuáa ní quide téé-án, te ní cudéé<sup>n</sup>-güedé núu-dé, te ní sáhá<sup>n</sup>-güedé ní xitñuhu-güedé téé cùu patróón<sup>n</sup>-güedé sá dúcá<sup>n</sup> ní quide-dé. <sup>32</sup> Te téé cùu patróón<sup>n</sup>-güedé-án ní cana-dé téé duca<sup>n</sup> ní

quide-án, te ní xáha<sup>n</sup>-dè: “Yòhó cúu-n ìn téé ìo cuihna iní-xi xinu cuechi núu-í, chi yúhu ní quide càhnu iní ñahá-í xii-n cuèndá nchaa sá tãú-n núu-í òré ní cãhá<sup>n</sup> ndàhú-n. <sup>33</sup> Te tñahá yòhó tãú-n dùca<sup>n</sup> cada-n cada cahnu iní-n téé xinu cuechi ndihi-n núu-í cuèndá nchaa sá tãú-dé núu-n dàtná ní quide ñaha-í xii-n ní quide càhnu iní-í cuèndá nchaa sá tãú-n”, cächí téé cùu patróón<sup>n</sup>-án xáha<sup>n</sup>-dè xii téé duca<sup>n</sup> ní quide-án. <sup>34</sup> Te téé cùu patróón<sup>n</sup>-án ní cudéé<sup>n</sup> víhí-dè sá dúcá<sup>n</sup> ní quide téé-án, te ní táuchíú<sup>n</sup>-dè dandòho ñaha-güedé xii-dé ndéé nacháhu-dé nchaa sá tãú-dé —duha ní caní Jèsús cuèndú núu-güedé.

<sup>35</sup> Te xáha<sup>n</sup> tucu-gá xii-güedé:

—Dàtná ní quide téé cùu patróón<sup>n</sup>-án ní dàndòhó-dè téé tãú núu-dè-án duca<sup>n</sup> cáda ñaha Tátá-í Dútú Ndióxi Yá ndécú àndiu xii-ndo, te núu vá ní yuhu ní iní-ndó cáda cahnu iní-ndó sá quidé ñaha tñaha ñáyiu-ndo xii-ndo —cachí-gá xáha<sup>n</sup>-gá xii-güedé.

## 19

*Jèsús cãhá<sup>n</sup>-gá cuèndá cue ñáyiu dàñá tñaha*

(Mr. 10:1-12; Lc. 16:18)

<sup>1</sup> Te sátá ní yáha duca<sup>n</sup> ní cãhá<sup>n</sup> Jèsús, te ní ndee-gá distrítú Galiléa cuáhá<sup>n</sup>-gá ndàa ingá xio yúte Jordán yucu distrítú Jüdeá. <sup>2</sup> Te ìo cuéhé ñáyiu nchicú<sup>n</sup> ñahá xii-gá cuáhá<sup>n</sup>, te yacá<sup>n</sup> ní quide tãna-gá nchaa ñáyiu cùhú.

<sup>3</sup> Te ní quexio ìn úú cue téé cùu fariséú núu ndécú Jèsús xitó ndéé ñahá-güedé xii-gá núu nása cunduu tñuhu cãhá<sup>n</sup>-gá, te xáha<sup>n</sup>-güedé xii-gá:

—Véxi-ndí xicá<sup>n</sup> tñuhú-ndí núu-n, ¿cuu daña ìn téé ñadihí-dé núu ndédani càa ìn sá ñá túú cundáa-yu-ã? —cachí-güedé xáha<sup>n</sup>-güedé xii-gá.

<sup>4</sup> Te Jèsús ní xáha<sup>n</sup>-gá xii-güedé:

—Te nchòhó, ¿nãá ñá túú dàcuaha-ndo núu tütú Yá Ndióxi, te díu núu tütú-gá cãhá<sup>n</sup>-xi sá cütñahá ní cadúha-gá ñáyiu, te téé ñadihí ní cadúha-gá-ã? <sup>5</sup> Te duha cächí tucu-xi núu tütú Yá Ndióxi nàcuáa ní cãhá<sup>n</sup>-gá: “Cue téé na ñihí ñadihí-xi te dii<sup>n</sup>-ná cada-güedé tãtá-güedé ndihi nãná-güedé, chi ñadihí-nã-güedé cuu cuu ndihi-güedé, te cada iní-ndó sã ìn<sup>n</sup>-nã yiqui cüñú cuú-yu cundecú-yu”, duha cächí Yá Ndióxi núu tütú-gá. <sup>6</sup> Te xiã<sup>n</sup> núu cada iní-ndó sã cuè ñáyiu úú-án ìn<sup>n</sup>-nã yiqui cüñú cüú-yu, te ñá túú-gá ndí dñí<sup>n</sup> ndí dñí<sup>n</sup> yiqui cüñú cüú-yu. Núu xiã<sup>n</sup> ñá túú ndúu váha-xi daña cuè téé ñadihí-güedé, chi mee Yá Ndióxi ní cachí-gá sá cúú úú-yu cundecú-yu —cachí Jèsús xáha<sup>n</sup>-gá xii-güedé.

<sup>7</sup> Te ní xáha<sup>n</sup>-güedé xii Jèsús:

—Te núu duca<sup>n</sup>, ¿te ná cuendá ndíi Moisés ní cachí ndíi sá núu ì<sup>n</sup> tée cuini-dé daña-dé ñadihí-dé, te cuu cadúha-dé ì<sup>n</sup> tutú núu càhá<sup>n</sup>-xi sá ní dáñá-dé ñadihí-dé, te duca<sup>n</sup> te cuu daña ñaha-dé ní cachí ndíi vã<sup>n</sup>? —cächí-güedé xáha<sup>n</sup>-güedé xii-gá.

<sup>8</sup>Te Jèsús ní xáha<sup>n</sup>-gá xii-güedé:

—Te duca<sup>n</sup> ní cachí ndíi Moisés sá cúú dáña-ndo ñadihí-ndó, chí nchòhó ío sàá iní-ndó, dico ndéé díhna chí ní tecú tnúhu nchaa cue téé sá vã dáñá-güedé ñadihí-güedé. <sup>9</sup>Dico yúhú cächí tnúhu-í xii-ndo sá núu ì<sup>n</sup> téé na dáña-dé ñadihí-dé te naquehe<sup>n</sup>-dé ingá ñadihí te ío nèhé quidè-dé, te núu ñá díú cuendá sá càhá<sup>n</sup> ndihi-a<sup>n</sup> ingá téé duca<sup>n</sup> na dáña ñaha-dé. Te sá dúcá<sup>n</sup> cuendá-ni na dáña ì<sup>n</sup> téé ñadihí-dé, te ì<sup>n</sup>-ní cuèchi cùu-xi ndihi cuèchi quide téé ndèca ñadihí te càhá<sup>n</sup> ndihi-dé ingá ñadihí —cächí-gá xáha<sup>n</sup>-gá xii-güedé.

<sup>10</sup>Te cue téé xica cuu ndihi-gá ní xáha<sup>n</sup>-güedé xii-gá:

—Te núu duca<sup>n</sup> cùu cuendá cue téé ndihi ñadihí-güedé, te váha-gá sá vã cándèca cue téé ñadihí —cächí-güedé xáha<sup>n</sup>-güedé xii-gá.

<sup>11</sup>Te Jèsús ní xáha<sup>n</sup>-gá xii-güedé:

—Ñá ncháá ñáiyu duca<sup>n</sup> ndúu táhú-yu cundecú-yu, chí mee-ni ñáiyu ní cachí Yá Ndióxi sá dúcá<sup>n</sup> tnáhi ndúu táhú cundecu mee. <sup>12</sup>Te ío cue téé duca<sup>n</sup> tnáhi ní ndúu táhú-güedé ndéé órè ní cacu-güedé sá vã cándèca-güedé ñadihí. Te ío cue téé ñá ndácú-güedé candèca-güedé ñadihí cuendá sá ní quide ñaha dàva-gá cue tnáha tée-güedé xii-güedé. Te dava-güedé ñá túú cándèca-güedé ñadihí chí cuini-güedé sá vã dáñá ndéé-güedé cuu cuechi-güedé núu Yá Ndióxi. Te nchaa cue téé duca<sup>n</sup> ní ndúu táhú núu Yá Ndióxi cundecu mee, te váha-ni te núu na cùndecu mee-güedé —cächí-gá xáha<sup>n</sup>-gá xii-güedé.

*Jèsús xicá<sup>n</sup> táhú-gá núu Yá Ndióxi cuendá landú*

(Mr. 10:13-16; Lc. 18:15-17)

<sup>13</sup>Te ì<sup>n</sup> úú ñáiyu ndècá-yu landú líhli cuáhá<sup>n</sup> núu Jèsús, chí cuini-yu sá téndàha ñaha-gá xii-güexi, te cacá<sup>n</sup> táhú-gá núu Yá Ndióxi cuendá-güexi. Te cue téé xica cuu ndihi-gá ní ngúita-güedé ténáá ñáhá-güedé xii-yu, te xáha<sup>n</sup>-güedé sá vã dúcá<sup>n</sup> cadá-yu. <sup>14</sup>Te Jèsús ní xáha<sup>n</sup>-gá xii-güedé:

—Chí dáñá ná quixi nahi cue landú líhli-á<sup>n</sup> nùu-í-a, te vã cãdí-ndó ichi-güexi, chí dàtná cúú váha iní cue landú líhli-á<sup>n</sup> duca<sup>n</sup> cùu váha iní cue ñáiyu yindaha ñaha Yá Ndióxi —cächí-gá xáha<sup>n</sup>-gá xii-güedé.

<sup>15</sup>Te ní tendaha ñaha-gá xii-güexi, te ní xicá<sup>n</sup> táhú-gá núu Yá Ndióxi cuendá-güexi, te sáta dúcá<sup>n</sup> ní quide-gá te ní xica-gá cuáhá<sup>n</sup>-gá.

*Ì<sup>n</sup> téé cuica càhá<sup>n</sup> ndihi-dé Jèsús*

(Mr. 10:17-31; Lc. 18:18-30)

<sup>16</sup>Te ì<sup>n</sup> téé cuechi ní quexio-dé núu ndécú Jèsús, te xicá<sup>n</sup> tnúhú-dé núu-gá, te xáha<sup>n</sup>-dè xii-gá:

—Yòhó Mèstrú, cùu-n téé ío váha iní-xi, te cuini-í núu vã cùndèe iní-n cächí tnúhu-n ná cúú sá váha cada-í cuendá ndúu táhú-í cundecu-í ndihi Yá Ndióxi ní caa ní quíhí<sup>n</sup> —cächí-dé xáha<sup>n</sup>-dè xii-gá.

<sup>17</sup>Te Jèsús ní xáha<sup>n</sup>-gá xii-dé:

—¿Te cùtumí iní-n nácuáa ndúu tnúhu càhá<sup>n</sup>-n sá yúhú váha iní-á<sup>n</sup>?, chí ì<sup>n</sup>ndíi díí-ni Yá Ndióxi ío váha iní-gá. Te núu cuini-n nánihí táhú-n te tnú<sup>n</sup>-n nchaa tnúhu càhá<sup>n</sup> Yá Ndióxi, tnúhu sá sánú ichi ñaha xii ñáiyu nácuáa cadá-yu cundecú-yu —cächí-gá xáha<sup>n</sup>-gá xii-dé.

<sup>18</sup>Te téé cuechi-á<sup>n</sup> ní xáha<sup>n</sup>-dè xii-gá:

—¿Te ndéndida cãa tnúhu càhá<sup>n</sup> Yá Ndióxi cada-í-í? —cächí-dé xáha<sup>n</sup>-dè xii-gá.

Te Jèsús ní xáha<sup>n</sup>-gá xii-dé:

—Te duha ní cachí Yá Ndióxi cada ñáiyu: “Vã cáhni-ndó tnáha ñáiyu-ndo, vã càhá<sup>n</sup> ndihi-ndo ñadihí te núu ñá díú ñadihí-ndó cùu-yu, te duca<sup>n</sup>-ni nchòhó cue ñáiyu díhí tucu vã càhá<sup>n</sup> ndihi-ndo tée te núu ñá díú yí-ndo cuu-güedé, te vã díhú-ndó sá ndécú ndihi tnáha ñáiyu-ndo, vã dácacu-ndo cuèchi neñúu sá cúu-xí tnáha ñáiyu-ndo. <sup>19</sup>Te canehe-ndo sá yíñùhu núu tãtã-ndó ndihi núu náná-ndó, te cundáhú iní-ndó tnáha ñáiyu-ndo dàtná cùndáhú iní-ndó mée-ndo”, duha ní cachí Yá Ndióxi cada ñáiyu —cächí-gá xáha<sup>n</sup>-gá xii-dé.

<sup>20</sup>Te téé cuechi-á<sup>n</sup> ní xáha<sup>n</sup>-dè xii-gá:

—Nchaa xíá<sup>n</sup> ní ngúita-í quidè-í ndéé cùtnáhá cúú landú-í, ¿te vitna nágá cùmáni cada-í-í? —cächí-dé xáha<sup>n</sup>-dè xii-gá.

<sup>21</sup>Te Jèsús ní xáha<sup>n</sup>-gá xii-dé:

—Te núu cuini-n cùu-n ì<sup>n</sup> téé ío váha cada ndáá, te cuáhá<sup>n</sup> dico-n nchaa sá ndécú ndihi-n, te díhú-n cuáha táhú-n cuè ñáiyu ndáhú, te duca<sup>n</sup> te ndúu táhú-n ngúndecu váha-n núu ndécú Yá Ndióxi táxi tnúni-gá. Te sáta ná yáha duca<sup>n</sup> cada-n te quixi-n chítnahá ñáhá-n xii-í —cächí-gá xáha<sup>n</sup>-gá xii-dé.

<sup>22</sup>Te sá dúcá<sup>n</sup> ní xáha<sup>n</sup> Jèsús xii-dé te ío ní cundi-yí-dé, chí ío cuica-dé, te ní xica-dé cuáhá<sup>n</sup>-dé.

<sup>23</sup>Te Jèsús ní xáha<sup>n</sup>-gá xii cue téé xica cuu ndihi-gá:

—Na cächí tnúhu ndáá-í xii-ndo sã ío úhú quíndáá iní ñaha cuè ñáiyu cuica xii Yá Ndióxi cuendá ndíhu ndaha ñaha-gá xii-yu. <sup>24</sup>Te na cächí tnúhu tucu-í xii-ndo sã yáchi-gá yáha ì<sup>n</sup> caméyu yaú ì<sup>n</sup> yiqui ticú dàcúúxí sã quíndáá iní ì<sup>n</sup> ñáiyu cuica Yá

Ndióxi cuendá ndíhu ndaha ñaha-gá xii-yu – cächí-gá xáha<sup>n</sup>-gá xii-güedé.

<sup>25</sup> Te sá dúcá<sup>n</sup> ní cáhá<sup>n</sup> Jësús, xiá<sup>n</sup> ío ní cuñúhu cue téé xica cuu ndihi-gá, te ní nguúta-güedé xitnáha-güedé:

–¿Yoo naníhí táhú te núu duca<sup>n</sup> vâi<sup>n</sup>? – cächí-güedé xitnáha-güedé.

<sup>26</sup> Te Jësús ní ndacoto-gá núu-güedé, te xáha<sup>n</sup>-gá xii-güedé:

–Nchaa ñáyiú ñuyíú-a chí vá ndacú-yu ná cada-yu nácuáa ndíhu ndaha ñaha Yá Ndióxi xii-yu, dico mee-gá chí ndacu-gá ndíhu ndaha ñaha-gá xii-yu chí nchaandi tühú sá váha ndacu-gá quidé-gá –cächí-gá xáha<sup>n</sup>-gá xii-güedé.

<sup>27</sup> Te té Pélú ní xáha<sup>n</sup>-dê xii-gá:

–Nchúhú ní dándóo-ndí nchaa sá ndécú ndíhi-ndí, te ní tuha ñaha-ndí xii-n, ¿te ná cúú sá nihí-ndí nduu táhú-ndí sá dúcá<sup>n</sup> ní quide-ndí-i? –cächí-dé xáha<sup>n</sup>-dê xii-gá.

<sup>28</sup> Te Jësús ní xáha<sup>n</sup>-gá xii-güedé:

–Na cächí tñúhu ndáá-í xii-ndo sá ná sáá nduu, ndúu saa nchaa sá ío andíu ndíhi ñuyíú-a, te dävá-á<sup>n</sup> cunucóo yúhú Téé cúu ñanáí tñáhá-ndó ncháa-ndo íi<sup>n</sup> núú xilé váha, te nchaa ñáyiú quini-yu sá ío càhnu cuu-í, te nchóhó cue téé ní tuha ñaha xii-í tñáhá-ndó cùnucóo-ndo núú íi<sup>n</sup> caa xilé váha ndí ùxúú tñáhá-ndó, te xiá<sup>n</sup> cunucóo-ndo càda ndáá-ndó cuéchi ndí ùxúú xichi cue ñáyiú isráél. <sup>29</sup> Te nchaa ñáyiú na dándóo vehe-xi, ádi ñanáí-xi, ádi cúha-xi, ádi tátá-xi, ádi ñaná-xi, ádi ñadíhí-xi, ádi déhe-xi, ádi ñuhu-xi, te núu duca<sup>n</sup> na càdá-yu sá cuendá-í te ío-gá cuéhé sá cuáñaha Yá Ndióxi cundecu ndíhí-yu, te ñá díú-ní xiá<sup>n</sup> chí tñáhá nduu táhú-yu cundécú-yu ndíhi-gá ní caa ní quíhí<sup>n</sup>. <sup>30</sup> Te dava ñáyiú cúnuu ndecu ichi Yá Ndióxi vitna, ñáyiú-á<sup>n</sup> sáá nduu te vá ío-gá cunúú-yu dàtná cúnúú-yu vitna, te dava ñáyiú nchícú<sup>n</sup> ñá túú cúnuu vitna, ñáyiú-á<sup>n</sup> sáá nduu te ío cunúú-yu –cächí-gá xáha<sup>n</sup>-gá xii-güedé.

## 20

### *Cuendá cue téé quide chiú<sup>n</sup>*

<sup>1</sup> Te xáha<sup>n</sup> tucu Jësús xii cue téé xica cuu ndíhi-gá:

–Na càni-í íi<sup>n</sup> cuendú núú-ndó cuendá tecú tñuní-ndó nácuáa cada-xi òré ndíhu ndaha ñaha Yá Ndióxi xii ñáyiú. Íi<sup>n</sup> téé ní xitu-dé yoho yáha stilé-á<sup>n</sup>, te íi<sup>n</sup> nduu ní quee-dé nehé-ni cuándúcú-dé cue téé cada chiú<sup>n</sup> núú dúcá<sup>n</sup> ní xitu-dé yoho yáha stilé-á<sup>n</sup>. <sup>2</sup> Te òré ní nihí-dé cue téé cada chiú<sup>n</sup>-á<sup>n</sup>, te ní quide ndáá-dé ndíhi-güedé sá cháhu ñaha-dê xii-güedé íi<sup>n</sup> díhú<sup>n</sup> denàriú íi<sup>n</sup> nduu. Te sáta dúcá<sup>n</sup> te ní tendaha ñaha-dê xii-güedé cuáhá<sup>n</sup>-güedé cada chiú<sup>n</sup>-güedé núú dúcá<sup>n</sup> ní xitu-dé yoho yáha stilé-á<sup>n</sup>. <sup>3</sup> Te dàtnúni

ní xica tucu-dé cuáhá<sup>n</sup>-dê dàtná òré caá íi<sup>n</sup> dàtnéé cuándúcú-gá-dé cue téé cada chiú<sup>n</sup> núú ní xitu-dé yoho yáha stilé-á<sup>n</sup>, te ní xini-dé xínutnii íi<sup>n</sup> úú cue téé núú yáhu te ñá túú ná chiú<sup>n</sup> xíquide-güedé. <sup>4</sup> Te ní xáha<sup>n</sup>-dê xii-güedé: “Ñá túú cudana cuyáchí-ndó càda-ndo chiú<sup>n</sup>-í te cháhu ñaha-í xii-ndo nácuáa tàú-xi cunduu-á<sup>n</sup>”, cächí-dé xáha<sup>n</sup>-dê xii-güedé. Te cue téé-á<sup>n</sup> ní sáha-güedé tñúhu cada chiú<sup>n</sup>-güedé te ní xica-güedé cuáhá<sup>n</sup>-güedé. <sup>5</sup> Te téé ní xitu yoho yáha stilé-á<sup>n</sup> ní xica tucu-dé dàtná òré cauxúú nduu cuándúcú-gá-dé cue téé cada chiú<sup>n</sup>-dê, te ní nihí tucu-dé cue téé cada chiú<sup>n</sup>. Te ní quee tucu-dé dàtná òré caá úní sacuaa, te díu-ni duca<sup>n</sup> ní quide tucu-dé. <sup>6</sup> Te ní quee tucu-dé dàtná òré caá úhú<sup>n</sup> sacuaa cuándúcú-gá-dé cue téé cada chiú<sup>n</sup>-dê, te ní xini-dé xínutnii íi<sup>n</sup> úú cue téé díu-ni núú yáhu-á<sup>n</sup> te ñá túú ná chiú<sup>n</sup> quide-güedé, te ní xáha<sup>n</sup>-dê xii-güedé: “Sánuu sá nchóhó ní cuu ncháca vitna ñá túú nihí-ndó chiú<sup>n</sup> cada-ndo”, cächí-dé xáha<sup>n</sup>-dê xii-güedé. <sup>7</sup> Te cue téé-á<sup>n</sup> ní xáha<sup>n</sup>-güedé xii-dé: “Ñá túú nihí-ndí chiú<sup>n</sup> cada-ndí chí vá yóo ndúcu ñaha xii-ndí”, cächí-güedé xáha<sup>n</sup>-güedé xii-dé. Te ní xáha<sup>n</sup>-dê xii-güedé: “Yúhú taxi-í chiú<sup>n</sup> cada-ndo, te quíhí<sup>n</sup>-ndó núú ní xitu-í yoho yáha stilé yáca<sup>n</sup> cada chiú<sup>n</sup>-ndo, te cháhu ñaha-í xii-ndo nácuáa tàú-xi cunduu”, cächí-dé xáha<sup>n</sup>-dê xii-güedé. <sup>8</sup> Te sáta ní dáhu nchíanchii, te téé díi chiú<sup>n</sup>-xi-á<sup>n</sup> ní xáha<sup>n</sup>-dê xii téé taxi tñuní ñáhá xii cue téé quide chiú<sup>n</sup>-á<sup>n</sup>: “Cúñaha xii nchaa cue téé quide chiú<sup>n</sup>-á<sup>n</sup> ná quixí-güedé te cháhu-n-güedé, te díhna-gá cue téé nchícú<sup>n</sup> cuií-ná cuánguihu núú chíú<sup>n</sup> ngüéta ncháhu-n, te ndéé núú ní ndíhí-ná cháhu-n cué téé cuánguihu díhna nuu-gá núú chíú<sup>n</sup>”, cächí-dé xáha<sup>n</sup>-dê xii téé taxi tñuní ñáhá xii cue téé quide chiú<sup>n</sup>-á<sup>n</sup>. <sup>9</sup> Te díhna-gá cue téé cuánguihu caá úhú<sup>n</sup> sacuaa ní quexío-güedé cuendá cháhu ñaha-dê, te ní cháhu ñaha-dê íi<sup>n</sup> caa díhú<sup>n</sup> denàriú xii íi<sup>n</sup> íi<sup>n</sup>-güedé. <sup>10</sup> Te sáta ní cháhu-dé dava-gá cue téé ní quide chiú<sup>n</sup>. Te ndéé núú ní ndíhí-ná ní cháhu-dé cue téé cuánguihu díhna nuu-gá núú chíú<sup>n</sup>. Te cue téé-á<sup>n</sup> ní sani iní-güedé sá vái-gá cháhu ñaha-dê xii-güedé, dico ñáhá chí íi<sup>n</sup> caa-ní díhú<sup>n</sup> denàriú ní cháhu ñaha-dê xii íi<sup>n</sup> íi<sup>n</sup>-güedé. <sup>11</sup> Te cue téé-á<sup>n</sup> ní quehe<sup>n</sup> cuendá-güedé díhú<sup>n</sup>-güedé dico ñá túú ní quide váha-xi iní-güedé. <sup>12</sup> Te ní xáha<sup>n</sup>-güedé xii téé díi chiú<sup>n</sup>-xi ní quide-güedé: “¿Ná cuendá cue téé nchícú<sup>n</sup> cuií-ná cuánguihu núú chíú<sup>n</sup> íi<sup>n</sup>-ni ní cháhu ñaha-n xii-ndí ndíhi-güedé, te íi<sup>n</sup> díi òré duha ní quide chiú<sup>n</sup>-güedé? Te nchúhú ncháca nchaa ní sahni iní-ndí ní quide chiú<sup>n</sup>-ndí, te ní ndoho-ndí cahni, te íi<sup>n</sup>-ni ní cháhu ñaha-n xii-ndí ndíhi-güedé”,

càchí-güedé xáha<sup>n</sup>-güedé xii téé dii chi<sup>n</sup>-xi ní quide-güedé. <sup>13</sup> Te téé dii chi<sup>n</sup>-xi ní quide-güedé-án ní xáha<sup>n</sup>-dē xii ñ<sup>n</sup> téé-án: “Yóhó, ñá túú quide-í ñ<sup>n</sup> sá ñá túú tàú-í cada-í sá cúú-xí-n, chi ní quide ndáá-ó sá díú-ní ñ<sup>n</sup> díhú<sup>n</sup> denàri cháhu ñaha-í xii-n ñ<sup>n</sup> nduu. <sup>14</sup> Te vitna quehe<sup>n</sup> díhú<sup>n</sup> cuendá nduu-n te núhú-n, chi yúhú cuini-í sá ñ<sup>n</sup>-ní cháhu ñaha-í xii-n ndíhi cue téé nchicú<sup>n</sup> cuif-ná cuánguihu núú chíú<sup>n</sup>. <sup>15</sup> Chi yúhú cuu-ní cada-í nání cuini-í ndíhi díhú<sup>n</sup>-í, çàdi dico ñá túú quide váha-xi ini-n sá dúhá cundahú ini-í cue téé-án duca<sup>n</sup> cháhu-í-güedé?”, càchí téé cùu patróó<sup>n</sup>-án xáha<sup>n</sup>-dē xii téé-án. Duha ndúu cuendú cání-í núú-ndó. <sup>16</sup> Te duha càhá<sup>n</sup>-í chi dava ñáyiú cùnuu ndecu ichi Yá Ndióxi vitna sáá nduu te vá cúnúu vihi-gá-yu dàtná cúnúu-yu vitna, te dava ñáyiú ñá túú cúnúu vitna sáá nduu ío cunúu-yu. Te ío cuéhé ñáyiú càhá<sup>n</sup> ñáhá Yá Ndióxi xii-yu dico sacú-ní-yu nduu táhú-yu cundecú-yu ndíhi-gá —càchí-gá xáha<sup>n</sup>-gá xii-güedé.

*Jesús càhá<sup>n</sup> tucu-gá sá cahní ñaha-güedé xii-gá*

(Mr. 10:32-34; Lc. 18:31-34)

<sup>17</sup> Te ñúhu Jesús ichi cuásaá-gá ñúu Jerusálén ndíhi cue téé xica cuu ndíhi-gá, te ní cana ñaha-gá xii-güedé ní naníhi tnáhá-güedé ndíhi-gá, te ta ndátnúhu ndíhi ñaha-gá xii-güedé cuáhá<sup>n</sup>, te xáha<sup>n</sup>-gá xii-güedé:

<sup>18</sup> —Vitna ñúhu-o ichi cuásaá-ó ñúu Jerusálén, te yacá<sup>n</sup> cuáha cuendá ñáhá-güedé xii yúhú Téé cùu ñaní tnáhá-ndó ncháa-ndo núú cuè téé cùu dútú cúnúu, ndíhi núú cuè téé dàcuaha ñaha xii ñáyiú nchaa tnúhu ní chidó tnúni ndíi Moisés. Te ñúu cue téé-án cùñaha-güedé xii dava-gá cue téé sá cahní ñaha-güedé xii-í. <sup>19</sup> Te cuáha cuendá ñáhá-güedé xii-í núú cuè téé ñá túú cùu cue téé israél, te cue téé-án cudíquí ndeé ñáhá-güedé xii-í, te caniha-güedé ndíhi ñúu, te dàtnúni cata caa ñaha-güedé xii-í núú cùrúxi te núú cùrúxi-án cuú-í, dico nduu úni sá cúú-í te ndoto-í —càchí-gá xáha<sup>n</sup>-gá xii-güedé.

*Náná tē Jácobó ndíhi té Juáá cuini-a<sup>n</sup> sá cúnúu-güedé ndíhi Jéstús*

(Mr. 10:35-45)

<sup>20</sup> Te cue déhe té Zebèdeú té Jácobó ndíhi té Juáá ndécá ñaha náná-güedé xii-güedé cuáhá<sup>n</sup> núú ndécú Jéstús, te órè ní quexio-a<sup>n</sup> ndíhi-güedé núú ndécú-gá te ní ngúñí xítí-án nñú-gá cuendá cuini-a<sup>n</sup> ndátnúhu ndíhi ñaha-a<sup>n</sup> xii-gá cuendá sá cúú-xí cuè déhe-a<sup>n</sup>. <sup>21</sup> Te cùmání-gá càhá<sup>n</sup>-a<sup>n</sup> te ní xicá<sup>n</sup> tnúhú Jéstús núú-a<sup>n</sup>, te xáha<sup>n</sup>-gá:

—¿Ná cuini-n? —càchí-gá xáha<sup>n</sup>-gá xii-a<sup>n</sup>.

Te ní xáha<sup>n</sup>-a<sup>n</sup> xii-gá:

—Véxi-í càhá<sup>n</sup> ndàhú-í núú-n núu vá cundée ini-n cùnucóo ñ<sup>n</sup> déhe-í-a xio cùha-n, te ingá-dé cùnucóo-dé xio dàtni-n na saá nduu cùnucóo-n núú táxi tnúni-n —càchí-án xáha<sup>n</sup>-a<sup>n</sup> xii-gá.

<sup>22</sup> Te Jesús ní xáha<sup>n</sup>-gá xii úú cue téé-án:

—Nchòhó, ñá túú cùtnúni váha ini-ndó nàcuáa ndúu sá xicá<sup>n</sup>-ndó núú-í. ÇTe náa cundee ini-ndó dàndoho ñaha ñáyiú xii-ndo dàtná dandòho ñahá-yu xii-í, te cundee túcu ini-ndó cahní ñahá-yu xii-ndo dàtná cahní ñahá-yu xii-í-án? —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Cundee ini-ndí yáha-ndí nchaa nàcuáa càhá<sup>n</sup>-n-án —càchí-güedé xáha<sup>n</sup>-güedé xii-gá.

<sup>23</sup> Te Jesús ní xáha<sup>n</sup>-gá xii-güedé:

—Ndáá sá cundée ini-ndó ndòho-ndo nchaa nacuáa ndòho-í, dico sá dúcá<sup>n</sup> cuini-ndó sá ñ<sup>n</sup>-ndó cùnucóo-ndo xio cuha-í, te ñ<sup>n</sup>-ndo cùnucóo-ndo xio datni-í, te xíá<sup>n</sup> chi ñá díú yúhú tàú-í cachi-í núu sá cúú cùnucóo-ndo àdi sá vá cúú cùnucóo-ndo, chi mee Tàtá-í Dútú Ndióxi cachi-gá te núu ná cúú ñáyiú nduu táhú cunucóo ñíhi-í dàvá-án —càchí-gá xáha<sup>n</sup>-gá xii-güedé.

<sup>24</sup> Te órè ní níhi úxi-gá cue téé xica cuu ndíhi-gá tnúhu nàcuáa ndúu sá cuini cue téé úú-án, te ní cudéén-güedé núú cuè téé úú-án.

<sup>25</sup> Te Jesús ní cana-gá nchaa cue téé xica cuu ndíhi-gá, te ní xáha<sup>n</sup>-gá xii-güedé:

—Nchòhó xini-ndó sá cuè téé yindaha nació<sup>n</sup> quidé-güedé sá ío cúnúu-güedé, te nchaa dava-gá cue téé cúnúu ndíhi-güedé quidé-güedé tnáhá-güedé sá ío cúnúu-güedé.

<sup>26</sup> Dico nchòhó chi vá dúcá<sup>n</sup> càda-ndo, chi núu dava-ndo cuini-ndó cúnúu-ndo, te xini ñúhu-xi cunu cuechi núú tnáhá-ndó te vá càdá-ndo sá cúnúu-ndo. <sup>27</sup> Te núu dava-ndo cuini-ndó quèné cáva-ndo, te cuu-ndo dàtná cue ñáyiú ñá túú tnáhi dàñá quee núú chíú<sup>n</sup> patróó<sup>n</sup>-xi cunu cuechi núú tnáhá-ndó.

<sup>28</sup> Te cada-ndo dàtná quidé yúhú Téé cùu ñaní tnáhá-ndó ncháa-ndo, chi yúhú véxi-í ñuyúú-a dico ñá díú sá cúnú cuèchi ñáyiú núú-í chi véxi-í sá cúnú cuèchi-í núú-yu. Te cuú-í ñuyúú-a cuendá vai-yu càcu nihnú-yu núú úhú núú ndàhú —càchí-gá xáha<sup>n</sup>-gá xii-güedé.

*Jesús quidé tātma-gá núú úú tnáhá cue téé cuáá*

(Mr. 10:46-52; Lc. 18:35-43)

<sup>29</sup> Te órè ní quee Jéstús ñúu Jericó ndíhi cue téé xica cuu ndíhi-gá, te cuéhé víhi ñáyiú nchicú<sup>n</sup> ñáhá xii-gá cuáhá<sup>n</sup>. <sup>30</sup> Te yuhu ichi cuáhá<sup>n</sup>-gá xínucóo úú tnáhá cue téé cuáá, te cue téé-án ní cutnúni ini-güedé sá Jesús ñúhú-gá ichi-án te ní ngúta-güedé níhi càhá<sup>n</sup>-güedé, te xáha<sup>n</sup>-güedé xii-gá:

—¡Yòhò Mèstrú, ñaní tnáhá ndíi Dávii, cundáhú iní ñáhá xii-ndí! —càchí-güedé xáha<sup>n</sup>-güedé xii-gá.

<sup>31</sup> Te cue ñáyiú tēnāá ñáhá-yu xii-güedé, te xáhá<sup>n</sup>-yu sá ná càdì-güedé yuhu-güedé, dico uu<sup>n</sup>-gá níhi ní cáhá<sup>n</sup>-güedé, te xáha<sup>n</sup>-güedé xii-gá:

—¡Yòhò Mèstrú, ñaní tnáhá ndíi Dávii, cundáhú iní ñáhá xii-ndí! —càchí-güedé xáha<sup>n</sup>-güedé xii-gá.

<sup>32</sup> Te ní ngüñí Jèsús te ní cana ñaha-gá xii-güedé, te ní xicá<sup>n</sup> tnúhú-gá núú-güedé, te xáha<sup>n</sup>-gá:

—¿Ná cuiñí-ndó càda ñaha-í xii-ndo-í? —càchí-gá xáha<sup>n</sup>-gá xii-güedé.

<sup>33</sup> Te ní xáha<sup>n</sup>-güedé xii-gá:

—Mèstrú, cuiñí-ndí sá cadá tātna-n núú-ndí cuendá cundehe-ndí —càchí-güedé xáha<sup>n</sup>-güedé xii-gá.

<sup>34</sup> Te Jèsús ní cundáhú iní ñáhá-gá xii-güedé, te ní tendaha-gá núú-güedé. Te òré-ní ní ndúha núú-güedé, te nchicú<sup>n</sup> ñáhá-güedé xii-gá cuáhá<sup>n</sup>.

## 21

*Jèsús cuánguihu-gá ñuú Jerusálén*

(Mr. 11:1-11; Lc. 19:28-40; Jn. 12:12-19)

<sup>1</sup> Te òré sa ta cūyatni Jèsús ndihi cue tēe xica cuu ndihí-gá ñuú Jerusálén, te ní quexio-gá ndihí-güedé yatni vii-ná ñuú Bètfage, te xiá<sup>n</sup> cáá yūcu nani Olivú. Te ní ndatnúhu-gá ndihí úú cue tēe xica cuu ndihí-gá, <sup>2</sup> te ní xáha<sup>n</sup>-gá xii-güedé:

—Chí cuáhá<sup>n</sup> ñuú cáá yatni yacá<sup>n</sup>, te òré quexio-ndo yacá<sup>n</sup> te nanihí-ndó ñ<sup>n</sup> búrru ñihí ndètní-di ndihí déhe-di, te nandaxi-ndo-güedé te candeca-ndo-güedé quixi. <sup>3</sup> Te núú ió ñáyiú ñáha ñaha xii-güedé, te cūñaha-ndo xii-yu sá yúhú Yáá xicá cūu ndihí-ndo xini ñuhu-í-güedé, te ndihí-ní natendaha-í-güedé núhú-güedé cūñaha-ndo —càchí-gá xáha<sup>n</sup>-gá xii-güedé.

<sup>4</sup> Te duca<sup>n</sup> ní cuu chí ní quee ndáá-xi nācuáa ní chídó tnúni ñ<sup>n</sup> tēe ní xóo cáhá<sup>n</sup> tnúhu Yá Ndióxi ndéé sanaha núú tütú-gá núú càchí-xi:

<sup>5</sup> Chí cūñaha cué ñáyiú ñuú Sión ná cadá cuendá-yu, chí véxi tēe yindaha ñaha xii-yu yòdo-dé ñ<sup>n</sup> búrru ñihli déhe ñ<sup>n</sup> búrru quiti sa xido,

te cūu-dé ñ<sup>n</sup> tēe ió ndáhú iní-xi. Duha ní chídó tnúni ñ<sup>n</sup> tēe ní xóo cáhá<sup>n</sup> tnúhu Yá Ndióxi ndéé sanaha núú tütú-gá.

<sup>6</sup> Te cue tēe xica cuu ndihí-gá ní xica-güedé cuáhá<sup>n</sup>-güedé, te ní quide-güedé nācuáa ní xáha<sup>n</sup>-gá xii-güedé cada-güedé. <sup>7</sup> Te ní ndexio-güedé ndécá-güedé ñ<sup>n</sup> búrru ñihí ndihí déhe-di, te ní sacá<sup>n</sup> ndodo-güedé dóo-güedé sātá-güedé, te dātñúni cuásaá Jèsús sātá ñ<sup>n</sup>-di ní ngódó ñaha-gá xii-di.

<sup>8</sup> Te ió cuéhé ñáyiú ta sácá<sup>n</sup>-yu dóo-yu ichi cuáhá<sup>n</sup>-gá cuendá núú dóo-yu-á<sup>n</sup> yáha-gá ndihí quiti yòdo-gá. Te davá-yu xèhndé-yu ndaha yūtnu ñuú tá sácá<sup>n</sup>-yu cuáhá<sup>n</sup>. <sup>9</sup> Te nchaa ñáyiú yòdonuu núú-gá ndihí nchaa ñáyiú nchicú<sup>n</sup> ndāa sātá-gá ní ngüita-yu níhi cáhá<sup>n</sup>-yu, te càchí-yu:

—¡Ío càhnu cuu Yáá cúú ñaní tnáhá ndíi Dávii! ¡Te Yá Ndióxi ió na chindee ñaha-gá chí cūu-gá Yáá ní tendaha Yá Ndióxi véxi quide núú-gá! ¡Te ndéé nchaa sá ió andu na càchí-xi sá ió càhnu cuu-gá! —duha càchí-yu.

<sup>10</sup> Te òré cuánguihu Jèsús ñuú Jerusálén, te nchaa ñáyiú ñuú-á<sup>n</sup> ní ngüita-yu xicuáa-yu, te davá-yu ní ngüita-yu xitnàhá-yu:

—¿Yoo cūu tēe-á<sup>n</sup>? —càchí-yu xitnàhá-yu.

<sup>11</sup> Te davá-yu xitnàhá-yu:

—Tēe-á<sup>n</sup> cúú-dé Jèsús tēe cáhá<sup>n</sup> tnúhu Yá Ndióxi, te cūu-dé tēe ñuú Nazàrét ñuú yindèhu distritú Galileá —càchí-yu xitnàhá-yu.

*Jèsús ñá túú tnàhá iní-gá nācuáa xiquide ñáyiú xití veñúhu*

(Mr. 11:15-19; Lc. 19:45-48; Jn. 2:13-22)

<sup>12</sup> Te Jèsús cuánguihu-gá xití veñúhu càhnu sá ió cūnuu, te xití veñúhu-á<sup>n</sup> xindecu ñáyiú quide ndáhú nádicó-yu, ndihí ñáyiú xisaa<sup>n</sup>, te nchaa-yu ní queñuhu ñaha Jèsús xii-yu quehé, te ní dānduá-gá mēsá nchaa ñáyiú ñama ñihú<sup>n</sup>, ndihí nchaa xilé sácóo nchihí ñáyiú dico lomá xindecu xití veñúhu-á<sup>n</sup>. <sup>13</sup> Te ní xáha<sup>n</sup>-gá xii-yu:

—Núú tütú Yá Ndióxi cáhá<sup>n</sup>-xi nācuáa ní cáhá<sup>n</sup>-gá, te ní càchí-gá: “Vehe-í cúú-xi núú cáhá<sup>n</sup> ndihí ñaha ñáyiú xii-í”, duha ní cáhá<sup>n</sup>-gá càchí-xi núú tütú-gá. Dico nchòhó quide-ndó vehe-gá vehe ñadúhú —càchí-gá xáha<sup>n</sup>-gá xii-yu.

<sup>14</sup> Te xiá<sup>n</sup> ndécú Jèsús ní quexio cue tēe cuáá ndihí cue tēe yacua, te ní quide tātna ñaha-gá xii-güedé te ní ndúha-güedé. <sup>15</sup> Te cue dütú cūnuu ndihí cue tēe ñacuaha ñaha xii ñáyiú nchaa tnúhu ní chídó tnúni ndíi Moisés ní xini-güedé ní quide Jèsús sá vā yóo tnàhí ndācu cada, te ndédóho tucu-güedé níhi xicáhá<sup>n</sup> cue landú xití veñúhu càhnu sá ió cūnuu-á<sup>n</sup>, te càchí-güexi: “Ío càhnu cuu Yáá cúú ñaní tnáhá ndíi Dávii”, càchí-güexi. Te ní cudéé<sup>n</sup>-güedé, <sup>16</sup> te ní xáha<sup>n</sup>-güedé xii Jèsús:

—¿Ndédóho-n nācuáa càhá<sup>n</sup> cue landú-á<sup>n</sup> ñá? —càchí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gá xii-güedé:

—Ndédóho-í, te nchòhó náa ñá túú ñacuaha-ndo núú tütú Yá Ndióxi núú cáhá<sup>n</sup>-xi cuendá cue landú-á<sup>n</sup>, te duha càchí-xi:

Yòhó ní quide-n sá cué landú vitna sàdi, ndihí cue dava-gá landú, chíñuhu ñaha-güexi xii-n nācuáa tàú-xi cūnduu.

Duha càchí-xi núu tütú-gá —càchí-gá xáha<sup>n</sup>-gá xii-güedé.

<sup>17</sup> Te xía<sup>n</sup> ní dándóo ñaha Jèsús xii-güedé, te ní xica-gá cuáhá<sup>n</sup>-gá ñuu Bètaniá, yacá<sup>n</sup> ní xíndecu-gá niú-á<sup>n</sup>.

*Jèsús xáha<sup>n</sup>-gá xii yutnu ngüxí sá vá cúu<sup>n</sup>-gá sávidí-xi*

(Mr. 11:12-14, 20-26)

<sup>18</sup> Te nduu tnéé-á<sup>n</sup> nehé-ni cuáhá<sup>n</sup> tucu Jèsús ñuu Jerusálén, te ichi ñuhu-gá ní xihí-gá docó. <sup>19</sup> Te ní xiní-gá ñ<sup>n</sup> yutnu ngüxí nútní ñ<sup>n</sup> xio yuhu ichi, te ní xica-gá cuáhá<sup>n</sup> ndéhe-gá núu ndéé sávidí-xi, dico ña túu ná ndéé chi mee-ni ndáha-xi ndeé. Te ní xáha<sup>n</sup>-gá xii yutnu ngüxí-á<sup>n</sup>:

—¡Vitna te vá ñ<sup>n</sup> ndüu-gá cuu<sup>n</sup> sávidí-n! —càchí-gá xáha<sup>n</sup>-gá xii-xi.

Te òré-ni-á<sup>n</sup> ní yíchí yutnu ngüxí-á<sup>n</sup>. <sup>20</sup> Te sá dúcá<sup>n</sup> ní cuu ní xiní cue téé xica cuu ndihi Jèsús, te ío ní cuñúhu-güedé, te ní xicá<sup>n</sup> tnúhu-güedé núu-gá, te xáha<sup>n</sup>-güedé:

—¿Ná cuendá ndéé dacá<sup>n</sup> ío ndíhi ní yíchí yutnu ngüxí-á<sup>n</sup>-í? —càchí-güedé xáha<sup>n</sup>-güedé xii-gá.

<sup>21</sup> Te Jèsús ní xáha<sup>n</sup>-gá xii-güedé:

—Na càchí tnúhu ndáá-í xii-ndo sá núu nchòhó quíndáá ndisa iní-ndó Yá Ndióxi, te vá caní ñ<sup>n</sup> caní úú iní-ndó, te ñá díú-ní sá ní quide-í-a ní xiní-ndó ndacu-ndo cada-ndo, chi ndéé tündúu-a xocuíñí-xi núu ndécú-xí te núu cuñaha-ndo sá xócuíñí-xi te quíhí<sup>n</sup>-xi queé-xi xití lámár. Te diu duca<sup>n</sup> cada-xi te núu na quíndáá iní-ndó. <sup>22</sup> Te nchaá sá ná cacá<sup>n</sup>-ndó núu Yá Ndióxi òré càhá<sup>n</sup> ndihi-ndo-gá te taxi-gá te núu sándáá ndisa iní-ndó sá taxi-gá sá xicá<sup>n</sup>-ndó núu-gá —càchí-gá xáha<sup>n</sup>-gá xii-güedé.

*Jèsús ndécú ndíhi-gá tnúhu ndee iní*

(Mr. 11:27-33; Lc. 20:1-8)

<sup>23</sup> Te Jèsús cuánguihu-gá xití veñúhu càhnu sá ío cùnno danehé-gá ñáyi, te xía<sup>n</sup> ndécú-gá ní quexio cue dútú cùnno ndihi cue téé cùu sacuéhé núu ñáyi israhél, te xáha<sup>n</sup>-güedé xii-gá:

—Cuíní-ndí cachí tnúhu-n xii-ndí nása ndüu tnúhu ndee iní ndécú ndíhi-n núu quide-n nándí sá quidé-n, ¿te yoo duca<sup>n</sup> ní taxi tnúhu ndee iní-á<sup>n</sup> xii-n-í? —càchí-güedé xáha<sup>n</sup>-güedé xii-gá.

<sup>24</sup> Te Jèsús ní xáha<sup>n</sup>-gá xii-güedé:

—Yúhú tnáhá-í cuíní-í cacá<sup>n</sup> tnúhu-í ñ<sup>n</sup> sá cacá<sup>n</sup> tnúhu-í núu-ndó, te núu na càchí tnúhu-ndo te cachí tnúhu-í xii-ndo yòo ní taxi tnúhu ndee iní duha quide-í. <sup>25</sup> Te chí càchí tnúhu xii-í yoo ní táuchí<sup>n</sup> ní dacuándute ndí Juáá ñáyi, ¿Yá Ndióxi á<sup>n</sup> cué téé ñuyíú-a ní táuchí<sup>n</sup> dùca<sup>n</sup> ní quide ndíí?, te chí càchí tnúhu —càchí-gá xáha<sup>n</sup>-gá xii-güedé.

Te ní ngüita-güedé xitnáha-güedé:

—¿Nása cuñaha-o? Chi núu na cuñaha-o sá Yá Ndióxi ní táuchí<sup>n</sup> dùca<sup>n</sup> ní quide ndí Juáá ñá, te quesaha-dé: “¿Ná cuendá ñá túú ní sándáá iní-ndó tnúhu ní càhá<sup>n</sup> ndíi vái<sup>n</sup>?””, quesaha-dé. <sup>26</sup> Te núu na cuñaha-o sá cué ñáyi ñuyíú-a ní táuchí<sup>n</sup> dùca<sup>n</sup> ní quide ndíi ña, te cudéé<sup>n</sup> ñáyi núu-ó, chi nchaá-yu càchí-yu sá Yá Ndióxi ní xáha<sup>n</sup>-gá xii ndíi sá càhá<sup>n</sup> ndíi tnúhu-gá núu ñáyi —càchí-güedé xitnáha-güedé.

<sup>27</sup> Te ní xáha<sup>n</sup>-güedé xii Jèsús:

—Ñá túú xiní-ndí yoo ní táuchí<sup>n</sup> dùca<sup>n</sup> ní dacuándute ndí Juáá ñáyi —càchí-güedé xáha<sup>n</sup>-güedé xii-gá.

Te ní xáha<sup>n</sup>-gá xii-güedé:

—Te núu duca<sup>n</sup> te ní yúhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gá xáha<sup>n</sup>-gá xii-güedé.

*Cuendá ñ<sup>n</sup> téé ndíhi úú déhe-dé*

<sup>28</sup> Te Jèsús ní xáha<sup>n</sup> tucu-gá xii-güedé:

—Na càni-í ñ<sup>n</sup> cuendú núu-ndó nácuáa tecú tnúni-ndó tnúhu càhá<sup>n</sup>-í. ñ<sup>n</sup> téé ndécú úú déhe-dé, te ní xáha<sup>n</sup>-dé xii déhe-dé téé sacuéhé-gá: “Yòhó déhe-í, véxi-í càhá<sup>n</sup> ndáhú-í núu-n núu vá cündée iní-n cuánundaha ñaha-n xii-í cada chiú<sup>n</sup>-o núu ní xitu-í yoho yáha stilé”, càchí-dé xáha<sup>n</sup>-dé. <sup>29</sup> Te ní xáha<sup>n</sup> déhe-dé xii-dé: “Vá quíhí<sup>n</sup>-í cada chiú<sup>n</sup>-í núu chíú<sup>n</sup>-n”, càchí-dé xáha<sup>n</sup>-dé xii tátá-dé. Dico cuéé ní nacani iní-dé te ní sáhá<sup>n</sup>-dé ní quide chiú<sup>n</sup>-dé núu chíú<sup>n</sup> tátá-dé. <sup>30</sup> Te téé-á<sup>n</sup> ní sáhá<sup>n</sup> tucu-dé ní xáha<sup>n</sup>-dé xii déhe-dé té líhli-gá núu vá cündée iní-dé cuánundaha ñaha-dé, te ní xáha<sup>n</sup> déhe-dé-á<sup>n</sup> xii-dé: “Cuu cuánundaha ñaha-í xii-n”, càchí-dé xáha<sup>n</sup>-dé. Dico ñá túú ní sáhá<sup>n</sup>-dé cada chiú<sup>n</sup>-dé. <sup>31</sup> Te vitna chí càhá<sup>n</sup> núu ndédacáa cue téé úú-á<sup>n</sup> ní quide-güedé sá cuíní tátá-güedé —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Téé cùu sacuéhé-gá, téé ní càhá<sup>n</sup> ndíhi-dé díhna —càchí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gá xii-güedé:

—Na càchí tnúhu ndáá-í xii-ndo sá nchaá cué téé cuíhna iní-xi quide cobrá ñháá xii ñáyi cuendá impuéstú, ndíhi cue ñáyi díhí xíndecu ichi díí iní yáchí-gá ndíhu ndaha ñáha Yá Ndióxi xii cue téé-á<sup>n</sup> ndíhi cue ñáyi díhí-á<sup>n</sup> dacúxí nchòhó. <sup>32</sup> Chi ndíi Juáá téé ní xóo dacuándute ñaha xii ñáyi ní càhá<sup>n</sup> ndíi nácuáa cada-yu cundecú-yu, dico nchòhó chí ñá túú cuíní-ndó quíndáá iní-ndó nácuáa ní càhá<sup>n</sup> ndíi, dico cue téé cuíhna iní-xi quide cobrá ñháá xii ñáyi cuendá impuéstú, ndíhi cue ñáyi díhí xíndecu ichi díí iní, chí sándáá iní-güedé ndíhi-yu tnúhu ní càhá<sup>n</sup> ndíi. Te nchòhó cuéi ndéhe-ndo sá sándáá iní cue ñáyi-á<sup>n</sup> nchaá tnúhu ní



cáhá<sup>n</sup> ndí, dico ñá túú cuíní-ndó ndíxi cuechi iní-ndó cuendá nchaa sá cuèhé sá dúhá quide-ndo cuendá tñii-ndo tñuhu ní cáhá<sup>n</sup> ndí —càchí-gá xáha<sup>n</sup>-gá xii-güedé.

*Cuendá cue tée cuihna iní-xi*  
(Mr. 12:1-12; Lc. 20:9-19)

<sup>33</sup> Te xáha<sup>n</sup> tucu Jesús xii-güedé:

—Cundedóho-ndo na càni tucu-í ingá cuendú núú-ndó cuendá tecú tñuni-ndó tñuhu cáhá<sup>n</sup>-í. H<sup>n</sup> tée ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sá vǎ cúú dañú, te ní cadúha-dé núú quíhni-dé ndéhé yoho yàha stilé-á<sup>n</sup> òré ná cùu, te ní cadúha-dé h<sup>n</sup> xító dúcú<sup>n</sup> núú cáundòdo cue tée coto nchaa yoho yàha stilé-á<sup>n</sup>.

Te ní sáá h<sup>n</sup> nduu queè-dé quíngaca cuu xica-dé te ní dándóo ndaha-dé sá ní xitu-dé-á<sup>n</sup> xii h<sup>n</sup> úú cue tée xini tñáhá ndíhí-dé cuendá cada chiú<sup>n</sup>-güedé, te ní ndatnúhu-güedé sá òré ná cúú te cuu cuendá dava-güedé, te duca<sup>n</sup> te ní quee-dé cuáhá<sup>n</sup>-dé. <sup>34</sup> Te sátá ní sáá nduu ní cuu ndéhé nchaa yoho yàha stilé sá ní xitu-dé-á<sup>n</sup>, te ní xáha<sup>n</sup>-dē xii h<sup>n</sup> úú cue tée xinu cuechi núú-dé: “Chí cuáhá<sup>n</sup> cácá<sup>n</sup>-ndó sá cúú cuendá-í núú cue tée ní dándóo ndáha-í nchaa yoho yàha stilé sá ní xitu-í<sup>n</sup>, càchí-dé xáha<sup>n</sup>-dē xii-güedé. <sup>35</sup> Te cue tée ní dándóo ndaha-dé nchaa yoho yàha stilé sá ní xitu-dé-á<sup>n</sup> ní tñii-güedé cue tée xinu cuechi núú-dé-á<sup>n</sup>, te h<sup>n</sup>-dé ní caní-güedé, te h<sup>n</sup>-dé ní sahní ñaha-güedé, te ingá-dé ní sáñaha-güedé yúú. <sup>36</sup> Te tée ní xitu yoho yàha stilé-á<sup>n</sup> ní tendaha-dé titní-gá tucu cue tée xinu cuechi núú-dé cuáhá<sup>n</sup>-güedé cuángacá<sup>n</sup>-güedé sá cúú cuendá-dé núú cuè tée ní dándóo ndaha-dé sá ní xitu-dé-á<sup>n</sup>, dico ñi-ni duca<sup>n</sup> ní quide ñaha cue tée-á<sup>n</sup> xii cue tée xinu cuechi núú-dé-á<sup>n</sup>.

<sup>37</sup> Te tée cùu xítóhó nchaa yoho yàha stilé-á<sup>n</sup> ní sani iní-dé: “Váha-gá núu tendaha-í déhe-í-a núhú-dé, chí òré quini ñáhá-güedé xii-dé te canehé-güedé sá yíñúhu núú-dé”, duha ní sani iní-dé. Te ní tendaha-dé déhe-dé cuánuhú-dé. <sup>38</sup> Dico òré ní xini cue tée quide chiú<sup>n</sup>-á<sup>n</sup> déhe tée cùu xítóhó nchaa yoho yàha stilé-á<sup>n</sup>, te ní xitnáha-güedé: “Tée-á<sup>n</sup> tée véxi nduu táhú ñuhu-a ndíhí nchaa sá cáá núú-xi, dico cahni-o-dé te mee-o ndúu táhú-ó sá ndúú táhú-dé”, càchí-güedé xitnáha-güedé. <sup>39</sup> Te ní tñii-güedé tée-á<sup>n</sup> te ndéca ñaha-güedé cuáhá<sup>n</sup> h<sup>n</sup> xio yuhu ñuhu-á<sup>n</sup>, te ní sahní ñaha-güedé xii-dé —duha cuáhá<sup>n</sup> cuendú ní caní Jesús núú-güedé.

<sup>40</sup> Te ní xáha<sup>n</sup> tucu Jesús xii-güedé:

—¿Te nchòhó sa cùtnuní iní-ndó nása cada ñaha xítóhó ñuhu-á<sup>n</sup> xii cue tée-á<sup>n</sup> ñá? —càchí-gá xáha<sup>n</sup>-gá xii-güedé.

<sup>41</sup> Te cue tée-á<sup>n</sup> ní xáha<sup>n</sup>-güedé xii-gá:

—Tée cùu xítóhó ñuhu-á<sup>n</sup> núhú-dé, te vǎ cùndáhú iní-dé cue tée cuihna iní-xi-á<sup>n</sup> chi cahni ñaha-dé xii-güedé, te dándóo ndaha-dé ñuhu-dé xii cue tée cùtnuní iní-dé cada ndáá cuendá ndi tñáhá cúú<sup>n</sup> ndéhé nchaa yoho yàha stilé sá ní xitu-dé-á<sup>n</sup> te cuáñaha-güedé xii-dé sá cúú cuendá-dé —càchí-güedé xáha<sup>n</sup>-güedé xii-gá.

<sup>42</sup> Te Jesús ní xáha<sup>n</sup>-gá xii-güedé:

—Te nchòhó, náa ñá túú dácuaha-ndo núú tütú Yá Ndióxi núú càchí-xi: Yúú sá ní dáqueé tihú cue tée dácaa vehe, ní cuu-xi yúú cùnùu vitna.

Chi mee Dütú Ndióxi duca<sup>n</sup> ní cachí-gá cunduu, te cùu-xi h<sup>n</sup> sá ío cùñúhu-o vitna. Duha càchí-xi núú tütú-gá. <sup>43</sup> Te duha cáhá<sup>n</sup>-í chi Yá Ndióxi cada-gá te vǎ ñihí-ndó tñuhu ndee iní cundecu ndíhí-ndo cuendá ndíhu ndaha ñaha-gá xii-ndo, chi tñuhu ndee iní-á<sup>n</sup> cundecu ndíhí cue ñáyiú cada ndáá cuendá ndíhu ndaha ñaha Yá Ndióxi xii-yu. <sup>44</sup> Te yúú sá cùnùu-á<sup>n</sup> cúú-xi yúhú, te nchaa ñáyiú ñá túú tñii tñúhu-í cùu-yu dàtná h<sup>n</sup> ñáyiú ndúá núú yúú-á<sup>n</sup> te tñáhnú duú<sup>n</sup>-yu, ádi núu na táú ñáhá-xi xii-yu, te dacàchi duu<sup>n</sup> ñaha-xi —cachí-gá xáha<sup>n</sup>-gá xii-güedé.

<sup>45</sup> Te sá dúcá<sup>n</sup> nduu cuendú ní caní Jesús te cue tée cùu dütú cùnùu-á<sup>n</sup>, ndíhí cue tée cùu fariséú ní cutnùní iní-güedé sá cuendá-güedé ní cáhá<sup>n</sup>-gá. <sup>46</sup> Te ní cuíní-güedé tñii ñaha-güedé xii-gá òré-á<sup>n</sup> dico ñá túú ní cùyí-güedé, chí ní yuhú-güedé cue ñáyiú, chí ní cutnùní iní-yu sá cúú-gá h<sup>n</sup> tée cáhá<sup>n</sup> tñuhu Yá Ndióxi.

## 22

*Cuendá h<sup>n</sup> vico tñándaha*

<sup>1</sup> Te Jesús ní ngúta tucu-gá cání-gá ingá cuendú núú-güedé, te xáha<sup>n</sup>-gá:

<sup>2</sup> —Na càni tucu-í ingá cuendú núú-ndó cuendá tecú tñuni-ndó nácuáa cada-xi òré ndíhu ndaha ñaha Yá Ndióxi xii ñáyiú. H<sup>n</sup> tée yíndaha ñaha xii ñáyiú ní quide-dé h<sup>n</sup> vico ní dátñándaha-dé déhe ducu<sup>n</sup>-dé.

<sup>3</sup> Te ní tendaha-dé cue tée xinu cuechi núú-dé cuáhá<sup>n</sup>-güedé cuángana-güedé cue ñáyiú sa ní cáhá<sup>n</sup>-dé cuhu<sup>n</sup> vico, dico ñáyiú-á<sup>n</sup> ñá túú ní cuíní-yu quíhí<sup>n</sup>-yu. <sup>4</sup> Te ní xáha<sup>n</sup> tucu-dé xii dava-gá cue tée xinu cuechi núú-dé: “Quíhí<sup>n</sup>-ndó cùñaha-ndo xii cue ñáyiú sa ní cáhá<sup>n</sup>-í cuhu<sup>n</sup> vico sá sá ní quide túha-í sá cáxi-yu, te sa ní sahní-í ndicutu ndíhí nchaa dava-gá quiti ní dánúcuíhnu-í, te nchaa sa ní quide túha-í, te na quixí-yu cuhú<sup>n</sup>-yu vico càchí-í cùñaha-ndo”, càchí-dé xáha<sup>n</sup>-dē xii cue tée xinu cuechi núú-dé-á<sup>n</sup>. <sup>5</sup> Dico ní h<sup>n</sup> ñáyiú ní cáhá<sup>n</sup>-dé-á<sup>n</sup> ñá túú ní cuíní-yu quíhí<sup>n</sup>-yu cuhú<sup>n</sup>-yu vico. Chí h<sup>n</sup>-yu ní sáhá<sup>n</sup>-yu ní quide chiú<sup>n</sup>-yu núú ñúhú-yu, te ingá-yu ní sáhá<sup>n</sup>-yu ní nadicó-yu núu nándí cùu ndáhú

quidé-yu. <sup>6</sup> Te dava-gá-yu ní tñí-yu dava cue téé xinu cuechi núú téé quide vico-án, te ní canihá-yu ndéé ní sahní ñahá-yu xii-güedé. <sup>7</sup> Te téé yíndaha ñaha xii ñáiyu quide vico-án ní cudéé<sup>n</sup> vihi-dé sá dúcá<sup>n</sup> ní quidé-yu, te ní tendaha-dé cue sandadú-dé ní sáhá<sup>n</sup>-güedé ní sahní-güedé cue ñáiyu duca<sup>n</sup> ní quide-án, te ní sahmí-güedé nchaa vehe cãa ñuú-yu. <sup>8</sup> Te sátá dúcá<sup>n</sup> te ní xáha<sup>n</sup>-dé xii dava-gá cue téé xinu cuechi núú-dé: “Nchaa sa ndécú túha, te cue ñáiyu ní cáhá<sup>n</sup>-í cuhu<sup>n</sup> vico-a ní cùu ñá túú-gá táu-yu sá cùhú<sup>n</sup>-yu. <sup>9</sup> Te chí cuahá<sup>n</sup> ndéni ní cuu te cáhá<sup>n</sup>-ndó nchaa ñáiyu na ñanihí-ndó ichi na quixí-yu cuhú<sup>n</sup>-yu vico-a”, cächí-dé xáha<sup>n</sup>-dé xii-güedé. <sup>10</sup> Te cue téé xinu cuechi-án ní quee-güedé cuahá<sup>n</sup>-güedé, te ní cáhá<sup>n</sup>-güedé nchaa ñáiyu ní naníhí-güedé ichi, te cuéi ñáiyu váha iní-xi, te cuéi ñáiyu cuihna iní-xi, te ní chítü-yu núú cúú vico-án.

<sup>11</sup> Te sátá dúcá<sup>n</sup> te téé yíndaha ñáiyu quide vico-án ní quíhu-dé xití vehe ní xíndéhé-dé cue ñáiyu ñúhu vico-án, te ní xini-dé ñ<sup>n</sup> téé ñútnahá tnuú-yu te ñá túú cãa dóó-dé dátá cãa dóó ñíhmú cué ñáiyu ñúhu vico-án. <sup>12</sup> Te ní xáha<sup>n</sup>-dé xii téé-án: “¿Táta, nása ní cuu cuánguñhu-ó iha, te ñá túú cãa dóó-n dátá cãa dóó ñíhmú cué ñáiyu ñúhu vico ñándaha-i?”, cächí-dé xáha<sup>n</sup>-dé xii téé-án. Dico téé-án ñá túú ní ñíhí-dé tñúhu cáhá<sup>n</sup>-dé. <sup>13</sup> Te téé yíndaha ñáiyu quide vico-án ní xáha<sup>n</sup>-dé xii cue ñáiyu xinu cuechi núú mèsá: “Chí tñíí téé-án te dacütü-ndo-dé, te queñúhu-ndo-dé ná quíhí<sup>n</sup>-dé cundecu-dé ñ<sup>n</sup> xichi núú néé núú ío ndoho-dé, te yacá<sup>n</sup> ío ndáhyú-dé te díco rúhñú-ná cuu núhu-dé sá sátú iní-dé sá ndóhó-dé”, cächí-dé xáha<sup>n</sup>-dé xii cue ñáiyu xinu cuechi núú mèsá-án. <sup>14</sup> Te duha ndúu cuendá cáhá<sup>n</sup>-í chí ío cuéhé ñáiyu cáhá<sup>n</sup> ñáhá Yá Ndióxi xii-yu, dico sacú-ni-yu nduu táhú-yu cundecú-yu ndíhi-gá —cächí-gá xáha<sup>n</sup>-gá xii-güedé.

#### *Cuendá impuéstú*

(Mr. 12:13-17; Lc. 20:20-26)

<sup>15</sup> Te cue téé cùu fariséú ní sáhá<sup>n</sup>-güedé ñ<sup>n</sup> xichi ní ndatnúhu-güedé ñacuáa cada-güedé daticánuu-güedé Jèsús núú tñúhu cáhá<sup>n</sup>-gá cuendá duca<sup>n</sup> ñíhí-güedé ñacuáa cada-güedé cacá<sup>n</sup> cuéchi-güedé cuendá-gá. <sup>16</sup> Te ní tendaha-güedé ñ<sup>n</sup> úú cue téé cùndíhi-güedé, ndíhi cue téé cùndíhi té Hèrodés cuahá<sup>n</sup>-güedé núú ndécú Jèsús. Te òré ní quexío-güedé núú ndécú-gá, te ní xáha<sup>n</sup>-güedé xii-gá:

—Mèstrú, ñíhí-ndí tñúhu sá ío ndáá cáhá<sup>n</sup>-n, te cáhá<sup>n</sup> ndáá-n ñacuáa cáhá<sup>n</sup> Yá Ndióxi cundecu-o ñuyíú-a, te cuéi ndéda-ni cãa ñáiyu ñ<sup>n</sup>-ni cáhá<sup>n</sup>-n ndíhi-yu chí ñá túú quide cuendá-n cuéi ná ñáiyu cùú-yu. <sup>17</sup> Te cachí tñúhu xii-ndí, núú váha-ni quide-ndí

sá cháhu-ndí té Cèsár téé ío cùnuu cuendá impuéstú á<sup>n</sup> ñáhá —cächí-güedé xáha<sup>n</sup>-güedé xii-gá.

<sup>18</sup> Dico Jèsús ní cutnúni iní-gá sá xitó ndéé ñáhá-güedé xii-gá, núú ní xáha<sup>n</sup>-gá xii-güedé:

—Nchòhó cue téé dándahú mée-xí sá quidé ndáá te ñá ndáá sá quidé ndáá-ndó, ¿ná cuendá xitó ndéé ñáhá-ndó xii-í? <sup>19</sup> Chí dánéhé ñáhá xii-í ñ<sup>n</sup> díhú<sup>n</sup> sá cháhu-ndo cuendá impuéstú núú nása cãa —cächí-gá xáha<sup>n</sup>-gá xii-güedé.

Te ní dánéhé ñáhá-güedé xii-gá ñ<sup>n</sup> díhú<sup>n</sup> sá nání dènaríú. <sup>20</sup> Te òré ní xini-gá díhú<sup>n</sup>-án te ní xicá<sup>n</sup> tñúhu-gá núú-güedé, te xáha<sup>n</sup>-gá:

—Chí cächí tñúhu yoo núú-xi ndéé ndíhi yoo diu-xi ndéé —cächí-gá xáha<sup>n</sup>-gá xii-güedé.

<sup>21</sup> Te ní xáha<sup>n</sup>-güedé xii-gá:

—Núú té Cèsár ndéé ndíhi diu-dé —cächí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gá xii-güedé:

—Te núu duca<sup>n</sup> te chí ñacuáha té Cèsár sá cúú cuendá-dé, te sá cúú cuendá mée Yá Ndióxi te xiá<sup>n</sup> ñacuáha-ndo-gá —cächí-gá xáha<sup>n</sup>-gá xii-güedé.

<sup>22</sup> Te cue téé-án ío ní cuñúhu-güedé sá dúcá<sup>n</sup> ní cáhá<sup>n</sup>-gá, te ní natñí-güedé ichi cuánuhú-güedé.

#### *Cuendá cue ñáiyu ndoto*

(Mr. 12:18-27; Lc. 20:27-40)

<sup>23</sup> Te diu-ni nduu-án ní quexío ñ<sup>n</sup> úú cue téé cùu saducéú núú ndécú Jèsús. Te cue téé-án ñá túú sandáá iní-güedé sá ndótó cué ñáiyu ní xíhí, te ní xáha<sup>n</sup>-güedé xii-gá:

<sup>24</sup> —Mèstrú, ndí Moisés ní cachí ndí sá núu ñ<sup>n</sup> téé ndécú ñadíhí-xi cuú-dé te quendóo ñadíhí-dé, te núu ñá túú déhe-dé ní xóo ndíhi-án te téé cùu ñaní-dé ñaquehe<sup>n</sup>-dé ñaha ní quendóo quée-án cuendá coo déhe-dé ndíhi-án cuendá ñaní-dé téé ní xíhí-án. <sup>25</sup> Te ñuú-ndí-a ní xíndecu úsá tñahá cue téé mee-ni ndí ñaní-güedé. Te téé díhna ní ñíhí ñadíhí-dé te ñá túú ní cùdí-dé cundecu-dé chí ní xíhí-dé, te ní ñ<sup>n</sup> déhe-dé ñá túú ní xóo ndíhi ñadíhí-dé-án. Te téé cùu uú ní ñaquehe<sup>n</sup>-dé ñaha ní quendóo quée-án.

<sup>26</sup> Dico ní xíhí tucu-dé, te ní ñ<sup>n</sup> tucu déhe-dé ñá túú ní xóo ndíhi ñaha-án, te diu-ni duca<sup>n</sup> ní yáha téé cùu uní, te ní xínu ndí úsá-güedé ní cándeca ñaha-güedé xii ñaha-án dico diu-ni duca<sup>n</sup> ní xíhí-güedé. <sup>27</sup> Te ndéé núú ní ndíhi-ná te ní xíhí tñahá ñadíhí-án. <sup>28</sup> Te na sáá nduu ndòto-güedé ndíhi ñaha-án, ¿te ndédacãa-güedé ñadíhí-güedé cuu-a-í? Chí ndí úsá-güedé ní cándeca ñaha-güedé xii-a<sup>n</sup> —cächí-güedé xáha<sup>n</sup>-güedé xii-gá.

<sup>29</sup> Te Jèsús ní xáha<sup>n</sup>-gá xii-güedé:

—Ní xita nchòhó tñúhu cáhá<sup>n</sup>-ndó, chí ñá túú xini-ndó ñacuáa cáhá<sup>n</sup> Yá Ndióxi núú tütú-gá, te ní ñá túú cùtnuní iní-ndó sá

díu-gã ndácú-gã quidé-gã nchaandi túhu sá váha. <sup>30</sup> Te na cächí tnúhu-í xii-ndo sã òré ná sãã nduu ndòto nchaa ñáyiu ní xihí, te dàvã-án vã yõo-gã dasa<sup>n</sup> dèhe yoco-xi chí vã yõo-gã candeca tnàha, chí cuu-ná-yu dàtná cue espíritú xínú cuèchi núú Yã Ndiòxi. <sup>31</sup> ¿Te náa ñã túú quide cuendá-ndó nàcuáa càhá<sup>n</sup> Yã Ndiòxi núú tùtú-gã núú càhá<sup>n</sup>-gã cuendá cue ñáyiu ní xihí-án? Te duha cächí-gã: <sup>32</sup> “Yúhú cùu-í Ndiòxi té Àbrahám, ndihi té Isàác, ndihi té Jãcòb”, duha cächí-gã núú tùtú-gã. Te cue tée-án chí cuèí ní xihí-güedé núú ñuyúú-a, dico sá cùu-xi Yã Ndiòxi chí ndècu vívú-ni-güedé. Chí ñu-gã cùu-gã Ndiòxi mee-ni cuè ñáyiu xíndecu vívú, te ñã túú cùu-gã Ndiòxi cue ñáyiu ñã túú ndècu vívú—cächí-gã xãha<sup>n</sup>-gã xii-güedé.

<sup>33</sup> Te sá ducá<sup>n</sup> ní càhá<sup>n</sup>-gã ní xii-gã cue tée-án, te ío ní cuñúhu nchaa ñáyiu cuendá sã ïo váha ndùu tnúhu ní càhá<sup>n</sup>-gã.

*Tnúhu sá ïo-gã cúnúu*  
(Mr. 12:28-34)

<sup>34</sup> Te cue tée cùu fariséú ní xini-güedé ní sadí Jèsús yuhu cue tée cùu saducéú, chí ñã túú ní ñihí-gã-güedé tnúhu cúnúu-güedé xii-gã, te cue tée cùu fariséú-án ní nat-acá-güedé te cuáhã<sup>n</sup>-güedé núú ndécú Jèsús. <sup>35</sup> Te ñ<sup>n</sup> tée cùu fariséú-án ïo váha cùnuni iní-dé nàcuáa ndùu nchaa tnúhu ní chídó tnúni ndí Moisés te xito ndeé-dé Jèsús, te xãha<sup>n</sup>-dè xii-gã:

<sup>36</sup> —Mèstrú, cachí tnúhu ndédacãa tnúhu sá ní chídó tnúni ndí Moisés ío-gã cúnúu cada-o—cächí-dé xãha<sup>n</sup>-dè xii-gã.

<sup>37</sup> Te Jèsús ní xãha<sup>n</sup>-gã xii-dé:  
—Duha càhá<sup>n</sup> tnúhu sá ïo-gã cúnúu: “Cuu iní-ndó Dùtú Ndiòxi Yá cùú Ndiòxi-ndó ñi yuhu ní iní-ndó, te caní iní-ndó càda-ndo datná cuini méé-gã, te mee-ni tnúhu váha caní iní-ndó nàcuáa cuu víi cuu váha-ndo núú-gã”, <sup>38</sup> duha càhá<sup>n</sup> tnúhu sá ïo-gã cúnúu. <sup>39</sup> Te duha càhá<sup>n</sup> tucu iní-gã tnúhu cùu úú sã ïo cùnúu, te sa yatni ñ<sup>n</sup>-ni cùu-xi ndihi tnúhu díhna nuu, te cächí-xi: “Cuu iní-ndó tnàha ñáyiu-ndo datná cùú iní-ndó mee-ndo”, duha càhá<sup>n</sup> tnúhu cùu úú-án. <sup>40</sup> Te cuendá úú tnúhu-a ní cáã nchaa tnúhu ní càhá<sup>n</sup> ndí Moisés nàcuáa cada ñáyiu, te ñu-ni cuendá úú tnúhu-a ní cáã tnúhu ní càhá<sup>n</sup> nchaa cue tée ní xóo càhá<sup>n</sup> tnúhu Yã Ndiòxi ndéé sanaha—cächí-gã xãha<sup>n</sup>-gã xii-güedé.

*Yoo cùu Xítóhó Jesucristú*  
(Mr. 12:35-37; Lc. 20:41-44)

<sup>41</sup> Te ndècu duca<sup>n</sup>-ni cue tée cùu fariséú núú ndécú Jèsús. <sup>42</sup> Te ní xicá<sup>n</sup> tnúhú-gã núú-güedé, te xãha<sup>n</sup>-gã:

—Cuini-í cachí tnúhu-ndo yòo déhe-xi cùu Cristú Yá tendaha Yã Ndiòxi quixi ñuyúú-a—cächí-gã xãha<sup>n</sup>-gã xii-güedé.

Te ní xãha<sup>n</sup>-güedé xii-gã:

—Déhe ndí Dávíí cùú Yáa-án—cächí-güedé xãha<sup>n</sup>-güedé xii-gã.

<sup>43</sup> Te Jèsús ní xãha<sup>n</sup>-gã xii-güedé:

—¿Te nása cächí-tu-ndo sã dèhe ndí Dávíí cùú Cristú Yá tendaha Yã Ndiòxi quixi ñuyúú-a, te mee ndí Dávíí-án ní dácáchí ñi ñáhã Espiritú Yã Ndiòxi xii ndí, te ní cachí ndí sá Cristú Yá tendaha Yã Ndiòxi quixi ñuyúú-a cùu-gã Xítóhó ndí? Te duha ní cachí ndí:

<sup>44</sup> Dùtú Ndiòxi ní xãha<sup>n</sup>-gã xii Yáa cùú Xítóhó-í:

“Ngóo xio cùu-í, te yúhu cada-í te nchaa sá cùú úhú ñi ñáhã xii-n canehe-xi sá yíñúhu núú-n.”

Duha ní xãha<sup>n</sup> Dùtú Ndiòxi xii Yáa cùú Xítóhó-í, cächí ndí. <sup>45</sup> ¿Te nása cùu Cristú déhe ndí Dávíí, te mee ndí ní cachí ndí sá cùu-gã Xítóhó ndí? —cächí Jèsús xãha<sup>n</sup>-gã xii-güedé.

<sup>46</sup> Te ní ñ<sup>n</sup>-güedé ñã túú-gã ní ñihí-güedé tnúhu cúnúu-güedé xii-gã. Te ndéé nduu-án ñã túú-gã ní cùyii-güedé ná tnúhu cáca<sup>n</sup> tnúhú-güedé núú-gã.

## 23

*Jèsús càhá<sup>n</sup>-gã cuendá cue tée cùu fariséú ndihi cuendá cue tée dàcuaha ñaha xii ñáyiu*  
(Mr. 12:38-40; Lc. 11:37-54; 20:45-47)

<sup>1</sup> Te Jèsús ní càhá<sup>n</sup> ndodo-gã núú nchaa ñáyiu, ndihi núú cuè tée xica cuu ndihi-gã, te xãha<sup>n</sup>-gã:

<sup>2</sup> —Cue tée dàcuaha ñaha xii ñáyiu nchaa tnúhu ní chídó tnúni ndí Moisés, ndihi cue tée cùu fariséú ndécú ndihi-güedé tnúhu ndee ñi càhá<sup>n</sup>-güedé nchaa tnúhu sá ní chídó tnúni ndí Moisés-án. <sup>3</sup> Te cada-ndo nàcuáa dànehé ñáhã-güedé xii-ndo, dico vã cáda-ndó datná xiquide-güedé, chí tucu ndúu tnúhu càhá<sup>n</sup>-güedé, te tucu quide-güedé. <sup>4</sup> Te quide-güedé dàtná quidé ñáyiu dàcuído ñ<sup>n</sup> tnaha ñáyiu-xi ñ<sup>n</sup> sã ïo vée, te mèe-yu ní lùha ñã túú cuini-yu cuído-yu. Te duca<sup>n</sup> sãtnahã-xi cùu-güedé chí dànehé ñáhã-güedé xii-ndo nàcuáa cada-ndo, dico mee-güedé chí ní lùha ñã túú cuini-güedé cada-güedé nàcuáa dànehé ñáhã-güedé xii-ndo. <sup>5</sup> Te mee-ni ndùcu-güedé nàcuáa quide-güedé cuendá quini ñáyiu sã ïo cùu cahnu-güedé. Te ndéé xindá sã ndéé ñ<sup>n</sup> úú tnúhu Yã Ndiòxi tneé-güedé ndihi ndaha-güedé, te tnàhá ñi-güedé sã ïo-gã cunduu quèhé<sup>n</sup> xindá-án dàcúúxi xindá dava-gã ñáyiu. Te tnàhá tucu ñi-güedé sã ïo-gã cunduu ñani núú dõo sácúihu-güedé dàcúúxi dõo sácúihu dava-gã-yu. <sup>6</sup> Te ndi tnahã òré sácõo vico, òré quihu-güedé mèsã caxi-güedé te ïo-gã cùdii ñi-güedé cunucóo-güedé núú xilé núú sácõo cue tée cùnúu-gã, te ñu-ni duca<sup>n</sup> quide tucu-güedé cuèí xití veñúhu. <sup>7</sup> Te nchaa núú xicá cùu-güedé cuini-güedé sã ndihi tnúhu

yiñùhu cáhá<sup>n</sup> ndihi ñaha ñáiyu xii-güedé, te cuiñi tucu-güedé sá cüñahá-yu xii-güedé mèstrú.

<sup>8</sup> 'Dico nchòhó vá cüñaha-ndo xii ñáiyu sá cüñahá-yu mèstrú xii-ndo, chi nchòhó ì<sup>n</sup>-ni cùu-ndo ndecu-ndo, chi duca<sup>n</sup> ì<sup>n</sup>-dii-ni yúhú Yáá ní tendaha Yá Ndiòxí véxi ñuyú-a cùu-í Mèstrú ndécú ndihi ñaha-í xii-ndo. <sup>9</sup> Te ì<sup>n</sup>-dii-ni Dútú Ndiòxí Yáá ndécú àndiu cuu-gá Tátá-ndó, núu xiá<sup>n</sup> vá cáhá<sup>n</sup>-ndó sá dàva cue téé ñuyú-a cùu-güedé tátá-ndó. <sup>10</sup> Te ni vá cáni iní-ndó càda-ndo nacuaá cáhá<sup>n</sup> ñáiyu sá cùnùu-ndo, chi ì<sup>n</sup>-dii-ni yúhú Cristú Yáá ní tendaha Yá Ndiòxí véxi ñuyú-a cùnùu-í. <sup>11</sup> Te ñáiyu io-gá cùnùu ndecu ndihi-ndo, ñáiyu-á<sup>n</sup> cùu-yu ñáiyu xinu cuechi núu-ndó. <sup>12</sup> Te nchaa ñáiyu quide cahnu mee-xi ñáiyu-á<sup>n</sup> vá cùu-yu ñáiyu cùnùu, te nchaa ñáiyu ñá túu quide cahnu mee-xi ñáiyu-á<sup>n</sup> cùnùu-yu.

<sup>13</sup> 'Te nchòhó cue téé dàcuaha ñaha xii ñáiyu nchaa tnúhu ní chidó tnùní ndíi Moisés, ndihi nchòhó cue téé cùu fariséu, cùu-ndo cue téé ío dàndahú méé-xí sá quidé ndáá te ñá ndáá sá quidé ndáá-ndó, te ndàhú ní cuu-ndo chi sàdí-ndó ìchi ñáiyu ñá dáñá-ndó ndíhu ndaha ñaha Yá Ndiòxí xii-yu, te ni mèe-ndo ñá túu quide-ndo nacuaá ndíhu ndaha ñaha-gá xii-ndo, te ni dàva-gá cue ñáiyu cuiñi sá ndíhu ndaha ñaha-gá xií-yu ñá dáñá-ndó.

<sup>14</sup> 'Te nchòhó cue téé dàcuaha ñaha xii ñáiyu nchaa tnúhu ní chidó tnùní ndíi Moisés, ndihi nchòhó cue téé cùu fariséu, cùu-ndó cuè téé ío dàndahú méé-xí sá quidé ndáá te ñá ndáá sá quidé ndáá-ndó, te ndàhú ní cuu-ndo chi quèndeé-ndó véhe cue ñáiyu quèé, te ío naha cáhá<sup>n</sup> ndihi-ndo Yá Ndiòxí cuèndá cuiñi-ndó sá vá yóo cutnùní iní-xi nàcuáa quide-ndo. Te sá dúcá<sup>n</sup> quide-ndo te ío-gá ndoho-ndo núu ùhú núu ndàhú dàcúxí dàva-gá ñáiyu.

<sup>15</sup> 'Te nchòhó cue téé dàcuaha ñaha xii ñáiyu nchaa tnúhu ní chidó tnùní ndíi Moisés, ndihi nchòhó cue téé cùu fariséu, cùu-ndó cuè téé ío dàndahú méé-xí sá quidé ndáá te ñá ndáá sá quidé ndáá-ndó, te ndàhú ní cuu-ndo chi sàhni iní-ndó cuhá<sup>n</sup>-ndó ndèni ní cuu dàcáhá<sup>n</sup>-ndó ñáiyu cuèndá cuiñi-ndó tní<sup>n</sup>-yu ichi ndècu-ndo. Te òré ná xinu iní-yu tní<sup>n</sup>-yu ichi ndècu-ndo-á<sup>n</sup> te uu<sup>n</sup>-gá cuíta nhnú-yu dàcúxí mèe-ndo.

<sup>16</sup> 'Te nchòhó cùu-ndó dàtná cue ñáiyu cuáá, chi ñá cùtnùní iní-ndó nàcuáa canu ichi-ndo ñáiyu, te ndàhú ní cuu-ndo chi cächí-ndó: "Í<sup>n</sup> ñáiyu na càcunehe veñúhu càhnu sá ío cùnùu òré cuiñi-yu cutnùní iní tnàha ñáiyú-yu sá ndáá cadá-yu ì<sup>n</sup> sá sání iní-yu cadá-yu, te vá cùu cuèchi xií-yu cuèi vá cadá-yu. Dico núu na càcu nehé-yu díhú<sup>n</sup> cuáá<sup>n</sup> yíhi xití veñúhu-á<sup>n</sup> te cuu cuèchi xií-yu

te núu vá cadá-yu sá ní cächí-yu cadá-yu", duha cächí-ndó.

<sup>17</sup> 'Nchòhó cùu-ndó cuè téé ío ñi díquí-xi, te cùu-ndo datná cue ñáiyu cuáá chi ñá tècú tnùní-ndó! Te vá cächí-ndó sá ío-gá cùnùu díhú<sup>n</sup> cuáá<sup>n</sup> dàcúxí veñúhu, chi díu cuèndá veñúhu-á<sup>n</sup> ní cuu íi díhú<sup>n</sup> cuáá<sup>n</sup>-á<sup>n</sup>. <sup>18</sup> Te cächí tucu-ndo: "Í<sup>n</sup> ñáiyu na càcunehe xito núu sácòdó sá ndúú tãhú Yá Ndiòxí òré cuiñi-yu cutnùní iní tnàha ñáiyú-yu sá ndáá cadá-yu ì<sup>n</sup> sá sání iní-yu cadá-yu, te vá cùu cuèchi xií-yu cuèi vá cadá-yu, dico núu na càcu nehé-yu sá ndúú tãhú Yá Ndiòxí yódó núu xito-á<sup>n</sup> te cuu cuèchi xií-yu te núu vá cadá-yu sá ní sani iní-yu cadá-yu", duha cächí-ndó. <sup>19</sup> 'Te cùu-ndo cue téé ío ñi díquí-xi, te cùu-ndo datná cue ñáiyu cuáá chi ñá tècú tnùní-ndó! Te vá cáni iní-ndó sá ío-gá nándíhi sá ndúú tãhú Yá Ndiòxí sácòdó núu xito núu sácòdó tnàhí sá ndúú tãhú-gá-á<sup>n</sup> dàcúxí mèe xito-á<sup>n</sup>. <sup>20</sup> Chi nchaa ñáiyu duca<sup>n</sup> càcunehe xito-á<sup>n</sup>, te tnàhá-ni sá yódó núu-xi càcu nehé-yu òré duca<sup>n</sup> cáhá<sup>n</sup>-yu. <sup>21</sup> Te nchaa ñáiyu duca<sup>n</sup> càcunehe veñúhu càhnu sá ío cùnùu te ñá díú mèe-ni veñúhu càcu nehé-yu òré duca<sup>n</sup> cáhá<sup>n</sup>-yu, chi tnàhá-ni Yá Ndiòxí Yáá cùu cuèndá veñúhu-á<sup>n</sup> cácu nehé-yu òré duca<sup>n</sup> cáhá<sup>n</sup>-yu. <sup>22</sup> Te nchaa ñáiyu càcunehe andiu cuèndá cutnùní iní tnàha ñáiyú-yu sá ndáá cadá-yu ì<sup>n</sup> sá sání iní-yu cadá-yu, te ñá díú mèe-ni andiu cacu nehé-yu chi tnàhá-ni núu núcóo Yá Ndiòxí táxi tnùní-gá cácu nehé-yu òré duca<sup>n</sup> cáhá<sup>n</sup>-yu, te tnàhá méé-gá cácu nehé-yu òré duca<sup>n</sup> cáhá<sup>n</sup>-yu.

<sup>23</sup> 'Te nchòhó cue téé dàcuaha ñaha xii ñáiyu nchaa tnúhu ní chidó tnùní ndíi Moisés, ndihi nchòhó cue téé cùu fariséu, cùu-ndó cuè téé ío dàndahú méé-xí sá quidé ndáá te ñá ndáá sá quidé ndáá-ndó. Te cuèi núu úxi xichi yúcu mèntá nhí-ndó, te sãñaha-ndo ì<sup>n</sup> xichi xii Yá Ndiòxí, te díu-ni duca<sup>n</sup> quide-ndo yúcu nání ànis, ndihi yúcu nání còminu, dico ndàhú ní cuu-ndo chi ñá túu quide cuèndá-ndó nàcuáa cáhá<sup>n</sup> nchaa tnúhu sá ío-gá cùnùu sanu ichi ñaha xii-ndo, te tnúhu-á<sup>n</sup> cächí-xi sá ío xini ñuhu-xi cada ndáá-ndó cùndecu-ndo, te cundàhú iní-ndó cuè tnaha ñáiyu-ndo, te quindáá iní-ndó Yá Ndiòxí, te cada-ndo nchaa nacuaá ndúu tnúhu cáhá<sup>n</sup>-ndó, te nchaa tnúhu-á<sup>n</sup> cùu-xi tnúhu sá ío cùnùu xini ñuhu-xi cada-ndo nacuaá cáhá<sup>n</sup>-xi, dico vá dáñá ndèe-ndó càda-ndo nchaa dàva-gá nàcuáa cáhá<sup>n</sup> tnúhu sá sánú ichi ñaha xii-ndo. <sup>24</sup> 'Te nchòhó cùu-ndó dàtná cue ñáiyu cuáá, chi ñá túu cùtnùní iní-ndó nàcuáa canu ichi-ndo ñáiyu, chi quide cuèndá-ndó mèe-ni nchaa tnúhu sá ñá túu ío cùnùu, dico nchaa tnúhu sá ío-gá cùnùu xini ñuhu-xi cada cuèndá-ndó ñá túu quide cuèndá-ndó!

<sup>25</sup> Te nchòhó cue tée dàcuaha ñaha xii ñáiyu nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cùu-ndo cue tée ío dándahú méé-xí sá quidé ndáá te ñá ndáá sá quidé ndáá-ndó. Te ndáhú ní cuu-ndo chí cùu-ndo datná cue ñáiyu nàquete sátá-ni tásá<sup>n</sup> ndíhi sátá-ni còhó te xití-xi cànhehe caduha-ni. Te duca<sup>n</sup> sátnahá-xi cùu-ndo chí mee-ni sá ndécú ndíhi tnahá ñáiyu-ndo ñúhu iní-ndó, te nándi dándahú-ndó-yu te quehe<sup>n</sup>-ndo sá ndécú ndíhi-yu. <sup>26</sup> Te nchòhó cue tée cùu fariséú, cúu-ndó datná cue ñáiyu cuáá, chí ñá túú cùtnuní iní-ndó nàcuáa ndúú sá quidé-ndó. Te ío xini ñúhu-xi sá cáda-ndó nàcuáa nduu ndoo nduu nine iní-ndó cuéndá ndacu-ndo cáda-ndo sá vâha, te xiá<sup>n</sup> núu chí cáda datná xiquide ñáiyu nàquete ndaa xití tásá<sup>n</sup> ndíhi ndáa xití còhó.

<sup>27</sup> Te nchòhó cue tée dàcuaha ñaha xii ñáiyu nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cùu-ndo cue tée ío dándahú méé-xí sá quidé ndáá te ñá ndáá sá quidé ndáá-ndó. Te ndáhú ní cuu-ndo chí cùu-ndo datná núu yíndüxi ndíyí núú ní cuáha vii te ní nacáhyú sá cuixi<sup>n</sup>, dico xití yaú-á<sup>n</sup> chí cànhehe caduha chí mee-ni yiqui ndíyí ñúhu. <sup>28</sup> Te duca<sup>n</sup> sátnahá-xi cùu-ndo chí sanuu sá cúu-ndó cuè tée vâha dico iní-ndó chí mee-ni sá cuèhe sá dúhá ñúhu, te ío dándahú-ndó mée-ndo sá quidé ndáá-ndó te ñá ndáá sá quidé ndáá-ndó.

<sup>29</sup> Te nchòhó cue tée dàcuaha ñaha xii ñáiyu nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cúu-ndó cuè tée ío dándahú méé-xí sá quidé ndáá te ñá ndáá sá quidé ndáá-ndó. Te ndáhú ní cuu-ndo chí cáduha-ndo nchaa núú ní nguíndüxi cue tée ní xóo cáhá<sup>n</sup> tnúhu Yá Ndióxi ndéé sanaha, te ío vii quide-ndo nchaa núú sá ní cuáha núu yíndüxi cue ñáiyu ní quide vâha ní xíndecu ñuyíyí-a. <sup>30</sup> Te cächí-ndó: “Te núu dícó nchoo ní xíndecu-o cùtnahá ní xíndecu cue ñani tnahá-ó ndéé sanaha, te vâ chítnahá-ó-güedé cahni-o cuè tée ní xóo cáhá<sup>n</sup> tnúhu Yá Ndióxi dàvâ-á<sup>n</sup> ní cùu”, duha cächí-ndó. <sup>31</sup> Te sá dúcá<sup>n</sup> cáhá<sup>n</sup>-ndó, te xiá<sup>n</sup> cùtnuní sá ñí<sup>n</sup>-ní cùu-ndo ndíhi cue ñani tnahá-ndó cuè tée ní xíndecu ndéé sanaha, cue tée ní sahani ñaha xii cue tée ní cáhá<sup>n</sup> tnúhu Yá Ndióxi dàvâ-á<sup>n</sup>. <sup>32</sup> Te núu duca<sup>n</sup> te chí dáxínu cava chiú<sup>n</sup> ní tausaha-güedé.

<sup>33</sup> Te nchòhó cúu-ndó cuè tée ío cuihna iní-xi, chí cùu-ndo datná cóó dèé! Te nchòhó vâ níhi-ndó nàcuáa cada-ndo cácu níhnu-ndo núú ùhú núú ndáhú. <sup>34</sup> Te cuéndá xiá<sup>n</sup> núu tendaha-í cue tée cáhá<sup>n</sup> tnúhu Yá Ndióxi quixi núu-ndó, ndíhi

cue tée cùu mestrú danèhé ñáhá xii-ndo tnúhu-gá, ndíhi cue tée ío vâha cùtnuní iní-xi cuéndá cáhá<sup>n</sup>-güedé tnúhu-gá núu-ndó. Dico nchòhó chí da cùu úhú iní-ndó-güedé, chí dava-güedé cahni-ndo-güedé, te dava-güedé cata caa-ndo-güedé núu cùrtixi, te dava-güedé cani-ndo-güedé xití veñúhu, te ndi tnahá ñúú ndi tnahá ñúú quíhi<sup>n</sup>-ndó nánducu-ndo-güedé cuéndá cada úhú iní-ndó-güedé. <sup>35</sup> Te sá dúcá<sup>n</sup> ná cáda-ndo, te ndadíquí-ndó cuè tée ní quide ndáá ní xíndecu ní xihí ní sahani ñaha cuè ñani tnahá-ndó. Te ndéé ndíi Abél tée ío vâha ní quide ndáá ní xíndecu ní sahani-güedé ndadíquí-ndó, ndíhi nchaa dava-gá cue tée ní sahani-güedé, ndíhi ndéé ndíi Zacàriá déhe ndí Berèquiás tée ní sahani-güedé ndéé núu ní ndíhi-ná ndadíquí-ndó, te ndíi-á<sup>n</sup> ní sahani-güedé mei tnúú veñúhu càhnu sá ío cùnuu ndíhi xití núú sácódó sá ndúú tãhú Yá Ndióxi, te nchaa cue tée-á<sup>n</sup> ndadíquí-ndó chí datná tnúhu mee-ndo ní sahani-ndo cuè tée-á<sup>n</sup>, chí diu-ni ñani tnahá mée-ndo duca<sup>n</sup> ní sahani ñaha xii-güedé. <sup>36</sup> Te na cächí tnúhu ndáá-í xii-ndo sá nchaa cue tée ní quide ndáá ní xíndecu ní sahani-güedé, nchaa cue tée-á<sup>n</sup> ndadíquí nchaa ñáiyu ndecu vitna – cächí-gá xâha<sup>n</sup>-gá xii-güedé.

*Jèsús cáhá<sup>n</sup>-gá cuéndá ñáiyu ñúú Jerusalén (Lc. 13:34-35)*

<sup>37</sup> Te xâha<sup>n</sup> Jèsús xii ñáiyu ñúú Jerusalén:

–Nchòhó ñáiyu ñúú Jerusalén sahani-ndo cue tée ní tendaha Yá Ndióxi véxi cáhá<sup>n</sup> tnúhu-gá núu-ndó, te mee-ni ndíhi yúú sáhani-ndó dáva-güedé. Te yúhu titní xito ní cuini-í coto ñaha-í xii-ndo datná quidé nchüxi xito-güedi déhe-güedi sàquíhi-güedi xití ndíxi<sup>n</sup>-güedi, dico nchòhó ñá túú ní cuini-ndó, te diu-ni duca<sup>n</sup> sàni iní-í ndéé vitna! <sup>38</sup> Te na cächí tnúhu ndáá-í xii-ndo sá sáá nduu te ío ndáhú yâha ñúú-ndó, te vâ cùndecu-gá-ndó. <sup>39</sup> Te na cächí tnúhu tucu-í xii-ndo sá vâ quini ñáhá-gá-ndó xii-í, dico sáá nduu quini ñáhá tucu-ndo, te dàvâ-á<sup>n</sup> cächí-ndó: “Ío càhnu cuu Yaá ní tendaha Dütú Ndióxi véxi”, duha cächí-ndó –cächí-gá xâha<sup>n</sup>-gá xii-yu.

## 24

*Jèsús cächí-gá sá ngóyó veñúhu (Mr. 13:1-2; Lc. 21:5-6)*

<sup>1</sup> Te Jèsús ní quee-gá veñúhu càhnu sá ío cùnuu, te mei òré ní quehe<sup>n</sup>-gá ichi quíhi<sup>n</sup>-gá ñí<sup>n</sup> xichi, te ní sánhehe yatni cue tée xica cuu ndíhi-gá ñíhi-gá, te xâha<sup>n</sup>-güedé xii-gá:

–Cundehe veñúhu-a ná ío vâha ní sáá – cächí-güedé xâha<sup>n</sup>-güedé xii-gá.

<sup>2</sup> Te Jèsús ní xâha<sup>n</sup>-gá xii-güedé:

—Na cächí tnúhu ndáá-í xii-ndo sã ncháá sã ndéhé-ndó-á vitna saá nduu te vá cündüu-gá-xi dàtná cáá-xí vitna, chí ni ìñ-gá yúú vá códó nchìhi tnaha-xi chí ndìhi ngoyo —cächí-gá xãha<sup>n</sup>-gã xii-güedé.

*Nàcuáa cada-xi nduu ta cüyatni naa ñuyú-a*

(Mr. 13:3-23; Lc. 21:7-24; 17:22-24)

<sup>3</sup> Te Jësús ní saá-gá ndìhi cue téé xica cuu ndìhi-gá yucu Olívú, te xiá<sup>n</sup> ní ngóo-gá te núú núcóo-gá-án ní sáhá<sup>n</sup> cue téé xica cuu ndìhi-gá, te dayuhu ní xãha<sup>n</sup>-güedé xii-gá:

—Cuini-ndí cächí tnúhu-n ná nduu ñuca<sup>n</sup> cada-xi ngoyo veñúhu cãhnu sã ïo cünüu, ndìhi nãndi cùu sã cáda-xí òré sa ta cüyatni nduu quixi tucu-n ñuyú-a, ndìhi òré sa ta cüyatni naa-xi —cächí-güedé xãha<sup>n</sup>-güedé xii-gá.

<sup>4</sup> Te Jësús ní xãha<sup>n</sup>-gã xii-güedé:

—Ío quíhi iní-ndó cündecu-ndo cuendá sã vá yoo dandáhú ñáhá xii-ndo. <sup>5</sup> Chí ío cuhéhe cue téé coo ñuyú, te danàni-güedé mée-güedé dàtná nãni-í, te cächí-güedé: “Yúhu cùú-í Cristú Yáá ní tendaha Yá Ndióxi véxi ñuyú-a”, duha cächí-güedé. Te sã ñuca<sup>n</sup> cãhá<sup>n</sup>-güedé te ío vai ñáiyu dandáhú-güedé. <sup>6</sup> Te níhi-ndó tnúhu nãá-güedé ndèni ní cuu, dico vá yuhú-ndó chí dacuití sã ñuca<sup>n</sup> cáda-xi, dico vátá saá-gá nduu nãa ñuyú òré duca<sup>n</sup> cáda-xi. <sup>7</sup> Chí cue téé ìñ nãció<sup>n</sup> nãá-güedé ndìhi cue téé ìngá nãció<sup>n</sup>, te titní ñuú nguúta-güedé nãá-güedé, te titní xichi ñuyú coo tnamá, te titní tucu xichi ñuyú quixi cuhéhe, te titní tucu xichi ñuyú ïo níhi tnáa. <sup>8</sup> Te nchaa xiá<sup>n</sup> cuu-xi tnúndòho sã vítná váha váha quèsaha sã cùú-xí cué ñáiyu xíndecu ñuyú.

<sup>9</sup> Te cue ñáiyu na cùu úhú iní ñáhá xii-ndo cuáha cuendá ñáhá-yu núú cué téé cùchiu<sup>n</sup> cuendá caniha-güedé xii-ndo, te dava-ndo cãhni ñaha-güedé, te nchaa ñáiyu cuu úhú iní ñáhá-yu xii-ndo sã cuendá-í. <sup>10</sup> Te dàvá-án ïo vai ñáiyu dàñá-yu sã sãndáá iní-yu Yá Ndióxi, te ngóo-yu cuu úhú iní tnáhá-yu, te cuáha cuendá tnáhá-yu núú cué téé cùchiu<sup>n</sup>. <sup>11</sup> Te ío vai cue téé cächí-güedé sã cãhá<sup>n</sup>-güedé tnúhu Yá Ndióxi te ñá ndáá sã cãhá<sup>n</sup>-güedé tnúhu-gá, te duca<sup>n</sup> ïo vai ñáiyu dandáhú-güedé. <sup>12</sup> Te dàvá-án<sup>n</sup> cunuú mée-ni nchaa sã cuhéhe sã dúhá cáda-yu, te vai-yu vá cùú iní-gá-yu tnàha ñáiyú-yu. <sup>13</sup> Dico nchaa ñáiyu na cáda ndee-ni iní canchicú<sup>n</sup> nihnu ñaha-ni xii-í, ñáiyu-án<sup>n</sup> naníhi táhú-yu. <sup>14</sup> Te níhi ñuyú quíhi<sup>n</sup> ñáiyu cãhá<sup>n</sup>-yu tnúhu váha, tnúhu sã cãhá<sup>n</sup> nãcuáa ndìhu ndaha ñaha Yá Ndióxi xii ñáiyu, te sátá ná níhi nchaa ñáiyu tnúhu-án<sup>n</sup> te naa ñuyú.

<sup>15</sup> Te ndí Dániél téé ní xóo cãhá<sup>n</sup> tnúhu Yá Ndióxi ndéé sanaha ní chídó tnùní ndí cuendá ìñ<sup>n</sup> sã dáquèe tihú Yá Ndióxi cundecu

ìñ<sup>n</sup> xichi núú ní cuu íí, te xiá<sup>n</sup> cada-xi sã vá cündecu-gá ní ìñ<sup>n</sup> ñáiyu xiá<sup>n</sup>. Te cada cuendá váha-ndo nãcuáa ní cãhá<sup>n</sup> ndí, chí nduu na quini-ndó xiá<sup>n</sup> cundecu-xi núú dúcá<sup>n</sup> ní cuu íí, <sup>16</sup> te dàvá-án<sup>n</sup> nchaa ñáiyu xíndecu distritú Jüdeá xini ñúhu-xi cunú-yu quíhi<sup>n</sup>-yu xití yucu. <sup>17</sup> Te nchaa ñáiyu ndáa ndódo ñiquí vehé-xí vá ndìhu-gá-yu vehé-yu quehé<sup>n</sup>-yu ìñ<sup>n</sup> ndachíu<sup>n</sup>-yu canehé-yu quíhi<sup>n</sup>. <sup>18</sup> Te nchaa ñáiyu cuáhá<sup>n</sup> yucu vá ñúhu-gá-yu vehé-yu cünüquehé<sup>n</sup>-yu dódó-yu. <sup>19</sup> Te ndáhú ní cuu nchaa ñáiyu díhi ñúhu dèhe-xi, ndìhi cue ñáiyu díhi xíndeca dèhe vitna sãdi na saá nduu ñuca<sup>n</sup> cada-xi! <sup>20</sup> Te nchòhó, chí cãcá<sup>n</sup> táhú núú Yá Ndióxi cuendá sã vá dúcá<sup>n</sup> ndòho-ndo yóo quidé víxi<sup>n</sup>-xi, te ní vá dúcá<sup>n</sup> ndòho-ndo nduu cuu-xi nduu ndetatú-ndó. <sup>21</sup> Chí dàvá-án<sup>n</sup> coo tnúndòho cãhnu vihi ñuyú, te vátá ìñ<sup>n</sup> ndúu-gá coo tnúndòho cãhnu vihi-án<sup>n</sup> ndéé cùtnáhá ní ngáva ñuyú, chí ñu-ni dàvá-án<sup>n</sup> coo tnúndòho cãhnu vihi-án<sup>n</sup>, te ní núú cuáhá<sup>n</sup> núú véxi vá cóo-gá tnúndòho-án<sup>n</sup>. <sup>22</sup> Te Yá Ndióxi cächí-gá sã vá ïo vai nduu coo tnúndòho cãhnu vihi-án<sup>n</sup> sã cuendá nchaa ñáiyu ní cãhá<sup>n</sup>-gá cundecu ndìhi-gá. Chí núú vai nduu na coo tnúndòho-án<sup>n</sup> te vá yoo cácu nihnu.

<sup>23</sup> Te núú ío ñáiyu cächí-yu xii-ndo: “Chí cündèhe iha, chí iha ní quexio Cristú Yáá ní tendaha Yá Ndióxi véxi ñuyú-a”, àdi cächí-yu: “Chí cündèhe yacá<sup>n</sup> chí yacá<sup>n</sup> ndécú-gã”, cächí-yu ña. Te vá quindáá iní-ndó tnúhu cãhá<sup>n</sup>-yu. <sup>24</sup> Chí coo cue téé cächí-güedé sã cùú-güedé Yáá ní tendaha Yá Ndióxi véxi ñuyú-a, te dava-güedé cächí-güedé sã cùú-güedé cue téé cãhá<sup>n</sup> tnúhu Yá Ndióxi dico ñá ndáa sã cùú-güedé cue téé cãhá<sup>n</sup> tnúhu-gá, te cada-güedé titní núú sã vá yoo tnàhi ndácu cada cuendá dandáhú-güedé ñáiyu. Te caní iní-güedé dandáhú-güedé ndéé cue ñáiyu ní cãhá<sup>n</sup> Yá Ndióxi cundecu ndìhi-gá. <sup>25</sup> Te duha ndúu tnúhu cãhá<sup>n</sup>-í dátúha ñaha-í xii-ndo. <sup>26</sup> Te núú cächí-yu xii-ndo: “Xití yucu-án<sup>n</sup> ní quexio Yáá ní tendaha Yá Ndióxi véxi ñuyú-a”, cächí-yu. Te vá quindáá iní-ndó quíhi<sup>n</sup>-ndó, àdi cächí-yu: “Vehe-án<sup>n</sup> ndécú Yáá ní tendaha Yá Ndióxi véxi ñuyú-a”, cächí-yu. Te vá quindáá iní-ndó tnúhu cãhá<sup>n</sup>-yu. <sup>27</sup> Chí dàtná xini nchaa ñáiyu quide-xi òré sãá ndúté dáyehé-xi ní càa xico ñuyú duca<sup>n</sup> cáda-xi òré quixi tucu yuhú Téé cùu ñani tnáhá-ndó nchaa-ndo chí nchaa-yu quini ñáhá-yu xii-í. <sup>28</sup> Te nchòhó xini-ndó sã ncháá núú yúcu yiquí cuñú ní xíhi te yacá<sup>n</sup> tàcá nchaa ndixí xéxi-güedé.

*Nàcuáa cada-xi òré quixi tucu Téé cùu ñani tnáhá cué ñáiyu*

(Mr. 13:24-37; Lc. 21:25-33; 17:26-30, 34-36)

<sup>29</sup> Te na yáha-ni coo tnúndòho cahnu vihi-án, te vá dáyèhé-gá nchícanhii, te ni vá dáyèhé-gá yóó, te ngoyo nchaa chódíní ndéé andiu, te quidi-xi andiu <sup>30</sup> nàcuáa cutnúní iní ñáiyu sá sá véxi yúhu Tée cùu ñani tnáhá-yu nchaa-yu. Te cue ñáiyu nihii ñuyú ndáhyú-yu sá ndihú iní-yu óré duca<sup>n</sup> càda-xi, te nchaa-yu quini ñáhá-yu xii-í quee-í andiu quixi-í ichi xití vícó, te quini-yu sá ío cahnu cuu-í, te quide-í nchaa sá vâha. <sup>31</sup> Te tauchiu<sup>n</sup>-í cue espíritu xínú cuèchi núú-í níhi tiú-xi cútú nadatácá-xi nchaa ñáiyu ní cáhá<sup>n</sup>-í chitnahá ñáhá xii-í xíndecu ní càxi cùu ñuyú.

<sup>32</sup> Te nchòhó sa xíní-ndó nàcuáa quide yutnu ngúxi, chi yutnu-án ndúú yúte núú dité-xi te nàtáhu ndaha-xi. Te óré duca<sup>n</sup> quide-xi te càchi-ndó sá sá ní cuyatni nuu cahni. <sup>33</sup> Te diu-ni duca<sup>n</sup> sàtnahá-xi cada-xi ñuyú-a óré ná quini-ndó càda-xi nchaa nacuaá ní cáhá<sup>n</sup>-í, te cutnúní iní-ndó sá sá ní cuyatni víi-ná nduu nàa ñuyú. <sup>34</sup> Te na càchi tnúhu ndáá-í xii-ndo sá óré vátá cùu-gá nchaa ñáiyu xíndecu ñuyú-a vitna, te cada-xi nchaa nàcuáa ní cáhá<sup>n</sup>-í. <sup>35</sup> Te andiu ndihú ñuyú-a chi ndihú nihnu-xi, dico tnúhu-í chi vá ndihú nihnu-xi chi cùu-xi tnúhu ndáá cuiti.

<sup>36</sup> Dico ñá túú cùtnuní ná nduu quixi tucu-í, te ni ñá túú cùtnuní ná óré chi vá yóo xíní, te ni cuè espíritu xínú cuèchi núú Yá Ndióxi ñá túú xíní-xi ná nduu quixi-í, te ni mèe yúhu Tée cùu Déhe Dútú Ndióxi ñá túú xíní-í ná nduu quixi tucu-í, chi ñ<sup>n</sup>di díí-ni mee-gá xíní-gá núu ná nduu quixi-í.

<sup>37</sup> Te nduu na quixi tucu yúhu Tée cùu ñani tnáhá-ndó nchaa-ndo ñuyú-a te cada-xi dátá ní quide-xi cùtnáhá ní xíndecu ndíi Nòé. <sup>38</sup> Chi nchaa ñáiyu ní xíndecu dàvá-án óré vátá ndáá-gá ndute ñuyú, te xèxi-yu xihí-yu quidé-yu, te davá-yu ío-yu víco tnándaha, te davá-yu dásá<sup>n</sup>-yu déhe yòcò-yu candeca ñaha tée, te duca<sup>n</sup>-ni xíquidé-yu ndéé ní sáá nduu cuànguee té Nòé xití bàrcú. <sup>39</sup> Te ñá túú ní cùtnuní iní-yu nàcuáa cada-xi ñuyú ndéé ní sáá nduu ní ngúta-xi ní cuu<sup>n</sup> dáú ní ndaa ndute ñuyú ní dánáá ñaha-xi xii-yu. Te diu-ni duca<sup>n</sup> sàtnahá tucu-xi cada-xi nduu na quixi tucu yúhu Tée cùu ñani tnáhá-yu nchaa-yu ñuyú-a, chi nduu ñá túú ná yíhi iní-yu te quixi tucu-í. <sup>40</sup> Te dàvá-án núu úú tnáhá cue tée yíhi-güedé xití yucu, te ñ<sup>n</sup>-dé ndanchita te ñ<sup>n</sup>-dé quendóo. <sup>41</sup> Ádi úú ñáiyu díhi nchícò-yu ñ<sup>n</sup>-ni vèhe, te ñ<sup>n</sup>-yu ndanchita te ñ<sup>n</sup>-yu quendóo.

<sup>42</sup> Te duha nduu tnúhu cáhá<sup>n</sup>-í cuendá nchòhó cundecu túha-ndo, chi ñá túú xíní-ndó ná óré quixi tucu yúhu Yáá cùú Xitohó-ndó. <sup>43</sup> Te nchòhó xíní-ndó sá núu ñ<sup>n</sup> tée cùu xitohó vehe xíní-dé ná óré cùú-xi níu quíhu ñadúhú vehe-dé duhu-güedé, te quíhi

iní-dé cundecu-dé cuendá sá vâ dáñá-dé quíhu ñadúhú-án vehe-dé duhu-güedé, dico ñá túú xíní-dé. <sup>44</sup> Te duha cáhá<sup>n</sup>-í chi nchòhó xíní ñúhu-xi cundecu túha-ndo, chi na cuáhá<sup>n</sup> óré ñá túú ná yíhi iní-ndó quèxio yúhu Tée cùu ñani tnáhá-ndó nchaa-ndo.

*Cuendá ñ<sup>n</sup> tée xínu cuechi  
(Lc. 12:41-48)*

<sup>45</sup> Te na càni-í ñ<sup>n</sup> cuendú núú-ndó. ñ<sup>n</sup> tée xínu cuechi núú ñ<sup>n</sup> patróó<sup>n</sup> cùu-dé ñ<sup>n</sup> tée ío váha tècú tnúni, te quide ndáá-dé ndécú-dé. Te ñ<sup>n</sup> xito ní dándòo ndaha ñaha patróó<sup>n</sup>-dé xii-dé nchaa cue ñáiyu ndècu vehe-dé cuendá coto ñaha-dé xii-yu cuáñaha-dé sá càxi-yu óré tàú-xi càxi-yu, te tée cùu patróó<sup>n</sup>-án ní quee-dé cuáhá<sup>n</sup>-dé. <sup>46</sup> Te váha táhu tée xínu cuechi-án te núu ndècuu-dé quidé-dé nchaa nàcuáa ní xáha<sup>n</sup> patróó<sup>n</sup>-dé cada-dé mei óré ní nasáá patróó<sup>n</sup>-dé-án. <sup>47</sup> Te na càchi tnúhu ndáá-í xii-ndo sá tée cùu patróó<sup>n</sup>-dé-án cùñaha-dé xii-dé sá quíndaha-dé nchaa sá ndécú ndihí-dé. <sup>48</sup> Dico núu tée xínu cuechi-án ní cùu-dé ñ<sup>n</sup> tée cuihna iní-xi, te ngóo-dé cani iní-dé sá cùyaa patróó<sup>n</sup>-dé vá nasáá ndihí-dé. <sup>49</sup> Te ngúta-dé cani-dé nchaa dava-gá cue ñáiyu xínu cuechi ndihí-dé, te ngóo-dé càxi-dé coho-dé cada-dé ndihí nchaa cue tée quíhu. <sup>50</sup> Te ñ<sup>n</sup> nduu óré ñá túú yíhi iní-dé nasáá patróó<sup>n</sup>-dé, <sup>51</sup> te ío dándòho ñaha patróó<sup>n</sup>-dé xii-dé, chi daquihí<sup>n</sup> ñáhá-dé xii-dé núú xíndecu cue ñáiyu ní cachí sá ní quide ndáá te ñá ndáá sá ní quide ndáá-yu. Te duca<sup>n</sup> sàtnahá-xi dándòho ñaha Yá Ndióxi xii ñáiyu, chi daquihí<sup>n</sup> ñáhá-gá xii-yu ñ<sup>n</sup> xichi núú ío ndohó-yu te yàcá<sup>n</sup> ío ndáhyú-yu, te dicó rúhñú-ná cuu núhu-yu sá sàtú iní-yu sá ndóhó-yu –càchi-gá xáha<sup>n</sup>-gá xii-güedé.

## 25

*Cuendá úxi ñáiyu díhi*

<sup>1</sup> Te xáha<sup>n</sup> tucu Jesús xii-güedé:

—Na càni-í ñ<sup>n</sup> cuendú núú-ndó nàcuáa tecú tnúni-ndó nàcuáa cada-xi óré ndíhu ndaha ñaha Yá Ndióxi xii ñáiyu. Te úxi tnáhá ñáiyu díhi ñáiyu cuechi ní quehé<sup>n</sup>-yu linterná-yu, te cuáhá<sup>n</sup>-yu ñ<sup>n</sup> xichi núú cóó víco tnándaha cuendá cundetío-yu quèxio tée tnándaha. <sup>2</sup> Te úhú<sup>n</sup> ñáiyu cuechi-án ío váha cùtnuní iní-yu, te úhú<sup>n</sup>-yu ñáhá. <sup>3</sup> Te ndi úhú<sup>n</sup> ñáiyu cuechi dùca<sup>n</sup> ñá túú cùtnuní iní-xi-án ñá túú ní cànehé-yu sá ndèe linterná-yu. <sup>4</sup> Dico ndi úhú<sup>n</sup> ñáiyu cuechi cùtnuní iní-xi-án nèhé-yu sá ndèe linterná-yu. <sup>5</sup> Te tée tnándaha-án cùyaa-dé quèxio-dé núú ndétú ñáhá-yu-án, te nini dùca<sup>n</sup> cuyaa-dé ní tñú ñaha sàni xii-yu ní xidí-yu. <sup>6</sup> Te cùu-xi datná dava níu níhi ní cáhá<sup>n</sup> dava-gá ñáiyu, te càchi-yu: “Sa véxi tée tnándaha, chí táquèe quehé quehe<sup>n</sup> cuendá-ndó-dé”, càchi-yu. <sup>7</sup> Te ndi úxi

ñáiyu cuechi-ã<sup>n</sup> nĩ ndacóo-yu quide túha-yu linternã-yu. <sup>8</sup> Te ndi ùhú<sup>n</sup> ñáiyu cuechi ñã túú cùtnunĩ inĩ-xi-ã<sup>n</sup> nĩ xáhã<sup>n</sup>-yu xii cue ndi ùhú<sup>n</sup> ñáiyu cùtnunĩ inĩ-xi-ã<sup>n</sup>: “Chĩ táxi ñuu luha sã ndëe linternã-ndó ná ndëe linternã-ndĩ chi ñã cuiñi-xi cáyu mee-ni ndáhvá<sup>n</sup>”, cãchĩ-yu xáhã<sup>n</sup>-yu. <sup>9</sup> Te cue ñáiyu cuechi cùtnunĩ inĩ-xi-ã<sup>n</sup> nĩ xáhã<sup>n</sup>-yu: “Vã táxi ñuu-ndĩ chi vã tñahã canehe chiú<sup>n</sup> mee-ndĩ, te váha-gã chí cuahã<sup>n</sup> cuaa<sup>n</sup>-ndo núú cuè ñáiyu xidícó cuendã sã vã cãmãní-xii-ndo, te vã cãmãní xii nchúhú tucu”, cãchĩ-yu xáhã<sup>n</sup>-yu. <sup>10</sup> Te nini cuahã<sup>n</sup> ndi ùhú<sup>n</sup> ñáiyu duca<sup>n</sup> ñã túú cùtnunĩ inĩ-xi-ã<sup>n</sup> cuãguaã<sup>n</sup>-yu sã ndëe linternã-yu ní quexio tée tñandaha. Te ndi ùhú<sup>n</sup> ñáiyu cuechi cùtnunĩ inĩ-xi-ã<sup>n</sup> nĩ quehe<sup>n</sup> cuendã ñãhã-yu xii-dé, te cuãnguihu ndihi ñãhã-yu xii-dé núú cóo vico tñandaha, te sátã dúcã<sup>n</sup> te ní nandedi yuyêhe. <sup>11</sup> Te òrè ní nasãã cue ñáiyu cuechi ñáiyu ní sãnguua<sup>n</sup> sã ndëe linternã-xi-ã<sup>n</sup>, te ní ngúita-yu cãhá<sup>n</sup>-yu xĩnutnĩ-yu ndãã sátã yuyêhe ndaa quehé, te xáhã<sup>n</sup>-yu xii tée tñandaha-ã<sup>n</sup>: “¡Tãta, nacaã<sup>n</sup> yuyêhe na quihu-ndĩ!”, cãchĩ-yu xáhã<sup>n</sup>-yu xii-dé. <sup>12</sup> Te tée tñandaha-ã<sup>n</sup> nĩ xáhã<sup>n</sup>-dè xii-yu: “Na cãchĩ tñúhu ndãã-í xii-ndo sã nchòhó ñã túú tàú-ndó quihu-ndo vico-a, chí ñã túú tñahã tñúhu ndihi ñaha-ndo xii-í”, cãchĩ-dé xáhã<sup>n</sup>-dè xii-yu –cãchĩ Jesús xáhã<sup>n</sup>-gã xii-güedé.

<sup>13</sup> Te xáhã<sup>n</sup> tucu Jesús xii-güedé:

—Ío quihĩ inĩ-ndó cùndecu-ndo, chí ñã túú xini-ndó nã nduu, te ní ñã túú xini-ndó nã òrè quixi tucu yúhú Tée cùu ñani tñahã-ndó nchãa-ndo –cãchĩ-gã xáhã<sup>n</sup>-gã xii-güedé.

*Cuendã cue tée ní ndóo ndaha dñhú<sup>n</sup>*  
(Lc. 19:11-27)

<sup>14</sup> Te xáhã<sup>n</sup> tucu Jesús xii-güedé:

—Na cãni tucu-í ingã cuendú núú-ndó nãcuãã tecú tñunĩ-ndó nãcuãã cada-xi òrè ndihi ndaha ñãhã Yã Ndióxi xii ñáiyu. ñ<sup>n</sup> tée sa ñũhu ichi-nã-dé sã cãcã-dé quingaca cuu xica-dé, te ní cana-dé cue tée xinu cuechi núú-dé cuendã dãndóo ndaha ñãhã-dé dñhú<sup>n</sup>-dè xii-güedé.

<sup>15</sup> Te nãcuãã nduu chiú<sup>n</sup> quide ñ<sup>n</sup> ñ<sup>n</sup>-güedé te duca<sup>n</sup> dñhú<sup>n</sup> nĩ sãñaha-dè xii-güedé, te ñ<sup>n</sup>-dè ní sãñaha-dè ùhú<sup>n</sup> tñahã dñhú<sup>n</sup> sã ío yahu ñani talentú, te ingã-dé ní sãñaha-dè úú tñahã dñhú<sup>n</sup>-ã<sup>n</sup>, te ingã-dé ní sãñaha-dè ñ<sup>n</sup> dñhú<sup>n</sup>-ã<sup>n</sup>, te dãtmnĩ ní quee-dé cuahã<sup>n</sup>-dè. <sup>16</sup> Te tée ní quehe<sup>n</sup> cuendã ùhú<sup>n</sup> tñahã dñhú<sup>n</sup> sã nãní tãlentú ní quide-dé ndáhú ndihi-xi te ní níhĩ tucu-dé ùhú<sup>n</sup>-gã tucu tñahã dñhú<sup>n</sup>-ã<sup>n</sup>. <sup>17</sup> Te ñ<sup>n</sup>-ni duca<sup>n</sup> nĩ quide tucu tée ní níhĩ úú dñhú<sup>n</sup> sã nãní tãlentú-ã<sup>n</sup>, chí ní quide-dé ndáhú te ní níhĩ tucu-dé úú-gã tucu tñahã. <sup>18</sup> Dico tée ní níhĩ ñ<sup>n</sup>-ni dñhú<sup>n</sup>-ã<sup>n</sup> chí da ní chivãhã-dé dñhú<sup>n</sup> patróo<sup>n</sup>-dè, chí ní xete-dé ñ<sup>n</sup> yãú te ní chindúxi-dé.

<sup>19</sup> Te ní cuu cuéhé nduu sã ní quee patróo<sup>n</sup>-güedé-ã<sup>n</sup> ní sãngaca cuu-dé, te ní nasãã-dé te ní ngúita-dé quidé ndãã-dé ndihi-güedé cuendã dñhú<sup>n</sup> sã ní dãndóo ndaha ñãhã-dé xii-güedé. <sup>20</sup> Te tée ní quendóo ndaha ùhú<sup>n</sup> tñahã dñhú<sup>n</sup>-ã<sup>n</sup> nĩ xáhã<sup>n</sup>-dè xii patróo<sup>n</sup>-dè: “Patróo<sup>n</sup>, náú ùhú<sup>n</sup> tñahã dñhú<sup>n</sup> sã ní dãndóo ndaha ñãhã-n xii-í-a, te ní sãhá<sup>n</sup>-í ní quide-í ndihi-xi ndáhú te ní chidó-xi ùhú<sup>n</sup>-gã tucu tñahã, te náú-a naquehe<sup>n</sup> cuendã-n”, cãchĩ-dé xáhã<sup>n</sup>-dè xii patróo<sup>n</sup>-dè. <sup>21</sup> Te tée cuu patróo<sup>n</sup>-dè-ã<sup>n</sup> ní xáhã<sup>n</sup>-dè xii-dé: “Ío váha ní quide-n, te vitna quide ñãhã-í xii-n ñ<sup>n</sup> tée váha tée quide ndãã, te sã sãcú dñhú<sup>n</sup> ní dãndóo ndaha ñãhã-í xii-n te ní quide ndãã-n, te sã dúcã<sup>n</sup> nĩ quide-n te vãi-gã taxi cuendã ñãhã-í xii-n. Te vitna cuu cundecu-n núú ndécú-í, te ío cudĩ ñ<sup>n</sup>-ó cùndecu ndihi tñaha-o”, cãchĩ tée cùu patróo<sup>n</sup>-dè-ã<sup>n</sup> xáhã<sup>n</sup>-dè xii-dé. <sup>22</sup> Te sátã dúcã<sup>n</sup> te tée ní quendóo ndaha úú tñahã dñhú<sup>n</sup> sã nãní tãlentú-ã<sup>n</sup> nĩ xáhã<sup>n</sup>-dè xii patróo<sup>n</sup>-güedé: “Patróo<sup>n</sup>, náú úú tñahã dñhú<sup>n</sup> sã ní dãndóo ndaha ñãhã-n-a, te ní sãhá<sup>n</sup>-í ní quide-í ndihi-xi ndáhú, te ní chidó-xi úú-gã tucu tñahã, te náú-a naquehe<sup>n</sup> cuendã-n”, cãchĩ-dé xáhã<sup>n</sup>-dè xii patróo<sup>n</sup>-güedé. <sup>23</sup> Te ní xáhã<sup>n</sup> tée cùu patróo<sup>n</sup>-ã<sup>n</sup> xii-dé: “Ío váha ní quide-n, te vitna quide ñãhã-í xii-n ñ<sup>n</sup> tée váha tée quide ndãã, te sã sãcú dñhú<sup>n</sup> ní dãndóo ndaha ñãhã-í xii-n te ní quide ndãã-n, te sã dúcã<sup>n</sup> nĩ quide-n te vãi-gã taxi cuendã-í. Te vitna cuu cundecu-n núú ndécú-í, te ío cudĩ ñ<sup>n</sup>-ó cùndecu ndihi tñaha-o”, cãchĩ tée cùu patróo<sup>n</sup>-ã<sup>n</sup> xáhã<sup>n</sup>-dè xii-dé. <sup>24</sup> Te tée ní ndóo ndaha ñ<sup>n</sup>-ni dñhú<sup>n</sup>-ã<sup>n</sup> nĩ xáhã<sup>n</sup>-dè xii tée cùu patróo<sup>n</sup>-dè-ã<sup>n</sup>: “Patróo<sup>n</sup>, yúhú sa ñãhã-í sã yòhó cúú-n ñ<sup>n</sup> tée nducu mee-ni sã cúú-xi mée-xi te tãhu-n chiú<sup>n</sup> cuahã<sup>n</sup> nchúhú cue tée xinu cuechi núú-n sãcã<sup>n</sup>-ndĩ triú, te òrè ná nãtaxi tñaha-ndĩ, te yòhó dñcò-nã náquehe<sup>n</sup> cuendã-n tãxúha-n. <sup>25</sup> Te núú xiã<sup>n</sup> ní yúhú-í cada-í ndáhú ndihi dñhú<sup>n</sup>-n, te ní sãhá<sup>n</sup>-í ní xete-í ñ<sup>n</sup> yãú te ní chindúxi-í, te náú dñhú<sup>n</sup>-n-ã<sup>n</sup> naquehe<sup>n</sup> cuendã-n”, cãchĩ-dé xáhã<sup>n</sup>-dè xii tée cùu patróo<sup>n</sup>-ã<sup>n</sup>. <sup>26</sup> Te tée cùu patróo<sup>n</sup>-ã<sup>n</sup> nĩ xáhã<sup>n</sup>-dè: “Yòhó cúú-n ñ<sup>n</sup> tée cuihna ñ<sup>n</sup>-xi xinu cuechi núú-í te cuhndu-n, te núú yòhó sãní ñ<sup>n</sup>-ni sã cúú-í ñ<sup>n</sup> tée tãchiú<sup>n</sup> cuahã<sup>n</sup>-ndó sãcã<sup>n</sup>-ndó triú te òrè nãtaxi tñaha-ndo, te yúhú dñcò-nã náquehe<sup>n</sup> cuendã-í nãtãxúha-í. <sup>27</sup> Te núú sãní ñ<sup>n</sup>-ni sã dúcã<sup>n</sup> quide-í, te dasã<sup>n</sup> núu-n dñhú<sup>n</sup>-í te cũñaha-n chãhu-yu díquí-xi ní cùu, te òrè ndexio-í te sa ngódó lùha-gã díquí-xi naquehe<sup>n</sup>-í ní cùu”, cãchĩ-dé xáhã<sup>n</sup>-dè xii tée xinu cuechi-ã<sup>n</sup>. <sup>28</sup> Te tée cùu patróo<sup>n</sup>-ã<sup>n</sup> nĩ xáhã<sup>n</sup>-dè xii dava-gã cue tée ndècu ndihi-dé: “Chĩ quendéè ñ<sup>n</sup> dñhú<sup>n</sup> sã nãní tãlentú néhé



têe-án, te cuáha-ndo tée nèhe úxí tnáhá ñiu-ni díhú<sup>n</sup>-án. <sup>29</sup> Chi cue tée sa ndècu ndihi te níhi-gá-güedé cundecu ndihi-güedé, te ni vâ níhi-gá-güedé ndèé cundecu nchaa sá cündècu ndihi-güedé. Te cue tée ñá túú nâ ndécú ndihi vai, te nchaa sá ndécú ndihi-güedé vá cündècu ndihi-gá-güedé. <sup>30</sup> Te tée ximú cuechi ñá túú vèdana nàndíhi-án, chí tníi-dé te daquihí<sup>n</sup>-ndó-dé ñi<sup>n</sup> xichi núú neé núú ío ndoho-dé, te yàcá<sup>n</sup> ndáhyú-dé, te dícú rúhúú-nâ cuu núhu-dé sá sátú iní-dé sá ndóhó-dé”, càchí tée cùu patróo<sup>n</sup>-án xáha<sup>n</sup>-dè xii-güedé. Duha sátnahá-xi ndoho nchaa ñáiyú ñá túú quide váha —càchí-gá xáha<sup>n</sup>-gá xii-güedé.

*Cuendá cue ñáiyú ní quide váha ndihi cuendá cue ñáiyú ñá túú ní quide váha*

<sup>31</sup> Te xáha<sup>n</sup> tucu Jesús xii-güedé:

—Te nduu na quixi tucu yúhú Tée cùu ñani tnáhá-ndó ncháa-ndo, te quixi-í ndihi nchaa cue espíritu ximú cuèchi núú-í, te nchaa ñáiyú quini-yu sá ío càhnu cuu-í, te dává-án cunucóo-í núú táxi tnúni-í, te ío cuñúhu ñáiyú sá ío càhnu cuu-í. <sup>32</sup> Te dává-án natacá nchaa ñáiyú xíndecu ní caa xico ñuyúú cundecú-yu núú-í, te cada-í-yu dátani-í. <sup>33</sup> Te ñáiyú toli oré táú ñáiyú-dé nchaa mbéé ndihi nchaa chivá chí ñáiyú taxi ndecu-dé nchaa mbéé, te ñáiyú taxi ndecu-dé nchaa chivá. <sup>34</sup> Te duca<sup>n</sup> sátnahá-xi cada-í chí nchaa ñáiyú ní quide ndáá núú-í ñáiyú-án taxi ndecu-í-yu xio cùha-í, te nchaa ñáiyú cuihna iní-xi ñá túú ní cuini cada ndáá núú-í ñáiyú-án taxi ndecu-í-yu xio dátani-í. <sup>35</sup> Te duca<sup>n</sup> te yúhú tée ío cùnuu cúñaha-í xii ñáiyú na cündecu xio cuha-í: “Nchaa nchòhó ñáiyú ní quide váha ñaha Tàtá-í Dútú Ndíoxí, chí nèhe chí vitna ní sáá nduu cündecu-ndo núú ndécú-gá táxi tnúni-gá, chí ndéé cùtnáhá ní ngáva ñuyúú sa ndècu túha tnáhi núú ndécú-gá-án sá nchòhó nduu táhú-ndó cündecu-ndo. <sup>36</sup> Te duca<sup>n</sup> chí oré xihí-í docó te ní taxi-ndo sá ní xexi-í, te oré yíchí-í ndute te ní taxi-ndo ndute ní xihí-í, te oré ñúhú-í ichi te ní taxi-ndo vehe ní ndetatú-í. <sup>37</sup> Te oré xini ñúhu-í dóo cuihnu-í te ní taxi-ndo, te oré ní cuhú-í te ní quixi coto ñaha-ndo xii-í, te oré ní xihí-í vècaá te ní quixi tucu-ndo ní quixi coto ñaha-ndo xii-í”, duha cúñaha-í xii nchaa ñáiyú-án. <sup>38</sup> Te nchaa ñáiyú duca<sup>n</sup> ní quide ndáá-án cúñahá-yu xii-í: “Yóhó Yáá cúú Xitohó-ndí, ní ñáiyú xito ñá túú ní tàxi-ndí sá cáxi-n oré xihí-n dócò, te ní ñáiyú xito ñá túú ní tàxi-ndí ndute coho-n oré yíchí-n. <sup>39</sup> Te ní ñá túú ní tàxi-ndí vehe ndetatú-í oré ñúhú-n ichi, te ní ñá túú ní tàxi-ndí dóo cuihnu-n oré xini ñúhu-n. <sup>40</sup> Te ní ñá túú ní quixi coto ñaha-ndí xii-n oré ní cuhú-n, te ní ñá túú ní quixi coto ñaha-ndí xii-n oré ní xihí-n vècaá”, duha quesahá-yu cúñahá-yu xii-í.

<sup>40</sup> Te yúhú tée cùnuu cúñaha-í xii-yu: “Na càchí tnúhu ndáá-í xii-ndo sá ncháá sá váha ní quide-ndo sá cúú-xi ncháa ñáiyú xíndecu ichi-í cuèi ío ndáhú xíndáa-yu, te sá dúcá<sup>n</sup> ní quide-ndo sá váha sá cúú-xi-yu, te cada iní-ndó sá mèe-í duca<sup>n</sup> ní quide-ndo ní xito ñaha-ndo xii-í”, duha cúñaha-í xii-yu.

<sup>41</sup> Te dátani-í: “Nchaa nchòhó ñáiyú ní xita ni-hnu chí xócuiñí núú ndécú-í-a, chí nchòhó ní nduu táhú-ndó cündecu-ndo núú ñúhú núú càyú, ñiu-ni núú ní quide túha-í cundecu sácuihna ndihi nchaa espíritu cündíhi-xi, te yàcá<sup>n</sup> cundecu-ndo ní caa ní quihí<sup>n</sup>. <sup>42</sup> Chi yúhú oré xihí-í docó te ñá túú ní tàxi-ndo sá cáxi-í, te ní oré yíchí-í ndute te ñá túú ní tàxi-ndo ndute coho-í. <sup>43</sup> Te ní oré ní xúhu<sup>n</sup>-í ichi ñá túú ní tàxi-ndo vehe ndetatú-í, te ní oré xini ñúhu-í dóo cuihnu-í te ñá túú ní tàxi-ndo, te ní oré ní cuhú-í te ñá túú ní quixi-ndo quixi coto ñaha-ndo xii-í, te ní oré ní xihí-í vècaá te ñáiyú-án ní quide-ndo ñá túú ní quixi-ndo quixi coto ñaha-ndo xii-í”, duha cúñaha-í xii-yu. <sup>44</sup> Te ñáiyú-án cúñahá-yu xii-í: “Yóhó Yáá cúú Xitohó-ndí ní ñáiyú xito ñá túú ní xini-ndí oré xihí-n dócò cuendá taxi-ndí sá cáxi-n, te ní ñáiyú xito ñá túú ní xini-ndí oré yíchí-n ndute cuendá taxi-ndí ndute coho-n, te ní ñáiyú xito ñá túú ní xini-ndí cuhú<sup>n</sup>-n ichi cuendá taxi-ndí vehe ndetatú-n, te ní ñáiyú xito ñá túú ní xini-ndí oré xini ñúhu-n dóo cuendá taxi-ndí dóo cuihnu-n, te ní ñáiyú xito ñá túú ní xini-ndí oré cùhú-n cuendá quixi coto ñaha-ndí xii-n, te ní ñáiyú xito ñá túú ní xini-ndí quihí-n vècaá cuendá quixi coto ñaha-ndí xii-n”, duha quesahá-yu cúñahá-yu xii-í. <sup>45</sup> Te yúhú cúñaha-í xii-yu: “Na càchí tnúhu ndáá-í xii-ndo sá sá cuendá sá ñá túú ní quide-ndo ñáiyú sá cúú-xi cuè ñáiyú ndècu ichi-í cuèi ío ndáhú xíndáa-yu, te sá dúcá<sup>n</sup> ní quide-ndo ñá túú ní quide-ndo sá váha sá cúú-xi-yu, te cada iní-ndó sá mèe-í duca<sup>n</sup> ní quide-ndo ñá túú ní quide-ndo sá váha sá cúú-xi-í”, duha cúñaha-í xii-yu. <sup>46</sup> Te nchaa ñáiyú-án quihí<sup>n</sup>-yu núú ùhú núú ndáhú ní caa ní quihí<sup>n</sup>. Te nchaa ñáiyú ní quide ndáá núú-í ní xíndecu ñuyúú-a, ñáiyú-án nduu táhú-yu ío váha cundecú-yu ní caa ní quihí<sup>n</sup> —càchí-gá xáha<sup>n</sup>-gá xii-güedé.

## 26

*Cue tée cùu úhú iní ñáhá xii Jesús ndúctú-güedé nàcuáa cada-güedé tnú ñaha-güedé xii-gá*

(Mr. 14:1-2; Lc. 22:1-2; Jn. 11:45-53)

<sup>1</sup> Te sáta ní yáha duca<sup>n</sup> ní cáhá<sup>n</sup> Jesús, te ní xáha<sup>n</sup>-gá xii cue tée xica cuu ndihi-gá:

<sup>2</sup> —Nchòhó sa xini-ndó sá cùmání úú-gá nduu te coo vico páscaá, te càchí tnúhu-í

xii-ndo sã yũhú Tée cùu ñani tnáhá-ndó nchàa-ndo tñii ñaha-güedé xii-í, te cuáha cuendá ñáhá-güedé núu cuè téé cùu úhú iní ñáhá xii-í, te cata caa ñaha-güedé núu cùrúxí te núu cùrúxí-án cuú-í –cächí-gá xáha<sup>n</sup>-gã xii-güedé.

<sup>3</sup> Te ñiu-ni òré càhá<sup>n</sup> ndihi Jèsús cue téé xica cuu ndihi-gá ní nataká cue téé cùu dútú cùnùu, ndihi cue téé dàcuaha ñaha xii ñáyiú nchaa tnúhu ní chidó tnùní ndii Moisés, ndihi cue téé cùu sacuéhé núu ñáyiú isràél. Te mei quèhé vehe núu cùu vèchiu<sup>n</sup> té Caifás téé cùu dútú ïo-gá cùnùu ní nataká-güedé. <sup>4</sup> Te xiá<sup>n</sup> ní ndatnúhu-güedé nàcuáa cada-güedé dandàhú-güedé Jèsús cuendá tñii ñaha-güedé xii-gá, te cahni ñaha-güedé. <sup>5</sup> Te ní xitnáha-güedé:

–Váha-gá sã vá tñii-ó Jèsús mei ndùu vico, chi núu duca<sup>n</sup> na càda-o te ïo dusa<sup>n</sup> càda ñáyiú –cächí-güedé xitnáha-güedé.

*È<sup>n</sup> ñadìhí chíhí-án àcítí díquí Jèsús*  
(Mr. 14:3-9; Jn. 12:1-8)

<sup>6</sup> Te ndècu Jèsús ñuú Bètaniá vehe ì<sup>n</sup> téé nani Xímú, téé ní tnahá cuèhé sã datèhyú nihnu-xi yiqui cùñú-ó. <sup>7</sup> Te xiá<sup>n</sup> ndècú-gá ní quexìo ì<sup>n</sup> ñadìhí néhé-án ì<sup>n</sup> sã ní cuáha yúú váha nani alabastrú, te xití xiá<sup>n</sup> ñúhú àcítí sàhá<sup>n</sup> tnámí sã ïo ndèyáhu. Te yihí Jèsús mesá xéxí-gã, te ñaha-án ní sáhá<sup>n</sup>-a ní sódó-a<sup>n</sup> àcítí ñúhú xití xiá<sup>n</sup> díquí-gã. <sup>8</sup> Te òré ní xini cue téé xica cuu ndihi Jèsús sã dúcá<sup>n</sup> ní quide ñaha-án te ní cudéé<sup>n</sup>-güedé, te ní nguíta-güedé xitnáha-güedé:

–Ñá túu quide váha ñaha-án dàcá<sup>n</sup> quidé-án dacuíta-a<sup>n</sup> acítí-án. <sup>9</sup> Chi váha-gá núu cuyáhu acítí-án ní cùu chi ïo ndèyáhu, te díhú<sup>n</sup> cuyáhu acítí-án cuu cuendá cue ñáyiú ndàhú ní cùu –cachí-güedé xitnáha-güedé.

<sup>10</sup> Te Jèsús ní cutnúni iní-gá nàcuáa ndùu tnúhu xitnáha-güedé, núu ní xáha<sup>n</sup>-gã xii-güedé:

–Vá dásàtú-ndó iní ñadìhí-a, chi sã ní quide ñaha-a<sup>n</sup> xii-í cuú-xí ì<sup>n</sup> sã váha. <sup>11</sup> Chi cue ñáyiú ndàhú duca<sup>n</sup>-ni cùtnahá ñáyiú-án tnuú-ndó, dico yúhú chi vá ncháá ndùu cundecu ndihi ñaha-í xii-ndo ñuyítú-a. <sup>12</sup> Te sã dúhá ní quide ñaha ñadìhí-a xii-í ní sódó-a<sup>n</sup> àcítí díquí-í, te xiá<sup>n</sup> cada iní-ndó sã sã quide túha-a<sup>n</sup> yiqui cùñú-í cuendá nguindúxi-xi. <sup>13</sup> Te na càchí tnúhu ndáá-í xii-ndo sã ndèni ní cuu ñihí ñuyítú ná càhá<sup>n</sup> ñáyiú tnúhu-í, te càhá<sup>n</sup>-yu tnàhá cuendá ñadìhí-a cuendá quini nchaa ñáyiú nàcuáa ní quide-a<sup>n</sup> te duca<sup>n</sup> vá nàcuána-yu –cächí-gá xáha<sup>n</sup>-gã xii-güedé.

*Té Jüdás ndúcú-dé nàcuáa cada-dé cuáha cuendá-dé Jèsús núu cuè téé cùu úhú iní ñáhá xii-gá*

(Mr. 14:10-11; Lc. 22:3-6)

<sup>14</sup> Te sáta dúcá<sup>n</sup> te té Jüdás Iscarioté ní sáhá<sup>n</sup>-dé ní ndatnúhu-dé ndihi cue téé cùu dútú cùnùu. Te núu tnàhá té Jüdás-án cùu ùxúu cue téé xica cuu ndihi Jèsús. <sup>15</sup> Te ní xáha<sup>n</sup>-dè xii cue téé cùu dútú cùnùu-án:

–¿Ndèdèu cháhu ñaha-ndo xii-í te taxi cuendá-í Jèsús xii-ndo-í? –cächí-dé xáha<sup>n</sup>-dè xii-güedé.

Te cue dútú-án ní xáha<sup>n</sup>-güedé xii-dé sã cuáñaha-güedé ócò úxí díhú<sup>n</sup> cuixí<sup>n</sup>, te ñiu-ni duca<sup>n</sup> ní sáñaha-güedé xii-dé. <sup>16</sup> Te ndéé òré ní quehe<sup>n</sup> cuendá té Jüdás-án díhú<sup>n</sup>, te ní nguíta-dé ndúcú-dé nàcuáa cada-dé cuáha cuendá-dé Jèsús núu-güedé.

*Cùdini Jèsús ndihi cue téé xica cuu ndihi-gá*  
(Mr. 14:12-25; Lc. 22:7-23; Jn. 13:21-30; 1 Co. 11:23-26)

<sup>17</sup> Te ní sáá nduu ní quesaha vico xexi ñáyiú pàá sã ñà túu yihí levadurá ñiu-ni vico pascuá, te cue téé xica cuu ndihi Jèsús ní sàndehe yatni-güedé ñini-gá, te xáha<sup>n</sup>-güedé xii-gá:

–Mèstrú, véxi-ndí xicá<sup>n</sup> tnúhú-ndí núu-n núu ndèé cuini<sup>n</sup> càda túha-ndí cuendá cudini-o sacuaa nduu vico pascuá –cächí-güedé xáha<sup>n</sup>-güedé xii-gá.

<sup>18</sup> Te Jèsús ní xáha<sup>n</sup>-gã xii-güedé:

–Chí cuáhá<sup>n</sup> xití ñuú-án, te yacá<sup>n</sup> nanihí-ndó ì<sup>n</sup> téé cùtnuni iní-ndó sã sã xini ñáhá-dè xii-o, te cùñaha-ndo xii-dé: “Yáá cúú Mèstrú càchí-gá sã sã ní cuyatni nduu vá cùndècu-gá ñuyítú-a, te vehe-n cuini-gá cada-gá vico pascuá ndihi cue téé xica cuu ndihi-gá”, duha cùñaha-ndo xii téé-án –cächí-gá xáha<sup>n</sup>-gã xii-güedé.

<sup>19</sup> Te cue téé xica cuu ndihi-gá-án ní xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gã xii-güedé, te ní quide túha-güedé sã cùdini-güedé ndihi-gá sacuaa nduu vico pascuá-án. <sup>20</sup> Te òré sa ní cundiqui<sup>n</sup> te cuánguihu Jèsús ndihi ndi ùxúu cue téé xica cuu ndihi-gá mesá cuendá cudini-gá ndihi-güedé. <sup>21</sup> Te ñini xexi-gá ndihi-güedé ní xáha<sup>n</sup>-gã xii-güedé:

–Na càchí tnúhu ndáá-í xii-ndo sã díú ì<sup>n</sup> nchohó cue téé xica cuu ndihi-í cuáha cuendá ñáhá-ndó xii-í núu cuè téé cùu úhú iní ñáhá –cächí-gá xáha<sup>n</sup>-gã xii-güedé.

<sup>22</sup> Te sã dúcá<sup>n</sup> ní xáha<sup>n</sup>-gã xii-güedé te nchaa-güedé ní nguíta-güedé cùndiyí-güedé, te da ì<sup>n</sup> na ì<sup>n</sup>-güedé ní nguíta-güedé xáha<sup>n</sup>-güedé xii-gá:

–Mèstrú, ñhá díú yúhú duca<sup>n</sup> sàni iní-n càda-í-u? –cächí-güedé xáha<sup>n</sup>-güedé xii-gá.

<sup>23</sup> Te ní xáha<sup>n</sup>-gã xii-güedé:

–Téé nacaxi ndihi-í ì<sup>n</sup>-ni cóhó caxi-ndí, téé-án cuáha cuendá ñáhá-dè xii-í núu cuè téé cùu úhú iní ñáhá. <sup>24</sup> Te yúhú Tée cùu ñani tnáhá-ndó nchàa-ndo ñuhu ichi-í cuáhá<sup>n</sup>-í yáha-í nàcuáa càhá<sup>n</sup>-xi núu tütú Yá Ndióxi,

dico ndàhú ní cuu tée duca<sup>n</sup> na cuáha cuendá ñáhá xii-í núú cuè tée cùu úhú iní ñáhá, chí váha-gá sá vǎ cǎcú tǎe-á<sup>n</sup> cundecu-dé ní cùu, te ñá díú sǎ ní cacu-dé te duca<sup>n</sup> càda-dé – cǎchí-gǎ xǎhá<sup>n</sup>-gǎ xii-güedé.

<sup>25</sup> Te sǎtá dúcá<sup>n</sup> te ní cǎhá<sup>n</sup> té Jüdás tée cuáha cuendá ñáhá xii-gǎ, te xǎhá<sup>n</sup>-dǎ:

–Mèstrú, ¿te náa sǎni iní-n sǎ yúhú cuáha cuendá ñáhá-í xii-n núú cuè tée cùu úhú iní ñáhá xii-n-á<sup>n</sup>? –cǎchí-dé xǎhá<sup>n</sup>-dǎ xii-gǎ.

Te Jèsús ní xǎhá<sup>n</sup>-gǎ xii-dǎ:

–Diu-n –cǎchí-gǎ xǎhá<sup>n</sup>-gǎ xii-dǎ.

<sup>26</sup> Te nini cùdini cue tée xica cuu ndihi Jèsús ní quehe<sup>n</sup>-gǎ pǎá, te ní ndacá<sup>n</sup> tǎhú-gǎ núú Yǎ Ndióxi, te dàtnùni ní tǎhú cuèchi-gǎ te ní ngüita-gǎ dǎcǎhñu-gǎ cue tée xica cuu ndihi-gǎ-á<sup>n</sup>, te xǎhá<sup>n</sup>-gǎ xii-güedé:

–Chí quéhé<sup>n</sup> pǎá-a caxi-ndo, te cada iní-ndó sǎ yiqui cuñú-í cùú-xí –cǎchí-gǎ xǎhá<sup>n</sup>-gǎ xii-güedé.

<sup>27</sup> Te ní quehe<sup>n</sup>-gǎ vǎsú ñùhú ndúdí ndéhé yoho yàha stilé, te ní ndacá<sup>n</sup> tǎhú-gǎ núú Yǎ Ndióxi, te dàtnùni ní ngüita-gǎ sǎñaha-gǎ xii-güedé cuendá coho-güedé luha luha sǎ ñùhú xití-xi, te xǎhá<sup>n</sup>-gǎ xii-güedé:

–Chí cóhó ncháa nchóhó ndudí ndéhé yoho yàha stilé ñùhú xití vǎsú-a. <sup>28</sup> Te cada iní-ndó sǎ cùú-xí dàtná ñíñi-í sǎ cǎtí òré cahni ñaha-güedé xii-í, te sǎ dúcá<sup>n</sup> cǎti ñíñi-í xǎá<sup>n</sup> cutnùni ndáá sǎ Yǎ Ndióxi cada-gǎ ingá núú sǎ váha sǎ cùú-xí vǎi ñáyiú dàtná ní cǎchí-gǎ cada-gǎ, te io vǎi ñáyiú cada cahnu iní-gǎ cuèchi-yu. <sup>29</sup> Te na cǎchí tnúhu-í xii-ndo sǎ vítǎnǎ-nǎ duha xihí ndihi ñaha-í xii-ndo ndúdí ndéhé yoho yàha stilé-a, te vǎ cóhó ndihi ñaha-gǎ-í xii-ndo, dico na sǎá nduú nànihí tnáhá-ó núú ndécú Tǎtá-í Dútú Ndióxi táxi tnùni-gǎ te dàvǎ-á<sup>n</sup> cada iní-ndó sǎ dàtná sǎ cóhó ndihi ñaha tucu-í xii-ndo chí io cudí iní-ó –cǎchí-gǎ xǎhá<sup>n</sup>-gǎ xii-güedé.

Te Pèlú cùñaha-dǎ xii ñáyiú sǎ ñá túú xini-dé Jèsús

(Mr. 14:26-31; Lc. 22:31-34; Jn. 13:36-38)

<sup>30</sup> Te Jèsús ní xita-gǎ ñ<sup>n</sup> ndudú ndihi cue tée xica cuu ndihi-gǎ, te dàtnùni ní xica-gǎ cuáhá<sup>n</sup>-gǎ ndihi-güedé yucu Òlívú. <sup>31</sup> Te yácá<sup>n</sup> ní xǎhá<sup>n</sup>-gǎ xii-güedé:

–Na cǎchí tnúhu-í xii-ndo sǎ ncháá-ndó dàndóo ñaha-ndo xii-í niú vitna, chí quee ndáá-xi nǎcuáa cǎhá<sup>n</sup>-xi núú tütú Yǎ Ndióxi núú cǎchí-xi: “Yúhú cuáha-í tnúhu cahni-güedé tée cùu toli, te ncháa mbéé-dé ndihi-güedé cuténuu”, duha cǎchí-xi núú tütú-gǎ. <sup>32</sup> Dico na ndòto-í te codonù-í núú-ndó quíhí<sup>n</sup> distritú Galiléa –cǎchí-gǎ xǎhá<sup>n</sup>-gǎ xii-güedé.

<sup>33</sup> Te té Pèlú ní xǎhá<sup>n</sup>-dǎ xii-gǎ:

–Te cuèi ncháa-güedé ná dàndóo ñaha-güedé xii-n, dico yúhú chí vǎ dàndóo ñaha-í xii-n –cǎchí-dé xǎhá<sup>n</sup>-dǎ xii-gǎ.

<sup>34</sup> Te Jèsús ní xǎhá<sup>n</sup>-gǎ xii-dǎ:

–Na cǎchí tnúhu ndáá-í xii-n sǎ niú vitna cùmání-gǎ cana ñ<sup>n</sup> líhi, te úní xito cǎhá<sup>n</sup>-n núú ñáyiú sǎ ñá túú xini ñáhá-n xii-í –cǎchí-gǎ xǎhá<sup>n</sup>-gǎ xii-dǎ.

<sup>35</sup> Te té Pèlú ní xǎhá<sup>n</sup>-dǎ xii-gǎ:

–Cuèi na cùú ndihi ñaha-í xii-n dico vǎ cǎhá<sup>n</sup>-í núú ñáyiú sǎ ñá túú xini ñáhá-í xii-n –cǎchí-dé xǎhá<sup>n</sup>-dǎ xii-gǎ.

Te ncháa dava-gǎ cue tée xica cuu ndihi-gǎ diu-ni duca<sup>n</sup> ní xǎhá<sup>n</sup>-güedé xii-gǎ.

Jèsús cǎhá<sup>n</sup> ndihi-gǎ Yǎ Ndióxi ñ<sup>n</sup> xichi núú nání Gètsemaní

(Mr. 14:32-42; Lc. 22:39-46)

<sup>36</sup> Te Jèsús ní quexio-gǎ ndihi cue tée xica cuu ndihi-gǎ ñ<sup>n</sup> xichi núú nání Gètsemaní, te xía<sup>n</sup> ní xǎhá<sup>n</sup>-gǎ xii-güedé:

–Chí cúnúcoo iha cundetú-ndo na quíhí<sup>n</sup>-í yácá<sup>n</sup> cǎhá<sup>n</sup> ndihi-í Yǎ Ndióxi –cǎchí-gǎ xǎhá<sup>n</sup>-gǎ xii-güedé.

<sup>37</sup> Te ndèca-gǎ té Pèlú, ndihi ndi ndúú déhe té Zebèdeú cuáhá<sup>n</sup>, te ní ngüita-xi súúni ndihú iní-gǎ. <sup>38</sup> Te ní xǎhá<sup>n</sup>-gǎ xii cue tée úní-á<sup>n</sup>:

–Súúni ndihú iní-í dàtná sǎ cùú-í, te chí quéndóo nchóhó iha te vǎ cùdú-ndó chí yúhú vǎ cùdú-í –cǎchí-gǎ xǎhá<sup>n</sup>-gǎ xii-güedé.

<sup>39</sup> Te sa ñünchiú luha ní xica ndehe Jèsús núú ndécú-güedé, te ní ngüíñi xití-gǎ te ní nuu núú-gǎ ndàa núú ñùhú, te ní ngüita-gǎ cǎhá<sup>n</sup> ndihi-gǎ Tǎtá-gǎ Dútú Ndióxi, te xǎhá<sup>n</sup>-gǎ:

–Yohó Tǎtá mée-í, cǎhá<sup>n</sup> ndàhú-í núú-n núu vǎ cùndèe iní-n tàunihnu ñaha-n xii-í cuendá sǎ vǎ ndóhò-í ná sǎá òré, dico vǎ cǎdá-n nǎcuáa cǎchí iní mée-í, chí cada-n nǎcuáa cǎchí iní mée-n –cǎchí-gǎ xǎhá<sup>n</sup>-gǎ xii Tǎtá-gǎ Dútú Ndióxi.

<sup>40</sup> Te sǎtá ní yáha ní cǎhá<sup>n</sup> ndihi-gǎ Tǎtá-gǎ Dútú Ndióxi, te cuánuhú-gǎ núú ní dàndóo-gǎ cue tée úní-á<sup>n</sup> te xixidí-güedé òré ní nasáá-gǎ, te ní xǎhá<sup>n</sup>-gǎ xii té Pèlú:

–¿Náa ñá cùndèe iní-ndó vǎ cùdú-ni-ndo cuèdicó ñ<sup>n</sup> òré nini cǎhá<sup>n</sup> ndihi-í Yǎ Ndióxi-á<sup>n</sup>? <sup>41</sup> Te chí quéndóo tucu te cuhu<sup>n</sup> iní-ndó vǎ cùdú-ndó, te cǎhá<sup>n</sup> ndihi-ndo Yǎ Ndióxi cuendá sǎ vǎ dǎcǎhá<sup>n</sup> ñáhá yucu ñávǎha xii-ndo càda-ndo sǎ ñá túú tǎú-ndó càda-ndo. Te xini ndáá-í sǎ nchóhó cuini-ndó càda-ndo ncháa nǎcuáa cǎhá<sup>n</sup>-í dicó-ni sǎ ñá túú nihí ndéé-ndó –cǎchí-gǎ xǎhá<sup>n</sup>-gǎ xii-güedé.

<sup>42</sup> Te xito cùu úú cuáhá<sup>n</sup> tucu Jèsús cǎhá<sup>n</sup> ndihi-gǎ Tǎtá-gǎ Dútú Ndióxi, te xǎhá<sup>n</sup>-gǎ:

–Yohó Tǎtá mée-í, te núu vǎ cùndèe iní-n tàunihnu ñaha-n xii-í cuendá sǎ vǎ ndóhò-í, te cada nǎcuáa cǎchí iní mée-n –cǎchí-gǎ xǎhá<sup>n</sup>-gǎ xii Tǎtá-gǎ Dútú Ndióxi.

<sup>43</sup> Te òré ní yáha ní cǎhá<sup>n</sup> ndihi-gǎ Tǎtá-gǎ Dútú Ndióxi, te cuánuhú tucu-gǎ núú xindecu cue tée úní xícá cùu ndihi-gǎ-á<sup>n</sup>, te xidí-ni

tucu-güedé òré ní nasáá-gá, te duca<sup>n</sup> ní quide-güedé chí sùúni ññuhu saní nùú-güedé.  
 44 Te ní dándóo ñaha tucu Jesús xii-güedé xíá<sup>n</sup>, te cuáhá<sup>n</sup> tucu-gá xito cùu uní cáhá<sup>n</sup> ndihi tucu-gá Tàtá-gá Dútú Ndióxi, te diu-ni tnúhu sá sà ní xáha<sup>n</sup>-gá xii Tàtá-gá Dútú Ndióxi, diu-ni tnúhu-á<sup>n</sup> ní xáha<sup>n</sup> tucu-gá. 45 Te sáta ní yáha ní cáhá<sup>n</sup> ndihi-gá Tàtá-gá Dútú Ndióxi, te cuánuhú tucu-gá nùú ndécú cuè téé xica cuu ndihi-gá-á<sup>n</sup>, te òré ní nasáá-gá, te ní xáha<sup>n</sup>-gá xii-güedé:

—¿Te náa xidí-ni tucu-ndo? Te sa ní sáá òré cuáha cuendá ñáhá-güedé xii-í nùú cuè téé ndécú ichi cuehé ichi duha. 46 Dico vitna chí ndácóo na quihí<sup>n</sup>-ó, chí sa véxi téé cuáha cuendá ñáhá xii-í nùú cuè téé cùu úhu ini ñáhá —càchí-gá xáha<sup>n</sup>-gá xii-güedé.

*Ní tñi-güedé Jesús ndécá ñaha-güedé xii-gá cuáhá<sup>n</sup>*

(Mr. 14:43-50; Lc. 22:47-53; Jn. 18:2-11)

47 Te cáhá<sup>n</sup> dúcá<sup>n</sup>-ní Jesús ní quexio té Judás. Te nùú tñahá téé-á<sup>n</sup> cúú ùxúú tñahá cue téé xica cuu ndihi-gá ní cùu te duca<sup>n</sup> ní quide-dé. Te ndihi-dé vai cue téé ní quexio te dava-güedé xínehe-güedé machítí, te dava-güedé xínehe-güedé carrutí. Te cue téé-á<sup>n</sup> ní tendaha ñaha cue dútú cùnùu, ndihi cue téé cùu sacuéhé nùú ñáyiu isráel. 48 Te té Judás téé cuáha cuendá ñáhá xii-gá-á<sup>n</sup> sa ní xitnùhu-dé cue téé-á<sup>n</sup> nàcuáa cada-dé cuáha cuendá-dé Jesús nùú-güedé, te duha ní xáha<sup>n</sup>-dè xii-güedé:

—Cundehe-ndo tée na tèyuhu-í te téé-á<sup>n</sup> tñi-ndo-dè chí téé-á<sup>n</sup> cúú-dè téé ndéé ini-ndo —duha ní xáha<sup>n</sup>-dè xii-güedé.

49 Te sáta dúcá<sup>n</sup> ní xáha<sup>n</sup>-dè xii-güedé, te ní sándehe yatni-dé nùú Jesús, te ní xáha<sup>n</sup>-dè xii-gá:

—¡Ració<sup>n</sup> Mèstrú! —càchí-dé xáha<sup>n</sup>-dè xii-gá.

Te ní teyuhu ñaha-dé xii-gá. 50 Te Jesús ní xáha<sup>n</sup>-gá xii-dé:

—Yòhó téé ní chitnahá ñáhá xii-í, ¿ná cuiní-n nùu véxi-n nùú-í? —càchí-gá xáha<sup>n</sup>-gá xii-dé.

Te òré-ni-á<sup>n</sup> ní tñi ñaha cuè téé ndihi té Judás-á<sup>n</sup> xii Jesús, te ndéca ñaha-güedé xii-gá cuáhá<sup>n</sup>.

51 Te ñi<sup>n</sup> cue téé ndihi Jesús ní tava-dé machítí-dé, te ní xehndé-ni-dé ñi<sup>n</sup> xio lóho ñi<sup>n</sup> téé xinu cuechi nùú dútú cùnùu te ní quende duu<sup>n</sup> lóho-dé. 52 Te Jesús ní xáha<sup>n</sup>-gá xii téé duca<sup>n</sup> ní xehndé lóho téé-á<sup>n</sup>:

—Nachihi machítí-n ñi<sup>n</sup>-xi, chí nchaa cue téé na nàa ndihi machítí cahni-güedé tñaha ñáyiu-güedé te diu-ni ndihi machítí cuú méé-güedé tucu. 53 Te na càchí tnúhu-í xii-ndo sá nùu yúhú cuiní-í cácu-í te cáhá<sup>n</sup> ndihi-í Tàtá-í Dútú Ndióxi, te tendaha-gá cuéhé víhí espíritú xínú cuèchi nùú-gá quixi-xi dácácu ñaha-xi xii-í. 54 Dico nùu

duca<sup>n</sup> na càda-í te vá quéé ndáá-xi nàcuáa cáhá<sup>n</sup>-xi nùú tütú Tàtá-í Dútú Ndióxi nùú ndéé tñuní sá dácuití<sup>n</sup> xini ññuhu-xi nándi ndoho-í —càchí-gá xáha<sup>n</sup>-gá xii-dé.

55 Te Jesús ní xáha<sup>n</sup>-gá xii cue téé duca<sup>n</sup> ní tñi ñaha xii-gá-á<sup>n</sup>:

—Nchaa-ni nduu ní xiní-ndo ní xóo cunucóo-í xití veñúhu càhnu sá ño cùnùu ní xóo danèhé-í ñáyiu, te ñá túú ní tñi ñaha-ndo xii-í, ¿te ná cuendá vitna quide ñaha-ná-ndo xii-í dàtná quidè-ndo ñi<sup>n</sup> ñadúhú, nèhe-ná-ndo machítí nèhe-ná-ndo càrrutí ní quexio ní tñi ñaha-ndo xii-í-í? 56 Dico dácuití<sup>n</sup> sá dúhá càda-xi nàcuáa quee ndáá-xi nàcuáa ní cáhá<sup>n</sup> cue téé ní xóo cáhá<sup>n</sup> tnúhu Yá Ndióxi ndéé sanaha ní ngódó tñuní nùú tütú-gá —càchí-gá xáha<sup>n</sup>-gá xii-güedé.

Te nchaa cue téé xica cuu ndihi-gá ní xinu-güedé ní dándóo ñaha-güedé xii-gá.

*Jésús ndécú-gá jundá*

(Mr. 14:53-65; Lc. 22:54-55, 63-71; Jn. 18:12-14, 19-24)

57 Te téé ní tñi ñaha xii Jesús ndécá ñaha-güedé xii-gá cuáhá<sup>n</sup> nùú té Caifás téé cùu dútú cùnùu-gá. Te nùú ndécú dútú cùnùu-gá-á<sup>n</sup> sa ní tacá cue téé dácuaa ñaha xii ñáyiu nchaa tnúhu ní chídó tñuní ndí Moisés, ndihi cue téé cùu sacuéhé nùú ñáyiu isráel cuendá cada-güedé jundá. 58 Te té Pèlú xica xica-ni nchicú<sup>n</sup> ñáhá-dè xii-gá cuáhá<sup>n</sup> ní sáá-dé ndéé quehé vehe nùú ndécú téé cùu dútú cùnùu-gá-á<sup>n</sup>, te xíá<sup>n</sup> ní ngóo-dé ndihi cue téé cùu poleciá cuendá cuiní-dé quini-dé nása cada ñaha-güedé xii Jesús.

59 Te cue téé cùu dútú cùnùu, ndihi cue téé cùu sacuéhé nùú ñáyiu isráel, ndihi nchaa dava-gá cue téé xindecu jundá ndécú-güedé nàcuáa cada-güedé dacáa-güedé ñi<sup>n</sup> cuèchi díquí Jesús cuèi cùu-xi ñi<sup>n</sup> sá ñá ndáa cuendá níhí-güedé nàcuáa cada-güedé cahni ñaha-güedé xii-gá. 60 Te vai cue téé ní nguíta-güedé dacáa-güedé cuèchi díquí-gá, dico ñá túú ní cundee tnúhu-güedé chí mee-ni tnúhu ndehnde cùn-xi. Te sáta dúcá<sup>n</sup> te ní quexio tucu úú tñahá cue téé dácuandehnde-güedé, 61 te xáha<sup>n</sup>-güedé xii nchaa cue téé xindecu jundá:

—Véxi-ndí càchí tnúhu-ndí xii-ndo sá tée-a càchí-dé sá dängóyo-dé veñúhu càhnu sá ño cùnùu nùú chññuhu-o Yá Ndióxi, te dandáa-dé ingá veñúhu saa, diu-ni nùú cáá tñahí veñúhu-á<sup>n</sup>, te xití úní-ni nduu sa nadaxinu-dé, duha càchí-dé —càchí-güedé xáha<sup>n</sup>-güedé.

62 Te téé cùu dútú cùnùu-gá-á<sup>n</sup> ní ndacuñí-dé, te xáha<sup>n</sup>-dè xii Jesús:

—¿Ná cuendá duha nduu tnúhu cáhá<sup>n</sup> cue téé-a cuendá-n? Te cáhá<sup>n</sup> nùu nása cunduu tnúhu cáhá<sup>n</sup>-n —càchí-dé xáha<sup>n</sup>-dè xii-gá.

<sup>63</sup> Dico Jèsús ñá túú tñáhi ní cǎhá<sup>n</sup>-gá. Te téé cùu dútú cùnù-gá-á<sup>n</sup> ní xáha<sup>n</sup> tucu-dé xii-gá:

—Yúhú, cǎcú ñèhe-í Yá Ndiòxi chí cuini-í sá cǎchi tñúhu ndáá-n xii-ndí núu sá díú Cristú Déhe Yá Ndiòxi Yáá ní tendaha-gá véxi ñuyú-a cùu-n —cǎchi-dé xáha<sup>n</sup>-dè xii-gá.

<sup>64</sup> Te Jèsús ní xáha<sup>n</sup>-gá xii-dé:

—Díu Yaá-á<sup>n</sup> cùu-í dàtná cǎchi-n-á<sup>n</sup>, te na cǎchi tñúhu-í xii-ndo sá sáa nduu te quini-ndó yúhú Téé cùu ñani tñáha-ndó nchaa-ndo cunucóo-í xio cùha Dútú Ndiòxi Yáá ndácú quide nchaandí tñúhú sá vaha. Te dáva-á<sup>n</sup> quini ñáhá-ndó xii-í quee-í andiu quixi-í ichi xití vico —cǎchi-gá xáha<sup>n</sup>-gá xii-dé.

<sup>65</sup> Te dútú cùnù-gá-á<sup>n</sup> ní ndátá-dè dóo ñhnu-dé cuendá sá ñá túú ní tñáha iní-dé nacúaa ní cǎhá<sup>n</sup> Jèsús, te ní xáha<sup>n</sup>-dè xii nchaa cue téé xíndecu jundá:

—Téé-a cǎhá<sup>n</sup> úhú-dé cuendá Yá Ndiòxi, te vitna ñá túú-gá xini ñùhu-xi cue téé cǎhá<sup>n</sup> ndáá núu ndáá sá ndecuéchi-dé àdi ñá túú ndecuéchi-dé, chí sa ní tecú dóho-o nacúaa nduu tñúhu ní cǎhá<sup>n</sup>-dè ní cǎhá<sup>n</sup> úhú-dé cuendá Yá Ndiòxi. <sup>66</sup> Te nchaa-ndo chí cǎhá<sup>n</sup> vitna núu nása sàni iní-ndó cùnduu cuendá téé-a —cǎchi-dé xáha<sup>n</sup>-dè xii nchaa cue téé-á<sup>n</sup>.

Te cue téé-á<sup>n</sup> ní xáha<sup>n</sup>-güedé:

—Nchúhú cǎchi-ndí sá tǎu-xi cuú-dé chí ndecuéchi-dé —cǎchi-güedé xáha<sup>n</sup>-güedé.

<sup>67</sup> Te ní nguíta-güedé ní tiú díí ñáhá-güedé xii-gá te ní caniha-güedé, te tñáha núú-gá ní cani-güedé. <sup>68</sup> Te ní cudiquí ndeé ñáhá-güedé xii-gá, te xáha<sup>n</sup>-güedé:

—Yóhó Téé cǎchi sá cúu Cristú Yaá ní tendaha Yá Ndiòxi véxi ñuyú-a, cǎhá<sup>n</sup> ná coto yoo ní caniha xii-n —cǎchi-güedé xáha<sup>n</sup>-güedé xii-gá.

*Té Pèlú xáha<sup>n</sup>-dè xii ñáyiú sá ñá túú xini-dé Jèsús*

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Te ñini núcóo té Pèlú quehé, te ní sáhá<sup>n</sup> ñi xíchi xínú cuèchi vehe-á<sup>n</sup> núú-dé, te xáha<sup>n</sup>-xi xii-dé:

—Yóhó tñáha-n cùu-n téé xica cuu ndíhi Jèsús téé distritú Galiléa —cǎchi-xi xáha<sup>n</sup>-xi xii-dé.

<sup>70</sup> Te té Pèlú ñá túú ní nùnuu-dé, te ndédóho nchaa ñáyiú xíndecu-á<sup>n</sup> ní xáha<sup>n</sup>-dè xii xíchi-á<sup>n</sup>:

—Yúhú, ñá túú cùtnuni iní-í nása nduu tñúhu cǎhá<sup>n</sup>-n —cǎchi-dé xáha<sup>n</sup>-dè xii-xi.

<sup>71</sup> Te ní xica té Pèlú cuáhá<sup>n</sup>-dè ndaa nacúaa nchí yuyèhe vehe-á<sup>n</sup>, te ní xini ñáhá tucu ingá xíchi xínú cuèchi vehe-á<sup>n</sup>, te xáha<sup>n</sup>-xi xii nchaa ñáyiú xíndecu-á<sup>n</sup>:

—Téé-a tñáha-dé xíca cùu-dé ndíhi Jèsús téé ñuu Nazàrét —cǎchi-xi xáha<sup>n</sup>-xi xii-yu.

<sup>72</sup> Te té Pèlú ní xáha<sup>n</sup>-dè:

—Nchacuiti Yá Ndiòxi sá ñá túú xini-í téé cǎcunehe-ndo-á<sup>n</sup> —cǎchi-dé xáha<sup>n</sup>-dè xii-yu.

<sup>73</sup> Te tna tnaa-ni ní cuu, te dáva ñáyiú xíndecu xíá<sup>n</sup> ní xáha<sup>n</sup> tucu-yu xii té Pèlú:

—Ndáá sá tñáha-n xica cuu-n ndíhi téé ndéca-güedé cuánguihu-á<sup>n</sup>, chí ñáyúhú cǎhá<sup>n</sup>-n —cǎchi-yu xáha<sup>n</sup>-yu xii-dé.

<sup>74</sup> Te té Pèlú ní xáha<sup>n</sup>-dè xii-yu:

—Nchacuiti Yá Ndiòxi sá yúhú cǎhá<sup>n</sup> ndáá-í sá ñá túú xini-í téé cǎcunehe-ndo-á<sup>n</sup> —cǎchi-dé xáha<sup>n</sup>-dè xii-yu.

Te órè-ni-á<sup>n</sup> ní cana ñi líhi. <sup>75</sup> Te ní ndacu iní té Pèlú nacúaa ní xáha<sup>n</sup> Jèsús xii-dé sá cùmání-gá cana ñi líhi te úni xito cǎhá<sup>n</sup>-dé sá ñá túú xini ñáhá-dé xii-gá. Te ní quee-dé tñuu ñáyiú-á<sup>n</sup> cuáhá<sup>n</sup>-dè ñi xio ní ndáhyú víhi-dé ní ndixi cuéchi iní-dé.

## 27

*Ndéca-güedé Jèsús cuáhá<sup>n</sup> núú té Pilatú (Mr. 15:1; Lc. 23:1-2; Jn. 18:28-32)*

<sup>1</sup> Te sáta ní tundaá te nchaa cue téé cùu dútú cùnù, ndíhi cue téé cùu sacuéhé núú ñáyiú isráel ní ndatnúhu-güedé nacúaa cada-güedé cahni-güedé Jèsús. <sup>2</sup> Te ní dácútu ñáha-güedé xii-gá, te ndéca ñaha-güedé cuáhá<sup>n</sup> núú té Pilatú téé cùu gobiernú.

*Ní xíhi té Júdás*

<sup>3</sup> Te té Júdás téé ní sáha cuendá ñáhá xii Jèsús ní cùtnuni iní-dé sá cǎhni ñáha-güedé xii-gá, te ní ndixi cuéchi iní-dé sá ñá túú ní quide váha-dé sá dúcá<sup>n</sup> ní quide-dé ní sáha cuendá ñáhá-dé xii-gá núú cue téé cùu úhú iní ñáhá, te ní xica-dé cuáhá<sup>n</sup>-dè danchòcava-dé ócò úxi díhú<sup>n</sup> cuixi<sup>n</sup> núú cue dútú cùnù-á<sup>n</sup>, ndíhi núú cue téé cùu sacuéhé núú ñáyiú isráel, chí díu cue téé-á<sup>n</sup> ní sáñaha-güedé díhú<sup>n</sup> xii-dé. <sup>4</sup> Te órè ní quexio té Júdás-á<sup>n</sup> núú ndécú-güedé, te xáha<sup>n</sup>-dè xii-güedé:

—Yúhú, ñá túú ní quide váha-í sá dúcá<sup>n</sup> ní quide-í ní taxi cuendá-í ñi téé ñá túú tñáhi cuéchi-xi cahni-ndo-dé —cǎchi-dé xáha<sup>n</sup>-dè xii-güedé.

Te cue téé-á<sup>n</sup> ní xáha<sup>n</sup>-güedé xii-dé:

—Nchúhú, ñá túú nǎga cuendú cuini-ndí cǎhá<sup>n</sup> ndíhi ñaha-ndí xii-n, te mee-n ñaha núu nása sàni iní-n càda-n —cǎchi-güedé xáha<sup>n</sup>-güedé xii-dé.

<sup>5</sup> Te té Júdás ní dǎngoyo-dé díhú<sup>n</sup>-á<sup>n</sup> xití veñúhu cǎhnu sá ño cùnuu, te ní xica-dé cuáhá<sup>n</sup>-dè ní dácuehné-dé méé-dé.

<sup>6</sup> Te cue dútú cùnù ní naquehe<sup>n</sup>-güedé díhú<sup>n</sup>-á<sup>n</sup>, te ní xitnáha-güedé:

—Díhú<sup>n</sup>-a ní quéyáhu cuendá sá cùu ñi ñáyiú, núu xíá<sup>n</sup> vá cùu nǎchihi-o xití cǎjá núú ñúhú sá cùu cuendá Yá Ndiòxi —cǎchi-güedé xitnáha-güedé.

<sup>7</sup> Te ní ndatnúhu-güedé te ní cuu ñi nuu-güedé cuendá nacúaa<sup>n</sup>-güedé ñi

xichi núú cáá ñuhu danani-güedé Núú Cuáha Nchaa Sá Cuáha Ñuhu, te xiá<sup>n</sup> ní saa<sup>n</sup>-güedé cuendá xiá<sup>n</sup> nguñdúxi nchaa ñáyiú véxi xica. <sup>8</sup> Te ní nadáma diu ñuhu-á<sup>n</sup>, te vitna dānani-güedé Ñuhu Yáhu Níñí, duha dānani-güedé. <sup>9</sup> Te duca<sup>n</sup> ní cuu chi ní quee ndáá-xi nācuáa ní cáhá<sup>n</sup> ndí Jeremías téé ní xóo cáhá<sup>n</sup> tnúhu Yá Ndióxi ndéé sanaha, te duha ní cachí ndí: “Cue téé isráel ní cachí-güedé sá òcò úxí díhú<sup>n</sup> cuix<sup>n</sup> cháhu-güedé cuendá ñ<sup>n</sup> téé quehe<sup>n</sup> cuendá-güedé. Te díhú<sup>n</sup>-á<sup>n</sup> nāquehe<sup>n</sup>-güedé, <sup>10</sup> te cuaa<sup>n</sup>-güedé ñ<sup>n</sup> xichi núú nání Núú Cuáha Nchaa Sá Cuáha Ñuhu, te duca<sup>n</sup> càda-xi chi duca<sup>n</sup> ní cachí Yá Ndióxi cunduu”, duha ní cachí ndí Jeremías-á<sup>n</sup>.

*Jèsús ndécú-gá núú tē Pilatú*

(Mr. 15:2-5; Lc. 23:3-5; Jn. 18:33-38)

<sup>11</sup> Te Jèsús ndécú-gá núú tē Pilatú téé cūu gobiernú, te téé-á<sup>n</sup> ní xicá<sup>n</sup> tnúhú-dé núú-gá, te xāhá<sup>n</sup>-dē xii-gá:

—¿Ndáá sá díu-n cūu-n téé yindaha ñaha xii ñáyiú isráel-á<sup>n</sup>? —cachí-dé xāhá<sup>n</sup>-dē xii-gá.

Te Jèsús ní xāhá<sup>n</sup>-gá xii-dé:

—Diu-í yindaha-í-yu —cachí-gá xāhá<sup>n</sup>-gá xii-dé.

<sup>12</sup> Te cue dútú cúnúu ndíhi cue téé cūu sacuéhé núú ñáyiú isráel sácá<sup>n</sup> cuéchi-güedé núú tē Pilatú cuendá Jèsús, dico mee-gá ní ñ<sup>n</sup> tnúhu ñá túú ní cáhá<sup>n</sup>-gá. <sup>13</sup> Te tē Pilatú ní xāhá<sup>n</sup>-dē xii-gá:

—Cáhá<sup>n</sup>, ná cuendá ñá túú cáhá<sup>n</sup>-n, te cundehe ná ndéé duha titní cuéchi dáca cue téé-a díquí-n —cachí-dé xāhá<sup>n</sup>-dē xii-gá.

<sup>14</sup> Dico Jèsús ñá túú tnáhi ní cáhá<sup>n</sup>-gá, te tē Pilatú téé cūu gobiernú-á<sup>n</sup> ío ní cuñúhu-dé sá dúcá<sup>n</sup> ñá túú tnáhi ní cáhá<sup>n</sup>-gá.

*Ní quide ndáá-güedé sá cahni-güedé Jèsús*

(Mr. 15:6-20; Lc. 23:13-25; Jn. 18:38-19:16)

<sup>15</sup> Te ndi tnáhá nduu vío pascuá dácácu tē Pilatú téé cūu gobiernú-á<sup>n</sup> ñ<sup>n</sup> téé yíhi ve-caá chi duca<sup>n</sup> tnáhi quide-dé, te mee ñáyiú cáhá<sup>n</sup>-yu te núu ndédacáa téé yíhi ve-caá-á<sup>n</sup> cácu-dé te téé-á<sup>n</sup> dácácu-dé. <sup>16</sup> Te dáva-á<sup>n</sup> yíhi ñ<sup>n</sup> téé nani Barrabás ve-caá, te téé-á<sup>n</sup> ío cuendú-dé sá ío nehé ní quide-dé. <sup>17</sup> Te ní nataká nchaa ñáyiú, te tē Pilatú ní xicá<sup>n</sup> tnúhú-dé núú-yu, te xāhá<sup>n</sup>-dē:

—¿Ndédacáa núú úú cue téé-a cuini-ndó dácácu-í-güedé-í? ¿Tē Barrabás á<sup>n</sup> Jèsús téé nani Cristú? —cachí-dé xāhá<sup>n</sup>-dē xii-yu.

<sup>18</sup> Te duca<sup>n</sup> ní cáhá<sup>n</sup> tē Pilatú, chi ní cutnùni iní-dé sá dicó sá cuedú iní-güedé duca<sup>n</sup> ní quide-güedé ní sáha cuendá ñáhá-güedé xii Jèsús núú-dé.

<sup>19</sup> Te nini núcóo tē Pilatú núú xèhndé-dé cuéchi ní tendaha ñádhí-dé tnúhu cuáhá<sup>n</sup> núú-dé, te duha nduu tnúhu ní tendaha-a<sup>n</sup>:

“Vá caní iní-n ná cada-n téé ní taxi cuendá ñáhá-güedé xii-n, téé ñá túú tnáhi cuéchi-xi, chi icuini ío nehé ní dácóto ñaha saní-í cuendá-dé”, duha nduu tnúhu ní xāhá<sup>n</sup>-a<sup>n</sup> xii tē Pilatú.

<sup>20</sup> Dico cue téé cūu dútú cúnúu, ndíhi cue téé cūu sacuéhé núú ñáyiú isráel ní xāhá<sup>n</sup>-güedé xii ñáyiú sá ná cuñáhá-yu xii tē Pilatú dácácu-dé tē Barrabás te cahni-dé Jèsús, te ní quide-yu nācuáa ní xāhá<sup>n</sup>-güedé.

<sup>21</sup> Te tē Pilatú-á<sup>n</sup> ní xāhá<sup>n</sup> tūcu-dé xií-yu:

—¿Ndédacáa núú úú cue téé-a cuini-ndó dácácu-í? —cachí-dé xāhá<sup>n</sup>-dē xii-yu.

Te ní xāhá<sup>n</sup>-yu xii-dé:

—Tē Barrabás dácácu-n —cachí-yu xāhá<sup>n</sup>-yu xii-dé.

<sup>22</sup> Te tē Pilatú ní xicá<sup>n</sup> tnúhú-dé núú-yu, te xāhá<sup>n</sup>-dē:

—¿Te ná cuini-ndó càda-í Jèsús téé nani Cristú téé cachí sá Yá Ndióxi ní tendaha ñaha xii-dé véxi-dé ñuyiú-a-í? —cachí-dé xāhá<sup>n</sup>-dē xii-yu.

Te nchaa-yu ní cáhá<sup>n</sup>-yu, te xāhá<sup>n</sup>-yu:

—Cata caa-dé núú cùrúxí —cachí-yu xāhá<sup>n</sup>-yu xii-dé.

<sup>23</sup> Te tē Pilatú ní xāhá<sup>n</sup> tūcu-dé xií-yu:

—¿Te ná cúu cuéchi ní quide-dé núu duca<sup>n</sup> cuini-ndó càda-í-dé-í? —cachí-dé xāhá<sup>n</sup>-dē xii-yu.

Dico nchaa-yu uu<sup>n</sup>-gá níhi ní cáhá<sup>n</sup>-yu, te xāhá<sup>n</sup>-yu xii-dé:

—¿Cata caa-dé núú cùrúxí! —cachí-yu xāhá<sup>n</sup>-yu xii-dé.

<sup>24</sup> Te tē Pilatú ní cutnùni iní-dé sá vā níhí-dé nācuáa cada-dé, chi uu<sup>n</sup>-gá ní nguíta ñáyiú xīcuáá-yu, te xiá<sup>n</sup> ní xicá<sup>n</sup>-dē ndute ní ndáhá-dé núú nchaa ñáyiú, te ní xāhá<sup>n</sup>-dē xii-yu:

—Téé-a cūu-dé ñ<sup>n</sup> téé ñá túú tnáhi cuéchi-xi, te nchóhò cuini-ndó sá cūu-dé, dico diu-ni mee-ndo cuidó yáhu-ndo-dé chí yúhú vá cuidó yáhu-í-dé —cachí-dé xāhá<sup>n</sup>-dē xii-yu.

<sup>25</sup> Te nchaa-yu ní xāhá<sup>n</sup>-yu xii-dé:

—¿Diu nchúhú ndíhi cue déhe-ndí cuidó yáhu-ndí-dé! —cachí-yu xāhá<sup>n</sup>-yu.

<sup>26</sup> Te sáta dúcá<sup>n</sup> tē tē Pilatú ní dácácu-dé tē Barrabás, te ní táuchíú-dé ní caní-güedé Jèsús. Te sáta dúcá<sup>n</sup> ní quide ñaha-güedé xii-gá, te ní táuchíú-dé candeca ñaha-güedé xii-gá quíhí<sup>n</sup> cata caa ñaha-güedé xii-gá núú cùrúxí.

<sup>27</sup> Te cue téé cūu sandadú tē Pilatú ndécá-güedé Jèsús cuánguihu xití vehe cànu cuu cuendá-dé, te cue téé cūu sandadú-á<sup>n</sup> ní cana-güedé dava-gá cue sandadú núú dúcá<sup>n</sup> ndéca-güedé Jèsús cuánguihu-á<sup>n</sup>. <sup>28</sup> Te xiá<sup>n</sup> ní taunu-güedé dóo-gá, te ní dácuíhú ñaha-güedé xii-gá ñ<sup>n</sup> dóo tícuèhé víhí. <sup>29</sup> Te ní cadúha-güedé ñ<sup>n</sup> coroná iñu ní chíhi-güedé díquí-gá, te ní chitná-güedé ñ<sup>n</sup> carrútí

ndaha cùha-gá, te ní ngúíñí xítí-güedé núu-gá cùdíquí ndeé ñáhá-güedé xii-gá, te xáha<sup>n</sup>-güedé:

—Ílo càhnu cuu yohó té yíndaha ñaha xii ñáyiú isráél! —cáchi-güedé xáha<sup>n</sup>-güedé xii-gá.

<sup>30</sup> Te ní tiú díí ñáhá-güedé xii-gá, te ní quehe<sup>n</sup>-güedé carrúti sá ní sáñaha-güedé xii-gá te ní ducu<sup>n</sup>-güedé díquí-gá. <sup>31</sup> Te sáta ní yáha ní cudíquí ndeé ñáhá-güedé xii-gá, te ní nataunuu ñaha-güedé xii-gá dóo tícuèhé víhí sá ní dácuíhñú ñaha-güedé xii-gá, te ní dándúnuu ñaha-güedé xii-gá dóo meé-gá, te dátmúni ndécá ñaha-güedé cuáhá<sup>n</sup> núu cáta cãa ñaha-güedé xii-gá núu cùrúxi.

*Sata caa-güedé Jèsús núu cùrúxi*  
(Mr. 15:21-32; Lc. 23:26-43; Jn. 19:17-27)

<sup>32</sup> Te ñuhu-güedé ndihi-gá ichi, te ní naníhí-güedé ñ<sup>n</sup> tée ñuu Cirené nání-dé Xímú, te téé-á<sup>n</sup> ní quide yica-güedé ní xido-dé cùrúxi sá nchídó Jèsús.

<sup>33</sup> Te ní sáá-güedé ndihi-gá ñ<sup>n</sup> xichi núu nání Gólgotá, te tnúhu-á<sup>n</sup> queé-xí: Núu nání yíqui díquí ndíyi, duha queé-xi tnúhu-á<sup>n</sup>. <sup>34</sup> Te xiá<sup>n</sup> sáñaha-güedé ndudi úa coho-gá ní cùu, te ñá túú ní xihí-gá chi dico-ni ní xito ndeé-gá.

<sup>35</sup> Te ní sata caa ñaha-güedé xii-gá núu cùrúxi, te sáta dúcá<sup>n</sup> te cue téé cùu sandadú-á<sup>n</sup> ní xito ndeé-güedé núu ndédacãa-güedé cuu cuendá-güedé dóo-gá. Te duca<sup>n</sup> ní cuu chí ní quee ndáá-xi nacúaa ní cáhá<sup>n</sup> ñ<sup>n</sup> téé ní xóo cáhá<sup>n</sup> tnúhu Yá Ndióxi ndeé sanaha yòdo tnuní núu tütú-gá, te duha cáchi-xi: “Ní xito ndeé-güedé núu ndédacãa-güedé cuu cuendá-güedé dóo-gá”, duha ní cáchi téé-á<sup>n</sup> te duca<sup>n</sup> ní ngódo tnuní núu tütú-gá. <sup>36</sup> Te sáta dúcá<sup>n</sup> ní quide-güedé, te ní ngóo-güedé ndeé ñáhá-güedé xii-gá. <sup>37</sup> Te ní taxi ndecu-güedé ñ<sup>n</sup> sá ndeé lètrá ndaa díquí-gá. Te lètrá-á<sup>n</sup> cáhá<sup>n</sup>-xi ná cuendá duca<sup>n</sup> ní quide ñaha-güedé xii-gá, te duha cáhá<sup>n</sup> lètrá-á<sup>n</sup>: “Tée-a cùu-dé téé yíndaha ñaha xii ñáyiú isráél”, duha cáchi-xi. <sup>38</sup> Te tnáhá úú cue téé cùu ñadúhú ní sata caa-güedé ñ<sup>n</sup>-ni núu cùrúxi tucu, te ñ<sup>n</sup>-dé ní sata caa-güedé xio cùha-gá, te ingá-dé ní sata caa-güedé xio dàtni-gá. <sup>39</sup> Te nchaa ñáyiú yáha yatni núu tácaa-gá-á<sup>n</sup>, te dàcuico-yu díquí-yu ndehe ñáhá-yu xii-gá, te xícuehé ñáhã-yu. <sup>40</sup> Te xáhã<sup>n</sup>-yu xii-gá:

—Yohó cáchi-n sá dãngoyo-n veñúhu càhnu sá ío cùnuu, te dandãa-n ingá veñúhu saa, te xítí úní-n nduu sa nadaxínu-n, te vitna tanuu núu cùrúxi-á<sup>n</sup> dàcácu-n mèe-n te núu ndisa sá Dèhe Yá Ndióxi cùu-n —cáchi-yu xáhã<sup>n</sup>-yu xii-gá.

<sup>41</sup> Te ñ<sup>n</sup>-ni duca<sup>n</sup> cùdíquí ndeé ñáhá cue téé cùu dútú cùnùu xii-gá, ndihi cue téé

dàcuaha ñaha xii ñáyiú nchaa tnúhu ní chídó tnuní ndíi Moisés, ndihi cue téé cùu fariséú, ndihi cue téé cùu sacuéhé núu ñáyiú isráél, te Xítnaha-güedé:

<sup>42</sup> —Tée-a ní ndacu-dé ní dácácu-dé dava ñáyiú, te mee-dé ñá ndácú-dé dàcácu nihnu-dé meé-dé. Te núu ndisa sá cùu-dé téé yíndaha ñaha xii ñáyiú isráél, te na cùndehe-o nuu-dé núu cùrúxi-a cuendá quíndáá iní-ó-dé. <sup>43</sup> Te cáchi-dé sá sándáá iní-dé Yá Ndióxi, te mee-gá ná dácácu ñaha-gá xii-dé te núu cùndahú iní ñáhá-gá, chi mee-dé cáchi-dé sá Dèhe-gá cùu-dé —cáchi-güedé xítnaha-güedé.

<sup>44</sup> Te ndeé tnáhá cue téé cùu ñadúhú tácaa xio xio díñi-gá xícuehé ñáhá-güedé xii-gá.

*Ní xihí Jèsús*  
(Mr. 15:33-41; Lc. 23:44-49; Jn. 19:28-30)

<sup>45</sup> Te òré ní cuu cuádava nduu te ní cunee nihíi ñuyúu, te duca<sup>n</sup>-ní cãa ní cuu caá úní sacuaa. <sup>46</sup> Te òré sa ta cùyatni cuu caá úní sacuaa-á<sup>n</sup>, te nihí ní cáhá<sup>n</sup> Jèsús, te cáchi-gá:

—Èlí, Èlí, ¿láma sabactani? —cáchi-gá.

Te tnúhu-á<sup>n</sup> queé-xí: Ndióxi mèe-í, Ndióxi mèe-í, ¿ná cuendá ní dáñá ñaha-n xii-í?, duha queé-xi tnúhu-á<sup>n</sup>.

<sup>47</sup> Te dava cue téé xíndecu yatni núu tácaa-gá-á<sup>n</sup> ní tecú dóho-güedé nacúaa ní cáhá<sup>n</sup>-gá, te ní xítnaha-güedé:

—Tée-a cãna-dé té Èliás —cáchi-güedé Xítnaha-güedé.

<sup>48</sup> Te òré-ni-á<sup>n</sup> ní quene cunu ñ<sup>n</sup> cue téé xíndecu-á<sup>n</sup> ní quehe<sup>n</sup>-dé luha cáchi, te ní chindóyo-dé xítí ndudi íá, te ní chinenu-dé díquí ñ<sup>n</sup> yutnu cãni te ní ndocani-dé ní chíhí-dé yuhu-gá. <sup>49</sup> Te dava-güedé ní xáha<sup>n</sup>-güedé xii téé-á<sup>n</sup>:

—Cundetú tnaa na cùndehe-o nacoto núu quixi té Èliás dàcácu ñaha-dé xii-dé —cáchi-güedé xáha<sup>n</sup>-güedé xii téé-á<sup>n</sup>.

<sup>50</sup> Te Jèsús nihí ní cana saa-gá, te ní xihí-ni-gá. <sup>51</sup> Te sáta dúcá<sup>n</sup> te ní ndátá dóo cùu còrtiná xítí veñúhu càhnu sá ío cùnuu ní queé dava ndáá, te ndaa núu ñnu ní ngúita-xi ní ndátá, te ní tnáa, te dava cava nãhnu ní táhú. <sup>52</sup> Te dava yaú núu yíndúxi ñáyiú ní xihí ní sándáá iní ñáhá xii Yá Ndióxi ní nacaá<sup>n</sup> te ní ndotó-yu. <sup>53</sup> Te sáta ní yáha ní ndoto Jèsús, te cue ñáyiú ní ndoto-á<sup>n</sup> cuãnguihú-yu xítí ñuu Jerusálén, te cue ñáyiú ñuu-á<sup>n</sup> ío vãi-yu ní xiní-yu cue ñáyiú duca<sup>n</sup> ní ndoto-á<sup>n</sup>.

<sup>54</sup> Te sá dúcá<sup>n</sup> nãndi ní quide-xi, ndihi sá dúcá<sup>n</sup> ní tnáa xiá<sup>n</sup> ío ní yuhú téé cùu capitá<sup>n</sup> ndihi nchaa dava-gá cue téé ndecu ndihi-dé ndeé-güedé yiqui cùñú Jèsús, te ní xítnaha-güedé:

—Sá ndáá ndisa sá díú tée-a cùu-dé Dèhe Yá Ndióxi ní cùu —cachí-güedé xítnaha-güedé.

<sup>55</sup> Te xica xĩnutnĩ vãi ñáiyu ñĩhĩ ndéhě-yu nchaa ñacuáa ní quide ñaha-güedé xii Jèsús, te ñáiyu-án cùŷ-yu ñáiyu ní chindèé-yu Jèsús, te ndéé distritú Gallleá ní chinchicú<sup>n</sup> ñáhá-yu xii-gá. <sup>56</sup> Te tnuú ñáiyu-án tnàhá tá Màriá Magdalená, ndihĩ tá Màriá náná tē Jàcobó ndihĩ tē Chèè, ndihĩ náná cue dēhe tē Zebèdeú.

*Chindúxi-güedé Jèsús*

(Mr. 15:42-47; Lc. 23:50-56; Jn. 19:38-42)

<sup>57</sup> Te ndècu ñ<sup>n</sup> tēe cuica nani-dé Chèè te cùu-dé tēe ñuú Arimàtēa, te tnàhá-dé ní tnàhá tnúhu-dé ndihĩ Jèsús. Te òrē sa ní cuaa, <sup>58</sup> te ní sáhá<sup>n</sup>-dé núú tē Pilatú, te xáha<sup>n</sup>-dē núu vā cündèe iní-dé ñaha-dé chindúxi-dé yiqui cùñú Jèsús. Te tē Pilatú-án ní sáha-dé tnúhu, te ní táuchíú<sup>n</sup>-dē sá cuáha cuendá-güedé tē Chèè-án yiqui cùñú-gá. <sup>59</sup> Te tē Chèè-án ní quehe<sup>n</sup> cuendá-dé yiqui cùñú-gá, te ní chiducú<sup>n</sup>nuu-dé ñ<sup>n</sup> dóo cuixí<sup>n</sup> dóo cándoo. <sup>60</sup> Te sa nchĩ ñ<sup>n</sup> yau sáá ní caá<sup>n</sup> tē Chèè-án ñ<sup>n</sup> yiqui naha cava te xíá<sup>n</sup> cùú cuendá-dé, te yau-án ní chihĩ-dé yiqui cùñú Jèsús, te dátñú ní sadi-dé ñ<sup>n</sup> yúú cáhnú yúú quèhē<sup>n</sup> yuhu yau-án, te ní xica-dé cuánuhú-dé. <sup>61</sup> Te tnàhá tá Màriá Magdalená, ndihĩ ingá xichĩ nání Màriá ní quexio-yu ní ngóo-yu yatni núú nchĩ yau-án.

*Cue tēe ndéé yau núú yihĩ yiqui cùñú Jèsús*

<sup>62</sup> Te sátá ní yáha ní quide túha ñáiyu nchaa sá nándihĩ-yu nduu tnèe nduu ndetatú-yu-án, te diu-ni nduu ndetatú-yu-án ní sáhá<sup>n</sup> cue dútú cúnú, ndihĩ cue tēe cùu fariséú ní cáhá<sup>n</sup> ndihĩ-güedé tē Pilatú. <sup>63</sup> Te xáha<sup>n</sup>-güedé xii-dé:

—Yöhó tēe cúnú, véxi-ndí càchĩ tnúhu-ndí sá ní ndacu iní-ndí sá tēe ndehnde ní xihĩ-án càchĩ-dé òrē ndécú-gá-dé sá ndúu úní sá cùu-dé, tē ndoto-dé. <sup>64</sup> Te tendaha-n cùe tēe na quihĩ<sup>n</sup>-güedé cundeé-güedé yuhu yau núú ní chihĩ-güedé yiqui cùñú-dé, chí na cuáhá<sup>n</sup> quihĩ<sup>n</sup> cue tēe ní xica cuu ndihĩ-dé duhu-güedé yiqui cùñú-dé, te cùñaha-güedé xii ñáiyu sá ní ndoto-dé. Chí núu duca<sup>n</sup> na cáda-güedé te io-gá dandáhú-güedé cue ñáiyu dàcúxí dàtná ní quide mee tēe ní xihĩ-án —càchĩ-güedé xáha<sup>n</sup>-güedé.

<sup>65</sup> Te tē Pilatú ní xáha<sup>n</sup>-dē xii-güedé:

—Náu cue sandádú-a candeca-ndo-güedé quihĩ<sup>n</sup>, te cadí váha-ndo ndihĩ-güedé yuhu yau-án ñacuáa tau-xi cunduu, te na cündèe-güedé ñacuáa sání iní-ndó cunduu —cachĩ-dé xáha<sup>n</sup>-dē xii-güedé.

<sup>66</sup> Te cue tēe-án ní xica-güedé cuáhá<sup>n</sup>-güedé, te ní tee-güedé ñ<sup>n</sup> sēñá yúú ndedí yēhe yau-án, te ní dándōo-güedé cue sandádú-án ndéé-güedé yau-án, te duca<sup>n</sup> ní quide-güedé cuendá sá vā yō quihĩ<sup>n</sup> naca<sup>n</sup> yau-án.

## 28

*Ní ndoto Jèsús*

(Mr. 16:1-8; Lc. 24:1-12; Jn. 20:1-10)

<sup>1</sup> Te sátá ní yáha nduu ndetatú ñáiyu, te ndumíngú nehé víhĩ-ní ní xica tá Màriá Magdalená ndihĩ ingá xichĩ nání Màriá cuángotó-yu yau núú ní chihĩ-güedé yiqui cùñú Jèsús. <sup>2</sup> Te uu<sup>n</sup>ni níhi víhi ní tnáa, te òrē duca<sup>n</sup> ní quide-xi chí ñ<sup>n</sup> espíritú xínú cuèchi núú Yá Ndióxi ní quexio-xi núú dúcá<sup>n</sup> nchĩ yau núú ní chihĩ-güedé yiqui cùñú Jèsús, te ní xócání espíritú-án yúú ndedí yēhe yau-án te ní ngóo-xi núú yúú-án. <sup>3</sup> Te dátñá dátása<sup>n</sup>-xi òrē sáá nduté dūca<sup>n</sup> dátása<sup>n</sup>-xi núú espíritú-án, te dóo níhnú-xi cuixí<sup>n</sup> quiyí. <sup>4</sup> Te òrē duca<sup>n</sup> ní quide-xi te cue sandádú ndéé yau-án ní quide ñaha-xi xii-güedé sá ní yuhú-güedé, te ní nduá-güedé, te ní xita sá xini tnúni-güedé. <sup>5</sup> Te espíritú-án ní xáha<sup>n</sup>-xi xii cue ñáiyu ñĩhĩ cuángoto yau-án:

—Nchòhó ñáiyu ñĩhĩ véxi coto yau-a, vā yuhú-ndó chí yuhú cùtnúni iní-í sá nchòhó véxi-ndo nánducu-ndo yiqui cùñú Jèsús Yáa ní xihĩ núú cùrúxí. <sup>6</sup> Dico Yaa-án chí ñá túú-gá ndécú yiqui cùñú-gá iha, chí sa ní ndoto-gá, te diu duca<sup>n</sup> ní cachĩ-gá sá ndótó-gá cùtnàhá vátá cùu-gá, te chí táquixi cundehe-ndo núú ní sacá<sup>n</sup>-güedé yiqui cùñú-gá ní cùu te quini-ndó nã ñá túú-gá. <sup>7</sup> Te vitna io ndihĩ chí cuáhá<sup>n</sup> núú xĩndecu cue tēe ní xica cuu ndihĩ-gá, te duha cùñaha-ndo xii-güedé: “Ní ndoto Jèsús Yáa ní xihĩ ní cùu, te codonú-gá núú-ndó quihĩ<sup>n</sup> distritú Gallleá tē yacá<sup>n</sup> quini-ndó-gá”, duha cùñaha-ndo xii-güedé. Duha ndúu tnúhu ní cachĩ tnúhu-í xii-ndo —càchĩ espíritú-án xáha<sup>n</sup>-xi xii cue ñáiyu ñĩhĩ-án.

<sup>8</sup> Te cue ñáiyu ñĩhĩ-án ní natñi-yu ichi, te súni ndihĩ cuánuhú-yu núú xĩndecu cue tēe ní xica cuu ndihĩ Jèsús cuendá nacani tnúhu-yu núú-güedé ñacuáa ní xáha<sup>n</sup> espíritú-án xii-yu, te cuèi ní yuhú-yu dico súni cùdñí iní-yu. <sup>9</sup> Te ichi ñhúhú-yu cuánuhú-yu, te na iní-yu ní quexio Jèsús núu-yu ní dándácō váha ñaha-gá xii-yu. Te ñáiyu-án ní ngúñí xití-yu núú-gá, te ní numi ñáhá-yu xii-gá, te ní chinuhu ñáhá-yu. <sup>10</sup> Te ní xáha<sup>n</sup>-gá xii-yu:

—Vá yuhú-ndó, chí cuáhá<sup>n</sup> cùñaha-ndo xii cue tēe ní xica cuu ndihĩ-í sá ná quihĩ<sup>n</sup>-güedé distritú Gallleá, te yacá<sup>n</sup> quini ñáhá-güedé xii-í —cachĩ-gá xáha<sup>n</sup>-gá xii-yu.

*Ñacuáa ndúu tnúhu ní nacani cue sandádú*

<sup>11</sup> Te nini ñhúhú cue ñáiyu ñĩhĩ-án ichi cuánuhú-yu, te dava cue sandádú cue tēe ndéé yau-án ní cùu ní xica-güedé cuánuhú-güedé ñuú cuendá nacani tnúhu-güedé núú cue tēe cùu dútú cúnú ñacuáa ní cuu. <sup>12</sup> Te cue tēe cùu dútú



cúnù-á<sup>n</sup> nǐ quide-güedé jùndá ndihi cue tée cùu sacuéhé nùú ñáyi isràél, te ní ndatnúhu-güedé nàcuáa cada-güedé, te ní quide ndáá-güedé ndihi cue sandàdú-á<sup>n</sup> sǎ cuǎñaha-güedé vǎi díhú<sup>n</sup> cuèndá dacuàndehnde-güedé. <sup>13</sup> Te ní xáha<sup>n</sup>-güedé xii cue sandàdú-á<sup>n</sup>:

—Cuini-ndí sǎ vǎ càhá<sup>n</sup> ndáá-ndó nùú ñáyi nàcuáa ní cuu, chi cùñaha-ndo xii-yu sǎ òré xidí-ndó nǐ quixi cue tée ní xica cuu ndihi-dé ní dúhú-güedé yiqui cùñú-dé néhé-güedé cuáhá<sup>n</sup>, duha cùñaha-ndo xii-yu. <sup>14</sup> Te núu na nihí té Pilatú tée cùu gobiernú tnúhu nàcuáa cùñaha-ndo xii ñáyi, te nchúhú cada ndáá-ndí ndihi-dé cuèndá sǎ ñà túu nǎ cada ñaha-dé xii-ndo —càchí-güedé xáha<sup>n</sup>-güedé xii cue sandàdú-á<sup>n</sup>.

<sup>15</sup> Te cue sandàdú-á<sup>n</sup> nǐ quehe<sup>n</sup> cuèndá-güedé díhú<sup>n</sup>, te ní xica-güedé cuáhá<sup>n</sup>-güedé te ní cáhá<sup>n</sup>-güedé nàcuáa ní xáha<sup>n</sup> cuè téé-á<sup>n</sup> càhá<sup>n</sup>-güedé. Te nchaa ñáyi isràél ní nihí-yu tnúhu ní cáhá<sup>n</sup>-güedé-á<sup>n</sup>, te diu-ni tnúhu-á<sup>n</sup> càhá<sup>n</sup>-yu ndéé vitna.

*Jèsús xáha<sup>n</sup>-gǎ xii cue téé ní xica cuu ndihi-gǎ nàcuáa ndùu chiw<sup>n</sup> cada-güedé*

*(Mr. 16:14-18; Lc. 24:36-49; Jn. 20:19-23)*

<sup>16</sup> Te ndí ùxí ñ<sup>n</sup> cue téé ní xica cuu ndihi Jèsús ní xica-güedé cuáhá<sup>n</sup>-güedé ñ<sup>n</sup> yucu càa distritú Galiléa núu nǐ xáha<sup>n</sup>-gǎ naníhí tnáhá-güedé ndihi-gǎ. <sup>17</sup> Te òré ní xini-güedé Jèsús te ní chíñuhu ñaha-güedé xii-gǎ, dico dava-güedé sǎni ñ<sup>n</sup> sǎni úú iní-güedé nùu diu-gǎ àdi ñǎ díú-gǎ. <sup>18</sup> Te Jèsús ní sándehe yatni-gǎ ndéé núu-güedé, te ní xáha<sup>n</sup>-gǎ xii-güedé:

—Yúhú ndécú ndihi-í tnúhu ndee iní táxí tnùn-í cuèi andiu te cuèi ñuyú-a. <sup>19</sup> Te vitna tàuchiu<sup>n</sup>-í sǎ quihí<sup>n</sup>-ndó ñihí ñuyú cáhá<sup>n</sup>-ndó tnúhu-í núu ñáyi cuèndá tuha ñàhá-yu xii-í, te dacuàndute-ndó-yu. Te òré duca<sup>n</sup> càda-ndo, te cacunehe-ndo tǎtá-ó Dütú Ndiòxí ndihi yúhú Yáa cúu Dèhe-gǎ ndihi Espiritú-gǎ. <sup>20</sup> Te cùñaha-ndo xii-yu sǎ ná càdá-yu nchaa nàcuáa sa ní dánèhé ñàhá-í xii-ndo càda-ndo. Te na càchí tnúhu-í sǎ cùndècu ndihi ñaha-ni-í xii-ndo ñuyú-a ndéé ná sǎá nduu nàa-xi —cachí-gǎ xáha<sup>n</sup>-gǎ xii-güedé. Te duca<sup>n</sup> na cùnduu.

## TNÚHU NÍ CHÍDÓ TNÙNÍ TÉ MÁCÚ

*Té Juàá téé dâcuandute ñaha xii ñáyiú cáhá-dé tnúhu Yá Ndióxi xiti yucu*

(Mt. 3:1-12; Lc. 3:1-9, 15-17; Jn. 1:19-28)

<sup>1</sup> Duha ní quesaha tnúhu sá cáhá<sup>n</sup> nâcuáa naníhí tãhú-ó tnúhu Xitohó Jesucrístú Déhe Yá Ndióxi.

<sup>2</sup> Te ndii Chàíá téé ní xóo cáhá<sup>n</sup> tnúhu Yá Ndióxi ndéé sanaha ní chídó tnùnì ndii nâcuáa ní xáha<sup>n</sup> Yá Ndióxi xii Déhe-gá, te duha ní xáha<sup>n</sup>-gá:

Tendaha-í ñ<sup>n</sup> téé codonú-dé núú-n, te dátúha-dé ñáyiú cuèndá tñi-yu tnúhu-n.

<sup>3</sup> Te téé-á<sup>n</sup> quihi-dé xiti yucu te níhi cáhá<sup>n</sup>-dé cúnaha-dé xii ñáyiú:

“Chí dáñá nchàa ichi cuehé ichi duha ndècu-ndo, te tñi-ndo ichi váha, te duca<sup>n</sup> càda-ndo cuèndá cundecu túha-ndo, chí véxi Yaaá lo cùnuu”, duha cúnaha-dé xii-yu.

Duha ndúu tnúhu ní chídó tnùnì ndii Chàíá nâcuáa ní xáha<sup>n</sup> Yá Ndióxi xii Déhe-gá. <sup>4</sup> Te téé dii cuèndá-xi ní ngódo tnùnì-á<sup>n</sup> nánì-dé Juàá, te téé-á<sup>n</sup> ní xíhi-dé xiti yucu ní cáhá<sup>n</sup>-dé tnúhu Yá Ndióxi, te ní xóo dâcuandute-dé ñáyiú, te duha ní xáha<sup>n</sup>-dé xii-yu:

—Chí dândixi túu iní sá ñá túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te duca<sup>n</sup> te Yá Ndióxi cada càhnu iní-gá nchaa yíca cuèchi-ndo —duha ní xáha<sup>n</sup>-dé xii-yu.

<sup>5</sup> Te nchaa ñáyiú distritú Jùdeá, ndihi ñáyiú ñuú Jerusálèn ní sáhá<sup>n</sup>-yu ndéé yúte Jórdán núú ndécú té Juàá ní xíndedóho-yu nchaa tnúhu ní cáhá<sup>n</sup>-dé. Te cue ñáyiú ní náhmá nchaa yíca cuèchi-xi te ní dâcuandute ñaha-dé xii-yu.

<sup>6</sup> Te té Juàá-á<sup>n</sup> ní xihnu-dé dóó idi càméyu, te ñ<sup>n</sup> ñi ní cuu pañú xiti-dé, te ní xóo caxi-dé tíca làngóstá ndihi nduúí ñiñú cuéchi. <sup>7</sup> Te ní xáha<sup>n</sup> tùcu-dé xii ñáyiú:

—Nchicú<sup>n</sup> ñ<sup>n</sup> téé véxi, te téé-á<sup>n</sup> Ìo-gá cúnúu-dé dâcúuxi yúhú, chí yúhú cùú-í ñ<sup>n</sup> téé duu<sup>n</sup> duu<sup>n</sup> ñá túú tãú-í ngúnudeyi-í nandaxi cuèdicó ñiñ nihnu cháú-dé dico quide-í chiú<sup>n</sup>-dé. <sup>8</sup> Te yúhú dâcuandute ñaha-í xii-ndo, dico mee-dé taxi-dé Espiritú Yá Ndióxi cundecu ndihi-ndo —càchí-dé xáha<sup>n</sup>-dé xii-yu.

*Sândute Jesús*

(Mt. 3:13-17; Lc. 3:21-22)

<sup>9</sup> Te dàvá-á<sup>n</sup> ní quee Jesús ñuú Nazàrét ñ<sup>n</sup> ñuú yíndèhu distritú Galileá cuáhá<sup>n</sup>-gá yúte Jórdán. Te yàcá<sup>n</sup> ní dâcuandute ñaha té Juàá xii-gá. <sup>10</sup> Te òré ní nene-gá xiti ndute, te ní

xini-gá nchii andiu, te ní quee Espiritú Yá Ndióxi véxi cuu<sup>n</sup>-xi ngúndecu ndihi ñaha-xi xii-gá, te dàtná cáá ñ<sup>n</sup> lómá cáá Espiritú-á<sup>n</sup> véxi cuu<sup>n</sup>-xi. <sup>11</sup> Te òré-á<sup>n</sup> ní tecú ní cáhá<sup>n</sup> Yá Ndióxi ndéé andiu, te xáha<sup>n</sup>-gá xii Jèsús:

—Yòhó cùú-n Déhe-í téé lo cùu iní-í te lo cùúí iní ñàhà-í xii-n —càchí-gá xáha<sup>n</sup>-gá.

*Sácuíhná quidé yica-xi cada Jesús sá ñá túú tãú-gá cada-gá dico ñá túú ní quide-gá*

(Mt. 4:1-11; Lc. 4:1-13)

<sup>12</sup> Te Espiritú Yá Ndióxi ndécá-xi Jèsús cuáhá<sup>n</sup> ñ<sup>n</sup> xiti yucu. <sup>13</sup> Te xiti yucu-á<sup>n</sup> ió víhi quiti déé<sup>n</sup>, te xiá<sup>n</sup> ndécú Jèsús ní ngúita sácuíhná quidé yica-xi cada-gá ñ<sup>n</sup> sá ñá túú tãú-gá cada-gá dico ñá túú ní sàndáá iní-gá. Te cue espiritú xínú cuèchi núú Yá Ndióxi ní xinu cuechi-xi núú-gá. Te ní xíndecu-gá údico nduu xiti yucu-á<sup>n</sup>.

*Distritú Galileá ní chisaha Jèsús chiú<sup>n</sup> ní tãhú Tãtá-gá Dúú Ndióxi cada-gá*

(Mt. 4:12-17; Lc. 4:14-15)

<sup>14</sup> Te sátá ní ngava té Juàá vecaá, te Jèsús cuáhá<sup>n</sup>-gá distritú Galileá dānehé-gá ñáyiú tnúhu váha, tnúhu sá cáhá<sup>n</sup> nâcuáa ndíhu ndaha ñaha Yá Ndióxi xii-yu. <sup>15</sup> Te xáha<sup>n</sup>-gá xii-yu:

—Vitna sa ní cuyatni nduu ndíhu ndaha ñaha Yá Ndióxi xii-ndo, te chí dáñá nchàa ichi cuehé ichi duha ndècu-ndo, te quindáá iní-ndó tnúhu váha, tnúhu sá cáhá<sup>n</sup> nâcuáa naníhí tãhú-ndó —càchí-gá xáha<sup>n</sup>-gá xii-yu.

*Jèsús cáhá<sup>n</sup>-gá cúmí tñhá cue téé tñi chácá*

(Mt. 4:18-22; Lc. 5:1-11)

<sup>16</sup> Te Jèsús ñúhú-gá ichi cuáhá<sup>n</sup>-gá tá yáha-gá yuhu làgúná Galileá, te ní xini-gá té Xímú ndihi ñani-dé té Ndríxi xidáquée-güedé ñunu-güedé xiti ndute tñi-güedé chácá, chí quiti tñáhi-á<sup>n</sup> cùú chiú<sup>n</sup>-güedé tñi-güedé-di. <sup>17</sup> Te Jèsús ní xáha<sup>n</sup>-gá xii-güedé:

—Chí dáñá chiú<sup>n</sup> quide-ndo-á<sup>n</sup>, te quixi-ndo chitnahá ñáhá-ndó xii-í te taxi-í ingá núú chiú<sup>n</sup> cada-ndo chí quihi<sup>n</sup>-ndó cáhá<sup>n</sup>-ndó ñáyiú cuèndá dâcuahá-yu tnúhu-í —càchí-gá xáha<sup>n</sup>-gá xii-güedé.

<sup>18</sup> Te òré-ni-á<sup>n</sup> ní dáñá cuè téé-á<sup>n</sup> ñunu-güedé te ní tuha ñaha-güedé xii-gá.

<sup>19</sup> Te cuáhá<sup>n</sup>-gá luha-gá, te ní xini-gá té Jácobó ndihi ñani-dé té Juàá ñúhú-güedé xiti Bàrcú-güedé náicu-güedé ñunu-güedé, te ndi ndúú-güedé cùú-güedé déhe té Zebèdeú. <sup>20</sup> Te ní cana ñaha-gá xii-güedé, te ní dándóo-güedé tãtá-güedé ndihi cue téé xinu cuechi núú-güedé xiti Bàrcú, te ní tuha ñaha-güedé xii-gá.

*Ñ<sup>n</sup> téé yíhi ñaha espíritú cundíhi yucu ñávaha*

(Lc. 4:31-37)

<sup>21</sup> Te ní quexio Jesús ndihi cue tée-án ññ nūú ñuú nání Cãpernaúm, te yácá<sup>n</sup> ndécú-gá ní tnahá nduu ndetátú ñáyíu, te cuãnguïhu-gá veñúhu ñáyíu isrâél dânehé ñáhá-gá xii-yu. <sup>22</sup> Te xicuñúhu vihi-yu nchaa tnúhu cáhá<sup>n</sup>-gá, chí quide-gá sá cúu-gá ññ Yaá táxí tnúni vihi, te ñá túú dàcuaha ñaha-gá xii-yu dàtná dàcuaha ñaha cue tée dàcuaha ñaha xii-yu nchaa tnúhu ní chídó tnúni ndíi Moisés. <sup>23</sup> Te xiti veñúhu-án ndécú tnahá ññ tée yihi ñaha ññ espíritu cundíhi yucu ñávãha, te espíritu-án ní quide-xi níhi ní cáhá<sup>n</sup> tée-án, te xãha<sup>n</sup>-dẽ xii Jësús:

<sup>24</sup> —¿Te ná cuini yòhó Jësús tée ñuú Nazaréet cada ñaha-n xii-ndí nūú vëxi-n nūú ndécú-ndí-i? ¿Á<sup>n</sup> vëxi-n dànaa ñaha-n xii-ndí? Chí yúhú xini ñáhã-í xii-n sã cúu-n ññ tée ñá túú tnahí cuëchi-xi, chí núú Yã Ndióxi ní quee-n vëxi-n ñuyú-a —cächí-dẽ xãha<sup>n</sup>-dẽ xii-gá.

<sup>25</sup> Dico Jësús ní tenãá-gá espíritu cundíhi yucu ñávãha-án, te xãha<sup>n</sup>-gá:

—¿Cadi yuhu-n, te taquëe yiqui cuñú tée-á<sup>n</sup>! —cächí-gá xãha<sup>n</sup>-gá xii espíritu-án.

<sup>26</sup> Te espíritu cundíhi yucu ñávãha-án ní dácúyihí ñáhã-xí xii tée-án, te ní dácánã sãa ñaha-xi, te ní quee-xi yiqui cuñú-dẽ cuáhã-xi. <sup>27</sup> Te nchaa ñáyíu xĩndecu-án ïo ní cuñúhu-yu, te ní xitnahã-yu:

—¿Te nása ndüu-tu sã quidé tée-a? ¿Ndudú sãá cáhá<sup>n</sup>-tu-dé sánúu? Te quide-dé dàtná quidé ññ tée cūnuu vihi, chí cáhá<sup>n</sup>-ni-dé te sãndãá ini ñáhã nchãa espíritu cundíhi yucu ñávãha —cächí-yu xitnahã-yu.

<sup>28</sup> Te ïo ndíhi ní níhi nchaa ñáyíu dava-gá ñuú yĩndëhu distritú Galilea tnúhu nchaa nãcuãã cáhá<sup>n</sup> Jësús ndihi nchaa sã quidé-gã.

*Jësús quidé tãtna-gã nãã ñadĩhí té Ximú*  
(Mt. 8:14-15; Lc. 4:38-39)

<sup>29</sup> Te òré ní ndee Jësús veñúhu cue ñáyíu isrâél, te cuáhã<sup>n</sup>-gá ndihi té Jacobo ndihi té Juãã vehe té Ximú ndihi té Ndríxi. <sup>30</sup> Te nãã ñadĩhí té Ximú cùhú-a<sup>n</sup> ñíhu vihi-a<sup>n</sup> cahni, te ndíhi-ni ní xãha<sup>n</sup>-güedẽ xii Jësús sã cùhú-a<sup>n</sup>. <sup>31</sup> Te ní sãhá<sup>n</sup>-gã núú cáã ñaha cùhú-a<sup>n</sup> te ní tñi<sup>n</sup>-gã ndaha-a<sup>n</sup> ní ndocani ñaha-gã xii-a<sup>n</sup>. Te òré-ni-án ní nchico-a<sup>n</sup> cahni, te ní ngüíta-a<sup>n</sup> xinu cuechi-a<sup>n</sup> núú-güedẽ ndíhi-gã.

*Jësús quidé tãtna-gã vai ñáyíu cùhú*  
(Mt. 8:16-17; Lc. 4:40-41)

<sup>32</sup> Te òré sa cuini-xi cundiqui<sup>n</sup> te ní quexio ñáyíu núú ndécú Jësús, te nchaa ñáyíu cùhú ní dátacã-yu ndecã-yu ní sãá núú-gã, te tnahã cue ñáyíu yihi ñaha espíritu cundíhi yucu ñávãha ndecã-yu ní sãá núú-gã. <sup>33</sup> Te nchaa ñáyíu ñuú-án ní chítú ñíhñú-yu yuyëhe vehe núú ní quexio Jesús. <sup>34</sup> Te Jësús ní quide tãtna-gã nchaa ñáyíu cùhú cuëí ndí

díi<sup>n</sup> ndí díi<sup>n</sup> nūú cuëhé tnahã-yu ññ ññ-yu, te ní queñuhu-gã nchaa espíritu cundíhi yucu ñávãha yihi ñaha xii ñáyíu, te ñá túú ní dàña-gã cáhá<sup>n</sup> cue espíritu cundíhi yucu ñávãha-án ní ññ tnúhu, te duca<sup>n</sup> ní quide-gã chí cue espíritu-án sa xini-xi yoo cùu-gã.

*Jësús cáhá<sup>n</sup>-gã tnúhu Yã Ndióxi distritú Galilea*

(Lc. 4:42-44)

<sup>35</sup> Te òré vátã tũndaã váha-gã ní ndacoo Jësús cuáhã<sup>n</sup>-gã ññ xio yuhu ñuú núú ñã túú ñáyíu ndecu cuendã yácã<sup>n</sup> cáhá<sup>n</sup> ndíhi-gã Yã Ndióxi. <sup>36</sup> Te té Ximú ndihi cue tée cundíhi-dé nãnducu ñaha-güedẽ xii-gã. <sup>37</sup> Te òré ní naníhí ñáhã-güedẽ xii-gã, te ní xãha<sup>n</sup>-güedẽ:

—Nchaa ñáyíu nãnducu ñahã-yu xii-n —cächí-güedẽ xãha<sup>n</sup>-güedẽ xii-gã.

<sup>38</sup> Te ní xãha<sup>n</sup>-gã xii-güedẽ:

—Chí ná quihí<sup>n</sup>-ó nchãa ñuú xĩndãa yatni-a, chí danëhé-í ñáyíu tnúhu Yã Ndióxi chí ñuú chiñu-án vëxi-í —cächí-gã xãha<sup>n</sup>-gã xii-güedẽ.

<sup>39</sup> Te Jësús tá xica ndodo-gã cuáhã<sup>n</sup> nchaa ñuú yĩndëhu distritú Galilea dãnehé-gã ñáyíu, te ndí tnahã ññ ññ núú sãã-gã te duca<sup>n</sup> cuãnguïhu-gã veñúhu-yu dãnehé ñáhã-gã xii-yu tnúhu Yã Ndióxi, te cue ñáyíu yihi ñaha espíritu cundíhi yucu ñávãha ta queñuhu-gã nchaa espíritu-án yiqui cuñú-yu cuáhã<sup>n</sup>.

*Jësús quidé tãtna-gã ññ tée tnahã cuëhé sã dátëhyú ñihnu-xi yiqui cuñú-ó*

(Mt. 8:1-4; Lc. 5:12-16)

<sup>40</sup> Te ní quexio ññ tée tnahã cuëhé sã dátëhyú ñihnu-xi yiqui cuñú-ó núú Jësús, te ní ngüíñí xití-dẽ núú-gã cáhá<sup>n</sup> ndáhú-dé, te xãha<sup>n</sup>-dẽ xii-gã:

—Vëxi-í cáhá<sup>n</sup> ndáhú-í núú-n nūú vá cundëe ini-n càda tãtna ñaha-n xii-í chí cūtnuní ini-í sã ndácú-n —cächí-dé xãha<sup>n</sup>-dẽ xii-gã.

<sup>41</sup> Te Jësús ní cundáhú ini ñáhã-gã xii-dé te ní dácãã-gã ndaha-gã ní tendaha ñaha-gã xii-dé, te xãha<sup>n</sup>-gã:

—Cuu cada tãtna ñaha-í xii-n, te vitna ndúha-n —cächí-gã xãha<sup>n</sup>-gã xii-dé.

<sup>42</sup> Te òré-ni-án ní xocuíñí cuëhé tnahã-dé. <sup>43-44</sup> Te Jësús ní cáhá<sup>n</sup> vihi-gã dóho-dé, te xãha<sup>n</sup>-gã xii-dé:

—Vitna cuanühú-na, dico vá yõo ññ cūñaha-n sã ní quide tãtna ñaha-í xii-n, te núú dütú-ni cuáhã<sup>n</sup> cuendã sã ná quini ñáhã-dẽ xii-n sã ní ndúha-n te cuãha-n-dẽ sã ndúú tãhú Yã Ndióxi dàtnã ní cachí ndíi Moisés cuendã ná quini ñáyíu sã ndãã ní ndúha-n —cächí-gã xãha<sup>n</sup>-gã xii-dé.

<sup>45</sup> Te tée ní cùhú-án ní xica-dé cuáhã<sup>n</sup>-dé, te ní ngüíta-dé xãha<sup>n</sup>-dẽ xii nchaa ñáyíu ta naníhí-dẽ nãcuãã ní quide Jësús ní quide tãtna ñaha-gã xii-dé. Te sã dúcã<sup>n</sup> ní xitë

nuu tée-án cuèndú nàcuáa ní quide ñaha Jèsús xii-dé ní quide tátna ñaha-gá ní ndúha-dé, te xiá<sup>n</sup> núu dayuhu ní xóo quíhu-gá dava ñúú núú ío vâi ñáyíu ndèhe ñaha xii-gá, te ní xóo cundecu-gá xití yucu núú ñà túú ñáyíu ndècu. Te nchaa ñúú ní quee ñáyíu ní sáhá<sup>n</sup>-yu núú ndécú-gá ní cáhá<sup>n</sup> ndihi ñáhá-yu xii-gá.

## 2

*Jèsús quidé tátna-gá í<sup>n</sup> tée cùhú ñà cúú-gá candá nihnu*

(Mt. 9:1-8; Lc. 5:17-26)

<sup>1</sup> Te sáta ní cuu í<sup>n</sup> úú nduu sá ní quee Jèsús ñúú Capèrnaúm te ní nasáá tucu-gá, te cue ñáyíu ní níhi-yu tnúhu sá ní ndexio-gá núú quidé vèhe-gá. <sup>2</sup> Te ndihi-ni ní tacá cuéhé víhi-yu, te ní chítú víhi-yu ndéé yuyèhe te ñà ní tnáhá-gá-yu. Te ní nguíta-gá ní dánèhé ñáhá-gá xii-yu tnúhu Yá Ndióxi. <sup>3</sup> Te òré-án ní quexio cúmí tnáhá cue tée núú ndécú-gá nchídó-güedé í<sup>n</sup> tée cùhú ñà cúú-gá candá nihnu-dé. <sup>4</sup> Dico ñà túú ní ndàcu-güedé sáá-güedé ndéé núú-gá chi ío cuéhé ñáyíu ndècu. Te xiá<sup>n</sup> núu ní sáá-güedé díquí véhé núú yíhí-gá-án ní caa<sup>n</sup>-güedé, te ichi ndàa díquí véhé-án ní dáquèe-güedé tée cùhú-án, te ñúhu-dé í<sup>n</sup> xító ní dáquèe ñaha-güedé ndéé núú-gá. <sup>5</sup> Te Jèsús sa ní cutnùní iní-gá sá sàndáa iní ñáhá-güedé xii-gá núu ní xáha<sup>n</sup>-gá xii tée cùhú-án:

—Yòhó tée cùhú, sa ní quide càhnu iní-í nchaa cuèchi-n —càchí-gá xáha<sup>n</sup>-gá xii-dé.

<sup>6</sup> Te xiá<sup>n</sup> xínucóo í<sup>n</sup> úú cue tée dàcuaha ñaha xii ñáyíu nchaa tnúhu ní chídó tnùní ndíi Moisés, te sá dúcá<sup>n</sup> ní cáhá<sup>n</sup> Jèsús núú cue tée-án ní sani iní-güedé: <sup>7</sup> “Tée-a càhá<sup>n</sup> cuéhé-dé cuèndá Yá Ndióxi duha càhá<sup>n</sup>-dé, chí vá yòo í<sup>n</sup> ndàcu cada cahnu iní nchaa yíca cuèchi ñáyíu chí í<sup>n</sup>ndi díí-ni Yá Ndióxi quidé càhnu iní-gá”, duha ní sani iní-güedé. <sup>8</sup> Dico òré-ni-án ní cutnùní iní Jèsús nàcuáa sàni iní-güedé, núu ní xáha<sup>n</sup>-gá xii-güedé:

—¿Te ná cuèndá duca<sup>n</sup> sàni iní-ndó-í? <sup>9</sup> Te sá dhúh ní xáha<sup>n</sup>-í xii tée cùhú-a sá ní quide càhnu iní-í nchaa yíca cuèchi-dé, te xiá<sup>n</sup> nchòhó ñà túú cutnùní iní-ndó núu ndáá càhá<sup>n</sup>-í àdi ñà ndáa. Dico núu cúu-í-dé sá ndácoo-dé, te ndocani-dé xító ñúhu-dé véxi, te caca-dé, te cutnùní ndáa iní-ndó núu ndáa càhá<sup>n</sup>-í àdi ñà ndáa chí cundehe núú-ndó nàcuáa cada-í. <sup>10</sup> Te vitna na càda-í nàcuáa cutnùní iní-ndó nchaa-ndo sá yùhú Tée cùu ñaní tnáhá-ndó nchaa-ndo ndecu ndihi-í tnúhu ndee iní sá cáda càhnu iní-í nchaa cuèchi ñáyíu ñuyítu-a —càchí-gá xáha<sup>n</sup>-gá xii-güedé.

Te sáta dúcá<sup>n</sup> te ní xáha<sup>n</sup>-gá xii tée cùhú-án:

<sup>11</sup> —Ndacóo te ndocani-n xító ñúhu-n véxi-án, te núhú-n vèhe-n —càchí-gá xáha<sup>n</sup>-gá xii-dé.

<sup>12</sup> Te òré-ni-án ní ndacóo-dé, te ní ndocani-dé xító ñúhu-dé ní quexio-án, te ndèhe nchaa ñáyíu xindecu-án ní ndee-dé tnuú-yu cuáhá<sup>n</sup>-dé. Te sá dúcá<sup>n</sup> ní quide Jèsús ní quide tátna-gá tée-án, xiá<sup>n</sup> ío ní cuñúhu nchaa ñáyíu, te ní xitnàhá-yu:

—Càhnu vihi cuu Yá Ndióxi, chí ñà í<sup>n</sup> ndúu quini-ó dhúha cuu datná ní cuu vitna —càchí-yu xitnàhá-yu.

*Jèsús càhá<sup>n</sup>-gá í<sup>n</sup> tée nàni Leví*

(Mt. 9:9-13; Lc. 5:27-32)

<sup>13</sup> Te Jèsús cuáhá<sup>n</sup> tucu-gá yuhu làgúná, te ío cuéhé ñáyíu ní sátnàhá ñáhá xii-gá, te ní dánèhé ñáhá-gá xii-yu tnúhu Yá Ndióxi. <sup>14</sup> Te òré ní yáha ní dánèhé ñáhá-gá xii-yu, te ní naquehe<sup>n</sup>-gá ichi, te ní yáha yatni-gá í<sup>n</sup> xichi núú núcòo í<sup>n</sup> tée nàni Leví déhe í<sup>n</sup> tée nàni Alfeu quidé còbrá-dé ñáyíu cuèndá impuèstú chí còbràdór cúú-dé. Te òré ní xini ñáhá-gá xii-dé, te ní xáha<sup>n</sup>-gá:

—Néhe chitnàhá ñáhá-n xii-í —càchí-gá xáha<sup>n</sup>-gá xii-dé.

Te té Leví-án ní ndacuñí-dé, te ní tuha ñaha-dé xii-gá.

<sup>15</sup> Te té Leví-án cuáhá<sup>n</sup>-dé ndihi Jèsús véhe-dé. Te yíhi Jèsús mèsá xéxi-gá ndihi cue tée xica cuu ndihi-gá, te tnáhá vâi cue tée cuihna iní-xi quide còbrá ñáhá xii ñáyíu cuèndá impuèstú, ndihi dava-gá cue tée ndècu ichi cuéhé ichi duha núcòo ndihi ñaha-güedé xii-gá xéxi ndihi ñaha-güedé, te duca<sup>n</sup> chí ío vâi ñáyíu nchícú<sup>n</sup> ñáhá xii-gá. <sup>16</sup> Te sá ní xini cue tée dàcuaha ñaha xii-yu nchaa tnúhu ní chídó tnùní ndíi Moisés, ndihi cue tée cùu fariséú xéxi Jèsús ndihi nchaa cue tée-án núu ní xicá<sup>n</sup> tnúhú-güedé núú cuè tée xica cuu ndihi-gá, te xáha<sup>n</sup>-güedé:

—¿Ná cuèndá duca<sup>n</sup> quide tée cùu mestrú-ndó xéxi-dé ndihi cue tée cuihna iní-xi quide còbrá ñáhá xii ñáyíu cuèndá impuèstú, ndihi nchaa dava-gá cue tée ndècu ichi cuéhé ichi duha-í? —càchí-güedé xáha<sup>n</sup>-güedé.

<sup>17</sup> Te Jèsús ní tecú dóho-gá nàcuáa ndúu tnúhu ní xáha<sup>n</sup>-güedé xii cue tée xica cuu ndihi-gá, núu ní xáha<sup>n</sup>-gá xii-güedé:

—Nchaa ñáyíu ñà túú cùhú chí ñà túú xini ñuhú-yu ñátátná, dico nchaa ñáyíu cùhú chí xini ñuhú-yu ñátátná. Te yùhú véxi-í càhá<sup>n</sup>-í ñáyíu cutnùní iní-xi sá ndécú cuèchi-xi te ñà túú véxi-í càhá<sup>n</sup>-í ñáyíu càchí sá ñà túú ndècu cuèchi-xi —càchí-gá xáha<sup>n</sup>-gá xii-güedé.

*Cuèndá cue ñáyíu ñà túú tnàhí ná xéxi áma càhá<sup>n</sup> ndihi-yu Yá Ndióxi*

(Mt. 9:14-17; Lc. 5:33-39)

<sup>18</sup> Te cue tée xica cuu ndihi té Juáa, ndihi cue tée xica cuu ndihi cue tée cùu

fariséú ñá túú tñàhí ná xéxí-güedé áma càhá<sup>n</sup> ndihí-güedé Yá Ndiòxí. Te ì<sup>n</sup> nduu duca<sup>n</sup> xíquide-güedé, te ní sáhá<sup>n</sup> ñáiyu ní xícá<sup>n</sup> tñùhù-yu núú Jèsús, te xáhá<sup>n</sup>-yu xii-gá:

—Cui<sup>n</sup>-ndí cachí tñùhu-n ná cuendá cue téé xica cuu ndihí té Juáá, ndihí cue téé xica cuu ndihí cue téé cùu fariséú ñá túú tñàhí ná xéxí-güedé áma càhá<sup>n</sup> ndihí-güedé Yá Ndiòxí, te cue téé xica cuu ndihí-n ñá túú duca<sup>n</sup> quide-güedé —cachí-yu xáhá<sup>n</sup>-yu xii-gá.

<sup>19</sup> Te Jèsús ní xáha<sup>n</sup>-gá xii-yu:

—Nchòhó xini-ndó sá vâ cùú cùñaha-o xii ñáiyu ñùhu vico tñándaha sá vâ cùú càxí-yu ñini ndécú ndihí ñaha téé tñándaha xii-yu. <sup>20</sup> Dico sáá nduu te vâ cùndécú ndihí ñaha-gá téé tñándaha-á<sup>n</sup> xii-yu, te dàvá-á<sup>n</sup> te cahni iní-yu vâ càxí-yu cuendá sá ndihú iní-yu.

<sup>21</sup> Te vâ yòo ì<sup>n</sup> dàndéé luha dóó sáá ì<sup>n</sup> dóó sa ní cuu tùhú víhí, chí dóó sáá-á<sup>n</sup> nàndiyi-xi te uu<sup>n</sup>-gá ndata-xi dóó sà ní cuu tùhú-á<sup>n</sup>. <sup>22</sup> Te ní vâ yòo ì<sup>n</sup> chíhí ndidí sáá xití ì<sup>n</sup> lamba sa ní cuu tùhú víhí, chí núu yoo duca<sup>n</sup> na cada te ndava lamba sa ní cuu tùhú-á<sup>n</sup>, chí ío ñíhí yócó ndidí-á<sup>n</sup>, te cuita-ñí ndidí-á<sup>n</sup> te cuita-ñí lamba-á<sup>n</sup> te núu duca<sup>n</sup> na cada-yu. Núu xiá<sup>n</sup> xini ñùhu-xi quée ndidí sáá-á<sup>n</sup> xití ì<sup>n</sup> lamba saa —cachí-gá xáha<sup>n</sup>-gá xii-yu.

*Cue téé xica cuu ndihí Jèsús sàhnú-güedé yoco triú nduu ndetatú ñáiyu*  
(Mt. 12:1-8; Lc. 6:1-5)

<sup>23</sup> Te ì<sup>n</sup> nduu cùu-xi nduu ndetatú ñáiyu ñùhu Jèsús ichi ndihí cue téé xica cuu ndihí-güedé, te ta yáha-gá ndihí-güedé ì<sup>n</sup> xichi núú cáá triú, te ní ngúita-güedé sàhnú-güedé yoco triú-á<sup>n</sup>. <sup>24</sup> Te cue téé cùu fariséú ní xáha<sup>n</sup>-güedé xii-gá:

—¿Ná cuendá duca<sup>n</sup> quide cue téé xica cuu ndihí-n sàhnú-güedé yoco triú vitna cùu-xi nduu ndetatú-i? Te ñá túú tàú-güedé duca<sup>n</sup> càda-güedé —cachí-güedé xáha<sup>n</sup>-güedé xii-gá.

<sup>25</sup> Te ní xáha<sup>n</sup>-gá xii-güedé:

—¿Te náa vátá dácùaha tñahi-gá-ndó núú tütú Yá Ndiòxí núú càhá<sup>n</sup>-xi nàcuáa ní quide ndí Dàvíí cùtñàhá ní xihí ndí docó ndihí cue téé ní xica cuu ndihí ndí-á<sup>n</sup>? <sup>26</sup> Te dàvá-á<sup>n</sup> ní xindecu ì<sup>n</sup> téé ní xini Abiátár ní cuu-dé dútú cùnù, te ndí Dàvíí ní quíhu ndí xití vehe Yá Ndiòxí ní quehe<sup>n</sup> ndí pàá ní cuu íí ndécú-á<sup>n</sup> ní dácàhñu ndí cue téé ní xica cuu ndihí ndí ní xexi ndí ndihí-güedé, te mee-ni cuè dútú tàú-güedé caxi-güedé pàá-á<sup>n</sup> ní cùu —cachí-gá xáha<sup>n</sup>-gá xii-güedé.

<sup>27</sup> Te ní xáha<sup>n</sup> tucu Jèsús xii-güedé:

—Mee Yá Ndiòxí ní taxi ndecu-gá nduu ndetatú ñáiyu, te ñá túú ní cachí-gá sá méé-yu nándi caní iní-yu cada-yu canehe ñ-yu nduu ndetatú-yu-á<sup>n</sup>. <sup>28</sup> Te yúhú Téé cùu ñani tñàhá-ndó nchàa-ndo, tñàhá-í ndécú ndihí-í tñùhu ndee iní sá cùu-í nchaa

ñáiyu nàcuáa cada-yu nduu ndetatú-ó-á<sup>n</sup> —cachí-gá xáha<sup>n</sup>-gá xii-güedé.

### 3

*Ì<sup>n</sup> téé ní yichí ì<sup>n</sup> xio ndaha-xi*

(Mt. 12:9-14; Lc. 6:6-11)

<sup>1</sup> Te Jèsús cuánguihu tucu-gá xití veñùhu, te xití veñùhu-á<sup>n</sup> ndécú ì<sup>n</sup> téé ní yichí ì<sup>n</sup> xio ndaha-dé. <sup>2</sup> Te xiá<sup>n</sup> ndécú cuè téé xito dayuhu ñaha xii-gá, te núu cada tátna-gá téé cùhú-á<sup>n</sup> nduu cùu-xi nduu ndetatú-güedé ndihí ñáiyu, cuendá duca<sup>n</sup> te níhí-güedé nàcuáa cada-güedé cacá<sup>n</sup> cuéchi-güedé cuendá-gá. <sup>3</sup> Te ní xáha<sup>n</sup>-gá xii téé cùhú ndaha-xi-á<sup>n</sup>:

—Ndocuñí te ngúutñí-n cuádava iha —cachí-gá xáha<sup>n</sup>-gá xii-dé.

<sup>4</sup> Te ní xícá<sup>n</sup> tñùhú-gá núu-güedé, te xáha<sup>n</sup>-gá:

—Chí cachí tñùhu ná cùú sá cùú càda-o nduu ndetatú-ó. ¿Sá vaha ñá sá cuèhé? ¿Sá cáda tátna-o ñáiyu cùhú ñá sá cahni-ó-yu? —cachí-gá xáha<sup>n</sup>-gá xii-güedé.

Dico ní ì<sup>n</sup>-güedé ñá túú tñàhí ní càhá<sup>n</sup>-güedé. <sup>5</sup> Te Jèsús ní xindéhé vaha-gá núu nchàa-güedé te ní cudéé<sup>n</sup>-gá, te ní ndíhú iní-gá chí ío sáá iní-güedé, te ní xáha<sup>n</sup>-gá xii téé cùhú ndaha-xi-á<sup>n</sup>:

—Ndocani ndaha-n —cachí-gá xáha<sup>n</sup>-gá xii-dé.

Te ní ndocani-dé ndaha-dé, te òré-ni-á<sup>n</sup> ní ndúha. <sup>6</sup> Te cue téé cùu fariséú ní xica-güedé cuáhá<sup>n</sup>-güedé ì<sup>n</sup> xichi núú ní naníhí tñàhá-güedé ndihí cue téé cùndihí té Hèrodés cuendá ndatnúhu-güedé nása cada-güedé cahni-güedé Jèsús.

*Cuehé víhí ñáiyu ní quexio yuhu lagúná*

<sup>7</sup> Te Jèsús ní xica-gá cuáhá<sup>n</sup>-gá ndihí cue téé xica cuu ndihí-gá yuhu lagúná distritú Galilea, te ío cuéhé ñáiyu distritú-á<sup>n</sup> nchicú<sup>n</sup> ñáhá-yu xii-gá cuáhá<sup>n</sup>. <sup>8</sup> Te núú ní quexio-gá-á<sup>n</sup> ní sáhá<sup>n</sup> ñáiyu distritú Judeá, ñáiyu ñuu Jerusalén, ñáiyu distritú Idumeá, ñáiyu xindecu ndaa ingá xio yúte Jordán, ndihí ñáiyu xindecu yatni ñuu Tírú ndihí ñuu Sidón, te duca<sup>n</sup> ío vai-yu ní sáhá<sup>n</sup> núú ndécú-gá chí ní níhí-yu tñùhu nchaa nàcuáa quide-gá. <sup>9</sup> Te Jèsús ní xáha<sup>n</sup>-gá xii cue téé xica cuu ndihí-gá sá cáda tñaha-güedé ì<sup>n</sup> bàrcú cuendá caa-gá núu-xi cuendá sá vâ dádèhnde ñáhá-yu xii-gá chí ío cuéhé-yu. <sup>10</sup> Te sá dúcá<sup>n</sup> ní níhí-yu tñùhu sá quidé tátna-gá ñáiyu cùhú, núu xiá<sup>n</sup> nchaa dava-gá ñáiyu cùhú súúni dícó ngónchihí tñàhá-yu cuáhá<sup>n</sup>-yu núú ndécú-gá cui<sup>n</sup>-yu tñándeé ñáhá-yu xii-gá cuendá sá cui<sup>n</sup>-yu ndúha-yu. <sup>11</sup> Te cue ñáiyu yíhí ñaha espíritú cùndihí yucu ñávaha ní sanu xití ñaha-xi xii-yu núú Jèsús òré ní xini ñáhá-xí xii-gá, te xiá<sup>n</sup> ní quide níhí ní càhá<sup>n</sup>-yu, te xáhá<sup>n</sup>-yu xii Jèsús:

—jYòhò cúu-n Dêhe Yá Ndiòxi! —càchí-yu xáhã<sup>n</sup>-yu xii-gá.

<sup>12</sup> Te Jèsús ní tenáá-gá nchaa espíritú cùndihí yucu ñávãha-án, te ní xáha<sup>n</sup>-gã xii nchaa ñáyíu ní xihí-xi-án sã vã càhá<sup>n</sup>-yu núú ñáyíu yoo cùu-gá.

*Jèsús càxi-gá úxúú tnhá cue tée dacuàha ñaha xii ñáyíu tnhu-gá*

(Mt. 10:1-4; Lc. 6:12-16)

<sup>13</sup> Te sátá dúcã<sup>n</sup> ní cuu te Jèsús ní sáá-gá ì<sup>n</sup> yucu, te xíá<sup>n</sup> ndécú-gã ní cana-gá nchaa cue tée càchí iní-gá. Te òré ní quexio nchaa cue tée-án núú-gã, <sup>14</sup> te ní càxi-gá úxúú tnhá cue tée caca cuu ndihí-gá, te ñiu-ni cue tée-án tendaha-gã quíhí<sup>n</sup>-güedé càhá<sup>n</sup>-güedé tnhu-gá núú ñáyíu. <sup>15</sup> Te ní sãñaha-gã xii-güedé tnhu ndee iní cundecu ndihí-güedé cuendá cada tátna-güedé ñáyíu cùhú, ndihí cuendá queñuhu-güedé nchaa espíritú cùndihí yucu ñávãha yihí ñaha xii ñáyíu. <sup>16</sup> Te duha xínani ndi úxúú cue tée-án: Ì<sup>n</sup>-dé nání-dé Ximú, te mee-gã ní taudíu ñaha-gã xii-dé sã cúnani-dé Pèlú. <sup>17</sup> Te ingá-dé nání-dé Jãcobó, te ingá-dé nání-dé Juáa, te ñani té Jãcobó-án cúú té Juáa te ndi ndúú-güedé cúú-güedé déhe té Zebèdeú, te ndi ndúú cue tée-án ní dánání ñaha Jèsús xii-güedé Boànergés, te tnhu-án queé-xi: Cue tée ío yáchi cùdée<sup>n</sup>, duha queé-xi tnhu-án. <sup>18</sup> Te duha xínani dáva-gã-güedé: Té Ndríxi, té Lipé, té Bartolómé, té Mátéú, té Mǎxi, té Jãcobó déhe té Àlféú, té Tãdeú, té Ximú tée ní cundihí cue tée cananístá ní cùu, <sup>19</sup> ndihí té Júdás Iscarióté tée ní sáá nduu ní sáha cuendá ñáhá xii Jèsús núú cué tée cùu úhú iní ñáhá xii-gá, duha xínani cué tée ní càxi Jèsús ní xica cuu ndihí-gá.

*Càchí-güedé sã ndécú ndihí Jèsús yucu ñávãha dico ñã ndáa*

(Mt. 12:22-32; Lc. 11:14-23; 12:10)

Te sátá dúcã<sup>n</sup> te cuáhã<sup>n</sup>-gã ndihí-güedé núú quidé vehe-gá. <sup>20</sup> Te ío vãi ñáyíu ní tacá-ni tucú-yu xíá<sup>n</sup>, te ní ñã ní ñihí-gã nása cada-gã caxi-gã ndihí cue tée xica cuu ndihí-gã cuendá sã ío vãi-yu. <sup>21</sup> Te cue ñáyíu cùu ndi mee Jèsús ní ñihí-yu tnhu nchaa nãcuáa cùu, te nchaa ñáyíu ñã cùtnuní váha iní-xi ní cachí-yu sã ní nduu lùcú-gá núú xíá<sup>n</sup> cuáhã<sup>n</sup> ñáyíu cùu ndi mee Jèsús núú ndécú-gã cuendá candeca ñáhã-yu xii-gá nùhú ní cùu.

<sup>22</sup> Te cue tée dàcuaha ñaha xii ñáyíu nchaa tnhu ní chídó tñuní ndí Moisés véxi ndéé ñúu Jerusalén ní càhá<sup>n</sup> cuèhé-güedé cuendá Jèsús, chi ní xítñaha-güedé:

—Tée-a ndècu ndihí-dé sácúhã<sup>n</sup>, te ñiu xíã<sup>n</sup> chíndée ñaha-xi xii-dé queñuhu-dé nchaa espíritú cùndihí-xi yihí ñaha xii ñáyíu, te

ñiu-ni-xi tàxi tñuní-xi nchaa espíritú-án —duha ní xítñaha-güedé.

<sup>23</sup> Te Jèsús ní cana ñaha-gã xii-güedé, te ní cani-gã ì<sup>n</sup> cuèndú núú-güedé nãcuáa tecú tñuní-güedé tnhu-gá, te xáha<sup>n</sup>-gã xii-güedé:

—¿Te nása cada sácúhã<sup>n</sup> queñuhu-xi cue espíritú cùndihí-xi yihí ñaha xii ñáyíu-í? <sup>24</sup> Te nchòhò xini-ndó sã núu ì<sup>n</sup> tée yìndaha ì<sup>n</sup> nació<sup>n</sup> vá cúú ì<sup>n</sup>nuu-dé ndihí cue tée cùndihí-dé, te vá cùdii-dé cunuu-dé. <sup>25</sup> Te ñiu-ni duca<sup>n</sup> sãtnahã-xi cùu tucu ñáyíu xíndecu ì<sup>n</sup> véhe, chi núu vá cúú ì<sup>n</sup>nuu-yu, te vá cùdii-yu cundecu càhnú-yu. <sup>26</sup> Te núu sácúhã<sup>n</sup> ñã túú cùu ì<sup>n</sup>nuu-xi ndihí cue espíritú cùndihí-xi, te vá cùdii-xi cundecu-xi taxi tñuní-xi te núu duca<sup>n</sup> quide-xi.

<sup>27</sup> Te nchòhò xini-ndó sã cué ñadúhú chi vá ndácú-güedé cuendá-ni quíhu-güedé duhu-güedé vehe ì<sup>n</sup> tée ío ndee, chi díhna-gã xini ñuhu-xi tñi-güedé tée-án dacútu ñaha-güedé xii-dé dàtñuní duca<sup>n</sup> te ndacu-güedé duhu-güedé nchaa sã ndécú ndihí-dé.

<sup>28</sup> Te na càchí tnhu ndáá-í xii-ndo sã ncháá sã cuèhé sã dúhá quide ñáyíu, ndihí nchaa tnhu cuèhé tnhu duha càhá<sup>n</sup>-yu cuendá Yá Ndiòxi cuu cada càhnu iní-gá.

<sup>29</sup> Dico cue ñáyíu na càhá<sup>n</sup> cuèhé cuendá Espíritú Yá Ndiòxi, ñáyíu-án vá cadá càhnu iní ñáhá tnhí-gã xii-yu, chi cundecu-ni cuéchi-yu núú-gã ní caa ní quíhí<sup>n</sup> —càchí-gã xáha<sup>n</sup>-gã xii-güedé.

<sup>30</sup> Te duca<sup>n</sup> ní càhá<sup>n</sup>-gã chi càchí-güedé sã ndécú ndihí-gã espíritú cùndihí yucu ñávãha.

*Náná Jèsús ndihí cue ñani-gá*

(Mt. 12:46-50; Lc. 8:19-21)

<sup>31</sup> Te ní quexio náná Jèsús ndihí cue ñani-gá núú ndécú-gã xínutñi<sup>n</sup>-yu quehé, te ní xáhã<sup>n</sup>-yu xii ì<sup>n</sup> ñáyíu xíndecu-án sã dáyãha-yu tnhu núú-gã cuendá quee-gã ndatnhu ndihí ñaha-gã xii-yu. <sup>32</sup> Te cue ñáyíu xíncúo ní càndéé ñiñi-gã ní xáhã<sup>n</sup>-yu xii-gã:

—Nánã-n ndihí cue ñani-n ndécú-yu quehé nãndúcu ñahã-yu xii-n —càchí-yu xáhá<sup>n</sup>-yu xii-gã.

<sup>33</sup> Te Jèsús ní xáha<sup>n</sup>-gã xii-yu:

—Te cachí tnhu-ndo yòndi-gã ñáyíu cùu datná nánã-í ndihí datná cue ñani-í —càchí-gã xáhá<sup>n</sup>-gã xii-yu.

<sup>34</sup> Te dàtñuní ní xíndéhé váha-gã núú ncháa ñáyíu xíncúo ní càndéé ñiñi-gã-án, te ní xáha<sup>n</sup>-gã xii-yu:

—Nchaa ñáyíu-a cúú-yu datná nánã-í ndihí datná cue ñani-í. <sup>35</sup> Chi nchaa ñáyíu quide nacúáa càhá<sup>n</sup> Yá Ndiòxi, ñáyíu-án cúú-yu datná cue ñani-í, ndihí datná cue cùha-í, ndihí datná nánã-í —càchí-gã xáha<sup>n</sup>-gã xii-yu.

## 4

*Nàcuáa quide téé cuángacá<sup>n</sup> triúu*  
(Mt. 13:1-9; Lc. 8:4-8)

<sup>1</sup> Te Jèsús ní ngúita-gá dácuaáa tucu-gá ñáyíu yuhu lágúná. Te cuéhé víhí-yu ní tacá xiá<sup>n</sup> núu cuásaá-gá núú ñ<sup>n</sup> bàrcú núnúú xítí ndute lágúná-á<sup>n</sup>, te núú xiá<sup>n</sup> ní ngóo-gá te ní ngúita-gá dánèhé ñáhá-gá xíí-yu, te nchaá-yu xixúcu-yu yuhu lágúná-á<sup>n</sup>. <sup>2</sup> Te ní ngúita-gá ní cani-gá titní cuèndú núú-yu nàcuáa tecú tñuní-yu tñúhu-gá, te xáha<sup>n</sup>-gá xíí-yu:

<sup>3</sup> —Chí cündedóho váha ñ<sup>n</sup> cuèndú ná càni-í-a. ñ<sup>n</sup> téé cuángacá<sup>n</sup>-dé triúu. <sup>4</sup> Te òré ní ngúita-dé dāngoyó-dé triú-á<sup>n</sup>, te dava ní quene ndava ní ngava ndéé ichi, te ní xíní cue tílaá te ní nadatácá-güedi. <sup>5</sup> Te dava ní ngava ñuhu yadi núú yíhí víhí yúú, te ndíhi-ni ní xínu-xi cuèndá sá ñá túú càvivi ñuhu. <sup>6</sup> Dico òré ní nayehé ñá túú ní cündee iní-xi chí ní yíchí-xi, chí ñá túú ní ñíhí quíhí<sup>n</sup> cúnú yóho-xi. <sup>7</sup> Te dava ní ngava núú yúcu ndíqui<sup>n</sup> tnu iñu, te ñ<sup>n</sup>nuu-ni ní xínu-xi ndíhi tnu iñu, te tnu iñu-á<sup>n</sup> ní sañu-xi te ní dánáá-xi ncháa triú sá ní xínu-á<sup>n</sup>. <sup>8</sup> Dico dava triú-á<sup>n</sup> ní ngava-xi núú ndécú ñuhu coco<sup>n</sup>, te xiá<sup>n</sup> ní xínu-xi te ní sañu-xi te ío váha ní cuu, chí núú ñ<sup>n</sup>-ní triú-á<sup>n</sup> te dava yoco-xi ní ngúihí ócú úxí triú-xi, te dava yoco-xi ní ngúihí únídico triú-xi, te dava yoco-xi ní ngúihí ñ<sup>n</sup> cièndú triú-xi —càchí-gá xáha<sup>n</sup>-gá xíí-yu.

<sup>9</sup> Te xáha<sup>n</sup> tucu-gá xíí-yu:

—Nchaa nchòhó ñáyíu ní xíndedóho nchaa tñúhu ní cáhá<sup>n</sup>-í-a, te ío váha chí cuáha cuèndá —càchí-gá xáha<sup>n</sup>-gá xíí-yu.

*Jèsús càhá<sup>n</sup>-gá ná cuèndá duca<sup>n</sup> càni-gá cuèndú*

(Mt. 13:10-17; Lc. 8:9-10)

<sup>10</sup> Te sátá ní ndaca ñáyíu-á<sup>n</sup> te ní quendóo mee-ná Jèsús ndíhi cue téé xíca cuu ndíhi-gá, ndíhi ñ<sup>n</sup> úú-ná ñáyíu. Te ñáyíu-á<sup>n</sup> ndíhi cue téé-á<sup>n</sup> ní xíca<sup>n</sup> tñúhú-yu ndíhi-güedé núú-gá, núú nása quèe-xi cuèndú ní cani-gá núú-yu ndíhi-güedé. <sup>11</sup> Te ní xáha<sup>n</sup>-gá:

—Nchòhó chí sa càchí tñúhu Yá Ndióxi xii-ndo ñ<sup>n</sup> sá vátá quíní-gá-ndó, chí càchí tñúhu-gá nàcuáa cada-gá ndíhu ndaha-gá ñáyíu, dico dava-gá ñáyíu càni-í mee-ni cuèndú núú-yu. <sup>12</sup> Chí cuéi na quíní-yu nchaa nàcuáa cuu dico ní vā cútñuní iní-yu ná cuèndá duca<sup>n</sup> cùu, àdi cuéi na cündedóho-yu dico ní vā tècú tñuní-yu. Te duca<sup>n</sup> ndòhó-yu cuèndá sá vā quíndáá iní-yu Yá Ndióxi, ndíhi cuèndá sá vā cádá càhnu iní-gá nchaa yíca cuèchí-yu —càchí-gá xáha<sup>n</sup>-gá xíí-yu ndíhi-güedé.

*Jèsús càhá<sup>n</sup>-gá nàcuáa quèe-xi cuèndá téé cuángacá<sup>n</sup> triúu*

(Mt. 13:18-23; Lc. 8:11-15)

<sup>13</sup> Te ní xáha<sup>n</sup> tucu Jèsús xii cue téé xíca cuu ndíhi-gá, ndíhi cue ñáyíu-á<sup>n</sup>:

—Nchòhó, ñá túú ní tècú tñuní-ndó cuèndú ní cani-í núú-ndó, te núu duca<sup>n</sup>, ¿te nása tecú tñuní-ndó dàva-gá cuèndú cani-í núú-ndó-í? Te na càchí tñúhu-í xii-ndo nàcuáa quèe-xi cuèndú ní cani-í núú-ndó.

<sup>14</sup> Te téé cuángacá<sup>n</sup> triú-á<sup>n</sup> cúú-dè dàtná ñ<sup>n</sup> téé cuáhá<sup>n</sup> càhá<sup>n</sup> tñúhu Yá Ndióxi núú ñáyíu.

<sup>15</sup> Te triú-á<sup>n</sup> cúú-xí dàtná tñúhu Yá Ndióxi, te triú sá ní quene ndava ní ngava ndéé ichi, xiá<sup>n</sup> cúú-xí dàtná ñáyíu ní tnahá iní-xi tñúhu Yá Ndióxi, dico sácuihná cuáhá<sup>n</sup>-xi xòcani-xi tñúhu-gá iní-yu cuèndá sá vā càchícú<sup>n</sup> nihnú-yu nàcuáa càhá<sup>n</sup> tñúhu-á<sup>n</sup>.

<sup>16</sup> Te triú sá ní ngava ñuhu yadi núú yíhí víhí yúú, xiá<sup>n</sup> cúú-xí dàtná ñáyíu ní xíndedóho tñúhu Yá Ndióxi te díí iní ní tñí-yu tñúhu-gá. <sup>17</sup> Dico òré ná ngúita ñáyíu cúcuèhé ñáhá-yu xíí-yu àdi nándi-gá sá yáha-yu sá cuèndá tñúhu-gá, te ñá cündee iní-yu chí dàhá-yu tñúhu-gá cuèndá sá ñá túú ñíhí ndéé-yu.

<sup>18</sup> Te triú sá ní ngava núú yúcu ndíqui<sup>n</sup> tnu iñu xiá<sup>n</sup> cúú-xí dàtná ñáyíu ní tecú dóho-xi tñúhu Yá Ndióxi, <sup>19</sup> dico cuèé cuèé ní nacuaaná-yu tñúhu-gá, chí cuèndá mee-ni sá cúú-xí mèe-yu ñuhu iní-yu, ndíhi cuèndá sá ío sàni iní-yu cuu cuicá-yu, ndíhi cuèndá sá ío cùdí iní-yu nchaa sá ío ñuyíú-a, te ñá túú ñuhu iní-yu tñúhu sá ní xíndedóho-yu-á<sup>n</sup> nàcuáa cada váha-yu cundecú-yu.

<sup>20</sup> Dico triú sá ní ngava núú ndécú ñuhu coco<sup>n</sup>, xiá<sup>n</sup> cúú-xí dàtná ñáyíu ní xíndedóho tñúhu Yá Ndióxi te quidé-yu nchaa nàcuáa càhá<sup>n</sup> tñúhu-á<sup>n</sup>. Te cada iní-ndó sá ñáyíu-á<sup>n</sup> cúú-yu dàtná triú sá ní ngúihí yoco-xi ócú úxí triú-xi, ndíhi triú sá ní ngúihí yoco-xi únídico triú-xi, ndíhi triú sá ní ngúihí yoco-xi ñ<sup>n</sup> cièndú triú-xi. Te duca<sup>n</sup> sátnahá-xi cúú-yu chí ío váha quidé-yu —càchí-gá xáha<sup>n</sup>-gá xii cue téé xíca cuu ndíhi-gá ndíhi cue ñáyíu-á<sup>n</sup>.

*Cuèndá iti*

(Lc. 8:16-18)

<sup>21</sup> Te xáha<sup>n</sup>-gá xii nchaa ñáyíu:

—Ñá túú ní ñ<sup>n</sup> ñáyíu tèñuhú iti te chiváha-yu ñ<sup>n</sup> xítí quídí, àdi chiváha-yu ñ<sup>n</sup> caha càamá, chí tàxi ndecú-yu ñ<sup>n</sup> núú dùcú<sup>n</sup> cuèndá cutñuní núú ncháa ñáyíu. <sup>22</sup> Te ní ñ<sup>n</sup> tñúhu sá ñá tècú tñuní ñáyíu vitna cachí-ó sá vā tècú tñuní-yu chí dacuitíí sá tècú tñuní-yu, te ní ñ<sup>n</sup> tñúhu sá càchí-ó cuu yuhu vitna vā cúú yùhu chí dacuitíí sá quèé tùu-xi núú ñáyíu.

<sup>23</sup> Te nchòhó cue ñáyíu ní xíndedóho nchaa tñúhu ní cáhá<sup>n</sup>-í-a, te ío váha chí ná cuáha cuèndá —càchí-gá xáha<sup>n</sup>-gá xíí-yu.

24 Te ní xáha<sup>n</sup> tũcu-gá:

—Ío váha chí cùndèdòho tñuhu na càhá<sup>n</sup>-í-a. Te nàcuáa-ni quide-ndo danehé-ndó ñáyiú tñuhu Yá Ndióxi, te diu-ni duca<sup>n</sup> càda ñaha-gá xii-ndo, te uu<sup>n</sup>-gá duca<sup>n</sup> càda-gá sá cùú-xi-ndó. 25 Te nchaa nchòhò ñáyiú tècú tñùní tñuhu Yá Ndióxi, uu<sup>n</sup>-gá cuita tecú tñùní-ndó tñuhu-gá quíhí<sup>n</sup>. Te nchaa nchòhò ñáyiú ñá tũú tècú tñùní tñuhu-gá, te uu<sup>n</sup>-gá vâ tècú tñùní-ndó —câchí-gá xáha<sup>n</sup>-gâ xii-yu.

*Nàcuáa sàhnu triú*

26 Te Jèsús xáha<sup>n</sup> tũcu-gá:

—Na càni-í ñ<sup>n</sup> cuèndú núú-ndó cuèndá tecú tñùní-ndó nàcuáa cada-xi òré ndíhu ndaha ñaha Yá Ndióxi xii ñáyiú. ñ<sup>n</sup> tée cuàngacá<sup>n</sup>-dé triú. 27-28 Te sátá ní yáha ní sacá<sup>n</sup>-dé triú-án, te cuánuhú-dé vehe-dé ndètátú-dé. Te duca<sup>n</sup>-ni ta xica nduu cuáhán<sup>n</sup> te ní xínu triú-án, te nàcuáa ta sàhnu-xi cuáhán<sup>n</sup> te ta quèe ndaha-xi, te duca<sup>n</sup>-ni cùu ní sáá nduu ní quene yoco-xi te ní nguíhi triú-xi, dico tée ní sacá<sup>n</sup> triú-án ñà tũú xini-dé nása ní sàhnu-xi, chí mee ñùhu ní quide-xi ní sàhnu triú-án. 29 Te òré sa ní ndíhi ní cuaa<sup>n</sup> te ní nguíta tée ní sacá<sup>n</sup>-án náquèhndé-dé nàtáxi tñaha-dé —câchí-gá xáha<sup>n</sup>-gâ xii-yu.

*Cuèndá ndíqui<sup>n</sup> yutnu nàni mostázá*

(Mt. 13:31-32; Lc. 13:18-19)

30 Te xáha<sup>n</sup> tũcu Jèsús xii-yu:

—Na càni tucu-í ingá cuèndú núú-ndó cuèndá tecú tñùní-ndó nàcuáa cada-xi òré ndíhu ndaha ñaha Yá Ndióxi xii ñáyiú. 31 ñ<sup>n</sup> yutnu nàni mostázá cùú-xi ñ<sup>n</sup> yutnu sá líhli vîhi-gá ndíqui<sup>n</sup>-xi dàcúúxi ndíqui<sup>n</sup> nchaa cùhú, 32 dico òré ná cacá<sup>n</sup>-güedé núú ñùhú-güedé, te na xínu-xi te sàhnu-gá-xi dàcúúxi nchàa cùhú, te nchaa dité-xi ío cùu cahnu-xi, te ndéé cue quiti ndàva núú táchí sácò-güedi nchaa núú dité-xi xínu ndeti-güedi —câchí-gá xáha<sup>n</sup>-gâ xii-yu.

*Ío titní cuèndú ní caní Jèsús núú ñáyiú*

(Mt. 13:34-35)

33 Te ío-gá vai cuèndú ní caní Jèsús núú ñáyiú cuèndá tecú tñùní-yu tñuhu Yá Ndióxi, dico dava cuèndú ñá tũú ní càni-gá núú-yu, chí ní cutnùní iní-gá sá vâ tècú tñùní-yu nchaa. 34 Te mee-ni cuèndú ní caní Jèsús núú ñáyiú ndi tñahá òré ní dánèhè ñáhá-gâ xii-yu tñuhu-gá. Te òré ndécú mée Jèsús ndíhi cue tée xica cuu ndíhi-gá, te ní xáha<sup>n</sup>-gâ xii-güedé nàcuáa quèe-xi ñ<sup>n</sup> cuèndú ní caní-gá núú ñáyiú.

*Jèsús ngánti-gâ táchí ndíhi ndute làgúná*

(Mt. 8:23-27; Lc. 8:22-25)

35 Te diu-ni nduu-án òré sa ta cùndiqui<sup>n</sup> cuáhán<sup>n</sup> ní xáha<sup>n</sup> Jèsús xii cue tée xica cuu ndíhi-gá:

—Chí ná quíhí<sup>n</sup>-ó ndàa ingá xio yuhu làgúná —câchí-gá xáha<sup>n</sup>-gâ xii-güedé.

36 Te ní quide ndee iní-gá nchaa ñáyiú xixúcu-án, te diu-ni bàrcú sá ñùhú-gâ òré ní dánèhè-gâ ñáyiú tñuhu-gá diu-ni xíá<sup>n</sup> ní dácácá cuè tée xica cuu ndíhi-gâ ndécá ñaha-güedé xii-gá cuáhán<sup>n</sup>, te tñàhâ ñ<sup>n</sup> úú-gâ bàrcú ní xica-xi nchicú<sup>n</sup>-xi bàrcú ñùhú-gâ-án cuáhán<sup>n</sup>. 37 Te ñùhu bàrcú ñùhú-gâ-án ichi cuáhán<sup>n</sup>-xi núú ndute, te ní quexio ñ<sup>n</sup> táchí ñíhi, te ta nàdachitú-xi ndute xití bàrcú-án cuáhán<sup>n</sup>, te sa cuíni-nâ-xi quèe naa bàrcú-án xití ndute ni cùu. 38 Te Jèsús cáá-gâ xidí-gâ ñ<sup>n</sup> xichi ndàa sátá bàrcú-án, te yinchíhi ñ<sup>n</sup> dóó díqui-gâ. Te sá dúcá<sup>n</sup> cuíni-xi quèe naa bàrcú-án ñùu ní sáhá<sup>n</sup>-güedé ní ndocani ñaha-güedé xii-gá, te xáha<sup>n</sup>-güedé:

—jMèstrú, ndiquíú iní! ¿Náa ñá tũú ndíhu iní-n sá tá quèe naa-o cuáhán<sup>n</sup>-án? —câchí-güedé xáha<sup>n</sup>-güedé xii-gá.

39 Te Jèsús ní ndiquíú iní-gá te ní ndacóo-gá, te ní tenáá-gâ táchí-án, te ní xáha<sup>n</sup>-gâ xii ndute làgúná:

—jTnavíí-nâ cuhu<sup>n</sup>, chí ío dusa<sup>n</sup>! —câchí-gâ xáha<sup>n</sup>-gâ xii ndute-án.

Te òré-ni ní nguíni táchí-án te ní nucúndecu nahí-nâ ndute làgúná-án. 40 Te Jèsús ní xáha<sup>n</sup>-gâ xii-güedé:

—¿Ná cuèndá ndéé dúcá<sup>n</sup> yùhú-ndó-í? ¿Náa ñá tũú sàndáá iní ñáhá ndisa-ndo xii-í-án? —câchí-gâ xáha<sup>n</sup>-gâ xii-güedé.

41 Dico mee-güedé chí ío ní yùhú-güedé sá duca<sup>n</sup> ní quide-gá ní xiní-güedé, te ní xitnàha-güedé:

—¿Te ná tée cùu tée-a núu ní cáhá<sup>n</sup>-ni-dé, te ní nguíni táchí te ní nucúndecu nahí ndute làgúná-a-í? —câchí-güedé xitnàha-güedé.

## 5

*Ñ<sup>n</sup> tée yíhi ñaha espíritú cùndíhi yucu ñávaha*

(Mt. 8:28-34; Lc. 8:26-39)

1 Te ní sáá Jèsús ndíhi cue tée xica cuu ndíhi-gâ ndàa ingá xio yuhu làgúná yucu cue tée ñùu Gàdará. 2 Te òré ní quene-gâ xití bàrcú te ñ<sup>n</sup> tée yíhi ñaha espíritú cùndíhi yucu ñávaha ní quèe-dé núú yíndüxi ndíyi cuáhán<sup>n</sup>-dé núú-gâ. 3 Te mee-ni núú yíndüxi ndíyi-án quidé vèhe-dé, te cuèi dàcutu ñaha-güedé cadená xii-dé dico ñá tũú tñahí ndàcu-güedé núú-dé. 4 Te ío titní xito ní dàcúú-güedé cadená sáhá-dé ndíhi ndaha-dé dico ní dándává-ni-dé, te ní xóo dácâchi-gâ-dé nchaa cadená-án, te ñá tũú tñahí ní ndàcu-güedé núú-dé. 5 Te cuèi nduu cuèi núú ní xóo cana saa-dé, te váha-ni núu xití yucu ndècu-dé àdi núú yíndüxi ndíyi dico càna saa nahí-ni-dé, te ío ní xóo dánícuèhè-dé mée-dé ndíhi yúú. 6 Te òré ní xiní-dé Jèsús te xínu-dé ní sáhá<sup>n</sup> núú-gâ, te ní nguíni xití-dé, 7 te espíritú yíhi ñaha xii-dé-án



ní quide-xi níhi ní cáhá<sup>n</sup>-dé, te xáha<sup>n</sup>-dê xii-gá:

—¿Ná cuendá véxi yòhò Jèsús Déhe Dútú Ndiòxi sàdí-n ichi-í? Te cáhá<sup>n</sup> ndàhú-í núú Ndiòxi yuhu núú-n sá vâ dándòho ñaha-n xii-í —cachí-dé xáha<sup>n</sup>-dê xii-gá.

<sup>8</sup> Te duca<sup>n</sup> ní cáhá<sup>n</sup>-dé cuendá sá Jèsús ní xáha<sup>n</sup>-gá xii espíritú cúndìhi yucu ñávàha yìhi ñaha xii-dé-á<sup>n</sup> sá queé ñaha-xi xii-dé.

<sup>9</sup> Te Jèsús ní xicá<sup>n</sup> tnúhú-gá núú-dé, te xáha<sup>n</sup>-gá:

—¿Nása nàni-n-í? —cachí-gá xáha<sup>n</sup>-gá xii-dé.

Te ní xáha<sup>n</sup>-dê:

—Vài Sandadú, duha nàni-í chi ío cuéhé-ndí —cachí-dé xáha<sup>n</sup>-dê xii-gá.

<sup>10</sup> Te cue espíritú cúndìhi yucu ñávàha-á<sup>n</sup> ní cáhá<sup>n</sup> ndàhú-xi núú Jèsús sá vâ téndàha ñaha-gá xii-xi quíhí<sup>n</sup>-xi ingá xichi. <sup>11</sup> Te ñu-ni yatni yucu núú ndécú Jèsús-á<sup>n</sup> yíhí vâi cuchí xixexi-güedi. <sup>12</sup> Te nchaá cue espíritú-á<sup>n</sup> ní cáhá<sup>n</sup> ndàhú-xi núú-gá, te xáha<sup>n</sup>-xi xii-gá:

—Càhá<sup>n</sup> ndàhú-ndí núú-n sá dáñá-n quíhu-ndí yiqui cùñú nchaá cùchí-á<sup>n</sup> —cachí-xi xáha<sup>n</sup>-xi xii-gá.

<sup>13</sup> Te Jèsús ní xáha<sup>n</sup>-gá sá cúú quíhu-xi yiqui cùñú-güedi, te xínu dàtná úú mîl-güedi yìhi yucu-á<sup>n</sup>. Te nchaá espíritú cúndìhi yucu ñávàha yìhi ñaha xii téé-á<sup>n</sup> ní quee ñaha-xi xii-dé, te cuánguihu-xi yiqui cùñú nchaá cùchí-á<sup>n</sup>, te nchaá-güedi ní xínu-güedi duha ní quee-güedi ndàa núú dèhvá yuhu làgúná-á<sup>n</sup>, te ní ngaunihnu-güedi xití ndute te ní ndihi-güedi ní cáhá.

<sup>14</sup> Te òré ní xiní cue téé xito cuchí-á<sup>n</sup> nàcuáa ní cuu te ní xínu-güedé, te ní sáhá<sup>n</sup>-güedé ní caní-güedé cuendú núú cuè ñáiyu ndècu xití ñuú, ndihi núú cuè ñáiyu ndècu xití yucu. Te nchaá ñáiyu ní níhí tnúhu ní xicá-yu cuáhá<sup>n</sup> ndéhé-yu nàcuáa ní cuu. <sup>15</sup> Te òré ní quexió-yu núú ndécú Jèsús te ní xiní-yu téé ní xíhi ñaha cuè espíritú cúndìhi yucu ñávàha-á<sup>n</sup> núcóo-dé núú sàhá Jèsús, te ñihnu-ná-dé dóó-dé te núcóo-ná-dé dàtná ñáiyu vâha, te ní yuhú-yu òré ní xiní ñáhá-yu xii-dé. <sup>16</sup> Te nchaá ñáiyu ní xiní nàcuáa ní cuu ní ndúha téé yìhi ñaha cue espíritú cúndìhi yucu ñávàha-á<sup>n</sup> ní cuu ní caní-yu cuendú núú nchàa ñáiyu ní quexio-á<sup>n</sup> nàcuáa ní cuu ní ndúha téé-á<sup>n</sup> ndihi nàcuáa ní cuu cuendá nchaá cùchí-á<sup>n</sup>. <sup>17</sup> Te sá dúcá<sup>n</sup> ní níhí ñáiyu-á<sup>n</sup> tnúhu nàcuáa ní cuu núú nchaá-yu ní nguíta-yu càhá<sup>n</sup> ndàhú-yu núú Jèsús sá ná quee-gá yucu ñuú-yu núhú-gá.

<sup>18</sup> Te ní xica-gá cuáhá<sup>n</sup>-gá núú ndécú bàrcú, te òré ndée-gá bàrcú-á<sup>n</sup> núhú-gá ní nguíta téé ní xíhi ñaha cuè espíritú cúndìhi yucu ñávàha-á<sup>n</sup> càhá<sup>n</sup> ndàhú-dé núú-gá núu

vâ cúndèe iní-gá quíhí<sup>n</sup> ndihi ñaha-gá xii-dé. <sup>19</sup> Dico ñá túú ní sáha-gá tnúhu quíhí<sup>n</sup> ndihi ñaha-gá xii-dé, te ní xáha<sup>n</sup>-gá xii-dé:

—Cuanùhú vehe-n, te caní-n cuendú núú cuè ñáiyu sá Yá Ndiòxi ní cundàhú iní ñáhá-gá xii-n, te ío càhnu cuu nchaá sá vâha ní quide-gá sá cúú-xi-n —cachí-gá xáha<sup>n</sup>-gá xii-dé.

<sup>20</sup> Te téé-á<sup>n</sup> ní xica-dé cuánuhú-dé, te ní sáhá<sup>n</sup>-dé ndi ùxí ñuú nání Dècápolis, te ní caní-dé cuendú núú nchàa ñáiyu sá ío càhnu cuu nchaá sá vâha ní quide ñaha Jèsús xii-dé, te nchaá-yu ío ní cuñúhu-yu.

*Cuendá déhe yoco té Jàiru ndihi cuendá ñá ñádhí ní tnándeé dóó Jèsús*

(Mt. 9:18-26; Lc. 8:40-56)

<sup>21</sup> Te Jèsús cuánde-gá bàrcú, te ní natehndé-gá ndàa ingá xio yuhu làgúná, te ío vâi ñáiyu ní tacá núú ní quexio-gá-á<sup>n</sup>, te xía<sup>n</sup> ndécú-gá <sup>22</sup> ní quexio ñá téé tàxi tnuní veñúhu núú-gá, te téé-á<sup>n</sup> nání-dé Jàiru, te ní nguíñí xití-dé núú-gá. <sup>23</sup> Te ní nguíta-dé càhá<sup>n</sup> ndàhú-dé núú-gá, te xáha<sup>n</sup>-dê xii-gá:

—Ío càhú tnàhá déhe yoco-í cùhú-xi, te ndècu-ná-xi sá cúú-xi, te véxi-í càhá<sup>n</sup> ndàhú-í núú-n núu vâ cúndèe iní-n quíhí<sup>n</sup>-ó vèhe-í tendaha-n-xi cuendá ndúha-xi, te cundecu-xi —cachí-dé xáha<sup>n</sup>-dê xii-gá.

<sup>24</sup> Te Jèsús ní xica-gá cuáhá<sup>n</sup>-gá ndihi téé-á<sup>n</sup>, te ío vâi ñáiyu nchícú<sup>n</sup> ñáhá xii-gá cuáhá<sup>n</sup>, te dàdehnde ñaha-ná-yu xii-gá ní cuu. <sup>25</sup> Te tnuú nchaá ñáiyu-á<sup>n</sup> ñútnàhá ñá ñaha cùhú, te ñaha-á<sup>n</sup> sa ní cuu úxúú cuáá sá cùhú-a<sup>n</sup> ngóyo ñaha níhí xii-a<sup>n</sup>. <sup>26</sup> Te ío ta ndòho-a<sup>n</sup> véxi, te ío cuéhé ñátátná ní cuu ta quide tátna ñaha xii-a<sup>n</sup>, te sa ní ndihi nchaá sá ndécú ndihi-a<sup>n</sup> ní nadico-a<sup>n</sup> cuendá ní níhí-a<sup>n</sup> díhú<sup>n</sup> ní quehe<sup>n</sup> nchaá ñáiyu ní quide tátna ñaha xii-a<sup>n</sup> dico ní ñá-yu ñá túú ní ndacú-yu ndúha-a<sup>n</sup>, chi da uu<sup>n</sup>-gá tá cùu cahú-a<sup>n</sup> cuáhá<sup>n</sup>. <sup>27</sup> Te òré ní níhí-a<sup>n</sup> tnúhu cuendá Jèsús, te ní xica-a<sup>n</sup> cuáhá<sup>n</sup>-a<sup>n</sup> núú ndécú-gá. Te òré ní quexio-a<sup>n</sup> núú ndécú-gá te ní sáhá<sup>n</sup> ndehe yatni-a<sup>n</sup> ndàa sátá-gá ní tnándeé-a<sup>n</sup> dóó-gá. <sup>28</sup> Te duca<sup>n</sup> ní quide-a<sup>n</sup> chi ní sani iní-a<sup>n</sup> sá núu ndacu-a<sup>n</sup> tnándeé-a<sup>n</sup> cuèdicó luha yuhu dóó Jèsús te ndúha-a<sup>n</sup> ní sani iní-a<sup>n</sup>. <sup>29</sup> Te òré duca<sup>n</sup> ní quide-a<sup>n</sup> te ní túú-gá ní ngóyo ñaha-gá níhí xii-a<sup>n</sup>, te òré-á<sup>n</sup> ní cutnúní iní-a<sup>n</sup> sá ní ndúha-a<sup>n</sup> cuéhé tnàhá-a<sup>n</sup>. <sup>30</sup> Te Jèsús ní cutnúní iní-gá sá ñá ñáiyu ní ndúha sá cuendá-gá, núu ní nchócótó-gá ndàa sátá-gá te ní xicá<sup>n</sup> tnúhú-gá núú nchàa ñáiyu nchícú<sup>n</sup> ñáhá xii-gá, te xáha<sup>n</sup>-gá xii-yu:

—¿Ndédacàa-ndo ní tnándeé ñáhá xii-í? —cachí-gá xáha<sup>n</sup>-gá xii-yu.

<sup>31</sup> Te cue téé xica cuu ndihi-gá ní xáha<sup>n</sup>-güedé xii-gá:

—Mèstrú, ndèhe-n sá vái ñáiyu nchícú<sup>n</sup> ñáhá xii-n, te texio texio dàdehnde ñáhá-yu xii-n te xicá<sup>n</sup> tnúhú-gá-n yòo ní tnándee ñáhá xii-n —cachí-güedé xáha<sup>n</sup>-güedé xii-gá.

<sup>32</sup> Te Jèsús ní xíndéhé vâha-gá xio xio ðíñi-gá núu ndédacâa ñáiyu ní tnándee ñáhá xii-gá. <sup>33</sup> Te sá dúcá<sup>n</sup> ní cutnúni iní ñadihí-á<sup>n</sup> nâcuâa ní cuu, núu yúhú yúhú-a<sup>n</sup> ní sáhá<sup>n</sup>-a<sup>n</sup> ní ngüñí xítí-á<sup>n</sup> núú Jèsús, te ní xáha<sup>n</sup> ndáá-a<sup>n</sup> xii-gá nâcuâa ndúu cuendá-a<sup>n</sup>. <sup>34</sup> Te Jèsús ní xáha<sup>n</sup>-gá xii-a<sup>n</sup>:

—Yòhó ñaha cùhú ní cuu, ní sándáá iní ñáhá-n xii-í, núu ní ndúha-n, te vitna cuanuhú te vá ndihú-gá iní-n, chí vá dúcá<sup>n</sup>-gá ndoho-n —cachí-gá xáha<sup>n</sup>-gá xii-a<sup>n</sup>.

<sup>35</sup> Te cáhá<sup>n</sup> dúcá<sup>n</sup>-ní Jèsús ní sáá cue teée xinu cuechi vehe té Jairú téé tàxi tnuní veñúhu-á<sup>n</sup>, te xáha<sup>n</sup>-güedé xii-dé:

—Sa ní xihí déhe-n, vá chíchiu<sup>n</sup>-gá-n Mèstrú —cachí-güedé xáha<sup>n</sup>-güedé xii-dé.

<sup>36</sup> Dico Jèsús ñá túú ní quide cuendá-gá nâcuâa ndúu tnúhu ní cáhá<sup>n</sup> cue téé-á<sup>n</sup>, te ní xáha<sup>n</sup>-gá xii téé tàxi tnuní veñúhu-á<sup>n</sup>:

—Ñá túú nã cani iní-n, quindáá iní ñáhá-ní-n xii-í —cachí-gá xáha<sup>n</sup>-gá xii-dé.

<sup>37</sup> Te Jèsús vá yòo-gá ní cuini-gá canchicú<sup>n</sup> ñáhá xii-gá quíhí<sup>n</sup>, chí té Pelú-ni, ndihí té Jacobó-ni, ndihí ñani-ni-dé té Juáa cuáhá<sup>n</sup> ndihí ñaha-gá xii-güedé. <sup>38</sup> Te òré ní quexio-gá ndihí-güedé vehe téé tàxi tnuní veñúhu-á<sup>n</sup>, te ní xiní-gá sá ïo vâi ñáiyu xindecu, te súuni dusa<sup>n</sup> quidé-yu te níhi xicáhá<sup>n</sup>-yu te xindáhi-yu. <sup>39</sup> Te òré cuanguihu-gá xítí vehe, te ní xáha<sup>n</sup>-gá xii-yu:

—¿Ná cuendá ndéé dúcá<sup>n</sup> ïo dusa<sup>n</sup> quide-ndo, te ndáhyú-ndó? Te xichí-a ñá túú ní xihí-xi chí dicó xidí-xi —cachí-gá xáha<sup>n</sup>-gá xii-yu.

<sup>40</sup> Te ní sácú ndéé ñáhá-yu xii-gá sá dúcá<sup>n</sup> ní cáhá<sup>n</sup>-gá, chí sá cúu-xí mée-yu chí ní xihí ndisa xichí-á<sup>n</sup>. Te òré-á<sup>n</sup> ní queñuhu-gá nchaá-yu quehé, te cuanguihu-gá núu cándodo yiqui cuñú xichí ní xihí-á<sup>n</sup>. Te ndéca-gá tátá xichí ní xihí-á<sup>n</sup> ndihí náná-xi cuanguihu, te tnàhá cue téé úní ndihí-gá-á<sup>n</sup> cuanguihu ndihí-gá. <sup>41</sup> Te ní tñii-gá ndaha xichí ní xihí-á<sup>n</sup>, te ní xáha<sup>n</sup>-gá:

—Tálita, cúmí —cachí-gá xáha<sup>n</sup>-gá.

Te tnúhu-á<sup>n</sup> queé-xi: Yòhó xichí cuéchi yúhú cachí-í sá ndácóo-n, duha quee-xi tnúhu-á<sup>n</sup>.

<sup>42</sup> Te òré-ni-á<sup>n</sup> ní ndoto xichí cuéchi-á<sup>n</sup> ní ndacóo-xi ní nacaca cuu-xi, te ndécu-xi úxúú cuíá-xi. Te ïo ní cuñuhu nchaá ñáiyu sá dúcá<sup>n</sup> ní dándótó ñaha Jესús xii-xi. <sup>43</sup> Te Jèsús ní cáhá<sup>n</sup> víhí-gá dóho tátá-xi ndihí náná-xi sá vá yòo ï<sup>n</sup> cúñáhá-yu sá ní dándótó ñaha-gá xii-xi. Te sáta dúcá<sup>n</sup> te ní xáha<sup>n</sup>-gá xii-yu sá cuañáhá-yu xii-xi sá cáxi-xi.

## 6

*Jèsús ndécú-gá ñuu Nazàrét*  
(Mt. 13:53-58; Lc. 4:16-30)

<sup>1</sup> Te Jèsús ní ndee-gá ñuu núú ní dándótó-gá xichí ní xihí-á<sup>n</sup>, te cuanuhú-gá núú cúu ñuu-gá, te tnàhá cue téé xica cuu ndihí-gá cuanuhú ndihí-gá. <sup>2</sup> Te ndécu Jესús ñuu-gá ní tnahá nduu ndétatú ñáiyu. Te nduu-á<sup>n</sup> cuanguihu-gá xítí veñúhu dàcuaha ñaha-gá xii-yu. Te vâi ñáiyu ndédóho nchaá tnúhu cáhá<sup>n</sup>-gá, te xicuñúhu víhí-yu, te xitnàhá-yu:

—¿Ndéé ní sáhá<sup>n</sup> dâcuáhá téé-a núu ndéé duha váha cáhá<sup>n</sup>-dé, nása ní quide-dé núu ndéé duha ïo váha cutnúni iní-dé, te ndâcu-dé quidé-dé nchaá sá vá yòo tnàhí ndâcu cada-í? <sup>3</sup> Te dicó carpinterú cúú-dé, dicó déhe tá Màriá cúú-dé, te ñani-dé cúú té Jacobó, ndihí té Chéé, ndihí té Judás, ndihí té Ximú, te ðiu-ni cue cúha-dé cúú ñáiyu ndécu ndihí-o ñuu-a —cachí-yu xitnàhá-yu.

Te ñá túú ní cuini-gá-yu cáhá<sup>n</sup> ndihí váha ñáhá-yu xii-gá. <sup>4</sup> Te Jèsús ní xáha<sup>n</sup>-gá xii-yu:

—Te núu ï<sup>n</sup> téé cáhá<sup>n</sup> tnúhu Yá Ndióxi ná násáá-dé ñuu-dé dacuàha-dé ñáiyu tnúhu-gá, te nchaá ñáiyu ñuu-dé-á<sup>n</sup>, ndihí nchaá ñáiyu ndécu ndihí-dé vehe-dé, ndihí nchaá ñáiyu cúu ndi mee-dé ñá túú nehé-yu sá yíñúhu núú-dé, dico cue ñáiyu nchaá dâva-gá ñuu chí nehé-yu sá yíñúhu núú-dé —cachí-gá xáha<sup>n</sup>-gá xii-yu.

<sup>5</sup> Te ñá túú ní quide tátna Jèsús vâi ñáiyu cuendá sá ñá túú ní sándáá iní ñáhá-yu xii-gá, dico ní quide tátna-gá ï<sup>n</sup> úú ñáiyu cùhú ní sándáá iní ñáhá xii-gá. Te ní tendaha ñaha-ni-gá xii-yu te ní ndúha-yu. <sup>6</sup> Te ïo ní cuñúhu-gá sá dúcá<sup>n</sup> ñá túú ní cuini-yu quindáá iní ñáhá-yu xii-gá. Te sáta dúcá<sup>n</sup> te ní xica-gá cuáhá<sup>n</sup>-gá nchaá dâva-gá ñuu líhli càa yatni xiá<sup>n</sup> cuendá dacuàha-gá ñáiyu tnúhu-gá.

*Jèsús táuchiu<sup>n</sup>-gá quíhí<sup>n</sup> cue téé xica cuu ndihí-gá cáhá<sup>n</sup>-güedé tnúhu Yá Ndióxi núú ñáiyu*

(Mt. 10:5-15; Lc. 9:1-6)

<sup>7</sup> Te Jèsús ní cana-gá ndi úxúú cue téé xica cuu ndihí-gá, te ní sáñaha-gá xii-güedé tnúhu ndee iní cundecu ndihí-güedé cuendá queñuhu-güedé nchaá espíritú cundihí yucu ñávaha yíhi ñaha xii ñáiyu. Te ní xáha<sup>n</sup>-gá xii-güedé sá ndi ndúú ndi ndúú-güedé quíhí<sup>n</sup>-güedé cáhá<sup>n</sup>-güedé tnúhu Yá Ndióxi núú ñáiyu. <sup>8-9</sup> Te cúmání-gá caca-güedé quíhí<sup>n</sup>-güedé, te ní xáha<sup>n</sup>-gá xii-güedé:

—Vá cânèhe-ndo ñunu cuhu<sup>n</sup> ndachiu<sup>n</sup>-ndo, te ni vâ cânèhe-ndo sá cáxi-ndó, te ni vâ cânèhe-ndo díhú<sup>n</sup>, chí ï<sup>n</sup> caa-ni tátnu canehe-ndo, te chàu yíhí-ni-ndó-á<sup>n</sup> xiá<sup>n</sup>-ni quíhí-ndo, te vá cânèhe-gá-ndó ñngá ichi

dóo-ndó chi ðu-ni dóo ñíhú-ndó-á<sup>n</sup> xiá<sup>n</sup> ñàhí-ni cuihnu-ndo te ñá túú ñàhí-gá ná canehe-ndo —càchí-gá xáha<sup>n</sup>-gá xii-güedé.

<sup>10</sup> Te xáha<sup>n</sup> tucu-gá:

—Te òré ná sàá-ndó ñúú, te íó ñáiyu cáhá<sup>n</sup> ñàhã-yu xii-ndo vehé-yu, te xiá<sup>n</sup>-ni cundecu-ndo ndéé ná sàá nduu ndèe-ndo ñúú-á<sup>n</sup>. <sup>11</sup> Te núu íó dava ñúú ñá túú cuíní-yu cáhá<sup>n</sup> ndihí ñaha váha-yu xii-ndo, te ní ñá túú cuíní-yu cundedóho-yu tñuhu cáhá<sup>n</sup>-ndó, te ndee-ni-ndo ñúú-á<sup>n</sup> te naquidi-ndo tìcáchúhmá ní tñúí sáhá-ndó cuèndá ná cùtnuní iní-yu sá ñá túú quide váha-yu. Te na cáchí tñuhu ndáá-í xii-ndo sá ná sàá nduu cáda ndáá Yá Ndióxi cuéchi nchaa ñáiyu, te cue ñáiyu duca<sup>n</sup> na càda ñaha xii-ndo-á<sup>n</sup> ño-gá ndohó-yu dàvá-á<sup>n</sup> dàcúxí dàtná ndoho cue ñáiyu ñúú Sòdomá ndihí cue ñáiyu ñúú Gómorrá —càchí-gá xáha<sup>n</sup>-gá xii-güedé.

<sup>12</sup> Te cue téé-á<sup>n</sup> ní xica-güedé cuáhá<sup>n</sup>-güedé te ní ngüíta-güedé dácua<sup>n</sup>-güedé cue ñáiyu tñuhu Yá Ndióxi, te xáha<sup>n</sup>-güedé xii-yu:

—Chí dándixi túu iní sá ñá túú quide váha-ndo ndècu-ndo, te daña-ndo nchaa ichi cuehé ichi duha ndècu-ndo. —càchí-güedé xáha<sup>n</sup>-güedé xii-yu.

<sup>13</sup> Te vai espíritu cùndihí yucu ñávaha yíhi ñaha xii ñáiyu ta queñuhu-güedé yiqui cuñú-yu cuáhá<sup>n</sup>, te vai tucu ñáiyu cùhú tá quide tátna-güedé cuáhá<sup>n</sup> chíhí ñaha-güedé acití xii-yu te ndúha-yu.

*Nàcuáa ní cuu ní xihí té Juáá téé dàcuandute ñaha xii ñáiyu*

(Mt. 14:1-12; Lc. 9:7-9)

<sup>14</sup> Te nchaa xichi ní níhí ñáiyu tñuhu nchaa nàcuáa quide Jesús, te ñàhá té Hèrodés téé yíndaha ñaha xii ñáiyu ní níhí-dé tñuhu nchaa nàcuáa quide-gá, te ní cachí-dé:

—Té Juáá téé ní xóo dàcuandute ñaha xii ñáiyu ní ndoto núu dàcá<sup>n</sup> ndácú-dé quidé-dé nchaa sá vã yóo ñàhí ndàcu cada —duha ní cachí-dé.

<sup>15</sup> Te dava ñáiyu càchí-yu sá tã Èliás téé ní xóo cáhá<sup>n</sup> tñuhu Yá Ndióxi ndéé sanaha ní nasáá-dé.

Te davá-yu càchí-yu sá cúú-gã dàtná ñúú téé ní xóo cáhá<sup>n</sup> tñuhu Yá Ndióxi ndéé sanaha. <sup>16</sup> Te té Hèrodés ní níhí-dé tñuhu nchaa nàcuáa cáhá<sup>n</sup>-yu, te ní cachí-dé:

—Ðiú té Juáá téé ní táuchíu<sup>n</sup>-í ní xehndé-güedé díquí-xi ní ndoto —càchí-dé.

<sup>17-18</sup> Te duha ní cuu cùtnhá ní sahni té Hèrodés té Juáá, chí dàvá-á<sup>n</sup> ní naquehe<sup>n</sup> té Hèrodés-á<sup>n</sup> ñúú ñaha ñani Herodiás ndécá-dé, te ñaha-á<sup>n</sup> sá ní cándeca ñaha ñani-dé té Lipé. Te té Juáá ní xáha<sup>n</sup>-dè xii té Hèrodés sá ñá túú ní quide váha-dé sá dúcá<sup>n</sup> ní naquehe<sup>n</sup>-dè ñaha ní cándeca ñani-dé, núu sá cuèndá ñaha-á<sup>n</sup> ní táuchíu<sup>n</sup> té Hèrodés ní tñúí-güedé té Juáá ní chíhí ñaha-güedé vecaá,

te ní dácútu ñaha-güedé xii-dé, te duca<sup>n</sup> ní quide-dé cuèndá sá ndécá ñaha-dé xii-a<sup>n</sup>.

<sup>19</sup> Te ñaha ñani Herodiás ndécá tã Hèrodés-á<sup>n</sup> ío ní cuu úhú iní-a<sup>n</sup> té Juáá, te ní cuíní-a<sup>n</sup> cahni-a<sup>n</sup>-dè, dico ñá túú ní níhí-a<sup>n</sup> nàcuáa cada-a<sup>n</sup>. <sup>20</sup> Te mee té Hèrodés chí ní cùtnuní ndáá iní-dé sá té Juáá cúú-dè ñúú tée quide mee-ni sá váha, te quide ndáá-dé núú Yá Ndióxi, te ní xóo yùhú ñàhá-dè ñúu xiá<sup>n</sup> ñá túú ní dàña-dé ná cada ñaha ñaha ndeca-dé-á<sup>n</sup> xii té Juáá. Te té Hèrodés-á<sup>n</sup> ío ní cudíí iní-dé ní xíndedóho-dé nchaa tñuhu ní xáha<sup>n</sup> té Juáá xii-dé, dico ñá túú ní sàni iní-dé duu<sup>n</sup> duu<sup>n</sup> tñúí-dé tñuhu-á<sup>n</sup>. <sup>21</sup> Te ñúú nduu ní xóo vico vehe té Hèrodés ní quide cáhnu-dé nduu ní cacu-dé. Te nduu-á<sup>n</sup> ní níhí ñaha ñani Herodiás-á<sup>n</sup> nàcuáa cada-a<sup>n</sup> cuèndá cuú té Juáá. Te nduu-á<sup>n</sup> ní cáhá<sup>n</sup> té Hèrodés nchaa cue tée cùchiu<sup>n</sup>, ndihí nchaa cue tée tàxi tñuní ñàhá xii cue sandadú, ndihí nchaa cue tée cuica ndècu distritú Galilea cuèndá cudini ndihí ñaha-dé xii-güedé nduu-á<sup>n</sup>. <sup>22</sup> Te ndècu ñúú déhe yoco ñaha ñani Herodiás-á<sup>n</sup>, te xíchí-á<sup>n</sup> ní quíhu-xi vehe núu cúú vico-á<sup>n</sup> ní xita saha-xi mèi oré yíhí té Hèrodés mèsá ndihí nchaa cue tée ní cáhá<sup>n</sup>-dè, te ío ní cudíí iní-dé ndihí nchaa cue tée-á<sup>n</sup> nàcuáa ní xita xíchí-á<sup>n</sup>. Te té Hèrodés ní xáha<sup>n</sup>-dè xii-xi:

—Cáca<sup>n</sup> núu-í ñúu ná cuíní-n te taxi-í —càchí-dé xáha<sup>n</sup>-dè xii-xi.

<sup>23</sup> Te ní cacuehe-dé ndéé Yá Ndióxi nàcuáa cùtnuní iní xíchí-á<sup>n</sup> sá ndáá cuáñaha-dè ñúu ná cúú sá ná cáca<sup>n</sup>-xi núu-dè cuéí ndéé cuádava nchaa sá ndécú ndihí-dé, te núu na cáca<sup>n</sup>-xi. <sup>24</sup> Te sá dúcá<sup>n</sup> ní xáha<sup>n</sup>-dè xii-xi núu ní quee-xi quehé ní xáha<sup>n</sup>-xi xii náná-xi:

—Náá, ¿ná cúú sá cáca<sup>n</sup>-í núu té Hèrodés? —càchí-xi xáha<sup>n</sup>-xi xii-a<sup>n</sup>.

Te náná-xi-á<sup>n</sup> ní xáha<sup>n</sup>-a<sup>n</sup> xii-xi:

—Cuáhá<sup>n</sup> cáca<sup>n</sup>-n díquí té Juáá téé dàcuandute ñaha xii ñáiyu —càchí-a<sup>n</sup> xáha<sup>n</sup>-a<sup>n</sup>.

<sup>25</sup> Te ndíhi-ni cuándihu xíchí-á<sup>n</sup> xití vehe núu yíhí té Hèrodés-á<sup>n</sup>, te xáha<sup>n</sup>-xi xii-dé:

—Cuíní-í sá mèi nduu vitna quehndé-n díquí té Juáá téé dàcuandute ñaha xii ñáiyu te taxi-n, dico na cùhu<sup>n</sup> ñúú xití cóhó taxi-n —càchí-xi xáha<sup>n</sup>-xi xii-dé.

<sup>26</sup> Te té Hèrodés ní ngüíta-dé ndihú víhí iní-dé sá dúcá<sup>n</sup> ní xáha<sup>n</sup>-xi xii-dé, dico ñá túú ní cùyi-dé cùñaha-dè xii-xi sá vã cúú cuáñaha-dè sá xicá<sup>n</sup>-xi, chí cuèndá sá ñúu nchaa ñáiyu ní xáha<sup>n</sup>-dè sá cúú cuáñaha-dè ñúu ná cúú sá ná cáca<sup>n</sup>-xi, te ní cacuehe-dé ndéé Yá Ndióxi nàcuáa cùtnuní iní-í sá ndáá cuáñaha-dè sá ná cáca<sup>n</sup>-xi núu-dé.

<sup>27</sup> Te té Hèrodés-á<sup>n</sup> ndíhi-ni ní xáha<sup>n</sup>-dè xii ñúú sandadú sá quíhí-dé quehndé-dé díquí té Juáá. <sup>28</sup> Te sandadú-á<sup>n</sup> ní xica-dé cuáhá<sup>n</sup>-dè vecaá núu yíhí té Juáá-á<sup>n</sup>, te

ní quexio-dé te ní xehndé-ni-dé díquí tē Juáá, te ní chihi-dé ìṣṣ xití cóhó te nèhe-dé cuánhú ní sáha-dé xíchí xicá-án, te xíchí-án ní nacúaha-xi náná-xi. <sup>29</sup> Te òrè ní níhí nchaa cue téé ní xica cuu ndihi ndí Juáá-án tñuhu sá dúcá ní sahni ñaha-güedé xii ndí, te ní sáhán-güedé ní ndocani-güedé yiqui cùñú ndí te ní chindúxi-güedé.

*Jèsús dácàxi-gá ùhúṣṣ mīl cue téé te ðìṣṣ ñáyíu ðìhí ndihi landú*

*(Mt. 14:13-21; Lc. 9:10-17; Jn. 6:1-14)*

<sup>30</sup> Te nchaa cue téé ní táuchíúṣṣ Jèsús cuáhán cáhán tñuhu Yá Ndióxi núú ñáyíu ní ndexio-güedé núú-gá te ní ngúita-güedé nácàni tñuhu-güedé nchaa nàcuáa ní quide-güedé ndihi nchaa nàcuáa ní dánèhè ñáhá-güedé xii-yu. <sup>31</sup> Te Jèsús ní xáha-gá xii-güedé:

—Chí nèhè ná quihí-ó ìṣṣ xichi núú ñà túú ñáyíu ndetatú-ó —càchí-gá xáha-gá xii-güedé.

Te duca ní xáha-gá xii-güedé, chí ío cuéhé ñáyíu cuáhán véxi-yu cùú-yu núú ndécú-gá. Te ní ñà níhí-gá nása cada-gá caxi-gá ndihi cue téé xica cuu ndihi-gá. <sup>32</sup> Te Jèsús cuánguee-gá bàrcú ndihi mee-ni cuè téé ní táuchíúṣṣ-gá cáhán tñuhu-gá, te cuáhán-gá ndihi-güedé ìṣṣ xichi núú ñà túú ñáyíu ndécú. <sup>33</sup> Dico vai ñáyíu ní cutnùni iní-yu sá díú-gá ñùhú bàrcú-án cuáhán ndihi cue téé xica cuu ndihi-gá, te nchaa ñúú cáá yàtni xiá ní quee ñáyíu xixínú-yu cuáhán núú ní quidé-yu cuèndá quexio Jèsús, te sa ndécú-yu xiá ní quexio-gá. <sup>34</sup> Te òrè ní quene Jèsús xití bàrcú, te ní xini-gá cuéhé víhí ñáyíu xixúcu núú ní quexio-gá-án, te ní cundàhú iní ñáhá-gá xii-yu chí ndécú-yu datná xñdecu cue mbéé cue quiti ñà túú tòli-xi, te ío vai núú sá ní ngúita-gá ní dácúahá ñaha-gá xii-yu. <sup>35</sup> Te sáta tá cuàa cuáhán te ní sáhán cue téé xica cuu ndihi Jèsús núú-gá, te xáha-güedé xii-gá:

—Sa ní cuaa te ñà túú ñáyíu ndécú yatni iha. <sup>36</sup> Váha-gá dandàca nchaa ñáyíu-a chí na quihí-yu nchaa vehe cáa xití yucu-a, ndihi nchaa ñúú cáá nchaa yatni iha cuáa-yu sá caxi-yu —càchí-güedé xáha-güedé xii-gá.

<sup>37</sup> Te Jèsús ní xáha-gá:

—Mee-ndo chí cuáñaha sá ná caxi-yu —càchí-gá xáha-gá xii-güedé.

Te xáha-güedé xii-gá:

—¿Te nása cada-ndí, chí xini ñuhu-xi datná úú cièndú díhúṣṣ denàriú cuèndá cuaa-ndí sá caxi-yu? —càchí-güedé xáha-güedé xii-gá.

<sup>38</sup> Te Jèsús ní xáha-gá xii-güedé:

—Chí cuáhán cundehe-ndo núu ná daha pàá ndécú ndihi-ndo te cachí tñuhu-ndo —càchí-gá xáha-gá xii-güedé.

Te ní sáhán ndéhé-güedé núu ná daha pàá ndécú, te ní xáha-güedé xii-gá:

—Úhúṣṣ duha-ná pàá ndihi úú-ná chácá ndécú —càchí-güedé xáha-güedé xii-gá.

<sup>39</sup> Te Jèsús ní xáha-gá xii nchaa ñáyíu sá ná níhí tñáhá-yu cuu tití xichí-yu, te ngóo-yu nchaa núú cùhú cuíí cáa xiá. <sup>40</sup> Te nchaa-yu ní ngóo-yu, te dava xichí-yu ní ngóo ìṣṣ cièndú-yu, te dava xichí-yu ní ngóo údico úxi-yu. <sup>41</sup> Te sáta ní ndihí-yu ní ngóo, te ní queheṣṣ Jèsús ndi ùhúṣṣ pàá ndi úú chácá-án, te ní ndacoto-gá andíu te ní ndacáṣṣ táhú-gá núú Yá Ndióxi, te dátñuni ní táhú cuèchi-gá pàá-án te ní sáñaha-gá xii cue téé xica cuu ndihi-gá ní dácàññu-güedé nchaa ñáyíu-án ní xexi-yu. Te ðíu-ni duca ní quide tucu-gá úú chácá-án. <sup>42</sup> Te nchaa-yu ní xexi-yu ní ndahá xití-yu. <sup>43</sup> Te sáta ní túhú cóhó-yu te ní nadatàcá-güedé nchaa sá ní quendóo, te ní chítú ùxúú tñáhá tídihi mee-ni sá ní quendóo núú ùhúṣṣ-ni pàá, ndihi núú úú-ni chácá. <sup>44</sup> Te nchaa ñáyíu ní xexi-án chí xñu ùhúṣṣ mīl mee-ni cuè téé chí ðíu-ni cue téé-án ní quíundehe, te ðìṣṣ ñáyíu ðìhí ndihi cue landú.

*Jèsús xicá-gá núú ndute*

*(Mt. 14:22-27; Jn. 6:16-21)*

<sup>45</sup> Te òrè-ni-án ní xáhaṣṣ Jèsús xii cue téé xica cuu ndihi-gá sá quèe-güedé bàrcú codonù-güedé quihí-güedé ìṣṣ ñúú nání Bètsaidá cáá ndàa ingá xio yuhu làgúná núú ndécú-güedé-án, te mee-gá quendóo-gá cada ndee iní tñáhá-gá ndihi cue ñáyíu. <sup>46</sup> Te sáta ní yáha ní quide ndee iní tñáhá-gá ndihí-yu, te ní xica-gá cuáhán-gá ìṣṣ tindúú cáá yàtni xiá cuèndá cáhán ndihi-gá Yá Ndióxi. <sup>47</sup> Te òrè sa ní cundiquiṣṣ te bàrcú sá ñùhú cuè téé xica cuu ndihi-gá sa cuáhán-xi ndéé cuádava xití làgúná-án, te mee-gá ndécú-gá ìṣṣ núú tindúú. <sup>48</sup> Te túu ndèhe-gá sá sùúni ndòho-güedé tá dácaca-güedé bàrcú-án cuáhán, chí cuèndá ndàa nacúaa cuáhán-xi-án duha véxi táchí te natùndaha-xi. Te ingá nduu-án tàculhá-gá sa ní cuyatni víi-ná Jèsús bàrcú ñùhú-güedé-án, dico núú ndute tá xica-gá cuáhán te luha-ná te yáha ñaha-gá xii-güedé ní cùu. <sup>49-50</sup> Te òrè ní xini ñáhá cuè téé ñùhu bàrcú-án xii-gá te ní yùhú-güedé ní cana saa-güedé, chí ní sani iní-güedé sá ìṣṣ almá cùú-gá. Te ní xáha-gá xii-güedé:

—¡Ñíṣṣ cunduu-ndo, vá yùhú-ndó, chí yùhú cùú-í! —càchí-gá xáha-gá xii-güedé.

<sup>51</sup> Te Jèsús cuánguee-gá xití bàrcú ñùhú-güedé-án, te sáta cuánguee-gá te òrè-ni ní ngúññí táchí, te ní cuñúhu víhi-güedé.

<sup>52</sup> Te duca chí cue téé-án ñà túú ní cutnuni iní-güedé nása quide-gá, chí ñà túú ní cutnuni váha iní-güedé nàcuáa nduu sá ní quide-gá òrè ní nadacàyá-gá pàá, chí ío ñí díquí-güedé.

*Jesús quidé tātna-gá ñáiyu cùhú ñuú Genesàrét*

(Mt. 14:34-36)

<sup>53</sup> Te ní yáha-güedé ndihi-gá ndáa ingá xio yuhu làgúná, te ní sáá-güedé ndihi-gá yucu cue téé ñuú Genesàrét. Te yacá<sup>n</sup> ní dácútú ndéé-güedé bàrcú-güedé yuhu làgúná. <sup>54</sup> Te òré ní quene Jesús ndihi cue téé xica cuu ndihi-gá xití bàrcú, te nchaa ñáiyu xíndecu-á<sup>n</sup> ní cutnùnì iní-yu sá díú-gá. <sup>55</sup> Te ñáiyu-á<sup>n</sup> ndihi-ni ní sáhán-yu nchaa núú xíndecu cue ñáiyu cùhú, te cue ñáiyu cùhú-á<sup>n</sup> ní quée-yu xito nchìdo ñahá-yu cuáhán<sup>n</sup> ndi tnahá ì<sup>n</sup> ì<sup>n</sup> xichi núú nihí-yu tnúhu quèxio Jesús. <sup>56</sup> Te nchaa ñuú náhnú ndihi nchaa ñuú líhli núú cuahá<sup>n</sup> Jesús, ducá<sup>n</sup> xíndecá-yu nchaa ñáiyu cùhú cuahá<sup>n</sup> xití ñuú sàcá<sup>n</sup> ñáhà-yu núú-gá cuendá cada tātna ñaha-gá xíi-yu. Te diu-ni ducá<sup>n</sup> xiquidé-yu nchaa dava-gá xichi núú cuahá<sup>n</sup>-gá núú xíndecu cue ñáiyu, te cáhán<sup>n</sup> ndáhú-yu núú-gá sá ná dáñá-gá tnándeé cue ñáiyu cùhú-á<sup>n</sup> cuèdicó luha yuhu dóó-gá cuendá ndúha-yu. Te nchaa ñáiyu cùhú ní tnándeé yuhu dóó-gá ní ndúha-yu.

## 7

*Cuendá nchaa sá quidé-xí ngúndecu cuéchi ñáiyu*

(Mt. 15:1-20)

<sup>1</sup> Te ñuú Jerusalén ní quee cue téé dàcuaha ñaha xii ñáiyu nchaa tnúhu ní chídó tnùnì ndíi Moisés, te ní quexio-güedé núú ndécú Jesús, te tnáhá cue téé cùu fariséú ní quexio ndihi-güedé. <sup>2</sup> Te cue téé-á<sup>n</sup> ní xini-güedé sá dáva cue téé xica cuu ndihi Jesús ñá túú ndáha-güedé dàtná ndáhá mèe cue téé cùu fariséú-á<sup>n</sup> òré caxi-güedé. Te xiá<sup>n</sup> núu cue téé ní quexio-á<sup>n</sup> ní cáhán<sup>n</sup> cuèhé-güedé cuendá cue téé xica cuu ndihi-gá. <sup>3</sup> Te ducá<sup>n</sup> chi nchaa cue téé cùu fariséú-á<sup>n</sup> ndihi nchaa ñáiyu isràél nchicú<sup>n</sup> nihnú-yu quidé-yu dàtná ní xóo cada nchaa cue ñani tnáhá-yu ní xíndecu ndéé sanaha, chi nchaa ñáiyu-á<sup>n</sup> và caxí-yu te núu và ndáhá-yu dàtná ní xóo ndaha nchaa cue ñani tnáhá-yu ní xíndecu ndéé sanaha-á<sup>n</sup>. <sup>4</sup> Te ñáiyu-á<sup>n</sup> ndi tnahá òré cuahá<sup>n</sup>-yu núú yáhu te násáá-yu, te ndáhá-yu nàcuáa sàni iní-yu ndúvétú iní Yá Ndióxi, te núu và dúcá<sup>n</sup> cadá-yu te và caxí-yu. Te tnáhá náqueté-yu vasú sá sácúhu<sup>n</sup> sá xihí-yu, ndihi lítu, ndihi cohó cáá, ndihi camá. Te nchaa xéhé náqueté-yu nàcuáa sàni iní-yu ndúvétú iní Yá Ndióxi. Te ío-gá titní sá ní xóo cada nchaa ñáiyu ní xíndecu ndéé sanaha-á<sup>n</sup> nchicú<sup>n</sup> nihnú-yu quidé-yu. <sup>5</sup> Te cue téé cùu fariséú-á<sup>n</sup>, ndihi cue téé dàcuaha ñaha xii ñáiyu nchaa tnúhu ní chídó tnùnì ndíi Moisés-á<sup>n</sup> ní xáha<sup>n</sup>-güedé xii Jesús:

—¿Ná cuendá cue téé xica cuu ndihi-ní ñá túú náquete-güedé ndaha-güedé òré caxi-güedé dàtná ní cachí nchaa cue téé ní xíndecu ndéé sanaha-í? —càchí-güedé xáha<sup>n</sup>-güedé xii-gá.

<sup>6</sup> Te Jesús ní xáha<sup>n</sup>-gá xii-güedé:

—Nchòhó cùu-ndó cuè téé io dàndahú mèé-xí chi càchí-ndó sá ìo quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tnùnì ndíi Chàia téé ní xóo cáhán<sup>n</sup> tnúhu Yá Ndióxi ndéé sanaha núú tütú-gá núú cáhán<sup>n</sup>-xi nàcuáa ní cáhán<sup>n</sup>-gá cuendá-ndó, te duha ní cachí-gá:

Ñáiyu-a càchí-yu sá ìo càhnu cuu-í, dico dicó-ni yuhu cáhán<sup>n</sup>-yu,

chi ñá túú ñuhu iní ñáhá-yu xii-í.

<sup>7</sup> Te áú<sup>n</sup> ná cuu chíñuhu ñahá-yu xii-í, chi ñá túú vèdana ndéé nándihí-xi,

chi cue ñáiyu-a dàcuahá-yu cue tnàha ñáiyú-yu nàcuáa cundecú-yu, dico mee-ni tnúhu sá ní cahu iní cue ñáiyu ñuyúí-a cáhán<sup>n</sup>-yu.

Duha ní chídó tnùnì ndíi Chàia núú tütú Yá Ndióxi nàcuáa ní cáhán<sup>n</sup>-gá cuendá-ndó.

<sup>8</sup> Te nchòhó ní dáñá-ndó nàcuáa ní cachí Yá Ndióxi cada-ndo, te nchicú<sup>n</sup> nihnu-ndo quide-ndo nàcuáa ní cahu iní cue ñáiyu ñuyúí-a, chi náquete-ni-ndo lítu, te náquete-ni-ndo vasú sácúhu<sup>n</sup> sá xihí-ndó nàtava-ndo nàcuáa ní xóo cada ñáiyu-á<sup>n</sup> ní xóo naqueté-yu nchaa xiá<sup>n</sup>, te nándi-gá nchaa núú sá quidé-ndó —càchí Jesús xáha<sup>n</sup>-gá xii-güedé.

<sup>9</sup> Te ní xáha<sup>n</sup> tucu-gá xii-güedé:

—Te nchòhó, ñá túú cuini-ndó càda-ndo nàcuáa cuini Yá Ndióxi, chi mee-ni nàcuáa ní cachí cue téé ní xíndecu ndéé sanaha nchicú<sup>n</sup> nihnu-ndo quide-ndo. <sup>10</sup> Te ndíi Moisés ní cachí ndíi sá ncháá ñáiyu canehé-yu sá yíñuhu núú tātá-yu ndihi núú náná-yu. Te nchaa ñáiyu na cáhán<sup>n</sup> úhú cuendá tātá-yu àdi cuendá náná-yu te cahni ñaha-güedé xii-yu ní cachí ndíi. <sup>11</sup> Te nchòhó càchí-ndó sá núu ì<sup>n</sup> téé na cùñaha-dé xii tātá-dé ndihi náná-dé sá sá ní sani iní-dé cuañaha-dé xii-yu cùu-xi Corbán, te ñá túú-gá xini ñuhu-xi sá cuañaha-dé xii-yu, te tnúhu Corbán-á<sup>n</sup> quée-xí: Sá cúu cuendá Yá Ndióxi. <sup>12</sup> Te sá dúcá<sup>n</sup> ná cáhán<sup>n</sup> ì<sup>n</sup> téé-á<sup>n</sup> te nchòhó chindéé tnúhu-ndo-dé cuendá sá và chindéé-gá-dé tātá-dé ndihi náná-dé. <sup>13</sup> Te ducá<sup>n</sup> quide-ndo chi ní dáquée tíhú-ndó nàcuáa ní cachí Yá Ndióxi cada-ndo, te mee-ni nàcuáa ta quide cue téé ñuyúí-a véxi nchicú<sup>n</sup> nihnu-ndo quide-ndo, te diu-ni ducá<sup>n</sup> ta sànu ichi tnaha-ndo véxi, te nándi-gá nchaa sá cáhú iní-ndó quide-ndo —cachí-gá xáha<sup>n</sup>-gá xii-güedé.

<sup>14</sup> Te Jesús ní xáha<sup>n</sup> tucu-gá xii cue ñáiyu xíndecu-á<sup>n</sup>:

—Chí táquixi ndehe iha, te cundedóho váha-ndo tñuhu na cãhá<sup>n</sup>-í-a te ío váha cuáha-ndo cuendá. <sup>15</sup> Nchaa sá xéxi-ndó chí ñá túú ná quidé-xí iní-ndó, dico nchaa sá cuèhé sá dúhá sàni iní-ndó quide-ndo, nchaa xiá<sup>n</sup> quidé-xí ndècu cuèchi-ndo. <sup>16</sup> Te nchaa nchòhó ñáiyu ndèdóho nchaa tñuhu cãhá<sup>n</sup>-í-a ío váha chí cuáha cuendá —càchi-gá xãha<sup>n</sup>-gá xií-yu.

<sup>17</sup> Te Jèsús ní dándõ-gá nchaa ñáiyu núu xixúcu-yu-á<sup>n</sup> te cuándihu-gá xití vehe. Te cue téé xica cuu ndihi-gá ní xicá<sup>n</sup> tñuhú-güedé núú-gá núu nása quèe-xi cuendú ní caní-gá núú ñáiyu-á<sup>n</sup>. <sup>18</sup> Te ní xãhá<sup>n</sup>-gá xii-güedé:

—¿Te náa tnahá nchòhó ñá túú ní tècú tñumí-ndó cuendú ní caní-í núú ñáiyu-á<sup>n</sup>? Nchaa sá xéxi-yu cuánguee xití-yu ñá túú quide-xi iní-yu nãcuáa ngündecu cuèchi-yu. <sup>19</sup> Chí ñá diú iní-yu cuánguee-xi chí cuánguee ndáá-xi xití-yu, te nãyáha ñaha-xi xií-yu —càchi-gá xãha<sup>n</sup>-gá xii-güedé.

Te sá dúcá<sup>n</sup> ní cãhá<sup>n</sup>-gá te ní dátũu-gá sá cúu càxi-o nchaa núú sá cúu càxi-o. <sup>20</sup> Te ní xãhá<sup>n</sup> tũcu-gá xii-güedé:

—Nchaa sá cuèhé sá dúhá quide ñáiyu xiá<sup>n</sup> cãcú ñihnu-xi iní-yu, te nchaa xiá<sup>n</sup> quidé-xí ndècu cuèchi-yu. <sup>21</sup> Te iní-yu-á<sup>n</sup> cãcú ñihnu nchaa sá cuèhé sá dúhá, chí sàni cuèhé sání dùha iní-yu. Te cue téé cãhá<sup>n</sup> ndihi-güedé ñadihi te ñá diú ñadihi-güedé cúu-yu, te diu-ni duca<sup>n</sup> quide cue ñáiyu dihi cãhá<sup>n</sup> ndihí-yu téé te ñá diú yí-yu cùu-güedé. Te sãhni-yu cue tñaha ñáiyú-yu, te mee-ni ichi dií iní cúdã iní-yu cundecu-yu. <sup>22</sup> Te dùhu ndachiu<sup>n</sup> tnahá-yu, te xihó-yu cundecu ndihí-yu sá ndécú ndihi tnahá ñáiyú-yu, te ío quide úhú iní-yu sá cúu-xi tñaha ñáiyú-yu, te ío dandahú tnahá-yu, te mee-ni nchaa sá cuèhé sá dúhá cudií iní-yu quide-yu, te ío cuédú iní-yu, te ío yiti yùhú-yu, te ío quide cahnú-yu mèe-yu, te quidé-yu nãndi-gá sá ñá túú tàu-yu cadá-yu. <sup>23</sup> Te nchaa sá cuèhé sá dúhá-á<sup>n</sup> cãcú ñihnu-xi iní-yu, te nchaa xiá<sup>n</sup> quidé-xí ndècu cuèchi-yu, te ñá túú cùu-xi sá váha sá cúu-xi iní-yu.

*Í<sup>n</sup> ñadihi véxi ñuú xicá ní sãndáa iní-a<sup>n</sup> Jèsús*

(Mt. 15:21-28)

<sup>24</sup> Te ní xica Jèsús cuáhá<sup>n</sup>-gá ndéé yucu cue téé ñuú Tírú, ndihi yucu cue téé ñuú Sidón. Te òré ní quexio-gá xiá<sup>n</sup> te cuánguihu-gá í<sup>n</sup> vehe te xiá<sup>n</sup> cundecu-gá, te cuní-gá sá vã quini ñáiyu sá xiá<sup>n</sup> ndécú-gá ní cùu, dico dai ní níhi-yu tñuhu. <sup>25</sup> Te í<sup>n</sup> ñadihi ndécú í<sup>n</sup> déhe yoco-a<sup>n</sup>, te yíhi ñaha espíritú cündihi yucu ñávãha xii-xi, te ñaha-á<sup>n</sup> ío ndihi ní níhi-a<sup>n</sup> tñuhu sá ní quexio Jèsús xiá<sup>n</sup> núu ní sãhá<sup>n</sup>-a<sup>n</sup> núu ndécú-gá, te ní ngüñí xití-á<sup>n</sup> núú-gá. <sup>26</sup> Te ní ngüita-a<sup>n</sup> cãhá<sup>n</sup> ndáhú-a<sup>n</sup> núú-gá, te

xãha<sup>n</sup>-a<sup>n</sup> sá núu vá cündèe iní-gá queñuhu-gá espíritú cündihi yucu ñávãha yíhi ñaha xii déhe-a<sup>n</sup>. Dico ñá diú ñaha israél cúu-á<sup>n</sup> chí ñaha ñuú Sirofènicia cúu-á<sup>n</sup> te tñuhu griégú cúu tñuhu-a<sup>n</sup>. <sup>27</sup> Te xiá<sup>n</sup> núu ní xãhá<sup>n</sup> Jèsús xii-a<sup>n</sup>:

—Daña na càxi tnaa nchaa landú chítú xití-güexi, te dátñuni caxi cue iná, chí ñá túú ndùu váha-xi quehe<sup>n</sup>-o sá xéxi lãndú te cuáha-o iná —càchi-gá xãha<sup>n</sup>-gá xii-a<sup>n</sup>.

<sup>28</sup> Te ní xãhá<sup>n</sup>-a<sup>n</sup> xii-gá:

—Mèstrú, ndáá-ni cãhá<sup>n</sup>-n, dico iná chí nãdatac-güedi sá ngóyó yùhu cóhó lãndú —càchi-a<sup>n</sup> xãhá<sup>n</sup>-a<sup>n</sup> xii-gá.

<sup>29</sup> Te Jèsús ní xãhá<sup>n</sup>-gá xii-a<sup>n</sup>:

—Ío váha ní cãhá<sup>n</sup>-n, te cuanùhú te ñá túú-gá ná caní iní-n, chí sa ní quee espíritú cündihi yucu ñávãha yíhi ñaha xii déhe-n —càchi-gá xãhá<sup>n</sup>-gá xii-a<sup>n</sup>.

<sup>30</sup> Te ñaha-á<sup>n</sup> ní nasáá-a<sup>n</sup> vehe-a<sup>n</sup> te càa déhe-a<sup>n</sup> núu cãmá, dico ñá túú-gá espíritú cündihi yucu ñávãha yíhi ñaha xii-xi chí sa ní quee ñaha-xi.

*Jèsús quidé tátna-gá í<sup>n</sup> téé ñá cúu cãhá<sup>n</sup> váha te doho-dé*

<sup>31</sup> Te Jèsús ní ndee-gá yucu cue téé ñuú Tírú te ní yáha-gá yucu cue téé ñuú Sidón, ndihi yucu ndi úxi ñuú nání Decápolis, te ní sáa-gá ndéé yuhu lãgúná districtú Galileá. <sup>32</sup> Te xiá<sup>n</sup> ndécú-gá ní quexio ñáiyu ndéé núú-gá ndécá-yu í<sup>n</sup> téé ñá cúu cãhá<sup>n</sup> váha-dé te doho-dé. Te cãhá<sup>n</sup> ndáhú-yu núú-gá sá ná tẽndaha ñaha-gá xii-dé cuendá ndúha-dé. <sup>33</sup> Te Jèsús ní queñuhu ñaha-gá xii-dé tnuú-yu, te ndéca ñaha-gá cuáhá<sup>n</sup> í<sup>n</sup> xio, te ní dáquihu-gá díquí ndáhá-gá yaú lóho-dé, te ní dácãnuu-gá dí-gá díquí ndáhá-gá, te ní tẽndaha-gá yãa-dé. <sup>34</sup> Te ní ndacoto-gá andiu te ní sãnuu iní-gá, te ní cãhá<sup>n</sup>-gá tñuhu mee-gá, te xãhá<sup>n</sup>-gá:

—¡Éfatá! —càchi-gá xãhá<sup>n</sup>-gá xii-dé.

Te tñuhu-á<sup>n</sup> quée-xi: Nacaá<sup>n</sup> yòhó lóho. <sup>35</sup> Te òré-ni-á<sup>n</sup> ní nacaá<sup>n</sup> lóho-dé, te ní nduu váha yãa-dé, te ní cuu cãhá<sup>n</sup> váha-dé. <sup>36</sup> Te Jèsús ní cãhá<sup>n</sup> víhi-gá dóho ñáiyu ndihi ñaha xii téé ní quide tátna-gá-á<sup>n</sup> sã vã yõo í<sup>n</sup> cunãhá-yu sá ní quide tátna ñaha-gá xii-dé, dico uu<sup>n</sup>-gá ní quidé-yu ní cãhá<sup>n</sup>-yu núu ñáiyu sá ní quide tátna-gá téé-á<sup>n</sup>. <sup>37</sup> Te nchaa-yu ío ní cuñuhu-yu, te ní xitñahá-yu:

—Vãha víhi quide-dé, chí nchaa-ni ndàcu-dé quidé-dé, chí quide tátna-ni-dé ñáiyu doho, te quide tátna-ni-dé ñáiyu ñíhi —càchi-yu xitñahá-yu.

## 8

*Jèsús dácãxi-gá cúmí mĩ ñáiyu*  
(Mt. 15:32-39)

<sup>1</sup> Te í<sup>n</sup> nduu tucu ío cuèhé ñáiyu ní tacá núu ndécú Jèsús, te ñá túú tnahí sá cãxi-yu.

Te ní cana-gá cue tée xica cuu ndihi-gá, te ní xáha<sup>n</sup>-gá xii-güedé:

<sup>2</sup> —Yúhú, cündahú iní-í nchaa ñáyiú-a chi sa ní cuu úní nduu ndècu ndihi ñahá-yu xii-o iha, te ña túú tnàhí nã sã cáxi-yu. <sup>3</sup> Te núu na nãtendaha-í-yu núhú tnãmá-yu vehé-yu, te cunee-yu docó ichi, chí davá-yu io xica ndècú-yu —càchí-gá xáha<sup>n</sup>-gá xii-güedé.

<sup>4</sup> Te ní xáha<sup>n</sup>-güedé xii-gá:

—¿Te ndèé níhí-ó sã cuãñaha-o càxi nchaa ñáyiú-a, te iha ña túú nã ió chí cùu-xi xití yucu-í? —càchí-güedé xáha<sup>n</sup>-güedé xii-gá.

<sup>5</sup> Te Jèsús ní xícá<sup>n</sup> tnúhú-gá núú-güedé, te xáha<sup>n</sup>-gá:

—¿Ná daha-gá pàá ndécú ndihi-ndo-í? —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Ndècu ndihi-ndí úsá-gá tnàhá —càchí-güedé xáha<sup>n</sup>-güedé xii-gá.

<sup>6</sup> Te Jèsús ní xáha<sup>n</sup>-gá xii nchaa ñáyiú sã ngóo-yu nchaa-yu, te ní ngóo-yu, te ní quehe<sup>n</sup>-gá ndí úsá pàá-á, te ní ndacá<sup>n</sup> táhú-gá núú Yá Ndióxi. Te dátñuní ní táhú cuèchi-gá te ní sãñaha-gá xii cue tée xica cuu ndihi-gá ní dácãñu-güedé nchaa ñáyiú-á<sup>n</sup>. <sup>7</sup> Te ndècu ndihi-güedé ñ<sup>n</sup> úú chácá líhli, te diu-ni duca<sup>n</sup> ní quide-gá ní ndacá<sup>n</sup> táhú-gá núú Yá Ndióxi. Te dátñuní ní táhúchíú<sup>n</sup>-gá ní dácãñu ñaha-güedé xii-yu. <sup>8</sup> Te nchaa-yu ní xexi-yu ní ndahá xití-yu. Te sátá ní túhú cóhó-yu te ní nadatácá-güedé nchaa sã ní quendóo, te ní chítú úsá tnàhá tídihi mee-ni sã ní quendóo-á<sup>n</sup>. <sup>9</sup> Te núú ncháá ñáyiú ní xexi-á<sup>n</sup> xínu dátñá cümü ml-yu. Te sátá ní yáha ní dácáxi ñaha Jèsús xii-yu te ní dándácá ñaha-gá. <sup>10</sup> Te dátñuní cuanguee-gá bàrcú ndihi cue tée xica cuu ndihi-gá cuáhá<sup>n</sup>-gá ndihi-güedé yucu cue tée ñuú Dalmãnutá.

*Cue tée cùu fariséú xáha<sup>n</sup>-güedé xii Jèsús cada-gá ñ<sup>n</sup> sã vá yóo tnàhí ndàcu cada (Mt. 16:1-4; Lc. 12:54-56)*

<sup>11</sup> Te núú ní quexio Jèsús xiá<sup>n</sup> ní sáá cue tée cùu fariséú, te ní ngúita-güedé nãndí tnúhu xáha<sup>n</sup>-güedé xii-gá xitó ndèé ñahá-güedé. Te xáha<sup>n</sup>-güedé sã ná cádá-gá ñ<sup>n</sup> sã vá yóo tnàhí ndàcu cada cundehe-güedé nàcuáa cutñuní iní-güedé núu ndáá sã Yá Ndióxi ní tendaha ñaha-gá xii-gá véxi-gá ñuyúú-a. <sup>12</sup> Te ní sánuu iní-gá te ní xáha<sup>n</sup>-gá xii-güedé:

—Nchaa nchóhó ñáyiú ndècu ñuyúú-a cümü-ndó cáda-í ñ<sup>n</sup> sã vá yóo tnàhí ndàcu cada nacuáa cutñuní iní-ndó núu ndáá sã Yá Ndióxi chindèe ñaha-gá xii-í. Dico na càchí tnúhu ndáá-í xii-ndo sã vá cádá-í sã cümü-ndó —càchí-gá xáha<sup>n</sup>-gá xii-güedé.

<sup>13</sup> Te ní dándóo-gá ñáyiú xĩndecu-á<sup>n</sup>, te cuãndee-gá bàrcú ndihi cue tée xica cuu ndihi-gá te cuáhá<sup>n</sup>-gá ndihi-güedé ndàa ingá xio yuhu làgúná.

*Nàcuáa quidè cue tée cùu fariséú (Mt. 16:5-12)*

<sup>14</sup> Te ní cunaa-güedé canehe-güedé sã cáxi-güedé quíhí<sup>n</sup>, te ñ<sup>n</sup> dii-ni pàá ndécú xití bàrcú-á<sup>n</sup> ní naníhí-güedé. <sup>15</sup> Te Jèsús ní cáhá<sup>n</sup>-gá dóho-güedé, te xáha<sup>n</sup>-gá xii-güedé:

—Na càchí tnúhu-í xii-ndo sã io quíhi iní-ndó cùndecu-ndo te vá cádá cuendá tnàhí-ndo lèvadurá cue tée cùu fariséú, ndihi levadurá cue tée cùndihi té Hèrodés —càchí-gá xáha<sup>n</sup>-gá xii-güedé.

<sup>16</sup> Te ní ngúita-güedé xitnàha-güedé:

—Cuendá sã ña túú ní cànehe-o pàá quixi núu xiá<sup>n</sup> duha cáhá<sup>n</sup>-gá —càchí-güedé xitnàha-güedé.

<sup>17</sup> Te Jèsús ní cutñuní iní-gá nàcuáa nduu tnúhu xitnàha-güedé, núu ní xáha<sup>n</sup>-gá xii-güedé:

—¿Ná cuendá da sã ña túú ní cànehe-ndo pàá quixi cáhá<sup>n</sup>-ndó? Te ña díú cuendá pàá-á<sup>n</sup> ní cáhá<sup>n</sup>-í, te dico-ni sã meé-ndó ña túú quidè cuendá váha-ndo nàcuáa nduu tnúhu cáhá<sup>n</sup>-í, te ní ña təcú tnùn-ndó chí io ñ<sup>n</sup> díquí-ndó. <sup>18</sup> Te cuèi ndèhe-ndo dico ña túú cutñuní iní-ndó nã cùú nchaa sã quidè-í, te cuèi ndèdóho-ndo nchaa tnúhu cáhá<sup>n</sup>-í dico ña cutñuní iní-ndó nãsa nduu-xi, te ní ña ndácú ñni-ndó nchaa sã tá quidè-í véxi. <sup>19</sup> Te chí dándacu iní cutnàhá ní táhú cuèchi-í úhú<sup>n</sup>-ni pàá te ní xexi úhú<sup>n</sup> ml mee-ni cue tée chí diu-ni cue tée-á<sup>n</sup> ní quítundu. Te chí càchí tnúhu ná daha tídihi ní chítú mee-ni sã ní quendóo òrè ní nadatácá-ndó —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Úxúú tnàhá tídihi ní chítú mee-ni sã ní quendóo —càchí-güedé xáha<sup>n</sup>-güedé xii-gá.

Te xáha<sup>n</sup> tucu-gá:

<sup>20</sup> —Te cutnàhá ní táhú cuèchi tucu-í úsá tnàhá pàá ní xexi cümü ml ñáyiú, te chí càchí tnúhu ná daha tucu tídihi ní chítú mee-ni sã ní quendóo —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Úsá tnàhá tídihi ní chítú mee-ni sã ní quendóo —càchí-güedé xáha<sup>n</sup>-güedé xii-gá.

<sup>21</sup> Te Jèsús ní xáha<sup>n</sup> tucu-gá xii-güedé:

—Vitna, ¿te sa ní tecú tnùn-ndó tnúhu ní cáhá<sup>n</sup>-í á<sup>n</sup> ñahá? —càchí-gá xáha<sup>n</sup>-gá xii-güedé.

*Jèsús quidè tátña-gá ñ<sup>n</sup> tée cuáá ñuú Bètsaidá*

<sup>22</sup> Te Jèsús ní sáá-gá ndihi cue tée xica cuu ndihi-gá ñuú Bètsaidá. Te ñuú-á<sup>n</sup> ndécú-gá ní quexio ñáyiú núú-gá tãnehé-yu ñ<sup>n</sup> tée cuáá, te cáhá<sup>n</sup> ndáhú-yu núú-gá núu vá cùndèe iní-gá tendaha ñaha-gá xii-dé cuendá ndúha núú-dé. <sup>23</sup> Te Jèsús ní tnii-gá ndaha tée cuáá-á<sup>n</sup>, te ní queñuhu ñaha-gá tnuú-yu, te ndèca ñaha-gá cuáhá<sup>n</sup> ñ<sup>n</sup> xio yuhu ñuú. Te yàcá<sup>n</sup> ní dácãñu-gá dí-gá núú-dé te ní

tendaha ñaha-gá xii-dé, te dàtnùní ní xícá<sup>n</sup> tnúhú-gá núú-dé, te xáha<sup>n</sup>-gá:

—¿Cùtnuní núú-n-áñ? —càchí-gá xáha<sup>n</sup>-gá xii-dé.

<sup>24</sup> Te téee cuàá-á<sup>n</sup> ní ndonehe núú-dé, te xáha<sup>n</sup>-dè xii-gá:

—Cùtnuní núú-í ndéhè-í nchaa cue téee-á<sup>n</sup>, dico dà ndáa yutnu cuí ndáa-güedé te xica-güedé —càchí-dé xáha<sup>n</sup>-dè xii-gá.

<sup>25</sup> Te Jèsús ní tendaha tucu-gá núú-dé te ní cuu ní ndacoto váha-gá-dé, te òré-á<sup>n</sup> ní ndúha núú-dé. Te nchaandi túhú sá ndéhé-dé ní cutnùní váha núú-dé nándi cuu nchaa xíá<sup>n</sup>. <sup>26</sup> Te ní xáha<sup>n</sup> Jèsús xii-dé:

—Vitna te nùhú-n, dico ndáá ichi vehe-n nùhú-n te ñá díú dà xití ñuu quíhí<sup>n</sup>-n, te vá yóo ì<sup>n</sup> cúñaha-n sá yuhú ní quide tátna-í núú-n ní ndúha —càchí-gá xáha<sup>n</sup>-gá xii-dé.

*Té Pèlú xáha<sup>n</sup>-dè xii Jèsús sá díú-gá cuú-gá Crístú*

(Mt. 16:13-20; Lc. 9:18-21)

<sup>27</sup> Te Jèsús ní xica-gá cuáhá<sup>n</sup>-gá ndihi cue téee xica cuu ndihi-gá nchaa ñuu líhli cãa ñuu Césareá Filipú, te òré ñúhú-gá ndihi-güedé ichi te ní xícá<sup>n</sup> tnúhú-gá núú-güedé, te xáha<sup>n</sup>-gá xii-güedé:

—Chí càchí tnúhu nása càhá<sup>n</sup> ñáyi cuèndá-í. ¿Yoo cuú-í càchí-yu-va? —càchí-gá xáha<sup>n</sup>-gá xii-güedé.

<sup>28</sup> Te ní xáha<sup>n</sup>-güedé xii-gá:

—Davá-yu càchí-yu sá cuú-n ndí Juáá téee ní xóo dacuàndute ñaha xii ñáyi, te davá-yu càchí-yu sá cuú-n tē Èliás, te dava tucu-yu càchí-yu sá cuú-n ì<sup>n</sup> téee ní xóo càhá<sup>n</sup> tnúhu Yá Ndióxi ndéee sanaha, duha càchí-yu —càchí-güedé xáha<sup>n</sup>-güedé xii-gá.

<sup>29</sup> Te ní xícá<sup>n</sup> tnúhú tucu-gá núú-güedé, te xáha<sup>n</sup>-gá xii-güedé:

—Te nchòhó, ¿yoo sãni iní-ndó cuú-í-í? —càchí-gá xáha<sup>n</sup>-gá xii-güedé.

Te té Pèlú ní xáha<sup>n</sup>-dè xii-gá:

—Yòhó cuú-n Crístú Yáá ní tendaha Yá Ndióxi véxi ñuyúú-a —càchí-dé xáha<sup>n</sup>-dè xii-gá.

<sup>30</sup> Te Jèsús ní càhá<sup>n</sup>-gá dóho-güedé, te xáha<sup>n</sup>-gá:

—Vá yóo ì<sup>n</sup> cúñaha-ndo yóo cuu-í —càchí-gá xáha<sup>n</sup>-gá xii-güedé.

*Jèsús càhá<sup>n</sup>-gá sá cahní ñaha-güedé xii-gá*  
(Mt. 16:21-28; Lc. 9:22-27)

<sup>31</sup> Te Jèsús ní ngúíta-gá xitnúhu-gá cue téee xica cuu ndihi-gá nãcuáa váha-gá, te xáha<sup>n</sup>-gá xii-güedé:

—Yúhú Téee cuu ñaní tnáhá-ndó nchãa-ndo chí ío ndoho-í, chí daquée tihú ñáhá nchãa cue téee cuu sacuéhé núú ñáyi isráél, ndihi cue dútú cúnú, ndihi cue téee dàcuaha ñaha xii ñáyi nchaa tnúhu ní chídó tnúni ní chídó tnúni ndí Moisés, nchaa cue téee-á<sup>n</sup> daquée tihú ñáhá-güedé xii-í. Te sáá nduu te cahní

ñaha-güedé xii-í, dico nduu úní sá cuú-í te ndoto-í —càchí-gá xáha<sup>n</sup>-gá xii-güedé.

<sup>32</sup> Te duca<sup>n</sup> ní càhá<sup>n</sup> Jèsús núú cué téee xica cuu ndihi-gá nãcuáa tecú tnúni váha-güedé tnúhu càhá<sup>n</sup>-gá. Te té Pèlú ní cana ñaha-dé xii-gá ì<sup>n</sup> xio, te ní ngúíta-dé ténáa ñáhá-dé xii-gá ní cuu. <sup>33</sup> Dico Jèsús ndihi-ni ní nchócuíhnu-gá ní ndãcoto-gá núú nchãa-güedé chí ndãa sãtã-gá xindecu-güedé, te ní ngúíta-gá ténáa-gá té Pèlú, te xáha<sup>n</sup>-gá xii-dé:

—¡Xocuíñi yòhó núú-í-a, chí dàtnã càhá<sup>n</sup> yucu ñávãha càhá<sup>n</sup>-n! Chí ñã túú sãni iní-ò dàtnã sãni iní Yá Ndióxi, chí ì<sup>n</sup>-ni sãni iní-ò ndihi dava-gá cue ñáyi ndècu ñuyúú-a —càchí-gá xáha<sup>n</sup>-gá xii-dé.

<sup>34</sup> Te Jèsús ní cana-gá nchaa cue téee xica cuu ndihi-gá, ndihi nchaa ñáyi xindecu-á<sup>n</sup>, te ní xáha<sup>n</sup>-gá:

—Nchaa ñáyi cuúni chitnahá ñáhá xii-í, te xini ñuhu-xi vá cáda-gá-yu sá sãníni méé-yu, te ío cada ndee iní-yu cundecu túha-yu ndohó-yu cuèndá-í, te cuéi na ndòhó-yu dàtnã ndoho-í. <sup>35</sup> Te nchaa ñáyi cuúni sá ñã túú tnáhi ná yãha cundecu ñuyúú-a cuíta nihnú-yu, dico nchaa ñáyi ñã túú tnáhi yuhú cuéi nándi sã ná yãha-yu cundecu-yu ñuyúú-a sá cuèndá-í, ndihi sá cuèndá tnúhu-í, te ñáyi-á<sup>n</sup> naníhí tãhú-yu. <sup>36</sup> Te cuéi nchaandi túhú sá ío ñuyúú-a na nihi ñáyi cundecu ndihi-yu, dico núu diu nchaa xíá<sup>n</sup> ná cáda cuíta nihnú-yu te ñã túú védana nãndihi-xi sá dúcã<sup>n</sup> ndècu ndihí-yu nchaa xíá<sup>n</sup>. <sup>37</sup> Te ní ì<sup>n</sup> sá ío ñuyúú-a vá chindèe-xi ñáyi cuèndá naníhí tãhú-yu. <sup>38</sup> Te nchaa ñáyi na cùcaha<sup>n</sup> núú-xi càhá<sup>n</sup> váha cuèndá-í, ndihi cuèndá tnúhu-í núú nchãa ñáyi daquée tihú ñáhá xii Yá Ndióxi, ñáyi xindecu ichi cuéhé ichi duha, te tnáhá yuhú téee cuu ñaní tnáhá-yu nchãá-yu cucaha<sup>n</sup> núú-í núú-yu òré ná quixi tucu-í ndihi cue espíritú xínú cuèchi núú Tãtã-í Dútú Ndióxi. Te mee-gá cada cutnùni iní nchaa ñáyi sá yuhú ío càhnu cuu-í.

## 9

<sup>1</sup> Te na càchí tnúhu ndáá-í xii-ndo sã ío dava nchòhó ñáyi xindecu íha vitna vá cuú-ni-ndo, chí cundecu-ni-ndo ndéee quini-ndó sãá nduu ndíhu ndaha ñaha Yá Ndióxi xii ñáyi, te davá-á<sup>n</sup> quini-ndó sã ndácú-gá quidè-gá nchaandi túhú sá váha —càchí-gá xáha<sup>n</sup>-gá xii cue téee xica cuu ndihi-gá ndihi cue ñáyi-á<sup>n</sup>.

*Jèsús ní nadama dóo-gá ndihi núú-gá*  
(Mt. 17:1-13; Lc. 9:28-36)

<sup>2</sup> Te núú ñúu sá dúcã<sup>n</sup> ní càhá<sup>n</sup> Jèsús te ní xica-gá cuásaá-gá ì<sup>n</sup> yucu dùcú<sup>n</sup>, te ndèca-gá té Pèlú, ndihi té Jacóbó, ndihi té Juáá cuásaá, te úní tnáhi-ni cue téee-á<sup>n</sup> ndécã-gá cuásaá. Te yucu-á<sup>n</sup> ndécú-gá ní



nadama núu-gã, <sup>3</sup> te ní nadama dóo-gã. Te dóo-gã-á<sup>n</sup> sũúni ní nduu cuixí<sup>n</sup> quiyí te tãsa<sup>n</sup>, te ní ì<sup>n</sup> ñáyíu ñuyíú-a ñá túú ndàcú-yu na-queté-yu ì<sup>n</sup> dóo nduu cuixí<sup>n</sup> dàtná ní nduu dóo-gã. <sup>4</sup> Te ní xini-güedé té Moisés ndihi té Èliás nútñi-güedé ndihi-gá ndátñuhu ndihi ñaha-güedé xii-gá. <sup>5</sup> Te té Pelú ní xáha<sup>n</sup>-dè xii Jèsús:

—Mèstrú, òvaha ní cuu sá ndécú-ó ìha vitna! Te na dàcaa-ndí úní tnàhá vehe truvixi<sup>n</sup>, te ì<sup>n</sup> cuu cuendá-n te ì<sup>n</sup> cuu cuendá té Moisés te ì<sup>n</sup> cuu cuendá té Èliás —càchí-dé xáha<sup>n</sup>-dè xii-gá.

<sup>6</sup> Te duca<sup>n</sup> ní cáhá<sup>n</sup>-dè chí ío ní yùhú-güedé, te cuendá-ní ní cuu yáchí-dé ní cáhá<sup>n</sup>-dè, te ní mée-dé ñá túú ní cútñuní iní-dé nása ndùu tnùhu ní cáhá<sup>n</sup>-dè. <sup>7</sup> Te òré-á<sup>n</sup> ní quexio ì<sup>n</sup> vícò núú ndécú-güedé ndihi Jèsús ní dádáhu ñaha-xi xii-güedé ndihi-gá, te xití vícò-á<sup>n</sup> ní cáhá<sup>n</sup> Yá Ndiòxí ní tecú dóho-güedé, te xáha<sup>n</sup>-gã xii-güedé:

—Tée-a cùu-dé Déhe-í tée ío cùu iní-í, te cundedòho-ndo nchaa tnùhu cáhá<sup>n</sup>-dè —càchí-gá xáha<sup>n</sup>-gã xii-güedé.

<sup>8</sup> Te òré ní quide cuendá-güedé, te ñá túú-gã ní xini-güedé cue tée úú-á<sup>n</sup> chí mee-ná Jèsús ndécú.

<sup>9</sup> Te òré cuánuu ndihi ñaha-gã xii-güedé yucu-á<sup>n</sup>, te ní cáhá<sup>n</sup>-gá dóho-güedé, te xáha<sup>n</sup>-gã:

—Vá yóo ì<sup>n</sup> cùñaha-ndo nchaa sá ní xini-ndó núú ní sáá-ó-á, te cuu cáhá<sup>n</sup>-ndó dico ndéé ná yáha ndoto yùhú Tée cùu ñani tnàhá-ndó nchaa-ndo sá cùu-í —càchí-gá xáha<sup>n</sup>-gã xii-güedé.

<sup>10</sup> Núu xiá<sup>n</sup> cue tée-á<sup>n</sup> ní xúhu<sup>n</sup> nahi-ní iní-güedé nchaa sá ní xini-güedé núú ní sáhá<sup>n</sup>-güedé ndihi Jèsús te ñá túú tnàhí ní cáhá<sup>n</sup>-güedé, dico ní ndúcú tnùhu núú tnàhá-güedé ná cuendá duca<sup>n</sup> ní cáhá<sup>n</sup>-gá sá ndéé ná yáha ndoto-gá sá cùu-gá te dàtnùni cáhá<sup>n</sup>-güedé nàcuáa ndùu nchaa sá ní xini-güedé. <sup>11</sup> Te ní xicá<sup>n</sup> tnùhú-güedé núú Jèsús, te xáha<sup>n</sup>-güedé xii-gá:

—¿Cùini-ndí cáchí tnùhu-n ná cuendá càchí cue tée dàcuaha ñaha xii ñáyíu nchaa tnùhu ní chidó tnùni ndí Moisés sá ìhna-gá té Èliás ndixi-dé te dàtnùni quixi Yaá tendaha Yá Ndiòxí quixi ñuyíú-a? —càchí-güedé xáha<sup>n</sup>-güedé xii-gá.

<sup>12</sup> Te Jèsús ní xáha<sup>n</sup>-gã:

—Ndáá sá códo núu ì<sup>n</sup> tée quixi-dé te cada-dé dàtná ní quide té Èliás, te tée-á<sup>n</sup> cada ndáá-dé nchaa nàcuáa cùu. Dico núú tütú Yá Ndiòxí cáhá<sup>n</sup>-xi cuendá yùhú Tée cùu ñani tnàhá-ndó nchaa-ndo sá ío ndoho-í, te daquèe tihú ñáhá ñáyíu xii-í. <sup>13</sup> Te na càchí tnùhu-í xii-ndo vitna sá sá ní quixi ì<sup>n</sup> tée ní quide dàtná ní xóo cada té Èliás, te cue ñáyíu ñá túú ní cànehé-yu sá yíñuhu núú-dè,

te ní quide ñáhá-yu xii-dé nchaa nàcuáa ní quixi iní mée-yu. Te núú tütú Yá Ndiòxí sa ndéé tnùni nchaa nàcuáa yáha-dé, te nchaa xiá<sup>n</sup> sa ní quide ñaha ñáyíu xii-dé —càchí-gá xáha<sup>n</sup>-gã xii-güedé.

*Jèsús quidé tãtna-gá ì<sup>n</sup> tée cuechi yíhi ñaha espíritú cùndíhi yucu ñávaha*

(Mt. 17:14-21; Lc. 9:37-43)

<sup>14</sup> Te Jèsús ní ndexio-gá ndihi cue tée úní-á<sup>n</sup> núú xíndecu dava-gá cue tée xica cuu ndihi-gá, te vai víhi ñáyíu ndecu núú ndécú-güedé-á<sup>n</sup>, te tnàhá cue tée dàcuaha ñaha xii-yu nchaa tnùhu ní chidó tnùni ndí Moisés xíndecu, te cue tée-á<sup>n</sup> nãndi tnùhu xáha<sup>n</sup>-güedé xii cue tée xica cuu ndihi Jèsús. <sup>15</sup> Te òré ní xini-yu ní ndexio-gá, te nchaa-yu ío ní cuñuhu-yu, te xinu-yu ní sáhá<sup>n</sup> ní cáhá<sup>n</sup> ndihi ñáhá-yu xii-gá. <sup>16</sup> Te ní xicá<sup>n</sup> tnùhú-gã núú cuè tée xica cuu ndihi-gá núu ná tnùhu ndátñuhu-güedé ndihi cue tée-á<sup>n</sup>. <sup>17</sup> Te ì<sup>n</sup> ñáyíu xíndecu xiá<sup>n</sup> ní xáhá<sup>n</sup>-yu xii-gá:

—Mèstrú, ndèca-í déhe-í véxi nànducu ñaha-í xii-n, chí yíhi ñaha espíritú cùndíhi yucu ñávaha xii-dé, te diu xiá<sup>n</sup> ní quide ní cuu ñihí-dé. <sup>18</sup> Te ío ndòho-dé chí sùuni ndèni ní cuu ngòtni ñaha-xi xii-dé, te òré duca<sup>n</sup> quide ñaha-xi xii-dé te dànduá ñáhá-xí, te quène tíñú yuhu-dé, te cùrùhñú nùhu-dé, te ndàda ruú<sup>n</sup> ñáhá-xí xii-dé. Te sa ní xáha<sup>n</sup>-í xii cue tée xica cuu ndihi-n sá quèñuhu-güedé espíritú cùndíhi yucu ñávaha yíhi ñaha xii-dé dico ñá túú ní ndàcu-güedé quèñuhu-güedé-xi —càchí ñáyíu-á<sup>n</sup> xáhá<sup>n</sup>-yu xii-gá.

<sup>19</sup> Te Jèsús ní xáha<sup>n</sup>-gã:

—¿Nchaa nchòhò ñáyíu ndècu ñuyíú-a ío sáá iní-ndó, chí ñá túú cuini-ndó quindáá iní-ndó Yá Ndiòxí, te ní cuu vai nduu quide ndee iní-í nchaa sá quidè-ndó! ¿Te ná ndéé ama vá dúcá<sup>n</sup>-gã cada-ndo-i? Te chí càndèca tée cùhú-á<sup>n</sup> táquixi iha —càchí-gá xáha<sup>n</sup>-gã xii-yu.

<sup>20</sup> Te ñáyíu ndihi ñaha xii tée yíhi ñaha espíritú cùndíhi yucu ñávaha-á<sup>n</sup> ndécá ñáhá-yu xii-dé cuáhá<sup>n</sup> ndéé núú Jèsús, te òré ní xini ñáhá espíritú cùndíhi yucu ñávaha-á<sup>n</sup> xii-gá, te ní ngúita-ni-xi sàhni yíhi ñáhá tucu-xi xii-dé, te ní dànduá ñáhá-xí xii-dé, te ní ngúita-dé xíchí ñuhu-dé, te quène tíñú yuhu-dé. <sup>21</sup> Te Jèsús ní xicá<sup>n</sup> tnùhú-gã núú tãtá-dé, te xáha<sup>n</sup>-gã xii-dé:

—¿Ná ndéé ama ní ngúita-xi duha ndòho déhe-n? —càchí-gá xáha<sup>n</sup>-gã xii-dé.

Te tée-á<sup>n</sup> ní xáha<sup>n</sup>-dè xii-gá:

—Ndéé cùtnàhá cúu ìhli-dé ní ngúita espíritú cùndíhi yucu ñávaha duha quide ñaha-xi xii-dé. <sup>22</sup> Te ní cùtñí xito dàngaunihnu ñaha-xi xii-dé núú ñùhú, te ní cùtñí tucu xito dàngaunihnu ñaha-xi

xii-dé ndute cuini-xi cahni ñaha-xi xii-dé. Te ndëca-í-dé véxi núú-n te núu ndacu-n càda tátna-n-dë, te cundähú iní ñáhá-n xii-ndí chindee ñaha-n —cächí-dé xáha<sup>n</sup>-dë xii-gá.

<sup>23</sup> Te Jësús ní xáha<sup>n</sup>-gá:

—Te ná cuendá cächí-n núu ndacu-í cada tátna-í déhe-n, chi nchaa ñáyiu na quindáá iní ñáhá xii-í te nihí-yu sá ná caca<sup>n</sup>-yu núú-í —cächí-gá xáha<sup>n</sup>-gá xii-dé.

<sup>24</sup> Te tátá tée cuechi-ã<sup>n</sup> nihí ní cáhá<sup>n</sup>-dé xáha<sup>n</sup>-dë xii-gá:

—Sándáá iní ñáhá-í xii-n, dico chindee ñaha xii-í cuendá ná quindáá iní ñáhá-gá-í xii-n —cächí-dé xáha<sup>n</sup>-dë xii-gá.

<sup>25</sup> Te Jësús ndéhé-gá sá io vai ñáyiu ta tàcá núú ndécú-gá-ã<sup>n</sup>. Te ní tenáa-gá espíritú cündihí yucu ñávãha-ã<sup>n</sup>, te xáha<sup>n</sup>-gá xii-xi:

—Yöhó espíritú cündihí yucu ñávãha, ní quide ñihí-n ní quide doho-n tée-a, dico vitna yúhú cächí-í sá queé-n yiqui cuñú-dé te vá ndíhu-gá-n —cächí-gá xáha<sup>n</sup>-gá xii espíritú cündihí yucu ñávãha-ã<sup>n</sup>.

<sup>26</sup> Te espíritú cündihí yucu ñávãha-ã<sup>n</sup> ní dácáná sãa ñaha-xi xii tée-ã<sup>n</sup>, te ní sahani yihí ñáhá tùcu-xi xii-dé, te dàtnùni ní quee ñaha-xi xii-dé cuáhã-xi, dico tée-ã<sup>n</sup> chi dacãa-ni ndiyi càa-dé cãtùu-dé. Te nchaa ñáyiu xñdecu xíã<sup>n</sup> cächí-yu sá ní xihí-dé ní cùu. <sup>27</sup> Te Jësús ní tñii-gá ndaha-dé ní ndocani ñaha-gá xii-dé, te ní ndacóo-dé ní nucunutñii-dé.

<sup>28</sup> Te Jësús cuándihu-gá xití vehe ndihi cue tée xica cuu ndihí-gá, te òré ndéhé-güedé ñá túú-gá ñáyiu, te ní xicã<sup>n</sup> tñuhú-güedé núú-gá, te xáha<sup>n</sup>-güedé xii-gá:

—Cächí tñuhu xii-ndí ná cuendá ñá túú ní ndacu-ndí queñuhu-ndí espíritú cündihí yucu ñávãha yihí ñaha xii tée-ã<sup>n</sup> —cächí-güedé xáha<sup>n</sup>-güedé xii-gá.

<sup>29</sup> Te Jësús ní xáha<sup>n</sup>-gá xii-güedé:

—Na cächí tñuhu-í xii-ndo sã núu òré cüni-ndó queñuhu-ndo espíritú cündihí yucu ñávãha yihí ñaha xii ñáyiu dàtná cùú espíritú cündihí-xi yihí ñaha xii tée-ã<sup>n</sup> ní cùu ña, te ximi ñuhu-xi sá io cáhá<sup>n</sup> ndihí-ndo Yã Ndiõxí te ñá túú tñáhí ná caxi-ndo cáhá<sup>n</sup> ndihí-ndo-gá, te duca<sup>n</sup> te ndacu-ndo queñuhu-ndo espíritú cündihí yucu ñávãha yihí ñaha xii ñáyiu —cächí-gá xáha<sup>n</sup>-gá xii-güedé.

*Jësús cáhá<sup>n</sup> tucu-gá sá cáhni ñaha-güedé xii-gá*

(Mt. 17:22-23; Lc. 9:43-45)

<sup>30</sup> Te Jësús ní quee-gá núú ndécú-gá-ã<sup>n</sup> ndihí cue tée xica cuu ndihí-gá cuáhã<sup>n</sup>-gá ndihí-güedé distritú Galilea, te cuini-gá sá vã quini ñáyiu ndéé ichi cuáhã<sup>n</sup>-gá. <sup>31</sup> Te duca<sup>n</sup> ní sani iní-gá, chi mee-gá sa ñaha-gá sá ndáá

cada-xi nàcuáa xáha<sup>n</sup>-gá xii cue tée xica cuu ndihí-gá, te duha xáha<sup>n</sup>-gá xii-güedé:

—Yúhú Tée cùu ñani tñáhá-ndó nchaa-ndo sáá ñii<sup>n</sup> nduu te cuáha cuendá ñáhá-güedé xii-í núú cuè tée cùu úhú iní ñáhá, te cahni ñaha-güedé xii-í, dico nduu úni sá cùú-í te ndoto-í —cächí-gá xáha<sup>n</sup>-gá xii-güedé.

<sup>32</sup> Dico ñá túú tñáhí ní təcú tñuni-güedé nása nduu tñuhu ní cáhá<sup>n</sup>-gá, te ní ñá túú ní cùyii-güedé cacã<sup>n</sup> tñuhú-güedé núú-gá.

*Cue tée ndücu tñuhu núú tñáhá núu ndëdacãa-güedé io-gá cünüu*

(Mt. 18:1-5; Lc. 9:46-48)

<sup>33</sup> Te Jësús ní quexio-gá ndihí cue tée xica cuu ndihí-gá ñuu Capernaúm, te òré sa ndëcu-gá ñii<sup>n</sup> vehe te ní xicã<sup>n</sup> tñuhú-gá núú-güedé, te xáha<sup>n</sup>-gá xii-güedé:

—¿Nãndi cùu tñuhu ta xitñaha-ndo véxi? —cächí-gá xáha<sup>n</sup>-gá xii-güedé.

<sup>34</sup> Dico ñá túú tñáhí ní cáhá<sup>n</sup>-güedé cüñaha-güedé xii-gá núu ná tñuhu xitñaha-güedé òré ñuhú-güedé ichi. Te duca<sup>n</sup> ní quide-güedé chi cuendá tá ndãtñuhu-güedé núu ndëdacãa-güedé io-gá cünüu. <sup>35</sup> Te Jësús ní ngóo-gá, te ní xáha<sup>n</sup>-gá xii ndi úxúu cue tée xica cuu ndihí-gá:

—Chi táquixi iha te cundedóho-ndo tñuhu na cáhá<sup>n</sup>-i-a. Te núu ió dava-ndo cuini-ndó cünüu-ndo, te cada-ndo sã cùú-ndó ñáyiu nchicú<sup>n</sup> cuii-nã, te cunu cuechi-ndo núu tñaha ñáyiu-ndo —cächí-gá xáha<sup>n</sup>-gá xii-güedé.

<sup>36</sup> Te Jësús ní sanutñii-gá ñii<sup>n</sup> té lĩhli cuádava tnuú-güedé, te dàtnùni ní nuigüdhé ñáhá-gá xii-dé, te xáha<sup>n</sup>-gá xii-güedé:

<sup>37</sup> —Nchaa ñáyiu na quehe<sup>n</sup> cuendá ñii<sup>n</sup> té lĩhli dàtná té lĩhli-a cuendá sã ñuhú iní ñáhã-yu xii-í ñá, te cada iní-yu sá yúhú ní quehe<sup>n</sup> cuendá-yu. Te nchaa ñáyiu na quehe<sup>n</sup> cuendá ñáhá xii-í te ñá díú-ní mée-í ní quehe<sup>n</sup> cuendá-yu, chi tñáhá Tãtã-í Dútú Ndiõxí Yaa ní tendaha ñaha xii-í véxi-í ñuyúú-a ní quehe<sup>n</sup> cuendá-yu —cächí-gá xáha<sup>n</sup>-gá xii-güedé.

*Nchaa ñáyiu ñá túú cùu úhú iní ñáhã xii-o te cündihí ñáhã-yu*

(Mt. 10:42; Lc. 9:49-50)

<sup>38</sup> Te té Juãá diu-ni ñii<sup>n</sup> tée xica cuu ndihí-gá ní xáha<sup>n</sup>-dë xii-gá:

—Mèstrú, ní xiní-ndí ñii<sup>n</sup> tée càcunehe ñaha-dé xii-n, te queñuhu-dé espíritú cündihí yucu ñávãha yihí ñaha xii ñáyiu, te nchúhú ñá túú ní dàña-gá-ndí duca<sup>n</sup> càda-dé, chi ñá túú xica cuu ndihí ñaha-dé xii-o —cächí-dé xáha<sup>n</sup>-dë xii-gá.

<sup>39</sup> Te Jësús ní xáha<sup>n</sup>-gá xii-güedé:

—Daña-ndo na càda nahi-dé ní cùu, chi ñá túú ní ñii<sup>n</sup> ñáyiu ndihí ndihí-ni ndacu cáhá<sup>n</sup> cuèhé cuendá-í te núu càcunehe ñáhã-yu xii-í, te quidé-yu sá vã yõo tñáhí ndãcu cada. <sup>40</sup> Te

nchaa ñáiyu ñá túu cùu ùhú iní ñáhá xii-o te cùndihí ñahá-yu. <sup>41</sup> Te na cächí tnúhu-í xii-ndo sá cuè ñáiyu na tàxi ì<sup>n</sup> yaxi<sup>n</sup> ndute coho-ndo cuendá sá cúu-ndó cuè tée xica cuu ndihí-í, te ñáiyu-án sáá nduu te dacuèí sá nihí-yu sá ndúú tãhú-yu –cächí-gá xãha<sup>n</sup>-gã xii-güedé.

*Cada cuendá-ó vã cùndècu-o ichi cuehé ichi duha*

(Mt. 18:6-9; Lc. 17:1-2)

<sup>42</sup> Te xãha<sup>n</sup> tucu Jesús xii-güedé:  
–Te núu ì<sup>n</sup> tée na dàcahá<sup>n</sup>-dé cue ñáiyu sãndáá iní ñáhá xii-í cadá-yu nãndi sá cuèhé sá dúhá, te váha-gá sá núu na dàcutu ndeé-güedé ì<sup>n</sup> yúú yódó dúcú<sup>n</sup>-dè, te dàqueé ñaha-güedé xii-dé xití ndute lámár, te ñá díú sá cùndècu-dé duca<sup>n</sup> càda-dé. <sup>43</sup> Te núu ì<sup>n</sup> xio ndaha-ndo quide-xi quide-ndo nãndi sá cuèhé sá dúhá, te quehndé-ndó cuíta-xi, chi váha-gá sá nãnihí tãhú-ndó cuèí na cuíta ì<sup>n</sup> xio ndaha-ndo te ñá díú sá quihí<sup>n</sup>-ndó nihíí ní ndúú-ndó núú ùhú núú ndàhú núú dicó sáá ndáhá itá ñuhú ní caa ni quihí<sup>n</sup>. <sup>44</sup> Chi yacá<sup>n</sup> cúu-xi núú ñá túú tnãhí ndàhvã ñuhú, te ío ndoho-ndo cùndècu-ndo xíá<sup>n</sup> ní caa ni quihí<sup>n</sup>. <sup>45</sup> Te núu ì<sup>n</sup> xio sáhã-ndó quide-xi quide-ndo nãndi sá cuèhé sá dúhá, te quehndé-ndó cuíta-xi, chi váha-gá sá nãnihí tãhú-ndó cuèí na cuíta ì<sup>n</sup> xio sáhã-ndó, te ñá díú sá quihí<sup>n</sup>-ndó nihíí ní ndúú-ndó núú ùhú núú ndàhú núú dicó sáá ndáhá itá ñuhú ní caa ni quihí<sup>n</sup>. <sup>46</sup> Chi yacá<sup>n</sup> ñá túú tnãhí ndàhvã ñuhú, te ío ndoho-ndo cùndècu-ndo xíá<sup>n</sup> ní caa ni quihí<sup>n</sup>. <sup>47</sup> Te núu ì<sup>n</sup> xio tinúu-ndo quide-xi quide-ndo nãndi sá cuèhé sá dúhá, te tava-ndo cuíta-xi, chi váha-gá sá cùndècu-ndo núú ndécú Yã Ndióxi táxi tnúni-gá cuèí na cuíta ì<sup>n</sup> xio tinúu-ndo, te ñá díú sá ndi ndúú xio núú-ndó quihí<sup>n</sup>-ndó núú ùhú núú ndàhú. <sup>48</sup> Chi yacá<sup>n</sup> ñá túú tnãhí ndàhvã ñuhú, te ío ndoho-ndo cùndècu-ndo xíá<sup>n</sup> ní caa ni quihí<sup>n</sup>.

<sup>49</sup> Te dàtnã quidé-güedé quiti sãhni-güedé chihí-güedé cuñú-di ñii te dàqueé-güedé núú ñuhú, duca<sup>n</sup> sãtnahã-xi ndoho cue ñáiyu chi ío ndohó-yu. <sup>50</sup> Te ñii chi ío váha nãndihí-xi, dico núu na ndúu víxi<sup>n</sup>-xi te ñá túú-gã nãndihí-xi te ni ñá túú-gã nása cada-o ndúu úhá tucu-xi. Te ío váha cada cuendá-ndó nãcuãa cundecu-ndo cuendá cuu-ndo ñáiyu váha, te duca<sup>n</sup> te cuu-ndo dàtnã ñii sá ñá túú ndúu víxi<sup>n</sup>, te ío váha cundecu ndihí tnãha-ndo –cächí-gá xãha<sup>n</sup>-gã xii-güedé.

## 10

*Jesús càhá<sup>n</sup>-gã cuendá cue ñáiyu dàña tnaha*

(Mt. 19:1-12; Lc. 16:18)

<sup>1</sup> Te Jesús ní xica-gã cuáhã<sup>n</sup>-gã ní yãha-gã yucu distrítú Júdeá ní téhndé-gã ndãa ingá

xio yúte Jórdán. Te yacá<sup>n</sup> ndécú-gã ní tacá tucu cuèhé víhí ñáiyu, te ní ngüita-ni tucu-gã dãnèhé ñáhã-gã xii-yu tnúhu-gã chi duca<sup>n</sup> tnãhí quidè-gã. <sup>2</sup> Te ní quèxio ì<sup>n</sup> úú cue tée cùu fariséu núú ndécú Jesús xito ndéé ñáhã-güedé xii-gã núu nása cunduu tnúhu càhá<sup>n</sup>-gã, te xãha<sup>n</sup>-güedé xii-gã:

–Véxi-ndí xicá<sup>n</sup> tnúhú-ndí núú-n núu cuu dàña ì<sup>n</sup> tée ñadihí-dé ã<sup>n</sup> ñáhã –cächí-güedé xãha<sup>n</sup>-güedé xii-gã.

<sup>3</sup> Te Jesús ní xãha<sup>n</sup>-gã xii-güedé:

–Te nchóhó, ¿nása ní cächí ndíi Moisés cada-ndo-i? –cächí-gã xãha<sup>n</sup>-gã xii-güedé.

<sup>4</sup> Te ní xãha<sup>n</sup>-güedé xii-gã:

–Ndíi Moisés ní cächí ndíi sá cúú dàña ì<sup>n</sup> tée ñadihí-dé dicó-ni sá cadúha-dé ì<sup>n</sup> tutú cuãñaha-dé, te núú tütú-ã<sup>n</sup> codo tnúni sá ní dáñã ñaha-dé, te duca<sup>n</sup> te cuu dàña-dé ñadihí-dé –cächí-güedé xãha<sup>n</sup>-güedé xii-gã.

<sup>5</sup> Te Jesús ní xãha<sup>n</sup>-gã xii-güedé:

–Te duca<sup>n</sup> ní chídó tnúni ndíi Moisés cada-ndo cuendá sá ío sãá iní-ndó. <sup>6</sup> Dico Yã Ndióxi cùtnahã ní cadúha-gã ñuyúú ndihí nchaa sá ío, chi tée ñadihí ní cadúha-gã. <sup>7</sup> Te xíã<sup>n</sup> núu nchaa cue tée na nihí ñadihí-xi, te díi<sup>n</sup>-nã cada-güedé tãtã-güedé ndihí nãná-güedé, chi mee-nã ñadihí-güedé cuu cuu ndihí-güedé. <sup>8</sup> Te cue ñáiyu úú-ã<sup>n</sup> ñá túú-gã ndí díi<sup>n</sup> ndí díi<sup>n</sup> yiqui cuñú cúu-yu, chi cada iní-ndó sá ì<sup>n</sup>-nã yiqui cuñú cúu-yu. <sup>9</sup> Te xíã<sup>n</sup> núu ñá túú ndúu váha-xi dàña cuè tée ñadihí-güedé, chi mee Yã Ndióxi ní cächí-gã sá cúú úú-yu cundecú-yu ndéé naa ndéé cuú-yu –cächí-gã xãha<sup>n</sup>-gã xii-güedé.

<sup>10</sup> Te òré yihí Jesús ndihí cue tée xica cuu ndihí-gã vehe, te ní xicá<sup>n</sup> tnúhú-güedé núú-gã nása ndúu tnúhu ní càhá<sup>n</sup>-gã cuendá cue ñáiyu dàña tnaha. <sup>11</sup> Te Jesús ní xãha<sup>n</sup>-gã xii-güedé:

–Te núu ì<sup>n</sup> tée na dàña-dé ñadihí-dé te naquehe<sup>n</sup>-dé ingá ñadihí, te ío nèhé quidé-dé, te ì<sup>n</sup>-ni cuèchi cùu-xi ndihí cuèchi quidè tée ndèca ñadihí te càhá<sup>n</sup> ndihí-dé ingá ñadihí. <sup>12</sup> Te díu-ni duca<sup>n</sup> sãtnahã-xi cùu tucu ñáiyu díhí te núu na dàña-yu yíi-yu te naquehe<sup>n</sup>-yu ingá tée, chi ì<sup>n</sup>-ni cuèchi cùu-xi sá quidè-yu ndihí sá quidè cuè ñáiyu díhí ndécú yíi-xi, te càhá<sup>n</sup> ndihí-yu ingá tée –cächí-gã xãha<sup>n</sup>-gã xii-yu.

*Jesús xicá<sup>n</sup> tãhú-gã núú Yã Ndióxi cuendá landú*

(Mt. 19:13-15; Lc. 18:15-17)

<sup>13</sup> Te ì<sup>n</sup> úú ñáiyu ndécá-yu landú lihli cuáhã<sup>n</sup> núú Jesús, chi cuini-yu sá tэндàha ñaha-gã xii-güexi. Te cue tée xica cuu ndihí-gã ní ngüita-güedé ténãá ñáhã-güedé xii-yu, te xãha<sup>n</sup>-güedé sá vã dúcã<sup>n</sup> càdá-yu. <sup>14</sup> Te òré ní xiní-gã sá dúcã<sup>n</sup> quidè-güedé,

te ní cudéé<sup>n</sup>-gã núú-güedé, te xáha<sup>n</sup>-gã xii-güedé:

—Chí dáñá ná quíxi nahi cue landú líhli-á<sup>n</sup> núú-í-a te vâ cãdí-ndó ichi-güexi, chí dàtná cúú váha iní cue landú líhli-á<sup>n</sup> duca<sup>n</sup> cúu váha iní cue ñáyiú yíndaha Yá Ndióxi. <sup>15</sup> Te na cãchí tñúhu ndáá-í xii-ndo sã núú vá quíndáá iní ñáhá-ndó dàtná quidé cuè landú líhli sàndáá iní ñáhá xii-í, te vâ ndíhu ndaha ñaha Yá Ndióxi xii-ndo —cãchí-gã xáha<sup>n</sup>-gã xii-güedé.

<sup>16</sup> Te sátá dúcá<sup>n</sup> ní xáha<sup>n</sup>-gã te ní nguídèhé-gã cue landú-á<sup>n</sup> te ní tendaha ñaha-gã xii-güexi, te ní xicá<sup>n</sup> táhú-gã núú Yá Ndióxi cuendá-güexi.

*Í<sup>n</sup> téé cuica cãhá<sup>n</sup> ndíhi-dé Jèsús*  
(Mt. 19:16-30; Lc. 18:18-30)

<sup>17</sup> Te óré sa ñúhu ichi Jèsús caca-gã quíhí<sup>n</sup>-gã íngá xichi ní cúu ní quexio cunu í<sup>n</sup> téé ní nguíñí xítí-dé núú-gã, te xáha<sup>n</sup>-dè xii-gã:

—Yòhó Mèstrú, cúu-n téé ío váha iní-xi, te cuíní-í núú vá cundèe iní-n cãchí tñúhu-n ná cúú sã cãdá-í cuendá nduu táhú-í cundecu-í ndíhi Yá Ndióxi ní caa ní quíhí<sup>n</sup> —cãchí-dé xáha<sup>n</sup>-dè xii-gã.

<sup>18</sup> Te Jèsús ní xáha<sup>n</sup>-gã xii-dé:

—¿Te cùtnuní iní-n nãcuáa ndúu tñúhu cãhá<sup>n</sup>-n sã yúhú váha iní-á<sup>n</sup>? Chí í<sup>n</sup>ndí díí-ni Yá Ndióxi ío váha iní-gã. <sup>19</sup> Te yòhó xíní-n nãcuáa ní cachí Yá Ndióxi cada ñáyiú, te duha ní cachí-gã: “Nchòhó cue téé vâ cãhá<sup>n</sup> ndíhi-ndo ñàdíhi te núú ñá díú ñàdíhi-ndó cúú-yu, te duca<sup>n</sup>-ni nchòhó cue ñáyiú díhí tucu vâ cãhá<sup>n</sup> ndíhi-ndo téé te núú ñá díú yí-ndo cuu-güedé, te vâ cãhni-ndó tñaha ñáyiú-ndo, te ní vâ dúhú-ndó sã ndécú ndíhi-yu, te ní vâ dácacu-ndo cuéchi neñúú sã cúú-xí tñaha ñáyiú-ndo, te ní vâ dácuañdehnde-ndo, te canehe-ndo sã yíñúhu núú tãtá-ndó ndíhi núú nãná-ndó”, duha ní cachí Yá Ndióxi cada ñáyiú —cãchí-gã xáha<sup>n</sup>-gã xii-dé.

<sup>20</sup> Te téé-á<sup>n</sup> ní xáha<sup>n</sup>-dè xii-gã:

—Mèstrú, nchaa xíá<sup>n</sup> ní nguíta-í quidé-í ndéé cùtnáhá cúú lãndú-í —cãchí-dé xáha<sup>n</sup>-dè xii-gã.

<sup>21</sup> Te Jèsús ní xíndéhé ñaha váha-gã xii-dé, te ní cuu váha iní ñáhá-gã, te ní xáha<sup>n</sup>-gã xii-dé:

—Dico cùmání íngá núú sã cãdá-n. Vitna te quíhí<sup>n</sup>-n te dico-n nchaa sã ndécú ndíhi-n, te díhú<sup>n</sup>-n cuãha táhú-n cuè ñáyiú ndáhú. Te duca<sup>n</sup>, te nduu táhú-n núcundecu váha-n núú ndécú Yá Ndióxi táxi tñuní-gã, te sátá ná yáha duca<sup>n</sup> cada-n, te quíxi-n chitnahá ñáhá-n xii-í cuéi na ndòho-n datná ndoho-í —cãchí-gã xáha<sup>n</sup>-gã xii-dé.

<sup>22</sup> Te sã dúcá<sup>n</sup> ní xáha<sup>n</sup> Jèsús xii-dé te ío ní cundiýí-dé chí ío cuica-dé, te ní xica-dé cuánuhú-dé.

<sup>23</sup> Te ní ndacoto-gã ní cãndéé díñi-gã, te ní xáha<sup>n</sup>-gã xii cue téé xica cuu ndíhi-gã:

—Cue ñáyiú cuica chí ío úhú quíndáá iní-yu Yá Ndióxi cuendá ndíhu ndaha ñaha-gã xii-yu —cãchí-gã xáha<sup>n</sup>-gã xii-güedé.

<sup>24</sup> Te cue téé xica cuu ndíhi-gã-á<sup>n</sup> ío ní cuñúhu-güedé nãcuáa ní cãhá<sup>n</sup>-gã, te ní xáha<sup>n</sup> tucu-gã xii-güedé:

—Nchòhó cue téé xica cuu ndíhi-í cãchí tñúhu tucu-í xii-ndo sã ío úhú quíndáá iní cue ñáyiú cuica Yá Ndióxi cuendá ndíhu ndaha ñaha-gã xii-yu, chí sãni iní-yu sã ncháá sã ndécú ndíhi-yu dácacu nihnu ñaha-xi xii-yu núú úhú núú ndáhú. <sup>25</sup> Te yáchí-gã yáha í<sup>n</sup> cãméyu yaú í<sup>n</sup> yiqui ticú dácúúxí sã quíndáá iní í<sup>n</sup> ñáyiú cuica Yá Ndióxi cuendá ndíhu ndaha ñaha-gã xii-yu —cãchí-gã xáha<sup>n</sup>-gã xii-güedé.

<sup>26</sup> Te cue téé xica cuu ndíhi-gã ní cuñúhu víhi-gã-güedé sã dúcá<sup>n</sup> ní cãhá<sup>n</sup>-gã, te ní nguíta-güedé xitñaha-güedé:

—¿Te yoo sa ndacu naníhí táhú te núú duca<sup>n</sup> vái<sup>n</sup>? —cãchí-güedé xitñaha-güedé.

<sup>27</sup> Te Jèsús ní xíndéhé váha ñaha-gã xii-güedé, te ní xáha<sup>n</sup>-gã:

—Nchaa ñáyiú ñuyúú-a chí vâ ndácú-yu ná cadá-yu nãcuáa ndíhu ndaha ñaha Yá Ndióxi xii-yu, dico mee-gã chí ndacu-gã ndíhu ndaha ñaha-gã xii-yu, chí nchaandi túhú sã váha ndacu-gã quidé-gã —cãchí-gã xáha<sup>n</sup>-gã xii-güedé.

<sup>28</sup> Te Pèlú ní xáha<sup>n</sup>-dè xii-gã:

—Nchúhú ní dándòo-ndí nchaandi túhú sã ndécú ndíhi-ndí te ní tuha ñaha-ndí xii-n —cãchí-dé xáha<sup>n</sup>-dè xii-gã.

<sup>29</sup> Te Jèsús ní xáha<sup>n</sup>-gã xii-dé:

—Na cãchí tñúhu ndáá-í xii-ndo sã ncháá ñáyiú na dándóo vehe-xi, àdi ñani-xi, cúha-xi, tãtá-xi, nãná-xi, déhe-xi, àdi ñuhu-xi, te núú duca<sup>n</sup> na cadá-yu sã cuendá-í ndíhi sã cuendá tñúhu-í, <sup>30</sup> te ío-gã cuéhé sã cuãñaha Yá Ndióxi cundecu ndíhi-yu, chí níhi-yu vehé-yu, ñuhu-yu, ñani-yu, cúha-yu, nãná-yu, déhe-yu, te ñá díú-ní sã nchaa xíá<sup>n</sup> níhi-yu cundecu ndíhi-yu, chí tñahá nduu táhú-yu cundecu ndíhi ñahá-yu xii-í ní caa ní quíhí<sup>n</sup> ná sáá nduu. Dico díhna-gã ndoho tñahá-yu núú ñuyúú-a sã cuendá-í. <sup>31</sup> Te dava ñáyiú cunuu ndecu ichi Yá Ndióxi vitna, ñáyiú-á<sup>n</sup> sáá nduu te vâ ío-gã cunúú-yu dàtná cunúú-yu vitna, te dava ñáyiú nchicú<sup>n</sup> ñá túú cunuu vitna ñáyiú-á<sup>n</sup> sáá nduu te ío cunúú-yu —cãchí-gã xáha<sup>n</sup>-gã xii-güedé.

*Jèsús cãhá<sup>n</sup> tucu-gã sã cãhni ñaha-güedé xii-gã*

(Mt. 20:17-19; Lc. 18:31-34)

<sup>32</sup> Te ñuhu Jesús ichi ndihi cue tée xica cuu ndihi-gá cuasaá ndihi ñaha-gá xii-güedé ñúu Jerusalén, te yòdo nuu-gá núu-güedé cuasaá. Te cue tée-án xicuñúhu-güedé sá dúcán cuáhán-gá ñúu Jerusalén, te dava cue ñayiu xinchícúñ xiyúhú-yu. Te ní taudíñ-gá ndi úxúu cue tée xica cuu ndihi-gá, te ní ngúita-gá cáni-gá cuendú núu-güedé nchaa nacuáa yáha-gá. <sup>33</sup> Te xáha-gá xii-güedé:

–Vitna ñuhu-o ichi cuasaá-ó ñúu Jerusalén, te yácán cuáha cuendá ñáhá-güedé xii yúhú Tée cùu ñaní tnáhá-ndó ncháa-ndo núu cuè tée cùu dútú cüntuu, ndihi núu cuè tée dácuaha ñaha xii ñayiu nchaa tnúhu ní chídó tnúni ndí Moisés. Te diu cue tée-án cùñaha-güedé xii dava-gá cue tée sá cáhni ñaha-güedé xii-í, te cuáha cuendá ñáhá-güedé xii-í núu cuè tée ñá túú cùu cue tée isráel. <sup>34</sup> Te cue tée-án cudíquí ndeé ñáhá-güedé xii-í, te caniha-güedé ndihi ñhi, te tiú dí ñáhá-güedé, te cahni ñaha-güedé xii-í dico nduu úní sá cùu-í te ndoto-í –cáchi-gá xáha-gá xii-güedé.

*Té Jacobó ndihi té Juáa cáhá ndàhú-güedé núu Jesús sá cáda-gá ñn sá cuini-güedé (Mt. 20:20-28)*

<sup>35</sup> Te cue déhe té Zebèdeú té Jacobó ndihi té Juáa ní quexio-güedé núu Jesús, te xáha-güedé xii-gá:

–Métrú, véxi-ndí cáhá ndàhú-ndí núu-n núu vá cündee iní-n cáda-n ñn sá cuini-ndí –cáchi-güedé xáha-güedé xii-gá.

<sup>36</sup> Te Jesús ní xicán tnúhú-gá núu-güedé, te xáha-gá:

–¿Ná cùu sá cuini-ndó cáda-í-í? –cáchi-gá xáha-gá xii-güedé.

<sup>37</sup> Te ní xáha-güedé xii-gá:

–Cuini-ndí sá òrè ná saá nduu cündecu-n núu táxi tnúni-n, te ñn-ndí cunucóo-ndí xio cùha-n te ñn-ndí cunucóo-ndí xio dátmi-n –cáchi-güedé xáha-güedé xii-gá.

<sup>38</sup> Te Jesús ní xáha-gá xii-güedé:

–Nchóhó, ñá túú cüntuni iní-ndó nacuáa nduu sá xicán-ndó núu-í. ¿Te náa cundee iní-ndó dándoho ñaha ñayiu xii-ndo dátna dándoho ñahá-yu xii-í, te cundee tucu iní-ndó cáhni ñahá-yu xii-ndo dátna cahni ñahá-yu xii-í-án? –cáchi-gá xáha-gá xii-güedé.

<sup>39</sup> Te ní xáha-güedé xii-gá:

–Cundee iní-ndí yáha-ndí nchaa nacuáa cáhá-n-án –cáchi-güedé xáha-güedé xii-gá.

Te Jesús ní xáha-gá xii-güedé:

–Ndáa sá cündee iní-ndó ndòho-ndo nchaa nacuáa ndòho-í, te cundee tucu iní-ndó cáhni ñahá-yu xii-ndo, chi yúhú cahni ñahá-yu xii-í. <sup>40</sup> Dico sá dúcán cuini-ndó sá ñn-ndó cunucóo-ndo xio cuhá-í te ñn-ndó cunucóo-ndo xio datni-í, te xián chi ñá díú yúhú táu-í cáchi-í te núu sá cùu

cunucóo-ndo àdi sá vá cùu cunucóo-ndo, chi mee Tàtà-í Dútú Ndióxi cachí-gá te núu ná cùu ñayiu nduu táhú cunucóo díñi-í dàvá-án –cáchi-gá xáha-gá xii-güedé.

<sup>41</sup> Te òrè ní níhí úxi-gá cue tée xica cuu ndihi-gá tnúhu nacuáa nduu sá cuini té Jacobó ndihi ñani-dé té Juáa, te ní cudéé-güedé núu cuè tée úu-án. <sup>42</sup> Te Jesús ní cana-gá nchaa cue tée xica cuu ndihi-gá-án, te ní xáha-gá xii-güedé:

–Nchóhó xini-ndó sá cuè tée yindaha ñn nacióñ quide-güedé sá io cüntuu-güedé, te nchaa dava-gá cue tée cündihi-güedé tnáhá-güedé quide-güedé sá io cüntuu-güedé. <sup>43</sup> Dico nchóhó chi vá dúcán cáda-ndo. Chi núu dava-ndo cuini-ndó cüntuu-ndo te xini ñuhu-xi cunu cuechi núu tnáhá-ndó te vá cáda-ndó sá cüntuu-ndo. <sup>44</sup> Te núu dava-ndo cuini-ndó quene cáva-ndo, te cuu-ndó dátna cue ñayiu ñá túú tnáhi dáñá quee núu chiúñ pàtróoñ-xi cunu cuechi núu tnáhá-ndó. <sup>45</sup> Te yúhú Tée cùu ñaní tnáhá-ndó ncháa-ndo, chi ñá túú véxi-í sá cùu cuèchi ñayiu núu-í, chi véxi-í sá cùu cuèchi-í núu-yu. Te cuú-í ñuyú-í-a cuendá vai-yu cácu nihnu núu ùhú núu ndàhú –cáchi-gá xáha-gá xii-güedé.

*Jesús quidé tátna-gá ñn tée cuáa nani-dé Bartiméu*

*(Mt. 20:29-34; Lc. 18:35-43)*

<sup>46</sup> Te Jesús ní quexio-gá ñúu Jericó ndihi cue tée xica cuu ndihi-gá, te ní yáha-gá ndihi-güedé ichi xiti ñuu-án, te ío cuéhé ñayiu nchícúñ ñáhá xii-gá cuáhán te ñn xio yuhu ichi sá ní quee xiti ñuu-án núcòo ñn tée cuáa nani-dé Bartiméu, te tãtà-dé nani-dé Timeú, te tée-án núcòo-dé yuhu ichi-án xicán ndàhú-dé. <sup>47</sup> Te tée-án ní cutnuni iní-dé sá Jesús tée ñuu Nazarét ñúhú-dé ichi, te ní ngúita-dé níhi cáhá-dé, te xáha-gá xii-gá:

–jjesús, ñaní tnáhá ndí Dávíí, cundàhú iní ñáhá xii-í! –cáchi-dé xáha-gá xii-gá.

<sup>48</sup> Te vai ñayiu tēnaá ñáhá-yu xii-dé, te xáhā-yu sá ná cádi-dé yuhu-dé dico uu-gá níhi ní cáhá-dé xáha-gá xii-gá:

–jjesús, ñaní tnáhá ndí Dávíí cundàhú iní ñáhá xii-í! –cáchi-dé xáha-gá xii-gá.

<sup>49</sup> Te Jesús ní ngúñí-gá te ní xáha-gá xii cue tée ndihi-gá:

–Chí cuánguaca tée cuáa-án can-deca-ndo-dé quixi iha –cáchi-gá xáha-gá.

Te cue tée-án ní xica-güedé cuánguaca-güedé tée cuáa-án, te òrè ní quexio-güedé núu-dé te ní xáha-güedé xii-dé:

–Ndacuíñi te vá ndihú-gá iní-n, na quihí-ó chí càna ñaha Jesús xii-n –cáchi-güedé xáha-güedé xii-dé.

<sup>50</sup> Te tée-án ní xócáni-dé dóo ndixí-dé, te ndihi-ni ní ndacuíñi-dé te ní xica-dé cuáhán-dé núu Jesús. <sup>51</sup> Te òrè ní quexio-dé

te ní xicá<sup>n</sup> tnúhú-gã núú-dě, te xãha<sup>n</sup>-gã xii-dě:

—¿Ná cuiñi-n càda ñaha-í xii-n-i? —càchí-gã xãha<sup>n</sup>-gã xii-dě.

Te tée cuuá-á<sup>n</sup> nĩ xãha<sup>n</sup>-dě xii-gã:

—Mestrú, cuiñi-í cada tátana-n nùú-í cuèndá cundehe-í —càchí-dě xãha<sup>n</sup>-dě xii-gã.

<sup>52</sup> Te Jèsús ní xãha<sup>n</sup>-gã xii-dě:

—Cuanùhú vitna, chi sa ní ndúha núú-n chi ní sándáá iní-n Yá Ndióxi —càchí-gã xãha<sup>n</sup>-gã xii-dě.

Te òré-ni-á<sup>n</sup> ní ndúha núú-dě te nchicú<sup>n</sup>-dě Jèsús cuáhá<sup>n</sup>.

## 11

*Jèsús cuánguihu-gã ñuú Jerusálén*

(Mt. 21:1-11; Lc. 19:28-40; Jn. 12:12-19)

<sup>1</sup> Te Jèsús ní cuyatni-gã ndihi cue tée xica cuu ndihí-gã ñuú Bètaníá, ndihi ñuú Bètágé, te xiá<sup>n</sup> cáá yùcu nani Olivú, te yatni vii-nã xiá<sup>n</sup> cáá ñuú Jerusálén. Te Jèsús ní cana-gã úú-ni tnàhá cue tée xica cuu ndihí-gã. <sup>2</sup> Te ní xãha<sup>n</sup>-gã xii-güedé:

—Chí cuáhá<sup>n</sup> ñuú cáá yatni yacá<sup>n</sup>, te òré quexio-ndo yacá<sup>n</sup> te naníhí-ndó ñ<sup>n</sup> búrru ndètní-dí, te vátá yóo ñ<sup>n</sup>-gã codo ñaha xii-dí, te nandaxi-ndo-dí te candeca-ndo-dí quixi.

<sup>3</sup> Te núu yoo na cacá<sup>n</sup> tnúhú núú-ndó nã cuèndá nándaxi-ndo-dí, te cùñaha-ndo sã yùhú Yáá xicá cùu ndihi-ndo xini ñuhu-í-dí, te na yãha canehe chiú<sup>n</sup>-í-dí te ndihí-ni nattendaha-í-dí, duha cùñaha-ndo —càchí-gã xãha<sup>n</sup>-gã xii-güedé.

<sup>4</sup> Te cue tée-á<sup>n</sup> ní xica-güedé cuáhá<sup>n</sup>-güedé, te òré ní quexio-güedé ñuú-á<sup>n</sup> te ní naníhí-güedé ñ<sup>n</sup> búrru ndètní-dí ñ<sup>n</sup> yutnu ñihu yatni ñ<sup>n</sup> yuyehé vehe caa yatni yuhu ichi, te ní nguíta-güedé nándaxi-güedé-dí.

<sup>5</sup> Te mei òré nándaxi-güedé-dí ní quexio ñáyiu xãhá<sup>n</sup>-yu xii-güedé:

—¿Ná cuèndá nándaxi-ndo búrru-á<sup>n</sup>-i? —càchí-yu xãhá<sup>n</sup>-yu xii-güedé.

<sup>6</sup> Te cue tée-á<sup>n</sup> ní xãha<sup>n</sup>-güedé xii-yu nãcuáa ní xãha<sup>n</sup> Jèsús cùñaha-güedé. Te sátá dúcá<sup>n</sup> te ní dàñã-yu ndèca-güedé búrru-á<sup>n</sup> cuáhá<sup>n</sup> núú ndécú Jèsús. <sup>7</sup> Te òré ní quexio-güedé ndihí-dí núú ndécú-gã, te ní sacá<sup>n</sup> ndodo-güedé dóo-güedé sátá-dí, ní ngódo ñaha Jèsús xii-dí. <sup>8</sup> Te ío cuéhé ñáyiu ta sácá<sup>n</sup>-yu dóo-yu ichi cuáhá<sup>n</sup>-gã cuèndá núú dóo-yu-á<sup>n</sup> yãha-gã ndihi quiti yòdo-gã, te davá-yu xèhndé-yu ndaha yutnu ta sacá<sup>n</sup>-yu cuáhá<sup>n</sup>.

<sup>9</sup> Te nchaa ñáyiu yòdo nuu núú-gã ndihí nchaa ñáyiu nchicú<sup>n</sup> ndaa sátá-gã ní nguíta-yu níhí cãhá<sup>n</sup>-yu, te càchí-yu:

—Ío cãhnu cuu Yáá-a! ¡Te Yá Ndióxi ná chindee ñaha-gã, chí ñuú-gã cúú-gã Yáá ní tendaha-gã véxi quide núú-gã! <sup>10</sup> ¡Te ñuú-ni Yáá-á cúú-gã Yáá véxi quindaha ñaha xii-o datná ní xóo cada ndí Dãví! ¡Te ndéé nchaa

sá ío andiu na càchí-xi sã ío cãhnu cuu-gã! —duha càchí-yu.

<sup>11</sup> Te Jèsús ní quexio-gã ñuú Jerusálén, te cuánguihu-gã xití veñúhu cãhnu sã ío cùnuu, te ní xindéhé vãha-gã nchaa sã ndécú xití veñúhu-á<sup>n</sup>. Te sátá dúcá<sup>n</sup> te ní ndee-gã cuáhá<sup>n</sup>-gã ñuú Bètaníá ndihí ndi ùxúú cue tée xica cuu ndihí-gã chí sa ní cuaa.

*Jèsús xãha<sup>n</sup>-gã xii yutnu ngúxi sã vã cúú<sup>n</sup>-gã sávidí-xi*

(Mt. 21:18-19)

<sup>12</sup> Te nduu tnéé-á<sup>n</sup> ní quee Jèsús ñuú Bètaníá ndihí cue tée xica cuu ndihí-gã, te ichi ñuhu-gã ní xihí-gã docó. <sup>13</sup> Te xica ní xini-gã nùtní ñ<sup>n</sup> yutnu ngúxi, te ní xica-gã cuándéhé-gã nùu ndéé sávidí-xi te ñã túú nã ndéé, chí mee-ni ndàha-xi ndéé chí ñã díú yóo sácúndéé sávidí-xi. <sup>14</sup> Te Jèsús ní xãha<sup>n</sup>-gã xii yutnu ngúxi-á<sup>n</sup>:

—Vitna te vã yóo ñ<sup>n</sup>-gã caxi sávidí-n, chí vã cúú<sup>n</sup>-gã —càchí-gã xãha<sup>n</sup>-gã xii yutnu ngúxi-á<sup>n</sup>.

Te cue tée xica cuu ndihí-gã ní tecú dóho-güedé nãcuáa ní xãha<sup>n</sup>-gã xii yutnu ngúxi-á<sup>n</sup>.

*Jèsús ñã túú tnàhá iní-gã nãcuáa quide ñáyiu xití veñúhu*

(Mt. 21:12-17; Lc. 19:45-48; Jn. 2:13-22)

<sup>15</sup> Te Jèsús ní quexio tucu-gã ndihí cue tée xica cuu ndihí-gã ñuú Jerusálén, te cuánguihu tucu-gã xití veñúhu cãhnu sã ío cùnuu, te xití veñúhu-á<sup>n</sup> xindecu cue ñáyiu quide ndáhú ndádicó-yu, ndihí cue ñáyiu xisaa<sup>n</sup>. Te nchaa-yu ní queñuhu ñaha Jèsús xii-yu quehé, te ní dándüá-gã mèsá cue ñáyiu dàma díhú<sup>n</sup>, ndihí nchaa xilé sácóo nchihí cue ñáyiu dico lómá xindecu xití veñúhu-á<sup>n</sup>. <sup>16</sup> Te ñã túú tnàhí-gã ní dàña-gã yãha cue ñáyiu ndihí nchaa sã nchidó-yu ichi xití veñúhu-á<sup>n</sup>. <sup>17</sup> Te ní xãha<sup>n</sup>-gã xii-yu:

—Núú tútú Yá Ndióxi cãhá<sup>n</sup>-xi nãcuáa ní cãhá<sup>n</sup>-gã, te ní cãchí-gã: “Vehe-í cúú-xí vèhe núú tàcá ñáyiu níhí ñuyíú cãhá<sup>n</sup> ndihí ñãhá-yu xii-í”, duha ní cãhá<sup>n</sup>-gã càchí-xi núú tútú-gã. Dico nchòhò quidé-ndo vèhe-gã vèhe ñadúhú —càchí-gã xãha<sup>n</sup>-gã xii-yu.

<sup>18</sup> Te nchaa dütú cùnùu, ndihí nchaa cue tée dàcuaha ñaha xii-yu nchaa tnúhu ní chidó tnúni ndí Moisés ní tecú dóho-güedé nãcuáa ní cãhá<sup>n</sup>-gã te ní nguíta-güedé ndúcú-güedé nãcuáa cada-güedé cãhni ñaha-güedé xii-gã, chí yùhú-güedé sã ío cunuu-gã, te duca<sup>n</sup> chí nchaa ñáyiu ío cùñúhu-yu nchaa tnúhu cãhá<sup>n</sup>-gã. <sup>19</sup> Te òré sa ní cuaa cuiñi-nã, te ní quee tucu Jèsús ndihí cue tée xica cuu ndihí-gã ñuú Jerusálén cuáhá<sup>n</sup>-gã ndihí-güedé ingá xichi.

*Ní yíhí yutnu ngúxi*

(Mt. 21:20-22)

<sup>20</sup> Te nduu tnéé nehé-ni ní yáha tucu Jèsús ndihi cue téé xica cuu ndihi-gá núú níhnú yùtnu ngúxí, te ní xini-güedé sa ní yíchi nihí ndéé yóho-xi. <sup>21</sup> Te té Pelú ní ndacu iní-dé nàcuáa ní xáha<sup>n</sup> Jèsús xii yutnu ngúxí-án, te ní xáha<sup>n</sup>-dè xii-gá:

—Mèstrú, cundehe ná ní yíchi yutnu ngúxí sá ní xáha<sup>n</sup>-n sá vâ cúu<sup>n</sup>-gâ sávidí-xi —câchí-dé xáha<sup>n</sup>-dè xii-gá.

<sup>22</sup> Te Jèsús ní xáha<sup>n</sup>-gâ xii-güedé:

—Quindáá ndisa iní-ndó Yâ Ndióxi. <sup>23</sup> Te na câchí tnúhu ndáá-í xii-ndo sá núu nchòhó cùñaha-ndo xii tndúú-a xocuíñi-xi núú ndécú-xí, te quíñi-xi quee-xi xití lámár. Te diu duca<sup>n</sup> càda-xi te núu nchòhó vâ cáni ñ<sup>n</sup> cani úú iní-ndó, te quindáá iní-ndó sá dúcán càda-xi. <sup>24</sup> Te xiá<sup>n</sup> núu câchí tnúhu-í xii-ndo sá nchâa sá ná càcán-ndó núú Yâ Ndióxi òré càhá<sup>n</sup> ndihi-ndo-gâ, te taxi-gâ te núu nchòhó sàndáá ndisa iní-ndó sá táxi-gâ sá xicá<sup>n</sup>-ndó núú-gâ. <sup>25</sup> Te òré càhá<sup>n</sup> ndihi-ndo Yâ Ndióxi te dandacu iní-ndó te núu ndècu ñáyiú ñá túú cùu váha iní ñáhá xii-ndo, te cada càhnu iní-ndó-yu cuendá duca<sup>n</sup> càda cahnu iní ñáhá Tátá-ndó Dütú Ndióxi Yá ndécú àndiu xii-ndo cuendá nchaa sá ñá túú vâha quide-ndo. <sup>26</sup> Dico núu nchòhó vâ càdá càhnu iní-ndó sá quidé ñaha tnaha ñáyiú-ndo xii-ndo, te ní Tátá-ndó Dütú Ndióxi vâ càdá càhnu iní ñáhá-gâ xii-ndo cuendá nchaa sá ñá túú vâha quide-ndo —câchí-gâ xáha<sup>n</sup>-gâ xii-güedé.

*Jèsús ndécú ndihi-gâ tnúhu ndee iní*  
(Mt. 21:23-27; Lc. 20:1-8)

<sup>27</sup> Te Jèsús ní ndexio tucu-gâ ñúú Jerusálén ndihi cue téé xica cuu ndihi-gâ, te cuánguihu tucu-gâ xití veñúhu càhnu sá ño cùnunu ndihi-güedé. Te xití veñúhu-án yíñi-gâ ní quexio cue dütú cùnunu ndihi cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi cue téé cùu sacuéhé núú ñáyiú israhél. <sup>28</sup> Te xáha<sup>n</sup>-güedé xii-gá:

—Cuní-ndí câchí tnúhu-n xii-ndí nása ndúu tnúhu ndee iní ndécú ndihi-n núu quide-n nándi sá quidé-n, ¿te yoo duca<sup>n</sup> ní taxi tnúhu ndee iní-án xii-n-í? —câchí-güedé xáha<sup>n</sup>-güedé xii-gá.

<sup>29</sup> Te Jèsús ní xáha<sup>n</sup>-gâ xii-güedé:

—Yúhú tnàhá-í cuiñí-í càcán tnúhu-í ñ<sup>n</sup> sá càcán tnúhu-í núu-ndó te núu na câchí tnúhu-ndo, te câchí tnúhu-í xii-ndo yòo ní taxi tnúhu ndee iní xii-í duha quide-í. <sup>30</sup> Te chí câchí tnúhu xii-í yoo ní táuchíú<sup>n</sup> ní dácuanúte ndíi Juáá ñáyiú, ¿Yâ Ndióxi á<sup>n</sup> cué téé ñáyiú-a ní táuchíú<sup>n</sup> dùca<sup>n</sup> ní quide ndíi? Te chí câchí tnúhu —câchí-gâ xáha<sup>n</sup>-gâ xii-güedé.

<sup>31</sup> Te ní nguíta-güedé xitnàha-güedé:

—¿Náa cùñaha-o? Chí núu na cùñaha-o sá Yâ Ndióxi ní táuchíú<sup>n</sup> dùca<sup>n</sup> ní quide ndíi

Juáá ñá, te quesaha-dè: “¿Ná cuendá ñá túú ní sàndáá iní-ndó tnúhu ní càhá<sup>n</sup> ndíi vâi?”; quesaha-dè. <sup>32</sup> Te ní vâ cúu cùñaha-o sá cué ñáyiú ñáyiú-a ní táuchíú<sup>n</sup> dùca<sup>n</sup> ní quide ndíi Juáá —câchí-güedé xitnàha-güedé.

Te duca<sup>n</sup> ní xitnàha-güedé chí ñá túú ní cùtnuní iní-güedé nása cùñaha-güedé xii-gâ, chí xiyùhú-güedé cue ñáyiú chí nchaa ñáyiú-án ní cùtnuní ndáá iní-yu sá Yâ Ndióxi ní táuchíú<sup>n</sup>-gâ duca<sup>n</sup> ní quide ndíi Juáá. <sup>33</sup> Te ní xáha<sup>n</sup>-güedé xii Jèsús:

—Ná túú xini-ndí yoo ní táuchíú<sup>n</sup> dùca<sup>n</sup> ní dácuanúte ndíi Juáá ñáyiú —câchí-güedé xáha<sup>n</sup>-güedé xii-gâ.

Te Jèsús ní xáha<sup>n</sup>-gâ xii-güedé:

—Te núu duca<sup>n</sup> te ní yùhú vâ câchí tnúhu-í xii-ndo yòo ní taxi tnúhu ndee iní duha quide-í —câchí-gâ xáha<sup>n</sup>-gâ xii-güedé.

## 12

*Cuendá cue téé cuihna iní-xi*  
(Mt. 21:33-46; Lc. 20:9-19)

<sup>1</sup> Te Jèsús ní nguíta-gâ cáni-gâ ñ<sup>n</sup> cuendú núú ñáyiú nàcuáa tecú tnùní-yu tnúhu-gâ, te xáha<sup>n</sup>-gâ xii-yu:

—Ñ<sup>n</sup> téé ní nacúxi-dé mee-ni yòho yaha stilé núú ñúhú-dè, te ní chidoco-dé cuendá sá vâ cúu dàñú, te ní cadúha-dé núú quíñi-dè ndéhé yoho yaha stilé-án òré ná cùu, te ní cadúha-dé ñ<sup>n</sup> xító dúcú<sup>n</sup> núú cáundòdo cue téé coto yoho yaha stilé-án.

“Te ní sáá ñ<sup>n</sup> nduu queé-dé quíngaca cuu xica-dé vâi nduu, te ní dándóo ndaha-dé sá ní xitu-dé-án xii ñ<sup>n</sup> úú cue téé càhá<sup>n</sup> ndihi-dé cuendá cada chiú<sup>n</sup>-güedé, te ní ndatnúhu-güedé sá òré ná cúu te cuu cuendá dava-güedé te duca<sup>n</sup> te ní quee-dé cuáhá<sup>n</sup>-dé. <sup>2</sup> Te sáta ní sáá nduu ní cuu ndéhé yoho yaha stilé sá ní xitu-dé-án, te ní xáha<sup>n</sup>-dè xii ñ<sup>n</sup> téé xinu cuechi núú-dé: “Cuáhá<sup>n</sup> càcán<sup>n</sup> sá cúu cuendá-í núú cué téé ní dándóo ndàha-í nchaa yoho yaha stilé sá ní xitu-í-án”, câchí-dé xáha<sup>n</sup>-dè. Te téé xinu cuechi-án ní xica-dé cuáhá<sup>n</sup>-dé. <sup>3</sup> Te cue téé-án ní tñi-güedé téé xinu cuechi-án, te ní caniha-güedé xii-dé, te dátuní ní nacucú<sup>n</sup> ñáhá-güedé, te ñá túú tnàhí ná ní sàñaha-güedé. <sup>4</sup> Te téé cùu xítóhó yoho yaha stilé-án ní tendaha tùcu-dé ingá téé xinu cuechi núú-dé cuáhá<sup>n</sup>-dé. Te òré ní quexio téé xinu cuechi-án te cue téé-án ní sáha ñaha-güedé yúú xii-dé, te ní táhú-güedé díqui-dé, te ní xicuéhé ñáhá-güedé xii-dé. <sup>5</sup> Te téé cùu xítóhó nchaa yoho yaha stilé-án ní tendaha tùcu-dé ingá téé xinu cuechi núú-dé cuáhá<sup>n</sup>-dé núú cué téé-án, dico téé-án òré ní quexio-dé te ní sahni ñaha-güedé xii-dé. Te téé cùu xítóhó nchaa yoho yaha stilé-án ní tendaha-dé vâi-gâ cue téé xinu cuechi núú-dé cuáhá<sup>n</sup> ngacá<sup>n</sup>-güedé sá cúu cuendá-dé ní cùu dico diu-ni duca<sup>n</sup>

ní quide ñaha tùcu cue tée ndeé nchaa yoho yàha stilé-án xii-güedé, chi dava-güedé ní caniha-güedé te dava-güedé ní sahani ñaha-güedé.

<sup>6</sup> Te tée cùu xitohó nchaa yoho yàha stilé-án ndécú ñndii-ná tée tendaha-dé quihín núu cuè tée ní dándóo ndaha-dé sá ní xitu-dé-án, te tée tendaha-dé-án cùu-dé déhe ducu-dé, te io cùu iní ñáhá-dé. Te ní sani iní-dé: “Váha-gá núu tendaha-í déhe-í a núhu-dé, chi óré quini ñáhá-güedé xii-dé te cànehe-güedé sá yíñuhu núu-dé”, duha ní sani iní-dé. Te duca<sup>n</sup> te ní xáha<sup>n</sup>-dè xii déhe-dé-án sá núhu-dé, te tée-án cuànuhú-dé cuáhán ngácá<sup>n</sup>-dé sá cùu cuendá tãtã-dé núu cuè tée-án. <sup>7</sup> Dico óré ní xiní cue tée quide chiuh-án déhe tée cùu xitohó nchaa yoho yàha stilé-án, te ní xítñaha-güedé: “Tée-án tée véxi nduu táhú ñuhu-a ndihi sá cáá núu-xi, dico cahni-o-dé te mee-o ndúu táhú-ó sá ndúu táhú-dé”, duha ní xítñaha-güedé. <sup>8</sup> Te ní tñii-güedé tée-án, te ní sahani ñaha-güedé, te ní dáquéné-güedé yiqui cùñú-dé ññ xio yuhu ñuhu núu cáá yoho yaha stilé-án —duha cuáhán cuendú ní cani Jèsús núu-yu.

<sup>9</sup> Te Jèsús ní xáha<sup>n</sup> tùcu-gá xii-yu:  
—¿Te nchòhó sa cùtnuní iní-ndó nàcuáa cada xitohó ñuhu-án án? Chi núhu-dé te cahni-dé cue tée-án te dándóo ndaha-dé ñuhu-dé xii cue tée cùtnuní iní-dé cada ndáá —cächí-gá xáha<sup>n</sup>-gá xii-yu.

<sup>10</sup> Te xáha<sup>n</sup> tùcu-gá xii-yu:  
—Te nchòhó, náa ñá túú dàcuaha-ndo núu tütú Yá Ndióxi núu cächí-xi: Yúu sá ní dáquée ñihu cue tée dàcaa vehe, ní cuu-xi yúu cùnù vitna.

<sup>11</sup> Chi mee Yá Ndióxi duca<sup>n</sup> ní cächí-gá cundu, te cùu-xi ññ sá io cùñuhu-o vitna. Duha cächí-xi núu tütú-gá —cächí Jèsús xáha<sup>n</sup>-gá xii-yu.

<sup>12</sup> Te cue tée ní xíndedóho nàcuáa ndúu tñuhu ní cáhá<sup>n</sup>-gá ní cuini-güedé tñii ñaha-güedé xii-gá ní cùu, chi ní cutnùní iní-güedé sá cuendá-güedé ní cáhá<sup>n</sup>-gá, dico ní yuhú-güedé tñii ñaha-güedé xii-gá cuendá sá io vai ñáiyu, te ná ío ná cada ñáhá-yu xii-güedé ní sani iní-güedé, te ní xica-güedé cuáhán-güedé.

#### *Cuendá impuéstú*

(Mt. 22:15-22; Lc. 20:20-26)

<sup>13</sup> Te sáta ní xica-güedé cuáhán-güedé, te ní tendaha-güedé ññ úú cue tée cùu fariséu, ndihi ññ úú cue tée cùndihi té Hèrodés cuáhán-güedé núu ndécú Jèsús ndúcú-güedé nàcuáa cada-güedé daticánuu ñaha-güedé xii-gá núu tñuhu cáhá<sup>n</sup>-gá. <sup>14</sup> Te cue tée-án ní quexlo-güedé núu Jèsús, te xáha<sup>n</sup>-güedé xii-gá:

—Mèstrú, cùtnuní iní-ndí sá ío ndáá cáhá<sup>n</sup>-n, te ñá túú quide cuendá-n nàcuáa cáhá<sup>n</sup> ñáiyu, te cuéi ndédani cáá-yu ññ-ní

cáhán-n ndihí-yu chi ñá túú quide cuendá-n cuéi ná ñáiyu cùu-yu, te cáhá<sup>n</sup> ndáá-n nàcuáa cáhá<sup>n</sup> Yá Ndióxi cundecu-o ññyú-a. Te cächí tñuhu xii-ndí núu váha-ni quide-ndí sá chähü-ndí té Cèsár tée ío cùnnu cuendá impuéstú án ñáhá —cächí-güedé xáha<sup>n</sup>-güedé xii-gá.

<sup>15</sup> Dico Jèsús ní cutnùní iní-gá sá xító ndeé ñáhá-güedé xii-gá, núu ní xáha<sup>n</sup>-gá xii-güedé:  
—¿Ná cuendá duca<sup>n</sup> xító ndeé ñáhá-ndó xii-í? Chí dánèhé ñáhá xii-í ññ díhú<sup>n</sup> sá chähü-ndo cuendá impuéstú te núu nása cáa —cächí-gá xáha<sup>n</sup>-gá xii-güedé.

<sup>16</sup> Te cue tée-án ní dánèhé ñáhá-güedé xii-gá ññ díhú<sup>n</sup> sá chähü-güedé cuendá impuéstú. Te Jèsús ní xáha<sup>n</sup>-gá xii-güedé:

—Chí cächí tñuhu xii-í núu yoo núu-xi ndeé ndihi yoo diu-xi ndeé —cächí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Núú té Cèsár ndeé ndihi diu-dé —cächí-güedé xáha<sup>n</sup>-güedé xii-gá.

<sup>17</sup> Te Jèsús ní xáha<sup>n</sup>-gá xii-güedé:

—Te núu duca<sup>n</sup> te chí nàcuáha té Cèsár sá cùu cuendá-dé, te sá cùu cuendá mée Yá Ndióxi te xiá<sup>n</sup> nàcuáha-ndo-gá —cächí-gá xáha<sup>n</sup>-gá xii-güedé.

Te cue tée-án ío ní cuñuhu-güedé sá dúcán ní cáhá<sup>n</sup>-gá.

#### *Cuendá cue ñáiyu ndoto*

(Mt. 22:23-33; Lc. 20:27-40)

<sup>18</sup> Te sáta dúcán te ní quexio ññ úú cue tée cùu saducéu núu ndécú Jèsús, te cue tée-án ñá túú sandáá iní-güedé sá ndótó cué ñáiyu ní xihí, te ní xáha<sup>n</sup>-güedé xii-gá:

<sup>19</sup> —Mèstrú, ndíi Moisés cächí ndíi núu tütú ndíi ndécú vitna sá núu ññ tée na cùu-dé te quendóo ñadhí-dé, te núu ñá túú ní xóo déhe-dé ndihi ñadhí-dé-án, te tée cùu ñaní-dé naquehe<sup>n</sup>-dé ñaha ní quendóo quée-án cuendá coo déhe-dé ndihi-a cuendá tée ní xihí-án. <sup>20</sup> Te ní xíndecu úsá tñáhá cue tée mee-ni ndí ñaní-güedé. Te tée díhna ní níhi ñadhí-dé, te ñá túú ní cùdíi-dé cundecu-dé chi ní xihí-dé, te ní ññ déhe-dé ñá túú ní xóo ndihi ñadhí-dé. <sup>21</sup> Te tée cùu úú ní naquehe<sup>n</sup>-dé ñaha ní quendóo quée-án, dico ní xihí tucu-dé, te ní ññ tucu déhe-dé ñá túú ní xóo ndihi ñaha-án. Te diu-ni duca<sup>n</sup> ní xihí tée cùu uní. <sup>22</sup> Te ní xínu ndi úsá-güedé ní cándeca ñaha-güedé xii ñaha-án, dico ní ññ-güedé ñá túú ní xóo déhe-güedé ndihi-a, te ní ndihi-güedé ní xihí te ndeé núu ní ndihi-ná ní xihí tñáhá ñadhí-án. <sup>23</sup> Te na sáa nduu ndòto-güedé ndihi ñaha-án, ¿te ndédacáa-güedé ñadhí-güedé cuu-a-í? Chí ndi úsá-güedé ní cándeca ñaha-güedé xii-a<sup>n</sup> —cächí-güedé xáha<sup>n</sup>-güedé xii-gá.

<sup>24</sup> Te Jèsús ní xáha<sup>n</sup>-gá xii-güedé:



—Ní xíta nchòhó tnúhu càhá<sup>n</sup>-ndó, chí ñá túú xíní-ndó nàcuáa càhá<sup>n</sup> Yá Ndióxi núú tütú-gá, te ní ñá túú xíní-ndó sá diú-gá ndácú-gá quidé-gá nchaandi túhú sá vâha. <sup>25</sup> Te ná cächí tnúhu-í xii-ndo sá òré ná sáá nduu ndòto nchaa ñâyü núú xíhí, te dàvâ-á<sup>n</sup> vâ yôo-gá dasa<sup>n</sup> dèhe yoco-xi chí vâ yôo-gá candeca tnâha, chí ná ndòtó-yu te cuu-ná-yu dàtná cue espíritú xínú cuèchi núú Yá Ndióxi. <sup>26</sup> Te núu nchòhó cuini-ndó càhá<sup>n</sup>-ndó cuendá nchaa ñâyü ndoto, te díhna-gá dacuâha-ndo nacuáa ní chidó tnúni ndíi Moisés núú tütú ndíi ní cuu. Chí díu núú tütú ndíi càhá<sup>n</sup>-xi nacuáa ní xâhá<sup>n</sup> Yá Ndióxi xii ndíi cütñáhá ní càhá<sup>n</sup> ndíhi ñaha-gã ì<sup>n</sup> xí-chí núú ñnhú tnùtaú nchicú<sup>n</sup> ñuhú. Te duha ní xâhá<sup>n</sup>-gã xii ndíi: “Yúhú cùú-í Ndióxi tẽ Ábrahám, ndíhi tẽ Isáác, ndíhi tẽ Jâcób”, duha ní xâhá<sup>n</sup> Yá Ndióxi xii ndíi cächí-xí núú tütú ndíi. <sup>27</sup> Te Yá Ndióxi ñá túú cùu-gá Ndióxi cue ñâyü ní xíhí, chí cùu-gá Ndióxi cue ñâyü xindecu vívú, núu xiã<sup>n</sup> nchòhó ío xíta-ndo tnúhu càhá<sup>n</sup>-ndó. Te sá dúcá<sup>n</sup> ní càhá<sup>n</sup>-gã cuendá cue tée-á<sup>n</sup>, te xiã<sup>n</sup> cütñúni sá cuèi ní xíhí-güedé sá cùú-xí tnâha ñâyü-güedé, dico ndècu vívú-güedé sá cùú-xí-gã —cächí-gã xâhá<sup>n</sup>-gã xii-güedé.

*Tnúhu sá ìo-gá cúnüu*  
(Mt. 22:34-40)

<sup>28</sup> Te tnâhá ì<sup>n</sup> tée dàcuaha ñaha xii ñâyü nchaa tnúhu ní chidó tnúni ndíi Moisés ndédóho-dé nchaa tnúhu càhá<sup>n</sup> Jèsús ndíhi cue tée cùu saducéú-á<sup>n</sup>, te ndédóho-dé sá stúni vâha níhí-gã tnúhu nàdanhocáva-gã. Te ní sãndehe yatni-dé núú-gã, te xâhá<sup>n</sup>-dẽ xii-gã:

—Cächí tnúhu xii-í ndédacaa tnúhu sá ní càhá<sup>n</sup> Yá Ndióxi ío-gã cúnüu cuu díhna —cächí-dé xâhá<sup>n</sup>-dẽ xii-gã.

<sup>29</sup> Te Jèsús ní xâhá<sup>n</sup>-gã xii-dé:

—Duha càhá<sup>n</sup> tnúhu sá ìo-gã cúnüu: “Nchòhó ñâyü israél ío vâha chí cündédóho tnúhu-a. Ì<sup>n</sup>ndíi díi-ni Yá Ndióxi ndécú, te díu-ni-gã cùú-gã Ndióxi-ó. <sup>30</sup> Te cuu ñí-ndó Dütú Ndióxi Yáá cùú Ndióxi-ndó ní yuhu ní ñí-ndó, te caní ñí-ndó càda-ndo datná cuini méé-gã, te mee-ni tnúhu vâha caní ñí-ndó cuendá cuu víi cuu vâha-ndo núú-gã, te coo ñí-ndó càda-ndo nacuáa cuu vâha ñí-gã”, duha càhá<sup>n</sup> tnúhu sá ìo-gã cúnüu. <sup>31</sup> Te duha càhá<sup>n</sup> tucu ñngá tnúhu cùu uú sá ío cúnüu: “Cuu ñí-ndó tnâha ñâyü-ndo dàtná cùú ñí-ndó mèe-ndo”, duha càhá<sup>n</sup> tnúhu cùu uú-á<sup>n</sup>. Te uú duha-ni tnúhu-a cùu-xí tnúhu sá ìo-gã cúnüu —cächí-gã xâhá<sup>n</sup>-gã xii-dé.

<sup>32</sup> Te tée dàcuaha ñaha xii ñâyü nchaa tnúhu ní chidó tnúni ndíi Moisés ní xâhá<sup>n</sup>-dẽ xii-gã:

—Mèstrú, vâha-ni càhá<sup>n</sup>-n chí ndáá sá ì<sup>n</sup>ndíi-ni Yá Ndióxi ndécú, te ñá túú-gã ndèé ndécú ñngá ndíoxí. <sup>33</sup> Te dàtná ní cächí-n

sá ní yuhu ní ñí-ó cùu ñí-ó Yá Ndióxi, te caní ñí-ó càda-ndo nacuáa cuu víi cuu vâha ñí-gã te ío víi ío vâha cuu ñí-ó dàtná cuini méé-gã, te coo ñí-ó càda-ndo nacuáa cuu vâha ñí-gã, te cuu ñí-ó cuè tnaha ñâyü-ndo dàtná cùú ñí-ó mèe-o. Te nchaa xiã<sup>n</sup> ío-gã xíní ñúhu-xi cada-ndo dacúúxí sá cuãñaha-ndo quiti cahni-güedé te càyú-di nduu táhú ñáhá Yá Ndióxi, ndíhi dacúúxí nchâa dava-gã sá sãñaha-ndo nduu táhú-gã —cächí-dé xâhá<sup>n</sup>-dẽ xii-gã.

<sup>34</sup> Te sá dúcá<sup>n</sup> ío vâha nduu tnúhu ní càhá<sup>n</sup> tée-á<sup>n</sup>, núu ní xâhá<sup>n</sup> Jèsús xii-dé:

—Luha-ná cümání xii-n te ndíhu ndaha ñaha Yá Ndióxi —cächí-gã xâhá<sup>n</sup>-gã xii-dé.

Te sá dúcá<sup>n</sup> ní xâhá<sup>n</sup>-gã xii tée-á<sup>n</sup>, núu vâ yôo ì<sup>n</sup>-gã ní cüyü ñagá tnúhu nducu tnúhu-yu núú-gã.

*Yoo cùu Xitohó Jesucristú*

(Mt. 22:41-46; Lc. 20:41-44)

<sup>35</sup> Te Jèsús yíhí-gã xítí veñúhu càhnu sá ío cúnüu danehé-gã ñâyü, te xâhá<sup>n</sup>-gã xii-yu:

—Cue tée dàcuaha ñaha xii ñâyü nchaa tnúhu ní chidó tnúni ndíi Moisés cächí-güedé sá Cristú Yáá tendaha Yá Ndióxi quixi ñuyúú-a cùu-gã dèhe ndíi Dávíi, te ndíi-á<sup>n</sup> ní cunaha víhi ní xíhí ndíi. ¿Te ná cuendá duca<sup>n</sup> càhá<sup>n</sup>-güedé? <sup>36</sup> Te mee ndíi Dávíi-á<sup>n</sup> ní dácáhú ñí ñáhá Espíritú Yá Ndióxi xii ndíi nacuáa càhá<sup>n</sup> ndíi, te duha ní cächí ndíi:

Dütú Ndióxi ní xâhá<sup>n</sup>-gã xii Yáá cùú Xitohó-í: “Ngóo xio cùha-í,

te yúhú cada-í te nchaa sá cùú ùhú ñí ñáhá xii-n canehe-xi sá yíñúhu núú-n.”

Duha ní xâhá<sup>n</sup> Dütú Ndióxi xii Yáá cùú Xitohó-í.

Duha ní cächí ndíi. <sup>37</sup> ¿Te nása cùu Cristú dèhe ndíi Dávíi, te mee ndíi ní cächí ndíi sá cùú-gã Xitohó ndíi? —cächí Jèsús xâhá<sup>n</sup>-gã xii-yu.

Te ío cuèhé ñâyü ní xindedóho nchaa tnúhu ní càhá<sup>n</sup>-gã, te ío ní cudíí ñí-yu ní xindedóho ñáhá-yu xii-gã.

*Jèsús càhá<sup>n</sup>-gã cuendá cue tée dàcuaha ñaha xii ñâyü nchaa tnúhu ní chidó tnúni ndíi Moisés*

(Mt. 23:1-36; Lc. 11:37-54; 20:45-47)

<sup>38</sup> Te òré dánèhé ñáhá Jèsús xii cue ñâyü, te xâhá<sup>n</sup>-gã xii-yu:

—Cada cuendá-ndó vâ cadá-ndó dàtná quidé cuè tée dàcuaha ñaha xii ñâyü nchaa tnúhu ní chidó tnúni ndíi Moisés, chí cue tée-á<sup>n</sup> tnâhá ñí-güedé cuíhnu-güedé dóó nání sá sácúhnu cue tée cúnüu-gã te cuini-güedé sá mèe-ní ndíhi tnúhu yíñúhu càhá<sup>n</sup> ndíhi ñaha ñâyü xii-güedé nchaa núú xicá cùu-güedé. <sup>39</sup> Te nácáxi-güedé xilé sácóo nchíhi cue tée cúnüu-gã xítí veñúhu sácóo nchíhi-güedé. Te duca<sup>n</sup>-ní quide-güedé cuèi òré quíhu-güedé mèsá

caxi-güedé òrè ndécú-güedé ìn vico, chi mee-ni núú sácóo cue téé cúnuu cuini-güedé coo-güedé. <sup>40</sup> Te quèndé-güedé vehe nchaa ñâyü quèé, te ío naha càhá<sup>n</sup> ndihí-güedé Yá Ndióxi dándahú-güedé méé-güedé sá ío quide ndáá-güedé cuèndá sá cuini-güedé càhá<sup>n</sup> váha ñâyü cuèndá-güedé. Te sá dúcá<sup>n</sup> quide-güedé te ío-gá ndoho-güedé núú ùhú núú ndàhú dàcúúxí dàva-gá ñâyü —càchí-gá xàha<sup>n</sup>-gá xii-yu.

*Dihú<sup>n</sup> nduu táhú Yá Ndióxi ní dáquèe ìn ñaha ndàhú ñaha quèé*  
(Lc. 21:1-4)

<sup>41</sup> Te núcóo Jèsús xití veñúhu yatni núú ndécú alcanciá te ndèhe-gá xidáquèe ñâyü dihú<sup>n</sup> xití alcanciá-án, te tnàhá cue ñâyü cuica xidáquèe-yu vai dihú<sup>n</sup>. <sup>42</sup> Te ní quexio ìn ñaha ndahú ñaha quèé, te ndèhe-gá ní dáquèe-a<sup>n</sup> úú tnàhá dihú<sup>n</sup> còbrí xití alcanciá, te dihú<sup>n</sup>-án ío sacú yáhu-xi. <sup>43</sup> Te Jèsús ní cana-gá cue téé xica cuu ndihí-gá, te ní xàha<sup>n</sup>-gá xii-güedé:

—Na càchí tnúhu ndáá-í xii-ndo sá ñaha ndahú ñaha quèé-a ío-gá nándihí dihú<sup>n</sup> ní dáquèe-a<sup>n</sup> xití alcanciá dàcúúxí dihú<sup>n</sup> ní dáquèe dáva-gá-yu. <sup>44</sup> Chi nchaa ñâyü-án ní dáquèe-yu mee-ná dihú<sup>n</sup> sá ní quendóo-ná, dico ñaha quèé-a cuèí ndàhú-a<sup>n</sup> dico ní dáquèe-a<sup>n</sup> nihí dihú<sup>n</sup> sá cuáá<sup>n</sup> sá caxí-án ní cùu —cachí-gá xàha<sup>n</sup>-gá xii-güedé.

### 13

*Jèsús càchí-gá sá ngóyo veñúhu*  
(Mt. 24:1-2; Lc. 21:5-6)

<sup>1</sup> Te òrè ní ndee Jèsús xití veñúhu càhnu sá ío cúnuu, te ìn téé xica cuu ndihí-gá ní xàha<sup>n</sup>-dè xii-gá:

—jMèstrú, cundehe ná ío vii ní sáá veñúhu-a<sup>n</sup> ndihí nchaa vehe nèhe tnaha ndihí-xi, te ío vii ndáa nchaa yúú yíhí! —càchí-dé xàha<sup>n</sup>-dè xii-gá.

<sup>2</sup> Te Jèsús ní xàha<sup>n</sup>-gá xii-dé:

—Nchaa nàcuáa càa nchaa vehe sá cúnúhu-n-a vitna sáá nduu te vá cúnúu-gá-xi dàtná cáá-xí vitna, chí ní ìn-gá yúú vá códo nchìhi tnaha-xi, chí ndihí ngoyo —cachí-gá xàha<sup>n</sup>-gá xii-dé.

*Nàcuáa cada-xi nduu ta cüyatni naa ñuyú*  
(Mt. 24:3-28; Lc. 21:7-24; 17:22-24)

<sup>3</sup> Te Jèsús ní xica-gá ndihí cue téé xica cuu ndihí-gá cuáhá<sup>n</sup> ndihí ñaha-gá xii-güedé yucu nàni Olívú, te yucu Olívú-án tũu ndáá núú cáá veñúhu càhnu sá ío cúnuu. Te Jèsús ní quexio-gá ndihí-güedé yucu Olívú-án, te xiá<sup>n</sup> ní ngóo-gá te núú núcóo-gá-án ní sáhá<sup>n</sup> té Pèlú ndihí té Jacobó ndihí té Juáa ndihí té Ndríxi, te dayuhu ní xàha<sup>n</sup>-güedé xii-gá:

<sup>4</sup> —Cuini-ndí cachí tnúhu-n ná nduu dúca<sup>n</sup> cada-xi ngoyo veñúhu càhnu sá ío cúnuu, àdi nándi cùu sá cádá-xí cuèndá cutnùni

iní-ndí sá ta cüyatni nduu duca<sup>n</sup> cada-xi —cachí-güedé xàha<sup>n</sup>-güedé xii-gá.

<sup>5</sup> Te Jèsús ní xàha<sup>n</sup>-gá xii-güedé:

—Ío quíhi iní-ndó cùndecu-ndo cuèndá sá vá yóo dándahú ñáhá xii-ndo. <sup>6</sup> Chi ío cuèhé cue téé coo ñuyú te danàni-güedé méé-güedé dàtná nàni-í, te cachí-güedé: “Yúhú cùú-í Crístú Yáá ní tendaha Yá Ndióxi véxi ñuyú-a”, duha cachí-güedé. Te sá dúcá<sup>n</sup> càhá<sup>n</sup>-güedé te ío vai ñâyü dándahú-güedé.

<sup>7</sup> Te òrè ná nihí-ndó tnúhu sá nàá-güedé ndèni ní cuu, te vá yùhú-ndó chí dacuítí sá dúcá<sup>n</sup> càda-xi, dico vátá sáá-gá nduu nàa ñuyú òrè duca<sup>n</sup> càda-xi. <sup>8</sup> Chi cue téé ìn nàció<sup>n</sup> nàá-güedé ndihí cue téé ingá nàció<sup>n</sup>, te titní ñuu ngúta-güedé nàá-güedé, te titní xichí ñuyú níhi víhi tnáa, te titní tucu xichí ñuyú coo tnamá, te ío-gá cuèhé sá yáha ñâyü. Te nchaa sá dúcá<sup>n</sup> càda-xi-án cùú-xí tnúndòho sá vitná váha váha quèsaha-xi sácúú-xí cuè ñâyü ndècu ñuyú-a.

<sup>9</sup> Dico nchòhó ío quíhi iní-ndó cùndecu-ndo, chí nchaa ñâyü na cùu úhú iní ñáhá xii-ndo cuáha cuèndá ñáhá-yu xii dáva-ndo núú cue téé cùchiu<sup>n</sup>, te candeca ñaha-güedé xii-ndo quíhí<sup>n</sup> xití veñúhu-güedé, te yàcá<sup>n</sup> caniha-güedé xii-ndo. Te quíhí<sup>n</sup>-ndó núú cuè téé yíndaha nàció<sup>n</sup> àdi núú dáva-gá cue téé cúnuu sá cuèndá-í, te nchòhó nihí-ndó nàcuáa cada-ndo càhá<sup>n</sup> váha-ndo cuèndá-í núú-güedé. <sup>10</sup> Te cùmání-gá sáá nduu nàa ñuyú-a te sa cutènuu tnúhu-í ní càa xico ñuyú-a, te tnúhu-án càhá<sup>n</sup>-xi nàcuáa naníhí táhú ñâyü. <sup>11</sup> Te òrè ná càndeca ñaha ñâyü xii-ndo quíhí<sup>n</sup> núú cuè téé cùchiu<sup>n</sup> cuáha cuèndá ñáhá-yu, te òrè vátá sáá-gá-ndó núú-güedé te vá caní iní-ndó núú nása cunduu tnúhu cùñaha-ndo xii-güedé. Chí òrè-ná te Yá Ndióxi dacàhu iní ñáhá-gá xii-ndo nása cunduu tnúhu cùñaha-ndo xii-güedé, te diu-ni tnúhu sá dacàhu iní ñáhá-gá-án cùñaha-ndo xii-güedé. Te ñá díú méè-ndo càhá<sup>n</sup>-ndó chí Espiritú Yá Ndióxi càhá<sup>n</sup>-xi yuhu-ndo. <sup>12</sup> Te dáva cue téé cuáha cuèndá-güedé ñaní-güedé núú cuè téé cùchiu<sup>n</sup> cuèndá cahní ñaha-güedé. Te dáva cue téé cùu tátá diu-ni duca<sup>n</sup> càda-güedé cuáha cuèndá-güedé déhe-güedé núú cuè téé cùchiu<sup>n</sup>. Te dáva cue téé cùu déhe cuu úhú iní-güedé tátá-güedé ndihí náná-güedé, te cuáha cuèndá ñáhá-güedé xii-yu núú cuè téé cùchiu<sup>n</sup> cuèndá cahní ñaha-güedé xii-yu. <sup>13</sup> Te ío cuèhé ñâyü cuu úhú iní ñáhá-yu xii-ndo sá cuèndá-í, dico nchaa nchòhó ñâyü na càda ndee-ni iní nchacú<sup>n</sup> nihnu ñaha-ni xii-í te naníhí táhú-ndó.

<sup>14</sup> Te ndí Dániél téé ní xóo càhá<sup>n</sup> tnúhu Yá Ndióxi ndéé sanaha ní chidó tnùni ndí núú tutú ndí cuèndá ìn sá dáquèe tìhú Yá Ndióxi cundece ìn xichí núú ñá

túú tàú-xi cundecu-xi, te xíá<sup>n</sup> cada-xi sá vâ cündècu-gá ni ìí<sup>n</sup> ñáiyu xíá<sup>n</sup>. Te cada cuèndá váha-ndo nâcuáa ní cáhá<sup>n</sup> ndíí, chí nduu na quíní-ndó xíá<sup>n</sup> cundecu-xi ìí<sup>n</sup> xichi núú ñâ túú tàú-xi cundecu-xi, te dâvâ-á<sup>n</sup> nchaa ñáiyu xíndecu distritú Jùdeá xíní ñùhu-xi cunú-yu quíhí<sup>n</sup>-yu xítí yucu. <sup>15</sup> Te nchaa ñáiyu ndáa ndódó díquí véhé-xí vâ ndíhu-gá-yu vehé-yu quehé<sup>n</sup>-yu ìí<sup>n</sup> ndachíú<sup>n</sup>-yu canehé-yu quíhí<sup>n</sup>. <sup>16</sup> Te nchaa ñáiyu cuáhá<sup>n</sup> yucu ni vâ ñùhú-gá-yu vehé-yu cúnúquehé<sup>n</sup>-yu dóó-yu. <sup>17</sup> Te ndàhú ní cuu nchaa ñáiyu díhí ñùhú dèhe-xi, ndíhi cue ñáiyu díhí xíndeca déhe vitna sàdi na saá nduu dùca<sup>n</sup> cada-xi! <sup>18</sup> Te nchòhó ío chí cacá<sup>n</sup> táhú núú Yá Ndióxi cuèndá sá vâ dúcá<sup>n</sup> ndòho-ndo yóo quidé víxi<sup>n</sup>-xi. <sup>19</sup> Chí dâvâ-á<sup>n</sup> coo tnúndòho cahnu vihi ñuyúú, te vátá ìí<sup>n</sup> ndúu-gá coo tnúndòho cahnu vihi-á<sup>n</sup> ndéé cútñàhá ní cadúha Yá Ndióxi ñuyúú, chí diu-ní dâvâ-á<sup>n</sup> coo tnúndòho cahnu vihi-á<sup>n</sup>, te ni núú cuáhá<sup>n</sup> núú véxi vâ cóó-gá tnúndòho-á<sup>n</sup>. <sup>20</sup> Te Yá Ndióxi cächí-gá sá vâ ío vai nduu coo tnúndòho cahnu vihi-á<sup>n</sup> ñuyúú sá cuèndá nchaa ñáiyu ní cáhá<sup>n</sup>-gá cundecu ndíhi-gá. Te núú vai nduu na coo tnúndòho-á<sup>n</sup>, te vâ yóo cácu ñihnu.

<sup>21</sup> Te dâvâ-á<sup>n</sup> cùñaha ñáiyu xii-ndo: “Chí cündèhe iha, chí iha ní quexio Cristú Yáa ní tendaha Yá Ndióxi véxi ñuyúú-a”, duha cùñàhá-yu xii-ndo. Ádi quesahá-yu: “Chí cündèhe yacá<sup>n</sup> chí yacá<sup>n</sup> ndécú-gá”, quesahá-yu. Te vâ quíndáá iní-ndó tnúhu cáhá<sup>n</sup>-yu. <sup>22</sup> Te coo cue tée danani-güedé mée-güedé dàtná nani-í te cachí-güedé sá cúú-güedé Yáa ní tendaha Yá Ndióxi véxi ñuyúú-a. Te dâvâ-güedé cachí-güedé sá cúú-güedé cue tée cáhá<sup>n</sup> tnúhu Yá Ndióxi dico ñâ ndáa sá cúú-güedé cue tée cáhá<sup>n</sup> tnúhu-gá, te cada-güedé tíni núú sá vâ yóo tnàhí ndàcu cada cuèndá dandàhú-güedé ñáiyu, te caní iní-güedé dandàhú-güedé ndéé cue ñáiyu ní cáhá<sup>n</sup> Yá Ndióxi cundecu ndíhi-gá. <sup>23</sup> Te vitna ío váha cuáhà-ndo cuèndá, te quíhi iní-ndó cündecu-ndo, chí nchaa sa ní dátúha ñaha-í xii-ndo.

*Nâcuáa cada-xi òré quixi tucu Tée cùu ñani tnàhá nchaa ñáiyu*  
(Mt. 24:29-35, 42-44; Lc. 21:25-36)

<sup>24</sup> Te nâ yáha-ní coo tnúndòho cahnu vihi-á<sup>n</sup>, te vâ dáyèhé-gá nchícanhí te ní vâ dáyèhé-gá yóo. <sup>25</sup> Te ngoyu nchaa chódíni ndéé andíu, te quídí-xi andíu. <sup>26</sup> Te dâvâ-á<sup>n</sup> quíní ñàhá nchaa ñáiyu xii yúhú Tée cùu ñani tnàhá-yu nchaa-yu quee-í andíu quixi-í ichi xítí vícò, te quíní-yu sá ío càhnu cuu-í, te quíde-í nchaa sá váha. <sup>27</sup> Te tendaha-í

cue espíritú xínú cuèchi núú-í quíhí<sup>n</sup>-xi nâ-datàcá-xi nchaa ñáiyu ní cáhá<sup>n</sup>-í chítñahá ñàhá xí-í xíndecu ní càa xico ñuyúú.

<sup>28</sup> Te cundehe-ndo nâcuáa quíde yutnu ngúxi, chí yutnu-á<sup>n</sup> ndúú yúte núú díte-xi te nàtahú ndaha-xi, te òré duca<sup>n</sup> quíde-xi te cächí-ndó sá sá ní cuyatni nuu cahni. <sup>29</sup> Te duca<sup>n</sup> sàtnahá-xi cada-xi òré ná quíní-ndó càda-xi nchaa nâcuáa ní cáhá<sup>n</sup>-í, te cutnúní iní-ndó sá sá ní cuyatni víi-nâ nduu nâa ñuyúú. <sup>30</sup> Te na cächí tnúhu ndáá-í xii-ndo sá òré vátá cúú-gá cue ñáiyu xíndecu ñuyúú-a vitna, te cada-xi nchaa nâcuáa ní cáhá<sup>n</sup>-í. <sup>31</sup> Te andíu ndíhi ñuyúú-a chí ndíhi ñihnu-xi, dico tnúhu-í chí vâ ndíhí ñihnu-xi chí cùu-xi tnúhu ndáa.

<sup>32</sup> Dico ñâ túú cùtnuní ná nduu quíxi tucu-í, te ní ñâ túú cùtnuní ná òré chí vâ yóo xíní, te ní cue espíritú xínú cuèchi núú Yá Ndióxi ñâ túú xíní-xi ná nduu quíxi-í, te ní mée yúhú tée cùu Déhe Dútú Ndióxi ñâ túú xíní-í ná nduu quíxi tucu-í, chí ìí<sup>n</sup> díí-ní mee Tàtâ-í Dútú Ndióxi xíní-gá núu ná nduu quíxi-í.

<sup>33</sup> Te nchòhó xíní ñùhu-xi sá ío quíhi iní-ndó cündecu-ndo, te cáhá<sup>n</sup> ndíhi-ndo Yá Ndióxi, chí ñâ túú xíní-ndó ná nduu quíxi tucu-í. <sup>34</sup> Te na cächí tnúhu-í xii-ndo cuèndá ìí<sup>n</sup> tée cùni quíngaca cuu xica. Te tée-á<sup>n</sup> cùmání-gá quee-dé vehe-dé te ní xáha<sup>n</sup>-dè xii cue tée xine cuèchi núú-dè sá ná cáda cuèndá-güedé vehe-dé. Te ní sáñaha-dè xii-güedé ndí díí<sup>n</sup> núú-güedé chùu<sup>n</sup> cada-güedé. Te ní xáha<sup>n</sup>-dè xii tée ndéé yuyèhe sá ná cündecu túha-ní-dé yuyèhe ndéé nàsáá-dé. <sup>35</sup> Te duha ndúu tnúhu cáhá<sup>n</sup>-í cuèndá nchòhó cundecu túha-ndo, chí ñâ túú xíní-ndó ná nduu te ní ñâ túú xíní-ndó ná òré quíxi tucu yúhú Yáa cúú Xítòhó-ndó, núú òré sa ní cundiquí<sup>n</sup>, àdi dâvâ níú, àdi òré sa ní cana uu<sup>n</sup> líhi, àdi òré sa ta cùdítò cuáhá<sup>n</sup>, núú xíá<sup>n</sup> ío chí cündècu túha. <sup>36</sup> Te duha cáhá<sup>n</sup>-í chí na cuáhá<sup>n</sup> òré ñâ túú ná yíhí iní-ndó quèxio-í, te ñâ túú ndècu túha-ndo. <sup>37</sup> Te dàtná-ní xáha<sup>n</sup>-í xii nchòhó sá cündècu túha-ndo, te diu-ní duca<sup>n</sup> xáha<sup>n</sup>-í xii nchaa dâvâ-gá ñáiyu sá cündècu túha-yu —cächí-gá xáha<sup>n</sup>-gá xii-güedé.

## 14

*Ndúcu-güedé nâcuáa cada-güedé cahni-güedé Jèsús*  
(Mt. 26:1-5; Lc. 22:1-2; Jn. 11:45-53)

<sup>1</sup> Te cùmání úú-gá nduu te quesaha vícò pascuá, vícò xèxi ñáiyu pàá sá ñâ túú yíhi levadurá. Te cue dútú cùnúu, ndíhi cue tée dàcuaha ñaha xii ñáiyu nchaa tnúhu ní chídó tnúní ndí Moisés ndúcú-güedé nâcuáa cada-güedé dandàhú-güedé Jèsús cuèndá tñii ñaha-güedé xii-gá te cahni ñaha-güedé. <sup>2</sup> Te ní xítñaha-güedé:

—Váha-gá sá vá tñí-ó Jèsús mei ndúu vico, chí núu duca-n na càda-o te ío dusa<sup>n</sup> càda ñáyiú —càchí-güedé xitnàha-güedé.

*È<sup>n</sup> ñadìhí chùhí-á<sup>n</sup> àcítí díqui Jèsús  
(Mt. 26:6-13; Jn. 12:1-8)*

<sup>3</sup> Te Jèsús ndécú-gá ñúu Bètaniá vehe ì<sup>n</sup> tée nàni Xímú, tée ní tnàhá cuéhé sá dátèhyú nihnu-xi yiqui cuñú-ó. Te yìhi Jèsús mesá xéxi-gá ní quexío ì<sup>n</sup> ñadìhí néhé-á<sup>n</sup> ì<sup>n</sup> sá ní cuáha yúú váha yúú nání àlabastrú, te xití xíá<sup>n</sup> ñúhú àcítí sàhá<sup>n</sup> tnámí sá nání nãrdú sá ío ndèyáhu, te ní tãhú-á<sup>n</sup> xíá<sup>n</sup> te acítí ñúhú xití-xi-á<sup>n</sup> ní sódo-a<sup>n</sup> díqui Jèsús. <sup>4</sup> Te ì<sup>n</sup> úú cue tée xindecu-á<sup>n</sup> ní cudéé<sup>n</sup>-güedé sá dúcá<sup>n</sup> ní quide-a<sup>n</sup>, te ní xitnàha-güedé:

—Ná túú quide váha ñaha-á<sup>n</sup> dàcá<sup>n</sup> quidé-á<sup>n</sup>, chí íí ní dácúita-a<sup>n</sup> acítí váha-á<sup>n</sup>. <sup>5</sup> Chí váha-gá núu cuyáhu acítí-á<sup>n</sup> sá úní cièndú díhú<sup>n</sup> denàriú, te díhú<sup>n</sup> sá cùyáhu acítí-á<sup>n</sup> cuu cuèndá ñáyiú ndàhú ní cùu —càchí-güedé xitnàha-güedé.

Te ní tenáá-güedé ñaha-á<sup>n</sup> sá dúcá<sup>n</sup> ní quide-a<sup>n</sup>.

<sup>6</sup> Te Jèsús ní xáha<sup>n</sup>-gá xii-güedé:

—Chí dáñá, vá dásàtú-ndó ínì ñadìhí-a, chí sá ní quide ñaha-a<sup>n</sup> xii-í cùú-xí ì<sup>n</sup> sá váha. <sup>7</sup> Chí cue ñáyiú ndàhú duca<sup>n</sup>-ní cùtnahá ñáyiú-á<sup>n</sup> tnuú-ndó, te nání òré càchí ínì-ndó te chindee-ndó-yu. Dico yúhú chí vá ncháá ndúu cundecu ndìhi ñaha-í xii-ndo ñuyúú-a.

<sup>8</sup> Te ñadìhí-a ní quide-a<sup>n</sup> ì<sup>n</sup> sá váha ndéè není ní ndacu-a<sup>n</sup>, chí sá dúhá ní quide ñaha-a<sup>n</sup> xii-í ní chíhi ñaha-a<sup>n</sup> àcítí, te xíá<sup>n</sup> cada ínì-ndó sá sá quide túha-a<sup>n</sup> yiqui cuñú-í cuèndá quíndúxi-xi. <sup>9</sup> Te na càchí tnúhu ndáá-í xii-ndo sá ndèni ní cuu nihíi ñuyúú ná càhá<sup>n</sup> ñáyiú tnúhu-í, te càhá<sup>n</sup>-yu tnàhá cuèndá ñadìhí-a cuèndá quini nchaa ñáyiú nàcuáa ní quide-a<sup>n</sup>, te duca<sup>n</sup> vá nàcuánaa-yu —càchí-gá xáha<sup>n</sup>-gá xii-güedé.

*Té Jüdás ndúcú-dé nàcuáa cada-dé cuáha cuèndá-dé Jèsús núú cuè tée cùu úhú ínì ñáhá xii-gá*

*(Mt. 26:14-16; Lc. 22:3-6)*

<sup>10</sup> Te té Jüdás Iscarioté ní sáhá<sup>n</sup>-dé ní ndatnúhu-dé ndìhi cue tée cùu dútú cùmúu sá cuáha cuèndá-dé Jèsús núú-güedé, te núú tnàhá té Jüdás-á<sup>n</sup> cùú úxúú tnàhá cue tée xica cuu ndìhi-gá ní cùu. <sup>11</sup> Te òré duca<sup>n</sup> ní ndatnúhu-dé ndìhi-güedé, te ío ní cudíí ínì-güedé, te ní xáha<sup>n</sup>-güedé xii-dé sá cuáñaha-güedé díhú<sup>n</sup> xii-dé. Te té Jüdás-á<sup>n</sup> ní ngúíta-dé ndúcú-dé nàcuáa cada-dé cuáha cuèndá-dé Jèsús núú-güedé.

*Cùdini Jèsús ndìhi cue tée xica cuu ndìhi-gá  
(Mt. 26:17-29; Lc. 22:7-23; Jn. 13:21-30;*

*1 Co. 11:23-26)*

<sup>12</sup> Te ní sáá nduu ní quesaha vico pascuá, vico ñá túú xéxi ñáyiú pãá sá ñá túú

yìhi levadurá, te diu-ni nduu-á<sup>n</sup> sáhní-güedé ì<sup>n</sup> mbéé líhli xéxi-yu nduu vico pascuá-á<sup>n</sup>. Te cue tée xica cuu ndìhi Jèsús ní xicá<sup>n</sup> tnúhú-güedé núú-gá, te xáha<sup>n</sup>-güedé xii-gá:

—Mèstrú, véxi-ndí xicá<sup>n</sup> tnúhú-ndí núú-n núu ndéè cáá véhe cuini<sup>n</sup> càda túha-ndí sá cùdini-o sacuaa nduu vico pascuá —càchí-güedé xáha<sup>n</sup>-güedé xii-gá.

<sup>13</sup> Te Jèsús ní xáha<sup>n</sup>-gá xii úú-ni tnàhá cue tée xica cuu ndìhi-gá:

—Chí cuáhá<sup>n</sup> xití ñúu-á<sup>n</sup>, te yàcá<sup>n</sup> naníhí-ndó ì<sup>n</sup> tée tãnehe yóó ndute, te tée-á<sup>n</sup> cándèndaha-ndo-dé quíhí<sup>n</sup>. <sup>14</sup> Te núu ndèdacàa vehe na ndìhu-dé te xíá<sup>n</sup> quíhu-ndo. Te cùñaha-ndo xii xitohó vehe-á<sup>n</sup>: “Yáá cùú Mèstrú càchí-gá sá núu ndèdacàa xichi xití vehe-n cuáñaha nùu-n xii-gá cudini-gá ndìhi cue tée xica cuu ndìhi-gá sacuaa nduu pascuá”, duha cùñaha-ndo.

<sup>15</sup> Te dàtnúni danéhé ñáhá-dé xii-ndo ì<sup>n</sup> cuartú cáhnú càa núú ñínu, chí vehe yòdo tnaha cuu-xi, te sa ní quide túha-dé nchaa sá nãndìhi, te nchòhó dicó-nã comidá cada túha-ndo cùdini-o —càchí-gá xáha<sup>n</sup>-gá xii-güedé.

<sup>16</sup> Te cue tée-á<sup>n</sup> ní xica-güedé cuáhá<sup>n</sup>-güedé xití ñúu-á<sup>n</sup>, te nchaa-ni nàcuáa ní xáha<sup>n</sup> Jèsús ní cuu. Te ní quide túha-güedé sá cùdini-güedé ndìhi-gá sacuaa nduu vico pascuá-á<sup>n</sup>.

<sup>17</sup> Te sátá ní cundiquí<sup>n</sup> te ní quexío Jèsús ndìhi ndi úxúú cue tée xica cuu ndìhi-gá. <sup>18</sup> Te cuánguihu-gá mesá ndìhi-güedé cuèndá cudini ndìhi ñaha-gá xii-güedé, te òré yìhi-gá mesá ndìhi-güedé, te xáha<sup>n</sup>-gá xii-güedé:

—Na càchí tnúhu ndáá-í xii-ndo sá ì<sup>n</sup> nchohó cue tée xéxi ndìhi ñaha xii-í cuáha cuèndá ñáhá-ndó núú cuè tée cùu úhú ínì ñáhá xii-í —càchí-gá xáha<sup>n</sup>-gá xii-güedé.

<sup>19</sup> Te sá dúcá<sup>n</sup> ní xáha<sup>n</sup>-gá xii-güedé, te nchaa-güedé ní ngúíta-güedé cùndiyí-güedé. Te da ì<sup>n</sup> da ì<sup>n</sup>-güedé ní ngúíta-güedé xicá<sup>n</sup> tnúhú-güedé núú-gá, te xáha<sup>n</sup>-güedé xii-gá:

—¿Ñá díú yúhú duca<sup>n</sup> sàni ínì-n càda-í-u? —càchí-güedé xáha<sup>n</sup>-güedé xii-gá.

<sup>20</sup> Te Jèsús ní xáha<sup>n</sup>-gá xii-güedé:

—Diu-ni ì<sup>n</sup> nchòhó cue tée úxúú xicá cùu ndìhi-í, tée na dàquèndaha còhó òré dàquèndaha-í, tée-á<sup>n</sup> cuáha cuèndá ñáhá-dé xii-í núú cuè tée cùu úhú ínì ñáhá. <sup>21</sup> Te yúhú Tée cùu ñani tnàhá-ndó ncháa-ndo ñúhu ichi-í cuáhá<sup>n</sup>-í ndoho-í nàcuáa càhá<sup>n</sup>-xi núú tütú Yá Ndiòxí. Dico ndàhú ní cuu tée duca<sup>n</sup> na cuáha cuèndá ñáhá xii-í núú cuè tée cùu úhú ínì ñáhá, chí váha-gá sá vá cacú tée-á<sup>n</sup> cundecu-dé ní cùu, te ñá díú sá ní cacu-dé te duca<sup>n</sup> càda-dé —càchí-gá xáha<sup>n</sup>-gá xii-güedé.

<sup>22</sup> Te nini cùdini cue tée xica cuu ndìhi Jèsús ní quehe<sup>n</sup>-gá pãá, te ní ndacá<sup>n</sup> tãhú-gá núú

Yá Ndiöxí, te dätñuní ní tǎhú cuèchi-gá, te ní ngúita-gá dácǎñhu ñaha-gá xii-güedé, te xáha<sup>n</sup>-gá:

–Chí quéhé<sup>n</sup> pàá-a caxi-ndo, te cada iní-ndó sǎ cúu-xí dátǎná yiqui cǎñú-í – cǎchí-gá xáha<sup>n</sup>-gá xii-güedé.

<sup>23</sup> Te ní quehe<sup>n</sup>-gá vǎsú ñúhú ndúdí ndéhé yoho yáha stilé, te ní ndacá<sup>n</sup> tǎhú-gǎ núú Yá Ndiöxí, te dätñuní ní ngúita-gá sǎñaha-gá xii-güedé cuendá coho-güedé luha luha sǎ ñúhú xití-xi, te nchaa-güedé ní xihí. <sup>24</sup> Te ní xáha<sup>n</sup>-gá xii-güedé:

–Ndudí ndéhé yoho yáha stilé-a cada iní-ndó sǎ cúu-xí dátǎná ñíñí-í sǎ cǎtí òré cahni ñaha-güedé xii-í. Te sǎ dúcá<sup>n</sup> cǎtí ñíñí-í xǎñ cutñuní ndáá sǎ Yá Ndiöxí cada-gǎ ingá núú sǎ vǎha sǎ cúu-xí vǎi ñǎyiu dátǎná ní cǎchí-gá cada-gǎ. <sup>25</sup> Te na cǎchí tñúhu ndáá-í xii-ndo sǎ vítǎná-na duha xihí-í ndudí ndéhé yoho yáha stilé-a te vǎ cohó-gǎ-í, dico na sǎá nduu cündecu-í núú ndécú Yá Ndiöxí táxí tñuní-gǎ, te dǎvá-á<sup>n</sup> cada iní-í sǎ dátǎná sǎ cohó tucu-í chí ío cudǎí iní-í –cǎchí-gá xáha<sup>n</sup>-gá xii-güedé.

*Jesús cǎhá<sup>n</sup>-gǎ sǎ té Pèlú cǎñaha-dě xii ñǎyiu sǎ ñà túú xini ñáhà-dě xii-gǎ*

(Mt. 26:30-35; Lc. 22:31-34; Jn. 13:36-38)

<sup>26</sup> Te Jesús ní xita-gǎ ñ<sup>n</sup> ndudú ndihí cue téé xica cuu ndihí-gǎ, te dätñuní ní xica-gǎ cuahá<sup>n</sup>-gǎ ndihí-güedé yucu Ólívú. <sup>27</sup> Te yacá<sup>n</sup> ní xáha<sup>n</sup>-gǎ xii-güedé:

–Na cǎchí tñúhu-í xii-ndo sǎ nchǎá-ndó dǎña nihnu ñaha-ndo xii-í niú vitna, chí queue ndáá-xi nǎcuáa cǎhá<sup>n</sup>-xi núú tütú Yá Ndiöxí núú cǎchí-xi: “Yúhú cuáha-í tñúhu cahni-güedé téé cùu toli, te nchaa mbéé-dě ndihí-güedé cuténuu”, duha cǎchí-xi núú tütú-gǎ. <sup>28</sup> Dico na cùu-í te ndoto-í te codonúu-í núú-ndó quíh<sup>n</sup> distritú Galiléa – cǎchí-gá xáha<sup>n</sup>-gǎ xii-güedé.

<sup>29</sup> Te té Pèlú ní xáha<sup>n</sup>-dě xii-gǎ:

–Te cuéi nchaa-güedé ná dándóo ñaha-güedé xii-n, dico yúhú chí vǎ dándóo ñaha-í xii-n –cǎchí-dé xáha<sup>n</sup>-dě xii-gǎ.

<sup>30</sup> Te Jesús ní xáha<sup>n</sup>-gǎ xii-dé:

–Na cǎchí tñúhu ndáá-í xii-n sǎ niú vitna cǎmání-gǎ cana líhi úú xito, te úní xito cǎhá<sup>n</sup>-n núú ñǎyiu sǎ ñà túú xini ñáhà-n xii-í –cǎchí-gá xáha<sup>n</sup>-gǎ xii-dé.

<sup>31</sup> Dico té Pèlú ní cǎhá<sup>n</sup> ñíí-dé, te xáha<sup>n</sup>-dě xii-gǎ:

–Cuéi na cùu ndihí ñaha-í xii-n dico vǎ cǎhá<sup>n</sup>-í núú ñǎyiu sǎ ñà túú xini ñáhà-í xii-n –cǎchí-dé xáha<sup>n</sup>-dě xii-gǎ.

Te nchaa dava-gǎ cue téé xica cuu ndihí-gǎ díu-ni duca<sup>n</sup> ní xáha<sup>n</sup>-güedé xii-gǎ.

*Jesús cǎhá<sup>n</sup> ndihí-gǎ Yá Ndiöxí ñ<sup>n</sup> xichi núú nání Gětsemani*

(Mt. 26:36-46; Lc. 22:39-46)

<sup>32</sup> Te Jesús cuahá<sup>n</sup>-gǎ ndihí cue téé xica cuu ndihí-gǎ ñ<sup>n</sup> xichi núú nání Gětsemani. Te òré ní quexiö-gǎ ndihí-güedé xǎñ, te ní xáha<sup>n</sup>-gǎ xii-güedé:

–Chí cúnucóo iha cundetú-ndo na quíhí<sup>n</sup>-í yacá<sup>n</sup> cǎhá<sup>n</sup> ndihí-í Yá Ndiöxí –cǎchí-gá xáha<sup>n</sup>-gǎ xii-güedé.

<sup>33</sup> Te ndéca-gǎ té Pèlú, ndihí té Jacobó, ndihí té Juáá cuahá<sup>n</sup>, te ñá túú tñáhí-gǎ cúu vǎha iní-gǎ te ní ngúita-xi sùúni ndihú iní-gǎ.

<sup>34</sup> Te ní xáha<sup>n</sup>-gǎ xii cue téé úní-á<sup>n</sup>:

–Súúni ndihú iní-í dátǎná sǎ cúu-í, te chí quéndóo iha te vǎ cùdú-ndó –cǎchí-gá xáha<sup>n</sup>-gǎ xii-güedé.

<sup>35</sup> Te sa ññunhí luha ní xica ndehe Jesús núú ndécú-güedé, te ní ngáundayi-gǎ ndéé ñuhu cǎhá<sup>n</sup> ndihí-gǎ Tǎtá-gǎ Dútú Ndiöxí sǎ núu vǎ cündée iní-gǎ taunihnu ñaha-gǎ xii-gǎ cuendá nchaa nǎcuáa yáha-gǎ. <sup>36</sup> Te òré cǎhá<sup>n</sup> ndihí Jesús Tǎtá-gǎ Dútú Ndiöxí, te xáha<sup>n</sup>-gǎ:

–Yòhó tǎtá mée-í, nchaandi tǎhú sǎ vǎha ndacu-n quide-n, te cǎhá<sup>n</sup> ndáhú-í núu-n núu vǎ cündée iní-n taunihnu ñaha-n xii-í cuendá sǎ vǎ ndóhò-í ná sǎá òré, dico na cǎdá-n nǎcuáa cǎchí iní mée-í chí cada-n nǎcuáa cǎchí mee-n –cǎchí-gá xáha<sup>n</sup>-gǎ xii Tǎtá-gǎ Dútú Ndiöxí.

<sup>37</sup> Te sǎtá ñí yáha ní cǎhá<sup>n</sup> ndihí-gǎ Tǎtá-gǎ Dútú Ndiöxí, te cuánuhú-gǎ núú ní dándóo-gǎ cue téé úní-á<sup>n</sup>, te xixídi-güedé òré ní nasáá-gǎ, te ní xáha<sup>n</sup>-gǎ xii té Pèlú:

–Xímú, ¿náa sama xidi-n? ¿Náa ñá cündée tñahí núu-n vǎ cùdú-ni-n cuédicó ñ<sup>n</sup> òré-á<sup>n</sup>? –cǎchí-gá xáha<sup>n</sup>-gǎ xii-dé.

Te ní xáha<sup>n</sup> tucu-gǎ xii-güedé:

<sup>38</sup> –Te chí quéndóo tucu, te cuhu<sup>n</sup> iní-ndó vǎ cùdú-ndó, te cǎhá<sup>n</sup> ndihí-ndo Yá Ndiöxí cuendá sǎ vǎ dácǎhá<sup>n</sup> ñáhá yucu ñávaha xii-ndo cada-ndo sǎ ñà túú tǎu-ndó cada-ndo. Te na cǎchí tñúhu ndáá-í xii-ndo sǎ nchòhó cuini-ndó cada-ndo nchaa nǎcuáa cǎhá<sup>n</sup>-í dicó-ni sǎ ñà túú nihí ndéé-ndó –cǎchí-gá xáha<sup>n</sup>-gǎ xii-güedé.

<sup>39</sup> Te Jesús ní xica tucu-gǎ cuahá<sup>n</sup>-gǎ cǎhá<sup>n</sup> ndihí-gǎ Tǎtá-gǎ Dútú Ndiöxí, te díu-ni nǎcuáa ní xáha<sup>n</sup>-gǎ dífna xáha<sup>n</sup> tucu-gǎ. <sup>40</sup> Te òré ní yáha ní cǎhá<sup>n</sup> ndihí-gǎ Tǎtá-gǎ Dútú Ndiöxí, te cuánuhú tucu-gǎ núú xindecu cue téé úní xicá cùu ndihí-gǎ-á<sup>n</sup>, te xidi-ni tucu-güedé òré ní nasáá-gǎ, te duca<sup>n</sup> ní quide-güedé chí súúni ñúhu saní núu-güedé, te ñá ní nihí-güedé tñúhu cǎñaha-güedé xii-gǎ òré ní nasáá-gǎ. <sup>41</sup> Te ní sáhá<sup>n</sup> tucu-gǎ xito cùu úní ní cǎhá<sup>n</sup> ndihí-gǎ Tǎtá-gǎ Dútú Ndiöxí, te òré ní nasáá tucu-gǎ núú xindecu-güedé, te xáha<sup>n</sup>-gǎ xii-güedé:

–¿Te náa xidi-ni tucu-ndo?, te vitna vǎ cùdú-gǎ-ndó chí sa ní sǎá òré cuáha cuendá ñáhá-güedé xii yúhú Tée cùu ñani tñáhá-ndó nchàa-ndo núú cué téé ndecu ichi cuehé ichi

duha. <sup>42</sup> Te vitna chí ndácõo na quíhí<sup>n</sup>-ó chí sa véxi téé cuáha cuendá ñáhá xii-í núú cuè téé cùu úhú iní ñáhá —càchí-gá xáha<sup>n</sup>-gá xii-güedé.

*Ní tñi-güedé Jèsús ndécá ñaha-güedé xii-gá cuáhá<sup>n</sup>*

(Mt. 26:47-56; Lc. 22:47-53; Jn. 18:2-11)

<sup>43</sup> Te càhá<sup>n</sup> dúcá<sup>n</sup>-ní Jèsús ní quexio té Júdás. Te núú tñáhá téé-á<sup>n</sup> cúú úxúú tñáhá cue téé xica cuu ndíhí-gá. Te ndíhí-dé vai cue téé ní quexio, te dava-güedé xínehe-güedé machití te dava-güedé xínehe-güedé carrutí. Te cue téé-á<sup>n</sup> ní tendaha ñaha cue dútú cúnúu ndíhí cue téé dàcuaha ñaha xii ñáyíu nchaa tñúhu ní chidó tñuní ndú Moisés, ndíhí cue téé cùu sacuéhé núú ñáyíu israhél. <sup>44</sup> Te té Júdás téé cuáha cuendá ñáhá xii Jèsús sa ní xitnúhu-dé cue téé-á<sup>n</sup> nàcuáa cada-dé cuáha cuendá ñáhá-dé xii Jèsús núú-güedé. Te duha ní xáha<sup>n</sup>-dè xii-güedé:

—Cundehe-ndo téé na tøyuhu-í, te téé-á<sup>n</sup> tñi-ndo-dé chí téé-á<sup>n</sup> cúú-dé téé ndéé iní-ndo, te ío quíhí iní-ndó càndeca-ndo-dé quíhí<sup>n</sup> —duha ní xáha<sup>n</sup>-dè xii-güedé.

<sup>45</sup> Te òré ní quexio té Júdás ndíhí cue téé-á<sup>n</sup> núú ndécú Jèsús, te ní xáha<sup>n</sup>-dè xii-gá:

—Mèstrú —càchí-dé xáha<sup>n</sup>-dè xii-gá.

Te ní tøyuhu ñaha-dé. <sup>46</sup> Te nchaa cue téé ndíhí-dé-á<sup>n</sup> ní tñi-güedé Jèsús cuendá can-deca ñaha-güedé xii-gá quíhí<sup>n</sup>. <sup>47</sup> Te ñi<sup>n</sup> cue téé cùndíhí Jèsús ní tava-dé machití-dé, te ní xehndé-ni-dé ñi<sup>n</sup> xio lóho ñi<sup>n</sup> téé xinu cuehí núú dútú cúnúu, te ní quendeé duu<sup>n</sup> lóho téé-á<sup>n</sup>. <sup>48</sup> Te Jèsús ní xáha<sup>n</sup>-gá xii cue téé ní tñi ñaha xii-gá-á<sup>n</sup>:

—Nchòhó, nèhe-ná-ndó machití, nèhe-ná-ndó càrrutí véxi ní tñi ñaha-ndo xii-í, dàtná quidé-ndó ñi<sup>n</sup> ñadúhú quidé ñaha-ndo xii-í. <sup>49</sup> Te nchaa-ni nduu ní xini-ndó ní xindecu-í xití veñúhu càhnu sá ío cúnúu ní xóo danèhé-í ñáyíu, te ñá túú ní tñi ñaha-ndo xii-í. Dico dàcutíí sá dúhá yáha-í cuendá quee ndáá-xi nàcuáa càhá<sup>n</sup>-xi núú tütú Yá Ndióxi —càchí-gá xáha<sup>n</sup>-gá xii-güedé.

<sup>50</sup> Te nchaa cue téé xica cuu ndíhí-gá ní xinu-güedé ní dándõ ñaha-güedé xii-gá.

*Ñi<sup>n</sup> téé cuehí ní xinu-dé*

<sup>51</sup> Te ñi<sup>n</sup> téé cuehí ndëndaha-dé Jèsús cuáhá<sup>n</sup>, te lavichi-dé, ñi<sup>n</sup>-ni dóó yadí yidúcú<sup>n</sup> nuu-dé nihí-dé, te ní tñi ñaha-güedé xii-dé, <sup>52</sup> dico ní ndacu-dé ní quenuñi<sup>n</sup>-dè te ní dándõ-dé dóó yidúcú<sup>n</sup> nuu-dé-á<sup>n</sup> ní xinu-dé.

*Jèsús ndécú-gá jündá*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Te cue téé ní tñi ñaha xii Jèsús ndécá ñaha-güedé xii-gá cuáhá<sup>n</sup> núú téé cùu dútú cúnúu-gá. Te xíá<sup>n</sup> ní tacá nchaa dava-gá cue téé cùu dútú cúnúu, ndíhí cue téé cùu

sacuéhé núú ñáyíu israhél, ndíhí cue téé dàcuaha ñaha xii-yu nchaa tñúhu ní chidó tñuní ndí Moisés cuendá cada-güedé jündá. <sup>54</sup> Te té Pèlú xica xica-ni nchicú<sup>n</sup> ñáhá-dé xii-gá cuáhá<sup>n</sup> ní sáá-dé ndéé quehé vehe núú ndécú téé cùu dútú cúnúu-gá-á<sup>n</sup>, te xíá<sup>n</sup> ní ngóo teté-dé yuhu nùhú ndíhí cue téé cùu poleciá.

<sup>55</sup> Te cue téé cùu dútú cúnúu ndíhí nchaa dava-gá cue téé xindecu jündá ndúcú-güedé ñáyíu dacáa ñi<sup>n</sup> cuehí díquí Jèsús cuendá duca<sup>n</sup> níhí-güedé nàcuáa cada-güedé cahni ñaha-güedé xii-gá, dico ñá túú ní ndacu-güedé. <sup>56</sup> Te cuéí vai ñáyíu dàcaá-yu cuehí díquí-gá dico mee-ni sá ní cahu iní méé-yu ní càhá<sup>n</sup>-yu, chí tucu càhá<sup>n</sup> ñi<sup>n</sup> tucu càhá<sup>n</sup> ñi<sup>n</sup>-yu. <sup>57</sup> Te davá-yu ní ndacuñi<sup>n</sup>-yu te ní nguíta-yu dàcaá-yu ñi<sup>n</sup> cuehí neñúu díquí-gá, te xáhá<sup>n</sup>-yu xii nchaa cue téé cúnúu:

<sup>58</sup> —Nchúhú ní tecú dóho-ndí càchí-dé sá dängöyo-dé veñúhu càhnu sá ío cúnúu sá ní dácáá cuè téé ñuyú-a, te dandáa tucu-dé ingá veñúhu saa, ñi<sup>n</sup>-ni núú cáá tñáhí veñúhu-á<sup>n</sup> te xití úni-ni nduu sa nadaxinu-dé, te vá cúú-gá-xi veñúhu sá ní dácáá cuè téé ñuyú-a, duha càchí-dé ní tecú dóho-ndí —càchí-yu xáhá<sup>n</sup>-yu xii-güedé.

<sup>59</sup> Dico ní dùca<sup>n</sup> ñá túú ní cùu ñi<sup>n</sup>nuú-yu nchaa tñúhu ní càhá<sup>n</sup>-yu.

<sup>60</sup> Te téé cùu dútú cúnúu-gá ní ndacuñi<sup>n</sup>-dé tñúu nchaa ñáyíu, te xáha<sup>n</sup>-dè xii Jèsús:

—¿Ná cuendá duha ndúu tñúhu càhá<sup>n</sup> ñáyíu-a cuendá-n? Te càhá<sup>n</sup> núu nása ndúu tñúhu càhá<sup>n</sup>-n —càchí-dé xáha<sup>n</sup>-dè xii-gá.

<sup>61</sup> Dico Jèsús ñá túú tñáhí ní càhá<sup>n</sup>-gá. Te téé cùu dútú cúnúu-gá-á<sup>n</sup> ní xáha<sup>n</sup> tucu-dé xii-gá:

—Cuñi-í cachí tñúhu-n xii-ndí núu sá díú Cristú Déhe Yá Ndióxi Yáá ní tendaha-gá véxi ñuyú-a cùu-n. Te ñi<sup>n</sup> Yá Ndióxi cúú-gá Yáá quidé càhnu-ndí —càchí-dé xáha<sup>n</sup>-dè xii-gá.

<sup>62</sup> Te Jèsús ní xáha<sup>n</sup>-gá xii-dé:

—Ñi<sup>n</sup> Yáá-á<sup>n</sup> cùu-í, te na càchí tñúhu-í xii-ndó sá sáa nduu te quini-ndó yúhú Téé cùu ñani tñáhá-ndó nchaa-ndo nucucóo-í xio cùha Dútú Ndióxi Yáá ndácú quide nchaandi tñúhú sá vaha. Te davá-á<sup>n</sup> quini ñáhá-ndó xii-í quee-í andíu quixi-í ichi xití vícú —càchí-gá xáha<sup>n</sup>-gá xii-dé.

<sup>63</sup> Te dútú cúnúu-gá-á<sup>n</sup> ní ndátá-dé dóó cání nihnu-dé cuendá sá ñá túú ní tñáhá iní-dé nàcuáa ní càhá<sup>n</sup> Jèsús, te ní xáha<sup>n</sup>-dè xii nchaa cue téé xindecu jündá:

—Ñá túú-gá xini ñúhu-xi cue téé càhá<sup>n</sup> núu ndáá sá ndècuéchi-dé àdi ñá túú ndècuéchi-dé. <sup>64</sup> Chí sa ní xindedóho-o nàcuáa ndúu tñúhu ní càhá<sup>n</sup>-dé ní càhá<sup>n</sup> úhú-dé cuendá Yá Ndióxi, te nchaa-ndo chí càhá<sup>n</sup>

vitna núu nása sàni iní-ndó cùnduu cuendá tée-a —càchí-dé xáha<sup>n</sup>-dê xii-í-güedé.

Te nchaa-güedé ní cachí-güedé sá ná cùu-dé.

<sup>65</sup> Te dava-güedé ní ngüita-güedé ní tíu díí ñáhá-güedé xii-gá, te ní dádáhu-güedé núu-gá, te ní ngüita-güedé cánliha-güedé xii-gá, te xáha<sup>n</sup>-güedé:

—¡Cáhá<sup>n</sup> ná cótó ná cúu tée ní caniha xii-n!  
—cachí-güedé xáha<sup>n</sup>-güedé xii-gá.

Te cue tée cùu poleciá ní cani-güedé núu-gá.

*Té Pèlú càhá<sup>n</sup>-dé núu ñáyiú sá ñà túú xini-dé Jèsús*

(Mt. 26:69-75; Lc. 22:56-62; Jn. 18:15-18, 25-27)

<sup>66</sup> Te ndéé xití vehe càa núu ñnu quide-güedé jündá, chi vehe yòdo tnahá cuu-xi, te té Pèlú núcòo-dé quehé vehe-á<sup>n</sup>. Te ñ<sup>n</sup> xichí xínú cuèchi núu dütú cùnùu-á<sup>n</sup> ní quexio-xi núu núcòo té Pèlú. <sup>67</sup> Te òrè ní xini ñáhá-xí xii-dé núcòo teté-dé yuhu nùhú, te ní xindéhé ñaha váha-xi xii-dé, te xáha<sup>n</sup>-xi:

—Yòhó tnahá-n cùu-n tée xica cuu ndihi Jèsús tée ñuu Nazàrèt —càchí-xi xáha<sup>n</sup>-xi xii-dé.

<sup>68</sup> Te té Pèlú ní xáha<sup>n</sup>-dê xii-xi:

—Yúhú ñà túú xini-í tée-á<sup>n</sup>, te ni ñà túú cùtnuní iní-í nása ndùu tñuhu càhá<sup>n</sup>-n —càchí-dé xáha<sup>n</sup>-dê xii-xi.

Te té Pèlú ní xica-dé cuáhá<sup>n</sup>-dé ndàa nacuaá nchii yuyèhe vehe-á<sup>n</sup>, te ní cana ñ<sup>n</sup> líhi. <sup>69</sup> Te xichí xínú cuèchi-á<sup>n</sup> ní xini ñáhá tucu-xi xii-dé, te xáha<sup>n</sup>-xi xii nchaa ñáyiú xindecu-á<sup>n</sup>:

—Diu tée-á<sup>n</sup> tnahá-dé xicá cùu-dé ndihi tée ndèca-güedé cuánguihu-a —càchí-xi xáha<sup>n</sup>-xi xii-yu.

<sup>70</sup> Dico té Pèlú ñà túú ní ñnuu tucu-dé sá xicá cùu-dé ndihi Jèsús. Te tna tnaa-ni ní cuu sá dúcá<sup>n</sup> ní xáha<sup>n</sup> xichí-á<sup>n</sup> xii-dé, te ní xáha<sup>n</sup> tucu dava cue ñáyiú xindecu-á<sup>n</sup> xii-dé:

—Ndáá sá tnahá-n cùu-n tée xica cuu ndihi tée ndèca-güedé cuánguihu-á<sup>n</sup> chí cùu-n tée distritú Galilea, te càhá<sup>n</sup>-n dàtná càhá<sup>n</sup>-güedé —càchí-yu xáhá<sup>n</sup>-yu xii-dé.

<sup>71</sup> Te té Pèlú ní xáha<sup>n</sup>-dê xii-yu:

—Nchàcuiití Yá Ndiòxí sá yùhú càhá<sup>n</sup> ndáá-í sá ñà túú xini-í tée càcunehé-ndo-á<sup>n</sup> —càchí-dé xáha<sup>n</sup>-dê xii-yu.

<sup>72</sup> Te òrè-ni-á<sup>n</sup> ní cana tucu líhi xito cùu uú, te òrè-á<sup>n</sup> ní ndacu iní té Pèlú nàcuáa ní xáha<sup>n</sup> Jèsús xii-dé sá cùmání-gá cana ñ<sup>n</sup> líhi uú xito te úní xito càhá<sup>n</sup>-dé núu ñáyiú sá ñà túú xini ñáhá-dê xii-gá. Te òrè duca<sup>n</sup> ní ndacu iní-dé nàcuáa ní xáha<sup>n</sup> Jèsús xii-dé, te ní ndáhyú-dé ní ndixi cuèchi iní-dé.

## 15

*Jèsús ndécú-gá núu tē Pilatú*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Te sáta ní túndaá te cue tée cùu dütú cùnùu, ndihi cue tée cùu sacuéhé núu ñáyiú isràél, ndihi cue tée dàcuaha ñaha xii ñáyiú nchaa tñuhu ní chidó tñuní ndii Moisés, ndihi nchaa dava-gá cue tée cùnùu ní xindecu jündá ní nataká-güedé, te ní dácútú-güedé Jèsús te ndèca ñaha-güedé xii-gá cuáhá<sup>n</sup> núu tē Pilatú. <sup>2</sup> Te té Pilatú ní xicá<sup>n</sup> tñuhú-dê núu Jèsús, te xáha<sup>n</sup>-dê xii-gá:

—¿Ndáá sá díú-n cùu-n tée yìndaha ñaha xii ñáyiú isràél-á<sup>n</sup>? —càchí-dé xáha<sup>n</sup>-dê xii-gá.

Te Jèsús ní xáha<sup>n</sup>-gá xii-dé:

—Diu-í yìndaha-í-yu —càchí-gá xáha<sup>n</sup>-gá xii-dé.

<sup>3</sup> Te cue tée cùu dütú cùnùu dacao-güedé vài cuèchi díquí-gá. <sup>4</sup> Te té Pilatú ní xicá<sup>n</sup> tñuhú tucu-dé núu-gá, te xáha<sup>n</sup>-dê xii-gá:

—Cáhá<sup>n</sup>, ná cuendá ñà càhá<sup>n</sup>-n te cundehe ná ndéé duha titní cuèchi dàcaa díquí ñáhá cuè tée-a xii-n —càchí-dé xáha<sup>n</sup>-dê xii-gá.

<sup>5</sup> Dico Jèsús ñà túú tnahí ní càhá<sup>n</sup>-gá te té Pilatú ío ní cuñúhu-dé sá dúcá<sup>n</sup> ñà túú tnahí ní càhá<sup>n</sup>-gá.

*Cue ñáyiú xáhá<sup>n</sup>-yu xii té Pilatú sá càhí-dê Jèsús*

(Mt. 27:15-31; Lc. 23:13-25; Jn. 18:38-19:16)

<sup>6</sup> Te ndi tnahá nduu víco pascuá dácácu té Pilatú ñ<sup>n</sup> tée yíhi vecaá chí duca<sup>n</sup> tnahí quide-dé, te mee ñáyiú càhá<sup>n</sup>-yu te núu ndédacáa tée yíhi vecaá-á<sup>n</sup> cácu-dé, te tée-á<sup>n</sup> dácácu-dé. <sup>7</sup> Te yíhi ñ<sup>n</sup> tée nani Barrabás vecaá ndihi dava-gá cue tée cùndihi-dé. Te té Barrabás-á<sup>n</sup> ní sanu ichi-dé ñáyiú ñuu ingá ichi, te ní ngüita-yu ndihi-dé ní cuu úhú iní-yu cue tée cùchiu<sup>n</sup>, te ní sahní-dé ndíyí núu xiá<sup>n</sup> ní chihí ñaha-güedé vecaá xii-dé. <sup>8</sup> Te nchaa ñáyiú ní sáhá<sup>n</sup>-yu núu tē Pilatú, te càhá<sup>n</sup> ndáhú-yu núu-dé sá ná cáda nàhi-ni-dé dàtná quidé-dé. <sup>9</sup> Te té Pilatú ní xáha<sup>n</sup>-dê xii-yu:

—¿Cuñí-ndó sá dácácu-í tée yìndaha ñaha xii ñáyiú isràél-á<sup>n</sup>? —càchí-dé xáha<sup>n</sup>-dê xii-yu.

<sup>10</sup> Te duca<sup>n</sup> ní càhá<sup>n</sup> té Pilatú, chí ní cutnuni iní-dé sá dicó sá cuèdú iní cuè dütú cùnùu núu xiá<sup>n</sup> duca<sup>n</sup> ní quide-güedé ní sáha cuendá ñáhá-güedé xii Jèsús núu-dé. <sup>11</sup> Te cue dütú cùnùu ní xáha<sup>n</sup>-güedé xii nchaa ñáyiú sá ná cùñáhá-yu xii té Pilatú dácácu-dé té Barrabás, te ní quidé-yu nàcuáa ní xáha<sup>n</sup>-güedé. <sup>12</sup> Te té Pilatú ní xicá<sup>n</sup> tñuhú-dé núu-yu, te xáha<sup>n</sup>-dê xii-yu:

—¿Ná cuini-ndó càda-í tée càchí-ndó yìndaha ñaha xii ñáiyu israhél-i? —càchí-dé xàhá<sup>n</sup>-dè xii-yu.

<sup>13</sup> Te nchaá-yu níhi ní cáhá<sup>n</sup>-yu, te xàhá<sup>n</sup>-yu xii-dé:

—¡Cata caa-dé núú cùrúxí! —càchí-yu xàhá<sup>n</sup>-yu xii-dé.

<sup>14</sup> Te té Pilatú ní xáhá<sup>n</sup>-dè xii-yu:

—¿Te ná cúú cuèchi ní quide-dé te núú duca<sup>n</sup> cuini-ndó càda-í-dé-i? —càchí-dé xàhá<sup>n</sup>-dè xii-yu.

Dico nchaá-yu uu<sup>n</sup>-gá níhi ní cáhá<sup>n</sup>-yu, te xàhá<sup>n</sup>-yu xii-dé:

—¡Cata caa-dé núú cùrúxí! —càchí-yu xàhá<sup>n</sup>-yu xii-dé.

<sup>15</sup> Te té Pilatú ní quide-dé nàcuáa ní xàhá<sup>n</sup>-yu xii-dé cuendá sá cúdiu-dé núú-yu, te ní dácacu-dé té Barrábás, te ní táuchíu<sup>n</sup>-dè ní cani-güedé Jèsús ndihi ñii. Te sáta dúcá<sup>n</sup> ní quide ñaha-güedé xii-gá, te ní táuchíu<sup>n</sup>-dè candeca ñaha-güedé quihí<sup>n</sup> cata caa ñaha-güedé xii-gá núú cùrúxí.

<sup>16</sup> Te cue tée cùu sandadú ndéca ñaha-güedé xii-gá cuáhá<sup>n</sup> vechiu<sup>n</sup>, te diu-ni xiá<sup>n</sup> cúú vèhe tée cùu gobiernú. Te xiá<sup>n</sup> ní tacá nchaa dava-gá cue tée cùu sandadú. <sup>17</sup> Te xiá<sup>n</sup> ní dácuhnú ñaha-güedé xii-gá ñii dóó ticuèhé víhi, te ní cadúha-güedé ñii coróná iñu ní chihi-güedé díquí-gá. <sup>18</sup> Te ní nguíta-güedé níhi cáhá<sup>n</sup>-güedé cúdíquí ndeé ñáhá-güedé xii-gá, te xàhá<sup>n</sup>-güedé:

—¡Ío cahnú cuu yohó tée yìndaha ñaha xii ñáiyu israhél! —càchí-güedé xàhá<sup>n</sup>-güedé xii-gá.

<sup>19</sup> Te càni-güedé díquí-gá ndihi ñii carrutí, te tiú díi ñáhá-güedé xii-gá, te nguñí xití-güedé núú-gá quidé-güedé sá néhé-güedé sá yíñuhu núú-gá dico ñá ndáa chi dicó cúdíquí ndeé ñáhá-güedé xii-gá. <sup>20</sup> Te sáta dúcá<sup>n</sup> ní cudíquí ndeé ñáhá-güedé xii-gá, te ní nataunuu ñaha-güedé xii-gá dóó ticuèhé víhi sá ní dácuhnú ñaha-güedé, te ní dándíunuu ñaha-güedé xii-gá dóó méé-gá. Te dátñuní ndéca ñaha-güedé cuáhá<sup>n</sup> núú catá caa ñaha-güedé xii-gá núú cùrúxí.

*Sáta caa-güedé Jèsús núú cùrúxí*

(Mt. 27:32-44; Lc. 23:26-43; Jn. 19:17-27)

<sup>21</sup> Te ichi cuáhá<sup>n</sup>-güedé ndihi Jèsús ní naníhí-güedé ñii tée ñuu Cirené nání-dè Ximú, te déhe-dé cúú ñii tée nani Lijandrú, ndihi ingá tée nani Rúfú. Te té Ximú-án ñuhú-dé ichi duha cuándixi-dé ní sáhá<sup>n</sup>-dé yucu, te ní quide yica-güedé ní xido-dé cùrúxí sá nchidó Jèsús.

<sup>22</sup> Te ndéca-güedé Jèsús cuáhá<sup>n</sup> ñii xichi núú nání Gólgotá, te tñuhu-án quée-xí: ñii xichi núú nání yiqui díquí ndiyi, duha quée-xi tñuhu-án. <sup>23</sup> Te ní sáñaha-güedé xii-gá ndudí sá ní quée yúcu nání mirrá

coho-gá ní cùu dico ñá túú ní xihí-gá. <sup>24</sup> Te ní sata caa ñaha-güedé xii-gá núú cùrúxí. Te sáta dúcá<sup>n</sup> te cue tée cùu sandadú-án ní xito ndeé-güedé núu ndédacaa-güedé cuu cuendá-güedé dóó-gá.

<sup>25</sup> Te cùu-xi caá ñii dátñéé òré ní sata caa ñaha-güedé xii-gá núú cùrúxí. <sup>26</sup> Te ní taxi ndecu-güedé ñii sá ndeé lètrá núú tácaa-gá. Te lètrá-án cáhá<sup>n</sup>-xi ná cuendá duca<sup>n</sup> ní quide ñaha-güedé xii-gá. Te duha cáhá<sup>n</sup> lètrá-án: “Tée yìndaha ñaha xii ñáiyu israhél”, duha càchí-xi. <sup>27</sup> Te tñahá úú cue tée cùu ñadúhu ní sata caa-güedé diu-ni núú cùrúxí tucu. Te ñii-dé ní sata caa-güedé xio cùha-gá, te ingá-dé ní sata caa-güedé xio dátñi-gá. <sup>28</sup> Te duca<sup>n</sup> ní cuu chi ní quee ndáa-xi nàcuáa cáhá<sup>n</sup>-xi núú tütú Yá Ndióxi núú càchí-xi: “Ñii-ni ní quide ñaha-güedé xii-gá ndihi cue tée ndecu cuèchi-xi”, duha càchí-xi núú tütú-gá.

<sup>29</sup> Te nchaa ñáiyu yáha yatni núú tácaa-gá dácucó-yu díquí-yu te xicuéhé ñáhá-yu xii-gá, te xàhá<sup>n</sup>-yu:

—Te ná cuendá duca<sup>n</sup> càa-n tacaa-n xiá<sup>n</sup>, te càchí-n sá dàngoyo-n veñúhu cahnú sá ío cùnuu te dandaa-n ingá veñúhu saa, te xití úní-ni nduu sa nadaxínu-n càchí-n. <sup>30</sup> Te vitna tanuu núú cùrúxí-án dácacu-n mée-n —càchí-yu xàhá<sup>n</sup>-yu xii-gá.

<sup>31</sup> Te diu-ni duca<sup>n</sup> ní quide cue tée cùu dútú cùnuu, ndihi cue tée dácuaa ñaha xii ñáiyu nchaa tñuhu ní chidó tñuní ndii Moisés, chi ní cudíquí ndeé ñáhá-güedé xii-gá, te ní xitñaha-güedé:

—Tée-a ní ndacu-dé ní dácacu nihnu-dé ñáiyu, ¿te ná cuendá ñá ndácú-dé dácacu nihnu-dé méé-dé-i? <sup>32</sup> Te núu ndáa sá diú-dé cúú-dé Cristú Yáá ní tendaha Yá Ndióxi véxi ñuyúú-a quindaha ñaha xii ñáiyu israhél, te na cundehe-o nuu-dé núú cùrúxí, cuendá quindáa iní-ó-dé —càchí-güedé xitñaha-güedé.

Te ndeé tñahá cue tée tácaa xio xio diñi-gá xicuéhé ñáhá-güedé xii-gá.

*Ní xihí Jèsús*

(Mt. 27:45-56; Lc. 23:44-49; Jn. 19:28-30)

<sup>33</sup> Te òré ní cuu cuádava nduu, te ní cunee nihí ñuyúú, te duca<sup>n</sup>-ni càa ní cuu ndeé caá úní sacuaa. <sup>34</sup> Te diu-ni òré caá úní sacuaa-án níhi ní cáhá<sup>n</sup> Jèsús, te xàhá<sup>n</sup>-gá xii Tátá-gá Dútú Ndióxi:

—Elói, Elói, láma sabàctaní —càchí-gá xàhá<sup>n</sup>-gá.

Te tñuhu-án quée-xí: Ndióxi méé-í, Ndióxi méé-í, ná cuendá ní dáñá ñaha-n xii-í, duha quée-xi tñuhu-án.

<sup>35</sup> Te dava cue tée xíndecu yatni núú tácaa-gá-án ní tecú dóho-güedé nàcuáa ní cáhá<sup>n</sup>-gá, te ní xitñaha-güedé:



—Chí cündèdòho chi càna-dé té Èliás — cächí-güedé xítñaha-güedé.

<sup>36</sup> Te ìn<sup>n</sup> cue tée xíndecu-á<sup>n</sup> xínú-dé ní sáhá<sup>n</sup> ní chindóyo-dé luha cächí xítí ndudí íá, te ní chinenu-dé díquí ìn<sup>n</sup> yutnu càni te ní ndocani-dé chíhí-dé yuhu-gá cuendá coho-gá. Te ní xáha<sup>n</sup> cué tée xíndecu-á<sup>n</sup> xii tée-á<sup>n</sup>:

—Cundetu tnaa na cündeh-e o nacoto núu quixi té Èliás nunehe ñaha-dé xii-dé núu cùrúxí —cächí-güedé xáha<sup>n</sup>-güedé xii-dé.

<sup>37</sup> Te Jèsús níhi ní canasaa-gá te ní xihí-ní-gá. <sup>38</sup> Te sátá dúcá<sup>n</sup> te ní ndátá dóbó cúú còrtíná xítí veñúhu càhnu sá ìo cùnuu ní quée dava ndáá, te ndàa núu ñnu ní ngúita-xi ní ndátá. <sup>39</sup> Te tée cùu capitá<sup>n</sup> nútñí-dé ndàa núu Jèsús, te ndèhe-dé nàcuáa ní quide-gá òré ní xihí-gá, te ní cächí-dé:

—Sá ndáa ndisa sá díú tée-a cùu-dé Déhe Yá Ndióxi ní cùu —duha ní cächí-dé.

<sup>40</sup> Te xica xínutñí ìn<sup>n</sup> úú ñáyíu díhí ndèhè-yu nchaa nàcuáa ní quide ñaha-güedé xii Jèsús, te tñahá tá Màriá Magdaléná, ndihí tá Salómé, ndihí tá Màriá náná té Chèé ndihí té Jàcobó tée cächí-güedé cúú líhli-gá. <sup>41</sup> Te cue ñáyíu díhí-á<sup>n</sup> ní xica cuú-yu ndihí Jèsús dístrítú Galiléa ní xinu cuèchí-yu núu-gá. Te cue ñáyíu díhí-á<sup>n</sup> nchicú<sup>n</sup> ñáhá-yu xii-gá ní quexío ndéé ñúu Jerusálén ndihí dava-gá ñáyíu díhí nchicú<sup>n</sup> ñáhá xii-gá cuáhá<sup>n</sup>.

#### *Chindúxi-güedé Jèsús*

(Mt. 27:57-61; Lc. 23:50-56; Jn. 19:38-42)

<sup>42</sup> Te cùu-xi nduu vispre nduu ndetátú ñáyíu. Te nduu-á<sup>n</sup> xíquide túha-yu sá cúú ñngá nduu nduu ndetátú-yu-á<sup>n</sup>, te díu-ni nduu-á sa ní cuaa víhi, <sup>43</sup> te ìn<sup>n</sup> tée nani Cheé tée ñúu Arimatea ní cuyí-dé ní sáhá<sup>n</sup>-dé núú té Pilatú, te ní xáha<sup>n</sup>-dé sá núu vá cündèe iní-dé daña-dé chindúxi-dé yíqui cùñú Jèsús. Te tñahá té Chèé-á<sup>n</sup> cúú-dé ìn<sup>n</sup> tée cùnuu cundihí-dé cue tée quide jundá, te tñahá-dé ndétú-dé sáá nduu ndihu ndaha ñaha Yá Ndióxi xii-dé ndihí cue ñáyíu. <sup>44</sup> Te té Pilatú ìo ní cuñúhu-dé sá dúcá<sup>n</sup> ìo ndihí ní xihí Jèsús, te ní cana-dé tée cùu capitá<sup>n</sup> ní xicá<sup>n</sup> tñuhú-dé núú-dé ñnu ndisa sá sá ní xihí-gá. <sup>45</sup> Te tée cùu capitá<sup>n</sup>-á<sup>n</sup> ní xáha<sup>n</sup>-dé xii té Pilatú sá ndáá ní xihí Jèsús, núu xíá<sup>n</sup> té Pilatú-á<sup>n</sup> ní sáha-dé tñuhu chindúxi té Chèé-á<sup>n</sup> yíqui cùñú-gá. <sup>46</sup> Te té Chèé-á<sup>n</sup> ní saa<sup>n</sup>-dé ìn<sup>n</sup> dóó vaha, te ní sáhá<sup>n</sup>-dé ní nunehe-dé yíqui cùñú Jèsús núu cùrúxí, te ní chidúcú<sup>n</sup>-nuu-dé yíqui cùñú-gá dóó vaha sá ní saa<sup>n</sup>-dé-á<sup>n</sup>, te dátñúni néhé-dé yíqui cùñú-gá cuáhá<sup>n</sup> ní chíhí-dé ìn<sup>n</sup> yaú nchii yíqui naha càva, te ní sadí-dé yuhu yaú-á<sup>n</sup> ndihí ìn<sup>n</sup> yúú quèhé<sup>n</sup>. <sup>47</sup> Te tá Màriá Magdaléná, ndihí tá Màriá náná té Chèé ní xini-yu núu ní chíhí-dé yíqui cùñú Jèsús.

## 16

#### *Ní ndoto Jèsús*

(Mt. 28:1-10; Lc. 24:1-12; Jn. 20:1-10)

<sup>1</sup> Te sátá ní cundiquí<sup>n</sup> nduu ndetátú ñáyíu, te tá Màriá Magdaléná, ndihí tá Salómé, ndihí tá Màriá náná té Jàcobó ní saa<sup>n</sup>-yu acití sáhá<sup>n</sup> tñámí cuendá canehé-yu quíhí<sup>n</sup> chíhí-yu yíqui cùñú Jèsús. <sup>2</sup> Te ndumíngú nehé-ní òré vitna vaha vaha ní xínu coto núu nchícanhii ní quexío-yu núu nchii yaú yíhí yíqui cùñú Jèsús. <sup>3</sup> Te ní xítñahá-yu:

—Yoo cùñaha-o xòcani yúú ndéá yuhu yaú-a, chí vá yòo tñahí ndècu iha —cachí-yu xítñahá-yu.

<sup>4</sup> Te òré ní xíndehé vaha-yu te ní xini-yu sá yúú cáhnu ndéá yuhu yaú-á<sup>n</sup> ìn<sup>n</sup> xio-ná ndécú. <sup>5</sup> Te cuánguihú-yu xítí yaú-á<sup>n</sup>, te ní xini-yu nùcòo ìn<sup>n</sup> espíritú xínú cuèchi núú Yá Ndióxi ndaa xio cùhá-yu, te càa-xi datná cáá ìn<sup>n</sup> tée cuechi, te ñhnu-xi ìn<sup>n</sup> dóó cuixí<sup>n</sup> dóó cáni, te ní yùhú-yu òré ní xini-yu espíritú-á<sup>n</sup>. <sup>6</sup> Te espíritú-á<sup>n</sup> ní xáha<sup>n</sup>-xi xii-yu:

—Vá yùhú-ndó, chí yùhú sa cùtmuní iní-í sá nchòhó véxi-ndo nànducu-ndo yíqui cùñú Jèsús tée ñúu Nazàrét tée ní sahní-güedé núu cùrúxí, dico ñá túú-gá yíqui cùñú-dé ndécú iha chí sa ní ndoto-dé, te chí cündèhe núu ní sacá<sup>n</sup>-güedé yíqui cùñú-dé te quini-ndo ná ñá túú-gá-dé. <sup>7</sup> Te chí cuáhá<sup>n</sup> núu ndécú té Pèlu ndihí dava-gá cue tée ní xica cuu ndihí-dé, te duha cùñaha-ndo xii-güedé: “Jèsús codonuu-gá núu-ndo quíhí<sup>n</sup> dístrítú Galiléa, te yàcá<sup>n</sup> quini-ndo-gá dátñá ní cächí-gá xii-ndo”, duha cùñaha-ndo xii-güedé —cächí espíritú-á<sup>n</sup> xáha<sup>n</sup>-xi xii-yu.

<sup>8</sup> Te cue ñáyíu díhí-á<sup>n</sup> ìo ní yùhú-yu, te ní quene cunú-yu cuánuhú-yu, te quèdi ñaha-ná-xi xii-yu sá ìo ní yùhú-yu, te ñá túú tñahí ná tñuhu ní xáhá<sup>n</sup>-yu xii cue ñáyíu ní naníhí-yu ichi cuendá sá ìo ní yùhú-yu.

#### *Tá Màriá Magdaléná ní xini-xi Jèsús*

(Jn. 20:11-18)

<sup>9</sup> Te sátá dúcá<sup>n</sup> ní ndoto Jèsús ndumíngú nehé-ni-á<sup>n</sup>, te díhna nuu-gá tá Màriá Magdaléná ní quée túu-gá núu-xi, te díu tá Màriá-á<sup>n</sup> cúú-xi xíchí ní xihí ñaha úsá espíritú cündihí yucu ñávaha ní cùu, te Jèsús ní queñuhu-gá nchaa espíritú-á<sup>n</sup> yíqui cùñú-xi. <sup>10</sup> Te xíchí-á<sup>n</sup> ní sáhá<sup>n</sup>-xi ní xitñuhu-xi cue tée ní xica cuu ndihí Jèsús nàcuáa ní cuu, te xíndahí-güedé sá ndihú iní-güedé òré ní quexío-xi núu ndécú-güedé. <sup>11</sup> Te òré ní xáha<sup>n</sup> tá Màriá xii-güedé sá ní ndoto Jèsús ndihí sá ní xini ñáhá-xi xii-gá, te ñá túú ní sándáá iní-güedé.

*Jèsús ní quée túu-gá núu úú cue tée ní xica cuu ndihí-gá*

(Lc. 24:13-35)

<sup>12</sup> Te úú tñhá cue téé ní xica cuu ndihi Jèsús ñúhú-güedé ichi cuáhá<sup>n</sup>-güedé yucu, te uu<sup>n</sup>i ní quee túu-gá núú-güedé, te ní dácótó ñàha-xi xii-güedé sá ñà túú-gá cáá-gá dàtná cáá-gá. <sup>13</sup> Te cue téé úú-á<sup>n</sup> ní xica-güedé cuáhá<sup>n</sup>-güedé ní xítñúhu-güedé nchaa dava-gá cue téé ní xica cuu ndihi-gá sá ní xini ñáhá-güedé xii-gá, dico diu-ni duca<sup>n</sup> ñà túú ní sàndáá iní cue téé-á<sup>n</sup> tñúhu ní cáhá<sup>n</sup>-güedé.

*Jèsús xáha<sup>n</sup>-gá xii cue téé ní xica cuu ndihi-gá nàcuáa ndüu chiü<sup>n</sup> cada-güedé*

*(Mt. 28:16-20; Lc. 24:36-49; Jn. 20:19-23)*

<sup>14</sup> Te ndi ùxí ì<sup>n</sup> cue téé ní xica cuu ndihi Jèsús yíhi-güedé mèsá xéxí-güedé, te ní quee túu-gá núú-güedé te ní tenáá ñáhá-gá xii-güedé cuendá sá lo sàá iní-güedé ñà túú sàndáá iní ñáhá vâha-güedé xii-gá, chi ñà túú ní cuini-güedé quíndáá iní-güedé nàcuáa ní xáha<sup>n</sup> ñáyiü ní xini ñáhá xii-gá sáta ní yáha ní ndoto-gá. <sup>15</sup> Te ní xáha<sup>n</sup>-gá xii-güedé:

—Quíhí<sup>n</sup>-ndó ñihí ñuyíü cáhá<sup>n</sup>-ndó núú nchaa ñáyiü tñúhu vâha tñúhu sá cáhá<sup>n</sup> nàcuáa naníhí tàhú-yu. <sup>16</sup> Te nchaa ñáyiü na quíndáá iní tñúhu-á<sup>n</sup> te cuanduté-yu, te naníhí tàhú-yu, dico nchaa ñáyiü vá quíndáá iní tñúhu-á<sup>n</sup> te cuíta niñnú-yu. <sup>17</sup> Te nchaa ñáyiü na quíndáá iní ñáhá xii-í te cadá-yu sá vâ yóo tñáhi ndàcu cada, te cacunehe ñáhá-yu xii-í, te queñuhú-yu nchaa espíritu cündihi yucu ñávâha yíhi ñaha xii ñáyiü. Te uu<sup>n</sup>i ndacú-yu cáhá<sup>n</sup>-yu ingá núú tñúhu sá vátá dâcuàha-gá-yu. <sup>18</sup> Te cuéi na tñú-yu cóó déé<sup>n</sup> dico ñà túú nâ cada ñaha-di xii-yu, te cuéi venènú ná cáxi-yu dico ñà túú nâ tñhá-yu, te tendáhá-yu cue ñáyiü cùhú te ndúha-yu —càchí-gá xáha<sup>n</sup>-gá xii-güedé.

*Jèsús cuánda-gá andiu*

*(Lc. 24:50-53)*

<sup>19</sup> Te sáta ní yáha duca<sup>n</sup> ní xáha<sup>n</sup> Jèsús xii cue téé ní xica cuu ndihi-gá, te ní ndanchita-gá cuánda-gá andiu te ní ngóo-gá xio cùha Dútú Ndiöxí. <sup>20</sup> Te cue téé-á<sup>n</sup> ní xica-güedé cuáhá<sup>n</sup>-güedé, te ní ngüüta-güedé cáhá<sup>n</sup>-güedé tñúhu Xitohó Jesucristú nchaa xichi. Te mee-gá ní chindee ñàha-gá xii-güedé ní quide-güedé nchaa sá vâ yóo tñáhi ndàcu cada cuendá cutnùní iní ñáyiü sá ndáá cáhá<sup>n</sup>-güedé tñúhu-gá. Duha ní cuu dàvá-á<sup>n</sup>.

## TNÚHU NÍ CHÍDÓ TNUNÍ TÉ LÚCÁ

*Nàcuáa ní ngódo tnuní tnúhu Yá Ndióxi*

<sup>1</sup> Te vai ñáyiú chido tnuní-yu nchaa nàcuáa nduu tnúhu ñihí-yu nàcuáa ní cuu, te nchoo tnáhá-ó sà naha-ó nacuáa ní cuu. <sup>2</sup> Te diu-ni nchaa tnúhu chido tnuní-yu-á<sup>n</sup> cúu-xí tnúhu ní cáhá<sup>n</sup> nchaa cue téé ní xiní ndáá nàcuáa ní cuu ndéé díhna, cue téé ní cáhá<sup>n</sup> tnúhu Yá Ndióxi. <sup>3</sup> Te yúhú sa ní cuu nduu quide cuendá-í nchaa nàcuáa ní cuu, núu xíá<sup>n</sup> ní sani iní-í tee váha-í nchaa tnúhu-a núú tütú sá cúu-xí yòhó té Tëofilú chi ío váha cùu iní-í sá cúu-xí-n, <sup>4</sup> te tée-í cuendá cutnúní iní-n sá sà ndáá cúu-xí nchaa sá ní dánèhè ñáhá-güedè xii-n.

*Í<sup>n</sup> espíritú xínú cuèchi núú Yá Ndióxi cächí-xi sá cacú í<sup>n</sup> tee cunani Juáá*

<sup>5</sup> Te cutnàhá ní xindaha té Hèrodes ñáyiú distritú Jüdeá dàvá-á<sup>n</sup> ní xindecu í<sup>n</sup> dütú ní xínani-dè Zacàriá, te ní cundi-dè cue dütú Abiás. Te ñadihí-dé ní xínani-a<sup>n</sup> Elisabét, te ñaha-á<sup>n</sup> ní cuu-a<sup>n</sup> ñani tnáhá ndí Arón. <sup>6</sup> Te ní nduu-yu ío ní quide ndáá-yu núú Dütú Ndióxi, chi ní tñi-yu nchaa tnúhu ní cáhá<sup>n</sup>-gá. <sup>7</sup> Te ñá túú ní í<sup>n</sup> déhe-yu, chi duca<sup>n</sup> táhú tá Elisabét sá vá cóó déhe-a<sup>n</sup>, te duca<sup>n</sup> ndí nduu-yu ío ní sahnú-yu.

<sup>8</sup> Te í<sup>n</sup> nduu xinu cuechi tucu té Zacàriá ndíhi nchaa cue téé cündihí-dé núú Yá Ndióxi xití veñúhu. <sup>9</sup> Te dàvá-á<sup>n</sup> ní xito ndéé-güedé cuendá cutnúní iní-güedé núu ndèdacaá-güedé quíhu núú nàá xití veñúhu-á<sup>n</sup> cahmi-güedé sá sàhá<sup>n</sup> tnámí, te ní cutnúní sá té Zacàriá quíhu-dé. Te duca<sup>n</sup> ní quide-güedé, chi duca<sup>n</sup> tnáhi ní xóo cada nchaa cue dütú dàvá-á<sup>n</sup>. <sup>10</sup> Te nini sàhmi té Zacàriá sá sàhá<sup>n</sup> tnámí núú nàá, te vai vihi ñáyiú xindecu quehé veñúhu-á<sup>n</sup> cáhá<sup>n</sup> ndíhi-yu Yá Ndióxi. <sup>11</sup> Te ní xiní té Zacàriá í<sup>n</sup> espíritú xínú cuèchi núú Yá Ndióxi tnúhí-xi xio cùha núú nàá núú càyú sá sàhá<sup>n</sup> tnámí-á<sup>n</sup>. <sup>12</sup> Te òré ní xiní té Zacàriá espíritú-á<sup>n</sup> te ñá ní cutnúní iní-dé nása cada-dé chi ío ní yúhú-dé. <sup>13</sup> Te espíritú-á<sup>n</sup> ní xáha<sup>n</sup>-xi:

—Zacàriá, vá yúhú-n chi Yá Ndióxi ní tedóho-gá tnúhu ní cáhá<sup>n</sup>-n, te vitna coo í<sup>n</sup> déhe ñadihí-n tá Elisabét te danani-n-dé Juáá. <sup>14</sup> Te ío cudíí iní-n, te duca<sup>n</sup> ío vai ñáyiú cudíí iní-yu na càcu-dé. <sup>15</sup> Te ío cuèhu-dé núú Yá Ndióxi, te ní vá cóhó-dé ndidí te ní vá cóhó-dé ndudí sá ní natiu, te sa cundecu ndíhi-dé Espíritú Yá Ndióxi òré cacu-dé. <sup>16</sup> Te diu-dé cada te ío vai ñáyiú isráel natuhá-yu ichi Dütú Ndióxi Yáá cúu Ndióxi-ó. <sup>17</sup> Te

té Juáá-á<sup>n</sup> codonùu-dé núú-gá, te cundecu ndíhi-dé Espíritú-gá, te taxi tnuní-dé dàtná ní quide té Èliás. Te nacanu ichi-dé cue téé cùu sacuéhé cuendá cada-güedé sá váha sá cúu-xí cuè téé cuechi, te cuèi cue téé ío sáá iní-xi, te diu-dé cada te tñi-güedé tnúhu váha, tnúhu cáhá<sup>n</sup> ñáyiú quide ndáá. Te duca<sup>n</sup> càda-dé cada túha-dé ñáyiú cuendá cunu cuèchi-yu núú Dütú Ndióxi —cächí-xi xáha<sup>n</sup>-xi xii-dé.

<sup>18</sup> Te té Zacàriá ní ndúcú tnúhu-dé núú espíritú-á<sup>n</sup>, te xáha<sup>n</sup>-dè:

—¿Te nása cutnúní ndáá iní-í tnúhu cáhá<sup>n</sup>-n-í? Chi yúhú ío ní sahnú-í ndíhi ñadihí-í —cächí-dé xáha<sup>n</sup>-dè xii-xi.

<sup>19</sup> Te espíritú-á<sup>n</sup> ní xáha<sup>n</sup>-xi:

—Yúhú cúu-í espíritú nání Gàbriél, te xinu cuechi-í núú Yá Ndióxi, te mee-gá ní táuchúú<sup>n</sup>-gá nàhá-í tnúhu-gá véxi cuendá cutnúní iní-n nàcuáa cada ñaha-gá xii-ndo. <sup>20</sup> Te vitna cuu ñihí-n te vá cáhá<sup>n</sup>-gá-n ndéé ná sáá nduu càcu déhe ñadihí-n, chi ñá túú ní sàndáá-ni iní-n tnúhu ní cáhá<sup>n</sup>-í. Te dacutíí sáá nduu càda-xi nacuáa ní cáhá<sup>n</sup>-í-a —cächí espíritú-á<sup>n</sup> xáha<sup>n</sup>-xi xii-dé.

<sup>21</sup> Te nchaa ñáyiú xindecu quehé ndétú-yu té Zacàriá, te xicuñúhu-yu sá ío cùyaa-dé xití veñúhu. <sup>22</sup> Te òré ní ndee té Zacàriá, te ñá ní cùu-gá cáhá<sup>n</sup> ndíhi ñaha-dè xii-yu, te òré-á<sup>n</sup> ní cutnúní iní-yu sá ní xiní-dé í<sup>n</sup> espíritú xínú cuèchi núú Yá Ndióxi xití veñúhu. Te mee-nà ndaha-dé ní quide-dé núú-yu chi ñá ní cùu-gá cáhá<sup>n</sup>-dè.

<sup>23</sup> Te ní xínu nduu ní xinu cuechi té Zacàriá núú Yá Ndióxi xití veñúhu, te cuánuhú-dé vehe-dé. <sup>24</sup> Te sáta dúcá<sup>n</sup> ní cuu te ñadihí-dé tá Elisabét ní ngúhu<sup>n</sup> déhe-a<sup>n</sup>, te í<sup>n</sup> yóo ñá túú tnàhi-gá ní quèe-a<sup>n</sup> caca cuu-a<sup>n</sup>, te ní cachí-a<sup>n</sup>: <sup>25</sup> “Mee Dütú Ndióxi duha ní cundàhú iní ñáhá-gá sá cóó í<sup>n</sup> déhe-í cuendá sá vá cúu yíchí iní ñáhá ñáyiú xii-í”, duha ní cachí-a<sup>n</sup>.

*Í<sup>n</sup> espíritú xínú cuèchi núú Yá Ndióxi cächí-xi sá cacú Jèsús*

<sup>26-27</sup> Te núú íñú yóo sá ní ngúhu<sup>n</sup> déhe tá Elisabét, te ní tendaha tucu Yá Ndióxi espíritú nání Gàbriél cuahá<sup>n</sup>-xi í<sup>n</sup> ñuú nání Nàzarét cuahá<sup>n</sup> ngoto-xi í<sup>n</sup> xíchí cuéchi nani Mariá. Te ñuú-á<sup>n</sup> yíndèhu-xi distritú Galiléa. Te xíchí-á<sup>n</sup> sa ní cundáá tnúhu sá tnàndaha-xi ndíhi í<sup>n</sup> tée nani Cheé ñani tnáhá ndí Dàvíí. <sup>28</sup> Te espíritú-á<sup>n</sup> ní quíhu-xi ndéé xití vehe núú ndécú tá Màriá, te ní xáha<sup>n</sup>-xi:

—¡Còvaha-n-a<sup>n</sup>! Dütú Ndióxi ío cùu iní ñáhá-gá xii-n te ndècu ndíhi ñaha-gá, te ío-gá xitó ñaha-gá xii-n dàcutúxí dàva-gá ñáyiú díhí —cächí espíritú-á<sup>n</sup> xáha<sup>n</sup>-xi.

<sup>29</sup> Dico òré ní xiní tá Màriá espíritú-á<sup>n</sup>, te ní quiyúhú iní-xi sá dúcá<sup>n</sup> ní cáhá<sup>n</sup> espíritú-á<sup>n</sup>. Te ní sani iní-xi: “¿Ná cuendá duha cáhá<sup>n</sup>-tu

espíritú-a-i?" duha ní sani iní-xi. <sup>30</sup> Te espíritú-án ní xáha<sup>n</sup>-xi:

—Màriá, vá yúhú-n chi duca<sup>n</sup> ní nduu táhú-n núu Yá Ndióxi. <sup>31</sup> Te vitna ngúhu<sup>n</sup> déhe-n, te na cacu-dé te danani-n-dé Jèsús. <sup>32</sup> Te ío cunu-dé, chi Dútú Ndióxi Yáá ío cunu cachi-gá sá Déhe-gá cúu-dé, te diu-gá cada te cuu-dé í<sup>n</sup> téé cunu núú ñáyiú is-ràél dàtná ní quide-gá ndí Dáví. <sup>33</sup> Te taxi tnúni-dé ñáyiú is-ràél, te duca<sup>n</sup>-ní cunu-dé ní caa ní quíhí<sup>n</sup> —càchí-xi xáha<sup>n</sup>-xi.

<sup>34</sup> Te tá Màriá ní xáha<sup>n</sup>-xi xii espíritú-án:

—¿Te nása cuu tnúhu càhá<sup>n</sup>-n te ñá túú yíi-í-i? —càchí-xi xáha<sup>n</sup>-xi.

<sup>35</sup> Te ní xáha<sup>n</sup> espíritú-án:

—Espíritú Yá Ndióxi quixi cundecu ndíhí-n, te duca<sup>n</sup> Yá Ndióxi cada-gá í<sup>n</sup> sá vâha sá cúu-xí-n ná càcu déhe-n. Te Yá Ndióxi càchí-gá sá ío cundecu yíñúhu-dé núú-gá, chi Déhe-gá cúu-dé. <sup>36</sup> Te tnàhá didí-n tá Elisàbét ñúhu déhe-a<sup>n</sup> cuéi ío ní sahu-a<sup>n</sup>, te diu-a<sup>n</sup> càchí-yu sá vâ cóo déhe-a<sup>n</sup> ní cùu, te vitna sa ní cuu íñú yóo ñúhú déhe-a<sup>n</sup>. <sup>37</sup> Chi Yá Ndióxi ndácú-gá quide-gá nchaa sá vâ yóo tnàhí ndàcu cada —càchí-xi xáha<sup>n</sup>-xi.

<sup>38</sup> Te tá Màriá ní xáha<sup>n</sup>-xi:

—Yúhú ná cúnú cuèchí-í núú Dútú Ndióxi, te mee-gá ná càdá ñàha-gá xii-í nàcuáa ní cachi-n —càchí-xi xáha<sup>n</sup>-xi xii espíritú-án.

Te sátá dúcá<sup>n</sup> te espíritú-án ní xica-xi cuáhá<sup>n</sup>-xi.

#### *Tá Màriá cuáhá<sup>n</sup> ngoto-xi tá Elisàbét*

<sup>39</sup> Te tá Màriá ío ndíhí cuáhá<sup>n</sup>-xi í<sup>n</sup> ñúú cáá xití yucu distritú Júdeá. <sup>40</sup> Te ní sáá-xi vehe té Zacàriá, te cuánguihu-xi ní dándácóo vâha-xi tá Elisàbét. <sup>41</sup> Te òré ní tecú dóho tá Elisàbét ní cáhá<sup>n</sup> tá Màriá, te ní candá déhe-a<sup>n</sup> xití-a<sup>n</sup>, te òré-án ní ngúndecu ndíhí-a<sup>n</sup> Espíritú Yá Ndióxi. <sup>42</sup> Te níhí ní cáhá<sup>n</sup>-a<sup>n</sup>, te xáha<sup>n</sup>-a<sup>n</sup> xii tá Màriá:

—Yá Ndióxi ío xito ñàha-gá xii-n dàcúúxi dàva-gá tnàha díhí-ó, te duca<sup>n</sup>-ní xito-gá cuéi déhe-n. <sup>43</sup> ¿Te ná cúu yúhú núu véxi coto ñàha yòhó náná Yáá cúu Xítohó-í-i? <sup>44</sup> Chi òré-ni ní tecú dóho-í ní cáhá<sup>n</sup>-n te ní candá-ni déhe-í xití-í sá cudíí iní-dé. <sup>45</sup> Te vâha táhú yòhó sá ní sàndáá iní-n, chi dacuitíí sá càdá Dútú Ndióxi nàcuáa ní cáhá<sup>n</sup> espíritú ní tendaha-gá ní quixi ní cachi tnúhu xii-n nàcuáa cada-gá —càchí-a<sup>n</sup> xáha<sup>n</sup>-a<sup>n</sup> xii tá Màriá.

<sup>46</sup> Te ní xáha<sup>n</sup> tá Màriá:

Ío càhnu cuu Dútú Ndióxi,

<sup>47</sup> Ío cudíí iní-í chi diu-gá taunihnu ñàha-gá xii-í núú ùhú núú ndàhú.

<sup>48</sup> Chi ní ndacu iní ñàhá-gá xii yúhú, te dicó í<sup>n</sup> xíchí xínú cuèchi núú-gá cúu-í,

te vitna te nchaandi túhú ñáyiú cachi-yu sá ío vâha táhú-í.

<sup>49</sup> Te Yá Ndióxi càndò caa nine iní-gá, te ío càhnu í<sup>n</sup> sá vâha ní quide-gá sá cúu-xí-í.

<sup>50</sup> Te cùndahú iní-gá nchaa ñáyiú nèhe sá yíñúhu núú-gá.

Te duca<sup>n</sup>-ní cuéi ñáyiú sa ndècu ñuyíú-a ndíhí ñáyiú vitna véxi.

<sup>51</sup> Chi ta quide-gá nchaa sá vâ yóo tnàhí ndàcu cada véxi,

te ta dàndóo canúú-gá cue ñáyiú quide cahnu mee-xi.

<sup>52</sup> Te cue ñáyiú tàxi tnuní ñá túú-gá dàñá-gá taxi tnúni-yu,

te cue ñáyiú ndàhú ní quide nínu ñàha-gá xii-yu.

<sup>53</sup> Te cue ñáyiú ndècu ndíhí tnúndòho tnúhu ndàhú ní quide vâha ñàha-gá xii-yu,

te cue ñáyiú cuica ñá túú ná ní níhí-gá-yu cundecu ndíhí-yu.

<sup>54</sup> Te chindee-gá ñáyiú is-ràél, ñáyiú xínu cuechí núú-gá, te ñá túú dàña níhnu ñàha-gá xii-yu, chi cùndahú iní ñàhá-gá.

<sup>55</sup> Chi duca<sup>n</sup> ní xáha<sup>n</sup>-gá xii ndíi Àbrahám, ndíhí cue ñani tnàhá ndíi.

Duha ní xáha<sup>n</sup> tá Màriá xii tá Elisàbét.

<sup>56</sup> Te ní xíndecu tá Màriá dàtná úní yóo ndíhí tá Elisàbét te dàtnúni cuánuhú-xi vehe-xi.

*Ní cacu té Juàá téé dacuàndute ñàha xii ñáyiú*

<sup>57</sup> Te ní sáá nduu ní cacu í<sup>n</sup> déhe téé tá Elisàbét. <sup>58</sup> Te nchaa ñáyiú ndècu yatni ndíhí-a<sup>n</sup>, ndíhí nchaa ñani tnàhá-án ní níhí-yu tnúhu nàcuáa ní chindee ñàha Yá Ndióxi xii-a<sup>n</sup>. Te ío ní cudíí iní-yu cuèndá-a<sup>n</sup>.

<sup>59</sup> Te núú úná nduu sá ní cacu déhe-a<sup>n</sup>, te ní sáhá<sup>n</sup> ñáyiú núú ndécú-án cuèndá cuáhá-yu sèñá ñii déhe-a<sup>n</sup>. Te cuiní-yu cunani déhe-án Zacàriá dàtná nání tâtá ní cùu. <sup>60</sup> Te ní xáha<sup>n</sup> náná dèhe-án:

—Ñàhá, chi Juàá cunani-dé —càchí-a<sup>n</sup> xáha<sup>n</sup>-a<sup>n</sup> xii-yu.

<sup>61</sup> Te ní xáhá<sup>n</sup>-yu:

—¿Te ná cuèndá te ñá túú ní í<sup>n</sup> ñani tnàhá-ndó dùca<sup>n</sup> nani-i? —càchí-yu xáhá<sup>n</sup>-yu.

<sup>62</sup> Te ní quide-yu ndàhá-yu núú tâtá déhe-án cuèndá cuiní-yu núu nása cuiní mee-dé cunani déhe-dé. <sup>63</sup> Te ní xícá<sup>n</sup>-dé í<sup>n</sup> tutú ní chidó tnúni-dé nàcuáa cunani déhe-dé, te duha ní chidó tnúni-dé: “Juàá cunani-dé”, càchí-xi núú tutú ní tee-dé-án.

Te nchaa ñáyiú xíndecu-án ní cuñúhu-yu nàcuáa ní cuu. <sup>64</sup> Te òré-án ní nacáhá<sup>n</sup> té Zacàriá sá ní cuu ñíhí-dé ní cùu, te ní nguíta-dé ní cachi-dé sá ío càhnu cuu Yá Ndióxi. <sup>65</sup> Te nchaa ñáyiú xíndecu yatni ndíhí-dé ní cuñúhu-yu, te nchaa ñáyiú xíndecu níhí xití yucu distritú Júdeá

ní níhí-yu tnúhu nàcuáa ní cuu. <sup>66</sup> Te nchaa ñáyi-u-án ío vâi ní sani iní-yu, te ní xítñahá-yu:

—¿Ná cúú sá cáda tée-ã<sup>n</sup> ndéé íd-gá ná cuèhnu-dé? —câchí-yu xítñahá-yu.

Te duca<sup>n</sup> ní xítñahá-yu chi Dútú Ndiöxí ndécú ndíhi ñaha-gá xii-dé.

*Té Zacàriá càchí-dé sá ío càhnu cuu Yá Ndiöxí*

<sup>67</sup> Te té Zacàriá tátá tē líhli-án ní ngúndecu ndíhi-dé Espíritú Yá Ndiöxí te ní cáhá<sup>n</sup>-dé nchaa tnúhu sá ní dánèhé ñáhá-gá, te ní cachí-dé:

<sup>68</sup> Ío càhnu cuu Dútú Ndiöxí nchoo ñáyi-u isráél,

chi ní quixi coto ñaha-gá xii-o, te cù-u ñáyi-u cùu cuendá-gá, chi dàcácu níhnu ñaha-gá xii-o vitna.

<sup>69</sup> Chi ní tendaha-gá ñ<sup>n</sup> tée véxi-dé dàcácu níhnu ñaha-dé xii-o núú ùhú núú ndáhú.

Te cùu-dé ñaní tnáhá ndíi Dávíí tée ní xinu cuechi núú-gá ndéé sanaha.

<sup>70</sup> Te ñu-ni tnúhu ní cáhá<sup>n</sup> Yá Ndiöxí ní cáhá<sup>n</sup> cue tée ní quide ndáá ní xíndecu núú-gá ñuyíú-a ndéé sanaha.

<sup>71</sup> Te ní cachí-güedé sá táúníhnu ñaha-gá xii-o núú nchaa ñáyi-u cùu ùhú iní ñáhá, ndíhi núú nchaa ñáyi-u ñá túú cùu quíní ndee ñáhá.

<sup>72</sup> Te ní xáha<sup>n</sup>-gá sá cùndáhú iní ñáhá-gá xii-o, te duca<sup>n</sup> càda-gá chi vá nàcuánaa-gá tnúhu ní cáhá<sup>n</sup>-gá ndíhi-güedé.

<sup>73</sup> Te ñu duca<sup>n</sup> ndúu tnúhu ní xáha<sup>n</sup>-gá xii ndíi Àbrahám sá

<sup>74</sup> táúníhnu ñaha-gá xii-o núú nchaa ñáyi-u cùu ùhú iní ñáhá,

cuendá sá vâ yùhú-ó cùnu cuechi-o núú-gá.

<sup>75</sup> Te cada ndáá-ó, te cundecu yíñùhu-o núú-gá ndí nchaa nduu cundecu-o ñuyíú-a.

Duha ní cachí té Zacàriá.

<sup>76</sup> Te xáha<sup>n</sup>-dè xii té líhli-án:

Te yohó té líhli, cáhá<sup>n</sup> ñáyi-u cuendá-n sá cúú-n ñ<sup>n</sup> tée càhá<sup>n</sup> tnúhu Dútú Ndiöxí Yáá ío cùnnu,

chi quíhí<sup>n</sup>-n còdonuu-n núú Yáá cúú Xítohó-ó dàtúha-n ñáyi-u cuendá cundecu túha-yu òré quexio-gá.

<sup>77</sup> Te cùñaha-n xii ñáyi-u isráél sá cuíní-gá cada càhnu iní-gá nchaa cuèchi-yu, te naníhí tãhú-yu.

<sup>78</sup> Te duca<sup>n</sup> càda-gá chi ío cùu iní ñáhá-gá xii-o, chi ndéé andíu ní tendaha-gá ñ<sup>n</sup> tée véxi

cuu<sup>n</sup>-dé dandixi túu-dé iní-ó cuendá cutnùní iní-ó nàcuáa ndúu cuendá Yá Ndiöxí.

<sup>79</sup> Te duca<sup>n</sup> dándixi túu-dé iní nchaa ñáyi-u ndécú ichi cuehé ichi duha ta xíta níhnu cuáhá<sup>n</sup> cuendá nucúnu ichí-yu ñ<sup>n</sup> ichi váha.

Duha ní xáha<sup>n</sup> tē Zacàriá xii déhe-dé.

<sup>80</sup> Te té líhli-án tá sàhnu-dé, te ta chùndee chítúu ñaha Yá Ndiöxí xii-dé cuáhá<sup>n</sup>, te ní xíndecu-dé xítí yucu ndéé ní sáá nduu ní ngúita-dé ní cáhá<sup>n</sup>-dé núú cue ñáyi-u isráél tnúhu Yá Ndiöxí.

## 2

*Ní cacu Jèsús  
(Mt. 1:18-25)*

<sup>1</sup> Te dàvã-á<sup>n</sup> ní táuchíu<sup>n</sup> tē Àugústú Cèsár nucódó tnùnì nchaa ñáyi-u nació<sup>n</sup> yíndàha-dé. <sup>2</sup> Te xéhe sá ðíhmanuu ní nucódó tnùnì ñáyi-u, te ñu-ni dàvã-á<sup>n</sup> ní cunuu té Cireníú distrítú Síriá. <sup>3</sup> Te nchaa ñáyi-u ní natacã-yu ñúu núú ní cacú-yu cuendá nucódó tnùnì-yu. <sup>4</sup> Núu xiã<sup>n</sup> ní quee té Chéé ñúu Nazàrét ñ<sup>n</sup> ñúu yíndèhu distrítú Galiléá, te cuáhã<sup>n</sup>-dé ñúu Belén ñ<sup>n</sup> ñúu yíndèhu distrítú Júdeá, chi xiã<sup>n</sup> ní cuu ñúu ndíi Dávíí, te ñu-ni ñaní tnáhá tē Chéé-á<sup>n</sup> ní cuu ndíi. <sup>5</sup> Núu xiã<sup>n</sup> cuáhã<sup>n</sup>-dé ndéé ñúu Belén nucódó tnùnì-dé, te tnáhã tá Màriá xíchí ní cundáã tnúhu sã tnãndaha ndíhi-dé cuáhã<sup>n</sup> ndíhi ñaha-dé, te sa ñúhu déhe-xi. <sup>6</sup> Te níni cùyãã-yu ñúu Belén-á<sup>n</sup> ní sáá òré cacu déhe-xi. <sup>7</sup> Te ní cacu déhe ðíhna-xi, te ní chidúcú<sup>n</sup>nuu-xi dóó, te ní sacã<sup>n</sup> ñáhã-xi ñ<sup>n</sup> vehe núú cúú vehe quiti, chi ñã túú ní níhí-yu vehe coó-yu.

*Cue espíritú xínú cuèchi núú Yá Ndiöxí ndíhi cue toli.*

<sup>8</sup> Te yatni ñúu-á<sup>n</sup> xíndecu ñ<sup>n</sup> ùú toli ndéé-güedé mbéé-güedé ndécú-güedé majadá niú-á<sup>n</sup>. <sup>9</sup> Te uu<sup>n</sup>ni ní quexio ñ<sup>n</sup> espíritú xínú cuèchi núú Yá Ndiöxí, te Yá Ndiöxí ní quide-gá ní dàyéhé-xi ní càndéé núú xíndecu-güedé, te ní yùhú víhí-güedé. <sup>10</sup> Te ní xáha<sup>n</sup> espíritú-á<sup>n</sup>:

—Vã yùhú-ndó, chi ñaha-í ñ<sup>n</sup> tnúhu váha véxi sã cúú-xí-ndó, te ío cudáí iní-ndó ndíhi nchaa ñáyi-u. <sup>11</sup> Chi vitna ní cacu ñ<sup>n</sup> tée dàcácu níhnu ñaha xii-ndó núú ùhú núú ndáhú ñúu ndíi Dávíí, te tée-á<sup>n</sup> cúú-dé Xítohó Jesucristú. <sup>12</sup> Te dàtã ñ<sup>n</sup> sèñã te naníhí-ndó tē líhli-á<sup>n</sup> yídúcú<sup>n</sup> nuu-dé dóó cáã-dé ñ<sup>n</sup> vehe quiti —câchí-xi xáha<sup>n</sup>-xi xii-güedé.

<sup>13</sup> Te òré-á<sup>n</sup> ní quexio cuéhe víhí espíritú véxi cuu<sup>n</sup> andíu ní naníhí tnáhã-xi ndíhi espíritú-á<sup>n</sup>, te ní ngúita-xi ní chíñuhu-xi Yá Ndiöxí, te càchí-xi:

<sup>14</sup> Ío càhnu cuu Yá Ndiöxí Yáá ndécú andíu, te na cùndecu váha-ni nchaa ñáyi-u cùu iní méé-gá!

Duha càchí cue espíritú-á<sup>n</sup>.

<sup>15</sup> Te òrè cuàndaa cue espíritú-án andiu, te ní ngúita cue toli-án xítñàha-güedé:

—Na quíhí<sup>n</sup>-ó ñùú Belén quíni-ó nàcuáa ní cuu, chí Dútú Ndiòxí sa ní cachí tnúhu-gá — cächí-güedé xítñàha-güedé.

<sup>16</sup> Te ní tnü-güedé ichi súuní ndíhi cuáhán-güedé, te ní naníhí-güedé tá Màriá ndíhi té Chèè, ndíhi té líhli-án cáá-dé xití ñ<sup>n</sup> vehe quiti. <sup>17</sup> Te òrè ní xini ñáhá-güedé te ní xáha<sup>n</sup>-güedé xii-yu nàcuáa ní xáha<sup>n</sup> espíritú-án xii-güedé cuendá té líhli-án. <sup>18</sup> Te nchaa ñáiyu ní tecú dóho-xi ní cuñúhu-yu nàcuáa ní cáhán-güedé. <sup>19</sup> Dico tá Màriá chí ñúhu nahi-ni iní-xi, te dicó-ni sàni iní-xi cuendá nchaa tnúhu-án. <sup>20</sup> Te cue toli-án ní natnü-güedé ichi, te ta xítñàha-güedé cuánuhú sá ïo càhnu cuu Yá Ndiòxí cuendá nchaa tnúhu ní xíndedóho-güedé, ndíhi cuendá nchaa sá ní xini-güedé, chí cuendá sá ndáa ní cuu nchaa nàcuáa ní tecú tnúhu-güedé.

#### *Ndècá-yu Jèsús cuáhán veñúhu*

<sup>21</sup> Te núú úná nduu sá ní cacu té líhli-án, te ní sáha-güedé seña ñi-dé, te ní dánáni ñàha-güedé Jèsús xii-dé, diu-ni nàcuáa ní xáha<sup>n</sup> espíritú xínú cuechi núú Yá Ndiòxí xii tá Màriá ndéé cútñàhá vátá ngúhu<sup>n</sup>-gá-dé xití-xi.

<sup>22</sup> Te sáta ní tnahá nduu, ndúu ñi-yu nàcuáa càhán<sup>n</sup> nchaa tnúhu ní chídó tnüni ndíi Moisés, te ndècá-yu té líhli-án cuáhán<sup>n</sup> ñuú Jerusálén cuendá quee túu-dé núú Dútú Ndiòxí. <sup>23</sup> Te duca<sup>n</sup> ní quidè-yu, chí duca<sup>n</sup> càhán-xi núú tütú Yá Ndiòxí sá ncháá làndú tée na càcu díhna quetúu-güexi núú-gá cuendá cundecu-ná-güexi cuendá-gá. <sup>24</sup> Te ní quidè-yu nàcuáa càhán<sup>n</sup> Yá Ndiòxí núú tütú-gá núú cächí-xi: “Canehe-ndo úú lómá àdi úú cücu quíhí<sup>n</sup> nduu táhú ñáhá Yá Ndiòxí”, duha càhán-gá núú tütú-gá.

<sup>25</sup> Te dáva-án ndécú ñ<sup>n</sup> téè nàni Mió ñuú Jerusálén. Te ïo váha iní-dé, te chíñúhu-dé Yá Ndiòxí, te ndètu-dé sáa nduu chindee ñaha Yá Ndiòxí xii ñáiyu isráèl. Te ndècu ndíhi té Mió-án Espíritú Yá Ndiòxí. <sup>26</sup> Te sa ní xáha<sup>n</sup>-xi xii-dé sá vá cütü-ni-dé, chí dacuití quíni-dé Crístú Yá tendaha Yá Ndiòxí quixi ñuyúú-a. <sup>27</sup> Te téè-án ndécá ñàha Espíritú Yá Ndiòxí xii-dé cuáhán<sup>n</sup> veñúhu càhnu sá ïo cùnnu. Te cuáhán<sup>n</sup>-yu ndíhi Jèsús veñúhu-án cuendá cadá-yu ndíhi-gá nàcuáa càhán<sup>n</sup> tnúhu ní chídó tnüni ndíi Moisés. <sup>28</sup> Te òrè ní sáa-yu, te té Mió-án ní ngúidèhé-dé Jèsús, te ní cáhán-dé sá ïo càhnu cuu Yá Ndiòxí, te ní xáha<sup>n</sup>-dè xii-gá:

<sup>29</sup> Yòhó Dútú Ndiòxí sa ní cuu dañà-n cütü-í vitna,

chí sa ní quidè-n nàcuáa ní cachí-n xii yúhú téè xinu cuechi núú-n.

<sup>30</sup> Chí sa ní xini núú-í Yá dáca cu nihnu ñaha xii ñáiyu núú úhú núú ndáhú vitna.

<sup>31</sup> Te Yáa ní tendaha-n vèxi núú ndécú ncháa ñáiyu ñuyúú-a.

<sup>32</sup> Te cütü-gá dátñá ñ<sup>n</sup> ñuhú, chí dandixi tütü-gá iní ñáiyu cuendá cutñüni iní-yu cuendá Yá Ndiòxí cueí ñá díú ñáiyu isráèl cütü-yu.

Te diu-gá cada, te canehe ñáiyu dáva-gá ñuú sá yíñúhu núú ñáiyu isráèl chí diu ñáiyu isráèl cütü-yu ñáiyu cütü cuendá-n.

Duha ní xáha<sup>n</sup> té Mió xii Yá Ndiòxí.

<sup>33</sup> Te té Chèè ndíhi náná Jèsús ní cuñúhu-yu tnúhu ní cáhán<sup>n</sup> té Mió cuendá-gá. <sup>34</sup> Te dátñüni té Mió ní xicá<sup>n</sup> táhú-dé núú Yá Ndiòxí cuendá-yu, te xáha<sup>n</sup>-dè xii tá Màriá náná Jèsús:

—Cundedóho tnúhu na càhán-í-a, té líhli-a ní nduu táhú-dé nacanu ichi-dé dáva ñáiyu isráèl ichi Yá Ndiòxí, te dáva-yu vá tnüñ-yu tnúhu càhán-dé, te ñáiyu-án cuita nihnú-yu, te cada-dé nàcuáa cutñüni iní ñáiyu sá Yá Ndiòxí ní tendaha ñàha-gá xii-dé, dico vá quíndáa iní-yu, chí daquèè tíhú ñáhá-yu xii-dé. <sup>35</sup> Te duca<sup>n</sup> te cutñüni nàcuáa sàni iní ñ<sup>n</sup> ñ<sup>n</sup> ñáiyu. Dico sá cütü-xi yòhó chí ïo cada ndáhú-xi iní-n, chí súuní dátñá sá ní nícuèhé iní-n càda-xi — cachí-dé xáha<sup>n</sup>-dè xii tá Màriá.

<sup>36</sup> Te xíá<sup>n</sup> ndécú tñáhá ñ<sup>n</sup> ñaha càhán<sup>n</sup> tnúhu Yá Ndiòxí nání-án Aná, te tátá-a<sup>n</sup> ní xínani-dé Fànuél ñani tñáhá ndíi Asér. Te ñaha-án sa ní sahnu víhi-a<sup>n</sup>, te cuechi-ni-a<sup>n</sup> ní tñándaha-a<sup>n</sup> te úsá-ni cuíá ní xíndecu-a<sup>n</sup> ndíhi yíi-a<sup>n</sup>. <sup>37</sup> Te ní quendóo quèe-a<sup>n</sup>, te sa ñúhu-a<sup>n</sup> cümídicó cümü cuíá-a<sup>n</sup>. Te ñá tütü ní xóo quee-a<sup>n</sup> veñúhu càhnu sá ïo cùnnu, chí nduu níú ní xóo chíñúhu-a<sup>n</sup> Dútú Ndiòxí, te áma ñá tütü tñáhí ná ní xóo caxi-a<sup>n</sup> ní xóo cáhán<sup>n</sup> ndíhi-a<sup>n</sup> Yá Ndiòxí. <sup>38</sup> Te diu-ni òrè ndécú-yu ndíhi Jèsús ní quexio-a<sup>n</sup> núu-yu, te ní ndacá<sup>n</sup> táhú-án núú Yá Ndiòxí cuendá sá ní xini-a<sup>n</sup> Jèsús, te dátñüni ní ngúita-a<sup>n</sup> càhán<sup>n</sup> váha-a<sup>n</sup> cuendá-gá núú ncháa ñáiyu, ñáiyu ndètu quíni sáa nduu dáca cu Yá Ndiòxí ñáiyu Jerusálén núú tñündóho tnúhu ndáhú.

#### *Cuánuhú-yu ñuú Nazàrèt*

<sup>39</sup> Te sáta ní quidè-yu nchaa nàcuáa càhán<sup>n</sup> tnúhu Yá Ndiòxí, te cuánuhú-yu ñuú Nazàrèt núú ndécú tñáhí-yu, te ñuú-án yíndèhu-xi distritú Galilea. <sup>40</sup> Te té líhli nàni Jèsús-án tá sàhnu-dé, te ta níhí ndéé-dé cuáhán<sup>n</sup>, te duca<sup>n</sup> ïo váha ta sáa sá xini tñüni-dé cuáhán<sup>n</sup>, chí Yá Ndiòxí ndécú ndíhi ñàha-gá xii-dé.

#### *Jèsús ndécú-gá veñúhu*

<sup>41</sup> Te ndi tñáhá cuíá ní xóo quíhí<sup>n</sup> té Chèè ndíhi náná Jèsús vico pàscuá ñuú Jerusálén.

<sup>42</sup> Te cútñàhá ní chítú Jèsús úxúú cuíá-gá, te cuáhán<sup>n</sup>-yu ndíhi-gá ñuú Jerusálén vico pàscuá, chí duca<sup>n</sup> tñáhí quidè-yu. <sup>43</sup> Te òrè ní

yáha vico, te ní natnî-yu ichi cuánuhú-yu, te ní quendóo-gá ñuú Jerusalén, te ní náná-gá, te ní tē Chèé ñá túú ní xíní ní quendóo-gá. <sup>44</sup> Chi ní sani iní-yu sá ñútnáhá-gá tnuú nchaa ñáyiú ní sáhá<sup>n</sup> vico cuánuhú. Te ní xúhu<sup>n</sup>-yu ñ<sup>n</sup> nduú ichi ta ndücu tnúhu-yu-gá núú ncháa ñani tnáhá-yu, ndíhi núú ncháa ñáyiú xíní tnáhá ndíhi-yu, <sup>45</sup> te ñá túú ní naníhí ñáhá-yu xii-gá. Núú ní nacuícú-yu cuánuhú tucú-yu ñuú Jerusalén cuendá yacá<sup>n</sup> nanducu ñáhá-yu xii-gá.

<sup>46</sup> Te núú ùní nduú sá ní dana núú ñáhá-yu xii-gá, te ní naníhí ñáhá-yu núcúo-gá xití veñúhu cahnu sá ío cúnuu tnuú cue tée dàcuaha ñaha xii-yu nchaa tnúhu ní chídó tnúni ndíi Moisés, te ndedóho ñaha-gá xii-güedé, te nándi sá ndúcú tnúhu-gá núú-güedé. <sup>47</sup> Te nchaa cue tée xindedóho ñaha xii-gá xicuñúhu-güedé sá ío váha sáa sá xíní tnúni-gá, te ío váha nihí-gá tnúhu ndanchocáva-gá. <sup>48</sup> Te òré ní xíní ñáhá tē Chèé ndíhi náná-gá xii-gá, te ío ní cuñúhu-yu, te ní xáha<sup>n</sup> náná-gá xii-gá:

—Yòhó déhe-í, ¿ná cuendá duca<sup>n</sup> ní quide ñaha-n xii-ndí? Te tátá-n ndíhi yúhú ndíhú iní-ndí xicá nanducu ñaha-ndí xii-n —càchí-xi xáha<sup>n</sup>-xi xii-gá.

<sup>49</sup> Te ní xáha<sup>n</sup> Jèsús xii-yu:

—¿Ná cuendá nánducu ñaha-ndo? ¿Náa ñá túú xíní-ndó sá núú chiú<sup>n</sup> Tàtá-í tâu-í caca cuu-í-á<sup>n</sup>? —càchí-gá xáha<sup>n</sup>-gá xii-yu.

<sup>50</sup> Dico mèe-yu ñá túú ní tēcú tnúni-yu nàcuáa ní xáha<sup>n</sup>-gá.

<sup>51</sup> Te sátá dúcá<sup>n</sup> te cuánuhú ndíhi ñáhá-yu xii-gá ñuú Nazàret, te ío ní sándáa iní ñáhá-gá xii-yu. Te nchaa sá ní quide-gá-á<sup>n</sup> ní xúhu<sup>n</sup> nahi-ni iní náná-gá. <sup>52</sup> Te Jèsús duca<sup>n</sup>-ni ta sàhnu-gá cuáhá<sup>n</sup>, te ta sáa-gá sá xíní tnúni-gá cuáhá<sup>n</sup>, te duca<sup>n</sup> cùdiu-gá núú Yá Ndióxi, ndíhi núú ncháa ñáyiú.

### 3

*Te Juáa tée dàcuandute ñaha xii ñáyiú càhá<sup>n</sup>-dé tnúhu Yá Ndióxi xití yucu (Mt. 3:1-12; Mr. 1:1-8; Jn. 1:19-28)*

<sup>1</sup> Te ní cuu sáhú<sup>n</sup> cuiá sá yíndàha té Tiberiú cuehé nació<sup>n</sup>, te dàvá-á<sup>n</sup> ní cunuu té Pilatú distritú Júdeá, te té Hèrodés ní cunuu-dé distritú Galileá, te ñani-dé té Lípé ní cunuu-dé distritú Itureá ndíhi ingá distritú nání Tràconite, te té Lisaniás ní cunuu-dé distritú Abiliniá. <sup>2</sup> Te té Anás ndíhi té Caifás ní cuu-güedé dútú cúnúu. Te dàvá-á<sup>n</sup> ní cáhá<sup>n</sup> ndíhi ñaha Yá Ndióxi xii té Juáa déhe té Zacariá xití yucu sá quihí<sup>n</sup>-dé cáhá<sup>n</sup>-dé tnúhu-gá núú ñáyiú. <sup>3</sup> Te té Juáa ní yáha-dé nchaa ñuú cáa yàtni yúte Jòrdán, te xáha<sup>n</sup>-dé xii nchaa ñáyiú:

—Chí dándixi túu iní sá ñá túú quide váha-ndo, te daña-ndo ncháa ichi cuehé

ichi duha ndècu-ndo, te cuandute-ndo, te duca<sup>n</sup> te cada càhnu iní Yá Ndióxi nchaa yicá cuèchi-ndo —duha ní xáha<sup>n</sup>-dé xii-yu.

<sup>4</sup> Te duca<sup>n</sup> ní quide-dé chi ní quee ndáá-xi nàcuáa ní chídó tnúni ndíi Chàia tée ní xóo cáhá<sup>n</sup> tnúhu Yá Ndióxi ndéé sanaha núú tütú ndíi núú càchí-xi:

Tēcú càhá<sup>n</sup> níhi ñ<sup>n</sup> tée yíhi xití yucu, te xáha<sup>n</sup>-dé xii ñáyiú:

“Chí dáña ncháa ichi cuehé ichi duha ndècu-ndo, te tnii-ndo ichi váha, te duca<sup>n</sup> càda-ndo cuendá cundecu túha-ndo, chí véxi Yaa ío cúnúu.

<sup>5</sup> Te nchaa núú cúnú nachitú, te nchaa tindúu ndíhi nchaa yucu ngoyo nihnu cuendá nduu ndáa, te nchaa ichi ñá túú cuáhá<sup>n</sup> ndáa nduu ndáa, te nchaa ichi ñá túú càváha nduu váha.

<sup>6</sup> Te nchaa ñáyiú ñuyúú-a nihí-yu tnúhu sá Yá Ndióxi véxi-gá dàcácu nihnu ñaha-gá xii-yu núú ùhú núú ndàhú.”

Duha ní chídó tnúni ndíi Chàia núú tütú ndíi.

<sup>7</sup> Te òré ní xica ñáyiú cuáhá<sup>n</sup>-yu cuendá dacuandute ñaha té Juáa xii-yu, te ní xáha<sup>n</sup>-dé:

—¿Nchaa nchòhó cúú-ndó dàtná ñ<sup>n</sup> cóo déé<sup>n</sup> chí ío cuihna iní-ndó! ¿Te nása ní cuu núú tnáhá nchòhó ndúcú-ndó nàcuáa cácu nihnu-ndo núú tnúndóho cahnu vihi sá tá cüyatni ñaha xii-ndo véxi-í? <sup>8</sup> Te chí cadá váha vitna cuendá duca<sup>n</sup> cùtnuní sá ní dáña-ndó ncháa ichi cuehé ichi duha ndècu-ndo. Te vá càchí-ndó sá ío càhnu cuu-ndo cuendá sá cúú-ndó ñani tnáhá ndíi Abrahám, chí cuié ndéé yúú te ndacu Yá Ndióxi ndada-gá ñáyiú te cuú-yu ñani tnáhá ndíi Abrahám. <sup>9</sup> Te caá chí ndècu túha-xi sá quèhndé-xi nchaa yutnu sá ñá túú càváha sávidí-xi, chí nchaa yutnu-á<sup>n</sup> tēhndé-xi te cuánguee-xi núú ñúhú càyú-xi. Te duha sàtnahá-xi ndoho nchaa ñáyiú ñá túú quide váha, chí nchaa ñáyiú duca<sup>n</sup> ñá túú quide váha cúu-yu dàtná nchaa yutnu sá ñá túú càváha sávidí-xi. —càchí-dé xáha<sup>n</sup>-dé xii-yu.

<sup>10</sup> Te ní xicá<sup>n</sup> tnúhu-yu núú-dé, te xáhã<sup>n</sup>-yu:

—¿Te nása cada-ndí váin? —càchí-yu xáhã<sup>n</sup>-yu xii-dé.

<sup>11</sup> Te xáha<sup>n</sup>-dé:

—Te núú ndèdacàa-ndo ndecu ndíhi-ndo úú dóó te cuañaha-ndo ñ<sup>n</sup> xii ñáyiú ñá túú ndècu ndíhi, ádi núú ndècu ndíhi-ndo sá nchító-ó te cuáhá-ndó-yu na càxi-yu —càchí-dé xáha<sup>n</sup>-dé xii-yu.

<sup>12</sup> Te ní quexio ñ<sup>n</sup> úú cue tée cuihna iní-xi quide cobrá ñáhá xii ñáyiú cuendá impuèstú cuendá cuandute-güedé, te ní xicá<sup>n</sup> tnúhu-güedé núú té Juáa, te xáha<sup>n</sup>-güedé:

—Mèstrú, ¿te nása cada-ndí cuendá cuu váha iní Yá Ndióxi-í? —càchí-güedé xáha<sup>n</sup>-güedé xii-dé.

<sup>13</sup> Te te Juää ní xáha<sup>n</sup>-dê:

—Vá cuidó-ndó cada cobrá-ndó ñâyiu — cächí-dé xáha<sup>n</sup>-dê xii-güedê.

<sup>14</sup> Te tnàhá ì<sup>n</sup> úú cue téé cùu sandadú xíndecu-á<sup>n</sup> ní xicá<sup>n</sup> tnúhú-güedê núú tē Juää, te xáha<sup>n</sup>-güedê:

—Te nchúhú ñnása cada-ndí cuendá cuu váha iní Yá Ndióxi-í? —cächí-güedê xáha<sup>n</sup>-güedê xii-dê.

Te ní xáha<sup>n</sup> tē Juää:

—Vá quéndê-ndó sã néhé tnàha ñâyiu-ndo, te ni vã dácãa díquí-ndó-yu ì<sup>n</sup> sã ñã túú ná quidê-yu, te nduu vétú iní-ndó nãcuáa ñuhu yáhu-ndo —cächí-dé xáha<sup>n</sup>-dê xii-güedê.

<sup>15</sup> Te nchaa ñâyiu xíndetu sá quíxi Crístú sãni ì<sup>n</sup> sãni úú iní-yu núu sá díú Crístú Yá tendaha Yá Ndióxi quíxi ñuyúú-a cùu te Juää àdi ñáhã. <sup>16</sup> Dico tē Juää ní cáhá<sup>n</sup> ndodo-dé núú-yu nchaa-yu, te xáha<sup>n</sup>-dê:

—Na cächí tnúhu ndáá-í xii-ndo sã yúhú véxi-í sã cuendá-ní dacúndute ñaha-í xii-ndo dátñã ní cachí Yá Ndióxi, dico nchicú<sup>n</sup> ingá téé véxi, te tē-á<sup>n</sup> taxi-dé Espíritú Yá Ndióxi cundecu ndihí-ndo, te cùu-xi dátñã ì<sup>n</sup> ñuhú, chi ndada ndoo ndada nine-xi iní-ndó. Te tē-á<sup>n</sup> ìo-gã cúnúu-dé dacúúxi yúhú, chi yúhú cùú-í ì<sup>n</sup> tēé duu<sup>n</sup> duu<sup>n</sup> ñã túú tãú-í nandaxi-í cuèdicó ñi chãú-dé dico quidê-í chiú<sup>n</sup>-dê. <sup>17</sup> Te tē-á<sup>n</sup> sa véxi túha-dé sã cáda dí<sup>n</sup> ñaha-dé xii-o dátñã quidê ñâyiu ndada ndoo triú, chi ñâyiu-á<sup>n</sup> sa néhe túha-ná-yu yaxi<sup>n</sup>-yu òrè ndãñãni cuendá ndada ndoo-yu, te òrè ndáda ndóo-yu triú-á<sup>n</sup> te dàquee dí<sup>n</sup>-yu mihi-xi, te tàxúha-yu mee-nã triú-á<sup>n</sup>, te mihi-xi-á<sup>n</sup> sãhmí-yu. Te dátñã quidê-yu mihi triú-á<sup>n</sup> duca<sup>n</sup> sãtnahã-xi cada ñaha tē-á<sup>n</sup> xii nchaa ñâyiu ñã túú quidê váha, chi daquihí<sup>n</sup> ñáhã-dê xii-yu núú ñuhú núú càyú, te ñuhú-á<sup>n</sup> ñã túú tnàhí ndãhvã —cächí-dé xáha<sup>n</sup>-dê xii-yu.

<sup>18</sup> Te titní víhí-gã tnúhu váha ní xáha<sup>n</sup> tē Juää xii-yu òrè ní dásàhú ñáhã-dê. <sup>19</sup> Te ní cáhá<sup>n</sup>-dê dóho te Herodés cuendá sã ndécã-dê ì<sup>n</sup> ñaha nãni Herodiás ñaha ní cándecañani-dé té Lipé, te ní xáha<sup>n</sup>-dê cuendá nchaa dava-gã sã cuèhé sã dúhá quidê-dê. <sup>20</sup> Dico tē Herodés ñã túú ní quidê cuendá-dé tnúhu ní cáhá<sup>n</sup> tē Juää, chi néhé-gã tucu ní quidê-dé, chi da vecaa ní chihí-dé tē Juää.

*Sãndute Jesús*

(Mt. 3:13-17; Mr. 1:9-11)

<sup>21</sup> Te òrè dacúndute tē Juää nchaa ñâyiu, te tnàhá Jesús ní dacúndute ñaha-dé xii-gã. Te nini cáhá<sup>n</sup> ndihí-gã Dútú Ndióxi ní nacaá<sup>n</sup> andiu, <sup>22</sup> te ní quee Espíritú Yá Ndióxi véxi cuu<sup>n</sup> túu-xi, te càa-xi dátñã cáá ì<sup>n</sup> lómã, te òrè-á<sup>n</sup> ní tecú ní cáhá<sup>n</sup> Yá Ndióxi ndéé andiu, te xáha<sup>n</sup>-gã xii Jesús:

—Yòhó cùú-n Dêhe-í téé ìo cùu iní-í, te ìo cùú ì<sup>n</sup> ñáhã-í xii-n —cächí-gã xáha<sup>n</sup>-gã xii Jesús.

*Cue tē ní xíndecu díhna-gã ñuyúú-a dacúúxi Xítoho Jesucristú*

(Mt. 1:1-17)

<sup>23</sup> Te ndecu Jesús dátñã ócò úxi cuiá-gã cúnáhã ní chisaha-gã chiú<sup>n</sup> ní táhú Tãtã-gã Dútú Ndióxi cada-gã. Te ní cuu-gã déhe tē Chèè chi duca<sup>n</sup> sãni iní ñâyiu ñuyúú-a. Te tē Chèè-á<sup>n</sup> ní cuu-dé déhe tē Èlì, <sup>24</sup> te tē-á<sup>n</sup> ní cuu-dé déhe tē Màtát. Te tē Màtát-á<sup>n</sup> ní cuu-dé déhe tē Lèví, te tē-á<sup>n</sup> ní cuu-dé déhe tē Mèlquí. Te tē Mèlquí-á<sup>n</sup> ní cuu-dé déhe tē Jàná, te tē-á<sup>n</sup> ní cuu-dé déhe tē Chèè. <sup>25</sup> Te tē Chèè-á<sup>n</sup> ní cuu-dé déhe tē Matatías, te tē-á<sup>n</sup> ní cuu-dé déhe tē Amós. Te tē Amós-á<sup>n</sup> ní cuu-dé déhe tē Nàhúm, te tē-á<sup>n</sup> ní cuu-dé déhe tē Èslí. Te tē Èslí-á<sup>n</sup> ní cuu-dé déhe tē Nagái, <sup>26</sup> te tē-á<sup>n</sup> ní cuu-dé déhe tē Màát. Te tē Màát-á<sup>n</sup> ní cuu-dé déhe tē Matatías, te tē-á<sup>n</sup> ní cuu-dé déhe tē Semèi. Te tē Semèi-á<sup>n</sup> ní cuu-dé déhe tē Chèè, te tē-á<sup>n</sup> ní cuu-dé déhe tē Jùdá. <sup>27</sup> Te tē Jùdá-á<sup>n</sup> ní cuu-dé déhe tē Joanã, tē tē-á<sup>n</sup> ní cuu-dé déhe tē Rèsã. Te tē Rèsã-á<sup>n</sup> ní cuu-dé déhe tē Zorobàbél, te tē-á<sup>n</sup> ní cuu-dé déhe tē Salatiél. Te tē Salatiél-á<sup>n</sup> ní cuu-dé déhe tē Nèrí, <sup>28</sup> te tē-á<sup>n</sup> ní cuu-dé déhe tē Mèlquí. Te tē Mèlquí-á<sup>n</sup> ní cuu-dé déhe tē Àdí, te tē-á<sup>n</sup> ní cuu-dé déhe tē Còsám. Te tē Còsám-á<sup>n</sup> ní cuu-dé déhe tē Elmòdám, te tē-á<sup>n</sup> ní cuu-dé déhe tē Èr. <sup>29</sup> Te tē Èr-á<sup>n</sup> ní cuu-dé déhe tē Jòsué, te tē-á<sup>n</sup> ní cuu-dé déhe tē Elièzér. Te tē Elièzér-á<sup>n</sup> ní cuu-dé déhe tē Jòrim, te tē-á<sup>n</sup> ní cuu-dé déhe tē Màtát. <sup>30</sup> Te tē Màtát-á<sup>n</sup> ní cuu-dé déhe tē Lèví, te tē-á<sup>n</sup> ní cuu-dé déhe tē Mió. Te tē Mió-á<sup>n</sup> ní cuu-dé déhe tē Jùdá, te tē-á<sup>n</sup> ní cuu-dé déhe tē Chèè. Te tē Chèè-á<sup>n</sup> ní cuu-dé déhe tē Jònán, te tē-á<sup>n</sup> ní cuu-dé déhe tē Eliàquím. <sup>31</sup> Te tē Eliàquím-á<sup>n</sup> ní cuu-dé déhe tē Mèleá, te tē-á<sup>n</sup> ní cuu-dé déhe tē Mainán. Te tē Mainán-á<sup>n</sup> ní cuu-dé déhe tē Nàtán. <sup>32</sup> Te tē Nàtán-á<sup>n</sup> ní cuu-dé déhe tē Dàvíi, te tē-á<sup>n</sup> ní cuu-dé déhe tē Isái. Te tē Isái-á<sup>n</sup> ní cuu-dé déhe tē Òbéd, te tē-á<sup>n</sup> ní cuu-dé déhe tē Bòoz. Te tē Bòoz-á<sup>n</sup> ní cuu-dé déhe tē Sãlmón, te tē-á<sup>n</sup> ní cuu-dé déhe tē Naàson. <sup>33</sup> Te tē Naàson-á<sup>n</sup> ní cuu-dé déhe tē Aminadáb, te tē-á<sup>n</sup> ní cuu-dé déhe tē Àrám. Te tē Àrám-á<sup>n</sup> ní cuu-dé déhe tē Èsróm, te tē-á<sup>n</sup> ní cuu-dé déhe tē Fàrés. Te tē Fàrés-á<sup>n</sup> ní cuu-dé déhe tē Jùdá, <sup>34</sup> te tē-á<sup>n</sup> ní cuu-dé déhe tē Jàcób. Te tē Jàcób-á<sup>n</sup> ní cuu-dé déhe tē Isàac, te tē-á<sup>n</sup> ní cuu-dé déhe tē Àbrahãm. Te tē Àbrahãm-á<sup>n</sup> ní cuu-dé déhe tē Tàrè, te tē-á<sup>n</sup> ní cuu-dé déhe tē Nàcór. <sup>35</sup> Te tē Nàcór-á<sup>n</sup> ní cuu-dé déhe tē Serúg, te tē-á<sup>n</sup> ní cuu-dé déhe tē Ragàú. Te tē Ragàú-á<sup>n</sup> ní cuu-dé déhe tē Pèlèg, te tē-á<sup>n</sup> ní cuu-dé déhe



té Hèbér. Te té Hèbér-án nǐ cuu-dé déhe té Sálá, <sup>36</sup> te té-án nǐ cuu-dé déhe té Cainán. Te té Cainán-án nǐ cuu-dé déhe té Arfâxád, te té-án nǐ cuu-dé déhe té Sêm. Te té Sêm-án nǐ cuu-dé déhe té Nôé, te té-án nǐ cuu-dé déhe té Láméc. <sup>37</sup> Te té Láméc-án nǐ cuu-dé déhe té Matusalén, te té-án nǐ cuu-dé déhe té Ênóc. Te té Ênóc-án nǐ cuu-dé déhe té Jàréd, te té-án nǐ cuu-dé déhe té Mahalaléél. Te té Mahalaléél-án nǐ cuu-dé déhe té Cainán, <sup>38</sup> te té-án nǐ cuu-dé déhe té Ênós. Te té Ênós-án nǐ cuu-dé déhe té Sêt, te té-án nǐ cuu-dé déhe té Ádán. Te té Ádán-án chi mee Yá Ndióxi ní cadúha ndaha ñaha-gá xii-dé.

#### 4

*Sácuíhná quidé yica-xi cada Jesús sá ña túú tau-gá cada-gá ní cùu*

(Mt. 4:1-11; Mr. 1:12-13)

<sup>1</sup> Te Jèsús ní naquehe<sup>n</sup>-gá ichi yuhu yúte Jordán cuánuhú-gá. Te sa ndècu ndihí-gá Espiritú Yá Ndióxi, te Espiritú-án ndécá ñaha-xi xii-gá cuáhá<sup>n</sup> ì<sup>n</sup> xití yucu. <sup>2</sup> Te yácá<sup>n</sup> ní xindecu-gá údico nduu, te sácuíhná ní cuiní-xi coto ndeé ñáhá-xi xii-gá te núu ndisa sá vǎ cadá-gá ì<sup>n</sup> sá ña túú tau-gá cada-gá. Te ña túú tñahí ná ní xèxi-gá ndi údico nduu-án, te sáta dúcá<sup>n</sup> te ní xicá<sup>n</sup> iní-gá caxi-gá. <sup>3</sup> Te sácuíhná-án ní xáha<sup>n</sup>-xi xii-gá:

—Te núu ndisa sá cúu-n Déhe Yá Ndióxi, te cúñaha xii yúu-a na nduu-xi paá —càchí-xi xáha<sup>n</sup>-xi xii-gá.

<sup>4</sup> Te Jèsús ní xáha<sup>n</sup>-gá xii-xi:

—Núú tütú Yá Ndióxi càchí-xi: “Ñá díú mèe-ni paá candeca-xi iní ñáyiu, chi tñahá nchaa tñúhu càhá<sup>n</sup> Yá Ndióxi candeca-xi iní-yu”, duha càchí-xi núú tütú-gá —càchí-gá xáha<sup>n</sup>-gá xii-xi.

<sup>5</sup> Te dátñuní sácuíhná ndécá ñaha-xi xii-gá cuáhá<sup>n</sup> ì<sup>n</sup> núú tindúú dúcú<sup>n</sup>, te uu<sup>n</sup> ní dánèhé núú ñáhá-xi xii-gá nchaandi tñúh nació<sup>n</sup> cáá ñùyíú. <sup>6</sup> Te ní xáha<sup>n</sup>-xi xii-gá:

—Yúhú cada-í, te taxi tñuní-n ncháa-ndi tñúh nació<sup>n</sup>-a ndihí nchaa sá vǎha ío díu-ni nchaa nació<sup>n</sup>-a, te cachí ñáyiu sá ío cùnuu-n, chi yúhú cúú cuendá-í nchaa sá ío nchaa nació<sup>n</sup>-a, te ndédani cáa ñáyiu cùu iní-í te cúñaha-í xii-yu taxi tñuní-yu. <sup>7</sup> Te núu ni yúhu ní iní-n chiñuhu ñaha-n xii-í ña, te nchaa taxi-í cuu cuendá-n —càchí-xi xáha<sup>n</sup>-xi xii-gá.

<sup>8</sup> Te Jèsús ní xáha<sup>n</sup>-gá xii-xi:

—Xocuíñi yohó sácuíhná núú ndécú-í-a, chi vǎ cúú cada-í nàcuáa càchí-n chi núú tütú Yá Ndióxi càchí-xi: “Chiñuhu-ndo Dütú Ndióxi Yaa cúú Ndióxi-ndó, te ì<sup>n</sup> díí ní-gá cada-ndo ncháa nacuáa càhá<sup>n</sup>-gá”, duha càchí-xi núú tütú-gá —càchí-gá xáha<sup>n</sup>-gá xii-xi.

<sup>9</sup> Te sácuíhná ndécá ñaha tucu-xi xii-gá cuáhá<sup>n</sup> ñuú Jerusalén, te ní xáha<sup>n</sup>-xi xii-gá

cuásaá-gá díquí veñúhu càñnu sá ío cùnuu, te ní xáha<sup>n</sup> tucu-xi:

—Te núu ndisa cùu-n Déhe Yá Ndióxi te cuandèe ndava ndeé núú ñúhú <sup>10</sup> cuendá quee ndáa-xi nàcuáa càhá<sup>n</sup>-xi núú tütú Yá Ndióxi núú càchí-xi:

Yá Ndióxi tendahá-gǎ cue espíritú xínú cuèchi núú-gǎ quixi-xi coto ñaha-xi xii-n.

<sup>11</sup> Te núú ndáhá-xi càundodo-n cuendá sá vǎ dānicuèhé yúú sáhá-n,

duha càchí-xi núú tütú-gǎ —càchí sácuíhná xáha<sup>n</sup>-xi xii-gǎ.

<sup>12</sup> Te Jèsús ní xáha<sup>n</sup>-gǎ xii-xi:

—Te càchí tucu-xi núú tütú Yá Ndióxi: “Vǎ cáni iní-n coto ndeé-n Dütú Ndióxi Yaa cúú Ndióxi-n núu ndisa sá dácácu nihnu ñaha-gǎ xii-n cuendá ì<sup>n</sup> sá sání iní-n càda-n sá cúú-xi mèe-n”, duha càchí-xi núú tütú-gǎ —càchí-gǎ xáha<sup>n</sup>-gǎ xii-xi.

<sup>13</sup> Te sáta dúcá<sup>n</sup> te sácuíhná ña túú-gǎ ní cùtnuní iní-xi nása cada-xi Jèsús, núu xiá<sup>n</sup> ní xica-xi cuáhá<sup>n</sup>-xi ní sanaa tnaa-xi.

*Distritú Galiléa ní chisaha Jèsús chi<sup>n</sup> ní táhú Tátá-gá Dütú Ndióxi cada-gá*

(Mt. 4:12-17; Mr. 1:14-15)

<sup>14</sup> Te Jèsús cuáhá<sup>n</sup> tucu-gǎ distritú Galiléa, dico sa ndècu ndihí-gǎ Espiritú Yá Ndióxi, te ní cáa xico xiá<sup>n</sup> ní nihí-yu tñúhu nchaa nàcuáa quide-gǎ. <sup>15</sup> Te ndi tñahá ñuú cuáhá<sup>n</sup>-gǎ duca<sup>n</sup> cuānguihu-gǎ veñúhu-yu dānehé ñáhá-gǎ xii-yu, te nchaa-yu càchí-yu sá ío càñnu cuu-gǎ.

*Jèsús ndécú-gǎ ñuú Nazàrét*

(Mt. 13:53-58; Mr. 6:1-6)

<sup>16</sup> Te Jèsús ní sáhá<sup>n</sup>-gǎ ñuú Nazàrét ñuú núú ní sañnu-gǎ. Te nduu ndètatú ñáyiu ní quíhu-gǎ veñúhu, chi duca<sup>n</sup> tñahí quide-gǎ, te ní ngúnutñi-gǎ dácuaà-gǎ tutú ndeé tñúhu Yá Ndióxi. <sup>17</sup> Te ní sáñaha-güedé xii-gǎ tutú ndeé tñúhu ní cáhá<sup>n</sup> ndí Chaiá téé ní xóo cáhá<sup>n</sup> tñúhu Yá Ndióxi ndeé sanaha, te òré ní nandicá-gǎ núú tütú-án te ní naníhí-gǎ núú càchí-xi:

<sup>18</sup> Espiritú Yá Ndióxi ndécú ndihí ñaha-xi xii-í,

chi ní cachí-gǎ sǎ càhá<sup>n</sup>-í tñúhu-gǎ sǎ cúú-xi ñáyiu ndàhú,

ñáyiu vátá cundédohó tñahí-gǎ.

Te véxi-í cuendá vǎ ndihú-gǎ iní ñáyiu ña túú ndècu váha iní-xi,

te cue ñáyiu sa nèhe váha ñaha-nǎ yucu ñávaha dàcácu nihnu-í-yu.

Te cue ñáyiu cuáa nacaá<sup>n</sup>-í núu-yu,

te ñáyiu ndóho dandoho ñaha tñaha ñáyiu-xi taunihnu-í-yu.

<sup>19</sup> Te cúñaha-í xii ñáyiu sǎ sǎa nduu càda Yá Ndióxi ì<sup>n</sup> sǎ vǎha sǎ cúú-xi-yu.

Duha càchí-xi núú tütú dácuaà-gǎ.

20 Te Jèsús ní nacadí-gá núú tütú-án, te ní nacúhá-gá ìᵐ tée xínu cuechi veñúhu-án, te ní ngóo-gá. Te nchaa ñáyiú yìhi veñúhu ñá núú nùú-yu ndèhe ñahá-yu xii-gá. 21 Te xáha<sup>n</sup>-gá xii-yu:

—Mei vitna ní quee ndáá-xi nàcuáa càhá<sup>n</sup>-xi núú tütú Yá Ndióxi —càchi-gá xáha<sup>n</sup>-gá xii-yu.

22 Te nchaa-yu ní cáhá<sup>n</sup> váha-yu cuèndá-gá, te ní cuñúhu-yu tnúhu váha càhá<sup>n</sup>-gá, te xítñahá-yu:

—¿Te náa ñá díú tée-a cùu-dé déhe té Chéé-á<sup>n</sup>? —càchi-yu xítñahá-yu.

23 Te Jèsús ní xáha<sup>n</sup>-gá:

—Na càchi tnúhu ndáá-í xii-ndo sá ñúhú ìní-ndó cùñaha-ndo xii-í ìᵐ tnúhu cùtexínu sá càhá<sup>n</sup> méé-ndó, te quesaha-ndo: “Nátátná cada tátna mee-n”, duha quesaha-ndo. Te cùñaha tucu-ndo xii-í: “Sa ní níhí-ndí tnúhu nàcuáa ní quide-n ñúú Capèrnaúm, te cada-n tnáhá ñúú núú ní sahnú-n”, duha quesaha-ndo —càchi-gá xáha<sup>n</sup>-gá xii-yu.

24 Te ní xáha<sup>n</sup> tucu-gá:

—Na càchi tnúhu ndáá-í xii-ndo sá ñi ìᵐ tée càhá<sup>n</sup> tnúhu Yá Ndióxi ñá túú tnáhá ìní ñáhá ñáyiú ñúú-dé. 25 Te na càchi tnúhu ndáá tucu-í xii-ndo sá ìo vài ñáyiú díhí ñáyiú quèé ní xíndecu nació<sup>n</sup> Isràél cùtnáhá ní xíndecu té Elías cùtnáhá ñá túú ní cùu<sup>n</sup> dáú ùní cuíá dawa, te dàvá-án ìo ní ndoho ñáyiú docó nitùhú nació<sup>n</sup>. 26 Dico Yá Ndióxi ñá túú ní tэндaha-gá té Elías quíhí<sup>n</sup>-dé vehe ndédani càa ñáyiú díhí-án, chi vehe ìᵐ ñaha ñúú Sàreptá ní xáha<sup>n</sup>-gá ní sáhá<sup>n</sup>-dé, te ñúú-án cáá yàtni-xi ñúú Sìdon. 27 Te ní xíndecu tucu ìngá tée ní xóo cáhá<sup>n</sup> tnúhu Yá Ndióxi ndéé sanaha, te tée-án ní xínani-dé Eliseú, te diu-ní dàvá-án ní xíndecu tucu vài ñáyiú cùhú nació<sup>n</sup> Isràél, ñáyiú ní tnahá cuéhé sá dátèhyú nihnu-xi yiqui cùñú-yu dico ñá túú ní ndúha-yu, chi ìᵐ-dìi-ni té Nàamán tée distritú Sìria ní ndúha-dé —càchi-gá xáha<sup>n</sup>-gá xii-yu.

28 Te sá dúcá<sup>n</sup> ní cáhá<sup>n</sup>-gá te xiá<sup>n</sup> ní cudéé<sup>n</sup> víhí nchàa ñáyiú yìhi veñúhu-án núú-gá. 29 Te ní queñuhú-yu Jèsús yuhu dèhvá tìndúú núú cáá ñúú-yu-án cuèndá yàcá<sup>n</sup> dàquée-yu-gá dèhvá ní cùu. 30 Dico Jèsús vii-ní ní quee-gá tnuú-yu cuáhá<sup>n</sup>-gá.

*Èᵐ tée yìhi ñaha espíritú cùndìhi yucu ñáváha*

(Mt. 1:21-28)

31 Te Jèsús cuáhá<sup>n</sup>-gá ñúú Capèrnaúm, te ñúú-án yíndèhu-xi distritú Galilea. Te yàcá<sup>n</sup> ndécú-gá ní tnahá nduu ndétatú ñáyiú, te ní ngúita-gá dácuàha-gá ñáyiú. 32 Te xicuñúhu-yu nchaa nàcuáa dànehé ñahá-gá xii-yu, chi càhá<sup>n</sup>-gá dàtná càhá<sup>n</sup> ìᵐ tée cùnuu, te cùnuu ndisa-gá.

33 Te xití veñúhu yìhi ìᵐ tée yìhi ñaha ìᵐ espíritú cùndìhi yucu ñáváha, te espíritú-án ní quide-xi níhi ní cáhá<sup>n</sup> tée-án, te xáha<sup>n</sup>-dè xii Jèsús:

34 —¿Te ná cuíni yòhó Jèsús tée ñúú Nazàret cada ñaha-n xii-ndí núu véxi-n núú ndécú-ndí-í? ¿Á<sup>n</sup> véxi-n dànaa ñaha-n xii-ndí? Chi yúhú xini ñahá-í xii-n sá cúu-n ìᵐ tée ñá túú tnáhí cuéchi-xi chi núú Yá Ndióxi ní quee-n véxi-n ñuyúú-a —càchi-dé xáha<sup>n</sup>-dè xii-gá.

35 Te Jèsús ní tenáá-gá espíritú cùndìhi yucu ñáváha-án, te xáha<sup>n</sup>-gá:

—¿Cadí yuhu-n, te taquée yiqui cuñú tée-án! —càchi-gá xáha<sup>n</sup>-gá.

Te espíritú cùndìhi yucu ñáváha-án ní dándúá-xi tée-án ndéé ñuhu tnuú ñáyiú xíndecu-án, te ñá túú-gá ná ní quide ñaha-xi, te ní quee ñaha-xi xii-dé. 36 Te nchaa ñáyiú xíndecu-án ní cuñúhu-yu, te ní xítñahá-yu:

—¿Te nása ndúu-tu tnúhu càhá<sup>n</sup> tée-án ñá? ¿Te càhá<sup>n</sup>-dé dàtná càhá<sup>n</sup> ìᵐ tée táxi tnuú víhí, chí càhá<sup>n</sup>-ni-dé te nchaa espíritú cùndìhi yucu ñáváha quèe-ni-xi yiqui cuñú-yu! —càchi-yu xítñahá-yu.

37 Te nchaa xichi ní níhi-yu tnúhu nàcuáa quide Jèsús.

*Jèsús quidé tátna-gá náná ñadìhí té Xímú*  
(Mt. 8:14-15; Mr. 1:29-31)

38 Te Jèsús ní ndee-gá xití veñúhu, te cuáhá<sup>n</sup>-gá vehe té Xímú. Te náná ñadìhí té Xímú-án cùhú-a<sup>n</sup> ñuhu víhi-a<sup>n</sup> cahni, te ní cáhá<sup>n</sup> ndàhú-yu núú Jèsús cuèndá-a<sup>n</sup>. 39 Te Jèsús ní sáhá<sup>n</sup>-gá núú ndécú-án, te ní ngúnundeyi-gá te ní xáha<sup>n</sup>-gá xii cahni-án sá ná xòcuñí-xi, te ní xócuñí-ni-xi, te òré-ni-án ní ndúha ñaha cùhú-án te ní ndacóo-a<sup>n</sup> ní xínu cuechi-a<sup>n</sup> núú-güedé ndihi-gá.

*Jèsús quidé tátna-gá vài ñáyiú cùhú*  
(Mt. 8:16-17; Mr. 1:32-34)

40 Te òré ní ngódo tnuú nchíanchii, te nchaa ñáyiú xíndecu ndihi ñáyiú cùhú vehe-xi ndéca ñahá-yu cuáhá<sup>n</sup> núú Jèsús. Te Jèsús ní sacá<sup>n</sup> ndodo-gá ndaha-gá díquí ìᵐ ìᵐ ñáyiú cùhú-án, te duca<sup>n</sup> ní quide-gá te ní ndúha-yu. Te ndi díí<sup>n</sup> núú cuéhé tnáhá-yu ìᵐ ìᵐ-yu ní cùu. 41 Te tnáhá dawa ñáyiú cùhú-án yíhi ñaha espíritú cùndìhi yucu ñáváha xii-yu ní cùu, te òré ní quee ñaha-xi xii-yu, te xiá<sup>n</sup> ní quide-xi níhi ní cáhá<sup>n</sup>-yu, te xáhá<sup>n</sup>-yu xii Jèsús:

—Yòhó cúu-n Déhe Dútú Ndióxi —càchi-yu xáhá<sup>n</sup>-yu xii-gá.

Dico Jèsús níhi ní cáhá<sup>n</sup>-gá ní tenáá-gá nchaa espíritú cùndìhi yucu ñáváha-án, te xáha<sup>n</sup>-gá sá vā dúcá<sup>n</sup>-gá cada-xi, chí sa xini-xi sá díú-gá cúú-gá Cristú Yáá ní tendaha Yá Ndióxi véxi ñuyúú-a.

*Jesús dānehé-gá ñāyiu distritú Galiléa*

(Mr. 1:35-39)

<sup>42</sup> Te ñ<sup>n</sup> nduu ní túndaá-ni ní quee Jèsús ñuu núú ndécú-gá-á<sup>n</sup> cuáhá<sup>n</sup>-gá ñ<sup>n</sup> xichi núú ñā túú ñāyiu ndécú. Te cue ñāyiu ní ngúíta-yu nānducu ñahá-yu xii-gá te ní naníhi ñahá-yu, te cuini-yu ngani ñahá-yu xii-gá cuendá sá ñā túú-gá ndèe quíhí<sup>n</sup>-gá ní cùu. <sup>43</sup> Dico ní xáha<sup>n</sup>-gá xii-yu:

–Dacuití quíhí<sup>n</sup>-í cúñaha-í xii nchaa ñāyiu dava-gá ñuu tñuhu sá càhá<sup>n</sup> nācuáa ndíhu ndaha ñaha Yá Ndióxi xii-yu, chi chiun<sup>n</sup> tnahí-á<sup>n</sup> vèxi-í –càchí-gá xáha<sup>n</sup>-gá xii-yu.

<sup>44</sup> Te ní xica cuu Jèsús ní dānehé-gá ñāyiu tñuhu-gá nchaa xití veñuhu ndāa distritú Galiléa.

## 5

*Jesús ní quide-gá ní níhí-güedé chácá*

(Mt. 4:18-22; Mr. 1:16-20)

<sup>1</sup> Te ñ<sup>n</sup> xito ndécú Jèsús yuhu làgúná Genesàrét, te ío cuéhé ñāyiu ní sáá, te ta dàdehnde ñaha-ná-yu xii-gá cuáhá<sup>n</sup> sá cuini-yu cundedóho-yu nchaa tñuhu càhá<sup>n</sup>-gá. <sup>2</sup> Te Jèsús ní xiní-gá úú bàrcú cue téé tñi chácá xīnutñi-xi yatni yuhu làgúná-á<sup>n</sup>, te sa ní quene cue téé ñuhu xití-xi-á<sup>n</sup> xīnaquete-güedé ñunu-güedé. <sup>3</sup> Te Jèsús cuasaá-gá núú ñ<sup>n</sup> bàrcú-á<sup>n</sup>, te bàrcú-á<sup>n</sup> cúú-xi bàrcú téé Ximú, te ní xáha<sup>n</sup>-gá xii téé Ximú-á<sup>n</sup> sá dánūndehe-dé-xi luha-gá xití ndute. Te dàtnūni ní ngóo-gá núú bàrcú-á<sup>n</sup>, te xiá<sup>n</sup> nūcúo-gá ní ngúíta-gá dānehé-gá ñāyiu. <sup>4</sup> Te òré ní túhú ní dānehé ñahá-gá xii-yu, te ní xáha<sup>n</sup>-gá xii téé Ximú:

–Daquíhí<sup>n</sup> bàrcú-a xití làgúná mei núú cùnú-gá, te dàqueé-ndo ñunu-ndo tñi-ndo chácá –càchí-gá xáha<sup>n</sup>-gá xii-dé.

<sup>5</sup> Te téé Ximú ní xáha<sup>n</sup>-dè:

–Mèstrú, ní núú ní quide chiun<sup>n</sup>-ndí te ní ñ<sup>n</sup> chácá ñā túú ní níhí-ndí, dico vitna cuendá-ni sá yòhó táuchiu<sup>n</sup>-n te na dàqueé-ndí ñunu-ndí vā<sup>n</sup> –càchí-dé xáha<sup>n</sup>-dè xii-gá.

<sup>6</sup> Te òré ní dàqueé-güedé ñunu-güedé te súni vāi chácá ní níhí-güedé, te ta ndátá-nā ñunu-güedé cuáhá<sup>n</sup> ní cùu. <sup>7</sup> Núú ní quide-güedé ndaha-güedé núú dāva-gá cue téé cūndíhí-güedé xixúhu<sup>n</sup> ingá bàrcú cuendá quíhí<sup>n</sup>-güedé chindee ñaha-güedé. Te cue téé-á<sup>n</sup> ní sáhá<sup>n</sup>-güedé ní chindee tñaha-güedé ní dáchitú-güedé ndí ndúú bàrcú mee-ni chácá, te súni ní cuu véé núu cuini-na-xi quée naa-güedé ndíhí bàrcú ní cùu. <sup>8</sup> Te sá dúcá<sup>n</sup> cuini-xi quée naa bàrcú ní cùu, núú téé Ximú, àdi Pelú chi úú diu-dé, ní ngúíhí xití-dé núú Jèsús, te xáha<sup>n</sup>-dè:

–Xocuiñí yòhó Jèsús núú ndécú-í-a, chi yuhú cùú-í ñ<sup>n</sup> téé ío ndécú cuéchi-xi –càchí-dé xáha<sup>n</sup>-dè xii-gá.

<sup>9</sup> Te duca<sup>n</sup> ní càhá<sup>n</sup>-dé chi ní yuhú-dé, te ní cuñúhu-dé ndíhí nchaa cue téé ndíhí-dé-á<sup>n</sup> cuendá sá ío vāi chácá ní níhí-güedé. <sup>10</sup> Te tñahá té Jacobó ndíhí té Juáá cue déhe té Zebèdeú ío ní cuñúhu-güedé, te diu-ni cue téé cūndíhí té Ximú-á<sup>n</sup> cúú-güedé tñahá-güedé. Te Jèsús ní xáha<sup>n</sup>-gá xii téé Ximú:

–Vā yuhú-n, chi neni vitna quíhí<sup>n</sup>-n dācáhá<sup>n</sup>-n ñāyiu cuendá tuha ñahá-yu xii-í –càchí-gá xáha<sup>n</sup>-gá xii-dé.

<sup>11</sup> Te ní quene-güedé ndíhí bàrcú ndéé ñuhu yìchí yuhu làgúná-á<sup>n</sup>. Te òré-á<sup>n</sup> ní dāndóo-güedé nchaandi túhú sá ndécú ndíhí-güedé, te ní tuha-güedé Jèsús.

*Jesús quidé tātna-gá ñ<sup>n</sup> téé tñahá cuéhé sá dátèhyú ñihu-xi yiqui cūñú-ó*

(Mt. 8:1-4; Mr. 1:40-45)

<sup>12</sup> Te òré ní quexio Jèsús ñ<sup>n</sup> ñuu, te ní quexio ñ<sup>n</sup> téé cūhú tñahá-dé cuéhé sá dátèhyú ñihu-xi yiqui cūñú-ó, te òré ní xiní-dé Jèsús te ní sáhá<sup>n</sup>-dè núú ndécú-gá, te ní ngúíhí xití-dé núú-gá te ní nuu núú-dé ndāa núú ñuhú te càhá<sup>n</sup> ndahú-dé, te xáha<sup>n</sup>-dè xii-gá:

–Mèstrú, vèxi-í càhá<sup>n</sup> ndahú-í núú-n núu vā cūndèe iní-n càda tātna ñaha-n xii-í, chi cūtnūni iní-í sá ndácú-n –càchí-dé xáha<sup>n</sup>-dè xii-gá.

<sup>13</sup> Te Jèsús ní dàcāá-gá ndaha-gá ní tendaha ñaha-gá xii-dé, te xáha<sup>n</sup>-gá:

–Cuu cada tātna ñaha-í xii-n, te vitna te ndúha-n –càchí-gá xáha<sup>n</sup>-gá xii-dé.

Te òré-ni ní xócuñí cuéhé tñahá-dé. <sup>14</sup> Te dàtnūni ní xáha<sup>n</sup> tūcu Jèsús xii-dé:

–Vā yòo ñ<sup>n</sup> cúñaha-n sá ní quide tātna ñaha-í xii-n, núú dūtú-ni cuáhá<sup>n</sup> cuendá sá ná quini ñahá-dé xii-n sá ní ndúha-n te cuáha-n-dé sá ndúú tñahú Yá Ndióxi dátna ní cachí ndí Moisés cuendá ná quini ñāyiu sá ndāá ní ndúha-n –càchí-gá xáha<sup>n</sup>-gá xii-dé.

<sup>15</sup> Te duca<sup>n</sup> ta xitè nuu-gá tñuhu nchaa nācuáa quide Jèsús, te ío cuéhé ñāyiu ní xóo tacá nchaa núú ní xīndecu-gá cuendá sá cuini-yu cundedóho-yu tñuhu càhá<sup>n</sup>-gá, ndíhí cuendá sá cuini-yu cada tātna ñaha-gá xii-yu. <sup>16</sup> Dico Jèsús ní xóo quee ñihí-gá tñuu-yu ní xóo quíhí<sup>n</sup>-gá núú ñā túú ñāyiu ndécú ní xóo càhá<sup>n</sup> ndíhí-gá Yá Ndióxi.

*Jesús quidé tātna-gá ñ<sup>n</sup> téé cūhú ñā cúú-gá candá ñihu*

(Mt. 9:1-8; Mr. 2:1-12)

<sup>17</sup> Te ñ<sup>n</sup> nduu dānehé-gá ñāyiu, te xīncúo ñ<sup>n</sup> úú cue téé cūu fariséú, ndíhí cue téé dàcuaha ñaha xii ñāyiu nchaa tñuhu ní chídó tñūni ndí Moisés. Te cue téé-á<sup>n</sup> ní quee-güedé nchaa ñuu yīndèhu distritú Galiléa, ndíhí distritú Júdeá, ndíhí ñuu Jerusalén, te nchaa ñuu-á<sup>n</sup> ní quee-güedé cuáhá<sup>n</sup>-güedé núú ndécú-gá. Te Yá Ndióxi chindee ñaha-gá quidé tātna-gá ñāyiu cūhú. <sup>18</sup> Te ñ<sup>n</sup> úú cue

tée nchido-güedé ñ<sup>n</sup> tée cùhú ñá cúú-gã candá nihnu ñuhu-dé xito ní quexio ndihi ñaha-güedé, te cuiñi-güedé quihu ndihi ñaha-güedé ndée xití vehe, sáa-güedé ndée núú Jesús ndihi tée cùhú-á<sup>n</sup>. <sup>19</sup> Dico ñá túú ní ñihí-güedé ndée ichi quihu-güedé, chí cuendá io cuehé ñáyiú ndècu, núú xiá<sup>n</sup> ní sáa-güedé díquí véhé-á<sup>n</sup> ní caá<sup>n</sup>-güedé te ndaa díquí véhé-á<sup>n</sup> ní dáquëe-güedé tée cùhú-á<sup>n</sup>, te ñuhu-ni-dé xito ní dáquëe ñaha-güedé tnuú ñáyiú ní sáa ndée núú Jesús. <sup>20</sup> Te Jesús ní cutnùni iní-gá sá ní yuhu ní iní-güedé sándáá iní ñáhá-güedé xii-gá, núú ní xáha<sup>n</sup>-gã xii tée cùhú-á<sup>n</sup>:

—Yòhó tée cùhú, sa ní quide càhnu iní-í nchaa cuéchi-n —cächí-gá xáha<sup>n</sup>-gã xii-dé.

<sup>21</sup> Te cue tée dàcuaha ñaha xií-yu nchaa tñuhu ní chídó tñuni ndú Moisés ndihi cue tée cùu fariséú ní sani iní-güedé: “¿Ná cúú tée-a núú cãhá<sup>n</sup> cuéhé-dé cuendá Yá Ndióxí-í? Te vá yòo ñ<sup>n</sup> ndàcu cada cahnu iní nchaa yíca cuéchi ñáyiú, chí ñ<sup>n</sup>dií dí-ni Yá Ndióxí quidé càhnu iní-gá”, duha ní sani iní-güedé.

<sup>22</sup> Dico Jesús sa ní cutnùni iní-gá nàcuáa sàni iní-güedé núú ní xáha<sup>n</sup>-gã xii-güedé:

—¿Te ná cuendá duca<sup>n</sup> sàni iní-ndó-í? <sup>23</sup> Te sá dúhá ní xáha<sup>n</sup>-í xii tée cùhú-a sá cadá càhnu iní-í nchaa yíca cuéchi-dé, te xiá<sup>n</sup> nchóhó ñá túú cutnùni iní-ndó núú ndáá càhá<sup>n</sup>-í àdi ñá ndáá. Dico núú cúu-í-dé sá ndácóo-dé, te caca-dé te cutnùni ndáá iní-ndó núú ndáá càhá<sup>n</sup>-í àdi ñá ndáá, chí cundehe núú-ndó nàcuáa cada-í. <sup>24</sup> Te vitna na càda-í nàcuáa cutnùni iní-ndó nchàa-ndo sá yùhú Tée cùu ñani tñáhá-ndó nchàa-ndo ndecu ndihi-í tñuhu ndee ñni sá cadá càhnu iní-í nchaa cuéchi ñáyiú ñuyú-a —cächí-gá xáha<sup>n</sup>-gã xii-güedé.

Te sáta dúcá<sup>n</sup> te ní xáha<sup>n</sup>-gã xii tée cùhú-á<sup>n</sup>:

—Ndacóo, te ndocani-n xito ñuhu-n véxi-á<sup>n</sup>, te nùhú-n véhe-n —cachí-gá xáha<sup>n</sup>-gã xii-dé.

<sup>25</sup> Te òré-ni-á<sup>n</sup> ní ndúha tée cùhú-á<sup>n</sup> te ní ndacóo-dé, te ní ndocani-dé xito ñuhu-dé ní quexio-á<sup>n</sup>, te ní natnñ-dé ichi ta càhá<sup>n</sup>-dé cuánuhú sá io càhnu cuu Yá Ndióxí. <sup>26</sup> Te nchaa ñáyiú xindecu-á<sup>n</sup> ní cuñúhu-yu, te tñáhá-yu ní cachí-yu sá io càhnu cuu Yá Ndióxí, te duca<sup>n</sup> io ní yùhú-yu, te ní xitnàhá-yu:

—Vitna ní xiní-ó ñ<sup>n</sup> sá ñá túú tñáhí xiní-ó ní cùu —cachí-yu xitnàhá-yu.

*Jesús caná-gã té Leví*  
(Mt. 9:9-13; Mr. 2:13-17)

<sup>27</sup> Te sáta dúcá<sup>n</sup> ní cuu te ní quee Jesús xiá<sup>n</sup>, te ní xiní-gá ñ<sup>n</sup> tée nani Leví núcòo-dé ñ<sup>n</sup> xichi quide cobrá-dé ñáyiú cuendá impuèstú, chí cobrádór cúú-dé, te ní xáha<sup>n</sup>-gã xii-dé:

—Néhe chitnahá ñáhá-n xii-í —cächí-gá xáha<sup>n</sup>-gã xii-dé.

<sup>28</sup> Te té Leví-á<sup>n</sup> ní ndàcuñí-dé te ní dándóo-dé nchaa sá ndécú ndihi-dé núú núcòo-dé-á<sup>n</sup>, te ní tuha-dé Jesús.

<sup>29</sup> Te sáta dúcá<sup>n</sup> te té Leví-á<sup>n</sup> ní quide-dé ñ<sup>n</sup> vico càhnu vehe-dé sá cúú-xi Jesús, te ní tacá vài cue tée quide chiu<sup>n</sup> quide-dé, te nchaa-güedé cuánguihu-güedé mesá ní ngóo-güedé ndihi dava-gá ñáyiú ní quexio cuendá caxi-güedé ndihi-yu. <sup>30</sup> Dico cue tée cùu fariséú ndihi cue tée dàcuaha ñaha xií-yu nchaa tñuhu ní chídó tñuni ndú Moisés ní ngúita-güedé xicuéhé-güedé cue tée xica cuu ndihi-gá, te xáha<sup>n</sup>-güedé:

—¿Ná cuendá xéxi-ndó xihí-ndo ndihi cue tée cuihna iní-xi quide cobrá ñáhá xii ñáyiú cuendá impuèstú, ndihi nchaa dava-gá cue tée ndècu ichi cuehé ichi duha-í? —cächí-güedé xáha<sup>n</sup>-güedé.

<sup>31</sup> Te Jesús ní xáha<sup>n</sup>-gã xii-güedé:

—Nchaa ñáyiú ñá túú cùhú chí ñá túú xini ñuhu-yu ñátátná, dico nchaa ñáyiú cùhú chí xini ñuhu ñáhá-yu. <sup>32</sup> Te yùhú véxi-í càhá<sup>n</sup>-í ñáyiú cutnuni iní-xi sá ndécú cuéchi-xi cuendá dàñá-yu nchaa sá cuéhé sá dúhá quidé-yu, te ñá túú véxi-í càhá<sup>n</sup>-í ñáyiú cächí sá ñá túú ndècu cuéchi-xi —cächí-gá xáha<sup>n</sup>-gã xii-güedé.

*Cue tée ndücu tñuhu núú Jesús cuendá ñáyiú ñá túú tñáhí ná xéxi áma càhá<sup>n</sup> ndihi-yu Yá Ndióxí*

(Mt. 9:14-17; Mr. 2:18-22)

<sup>33</sup> Te ní xáha<sup>n</sup>-güedé xii Jesús:

—Te áma ñá túú tñáhí ná xéxi cué tée xica cuu ndihi té Juáá càhá<sup>n</sup> ndihi-güedé Yá Ndióxí, te diu-ni duca<sup>n</sup> quide cue tée xica cuu ndihi nchúhú cue tée cùu fariséú. ¿Te ná cuendá cue tée xica cuu ndihi-n ñá túú dùca<sup>n</sup> quide-güedé núú nchaa-ni nduu xéxi-güedé xihí-güedé quidé-güedé-í? —cachí-güedé xáha<sup>n</sup>-güedé xii-gá.

<sup>34</sup> Te Jesús ní xáha<sup>n</sup>-gã xii-güedé:

—Nchóhó xiní-ndó sá vá cúú cùñaha-o xii cue ñáyiú ñuhu vico tñándaha sá vá cúú caxí-yu ñini ndècu ndihi ñaha tée tñándaha-á<sup>n</sup> xií-yu. <sup>35</sup> Dico sáa nduu te vá cündecu ndihi ñaha-gá tée tñándaha-á<sup>n</sup> xií-yu, te dàvá-á<sup>n</sup> te cahni iní-yu vá caxí-yu sá ndihú iní-yu —cächí-gá xáha<sup>n</sup>-gã xii-güedé.

<sup>36</sup> Te ní caní-gá ñ<sup>n</sup> cuendú núú ñáyiú nàcuáa tecú tñuni-yu tñuhu-gá, te xáha<sup>n</sup>-gã:

—Vá yòo ñ<sup>n</sup> dándée luha dóo sáá ñ<sup>n</sup> dóo sa ní cuu tùhú víhí, chí núu yoo duca<sup>n</sup> na càda, te dóo sáá-á<sup>n</sup> nàndiyi-xi te uu<sup>n</sup>-gá ndata-xi dóo sá ní cuu tùhú-á<sup>n</sup>, te luha dóo sáá-á<sup>n</sup> ñá túú nàtaú-xi ndée dóo sá ní cuu tùhú-á<sup>n</sup>. <sup>37</sup> Te ní vá yòo ñ<sup>n</sup> chíhí ndidí sáá xití ñ<sup>n</sup> lamba sa ní cuu tùhú víhí, chí núu yoo duca<sup>n</sup> na càda, te ndava lamba sa ní cuu tùhú-á<sup>n</sup> chí

ío níhi yócó ndidí-án, te cuíta-ni ndidí-án te cuíta-ni lamba-án. <sup>38</sup> Núu xíá<sup>n</sup> xíní ñùhu-xi quée ndidí sáá-án xítí ñ<sup>n</sup> lamba saa cuèndá duca<sup>n</sup> ñà túú nã cuu cováha-xi. <sup>39</sup> Te ni ñ<sup>n</sup> ñáyiu ñà túú tnàhá ini-yu cohó-yu ndidí sáá, te núu díhna-gá ná cohó-yu ndidí sá ní quene díhna-gá, chí càchí-yu sá xíhí vâha-gá ndidí sá ní quene díhna-gá-án dâcúúxí ndidí sáá — càchí-gá xâha<sup>n</sup>-gá xii-yu.

## 6

*Cue tée xica cuu ndihi Jesús sàhnú-güedé yoco triú nduu ndetátú ñáyiu*

(Mt. 12:1-8; Mr. 2:23-28)

<sup>1</sup> Te ñ<sup>n</sup> nduu cùu-xi nduu ndetátú ñáyiu ñùhu Jesús ichi ndihi cue tée xica cuu ndihi-gá, te ta yâha-gá ndihi-güedé ñ<sup>n</sup> xichi núu cáá triú, te ní ngúita-güedé sàhnú-güedé yoco triú-án te ndihi ndaha-güedé quíñ<sup>n</sup>-güedé quée triú tá xèxi-güedé cuáhán. <sup>2</sup> Te ñ<sup>n</sup> úú cue tée cùu fariséú ní xâha<sup>n</sup>-güedé xii cue tée xica cuu ndihi-gá:

—¿Te ná cuèndá duca<sup>n</sup> quide nchohó ñ<sup>n</sup> sá ñã túú tàú-ó càda-o vitna cuu-xi nduu ndetátú-ó-í? —càchí-güedé xâha<sup>n</sup>-güedé.

<sup>3</sup> Te Jesús ní xâha<sup>n</sup>-gá xii-güedé:

—¿Te náa ñã túú dâcuaha-ndo núu tùú Yá Ndióxi núu càhá<sup>n</sup>-xi nâcuáa ní quide ndí Dàví cútñàhá ní xíhí ndí docó ndihi cue tée ní xica cuu ndihi ndí-án? <sup>4</sup> Chí ní quíhu ndí vehe Yá Ndióxi, te ní quehe<sup>n</sup> ndí pãá ní cuu í ndécú-án ní dâcâhñu ndí cue tée xica cuu ndihi ndí ní xexi ndí ndihi-güedé, te ñã túú tàú ndí sá dúcá<sup>n</sup> càda ndí ní cùu, chí mee-ni cuè dútú tàú-güedé caxi-güedé pãá-án ní cùu —càchí-gá xâha<sup>n</sup>-gá xii-güedé.

<sup>5</sup> Te ní xâha<sup>n</sup> tùcu-gá:

—Te yúhú Tée cùu ñani tnàhá-ndo nchâa-ndo, tnàhá-í ndécú ndí-í tnùhu ndee ini sá cùu-í nchaa ñáyiu nâcuáa cadá-yu nduu ndetátú-ó-á —càchí-gá xâha<sup>n</sup>-gá xii-güedé.

*Ñ<sup>n</sup> tée ní yichí ñ<sup>n</sup> xio ndaha-xi*

(Mt. 12:9-14; Mr. 3:1-6)

<sup>6</sup> Te ingá nduu ñiu-ni nduu ndetátú ñáyiu cuánguihu Jesús xítí veñúhu dânehé-gá ñáyiu. Te xía<sup>n</sup> ndécú ñ<sup>n</sup> tée cùhú ní yichí nihnu ñ<sup>n</sup> xio ndaha cùha-dé. <sup>7</sup> Te cue tée dâcuaha ñaha xii ñáyiu nchaa tnùhu ní chídó tnùn ndí Moisés, ndíhi cue tée cùu fariséú ndéhé-güedé núu cada tátna ñaha Jesús xii tée cùhú-án nduu ndetátú-güedé-án cuèndá níhí-güedé nâcuáa cada-güedé cacá<sup>n</sup> cuéchi-güedé cuèndá-gá. <sup>8</sup> Dico Jesús sa ní cutnùn ini-gá nâcuáa sàni ini-güedé, te ní xâha<sup>n</sup>-gá xii tée cùhú ndaha-xi-án:

—Ndâcuíñí te ngúnutñi-n cuâdava tnuú-ndí-a —càchí-gá xâha<sup>n</sup>-gá xii-dé.

Te tée-án ní ndacuíñí-dé te ní ngúnutñi-dé cuâdava tnuú-güedé ndíhi-gá. <sup>9</sup> Te dâtnùn

Jésús ní xícá<sup>n</sup> tnùhú-gá núu cuè ñáyiu xîndecu-án, te xâha<sup>n</sup>-gá xii-yu:

—Cuíní-í cachí tnùhu-ndo nã cúú sã vâha cada-o nduu ndetátú-ó. ¿Ñ<sup>n</sup> chiú<sup>n</sup> vâha àdi ñ<sup>n</sup> chiú<sup>n</sup> cuehé, sá cadá tátna-o ñáyiu cùhú àdi sá cãhni-ó-yu? —càchí-gá xâha<sup>n</sup>-gá xii-yu.

<sup>10</sup> Te dâtnùn ní ndacoto-gá núu-yu nchaa-yu, te ní xâha<sup>n</sup>-gá xii tée cùhú ndaha-xi-án:

—Ndocani ndaha-n —càchí-gá xâha<sup>n</sup>-gá xii-dé.

Te ní ndocani-dé ndaha-dé, te òre-ni ní ndúha. <sup>11</sup> Te cue tée xîndecu-án sùúní ní cudéé<sup>n</sup>-güedé sá dúcá<sup>n</sup> ní quide tátna Jesús tée cùhú-án, te ní ngúita-güedé ndâtnùhu-güedé núu nása cada ñaha-güedé xii-gá.

*Jésús cãxi-gá úxúú tnàhá cue tée dacuàha ñaha xii ñáyiu tnùhu-gá*

(Mt. 10:1-4; Mr. 3:13-19)

<sup>12</sup> Te sáta dúcá<sup>n</sup> ní cuu te ní xica Jesús cuáhán-gá xítí yucu cuèndá yacá<sup>n</sup> cáhá<sup>n</sup> ndíhi-gá Tãtã-gá Dútú Ndióxi, te ní núú ní cáhá<sup>n</sup> ndíhi ñaha-gá. <sup>13</sup> Te sáta ní tûndaá, te ní cana-gá nchaa cue tée xica cuu ndíhi-gá, te ní cãxi-gá úxúú tnàhá-güedé, te cue tée-án ní xâha<sup>n</sup>-gá sá díú-güedé cuu-güedé cue tée quíñ<sup>n</sup> cáhá<sup>n</sup> tnùhu-gá núu ñáyiu. <sup>14</sup> Te duha xînani ndi úxúú cue tée-án. Té Ximú, àdi Pelú chí úú ñiu-dé, ndíhi ñani-dé té Ndríxi, ndíhi té Jacobó, ndíhi té Juuá, ndíhi té Lipé, ndíhi té Bartolómé, <sup>15</sup> ndíhi té Mâteú, ndíhi té Máxi, ndíhi té Jacobó dèhe té Alféú, ndíhi ingá té Ximú tée ní cundihi cue tée cananistá, <sup>16</sup> ndíhi té Judás ñani té Jacobó, ndíhi té Judás Iscarioté tée ní sáa nduu ní sâha cuèndá ñáhá xii Jesús núu cuè tée cùu úhú ini ñáhá xii-gá, duha xînani cuè tée ní cãxi Jesús ní xica cuu ndíhi-gá.

*Jésús dânehé-gá cuehé víhi ñáyiu*

(Mt. 4:23-25)

<sup>17</sup> Te Jesús cuánuu-gá yucu núú ní sáa-gá-án, te ní ngava-gá ñ<sup>n</sup> núú ndáá ndíhi cue tée xica cuu ndíhi-gá, te xía<sup>n</sup> ní ngúnutñi-gá. Te xía<sup>n</sup> ndécú dàva-gá cue tée xica cuu ndíhi-gá ndíhi vai ñáyiu ndetu ñáhá-yu xii-gá, te ñáyiu-án vèxi-yu nchaa ñúú cáá distritú Judeá, ndíhi ñúú Jerusalén, te ndècu ñáyiu véxi ndàa yuhu lamár yatni ñúú Tirú, ndíhi ñúú Sidón. Te nchaa ñáyiu-án ní quexió-yu cuíní-yu cundedóho-yu nchaa tnùhu cáhá<sup>n</sup> Jesús, ndíhi cuèndá sá cuíní-yu ndúha-yu nchaa cuehé tnàhá-yu. <sup>18</sup> Te tnàhá ñáyiu yíhi ñaha espíritu cundíhi yucu ñávâha. <sup>19</sup> Te nchaa-yu cuíní-yu dacáá-yu ndahá-yu tendàhá-yu Jesús ní cùu cuèndá sá ní níhí-yu tnùhu sá ndècu ndíhi-gá tnùhu ndee ini quide tátna-gá nchaa ñáyiu cùhú.

*Cuèndá ñáyiu ío váha táhú-xi*

(Mt. 5:1-12)

<sup>20</sup> Te Jèsús ní ndacoto-gá núú cuè téé xica cuu ndihí-gá, te ní xáha<sup>n</sup>-gá:

—Váha táhú nchaa nchòhò cue ñáyiú ndàhú, chí nduu táhú-ndó cùndecu-ndo núú táxí tnùnì Yá Ndiòxí.

<sup>21</sup> Váha táhú nchaa nchòhò ñáyiú ío cuiní cundedóho tnúhu Yá Ndiòxí chí ío víú ío váha cuu iní-ndó.

Váha táhú nchaa nchòhò ñáyiú ndàhyú sá ndihú iní-ndó, chí sáá nduu te cudíí iní-ndó ní caa ní quíhí<sup>n</sup>.

<sup>22</sup> Váha táhú nchaa nchòhò ñáyiú na cùu úhú iní ñáhá tnàha ñáyiú-xi, chí sáá nduu te vá dáñá-gá-yu quíhu-ndo vèñúhu, te cúcuéhé ñáhá-yu xii-ndo, te cachí-yu sá ñà díú ñáyiú váha cùu-ndo, te duca<sup>n</sup> càda ñáhá-yu xii-ndo sá cuèndá yúhú Téé cùu ñaní tnàhá-ndó nchàa-ndo. <sup>23</sup> Te òré duca<sup>n</sup> na càda ñáhá-yu xii-ndo te cudíí víhí-ní iní-ndó cùndecu-ndo, chí sáá nduu nduu táhú-ndó sá ío váha càa ndecu andíu cundecu ndihí-ndo nduu na nasaá-ndó yàcá<sup>n</sup> cundecu-ndo, chí díu-ni duca<sup>n</sup> ní xóo càda ñaha cuè ñaní tnàhá-yu xii cue téé ní xóo cáhá<sup>n</sup> tnúhu Yá Ndiòxí ní xíndecu ndéé sanaha.

<sup>24</sup> Te ndàhú ní cuu nchaa ñáyiú cuica ñà túú sàndáá iní ñáhá xii Yá Ndiòxí, chí vitna ío váha ndécú-yu, dico sáá nduu te nduu ndàhú-yu.

<sup>25</sup> Te ndàhú ní cuu tucu nchaa ñáyiú ñà túú tnàhí ná cúmàni xii-xi vitna, chí sáá nduu quini-yu tnúndóho tnúhu ndàhú.

Te ndàhú ní cuu nchaa ñáyiú cudíí iní-xi ndècu ichi cuehé ichi duha vitna, chí sáá nduu te ndàhyú-yu sá ndihú iní-yu.

<sup>26</sup> Te ndàhú ní cuu nchaa ñáyiú na càhá<sup>n</sup> váha dava-gá ñáyiú cuèndá-xi, chí duca<sup>n</sup> ní xóo cáhá<sup>n</sup> váha-yu cuèndá nchaa cue téé ní xóo dandàhú ñáhá xii ñáyiú ndéé sanaha, chí ní cachí-güedé sá càhá<sup>n</sup>-güedé tnúhu Yá Ndiòxí te ñà ndáá —cachí-gá xáha<sup>n</sup>-gá xii-güedé.

*Cuu iní-ó nchàa ñáyiú cùu úhú iní ñáhá xii-ó*

(Mt. 5:38-48; 7:12)

<sup>27</sup> Te Jèsús ní xáha<sup>n</sup>-gá xii nchaa ñáyiú xíndecu-á<sup>n</sup>:

—Nchaa nchòhò ñáyiú xíndedóho ñaha càchí tnúhu-í xii-ndo sá cúú iní-ndó ñáyiú cùu úhú iní ñáhá xii-ndo, te cada-ndo sá váha sá cúú-xí-yu cuèí nàndí sá ná cáda ñáhá-yu xii-ndo. <sup>28</sup> Te cacadá<sup>n</sup> táhú-ndó núú Yá Ndiòxí cuèndá ñáyiú càhá<sup>n</sup> úhú ñáhá xii-ndo, ndihí cuèndá ñáyiú tèe ñaha cuéchi neñlú xii-ndo. <sup>29</sup> Te núu ní canihá-yu xii-ndo ñ<sup>n</sup> xito te cuiní tucú-yu canihá-yu, te dañá-ndo na canihá-yu, àdi núu na quèndé-yu dóó ndixí ndòdo-ndo, ndihí dúhnú-ndó, te dañá-ndo na cànehé-yu quíhí<sup>n</sup>. <sup>30</sup> Te núu xicá<sup>n</sup>-yu ñ<sup>n</sup> sá nándíhí-yu

núu-ndó te cuáñaha-ndo, àdi quèndé-yu ñ<sup>n</sup> ndachiu<sup>n</sup>-ndo, te vá nándacá<sup>n</sup>-ndó núu-yu.

<sup>31</sup> Te nchaa sá váha cuiní-ndó càda tnàha ñáyiú-ndo, te cada-ndo tnàhá-ndó ndihí-yu.

<sup>32</sup> Chí núu nchòhò ná cùu iní-ndó mèe-ni ñáyiú cùu iní ñáhá xii-ndo, te vá cachí-ndó sá ío váha quide-ndo, chí tnàhá nchaa ñáyiú ndècu ichi cuehé ichi duha duca<sup>n</sup> xíquidé-yu.

<sup>33</sup> Àdi mee-ni ñáyiú quide ñaha sá váha xii-ndo quide váha-ndó-yu, te vá cachí-ndó sá ío váha quide-ndo, chí tnàhá nchaa ñáyiú ndècu ichi cuehé ichi duha duca<sup>n</sup> xíquidé-yu.

<sup>34</sup> Àdi mee-ni ñáyiú sàni iní-ndó nàcoto ñaha xii-ndo cuáñaha-ndo ñ<sup>n</sup> sá xicá<sup>n</sup>-yu núu-ndó, te vá cání iní-ndó sá ío quide váha-ndo, chí tnàhá ñáyiú ndècu ichi cuehé ichi duha dàsa<sup>n</sup> nuú-yu ñ<sup>n</sup> sá néhé váha-yu, te ndètu cahnu-ná-yu nacoto ñaha ñáyiú ní sàha núu-yu-á<sup>n</sup>. <sup>35</sup> Dico nchòhò xini ñúhu-xi cuu iní-ndó ñáyiú cùu úhú iní ñáhá xii-ndo, te cada-ndo sá váha sá cúú-xí-yu, te cuáñaha núu-ndo ñ<sup>n</sup> sá ná ndíhí-yu te núu xicá<sup>n</sup>-yu núu-ndó, te vá cùndètu-ndo nacoto ñáhá-yu xii-ndo. Te duca<sup>n</sup> te ío-gá cuehé níhí-ndó cùndecu ndihí-ndo, te cuu ndisa-ndo dèhe Dútú Ndiòxí, chí ío càhnu iní-gá sá cúú-xí nchàa ñáyiú ñà túú ndacá<sup>n</sup> táhú núú-gá cuèndá nchaa sá váha quide-gá, ndihí sá cúú-xí nchàa ñáyiú ndècu ichi cuehé ichi duha. <sup>36</sup> Te cunduu càhnu iní nchòhó tucu dàtná càhnu iní Tàtá-ó Dútú Ndiòxí.

*Vá càhá<sup>n</sup> cuèhé-ó cuèndá tnàha ñáyiú-ó*

(Mt. 7:1-5)

<sup>37</sup> Te vá càhá<sup>n</sup> cuèhé-ndó cuèndá sá quidé tnàha ñáyiú-ndo, te duca<sup>n</sup> te Yá Ndiòxí ñà túú ná tnúhu cùñaha-gá xii-ndo. Te vá cùñaha-ndo xii ñáyiú sá quíhí<sup>n</sup>-yu ñ<sup>n</sup> xi-chi núu úhú núu ndàhú ndohó-yu cuèndá nchaa sá ñà túú váha quide-yu, te duca<sup>n</sup> te Yá Ndiòxí vá cùñaha-gá xii-ndo sá tnàhá-ndó quíhí<sup>n</sup>-ndó ñ<sup>n</sup> xichi núu úhú núu ndàhú ndohó-ndo. Te chí cáda càhnu iní nchaa sá quidé-yu, te duca<sup>n</sup> te Yá Ndiòxí cada càhnu iní ñáhá-gá xii-ndo tucu. <sup>38</sup> Te chí cuáñaha xii ñáyiú núu ná cúú sá xini ñúhú-yu, te dàtná chitu ñ<sup>n</sup> yicá súni xidó coyo-ná, duca<sup>n</sup> tàxi Yá Ndiòxí xii-ndo. Te nànicuáa na càa-ndo cada váha-ndo sá cúú-xí tnàha ñáyiú-ndo, te díu-ni duca<sup>n</sup> càda ñaha Yá Ndiòxí xii-ndo —cachí Jèsús xáha<sup>n</sup>-gá xii-yu.

<sup>39</sup> Te dàtnúni ní caní-gá ñ<sup>n</sup> cuèndú núu-yu nàcuáa tecú tnùnì-yu tnúhu-gá, te xáha<sup>n</sup>-gá:

—Ñ<sup>n</sup> téé cuáá chí ñà ndacú-dé cuita nehe-dé ingá téé cuáá, chí núu duca<sup>n</sup> na càda-güedé te ndí ndtú-güedé ngau-nihnu-güedé déhva. <sup>40</sup> Te ní ñ<sup>n</sup> landú yíhí scuèlá ñà túú cùnuu-gá-güexi dàcúúxi mèstrú-güexi, te ndéé núu na cùtúha váha-güexi, te dàtnúni nútahá-güexi téé dànehé ñáhá xii-güexi.

41 Te na càchí tnúhu-í xii-ndo sã nchaa cuechi quide ñáyiu cùu-xi datná ì<sup>n</sup> sã mihi líhli. ¿Te ná cuendá ndéhé-ndó ì<sup>n</sup> sã ñà túú vãha quide tnaha ñáyiu-ndo, te mee-ndo vihi-gã quide-ndó-í? Te sã dúcá<sup>n</sup> quide-ndo te cada iní-ndó sã ndéhé-ndó datná ì<sup>n</sup> mihi líhli ñuhu núu tnaha ñáyiu-ndo, te mee-ndo ñuhu ì<sup>n</sup> mihi cahnu-gã núu-ndó. 42 Te núu na nãcanu ichi-ndo tnaha ñáyiu-ndo cuendá sã ñà túú quide vãha-yu ndécú-yu te mee-ndo vihi-gã quide-ndó ñã, te cada iní-ndó sã xãha<sup>n</sup>-ndo xií-yu sã nátava-ndo mihi líhli ñuhu núu-yu, te mihi cahnu ñuhu núu mée-ndó ñà túú quide cuendá-ndó. ¿Te sã dúcá<sup>n</sup> quide-ndo te ío dandahú-ndó mée-ndo sã quide ndáá-ndó te ñã ndáá sã quide ndáá-ndó! Te xini ñuhu-xi ñihna-gã ñãha-ndo nchaa sã ñà túú vãha quide-ndo, te dãtnúni duca<sup>n</sup> te cutnúni vãha iní-ndó nãcuáa nacanu ichi-ndo tnaha ñáyiu-ndo.

*Ndi ñá<sup>n</sup> núu yutnu xini-ó nã yutnu cùu-xi cuendá sã sãvidí-xi*

(Mt. 7:17-20; 12:34-35)

43 Te ñà túú ni ì<sup>n</sup> yutnu vãha te quini-ó cùu<sup>n</sup> sãvidí sã ñà túú vãha, te ni ì<sup>n</sup> yutnu sã ñà túú vãha, te quini-ó cùu<sup>n</sup> sãvidí vãha, chi mee-ni sãvidí sã ñà túú vãha cùu<sup>n</sup>. 44 Te ndi ñá<sup>n</sup> núu yutnu xini-ó nã yutnu cùu-xi cuendá sã sãvidí-xi, chi ñà túú xini-ó cùu<sup>n</sup> ngúxí ì<sup>n</sup> tnu ñu, te ni ñà túú xini-ó cùu<sup>n</sup> ndéhé yoho yãha stilé díquí ì<sup>n</sup> yoho yãha cuxetínu. 45 Te nchaa ñáyiu vãha iní-xi càhá<sup>n</sup>-yu tnúhu vãha, chi ñu-ni tnúhu vãha tnãhí-á<sup>n</sup> ñúhú iní-yu, te nchaa ñáyiu ñà túú vãha iní-xi càhá<sup>n</sup> cuèhé-yu, chi ñu-ni tnúhu cuèhé tnãhí-á<sup>n</sup> ñúhú iní-yu, chi nchaa sã ñúhú iní-yu te xiã<sup>n</sup> càhá<sup>n</sup>-yu.

*Ì<sup>n</sup> vehe ndècu cimièntú-xi ndihi ì<sup>n</sup> vehe ñà túú cimièntú-xi*

(Mt. 7:24-27)

46 ¿Te ná cuendá càchí-ndó sã yúhú cùu-í Yáá cùú Xitohó-ndó te ñà túú quide-ndo nchaa nacuaá càhá<sup>n</sup>-í-i? 47 Te na càchí tnúhu-í xii-ndo cuendá ñáyiu tũha ñaha xii-í, chi ñáyiu-á<sup>n</sup> sãcúndedóho-yu nchaa tnúhu càhá<sup>n</sup>-í te tní<sup>n</sup>-yu. 48 Te ñáyiu-á<sup>n</sup> cùu-yu datná ì<sup>n</sup> téé ní dácáá ì<sup>n</sup> vehe, chi téé-á<sup>n</sup> ñihna-gã ní xete-dé ndéé ní tnahá-dé yúú cáxí<sup>n</sup> te dãtnúni ní tava-dé cimièntú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vèhe-á<sup>n</sup>, dico ñà túú ní ndàcu-xi cuido-xi, te duca<sup>n</sup> chi téé ní dácáá vèhe-á<sup>n</sup> ní tava-dé cimièntú-xi núú yúú cáxí<sup>n</sup>. Duha sãtnahá-xi cùu nchaa ñáyiu sãcúndedóho tnúhu càhá<sup>n</sup>-í te tní<sup>n</sup>-yu. 49 Te ñáyiu sãcúndedóho tnúhu càhá<sup>n</sup>-í te ñà túú tní<sup>n</sup>-yu, ñáyiu-á<sup>n</sup> cùu-yu datná ì<sup>n</sup> téé ní dácáá ì<sup>n</sup> vehe, te ñà túú ní tava-dé cimièntú-xi, te òré ní cuu<sup>n</sup> dáú, te ní ndee ndute ñuhu, te ní

ndacá<sup>n</sup>-xi ndéé núú cáá vèhe-á<sup>n</sup>, te íí-ní ní xido-xi vèhe-á<sup>n</sup> cuendá sã ñà túú ní quène cimientú-xi. Duha sãtnahá-xi cùu nchaa ñáyiu sãcúndedóho tnúhu-í te ñà túú cuini-yu tní<sup>n</sup>-yu —càchí-gã xãha<sup>n</sup>-gã xií-yu.

## 7

*Jèsús quidé tãtna-gã ì<sup>n</sup> téé xinu cuechi núú ì<sup>n</sup> téé cùu capitá<sup>n</sup>*

(Mt. 8:5-13)

1 Te sátá ní yãha ní cáhá<sup>n</sup> Jèsús ndihi ñáyiu, te cuáhã<sup>n</sup>-gã ñuu Capèrnaúm. 2 Te yacá<sup>n</sup> ndécú ì<sup>n</sup> téé cùu capitá<sup>n</sup>, te cùhú ì<sup>n</sup> téé xinu cuechi núú-dé téé ío-gã cùú iní-dé, te sa ndècu-ná-dé sã cùú-dé. 3 Te òré ní níhí téé cùu capitá<sup>n</sup>-á<sup>n</sup> tnúhu cuendá Jèsús, te ní tendaha-dé ì<sup>n</sup> úú cue téé cùu sacuéhé núú ñáyiu isrãel cuáhã<sup>n</sup>-güedé cáhá<sup>n</sup> ndàhú-güedé núú-gã núu vá cündèe iní-gã quíhí-gã cada tãtna-gã téé xinu cuechi núú-dé-á<sup>n</sup>. 4 Te ní quexio-güedé núú ndécú Jèsús, te ní ngúita-güedé cáhá<sup>n</sup> ndàhú vihi-güedé núú-gã, te xãha<sup>n</sup>-güedé:

—Téé cùu capitá<sup>n</sup> ní cachí-dé véxi-ndí núu vá cündèe iní-n quíhí-n càda tãtna-n ì<sup>n</sup> téé xinu cuechi núú-dé chi cùú-dé, te táú ndisa-n càda-n nacuaá cáhá<sup>n</sup> capitá<sup>n</sup>-á<sup>n</sup>, 5 chi téé-á<sup>n</sup> ío cùu iní ñãhá-dé xii nchaa nchúhú ñáyiu isrãel te ñu-dé ní táúchúú-dé ní sáá veñúhu-ndí —càchí-güedé xãha<sup>n</sup>-güedé xii-gã.

6 Te sátá dúcá<sup>n</sup> te Jèsús ní xica-gã cuáhã<sup>n</sup>-gã ndihi-güedé, te òré tá cüyatni-gã vehe núú ndécú téé cùhú-á<sup>n</sup> cuáhã<sup>n</sup>, te téé cùu capitá<sup>n</sup>-á<sup>n</sup> ní xãha<sup>n</sup>-dè xii ì<sup>n</sup> úú cue téé cáhá<sup>n</sup> ndihi-dé:

—Quíhí<sup>n</sup>-ndó cũñaha-ndo xii Yáá cùú Mèstrú sã càchí-í sã ñà túú nã caní iní-gã, chi ñà túú táu-í sã quíhu-gã ndéé xití vehe-í, 7 chi ní sã cùú ndúcú mée-í-gã ñà túú ní cüyí-í. Núu xiã<sup>n</sup> cũñaha-ndo xii-gã sã ná càhá<sup>n</sup>-ni-gã sã ndũha téé xinu cuechi núú-í-a te ndũha-dé. 8 Chi yúhú ndécú cuè téé taxi tnúni ñãhá xii-í, te duca<sup>n</sup> yúhú tucu ndècu cue sandadú táxi tnúni-í. Te òré xãha<sup>n</sup>-í xii ì<sup>n</sup>-dè quíhí<sup>n</sup>-dè ì<sup>n</sup> chiú<sup>n</sup> te cuáhã<sup>n</sup>-dè, te òré xãha<sup>n</sup>-í xii ñngá-dé quixi-dé te véxi-dé, te òré xãha<sup>n</sup>-í xii téé xinu cuechi núú-í cada-dé ì<sup>n</sup> chiú<sup>n</sup> te quide-dé. Duha càchí-í cũñaha-ndo xii-gã —càchí-dé xãha<sup>n</sup>-dè xii cue téé cáhá<sup>n</sup> ndihi-dé-á<sup>n</sup>.

9 Te sátá dúcá<sup>n</sup> ní xãha<sup>n</sup>-güedé xii Jèsús, te ní cuñúhu-gã nchaa tnúhu ní cáhá<sup>n</sup> téé cùu capitá<sup>n</sup>-á<sup>n</sup>, te ní nchócótó-gã núú nchaa ñáyiu nchicú<sup>n</sup> ñãhá xii-gã cuáhã<sup>n</sup>, te ní xãha<sup>n</sup>-gã:

—Na càchí tnúhu ndáá-í xii-ndo sã vátã quini-gã-í ní ì<sup>n</sup> ñáyiu isrãel, ñáyiu ío vãha sãndáá iní-xi Yá Ndióxi datná sãndáá iní ñãhá téé-á<sup>n</sup> xii-gã —càchí-gã xãha<sup>n</sup>-gã xií-yu.

<sup>10</sup> Te òré ní ndexio cue tée nèhe tnúhu-án ní sáhá<sup>n</sup> núú Jèsús, te sa ní ndúha tée cùhú-án.

*Jèsús dándòto-gá déhe ì<sup>n</sup> ñaha quèè*

<sup>11</sup> Te sàtá dúcá<sup>n</sup> ní cuu te ní xica Jèsús cuáhá<sup>n</sup>-gá ì<sup>n</sup> ñúú nání Nàin, ndihí cue tée xica cuu ndihí-gá, ndihí vai ñáiyu. <sup>12</sup> Te òré ní sáá-gá yuhu ñúú-án, te ní xiní-gá nchídó-güedè ì<sup>n</sup> ndiyi cuáhá<sup>n</sup> chindúxi ñaha-güedè, te ndiyi-án cúú déhe ì<sup>n</sup> ñaha quèè, te ì<sup>n</sup> ddi duca<sup>n</sup>-ni déhe-a<sup>n</sup> ndècu ní cuu te ní xihí-dé. Te ío cuèhé ñáiyu cuáhá<sup>n</sup> chindúxi ñaha. <sup>13</sup> Te òré ní xiní ñáhá Jèsús xii-a<sup>n</sup> ndàhyú-a<sup>n</sup> te ní cundàhú iní ñáhá-gá, te ní xáha<sup>n</sup>-gá:

—Vá ndàhyú-n —càchí-gá xáha<sup>n</sup>-gá xii-a<sup>n</sup>.

<sup>14</sup> Te ní dáyatní-gá cajú ñúhú ndiyi-án te ní dáccáá-gá ndaha-gá te ní tendaha-gá cajú-án, te ní ngúíñí cue tée nchido ñaha-án. Te ní xáha<sup>n</sup>-gá xii ndiyi-án:

—Tée cuechi, yúhú càchí-í sá ndáccò-n —càchí-gá xáha<sup>n</sup>-gá xii ndiyi-án.

<sup>15</sup> Te tée ní xihí-án ní nucúnucúo-dé te ní ngúita-dé càhá<sup>n</sup>-dé, te Jèsús ní nacuéha cuèndá ñáhá-gá xii-dé ndaha náná-dè. <sup>16</sup> Te sá dúcá<sup>n</sup> ní quide Jèsús ní xiní-yu te ío ní yúhú-yu, te ní xitnàhá-yu:

—Ío cãhu cuu Yá Ndióxi chi ì<sup>n</sup> tée càhá<sup>n</sup> tnúhu-gá ní quexio núú ndécú-ó —càchí-yu xitnàhá-yu.

Te ní xitnàha tucú-yu:

—Yá Ndióxi véxi-gá chindee ñaha-gá xii nchaa nchoo ñáiyu cùu cuèndá-gá —càchí-yu xitnàhá-yu.

<sup>17</sup> Te nchaa ñúú distritú Jùdeá, ndihí dava-gá ñúú ní nihí-yu tnúhu nàcuáa ní quide Jèsús.

*Cue tée ní tendaha té Juáa cuáhá<sup>n</sup> núú ndécú Jèsús*

*(Mt. 11:2-19)*

<sup>18</sup> Te cue tée xica cuu ndihí té Juáa ní xáha<sup>n</sup>-güedè xii-dé nchaa sá ní quide-gá, núu ní cana-dé úú tnàhá-güedè <sup>19</sup> cuèndá cùñaha-dè quíhí<sup>n</sup>-güedè nducu tnúhu-güedè núú Jèsús, te núu sá díú-gá cúú-gá Crístú Yáa ní tendaha Yá Ndióxi véxi ñuyíú-a àdi sá cündètu nahi-ni-güedè mei Yàá-án. <sup>20</sup> Te òré ní quexio cue tée ní tendaha té Juáa núú ndécú Jèsús, te xáha<sup>n</sup>-güedè xii-gá:

—Té Juáa tée dàcuandute ñaha xii ñáiyu ní tendaha ñaha-dé xii-ndí véxi-ndí cãcá<sup>n</sup> tnúhú-ndí núú-n, núu sá díú-n cùu Crístú Yáa quixi ñuyíú-a, àdi sá cündètu-ndí mei Crístú càchí-dé —càchí-güedè xáha<sup>n</sup>-güedè xii-gá.

<sup>21</sup> Te mei òré ní quexio-güedè-án ní quide tátna Jèsús vai ñáiyu cùhú, te davá-yu càhú víhí tnàhá-yu, te ndí díí<sup>n</sup> ndí díí<sup>n</sup> núú cuèhé tnàhá-yu ì<sup>n</sup> ñúú-yu, te cue ñáiyu yihí ñaha espíritú cündihí yucu ñávàha ní queñuhu-gá

espíritú-án yiqui cùñú-yu, te ío vai ñáiyu cuáá ní nacaa<sup>n</sup>-gá núú-yu. <sup>22</sup> Te Jèsús ní xáha<sup>n</sup>-gá xii-güedè:

—Chí cuánúhú te cani-ndo cuèndú núú té Juáa nchaa sá ní xiní-ndó quide-í, ndihí nchaa nàcuáa ndúu tnúhu ní càhá<sup>n</sup>-í ní xindedóho-ndo. Te cùñaha-ndo xii-dé sá quide tátna-í núú cuè ñáiyu cuáa, te quide tátna-í cue ñáiyu yacua, ndihí cue ñáiyu tnàhá cuèhé sá dátèhyú nihnu-xi yiqui cùñú-yu, ndihí cue ñáiyu doho, nchaa ñáiyu-án quide tátna-í te ndúha-yu, te ndéé cue ñáiyu sa ní xihí dándòto-í cùñaha-ndo xii-dé, te cùñaha tucu-ndo xii-dé sá ndècu-í dánèhé-í nchaa ñáiyu ndàhú tnúhu sá sánú ichi ñaha xii-yu nàcuáa nanhí tàhú-yu. <sup>23</sup> Te cùñaha tucu-ndo xii-dé sá ío váha táhú nchaa ñáiyu ñá túú quide sáa iní nchaa tnúhu càhá<sup>n</sup>-í, duha cùñaha-ndo xii-dé —càchí-gá xáha<sup>n</sup>-gá xii-güedè.

<sup>24</sup> Te sàtá ní yáha-güedè cuánuhú-güedè, te ní ngúita Jèsús ní càhá<sup>n</sup>-gá núú ñáiyu cuèndá té Juáa, te xáha<sup>n</sup>-gá xii-yu:

—Nchòhó ní sándèhé-ndó ì<sup>n</sup> tée ndècu xití yucu, te tée-án ñá túú sàni ì<sup>n</sup> sàni úú iní-dé, chí ñá túú quide-dé dátna quide nchaa ité nánhú cuáhá<sup>n</sup>-xi duha cuáhá<sup>n</sup>-xi dáccá<sup>n</sup> òré quené táchí. <sup>25</sup> Te ní ñá túú ní sándèhé-ndó ì<sup>n</sup> tée nihnu dóó váha dóó vii cãa. Te nchòhó xiní-ndó sá ñáiyu sàcuñhu dóó váha dóó vii cãa ñá túú ná cãmáni xii-yu, te nchaa ñáiyu-án ndécú-yu vehe cue tée cùnuu yindaha ñaha xii ñáiyu. <sup>26</sup> Dico nchòhó chí ní sándèhé-ndó ì<sup>n</sup> tée càhá<sup>n</sup> tnúhu Yá Ndióxi. Te ndáa sá díú tée càhá<sup>n</sup> tnúhu-gá cúú-dé dico cùnuu-gá-dé dàcúxí dáva-gá cue tée càhá<sup>n</sup> tnúhu-gá. <sup>27</sup> Te diu cuèndá té Juáa-án càhá<sup>n</sup>-xi núú tütú Yá Ndióxi nàcuáa ní xáha<sup>n</sup>-gá xii Crístú, te duha ní xáha<sup>n</sup>-gá: Tendaha-í ì<sup>n</sup> tée càhá<sup>n</sup> tnúhu-í codonúu-dé núu-n cuèndá dátúha-dé ñáiyu cuèndá quíndáa iní-yu tnúhu-n.

Duha ní xáha<sup>n</sup>-gá, te duca<sup>n</sup> ní ngódo tnùni núú tütú-gá. <sup>28</sup> Te na càchí tnúhu-í xii-ndo sá ní ì<sup>n</sup> cue tée ñuyíú-a ñá túú cùnuu-güedè dátna cùnùu té Juáa tée dàcuandute ñaha xii ñáiyu. Te nchaa ñáiyu sa ta ndiñu ndaha ñaha Yá Ndióxi vitna cuáhá<sup>n</sup> cùnùu-gá-ni tucú-yu dàcúxí té Juáa cuèi cùu-yu ñáiyu ñá túú cùnuu dàcúxí dáva-gá ñáiyu yindaha-gá —càchí Jèsús xáha<sup>n</sup>-gá xii-yu.

<sup>29</sup> Te sá dúcá<sup>n</sup> ní càhá<sup>n</sup> Jèsús, núu nchaa ñáiyu ní dàcuandute té Juáa ní càchí-yu sá ío váha quide Yá Ndióxi, te diu-ni duca<sup>n</sup> ní càhá<sup>n</sup> cue tée cuìhna iní-xi quide cobrá ñáhá xii ñáiyu cuèndá impuèstú, cue tée ní dàcuandute-dé. <sup>30</sup> Dico cue tée cùu fariséú, ndihí cue tée dàcuaha ñaha xii ñáiyu nchaa tnúhu ní chídó tnùni ndii Moisés, cue tée ñá túú ní dàcuandute té Juáa ñá túú ní tnàhá iní-güedè cada-güedè nchaa sá váha cuíni Yá



Ndiöxi. <sup>31</sup> Te Xítoho Jesucristú ní xáha<sup>n</sup>-gã xii-yu:

—Na cächí tnúhu-í xii-ndo nacuaa sätnahá-xi cùu ñáyiú ndècu vitna. <sup>32</sup> Chi ñáyiú-á<sup>n</sup> cùú-yú dàtnà cue landú sácòo núú yáhu dàdiqui-güexi te níhi cáhá<sup>n</sup>-güexi, te xitnáha-güexi: “Ní tíú-ndí yaá ndihi vilu te ñá túú ní cuíní-ndó càta-ndo. Te ío yica iní ní xita yuhu-ndí te ñá túú ní ndáhyú-ndó”, cächí-güexi xitnáha-güexi. Te duca<sup>n</sup> sätnahá-xi cùu ñáyiú ndècu vitna. <sup>33</sup> Te té Juáá téé ní xóo dacuandute ñaha xii ñáyiú ío ndáhú ní xóo caxi-dé, te ní ñá túú ní xóo coho-dé ndudí ndéhe yoho yáha stilé sá sá ní nduu-xi ndidí, te ní cächí-ndó sá ní xíndecu ndihi-dé espíritú cúndihi yucu ñávaha. <sup>34</sup> Te sátá ní quexio yúhú Téé cùu ñamí tnáhá-ndó ncháa-ndo, te xèxi-í xihí-í ndécú-í te cächí-ndó sá cùú-í téé xica cuu ndihi cue téé cuinha iní-xi quide cobrá ñáhá xii ñáyiú cuendá impuèstú, ndihi nchaa dava-gá cue téé ndècu ichi cuehé ichi duha, duha cächí-ndó. <sup>35</sup> Te ñáyiú ní tnahá tnúhu ndihi Yá Ndiöxi, ñáyiú-á<sup>n</sup> quidè-yu nacuaa cutnùní sá méé-gá ío ndècu ndihi-gá sá xini tnùn-í-gá —cächí-gá xáha<sup>n</sup>-gá xii-yu.

*Jèsús ndécú-gá vehe ì<sup>n</sup> téé cùu fariséú téé nàni Ximú*

<sup>36</sup> Te ì<sup>n</sup> téé cùu fariséú ní cáhá<sup>n</sup>-dé Jèsús vehe-dé caxi-gá, te óré ní quexio-gá te cuánguihu-gá mèsá. <sup>37</sup> Te xíá<sup>n</sup> núcòo-gá ní sáá ì<sup>n</sup> ñadìhí te ñu-ni ñaha ñuú-á<sup>n</sup> cùú-á<sup>n</sup>, te ndècu-a<sup>n</sup> ichi díí iní, te sá ní níhí-a<sup>n</sup> tnúhu sá cuángaxi Jèsús vehe téé cùu fariséú-á<sup>n</sup>, núu nèhe-a<sup>n</sup> ì<sup>n</sup> yoo chitu àcítí sáhá<sup>n</sup> tnámí. <sup>38</sup> Te ní ngóo-a<sup>n</sup> ì<sup>n</sup> xio díñi Jèsús, te ní ngúta-a<sup>n</sup> ndáhyú-a<sup>n</sup> te ndihi ndute núú-a<sup>n</sup> ní naquete-a<sup>n</sup> sáhá-gá. Te dàtnùní ní nadayichí-a<sup>n</sup> ndihi idi díquí-a<sup>n</sup>, te ní teyuhu-a<sup>n</sup> sáhá-gá, te ní chihí ñaha-a<sup>n</sup> àcítí sáhá<sup>n</sup> tnámí-á<sup>n</sup>. <sup>39</sup> Te sá dúcá<sup>n</sup> ní quide-a<sup>n</sup> ní xini téé cùu fariséú téé ní cáhá<sup>n</sup> ñáhá xii-gá-á<sup>n</sup> núu ní sani iní-dé: “Te núu dicó ndisa téé cáhá<sup>n</sup> tnúhu Yá Ndiöxi cùú tée-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñáyiú cùu-a<sup>n</sup>, te dicó ì<sup>n</sup> ñaha ndècu ichi díí iní cùú-á<sup>n</sup>”, duha ní sani iní-dé. <sup>40</sup> Te Jèsús ní xáha<sup>n</sup>-gá xii-dé:

—Ximú, ndècu ì<sup>n</sup> tnúhu cächí tnúhu-í xii-n —cächí-gá xáha<sup>n</sup>-gá xii-dé.

Te téé cùu fariséú-á<sup>n</sup> xáha<sup>n</sup>-dè xii-gá:

—Cächí tnúhu, Mèstrú —cächí-dé xáha<sup>n</sup>-dè xii-gá.

<sup>41</sup> Te Jèsús ní xáha<sup>n</sup>-gá:

—Ní xíndecu ì<sup>n</sup> téé ní xóo dasa<sup>n</sup> núu díhú<sup>n</sup>, te ní xitáú úú tnáhá-güedé núú-dé. Te ì<sup>n</sup>-dé ní sáha-dé úhú<sup>n</sup> cièndú díhú<sup>n</sup> denàriú, te ingá-dé ní sáha-dé údico úxí. <sup>42</sup> Te ñá ní níhí-güedé nacháhu-güedé núú-dé, te téé ní sánúu ñaha-á<sup>n</sup> ní quide cahnú iní-dé

ndi ndúú-güedé. Te vitna cächí-ò tucu te núu ndèda càa-güedé cùú iní ñáhá-gá-güedé xii-dé —cächí-gá xáha<sup>n</sup>-gá xii-dé.

<sup>43</sup> Te ní xáha<sup>n</sup> téé Ximú-á<sup>n</sup>:

—Sànúu sá tée tàú vai-gá díhú<sup>n</sup> ío-gá cùú iní-dé téé ní sánúu ñaha díhú<sup>n</sup>-á<sup>n</sup> —cächí-dé xáha<sup>n</sup>-dè xii-gá.

Te ní xáha<sup>n</sup> Jèsús:

—Sá ndaá cáhá<sup>n</sup>-n —cächí-gá xáha<sup>n</sup>-gá xii-dé.

<sup>44-46</sup> Te Jèsús ní ndacoto-gá núú ñadìhí-á<sup>n</sup>, te ní xáha<sup>n</sup>-gá xii téé Ximú-á<sup>n</sup>:

—¿Ndèhe-n nacuaa quide ñadìhí-a ñá? Chi cuánguihu-í vehe-n, dico ñá túú ní tàxi-n ndute ndoo sáhá-í, te ní ñá túú ní tèyuhu ñaha-n, te ní ñá túú ní chihí-n acítí díquí-í, dico ñadìhí-a ní naquete-a<sup>n</sup> ndihi ndute núú-a<sup>n</sup> sáhá-í, te ní nadayichí-a<sup>n</sup> ndihi idi díquí-a<sup>n</sup>, te núu núu teyuhu-a<sup>n</sup> sáhá-í, te ní chihí-a<sup>n</sup> acítí sáhá<sup>n</sup> tnámí sáhá-í. <sup>47</sup> Te na cächí tnúhu-í xii-n sá ío cùu iní ñáhá-á<sup>n</sup> xii-í, te núu xíá<sup>n</sup> cútùn-í iní-ó sá cuéí ío vai sá cuéhé sá dúhá ní quide-a<sup>n</sup>, dico Yá Ndiöxi sa ní quide cahnú iní ñáhá-gá xii-a<sup>n</sup>. Chi Yá Ndiöxi quidè cahnú iní-gá ñáyiú cuéí vai àdi sacú cuéchi-yu, te núu sacú cuéchi-yu te sacú cùú iní ñáhá-yu xii-í —cächí-gá xáha<sup>n</sup>-gá xii-dé.

<sup>48</sup> Te ní xáha<sup>n</sup>-gá xii ñadìhí-á<sup>n</sup>:

—Sa ní quide cahnú iní-í nchaa cuéchi-n —cächí-gá xáha<sup>n</sup>-gá xii-a<sup>n</sup>.

<sup>49</sup> Te cue téé xínucóo ndihi-gá xitnáha-güedé:

—¿Ná téé cùu tée-a núu nándi sá quidè-dé, te ndéé nchaa yíca cuéchi ñáyiú quide cahnú iní-dé-í? —cächí-güedé xitnáha-güedé.

<sup>50</sup> Te Jèsús ní xáha<sup>n</sup> tùcu-gá xii ñadìhí-á<sup>n</sup>:

—Sa ní cácu nihnu-n núu ùhú núu ndáhú vitna chihí ní sándáá iní ñáhá-n xii-í, te vitna cuanúhú te ñá túú-gá ná caní iní-n —cächí-gá xáha<sup>n</sup>-gá xii-a<sup>n</sup>.

## 8

*Ñáyiú díhí ní chindee ñaha xii Jèsús*

<sup>1</sup> Te sátá dúcá<sup>n</sup> ní cuu te Jèsús ní xica-gá cuáhá<sup>n</sup>-gá titní víhí ñúú náhnú, ndihi ñuú líhli dānehé-gá ñáyiú nacuaa ndihi ndaha ñaha Yá Ndiöxi xii-yu. Te cuáhá<sup>n</sup> ndihi-gá ndi ùxúú tnáhá cue téé xica cuu ndihi-gá, <sup>2</sup> ndihi ì<sup>n</sup> úú ñáyiú díhí ní quide tátna-gá ní xihí ñaha espíritú cúndihi yucu ñávaha, ndihi ñáyiú tnáhá dava-gá cuéhé ùhú ní cùu. Te xíá<sup>n</sup> tnáhá tucu ì<sup>n</sup> ñaha nàni Mariá Magdaléná, te ñaha-á<sup>n</sup> ní xihí ñaha úsá espíritú cúndihi yucu ñávaha xii-a<sup>n</sup> ní cùu, te ní quee ñaha-xi. <sup>3</sup> Te tnáhá ì<sup>n</sup> ñaha nàni Juáná ñadìhí ì<sup>n</sup> téé nàni Chúza téé ní cunuu ní xinu cuechi vèhe té Hèrodés, ndihi ingá ñaha nàni Susaná nchaa ñáyiú-á<sup>n</sup> ní chindee ñáhá-yu xii-gá ndihi

nchaa sá ndécú ndíhí-yu, te ñiú-ni duca<sup>n</sup> ní quide vai-gá tucu ñáyiú nchicú<sup>n</sup> ñáhá xii-gá cuáhá<sup>n</sup>.

*Nàcuáa quide té cuángacá<sup>n</sup> triú*  
(Mt. 13:1-9; Mr. 4:1-9)

<sup>4</sup> Te ío vai ñáyiú ndaa ñuú ní tacá-yu núú ndécú Jèsús, te ní ngúita-gá ní cani-gá ñ<sup>n</sup> cuendú núú-yu cuendá tecú tnúni-yu tnúhu-gá, te xáha<sup>n</sup>-gá xii-yu:

<sup>5</sup> -Ñ<sup>n</sup> té cuángacá<sup>n</sup>-dé triú. Te òré ní ngúita-dé dangoyo-dé triú-án te dava ní quene ndava ní ngava ndéé ichi, te ní xénihnu ñáyiú, te ní xiní tilaa te ní nadatacá-güedi. <sup>6</sup> Te dava ní ngava ñuhu yadi núú yíhí víhi yúú, te ní xínu-xi dico núú sácú-ni nduu te ní yíchí-xi, chí ñá túú còhyo yíhi. <sup>7</sup> Te dava ní ngava núú yúú ndíquí<sup>n</sup> tnu ñuú, te ñ<sup>n</sup>nuu-ni ní xínu-xi ndíhi tnu ñuú-án, te tnu ñuú-án ní dánáá-xí ncháa triú sá ní xínu-án. <sup>8</sup> Dico dava triú-án ní ngava-xi núú ndécú ñuhu coco<sup>n</sup>, te xiá<sup>n</sup> ní xínu-xi te ní sahnu-xi, te ío váha ní cuu, chí núú ñ<sup>n</sup>-ní triú te ní nguíhi yoco-xi ñ<sup>n</sup> ciendú triú-xi -cáchi-gá xáha<sup>n</sup>-gá xii-yu.

Te níhi ní cáhá<sup>n</sup>-gá ní xáha<sup>n</sup> tucu-gá xii-yu: -Nchaa nchòhó ñáyiú ní xíndedóho tnúhu ní cáhá<sup>n</sup>-í-a, te ío váha chí cuáha cuendá -cáchi-gá xáha<sup>n</sup>-gá xii-yu.

*Nàcuáa quèe-xi tnúhu ní cáhá<sup>n</sup> Jèsús*  
(Mt. 13:10-17; Mr. 4:10-12)

<sup>9</sup> Te cue téé xica cuu ndíhi Jèsús ní xicá<sup>n</sup> tnúhú-güedé núú-gá núu nása quèe-xi cuendú ní cani-gá núú ñáyiú. <sup>10</sup> Te ní xáha<sup>n</sup>-gá xii-güedé:

-Nchòhó chí sa cáchi tnúhu Yá Ndióxi xii-ndo ñ<sup>n</sup> sá vátá quini-gá-ndó, chí cáchi tnúhu-gá nàcuáa cada-gá ndíhu ndaha-gá ñáyiú, dico dava-gá ñáyiú cani-í mee-ni cuendú núú-yu, chí cuéi na quini-yu nchaa nàcuáa cuu dico ní vá cúnúni iní-yu ná cuendá duca<sup>n</sup> cùu, àdi cuéi na cündedóho-yu dico ní vá tecú tnúni-yu -cáchi-gá xáha<sup>n</sup>-gá xii-güedé.

*Jèsús cáhá<sup>n</sup>-gá nàcuáa quèe-xi tnúhu cuendá té cuángacá<sup>n</sup> triú*

(Mt. 13:18-23; Mr. 4:13-20)

<sup>11</sup> Te xáha<sup>n</sup> tucu-gá xii-güedé:

-Duha quèe-xi cuendú ní cani-í núú-ndó, chí triú ní sacá<sup>n</sup> téé-án cúú-xí dátá tnúhu Yá Ndióxi. <sup>12</sup> Te triú sá ní quene ndava ní ngava ndéé ichi-án, xiá<sup>n</sup> cúú-xí dátá ñáyiú ní quèe iní-xi tnúhu Yá Ndióxi, dico sácúíhna cuáhá<sup>n</sup>-xi xòcani-xi tnúhu-gá iní-yu cuendá sá vá quindáá iní-yu, te vá nanihí tàhú-yu. <sup>13</sup> Te triú sá ní ngava ñuhu yadi núú yíhí víhi yúú, xiá<sup>n</sup> cúú-xí dátá ñáyiú ní xíndedóho tnúhu Yá Ndióxi te dáí iní ní tnú-yu tnúhu-gá, dico òré ná dàcáha<sup>n</sup> ñáhá yucu ñáváha xii-yu nándi cadá-yu, te dáña nihnú-yu tnúhu-gá

chí ñá níhí ndéè-yu canchicú<sup>n</sup> nihnú-yu nàcuáa cáhá<sup>n</sup> tnúhu-gá. <sup>14</sup> Te triú sá ní ngava núú yúú ndíquí<sup>n</sup> tnu ñuú-án, xiá<sup>n</sup> cúú-xí dátá ñáyiú ní tecú dóho-xi tnúhu Yá Ndióxi, dico cuéé cuéé ní nacunaá-yu tnúhu-gá, chí cuendá mee-ni sá cúú-xí meè-yu ñuhu iní-yu, ndíhi cuendá sá ío sàni iní-yu cuu cuicá-yu, ndíhi cuendá sá ío cùdí iní-yu nchaa sá ío ñuyúú-a núu xiá<sup>n</sup> àú<sup>n</sup> ní cuu ní xíndedóho-yu tnúhu-gá. <sup>15</sup> Dico triú sá ní ngava núú ndécú ñuhu coco<sup>n</sup>, xiá<sup>n</sup> cúú-xí dátá ñáyiú váha iní-xi ní xíndedóho tnúhu Yá Ndióxi chí ñá túú dáña nihnú-yu, te ní yúhu ní iní-yu quidé-yu nchaa nàcuáa cáhá<sup>n</sup> tnúhu-gá.

*Nàcuáa quidé-yu iti*  
(Mr. 4:21-25)

<sup>16</sup> Te ñá túú ní ñ<sup>n</sup> ñáyiú tènúhú-yu ñ<sup>n</sup> iti te dàdáhu-yu, àdi chiváha-yu ñ<sup>n</sup> caha cáma, chí tàxi ndecú-yu núú ñinu cuendá cutnúni núú ncháa ñáyiú ndecu vehe. <sup>17</sup> Te ní ñ<sup>n</sup> tnúhu sá ñá tecú tnúni ñáyiú vitna vá cáchi-ó sá vá tecú tnúni-yu chí dacuèi sá tecú tnúni-yu, te ní ñ<sup>n</sup> tnúhu sá cáchi-ó cùu yuhu vitna vá cúú yuhu chí dacuèi sá quèé tùu-xi núú ñáyiú.

<sup>18</sup> Te chí cündedóho váha tnúhu na cáhá<sup>n</sup>-í-a. Nchaa ñáyiú sàndáá iní ñáhá xii Yá Ndióxi ío-gá cuita quindáá-gá iní ñáhá-yu xii-gá quíhí<sup>n</sup>, te nchaa ñáyiú ñá túú sàndáá iní ñáhá xii-gá uu<sup>n</sup>-gá cuita cuu sàá-gá iní-yu núú-gá quíhí<sup>n</sup> -cáchi-gá xáha<sup>n</sup>-gá xii-güedé.

*Cue ñani Jèsús ndíhi náná-gá*  
(Mt. 12:46-50; Mr. 3:31-35)

<sup>19</sup> Te ní quexio náná Jèsús ndíhi cue ñani-gá vehe núú ndécú-gá, te ñá ndacú-yu cáhá<sup>n</sup> ndíhi ñáhá-yu xii-gá chí ío cuéhé ñáyiú ndecu núú ndécú-gá. <sup>20</sup> Te ñ<sup>n</sup> ñáyiú xíndecu-án ní dáyáha-yu tnúhu núú-gá, te xáhá<sup>n</sup>-yu:

-Ní quexio náná-n ndíhi cue ñani-n xínutnú-yu quehé, te cuini-yu cáhá<sup>n</sup> ndíhi ñáhá-yu xii-n -cáchi-yu xáhá<sup>n</sup>-yu xii-gá.

<sup>21</sup> Te ní xáha<sup>n</sup>-gá:

-Nchaa ñáyiú sácündedóho tnúhu Yá Ndióxi te quidé-yu nchaa nàcuáa cáhá<sup>n</sup> tnúhu-gá, ñáyiú-án cúú-yu dátá náná-í ndíhi dátá cue ñani-í -cáchi-gá xáha<sup>n</sup>-gá xii ñáyiú ní dáyáha tnúhu núú-gá-án.

*Jèsús ngáni-gá táchi ndíhi ndute làgúná*  
(Mt. 8:23-27; Mr. 4:35-41)

<sup>22</sup> Te ñ<sup>n</sup> nduu ní quèe Jèsús bàrcú ndíhi cue téé xica cuu ndíhi-gá, te ní xáha<sup>n</sup>-gá:

-Chí ná quíhí<sup>n</sup>-ó ndaa ingá xio yuhu làgúná -cáchi-gá xáha<sup>n</sup>-gá xii-güedé.

Te cuáhá<sup>n</sup>-güedé ndíhi-gá. <sup>23</sup> Te nini ñuhu bàrcú ichi cuáhá<sup>n</sup>-xi núú ndute ní xidí Jèsús. Te ní ngúita-xi níhi víhi quene táchi te ta nàdachitú-xi ndute xití bàrcú-án cuáhá<sup>n</sup>, te sa cuini-ná-xi quèe naa bàrcú-án xití ndute

ni cùu. <sup>24</sup> Te ní sáhá<sup>n</sup>-güedé núú cáá Jèsús xidí-gá, te ní xáha<sup>n</sup>-güedé xii-gá:

—¡Mèstrú, ndiquíúú ínì chí tà quée naa-o cuáhá<sup>n</sup>! —càchí-güedé xáha<sup>n</sup>-güedé xii-gá.

Te Jèsús ní ndiquíúú ínì-gá te ní ndacóo-gá te ní tenàá-gá táchí-á<sup>n</sup> ndihi ndute làgúná-á<sup>n</sup>, te ní ngüñí-ni táchí-á<sup>n</sup> te ní nucúndecu nahi-ná ndute làgúná-á<sup>n</sup>. <sup>25</sup> Te ní xáha<sup>n</sup>-gá xii-güedé:

—¿Náa ñá túú sàndáá ínì ñáhá ndisa-ndo xii-í á<sup>n</sup>? —càchí-gá xáha<sup>n</sup>-gá xii-güedé.

Te ní cuñúhu-güedé sá dúcá<sup>n</sup> ní quide-gá ní xiní-güedé, te ní yùhú-güedé, te ní xitnáha-güedé:

—¿Te ná téé cùu téé-a núú ní cáhá<sup>n</sup>-ni-dé te ní ngüñí táchí te ní nucúndecu nahi-ni ndute làgúná-a-í? —càchí-güedé xitnáha-güedé.

*Tée yíhi ñaha cue espíritú cúndihi yucu ñávaha*

(Mt. 8:28-34; Mr. 5:1-20)

<sup>26</sup> Te ní sáá-gá ndihi-güedé yucu cue téé ñúu Gàdará, te yíhi ndáá-ni ndàa ingá xio làgúná-á<sup>n</sup> cáá distritú Galileá. <sup>27</sup> Te òré ní quene Jèsús xití bàrcú te ní dáyátni ñaha ñ<sup>n</sup> téé ñúu-á<sup>n</sup> xii-gá, te yíhi ñaha titní espíritú cúndihi yucu ñávaha xii-dé. Te ní cunaha ñà túú-gá sácúñhu-dé dóo-dé, te ní ñà túú-gá sácúndecu-dé vehe-dé, chí da nchaa núú yíndúxi ndíyi quide vehe-dé. <sup>28</sup> Te òré ní xiní-dé Jèsús te ní ngüñí xití-dé núú-gá, te cue espíritú yíhi ñaha xii-dé-á<sup>n</sup> ní quide-xi níhi ní cáhá<sup>n</sup>-dé, te xáha<sup>n</sup>-dè xii-gá:

—¿Ná cuendá véxi-ò Jèsús Déhe Dútú Ndióxi sáá-n ichi-í-í? Te cáhá<sup>n</sup> ndàhú-í núú-n sá vâ dándòho ñaha-n xii-í —càchí-dé xáha<sup>n</sup>-dè xii-gá.

<sup>29</sup> Te duca<sup>n</sup> ní cáhá<sup>n</sup>-dè cuendá sá Jèsús ní xáha<sup>n</sup>-gá xii nchaa espíritú cúndihi yucu ñávaha yíhi ñaha sá ná quée ñaha-xi xii-dé. Te nchaa xíá<sup>n</sup> ní xóo dacáhá<sup>n</sup>-xi ínì-dé nándi sá ní xóo cada-dé núu ní xóo dacùu ñaha-güedé cadená xii-dé cuendá sá ñà túú-gá ná cada-dé, te ní xóo cundee ñáhá-güedé, dico cuéi duca<sup>n</sup> dico ní xóo dandáva-ni-dé cadená, te cue espíritú cúndihi yucu ñávaha-á<sup>n</sup> ní xóo dacùnu ñaha-xi xii-dé ní xóo quíhí<sup>n</sup>-dè xití yucu. <sup>30</sup> Te Jèsús ní xicá<sup>n</sup> tnúhú-gá núú-dé, te xáha<sup>n</sup>-gá:

—¿Nása nàni-n-í? —càchí-gá xáha<sup>n</sup>-gá.

Te ní xáha<sup>n</sup>-dè:

—Vâi Sandadú nàni-í —càchí-dé xáha<sup>n</sup>-dè xii-gá.

Te duca<sup>n</sup> ní xáha<sup>n</sup>-dè xii-gá cuendá sá ïo cuéhé espíritú cúndihi yucu ñávaha yíhi ñaha xii-dé. <sup>31</sup> Te nchaa espíritú-á<sup>n</sup> ní cáhá<sup>n</sup> ndàhú-xi núú Jèsús sá vâ téndàha ñaha-gá xii-xi quíhí<sup>n</sup>-xi núú ùhú núú ndàhú. <sup>32</sup> Te ñu-ni yatni yucu núú ndécú Jèsús-á<sup>n</sup> yíhi

vâi cuchí xixexi-güedi, te nchaa espíritú-á<sup>n</sup> ní cáhá<sup>n</sup> ndàhú-xi núú-gá sá ná dàña-gá quíhu-xi yiqui cùñú nchaa cùchí-á<sup>n</sup>, te Jèsús ní xáha<sup>n</sup>-gá sá cúu quíhu-xi yiqui cùñú-güedi. <sup>33</sup> Te ní quée ñaha nchaa espíritú-á<sup>n</sup> xii téé-á<sup>n</sup>, te ní quíhu-xi nchaa cùchí-á<sup>n</sup>, te cùchí-á<sup>n</sup> ní xinu-güedi duha ní quée-güedi ndàa núú dèhvâ yuhu làgúná-á<sup>n</sup>, te ní ngaunihnu-güedi xití ndute te ní ndihi-güedi ní cáhá.

<sup>34</sup> Te òré ní xiní cue téé xito cuchí-á<sup>n</sup> nàcuáa ní cuu te ní yùhú-güedé ní xinu-güedé, te ní sáhá<sup>n</sup>-güedé ní caní-güedé cuendú núú cué ñáyiu ndècu xití ñúu, ndihi núú cué ñáyiu ndècu xití yucu. <sup>35</sup> Te nchaa ñáyiu ní níhi tnúhu ní quée-yu cuáhá<sup>n</sup> ndéhè-yu nàcuáa ní cuu. Te òré ní quexió-yu núú ndécú Jèsús, te ní xiní-yu téé ní xíhi ñaha cué espíritú cúndihi yucu ñávaha-á<sup>n</sup> núcóo-dé núú sáhá Jèsús, te níhnu-ná-dé dóo-dé, te núcóo-dé dàtná ñ<sup>n</sup> ñáyiu vâha, te ní yùhú-yu òré ní xiní ñáhá-yu xii-dé.

<sup>36</sup> Te nchaa ñáyiu ní xiní nàcuáa ní cuu ní ndúha téé yíhi ñaha cue espíritú cúndihi yucu ñávaha-á<sup>n</sup> ní cùu ní caní-yu cuendú núú nchaa ñáyiu ní quexio-á<sup>n</sup> nàcuáa ní cuu ní ndúha téé-á<sup>n</sup> ndihi nàcuáa ní cuu cuendá nchaa cùchí-á<sup>n</sup>. <sup>37</sup> Te sá dúcá<sup>n</sup> ní níhi-yu tnúhu nàcuáa ní cuu, núu nchaa ñáyiu ñúu Gàdará ío ní yùhú-yu te ní ngüita-yu cáhá<sup>n</sup> ndàhú-yu núú Jèsús sá ná nùhú-gá núu ndéé ichi véxi-gá. Te sá dúcá<sup>n</sup> ní cáhá<sup>n</sup>-yu núu cuáhá<sup>n</sup>-gá núú ndécú bàrcú. Te òré ndée-gá bàrcú-á<sup>n</sup> nùhú-gá <sup>38</sup> ní ngüita téé ní xíhi ñaha cue espíritú cúndihi yucu ñávaha cáhá<sup>n</sup> ndàhú-dé núú-gá núu vâ cundee ínì-gá quíhí<sup>n</sup> ndihi ñaha-gá xii-dé, dico Jèsús ní quide ndee ínì ñáhá-ni-gá xii-dé, te ní xáha<sup>n</sup>-gá:

<sup>39</sup> —Cuanùhú vehe-n, te caní-n cuendú núú nchaa ñáyiu sá ïo càhnu cuu nchaa sá vâha ní quide ñaha Yâ Ndióxi xii-n —càchí-gá xáha<sup>n</sup>-gá xii-dé.

Te téé-á<sup>n</sup> ní xica-dé cúanuhú-dé te ní ngüita-dé ní caní-dé cuendú núú nchaa ñáyiu xíndecu níhi ñúu sá ïo càhnu cuu nchaa sá vâha ní quide ñaha Jèsús xii-dé.

*Cuendá déhe yoco té Jàirú, ndihi cuendá ñ<sup>n</sup> ñadhí ní tnándeé dóo Jèsús*

(Mt. 9:18-26; Mr. 5:21-43)

<sup>40</sup> Te òré ní ndexio Jèsús ndàa ingá xio yuhu làgúná, te ñáyiu xíndecu xíá<sup>n</sup> sa ndètu cahnu ñaha-ná-yu, te ío vâha ní cáhá<sup>n</sup> ndihi ñáhá-yu xii-gá òré ní nasáá-gá. <sup>41</sup> Te ñ<sup>n</sup> téé tàxi tnuní veñúhu ní quexio-dé núú ndécú Jèsús, te téé-á<sup>n</sup> nání-dé Jàirú, te ní ngüñí xití-dé núú-gá cáhá<sup>n</sup> ndàhú-dé, te xáha<sup>n</sup>-dè xii-gá:

—Véxi-í cáhá<sup>n</sup> ndáhú-í núú-n núu vá cündèe iní-n quíhí<sup>n</sup>-ó vèhe-í cada tátna-n dèhe yoco-í —càchí-dé xáha<sup>n</sup>-dè xii-gá.

<sup>42</sup> Te duca<sup>n</sup> ní xáha<sup>n</sup>-dè chí ndècu ì<sup>n</sup> dii-ni dèhe yoco-dè, te ndècu-xi datná úxúú cuía-xi, te càhú víhí tnhàh-xi cùhú-xi te cùiní-xi cuú-xi. Te Jèsús ní xica-gá cuáhá<sup>n</sup>-gá ndihí tée-á<sup>n</sup>, te ío vai ñáyiú nchicú<sup>n</sup> ñháhá xii-gá cuáhá<sup>n</sup>, te dàdehnde ñaha-ná-yu xii-gá ní cùu.

<sup>43</sup> Te tnuú nchaa ñáyiú-á<sup>n</sup> ñútnàhá ì<sup>n</sup> ñaha cùhú, te ñaha-á<sup>n</sup> sà ní cuu úxúú cuía sá cùhú-a<sup>n</sup> ngòyo ñaha ñíñí xii-a<sup>n</sup>, te ío cuéhé díhú<sup>n</sup> ní cuu dādoñuhu-a<sup>n</sup> chí ní nadico-a<sup>n</sup> nchàa sá ndécú ndihí-a<sup>n</sup> cuendá ní níhí-a<sup>n</sup> díhú<sup>n</sup> ní quehe<sup>n</sup> nchaa ñáyiú ní quide tátna ñaha xii-a<sup>n</sup>, dico ní ì<sup>n</sup>-yu ñá túú ní ndàcú-yu ndúha-a<sup>n</sup>. <sup>44</sup> Te ní sáhá<sup>n</sup> ndehe yatni-a<sup>n</sup> ndàa sátá Jèsús, te ní tnàndéé-a<sup>n</sup> luha yuhu dóo-gá te òré-ni-á<sup>n</sup> ní ndúha-a<sup>n</sup>.

<sup>45</sup> Te Jèsús ní xicá<sup>n</sup> tñuhú-gá núú-yu, te xáha<sup>n</sup>-gá:

—¿Ndédacàa-ndo ní tnàndéé ñháhá xii-í? —càchí-gá xáha<sup>n</sup>-gá xii-yu.

Te nchaa-yu ní xáhá<sup>n</sup>-yu sá ní ì<sup>n</sup>-yu ñá túú ní tnàndéé ñháhá xii-gá. Te té Pèlú ndihí cue tée cündihí-dé ní xáha<sup>n</sup>-güedé xii-gá:

—Mèstrú, ndèhe-n sá vái ñáyiú nchicú<sup>n</sup> ñháhá xii-n, te xio xio dàdehnde ñháhá-yu, te xicá<sup>n</sup> tñuhú-gá-n yòo ní tnàndéé ñháhá xii-n —càchí-güedé xáha<sup>n</sup>-güedé xii-gá.

<sup>46</sup> Dico Jèsús ní xáha<sup>n</sup>-gá xii-yu:

—Dico diu ì<sup>n</sup>-ndo ní tnàndéé ñháhá xii-í, chí ní cutnùnì iní-í sá ì<sup>n</sup> ñáyiú cùhú ní tnàndéé ñháhá xii-í te ní ndúha-yu —càchí-gá xáha<sup>n</sup>-gá xii-yu.

<sup>47</sup> Te sátá ní xiní ñaha-á<sup>n</sup> sá ní cutnùnì iní Jèsús sá ní tnàndéé ñháhá-á<sup>n</sup> xii-gá, te yuhú yuhú-a<sup>n</sup> ní sáhá-a<sup>n</sup> ní ngüñí xití-á<sup>n</sup> núú-gá, te ní náhmá-a<sup>n</sup> núú-gá, ndihí núú nchàa ñáyiú ná cuendá duca<sup>n</sup> ní quide-a<sup>n</sup> ní tnàndéé-a<sup>n</sup>-gá, ndihí cuendá sá òré-ni-á<sup>n</sup> ní ndúha-a<sup>n</sup>. <sup>48</sup> Te Jèsús ní xáha<sup>n</sup>-gá xii-a<sup>n</sup>:

—Yòhó ñaha cùhú, ní sándáá iní ñháhá-n xii-í núu ní ndúha-n, te cuanùhú vitna te ñá túú-gá ná canì iní-n —càchí-gá xáha<sup>n</sup>-gá xii-a<sup>n</sup>.

<sup>49</sup> Te càhá<sup>n</sup> dúcá<sup>n</sup>-ní Jèsús ní sáá ì<sup>n</sup> tée xìnu cuechi vehe té Jàirú tée tàxi tunì veñúhu, te xáha<sup>n</sup> tée xìnu cuechi-á<sup>n</sup> xii-dé:

—Sa ní xihí dèhe-n, vá chíchiu<sup>n</sup>-gá-n Mèstrú —càchí-dé xáha<sup>n</sup>-dè.

<sup>50</sup> Te sá dúcá<sup>n</sup> xáha<sup>n</sup> tée xìnu cuechi-á<sup>n</sup> xii té Jàirú ní tecú dóho Jèsús, núu ní xáha<sup>n</sup>-gá xii-dé:

—Vá ndihú iní-n, quindáá iní ñháhá-ní-n xii-í te ndúha dèhe-n —càchí-gá xáha<sup>n</sup>-gá xii-dé.

<sup>51</sup> Te òré ní sáá-gá vehe té Jàirú te ñá ní dàña-gá quíhu ñáyiú cùtexínu, núu té Pèlú-ni ndihí té Jàcobó-ni, ndihí té Juáá-ni, ndihí

tátá ndihí náná-ni xíchí ní xihí-á<sup>n</sup> cuānguihu ndihí-gá xití vehe. <sup>52</sup> Te nchaa ñáyiú sa xindecu vehe-dé-á<sup>n</sup> xindáhyu sá ndihú iní-yu cuendá sá ní xihí-xi. Te Jèsús ní xáha<sup>n</sup>-gá xii-yu:

—Vá ndàhyú-ndó, chí dícó-ni xidí-xi ñá túú ní xihí-xi —càchí-gá xáha<sup>n</sup>-gá xii-yu.

<sup>53</sup> Te ní sácú ndeé ñháhá-yu xii-gá, chí sá cúú-xí mèè-yu chí ní xihí ndisa xichí-á<sup>n</sup>. <sup>54</sup> Te Jèsús ní tñii-gá ndaha xíchí ní xihí-á<sup>n</sup>, te níhí ní càhá<sup>n</sup>-gá, te xáha<sup>n</sup>-gá:

—Xíchí cuéchi, ndacóo —càchí-gá xáha<sup>n</sup>-gá.

<sup>55</sup> Te xíchí-á<sup>n</sup> ní ndoto-xi, te òré-ni ní ndacóo-xi, te Jèsús ní xáha<sup>n</sup>-gá sá ná cuñháhá-yu sá caxí-xi. <sup>56</sup> Te tátá-xi ndihí náná-xi súmí ní cuñuhu-yu sá dúcá<sup>n</sup> ní dándótó ñaha Jesús xii-xi, te ní xáha<sup>n</sup>-gá xii-yu sá vá yòo ì<sup>n</sup> cuñháhá-yu sá dúcá<sup>n</sup> ní quide-gá.

## 9

*Jèsús téndàha-gá ndi úxúú cue tée xica cuu ndihí-gá quíhí<sup>n</sup>-güedé càhá<sup>n</sup>-güedé tñuhu-gá (Mt. 10:5-15; Mr. 6:7-13)*

<sup>1</sup> Te Jèsús ní cana-gá ndi úxúú cue tée xica cuu ndihí-gá, te ní sáñaha-gá xii-güedé tñuhu ndee iní cundecu ndihí-güedé cuendá queñuhu-güedé nchaa espíritú cündihí yucu ñávaha yihí ñaha xii ñáyiú, ndihí cuendá sá cada tátna-güedé nchaa ñáyiú cùhú.

<sup>2</sup> Te ní xáha<sup>n</sup>-gá xii-güedé sá quíhí<sup>n</sup>-güedé danèhé-güedé ñáyiú nàcuáa cada Yá Ndióxi ndihu ndaha ñaha-gá xii-yu, te duca<sup>n</sup> càda tátna-güedé cue ñáyiú cùhú. <sup>3</sup> Te cùmání-gá caca-güedé quíhí<sup>n</sup>-güedé, te ní xáha<sup>n</sup>-gá xii-güedé:

—Ñá túú tnháí ná canehe-ndo cùu ichi-ndo, ní tàtnu, ní ñunu, ní sá caxí-ndó, ní díhú. Te ní vá cánèhe-ndo ingá ichi dóo-ndó, chí diu-ni dóo ñíhmú-ndó-á<sup>n</sup> xíá<sup>n</sup> tnháí-ni. <sup>4</sup> Te ndédani càa vehe na saá-ndó, te xíá<sup>n</sup> cundecu-ndo ndèè ná saá nduu ndèe-ndo. <sup>5</sup> Te núu ñá túú cùiní-yu quehe<sup>n</sup> cuendá ñháhá-yu xii-ndo, te ndee-ndo ñúú-á<sup>n</sup>, te naquidi-ndo ticá chúhmá ní tñii sáhá-ndó cuendá sá ná cùtnunì iní-yu sá ñá túú quide váha-yu —càchí-gá xáha<sup>n</sup>-gá xii-güedé.

<sup>6</sup> Te sátá dúcá<sup>n</sup> ní xáha<sup>n</sup> Jèsús xii-güedé, te ní quee-güedé cuáhá<sup>n</sup>-güedé nchaa ñuu dácua<sup>n</sup>-güedé ñáyiú tñuhu Yá Ndióxi, tñuhu sá càhá<sup>n</sup> nàcuáa nanihí tàhú-yu, te duca<sup>n</sup> ta quide tátna-güedé nchaa ñáyiú cùhú cuáhá<sup>n</sup>.

*Nàcuáa ní cuu ní xihí té Juáá tée dàcuandute ñaha xii ñáyiú*

*(Mt. 14:1-12; Mr. 6:14-29)*

<sup>7</sup> Te té Hèrodés tée cùu gobiernú ní níhí-dé tñuhu nchaa nàcuáa quide Jesús, te quiyuhú iní-dé te sàni iní-dé yoo cùu-gá. Te duca<sup>n</sup>

ní sani iní-dé chi dava ñáiyu càchí-yu sá tẽ Juáá téé ní xóo dacuàndute ñaha xii ñáiyu ní ndoto cùu-gá. <sup>8</sup> Te davá-yu càchí-yu sá tẽ Èliás cùu-gá, te davá-yu càchí-yu sá ì<sup>n</sup> téé ní xóo cáhá<sup>n</sup> tnúhu Yá Ndióxi ndéé sanaha vihi ní ndoto cùu-gá, càchí-yu. <sup>9</sup> Dico té Hèrodés ní cachí-dé:

–Yúhú ní táuchíu<sup>n</sup>-í ní xehndé-güedé díquí tẽ Juáá. ¿Te yoo cùu téé dii cuèndú-xi nihí-a sá súni cuèhé núú sá quidé-dé vái<sup>n</sup>? –duha ní cachí-dé.

Te té Hèrodés ndúcú-dé nàcuáa cada-dé cuèndá quini-dé Jesús.

*Jèsús dácàxi-gá úhú<sup>n</sup> mül cue téé te ði<sup>n</sup> ñáiyu ðihí ndihi landú*

(Mt. 14:13-21; Mr. 6:30-44; Jn. 6:1-14)

<sup>10</sup> Te nchaa cue téé ní táuchíu<sup>n</sup> Jèsús cuahá<sup>n</sup> cáhá<sup>n</sup> tnúhu Yá Ndióxi núú ñáiyu ní ndexio-güedé núu-gá te ní ngüita-güedé nácàni tnúhu-güedé nchaa nàcuáa ní quide-güedé. Te dátñúni ní xica-gá medií-ni-gá ndécá ñaha-gá xii-güedé cuahá<sup>n</sup> ì<sup>n</sup> xichi núú ñà túú ñáiyu ndècu, yatni núú cáá ñúú Betsaidá. <sup>11</sup> Dico òré ní nihí ñáiyu tnúhu sá cuahá<sup>n</sup> Jèsús, te nchicú<sup>n</sup>-yu-gá cuahá<sup>n</sup>, te òré ní quexió-yu núu-gá, te ní quehe<sup>n</sup> cuèndá ñáhá-gá xii-yu, te ní dánèhé ñáhá-gá xii-yu nàcuáa ndíhu ndaha ñaha Yá Ndióxi xii-yu, te ní quide tátna-gá nchaa ñáiyu cùhu.

<sup>12</sup> Te òré sa ní cuaa te ní natacá ndi úxúu cue téé xica cuu ndihi-gá núu-gá, te ní xáha<sup>n</sup>-güedé xii-gá:

–Sa ní cuu dandàca-n nchaa ñáiyu-a, chi sa ní cuaa, te na quihí<sup>n</sup>-yu nchaa vehe càa yatni iha, ndihi nchaa xiti ñúú cáá yatni iha cuaa<sup>n</sup>-yu sá caxí-yu, te ðiu-ni yacá<sup>n</sup> ndetatú-yu, chi núú ndécú-ó ña ñà túú tnàhí ná íó –càchí-güedé xáha<sup>n</sup>-güedé xii-gá.

<sup>13</sup> Te Jèsús ní xáha<sup>n</sup>-gá xii-güedé:

–Mee-ndo chí cuñaha sá ná caxí-yu –càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

–Ñá túú nágá ndécú ndihi-ndí, chi úhú<sup>n</sup> duha-ná pàá, ndihi úú-ná chácá ndécú ndihi-ndí, te ðiu-ni núu quihí<sup>n</sup>-ndí cuaa<sup>n</sup>-ndí sá caxí-yu –càchí-güedé xáha<sup>n</sup>-güedé xii-gá.

<sup>14</sup> Te xínu dátñá úhú<sup>n</sup> mül mee-ni cuè téé, te ði<sup>n</sup> ñáiyu ðihí ndihi landú. Te Jèsús ní xáha<sup>n</sup>-gá xii cue téé xica cuu ndihi-gá:

–Chí cuñaha na ngóo ndi údico úxí ndi údico úxí-yu ì<sup>n</sup> ì<sup>n</sup> xichi –càchí-gá xáha<sup>n</sup>-gá xii-güedé.

<sup>15</sup> Te duca<sup>n</sup> ní quide-güedé, te ní ngóo-yu nchaa-yu. <sup>16</sup> Te dátñúni ní quehe<sup>n</sup>-gá ndi úhú<sup>n</sup> pàá-án, ndihi ndi ndúú chácá-án. Te ní ndacoto-gá andiu, te ní ndacá<sup>n</sup> táhú-gá núú Yá Ndióxi, te dátñúni ní táhú cuèchi-gá pàá-án ndihi chácá-án, te ní sáha-gá nchaa cue téé xica cuu ndihi-gá ní dácáñhu

ñaha-güedé xii-yu. <sup>17</sup> Te nchaa-yu ní xexí-yu ní ndahá xiti-yu. Te sátá ní túhú cohó-yu te ní nadatacá-güedé nchaa sá ní quendóo, te ní chítú ùxúú tnàhá tídihi mee-ni sá ní quendóo.

*Té Pèlú xáha<sup>n</sup>-dè xii Jèsús sá díu-gá cùu-gá Crístú*

(Mt. 16:13-19; Mr. 8:27-29)

<sup>18</sup> Te ì<sup>n</sup> nduu ndècu mee Jesús ndihi cue téé xica cuu ndihi-gá, te càhá<sup>n</sup> ndihi-gá Yá Ndióxi, te sátá ní yáha ní cáhá<sup>n</sup> ndihi-gá Yá Ndióxi, te ní xicá<sup>n</sup> tnúhú-gá núu-güedé, te xáha<sup>n</sup>-gá xii-güedé:

–¿Yoo cùu yúhú càchí ñáiyu-va? –càchí-gá xáha<sup>n</sup>-gá xii-güedé.

<sup>19</sup> Te ní xáha<sup>n</sup>-güedé xii-gá:

–Davá-yu càchí-yu sá cùu-n ndii Juáá téé ní xóo dacuàndute ñaha xii ñáiyu, te davá-yu càchí-yu sá cùu-n tẽ Èliás, te davá-yu càchí-yu sá ì<sup>n</sup> téé ní xóo cáhá<sup>n</sup> tnúhu Yá Ndióxi ndéé sanaha ní ndoto cùu-n, duha càchí-yu –càchí-güedé xáha<sup>n</sup>-güedé xii-gá.

<sup>20</sup> Te ní xicá<sup>n</sup> tnúhú tùcu-gá núu-güedé, te xáha<sup>n</sup>-gá xii-güedé:

–Te nchòhó, ¿yoo sàni iní-ndó cùu-í-í? –càchí-gá xáha<sup>n</sup>-gá xii-güedé.

Te té Pèlú ní xáha<sup>n</sup>-dè xii-gá:

–Yòhó cùu-n Crístú Déhe Dútú Ndióxi –càchí-dé xáha<sup>n</sup>-dè xii-gá.

*Jèsús càhá<sup>n</sup>-gá sá cáhni ñaha-güedé xii-gá*

(Mt. 16:20-28; Mr. 8:30-9:1)

<sup>21</sup> Te ní xáha<sup>n</sup>-gá xii-güedé sá vã yòo ì<sup>n</sup> cùñaha-güedé yoo cùu-gá. <sup>22</sup> Te ní xáha<sup>n</sup>-gá xii-güedé:

–Yúhú Téé cùu ñani tnàhá-ndó nchaa-ndo ío cuèhé sá ndòhó-í, chi daquèe tíhú ñáhá cuè téé cùu sacuéhé núú ñáiyu israhél, ndihi cue dútú cúnúu, ndihi cue téé dácuaaha ñaha xii ñáiyu nchaa tnúhu ní chidó tuñi ndii Moisés, te sáá nduu te cahni ñaha-güedé xii-í, dico nduu úní sá cùu-í te ndoto-í –càchí-gá xáha<sup>n</sup>-gá xii-güedé.

<sup>23</sup> Te dátñúni ní xáha<sup>n</sup>-gá xii nchaa ñáiyu:

–Nchaa ñáiyu cuñi chitnahá ñáhá xii-í, te xini ñuhu-xi vã cadá-gá-yu sá sání ñi méè-yu, te ì<sup>n</sup> nduu ì<sup>n</sup> nduu cada ndee ñi-yu cundecu túha-yu ndohó-yu cuèndá-í, te cuèi na ndòhó-yu dátñá ndoho-í. <sup>24</sup> Te nchaa ñáiyu cuñi sá ñà túú tnàhí ná yáha cundecu ñuyú-a cuíta nihnú-yu. Dico nchaa ñáiyu ñá túú yuhú cuèi nándi sá ná yáha-yu cundecú-yu ñuyú-a sá cuèndá-í, te ñáiyu-án naníhí tãhú-yu. <sup>25</sup> Te cuèi nchaandi túhú sá lò ñuyú-a na nihí ñáiyu cundecu ndihí-yu, dico núu diu nchaa xiá<sup>n</sup> ná cada cuíta nihnú-yu te ñà túú védana nandíhí-xi sá dúcá<sup>n</sup> ndècu ndihí-yu nchaa xiá<sup>n</sup>. <sup>26</sup> Te nchaa ñáiyu na cùcaha<sup>n</sup> núu-xi cáhá<sup>n</sup> váha cuèndá-í ndihi cuèndá nchaa tnúhu-í, te tnàhá yúhú Téé cùu ñani tnàhá-ndó nchaa-ndo cucaha<sup>n</sup>

núu-í núu-yu òrè quixi tucu-í ndihi cue espíritú xínú cuèchi núú Tàtà-í Dútú Ndiòxí, te mee-gã cada cutnùnì iní nchaa ñáyíu sá ïo càhmu cuu-í. <sup>27</sup> Te na cãchí tnúhu ndáá-í xii-ndo sá ïo dava nchòhò ñáyíu ndècu iha vitna vã cùu-ni-ndo, chi cundecu-ni-ndo ndéé quini-ndó sáá nduu ndíhu ndaha ñaha Yá Ndiòxí xii ñáyíu —cãchí-gã xáha<sup>n</sup>-gã xii-yu.

*Ní nadáma dóo Jèsús ndihi núu-gã*  
(Mt. 17:1-8; Mr. 9:2-8)

<sup>28</sup> Te ní cuu dàtná úná nduu sá dúcá<sup>n</sup> ní cãhá<sup>n</sup> Jèsús, te cuásaá-gã ï<sup>n</sup> yucu cãhá<sup>n</sup> ndihi-gã Yá Ndiòxí, te ndèca-gã té Pèlú, ndihi té Jacóbó, ndihi té Juáá cuásaá. <sup>29</sup> Te nini cãhá<sup>n</sup> ndihi-gã Yá Ndiòxí ní nadáma núu-gã ndihi dóo-gã, te dóo-gã-á<sup>n</sup> súúni ní nduu cuixí<sup>n</sup> víhí, te súúni dàtása<sup>n</sup>-xi. <sup>30</sup> Te òrè-ni-á<sup>n</sup> ní xini-güedé úú tnáhã cue tée cãhá<sup>n</sup> ndihi-gã, te ï<sup>n</sup>-dé cùu-dè té Moisés, te ingã-dé cùu-dè té Eliás, <sup>31</sup> te súúni dàtása<sup>n</sup>-xi ní cãndéé núú ndécú cuè tée úú-á<sup>n</sup> ndihi-gã, te xĩdatnúhu-güedé nãcuáa ndoho Jèsús cuu-gã ñúú Jerusalén dàtná ní cãchí meé-gã. <sup>32</sup> Te té Pèlú ndihi úú-gã-güedé cuini víhí-güedé cùdú-güedé, dico ní sahni iní-güedé ñã túú ní xidí-güedé, te ní dánèhé núú ñáhã-xí xii-güedé sá súúni vãha càa núú ndécú Jèsús, ndihi úú cue tée cãhá<sup>n</sup> ndihi-gã-á<sup>n</sup>. <sup>33</sup> Te òrè sa ndücu ndee cue tée úú-á<sup>n</sup> caca-güedé núhú-güedé, te ní xáha<sup>n</sup> té Pèlú xii-gã:

—Mèstrú, ¡vãha ní cuu sá ndécú-ó iha vitna! Te na dàcaa-ndí úní tnáhã vehe tnúvixi<sup>n</sup>, ï<sup>n</sup> cuu cuèndá-n, te ï<sup>n</sup> cuu cuèndá té Moisés, te ï<sup>n</sup> cuu cuèndá té Eliás —cãchí-dé xáha<sup>n</sup>-dè xii-gã.

Dico té Pèlú chi ní mèe-dé ñã túú ní cutnùnì iní-dé nása ndüu tnúhu ní cãhá<sup>n</sup>-dè. <sup>34</sup> Te nini cãhá<sup>n</sup>-dè ní quexio ï<sup>n</sup> vícò núú ndécú-güedé-á<sup>n</sup> ní dádãhu ñaha-xi xii-güedé, te ní yùhú-güedé sá dúcá<sup>n</sup> ní quexio vícò-á<sup>n</sup> ní dádãhu ñaha-xi. <sup>35</sup> Te xití vícò-á<sup>n</sup> ní tecú ní cãhá<sup>n</sup> Yá Ndiòxí, te xáha<sup>n</sup>-gã xii-güedé:

—Tée-a cùu-dé Déhe-í, tée ïo cùu iní-í, te tnã-ndo nchãa tnúhu cãhá<sup>n</sup>-dè —duha ní xáha<sup>n</sup>-gã xii-güedé.

<sup>36</sup> Te sáta dúcá<sup>n</sup> ní cãhá<sup>n</sup> Yá Ndiòxí, te ní quide cuèndá-güedé sá mèdi-ná Jèsús ndécú-gã xiá<sup>n</sup>. Te vã yõo ï<sup>n</sup> ní xáha<sup>n</sup>-güedé nãcuáa ndüu nchaa sá ní xini-güedé-á<sup>n</sup>.

*Jèsús quidé tãma-gã ï<sup>n</sup> tée cuechi yihí ñaha espíritú cundíhi yucu ñávãha*  
(Mt. 17:14-21; Mr. 9:14-29)

<sup>37</sup> Te ingã nduu-á<sup>n</sup> cuãnuu-gã yucu-á<sup>n</sup> ndihi-güedé, te ïo cuéhé ñáyíu cuáhã<sup>n</sup> tnáhã ñáhã xii-gã. <sup>38</sup> Te ï<sup>n</sup> tée ñúhu tnáhã tnuú-yu-á<sup>n</sup> ní cãhá<sup>n</sup> níhi-dé, te xáha<sup>n</sup>-dè xii-gã:

—Mèstrú, ïo cãhá<sup>n</sup> ndáhú-í núu-n núu vã cundèe iní-n càda tátna-n dèhe-í, chi ï<sup>n</sup>di duha-dé ndécú, <sup>39</sup> te yihí ñaha espíritú cundíhi yucu ñávãha xii-dé, te òrè ná nãtni ñaha-xi xii-dé, te dàcana saa ñaha-xi, te ndãda ruu<sup>n</sup> ñáhã-xí xii-dé, te tãva-xi tĩnú yuhu-dé. Te ïo dãndoho ñaha-xi xii-dé, chi ndéé núú ñã cùu-gã, te dàña ñaha tnaa-xi xii-dé. <sup>40</sup> Te sa ní cãhá<sup>n</sup> ndáhú-í núú cuè tée xica cuu ndíhi-n queñuhu-güedé-xi, dico ñã túú ní ndãcu-güedé —cãchí-dé xáha<sup>n</sup>-dè xii-gã.

<sup>41</sup> Te Jèsús ní xáha<sup>n</sup>-gã xii nchaa ñáyíu:

—¡Nchaa nchòhò ñáyíu ndècu ñuyíu-a ïo sãá iní-ndó, chi ñã túú cuini-ndó quindáá iní-ndó Yá Ndiòxí! Te ní cuu vãí nduu quide ndee iní-í nchaa sá quidé-ndó, ¿te ná ndéé ama vã dúcá<sup>n</sup>-gã cada-ndo-í? —cãchí-gã xáha<sup>n</sup>-gã xii-yu.

Te ní xáha<sup>n</sup>-gã xii tée cùhú déhe-xi-á<sup>n</sup>:

—Taxi déhe-n iha —cãchí-gã xáha<sup>n</sup>-gã xii-dé.

<sup>42</sup> Te òrè cuáhã<sup>n</sup> tée cuechi-á<sup>n</sup> núu-gã, te espíritú cundíhi yucu ñávãha-á<sup>n</sup> ní dándúá ñáhã-xí xii-dé, te sãhni yihí ñáhã tucu-xi xii-dé ní cùu, dico Jèsús níhi ní cãhá<sup>n</sup>-gã ní tenàá-gã espíritú-á<sup>n</sup>, te ní quee ñaha-xi xii-dé, te ní nacuáha cuèndá ñáhã-gã xii-dé tátã-dé. <sup>43</sup> Te nchaa-yu ní cuñúhu-yu sá dúcá<sup>n</sup> ní cuu, te ní cãchí-yu sá ïo càhmu cuu Yá Ndiòxí.

*Jèsús cãhá<sup>n</sup> tucu-gã sã cùu-gã*  
(Mt. 17:22-23; Mr. 9:30-32)

Te nini xicunúhu-yu nãcuáa ní quide Jèsús, te ní xáha<sup>n</sup>-gã xii cue tée xica cuu ndíhi-gã:

<sup>44</sup> —Nchòhò cundedóho vãha-ndo tnúhu na cãhá<sup>n</sup>-i-a, te vã ná cuãnaa-ndo, chi yihú Tée cùu ñani tnáhã-ndó nchãa-ndo sãá ï<sup>n</sup> nduu te cuáha cuèndá ñáhã-güedé xii-í núú cuè tée cùu úhú iní ñáhã —cãchí-gã xáha<sup>n</sup>-gã xii-güedé.

<sup>45</sup> Dico cue tée-á<sup>n</sup> ñã túú ní tècú tnùnì-güedé nãcuáa ndüu tnúhu ní xáha<sup>n</sup>-gã xii-güedé, te duca<sup>n</sup> ní yãha-güedé, chi duca<sup>n</sup> tnãhí ní cãchí-gã sã vã tècú tnùnì-güedé, te ní yùhú-güedé cãcá<sup>n</sup> tnúhú-güedé núu-gã nása ndüu tnúhu ní xáha<sup>n</sup>-gã xii-güedé.

*Cue tée ndücu tnúhu núú tnáhã núu ndédacãa-güedé ïo-gã cùnùu*

(Mt. 18:1-5; Mr. 9:33-37)

<sup>46</sup> Te cue tée xica cuu ndíhi-gã ní ngúita-güedé ndãtnúhu-güedé núu ndédacãa-güedé ïo-gã cùnùu, <sup>47</sup> dico Jèsús ní cutnùnì iní-gã nãcuáa sãni iní-güedé núu ní cana-gã ï<sup>n</sup> té lihli, te ní sanu tnã ñaha-gã ï<sup>n</sup> xio diñí-gã. <sup>48</sup> Te ní xáha<sup>n</sup>-gã xii-güedé:

—Nchaa ñáyíu na quèhe<sup>n</sup> cuèndá ï<sup>n</sup> té lihli dàtná té lihli-a cuèndá sã ñúhú iní ñáhã-yu xii-í ñã, te cada iní-yu sã yùhú ní quehe<sup>n</sup> cuèndá-yu, te nchaa ñáyíu na quèhe<sup>n</sup> cuèndá ñáhã xii yùhú, te cada iní-yu sã tnáhã Tãtà-í

Dútú Ndióxi Yaa ní tendaha ñaha xii-í véxi-í ñuyú-a ní quehe<sup>n</sup> cuendá-yu. Te nchaa ñáiyu ío ndáhu iní-xi mee-ni xinu cuechí-yu, ñáiyu-á<sup>n</sup> ío-gá cúnúu-yu —cächí-gá xáha<sup>n</sup>-gá xii-güedé.

*Ñáiyu ñá túú cùu úhu iní ñáhá cùndihi ñáhá-yu xii-o*

(Mr. 9:38-40)

<sup>49</sup> Te té Juää diu-ni ì<sup>n</sup> tée xica cuu ndihi-gá ní xáha<sup>n</sup>-dè xii-gá:

—Mèstrú, ní xiní-ndí ì<sup>n</sup> tée càcunehe ñaha-dè xii-n, te ndèñuhu-dé espíritú cùndihi yucu ñáváha yíhi ñaha xii ñáiyu, te nchúhu ñá túú ní daña-gá-ndí duca<sup>n</sup> càda-dé, chí ñá túú xica cuu ndihi ñaha-dé xii-o —cächí-dé xáha<sup>n</sup>-dè xii-gá.

<sup>50</sup> Te Jèsús ní xáha<sup>n</sup>-gá xii-dé:

—Daña-ndo na càda nahi-dé ní cùu, chí ñáiyu ñá túú cùu úhu iní ñáhá xii-o te cùndihi ñáhá-yu —cächí-gá xáha<sup>n</sup>-gá xii-dé.

*Jèsús càhá<sup>n</sup>-gá dóho té Jacobó ndihi té Juää*

<sup>51</sup> Te òré sa ta cùyatni ndaa Jèsús andiú, te ní xica-gá cuáhá<sup>n</sup>-gá ñúú Jerusalén, chí duu<sup>n</sup> duu<sup>n</sup> ní sani iní-gá sá quíhí<sup>n</sup>-gá. <sup>52</sup> Te ní tendaha-gá cue tée yòdo nuu cuáhá<sup>n</sup>, te ní quexio-güedé ì<sup>n</sup> ñúu, te ñúu-á<sup>n</sup> yindèhu-xi distritú Sámariá, te ndücu-güedé ì<sup>n</sup> vehe cada túha-güedé òré quexio-gá. <sup>53</sup> Dico ñáiyu Sámariá ñá túú ní cuíni-yu cuáñaha núu-yu vehe, chí cuendá sá ní cutnùni iní-yu sá ichi yáha-ni-gá quíhí<sup>n</sup>-gá ñúú Jerusalén. <sup>54</sup> Te sá dúcá<sup>n</sup> ní quidé-yu ñá túú ní cuíni-yu cuáñaha núu-yu vehe ndetatú-gá, núu ní xáha<sup>n</sup> tē Jacobó ndihi té Juää cue tée xica cuu ndihi-gá xii-gá:

—Mèstrú, ¿cuíni-n càcá<sup>n</sup> táhu-ó núú Yá Ndióxi cuendá dangáva-gá ñuhu danàa-gá ñáiyu ñúu-a dàtná ní quide té Eliás tée ní xóo càhá<sup>n</sup> tnúhu Yá Ndióxi ndéé sanaha-á<sup>n</sup>? —cächí-güedé xáha<sup>n</sup>-güedé xii-gá.

<sup>55</sup> Te Jèsús ní nchóótó-gá núu-güedé, te níhi ní càhá<sup>n</sup>-gá dóho-güedé, te xáha<sup>n</sup>-gá:

—Nchòhó, chí ñá túú vaha iní-ndó te núu duca<sup>n</sup> càhá<sup>n</sup>-ndó. <sup>56</sup> Chí yúhu Tée cùu ñani tnáhá-ndó nchaa-ndo véxi-í sá dácacu ni-hnu-í ñáiyu, te ñá díú véxi-í sá dácuita ni-hnu-í-yu —cächí-gá xáha<sup>n</sup>-gá xii-güedé.

Te sáta dúcá<sup>n</sup> ní xáha<sup>n</sup>-gá, te ní xica-gá cuáhá<sup>n</sup>-gá ndihi-güedé ingá ñúu.

*Ñáiyu cuíni chitnahá ñáhá xii Jèsús ní cùu (Mt. 8:19-22)*

<sup>57</sup> Te ñuhu Jèsús ichi ndihi-güedé, te ì<sup>n</sup> tée ní xáha<sup>n</sup>-dè xii-gá:

—Mèstrú, cuíni-í canchicú<sup>n</sup> ñáhá-í xii-n ndèni ní cuu na quíhí<sup>n</sup>-n —cächí-dé xáha<sup>n</sup>-dè xii-gá.

<sup>58</sup> Te Jèsús ní xáha<sup>n</sup>-gá xii-dé:

—Nchaa ñúcui chí ndècu yaú cùu véhe-güedi saquíhi-güedi, te nchaa quiti

ndáva caa tacá-güedi díquí yutnu, dico yúhu Tée cùu ñani tnáhá-ndó nchaa-ndo chí ñá túú ndéé cáá véhe-í ñuyú-a ndetatú-í —cächí-gá xáha<sup>n</sup>-gá xii-dé.

<sup>59</sup> Te dàtnùni ní xáha<sup>n</sup> tucu-gá xii ingá-dé:

—Yòhó taquixi chitnahá ñáhá-n xii-í —cächí-gá xáha<sup>n</sup>-gá xii-dé.

Dico tée-á<sup>n</sup> ní xáha<sup>n</sup>-dè xii-gá:

—Mèstrú, daña na nùhú-í cundetú-í cuú tātá-í te chindúxi-í-dé, te dàtnùni quixi-í chitnahá ñáhá dùca<sup>n</sup>-ná-í xii-n —cächí-dé xáha<sup>n</sup>-dè xii-gá.

<sup>60</sup> Te Jèsús ní xáha<sup>n</sup>-gá xii-dé:

—Daña ñáiyu ñá túú sándáá iní ñáhá xii-í ná chindúxi tnaha meé-yu, chí ñáiyu-á<sup>n</sup> cùu-yu dàtná ñáiyu ní xihí cuéi ndècu-ní-yu núu ñuyú-a. Te yòhó taquixi, chí quíhí<sup>n</sup>-n dànehé-n ñáiyu nàcuáa cada Yá Ndióxi ndihu ndaha ñaha-gá xii-yu —cächí-gá xáha<sup>n</sup>-gá xii-dé.

<sup>61</sup> Te ní xáha<sup>n</sup> tucu ingá-dé xii-gá:

—Mèstrú, cuíni-í chitnahá ñáhá-í xii-n, dico díhna-gá daña na nùhú-í cada ndee iní-í nchaa ñáiyu ndècu vehe-í, te dàtnùni quixi-í —cächí-dé xáha<sup>n</sup>-dè xii-gá.

<sup>62</sup> Te Jèsús ní xáha<sup>n</sup>-gá:

—Nchaa ñáiyu ní sándáá iní ñáhá xii-í, te núu vá cánchezú<sup>n</sup> niñnu ñáhá-yu ní yùhu ní iní-yu, te cùu-yu dàtná ì<sup>n</sup> tée ní tnì ndaha látú cutu-dé, chí tée-á<sup>n</sup> núu na ndàcoto-dé ndaa sáta-dé òré xítú-dé, te vá quíhí<sup>n</sup> ndáá látú-dé duca<sup>n</sup> sátnahá-xi cùu-yu. Te cue ñáiyu chí vá cùu ndáá-yu nàcuáa ndihu ndaha-gá dava-gá ñáiyu—cächí-gá xáha<sup>n</sup>-gá xii-dé.

## 10

*Jèsús téndaha-gá únidico úxi cue tée quíhí<sup>n</sup> càhá<sup>n</sup> tnúhu-gá núu ñáiyu*

<sup>1</sup> Te sáta dúcá<sup>n</sup> ní cuu, te ní cáxi tucu Xitohó Jesucristú únidico úxi cue tée codonù-güedé quíhí<sup>n</sup>-güedé càhá<sup>n</sup>-güedé tnúhu-gá nchaa ñúu, ndihi nchaa dava-gá xichi núu quíhí<sup>n</sup>-gá, te ndi ndúú ndi ndúú-güedé tendaha ñaha-gá xii-güedé quíhí<sup>n</sup>-güedé. <sup>2</sup> Te cùmání-gá caca-güedé, te ní xáha<sup>n</sup>-gá xii-güedé:

—Nchòhó xiní-ndó sá òré ná sàa yóo cuu nchaa sá xítú ñáiyu, te ío vai cuu. Te na cächí tnúhu ndáá-í xii-ndo sá dàtná vai sá xítú ñáiyu cùu, duca<sup>n</sup> ío vai ñáiyu cùmání cundedóho tnúhu Yá Ndióxi te ío sacú ñáiyu dàcuaha ñaha xii-yu tnúhu-gá, núu xiá<sup>n</sup> xiní ñuhu-xi càcá<sup>n</sup>-ndó núú Yá Ndióxi cuendá sá ná dàcahá<sup>n</sup>-gá iní ñáiyu càhá<sup>n</sup>-yu tnúhu-gá núu ñáiyu cùmání cunedóho tnúhu-gá. <sup>3</sup> Te nchòhó cùu-ndó dàtná cue mbéé cue quiti cuáhá<sup>n</sup> núu yíhí cué quiti déé<sup>n</sup>. Chí tendaha ñaha-í xii-ndo quíhí<sup>n</sup>-ndó núu xindècu nchaa ñáiyu cuihna

iní-xi. <sup>4</sup> Te vá cànèhe-ndo ñunu cuhu<sup>n</sup> ndachiu<sup>n</sup>-ndo, ni núú cùhú<sup>n</sup> dihú<sup>n</sup>-ndó, te ni vá cáda túha-gá-ndó chàu-ndó chi ñu-ni chàu yíhí-ndó-á<sup>n</sup> xiá<sup>n</sup>-ni quihi-ndo, te vá ío cuyaa-ndo cáhá<sup>n</sup> ndihi-ndo ñáyiú ñúhu ichi. <sup>5</sup> Te óré ná quèxio-ndo ñ<sup>n</sup> vehe, te duha cúñaha-ndo xii ñáyiú dii vehe-xi-á<sup>n</sup>: “Yá Ndióxi chindee ñaha-gá xii-ndo ío váha cuu iní-ndó cundecu-ndo”, duha cúñaha-ndo cundecu váha iní-yu núú Yá Ndióxi, te cuu-xi sá váha sá cúú-xi-yu tnúhu cúñaha-ndo-á<sup>n</sup>, dico núú ñá túú ní cáhá<sup>n</sup> váha ndihi ñahá-yu xii-ndo, te cúñaha-ndo sá vá cúú-xi sá váha sá cúú-xi-yu. Dico núú ní cáhá<sup>n</sup> váha ndihi ñahá-yu xii-ndo, <sup>7</sup> te ñu-ni vehe-á<sup>n</sup> cada vehe tnaa-ndo, te ñá túú-gá ndéé nducu-ndo vehe cundecu-ndo, te caxi-ndo nchaa sá ná táxi-yu, chi nchaa cue téé quide chiu<sup>n</sup> dacu<sup>n</sup> tí táu-güedé sá ñihí-güedé sá cáxi-güedé cuendá nchaa chiu<sup>n</sup> quide-güedé. <sup>8</sup> Te núú ní sáá-ndó ñ<sup>n</sup> ñuú núú ní quehe<sup>n</sup> cuendá ñahá-yu xii-ndo, te caxi-ndo nchaa sá ná táxi-yu. <sup>9</sup> Te cada tátna-ndo cué ñáyiú cùhú xñdecu ñuú-á<sup>n</sup>, te cúñaha-ndo xii-yu sá sá ní sáá nduu ndíhu ndaha ñaha Yá Ndióxi xii-yu. <sup>10</sup> Dico núú ní sáá-ndó ñ<sup>n</sup> ñuú núú ñá túú ní quehe<sup>n</sup> cuendá ñahá-yu xii-ndo, te tñi-ndo ìchi cuita cáhá-ndó cuáhá<sup>n</sup>, te cúñaha-ndo xii-yu: <sup>11</sup> “Ndéé ticá chúhmá ní tñi sáhá-ndí ñuú-ndó nàquidi-ndí, te duha quide-ndí cuendá cutnúni iní-ndó sá ñá túú quide váha-ndo ndécu-ndo. Dico cunaha-ndo sá sá ní sáá nduu ndíhu ndaha ñaha Yá Ndióxi xii-ndo ní cùu”, duha cúñaha-ndo xii-yu. <sup>12</sup> Te na cächí tnúhu-í xii-ndo sá ná sáá nduu càda ndáá Yá Ndióxi cuéchi nchaa ñáyiú, te ñáyiú ñuú-á<sup>n</sup> ío-gá ndohó-yu dàvá-á<sup>n</sup> dàcúxí ñáyiú ñuú Sòdomá –cächí-gá xáha<sup>n</sup>-gá xii-güedé.

*Cuendá ñáyiú dava ñuú ñá túú sàndáá iní tnúhu Xitohó Jesucristú*

(Mt. 11:20-24)

<sup>13</sup> Te Jesús xáha<sup>n</sup>-gá xii ñáyiú dava ñuú ñá túú sàndáá iní tnúhu-gá:

–ñdàhú nchòhó cue ñáyiú ñuú Corazín! Chi nùu dicó ñuú Tírú, ndihi ñuú Sidón ní quide-í nchaa sá vá yò tñahí ndàcu cada datná ní quide-í ñuú-ndó-á<sup>n</sup> ní xiní-ndó ñá, te sá ndéé ama-gá cuihnú-yu dóo ndàhú, te cucucóo-yu núú yáa cuendá sá ndíxi cuéchi iní-yu sá ñá túú quide váha-yu ní cùu. <sup>14</sup> Dico sáá nduu te ío-gá dandòho ñaha Yá Ndióxi xii-ndo dàcúxí ñáyiú ñuú Tírú, ndihi ñáyiú ñuú Sidón. <sup>15</sup> Te nchòhò ñáyiú ñuú Capèrnaúm quide iní-ndó sá sá cuándaa-ndo àndiu, dico ñahá chi núú ùhú núú ndàhú cundecu-ndo –duha ní xáha<sup>n</sup>-gá xii nchaa ñáyiú ñuú-á<sup>n</sup>.

<sup>16</sup> Te xáha<sup>n</sup> tùcu-gá xii cue téé tendaha-gá quíhí<sup>n</sup> cáhá<sup>n</sup> tnúhu-gá-á<sup>n</sup>:

–Nchaa ñáyiú na cundédòho nchaa tnúhu cáhá<sup>n</sup>-ndó, te cada iní-yu sá yùhú cáhá<sup>n</sup>-í ndédòho-yu, te nchaa ñáyiú na dàquee tíhú ñahá xii-ndo, te tnàhá yùhú daquèe tíhú-yu, te nchaa ñáyiú duca<sup>n</sup> na dàquee tíhú ñahá xii-í, te tnàhá Tàtá-í Dútú Ndióxi Yáá ní tendaha ñaha xii-í véxi-í ñuyúú-a dàquee tíhú-yu –cächí-gá xáha<sup>n</sup>-gá xii-güedé.

Te duca<sup>n</sup> te ní xica-güedé cuáhá<sup>n</sup>-güedé.

*Ní nasáá cue téé únidico úxi ní tendaha Jèstus ní sáhá ní cáhá<sup>n</sup> tnúhu-gá núú ñáyiú*

<sup>17</sup> Te cue téé únidico úxi-á<sup>n</sup> ní nasáá-güedé te súúni cùdí iní-güedé, te xáha<sup>n</sup>-güedé xii Jèstus:

–Mèstrú, ndéé espíritú cundíhi yucu ñávaha sàndáá iní ñahá-xi xii-ndí óré cáciu nèhe ñaha-ndí xii-n –cächí-güedé xáha<sup>n</sup>-güedé xii-gá.

<sup>18</sup> Te Jesús ní xáha<sup>n</sup>-gá:

–Ndáá cáhá<sup>n</sup>-ndó chi yùhú ní xiní-í cutnàhá ní xita nihnu yucu ñávaha, chi datná ní ngava ñ<sup>n</sup> tasa<sup>n</sup> ní ngava-xi ñuyúú-a.

<sup>19</sup> Te datná quidé-ndó óré xènihnu-ndo ñ<sup>n</sup> cóó, àdi ñ<sup>n</sup> nchacua duca<sup>n</sup> cada-ndo daquee tíhú-ndó yùcu ñávaha, te ñá túú ná cada ñaha-xi xii-ndo, chi ní taxi-í tnúhu ndee iní ndécú ndihi-ndo. <sup>20</sup> Dico vá cùdí iní-ndó cuendá sá sàndáá iní ñahá cué espíritú cundíhi yucu ñávaha xii-ndo, chi cùdí iní-ndó cuendá sá sá yodo tñuní-ndó núú tütú Yá Ndióxi Yáá ndécú àndiu –cächí-gá xáha<sup>n</sup>-gá xii-güedé.

*Jèstus cùdí iní-gá*

(Mt. 11:25-27; 13:16-17)

<sup>21</sup> Te óré-á<sup>n</sup> súúni ní quide díí iní ñahá Espíritú Yá Ndióxi xii Jesús, te ní xáha<sup>n</sup>-gá xii Yá Ndióxi:

–Yòhó Tàtá-í Dútú Ndióxi, ío chiñuhu ñaha-í xii-n chi ñu-n táxi tñuní-n àndiu ndihi ñuyúú-a, te dànehé-n cué ñáyiú nchaa tnúhu váha, te ñu-ni ñáyiú-á<sup>n</sup> cúú-yu ñáyiú ñá túú cutnúni iní-xi nchaa tnúhu cáhá<sup>n</sup>-n cue téé túha, te nchaa tnúhu cáhá<sup>n</sup>-n-á<sup>n</sup> ñá túú ní dátúu-n núú ñáyiú cächí sá ío túha, te ío váha sáá díquí-xi. Te duca<sup>n</sup> quide-n, chi duca<sup>n</sup> cuní-n cunduu –cächí-gá xáha<sup>n</sup>-gá xii Yá Ndióxi.

<sup>22</sup> Te xáha<sup>n</sup> tùcu-gá xii cue téé ní nasáá-á<sup>n</sup>:

–Mee Tàtá-í Dútú Ndióxi ní cächí-gá sá cùnù-í núú nchaa-ndí túhú sá ío. Te vá yò ñ<sup>n</sup> xiní nàcuáa sàni iní yùhú Déhe Dútú Ndióxi, chi ñ<sup>n</sup>dií díí ní mee-gá xiní-gá nàcuáa sàni iní-í. Te duca<sup>n</sup> ñ<sup>n</sup>dií-ni yùhú xiní-í nàcuáa sàni iní mée-gá, te nchaa ñáyiú cächí iní-í sá quini-yu nàcuáa sàni iní Tàtá-í Dútú Ndióxi te xitnúhu-í-yu, te vá yò ñ<sup>n</sup>-gá xiní nàcuáa sàni iní-gá chi ñu-ni



ñáiyu duca<sup>n</sup> xitnúhu-í-á<sup>n</sup> xini-yu —càchí-gá xáha<sup>n</sup>-gá xii-güedé.

<sup>23</sup> Te ní nchócótó-gá núú xĩndecu mee-ni cué téé xica cuu ndihi-gá, te ní xáha<sup>n</sup>-gá xii-güedé:

—Váha táhú nchòhò ndihi nchaa ñáiyu ndèhe nchaa nacuaá guide-í vitna. <sup>24</sup> Chi ío cuéhé cue téé ní xóo cáhá<sup>n</sup> tnúhu Yá Ndióxi ndéé sanaha, ndihi cue téé ní xĩndaha ñaha xii ñáiyu ní cuini-güedé cundehe-güedé nchaa sá ndéhé-ndó guide-í vitna, te ñá túú ní xini-güedé, te ní cuini-güedé cundedóho-güedé nchaa tnúhu cáhá<sup>n</sup>-í ndèdóho-ndo vitna, te ñá túú ní xĩndedóho-güedé —càchí-gá xáha<sup>n</sup>-gá xii-güedé.

*Nàcuáa ní quide ì<sup>n</sup> téé distritú Sàmariá*

<sup>25</sup> Te ì<sup>n</sup> téé dàcuaha ñaha xii ñáiyu nchaa tnúhu ní chídó tnúni ndí Moisés ní ndacuñí-dé xitó ndèé-dé Jèsús núu nása cunduu tnúhu cáhá<sup>n</sup>-gá, te xáha<sup>n</sup>-dè xii-gá:

—Mèstrú, ¿ná cuú sá cáda-í cuendá nduu táhú-í cundecu-í ndihi Yá Ndióxi ní caa ní quíhí-í? —càchí-dé xáha<sup>n</sup>-dè xii-gá.

<sup>26</sup> Te Jèsús ní xáha<sup>n</sup>-gá xii-dé:

—Cuini-í cachí tnúhu-n nása cáhá<sup>n</sup>-xi núú tùtú ndí Moisés —càchí-gá xáha<sup>n</sup>-gá xii-dé.

<sup>27</sup> Te xáha<sup>n</sup>-dè xii-gá:

—Ndí Moisés càchí ndí núú tùtú ndí: “Cuu iní-ndó Dütú Ndióxi Yáa cuú Ndióxi-ndó ní yuhu ní iní-ndó, te cani iní-ndó cáda-ndo datná méé-gá, te mee-ni tnúhu váha cani iní-ndó nàcuáa cuu vii cuu váha-ndo núú-gá, te coo iní-ndó cuu iní-ndó-gá. Te cuu iní-ndó tnàha ñáiyu-ndo datná cuú iní-ndó mée-ndo”, duha càchí ndí núú tùtú ndí —càchí-dé xáha<sup>n</sup>-dè xii-gá.

<sup>28</sup> Te Jèsús ní xáha<sup>n</sup>-gá:

—Váha ní cáhá<sup>n</sup>-n, te núu cada-n nàcuáa cáhá<sup>n</sup>-n á<sup>n</sup>, te nduu táhú-n cundecu-n ndihi Yá Ndióxi ní caa ní quíhí —càchí-gá xáha<sup>n</sup>-gá xii-dé.

<sup>29</sup> Te sá dúcá<sup>n</sup> ní xáha<sup>n</sup> Jèsús xii-dé núu ndücu-dé nàcuáa cada-dé cácu nihnu-dé núú tnúhu ní cáhá<sup>n</sup>-dé, te ní xicá<sup>n</sup> tnúhú-dé núú-gá, te xáha<sup>n</sup>-dè:

—¿Yoo cuu tnaha ñáiyu-í-í? —càchí-dé xáha<sup>n</sup>-dè xii-gá.

<sup>30</sup> Te Jèsús ní cani-gá ì<sup>n</sup> cuendú núú-dé nàcuáa tecú tnúni-dé tnúhu-gá, te xáha<sup>n</sup>-gá:

—Ì<sup>n</sup> téé ní ndee-dé ñuu Jerusálén ñuhú-dé ichi cuánuu-dé cuáhá<sup>n</sup>-dé ñuu Jericó, te ní quee ñadúhú ichi-dé ní dühú-güedé dóo nihnú-dé, ndihi nchaa sá néhé-dé, te ní caniha vihi-güedé, te nchito diu-ná-dé ní dáñá ñaha-güedé te cuáhá<sup>n</sup>-güedé. <sup>31</sup> Te mei òré cátuu-dé-á<sup>n</sup> ñuhú ì<sup>n</sup> dütú ichi-á<sup>n</sup>, te òré ní xini ñáhá dütú-á<sup>n</sup> xii-dé, te ì<sup>n</sup> xio-ni ní xócóo ndee-dé ní yáha-dé. <sup>32</sup> Te ñuhu tucu ì<sup>n</sup> téé cuu levitá ichi-á<sup>n</sup>, te òré ní xini-dé téé-á<sup>n</sup> cátuu-dé, te diu-ni duca<sup>n</sup> ní quide-dé

ì<sup>n</sup> xio-ni ní xócóo ndee-dé ní yáha-dé. <sup>33</sup> Dico ì<sup>n</sup> téé distritú Sàmariá ñuhú tucu-dé ichi-á<sup>n</sup> te òré ní xini-dé téé-á<sup>n</sup> cátuu-dé, te ní cundáhú iní ñáhá-dé. <sup>34</sup> Te ní sáhá<sup>n</sup>-dé núú cátuu téé-á<sup>n</sup>, te ní quide tátna-dé nchaa núú ní nícuehé xii téé-á<sup>n</sup> ní chihi-dé yúcu, te ní dácútú-dé. Te dátunúni ní dácáá ñaha-dé sáta quiti-dé, te ndèca ñaha-dé cuáhá<sup>n</sup> ì<sup>n</sup> vehe núú sácóo cue ñáiyu sácúhu<sup>n</sup> ichi, te yacá<sup>n</sup> ní xito ñaha-dé. <sup>35</sup> Te ingá nduu òré ní nucúhu<sup>n</sup> téé Samaritánú-á<sup>n</sup> ichi, te ní tava-dé úú dñhú<sup>n</sup> denàriú, te ní sáha-dé téé cuu xitohó vehe-á<sup>n</sup>, te ní xáha<sup>n</sup>-dè: “Coto saú-n téé-a, te núu ñá ní tnàhá dñhú<sup>n</sup> sá ní taxi-í, te cuéi na dàndoñuhu-gá-n dñhú<sup>n</sup>-n cuendá-dé, te òré ná quixi tucu-í te nacháhu-í”, duha ní xáha<sup>n</sup> téé Samaritánú-á<sup>n</sup> xii téé dii vehe xiá<sup>n</sup>. <sup>36</sup> Te vitna cáhá<sup>n</sup>, te núu ndèdacaá cue téé úni-á<sup>n</sup> cuú-güedé téé váha cuu iní-güedé tnàha ñáiyu-güedé —càchí-gá xáha<sup>n</sup>-gá xii téé dàcuaha ñaha xii-í ñáiyu-á<sup>n</sup> nchaa tnúhu ní chídó tnúni ndí Moisés.

<sup>37</sup> Te téé-á<sup>n</sup> ní xáha<sup>n</sup>-dè xii-gá:

—Téé ní cundáhú iní ñáhá xii téé ní dñicuehé ñáhá cué ñadúhú-á<sup>n</sup>, téé-á<sup>n</sup> cuú-dé téé cuu iní tnàha ñáiyu-xi —càchí-dé xáha<sup>n</sup>-dè xii-gá.

Te Jèsús ní xáha<sup>n</sup>-gá:

—Cuáhá<sup>n</sup> te diu-ni duca<sup>n</sup> cáda-n tnahá-n —càchí-gá xáha<sup>n</sup>-gá xii-dé.

*Jèsús ndécú-gá vehe tá Mária ndihi tá Mária*

<sup>38</sup> Te Jèsús ñuhú-ni-gá ichi cuáhá<sup>n</sup>-gá ndihi cue téé xica cuu ndihi-gá, te ní sáá-gá ì<sup>n</sup> ñuu líhli, te xiá<sup>n</sup> ní quee ì<sup>n</sup> xichí nání Mária ní cáhá<sup>n</sup> ñáhá-xi xii-gá vehe-xi. <sup>39</sup> Te tá Mária ndècu ì<sup>n</sup> cùhú-xi nani-xi Mária, te xichí-á<sup>n</sup> ní ngóo-xi núú Jèsús ndèdóho-xi nchaa tnúhu cáhá<sup>n</sup>-gá. <sup>40</sup> Te tá Mária-á<sup>n</sup> ndihi vihi-ni iní-xi quide-xi chiu-xi, te ní sáhá<sup>n</sup>-xi núú Jèsús, te ní xáha<sup>n</sup>-xi:

—Mèstrú, ¿náa ñá túú tnàhí sàni iní-n sá ní dándóo ndaha ñaha cùhú-í nchaa chiu<sup>n</sup>-á<sup>n</sup>? Cúñaha saú ná quixi-xi chindee ñaha-xi —càchí-xi xáha<sup>n</sup>-xi xii-gá.

<sup>41</sup> Dico Jèsús ní xáha<sup>n</sup>-gá:

—Yohó Mária, ñuhu tnehu vihi-n, te ndihú iní-n sá ío vái chiu<sup>n</sup>-n ñuhu, <sup>42</sup> dico xini ñuhu vihi-gá-xi cundedóho-n tnúhu cáhá<sup>n</sup>-í, chi tá Mária-a sa ndèdóho-xi tnúhu-í, te vá yóo ì<sup>n</sup> ndacu xocàni tnúhu-í sá ní ngúndecu ndihi-xi —càchí-gá xáha<sup>n</sup>-gá xii-xi.

## 11

*Jèsús dánèhé-gá cue téé xica cuu ndihi-gá nàcuáa cáhá<sup>n</sup> ndihi-güedé Yá Ndióxi*  
(Mt. 6:9-15, 7:7-11)

<sup>1</sup> Te ì<sup>n</sup> nduu cáhá<sup>n</sup> ndihi Jèsús Yá Ndióxi ì<sup>n</sup> xichi, te sáta ní yáha ní cáhá<sup>n</sup> ndihi-gá Yá

Ndiöxí, te ní xáha<sup>n</sup> ì<sup>n</sup> tée xica cuu ndihi-gá xii-gá:

—Mèstrú, danèhè ñáhá xii-ndí nása cáhá<sup>n</sup> ndihi-ndí Yá Ndiöxí dàtná ní quide ndí Juàá ní danèhè ndí cue tée ní xica cuu ndihi ndí —cächí-dé xáha<sup>n</sup>-dè xii-gá.

<sup>2</sup> Te Jèsús ní xáha<sup>n</sup>-gá:

—Òré cáhá<sup>n</sup> ndihi-ndo Yá Ndiöxí, te cächí-ndó:

Yòhó tátá-ndí Dútú Ndiöxí Yáá ndécú àndiu, nchaa ñáyiú na cáhá<sup>n</sup>-yu sá cúú-n Yáá ío yíñúhu.

Te xicá<sup>n</sup> táhú-ndí núú-n sá ná sáá nduu ndíhu ndáhá-n-yu.

Te cada-n dàtná cächí iní-n ñùyúú-a dàtná quidé-n àndiu.

<sup>3</sup> Te xicá<sup>n</sup> táhú-ndí núú-n sá táxí-n sá cándèca iní-ndí ì<sup>n</sup> nduu ì<sup>n</sup> nduu.

<sup>4</sup> Te cada càhnu iní-n nchaa yíca cuèchi-ndí, chi tnàhá nchúhú quidé càhnu iní-ndí nchaa sá quidé ñaha tnaha ñáyiú-ndí.

Te vá dáñá-n dàcáhá<sup>n</sup> ñáhá yùcu ñáváha xii-ndí cada-ndí sá ñá túú vaha, chi coto ñaha-n xii-ndí cuèndá sá vá dúcá<sup>n</sup> càda ñaha-xí,

duha cáhá<sup>n</sup>-ndó

—cächí-gá xáha<sup>n</sup>-gá xii-güedé.

<sup>5</sup> Te Jèsús ní xáha<sup>n</sup> tùcu-gá:

—Te núú ndèdacaà nchòhó ndécú ì<sup>n</sup> tée tnàha tnúhu ndihi-ndo, te dava niú cuáhá<sup>n</sup>-ndó vèhe-dé, te òré ní quexio-ndo, te xáha<sup>n</sup>-ndo xii-dé: “Véxi-í núú vá cündèe iní-n tàxi nuu-n úní tnàhá pàá, <sup>6</sup> chi ì<sup>n</sup> tée xiní tnàhá ndíhi-í fíñúhú-dé ichi ní quexio-dé vehe-í, te ñá túú tnàhá ná cuáñaha-í caxi-dé”, quesaha-ndó cùñaha-ndo. <sup>7</sup> Te tée-á<sup>n</sup> cáhá<sup>n</sup>-dé ndéé xití vehe-dé, te cúñaha-dé xii-ndo: “Vá dásàtú nihá-n chi ndèdí yuyèhe-í, te càa-í ndíhi cue landú-í, te vá cúú ndácóo-í taxi-í sá cuiní-n”, quesaha-dé cúñaha-dé xii-ndo. <sup>8</sup> Te na cächí tnúhu-í xii-ndo sá cuèi cùu-dé tée tnàha tnúhu ndihi-ndo, dico duca<sup>n</sup> cùñaha-dé xii-ndo, dico dacuití sá ndácóo-dé taxi-dé sá cuiní-ndó cuèndá sá vá dásàtú-gá-ndó iní-dé.

<sup>9</sup> Te yúhú cächí-í xii-ndo sá cãcã<sup>n</sup>-ndó núú ná cuiní-ndó núú Yá Ndiöxí te taxi-gá. Te vá dáñá ndéè-ndó cãcã<sup>n</sup>-ndó núú-gá núú ná cuiní-ndó, te duca<sup>n</sup> te nihí-ndó. Te cada iní-ndó sá ní quexio-ndo vehe ì<sup>n</sup> tnaha ñáyiú-ndo te ní cáhá<sup>n</sup>-ndó, te ñáyiú-á<sup>n</sup> ní tedóho ñàhá-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yá Ndiöxí tedóho ñaha-gá xii-ndo, te taxi-gá sá ná cãcã<sup>n</sup>-ndó núú-gá. <sup>10</sup> Chi nchaa ñáyiú duca<sup>n</sup> xiquide te Yá Ndiöxí tedóho ñaha-gá xii-yu nihí-yu sá cuiní-yu. Te diu-ni duca<sup>n</sup> tùcu nchaa ñáyiú na cãcã<sup>n</sup> núú-gá ì<sup>n</sup> sá cuiní-yu, chi sãñaha-gá sá xicá<sup>n</sup>-yu núú-gá. Te diu-ni duca<sup>n</sup> tùcu níhi nchaa ñáyiú ñá túú dàña

ndéè xicá<sup>n</sup> núú Yá Ndiöxí sá cuiní-yu, chi nihí-yu.

<sup>11</sup> Te nchòhó cue tée cùu tátá ñá túú cündèe iní-ndó cuáña-ndo cuè déhe-ndo ì<sup>n</sup> yúú caxi-güexi òré xicá<sup>n</sup>-güexi ì<sup>n</sup> pàá núú-ndó cãxi-güexi, te ní ñá túú cündèe iní-ndó cuáñaha-ndo ì<sup>n</sup> cóo caxi-güexi òré xicá<sup>n</sup>-güexi ì<sup>n</sup> chácá núú-ndó cãxi-güexi. <sup>12</sup> Te ní ñá túú cündèe iní-ndó cuáñaha-ndo ì<sup>n</sup> nchacua caxi-güexi òré xicá<sup>n</sup>-güexi ì<sup>n</sup> ndíú núú-ndó cãxi-güexi. <sup>13</sup> Te nchòhó cuèi ndèè dau sáá iní-ndó, dico sãha-ndo cuè déhe-ndo sá vaha xèxi-güexi òré xicá<sup>n</sup>-güexi núú-ndó. Te núú nchòhó duca<sup>n</sup> quide-ndo, jte uu<sup>n</sup>-gá duca<sup>n</sup> quide Tátá-ndó Dútú Ndiöxí Yáá ndécú àndiu, chi taxi-gá Espiritú-gá cundecu ndihi-ndo te núú na cãcã<sup>n</sup>-ndó núú-gá! —cächí-gá xáha<sup>n</sup>-gá xii-güedé.

*Cächí-güedé sá ndécú ndíhi Jèsús yucu ñáváha*

(Mt. 12:22-30; Mr. 3:20-27)

<sup>14</sup> Te Jèsús ndèñúhu-gá espíritú cündíhi yucu ñáváha yíhi ñaha xii ì<sup>n</sup> tée ní quide ñíhi-xi, te òré ní ndee ñaha espíritú-á<sup>n</sup> xii tée-á<sup>n</sup>, te òré ní nacáhá<sup>n</sup>-dé. Te ío ní cuñúhu ñáyiú sá dúcá<sup>n</sup> ní quide-gá. <sup>15</sup> Te davá-yu ní xitnàhá-yu:

—Tée-a ndèñúhu-dé nchaa espíritú cündíhi sãcuíhná yíhi ñaha xii ñáyiú, chi diu-ni sãcuíhná-á<sup>n</sup> chündèe ñaha-xi xii-dé, te diu-ni-xi tàxi tnuni-xi nchaa espíritú-á<sup>n</sup> —cächí-yu xitnàhá-yu.

<sup>16</sup> Te davá-yu xitò ndéè ñáhá-yu xii-gá, te xáhá<sup>n</sup>-yu sá ná cãdá-gá ì<sup>n</sup> sá vá yòo tnàhi ndàcu cada ñùyúú-a cundèhé-yu nàcuáa cutnùni iní-yu núú ndáá sá Yá Ndiöxí ní tendaha ñaha-gá xii-gá véxi-gá ñùyúú-a. <sup>17</sup> Dico mee-gá sa ní cutnùni iní-gá nchaa nàcuáa sàni iní-yu, núú ní xáha<sup>n</sup>-gá xii-yu:

—Te nchòhó xiní-ndó sá núú ì<sup>n</sup> tée yíndaha ì<sup>n</sup> nació<sup>n</sup> vá cúú ì<sup>n</sup>-nuu-dé ndíhi cue tée cündíhi-dé, te vá cúdí-dé cunu-dé. Te diu-ni duca<sup>n</sup> sãtnahá tucu-xi cùu cue ñáyiú xíndecu ì<sup>n</sup>-ni vèhe, chi núú vá cúú ì<sup>n</sup>-nuu-yu cundecu-yu, te vá cúdí-yu cundecu cãhnú-yu. <sup>18</sup> Te duca<sup>n</sup> sãtnahá-xi cùu sãcuíhná, chi núú vá cúú ì<sup>n</sup>-nuu-xi ndíhi nchaa espíritú cündíhi-xi te vá cúdí-xi cundecu-xi taxi tnùni-xi. Te duha cáhá<sup>n</sup>-í chi nchòhó cächí-ndó sá sãcuíhná chündèe ñaha-xi xii-í quèñúhu-í nchaa espíritú cündíhi-xi yíhi ñaha xii ñáyiú. <sup>19</sup> Te núú yúhú quidé cuèndá-ndó sá sãcuíhná chündèe ñaha-xi xii-í, te xiní ñuhu-xi cada cuèndá-ndó yòo chindee ñaha xii cue tée xica cuu ndíhi-ndo queñúhu-güedé nchaa espíritú cündíhi-xi yíhi ñaha xii ñáyiú. Te mee-güedé cächí-güedé sá nchòhó ñá túú cáhá<sup>n</sup> ndáá-ndó sá dúcá<sup>n</sup> cáhá<sup>n</sup>-ndó. <sup>20</sup> Te ndáá sá Yá Ndiöxí chündèe ñaha-gá xii-í

quẽñhu-í nchaa espíritú cündihí sácúlnhá yihí ñaha xii ñáiyu, te xiã<sup>n</sup> cutnùnì iní-ndó sá sá ní sáá nduu ndihu ndaha ñaha Yá Ndióxi xii-ndo.

<sup>21</sup> Te núu ì<sup>n</sup> tée ío ndee, te súunì ñíi cáá-dé, te ndèè-dé vehe-dé cuendá sá vã cuíta, te ní quide túhá-dé titní sá déé<sup>n</sup>, te ío váha nèhe váha-dé nchaa ndachìu<sup>n</sup>-dé. <sup>22</sup> Dico núu quexìo ingá tée ío-gá ñíi cáá te ndee-gã-dé, te ngúíta-dé nàà-dé ndihí tée ndèè vehe-xi-á<sup>n</sup>, te cada cànráí ñáhá tée-á<sup>n</sup> xii tée ndèè vehe-xi-á<sup>n</sup>, te quendeé-dé nchaa sá déé<sup>n</sup> cündèe iní-dé, te taxi tñùnì-na-dé nchaa xiã<sup>n</sup>, ndihí nchaa sá ndécú ndihí-dé, te dàcáñhu-dé nchaa cue tée cündihí-dé nchaa sá ná ñihí-dé.

<sup>23</sup> Te nchaa ñáiyu ñá túú cündihí ñaha xii-í, te cùu úhú iní ñáhã-yu, te nchaa ñáiyu ñá túú chindèe ñaha xii-í, te dàquee tíhũ-yu chiù<sup>n</sup> quide-í.

*Espíritú cündihí yucu ñávãha sá nánchócava xito cùu uú*  
(Mt. 12:43-45)

<sup>24</sup> Te òrè ná quèe ñaha ì<sup>n</sup> espíritú cündihí yucu ñávãha xii ì<sup>n</sup> ñáiyu, te cuáhã-xi ndúcu-xi ì<sup>n</sup> xichí núú cündècu-xi te ñá ñihí-xi, te ní sani iní-xi: “Váha-gá núhú tucu-í núú ní xíndecu-í<sup>n</sup>, duha ní sani iní-xi. <sup>25</sup> Te cuánuhú-xi, te òrè ní nasáá-xi, te ní xini-xi sá cáá iní ñáiyu-á<sup>n</sup> dátá cáá-nã ì<sup>n</sup> vehe ní natíhú, chi ní nduu vii-ná, vá yõ-gá ndécú. <sup>26</sup> Te sátá dúcã<sup>n</sup> te ní xica-xi cuáhã-xi cuándúcú-xi úsã tñáhã espíritú cündihí-xi sá nèhe víhí-gã xíquide, te òrè ní ñihí-xi cue espíritú-á<sup>n</sup> te ndèca ñaha-xi cuáhã<sup>n</sup> cuendá ngúndecu ndihí-xi ñáiyu-á<sup>n</sup>, te ñáiyu-á<sup>n</sup> uu<sup>n</sup>-gã nãndi yáha-yu dàcúúxí ndèé díhna —cãchí-gã xãha<sup>n</sup>-gã xii-yu.

*Cuendá ñáiyu cùu váha ndisa iní-xi*

<sup>27</sup> Te nini càhá<sup>n</sup> Jèsús tñúhu-á<sup>n</sup> núú ñáiyu ní càhá<sup>n</sup> ñihí ì<sup>n</sup> ñadihí tnuú-yu, te xãha<sup>n</sup>-a<sup>n</sup> xii Jèsús:

—jSá váha táhú ñadihí ní dàcácu ñaha xii-n, te ní dàcuéhnú ñaha-a<sup>n</sup>! —cachí-a<sup>n</sup> xãha<sup>n</sup>-a<sup>n</sup> xii-gã.

<sup>28</sup> Te Jèsús ní xãha<sup>n</sup>-gã:

—jVáha-gã táhú nchã ñáiyu sácúndedóho nchaa tñúhu càhá<sup>n</sup> Yá Ndióxi te sãndáá iní-yu! —cãchí-gã xãha<sup>n</sup>-gã xii-a<sup>n</sup>.

*Ñáiyu ñá túú sãndáá iní ñáhã xii Jèsús cùiní-yu cada-gã ì<sup>n</sup> sã vã yõ tñáhí ndàcu cada*  
(Mt. 12:38-42; Mr. 8:12)

<sup>29</sup> Te ta tàcã vãi ñáiyu te dàdehnde tñaha-nã-yu, te ní ngúíta Jèsús xãha<sup>n</sup>-gã xii-yu:

—Nchòhó ñáiyu ndècu ñuyú vitna, chi ío sáá iní-ndó, te cuiní-ndó càda-í ì<sup>n</sup> sã vã yõ tñáhí ndàcu cada cuendá cuiní-ndó cùtnuní iní-ndó núu ndisa sã Yá Ndióxi ní

tendaha ñaha-gã xii-í véxi-í. Dico ñá túú nãgã cada-í quini-ndó, chi sa ñihí-ndó tñúhu nãcuáa ní yáha ndíi Jònás tée ní xóo cáhá<sup>n</sup> tñúhu Yá Ndióxi ndèé sanaha, te ñiu-ni duca<sup>n</sup> yáha yúhú tucu. <sup>30</sup> Chi nchaa ñáiyu ñúú Nínivé ní cutnùnì iní-yu sã Yá Ndióxi ní tendaha ñaha-gã xii ndíi Jònás ní sáhã<sup>n</sup> ndíi ñúu-yu. Te duca<sup>n</sup> sãtnahã-xi cùu yúhú Tée cùu ñani tñáhã-ndó nchãa-ndo, chi sáá nduu te cutnùnì iní-ndó sã Yá Ndióxi ní tendaha ñaha-gã xii-í véxi-í ñuyú-á.

<sup>31</sup> Te na sáá nduu càda ndáá Yá Ndióxi cuéchi nchaa nchòhó ñáiyu ndècu ñuyú-á, te dàvã-á<sup>n</sup> quini-ndó ì<sup>n</sup> ñadihí ñaha ní xíndaha ì<sup>n</sup> nació<sup>n</sup> cáá ndãa xio cuha núu quéné nchìcanchii. Te ñaha-á<sup>n</sup> ío xica ní xíndecu-a<sup>n</sup>, te ní sáhã<sup>n</sup>-a<sup>n</sup> ní xíndedóho-a<sup>n</sup> nchaa tñúhu ní cáhá<sup>n</sup> ndíi Salòmón, chi ndíi-á<sup>n</sup> ío ní sáá sá xini tñùnì ndíi. Te ñaha-á<sup>n</sup> càhá<sup>n</sup>-a<sup>n</sup> dàvã-á<sup>n</sup> sã nchòhó ñáiyu ndècu vitna ñá túú ní quide ndáá-ndó. Dico vitna iha ndècu ndihí ñaha-ndo xii yúhú, te ñiu-í ío-gá cùnũ-í dàcúúxí ndíi Salòmón. <sup>32</sup> Te ñiu-ni nduu càda ndáá Yá Ndióxi cuéchi nchaa nchòhó ñáiyu ndècu ñuyú-á vitna, dàvã-á<sup>n</sup> tñáhã cue ñáiyu ní xíndecu ñúú Nínivé cundecú-yu núú Yá Ndióxi, te tñáhã-yu cachí-yu sã ñá túú ní quide ndáá-ndó. Chi ñáiyu ñúú Nínivé-á<sup>n</sup> ní ndixi túu iní-yu sã ñá túú quide váha-yu ndècu-yu te ní natuhã-yu ichi Yá Ndióxi cùtmãhá ní càhá<sup>n</sup> ndihí ñaha ndíi Jònás tñúhu-gã xii-yu. Dico vitna iha ndècu ndihí ñaha-ndo xii yúhú tée càhá<sup>n</sup> tucu tñúhu Yá Ndióxi, te ñiu-í ío-gá cùnũ-í dàcúúxí ndíi Jònás.

*Núú-ó cùu-xi dátá ì<sup>n</sup> ñuhú*

(Mt. 5:15; 6:22-23)

<sup>33</sup> Te ñá túú ñi ì<sup>n</sup> ñáiyu tẽñuhú ì<sup>n</sup> lntèrnã, te taxi ndecú-yu ì<sup>n</sup> núú yídãhu, àdi chivãha-yu xití ì<sup>n</sup> tídihi, chi tàxi ndecú-yu ì<sup>n</sup> núú ñinu cuendá nchaa ñáiyu quíhu vehe cutnùnì núu-yu. <sup>34</sup> Te núú-ndó cùu-xi dátá ì<sup>n</sup> ñuhú, chi ì<sup>n</sup> sã ná quini-ndó te ndixi túu iní-ndó nã cùú xiã<sup>n</sup>, te núu càvãha núu-ndó, te duca<sup>n</sup> cùtnuní iní-ndó nã cùú sã ndécú núu-ndó, á<sup>n</sup> te núu cùhú, te vá cùtnuní iní-ndó nã cùú sã ndécú núu-ndó. Te sã dúcã<sup>n</sup> cùhú núu-ndó te cada iní-ndó sã ndécú-ndó dátá ì<sup>n</sup> núú néé. <sup>35</sup> Te ío cada cuendá-ndó vá cãní cuèhé iní-ndó cuendá tñúhu Yá Ndióxi cuendá cutnùnì iní-ndó nãcuáa cundecu-ndo, chi núu na càni cuèhé iní-ndó cuendá tñúhu-gã, te cùu-ndo dátá ì<sup>n</sup> ñáiyu ñá túú cùtnuní núu-xí. <sup>36</sup> Te núu càndoo canine iní-ndó, te mee-ni sã váha ñúhu iní-ndó, te cùtnuní váha iní-ndó tñúhu ndáá dátá cùtnuní váha núu-ndó òrè càyú ñuhú, duca<sup>n</sup> cùtnuní iní-ndó —cãchí-gã xãha<sup>n</sup>-gã xii-yu.

*Jèsús càhá<sup>n</sup>-gá cuendá cue tée cùu fariséu ndihi cue tée dàcuaha ñaha xii-í-ñâyiu*

(Mt. 23:1-36; Mr. 12:38-40; Lc. 20:45-47)

<sup>37</sup> Te òré ní ndihi tnúhu ní càhá<sup>n</sup> Jèsús, te ì<sup>n</sup> tée cùu fariséu ní càhá<sup>n</sup> ñàhá-dě xii-gá vehe-dé caxi-gá, te cuànguihu-gá vehe-dé, te ní ngóo-gá mèsá. <sup>38</sup> Te tée cùu fariséu-á<sup>n</sup> ìo ní cuñúhu-dé, chi Jèsús ñá túú ní ndàha-gá nàcuáa sàni iní-güedé nduu vétú iní Yá Ndiòxí òré ní ngóo-gá caxi-gá dàtná quidé mèe-güedé. <sup>39</sup> Te Jèsús ní xáha<sup>n</sup>-gá xii-dé:

—Nchòhó cue tée cùu fariséu xini-ndó sá ìo ñâyiu nàquete sátá-ni tásá<sup>n</sup> ndihi sátá-ni còhó, te xití-xi càndehé caduaha-ni. Te duca<sup>n</sup> sàtnahá-xi cùu nchòhó, chi ndaha-ni-ndo nàquete-ndo, te iní-ndó ñà túú nduu ndoo, te nándi dándahú-ndó tnàha ñâyiu-ndo, te quèhe<sup>n</sup>-ndo sá ndécú ndihí-yu, te nándi-gá nchaa sá cuèhé sá dúhá ñuhu iní-ndó quide-ndo. <sup>40</sup> ¡Te nchòhó cúu-ndó cuè tée ìo ñí iní-xi! ¿Te náa ñá túú cùtnuní iní-ndó sá Yá Ndiòxí Yáa ní cadúha yiqui cùñú-ó diu-ni-gá ní chihí-gá iní-ó-á<sup>n</sup>? <sup>41</sup> Te nchaa sá vaha ndècu ndihi-ndo cuáha-ndo nchàa ñâyiu xini ñuhu na cundecu ndihí-yu, te núu duca<sup>n</sup> na càda-ndo, te cuu-ndo ñâyiu sa ní nduu ndoo ní nduu nine iní-xi.

<sup>42</sup> ¡Te ndàhú ní cuu nchaa nchòhó cue tée cùu fariséu! Chi sàha-ndo Yá Ndiòxí núú ùxi xichi yúcú nání mèntá, ndihi yúcú rúdá, ndihi nchaa dava-gá núú yúcú quèe comidá, dico ñá túú quidé ndáá-ndó, te ni ñà túú ñuhu iní-ndó Yá Ndiòxí. Dico tnúhu càhá<sup>n</sup>-í-a tàù-ndó càda-ndo, te ni vā dáña ndèe-ndó càda-ndo nchaa dava-gá sá vaha.

<sup>43</sup> ¡Te ndàhú ní cuu nchòhó cue tée cùu fariséu! Chi cuini-ndó cùnucóo-ndo núú sácóo cue tée ìo cùnucú veñúhu, te cuini-ndó mèe-ni ndihi tnúhu yifñuhu càhá<sup>n</sup> ndihi ñaha ñâyiu xii-ndo nchàa núú xicá cùu-ndo.

<sup>44</sup> ¡Te ndàhú ní cuu nchòhó cue tée dàcuaha ñaha xii ñâyiu nchaa tnúhu ní chídó tnùní ndíi Moisés, ndihi nchòhó cue tée cùu fariséu chi ìo dándahú-ndó mèe-ndo sá quidé ndáá-ndó te ñà ndáá sá quidé ndáá-ndó! Chi cùu-ndo datná ì<sup>n</sup> ñâyiu ní xihí te ní nguindúxi, te ñá túú cùtnuní-gá ndèe yindúxi-yu, te cuèi nà yáha ñâyiu dico ñá túú cùtnuní sá yindúxi ndíyi. Te duca<sup>n</sup> sàtnahá-xi cùu nchòhó, chi nchaa ñâyiu ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó —càchi-gá xáha<sup>n</sup>-gá xii-güedé.

<sup>45</sup> Te ní xáha<sup>n</sup> ì<sup>n</sup> tée dàcuaha ñaha xii-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcá<sup>n</sup> càhá<sup>n</sup>-n te tnàhá nchúhú xicuehé-n à<sup>n</sup> —càchi-dé xáha<sup>n</sup>-dè xii-gá.

<sup>46</sup> Te Jèsús ní xáha<sup>n</sup>-gá:

—¡Ndàhú ní cuu tnàhá nchaa nchòhó cue tée dàcuaha ñaha xii ñâyiu nchaa tnúhu ní chídó tnùní ndíi Moisés! Chi quide-ndo datná quidé ñâyiu dàcuído ì<sup>n</sup> tnaha ñâyiu-xi ì<sup>n</sup> sá ìo vée, te mèe-yu ni lùha ñá túú cuini-yu cuidó-yu. Te duca<sup>n</sup> sàtnahá-xi quide nchòhó chi dānehé-ndó ñâyiu nàcuáa cadá-yu, dico mee-ndo chi ni lùha ñá túú cuini-ndó càda-ndo nàcuáa dānehé-ndó-yu.

<sup>47</sup> ¡Te ndàhú ní cuu tucu-ndo! Chi càdúha-ndo núú ní nguindúxi cue tée ní xóo càhá<sup>n</sup> tnúhu Yá Ndiòxí ndéé sanaha cuendá sá cúnaha-ndo núú yindúxi cue ndíi, te diu-ni cue ñani tnàhá-ndó ní sahani-güedé cue ndíi. <sup>48</sup> Te nchòhó sa nàha-ndo nàcuáa ní quide cue ñani tnàhá-ndó, te càchi-ndó sá ní quide vaha-güedé sá dúcá<sup>n</sup> ní sahani-güedé cue ndíi-á<sup>n</sup>, te vitna càdúha-ndo núú ní nguindúxi cue ndíi.

<sup>49</sup> Te Yá Ndiòxí ìo sàà nchaa sá xini tnùní-gá, te ní càchi-gá sá dācāhá<sup>n</sup>-gá iní cue tée cuendá càhá<sup>n</sup>-güedé tnúhu-gá núú ñâyiu, te cada-güedé nchaa nàcuáa cuini-gá, te dava-güedé cahni ñàhá-yu xii-güedé, te dava-güedé ìo dandòho ñàhá-yu xii-güedé duha ní càchi-gá. <sup>50</sup> Te nchaa ñâyiu ñuyú vitna tnàhá-yu nacháhu-yu núú Yá Ndiòxí cuendá sá ní sahani-güedé cue tée ní càhá<sup>n</sup> tnúhu-gá ndéé cùtnahá ní ngáva ñuyú. <sup>51</sup> Te ndéé ndíi Àbél téé ní sahani-güedé ndéé díhna nuu, ndihi ndéé ndíi Zacàriá téé ní sahani-güedé ndéé núú ní ndihi-ná ndácá<sup>n</sup> cuendá ñàhá Yá Ndiòxí núú ñâyiu ndècu ñuyú vitna, te diu ndíi-á<sup>n</sup> ní sahani-güedé mei tnúú veñúhu càhnu sá ìo cùnucú, ndihi xito núú sácódo sá ndúú tǎhú Yá Ndiòxí.

<sup>52</sup> ¡Te ndàhú ní cuu tucu nchaa nchòhó cue tée dàcuaha ñaha xii ñâyiu nchaa tnúhu ní chídó tnùní ndíi Moisés! Chi quide-ndo datná quidé ì<sup>n</sup> téé tàxi tnuní ì<sup>n</sup> vehe, chi nacadí-dé te ñà dáña-dé quihu ñâyiu te ni mèe-dé ñá túú quihu-dé. Te duca<sup>n</sup> sàtnahá-xi quide-ndo, chi dàcuaha-ndo tnúhu Yá Ndiòxí te ñá túú cuini-ndó quindá iní-ndó te ni ñà túú dānehé-ndó ñâyiu cuini tníi tnúhu-gá nàcuáa tàù-xi cunduu cuendá naníhí tǎhú-yu —càchi-gá xáha<sup>n</sup>-gá xii-dé.

<sup>53</sup> Te òré ní ndee Jèsús vehe tée cùu fariséu-á<sup>n</sup>, te cue tée dàcuaha ñaha xii ñâyiu nchaa tnúhu ní chídó tnùní ndíi Moisés, ndihi cue tée cùu fariséu ní cudé<sup>n</sup>-güedé núú-gá, te ní nguíta-güedé nándi sá xicá<sup>n</sup> tnúhu-güedé núú-gá cuendá cuini-güedé núu vā cuita-gá ì<sup>n</sup> tnúhu càhá<sup>n</sup>-gá <sup>54</sup> cuendá duca<sup>n</sup> níhí-güedé nàcuáa cada-güedé cacá<sup>n</sup> cuéchi-güedé cuendá-gá.

## 12

*Jèsús càhá<sup>n</sup>-gá cuendá cue tée dándahú méé-xi*

<sup>1</sup> Te òré-án nĩ tacá titní mĩ ñáiyu núú ndécú Jèsús, te súúni dícó ngõnchihi tnàha-ná-yu. Te ndédóho-yu ní xáha<sup>n</sup> Jèsús xii cue téé xica cuu ndihi-gá:

—Cada cuendá-ndó vǎ cáncchícú<sup>n</sup> ni-hnu-ndo nácuáa guide cue téé cùu fariséú, chi cue téé-án<sup>o</sup> io dándahú-güedé méé-güedé sá quidé ndáá-güedé dico ñá ndáá sá quidé ndáá-güedé. <sup>2</sup> Te nchaa tnúhu sá cúu yúhu ni cuu vǎ cúu yúhu-gá, chi nchaa dacuítí sá quéeé túu-xi núú ñáiyu. <sup>3</sup> Chi nchaa tnúhu cáhá<sup>n</sup> dayuhu-ndo quée túu-xi núú chítú núú tacá, te nchaa tnúhu cáhá<sup>n</sup> méé-ndó vèhe-ndo dacuítí sá nihí ñáiyu tnúhu.

*Yá Ndióxi xini ñuhu-xi yuhú-ó-gǎ*  
(Mt. 10:26-31)

<sup>4</sup> Te nchòhó cue téé io váha tnàhá tnúhu ndihi-í ná cǎchí tnúhu-í xii-ndo sǎ vǎ yuhú-ndó cué ñáiyu cuéi na cǎhni ñahá-yu xii-ndo, chi diu-ni yiqui cùñú-ndó ndácú-yu cǎhni-yu, te ñá túú nǎgǎ ndacú-yu cada ñahá-yu xii-ndo. <sup>5</sup> Te na cǎchí tnúhu-í xii-ndo sǎ Yá Ndióxi táu-ndó yuhú-ndó-gǎ, chi mee-gǎ io cùnuu-gǎ, te diu-gǎ quidé-gǎ sǎ vǎ cùndecu-gǎ ñáiyu ñuyú, te daquihí<sup>n</sup> ñahá-gǎ xii-yu núú ùhú núú ndàhú, núú xiǎ<sup>n</sup> cǎchí tnúhu-í xii-ndo sǎ Yáá-án táu-ndó yuhú-ndó-gǎ.

<sup>6</sup> Te nchòhó xini-ndó sǎ ndèé úhú<sup>n</sup> tnàhá tiláá cùyáhu-di núú úú díhú<sup>n</sup>, dico Yá Ndióxi ñá túú cùnaa-gǎ ni ñ<sup>n</sup>-güedi, chi nèhe cuendá ñahá-gǎ xii-güedi. <sup>7</sup> Te nchòhó ndéé ñ<sup>n</sup> idi díquí-ndó yindehu, núú xiǎ<sup>n</sup> cǎchí-í sǎ vǎ yuhú-ndó, chi cùnuu-gǎ-ndó dàcúúxi tiláá cuéi vǎi vihi-güedi.

*Ñáiyu na dátúu núú dàva-gǎ ñáiyu sǎ ndécú ndihi-yu Xitohó Jesucristú*  
(Mt. 10:32-33; 12:32; 10:19-20)

<sup>8</sup> Te na cǎchí tnúhu-í xii-ndo sǎ núu na dátúu-ndo núú dàva-gǎ ñáiyu sǎ ndécú ndihi ñaha-í xii-ndo. Te duca<sup>n</sup> te tnàhá yuhú Téé cùu ñani tnàhá-ndó nchàa-ndo dátúu-í núú nchàa cue espíritú xínú cuéchi núú Yá Ndióxi sǎ nchòhó ndécú ndihi ñaha-ndo xii-í. <sup>9</sup> Dico núu na cùñaha-ndo xii ñáiyu sǎ ñá túú ndècu ndihi ñaha-ndo xii-í, te diu-ni duca<sup>n</sup> cada yuhú Téé cùu ñani tnàhá-ndó nchàa-ndo, chi cùñaha-í xii cue espíritú xínú cuéchi núú Yá Ndióxi sǎ ñá túú ndècu ndihi ñaha-í xii-ndo.

<sup>10</sup> Te ndédani cǎa ñáiyu na cáhá<sup>n</sup> cuèhé cuendá yuhú Téé cùu ñani tnàhá-ndó nchàa-ndo, te cada cǎhnu iní ñahá Yá Ndióxi xii-yu. Dico ñáiyu na cáhá<sup>n</sup> cuèhé cuendá Espíritú Yá Ndióxi, te ñáiyu-án<sup>n</sup> vǎ cadá cǎhnu iní ñahá-gǎ xii-yu.

<sup>11</sup> Te òré ná cǎndeca ñaha-güedé xii-ndo quihí<sup>n</sup> veñúhu, àdi núú cué téé cùchiu<sup>n</sup>, te ni vǎ cǎni iní-ndó núu nása cunduu tnúhu cùñaha-ndo xii-güedé, te ni vǎ cǎni

iní-ndó núu ná tnúhu nadànchocáva-ndo núu ná tnúhu na cùñaha-güedé xii-ndo, <sup>12</sup> chi òré-nǎ te mee Espíritú Yá Ndióxi dacáhu iní ñahá-xi xii-ndo tnúhu cùñaha-ndo xii-güedé —cǎchí-gǎ xáha<sup>n</sup>-gǎ xii-güedé.

*Cuendá ñ<sup>n</sup> téé cuica*

<sup>13</sup> Te ñ<sup>n</sup> téé ñuhu tnahá tnuu ñáiyu-án<sup>n</sup> nĩ xáha<sup>n</sup>-dè xii Jèsús:

—Mèstrú, cùñaha xii ñani-í sǎ ná chidava-dé sǎ nĩ dándóo tǎtǎ-ndí cuu cuendá-ndí —cǎchí-dé xáha<sup>n</sup>-dè xii-gǎ.

<sup>14</sup> Te Jèsús ní xáha<sup>n</sup>-gǎ xii-dé:

—¿Te ná cuendá duca<sup>n</sup> cáhá<sup>n</sup>-n? Te ñá diú chiu<sup>n</sup>-án<sup>n</sup> vèxi-í cada-í, chi ñá diú téé cùchiu<sup>n</sup> cuu-í —cǎchí-gǎ xáha<sup>n</sup>-gǎ xii-dé.

<sup>15</sup> Te xáha<sup>n</sup>-gǎ xii nchaa ñáiyu xĩndecu-án<sup>n</sup>:

—Nchaa nchòhó ñáiyu ndédóho nchaa tnúhu cáhá<sup>n</sup>-í io váha cada cuendá-ndó, te vǎ cǎni iní-ndó nǎndi nducuu-ndo cùndecu ndihi-ndo, chi cuéi vǎi vihi na nihí-ndó cùndecu ndihi-ndo, dico vǎ chĩndèe ñaha-xi cudíi-ndo cùndecu-ndo ñuyú-a —cǎchí-gǎ xáha<sup>n</sup>-gǎ xii-yu.

<sup>16</sup> Te dátñuni ní ngúita-gǎ cǎni-gǎ ñ<sup>n</sup> cuendú núu-yu cuendá tecú tnúni-yu tnúhu-gǎ, te xáha<sup>n</sup>-gǎ:

—Ñ<sup>n</sup> téé cuica súúni nĩ cuu nchaa tatá ní xitu-dé núú ñúhú-dé. <sup>17</sup> Te ní ngúita-dé sǎni iní-dé: “¿Te nása cada-í? Te ñá túú ndéé nataxúha-í nchaa sǎ ní xitu-í”, duha ní sani iní-dé. <sup>18</sup> Te dátñuni ní sáha váha tucu-dé cuendá nácuáa cada-dé, te ní cǎchí-dé: “Duha na cùnduu, dangòyo-í yacá-í, te ndada cǎhnu-gǎ-í, te xití-xi nataxúha-í nchaandi túhú sǎ ní xitu-í, ndihi nchaa dava-gǎ sǎ ndécú ndihi-í. <sup>19</sup> Te sátá dúcǎn, te cǎchí-í: Ío vǎi sǎ ndécú ndihi-í, te cudíi-xi cuéhé culá, te vitna ndetatú-í, te coho-í te caxi-í cada-í, te nǎndi-gǎ cada-í cuendá cudíi iní-í cundecu-í, duha quesaha-í”, cǎchí-dé. <sup>20</sup> Dico Yá Ndióxi ní xáha<sup>n</sup>-gǎ xii-dé: “Yòhó, ñá túú nǎndihi sǎ sǎni iní-n, chi yuhú cǎchí-í sǎ níu vitna cuú-n, te nchaa sǎ ndécú ndihi-n ¿yoó cuu sǎ váha xii-a-í?”, cǎchí-gǎ xáha<sup>n</sup>-gǎ xii-dé. <sup>21</sup> Duha yáha nchaa ñáiyu nǎndi sǎni iní-xi cundecu ndihi-xi ñuyú-a, dico ñáiyu-án<sup>n</sup> io ndàhú-yu chi ñá túú ná nduu táhú-yu núú Yá Ndióxi cundecu ndihi-yu —cǎchí Jèsús xáha<sup>n</sup>-gǎ xii-yu.

*Yá Ndióxi xitó-gǎ nchaa ñáiyu sǎndáá iní ñahá xii-gǎ*

(Mt. 6:25-34)

<sup>22</sup> Te ní xáha<sup>n</sup> Jèsús xii cue téé xica cuu ndihi-gǎ:

—Te na cǎchí tnúhu-í xii-ndo sǎ vǎ ío cǎni iní-ndó núu nása cundecu-ndo, àdi nása nihí-ndó sǎ cǎxi-ndó, àdi nása nihí-ndó dǒó cuihnu-ndo. <sup>23</sup> Chi cùnuu-gǎ méé-ndó dàcúúxi sǎ nchító-ndó, te duca<sup>n</sup> yiqui cuñú-ndó cùnuu-gǎ-xi dàcúúxi dǒó

sacúhnu-ndo. <sup>24</sup> Te chí cuáha cuendá nàcuáa quide cue tícacá, chí ni ñá túú chíhi-güedi tatá cuu itú natahu-güedi te ni ñá túú ndèé núnñi yacá-güedi, te nihí-güedi xèxi-güedi, chí Yá Ndióxi xító ñaha-gá xii-güedi. ¡Te nchòhò cúnùu-gá-ndó dácúuxi nchàa cue quiti ndava! <sup>25</sup> Te cuèi nándi sá sání vñhi iní-ndó ndècu-ndo, dico ñá ndácú-ndó càda-ndo nacuaa cuehnu-ndo cuèdicó ñi yiqui-gá. <sup>26</sup> Te núu ni sá lúhá xiá ñá ndácú-ndó càda-ndo, ¿te ná cuendá io sání iní-ndó cuendá nchaa sá cuini-ndó nihí-ndó cùndecu ndihi-ndo?

<sup>27</sup> Te chí cadá cuendá nàcuáa sàhnu ñi tnu itá, chí ni ñá túú quide chíu-xi, te ni ñá túú quèhe-xi idi. Te na cächi tñuhu-í xii-ndo sá ndii Salómón io víi ni cãa nchaa sá ñi xindecu ndihi ndii, dico víi-gá tucu cãa nchaa itá dácúuxi nchàa sá ñi xindecu ndihi ndii. <sup>28</sup> Te cùhú sá io vitna tnaa-ni cùdii-xi te sàhmí-yu, te cuèi duca ñi dico io víi cadúha Yá Ndióxi nchaa cùhú-ã. ¡Te nchòhò io cúnuu-ndo dácúuxi nchàa cùhú-ã, núu xiá io xító ñaha-gá xii-ndo, te dicó yica cùu iní-ndó sàndáa iní-ndó-gá! <sup>29</sup> Te vã io can-chicú ñi hnu-ndo sá cohó sá caxí-ndó, te ni vã dándihú-ndó iní-ndó núu nása cada-ndo nihí-ndó. <sup>30</sup> Chí nchaa ñáyiú ñá túú sàndáa iní ñhá xii Yá Ndióxi duca ñi mee-ni sá cohó sá caxí-yu xica nchicú ñi hnu-yu. Dico mee Tãtã-ó Dütú Ndióxi sã ñaha-gá nándi cùu sá xini ñuhu-ndo, te taxi-gá. <sup>31</sup> Te cada-ndo nchàa nacuaa cãhá Yá Ndióxi Yaá yindàha ñaha xii-ndo, te duca ñi taxi-gá nchaa sá xini ñuhu-ndo.

*Cuendá sã vãha nduu tãhú-ó núu Yá Ndióxi*

(Mt. 6:19-21)

<sup>32</sup> Te vã yùhú nchòhò cue tée ndècu ndihi-í cuèi io sacú-ndó, chí Tãtã-ó Dütú Ndióxi ní cächi-gá sá ndúú tãhú-ndó cùndecu-ndo núu ndécú-gã taxi tñuni-ndó tñhá-ndó. <sup>33</sup> Te chí dicó nchàa sá ndécú ndihi-ndo, te chí cuáha nchaa ñáyiú ndàhú dihú-ndó ñáyiú xini ñuhu, te cada vãha-ndo cùndecu-ndo, te duca ñi nduu tãhú-ndó sã io-gã vãha núu Yá Ndióxi cùndecu ndihi-ndo, te xiá vã cùú tühú tñhá-gá-xi, te ni vã ndihí ñihnu-gá-xi, te ni ñadúhú vã ndácú-güedé duhu-güedé, te ni ñi quidi vã quèé-dí. <sup>34</sup> Te núu xiá cùú cuendá-ndó ñá, te ñi-ni xiá ñuhú iní-ndó, á ñi te núu mee-ni sá ndécú ñi yíú-a ndècu ndihi-ndo, te ñi-ni nchaa xiá ñuhú iní-ndó.

*Xini ñuhu-xi quihí iní-ó cùndecu-ó*

<sup>35-36</sup> Te io quihí iní-ndó cùndecu-ndo, te cada-ndo dàtná quidé dãva cue tée xinu cuechi sacúndecu tãha-güedé cuèi nání òré-ã ñdétú-güedé patróó-güedé ná òré nasáa-dé sã cuhá-ndé vico tñandaha. Te núu niú te sa cùu cáyú-ñi ñuhú-güedé sã cùndetu

ñaha-güedé, chí òré ná nasáa-dé dacasa-ndé yuyèhe, te ndihí-ni nacaá-güedé ndihu-dé.

<sup>37</sup> Te vãha tãhú nchaa cue tée xinu cuechi-ã, chí ndècu tãha-ni-güedé ndétú-güedé ndéé òré ní nasáa patróó-güedé, te na cächi tñuhu ndáa-í xii-ndo sã òré ná nasáa patróó-güedé-ã ñi te chíhi ñaha-dé mèsã xii-güedé, te ndacá ñi ndee-dé dóo ñihnú-dé núu yiquí-dé, te ngúita-dé cani-dé cohó-güedé cuendá caxi-güedé. <sup>38</sup> Te ñi-ni duca càda-dé cuèi dava niú, ádi tacuihndá-gá, te núu ñá túú xidi-güedé òré nasáa-dé, te cue tée xinu cuechi-ã io vãha tñhá-güedé. <sup>39</sup> Te núu dicó ñi tée cùu xitohó ñi vehe xini-dé ná òré quihu ñaduhú vehe-dé ñá, te quihí iní-dé te vã cùdú-dé, te vã dàñá-dé nacaá-güedé yuyèhe-dé quihu-güedé duhu-güedé. <sup>40</sup> Te nchòhò tucu nchaa-ni nduu quihí iní-ndó cùndecu tãha-ndo, chí na cuhá ñi nduu ñá túú yihí iní-ndó, te quixi tucu yuhú Tée cùu ñani tñhá-ndó nchàa-ndo —cächi-gá xãha-gá xii-güedé.

*Cue tée quide ndáa ndihi cue tée ñá túú quide ndáa*

(Mt. 24:45-51)

<sup>41</sup> Te tã Pelú ní xicã tñuhú-dé núu Jèsús, te xãha-ndé:

—Mèstrú, ¿te tñuhu ní cãhá-n-ã cùu-xi mee-ni cuendá nchuhú ñi cuendá nchaa ñáyiú? —cächi-dé xãha-dé xii-gã.

<sup>42</sup> Te Jèsús ní xãha-gã:

—Cãhá-í cuendá ñáyiú quide vãha dàtná quidé ñi tã taxi tñuni ñhá xii cue ñáyiú xinu cuechi ndecu vehe patróó-xi, chí tã-ã io vãha tãcú tñuni-dé, te quide-dé nchaa nàcuáa cãhá patróó-dé, te dácaxi-dé cue ñáyiú xinu cuechi òré tãu-xi caxi-yu. <sup>43</sup> Te núu duca quide vãha tã taxi tñuni ñhá xii cue ñáyiú xinu cuechi-ã ñá, te io vãha tñhá-dé òré nasáa patróó-dé núu ndéé cuhá-ndé. <sup>44</sup> Te na cächi tñuhu ndáa-í xii-ndo sã tã quide ndáa tãxi tñuni ñhá xii cue ñáyiú xinu cuechi-ã cñaha-nã patróó-dé xii-dé sã nchãndi tñuhú-nã sã ndécú ndihi-dé quindaha-dé. <sup>45</sup> Dico núu tãe tãxi tñuni ñhá xii cue ñáyiú xinu cuechi-ã ná cani iní-dé sã cùyaa patróó-dé vã nasáa ndihí-ni-dé ñá, te ngúita-dé cani-dé nchaa ñáyiú xinu cuechi, cuèi tãe cuèi ñadihí, te ngúita-dé caxi-dé coho-dé, te dàxini-dé mée-dé, <sup>46</sup> te nduu ñá túú yihí iní-dé te nasáa patróó-dé, te dandohó ñaha patróó-dé-ã xii-dé, te daquihí ñhá-dé xii-dé núu ndécú ñáyiú ñá túú ní quide ndáa.

<sup>47</sup> Te dava cue tãe xinu cuechi xini-güedé nàcuáa cuini patróó-güedé cada-güedé te ñá túú quide-güedé, te ni ñá túú

cuini-güedé cundecu túha-güedé cundetu-güedé patróó<sup>n</sup>-güedé, te nchaa cue tée duca<sup>n</sup> xíquide dandóho ñaha patróó<sup>n</sup>-güedé, chi ñani vihi-güedé. <sup>48</sup> Te dava cue tée xinu cuechi ñá túú xini-güedé nàcuáa cuini patróó<sup>n</sup>-güedé cada-güedé, te ní quide-güedé sá neñtúú-güedé ñ<sup>n</sup> sá ñá túú tãú-güedé cada-güedé ñá, te cue tée-á<sup>n</sup> sacú-gá dandóho ñaha patróó<sup>n</sup>-güedé, chi sacú-gá ñani-güedé. Te ñayiu cùnuni ini-xi nàcuáa cuini Yá Ndióxi cadá-yu, te ñiu-ni duca<sup>n</sup> tãú-yu cadá-yu nàcuáa cuini-gá. Te ñayiu vai-gá təcú tñuni nàcuáa càhá<sup>n</sup>-gá, te ñiu-ni duca<sup>n</sup> vai nchaa sá càhá<sup>n</sup>-gá tãú-yu cadá-yu.

*Ñá túú cùu ñ<sup>n</sup>nuu ñayiu*  
(Mt. 10:34-36)

<sup>49</sup> Te yúhú véxi-í ñuyúú-a cuendá cutnùni ini ñayiu nàcuáa cada ñaha Yá Ndióxi xii-yu, ÿte cuini-í sá ndíhi-ni cada-gá nàcuáa sàni ini-gá! <sup>50</sup> Te yúhú ío vai tñuhu sàni ini-í, ÿchi sáa nduu te ío ndoho-í, te ñiu-ni xiá<sup>n</sup> cuhu<sup>n</sup> ini-í ndéé ná sáa nduu ñuca<sup>n</sup> yáha-í! <sup>51</sup> Te nchóhó vá caní ini-ndó sá yúhú véxi-í ñuyúú-a te cundecu ndíhi tñaha váha-ni ñayiu, te ñáhá chi da ngúita-yu vá cúú ñ<sup>n</sup>nuú-yu cundecú-yu. <sup>52</sup> Te ndéé neni vitna ngúita ñayiu vá cúú ñ<sup>n</sup>nuú-yu cundecú-yu, te na cada-o cuendá te núu úhú<sup>n</sup> ñayiu xindecu ñ<sup>n</sup>-ni vèhe, te vá cúú ñ<sup>n</sup>nuu-gá-yu, chi úní-yu ndatnúhu-yu te nãá-yu ndíhi úú-gá-yu, ñdi ñayiu úú-á<sup>n</sup> ndatnúhu-yu te nãá-yu ndíhi ñayiu úní-á<sup>n</sup>. <sup>53</sup> Te dava cue tée cùu tátá vá cúú ñ<sup>n</sup>nuu-gá-güedé ndíhi déhe ducu<sup>n</sup>-güedé, te ní ñava cue ñayiu cùu náná vá cúú ñ<sup>n</sup>nuu-gá-yu ndíhi déhe yócó-yu, te ní sãnu-yu vá cúú ñ<sup>n</sup>nuu ndíhi-gá-yu. Te duca<sup>n</sup> cadá-yu chi davá-yu quindáá ini ñáhã-yu xii-í, te davá-yu vá quindáá ini ñáhã-yu — cãchí-gá xãha<sup>n</sup>-gá xii-güedé.

*Ñayiu cùnuni ini-xi nàcuáa quide-xi ñuyúú ndíhi andiu*  
(Mt. 16:1-4; Mr. 8:11-13)

<sup>54</sup> Te Jèsús ní xãha<sup>n</sup>-gá xii nchaa ñayiu xindecu-á<sup>n</sup>:

—Te nchóhó òré ndéhé-ndó ndànchita vícò ndàa xio quée nchíanchii, te cãchí-ndó sá cúú<sup>n</sup> dàú, te ñiu duca<sup>n</sup> ndisa quide-xi. <sup>55</sup> Te òré ná quène táchí ndàa xio datni nacúaa quène nchíanchii, te cãchí-ndó sá ío cada ihni-xi, te ñiu duca<sup>n</sup> ndisa quide-xi. <sup>56</sup> Te nchóhó ío váha cùnuni ini-ndó nàcuáa quide-xi andiu ndíhi ñuyúú, ÿte ná cuendá quidé-ni-ndó sá ñá təcú tñuni-ndó nàcuáa quide Yá Ndióxi vitna? Te sá dúcá<sup>n</sup> quide-ndo-á<sup>n</sup> ío dandahú-ndó mée-ndo sá ío váha cùnuni ini-ndó, chi ñá ndáá sá cùnuni ini-ndó.

*Nducu-o nàcuáa nucúndecu ndíhi váha-o ñayiu cùu úhú ini ñáhá*  
(Mt. 5:25-26)

<sup>57</sup> Te nchóhó, çná cuendá ñá túú dandixi túu-ndo ini-ndó cada-ndo mee-ni sá váha sá tãú-ndó cada-ndo-í? <sup>58</sup> Te núu ío ñ<sup>n</sup>-ndo ní sacá<sup>n</sup> cuèchi ñayiu cuendá-ndó cuendá ñ<sup>n</sup> sá ní quide-ndo, te cuáhá<sup>n</sup>-ndó ndíhi-yu núu tée cùchiu<sup>n</sup>, te nini ñuhu-ndo ndíhi-yu ichi, te nducu-ndo nàcuáa cada-ndo nãcãhá<sup>n</sup> càhnú ini tñáhá-ndó ndíhi-yu cuendá sá vá càndeca ñaha-gá-yu quíhí<sup>n</sup> núu tée cùchiu<sup>n</sup>, chi núu duca<sup>n</sup> na cadá-yu te tée cùchiu<sup>n</sup>-á<sup>n</sup> nachihi ñaha-dé ndaha cue tée cùu poleciá, te cue tée-á<sup>n</sup> chihí ñaha-güedé veçaá xii-ndo. <sup>59</sup> Te na cãchí tñuhu-í xii-ndo sá núu na ngáva-ndo veçaá, te vá cãcu-ndo te núu vá nãchãhu-ndo nchãa sá tãú-ndó —cãchí-gá xãha<sup>n</sup>-gá xii-yu.

## 13

*Xini ñuhu-xi natuha-o ichi Yá Ndióxi*

<sup>1</sup> Te ñiu-ni òré-á<sup>n</sup> ní ngúnutñi ñ<sup>n</sup> úú ñayiu núu Jèsús caní-yu cuendú núu-gá nàcuáa ní quide ñaha té Pilatú xii cue tée distritú Galiléa cue tée ní sañni quiti nduu tãhú Yá Ndióxi, te mei òré ní sañni-güedé cue quiti-á<sup>n</sup> ní táuchíú<sup>n</sup> té Pilatú cue sandadú-dé ní sañni-güedé cue tée Galiléa-á<sup>n</sup>, te ní xica ñíhí-güedé núu ñuhú ndíhi ñíhí cue quiti-á<sup>n</sup>, te ní nadacánuu-xi. <sup>2</sup> Te Jèsús ní xãha<sup>n</sup>-gá xii-yu:

—Te núu nchóhó sání ini-ndó sá sá dúcá<sup>n</sup> ní yáha cue tée distritú Galiléa-á<sup>n</sup> te cùu-güedé cue tée ndècu vihi-gá cuèchi-xi dàcúúxí cuè tée ñuu-güedé ñá. <sup>3</sup> Te na cãchí tñuhu-í xii-ndo sá ñáhá. Te núu nchóhó vá ndíxí cuèchi ini-ndó cuendá nchaa sá cuèhé sá dúhá quide-ndo ndecu-ndo ña, te tñáhá nchaa nchóhó cuíta nihnu-ndo te núu vá nãtñi-ndo ichi Yá Ndióxi. <sup>4</sup> Te núu nchóhó sání ini-ndó sá ñayiu sãhú<sup>n</sup> úní ní xihí ní tãú ñáhá vèhe ducú<sup>n</sup> Silóé ío-gá ndécú cuèchi-yu dàcúúxí nchaa ñayiu xindecu ñuu Jerusálén ñá, <sup>5</sup> te na cãchí tñuhu tucu-í xii-ndo sá ñáhá. Te núu nchóhó vá ndíxí cuèchi ini-ndó cuendá nchaa sá cuèhé sá dúhá quide-ndo ndecu-ndo ña, te tñáhá nchaa nchóhó cuíta nihnu-ndo te núu vá nãtñi-ndo ichi Yá Ndióxi —cãchí-gá xãha<sup>n</sup>-gá xii-yu.

*Yutnu ngúxi ñá túú cùu sávidí-xi*

<sup>6</sup> Te Jèsús ní caní tucu-gá ñ<sup>n</sup> cuendú núu-yu nàcuáa tecú tñuni-yu tñuhu-gá, te xãha<sup>n</sup>-gá:

—Ñ<sup>n</sup> tée nùtñi ñ<sup>n</sup> yutnu ngúxi núu ñuhú-dé, te cuáhá<sup>n</sup> ndéhé-dé núu ní cuu<sup>n</sup> sávidí-xi ní cùu, te ní ñ<sup>n</sup> ñá túú ní cùu<sup>n</sup>. <sup>7</sup> Te ní xãha<sup>n</sup> tée-á<sup>n</sup> xii tée ndéé ñuhu-dé: “Ñaha-n sá vitna ní cuu úní cuía quixí còto-í yutnu ngúxi-a te ñá túú xini-í ní ñ<sup>n</sup> sávidí-xi. Te quehndé-n vitna, chi áu<sup>n</sup> ñá cuu nùtñi-xi quide tneñu-xi núu ñuhu-á<sup>n</sup>”,

càchí-dé xáha<sup>n</sup>-dê xii téé ndèé ñuhu-dé-á<sup>n</sup>.  
 8 Te téé ndèé ñuhu-á<sup>n</sup> ní xáha<sup>n</sup>-dê: “Pàtróó<sup>n</sup>,  
 dañá na cuíhu-xi cuíá vitna-ná, te na  
 nàdatayá-í ñuhu núú sàhá-xi, te chíhi-í sahá<sup>n</sup>.  
 9 Te duca<sup>n</sup> te cudana cuu<sup>n</sup> sávidí-xi, àdi núú  
 ñá túú ní cùu<sup>n</sup> sávidí-xi ña te téhndé-nà-xi”,  
 càchí-dé xáha<sup>n</sup>-dê xii pàtróó<sup>n</sup>-dê —càchí-gá  
 xáha<sup>n</sup>-gá xii-yu.

*Jesús quidé tãtã-gá ñ<sup>n</sup> ñadihi ní nduu cueyi  
 sãtã-xi nduu ndetatu ñáiyu*

10 Te ñ<sup>n</sup> xito cùu-xi nduu ndetatu ñáiyu,  
 te yíhi Jesús ñ<sup>n</sup> veñúhu dànehé-gá ñáiyu.  
 11 Te xián<sup>n</sup> ndécú ñ<sup>n</sup> ñadihi ní cuu sáhú<sup>n</sup> úní  
 cuíá sã cùhú-a<sup>n</sup> yíhi ñaha espíritú cùndíhi  
 yucu ñávãha xii-a<sup>n</sup>, te xián<sup>n</sup> ní ndada cueyi-xi  
 sãtã-a<sup>n</sup>, te ñá dáñá-gá-xi núcunútní ndáá-a<sup>n</sup>.  
 12 Te òré ní xini ñáhá Jesús xii-a<sup>n</sup> te ní cana  
 ñaha-gá, te xáha<sup>n</sup>-gá:

—Yòhò ñaha cùhú, ndúha-n cuéhé tñhá-n  
 —càchí-gá xáha<sup>n</sup>-gá xii-a<sup>n</sup>.

13 Te ní dácáá-gá ndaha-gá ní tendaha  
 ñaha-gá xii-a<sup>n</sup>, te òré-ni-á<sup>n</sup> ní ndúha-a<sup>n</sup> te  
 ní núcunútní ndáá-a<sup>n</sup>, te ní ngúita-a<sup>n</sup> ní  
 cachí-a<sup>n</sup> sã ño càhnu cuu Yá Ndióxi. 14 Dico  
 téé tàxi tñuní veñúhu ní cudéé<sup>n</sup>-dê sã dúcá<sup>n</sup>  
 ní quide Jesús ní quide tãtã-gá ñaha cùhú-á<sup>n</sup>  
 nduu ndetatu-yu, te ní xáha<sup>n</sup>-dê xii-yu:

—Ío ñú nduu tãú-ó càda chiu<sup>n</sup>-o, te  
 ndédani càa nduu-á<sup>n</sup> quixi-ndo cùtãtã-ndo,  
 dico ñá díú nduu cuu-xi nduu ndetatu-ó —  
 càchí-dé xáha<sup>n</sup>-dê xii-yu.

15 Te ní xáha<sup>n</sup> Jesús:

—Nchòhó chí ño dándahú-ndó mèe-ndo  
 sã quidé ndáá-ndó dico ñá ndáá  
 sã quidé ndáá-ndó, çnáa ñá túú  
 nàndaxi-ndo ndicutu-ndo àdi búrru-ndo  
 dàcoho-ndo-güedi ndute nduu ndetatu-ó  
 á<sup>n</sup>? 16 Te ñadihi-a cùu-a<sup>n</sup> ñani tñáhá ndíi  
 Àbrahám, te dicó-ní sã yùcu ñávãha quide  
 duha cùhú-a<sup>n</sup> ní cuu sáhú<sup>n</sup> úní cuíá, çte náa  
 ñá túú xini ñuhu-xi cutãtã-a<sup>n</sup> cuéi cùu-xi  
 nduu ndetatu-ó á<sup>n</sup>? —càchí-gá xáha<sup>n</sup>-gá  
 xii-dé.

17 Te sã dúcá<sup>n</sup> ní cáhá<sup>n</sup> Jesús, núu nchaa  
 cue téé cùu úhú iní ñáhá xii-gá ní cucaha<sup>n</sup>  
 núú-güedé, dico nchaa dava-gá ñáiyu chí  
 xicudíí iní-yu xindéhé-yu nchaa sã vã yò  
 tñáhí ndácu cada quide-gá.

*Cuendá ndiquí<sup>n</sup> yutnu nani mostázá  
 (Mt. 13:31-32; Mr. 4:30-32)*

18 Te ní xáha<sup>n</sup>-gá xii-yu:

—Na càni-í ñ<sup>n</sup> cuendú núú-ndó nàcuáa  
 tecú tñuní-ndó nàcuáa cada-xi òré ndíhu  
 ndaha ñaha Yá Ndióxi xii-ndo. 19 ñ<sup>n</sup> téé ní  
 quehe<sup>n</sup>-dé ndiquí<sup>n</sup> yutnu nani mostázá te  
 nèhe-dé cuáhá<sup>n</sup> ní sacá<sup>n</sup>-dé núú ñúhú-dé te  
 ní xínu-xi, te ní sahnu-xi ní cuu dúcú<sup>n</sup>-xi,  
 te cue quiti ndáva núú tàchí cãdúha-güedi

tacá-güedi núú dìté-xi —càchí-gá xáha<sup>n</sup>-gá  
 xii-yu.

*Nàcuáa quide levadurá  
 (Mt. 13:33)*

20 Te ní xáha<sup>n</sup> tucu Jesús xii-yu:

—Te na càchí tñuhu tucu-í xii-ndo nàcuáa  
 cada tucu Yá Ndióxi òré ndíhu ndaha  
 ñaha-gá xii-ndo. 21 ñ<sup>n</sup> ñadihi ní quehe<sup>n</sup>-a<sup>n</sup>  
 levadurá ní chíhi-a<sup>n</sup> úní arròbá yuchi triú,  
 te levadurá-á<sup>n</sup> ní quide-xi ní ndaa nihíi  
 yusa<sup>n</sup>-á<sup>n</sup> —càchí-gá xáha<sup>n</sup>-gá xii-yu.

*Yuyèhe cuiñí  
 (Mt. 7:13-14, 21-23)*

22 Te ichi ñuhu Jesús cuáhá<sup>n</sup>-gá ñúu  
 Jerusálén, te nchaa ñúu náhnú, ndíhi nchaa  
 ñúu líhli ta yãha-gá duca<sup>n</sup> ta dànehé-gá ñáiyu  
 tñuhu-gá cuáhá<sup>n</sup>. 23 Te ñ<sup>n</sup> ñúu-á<sup>n</sup> ní xáha<sup>n</sup> ñ<sup>n</sup>  
 téé xii-gá:

—Mèstrú, cuiñí-í cáca<sup>n</sup> tñuhu-í ñ<sup>n</sup> tñuhu  
 núú-n, çndáá sã ño sacú ñáiyu nàníhi tãhú-á<sup>n</sup>?  
 —càchí-dé xáha<sup>n</sup>-dê xii-gá.

Te Jesús ní xáha<sup>n</sup>-gá xii-dé ndíhi nchaa  
 ñáiyu:

24 —Cada-ndo sã nánihí tãhú-ndó, te  
 tñú-ndo ichi Yá Ndióxi, te ichi-gá-á<sup>n</sup> cúu-xí  
 dàtná ñ<sup>n</sup> yuyèhe cuiñí, te càchí tñuhu-í  
 xii-ndo sã ño cuéhé ñáiyu cachí iní-yu  
 quíhu-yu yuyèhe cuiñí-á<sup>n</sup> dico vã ndácú-yu.  
 25 Te na càni tucu-í ingá cuendú núú-ndó  
 nàcuáa tecú tñuní-ndó tñuhu cáhá<sup>n</sup>-í. Te òré  
 ná ndacúñí téé cùu xitohó vehe, te nacadí-dé  
 yuyèhe, te nchaa nchòhó ñáiyu na quèndóo  
 quehé dacása<sup>n</sup>-ndo yuyèhe, te quesaha-ndo  
 cùñaha-ndo xii-dé: “Tãtã, nacaá<sup>n</sup> yuyèhe  
 na quíhu-ndí”, quesaha-ndo cùñaha-ndo  
 xii-dé. Dico téé cùu xitohó vehe-á<sup>n</sup> cùñaha-dê  
 xii-ndo: “Ná túú xini-í nchòhó ndéé ñáiyu  
 cùu-ndo”, duha cùñaha-dê xii-ndo. 26 Te  
 dàtmúní ngúita nchòhó cùñaha-ndo xii-dé:

“Nchúhú ní xexi ndíhi ñaha-ndí, te ní  
 xíhi ndíhi ñaha-ndí xii-n, te nchaa ichi ní  
 xóo dacuàha ñaha-n xii-ndí”, quesaha-ndo  
 cùñaha-ndo xii-dé. 27 Dico cachí tucu téé  
 cùu xitohó vehe-á<sup>n</sup> cùñaha-dê xii-ndo: “Sa ní  
 cachí-í sã ña túú xini-í ndèé ñáiyu cùu-ndo.

Te chí xócuiñí nchòhó ñáiyu ndècu ichi  
 cuehé ichi duha núú ndècu-í”, quesaha-dê  
 cùñaha-dê xii-ndo. 28 Te na sãa nduu dúcá<sup>n</sup>  
 cada-xi te quiní-ndó tã Àbrahám, ndíhi té  
 Isáác, ndíhi té Jacób, ndíhi nchaa cue téé  
 ní xóo cáhá<sup>n</sup> tñuhu Yá Ndióxi, te nchaa  
 cue téé-á<sup>n</sup> ndécú-güedé núú ndécú-gá táxi  
 tñuní-gá, te nchòhó quee tñú-ndó núú-gá sã  
 tñuhu ñá túú ní cuiñí cada ndáá, te dàvã-á<sup>n</sup>  
 ndáhyú-ndó te cuu rúhñú-nã ñuhu-ndo sã  
 sãtú iní-ndó cuendá sã ndòhó-ndó. 29 Te  
 dàvã-á<sup>n</sup> quíhu nchaa ñáiyu ndí cùmí xio  
 ñuyúú núú ndécú Yá Ndióxi táxi tñuní-gá  
 caxí-yu ndíhi-gá, te cundecú-yu ndíhi-gá.  
 30 Te dava ñáiyu nchicú<sup>n</sup> ñá túú cùmuu ndecu



ichi Yá Ndióxi vitna, ñáyiú-án sáá nduu te ío cunúú-yu. Te dava ñáyiú cùnno ndecu ichi-gá vitna, ñáyiú-án sáá nduu te vá ío-gá cunúú-yu —cächí-gá xáha<sup>n</sup>-gá xii-yu.

*Jesús ndàhyú-gá cuendá ñáyiú ñuu Jerusálén*

(Mt. 23:37-39)

<sup>31</sup> Te ñu-ni nduu-án ní quexio ñ<sup>n</sup> úú cue téé cùu fariséú núú ndécú-gá, te xáha<sup>n</sup>-güedé xii-gá:

—Quee-n íha quíhí<sup>n</sup>-n núu ndéé quíhí<sup>n</sup>-n, chí téé cùu Herodés cuíní-dé cahni ñaha-dé xii-n —cächí-güedé xáha<sup>n</sup>-güedé xii-gá.

<sup>32</sup> Te Jesús ní xáha<sup>n</sup>-gá:

—Chí cuahá<sup>n</sup> te cúñaha-ndo xii téé nèhe mañá-án sá cächí-í sá ná cündedóho váha-dé ñ<sup>n</sup> tnúhu cáhá<sup>n</sup>-í, chí cùmání ñ<sup>n</sup> úú-gá nduu cundecu-í xocani-í nchaa espíritú cündíhi yucu ñávaha yíhi ñaha xii ñáyiú, te cada tátna-í nchaa dava-gá ñáyiú cùhú, te duca<sup>n</sup> te ndíhi chíu-í, duha cúñaha-ndo xii-dé.

<sup>33</sup> Dico dacuítí sá cùhú-í íchi ñ<sup>n</sup> úú-gá nduu, te duca<sup>n</sup> te sáá-í núú quíhí<sup>n</sup>-í, chí vá cúú tnàhí cuú ñ<sup>n</sup> téé cáhá<sup>n</sup> tnúhu Yá Ndióxi ingá ñuu, chí mei ñuu Jerusálén cuú-güedé —cächí-gá xáha<sup>n</sup>-gá xii-güedé.

<sup>34</sup> Te ní xáha<sup>n</sup>-gá xii ñáyiú ñuu Jerusálén:

—Nchòhó chí sàhni-ndo nchaa cue téé cáhá<sup>n</sup> tnúhu Yá Ndióxi, cue téé ní tendaha-gá véxi, te mee-ni ndíhi yúú sáhni-ndó-güedé. jTe titní xito ní cuíní-í nadatàcá ñáhá-í xii-ndo dàtná nádàtaçá ñ<sup>n</sup> nchuxi cué déhe-di sàquíhi-güedé xití ndíxi<sup>n</sup>-di, dico ñá ní cuíní-ndó, te duca<sup>n</sup>-ni sàni iní-í ndéé vitna! <sup>35</sup> Te chí cündedóho tucu ingá tnúhu na cáhá<sup>n</sup>-í-a: Yá Ndióxi dañá ñaha-gá xii-ndo. Te na cächí tnúhu tucu-í xii-ndo sá vá quíní ñáhá-gá-ndó xii-í, dico sáá nduu te quíní ñáhá tucu-ndo, te nduu-án cächí-ndó sá ío cànno cuu yúhú Yáá ní tendaha Dütú Ndióxi véxi ñuyúú-a —cächí-gá xáha<sup>n</sup>-gá xii-yu.

## 14

*Jesús quidé tátna-gá ñ<sup>n</sup> téé ñuu cuiñu*

<sup>1</sup> Te duha ní cuu ñ<sup>n</sup> nduu, nduu ndetátú ñáyiú chí ñ<sup>n</sup> téé cùu fariséú cùnno ní cáhá<sup>n</sup>-dé Jesús vehe-dé caxi-gá, te cue téé ndéu vehe-dé ndéhe-güedé núu nása cada-gá. <sup>2</sup> Te xíá<sup>n</sup> ndécú tnàhá ñ<sup>n</sup> téé cùhú ñúhú-dé cuiñu.

<sup>3</sup> Te Jesús ní xicá<sup>n</sup> tnúhú-gá núú cué téé dàcuaha ñaha xii ñáyiú nchaa tnúhu ní chídó tnúni ndíi Moisés, ndíhi núú cué téé cùu fariséú, te xáha<sup>n</sup>-gá:

—¿Cuu cada tátna-o ñ<sup>n</sup> ñáyiú cùhú nduu ndetátú-ó á<sup>n</sup> ñáhá? —cächí-gá xáha<sup>n</sup>-gá xii-güedé.

<sup>4</sup> Dico cue téé-án ñà túú tnàhí ní cáhá<sup>n</sup>-güedé. Te ní dácáá-gá ndaha-gá ní tendaha-gá téé cùhú-án ní quide tátna ñaha-gá xii-dé, te ní xáha<sup>n</sup>-gá sá ná nùhú-dé

vehe-dé. <sup>5</sup> Te ní xicá<sup>n</sup> tnúhú-gá núú nchàa cue téé-án, te xáha<sup>n</sup>-gá:

—¿Te núu nchòhó ná ngáúñhnu ñ<sup>n</sup> búrru-ndo àdi ñ<sup>n</sup> ndicutu-ndo déhvá, te vá ná tàva ndíhi-ni-ndo-di cuéi cùu-xi nduu ndetátú-ndó-án? —cächí-gá xáha<sup>n</sup>-gá xii-güedé.

<sup>6</sup> Te ñá túú ní níhi-güedé tnúhu na dànhocáva-güedé.

*Ñáyiú cáhá<sup>n</sup>-yu quíhí<sup>n</sup> vico tnándaha*

<sup>7</sup> Te ndéhe Jesús nàcuáa xiquide nchaa ñáyiú ndéu vico sá súúni ní nacáxi-yu xilé sácóo nchíhi cue téé cùnno-gá conchíhi-yu òré cuánguñhú-yu mèsá caxi-yu, núu ní xáha<sup>n</sup>-gá xii-yu:

<sup>8</sup> —Òré ná cáhá<sup>n</sup> ñáhá ñ<sup>n</sup> ñáyiú xii-ndo ñ<sup>n</sup> vico tnándaha, te vá cóo-ndó núú xilé sácóo cue téé cùnno-gá, chí núu duca<sup>n</sup> na càda-ndo, te cudana quexio dava-gá ñáyiú cùnno-gá dácúúxi nchòhó. <sup>9</sup> Te ñáyiú ní cáhá<sup>n</sup> ñáhá xii-ndo-án quixi-yu te cúñahá-yu xii-ndo: “Chí cuñaha xilé núcóo nchíhi-ndo-án ná còncíhi ñáyiú ní quexio-a”, quesàhá-yu cúñahá-yu xii-ndo. Te cuíní-ndó ñáhá cuéi cùcaha<sup>n</sup> núú-ndó ndàcuíñí-ndó quíhí<sup>n</sup>-ndó ngóo-ndo núú xilé xínutnii ndéé núú ní ndíhi-ná ndàa sáta-xi. <sup>10</sup> Te yúhú cächí-í sá òré ná cáhá<sup>n</sup> ñáhá-yu xii-ndo, te ngóo-ndo núú xilé xínutnii ndéé núú ní ndíhi-ná ndàa sáta-xi chí cuendá òré ná quexio ñáyiú ní cáhá<sup>n</sup> ñáhá xii-ndo, te cúñahá-yu xii-ndo: “Nchòhó cue ñáyiú cáhá<sup>n</sup> ndíhi-í, chí yáha núú xilé sácóo cue téé cùnno-gá coo-ndo”, duha cúñahá-yu xii-ndo. Te duca<sup>n</sup> te cada nínu ñaha nchàa ñáyiú yíhi ndíhi-ndo mesá.

<sup>11</sup> Te nchaa ñáyiú na càda nínu mee-xi, te ñáyiú-án ñà túú cùu nínu-yu, te nchaa ñáyiú ñà túú quide nínu mee-xi, ñáyiú-án cúú nínu-yu —cächí-gá xáha<sup>n</sup>-gá xii-yu.

<sup>12</sup> Te dàtnúni ní xáha<sup>n</sup>-gá xii téé ní cáhá<sup>n</sup> ñáhá xii-gá:

—Te yòhó òré cuíní-n càda-n ñ<sup>n</sup> vico, te vá cáhá<sup>n</sup>-n mée-ni cue téé cáhá<sup>n</sup> ndíhi-n, ní cué ñani-n, ní cué ñáyiú cùu ñani tnàhá-n, ní cué ñáyiú cuica ndéu yatni ndíhi-n, chí ñáyiú-án duca<sup>n</sup> càdá-yu ñ<sup>n</sup> nduu cáhá<sup>n</sup> ñáhá-yu xii-n te ndéyáhu-ni sá ní quidé-n-yu. <sup>13</sup> Te ñáhá chí òré ná càda-n ñ<sup>n</sup> vico, te cáhá<sup>n</sup>-n ñáyiú ndàhú, ndíhi ñáyiú ñà cúú càca, ndíhi ñáyiú yacua, ndíhi ñáyiú cuáá. <sup>14</sup> Te núu duca<sup>n</sup> na càda-n, te cuu-xi ñ<sup>n</sup> sá váha xii-n, chí ñáyiú-án vá níhi-yu nacoto ñáhá-yu xii-n, dico na cùú-n te sáá nduu ndòto-n ndíhi nchaa ñáyiú ní quide ndáá ní xíndecu ichi Yá Ndióxi, te dàvá-án taxi-gá sá ndúú tàhú-n —cächí-gá xáha<sup>n</sup>-gá xii-dé.

*Nàcuáa xiquide ñáyiú òré cáhá<sup>n</sup> ñáhá ñ<sup>n</sup> téé cada vico*

(Mt. 22:1-10)

<sup>15</sup> Te sá dúcá<sup>n</sup> ní cáhá<sup>n</sup> Jèsús ní tecú dóho cue tée yìhi mesá-án, núu ní xáha<sup>n</sup> ì<sup>n</sup>-dé xii-gá:

—Ío váha táhú nchaa ñáiyu na càxi nchaa sá cuáha ñaha Yá Ndiòxi nduu na sáá-yu cundecú-yu núu ndécú-gá táxi tñuní-gá —càchí-dé xáha<sup>n</sup>-dè xii-gá.

<sup>16</sup> Te Jèsús ní xáha<sup>n</sup>-gá xii-dé:

—Ì<sup>n</sup> tée quide-dé vico, te ní dátècú tñúhu-dé cuéhé víhi ñáiyu quíhí<sup>n</sup>-yu caxí-yu.

<sup>17</sup> Te òré sa ní cuu-ná sá caxí-yu, te ní xáha<sup>n</sup>-dè xii tée xinu cuechi núú-dé sá quíhí<sup>n</sup>-dé cúñaha-dé quíhí<sup>n</sup>-yu caxí-yu, chi sa ndècu túha nchaa sá caxí-yu. <sup>18</sup> Dico nchaa<sup>n</sup>-yu ní xáhá<sup>n</sup>-yu xii-dé sá ná cáda càhu iní tée càhá<sup>n</sup> ñáhá-án, chi ñá túú cùyáchí-yu quíhí<sup>n</sup>-yu vico-án. Te tée ní cáhá<sup>n</sup> ndíhi tée xinu cuechi-án díhna ní xáha<sup>n</sup>-dè:

“Íchí ní saa<sup>n</sup>-í ì<sup>n</sup> pedású ñuhu, te quíhí<sup>n</sup> ndèhé-í tnaví, núu xíá<sup>n</sup> càhá<sup>n</sup> ndàhú-í núú-n sá cúñaha-n xii tée càhá<sup>n</sup> ñáhá-án xii-í sá ná cáda càhu iní-dé chi ñá túú cùyáchí-í”, càchí-dé xáha<sup>n</sup>-dè. <sup>19</sup> Te ingá-dé ní xáha<sup>n</sup>-dè:

“Ní saa<sup>n</sup>-í úhú<sup>n</sup> yùndá ndicutu sa xitu, te cue quití-án quíhí<sup>n</sup>-í coto ndeé-í güedé vitna, núu xíá<sup>n</sup> càhá<sup>n</sup> ndàhú-í núú-n sá cúñaha-n xii tée càhá<sup>n</sup> ñáhá-án xii-í sá ná cáda càhu iní-dé chi ñá túú cùyáchí-í”, càchí-dé xáha<sup>n</sup>-dè. <sup>20</sup> Te ingá tucu-dé ní xáha<sup>n</sup>-dè: “Íchí ní tñandaha-í núu xíá<sup>n</sup> vá cùyáchí-í quíhí<sup>n</sup>-í”, càchí-dé xáha<sup>n</sup>-dè. <sup>21</sup> Te òré ní nasáá tée xinu cuechi-án, te ní nacani tñúhu-dé núú patróó<sup>n</sup>-dè nchaa nàcuáa ní xáhá<sup>n</sup>-yu. Te ní cudéé<sup>n</sup> tée cùu patróó<sup>n</sup>-án, te ní xáha<sup>n</sup>-dè xii tée xinu cuechi núú-dé-án: “Yáchí cuàhá<sup>n</sup> nanducu-n nchaa ñáiyu ndàhú, ndíhi nchaa ñáiyu ñá cùú càca, ndíhi nchaa ñáiyu yacua, ndíhi nchaa ñáiyu cuàá, te ndèni ní cuu na nàníhí-n-yu te candecá-n-yu quixí”, càchí-dé xáha<sup>n</sup>-dè. <sup>22</sup> Te sáta ní nasáá tée xinu cuechi-án, te ní xáha<sup>n</sup>-dè xii patróó<sup>n</sup>-dè: “Patróó<sup>n</sup>, sa ní quide-í chiú<sup>n</sup> ní táhú-n, dico ndècu-gá núú cóo-yu”, càchí-dé xáha<sup>n</sup>-dè. <sup>23</sup> Te tée cùu patróó<sup>n</sup>-dè-án ní xáha<sup>n</sup>-dè: “Cuàhá<sup>n</sup> tucu ndèni ní cuu te cada yica-n na quixí-yu quíhu-yu cuendá ná chitú vehe-í. <sup>24</sup> Te na càchí tñúhu-í xii-n sá ní ì<sup>n</sup> ñáiyu ní cáhá<sup>n</sup>-í díhna vá cùú-gá caxí-yu sá sá ní quide túha-í caxí-yu ní cùu”, cachí tée-án xáha<sup>n</sup>-dè xii tée xinu cuechi núú-dé —càchí-gá xáha<sup>n</sup>-gá xii tée-án.”

*Ndoho-o cùndecu-o ichi Xitohó Jesucristú*  
(Mt. 10:37-38)

<sup>25</sup> Te ío cuéhé ñáiyu nchicú<sup>n</sup>-yu Jèsús, te ní xáha<sup>n</sup>-gá xii-yu:

<sup>26</sup> —Te núu dava nchòhó cuini-ndó chitnahá ñáhá-ndó xii-í, te cuu iní ñáhá ndisa-ndo. Te cuèi na dandóo-ndo tátá-ndó, ndíhi náná-ndó, ndíhi ñadíhí-ndó, ndíhi déhe-ndo, ndíhi ñaní-ndó, ndíhi cúha-ndo,

te cani iní-ndó sá cuèi na cùú-ndó sá cuendá-í, te duca<sup>n</sup> te cuu ndisa-ndo cuè ñáiyu tñahá tñúhu ndíhi-í. <sup>27</sup> Te nchaa ñáiyu vá cànchicú<sup>n</sup> nihnu ñaha xii-í cuendá sá yùhú-yu ndohó-yu dátña ndoho-í, ñáiyu-án vá cùú-yu ñáiyu tñahá tñúhu ndíhi-í. <sup>28</sup> Te núu ì<sup>n</sup> nchòhó ná cani iní-ndó dàcaa-ndo ì<sup>n</sup> vehe ducú<sup>n</sup>, ¿te náa ñá díú díhna-gá cada cuendá-ndó núu ndèdau díhú<sup>n</sup> cuu, duca<sup>n</sup> te cutnùni iní-ndó núu tñahá díhú<sup>n</sup>-ndó càa vehe-án àdi ñáhá? <sup>29</sup> Chi núu vá dúcá<sup>n</sup> càda-ndo, te na ngüita-ndo tàusaha-ndo te vá xinu cada-ndo, te nchaa ñáiyu na cundehe ñaha xii-ndo, te cáhá<sup>n</sup> cuéhé-yu cuendá-ndó. <sup>30</sup> Te cachí-yu: “Tée-án ní ngüita-dé dácàa-dé ì<sup>n</sup> vehe te ñá ní ndacu-dé xinu”, cachí-yu. <sup>31</sup> Àdi te núu ì<sup>n</sup> tée yindaha ñaha xii ñáiyu cuini-dé nàa-dé ndíhi ingá tucu tée yindaha ñaha xii ñáiyu, ¿te náa ñá díú díhna-gá cada cuendá-dé te núu ndacu-dé ndíhi úxi míl cue sandàtú-dé nàa-güedé, ndíhi ócó míl cue sandàtú ingá tucu tée yindaha ñaha xii ñáiyu cùu úhú iní tñahá ndíhi-dé-án? <sup>32</sup> Àdi te núu xito-dé sá vá ndacú<sup>n</sup>-dè ñá, te òré vátá cùyatni ñaha-gá tée cùu úhú iní tñahá ndíhi-dé-án, te tendaha-dé ì<sup>n</sup> tée quíhí<sup>n</sup>-dé quíhu-dé tñúhu ndàhú núú tée-án cuendá sá vá nàa-güedé. <sup>33</sup> Te duha cáhá<sup>n</sup>-í chi núu nchòhó vá cáda ndèe iní-ndó dàña-ndo nchaa sá ndécú ndíhi-ndo cuendá chitnahá ñáhá-ndó xii-í, te vá cùú-ndó cuè ñáiyu tñahá tñúhu ndíhi-í.

*Ñíi ní nduu víxi<sup>n</sup>*

(Mt. 5:13; Mr. 9:50)

<sup>34</sup> Te ñíi chi ío váha, dico núu na ndúu víxi<sup>n</sup>-xi, ¿te nása-gá cada-o nàndíhi-o te núu duca<sup>n</sup>-í? <sup>35</sup> Chi ñá túú-gá nàndíhi-xi ní sá dácá ñuhu, te ní sá dácá sahá<sup>n</sup>, chi cuendá-ná dāngoyo-o. Te nchaa nchòhó ñáiyu ní xindedóho tñúhu ní cáhá<sup>n</sup>-í-a xini ñuhu-xi ío váha cuáha-ndo cuendá —càchí-gá xáha<sup>n</sup>-gá xii-yu.

## 15

*Cuendá ì<sup>n</sup> mbéé quití ní xita*

(Mt. 18:10-14)

<sup>1</sup> Te cue tée cuíhna iní-xi quide cobrá ñáhá xii ñáiyu cuendá impuèstú ndíhi cue dava-gá ñáiyu ndècu ichi cuéhé ichi duha ní quexió<sup>n</sup>-yu núu ndécú Jèsús cuendá cund-edóho-yu tñúhu cáhá<sup>n</sup>-gá. <sup>2</sup> Te ní ngüita cue tée cùu fariséú, ndíhi cue tée dàcuaha ñaha xii ñáiyu nchaa tñúhu ní chídó tñuní ndíi Moisés xicáhá<sup>n</sup> cuéhé-güedé cuendá-gá, te càchí-güedé:

—Tée-a quèhe<sup>n</sup> cuendá-dé ñáiyu ndècu ichi cuéhé ichi duha, te xèxi ndíhi ñaha-dé xii-yu —càchí-güedé xitñaha-güedé.

<sup>3</sup> Te Jèsús ní cani-gá ì<sup>n</sup> cuendú nàcuáa tecú tñuní-güedé tñúhu-gá, te xáha<sup>n</sup>-gá xii-güedé:

4 —H<sup>n</sup> tée ndècu ì<sup>n</sup> ciendú mběé-dě, te ní xíta ì<sup>n</sup>-di, te nchòhó sa cùtnuní ìní-ndó nàcuáa cada téé-án, chi dándóo-dé cùmídíco sáhú<sup>n</sup> cùmí-di ì<sup>n</sup> yucu, te cùnúndúcu-dě quiti ní xíta xiá<sup>n</sup> ndéé ndéé naníhí-dě-di. 5 Te òré ní naníhí-dě-di te ní dátácá-dě-di chíó-dě ní docó-dě-di sá cùdí<sup>n</sup> ìní-dé. 6 Te òré ní nasáá-dé vehe-dé, te ní dátácá-dé nchaa cue téé càhá<sup>n</sup> ndíhí-dé, ndíhí nchaa ñáyiú ndècu yatni ndíhí-dé, te ní xáha<sup>n</sup>-dě: “Chí ná cùdí<sup>n</sup> ìní-ó vitna, chi ní naníhí-i mběé-i quiti ní xíta ni cùu”, cachí-dé xáha<sup>n</sup>-dě xii-yu. 7 Te yúhú cächí-i sá ìo-gá cùdí<sup>n</sup> ìní Yá Ndióxi ndíhí cue espíritu xínu cuèchi núú-gá núu ì<sup>n</sup> ñáyiú ndècu ichi cuehé ichi duha na ndixi cuèchi ìní-yu cuèndá nchaa sá ñà túú vâha quidé-yu ndècú-yu te tñí<sup>n</sup>-yu ichi-gá, dàcúúxi cùmídíco sáhú<sup>n</sup> cùmí ñáyiú sa ní tuha ichi-gá, chi ñà túú-gá xíní ñùhu-xi ndixi cuèchi ìní-yu chi sa ndècú-yu ichi-gá —cachí-gá xáha<sup>n</sup>-gá xii-güedé.

*Cuèndá dîhú<sup>n</sup> ní xíta*

8 Te ní caní Jèsús ingá cuèndú núú-güedé, te xáha<sup>n</sup>-gá:

—H<sup>n</sup> ñadíhí ndécú ndíhí-a<sup>n</sup> úxi dîhú<sup>n</sup> cuixí<sup>n</sup>, te ní dácúita-a<sup>n</sup> ì<sup>n</sup> te ní teñuhú<sup>n</sup>-a<sup>n</sup> iti, te ní ngúíta-a<sup>n</sup> nàtihu-a<sup>n</sup> vehe, te súní vâha vâha ní nanducu-a<sup>n</sup> ndéé ní naníhí-a<sup>n</sup>. 9 Te òré ní naníhí-a<sup>n</sup>, te ní dátácá-a<sup>n</sup> nchaa ñáyiú dîhí càhá<sup>n</sup> ndíhí-a<sup>n</sup> ndíhí nchaa ñáyiú ndècu yatni ndíhí-a<sup>n</sup>, te ní xáha<sup>n</sup>-a<sup>n</sup>: “Chí ná cùdí<sup>n</sup> ìní-ó vitna chi ní naníhí-i dîhú<sup>n</sup>-i sá ní xíta ni cùu”, cachí-a<sup>n</sup> xáha<sup>n</sup>-a<sup>n</sup> xii-yu. 10 Te yúhú cächí-i sá dúcá<sup>n</sup> ìo cùdí<sup>n</sup> ìní nchaa espíritu xínu cuèchi núú Yá Ndióxi, núu ì<sup>n</sup> ñáyiú ndècu ichi cuehé ichi duha na ndixi cuèchi ìní-yu cuèndá nchaa sá ñà túú vâha quidé-yu, te tñí<sup>n</sup>-yu ichi-gá —cachí-gá xáha<sup>n</sup>-gá xii-güedé.

*Cuèndá ì<sup>n</sup> téé ñà túú ní quide vâha*

11 Te ní caní tuú Jèsús ingá cuèndú núú-güedé, te xáha<sup>n</sup>-gá:

—H<sup>n</sup> tée ndècu úú déhe ducu<sup>n</sup>-dé, 12 te téé lîhli-gá ní xáha<sup>n</sup>-dě xii tâtá-dé: “Táu, taxi-n tâhú sá cùú cuèndá-í”, cächí-dé xáha<sup>n</sup>-dé. Te tâtá-dé-án ní sâñaha-dé ndí díí<sup>n</sup> núú-güedé sá cùú cuèndá-güedé. 13 Te núú sàcú-ni nduu, te déhe-dé téé lîhli-gá-án ní nadico-dé nchaa sá ní sâñaha tâtá-dé, te ní xica-dé cuáhá<sup>n</sup>-dé ì<sup>n</sup> ñúú xícá, te yàcá<sup>n</sup> ní tñí<sup>n</sup>-dè ì<sup>n</sup> ichi cuehé ichi duha, te ní ndíhí dîhú<sup>n</sup>-dè ní dándóñùhu-dé ndíhí cue téé càhá<sup>n</sup> ndíhí-dé, ndíhí nchaa ñáyiú dîhí xîndecu ichi díí ìní. 14 Te ní ndíhí ndoo dîhú<sup>n</sup>-dè ní dándóñùhu-dé, te núú sàcú-ni nduu ní sáá tnamá ñúú núú ndécú-dé-án, te ñà ñíhí-gá-dé sá caxí-dé, te xihí-dé docó. 15 Núú ní xica-dé cuáhá<sup>n</sup> ndúcú chîu<sup>n</sup>-dè núú ì<sup>n</sup> téé diu-ni ñúú xiá<sup>n</sup>, te téé-án ní sâha chîu<sup>n</sup> ñaha-dé ì<sup>n</sup> xichi núú ñùhú-dé coto-dé cùchí. 16 Te súní xihí-dé docó te cuíní-dé caxí-dé

nchaa sá sâha-yu cùchí-án ní cùu, dico ñà túú ní sâñahá-yu xii-dé. 17 Te uu<sup>n</sup> ní sani vâha ìní-dé, te ní cachí-dé: “Ío cuéhé cue téé xínu cuechi vehe tâtá-i te ío cuéhé sá xéxi-güedé ndécú, te yúhú duha ndòho-i docó iha! 18 Te ndacuñí-í te núhú-i vehe tâtá-i, te cùñaha-i xii-dé: Táu, ñà túú ní quide vâha-i núú Yá Ndióxi te ní ñà túú ní quide vâha-i núú-n, 19 te ñà túú-gá tâu-i sá cùú-i déhe-n vitna, te cada ñaha-n-á-n xii-í dàtná ì<sup>n</sup> téé xínu cuechi núú-n”, duha ní sani ìní-dé cùñaha-dé xii tâtá-dé. 20 Te sáta dúcá<sup>n</sup> ní sani ìní-dé, te ní natñí-dé ichi cuánuhú-dé vehe tâtá-dé, te xica-gá cuánuhú-dé ní xíní ñáhá tâtá-dé xii-dé te ní cundàhú ìní ñáhá-dé. Te xínu tâtá-dé-án ní sáhá<sup>n</sup> nùtnahá ñáhá-dé, te ní numi ñaha-dé, te ío vâha ní càhá<sup>n</sup> ndíhí ñaha-dé. 21 Te ní xáha<sup>n</sup> déhe-dé-án xii-dé: “Táu, ñà túú ní quide vâha-i núú Yá Ndióxi te ní ñà túú ní quide vâha-i núú-n, te ñà túú-gá tâu-i sá cùú-i déhe-n vitna”, cachí-dé xáha<sup>n</sup>-dé.

22 Dico tâtá-dé-án ní xáha<sup>n</sup>-dè xii cue téé xínu cuechi núú-dé: “Chí quèñùhu ndíhí-ni dóó vâha-gá cuáha-ndo déhe-í-a na cuñnu-dé, ndíhí ì<sup>n</sup> dehé ná quíhí díquí ndáhá-dé, ndíhí chàú vâha na quíhí-dé. 23 Te quíhí<sup>n</sup> ñguehe<sup>n</sup>-ndo ì<sup>n</sup> ndicutu numa quiti caváha-gá, te cahni-ndo-di, te na càda-o vico, te na caxi-o-di. 24 Chi déhe-í-a ní sani ìní-í sá ní xihí-dé ní cùu, te ñáhá chi ndècu vívú-dé, te ní sani tuú ìní-í sá ní xíta-dé ní cùu te ní nasáá méé-dé”, cächí-dé xáha<sup>n</sup>-dè xii cue téé xínu cuechi núú-dé-án. Te ní ngúita-güedé ní quide-güedé vico.

25 Te déhe-dé téé sàcuéhé-gá cuáhá<sup>n</sup>-dé yucu, te òré cuándixi-dé tá ndúu yatni-dé vehe, te ní tecú dóho-dé ío yáá cùú vico. 26 Te ní cana-dé ì<sup>n</sup> téé xínu cuechi, te ní xícá<sup>n</sup> tñúhú-dé núú-dé ná cuèndá duca<sup>n</sup> ío yáá. 27 Te téé xínu cuechi-án ní xáha<sup>n</sup>-dè: “Ñaní-n tée cuáhá<sup>n</sup> ní cùu ní nasáá-dé, te tâtá-n ní táuchíu<sup>n</sup>-dè ní xihí ì<sup>n</sup> ndicutu nùma quiti caváha-gá cuèndá sá ní nasáá vâha-dé”, cächí-dé xáha<sup>n</sup>-dè.

28 Dico ñaní-dé téé sàcuéhé-án ní cudé<sup>n</sup>-dè, te ní cachí-dé sá vâ ndíhu-dé vehe cundecu-dé vico-án ní cùu, dico ní quee tâtá-güedé ní càhá<sup>n</sup> ndáhú-dé núú-dé cuèndá ndíhu-dé. 29 Te ní xáha<sup>n</sup>-dè xii tâtá-dé: “Táu, cundedóho vâha saú-n tñúhu na càhá<sup>n</sup>-í-a, yúhú ío cuéhé cuíá ní cuu xínu cuechi-í núú-n, te ní ì<sup>n</sup> xito ñà túú quide sáá ìní-í núú-n, te ní ì<sup>n</sup> chivá lîhli ñà túú tàxi-n-di caxi díí ìní-í ndíhí cue téé càhá<sup>n</sup> ndíhí-í. 30 Te vitna ní nasáá déhe-n téé ní sáhá<sup>n</sup> ní dándóñùhu dîhú<sup>n</sup>-n ndíhí nchaa ñáyiú xîndecu ichi díí ìní. Te ní sañni-n ì<sup>n</sup> ndicutu numa quiti caváha-gá sá cuèndá-dé”, cächí-dé xáha<sup>n</sup>-dè xii tâtá-dé.

31 Te ní xáha<sup>n</sup> tǎtá-dě xii-dé: “Yòhó déhe-í duca<sup>n</sup>-ni ndècu ndìhi ñaha-n xii-í, te nchaa sá ndécú ndìhi-í cúú-xí cuèndá-n. 32 Te vitna dacuítí tǎu-xi sá cádá-ó víco, te cudíí iní-ó, chi ñaní-n-án nǐ quide-í cuèndá sá nǐ xhí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, cǎchí-dé xáha<sup>n</sup>-dě xii déhe-dé tée sàcuéhé-gǎ-án —duha cuáhá<sup>n</sup> cuèndú ní caní Jèsús núú-güedě.

## 16

*Nàcuáa ní quide ñ<sup>n</sup> tée tàxi tñuní ñáhá xii cue tée xínu cuechi*

<sup>1</sup> Te Jèsús xáha<sup>n</sup>-gǎ xii cue tée xica cuu ndìhi-gǎ:

—Ní xíndecu ñ<sup>n</sup> tée cuica, te duca<sup>n</sup> nǐ xíndecu ñ<sup>n</sup> tée ní taxi tñuní ñáhá xii cue tée ní xínu cuechi núú-dě. Te tée-án nǐ xini ñáhá ñáyiú dùhu-dé díhú<sup>n</sup> tée cùu patróó<sup>n</sup>-dě, te cuáhá<sup>n</sup>-dé dándòñuhu-dé, te ní xáhá<sup>n</sup>-yu xii tée cùu patróó<sup>n</sup>-dě sá dúcá<sup>n</sup> quide-dé. <sup>2</sup> Te tée cùu patróó<sup>n</sup>-dě-án nǐ cana ñaha-dě xii-dé, te ní xáha<sup>n</sup>-dě: “¿Ná cuèndá duha cǎhá<sup>n</sup> ñáyiú cuèndá-n? Yáchí chi na tàxi cuèndá-n nchaa chiú<sup>n</sup> nǐ quide-n, chi vitna te vá táxi tñuní-gǎ-n cué tée xínu cuechi núú-í”, cǎchí-dé xáha<sup>n</sup>-dě. <sup>3</sup> Te tée tàxi tñuní ñáhá xii cue tée xínu cuechi-án nǐ sani iní-dé: “¿Te nása cada-í vitna na quèhndé patróó<sup>n</sup>-í chiú<sup>n</sup>-í? Chi ñá cùndèe-gǎ-í cada-í chiú<sup>n</sup> vée, te cùcaha<sup>n</sup> núú-í cǎcá<sup>n</sup> ndáhú-í. <sup>4</sup> Dico duha cada-í cuèndá quehe<sup>n</sup> cuèndá ñáhá ñáyiú vehé-yu òré ná quèhndé duu<sup>n</sup>-ná patróó<sup>n</sup>-í chiú<sup>n</sup>-í”, duha ní sani iní-dé. <sup>5</sup> Te sátá dúcá<sup>n</sup> te ní cana-dé ñ<sup>n</sup> ñ<sup>n</sup> cue tée tǎu núú patróó<sup>n</sup>-güedě. Te tée díhna ní xicá<sup>n</sup> tñuhú-dě núú-dě, te xáha<sup>n</sup>-dě: “¿Ndèé dau tǎu-n núú patróó<sup>n</sup>-í?”, cǎchí-dé xáha<sup>n</sup>-dě. <sup>6</sup> Te tée-án nǐ xáha<sup>n</sup>-dě: “Tǎu-í ñ<sup>n</sup> cièndú bàrril acití”, cǎchí-dé xáha<sup>n</sup>-dě. Te tée tàxi tñuní ñáhá xii cue tée xínu cuechi-án nǐ xáha<sup>n</sup>-dě: “Iha náu recíu-n-á, te ndadúha ingá sá ùdico úxí taxi-n”, cǎchí-dé xáha<sup>n</sup>-dě. <sup>7</sup> Te dátñuní ní xicá<sup>n</sup> tñuhú tucu-dé núú ingá-dé, te xáha<sup>n</sup>-dě: “Te yòhó, ¿ndèé dau tǎu-n-í?”, cǎchí-dé xáha<sup>n</sup>-dě. Te tée tǎu-án nǐ xáha<sup>n</sup>-dě: “Ñ<sup>n</sup> cièndú ngohnchi triú tǎu-í”, cǎchí-dé xáha<sup>n</sup>-dě. Te tée tàxi tñuní ñáhá xii cue tée xínu cuechi-án nǐ xáha<sup>n</sup>-dě: “Iha náu recíu-n-á, te cadúha ingá sá cùmídico-nǎ taxi-n”, cǎchí-dé xáha<sup>n</sup>-dě. <sup>8</sup> Te tée cùu patróó<sup>n</sup>-án nǐ cǎchí-dé sá ío váha ñuhu díquí tée dùhu-án nàcuáa cada-dé cundecu váha-dé. Te nchaa ñáyiú xíndecu ichi cuèhé ichi duha, ío-gǎ váha ñuhu díquí-yu nàcuáa cada-yu cundecu váha-yu ndìhi nchaa ñáyiú cùndihí-yu dàcúxí ñáyiú ndècu ichi Yá Ndióxi.

<sup>9</sup> Te yúhú cǎchí-í sá cádá-ndó sá váha ndìhi nchaa sá ndécú ndìhi-ndo ní cuáha ñuyúú

yíca cuèchi-a, te duca<sup>n</sup> te coo cue tée ío váha tnahá tñuhu ndìhi-ndo, te òré ná ndìhi nchaa sá ío ñuyúú-a, te Yá Ndióxi quehe<sup>n</sup> cuèndá ñáhá-gǎ xii-ndo, te cundecu-ndo ndìhi-gǎ ní caa ní quíhí<sup>n</sup>.

<sup>10</sup> Te núu ñ<sup>n</sup> tée quide ndáá cuéi ñ<sup>n</sup> chiú<sup>n</sup> líhli na cáda-dé, te díu-ni duca<sup>n</sup> quide ndáá-dé cuéi ñ<sup>n</sup> chiú<sup>n</sup> cahnu na cada-dé. Dico tée ñá túú quide ndáá, chi cuéi chiú<sup>n</sup> líhli ádi chiú<sup>n</sup> cahnu na cada-dé dico ñ<sup>n</sup>-ni quide-dé. <sup>11</sup> Te núu nchòhó vá cádá-ndó sá váha ndìhi nchaa sá ní cuáha ñuyúú yíca cuèchi-a ña, te Yá Ndióxi vá táxi-gǎ sá váha ndècu ndìhi-gǎ xii-ndo. <sup>12</sup> Te núu vá cádá ndáá-ndó còto-ndo nchaa sá táxi núu tnahá ñáyiú-ndo, te vá yòo taxi sá núú tǎhú-ndó.

<sup>13</sup> Te ní ñ<sup>n</sup> tée xínu cuechi vá ndácú-dě cunu cuechi-dě núú úú patróó<sup>n</sup>, chi tée-án cuu váha iní-dé núú ñ<sup>n</sup> patróó<sup>n</sup>-dě te tñi-dé nchaa tñuhu cǎhá<sup>n</sup> patróó<sup>n</sup> tée cùu váha iní-dé núú-xi-án. Te núu ingá tucu patróó<sup>n</sup>-dě vá cúú váha iní-dé, te ní vá tñi-dě tñuhu cǎhá<sup>n</sup> patróó<sup>n</sup>-dě-án. Te duca<sup>n</sup> sǎtnahá-xi cùu nchòhó chi vá ndácú-ndó cùnu cuechi-ndo núú Yá Ndióxi te cuhu<sup>n</sup> iní-ndó nchaa sá ío ñuyúú-a —cǎchí-gǎ xáha<sup>n</sup>-gǎ xii-güedě.

<sup>14</sup> Te nchaa cue tée cùu fariséu ío ñuhu iní-güedé nchaa sá ío ñuyúú-a, te xíndedóho-güedé nchaa tñuhu cǎhá<sup>n</sup> Jèsús, te ní cǎhá<sup>n</sup> yíchí-güedé cuèndá-gǎ. <sup>15</sup> Te Jèsús ní xáha<sup>n</sup>-gǎ xii-güedé:

—Nchòhó cúú-ndó cué tée ío váha cǎhá<sup>n</sup> núú ñáyiú cuèndá-nǐ sá cuíní-ndó cǎhá<sup>n</sup> váha-yu cuèndá-ndó, dico Yá Ndióxi xini ndáá-gǎ nàcuáa cǎa iní-ndó ñ<sup>n</sup> ñ<sup>n</sup>-ndo, te nchaa sá cǎchí cue ñáyiú ñuyúú-a sá ío nándíhi, Yá Ndióxi dáquèe tǎhú-gǎ.

*Cuèndá nchaa tñuhu ní chídó tñuní ndíi Moisés*

<sup>16</sup> Te nchaa tñuhu ní chídó tñuní ndíi Moisés cùnúu-xi ní cuu, ndìhi nchaa tñuhu ní chídó tñuní cue tée ní xóo cǎhá<sup>n</sup> tñuhu Yá Ndióxi ndéé sanaha. Dico cùtnàhá ní ngúíta té Juáá tée ní xóo dacuàndute ñaha xii ñáyiú ní cǎhá<sup>n</sup>-dé tñuhu-í, ndéé dàvá-án ñá túú-gǎ ní cùnuu nchaa tñuhu ní chídó tñuní ndíi Moisés ndìhi nchaa tñuhu ní chídó tñuní cue tée ní xóo cǎhá<sup>n</sup> tñuhu Yá Ndióxi ndéé sanaha. Te díu-ni ndéé dàvá-án ní que-saha ta tècú tñuní ñáyiú nàcuáa ndìhu ndaha ñaha Yá Ndióxi xii-yu, te vai ñáyiú ío sàni iní-yu vitna nàcuáa cada-yu ndìhu ndaha ñaha Yá Ndióxi xii-yu. <sup>17</sup> Te nchaa tñuhu ní chídó tñuní ndíi Moisés ío ndáá cǎhá<sup>n</sup>-xi, te ndìhi-gǎ naa andíu ndìhi ñuyúú dàcúxí sá ndíhí ñ<sup>n</sup> ñ<sup>n</sup> tñuhu-án cada-xi nàcuáa cǎhá<sup>n</sup>-xi.

*Jèsús cǎhá<sup>n</sup>-gǎ cuèndá ñáyiú dàña tnahá (Mt. 19:1-12; Mr. 10:1-12)*

<sup>18</sup> Te núu ìn tée na dàña tnaha-dé, ndihi ñadihi-dé, te tnándaha tucu-dé ndihi ingá-yu, te nehé víhí quide-dé te núu duca<sup>n</sup> na càda-dé, te tée na tnándaha ndihi ñaha ní dàñá yí-xi, te ñu-ni duca<sup>n</sup> ñà túu cùu-xi sá vaha te núu duca<sup>n</sup> na càda-yu —càchí-gá xáha<sup>n</sup>-gá xii-güedé.

*Cuendá ìn tée nàni Lázaru ndihi cuendá ìn tée cuica*

<sup>19</sup> Te xáha<sup>n</sup> tucu-gá xii-güedé:

—Ní xindecu ìn tée cuica, te ní xóo cuihnu-dé mee-ni dóó vaha dóó víi càa, te nchaa nduu súúni vaha ní xóo cada-dé vico vehe-dé. <sup>20</sup> Te ní xindecu tucu ìn tée ndàhú ní xínani-dé Lázaru, te tée-án ní cuhú-dé ní xindeé-dé nitùhú-dé ndihyi, te ìn nduu ìn nduu ní xóo taxinucóo ñaha-güedé xii-dé yuyèhe tée cuica-án. <sup>21</sup> Te tée ndàhú-án ní xóo cuú-dé docó, te ní xóo cuini-dé caxi-dé nchaa sá ñà túu-gá ní xóo yáha caxi tée cuica-án, te ñà túu ní xóo níhi-dé. Te cuèi iná ní xóo quíhí<sup>n</sup>-dí ní xóo nayuu-di nchaa núu ndihyi ndeé-dé-án. <sup>22</sup> Te ní sáá ìn nduu te ní xihí tée ndàhú-án, te cue espíritú xínú cuèchi núu Yá Ndióxi ndécá ñaha-xi xii-dé cuándaa núu ndécú té Abrahám cundecu-dé. Te ní sáá nduu ní xihí tée cuica-án tnàhá-dé, te ní chindúxi ñaha-güedé xii-dé. <sup>23</sup> Te ní sáá-dé núu xindecu nchaa ñayiu ní xihí ñà túu ní quide ndáá núu Yá Ndióxi te xián ío ndòho-dé ndécú-dé, te ní ndonehe núu-dé te xica ní xini-dé té Abrahám ndihi té Lázaru-án xindecu-güedé. <sup>24</sup> Te níhi ní cáhá<sup>n</sup>-dé, te xáha<sup>n</sup>-dé: “Yòhó tátá Abrahám, cundàhú iní ñàhá xii-í, te cùñaha xii té Lázaru ná dandaxi<sup>n</sup>-dé díquí ndàhá-dé, te na quixi-dé dandaxi<sup>n</sup>-dé yàa-í, chí ío ndòho-í ñùhù-í núu ñùhù núu càyú-a”, càchí-dé xáha<sup>n</sup>-dé xii té Abrahám. <sup>25</sup> Dico té Abrahám ní xáha<sup>n</sup>-dé: “Ndàhú yòhó ñani tnàhá-í, dandàcu iní sá ío vaha ní xindecu-n ñùyúu, te té Lázaru ío ndàhú ní ndoho-dé ní xindecu-dé. Te vitna ní nucundecu vaha-dé iha, te yòhó ndòhó-n vitna. <sup>26</sup> Te ñà díú-ní sá xián tucu, chí cuádava ndècu ìn déhvá cùnú ñùhù nèhu-xi núu ndécú-ó, te cuèi nchaa ñayiu xindecu iha na càchí iní-yu quixi-yu núu ndécú-ndó dico vá ndácü-yu, te ní nchòhó vá ndácü-ndó quixi-ndo núu ndécú-ndí”, càchí-dé xáha<sup>n</sup>-dé. <sup>27</sup> Te ní xáha<sup>n</sup> tée cuica-án: “Te núu duca<sup>n</sup> te càhá<sup>n</sup> ndàhú-í núu yòhó tátá Abrahám vitna sá téndàha-n té Lázaru ná quíhí<sup>n</sup>-dé vehe tātā-í, <sup>28</sup> chí ndècu úhù<sup>n</sup>-gá ñani-í, te na cùñaha-dé xii-güedé sá vá càdá-güedé dàtná ní quide-í cuendá sá vá quixi-güedé tnàhá-güedé núu ndécú-í ndòhò-í-a”, càchí-dé xáha<sup>n</sup>-dé. <sup>29</sup> Te té Abrahám ní xáha<sup>n</sup>-dé: “Mee-güedé ndécú ndihi-güedé nchaa tnúhu ní chídó tnùní ndí Moisés, ndihi nchaa tnúhu ní chídó tnùní

cue tée ní xóo cáhá<sup>n</sup> tnúhu Yá Ndióxi ndéé sanaha, te nchaa tnúhu-án ná tñii-güedé nàcuáa càhá<sup>n</sup>-xi”, càchí-dé xáha<sup>n</sup>-dé xii-dé.

<sup>30</sup> Te ní xáha<sup>n</sup> tucu tée cuica-án: “Tátá Abrahám, dico vá càdá cuendá-güedé nchaa tnúhu-án, dico núu ìn ñayiu ñà túu-gá ndécú ñùyúu ìn ñayiu ndècu ndihi-n quíhí<sup>n</sup>-yu cáhá<sup>n</sup> ndihi ñàhá-yu xii-güedé nàcuáa nduu tnúhu vaha, te ndixi cuèchi iní-güedé nchaa sá ñà túu quide vaha-güedé ndécú-güedé, te cada vaha-güedé”, càchí-dé xáha<sup>n</sup>-dé xii-dé.

<sup>31</sup> Dico té Abrahám ní xáha<sup>n</sup>-dé: “Te núu ñà túu cuini-güedé tñii-güedé tnúhu ní cáhá<sup>n</sup> ndí Moisés, ndihi tnúhu ní cáhá<sup>n</sup> cue tée ní xóo cáhá<sup>n</sup> tnúhu Yá Ndióxi ndéé sanaha ña, te ñu-ni duca<sup>n</sup> càda-güedé cuèi ìn ñayiu ní xihí ná ndótó-yu cùñàhá-yu nàcuáa nduu tnúhu vaha, chí vá quíndáa iní-güedé”, càchí té Abrahám xáha<sup>n</sup>-dé xii tée cuica-án —càchí Jèsús xáha<sup>n</sup>-gá xii cue tée cùu fariséu.

## 17

*Quihi iní-ó vā cündecu-o ichi cuehé ichi duha*

(Mt. 18:6-7, 21-22; Mr. 9:42)

<sup>1</sup> Te Jèsús ní xáha<sup>n</sup>-gá xii cue tée xica cuu ndihi-gá:

—Dacutíí sá cóo cuè tée dacàhá<sup>n</sup>-güedé ñayiu cadá-yu nándi sá cuèhé sá dúhá, j dico ndàhú ní cuu cue tée duca<sup>n</sup> na dàcàhá<sup>n</sup> ñàhá xii-yu cadá-yu nándi sá cuèhé sá dúhá! <sup>2</sup> Chí vaha-gá sá núu na dàcutu ndeé ñayiu ìn yúu yódó dúcú<sup>n</sup>-güedé té dàqueé ñàhá-yu xii-güedé xití ndute làmár, te ñà díú sá cündecu-güedé dacàhá<sup>n</sup>-güedé ñayiu cadá-yu nándi sá cuèhé sá dúhá, cuèi ñayiu ndàhú iní-xi dandàhú-güedé. <sup>3</sup> Te ío quihi iní-ndó cündecu-ndo.

“Te núu ìn ñani tnàhá-ndó quide-dé ìn sá ñà túu tau-dé cada-dé sá cuú-xi-ndó té cáhá<sup>n</sup>-ndó dòho-dé, te núu ní ndixi cuèchi iní-dé sá ñà túu ní quide vaha-dé, te cada càhnu iní-ndó sá ní quide-dé. <sup>4</sup> Te cuèi úsá xito na càda-dé nándi sá ñà túu tau-dé cada-dé sá cuú-xi-ndó ìn nduu, te núu na quixi-dé úsá xito núu-ndó, te càchí-dé sá vá dúcá<sup>n</sup>-gá cada-dé, te xini ñuhu-xi cada cahnu iní-ndó-dé —càchí-gá xáha<sup>n</sup>-gá xii-güedé.

*Ñayiu sàndáa ndisa iní-xi*

<sup>5</sup> Te ní xáha<sup>n</sup> cuè tée xica cuu ndihi Jèsús xii-gá:

—Chindee ñaha xii-ndí cuendá duca<sup>n</sup> te quíndáa-gá iní-ndí sá Yá Ndióxi ndácú-gá quide-gá nchaa sá vaha —càchí-güedé xáha<sup>n</sup>-güedé xii-gá.

<sup>6</sup> Te ní xáha<sup>n</sup> Jèsús:

—Te núu nchòhó quíndáa ndisa iní-ndó súúni cuèdicó luha líí dàtná cuini-ndó càa ìn ndíquí<sup>n</sup> yutnu nàni mostázá, te duca<sup>n</sup> te cuu cùñaha-ndo xii ìn yutnu: “Quene-n

ilha te quihí<sup>n</sup>-n cuihnu-n xití lámár”, duha cūñaha-ndo. Te duca<sup>n</sup> càda-xi te núu na quíndáá ndisa iní ñáhá-ndó xii-í —càchí-gá xáha<sup>n</sup>-gá xii-güedé.

*Nàcuáa tàú ì<sup>n</sup> tée xinu cuechi cada-dé*

<sup>7</sup> Te xáha<sup>n</sup> tucu-gá xii-güedé:

—Te núu ì<sup>n</sup> nchòhó ndécú ì<sup>n</sup> tée xinu cuechi núu-ndó, te cuáhá<sup>n</sup>-dé yucu cuángada chiú<sup>n</sup>-dé, àdi cuáhá<sup>n</sup>-dé yucu coto-dé quiti, te òré ní nasáá-dé vehe sá ní sáhá<sup>n</sup>-dé yucu, te vá cūñaha nchòhó cue tée cùu patróo<sup>n</sup>-dè xii-dé: “Yáchí nehé caxi-n dítá”, vá dúhá cūñaha-ndo. <sup>8</sup> Chi nchòhó cue tée cùu patróo<sup>n</sup>-dè cūñaha-ndo xii-dé: “Cundihí iní cada túha sá cùdini-í, te díhna-gá-í caxi-í dítá te dàtnùni caxi-n”, duha cūñaha nchòhó cue tée cùu patróo<sup>n</sup> xii-dé. <sup>9</sup> Te òré ná ndihí chiú<sup>n</sup> ní táhú nchòhó cue tée cùu patróo<sup>n</sup> cada tée xinu cuechi núu-ndó, te ñá túú tàú-ndó ndacá<sup>n</sup> táhú-ndó núú tée xinu cuechi núu-ndó. <sup>10</sup> Te duha càhá<sup>n</sup>-í chi núu òré ná ndihí nchaa chiú<sup>n</sup> ní táhú Yá Ndióxi cada-ndo, te cachí-ndó: “Nchúhú cùú-ndí cue tée xinu cuechi núú Yá Ndióxi, dico ñá túú tàú-gá ndacá<sup>n</sup> táhú-gá núú-ndí, chi mee-ni chiú<sup>n</sup> ní táhú-gá ní quide-ndí”, duha cachí-ndó —càchí-gá xáha<sup>n</sup>-gá xii-güedé.

*Jesús quidé tātma-gá úxi cue tée tnàhá cuéhé sá dátèhyú nihnu-xi yiqui cūñú ñáyiu*

<sup>11</sup> Te ñuhu Jesús ichi cuáhá<sup>n</sup>-gá ñuú Jerusálén, te ní yáha-gá núú ràyá distritú Sámariá ndihí distritú Galiléa. <sup>12</sup> Te ta cūyatni-gá ì<sup>n</sup> ñuú líhli cuáhá<sup>n</sup>, te ní sátnahá ñáhá úxi tnàhá cue tée cùhú xii-gá, te tnàhá-güedé cuéhé sá dátèhyú nihnu-xi yiqui cūñú-ó dico xica lùha ní ngúnu tñi-güedé, <sup>13</sup> te níhi ní cáhá<sup>n</sup>-güedé, te xáha<sup>n</sup>-güedé xii Jesús:

—jMèstrú, cundháá iní ñáhá xii-ndí! —càchí-güedé xáha<sup>n</sup>-güedé xii-gá.

<sup>14</sup> Te òré ní xiní ñáhá Jesús xii-güedé, te ní xáha<sup>n</sup>-gá:

—Chí cuáhá<sup>n</sup> núú dütú ná cùndehe ñaha-dé xii-ndo —càchí-gá xáha<sup>n</sup>-gá xii-güedé.

Te ní xica-güedé cuáhá<sup>n</sup>-güedé, te ichi-ni ñuhu-güedé cuáhá<sup>n</sup>-güedé ní ndúha-güedé cuéhé tnàhá-güedé. <sup>15</sup> Te nchaa-güedé ní cutnùni iní-güedé sá ní ndúha-güedé, dico ì<sup>n</sup>-ni-dé ní nacuico-dé, te ní ngúita-dé níhi ní cáhá<sup>n</sup>-dé, te ní cachí-dé sá io càhnu cuu Yá Ndióxi. <sup>16</sup> Te ní ngúíñi xití-dé núú Jesús, te ní nuu núú-dé ndaa núú ñuhú ndacá<sup>n</sup> táhú-dé núú-gá. Te tée-á<sup>n</sup> cùú-dé tée distritú Sámariá. <sup>17</sup> Te Jesús ní cachí-gá:

—Úxi tnàhá-güedé ní ndúha cuéhé tnàhá-güedé. ¿Te ndéé ndécú dàva-gá-güedé-í?

<sup>18</sup> ¿Te náa ì<sup>n</sup>di-ni tée ingá ñuú-a ní nacuico-dé ndacá<sup>n</sup> táhú-dé núú Yá Ndióxi, te càchí-dé sá io càhnu cuu-gá ñá? —càchí-gá.

<sup>19</sup> Te ní xáha<sup>n</sup>-gá xii tée-á<sup>n</sup>:

—Ndacuíñi te núhú-n, chi sa ní ndúha-n cuéhé tnàhá-n, chi ní sándáá iní-n Yá Ndióxi —càchí-gá xáha<sup>n</sup>-gá xii-dé.

*Nàcuáa yíndaha ñaha Yá Ndióxi*

(Mt. 24:23-28, 36-41)

<sup>20</sup> Te cue tée cùu fariséú ní xicá<sup>n</sup> tnúhú-güedé núú Jesús núu ná ama ngúita Yá Ndióxi ndihu ndaha-gá ñáyiu. Te ní xáha<sup>n</sup>-gá:

—Ñá túú ná cada-xi ñuyú quini-ndó cuendá cutnùni iní-ndó sá ndihu ndaha ñaha Yá Ndióxi xii-ndo. <sup>21</sup> Te ní vá yóo cachí: “Iha ndécú-gá táxi tnùni-gá, àdi yacá<sup>n</sup> ndécú-gá táxi tnùni-gá”, chi tnuú-ndó sá ndécú-gá ndihí nchaa ñáyiu yíndaha-gá —càchí-gá xáha<sup>n</sup>-gá xii-güedé.

<sup>22</sup> Te ní xáha<sup>n</sup>-gá xii cue tée xica cuu ndihí-gá:

—Te nchòhó chí sáá nduu, te cachí iní-ndó sá sùúni cuèdicó ì<sup>n</sup> nduu quini ñáhá-ndó xii yúhú Tée cùu ñaní tnàhá-ndó nchaa-ndo, dico vá quini ñáhá-gá-ndó xii-í. <sup>23</sup> Te coo ñáyiu cūñáhá-yu xii-ndo: “Iha ndécú-gá, á<sup>n</sup> yacá<sup>n</sup> ndécú-gá”, quesàhá-yu cūñáhá-yu xii-ndo. Dico vá quíndáá iní-ndó quihí<sup>n</sup>-ndó ndihí-yu núú càchí-yu, te ní vá cáni iní-ndó quihí<sup>n</sup> mée-ndó. <sup>24</sup> Chi dàtná cuini-ndó quide-xi òré sáá nduté àndiu, chi uu<sup>n</sup>ni dáyehé-xi nihí ñuyú, duca<sup>n</sup> càda-xi nduu na quixi tucu yúhú Tée cùu ñaní tnàhá-ndó nchaa-ndo, te dàvá-á<sup>n</sup> quini ñáhá nchaa-ndi túhú ñáyiu xii-í. <sup>25</sup> Dico díhna-gá ndoho vihi-í, te daquèe tíhú ñáhá ñáyiu ñuyú-a xii-í. <sup>26</sup> Te cadá-yu dàtná ní quide ñáyiu ní xíndecu cùtnàhá ní xíndecu té Nòé, te diu-ni duca<sup>n</sup> sátnahá-xi cada nchaa ñáyiu ndécu vitna ndéé sáá nduu quixi tucu yúhú Tée cùu ñaní tnàhá-ndó nchaa-ndo. <sup>27</sup> Chi caxi-ni-yu, coho-ni-yu, te caca cuu-ni cue tée xica ndáhú, te tnàndaha-ni-yu, chí duca<sup>n</sup> ní quide-yu dàvá-á<sup>n</sup> ndéé ní sáá nduu cuànguee té Nòé xití bàrcú, te ní ngúita-xi ní cuu<sup>n</sup> dáú ní ndaa ndute ñuyú, te nchaa-yu ní xihí ní cáhá-yu dàvá-á<sup>n</sup>. <sup>28</sup> Te diu-ni duca<sup>n</sup> ní quide tucu ñáyiu cùtnàhá ní xíndecu té Lót, chí xèxi-yu xihí-yu, te sáá-yu te nàdicó-yu, te xixitú-yu nándi sá xixitú-yu, te nchaa cue tée xidacáa-güedé vehe. <sup>29</sup> Te òré ní quee té Lót ñuú Sòdomá, te ní ngoyu ñuhú andiu, te dàcá yúú sùúni dicó ní nduu ñuhú-ná-xi, te ní xihí nchaandi túhú ñáyiu ñuú-á<sup>n</sup>. <sup>30</sup> Te diu-ni duca<sup>n</sup> sátnahá-xi cada ñáyiu na sáá nduu quixi tucu yúhú Tée cùu ñaní tnàhá-ndó nchaa-ndo ñuyú-a.

<sup>31</sup> Te núu ì<sup>n</sup> ñáyiu càndodó-yu díqui vèhé-yu nduu-á<sup>n</sup>, te ní vá ndihu-gá-yu quehén-yu ì<sup>n</sup> ndachiú<sup>n</sup>-yu canehé-yu quihí<sup>n</sup>, te ñáyiu cuáhá<sup>n</sup> yucu, te ní vá nùhú-gá-yu vèhé-yu. <sup>32</sup> Te chí dándacu iní nàcuáa ní yáha

ñadihí té Löt. <sup>33</sup> Te nchaa ñáyiú cuíní dàcácu nihnu mee-xi ñuyíú-a ña, te cuita nihnú-yu, te nchaa ñáyiú na cùú sá cuendá-í, te naníhí tãhú-yu.

<sup>34</sup> Te na càchí tnúhu tucu-í xii-ndo sã ndùu-án, te núu úú-yu cãa ñn núú xíto, te ñn-yu ndanchitá-yu ndaá-yu andiu, te ñn-yu quendóo. <sup>35</sup> Te núu úú ñáyiú ñihí nchícō-yu ñn-ni vehe, te ñn-yu ndanchitá-yu ndaá-yu andiu, te ñn-yu quendóo. <sup>36</sup> Te núu úú cue tée yihí-güedé yucu, te ñn-dé ndanchita-dé ndaa-dé andiu, te ñn-dé quendóo —càchí-gá xãha<sup>n</sup>-gã xii-güedé.

<sup>37</sup> Te sá dúcã<sup>n</sup> ñí cãhá<sup>n</sup>-gã núu ní xicã<sup>n</sup> tnúhú-güedé núu-gã, te xãha<sup>n</sup>-güedé xii-gã: —Métrú, ¿te ndéé duca<sup>n</sup> càda-xi-í? —cachí-güedé xãha<sup>n</sup>-güedé xii-gã.

Te ní xãha<sup>n</sup>-gã:  
—Te nchòhó xìní-ndó sã ncháá núu yúcu yiqui cuñú ní xihí, te yacã<sup>n</sup> tàcã cue ndixíí xéxí-güedé —cachí-gã xãha<sup>n</sup>-gã xii-güedé.

## 18

*Jèsús cãhá<sup>n</sup>-gã cuendá ñn juéxí ndihí cuendá ñn ñaha quèé*

<sup>1</sup> Te Jèsús ní cani-gã ñn cuendú núu-güedé cuendá sã vã ná tũhú iní-güedé cãhá<sup>n</sup> ndihí-güedé Yã Ndiöxí nchaa-ni òré. <sup>2</sup> Te xãha<sup>n</sup>-gã:

—Ñn ñuú ndécú ñn juéxí, te ni ña túú sãndáá iní-dé Yã Ndiöxí, te ni ñn tnúhu xãha<sup>n</sup> ñáyiú ñã túú cuíní-dé cada cuendá-dé. <sup>3</sup> Te ñuú-ni ñuú-án ndécú tucu ñn ñadihí ñaha quèé, te ní sãhá<sup>n</sup>-a<sup>n</sup> cãhá<sup>n</sup> ndãhú-a<sup>n</sup> núu juéxí-án cuendá cada ndáá-dé ñn cuéchi. <sup>4</sup> Te titní xito ní cuu sãhá<sup>n</sup>-a<sup>n</sup> cãhá<sup>n</sup> ndãhú-a<sup>n</sup> núu-dé te ñã túú cuíní-dé cada cuendá-dé tnúhu cãhá<sup>n</sup>-a<sup>n</sup> ni cùu, te ndéé núú ñã cùú-gã te ní sani iní-dé: “Te cuéi ñã túú sãndáá iní-í Yã Ndiöxí, te ni ñã túú quide cuendá-í nchaa tnúhu cãhá<sup>n</sup> ñáyiú cada-í, <sup>5</sup> dico na càda ndáá-í cuendá ñaha quèé-a ndihí ñáyiú cùu úhú iní tnãhá ndihí-a<sup>n</sup>, chi vã cùndèe-gã iní-í nuu núu quixi-a<sup>n</sup> dasátú iní ñãhá xii-í”, duha ní sani iní tée cùu juéxí-án —cãchí-gã xãha<sup>n</sup>-gã xii-güedé.

<sup>6</sup> Te ní xãha<sup>n</sup> tucu-gã xii-güedé:

—Cada cuendá-ndó ñacuáa ní sani iní juéxí tée cuihna iní-xi-án. <sup>7</sup> Te Yã Ndiöxí ío chindee-gã nchaa ñáyiú ní cãhá<sup>n</sup>-gã cundecu ndihí-gã, chi cuéi nduu cuéi niú cãhá<sup>n</sup> ndihí ñãhá-yu xii-gã, te vã cùyãa-gã nachinaa-gã nchaa sã quidé ñaha nchaa ñáyiú cùu úhú iní ñãhá xii-yu. <sup>8</sup> Te ío ndihí duca<sup>n</sup> càda-gã. Te òré ná quixi yúhú Tée cùu ñaní tnãhá-ndó nchaa-ndo, ¿te náa naníhí-gã-í ñáyiú sãndáá ndisa iní Yã Ndiöxí-án? —cãchí-gã xãha<sup>n</sup>-gã xii-güedé.

*Nãcuáa quide ñn tée cùu fariséú ndihí ñn tée cùu cobradó*

<sup>9</sup> Te Jèsús ní cãhá<sup>n</sup>-gã núu ñáyiú ñacuáa quide ñáyiú sãni iní sã ío quide ndáá te dàquee tũhú-yu tnãha ñáyiú-yu, te xãha<sup>n</sup>-gã xii-yu:

<sup>10</sup> —Úú cue tée cuáhã<sup>n</sup>-güedé veñũhu càhnu sã ío cùnuu cãhá<sup>n</sup> ndihí-güedé Yã Ndiöxí, te ñn-dé cùú-dé tée cùu fariséú, te ingã-dé cùú-dé tée cuihna iní-xi quide cobrá ñãhá xii ñáyiú cuendá impuèstú. <sup>11</sup> Te tée cùu fariséú-án nũtnĩ-dé cãhá<sup>n</sup> ndihí-dé Yã Ndiöxí, te xãha<sup>n</sup>-dè xii-gã: “Yohó Dútú Ndiöxí ndacã<sup>n</sup> tãhú-í núu-n, chi ñã túú quide-í dàtnã quidé dàva-gã-güedé, chi dùhu-güedé, cãhá<sup>n</sup> ndihí-güedé ñadihí te ñã díú ñadihí-güedé cùú-yu, te ñãndi-gã nchaa sã cuèhé sã dùhá quide-güedé, te ni ñã túú quide-í dàtnã quidé tée cuihna iní-xi quide cobrá ñãhá xii ñáyiú cuendá impuèstú ndécú ñha. <sup>12</sup> Chi yúhú ñã túú tnãhí ná xéxi-í úú nduu xití samãna cuendá sã cãhá<sup>n</sup> ndihí ñaha-í xii-n, te nchaa sã nihí-í te càhu-í úxí xichí, te ñn xichí tàxi-í xii-n”, càchí-dé xãha<sup>n</sup>-dè xii Yã Ndiöxí. <sup>13</sup> Dico tée cuihna iní-xi quide cobrá ñãhá xii ñáyiú cuendá impuèstú-án chi xica lùha nutnĩ-dé, te ni lùha ñã túú cùyã-dé ndonehe núu-dé andiu cuendá sã ndixí cuéchi iní-dé nchaa sã ñã túú vãha quide-dé, te ndèdí ndaha-dé pèchú-dé sã ndihí iní-dé, te xãha<sup>n</sup>-dè xii Yã Ndiöxí: “Yohó Dútú Ndiöxí cundãhú iní ñãhá xii-í, chi ío cuèhé sã ñã túú vãha quide-í núu-n!”, càchí-dé xãha<sup>n</sup>-dè xii Yã Ndiöxí. <sup>14</sup> Te na càchí tnúhu-í xii-ndo sã tée cuihna iní-xi quide cobrá ñãhá xii ñáyiú-án ní tedóho Yã Ndiöxí nchaa tnúhu ní cãhá<sup>n</sup>-dè, te ní quide càhnu iní-gã nchaa sã ñã túú vãha ní quide-dé, te cuánhú-dé vehe-dé. Te tée cùu fariséú-án ñã túú ní tedóho ñaha Yã Ndiöxí xii-dé. Chi nchaa ñáyiú na càda cahnu mee-xi ñuyíú-a te vã cùú-yu ñáyiú cùnuu, te nchaa ñáyiú ñã túú quide cahnu mee-xi, ñáyiú-án cunúú-yu —cãchí Jèsús xãha<sup>n</sup>-gã xii-yu.

*Jèsús quidé ñ-gã landú*

(Mt. 19:13-15; Mr. 10:13-16)

<sup>15</sup> Te ñn úú ñáyiú ndécã-yu landú lĩhli cuáhã<sup>n</sup> núú Jèsús chi cuíní-yu sã téndaha ñaha-gã xii-güexi, te òré ní xini cue tée xica cuu ndihí-gã sã ndécã-yu landú-án cuáhã<sup>n</sup> núu-gã, te ní ngúita-güedé ténãã ñãhá-güedé xii-yu, te xãha<sup>n</sup>-güedé sã vã dúcã<sup>n</sup> càdã-yu. <sup>16</sup> Dico Jèsús ní cana ñaha-gã xii-güedé, te ní xãha<sup>n</sup>-gã:

—Chí dàñá ná quixi nahi landú lĩhli-án núu-í-a, te vã càdí-ndó ichi-güexi, chi dàtnã cùú vãha iní cue landú lĩhli-án duca<sup>n</sup> cùu vãha iní cue ñáyiú yĩndaha ñaha Yã Ndiöxí. <sup>17</sup> Te ña càchí tnúhu ndáá-í xii-ndo sã núu vã quindáá iní ñãhá-ndó dàtnã quidé dàva landú lĩhli sãndáá iní ñãhá xii-í, te vã ndihú

ndaha ñaha Yá Ndiöxí xii-ndo, te vá ndúú táhú-ndó cundecu-ndo ndihi-gá ni caa ni quíhí<sup>n</sup> —cächí-gá xáha<sup>n</sup>-gá xii-güedé.

*Ín tée cuica cãhá<sup>n</sup> ndihi-dé Jèsús  
(Mt. 19:16-30; Mr. 10:17-31)*

18 Te ì<sup>n</sup> tée cùnunu ní xicá<sup>n</sup> tnúhú-dé núú Jèsús, te xáha<sup>n</sup>-dé xii-gá:

—Yòhó Mèstrú, cùu-n tée ío váha iní-xi, te cùníní-í núu vá cundèe iní-n cächí tnúhu-n ná cúú sã váha cada-í cuendá nduu táhú-í cundecu-í ndihi Yá Ndiöxí ni caa ni quíhí<sup>n</sup> —cächí-dé xáha<sup>n</sup>-dé xii-gá.

19 Te Jèsús ní xáha<sup>n</sup>-gá xii-dé:

—¿Te cùtnuní iní-n nácuáa ndùu tnúhu cãhá<sup>n</sup>-n sã yúhú váha iní-ã<sup>n</sup>? Chi ì<sup>n</sup>dií díí-ni Yá Ndiöxí váha iní-gá. 20 Te yòhó xìní-n nácuáa ní cachí Yá Ndiöxí cada ñáyiú, te duha ní cachí-gá: “Nchòhó cue tée vá cãhá<sup>n</sup> ndihi-ndo ñàdihí te núu ñá díú ñàdihí-ndó cùú-yu, te duca<sup>n</sup>-ni nchòhó cue ñáyiú ñáyiú tucu vá cãhá<sup>n</sup> ndihi-ndo tée te núu ñá díú yíi-ndo cuu-güedé, te vá cãhíní-ndó tnàha ñáyiú-ndo, te ni vá dúhú-ndó sã ndécú ndihí-yu, te ni vá dácacu-ndo cuéchi neñúú sã cúú-xi tnàha ñáyiú-ndo, te canehe-ndo sã yíñùhu núú tãtã-ndó ndihi núú ñaná-ndó”, duha ní cachí Yá Ndiöxí cada ñáyiú —cächí Jèsús xáha<sup>n</sup>-gá xii-dé.

21 Te tée-ã<sup>n</sup> ní xáha<sup>n</sup>-dé xii-gá:

—Nchaa xíã<sup>n</sup> ní ngúíta-í quidé-í ndéé cùtnáhã cúú lándú-í —cächí-dé xáha<sup>n</sup>-dé xii-gá.

22 Te Jèsús ní xáha<sup>n</sup>-gá xii-dé:

—Dico cùmání ingá núú sã cãdá-n, vitna te quíhí<sup>n</sup>-n te dico-n nchaa sã ndécú ndihi-n, te díhú<sup>n</sup>-n cuãha táhú-n cuè ñáyiú ndàhú, te duca<sup>n</sup> te nduu táhú-n cundecu váha-n núú ndécú Yá Ndiöxí táxi tnúní-gá, te na yãha duca<sup>n</sup> cada-n te quixi-n chitnahã ñáhã-n xii-í —cächí-gá xáha<sup>n</sup>-gá xii-dé.

23 Te sã dúcã<sup>n</sup> ní xáha<sup>n</sup> Jèsús xii-dé, te ío ní cundíyí-dé, chi ío cuica-dé. 24 Te sã ní xini ñáhã Jèsús xii-dé cundíyí-dé, núu ní cachí-gá:

—Ílo úhú quindáá iní ñáyiú cuica Yá Ndiöxí cuendá ndihu ndaha ñaha-gá xii-yu! 25 Te yáchí-gá yãha ì<sup>n</sup> caméyu yaú ì<sup>n</sup> yiquí tìcú dácúúxí sã quindáá iní ì<sup>n</sup> ñáyiú cuica Yá Ndiöxí cuendá ndihu ndaha ñaha-gá xii-yu —duha ní cachí-gá.

26 Te nchaa ñáyiú ní tecú dóho-xi tnúhu ní cãhá<sup>n</sup>-gá ní xáhã<sup>n</sup>-yu xii-gá:

—¿Te yoo naníhí táhú te núu duca<sup>n</sup> vãi<sup>n</sup>? —cächí-yu xáhã<sup>n</sup>-yu xii-gá.

27 Te Jèsús ní xáha<sup>n</sup>-gá xii-yu:

—Cue ñáyiú ñuyíú-a chi vá ndácú-yu ná cadá-yu nácuáa ndihu ndaha ñaha Yá Ndiöxí xii-yu, dico mee-gã chi ndacu-gá ndihu ndaha ñaha-gá xii-yu chi nchaa sã

vãha ndacu-gá quidé-gã —cächí-gá xáha<sup>n</sup>-gá xii-yu.

28 Te te Pèlú ní xáha<sup>n</sup>-dè xii-gá:

—Nchúhú ní dándóo-ndí nchaa sã ndécú ndihi-ndí, te ní tuha ñaha-ndí xii-n —cächí-dé xáha<sup>n</sup>-dè xii-gá.

29 Te ní xáha<sup>n</sup>-gá xii ñáyiú:

—Na cächí tnúhu ndáá-í xii-ndo sã ncháá ñáyiú na dándóo vehe-xi, àdi tátã-xi, ñaná-xi, ñaní-xi, cúha-xi, ñàdihí-xi, déhe-xi cuendá sã cuini-yu ndihu ndaha ñaha Yá Ndiöxí xii-yu, 30 te ío-gã cuèhé sã cuãñaha-gã xii-yu cundecu ndihí-yu, te ñá díú-ní xíã<sup>n</sup>, chi tnáhã nduu táhú-yu cundecu ndihi ñáhã-yu xii-í ni caa ni quíhí<sup>n</sup> ná sãá nduu —cächí-gá xáha<sup>n</sup>-gá xii-yu.

*Jèsús cãhá<sup>n</sup> tucu-gá sã cãhni ñaha-güedé xii-gá*

*(Mt. 20:17-19; Mr. 10:32-34)*

31 Te Jèsús ní taudí<sup>n</sup>-gá ndí ùxúú cue tée xica cuu ndihi-gá tnuú ñáyiú, te ní xáha<sup>n</sup>-gá xii-güedé:

—Vitna te quíhí<sup>n</sup>-ó ñùú Jerusalén, chi yacã<sup>n</sup> cada-xi nchaa nácuáa sa ní chidó tnúní cue tée ní xóo cãhá<sup>n</sup> tnúhu Yá Ndiöxí ndéé sanaha nácuáa yãha yúhú Tée cùu ñani tnáhã-ndó nchaa-ndo. 32 Chi cuãha cuendá ñáhã-güedé xii-í núú cuè tée ñá túú cùu cue tée isràèl, te cudíquí ndéé ñáhã-güedé xii-í, te cúcuèhé ñáhã-güedé, te tiú díí ñáhã-güedé xii-í. 33 Te caniha-güedé ndihi ñi, te dátñuní cãhni ñaha-güedé xii-í, dico nduu úní sã cúú-í te ndoto-í —cächí-gá xáha<sup>n</sup>-gá xii-güedé.

34 Dico ní ì<sup>n</sup> tnúhu ní cãhá<sup>n</sup>-gá ñá túú ní tècú tnúní-güedé, chi ío yidáhu tnúhu ní cãhá<sup>n</sup>-gá núu xíã<sup>n</sup> ní ì<sup>n</sup> ñá túú ní tècú tnúní-güedé.

*Jèsús quidé tãtna-gá núú ì<sup>n</sup> tée cuãá ñuú Jericó*

*(Mt. 20:29-34; Mr. 10:46-52)*

35 Te òré tá cùyatni Jèsús ñuú Jericó cuáhã<sup>n</sup>, te yuhu ichi cuáhã<sup>n</sup>-gã-ã<sup>n</sup> núcõo ì<sup>n</sup> tée cuãá xicã<sup>n</sup> ndàhú-dé. 36 Te òré ní tecú dóho-dé xicãhá<sup>n</sup> vãi ñáyiú xiyãha-yu, te ní xicã<sup>n</sup> tnúhú-dé núú ñáyiú ndécú ndihi-dé ná cuendá duca<sup>n</sup> vãi-yu yãha. 37 Te ní xáhã<sup>n</sup>-yu sã Jèsús tée ñuú Nazarét ñúhú-dé ichi. 38 Te níhi ní cãhá<sup>n</sup>-dè, te xáha<sup>n</sup>-dè xii-gá:

—Jèsús ñani tnáhã ndíi Dàvíí, cundáhú iní ñáhã xii-í! —cächí-dé xáha<sup>n</sup>-dè xii-gá.

39 Te ñáyiú xixódó núú núú Jèsús ní tenãá ñáhã-yu xii-dé, te xáhã<sup>n</sup>-yu sã ná cãdí-dé yuhu-dé dico uu<sup>n</sup>-gã níhi ní cãhá<sup>n</sup>-dè xáha<sup>n</sup>-dè xii-gá:

—¿Yòhó tée cùu ñani tnáhã ndíi Dàvíí, cundáhú iní ñáhã xii-í! —cächí-dé xáha<sup>n</sup>-dè xii-gá.



40 Te Jèsús ní ngüñí-gá, te ní táuchíu<sup>n</sup>-gá ní sánguehe<sup>n</sup> ñaha cuè téé ndíhi-gá. Te òré ní quexìo-dé núú-gá, te ní xícá<sup>n</sup> tnúhú-gá núú-dé, te xáha<sup>n</sup>-gá:

41 —¿Ná cuini<sup>n</sup> càda ñaha-í xii-n-í? — cächí-gá xáha<sup>n</sup>-gá xii-dé.

Te téé cuàà-án ní xáha<sup>n</sup>-dè:  
—Mèstrú, cuini-í cada tátna-n núú-í cuendá cundehe-í —cächí-dé xáha<sup>n</sup>-dè xii-gá.

42 Te Jèsús ní xáha<sup>n</sup>-gá:  
—Sa ní ndúha núú-n chí ní sándáá iní-n Yá Ndióxi —cächí-gá xáha<sup>n</sup>-gá xii-dé.

43 Te òré-ni-án ní ndúha núú-dé, te ní chinchícú<sup>n</sup>-dé Jèsús, te ní cächí-dé sá ío càhnu cuu Yá Ndióxi. Te nchaa ñáyiú ní xini nàcuáa ní cuu ní ndúha núú-dé tnàhá-yu ní cächí-yu sá ío càhnu cuu Yá Ndióxi.

## 19

### *Jèsús ndíhi ì<sup>n</sup> téé nàni Zaqueú*

1 Te Jèsús ní sáá-gá ñúú Jericó, te ta yáha-gá xití ñúú-án cuáhá<sup>n</sup>. 2 Te ñúú-án ndécú ì<sup>n</sup> téé cuica nàni-dé Zaqueú, te cùnno-dé táxi tnúni-dé cue téé cùndíhi-dé, cue téé cuihna iní-xi quide cobrá ñhá xii ñáyiú cuendá impuestú. 3 Te téé-án cuini<sup>n</sup>-dé cuini<sup>n</sup>-dé Jèsús òré-án ní cùu te ñá ní ndàcu-dé, chí ío cuéhé ñáyiú, te ñá túú ducú<sup>n</sup>-dé. 4 Te xinu-dé ní ngódó núú-dé te ní sáá-dé díquí ì<sup>n</sup> yutnu sicómorú nùñí yatni yuhu ichi núú yáha Jèsús cuendá cuini<sup>n</sup>-dé quini ñhá-dé xii-gá. 5 Te òré tá yáha Jèsús xía<sup>n</sup>, te ní ndonehe núú-gá díquí yutnu núú cándodo-dé-án, te ní xáha<sup>n</sup>-gá xii-dé:

—Zaqueú, tanúu ndíhi díquí yutnu-án, chí tnaví quexìo-í vehe-n ndetátú-í —cächí-gá xáha<sup>n</sup>-gá xii-dé.

6 Te té Zaqueú-án ní nuu ndíhi-dé díquí yutnu-án, te ío ní cudí iní-dé ní quehe<sup>n</sup> cuendá-dé Jèsús vehe-dé. 7 Te sá ní xini ñáyiú ní quexìo Jèsús vehe-dé, te nchaa-yu ní ngüita-yu càhá<sup>n</sup> cuéhé-yu cuendá-gá, te xitnàhá-yu:

—Téa-a cuánguihu-dé vehe ì<sup>n</sup> téé ndècu ichi cuéhé ichi duha —cächí-yu xitnàhá-yu.

8 Te té Zaqueú-án ní ndacuñí-dé tnuú-yu, te xáha<sup>n</sup>-dè xii Jèsús:

—Yohó Mèstrú, na cuáha-í ñáyiú ndàhú cuádava nchaa sá ndécú ndíhi-í. Te núu yoo ní dándàhú-í ní dühú-í, te codo ùni-gá tnàhá sá ní dühú-í-yu nacuañaha-í xii-yu —cächí-dé xáha<sup>n</sup>-dè xii-gá.

9 Te Jèsús ní xáha<sup>n</sup>-gá xii té Zaqueú:

—Vitna ní naníhí tàhú-n ndíhi nchaa ñáyiú xindecu vehe-n, chí tnàhá-n cùu-n ñani tnàhá ndíi Àbrahám. 10 Te yúhú Téé cùu ñani tnàhá-ndó nchaa-ndó véxi-í nánducu-í ñáyiú ní xita nihnu cuendá dácacu nihnu-í-yu núú úhú núú ndàhú —cächí-gá xáha<sup>n</sup>-gá xii-dé.

### *Nàcuáa ní quide-güedé ndíhi díhú<sup>n</sup> cuàà<sup>n</sup>* (Mt. 25:14-30)

11 Te nchaa ñáyiú-án ní sani iní-yu sá ndíhi-ni ndíhu ndaha ñaha Yá Ndióxi xii-yu cuendá sá ní cuyatni Jèsús ñúú Jerusalén, te xía<sup>n</sup> núu ní ngüita Jèsús ní cani-gá ì<sup>n</sup> cuendú núú-yu cuendá tecú tnúni váha-yu tnúhu-gá. 12 Te xáha<sup>n</sup>-gá xii-yu:

—Ní xindecu ì<sup>n</sup> téé cùu ñani tnàhá ñáyiú cùnno, te cuáhá<sup>n</sup>-dé ingá ñúú xícá cuendá yácá<sup>n</sup> cuáha ñaha-güedé chiu<sup>n</sup> coo-dé, te dātñúni ndixi-dé quindaha-dé titni ñúú.

13 Te cümáni-gá quee-dé quíhí<sup>n</sup>-dé, te ní cana-dé úxi cue téé xinu cuechi núú-dé, te ní sáñaha-dé ndí díhú<sup>n</sup> núú-güedé ì<sup>n</sup> caa ì<sup>n</sup> caa díhú<sup>n</sup> cuàà<sup>n</sup>, te ní xáha<sup>n</sup>-dè: “Chí cáda ndàhú ndíhi díhú<sup>n</sup>-án ndèé ná sáa nduu násáá-í”, cächí-dé xáha<sup>n</sup>-dè xii-güedé.

14 Dico nchaa ñáyiú ñúú quindaha-dé-án ña túú tnàhá iní-yu sá quindaha ñaha-dé, núu ní tendàhá-yu cue téé nèhe tnúhu cuáhá<sup>n</sup> núú cuè téé cuáñaha chiu<sup>n</sup> coo-dé-án, te ní xáhá<sup>n</sup>-yu sá cūñaha-güedé sá ña túú tnàhá iní-yu sá téé-án quindaha ñaha-dé xii-yu.

15 Dico dacuítíi sá ní sáha-güedé téé-án chiu<sup>n</sup> coo-dé sá díú-dé quindaha-dé ñáyiú nchaa ñúú-án, te ní nacuoí-dé cuánuhú-dé ñúú-dé. Te òré ní nasáá-dé vehe-dé, te ní tendaha-dé ì<sup>n</sup> téé ní sánucana ñaha xii cue téé xinu cuechi núú-dé, cue téé ní dándóo ndaha-dé díhú<sup>n</sup> cuendá cáca<sup>n</sup> tnúhú-dé núú-güedé ì<sup>n</sup>

ì<sup>n</sup>-güedé núu ndèé dau ní chídó-xí díquí díhú<sup>n</sup> sá ní dándóo ndaha ñaha-dé-án. 16 Te téé ní ndèxio díhna xáha<sup>n</sup>-dè: “Pàtróón, ní quide-í ndàhú ndíhi díhú<sup>n</sup>-n sá ní dándóo ndaha ñaha-n xii-í, te sá ì<sup>n</sup> ní taxi-n te ní chídó-xí úxi-gá tnàhá te náu-a naquehe<sup>n</sup> cuendá-n”, cächí-dé xáha<sup>n</sup>-dè.

17 Te téé cùu patróón-dé-án ní xáha<sup>n</sup>-dè: “Ío váha téé xinu cuechi cuu-n chí ío váha ní quide-n, te sá ní quide váha-n ndíhi sacú díhú<sup>n</sup> sá ní dándóo ndaha ñaha-í xii-n, te xía<sup>n</sup> núu yúhú cächí-í sá táxi tnúni-n úxi ñúú vitna”, cächí-dé xáha<sup>n</sup>-dè.

18 Te ní ndèxio ingá-dé, te ní xáha<sup>n</sup>-dè: “Pàtróón, ní quide-í ndàhú ndíhi díhú<sup>n</sup>-n sá ní dándóo ndaha ñaha-n xii-í, te sá ì<sup>n</sup> ní taxi-n te ní chídó-xí úhú<sup>n</sup>-gá tnàhá te náu-a naquehe<sup>n</sup> cuendá-n”, cächí-dé xáha<sup>n</sup>-dè.

19 Te ní xáha<sup>n</sup> téé cùu patróón-dé-án xii-dé: “Te yohó taxi tnúni-n úhú<sup>n</sup> ñúú”, cächí-dé xáha<sup>n</sup>-dè xii téé xinu cuechi-án. 20 Te dātñúni ní ndèxio tucu ingá-dé, te xáha<sup>n</sup>-dè: “Pàtróón, náu díhú<sup>n</sup>-n-á, te naquehe<sup>n</sup> cuendá-n chí ní taxúha-í ní chidúcu<sup>n</sup>-nuu-í ì<sup>n</sup> pāñú te ña túú ní quide-í ndàhú ndíhi díhú<sup>n</sup>-n, 21 chí ní yúhú ñàhá-í xii-n, chí cùu-n ì<sup>n</sup> téé díi, te náquehe<sup>n</sup>-n ì<sup>n</sup> sá ña túú ní taxi ndècu-n, te nàtahu-n ì<sup>n</sup> xichi núú ña túú ní chíhi-n tatá”, cächí-dé xáha<sup>n</sup>-dè xii patróón-dè.

22 Te ní xáha<sup>n</sup>

patrón-dě xii-dé: “Yòhó cúu-n ìñ tée cuihna ìní-xi xinu cuechi núú-í, te diu-ni nchaa tnúhu càhá-n-ñ cächí tnùni-xi nàcuáa cuu ndáa cuéchi-n. Te núu sàni ìní-n sá cùu-í ìñ tée díi, te nàquehe<sup>n-í</sup> ìñ sá ñà túú ní tàxi ndecu-í, te nàtahu-í ìñ xichi núú ñà túú ní chihí-í tatá, <sup>23</sup> te núu duca<sup>n</sup> ña, ÷te ná cuëndá ñà túú ní càhu ìní-n dása<sup>n</sup> nuu-n dihú<sup>n</sup> ní taxi-í, te cùñaha-n chāhu-yu díquí-xi, te òré ná nàsá-í vehe-í, te sa ngódó lùha-gá díquí-xi naquehe<sup>n</sup> cuëndá-í ní cùu-í<sup>2</sup>”, cächí-dé xāha<sup>n</sup>-dě xii tée xinu cuechi-á<sup>n</sup>. <sup>24</sup> Te ní xāha<sup>n</sup> tée cùu patrón-á<sup>n</sup> xii cue tée xīndecu xiá<sup>n</sup>: “Chí quéndé dihú<sup>n</sup> cuáá<sup>n</sup> néhé tée-a, te cuāha-ndo tée néhe úxi tucu dihú<sup>n</sup> cuáá<sup>n</sup>-á<sup>n</sup>”, cächí-dé xāha<sup>n</sup>-dě xii-güedé. <sup>25</sup> Te ní xāha<sup>n</sup>-güedé: “Patrón, dico sa néhe-dé úxi dihú<sup>n</sup> cuáá<sup>n</sup>”, cächí-güedé xāha<sup>n</sup>-güedé. <sup>26</sup> Te ní xāha<sup>n</sup> tée cùu patrón-á<sup>n</sup>: “Na cächí tnúhu-í xii-ndo sá cuè ñāyiu ío xii-xi te níhí-gā-yu cundecu ndihí-yu, te cue ñāyiu sacú ndécú ndihí cuita ndihí nihnu nchaa sá ndécú ndihí-yu”, cächí tée cùu patrón-á<sup>n</sup> xāha<sup>n</sup>-dě xii-güedé. <sup>27</sup> Te xāha<sup>n</sup> tūcu-dé xii-güedé: “Nchaa ñāyiu cùu úhú ìní ñāhá xii-í ñā tnāhá ìní-yu quindaha-í-yu, te chí cāndecā-yu taquixi iha, te cahni-ndó-yu núú-í-a”, cächí tée cùu patrón-á<sup>n</sup> xāha<sup>n</sup>-dě xii-güedé —duha cuáhā<sup>n</sup> cuëndú ní cani Jēsús núú ñāyiu.

*Jēsús cuānguihu-gá ñūú Jerusálén*

(Mt. 21:1-11; Mr. 11:1-11; Jn. 12:12-19)

<sup>28</sup> Te sátá dúcā<sup>n</sup> ní cáhá<sup>n</sup>-gá, te ní nucúhu<sup>n</sup> ìchí-í cuáhā<sup>n</sup>-gá ñūú Jerusálén. <sup>29</sup> Te òré sa ní cuyatni-gá ñūú Bètāfagé, ndihí ñūú Bètāniá te xiá<sup>n</sup> cáá yūcu nani Olivú, te ní xāha<sup>n</sup>-gá xii úú cue tēe xīca cuu ndihí-gá:

<sup>30</sup> —Chí cuáhā<sup>n</sup> ñūú cáá yātni yacá<sup>n</sup>, te òré quexio-ndo yacá<sup>n</sup>, te nanihí-ndó ìñ búrru ndétní-di, te vátá yōo ìñ-gá codo ñāha xii-di, te nandaxi-ndo-di te candeca-ndo-di quixi. <sup>31</sup> Te núu yoo na cācā<sup>n</sup> tnúhu núú-ndó ñā cuëndá nāndāxi-ndo-di, te cùñaha-ndo xii-yu sá yūhú Yáá xicá cùu ndihí-ndo xini ñūhu-í-di —cächí-gá xāha<sup>n</sup>-gá xii-güedé.

<sup>32</sup> Te cue tēe-á<sup>n</sup> ní xīca-güedé cuáhā<sup>n</sup>-güedé, te nchaa-ni nācuáa ní xāha<sup>n</sup> Jēsús duca<sup>n</sup> ní cuu, <sup>33</sup> chí mei òré nāndāxi-güedé búrru-á<sup>n</sup> ní quexio cue ñāyiu cùu xitohó-di xicá<sup>n</sup> tnúhu-yu núú-güedé, te xāhá<sup>n</sup>-yu:

—¿Ná cuëndá nāndāxi-ndo búrru-ndí-í? — cächí-yu xāhá<sup>n</sup>-yu.

<sup>34</sup> Te ní xāha<sup>n</sup>-güedé xii-yu:

—Nā ndaxi-ndí-di chí Yáá xicá cùu ndihí-ndí xini ñūhu ñāha-gá xii-di — cächí-güedé xāha<sup>n</sup>-güedé xii-yu.

<sup>35</sup> Te ndēca-güedé-di cuáhā<sup>n</sup> núú ndécú Jēsús, te òré ní quexio-güedé ndihí-di núú ndécú-gā te ní sacā<sup>n</sup> ndodo-güedé dóo-güedé sátā-di, te ní ngódó ñāhá-gā xii-di. <sup>36</sup> Te

ío cuéhé ñāyiu ta sácā<sup>n</sup>-yu dóo-yu ìchí cuáhā<sup>n</sup>-gá cuëndá núú dóo-yu-á<sup>n</sup> yāha-gá ndihí quiti yōdo-gá. <sup>37</sup> Te ní nucúita nuu-gá ìchí tindúú yucu Olivú tá cūyatni-gá ñūú Jerusálén cuáhā<sup>n</sup>, te nchaa ñāyiu sāndáa ìní ñāhá xii-gá nchicú<sup>n</sup> ñāhá-yu te ní ngūita-yu níhí cáhá<sup>n</sup>-yu sá cūdí ìní-yu, te cächí-yu sá ïo cāhnu cuu Yá Ndióxi cuëndá sá ní xini-yu nchaa sá vā yōo tnāhí ndācu cada ní quide-gá. <sup>38</sup> Te cächí-yu:

—Ío cāhnu cuu Yá véxi quindaha ñāha xii-o, te diu-gá cūú-gá Yáá ní tendaha Yá Ndióxi véxi quide núú-gá! ¡Te ío cāhnu cuu mee-gá! ¡Te andiu ñā túú tnāhí ná cūú! — duha cächí-yu.

<sup>39</sup> Te ìñ úú cue tēe cùu fariséú ñūhú tnāhá tnúú ñāyiu-á<sup>n</sup> ní xāha<sup>n</sup>-güedé xii Jēsús:

—Mēstrú, cūñaha nchāa ñāyiu ndihí-n na cādí-yu yuhú-yu —cächí-güedé xāha<sup>n</sup>-güedé xii-gá.

<sup>40</sup> Dico Jēsús ní xāha<sup>n</sup>-gā xii-güedé:

—Te na cächí tnúhu-í xii-ndo sá núu ñāyiu-a na cādí-yu yuhú-yu ñā, te nchaa yúú cáhá<sup>n</sup> níhí-xi dátā ñā ñāyiu —cächí-gá xāha<sup>n</sup>-gā xii-güedé.

<sup>41</sup> Te òré ní cuyatni-gá ñūú Jerusálén te ní xini-gá, te ní ndāhyú-gá cuëndá nchaa ñāyiu dii ñūú-xi-á<sup>n</sup> sá ndihí ìní-gá. <sup>42</sup> Te ní xāha<sup>n</sup>-gā xii cue ñāyiu-á<sup>n</sup>:

—Ío cuu váha ìní-í te núu dicó nchòhó tecú tnùni-ndó vitna ìñ tnúhu sá cādā váha ñāha xii-ndo, chí ñā túú-gá ná cuu cundecu-ndo, te núu na tēcú tnùni-ndó. Dico ñā tēcú tnùni-ndó, chí ío yidáhu tnúhu-a. <sup>43</sup> Te sáá nduu tnūndòho tnúhu ndāhú sá cūú-xi-ndó, te nchaa cue tēe dāva-gá ñūú cūú úhú ìní tnāhá ndihí-ndo quixi-güedé chidoco ñāha-güedé xii-ndo, te ní cāndéé núú ndécú-ndó-á<sup>n</sup> dacāa-güedé ndóho cuëndá xiá<sup>n</sup> quixi váha-güedé nāa ndihí ñāha-güedé xii-ndo, te vā dāñā-güedé cunu-ndo. <sup>44</sup> Te cahni ñāha-güedé xii-ndo, te ndihí nchaa vehe-ndo dāngoyo-güedé ndéé cimientú-xi, chí ñā túú ní cuini-ndó nācuāha-ndo cuëndá òré ní quixi coto ñāha Yá Ndióxi xii-ndo — duha ní xāha<sup>n</sup>-gá xii ñāyiu ñūú-á<sup>n</sup>.

*Jēsús ñā túú tnāhá ìní-gá nācuāa quidé-yu veñūhu*

(Mt. 21:12-17; Mr. 11:15-19; Jn. 2:13-22)

<sup>45</sup> Te Jēsús cuānguihu-gá xiti veñūhu cāhnu sá ío cūnuu, te xiti veñūhu-á<sup>n</sup> xīndecu cue ñāyiu quide ndāhú ndihí cue ñāyiu xīsaa<sup>n</sup>. Te ní queñūhu ñāha Jēsús xii-yu quehé. <sup>46</sup> Te ní xāha<sup>n</sup>-gā xii-yu:

—Núú túú Yá Ndióxi cáhá<sup>n</sup>-xi nācuāa ní cáhá<sup>n</sup>-gá, te duha ní cächí-gá: “Vehe-í cuú-xi núú cáhá<sup>n</sup> ndihí ñāha ñāyiu xii-í”, duha ní cáhá<sup>n</sup>-gá cächí-xi núú túú-gá. Dico nchòhó quidé-ndó vehe-gá vehe ñādúhú —cächí-gá xāha<sup>n</sup>-gā xii-yu.

47 Te Jesús nchaa nduu dānehé-gá ñāyiu xití veñúhu, dico cue tée cūu dūtú cūnūu, ndīhi cue tée dācuaha ñaha xii ñāyiu nchaa tnúhu ní chídó tnùnī ndíi Moisés, ndīhi cue tée cūnuu ñuú-án ndúcú-güedē nācuáa cada-güedē cahni ñaha-güedē xii-gá. 48 Dico ñā nihi-güedē nācuáa cada-güedē, chi cuendá nchaa ñāyiu ío cùdāí ñi-ñi-yu ndédóho-yu nchaa tnúhu cāhá-n-gá.

## 20

*Jesús ndécú ndīhi-gá tnúhu ndee ñi*  
(Mt. 21:23-27; Mr. 11:27-33)

1 Te ñi nduu yīhi Jesús xití veñúhu cānuu sá ío cūnuu danehé-gá ñāyiu tnúhu sá cāhá-n nācuáa naníhi tǎhú-yu. Te ní quexio cue tée cūu dūtú cūnūu ndīhi cue tée dācuaha ñaha xii ñāyiu nchaa tnúhu ní chídó tnùnī ndíi Moisés, ndīhi cue tée cūu sacuéhé nūu ñāyiu isráel, 2 te ní xáha-n-güedē xii-gá:

—Cuini-ndí cachí tnúhu-n xii-ndí nása ndūu tnúhu ndee ñi ndécú ndīhi-n nūu quide-n nándi sá quidé-n. ¿Te yoo duca-n ní taxi tnúhu ndee ñi-án xii-n? —cachí-güedē xáha-n-güedē xii-gá.

3 Te Jesús ní xáha-n-gá:

—Yúhú tnàhá-í cuini-í cǎcá-n tnúhu-í ñi sá cǎcá-n tnúhu-í nūu-ndó, te cachí tnúhu-ndo. 4 Te chí cachí tnúhu xii-í yoo ní táuchíu-n ní dācuándute ndíi Juáa ñāyiu. ¿Yá Ndióxi án cuè tée ñuyú-a ní táuchíu-n duca-n ní quide ndíi? —cachí-gá xáha-n-gá xii-güedē.

5 Te ní ngúita-güedē xitnáha-güedē:

—¿Nása cūñaha-o? Chí núu ná cūñaha-o sá Yá Ndióxi ní táuchíu-n duca-n ní quide ndíi Juáa ñā, te quesaha-dé: “¿Ná cuendá ñā túu ní sándáa ñi-ndó tnúhu ní cǎhá-n ndíi vǎi?”, quesaha-dé. 6 Adí te núu ná cūñaha-o sá cuè ñāyiu ñuyú-a ní táuchíu-n duca-n ní quide ndíi ñā, te nchaa ñāyiu cuáha ñhá-yu yúu xii-o, te cahni ñhá-yu, chí cachí-yu sá ndáa sá Yá Ndióxi ní táuchíu-n-gá ní cǎhá-n ndíi Juáa tnúhu-gá nūu ñāyiu —cachí-güedē xitnáha-güedē.

7 Te ní xáha-n-güedē xii-gá sá ñā túu xini-güedē yoo ní táuchíu-n duca-n ní dācuándute ndíi Juáa ñāyiu. 8 Te ní xáha-n Jesús xii-güedē:

—Te núu duca-n te ni yúhú vá cachí tnúhu-í xii-ndo yoo ní taxi tnúhu ndee ñi duha quide-í —cachí-gá xáha-n-gá xii-güedē.

*Cuendá cue tée cuihna ñi-xi*  
(Mt. 21:33-44; Mr. 12:1-11)

9 Te sáta dúcá-n te ní ngúita Jesús ní cani-gá ñi cuendú nūu ñāyiu nācuáa tecú tnùnī-yu tnúhu-gá, te xáha-n-gá xii-yu:

—Ñi tée ní xitu-dé mee-ni yóho yaha stilé nūu ñúhú-dé. Te ní sáa ñi nduu quǎngaca cuu xica-dé vǎi nduu te ní dándóo ndaha-dé sá ní xitu-dé-án xii ñi

úu cue tée cǎhá-n ndīhi-dé cuendá cada chiú-n-güedé, te ní ndatnúhu-güedé sá óré ná cūu te cuu cuendá dava-güedé te duca-n te ní quee-dé cuáhá-n-dé. 10 Te sáta ní sáa nduu ní cuu nchaa ndéhe yóho yaha stilé sá ní xitu-dé-án, te ní xáha-n-dé xii ñi tée xinu cuechi nūu-dé: “Cuáhá-n cǎcá-n sá cūu cuendá-í nūu cuè tée ní dándóo ndáha-í nchaa yóho yaha stilé sá ní xitu-í”, cǎchí-dé xáha-n-dé. Te tée xinu cuechi-án ní xica-dé cuáhá-n-dé, dico cue tée ndéè nchaa yóho yaha stilé-án ní tñi-güedé tée xinu cuechi-án te ní caniha-güedé, te ní nacucú-n ñáha-güedé xii-dé, te ñā túu tnáhi ná ní sǎñaha-güedé. 11 Te dǎtnūni tée cūu xitohó nchaa yóho yaha stilé-án ní tendaha tūcu-dé ingá tée xinu cuechi nūu-dé cuáhá-n-dé, dico ñi-ni duca-n ní quide ñaha-güedé xii-dé, chí ní xicuéhé ñáha-güedé, te ní caniha-güedé te ní nacucú-n ñáha-güedé, te ñā túu tnáhi ná ní sǎñaha-güedé. 12 Te tée cūu xitohó nchaa yóho yaha stilé-án ní tendaha tūcu-dé ingá-dé cuáhá-n-dé, te ñi-ni duca-n ní quide ñaha tūcu-güedé, chí ní dānicuéhé ñáha-güedé, te ní nacucú-n ñáha-güedé.

13 Te tée cūu xitohó nchaa yóho yaha stilé-án ní sani ñi-dé: “¿Nása cada-í vitna? Váha-gá tendaha-í déhe-í tée ío cūu ñi-á nūhú-dé, chí cudana te óré quini ñáha-güedé xii-dé, te canehé-güedé sá yǎñúhu nūu-dé”, duha ní sani ñi-dé. 14 Dico óré ní xini cue tée quide chiú-n-án déhe xitohó nchaa yóho yaha stilé-án, te ní xitnáha-güedé: “Tée-án tée véxi nduu táhu ñuho-a ndīhi nchaa sá cǎa nūu-xi, dico cahni-o-dé te mee-o ndūu tahú-o sá ndúu táhú-dé”, cǎchí-güedé xitnáha-güedé. 15 Te ní queñuhu ñaha-güedé ñi xio yuhu ñúhu-án, te ní sahni ñaha-güedé xii-dé —duha cuáhá-n cuendú ní cani Jesús nūu-yu.

Te dǎtnūni ní xáha-n tūcu-gá xii-yu:

—¿Te nchóho sa cūtnūni ñi-ndó nācuáa cada ñaha xitohó ñuho-án xii cue tée-án ñā? 16 Chí nūhú-dé te cahni-dé cue tée-án, te dándóo ndaha-dé ñuho-dé xii cue tée cūtnūni ñi-dé cada ndáa —cachí-gá xáha-n-gá xii-yu.

Te sá dúcá-n ní cǎhá-n-gá, nūu ní cachí-yu:

—¿Sá vá cachí Ndióxi sá dúcá-n yáha-o! —cachí-yu.

17 Te Jesús ní ndacoto-gá nūu-yu, te ní xáha-n-gá:

—Chí cachí tnúhu nása quèe-xi nācuáa cǎhá-n-xi nūu tūtú Yá Ndióxi, nūu cachí-xi: Yúu sá ní dáquée tǎhu cue tée dácaa vehe ní saa-xi cūu-xi yúu cūnūu vitna.

Duha cachí-o nūu tūtú-gá. 18 Te nchaa ñāyiu ñā túu cuini tñi tnúhu-í, te ndohó-yu dǎtná ñi ñāyiu tnáhnú duu-n óré ndúá-yu nūu yúu, adí núu na tǎu ñáha-xi te dācachi duu-n ñaha-xi —cachí-gá xáha-n-gá xii-yu.

*Cuendá impuestú*

(Mt. 21:45-46; 22:15-22; Mr. 12:12-17)

<sup>19</sup> Te cue tée cùu dùtú cùnùu, ndihi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés ní cuini-güedé tñi-güedé Jesús òré-ni-á ní cùu, chi ní cutnùnì iní-güedé sá cuendá-güedé ní cáhá<sup>n</sup>-gá, dico ní yuhú-güedé cuendá sá ño vài ñáyiú. <sup>20</sup> Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue tée cuáhá<sup>n</sup> ngoto dayuhu ñaha xii-gá, te cuáhá<sup>n</sup>-güedé dàtná cue tée váha iní-xi, te ndúcú-güedé nàcuáa cada-güedé núu cáhá<sup>n</sup>-gá ñi<sup>n</sup> tnúhu sá ñá túú tàú-gá cáhá<sup>n</sup>-gá cuendá duca<sup>n</sup> te candeca ñaha-güedé xii-gá quíhí<sup>n</sup> cuáha cuendá ñáhá-güedé núu tée cùnúu. <sup>21</sup> Te ní xáha<sup>n</sup>-güedé xii Jesús:

—Mèstrú, nihi-ndí tnúhu sá dánèhé-n ñáyiú mee-ni tnúhu váha, te cuéi ndédani cãa ñáyiú ñi<sup>n</sup>-ni cáhá<sup>n</sup>-n ndihi-yu, te cáhá<sup>n</sup> ndáá-n nàcuáa cáhá<sup>n</sup> Yá Ndióxi nchandu-o ñuyú-a. <sup>22</sup> Te cachí tnúhu xii-ndí núu váha-ni cháhu-ndí té Cèsár tée ío cùnúu cuendá impuestú á<sup>n</sup> ñáhá —cachí-güedé xáha<sup>n</sup>-güedé xii-gá.

<sup>23</sup> Dico Jesús ní cutnùnì iní-gá sá xító ndéé ñáhá-güedé xii-gá, núu ní xáha<sup>n</sup>-gá xii-güedé:

<sup>24</sup> —Chí dánèhé ñáhá xii-í ñi<sup>n</sup> dñhú<sup>n</sup> cuixí<sup>n</sup> te cachí tnúhu-ndo núu yoo núu-xi ndéé, ndihi yoo ñu-xi ndéé —cachí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Núu té Cèsár ndéé ndihi ñu-dé —cachí-güedé xáha<sup>n</sup>-güedé xii-gá.

<sup>25</sup> Te ní xáha<sup>n</sup> tucu-gá xii-güedé:

—Te núu duca<sup>n</sup> te chí nàcuáha té Cèsár sá cúu cuendá-dé, te sá cúu cuendá méé Yá Ndióxi, te xiá<sup>n</sup> nacuáha-ndo-gá —cachí-gá xáha<sup>n</sup>-gá xii-güedé.

<sup>26</sup> Te ñá ní ndácu tnahí-güedé daticánuu ñaha-güedé xii-gá núu tnúhu cáhá<sup>n</sup>-gá, chi òré ní cáhá<sup>n</sup>-gá, te da ní cuñúhu-güedé nchaa tnúhu ní cáhá<sup>n</sup>-gá, te váha-gá ní sadí-güedé yuhu-güedé.

*Cuendá nchaa ñáyiú ndoto*  
(Mt. 22:23-33; Mr. 12:18-27)

<sup>27</sup> Te sátá dúcá<sup>n</sup> te ní sáá ñi<sup>n</sup> ùú cue tée cùu saduceú núu ndécú Jesús. Te cue tée-á<sup>n</sup> ñá túú sándáá iní-güedé sá ndótó cue ñáyiú ní xihí, te ní xáha<sup>n</sup>-güedé xii-gá:

<sup>28</sup> —Mèstrú, ndíi Moisés cachí ndíi núu tütú ndècu vitna sá núu ñi<sup>n</sup> tée na cùu, te quendóo ñadihi-dé te ñá túú dèhe-dé ní xóo ndihi-a<sup>n</sup>, te tée cùu ñani-dé naquehe<sup>n</sup>-dé ñaha ní quendóo quèé-á<sup>n</sup> cuendá coo déhe-dé ndihi-a<sup>n</sup> cuendá ñani-dé tée ní xihí-á<sup>n</sup>. <sup>29</sup> Te ní xíndecu úsá tnahá cue tée mee-ni ndí ñani-güedé. Te tée díhna ní nihi ñadihi-dé, dico ñá túú ní cùdí-dé cundecu-dé chi ní xihí-dé, te ní ñi<sup>n</sup> dèhe-dé ñá túú ní xóo ndihi ñadihi-dé-á<sup>n</sup>. <sup>30</sup> Te tée cùu úú ní naquehe<sup>n</sup>-dé ñaha ní quendóo quèé-á<sup>n</sup> dico

ní xihí tucu-dé, te ní ñi<sup>n</sup> tucu dèhe-dé ñá túú ní xóo ndihi ñaha-á<sup>n</sup>. <sup>31</sup> Te tée cùu uní ní naquehe<sup>n</sup> tucu-dé ñaha ní quendóo quèé-á<sup>n</sup>, te ñu-ni duca<sup>n</sup> ní xihí-dé, te ní xínu ndi úsá-güedé ní cándeca ñaha-güedé xii ñaha-á<sup>n</sup>, dico ní ñi<sup>n</sup>-güedé ñá túú ní xóo dèhe-güedé ndihi-a<sup>n</sup>, te ní ndihi-güedé ní xihí. <sup>32</sup> Te ndéé núu ní ndihi-ná ní xihí tnahá ñadihi-á<sup>n</sup>. <sup>33</sup> Te na sáá nduu ndòto-güedé ndihi ñaha-á<sup>n</sup> ¿Te ndédacãa-güedé ñadihi-güedé cuu-a<sup>n</sup>-i? Chi ndi úsá-güedé ní cándeca ñaha-güedé xii-a<sup>n</sup> —cachí-güedé xáha<sup>n</sup>-güedé xii-gá.

<sup>34</sup> Te Jesús ní xáha<sup>n</sup>-gá xii-güedé:

—Nchaa ñáyiú ñuyúú-a tñandahá-yu.

<sup>35</sup> Dico nchaa ñáyiú ní nduu táhu ndoto díhna nuu ñáyiú-á<sup>n</sup> cundecú-yu ndihi Yá Ndióxi ní caa ní quíhí<sup>n</sup>, te yàcá<sup>n</sup> ñá túú-gá sá cándeca tnahá-yu. <sup>36</sup> Te ní ñá túú-gá tnúhu xihí, chi cuu-ná-yu dàtná cue espíritu xínu cuèhi núu Yá Ndióxi cuendá sá ní ndotó-yu, chi cùu-yu dèhe-gá. <sup>37</sup> Te ndéé ndíi Moisés ní chídó tnùnì ndíi núu tütú ndíi sá ncháá ñáyiú ní xihí ndotó-yu, te ñu-ni xiá<sup>n</sup> cáhá<sup>n</sup>-xi cuendá tnutáú nchicú<sup>n</sup> ñuhú, te ñu-ni xiá<sup>n</sup> cachí tucu-xi sá Yá Ndióxi cùú-gá Ndióxi ndíi Àbrahám, ndíi Isàác, ndihi ndíi Jàcób. <sup>38</sup> Te cue tée-á<sup>n</sup> chi cuéi ní xihí-güedé sá cúu-xi nchòhò, dico sá cúu-xi Yá Ndióxi chi ndècu vívú-ni-güedé. Chi cutnùnì iní-ó sá Yá Ndióxi cùú-gá Ndióxi mee-ni cué ñáyiú xíndecu vívú, te ñá túú cùu-gá Ndióxi cue ñáyiú ñá túú ndècu vívú. Te sá cúu-xi mèe-gá chi nchaa ñáyiú ndècu ndihi-gá ndécú vívú-yu cuéi sa ní xihí-yu núu ñuyúú-a —cachí-gá xáha<sup>n</sup>-gá xii-güedé.

<sup>39</sup> Te ñi<sup>n</sup> tée dàcuaha ñaha xii ñáyiú nchaa tnúhu ní chídó tnùnì ndíi Moisés ní xáha<sup>n</sup>-dè xii Jesús:

—Mèstrú, váha-ni cáhá<sup>n</sup>-n —cachí-dé xáha<sup>n</sup>-dè xii-gá. <sup>40</sup> Te ñá túú-gá ní cùyí-güedé cácá<sup>n</sup> tnúhú-güedé ní ñi<sup>n</sup> tnúhu núu-gá.

*Yoo dèhe-xi cùu Cristú*

(Mt. 22:41-46; Mr. 12:35-37)

<sup>41</sup> Te Jesús ní xáha<sup>n</sup>-gá xii-güedé:

—¿Te nása cachí-tu-yu sá Cristú Yaá tendaha Yá Ndióxi quixi ñuyúú-a cùu-gá dèhe ndíi Dàví? <sup>42</sup> Te mee ndíi Dàví-á<sup>n</sup> ní cachí ndíi núu librú Sálmu:

Dútú Ndióxi ní xáha<sup>n</sup>-gá xii Yaá cúu Xítohó-í: “Ngóo xio cùha-í,

<sup>43</sup> te yuhú cada-í te nchaa sá cúu ùhú iní ñáhá xi-n canehe-xi sá yíñhú núu-n.”

Duha ní xáha<sup>n</sup> Dütú Ndióxi xii Yaá cúu Xítohó-í cachí ndíi núu librú Sálmu. <sup>44</sup> ¿Te nása cùu Cristú dèhe ndíi Dàví, te mee ndíi ní cachí ndíi sá cúu-gá Xítohó ndíi-i? —cachí Jesús xáha<sup>n</sup>-gá xii-güedé.

Jesús càhá<sup>n</sup>-gá cuèndá cue tée dàcuaha ñaha xii ñáyi u nchaa tnúhu ní chidó tnúni ndí Moisés

(Mt. 23:1-36; Mr. 12:38-40; Lc. 11:37-54)

<sup>45</sup> Te òrè ndátñuhu Jesús ndihí cue tée xica cuu ndihí-gá xíndedóho ñaha ñáyi u, te xáha<sup>n</sup>-gá xii-güedé:

<sup>46</sup> —Cada cuèndá-ndó vâ cáda-ndó nàcuáa quide cue tée dàcuaha ñaha xii ñáyi u nchaa tnúhu ní chidó tnúni ndí Moisés, chí tnàhá iní-güedé cuíhnu-güedé dóó nání sâ sâcuíhnu cue tée cunu u. Te nchaa núú tàcá ñáyi u cuíni-güedé sâ ndihí tnúhu yíñuhu cáhá<sup>n</sup> ndihí ñàhá-yu xii-güedé, te nàcáxi-güedé xilé sácóo nchihí cue tée cunu u-gá xití veñúhu conchihí-güedé, te duca<sup>n</sup>-ní quide-güedé cuèi òré quíhu-güedé mèsá caxi-güedé òré ndécú-güedé ì<sup>n</sup> vico, chí mee-ni núú sácóo cue tée cunu u-gá cuíni-güedé coo-güedé.

<sup>47</sup> Te quèndé-güedé vehe nchaa ñáyi u dñí ñáyi u quèé, te io naha cáhá<sup>n</sup> ndihí-güedé Yá Ndióxi cuèndá cuíni-güedé cáhá<sup>n</sup> váha-yu cuèndá-güedé. Te sâ dúcá<sup>n</sup> quide-güedé te sâá nduu te io-gá ndoho-güedé núú ùhú núú ndàhú dàcúuxí dàva-gá ñáyi u —cáchi-gá xáha<sup>n</sup>-gá xii-güedé.

## 21

Dihú<sup>n</sup> nduu táhú Yá Ndióxi ní dáquèe ì<sup>n</sup> ñaha ndàhú ñaha quèé

(Mr. 12:41-44)

<sup>1</sup> Te Jesús ní xiní-gá xití veñúhu xidáquèe cue tée cuica dihú<sup>n</sup> nduu táhú Yá Ndióxi xití alcanciá. <sup>2</sup> Te ní xiní-gá tnàhá ì<sup>n</sup> ñaha ndàhú ñaha quèé ní dáquèe-a<sup>n</sup> úú dihú<sup>n</sup> còbrí, <sup>3</sup> te ní xáha<sup>n</sup> Jesús xii cue ñáyi u xíndecu-á<sup>n</sup>:

—Na cáchi tnúhu ndáá-í xii-ndo sâ ñaha ndahú ñaha quèé-a io-gá nándñi dihú<sup>n</sup> ní dáquèe-a<sup>n</sup> xití alcanciá nduu táhú Yá Ndióxi dàcúuxí dihú<sup>n</sup> ní dáquèe dáva-gá-yu. <sup>4</sup> Chi nchaa ñáyi u-á<sup>n</sup> ní dáquèe-yu mee-nâ sâ ní ndóo-nâ, dico ñaha quèé-a cuèi ndàhú-a<sup>n</sup> dico ní dáquèe-a<sup>n</sup> nihí dihú<sup>n</sup> sâ cuáá<sup>n</sup>-á<sup>n</sup> sâ cáxi-á<sup>n</sup> ní cuu —cáchi-gá xáha<sup>n</sup>-gá xii-yu.

Jesús cáchi-gá sâ ngóyo veñúhu

(Mt. 24:1-2; Mr. 13:1-2)

<sup>5</sup> Te ì<sup>n</sup> úú ñáyi u xicáhá<sup>n</sup>-yu cuèndá veñúhu càhnu sâ ìo cunu u sâ ìo vii càa nchaa yúú yíhí, ndihí cuèndá nchaa sâ ní sáñaha táhú ñáyi u yíhí xití-xi. Te Jesús ní xáha<sup>n</sup>-gá xii-yu:

<sup>6</sup> —Sâá nduu te nchaa sâ cúnñuhu-ndo-a vâ cundúu-gá-xi dàtná cáá-xi vitna, chí ní ì<sup>n</sup>-gá yúú vâ códó nchihí tnaha-gá-xi chí ndihí ngoyo —cáchi-gá xáha<sup>n</sup>-gá xii-yu.

Nàcuáa cada-xi nduu ta cuyatni naa ñuyú

(Mt. 24:3-28; Mr. 13:3-23)

<sup>7</sup> Te cue tée xíndecu-á<sup>n</sup> ní xicá<sup>n</sup> tnúhú-güedé núú Jesús, te xáha<sup>n</sup>-güedé xii-gá:

—Mèstrú, ¿te ná nduu dúcá<sup>n</sup> cada-xi ngoyo veñúhu, ádi nándi cuu sâ cáda-xi cuèndá cutnúni iní-ndí sâ sâ ta cuyatni nduu duca<sup>n</sup> cada-xi-í? —cáchi-güedé xáha<sup>n</sup>-güedé xii-gá.

<sup>8</sup> Te Jesús ní xáha<sup>n</sup>-gá xii-güedé:

—Ío quihí iní-ndó cundecu-ndo, te vâ dáñá-ndó mée-ndo dandahú ñáhá ñáyi u xii-ndo. Chí io cuéhé cue tée coo ñuyú-a, te danáni-güedé mée-güedé dàtná nání-í te cáchi-güedé: “Yúhú cùú-í Cristú Yáá ní tendaha Yá Ndióxi véxi ñuyú-a”, duha cáchi-güedé. Te cáchi tucu-güedé: “Vitna sa ní sâá nduu cáda-xi nchaa nacuaá ní cáhá<sup>n</sup>-í”, duha cáchi-güedé. Dico vâ quèndá iní-ndó, te ní vâ túhá-ndó-güedé. <sup>9</sup> Te òré ná nihí-ndó tnúhu sâ titní nació<sup>n</sup> xínáá-güedé te dava ñuu xínáá-güedé ndi mée-güedé, te vâ yúhú-ndó chí dacuití sâ dúcá<sup>n</sup> cáda-xi, dico vátá sâá-gá nduu nàa ñuyú òré duca<sup>n</sup> cáda-xi —cáchi-gá xáha<sup>n</sup>-gá xii-güedé.

<sup>10</sup> Te xáha<sup>n</sup> tucu-gá xii-güedé:

—Nchaa cue tée ì<sup>n</sup> nació<sup>n</sup> nàá-güedé ndihí cue tée ingá nació<sup>n</sup>, te titní ñuu ngúíta-güedé nàá-güedé. <sup>11</sup> Te titní xichi ñuyú ñihí vihi tnáa, te titní tucu xichi ñuyú coo tnamá, te titní tucu xichi ñuyú quixi cuéhé, te titní núú sâ cáda-xi àndiu, te yúhú ñáyi u.

<sup>12</sup> Te òré cùmání-gá cáda-xi nchaa nàcuáa cáhá<sup>n</sup>-i-a, te cue tée cuu úhú iní ñáhá xii-ndo tñii ñaha-güedé, te candeca ñaha-güedé xii-ndo quíhí<sup>n</sup> xití veñúhu-güedé cada ndáá-güedé cuèchi-ndo, te chíhí ñaha-güedé veaca xii-ndo, te candeca ñaha-güedé quíhí<sup>n</sup> núú cuè tée cunu u yindaha nació<sup>n</sup> ádi núú dàva-gá cue tée cunu u sâ cuèndá-í. <sup>13</sup> Te òré duca<sup>n</sup> na cáda ñaha-güedé xii-ndo, te òré-á<sup>n</sup> tàú-xi cáhá<sup>n</sup> váha-ndo cuèndá-í núú-güedé. <sup>14</sup> Te vâ cáni iní-ndó núú nása cunduu tnúhu cúnñaha-ndo xii-güedé cuèndá cácu nihnu-ndo. <sup>15</sup> Chí yúhú dacàhu iní ñáhá-í xii-ndo tnúhu cúnñaha-ndo xii-güedé, te taxi-í sâ vátá quini tnúni-gá-ndó, te ní ì<sup>n</sup> ñáyi u cuu úhú iní ñáhá xii-ndo vâ nihí-gá-yu tnúhu cúnñáhá-yu xii-ndo. <sup>16</sup> Te ndéé tátá-ndó, ndihí ñaní-ndó, ndihí cue ñáyi u cuu ñaní tnáhá-ndó, ndihí cue ñáyi u cáhá<sup>n</sup> ndihí váha-ndo cuáha cuèndá ñáhá-yu xii-ndo núú cuè tée cùchiu<sup>n</sup>, te dava-ndo càhni ñaha-güedé xii-ndo. <sup>17</sup> Te io cuéhé ñáyi u cuu úhú iní ñáhá-yu xii-ndo sâ cuèndá-í. <sup>18</sup> Dico Yá Ndióxi io coto ñaha-gá xii-ndo chí ndéé idi díquí-ndó cóto-gá. <sup>19</sup> Te núu na cáda ndee iní-ndó càncicú<sup>n</sup> nihnu ñaha-ndo xii-í, te nduu táhú-ndó cundecu-ndo ndihí Yá Ndióxi ní caa ní quíhí<sup>n</sup>.

<sup>20</sup> Te nduu na quini-ndó ñuhu doco sandadú ní càndéé yuhu ñuu Jerusalén, te sa cutnúni iní-ndó sâ sâ ní cuyatni nduu dànaa-güedé ñuu-á<sup>n</sup>. <sup>21</sup> Te dàvá-á<sup>n</sup> nchaa ñáyi u xíndecu distritú Júdeá xini ñuhu-xi

cunú-yu quíhí<sup>n</sup>-yu xití yucu, te nchaa ñáyi  
xíndecu ñuú Jerusálén queé-yu xití ñuú-á<sup>n</sup>, te  
ñáyi ñá túú xíndecu ñuú-á<sup>n</sup> vâ ndíhu-gá-yu.  
<sup>22</sup> Chi dâvâ-á<sup>n</sup> cuu-xi nduu tñúndòho tñúhu  
ndâhú, te duca<sup>n</sup> càda-xi chi duca<sup>n</sup> ndèé tñuní  
núú tûtú Yâ Ndióxi nâcuáa dandòho ñaha-gá  
xí-yu. <sup>23</sup> ¡Te ndâhú ní cuu nchaa ñáyi dihi  
ñúhú dêhe-xi, ndíhi nchaa ñáyi ndêca dêhe  
vitna sâdi na sâá nduu dûca<sup>n</sup> cada-xi! Chi  
ío cuéhé tñúndòho tñúhu ndâhú coo núú  
ndécú-yu dâvâ-á<sup>n</sup>, te xiá<sup>n</sup> cuu-xi ñ<sup>n</sup> tñúndòho  
tendaha Yâ Ndióxi quixi sâ cúú-xí-yu. <sup>24</sup> Te  
dava cue téé cuú-güedé cahni ñaha-güedé,  
te dava-güedé tñi ñaha-güedé candeca  
ñaha-güedé quíhí<sup>n</sup> nchaa ñuú xicá, te cue  
téé dava-gá ñuú cunuu-güedé ñuú Jerusálén,  
te mee Yâ Ndióxi cachí-gá te núu ná daha  
nduu cunuu-güedé ñuú-á<sup>n</sup>.

*Nâcuáa cada-xi òré quixi tucu Téé cùu ñani  
tnáhâ cué ñáyi*

(Mt. 24:29-35, 42-44; Mr. 13:24-37)

<sup>25</sup> Te cada-xi ñ<sup>n</sup> sâ vâtá quíni-gá ñáyi  
núú nchíanchii, ndíhi núú yóó, ndíhi núú  
ncháa chódíni, te ñuyú-a coo tñúhu ndíhú  
iní-xi te vâ cútnúni iní-yu nása cadâ-yu  
cuendá sâ ío dusa<sup>n</sup> càda ndute lamár òré  
candaundéé tnáhâ-xí. <sup>26</sup> Te nchaa ñáyi  
cunee-yu sâ yùhú-yu, ndíhi sâ ndíhú iní-yu  
cuendá nchaa sâ cadâ-xí ñuyú-a, te quidi-xi  
andíu. <sup>27</sup> Te sâtá dúcá<sup>n</sup> te quíni-ndó yùhú Téé  
cùu ñani tnáhâ-ndó ncháa-ndo quee-í andíu  
quixi-í ichi xití vícò, te dâvâ-á<sup>n</sup> quíni ñáhâ  
ncháa ñáyi sâ ío cùnuu-í te ndacu-í quide-í  
nchaa sâ vâha. <sup>28</sup> Te òré ná ngüita-xi duca<sup>n</sup>  
câda-xi, te cuita cundee-gá iní-ndó quíhí<sup>n</sup>,  
te quíhí iní-ndó chi sa ní cuyatni víi-nâ  
nduu cácu nihnu-ndo vâ cundêcu-gá-ndó  
núú ñuyú yicá cuéchi-a –câchí-gá xâha<sup>n</sup>-gá  
xii-güedé.

<sup>29</sup> Te ní cani-gá ñ<sup>n</sup> cuendú núú-güedé  
nâcuáa tecú tñuní vâha-güedé tñúhu-gá, te  
xâha<sup>n</sup>-gá xii-güedé:

—Chí cundêhe yutnu ngúxi ndíhi nchaa  
dava-gá yutnu. <sup>30</sup> Chi nâtahú ndaha-xi, te  
òré duca<sup>n</sup> quide-xi te câchí-ndó sâ sâ ní cuyatni  
nuu cahni. <sup>31</sup> Te ñuú ní duca<sup>n</sup> sâtnahâ-xi  
cùu òré ná quíni-ndó càda-xi nchaa nâcuáa  
câhá<sup>n</sup>-í, te sâ dúcá<sup>n</sup> te cutnúní iní-ndó sâ sâ ní  
cuyatni nduu ndíhu ndaha ñaha Yâ Ndióxi  
xii-ndo.

<sup>32</sup> Te na câchí tñúhu ndáá-í xii-ndo sâ  
òré vâtá cúú-gá cue ñáyi xíndecu ñuyú-a  
vitna, te cada-xi nchaa nâcuáa ní câhá<sup>n</sup>-í.  
<sup>33</sup> Te andíu ndíhi ñuyú-a chi ndíhi nihnu-xi,  
dico tñúhu-í chi vâ ndíhí nihnu-xi, chi cùu-xi  
tñúhu ndáá.

<sup>34</sup> Te quíhí iní-ndó vâ cundêcu-ndo ichi  
cuehé ichi duha, te vâ cúú-ndó ñáyi quíhu,  
te vâ cúhú<sup>n</sup> iní-ndó mée-ni nchaa sâ ío  
ñuyú-a, chí núu duca<sup>n</sup> na càda-ndo te

nâcuanaa-ndo sâ sâá nduu càda-xi nâcuáa  
ní câhá<sup>n</sup>-í. Te uu<sup>n</sup>ni sâá nduu-á<sup>n</sup>, <sup>35</sup> te  
cada-xi dâtnâ cuíni-ndó quide ñ<sup>n</sup> trampá  
chi uu<sup>n</sup>ni ngáva-xi, te duca<sup>n</sup> càda-xi nchaa  
ñáyi xíndecu ñuyú-a, chi uu<sup>n</sup>ni sâá nduu-á<sup>n</sup>.  
<sup>36</sup> Te nchóhò cundecu túha-ndo te ío câhá<sup>n</sup>  
ndíhi-ndo Yâ Ndióxi cuendá ndacu-ndo  
yâha-ndo ncháa tñúndòho quixi ñuyú-a, te  
duca<sup>n</sup> te nasâá-ndó cundecu-ndo núú ndécú  
yùhú Téé cùu ñani tnáhâ-ndó ncháa-ndo —  
cachí-gá xâha<sup>n</sup>-gá xii-güedé.

<sup>37</sup> Te nduu nduu ní xóo danèhè Jèsús ñáyi  
tñúhu-gá xití veñúhu càhu sâ ío cùnuu, te  
níú níú ní xóo quíhí<sup>n</sup> ngúdú-gá xití yucu  
Olívú. <sup>38</sup> Te nehé nehé ní xóo quíhí<sup>n</sup> nchaa  
ñáyi veñúhu-á<sup>n</sup> ní xóo cundedóho-yu nchaa  
tñúhu câhá<sup>n</sup>-gá.

## 22

*Ndúcu-güedé nâcuáa cada-güedé  
cahni-güedé Jèsús*

(Mt. 26:1-5, 14-16; Mr. 14:1-2, 10-11; Jn.  
11:45-53)

<sup>1</sup> Te sa ní cuyatni nduu tnáhâ vico pascúa,  
te vico-á<sup>n</sup> xéxi ñáyi pàá sâ ñâ túú yíhi  
levadurá. <sup>2</sup> Te cue téé cùu dútú cúmu, ndíhi  
cue téé dâcuaha ñaha xii ñáyi nchaa tñúhu ní  
chídó tñuní ndíi Moisés ndúcú-güedé nâcuáa  
cada-güedé cahni-güedé Jèsús, te dicó-ni sâ  
xíyùhú-güedé ñáyi.

<sup>3</sup> Te yucu ñávâha ní dâcáhu iní ñáhâ-xí  
xii té Júdás dêhe té Iscarioté, te núú tnáhâ  
téé-á<sup>n</sup> cúú ùxúú tnáhâ cue téé xica cuu  
ndíhi-gá ní cùu. <sup>4</sup> Te té Júdás-á<sup>n</sup> ní sâhá<sup>n</sup>-dé  
ní ndatnùhu-dé ndíhi cue téé cùu dútú  
cúnúu, ndíhi cue téé tàxi tñuní ñáhâ xii cue  
téé quide cuendá veñúhu nâcuáa cada-dé  
cuáha cuendá-dé Jèsús núú-güedé. <sup>5</sup> Te ío  
ní cudíí iní-güedé, te ní xâha<sup>n</sup>-güedé xii-dé  
sâ cuáñaha-güedé díhú<sup>n</sup>, <sup>6</sup> te ní xâha<sup>n</sup>-dé  
sâ cúú quèhe<sup>n</sup>-dé díhú<sup>n</sup>-á<sup>n</sup>, te ní ngüita-dé  
ndécú-dé nâcuáa cada-dé cuáha cuendá-dé  
Jèsús núú-güedé òré ñâ túú ñáyi.

*Cúdini Jèsús ndíhi cue téé xica cuu ndíhi-gá*  
(Mt. 26:17-29; Mr. 14:12-25; Jn. 13:21-  
30; 1 Co. 11:23-26)

<sup>7</sup> Te ní sâá nduu ní quesaha vico xéxi-yu  
pàá sâ ñâ túú yíhi levadurá, te ñuú-ni  
nduu-á<sup>n</sup> sâhni-güedé ñ<sup>n</sup> mbéé líhli xéxi-yu.  
<sup>8</sup> Te Jèsús ní xâha<sup>n</sup>-gá xii té Pelú ndíhi té Juáa:  
—Chí cuhá<sup>n</sup> chi cada túha-ndo núú  
cúdini-o sacuaa nduu vico pascúa —cachí-gá  
xâha<sup>n</sup>-gá xii-güedé.

<sup>9</sup> Te ní xicá<sup>n</sup> tñúhú-güedé núú-gá, te  
xâha<sup>n</sup>-güedé xii-gá:

—¿Te ndéé cáá vèhe cuíni-n càda  
túha-ndí-i? —cachí-güedé xâha<sup>n</sup>-güedé xii-gá.

<sup>10</sup> Te ní xâha<sup>n</sup> Jèsús xii-güedé:

—Chí cundedóho na câchí tñúhu-í xii-ndo  
nâcuáa cada-ndo. Òré quíhu-ndo xití ñuú

núu quíhí<sup>n</sup>-ndó, te nanihí-ndó ñ<sup>n</sup> té tãnehe ñ<sup>n</sup> yoó ndute, te téé-án candèndaha-ndo-dè quíhí<sup>n</sup>, te núu ndèdacàa vehe na ndíhu-dé te xiá<sup>n</sup> quíhu-ndo. <sup>11</sup> Te cúñaha-ndo xii xitohó vehe-án: “Yaá cúu Mèstrú cächí-gá nõu ndèdacàa xichi xití vehe-n cuãñaha nõu-n xii-gá cudini-gá ndíhi cue téé xica cuu ndíhi-gá sacuaa nduu vico pascuá”, duha cúñaha-ndo. <sup>12</sup> Te dàtnúni danèhé ñáhá-dè xii-ndo ñ<sup>n</sup> cuartú cáhnú càa nõu ñinu, chi vehe yòdo tñaha cuu-xi, te sa ní quide túha-dé nchaa sá ná ndíhi, te nchòhó ñicó-ná sá cúdini-o cada túha-ndo —cächí-gá xáha<sup>n</sup>-gá xii-güedé.

<sup>13</sup> Te ní xica-güedé cuáhá<sup>n</sup>-güedé, te nchaa-ní nãcuáa ní xáha<sup>n</sup> Jesús xii-güedé ní cuu, chi nchaa sa ndècu túha, te ní quide túha-güedé sá cúdini-güedé ndíhi-gá sacuaa nduu vico pascuá-án.

<sup>14</sup> Te sátá ñí tñahá òré cudini Jesús ndíhi cue téé ní táuchíú<sup>n</sup>-gá cáhá<sup>n</sup> tñúhu-gá núú ñãyiu, te cuánguihu ndíhi ñaha-gã xii-güedé mèsá. <sup>15</sup> Te xáha<sup>n</sup>-gá xii-güedé:

—jDuca<sup>n</sup>-ní ño sãni iní-í sá cúdini ndíhi ñaha-í xii-ndo sàcuua nduu vico pascuá òré cúmãni-gá sáá nduu ndòho-í te cuú-í! <sup>16</sup> Te na cächí tñúhu-í xii-ndo sã vã dúhá-gã caxi ndíhi ñaha-í xii-ndo ndúu vico pascuá, chi ndéé òré ná sáá nduu nãsáá-ndó núú táxí tñúni Yã Ndiòxí cundecu-o, te dàvá-án cada iní-ndó sã dàtná sá cáxí tñucu-o chi ño váha cuu iní-ó cundecu-o —cächí-gá xáha<sup>n</sup>-gá xii-güedé.

<sup>17</sup> Te ní quehe<sup>n</sup>-gá ñ<sup>n</sup> vãsú ñúhú ndúdí ndéhé yoho yàha stilé, te ní ndacá<sup>n</sup> táhú-gã núú Yã Ndiòxí, te dàtnúni ní xáha<sup>n</sup>-gá xii-güedé:

—Chí quehé<sup>n</sup> vãsú ñúhú ndúdí ndéhé yoho yàha stilé-a, te coho-ndo lüha luha nchaa-ndo. <sup>18</sup> Te na cächí tñúhu tucu-í xii-ndo sã vítñá-nã duha xíhi ndíhi ñaha-í xii-ndo ndúdí ndéhé yoho yàha stilé-a te vã cóhó ndíhi ñaha-gá-í, dico na sáá nduu nãníhí tñáhá-ó núú ndécú Tãtã-í Dútú Ndiòxí táxí tñúni-gá, te dàvá-án cada iní-ó sã dàtná sã cóhó ndíhi ñaha tucu-í xii-ndo, chi ño cudí iní-ó —cächí-gá xáha<sup>n</sup>-gá xii-güedé.

<sup>19</sup> Te sátá ñí túhú cóhó-güedé ní cudini-güedé, te ní quehe<sup>n</sup>-gá pãá te ní ndacá<sup>n</sup> táhú tñucu-gá núú Yã Ndiòxí, te dàtnúni ní táhú cuèchi-gã, te ní dàcãñu ñaha-gã xii-güedé, te xáha<sup>n</sup>-gã:

—Pãá-a cùu-xi datná yiqui cùñú-í, chi cahni ñaha-güedé xii-í sã cuendá-ndó, te duca<sup>n</sup>-ní càxi-ndo pãá-a cuendá ndacu iní ñáhá-ndó xii-í —cächí-gá xáha<sup>n</sup>-gá xii-güedé.

<sup>20</sup> Te ñiu-ni duca<sup>n</sup> ní quide-gá ndíhi vãsú ñúhú ndúdí ndéhé yoho yàha stilé, chi ní quehe<sup>n</sup>-gá te òré sãñaha-gã xii-güedé coho-güedé, te ní xáha<sup>n</sup>-gã:

—Ndudí ñúhú vãsú-a cada iní-ndó sã cúu-xí dàtná ñíñi-í sã cáti òré cahni ñaha-güedé xii-í. Te sã dúcã<sup>n</sup> càti ñíñi-í xiá<sup>n</sup> cutnùni ndáá sã Yã Ndiòxí cada-gã ingá núú sã váha sã cúu-xí-ndó.

<sup>21</sup> Dico vitna chi iha tñahá téé cuáha cuendá ñáhá xii-í núú cuè téé cùu úhú iní ñáhá yíhi-dé mèsá. <sup>22</sup> Te yúhú Téé cùu ñani tñáhá-ndó nchaa-ndo ñuhu ichi-í cuáhá<sup>n</sup>-í cuú-í dàtná ní cächí Yã Ndiòxí. jDico ndáhú ní cuu téé duca<sup>n</sup> na cuáha cuendá ñáhá xii-í núú cuè téé cùu úhú iní ñáhá! —cächí-gá xáha<sup>n</sup>-gá xii-güedé.

<sup>23</sup> Te ní ngúita-güedé ndúcú tñúhu núú tñáhá-güedé nõu ndèda càa-güedé duca<sup>n</sup> càda cuáha cuendá ñáhá xii-gá núú cuè téé cùu úhú iní ñáhá.

*Xĩdatnúhu-güedé ndèdacàa-güedé cunuu-gã*

<sup>24</sup> Te sátá dúcã<sup>n</sup> te ní ngúita-güedé xĩdatnúhu-güedé nõu ndèdacàa-güedé tàú-güedé cunuu-güedé. <sup>25</sup> Dico Jesús ní xáha<sup>n</sup>-gá xii-güedé:

—Nchaa cue téé yindaha ñaha xii ñãyiu ño tàxi tñuni-güedé, te mee-güedé cuní-güedé sã cáhá<sup>n</sup> váha ñãyiu cuendá-güedé. <sup>26</sup> Dico nchòhó vã dúcã<sup>n</sup> càda-ndo, chi nõu ñ<sup>n</sup>-ndo cùnuu te cada-ni-ndo sã ñã túú cùnuu-ndo, àdi cuu-ndo ñ<sup>n</sup> téé tàxi tñuni ñáhá xii cue téé xinu cuechi, te cada-ni-ndo sã cúú-ndó ñ<sup>n</sup> téé xinu cuechi-án. <sup>27</sup> Te vã cächí-ó sã téé xinu cuechi cunuu-gã-dé, chi téé quíhu mèsá cùnùu-gã-dé. Dico yúhú ndécú ndíhi ñaha-í xii-ndo dàtná ñ<sup>n</sup> téé xinu cuechi.

<sup>28</sup> Te nchòhó duca<sup>n</sup>-ni ndècu ndíhi ñaha-ndo xii-í, te tàyáha ndíhi ñaha-ndo xii-í nchaa sã tàyáha-í véxi. <sup>29</sup> Te Tãtã-í Dútú Ndiòxí ní cächí-gá sã táxí tñuni-í, te yúhú cächí-í xii-ndo sã sáá nduu te tñáhá-ndó tàxi tñuni-ndó. <sup>30</sup> Te dàvá-án caxi-o coho-o càda-o núú táxí tñuni-í, te yacá<sup>n</sup> ngúita-ndo càda ndáá-ndó cuèchi ndi ùxúu xichi ñãyiu isràél —cächí-gá xáha<sup>n</sup>-gá xii-güedé.

*Jesús càhá<sup>n</sup>-gá sã tẽ Pèlú cúñaha-dè xii ñãyiu sã ñã túú xini ñáhá-dè xii-gã*

(Mt. 26:31-35; Mr. 14:27-31; Jn. 13:36-38)

<sup>31</sup> Te Xitohó Jesucristú ní xáha<sup>n</sup>-gá xii té Ximú:

—Yòhó Ximú, cundedóho váha ñ<sup>n</sup> tñúhu na càhá<sup>n</sup>-í-a, chi dàtná cuní-n quide táchí triú sàcã<sup>n</sup>-xi duha sàcã<sup>n</sup>-xi dàcã<sup>n</sup>, duca<sup>n</sup> quèsaha yucu ñáváha cada ñaha-xi xii-ndo. Chi coto ndeé ñáhá-xí xii-ndo te nõu ndisa sãndáá iní ñáhá-ndó xii-í. <sup>32</sup> Dico yúhú xicã<sup>n</sup> táhú-í núú Yã Ndiòxí cuendá-n, cuendá sã vã dáñá ndeé-n quindáá iní ñáhá-n xii-í. Te òré ndixi túu iní-n sã ñã túú ní quide váha-n, te quíhí<sup>n</sup>-n cuáha-n cuè téé cundíhi-n tñúhu

ndee iní cuëndá canchicú<sup>n</sup> nihnu-ni-güedé ichi Yá Ndióxi —cächí-gá xáha<sup>n</sup>-gá xii-dé.

<sup>33</sup> Te ní xáha<sup>n</sup>-dê xii-gá:

—Mèstrú, sa ndècu túha-í sá quihí<sup>n</sup> ndihi ñaha-í xii-n vècaá, ádi cuéi na cùu ndihi ñaha-í xii-n —cächí-dé xáha<sup>n</sup>-dê xii-gá.

<sup>34</sup> Te Jèsús ní xáha<sup>n</sup>-gá:

—Pèlú, na cächí tnúhu-í xii-n sá cùmání-gá cana ì<sup>n</sup> líhi te úní xito cáhá<sup>n</sup>-n núu ñáyiú sá ñà túú xini ñáhá-n xii-í —cächí-gá xáha<sup>n</sup>-gá xii-dé.

*Sa ní cuyatni ndoho Jèsús*

<sup>35</sup> Te Jèsús ní xáha<sup>n</sup>-gá xii-güedé:

—Te cúnàhá ní tendaha ñaha-í xii-ndo ní sáhá<sup>n</sup>-ndó chiú<sup>n</sup>-í, chi ñà túú ní cãnehe-ndo ní ì<sup>n</sup> sá cùhú<sup>n</sup> dîhú<sup>n</sup>-ndó, te ní ì<sup>n</sup> sá cùhú<sup>n</sup> ndächiu<sup>n</sup>-ndo ñà túú ní cãnehe-ndo. Te chí cächí tnúhu núu íó ì<sup>n</sup> sá ní cumání xii-ndo —cächí-gá xáha<sup>n</sup>-gá xii-güedé.

Te ní xáha<sup>n</sup>-güedé:

—Ñáhá, chí ní ì<sup>n</sup> sá ñà túú ní cùmání xii-ndí —cächí-güedé xáha<sup>n</sup>-güedé xii-gá.

<sup>36</sup> Te ní xáha<sup>n</sup>-gá:

—Te vitna núu ndècu ndihi-ndo sá sácùhu<sup>n</sup> dîhú<sup>n</sup>-ndó, ádi sá sácùhu<sup>n</sup> ndächiu<sup>n</sup>-ndo te canehe-ndo. Te núu ñà túú ndècu ndihi-ndo machití, te nadico-ndo dóó ùcachi nihnu-ndo te cuaa<sup>n</sup>-ndo. <sup>37</sup> Te na cächí tnúhu-í xii-ndo sá dácuití sá yáha-í nàcuáa cáhá<sup>n</sup>-xi núu tùtú Yá Ndióxi núu cächí-xi: “È<sup>n</sup>-ní ní quide ñaha-güedé xii-gá, ndihi cue té ndècu cuéchi-xi”, duha cächí-xi núu tùtú-gá. Te ñà díú<sup>n</sup> ní xiá<sup>n</sup> yáha-í chí nchaandi túhú nàcuáa cáhá<sup>n</sup>-xi núu tùtú-gá yáha-í —cächí-gá xáha<sup>n</sup>-gá xii-güedé.

<sup>38</sup> Te xáha<sup>n</sup>-güedé:

—Mèstrú, íha ndècu úú machití —cächí-güedé xáha<sup>n</sup>-güedé xii-gá.

Te ní xáha<sup>n</sup>-gá:

—Chí návíi-ná yuhu-ndo, vá cáhá<sup>n</sup>-gá-ndó —cächí-gá xáha<sup>n</sup>-gá xii-güedé.

*Jèsús cáhá<sup>n</sup> ndihi-gá Yá Ndióxi yucu Òlívú*  
(Mt. 26:36-46; Mr. 14:32-42)

<sup>39</sup> Te Jèsús ní quee-gá cuáhá<sup>n</sup>-gá yucu Òlívú, chí duca<sup>n</sup> tnáhi quide-gá. Te cue téé xica cuu ndihi-gá nchicú<sup>n</sup> ñáhá-güedé xii-gá cuáhá<sup>n</sup>. <sup>40</sup> Te òré ní quexio-gá xiá<sup>n</sup>, te ní xáha<sup>n</sup>-gá xii-güedé:

—Chí cáhá<sup>n</sup> ndihi Yá Ndióxi cuëndá sá vâ dácáhá<sup>n</sup> ñáhá yùcu ñáváha xii-ndo càda-ndo sá ñà túú tãú-ndó càda-ndo —cächí-gá xáha<sup>n</sup>-gá xii-güedé.

<sup>41</sup> Te sáta dúcá<sup>n</sup> te ní quee dî<sup>n</sup>-gá tnuú-güedé cuáhá<sup>n</sup>-gá ì<sup>n</sup> xio, te sa ñunchíí luha ní xica ndehe-gá núu ndécú-güedé, te xiá<sup>n</sup> ní ngúíí xiá<sup>n</sup>-gá cáhá<sup>n</sup> ndihi-gá Tãtá-gá Dútú Ndióxi. <sup>42</sup> Te xáha<sup>n</sup>-gá:

—Tãú, te núu dicó cächí-n te taunihnu ñaha-n xi-í cuëndá sá vâ ndóhò-í ná sãá òré, dico vá cádá-n nàcuáa cächí iní mée-í,

chí cada-n nàcuáa cächí iní mée-n —cächí-gá xáha<sup>n</sup>-gá xii Tãtá-gá Dútú Ndióxi.

<sup>43</sup> Te sáta dúcá<sup>n</sup> te ní quexio ì<sup>n</sup> espíritu xínú cuéchi núú Yá Ndióxi ní sãñaha-gá-xi tnúhu ndee iní xii-gá. <sup>44</sup> Te òré súúni ndihú iní-gá, te uu<sup>n</sup>-gá súúni ñi yuhu ní iní-gá cáhá<sup>n</sup> ndihi-gá Dútú Ndióxi, te tnée-gá cáá dàtná cáá ñíhi te ngóyó núú ñúhú.

<sup>45</sup> Te sáta ní yáha ní cáhá<sup>n</sup> ndihi-gá Tãtá-gá Dútú Ndióxi, te ní ndacuñí-gá cuánuhú-gá núú ní dándõo-gá cue téé-á<sup>n</sup>, te òré ní nasáá-gá te xixídí-güedé cuëndá sá ío cuéhé tnúhu sãni iní-güedé cuëndá-gá. <sup>46</sup> Te xáha<sup>n</sup>-gá xii-güedé:

—¿Ná cuëndá xidí-ndó? Chí ndácõ, te cáhá<sup>n</sup> ndihi-ndo Yá Ndióxi cuëndá sá vâ dácáhá<sup>n</sup> ñáhá yùcu ñáváha xii-ndo càda-ndo sá ñà túú tãú-ndó càda-ndo —cächí-gá xáha<sup>n</sup>-gá xii-güedé.

*Ní tnií-güedé Jèsús ndécá ñaha-güedé cuáhá<sup>n</sup>*

(Mt. 26:47-56; Mr. 14:43-50; Jn. 18:2-11)

<sup>47</sup> Te cáhá<sup>n</sup> dúcá<sup>n</sup>-ní Jèsús ní quexio vai cue téé, te ì<sup>n</sup> téé xica cuu ndihi-gá ñani Jüdás cúnúu-dé yódó núu-dé núu-güedé ní quexio ndée núu-gá, te ní teyuhu ñaha-dé xii-gá, te núu tnàhá téé-á<sup>n</sup> cùú ùxúú cue téé xica cuu ndihi-gá. <sup>48</sup> Te ní xáha<sup>n</sup> Jèsús xii-dé:

—Jüdás, ¿te yòhò cuáha cuëndá ñáhá-n xii yúhú Téé cùu ñani tnáhá-ndó ncháa-ndo núú cué téé cùu úhú iní ñáhá xii-í cáhá<sup>n</sup>-n núu duha tàyuhu ñaha-n-á<sup>n</sup>? —cächí-gá xáha<sup>n</sup>-gá xii-dé.

<sup>49</sup> Te sáta ní xini nchaa cue téé cùndihi Jèsús nàcuáa cùu cue téé ní quexio-á<sup>n</sup>, núu ní xicá<sup>n</sup> tnúhú-güedé núu-gá, te xáha<sup>n</sup>-güedé xii-gá:

—Mèstrú, ¿cuu nãá-ndí ndihi-güedé ndihi machití-a ñã? —cächí-güedé xáha<sup>n</sup>-güedé xii-gá.

<sup>50</sup> Te ì<sup>n</sup>-dé ní xehndé-ni-dé lóho xio cùha ì<sup>n</sup> cue téé ní quexio-á<sup>n</sup>, te téé-á<sup>n</sup> xínú cuéchi-dé núu dütú cúnúu-gá, te ní quendeé duu<sup>n</sup> lóho-dé. <sup>51</sup> Te Jèsús ní xáha<sup>n</sup>-gá xii-güedé:

—Chí dáñá-güedé, vá dúcá<sup>n</sup> càda-ndo —cächí-gá xáha<sup>n</sup>-gá xii-güedé.

Te ní dácáá-gá ndaha-gá ní tendaha-gá núú ní xindeé lóho téé-á<sup>n</sup>, te ní nduu váha dàtná-ni cà. <sup>52</sup> Te nchaa cue téé cùu dütú cúnúu, ndihi cue téé tàxi tnuú nchaa cue téé quide cuendá veñúhu ío cùnúu, ndihi cue téé cùu sacuéhé núu ñáyiú isráel, nchaa cue téé-á<sup>n</sup> vèxi tnií ñaha-güedé xii-gá, te ní xáha<sup>n</sup>-gá xii-güedé:

—Nchòhò, nèhe-ná-ndó màchití, nèhe-ná-ndó càrrutí vèxi-ndo núu ndécú-í, dàtná quidé-ndó ì<sup>n</sup> ñadúhú quidé ñaha-ndo xii-í. <sup>53</sup> Te duca<sup>n</sup>-ní ní xini-ndó ní xindecu-í xití veñúhu càhnu sá ío cùnúu ní xóo danèhé-í ñáyiú, te ní lùha ñà túú ní cùu tnãndéé



ñáhá-ndó xii-í òré-án, te vitna ní sáá òré duca<sup>n</sup> càda-ndo, te cada sácuihná nàcuáa cùu iní-xi —càchí-gá xáha<sup>n</sup>-gá xii-güedé.

*Té Pèlú càhá<sup>n</sup>-dé núú ñáyiú sá ñà túú xini-dé Jèsús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Te ní tñii-güedé Jèsús, te ndèca ñaha-güedé xii-gá cuáhá<sup>n</sup> vehe téé cùu dútú cùnù-gá, te té Pèlú xica xica-ni nchicú<sup>n</sup> ñáhá-dé xii-gá cuáhá<sup>n</sup>. <sup>55</sup> Te òré ní quexio-güedé xiá<sup>n</sup> te ní dátñhá-güedé ñuhú quehé vehe-án, te ni càndéé yuhu nùhú-án ní ngóo teté-güedé, chi quide víxi<sup>n</sup>-xi, te tñhá té Pèlú ní ngóo teté ndihi ñaha-dé xii-güedé.

<sup>56</sup> Te xiá<sup>n</sup> ndécú ñ<sup>n</sup> xíchí xínú cuèchi vehe-án, te òré ní xini-xi nùcúo teté tñhá té Pèlú, te ní ndacoto-xi núú-dé, te ní xáha<sup>n</sup>-xi xii-güedé:

—Tñhá té-a xica cuu ndihi-dé téé ndèca-güedé cuánguihu-án —càchí-xi xáha<sup>n</sup>-xi xii-güedé.

<sup>57</sup> Dico té Pèlú ñà túú ní nñuu-dé, te xáha<sup>n</sup>-dé xii-xi:

—Yúhú ñà túú xini-í téé-án —càchí-dé xáha<sup>n</sup>-dé xii-xi.

<sup>58</sup> Te tna tnaa-ni ní cuu, te ní xini ñáhá tucu ñ<sup>n</sup>-dé, te xáha<sup>n</sup>-dé:

—Yòhò tñhá-n xica cuu ndihi-n téé ndèca-güedé cuánguihu-án —càchí-dé xáha<sup>n</sup>-dé xii-dé.

Dico té Pèlú ní xáha<sup>n</sup>-dé:

—Ñáhá, ñà díú yúhú xicá cùu ndihi-í-dé —càchí-dé xáha<sup>n</sup>-dé.

<sup>59</sup> Te sa ní cuu dàtná ñ<sup>n</sup> òré te càchí tucu ingá-dé:

—Ndáá sá tée-a xica cuu ndihi-dé téé ndèca-güedé cuánguihu-án, chi tñhá-dé cúú-dé téé distritú Galiléa —càchí-dé xáha<sup>n</sup>-dé xii-güedé.

<sup>60</sup> Te té Pèlú ní xáha<sup>n</sup>-dé xii téé-án:

—Yúhú ñà túú cùtnúni iní-í nása ndùu tñuhu càhá<sup>n</sup>-n —càchí-dé xáha<sup>n</sup>-dé.

Te ni vátá xínu duca<sup>n</sup>-gá tñuhu càhá<sup>n</sup>-dé ní cana-ni ñ<sup>n</sup> lihi. <sup>61</sup> Te Xitohó Jesucristú ní nchócótó-gá núú-dé, te òré-ñ-án ní ndacu iní-dé tñuhu ní xáha<sup>n</sup>-gá xii-dé sá cùmání-gá cana ñ<sup>n</sup> lihi, te úní xito cáhá<sup>n</sup>-dé sá ñà túú xini ñáhá-dé xii-gá. <sup>62</sup> Te té Pèlú ní quee-dé tñuu-güedé cuáhá<sup>n</sup>-dé ñ<sup>n</sup> xio, te ní ndáhyú víhí-dé ní ndixi cuéchi iní-dé.

*Cùdíquí ndeé-güedé Jèsús*

(Mt. 26:67-68; Mr. 14:65)

<sup>63-64</sup> Te cue téé ndéé ñáhá xii Jèsús ní cudíquí ndeé ñáhá-güedé xii-gá, te ní dàdáhu-güedé núú-gá, te ní caniha-güedé xii-gá, te xáha<sup>n</sup>-güedé:

—¡Cáhá<sup>n</sup> ná cótó yòo ní caniha xii-n! —càchí-güedé xáha<sup>n</sup>-güedé xii-gá.

<sup>65</sup> Te cuéhé víhí-gá tñuhu cuéhé ní xáha<sup>n</sup>-güedé xii-gá.

*Jèsús ndécú-gá jündá*

(Mt. 26:59-66; Mr. 14:55-64; Jn. 18:19-24)

<sup>66</sup> Te sátá ní tñundaá, te ní tacá cue téé cùu sacuéhé núú ñáyiú isráél, ndihi cue téé cùu dútú cùnùu, ndihi cue téé dàcuaha ñaha xii-yu nchaa tñuhu ní chídó tñuní ndíi Moisés, te ndèca-güedé Jèsús cuáhá<sup>n</sup> núú cádá-güedé jündá, te òré ní quexio-güedé ndihi-gá núú cádá-güedé jündá-án, te ní xáha<sup>n</sup>-güedé xii-gá:

<sup>67</sup> —Cùini-ndí cachí tñuhu-n xii-ndí núu ñ<sup>n</sup>-n cùu-n Cristú Yaá ní tendaha Yá Ndióxi véxi ñuyúú-a —càchí-güedé xáha<sup>n</sup>-güedé xii-gá.

Te ní xáha<sup>n</sup>-gá xii-güedé:

—Te núu na càchí-í sá díú-í cúú Cristú ñà, te ní vá quindáá iní-ndó, <sup>68</sup> ãdi te núu ñ<sup>n</sup> sá ná càcá<sup>n</sup> tñuhu-í núú-ndó, te ní vá càchí tñuhu-ndo, te ní vá dáñá ñaha-ndo.

<sup>69</sup> Dico vitna ní cuyatni nduu ngóo yúhú Téé cùu ñani tñáhá-ndó nchaa-ndo xio cuha Dútú Ndióxi Yaá ío cùnùu —càchí-gá xáha<sup>n</sup>-gá xii-güedé.

<sup>70</sup> Te dátñuní nchaa-güedé ní xicá<sup>n</sup> tñuhú-güedé núú-gá, te xáha<sup>n</sup>-güedé xii-gá:

—¿Te yòhò cúú-n Dèhe Yá Ndióxi te núu duca<sup>n</sup> vání? —càchí-güedé xáha<sup>n</sup>-güedé xii-gá.

Te ní xáha<sup>n</sup> Jèsús:

—Ndáá sá díú Dèhe-gá cùú-í dàtná càchí méé-ndó-án —càchí-gá xáha<sup>n</sup>-gá xii-güedé.

<sup>71</sup> Te ní xitñaha-güedé:

—Ñà túú-gá xini ñuhu-xi cue téé cáhá<sup>n</sup> núu ndáá sá ndècuéchi-dé ãdi ñà túú ndècuéchi-dé chi yuhu mee-dé ní cáhá<sup>n</sup>-dé vitna ní xindedóho-o —càchí-güedé xitñaha-güedé.

## 23

*Jèsús ndécú-gá núú té Pilatú*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Te nchaa-güedé ní ndacuñí-güedé, te ndèca-güedé Jèsús cuáhá<sup>n</sup> núú té Pilatú, <sup>2</sup> te núú téé-án ní ngúita-güedé sácá<sup>n</sup> cuéchi-güedé cuèndá-gá, te xáha<sup>n</sup>-güedé:

—Ní nanihí-ndí téé-a dàndahú-dé ñáyiú ñuú-ó, chi xáha<sup>n</sup>-dé xii-yu sá vá cháhu-gá-yu impuestú xii té Césár téé ío cùnùu, te càchí-dé sá díú-dé cúú-dé Cristú Yaá ní tendaha Yá Ndióxi véxi ñuyúú-a te yindaha-dé ñáyiú càchí-dé —càchí-güedé xáha<sup>n</sup>-güedé xii-dé.

<sup>3</sup> Te té Pilatú ní xicá<sup>n</sup> tñuhu-dé núú-gá, te xáha<sup>n</sup>-dé xii-gá:

—¿Ndáá sá díú-n cùu-n téé yindaha ñaha xii ñáyiú isráél-án? —càchí-dé xáha<sup>n</sup>-dé xii-gá.

Te Jèsús ní xáha<sup>n</sup>-gá xii-dé:

—Díu-í yindaha-í-yu —càchí-gá xáha<sup>n</sup>-gá xii-dé.

4 Te té Pilatú ní xáha<sup>n</sup>-dë xii nchaa ñáyi, ndihi cue tée cùu dùtú cùnùu:

—Yúhú cùtnùni iní-í sá ñà túú nì ñ<sup>n</sup> cuéchi tée-a —càchí-dé xáha<sup>n</sup>-dë xii-yu.

5 Dico níhi-gá ní cáhá<sup>n</sup>-güedé, te xáha<sup>n</sup>-güedé:

—Càchí-ndí sá ño dusa<sup>n</sup> xíquide ñáyi cuendá nchaa sá dánèhé ñáhá-dë xii-yu, te ní quesaha-dë ndéé distritú Galiléa, te ní yáha-dé níhi distritú Jüdeá dánèhé-dé ñáyi, te vitna ní sáá-ni-tu-dé ndéé ndíha dánèhé-dé-yu —càchí-güedé xáha<sup>n</sup>-güedé xii té Pilatú.

*Jësús ndécú-gá núú tē Herodés*

6 Te sá dúcá<sup>n</sup> ní tecú dóho té Pilatú ní cacu nehé-yu distritú Galiléa, núu xiá<sup>n</sup> ní xicá<sup>n</sup> tnúhú-dë núú-yu núu tée Galiléa cúu-gá. 7 Te ní xáhá<sup>n</sup>-yu sá díú tée yácá<sup>n</sup> cúu-gá, núu xiá<sup>n</sup> ní na dàyáha ñaha-dë xii-gá ndaha té Herodés tée cùu gobiernú distritú Galiléa chi nduu-á<sup>n</sup> ndécú-dë tnáhá-dé ñúú Jerusálén-á<sup>n</sup>. 8 Te òré ní xiní té Herodés-á<sup>n</sup> Jësús te ño ní cudíí iní-dé, chi ní cunaha dúca<sup>n</sup>-ní cuini-dé quini ñáhá-dë xii-gá te ñá túú tnàhí xiní ñáhá-dë xii-gá ní cùu, chi cuendá-ni tnúhu níhi-dé cuendá-gá, te ndètu-dé sáá ñ<sup>n</sup> nduu quini ñáhá-dë xii-gá, te cada-gá ñ<sup>n</sup> sá vâ yôo tnàhí ndàcu cada cundehe-dé ní sani iní-dé. 9 Te vâi sá ní xicá<sup>n</sup> tnúhú-dë núú Jësús, dico ní ñ<sup>n</sup> tnúhu ñá túú ní cáhá<sup>n</sup>-gá. 10 Te xiá<sup>n</sup> xíndecu tnáhá cue tée cùu dùtú cùnùu, ndihi cue tée dàcuaha ñaha xii ñáyi nchaa tnúhu ní chídó tnùni ndí Moisés, te cue tée-á<sup>n</sup> súñí ío iní-güedé sàcá<sup>n</sup> cuéchi-güedé cuendá-gá. 11 Te té Herodés ndihi cue tée cùu sandadú-dé ñá túú ní cùu váha iní-güedé núú Jësús, te ní cudíquí ndéé ñáhá-güedé xii-gá, te ní dácuhnú ñaha-güedé dóó váha xii-gá dàtná cáá dóó sácuhnu cue tée sàquindaha ñaha xii ñáyi. Te dàtnùni té Herodés ní dánúhú ñáhá tùcu-dé xii-gá ndaha té Pilatú. 12 Te nduu-á<sup>n</sup> ní tnahá tnúhu té Pilatú ndihi té Herodés, chi cùu úhú iní tnáhá-güedé ní cùu.

*Càchí-güedé sá cáhni-güedé Jësús*

(Mt. 27:15-26; Mr. 15:6-15; Jn. 18:39-19:16)

13 Te té Pilatú ní nadatàcá-dé nchaa cue tée cùu dùtú cùnùu ndihi dava-gá cue tée cùnùu, ndihi nchaa ñáyi ñúú-á<sup>n</sup>, 14 te ní xáha<sup>n</sup>-dë:

—Nchòhò ndécá-ndó tée-a véxi ní taxi cuendá-ndó-dë ñha, te càchí-ndó sá ño dusa<sup>n</sup> quide ñáyi cuendá nchaa sá dánèhé ñáhá-dë xii-yu, te núú-ndó ndùcu tnúhu-í núú-dë núu ná ní quide-dé. Dico yúhú cùtnùni iní-í sá ñà túú ní ñ<sup>n</sup> cuéchi-dé dàtná cáhá<sup>n</sup>-ndó-á<sup>n</sup>. 15 Te cuéi té Herodés ñu-ni duca<sup>n</sup> cáhá<sup>n</sup>-dé sá ñà túú cuéchi-dé núu ní techiú<sup>n</sup> ñaha tucu-dé cuándixi-dé ñha. Te vitna sa ní cutnùni iní-ó sá ñà túú tàú-xi cahni-o-dé chi ñà túú cuéchi

ni quide-dé. 16 Te na dàndoho-ni-í-dé te dácácu-í-dé —càchí-dé xáha<sup>n</sup>-dë xii-yu.

17 Te ndi tnahá nduu víco pascuá te dacuítí sá dácácu té Pilatú-á<sup>n</sup> ñ<sup>n</sup> cue tée yíhi vecaá, chi duca<sup>n</sup> tnàhí quide-dé. 18 Dico nchaa-yu ní cuáá-yu, te xáhá<sup>n</sup>-yu xii-dé:

—¡Queñuhu tée nàni Jësús-á<sup>n</sup>, te cahni-n-dë! ¡Te dácácu-n tē Barrábás! —càchí-yu xáhá<sup>n</sup>-yu xii-dé.

19 Te té Barrábás-á<sup>n</sup> ní sanu ichi-dé ñáyi ñúú ingá ichi, te ní nguíta-yu ndihi-dé ní cuu úhú iní-yu cue tée cùchiu<sup>n</sup>, te ní sahní-dé ndíyí núu xiá<sup>n</sup> ní chíhi ñaha-güedé vecaá xii-dé. 20 Te té Pilatú cuini-dé dácácu-dé Jësús núu xiá<sup>n</sup> cáhá<sup>n</sup> ndihi ñaha tùcu-dé xii-yu ní cùu, 21 dico uu<sup>n</sup>-gá níhi ní cuáá-yu, te ní xáhá<sup>n</sup>-yu xii-dé úú xito:

—¡Cata caá-dé núu cùrúxí! ¡Cata caá-dé núu cùrúxí! —càchí-yu xáhá<sup>n</sup>-yu xii-dé.

22 Te xito cuu úní ní xáha<sup>n</sup> té Pilatú:

—¿Te ná cúu cuéchi ní quide-dé te núu duca<sup>n</sup> cuini-ndó càda-í-dé-í? Te yúhú cùtnùni iní-í sá ñà túú cuéchi ní quide-dé núu xiá<sup>n</sup> ñá túú tàú-xi cahni-o-dé, te na dàndoho-ni-í-dé te dácácu-í-dé —càchí-dé xáha<sup>n</sup>-dë xii-yu.

23 Dico níhi-ni cáhá<sup>n</sup>-yu xáhá<sup>n</sup>-yu sá ná càta caa ñaha-dé xii-gá núu cùrúxí, te ñáyi-á<sup>n</sup> ndihi nchaa cue tée cùu dùtú cùnùu xicáhá<sup>n</sup> níhi-güedé ndíhi-yu ndéé ní xínu iní té Pilatú cada-dé nàcuáa càchí iní-yu. 24 Te ní xáha<sup>n</sup>-dë xii-yu sá cúu càda-dé nàcuáa xáhá<sup>n</sup>-yu. 25 Te duca<sup>n</sup> te ní dácácu-dé té Barrábás tée ní sanu ichi ñáyi ñúú ingá ichi, te ñu-ni-dé ní sahní-dé ndíyí núu xiá<sup>n</sup> ní xíhi-dé vecaá, te dàtnùni ní táuchíú<sup>n</sup>-dë cada-güedé Jësús nàcuáa xáhá<sup>n</sup>-yu.

*Sàta caa-güedé Jësús núu cùrúxí*

(Mt. 27:32-44; Mr. 15:21-32; Jn. 19:17-27)

26 Te ndéca-güedé Jësús cuáhá<sup>n</sup> núu cáta caa ñaha-güedé xii-gá, te ichi cuáhá<sup>n</sup>-güedé ndíhi-gá ní tnú-güedé ñ<sup>n</sup> tée ñúú Cirené nání-dé Ximú ñúhú-dé ichi duha cuándixi-dé ní sáhá<sup>n</sup>-dé yucu, te ní dácúidó ñaha-güedé xii-dé cùrúxí nchídó Jësús, te ní nguíta nchicú<sup>n</sup>-dé sátá-gá.

27 Te ño cuéhé ñáyi nchicú<sup>n</sup> ñáhá xii-gá cuáhá<sup>n</sup>, te vâi ñáyi díhi ío níhi ndàhí-yu sá ndíhú iní-yu cuendá Jësús. 28 Te Jësús ní nchóótó-gá núu-yu, te ní xáha<sup>n</sup>-gá:

—Nchòhò ñáyi díhi ñúú Jerusálén, vá ndàhyú-ndó cuendá-í chí ndàhyú cuendá méé-ndó ndíhi cuendá déhe-ndo. 29 Chi sáá nduu quésaha ñáyi: “Sá váha táhú nchaa ñáyi ñà túú càcu déhe-xi, ndíhi nchaa ñáyi vátá quini-gá cuhu<sup>n</sup> déhe-xi, chí ní ñà túú xiní-yu dacadí-yu”, duha quesáhá-yu. 30 Te dává-á<sup>n</sup> cùñaha ñáyi xii nchaa tindúú ndíhi nchaa núu xiquí: “Chí

tácùn<sup>n</sup> ngónchihí ñaha-ndo xii-ndí", duha cúñáhá-yu. <sup>31</sup> Te núu yúhú téé quide ndáá duha quide ñaha-güedé xii-í vitna, te ndéé-gá cada-güedé nchaa ñáyiú ndècu ichi cuehé ichi duha —cächí-gá xáha<sup>n</sup>-gá xii-yu.

<sup>32</sup> Te ndèca tucu-güedé úú tñahá cue téé ndècu ndisa cuéchi-xi cuáhá<sup>n</sup> cuendá cahni ñaha-güedé xii-güedé ndihí Jèsús. <sup>33</sup> Te òré ní quexio-güedé ndihí-gá ì<sup>n</sup> xichi núu nání Yiquí Díqui Ndiyi, te xián ní sata caa ñaha-güedé xii-gá núu cùrúxí, ndihí úú cue téé ndècu ndisa cuéchi-xi-á<sup>n</sup>, te ì<sup>n</sup>-dé ní sata caa-güedé xio cùha-gá te ingá-dé ní sata caa-güedé xio dàtni-gá ì<sup>n</sup>-ni núu cùrúxí tucu. <sup>34</sup> Te ní xáha<sup>n</sup>-gá xii Tátá-gá Dútú Ndióxi:

—Táu, cada cahnu iní sá quidé-güedé, chí ñá túú cùtnuní iní-güedé ná cúú sá quidé-güedé —cächí-gá xáha<sup>n</sup>-gá.

Te cue téé cùu sandadú ní xito ndéé-güedé núu ndèdacáa-güedé cuu cuendá-güedé dóó-gá. <sup>35</sup> Te nchaa ñáyiú xindecu-á<sup>n</sup> ndèhé-yu nàcuáa quide-güedé Jèsús, te nchaa cue téé cùnuu ní cudíquí ndéé ñáhá-güedé xii-gá, te ní xitñaha-güedé:

—Te dava ñáyiú ní ndacu-dé ní dácácu nihnu-dé, te vitna na dácácu nihnu-dé méé-dé, te núu ndisa sá Cristú Yaá ní tendaha Yá Ndióxi véxi ñuyúú-a cùu-dé —cächí-güedé xitñaha-güedé.

<sup>36</sup> Te tñahá cue téé cùu sandadú ní cudíquí ndéé ñáhá-güedé xii-gá, chí ní sàndehe yatni-güedé núu táca-gá sáñaha-güedé ndudí íá còho-gá ní cùu, <sup>37</sup> te ní xáha<sup>n</sup>-güedé xii-gá:

—Te núu yòhó cúú-n téé yìndaha ñaha xii ñáyiú isràél, te dácácu nihnu mee-n —cächí-güedé xáha<sup>n</sup>-güedé xii-gá.

<sup>38</sup> Te ní taxi ndecu-güedé ì<sup>n</sup> sá ndéé lètrá ndáa díquí-gá te ndéé úní núu tñúhu, tñúhu gríégú, ndihí tñúhu látin, ndihí tñúhu hèbreú, te duha quèe-xi ndi nuní núu tñúhu-á<sup>n</sup> "Téa cùu-dé téé yìndaha ñaha xii ñáyiú isràél", duha quèe-xi.

<sup>39</sup> Te ì<sup>n</sup> téé ndècu ndisa cuéchi-xi, téé ní sata caa-güedé díñi-gá xicuehé ñáhá-dé xii-gá, te xáha<sup>n</sup>-dè:

—Te núu yòhó cúú-n Cristú Yaá ní tendaha Yá Ndióxi véxi ñuyúú-a, te dácácu nihnu mee-n, te dácácu nihnu ñaha xii nchúhú tñahá-ndí tucu —cächí-dé xáha<sup>n</sup>-dè xii-gá.

<sup>40</sup> Dico ingá téé cùndihí-dé téé tàcaa ingá xio díñi-gá ní tenáá ñáhá-dé xii-dé, te xáha<sup>n</sup>-dè:

—¿Te náa ñá túú ndàcu iní-n Yá Ndióxi vitna duha cãa-o ndoho-o ndihí téé nání Jèsús-a ñá? <sup>41</sup> Chi nchoo tàú ndisa-o sá dúhá ndòho-o nacháhu-o cuéchi-o, dico Jèsús-a chí ñá túú cuéchi-dé —cächí-dé xáha<sup>n</sup>-dè xii téé tàcaa ndihí-dé-á<sup>n</sup>.

<sup>42</sup> Te dàtnuní ní xáha<sup>n</sup>-dè xii-gá:

—Jèsús, ndacu iní ñáhá-n xii-í òré ná quixi-n taxi tñuní-n ñuyúú-a —cächí-dé xáha<sup>n</sup>-dè xii-gá.

<sup>43</sup> Te Jèsús ní xáha<sup>n</sup>-gá:

—Na cächí tñúhu ndáá-í xii-n sá méi ndúu vitna ndecu ndihí ñaha-í xii-n núu ní nduu táhù-í cundecu-í —cächí-gá xáha<sup>n</sup>-gá xii-dé.

*Ní xihí Jèsús*

(Mt. 27:45-56; Mr. 15:33-41; Jn. 19:28-30)

<sup>44</sup> Te òré ní cuu cuádava nduu. Te ní cunee nihí ñuyúú, te duca<sup>n</sup>-ni cãa ní cuu ndéé caá úní sacuaa. <sup>45</sup> Chi ñá túú-gá ní ðayehé nchicanhii te ní ndátá dóó cúú còrtiná veñúhu cãhnu sá ìo cùnuu ní quée dava ndáá. <sup>46</sup> Te níhi ní cáhán Jèsús, te xáha<sup>n</sup>-gá xii Tátá-gá Dútú Ndióxi:

—Táu, naquehe<sup>n</sup> cuendá-n espíritú-í —cächí-gá xáha<sup>n</sup>-gá xii Tátá-gá.

Te tñúhu-ná-á<sup>n</sup> ní cáhán-gá te ní xihí-ni-gá.

<sup>47</sup> Te òré ní xini téé cùu capitán sá dúcán ní cuu, te ní ndacu iní-dé Yá Ndióxi, te ní cachí-dé:

—Sá ndáa ndisa sá téa cùu-dé ì<sup>n</sup> téé ìo quide ndáa ndécú ñuyúú-a ní cùu —duha ní cachí-dé.

<sup>48</sup> Te chitu ñáyiú ní tacá xián chí cuíní-yu cundèhé-yu nása cada-güedé Jèsús. Te sáta ní yáha ní xini-yu nàcuáa ní quide ñaha-güedé xii-gá, te ní ndihí-yu ní ndaca ta cání-yu pèchú-yu cuánuhú sá ndihí iní-yu. <sup>49</sup> Dico ndècu tñahá cue ñáyiú xini tñahá ndihí Jèsús, ndihí ñáyiú ðihí ní chinchícú<sup>n</sup> ñáhá xii-gá ndéé distritú Galilea, te ñáyiú-á<sup>n</sup> xica-ni xixinutñi-yu xindèhé-yu nchaa nàcuáa ní quide ñaha-güedé xii-gá.

*Chindixi-güedé Jèsús*

(Mt. 27:57-61; Mr. 15:42-47; Jn. 19:38-42)

<sup>50</sup> Te ndècu ì<sup>n</sup> téé ñuu Arimatea nání-dé Chéé, te ñuu-á<sup>n</sup> yìndèhu-xi distritú Júdeá, te ìo váha iní-dé te quide ndáá-dé núu Yá Ndióxi, te tñahá-dé cúú-dé chi<sup>n</sup> te ní xindecu-dé jundá cue téé isràél. <sup>51</sup> Te ñá ní tñahá tñahí iní-dé nàcuáa ní cáhán-güedé núu jundá nàcuáa cada-güedé Jèsús. Te téa-á<sup>n</sup> ndétú-dé sáá nduu ndihu ndaha ñaha Yá Ndióxi xii-dé ndihí ñáyiú. <sup>52</sup> Te téa-á<sup>n</sup> ní sáhán-dé núu té Pilatú te ní xáha<sup>n</sup>-dè sá núu vá cündee iní-dé daña-dé chindixi-dé yiqui cùñú Jèsús. Te té Pilatú-á<sup>n</sup> ní sáha-dé tñúhu. <sup>53</sup> Te ní nunehe-dé yiqui cùñú-gá núu cùrúxí, te ní chidúcú<sup>n</sup>-muu-dé ì<sup>n</sup> dóó cuixí<sup>n</sup>, te ní chihí-dé ì<sup>n</sup> yaú nchii yiqui naha cava, te vátá yòo ì<sup>n</sup>-gá nguindúxi yaú-á<sup>n</sup>. <sup>54</sup> Te cùu-xi nduu vispre nduu ndétatú ñáyiú, núu xiquide túha-ná-yu sá cúú ìngá nduu.

<sup>55</sup> Te nchaa ñáyiú ðihí ní chinchícú<sup>n</sup> ñáhá xii Jèsús ndéé distritú Galilea ndèndáhá-yu

te Chée ní sáhá<sup>n</sup> núú nchíí yaú-á<sup>n</sup>, núú ní xiní-yu nácuáa ní sacá<sup>n</sup>-dé yiqui cuñú-gá xití yaú-á<sup>n</sup>. <sup>56</sup> Te duca<sup>n</sup> te cuánuhú-yu vehé-yu, te ní quide túha-yu acití sáhá<sup>n</sup> tnámí, ndíhi pomadá, te ní ndetatú-yu ingá nduu-á<sup>n</sup> ní quidé-yu nácuáa cáhá<sup>n</sup> tnúhu Yá Ndióxi.

## 24

### Ní ndoto Jèsús

(Mt. 28:1-10; Mr. 16:1-8; Jn. 20:1-10)

<sup>1</sup> Te ndumìngú nehé víhí-ní cuáhá<sup>n</sup> tucu ñáiyu díhí núú nchíí yaú ní chihí-güedé yiqui cuñú Jèsús, te nehé-yu nchaa sá sáhá<sup>n</sup> tnámí ní quide túha-yu-á<sup>n</sup> cuáhá<sup>n</sup>, te tnáhá tucu ñ<sup>n</sup> úú-gá tnáha díhí-yu nchicú<sup>n</sup> ñáhá xii-yu cuáhá<sup>n</sup>. <sup>2</sup> Te òré ní quexió-yu yuhu yaú-á<sup>n</sup> te ní xiní-yu sá yúú ndedéí ñ<sup>n</sup> xio-ná ndécú, <sup>3</sup> te ní quihu-yu xití yaú-á<sup>n</sup>, dico ñá túú-gá yiqui cuñú Jèsús yíhí. <sup>4</sup> Te ñá ní cùtnuní tnáhi iní-yu ndéé ichi cuáhá<sup>n</sup> yiqui cuñú-gá, te ní xiní-yu úú espíritú xínú cuèchi núú Yá Ndióxi xínutnii-xi díñí-yu te xixíhnu-xi dóó chàhnhí. <sup>5</sup> Te ní yuhú-yu te ñá túú ní cùyí-yu cundehé-yu cue espíritú-á<sup>n</sup>, te cue espíritú-á<sup>n</sup> ní xáhá<sup>n</sup>-xi xii-yu:

—¿Ná cuendá nánducu-ndo Jèsús Yaá ndécú vívú núú yínduxi ñáiyu ní xihí-i? <sup>6</sup> Te ñá túú-gá yiqui cuñú-gá ndécú ìha chí sa ní ndoto-gá, te chí dándacu iní nácuáa ní cáhá<sup>n</sup>-gá cùtnáhá ní xíndecu-ndo ndíhi-gá distritú Galiléa, <sup>7</sup> chí ní cachí-gá sá méé-gá cúú-gá ñaní tnáhá-ndó ncháa-ndo, te dacuitíí cuáha cuendá ñáhá-güedé xii-gá núú cue tée ndécú ichi cuéhé ichi duha, te cata caa ñaha-güedé xii-gá núú cùrúxí, te núú cùrúxí-á<sup>n</sup> cuú-gá dico nduu úní sá cùú-gá te ndoto-gá, duha ní cachí-gá xii-ndo.

<sup>8</sup> Te òré-á<sup>n</sup> ní ndacu iní-yu tnúhu ní cáhá<sup>n</sup> Jèsús. <sup>9</sup> Te sátá dúcá<sup>n</sup> te ní naquehé<sup>n</sup>-yu ichi cuánuhú-yu, te ní caní-yu cuendú núú ndí úxí ñ<sup>n</sup> cue tée ní táuchíú<sup>n</sup> Jèsús cáhá<sup>n</sup> tnúhu-gá, ndíhi núú dáva-gá ñáiyu. <sup>10</sup> Te ñáiyu duca<sup>n</sup> ñaha tnúhu cuánuhú núú-güedé-á<sup>n</sup> cúú tá Màriá Magdaléná, ndíhi tá Juáná, ndíhi tá Màriá náná té Jacobó, ndíhi dáva-gá ñáiyu díhí. <sup>11</sup> Dico cue tée-á<sup>n</sup> ní sani iní-güedé sá dicó cáhu iní-yu tnúhu xáhá<sup>n</sup>-yu xii-güedé núú ñá túú ní sándáá iní-güedé nácuáa ní xáhá<sup>n</sup>-yu.

<sup>12</sup> Dico té Pélú ní quee-dé xínú-dé cuáhá<sup>n</sup> cuándehé-dé yaú núú ní chihí-güedé yiqui cuñú Jèsús, te ní sáá-dé te ní ngáundeiy-dé xító ñhni-dé xití yaú-á<sup>n</sup> te ní xiní-dé sá méé-ná dóó ní xíducú<sup>n</sup> nuu-gá yúcu ñ<sup>n</sup> xio, te ío ní cuñúhu-dé sá dúcá<sup>n</sup> ní cuu, te ní natnii-dé ichi cuánuhú-dé vehe núú xíndecu-güedé.

### Ichi ñúú Emàús

(Mr. 16:12-13)

<sup>13</sup> Te diu-ní nduu-á<sup>n</sup> ñúhú úú cue tée ní xica cuu ndíhi Jèsús ichi cuáhá<sup>n</sup>-güedé ñ<sup>n</sup> ñúú nání Emàús, te sácúhu-güedé dátáá úú òré ichi ndéé ñúú Jerusalén, te ndéé ñúú Emàús. <sup>14</sup> Te ta ndátnúhu-güedé cuáhá<sup>n</sup> nchaa nácuáa ní cuu, <sup>15</sup> te níní dúca<sup>n</sup> xicáhá<sup>n</sup>-güedé, te Jèsús ní natnáhá ñáhá-gá xii-güedé te ndéca tnaha-gá ndíhi-güedé cuáhá<sup>n</sup>. <sup>16</sup> Te cuèí ndéhe ñaha-güedé xii-gá dico dátáá ñ<sup>n</sup> sá ndedéí núú-güedé, chí ñá ná quíní ñáhá-güedé xii-gá ní cuu. <sup>17</sup> Te Jèsús ní xicá<sup>n</sup> tnúhú-gá núú-güedé, te xáhá<sup>n</sup>-gá:

—¿Ná tnúhu xicáhá<sup>n</sup>-ndó ñúhu-ndo ichi núú duca<sup>n</sup> ío cùu ndíyí-ndó-í? —cachí-gá xáhá<sup>n</sup>-gá xii-güedé.

<sup>18</sup> Te ñ<sup>n</sup> tée nání Cleofás ní xáhá<sup>n</sup>-dè xii-gá:

—¿Te ná cuendá nchaa ñáiyu íchí ní sáá ñúú Jerusalén xiní-yu nchaa nácuáa ní cuu, te ñ<sup>n</sup> díi-ná yòhó ñá túú xiní-n-í? —cachí-dé xáhá<sup>n</sup>-dè xii-gá.

<sup>19</sup> Te ní xáhá<sup>n</sup>-gá xii-güedé:

—¿Te ná ní cuu-í? —cachí-gá xáhá<sup>n</sup>-gá xii-güedé.

Te ní xáhá<sup>n</sup>-güedé xii-gá:

—Cuendá Jèsús tée ñúú Nazàréet cáhá<sup>n</sup>-ndí, chí tée-á<sup>n</sup> cúú-dé ñ<sup>n</sup> tée cáhá<sup>n</sup> tnúhu Yá Ndióxi, te ío váha ndúu tnúhu cáhá<sup>n</sup>-dé ní cuu, te quide-dé sá vá yóo tnáhi ndácu cada nácuáa cudíí iní Yá Ndióxi ndíhi ñáiyu ní cuu. <sup>20</sup> Te cue tée cùu dútú cùnúu, ndíhi cue tée cùnúu taxi tnumí ñáhá xii-ndí ní sáha cuendá ñáhá-güedé xii-dé núú té Pilatú te ní sata caa ñaha-güedé te núú cùrúxí-á<sup>n</sup> ní xihí-dé. <sup>21</sup> Dico vitna sa ní cuu úní nduu sá ní xihí-dé, te nchúhú ní sani iní-ndí sá tée-á<sup>n</sup> dáacu nihnu ñaha-dé xii nchúhú ñáiyu isráel núú ncháa tnúndòho tnúhu ndáhú ndécú-ndí. <sup>22</sup> Dico ío cuñúhu-ndí cúú, chí ñ<sup>n</sup> úú ñáiyu díhí ní tuha ñaha xii-dé ndécú ndíhi-ndí ní sáhá<sup>n</sup> ngotó-yu ndéxuehe tàculhndá-gá yaú núú ní chihí-güedé yiqui cuñú-dé, <sup>23</sup> te ní nasáá-yu cachí-yu xii-ndí sá ñá túú-gá yiqui cuñú-dé yíhí xití yaú-á<sup>n</sup>. Te ní xiní-yu espíritú xínú cuèchi núú Yá Ndióxi, te ní xáhá<sup>n</sup>-xi xii-yu sá ndécú vívú-dé. <sup>24</sup> Te sátá dúcá<sup>n</sup> te ñ<sup>n</sup> úú cue tée cùndíhi-ndí ní sáhá<sup>n</sup> ndéhé-güedé yaú-á<sup>n</sup>, te ní xiní-güedé sá ndáá cúú-xí ncháa tnúhu ní cáhá<sup>n</sup> ñáiyu díhí-á<sup>n</sup>, dico ñá túú ní xiní-güedé tée-á<sup>n</sup> —cachí-güedé xáhá<sup>n</sup>-güedé xii-gá.

<sup>25</sup> Te Jèsús ní xáhá<sup>n</sup>-gá xii-güedé:

—Ío cùmání sá xiní tnúni-ndó, chí ío cuèé sándáá iní-ndó tnúhu ní cáhá<sup>n</sup> cue tée ní xóo cáhá<sup>n</sup> tnúhu Yá Ndióxi ndéé sanaha! <sup>26</sup> ¿Te náa ñá túú tau-xi sá ndóhó Cristú òré cùmání-gá sáá nduu ndáa-gá andiu núú ndécú Dütú Ndióxi cundecu-gá-á<sup>n</sup>? —cachí-gá xáhá<sup>n</sup>-gá xii-güedé.

<sup>27</sup> Te ní nguíta-gá xáha<sup>n</sup>-gá nàcuáa quèe-xi nchaa tnúhu cáhá<sup>n</sup>-xi núú tütú Yá Ndióxi cuèndá-gá, te díhna-gá ní cáhá<sup>n</sup>-gá nàcuáa ndúu nchaa tnúhu yòdo tñuní núú tütú ndíi Moisés, te dàtnùní ní cáhá<sup>n</sup>-gá nàcuáa ndúu nchaa tnúhu yòdo tñuní núú tütú nchaa cue téé ní xóo cáhá<sup>n</sup> tnúhu Yá Ndióxi ndéé sanaha.

<sup>28</sup> Te òré ní quexìo-güedé yuhu ñúú núú cuáhá<sup>n</sup>-güedé-á<sup>n</sup>, te Jesús ní quide-ni-gá sá yáha-gá quíhí<sup>n</sup>-gá ingá xichi ní cùu. <sup>29</sup> Dico ní cáhá<sup>n</sup> ndàhú-güedé núú-gá sá quèndóo-gá xiá<sup>n</sup> ndetatú-gá ndihí-güedé, te xáha<sup>n</sup>-güedé xii-gá:

—Quèndóo ndihí ñaha xii-ndí iha ndetatú-n chí sa ní cuaa, te tñavíi cundiqui<sup>n</sup> —càchí-güedé xáha<sup>n</sup>-güedé xii-gá.

Te xiá<sup>n</sup> cáá ñ<sup>n</sup> vehe cuánguihu-güedé ndetatú-güedé ndihí-gá. <sup>30</sup> Te òré sa yíhi-güedé mésá ndihí-gá cùdini ndihí ñaha-güedé, te ní quehe<sup>n</sup>-gá pàá te ní ndacá<sup>n</sup> táhú-gá núú Yá Ndióxi, te ní táhú cuèchi-gá te dàtnùní ní dácáñu ñaha-gá xii-güedé. <sup>31</sup> Te òré-á<sup>n</sup> ní naquini ñáhá-güedé xii-gá ní cùu, dico uu<sup>n</sup> ní ní ndóñhú-gá. <sup>32</sup> Te ní xítñaha-güedé:

—Te ndáá sá súúni cùdíí ñí-ó òré tá ndàtnúhu-o ndihí Jesús véxi ichi, te ta dànehé ñáhá-gá xii-o nchaa nacuáa quèe-xi tnúhu cáhá<sup>n</sup>-xi núú tütú Yá Ndióxi —càchí-güedé xitñaha-güedé.

<sup>33</sup> Te ñá túú-gá ní xíndetu-güedé chi ndihí-ni ní natñi-güedé ichi cuánuhú-güedé ñúú Jerusalén, te ní nasáá-güedé núú xíndecu ndí ùxí ñ<sup>n</sup> cue téé ní táuchíú<sup>n</sup> Jesús cáhá<sup>n</sup> tnúhu-gá, ndihí dava-gá ñáyíu. <sup>34</sup> Te cue téé xíndecu-á<sup>n</sup> xáha<sup>n</sup>-güedé:

—Ndáá sá ní ndoto Yaá cúú Mèstrú, chi ní xini ñáhá tē Ximú —càchí-güedé xáha<sup>n</sup>-güedé.

<sup>35</sup> Te cue téé ní nasáá-á<sup>n</sup> ní cani-güedé cuèndú nàcuáa ní cuu ichi, ndihí nàcuáa ní cuu ní naquini-güedé Jesús òré ní táhú-gá pàá ní dácáñu ñaha-gá xii-güedé.

*Jesús ní quexìo-gá núú xíndecu cue téé ní xica cuu ndihí-gá*

(Mt. 28:16-20; Mr. 16:14-18; Jn. 20:19-23)

<sup>36</sup> Te cáhá<sup>n</sup> dúcá<sup>n</sup>-ní-güedé nàcuáa ní cuu ní quexio Jesús ní ngúnutñi-gá ndéé tñuú-güedé, te xáha<sup>n</sup>-gá xii-güedé:

—Yá Ndióxi chíndèe ñaha-gá xii-ndo ño váha cùu ñí-ndó ndècu-ndo —càchí-gá xáha<sup>n</sup>-gá xii-güedé.

<sup>37</sup> Te da ní yùhú-güedé, te ní sani ñí-güedé sá díco ñ<sup>n</sup> espíritú cúú sá ndéhe-güedé ní cùu.

<sup>38</sup> Dico Jesús ní xáha<sup>n</sup>-gá xii-güedé:

—¿Ná cuèndá yùhú-ndó, te sàni ñ<sup>n</sup> sani úú ñí-ndó-í? <sup>39</sup> Chí cùndèhe ndaha-í ndihí sáhá-í te quini-ndó nã diu-ni-í. Te chí téndàha ñaha xii-í te cundehe-ndo, te núu

ñ<sup>n</sup> espíritú ndécú yiqui cuñú-xi dàtná ndécú ndihí yùhú —càchí-gá xáha<sup>n</sup>-gá xii-güedé.

<sup>40</sup> Te sátá dúcá<sup>n</sup> ní xáha<sup>n</sup>-gá te ní dánèhé ñáhá-gá xii-güedé ndaha-gá ndihí sáhá-gá.

<sup>41</sup> Te ño ní cuñúhu-güedé, te ní cudíí ñí-güedé sá ndécú-gá tñuú-güedé dico sàni ñ<sup>n</sup> sani úú ñí-güedé, te ní xáha<sup>n</sup> Jesús xii-güedé:

—¿Ndècu ndihí-ndo luha sá cáxí-ó iha ñá? —càchí-gá xáha<sup>n</sup>-gá xii-güedé.

<sup>42</sup> Te ní sáñaha-güedé xii-gá luha chácá ní chíhó, ndihí díta ñúñú ñúhú ndúdí, <sup>43</sup> te ní quehe<sup>n</sup>-gá te ndèhe-güedé ní xexi-gá. <sup>44</sup> Te dàtnùní ní xáha<sup>n</sup>-gá:

—Nchaa sá ní yáha-í-a cùu-xi sá ní cachí tnúhu-í xii-ndo cùtnáhá ndécú ndihí ñaha-gá-í xii-ndo, chí ní cachí-í sá dàcutíi càda-xi nchaa nacuáa cáhá<sup>n</sup>-xi núú tütú ndíi Moisés, ndihí núú tütú ndéé tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndióxi ndéé sanaha, ndihí núú librú Sálmú —càchí-gá xáha<sup>n</sup>-gá xii-güedé.

<sup>45</sup> Te òré-á<sup>n</sup> ní sáñaha-gá sá xini tñuní-güedé, te ní tecú tñuní-güedé nchaa tnúhu cáhá<sup>n</sup>-xi núú tütú Yá Ndióxi. <sup>46</sup> Te ní xáha<sup>n</sup>-gá xii-güedé:

—Duca<sup>n</sup> ndéé tñuní núú tütú Yá Ndióxi sá dàcutíi sá yùhú Crístú cuú-í, te nduu úní ndoto-í. <sup>47</sup> Te ñihí ñuyúí cùtènuu tnúhu ní cáhá<sup>n</sup>-í, dico díhna nuu-gá ñúú Jerusalén nguíta-yu cacunehe ñáhá-yu xii-í, te cáhá<sup>n</sup>-yu nàcuáa ní dánèhé-í-yu, te cùñáhá-yu xii cue ñáyíu sá ná dàndixi túu-yu ñí-yu sá ñá túú quide váha-yu, te dàñá-yu nchaa ichi cuèhé ichi duha ndécú-yu, te natñí-yu ichi Yá Ndióxi, te duca<sup>n</sup> te cada càhnu ñí-gá nchaa yíca cuèchi-yu. <sup>48</sup> Te vitna nchóhó cuu-ndo cue téé cáhá<sup>n</sup> ndáá nchaa nàcuáa ní cuu chí ní xini núú-ndó. <sup>49</sup> Te yùhú tendaha-í Espíritú Yá Ndióxi quixi cundecu ndihí-ndo, chí duca<sup>n</sup> ní cachí-gá. Dico chí cundècu-ni ñúú Jerusalén-á<sup>n</sup> ndéé ná quèxio Espíritú Yá Ndióxi ngúndecu ndihí-ndo cuèndá chindee ñaha-xi xii-ndo cada-ndo nchaa nacuáa ní cáhá<sup>n</sup>-í —càchí-gá xáha<sup>n</sup>-gá xii-güedé.

*Jesús cuándaa-gá andiu*  
(Mr. 16:19-20)

<sup>50</sup> Te Jesús ní queñuhu ñaha-gá xii-güedé ñúú Jerusalén ndécá ñaha-gá cuáhá<sup>n</sup> ñúú Bètaniá, te xiá<sup>n</sup> ní ndonehe-gá ndaha-gá núú ñnu, te ní xícá<sup>n</sup> táhú ñaha-gá xii-güedé núú Yá Ndióxi. <sup>51</sup> Te sátá ní xicá<sup>n</sup> táhú ñaha-gá xii-güedé núú Yá Ndióxi, te ní quee-gá tñuú-güedé cuándaa-gá andiu. <sup>52</sup> Te ní nguíta-güedé ní cachí-güedé sá ño càhnu cuu Jesús, te ní natñi-güedé ichi cuánuhú-güedé ñúú Jerusalén, te súúni cùdíí ñí-güedé ñúhú-güedé ichi. <sup>53</sup> Te nchaa nduu ní xíndecu-güedé veñúhu càhnu sá ño cùnuu ní ndacá<sup>n</sup> táhú-güedé núú Yá Ndióxi, te ní

cachí-güedé sá ño càhnu cuu-gá. Duha ní cuu  
dává-á<sup>n</sup>.

## TNÚHU NÍ CHÍDÓ TǸNÍ TÈ JUÁÁ

*Déhe Yá Ndióxi ní cuu-gá ìn̄ ñáyíu*

<sup>1</sup> Cùmání-gá ngáva ñuyíu, te sa ndècu ndihí Yá Ndióxi Déhe-gá. Te ìn̄-ni xícuu-gá. Te Déhe-gá-án̄ ní cuu-gá dàtná ìn̄ tnúhu, chí ní cachí tnúhu-gá nàcuáa càa Tátá-gá Dútú Ndióxi. <sup>2</sup> Te sa ndècu-gá ndihí Dútú Ndióxi te ní ngáva ñuyíu. <sup>3</sup> Te òu-ni tnúhu mee Dútú Ndióxi ní cuu ní cadúha Déhe-gá nchaa sá ío ñuyíu. Te núu ñá túú Déhe-gá ñá, te ñá túú ná coo ñuyíu-a ní cùu. <sup>4</sup> Te òu-ni Déhe-gá quidè-gá ndécú-ò, te ní dáyèhé-gá iní-ò nàcuáa cundecu-o. <sup>5</sup> Te tnúhu-gá ní xítè nuu-xi núú ndécú nchaa ñáyíu ñúhu íchi cuehé ichi duha. Te ñáyíu-án̄ cùu-yu dàtná cue ñáyíu ndècu ìn̄ núú néé, te òu-ni-yu cachí iní-yu xocání-yu tnúhu-gá dico vá ndácú-yu.

<sup>6-7</sup> Te ní xíndecu ìn̄ tée ní xínani-dé Juáá, te tée-án̄ ní táuchíú<sup>n</sup> Yá Ndióxi sá càhá<sup>n</sup>-dé tnúhu-gá núú ñáyíu. Te ní xáha<sup>n</sup>-dè xii-yu sá véxi Déhe-gá ñuyíu-a, te dandixi túu-gá iní-yu cuèndá cutnùni iní-yu nàcuáa ndúu cuèndá Yá Ndióxi cuèndá quíndáá iní-yu tnúhu-gá. <sup>8</sup> Te ñá díú mee té Juáá ní dándixi túu-dé iní-yu cuèndá cutnùni iní-yu nàcuáa ndúu cuèndá Yá Ndióxi, chí cuèndá-ni ní xica cuu-dé ní càhá<sup>n</sup>-dé sá Déhe Yá Ndióxi véxi-gá dandixi túu-gá iní-yu. <sup>9</sup> Te ndáá ndisa sá mée-gá dándixi túu-gá iní ñáyíu ñuyíu-a cuèndá cutnùni iní-yu nàcuáa ndúu cuèndá Yá Ndióxi.

<sup>10</sup> Te ní xíndecu-gá ñuyíu-a, te ñáyíu ñuyíu-a ñá ní cùtnuní iní-yu yoo cùu-gá, te òu-ni mee-gá ní cadúha-gá ñuyíu-a ní quide-gá chiú<sup>n</sup> ní táhú Dútú Ndióxi. <sup>11</sup> Te ní quixi-gá ñuyíu ní cadúha mee-gá, dico cue ñáyíu ñuyíu-a ñá ní cùu váha iní-yu núú-gá. <sup>12</sup> Dico davá-yu ní sándáá iní ñáhá-yu xii-gá, te ní nduu táhú-yu ní nduu déhe ñaha Yá Ndióxi xii-yu. <sup>13</sup> Te ñá túú ní ndúu déhe ñaha-gá xii-yu sá cùu-yu déhe ñáyíu ñuyíu-a, àdi sá ndécú tátá-yu, náná-yu chí mee Yá Ndióxi duca<sup>n</sup> ní cuiní-gá cunduu sá ndúú déhe ñaha-gá xii-yu.

<sup>14</sup> Te Déhe-gá ní quixi túu-gá ñuyíu-a, te ní cuu-gá ìn̄ yiqúu cùñú ní xíndecu ndihí ñaha-gá xii nchoo cuè ñáyíu ní xica cuu túu ndihí-gá. Te ní xiní-ò sá ío càhnu cuu-gá cuèndá sá ìn̄ dìi díi-ni-gá cùú-gá Déhe Yá Ndióxi, te ío cùndahú iní ñáhá-gá chindèe ñaha-gá xii nchoo ñáyíu ndècu ñuyíu-a, te ío ndáá càhá<sup>n</sup>-gá. <sup>15</sup> Te duha ní càhá<sup>n</sup> té Juáá cuèndá Déhe Yá Ndióxi ní xáha<sup>n</sup>-dè xii ñáyíu.

—Cuèndá tée iha ní càhá<sup>n</sup>-í ndéé càni-gá ní cachí-í sá quíxí ìn̄ tée quixi. Te tée-án̄

cùnuu-gá-dé, chí díhna-gá-dé sa ndècu-dé dàcúxí yùhú —duha ní xáha<sup>n</sup>-dè xii-yu.

<sup>16</sup> Te ío váha iní Yáá-án̄ chí xitò ñaha-gá xii-o nchaa-o ìn̄ nduu ìn̄ nduu. <sup>17</sup> Te ndíi Moisés ní cachí tnúhu ndíi tnúhu Yá Ndióxi tnúhu sá sánú ichi ñaha xii-o nacuáa cundecu-o, dico Déhe-gá Xitohó Jesucristú ní cachí-gá sá ío cùu iní ñáhá Yá Ndióxi xii-o. Te ní càhá<sup>n</sup>-gá nchaa dava-gá tnúhu ndáá. <sup>18</sup> Te ñá ìn̄ ñáyíu xiní túu-yu Yá Ndióxi. Dico ìn̄ dìi díi-ni Déhe-gá Yáá ndécú ndihí-gá càchí tnúhu-gá nàcuáa càa-gá.

*Té Juáá tée dàcuandute ñaha xii ñáyíu càhá<sup>n</sup> váha-dé cuèndá Xitohó Jesucristú*

*(Mt. 3:11-12; Mr. 1:7-8; Lc. 3:15-17)*

<sup>19</sup> Te cue tée isráel ndécú ñúu Jerusalén ní tendaha-güedé cue dútú ndihí cue tée cùu levítá cuáhá<sup>n</sup>-güedé núú ndécú té Juáá ndécú tnúhu-güedé núú-dè núu ná tée cùu-dé. <sup>20</sup> Te ní càhá<sup>n</sup> ndáá-dé ní xáha<sup>n</sup>-dè xii-güedé:

—Yúhú, ñá díú Cristú Yáá ní tendaha Yá Ndióxi véxi ñuyíu-a cùu-í —càchí-dé xáha<sup>n</sup>-dè.

<sup>21</sup> Te ní xáha<sup>n</sup> tùcu-güedé:

—¿Te yoo cùu yohó vái<sup>n</sup>? ¿Á yohò cùu-n té Èliás? —càchí-güedé xáha<sup>n</sup>-güedé xii-dé.

Te ní xáha<sup>n</sup> té Juáá:

—Yúhú, ñá díú té Èliás cùu-í —càchí-dé xáha<sup>n</sup>-dè.

Te xáha<sup>n</sup> tùcu-güedé:

—¿Te yohò cùu-n tée ní cachí cue tée ndéé sanaha quixi càhá<sup>n</sup> tnúhu Yá Ndióxi-án̄? —càchí-güedé xáha<sup>n</sup>-güedé xii-dé.

Te ní xáha<sup>n</sup>-dè:

—Ni ñá díú tée-án̄ cùu-í —càchí-dé xáha<sup>n</sup>-dè xii-güedé.

<sup>22</sup> Te ní xáha<sup>n</sup> tùcu-güedé:

—¿Te ná tée cùu yohó vái<sup>n</sup>?, cuèndá duca<sup>n</sup> nàcani tnúhu-ndí núú cuè tée ní tendaha ñaha xii-ndí véxi-ndí, te càhá<sup>n</sup> duu<sup>n</sup>-n núu ná tée cùu-n —cachí-güedé xáha<sup>n</sup>-güedé xii-dé.

<sup>23</sup> Te ní xáha<sup>n</sup> té Juáá:

—Yúhú cùu-í tée xica càhá<sup>n</sup> xití yucu nàcuáa ní càhá<sup>n</sup> ndíi Cháíá, chí ndíi-án̄ ní cachí ndíi: “Chí dání ichi cuehé ichi duha ndècu-ndo te tnú-ndo ichi váha, chí véxi Yáá ío cùnuu”, duha ní cachí ndíi —cachí té Juáá xáha<sup>n</sup>-dè xii-güedé.

<sup>24</sup> Te cue tée ndúcu tnúhu núú té Juáá núu ná tée cùu-dé, cue tée-án̄ ní tendaha ñaha cue tée cùu fariséú xii-güedé. <sup>25</sup> Te ní xáha<sup>n</sup> tùcu-güedé xii té Juáá:

—¿Ná cuèndá dàcuandute-n ñáyíu te núu ñá díú Cristú cùu-n, te ni ñá díú té Èliás, te ni ñá díú tée véxi càhá<sup>n</sup> tnúhu Yá Ndióxi cùu-n vái<sup>n</sup>? —càchí-güedé xáha<sup>n</sup>-güedé xii-dé.

<sup>26-27</sup> Te ní xáha<sup>n</sup> té Juáá:

—Yúhú ní ngódó núu-í dàcuandute-í ñáyíu. Dico nchícú<sup>n</sup> ìn̄ tée véxi, te tée-án̄

cúnü-gá-dé dàcüúxí yühú, chí yúhú cùú-í ìí<sup>n</sup> téé duu<sup>n</sup> duu<sup>n</sup> ñá túú táu nandaxi cuèdicó ñí chàu-dé dico quide-í chiù<sup>n</sup>-dé. Te téé-á<sup>n</sup> sa ñühu tnahá-dé tnuú-ndó dicó-ní sá ñá túú xini-ndó-dé —cächí-dé xáha<sup>n</sup>-dë.

<sup>28</sup> Duha ní cuu ñüú Bètábará ñüú cáá ndàa ingá xio yúte Jòrdán, yàcá<sup>n</sup> ní xindecu té Juàá ní dácuañdute-dé ñáyü.

*Jèsüs quidé càhnu iní-gá nchaa yíca cuèchi ñáyü*

<sup>29</sup> Te nduu tnéé ní xini té Juàá Jèsüs véxi yatni-gá núú ndécú-dé ndihi ñáyü. Te ní xáha<sup>n</sup>-dë xii-yu:

—Chí cündéhe téé-á<sup>n</sup>, chí téé-á<sup>n</sup> cùú-dé Cristú Yaá ní tendaha Yá Ndióxi véxi ñuyúú-a, te véxi-dé cada càhnu iní-dé nchaa yíca cuèchi ñáyü ñuyúú. Te cùú-dé dàtná ìí<sup>n</sup> mbéé quití ío váha iní-xi. <sup>30</sup> Te diu téé-á<sup>n</sup> ní cachí-í sá cánchezí<sup>n</sup>-dé quixi. Te cùnüu-gá-dé dàcüúxí yühú, chí díhna-gá-dé sa ndécú ní cachí-í xii-ndo. <sup>31</sup> Te ní yühú ñá túú xini-í-dé ní cùú, dico xica cuu-í dácuañdute-í ñáyü cuèndá nchaa ñáyü isràél quini ñáhá-yu xii-dé —cächí-dé xáha<sup>n</sup>-dë xii-yu.

<sup>32</sup> Te ní xáha<sup>n</sup> tucu-dé:

—Ní xini-í Espiritú Yá Ndióxi ní quee-xi andü véxi cuu<sup>n</sup>-xi ngúndecu ndihi ñaha-xi xii-dé, te dàtná cáá lómá cáá Espiritú-á<sup>n</sup> véxi cuu<sup>n</sup>-xi. <sup>33</sup> Te yühú ñá túú xini-í-dé ní cùú, dico Yá Ndióxi Yaá ní tendaha ñaha xii-í xicá cùú-í dácuañdute-í ñáyü, Yaá-á<sup>n</sup> ní cachí tñühu-gá sá téé na quini-í ngúndecu ndihi Espiritú-gá sá véxi cuu<sup>n</sup> andü, te téé-á<sup>n</sup> taxi-dé Espiritú-gá cundecu ndihi-o. <sup>34</sup> Te yühú ní xini-í-dé te xini ndáá-í sá Déhe Dütü Ndióxi cùú-dé. Te xiá<sup>n</sup> cächí tñühu-í xii-ndo —cächí té Juàá xáha<sup>n</sup>-dë xii-yu.

*Cue téé díhna nuu xica cuu ndihi Jèsüs*

<sup>35</sup> Te nduu tnéé-á<sup>n</sup> diu-ni xiá<sup>n</sup> ndécú té Juàá ndihi úú cue téé xica cuu ndihi-dé. <sup>36</sup> Te ní xini-dé Jèsüs ñühú-gá ichi, te ní xáha<sup>n</sup>-dë xii cue téé xica cuu ndihi-dé-á<sup>n</sup>:

—Chí cündéhe téé-á<sup>n</sup>, chí téé-á<sup>n</sup> cùú-dé Cristú Yaá ní tendaha Yá Ndióxi véxi ñuyúú-a. Te cùú-dé dàtná ìí<sup>n</sup> mbéé quití ío váha iní-xi —cächí-dé xáha<sup>n</sup>-dë.

<sup>37</sup> Te sá dúcá<sup>n</sup> ní cáhá<sup>n</sup> té Juàá núú cuè téé úú ndihi-dé-á<sup>n</sup> núú ní chinchí<sup>n</sup>-güedé Jèsüs. <sup>38</sup> Te ní nchócótó-gá ndàa sátá-gá, te ní xini-gá sá nchí<sup>n</sup> ñáhá-güedé xii-gá. Te ní xáha<sup>n</sup>-gá xii-güedé:

—¿Ná nándücu-ndo? —cachí-gá xáha<sup>n</sup>-gá xii-güedé.

Te ní xáha<sup>n</sup>-güedé:

—¿Ndéé ndécú-n, Ràbí? —cächí-güedé xáha<sup>n</sup>-güedé xii-gá.

Te Ràbí-á<sup>n</sup> queé-xí Mèstrú tñühu mee-güedé. <sup>39</sup> Te ní xáha<sup>n</sup> Jèsüs xii-güedé:

—Chí nehé te quini-ndó —cächí-gá xáha<sup>n</sup>-gá.

Te ní xica-güedé cuáhá<sup>n</sup>-güedé, te ní quexio-güedé núú quidé véhe-gá. Te ndécú-ni-güedé ndihi-gá ní cuaa, chí dàtná òré caa cümü sacuaa ní sáá-güedé.

<sup>40</sup> Te úú cue téé-á<sup>n</sup> ní tñü-güedé tñühu ní cáhá<sup>n</sup> té Juàá, te ní chinchí<sup>n</sup>-güedé Jèsüs. Te núú úú cue téé-á<sup>n</sup>, ìí<sup>n</sup>-dé nání-dé Ndríxi, te ñani-dé cùú té Ximú, àdi Pelú chí úú diu-dé. <sup>41</sup> Te té Ndríxi-á<sup>n</sup> ní nanducu-ní-dé ñani-dé te ní xáha<sup>n</sup>-dë:

—Ní naníhi-ndí téé cùú Mesías —cächí-dé xáha<sup>n</sup>-dë.

Te Mésías-á<sup>n</sup> queé-xí Cristú tñühu mee-güedé, Yaá ní tendaha Yá Ndióxi véxi ñuyúú-a. <sup>42</sup> Te ndéca té Ndríxi ñani-dé cuáhá<sup>n</sup> núú ndécú Jèsüs. Te òré ní xini ñáhá Jèsüs xii té Ximú, te ní xáha<sup>n</sup>-gá:

—Yòhó cùú-n té Ximú déhe té Jónás, te vitna danàni ñaha-í Cefás xii-n —cächí-gá xáha<sup>n</sup>-gá.

Te Cefás-á<sup>n</sup> queé-xí Pelú tñühu mee-güedé.

*Jèsüs ní cáhá<sup>n</sup>-gá té Lipé ndihi té Natanàel*

<sup>43</sup> Te nduu tnéé ní sani iní-gá quíhí<sup>n</sup>-gá distrítü Galléa. Te ní naníhi-gá ìí<sup>n</sup> téé nani Lipé, te ní xáha<sup>n</sup>-gá xii-dé:

—Néhe ná quíhí<sup>n</sup>-ó núú quíhí<sup>n</sup>-í-a —cächí-gá xáha<sup>n</sup>-gá.

<sup>44</sup> Te té Lipé-á<sup>n</sup> cùú-dé téé ñüú Bètsaidá. Te diu-ni ñüú yàcá<sup>n</sup> cùú ñüú té Ndríxi ndihi té Pelú. <sup>45</sup> Te té Lipé ní naníhi tñáhá-dé ndihi té Natanàel, te ní xáha<sup>n</sup>-dë:

—Ní naníhi-ndí téé dii cuèndú-xi ní chídó tñüni ndíi Moisés ndíi dava-gá cue téé ní xóo cáhá<sup>n</sup> tñühu Yá Ndióxi ndéé sanaha. Te téé-á<sup>n</sup> nání-dé Jèsüs déhe té Chèé, téé ñüú Nazàrèt —cächí-dé xáha<sup>n</sup>-dë.

<sup>46</sup> Te ní xáha<sup>n</sup> té Natanàel xii té Lipé:

—¿Te náa ío váha cáa ñüú Nazàrèt núu da yàcá<sup>n</sup> quee téé cáhá<sup>n</sup> tñühu Yá Ndióxi? —cächí-dé xáha<sup>n</sup>-dë.

Te ní xáha<sup>n</sup> té Lipé:

—Néhe ná quíhí<sup>n</sup>-ó te quini-n —cächí-dé xáha<sup>n</sup>-dë.

<sup>47</sup> Te òré ní xini Jèsüs té Natanàel tá cüyatni-dé cuáhá<sup>n</sup>, te ní cáhá<sup>n</sup>-gá cuèndá-dé te ní cachí-gá:

—Téé véxi-á<sup>n</sup> cùú-dé mei téé isràél, te ñá ìí<sup>n</sup> ndüu dandahú-dé ñáyü —cächí-gá xáha<sup>n</sup>-gá.

<sup>48</sup> Te ní xáha<sup>n</sup> té Natanàel xii Jèsüs:

—¿Te nása náquini ñáhá-n? —cächí-dé xáha<sup>n</sup>-dë.

Te ní xáha<sup>n</sup> Jèsüs:

—Yühú sa ní xini ñáhá-í xii-n òré ndécú-gá-n càha yutnu ngúxí-á<sup>n</sup> te ní té Lipé vátá caná ñaha-gá-dé xii-n òré-á<sup>n</sup> —cächí-gá xáha<sup>n</sup>-gá xii-dé.

<sup>49</sup> Te sá dúcá<sup>n</sup> ní cáhá<sup>n</sup>-gá, núú ní xáha<sup>n</sup> té Natanàel xii-gá:



—Mèstrú, yòhó cúu-n Dêhe Dútú Ndiöxí yíndaha-n ñáiyu isráel —cächí-dé xáha<sup>n</sup>-dê xii-gá.

<sup>50</sup> Te Jèsús ní xáha<sup>n</sup>-gá:

—Cuèndá sá ní xini ñáhà-í xii-n càha yutnu ngúxí xiá<sup>n</sup> iní ñáhá-n, dico cuéhé-gá núú sá quini<sup>n</sup> —cächí-gá xáha<sup>n</sup>-gá xii-dé.

<sup>51</sup> Te ní xáha<sup>n</sup> tùcu-gá:

—Na cächí tnúhu ndáá-í sá sáá nduu, te quini-ndó nacaá<sup>n</sup> andiu. Te quini-ndó cuè espíritu xínú cuèchi núú Yá Ndiöxí sá ndáa nuu-xi quide-xi núú cündècu yúhú Tée cùu ñaní tnáhá-ndó ncháa-ndo —cachí-gá xáha<sup>n</sup>-gá xii-güedé.

## 2

*Vico tnándaha ió ñúú Cànaá*

<sup>1</sup> Te nduu úní sá dúcá<sup>n</sup> ní cuu te ní xóo ñ<sup>n</sup> vico tnándaha ñúú Cànaá, ñ<sup>n</sup> ñúú yíndèhu distritú Galiléa. Te yacá<sup>n</sup> ní xíndecu náná Jèsús. <sup>2</sup> Te tnáhá Jèsús ndihi cue tée xica cuu ndihi-gá ní cáhá<sup>n</sup>-yu cuáhá<sup>n</sup>-gá ndihi-güedé vico-á<sup>n</sup>. <sup>3</sup> Te òré ní ndihi vínú, te ní xáha<sup>n</sup> náná Jèsús xii-gá:

—Ñá túu-gá vínú ndécú ndihí-yu —cächí-a<sup>n</sup> xáha<sup>n</sup>-a<sup>n</sup>.

<sup>4</sup> Te ní xáha<sup>n</sup> Jèsús xii-a<sup>n</sup>:

—Náá, ñá túú xini ñuhu-xi da yúhú cùñaha-n cuèndá vínú-á<sup>n</sup>, chi vátá tnáhá-gá òré quini<sup>n</sup>-yu yoo cùu yúhú —cächí-gá xáha<sup>n</sup>-gá xii-a<sup>n</sup>.

<sup>5</sup> Te ní xáha<sup>n</sup>-a<sup>n</sup> xii ñáiyu xínu cuechi:

—Cada-ndo ncháa nacúa<sup>n</sup> na cáhá<sup>n</sup> Jèsús —cächí-a<sup>n</sup> xáha<sup>n</sup>-a<sup>n</sup>.

<sup>6</sup> Te yacá<sup>n</sup> nútñí ñúú quídi yúú te queé dàtná ñ<sup>n</sup> cièndú lítrú ndute ñ<sup>n</sup> ñ<sup>n</sup> quídi-á<sup>n</sup>. Te ndute-á<sup>n</sup> nándihí ñáiyu isráel ndáhá-yu te nàqueté-yu cóhó-yu chi duca<sup>n</sup> tnàhí quidé-yu nacúa<sup>n</sup> sándáá iní-yu Yá Ndiöxí. <sup>7</sup> Te ní xáha<sup>n</sup> Jèsús xii ncháa cue tée xínu cuechi:

—Nadachitú-ndó ndüte ndi ncháa quídi-á<sup>n</sup> —cächí-gá xáha<sup>n</sup>-gá xii-güedé.

Te ní nadachitú-güedé. <sup>8</sup> Te ní xáha<sup>n</sup>-gá:

—Vitna te tava-ndo lùha, te canehe-ndo quíhí<sup>n</sup> cuáha-ndo tée quide vico —cachí-gá xáha<sup>n</sup>-gá xii-güedé.

Te duca<sup>n</sup> ní quide-güedé ní tava-güedé luha nèhe-güedé cuáhá<sup>n</sup> ní sáha-güedé tée quide vico. <sup>9</sup> Te ní xito ndéé tée quide vico-á<sup>n</sup>, te sa ní nduu-xi vínú, te ñá túú ní xini-dé ndéé véxi-xi, dico mee cuè tée xínu cuechi sa naha-güedé núú ní tava-güedé. Duca<sup>n</sup> te tée quide vico-á<sup>n</sup> ní cana-dé tée tnándaha. <sup>10</sup> Te ní xáha<sup>n</sup>-dê:

—Ncháa ñáiyu quide vico queñuhú-yu díhna-gá vínú váha. Te sa vai vínú váha xihí-yu, te dàtnúni queñuhú-yu vínú ndáhú. Te yòhó díhna-gá vínú ndáhú ní queñuhu-n, te ndéé núú ní ndihí-ná ní queñuhu-n vínú

váha —cächí tée quide vico-á<sup>n</sup> xáha<sup>n</sup>-dê xii tée tnándaha-á<sup>n</sup>.

<sup>11</sup> Te sá ní nadatiu Jèsús ndute-á<sup>n</sup> ní nduu-xi vínú cúu-xí ñ<sup>n</sup> chiú<sup>n</sup> díhna nuu sá vā yòo tnàhí ndàcu cada ní quide-gá ñúú Cànaá, ñ<sup>n</sup> ñúú yíndèhu distritú Galiléa, te chiú<sup>n</sup> ní quide-gá-á<sup>n</sup> cúu-xí ñ<sup>n</sup> chiú<sup>n</sup> cahnu vihi, núú xiá<sup>n</sup> ní cutnùni iní-yu sá ño càhnu cuu-gá, te ní sándáá iní ñáhá ncháa cue tée xica cuu ndihi-gá.

<sup>12</sup> Te sáta ní yáha vico, te ní xica Jèsús ndihi náná-gá, ndihi cue ñaní-gá, ndihi ncháa cue tée xica cuu ndihi-gá cuáhá<sup>n</sup>-yu ñúú Capèrnaúm. Te yacá<sup>n</sup> ní xíndecú-yu ñ<sup>n</sup> úú nduu ndihi-gá.

*Jèsús ñá túú tnáhá iní-gá nacúa quide ñáiyu xití veñúhu*

(Mt. 21:12-13; Mr. 11:15-18; Lc. 19:45-46)

<sup>13</sup> Te ta cùyatni cada ñáiyu isráel vico pàscuá, te ní xica Jèsús cuáhá<sup>n</sup>-gá ñúú Jerusalén. <sup>14</sup> Te sáta ní sáá-gá yacá<sup>n</sup>, te ní xica-gá cuáhá<sup>n</sup>-gá veñúhu càhnu sá ño cùnuu, te xití veñúhu-á<sup>n</sup> ní xini-gá ndécú ñáiyu dicó-yu ndicutu, mbéé ndihi lómá, te tnáhá ñáiyu dàma díhú<sup>n</sup> núú-ò-yu ní xini-gá. <sup>15</sup> Te ní quehe<sup>n</sup>-gá ñ<sup>n</sup> úú yoho, te ní cáunuu tnàha-gá, te ní dáyúhu-gá ñáiyu ní queé-yu quehé veñúhu, ndihi ndicutú-yu ndihi mbéé-yu. Te cue ñáiyu dàma díhú<sup>n</sup>-á<sup>n</sup> ní dāngóyo-gá díhú<sup>n</sup>-yu, te ní dāndúá-gá mēsa-yu. <sup>16</sup> Te ní xáha<sup>n</sup>-gá xii cue ñáiyu dico lómá:

—¡Queñuhu-ndo ncháa quiti-a xití veñúhu-a! ¡Vá cadá-ndó vèhe núú yáhu núú cúú vèhe Tàtá-í Dútú Ndiöxí! —cächí-gá xáha<sup>n</sup>-gá xii-yu.

<sup>17</sup> Te xiá<sup>n</sup> ní ndacu iní cue tée xica cuu ndihi-gá sá dúcá<sup>n</sup> yòdo tnuní núú tùtú-gá, te cächí-xi: “Ío cùyica iní-í chi ñá cuini<sup>n</sup>-yu canehé ñ<sup>n</sup>-yu vèhe Tàtá-í”, duha cächí-xi núú tùtú-gá.

<sup>18</sup> Te ní xáha<sup>n</sup> cuè tée isráel xii-gá:

—¿Ná cúú sá vā yòo tnàhí ndàcu cada, cada-n cuèndá cutnùni iní-ndí sá cúú dùha taxi tnuní ñáhá-n xii-ndí-í? —cächí-güedé xáha<sup>n</sup>-güedé xii-gá.

<sup>19</sup> Te ní xáha<sup>n</sup> Jèsús:

—Chí dāngóyo veñúhu-a, te není xití úní nduu te sa nadaxínu-í —cächí-gá xáha<sup>n</sup>-gá xii-güedé.

<sup>20</sup> Te ní xáha<sup>n</sup> tùcu cue tée isráel:

—Údico ñúú cuíá ní xíndecuu-güedé ní sáá veñúhu-a, te yòhó cuini<sup>n</sup>-n nadaxínu-n xití úní-ni nduu —cächí-güedé xáha<sup>n</sup>-güedé xii-gá.

<sup>21</sup> Dico sá ní cáhá<sup>n</sup>-gá chi ñá díú cuèndá veñúhu ní cáhá<sup>n</sup>-gá chi cuèndá yiqui cùñú-gá ní cáhá<sup>n</sup>-gá. <sup>22</sup> Núú sáta ní xihí-gá, te ní ndoto-gá, te òré-á<sup>n</sup> ní ndacu iní cue tée ní

xica cuu ndihi-gá nàcuáa ní cáhá<sup>n</sup>-gá, núu xiá<sup>n</sup> ní sándáá iní-güedé tnúhu yódo tnuni núú tütú-gá. Te duca<sup>n</sup> te ní sándáá iní-güedé tnúhu ní cáhá<sup>n</sup>-gá.

*Jesús xini-gá nàcuáa cãa iní nchaa ñáyi*

<sup>23</sup> Te öré ndécú Jesús vico pãscuá, te io vai ñáyi ní sándáá iní ñáhá xii-gá cuendá ío titní sá vã yõo tnáhi ndacu cada ní quide-gá ní xini-yu. <sup>24</sup> Dico Jesús ñã ní cáhá<sup>n</sup>-gá nchaa tnúhu ñúhu iní-gá, chi sa ní cutnuni iní-gá sã ñã tũú cùu váha iní-yu. <sup>25</sup> Te ñã tũú xini ñúhu-gá íu<sup>n</sup> ñáyi cúnaha nãcuáa cãa iní nchaa tnáha ñáyi-yu, chi mee-gã sa ñaha ndáá-gá nãcuáa cãa iní-yu nchaa-yu.

### 3

*Jesús ndihi té Nicodemú*

<sup>1</sup> Ní xindecu íu<sup>n</sup> té cùu fariséu ní xínani-dé Nicodemú, te ní cuu-dé íu<sup>n</sup> té cùnuu núú ñáyi isráel. <sup>2</sup> Te téé-ã ní sáhã-dé niú ní cáhá<sup>n</sup> ndihi-dé Jesús, te ní xáha<sup>n</sup>-dè:

—Mèstrú, yúhú ndihi dava-gã-güedé sa ñaha-ndí sã Yã Ndióxi ní tendaha ñaha-gá xii-n vëxi-n dãnehé ñáhã-n xii-ndí, chi núu ñã tũú Yã Ndióxi ndécú ndihi-n, te vã ndácú-n cãda-n nchaa sã vã yõo tnáhi ndacu cada quide-n —cachí-dé xáha<sup>n</sup>-dè.

<sup>3</sup> Te ní xáha<sup>n</sup> Jesús:

—Na cachí tnúhu ndáá-í xii-n sã ncháá ñáyi vã ná cãcu saa tucu, te vã ndihu ndaha ñaha Yã Ndióxi xii-yu —cachí-gã xáha<sup>n</sup>-gã xii-dé.

<sup>4</sup> Te ní xáha<sup>n</sup> tè Nicodemú:

—¿Te nása cada íu<sup>n</sup> ñáyi sa ní yí te cacu-ni tucú-yu? ¿Náa ndihu tucú-yu xiti ñãñã-yu te cacu tucú-yu xito cùu uú-ã<sup>n</sup>? —cachí-dé xáha<sup>n</sup>-dè xii-gã.

<sup>5</sup> Te ní xáha<sup>n</sup> Jesús:

—Na cachí tnúhu ndáá-í xii-n sã nchaa ñáyi na ndùu ndoo nduu nine iní-xi cuú-yu ñáyi ní na cãcu saa ndihi ndute ndihi Espiritú Yã Ndióxi, ñáyi-ã<sup>n</sup> ndihu ndaha ñaha-gã xii-yu. <sup>6</sup> Te nchaa ñáyi cãcu ñuyú-a, chi déhe ñáyi ñuyú-a cùu-yu. Te ñáyi ní nduu ndoo ní nduu nine iní-xi, ñáyi-ã<sup>n</sup> ní nduu táhú-yu Espiritú Yã Ndióxi te táxi tnuni ñáhã-nã Espiritú-gã xii-yu. <sup>7</sup> Te vã cúnúhu-n tnúhu ní cáhá<sup>n</sup>-í-a, chi nchaa ñáyi ní sándáá iní ñáhã xii-í ní nduu ndoo ní nduu nine iní-yu, te ñáyi-ã<sup>n</sup> cùu-yu dàtnã ñáyi ní nacacu saa. <sup>8</sup> Táchi ndèni xiá<sup>n</sup> təcú dóho-o xico-xi, dico ñã tũú xini-ó ndèé ichi véxi-xi, te ní ñã tũú xini-ó ndèé ichi cuáhã-xi. Duca<sup>n</sup> sãtnahã-xi cùu Espiritú-gã ndécú ndihi ñáyi ní nduu ndoo ní nduu nine iní-xi —cachí-gã xáha<sup>n</sup>-gã xii-dé.

<sup>9</sup> Te dàtnuni ní xicã<sup>n</sup> tnúhú tucu té Nicodemú núú-gã, te xáha<sup>n</sup>-dè xii-gã:

—¿Te nása ndùu tnúhu cáhá<sup>n</sup>-n dùca<sup>n</sup> cahã<sup>n</sup>-n? —cachí-dé xáha<sup>n</sup>-dè xii-gã.

<sup>10</sup> Te ní xáha<sup>n</sup> Jesús:

—Yòhó cùu-n íu<sup>n</sup> té cùtnuni iní-xi, chi dàcuaha-n ñáyi isráel, ¿te ñã təcú tnuni-n tnúhu cáhá<sup>n</sup>-í-u? <sup>11</sup> Te na cãchí tnúhu ndáá-í xii-n sã nchúhú cáhá<sup>n</sup>-ndí íu<sup>n</sup> sã ní təcú tnuni-ndí, te cáhá<sup>n</sup> ndáá-ndí cuendá íu<sup>n</sup> sã ní xini-ndí. Dico nchòhó ñã təcú tnuni-ndó tnúhu cáhá<sup>n</sup>-ndí. <sup>12</sup> Te ñã sándáá iní-ndó tnúhu cáhá<sup>n</sup>-í cuendá nchaa nãcuáa cùu ñuyú-a, te uu<sup>n</sup>-gã cada-ndo núu cáhá<sup>n</sup>-í cuendá nchaa nãcuáa cùu andiú.

<sup>13</sup> Vã yõo íu<sup>n</sup> sãã andiú, te cani-xi cuendú nãcuáa cãa. Chi íu<sup>n</sup> dií-ni yúhú véxi cuu<sup>n</sup>-í andiú, te cùu-í ñani tnáhã-ndo nchaa-ndo. Te diu-ni yãcã<sup>n</sup> ndaa-í cundecu-í. <sup>14</sup> Te dàtnã ní ndanehe ndí Moisés cóo ní sata caa ndí-di xiti yucu, duca<sup>n</sup> cãda ñaha-güedé cata caa ñaha-güedé núu cùruxí xii yúhú Té cùu ñani tnáhã-ndo nchaa-ndo íu<sup>n</sup> nduu. <sup>15</sup> Te duca<sup>n</sup> yãha-í cuendá nchaa ñáyi na quindáá iní ñáhã xii-í te nduu táhú-yu cundecu-yu ndihi Yã Ndióxi ní caa ní quíhí<sup>n</sup> —cachí-gã xáha<sup>n</sup>-gã xii-dé.

*Yã Ndióxi ío cùu iní-gã ñáyi ñuyú-a*

<sup>16</sup> Te Yã Ndióxi ío cùu iní-gã ñáyi ñuyú-a. Te íu<sup>n</sup> dií-ni Déhe-gã ndécú, te ní tendaha ñaha-gã ní quixi-gã ñuyú-a, te núu na quindáá iní ñáhã ñáyi, te vã cuíta nihnú-yu, chi nduu táhú-yu cundecu-yu ndihi-gã ní caa ní quíhí<sup>n</sup>. <sup>17</sup> Te Yã Ndióxi ñã tũú ní tendaha-gã Déhe-gã quixi-gã ñuyú-a dacuíta nihnu-gã ñáyi, chi ní tendaha-gã Déhe-gã ní quixi-gã sã dácacu nihnu-gã ñáyi ñuyú-a núu ùhú núu ndàhú.

<sup>18</sup> Nchaa ñáyi sándáá iní ñáhã xii Déhe-gã, te vã cuíta nihnú-yu. Te nchaa ñáyi ñã tũú sándáá iní ñáhã xii Déhe-gã ñúhú-yu ichi cuáhã<sup>n</sup>-yu núu ùhú núu ndàhú, chi ñã tũú sándáá iní-yu Déhe Dütú Ndióxi. <sup>19</sup> Chi ní quixi Déhe-gã ñuyú-a ní dándíxi tũu-gã iní-yu cuendá cutnuni iní-yu nãcuáa ndùu cuendá Yã Ndióxi te tniú-yu íu<sup>n</sup> ichi váha ní cùu, te ñã ní tnáhã iní-yu, chi ní cudí-gã iní-yu nchaa sã cuèhé sã dúhá dácúxí sã váha, núu xiã<sup>n</sup> tá xita nihnú-yu cuáhã<sup>n</sup>. <sup>20</sup> Te nchaa ñáyi quide nchaa sã cuèhé sã dúhá ñã tnáhã iní-yu cutnuni iní-yu nãcuáa ndùu cuendá Yã Ndióxi, te ñã tniú-yu tnúhu-gã cuendá yúhú-yu nduu tnuni nchaa sã quidè-yu. <sup>21</sup> Te nchaa ñáyi ñúhu ichi ndáá cuní-yu cutnuni iní-yu nãcuáa ndùu cuendá Yã Ndióxi, te cutnuni sã chindèe ñaha-gã xii-yu, chi quide váha-yu.

*Té Juáã tée dàcuandute ñaha xii ñáyi cáhá<sup>n</sup> váha tucu-dé cuendá Jesús*

<sup>22</sup> Te sãtã ducã<sup>n</sup> ní cuu, te ní quee Jesús cuáhã<sup>n</sup>-gã ndihi cue té xica cuu ndihi-gã dístrítu Judeá. Te yãcã<sup>n</sup> ní xindecu tnaa-gã ndihi-güedé ní xóo dacuandute-güedé ñáyi. <sup>23</sup> Te ndècu té Juáã íu<sup>n</sup> xichi núu ñãní Ènon

yatni ñuú Sálém dácuañdute-dé ñáiyu, chi yáca<sup>n</sup> ío váha ñuhu ndute, núu xiá<sup>n</sup> ní xóo quíhí<sup>n</sup> ñáiyu yáca<sup>n</sup> ní xóo cuanduté-yu. <sup>24</sup>Duha ní cuu cútnhá váta ngává-gá té Juáa veaca.

<sup>25</sup>Te ní cacu ñ<sup>n</sup> cuéndú ní cáhá<sup>n</sup> cue téé xica cuu ndihi té Juáa ndihi ñ<sup>n</sup> úú cue téé isrâél, núu ndédacaá sá váha-gá cada ñáiyu cuéndá nduu í-yu. <sup>26</sup>Te ní sáhá<sup>n</sup>-güedé núu ndécú té Juáa ní xáha<sup>n</sup>-güedé:

—Mèstrú, téé ní quixi núu ní xíndecu-n ndaa ingá xio yúte Jórdán, téé dii cuéndú-xi ní cáhá<sup>n</sup>-n, téé-á<sup>n</sup> dácuañdute-dé tnáhá-dé ñáiyu. Te ío vai ñáiyu ní chinchícú<sup>n</sup> ñáhá xii-dé —cáchi-güedé xáha<sup>n</sup>-güedé xii-dé.

<sup>27</sup>Te ní xáha<sup>n</sup> té Juáa:

—Te vá yóo ñ<sup>n</sup> ndacu cada ñ<sup>n</sup> chiu<sup>n</sup> nacuaá cuu váha iní Yá Ndióxi, te núu ñá túú mée-gá chindé ñaha-gá xii-yu. <sup>28</sup>Te nchóhó sa ñaha-ndo sá yúhú ní cáhá<sup>n</sup> ndáá-í sá ñà díú Cristú cuú-í, dico mee Yá Ndióxi ní tendaha ñaha-gá yódo núu-í véxi núu Yáa-á<sup>n</sup>. <sup>29</sup>Te nchóhó xini-ndo sá ñ<sup>n</sup> tee tnándaha te xíchi tnándaha ndihi-ná-dé cúndihí-dé. Te téé ní xica ndáhú ío cùdíí iní-dé ndédóho-dé nchaa tnúhu cáhá<sup>n</sup> téé tnándaha-á<sup>n</sup>. Te duca<sup>n</sup> sátnahá-xi cuu yúhú, chi ío cùdíí iní-í sá vái ñáiyu ta chinchícú<sup>n</sup> ñáhá xii Jesús cuahá<sup>n</sup>. <sup>30</sup>Te uu<sup>n</sup>-gá cuita cuu vai ñáiyu cutnùní iní-xi sá ío cùnuu-gá, te yúhú cuita ndóo ndee-í quíhí<sup>n</sup> —cáchi-dé xáha<sup>n</sup>-dè xii-güedé.

#### *Cristú véxi cuu<sup>n</sup>-gá andiu*

<sup>31</sup>Te ñ<sup>n</sup> dii díí-ni Cristú Yáa véxi cuu<sup>n</sup> andiu cùnuu-gá núu ñuyú-a. Te nchaa ñáiyu ndécu ñuyú-a cuú-yu ñáiyu ñuyú íha, te cáhá<sup>n</sup>-yu sá cuú-xi ñuyú-a. Dico Cristú Yáa véxi cuu<sup>n</sup> andiu <sup>32</sup>cáhá<sup>n</sup>-gá ñ<sup>n</sup> sá ní xini-gá, te cáhá<sup>n</sup>-gá ñ<sup>n</sup> sá ní tecú dóho-gá. Te ñá túú cuíni-yu quindáa iní-yu tnúhu cáhá<sup>n</sup>-gá. <sup>33</sup>Te nchaa ñáiyu tnúhu cáhá<sup>n</sup> Yáa véxi cuu<sup>n</sup> andiu-á<sup>n</sup> cáhá<sup>n</sup>-yu sá tnúhu Yá Ndióxi cuú-xi ñ<sup>n</sup> sá ndáa. <sup>34</sup>Te Déhe-gá Yáa véxi cuu<sup>n</sup> andiu cáhá<sup>n</sup>-gá mee-ni tnúhu-gá. Te ñá ùhú iní-gá ní sañaha-gá Espiritú-gá ndécú ndihi Déhe-gá. <sup>35</sup>Te Dútú Ndióxi ío cuu iní-gá Déhe-gá, núu ní xáha<sup>n</sup>-gá sá mée-gá taxi tnúni-gá nchaandi túhú sá ío. <sup>36</sup>Te nchaa ñáiyu na quindáa iní ñáhá xii Déhe-gá, ñáiyu-á<sup>n</sup> cundecú-yu ndihi-gá ní caa ní quíhí<sup>n</sup>. Te nchaa ñáiyu vá quindáa iní ñáhá xii Déhe Yá Ndióxi ío dandóho ñaha-gá xii-yu.

## 4

### *Jesús ndihi ñ<sup>n</sup> ñaha Sámariá*

<sup>1</sup>Te ní níhí cue téé cuu fariséu tnúhu sá vai-gá ñáiyu ta chinchícú<sup>n</sup> ñáhá xii Jesús. Te duca<sup>n</sup> vai-gá-yu ta dácuañdute-gá cuahá<sup>n</sup> dácúxí té Juáa. <sup>2</sup>Te cuéi ñá díú mée-gá

dácuañdute ñaha-gá xii-yu, dico cue téé xica cuu ndihi-gá dácuañdute ñaha-güedé xii-yu. <sup>3</sup>Te ní níhí Jesús tnúhu nacuaá cáhá<sup>n</sup> cue téé cuu fariséu, núu ní ndee-gá distritú Jüdeá cuánuhú tucu-gá distritú Galilea.

<sup>4</sup>Te ichi ñuhu-gá ní nayaha-gá distritú Sámariá. <sup>5</sup>Te ní sáa-gá ñ<sup>n</sup> ñuú nání Sicár te ñuú-á<sup>n</sup> yíndèhu-xi distritú Sámariá. Te xiá<sup>n</sup> cáá yatni ñuhu núu ní sáha táhú ndíi Jácób déhe ndíi ndíi Chèé. <sup>6</sup>Te yáca<sup>n</sup> cáá dòco ní cuu cuéndá ndíi Jácób. Te cuu-xi datná cuádava nduu ñuhu Jesús ichi, te ío ní xáú-gá núu ní sáa-gá yuhu dòco-á<sup>n</sup> ní ngóo-gá ndétátú-gá. <sup>7-8</sup>Te ní xica cue téé xica cuu ndihi-gá cuahá<sup>n</sup>-güedé xiti ñuú Sicár cuánguaa<sup>n</sup>-güedé sá cáxi-güedé. Te yuhu dòco-á<sup>n</sup> núcoo-gá ní sáa ñ<sup>n</sup> ñadihí ñaha distritú Sámariá véxi quèhmu-a<sup>n</sup> ndute, te ní xáha<sup>n</sup> Jesús:

—Taxi táhú luha ndute na cohó-í —cáchi-gá xáha<sup>n</sup>-gá.

<sup>9</sup>Te ní xáha<sup>n</sup> ñadihí-á<sup>n</sup>:

—¿Ná cuéndá da núu-í xicá<sup>n</sup>-n ndüte cohó-n? Te yòhó cuú-n téé isrâél, te yúhú cuú-í ñaha Sámariá —cáchi-a<sup>n</sup> xáha<sup>n</sup>-a<sup>n</sup> xii-gá.

Te duca<sup>n</sup> ní xáha<sup>n</sup>-a<sup>n</sup>, chi ñá túú ndécu váha ñáiyu isrâél ndihi ñáiyu distritú Sámariá. <sup>10</sup>Te ní xáha<sup>n</sup> Jesús xii-a<sup>n</sup>:

—Ñá cútnúni iní-n ná taxi Yá Ndióxi xii-n, te ní ñá cútnúni iní-n yóo xicá<sup>n</sup> ndute núu-n. Te núu dicó xini-n yóo cuu yúhú á, te da mee-n cáca<sup>n</sup>-n ndüte núu-í cohó-n, te yúhú taxi-í ndute cundecu ndihi-n núu cuahá<sup>n</sup> núu véxi —cáchi-gá xáha<sup>n</sup>-gá.

<sup>11</sup>Te ní xáha<sup>n</sup> túcu ñadihí-á<sup>n</sup>:

—Tátá, ní sá quèhmu-n ndüte ñá túú nèhe-n, te doco-a cùnú víhí, te ñá túú ndéé quínguehe<sup>n</sup>-n ndüte taxi-n cohó-í. <sup>12</sup>Ndíi Jácób ñani tnáhá-ndí ní xíndecu ndéé sanaha ní cadúha ndíi doco-a ní tóo ndute ní xihí ndíi, ndihi nchaa déhe ndíi, ndihi nchaa quiti ndíi, te ní ndóo cuu cuendá-ndí. ¿Te násai, te yòhó cùnú-gá-n dácúxí ndíi-á<sup>n</sup>? —cáchi-a<sup>n</sup> xáha<sup>n</sup>-a<sup>n</sup> xii-gá.

<sup>13</sup>Te ní xáha<sup>n</sup> Jesús:

—Nchaa ñáiyu xihí ndute doco-a, te vá cuú vétú dúcá<sup>n</sup> iní-yu chi dayíchi ñáhá-ní túcu-xi ndute-a. <sup>14</sup>Dico nchaa ñáiyu na cohó ndute na cuañaha-í, te vá ñ<sup>n</sup> ndúu-gá dayíchi ñáhá-xí ndüte-á<sup>n</sup> xii-yu, chi ndute cuañaha-í cuú-xi ndüte váha-gá. Te datná quée níhni ndute xiti doco-a, nchaa-ni nduu ñuhu ñá túú yíchi, duca<sup>n</sup> sátnahá-xi cada-xi chi candeca-xi iní-yu ní caa ní quíhí<sup>n</sup>, te núu na cohó-yu ndute cuañaha yúhú —cáchi-gá xáha<sup>n</sup>-gá xii-a<sup>n</sup>.

<sup>15</sup>Te ní xáha<sup>n</sup>-a<sup>n</sup>:

—Tátá, taxi ndute-á<sup>n</sup> ná cohó-í cuéndá sá vá dayíchi ñáhá tnáhí-gá-xi ndute. Te vá

quixí-gã-í quixi quéhnu-í ndute doco-a — cächí-a<sup>n</sup> xáha<sup>n</sup>-a<sup>n</sup> xii-gã.

<sup>16</sup> Te ní xáha<sup>n</sup> Jësús:

—Cuáhá<sup>n</sup> cuángana yii-n, te quixi-ndo lha — cächí-gã xáha<sup>n</sup>-gã xii-a<sup>n</sup>.

<sup>17</sup> Te ní xáha<sup>n</sup>-a<sup>n</sup>:

—Ñã túú yii-í — cächí-a<sup>n</sup> xáha<sup>n</sup>-a<sup>n</sup> xii-gã.

Te ní xáha<sup>n</sup> túcu Jësús:

—Ndáá cãhá<sup>n</sup>-n sã ñã túú yii-n. <sup>18</sup> Dico ní cuu úhú<sup>n</sup> tée cãndeca-n, te tée ndéca-n vitna chí ñã díú yii-n cuu-dé, te ndáá cãhá<sup>n</sup>-n sã ñã túú yii-n — cächí-gã xáha<sup>n</sup>-gã xii-a<sup>n</sup>.

<sup>19</sup> Te sã dúcá<sup>n</sup> ní xáha<sup>n</sup>-gã núu ní xáha<sup>n</sup> túcu-a<sup>n</sup>:

—Tátá, yúhú sání iní-í sã yòhó cúú-n ì<sup>n</sup> tée cãhá<sup>n</sup> tnúhu Yá Ndióxi. <sup>20</sup> Te cue ñani tnáhá-ndí ní xindecu ndéé sanaha ní xoo cada cãhnú-yu Yá Ndióxi tindúú-a, dico nchòhó ñáyiu isràél cächí-ndó sã ndéé ñúú Jerusálén cada cãhnu-o-gã — cächí-a<sup>n</sup> xáha<sup>n</sup>-a<sup>n</sup> xii-gã.

<sup>21</sup> Te ní xáha<sup>n</sup> Jësús xii-a<sup>n</sup>:

—Ì<sup>n</sup> tnúhu na cãhá<sup>n</sup>-í-a, te quindáá iní-n. Sa ta cùyatni sáá nduu sã ñã díú-gã mee-ni tindúú-a, te ni ñã díú-gã mee-ni ñúú Jerusálén cada cãhnu-ndo Tátá-ó Dútú Ndióxi, chi ndéni ní cuu cada cãhnu-ndo-gã.

<sup>22</sup> Te nchòhó cue ñáyiu Sãmariá chí ñã cútñuní iní-ndó nã cúú sã quidé cãhnu-ndo, dico nchúhú ñáyiu isràél, chí cútñuní iní-ndí ná cúú sã quidé cãhnu-ndí. Chí ì<sup>n</sup> tée isràél véxi-dé dàccacu nihnu-dé ñáyiu cuendá vá quihí<sup>n</sup>-yu núú úhú núú ndáhú. <sup>23</sup> Te není vitna ngúita-yu cada cãhnu ndisá-yu Tátá-ó Dútú Ndióxi, te cadá-yu ni yúhu ni iní-yu sã cúú-xí-gã, chí mee-gã duca<sup>n</sup> cuení-gã cadá-yu cada cãhnú-yu-gã. <sup>24</sup> Te Yá Ndióxi chí ì<sup>n</sup> espíritú cúú-gã. Te nchaa ñáyiu na cada cãhnu ñaha, te cadá-yu ni yúhu ni iní-yu sã cúú-xí-gã te cadá-yu dàtná cãhá<sup>n</sup> tnúhu-gã — cächí-gã xáha<sup>n</sup>-gã xii-a<sup>n</sup>.

<sup>25</sup> Te ní xáha<sup>n</sup> ñadihí<sup>n</sup>-á<sup>n</sup>:

—Xini-í sã quixí tée cuu Mesías, tée cächí-güedé nání Cristú. Te tée-á<sup>n</sup> nã sàá-dé, te cächí tnúhu ndáá-dé nãcuáa cuu — cächí-a<sup>n</sup> xáha<sup>n</sup>-a<sup>n</sup> xii-gã.

<sup>26</sup> Te ní xáha<sup>n</sup> Jësús:

—Diu tée-á<sup>n</sup> cúú yúhú tée ndátñúhu ndihi-n — cächí-gã xáha<sup>n</sup>-gã xii-a<sup>n</sup>.

<sup>27</sup> Te òré-á<sup>n</sup> ní ndexio cue tée xica cuu ndihi-gã, te ní cuñúhu-güedé sã ndátñúhu-gã ndihi ñadihí<sup>n</sup>-á<sup>n</sup>. Dico ní ì<sup>n</sup>-güedé ñã ní xicá<sup>n</sup> tnúhú-güedé núú-gã núu nã cuendú ndátñúhu-gã ndihi ñadihí<sup>n</sup>-á<sup>n</sup>. <sup>28</sup> Duca<sup>n</sup> te ní dándóo ñadihí<sup>n</sup>-á<sup>n</sup> yoó ndute-a<sup>n</sup> xicá<sup>n</sup>, te ní xica-a<sup>n</sup> cuánuhú-a<sup>n</sup> ñúú cútñúhu-a<sup>n</sup> ñáyiu cuendá Jësús. <sup>29</sup> Te ní xáha<sup>n</sup>-a<sup>n</sup>:

—Chí nèhé ná quihí<sup>n</sup>-ó, chí quini-ndó nã cúú ì<sup>n</sup> tée núcóo yuhu dòco-á<sup>n</sup> núu ñã díú Cristú Yáá ní tendaha Yá Ndióxi véxi ñuyú-a

cúu-dé núu ní cãhá<sup>n</sup> ndáá-dé nãcuáa cuu ndecu-í — cächí-a<sup>n</sup> xáha<sup>n</sup>-a<sup>n</sup> xii-yu.

<sup>30</sup> Te sã ní nihí ñáyiu ñúú-á<sup>n</sup> tnúhu, xicá<sup>n</sup> ní xicá-yu cuáhá<sup>n</sup>-yu. <sup>31</sup> Te òré vátá sàá-gã-yu xicá<sup>n</sup> ní xáha<sup>n</sup> cué tée xica cuu ndihi-gã xii-gã:

—Métrú, cudèñhu na cudeñhu-o — cächí-güedé xáha<sup>n</sup>-güedé xii-gã.

<sup>32</sup> Te ní xáha<sup>n</sup>-gã:

—Ndécu ì<sup>n</sup> sã cãxi-í, ì<sup>n</sup> sã ñã túú xini nchòhó — cächí-gã xáha<sup>n</sup>-gã xii-güedé.

<sup>33</sup> Te cue tée xica cuu ndihi-gã xitnaha-güedé:

—Vaa íó ñáyiu ní quixi nehe sã ní xexi-gã núu duha cãhá<sup>n</sup>-gã — cächí-güedé xitnaha-güedé.

<sup>34</sup> Te ní xáha<sup>n</sup>-gã:

—Dàtná cuení-ndó cuu vétú iní-ó òré xéxi-ó, duca<sup>n</sup> cuu vétú iní-í quidé-í nchaa nãcuáa ní cãhá<sup>n</sup> Yá Ndióxi Yáá ní tendaha ñaha xii-í véxi-í ñuyúú-a, te chiú<sup>n</sup>-gã ío cudií iní-í dandihí-í. <sup>35</sup> Te nchòhó cächí-ndó sã cãmání cümü-gã yoó te cuu itú. Dico yúhú cächí-í sã cundehe-ndo ñáyiu-á<sup>n</sup>, chí sa ndécu túha-yu, dàtná cúú-nã itú sã sã ní cuu-ná natahu-o cúú-yu, chí sa ndécu túha-ná-yu cundedóho-yu tnúhu-í. <sup>36</sup> Te dàtná cúú ñáyiu nãtahu itú chí sa cúhu<sup>n</sup> yáhu-yu, duca<sup>n</sup> sãtnahá-xi cuu ñáyiu na cãhá<sup>n</sup> tnúhu-í, chí cuãñaha-í sã ndúú tãhú-yu na sãá nduu.

Te nchaa ñáyiu na tñi tnúhu-í te nduu tãhú-yu cundecu-í ndihi-yu ni caa ní quihí<sup>n</sup>. Te dàtná cúú ñáyiu ní chihí tatá-xi, ndihi ñáyiu ní natahu itú-xi cudií-nã iní-yu. Duca<sup>n</sup> sãtnahá-xi cuu ñáyiu na cãhá<sup>n</sup> tnúhu-í. <sup>37</sup> Chí ndáá quée-xi nãcuáa cuáhá<sup>n</sup> ì<sup>n</sup> cuendú sã cächí-xi: “Tucu tée ní chihí tatá, te tucu tée ní natahu”, duha cuáhá<sup>n</sup> cuendú-á<sup>n</sup>. <sup>38</sup> Te yúhú tendaha ñaha-í xii-ndo quihí<sup>n</sup>-ndó cãhá<sup>n</sup>-ndó tnúhu-í núú sã ní yáha-güedé ní cãhá<sup>n</sup>-güedé tnúhu-í. Te nchòhó quihí<sup>n</sup>-ndó dicó-nã nduu cuendá-ndó chiú<sup>n</sup>-á<sup>n</sup> — cächí-gã xáha<sup>n</sup>-gã xii-güedé.

<sup>39</sup> Te ío cuéhé ñáyiu ñúú-á<sup>n</sup> ní xindédóho-yu cuendú ní cani ñadihí<sup>n</sup>-á<sup>n</sup> núú-yu sã Jësús ní xáha<sup>n</sup>-gã nchaa nãcuáa quide-a<sup>n</sup>, te xicá<sup>n</sup> ío vãi-yu ní sãndáá iní-yu Jësús. <sup>40</sup> Te ní quexio-yu núú ndécu-gã, te ní cãhá<sup>n</sup> ndáhú-yu núú-gã sã quendóo-gã ñúú-yu, núu xicá<sup>n</sup> ní xindecu-gã ndihi-yu úú nduu. <sup>41</sup> Te ío cuéhé-gã-yu ní sãndáá iní-yu tnúhu ní cãhá<sup>n</sup> mée-gã. <sup>42</sup> Te ní xáhã<sup>n</sup>-yu xii ñadihí<sup>n</sup>-á<sup>n</sup>:

—Vitna te ñã díú mée-ni tnúhu ní cãhá<sup>n</sup>-n ní sãndáá iní-ndí-gã, chí ní cãhá<sup>n</sup> mée-gã ní xindédóho-ndí vitna núu ní sãndáá ndisa iní-ndí sã díú-gã cúú-gã Cristú Yáá ní tendaha Yá Ndióxi véxi ñuyúú-a dàccacu nihnu-gã ñáyiu núú úhú núú ndáhú — cächí-yu xáhã<sup>n</sup>-yu xii-a<sup>n</sup>.

*Jësús quidé tãtna-gã déhe ì<sup>n</sup> tée ndéé chíú<sup>n</sup> núú gobièrnú*

<sup>43</sup> Te nduu úní ní núcúhu<sup>n</sup> Jèsús ichi cuáhá<sup>n</sup>-gá distritú Galileá. <sup>44</sup> Te cuáhá<sup>n</sup>-gá yàcá<sup>n</sup>, chí mee-gá ní cachí-gá sá núu ì<sup>n</sup> tée na càhá<sup>n</sup>-dé tñúhu Yá Ndiòxí ñúú núú ní cacu-dé, te ñá túú nèhé-yu sá yíñùhu núú-dé. <sup>45</sup> Te òré ní sáá-gá distritú Galileá, te ío váha ní cuu iní ñáhá-yu xii-gá, chí cuendá tñáhá-yu ní xindecu ndíhi-gá vico pàscuá ñúú Jerusálén. Te yàcá<sup>n</sup> ní xini-yu nchaa sá ní quide-gá.

<sup>46</sup> Te ní sáhá<sup>n</sup> tucu-gá ñúú Cànaá ì<sup>n</sup> ñúú yíndèhu distritú Galileá, núú ní nadatiu-gá ndute ní nduu-xi vñú. Te ñúú Capèrnaúm ndécú ì<sup>n</sup> tée ndéé chíú<sup>n</sup> núú tée cuu gobiernú, te tée-án cùhú ì<sup>n</sup> déhe-dé. <sup>47</sup> Te ní níhí-dé tñúhu sá ní ndee Jèsús distritú Jùdeá ní ndexio-gá distritú Galileá, núú ní sáhá<sup>n</sup>-dé núú ndécú-gá, te ní cáhá<sup>n</sup> ndáhú-dé núú-gá sá quíhí<sup>n</sup>-gá cada tátna-gá déhe-dé, chí sa ndècu-na-dé sá cùú-dé. <sup>48</sup> Te ní xáhá<sup>n</sup> Jèsús xii-dé:

—Nchòhó, chí vá quíndáá iní ñáhá-ndó xii-í te núu vá cádá-í ì<sup>n</sup> sá vā yōo tñáhí ndàcu cada quini-ndó —cachí-gá xáhá<sup>n</sup>-gá xii-dé.

<sup>49</sup> Te ní xáhá<sup>n</sup> tucu tée cùhú déhe-xi-án xii-gá:

—Tátá, cundee iní-n ná quíhí<sup>n</sup>-ni-ò càda tátna-n déhe-í ná cuu-dé, chí càhú víhí tñáhá-dé —cachí-dé xáhá<sup>n</sup>-dè xii-gá.

<sup>50</sup> Te ní xáhá<sup>n</sup> Jèsús:

—Cuanùhú te quini-n ná ní ndúha déhe-n —cachí-gá xáhá<sup>n</sup>-gá xii-dé.

Te ní sándáá iní-dé tñúhu ní cáhá<sup>n</sup> Jèsús, te cuánuhú-dé. <sup>51</sup> Te ñúhu-dé ichi cuánuhú-dé ní sánú tñáhá ñáhá cuè tée xinu cuechi núú-dé. Te ní xáhá<sup>n</sup>-güedé sá sà ta ndúha déhe-dé cuáhá<sup>n</sup>.

<sup>52</sup> Te ní xicá<sup>n</sup> tñúhú-dé núú-güedé ná òré cùú-xi ní ngúita-xi ta quètaú cuéhé-dé. Te ní xáhá<sup>n</sup>-güedé:

—Icu dàtná òré caá ì<sup>n</sup> sacuaa ní nchíco-dé cahni —cachí-güedé xáhá<sup>n</sup>-güedé xii-dé.

<sup>53</sup> Te tātá tée cùhú-án ní ndacu iní-dé sá díú òré ní quètaú cuéhé-dé ní cáhá<sup>n</sup> ndíhi-dé Jèsús ní xáhá<sup>n</sup>-gá sá ndúha déhe-dé. Te xiá<sup>n</sup> núu ndi ncháa tée-án vehe-dé ní sándáá iní-yu Jèsús.

<sup>54</sup> Te sá ní quide-gá-án cùú úú xito quide-gá sá vā yōo tñáhí ndàcu cada. Te sá ní quide-gá xito cùu uú-án cùú-xi sá ní quide-gá cùtñáhá ní ndee-gá distritú Jùdeá cuánuhú-gá distritú Galileá.

## 5

*Jèsús quidé tátna-gá ì<sup>n</sup> tée cùhú ì<sup>n</sup> xichi núú nání Bètesdá*

<sup>1</sup> Te sātá dúcá<sup>n</sup> ní cuu, te ní tñáhá nduu ní quide ñáyiu isràél ì<sup>n</sup> vico. Te ní sáhá<sup>n</sup> Jèsús ñúú Jerusálén. <sup>2</sup> Te ní cāa xico yuhu ñúú-án ñúhú dòco, te titní yèhe-xi ndecu. Te ì<sup>n</sup> yèhe-xi-án nání Yùyehe Mbéé,

te yatni xiá<sup>n</sup> caá ì<sup>n</sup> tanquí ndute dàna-ní-yu Bètesdá tñúhu mèé-yu tñúhu hèbreú, te yuhu tànquí-án caá úhú<sup>n</sup> corrèdór. <sup>3</sup> Te xití corrèdór-án xindecu cuéhé ñáyiu cùhú, ñáyiu cuàá, ñáyiu yacua, ñáyiu ñá cùú-gá candá ni-hnu, ndétú-yu candá ndute-án. <sup>4</sup> Chí níhí-yu tñúhu sá áma nihnu ndute ì<sup>n</sup> espritú xínú cuèchi núú Yá Ndiòxí, te dàcandá-xi ndute ñúhu tanquí-án. Te ñáyiu díhna nuu ná quée xití ndute-án, te òré-ni ndúha-yu. <sup>5</sup> Te yàcá<sup>n</sup> ñútnáhá ì<sup>n</sup> tée ní cuu ócò sáhú<sup>n</sup> úní cuía sá cùhú-dé. <sup>6</sup> Te ní xini Jèsús caá-dé, te ní cutnúní iní-gá sá ní cuu cuéhé cuía cùhú-dé, te ní xáhá<sup>n</sup>-gá:

—¿Cuiní-n ndúha-n-án? —cachí-gá xáhá<sup>n</sup>-gá xii-dé.

<sup>7</sup> Te ní xáhá<sup>n</sup> tée cùhú-án:

—Tāta, vá yōo níhí-í dàquée ñaha xii-í xití tànquí-a òré candá ndute, chí òré cuini-í quée-í, te ingá-ni tucú-yu quèndú-yu núú-í cuànguée-yu —cachí-dé xáhá<sup>n</sup>-dè xii-gá.

<sup>8</sup> Te ní xáhá<sup>n</sup> Jèsús:

—Ndacuíñí, te ndaca-ni-n yùu-n, te caca-n —cachí-gá xáhá<sup>n</sup>-gá xii-dé.

<sup>9</sup> Te òré-ni-án ní ndúha tée cùhú-án, te ní ndaca-ni-dé yuu-dé, te ní xica-dé cuáhá<sup>n</sup>-dé. Te nduu-án cùú-xi nduu ndetatú ñáyiu, <sup>10</sup> núu ní xáhá<sup>n</sup> cuè tée isràél xii tée ní cuhu-án:

—Vitna cùu-xi nduu ndetatú-ó núu vá cùú cuído-n yuu-n —cachí-güedé xáhá<sup>n</sup>-güedé xii-dé.

<sup>11</sup> Te ní xáhá<sup>n</sup>-dè:

—Mee tée ní quide tátna ñaha xii-í ní cachí-dé sá ndacani-í yuu-í, te caca-í —cachí-dé xáhá<sup>n</sup>-dè xii-güedé.

<sup>12</sup> Te ní xáhá<sup>n</sup>-güedé:

—¿Te ná cùú tée duca<sup>n</sup> ní cachí sá ndacani-n yuu-n te caca-ni? —cachí-güedé xáhá<sup>n</sup>-güedé xii-dé.

<sup>13</sup> Dico tée ní cuhú-án ñá túú ní cùtnuní iní-dé ná cùú tée ní quide tátna ñaha xii-dé, chí Jèsús òré-ni ní xica-gá cuáhá<sup>n</sup>-gá tnuú nchaa ñáyiu chitu xindecu xiá<sup>n</sup>. <sup>14</sup> Te sātá dúcá<sup>n</sup> te ní naníhí tñáhá Jèsús ndíhi tée ní quide tátna-gá-án xití veñúhu càhnu sá ío cùnuu, te ní xáhá<sup>n</sup>-gá xii-dé:

—Ní xini-n ná ní ndúha-n-va. Te vitna vá cádá-gá-n nāndi sá cuéhé sá díhā, chí núu na càda-ni-n ña, te quixi ingá cuéhé, te vihi-gá ndoho-n —cachí-gá xáhá<sup>n</sup>-gá xii-dé.

<sup>15</sup> Duca<sup>n</sup> te ní xica tée ní cuhú-án cuàngúñaha-dè xii cue tée isràél sá Jèsús ní quide tátna ñaha-gá xii-dé. <sup>16</sup> Núu sātá ní níhí cue tée isràél tñúhu, te ní cuu úhú iní-güedé Jèsús. Te ní cuini-güedé cahni ñaha-güedé xii-gá cuendá sá dúcá<sup>n</sup> ní quide tátna-gá nduu ndetatú-güedé. <sup>17</sup> Te ní xáhá<sup>n</sup> Jèsús xii-güedé:

—Tàtá-í Dútú Ndióxi quidé chiú<sup>n</sup>-ni-gá núu xiá<sup>n</sup> quidé chiú<sup>n</sup>-í tnáhá-í —càchí-gá xáha<sup>n</sup>-gá xii-güedé.

<sup>18</sup> Te ní cudéé<sup>n</sup>-güedé sá ñá ní cãnehe í-gá nduu ndetátú-güedé, te ní cuini-güedé cahni ñaha-güedé, te uu<sup>n</sup>-gá ní cuini-güedé cahni ñaha-güedé xii-gá sá ní cachí-gá sá Tàtá-gá cúú Dútú Ndióxi, chi ní sani iní-güedé sá cuini-gá nùtnahá-gá Yá Ndióxi núu xiá<sup>n</sup> ío ní cudéé<sup>n</sup>-güedé.

*Jésus Déhe Yá Ndióxi táxi tnùni-gá*

<sup>19</sup> Te ní xáha<sup>n</sup> tucú Jesús xii-güedé:

—Na càchí tnúhu ndáá-í xii-ndo sá yúhú chi ní ñá sá ñá ndacú-í cada mee-í núu ñá túú mée Tàtá-í dánéhé ñáhá-gá xii-í nàcuáa cada-í, chi nchaa sá quidé Tàtá-í quidé-í tnáhá-í. <sup>20</sup> Te Tàtá-í ío cùu iní ñáhá-gá xii-í núu dánéhé ñáhá-gá nchaa nàcuáa quide-gá. Te vitna ndècu vai-gá chiú<sup>n</sup> tahu-gá cada-í, chiú<sup>n</sup> sá vátá quini-gá-ndó cada-í nàcuáa cuñúhu vihi-ndo. <sup>21</sup> Chi Tàtá-í dandóto-gá ñáyú ní xihí. Te yúhú cada-í te nduu táhú nchaa ñáyú càchí iní-í cundecu ndíhi ñáhá-yu xii-í ní caa ní quíhí<sup>n</sup>. <sup>22</sup> Te na sáa nduu te ñá díú Tàtá-í cada ndáá-gá cuéchi ñáyú, chi ní cachí-gá sá yúhú cada ndáá-í <sup>23</sup> cuendá nchaa ñáyú canehé-yu sá yíñúhu núú-í dàtná néhé-yu sá yíñúhu núú Tàtá-í Yá ní tendaha ñaha xii-í véxi-í ñuyú-a. Te nchaa ñáyú ñá túú nèhe sá yíñúhu núú yúhú, te ní núú Tàtá-í ñá túú nèhé-yu sá yíñúhu.

<sup>24</sup> Te na càchí tnúhu ndáá-í xii-ndo sá nchaa ñáyú na cündedóho tnúhu na càhá<sup>n</sup>-í, te núu na quindáá iní-yu Dútú Ndióxi Yáa ní tendaha ñaha xii-í véxi-í ñuyú-a ña, te vá cuíta nihnú-yu chi nduu táhú-yu cundecu-yu ndíhi-gá ní caa ní quíhí<sup>n</sup>. <sup>25</sup> Te vitna na càchí tnúhu ndáá-í xii-ndo sá nchaa ñáyú ndècu ichi cuéhé ichi duha cùu-yu dàtná ñá ñáyú ní xihí, te vitna ní sáa nduu cündedóho-yu tnúhu càhá<sup>n</sup> yúhú Déhe Dútú Ndióxi, te nchaa ñáyú na quindáá iní-xi, te naníhí táhú-yu. <sup>26</sup> Te dàtná quidé mée Tàtá-í dácácu nihnu-gá ñáyú, duca<sup>n</sup> ní cachí-gá cada-í dácácu nihnu-í-yu. <sup>27</sup> Te ní cachí tucu-gá sá sáa ñá nduu, te cada ndáá-í cuéchi nchaa ñáyú ñá túú quide ndáá, chi yúhú táxi tnùni-í, te cùu-í ñani tnáhá-ndó nchaa-ndo. <sup>28</sup> Te ní vá cùñúhu-ndo tnúhu càhá<sup>n</sup>-í, chi sáa nduu te nchaa ñáyú ní xihí tecú dóho-yu tnúhu càhá<sup>n</sup>-í. <sup>29</sup> Te ndoto nchaa ñáyú ní quide váha cundecu ndíhi-í-yu ní caa ní quíhí<sup>n</sup>, te ndoto tnáhá nchaa ñáyú ní quide cuéhé ní quide duha, te ñáyú-á<sup>n</sup> quíhí<sup>n</sup>-yu núú úhú núú ndáhú.

*Yá Ndióxi chindéè tnúhu-gá Jesús*

<sup>30</sup> Te yúhú, chi ní ñá sá ñá ndacú-í cada mee-í núu ñá díú mée Yá Ndióxi táuchiu<sup>n</sup>-gá

nàcuáa cada-í. Te quide ndáá-í cuéchi ñáyú nàcuáa tàxi tnuni-gá cada-í, te yúhú ñá túú quide-í sá cúú iní mée-í chi Tàtá-í ní táuchíu<sup>n</sup>-gá nàcuáa cada-í. <sup>31</sup> Te núu na càhá<sup>n</sup>-í sá mée-í táxi tnuni-í, te vá quindáá iní-ndo. <sup>32</sup> Chi Yá Ndióxi chindéè tnúhu ñaha-gá xii-í, te yúhú xini-í sá tnúhu càhá<sup>n</sup>-gá cuendá-í cúú-xí ñá sá ndáa. <sup>33</sup> Te nchòhó ní téchíu<sup>n</sup>-ndó cuè téé ní sáhá<sup>n</sup> ní ndúcú tnúhu-güedé núú tē Juáa núu na tnúhu càhá<sup>n</sup>-dé cuendá-í, te téé-á<sup>n</sup> ní càhá<sup>n</sup> ndáá-dé nàcuáa nduu cuendá-í. <sup>34</sup> Dico yúhú, chi ñá túú xini ñuhu-í ñá ñáyú ñuyú-a chindéè tnúhu ñaha-yu xii-í, dico tē Juáa ní càhá<sup>n</sup> váha-dé cuendá-í, te xiá<sup>n</sup> càchí tnúhu tucu-í cuendá quindáá iní-ndo, te naníhí táhú-ndó. <sup>35</sup> Te dàtná cuini-ndó cùu ñá iti ndéñúhú te dàyehé-xi, duca<sup>n</sup> sàtnahá-xi ní cuu tē Juáa, chi sacú-ní nduu ío ní cudíí iní-ndo tnúhu ní càhá<sup>n</sup>-dé. <sup>36</sup> Te váha-ni ní càhá<sup>n</sup> tē Juáa, dico yúhú chi ndècu nchaa sá tá quide-í véxi nàcuáa ní táuchíu<sup>n</sup> Yá Ndióxi cada-í, te nchaa xiá<sup>n</sup> cúú-xí ñá sá cùtnúni iní-ndo sá mée Yá Ndióxi ní tendaha ñaha-gá xii-í véxi-í ñuyú-a. <sup>37</sup> Te diu-ni-gá chindéè tnúhu ñaha-gá xii-í, dicó-ni sá mée-ndo ñá túú cuini-ndó cada cuendá-ndó tnúhu càhá<sup>n</sup>-gá, te ní ñá túú xini-ndó nàcuáa càa-gá. <sup>38</sup> Te ñá túú quèe iní nchòhó tnúhu càhá<sup>n</sup>-gá, chi ñá túú sàndáá iní ñáhá-ndó xii yúhú Déhe-gá. <sup>39</sup> Te dácuaa vihi-ndo tutú ndéè tnúhu-gá, chi sàni iní-ndó sá xiá<sup>n</sup>-ni dacuàha-ndo te naníhí táhú-ndó. Te váha-ni quide-ndo, chi diu tutú-á<sup>n</sup> càhá<sup>n</sup>-xi cuendá-í. <sup>40</sup> Te nchòhó ñá túú cuini-ndó quindáá iní ñáhá-ndó xii-í cuendá naníhí táhú-ndó.

<sup>41</sup> Te yúhú, ñá túú xini ñuhu-í sá cáda càhu ñaha-ndo xii-í. <sup>42</sup> Dico sa xini-í nàcuáa sàni iní-ndó chi ñá túú cùu iní-ndó Yá Ndióxi. <sup>43</sup> Te yúhú ñáyú ñuyú-a chi Tàtá-í ní tendaha ñaha-gá, te nchòhó ñá túú cuini-ndó tnúhu càhá<sup>n</sup>-í, dico núu quixi ñá téé càhá<sup>n</sup> cuendá mée-xi, chi quindáá iní-ndo. <sup>44</sup> Te ná váha nchòhó ná tñí-ndo tnúhu càhá<sup>n</sup>-í, te xio xio-ni quide cahnu tnaha-ndo, te ñá túú quide cuendá-ndó sá tnúhu váha càhá<sup>n</sup> Yá Ndióxi cuu xii-ndo. <sup>45</sup> Te vá cáni iní-ndo sá yúhú ndacá<sup>n</sup> cuéchi-í núú Tàtá-í nàcuáa quide-ndo, chi ndíí Moisés ní chídó tnùni ndíí núú tutú Yá Ndióxi nàcuáa quide-ndo sá ñá túú quide váha-ndo, te mee-ndo sàni iní-ndó sá naníhí táhú-ndó cuendá tnúhu ní càhá<sup>n</sup> ndíí. <sup>46</sup> Chi núu nchòhó sàndáá ndisa iní-ndó tnúhu ní càhá<sup>n</sup> ndíí Moisés ñá, te duca<sup>n</sup> te quindáá iní-ndó yúhú ní cùu, chi ndíí-á<sup>n</sup> ní chídó tnùni ndíí nàcuáa cada-í ñuyú-a vitna. <sup>47</sup> Te núu ñá túú sàndáá iní-ndó tnúhu ní chídó tnùni ndíí, te diu-ni duca<sup>n</sup> cada ñaha-ndo xii-í vá quindáá iní-ndó tnúhu càhá<sup>n</sup>-í —càchí-gá xáha<sup>n</sup>-gá xii-güedé.

## 6

*Jèsús dácàxi-gá úhú<sup>n</sup> mĩ ñáiyu*

*(Mt. 14:13-21; Mr. 6:30-44; Lc. 9:10-17)*

<sup>1</sup> Te sáta dúcá<sup>n</sup> ní cuu, te ní quee Jèsús cuáhá<sup>n</sup>-gá ingá xio yuhu làgúná Galileá, àdi Tiberiás chi úú ñi-xi. <sup>2</sup> Te ío cuéhé ñáiyu nchícú<sup>n</sup> ñáhá xii-gá cuáhá<sup>n</sup> cuendá sá ní xiní-yu nchaa sá vā yōo tnàhí ndàcu cada ní quide-gá, chí ní quide tátna-gá nchaa ñáiyu cùhú. <sup>3</sup> Te ní sáá Jèsús ndihí cue tée xica cuu ndihí-gá ñ<sup>n</sup> núú tĩndúú, te xiá<sup>n</sup> ní ngóo-gá ndihí-güedé. <sup>4</sup> Te ta cùyatni coo vico pascuá, vico quide ñáiyu israhél. <sup>5</sup> Te ní xiní-gá sá ío vāi ñáiyu nchícú<sup>n</sup> ñáhá xii-gá cuáhá<sup>n</sup>, te ní xáha<sup>n</sup>-gá xii té Lipé:

—¿Ndéé quíhí<sup>n</sup>-ó quĩguaa<sup>n</sup>-o sá cáxi nchaa ñáiyu-a? —càchí-gá xáha<sup>n</sup>-gá xii-dé.

<sup>6</sup> Te duca<sup>n</sup> ní xáha<sup>n</sup>-gá xii-dé cuendá sá cuiní-gá quini-gá nása cunduu tnúhu cáhá<sup>n</sup>-dé, dico mee-gá sa xiní-gá nàcuáa cada-gá. <sup>7</sup> Te ní xáha<sup>n</sup> té Lipé xii-gá:

—Te cuéi úú ciendú díhú<sup>n</sup> denàriú ná dàndoñuhu-o cuaa<sup>n</sup>-o paá, te ní vā tnàhá caxi-yu luha luha —càchí-dé xáha<sup>n</sup>-dè xii-gá.

<sup>8</sup> Te té Ndríxi ingá tée xica cuu ndihí-gá, ñani té Ximú, àdi Pelú chi úú ñi-dé, ní xáha<sup>n</sup>-dè:

<sup>9</sup> —Iha ndècu ñ<sup>n</sup> té líhli nèhe-dé úhú<sup>n</sup> paa cebadá te úú chácá, dico ndéé tnàhá xéhé, te cuéhé víhí ñáiyu —càchí-dé xáha<sup>n</sup>-dè xii-gá.

<sup>10</sup> Te ní xáha<sup>n</sup> Jèsús xii-güedé:

—Chí cñaha ná ngóo-yu nchaa-yu —càchí-gá xáha<sup>n</sup>-gá.

Te ñáiyu-á<sup>n</sup> ní ngóo-yu, te caa víhí ite núú ní ngóo-yu-á<sup>n</sup>, te xínu dàtná úhú<sup>n</sup> mĩ mee-ni cuè tée, te díñ ñáiyu díhí ndihí landú.

<sup>11</sup> Te ní quehe<sup>n</sup> Jèsús paa, te ní ndacá<sup>n</sup> táhú-gá núú Yá Ndióxi, te ní sáñaha-gá paa-á<sup>n</sup> xii cue tée xica cuu ndihí-gá, te cue tée-á<sup>n</sup> ní dácáñu-güedé ní xexi nchaa ñáiyu xixúcu-á<sup>n</sup>. Te ñi-ni duca<sup>n</sup> ní quide-gá chácá, te ní dácáñu tucu-güedé-di ní xexi ñáiyu ní ndahá xití-yu. <sup>12</sup> Te óré ní túhú cóhō-yu, te ní xáha<sup>n</sup> Jèsús xii cue tée xica cuu ndihí-gá sá ná naquehe<sup>n</sup>-güedé nchaa sá ní quendoo cuendá sá vā quíhí<sup>n</sup>-xi núú míhí.

<sup>13</sup> Te cue tée-á<sup>n</sup> ní naquehe<sup>n</sup>-güedé nchaa sá ní quendoo, te ní chítú ùxúú tídihi núú úhú<sup>n</sup>-ni paa cebadá. <sup>14</sup> Te sá ní xiní-yu ní nadacáyá-gá sá ní xexi-yu, xiá<sup>n</sup> ní ngúita-yu ní xitnàhá-yu:

—Ndáá sá tée-a sa ío cuendú sá quixí-dè ñuyú-a cáhá<sup>n</sup>-dé tnúhu Yá Ndióxi —càchí-yu xitnàhá-yu.

<sup>15</sup> Te ní cutnùnì iní Jèsús sá cadá yicá-yu candeca ñàhá-yu xii-gá quíhí<sup>n</sup> cuendá cundecu-gá quindaha ñàha-gá xii-yu ní cùu, núú xiá<sup>n</sup> ní xica tucu-gá cuáhá<sup>n</sup>-gá xití yucu mee díi chícuú-gá.

*Jèsús xicá-gá núú ndute*

*(Mt. 14:22-27; Mr. 6:45-52)*

<sup>16</sup> Te óré ní cuu ndiquí<sup>n</sup>, te cuáhá<sup>n</sup> cue tée xica cuu ndihí-gá yuhu làgúná. <sup>17</sup> Te ní quee-güedé bàrcú cuáhá<sup>n</sup>-güedé ñúu Capèrnaúm cáá ndaa ingá xio yuhu làgúná, te sa ní cuu ndiquí<sup>n</sup>, te ñá túú Jèsús quéxio quee-gá bàrcú ñúhú-güedé-á<sup>n</sup>. <sup>18</sup> Te ní ngúita-xi quène táchí níhi, te níhi dácandau ndéé tnàhá ndùte làgúná-á<sup>n</sup>. <sup>19</sup> Te sa ní cuu dàtná úhú<sup>n</sup> kilòmetrú cuáhá<sup>n</sup>-güedé, te ní xiní-güedé Jèsús tá cùyatni-gá bàrcú ñúhú-güedé véxi-gá núú ndute, te ní yùhú-güedé. <sup>20</sup> Te ní xáha<sup>n</sup> Jèsús xii-güedé:

—Yúhú véxi-í, vā yùhú-ndó —càchí-gá xáha<sup>n</sup>-gá xii-güedé.

<sup>21</sup> Te ío ní cudíí iní-güedé sá ní quexio-gá cuánguee-gá bàrcú, te óré-ni ní quexio-güedé ndihí-gá ndéé ingá xio yuhu làgúná núú cuáhá<sup>n</sup>-güedé.

*Ñáiyu nanducu ñaha xii Jèsús*

<sup>22</sup> Te ingá nduu-á<sup>n</sup> xĩndecu-ni nchaa ñáiyu ní quendoo yuhu làgúná. Te ní quide cuendá-yu sa ñ<sup>n</sup> díi-ná bàrcú nùtní-á<sup>n</sup> ní cùu ñá túú-gá, chí cue tée xica cuu ndihí Jèsús ní quee-güedé bàrcú-á<sup>n</sup> cuáhá<sup>n</sup>-güedé. Te ní níhi-yu tnúhu sá ñá túú ní quee tnàhá Jèsús. <sup>23</sup> Te ñi-ni nduu-á<sup>n</sup> ní quee ñ<sup>n</sup> úú bàrcú ñúu Tiberiás ní sáa-xi yatni núú ní xexi-yu paa sá ní ndacá<sup>n</sup> táhú Jèsús núú Yá Ndióxi. <sup>24</sup> Te ní xiní-yu sá ñá túú Jèsús ndihí cue tée xica cuu ndihí-gá, núu ní quee-yu bàrcú-á<sup>n</sup> cuáhá<sup>n</sup>-yu ñúu Capèrnaúm cuánundúcu ñàhá-yu xii-gá.

*Jèsús cúú-gá dàtná ñ<sup>n</sup> sá nchító-ó*

<sup>25</sup> Te ní sáa-yu ingá xio yuhu làgúná, xiá<sup>n</sup> ní naníhí-yu Jèsús, te ní xáhá<sup>n</sup>-yu xii-gá:

—Mèstrú, ¿ná óré ní sáa-n iha? —càchí-yu xáhá<sup>n</sup>-yu xii-gá.

<sup>26</sup> Te ní xáha<sup>n</sup> Jèsús:

—Na càchí tnúhu ndaa-í sá nchòhó nanducu ñaha-ndo xii-í cuendá-ni sá ní xexi-ndo ní ndahá xití-ndó, dico ñá díú cuendá sá ní quide-í sá vā yōo tnàhí ndàcu cada nanducu ñaha-ndo. <sup>27</sup> Te vā cadá cuendá-ndó sá mée-ní sá cáxi-ndó cada chiú<sup>n</sup>-ndo chí xiá<sup>n</sup> vā cúdíí-xi. Chí ío-gá xíní ñúhu-xi cada cuendá-ndó tnúhu Yá Ndióxi te tní-ndo, te naníhí táhú-ndó. Te tnúhu-á<sup>n</sup> cachí tnúhu yùhú Tée cùu ñani tnàhá-ndó nchaa-ndo, te xiá<sup>n</sup> candeca-xi iní-ndó ní caa ní quíhí<sup>n</sup>, chí mee Dítú Ndióxi ní cachí-gá sá dúcá<sup>n</sup> càda-í —càchí-gá xáha<sup>n</sup>-gá xii-yu.

<sup>28</sup> Te ní xáhá<sup>n</sup>-yu:

—¿Nása cada-ndí cuendá ngúnu ichi-ndí nàcuáa cuiní Yá Ndióxi cunduu-í? —càchí-yu xáhá<sup>n</sup>-yu xii-gá.

<sup>29</sup> Te ní xáha<sup>n</sup> Jèsús xii-yu:

—Yá Ndióxi cuiní-gá sá quindáá iní ñàhá-ndó xii yùhú, tée ní tendaha-gá véxi ñuyú-a —càchí-gá xáha<sup>n</sup>-gá xii-yu.

<sup>30</sup> Te ní xáha<sup>n</sup> tùcú-yu xii-gá:

—¿Ná cúu sá vǎ yǒo tnáhi ndácu cada, cada-n cùndehe-ndí cuendá quindáá ini ñáhá-ndí xii-n-i? ¿Àdi nágá cúu sá cáda-n cuendá cutnùni iní-ndí sá ndáá càhá<sup>n</sup>-n-i?

<sup>31</sup> Chi cue ñani tnáhá-ó ní xíndecu ndéé sanaha ní xexí-yu pàa nání mànáá xití yucu dàtná yódó tnùni núu tùtú Yá Ndióxi núu càchí-xi: “Yá Ndióxi ní sáñaha-gá sá ní xexí-yu, te ní cuu<sup>n</sup> túu-xi andiu”, duha càchí-xi núu tùtú-gá —càchí-yu xáhá<sup>n</sup>-yu xii-gá.

<sup>32</sup> Te ní xáha<sup>n</sup> Jèsús:

—Na càchí tnúhu ndáá-í xii-ndo sá ñá díu ndí Moisés ní sáñaha ndí pàa ní cuu<sup>n</sup> andiu ní xexí-yu, chi mee Tàtá-í ní sáñaha-gá sá ní xexí-yu. Te sá táxi-gá vitna cùu-xi <sup>33</sup> dàtná pàa véxi cuu<sup>n</sup> andiu càndeca-xi iní-ndó ní caa ní quíhí<sup>n</sup> —càchí-gá xáhá<sup>n</sup>-gá xii-yu.

<sup>34</sup> Te ní xáhá<sup>n</sup>-yu xii-gá:

—Tàtá, mee-ni pàa-án taxi-n càxi-ndí —càchí-yu xáhá<sup>n</sup>-yu xii-gá.

<sup>35</sup> Te ní xáha<sup>n</sup> Jèsús:

—Yúhú cùu-í dàtná ì<sup>n</sup> sá xexí-ndó càndeca-xi iní-ndó. Te duha ndùu tnúhu càhá<sup>n</sup>-í, chi nchaa ñáyiú na quindáá ini ñáhá xii-í, te vǎ ndóhó-gá-yu docó te vǎ ndóhó-gá-yu ndute. <sup>36</sup> Dico-ni sá nchòhó ñá túu sàndáá ini ñáhá-ndó cuéi xini ñáhá-ndó xii-í. <sup>37</sup> Te nchaa ñáyiú na càchí Tàtá-í nduu cuendá-í nasaá-yu núu-í, te ñáyiú-án vǎ dáquèe tíhù-í-yu. <sup>38</sup> Te ñá díu yúhú sá véxi cuu<sup>n</sup>-í andiu te guide-í nchaa sá cúu ini mée-í, chi véxi cuu<sup>n</sup>-í sá cáda-í nchaa nàcuáa ní táuchíu<sup>n</sup> mée Tàtá-í Dútú Ndióxi Yáá ní tendaha ñaha xii-í véxi-í ñuyúú-a.

<sup>39</sup> Te cuini-gá sá ncháá ñáyiú ní cachí-gá nduu cuendá-í vǎ dàñá-í-yu cuíta nihnú-yu, te na sáa nduu te diu-ni-í dandòto-í-yu. <sup>40</sup> Chi duca<sup>n</sup> ní cachí Dútú Ndióxi cunduu sá ncháá ñáyiú na tní tnúhu càhá<sup>n</sup>-í, te quindáá ndisa ini ñáhá-yu xii yúhú Déhe-gá, te nduu táhù-yu cundecú-yu ndihí Yá Ndióxi ní caa ní quíhí<sup>n</sup>, te yúhú dandòto-í-yu na sáa nduu —càchí-gá xáhá<sup>n</sup>-gá xii-yu.

<sup>41</sup> Te ñá ní tnáhá ini ñáyiú isráel tnúhu ní càhá<sup>n</sup> Jèsús núu ní nguíta-yu ní càhá<sup>n</sup> cuèhé-yu cuendá-gá cuendá sá ní xáha<sup>n</sup>-gá sá mée-gá cúu-gá dàtná sá xexí-ó véxi cuu<sup>n</sup> andiu. <sup>42</sup> Te ní xitnàhá-yu:

—¿Náa ñá díu téa-a cùu-dé Jèsús déhe té Chéé? Nchoo xini-ó tātá-dé, te xini-ó náná-dé, ñná cachí-tu téa-a sá andiu véxi cuu<sup>n</sup>-dé! —càchí-yu xitnàhá-yu.

<sup>43</sup> Te ní xáha<sup>n</sup> Jèsús xii-yu:

—Vǎ càhá<sup>n</sup> cuèhé-gá-ndó cuendá-í, chí dàñá. <sup>44</sup> Vǎ yǒo quindáá ini ñáhá xii yúhú núu ñá túu mée Tàtá-í táxi cuendá ñáhá-gá xii-yu. Te diu-gá ní tendaha ñaha-gá xii-í véxi-í, te yúhú dandòto-í-yu na sáa nduu.

<sup>45</sup> Te núu tùtú cue téa ní xóo càhá<sup>n</sup> tnúhu Yá Ndióxi ndéé sanaha càchí-xi: “Yá Ndióxi danèhé ñáhá-gá xii-yu tnúhu-gá”, duha càchí-xi. Te nchaa ñáyiú na cùndedóho nchaa tnúhu càhá<sup>n</sup> Dútú Ndióxi, te cutúha-yu nàcuáa càhá<sup>n</sup>-gá, te ñáyiú-án quindáá ini ñáhá-yu xii yúhú.

<sup>46</sup> Te vǎ yǒo xini ñáhá xii Dútú Ndióxi chí ì<sup>n</sup>ndi-ni yúhú xini-í-gá, chí núu ndécú-gá ní quee-í véxi cuu<sup>n</sup>-í —càchí-gá xáhá<sup>n</sup>-gá xii-yu.

<sup>47</sup> Te xáhá<sup>n</sup> tùcú-gá:

—Na càchí tnúhu ndáá-í xii-ndo sá nchaa ñáyiú na quindáá ini ñáhá xii-í, te naníhí tǎhù-yu. <sup>48</sup> Te yúhú cùu-í dàtná ì<sup>n</sup> sá xexí-ndó càndeca-xi iní-ndó, te duca<sup>n</sup> sátnahá-xi cùu-í chí yúhú cada-í te nduu táhù-ndó cùndecu-ndo ndihí Yá Ndióxi ní caa ní quíhí<sup>n</sup>. <sup>49</sup> Te cue ñani tnáhá-ó ní xíndecu ndéé sanaha ní xexí-yu pàa nání mànáá xití yucu, dico ní sáa nduu te dacuítí ní xihí-yu. <sup>50-51</sup> Te yúhú càhá<sup>n</sup>-í cuendá mée-í, chí véxi cuu<sup>n</sup>-í andiu. Te cùu-í dàtná ì<sup>n</sup> sá nchító-ndó, te nchaa ñáyiú na càxi te càndeca-xi iní-yu ní caa ní quíhí<sup>n</sup> te vǎ cuíta nihnú-gá-yu. Te sá táxi-í xii-ndo xiá<sup>n</sup> cùu-xi yiqui cuñú-í, te cùu-xi cuendá nchaa ñáyiú niñí ñuyúú cuendá nduu táhù-yu cundecú-yu ndihí Yá Ndióxi ní caa ní quíhí<sup>n</sup> —càchí-gá xáhá<sup>n</sup>-gá xii-yu.

<sup>52</sup> Te ní nguíta ñáyiú isráel xitnàhá-yu:

—¿Náa cada-tu téa-a núu càchí-tu-dé sá yiqui cuñú-dé taxi-dé caxi-o-i? —càchí-yu xitnàhá-yu.

<sup>53</sup> Te ní xáha<sup>n</sup> Jèsús:

—Na càchí tnúhu ndáá-í xii-ndo sá núu na càda ini-ndó sá dàtná sá caxí-ndó yiqui cuñú yúhú Téa cùu ñani tnáhá-ndó nchaa-ndo, te cada tuu ini-ndó sá dàtná sá cóhó-ndó niñí-í ñá, te xiá<sup>n</sup> queé-xi sá quindáá ini ñáhá-ndó ní yuhu ní ini-ndó te naníhí tǎhù-ndó, te núu ñáhá te cuíta nihnú-ndo. <sup>54</sup> Nchaa ñáyiú na càda ini-xi sá dàtná sá caxí-yu yiqui cuñú-í te cohó-yu niñí-í, ñáyiú-án naníhí tǎhù-yu te yúhú dandòto-í-yu na sáa nduu. <sup>55</sup> Chi yiqui cuñú-í ndihí niñí-í cúu-xi mée-í. <sup>56</sup> Te nchaa ñáyiú na càda ini-xi sá dàtná sá caxí-yu yiqui cuñú-í te cohó-yu niñí-í, te ñáyiú-án ì<sup>n</sup>-ná cuu-í ndihí-yu chí cundecu ndihí-í-yu. <sup>57</sup> Te yúhú nchító-í chí duca<sup>n</sup> nchító Tàtá-í Yáá ní tendaha ñaha xii-í véxi-í ñuyúú-a. Te diu-ni duca<sup>n</sup> nchaa ñáyiú na quindáá ini ñáhá xii-í te cundecu ndihí-í-yu ní caa ní quíhí<sup>n</sup>. <sup>58</sup> Te yúhú cùu-í dàtná ì<sup>n</sup> sá nchító-ndó véxi cuu<sup>n</sup> andiu, dico ñá díu pàa sá nání mànáá ní xexi cue ñani tnáhá-ó ní xíndecu ndéé sanaha, chí ní xexí-yu pàa te dacuèi ní xihí-yu. Te nchaa ñáyiú na quindáá ini ñáhá xii yúhú Yáá véxi



cuu<sup>n</sup> andiu, te cundecu ndihi-í-yu ni caa ni quíhí<sup>n</sup> —càchí-gá xáha<sup>n</sup>-gá xii-yu.

<sup>59</sup> Nchaa tnúhu-a ní cáhá<sup>n</sup>-gá xití veñúhu ñáiyu ñúú Capernaúm.

*Jèsús càchí tnúhu-gá nàcuáa naníhí tàhú-ó*

<sup>60</sup> Te sá dúcá<sup>n</sup> ní cáhá<sup>n</sup>-gá núu vai ñáiyu nchicú<sup>n</sup> ñáhá xii-gá ní xitnáhá-yu:

—Vá tñí cuíti-o tnúhu càhá<sup>n</sup>-dé chi ñá díú tnúhu sá cúú vâha iní-ó càhá<sup>n</sup>-dé —càchí-yu xitnáhá-yu.

<sup>61</sup> Te ní cutnùní iní Jèsús sá ñà túú càhá<sup>n</sup> váha-yu cuendá tnúhu ní cáhá<sup>n</sup>-gá, núu ní xáha<sup>n</sup>-gá xii-yu:

—¿Náa ñá tnáhá iní-ndó nàcuáa càhá<sup>n</sup>-í-a?

<sup>62</sup> Te uu<sup>n</sup>-gá cada nchòhó núu quini-ndó yúhú Téé cùu ñaní tnáhá-ndó nchâa-ndo ndaa-í núú ní xindecu-í díhna. <sup>63</sup> Te espíritú ndécú ndihi yiqui cuñú-ó, xiá<sup>n</sup> ndécá ñáha-xi xii-o, te núu ñá túú xiá<sup>n</sup>, te yiqui cuñú-ó ñá túú nándíhi-xi. Dico núu nchaa tnúhu càhá<sup>n</sup>-í-a quée-xi iní-ndó ñá, te quini-ndó nâ xéhe candeca ñáha-xi xii-ndo núú cuàhá<sup>n</sup> núú véxi. <sup>64</sup> Te dava nchòhó chi ñá túú sàndáá iní-ndó —càchí-gá xáha<sup>n</sup>-gá xii-yu.

Te duca<sup>n</sup> ní xáha<sup>n</sup>-gá chi sa nâha-gá nândi cùu ñáiyu vá quindáá iní ñáhá xii-gá. Te duca<sup>n</sup> sâ nâha-gá ndédacaa téé cuáha cuendá ñáhá xii-gá núú cué téé cùu úhú iní ñáhá. <sup>65</sup> Te ní xáha<sup>n</sup> tùcu Jèsús xii-yu:

—Te duha càhá<sup>n</sup>-í chi sa ní cachí tnúhu-í xii-ndo sâ vá yòo ñ<sup>n</sup> cuíni tñí tnúhu-í te núu ñá túú Tàtà-í Dútú Ndióxi sánú ichi ñáha-gá xii-yu —càchí-gá xáha<sup>n</sup>-gá xii-yu.

<sup>66</sup> Te òrè-á<sup>n</sup> ïo vai ñáiyu nchicú<sup>n</sup> ñáhá xii-gá ní xócòo-yu ñá ní xica cuu-gá-yu ndihi-gá. <sup>67</sup> Te xiá<sup>n</sup> ní xáha<sup>n</sup> Jèsús xii ndi ùxúú cue téé xica cuu ndihi-gá:

—¿Cuíni-ndó dândóo ñáha-ndo tnáhá-ndó-á<sup>n</sup>? —càchí-gá xáha<sup>n</sup>-gá xii-güedé.

<sup>68</sup> Te ní xáha<sup>n</sup> tè Xímú, àdi Pelú chi úú diu-dé:

—Mèstrú, ñá túú-gá ndèé quíhí<sup>n</sup>-ndí, chi nchúhú náhá-ndí sá tnúhu mee-n cùu-xi sá vâha candeca-xi iní-ndó ní caa ni quíhí<sup>n</sup>. <sup>69</sup> Chi nchúhú sa ní sàndáá iní ñáhá-ndí xii-n chi nâha-ndí sá yòhó cúú-n Cristú Déhe Dútú Ndióxi yaá ndécú àndiu —cachí-dé xáha<sup>n</sup>-dè xii-gá.

<sup>70</sup> Te ní xáha<sup>n</sup> Jèsús:

—Nâha-ndo sá yúhú ní cáhá<sup>n</sup> ñáhá-í xii ndi ùxúú-ndó xica cuu ndihi ñáha-í xii-ndo, dico ñ<sup>n</sup>-ndo quíhu ñáha yücu ñávâha xii-ndo —càchí-gá xáha<sup>n</sup>-gá xii-güedé.

<sup>71</sup> Duha ní cáhá<sup>n</sup> Jèsús cuendá tè Júdás déhe té Xímú Iscarioté ñ<sup>n</sup> téé ñutnáhá núú ùxí ñ<sup>n</sup> cue téé xica cuu ndihi-gá, chi sa nâha-gá sá tèé-á<sup>n</sup> cuáha cuendá ñáhá-dè xii-gá ñ<sup>n</sup> nduu núú cué téé cùu úhú iní ñáhá.

## 7

*Cue ñaní Jèsús ñá túú sàndáá iní-güedé nàcuáa ndüu tnúhu càhá<sup>n</sup>-gá*

<sup>1</sup> Te sáta dúcá<sup>n</sup> ní cuu, te ní xica cuu Jèsús distritú Galiléa, te ñá ní sáhá<sup>n</sup>-gá distritú Júdeá, chi yàcá<sup>n</sup> cuíni cue téé israhél cahni ñáha-güedé xii-gá ní cùu. <sup>2</sup> Te ní cuyatni nduu càdá dâyuhu vico, vico sá dánâni-yu Vico Vehe Tnuvixi<sup>n</sup>. <sup>3</sup> Te ní xáha<sup>n</sup> cué ñaní Jèsús xii-gá:

—Vâha-gá quíhí<sup>n</sup>-n distritú Júdeá te vá cündècu-n iha, chi yàcá<sup>n</sup> cada-n nchâa sá quidé-n iha cuendá quini nchaa ñáiyu cündíhi ñáha xii-n ndecu yacá<sup>n</sup>. <sup>4</sup> Chi núu cuíni-ó quini nchaa ñáiyu ná chiú<sup>n</sup> cada-o te vá càdá dâyuhu-o. Te yòhó cuéhé núú sá quidé-n, te cada-n na quini nchaa ñáiyu —càchí-güedé xáha<sup>n</sup>-güedé xii-gá.

<sup>5</sup> Duca<sup>n</sup> ní cáhá<sup>n</sup> cue ñaní-gá, chi ní mèe-güedé ñá túú sàndáá iní-güedé nàcuáa ndüu tnúhu càhá<sup>n</sup>-gá. <sup>6</sup> Te ní xáha<sup>n</sup> Jèsús xii-güedé:

—Vátá tnáhá-gá òrè quíhí<sup>n</sup>-í dico nchòhó ndédani càa òrè cuu quíhí<sup>n</sup>-ndó. <sup>7</sup> Chi nchaa ñáiyu ñúhu ichi cuehé ichi duha chi ñá túú cùu úhú iní ñáhá-yu xii nchòhó. Dico yúhú chi cùu úhú iní ñáhá-yu xii-í cuendá sá càhá<sup>n</sup>-í sá quidé-yu nchaa sá cuéhé sá dúhá. <sup>8</sup> Te chí cuáhá<sup>n</sup> nchòhó vico chí yúhú vá quíhí<sup>n</sup>-ni-í chí vátá tnáhá-gá òrè quíhí<sup>n</sup>-í —càchí-gá xáha<sup>n</sup>-gá xii-güedé.

<sup>9</sup> Te duca<sup>n</sup> ní xáha<sup>n</sup>-gá te ní ndóo-gá Galiléa, te cue téé-á<sup>n</sup> cuáhá<sup>n</sup>-güedé.

*Jèsús ndécú-gá ñ<sup>n</sup> vico chíñuhú-yu Yá Ndióxi*

<sup>10</sup> Dico sáta cuáhá<sup>n</sup> cue ñaní-gá, te ní xica-gá cuáhá<sup>n</sup>-gá tnáhá-gá dicó-ni sá dâyuhu cuáhá<sup>n</sup>-gá. <sup>11</sup> Te ñáiyu israhél ñáiyu xindecu vico nànducú-yu Jèsús, te xitnáhá-yu: —¿Ndéé ndécú Jèsús? —càchí-yu xitnáhá-yu.

<sup>12</sup> Te nchaa ñáiyu xindecu vico xindatnúhu-yu cuendá-gá. Te davá-yu xitnáhá-yu sá ïo vâha iní-gá, te davá-yu xitnáhá-yu sá ñá díú téé vâha cùu-gá, chí dândahú-gá ñáiyu.

<sup>13</sup> Dico mee-ni xicáhá<sup>n</sup> náhi-yu, chí xiyúhú-yu cue téé cùnno núu-yu.

<sup>14</sup> Te ta ngúhu<sup>n</sup> dava vico, te cuánguihu Jèsús veñúhu càhnu sá ïo cùnno, te ní ngúíta-gá dâcuáha-gá ñáiyu. <sup>15</sup> Te ñáiyu israhél ní cuñúhu víhi-yu sá ïo vâha càhá<sup>n</sup>-gá, te ní xitnáhá-yu:

—¿Ná cuendá ïo vâha ñúhu-tu díquí tèe-a tnúhu càhá<sup>n</sup>-dè te ñá túú ní dàcuaha-dé-í? —càchí-yu xitnáhá-yu.

<sup>16</sup> Te ní xáha<sup>n</sup> Jèsús:

—Ñá díú cuendá mèe-í cúú-xí sá dánéhé ñáhá-í xii-ndo, chí cuendá Dútú Ndióxi Yaá ní tendaha ñáha xii-í véxi-í cúú-xí. <sup>17</sup> Te núu

io dava-ndo ñi yuhu ñi iní-ndo cuini-ndo cada-ndo nacuaa cuini Yá Ndióxi cunduu, te cutnúni ndáa iní-ndo sá tnúhu dâcuaha ñaha-í xii-ndo cùu-xi cuendá méé Dútú Ndióxi, te ñá díu cuendá méé-í cúu-xí. <sup>18</sup> Te téé cuini sá cáda cãhnu ñaha ñáyiu xii-dé, téé-án cáhá<sup>n</sup>-dé nacuaa véxi iní méé-dé. Dico yúhú cuini-í sá cáda cãhnú-yu Dútú Ndióxi Yáa ní tendaha ñaha xii-í véxi-í ñuyíú-a, te cáhá<sup>n</sup> ndáa-í te ñá túú dâcuandehnde-í.

<sup>19</sup> Te ndíi Moisés ní taxi ndíi tnúhu sá sánú ichi ñaha xii-ndo nacuaa cundecu-ndo, te ni dũca<sup>n</sup> ñá túú sandáa iní-ndo nacuaa cáhá<sup>n</sup> tnúhu-án. ¿Te ná cuendá cuini-ndo cãhni ñaha-ndo xii-í? —cãchí-gá xáha<sup>n</sup>-gã xii-yu.

<sup>20</sup> Te ní xáhã<sup>n</sup>-yu xii-gá:

—Yucu ñávãha dâcoto ñaha xii-ó, chi vá yõo ñ<sup>n</sup> cuini cãhni ñaha xii-n —cachí-yu xáhã<sup>n</sup>-yu xii-gá.

<sup>21</sup> Te ní xáha<sup>n</sup> Jèsús xii-yu:

—Sá ní quide-í ñ<sup>n</sup> sá vá yõo tnãhí ndâcu cada nduu cuu-xi nduu ndetatú-ó, xíã<sup>n</sup> ío ní cuñúhu ñaha-ndo xii-í. <sup>22</sup> Te ndíi Moisés ní cachí ndíi sá cuãha-yu señã ñ<sup>n</sup> cue landú téé, dico ñá díu mée ndíi ni cãhu iní ndíi chi duca<sup>n</sup> tnãhí ní xóo cada cue ñani tnãhá-ó dává-án, núu xíã<sup>n</sup> nchóhó sãha-ndo señã ñ<sup>n</sup> landú téé cuéi cùu-xi nduu ndetatú-ó. <sup>23</sup> Te duca<sup>n</sup> quide-ndo cuendá sá ñá túú nã cumãni-ndo núu tnúhu sá sánú ichi ñaha xii-ndo ní dándõo ndíi Moisés. ¿Te ná cuendá cúdeén-ndo núu-í sá ní quide tãtna-í téé cùhú nduu ndetatú-ó-í? <sup>24</sup> Te váha váha cada cuendá-ndo, te vá cuendá-ni cáhá<sup>n</sup>-ndo sá yúhú ndécuechi-í chi ñá túú xini-ndo —cãchí-gá xáha<sup>n</sup>-gã xii-yu.

*Jèsús xáha<sup>n</sup>-gã xii-yu núu véxi-gá*

<sup>25</sup> Te dava ñáyiu ñuú Jerusálén ni ngúta-yu xitnãhá-yu:

—¿Náa ñá díu téé-án nánducu-güedé cãhni-güedé?, <sup>26</sup> núu náí-dé nútníi núu chítú núú tacá-án cáhá<sup>n</sup>-dé, te vá yõo cüyíi cùñaha xii-dé ñ<sup>n</sup> tnúhu. Cudana te cue téé cùchiu<sup>n</sup> sandáa iní-güedé sá díu-dé cúu-dé Cristú Yáa ní tendaha Yá Ndióxi véxi ñuyíú-a. <sup>27</sup> Dico nchoo xini-ó ndéé ichi véxi téé-án, dico Cristú ná quixi-gá chi vá yõo ñ<sup>n</sup> quini ndéé ichi quixi Yáa-án —cãchí-yu xitnãhá-yu.

<sup>28</sup> Te yíhi Jesús xití veñúhu cãhnu sá ío cùnuu danehe-gá ñáyiu, te ní tecú dóho-gá tnúhu cáhá<sup>n</sup>-yu. Te níhi ní cáhá<sup>n</sup>-gá, te xáha<sup>n</sup>-gã xii-yu:

—¡Ná quini-tu nchóhó ndéé ichi véxi yúhú! Yúhú véxi-í dico ñá díu sá cúu iní méé-í, chi Yá Ndióxi Yáa quide nchãa-ndi túhú sá váha ní tendaha ñaha-gá xii-í véxi-í, te nchóhó ñá túú xini-ndo-gã. <sup>29</sup> Te yúhú xini-í-gá chi núu ndécú-gã ní quee-í véxi-í, te díu mee-gã ní tendaha ñaha-gá véxi-í —cãchí-gá xáha<sup>n</sup>-gã xii-yu.

<sup>30</sup> Te sá dúcã<sup>n</sup> ní cáhá<sup>n</sup>-gá, núu cuini-güedé tníi ñaha-güedé xii-gá quihí<sup>n</sup>-gá veccá ní cùu, dico vá yõo ñ<sup>n</sup> ní cüyíi tníi ñaha xii-gá chi vátá sáa-gá óré tníi ñaha-güedé. <sup>31</sup> Dico vai-yu ní sandáa iní ñáhã-yu xii-gá, te ní xitnãhá-yu:

—¿Nágá cúu sá cáda Cristú ná quixi-gá-í?, te téé-a ío cuéhe núú sá tá quide-dé véxi. Vãa díu téé-a cùu-dé Cristú Yáa ní tendaha Yá Ndióxi véxi ñuyíú-a —cãchí-yu xitnãhá-yu.

*Cue téé cùu fariséu cuini-güedé quihí<sup>n</sup> Jèsús veccá*

<sup>32</sup> Te ní níhi cue téé cùu fariséu tnúhu nacuaa cáhá<sup>n</sup> ñáyiu cuendá Jèsús, núu ní ndatnúhu-güedé ndíhi cue dútú cùnùu, te ní techiu<sup>n</sup>-güedé cue téé quide cuendá veñúhu cuáhã<sup>n</sup>-güedé cuátníi ñaha-güedé xii-gá ní cùu. <sup>33</sup> Te ní xáha<sup>n</sup>-gã xii-güedé:

—Sacú duha nduu cundecu ndíhi ñaha-í xii-ndo, te núhú tucu-í núú ndécú tãtã-í Yáa ní tendaha ñaha xii-í véxi-í ñuyíú-a. <sup>34</sup> Te cuéi na nãnducu ñaha-ndo dico vá ná níhi ñáhã-ndo chi vá sãa-ndo núú cündecu-í —cãchí-gá xáha<sup>n</sup>-gã xii-güedé.

<sup>35</sup> Te ní ngúta ñáyiu isráel xitnãhá-yu:

—¿Ndéé quihí<sup>n</sup>-tu téé-a te vá ná níhi-ó-dé-í? ¿Ádi quihí<sup>n</sup>-dé na chitnãhá-dé ñáyiu isráel ñáyiu nchitenuu nchaa ñuú xicá cuendá danèhè-dé ñáyiu griégú? <sup>36</sup> ¿Náa cáhá<sup>n</sup>-tu-dé duha cáhá<sup>n</sup>-dé: “Nanducu ñaha-ndo te vá nãníhi ñáhã-ndo chi vá sãa-ndo núú cündecu-í”, cãchí-tu-dé? —cãchí-yu xitnãhá-yu.

*Nãcuãa cada Espiritú Yá Ndióxi iní-ó*

<sup>37</sup> Te nduu ní yáha-ná vico cùu-xi nduu cãhnu vihi, te nduu-án ní ngúnu tníi Jèsús tnuú ñáyiu, te níhi ní cáhá<sup>n</sup>-gá, te xáha<sup>n</sup>-gã xii-yu:

—Núu ío dava-ndo yíchí-ndo ndúte, te quixi-ndo núu-í, te coho-ndo. <sup>38</sup> Duha cáhá<sup>n</sup>-í chi nchaa ñáyiu na quindáa iní ñáhã xii-í, te cada-xi iní-yu dãtná ñ<sup>n</sup> núú xicá ndúte, nchaa-ni nduu xica ñá túú yichí, duca<sup>n</sup> cáda-xi iní-yu núu cuáhã<sup>n</sup> núú véxi dãtná cáhá<sup>n</sup>-xi núú tütú Yá Ndióxi —cãchí-gá xáha<sup>n</sup>-gã xii-yu.

<sup>39</sup> Te duca<sup>n</sup> ní cáhá<sup>n</sup>-gá cuendá sá quixí Espiritú Yá Ndióxi ngündecu ndíhi nchaa ñáyiu na quindáa iní ñáhã xii-gá, chi sáa nduu ndãa-gã andíu cáda cãhnu ñaha Tãtã-gã xii-gá, te dává-án te quixi Espiritú Yá Ndióxi cundecu ndíhi-yu.

*Ñá ní cùu ñ<sup>n</sup> nuú-yu cuendá tnúhu ní cáhá<sup>n</sup> Jèsús*

<sup>40</sup> Te dava ñáyiu ní xindedóho tnúhu ní cáhá<sup>n</sup> Jèsús ní xitnãhá-yu:

—Ndáa sá téé-a cùu-dé téé cãchí-yu quixi cáhá<sup>n</sup> tnúhu Yá Ndióxi —cãchí-yu xitnãhá-yu.

<sup>41</sup> Te dava tucú-yu xitnãhá-yu:

—Tée-a cùu-dé Cristú Yaá ní tendaha Yá Ndióxi véxi ñuyúú-a —cächí-yu xitnàhá-yu.

Te dava-gá tucú-yu xitnàhá-yu:

—¿Náa ndáa distritú Galileá quixi Cristú Yaá tendaha Yá Ndióxi quixi ñuyúú-a? <sup>42</sup> Chi núú túú Yá Ndióxi cächí-xi sá Cristú Yaá tendaha Yá Ndióxi quixi ñuyúú-a cuu-gá ñ<sup>n</sup> ñani tnáhá ndíi Dàvíi, te quee-gá ñuú Bèlén ñuú méé ndíi Dàvíi, duha cáhá<sup>n</sup>-xi núú túú Yá Ndióxi —cächí-yu xitnàhá-yu.

<sup>43</sup> Te xiá<sup>n</sup> núu ñá ní cùu ñ<sup>n</sup>nuú-yu cuendá Jèsús. <sup>44</sup> Te davá-yu cuini-yu tñí-yu Jèsús quihí<sup>n</sup>-gá vecaá ní cùu, dico ni ñ<sup>n</sup>-yu ñá túú ní cùyí-yu tñí ñáhá-yu xii-gá.

*Cue téé cùchiu<sup>n</sup> ñá túú sàndáá iní-güedé Jèsús*

<sup>45</sup> Te cue téé cuáhá<sup>n</sup> tñí ñaha xii Jèsús ní cùu ní ndexio-güedé núú cué téé cùu fariséú ndíi núú cué dítúú cúnúu. Te xáha<sup>n</sup> cué téé cúnúu-á<sup>n</sup>:

—¿Ná cuendá ñá ní cãndeca-ndo tée-ã<sup>n</sup> quixi? —cächí-güedé xáha<sup>n</sup>-güedé.

<sup>46</sup> Te cue téé ní sáhá<sup>n</sup> chiú<sup>n</sup> ní xáha<sup>n</sup>-güedé: —Ni ñ<sup>n</sup> téé ñá túú xiní-ndí cáhá<sup>n</sup> dàtná cáhá<sup>n</sup> tée-ã<sup>n</sup> —cächí-güedé xáha<sup>n</sup>-güedé.

<sup>47</sup> Te ní xáha<sup>n</sup> cué téé cùu fariséú: —¿Náa tnáhá nchòhó ní sàndáá iní-ndó tnúhu ndehnde cáhá<sup>n</sup> tée-ã<sup>n</sup>? <sup>48</sup> ¿Náa ñá túú xiní-ndó sá ní ñ<sup>n</sup> cue téé tàxi tnuní nchúhú, te ní ñ<sup>n</sup> nchúhú cue téé cùu fariséú ñá túú sàndáá iní-ndí tée-ã<sup>n</sup> ñá? <sup>49</sup> Nchaa ñáiyu tùha ñaha xii tée-ã<sup>n</sup> ñá túú sàndáá iní-yu nacuáa cáhá<sup>n</sup> tnúhu sá sánú ichi ñaha xii-o, dico cuíta nihnú-yu sá dúcá<sup>n</sup> quidé-yu —cächí-güedé xáha<sup>n</sup>-güedé xii cue téé-ã<sup>n</sup>.

<sup>50</sup> Te té Nicòdemú téé ní sáhá<sup>n</sup> níú ní ndatnúhu-dé ndíhi Jèsús cùú-dé tnáhá-dé ñ<sup>n</sup> téé fariséú, te ní xáha<sup>n</sup>-dè xii-güedé:

<sup>51</sup> —Tnúhu sá sánú ichi ñaha xii-o nacuáa cundecu-o cächí-xi sá ndéé cundedòho-o nása cáhá<sup>n</sup> téé tàú cuéchi cuendá cutnúni iní-ó ná ní quide-dé, te dàtnúni cáhá<sup>n</sup>-ó núu ndisa ndècuéchi-dé àdi ñá túú ndècuéchi-dé —cächí-dé xáha<sup>n</sup>-dè.

<sup>52</sup> Te ní xáha<sup>n</sup>-güedé:

—Cùu ní cächí sá tnáhá-ò cùú-n tée distritú Galileá núu duca<sup>n</sup> cáhá<sup>n</sup>-n. Dacuàha tutú yodó tnúni tnúhu Yá Ndióxi te quini-n nacuáa cáhá<sup>n</sup>-xi sá ní ñ<sup>n</sup> téé véxi distritú Galileá ñá túú cáhá<sup>n</sup>-dè tnúhu Yá Ndióxi —cächí-güedé xáha<sup>n</sup>-güedé.

<sup>53</sup> Duca<sup>n</sup> te ndí díí<sup>n</sup> cuãnuhú-güedé vehe-güedé.

## 8

*Ñ<sup>n</sup> ñadìhí ndécú vñhi cuéchi-xi*

<sup>1</sup> Te Jèsús cuáhá<sup>n</sup>-gá yucu Òlívú. <sup>2</sup> Te sátá ní túndaá nduu tnéé, te cuáhá<sup>n</sup> tucu-gá veñúhu càhnu sá ío cúnúu. Te ío cuéhé ñáiyu ní chítú níhnú-yu núú-gá, te ní ngóo-gá ní

dánèhé ñáhá-gá xii-yu. <sup>3</sup> Te ní quexio cue téé dàcuaha ñaha xii-yu nchaa tnúhu ní chídó tnúni ndíi Moisés, ndíhi cue téé cùu fariséú, te ndèca-güedé ñ<sup>n</sup> ñadìhí ní sáá, te ñaha-ã<sup>n</sup> ní xiní ñáhá-yu cáhá<sup>n</sup> ndíhi-a<sup>n</sup> ñ<sup>n</sup> téé dico ñá díú yíi-a<sup>n</sup> cuu-dé, te ní sanutnñí ñaha-güedé xii-a<sup>n</sup> tnuú nchaa ñáiyu xindecu núú Jèsús. <sup>4</sup> Te ní xáha<sup>n</sup>-güedé xii Jèsús:

—Mèstrú, ñadìhí-a ní xiní ñáhá ñáiyu xii-a<sup>n</sup> cáhá<sup>n</sup> ndíhi-a<sup>n</sup> ñ<sup>n</sup> téé dico ñá díú yíi-a<sup>n</sup> cuu-dé. <sup>5</sup> Te tnúhu ní chídó tnúni ndíi Moisés cächí-xi sá yúú cahni-o nchaa ñáiyu díhi duha quide. Te yòhó, ¿nása cächí-n cunduu-i? —cächí-güedé xáha<sup>n</sup>-güedé xii-gá.

<sup>6</sup> Duha ní cáhá<sup>n</sup>-güedé chi cuendá sá cuini-güedé coto ndéé ñáhá-güedé xii-gá núu nása cáhá<sup>n</sup>-gá cuendá núcóo nchihi ñaha-güedé xii-gá ní cáhá<sup>n</sup>-güedé. Te ní ngúnu ndeyi-gá te ní ngúita-gá tée-gá ndíhi díquí ndáhá-gá lètrá núú ñúhú. <sup>7</sup> Te xicá<sup>n</sup> tnúhú-ní tucu-güedé núú-gá núu ní ndonehe núú-gá, te ní xáha<sup>n</sup>-gá:

—Ndédani càa nchòhó te núu ñá túú nã cuéchi quide-ndo te díhna nuu-gá-ndó chí cuàha-a<sup>n</sup> yúú —cächí-gá xáha<sup>n</sup>-gá xii-güedé.

<sup>8</sup> Te ní ngúnu ndeyi tucu-gá tée tucu-gá lètrá núú ñúhú. <sup>9</sup> Te sá dúcá<sup>n</sup> ní xáha<sup>n</sup>-gá xii-güedé te ní ndixi túu iní-güedé sá ñá túú quide váha mee-güedé tnáhá-güedé, núu da ñ<sup>n</sup> da ñ<sup>n</sup>-güedé ní ndee, te díhna-gá cue téé cùu sacuéhé ní ndee te ní ngúita nchicú<sup>n</sup> dava-gá-güedé. Te sátá ní ndíhi-güedé ní ndee, te ní quendóo mee-nã Jèsús ndíhi ñadìhí-ã<sup>n</sup>. <sup>10</sup> Te ní ndonehe núú Jèsús te ní xiní-gá sá ní ndíhi-güedé cuáhá<sup>n</sup> te mee-nã ñadìhí-ã<sup>n</sup> ní ndóo-a<sup>n</sup>, te ní xáha<sup>n</sup>-gá xii-a<sup>n</sup>:

—¿Ndèndi cuáhá<sup>n</sup> cue téé cächí sá ní quide-n cuéchi? ¿Ni ñ<sup>n</sup>-güedé ñá ní cundee tnúhu-güedé quíhi<sup>n</sup>-n càstiú-va? —cächí-gá xáha<sup>n</sup>-gá xii-a<sup>n</sup>.

<sup>11</sup> Te ní xáha<sup>n</sup>-a<sup>n</sup> xii Jèsús:

—Ñáhá, chi ní ñ<sup>n</sup>-güedé ñá ní ndacu-güedé —cächí-a<sup>n</sup> xáha<sup>n</sup>-a<sup>n</sup>.

Te ní xáha<sup>n</sup> Jèsús:

—Te ní yúhú vá dáquihí<sup>n</sup> ñáhá-í castiú xii-n. Te vitna te nùhú-n te vá cadá-gá-n nãndi sá cuéhé sá dúhá —cächí-gá xáha<sup>n</sup>-gá xii-a<sup>n</sup>.

*Jèsús dándixi túu-gá iní-ó*

<sup>12</sup> Te ní cáhá<sup>n</sup> tucu Jèsús núú ñáiyu, te xáha<sup>n</sup>-gá xii-yu:

—Yúhú cùú-í dàtná ñ<sup>n</sup> ñuhú dáyèhe-í ñuyúú-a, te nchaa ñáiyu na chitnahá ñáhá xii-í, te vá cundècu-gá-yu ichi cuéhé ichi duha, chi yúhú dándixi túu-í iní-yu cuendá cutnúni iní-yu nacuáa nduu cuendá Yá Ndióxi, te cundecu-í ndíhi-yu ní caa ní quihí<sup>n</sup> —cächí-gá xáha<sup>n</sup>-gá xii-yu.

<sup>13</sup> Te ní xáha<sup>n</sup> cué téé cùu fariséú xii-gá:

—Medli-n cahá<sup>n</sup>-n sã cúú-n tée váha, te vá yõo ì<sup>n</sup>-gã chindée tnúhu ñaha xii-n núu ná tée cùu-n, dico xiã<sup>n</sup> ñã túú nãndíhi-xi — cãchí-güedé xãha<sup>n</sup>-güedé xii-gã.

<sup>14</sup>Te ní xãhá<sup>n</sup> Jësús:

—Cuëi cãhá<sup>n</sup>-í cuendá mée-í dico nãndíhi tnúhu cãhá<sup>n</sup>-í. Chi yúhú ñaha-í ndée ichi véxi-í, te xini-í ndée ichi núhú-í, dico nchòhó chi ñã túú xini-ndó ndée ichi véxi-í, te ni ñã túú xini-ndó ndée ichi quíhí<sup>n</sup>-í. <sup>15</sup>Te nchòhó chi cuendá-ni cãhá<sup>n</sup>-ndó cuendá ñáyiu núu quide váha-yu àdi ñã túú quide váha-yu. Te yúhú ñã túú cãhá<sup>n</sup>-í cuendá ñáyiu núu quide váha-yu àdi ñã túú quide váha-yu. <sup>16</sup>Àdi núu cãhá<sup>n</sup>-í dico ì<sup>n</sup> tnúhu ndáá cãhá<sup>n</sup>-í chi ñã díú-ní mée-í cãhá<sup>n</sup>, chi tnàhá Tãtã-í Yaa ní tendaha ñaha xii-í véxi-í ñuyúú-a cãhá<sup>n</sup>-gã chindée tnúhu ñaha-gã xii-í. <sup>17</sup>Te tnúhu sã sãnú ichi ñaha xii-ndo cãchí-xi sã núu na cundecu úú cue tée cãhá<sup>n</sup> ndáá-güedé nãcuáa cùu ì<sup>n</sup> sã cundáá, te núu ì<sup>n</sup>-ni tnúhu na cãhá<sup>n</sup>-güedé ndi ndúú-güedé te xiã<sup>n</sup> nãndíhi-xi, duha cãchí tnúhu-á<sup>n</sup>. <sup>18</sup>Te diu-ni duca<sup>n</sup> cùu-xi yúhú chi cãhá<sup>n</sup>-í ì<sup>n</sup> tnúhu ndáá sã cúú-xi mée-í, te diu-ni dátã cãhá<sup>n</sup>-í cãhá<sup>n</sup> Tãtã-í Yaa ní tendaha ñaha xii-í véxi-í ñuyúú-a — cãchí-gã xãhá<sup>n</sup>-gã xii-güedé.

<sup>19</sup>Te ní xãhá<sup>n</sup>-güedé xii-gã:

—¿Te ndée ndécú Tãtã-n-í? —cãchí-güedé xãhá<sup>n</sup>-güedé.

Te ní xãhá<sup>n</sup> Jësús:

—Te núu dicó xini-ndó yõo cuu yúhú-á te duca<sup>n</sup> te quini-ndó Tãtã-í. Te ni yúhú ñã túú xini-ndó yõo cuu-í núu xiã<sup>n</sup> ñã túú xini-ndó Tãtã-í — cãchí-gã xãhá<sup>n</sup>-gã xii-güedé.

<sup>20</sup>Duha ní cãhá<sup>n</sup> Jësús nini dàcuaha-gã ñáyiu xití veñuhu núu ndécú àlcanciá díhú<sup>n</sup>. Te vá yõo ì<sup>n</sup> ni cùyi<sup>n</sup> tnií ñaha xii-gã chi vátã sãá-gã òrè tnií ñaha-güedé.

*Ñáyiu ñã túú sãndáá iní ñáhã xii Jësús vá ndácú-yu quíhí<sup>n</sup>-yu núu núhú-gã cundecu-gã*

<sup>21</sup>Te ní xãhá<sup>n</sup> tucu Jësús xii-güedé:

—Yúhú núhú-í te nanducu ñaha-ndo te vá nãníhi ñáhã-ndó, te cuú-ndó núú yíca cuëchi-ndo, chi vá ndácú-ndó sãá-ndó núú núhú-í cundecu-í — cãchí-gã xãhá<sup>n</sup>-gã xii-güedé.

<sup>22</sup>Te ní xitnaha cue tée isràél:

—¿Te náa cahni-dé mée-dé núu cãchí-dé sã vá ndácú-ó sãá-ó núu quíhí<sup>n</sup>-dé-á<sup>n</sup>? — cãchí-güedé xitnaha-güedé.

<sup>23</sup>Te ní xãhá<sup>n</sup> Jësús xii-güedé:

—Nchòhó chi cue tée ñuyúú-a cùu-ndo, núu ío ñuhu iní-ndó sã ío ñuyúú-a. Te yúhú chi tée núu ñinu cùu-í núu xiã<sup>n</sup> ñã túú sã ío ñuyúú-a ñuhu iní-í. <sup>24</sup>Te xiã<sup>n</sup> núu cãchí-í sã cúú-ndó núú yíca cuëchi-ndo, chi ñã cuini-ndó quindáá iní-ndó sã yúhú véxi cuu<sup>n</sup>-í andiú, te núu xiã<sup>n</sup> diu-ni núú

yíca cuëchi-ndo cúú-ndó — cãchí-gã xãhá<sup>n</sup>-gã xii-güedé.

<sup>25</sup>Te ní xicã<sup>n</sup> tnúhú-güedé núu-gã, te xãhá<sup>n</sup>-güedé:

—¿Te ná cúú yòhó núu duca<sup>n</sup> cãhá<sup>n</sup>-n-í? — cãchí-güedé xãhá<sup>n</sup>-güedé xii-gã.

Te ní xãhá<sup>n</sup>-gã:

—Sa ní cãchí tnúhu-í xii-ndo ndée díhna — cãchí-gã xãhá<sup>n</sup>-gã xii-güedé.

<sup>26</sup>Te xãhá<sup>n</sup> tucu-gã:

—Ndécu cuéhé tnúhu cãhá<sup>n</sup>-í cada ndáá-í cuendá nchòhó. Te Tãtã-í Yaa ní tendaha ñaha xii-í véxi-í ñuyúú-a cãhá<sup>n</sup>-gã tnúhu ndáá, te tnúhu cãhá<sup>n</sup> yúhú ñuyúú-a cùu-xi tnúhu ní cãhá<sup>n</sup>-gã ní xindedóho-í — cãchí-gã xãhá<sup>n</sup>-gã xii-güedé.

<sup>27</sup>Te mee-güedé ñã túú ní təcú tnúni-güedé sã cuendá Dútú Ndióxi ní cãhá<sup>n</sup> Jësús. <sup>28</sup>Te ní xãhá<sup>n</sup>-gã xii-güedé:

—Òrè ná catá càa ñaha-ndo xii yúhú Tée cùu ñani tnáhã-ndó nchàa-ndo núú cùrúxi cahni ñaha-ndo, te òrè-á<sup>n</sup> cutnuni iní-ndó yõo cuu-í, te ñã túú quide-í sã cúú iní mée-í, chi yúhú cãhá<sup>n</sup>-í nãcuáa ní dánèhé ñáhã Tãtã-í <sup>29</sup>Yaa ní tendaha ñaha xii-í véxi-í. Te diu-gã ndécú ndíhi ñaha-gã xii-í, te ñã túú dáña nihnu ñaha-gã chi quide-í nchaa nãcuáa cùu iní-gã — cãchí-gã xãhá<sup>n</sup>-gã xii-güedé.

<sup>30</sup>Te sã dúcã<sup>n</sup> ní cãhá<sup>n</sup>-gã núu ío vai ñáyiu ní sãndáá iní ñáhã xii-gã.

*Ñáyiu sãndáá iní ñáhã xii Yá Ndióxi ndíhi ñáyiu ndécú ichi cuéhé ichi duha*

<sup>31</sup>Te ní xãhá<sup>n</sup> Jësús xii ñáyiu isràél ñáyiu ní sãndáá iní ñáhã xii-gã:

—Te núu vá dáñã ndée-ndó càda-ndo nchaa nãcuáa cãhá<sup>n</sup>-í, te cuu ndisa-ndo cuè tée tnáhã tnúhu ndíhi-í, <sup>32</sup>te tecú tnúni-gã-ndó tnúhu ndáá, te duca<sup>n</sup> te càcu nihnu-ndo — cãchí-gã xãhá<sup>n</sup>-gã xii-yu.

<sup>33</sup>Te ní xãhá<sup>n</sup>-yu:

—Nchúhú cúú-ndí cue ñani tnáhã ndíi Ábrahã, te ni ì<sup>n</sup> nduu ñã túú ndée sãcundedí nihnu-ndí ndoho tnáhã-ndí núu cãchí-ó sã dàcãcu nihnu ñaha-n xii-ndí — cãchí-yu xãhá<sup>n</sup>-yu xii-gã.

<sup>34</sup>Te ní xãhá<sup>n</sup> Jësús xii-yu:

—Na cãchí tnúhu ndáá-í xii-ndo sã nchàa ñáyiu quide nchaa sã cuéhé sã dúhá tàxi tnuni ñáhã-nã-xi xií-yu. <sup>35</sup>Te cue ñáyiu xinu cuechi te vá cúú ì<sup>n</sup>-ná cúú-yu ndíhi ñáyiu dii vèhe-xi xinu cuechi-yu, dico cue dèhe ñáyiu dii vèhe-xi-á<sup>n</sup> chi ì<sup>n</sup>-ni cùu ndíhi ñaha-güexi xií-yu. <sup>36</sup>Te núu yúhú Yaa cúú Dèhe Yá Ndióxi dàcãcu nihnu ñaha-í xii-ndo núú nchaa yíca cuëchi-ndo, te ndáá sã nchòhó càcu nihnu ndisa-ndo. <sup>37</sup>Te yúhú sa xini-í sã nchòhó cúú-ndó ñani tnáhã ndíi Ábrahã, te dicó-ni sã ñã tnáhã iní-ndó tnúhu cãhá<sup>n</sup>-í núu xiã<sup>n</sup> cuini-ndó cahni ñaha-ndo. <sup>38</sup>Te

yúhu càhá<sup>n</sup>-í nàcuáa ní dánhé ñhá Táta-í, te nchòhò quidé-ndó nàcuáa càhá<sup>n</sup> tátá-ndó —càchí-gá xáha<sup>n</sup>-gá xii-yu.

<sup>39</sup> Te ní xáhá<sup>n</sup>-yu:

—Ndíi Àbrahám cúu tátá-ndí —càchí-yu xáhá<sup>n</sup>-yu xii-gá.

Te ní xáha<sup>n</sup> Jèsús:

—Núu ndisa ñani tnáhá ndíi Àbrahám cúu-ndó, te cada-ndo nàcuáa ní xóo cada ndíi ní cùu. <sup>40</sup> Te yúhu cuéi càhá<sup>n</sup>-í ñ<sup>n</sup> tnúhu ndáá nàcuáa càhá<sup>n</sup> Yá Ndiòxí càchí tnúhu-gá xii-í, te cuini-ndó càhni ñaha-ndo. ¡Dico ndíi Àbrahám chí ñá túú duca<sup>n</sup> ní quide ndíi! <sup>41</sup> Te nchòhò quidé-ndó nàcuáa quide tátá-ndó —càchí-gá xáha<sup>n</sup>-gá xii-yu.

Te ní xáhá<sup>n</sup>-yu:

—Nchúhú, ñá túú yàyacá<sup>n</sup> ndécú tátá-ndí, chí ñ<sup>n</sup>ndíi Yá Ndiòxí cúu tátá-ndí —càchí-yu xáhá<sup>n</sup>-yu xii-gá.

<sup>42</sup> Te ní xáha<sup>n</sup> Jèsús:

—Núu dico Yá Ndiòxí ndisa cùu Tátá-ndó te cuu iní ñhá-ndó xii-í ní cùu chí yúhú ní quee-í núu ndécú-gá véxi-í ñuyú-a. Te ñá túú véxi-í sá cúu iní mée-í, chí mee-gá ní tendaha ñaha-gá véxi-í. <sup>43</sup> Te ñá túú tècú tnúni-ndó tnúhu càhá<sup>n</sup>-í chí ñá túú tnáhá iní-ndó. <sup>44</sup> Te nchòhò chí tátá-ndó cùu yucu ñávaha núu cùdíi iní-ndó quide-ndo nchaa nacuáa cùu iní-xi, chí ndéé òré ní ngáva ñuyú duca<sup>n</sup>-ni ndècu-xi dacáhá<sup>n</sup>-xi iní-ndó sàhni tnaha-ndo. Te ñá ñ<sup>n</sup> ndúu càhá<sup>n</sup>-xi ñ<sup>n</sup> tnúhu ndáa chí ñá túú xica-xi ichi ndáa, chí mee-ní ichi tnúhu ndehnde xica-xi chí duca<sup>n</sup> iní-xi. Te diu-xi dàcahu-xi iní-ndó dàcuandehnde-ndo. <sup>45</sup> Te yúhú càhá<sup>n</sup>-í tnúhu ndáa te ñá túú cuini-ndó quindáa iní ñhá-ndó. <sup>46</sup> ¿Te ndédacaa nchòhò xiní-ndó sá quidé-í ñ<sup>n</sup> sá cuéhé sá dúhá-í?, te yúhú ñá túú ná quidé-í chí càhá<sup>n</sup> ndáa-í, ¿te ná cuendá ñá túú cuini-ndó quindáa iní-ndó tnúhu càhá<sup>n</sup>-í? <sup>47</sup> Te nchaa ñáyuu ndècu ichi Yá Ndiòxí, ñáyuu-án sácúndedóho-yu nchaa tnúhu càhá<sup>n</sup>-gá. Te nchòhò chí ñá díú ichi Yá Ndiòxí ndécú-ndó núu ñá túú sácúndedóho-ndo tnúhu càhá<sup>n</sup>-gá —càchí-gá xáha<sup>n</sup>-gá xii-yu.

*Díha-gá Cristú sa ndècu dacúúxi ndíi Àbrahám*

<sup>48</sup> Te ní xáha<sup>n</sup> ñáyuu isràél:

—Váha-ni càhá<sup>n</sup>-ndí sá tée samaritanú cúu-n, te yucu ñávaha ndècu ndíh-n —càchí-yu xáhá<sup>n</sup>-yu xii-gá.

<sup>49</sup> Te ní xáha<sup>n</sup> Jèsús:

—Yúhú, ñá túú yucu ñávaha ndècu ndíh-n, chí Tàtá-í quidé càhnu-í, te nchòhò da cùu úhú iní ñhá-ndó xii-í —càchí-gá xáha<sup>n</sup>-gá xii-yu.

<sup>50</sup> Te xáha<sup>n</sup> tucu-gá:

—Yúhú, ñá túú càchí-í sá cáda càhnu ñaha-ndo, dico Dútú Ndiòxí cuini-gá sá

cáda càhnu ñaha-ndo xii-í. Te mee-gá càhá<sup>n</sup>-gá núu ndédacaa-ndo quide váha, te ndédacaa-ndo ñá túú quide váha. <sup>51</sup> Te na càchí tnúhu ndáa-í xii-ndo sá nchaa ñáyuu na tnúu tnúhu càhá<sup>n</sup>-í te vá cuíta nihnú-yu —càchí-gá xáha<sup>n</sup>-gá xii-yu.

<sup>52</sup> Te ní xáha<sup>n</sup> tucu ñáyuu isràél:

—Vitna te ní xiní ndáa-ndí sá yucu ñávaha ndècu ndíh-n, chí ndíi Àbrahám ndíh nchaa cue tée ní xóo càhá<sup>n</sup> tnúhu Yá Ndiòxí ndéé sanaha ní xihí-güedé, te yòhò càchí-tu-n sá ncháa ñáyuu na tnúu tnúhu càhá<sup>n</sup>-n te vá cùu-gá-yu. <sup>53</sup> ¿Náa io-gá càhnu cuu-ó dacúúxi ñani tnáhá-ndí ndíi Àbrahám-án? Tée-án dai ní xihí-dé ndíh cue tée ní xóo càhá<sup>n</sup> tnúhu Yá Ndiòxí ndéé sanaha. ¿Te yòhò nágá-tu cùu-n te vá cùu-n càha<sup>n</sup>-n-í? —càchí-yu xáhá<sup>n</sup>-yu.

<sup>54</sup> Te ní xáha<sup>n</sup> Jèsús:

—Te núu dico mée-í quidé càhnu-í mée-í ñá, te ñá túú nandíhí sá quidé-í núu duca<sup>n</sup>. Dico Tàtá-í quidé càhnu ñaha-gá xii-í, te diu-ni Yáa-án càchí-ndó cùu Ndiòxí-ndó. <sup>55</sup> Te nchòhò chí ñá túú xiní-ndó-gá. Te yúhú chí xiní-í-gá. Te núu na càchí-í sá ñá túú xiní-í-gá te dàcuandehnde-í dàtná ndehnde mée-ndo. Te yúhú chí xiní ndisa-í-gá te tnú-í nchaa tnúhu càhá<sup>n</sup>-gá. <sup>56</sup> Te ndíi Àbrahám ñani tnáhá-ndó ní xindecu ndéé sanaha io ní cudíi iní ndíi sá quini ñhá ndíi xii-í, te ní sáa nduu ní xiní ñhá ndíi xii-í núu io ní cudíi iní ndíi —càchí-gá xáha<sup>n</sup>-gá xii-yu.

<sup>57</sup> Te ní xáha<sup>n</sup> ñáyuu isràél xii Jèsús:

—Ni vátá cùhú-gá-n ùdico úxí cuía-n te càchí-n sá ní xiní-n ndíi Àbrahám, te ní cunaha víhi ní xihí ndíi-án —càchí-yu xáhá<sup>n</sup>-yu xii-gá.

<sup>58</sup> Te ní xáha<sup>n</sup> Jèsús:

—Te na càchí tnúhu ndáa-í xii-ndo sá cùmání-gá cundecu ndíi-án ñuyú-a te yúhú sa ndècu-gá-í —càchí-gá xáha<sup>n</sup>-gá xii-yu.

<sup>59</sup> Te sá dúcá<sup>n</sup> ní càhá<sup>n</sup>-gá núu xíá<sup>n</sup> ní quehé<sup>n</sup>-yu yúu cuáha ñhá-yu xii-gá ní cùu, te ní nguiváha-gá núu-yu te ní quee-gá xití veñúhu cuáhá<sup>n</sup>-gá.

## 9

*Jèsús quidé tātana-gá ñ<sup>n</sup> tée cuáa*

<sup>1</sup> Te núu xíca cùu Jèsús ní naníhí-gá ñ<sup>n</sup> tée cuáa, te sa duca<sup>n</sup> tnáhi cãa núu-dé ní cacu-dé. <sup>2</sup> Te ní xáha<sup>n</sup> cuu tée tée xica cuu ndíhí-gá xii-gá:

—Mèstrú, ¿ná cuendá dàcá<sup>n</sup> cuáa tée-án ní cacu-dé? ¿Sá cuendá nchaa yíca cuéchi tátá-dé, án sá cuendá nchaa yíca cuéchi náná-dé, án sá cuendá nchaa yíca cuéchi mee-dé dàcá<sup>n</sup> cáa-dé ní cacu-dé? —càchí-güedé xáha<sup>n</sup>-güedé xii-gá.

<sup>3</sup> Te ní xáha<sup>n</sup> Jèsús:

—Ni ña díu sá cuendá nchaa yíca cuéchi mee-dé, te ni ña díu sá cuendá nchaa yíca cuéchi tátá-dé, te ni ña díu sá cuendá nchaa yíca cuéchi ñaná-dé, chi mee Yá Ndióxi ní cuini-gá sá dúcá<sup>n</sup> cundu-dé sáá-dé ñuyú-a cuendá sá ñuyú-a quini ñáyiú nása cada ñaha Yá Ndióxi xii-dé ndúha núú-dé. <sup>4</sup> Te vitna ió-gá nduu cùyica sá cada-í nchaa chiú<sup>n</sup> ní táhú Yáá ní tendaha ñaha xii-í véxi-í ñuyú-a, chi sáá nduu te vá ndácú-gá-í cada-í chiú<sup>n</sup>-gá. <sup>5</sup> Te nini ndècu-gá-í ñuyú-a te dándixi túú-í iní nchaa ñáyiú cuendá cutnùní iní-yu nàcuáa nduu cuendá Yá Ndióxi —cächí-gá xáha<sup>n</sup>-gá xii-güedé.

<sup>6</sup> Te sáta dúcá<sup>n</sup> ní cáhá<sup>n</sup>-gá, te ní sati-gá díí-gá núú ñúhú te ní dácá-gá luha ñuhu ní cuáha ndéhyú, te ndéhyú-á<sup>n</sup> ní dácánú-gá ndúú xio núú tée cuáá-á<sup>n</sup>. <sup>7</sup> Te ní xáha<sup>n</sup>-gá xii-dé:

—Quihí<sup>n</sup> n àquete-n núú-n ndute tanqui Silòé —cächí-gá xáha<sup>n</sup>-gá xii-dé. Te Silòé-á<sup>n</sup> quée-xi tnúhu meé-yu: Tée xica chiú<sup>n</sup>.

Te ní sáhá<sup>n</sup> tée cuáá-á<sup>n</sup> ní naquete-dé núú-dé, te òré ní ndexio-dé te sa ndèhe-dé. <sup>8</sup> Te nchaa ñáyiú ndècu yatni núú ndécú-dé ndihi nchaa ñáyiú xini ñháá xii-dé núú xicá<sup>n</sup> ndáhú-dé ní xitnáhá-yu:

—¿Náa ña díu tée-á<sup>n</sup> ní xóo cáca<sup>n</sup> ndáhú-dé? —cächí-yu xitnáhá-yu.

<sup>9</sup> Te davá-yu cächí-yu sá díu-dé, te davá-yu cächí-yu sá ña díu-dé, dico duca<sup>n</sup> cää-dé, cächí-yu xitnáhá-yu.

Dico mee-dé ní xáha<sup>n</sup>-dè xií-yu sá díu-dé.

<sup>10</sup> Te ní xicá<sup>n</sup> tnúhú-yu núú-dé, te xáhá<sup>n</sup>-yu:

—¿Náa ní cuu núú ní ndúha núú-n ndèhe-n vitna? —cächí-yu xáhá<sup>n</sup>-yu xii-dé.

<sup>11</sup> Te ní xáha<sup>n</sup>-dè:

—Tée nani Jesús-á<sup>n</sup> ní cadúha-dé luha ndéhyú te ní dácánú-dé núú-í, te ní táuchíú<sup>n</sup>-dè ní sáhá<sup>n</sup>-í tànquí Silòé ní naquete-í núú-í, te òré-á<sup>n</sup> ní cuu cundehe-í —cächí-dé xáha<sup>n</sup>-dè xii-yu.

<sup>12</sup> Te ní xicá<sup>n</sup> tnúhú tucú-yu núú-dé, te xáhá<sup>n</sup>-yu:

—¿Te ndéé ndécú tée-á<sup>n</sup>? —cächí-yu xáhá<sup>n</sup>-yu xii-dé.

Te ní xáha<sup>n</sup>-dè:

—Ñá túú xini-í —cächí-dé xáha<sup>n</sup>-dè xii-yu.

*Cue tée cùu fariséú ndátñu-güedé ndihi tée ní ndúha núú-xi*

<sup>13</sup> Te ndèca-güedé tée ní ndúha núú-xi-á<sup>n</sup> cuáhá<sup>n</sup> núú cué tée cùu fariséú. <sup>14</sup> Te cuendá sá nduu ndetatú-yu ní cadúha Jesús ndéhyú ní dácánú-gá núú tée-á<sup>n</sup> te ní ndúha, <sup>15</sup> xiá<sup>n</sup> núú ní xicá<sup>n</sup> tnúhú cué tée cùu fariséú núú-dé, te xáha<sup>n</sup>-güedé:

—¿Náa ní cuu ní ndúha núú-n? —cächí-güedé xáha<sup>n</sup>-güedé xii-dé.

Te ní xáha<sup>n</sup>-dè xii-güedé:

—H<sup>n</sup> tée ní dácánú-dé ndéhyú núú-í te ní sáhá<sup>n</sup>-í ní naquete-í, te ní cuu ndèhe-í vitna —cächí-dé xáha<sup>n</sup>-dè xii-güedé.

<sup>16</sup> Te dava cue tée cùu fariséú ní xitnáha-güedé:

—Ñá díu Yá Ndióxi ní tendaha ñaha-gá xii tée-á<sup>n</sup> véxi-dé núu duha quide-dé nchaa sá vá yóo tnáhi ndàcu cada, te ña túú sándáá iní-dé canehe íí-dé nduu ndetatú-ó —cächí-güedé xitnáha-güedé.

Te dava-güedé ní xitnáha-güedé:

—¿Náa ndacu-dé cada-dé sá vá yóo tnáhi ndàcu cada te núu cùu-dé tée yíca cuéchi? —cächí-güedé xitnáha-güedé.

Te ña túú ní cùu ñ<sup>n</sup>nuu-güedé tnúhu ní cáhá<sup>n</sup>-güedé. <sup>17</sup> Te ní xicá<sup>n</sup> tnúhú tucu-güedé núú tée ní ndúha núú-xi-á<sup>n</sup>, te xáha<sup>n</sup>-güedé:

—Te yóhó, ¿náa cächí-n cuendá tée ní quide tátna núú-n te ní ndúha? —cächí-güedé xáha<sup>n</sup>-güedé xii-dé.

Te ní xáha<sup>n</sup>-dè:

—Yúhú cächí-í sá ñ<sup>n</sup> tée cáhá<sup>n</sup> tnúhu Yá Ndióxi cúú-dé —cächí-dé xáha<sup>n</sup>-dè xii-güedé.

<sup>18</sup> Dico cue tée isráel ña ní sándáá iní-güedé sá cuáá-dé ní cùu, chi cuendá sa ní ndúha núú-dé ní xini ñháá-güedé, te xiá<sup>n</sup> núu ní cana-güedé tátá-dé ndihi ñaná-dé, <sup>19</sup> te ní xicá<sup>n</sup> tnúhú-güedé núú-yu, te xáha<sup>n</sup>-güedé:

—¿Diu tée-a dèhe-ndo tée cächí-ndó cuáá-dé ní cacu-dé-á<sup>n</sup>? ¿Te náa ní cuu ní ndúha núú-dé? —cächí-güedé xáha<sup>n</sup>-güedé xií-yu.

<sup>20</sup> Te ní xáha<sup>n</sup> tátá-dé ndihi ñaná-dé:

—Diu dèhe-ndí cúú-dé te sa cuáá ndisa-dé ní cacu-dé, <sup>21</sup> dico ña túú xini-ndí náa ní cuu ní ndúha núú-dé, te ni ña túú xini-ndí yoo ní quide tátna. Chí cáca<sup>n</sup> tnúhú núú meé-dé xiá<sup>n</sup> núu sa sacuéhé-dé, te na cáhá<sup>n</sup>-dè núu náa ní cuu ní ndúha núú-dé —cächí-yu xáhá<sup>n</sup>-yu xii-güedé.

<sup>22</sup> Duha ní cáhá<sup>n</sup> tátá-dé ndihi ñaná-dé ní xáhá<sup>n</sup>-yu xii-güedé cuendá sá yuhú-yu cue tée cùnuu núú ñáyiú isráel, chi cue tée-á<sup>n</sup> sa ní ndatnúhu-güedé ní cuu ñ<sup>n</sup>nuu-güedé sá núu ndédaca ñáyiú na cáhá<sup>n</sup> sá Jesús cúú-gá Crístú Yáá ní tendaha Yá Ndióxi véxi ñuyú-a, te vá dáñá-gá-güedé quihu-yu veñuhu.

<sup>23</sup> Núu xiá<sup>n</sup> ní xáha<sup>n</sup> tátá-dé ndihi ñaná-dé sá ná cáca<sup>n</sup> tnúhú-güedé núú meé-dé chi sa sacuéhé-dé.

<sup>24</sup> Te xiá<sup>n</sup> núu ní cana tucu-güedé tée ní ndúha núú-xi-á<sup>n</sup>, te ní xáha<sup>n</sup>-güedé:

—Cáhá<sup>n</sup>-n ñ<sup>n</sup> tnúhu ndáá chi Yá Ndióxi ndéhé ndí-gá nàcuáa ní cuu ní ndúha núú-n, chi nchúhú xini-ndí sá dico ñ<sup>n</sup> tée ndècu yíca cuéchi-xi cùu tée cächí-n ní quide tátna núú-n —cächí-güedé xáha<sup>n</sup>-güedé xii-dé.

<sup>25</sup> Te ní xáha<sup>n</sup>-dè:

—Yúhú, ña túú xini-í te núu tée ndècu yíca cuéchi-xi cùu-dé ádi ñháá. Dico-ní sá xini-í

sá cuàá-í ní cùu te vitna ní cuu cundehe-í — cächí-dé xáha<sup>n</sup>-dè xii-güedé.

<sup>26</sup> Te ní xícá<sup>n</sup> tnúhú tùcu-güedé núú-dé, te xáha<sup>n</sup>-güedé:

—¿Nása ní quide ñaha-dé xii-n te ní ndúha núú-n-í? —cächí-güedé xáha<sup>n</sup>-güedé xii-dé.

<sup>27</sup> Te ní xáha<sup>n</sup>-dè:

—Yúhú sa ní cáhá<sup>n</sup>-í te ñá túú quide cuendá-ndó. ¿Te ná cuendá cuiní-ndó cächí tnúhu-ni tucu-í? ¿Á tnáhá-ndó cuiní-ndó quindáá iní-ndó tnúhu cáhá<sup>n</sup>-dé? —cächí-dé xáha<sup>n</sup>-dè xii-güedé.

<sup>28</sup> Te ní cudéé<sup>n</sup>-güedé núú-dé, te ní xáha<sup>n</sup>-güedé xii-dé:

—Te núu yóhó cuiní-n chinchícú<sup>n</sup>-n tée-án<sup>n</sup> te cuahá<sup>n</sup>, dico nchúhú chi canchícú<sup>n</sup> nihnu nahi-ni-ndí nácuaá ní cáhá<sup>n</sup> ndíi Moisés. <sup>29</sup> Te nchúhú chi naha-ndí sá Yá Ndióxi ní cáhá<sup>n</sup> ndíhi-gá ndíi Moisés, dico tée cächí-n-án<sup>n</sup> chi ní ñà túú xiní-ndí ndéé tée cùu-dé —cächí-güedé xáha<sup>n</sup>-güedé xii-dé.

<sup>30</sup> Te ní xáha<sup>n</sup> tée ní ndúha núú-xi-án<sup>n</sup>:

—¿Te náa ñá díu nchóhó cächí-ndó sá io túha-ndo? Te núu duca<sup>n</sup> cáhá<sup>n</sup>-ndó sá ñà túú xiní-ndó ndéé tée cùu-dé, te díu-dé ní quide tátna-dé núú-í ní ndúha —cächí-dé xáha<sup>n</sup>-dè xii-güedé.

Te xáha<sup>n</sup> tùcu-dé:

<sup>31</sup> —Xiní-ó sá Yá Ndióxi ñá túú tédóho-gá tnúhu cáhá<sup>n</sup> ñáiyu quide nchaa sá cuèhé sá dúhá, chi nchaa ñáiyu quide cahnu ñaha xii-gá te quidé-yu nchaa nácuaá cùu iní-gá, te ñáiyu-án<sup>n</sup> tédóho-gá tnúhu cáhá<sup>n</sup>-yu. <sup>32</sup> Te ñá ñ<sup>n</sup> ndúu cáhá<sup>n</sup> ñáiyu cuendá ñ<sup>n</sup> tée cada tátna núú ñ<sup>n</sup> ñáiyu cuàá ndéé ní cacu-xi te ndúha. <sup>33</sup> Te núu ñá díu mèe Yá Ndióxi ní tëndaha ñaha-gá xii tée-án<sup>n</sup> véxi-dé ñá, te vá ndácú-dé cada tátna-dé núú-í ní cùu —cächí-dé xáha<sup>n</sup>-dè xii-güedé.

<sup>34</sup> Te ní xáha<sup>n</sup>-güedé:

—Dico yóhó ndéé yatni vai cuéchi sa ta quide-n véxi, ¿te vitna nacanú ichi ñaha-n xii-ndí cáhá<sup>n</sup>-n-án<sup>n</sup>? —cächí-güedé xáha<sup>n</sup>-güedé xii-dé.

Te ní queñuhu ñaha-güedé xii-dé tnuú-güedé ñá túú ní dàña-gá-güedé níhi tnáhá ndíhi ñaha-dé xii-güedé.

*Ñáiyu ñá túú ndíxi túu iní cuendá nchaa sá cuèhé sá dúhá quidé-yu*

<sup>35</sup> Te ní níhi Jèsús tnúhu sá ní queñuhu-güedé tée ní cuhú núú-xi-án<sup>n</sup> tnuú-güedé cuendá sá vá tnáhá tnúhu ndíhi ñaha-gá-dé xii-güedé, te ní naníhi ñáhá-gá xii-dé te ní xáha<sup>n</sup>-gá:

—¿Sándáá iní-n Dèhe Yá Ndióxi-án<sup>n</sup>? —cächí-gá xáha<sup>n</sup>-gá.

<sup>36</sup> Te ní xáha<sup>n</sup> tée ní cuhú núú-xi-án<sup>n</sup>:

—Métrú, cachí tnúhu núu ndéé ndécú tée-án<sup>n</sup> cuendá quindáá iní-í-dé —cächí-dé xáha<sup>n</sup>-dè xii-gá.

<sup>37</sup> Te ní xáha<sup>n</sup> Jèsús:

—Sa xiní-n-dé chi díu-dé cúu yúhú tée ndáttnúhu ndíhi-n —cächí-gá xáha<sup>n</sup>-gá xii-dé.

<sup>38</sup> Te ní ngúíni xítí-dé núú-gá, te ní xáha<sup>n</sup>-dè:

—Xítóhó Jesucristú, sándáá iní ñáhá-í xii-n —cächí-dé xáha<sup>n</sup>-dè xii-gá.

<sup>39</sup> Te ní xáha<sup>n</sup> tùcu Jèsús:

—Yúhú véxi-í ñuyúu-a cada ndáá-í cuéchi ñáiyu. Te nchaa ñáiyu ñá túú quide váha cùu-yu dátá ñ<sup>n</sup> ñáiyu cuàá, dico nchaa ñáiyu cùtnuní iní-xi sá ñà túú quide váha, te núu na quindáá iní-yu tnúhu cáhá<sup>n</sup>-í, te cada iní-ndó sá dátá sá ní nacaá<sup>n</sup> núu-yu chi tñí-yu tnúhu cáhá<sup>n</sup>-í. Te ñáiyu cächí sá quidé váha vá núu núu-yu cuéchi-yu chi quesáhá-yu sá io ndáá quidé-yu, ñáiyu-án<sup>n</sup> cùu-yu dátá ñ<sup>n</sup> ñáiyu cuàá, chi vá ndíxi túu iní-yu sá ñà túú quide váha-yu ndécú-yu, te vá tñí-yu tnúhu cáhá<sup>n</sup>-í —cächí-gá xáha<sup>n</sup>-gá xii-dé.

<sup>40</sup> Te sá dúcá<sup>n</sup> ní cáhá<sup>n</sup>-gá, núu ní cáhá<sup>n</sup> ñ<sup>n</sup> úu cue tée cùu fariséu, te xáha<sup>n</sup>-güedé:

—¿Te náa tnáhá nchúhú cuàá-ndí cáhá<sup>n</sup>-n-án<sup>n</sup>? —cächí-güedé xáha<sup>n</sup>-güedé xii-gá.

<sup>41</sup> Te ní xáha<sup>n</sup> Jèsús:

—Te núu díco nchóhó cuàá-ndó ñá, te vá cündecu cuéchi-ndo ní cùu, dico cächí-ndó sá ndéhé-ndó ñ<sup>n</sup> sá quidé-ndó te ñá ndáá, núu xiá<sup>n</sup> io ndécu cuéchi-ndo.

## 10

*Jèsús cáhá<sup>n</sup>-gá cuendá curráli mbéé*

<sup>1</sup> Te na cächí tnúhu ndáá-í xii-ndo sá ñ<sup>n</sup> tée ñá túú quíhu ndáa yuyehé ñ<sup>n</sup> curráli mbéé, te cùtexinu-ni na cuídó-dé, tée-án<sup>n</sup> cùú-dé ñádúhú. <sup>2</sup> Dico tée quíhu ichi yèhe curráli-güedi, tée-án<sup>n</sup> cùú-dé xitohó-güedi. <sup>3</sup> Te tée ndéé yèhe curráli-güedi nacaá<sup>n</sup>-dé te cuángühu xitohó-güedi te ní cáhá<sup>n</sup>-dè, te ní nucúhu<sup>n</sup> ndudú ñáhá-güedi xii-dé. Te ní cáhá<sup>n</sup> díu-dé-güedi te ní queñuhu-dé-güedi curráli. <sup>4</sup> Te sátá ní quee-güedi curráli, te ní ngódó núú-dé núú-güedi, te ní ngúita nchícú<sup>n</sup> ñáhá-güedi xii-dé chi ní nucúhu<sup>n</sup> ndudú ñáhá-güedi. <sup>5</sup> Te ñá túú chinchícú<sup>n</sup>-güedi ñ<sup>n</sup> tée tátú, chi nucúhu<sup>n</sup> ndudú-güedi sá ñà díu xitohó-güedi cùu-dé, núu xiá<sup>n</sup> xinú-güedi núú-dé —cächí-gá xáha<sup>n</sup>-gá xii-güedé.

<sup>6</sup> Duha ní cáhá<sup>n</sup> Jèsús cuendá sá cuiní-gá dacuahá-yu tnúhu-gá ní cùu, dico ñá ní təcú tnuní-yu nása ndúu tnúhu ní cáhá<sup>n</sup>-gá.

*Jèsús cùú-gá dátá ñ<sup>n</sup> toli*

<sup>7</sup> Te ní xáha<sup>n</sup> tùcu Jèsús xii-güedé:

—Na cächí tnúhu ndáá-í xii-ndo sá yúhú cùú-í dátá ñ<sup>n</sup> yèhe curráli núu ndíhu cue mbéé. <sup>8</sup> Te nchaa cue tée sa yòdo nuu-gá ní quixi ní dándáhú-güedé ñáiyu cùu-güedé

dàtná ñádúhú dùhu-güedé cue mbéé ní cùu, dico ñá ní quide cuendá ñáhá-güedi xii-güedé, chi ní cutnùni iní-güedi sá ñá díú xitohó-güedi cùu-güedé. <sup>9</sup> Te yúhú cùu-í dàtná yuyéhe curráli cue mbéé. Te duca<sup>n</sup> sátnahá-xi cùu-í chi nchaa ñáiyu na tùha ñaha xii-í te naníhi tãhú-yu. Te cùu-yu dàtná cue mbéé quiti xíquee curráli-xi cuahán-güedi núu cáá ité caxi-güedi, te dàtnùni cuándihu-ná-güedi curráli, duca<sup>n</sup> sátnahá-xi cùu-yu.

<sup>10</sup> Ñádúhú òré véxi-dé chi dùhu-dé, sàhni-dé te dànaa-dé mbéé, dico yúhú chi véxi-í cuendá sá naníhi tãhú-ndó te ío cudíi iní-ndó cùu cuuchi-ndo núu Dútú Ndióxi ní caa ní quíhí<sup>n</sup>. <sup>11</sup> Te yúhú cùu-í dàtná ñ<sup>n</sup> toli téé ío nèhe cuendá mbéé-xi, chi téé-án cuéi na cùu-dé sá cùu-xi mbéé-dé cuendá-ná sá ná cácu-güedi. <sup>12</sup> Te núu ñ<sup>n</sup> téé na còto ñaha xii-güedi, te téé-án cuendá-ni sá ñúhú yáhu-dé xitó-dé-güedi. Te núu na quini-dé sáá ñ<sup>n</sup> quiti déé<sup>n</sup> te dàna-dé-güedi xinu-dé, te ndíhi-güedi xité nuu ñaha quiti déé<sup>n</sup>-án, chi ñá díú mèi xitohó-güedi cùu-dé. <sup>13</sup> Chi cuendá-ni sá ñúhú yáhu-dé xitó-dé-güedi núu ñá túu ná ndíhú iní-dé cuéi na dàndíhi ñaha quiti cuíhna. <sup>14</sup> Te yúhú cùu-í dàtná ñ<sup>n</sup> téé ío váha xito mbéé-xi, chi téé-án da ñ<sup>n</sup> da ñ<sup>n</sup>-di xini-í-dé nàcuáa ndáa-di, te duca<sup>n</sup> xini ñáhá-güedi xii-dé. Te duca<sup>n</sup> sátnahá-xi cùu yúhú ndíhi nchaa ñáiyu sàndáá iní ñáhá xii-í, chi yúhú xini-í-yu te duca<sup>n</sup> mèe-yu xini ñáhá-yu xii-í.

<sup>15</sup> Te ñ<sup>n</sup> duca<sup>n</sup> cùu-í ndíhi Tãtà-í, chi xini ñáhá-gá xii-í te xini-í-gá. Te sáá nduu cùu-í cuendá nchaa ñáiyu sàndáá iní ñáhá xii-í. <sup>16</sup> Te ndècu-gá ñáiyu vátá quindáá iní ñáhá-gá xii-í. Te xini ñuhu-xi cundedóho-yu tñúhu-í te quindáá iní ñáhá-yu cuendá ñ<sup>n</sup>-ná ichi cùu-yu, te duca<sup>n</sup> cundecu ñ<sup>n</sup>-ná téé coto ñaha xii-yu cuu-dé dàtná ñ<sup>n</sup> tóli-yu, te téé coto ñaha xii-yu-án cùu yúhú.

<sup>17</sup> Te Tãtà-í ío cudíi iní ñáhá-gá xii-í cuendá sá sáá ñ<sup>n</sup> nduu te cuú-í, te cuú-í chi duca<sup>n</sup> cächí iní-í, te ñá díú sá cùu iní ñáiyu ñuyú-a cuú-í, te cuú-í dico ndoto-í. <sup>18</sup> Te vá yóo ñ<sup>n</sup> te ndacu cahni ñaha xii-í, te núu ñá díú sá cùu iní mèe-í cuú-í. Te dàtná-ni cùu iní-í sá cùu-í te ñ<sup>n</sup> duca<sup>n</sup> ndoto-í chi duca<sup>n</sup> ní cächí Tãtà-í Dútú Ndióxi cunduu —cächí-gá xáha<sup>n</sup>-gá xii-güedé.

<sup>19</sup> Te sá dúcá<sup>n</sup> ní cáhá<sup>n</sup>-gá te ñá ní cùu ñ<sup>n</sup>nuu tucu ñáiyu isràél. <sup>20</sup> Te davá-yu ní xitnàhá-yu:

—¿Ná cuendá sàndáá-tu iní-ndó tñúhu càhá<sup>n</sup> téé-án, te yucu ñávàha ndècu ndíhi-dé, lúcú téé-án? —cächí-yu xitnàhá-yu.

<sup>21</sup> Te davá-yu ní xitnàhá-yu:

—¿Náa xini-ndó ñ<sup>n</sup> téé ndècu ndíhi yucu ñávàha duha váha càhá<sup>n</sup>-dé? ¿Náa xini-ndó

núu ndacu yucu ñávàha cada tátna-xi núu ñ<sup>n</sup> téé cuáá te ndúha? —cächí-yu xitnàhá-yu.

*Ñáiyu isràél dáquèe tihú-yu Jesús*

<sup>22</sup> Te ndí tnahá cuía ndadá cahnú-yu vico veñúhu càhuu sá ío cùnuu ñuú Jerusalén, te mei yóo quidé vixi<sup>n</sup>-xi quidé-yu vico-án. <sup>23</sup> Te corrèdór veñúhu-án nání-xi Sàlomón, te xiá<sup>n</sup> xicá cùu Jesús. <sup>24</sup> Te ní chítú níhnú ñáiyu isràél núu-gá, te ní xáhá<sup>n</sup>-yu:

—¿Ná ndéé òré cächí tñúhu ndáa-n, te núu sá Cristú Yaá ní tendaha Yá Ndióxi véxi ñuyú-a cùu-n, àdi ná téé cùu-n?, cáhá<sup>n</sup>-ni-n —cächí-yu xáhá<sup>n</sup>-yu xii-gá.

<sup>25</sup> Te ní xáhá<sup>n</sup> Jesús:

—Sa ní cächí tñúhu-í te ñá sàndáá iní-ndó, te ndèhe-ndo sá vái núú sá quidé-í sá ní táuchíú<sup>n</sup> Tãtà-í cada-í, te cùu-xi ñ<sup>n</sup> sá cutnùni iní-ndó ná téé cùu-í. <sup>26</sup> Dico nchòhó ñá sàndáá iní-ndó, chi ñá túu cùu-ndo ñáiyu ní chitnahá ñáhá xii-í. <sup>27</sup> Chi nchaa ñáiyu ní chitnahá ñáhá xii-í cùu-yu dàtná cue mbéé quiti xíndecu ndíhi xitohó-xi chi núcúhu<sup>n</sup> ndudú-güedi xitohó-güedi, te duca<sup>n</sup> nàquini ñáhá-ni xitohó-güedi xii-güedi. Duca<sup>n</sup> sátnahá-xi cùu nchaa ñáiyu ní chitnahá ñáhá xii-í. <sup>28</sup> Te yúhú cada-í te nduu tãhú-yu cundecu ndíhi ñáhá-yu xii-í ní caa ní quíhí<sup>n</sup> te vá ñ<sup>n</sup> nduu-gá cuíta nihnú-yu, te ní vá yóo ñ<sup>n</sup> ndacu naquendeé ñáhá xii-yu ndaha-í. <sup>29</sup> Chi Tãtà-í ní taxi cuendá ñáhá-gá xii-yu. Te ío cùnuu-gá núu xiá<sup>n</sup> vá yóo ñ<sup>n</sup> ndacu naquendeé ñáhá xii-yu ndaha-gá. <sup>30</sup> Yúhú ndíhi Tãtà-í Dútú Ndióxi ñ<sup>n</sup>-ni cùu-ndí —cächí-gá xáha<sup>n</sup>-gá xii-yu.

<sup>31</sup> Te ní quehe<sup>n</sup> tucu ñáiyu isràél yúu cuáha ñáhá-yu xii-gá ní cùu.

<sup>32</sup> Te ní xáhá<sup>n</sup>-gá xii-yu:

—Ío cuéhé sá váha ní quide-í núu-ndó ní chindee ñaha Tãtà-í Dútú Ndióxi. ¿Te ndédacáa sá ñá tnahá iní-ndó núu cuini-ndó cuáha ñaha-ndo yúu xii-í? —cächí-gá xáha<sup>n</sup>-gá xii-yu.

<sup>33</sup> Te ní xáhá<sup>n</sup> ñáiyu isràél:

—Ñá díú cuendá nchaa sá váha ní quide-n cuini-ndí cuáha ñaha-ndí yúu xii-n, chi ñ<sup>n</sup> di-ni sá ío cáhá<sup>n</sup> úhú-n cuendá Yá Ndióxi. Te dícó ñ<sup>n</sup> téé ñuyú-a cùu-n te cächí-n sá cùu-n Ndióxi —cächí-yu xáhá<sup>n</sup>-yu xii-gá.

<sup>34</sup> Te ní xáhá<sup>n</sup> Jesús:

—Núu tütú Yá Ndióxi sá ndécú ndíhi-ndo cáhá<sup>n</sup>-xi nàcuáa ní cáhá<sup>n</sup>-gá, te duha ní cächí-gá: “Nchòhó quidé-ndó núu-í”, duha ní cächí-gá. <sup>35</sup> Te ñaha-o sá vá cùu quèhndé nihnu-o tñúhu yòdo tñuni núu tütú Yá Ndióxi, chi mee-gá ní cächí-gá sá cádá-yu núu-gá, te vá cächí-ó sá ñá ndáa. <sup>36</sup> Te núu duca<sup>n</sup> ní cáhá<sup>n</sup>-gá sá núu-gá quidé ncháa ñáiyu ní sàndáá iní ñáhá xii-gá ñá, ¿te ná cuendá cudéé<sup>n</sup>-ndó núu yúhú sá cächí-í sá



cùu-í Déhe-gá? Te mee Yá Ndiöxi ní tendaha ñaha-gá xii-í véxi-í ñuyúu-a sá cada-í chiúu-gá. <sup>37</sup> Te núu ñá túu quide-í nàcuáa ní táuchíúu<sup>n</sup> Tàtá-í cada-í ñá, te vá quindáa iní ñáhá-ndó. <sup>38</sup> Te núu quide-í ñá, te cuéi vá quindáa iní ñáhá-ndó xii mee-í dico quindáa iní-ndó nchaa chiúu<sup>n</sup> quide-í. Duca<sup>n</sup> te cutnùnì ndáa iní-ndó sá Yá Ndiöxi ndécú ndíhi-í te ñ<sup>n</sup>-ni cùu-ndí —càchí-gá xáha<sup>n</sup>-gá xii-yu.

<sup>39</sup> Te ní cuini-güedé tñi ñaha tùcu-güedé xii-gá quíhí<sup>n</sup>-gá vecaá ní cùu, dico ní xinu núu ñáhá-gá xii-güedé.

<sup>40</sup> Te ní xica-gá cuáhá<sup>n</sup>-gá ndaa ingá xio yúte Jórdán núu ní xóo dacuàndute ndí Juàá ñáyiu ndéé díhna, yàcá<sup>n</sup> ní xíndecu-gá. <sup>41</sup> Te yàcá<sup>n</sup> ío vái ñáyiu ní sáhá<sup>n</sup> ní cáhá<sup>n</sup> ndíhi ñaha xii-gá, te ní xitnáhá-yu:

—Ndí Juàá, cuéi ñá túu ní quide ndíi sá vá yóo tñahí ndacu cada dico ndáa ní cáhá<sup>n</sup> ndíi, chí dàtná-ni ní cáhá<sup>n</sup> ndíi quide téa-a —càchí-yu xitnáhá-yu.

<sup>42</sup> Te yàcá<sup>n</sup> ío vái-yu ní sándáa iní ñáhá-yu xii-gá.

## 11

### *Ní xíhi té Lázaru*

<sup>1</sup> Ñúu Bètaniá ní xíndecu ñ<sup>n</sup> té ní xínani-dé Lázaru. Te càhú víhí ní tñahá-dé ní cuhú-dé, te ní xíndecu ndíhi-dé cue cùha-dé tá Màriá ndíhi tá Màrta chí xiá<sup>n</sup> ñúu-yu. <sup>2</sup> Te tá Màriá-á<sup>n</sup> cúu-xí xíchí ní sódo ácti sáhá<sup>n</sup> tñamí sáhá Jèsús, te ní nadayíchi-xi sáhá-gá ndíhi idi díquí-xi. Te cuendá sá cùhú cùha-yu té Lázaru, <sup>3</sup> núu ní tendáhá-yu ñáyiu ñaha tñúhu cuáhá<sup>n</sup> núu Jèsús, te xáhá<sup>n</sup>-yu xii-gá:

—Mèstrú, tée ío cùu iní-n ío càhú tñahá-dé cùhú-dé —càchí-yu xáhá<sup>n</sup>-yu xii-gá.

<sup>4</sup> Te sá dúcá<sup>n</sup> caa tñúhu ní sáa, núu ní xáha<sup>n</sup> Jèsús xii-yu:

—Dico cuéhé-á<sup>n</sup> chí vá cùu-dé sá cùu dúcá<sup>n</sup>-dè, chí Yá Ndiöxi cuini-gá sá quini-yu nchaa sá cada-gá cuendá chiñuhu ñáhá-yu xii-gá, te diu-ni duca<sup>n</sup> chiñuhu ñáhá-yu xii yúhú Déhe-gá —càchí-gá xáha<sup>n</sup>-gá xii-yu.

<sup>5</sup> Te cuéi ío cùu iní ñáhá Jèsús xii té Lázaru ndíhi cue cùha-dé <sup>6</sup> dico òré ní níhí-gá tñúhu, te ní cuyaa-gá úu-gá nduu núu ndécú-gá. <sup>7</sup> Te ní xáha<sup>n</sup>-gá xii cue téa xica cuu ndíhi-gá:

—Na quíhí<sup>n</sup> tucu-o distritú Jùdea —càchí-gá xáha<sup>n</sup>-gá xii-güedé.

<sup>8</sup> Te ní xáha<sup>n</sup> cué téa xica cuu ndíhi-gá xii-gá:

—Mèstrú, vitna-ni cuini cue téa israél xíndecu yàcá<sup>n</sup> cuáha ñaha-güedé xii-n yúu ní cùu, ¿te cuini-ni tucu-n quíhí<sup>n</sup>-n-ú? —càchí-güedé xáha<sup>n</sup>-güedé xii-gá.

<sup>9</sup> Te ní xáha<sup>n</sup> Jèsús:

—Úxúú òré cúu ñ<sup>n</sup> nduu, te núu nduu na càca cuu-o, te ñá túu ná candaundeé-ó chí

cùtnuní núu-ó chí dìtó. <sup>10</sup> Dico núu níu ná càca cuu-o, te ío ná candaundeé-ó chí vá cùtnuní núu-ó —càchí-gá xáha<sup>n</sup>-gá xii-güedé.

<sup>11</sup> Te ní xáha<sup>n</sup> Jèsús:

—Té Lázaru tée ío váha tñahá tñúhu ndíhi-o ní xídí-dé dico quíhí<sup>n</sup>-ó chí ndocani-o-dé —càchí-gá xáha<sup>n</sup>-gá xii-güedé.

<sup>12</sup> Te ní xáha<sup>n</sup>-güedé xii-gá:

—Mèstrú, te núu xídí-dé te váa sa ta ndúha-dé cuáhá<sup>n</sup> —càchí-güedé xáha<sup>n</sup>-güedé xii-gá.

<sup>13</sup> Duha ní cáhá<sup>n</sup> Jèsús, chí té Lázaru sa ní xíhí-dé te cue téa xica cuu ndíhi-gá ní sani iní-güedé sá ní xídí ndisa-dé. <sup>14</sup> Te Jèsús ní xáha<sup>n</sup> ndáa-gá xii-güedé:

—Sa ní xíhí té Lázaru. <sup>15</sup> Váha-gá sá ñá ní sáhá<sup>n</sup>-í quingoto-í-dé, chí ndècu ingá chiúu<sup>n</sup> cada-í quini-ndó, te quindáa iní ñáhá-gá-ndó xii-í, te vitna na quíhí<sup>n</sup>-ó núu ndécú yiqui cuñú ndíi —càchí-gá xáha<sup>n</sup>-gá xii-güedé.

<sup>16</sup> Te té Mǎxí téa xáha<sup>n</sup>-güedé cuáchí ní xáha<sup>n</sup>-dè xii dava-gá-güedé:

—Na quíhí<sup>n</sup>-ó nchaa-o chí yàcá<sup>n</sup> cuú-ó ndíhi-dé —càchí-dé xáha<sup>n</sup>-dè xii-güedé.

*Jèsús càhá<sup>n</sup>-gá sá cuéi na cùu ñáyiu dico ndotó-yu cundecú-yu ndíhi-gá*

<sup>17</sup> Te òré ní sáa Jèsús ñúu Bètaniá, te ní xáhá<sup>n</sup>-yu sá sá ní cuu cùmí nduu ní xíhí té Lázaru. <sup>18</sup> Te ñúu-á<sup>n</sup> caa yatni-ni-gá ñúu Jerusalén, dàtná cuádava-ná òré cuhu<sup>n</sup>-o ichi te saá-ó. <sup>19</sup> Núu xiá<sup>n</sup> vái ñáyiu israél ní sáhá<sup>n</sup>-yu ní cáhá<sup>n</sup> ndíhi-yu tá Màrta ndíhi cùhú-xi tá Màriá, te ní sáñahá-yu tñúhu ndee iní sá dúcá<sup>n</sup> ní xíhí cùha-yu. <sup>20</sup> Te ní níhí tá Màrta tñúhu sá ñúhú Jèsús ichi cuáhá<sup>n</sup>-gá núu ndécú-yu núu ní sáhá<sup>n</sup>-xi ní sátnahá-xi-gá, te cùhú-xi tá Màriá ní ndóo-xi vehe. <sup>21</sup> Te òré ní naníhí tá Màrta Jèsús, te ní xáha<sup>n</sup>-xi xii-gá:

—Mèstrú, te núu dico ní xíndecu-n iha te vá cùu cùha-ndí ní cùu. <sup>22</sup> Te cuéi vitna te núu ná sá ná càcá<sup>n</sup>-n núu Yá Ndiöxi te taxi-gá xii-n —càchí-xi xáha<sup>n</sup>-xi xii-gá. <sup>23</sup> Te ní xáha<sup>n</sup> Jèsús:

—Vá ndíhú iní-n chí ndoto cùha-n —càchí-gá xáha<sup>n</sup>-gá xii-xi.

<sup>24</sup> Te ní xáha<sup>n</sup> tá Màrta:

—Ndáa chí sa xini-í sá ndótó-dé ná quítnahá nduu ndoto nchaa ñáyiu ní xíhí —càchí-xi xáha<sup>n</sup>-xi xii-gá.

<sup>25</sup> Te ní xáha<sup>n</sup> Jèsús:

—Yúhú dandoto-í-yu cuendá cundecú-yu ní caa ní quíhí<sup>n</sup> ná sáa nduu. Te nchaa ñáyiu na quindáa iní ñáhá xii-í, te cuéi na cùu-yu dico ndotó-yu cundecú-í ndíhi-yu ní caa ní quíhí<sup>n</sup>. <sup>26</sup> Te nchaa ñáyiu ndècu vívú ñuyúu-a te núu na quindáa iní ñáhá-yu xii-í, te cundecu ndíhi-í-yu ní caa ní quíhí<sup>n</sup>. ¿Sándáa

iní-n tnúhu-a ñá? —càchí-gá xáha<sup>n</sup>-gã xii tá Mårta.

<sup>27</sup> Te xåha<sup>n</sup>-xi:

—Mèstrú, sàndáá iní-í, te sàndáá tucu iní-í sá díu-n cùu-n Cristú Déhe Yá Ndiöxí, Yaá ní tendaha-gã véxi ñuyúú-a —càchí-xi xáha<sup>n</sup>-xi xii-gá.

*Jèsús ndåhi-gá núú ní nguindüxi té Låzarú*  
<sup>28</sup> Sátá dúcá<sup>n</sup> ní cáhá<sup>n</sup>-xi te ní sáhá<sup>n</sup> ngana-xi cùhú-xi tá Màriá, te dayuhu ní xáha<sup>n</sup>-xi:

—Yácá<sup>n</sup> ní quexio Mèstrú, te càna ñaha-dé xii-n —càchí-xi xáha<sup>n</sup>-xi.

<sup>29</sup> Te sá dúcá<sup>n</sup> xáha<sup>n</sup> cùhú tá Màriá sá cáná ñaha Jesús xii-xi, núu ndíhi-ní ní xica-xi cuáhá<sup>n</sup>-xi núú ndécú-gá. <sup>30</sup> Te Jèsús vátá quíhu-gá xití ñuú, chí ndècu-ni-gá núú ní sáhá<sup>n</sup> tnahá ñáhá tá Mårta. <sup>31</sup> Te ñayiu isràél ndécú sãñaha tnúhu ndee iní xii tá Màriá ndíhi cùhú-xi ní sani iní-yu sá cuáhá<sup>n</sup>-xi núú yindüxi cúha-xi ndáhyu-xi ní cáhá<sup>n</sup>-yu, núu nchicú<sup>n</sup>-yu-xi cuáhá<sup>n</sup>.

<sup>32</sup> Te ní sáá tá Màriá núú ndécú Jèsús te ní nguññí xití-xi núú-gá, te xáha<sup>n</sup>-xi xii-gá:

—Mèstrú, te núu dicó ní xñdecu-n iha te vá cùú cúha-ndí ní cùu —càchí-xi xáha<sup>n</sup>-xi xii-gá.

<sup>33</sup> Te sá ní xini Jèsús ndáhyú tá Màriá ndíhi ñayiu isràél nchicú<sup>n</sup> ñáhá cuáhá<sup>n</sup>, xiã<sup>n</sup> ío ní cuyica iní-gá. <sup>34</sup> Te ní xáha<sup>n</sup>-gã xii-yu:

—¿Ndèé ní taxi ndecu-ndo yiqui cuñú-dé-i? —càchí-gá xáha<sup>n</sup>-gã xii-yu.

Te ní xáhã<sup>n</sup>-yu:

—Mèstrú, néhé ná quíhi<sup>n</sup>-ó te quini-n —càchí-yu xáhã<sup>n</sup>-yu xii-gá.

<sup>35</sup> Te ní ndáhyú-gá tnahá-gá. <sup>36</sup> Te ní xitnáha ñayiu isràél:

—Súmi cùu iní-dé ndíi ní cùu —càchí-yu xitnáhá-yu.

<sup>37</sup> Te davá-yu xitnáhá-yu:

—Tée-a ní quide tátna-dé núú tée cuàá te ní ndúha. ¿Te nása ní cuu núú ñá túú ní quide tátna-dé té Låzarú cuendá sá vá cùú-dé ní cùu-i? —càchí-yu xitnáhá-yu.

*Jèsús dándoto-gá té Låzarú*

<sup>38</sup> Te ío ní cuyica tucu iní Jèsús òré ní quexio-gá yuhu yàú núú ní chíhi-güedé yiqui cuñú té Låzarú. Te yuhu yàú-án ndedí ñ<sup>n</sup> yúú. <sup>39</sup> Te ní xáha<sup>n</sup> Jèsús xii-yu:

—Chí xócáni yúú-án —càchí-gá xáha<sup>n</sup>-gã xii-yu.

Te ní xáha<sup>n</sup> tá Mårta cúha tée ní xihí-án:

—Mèstrú, sa tucu sáhã<sup>n</sup>-dé chí sa ní cuu cúmi nduu sá ní xihí-dé —càchí-xi xáha<sup>n</sup>-xi xii-gá.

<sup>40</sup> Te ní xáha<sup>n</sup> Jèsús:

—¿Náa ñá díú ní cachí-í sá núu na quindáá iní-n, te quini-n sã ío càhnu cuu Yá Ndiöxí? —càchí-gá xáha<sup>n</sup>-gã xii-xi.

<sup>41</sup> Te ní xócáni-yu yúú ndedí yuhu yàú-án. Te ní ndacoto-gá andiu, te ní xáha<sup>n</sup>-gã xii Tátá-gã Dútú Ndiöxí:

—Táu, ndácã<sup>n</sup> táhù-í núú-n sã ní tètòho-n tnúhu ní cáhá<sup>n</sup>-í. <sup>42</sup> Te yúhú sa náha-í sã ncháá-n òré ndedóho ñaha-n xii-í, dico duha càhá<sup>n</sup>-í cuendá sá ná təcú dóho nchaa ñayiu ndècu iha cuendá quindáá iní-yu sá díu-n ní tendaha ñaha-n xii-í véxi-í ñuyúú-a —càchí-gá xáha<sup>n</sup>-gã xii Dútú Ndiöxí.

<sup>43</sup> Te sátá dúcá<sup>n</sup> ní cáhá<sup>n</sup>-gã ndíhi Yá Ndiöxí, te níhi ní cáhá<sup>n</sup>-gá xáha<sup>n</sup>-gã xii tée ní xihí-án:

—¿Låzarú, tandèe xiá! —càchí-gá xáha<sup>n</sup>-gã xii-dé.

<sup>44</sup> Te ní ndee tée ní xihí-án yáú-án, te ndùtu dóó cuiñí ndàha-dé ndíhi sáhã-dé, te dàhu tucu ñ<sup>n</sup> dóó núú-dé. Te ní xáha<sup>n</sup> Jèsús xii-yu:

—Chí nándaxi-dé te dañã-ndo-dé ná cacá-dé —càchí-gá xáha<sup>n</sup>-gã xii-yu.

*Ndücu-güedé nàcuáa cada-güedé cahni-güedé Jèsús*

(Mt. 26:1-5; Mr. 14:1-2; Lc. 22:1-2)

<sup>45</sup> Te nchaa ñayiu nchicú<sup>n</sup> ñáhá xii tá Màriá cuáhá<sup>n</sup> ío vai-yu ní sándáá iní-yu Jèsús sá ní xini-yu nàcuáa ní quide-gá. <sup>46</sup> Dico davá-yu ní sáhã<sup>n</sup>-yu núú cuè tée cùu fariséú, te ní caní-yu cuendú núú-güedé nàcuáa ní quide Jèsús. <sup>47</sup> Te cue tée cùu fariséú ndíhi cue dútú cùnú ní natacá-güedé ní xóo-güedé jündá, te ní xitnáha-güedé:

—¿Nása cada-o?, chí tée-án ío vai sá vã yõ tnáhi ndàcu cada quide-dé. <sup>48</sup> Te núu na dañá ío te nchaa ñayiu quindáá iní ñáhã-yu xii-dé, te quixi cue tée ñuú Rómá dangóyo-güedé veñúhu-o te danãa-güedé nchaa ñuú-ó —càchí-güedé xitnáha-güedé.

<sup>49</sup> Te ñ<sup>n</sup> cue tée-án nání-dé Caifás, te cùnuu-gá-dé núú dàva-gá cue dútú cuáá-án, te ní xáha<sup>n</sup>-dé xii-güedé:

—Nchóhó ní lúha ñá túú cùtnuní iní-ndó. <sup>50</sup> Te ní ñã sãha-ndo cuendá sá vãha-gá tnahá-ó, te núu na cùú ñ<sup>n</sup> ní tée cuendá nchaa ñayiu isràél, te ñá díú sã dánãa ñaha-güedé xii-yu —càchí-dé xáha<sup>n</sup>-dé xii-güedé.

<sup>51</sup> Dico té Caifás chí ñá díú sã cúú iní mée-dé ní cáhá<sup>n</sup>-dé, chí cuendá sá cuáá-án ní cùnuu-dé núú cuè dútú, núu xiã<sup>n</sup> Yá Ndiöxí ní dácáhu iní ñáhã-gã nàcuáa cáhá<sup>n</sup>-dé sá Jèsús cuú-gá sá cúú-xi nchaa ñayiu isràél.

<sup>52</sup> Te ñá díú cuendá mee-ní ñayiu-án cuú-gá, chí cuú-gá tnahá cuendá nchaa ñayiu ní sándáá iní ñáhã xii-gá, ñayiu nchiténuu níhi ñuyúú, te ñ<sup>n</sup>-ná cuú-yu ndíhi-gá. <sup>53</sup> Núu ndéé nduu-án ní ndatnúhu cue tée cùnuu núú ñayiu isràél nàcuáa cada-güedé cahni-güedé Jèsús.

<sup>54</sup> Te xiã<sup>n</sup> núu ñá ní xica cuu-gá Jèsús quini ñáhã ñayiu isràél, te ní quee-gá cuáhã<sup>n</sup>-gá

ñuú Efraín, ñ<sup>n</sup> ñuú cáá yàtni yucu, yàcá<sup>n</sup> ní nguúñí-gá ndihi cue tée xica cuu ndihí-gá.

<sup>55</sup> Te ta cùyatni nduu cada-yu vico pascuá. Te cuéhé ñáyiú ní queé-yu ñuú-yu cuáhá<sup>n</sup>-yu ñuú Jerusálén cuendá sá sá ndihí-yu nchaá-yu nduu íí, te tnahá nduu vico pascuá. <sup>56</sup> Te yàcá<sup>n</sup> nánducú-yu Jesús ní cùu te ñá túú-gá òré-á<sup>n</sup>, te ní nanihí tnahá-yu xití veñúhu, te xitnàhá-yu:

—¿Nása sàni iní-ndó-í? ¿Quixi Jesús vico á<sup>n</sup> ñàhá? —càchí-yu xitnàhá-yu.

<sup>57</sup> Te cue tée cùu fariséu ndihi cue dútú cúnúu sa ní xáha<sup>n</sup>-güedé xii ñáyiú sá núu ndéda-ní cáa-yu xini-yu núu ndécú Jesús te na cáhá<sup>n</sup>-ni-yu cuendá tñi ñaha-güedé xii-gá.

## 12

*Íñ ñadihí chihí-á<sup>n</sup> Jesús acití*  
(Mt. 26:6-13; Mr. 14:3-9)

<sup>1</sup> Íñú-gá nduu cùmaní tnahá vico pascuá, te ní sáhá<sup>n</sup> Jesús ñuú Bètaniá, ñuú té Lázaru tée ní dándótó-gá. <sup>2</sup> Te xía<sup>n</sup> ní cadúha-yu sá ní cudini Jesús. Te tá Márta ní sani-xi cohó, te té Lázaru yihí-dé mesá ndihi Jesús, ndihi dawa-gá-güedé xéxi-güedé. <sup>3</sup> Te tá Mariá néhé-xí cuádava lítrú acití sáhá<sup>n</sup> tnámi sá ío ndéyáhu, te acití-á<sup>n</sup> ní cuáha mee-ni yúcú nárdú, te ní sódo-xi sáhá Jesús, te ní nadayichí-xi ndihi idi díquí-xi sáhá-gá. Te nihí xití vehe ní xité nuu dicó acití-á<sup>n</sup>. <sup>4</sup> Te té Júdás déhe té Ximú Iscarioté diu-ni ñ<sup>n</sup> tée xica cuu ndihí-gá, tée cuáha cuendá ñàhá xii-gá núu cue tée cùu úhú iní ñàhá ní xáha<sup>n</sup>-dè xii-gá:

<sup>5</sup> —¿Ná cuendá ñá ní cùyáhu acití-a sá ùni cièndú díhú<sup>n</sup> denàriú cuu cuendá ñáyiú ndàhú? —càchí-dé xáha<sup>n</sup>-dè xii-gá.

<sup>6</sup> Dico sá dúcá<sup>n</sup> ní cáhá<sup>n</sup> té Júdás chi ñá díú sá ndísá ñuhu iní-dé ñáyiú ndàhú chi dicó-ni ñ<sup>n</sup> ñádúhú cúu-dé, chi diu-dé néhé cuendá-dé díhú<sup>n</sup>-güedé nchaá-güedé te ní xóo duhu ñaha-dé xii-güedé. <sup>7</sup> Te ní xáha<sup>n</sup> Jesús:

—Daña, vá dásátú-n íni xíchí-a na tàxúha nahí-xi acití-a, chi nandihí ndéé òré ná nguúndúxi-í. <sup>8</sup> Chi nchòhó chi cuhu<sup>n</sup> tnahá-ni ñáyiú ndàhú tnuú-ndó, dico yúhú chi vá ncháá ndúu cundecu ndihi ñaha-í xii-ndo —càchí-gá xáha<sup>n</sup>-gá xii-dé.

*Tnahá té Lázaru cuini-güedé cahni ñaha-güedé xii-dé*

<sup>9</sup> Te vai ñáyiú isráel ní nihí-yu tnúhu sá ndécú Jesús ñuú Bètaniá. Te ní sáhá<sup>n</sup>-yu cuendá quini-yu-gá, te quini-yu tnahá té Lázaru tée ní dándótó-gá. <sup>10</sup> Te cue dútú cúnúu ní ndatnúhu-güedé ní cuu ñ<sup>n</sup>-nuu-güedé cuendá sá cáhni-güedé tnahá té Lázaru ní cùu, <sup>11</sup> chi diu cuendá tée-á<sup>n</sup> ní cuu cuéhé ñáyiú isráel tá daña nihnú-yu-güedé cuáhá<sup>n</sup> cuendá sá ní sándáá iní-yu Jesús.

*Jesús cuánguihu-gá ñuú Jerusálén*

(Mt. 21:1-11; Mr. 11:1-11; Lc. 19:28-40)

<sup>12</sup> Te nduu tnéé-á<sup>n</sup> vai ñáyiú ní quexio ñuú Jerusálén cuendá cundecu-yu vico, te ní nihí-yu tnúhu sá Jesús sáá-gá tnahá-gá cundecu-gá vico-á<sup>n</sup>, <sup>13</sup> núu ní xehndé-yu ndaha yútnu ñuú, te néhé-yu ní sáhá<sup>n</sup> ní sátnahá ñàhá-yu xii-gá. Te nihí ní cáhá<sup>n</sup>-yu, te càchí-yu:

—Ío cahnu cuu Yá Ndióxi! Te duca<sup>n</sup>-ni ío cahnu cuu Yá ní tendaha-gá véxi quindaha ñaha xii-o —duha ní cachí-yu.

<sup>14</sup> Te Jesús ní nihí-gá ñ<sup>n</sup> búrru, te yòdo-gá-di cuáhá<sup>n</sup>. Te duca<sup>n</sup> ní cuu chi ní quee ndáá-xi nàcuáa cáhá<sup>n</sup>-xi núu tütú Yá Ndióxi núu càchí-xi:

<sup>15</sup> Vá yúhú nchòhó cue ñáyiú ndècu ñuú Sión, chi iha véxi tée yindaha ñaha xii-ndo yodo-dé ñ<sup>n</sup> búrru.

Duha càchí-xi núu tütú-gá. <sup>16</sup> Dico cue tée xica cuu ndihi Jesús ñá ní ndàcu iní-güedé nàcuáa cáhá<sup>n</sup>-xi núu tütú Yá Ndióxi nàcuáa cada Jesús. Dico sáta cuandaa-gá andiú càda cahnu ñaha Tátá-gá xii-gá, te ní ndacu iní-güedé sá dúcá<sup>n</sup> yòdo tnuni nàcuáa cada-gá, te duca<sup>n</sup> ní cuu.

<sup>17</sup> Nchaá ñáyiú ní xindecu ndihi Jesús òré ní dándótó-gá té Lázaru, yu yàcá<sup>n</sup> ní caní-yu cuèndú núu ñáyiú nàcuáa ní quide ñaha-gá xii-dé. <sup>18</sup> Te vai-yu ní sáhá<sup>n</sup>-yu núu ndécú Jesús cuendá sá ní nihí-yu tnúhu ní quide-gá sá vá yòo tnahá ndàcu cada. <sup>19</sup> Te cue tée cùu fariséu ní xitnàha-güedé:

—Ní xito-ndo nã ñá túú nandihí sá quidé-ó-vá, chi nchaá ñáyiú ní chinchícú<sup>n</sup> ñàhá-yu xii-dé —càchí-güedé xitnàha-güedé.

*Ñáyiú ñá túú cùu ñáyiú isráel nánducú-yu Jesús*

<sup>20</sup> Te tnahá ñáyiú ñá túú cùu ñáyiú isráel ní sáhá<sup>n</sup>-yu vico ñuú Jerusálén ní quide cahnu-yu Yá Ndióxi. <sup>21</sup> Te ñáyiú-á<sup>n</sup> ní sáhá<sup>n</sup>-yu núu té Lipé tée ñuú Bètsaidá, te ñuú-á<sup>n</sup> yíndèhu-xi distritú Galilea. Te ní xáhá<sup>n</sup>-yu xii-dé:

—Tátá, vá cündèe iní-n càchí tnúhu-n núu ndéé ndécú Jesús, chi cuini-ndí cáhá<sup>n</sup> ndihí-ndí-gá —càchí-yu xáhá<sup>n</sup>-yu xii-dé.

<sup>22</sup> Te té Lipé ní nanihí-dé té Ndríxi te ní xáha<sup>n</sup>-dè nàcuáa cáhá<sup>n</sup>-yu, te ndi ndúu-güedé ní sáhá<sup>n</sup>-güedé ní xáha<sup>n</sup>-güedé xii Jesús nàcuáa cáhá<sup>n</sup>-yu. <sup>23</sup> Te ní xáha<sup>n</sup> Jesús xii-güedé:

—Vitna ní cuyatni òré cada cahnu ñaha Tátá-í xii-í, te quini-yu sá ío cahnu cuu yúhú Tée cùu ñani tnahá-yu nchaá-yu. <sup>24</sup> Te na càchí tnúhu ndáá-í xii-ndo sá núu ñ<sup>n</sup> tatá vá ngává-xi núu ñúhú tēhyú-xi ña, te diu-ni duca<sup>n</sup> cunduu-xi cundecu-xi. Dico ñ<sup>n</sup> tatá ná ngává núu ñúhú xinu déhe-xi, te xía<sup>n</sup> nádàcayá tnahá-xi, te mee-xi tēhyú-xi. <sup>25</sup> Te

nchaa ñáiyu ío ñùhu iní-xi cundecu ñuyú-a ñá túú ñùhu iní-yu Yá Ndióxi, te ñáiyu-án cuíta nihnú-yu. Te nchaa ñáiyu ío ñùhu iní ñáhá xii Yá Ndióxi, ñáiyu-án cundecu-yu ndihi-gá ni caa ni quíhí. <sup>26</sup> Te nchaa ñáiyu cuini cunu cuechi núu-í xini ñuhu-xi natuha ñahá-yu xii-í, te nduu táhú-yu cundecu-yu núu ñuhú-í cundecu-í. Te nchaa ñáiyu na cunu cuechi núu-í, te cada càhnu ñaha Tàtá-í xii-yu —càchi-gá xáha<sup>n</sup>-gá xii-güedé.

*Jesús càhá<sup>n</sup>-gá sá càhni ñaha-güedé xii-gá*  
<sup>27</sup> Te ní xáha<sup>n</sup> tucu-gá:

—Ío ndihú iní-í. Te cùñaha-í xii Tàtá-í tau-nihnu ñaha-gá núu dico sá cúu, dico vá cúu chí cuendá tnàhí-a véxi-í —càchi-gá xáha<sup>n</sup>-gá xii-güedé.

<sup>28</sup> Te ní xáha<sup>n</sup>-gá xii Tàtá-gá Dútú Ndióxi:

—Táu, cada nàcuáa ní sani iní-n cùnduu cuendá sá ná cáda càhnu ñaha ñáiyu xii-n —càchi-gá xáha<sup>n</sup>-gá.

Te duca<sup>n</sup> te ní tecú ní càhá<sup>n</sup> Yá Ndióxi ndéé andü, te càchi-gá:

—Sa ní quide-í nàcuáa cachí ñáiyu sá ío càhnu cuu-í. Te cada tucu-í cuendá cada càhnu ñaha-gá-yu xii-í —càchi Yá Ndióxi xáha<sup>n</sup>-gá xii Déhe-gá.

<sup>29</sup> Te nchaa ñáiyu xindecu ní tecú dóho-yu ní càhá<sup>n</sup>-gá, dico ñá túú ní sàni iní-yu sá méé-gá ní càhá<sup>n</sup>, chi davá-yu ní xítnàhá-yu sá ñùhu ní càhá<sup>n</sup>, te davá-yu ní xítnàhá-yu sá ñ<sup>n</sup> espíritú xínú cuèchi núu Yá Ndióxi ní càhá<sup>n</sup>. <sup>30</sup> Te ní xáha<sup>n</sup> Jesús xii-yu:

—Ñá díu cuendá yúhú ní càhá<sup>n</sup> Yá Ndióxi, chi ní càhá<sup>n</sup>-gá cuendá sá nchóhó cund-edóho-ndo. <sup>31</sup> Te vitna ní sáá nduu càda ndáa Yá Ndióxi cuèchi nchaa ñáiyu ñuyú-a, te duca<sup>n</sup> te vá cùnù-gá yucu ñávaha. <sup>32</sup> Te na càta caa ñaha-güedé xii-í núu cùrúxi, te xía<sup>n</sup> cuu-í te níhí-yu tnúhu ní càa xico ñuyú, te quindáa iní-yu tnúhu-í —càchi-gá xáha<sup>n</sup>-gá xii-yu.

<sup>33</sup> Duha ní càhá<sup>n</sup>-gá cuendá cutnùni iní-yu nàcuáa ndoho-gá óré cuú-gá. <sup>34</sup> Te ní xáhá<sup>n</sup>-yu xii-gá:

—Nihí-ndí tnúhu sá núu tütú yódó tnùni tnúhu Yá Ndióxi càhá<sup>n</sup>-xi sá Cristú Yá tendaha-gá quixi ñuyú-a cundecu-gá ní caa ni quíhí. ¿Te yòhó nása càhá<sup>n</sup>-tu-n sá ñ<sup>n</sup> téé cùu ñani tnáhá nchaa ñáiyu ñuyú-a cahni ñaha-güedé núu cùrúxi? Te cachí tnúhu-n ná cúu téé-á<sup>n</sup> —càchi-yu xáhá<sup>n</sup>-yu xii-gá.

<sup>35</sup> Te ní xáha<sup>n</sup> Jesús:

—Yúhú cùu-í dàtná ñ<sup>n</sup> ñuhú dáyehe ñuyú-a, dico sacú-ni nduu ndècu ndihi ñaha-í xii-ndo. Te caca-ndo ichi ndáa vitna dáyehe-gá-í núu-ndo chi na cùnee te vá cutnùni-gá núu-ndo ndéé ichi quíhí-ndo.

<sup>36</sup> Quindáa iní ñáhá-ndo xii-í vitna ndècu ndihi ñaha-gá-í xii-ndo dàndixi túu-í iní-ndo, cuendá cutnùni iní-ndo nàcuáa nduu cuendá

Yá Ndióxi, te cuu-ndo dèhe-í —càchi-gá xáha<sup>n</sup>-gá xii-yu.

Te sáta dúcá<sup>n</sup> ní càhá<sup>n</sup> Jesús, te ní quee-gá cuáhá<sup>n</sup>-gá ñ<sup>n</sup> núu vá ná nihí ñáhá-yu xii-gá.

*Ñáiyu isràel ñá cuini-yu quindáa iní-yu*  
*Jésus*

<sup>37</sup> Te cuèi ío vai sá vá yòo tnàhí ndàcu cada ní quide Jesús ní xini-yu, dico ní dùca<sup>n</sup> ñá túú ní sàndáa iní-yu-gá. <sup>38</sup> Te duca<sup>n</sup> ní quide-yu chi dacuítí ní quee ndáa-xi nàcuáa ní chidó tnùni ndí Chàia ndí ní càhá<sup>n</sup> tnúhu Yá Ndióxi ndéé sanaha núu tütú-gá núu càchi-xi:

Yòhó Yáa cúu Xitohó-í, vá yòo ñ<sup>n</sup> sàndáa iní tnúhu càhá<sup>n</sup>-ndí.

Te vá yòo ñ<sup>n</sup> cùtnuni iní-xi sá ío càhnu cuu-n. Duha ní chidó tnùni ndí Chàia núu tütú-gá.

<sup>39</sup> Te ñá ní sàndáa iní-yu chi ní quee ndáa-xi nàcuáa ní chidó tnùni tucu ndí Chàia núu tütú Yá Ndióxi nàcuáa càhá<sup>n</sup> Jesús:

<sup>40</sup> Mee Yá Ndióxi ní quide-gá sá vá tecú tnùni-yu,

chi ní dádáhu ndodo iní ñáhá-gá xii-yu, chi ío sáa iní-yu núu ñá ní cuini-gá-yu quindáa iní ñáhá-yu xii-gá.

Te ní vá túhá ñáhá-yu xii yúhú cuendá dacàcu nihnu-í-yu.

<sup>41</sup> Duha ní chidó tnùni ndí Chàia nàcuáa càhá<sup>n</sup> Jesús chi ní xini ndí sá ío càhnu cuu-gá.

<sup>42</sup> Te cuèi duca<sup>n</sup> ní cuu dico tití cue téé cùnuu núu ñáiyu isràel ní sàndáa iní ñáhá-güedé xii-gá. Dico ñá túú ní xóo càhá<sup>n</sup> ndáa-güedé chi ní xóo yúhú-güedé sá vá dáñá-gá cue téé cùu fariséu quíhu-güedé veñúhu. <sup>43</sup> Chi ní xóo cuúí-gá iní-güedé sá càhá<sup>n</sup> ñáiyu dàcúúxi tnúhu càhá<sup>n</sup> Yá Ndióxi.

*Ñáiyu ñá túú sàndáa iní tnúhu Jesús cuíta*  
*nihnú-yu*

<sup>44</sup> Jesús nihí ní càhá<sup>n</sup>-gá, te càchi-gá:

—Nchaa ñáiyu na quindáa iní ñáhá xii-í, te ñá díu-ní mée-í quindáa iní-yu, chi tnàhá Tàtá-í Yáa ní tendaha ñaha xii-í véxi-í ñuyú-a quindáa iní-yu. <sup>45</sup> Te ñáiyu xini ñáhá xii yúhú xini-yu tnàhá Tàtá-í. <sup>46</sup> Te yúhú véxi-í dàndixi túu-í iní ñáiyu ñuyú-a cuendá cutnùni iní-yu nàcuáa nduu cuendá Yá Ndióxi, te nchaa ñáiyu na quindáa iní ñáhá xii-í te vá cundecu-gá-yu ichi cuèhé ichi duha. <sup>47</sup> Te núu ío davá-yu ndédóho-yu nàcuáa càhá<sup>n</sup>-í te ñá túú tñi-yu tnúhu-í, te ñá díu yúhú dàcuíta nihnu-í-yu, chi ñá túú véxi-í ñuyú-a sá dàcuíta nihnu-í-yu, chi véxi-í sá dacàcu nihnu-í-yu. <sup>48</sup> Te nchaa ñáiyu na cùyíchi iní ñáhá xii-í te ñá túú quide cuendá-yu nàcuáa càhá<sup>n</sup>-í, te ñáiyu-án ná sáa nduu te cuíta nihnú-yu chi ñá ní tñi-yu tnúhu ní càhá<sup>n</sup>-í. <sup>49</sup> Te yúhú ñá túú càhá<sup>n</sup>-í tnúhu véxi iní mée-í, chi mee Tàtá-í Yáa ní tendaha ñaha xii-í véxi-í ñuyú-a

ní cachí tnúhu-gá nàcuáa cunduu tnúhu cáhá<sup>n</sup>-í danèhè-í ñáyiu. <sup>50</sup> Te yúhú xini-í sá tnúhu ní táuchíú<sup>n</sup> Tàtá-í cáhá<sup>n</sup>-í cúu-xi ñ<sup>n</sup> sá váha sá cúu xii-ndo chi nduu táhú-ndó cundecu-ndo ndihi-gá ní caa ní quíhí<sup>n</sup>, núu xiá<sup>n</sup> cáhá<sup>n</sup>-í nchaa nàcuáa ní táuchíú<sup>n</sup>-gá — cächí-gá xáha<sup>n</sup>-gá xii-yu.

### 13

*Jesús náquete-gá sáhá cuè téé xica cuu ndihi-gá*

<sup>1</sup> Te cumáni-gá tnàhá vico pàscuá, te Jesús sa náha-gá sá sá ní cuyatni òrè dándoo-gá ñuyú-á, te ndaa-gá núu ndécú Tàtá-gá. Te ío ní cuu iní-gá nchaa ñáyiu ní sándáá iní ñáhá xii-gá, te ní quide ndisa-gá sá ní cuu iní ñáhá-gá xii-yu.

<sup>2-4</sup> Te ní quíhu yucu ñávaha díquí tè Júdás déhe té Ximú Iscarioté, te ní sani iní-dé nàcuáa cada-dé cuáha cuendá-dé Jesús núu cuè téé cùu úhú iní ñáhá xii-gá. Te Jesús sa náha-gá sá méé Yá Ndióxi Yáá cúu Tàtá-gá ní sánaha-gá tnúhu ndee iní xii-gá sá cáda-gá núu-gá, te náha-gá sá díu núu Tàtá-gá ní quee-gá véxi-gá ñuyú-á. Te sáá nduu násáá tucu-gá núu Tàtá-gá. Te cùdini Jesús ndihi cue téé xica cuu ndihi-gá ní cùu, te ní ndacuñí-gá yuhu mèsá, te ní taunuu-gá ñ<sup>n</sup> dóo ñihnú-gá, te ní quehe<sup>n</sup>-gá ñ<sup>n</sup> dóo ní dácúú-í-gá núu yíquí-gá. <sup>5</sup> Te ní chihí-gá ndute ñ<sup>n</sup> tñá, te xiá<sup>n</sup> ní naquete-gá sáhá cuè téé xica cuu ndihi-gá, te ndihi dóo ndúú núu yíquí-gá-án ní nadayichí-gá sáhá-güedé.

<sup>6</sup> Te òrè naquete-gá sáhá tè Ximú, ádi Pelú, ní cùu ní xáha<sup>n</sup>-dè xii-gá:

—Méstrú, ¿te yòhò naquete-n sàhá-í-u? — cächí-dé xáha<sup>n</sup>-dè xii-gá.

<sup>7</sup> Te ní xáha<sup>n</sup> Jesús:

—Vitna ñá cùtnúni iní-n sá quidè-í-a dico sáá nduu te cùtnúni iní-n — cächí-gá xáha<sup>n</sup>-gá xii-dé.

<sup>8</sup> Te ní xáha<sup>n</sup> tè Pèlú:

—Yúhú chi vá ñ<sup>n</sup> nduu te naquete-n sàhá-í — cächí-dé xáha<sup>n</sup>-dè xii-gá.

Te ní xáha<sup>n</sup> Jesús:

—Te núu vá náquete-í sáhá-n á, te vá cáda-gá-n cuendá sá ndécú ndihi ñaha-í xii-n — cächí-gá xáha<sup>n</sup>-gá xii-dé.

<sup>9</sup> Te ní xáha<sup>n</sup> tè Pèlú:

—Te núu duca<sup>n</sup> te vá méé-ní sàhá-í naquete-n, chi naquete-n tnàhá ndaha-í ndihi díquí-í — cächí-dé xáha<sup>n</sup>-dè xii-gá.

<sup>10</sup> Te ní xáha<sup>n</sup> Jesús xii-dé:

—Tée íchí ní xichí chí xini ñuhu-xi sá sáhá-na-dè ndoo, te duca<sup>n</sup> te nduu ndoo-dé ñihí-dé. Te nchòhó sá càndoo-ndo cuéi ñá ncháá-ndó càndoo — cächí-gá xáha<sup>n</sup>-gá xii-dé.

<sup>11</sup> Te duca<sup>n</sup> ní cáhá<sup>n</sup> Jesús chí sa náha-gá sá ñ<sup>n</sup> cuè téé-án cuáha cuendá ñáhá-güedé

xii-gá núu cuè téé cùu úhú iní ñáhá, xiá<sup>n</sup> núu ní xáha<sup>n</sup>-gá sá ñá túú càndoo-güedé nchaa-güedé.

<sup>12</sup> Te sátá ní naquete-gá sáhá-güedé, te ní ndécúñhu-gá dóo-gá, te ní núcóo-gá yuhu mèsá, te ní xáha<sup>n</sup>-gá xii-güedé:

—¿Te ní cùtnúni iní-ndo sá ní quide ñaha-í xii-ndo-án? <sup>13</sup> Te nchòhó váha-ni cáhá<sup>n</sup>-ndó sá cùtnú-í, te dānani ñaha tucu-ndo Mestrú xii-í, te ndáá cáhá<sup>n</sup>-ndó. <sup>14</sup> Te núu yúhú cùu-í Mestrú, te cùu tucu-í téé cùnuu te náquete-í sáhá-ndó, te díu-ni duca<sup>n</sup> càda nchòhó tucu naquete sáhá tnàhá-ndó. <sup>15</sup> Yúhú sànu íchí ñaha-í xii-ndo nàcuáa cada-ndo. <sup>16</sup> Te na cächí tnúhu ndáá-í xii-ndo sá ní ñ<sup>n</sup> téé xinu cuechi ñá túú cùnuu-dé dácúúxí pàtróo<sup>n</sup>-dè, te ní ñ<sup>n</sup> téé xica chiú<sup>n</sup> ñá túú cùnuu-dé dácúúxí téé tendaha ñaha xii-dé cuáhá<sup>n</sup>-dè chiú<sup>n</sup>. Te duca<sup>n</sup> sàtnahá-xi cùu yúhú ndihi nchòhó. <sup>17</sup> Te núu ní cùtnúni iní-ndo nàcuáa ní quide ñaha-í xii-ndo ña, te duca<sup>n</sup> càda tnaha-ndo te cuu váha iní ñáhá Yá Ndióxi xii-ndo.

<sup>18</sup> Yúhú, ñá túú cáhá<sup>n</sup>-í cuendá-ndó ncháa-ndo, chí yúhú sa náha-í nàcuáa sàni iní ñ<sup>n</sup> ñ<sup>n</sup> nchòhó cue téé ní nanducu ñihnu-í tnuú nchaa ñáyiu ñuhu íchí cuehé íchí duha ní cachí-í chitnahá ñáhá-ndó xii-í. Chí dacuítí sá queé ndáá-xi nàcuáa cáhá<sup>n</sup>-xi núu tütú Yá Ndióxi núu cächí-xi: “Tée xèxi ndihi ñaha xii-í ngóo-dé cuu úhú iní ñáhá-dè”, duha cächí-xi núu tütú-gá. <sup>19</sup> Te cumáni-gá sáá nduu càda ñaha-dé sá sání iní-dé, núu xiá<sup>n</sup> cächí tnúhu-í xii-ndo nàcuáa cada-dé, chí na sáá nduu-án te cùtnúni iní-ndo sá yúhú cùu-í Crístú Yáá ní tendaha Yá Ndióxi véxi ñuyú-á. <sup>20</sup> Te na cächí tnúhu ndáá-í xii-ndo sá ncháa ñáyiu na quehe<sup>n</sup> cuendá ñáhá xii cue téé tendaha-í cáhá<sup>n</sup> tnúhu-í, te cada iní-yu sá tnàhá yúhú ní quehe<sup>n</sup> cuendá-yu. Te nchaa ñáyiu na quehe<sup>n</sup> cuendá ñáhá xii-í, te cada iní-yu sá tnàhá Tàtá-í Dútú Ndióxi Yáá ní tendaha ñaha xii-í véxi-í ñuyú-á ní quehe<sup>n</sup> cuendá-yu — cächí-gá xáha<sup>n</sup>-gá xii-güedé.

*Jesús cächí-gá sá tè Júdás cuáha cuendá ñáhá-dè xii-gá núu cuè téé cùu úhú iní ñáhá*  
(Mt. 26:20-25; Mr. 14:17-21; Lc. 22:21-23)

<sup>21</sup> Te sátá dúcá<sup>n</sup> ní cáhá<sup>n</sup> Jesús te ío ní ndihú iní-gá, te ní xáha<sup>n</sup>-gá xii-güedé:

—Na cächí tnúhu ndáá-í xii-ndo sá díu-ní ñ<sup>n</sup> nchòhó cuáha cuendá ñáhá-ndó xii-í núu cuè téé cùu úhú iní ñáhá — cächí-gá xáha<sup>n</sup>-gá xii-güedé.

<sup>22</sup> Te ní ngúita cue téé xica cuu ndihi-gá ndéhe ñ<sup>n</sup> ndehe ñ<sup>n</sup> núu tnàhá-güedé, chí ñá ní cùtnúni iní-güedé ndédacàa-güedé cuendá-güedé ní cáhá<sup>n</sup>-gá. <sup>23</sup> Te ñ<sup>n</sup> téé-án ío cùdí iní ñáhá Jesús, te ndécú yatni-dé díñi-gá cùdini-dé ndihi-gá. <sup>24</sup> Te té Ximú, ádi

Pelú chi úú díu-dé, ní quide-dé sèñá núú tée ndècu yatni díñi-gá-á<sup>n</sup> sá cãcã<sup>n</sup> tnúhú-dé núú-gã núu ndèdacãa-güedé cuëndá-güedé ní cãhá<sup>n</sup>-gã. <sup>25</sup> Te tée-á<sup>n</sup> ní sãhá<sup>n</sup> ndehe yatni-gá-dé díñi Jesús, te ní xãhá<sup>n</sup>-dè xii-gã:

—Mèstrú, ¿ndèdacãa-ndí cuëndá-ndí ní cãhá<sup>n</sup>-n-i? —cãchí-dé xãhá<sup>n</sup>-dè xii-gã.

<sup>26</sup> Te ní xãhá<sup>n</sup> Jèsús:

—Na chindóyo-í luha pãá, te tée na cuãha-í te tée-á<sup>n</sup> cúú-dé —cãchí-gã xãhá<sup>n</sup>-gã xii-dé.

Te ní chindóyo-gã luha pãá, te ní sãha-gã té Jüdás déhe té Ximú Iscarioté. <sup>27</sup> Te òré ní quehe<sup>n</sup>-dé pãá, te ní ngúndecu ndihi ñaha dùu<sup>n</sup>-ná yucu ñávãha xii-dé. Te ní xãhá<sup>n</sup> Jèsús:

—Sã ñí sani iní-n cãda-n te cada ndíhi-ni-n —cãchí-gã xãhá<sup>n</sup>-gã xii-dé.

<sup>28</sup> Te ní ñ<sup>n</sup> cue tée cùdini ndíhi-gã ñá ní tècú tnúni-güedé nása ndúu tnúhu ní xãhá<sup>n</sup>-gã xii té Jüdás. <sup>29</sup> Te dava-güedé ní sani iní-güedé sã sã cuëndá sã ndécú ndíhi-dé sã ñúhú díhú<sup>n</sup>, te vãa ío ñ<sup>n</sup> sã cuáá-dé nãndíhi-güedé vico, àdi díhú<sup>n</sup> cuãha-dé ñáyiu ndáhú xãhá<sup>n</sup>-gã ní cãhá<sup>n</sup>-güedé. <sup>30</sup> Te sa ní cundiqui<sup>n</sup> ní quehe<sup>n</sup> cuëndá té Jüdás pãá caxi-dé, te òré ní níhí-dé pãá-á<sup>n</sup> te ní quee-dé cuáhã-dé.

*Jèsús cãchí tnúhu-gã nãcuãa cada-o*

<sup>31</sup> Te sãtã ní quee té Jüdás cuáhã-dé, te ní xãhá<sup>n</sup> Jèsús xii dava-gã-güedé:

—Vitna te quini-ndó ndíhi nchaa ñáyiu sã ío cãhnu cuu yúhú Tée cuu ñani tnáhã-ndó nchãa-ndo, te òré-á<sup>n</sup> cutnùni iní-ndó sã ío cãhnu cuu tucu mee Yã Ndióxi. <sup>32</sup> Te núu yúhú quidé cãhnu-í Yã Ndióxi, te díu-ni duca<sup>n</sup> cãda cãhnu ñaha-gã xii yúhú, te ñá túú-gã titní nduu te duca<sup>n</sup> cãda-gã. <sup>33</sup> Te nchóhó cue déhe-í na cãchí tnúhu-í sã sãcú duha-ná nduu ndècu ndíhi ñaha-í xii-ndo. Te nchóhó nanducu ñaha-ndo xii-í dico vá ná níhí ñáhã-ndó dàtná ní xãhá<sup>n</sup>-í xii ñáyiu isrãel, te díu-ni duca<sup>n</sup> cãhá<sup>n</sup>-í núú-ndó sã vá ndácú-ndó quíhí-ndó núú quíhí-í. <sup>34</sup> Te duha sãnu ichi ñaha tucu-í xii-ndo nãcuãa cada-ndo sã cúú iní tnáhã-ndó ñ<sup>n</sup> ñ<sup>n</sup>-ndo datná yúhú cúú iní ñáhã-í xii-ndo. <sup>35</sup> Te núu na cúú iní tnáhã-ndó ñ<sup>n</sup> ñ<sup>n</sup>-ndo ña, te duca<sup>n</sup> te cutnùni iní nchaa ñáyiu sã cúú-ndó cué tée ní chitnahã ñáhã xii-í —cãchí-gã xãhá<sup>n</sup>-gã xii-güedé.

*Jèsús cãhá<sup>n</sup>-gã sã té Pelú vá ñnuu-dé sã xicã cuu ndíhi ñaha-dé xii-gã*

(Mt. 26:31-35; Mr. 14:27-31; Lc. 22:31-34)

<sup>36</sup> Te ní xãhá<sup>n</sup> tã Ximú, àdi Pelú chi úú díu-dé, xii Jèsús:

—Mèstrú, ¿ndèé quíhí<sup>n</sup>-n-i? —cãchí-dé xãhá<sup>n</sup>-dè xii-gã.

Te ní xãhá<sup>n</sup> Jèsús:

—Vitna te vá ndácú-n cãchicú<sup>n</sup> ñáhã-n quíhí<sup>n</sup> núú quíhí<sup>n</sup>-í, dico na sãá nduu te dai sãá-n núú cúndècu-í —cãchí-gã xãhá<sup>n</sup>-gã xii-dé.

<sup>37</sup> Te ní xãhá<sup>n</sup> tã Pelú xii-gã:

—Mèstrú, ¿te ná cuëndá núu vá ndácú-í cãchicú<sup>n</sup> ñáhã-í xii-n quíhí<sup>n</sup> vitna-i? Chi yúhú ñá túú tnáhí yúhú-í cuéi na cúú-í sã cuëndá-n —cãchí-dé xãhá<sup>n</sup>-dè xii-gã.

<sup>38</sup> Te ní xãhá<sup>n</sup> Jèsús:

—¿Te ndáá sã xèhndé iní-n sã cuéi na cúú-n cuëndá-í-u? Te na cãchí tnúhu ndáá-í xii-n sã cùmání-gã cana líhi, te úní xito cãhá<sup>n</sup>-n sã ñá túú xini ñáhã-n xii-í —cãchí-gã xãhá<sup>n</sup>-gã xii-dé.

## 14

*Jèsús dãnèhè ñáhã-gã nãcuãa cada-o nãsãá-ó núú ndécú Yã Ndióxi*

<sup>1</sup> Te ní xãhá<sup>n</sup>-gã xii-güedé:

—Te ñá túú ná caní iní-ndó. Quindáá iní-ndó Yã Ndióxi, te quindáá iní-ndó yúhú. <sup>2</sup> Chi núú ndécú Tãtã-í ío nùne núú cúndècu-o, chi núu ñáhã ñá te sa cãchí tnúhu-í xii-ndo ní cùu. Te vitna na ñúhú-í te cada túha-í núú cúndècu-ndo. <sup>3</sup> Te dàtnùni quixi tucu-í te candeca ñaha-í xii-ndo quíhí<sup>n</sup> cuëndá ñ<sup>n</sup>-ni xìchi cundecu-o. <sup>4</sup> Te sa ñaha-ndo ndéé quíhí<sup>n</sup>-í te sa xini-ndó ichi —cãchí-gã xãhá<sup>n</sup>-gã xii-güedé.

<sup>5</sup> Te ní xãhá<sup>n</sup> tã Mãxi xii-gã:

—Mèstrú, ñá túú xini-ndí ndèé quíhí<sup>n</sup>-n te da ichi-ná quini-ndí —cãchí-dé xãhá<sup>n</sup>-dè xii-gã.

<sup>6</sup> Te ní xãhá<sup>n</sup> Jèsús:

—Yúhú cúú-í dàtná ñ<sup>n</sup> ichi te cãhá<sup>n</sup>-í tnúhu ndáá, te yúhú cada-í te naníhí tãhú-ndó. Te ñ<sup>n</sup> díi díi-ni yúhú cada-í te sãá-ndó núú Yã Ndióxi cundecu-ndo te núu na quindáá iní ñáhã-ndó xii-í. <sup>7</sup> Te núu dicó cutnùni ndisa iní-ndó yòo cuu-í-á<sup>n</sup>, duca<sup>n</sup> te cutnùni iní-ndó yòo cuu Tãtã-í ní cùu. Dico vitna dàtná sã ní xini núú-ndó Dútú Ndióxi Yaa cúú Tãtã-í cada iní-ndó, chi ní xini-ndó yúhú —cãchí-gã xãhá<sup>n</sup>-gã xii-dé.

<sup>8</sup> Te ní xãhá<sup>n</sup> tã Lìpé xii-gã:

—Mèstrú, dãnèhè ñáhã xii-ndí Dútú Ndióxi chi na cùu váha iní-ndí —cãchí-dé xãhá<sup>n</sup>-dè xii-gã.

<sup>9</sup> Te ní xãhá<sup>n</sup> Jèsús xii-dé:

—Lìpé, ¿te náa ñá túú xini ñáhã-n xii-í? Te sa ní cuu vái nduu ndecu ndíhi ñaha-í xii-ndo, chi ñáyiu xini ñáhã xii-í te xini-yu tnáhã Tãtã-í. ¿Te ná cuëndá yòhó cãchí-n sã dãnèhè ñáhã-í xii-ndo Tãtã-í? <sup>10</sup> ¿Nãa ñá túú sãndáá iní-ndó sã yúhú ndécú-í ndíhi Tãtã-í? Te mee-gã ndécú ndíhi ñaha-gã xii-í. Te nchaa tnúhu cãhá<sup>n</sup>-í núú-ndó ñá túú cãhá<sup>n</sup>-í sã vèxi iní meè-í, chi Tãtã-í Yaa ndécú ndíhi ñaha xii-í chindèe ñaha-gã quidé-í chùu<sup>n</sup>-gã. <sup>11</sup> Te quindáá iní-ndó sã yúhú ndécú-í ndíhi

Tàtá-í, te duca<sup>n</sup> mèe-gá ndécú ndìhi ñaha-gá xii-í. Te núu ñá túú sàndáá iní-ndó tnúhu càhá<sup>n</sup>-í-a, te dandàcu iní-ndó nchàa chiu<sup>n</sup> ta quide-í véxi, te quindáá iní ñáhá-ndó. <sup>12</sup> Te na càchí tnúhu ndáá-í xii-ndo sá nchàa ñáyiú na quindáá iní ñáhá xii-í, te cadá-yu chiú<sup>n</sup> quide-í te càhnu-gá chiú<sup>n</sup> cadá-yu chí yúhú núhú-í núú ndécú Tàtá-í cundecu-í nàcuáa níhi ndéé-gá-yu cundecu-yu. <sup>13</sup> Te nchaa sá ná càcá<sup>n</sup>-ndó te taxi-í te núu na quindáá iní ñáhá-ndó xii-í, te nchaa cada-í cuèndá cutnùnì iní ñáyiú sá ìo càhnu cuu Tàtá-í Dútú Ndiòxi. <sup>14</sup> Te yúhú cada-í nchaa sá cuiní-ndó càcá<sup>n</sup> táhú-ndó núù-í, te núu na quindáá iní ñáhá ndìsa-ndo xii-í.

*Jesús càchí-gá sá tэндàha-gá Espiritú Yá Ndiòxi quixi cundecu ndìhi-o*

<sup>15</sup> Te núu nchòhó cúú iní ñáhá-ndó xii-í te tnú-ndo nchàa tnúhu càhá<sup>n</sup>-í. <sup>16</sup> Te yúhú cacá<sup>n</sup> táhú-í núú Tàtá-í sá tэндàha-gá Espiritú-gá quixi cundecu ndìhi-ndo cànu ichi ñaha-xi xii-ndo nacuáa cundecu-ndo, te chindee ñaha-xi xii-ndo ni caa ni quíhí<sup>n</sup>. <sup>17</sup> Te nchaa ñáyiú ndécú ichi cuehé ichi duha ñá túú xini-yu Espiritú Yá Ndiòxi te ni vā cúú cundecu ndìhi-yu. Dico nchòhó sa xini-ndó Espiritú-gá te ndècu ndìhi ñaha-xi xii-ndo. Te sáá ì<sup>n</sup> nduu te cuunu Espiritú-gá iní-ndó. <sup>18</sup> Te yúhú vā dáñá nihnu ñaha-í xii-ndo, chí quixi tucu-í cundecu ndìhi ñaha-í xii-ndo. <sup>19</sup> Te sácú duha-ná nduu ndècu-í te vā quini ñáhá-gá ñáyiú xii-í, dico nchòhó chí quini ñáhá-ní-ndó xii-í. Te duca<sup>n</sup>-ni cundecu-ndo ichi váha chí cundecu ndìhi ñaha-í xii-ndo ni caa ni quíhí<sup>n</sup>. <sup>20</sup> Te dàvā-án cutnùnì iní-ndó sá ndécú-í ndìhi Tàtá-í, te duca<sup>n</sup> nchòhó cundecu ndìhi ñaha-ni-ndo xii-í. <sup>21</sup> Te nchaa ñáyiú dàcuaha tnúhu-í te tnú-yu, ñáyiú-án quidè ndìsá-yu sá cúú iní ñáhá-yu xii-í. Te duca<sup>n</sup> Tàtá-í cúú iní ñáhá-gá xii-yu, te duca<sup>n</sup>-ni yúhú cúú iní-í-yu tucu, te duca<sup>n</sup> te cutnùnì iní-yu sá ndécú ndìhi-í-yu —càchí-gá xáha<sup>n</sup>-gá xii-dé.

<sup>22</sup> Te ní càhá<sup>n</sup> ì<sup>n</sup> tée nàni Judás dico ñá díú tē Judás déhe té Ximú Iscariote ní càhá<sup>n</sup>, chí ingá té Judás ní xáha<sup>n</sup>-dē xii-gá:

—Mèstrú, ìnása cada-n cuèndá cutnùnì iní-ndí sá cundècu ndìhi ñaha-n xii-ndí, te ñáyiú ñùhu ichi cuehé ichi duha vā cundècu ndìhí-n-yu-í? —càchí-dé xáha<sup>n</sup>-dē xii-gá.

<sup>23</sup> Te ní xáha<sup>n</sup> Jesús xii-güedé:

—Nchaa ñáyiú cùu iní ñáhá xii-í te tnú-yu tnúhu càhá<sup>n</sup>-í, te ñáyiú-án cúú iní ñáhá Tàtá-í xii-yu, te yúhú ndìhi Tàtá-í ndécú-ndí ndìhí-yu. <sup>24</sup> Te nchaa ñáyiú ñá túú cùu iní ñáhá xii-í te ñá túú tnú-yu tnúhu càhá<sup>n</sup>-í. Te nchaa tnúhu ní càhá<sup>n</sup>-í ní xindèdòho-ndo chí Tàtá-í Yáá ní tendaha ñaha xii-í véxi-í

ñuyú-í-a ní dácáhú iní ñáhá-gá xii-í, te ñá díú mèe-í ní càhu iní-í tnúhu càhá<sup>n</sup>-í.

<sup>25</sup> Duha ndùu tnúhu càhá<sup>n</sup>-í núú-ndó vitna ndecu ndìhi ñaha-gá-í xii-ndo. <sup>26</sup> Dico Yá Ndiòxi tendaha-gá Espiritú-gá quixi-xi cada-xi núù-í taxi-í tnúhu ndee iní xii-ndo, te diu-xi chindee ñaha-xi xii-ndo te danèhé ñáhá-xí xii-ndo nchaa sá cùmàni quini-ndó, te diu-ni-xi dandàcu iní ñáhá-xí xii-ndo nchaa nacuáa ní càhá<sup>n</sup>-í.

<sup>27</sup> Te yúhú chindee chituu ñaha-í xii-ndo ìo váha cuu iní-ndó cundecu-ndo datná yúhú ìo váha cùu iní-í ndécú-í, chí sa ta cüyatni nduu núhú-í. Te yúhú càchí tnúhu ndáá-í sá chindèe ñaha-í xii-ndo, te vā cadá-í dàtná quidè ñáyiú ñùhu ichi cuehé ichi duha. Te ni vā ndìhú iní-ndó, te ni vā yúhú-ndó. <sup>28</sup> Te sa ní xindèdòho-ndo ní càhá<sup>n</sup>-í sá núhú-í, te quixi tucu-í cundecu ndìhi ñaha-í xii-ndo. Te núu ndìsa cùu iní ñáhá-ndó xii-í ñá, te òrè ní níhi-ndó tnúhu sá núhú-í núú ndécú Tàtá-í, te cudíí iní-ndó ní cùu, chí ìo càhnu cuu-gá dàcúxú yúhú. <sup>29</sup> Te sa ní càchí tnúhu-í sá núhú-í, te na sáá òrè núhú-í núú ndécú Tàtá-í, te quindáá iní ñáhá-ndó xii-í.

<sup>30</sup> Te ñá túú-gá vāi tnúhu ndatnúhu ndìhi ñaha-í xii-ndo chí sa véxi yacu ñávàha sá táxi tnùnì ñuyú-í-a, dico vā táxi tnùnì ñáhá-xí xii yúhú. <sup>31</sup> Te cada-í nchaa nacuáa ní táuchítú<sup>n</sup> Tàtá-í cuèndá cutnùnì iní nchaa ñáyiú ñuyú-a sá yúhú ìo cùu iní-í-ga. Te vitna chí ndácúñí ná quíhí<sup>n</sup>-ó —càchí-gá xáha<sup>n</sup>-gá xii-güedé.

## 15

*Cuèndá yoho yàha stilé ndìhi nchaa dité-xi*

<sup>1</sup> Te ní xáha<sup>n</sup> tucu-gá xii-güedé:

—Yúhú cùu-í dàtná yoho yàha stilé, te Tàtá-í cúú-gá dàtná ì<sup>n</sup> tée xito yoho yàha stilé-án. <sup>2</sup> Te nchaa ñáyiú ní sàndáá iní ñáhá xii-í cúú-yu dàtná dité nchaa yoho yàha stilé-án. Te tée xito yoho yàha stilé-án xèhndé-dé nchaa dité-xi sá ñá cuiní-gá-xi cuu<sup>n</sup> ndéhé-xi, te ndàda ndoo-dé nchaa dité-xi sá cúú<sup>n</sup> cuèndá cuu<sup>n</sup>-gá. <sup>3</sup> Te duca<sup>n</sup> sàtnahá-xi cùu nchòhó, chí sa ní xócúñí nchaa sá cuehé sá dúhá ndècu ndìhi-ndo, chí ní sàndáá iní-ndó tnúhu ní càhá<sup>n</sup>-í. <sup>4</sup> Te cuu ì<sup>n</sup> nuu-ndo cundecu ndìhi ñaha-ndo xii-í, te núu duca<sup>n</sup> na càda-ndo, te cundecu ndìhi ñaha-í xii-ndo. Chí núu ì<sup>n</sup> yutnu vídì ná quèndé dité-xi, te dité-xi sá ní quen-deé-án vā cúú<sup>n</sup>-gá sávídì-xi chí duu<sup>n</sup> duu<sup>n</sup> ní xíta-xi. Duca<sup>n</sup> sàtnahá-xi cùu nchòhó chí vā ndácú-ndó càda-ndo chiu<sup>n</sup>-í, te núu vā cundècu ndìhi ñaha-í xii-ndo.

<sup>5</sup> Chí yúhú cùu-í dàtná yutnu vídì-án, te nchòhó cúú-ndó dàtná nchaa dité-xi. Te nchaa ñáyiú cùu ì<sup>n</sup> nuu ndìhi ñaha xii-í, te ndècu ndìhi-í-yu, te ndácú-yu quidè-yu chíu<sup>n</sup>-í. Te núu vā cúú ì<sup>n</sup> nuu ndìhi ñáhá-yu

xii-í, te vá ndácŭ-yu cadá-yu chiú<sup>n</sup>-í. <sup>6</sup> Te nchaa ñáiyu vá cúú ñ<sup>n</sup>nuu ndihi ñaha xii-í, te yáha-yu dátá ná yáha ñ<sup>n</sup> díte yutnu vidí sá ñá túú cùu<sup>n</sup> sávidí-xi, chi xèhndé-güedé yìchí-xi, te sàhmi-güedé.

<sup>7</sup> 'Cuu ñ<sup>n</sup>nuu ndihi ñaha-ndo xii-í, te vá nàcuànaa-ndo nacuaá ní cáhá<sup>n</sup>-í. Te núu duca<sup>n</sup> na càda-ndo, te nání cuiní-ndó cãcã<sup>n</sup>-ndó núu-í te taxi-í. <sup>8</sup> Te núu nchòhó ná cadá váha-ndo cùndecu-ndo, te ío cada càhnu-ndo Tãtà-í, te duca<sup>n</sup> cùtnuní sá ndísá cùu-ndo cue tée ní chitnahá ñáhá xii-í. <sup>9</sup> Te yúhú ío cùu iní ñáhà-í xii-ndo dátá ná cúú iní ñáhá Yá Ndiòxí xii-í. Te cada-ni-ndo mèe-ni sá váha cuendá cudíí iní ñáhá-gã-í xii-ndo. <sup>10</sup> Te núu na quindáá iní-ndó càda-ndo nchaa nacuaá ní cáhá<sup>n</sup>-í, te ío cuu iní ñáhà-í xii-ndo, chi yúhú duca<sup>n</sup> ío sãndáá iní-í Tãtà-í quidé-í nchaa nàcuáa ní cáhá<sup>n</sup>-gã, te xiã<sup>n</sup> núu ío cùu iní ñáhá-gã xii-í.

<sup>11</sup> 'Duha càhá<sup>n</sup>-í núu-ndó cuendá cudíí ndísa iní-ndó dátá ná cudíí iní mèe-í. <sup>12</sup> Te duha ndùu tnúhu càhá<sup>n</sup>-í cuendá sá cúú iní tnáhá-ndó ñ<sup>n</sup> ñ<sup>n</sup>-ndo dátá ná cúú iní ñáhà-í xii-ndo. <sup>13</sup> Te núu ní xíhó sá cúú-xí ñ<sup>n</sup> tée ío váha tnáhá tnúhu ndihi-o, te xiã<sup>n</sup> cutnùní iní ñáiyu sá ío cùu iní-ó-dé. <sup>14</sup> Te nchòhó cuu-ndo cuè tée ío váha tnáhá tnúhu ndihi-í te núu na càda-ndo nchaa nacuaá càhá<sup>n</sup>-í. <sup>15</sup> Te vá cùñaha-gã-í xii-ndo sá cúú-ndó cuè tée xínu cuechí núu-í, chi ní ñ<sup>n</sup> tée xínu cuechí ñá túú xini-dé ná quidé pãtróo<sup>n</sup>-dé. Te yúhú càchí-í xii-ndo sá cúú-ndó cuè tée ío váha tnáhá tnúhu ndihi-í, chi ní càchí tnúhu-í nchaa nàcuáa ní cáhá<sup>n</sup> Tãtà-í. <sup>16</sup> Te ñá díu nchòhó ní cáhá<sup>n</sup> ñáhá-ndó xii yúhú, chi yúhú ní cáhá<sup>n</sup> ñáhà-í xii-ndo. Te yúhú tauchiú<sup>n</sup>-í quíhí<sup>n</sup>-ndó càda-ndo nchaa nacuaá ní cáhá<sup>n</sup>-í, chi tnúhu-á<sup>n</sup> vá ndíhí ñihnu-xi. Te duca<sup>n</sup> nchaa sá ná càcã<sup>n</sup>-ndó núú Tãtà-í Yá Ndiòxí te taxi-gã, te núu na quindáá iní ñáhá-ndó xii-í. <sup>17</sup> Te yúhú càhá<sup>n</sup>-í dóho-ndo sá cúú iní tnáhá-ndó ñ<sup>n</sup> ñ<sup>n</sup>-ndo.

*Ñáiyu ndècu ichi cuehé ichi duha cùu úhú iní-yu Jèsús ndihi nchaa ñáiyu sãndáá iní tnúhu-gã*

<sup>18</sup> Te nchaa ñáiyu ndècu ichi cuehé ichi duha ñá cúú quini ñáhá-yu xii-ndo, te sa nàha-ndo sá díhna-gã yúhú ní ngüíta-yu duca<sup>n</sup> ñá cúú quini ñáhá-yu xii-í. <sup>19</sup> Te núu dícò tnáhá nchòhó ndècú-ndó ichi cuehé ichi duha ña, te cuu iní ñáhá-yu xii-ndo dátá ná cúú iní tnáhá-yu ndi mèe-yu ní cùu. Te yúhú ní nanducu ñihnu ñaha-í xii-ndo tnùú ñáiyu ndècu ichi cuehé ichi duha, núu xiã<sup>n</sup> ío cùu úhú iní ñáhá-yu xii-ndo cuendá sá ñá túú-gã chítnahá-ndó-yu. <sup>20</sup> Te dandàcu iní-ndó nàcuáa ní cáhá<sup>n</sup>-í sá ní ñ<sup>n</sup> tée xínu cuechí ñá túú cùnuu-dé dácúúxí pãtróo<sup>n</sup>-dé.

Te yúhú cúu úhú iní ñáhá-yu, te ñ<sup>n</sup>-ni duca<sup>n</sup> càda ñáhá-yu xii nchòhó. Te núu dícò ní tnú<sup>n</sup>-yu tnúhu ní cáhá<sup>n</sup>-í ñá, te ñ<sup>n</sup>-ni duca<sup>n</sup> tnú<sup>n</sup>-yu tnúhu cáhá<sup>n</sup>-ndó núu-yu ní cùu. <sup>21</sup> Te duca<sup>n</sup> càda ñáhá-yu xii-ndo sá cuendá-í, chi ñá xini-yu Tãtà-í Yáa ní tendaha ñaha xii-í véxi-í ñuyúú-a.

<sup>22</sup> 'Te váa vá cùndècu cuechi-yu ní cùu, te núu ñá túú yúhú ní cáhá<sup>n</sup>-í núu-yu, te vitna vá cúú tnáhí cachí-yu sá ñá túú cuechi-yu. <sup>23</sup> Chi nchaa ñáiyu cùu úhú iní ñáhá xii-í, te cùu úhú iní-yu tnáhá Tãtà-í. <sup>24</sup> Te váa ní ñ<sup>n</sup> cuechi-yu vá cùndècu ní cuu, te núu dícò ñá túú ní xini-yu nchaa sá ní quide-í sá vá yòo tnáhí ndàcu cada. Te cuè ní xini-yu díco dai cùu úhú iní ñáhá-yu xii-í ndihi Tãtà-í. <sup>25</sup> Te duha quidè-yu chi dacuítí quèe ndáá-xi nàcuáa yòdo tnuní núú tütú Yá Ndiòxí sá dácuaá-yu, chi càchí-xi sá ñá túú ná cuechí-í te cuu úhú iní ñáhá-yu xii-í.

<sup>26</sup> 'Te Espiritú Tãtà-í Dútú Ndiòxí sá ndécú núu-gã tendaha-í quixi chindee ñaha-xi xii-ndo, te canu ichi ñaha-xi nàcuáa cundecu-ndo, te Espiritú-á<sup>n</sup> cáhá<sup>n</sup> ndáá-xi cuendá cutnùní iní nchaa ñáiyu yoo cùu-í. <sup>27</sup> Te nchòhó tnáhá-ndó cáhá<sup>n</sup> váha-ndo cuendá-í cuendá cutnùní iní-yu yoo cùu-í, chi ñaha-ndo sá ndéé òré ní ngüíta-í quidè-í chiú<sup>n</sup> Tãtà-í ní chitnahá ñáhá-ndó xii-í — càchí-gã xáha<sup>n</sup>-gã xii-güedé.

## 16

<sup>1</sup> Te ní xáha<sup>n</sup> tucu-gã xii-güedé:

—Duha càhá<sup>n</sup>-í cuendá ná nanchòcava iní-ndó nùhú-ndó ichi cuehé ichi duha. <sup>2</sup> Chi vá dáñá-gã-güedé quíhu-ndo vèñúhu, te ní vá cúú-gã quini ndéé ñáhá-güedé xii-ndo. Te sáá ñ<sup>n</sup> nduu te cahni ñaha-güedé xii-ndo, te xiã<sup>n</sup> cuu cahã<sup>n</sup>-güedé sá quidè-güedé chiú<sup>n</sup> Yá Ndiòxí. <sup>3</sup> Te duca<sup>n</sup> càda-güedé chi ñá túú xini-güedé Tãtà-í, te ní ñá túú xini ñáhá-güedé xii yúhú. <sup>4</sup> Te duha ndùu tnúhu càhá<sup>n</sup>-í núu-ndó, chi na sáá òré te ndacu iní-ndó nchaa tnúhu sá sá ní càchí tnúhu-í xii-ndo nàcuáa cada ñaha-güedé xii-í.

*Nchaa chiú<sup>n</sup> quide Espiritú Yá Ndiòxí*

'Te ñá túú ní càchí tnúhu-í xii-ndo ndéé díhna chi ndècu ndihi ñaha-í xii-ndo. <sup>5</sup> Díco vitna sa ta cüyatni nduu nùhú-í núú ndécú Tãtà-í Yáa ní tendaha ñaha xii-í véxi-í ñuyúú-a. Te ní ñ<sup>n</sup> nchòhó ñá túú xicã<sup>n</sup> tnúhú-ndó núu-í núu ndéé quíhí<sup>n</sup>-í. <sup>6</sup> Chi mee-ni sá ndíhú iní-ndó sá dúcã<sup>n</sup> ní cáhá<sup>n</sup>-í. <sup>7</sup> Te na càchí tnúhu ndáá-í xii-ndo sá váha-gã sá cúú-xi-ndó núu nùhú-í, chi tendaha-í Espiritú Yá Ndiòxí quixi cundecu ndihi-ndo chindee ñaha-xi, chi núu vá nùhú-í te vá quixí Espiritú-gã cundecu ndihi-ndo chindee ñaha-xi xii-ndo. <sup>8</sup> Te na quixi Espiritú-gã te dandixi túu-xi iní nchaa ñáiyu ndècu ichi



cuehé ichi duha sá ñà túú quide váha-yu. Te dacàhu iní ñáhá-xí sá ndécú ñi ichi váha ichi ndáá. Te Espiritú-gá-án cada-xi nàcuáa cutnùnì iní-yu sá Yá Ndióxi cada ndáá-gá cuéchi-yu. <sup>9</sup> Te duca<sup>n</sup> te cutnùnì iní-yu sá ndécú cuéchi-yu, chi ñá túú sàndáá iní ñáhá-yu xii-í. <sup>10</sup> Te duca<sup>n</sup> te cutnùnì iní-yu nàcuáa ndùu cuendá ichi váha ichi ndáá, chi yúhú nùhú-í núú ndécú Tàtà-í, te nchòhó vá quini ñáhá-gá-ndó. <sup>11</sup> Te duca<sup>n</sup> te cutnùnì iní-yu sá Yá Ndióxi cada ndáá-gá cuéchi-yu, chi sa ní cáhá<sup>n</sup>-gá sá yúcu ñáváha sá táxi tnùnì ñuyúú-a quihí<sup>n</sup>-xi núú ùhú núú ndàhú.

<sup>12</sup> Te vai-gá tnùhu ndècu cachí tnùhu-í xii-ndo, dico nchòhó chi vá cùndèe iní-ndó cùndedóho-ndo nchàa vitna. <sup>13</sup> Te na quixi Espiritú Yá Ndióxi, Espiritú càhá<sup>n</sup> ndáá cuiti, te Espiritú-án danèhé ñáhá-xí nchàa tnùhu váha tnùhu ndáá. Te vá dacàhu iní ñáhá-xí xii-ndo sá véxi iní méé-xí chi dacàhu iní ñáhá-xí nchàa sá cáhá<sup>n</sup> Yá Ndióxi, te cachí tnùhu-xi nchaa nàcuáa cada-xi ndéé núú cuahá<sup>n</sup> núú véxi-gá. <sup>14</sup> Te Espiritú-gá-án cada càhnu ñaha-xi xii yúhú chi ndècu ndihí-xi tnùhu-í, te danèhé ñáhá-xí xii-ndo. <sup>15</sup> Te nchaa sá ndécú ndihí Tàtà-í ndécú ndihí-í ñáhá-í, núú xiá<sup>n</sup> càchí-í sá Espiritú-gá danèhé ñáhá-xí nchàa tnùhu-í xii-ndo.

*Nchaa ñáyiu ndihú iní-xi nduu ñá iní-yu na quixi tucu Jesús*

<sup>16</sup> Te ñi úú-ná nduu ndècu-í te vá quini ñáhá-gá-ndó xii-í, dico núú sàcú-ni nduu te quini ñáhá tùcu-ndo xii-í, te duca<sup>n</sup> chi nùhú-í núú ndécú Tàtà-í —càchí-gá xáha<sup>n</sup>-gá xii-güedé.

<sup>17</sup> Te sá dúcá<sup>n</sup> ní cáhá<sup>n</sup>-gá núu ní ngúita ñi úú cue téé xica cuu ndihí-gá xitnáha-güedé:

—¿Nása ndùu-tu tnùhu càhá<sup>n</sup>-gá sá càchí-gá sá ñi úú-ná nduu ndècu-gá te vá quini-gá-ó-gá, dico núú sàcú-ni nduu te quini tucu-o-gá-í?, chi nùhú-gá núú ndécú Tàtà-gá —càchí-güedé xitnáha-güedé.

<sup>18</sup> Te xitnáha tucu-güedé:

—¿Nása cuahá<sup>n</sup>-tu tnùhu-án sá sàcú-ni nduu? Te ñá tècú tnùnì-ó nása ndùu tnùhu càhá<sup>n</sup>-gá —càchí-güedé xitnáha-güedé.

<sup>19</sup> Te Jesús ní cutnùnì iní-gá sá cuini-güedé cáhá<sup>n</sup> tnùhú-güedé núú-gá nása ndùu tnùhu ní cáhá<sup>n</sup>-gá, núu ní xáha<sup>n</sup>-gá:

—Cuendá sá ní cachí-í sá ñi úú-ná nduu ndècu-í te vá quini ñáhá-gá-ndó xii-í, dico núú sàcú-ni nduu te quini ñáhá tùcu-ndo xii-í ní cachí-í, ¿xiá<sup>n</sup> ndúcú tnùhu núú tnáhá-ndó-án? —càchí-gá xáha<sup>n</sup>-gá xii-güedé.

<sup>20</sup> Te ní xáha<sup>n</sup> tùcu-gá:

—Te na cachí tnùhu ndáá-í xii-ndo sá nchòhó ndihú víhí iní-ndó te ndáhyú-ndó, dico nchaa ñáyiu ndècu ichi cuehé ichi duha chi dá cudí<sup>n</sup> iní-yu. Dico nchòhó ñáyiu ndáhyú chi sáá nduu te nduu ñá iní-ndó.

<sup>21</sup> Chi dátna cuini-ndó cùu ñi ñadihí ñaha ní tnáhá nduu cacu déhe-xi vai sani iní-án sá quidé ùhú ñáhá-xí. Dico na yáha cacu déhe-án, te ñá túú-gá ndácú iní-án sá ní quide ùhú ñáhá-xí xii-án chi mee-ná sá cudí<sup>n</sup> iní-án déhe-án. <sup>22</sup> Duca<sup>n</sup> sátnahá-xi cùu nchòhó vitna chi ndihú iní-ndó sá nùhú-í, dico quixi tucu-í quixi coto ñaha-í xii-ndo, te òré-án te cudí<sup>n</sup> ndisa iní-ndó, te vá yòo ñi-gá dandihú iní ñáhá xii-ndo davá-án.

<sup>23</sup> Te dàvá-án ñá túú-gá ná nducu tnùhu-ndo núú-í. Te na cachí tnùhu ndáá-í xii-ndo sá Tàtà-í taxi-gá nchaa sá ná càcá<sup>n</sup>-ndó núú-gá núu na quindáá iní ñáhá-ndó xii-í. <sup>24</sup> Te ndéé vitna vátá dúcá<sup>n</sup>-gá cada-ndo càcá<sup>n</sup>-ndó. Dico càcá<sup>n</sup>-ndó núú-gá núu ná cuini-ndó te taxi-gá cuendá cudí<sup>n</sup> ndisa iní-ndó —càchí-gá xáha<sup>n</sup>-gá xii-güedé.

*Xitohó Jesucristú ní cunuu tnùhu-gá núú yucu ñáváha*

<sup>25</sup> Te xáha<sup>n</sup> tùcu-gá xii-güedé:

—Mee-ni ní chidáhu ndodo-í tnùhu ní cáhá<sup>n</sup>-í núú-ndó, dico sáá nduu te vá chidáhu-gá-í tnùhu cáhá<sup>n</sup>-í, chi cáhá<sup>n</sup> ndáá-na-í cuendá Tàtà-í. <sup>26</sup> Te dàvá-án càcá<sup>n</sup>-ndó núú Tàtà-í núu ná cuini-ndó te taxi-gá, te núu na quindáá iní ñáhá-ndó xii yúhú Déhe-gá. Te ñá túú-gá xini ñihu-xi sá yúhú cácá<sup>n</sup>-í núú-gá cuendá-ndó chi cácá<sup>n</sup> méé-ná-ndó. <sup>27</sup> Chi mee Tàtà-í ío cùu iní ñáhá-gá xii-ndo cuendá cúú iní ñáhá-ndó xii-í, te sàndáá iní-ndó sá núú-gá ní quee-í véxi-í. <sup>28</sup> Te yúhú ní quee-í núú Tàtà-í véxi-í ñuyúú-a, te vitna dándóo-í ñuyúú-a te nùhú-í núú ndécú-gá —càchí-gá xáha<sup>n</sup>-gá xii-güedé.

<sup>29</sup> Te ní xáha<sup>n</sup> cué téé xica cuu ndihí-gá:

—Vitna chi càhá<sup>n</sup> ndáá-ná-n, ñá túú-gá chidáhu-n tnùhu càhá<sup>n</sup>-n. <sup>30</sup> Te vitna ní xini-ndí sá ío váha cutnùnì iní-n nchàa nacuáa cùu, te cutnùnì iní-n nchàa nacuáa sàni iní nchaa ñáyiu. Te ñá túú xini ñihu-xi nágá nducu tnùhu-yu núú-n chi nchaa sa ní dátúu-n núu-yu. Te xiá<sup>n</sup> núu sàndáá iní-ndí sá núú Yá Ndióxi ní quee-n véxi-n —càchí-güedé xáha<sup>n</sup>-güedé xii-gá.

<sup>31</sup> Te ní xáha<sup>n</sup> Jesús:

—¿Te vitna sàndáá iní-ndó-án? <sup>32</sup> Vitna ní sáá nduu ní sáá òré sá ncháá nchòhó cutènuu-ndo cãa ñi cãa úu cuu-ndo, te dándóo mee ñaha-ndo xii-í. Dico ñá díú mee díi-í quendóo chi ndècu ndihí-í Tàtà-í. <sup>33</sup> Duha càhá<sup>n</sup>-í cuendá cùu váha iní-ndó cùndecu-ndo, chi ñuyúú-a cuu ùhú iní ñáhá-yu xii-ndo, dico ní vá yúhú-ndó chi yúhú sa ní dáqueé tihú-í nchaa sá cuéhé sá dúhá ío ñuyúú-a —càchí-gá xáha<sup>n</sup>-gá xii-güedé.

## 17

*Jesús xicá<sup>n</sup> tãhù-gã núú Tãtã-gã Dútú Ndióxi cuendá cue téé xica cuu ndihi-gã*

<sup>1</sup> Te sãtã dúcã<sup>n</sup> ní cáhá<sup>n</sup> Jësús te ní ndacoto-gã andiu, te ní xáha<sup>n</sup>-gã xii Tãtã-gã Dútú Ndióxi:

—Táu, vitna ní sãá nduu càda cahnu ñaha-n xii-í cuendá duca<sup>n</sup> càda cahnu ñaha-í xii-n. <sup>2</sup> Chi mee-n ní cachí-n sã táxi tnùn-í nchaa ñáyiu ñuyú-a, te dácacu nihnu-í nchaa ñáyiu ní cachí-n nãníhí tãhú. <sup>3</sup> Te cundecu ndihi-ò-yu ní caa ní quíh<sup>n</sup>, chí sãndáá iní ñãhá-yu sã ñ<sup>n</sup> di dí-ni yòhó cúú-n Ndióxi ndisa, te duca<sup>n</sup> xiní ñãhá-yu xii yúhú Jesucristú téé ní tendaha-n véxi ñuyú-a.

<sup>4</sup> Te yúhú ní chiñuhu ñaha-í xii-n ñuyú-a, te ní xínu chiu<sup>n</sup> ní cachí-n càda-í. <sup>5</sup> Táu, vitna na nãsãá-í núú-n te cada càhnu ñaha-n xii-í dàtná ní xóo cada càhnu ñaha-n xii-í ndéé cutnãhá vátã ngãva-gã ñuyú.

<sup>6</sup> Te nchaa ñáyiu ní nanducuc nihnu-n tnuú nchaa ñáyiu ndëcu ichi cuehé ichi duha, ní taxi cuendá-n-yu, te ní xáha<sup>n</sup>-í xii-yu yoo cùu-n. Te cuendá-n cùu-yu, te ní taxi cuendá-n-yu, te ní sãndáá iní-yu tnúhu-n. <sup>7</sup> Te vitna ní cutnùn-í iní-yu sã nchãá tnúhu ndëcu ndihi-í diu-ni mee-n ní taxi-n. <sup>8</sup> Te ní dãnèhé-í-yu nchaa tnúhu sã ní dãnèhé ñãhá-n xii-í, te ní sãndáá iní-yu. Te ní cutnùn-í iní-yu sã núú-n ní quee-í véxi-í, te ní sãndáá iní-yu sã yòhó ní tendaha ñaha-n xii-í véxi-í ñuyú-a.

<sup>9</sup> Te yúhú cáhá<sup>n</sup> ndãhú-í núú-n cuendá nchaa ñáyiu ní taxi cuendá-n. Te ñã túú cáhá<sup>n</sup> ndãhú-í núú-n cuendá ñáyiu ndëcu ichi cuehé ichi duha, chí cuendá nchaa ñáyiu ní taxi cuendá-n cáhá<sup>n</sup>-í, chí cuendá-n cùu-yu. <sup>10</sup> Te nchaa sã cúú cuendá-í cúú-xi cuendá-n, te nchaa sã cúú cuendá-n cùu-xi cuendá-í tnãhá-í. Te xiquide càhnu ñãhá-yu xii-í.

<sup>11</sup> Te yúhú vá cundëcu-gã-í ñuyú-a, dico mée-yu chí cundecu-ni-yu, te yúhú ndixi-í núú ndécú-n. Táu, yòhó ío yiñuhu ndecu-n, te yúhú cáhá<sup>n</sup> ndãhú-í núú-n sã ní yùhu ní iní-n còto-n nchaa ñáyiu ní taxi cuendá-n, ñáyiu ní sãndáá iní tnúhu-í cuendá sã ñ<sup>n</sup>-ní ichi cuú-yu cundecu-yu dàtná ñ<sup>n</sup>-ní cùu nchoo. <sup>12</sup> Chí òré ndëcu-í ndihi-yu ñuyú-a ní xito-í-yu nãcuáa cùu iní-n, te ní ñ<sup>n</sup>-yu ñã túú ní xita nihnu, chí ñ<sup>n</sup>-di-ni té Júdás ní xita nihnu tnãhí-dé, te duca<sup>n</sup> ní cuu cuendá sã ní quee ndáá-xi nãcuáa yòdo tnuní núú tütú-n.

<sup>13</sup> Te vitna sa ndixi-í núú ndécú-n, dico nini ndëcu-gã-í ñuyú-a duha cáhá<sup>n</sup>-í cuendá sã cùdñ iní-yu dàtná cùdñ iní mée-í. <sup>14</sup> Te yúhú ní dãnèhé-í-yu tnúhu-n, dico nchaa ñáyiu ndëcu ichi cuehé ichi duha cùu úhú iní ñãhá-yu xii-yu cuendá sã ñã túú-gã ndécú-yu ichi cuehé ichi duha-á<sup>n</sup> dàtná

yúhú ñã túú ndëcu-í ichi-á<sup>n</sup>. <sup>15</sup> Te ñã túú cáhí-í sã xócãní-n-yu ñuyú-a, dico cáhá<sup>n</sup> ndãhú-í núú-n sã dácacu nihnú-n-yu núú yucu ñãvãha. <sup>16</sup> Te yúhú ñã túú ndëcu-í ichi cuehé ichi duha, te duca<sup>n</sup> mée-yu ñã túú-gã ndécú-yu ichi cuehé ichi duha. <sup>17</sup> Te ío na cundecu yihi ñuhu-gã-yu núú-n dãcuahã-yu tnúhu-n, chí cùu-xi ñ<sup>n</sup> tnúhu ndáá. <sup>18</sup> Te dàtná ní tendaha ñaha-n xii yúhú véxi-í tnuú nchaa ñáyiu ndëcu ichi cuehé ichi duha, duca<sup>n</sup> càda-í tendaha-í-yu quíh<sup>n</sup>-yu cáhá<sup>n</sup>-yu tnúhu-í tnuú nchaa ñáyiu ndëcu ichi cuehé ichi duha. <sup>19</sup> Te yúhú ndécú yiñuhu-í núú-n, te cada ñaha-n xii-í nãcuáa cùu iní-n sã cuendá-yu, te duca<sup>n</sup> te cundecu yiñuhu-yu núú-n dãcuahã-yu tnúhu-n.

<sup>20</sup> Te ñã díú cuendá mee-ni ñáyiu sa ní sãndáá iní-xi cáhá<sup>n</sup> ndãhú-í núú-n, chí tnãhá cuendá nchaa ñáyiu na quindáá iní ñãhá xii-í ndéé idã-gã núu na cundedòho-yu tnúhu cáhá<sup>n</sup> ñáyiu na tendaha-í. <sup>21</sup> Te xicã<sup>n</sup> tãhú-í núú-n sã nchãá-yu ñ<sup>n</sup>-nã ichi na cùu-yu, te ñ<sup>n</sup>-nã cani iní ndihi ñãhá-yu xii-ò dàtná cúú nchòo ñ<sup>n</sup>-ni cuu-o. Te duca<sup>n</sup> ñ<sup>n</sup>-nã cuu-o ndihí-yu cuendá sã ná quindáá iní nchaa ñáyiu ndëcu ichi cuehé ichi duha sã díú-n ní tendaha ñaha-n xii-í véxi-í ñuyú-a. <sup>22</sup> Te nchaa sã vãha ní taxi-n ndëcu ndihi-í ní dãnèhé-í-yu cuendá sã ñ<sup>n</sup>-nã cuú-yu cundecu-yu dàtná ndécú nchòo. <sup>23</sup> Te yúhú cundecu ndihi-í-yu, te yòhó cundecu ndihi ñaha-n xii yúhú cuendá ñ<sup>n</sup>-nã cuu ndisã-yu cundecu-yu. Te duca<sup>n</sup> te cutnùn-í iní nchaa ñáyiu ndëcu ichi cuehé ichi duha sã díú mée-n ní tendaha ñaha-n xii-í véxi-í ñuyú-a, te cùu iní-n-yu dàtná cúú iní ñãhá-n xii yúhú.

<sup>24</sup> Táu, mee-n ní taxi cuendá-n-yu, te cuini-í sã cundëcu-yu núú cundëcu-í cuendá quini-yu sã quidé càhnu ñaha-n xii-í chí duca<sup>n</sup>-ni cùu iní ñãhá-n xii yúhú ndéé cutnãhá vátã ngãva-gã ñuyú. <sup>25</sup> Táu, yòhó ío yiñuhu ndecu-n. Te ñáyiu ndëcu ichi cuehé ichi duha ñã túú xiní ñãhá-yu xii-n, dico yúhú chí xiní ñãhá-í xii-n, dico ñáyiu ní sãndáá iní ñãhá xii-í sa xiní-yu sã díú-n ní tendaha ñaha-n xii-í véxi-í ñuyú-a. <sup>26</sup> Te sa xáha<sup>n</sup>-í xii-yu yoo cùu-n, te diu-ni duca<sup>n</sup> càda-í cuendá cuu iní tnãhá-yu dàtná cúú iní ñãhá-n xii-í, te duca<sup>n</sup> cundëcu-í ndihi-yu — cáhí-gã xáha<sup>n</sup>-gã xii Tãtã-gã Dútú Ndióxi.

## 18

*Ní tni-igüedé Jësús ndécã ñaha-güedé cuahã<sup>n</sup>*

(Mt. 26:47-56; Mr. 14:43-50; Lc. 22:47-53)

<sup>1</sup> Te sãtã dúcã<sup>n</sup> ní cáhá<sup>n</sup> Jësús, te ní quee-gã ndihi cue téé xica cuu ndihi-gã cuahã<sup>n</sup>-güedé ndãa ingã xio yuhu yu Cèdrón. Te yacã<sup>n</sup> cáá ñ<sup>n</sup> lahuertã, te xiti lahuertã-á<sup>n</sup> cuãnguihu

Jësús ndihí cue tée xica cuu ndihí-gá. <sup>2</sup> Te té Júdás déhe té Xímú Iscarioté tée ní sáha cuendá ñháá xii-gá núu cuè tée cùu úhú iní ñháá sa xini-dé lahuertá-án chi titní xito ní sáhá<sup>n</sup> Jësús ndihí-güedé xiá<sup>n</sup>. <sup>3</sup> Núu ndáá ichi xiá<sup>n</sup> ní sáá té Júdás ndihí vai sandadú, ndihí cue tée quide cuendá veñúhu ní techiú<sup>n</sup> ñaha cue dütú cúnúu, ndihí cue tée cùu fariséú. Te xinehe-güedé machiti ndihí i<sup>n</sup> úú-gá sá déé<sup>n</sup>, te yòtnuú-güedé linterná ndihí iti ní sáá. <sup>4</sup> Te Jësús sa ñaha-gá nchaa ñacuáa cada ñaha-güedé xii-gá núu ní sáhá<sup>n</sup> tuha ñaha-gá xii-güedé, te ní xáha<sup>n</sup>-gá:

—¿Yoo nánducu-ndo? —cachí-gá xáha<sup>n</sup>-gá xii-güedé.

<sup>5</sup> Te ní xáha<sup>n</sup>-güedé:

—Jësús tée ñuú Nazàrét nánducu-ndí —càchí-güedé xáha<sup>n</sup>-güedé xii-gá.

Te ní xáha<sup>n</sup> Jësús:

—Yúhú duca<sup>n</sup> ñani-í, te náu-í ndécú-á te núu yúhú nánducu-ndo —cachí-gá xáha<sup>n</sup>-gá xii-güedé.

Te tñhá té Júdás tée ní sáha cuendá ñháá xii-gá ndihí-güedé. <sup>6</sup> Te òré ní xáha<sup>n</sup> Jësús sá díú-gá cúu tée nánducu-güedé, te ní nacaca duma-güedé te ní nduá-güedé ndéé ñuhu. <sup>7</sup> Te ní xicá<sup>n</sup> tñhú túcu Jësús núu-güedé yoo nánducu-güedé. Te ní xáha<sup>n</sup> túcu-güedé sá Jësús tée ñuú Nazàrét nánducu-güedé, <sup>8</sup> núu ní xáha<sup>n</sup>-ñá Jësús:

—Sa ní cáhá<sup>n</sup>-í sá díú yúhú duca<sup>n</sup> ñani-í, te núu yúhú nánducu-ndo, te daña-ndo nchaa cue tée iha na nùhú-güedé —càchí-gá xáha<sup>n</sup>-gá xii-güedé.

<sup>9</sup> Duha ní cuu chi ní quee ndáá-xi ñacuáa ní cáhá<sup>n</sup> méé Jësús chi ní cachí-gá sá ncháá ñáyiú ní sáha cuendá ñháá Yá Ndióxi cundecu ndihí-gá vá cuíta niñnú-yu. <sup>10</sup> Te té Xímú, àdi Pelú chi úú díu-dé, néhé-dé i<sup>n</sup> machiti, te ní tava-dé machiti-án ñi-xi te ní xehndé-dé lóho xio cùha i<sup>n</sup> tée ñani Malcú ní quéndeé duu<sup>n</sup>. Te tée-án xínú cuèchi-dé núu dütú cúnúu-gá. <sup>11</sup> Te ní xáha<sup>n</sup> Jësús xii té Pelú:

—Nataxúha machiti-án núu ñhú-xí, chi dacuití sá ndóhò-í ñacuáa ní cachí Tàt-á i cunduu —càchí-gá xáha<sup>n</sup>-gá xii-dé.

*Jësús ndécú-gá núu dütú cúnúu-gá*

(Mt. 26:57-58; Mr. 14:53-54; Lc. 22:54)

<sup>12</sup> Te cue sandadú ndihí cue tée cúnúu-gá núu-güedé, ndihí cue tée quide cuendá veñúhu ní tñi-güedé Jësús, te ní dácútú ñaha-güedé. <sup>13</sup> Te ndéca ñaha-güedé xii-gá cuáhá<sup>n</sup> núu ndécú té Ànás, te té Ànás-án cúu-dé tātá ñadihi té Caifás. Te té Caifás-án ní cuu-dé dütú cúnúu-gá cuía-án. <sup>14</sup> Te díu-ni tée-án ní xáha<sup>n</sup>-dè xii ñáyiú isráel sá vaha-gá sá i<sup>n</sup>-ní tée na cúu-dé sá cuendá-yu ncháa-yu.

*Té Pelú cáhá<sup>n</sup>-dè núu ñáyiú sá ñà túú xini-dé Jësús*

(Mt. 26:69-70; Mr. 14:66-68; Lc. 22:55-57)

<sup>15</sup> Te té Pelú, àdi Xímú chi úú díu-dé, ndihí ingá tucu-dé ñacuáa xica cuu ndihí-güedé Jësús nchicú<sup>n</sup> ñháá-güedé xii-gá cuáhá<sup>n</sup>. Te i<sup>n</sup> tée-án xini tñháá-dé ndihí dütú cúnúu-án núu nchicú<sup>n</sup>-dè tñháá-dé Jësús cuánguihu ndéé núu cáá vèhe tée cúnúu-án. <sup>16</sup> Dico té Pelú ní ndóo-dé yuyèhe ndaa quehé, núu ní ndee tée ndihí té Pelú-án ní cáhá<sup>n</sup> ndihí-dé ñaha ndéé yuyèhe, te ndéca-dé té Pelú cuánguihu. <sup>17</sup> Te ní xáha<sup>n</sup> ñaha ndéé yuyèhe-án xii té Pelú:

—¿Náa ñá díú yòhó tñháá-n xica cuu ndihí-n tée ndéca-güedé cuánguihu-a? —càchí-án xáha<sup>n</sup>-a<sup>n</sup> xii-dé.

Te ní xáha<sup>n</sup> té Pelú:

—Ñháá, ñá túú tée-án xicá cùu ndihí-ú —càchí-dé xáha<sup>n</sup>-dè xii-a<sup>n</sup>.

<sup>18</sup> Te ío víxi<sup>n</sup> quide-xi núu cue tée xinu cuechi, ndihí cue tée quide cuendá veñúhu ní dátñháá-güedé ñhúhú, te xínutñi teté-güedé ndihí té Pelú.

*Dütú cúnúu nducu tñhu-dé núu Jësús*

(Mt. 26:59-66; Mr. 14:55-64; Lc. 22:66-71)

<sup>19</sup> Te dütú cúnúu ní xicá<sup>n</sup> tñhú-dé núu Jësús núu nándi cùu cue tée xica cuu ndihí-gá, te nándi sá dánhèhé ñháá-gá xii-güedé. <sup>20</sup> Te ní xáha<sup>n</sup>-gá:

—Yúhú cáhá<sup>n</sup> ndodo-í núu ncháa ñáyiú cuéi xiti veñúhu càhnu sá ío cúnúu, te cuéi xiti nchaa dava-gá veñúhu núu tàca nchaa ñáyiú isráel duca<sup>n</sup>-ni dánhèhé-í-yu, te ñá túú dáyuhu cáhá<sup>n</sup>-í. <sup>21</sup> Núu vá càcá<sup>n</sup> tñhú-n núu-í. Càcá<sup>n</sup> tñhú núu ncháa ñáyiú sácúndedóho tñhu cáhá<sup>n</sup>-í, te na cáhá<sup>n</sup>-yu núu nása nduu tñhu cáhá<sup>n</sup>-í chi xini-yu —càchí-gá xáha<sup>n</sup>-gá xii-dé.

<sup>22</sup> Te sá díú-dé ní cáhá<sup>n</sup> Jësús núu i<sup>n</sup> tée quide cuendá veñúhu nùtni-dé tñháá-dé te ní cani-dé i<sup>n</sup> déhndé núu-gá. Te ní xáha<sup>n</sup>-dè: —¿Ná cuendá duca<sup>n</sup> cáhá<sup>n</sup>-n núu dütú cúnúu-í? —càchí-dé xáha<sup>n</sup>-dè xii-gá.

<sup>23</sup> Te ní xáha<sup>n</sup> Jësús xii-dé:

—Te núu nèhé ní cáhá<sup>n</sup>-í te cáhá<sup>n</sup>-n nása nduu tñhu ní cáhá<sup>n</sup>-í, te yúhú cáhá<sup>n</sup> váha-í te duca<sup>n</sup> càniha-n —cachí-gá xáha<sup>n</sup>-gá xii-dé.

<sup>24</sup> Te ndütú yoho-ni Jësús ní dánúhú ñháá té Ànás xii-gá ndaha té Caifás dütú cúnúu-gá.

*Té Pelú cáhá<sup>n</sup> tucu-dé núu ñáyiú sá ñà túú xini-dé Jësús*

(Mt. 26:71-75; Mr. 14:69-72; Lc. 22:58-62)

<sup>25</sup> Te té Pelú nùtni teté-ni-dé, te ní xáha<sup>n</sup>-güedé xii-dé:

—¿Náa ñá díú tñháá yòhó xicá cùu ndihí tée ndéca-ndí véxi-án? —càchí-güedé xáha<sup>n</sup>-güedé xii-dé.

Te ní xáha<sup>n</sup> tē Pèlù:

—Náhá, ñá túú tē-á<sup>n</sup> xíca cùu ndihí-ú — cächí-dé xáha<sup>n</sup>-dē xii-güedé.

<sup>26</sup> Te ì<sup>n</sup> ñaní tnáhá tēe ní xehndé té Pèlù lóho-xi-á<sup>n</sup> xínú cuèchi-dé tnáhá-dé núú dütú cùnùu. Te tēe-á<sup>n</sup> ñí xáha<sup>n</sup>-dē xii té Pèlù:

—¿Náa ñá díú tnáhá-n ndihí-n-dé ní xini ñáhà-í òré ní tñi-ndí-dé xití lahuertá? — cächí-dé xáha<sup>n</sup>-dē xii-dé.

<sup>27</sup> Te té Pèlù ní xáha<sup>n</sup> tūcu-dé sá ñá díú-dé, te òré-á<sup>n</sup> ñí cana ì<sup>n</sup> líhi.

*Jèsús ndécú-gá núú tē Pilatú*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Te ní ndeñuhu-güedé Jèsús vehe té Caifás, te ndéca ñaha-güedé xii-gá cuáhá<sup>n</sup> vechi<sup>n</sup> tēe cùu gobiernú. Te sa ta cùditó-ni-gá cuáhá<sup>n</sup> núu ñá ní cuini cue tēe israhél quíhu-güedé xití vechi<sup>n</sup> tēe cùu gobiernú-á<sup>n</sup>. Te núu ñí quíhu-güedé vechi<sup>n</sup>-á<sup>n</sup> ñá, te vá cúú-gá quíhu-güedé cudini-güedé vico pascuá ní cùu chí duca<sup>n</sup> tnáhí quide-güedé. <sup>29</sup> Núu té Pilatú tēe cùu gobiernú ní quee-dé vechi<sup>n</sup>-dé ní cáhá<sup>n</sup> ndihí ñaha-dē xii-güedé, te ní xáha<sup>n</sup>-dē:

—¿Ná cuéchi ní quide tēe-a núu ndéca-ndo-dé véxi? —cächí-dé xáha<sup>n</sup>-dē xii-güedé.

<sup>30</sup> Te ní xáha<sup>n</sup>-güedé:

—Te núu dicó ñá túú cuéchi-dé-á<sup>n</sup> te vá cándéca-ndí-dé quixi núu-n ní cùu — cächí-güedé xáha<sup>n</sup>-güedé xii-dé.

<sup>31</sup> Te ní xáha<sup>n</sup> tūcu té Pilatú xii-güedé:

—Chí cándéca-dé cuanùhu, te cada ndáá-ndó cuéchi-dé nácuáa cãa lei méé-ndó —cächí-dé xáha<sup>n</sup>-dē xii-güedé.

Te ní xáha<sup>n</sup>-güedé:

—Dico nchúhu ñáyiú israhél chí ñá túú dūca<sup>n</sup> taxi tñuní léi sã cáhni-ndí — cächí-güedé xáha<sup>n</sup>-güedé xii-dé.

<sup>32</sup> Te duca<sup>n</sup> ñí cuu chí dacuití ñí quee ndáá-xi nácuáa ní cáhá<sup>n</sup> méé Jèsús cada-xi cuú-gá. <sup>33</sup> Te cuándihu té Pilatú vechi<sup>n</sup>-dé, te ní cana-dé Jèsús ní xíca<sup>n</sup> tnúhu-dé núú-gá, te xáha<sup>n</sup>-dē:

—¿Yòhó yíndaha-n ñáyiú israhél-á<sup>n</sup>? — cächí-dé xáha<sup>n</sup>-dē xii-gá.

<sup>34</sup> Te ní xáha<sup>n</sup> Jèsús:

—¿Te xiá<sup>n</sup> cáhá<sup>n</sup>-n sã véxi iní méé-n, àdi ío ì<sup>n</sup> ñáyiú ní cächí tnúhu xii-n cuendá-í? — cächí-gá xáha<sup>n</sup>-gá xii-dé.

<sup>35</sup> Te ní xáha<sup>n</sup> tē Pilatú xii-gá:

—Ñá díú tēe israhél cúú-í núu duca<sup>n</sup> cáhá<sup>n</sup>-n, chí cue ñaní tnáhá-n cué tēe israhél ndihí cue dütú cùnùu ní taxi cuendá ñáhá-güedé xii-n iha. ¿Te ná ní quide-n? —cächí-dé xáha<sup>n</sup>-dē xii-gá.

<sup>36</sup> Te ní xáha<sup>n</sup> Jèsús:

—Ñá díú tēe ñuyúú-a cùu-í te ñí ñá túú véxi-í taxi tñuní-í ñuyúú-a, chí núu dicó iha táxi tñuní-í á<sup>n</sup> te cue tēe xica cuu ndihí-í

naá-güedé ndihí cue tēe israhél cuendá sã vã tñí ñaha-güedé xii-í ní cùu, dico ñá túú véxi-í sã táxi tñuní-í ñuyúú-a —cächí-gá xáha<sup>n</sup>-gá xii-dé.

<sup>37</sup> Te ní xáha<sup>n</sup> tē Pilatú:

—¿Te tēe yíndaha ñáyiú cùu-ó vání? — cächí-dé xáha<sup>n</sup>-dē xii-gá.

Te ní xáha<sup>n</sup> Jèsús:

—Te dàtná cächí-n-á<sup>n</sup> yíndaha ndisa-í ñáyiú, chí yúhu véxi-í ñuyúú-a te iha ní cacu-í te cáhá<sup>n</sup>-í mee-ni tnúhu ndáá. Te nchaa ñáyiú na cùdí iní-xi tnúhu ndáá, te tedóho-yu nchaa tnúhu cáhá<sup>n</sup>-í —cächí-gá xáha<sup>n</sup>-gá xii-dé.

<sup>38</sup> Te ní xáha<sup>n</sup> tē Pilatú:

—¿Te ná cúú-tu tnúhu ndáá-ái? —cächí-dé xáha<sup>n</sup>-dē xii-gá.

*Cächí-güedé sã cáhni-güedé Jèsús*

(Mt. 27:15-31; Mr. 15:6-20; Lc. 23:13-25)

Te sáta ní yáha ní xíca<sup>n</sup> tnúhu tē Pilatú núú Jèsús, te ní quee tucu-dé quehé, te xáha<sup>n</sup>-dē xii cue tēe israhél:

—Ñá túú ná cuéchi tēe-a. <sup>39</sup> Te yáha-ni chí duca<sup>n</sup> tnáhí quide nchohó sã ndí tnáhá nduu vico pascuá cuini-ndó sã dácacu-í ì<sup>n</sup> tēe yíhi vecaá. Te núu cuini-ndó te na dácacu-í tēe yíndaha ñaha xii-ndo —cächí-dé xáha<sup>n</sup>-dē xii-güedé.

<sup>40</sup> Te sã dúcá<sup>n</sup> ñí cáhá<sup>n</sup>-dé, núu nchaa-güedé níhi ní cáhá<sup>n</sup>-güedé, te xáha<sup>n</sup>-güedé:

—¡Vã dácacu-n tēe-á<sup>n</sup>, té Barrabás dácacu-n! —cächí-güedé xáha<sup>n</sup>-güedé xii-dé.

Te té Barrabás-á<sup>n</sup> ñí cuu-dé ì<sup>n</sup> ñadúhu.

## 19

<sup>1</sup> Te té Pilatú ní táuchíú<sup>n</sup>-dē ní tñí ñaha cué sandadú xii Jèsús, te ní caniha-güedé xii-gá ndihí ñí. <sup>2</sup> Te díu-ni cue tēe-á<sup>n</sup> ñí cadúha-güedé ì<sup>n</sup> coroná iñu ní chíhi-güedé díquí-gá, te ní dáquíu nuu ñaha-güedé xii-gá ì<sup>n</sup> dóo tícuèhé víhí. <sup>3</sup> Te ní sáhá<sup>n</sup> ndehe yatni-gá-güedé núú-gá, te ní xáha<sup>n</sup>-güedé:

—¡Ío cáhuu cuu yohó tēe yíndaha ñaha xii ñáyiú israhél! —cächí-güedé xáha<sup>n</sup>-güedé cúdíqui ndéé ñáhá-güedé xii-gá.

Te ní cani-güedé déhndé núú-gá.

<sup>4</sup> Te ní quee tucu té Pilatú quehé te ní xáha<sup>n</sup>-dē xii nchaa ñáyiú xíndecu quehé:

—Te cundehe-ndo-dé ná ndéé ñuhu-í-dé iha, chí yúhu sáha-í cuendá sã ñá túú cuéchi-dé —cächí-dé xáha<sup>n</sup>-dē xii-yu.

<sup>5</sup> Te ní ndeñuhu ñaha té Pilatú xii Jèsús xití vechi<sup>n</sup>-dé té ñuhu ì<sup>n</sup> coroná iñu díquí-gá, te ñihnu-gá dóo tícuèhé víhí-á<sup>n</sup>. Te ní xáha<sup>n</sup> tē Pilatú xii-yu:

—¡Nái-dé-a! —cächí-dé xáha<sup>n</sup>-dē xii-yu.

<sup>6</sup> Te ní xini ñáhá cué dütú cùnùu ndihí cue tēe quide cuendá veñúhu. Te ní cuáá-güedé, te xáha<sup>n</sup>-güedé:

—¡Cata caa-dé! ¡Cata caa-dé núú cùrúxi! —  
càchí-güedé xáha<sup>n</sup>-güedé xii-dé.

Te ní xáha<sup>n</sup> té Pilatú:

—Váha-gá núu candeca mee-ndo-dé quíhí<sup>n</sup>  
cata caa-ndo-dé núú cùrúxi, chí yúhú  
cutnùní iní-í sá ñá túú na cuèchi-dé —  
càchí-dé xáha<sup>n</sup>-dé xii-güedé.

<sup>7</sup> Te ní xáha<sup>n</sup> cuè téé isràél:

—Lèi ndécú ndíhi nchúhú càchí-xi sá dàí  
cuú-dé, chí càchí-dé sá Dêhe Yá Ndióxi  
cuú-dé —càchí-güedé xáha<sup>n</sup>-güedé xii-dé.

<sup>8</sup> Te sá dúcá<sup>n</sup> ní xáha<sup>n</sup>-güedé xii té Pilatú, te  
vàa-gá ní yúhú-dé. <sup>9</sup> Núu cuándihu tucu-dé  
vechiu<sup>n</sup>-dé, te ní xáha<sup>n</sup> tucu-dé xii Jèsús:

—¿Te yohó ndèé téé cùu-n-í? —cachí-dé  
xáha<sup>n</sup>-dé xii-gá.

Dico Jèsús ñá túú ní cáhá<sup>n</sup>-gá.

<sup>10</sup> Núu ní xáha<sup>n</sup> té Pilatú xii-gá:

—¿Te vá càchí tnúhu-n núu ndèé téé  
cùu-n-u? ¿Náa ñá túú xiní-n sá yúhú  
táxi tnùn-í, te cuu-ni tauchiú<sup>n</sup>-í cata caa  
ñaha-güedé xii-n núú cùrúxi cuú-n, te cuu-ni  
dácácu ñaha-í xii-n-á? —càchí-dé xáha<sup>n</sup>-dé  
xii-gá.

<sup>11</sup> Te ní xáha<sup>n</sup> Jèsús:

—Yohó ñá túú sá táxi tnùn-í ñáhá-n xii yúhú  
ní cùu núu ñá túú Yá Ndióxi ní cùn-í-gá sá  
dúcá<sup>n</sup> cùnduu, te téé ní taxi cuendá ñáhá  
xii-í núú n tée-á<sup>n</sup> ño-gá ndécuechi-dé dácúúxi  
yohó —càchí-gá xáha<sup>n</sup>-gá xii-dé.

<sup>12</sup> Te órè-á<sup>n</sup> ní nguíta té Pilatú ndúcú-dé  
nàcuáa cada-dé dácácu-dé Jèsús ní cùu, dico  
cue téé isràél ní nguíta-güedé ní cuáá-güedé,  
te xáha<sup>n</sup>-güedé:

—Te núu na dácácu-n tée-á<sup>n</sup>, te ñá díú  
tée ñáhá tnúhu ndíhi té Césár cuú-n. Chí  
ndéda-ni càa téé na càchí sá cuú-dé téé  
yíndaha ñaha xii ñáyiú cùu úhú iní-dé té  
Césár. Te téé Jèsús-á<sup>n</sup> càchí-dé sá táxi tnùn-í  
—càchí-güedé xáha<sup>n</sup>-güedé xii-dé.

<sup>13</sup> Te sá dúcá<sup>n</sup> ní xáha<sup>n</sup>-güedé xii té Pilatú  
núu ní quee-dé ndíhi Jèsús cuáhá<sup>n</sup> ndíhi  
ñaha-dé corrèdor núú ní quee mee-ni yúú  
váha núú ñúhú, te xíá<sup>n</sup> nán-í Gábatá tnúhu  
hèbreú. Te xíá<sup>n</sup> ndécú xilè sácóo nchíhi  
té Pilatú xèhndé-dé cuèchi ñáyiú, núu ní  
nucóo-dé núú xilè-dé órè ní quexio-dé ndíhi  
Jèsús. <sup>14</sup> Te cùu-xi datná cuádava nduu, nduu  
vispré vico pascuá. Te ní xáha<sup>n</sup> té Pilatú xii  
ñáyiú isràél:

—¡Nái téé yíndaha ñaha xii-ndo-a! —  
cachí-dé xáha<sup>n</sup>-dé xii-yu.

<sup>15</sup> Te ní cuáá-yu, te xáhá<sup>n</sup>-yu:

—¡Cahni-dé! ¡Cahni-dé! ¡Cata caa-dé núú  
cùrúxi! —càchí-yu xáhá<sup>n</sup>-yu.

Te ní xáha<sup>n</sup> té Pilatú:

—¿Te yúhú cata caa-í téé yíndaha ñaha  
xii-ndo-u? —cachí-dé xáha<sup>n</sup>-dé xii-yu.

Te cue dútú cúnúu ní xáha<sup>n</sup>-güedé:

—Nchúhú ñá túú-gá téé yíndaha ñaha  
xii-ndí, chí ñ<sup>n</sup>di-ni té Césár yíndaha ñaha-dé  
xii-ndí —càchí-güedé xáha<sup>n</sup>-güedé xii-dé.

<sup>16</sup> Te té Pilatú ní xáha<sup>n</sup>-dé ní quee<sup>n</sup>  
cuendá-güedé Jèsús ndécá ñaha-güedé  
cuáhá<sup>n</sup> cata caa ñaha-güedé núú cùrúxi.

*Sàta caa-güedé Jèsús núú cùrúxi*

(Mt. 27:32-44; Mr. 15:21-32; Lc. 23:26-43)

<sup>17</sup> Te ní quee Jèsús nchídó-gá cùrúxi cuáhá<sup>n</sup>  
ñ<sup>n</sup> xichi núú nán-í Yiquí Diquí Ndiyi. Te  
tnúhu hèbreú queé-xí Gólgotá. <sup>18</sup> Te yàcá<sup>n</sup>  
ní sata caa ñaha-güedé xii-gá núú cùrúxi-á<sup>n</sup>.

Te xio xio diñi-gá ní sata caa-güedé úú cue  
téé ndècu ndisa cuèchi-xi diu-ni núú cùrúxi  
tucu. <sup>19</sup> Te ní táuchíu<sup>n</sup> té Pilatú ní taxi  
ndecu-güedé ñ<sup>n</sup> sá ndèé lètrá núú cùrúxi  
tá càa-gá, te duha càchí lètrá-á<sup>n</sup>: “Jèsús téé  
ñúú Nazàrèt, téé yíndaha ñaha xii ñáyiú is-  
ràél”, duha càchí-xi. <sup>20</sup> Te vài ñáyiú isràél  
ní xiní-yu nàcuáa cáhá<sup>n</sup> lètrá-á<sup>n</sup>, chí yatni-ni  
yuhu ñúú ní sata caa ñaha-güedé xii-gá núú  
cùrúxi. Te lètrá-á<sup>n</sup> cáhá<sup>n</sup>-xi tnúhu hèbreú,  
te cáhá<sup>n</sup>-xi tnúhu griégú, te cáhá<sup>n</sup>-xi tnúhu  
làtín. <sup>21</sup> Te ní xáha<sup>n</sup> cuè dútú cúnúu xii té  
Pilatú:

—Vá táuchíu<sup>n</sup>-n tee-güedé lètrá cáhá<sup>n</sup>-xi  
“Téé yíndaha ñaha xii ñáyiú isràél” ní cùu,  
váha-gá tauchiú<sup>n</sup>-n tee-güedé lètrá cáhá<sup>n</sup>-xi  
“Téé càchí yíndaha ñaha xii ñáyiú isràél ní  
cùu” —cachí-güedé xáha<sup>n</sup>-güedé xii-dé.

<sup>22</sup> Te ní xáha<sup>n</sup> té Pilatú:

—Nàcuáa ní táuchíu<sup>n</sup>-í ní tee-güedé te  
duca<sup>n</sup> quèndóo-xi —càchí-dé xáha<sup>n</sup>-dé  
xii-güedé.

<sup>23</sup> Te sátá ní sata caa ñaha cuè san-  
dadú xii Jèsús núú cùrúxi, te cúmi xichi ní  
quide-güedé dóo-gá, te ñ<sup>n</sup> xichi dóo-gá ní  
cáhñu cue sandadú-á<sup>n</sup>. Te ndècu ñ<sup>n</sup> dóo-gá  
dóo cáni ñá túú ní tícu. <sup>24</sup> Te cuendá dóo-á<sup>n</sup>  
ní xítñaha cue sandadú-á<sup>n</sup>:

—Vá ndátá-ó dóo-a, váha-gá núu na còto  
ndéé-ó cuendá quini-ó ndèdacaa-o cuu  
cuendá-ó —cachí-güedé xítñaha-güedé.

Te duca<sup>n</sup> ní quide-güedé chí ní quee  
ndaá-xi nàcuáa cáhá<sup>n</sup>-xi núú tütú Yá Ndióxi  
núú càchí-xi: “Títíni xichi ní cáhñu-güedé  
dóo-í. Te ní xito ndéé-güedé cuendá cutnùní  
iní-güedé ndèdacaa-güedé níhí-güedé dóo-í”,  
duha càchí-xi núú tütú-gá. Te sá dúcá<sup>n</sup>  
cáhá<sup>n</sup>-xi núú tütú Yá Ndióxi núu xíá<sup>n</sup> duca<sup>n</sup>  
ní quide cue sandadú-á<sup>n</sup>.

<sup>25</sup> Te yatni diñi curúxi núú tákàa Jèsús  
nútnñi náná-gá, ndíhi cùhú-xi, ndíhi tá Màriá  
ñadhí té Clèofás, ndíhi tá Màriá Magdalèna.  
<sup>26</sup> Te ní xiní Jèsús náná-gá nútnñi-a<sup>n</sup> diñi ñ<sup>n</sup> téé  
ní xica cuu ndíhi-gá, téé ío cùu iní-gá, te ní  
xáha<sup>n</sup>-gá xii náná-gá:

—Náá, téé nùtníí-á<sup>n</sup> nduu-dé dàtná déhe mee-n —càchí-gá xáha<sup>n</sup>-gá xii-a<sup>n</sup>.

<sup>27</sup> Te ní xáha<sup>n</sup>-gá xii téé ní xica cuu ndihi-gá-á<sup>n</sup>:

—Naha-á<sup>n</sup> nduu-a<sup>n</sup> dàtná náná méé-n —càchí-gá xáha<sup>n</sup>-gá xii-dé.

Núu ndéé dàvá-á<sup>n</sup> ní nduu náná ñháá téé-á<sup>n</sup> xii náná-gá.

*Ní xihí Jèsús*

(Mt. 27:45-56; Mr. 15:33-41; Lc. 23:44-49)

<sup>28</sup> Te ní cutnùní iní Jèsús sá ní ndihi chiú<sup>n</sup> ní táhú Tàtá-gá Dútú Ndiòxí ní quide-gá núu ní cachi-gá:

—Yíhí-í ndute —càchí-gá.

Te duha ní cáhá<sup>n</sup>-gá chí ní quee ndáá-xi nàcuáa cáhá<sup>n</sup>-xi núu tütú Yá Ndiòxí.

<sup>29</sup> Te ndècu ì<sup>n</sup> lítu ñùhu ndudí íá. Te sá dúcá<sup>n</sup> ní cáhá<sup>n</sup>-gá sá yíhí-gá ndute, núu xiá<sup>n</sup> ní quehe<sup>n</sup>-güedé cachi te ní chindóyo-güedé xití ndudí íá-á<sup>n</sup>, te ní chinenu-güedé díquí ì<sup>n</sup> dité yutnu nani hisópó, te ní ndocani-güedé ní chihí-güedé yuhu-gá. <sup>30</sup> Te sáta ní xihí-gá ndudí íá-á<sup>n</sup>, te cachi-gá:

—Vitna ní dáxínu cava-í nchaá chiú<sup>n</sup> ní cachi Tàtá-í cada-í —duha ní cachi-gá.

Te ní xócuíta dúcú<sup>n</sup>-gá ndáa núú-gá, te ní xihí-ni-gá.

*Ì<sup>n</sup> sandádú ní caá<sup>n</sup>-dé yiqui naha Jèsús ndihi ì<sup>n</sup> pùyá yíhí càà núú-xi*

<sup>31</sup> Te cuèndá sá ndúu vispré vico pàscuá cúu-xi núu ñá ní cuíni cue téé isràél cundecu-ni yiqui cùñú-gá núu cùrúxí ndihi yiqui cùñú cue téé ní sata caa-güedé díñi-gá, chí cuèndá nduu tnèé-á<sup>n</sup> cúu-xi ndúu ndetátú ñáyíu, te ío quide cahnú-yu nduu-á<sup>n</sup>, núu ní xáha<sup>n</sup>-güedé xii té Pilatú sá táuchíu<sup>n</sup>-dé quíhí<sup>n</sup> cue téé cahnú-güedé díhí<sup>n</sup> Jèsús ndihi díhí<sup>n</sup> cue téé tàcaa ndihi-gá, te xocàni-güedé yiqui cùñú-gá ndihi yiqui cùñú-güedé yàcá<sup>n</sup>. <sup>32</sup> Te sáta dúcá<sup>n</sup> te ní sáhá<sup>n</sup> cue sandádú ní sáhnú-güedé díhí<sup>n</sup> cue téé tàcaa xio xio díñi Jèsús. <sup>33</sup> Te òré ní cuyatni-güedé núú-gá, te ní xiní-güedé sá sá ní xihí-gá núu ñá ní sáhnú-güedé díhí<sup>n</sup>-gá.

<sup>34</sup> Dico ì<sup>n</sup> sandádú-á<sup>n</sup> ní cúxi-dé pùyá néhé-dé ì<sup>n</sup> xio yiqui naha-gá, te yíhí caá núú-xi núu ní caá<sup>n</sup>-xi yiqui naha-gá ní quee níñi ndihi ndute cuíi. <sup>35</sup> Te yúhú té Juáá téé ní cadúha tutú-a ní xiní-í nàcuáa ní cuu ní xihí Jèsús, te xiá<sup>n</sup> núu cáhá<sup>n</sup> ndáá-í cuèndá quíndáá iní-ndó. <sup>36</sup> Te duca<sup>n</sup> ní cuu ñá ní sáhnú-güedé díhí<sup>n</sup> Jèsús, chí ní quee ndáá-xi nàcuáa cáhá<sup>n</sup>-xi núu tütú Yá Ndiòxí núu cachi-xi: “Vá cahnú-güedé ní ì<sup>n</sup> yiqui-gá”, duha cachi-xi. <sup>37</sup> Te duca<sup>n</sup> ní quide-güedé Jèsús ní caá<sup>n</sup>-güedé yiqui naha-gá, chí ingá xichí núu tütú Yá Ndiòxí cachi-xi: “Sáá nduu

te quini-güedé ì<sup>n</sup> téé ní dánícuèhé-güedé”, duha cachi-xi.

*Chindúxi-güedé Jèsús*

(Mt. 27:57-61; Mr. 15:42-47; Lc. 23:50-56)

<sup>38</sup> Te sáta dúcá<sup>n</sup> ní cuu, te té Chèé téé ñúu Arimàtea tnháá-dé ní sándáá iní-dé tnhúu Jèsús dico dayuhu, chí ní xóo yúhú-dé cue téé cùnuu núu ñáyíu isràél. Te téé-á<sup>n</sup> ní xáha<sup>n</sup>-dé xii té Pilatú núu vá dáñá-dé canehe-dé yiqui cùñú Jèsús quíhí<sup>n</sup> chindúxi-dé, te té Pilatú ní xáha<sup>n</sup>-dé xii-dé sá cúu cànehe-dé yiqui cùñú Jèsús quíhí<sup>n</sup>, núu ní sáhá<sup>n</sup>-dé ní nuu nehe-dé yiqui cùñú-gá núu cùrúxí nchídó-dé cuáhá<sup>n</sup>. <sup>39</sup> Te té Nicòdemú téé ní sáhá<sup>n</sup> niú ní cáhá<sup>n</sup> ndihi-dé Jèsús ndéé díhna, téé-á<sup>n</sup> néhé-dé ócò úxí kílu yuchi ní cuáha mee-ni yúcu sá nání mirrá ndihi yúcu sá nání àloés. Te ío váha tnhàmi sahá<sup>n</sup>. <sup>40</sup> Te ní naníhí tnháá-dé ndihi té Chèé, te ní chidúcú<sup>n</sup>-nuu-güedé yiqui cùñú Jèsús mee-ni dóó váha, te nàcuáa ta dùcu<sup>n</sup> nuu-güedé yiqui cùñú-gá dóó-á<sup>n</sup>, te duca<sup>n</sup> ta chido-güedé yuchi sáhá<sup>n</sup> tnháá-á<sup>n</sup> núu dóó-á<sup>n</sup> chí duca<sup>n</sup> tnháí quide ñáyíu isràél òré chindúxi tnháá-yu. <sup>41</sup> Te yatni núu ní sata caa-güedé Jèsús caá ì<sup>n</sup> lahuertá. Te xití lahuertá-á<sup>n</sup> nchii ì<sup>n</sup> yaú cava duha cuáhá<sup>n</sup> ndáá-xi, te vátá yóo ì<sup>n</sup>-gá nguindúxi xiá<sup>n</sup>. <sup>42</sup> Te cuèndá sá ní cuyatni tnháá nduu ndetátú ñáyíu isràél núu xiá<sup>n</sup> yaú cava nchii yatni-ni xiá<sup>n</sup> ní chihí-güedé yiqui cùñú Jèsús.

## 20

*Jèsús ní ndoto-gá*

(Mt. 28:1-10; Mr. 16:1-8; Lc. 24:1-12)

<sup>1</sup> Te ndumíngú tacuìhndá-gá cuáhá<sup>n</sup> tá Mariá Magdaléná cuáhá<sup>n</sup> ngoto-xi yaú núu ní chihí-güedé yiqui cùñú Jèsús, te ní saá-xi ní xiní-xi sá ñáa tñú-gá ndéé yúu yèhe yaú-á<sup>n</sup>. <sup>2</sup> Núu xínu-xi cuánuhú núu ndécú té Xímú, àdi Pelú chí úú díu-dé, ndihi ingá téé ní xica cuu ndihi-gá téé ío cùu iní-gá, te ní xáha<sup>n</sup>-xi xii-güedé:

—Nèhe-güedé yiqui cùñú Jèsús cuáhá<sup>n</sup>, te ñá xiní-ó ndéé ní taxi ndecu-güedé —càchí-xi xáha<sup>n</sup>-xi xii-güedé.

<sup>3</sup> Te ní quee té Pelú ndihi ingá téé-á<sup>n</sup> cuáhá<sup>n</sup> ndéhé-güedé yaú núu ní chihí-güedé yiqui cùñú-gá. <sup>4</sup> Te ndúu-güedé xínú-güedé cuáhá<sup>n</sup> ní cùu, dico ingá téé-á<sup>n</sup> ní cuu níhí-gá sáhá-dé cuáhá<sup>n</sup>-dé núu díhna-gá-dé ní saá-dé yuhu yaú núu ní chihí-güedé yiqui cùñú Jèsús ní cùu. <sup>5</sup> Te ní ngáundeyi-dé xító níhni-dé xití yaú-á<sup>n</sup>, te ní xiní-dé mee-ná dóó váha sá ní xiducú<sup>n</sup> nuu-gá yúcu, dico ñá ní quíhu-dé. <sup>6</sup> Te sáta ní saá té Pelú te cuánguihu-dé xití yaú-á<sup>n</sup>, núu tnháá-dé ní xiní-dé nchaá dóó ní xiducú<sup>n</sup> nuu-gá yúcu-á<sup>n</sup>. <sup>7</sup> Te ní xiní-dé

sá dõó ní xindútú díquí-gã ñá túú càtuu jundú-xi ndihi dóó ní xiducú<sup>n</sup> nuu-gá chi ní naducú<sup>n</sup>nuu-ná càtúu ì<sup>n</sup> xio. <sup>8</sup> Te nchicú<sup>n</sup> tucu téé ní sáá díhna-gá-á<sup>n</sup> cuànguihu xití yaú-á<sup>n</sup>, te ní xiní-dé sá dõó-ná yúcu, te ñá túú-gá yiqui cuñú Jèsús núu ní sándáá iní-dé sá ní ndoto-gá. <sup>9</sup> Chi vátá təcú tnúni-gá-güedé nàcuáa càhá<sup>n</sup>-xi núú tütú Yá Ndióxi núú càchí-xi sá Jèsús ndoto-gá. <sup>10</sup> Te ní xícó ndí ndúú cue téé ní sángoto yaú núú ní chihí-güedé yiqui cuñú Jèsús ní cùu cuánuhú-güedé vehe-güedé.

*Jèsús ní naníhí tnáhá-gã ndihi tá Màriá Magdalená*

(Mr. 16:9-11)

<sup>11</sup> Te ní sáá tucu tá Màriá yuhu yaú núú ní chihí-güedé yiqui cuñú Jèsús te ní ngúita-xi ndàhyú-xi, te ní ngáundeyi-xi xito nihni-xi xití yaú-á<sup>n</sup>. <sup>12</sup> Te xití yaú-á<sup>n</sup> ní xiní-xi úú espíritú xínú cuèchi núú Yá Ndióxi Xixíhnu-xi mee-ni dõó cuixí<sup>n</sup> xindecu-xi núú ní cáa yiqui cuñú-gá. Te ì<sup>n</sup>-xi núcóo núú ní cáa díquí-gã, te ì<sup>n</sup>-xi núcóo núú ní cáa sáhá-gã. <sup>13</sup> Te espíritú-á<sup>n</sup> ní xáha<sup>n</sup>-xi xii tá Màriá:

—¿Ná cuendá ndàhyú-n? —càchí-xi xáha<sup>n</sup>-xi.

Te ní xáha<sup>n</sup> tá Màriá:

—Ndàhyú-í chi nèhe-güedé yiqui cuñú Yaá cúú Xitohó-í cuahá, te ñá túú xiní-í ndèé ní taxi ndecu-güedé —càchí-xi xáha<sup>n</sup>-xi xii cue espíritú-á<sup>n</sup>.

<sup>14</sup> Te tnúhu-ni-á<sup>n</sup> ní cáhá<sup>n</sup>-xi te ní nchócótó-xi ì<sup>n</sup> xio, te ní xiní-xi Jèsús núní-gá dico ñá túú ní cùtnuní iní-xi sá díú mée-gá. <sup>15</sup> Te ní xáha<sup>n</sup> Jèsús xii-xi:

—¿Ná cuendá ndàhyú-n? ¿Yoo nànducu-n? —càchí-gá xáha<sup>n</sup>-gã xii-xi.

Te mee-xi ní sani iní-xi sá tée xito lahuertá-á<sup>n</sup> cúú tée-á<sup>n</sup>, núú ní xáha<sup>n</sup>-xi:

—Táta, te núu yohó néné-n yiqui cuñú Jèsús cuahá, te cáhá<sup>n</sup>-n ndèé ní taxi ndecu-n chi cuendá naquehe<sup>n</sup>-í canehe-í nùhú —càchí-xi xáha<sup>n</sup>-xi.

<sup>16</sup> Te ní cáhá<sup>n</sup> díú ñaha-gá xii-xi, te xáha<sup>n</sup>-gã:

—jMáriá! —càchí-gá xáha<sup>n</sup>-gã xii-xi.

Te ní ndacoto-xi núú-gã, te ní cáhá<sup>n</sup>-xi tnúhu hëbreú, te xáha<sup>n</sup>-xi:

—jRabóní! —càchí-xi xáha<sup>n</sup>-xi. Te tnúhu-á<sup>n</sup> quée-xi Mëstrú.

<sup>17</sup> Te ní xáha<sup>n</sup> Jèsús:

—Daña vá ngání ñaha-n chi vátá ndáá-gã-í núú ndécú Tàtá-í. Te nùhú-n cuñaha-n xii cue téé ío váha ní tnáhá tnúhu ndihi-í sá ndáá-í núú ndécú Tàtá-í Dútú Ndióxi, te diu-gá cúú Tàtá-ndó nchàa-ndo, te diu-ni-gá cúú Ndióxi-ndó —càchí-gá xáha<sup>n</sup>-gã xii-xi.

<sup>18</sup> Te ní natnii tá Màriá Magdalená ichi cuánuhú-xi cúñaha-xi xii cue téé ní xica cuu

ndihi-gá sá ní xiní-xi Jèsús, te ní xáha<sup>n</sup>-xi xii-güedé nchaa nàcuáa ní xáha<sup>n</sup>-gã xii-xi.

*Ní quexio Jèsús núú xindecu cue téé ní xica cuu ndihi-gá*

(Mt. 28:16-20; Mr. 16:14-18; Lc. 24:36-49)

<sup>19</sup> Te diu-ni ndumíngú sandiqui<sup>n</sup> ní nataká cue téé ní xica cuu ndihi-gá, te xíndedí nihnu-güedé vehe sá xiyùhú-güedé cue téé cùnunu núú ñàyiú isràél. Te ní quíhu Jèsús ndéé tnuú-güedé ní ngútnúí-gá, te ní xáha<sup>n</sup>-gã:

—Yá Ndióxi chindèe ñaha-gá xii-ndo ío váha cùu iní-ndó ndècu-ndo —càchí-gá xáha<sup>n</sup>-gã xii-güedé.

<sup>20</sup> Te ní dánèhé ñahá-gã ndaha-gá ndihi yiqui naha-gã xii-güedé. Te ío ní cudíí iní-güedé sá díú ndísa-gá ní xiní ñahá-güedé.

<sup>21</sup> Te ní xáha<sup>n</sup> tucu Jèsús xii-güedé:

—Yá Ndióxi chindèe ñaha-gá xii-ndo ío váha cùu iní-ndó ndècu-ndo. Te dátáná ní tendaha ñaha Tàtá-í Dútú Ndióxi xii-í véxi-í ñuyíú-a, te duca<sup>n</sup> tendaha ñaha-í xii-ndo quíhí<sup>n</sup>-ndó càhá<sup>n</sup>-ndó tnúhu-í núú ñàyiú —càchí-gá xáha<sup>n</sup>-gã xii-güedé.

<sup>22</sup> Te ní chiyócó-gã núú-güedé, te ní xáha<sup>n</sup>-gã:

—Chí ndúú tàhú Espíritú Yá Ndióxi cun-decu ndihi-ndo. <sup>23</sup> Te nchaa ñàyiú na quíndáá iní-xi tnúhu-í te cúñaha-ndo xii-yu sá ní quide càhnu iní Yá Ndióxi nchaa cuèchi-yu. Te nchaa ñàyiú vá quíndáá iní tnúhu-í te cúñaha-ndo xii-yu sá vá cadá càhnu iní-gá cuèchi-yu —càchí-gá xáha<sup>n</sup>-gã xii-güedé.

*Té Mǎxí càhá<sup>n</sup> ndihi-dé Jèsús*

<sup>24</sup> Te núú ùxúú cue téé ní xica cuu ndihi-gá, te ì<sup>n</sup>-dé nání-dé Mǎxí téé ní xóo danàni-güedé Cuáchí, te tée-á<sup>n</sup> ñá túú-dé ndécú ndihi-güedé òré ní sáhá<sup>n</sup> Jèsús. <sup>25</sup> Te dava-gá cue téé ní xica cuu ndihi-gá ní xáha<sup>n</sup>-güedé xii-dé:

—Ní xiní-ndí Jèsús —càchí-güedé xáha<sup>n</sup>-güedé.

Te ní xáha<sup>n</sup> tē Mǎxí:

—Te vá quíndáá iní-í, chi ndéé quíní-í ndaha-gá núú ní quée nduyú, te dàquíhu-í díquí ndáhá-í núú ní caá<sup>n</sup> nduyú-á<sup>n</sup>, te dàquíhu ndàha-í yiqui naha-gã núú ní caá<sup>n</sup>, duca<sup>n</sup> te quíndáá iní-í —càchí-dé xáha<sup>n</sup>-dè xii-güedé.

<sup>26</sup> Te núú ùná tucu nduu ní nataká tucu cue téé ní xica cuu ndihi Jèsús ì<sup>n</sup> vehe, te nduu-á<sup>n</sup> tnáhá té Mǎxí ndécú ndihi-güedé. Te cuèi ndedí nihnu-güedé vehe-á<sup>n</sup>, te ní quíhu Jèsús ndéé tnuú-güedé, te ní xáha<sup>n</sup>-gã:

—Yá Ndiöxí chindèe ñaha-gá xii-ndo ïo váha cùu iní-ndó ndècu-ndo —cachí-gá xáha<sup>n</sup>-gá xii-güedé.

<sup>27</sup> Te ní xáha<sup>n</sup>-gá xii té Mǎxí:

—Cundehe ndàha-í te dàquihu-n ñíquí ndáhá-n núu ní quée nduyú, te dàquihu-n ndàha-n yiquí naha-í-a cuendá quíndáá iní-n te vá cání ñ<sup>n</sup> caní úú iní-n —cachí-gá xáha<sup>n</sup>-gá xii-dé.

<sup>28</sup> Te ní xáha<sup>n</sup> té Mǎxí xii-gá:

—ÿYòhó cùu-n Xítòhó-í! ÿYòhó cùu-n Ndiöxi-í! —cachí-dé xáha<sup>n</sup>-dè xii-gá.

<sup>29</sup> Te ní xáha<sup>n</sup> Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdè-gá iní nchaa ñayiu ñá túú ní xiní núu ñáhá xii-í, te ní sándáá iní-yu —cachí-gá xáha<sup>n</sup>-gá xii-dé.

*Quíndáá iní-ó tnúhu yòdo tnuni núu tütú-a*

<sup>30</sup> Te vai-gá sá vá yòo tnàhí ndàcu cada ñá túú yòdo tnuni núu tütú-a ní quide Jèsús núu cue téé ní xica cuu ndihi-gá. <sup>31</sup> Dico dava-gá ní ngódó tnuni núu tütú-a cuendá sá quíndáá iní-ndó sǎ Jèsús cùu-gǎ Cristú Déhe Dútú Ndiöxí, te naníhí tǎhú-ndó te núu na quíndáá iní-ndó-gǎ.

## 21

*Úsá cue téé ní xica cuu ndihi Jèsús ní xiní ñáhá-güedé xii-gá*

<sup>1</sup> Te ingá nduu tucu xíndecu cue téé ní xica cuu ndihi Jèsús yuhu lǎgúná ñuu Tiberiás, te ní sáhá<sup>n</sup>-gá núu xíndecu-güedé-án. Te duha ní cuu ní xiní ñáhá-güedé xii-gá. <sup>2</sup> Te ndècu té Xímú, àdi Pelú chí úú ñiu-dé, ndihi té Mǎxí téé ní xóo cúnaha-güedé Cuáchí, ndihi té Natanàel téé ñuu Cànaá, te ñuu-án yíndèhu-xi distritú Galileá, te tnàhá ndi ndúú déhe té Zebèdeú, ndihi úú-gá tucu cue téé ní xica cuu ndihi-gá. <sup>3</sup> Te ní xáha<sup>n</sup> té Pèlú xii-güedé:

—Quíhí<sup>n</sup>-í quítní<sup>n</sup>-í chácá —cachí-dé xáha<sup>n</sup>-dè xii-güedé.

Te ní xáha<sup>n</sup>-güedé:

—Tnàhá nchúhú canchicú<sup>n</sup> ñáhá-ndí xii-n quíhí<sup>n</sup> tucu —cachí-güedé xáha<sup>n</sup>-güedé xii-dé.

Te ní xica-güedé cuáhá<sup>n</sup>-güedé ní sáá-güedé núu ndécú bàrcú, te ní quée-güedé xití bàrcú-án cuáhá<sup>n</sup>-güedé. Te niú-án ñá ní níhí tnàhí-güedé chácá. <sup>4</sup> Te sa ta cùditó-ñá cuáhá<sup>n</sup> ní xiní-güedé Jèsús yuhu lǎgúná, dico ñá ní cùtnuní iní-güedé sá díú-gá. <sup>5</sup> Te ní xáha<sup>n</sup>-gá xii-güedé:

—Cue téé cuechi, ¿ní níhí-ndó chácá caxi-o ñǎ? —cachí-gá xáha<sup>n</sup>-gá xii-güedé.

Te ní xáha<sup>n</sup>-güedé:

—Vèdana chácá ñá túú ní níhí-ndí —cachí-güedé xáha<sup>n</sup>-güedé xii-gá.

<sup>6</sup> Te ní xáha<sup>n</sup> Jèsús:

—Chí dàquèe ñunu-ndo ndàa xio cuha bàrcú chí níhí-ndó-dí —cachí-gá xáha<sup>n</sup>-gá xii-güedé.

Te duca<sup>n</sup> ní quide-güedé, te òrè natáva-güedé ñunu xití ndute, te ñá cündèe-gá-güedé natava-güedé cuendá sá ní chítú chácá xití-xi. <sup>7</sup> Te téé ní xica cuu ndihi-gá téé ïo cùu iní-gá ní xáha<sup>n</sup>-dè xii té Pèlú:

—ÿDiu Xítòhó Jesucristú! —cachí-dé xáha<sup>n</sup>-dè xii-dé.

Te sá ní tecú dóho té Pèlú sá dúcá<sup>n</sup> càhá<sup>n</sup>-dè núu ní ndíunuu-dé dóó-dé, chí dóó sá yimàa-ni-dé níhí-ndé ní cùu. Duca<sup>n</sup> te ní nuu ndava-dé bàrcú ní ngaunihnu-dé ndute, te cuáhá<sup>n</sup>-dè núu ndute-án ní quene-dé ndéé ñuhu yíchí. <sup>8</sup> Te dava-gá cue téé ndihi té Pèlú ñiu-ni cue téé ní xica cuu ndihi Jèsús ní quendóo-güedé dàtná ñ<sup>n</sup> ciendú-gá mètrú te quene-güedé yuhu ndute. Te tǎñuhu-ni-güedé ñunu-güedé chitu chácá ní quene-güedé ndéé yuhu ndute. <sup>9</sup> Te òrè ní quene-güedé ñuhu yíchí, te ní xiní-güedé càyú ñuhú, te núu ñuhú-án ñuhú ñ<sup>n</sup> chácá ndihi ñ<sup>n</sup> pàá. <sup>10</sup> Te ní xáha<sup>n</sup> Jèsús xii-güedé:

—Quíhí<sup>n</sup> ngehe<sup>n</sup>-ndo ñ<sup>n</sup> úú chácá quiti íchí ní tní<sup>n</sup>-ndo —cachí-gá xáha<sup>n</sup>-gá xii-güedé.

<sup>11</sup> Núu té Pèlú ní sáhá<sup>n</sup>-dè núu ndécú bàrcú, te ní quée-dé xití-xi ní cǎndéé-dé ñunu ñuhu chácá tǎñuhu-dé ní quene ndéé ñuhu yíchí, te chitu chácá nǎhnú, te ñuhu ñ<sup>n</sup> ciendú údico úxí úní-di xití ñunu-án, te cueí duca<sup>n</sup> vai-di ñuhu dico ñá ní ndátá ñunu-án. <sup>12</sup> Te ní xáha<sup>n</sup> Jèsús:

—Chí nèhè cadí iní-ndó —cachí-gá xáha<sup>n</sup>-gá xii-güedé.

Dico ní ñ<sup>n</sup> cue téé ní xica cuu ndihi-gá-án ñá ní xicá<sup>n</sup> tnúhú-güedé núu-gá núu yoo cùu-gá, chí sa ní cutnùní iní-güedé sá díú Jèsús cùu-gá. <sup>13</sup> Te Jèsús ní sáhá<sup>n</sup>-gá ní quehe<sup>n</sup>-gá pàá ní sǎñaha-gá xii-güedé caxi-güedé, te dàtnùní ní quehe<sup>n</sup> tucu-gá chácá ní sǎñaha-gá xii-güedé.

<sup>14</sup> Vitna cùu úní xito sá xiní ñáhá cue téé ní xica cuu ndihi-gá sátá ní ndoto-gá.

*Jèsús càhá<sup>n</sup> ndihi-gá té Pèlú*

<sup>15</sup> Te sátá ní túhú cóhó-güedé ní sadí iní-güedé te ní xicá<sup>n</sup> tnúhú Jèsús núu té Xímú, àdi Pelú chí úú ñiu-dé, te xáha<sup>n</sup>-gá:

—Xímú, déhe té Jónás, ¿cùu iní-gá-n yúhú dàcúúxí dàva-gá cue téé-a ñǎ? —cachí-gá xáha<sup>n</sup>-gá xii-dé.

Te ní xáha<sup>n</sup> té Pèlú:

—Mèstrú, cùu iní ñáhá-í, yòhó sa nàha-n —cachí-dé xáha<sup>n</sup>-dè xii-gá.

Te ní xáha<sup>n</sup> Jèsús:

—Te núu duca<sup>n</sup>, te dàcaxi-n cue mbéé líhli-í —cachí-gá xáha<sup>n</sup>-gá xii-dé.



Te cue mbéé-á<sup>n</sup> cúu-güèdi ñáyiú cùu cuendá-gá.

<sup>16</sup> Te ní xáha<sup>n</sup> tùcu-gá xii té Pèlú:

—Xímú, déhe té Jónás, ¿cùu iní ñáhá-n xii-í-u? —càchí-gá xáha<sup>n</sup>-gá xii-dé.

Te ní xáha<sup>n</sup> tùcu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáha<sup>n</sup>-dè xii-gá.

Te ní xáha<sup>n</sup>-gá:

—Te núu duca<sup>n</sup>, te coto-n cuè mbéè-í —càchí-gá xáha<sup>n</sup>-gá xii-dé.

<sup>17</sup> Te xito cùu uní ní xáha<sup>n</sup> tùcu-gá xii té Pèlú:

—Xímú, déhe té Jónás, ¿cùu iní ñáhá-n-á<sup>n</sup>? —càchí-gá xáha<sup>n</sup>-gá xii-dé.

Te té Pèlú ío ní cundií-dé sá dúcá<sup>n</sup> ní cuu úní xito xicá<sup>n</sup> tnúhú-gá núu-dè núu ndisa sá cúu iní ñáhá-dè xii-gá, te ní xáha<sup>n</sup>-dè:

—Mèstrú, yòhó nchaa sa xini-n, te sa cùtnuní iní-n sá cúu iní ñáhà-í xii-n —càchí-dé xáha<sup>n</sup>-dè xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéè-í.

<sup>18</sup> Te na càchí tnúhu ndáá-í xii-n sá cùtnáhá cuechí-gá-n ní xóo ndécuihnu mee-n dóó-n, te ní xóo quíhí<sup>n</sup>-n ndèni ní xóo cachí iní-n, dico na yè-n te dacáá-n ndàha-n, te ingá tée dacuihnu ñaha xii-n dóó-n te cada yica-dè candeca ñaha-dè xii-n quíhí<sup>n</sup> ì<sup>n</sup> núu ñà túu tnàhá iní-n —càchí-gá xáha<sup>n</sup>-gá xii-dé.

<sup>19</sup> Te sá dúcá<sup>n</sup> ní cáhá<sup>n</sup> Jèsús cúu-xí sá ní dátécú tnúhu ñaha-gá xii té Pèlú nàcuáa cada-xi cúu-dé, te duca<sup>n</sup> càda cahnu-dé Yá Ndióxi, te ní xáha<sup>n</sup>-gá xii-dé:

—¿Canchicú<sup>n</sup> ñáhá-n xii-í! —càchí-gá xáha<sup>n</sup>-gá xii-dé.

### *Tée ío cùu iní-gá*

<sup>20</sup> Te ní nchócótó tè Pèlú ndàa sáta-dè, te ní xini-dé sá nchicú<sup>n</sup> ñáhá ingá tée xica cuu ndihí-gá cuáhá<sup>n</sup>, téé ío cùu iní-gá téé ní xínucóo diñi-gá òré ní cudini ndihí ñaha-gá xii-güedé, te ñu-ni téé-á<sup>n</sup> ní xicá<sup>n</sup> tnúhú-dè núu-gá dàvá-á<sup>n</sup> núu ndéda càa téé cuáha cuendá ñáhá xii-gá núu cuè téé cùu úhú iní ñáhá. <sup>21</sup> Te òré ní xini té Pèlú sá nchicú<sup>n</sup> ñáhá téé-á<sup>n</sup>, te ní xicá<sup>n</sup> tnúhú-dè núu Jèsús, te xáha<sup>n</sup>-dè:

—Mèstrú, te téé-á<sup>n</sup>, ¿ná cúu sá yàha-dé-i? —càchí-dé xáha<sup>n</sup>-dè xii-gá.

<sup>22</sup> Te ní xáha<sup>n</sup> Jèsús:

—Te núu yúhú cuiní-í sá cùndècu-ni-dé ndéé ná quíxi tucu-í ñuyíú-a, ¿te yòhó ná cuendá-n núu xicá<sup>n</sup> tnúhú-n? Yòhó canchicú<sup>n</sup> ñáhá-ní xii-í —càchí-gá xáha<sup>n</sup>-gá xii-dé.

<sup>23</sup> Te ní xinu tnúhu núu nchàa ñáyiú sàndáá iní tnúhu-gá sá téé-á<sup>n</sup> vǎ cùu-dé. Dico Jèsús ñá túu ñuca<sup>n</sup> ní xáha<sup>n</sup>-gá sá vǎ cùu-dé, chí ní xáha<sup>n</sup>-gá: “Núu yúhú cuiní-í sá téé-á<sup>n</sup> cundècu-ni-dé ndéé ná quíxi tucu-í ñuyíú-a,

¿te yòhó ná cuendá-n?”, duha ní xáha<sup>n</sup>-gá xii té Pèlú.

<sup>24</sup> Te ñu-ni yúhú té Juáá téé ní sani iní-yu sá vǎ cùu cáhá<sup>n</sup> ndáá-í nchaa nàcuáa ní cuu, te duca<sup>n</sup> ní tee-í núu tùtú-a, te cùtnuní iní-ndó sá tnúhu ndáá cúu-xí.

<sup>25</sup> Te ndècu vai-gá núu sá ní quide Jèsús. Te núu dicó ní ngúndee nchaaandí túhú ñá, te vǎa ni te nihí ñuyíú te vǎ tnàhá núu-xi cundècu ñbrú, te núu dicó ní ngúndee nchaa. Te duca<sup>n</sup> na cùnduu. Te ío chí cáda ndèe iní-nǎ vitna.

## NCHAA NÀCUÁA NÍ QUIDE CUE TÉE NÍ TÁÚCHÍÚ<sup>n</sup> JÈSÚS DACUÀHA ÑAHA XII ÑÁYIU TNÚHU-GÁ

*Jèsús ní cachí tnúhu ndáa-gá sá quíxi  
Espiritú Yá Ndióxi cundecu ndihi ñáyiu*

<sup>1</sup> Te duha ní cáhá<sup>n</sup> té Lùcá ní xii-dé té Tèofilú: Yúhú sa ní chídó tnúni-í núú librú ndéé díhna nchaa sá ní quide Jèsús, ndihi nchaa sá ní dácuaá-gá ñáyiu. Te ní chídó tnúni-í nchaa sá ní quide-gá ndéé nduu ní quesaha-gá quidé chiu<sup>n</sup>-gá, <sup>2</sup> ndihi nchaa sá ní quide-gá ndéé òré cuándaa-gá andiu. Te sa ta cüyatni nduu ndaa-gá andiu, te ní ndatnúhu-gá ndihi cue téé ní cáhá<sup>n</sup>-gá dacuàha ñaha xii ñáyiu tnúhu-gá, te mee Espiritú Yá Ndióxi ní chindee ñaha-xi xii-gá ní xáha<sup>n</sup>-gá nàcuáa cada-güedé. <sup>3</sup> Te sáta ní xihí-gá te ní ndoto-gá, te ní xindecu-gá údico nduu. Te titní xito ní sáhá<sup>n</sup>-gá núú ní xindecu-güedé, te duca<sup>n</sup> ní quide-gá cuèndá quini-güedé sá ndáá ní ndoto-gá, te ní xáha<sup>n</sup>-gá nàcuáa quide Yá Ndióxi ndihu ndaha-gá ñáyiu.

<sup>4</sup> Te ñ<sup>n</sup> nduu ndècu ndihi ñaha-gá xii-güedé, te ní xáha<sup>n</sup>-gá:

—Vá quée-ní-ndó ñúú Jerusàlén, chi cundetu-ndó quíxi Espiritú Yá Ndióxi cundecu ndihi-ndo, chi sa ní cachí tnúhu-í sá dúcá<sup>n</sup> ní cáhá<sup>n</sup> Tátá-ó Dütú Ndióxi Yaá ndécú andiu nacuaa cunduu. <sup>5</sup> Te ndáá sá ndii Juáá ní dácuaándüte ñaha ndii xii-ndo, dico vitna ñá túú-gá cuéhé nduu, te quexio Espiritú Yá Ndióxi cundecu ndihi-ndo —cachí-gá xáha<sup>n</sup>-gá xii-güedé.

*Jèsús cuándaa-gá andiu*

<sup>6</sup> Te òré ní xindecu-güedé ndihi Jèsús, te ní xáha<sup>n</sup>-güedé xii-gá:

—Mèstrú, cuini-ndí cachí tnúhu-n ñúu sa ta cüyatni nduu chindee-n ñáyiu ñúú Isràél cuèndá taxi tnúni tucú-yu ñúu-yu —cachí-güedé xáha<sup>n</sup>-güedé xii-gá.

<sup>7</sup> Te ní xáha<sup>n</sup> Jèsús xii-güedé:

—Ñá túú xini ñuhu-xi cunaha nchohó xiá<sup>n</sup>, chi Tátá-ó Dütú Ndióxi náhá-gá ná nduu cada-gá nchaa sá ní cáhá<sup>n</sup>-gá. <sup>8</sup> Te òré quexio Espiritú Yá Ndióxi cundecu ndihi-ndo, te cuyii-ndo ní yuhu ní iní-ndó quíhí<sup>n</sup>-ndó cáhá<sup>n</sup>-ndó tnúhu-í núú ñáyiu ñúú Jerusàlén ndihi núú ñáyiu distritú Júdeá ndihi núú ñáyiu distritú Sámariá. Te duca<sup>n</sup>-ní cáhá<sup>n</sup>-ndó quíhí<sup>n</sup>-ndó ní caxico ñuyúú —cachí-gá xáha<sup>n</sup>-gá xii-güedé.

<sup>9</sup> Te sáta dúcá<sup>n</sup> ní cáhá<sup>n</sup>-gá, te ndèhe-güedé ní ndanchita-gá cuándaa-gá andiu

cuándihu-gá xití vícò, te ñá túú-gá ní xini ñáhá-güedé xii-gá. <sup>10</sup> Te ndèhe vihi-güedé andiu núu ndéé quini ñáhá-güedé xii-gá yòtnúhu, te ní quexio cunu úú cue téé nihnu dóó cuixi<sup>n</sup> núú ndécú-güedé. <sup>11</sup> Te xáha<sup>n</sup>-güedé:

—Nchòhò cue téé Galiléa, ¿ná cuèndá ndéhe-ndó andiu? Te dátá-ni càa Jèsús cuándaa-gá andiu vitna, te duca<sup>n</sup>-ní cünduu-gá quíxi tucu-gá —cachí cue téé nihnu dóó cuixi<sup>n</sup>-án xáha<sup>n</sup>-güedé.

*Cuèndá sá ñá túú-gá ndii Júdás ñúu ní nanducu-güedé té Màtiá ní nucnutni-dé núú ndii*

<sup>12</sup> Te ní ndee-güedé yucu Òlívú cuánuhú-güedé ñúú Jerusàlén, te ní xúhu<sup>n</sup>-güedé cuèdicò cuádava òré ichi. <sup>13</sup> Te òré ní ndexio-güedé ñúú-án, te cuándaa-güedé cuártú ndéé núú ñinu, chi vehe yòdo tnahá ndecu-güedé. Te ní naníhí tnáhá-güedé nchaa-güedé té Pèlú, té Jacóbó, té Juáá, té Ndríxi, té Lípé, té Mǎxi, té Bartolòmè, té Mǎteu, té Jacóbó déhe té Àlfeu, ndihi té Xímú téé ní cundihí cue téé cananístá, ndihi té Júdás ñani té Jacóbó. <sup>14</sup> Te ní naníhí tnáhá-güedé nchaa-güedé yacá<sup>n</sup> ndihi tá Màriá náná Jèsús, ndihi cue ñani-gá ndihi dava-gá cue ñáyiu ñii. Te ñ<sup>n</sup>-ní ní cuú-yu ní cáhá<sup>n</sup> ndihí-yu Yá Ndióxi.

<sup>15</sup> Te ñ<sup>n</sup> nduu ní xindecu dátá ñ<sup>n</sup> cièndú ócò mee-ni ñáyiu sàndáá iní tnúhu Jèsús, te ní ngúnutnií té Pèlú núu-yu, te ní xáha<sup>n</sup>-dè xii-yu:

<sup>16-17</sup> —Nchòhò cue ñáyiu ndècu ndihi-í ichi Xitohó Jesucristú, na càni-í cuèndú núú-ndó nàcuáa ní chídó tnúni ndii Dàvií téé ní xindecu ndéé sanaha nàcuáa ní cáhá<sup>n</sup> Espiritú Yá Ndióxi cuèndá té Júdás. Te dacuití dúcá<sup>n</sup> ní cuu, chi tnáhá té Júdás ní xindecu ndihi-o, te ní xinu cuechi-o ndihí-dé núú-gá sá díhna, te duca<sup>n</sup> ní quide-dé ní sáha cuèndá-dé Jèsús núú cuè téé cùu úhú iní ñáhá xii-gá. <sup>18</sup> Te ní cháhu ñaha-güedé xii-dé cuèndá sá ní sáha cuèndá ñáhá-dé xii-gá. Te ní sáhá<sup>n</sup>-dè ñ<sup>n</sup> xichi ní sata caa-dé meé-dé, te ní ngava-dé, te ní cahndí duu<sup>n</sup> xití-dé te xiá<sup>n</sup> ní xihí-dé. Te ní naquehe<sup>n</sup>-güedé díhú<sup>n</sup> sá ní cháhu-güedé ndii, te ní nacuaa<sup>n</sup>-güedé ñuhu núú ní ngava ndii-án. <sup>19</sup> Te nchaa ñáyiu Jerusàlén ní nihí-yu tnúhu, te ní dánáni-yu ñuhu núú Àcèldamá. Te tnúhu meé-yu quèe-xi: Ñuhu núú ní sati ñíí. <sup>20</sup> Te duha ní cáhá<sup>n</sup> ndii Dàvií ní chídó tnúni ndii núú librú Sǎlmú ní dándòò ndii: “Nà ndóo nahi vehe-dé, vá yòò ñ<sup>n</sup> quíhí<sup>n</sup> cundecu”, duha ní cáhá<sup>n</sup> ndii. Te ingá tucu tnúhu ní cachí ndii: “Na nanducu-güedé ingá téé nucnutnií núú ndii”, duha ní cáhá<sup>n</sup> ndii Dàvií —cachí té Pèlú xáha<sup>n</sup>-dè xii-yu.

<sup>21-22</sup> Te ní xáha<sup>n</sup> tucu-dé:

—Te duca<sup>n</sup> nĩ cáhá<sup>n</sup> ndíi Dàvíí, te vitna xini ñuhu-xi nanducu-o ñ<sup>n</sup> téé nucúnutnĩ-dé núú ndíi Júdás, te xini ñuhu-xi diu-ni ñ<sup>n</sup> téé ní xica cuu ndíhi Xitohó Jesucristú cútñáhá ní xica cuu-o ndíhi-gá, ñ<sup>n</sup> téé ní xini ndéé órè ní dácuañdute ñaha ndíi Juáá xii-gá, te ndéé órè cuáñdaa-gá andíu. Te téé nanducu-o cùndecu-dé cáhá<sup>n</sup>-dé nàcuáa ní cuu ní ndoto-gá —càchí té Pelú xáha<sup>n</sup>-dé xii-yu.

<sup>23</sup> Te ní cacunehe-güedé úú tñáhá-güedé nũ ndédacáa-güedé nduu tãhú-güedé nucúnutnĩ-güedé núú ndíi. Te ñ<sup>n</sup>-dé nání-dě Chèè Barsàbás, àdi Justú chi úú diu-dé, te ingá-dé nání-dě Mátíá. <sup>24</sup> Te ní cáhá<sup>n</sup> ndíhi-güedé Yá Ndióxi, te xáha<sup>n</sup>-güedé xii-gá: —Yohó Dútú Ndióxi xini-n iní nchaa ñáyíu, te mee-n ñaha-n núú ndéda càa núú ùú cue téé-a tñáhá iní-n <sup>25</sup> cáhá<sup>n</sup>-güedé tñúhu-n núú ñáyíu, te téé-á<sup>n</sup> nucúnutnĩ-dé núú ndíi Júdás, chí cuáhá<sup>n</sup> ndíi núú ùhú núú ndáhú núú tãú-xi quíhí<sup>n</sup> ndíi —càchí-güedé xáha<sup>n</sup>-güedé xii-gá.

<sup>26</sup> Te ní xito ndéé-güedé, te ní cutnùní sá téé nani Matíá quendóo-dé ndíhi úxí ñ<sup>n</sup> cue téé ní táuchíú<sup>n</sup>-gá dacuàha ñaha xii ñáyíu tñúhu-gá.

## 2

*Ní quexio Espiritú Yá Ndióxi cundecu ndíhi ñáyíu*

<sup>1</sup> Te ní sáá nduu còo vico Pentecostés te xĩndecu nchaa ñáyíu ñ<sup>n</sup>-ní xichi. <sup>2</sup> Te ní tecú dóho-yu uu<sup>n</sup>ni ní ñíhi andíu, dátña quidé ñ<sup>n</sup> táchí ñíhi víhi ní quide-xí, te duca<sup>n</sup> ní cuu ndéé xití vehe núú ndécú-yu nchaa-yu. <sup>3</sup> Te ní xini-yu dátña cáá itá ñuhú cáá sá ndécú xití vehe, te ní xité nuu-xi ní ngoyo ndodo-xi díquí-yu nchaa-yu. <sup>4</sup> Te duca<sup>n</sup> ní quide-xi órè ní quexio Espiritú Yá Ndióxi ní ngũndecu ndíhi-yu nchaa-yu. Te ní ngũíta-yu ní cáhá<sup>n</sup>-yu tñúhu cue ñáyíu ñá túú cùu ñáyíu isràél, te nchaa xíá<sup>n</sup> ní quide Espiritú Yá Ndióxi.

<sup>5</sup> Te vai ñáyíu isràél xĩndecu nchaa dava-gá ñúú ní tacá-yu ñúú Jerusalén, te ñáyíu-á<sup>n</sup> lo ndùcu ndéé-yu dácuañá-yu nchaa ndudú sá dácuañaha tñahí-yu. <sup>6</sup> Te órè ní tecú dóho-yu ñíhi, te ní sáhá<sup>n</sup>-yu ní xĩndedóho-yu tñúhu cáhá<sup>n</sup> meé-yu ñ<sup>n</sup> ñ<sup>n</sup> ñúú-yu, chí ndí díí<sup>n</sup> ndí díí<sup>n</sup> tñúhu cáhá<sup>n</sup> ñáyíu ndècu-á<sup>n</sup>. <sup>7</sup> Te xíá<sup>n</sup> ío ní cuñúhu ñáyíu véxi dava-gá ñúú, te ní xitñáhá-yu:

—Ñáyíu duca<sup>n</sup> xicáhá<sup>n</sup> cúú-yu ñáyíu distritú Galiléá. <sup>8</sup> ¿Te nása ní quidé-yu ní cutúha-yu nàcuáa cáhá<sup>n</sup>-ó ñ<sup>n</sup> ñ<sup>n</sup>-o ndéé líhli-o? <sup>9</sup> Te iha véxi ñáyíu dava nació<sup>n</sup>, chí véxi ñáyíu Partíá, véxi ñáyíu Mediá, véxi ñáyíu Èlám, véxi ñáyíu Mesopotamiá, véxi ñáyíu Júdeá, véxi ñáyíu Capadócia, véxi ñáyíu Pòntó,

véxi ñáyíu Àsiá, <sup>10</sup> véxi ñáyíu Frigíá, véxi ñáyíu Pànfilíá, véxi ñáyíu Ègiptú, véxi ñáyíu Áfricá ñáyíu ndècu ndéé núú-gá-xi ñúú Cirené. Te tñáhá ñáyíu ñúú Rómá véxi, te ñáyíu-á<sup>n</sup> chí ñá díú mèe-ni ñáyíu isràél cùu-yu nchaa-yu, dico ñ<sup>n</sup>-ní cùu sá dácuañá-yu. <sup>11</sup> Te véxi ñáyíu Crétá, véxi ñáyíu Árabíá. Te nchaa-o sa ndédóho-o cáhá<sup>n</sup>-yu nàcuáa cuáhá<sup>n</sup> tñúhu mee-o ñ<sup>n</sup> ñ<sup>n</sup>-o. Te nchaa ñáyíu xicáhá<sup>n</sup> tñúhu-o cáhá<sup>n</sup>-yu cuendá nchaa sá vã yõo tñáhí ndàcu cada ní quide Yá Ndióxi —càchí-yu xitñáhá-yu.

<sup>12</sup> Te ní cuñúhu víhí-yu, te ñá ná sáá iní-yu nása ní cuu, te xitñáhá-yu:

—¿Nása ní cuu duha cáhá<sup>n</sup>-yu tñúhu-o? —càchí-yu xitñáhá-yu.

<sup>13</sup> Te dava-yu ní sácú ndeé yíchí ñáhá-yu, te xitñáhá-yu:

—Xixini ñáyíu-á<sup>n</sup> nũ ñá náhá-yu tñúhu cáhá<sup>n</sup>-yu —càchí-yu xitñáhá-yu.

*Tñúhu ní xáha<sup>n</sup> tẽ Pelú xii cue ñáyíu*

<sup>14</sup> Te ní ngũnutnĩ té Pelú ndíhi úxí ñ<sup>n</sup> cue téé ní táuchíú<sup>n</sup> Jesús dacuàha ñaha xii ñáyíu tñúhu-gá, te ñíhi ní cáhá<sup>n</sup>-dé, te xáha<sup>n</sup>-dẽ xii-yu:

—Nchaa nchòhó ñáyíu distritú Júdeá ndíhi nchòhó ñáyíu ñúú Jerusalén, cundedóho vãha-ndo tñúhu na cáhá<sup>n</sup>-í-a. <sup>15</sup> Ñá ndáá tñúhu cáhá<sup>n</sup>-ndó, chí ñá túú xini-ndí te duca<sup>n</sup> cáhá<sup>n</sup>-ndó, chí davitna cùu-xi caá ñ<sup>n</sup> dátneé, vátá tñáhá-gá órè coho ñáyíu ndidí. <sup>16</sup> Te yúhú ná càchí tñúhu-í xii-ndo vitna nacuáa ní xáha<sup>n</sup> Yá Ndióxi xii ndíi Joél téé ní xóo cáhá<sup>n</sup> tñúhu-gá ndéé sanaha nàcuáa cada ñaha-gá xii ñáyíu, te ndíi-á<sup>n</sup> ní chídó tñúni ndíi nàcuáa ní cáhá<sup>n</sup>-gá. <sup>17</sup> Te duha ní xáha<sup>n</sup>-gá xii ndíi: Cùmání-gá sáá nduu nãa ñuyíú, te cuáñaha-í

Espiritú-í cundecu ndíhi nchaa ñáyíu na quindáá iní ñáhá xii-í.

Te cue déhe-yu cáhá<sup>n</sup>-yu tñúhu-í, te cue téé cuechi dacòto núú ñáhá-xí xii-güedé,

te duca<sup>n</sup>-ní cuè téé ní sãhnu cáhá<sup>n</sup> saní-güedé,

te diu-ni cuendá nchaa sá quidé-í duca<sup>n</sup> dácoto núú ñáhá-xí xii-güedé.

<sup>18</sup> Te nchaa ñáyíu xinu cuechi núú-í cáhá<sup>n</sup>-yu tñúhu-í, te cuáñaha-í Espiritú-í cundecu ndíhi-yu.

<sup>19</sup> Te ndéé andíu, yàcá<sup>n</sup> vai sá cadà-í nàcuáa cuñúhu víhí-yu,

te núú ñuyíú-a cada-í ñ<sup>n</sup> sá vátá quini tñáhí-gá-yu,

te ngoyo ñíhi te ngoyo ñuhú te quene víhi ñúh má.

<sup>20</sup> Te vá dayèhé-gá nchicanchii, cuu nee ñuyíú te cuu ticuèhé núú yõo dátña ticuèhé ñíhí.

Te dàvã-á<sup>n</sup> sáá nduu quixi Yáá cúú Xitohó-yu,

te nduu-ã<sup>n</sup> cuu-xi ì<sup>n</sup> nduu càhmu vihi, chi cada-gá nchaa sá ñà túú xini-yu, te cuñúhu vihi-yu.

<sup>21</sup> Te òrè xíá<sup>n</sup> te nchaa ñáyíu càhá<sup>n</sup> ndíhi ñaha xii Yaá cúú Xitohó-yu-á<sup>n</sup> naníhi tãhú-yu.

Duha ní xáha<sup>n</sup> Yá Ndiòxí xii ndíi Joél ní chídó tñuní ndíi.

<sup>22</sup> Te nchòhó ñáyíu isràél, cundedóho váha-ndo tñuhu na càhá<sup>n</sup>-í-a cuendá Jèsús téé ñuu Nazàrét. Te Jèsús ní quide-gá chiur<sup>n</sup> Yá Ndiòxí, chi mee Yá Ndiòxí ní chindee ñaha-gá ní quide Jèsús ná daha núú chiur<sup>n</sup>, núu xiá<sup>n</sup> ní ndacu-gá ní quide-gá nchaa sá vã yoo tñàhi ndàcu cada, te xiá<sup>n</sup> ní cuñúhu vihi-ndo. Te sa nàha-ndo nacuaá ní quide-gá cútñàhá ní xica cuu-gá ñuyúú. <sup>23</sup> Te ndíi Jùdás ní taxi cuendá ñàhá ndíi Jèsús xii nchòhó cue téé ní cuu úhú iní ñàhá xii-gá, te ní ndúcú-ndó cuè téé úhú iní-xi ní tñú ñaha-güedé xii-gá te ní sata caa ñaha-güedé núú cürúxí, te núú cürúxí-á<sup>n</sup> ní xihí-gá. Dico sa ní cutñuní iní Yá Ndiòxí sá dúcá<sup>n</sup> cada-ndo Jèsús, te mee Yá Ndiòxí ní cachí-gá sá dúcá<sup>n</sup> ndòho Jèsús. <sup>24</sup> Te ñuu-ni mee Yá Ndiòxí ní dándótó-gá Jèsús, chi sa ní càhá<sup>n</sup>-gá sá òrè cuú-gá te vã cuú dúcá<sup>n</sup>-gá. <sup>25</sup> Te ndíi Dàvíí téé ní xindaha ñaha xii cue ñani tñàhá-ó ní xindecu ndéé sanaha ní chídó tñuní ndíi nacuaá ní càhá<sup>n</sup> Jèsús, te duha ní càhá<sup>n</sup>-gá:

Cùtnuní iní-í sá ncháá nduu ndecu ndíhi-í Yá Ndiòxí, te ío chindee ñaha-gá xii-í,

te ñà túú tñàhi sá yuhú-í.

<sup>26</sup> Te ío ndácá<sup>n</sup> tãhù-í núú Yá Ndiòxí chi cùdíí iní-í, chi sa nàha-í sá cúú-í dico ndoto-í,

<sup>27</sup> chi vã dàñá-gá quíhí<sup>n</sup> dúcá<sup>n</sup> àlmá-í núú ndécú ñáyíu ní xihí,

te vã dàñá-gá téhyú yiqui cuñú-í chi cùu-í Déhe-gá, te yuhú sa nàha-í sá cúú iní ñàhá-gá xii-í.

<sup>28</sup> Te sa ní cachí tñuhu-gá nacuaá cada-í cundecu-í ichi váha, te cuendá sá ndécú ndíhi ñaha-gá xii-í núu ío cùdíí iní-í.

Duha ní càhá<sup>n</sup> Jèsús, te duca<sup>n</sup> ní chídó tñuní ndíi Dàvíí.

<sup>29</sup> Te nchòhó cue ñani tñàhá-í, na càchi tñuhu ndáá-í xii-ndo cuendá ndíi Dàvíí téé ní xindecu ndéé sanaha vihi, chi ní xihí-dé, te ní chindúxi ñaha-güedé, te nàha-ó tnavíí núú ní chindúxi ñaha-güedé. <sup>30</sup> Te ndíi Dàvíí ní xoo càhá<sup>n</sup> ndíi tñuhu Yá Ndiòxí, te sa nàha ndíi sá Yá Ndiòxí ní càhá<sup>n</sup> ndáá cuiti-gá sá díú-ní ì<sup>n</sup> tñaha ndíi taxi tñuní-dé ñáyíu isràél ndéé cuèé-gá dàtná ní xoo taxi tñuní méé ndíi cútñàhá ní xindecu ndíi, te téé taxi tñuní-á<sup>n</sup> cúú Cristú chi cùu-gá ì<sup>n</sup> tñaha ndíi.

<sup>31</sup> Te sa ní cutñuní iní ndíi sá ndótó Cristú, núu xiá<sup>n</sup> ní chídó tñuní ndíi sá vã dàñá Yá Ndiòxí sá quíhí<sup>n</sup> dúcá<sup>n</sup> àlmá-gá cundecu-xi

núú ndécú ñáyíu ní xihí, te vã dàñá-gá téhyú yiqui cuñú-gá.

<sup>32</sup> Te ndáá chi Yá Ndiòxí ní dándótó-gá Jèsús, te nchúhú ní xini-ndí sá ní ndoto-gá.

<sup>33</sup> Te ní xáha<sup>n</sup> Yá Ndiòxí xii Jèsús sá cundecu ndíhi ñaha-gá, te taxi tñuní Jèsús ní caa ní quíhí<sup>n</sup>. Te Yá Ndiòxí ní sãñaha-gá Espiritú-gá ní ngündecu ndíhi-gá nacuaá ní xáha<sup>n</sup>-gá, te ñuu Jèsús ní quide-gá nchaa sá ní xini-ndó vitna ndíhi nchaa sá ní xindecóho-ndo. <sup>34</sup> Te ndíi Dàvíí ñà túú ní ndáa túú ndíi andíu ndíhi yiqui cuñú ndíi, te òrè ndécú-gá ndíi ñuyúú-a ní cachí ndíi:

Dúú Ndiòxí ní xáha<sup>n</sup>-gá xii Yaá cúú Xitohó-í: “Ngóo xio cùha-í,

<sup>35</sup> te yuhú cada-í te nchaa sá cúú úhú iní ñàhá xii-n canehe-xi sá yíñuhu núú-n.”

Duha ní xáha<sup>n</sup> Dúú Ndiòxí xii Yaá cúú Xitohó-í cachí ndíi.

<sup>36</sup> Te nchòhó ñáyíu isràél cùu-ndo ndí mee-í, te cuini-í cundedóho váha-ndo ì<sup>n</sup> tñuhu na càhá<sup>n</sup>-í-a. Jèsús ní sata caa-ndo-gá núú cürúxí, dico Yá Ndiòxí ní cachí-gá sá Jèsús dacácu niñu-gá ñáyíu, te vã cání ì<sup>n</sup> caní úú iní-ndó, chi ñuu-gá cùnùu-gá núú nchaa ñáyíu —càchi té Pèlú xáha<sup>n</sup>-dè xii-yu.

<sup>37</sup> Te ñáyíu ní xindecóho tñuhu ní càhá<sup>n</sup> té Pèlú ní ndixi túu iní-yu nacuaá quidè-yu ndécú-yu, te ní xáhá<sup>n</sup>-yu xii-dé ndíhi dava-gá cue téé ní táuchíú<sup>n</sup> Jèsús dacuàha ñaha xii-yu tñuhu-gá:

—Nchaa nchòhó cue ñani tñàhá-ndí, ¿nása cachí-ndó cunduu, nása cada-ndí vitna? —càchi-yu xáhá<sup>n</sup>-yu xii-güedé.

<sup>38</sup> Te ní xáha<sup>n</sup> té Pèlú xii-yu:

—Daña-ndo nchaa sá cuèhé sá dúhá quide-ndo, te cada càhmu iní Yá Ndiòxí nchaa yíca cuèchi-ndo. Te cuandute-ndo cuendá quini-yu sá ní natuha-ndo ichi Jèsús, te duca<sup>n</sup> te taxi Yá Ndiòxí Espiritú-gá cundecu ndíhi-ndo, <sup>39</sup> chi cuini-gá taxi-gá Espiritú-gá xii mee-ndo ndíhi déhe-ndo, te cuãñaha-gá Espiritú-gá xii nchaa ñáyíu ní caa xico ñuyúú, ñáyíu càhá<sup>n</sup>-gá cundecu ichi-gá ndéé idá-gá —càchi té Pèlú xáha<sup>n</sup>-dè xii-yu.

<sup>40</sup> Te titní-gá tñuhu ní xáha<sup>n</sup>-dè nacuaá cada-yu, te xáha<sup>n</sup> tucu-dé:

—Daña-ndo nchaa sá cuèhé sá dúhá quide-ndo, vã cadá-ndó sá quidè dava-gá-yu —càchi-dé xáha<sup>n</sup>-dè.

<sup>41</sup> Te nchaa ñáyíu ní sándáá iní-xi tñuhu ní càhá<sup>n</sup> té Pèlú ní sanduté-yu, te ñuu-ni nduu-ã<sup>n</sup> ní cuu dàtná úní míl ñáyíu ní sándáá iní-xi ní xindecu ndíhi ñáyíu xidácuahá tñuhu Yá Ndiòxí. <sup>42</sup> Te ío ní xindecóho-yu tñuhu ní càhá<sup>n</sup> cue téé ní táuchíú<sup>n</sup> Jèsús dacuàha ñaha xii-yu tñuhu-gá, te ío váha ní xindecú-yu ní xoo ndatñuhu váha-yu. Te ní xoo caxi càhnú-yu cuendá nàhá-yu sá dúcá<sup>n</sup> ní quide

Jësús cútñahá vátá cáhni ñaha-gá-güedé xii-gá, te ní xóo cáhá<sup>n</sup> ndihí-yu Yá Ndióxi.

*Nácuáa ní quide nchaa ñáyiú ní sándáá ínì tñúhu Jësús ndéé díhna nuu*

<sup>43</sup> Te nchaa-yu ní cuñúhu vihi-yu, chi cue téé ní táuchíú<sup>n</sup>-gá dachuáa ñaha xii-yu tñúhu-gá ní quide-güedé titni núú sá vã yõo tñahí ndácu cada, te xiá<sup>n</sup> ní cutnùni iní-yu sá méé Yá Ndióxi chíndéé ñaha-gá xii-güedé. <sup>44</sup> Te nchaa ñáyiú sándáá ínì tñúhu Jësús cáhá<sup>n</sup> ndihí tñaha váha-yu, te cuéi-ni nchaa ndachíu<sup>n</sup> nandíhi-yu ndécu cahnu. <sup>45</sup> Te ní dícõ-yu nchaa ndachíu<sup>n</sup> sá ñà túú xini ñuhú-yu, te ní nihí-yu díhú<sup>n</sup> te ní sáñahá-yu xii nchaa ñáyiú ñá nihí. <sup>46</sup> Te ñ<sup>n</sup> nduu ñ<sup>n</sup> nduu ní xóo quíhi<sup>n</sup> ndihí tñahá-yu veñúhu cáhnu sá ío cùnunu. Te ní nexi ndihí tñahá-yu vehé-yu. Te ío ní cudíú iní-yu chí ñ<sup>n</sup>-ní ní cuú-yu nchaa-yu. <sup>47</sup> Te ío ní ndacá<sup>n</sup> táhú-yu núú Yá Ndióxi, te nchaa dava-gá ñáyiú ní cáhá<sup>n</sup> váha-yu cuená ñáyiú-á<sup>n</sup>. Te mee Yá Ndióxi ní quide-gá ní sándáá ínì vãi-gá ñáyiú, te ní xíndecú-yu ndihí dava-gá ñáyiú xidácuáhá tñúhu-gá.

### 3

*Quide tátña-güedé ñ<sup>n</sup> téé yacua*

<sup>1</sup> Te ñ<sup>n</sup> nduu òré caá únì sacuaa, òré xicáhá<sup>n</sup>-yu ndihí Yá Ndióxi cuáhá<sup>n</sup> té Pèlú ndihí té Juáa veñúhu cáhnu sá ío cùnunu sácúú-xí ñáyiú isráel. <sup>2</sup> Te ndécu ñ<sup>n</sup> téé yacua, te duca<sup>n</sup>-ni càa-dé ní cacu-dé. Te sáhá<sup>n</sup> ndihí ñahá-yu veñúhu cáhnu sá ío cùnunu, te sácóo-dé ñ<sup>n</sup> xio yuyéhe veñúhu sá nání Yèhe Vii Caa, chí duca<sup>n</sup> nani-xi, te xicá<sup>n</sup> ndáhú-dé núú nchaa ñáyiú sáhá<sup>n</sup> veñúhu. <sup>3</sup> Te ní xini-dé té Pèlú ndihí té Juáa cuánguihu-güedé veñúhu, te xicá<sup>n</sup> ndáhú-dé núú-güedé. <sup>4</sup> Te ní ndacoto-güedé núú-dé, te ní xáha<sup>n</sup> té Pèlú xii téé yacua-á<sup>n</sup>:

—Cundehe ñaha xii-ndí —càchí té Pèlú xáha<sup>n</sup>-dè xii-dé.

<sup>5</sup> Te ní xindéhe ñaha-dé xii-güedé, chí ní cáhá<sup>n</sup>-dè sá ío ñ<sup>n</sup> sá cuañaha-güedé. <sup>6</sup> Te ní xáha<sup>n</sup> té Pèlú:

—Ñà túú tñahí díhú<sup>n</sup> néhè-í dico chindee ñaha-í xii-n, te Xitohó Jesucristú Yáa ní xíndecu ñuu Nazàrèt, ndacu-gá cada tátña ñaha-gá xii-n, ndacuíñí te caca-n —càchí-dé xáha<sup>n</sup>-dè.

<sup>7</sup> Te té Pèlú ní tñi-dé ndaha cùha téé yacua-á<sup>n</sup>, te ní nguíta-dé ndácani ñaha-dé, te òré xiá<sup>n</sup> ní nanihí ndéé-dé, te ní ndúha sáhá-dé. <sup>8</sup> Te ní ndacuíñí cunu mee-dé te ní xica-dé, te ní cachí-dé sá ío cáhnu cuu Yá Ndióxi cuená sá ní ndúha-dé, te ta sándava-dé cuánguihu ndihí ñaha-güedé veñúhu. <sup>9</sup> Te nchaa ñáyiú xíndecu-á<sup>n</sup> ní xini-yu sá ní nduu váha-dé, te ndèhé-yu ndacá<sup>n</sup> táhú-dé núú Yá Ndióxi. <sup>10</sup> Te ní

naquini ñahá-yu xii-dé sá díú téé xicá<sup>n</sup> ndáhú téé ní xóo cunucóo yuyéhe veñúhu sá nání Yèhe Vii Caa cuu-dé, te ní cuñúhu vihi-yu sá ní ndúha-dé.

*Té Pèlú ní cáhá<sup>n</sup>-dè corrèdór sá néhé díu ndí Salomón*

<sup>11</sup> Te sáta veñúhu càa corrèdór sá néhé díu ndí Salomón. Yacá<sup>n</sup> ndécú té Pèlú ndihí té Juáa ndihí téé ní ndúha sáhá-xi, te ñà cuini téé ní ndúha sáhá-xi-á<sup>n</sup> dañá-dé quíhi-güedé dandóo ñaha-güedé xii-dé. Te chitú-yu ní quexio coyó-yu núú ndécú-güedé, te ní cuñúhu vihi-yu sá ní ndúha sáhá téé cùhú-á<sup>n</sup>. <sup>12</sup> Te té Pèlú ní xini-dé ní quexio coyó-yu, te ní xáha<sup>n</sup>-dè xii-yu:

—Nchòhò ñáyiú isráel, ¿ná cuená ndéé dúcá<sup>n</sup> ndèhe ñaha-ndo xii-ndí te cuñúhu-ndo sá ní ndúha téé yacua-á<sup>n</sup>? Nchòhò cáhá<sup>n</sup>-ndó sá méé-ndí ní quide tátña-ndí-dé sá ío váha iní-ndí, dico ñahá chí ñà díú mèe-ndí ní quide tátña-ndí-dé. <sup>13</sup> Chí Yá Ndióxi ní ndadúha ñaha-gá xii-dé, chí díu-gá cúú Ndióxi ndíi Abrahám ndihí ndíi Isáac ndihí ndíi Jácób, te díu-ni cue téé-á<sup>n</sup> cúú ñani tñahá-ó ní xíndecu ndéé sanaha vihi. Te díu-ni Ndióxi-á<sup>n</sup> ní xáha<sup>n</sup>-gá xii Déhe-gá Jësús sá táxi tñuni-gá nchaa sá ío andiu ndihí nchaa ñáyiú ndécu ñuyúú-a, dico mee-ndo ní sáha cuená-ndó Jësús núú téé cùchiu<sup>n</sup>. Te té Pilatú ní cuini-dé dacácu-dé Jësús ní cùu, te mee-ndo ñà ní cuini-ndó. <sup>14</sup> Te Yá Ndióxi ní cachí-gá sá ío váha iní Jësús te ñà túú tñahí cuéchi-gá. Te mee-ndo ñà túú ní cuini-ndó cácu-gá núú ní xáha<sup>n</sup>-ndo xii té Pilatú sá váha-gá dacácu-dé ñ<sup>n</sup> téé ndécu vihi cuéchi-xi, te vá dacácu-dé Jësús. <sup>15</sup> Te ní xáha<sup>n</sup>-ndo sá cáhni-güedé Jësús Yáa quide nchìto-o ndecu-o, dico Yá Ndióxi ní dándótó ñaha-gá, te ní xini-ndí sá ndáá ní ndoto-gá. <sup>16</sup> Te nchúhú sa ñaha-ndí sá díú Xitohó Jesucristú ní ndadúha-gá téé yacua, te ñà-dé nùtní-a. Te duca<sup>n</sup> ní quide-gá chí ní sándáá ínì ñahá-dé xii-gá, te vitna ní xini-ndó sá ndáá ní ndúha-dé.

<sup>17</sup> Te nchòhò ndihí cue téé cùnunu ní sahani-ndo Xitohó Jesucristú, chí ñà ní cùtnuni iní-ndó sá ní quide-ndo. <sup>18</sup> Te cue téé ní xóo cáhá<sup>n</sup> tñúhu Yá Ndióxi ndéé sanaha ní chídó tñuni-güedé nàcuáa ní xáha<sup>n</sup> Yá Ndióxi xii-güedé sá Cristú quixi-gá ñuyúú-a, te ndoho vihi-gá, te xiá<sup>n</sup> núú duca<sup>n</sup> ní cuu ío ní ndoho-gá. <sup>19</sup> Te vitna te dañá-ndo nchaa sá cuèhé sá dúhá quide-ndo. Te quindáá iní-ndó Yá Ndióxi, te duca<sup>n</sup> te cada cáhnu iní-gá nchaa sá ñà túú váha ní quide-ndo ñuyúú-a, te canu ichi ñaha-gá xii-ndo ñ<sup>n</sup> ichi váha. <sup>20</sup> Te ní tendaha-gá Cristú ní quixi-gá ñuyúú-a, chí mee Yá Ndióxi ní cachí-gá sá díú Cristú taunihu ñaha-gá xii-ndo. <sup>21</sup> Te

dacutií cùndecu-gá andiu ndéé ná sàa nduu nàtaxi ndecu-gá nchaa sá ndécú ñuyú nàcuáa sàni iní méé-gá. Te ñu duca<sup>n</sup> ní cáhá<sup>n</sup> Yá Ndióxi núu duca<sup>n</sup> ní chídó tñuní cue téé ní xóo cáhá<sup>n</sup> tñúhu-gá ndéé sanaha. <sup>22</sup> Te ndí Moisés ní xáha<sup>n</sup> ndíi xii cue ñani tñáhá-ó ní xíndecu ndéé sanaha: “Yá Ndióxi tendaha-gá ñi<sup>n</sup> téé quixi-dé cáhá<sup>n</sup>-dé tñúhu-gá dàtná cuiní-ndó ní quide ñaha-gá xii yúhú, te téé-á<sup>n</sup> cuu-dé ñi<sup>n</sup> ñani tñáhá-ndó. Te cundadóho váha-ndo ncháa tñúhu cáhá<sup>n</sup>-dé. <sup>23</sup> Te nchaa ñáiyu vá quindáa iní tñúhu cáhá<sup>n</sup>-dé, te cuíta nihnú-yu chi vá quihí<sup>n</sup>-yu núu quihí<sup>n</sup> ñáiyu sándáa iní tñúhu Yá Ndióxi”, duha ní xáha<sup>n</sup> ndíi Moisés xii-yu —cáchi té Pèlú xáha<sup>n</sup>-dé xii-yu.

<sup>24</sup> Te ní xáha<sup>n</sup> tñúcu té Pèlú xii-yu:

—Ndíi Sàmuel ndíi nchaa cue tée nchicú<sup>n</sup>-gá ní xóo cáhá<sup>n</sup> tñúhu Yá Ndióxi ndéé sanaha ní cáhá<sup>n</sup>-güedé nàcuáa cada-xi vitna. <sup>25</sup> Te Yá Ndióxi ní cáhá<sup>n</sup>-gá ndíi cue téé ní cáhá<sup>n</sup> tñúhu-gá ndéé sanaha. Te ní quide ndáá-gá ndíi nchaa ñani tñáhá-ó ní xíndecu ndéé sanaha nàcuáa cada-gá naníhí tñáhú-ó. Te duha ní xáha<sup>n</sup>-gá xii ndíi Abrahám: “Ío nduu cacu ñi<sup>n</sup> tñaha-n, te téé-á<sup>n</sup> cada-dé te naníhí tñáhú ñáiyu ñuyú-a”, duha ní xáha<sup>n</sup>-gá xii ndíi Abrahám. <sup>26</sup> Núu xiá<sup>n</sup> ní tendaha-gá Déhe-gá ní quixi-gá núu ndécú-ndó cuendá dañ-ndo ncháa sá cuéhé sá dúhá quide-ndo, te naníhí tñáhú-ndó —cáchi té Pèlú xáha<sup>n</sup>-dé xii-yu.

## 4

*Té Pèlú ndíi té Juáa ndécú-güedé ndaha téé cùchiu<sup>n</sup>*

<sup>1</sup> Te té Pèlú ndíi té Juáa cáhá<sup>n</sup> dúcá<sup>n</sup>-ni-güedé ndíi ñáiyu, ní quexio cue dútú ndíi téé tñaxi tñuní ñáhá xii cue téé quide cuendá veñúhu càhnu sá ío cùnno, ndíi cue téé cùu saducéú. <sup>2</sup> Te ní cudéé<sup>n</sup>-güedé nchaa-güedé núu té Pèlú ndíi té Juáa sá xáha<sup>n</sup>-güedé xii ñáiyu sá ndótó ñáiyu ní xíhí dàtná ní ndoto Jèsús. <sup>3</sup> Te ní tñii ñaha-güedé ní chíhí ñaha-güedé vecaá xii-güedé, te ñá ní quide ndáa téé cùchiu<sup>n</sup> cuéchi-güedé nduu-á<sup>n</sup> chí sa ní cuaa. <sup>4</sup> Te ío vai ñáiyu ní sándáa iní-yu tñúhu ní cáhá<sup>n</sup>-güedé, te ñáiyu-á<sup>n</sup> ndíi ñáiyu sa ní sándáa iní-xi ndéé cáni-gá ní xínu dàtná úhú<sup>n</sup> míl mee-ni cué téé, te ñi<sup>n</sup> ñáiyu díhí ndíi landú.

<sup>5</sup> Te nduu tñéé-á<sup>n</sup> ñu-ni ñuú Jerusálén-á<sup>n</sup> ní tacá cue téé yíndaha veñúhu, ndíi cue téé cùu sacuéhé núu ñáiyu israhél ndíi cue téé dàcuaha ñaha xii-yu nchaa tñúhu ní chídó tñuní ndíi Moisés. <sup>6</sup> Te tñáhá dútú cùnno-gá téé nàni Anás ndécú ndíi té Caifás, ndíi té Juáa, ndíi té Lijandrú ndíi dava-gá ñani tñáhá dútú cùnno-gá-á<sup>n</sup> ndécú.

<sup>7</sup> Te ní xáha<sup>n</sup>-güedé xii cue téé xínu cuechi núu-güedé:

—Chí cuáhá<sup>n</sup> queñuhu-ndo té Pèlú ndíi té Juáa vecaá, te na quixi-güedé iha —cáchi-güedé xáha<sup>n</sup>-güedé.

Te ní quexio té Pèlú ndíi té Juáa núu cué téé cùnno, te téé cùnno-á<sup>n</sup> ní xicá<sup>n</sup> tñúhú-güedé núu-güedé, te xáha<sup>n</sup>-güedé:

—¿Nása ní quide-ndo cuendá téé yacua-á<sup>n</sup>? ¿Yoo ní táuchíú<sup>n</sup> ñuca<sup>n</sup> cada-ndo? —cachí-güedé xáha<sup>n</sup>-güedé.

<sup>8</sup> Te ndécú ndíi té Pèlú Espiritú Yá Ndióxi, núu xiá<sup>n</sup> ní xáha<sup>n</sup>-dé xii-güedé:

—Nchòhó cue téé cùchiu<sup>n</sup> ndíi nchòhó cue téé cùu sacuéhé núu ñáiyu israhél, <sup>9</sup> te núu cuiní-ndó quini-ndó nása ní quide-ndí ní ndúha téé yacua-á<sup>n</sup>, <sup>10</sup> te cundadóho-ndo ñi<sup>n</sup> tñúhu na cáhá<sup>n</sup>-í-a. Xíni ñuhu-xi cundadóho nchaa ñáiyu israhél cuendá quini-yu nàcuáa ní cuu ní ndúha téé-á<sup>n</sup>. Xítohó Jesucristú Yáa ní xíndecu ñuú Nazaré<sup>n</sup> ní quide tátna-gá sáhá téé yacua ní ndúha, te ñu-ni-gá ní sata caa-ndo núu cùrúxi te núu cùrúxi-á<sup>n</sup> ní xíhí-gá, te ní dándótó ñaha Yá Ndióxi xii-gá. <sup>11</sup> Te núu tütú Yá Ndióxi cáchi-xi: “Cristú cùu-gá dàtná ñi<sup>n</sup> yúu ndécú xiquí ñi<sup>n</sup> vehe. Te yúu cáchi-yu sá ña tütú nándíi, te ñu xiá<sup>n</sup> ní nándíi-xi ní ngúnutñi-xi xiquí véhé”, duha cáchi-xi núu tütú-gá. Te duca<sup>n</sup> sátnahá-xi cùu Jesús, chí cáchi-ndó sá ña tütú nándíi-gá, <sup>12</sup> dico Yá Ndióxi ña tütú ndéé ní tñaxi ndecu-gá ingá téé dàcácu nihnu ñaha xii-o núu ùhú núu ndàhú, chí ñi<sup>n</sup> díi ní Déhe-gá Xítohó Jesucristú dacácu nihnu ñaha-gá xii-o —cáchi té Pèlú xáha<sup>n</sup>-dé xii-güedé.

<sup>13</sup> Te té Pèlú ndíi té Juáa ña tütú tñaha-güedé, te cùñúhu cue téé cùchiu<sup>n</sup> sá ío ñi<sup>n</sup> xíndaa-güedé. Te ní cutnùni iní cue téé cùchiu<sup>n</sup>-á<sup>n</sup> sá Jèsús ní xica cuu ndíi-güedé, núu xiá<sup>n</sup> ña tütú tñahí yùhú-güedé cáhá<sup>n</sup>-güedé. <sup>14</sup> Te cuendá ndécú ndíi té Pèlú ndíi té Juáa téé ní ndúha sáhá-xi, núu xiá<sup>n</sup> ña ní nihí cue téé cùchiu<sup>n</sup> tñúhu cáhá<sup>n</sup>-güedé. <sup>15</sup> Te ní xáha<sup>n</sup>-güedé xii té Pèlú ndíi té Juáa sá queé-güedé quehé cuendá ndóo mee-güedé ndatnùhu-güedé. <sup>16</sup> Te ní xitñaha-güedé:

—¿Nása cada-o ùu cue téé-á<sup>n</sup>?, chí nchaa ñáiyu ñuú Jerusálén nàhà-yu sá ní quide tátna-güedé ñi<sup>n</sup> téé yacua, te xiá<sup>n</sup> xicuñúhu vilí ñáiyu. Te vá cúu cáchi-ó sá ña ndáa, chí vai ñáiyu ní xini nàcuáa ní cuu. <sup>17</sup> Te dayùhú-ó-güedé te cùñaha-ó sá vá cáhá<sup>n</sup>-gá-güedé tñúhu Jèsús, chí núu ñáhá te quindáa-gá iní-yu —cáchi-güedé xitñaha-güedé.

<sup>18</sup> Te ní cana tucu-güedé té Pèlú ndíi té Juáa, te xáha<sup>n</sup>-güedé sá vá dàcuaha-gá-güedé

ñáiyu tnúhu Jësús. <sup>19</sup> Te té Pèlú ndihi té Juáá ní xáha<sup>n</sup>-güedë:

—Chí cuáha cuendá, te núu sá cächí nchòhó cada-ndí àdi sá cáhá<sup>n</sup> Yá Ndióxi cada-ndí. Te cada càhu iní-ndó chi vá cúú càda-ndí sá cächí-ndó, chí cada nahi-ni-ndí sá cächí Yá Ndióxi. <sup>20</sup> Chi dacuítí cáhá<sup>n</sup>-ndí nàcuáa ní cáhá<sup>n</sup> Jësús, te cáhá<sup>n</sup>-ndí nchaa sá ní xiní-ndí ní quide-gá —cächí-güedé xáha<sup>n</sup>-güedë.

<sup>21</sup> Te cue tée cùchiu<sup>n</sup> níhi-gá ní cáhá<sup>n</sup>-güedé xáha<sup>n</sup>-güedé sá cáda càstiú ñáhá-güedé núu vá dañá-güedé sá dacuàha-güedé ñáiyu. Te duca<sup>n</sup> te ní dañá ñaha-güedé cuánuhú-güedé, chí ñá ní níhi-güedé nása cada-güedé cada castiú ñáhá-güedé, chí nchaa<sup>n</sup>-yu ndacá<sup>n</sup> táhú-yu núu Yá Ndióxi sá ní ndúha tée yacua. <sup>22</sup> Te tée ní quide tátna-güedé-á<sup>n</sup> ndécú-dë vihi-gá údico cuiá-dë, te ío ní cuñúhu-yu sá ní ndúha-dë.

*Ñáiyu sándáa iní tnúhu Jësús xicá<sup>n</sup> táhú-yu núu-gá sá vá yühú-yu cáhá<sup>n</sup>-yu tnúhu-gá*

<sup>23</sup> Te ní ndee té Pèlú ndihi té Juáá cuánuhú-güedé núu ndécú cue tée cündihí-güedé, te ní nacani tnúhu-güedé nàcuáa ní xáha<sup>n</sup> cue dútú cúnúu ndihi cue tée cùu sacuéhé núu ñáiyu isràél. <sup>24</sup> Te sáta ní xíndedóho-yu tnúhu ní cáhá<sup>n</sup>-güedé, te ñ<sup>n</sup>-ní tnúhu ní cáhá<sup>n</sup>-yu nchaa<sup>n</sup>-yu ndihi Yá Ndióxi, te ní xáhá<sup>n</sup>-yu xii-gá:

—Yohó Dútú Ndióxi, ní cadúha-n àndiu, ní cadúha-n ñuyúú, ní cadúha-n lámár, ní cadúha-n ncháandi túhú sá ío ñuyúú. <sup>25</sup> Te ndí Dàvíí ní sándáa iní ndí tnúhu ní cáhá<sup>n</sup>-n, te ní chídó tnúni ndí nàcuáa ní xáha<sup>n</sup>-n cáhá<sup>n</sup> ndí, te ñ<sup>n</sup>-ni Espiritú-n ní chindee ñaha-xi xii ndí ní chídó tnúni ndí, te duha ní chídó tnúni ndí:

Ñáiyu ñá túú cùu ñáiyu isràél ío cüdé<sup>n</sup>-yu núu Yá Ndióxi,

te cuini-yu nàa-yu ndihi-gá, dico vá ndacú-yu chí mee-gá cúnúu-gá.

<sup>26</sup> Te cue tée yíndaha nació<sup>n</sup> ndihi cue tée cùchiu<sup>n</sup> tacá-güedé nàa-güedé ndihi Dútú Ndióxi ndihi Cristú Yaá ní quixi ñuyúú-a.

Duha ní chídó tnúni ndí Dàvíí nàcuáa ndúu tnúhu ní cáhá<sup>n</sup>-n —cächí-yu xáhá<sup>n</sup>-yu xii Yá Ndióxi.

<sup>27</sup> Te xáha<sup>n</sup> tucú-yu xii-gá:

—Ndáa ní cáhá<sup>n</sup> ndí Dàvíí chí ñ<sup>n</sup>-ni ñúú íha ní tacá té Hèrodés ndihi té Pònciú Pilatú ndihi ñáiyu ñá túú cùu ñáiyu isràél ndihi ñáiyu isràél ní cáhá<sup>n</sup> cuéhé-yu cuendá Jësús. Te Yohó Dútú Ndióxi, Déhe-n cùu Jësús núu ío váha iní-gá, te ní sáha chiú<sup>n</sup>-n-gá, te ío úhú ní cuu iní ñáhá ñáiyu xii-gá. <sup>28</sup> Te ní quidé-yu nàcuáa ní sani iní-n cáda-yu ndéé sanaha, ndéé cúnáhá ní ngáva ñuyúú. <sup>29</sup> Te Yohó Dútú Ndióxi sa ñaha-n nása cáhá<sup>n</sup> cue tée cuini cada úhú ñáhá xii-ndí. Te quide-ndí chiú<sup>n</sup> tahu-n, te vitna chindee ñaha-n xii-ndí

cuendá sá vá yühú-ndí cáhá<sup>n</sup>-ndí tnúhu-n. <sup>30</sup> Te cada tátna-n ñáiyu cùhú, te chindee ñaha-n xii-ndí, te cada-ndí nchaa sá vá yóo tnáhí ndàcu cada nacuáa cuñúhu vihi-yu. Te xiní-ndí sá meé Jësús chindee ñaha-gá xii-ndí, chí quide-gá chiú<sup>n</sup> tahu-n —cächí-yu xáhá<sup>n</sup>-yu xii Yá Ndióxi.

<sup>31</sup> Te sáta ní yáha ní cáhá<sup>n</sup>-yu ndihi Yá Ndióxi, te ní quidi-xi vehe núu xíndecú-yu, te òré-á<sup>n</sup> ní cutáhú tucú-yu nchaa<sup>n</sup>-yu Espiritú-gá. Te ní cáhá<sup>n</sup>-yu tnúhu Yá Ndióxi, te ñá túú tnáhí ní yühú-yu.

*Cuendá nchaa ndachiu<sup>n</sup> cánehe chiú<sup>n</sup>-yu*

<sup>32</sup> Te nchaa ñáiyu ní sándáa iní tnúhu Yá Ndióxi ñ<sup>n</sup>-ní tnúhu ní cáhá<sup>n</sup>-yu nchaa<sup>n</sup>-yu. ñ<sup>n</sup>-ní tnúhu ní sani iní-yu, te ní xóo chindee tnáhá-yu chí ní xóo cuáha táhú tnáhá-yu nchaa sá xiní ñühú-yu, te ní ñ<sup>n</sup>-yu ñá túú ní cáhá<sup>n</sup>-yu sá ndachiú<sup>n</sup>-yu ñ<sup>n</sup>-di-ní-yu cùu nchaa sá ndécú ndíhí-yu. <sup>33</sup> Te cue tée ní táuchíú<sup>n</sup> Jësús dacuàha ñaha xii-yu tnúhu-gá ío váha ní cáhá<sup>n</sup>-güedé nàcuáa ní cuu ní ndoho Xítóhó Jesucristú. Te ío ní chindee ñaha Yá Ndióxi ní cáhá<sup>n</sup>-yu tnúhu-gá, te ñá túú ní cáhá<sup>n</sup> cuéhé daga-gá-yu cuendá ñáiyu dacuaha tnúhu-gá. <sup>34</sup> Te ñá túú tnáhí ní cündahú-yu díhú<sup>n</sup>, chí nchaa ñáiyu ndécú ndihi ñuhu-xi, ndihi nchaa ñáiyu cãa vehe-xi ní nadicó-yu, te da ñ<sup>n</sup> da ñ<sup>n</sup> ndachiu<sup>n</sup>-yu ní nadicó-yu òré xiní ñühú-yu díhú<sup>n</sup>. <sup>35</sup> Te ní sáñhá<sup>n</sup>-yu xii cue tée ní táuchíú<sup>n</sup> Jësús dacuàha ñaha xii-yu tnúhu-gá, te cue tée-á<sup>n</sup> ní dácáhñu-güedé nchaa ñáiyu xiní ñuhu.

<sup>36</sup> Te dístrítú Chìpré ndécú ñ<sup>n</sup> tée nani-dé Chèé ñani tnáhá ndí Lèví, te ní xóo cunu cuechi-dë veñúhu ñáiyu isràél. Te cuendá sá sáñaha-dë tnúhu ndee iní xii-yu, xíá<sup>n</sup> núu ní dánani ñaha-güedé Vèé xii-dë. <sup>37</sup> Te tée-á<sup>n</sup> ní nadico-dë luha ñuhu-dë, te nèhe-dé díhú<sup>n</sup> cuáhá<sup>n</sup> núu cue tée ní táuchíú<sup>n</sup>-gá dacuàha ñaha xii-yu tnúhu-gá.

## 5

*Té Ananiás ndihi tá Sáfíra ñá túú ní quide ndáa-yu*

<sup>1</sup> Te ndécú ñ<sup>n</sup> tée nani Ananiás, te ñadihí-dé nani-á<sup>n</sup> Sáfíra, te ñáiyu-á<sup>n</sup> ní nadicó-yu luha ñuhú-yu. <sup>2</sup> Te ní taxúha-dé sacú díhú<sup>n</sup>, te sacú-gá nehé-dë cuáhá<sup>n</sup> ní sáñaha-dë xii cue tée ní táuchíú<sup>n</sup> Jësús dacuàha ñaha xii ñáiyu tnúhu-gá, te ní dándahú ñáhá-dë xii-güedé, chí ní xáha<sup>n</sup>-dë sá ñihí ní sáñaha-dë, te ñaha ñadihí-dé sá dúcá<sup>n</sup> ní quide-dé. <sup>3</sup> Te ní xáha<sup>n</sup> té Pèlú xii-dë:

—Ananiás, ¿ná cuendá duca<sup>n</sup> ní quide-n ní dañá-n ní quíhu sácúhna iní-n? Te ní dacuándèhnde-n núu Espiritú Yá Ndióxi, te ní taxúha-n sácú díhú<sup>n</sup> ní níhi-n cuendá ñuhu-n. <sup>4</sup> ¿Te ñuhu-á<sup>n</sup> cuendá sá ñühú mèe-n, àdi díhú<sup>n</sup>-á<sup>n</sup> cuendá sá díhú<sup>n</sup> meé-n cùu-xi, te

cuu-ni cada-n nàcuáa càchí iní-n càha<sup>n</sup>-n ñá? ¿Ná cuèndá duca<sup>n</sup> ní quide-n? ¿Ná ní quide-xi iní-n núu ní dácuaándèhnde-n núú Yá Ndióxi? Chì ñá díú-ní mèe-ni ñáyíu ní dàndahú-n —càchí té Pèlú xáha<sup>n</sup>-dè xii-dé.

<sup>5</sup> Te òré ní ndihi tnúhu ní xáha<sup>n</sup> tē Pèlú, te uu<sup>n</sup> ní nduá-dé te ní xihí-n-dé. Te nchaa ñáyíu ní níhí tnúhu sá ní xihí-dé, te ní yuhú víhí-yu. <sup>6</sup> Te ní quixi ñá úú cue tée cuechi, te ní ndanehe ñaha-güedé ní sacá<sup>n</sup> ñahá-güedé núu yuu, te ní ducu<sup>n</sup> nuu ñaha-güedé yuu-án, te ní xido ñaha-güedé néhé ñaha-güedé cuáhá<sup>n</sup> chindúxi ñaha-güedé xii-dé.

<sup>7</sup> Te ní cuu úú uní òré, te ní quexío ñadihí tée ní xihí-án, te vátá quini-gá-a<sup>n</sup> sá ní xihí yíi-a<sup>n</sup>. <sup>8</sup> Te ní xáha<sup>n</sup> tē Pèlú xii-a<sup>n</sup>:

—Cuini-í cachí tnúhu ndáá-n. ¿Ndédau ní díco-ndó ñúhu, ní díco-ndó nàcuáa ní cachí yíi-án? —càchí té Pèlú xáha<sup>n</sup>-dè xii-a<sup>n</sup>.

Te ní xáha<sup>n</sup>-a<sup>n</sup>:

—Ndáá sá díú-ní dùca<sup>n</sup> —cachí-a<sup>n</sup> xáha<sup>n</sup>-a<sup>n</sup>.

<sup>9</sup> Te ní xáha<sup>n</sup> tē Pèlú:

—¿Ná cuèndá duca<sup>n</sup> ní chitnàha tnúhu-ndo dùca<sup>n</sup> ní quide-ndo ní cuini-ndó dàndahú-ndó Espiritú Yá Ndióxi? Quini-n, chí sa cuándixi cue tée ní sáhá<sup>n</sup> ní chindúxi yíi-n, te yòho tnàhá-n càndeca ñaha tucu-güedé xii-n quihí<sup>n</sup> vitna —càchí-dé xáha<sup>n</sup>-dè xii-a<sup>n</sup>.

<sup>10</sup> Te òré-án ní nduá-a<sup>n</sup> núú tē Pèlú, te ní xihí-ni-a<sup>n</sup>. Te cuándihu cue tée cuechi-án xití vehe, te ní xini-güedé sá sá ní xihí-a<sup>n</sup>, núu ní xido ñaha tucu-güedé cuáhá<sup>n</sup> chindúxi-güedé-a<sup>n</sup> diñi yíi-a<sup>n</sup>. <sup>11</sup> Te ní yuhú víhí ñáyíu ní sándáá iní tnúhu Yá Ndióxi, ndihi dava-gá ñáyíu ní níhí tnúhu nàcuáa ní cuu.

*Ní quide-güedé titní núú sá vā yōo tnàhí ndàcu cada te io ní cuñúhu ñáyíu*

<sup>12</sup> Te cue tée ní táuchíu<sup>n</sup> Jesús dacuàha ñaha xii-yu tnúhu-gá titní víhí sá vā yōo tnàhí ndàcu cada ní quide-güedé, te ní cuñúhu víhí-yu. Te nchaa ñáyíu ní sándáá iní-xi tnúhu Jesús ní xóo tacá-yu corredór néhé díu ndii Salómón. <sup>13</sup> Te nchaa ñáyíu ñá túú dàcuaha tnúhu-gá ñá ní cùyíi-yu chitnàhá-yu ñáyíu ní sándáá iní-xi tnúhu-gá, dico nchaá-yu ní cáhá<sup>n</sup> váha-yu cuèndá ñáyíu ní sándáá iní-xi tnúhu-gá. <sup>14</sup> Te vai tée, vai ñadihí ní sándáá iní-yu tnúhu-gá. <sup>15</sup> Te cuèndá sá ní níhí-yu tnúhu sá quidé tátua cue tée ní xica cuu ndihi Jesús, núu xíá<sup>n</sup> ní queñuhú-yu nchaa ñáyíu cùhú ichi, te davá-yu ní quide túha-yu càmá te davá-yu ní quide túha-yu yuu, núu núú nchàa xíá<sup>n</sup> tá sácá<sup>n</sup>-yu cue ñáyíu cùhú-án cuáhá<sup>n</sup>, te xíá<sup>n</sup> cáá-yu ndètú-yu, chí ní sani iní-yu sá òré yáha té Pèlú te cuèdicó cuándahú-dé yáha ndodo ñaha-xi xii-yu te ndúha-yu. <sup>16</sup> Te ní quixi ñáyíu ñúu yatni Jerusalén ndécá-yu

ñáyíu cùhú, ndihi ñáyíu yíhí ñaha espíritú cùndihí yucu ñávaha ní quixi, te nchaá-yu ní ndúha.

*Ío ní quide úhú-güedé té Pèlú ndihi té Juáa*

<sup>17-18</sup> Te dútú cùnúu-gá ndihi cue tée cùu sàducéú cue tée cùndihí-dé ní cudéé<sup>n</sup>-güedé sá ío chítú-yu dàcuaha tnúhu Jesús, núu xíá<sup>n</sup> ní tnii-güedé cue tée ní táuchíu<sup>n</sup> Jesús dacuàha ñaha xii-yu tnúhu-gá ní chihí ñaha-güedé vècaá. <sup>19</sup> Te xití niú-án ní quexío ñá espíritú xínú cuèchi núu Yá Ndióxi ní nacaá<sup>n</sup>-xi yèhe vècaá ní quee-güedé, te ní xáha<sup>n</sup>-xi xii-güedé:

<sup>20</sup> —Quihí<sup>n</sup>-ndó veñúhu càhnu sá ío cùnúu te cùñaha-ndo xii ñáyíu nàcuáa cadá-yu naníhí tàhú-yu —càchí espíritú-án xáha<sup>n</sup>-xi xii-güedé.

<sup>21</sup> Te sá dúcá<sup>n</sup> ní xáha<sup>n</sup>-xi núu sátá ní túndaá, te ní sáhá<sup>n</sup>-güedé veñúhu càhnu sá ío cùnúu sá cùú-xí ñáyíu isráel ní dácuaáhá ñaha-güedé xii-yu.

Te dútú cùnúu-gá ndihi cue tée cùndihí-dé ní nadatàcá tnàhá-güedé ndihi nchaa cue tée cùu sacuéhé núu ñáyíu isráel ndihi cue tée cùchíu<sup>n</sup>, te ní tendaha-güedé sandádú cuáhá<sup>n</sup> queñuhú-güedé cue tée yíhí vècaá ní cùu. <sup>22</sup> Te ní quexío-güedé yèhe vècaá, te ní xini-güedé sá ní ñá-gá cue tée dàcuaha ñaha xii ñáyíu tnúhu Jesús ñá túú-gá-güedé yíhí. Te cuánuhú-güedé <sup>23</sup> ní xitnúhu-güedé cue tée cùchíu<sup>n</sup>, te xáha<sup>n</sup>-güedé:

—Ní sáhá<sup>n</sup>-ndí ní sándéhé-ndí vècaá, te ndéé chóo-ni, te xíndecu-ni sandádú cue tée xíndeé yèhe vècaá. Te ní nacaá<sup>n</sup>-ndí vècaá, te vā yōo ñá-gá yíhí —càchí-güedé xáha<sup>n</sup>-güedé.

<sup>24</sup> Te sá dúcá<sup>n</sup> ní xáha<sup>n</sup>-güedé, te cuáhá<sup>n</sup> iní cue dútú cùnúu ndihi tée tàxi tnuní cue tée xíndeé veñúhu càhnu sá ío cùnúu, te ní xitnàha-güedé:

—¿Nása cada-xi vitna duha càa ní cuu ní xinu cue tée yíhí vècaá-i? —càchí-güedé xitnàha-güedé.

<sup>25</sup> Te ní quexío ñá tée ní xáha<sup>n</sup>-dè:

—Cundedóho-ndo na càchí tnúhu-i ñá tnúhu. Cue tée ní chihí-ndo vècaá ndécú-güedé veñúhu càhnu sá ío cùnúu dacuaha-güedé ñáyíu —càchí-dé xáha<sup>n</sup>-dè.

<sup>26</sup> Te cue tée ndéé veñúhu ndihi tée tàxi tnuní ñahá xii-güedé cuánguaca ñaha-güedé, te ñá túú ní quide úhú ñahá-güedé, chí ní yuhú-güedé cuàha yúú ñahá ñáyíu dii ñúu-xi-án. <sup>27</sup> Te ní ndexio ndihi ñaha-güedé núu cuè tée cùu sacuéhé ndihi núu cuè tée cùchíu<sup>n</sup>. Te dútú cùnúu-gá ní ngüita-dé ténáá ñahá-dè xii-güedé, te xáha<sup>n</sup>-dè:

<sup>28</sup> —Te náa ñá díú ní cachí-ndí sá vā dácuaáhá-gá-ndó ñáyíu tnúhu Jesús te dàcuaha-ni-ndó-yu, te vitna nchaa ñáyíu ñúu Jerusalén ní níhí-yu tnúhu nàcuáa càhá<sup>n</sup>-ndó. ¿Te ná cuèndá duca<sup>n</sup> quide-ndo, te cachí-ndó sá nchúhú ndécuéchi-ndí ní



sahni-ndí Jèsús-i? —càchí dútú cúnùu-gá xáha<sup>n</sup>-dè xii-güedé.

<sup>29</sup> Te té Pèlú ndihi dava-gá cue téé ní táuchíú<sup>n</sup> Jèsús dacuàha ñaha xii-yu ní xáha<sup>n</sup>-güedé xii cue téé cùchiu<sup>n</sup>:

—Nchúhú, Yá Ndióxi cúnùu-gá sàndáá iní-ndí tnúhu càhá<sup>n</sup>-gá dàcúúxí tnúhu càhá<sup>n</sup> ñáiyu. <sup>30</sup> Te nchòhó ní sata caa-ndo Jèsús núú cùrúxí te núú cùrúxí-á<sup>n</sup> ní xíhí-gá, dico ní dándótó ñaha Yá Ndióxi xii-gá. Te Yá Ndióxi ní sàndáá iní cue ñani tnáhá-ndí ní xíndecu ndéé sanaha. <sup>31</sup> Te Yá Ndióxi ní xáha<sup>n</sup>-gá sá cùndècu Jèsús xio cùha-gá cuèndá taxi tnúni-gá te dacácu nihnu-gá ñáiyu isràél núú ùhú núú ndàhú. Te duca<sup>n</sup>-ni dacácu nihnu-gá nchaa ñáiyu na ñàña nchaa sá cuèhé sá dúhá, te cada càhnu iní-gá nchaa yícá cuèchi-yu. <sup>32</sup> Te ní xini-ndí nàcuáa ní quide-gá, núú xiá<sup>n</sup> cání-ndí cuèndú núú ncháa ñáiyu, te Espíritú Yá Ndióxi chíndèe ñaha-xi xii-ndí càhá<sup>n</sup>-ndí tnúhu-gá. Te ñiu-ni Espíritú-gá ní sàñaha-gá xii nchaa ñáiyu ní sàndáá iní-xi tnúhu-gá —càchí té Pèlú ndihi dava-gá-güedé xáha<sup>n</sup>-güedé xii cue téé cùchiu<sup>n</sup>.

<sup>33</sup> Te sátá dúcá<sup>n</sup> ní xáha<sup>n</sup>-güedé xii cue téé cùchiu<sup>n</sup>, te ní cudéé<sup>n</sup>-güedé, te ní ndatnúhu-güedé sá cáhni ñaha-güedé. <sup>34</sup> Te ñ<sup>n</sup> téé cùu fariséu tnàha-dé cùú-dé chiú<sup>n</sup>, te nàni-dé Gamaliél, te cùu-dé mèstrú dácuaàha-dé ñáiyu nàcuáa ní chídó tnúni ndí Moisés, te ío yíñùhu càhá<sup>n</sup> ndihi ñàhá-yu xii-dé. Te ní ngúnutñí-dé, te ní xáha<sup>n</sup>-dè sá ná quèe tnaa té Pèlú ndihi dava-gá-güedé quèhé. <sup>35</sup> Te ní xáha<sup>n</sup>-dè xii cue téé cùchiu<sup>n</sup>:

—Nchòhó cue téé isràél, xini ñuhu-xi sá cání vaha iní-ndó ñasa cada-ndo ndihi cue téé-á<sup>n</sup>. <sup>36</sup> Chi ní canaha ní xíndecu ñ<sup>n</sup> téé ní xínani Tèudás, te ní cachí-dé sá cúnùu-dé, te ní cundihi-dé dàtná cùmí cièndú cue téé, te ñá ní cuèni-güedé cuu ñ<sup>n</sup>-nuu-güedé ndihi cue téé cùchiu<sup>n</sup>. Te ní sañni ñaha cuè téé cùchiu<sup>n</sup>-á<sup>n</sup> xii téé Tèudás, te ní ndihi cue téé ní xica cuu ndihi-dé ní xité nuu-güedé, te ñá túú-gá ní quide-güedé nàcuáa ní sani iní-güedé cada-güedé. <sup>37</sup> Te sátá ní xíhí téé-á<sup>n</sup>, te ní tnahá nduu nùcódó tnúni ñáiyu. Te dàvá-á<sup>n</sup> ní xíndecu ñ<sup>n</sup> téé distritú Galiléa ní xínani-dé Júdás. Te titní-güedé ní chitnahá ñàhá-güedé xii-dé. Te tnàhá-dé ní sañni ñaha tucu cue téé cùchiu<sup>n</sup>, te nchaa cue téé ní xica cuu ndihi-dé ní xité nuu-güedé. <sup>38</sup> Te na càchí tnúhu-í sá dáñá-ndó cuè téé-á<sup>n</sup>, te ní ñá túú ngáá tnúhu cùñaha-ndo xii-güedé, chí núu chiú<sup>n</sup> mee-güedé quidé-güedé te cuíta-güedé, <sup>39</sup> dico núu chiú<sup>n</sup> Yá Ndióxi quidé-güedé, te vá ndáñihnu chiú<sup>n</sup> quide-güedé. Te núu quide-güedé chiú<sup>n</sup> Yá Ndióxi, te vá nàá-ndó ndihi-güedé, chí Yá Ndióxi nàá ndihi-ndo

sá dúcá<sup>n</sup> xíquide-ndo —càchí té Gamaliél xáha<sup>n</sup>-dè xii cue téé cùchiu<sup>n</sup>.

<sup>40</sup> Te nchaa-güedé ní càhá<sup>n</sup> sá tnúhu ndáá càhá<sup>n</sup>-dè. Te dàtnúni ní nacana tucu-güedé té Pèlú ndihi dava-gá-güedé te ní caniha-güedé, te ní càhá<sup>n</sup> níhi-güedé, te xáha<sup>n</sup>-güedé sá vā càhá<sup>n</sup>-gá-güedé tnúhu Jèsús, te dàtnúni ní dáñá ñaha-güedé cuánuhú-güedé. <sup>41</sup> Te ío ní cudí iní-güedé, chí mee Yá Ndióxi ní cachí-gá sá dúcá<sup>n</sup> ndòho-güedé dacuàha-güedé ñáiyu tnúhu Jèsús. <sup>42</sup> Te ñ<sup>n</sup> nduu ñ<sup>n</sup> nduu ní dácuaàha-güedé ñáiyu xití veñùhu càhnu sá ío cúnnu ndihi nchaa vehé-yu. Te ní xáha<sup>n</sup>-güedé xii-yu sá Jèsús cùú-gá Cristú Yaa ní quixi ñuyúú-a.

## 6

*Ní ndúcú-güedé úsá cue téé cundecu dacáhñu sá cáxi ñáiyu*

<sup>1</sup> Te ñiu-ni dàvá-á<sup>n</sup> ní sàndáá iní vai ñáiyu tnúhu Jèsús. Te cue ñáiyu griégú ní càhá<sup>n</sup> cuèhé-yu cuèndá ñáiyu isràél, sá ñáiyu ñáiyu quèé ñáiyu càhá<sup>n</sup> tnúhu griégú ñá túú tnàhá sá cáxi-yu, chí ñá túú sàñaha ñ<sup>n</sup>-nuu-güedé. <sup>2</sup> Te cue téé úxúú ní táuchíú<sup>n</sup> Jèsús dacuàha ñaha xii-yu tnúhu-gá, cue téé-á<sup>n</sup> ní cana-güedé nchaa ñáiyu sàndáá iní tnúhu Jèsús. Te ní xáha<sup>n</sup>-güedé xii-yu:

—Nchúhú chí vá cùú dácáhñu-ndí sá cáxi-yu, chí mee-ni tnúhu Yá Ndióxi càhá<sup>n</sup>-ndí. <sup>3</sup> Te nchòhó cue téé ndècu ndihi-ndí ichi Xitohó Jesucristú càhá<sup>n</sup> ndihi-ndo úsá cue téé xíndecu íha, cue téé càhá<sup>n</sup> ndihi ñàhá-yu mee-ni tnúhu yíñùhu, cue téé ndècu ndihi Espíritú Yá Ndióxi, mee-ni cuè téé cùtnuní vaha iní-xi. Te cue téé-á<sup>n</sup> cuàha-ndí-güedé chiú<sup>n</sup> cada-güedé dacáhñu-güedé sá cáxi-yu. <sup>4</sup> Te nchúhú mee-ni Yá Ndióxi càhá<sup>n</sup> ndihi-ndí, te mee-ni tnúhu-gá dacuàha-ndí-yu —càchí-güedé xáha<sup>n</sup>-güedé xii-yu.

<sup>5</sup> Te nchaa-yu ní tná-yu tnúhu ní càhá<sup>n</sup>-güedé, núú ní ndúcú-yu cue téé cada chiú<sup>n</sup>-á<sup>n</sup>. Te ñ<sup>n</sup>-dè nání-dé Tévá, te ío vaha sàndáá iní-dé Yá Ndióxi, te ndècu ndihi-dé Espíritú-gá. Te duha ní xínani dàva-gá-güedé: té Lipé, té Pròcoró, té Nicànor, té Tímón, té Pàrmenás, té Laxí téé ñuú Antiòquia téé ní sàndáá iní-xi sá dácuaàha ñáiyu isràél te vitna ní sàndáá iní-dé tnúhu Jèsús. <sup>6</sup> Te úsá cue téé-á<sup>n</sup> ní sáhá<sup>n</sup>-güedé núú cuè téé úxúú ní táuchíú<sup>n</sup> Jèsús dacuàha ñaha xii-yu tnúhu-gá, te cue téé úxúú-á<sup>n</sup> ní càhá<sup>n</sup> ndihi-güedé Yá Ndióxi, te ní sacá<sup>n</sup> ndodo-güedé ndaha-güedé díquí cuè téé úsá-á<sup>n</sup>.

<sup>7</sup> Te ñáiyu ní sàndáá iní tnúhu Jèsús cuáhá<sup>n</sup>-yu titní xichi càhá<sup>n</sup>-yu tnúhu-gá. Te vai-gá ñáiyu ta sàndáá iní-yu tnúhu-gá

cuahá<sup>n</sup>, te ní xíndecú-yu ndihi dava-gá ñáyiú dâcuaha tnúhu-gá ñuú Jerusálén. Te titní dütú ní sándáá iní-güedé tnúhu-gá.

*Ní tñi-güedé té Tévá*

<sup>8</sup> Te té Tévá ní quide-dé titní núú sá vâ yôo tnáhi ndâcu cada, te ní cuñúhu vihi-yu sá dúcá<sup>n</sup> ní quide-dé, te duca<sup>n</sup> ní quide-dé chi ndècu ndihi-dé Yá Ndióxi chindée ñaha-gá. <sup>9</sup> Te ní xíndecu cue téé ní xóo cunu cuechi núú ñ<sup>n</sup> téé tàxi tñuní, te téé tàxi tñuní-án ñá ní xóo dañá tnáhi-dé quee-güedé núú chíú<sup>n</sup>-dè, te ní xinu-ná-güedé. Te sáta xiá, te ní dácáá-güedé veñúhu-güedé, te veñúhu-án sáhá<sup>n</sup> ñáyiú ñuú Cirené, ñáyiú ñuú Alejandriá, ñáyiú ñuú Ciliciá, ndihi ñáyiú distritú Asiá. Te nchaa ñáyiú-án ní nâá ndihí-yu té Tévá. <sup>10</sup> Te ñá ní nhí-yu tnúhu cáhá<sup>n</sup>-yu, chi ío váha ní sáá díquí-dé nâcuáa ní xáha<sup>n</sup>-dè xí-yu, chi Espiritú Yá Ndióxi ní chindee ñaha-xi xii-dé. <sup>11</sup> Te ní cháhu-yu cue téé ní dâcuándèhnde tnúhu ní cáhá<sup>n</sup> té Tévá núú-yu. Te ní xáha<sup>n</sup>-güedé sá cáhá<sup>n</sup> cuèhé-dé cuendá ndí Moisés ndihi cuendá Yá Ndióxi. <sup>12</sup> Te cuendá sá dúcá<sup>n</sup> ní dâcuándèhnde-güedé núú ní sándáá iní-yu, te ní cudéé<sup>n</sup>-yu núú té Tévá. Te ní cudéé<sup>n</sup> cue téé cùu sacuéhé, te tnáhá cue téé dâcuaha ñaha xii-yu nchaa tnúhu ní chídó tñuní ndí Moisés ní cudéé<sup>n</sup>-güedé. Te ní sáhá<sup>n</sup>-güedé ní tñi-güedé té Tévá ndécá ñaha-güedé cuahá<sup>n</sup> núú quidé cuè téé cùchiu<sup>n</sup> jundá, ndihi cue téé cùu sacuéhé. <sup>13</sup> Te ndécá-yu cue téé dâcuandehnde cuahá<sup>n</sup> núú quidé-güedé jundá, te ní quesaha-ní tûcu-güedé cáhá<sup>n</sup> cuèhé-güedé, te xáha<sup>n</sup>-güedé:

—Tée-a mee-ní cáhá<sup>n</sup> cuèhé-dé cuendá veñúhu sá ío cùnuu, veñúhu ní cuu íí, te cáhá<sup>n</sup> cuèhé-dé cuendá nchaa sá ní chídó tñuní ndí Moisés. <sup>14</sup> Te ní tecú dóho-ndí càchí-dé sá Jèsus téé ñuú Nazàrèt dangoyo-dé veñúhu càhnu sá ío cùnuu te vá dáñá-gá-dé cada-ndí nâcuáa ní cachí ndí Moisés cada-ndí —càchí-güedé xáha<sup>n</sup>-güedé.

<sup>15</sup> Te nchaa cue téé ndècu jundá ní ndacoto váha-güedé núú té Tévá. Te ní dáyèhé-xi núú-dé dàtná quidé-xí núú espíritú xínú cuechi núú Yá Ndióxi.

**7**

*Té Tévá xáha<sup>n</sup>-dè sá ñà túú cuèchi-dé*

<sup>1</sup> Te ní xáha<sup>n</sup> dütú cùtùu-gá xii-dé:

—¿Ndáá tnúhu cáhá<sup>n</sup>-güedé cuendá-n-án? —càchí-dé xáha<sup>n</sup>-dè.

<sup>2</sup> Te té Tévá ní xáha<sup>n</sup>-dè xii-güedé:

—Nchòhó cue ñaní tnáhá-í ndihi nchòhó cue téé cùu sacuéhé, cundedóho-ndo ñ<sup>n</sup> tnúhu na cáhá<sup>n</sup>-í-a. Yá Ndióxi ío cùnuu-gá, te ní cáhá<sup>n</sup> ndihi-gá ndí Abrahám nació<sup>n</sup> Mesopotamiá cùtnháá vátá quihí<sup>n</sup>-gá ndí cundecu ndí ñuú Hàrán. <sup>3</sup> Te ní xáha<sup>n</sup>-gá

xii ndí: “Daña-n ncháa ñaní tnáhá-n, te dañá-n ñúhu-n, te quihí<sup>n</sup>-n ñ<sup>n</sup> xichi núú dánèhé ñáhá-í cundecu-n”, duha ní xáha<sup>n</sup> Yá Ndióxi xii ndí Abrahám. <sup>4</sup> Te sáta dúcá<sup>n</sup> ní xáha<sup>n</sup> Yá Ndióxi xii ndí Abrahám, te ní ndee ndí ñuú Càldeá, te cuahá<sup>n</sup> ndí cundecu ndí ñuú Hàrán. Te sáta ní xihí tâtá ndí, te ní xáha<sup>n</sup> Yá Ndióxi quixi ndí cundecu ndí núú ndécú-ó vitna. <sup>5</sup> Te Yá Ndióxi ñá túú ní sáñaha-gá ní lùha ñuhu cuu cuendá ndí núú ní xíndecu ndí. Te ní xáha<sup>n</sup> ndáá Yá Ndióxi xii ndí sá cuáñaha-gá ñuhu cuu cuendá ndí, te na cùú ndí, te ndóo ndihi nchaa ñaní tnáhá ndí cacu túú ndee cuèé-gá. Te duca<sup>n</sup> ní xáha<sup>n</sup>-gá cuèí vátá cùndecu-gá ní ñ<sup>n</sup> déhe ndí. <sup>6</sup> Te ní xáha<sup>n</sup> tûcu Yá Ndióxi xii ndí Abrahám sá díú-ní ñaní tnáhá ndí quihí<sup>n</sup>-yu núú xicá cundécú-yu cùmí cièndú cuí, te vá dáñá-yu queé-yu núú chíú<sup>n</sup>-yu, te ío dandòho ñaha-güedé núú cùndécú-yu. Duha ní xáha<sup>n</sup> Yá Ndióxi xii ndí, te ndáá duca<sup>n</sup> ní cuu. <sup>7</sup> Te ní xáha<sup>n</sup> tûcu Yá Ndióxi xii ndí Abrahám: “Yúhú dandòho-í nchaa ñáyiú na dandòho ñaha xii cue ñaní tnáhá-n. Te dàvâ-án te ndee cue ñaní tnáhá-n núú cùndécú-yu, te quixi-yu chíñuhu ñahá-yu xii-í iha”, duha ní xáha<sup>n</sup> Yá Ndióxi xii ndí Abrahám, te ndáá duca<sup>n</sup> ní cuu. <sup>8</sup> Te Yá Ndióxi ní quide ndáá-gá ndihi ndí Abrahám, te ní xáha<sup>n</sup>-gá xii ndí sá cuáha-güedé seña ñií nchaa landú téé cuendá cunáhá-yu nâcuáa ndúu sá ní quide ndáá-gá ndihi ndí Abrahám. Núu xíá<sup>n</sup> núú uná nduu sá ní cacu té Isáac déhe ndí Abrahám, te ní sáha ndí seña ñií-dé. Te diu-ní duca<sup>n</sup> ní quide tucu té Isáac déhe-dé té Jácób, te diu-ní duca<sup>n</sup> ní quide té Jácób, chi úxúú déhe-dé ní xíndecu, te nchaa-güedé duca<sup>n</sup> ní quide-dé. Te ndí úxúú cue téé-án ní cuu-güedé ñaní tnáhá-ó.

<sup>9</sup> Te ñ<sup>n</sup> déhe té Jácób ní xínani-dè Chèé. Te ñá ní cùu váha iní cue ñaní-dé núú-dè, núú ní dícò ñaha-güedé ní quehe<sup>n</sup> ñaha cuè téé cuahá<sup>n</sup> nació<sup>n</sup> Egiptú, te Yá Ndióxi ñá ní dáña ñaha-gá xii-dé cuita nihnu-dé. <sup>10</sup> Te ní chindee ñaha-gá xii-dé ní cácu-dé cùtnháá ní ndòho vihi-dé. Te téé yíndaha Egiptú ío ní cudíí iní-dé té Chèé, te ní cutnùní iní-dé sá ío váha túha té Chèé, te duca<sup>n</sup> ní cutnùní iní-dé, chi Yá Ndióxi ní chindee ñaha-gá xii té Chèé. Te ní xáha<sup>n</sup> téé yíndaha Egiptú xii té Chèé sá díú té Chèé coo-dé gobièrnú Egiptú, te taxi tñuní-dé nchaa ñáyiú xínu cuechi núú téé yíndaha Egiptú-án.

<sup>11</sup> Te ní quíhu tnamá nihí nació<sup>n</sup> Egiptú ndihi nació<sup>n</sup> Cànaa, te ío ní ndòho-yu. Te nchaa ñaní tnáhá-ó ní xíndecu ndéé sanaha ñá ní xóo nihí-gá-yu sá cáxi-yu. <sup>12</sup> Te ní nihí té Jácób tnúhu sá ío triú Egiptú, núu ní tendaha-dé cue déhe-dé ní sáhá<sup>n</sup>-güedé ní

sánguaa-n güedé triú-án, te dává-án ní sáhán cue ñani tnáhá-ó xito díhna nuu nació<sup>n</sup> Ègiptú. <sup>13</sup> Te xito cùu uú cuáhán-güedé, te ní xáha<sup>n</sup> tè Chèè sá ñani-dé cúu-güedé. Te tée yindaha Ègiptú ní cutnùni iní-dé sá díú-ní ñani té Chèè cúu-güedé. <sup>14-15</sup> Te ní cana té Chèè tátá-dé tè Jácób ndihi nchaa ñani tnáhá-dé. Te cùu-xi datná únídico sáhú-n-yu ndéca tè Jácób cuáhán<sup>n</sup> nació<sup>n</sup> Ègiptú núu ndécú tè Chèè, te xián<sup>n</sup> ní quexió-yu ní ngóo-yu. Te yácá<sup>n</sup> ní xíhi té Jácób ndihi nchaa déhe-dé cue ñani tnáhá-ó. <sup>16</sup> Te sáta ní cuu titní cuía, te ní natava-güedé yiqui ndíi Jácób ndihi nchaa déhe ndíi nchìdo-güedé cuáhán<sup>n</sup> ñuú Siqém. Te ndíi Abrahám sa ní cuu titní-gá cuía sá ní nacuaa<sup>n</sup> ndíi ñuhu núu cuè déhe ndíi Hámór. Te xián<sup>n</sup> nchíi yaú ní nachindúxi-güedé yiqui-á<sup>n</sup>.

<sup>17</sup> Te cútnáhá vátá nátáva-gá-güedé yiqui cue ndíi, te sa ta tnáhá yatni cada Yá Ndióxi nácuáa ní xáha<sup>n</sup>-gá xii ndíi Abrahám cada-gá sá cúu-xí ñayiu isráel ndécú Ègiptú, te ta cáyá vihi-yu cuáhán<sup>n</sup>. <sup>18</sup> Te dává-án<sup>n</sup> chi ingá tée yindaha nació<sup>n</sup> Ègiptú, te ñá túú-gá ní xini-dé nása ní xóo cada ndíi Chèè. <sup>19</sup> Te tée yindaha Ègiptú ñá ní quide ndáá-dé, chi ío ní dándóhó-dé ñani tnáhá-ó ní xindecu dává-án<sup>n</sup>. Te ní táuchúú-n-dé sá xócuñi-yu dándóo-yu déhe yiqui<sup>n</sup> cuendá ndihi-güexi cuú. <sup>20</sup> Te dává-án<sup>n</sup> ní cacu té Moisés, te ío ní cudíi íni ñáhá Yá Ndióxi xii-dé. Te ní xindecu ndíi ñaha náná-dé ndíi tátá-dé úní-ní yóo. <sup>21</sup> Te ndéca ñahá-yu cuáhán<sup>n</sup> ingá xichi, te yácá<sup>n</sup> ní dándóo ñahá-yu xii-dé, te ní naníhi ñahá déhe yoco tée yindaha Ègiptú, te ní xito-xi-dé dátáa xító-xí ñi<sup>n</sup> déhe mee-xi ní xito-xi-dé ndéé ní sahnú-dé. <sup>22</sup> Te ní cutúha-dé nchaa sá xini cue tée ègiptú, te ío váha ní sáa díquí-dé tnúhu cáhá<sup>n</sup>-dé ndihi nchaa sá cáda-dé.

<sup>23</sup> Te cútnáhá ndécú-dé údico cuía-dé, te ní cachí-dé sá quihí<sup>n</sup>-dé cáhá<sup>n</sup> ndíi-dé cue ñani tnáhá-dé ñayiu isráel. <sup>24</sup> Te ní xini-dé ní caniha ñi<sup>n</sup> téè ègiptú xii ñi<sup>n</sup> téè isráel, te ñá ní cùndee iní-dé cundehe-dé núu ní sáhán-dé ní chindee-dé téè isráel, te ní sahní-dé téè ègiptú, <sup>25</sup> chi ní cachí Yá Ndióxi sá díú-dé dacácu-dé ñani tnáhá-dé ñayiu isráel núu cuè téè ègiptú. Te ní sani iní-dé sá cutnùni iní-yu nacuaa<sup>n</sup> ní xáha<sup>n</sup> Yá Ndióxi xii-dé, dico ñá túú ní cutnùni iní-yu. <sup>26</sup> Te nduu tncé ní xini-dé náa úu cue téè isráel, te ñá túú ní tnáhá iní-dé náa-güedé núu ní xáha<sup>n</sup>-dé xii-güedé: “¿Ná cuendá duca<sup>n</sup> xináa-ndó? ¿Ná ñá díú ndímee-ndo núu duca<sup>n</sup> xináa-ndó?” Duha ní xáha<sup>n</sup> té Moisés xii-güedé. <sup>27</sup> Te téè ndécuechi ní sáhán-dé ní chindaha ñihnu-dé té Moisés ñi<sup>n</sup> xio, te ní xáha<sup>n</sup>-dé: “¿Ná cúu yòhó núu véxi-n tàxi tnuni ñáhá-n? <sup>28</sup> Te tnáhá-ni tucu yúhú

cahni-n dátáa ní sahní-n téè ègiptú icu cáha<sup>n</sup>-n á<sup>n</sup>, duha ní xáha<sup>n</sup>-dé xii té Moisés. <sup>29</sup> Te sá dúcá<sup>n</sup> ní cáhá<sup>n</sup> téè isráel núu ní yúhú té Moisés ní xinú-dé cuáhán<sup>n</sup>-dé ní sáá-dé nació<sup>n</sup> Mèdián. Yácá<sup>n</sup> ní ngóo-dé, te yácá<sup>n</sup> ní tnándaha-dé, te ní cacu úu déhe téè-dé.

<sup>30</sup> Te sáta ní xinú údico cuía, te ní sáhán té Moisés ñi<sup>n</sup> xio yucu Sinái. Te yácá<sup>n</sup> ní xini-dé ñi<sup>n</sup> tnutaú nchícú<sup>n</sup> ñuhú, te xiti itá ñuhú-án<sup>n</sup> ní xini-dé yíhi ñi<sup>n</sup> espíritú xinú cuèchi núú Yá Ndióxi. <sup>31</sup> Te òrè ní xini-dé sá yíhi-xí xiti itá ñuhú-án<sup>n</sup>, te ní cuñuhu vihi-dé sá ní xini-dé espíritú-án<sup>n</sup> xiti itá ñuhú-án<sup>n</sup>, te ní sándehe-gá-dé, te ní xindéhe váha-dé. Te ní tecú dóho-dé ní cáhá<sup>n</sup> Yá Ndióxi, te xáha<sup>n</sup>-gá xii-dé: <sup>32</sup> “Yúhu cùu-í Ndióxi ní cáhá<sup>n</sup> ndíi cue ñani tnáhá-n ndéè sanaha, ndíi Abrahám ndíi ndíi Isáac ndíi ndíi Jácób, ndíi dává-gá cue ñani tnáhá-n. Nchaa cue ndíi-án<sup>n</sup> ní xóo cáhá<sup>n</sup> ndíi-í.” Duha ní xáha<sup>n</sup>-gá xii té Moisés. Te ní quidi ñaha-xi xii té Moisés sá ní yúhú-dé, te ñá ní cùyi-gá-dé cundehe-dé tnutaú nchícú<sup>n</sup> ñuhú-án<sup>n</sup>. <sup>33</sup> Te Yá Ndióxi ní xáha<sup>n</sup>-gá xii-dé: “Queñuhu chàu-n, chí núu ñuhú ní cuu íi nùñi-n. <sup>34</sup> Te yúhú ndéhè-í sá ío ndòho nchaa ñayiu cùu cuendá-í, ñayiu ndécu nació<sup>n</sup> Ègiptú. Te ní tecú dóho-í sá ío ndàhú xícáhán<sup>n</sup>-yu, núu xián<sup>n</sup> véxi-í càchi tnúhu-í sá nùhú-n nació<sup>n</sup> Ègiptú cuendá ndeñuhú-n-yu yácá<sup>n</sup>.” Duha ní xáha<sup>n</sup> Yá Ndióxi xii té Moisés.

<sup>35</sup> Te ñá ní sándáa iní-yu té Moisés ndéé díhna, chí ní xáhá<sup>n</sup>-yu: “¿Ná cuendá véxi-n tàxi tnuni ñáhá-n xii-ndí?” Duha ní xáhá<sup>n</sup>-yu xii té Moisés. Te diu-ni té Moisés ní tendaha ñaha Yá Ndióxi ní sáhán-dé dacácu-dé ñayiu isráel nació<sup>n</sup> Ègiptú cuèi ñá ní sándáa iní ñáhá-yu xii-dé. Dico ní taxi tnuni-dé-yu, chí duca<sup>n</sup> ní xáha<sup>n</sup>-gá òrè ní xini-dé espíritú xinú cuèchi núu-gá xiti tnutaú nchícú<sup>n</sup> ñuhú. <sup>36</sup> Te té Moisés ní nguíta-dé ní quide-dé sá vá yòo tnàhí ndàcu cada, te ní cuñuhu vihi-yu sá dúcá<sup>n</sup> ní quide-dé, te duca<sup>n</sup> ní quide-dé Ègiptú ndíi Lámár Tícuèhé. Te ní ngódo núu-dé núu-yu ní queé-yu Ègiptú cuáhán<sup>n</sup>-yu ñi<sup>n</sup> ichi xiti yucu núu vá yòo tnàhí ndécu, te ní xíhi-yu údico cuía xiti yucu-án<sup>n</sup>, te xián<sup>n</sup> ní xóo cada-dé sá vá yòo tnàhí ndàcu cada. <sup>37</sup> Te diu-ni té Moisés ní xáha<sup>n</sup>-dé xii cue ñani tnáhá-dé dává-án<sup>n</sup>: “Yá Ndióxi cada-gá te coo ñi<sup>n</sup> ñani tnáhá-ndó ndéè cuèè-gá, te téè-án<sup>n</sup> cáhá<sup>n</sup>-dé tnúhu-gá núu-ndó dátáa cuini-ndó ní cachí-gá quidé yúhú, te ío xini ñuhu-xi cundédóho-ndo tnúhu cáhá<sup>n</sup>-dé”, duha ní xáha<sup>n</sup> té Moisés xii-yu dává-án<sup>n</sup>. <sup>38</sup> Te diu-ni té Moisés ní xindecu ndíi-dé ñayiu isráel xiti yucu, te ní sáá-dé yucu Sinái, te xián<sup>n</sup> ní quixi ñi<sup>n</sup> espíritú xinú cuèchi núu Yá Ndióxi ní cáhá<sup>n</sup> ndíi ñaha-xi xii-dé, te yácá<sup>n</sup> ní

dácuahá ñaha-xi tnúhu-gá, te ñu-ni tnúhu-á<sup>n</sup> ní ndóo dácuaha-o.

<sup>39</sup> Te cue ñani tnáhá-ó ní xíndecu ndéé sanaha ñá ní sándáá iní-yu té Moisés, te ñá ní ndéé iní ñáhá-yu xii-dé, chi ní cuini-yu nuhú tucú-yu ñuú Ègiptú cundecú-yu. <sup>40</sup> Te òré ndécú té Moisés yucu ní xáhá<sup>n</sup>-yu xii ñani-dé té Àron: “Cadúha-n ñ<sup>n</sup> úú ndiòxí ðihú<sup>n</sup> cuáá<sup>n</sup> codonùu núú-ó cùhu<sup>n</sup>-o ichi, chi ñá túú cùtnuní iní-ó ndéé ichi cuahá<sup>n</sup> té Moisés, téé yòdo nuu núú-ó ndùu ní quee-o Ègiptú”, duha ní xí-yu té Àron. <sup>41</sup> Te ðavá-á<sup>n</sup> ní cadúha-güedé ñ<sup>n</sup> chëhlu mee-ni ðihú<sup>n</sup> cuáá<sup>n</sup>, te ní sahní-güedé ñ<sup>n</sup> úú quiti nchito ní quide càhnu-güedé chëhlu-á<sup>n</sup>. Te ío ní cudíí iní-yu quiti-á<sup>n</sup>, chi ní cachí-yu sá ðiú-ní ndiòxí cúú-dí. <sup>42</sup> Te sá ðucá<sup>n</sup> ní quide-yu, xiá<sup>n</sup> ní dáñá ñaha Yá Ndiòxí xii-yu. Te ní dáñá-gá ní xóo cada càhnú-yu nchicanchii, ndihí yóo, ndihí nchaa chódíní. Te duha ní chidó tnùní ñ<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha nàcuáa ní xáha<sup>n</sup>-gá xii ñáyiú ðavá-á<sup>n</sup>: Nchòhó ñáyiú israhél, ní cuu údico cuíá yíhí-ndó yucu,

te ní sahní-ndo quiti-ndo ní quide càhnu ñaha-ndo xii-í cáhá<sup>n</sup>-ndó, dico ñáhá chi ní sahní-ndo-güedé ní quide càhnu-ndo sá ní cadúha mee-ndo.

<sup>43</sup> Te ní cadúha-ndo ñ<sup>n</sup> veñúhu líhli, te ní sanutñí-ndo Mólóc sá cachí-ndó cùu ndiòxí-ndó xica nchido-ndo xiti yucu, te ní cadúha-ndo ñ<sup>n</sup> chódíní, te quiti-á<sup>n</sup> càchí-ndó sá cúú-dí ndiòxí Rènfán, te ndi ndúú sá ní cadúha-ndo-á<sup>n</sup> ní quide càhnu-ndo.

Te cuendá sá ðucá<sup>n</sup> ní quide-ndo te yúhú queñuhu ñaha-í xii-ndo quihí<sup>n</sup>-ndó cùndecu-ndo ingá xio naciò<sup>n</sup> Babiloniá. Duha ní xáha<sup>n</sup> Yá Ndiòxí xii-yu, te duca<sup>n</sup> ní chidó tnùní téé ní xóo cáhá<sup>n</sup> tnúhu-gá.

<sup>44</sup> Te xiti yucu-á<sup>n</sup> ní dácaá-güedé ñ<sup>n</sup> veñúhu vehe dóo. Te vehe-á<sup>n</sup> ní cuu-xi ñ<sup>n</sup> sá cùtnuní iní-yu sá Yá Ndiòxí ndécú ndihí ñaha-gá xii-yu. Te vehe-á<sup>n</sup> ní dácaá-güedé nàcuáa ní xáha<sup>n</sup> Yá Ndiòxí xii té Moisés, chi ní dánèhé ñáhá-gá xii-dé nàcuáa dacàa-güedé. <sup>45</sup> Te sátá ní xihí nchaa cue téé-á<sup>n</sup>, te ní ndóo ndihí nchaa ðehe-güedé veñúhu-á<sup>n</sup>. Te ní xido tucu-güedé veñúhu-güedé cuahá<sup>n</sup>-güedé, te cuahá<sup>n</sup> ndihí-güedé té Jòsué núú cùndécú-yu. Te sátá ní quexió-yu, te ní dácuñú-yu ñáyiú dii ñuú-xi-á<sup>n</sup> chi mee Yá Ndiòxí ní chindee ñaha-gá xii-yu. Te sátá ní ndihí nchaa ñáyiú ní xica nchido veñúhu dóo-á<sup>n</sup> ní xihí, te ní ndóo ndihí dava-gá-yu. Te duca<sup>n</sup>-ni ndécú-xi ní cacu té Davíí, téé ní xíndaha ñaha xii-yu. <sup>46</sup> Te Yá Ndiòxí ní cudíí víhí iní-gá té Davíí. Te ní xicá<sup>n</sup> tnúhú-dé núú-gá núu cuu dacàa-dé

veñúhu cuu cuendá-gá, chi ñ<sup>n</sup>-ni Yá Ndiòxí ní xóo cada càhnu té Davíí ndihí té Jacób, ñani tnáhá-ó ní xíndecu ndéé sanaha víhí-gá. <sup>47</sup> Te Yá Ndiòxí ñá ní ðañá-gá dacàa té Davíí veñúhu-gá dico ðehe-dé té Salòmón, chi ní dáñá-gá ní dácaá-dé veñúhu cuu cuendá-gá <sup>48</sup> cuéi ñá túú sàcùndecu-gá veñúhu dacaa cue téé ñuyú-a, chi ndèni xiá<sup>n</sup> ndécú-gá chi espíritú cúú-gá. Te duha ní chidó tnùní téé ní xóo cáhá<sup>n</sup> tnúhu Yá Ndiòxí ndéé sanaha nàcuáa ní cáhá<sup>n</sup>-gá:

<sup>49</sup> Yúhú táxi tnùní-í andiú ndihí ñuyú, te xiá<sup>n</sup> núu nchòhó vá ndácú-ndó chihí ñaha-ndo xiti veñúhu dátñá quidé-yu sá cachí-yu cùu ndiòxí-yu ní cadúha-yu.

Te ñá túú xini ñuhu-í núú ndétátú-í, <sup>50</sup> chi yúhú ní cadúha-í nchaa sá ío ñuyú-a. Duha ní cáhá<sup>n</sup> Yá Ndiòxí, te ðiú-ni duca<sup>n</sup> ní chidó tnùní téé ní xóo cáhá<sup>n</sup> tnúhu-gá —duha ndùu nchaa tnúhu ní xáha<sup>n</sup> té Tévá xii-güedé.

<sup>51</sup> Te ní xáha<sup>n</sup> tucu-dé:

—Nchòhó, ío sáa iní-ndó chi quide-ndo dátñá quidé ñáyiú ñá túú cùu ñáyiú israhél chi ñá túú tédòho-ndo tnúhu càhá<sup>n</sup> Yá Ndiòxí, chi ñá cuini-ndó quindáá iní-ndó tnúhu-gá, mee-ni cuu úhú iní-ndó Espíritú-gá dátñá ní xóo cada cue ñani tnáhá-ndó ní xíndecu ndéé sanaha. <sup>52</sup> Chi cue téé-á<sup>n</sup> ío ní xóo dandòho-güedé nchaa cue téé ní xóo cáhá<sup>n</sup> tnúhu Yá Ndiòxí ndéé sanaha. Te ní sahní-güedé nchaa cue téé ní cáhá<sup>n</sup> sá quixí Cristú ñuyú-a, te Yaá-á<sup>n</sup> ñá túú cuèchi-gá. Te ðiú-ni duca<sup>n</sup> ní quide-ndo Cristú cùtnáhá ní quixí-gá ñuyú-a, chi ní sáha cuendá-ndó-gá núú cué téé ní cuu úhú iní ñáhá xii-gá ní sahní ñaha-güedé. <sup>53</sup> Te ndécú ndihí-ndo tnúhu ní chidó tnùní ndii Moisés nàcuáa ní xáha<sup>n</sup> espíritú ximú cuèchi núú Yá Ndiòxí xii ndii, te ní duca<sup>n</sup> ñá túú sándáá iní-ndó tnúhu-á<sup>n</sup> núu ní sahní-ndo Jèsús. Te ðiú-ni tnúhu-á<sup>n</sup> ndécú ndihí-ndo ndéé vitna —cachí té Tévá xáha<sup>n</sup>-dè xii-güedé.

#### Ní sahní-güedé té Tévá

<sup>54</sup> Te sá ðucá<sup>n</sup> ní xáha<sup>n</sup> té Tévá xii-güedé, te ní cudéé<sup>n</sup> víhí-güedé núú-dé, núu ní quide rúhñú-güedé ñuhu-güedé sá sàtú iní-güedé.

<sup>55</sup> Te té Tévá ndécú ndihí-dé Espíritú Yá Ndiòxí, te ní ndacoto váha-dé andiú, te ní xini-dé súúni dátása<sup>n</sup>-xi núú ndécú Yá Ndiòxí, te ní xini-dé Xitohó Jesucristú nùtní-gá xio cùha Yá Ndiòxí. <sup>56</sup> Te ní xáha<sup>n</sup> té Tévá xii-güedé:

—Chí cùndèhe andiú chi yúhú ndéhè-í Xitohó Jesucristú nùtní-gá xio cùha Yá Ndiòxí, te ðiú-gá cúú-gá ñani tnáhá-ndó nchaa-ndo —cachí-dé xáha<sup>n</sup>-dè.

<sup>57</sup> Te ní sadí-güedé dóho-güedé cuendá sá ñá ní tnáhá iní-güedé cundédòho-güedé tnúhu cáhá<sup>n</sup>-dé, te uu<sup>n</sup> ní cuáá-güedé, te

ní taxi ndaha ñaha-güedé xii-dé <sup>58</sup> ndécá ñaha-güedé cuáhá<sup>n</sup> ndéé ì<sup>n</sup> xio yuhu ñúú, te yacá<sup>n</sup> ní sãñaha-güedé yúú xii-dé. Te ndécu ì<sup>n</sup> tée cuechi nàni-dé Sàulú, te té-á<sup>n</sup> ní quide cuendá-dé dóo-güedé cuendá ní nune ndaha-güedé ní sãñaha-güedé yúú xii té Tévá. <sup>59</sup> Te òré sãñaha-güedé yúú, te ní cáhá<sup>n</sup> ndihi-dé Xitohó Jesucristú te xáha<sup>n</sup>-dè:

—Yòhó Xitohó Jesucristú, naquehe<sup>n</sup>-n iní-í —càchí-dé xáha<sup>n</sup>-dè xii-gá.

<sup>60</sup> Te ní nguñí xítí-dé, te níhi ní cáhá<sup>n</sup>-dè, te xáha<sup>n</sup>-dè:

—Yòhó Xitohó Jesucristú, vá técuéchi-n cue té-á sá dúhá quide ñaha-güedé xii-í —càchí-dé xáha<sup>n</sup>-dè xii-gá.

Te xíá<sup>n</sup>-ná ní cáhá<sup>n</sup>-dè, te ní xíhí-dé.

## 8

*Té Sàulú chíhí-dé ñáyiú sándáá iní-xi tnúhu Jèstús vecaá*

<sup>1</sup> Te té Sàulú ní nduu vétú iní-dé sá ní sahní-güedé té Tévá.

Te ñu-ni nduu-á<sup>n</sup> ní cuu níhi cuendá nchaa ñáyiú sándáá iní-xi tnúhu Jèstús ñúú Jerusalén. Te ní ndihí-yu ní xité nuu cuáhá<sup>n</sup>-yu distritú Jüdeá ndihí distritú Sãmariá. Te cue té ní táuchíú<sup>n</sup> Jèstús dácuáha ñaha xii-yu tnúhu-gá ní ndóo-güedé ñúú Jerusalén. <sup>2</sup> Te nchaa cue té cáhá<sup>n</sup> ndihí Yá Ndióxi ní chindúxi-güedé ndíi Tévá. Te ío ní ndáhyú ñáyiú ní sándáá iní tnúhu Jèstús sá ní xíhí ndíi. <sup>3</sup> Te té Sàulú ío dándoho-dé-yu, chí ndí vehe ndí vehe cuáhá<sup>n</sup>-dè cuátní-dé cuéi tée cuéi ñadihí ndécá-dé cuáhá<sup>n</sup> vecaá.

*Cáhá<sup>n</sup>-yu tnúhu Yá Ndióxi distritú Sãmariá*

<sup>4</sup> Te nchaa ñáyiú ní xité nuu cuáhá<sup>n</sup>-yu cáhá<sup>n</sup>-yu tnúhu Jèstús nchaa núú quexió-yu.

<sup>5</sup> Te té Lìpé cuáhá<sup>n</sup>-dè distritú Sãmariá cáhá<sup>n</sup>-dè tnúhu Xitohó Jesucristú Yáá ní tendaha Yá Ndióxi ní quixi ñuyúú-a. <sup>6</sup> Te ío vai núú sá vá yóo tnàhí ndàcu cada ní quide-dé, te ní cuñúhu vihí-yu, te ní xíndedóho váha-yu nchaa tnúhu ní cáhá<sup>n</sup>-dè.

<sup>7</sup> Te vai ñáyiú yíhi ñaha espíritú cundihí yucu ñáváha ní queñúhu-dé nchaa espíritú-á<sup>n</sup> yiqui cuñú-yu, te ní cana saa-xi òré ní ndee-xi yiqui cuñú-yu cuáhá<sup>n</sup>-xi, te ní ndúha-yu. Te vai ñáyiú cùhú ñá cúú-gá candá nihnú-yu ndihí ñáyiú yacua ní quide tátna-dé, te ní ndúha-yu. <sup>8</sup> Te sá dúcá<sup>n</sup> ní cáhá<sup>n</sup>-dè tnúhu Jèstús te ní quide tátna-dé-yu, xíá<sup>n</sup> ío ní cudíí iní ñáyiú ñúú-á<sup>n</sup>.

<sup>9</sup> Te ñu-ni ñúú-á<sup>n</sup> ndécú ì<sup>n</sup> tée nàni Xímú, te té-á<sup>n</sup> xíní-dé cada ndúu-dé, te ní cuu naha dùca<sup>n</sup> quide-dé, te ní xóo cuñúhu ñáyiú distritú Sãmariá sá dúcá<sup>n</sup> quide-dé, te ní cachí-dé sá díú-ní-dé cúnú. <sup>10</sup> Te nchaa ñáyiú cuéi ñáyiú cuica te cuéi ñáyiú ndàhú ío nehé-yu sá yíñúhu núú-dè, te xitnàhá-yu:

—Té-á<sup>n</sup> ío chindee ñaha Yá Ndióxi xii-dé núu vai núú sá quidè-dè —càchí-yu xitnàhá-yu.

<sup>11</sup> Te ní sándáá iní-yu nàcuáa ní xóo cada ndúu-dé, te ní xóo cuñúhu vihí-yu, te ní cuu naha dùca<sup>n</sup>-ní dandahú ñáhá-dé xii-yu. <sup>12</sup> Te té Lìpé ní cáhá<sup>n</sup>-dè tnúhu Xitohó Jesucristú, te ní xáha<sup>n</sup>-dè xii-yu sá Yá Ndióxi cuñí-gá ndíhu ndaha ñaha-gá xii-yu. Te cuéi tée cuéi ñadihí ní sándáá iní-yu tnúhu-gá, te ní sanduté-yu. <sup>13</sup> Te tnàhí té Xímú ní sándáá iní-dé tnúhu-gá, te ní sandute-dé, te ní xica cuu-dé ndihí té Lìpé, te ní cuñúhu-dé chí titní núú sá vá yóo tnàhí ndàcu cada ní quide té Lìpé, te ní cuñúhu vihí nchaa ñáyiú.

<sup>14</sup> Te dava-gá cue té ní táuchíú<sup>n</sup> Jèstús dacuáha ñaha xii ñáyiú tnúhu-gá ní níhí-güedé tnúhu sá ñáyiú distritú Sãmariá ní sándáá iní-yu tnúhu Yá Ndióxi. Te ní tendaha-güedé té Pèlú ndihí té Juáa cuáhá<sup>n</sup>-güedé distritú Sãmariá. <sup>15</sup> Te ní quexio-güedé, te ní cáhá<sup>n</sup> ndihí-güedé Yá Ndióxi ní xícá<sup>n</sup>-güedé Espíritú-gá quixi cundecu ndihí-yu. <sup>16</sup> Chí ní ñ-nyu vátá sáa-gá Espíritú-gá cundecu ndihí-yu, chí òré ní sanduté-yu, te mee-ni Jèstús ní cacunehe-güedé. <sup>17</sup> Te òré ní sacá<sup>n</sup> ndodo-güedé ndaha-güedé díquí-yu, te ní quexio Espíritú-gá ní ngúndecu ndihí-yu.

<sup>18</sup> Te ní xíní té Xímú nàcuáa ní quide-güedé ní quexio Espíritú-gá ní ngúndecu ndihí-yu, te cuñí-dé cuáñaha-dé díhú<sup>n</sup> xii té Pèlú ndihí té Juáa ní cùu. <sup>19</sup> Te ní xáha<sup>n</sup>-dè:

—Chindee ñaha-ndo cuendá ndèda-ni càa-yu cacá<sup>n</sup> ndodo-í ndaha-í díquí-yu, te níhi-yu Espiritú Yá Ndióxi cundecu ndihí-yu —càchí-dé xáha<sup>n</sup>-dè xii-güedé.

<sup>20</sup> Te té Pèlú ní xáha<sup>n</sup>-dè xii-dé:

—Yòhó cuíta nihnu-n ndihí díhú<sup>n</sup>-n, chí cuñí-n cuáa<sup>n</sup>-n sá váha quide Yá Ndióxi. <sup>21</sup> Yòhó vá cúú càda-n chiu<sup>n</sup> quide-ndí, chí ñá túú ndècu váha iní-n núú Yá Ndióxi. <sup>22</sup> Te vá dúcá<sup>n</sup> cáhá<sup>n</sup>-n, chí ío nehé cáhá<sup>n</sup>-n sá dúcá<sup>n</sup> cáhá<sup>n</sup>-n. Te cáhá<sup>n</sup> ndàhú-n núú Yá Ndióxi sá ná cáda càhu iní-gá tnúhu ní cáhá<sup>n</sup>-n. <sup>23</sup> Te yúhú sa xíní-í sá ío ùhú iní-n, chí mee-ni sá cuèhé sá dúhá chido nuu-n quide-n —cachí té Pèlú xáha<sup>n</sup>-dè xii té Xímú.

<sup>24</sup> Te ní xáha<sup>n</sup> té Xímú xii-güedé:

—Cáhá<sup>n</sup> ndàhú-ndó núú Yá Ndióxi sá ñá túú ná tnahá-í sá dúcá<sup>n</sup> ní cáhá<sup>n</sup>-í —càchí-dé xáha<sup>n</sup>-dè.

<sup>25</sup> Te té Pèlú ndihí té Juáa ní cáhá<sup>n</sup>-güedé tnúhu Yá Ndióxi núú ñáyiú ñúú-á<sup>n</sup>. Te ní xáha<sup>n</sup>-güedé nchaa nàcuáa ní quide Jèstús ní xíní-güedé òré ní xica cuu-gá ñuyúú-a. Te ní tñí-güedé ichi cuánuhú-güedé ñúú Jerusalén, te ní yáha-güedé titní ñúú yíndèhu distritú Sãmariá, te ní cáhá<sup>n</sup>-güedé tnúhu-gá.

*Té Lìpé ndihí ì<sup>n</sup> té ñúú Etiópía*

<sup>26</sup> Te ìn espíritú xínú cuèchi núú Yá Ndióxi ní quexio-xi ñuú Jerusalén ní xáha<sup>n</sup>-xi xii té Lìpé:

—Cada túha-n chi quée nuu-n ñuú Gázá, dico mee-ni xití yucu cuáhá<sup>n</sup> ichi —càchí-xi xáha<sup>n</sup>-xi xii-dé.

<sup>27</sup> Te ní xica-dé cuáhá<sup>n</sup>-dé, te ní nat-nahá-dé ìn té nació<sup>n</sup> Etiópia ñúhú-dé ichi. Te cùu-dé tesorerú xínú cuèchi-dé núú ìn ñadihí ñaha yindaha nació<sup>n</sup> Etiópia, te ñaha-án nání-án Cándacé. <sup>28</sup> Te té etiópia-án ní sáhá<sup>n</sup>-dé ñuú Jerusalén ní cáhá<sup>n</sup> ndíhi-dé Yá Ndióxi, te ñuhu-dé ichi cuánuhú-dé ñuú-dé ñúhú-dé carrètá, te dàcuaha-dé tñuhu ní chídó tñuni ndí Chàia té ní xóo cáhá<sup>n</sup> tñuhu Yá Ndióxi ndéé sanaha. <sup>29</sup> Te ní xáha<sup>n</sup> Espíritú Yá Ndióxi xii té Lìpé:

—Quíhí<sup>n</sup> tuha-n càrretá-án —càchí Espiritú-gá xáha<sup>n</sup>-xi xii-dé.

<sup>30</sup> Te té Lìpé ní sátuha-dé carrètá-án, te ní tecú dóho-dé nàcuáa cáhá<sup>n</sup> té etiópia-án, té ñuhu carrètá-án dàcuáha-dé nàcuáa ní chídó tñuni ndí Chàia. Te ní xáha<sup>n</sup> té Lìpé xii té etiópia-án:

—¿Técú tñuni-n nchàa tñuhu dàcuaha-n-án? —càchí té Lìpé xáha<sup>n</sup>-dè xii-dé.

<sup>31</sup> Te ní xáha<sup>n</sup> té etiópia:

—¿Nása tecú tñuni-í te vâ yôo dànehé ñáhá xii-í? Ta quène iha coo-n chi danèhé ñáhá-n —càchí-dé xáha<sup>n</sup>-dè xii té Lìpé.

Te cuasaá té Lìpé núú carrètá ní ngóo-dé.

<sup>32</sup> Te ndédóho-dé nàcuáa dàcuaha té etiópia-án nàcuáa ní chídó tñuni ndí Chàia núú tütü Yá Ndióxi núú càchí-xi:

Dàtná quidé ìn mbéé cada-dé òré can-deca ñaha-güedé xii-dé quíhí<sup>n</sup> cahni ñaha-güedé chi ñá túú nâ cada-dé, dàtná cuini-ndó quide mbéé òré dété-di ñá túú ndáhí-di duca<sup>n</sup> càda-dé òré cahni ñaha-güedé chi ní vâ cáhá<sup>n</sup>-dé.

<sup>33</sup> Te mee-ni cùdiquí ndéé ñáhá-güedé xii-dé, te ní vâ ndúcú tñuhu-güedé núú-dé núu ndáá ndécucéchi-dé.

Te ío cuu nduu cuihna íni cue ñaní tñáhá-dé, chi cahni ñaha-güedé xii-dé ñuyíú-a. Duha cáhá<sup>n</sup> tutú ní dàcuáhá té etiópia ní xíndedóho té Lìpé.

<sup>34</sup> Te ní xáha<sup>n</sup> tütü té Etiópia xii té Lìpé:

—Cundee íni-n càchí tñuhu-n yòo cuncuhe té ní cáhá<sup>n</sup> tñuhu Yá Ndióxi ndéé sanaha, núu cáhá<sup>n</sup>-dè cuèndá mée-dé àdi cáhá<sup>n</sup>-dè cuèndá ingá ñayiu —càchí té etiópia-án xáha<sup>n</sup>-dè xii té Lìpé.

<sup>35</sup> Te té Lìpé ní cani-dé cuèndú núú té etiópia nàcuáa ní cáhá<sup>n</sup> ndí Chàia nàcuáa cada Jèsús òré quixi-gá ñuyíú-a. Te ní xáha<sup>n</sup>-dè nàcuáa ndùu tñuhu Jèsús ndíhi nàcuáa ní quide-gá. <sup>36</sup> Te ñuhu-güedé ichi cuáhá<sup>n</sup>-güedé ní naníhí-güedé ìn xichi núú ñúhú ndüte, te ní xáha<sup>n</sup> té etiópia:

—Iha ñuhu ndute, ¿te vâ cúu cuàndute-í iha-án? —càchí-dé xáha<sup>n</sup>-dè xii té Lìpé.

<sup>37</sup> Te xáha<sup>n</sup> té Lìpé:

—Te núu sàndáá ndisa íni-n Jèsús, te cuu cuandute-n —càchí-dé xáha<sup>n</sup>-dè.

Te ní xáha<sup>n</sup> té etiópia:

—Sàndáá ndisa íni-í sá Dèhe Yá Ndióxi cúu Xitohó Jesucristú —càchí-dé xáha<sup>n</sup>-dè.

<sup>38</sup> Te ní ngani-dé carrètá, te ní nuu-güedé ndi ndùu-güedé, te cuánguee-güedé xití ndute, te ní dàcuàndüte ñaha té Lìpé xii-dé.

<sup>39</sup> Te òré ní nene-güedé xití ndute, te ndéca ñaha Espiritú Yá Ndióxi xii té Lìpé cuáhá<sup>n</sup>. Te ñá túú ní xini té ní sandute-án ndéé ichi cuáhá<sup>n</sup> té Lìpé. Te ío ní cudíhí íni-dé sá ní natuha-dé ichi Yá Ndióxi, te cuàndaa-dé núú carrètá-dé cuánuhú-dé. <sup>40</sup> Te ní quexio té Lìpé ñuú Àzotó, te ndi tnahá ñuú ndi tnahá ñuú cuáhá<sup>n</sup>-dé cáhá<sup>n</sup>-dé tñuhu Yá Ndióxi, te ní yáha-dé cuáhá<sup>n</sup>-dé ní quexio-dé ndéé ñuú Cèsarea.

## 9

### *Té Sàulú ní tuha-dé ichi Xitohó Jesucristú (Hch. 22:6-16; 26:12-18)*

<sup>1</sup> Te té Sàulú mee-ni cáhá<sup>n</sup> cuèhé-dé cuèndá ñayiu ní sàndáá íni tñuhu Jèsús, te cuini-dé cahni ñaha-dé xii-yu. Te ní sáhá<sup>n</sup>-dè núú dütü cùnùu-gá, <sup>2</sup> te ní xáha<sup>n</sup>-dè sá cádúha dütü-án ìn tutú canehe-dé quíhí<sup>n</sup> cuáha-dé cue téé xíndeé nchito veñúhu ñuú Dàmascú, chi cuini-dé tñi-dé nchaa ñayiu dàcuaha tñuhu Xitohó Jesucristú candeca ñaha-dé quíhí<sup>n</sup> ñuú Jerusalén. <sup>3</sup> Te ní xica-dé cuáhá<sup>n</sup>-dè tá cùyatni-dé ñuú Dàmascú, te uu<sup>n</sup> ní quee ñuhu andiu, te ní dàyèhé-xi ndéé núú nütñi-dé. <sup>4</sup> Te ní nduá-dé ndéé ñuhu, te ní tecú dóho-dé cáhá<sup>n</sup> ìn sá cáhá<sup>n</sup> núú ñinu, te xáha<sup>n</sup>-xi xii-dé:

—Yòho Sàulú, ¿ná cuèndá cúu ùhú íni ñáhá-n xii-í te dàndoho ñaha-n? —càchí sá cáhá<sup>n</sup>-án xáha<sup>n</sup>-xi xii-dé.

<sup>5</sup> Te ní xáha<sup>n</sup>-dè:

—¿Ná cúu yòhó sá cáhá<sup>n</sup>-án-í? —càchí-dé xáha<sup>n</sup>-dè.

Te ní xáha<sup>n</sup> sá cáhá<sup>n</sup> xii-dé:

—Yúhu cúu-í Jèsús téé cùu úhú íni-n. Te ío dàndoho-n mee-n, chi dàtná quidé ndicutu quide-n, chi quiti-án núu na cùxi-güedé-di pùya te sáha-di patadá núu-xi, te quide úhú-di mee-di. Te duca<sup>n</sup> sàtnahá-xi cùu yohó chi ñá túú sàndáá íni ñáhá-n xii-í —càchí sá cáhá<sup>n</sup>-án xáha<sup>n</sup>-xi xii-dé.

<sup>6</sup> Te té Sàulú ní quidi ñaha-xi xii-dé sá ní yuhú-dé, te ní xáha<sup>n</sup>-dè:

—Xitohó Jesucristú, ¿te ná cuini-n càda-í-í? —càchí-dé xáha<sup>n</sup>-dè.

Te Jèsús ní xáha<sup>n</sup>-gá xii-dé:

—Ndacóo, te quíhí<sup>n</sup>-n ñúú-ã<sup>n</sup>, te yàcá<sup>n</sup> tecú tnúhu-n nã cúú sã cádá-n —càchí-gá xáha<sup>n</sup>-gã xii-dé.

<sup>7</sup> Te cue tée cuáhá<sup>n</sup> ndihi té Sàulú ní tecú dóho-güedé càhá<sup>n</sup> ì<sup>n</sup> sã cáhá<sup>n</sup>, dico yã yõ tñàhí ní xini-güedé, te ní yùhú vñí-güedé, te ñã túú tñàhí ní càhá<sup>n</sup>-güedé. <sup>8</sup> Te ní ndacóo té Sàulú, te ñã ní cùu-gá cundehe-dé, chí ní cuaa-dé, te ní tñii-güedé ndaha-dé ndécá ñàha-güedé cuáhá<sup>n</sup> ñúú Dàmascú. <sup>9</sup> Te yàcá<sup>n</sup> ní xíndecu-dé úní nduu, te ñã ní cùu tñahí cundehe-dé, te ñã túú nã ní xèxi-dé, te ñã túú ní xihí-dé ndute.

<sup>10</sup> Te ndècu téé sàndáá iní tnúhu Jèsús ñúú Dàmascú, nání-dé Ananiás, te ní sáhá<sup>n</sup> Jèsús núú sání-dé, te ní xáha<sup>n</sup>-gã xii-dé:

—¡Ananiás! —càchí-gá xáha<sup>n</sup>-gã.

Te ní xáha<sup>n</sup>-dè:

—¿Yùhú càhá<sup>n</sup> ndihi-n-ã<sup>n</sup>? —càchí-dé xáha<sup>n</sup>-dè.

<sup>11</sup> Te ní xáha<sup>n</sup>-gã:

—Ndacuíñí, te quíhí<sup>n</sup>-n ì<sup>n</sup> chiu<sup>n</sup> ichi núú dánani-güedé Ichi Ndáá, te yàcá<sup>n</sup> nanducu-n vehe té Júdás, chí vehe téé-ã<sup>n</sup> ndécú ì<sup>n</sup> téé ñúú Tarsú nání-dé Sàulú, te téé-ã<sup>n</sup> sã cáhá<sup>n</sup> ndihi ñaha-dé xii-í. <sup>12</sup> Te téé-ã<sup>n</sup> ní dácótó ñaha-xi sã ní xini ñáhá-dé xii-n ní quexio-n núú ndécú-dé, te ní sacá<sup>n</sup> ndodo-n ndàha-n díquí-dé, te duca<sup>n</sup> te ní nacaá<sup>n</sup> núú-dé ní dácótó ñaha-xi xii-dé —càchí-gá xáha<sup>n</sup>-gã.

<sup>13</sup> Te té Ananiás ní xáha<sup>n</sup>-dè:

—Yòhó Xítóhó Jesucristú, càchí tnúhu-í xii-n sã ní ñihí-í tnúhu nàcuáa cuide-dé sã ìo quide úhú-dé ñáyíu càhá<sup>n</sup> ndihi-n ñúú Jerusàlén. <sup>14</sup> Chí nèhe-dé tutú ní sáñaha cuè dútú cúnúu cuendá ñihí-dé nàcuáa cada-dé tñii-dé nchaa ñáyíu sàndáá iní ñáhá xii-n —càchí-dé xáha<sup>n</sup>-dè xii-gã.

<sup>15</sup> Te Jèsús ní xáha<sup>n</sup>-gã xii-dé:

—Quíhí<sup>n</sup>-n ndàtnúhu-n ndihi-dé, chí cuini-í cada-dé chiu<sup>n</sup>-í, quíhí<sup>n</sup>-dè càhá<sup>n</sup>-dè tnúhu-í núú cuè ñáyíu isràél, ndihi núú cuè ñáyíu ñã túú cùu ñáyíu isràél, ndihi núú cuè téé yíndaha ñaha xii-yu. <sup>16</sup> Te yùhú cùñaha-í xii-dé sã ndóhó vñí-dé cuendá-í —càchí-gá xáha<sup>n</sup>-gã xii té Ananiás.

<sup>17</sup> Te cuáhá<sup>n</sup> té Ananiás vehe núú ndécú té Sàulú te ní sacá<sup>n</sup> ndodo-dé ndaha-dé díquí té Sàulú, te ní xáha<sup>n</sup>-dè:

—Yòhó té Sàulú téé ndècu ndihi-í ichi Xítóhó Jesucristú, diu-ni Xítóhó Jesucristú Yaa ní càhá<sup>n</sup> ndihi ñaha xii-n ichi ní tendaha ñaha-gã véxi-í cuendá cacá<sup>n</sup> tãhú-í núú-gã cuendá-n te ndúha núú-n, te dàtnúú quixi Espiritú-gã cundecu ndihi-n —càchí-dé xáha<sup>n</sup>-dè.

<sup>18</sup> Te dàtná sã ní xócání-ó ì<sup>n</sup> sã ndèdí núú-dé ní quide ñaha-xi xii-dé, te ní nacaá<sup>n</sup> núú-dé, te ní sandute-dé. <sup>19</sup> Te ní xèxi-dé, te ní naníhí ndéé-dé, te tití nduu ní xíndecu

ndihi-dé ñáyíu ní sàndáá iní tnúhu-gã ñúú Dàmascú.

*Té Sàulú dácuaàha-dé ñáyíu tnúhu Yá Ndióxi ñúú Dàmascú*

<sup>20</sup> Te sáta ní ndúha núú-dé, te ní sáhá<sup>n</sup>-dè veñúhu cue ñáyíu isràél ní xáha<sup>n</sup>-dè sã Jèsús cúú-gã Déhe Yá Ndióxi. <sup>21</sup> Te nchaa ñáyíu ní xíndédoho tnúhu ní càhá<sup>n</sup>-dè, te ní cuñúhu vñí-yu, te ní xítnàhá-yu:

—Diu téé-ã<sup>n</sup> ní sahani-dé ñáyíu ní xóo chíñuhu ñaha xii Jèsús ñúú Jerusàlén. Te ní quixi-dé iha ní cuini-dé tñii ñaha-dé xii-yu candeca ñaha-dé quíhí<sup>n</sup> núú cuè dútú cúnúu ní cuu —càchí-yu xítnàhá-yu.

<sup>22</sup> Te ió iní-gã té Sàulú xáha<sup>n</sup>-dè xii-yu sã díú Jèsús cúú-gã Cristú Yaa ní tendaha Yá Ndióxi ní quixi ñuyíu-a, te xiã<sup>n</sup> ñã ní ñihí ñáyíu isràél ndécú ñúú Dàmascú tnúhu càhá<sup>n</sup>-yu, te ní cuñúhu vñí-yu.

*Té Sàulú ní dácú-dé núú ñáyíu isràél*

<sup>23</sup> Te sáta ní cuu tití nduu, te ní ndatnúhu cue téé isràél sã càhni-güedé té Sàulú. <sup>24</sup> Te té Sàulú ní ñihí-dé tnúhu nàcuáa càhá<sup>n</sup>-güedé cada ñaha-güedé xii-dé, te cuè nduu cuè níu nèhé cuendá-güedé yuyèhe núú ñúúdoho ndóho yuhu ñúú cuendá cuini-güedé tñii ñaha-güedé xii-dé te cahni ñaha-güedé. <sup>25</sup> Te ì<sup>n</sup> núú ndécá ñaha cue téé ní sàndáá iní-í tnúhu Jèsús cuáhá<sup>n</sup> ndéé núú ñúúdoho ndóho yuhu ñúú. Te ní sáá-güedé núú ndóho, te ní chíhí ñaha-güedé xii-dé xití tídihi te ní dándéé ñaha-güedé núú ñúhú, te ní quene-dé cuáhá<sup>n</sup>-dè.

*Te Sàulú ndécú-dé ñúú Jerusàlén*

<sup>26</sup> Te té Sàulú ní nasáá-dé ñúú Jerusàlén, te cuini-dé chitnahá-dé ñáyíu sàndáá iní tnúhu Jèsús, te ní yùhú-yu chí ní càhá<sup>n</sup>-yu sã dándàhú ñáhá-dé sã sàndáá iní-dé Jèsús. <sup>27</sup> Te té Bèé ndécá-dé té Sàulú cuáhá<sup>n</sup> núú ndécú cuè téé ní táuchíú<sup>n</sup> Jèsús dacuaàha ñaha xii-yu tnúhu-gã. Te ní cani té Bèé cuendú núú-güedé nàcuáa ní cuu ní naníhí tñáhá té Sàulú ndihi Jèsús ichi, te ní càhá<sup>n</sup> ndihi ñaha-gã xii-dé. Te ní xáha<sup>n</sup> tucu té Bèé nàcuáa ní càhá<sup>n</sup> té Sàulú tnúhu Jèsús núú ñáyíu Dàmascú, te ñã túú tñàhí ní yùhú-dé ní càhá<sup>n</sup>-dè, càchí té Bèé xáha<sup>n</sup>-dè xii-güedé. <sup>28</sup> Te ní xíndecu té Sàulú ndihi ñáyíu xidácuaàhá tnúhu-gã ñúú Jerusàlén. Te ní ndicuu ndicuu-dé ní càhá<sup>n</sup>-dè tnúhu Jèsús, te ñã túú tñàhí ní yùhú-dé <sup>29</sup> ní càhá<sup>n</sup> ndihi-dé ñáyíu isràél ñáyíu càhá<sup>n</sup> tnúhu griégú. Te ñáyíu-ã<sup>n</sup> ní ngúíta-yu ndàtnúhu-yu sã càhni ñáhá-yu xii-dé. <sup>30</sup> Te ñáyíu sàndáá iní tnúhu-gã ní ñihí-yu tnúhu nàcuáa cuini ñáyíu càhá<sup>n</sup> tnúhu griégú cada ñáhá-yu xii té Sàulú, núú ní sàndeca ñáhá-yu xii-dé ñúú Cèsareá, te yàcá<sup>n</sup> ní tendaha ñáhá-yu cuánuhú-dé ñúú Tarsú.

<sup>31</sup> Te sáta xiá<sup>n</sup> te ní sanaa-yu ñá túú-gá ní xóo cada úhú-yu nchaa ñáiyu sàndáá iní tnúhu Jèsús nihíi distritú Júdeá, ndihi distritú Galiléa, ndihi distritú Sàmariá. Te ní nihí ndéé-yu ní quidé-yu nàcuáa ní xáha<sup>n</sup> Yá Ndióxi cada-yu, te ío ní xindecu yiñhú-yu núú-gá, te Espiritú-gá ní chindee ñaha-xi xií-yu, te vai-gá ñáiyu ní sàndáá iní-yu tnúhu-gá.

*Té Pèlú ní quide tátna-dé té Èneás*

<sup>32</sup> Titní xichi ní sáhá<sup>n</sup> té Pèlú ní cáhá<sup>n</sup>-dé tnúhu Yá Ndióxi. Te ñ<sup>n</sup> nduu ní sáhá<sup>n</sup>-dé ñúú Lidá ní cáhá<sup>n</sup> ndihi-dé ñáiyu sàndáá iní ñáhá xii Jesús. <sup>33</sup> Te yacá<sup>n</sup> ní nanihí-dé ñ<sup>n</sup> tée nàni Eneás, te ní cuu úná cuía cùhú-dé, te ní lùha ñá cùú-gá candá nihnu-dé. <sup>34</sup> Te ní xáha<sup>n</sup> té Pèlú xii-dé:

—Èneás, Xítohó Jesucristú cada tátna ñaha-gá xii-n tnávii. Ndacóo te ndocani-n yúu-n —cachí-dé xáha<sup>n</sup>-dè.

Te òré-ni ní ndacóo-dé. <sup>35</sup> Te nchaa ñáiyu ñúú Lidá ndihi ñáiyu ñúú Sàron ní xiní-yu sá ní ndúha-dé, te ní sàndáá víhi iní-yu Xítohó Jesucristú.

*Ní ndoto tá Dòrcás*

<sup>36</sup> Te ñúú Jòpé ndécú ñ<sup>n</sup> ñadhií sàndáá iní-a<sup>n</sup> tnúhu Jèsús, te nàni-a<sup>n</sup> Tabitá, te tnúhu griégú xáhá<sup>n</sup>-yu Dòrcás, te ío váha ní xóo cada-a<sup>n</sup> chí ío váha iní-a<sup>n</sup>, te ní xóo chindee-a<sup>n</sup> ñáiyu ndàhú. <sup>37</sup> Te váha-ni ndècu-a<sup>n</sup> ni cuu, te ní tñii ñaha cuèhé ní xihí-a<sup>n</sup>, te ní nadacúchi ñahá-yu, te ní chihí ñahá-yu ñ<sup>n</sup> cuàrtú ndécú ndéé núú ñnu. <sup>38</sup> Te ñáiyu ní sàndáá iní tnúhu Jèsús ñúú Jòpé ní nihí-yu tnúhu sá ndécú té Pèlú ñúú Lidá. Te yatni-ni cáa ñúú-án, te ní tendahá-yu úú cue tée cuáhá<sup>n</sup>-güedé núú ndécú-dé cuendá cùña-güedé candeca ñaha-güedé xii-dé quihí<sup>n</sup> núú ndécú-yu. Te ní xáha<sup>n</sup>-güedé xii té Pèlú:

—Yáchí ná quihí<sup>n</sup>-ó ñúú-ndí, chí yacá<sup>n</sup> cáná ñahá-yu quihí<sup>n</sup>-n tnávii —cachí-güedé xáha<sup>n</sup>-güedé xii té Pèlú.

<sup>39</sup> Te té Pèlú ní xica-dé cuáhá<sup>n</sup>-dé ndihi cue tée-án ñúú Jòpé, te òré ní quexio-güedé ndihi-dé, te cuasáa ndihi ñaha-güedé cuàrtú ndéé núú ñnu. Te nchaa ñáiyu dihi ñáiyu quèé ní tacá ndéé ñáhá xii ndiyi-án xindáhyú-yu, te ní dánèhé ñahá-yu nchaa dóó ní cadúha ñaha ní xihí-án. Chí ní xóo cadúha-a<sup>n</sup> dícu<sup>n</sup>, te ní xóo cadúha-a<sup>n</sup> dío òré ní xindecu-a<sup>n</sup> ñuyiú-a, te nchaa xiá<sup>n</sup> ní dánèhé ñahá-yu xii té Pèlú. <sup>40</sup> Te té Pèlú ní xáha<sup>n</sup>-dè sá quèé-yu nchaa-yu quehé, te ní queé-yu. Te ní ngüñí xití-dé te ní cáhá<sup>n</sup> ndihi-dé Yá Ndióxi, te dátñuni ní ndacoto-dé núú cándòdo ndiyi-án, te ní xáha<sup>n</sup>-dè:

—Tabitá, ndacóo —cachí-dé xáha<sup>n</sup>-dè.

Te ní ndacoto-a<sup>n</sup> núú té Pèlú te ní ndacóo-a<sup>n</sup>. <sup>41</sup> Te ní tñii-dé ndaha-a<sup>n</sup> ní

nacanutñii ñaha-dè. Te ní cana-dé nchaa ñáiyu dihi ñáiyu quèé ndihi nchaa ñáiyu sàndáá iní tnúhu Jèsús cuèndá quini-yu sá ní ndoto-a<sup>n</sup>. <sup>42</sup> Te nchaa ñáiyu ñúú Jòpé ní nihí-yu tnúhu nàcuáa ní quide té Pèlú ní ndoto ñaha ní xihí-án, te vai-yu ní sàndáá iní-yu Xítohó Jesucristú. <sup>43</sup> Te titní nduu ní xindecu té Pèlú vehe té Xímú tée dàcuitá ñii.

## 10

*Té Pèlú ndihi té Còrneliú*

<sup>1</sup> Te ndècu ñ<sup>n</sup> tée nàni-dé Còrneliú ñúú Cèsareá te cùu-dé capitá<sup>n</sup>, te ndècu ndihi-dé ñ<sup>n</sup> cièndú sandadú. Te cue tée-án nàni-güedé Sandadú Itàliánú. <sup>2</sup> Te tée cùu capitá<sup>n</sup> ío váha iní-dé, te mee-dé ndihi ñadhií-dé ndihi nchaa landú-dé ío nèhé-yu sá yiñhú núú Yá Ndióxi, te sáha-dé ñáiyu ndàhú ñáiyu isràél dihú<sup>n</sup>, te ío cáhá<sup>n</sup> ndihi-dé Yá Ndióxi. <sup>3</sup> Te ñ<sup>n</sup> nduu dátñá òré caá úní sacuaa ní dácótó núú ñáhá-xi xii-dé sá ní sáhá<sup>n</sup> ñ<sup>n</sup> espíritú xinú cuèchi núú Yá Ndióxi núú-dé, te ní xáha<sup>n</sup>-xi:

—Còrneliú —cachí-xi xáha<sup>n</sup>-xi xii-dé.

<sup>4</sup> Te ní xiní-dé ndi ndúú xio núú-dé espíritú-án. Te ío ní yuhú-dé. Te ní xáha<sup>n</sup>-dè:

—¿Ná chíu<sup>n</sup> vèxi-n? —cachí-dé xáha<sup>n</sup>-dè.

Te xáha<sup>n</sup>-xi:

—Ío cáhá<sup>n</sup> ndihi-n Yá Ndióxi, te ñáiyu ndàhú sáñaha-n dihú<sup>n</sup>-n, te nchaa xiá<sup>n</sup> sa ñaha-gá. <sup>5</sup> Te vitna tendaha-n cuè tée na quihí<sup>n</sup>-güedé ñúú Jòpé quingana-güedé ñ<sup>n</sup> tée nàni Xímú, ãdi Pelú chí úú diu-dé, te candeca ñaha-güedé quixi. <sup>6</sup> Te òré quexio-dé te cachí tnúhu-dé nchaa dava-gá sá cuini Yá Ndióxi cada-n. Te ndècu-dé vehe ingá tucu tée nàni Xímú tée dàcuitá ñii, te vehe tée-án caá ñ<sup>n</sup> xio yuhu lamár —cachí-xi xáha<sup>n</sup>-xi xii-dé.

<sup>7</sup> Te sáta cuáhá<sup>n</sup> espíritú-án, te té Còrneliú ní cana-dé úú tnàhá cue tée xinú cuèchi núú-dé ndihi ñ<sup>n</sup> sandadú xinú cuèchi tucu núú-dé, te tnàhá sandadú-án ío cáhá<sup>n</sup> ndihi-dé Yá Ndióxi. <sup>8</sup> Te té Còrneliú ní cani-dé cuèndú núú-güedé nàcuáa ní cáhá<sup>n</sup> espíritú xinú cuèchi núú Yá Ndióxi. Te ní tendaha ñaha-dé xii-güedé cuáhá<sup>n</sup>-güedé ñúú Jòpé.

<sup>9</sup> Te nduu tñéé-án ñuhú-ni-güedé ichi cuáhá<sup>n</sup>-güedé, te cùu-xi dátñá òré cauxúú nduu ta cùyatni-güedé ñúú-án, te òré-án ní sáá té Pèlú díqui véhé cáhá<sup>n</sup> ndihi-dé Yá Ndióxi. <sup>10</sup> Te òré-án sa xihí-dé docó cuini-dé caxi-dé, te ñini cadúha-yu sá caxi-dé ní dácótó núú ñáhá-xi <sup>11</sup> sá ní xiní-dé ñ<sup>n</sup> sá ndécú andiu, te cáa dátñá caá ñ<sup>n</sup> dóó cáhnú nhicú<sup>n</sup> yoho ndi cùmi xiquí-xi véxi cuu<sup>n</sup> núú ñuhú. <sup>12</sup> Te núú dóó-án yódó cóo ndihi quiti ndàva ndihi nchaa núú quiti ndéé cùmi sáhá-xi. <sup>13</sup> Te ní tecú dóho-dé cáhá<sup>n</sup> ñ<sup>n</sup> sá cáhá<sup>n</sup>, te xáha<sup>n</sup> sá cáhá<sup>n</sup>-án xii-dé:



—Pèlú, ndacuñí cahni-n nděda-ni càa quiti-a caxi-n-di —cachí sá cáhá<sup>n</sup>-án xáha<sup>n</sup>-xi xii-dé.

<sup>14</sup> Te té Pèlú ní xáha<sup>n</sup>-dè:

—Vá cáhni-í-di chí cächí tnúhu sá sánú lchi ñaha xii nchúhú ñáyiu isráel sá vā cúú caxi-ndí nchaa quiti-a chí cuu cuéchi, te vátá caxi-gá-í-di ní ñ<sup>n</sup> xito —cachí-dé xáha<sup>n</sup>-dè.

<sup>15</sup> Te ní cáhá<sup>n</sup> tucu sá ní cáhá<sup>n</sup>-án, te xáha<sup>n</sup>-xi:

—Vá cúú cächí-n sá vā cúú caxi-n-di, chí mee Yá Ndióxi ní cachí-gá sá díú nchaa quiti-a cuu caxi-o vitna —cachí sá ní cáhá<sup>n</sup>-án xáha<sup>n</sup>-xi xii-dé.

<sup>16</sup> Te duca<sup>n</sup> ní cáhá<sup>n</sup> sá ní cáhá<sup>n</sup>-án ñí xito, te dātñúni cuándaa tucu dóó-án andiu.

<sup>17</sup> Te té Pèlú ñá ní cūtnumí iní-dé ná cuéndá duca<sup>n</sup> ní dácótó núú ñáhá-xí xii-dé, núú xiá<sup>n</sup> ío cuéhé ní sani iní-dé. Te òré-án ní quexio cue téé ní tendaha té Còrneliú ndéé yuyèhe, chí ndi vehe ndi vehe cuáhá<sup>n</sup>-güedé ndúcú tnúhu-güedé ndéé cáá vèhe té Xímú téé dii vèhe-xi ndecu té Pèlú. <sup>18</sup> Te ní cáhá<sup>n</sup> níhi-güedé, te xáha<sup>n</sup>-güedé:

—Ñá túú cūdana iha ndecu ñ<sup>n</sup> téé nānducu-ndí nání-dé Xímú, àdi Pelú chí úú diu-dé —cachí-güedé xáha<sup>n</sup>-güedé.

<sup>19</sup> Te té Pèlú vai sani iní-dé sá ní dácótó núú ñáhá-xí xii-dé. Te òré-án ní xáha<sup>n</sup> Espiritú Yá Ndióxi xii-dé:

—Cundedóho-n ñ<sup>n</sup> tnúhu na cáhá<sup>n</sup>-í-a. Ní quexio úní cue téé nānducu ñaha xii-n.

<sup>20</sup> Yáchí, cuandèe chí quíhí<sup>n</sup>-n ndíhi-güedé, te vā yúhú-n chí yúhú ní xáha<sup>n</sup>-í véxi cuaca ñaha-güedé xii-n —cachí Espiritú-gá xáha<sup>n</sup>-xi xii té Pèlú.

<sup>21</sup> Te ní xica-dé cuándee-dé núú ndécú cué tee xica nanducu ñaha xii-dé, te xáha<sup>n</sup>-dè xii-güedé:

—Yúhú cúú téé nānducu-ndo-án. Náú-í-a núú ná chíú<sup>n</sup> cuini ñáhá-ndó —cachí-dé xáha<sup>n</sup>-dè xii-güedé.

<sup>22</sup> Te xáha<sup>n</sup>-güedé:

—Téé cūu capitá<sup>n</sup> téé nani Corneliú ní tendaha ñaha-dé véxi-ndí, te téé-án ío váha iní-dé, chí ío sándáá iní-dé Yá Ndióxi, te nchaa ñáyiu isráel ío váha cáhá<sup>n</sup>-yu cuéndá-dé. Te ñ<sup>n</sup> espíritú xínú cuéchi núú Yá Ndióxi ní xáha<sup>n</sup>-xi xii-dé sá cáná ñaha-dé xii-n quíhí<sup>n</sup>-n vèhe-dé dacúaha-n-dé tnúhu Yá Ndióxi —cachí cue téé ní tendaha té Còrneliú xáha<sup>n</sup>-güedé xii té Pèlú.

<sup>23</sup> Te ní xáha<sup>n</sup> té Pèlú sá quíhu-güedé vehe-dé, te candeca tnàha-güedé ndíhi-dé quíhí<sup>n</sup> ndéé nduu tnéé. Te nduu tnéé-án ní xica-güedé ndécá tnàha-güedé ndíhi té Pèlú cuáhá<sup>n</sup>, te tnàhá ñ<sup>n</sup> úú cue téé sándáá iní tnúhu Jèsús ñúú Jòpé cuáhá<sup>n</sup> ndíhi ñaha-güedé xii-dé.

<sup>24</sup> Te ndéé ingá nduu ní quexio-güedé ñúú Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndíhi ñadhí<sup>n</sup>-dé ndíhi nchaa landú-dé ndíhi cue téé ío váha tnàhá tnúhu ndíhi-dé, chí ní cana ñaha-dé ní nitnàhá-yu ndíhi-dé cundetu-yu té Pèlú. <sup>25</sup> Te sátá ní quexio té Pèlú vehe té Còrneliú, te ní quee-dé quehé, te ní ngüñí xítí-dé núú té Pèlú chíñúhu ñaha-dé ní cūu. <sup>26</sup> Te té Pèlú ní xáha<sup>n</sup>-dè:

—Ndacuñí vā ngüñí xítí-n núú-í chí ñá díú Ndióxi cúú-í, díco ñ<sup>n</sup> téé ñuyúú-a cúú-í —cachí té Pèlú xáha<sup>n</sup>-dè xii-dé.

<sup>27</sup> Te ta cáhá<sup>n</sup> té Pèlú ndíhi té Còrneliú cuánguihu-güedé xítí vehe, te chitu ñáyiu xixíhi xítí vehe. <sup>28</sup> Te ní xáha<sup>n</sup> té Pèlú xii-yu:

—Sa ñaha-ndo sá cächí tnúhu sá sánú lchi ñaha xii nchúhú ñáyiu isráel sá vā cúú quixi-ndí vehe ní ñ<sup>n</sup> nchohó ñáyiu ñá túú cūu ñáyiu isráel te ní vā cúú tnàhá tnúhu ndíhi ñaha-ndí xii-ndo. Dico Yá Ndióxi ní cachí-gá sá vā cúú cáhá<sup>n</sup>-í sá vā cúú cáhá<sup>n</sup> ndíhi-í ñáyiu ñá túú cūu ñáyiu isráel, chí cuu cuéchi. <sup>29</sup> Núú xiá<sup>n</sup> ndíhi-ni véxi-í òré ní quexio tnúhu sá cáná ñaha-ndo. Te cachí tnúhu-ndo ná cuéndá cáná ñaha-ndo —cachí té Pèlú xáha<sup>n</sup>-dè xii-yu.

<sup>30</sup> Te té Còrneliú ní xáha<sup>n</sup>-dè:

—Ní cuu cūmí nduu, te diu-ni dátñá òré iha cūu-xi, te yúhú ndècu-í diu-ni vehe-í, te ñá túú tnàhá ná véxi-í cáhá<sup>n</sup> ndíhi-í Yá Ndióxi, te òré-án ní quexio ñ<sup>n</sup> espíritú xínú cuéchi núú-gá nñmú-xí dóó cuixá<sup>n</sup> dóó chàhncí. <sup>31</sup> Te cächí-xi: “Còrneliú, ní xíndedóho Yá Ndióxi tnúhu ní cáhá<sup>n</sup>-n ndíhi-gá, te xíní-gá sá sáñaha-n díhú<sup>n</sup> xii ñáyiu ndàhú. <sup>32</sup> Te ñúú Jòpé ndécú ñ<sup>n</sup> téé nani Xímú, àdi Pelú chí úú diu-dé, te ndècu-dé vehe ñ<sup>n</sup> téé nani tucu Xímú téé dàcuta ñúu, te càa vehe-dé ñ<sup>n</sup> xio yuhu lámár, te cana-n-dè ná quixi-dé ndatnúhu-n ndíhi-dé”, duha ní cáhá<sup>n</sup> espíritú xínú cuéchi núú Yá Ndióxi. <sup>33</sup> Núú xiá<sup>n</sup> ndíhi-ni ní cana ñaha-í xii-n. Te táxáhu xii-n sá véxi-n chí iha ndècu-ndí nchaa-ndí ndétú ñaha-ndí xii-n cūndedóho-ndí tnúhu Yá Ndióxi, te cuini-ndí cachí tnúhu-n nchaa tnúhu ní cachí Yá Ndióxi cáhá<sup>n</sup>-n —cachí té Còrneliú xáha<sup>n</sup>-dè.

*Té Pèlú ní ndatnúhu-dé ndíhi ñáyiu ní tacá vehe té Còrneliú*

<sup>34</sup> Te té Pèlú xáha<sup>n</sup>-dè xii-yu:

—Vitna ní xíní-í sá Yá Ndióxi cáhá<sup>n</sup> ndíhi-gá ñáyiu cuéi ndèda-ni càa ñúú, te ñ<sup>n</sup>-ní quide-gá ndíhi nchaa-yu. <sup>35</sup> Te nchaa ñáyiu nèhe sá yáñúhu núú Yá Ndióxi, te xíquide váha-yu, te nchaa-yu cūu váha iní ñáhá-gá xii-yu. Te ñá túú quide cuéndá-gá cuéi ná ñáyiu ñúú cúu-yu. <sup>36</sup> Te Yá Ndióxi ní tendaha-gá Xitohó Jesucristú ní sáhá<sup>n</sup>-gá

ní xíndecu-gá nació<sup>n</sup> Isráel, te ní xáha<sup>n</sup>-gá xii-yu #<sup>n</sup> tnúhu váha nácuáa cuu váha iní-yu. Te diu-ni mee Jèsús cúnúu-gá núú ñáiyu ní caa xico ñuyúú. <sup>37</sup> Te nàha-ndo sá díhna-gá ndí Juáa ní cáhá<sup>n</sup> ndí tnúhu Yá Ndióxi núú ñáiyu, te ní dácuándute ñaha ndí xii-yu. Te dátnúni ní ngúíta Jèsús ní cáhá<sup>n</sup>-gá tnúhu-gá distritú Galiléa, te dátnúni ní sáhá<sup>n</sup>-gá nihí nació<sup>n</sup> Isráel ní cáhá<sup>n</sup>-gá tnúhu-gá núú ñáiyu. <sup>38</sup> Te sa nàha-ndo sá Yá Ndióxi ní sáñaha-gá Espíritú-gá xii Jèsús téé ñuú Nazàrét ndécú ndíhi-dé chindée ñaha-xi xii-dé. Te nàha-ndo sá ní xica cuu Jèsús ní quide tátna-gá nchaa ñáiyu yíhi ñaha espíritú cúndíhi yucu ñávaha. Te ío vâi-gá sá váha ní quide ñaha-gá xii-yu, te duca<sup>n</sup> ní quide-gá, chí Yá Ndióxi ní chindee ñaha-gá. <sup>39</sup> Te mee-ndí ní xini-ndí nácuáa ní quide Jèsús ñuú Jerusalén ndíhi nihí nació<sup>n</sup> Isráel. Te ní sata caa ñaha-güedé xii-gá núú cùrxí te yácá<sup>n</sup> ní xihí-gá. <sup>40</sup> Te núú ùní nduu ní dándótó ñaha Yá Ndióxi xii-gá. Te ní cuini-gá sá cúndecu Xítohó Jesucristú titní nduu sáta ní ndoto-gá cuendá cáhá<sup>n</sup> ndíhi ñaha-gá xii-ndí nchaa-ndí nácuáa ní xica cuu-ndí ndíhi-gá. <sup>41</sup> Te ñá ncháá ñáiyu ní xini ñáhá xii-gá, chí mee-ni nchúhú cue téé ní cachí-gá sá cáhá<sup>n</sup> ndáá-ndí sá ní ndoto-gá, chí ní xíndecu ndíhi-ndí-gá, te ní xihí ní xexi-ndí ndíhi-gá, núú cáhá<sup>n</sup> ndáá-ndí sá ní ndoto-gá. <sup>42</sup> Te ní cachí-gá sá nchúhú quíhí<sup>n</sup>-ndí cúñaha-ndí xii ñáiyu sá méé Yá Ndióxi ní táuchíu<sup>n</sup>-gá sá Jèsús cada ndáá-gá cuéchi nchaa ñáiyu ndécú vivú ndíhi cuéchi nchaa ñáiyu ní xihí. Te duca<sup>n</sup> ní xáha<sup>n</sup> Yá Ndióxi xii Jèsús, te diu-ni duca<sup>n</sup> ní cachí Jèsús cáhá<sup>n</sup>-ndí. <sup>43</sup> Te cue téé ní cáhá<sup>n</sup> tnúhu Yá Ndióxi ndéé sanaha ní cáhá<sup>n</sup>-güedé sá quíxi Jèsús, te ní cachí-güedé sá ncháá ñáiyu na quíndáá iní ñáhá xii Jèsús, te cada cáhnu iní-gá nchaa cuéchi-yu —cachí té Pèlú xáha<sup>n</sup>-dè xii-yu.

*Ní quexio Espíritú Yá Ndióxi ní ngúndecu ndíhi cue ñáiyu ñá túú cùu ñáiyu isráel*

<sup>44</sup> Te meí òré cáhá<sup>n</sup>-dè ndédóho-yu ní quexio Espíritú Yá Ndióxi ní ngúndecu ndíhi nchaa ñáiyu-án. <sup>45</sup> Te cue téé isráel cuáhá<sup>n</sup> ndíhi té Pèlú, cue téé ní sándáá iní tnúhu Jèsús ní cuñúhu víhi-güedé sá ní quexio Espíritú Yá Ndióxi ní ngúndecu ndíhi-yu, chí cuendá sá ñá díú ñáiyu isráel cùu-yu núú xíá<sup>n</sup> ní cuñúhu-güedé. <sup>46</sup> Te ní cutnùni sá ní quexio Espíritú Yá Ndióxi ní ngúndecu ndíhi-yu, chí ní ngúíta-yu cáhá<sup>n</sup>-yu tnúhu sá dácahu iní ñáhá Espíritú-gá, tnúhu sá ñá túú xini-yu cáhá<sup>n</sup>-yu. Te ní ndacá<sup>n</sup> táhú-yu núú Yá Ndióxi cuendá nchaa sá ní quide-gá. <sup>47</sup> Te dátnúni ní xáha<sup>n</sup> té Pèlú:

—Vitna te cuandute ñáiyu ní natuha ichi Xítohó Jesucristú chí sa ndécú ndíhi-yu

Espíritú Yá Ndióxi dátna cuini-ndó ndécú ndíhi nchoo, núú xíá<sup>n</sup> vá cúú cáchí dava-gá ñáiyu sá vá cúú cuandute-yu —cachí-dé xáha<sup>n</sup>-dè xii-yu.

<sup>48</sup> Te dátnúni ní xáha<sup>n</sup>-dè xii ñáiyu:

—Vitna te cuandute-ndo, te òré-án te cacunehe-ndo Xítohó Jesucristú —cachí-dé xáha<sup>n</sup>-dè xii-yu.

Te dátnúni ní cáhá<sup>n</sup> ndáhú-yu núú té Pèlú cundecu ndíhi ñaha-dè xii-yu #<sup>n</sup> úú nduu.

## 11

*Té Pèlú ní cani-dé cuendú núú ñáiyu sándáá iní tnúhu Jèsús ñuú Jerusalén*

<sup>1</sup> Te cue téé ní táuchíu<sup>n</sup> Jèsús dacuàha ñaha xii ñáiyu tnúhu-gá, ndíhi cue ñáiyu ní sándáá iní tnúhu-gá, ñáiyu ndécú distritú Jüdeá ní nihí-yu tnúhu sá ñáiyu ñá túú cùu ñáiyu isráel ní sándáá iní-yu tnúhu Yá Ndióxi. <sup>2</sup> Te òré ní ndexio té Pèlú ñuú Jerusalén, te ñáiyu isráel ñáiyu ní cachí sá cáda ncháa nácuáa ní cáhá<sup>n</sup> ndíhi Moisés ní satnuhu ñáhá-yu xii-dé. <sup>3</sup> Te ní xáhá<sup>n</sup>-yu xii té Pèlú:

—¿Ná cuendá ní sáhá<sup>n</sup>-n ndéé ndíacá<sup>n</sup> ní cáhá<sup>n</sup> ndíhi-n ñáiyu-án, te ñá túú quidè-yu dátna quidè nchóo-í? Te ní sáhá<sup>n</sup>-n yácá<sup>n</sup> ní xexi-n ndíhi-yu —cachí-yu xáhá<sup>n</sup>-yu xii-dé.

<sup>4</sup> Te té Pèlú ní cani-dé cuendú nácuáa ní cuu núú ní sáhá<sup>n</sup>-dè, te xáha<sup>n</sup>-dè:

<sup>5</sup> —Ní xíndecu-í ñuú Jòpé. Te òré cáhá<sup>n</sup> ndíhi-í Yá Ndióxi, te ní dácóto ñaha-xi xii-í sá vèxi cuu<sup>n</sup> #<sup>n</sup> dóo cáhnu àndiu, te ndútu ndí cumí xíquí-xi, te ní ngava-xi núú ndécú-í. <sup>6</sup> Te ní xindéhé váha-í, te ní xini-í nchaa quiti yòdo núú-xi. Te #<sup>n</sup> xichi yòdo quiti cúmi sáhá-xi, te #<sup>n</sup> xichi yòdo quiti déé, te #<sup>n</sup> xichi yòdo cóo, te #<sup>n</sup> xichi yòdo quiti ndava. <sup>7</sup> Te ní tecú dóho-í cáhá<sup>n</sup> #<sup>n</sup> sá cáhá<sup>n</sup>, te cachí-xi: “Pèlú, ndacuñí cahni-n ndéda-ni caa quiti-a caxi-n-di”, cachí sá ní cáhá<sup>n</sup>-án. <sup>8</sup> Te ní xáha<sup>n</sup>-í: “Vá cáhni-í-di chí cachí tnúhu sá sanú ichi ñaha xii nchúhú ñáiyu isráel sá vá cúú caxi-ndí nchaa quiti-a”, xáha<sup>n</sup>-í. <sup>9</sup> Te ní tecú dóho-í cáhá<sup>n</sup>-ni tucu núú ñnu, te cachí sá cáhá<sup>n</sup>-án: “Vá cúú cachí-n sá vá cúú caxi-n-di, chí mee Yá Ndióxi ní cachí-gá sá díú ncháa quiti-án cuu caxi-o”, cachí sá cáhá<sup>n</sup>-án. <sup>10</sup> Te duca<sup>n</sup> ní cáhá<sup>n</sup> sá ní cáhá<sup>n</sup>-án ùní xito, te dátnúni cuandaa dóo-án ndíhi nchaa quiti-án andiu. <sup>11</sup> Te òré-ni ní quexio ùní cue téé vehe núú ndécú-í. Te cue téé-án ní tendaha ñaha #<sup>n</sup> téé ñuú Cèsareá nándücu ñaha-güedé xii-í. <sup>12</sup> Te mee Espíritú Yá Ndióxi ní cachí-xi sá quíhí<sup>n</sup>-í ndíhi-güedé, te ní cachí-xi sá ñá túú ñá cani iní-í. Te tnáhá ífú cue téé ndécú iha ní sáhá<sup>n</sup> ndíhi ñaha-güedé xii-í, te nchaa-ndí ní sáhá<sup>n</sup>-ndí vehe té Còrneliú ñuú Cèsareá. <sup>13</sup> Te ní cani-dé cuendú nácuáa ní cuu ní sáhá<sup>n</sup> #<sup>n</sup> espíritú xínú cuéchi núú Yá Ndióxi vehe-dé, te ní quíhu-xi ndéé

xítí vehe-dé, te ní xáha<sup>n</sup>-xi xii-dé: “Tendaha-n cuè téé na quíhí<sup>n</sup>-güedé ñúú Jòpé quíngana-güedé ì<sup>n</sup> téé nàni Xímú, àdi Pelú chí úú òú-dé. Te candeca ñaha-güedé quixi. <sup>14</sup> Te téé-án cachí tnúhu-dé nása cada-n naníhí tãhú-n ndíhí ñadíhí-n, ndíhí landú-n, ndíhí nchaa ñáyíu xínu cuechi vehe-n”, duha ní xáha<sup>n</sup> espíritú-án xii té Còrneliú. <sup>15</sup> Te òré ní ngúíta-í cãhá<sup>n</sup> ndíhí-í-yu ní quexio Espíritú Yã Ndiòxí ní ngúndecu ndíhí-yu dàtná ní quide-xi cútñhá ní taxi Yá Ndiòxí Espíritú-gã ndéé díhna ní ngúndecu ndíhí nchoo. <sup>16</sup> Te ní ndacu iní-í nàcuáa ní cãhá<sup>n</sup> Xítóhó Jesucristú, te duha ní cachí-gã: “Té Juáá ní xóo dacuãndute-dé ñáyíu, dico yúhú sãñaha-í Espíritú Yã Ndiòxí cundecu ndíhí-yu”, duha ní cachí-gã. <sup>17</sup> Te Yá Ndiòxí ní sãñaha-gã Espíritú-gã cundecu ndíhí ñáyíu ñã túú cùu ñáyíu isràèl dàtná ní quide-gã cútñhá ní sãndáá iní-ó tnúhu Jèsús, núu xiã<sup>n</sup> vá cachí-í sá vã cúú càda-í ì<sup>n</sup> sá cuiñí Yá Ndiòxí cada-í —cachí té Pèlú xãha<sup>n</sup>-dè xii-yu.

<sup>18</sup> Te sáta dúcã<sup>n</sup> ní xáha<sup>n</sup> tã Pèlú, te ñã túú-gã ná tnúhu ní cãhá<sup>n</sup>-yu, te ío ní cudíí iní-yu nchaa nàcuáa ní quide Yá Ndiòxí, te ní xítñhá-yu:

—Tnãhá nchaa ñáyíu ñã túú cùu ñáyíu isràèl naníhí tãhú-yu núu na dàñã-yu nchaa sá cuèhé sá dúhá quidè-yu, chí duca<sup>n</sup> cuiñí Yá Ndiòxí cunduu —càchí-yu xítñhá-yu.

*Ñáyíu sãndáá iní tnúhu Jèsús ñúú Antiòquiá*

<sup>19</sup> Te sáta ní sahní-güedé té Tèvã, te ní cuiñí-güedé cada úhú-güedé nchaa ñáyíu ní sãndáá iní-xi tnúhu Jèsús, te ní xíté nuú-yu ndí tñhá ì<sup>n</sup> ñúú. Te davá-yu cuáhã<sup>n</sup>-yu ndéé distritú Fènicia ndíhí distritú Chìpré ndíhí ñúú Antiòquiá. Te ní cãhá<sup>n</sup>-yu tnúhu Jèsús núu mee-ní ñáyíu isràèl, te ñã ní xítñhu-yu dava-gã-yu. <sup>20</sup> Te dava-gã ñáyíu distritú Chìpré ndíhí ñáyíu ñúú Crené ní sãhá<sup>n</sup>-yu ñúú Antiòquiá. Te ñã díú mèe-ní ñáyíu isràèl ní cãhá<sup>n</sup> ndíhí-yu, chí tñhá ñáyíu ñã túú cùu ñáyíu isràèl ní xãhá<sup>n</sup>-yu tnúhu Jèsús. <sup>21</sup> Te ní chindee ñaha-gã xii ñáyíu cãhá<sup>n</sup> tnúhu-gã, te vãi-gã-yu ní sãndáá iní-yu-gã chí ní tuhã-yu ichi-gã.

<sup>22</sup> Te ñáyíu ndècu ñúú Jerusálén ñáyíu ní sãndáá iní tnúhu Jèsús ní níhí-yu tnúhu nàcuáa ní cuu, núu xiã<sup>n</sup> ní tendãhá-yu té Bèe cuáhã<sup>n</sup>-dè ñúú Antiòquiá. <sup>23</sup> Te òré ní quexio té Bèe, te ní xini-dé nàcuáa ní quide ñaha-gã xii-yu sá ní naníhí tãhú-yu, núu xiã<sup>n</sup> ío ní cudíí iní-dé. Te ní dácãhú iní ñãhá-dé, te ní xãha<sup>n</sup>-dè:

—Ío nducu ndèe-ndo cada-ndo nchaa sá cãchí Yá Ndiòxí cada-ndo —cãchí-dé xãha<sup>n</sup>-dè xii-yu.

<sup>24</sup> Te té Bèe cúú-dé ì<sup>n</sup> téé váha iní-xi, te ndècu ndíhí-dé Espíritú Yã Ndiòxí, te ío

sãndáá iní-dé tnúhu Jèsús. Te vãi vihi ñáyíu ní tuhã-yu ichi-gã.

<sup>25</sup> Te dàtnùni cuáhã<sup>n</sup> té Bèe ñúú Tàrsú cuánúndúcú-dé té Sàulú. <sup>26</sup> Te òré ní naníhí ñãhá-dé, te ndèca ñaha-dé cuáhã<sup>n</sup> ñúú Antiòquiá, te yácã<sup>n</sup> ní xindecu-güedé ì<sup>n</sup> cuíá ndíhí ñáyíu ní sãndáá iní tnúhu Jèsús, te vãi-yu ní dácúháã ñaha-güedé tnúhu-gã. Te òú-ni ñúú Antiòquiá ní dánání ñãhá-yu Cristiánú xii nchaa ñáyíu sãndáá iní tnúhu Jèsús.

<sup>27</sup> Te ndéé dàvã-á<sup>n</sup> ní quee ì<sup>n</sup> úú cue téé cãhá<sup>n</sup> tnúhu Yá Ndiòxí ñúú Jerusálén cuáhã<sup>n</sup>-güedé ñúú Antiòquiá. <sup>28</sup> Te ì<sup>n</sup>-dè nání-dé Àgabú, te ní chindee ñaha Espíritú Yã Ndiòxí xii-dé, te ní sãhá<sup>n</sup>-dè núu nchaa ñáyíu sãndáá iní tnúhu-gã, te ní xãha<sup>n</sup>-dè xii-yu sá quíxí ì<sup>n</sup> tnamã níhí ñuyú. Te duca<sup>n</sup> ní cuu sáta ní ngúnutñí té Clãudiú téé yíndaha cuèhé nació<sup>n</sup>. <sup>29</sup> Núu xiã<sup>n</sup> nchaa ñáyíu sãndáá iní tnúhu Jèsús ñúú Antiòquiá ní ndatnúhu-yu sá chindèe-yu nchaa ñáyíu sãndáá iní tnúhu-gã ndécú distritú Jüdeá cuèndá vá ndóhó viñí-yu docó. Te nàcuáa ní níhí-yu, te duca<sup>n</sup> ní sacã<sup>n</sup> tñãhá-yu. <sup>30</sup> Te ní tacá díhú<sup>n</sup>-á<sup>n</sup>, te nèhe té Bèe ndíhí té Sàulú cuáhã<sup>n</sup>, cuãha-güedé cue téé yíndaha ñáyíu sãndáá iní tnúhu-gã.

## 12

*Sáta ní xihí té Jacobó, te ní ngava té Pèlú vecaá*

<sup>1</sup> Te ndéé dàvã-á<sup>n</sup> ní ngúíta té Hèrodés téé yíndaha ñaha xii ñáyíu isràèl ní quide úhú-dé ì<sup>n</sup> úú ñáyíu sãndáá iní tnúhu Yá Ndiòxí. <sup>2</sup> Te ní táuchíu<sup>n</sup>-dè ní tñii-güedé té Jacobó ñani té Juáá, te ní sahní ñaha-güedé ndíhí machítí.

<sup>3</sup> Te ío ní cudíí iní dava ñáyíu isràèl cuèndá sá ní sahní ñaha-güedé xii té Jacobó, núu xiã<sup>n</sup> ní tendaha túcu té Hèrodés sandadú-dé ní sãhá<sup>n</sup> tñii tucu-güedé té Pèlú. Te duca<sup>n</sup> ní quide-dé cútñhá ní xóo vico ní xexí-yu pãá sã ñã túú yíhí levadurá. <sup>4</sup> Te ní naníhí-güedé té Pèlú, te ní tñii ñaha-güedé ndécã ñaha-güedé cuáhã<sup>n</sup> vecaá. Te té Hèrodés ní táuchíu<sup>n</sup>-dè cuáhã<sup>n</sup> sãhú<sup>n</sup> ì<sup>n</sup> sandadú cündèe-güedé té Pèlú. Te ní xãha<sup>n</sup>-dè:

—Cundeé-ndó ndí cúmí ndí cúmí-ndó téé-án —cãchí-dé xãha<sup>n</sup>-dè xii-güedé.

Te té Hèrodés ní sani iní-dé queñuhu-dé té Pèlú vecaá òré ná yãha vico cuèndá cahni ñaha-güedé cãhá<sup>n</sup>-dè ní cùu. <sup>5</sup> Te ní xihí-ni té Pèlú vecaá, te ní xindee cuaa ñaha sandadú xii-dé. Te cue ñáyíu sãndáá iní tnúhu Yá Ndiòxí ío ní xícã<sup>n</sup> tãhú-yu núu-gã cuèndá sã ñã túú nã cada ñaha-güedé xii-dé.

*Yá Ndiòxí ní dácãcu-gã té Pèlú vecaá*

<sup>6</sup> Ì<sup>n</sup> niú-gã quíhí té Pèlú vecaá ní cùu, te nduu tñèe tauchíu<sup>n</sup> té Hèrodés quíhí<sup>n</sup> sandadú queñuhu ñaha-güedé xii-dé vecaá

cuendá quini nchaa ñayiu nása cada ñaha-güedé ní cúu. Te té Pèlú caá-dé xidí-dé xití vecaá, te ndi ndúú dúcú<sup>n</sup> ndáhá-dé ndútú cadená, te xio xio ññi-dé ndécú sándadú, te dava-gá sandadú xindeé-güedé yehe vecaá. <sup>7</sup> Te ní quexio ñ<sup>n</sup> espíritu xínú cuèchi núú Yá Ndióxi xití vecaá núú caá té Pèlú xidí-dé, te uu<sup>n</sup> ní ní dáyèhé-xi xití vecaá, te ní danguíhi ñaha-xi xii-dé, te xáha<sup>n</sup>-xi xii-dé:

—Yáchí, ndácóo —càchí-xi xáha<sup>n</sup>-xi xii-dé.

Te ní ndacóo-dé, te nchaa cadená ndútú dúcú<sup>n</sup> ndáhá-dé ní nandáxi. <sup>8</sup> Te ní xáha<sup>n</sup> tucu espíritu-á<sup>n</sup> xii-dé:

—Yáchí, nucuíhnu dóo-n, te ndíhu-n chàu-n —càchí-xi xáha<sup>n</sup>-xi xii-dé.

Te ní ndíhu nuu-dé dóo-dé, te ní xáha<sup>n</sup> tucu espíritu-á<sup>n</sup>:

—Candixi dóo-n, te na quíhi<sup>n</sup>-ó —càchí-xi xáha<sup>n</sup>-xi xii-dé.

<sup>9</sup> Te té Pèlú ní chinchícú<sup>n</sup>-dé espíritu-á<sup>n</sup>, te ñá ní cùtnuní iní-dé núu ndáá ñ<sup>n</sup> espíritu xínú cuèchi núú Yá Ndióxi duca<sup>n</sup> quide ádi ñhá, te dàcoto ñaha-xi xii-dé ní sani iní-dé. <sup>10</sup> Te ndëndaha-ni-dé espíritu-á<sup>n</sup> cuáhá<sup>n</sup> ní yáha-dé nàcuáa xñutññ sandadú, te ta yáha-gá-dé núú ndécú dáva-gá-güedé. Te ní sáá-dé ndéé yuyèhe núú ndéí caá nàcuáa ní yáha ichi sá cuáhá<sup>n</sup> ndéé xití ñuú, te ní nacaá<sup>n</sup> méé yehe-á<sup>n</sup>, te ní quee-dé cuáhá<sup>n</sup>-dé ndíhi espíritu-á<sup>n</sup>. Te ní tnahá-dé ñ<sup>n</sup> tnuú, te yacá<sup>n</sup> ní dándóo ñaha espíritu-á<sup>n</sup> xii-dé. <sup>11</sup> Te dàtnuní ní nene váha sani núú-dé, te ní cutnñí iní-dé, te ní cachí-dé:

—Ndáá sá Yá Ndióxi ní tendaha-gá espíritu-á<sup>n</sup> ní quixi-xi ní dácácu ñaha-xi xii-dé cuendá sá vè cáhñí ñaha té Hèrodés. Te dava ñayiu israél io ní cudíí iní-yu cuendá sá ní cuiní té Hèrodés cahni ñaha-dé xii-dé —duha ní cachí-dé sátá ní cutnñí iní-dé.

<sup>12</sup> Te sátá ní cutnñí iní-dé sá ní cácu-dé, te cuáhá<sup>n</sup>-dé vehe ñ<sup>n</sup> ñaha nani Mariá náná té Juáa, ádi Mácú chi úú diu-dé, te xiá<sup>n</sup> ndécú vai-yu càhá<sup>n</sup> ndíhi-yu Yá Ndióxi. <sup>13</sup> Te té Pèlú ní quexio-dé ndéé yuyèhe ní dácásá<sup>n</sup>-dé, te ní quixi ñ<sup>n</sup> xíchí nání Ródé ní quixi ndehe-xi ná cúú ñayiu dácasa<sup>n</sup>. <sup>14</sup> Te ní nucúhu<sup>n</sup> ndudú-xi sá díú té Pèlú, te ní cudíí víhí iní-xi, dico ñá ní nacaá<sup>n</sup>-xi yuyèhe. Te ní quene cunu-xi cuáhá<sup>n</sup> ngúñaha-xi xii-yu sá nútññí té Pèlú yuyèhe ndaa quehé. <sup>15</sup> Te ñá ní sándáa iní-yu tñúhu ní cáhá<sup>n</sup>-xi, te xáhá<sup>n</sup>-yu xii-xi:

—¡Ná tñúhu víhi cáhá<sup>n</sup>-ó<sup>n</sup> xíchí lúcú! —càchí-yu xáhá<sup>n</sup>-yu.

Te xáha<sup>n</sup>-xi sá ndáa nútññí-dé, te xáhá<sup>n</sup>-yu: —Ná díú té Pèlú chi espíritu sá xitó ñaha xii-dé cúú sá càhá<sup>n</sup> —càchí-yu xáhá<sup>n</sup>-yu xii-xi.

<sup>16</sup> Te òré duca<sup>n</sup> xñtñahá-yu, te té Pèlú ní dácásá<sup>n</sup> tucu-dé yuyèhe. Te ní sáhá<sup>n</sup>-yu ní

nacaá<sup>n</sup>-yu yuyèhe, te ní xiní-yu sá díú té Pèlú, te ní cuñúhu víhi-yu. <sup>17</sup> Te ní quide-dé ndaha-dé núu-yu cuendá cadí-yu yuhú-yu. Te ní ngúita-dé ní cani-dé cuendú nàcuáa ní quide ñaha Yá Ndióxi xii-dé sá ní dácácu ñaha ñ<sup>n</sup> espíritu xínú cuèchi núú-gá xii-dé vecaá, te ní xáha<sup>n</sup>-dé xii-yu:

—Cúu-ndo té Jácobó ndíhi dava-gá ñayiu sándáa iní tñúhu Jèsús nàcuáa ní quide ñaha Yá Ndióxi xii-dé —càchí-dé xáha<sup>n</sup>-dé xii-yu.

Te sátá dúcá<sup>n</sup> ní xáha<sup>n</sup>-dè, te ní quee-dé cuáhá<sup>n</sup>-dé ingá xichi.

<sup>18</sup> Te sátá ní tñundaá, te ní ngúita nchaa sandadú càhá<sup>n</sup> ñ<sup>n</sup> càhá<sup>n</sup> ñ<sup>n</sup>-güedé, te xñtñaha-güedé:

—Ñá túu-gá té Pèlú yíhi vècaá, ¿te nása cada-o-i? —càchí-güedé xñtñaha-güedé.

<sup>19</sup> Te té Hèrodés ní tendaha-dé titní sandadú cuáhá<sup>n</sup>-güedé cuánundúcu ñaha-güedé, te ñá ní náníhi ñáhá-güedé xii-dé. Te dàtnuní ní cana-dé sandadú cue téé ní xindeé ñáhá xii té Pèlú, te ní tenáa ñáhá-dé xii-güedé, te ní xáha<sup>n</sup>-dè xii dava-gá cue sandadú-dé:

—Cahni-ndo cue téé-á<sup>n</sup> —càchí té Hèrodés xáha<sup>n</sup>-dè.

Te dàtnuní ní quee té Hèrodés distritú Júdeá cuáhá<sup>n</sup>-dé ñuú Cèsareá, yacá<sup>n</sup> ní ngündecu-dé.

#### Ní xíhi té Hèrodés

<sup>20</sup> Té Hèrodés ní cudéé<sup>n</sup>-dè núú ñayiu ñuú Tírú ndíhi núú ñayiu ñuú Sidón. Te xiá<sup>n</sup> ní ndatnúhu-yu ní cuu ñ<sup>n</sup>nuu tñúhu-yu, te ní xicá-yu cuáhá<sup>n</sup>-yu cuáhá<sup>n</sup> ndatnúhu ndíhi ñáhá-yu xii-dé, te ní ndatnúhu ndíhi-yu té Blástú. Te téé-á<sup>n</sup> cúú-dé chiú<sup>n</sup> quide-dé núú té Hèrodés, te ní chindee tñúhu ñaha-dé xii-yu, chi ní cáhá<sup>n</sup> ndáhú-yu núú té Hèrodés sá vè cáda úhú ñáhá-dé xii-yu. Te duca<sup>n</sup> ní quide-yu cuendá ñuú té Hèrodés-á<sup>n</sup> queé sá xéxi-yu. <sup>21</sup> Te ní xáha<sup>n</sup> té Hèrodés ná nduu quíhi<sup>n</sup>-yu ndatnúhu ndíhi ñaha-dé xii-yu, te nduu-á<sup>n</sup> ní quiunuu-dé ñ<sup>n</sup> dóo váha, ñ<sup>n</sup> sá sácuíhnu téé tàxi tñuní. Te ní ngóo-dé núú xilé váha, xilé sá sácco nchíhi téé tàxi tñuní, te ní ngúita-dé ní cáhá<sup>n</sup> sáhú-dé dóho-yu. <sup>22</sup> Te uu<sup>n</sup> ní ní cuáá-yu té cachi-yu:

—¡Téé-a càhá<sup>n</sup>-dé dico ñá díú téé ñuyíú-a cúu-dé chi ndiódí cúú-dé! —càchí-yu xñtñahá-yu.

<sup>23</sup> Te diu-ní òré-á<sup>n</sup> ní yáha ñ<sup>n</sup> espíritu xínú cuèchi núú Yá Ndióxi, te ní sáñaha-xi cuéhé xii té Hèrodés. Te duca<sup>n</sup> ní tnahá-dé chí mee-dé ñá ní xáha<sup>n</sup>-dè sá ñayiu cúu-dé, te ní cáhá<sup>n</sup>-yu sá ndiódí cúú-dé. Te nchito-gá-dé ní sanú ñáhá tñdácú xii-dé, te dàtnuní ní xíhi-dé.

<sup>24</sup> Te ío titní xichi ní sáhá<sup>n</sup> ñayiu sándáa iní tñúhu Yá Ndióxi ní cáhá<sup>n</sup>-yu tñúhu-gá, te ío chítú-yu ní sándáa iní-yu tñúhu-gá.

<sup>25</sup> Te té Beé ndihi té Sàulú ní ndihi chiú<sup>n</sup>-güedé, te ní ndee-güedé ñuú Jerusálén cuáhá<sup>n</sup>-güedé ndihi té Juáá, àdi Mácú chi úú diu-dé.

## 13

*Té Beé ndihi té Sàulú cuáhá<sup>n</sup>-güedé dácua<sup>n</sup>-güedé ñáyiu tnúhu Yá Ndióxi nchaa ñuú xíca*

<sup>1</sup> Te ñuú Antióquia ndécú ñ<sup>n</sup> úú cue té cáhá<sup>n</sup> tnúhu Yá Ndióxi núú nchaa ñáyiu ní sándáá iní-xi tnúhu-gá. Te ndècu tucu ñ<sup>n</sup> úú cue té cùu mestru dácua<sup>n</sup> ñaha-güedé xí-yu tnúhu-gá. H<sup>n</sup>-dé nání-dé Beé, te ñ<sup>n</sup>-dé nání-dé Xímú, te té Xímú-án xáha<sup>n</sup>-güedé Négrú chi tnúu-dé. Te ingá-dé nání-dé Lúciú, te té-án cùú-dé téé ñuú Cirené. Te ingá-dé nání-dé Sàulú, te ingá tucu-dé nání-dé Manàén. Te té Manàén-án ndihi té Hèrodés téé cùu gobiernú Galiléa ío váha ní xóo cáhá<sup>n</sup> ndihi tnàha-güedé cùtnháá ní cuu líhli-güedé. <sup>2</sup> Te ñ<sup>n</sup> nduu ñá túú ná ní xèxi ñáyiu ní sándáá iní tnúhu Yá Ndióxi cuendá mee-ni-gá ní cáhá<sup>n</sup> ndihí-yu, te ní xáha<sup>n</sup> Espiritú Yá Ndióxi xí-yu:

—Tendaha-ndo të Beé ndihi té Sàulú quíh<sup>n</sup>-güedé dava-gá ñuú cada-güedé chiú<sup>n</sup> tahu-í, chi duca<sup>n</sup> cuíni-í cunduu —càchí Espiritú-gá xáha<sup>n</sup>-xi xí-yu.

<sup>3</sup> Te ní cáhá<sup>n</sup> ndihi tucú-yu Yá Ndióxi, te ñá túú tnáhi ná ní xèxi tucú-yu, te ní sacá<sup>n</sup> ndodo-güedé ndaha-güedé díqui të Beé ndihi té Sàulú. Te sátá dúcá<sup>n</sup> ní quide-güedé, te ní quide ndee iní ñáhá-yu xii-güedé.

*Té Beé ndihi té Sàulú cuáhá<sup>n</sup>-güedé distritú Chìpré cáhá<sup>n</sup>-güedé tnúhu Yá Ndióxi*

<sup>4</sup> Te té Beé ndihi té Sàulú ní quee-güedé cuáhá<sup>n</sup>-güedé cuendá duca<sup>n</sup> cuíni Espiritú Yá Ndióxi cunduu sá cáca cùu-güedé dava-gá ñuú, te ní quexio-güedé ñuú Selenciá, te yacá<sup>n</sup> ní quee-güedé bàrcú cuáhá<sup>n</sup>-güedé distritú Chìpré. Te ñuú-án cáá xití lámár chi ndècu ñuhu yichí xití ndute. <sup>5</sup> Te ní quexio-güedé mei ñuú Salàminá, te ní quene-güedé bàrcú, te ní xica-güedé cuáhá<sup>n</sup>-güedé nchaa veñúhu ñáyiu isráél cáhá<sup>n</sup>-güedé tnúhu Yá Ndióxi. Te cuáhá<sup>n</sup> ndihi-güedé té Juáá cuendá chindee ñaha-dé xii-güedé. <sup>6</sup> Te ní tñi-güedé ichi cuáhá<sup>n</sup>-güedé ñuú Páfós cáá ndaa ingá xio Chìpré, te yacá<sup>n</sup> ní nanihí tnáhá-güedé ndihi ñ<sup>n</sup> téé isráél nání-dé Barjesús, te té-án xini-dé cada nduu-dé, te càchí-dé sá cáhá<sup>n</sup>-dé tnúhu Yá Ndióxi dico ñá ndaa. <sup>7</sup> Te té-án quidé chiú<sup>n</sup>-dé ndihi té Sèrgiú, àdi Páblú chi úú diu-dé, te cùu-dé gobiernú Chìpré, te ío túha-dé. Te ní cana-dé të Beé ndihi té Sàulú, chi cuíni-dé cundedóho-dé tnúhu Yá Ndióxi. <sup>8</sup> Te téé quide nduu-án ñá ní ñáha-dé cáhá<sup>n</sup>-güedé tnúhu-gá, chi ñá ní

cuíni-dé sá tëé cùu gobiernú-án tuha-dé ichi Yá Ndióxi. Te duca<sup>n</sup> ní quide té Barjesús, téé xáha<sup>n</sup>-güedé Èlimás. <sup>9</sup> Te tnàhá tucu té Sàulú ndécú úú diu-dé chi xáha<sup>n</sup> tucu-güedé Páblú, te ndècu ndihi-dé Espiritú Yá Ndióxi. Te ní xindéhe ñí ñáhá-dé xii téé quide nduu-án. <sup>10</sup> Te ní xáha<sup>n</sup>-dé:

—Yòhó, chi dàtná quidé yùcu ñávàha quide-n chi mee-ni dándahú-n ñáyiu. Yòhó cùú-n déhe sácuhlá, chi nchaa tnúhu váha cuíni Yá Ndióxi cáhá<sup>n</sup>-yu, te yòhó ñá ñá ñá-n. <sup>11</sup> Te vitna quíni-n nàcuáa cunduu, chi taxi Yá Ndióxi ñ<sup>n</sup> castiú xii-n chi vá cùtnúni-gá núú-n cáca cuu-n ñ<sup>n</sup> úú nduu —càchí-dé xáha<sup>n</sup>-dé xii téé quide nduu-án.

Te òré duca<sup>n</sup> ní xáha<sup>n</sup> të Páblú xii-dé, te òré-ni ní cuaa-dé, te ñá túú ní cùtnúni tnáhi-gá núú-dé, te ní xóo nducu-ná-dé ñáyiu ní xóo cuita nehe ñaha xii-dé. <sup>12</sup> Te téé cùu gobiernú ní xini-dé nàcuáa ní quide të Páblú, te ío ní cuñúhu-dé. Te ní tnàhá iní-dé tnúhu Jesús, núu xiá<sup>n</sup> ní sándáá iní-dé.

*Té Páblú ndihi té Beé ndécú-güedé ñuú Antióquia Písidiá*

<sup>13</sup> Te té Páblú ndihi dava-gá cue téé xica cuu ndihi-dé ní quee-güedé bàrcú, te ní quee-güedé ñuú Páfós cuáhá<sup>n</sup>-güedé ñuú Pèrgé, te ñuú-án yindèhu-xi distritú Pánfilia. Te té Juáá ní nacuico-dé ní dándóo ñaha-dé xii-güedé cuánuhú-dé ñuú Jerusálén. <sup>14</sup> Te dava-gá-güedé ní quee-güedé ñuú Pèrgé cuáhá<sup>n</sup>-güedé ñuú Antióquia, te Písidiá yindàha-xi ñuú-án. Te nduu xíndetatú-yu, te ní sáhá<sup>n</sup>-güedé veñúhu ñáyiu isráél, te ní ngóo-güedé xití veñúhu. <sup>15</sup> Te cue téé ndècu veñúhu ní quehe<sup>n</sup>-güedé tutú yódó tñúni nchaa tnúhu sá ñí chidó tñúni ndii Moisés ndihi tutú yódó tñúni nchaa tnúhu sá ñí chidó tñúni dava-gá cue téé ní xóo cáhá<sup>n</sup> tnúhu Yá Ndióxi ndéé sanaha, te ní dácua<sup>n</sup>-güedé ní xindédóho cue ñáyiu, te dàtnúni cue téé yindaha veñúhu-án ní xáha<sup>n</sup>-güedé xii të Páblú ndihi dava-gá-güedé:

—Nchòhó cue téé cùu ñaní tnáhá-ndí, te núu cuíni-ndo cáhá<sup>n</sup>-ndo tnúhu Yá Ndióxi, te cuu cáhá<sup>n</sup>-ndo tnáví cuendá cutúha-yu —càchí-güedé xáha<sup>n</sup>-güedé.

<sup>16</sup> Te té Páblú ní ndacuñí-dé, te ní ndacani-dé ndaha-dé cuendá cadí-yu yuhú-yu te cundedóho-yu tnúhu cáhá<sup>n</sup>-dé, te ní xáha<sup>n</sup>-dé:

—Te nchòhó ñáyiu quide nchaa nacuaá cáhá<sup>n</sup> Yá Ndióxi ndihi nchaa nchòhó ñáyiu isráél, cundedóho-ndo nchaa-ndo ñ<sup>n</sup> tnúhu na cáhá<sup>n</sup>-í-a. <sup>17</sup> Te cuéi ndéé sanduu te cuéi vitna chindee ñaha-ni Yá Ndióxi xii nchaa ñáyiu isráél, te ní nacáxi ñaha-gá xí-yu te ní chindee ñaha-gá cuendá cáyá-yu, chi cuíni-gá sá cùú vái-yu, te duca<sup>n</sup> ní quide-gá

cútnàhá ní xíndecú-yu nàció<sup>n</sup> Ègíptú. Te dàtnùní ní dácácu ñaha-gá xii-yu ñuu-á<sup>n</sup>, chí mee-gã nchaa ndäcu-gã quidé-gã. <sup>18</sup> Te ní xíndecú-yu ñ<sup>n</sup> xichí núú ñà túú tnàhí sácúndecu ñâyüu údico cuíá, te xiti údico cuíá-á<sup>n</sup> ní cundee iní-gã nchaa sá ní quidé-yu. <sup>19</sup> Te Yá Ndióxi ní chindee ñaha-gá xii ñâyüu isráél, te ní dánáá-yu úsá nàció<sup>n</sup>, chí cuendá ní cuiní-gã cuu cuendá-yu ñuhu-á<sup>n</sup>. <sup>20</sup> Te dàtnùní ní cachí Yá Ndióxi sá díú-ní cue té tée cùchiu<sup>n</sup> taxi tñuni-güedé nchaa ñâyüu, te duca<sup>n</sup> ní quide-güedé dàtná cümü ciëndú dava cuíá. Te sátá xiá<sup>n</sup>, te ní xíndecu té Sàmuel té ní cáhá<sup>n</sup> tnúhu Yá Ndióxi. <sup>21</sup> Te dàvá-á<sup>n</sup> ní cuiní ñâyüu isráél sá cündècu ñ<sup>n</sup> tée quindaha ñaha-dé xii-yu, te Yá Ndióxi ní cachí-gã sá tē Sàul quindaha-dē-yu, te tē-á<sup>n</sup> ní cuu-dé déhe té Cís, te té Benjamín tēe ní xíndecu ndéé sanaha-gã ní cuu ñaní tnáhá-dē. Te té Sàul ní xindaha-dē ñâyüu údico cuíá. <sup>22</sup> Te Yá Ndióxi ñá ní cuiní-gã cundecu-ni-dé quindaha-dē ñâyüu, chí ní cuiní-gã sá té Dàví ndíhu ndaha-dé cue ñâyüu isráél, te ní cachí-gã: “Ío váha ní tnahá iní-í nàcuáa quide té Dàví déhe tēe Isái, te cada-dé nchaa nàcuáa cùñaha-í xii-dé”, duha ní cachí Yá Ndióxi —cachí té Páblú xáha<sup>n</sup>-dē xii-yu.

<sup>23</sup> Te ní xáha<sup>n</sup> tucu té Páblú:

—Diu-ni ñaní tnáhá tē Dàví cúú Jèsús. Te Yá Ndióxi ní tendaha-gã Jèsús ní quixi-gã ñuyú-a cuendá nchaa ñâyüu isráél ná quindáá iní ñáhá xii Jèsús naníhí tãhú-yu, chí duca<sup>n</sup> ní cachí Yá Ndióxi cunduu. <sup>24</sup> Te cútnàhá vátá ngüita-gã Jèsús cáhá<sup>n</sup>-gã tnúhu Yá Ndióxi, te ní cáhá<sup>n</sup> té Juáá núú ñâyüu isráél sá xini ñuhu-xi dañá-yu nchaa sá cuéhé sá dúhá, te cuandutē-yu. <sup>25</sup> Te sa ta cùyatni-ni-gã cuú-dé, te ní xáha<sup>n</sup>-dē xii-yu: “Nchòhó cächí-ndó sá yúhú cùú-í Cristú Yaá ndétú-ndó dico ñáhá, chí ñá díú yúhú cùú-í Cristú, chí davitna quixi Cristú Yaá tendaha Yá Ndióxi quixi ñuyú-a. Te yúhú cùú-í ñ<sup>n</sup> tée duu<sup>n</sup> duu<sup>n</sup> ñá túú tàù nandaxi cuédicó chàú-gã dico quide-í chiú<sup>n</sup>-gã”, duha ní cáhá<sup>n</sup> te Juáá —cachí té Páblú xáha<sup>n</sup>-dē xii-yu.

<sup>26</sup> Te ní xáha<sup>n</sup> tucu té Páblú:

—Cundedóho tucu-ndo ñngá tnúhu na cáhá<sup>n</sup>-í. Nchòhó tnáhá-ndó cùu-ndo ñaní tnáhá ndíi Abrahám, te xini-ndó sá Yá Ndióxi cùnùu-gã. Te diu-ni-gã cuiní-gã sá ncháá-ndó cündedóho-ndo tnúhu-gã, chí cùu-xi tnúhu sá cáhá<sup>n</sup> nàcuáa naníhí tãhú-ndó. <sup>27</sup> Te nchaa ñâyüu ndècu ñuu Jerusalem ndihi nchaa cue tēe cùnnu ñá ní cùtnuní iní-yu ndihi-güedé sá Yá Ndióxi ní tendaha-gã Jèsús ní quixi-gã ñuyú-a. Te ñá ní sãha-yu cuendá sá díú Jèsús ní cacunehe cue tēe ní cáhá<sup>n</sup> tnúhu Yá Ndióxi

ndéé sanaha cuéi ní dácuaá-yu tnúhu-gã veñuhu-yu ndi tnahá úná nduu, nduu ndetátú-yu. Te ní cachí-yu sá ndècúechi Jèsús, te ní xáhá<sup>n</sup>-yu sá cáhni ñaha-güedé xii-gã. Te xiá<sup>n</sup> sa ñaha cue tēe ní xóo cáhá<sup>n</sup> tnúhu-gã ndéé sanaha sá dúcá<sup>n</sup> cáhá<sup>n</sup>-yu. <sup>28</sup> Te cuéi ñá túú ná ní quide-gã te ní xáhá<sup>n</sup>-yu xii té Pilatú tēe cùu gobiernú sá táuchiu<sup>n</sup>-dé cahni ñaha-güedé xii-gã. <sup>29</sup> Te xiá<sup>n</sup> núu ní sata caa ñaha-güedé xii-gã núu cùrúxi. Te ní quide-güedé nchaa nàcuáa ní chidó tnùní cue tēe ní cáhá<sup>n</sup> tnúhu Yá Ndióxi ndéé sanaha. Te sátá ní xihí-gã, te ní nunehe ñaha-güedé xii-gã núu cùrúxi, te nchido ñaha-güedé cuáhá<sup>n</sup>, te ní chihí ñaha-güedé ñ<sup>n</sup> xiti yaú. <sup>30</sup> Te Yá Ndióxi ní dándótó-gã Jèsús. <sup>31</sup> Te titni xito ní sáhá<sup>n</sup> Jèsús núu ndécú ñâyüu ní xica cuu ndihi-gã, ñâyüu ní quee distritú Galileá ní sáhá<sup>n</sup>-yu ndihi-gã ñuu Jerusalem. Te vitna nchaa ñâyüu-á<sup>n</sup> xáhá<sup>n</sup>-yu xii dava-gã ñâyüu isráél nàcuáa ní cuu ní ndoto-gã.

<sup>32</sup> Te nchúhú cáhá<sup>n</sup>-ndí nàcuáa cada-ndo naníhí tãhú-ndó, chí Yá Ndióxi ní xáha<sup>n</sup>-gã xii cue ñaní tnáhá-ó ní xíndecu ndéé sanaha sá tendaha-gã Déhe-gã Jèsús quixi-gã ñuyú-a. <sup>33</sup> Te ní quixi-gã ní xihí-gã, te ní dándótó ñaha Yá Ndióxi xii-gã, te núu xiá<sup>n</sup> naníhí tãhú-ó núu na quindáá iní-ó-gã. Te ñ<sup>n</sup> tēe ní cáhá<sup>n</sup> tnúhu Yá Ndióxi ndéé sanaha ní chidó tnùní-dé núu sálmú cúú úú nàcuáa ní cáhá<sup>n</sup> Yá Ndióxi ní xáha<sup>n</sup>-gã xii Déhe-gã, te duha ní xáha<sup>n</sup>-gã: “Yòhó cúú-n Déhe-í, te vitna cutnùní iní ñâyüu sá yúhú cùú-í Tãtá-n”, duha ní xáha<sup>n</sup>-gã xii Jèsús. Te diu-ni duca<sup>n</sup> ní chidó tnùní tēe ní cáhá<sup>n</sup> tnúhu-gã ndéé sanaha. <sup>34</sup> Te ñngá xichí tucu núú tütú-gã ní chidó tnùní ñ<sup>n</sup> tēe ní xíndecu ndéé sanaha nàcuáa ní xáha<sup>n</sup>-gã xii Déhe-gã, te duha ní xáha<sup>n</sup>-gã: “Mee-ni sá váha cada ñaha-í dàtná ní xii-í té Dàví”, duha ní xáha<sup>n</sup>-gã. Te duca<sup>n</sup> ní chidó tnùní tēe ní xíndecu ndéé sanaha nàcuáa ní cáhá<sup>n</sup> Yá Ndióxi, chí òré ní xihí Jèsús te ní dándótó ñaha-gã cuendá sá vá tíú yiqui cuñú-gã. <sup>35</sup> Te núu xiá<sup>n</sup> duha ní chidó tnùní ñ<sup>n</sup> tēe ní xíndecu ndéé sanaha núu lbrú Sálmú nàcuáa ní xáha<sup>n</sup>-dē xii-gã: “Vá dañá-n sá tíú yiqui cuñú Déhe-n chí ío váha quide-gã”, duha ní chidó tnùní tēe ní xíndecu ndéé sanaha —cachí té Páblú xáha<sup>n</sup>-dē xii-yu.

<sup>36</sup> Te xáha<sup>n</sup> tucu-dé:

—Te té Dàví ní quide-dé nchaa chiú<sup>n</sup> ní tãhú Yá Ndióxi cada-dé, te dàtnuní ní xihí-dé. Te ní chindúxi ñaha-güedé xii-dé yatni nàcuáa yindúxi cue ñaní tnáhá-dē ndéé sanaha-gã, te xiá<sup>n</sup> ní téhyú yiqui cùñú-dé. <sup>37</sup> Te Jèsús chí ñá ní téhyú yiqui cùñú-gã, chí ní dándótó ñaha Yá Ndióxi xii-gã. <sup>38</sup> Te cuiní-í cachí tnúhu-í xii-ndo cuendá cutnùní iní-ndó ncháa-ndo sá cáhá<sup>n</sup> cãhnu iní Yá Ndióxi nchaa cuéchi-o, chí ní xihí Jèsús

cuendá naníhí tãhú-ó. <sup>39</sup> Te nchaa ñáiyu na quindáá iní ñáhá xii Jesús te cada cànhu iní-gá nchaa sã ñã túú váha ní quidé-yu, chí núu mee-ni tnúhu ní chídó tnúni ndíi Moisés ná quindáá iní-yu te vã naníhí tãhú-yu. <sup>40-41</sup> Te ío coto-ndo mee-ndo cuendá sã vã yãha-ndo dátã ní cachí Yã Ndióxi yáha cue ñáiyu ñã túú ní quide váha ní xindecu ndéé sanaha. Te nãcuáa ní cáhá<sup>n</sup>-gã ní chídó tnúni ì<sup>n</sup> tée ní cáhá<sup>n</sup> tnúhu-gã ndéé sanaha, te duha ní xãha<sup>n</sup>-gã xii-yu ðávã-ã<sup>n</sup>:

Cundedóho nchaa nchóhó ñáiyu cuèhé yuhu-xi na cáhá<sup>n</sup>-í ì<sup>n</sup> tnúhu te quini-ndó ñã cuñúhu-ndo,

yúhú quidé-í vai núu sã ío váha vitna ndècu-ndo ñuyú-a,

te cuèi na còo ñáiyu cachí tnúhu xii-ndo nãcuáa ndúu nchaa sã váha-án, dico nchóhó vã quindáá iní-ndo,

te sã dúcã<sup>n</sup> càda-ndo vã quindáá iní-ndó, te dàcuíta nihnu-ndo mée-ndo.

Duha ní xãha<sup>n</sup>-gã xii-yu te duca<sup>n</sup> ní chídó tnúni tée ní cáhá<sup>n</sup> tnúhu-gã ndéé sanaha — cachí té Pãblú xãha<sup>n</sup>-dè xii-yu.

<sup>42</sup> Te òré ní ndee té Pãblú veñúhu ñáiyu isràél ndíhi cue tée xica cuu ndíhi-dé, te ní cáhá<sup>n</sup> ndáhú ñáiyu yíhi veñúhu núu-dè sã quihí<sup>n</sup>-dè núu unã nduu, te diu-ni tnúhu ní cáhá<sup>n</sup>-dè cáhá<sup>n</sup> tucu-dé òré quexio-dé. <sup>43</sup> Te sátã ní túhú veñúhu-yu, te vai ñáiyu isràél ndíhi ñáiyu ní chitnahá ñáhá xii-yu nchicú<sup>n</sup> nihnu quide nacuáa quidé-yu cáhá<sup>n</sup> ndíhi-yu Yã Ndióxi cuáhã<sup>n</sup> ndíhi-yu té Pãblú ndíhi té Bèé. Te ní xãha<sup>n</sup>-güedé xii-yu sã vã dáñã ndéé-yu canchicú<sup>n</sup> nihnú-yu tnúhu sã cáhá<sup>n</sup> nãcuáa quide Yã Ndióxi sã cúu-xi-yu.

<sup>44</sup> Te núu unã nduu, nduu ndètatú-yu ní quexio vai vihi ñáiyu, chí nihíhi ñuu ní quexio ndedóho-yu tnúhu Yã Ndióxi. <sup>45</sup> Te cuendá sã ío vai ñáiyu ní quexio, núu xiã<sup>n</sup> ní cuu cuedú iní ñáhá ñáiyu isràél xii té Pãblú, te ní xicuehé ñáhã-yu xii-dé. Te ní xãhá<sup>n</sup>-yu xii-dé sã dándãhú ñáhã-dè xii-yu ndíhi tnúhu cáhá<sup>n</sup>-dè. <sup>46</sup> Te té Pãblú ndíhi té Bèé ñã túú ní yúhú ñáhã-güedé xii-yu. Te ní xãha<sup>n</sup>-güedé:

—Xini ñuhu-xi díhma-gã nchóhó ñáiyu isràél cáhá<sup>n</sup> ndíhi-ndí tnúhu Yã Ndióxi, te mee-ndo ñã cuini-ndó cundedóho-ndo. Te sã dúcã<sup>n</sup> quide-ndo, te vã naníhí tãhú-ndó, te ní vã cáhá<sup>n</sup>-gã ndí tnúhu Yã Ndióxi núu-ndó, dico cáhá<sup>n</sup>-ndí núu ðava-gã ñáiyu cuèi ñã díú ñáiyu isràél cúu-yu, <sup>47</sup> chí duca<sup>n</sup> ní táuchíú<sup>n</sup> Yã Ndióxi cada-ndí. Te ní cachí-gã:

Cuini-í cundecu-ndo dátã ì<sup>n</sup> tée yòtnuú ñuhú cundecu-ndo

cáhá<sup>n</sup>-ndó tnúhu-í núu nchãa ñáiyu ñã túú cündíhi-ndo ñáiyu ndècu nihíhi ñuyú,

te naníhí tãhú-yu,

duha ní cáhá<sup>n</sup>-gã —cachí té Pãblú ndíhi té Bèé xãha<sup>n</sup>-güedé xii-yu.

<sup>48</sup> Te ñáiyu ñã túú cùu ñáiyu isràél ío ní cudíí iní-yu sã dúcã<sup>n</sup> ní cáhá<sup>n</sup>-güedé, te ní xitnãhá-yu sã ío váha cuáhã<sup>n</sup> tnúhu Yã Ndióxi. Te mee Yã Ndióxi sa ñãha-gã nándi cùu ñáiyu naníhí tãhú, te diu-ni ñáiyu-án ní sãndáá iní-yu. <sup>49</sup> Te nchaa xichi xiã<sup>n</sup> ní sáhã<sup>n</sup>-yu ní cáhá<sup>n</sup>-yu tnúhu-gã. <sup>50</sup> Te cue tée isràél ní ndatnúhu-güedé ndíhi cue tée cünüu, ndíhi cue ñáiyu díhi cünüu, te ñáiyu díhi-án ñã túú tnãhí cümãni-yu veñúhu. Te ní xãha<sup>n</sup>-güedé sã cáda úhu-yu té Pãblú ndíhi té Bèé, te dátñuni cuicú<sup>n</sup> ñáhã-yu xii-güedé, te duca<sup>n</sup> ní quidé-yu. <sup>51</sup> Te ní casa<sup>n</sup> ñuhu té Pãblú ndíhi té Bèé sáhã-güedé ní naquidi-güedé tíca chúhmã ní tñi sáhã-güedé. Te duca<sup>n</sup> ní quide-güedé cuendá cutñuni iní-yu sã ñã túú ní quide váha-yu. Te dátñuni ní quee-güedé cuáhã<sup>n</sup>-güedé ñuu Ìconiú. <sup>52</sup> Te ñáiyu ní sãndáá iní-xi tnúhu Jesús ío váha ní cuu iní-yu cuendá sã ní naníhí tãhú-yu, te nchaa<sup>n</sup> sa ndècu ndíhi-yu Espiritú Yã Ndióxi.

## 14

*Té Pãblú ndíhi té Bèé ndécú-güedé ñuu Ìconiú*

<sup>1</sup> Te ní quexio té Pãblú ndíhi té Bèé ñuu Ìconiú. Te ní sáhã<sup>n</sup>-güedé veñúhu ñáiyu isràél, te ío váha ní cáhá<sup>n</sup>-güedé tnúhu Yã Ndióxi, te vai ñáiyu isràél ndíhi ñáiyu ñã túú cùu ñáiyu isràél ní sãndáá iní-yu tnúhu-gã. <sup>2</sup> Te ðava ñáiyu isràél ñã ní sãndáá iní-yu, te ní cáhá<sup>n</sup> cuèhé-yu cuendá té Pãblú ndíhi té Bèé cuendá sã vã quindáá iní ñáiyu ñã túú cùu ñáiyu isràél. <sup>3</sup> Te ní xindecu-güedé titni nduu, te ñã túú tnãhí ni yúhú-güedé ní dácuahã-güedé ñáiyu tnúhu Yã Ndióxi. Te mee-gã ní chindee ñãha-gã ní quide-güedé titni núu sã vã yòo tnãhí ndacu cada, te ío ní cuñúhu-yu. Te duca<sup>n</sup> ní quide-gã cuendá cutñuni iní-yu sã ndãã cáhá<sup>n</sup>-güedé sã mée-gã ío cùu iní ñáhã-gã xii-yu, te naníhí tãhú-yu núu na quindáá iní-yu tnúhu-gã. <sup>4</sup> Te ní quee ðava ñáiyu ñuu Ìconiú, ðavã-yu cündíhi-yu ñáiyu isràél ñáiyu ñã túú sãndáá iní tnúhu Jesús. Te ðavã-yu cündíhi-yu cue tée ní táuchíú<sup>n</sup> Jesús cáhá<sup>n</sup> tnúhu-gã. <sup>5</sup> Te ñáiyu isràél ndíhi ðava-gã ñáiyu ñã túú sãndáá iní-xi ní cuu ì<sup>n</sup>-núu-yu ndíhi cue tée cünüu sã cáni-yu-güedé, te cuáha yúu ñáhã-yu xii-güedé. <sup>6</sup> Te té Pãblú ndíhi té Bèé ní níhi-güedé tnúhu sã cuini-yu canihã-yu, núu xiã<sup>n</sup> ðayuhu ní quee-güedé cuáhã<sup>n</sup>-güedé ñuu Listrã ndíhi ñuu Dèrbé. Te ndi ndúu ñuu-án yíndèhu-xi Licaonia. Te ní sáhã<sup>n</sup>-güedé ðava-gã ñuu lihli càa yatni xiã<sup>n</sup>. <sup>7</sup> Te nchaa ñuu-án ní cáhá<sup>n</sup>-güedé tnúhu Jesús.

*Ñuu Listrã ní sãhã-yúu ñáhã-yu xii té Pãblú*

<sup>8</sup> Te ñuú Listrá ndécú ñi<sup>n</sup> téé yacua, mee-ni nùcòo-dé chí duca<sup>n</sup> tnàhí càa-dé ní cacu-dé. <sup>9</sup> Te ndèdóho-dé tnúhu càhá<sup>n</sup> té Páblú, te ní cutnùní iní té Páblú sá ío sàndáá iní téé yacua-á<sup>n</sup> sá Yá Ndiòxí cada tátna ñaha-gá xii-dé, núu xiá<sup>n</sup> ní xindéhé ñaha váha té Páblú xii-dé. <sup>10</sup> Te té Páblú ní cáhá<sup>n</sup> níhi-dé, te ní xáha<sup>n</sup>-dè:

—Ndacuíñí cunutnùí váha-n —càchí-dé xáha<sup>n</sup>-dè.

Te ní ndacuíñí cunu-dé te ní xica-ni-dé. <sup>11</sup> Te òré ní xiní-yu sá tè Páblú ní quide tátna-dé téé yacua-á<sup>n</sup>, te nchaá-yu ní cáhá<sup>n</sup>-yu tnúhu mée-yu tnúhu Licàoniá. Te ní cáhá<sup>n</sup> níhi-yu, te xitnàhá-yu:

—Cue téé-á<sup>n</sup> sànuu sá ñáyíu cùu-güedé dico ñàhá, chí ndiòxí cúu-güedé te ní quexio-güedé ñuyíu-a —càchí-yu xitnàhá-yu.

<sup>12</sup> Te ní cachí-yu sá tè Bèé cúu-dé ndiòxí dánàni-yu Jüpitér, te té Páblú cúu-dé ndiòxí dánàni-yu Mècuriú, chí cuèndá téé-á<sup>n</sup> cúu-dé téé càhá<sup>n</sup>. <sup>13</sup> Te càa ñi<sup>n</sup> veñúhu yuhu ñuú-á<sup>n</sup> núu quidé càhnú-yu ndiòxí sá dánàni-yu Jüpitér. Te dútú yíndàha veñúhu-á<sup>n</sup> ndécá-dé ñi<sup>n</sup> úú ndicutu cuáhá<sup>n</sup> quehé veñúhu, te ñúhu itá dúcú<sup>n</sup>-güedé. Te cue quití-á<sup>n</sup> cahni-dé cada càhnu-dé ndihí-yu té Bèé ndihí té Páblú ní cùu, chí duca<sup>n</sup> quidé-yu quide cahnú-yu ndiòxí-yu. <sup>14</sup> Te té Bèé ndihí té Páblú ní níhi-güedé tnúhu nàcuáa sàni iní-yu cadá-yu, te ní ndátá-güedé dóó-güedé cuèndá cutnùní iní-yu sá ñà tnàhá iní-güedé nàcuáa sàni iní-yu cadá-yu. Te xinu-güedé cuànguihu-güedé tnuú-yu, te níhi ní cáhá<sup>n</sup>-güedé, te xáha<sup>n</sup>-güedé:

<sup>15</sup> —¿Ná cuèndá duca<sup>n</sup> cuini<sup>n</sup>-ndó càda-ndo? Te ñi<sup>n</sup> ni tnàha ñáyíu-ndo cùu-ndí, dicó-ni tnúhu Yá Ndiòxí véxi-ndí dacuàha ñaha-ndí xii-ndo cuèndá sá vā cadá-gá-ndó nàcuáa quide-ndo, te quíndáá iní-ndó Yá Ndiòxí, chí ñi<sup>n</sup> dii-ni Yá Ndiòxí ndécú. Te ñi<sup>n</sup> gá ní cadúha-gá andíu ndihí ñuyíu-a ndihí lámár ndihí nchaandí túhú sá ío ñuyíu-a. <sup>16</sup> Te ndéé sanaha ní dáñá Yá Ndiòxí ní quidé-yu nàcuáa cuáhá<sup>n</sup> iní mée-yu. <sup>17</sup> Te ní xóo cada-gá sá váha cuèndá cutnùní iní-yu sá ío váha iní-gá. Te ñi<sup>n</sup> gá dácúu<sup>n</sup>-gá dáú, te tàxi-gá sá nchító-ó chí xitò-gá nchaa tatá xítú-ó, te xiá<sup>n</sup> cúdí iní-ó ndècu-o ñuyíu-a —càchí té Páblú ndihí té Bèé xáha<sup>n</sup>-güedé xii-yu.

<sup>18</sup> Te cuéi duca<sup>n</sup> ní xáha<sup>n</sup>-güedé nchaa tnúhu-á<sup>n</sup>, dico ío úhú ní sàndáá iní-yu ñá ní sàhni-yu ndicutu-á<sup>n</sup> chí cuèndá duca<sup>n</sup> tnàhí quidé-yu sàhni-yu ndicutu òré quidé càhnú-yu ndiòxí-yu.

<sup>19</sup> Te ñuú Antiòquiá ndihí ñuú Ìconiú xíndecu dava ñáyíu isràél, te ní queé-yu cuáhá<sup>n</sup>-yu ñuú Listrá núu ndécú tè Páblú. Te xiá<sup>n</sup> ní quexió-yu te ní xáhá<sup>n</sup>-yu xii ñáyíu

dii ñuú xiá<sup>n</sup> sá càhni-yu té Páblú. Te ní sáha yúú ñàhá-yu xii-dé, te ní cáhá<sup>n</sup>-yu sá ní xihí-dé, te ní tnúí ñaha-güedé xii-dé, te tañuhu ñaha-güedé xii-dé cuáhá<sup>n</sup> ñi<sup>n</sup> xio yuhu ñuú ní sá dáquéné ñaha-güedé. <sup>20</sup> Te ní quexio cue ñáyíu sàndáá iní tnúhu Jèsús núu càtúu-dé-á<sup>n</sup>, te ní nadúcú<sup>n</sup> ndèé ñàhá-yu xii-dé, te níni xitnùñi-yu-á<sup>n</sup> ní ndacóo-dé cuánuhú ndihí ñaha tucu-dé xii-yu xití ñuú. Te nduu tnèé-á<sup>n</sup> ní ndee-dé ndihí té Bèé cuáhá<sup>n</sup>-güedé ñuú Dèrbé.

<sup>21</sup> Te ní cáhá<sup>n</sup>-güedé tnúhu Yá Ndiòxí ñuú-á<sup>n</sup>, te ío vai ñáyíu ní sàndáá iní-yu tnúhu-gá. Te dàtnùní ní quee-güedé cuáhá<sup>n</sup> tucu-güedé ñuú Listrá, ndihí ñuú Ìconiú, ndihí ñuú Antiòquiá. <sup>22</sup> Te ní xáha<sup>n</sup>-güedé xii-yu sá vā dáñá nihnú-yu tnúhu Jèsús. Te sá dúcá<sup>n</sup> ní cáhá<sup>n</sup>-güedé, te vihi-gá ní cudú iní-yu cadá-yu nàcuáa cuini<sup>n</sup> Yá Ndiòxí cadá-yu, te ní xáha<sup>n</sup>-güedé:

—Dacuñí cùndecu-o ñuyíu-a ndoho-o, te dàtnùní duca<sup>n</sup> te nacuaa ñaha Yá Ndiòxí xii-o —càchí-güedé xáha<sup>n</sup>-güedé xii-yu.

<sup>23</sup> Te ní sáhá<sup>n</sup>-güedé ndi tnàhá ñi<sup>n</sup> ñi<sup>n</sup> xichi núu ndécú ñáyíu dacuaha tnúhu Yá Ndiòxí, te ní taxi ndecu-güedé cue téé quíndaha ñaha xii-yu, te ní cáhá<sup>n</sup> ndihí-güedé Yá Ndiòxí, te ñá túú tnàhí ná ní xèxi-güedé cuèndá sá ní cáhá<sup>n</sup> ndihí-güedé-gá. Te ní xáha<sup>n</sup>-güedé sá Yá Ndiòxí coto ñaha-gá xii-yu chí ñi<sup>n</sup> ni-gá ní sàndáá iní-yu.

*Té Páblú ndihí té Bèé cuáhá<sup>n</sup> tucu-güedé ñuú Antiòquiá Siríá*

<sup>24-25</sup> Te dàtnùní ní quee té Páblú ndihí té Bèé cuáhá<sup>n</sup>-güedé, ní yáha-güedé distritú Písidiá. Te ní quexio-güedé ñuú Pèrgé, xiá<sup>n</sup> ní cáhá<sup>n</sup>-güedé tnúhu Jèsús. Te ñuú-á<sup>n</sup> yíndèhu-xi Panfilíá. Te dàtnùní cuáhá<sup>n</sup>-güedé ñuú Àtaliá. <sup>26</sup> Te yáca<sup>n</sup> ní quee-güedé bàrcú cuánuhú tucu-güedé ñuú Antiòquiá. Te ñuú-á<sup>n</sup> cúu-xi ñuú núu ní xicá<sup>n</sup> táhú-yu núu Yá Ndiòxí cuèndá sá chindèe ñaha-gá xii-güedé chiú<sup>n</sup> quide-güedé. Te cuèndá sá ní ndihí chiú<sup>n</sup>-güedé nchaa ñuú núu ní sáhá<sup>n</sup>-güedé, núu xiá<sup>n</sup> cuánuhú-na-güedé. <sup>27</sup> Te ní ndexio-güedé ñuú-á<sup>n</sup>, te ní cana-güedé nchaa ñáyíu sàndáá iní tnúhu-gá, te ní cani-güedé cuèndú núu-yu nchaa nàcuáa ní cuu núu ní sáhá<sup>n</sup>-güedé, te xáha<sup>n</sup>-güedé: “Yá Ndiòxí ío ní chindee ñaha-gá xii-ndí ní cáhá<sup>n</sup>-ndí tnúhu-gá núu ní sáhá<sup>n</sup>-ndí, te mee-gá ní quide sá tnàhá ñáyíu ñá túú cùu ñáyíu isràél ní xíndedóho-yu tnúhu-gá cuèndá quíndáá iní-yu”, càchí-güedé xáha<sup>n</sup>-güedé xii-yu. <sup>28</sup> Te vai nduu ní xíndecu-güedé ñuú Antiòquiá ndihí nchaa ñáyíu ní sàndáá iní tnúhu Jèsús.



## 15

*Ni nataká ñáiyu sàndáá iní tnúhu Jesús ñuú Jerusálén*

<sup>1</sup> Te ní quee ñ' úú cue tée distritú Júdeá cuáhá<sup>n</sup>-güedé ñuú Antióquiá, te ní sáá-güedé, te ní xáha<sup>n</sup>-güedé xii ñáiyu sàndáá iní tnúhu Jesús sá núu vá cuáha-güedé señá ñii nchaa cue tée dátá ní cachí ndí Moisés, te vá nánihí tãhú-güedé. <sup>2</sup> Te sá dúcá<sup>n</sup> ní cáhá<sup>n</sup> cue tée-á<sup>n</sup>, te ní ngüíta té Páblú ndihí té Bèé ní tenàa-güedé cue tée-á<sup>n</sup>, chí dandáhú ñáhá-güedé cuini-güedé ní cùu. Te nchaa ñáiyu sàndáá iní tnúhu-gá ní cachí-yu sá quihí<sup>n</sup> té Páblú ndihí té Bèé ndihí ñ' úú-gá-güedé ñuú Jerusálén. Te yácá<sup>n</sup> cada-güedé ñ' jündá ndihí mee-ní cue tée ní táuchíu<sup>n</sup> Jesús cáhá<sup>n</sup> tnúhu-gá, ndihí cue tée yindaha ñáiyu sàndáá iní tnúhu-gá ñuú-á<sup>n</sup>, te jündá-á<sup>n</sup> cada ndáá-güedé tnúhu ní cáhá<sup>n</sup> cue tée ní sáá ñuú Antióquiá.

<sup>3</sup> Te nchaa ñáiyu sàndáá iní tnúhu-gá ní quide ndee iní ñáhá-yu xii-güedé, te ní tñii-güedé ichi cuáhá<sup>n</sup>-güedé. Te ní yáha-güedé distritú Fènicía ndihí distritú Sámariá, te yácá<sup>n</sup> ní caní-güedé cuendú nása ní cuu ní tuha ñáiyu ñá túú cùu ñáiyu isráél ichi Yá Ndióxi, te ní cudíí víhi iní nchaa ñáiyu ní Xindedóho-á<sup>n</sup>.

<sup>4</sup> Te té Páblú ndihí té Bèé ní ndexio-güedé ñuú Jerusálén, te ío ní cudíí iní-yu sá ní ndexio váha-güedé. Te ndècu dava-gá cue tée ní táuchíu<sup>n</sup> Jesús dácuàha ñaha xii-yu tnúhu-gá, ndihí cue tée yindaha ñaha xii-yu, ndihí dava-gá ñáiyu sàndáá iní tnúhu-gá, te ní caní-güedé cuendú núu-yu nàcuáa ní quide Yá Ndióxi ní chindee ñaha-gá xii-güedé ní quide-güedé chiu<sup>n</sup>-gá. <sup>5</sup> Te ndècu ñ' úú cue tée ní tuha ichi Yá Ndióxi, te cue tée-á<sup>n</sup> cúu-güedé cue tée fariséu, te ní ndacuñí-güedé, te ní xáha<sup>n</sup>-güedé:

—Dacuñí xini ñuuh-xi sá cuáha-güedé señá ñii cue tée cùmání cue tée ñá túú cùu ñáiyu isráél, te cùñaha-ndo sá ná cáda-güedé nchaa nàcuáa ní chídó tñuní ndí Moisés —cachí cue tée cùu fariséu-á<sup>n</sup> xáha<sup>n</sup>-güedé xii-güedé.

<sup>6</sup> Te cue tée ní táuchíu<sup>n</sup> Jesús dacuáha ñaha xii ñáiyu tnúhu-gá, ndihí cue tée yindaha ñáiyu sàndáá iní tnúhu-gá ní quide-güedé jündá cuendá ní ndatnúhu-güedé nása cundu. <sup>7</sup> Te vai víhi tnúhu ní cáhá<sup>n</sup>-güedé. Te té Pelú ní ndacuñí-dé, te ní xáha<sup>n</sup>-dè xii-güedé:

—Nchòhó cue tée ndècu ndihí-í ichi Xitohó Jesucristú, chí cündedóho ñ' tnúhu na cáhá<sup>n</sup>-í-a. Sa náha-ndo sá ní cachí Yá Ndióxi sá diú-í cáhá<sup>n</sup>-í tnúhu Jesús núu ñáiyu ñá túú cùu ñáiyu isráél cuendá sá quindáá iní-yu, te nanihí tãhú-yu. <sup>8</sup> Dico Yá Ndióxi sa náha-gá nása cáa iní ñ' ñ' ñáiyu. Te cùtnuní iní-ó sá cúu iní ñáhá-gá xii cue ñáiyu ñá túú cùu ñáiyu isráél, chí ní sãñaha-gá Espiritú-gá

ndécú ndihí-yu dátá cuini-ndó ní taxi-gá ndécú ndihí nchoo. <sup>9</sup> Chi Yá Ndióxi ñ' nuu-ni cùu iní ñáhá-gá xii-o nchaa-o ndihí cue ñáiyu ñá túú cùu ñáiyu isráél, chí tnáhá-yu ní xócáni-gá nchaa sá cuéhé sá dúhá ní xóo cada-yu ndéé óré ní sàndáá iní-yu Jesús. <sup>10</sup> Te ná cuendá nchòhó cuini-ndó cáda ñáiyu ní sàndáá iní tnúhu-gá ñ' sá ñá tnáhá iní-gá sá cáda-yu? Te cuini-ndó dandoho-ndó-yu. Te ni nchòo te ni cue ñani tnáhá-ó ní xindecu ndéé sanaha ñá ní ndácú-yu cada-yu nchaa xiá<sup>n</sup>. <sup>11</sup> Te vá dúcá<sup>n</sup> cáhá<sup>n</sup>-ndó, chí sa náha-ndo sá Yá Ndióxi ní cundahú iní ñáhá-gá xii-o, te dió duca<sup>n</sup> ní quide-gá sá nanihí tãhú-ó nchaa-o. Te diu-ni duca<sup>n</sup> ní quide-gá ñáiyu ñá túú cùu ñáiyu isráél, te ní nanihí tãhú-yu —cachí té Pelú xáha<sup>n</sup>-dè xii-güedé.

<sup>12</sup> Te dátñuní té Bèé ndihí té Páblú ní ngüíta-güedé ní cáhá<sup>n</sup>-güedé, te ní xindedóho-yu nchaa tnúhu ní cáhá<sup>n</sup>-güedé. Te ní xáha<sup>n</sup>-güedé xii-yu nàcuáa ní chindee ñaha Yá Ndióxi xii-güedé, te ní quide-güedé vai núu sá vá yòo tnáhí ndacu cada, te duca<sup>n</sup> te ní cutñuní iní ñáiyu ñá túú cùu ñáiyu isráél sá ndáa cáhá<sup>n</sup>-güedé. <sup>13</sup> Te óré ní ndihí cuendú ní cáhá<sup>n</sup>-güedé, te té Jacóbo ní xáha<sup>n</sup>-dè:

—Nchòhó cue tée ndècu ndihí-í ichi Xitohó Jesucristú, chí cündedóho ñ' tnúhu na cáhá<sup>n</sup>-í-a. <sup>14</sup> Té Ximú, àdi Pelú chí úú diú-dé, ní caní-dé cuendú nàcuáa ní quide Yá Ndióxi ndéé díhna ní dáquée dii<sup>n</sup>-gá ñáiyu ñá túú cùu ñáiyu isráél tnuú nchaa ñáiyu ñá túú ndècu ichi-gá, cuendá cuini-gá chiñuuh ñáhá-yu xii-gá. <sup>15</sup> Te dátñuní ní cáhá<sup>n</sup>-dè nàcuáa ní cáhá<sup>n</sup> Yá Ndióxi ndéé sanaha. Te duha ní chídó tñuní cue tée ní xóo cáhá<sup>n</sup> tnúhu-gá ndéé sanaha nàcuáa ní cáhá<sup>n</sup>-gá, te duha ní cachí-gá:

<sup>16</sup> Dátá cuini-ndó cùu ñ' vehe ní sáa te ní ngoyo te dandaa-güedé xito cùu úú, duca<sup>n</sup> sãtnahá-xi cada-xi ñ' nduu,

chí ñani tnáhá ndí Davíí ní xóo cáhá<sup>n</sup> ndihí ñáhá-yu xii-í ní cùu, te ní dáñá ndéé-yu ichi-í,

te na quixí-í te natuha ñaha tucú-yu.

<sup>17</sup> Te duca<sup>n</sup> te vai ñáiyu ñá túú cùu ñáiyu isráél nandúcú-yu ichi-í té cáhá<sup>n</sup> ndihí ñáhá-yu.

<sup>18</sup> Duha ní cáhá<sup>n</sup> Yá Ndióxi, te duca<sup>n</sup> ní chídó tñuní cue tée ní xóo cáhá<sup>n</sup> tnúhu-gá ndéé sanaha —cachí té Jacóbo xáha<sup>n</sup>-dè xii-güedé.

<sup>19</sup> Te xáha<sup>n</sup> tucu-dé:

—Yúhu cachí iní-í sá vá cúu dásatú-ó iní nchaa ñáiyu ta sàndáá iní-xi tnúhu Yá Ndióxi, ñáiyu ñá túú cùu ñáiyu isráél, te ñ' úú-ni tnúhu cùñaha-o nàcuáa cada-yu.

<sup>20</sup> Dico xini ñuuh-xi daquihí<sup>n</sup>-ó títú cùñaha-o sá vá cáxi-gá-yu nchaa sá nchító-ó nduu tãhú nchaa sá cachí-yu cùu ndiúxi-yu. Te

cúñaha-o sã vã cãhá<sup>n</sup> ndihí cue tée ñadhí te núu ñã díú ñadhí-güedé cúu-yu, te ni cuè ñayiu ñihí vã cãhá<sup>n</sup> ndihí-yu tée te núu ñã díú yí-yu cùu-güedé, te vã cáxi-yu cuñú quití cuèhné, te vã cáxi-yu ñihí. <sup>21</sup> Te duca<sup>n</sup> cùñaha-o, chi ndi tnahá ñuu núu ndécü-yu, te xíndecu ñayiu israhél dácuahá-yu tñuhu ní chidó tñuní ndii Moisés, te ndi tnahá nduu ndetátü-yu dácuahá-yu tñuhu ndii veñuhu-yu —cächí té Jacobó xãha<sup>n</sup>-dè xii-güedé.

<sup>22</sup> Te dätñuní cue tée ní táuchíu<sup>n</sup> Jèsús dácuaá ñaha xii-yu tñuhu-gá, ndihí cue tée yíndaha ñayiu sándáá iní tñuhu-gá ní cachí-güedé sã ndúcü-güedé ñ<sup>n</sup> úu-gá cue tée quihí<sup>n</sup> ndihí té Pãblü ndihí té Bèé ñuu Antióquia, te ñiu-ni duca<sup>n</sup> ñí cãhá<sup>n</sup> dava-gá ñayiu ndécü ichi-gá. Te úu cue tée ní ndúcü-güedé, ñ<sup>n</sup>-dè nání-dè Silás, te ñ<sup>n</sup>-dè nání-dè Judás, ñdi Barsabás chi úu ñiu-dé, te cùnuu-güedé ndi ndüü-güedé. <sup>23</sup> Te ní cadúha nchaa cue tée cùnuu tutú canehe-güedé quihí<sup>n</sup>, te duha cãhá<sup>n</sup>-xi:

“Cóvãha díi-ndó nchãa-ndo. Nchúhú cue tée ní táuchíu<sup>n</sup> Jèsús cãhá<sup>n</sup>-ndí tñuhu-gá, ndihí cue tée yíndaha cue ñayiu sándáá iní tñuhu-gá quide ndee iní ñãhá-ndí xii nchòhó cue ñayiu ndécü ndihí-ndí ichi-gá cuèí ñã díú ñayiu israhél cúu-ndó. Te nchòhó ñayiu xíndecu ñuu Antióquia, ndihí nchòhó ñayiu ndécü distritú Siríá, ndihí nchòhó ñayiu ndécü distritú Ciliciá, cächí tñuhu-ndí xii-ndo sã <sup>24</sup> ñí ñihí-ndí tñuhu sã ñ<sup>n</sup> úu cue tée ndécü iha ní quixi-güedé núu ndécü-ndó, te ñã túú chi<sup>n</sup> ñí tahu-ndí quixi-güedé. Te sã ñ<sup>n</sup> tñuhu ní cãhá<sup>n</sup>-güedé ní xãha<sup>n</sup>-güedé xii-ndo sã ngündecu seña ñii-ndo, te canchicú<sup>n</sup> nihnu-ndo nchãa nacuaá ní chidó tñuní ndii Moisés, te xiã<sup>n</sup> ní sani ñ<sup>n</sup> ní sani úu iní-ndó, chi ñã túú xini-ndó núu ndáá tñuhu cãhá<sup>n</sup>-güedé ñdi ñã ndáá. <sup>25</sup> Te ní ndatñuhu-ndí nacuaá cunduu sã tэндãha-ndí úu cue tée quixi-güedé ndihí té Bèé ndihí té Pãblü, cue tée ío cùu iní-ndí, te cue tée-ã<sup>n</sup> cãhá<sup>n</sup>-güedé nacuaá cãhá<sup>n</sup>-ndí-a. <sup>26</sup> Te ñiu-ni té Bèé ndihí té Pãblü ní sãhá<sup>n</sup>-güedé ní cãhá<sup>n</sup>-güedé tñuhu Xitohó Jesucristú nchaa xichi. Te ndi tnahá cuahã<sup>n</sup>-güedé cuini-yu cahni ñãhá-yu xii-güedé. <sup>27</sup> Te tendaha-ndí té Judás ndihí té Silás quixi-güedé tnahã-güedé cachí tñuhu váha-güedé nacuaá cuahã<sup>n</sup> tñuhu cãhá<sup>n</sup>-ndí. <sup>28</sup> Te ñiu-ni duca<sup>n</sup> cãhá<sup>n</sup>-ndí cächí tñuhu-ndí nacuaá cãhá<sup>n</sup> Espiritú Yã Ndióxi cada-ndo, chi nchúhú vã cãhá<sup>n</sup>-ndí sã cadã-ndó nchãa sã ñí cãhá<sup>n</sup> ndii Moisés cada ñayiu, chi ío úhú, te vã yõo ndacu cada. Te vitna na cãhá<sup>n</sup>-ndí ñ<sup>n</sup> úu-ni tñuhu nacuaá cada-ndo.

<sup>29</sup> Vã cáxi-ndó sã nchító-ó ndüu táhú nchaa sã cächí ñayiu cùu ndiöxi-yu, te vã cáxi-ndó ñihí, te vã cáxi-ndó cuñú quití cuèhné, te vã cãhá<sup>n</sup> ndihí cue tée ñadhí te núu ñã díú ñadhí-güedé cúu-yu, te ni cuè ñayiu ñihí vã cãhá<sup>n</sup> ndihí-yu tée te núu ñã díú yí-yu cùu-güedé. Te núu na càda-ndo nchaa nacuaá cãhá<sup>n</sup>-ndí-a, te cada váha-ndo. Te vitna ío cada ndee iní-ndó nchãa-ndo-na.” Duha ní chidó tñuní-güedé núu tutú ní tendaha-güedé cuahã<sup>n</sup>.

<sup>30</sup> Te ní quide ndee iní-yu cue tée quihí<sup>n</sup> ñuu Antióquia, te duca<sup>n</sup> te ní xica-güedé cuahã<sup>n</sup>-güedé. Te òré ní quexio-güedé ñuu-ã<sup>n</sup>, te ní cana-güedé nchaa ñayiu sándáá iní tñuhu Jèsús, te ní sãñaha-güedé tutú xii-yu. <sup>31</sup> Te ní dácuaá-yu tutú ní sãñaha-güedé-ã<sup>n</sup>, te ní cudíí víhí iní-yu chi ío váha cãhá<sup>n</sup> tutú-ã<sup>n</sup>. <sup>32</sup> Te té Jüdás ndihí té Silás tnahã-güedé ní nduu táhú-güedé cãhá<sup>n</sup>-güedé tñuhu sã dácãhu iní ñãhá Yã Ndióxi. Te ní xãha<sup>n</sup>-güedé vai tñuhu nacuaá cadã-yu, te víhi-gá ní cudíí iní-yu cadã-yu nacuaá cãhá<sup>n</sup> Yã Ndióxi cadã-yu. <sup>33</sup> Te ní xíndecu-güedé ñ<sup>n</sup> úu nduu ndihí-yu, te dätñuní ní quide ndee iní ñãhá-yu xii-güedé cuendá sã ñuhú-güedé núu vèxi-güedé, te mee-ni té Judás cuánuhú-dé. <sup>34</sup> Te té Silás ní xãha<sup>n</sup>-dè sã vã ñuhú-ni-dé. <sup>35</sup> Te té Pãblü ndihí té Bèé ní ndóo-güedé ní cãhá<sup>n</sup>-güedé tñuhu Yã Ndióxi ñuu Antióquia, te vai-gá tucu ñayiu Antióquia ní cãhá<sup>n</sup>-yu tñuhu-gá.

*Xito cùu úu cuahã<sup>n</sup> té Pãblü cãhá<sup>n</sup>-dè tñuhu Yã Ndióxi núu ñayiu*

<sup>36</sup> Te sátã ní cuu cuèhé nduu, te ní xãha<sup>n</sup> té Pãblü xii té Bèé:

—Na quihí<sup>n</sup>-ó nchãa ñuu núu ñí sãhá<sup>n</sup>-ó ñí cãhá<sup>n</sup>-ó tñuhu Yã Ndióxi cãhá<sup>n</sup> ndihí-o nchãa ñayiu ní tuha ichi-gá cuendá quini-ó núu ndécü váha-yu —cächí-dé xãha<sup>n</sup>-dè.

<sup>37</sup> Te té Bèé ní xãha<sup>n</sup>-dè sã quihí<sup>n</sup> ndihí-güedé té Juãá, ñdi Mácú chi úu ñiu-dé.

<sup>38</sup> Dico té Pãblü ñã ní dãña-gá-dé quihí<sup>n</sup> té Juãá, chi ní dándoo ñaha-dé xii-güedé cútñãhá ní xíndecu-güedé Pãñfilíá, te ní nacuaico-dé cuánuhú-dé, te ñã túú-gá ní sãhá<sup>n</sup> ndihí ñaha-dé xii-güedé. <sup>39</sup> Xiã<sup>n</sup> ní cuu ní tenãá tnahã té Bèé ndihí té Pãblü, te ichi cãa ichi caa ní cuu-güedé. Te té Bèé ndihí té Mácú ní quée-güedé bãrcú cuahã<sup>n</sup>-güedé Chìpré. <sup>40</sup> Te té Pãblü ní xãha<sup>n</sup>-dè xii té Silás sã quihí<sup>n</sup> ndihí ñaha-dé, te ñayiu sándáá iní-xi tñuhu Jèsús ní cãhá<sup>n</sup> ndihí-yu Yã Ndióxi sã chíndee ñaha-gá xii-güedé. <sup>41</sup> Te ní xica-güedé cuahã<sup>n</sup>-güedé te ní yãha-güedé ñihí distritú Siríá ndihí distritú Ciliciá. Te ní cãhá<sup>n</sup>-güedé tñuhu Jèsús núu nchãa ñayiu ní sándáá iní tñuhu-gá, núu xiã<sup>n</sup> ío-gá ní cudíí iní-yu cadã-yu nacuaá cãhá<sup>n</sup> Yã Ndióxi.

## 16

*Tnàhá té Timùteú cuáhá<sup>n</sup> ndihi-dé té Páblú ndihi té Silás*

<sup>1</sup> Te té Páblú ndihi té Silás cuáhá<sup>n</sup>-güedé ñúú Dèrbé ndihi ñúú Lìstrá, te ñúú Lìstrá yàcá<sup>n</sup> ndécú ì<sup>n</sup> téé nàni Timuteú. Te téé-á<sup>n</sup> sàndáá iní-dé tnúhu Jèsús, te tnàhá náná-dé sàndáá iní-a<sup>n</sup> tnúhu-gá, te ñaha isràél cúú-á<sup>n</sup>, te téé griégú cúú tātá-dé.

<sup>2</sup> Te nchaa ñáyiú ní sàndáá iní tnúhu-gá ñáyiú ndècu ñúú Lìstrá, ndihi ñáyiú ñúú Ìconiú, nchaa ñáyiú-á<sup>n</sup> cùdìí iní-yu nàcuáa quide-dé. <sup>3</sup> Te ní cuiñí té Páblú sá tnàhá té Timùteú quíhí<sup>n</sup> ndihi-dé dava-gá ñúú, núu xiá<sup>n</sup> dihna-gá señá ní sáha té Páblú ñii té Timùteú, chi ñá ní tnàhá iní té Páblú sá càhá<sup>n</sup> cuèhé ñáyiú isràél cuèndá té Timùteú. Te nchaa ñáyiú isràél ndécú ñúú-á<sup>n</sup> xini-yu sá téé griégú cúú tātá-dé, te ñá díú téé isràél cúú-dé, te xiá<sup>n</sup> ní sáha té Páblú señá ñii té Timùteú. <sup>4</sup> Te ndi tnàhá ñúú ndi tnàhá ñúú cuáhá<sup>n</sup>-güedé càhá<sup>n</sup> ndihi-güedé nchaa ñáyiú ní sàndáá iní tnúhu Jèsús. Te ní xáha<sup>n</sup>-güedé nàcuáa càhá<sup>n</sup> tutú ní cadúha cue téé ní táuchíú<sup>n</sup> Jèsús dacuàha ñaha xií-yu tnúhu-gá, ndihi cue téé yindaha ñáyiú sàndáá iní tnúhu-gá ñúú Jerusalén. <sup>5</sup> Te cuèndá duca<sup>n</sup> ní sáhá<sup>n</sup>-güedé nchaa ñúú núú ndécú ñáyiú sàndáá iní tnúhu-gá ní dácuhá ñaha-güedé xií-yu, núu xiá<sup>n</sup> tá cùu túha-gá-yu tnúhu Yá Ndióxi, te vai-gá-yu ní tuhá-yu ichi-gá.

*Ní dácótó ñaha-xi xii té Páblú sá ní xini-dé ì<sup>n</sup> téé distritú Macèdoniá*

<sup>6</sup> Te ñá ní dàña Espiritú Yá Ndióxi quíhí<sup>n</sup>-güedé càhá<sup>n</sup>-güedé tnúhu-gá distritú Asiá, núu ní sáhá<sup>n</sup>-güedé distritú Frigiá ndihi distritú Gàlaciá càhá<sup>n</sup>-güedé tnúhu-gá. <sup>7</sup> Te ní sáá-güedé yuhu distritú Misiá. Te quíhí<sup>n</sup>-güedé distritú Bitiniá ní cùu, dico ñá ní dàña Espiritú Yá Ndióxi quíhí<sup>n</sup>-güedé yàcá<sup>n</sup>. <sup>8</sup> Te ní yáha-güedé Misiá, te ní quexio-güedé ñúú Tróás, te yàcá<sup>n</sup> ní nanítnàhá-ndí ndihi-dé. <sup>9</sup> Te ì<sup>n</sup> niú ní dácótó-xi núú té Páblú sá ní xini-dé ì<sup>n</sup> téé distritú Macèdoniá nútñí-dé, te ní xáha<sup>n</sup> téé-á<sup>n</sup> xii té Páblú: “Cada ndee iní-n quíhí<sup>n</sup>-n Mácèdoniá chi dacuàha ñaha-n nchaa sá xini-n”, càchí-dé xáha<sup>n</sup>-dè, ní dácótó ñaha-xi xii té Páblú. <sup>10</sup> Te cuèndá sá dúcá<sup>n</sup> ní dácótó ñaha-xi xii té Páblú núu ní ndatnúhu-ndí quíhí<sup>n</sup>-ndí Macèdoniá, chi ní cutnùnì iní-ndí sá cáná ñaha Yá Ndióxi quíhí<sup>n</sup>-ndí càhá<sup>n</sup>-ndí tnúhu-gá núú ñáyiú yàcá<sup>n</sup>.

*Té Páblú ndihi té Silás ndécú-güedé ñúú Filipú*

<sup>11</sup> Te ní quée-ndí bàrcú ñúú Tróás, te cuáhá<sup>n</sup> ndáá-ndí ñúú Samòtraciá, te yàcá<sup>n</sup> ní quexio-ndí, te ní yáha-ní-ndí cuáhá<sup>n</sup>-ndí.

Te nduu tnéé ní quexio-ndí ñúú Nèápolis. <sup>12</sup> Te yàcá<sup>n</sup> ní quene-ndí bàrcú, te xica-na-ndí cuáhá<sup>n</sup>-ndí ñúú Filipú te ñúú-á<sup>n</sup> yindèhu-xi distritú Macèdoniá. Te yàcá<sup>n</sup> ní cudíi-ndí ní xindecu tnaa-ndí. Te ñúú Filipú-á<sup>n</sup> ìo cùnuu-xi, chi ìo chitu ñáyiú rómá ní ngóo-yu. <sup>13</sup> Te nduu ndetàtú-yu ní quée-ndí ñúú cuáhá<sup>n</sup>-ndí ì<sup>n</sup> xio yuhu yùte, chi yàcá<sup>n</sup> sàhá<sup>n</sup>-yu càhá<sup>n</sup> ndihí-yu Yá Ndióxi. Te òré ní quexio-ndí, te ní naníhí tnàhá-ndí ndihi mee-ni ñáyiú dihí, te ní càhá<sup>n</sup>-ndí tnúhu Yá Ndióxi ní xindedóho-yu. <sup>14</sup> Te ndècu ì<sup>n</sup> ñaha naní Lidiá ní xindedóho-a<sup>n</sup> nàcuáa ní càhá<sup>n</sup>-ndí, te ñaha ñúú Tiàtirá cúú-á<sup>n</sup>, te dico-a<sup>n</sup> dóó muradú, te ìo càhá<sup>n</sup> ndihí-a<sup>n</sup> Yá Ndióxi. Te diu-ni mee Yá Ndióxi ní chindee ñaha-gá ní sàndáá iní-a<sup>n</sup> tnúhu ní càhá<sup>n</sup> té Páblú. <sup>15</sup> Te ní sandute-a<sup>n</sup> ndihi landú-a<sup>n</sup>, ndihi nchaa ñáyiú xìnu cuechi núú-a<sup>n</sup>, te ní cachí-a<sup>n</sup> xii-ndí:

—Te núu ní cutnùnì iní-ndó sá ní sàndáá ndisa iní-í tnúhu Jèsús, te cundecu tnaa-ndo vèhe-í —càchí-a<sup>n</sup> xii-ndí.

Te ní quide yica-a<sup>n</sup> ní xindecu-ndí vehe-a<sup>n</sup>.

<sup>16</sup> Te ì<sup>n</sup> nduu ñúhu-ndí ichi cuáhá<sup>n</sup>-ndí núú càhá<sup>n</sup> ndihí-yu Yá Ndióxi, te ní naníhí-ndí ì<sup>n</sup> xichí ñúhú ichi, te yìhi ñaha espíritu cùndihí yucu ñávaha xii-xi. Te xiá<sup>n</sup> ní quide ní càhá<sup>n</sup>-xi nchaa sá vā yōo tnàhí cùtnùnì iní-xi núú nchaa ñáyiú ní sàngándihí ñaha xii-xi. Te ñáyiú dii vèhe-xi xinu cuechi-xi ìo vai díhú<sup>n</sup> ní níhi-yu chi ní cháhu nchaa ñáyiú ní sàngándihí ñaha xii-xi. <sup>17</sup> Te xichí-á<sup>n</sup> ní chinchícú<sup>n</sup> ñáhá-xi xii-ndí ndihi té Páblú ndèndaha ñaha-xi cuáhá<sup>n</sup>, te ní càhá<sup>n</sup> níhi-xi xáha<sup>n</sup>-xi xii dava-gá ñáyiú:

—Cue téé-a xinu cuechi-güedé núú Yá Ndióxi, chi ìo càhnu cuu-gá, te càchí tnúhu-güedé nása cada-ndo naníhí tãhú-ndó —càchí-xi xáha<sup>n</sup>-xi xii-yu.

<sup>18</sup> Te titní xito ní yáha-ndí duca<sup>n</sup>-ni ní càhá<sup>n</sup>-xi. Te ñá ní cùndee-gá iní té Páblú sá dúcá<sup>n</sup> càhá<sup>n</sup>-xi, núu ní nanchocuíhnu-dé núú nútñí-xi, te ní xáha<sup>n</sup>-dè xii espíritu cùndihí yucu ñávaha yìhi ñaha xii-xi:

—Ìo càhnu cuu Xitohó Jesucristú, núu xiá<sup>n</sup> càchí-í sá xocuíhí-n vā quíhí-gá-n yìqì cuñú xichí-a —càchí-dé xáha<sup>n</sup>-dè.

Te òré-ni ní quée espíritu cùndihí yucu ñávaha-á<sup>n</sup> yìqì cuñú-xi.

<sup>19-20</sup> Te ñáyiú dii vèhe-xi xinu cuechi-xi-á<sup>n</sup> ní cutnùnì iní-yu sá vā níhi-gá-yu díhú<sup>n</sup> cuèndá tnúhu càhá<sup>n</sup>-xi, núu ní tñii-yu té Páblú ndihi té Silás ndécá ñáhá-yu cuáhá<sup>n</sup> núú cuè téé cùchiu<sup>n</sup> Romá, te xáhá<sup>n</sup>-yu xii-güedé:

—Cue téé-a cùu-güedé cue téé isràél, te ìo dusa<sup>n</sup> xíquide-güedé ñúú-ó. <sup>21</sup> Te cuiñí-güedé cada-o nàcuáa quide-güedé, te vā cúú dúcá<sup>n</sup>

cada-o chi ñáyu nàció<sup>n</sup> Rómá cúú-ó — cächí-yu xähá<sup>n</sup>-yu xii cue téé cùchiu<sup>n</sup>.

<sup>22</sup> Te uu<sup>n</sup>ni ní cáhá<sup>n</sup> nchaá-yu, te xähá<sup>n</sup>-yu sá ñá túú quide váha té Páblú ndihi té Silás. Te cue té cùchiu<sup>n</sup> ní cándeé-güedé dóó té Páblú ndihi dóó té Silás ní ndátá-güedé, te ní táuchíú<sup>n</sup>-güedé caniha-güedé ndihi tudhi xii-güedé. <sup>23</sup> Te ní caniha-güedé, te dátñuní ní chihí ñaha-güedé vecaá. Te ní xáha<sup>n</sup>-güedé xii téé ndénchito vecaá sá cádá cuèdadú víhi-dé cuèndá ná canú-güedé vecaá. <sup>24</sup> Te cuèndá sá dúcá<sup>n</sup> ní cáhá<sup>n</sup>-güedé, núu téé ndénchito vecaá ní dáyaña ñaha-dé ingá cuártú ndécú xití vecaá, te ní chihí-dé sáhá-güedé yaú nduhu, te ní quide tí-dé.

<sup>25</sup> Te dava niú ní cáhá<sup>n</sup> ndihi té Páblú ndihi té Silás Yá Ndióxi, te ní xita-güedé ndudú ní quide càhnu ñaha-güedé xii-gá. Te dava-gá cue téé yíhi vecaá ní xíndedóho-güedé nàcuáa ní xita-güedé. <sup>26</sup> Te uu<sup>n</sup>ni níhi víhi ní tnáa ní quidi-xi ndéé cimientú vecaá, te ní nacaá<sup>n</sup> nchaa yèhe vecaá, te ní ndihi cadená ndútú cuè téé yíhi vecaá ní nandáxi. <sup>27</sup> Te ní ndiquíú cúnú íní téé ndénchito vecaá, te ní quide cuèndá-dé nchíi nchaa yèhe vecaá. Te ní tava-dé machití-dé cahni-dé méé-dé ní cùu, chi ní cáhá<sup>n</sup>-dè sá ní ndihi cue téé yíhi vecaá ní xinu ní cùu. <sup>28</sup> Te té Páblú ní cáhá<sup>n</sup> níhi-dé, te xáha<sup>n</sup>-dè xii téé ndénchito vecaá:

—Vá dúcá<sup>n</sup> càda-n cahni-n mee-n, chi nchaa-ni-ndí yíhi —cächí-dé xáha<sup>n</sup>-dè xii téé ndénchito vecaá.

<sup>29</sup> Te dátñuní ní xicá<sup>n</sup> téé ndénchito vecaá ñuhú, te xinu-dé cuánguihu xití vecaá núu yíhi té Páblú ndihi té Silás, te quidi ñaha-ná-xi xii-dé ní quexio-dé ní ngüñí xití-dé núu-güedé. <sup>30</sup> Te dátñuní ndéca ñaha-dé xii-güedé ní ndee vecaá, te ní xicá<sup>n</sup> tnúhú-dé núu-güedé, te xáha<sup>n</sup>-dè:

—Nchòhó cachí tnúhu-ndo nása cada-í nanihí tàhú-í —cächí-dé xáha<sup>n</sup>-dè.

<sup>31</sup> Te ní xáha<sup>n</sup>-güedé:

—Quindáá íní-n ndihi ñadhi-n, ndihi landú-n, ndihi nchaa ñáyu xinu cuechi núu-n tnúhu cáhá<sup>n</sup> Xitohó Jesucristú, te nanihí tàhú-ndó —cächí-güedé xáha<sup>n</sup>-güedé.

<sup>32</sup> Te ní dácuáhá ñaha-güedé xii téé ndénchito vecaá ndihi nchaa ñáyu ndécu vehe-dé tnúhu Yá Ndióxi. <sup>33</sup> Te diu-ni óré-án ní naquete-dé sátá-güedé núu ní ñáni, te dátñuní ní sandute-dé ndihi-yu. <sup>34</sup> Te ndéca ñaha-dé cuáhá<sup>n</sup> vehe-dé ní sáñaha-dé sá ní xexi-güedé, te ní cudíí víhi íní téé ndénchito vecaá ndihi nchaa-dé vehe-dé sá ní tuhá-yu ichi Yá Ndióxi. Te cuándihu tucu té Páblú ndihi té Silás vecaá.

<sup>35</sup> Te nduu tnèé ní xáha<sup>n</sup> cuè téé cùchiu<sup>n</sup> xii poleciá cuáhá<sup>n</sup>-güedé cuu-güedé téé ndénchito vecaá queñuhu-dé úu cue téé cuánguihu ndedí nduu ícu nùhú-güedé. <sup>36</sup> Te

téé ndénchito vecaá ní xáha<sup>n</sup>-dè xii té Páblú ndihi té Silás:

—Cue téé cùchiu<sup>n</sup> ní cachí-güedé sá queé-ndó nùhú-ndó, chi ñá túú-gá ná cada-güedé, chi sa ní yáha cuèndá-ndó —cächí téé ndénchito vecaá xáha<sup>n</sup>-dè xii-güedé.

<sup>37</sup> Te té Páblú ní xáha<sup>n</sup>-dè xii cue téé cùu poleciá:

—Téé rómá cúú-ndí, te vá cúú dùca<sup>n</sup>-ni cunduu, chi ní caniha-güedé tudhi xii-ndí, te ní xiní-yu nchaá-yu. Te ñá túú tnáhi ní xicá<sup>n</sup> tnúhú-güedé núu ndáá ndècuéchi-ndí àdi ñáhá, chi cuèndá-ni ní chihí ñaha-güedé vecaá xii-ndí. Te vitna cuíní-güedé dacäcu ñaha-güedé nùhú-ndí cuèndá sá vā yōo quini ñáhá nùhú-ndí cáhá<sup>n</sup>-güedé, dico vá cúú dùca<sup>n</sup> cada ñaha-güedé xii-ndí. Chí cuáhá<sup>n</sup> cùñaha-ndo na quixi mee-güedé queñuhu ñaha-güedé —cächí té Páblú xii-dé cue poleciá.

<sup>38</sup> Te cue téé cùu poleciá cuánuhú-güedé núu ndécú cuè téé cùchiu<sup>n</sup>, te ní xáha<sup>n</sup>-güedé nàcuáa ní cáhá<sup>n</sup> té Páblú. Te sá dúcá<sup>n</sup> ní xáha<sup>n</sup> poleciá sá téé rómá cúú-güedé, xiá<sup>n</sup> ní yùhú-güedé. <sup>39</sup> Te ní sáhá<sup>n</sup> cue téé cùchiu<sup>n</sup> yèhe vecaá, te ní xáha<sup>n</sup>-güedé sá cádá càhnu íní-güedé sá ní chihí ñaha-güedé vecaá, te ní ndeñuhu ñaha-güedé vecaá. Te ní cáhá<sup>n</sup> ndàhú-güedé núu cuè téé ní xíhi vecaá sá ndéé-güedé ñuú-án nùhú-güedé. <sup>40</sup> Te ní ndee-güedé vecaá, te cuáhá<sup>n</sup>-güedé vehe tá Lidíá, te ní ndatnúhu-güedé ndihi nchaa ñáyu ní sándáá íní-xi tnúhu Jesús, te ní xáha<sup>n</sup>-güedé xií-yu nàcuáa cadá-yu, te ío ní cudíí íní-yu, te duca<sup>n</sup> te ní xica-güedé cuáhá<sup>n</sup>-güedé.

## 17

### *Ío dusa<sup>n</sup> quide ñáyu ñuú Tesalónica*

<sup>1</sup> Te ní yáha-güedé ñuú Anfipólís ndihi ñuú Apolóniá, te ní quexio-güedé ñuú Tesalónica, te yacá<sup>n</sup> cáá ñ<sup>n</sup> veñúhu ñáyu isràél. <sup>2</sup> Te ní sáhá<sup>n</sup> té Páblú veñúhu-án, chi duca<sup>n</sup> tnáhi quide-dé, te ndi tnahá nduu ndetarú-yu ní sáhá<sup>n</sup>-dè veñúhu-án ùní xito. Te ní ndatnúhu ndihi ñaha-dé xií-yu nàcuáa ní chidó tnúni cue téé ní xóo cáhá<sup>n</sup> tnúhu Yá Ndióxi ndéé sanaha. <sup>3</sup> Te ní xitnúhu ñaha-dé nàcuáa ní cáhá<sup>n</sup> cue téé-án sá Cristú Yaá tendaha Yá Ndióxi quixi ñuyiú-a ndoho víhi-gá, te cuú-gá, te ndoto-gá, te xáha<sup>n</sup>-dè:

—Te diu Jesús cúú Cristú Yaá ní tendaha Yá Ndióxi ní quixi ñuyiú-a, núu xiá<sup>n</sup> cächí tnúhu-í vitna —cächí té Páblú xáha<sup>n</sup>-dè xií-yu.

<sup>4</sup> Te dava ñáyu isràél ní sándáá íní-yu tnúhu ní cáhá<sup>n</sup> té Páblú, te ní níhi tnáhá-yu ndihi-dé, ndihi té Silás. Te vai ñáyu grègú ñáyu cáhá<sup>n</sup> ndihi Yá Ndióxi ní sándáá íní-yu tnúhu Jesús. Te ndécu titní ñáyu

dihí ñáiyu cunu, te ñáiyu-án tnàhá-yu ní sándáá iní-yu tnúhu-gá. <sup>5</sup> Te dava ñáiyu isráel ñá túú ní cùu váha iní-yu núú tē Páblú núú ní ndúcú-yu cue tēe cuihna iní-xi tuhío-güedé cada chiú<sup>n</sup>-güedé, chi ndi cuihnu ndi cuihnu-ni-güedé, te nchaá-yu ndihi cue tēe-án ndi coyo ndi coyo-yu xicuaá-yu. Te sátá ní tecu dóho dava-gá-yu, te ní sáhá<sup>n</sup> tuhá-yu, te ío ní quide dúsá<sup>n</sup>-yu. Te nísáhá<sup>n</sup>-yu vehe té Jásón, te ní quide yicá-yu ní quíhu-yu vehe-dé nándúcú-yu té Páblú ndihi té Silás cuendá queñuhu ñáhá-yu núú ncháa ñáiyu. <sup>6</sup> Te ñá ní nánihí ñáhá-yu xii-güedé, núu xiá<sup>n</sup> ní tñí<sup>n</sup>-yu té Jásón ndihi ñ<sup>n</sup> úú-gá cue tēe sándáá iní tnúhu Jèsús, te tñíhu ñáhá-yu xii-güedé cuáhá<sup>n</sup> núú cué tēe cùchiu<sup>n</sup>. Te òrè ní quexió-yu núú ndécú cué tēe cùchiu<sup>n</sup>, te ní ngúita-yu ní cuáá-yu, te xáhá<sup>n</sup>-yu xii-güedé:

—Ní quexio cue tēe-án ñúú-ó, te ío dusa<sup>n</sup> quide-güedé, te duca<sup>n</sup>-ni quide-güedé nchaa ñúú núú xicá cùu-güedé. <sup>7</sup> Te té Jásón-án ní xáha<sup>n</sup>-dè sá cùú cùndecu-güedé vehe-dé, te ñá túú sándáá iní-güedé nàcuáa càhá<sup>n</sup> té Cèsár tēe yindaha cuéhé nàció<sup>n</sup>, te càchí-güedé sá ndécú ñngá tēe cunu-gá tucu nani-dé Jèsús —càchí-yu xáhá<sup>n</sup>-yu xii cue tēe cùchiu<sup>n</sup>.

<sup>8</sup> Te sátá ducá<sup>n</sup> ní càhá<sup>n</sup>-yu, te ní cudéén víhí cué tēe cùchiu<sup>n</sup> ndihi dava-gá ñáiyu ndédóho. <sup>9</sup> Te vai díhu<sup>n</sup> ní xicá<sup>n</sup> cue tēe cùchiu<sup>n</sup> núú tē Jásón ndihi dava-gá cue tēe cuáhá<sup>n</sup> ndihi-dé cuendá té Páblú ndihi té Silás, te núu na ndèe-güedé nùhú-güedé, te nacuañaha cué tēe cùchiu<sup>n</sup> dihú<sup>n</sup>-güedé.

*Té Páblú ndihi té Silás ndécú-güedé ñúu Bèréa*

<sup>10</sup> Te òrè ní cundiqui<sup>n</sup>, te ní quide ndee iní ñáhá ñáiyu sándáá iní tnúhu Jèsús xii té Páblú ndihi té Silás, te ní xica-güedé cuáhá<sup>n</sup>-güedé ñúu Bèréa. Te diu-ni nduu ní sáa-güedé yacá<sup>n</sup> ní sáhá<sup>n</sup>-güedé veñuhu ñáiyu isráel. <sup>11</sup> Te váha-gá iní ñáiyu ñúu Bèréa dàcúúxi ñáiyu ñúu Tesalónica, chi ío ní cudí iní-yu ní xíndedóho-yu tnúhu Jèsús, te ñ<sup>n</sup> nduu ñ<sup>n</sup> nduu ní dàcuáhá-yu tnúhu ní chídó tñuni cue tēe ní xóo càhá<sup>n</sup> tnúhu Yá Ndióxi ndéé sanaha cuendá cuini-yu quini-yu núu ndáá càhá<sup>n</sup> té Páblú ndihi té Silás. <sup>12</sup> Te titní ñáiyu isráel ní sándáá iní-yu tnúhu-gá ndihi titní cue tēe griégú ndihi ñáiyu dihí ñáiyu cunu ní sándáá iní-yu. <sup>13</sup> Te dava ñáiyu isráel ndécú-yu ñúu Tesalónica, te ñáiyu-án ní níhí-yu tnúhu sá ndécú té Páblú ndihi té Silás ñúu Bèréa càhá<sup>n</sup>-güedé tnúhu Yá Ndióxi, núu xiá<sup>n</sup> ní sáhá<sup>n</sup>-yu ñúu Bèréa ní dàcuándehndé-yu núú ncháa ñáiyu vátá dàcuáhá-gá. Te ñáiyu-án ní sándáá iní-yu tnúhu ndehnde te ní cudéén víhí-yu núu-güedé. <sup>14</sup> Te òrè-án ní xáha<sup>n</sup> ñáiyu sándáá iní tnúhu-gá xii té Páblú sá quíhí<sup>n</sup>-dé

yuhu làmár, te ní xica-dé cuáhá<sup>n</sup>-dé, te té Silás ndihi té Timüteú ní quendóo-güedé ñúu Bèréa. <sup>15</sup> Te ñ<sup>n</sup> úú-güedé cuáhá<sup>n</sup> ndihi-güedé té Páblú, te ndèca ñaha-güedé cuáhá<sup>n</sup> ndéé ñúu Àtenás, te ní xáha<sup>n</sup> té Páblú xii-güedé:

—Núu na nùhú-ndó, te cùu-ndo té Silás ndihi té Timüteú ná quixí ndihi-ni-güedé nanítnáhá-ndí iha —càchí-dé xáha<sup>n</sup>-dè.

Te ní xica-güedé cuánuhú-güedé.

*Té Páblú ndécú-dé ñúu Àtenás*

<sup>16</sup> Te ñúu Àtenás ndétú té Páblú quíhí<sup>n</sup> té Silás ndihi té Timüteú. Te yacá<sup>n</sup> ní xini-dé sá ío cuéhé sá càchí-yu cùu ndióxí-yu ndécú te ñá ndáa sá díú ndióxí cùú-xí, te xiá<sup>n</sup> ñá túú ní cùu váha iní-dé, chi ñá tnàhá iní-dé nàcuáa quidè-yu. <sup>17</sup> Te ní sáhá<sup>n</sup>-dé veñuhu ní càhá<sup>n</sup> ndihi-dé ñáiyu isráel ndihi dava-gá ñáiyu càhá<sup>n</sup> ndihi Yá Ndióxi. Te ñ<sup>n</sup> nduu ñ<sup>n</sup> nduu sáhá<sup>n</sup>-dé xití ñúu càhá<sup>n</sup>-dé tnúhu-gá ndihi nchaa ñáiyu xica cuu yacá<sup>n</sup>. <sup>18</sup> Te cue tēe cùu epicureú ndihi cue tēe cùu estoicú, cue tēe-án ní ndatnùhu-güedé ndihi té Páblú, te dava-güedé xitnàha-güedé:

—¡Ná tnúhu víhí càhá<sup>n</sup> tēe lúcú-án! —càchí-güedé xitnàha-güedé.

Te dava-güedé xitnàha-güedé:

—Sàni iní-ndí sá càhá<sup>n</sup>-dé cuendá ndióxí sá vátá quini-gá-ó —càchí-güedé xitnàha-güedé.

Te duca<sup>n</sup> xitnàha-güedé, chi càhá<sup>n</sup> té Páblú tnúhu Jèsús, te ní càhá<sup>n</sup>-dé nàcuáa ní dándótó ñaha Yá Ndióxi xii-gá, xiá<sup>n</sup> núu duca<sup>n</sup> xitnàha-güedé. <sup>19</sup> Te ndèca ñaha-güedé xii té Páblú cuáhá<sup>n</sup> ñ<sup>n</sup> xichi núu nání Areópágu, te ní xáha<sup>n</sup>-güedé xii-dé:

—Cachí tnúhu ndáa-n nása cuáhá<sup>n</sup> tnúhu càhá<sup>n</sup>-n, chi na cutnuni ndáa iní-ndí, <sup>20</sup> chi duca<sup>n</sup>-ni càhá<sup>n</sup>-n tnúhu sá ñá túú sácúndedóho-ndí, te cuini-ndí cachí tnúhu ndáa-n nása nduu tnúhu-án cuendá cutnuni váha iní-ndí —càchí-güedé xáha<sup>n</sup>-güedé xii-dé.

<sup>21</sup> Te nchaa ñáiyu ñúu Àtenás ndihi ñáiyu dava-gá ñúu, mee-ni tnúhu saa cuini-yu càhá<sup>n</sup>-yu, nchaa sá vátá cùndedóho-gá-yu cuini-yu cùndedóho-yu.

<sup>22</sup> Te té Páblú ní ngúnutñí-dé núu xixúcu-yu nchaá-yu, te xáha<sup>n</sup>-dè:

—Nchòhó cue ñáiyu ñúu Àtenás, cùndedóho-ndo ncháa tnúhu na càhá<sup>n</sup>-í-a. Ío quide cahnu nchòhó sá càchí-ndó cùu ndióxí-ndó. <sup>23</sup> Te vitna ní quexio-í ñúu-ndó, te ní xini-í sá yàyacá<sup>n</sup> ndécú ncháa sá càchí-ndó cùu ndióxí-ndó càhá<sup>n</sup> ndihi-ndo. Te ní xini-í ñ<sup>n</sup> xichi núu ndéé tñuni quidè càhnu-ndo Yá Ndióxi Yáá ñá túú xini-ndó, te diu-ni duca<sup>n</sup> càhá<sup>n</sup> lètrá ndéé tñuni xiá<sup>n</sup>, te càchí-xi: “Iha quide cahnu-ndí Ndióxi sá ñá túú xini-ndí”, duha càhá<sup>n</sup> lètrá-án. Te quide cahnu-ndo Yá Ndióxi càhá<sup>n</sup>-ndó, dico ñá túú xini-ndó nása cà-gá, te yuhú xini ndáa-í

## 18

nàcuáa càa Yá Ndiòxí, chi diu-ni Yá Ndiòxí càhá<sup>n</sup> ndihi-í, te diu tñuhu-gá càhá<sup>n</sup>-í vitna.

<sup>24</sup> Te diu Yá Ndiòxí ní cadúha-gá ñuyú-a ndihi nchaa sá ió, núu diu-gá cúú Xitohó ñuyú-a ndihi andú. Te ñá túú xini ñuhu-gá vehe dácaa ñáyiú ñuyú-a cundecu-gá. <sup>25</sup> Te ñá túú xini ñuhu-gá ñáyiú chindee ñahá-yu xii-gá, chi mee-gá quidé-gá nchító-ó ndécu-o te tàxi-gá yóco táchi-ó ndihi nchaa sá xini ñuhu-o.

<sup>26</sup> Te ndée sanaha ní cadúha-gá ñndi-ni téé, te diu-ni níñi-dé cúú ñáyiú ndécu nicaxico ñuyú. Te diu-ni mee Yá Ndiòxí ní xáha<sup>n</sup>-gá nchaa núu cundécú-yu, te mee-gá ní cáhá<sup>n</sup>-gá ná daha cuá cuá nchaa nació<sup>n</sup> ndihi meé-yu. <sup>27</sup> Te cuní-gá sá ncháá ñáyiú nanducu ñahá-yu cáhá<sup>n</sup> ndihi ñahá-yu xii-gá, te mee-gá ndécú túha-gá sá cáhá<sup>n</sup> ndihi ñaha-gá xii-yu ññ<sup>n</sup>-yu. <sup>28</sup> Te diu-ni Yá Ndiòxí xitó ñaha-gá xii-yu núu cudiú-yu ndécú-yu te càndá-yu. Te duha ní cáhá<sup>n</sup> ññ<sup>n</sup> ñaní tnáhá-ndó, téé ní cutnúni iní-xi ní xindecu ndée sanaha, te ní xáha<sup>n</sup>-dè xii-yu: “Nchaa-o cùu-o déhe Yá Ndiòxí”, duha ní xáha<sup>n</sup>-dè xii-yu. <sup>29</sup> Te núu déhe Yá Ndiòxí cúú-yu nchaa<sup>n</sup>-yu, te vá cúú cáhá<sup>n</sup>-yu sá Yá Ndiòxí cúú sá ní cadúha-yu ndahá-yu. Te sá ní cadúha-yu cùu ndiòxí-yu-á<sup>n</sup>, dava cùu-xi díhú<sup>n</sup> cuáá<sup>n</sup>, dava cùu-xi díhú<sup>n</sup> cuixí<sup>n</sup>, dava cùu-xi yúú. Te meé-yu ní cahu iní-yu nàcuáa cunduu sá cúú ndiòxí-yu. <sup>30</sup> Te cútñahá ñá túú ní cútñuni iní-yu sá nèhé ní quidé-yu ní cadúha-yu nchaa xiá<sup>n</sup>, te ñá túú ní quide cuendá Yá Ndiòxí sá dúcá<sup>n</sup> ní quidé-yu. Te vitna cachi Yá Ndiòxí sá dáñá ncháa ndi túhú-yu nchaa sá cuèhé sá dúhá quidé-yu. <sup>31</sup> Te Yá Ndiòxí náhá-gá ná nduu cundecu nchaa ñáyiú núú-gá, te mee-gá sa náha-gá ndéndida càa ñáyiú ní quide váha, te ndéndida càa ñáyiú ñá túú ní quide váha. Te mee-gá ní xáha<sup>n</sup>-gá xii Déhe-gá Yáa nání Jhésús cuñaha-gá xii-yu núu ndéndida cáa-yu ní quide váha te ndéndida cáa-yu ñá túú ní quide váha. Te mee Jhésús cáhá<sup>n</sup> ndáá cuiti-gá, te sa náha-o sá ncháá xiá<sup>n</sup> cada Jhésús, chi diu cuendá-á<sup>n</sup> ní dándotó ñaha Yá Ndiòxí xii-gá —cachí té Páblú xáha<sup>n</sup>-dè xii-yu.

<sup>32</sup> Te òré ní cáhá<sup>n</sup> té Páblú sá ní ndoto Jhésús, te dava ñáyiú ñá ní tnáhá iní-xi tñuhu ní cáhá<sup>n</sup>-dè ní cáhá<sup>n</sup> yíchí-yu. Te davá-yu ní cáhá<sup>n</sup>-yu xii-dé:

—Te ingá xito quixi-n, te cáhá<sup>n</sup> tucu-n tñuhu ní cáhá<sup>n</sup>-n vitna —cachí-yu xáhá<sup>n</sup>-yu xii-dé.

<sup>33</sup> Te ní xica-dé cuáhá<sup>n</sup>-dè. <sup>34</sup> Te dava ñáyiú ní xindedóho tñuhu ní cáhá<sup>n</sup> té Páblú ní sándáá iní-yu Jhésús, te ní chindee tñuhu ñahá-yu xii-dé. Te ññ<sup>n</sup> téé cùchiu<sup>n</sup> Areópagú nání-dè Nixú ndihi ññ<sup>n</sup> ñadihí nání-á<sup>n</sup> Dámaris, tnáhá-yu ní sándáá iní-yu tñuhu-gá ndihi dava-gá-yu.

*Té Páblú ndécú-dé ñuú Còrintú*

<sup>1</sup> Te té Páblú ní quee-dé ñuú Átenás cuáhá<sup>n</sup>-dè ñuú Còrintú. <sup>2</sup> Te yacá<sup>n</sup> ní naníhí tnáhá-dé ndihi ññ<sup>n</sup> téé isráél nání-dè Áquilú, te téé-á<sup>n</sup> cúú-dé téé distritú Pontó, te ní xindecu-dé ndihi ñadihí-dé tá Priscilá ñuú Rómá. Te té Césár téé yindaha cuèhé nació<sup>n</sup>, téé nani Claudiú ní xáha<sup>n</sup>-dè sá vá cúú-gá cundecu ñáyiú isráél ñuú Rómá, te xiá<sup>n</sup> núu ní ndee té Áquilú ndihi ñadihí-dé cuáhá<sup>n</sup>-yu ñuú Còrintú. Te sácú-ni nduu ní cuu sá ní quexiò-yu ñuú-á<sup>n</sup>, te ní sáhá<sup>n</sup> té Páblú ní ndatnúhu ndihi ñaha-dé xii-yu vehé-yu. <sup>3</sup> Te ní xáhá<sup>n</sup>-yu sá cundécú-dé cada chiú<sup>n</sup> ndihi ñahá-yu, chi ññ<sup>n</sup>-ni chiú<sup>n</sup> quide-dé ndihi-yu, te ní xóo dacáa-yu vehe dóó. Te núu xiá<sup>n</sup> ní xindecu ndihi ñaha té Páblú ní quide chiú<sup>n</sup> ndihi ñaha-dé xii-yu. <sup>4</sup> Te núu úná núu úná nduu, nduu ndetatú-yu, ní xóo quihí<sup>n</sup>-dè veñúhu ñáyiú isráél. Te ní ndatnúhu-dé ndihi ñáyiú isráél ndihi ñáyiú ñá túú cùu ñáyiú isráél, te ní xáha<sup>n</sup>-dè sá quindáá iní-yu tñuhu Jhésús.

<sup>5</sup> Te té Silás ndihi té Timúteú ní quee-güedé distritú Macedoniá cuáhá<sup>n</sup>-güedé núu ndécú té Páblú. Te òré ní quexiò-güedé, te ní cáhá<sup>n</sup>-ni té Páblú tñuhu Yá Ndiòxí núu ñáyiú isráél, te xáha<sup>n</sup>-dè xii-yu sá Jhésús cúú-gá Cristú Yáa ní tendaha Yá Ndiòxí ní quixi ñuyú-a. <sup>6</sup> Te sá dúcá<sup>n</sup> ní cáhá<sup>n</sup>-dè núu ní náá ndihi ñahá-yu xii-dé, te ní cáhá<sup>n</sup> cuèhé-yu cuendá-dé, núu xiá<sup>n</sup> ní naquidi-dé dóó-dé. Te duca<sup>n</sup> ní quide-dé cuendá sá cútñuni iní-yu sá ñá ní tnáhá iní-dé nàcuáa ní cáhá<sup>n</sup>-yu, te ní xáha<sup>n</sup>-dè xii-yu:

—Yúhu ñá túú cuèchi-í, te núu ní xíta ni-hnu-ndo, xiá<sup>n</sup> quendóo cuèchi mee-ná-ndó. Te vitna quihí<sup>n</sup>-í cáhá<sup>n</sup> ndihi-í ñáyiú ñá túú cùu ñáyiú isráél, te vá nánducu-gá-í nchòhó ñáyiú isráél cáhá<sup>n</sup> ndihi ñaha-í xii-ndo —cachí-dé xáha<sup>n</sup>-dè xii-yu.

<sup>7</sup> Te ní xica-dé cuáhá<sup>n</sup>-dè vehe ññ<sup>n</sup> téé nani Justú, te téé-á<sup>n</sup> ndécú yáni-dé núu cáá veñúhu, te tnáhá-dé cáhá<sup>n</sup> ndihi-dé Yá Ndiòxí. <sup>8</sup> Te té Crispú téé yindaha veñúhu-á<sup>n</sup> ní sándáá iní-dé Jhésús ndihi ñadihí-dé ndihi landú-dé. Te vai ñáyiú ñuú Còrintú ní sáhá<sup>n</sup>-yu ní xindedóho-yu tñuhu-gá, te ní sándáá iní ñahá-yu xii-gá, te ní sanduté-yu. <sup>9</sup> Te ññ<sup>n</sup> núu ní cáhá<sup>n</sup> saní té Páblú sá ní xáha<sup>n</sup> Yá Ndiòxí xii-dé:

—Cáhá<sup>n</sup>-ni-n tñuhu-í, te vá yùhu-n ncháa tñuhu cuèhé tñuhu duha cáhá<sup>n</sup> ñáyiú, <sup>10</sup> chi yúhu chindee ñaha-í xii-n, te vá yóo ññ<sup>n</sup> cada úhu ñahá xii-n, te vai-gá ñáyiú ñuú-á<sup>n</sup> quindáá iní-yu tñuhu-í —cachí-gá xáha<sup>n</sup>-gá núu sání-dé.

11 Te ñuú Còrintú ní xíndecu té Páblú ñi cuíá dava, te mee-ni tnúhu Yá Ndióxi ní xóo dacuàha-dé ñáiyu.

12 Te ndècu-gá-dé ñuú-án ní ngóo té Galión chiú<sup>n</sup> taxi tnuni-dé distritú Acáyá. Te dàvá-án ní cudéé<sup>n</sup> ñáiyu isráel núú té Páblú, te ní tñii ñàhá-yu xii-dé ndéca ñàhá-yu cuáhá<sup>n</sup> núú cuè tée cùchiu<sup>n</sup>. 13 Te ní xáhá<sup>n</sup>-yu xii té Galión tée cùu gobiernú:

—Tée-a ní quexio-dé ñuú-ó xica cuu-dé te cuini-dé dandàhú ñàhá-dé chitnahá-ndí-dé cada-ndí nàcuáa quide-dé quidé càhnu-dé Ndióxi-dé, te dañá-ndí vá cáda-gá-ndí nàcuáa càhá<sup>n</sup> tnúhu sá sánú ichi ñàhá xii-o nàcuáa cundecu-o cuini-dé —càchí-yu xáhá<sup>n</sup>-yu xii tée cùu gobiernú.

14 Te té Páblú cuini-dé cani-dé cuèndú ní cùu, te ní ngúita té Galión càhá<sup>n</sup>-dé, te xáhá<sup>n</sup>-dé xii-yu:

—Nchóhó ñáiyu isráel, cundedóho-ndo tnúhu na càhá<sup>n</sup>-í-a. Te núu ndècu núú ñi cuéchi ní quide-dé àdi ní sahní-dé ñi ndíyi, te cuu cundáá-xi iha, te cáhá<sup>n</sup>-ndó ñuú nándi cùu sá ní quide-dé, 15 àdi dico-ni sá ñi tnúhu ní cáhá<sup>n</sup>-dé, te yáchí-gá chí cuáhá<sup>n</sup> yàcá<sup>n</sup> ndatnúhu-ndo núú meé-ndó, chí mee-ni sá ñà túú quide-dé nàcuáa càhá<sup>n</sup> tnúhu sá sánú ichi ñàhá xii-ndo càhá<sup>n</sup>-ndó, te yúhú ñà túú tnàhá iní-í cada ndáá-í nchaa xiá<sup>n</sup> —càchí-dé xáhá<sup>n</sup>-dé.

16 Te ní cudéé<sup>n</sup>-dè, te ní ndèñuhu ñàhá-dé xii-yu vechiu<sup>n</sup>. 17 Te ñáiyu ñà túú cùu ñáiyu isráel ní tñii-yu té Sòstenés tée yindaha veñúhu ñáiyu isráel, te ndèhe té Galión tée cùu gobiernú ní canihá-yu xii-dé, dico ñà túú tnàhí ná tnúhu ní càhá<sup>n</sup>-dé taunihnu-dé tée ní caní-yu-á<sup>n</sup>.

*Té Páblú cuáhá<sup>n</sup> tucu-dé ñuú Antiòquia, te yàcá<sup>n</sup> ní xica tucu-dé cuáhá<sup>n</sup>-dé dava-gá ñuú càhá<sup>n</sup>-dé tnúhu Yá Ndióxi*

18 Te titní-gá nduu ní xíndecu té Páblú ñuú Còrintú, te ní quide ndee iní-dé nchaa ñáiyu ní sàndáá iní-xi tnúhu Jèsús, te ní tñii-dé ichi cuáhá<sup>n</sup>-dé distritú Siríá ndihi té Àquilú ndihi ñadhí<sup>n</sup> té Àquilú-án tá Priscilá, te ní quexio-yu ñuú Cèncreá. Te cùmání-gá tñii-yu ichi quihí<sup>n</sup>-yu ñuú Éfesú, te ní dèté díquí té Páblú, chí duca<sup>n</sup> ní xáhá<sup>n</sup>-dè xii Yá Ndióxi sá ndéé xínu ñi chiú<sup>n</sup> ní saní iní-dé cada-dé cuèndá-gá, te dàtnùni dèté-dé. Te ní quée-yu bàrcú cuáhá<sup>n</sup>-yu. 19 Te ní quexio-yu ñuú Éfesú, te yàcá<sup>n</sup> ní xáhá<sup>n</sup> té Páblú sá cùndècu té Àquilú ndihi ñadhí<sup>n</sup>-dé, te mee-dé quihí<sup>n</sup>-dé dava-gá ñuú. Te cùmání-gá caca-dé quihí<sup>n</sup>-dé, te ní sáhá<sup>n</sup>-dé veñúhu ñáiyu isráel ní ndatnúhu ndihi ñàhá-dé xii-yu. 20 Te ní xáhá<sup>n</sup>-yu sá cùndècu-dé titní nduu, te ñà ní cuini-dé cundecu-dé. 21 Te ní xáhá<sup>n</sup>-dè:

—Núh-í chí dacutíí xini ñuhu-xi cundecu-í vico coo ñuú Jerusálén, te quixi tucu-í te núu Ndióxi ná càchí-gá, te vitna chí cáda ndèe iní —càchí-dé xáhá<sup>n</sup>-dè xii-yu.

Te ní quée-dé bàrcú cuáhá<sup>n</sup>-dé. 22 Te ní quexio-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusálén, te ní ndexio-dé, te ní dándácóo váha-dé ñáiyu ndècu ichi Yá Ndióxi, te dàtnùni ní xica-dé cuáhá<sup>n</sup>-dé ñuú Antiòquia. 23 Te yàcá<sup>n</sup> ní xíndecu-dé titní nduu, te dàtnùni ní tñii-dé ichi cuáhá<sup>n</sup>-dé. Te ní sáhá<sup>n</sup>-dé ndihi distritú Gálaciá ndihi distritú Frigiá. Te ndi tnahá ñuú ní sáhá<sup>n</sup>-dé ní cáhá<sup>n</sup>-dé ndihi ñáiyu sàndáá iní tnúhu Yá Ndióxi, te ní ndúcú ndéé-gá-yu ní quidé-yu nchaa nàcuáa ní xáhá<sup>n</sup>-dè cadá-yu.

*Té Àpolós càhá<sup>n</sup>-dé tnúhu Yá Ndióxi ñuú Éfesú*

24 Te dàvá-án ní quexio ñi tée isráel ñuú Éfesú, te nàni-dé Àpolós, te cùu-dé tée ñuú Alejandriá, te ío váha túha-dé tnúhu Yá Ndióxi, te ío váha ñuhu díquí-dé nàcuáa cáhá<sup>n</sup>-dé, 25 chí sa xini-dé nàcuáa ní xóo cáhá<sup>n</sup> ndí Juáá cùtnàhá ní xóo dacuandute ndii ñáiyu. Te ío ní cudí iní-dé ní cáhá<sup>n</sup>-dé nchaa nàcuáa ní cuu cuèndá Jèsús, dico vátá dacuàha-gá-dé nchaa tnúhu ní cáhá<sup>n</sup> meé Jèsús. 26 Te ní sáhá<sup>n</sup>-dé veñúhu ñáiyu isráel, te yàcá<sup>n</sup> ní cáhá<sup>n</sup>-dé ní yùhu ní iní-dé. Te ndècu té Àquilú ndihi ñadhí<sup>n</sup>-dé tá Priscilá ndèdóho-yu tnúhu ní cáhá<sup>n</sup>-dé, te ní xáhá<sup>n</sup>-yu sá quihí<sup>n</sup>-dé vehé-yu, te ní sáhá<sup>n</sup>-dè, te ní xitnúhu ñàhá-yu xii-dé dava-gá tnúhu Yá Ndióxi sá ñà túú xini-dé.

27 Te ní cachí té Àpolós sá quihí<sup>n</sup>-dé distritú Acáyá, núu xiá<sup>n</sup> ní cadúha ñáiyu ñuú Éfesú ñi tutú canehe-dé quihí<sup>n</sup> ndaha ñáiyu sàndáá iní tnúhu-gá xíndecu Acáyá. Te xáhá<sup>n</sup>-yu núu tütú-yu: “Cáhá<sup>n</sup> váha-ndo ndihi té Àpolós ñuú ní quexio-dé”, càchí-yu xáhá<sup>n</sup>-yu núu tütú-yu. Te ní xica-dé cuáhá<sup>n</sup>-dé, te ní quexio-dé Acáyá. Te nchaa ñáiyu sàndáá iní tnúhu-gá yàcá<sup>n</sup>, diu-ni mee Yá Ndióxi ní chindee ñàhá-gá ní sàndáá iní ñàhá-yu xii-gá. Te té Àpolós ío váha ní cáhá<sup>n</sup>-dé tnúhu Yá Ndióxi núu-yu, te xiá<sup>n</sup> ío ní ndúcú ndéé-gá-yu ní quidé-yu chiú<sup>n</sup>-gá. 28 Te Àpolós ní ndatnúhu-dé ndihi ñáiyu isráel, te ní xíndedóho dava-gá-yu. Te ío váha ní cani-dé cuèndú nchaa nàcuáa ní xóo cáhá<sup>n</sup> cue tée ndéé sanaha sá quixí Crístú ñuyú<sup>n</sup>-a. Te ní cáhá<sup>n</sup> ndáá-dé ní xáhá<sup>n</sup>-dè sá díú-ní Jèsús cúu-gá Crístú Yá ní tendaha Yá Ndióxi ní quixi ñuyú<sup>n</sup>-a. Te ñáiyu isráel xíndatnúhu-yu sá ñà ndáá nàcuáa cáhá<sup>n</sup>-dè, dico ñà ní ndii-yu tnúhu cùñàhá-yu xii-dé, chí ío váha ñuhu díquí-dé tnúhu cáhá<sup>n</sup>-dè.

## 19

*Té Páblú ndécú-dě ñúú Éfesú*

<sup>1</sup> Te cútñàhá ndécú-gá té Àpolós ñúú Còrintú, te ní xica té Páblú cuáhá-dé tá yáha-dé mee-ni xití yucu cuáhá, te ní sáá-dé ndéé ñúú Éfesú. Te ñúú-á ní naníhí tnáhá-dé ndíhi cue té sàndáá iní tnúhu Jèsús. <sup>2</sup> Te ní xicá<sup>n</sup> tnúhú-dé núú-güedé, te xáha<sup>n</sup>-dè:

—¿Sa ní quexio Espiritú Yá Ndiöxí ní ngúndecu ndíhi-ndo ndéé òré ní sàndáá iní-ndó Jèsús-á? —cächí-dé xáha<sup>n</sup>-dè xii-güedé.

Te ní xáha<sup>n</sup>-güedé:

—Ñá túú xini-ndí sá ío Espiritú Yá Ndiöxí —cächí-güedé xáha<sup>n</sup>-güedé xii-dé.

<sup>3</sup> Te ní xáha<sup>n</sup> tucu-dé:

—¿Nása ní cáhá<sup>n</sup> té ní dácúandüte ñaha xii-ndo-i? —cächí-dé xáha<sup>n</sup>-dè xii-güedé.

Te ní xáha<sup>n</sup>-güedé:

—Ní cáhá<sup>n</sup>-dé nàcuáa ní xóo cáhá<sup>n</sup> ndíi Juáa —cächí-güedé xáha<sup>n</sup>-güedé xii-dé.

<sup>4</sup> Te ní xáha<sup>n</sup> tē Páblú:

—Ndíi Juáa ní dácúandüte ñaha ndíi xii ñáyíu, chí ní cuini-yu sá dañá-yu nchaa sá cuèhé sá dúhá quidé-yu. Te ní xáha<sup>n</sup> ndíi xii-yu: “Quindáá iní-ndó tnúhu Jèsús chí dacuití quixi-gá ñ<sup>n</sup> nduu”, duha ní xáha<sup>n</sup> ndíi Juáa xii-yu —cächí té Páblú xáha<sup>n</sup>-dè xii-güedé.

<sup>5</sup> Te sá dúcá<sup>n</sup> ní cáhá<sup>n</sup> té Páblú xáha<sup>n</sup>-dè xii-güedé, núú xiá<sup>n</sup> ní sandute-güedé nàcuáa ní dándóo tnúhu Jèsús. <sup>6</sup> Te ní sacá<sup>n</sup> ndodo té Páblú ndahá-dé díquí-güedé, te òré-ni ní quexio Espiritú Yá Ndiöxí ní ngúndecu ndíhi-güedé, te ní ngüíta-güedé ní cáhá<sup>n</sup>-güedé tnúhu sá dácáhu iní ñáhá Espiritú-gá, tnúhu sá ñá túú xini-güedé cáhá<sup>n</sup>-güedé, te ní cáhá<sup>n</sup>-güedé tnúhu Yá Ndiöxí nàcuáa ní dácáhu iní ñáhá Espiritú-gá xii-güedé. <sup>7</sup> Te cùu datná úxúú tnàhá-güedé.

<sup>8</sup> Te té Páblú ní sáhá<sup>n</sup>-dè veñúhu ñáyíu isràél ní cáhá<sup>n</sup> ndíhi-dé-yu, te úní yóó ní xínu ní xica cuu-dé veñúhu-yu. Te ío váha ñúhu díquí-dé tnúhu cáhá<sup>n</sup>-dè, núú xiá<sup>n</sup> ní cuyii-dé ní cáhá<sup>n</sup>-dè, te ní xáha<sup>n</sup>-dè sá quindáá iní-yu tnúhu Jèsús, te duca<sup>n</sup> te ndíhu ndaha ñaha Yá Ndiöxí xii-yu. <sup>9</sup> Te davá-yu ío sáa iní-yu ñá ní cuini-yu quindáá iní-yu, te ío ní cáhá<sup>n</sup> cuèhé-yu cuendá Jèsús xití veñúhu núú dává-gá-yu. Te té Páblú ní ndee-dé veñúhu cuáhá<sup>n</sup>-dè ndíhi ñáyíu sàndáá iní tnúhu Jèsús. Te ñ<sup>n</sup> nduu ñ<sup>n</sup> nduu ní sáhá<sup>n</sup>-dè scuèlá té Tiranú ní dácúáhá ñaha-dé xii-yu. <sup>10</sup> Te úú cuía duca<sup>n</sup> ní sáhá<sup>n</sup>-dè scuèlá ní dácúáhá-dè ñáyíu. Te nchaa ñáyíu isràél ñáyíu ndéu nihií distritú Àsiá ndíhi nchaa ñáyíu ñá túú cùu ñáyíu isràél ní xindedóho-yu tnúhu Jèsús.

<sup>11</sup> Te té Páblú ío ní chindee ñaha Yá Ndiöxí xii-dé ní quide-dé vai núú sá vā yōo tnàhí ndàcu cada. <sup>12</sup> Te pañú díquí-dé ndíhi dóo

cándéé núú yíquí-dè ní xicá<sup>n</sup>-yu nèhé-yu ní sáhá<sup>n</sup> núú ndécú ñáyíu cùhú, te xiá<sup>n</sup> ní tñii ñáyíu cùhú ndíhi ñáyíu yíhi ñaha espíritú cùndíhi yucu ñáváha, te ní ndúha-yu.

<sup>13</sup> Te ñúú Isràél véxi cue tée tatna xica cuu-güedé quidé tátna-güedé ñáyíu yíhi ñaha espíritú cùndíhi yucu ñáváha. Te ní ngüíta-güedé ní cacu nèhé-güedé Jèsús cuendá quee espíritú-á yíqui cùñú-yu, te ní xáha<sup>n</sup>-güedé:

—Xocuiñi-n, chí cächí Jèsús sá vā cùndècu ndíhi-gá-n tēe-a. Te diu-ni Jèsús cacú nèhé té Páblú òré càhá<sup>n</sup>-dè tnúhu-gá —cächí-güedé xáha<sup>n</sup>-güedé xii espíritú-á.

<sup>14</sup> Te úsá tnàhá-güedé duca<sup>n</sup> ní xóo cada-güedé. Te tátá-güedé ní xínani-dè Èsevá, te tēe-á ní cuu-dé dütú cùnuu. <sup>15</sup> Te sá dúcá<sup>n</sup> ní cáhá<sup>n</sup>-güedé, te ní xáha<sup>n</sup> espíritú cùndíhi yucu ñáváha-á xii-güedé:

—¿Te ná cùú nchòhó nñu dayúhú ñáhá-ndó? Te xini-í Jèsús, te xini-í yoo cùu té Páblú, te nchòhó ñá túú xini ñáhá-í xii-ndo —cächí espíritú-á xáha<sup>n</sup>-xii xii-güedé.

<sup>16</sup> Te tēe yíhi ñaha espíritú cùndíhi yucu ñáváha-ndó? Te ñandachita-dé ní tñii-dé cue tēe quide tátna-á, te ní ndíhi dóo-güedé ní ndátá-dé, te ní dánicuèhé ñáhá-dè xii-güedé, te ní xinu-güedé cuáhá<sup>n</sup>-güedé. <sup>17</sup> Te nchaa ñáyíu isràél ndécú ñúú Éfesú ndíhi dává-gá ñáyíu ndécu diu-ni ñúú-á ní níhi-yu tnúhu nàcuáa ní cuu, te ío ní yúhú-yu, te vai-yu ní cachí sá ío càhnu cuu Xitohó Jesucristú.

<sup>18</sup> Te dává ñáyíu ní sàndáá iní-xi tnúhu Jèsús ní sáhá<sup>n</sup>-yu núú ndécú té Páblú, ndíhi núú ndécú nchàa ñáyíu ní sàndáá iní tnúhu-gá ní náhmá-yu nàcuáa ní xóo cadá-yu. <sup>19</sup> Te titni ñáyíu ní xóo cada ndúu nehé-yu tutú-yu ní sáhá<sup>n</sup> núú ndécú nchàa ñáyíu sàndáá iní-xi tnúhu-gá, te yàcá<sup>n</sup> ní ndada cuendá-yu sá ío yahu ní sáha-yu tutú-yu, chí ndéé údico úxí míl díhú<sup>n</sup> cuixi<sup>n</sup> ní sáha-yu núú ncháá. Te ncháá-yu ní sahmí-yu tutú-yu. <sup>20</sup> Te sátá ní cáyú nchaa tutú-á, te vai-gá ñáyíu ní tuhá-yu ichi Yá Ndiöxí, te ní sáha-yu cuendá sá ío xini ñuhu tnúhu Yá Ndiöxí.

<sup>21</sup> Te ní cachí té Páblú sá quíhí<sup>n</sup>-dè distritú Macèdoniá ndíhi distritú Acáyá, te dátñuní nñúhú-dé ñúú Jerusalén, te duca<sup>n</sup> te dátñuní quíhí<sup>n</sup>-dè ñúú Rómá. <sup>22</sup> Te ndécu ndíhi-dé té Timutéu ndíhi té Èrastú cue tēe chindee ñaha xii-dé. Te té Páblú ní xáha<sup>n</sup>-dè xii-güedé sá códo nùu-güedé quíhí<sup>n</sup> Macèdoniá, te ní xica-güedé cuáhá<sup>n</sup>-güedé, te mee-dè ní quendóo-dé.

*Ñáyíu Éfesú ío dusa<sup>n</sup> quidé-yu ñúú-yu*

<sup>23</sup> Te davá-á ío ní cudéè<sup>n</sup>-yu núú nchàa ñáyíu ní tuha ichi Yá Ndiöxí. <sup>24</sup> Te ñ<sup>n</sup> tēe ñúú Éfesú nání-dè Demètriú. Te tēe-á ní xóo



canehe chiú<sup>n</sup>-dé mee-ni dîhú<sup>n</sup> cuixí<sup>n</sup> ní xóo cadúha-dé veñúhu lîhî, dàtná cuiñí-ndó càa veñúhu Diàná sá cúu ndiõxí-yu. Te vâi dîhú<sup>n</sup> ní xóo nihí-dé ndîhi cue téé ní xóo cada chiú<sup>n</sup> ndîhi-dé. <sup>25</sup> Te ní cana-dé cue téé quide chiú<sup>n</sup> ndîhi-dé, ndîhi nchaa cue téé quide chiú<sup>n</sup> ndîhi dîhú<sup>n</sup> cuixí<sup>n</sup>, te ní xáha<sup>n</sup>-dê xii-güedé:

—Nâha-ndo sá ïo váha nihí-ó dîhú<sup>n</sup> cuendá chiú<sup>n</sup> quide-o. <sup>26</sup> Te nâha-ndo sá cächí té Pâblú sá ñá díú ndiõxí cúu sã ní cadúha ñâyüu ñuyüú-a. Te duca<sup>n</sup> cãhá<sup>n</sup>-dé ñuú-ó, te duca<sup>n</sup>-ni cãhá<sup>n</sup>-dé nihî distritú Àsiá, te ïo-gá vâi ñâyüu sãndáá iní tnúhu cãhá<sup>n</sup>-dé. <sup>27</sup> Te ïo úhu núu na cuiña chiú<sup>n</sup> quide-o, vá yóo-gá cuaa<sup>n</sup> sá cadúha-o. Te ngüüta-yu cãhá<sup>n</sup>-yu sã veñúhu Diàná ñá túu càváha, te vá cadá càhnu-gá-yu sãndú-ó. Te nâha-ndo sá ïo càhnu cuu Dianá, chi nchaa ñâyüu distritú Àsiá quidé càhnu ñahá-yu ndîhi ñâyüu xîndecu ní càa xico ñuyüú —cächí té Demètriú xáha<sup>n</sup>-dê xii-güedé.

<sup>28</sup> Te sá dúcã<sup>n</sup> ní cãhá<sup>n</sup> té Demètriú, xíã<sup>n</sup> ní cuadé<sup>n</sup>-güedé núu té Pâblú, te uu<sup>n</sup>i ní cuáá-güedé te cächí-güedé:

—Ïo càhnu cuu Dianá sãndú ñâyüu Éfesú! —cächí-güedé.

<sup>29</sup> Te nchaa ñâyüu ñuú Éfesú ndî coyo ndî coyó-yu xicãhá<sup>n</sup>-yu. Te tnãhá úú cue téé distritú Macèdoniá xicá cùu-güedé ndîhi té Pâblú, ñ<sup>n</sup>-dé nání-dé Gàyú, te ñ<sup>n</sup>-dé nání-dé Aristarcú. Te ní tnü-güedé úú cue téé-án, te cuàngüihu coyo ndîhi ñaha-güedé vehe núu quidé-güedé jündá. <sup>30</sup> Te té Pâblú cuiñí-dé quíhu-dé tnãhá-dé vehe-án cãhá<sup>n</sup> ndîhi ñaha-dé ní cùu, te ñá ní dàña cue téé ní sãndáá iní tnúhu-gá. <sup>31</sup> Te ñ<sup>n</sup> úú cue téé cùnnu distritú Àsiá ní cãhá<sup>n</sup> váha-güedé cuendá té Pâblú, te ní xáha<sup>n</sup>-güedé xii ñ<sup>n</sup> téé xînu cuechi núu-güedé ní sãhá<sup>n</sup>-dé ní xáha<sup>n</sup>-dê xii té Pâblú sá vâ quíhu-dé vehe núu quidé-güedé jündá. <sup>32</sup> Te uu<sup>n</sup>i ní cuáá-yu ncháa-yu, te ñá ñ<sup>n</sup>-ní tnúhu ní cãhá<sup>n</sup>-yu, chi ndî ñ<sup>n</sup>-ní tnúhu ní cãhá<sup>n</sup>-yu ñ<sup>n</sup> ñ<sup>n</sup>-yu. Te chitu-gá ñâyüu ñá ní cùtnumí iní-yu ná cuendá ní dàtácã ñãhá-güedé xiti vehe-án, chi ñá ñ<sup>n</sup>-ní tnúhu ní cãhá<sup>n</sup>-yu. <sup>33</sup> Te davá-yu ní cãhá<sup>n</sup>-yu sã cuèchi té Ljandrú cúu-xí, chi ní xáha<sup>n</sup> ñâyüu isrãêl xii-dé sá cãhá<sup>n</sup>-dé yuhú-yu chindee tnúhu ñaha-dê xii-yu. Te ní quide-dé ndaha-dé núu-yu sá cündédóho-yu tnúhu cãhá<sup>n</sup>-dé chindee tnúhu ñaha-dê xii-yu yòtnúhu. <sup>34</sup> Te ní cùtnumí iní-yu sá tée isrãêl cúu-dé, te uu<sup>n</sup>i ní cuáá tucú-yu, ñá ní dàñá-yu cãhá<sup>n</sup>-dé, te cächí-yu:

—Ïo cùnnu Dianá sãndú ñuú Éfesú! —cächí-yu. Te dàtná úú òré ñ<sup>n</sup>-ni tnúhu ní cãhá<sup>n</sup>-yu.

<sup>35</sup> Te téé cùu secretariú-ni-gá ní cãhá<sup>n</sup>-dé, te dàtnumí cuèé cuèé ní sadí-yu yuhú-yu. Te

ní xáha<sup>n</sup>-dê xii-yu:

—Nchaa-ndo cündedóho-ndo ñ<sup>n</sup> tnúhu na cãhá<sup>n</sup>-í-a. Ïo cùnnu Dianá, te nchaandi túhu ñâyüu sa nãhá-yu sá ncháá-ó ïo nèhe cuendá-ó veñúhu-án. Te nãhá-yu sã nèhé cuendá-ó sãndú-án, chi véxi cuu<sup>n</sup>-gá andü. <sup>36</sup> Te vá yóo ñ<sup>n</sup> cãhá<sup>n</sup> sá ñãndá. Te coto-ndo mèe-ndo, te vá cuidó-ndó càda-ndo, te vá cuidó-ndó cãhá<sup>n</sup>-ndó. <sup>37</sup> Te ná cuendá ndécá-ndó cuè téé-án véxi, te ñá túu ná ní quide-güedé, te ñá túu ná ní dùhu-güedé veñúhu, te ñá túu cãhá<sup>n</sup> cuèhé-güedé cuendá Diàná. <sup>38</sup> Te núu ïo yoo nãá ndîhi ñaha xii té Demètriú ndîhi cue téé quide chiú<sup>n</sup> ndîhi-dé, te quíhí<sup>n</sup>-güedé cacã<sup>n</sup> cuèchi-güedé núu cue téé cùchiu<sup>n</sup>. Te cue téé cùchiu<sup>n</sup> na cundoho-güedé núu quehndé-güedé cuèchi-yu àdi ñãhá. <sup>39</sup> Àdi ïo-gá ná cuendú ñúhu iní-ndó, te cãhá<sup>n</sup>-ndó òré ná cóo jündá. <sup>40</sup> Te ïo úhu núu na nihí téé táxi tnumí ñãhá xii-o tnúhu sá dúhá ïo quide dusa<sup>n</sup>-o, te cächí-dé sá ndécucéchi-o chí ñá túu sãndáá iní-ó-dé quesaha-dé. Te ñá túu tnãhí ndüu váha-xi sá dúhá càda-o ní cuu, te vitna duha ní quide-o, te ñá cùtnumí iní-ó nãsa cùñaha-o xii téé táxi tnumí ñãhá xii-o núu na càna ñaha-dé —cächí té cùu secretariú xáha<sup>n</sup>-dê xii-yu.

<sup>41</sup> Te ní xáha<sup>n</sup>-dê sá nùhú-yu te ní ndîhí-yu cuánuhú.

## 20

*Té Pâblú cuáhã<sup>n</sup>-dé distritú Macèdoniá ndîhi distritú Grèciá*

<sup>1</sup> Te òré ñá túu-gã ní quide dusá<sup>n</sup>-yu, te ní cana ñaha té Pâblú xii nchaa ñâyüu sãndáá iní tnúhu Jèsús ní cãhá<sup>n</sup>-dé dóho-yu nãcuáa cadá-yu. Te ní quide ndee iní ñãhá-dê xii-yu, te ní tnü-dé ichi cuáhã<sup>n</sup>-dé distritú Macèdoniá. <sup>2</sup> Te tayãha-dé cuáhã<sup>n</sup> ñ<sup>n</sup> ñ<sup>n</sup> ñuú yíndèhu Macèdoniá. Te cãhá<sup>n</sup>-dé dóho nchaa ñâyüu sãndáá iní tnúhu Jèsús nãcuáa cadá-yu, te ní cudí<sup>n</sup> iní-yu cadá-yu nãcuáa cãhá<sup>n</sup> Yá Ndiõxí cadá-yu sã dúcã<sup>n</sup> ní cãhá<sup>n</sup>-dé dóho-yu. Té ní quexio-dé distritú Grèciá. <sup>3</sup> Te xíã<sup>n</sup> ní xîndecu-dé úní yóó. Te xíã<sup>n</sup> quèe-dé bàrcú quíhí<sup>n</sup>-dé distritú Siriá ní cùu, te ní nihí-dé tnúhu sã ndétú ñaha ní úú cue téé isrãêl cahni ñaha-güedé xii-dé ní cùu, núu xíã<sup>n</sup> ní tnü-dé ichi cuáhã<sup>n</sup>-dé ní yãha-dé ichi distritú Macèdoniá. <sup>4</sup> Te cuáhã<sup>n</sup> ndîhi-dé té Sopãtér téé ñuú Bèrea, ndîhi té Aristarcú, ndîhi ñ<sup>n</sup> téé nãni Segundú. Te ndî ndüú cue téé-án cúu-güedé cue téé ñuú Tesalónicá. Te tnãhá té Gàyú téé ñuú Dèrbé, ndîhi té Timùteú cuáhã<sup>n</sup> ndîhi-dé, te tnãhá té Tiquicú ndîhi té Trõfimú cuáhã<sup>n</sup> ndîhi-dé, te úú cue téé-án cúu-güedé cue téé distritú Àsiá. Te nchaa cue téé-án cuáhã<sup>n</sup> ndîhi-güedé té Pâblú. <sup>5-6</sup> Te ní quexio-güedé ñuú Filipú, te yacá<sup>n</sup> ní naníhí ñãhá-güedé xii-ndí. Te

té Páblú ní tendaha-dé cue téé ndihi-dé cuáhán-güedé ñuú Tròás, te ní xáha<sup>n</sup>-dé sá díú-ní yàcá<sup>n</sup> cundetú ñaha-güedé xii-ndí. Te ní ndóo-í ndihi-dé, te ní xíndecu-ndí vico xèxi-yu pàá sá ñá túú yíhi levadurá. Te sátá nǐ yáha vico, te ní queé-ndí bàrcú cuáhán-ndí, te ní xúhu<sup>n</sup>-ndí ichi úhú<sup>n</sup> nduu, te ní quexio-ndí ñuú-á<sup>n</sup>. Te yàcá<sup>n</sup> ní naníhí tnáhá-ndí ndihi cue téé yòdo nuu cuáhán ní xíndecu-ndí úsá nduu.

*Té Páblú cuáhán ngándihi-dé ñáyiu ñuú Tròás*

<sup>7</sup> Te ñ<sup>n</sup> nduu ndumíngú ní naníhí tnáhá-ndí ndihi nchaa ñáyiu ní sándáá iní-xi tnúhu Jesús ní xexi-ndí pàá ndihi-yu. Te duca<sup>n</sup> nǐ quide-ndí, chi ní cachí Jèsús sá dúcá<sup>n</sup> càda-o cuendá sá vǎ nàcuànaa-o sá nǐ xihí-gá cuendá naníhí tǎhú-ó. Te té Páblú ní ngúita-dé càhán-dé tnúhu-gá, te càhán-dé ní cuu dava niú, chi cuendá ná tũndaá ingá nduu-á<sup>n</sup>, te caca-dé quihí<sup>n</sup>-dé ingá xichi. <sup>8</sup> Te ndécú-yu vehe yòdo tnaha, te yíhi-yu ndéé cuártú cùú ùní núú ñinu, te càyú víhi ñùhú xití cuártú-á<sup>n</sup>. <sup>9</sup> Te ñ<sup>n</sup> téé sa ta cùu sacuéhé luha nani-dé Eùticú núcóo-dé yéhe ventaná, cuíní-dé cúdú-dé, chi ní cunaha víhi cahá<sup>n</sup> té Páblú, te ní tnú ñaha sàni xii-dé ní xidí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñahá-yu, te sa ní xihí-dé, chi ío dùcú<sup>n</sup> ní ngava-dé. <sup>10</sup> Te tnáhá té Páblú nchicú<sup>n</sup>-dé ní nuu. Te ní quexio cunu-dé núú càtúu téé ní xihí-á<sup>n</sup>, te ní numi ñaha-ni-dé, te ní xáha<sup>n</sup>-dé xii-yu:

—Vǎ ndiñú iní-ndó, chi ní ndoto-dé — cachí-dé xáha<sup>n</sup>-dé xii-yu.

<sup>11</sup> Te dàtnúni cuánda ndihi ñaha tucu-dé xii-yu cuártú núú yíhi-yu ní cùu, te yàcá<sup>n</sup> ní xexi ndihi ñaha-dé xii-yu, dàtnúni ní ngúita-dé vǎi-gá tnúhu ní càhán-dé, te càhán-ni-dé ní tũndaá, te dàtnúni ní xica-dé cuáhán-dé. <sup>12</sup> Te téé ní ngava-á<sup>n</sup> ní sánúndeca ñahá-yu xii-dé ndéé vehe-dé, te ío ní cudíí iní-yu sá nǐ ndoto-dé.

*Ní quee-güedé ñuú Tròás cuáhán-güedé ñuú Miletú*

<sup>13</sup> Te té Páblú ní cachí-dé sá quihí<sup>n</sup>-ndí ndihi bàrcú ndéé ñuú Àsón, te mee-dé caca saha-dé, te yàcá<sup>n</sup> naníhí tnáhá-ndí ndihi-dé te queé-dé bàrcú, te ní queé-ndí bàrcú cuáhán-ndí. <sup>14</sup> Te ní naníhí tnáhá-ndí ndihi-dé ñuú Àsón, te yàcá<sup>n</sup> ní queé-dé bàrcú tnáhá-dé cuáhán-ndí ñuú Mitiléné. <sup>15</sup> Te ní quexio-ndí ndéé ingá nduu yatni ñuú Quiú, te ndéé nduu tnéé ní quexio-ndí ñuú Sámú te yàcá<sup>n</sup> ní yáha-ndí, te ní quexio-ndí ñuú Tróglíú. Te ndéé nduu idá ní quexio-ndí ñuú Miletú. <sup>16</sup> Te té Páblú ñá ní cuíní-dé yáha-ndí ñuú Éfesú, chi ñá túú ní tnáhá

iní-dé cuyaa-dé ichi, chi ío ndihi iní-dé cuendá cuíní-dé quini-dé núu vǎ ndácú-dé ndexio-dé ñuú Jerusalén cundecu-dé vico Pentecóstés.

*Té Páblú càhán ndihi-dé cue téé yíndaha ñaha xii ñáyiu sándáá iní tnúhu Jèsús ñuú Éfesú*

<sup>17</sup> Te òré ndécú té Páblú ñuú Miletú, te ní cana-dé cue téé yíndaha ñaha xii ñáyiu sándáá iní tnúhu Jèsús ñuú Éfesú sá quihí<sup>n</sup>-güedé núú ndécú-dé. <sup>18</sup> Te sátá ní quexio-güedé, te ní xáha<sup>n</sup>-dé xii-güedé:

—Nàha-ndo nacuáa ní quide-í ndéé cùtnáhá ní quexio-í distritú Àsiá. <sup>19</sup> Chi ní quide-í nàcuáa ní càhán Yǎ Ndióxi cada-í, ñá túú ní tũhí-í, te ñá túú ní quide cahnu-í mèè-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá tĩní xito ní cuíní ñáyiu isráel cahni ñahá-yu xii-í ní cùu, te ío ní ndoho-í ní cácu-í. <sup>20</sup> Te sa nàha-ndo sá ncháandi tũhú sa ní cachí tnúhu-í nàcuáa cada-ndo cuendá sá chĩndé ñaha Yǎ Ndióxi xii-ndo. Te ní càhán-í tnúhu-gá núú-ndó ncháa-ndo, te diu-ni duca<sup>n</sup> ní quixi-í ndi tnáhá vehe-ndo ní càhán-í tnúhu-gá núú-ndó. <sup>21</sup> Te ní xáha<sup>n</sup>-í xii ñáyiu isráel ndihi ñáyiu ñá túú cùu ñáyiu isráel sá dàñá-yu nchaa sá cuéhé sá dúhá quide-yu te quindáá iní-yu tnúhu Xítóhó Jesucristú. <sup>22</sup> Te dacuítí quihí<sup>n</sup>-í ñuú Jerusalén, chi Espiritú Yǎ Ndióxi ní cachí-xi sá dáí quihí<sup>n</sup>-í, te ñá túú xini-í nándi cada ñaha-güedé xii-í yàcá<sup>n</sup> te núu na quèxio-í. <sup>23</sup> Te ñ<sup>n</sup> ñ<sup>n</sup> ñuú núú sàhán-í cachí tnúhu Espiritú-gá sá chihí ñaha-güedé vecaá, te cada úhú ñahá-güedé. <sup>24</sup> Dico ñá túú tnàhí ná cuu cuéi na cahni ñaha-güedé xii-í, dico cuíní-í sá díí iní dandihí-í nchaa sá ní cachí Xítóhó Jesucristú cada-í. Te ní cachí Yǎ Ndióxi sá càhán-í núú ñáyiu sá ío cùu iní ñahá-gǎ xii-yu, te naníhí tǎhú-yu núu na quindáá iní-yu tnúhu-gá.

<sup>25</sup> Te sa ní cachí tnúhu-í xii-ndo ncháa-ndo sá núu na quindáá iní-ndó Yǎ Ndióxi, te ndiñu ndaha ñaha-gá xii-ndo. Te na cachí tnúhu-í sá ní ñ<sup>n</sup> nduu-gá vǎ quini ñahá-ndó xii-í ñuyú-a. <sup>26-27</sup> Te yúhú ñá túú cuèchi-í núu ío ñáyiu vǎ naníhí tǎhú, chi sa ní cachí tnúhu-í nchaa sá ní càhán mée Yǎ Ndióxi cada-ndo. <sup>28</sup> Te coto-ndo mée-ndo, te coto-ndo tnáhá ñáyiu sándáá iní tnúhu-gá, chi Espiritú-gá ní cachí-xi sá cúnú-ndo núu-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu duca<sup>n</sup> càda-ndo cuendá, chi nàha-ndo sá Jèsús ní sati níñí-gǎ, te ní xihí-gá cuendá naníhí tǎhú-ó ndihi-yu. <sup>29</sup> Te yúhú sa cùtnuni iní-í sá òré ñá túú-gǎ-í ndécú, te quixi ñáyiu dandáhú ñahá xii-ndo

cuendá ñàhá-ndo tnúhu Yá Ndiòxí, te cada ñàhá-yu xii-ndo dàtná quidé ñáñá òré tñí-dí mbéé. <sup>30</sup> Te ñá-ndí ní úú cue téé ndècu ndihí-ndo, cue téé-án dachuandehnde-güedé, te cudana davá-yu quindáá iní-yu chitnàhá ñàhá-yu xii-güedé. <sup>31</sup> Te xián núu càchí tnúhu-í sá ño quihí iní-ndó cùndecu-ndo ndihí nchaa ñáiyu sàndáá iní tnúhu-gá. Te ñàhá-ndo sá yúhú ní xíndecu-í úní cuiá ní càhá-í tnúhu Jèsús núu ñáiyu cuéi nduu cuéi níu. Te áma ní xóo ndáhyú-í, chí ñá ní cuini-yu quindáá iní-yu nchaa-yu tnúhu ní càhá-í —càchí té Páblú xáha-dé xii-güedé.

<sup>32</sup> Te xáha<sup>n</sup> tucu-dé:

—Nchòhó cue téé ndècu ndihí-í ichi Xitohó Jesucristú, ío cuini-í sá mée Yá Ndiòxí chindee ñàhá-gá xii-ndo. Te mee-gá ní càhá-gá sá ño cudií iní ñàhá-gá xii-ndo. Te nanihí tãhú-ndo ndihí nchaa ñáiyu cùu cuendá-gá, te chindee ñàhá-gá xii-ndo cuendá cada-ndo nchaa sá càhá-gá. <sup>33</sup> Te òré ní xíndecu ndihí ñàhá-í xii-ndo, te ní ñáiyu ní dõó ñá túú ní cudií iní-í. <sup>34</sup> Te mee-ndo sá ñàhá-ndo sá yúhú ní quide chiu-í, te ní ñáiyu ní nchaa sá ní nandihí-í ndihí cue téé xica cuu ndihí-í. <sup>35</sup> Te sa ní xini-ndó ñacuáa ní quide-í ní quide chiu-í, te ñáiyu ní duca<sup>n</sup> cada chiu-ndo cuendá chindee-ndo nchaa ñáiyu ndáhu, chí sa ñàhá-ndo nacuaa ní cachí Xitohó Jesucristú, te duha ní cachí-gá: “Cudií-gá iní-ó cuáha-o ñáiyu ndáhu sá xini ñáiyu-yu dácúxí sá xáxi-yu xii mee-o”, duha ní cachí-gá —càchí té Páblú xáha-dé xii-güedé.

<sup>36</sup> Te sáta ducá<sup>n</sup> ní càhá-dé, te ní ngüíñí xití-dé ndihí dava-gá-güedé, te ní càhá<sup>n</sup> ndihí-dé Yá Ndiòxí. <sup>37</sup> Te sáta ní tnúhu tnúhu ní càhá-dé ndihí Yá Ndiòxí, te ní ndáhyú vihi-güedé sá quihí-dé, te ní numi ñàhá-güedé, te ní teyuhu ñàhá-güedé. <sup>38</sup> Te ní ndáhyú vihi iní-güedé, chí ní xáha<sup>n</sup> té Páblú sá ní ñáiyu nduu-gá vâ nanihí tnáhá-güedé càhá<sup>n</sup> ndihí tnàhá-güedé. Te cuáhá<sup>n</sup> ndihí ñàhá-güedé xii-dé núu ndécú bàrcú.

## 21

### *Té Páblú cuáhá-dé ñúu Jerusalén*

<sup>1</sup> Te ní quide ndee iní-ndí nchaa cue téé cùnuu. Te ní quée-ndí bàrcú cuáhá<sup>n</sup> ndáá ichi-ndí ñúu Còs. Te nduu tnée ní sáhá<sup>n</sup>-ndí ñúu Ródás, te ní yáha-ndí cuáhá<sup>n</sup>-ndí ñúu Pátará. <sup>2</sup> Te yacá<sup>n</sup> ní nanihí-ndí ñáiyu bàrcú ñáiyu ichi-xi quihí-xi distritú Fènicíá, xián ní quée-ndí cuáhá<sup>n</sup>-ndí. <sup>3</sup> Te ichi cuáhá<sup>n</sup>-ndí ní xini-ndí distritú Chìpré cáá cuádhava xití lámár, te ní yáha-ndí, te ní quendóo ñúu-án xio dàtni-ndí. Te cuáhá<sup>n</sup>-ndí ñúu Tirú ñúu yíndèhu distritú Siríá cuendá yacá<sup>n</sup> tava-güedé nchaa sá nchidó bàrcú. <sup>4</sup> Te yacá<sup>n</sup>

ní nanihí tnáhá-ndí ndihí ñáiyu ní sàndáá iní tnúhu Jèsús, te ní xíndecu-ndí úsá nduu ndihí-yu. Te ní xáhá<sup>n</sup>-yu sá vâ quihí<sup>n</sup> té Páblú ñúu Jerusalén, chí Espiritú Yá Ndiòxí ní xáha<sup>n</sup>-xi xii-yu sá ndóhó vihi-dé núu na quihí<sup>n</sup>-dé. <sup>5</sup> Te sáta ní yáha nduu úsá, te ní quée-ndí cuáhá<sup>n</sup>-ndí yuhu lámár. Te ní quée nchaa ñáiyu ní sàndáá iní tnúhu-gá, téé, ñadihí, nchaa landú, nchaa-yu ní sàndeca ñàhá-yu yuhu lámár, te òré ní quexio-ndí, te ní ngüíñí xití-ndí ní càhá<sup>n</sup> ndihí-ndí Yá Ndiòxí. <sup>6</sup> Te ní quide ndee iní tnáhá-ndí ndihí-yu, te dàtní ní quée-ndí bàrcú, te ní naquehé<sup>n</sup>-yu ichi cuanuhú-yu vehé-yu.

<sup>7</sup> Te ní xica bàrcú ñáiyu-ndí ní quée-xi ñúu Tirú cuáhá<sup>n</sup>-ndí ndihí-xi ñúu Tolémaidá. Te xián ní sáa-xi te ní quene-ndí, te ní sáhá<sup>n</sup>-ndí ní càhá<sup>n</sup> ndihí-ndí nchaa ñáiyu sàndáá iní-xi tnúhu Jèsús, te ní xíndecu-ndí ndihí-yu ñáiyu nduu. <sup>8</sup> Te nduu tnée ní ndee tucu-ndí bàrcú cuáhá<sup>n</sup>-ndí ñúu Cèsareá, te yacá<sup>n</sup> ní quene tucu-ndí bàrcú, te cuáhá<sup>n</sup>-ndí vehe té Lipé cundecu-ndí ndihí-dé. Te téé-án ní xóo cada chiu<sup>n</sup> ndihí-dé ñáiyu-gá cue téé ní chindee ñàhá xii ñáiyu sàndáá iní tnúhu-gá ñúu Jerusalén ní xóo cuáñàhá-güedé sá ní xóo caxi-yu. Te dàtní mee-ná tnúhu Yá Ndiòxí càhá<sup>n</sup>-dé xicá cùu-dé. <sup>9</sup> Te té Lipé-án ndècu cümü dèhe ñáiyu-gá, te ní ñáiyu vátá ndúcú ñàhá-gá téé xii-yu, te nchaa-yu càhá<sup>n</sup>-yu tnúhu Yá Ndiòxí tnúhu sá dácáhu iní ñàhá mèe-gá. <sup>10</sup> Te xián ní cuu titní nduu ndècu-ndí, te ní quexio ñáiyu téé nani Agabú ñúu-án, véxi-dé distritú Júdeá, te téé-án tnáhá-dé càhá<sup>n</sup>-dé tnúhu Yá Ndiòxí. <sup>11</sup> Te ní ñáiyu-ndí tnúhu núu ndécú-ndí núu ní quixi-dé ní càhá<sup>n</sup> ndihí ñàhá-dé xii-ndí. Te ní xicá<sup>n</sup>-dé cinchú té Páblú, te ní ngóo-dé, te ní ngüíta-dé ní dácútu-dé sáhá-dé ndihí ndaha-dé, te ní cachí-dé xii-ndí:

—Espiritú Yá Ndiòxí ní cachí-xi sá téé dui cinchú-xi-a tñí ñàhá cué téé israhél ñúu Jerusalén, te duha dacutu ñàhá-güedé xii-dé, te cuáha cuendá ñàhá-güedé xii-dé núu cué téé ñúu Rómá. Duha ní càhá<sup>n</sup> Espiritú-gá —càchí té Àgabú.

<sup>12</sup> Te sá ducá<sup>n</sup> ní càhá<sup>n</sup>-dé, te ní xáha<sup>n</sup>-ndí nchaa-ndí sá vâ quihí<sup>n</sup> té Páblú ñúu Jerusalén. <sup>13</sup> Te té Páblú ní cachí-dé:

—¿Ná cuendá ndée ducá<sup>n</sup> ndáhyú-ndó dàndihú iní ñàhá-ndó xii-í-í? Te ñá túú ná cuu cuéi na dácutu ñàhá-güedé, àdi cuéi na càhni ñàhá-güedé xii-í cuendá sá càhá<sup>n</sup> ndihí-í Jèsús, chí sa ndècu túha-í sá cùu-í —càchí-dé.

<sup>14</sup> Te ñá túú ní sàndáá iní-dé sá ducá<sup>n</sup> xáha<sup>n</sup>-ndí, núu xián ñá túú-gá ná ní xáha<sup>n</sup>-ndí xii-dé sá vâ quihí<sup>n</sup>-dé, te ní xitnàhá-ndí:

—Mee-ni-gã Yã Ndióxi ná cùna-ha-gá nása sàni iní-gá cada-gá —xítñaha-na-ndí.

15 Te ní quehe<sup>n</sup>-ndí ndàchiu<sup>n</sup>-ndí, te ní xica-ndí cuáhá<sup>n</sup>-ndí ñuú Jerusalén. 16 Te cuáhá<sup>n</sup> ndihí-ndí ñ<sup>n</sup> úú cue téé Cèsareá, cue téé ní sándáá iní tnúhu Jèsús. Te ndèca ñaha-güedé xii-ndí cuáhá<sup>n</sup> vehe té Mnàson, te téé-án<sup>n</sup> cúú-dé téé distritú Chìpré, te ndècu-dé ñuú Jerusalén, te sa ní cuu vài nduu ní sándáá iní-dé tnúhu-gá, te vehe téé-án<sup>n</sup> ní xíndecu-ndí.

*Té Páblú ndátnúhu-dé ndihí té Jácobó*

17 Te òré ní quexio-ndí ñuú Jerusalén, te nchaa ñáyú ní sándáá iní tnúhu Jèsús ní quixí-yu ní dándácóo váha ñahá-yu, chi ní cudáí víhí iní-yu sá ní quexio-ndí. 18 Te nduu tnèé cuáhá<sup>n</sup> ndihí-ndí té Páblú cuèndá cáhá<sup>n</sup> ndihí-ndí té Jácobó, te òré ní quexio-ndí núú ndécú-dé, te ndècu ndihí-dé nchaa cue téé yindaha ñaha xii ñáyú sándáá iní tnúhu Jèsús. 19 Te té Páblú ní dándácóo váha ñaha-dé xii-güedé, te ní xáha<sup>n</sup>-dè nàcuáa ní quide Yã Ndióxi ní chindee ñaha-gá xii-dé ní cáhá<sup>n</sup>-dé tnúhu-gá núú ñáyú ñá túú cùu ñáyú isràél. 20 Te sáta ní yáha ní cáhá<sup>n</sup>-dé, te ní ndácá<sup>n</sup> táhú-yu núú Yã Ndióxi cuèndá nchaa sá ní quide-gá. Te dàtnúni ní xáha<sup>n</sup>-güedé xii té Páblú:

—Yòhó sa ñaha-n sá ní cuu titní mĩ ñáyú isràél ní sándáá iní-yu tnúhu Jèsús, te cächí-yu sá ño xini ñuhu-xi cadá-yu nchaa nàcuáa cáhá<sup>n</sup> tnúhu sá ní chídó tnúni ndí Moisés. 21 Te ní níhí-yu tnúhu sá dácúaha-n ñáyú isràél ñáyú ndècu ñuú xicá cuèndá sá vã cadá-gá-yu nàcuáa ní cachí ndí Moisés cadá-yu. Te xáha<sup>n</sup>-n xii-yu sá vã cuáha-gá-yu sèñá ññi landú-yu, te vã cadá-gá-yu dàtná ní xóo cada ñáyú ndéé sanaha, duha dàcuaha-n ñáyú ní níhí-yu tnúhu. 22 Te na níhí-yu tnúhu sá ndécú-n iha, te tnáví ngúita-yu cáhá<sup>n</sup> cuèhé-yu cuèndá-n. 23 Te na cächí tnúhu-ndí nàcuáa cada-n. Ndècu cümü cue téé vátá cadá-gá-güedé nàcuáa ní cáhá<sup>n</sup> mée-güedé sá cadá-güedé cuèndá nduu vétú iní Yã Ndióxi. 24 Te quíhí<sup>n</sup>-n ndihí-güedé te cada-n nchaa nàcuáa ní xóo cada ñáyú ndéé sanaha cuèndá nduu vétú iní Yã Ndióxi. Te tava-n díhú<sup>n</sup> cuu núú-güedé cháhu-güedé veñúhu, te duca<sup>n</sup> te dàtnúni ndacu dèté díquí-güedé. Nchaa xicá<sup>n</sup> cada-n, te quini ñáyú sá ña ndàá tnúhu cáhá<sup>n</sup> nchaa ñáyú cáhá<sup>n</sup> cuèhé cuèndá-n. Te na cùtnúni iní-yu sá tnàhá-n quide-n nchaa nàcuáa ní chídó tnúni ndí Moisés cadá-yu. 25 Te sa ní quide ndáá-ndí cuèndá nchaa ñáyú ñuú xicá, nchaa ñáyú ní tuha ichi Jèsús. Te sa ní cadúha-ndí tutú ní tendaha-ndí cuáhá<sup>n</sup> ndaha nchaa ñáyú-án<sup>n</sup> sá vã caxí-yu nchaa sá chító-ó nduu táhú nchaa sá cächí-yu cùu

ndiόxi ní cadúha cue ñáyú ñuyú-a. Te ní xáha<sup>n</sup>-ndí sá vã caxí-yu níhí, te vã caxí-yu cuñú nchaa quiti cuèhné. Te vã cáhá<sup>n</sup> ndihí cue téé ñadhí te núu ñá díú ñadhí-güedé cúú-yu, te ní cuè ñáyú díhí vã cáhá<sup>n</sup> ndihí-yu téé te núu ñá díú yí-yu cùu-güedé. Duha ní tee-ndí núú tútu cuáhá<sup>n</sup> —cächí-güedé xáha<sup>n</sup>-güedé xii té Páblú.

*Ní tñi-güedé té Páblú xití veñúhu ñáyú isràél*

26 Te nduu tnèé cuáhá<sup>n</sup> té Páblú ndihí cümü cue téé veñúhu càhnu sá ño cùnuu núú ñáyú isràél cada-güedé nàcuáa ní xóo cada ñáyú ndéé sanaha cuèndá nduu vétú iní Yã Ndióxi. Te ní quíhu-dé veñúhu càhnu sá ño cùnuu-án<sup>n</sup> ní xáha<sup>n</sup>-dè ná daha-gá nduu cùmání dandihí-güedé nàcuáa ní xóo cada ñáyú ndéé sanaha, te dàtnúni cànehe-güedé sá ndúú táhú Yã Ndióxi quíhí<sup>n</sup> veñúhu.

27 Te cùmání-gá cuu úsá nduu sá ní sáhá<sup>n</sup>-güedé veñúhu càhnu sá ño cùnuu, te sa ndècu tucu té Páblú veñúhu. Te cue téé isràél véxi distritú Asía ní xini-güedé té Páblú yíhí-dé veñúhu, te ní tñi ñaha-güedé xii-dé, te ño ní cáhá<sup>n</sup> cuèhé-güedé cuèndá-dé núú dàva-gá ñáyú yíhí veñúhu cuèndá sá cüdèè<sup>n</sup>-yu núú té Páblú. 28 Te níhí ní cáhá<sup>n</sup>-güedé, te xáha<sup>n</sup>-güedé xii-yu:

—ñNchòhó ñáyú isràél, yáchí-ndó chì cuánundaha ñaha-ndo! Chi téé-a yavácá<sup>n</sup> cuáhá<sup>n</sup>-dé cáhá<sup>n</sup>-dé sá ña túú nàndihí-o, te cáhá<sup>n</sup>-dé sá vã cadá-ó nchaa nàcuáa cáhá<sup>n</sup> tnúhu sá ní chídó tnúni ndí Moisés, te cächí-dé sá ña túú nàndihí veñúhu-a. Te ñá díú-ní xicá<sup>n</sup> chi sa ní quíhu-dé veñúhu-a ndihí cue téé ña túú cùu ñáyú isràél, te sá dúcá<sup>n</sup> ní quide-dé, te ña túú-gá ní cànehe í-dé xití veñúhu. Te veñúhu-a cùu-xi vehe Yã Ndióxi —cächí-güedé xáha<sup>n</sup>-güedé xii-yu.

29 Te duca<sup>n</sup> ní cáhá<sup>n</sup>-güedé chì ní sani iní-güedé sá ní quíhu ndihí-dé té Trófimú veñúhu-güedé, chì ní xini-güedé xicá cùu ndihí ñaha-dé xití ñuú. Te téé-án<sup>n</sup> cúú-dé téé ñuú Èfesú, te ñá díú téé isràél cúú-dé.

30 Te chítu ñáyú ñuú-án<sup>n</sup> ní tacá-yu ní tñi-yu té Páblú táñúhu ñahá-yu ní ndee veñúhu càhnu sá ño cùnuu, te òré-ni ní nacadí-güedé yèhe veñúhu-án<sup>n</sup>. 31 Te sa cahni-yu té Páblú ní cùu, te ní sáhá<sup>n</sup> ñ<sup>n</sup> úú-güedé núú ndécú téé cùu capitá<sup>n</sup> cùnúu-gá, te ní xáha<sup>n</sup>-güedé xii-dé sá ncháá ñáyú ñuú Jerusalén xináa-yu. 32 Te òré-án<sup>n</sup> cuáhá<sup>n</sup> téé cùu capitá<sup>n</sup> cùnúu-gá ndihí daga-gá cue téé nchicú<sup>n</sup>-gá ndihí sandadú-dé. Te òré ní xini-yu ní quexlo coyo-güedé núú xixúcu-yu, te ní yùhú-yu ña túú-gá ní caní-yu té Páblú. 33 Te téé cùu capitá<sup>n</sup> ní sátuha-dé té Páblú, te ní xáha<sup>n</sup>-dè xii cue sandadú-dé sá tñi ñaha-güedé dacútu

ñaha-güedé úu cadená. Te dätmùní ní xícá<sup>n</sup> tnúhú-dé núu-yu, te xáha<sup>n</sup>-dè:

—¿Ná cúu tée-a? ¿Ná ní quide-dé? —  
càchí-dé xáha<sup>n</sup>-dè xii-yu.

<sup>34</sup> Te tée cùu capitá<sup>n</sup>-án ñã ní cùtnuní iní-dé núu ná cúu sá ní quide té Pàblú, chí uu<sup>n</sup> ní ní cuáá-yu. Te tucu càhá<sup>n</sup> ì<sup>n</sup>, tucu càhá<sup>n</sup> ì<sup>n</sup>-yu, núu xiã<sup>n</sup> ní xáha<sup>n</sup>-dè cue sandadú-dé sá cándeca ñaha-güedé xii-dé quihí<sup>n</sup> cuàrtél núu ndécú-güedé. <sup>35-36</sup> Te nchicú<sup>n</sup> ñahá-yu cuáhá<sup>n</sup> ní quexio ndéé nàcuáa càa nchio cuini-yu cahni ñahá-yu xii-dé ní cùu. Te níhi ní càhá<sup>n</sup>-yu xáhã-yu sá cáhni ñaha-güedé, te xiã<sup>n</sup> ní ndacani ñaha-güedé ndéca ñaha-güedé cuásaá nchio-án.

*Té Pàblú xáha<sup>n</sup>-dè xii-güedé sá ñã túú cuèchi-dé*

<sup>37</sup> Te cuánguihu-güedé cuàrtél ndihi té Pàblú ní cùu, te ní xáha<sup>n</sup>-dè xii tée cùu capitá<sup>n</sup> cùnù-gá:

—Càhá<sup>n</sup> ndàhú-í núu-n cùndetu-n na cùñaha-í ì<sup>n</sup> úú tnúhu xii-yu —càchí-dé xáha<sup>n</sup>-dè.

Te tée tàxi tnuní-án ní xáha<sup>n</sup>-dè:

—¿Náa tnàhá yòhò càhá<sup>n</sup>-n tnúhu griégú?  
<sup>38</sup> Te ní càhá<sup>n</sup>-í sá tée ègiptú cúu-n, chí ñuu-n ní ndúcú-n cuè tée ní nã ndihi tée cùchiu<sup>n</sup> Cesár ní càhá<sup>n</sup>-í, chí ñuu ì<sup>n</sup> tée yàcá<sup>n</sup> ní ndúcú-dé cúmí mìl cue tée ní sahni ndíyi. Te ndéca tnaha-güedé ní sáhá<sup>n</sup> xití yucu ní xíhi váha-güedé —càchí-dé xáha<sup>n</sup>-dè xii té Pàblú.

<sup>39</sup> Te té Pàblú ní xáha<sup>n</sup>-dè:

—Ñã díú tée ègiptú cúu-í, chí tée isràél cúu-í, chí ñuu-ni tée isràél cúu tãtà-í, te ñicó-ní sá ní cacu-í ñuu Tàrsú ñuu cáhni, te ñuu-án yíndèhu-xi distritú Ciliciá. Te cuini-í cada ndee ñi-n ñãna-n na cahá<sup>n</sup> ndihi-í-yu —càchí-dé xáha<sup>n</sup>-dè.

<sup>40</sup> Te ní xáha<sup>n</sup> tée cùu capitá<sup>n</sup> cùnù-gá sá cúu càhá<sup>n</sup> té Pàblú, núu ní ngúnutnii-dé núu nchio, te ní quide-dé ndaha-dé sá cündedóho-yu. Te ní sadí-yu yuhú-yu, te ní càhá<sup>n</sup>-dé tnúhu ñáyi isràél, te xáha<sup>n</sup>-dè xii-yu:

## 22

<sup>1</sup> —Chí cadá càhu iní nchòhò cue tée sa cuéhé ndihi nchòhò cue tée cuechi, na càhá<sup>n</sup>-í ì<sup>n</sup> tnúhu cundedóho-ndo sã ñã túú cuèchi-í, chí ñã túú ñã ní quide-í, te ní ñã túú ñã tnúhu càhá<sup>n</sup>-í —càchí-dé xáha<sup>n</sup>-dè xii-güedé.

<sup>2</sup> Te cuendá sá dúcá<sup>n</sup> ní càhá<sup>n</sup>-dé tnúhu mèe-yu núu tnáví-ñã ní sadí-yu yuhú-yu ní xíndedóho-yu ní càhá<sup>n</sup>-dé, te xáha<sup>n</sup>-dè:

<sup>3</sup> —Yúhú cúu-í tée isràél, te ní cacu-í ñuu Tàrsú, te ñuu-án yíndèhu-xi Ciliciá. Te davitna lihli-í cùtnàhá ní quexio-í ñuu Jerusalén ní dácuhá ñaha té Gamaliél. Te ní dácuhá-í nchaa tnúhu ní chidó tnùní

nchaa cue tée ndéé sanaha nàcuáa cada ñáyi. Te yúhú ní cahu iní-í ní quide-í titní núu chiu<sup>n</sup> nacuáa cuu váha iní Yã Ndióxi ní càhá<sup>n</sup>-í, te ñuu-ni duca<sup>n</sup> quide nchòhò tucu. <sup>4</sup> Te ní sánú ndúcú-í nchaa ñáyi sandáá iní-xi tnúhu Jèsús, cuèi tée, cuèi ñáyi ñihí ní dácútu-í-yu, te ní chíhi-í-yu vecaá, te ní níhi-í tnúhu ndee iní sá cáhni-ndí-yu. <sup>5</sup> Te dútú cùnù-gá ndihi cue tée cùnùu núu-ndó ñaha-güedé sá ndáá càhá<sup>n</sup>-í chí mee-güedé ní taxi-güedé tutú cuñaha-í xii ñáyi isràél ñáyi ndécu ñuu Dàmascú cuendá cutnùní iní-yu ná chíu<sup>n</sup> cuáhã-í ní cùu. Te ñuu-í ichi cuáhã-í ñuu-án cuánndúcú-í ñáyi ní sandáá iní-xi tnúhu Jèsús cuendá dácútu-í-yu te candeca-í-yu ndixi, te iha cada úhú ñahá-güedé xii-yu ní cùu.

*Té Pàblú xáha<sup>n</sup>-dè xii ñáyi nàcuáa ní cuu ní tuha-dé ichi Jèsús*

*(Hch. 9:1-19; 26:12-18)*

<sup>6</sup> Te ta cüyatni-í ñuu Dàmascú cuáhã-í, te cùu-xi datná òré caúxú nduu, te uu<sup>n</sup> ní quee ñuhú andiu, te ní dáyehé-xi ndéé núu nùtnii-í. <sup>7</sup> Te ní quide nee-xi núu-í, xiã<sup>n</sup> ní nduá-í ndéé ñuu. Te ní tecú dóho-í càhá<sup>n</sup> ì<sup>n</sup> sá càhá<sup>n</sup> andiu, te càchí-xi: “Yòhó té Sàulú, ¿ná cuendá cúu úhú iní ñahá-n dándoho ñaha-n xii-í?”, càchí sá càhá<sup>n</sup>-án. <sup>8</sup> Te ní xáha<sup>n</sup>-í: “¿Ná cúu yòhó sá càhá<sup>n</sup>-ái?”, xáha<sup>n</sup>-í. Te ní càhá<sup>n</sup> tucu ingá xito te càchí-xi: “Yúhú cúu-í Jèsús tée ní xíndecu ñuu Nazàrét, te duca<sup>n</sup> ío dándoho ñaha-n xii-í”, càchí sá càhá<sup>n</sup>-án. Te xiã<sup>n</sup> ní cutnùní iní-í sá díú Jèsús càhá<sup>n</sup>. <sup>9</sup> Te nchaa cue tée ndihi-í ní xiní-güedé ní dáyehé ñuhú, te ní yuhú-güedé, dico ñã túú ní təcú dóho-güedé òré ní càhá<sup>n</sup>-gá. <sup>10</sup> Te ní xáha<sup>n</sup>-í xii-gá: “Yòhó Xitohó Jesucristú, ¿ná cuini-n càda-í?”, xáha<sup>n</sup>-í xii-gá. Te ní càchí-gá: “Ndacóo, te quihí<sup>n</sup>-n ñuu Dàmascú, yàcá<sup>n</sup> tecú tnúhu-n nchaa nacuáa cuini Yã Ndióxi cada-n”, càchí-gá —càchí té Pàblú xáha<sup>n</sup>-dè xii-yu.

<sup>11</sup> Te ní xáha<sup>n</sup> túcu té Pàblú:

—Te cuendá sá ní dácuhá ñaha ñuhú xii-í núu ní tnii cue tée ndihi-í ndaha-í ndéca ñaha-güedé cuáhã<sup>n</sup> ndéé ñuu Dàmascú.

<sup>12</sup> Te yàcá<sup>n</sup> ndécú ì<sup>n</sup> tée ñani Ananiás, te ío vai sá ní chidó tnùní ndii Moisés cadá-yu quide-dé. Te nchaa ñáyi ñuu Dàmascú ío váha càhá<sup>n</sup> ndihi ñahá-yu xii-dé. <sup>13</sup> Te ní quexio-dé núu ndécú-í, te ní càchí-dé: “Yòhó té Sàulú, tée ndécu ndihi-í ichi Xitohó Jesucristú, ndúha núu-n”, càchí-dé. Te òré-ni ní nacaá<sup>n</sup> núu-í te ní xiní-í-dé. <sup>14</sup> Te dätmùní ní càchí-dé: “Yã Ndióxi ní càhá<sup>n</sup> ndihi-gá ñani tnáhã-ó ní xíndecu ndéé sanaha. Te ñuu-gá ní cáxi ñaha-gã xii-n cuendá quini-n nchaa sá váha cuini-gá cada-n. Te quini-n Jèsús Yáa ñã túú cuèchi-xi, te ñuu-ni mee-gã càhá<sup>n</sup> ndihi ñaha-gã xii-n. <sup>15</sup> Te càhá<sup>n</sup>-n tnúhu

Jesús núu nchàa ñáyi, te cáhá<sup>n</sup>-n nchàa sá ní xini<sup>n</sup>-n ndíhi nchaa sá ní xindedóho-n. <sup>16</sup> Tñáví, te quíhí<sup>n</sup>-n cuándute-n, te cáhá<sup>n</sup> ndíhi-n Yá Ndióxi cuendá cada càhu iní-gá nchaa sá cuéhé sá dúhá ní quide-n”, duha ní cachí té Ananiás xii-í —cachí té Páblú xáha<sup>n</sup>-dè xii-yu.

*Té Páblú ní cani-dé cuendá nàcuáa ní xáha<sup>n</sup> Jesús cada-dé quíhí<sup>n</sup>-dè ñúu núu xindecu ñáyi ñá túu cùu ñáyi isráel*

<sup>17</sup> Te ní xáha<sup>n</sup> tucu té Páblú:

—Te ní ndee-í cuándixi-í ñúu Jerusalén. Te ní sáhá<sup>n</sup>-í veñúhu càhu sá ïo cùnù ní cáhá<sup>n</sup> ndíhi-í Yá Ndióxi, te ní dácóto núu ñáhá-xí sá méé Jesús ní xini-í xití veñúhu, <sup>18</sup> te ní cachí-gá: “Yáchí, quee-n ñúu Jerusalén, chí ñáyi-u a vā quindáa iní-yu nàcuáa ní cachí-í cùñaha-n xii-yu cuendá-í”, duha ní cachí-gá xii-í. <sup>19</sup> Te ní xáha<sup>n</sup>-í xii-gá: “Yòhó Xítóhó Jesucristú, sa xini<sup>n</sup>-n sá ncháá ñáyi nahá-yu sá ní sáhá<sup>n</sup>-í ndí tnahá ñú ndí tnahá ñú veñúhu nànducu-í ñáyi sàndáa iní tñuhu-n, te ní tñú-í-yu, ní chíhi-í-yu vecaá, te ní táuchíu<sup>n</sup>-í ní caniha-güedé xii-yu. <sup>20</sup> Te cùtnáhá ní sahni-güedé ndí Tévá tée ní xóo cáhá<sup>n</sup> tñuhu-n, te tñé-í ndécú òrè-á<sup>n</sup> te ní xindeé-í dóo cue tée ní sahni ñaha xii ndí. Te yúhú ní cáhá<sup>n</sup>-í sá ní quide váha-güedé sá dúcá<sup>n</sup> ní quide-güedé”, duha ní xáha<sup>n</sup>-í xii-gá. <sup>21</sup> Te ní cachí tñuhu-gá xii-í: “Cuáhá<sup>n</sup> chí cuini-í quíhí<sup>n</sup>-n nchàa ñúu xicá núu xindecu cue ñáyi ñá túu cùu ñáyi isráel cáhá<sup>n</sup>-n tñuhu-í”, cachí-gá —cachí té Páblú xáha<sup>n</sup>-dè xii-yu.

*Te Páblú ndíhi tée tàxi tñuní ñáhá xii cue sandadú*

<sup>22</sup> Te sá dúcá<sup>n</sup> ní cáhá<sup>n</sup>-dè, te ñá ní tnahá-gá iní-yu cundedóho-yu tñuhu cáhá<sup>n</sup>-dè. Te ñú-ní ní cuú-yu ncháa-yu, te ní cuáa-yu, te xáhá<sup>n</sup>-yu:

—jChí cáhni-dè! jÑá díú sá cundècu-dé ñuyíu-a! —cachí-yu xáhá<sup>n</sup>-yu.

<sup>23</sup> Te mei òrè duca<sup>n</sup> ní cáhá<sup>n</sup>-yu, te ní ndátà-yu dóo-yu, te ní dáquené-yu núu ñnu sá sátú iní-yu. Te ní quéhnu-yu ñuhu, te ní dáccóbó-yu núu ñnu sá ïo sátú iní-yu. <sup>24</sup> Te tée cùu capitá<sup>n</sup> cùnù-gá ní xáha<sup>n</sup>-dè xii cue sandadú-dé:

—Chí dítá-dè ná quíhu-dé ndéé xití vehe, te cani-ndo-dè ñú, chí na quène yuhu-dé ná tñuhu ní cáhá<sup>n</sup>-dè núu ndéé dúcá<sup>n</sup> cùdèñ<sup>n</sup>-yu núu-dè —cachí-dé xáha<sup>n</sup>-dè xii-güedé.

<sup>25</sup> Te sátá ní dácútu ñaha-güedé xii té Páblú sá cáni ñaha-güedé ní cùu, te ní xáha<sup>n</sup>-dè xii tée cùu capitá<sup>n</sup> ndécú-á<sup>n</sup>:

—Te na cachí tñuhu-í sá vā cùu caniha-güedé ñú, chí tée rómá cùu-í, te vátá quini ndáa-gá-ndó núu ndècuéchi-í àdi ñáhá —cachí-dé xáha<sup>n</sup>-dè xii tée cùu capitá<sup>n</sup>.

<sup>26</sup> Te sá dúcá<sup>n</sup> ní cáhá<sup>n</sup>-dè, te ní sáhá<sup>n</sup> tée cùu capitá<sup>n</sup> núu tée cùnù-gá, te ní xáha<sup>n</sup>-dè:

—Vá cùu cani-o tée-á<sup>n</sup>, chí tée rómá cùu-dè —cachí-dé xáha<sup>n</sup>-dè.

<sup>27</sup> Te ní sáhá<sup>n</sup> tée cùu capitá<sup>n</sup> cùnù-gá ndéé núu té Páblú, te ní xáha<sup>n</sup>-dè:

—Cáhá<sup>n</sup> ndáa<sup>n</sup> núu ndisa tée rómá cùu-n —cachí-dé xáha<sup>n</sup>-dè.

Te ní xáha<sup>n</sup> té Páblú:

—Ndáa sá tée rómá cùu-í —cachí té Páblú xáha<sup>n</sup>-dè xii tée cùnù-á<sup>n</sup>.

<sup>28</sup> Te ní xáha<sup>n</sup> tée cùnù-á<sup>n</sup>:

—Yúhú tñáhá-í cùu-í tée rómá, chí vāi díhú<sup>n</sup> ní cháhu-í —cachí-dé xáha<sup>n</sup>-dè.

Te té Páblú ní xáha<sup>n</sup>-dè:

—Tñáhá-í cùu-í tée yacá<sup>n</sup> tucu, chí tātá-í cùu-dè tée rómá —cachí té Páblú xáha<sup>n</sup>-dè xii tée cùu capitá<sup>n</sup> cùnù-gá.

<sup>29</sup> Te uu<sup>n</sup> ní nacaca sata cuè tée cuáhá<sup>n</sup> caniha xii-dé ní cùu. Te ní yúhú tée tàxi tñuní sá dúcá<sup>n</sup> ní xáha<sup>n</sup> té Páblú sá tée rómá cùu-dè, chí ní xáha<sup>n</sup>-dè ní dácútu ñaha-güedé xii-dé, núu xiá<sup>n</sup> ní yuhu-dé.

*Té Páblú ní cáhá<sup>n</sup> ndíhi-dé cue tée cùnù oré ní quide-güedé jundá*

<sup>30</sup> Te tée tàxi tñuní sandadú ñá ní xini-dé ná cuéchi ní dácáa ñáyi isráel díquí té Páblú, núu xiá<sup>n</sup> nduu tñéé ní cana-dé cue dítú cùnù, ndíhi cue tée cùchiu<sup>n</sup>, ndíhi cue tée cùu sacuéhé, te ní xáha<sup>n</sup>-dè sá cáda-güedé jundá cuendá nducu tñuhu-güedé núu té Páblú ná cuéchi ní dácáa-yu díquí-dè. Te ní xáha<sup>n</sup>-dè xii cue sandadú sá nándaxi ñaha-güedé cadená ndútú-dè, te candeca ñaha-güedé quíhí<sup>n</sup> núu cáda-güedé jundá. Te ní sáhá<sup>n</sup>-güedé ní nandaxi ñaha-güedé xii-dé ndéca ñaha-güedé cuáhá<sup>n</sup> jundá, te ní quexiò-güedé, te ní ngúnutñú-dé núu cuè tée cùchiu<sup>n</sup>.

## 23

<sup>1</sup> Te yacá<sup>n</sup> ní xindéhé váha té Páblú núu nchàa-güedé, te ní xáha<sup>n</sup>-dè:

—Cada càhu iní nchòhó cue tée cùchiu<sup>n</sup>, te duca<sup>n</sup> nchòhó cue tée cùu sacuéhé, véxi-í cachí tñuhu-í sá ñá túu cuéchi-í, chí mee Yá Ndióxi náhá-gá nasa ndécú-í ñuyíu-í, te ñá túu cùcaha<sup>n</sup> núu-í núu-gá —cachí té Páblú xáha<sup>n</sup>-dè xii-güedé.

<sup>2</sup> Te té Ananiás tée cùu dítú cùnù-gá ní xáha<sup>n</sup>-dè xii cue tée tñúñi yatni díñi té Páblú sá cáni-güedé déhndé yuhu-dé. <sup>3</sup> Te té Páblú ní xáha<sup>n</sup>-dè xii dítú-á<sup>n</sup>:

—Yòhó, chí úhú tñáhí iní-n, chí ní ndúcú-n tée ní caniha xii-í, te ñá túu cuéchi-í, dico quini<sup>n</sup> ná cada ñaha Yá Ndióxi xii-n. Te yòhó ní cana ñaha-n nducu tñuhu-n núu quide-í nchaa nàcuáa cáhá<sup>n</sup> tñuhu sá ní chídó tñuní ndí Moisés cada-o. Te mee-n ní ndúcú-n tée ní caniha, te ñá túu dúcá<sup>n</sup> ní

cáhá<sup>n</sup> ndíi cada-o —cächí té Páblú xáha<sup>n</sup>-dê xii dütú cúnü-gá-á<sup>n</sup>.

<sup>4</sup> Te cue té xnutníi díñi té Páblú ní xáha<sup>n</sup>-güedê xii-dê:

—Nèhé ní quide-n chi ní xícuèhê-n dütú cúnü-gá té xínu cuechi núú Yá Ndióxi —cächí-güedê xáha<sup>n</sup>-güedê xii té Páblú.

<sup>5</sup> Te té Páblú ní xáha<sup>n</sup>-dê xii-güedê:

—Cada càhnu iní-ndó chi ñá túú xini-í sá dütú cúnü-gá cúú-dê, chi núú tütú Yá Ndióxi cächí-xi sá vâ cúú cáhá<sup>n</sup> cuèhé-ó cuèndá ñ<sup>n</sup> té cúnü ñuú-ó yòtnúhu. Te yúhú ñá túú xini-í sá té cúnü cuu-dé núú ní sácóo-í ní cáhá<sup>n</sup>-í —cächí té Páblú xáha<sup>n</sup>-dê xii-güedê.

<sup>6</sup> Te òrê-á<sup>n</sup> ní cutnùni iní té Páblú sá dáva-güedê cündihí-güedê cue té cùu saducéú, te dáva-güedê cündihí-güedê cue té cùu fariséú, te níhi ní cáhá<sup>n</sup>-dê ní xáha<sup>n</sup>-dê xii-güedê:

—Yúhú cúú-í té fariséú, te tñahá tâtá-í ndihí xú-í cúú-güedê cue té fariséú tucu. Te tñahá yúhú sàndáá iní-í sá ndótó nchàa ñáyiú ní xihí, te núú xiá<sup>n</sup> cuini-ndó ndücu tñuhu-ndo núú-í cáná ñaha-ndo —cächí-dé xáha<sup>n</sup>-dê xii-güedê.

<sup>7</sup> Te sá dúcá<sup>n</sup> ní cáhá<sup>n</sup>-dê xiá<sup>n</sup> ní nàa ndihí tñaha cue té cùu fariséú ndihí cue té cùu saducéú, chi ñá ñ<sup>n</sup>-ní tñuhu ní cáhá<sup>n</sup>-güedê, chi ní ndi quehe<sup>n</sup> ndi quehe<sup>n</sup>-güedê sá ní cáhá<sup>n</sup>-güedê.

<sup>8</sup> Te cue té cùu saducéú cächí-güedê sá vâ ndótó cuè ñáyiú ní xihí, te cue té cùu fariséú cächí-güedê sá ndótó-yu. Te cue té cùu saducéú cächí-güedê sá ñá túú espíritú xínú cuèchi núú Yá Ndióxi, te cue té cùu fariséú cächí-güedê sá ío espíritú xínú cuèchi núú-gá. <sup>9</sup> Te ta cüdè<sup>n</sup>-güedê cuáhá<sup>n</sup>, te níhi-gá cúú iní-güedê cáhá<sup>n</sup>-güedê, te ñ<sup>n</sup> úú cue té cùu fariséú cue té dàcuaha ñaha xii ñáyiú nchaa tñuhu ní chidó tñúni ndíi Moisés ní cáhá<sup>n</sup> níhi-güedê, te xáha<sup>n</sup>-güedê:

—Ñá túú cuèchi-dé, te cudana te ní cáhá<sup>n</sup> ndihí-dé ñ<sup>n</sup> espíritú xínú cuèchi núú Yá Ndióxi te vâ ngóo vâ cúú vaha iní-ó núú-gá —cächí cue té cùu fariséú xáha<sup>n</sup>-güedê xii-güedê.

<sup>10</sup> Te cuèndá sá ío xínáa-güedê, xiá<sup>n</sup> ní yúhú té cùu capitá<sup>n</sup> cúnü-gá sá cáhni-güedê té Páblú, núú xiá<sup>n</sup> ní xáha<sup>n</sup>-dê sá quihí<sup>n</sup>-güedê cúnúcuaca ñaha-güedê candeca ñaha-güedê níhú cuártel.

<sup>11</sup> Te ndéé niú cúú úú ní quexio Xitohó Jesucristú núú ndécú té Páblú, te ní xáha<sup>n</sup>-gá:

—Ñíi cunduu-n, vâ yúhú-n, chi nàcuáa ní cáhá<sup>n</sup>-n ní cacunehe ñaha-n xii-í iha, te diu-ni duca<sup>n</sup> cáhá<sup>n</sup>-n cacunehe ñaha-n xii-í quihí<sup>n</sup>-n ñúú Rómá —cächí-gá xáha<sup>n</sup>-gá xii-dê.

*Cahni-güedê té Páblú ní cùu*

<sup>12-13</sup> Te nduu tñéé ní natacá vihi-gá údico cue tée isráel ní ndatnúhu-güedê sá cáhni-güedê té Páblú, te ní xitñaha-güedê:

—Ní dítá vâ caxí-ó te ní ndüte vâ cóhó-ó ndéé ndacu-o cáhni-o té Páblú, te dátñúni caxi-o dítá, te coho-o ndüte, chi sa ní sani iní-ó sá cadá-ó, te cuu cuèchi xii-o núu vâ cadá-ó —cächí-güedê xitñaha-güedê.

<sup>14</sup> Te ní sáhá<sup>n</sup>-güedê núú ndécú nchàa dütú cúnü ndihí nchaa cue té cùu sacuéhé, te ní xáha<sup>n</sup>-güedê:

—Ní cächí-ndí sá ní dítá vâ caxí-ndí ndéé núu ní ndacu-ndí ní sahni-ndí té Páblú, chi sa ní sani iní-ndí sá cadá-ndí, te cuu cuèchi núu vâ cadá-ndí. <sup>15</sup> Te duha cada-ndo ndihí dáva-gá cue té cúnü, chi cúñaha-ndo xii té cùu capitá<sup>n</sup> cúnü-gá: “Quixi ndihí-n tñé Páblú núú ndécú-ndí cuèndá ndatnúhu ndihí-ndí-dé, chi cuini-ndí nducu tñuhu váha-gá-ndí ná cúú sá ní quide-dé”, duha cúñaha-ndo xii tée tàxi tñúni sandadú. Te duca<sup>n</sup>-ni cúñaha-ndo dandahú-ndó-güedê cuèndá quixi ndihí-güedê té Páblú, te nchúhú sa cundetu-ndí-güedê ichi, chi quini té Páblú ná cahni-ndí-dé —cächí-güedê xáha<sup>n</sup>-güedê xii cue té cùchiu<sup>n</sup>.

<sup>16</sup> Te déhe cúha té Páblú ní níhi-dé tñuhu nàcuáa cada-güedê dító-dé. Te ní sáhá<sup>n</sup>-dê cuártel, te ní xáha<sup>n</sup>-dê xii dító-dé nàcuáa cáhá<sup>n</sup>-güedê cada ñaha-güedê. <sup>17</sup> Te ní cana té Páblú ñ<sup>n</sup> té cùu capitá<sup>n</sup>, te ní xáha<sup>n</sup>-dê:

—Vá cündèe iní-n, quihí<sup>n</sup> ndihí-n tñe-a na cáhá<sup>n</sup> ndihí-dé té cúnü-gá, chi ndécú ñ<sup>n</sup> cuèndú cúñaha-dé cuini-í —cächí té Páblú xáha<sup>n</sup>-dê xii té cùu capitá<sup>n</sup>.

<sup>18</sup> Te dátñúni ní xica té cùu capitá<sup>n</sup> ndécá-dé dáxi<sup>n</sup> té Páblú cuáhá<sup>n</sup> núú ndécú té cúnü-gá, te òrê ní quexio-güedê núú-dê, te ní xáha<sup>n</sup> té cùu capitá<sup>n</sup> xii-dê:

—Té Páblú tée yihi vecaá ní cana ñaha-dé xii-í, te ní cächí-dé véxi-í ndihí tée-a cuèndá cächí tñuhu-dé ñ<sup>n</sup> cuèndú cuini-í —cächí-dé xáha<sup>n</sup>-dê xii té cúnü-gá.

<sup>19</sup> Te té cúnü-á<sup>n</sup> ní tñi-dé ndaha dáxi<sup>n</sup> té Páblú, te tanehe ñaha-dé cuáhá<sup>n</sup> ñ<sup>n</sup> xio, te ní xicá<sup>n</sup> tñuhú-dé núú-dê, te xáha<sup>n</sup>-dê:

—¿Ná cuèndú cuini-n cáhá<sup>n</sup>-n? —cächí-dé xáha<sup>n</sup>-dê xii dáxi<sup>n</sup> té Páblú.

<sup>20</sup> Te ní xáha<sup>n</sup>-dê xii té cúnü-á<sup>n</sup>:

—Cue tée isráel ní ndatnúhu ndáa-güedê sá quixí-güedê tñé cáhá<sup>n</sup> ndahú-güedê núú-n càndeca-n té Páblú quihí<sup>n</sup> jündá, te yacá<sup>n</sup> cacá<sup>n</sup> tñuhú ndáa-güedê núú-dé ná cúú sá ní quide-dé, cächí-güedê xitñaha-güedê. <sup>21</sup> Te vâ quindáa iní-n chi díco dandahú ñahá-güedê, chi vihi-gá údico-güedê ndatnúhu-güedê cundedí-güedê ichi cahni ñaha-güedê. Te xitñaha-güedê sá ní dítá vâ caxí-güedê, te ní ndüte vâ cóhó-güedê ndéé núu ní ndacu-güedê ní

sahni ñaha-güedé, te dātnūni caxi-güedé dītá, te coho-güedé ndute, chi sa ní sani iní-güedé sá cáda-güedé, te cuu cuéchi núu vá cáda-güedé, cāchí-güedé xītnāha-güedé. Te cundecu túha-ná-güedé cundetu ñaha-güedé tneé, te núu na quindáá iní-n cāndeca-n-dé quihí<sup>n</sup> jündá —cāchí-dé xāha<sup>n</sup>-dē xii té cūnuu-á<sup>n</sup>.

<sup>22</sup> Te té cūnuu-á<sup>n</sup> nī xāha<sup>n</sup>-dē:

—Cuanhúh, te vá yōo tnāhí cūñaha-n sǎ ní quixi-n nī cachí tnūhu-n nācuáa cāhā<sup>n</sup>-güedé cada-güedé té Pāblú —cāchí-dé xāha<sup>n</sup>-dē.

*Ndēca-güedé té Pāblú cuáhā<sup>n</sup> núu té Juéi<sup>n</sup> té cū gobiernú*

<sup>23</sup> Te té cūnuu-gá ní cana-dé úú cue té cū capitá<sup>n</sup>, te xāha<sup>n</sup>-dē:

—Tava-ndo úú ciendú sandādú cue té xica saha, ndihí únidico úxí sandādú cue té yōdo cuayú, ndihí úú ciendú sandādú mee-ni cué té xīnehe lānzá. Te cada túha-ndo chi caca-ndo òré caá í<sup>n</sup> niú quihí<sup>n</sup>-ndó ñúú Cēsareá ndihí té Pāblú. <sup>24</sup> Te nducu-ndo cuédico í<sup>n</sup> úú cuayú yōdo ndihí cue té ndéé ñáhá xii-dé. Te cada cuedādú-ndó-dé ichi, te candeca-ndo-dé quihí<sup>n</sup> quindeca-ndo-dé núu té cū gobiernú —cāchí té cūnuu-á<sup>n</sup> xāha<sup>n</sup>-dē xii cue té cū capitá<sup>n</sup>.

<sup>25</sup> Te té cūnuu-á<sup>n</sup> ní cadúha-dé tutú cuendá quihí<sup>n</sup> ndaha té Juéi<sup>n</sup> té cū gobiernú. Te duha ní chídó tnūni-dé núu tutú cuáhā<sup>n</sup>:

<sup>26</sup> “Cóvāha díi-n, tātá gobernádór. Ío cada cāhnu iní, yúhú nāni-í Clāudiú Lisiás. Yúhú ní tendaha-í í<sup>n</sup> tutú véxi ndaha-n cuendá quini tnūni-n nācuáa ní cuu iha. <sup>27</sup> Cue tée isráel ní tnūi-güedé í<sup>n</sup> té nāni Pāblú cuini-güedé cāhni ñaha-güedé ní cuu, te ní níhí-í tnūhu sá tée rómá cūú-dé núu ní sáhā<sup>n</sup>-í ndihí sandādú-í ní dácācu-ndí-dé. <sup>28</sup> Te ní cuini-í quini-í ná cuendá téé ñaha-güedé cuéchi xii-dé, núu xiá<sup>n</sup> ndécá-í-dé ní sáhā<sup>n</sup> núu ní quide cue té cūchiu<sup>n</sup> isráel jündá. <sup>29</sup> Te yacá<sup>n</sup> ní níhí-í tnūhu sá ñā túú ná cuéchi ní quide-dé, chí cuendá-ní sá ní níhí-güedé tnūhu sá ñā túú sandáá iní-dé cada-dé nchaa sá ní xóo cada ñāyiu ní xindecu ndéé sanaha nchicú<sup>n</sup> nihnu-güedé quide-güedé, xiá<sup>n</sup> ní cudéé<sup>n</sup>-güedé núu-dé. Te ñā túú cuéchi cāhnu ní quide-dé núu quihí<sup>n</sup>-dé veccá ádi cāhni-í-dé. <sup>30</sup> Te ní níhí-í tnūhu sá cué tée isráel ndúctú-güedé nācuáa cada-güedé cāhni ñaha-güedé xii-dé, xiá<sup>n</sup> ní xāha<sup>n</sup>-í xii sandādú-í sá cāndēca ñaha-güedé quixi xiá<sup>n</sup>. Te ní xāha<sup>n</sup>-í xii cue té té ñaha cuéchi sá quixi-güedé ndéé xiá<sup>n</sup> cāhā<sup>n</sup>-güedé núu ná cuéchi ní quide-dé. Te cada cāhnu iní-n chí duha-ní ndūu tnūhu cāhā<sup>n</sup>-í, te cundee iní-n quēhe<sup>n</sup> cuendá-n-dē”, duha ní chídó tnūni té ní cadúha tutú cuáhā<sup>n</sup> ndaha té Juéi<sup>n</sup>.

<sup>31</sup> Te cue sandādú ní quide-güedé nācuáa ní xāha<sup>n</sup> téé tǎxi tnūni ñáhá xii-güedé chí ní xica-güedé ndihí té Pāblú òré caá í<sup>n</sup> niú, te díu-ni niú-á<sup>n</sup> ní quexio-güedé ñúú Antipatris. <sup>32</sup> Te sātá ní tūndaá, te ní nauico cué té xīnehe lānzá ndihí dava-gá sandādú xicá saha cuānuhú-güedé cuártel, te mee-nā sandādú cue té yōdo cuayú cuáhā<sup>n</sup> ndihí té Pāblú. <sup>33</sup> Te òré ní quexio-güedé ñúú Cēsareá, te ní sáha-güedé té cū gobiernú tutú néhe-güedé cuáhā<sup>n</sup>. Te ní quehe<sup>n</sup> cuendá-dé té Pāblú. <sup>34</sup> Te sātá ní dācuáhá té cū gobiernú-á<sup>n</sup> tutú-á<sup>n</sup> te ní xicá<sup>n</sup> tnūhú-dé núu té Pāblú, te xāha<sup>n</sup>-dē:

—¿Ndéé té cū-n? —cāchí-dé xāha<sup>n</sup>-dē.

Te ní xāha<sup>n</sup> té Pāblú:

—Tée Ciliciá cūú-í —cāchí-dé xāha<sup>n</sup>-dē.

<sup>35</sup> Te ní xāha<sup>n</sup> té cū gobiernú-á<sup>n</sup>:

—Òré quexio cue té té ñaha cuéchi xii-n, te cāhā<sup>n</sup>-n nāsa ní cuu, chí níhí-í nācuáa cada ndáá-í cuendá-n —cāchí-dé xāha<sup>n</sup>-dē xii té Pāblú.

Te ní xāha<sup>n</sup>-dē xii sandādú sá cūndéé-güedé té Pāblú vehe cāhnu té Hērodés.

## 24

*Té Pāblú xāha<sup>n</sup>-dē xii té Juéi<sup>n</sup> sá ñā túú cuéchi-dé*

<sup>1</sup> Te sātá ní cuu úhú<sup>n</sup> nduu, te té Ananiás dítú cūnuu-gá cuáhā<sup>n</sup>-dé ñúú Cēsareá ndihí cue té cū sacuéhé ndihí í<sup>n</sup> té nāni Tértulú té cāhā<sup>n</sup> yuhu-güedé. Te cuáhā<sup>n</sup>-güedé núu té cū gobiernú cuáhā<sup>n</sup> dācuándēhnde-güedé núu-dé sá ndécuechi té Pāblú. <sup>2</sup> Te ní sānguaca-güedé té Pāblú. Te òré ní quexio-dé núu-güedé, te ní ngüita té Tértulú xāha<sup>n</sup>-dē xii té Juéi<sup>n</sup> nācuáa cāa cuéchi té-güedé té Pāblú:

—Ío cāhnu cada iní tātá gobernádór. Duha ndūu chiu<sup>n</sup> ndéé iní ñáhā-ndí xii-n véxi-ndí, núu nāsa cachí-n cūndu. Tāxāhu xii-n, chí ío váha ndēcu nchaa ñāyiu, te ñā túú nāa-yu chí ío váha quide-n. <sup>3</sup> Te ío cūdúí iní-yu chí nchaa-ni ndūu xindecu váha-yu nchaa-yu, te ío táxāhu Ndióxi xii-n sá dúcá<sup>n</sup> quide-n.

<sup>4</sup> Te cada cāhnu iní, cuini-í ndatnúhu-o í<sup>n</sup> úú-ni cuendú cuendá sá vá cūyāa-o dācuíta-í chiu<sup>n</sup>-n. <sup>5</sup> Te í<sup>n</sup> té iha ío dāsatu iní ñáhā-dē, chí ndēni ní cuu cuáhā<sup>n</sup>-dé ndátnūhu-dé ndihí ñāyiu isráel dānāá-dé-yu. Te néhe quide-dé chí cuáhā<sup>n</sup>-dé dācāhā<sup>n</sup>-dé nchaa ñāyiu cuendá quindáá iní-yu tnūhu té ní xindecu ñúú Nazàrét. <sup>6</sup> Chí duca<sup>n</sup> cāhā<sup>n</sup> cue té iha sá ní sáhā<sup>n</sup>-dé veñúhu cāhnu sá ío cūnuu, te cuini-dé daquēe tihú-dé veñúhu cuendá cuini-dé xocāni-dé sá íi ndécú, núu xiá<sup>n</sup> ní tnūi ñaha-güedé ndécá ñaha-güedé cuáhā<sup>n</sup> núu cué té cūchiu<sup>n</sup> cuendá cācá<sup>n</sup> tnūhú-güedé núu-dé núu ná cuendá duca<sup>n</sup> cuini-dé cada-dé, chí duca<sup>n</sup> cāa leí ndécú



ndihi-güedé sá cáda ndáá-güedé núu ná ìp sá cùu. <sup>7</sup> Te té Lisiú tée cùu capitá<sup>n</sup> cùnùu-gá ní quexio-dé ndihi sandádú, te ní dácúnü-güedé nchaa cue tée nùtní ndihi té Páblü, te dätñüni ní tñi ñaha-güedé xii-dé ndécá ñaha-güedé cuahá<sup>n</sup>. <sup>8</sup> Te sátá xiá<sup>n</sup>, te ní xáha<sup>n</sup>-dè sá quixí-güedé ndéé ndíha cundáá cuéchi-dé. Te yòhó cundee iní-n càcá<sup>n</sup> tnúhú-n núu-dé, te núu ndáá duca<sup>n</sup> ní quide-dé àdi ñáhá —càchí té Tèrtulú xáha<sup>n</sup>-dè xii té Juéli tée cùu gobiernú.

<sup>9</sup> Te dava-gá cue tée isràèl xìnütní xiá<sup>n</sup> ní càhá<sup>n</sup>-güedé sá ndáá càhá<sup>n</sup> té Tèrtulú. <sup>10</sup> Te tée cùu gobiernú ní quide-dé ndaha-dé núu té Páblü cuendá càhá<sup>n</sup>-dè, te té Páblü ní xáha<sup>n</sup>-dè:

—Yòhó sa ní cuu titní cuíá ndécú-n iha xehndé-n cuéchi nchaa ñáyiü xínáá, núu xiá<sup>n</sup> ío cùdíí iní-í sá ndíha téhdé cuéchi tée ñaha-güedé xii-í. Te cundee ìni-n cündedóho-n na càni-í cuendú nàcuáa ní cuu. <sup>11</sup> Te nducu tnúhu-n te quini<sup>n</sup> nã càhá<sup>n</sup> ndáá-í, chí sa ní cuu úxúü nduu sá ní sáhá<sup>n</sup>-í veñúhu càhnu sá ío cùnnu ñuu Jerusálén ní càhá<sup>n</sup> ndíhi-í Yá Ndióxi. <sup>12</sup> Te ní ñà túú ní nã-í ndíhi ñáyiü xití veñúhu, te ñà túú ní xáha<sup>n</sup>-í nãá-yu ní ìp xichi, te ní ìp veñúhu líhli ní sáhá<sup>n</sup>-í ñà túú ná ní xáha<sup>n</sup>-í cada-yu. <sup>13</sup> Te ní ñà túú quèñuhu-güedé cue tée càhá<sup>n</sup> ndáá te núu ndáá duca<sup>n</sup> ní quide-í. <sup>14</sup> Te yúhú càhá<sup>n</sup> ndáá-í sá càhá<sup>n</sup> ndíhi-í Yá Ndióxi, chí diu ní Yá Ndióxi ní xóo càhá<sup>n</sup> ndíhi ñáyiü ndéé sanaha, núu xiá<sup>n</sup> ní tuha-í ichi-gá. Te cue tée-a càchí-güedé sá ñà díü ìp ichi váha ní tuha-í. Te yúhú sàndáá iní-í nchaa sá ní chídó tnüni ndíi Moisés ndíhi dava-gá cue tée ní xóo càhá<sup>n</sup> tnúhu Yá Ndióxi ndéé sanaha. <sup>15</sup> Te sàndáá tucu iní-í sá ndótó nchaa ñáyiü ní xíhí, cuéi ñáyiü váha iní-xi, te cuéi ñáyiü úhú iní-xi, dico ndotó-yu. Te duca<sup>n</sup> ní xóo quindáá iní nchaa ñáyiü ní xíndecu ndéé sanaha. <sup>16</sup> Te yúhú ío ndücu ndee-í quidè-í nchaa sá càhá<sup>n</sup> Yá Ndióxi cuendá sá vá cùú càhá<sup>n</sup> núu-í núu-gá ndíhi núu ñáyiü ñuyúú-a.

<sup>17</sup> Te sa ní cuu titní cuíá sá ñà túú-gá sáhá<sup>n</sup>-í ñuu Jerusálén, te ní sáhá<sup>n</sup> tucu-í nèhé-í díhú<sup>n</sup> ní taxi ñáyiü ñuu xicá cuendá cuañaha-í xii ñáyiü ñuu Jerusálén. Te ní ndúcú-í sá cuàha táhú-í Yá Ndióxi. <sup>18</sup> Te ní xíndecu-í veñúhu càhnu sá ío cùnnu ní quide-í nchaa nàcuáa ní xóo cada ñáyiü ní xíndecu ndéé sanaha cuendá nduu vétü iní Yá Ndióxi. Te ñà túú chitü-yu ní sáhá<sup>n</sup>, te ní ñà túú ná ní cùu, te ní naníhí ñáhá ìp úu cue tée isràèl xii-í, cue tée véxi distritú Asiá. <sup>19</sup> Te quixi mee-güedé iha càhá<sup>n</sup>-güedé, te núu sá ndáá ní xini-güedé sá yúhú ndécuéchi-í ní cùu, <sup>20</sup> àdi ñáhá. Dico cachí tnúhu cue tée-á<sup>n</sup> nása ní cuu òré ní xíndecu-í júndá-güedé núu ndécuéchi-í àdi ñà túú ndécuéchi-í. <sup>21</sup> Dico ñà túú cuéchi-í chí ìp-di-ní tnúhu ní càhá<sup>n</sup>-í

ní xáha<sup>n</sup>-í xii-güedé sá sàndáá iní-í sá ndótó nchaa ñáyiü ní xíhí, te diu-ní núu xiá<sup>n</sup> càchí-güedé sá ndécuéchi-í —càchí té Páblü xáha<sup>n</sup>-dè xii té Juéli.

<sup>22</sup> Te té Juéli sa xini váha-dé nàcuáa cuahá<sup>n</sup> tnúhu Jesús, núu xiá<sup>n</sup> ñà ní cuini-gá-dé ndatnúhu-dé ndíhi té Páblü, te ní xáha<sup>n</sup>-dè:

—Sa ní cuu, cundetu-n na quèxio té Lisiú tée cùu capitá<sup>n</sup> cùnùu-gá, te òré-á<sup>n</sup> cundáá cuendá-n —càchí té Juéli xáha<sup>n</sup>-dè.

<sup>23</sup> Te ní xáha<sup>n</sup>-dè xii tée cùu capitá<sup>n</sup>:

—Cundee-n té Páblü-á<sup>n</sup>, te núu nása càchí-dé cada-n, te daña-n na càhá<sup>n</sup> ndíhi-dé cue tée xini tnáhá ndíhi-dé núu cuañaha-güedé nchaa sá xini ñùu-dé àdi nása cada-güedé —càchí té Juéli xáha<sup>n</sup>-dè xii tée cùu capitá<sup>n</sup>.

<sup>24</sup> Te ní cuu titní nduu, te ní sáhá<sup>n</sup> té Juéli vechü<sup>n</sup> ndíhi ñadíhí-dé, te ñaha-á<sup>n</sup> nání-á<sup>n</sup> Drüsílá, te ñaha isràèl cùú-á<sup>n</sup>. Te ní xáha<sup>n</sup>-dè sá quíngueñuhu-güedé té Páblü, te òré ní quexio-dé vechü<sup>n</sup>, te ní càhá<sup>n</sup>-dè núu-yu nchaá-yu sá quindáá iní-yu tnúhu Xitohó Jesucristú. <sup>25</sup> Te ní xáha<sup>n</sup>-dè:

—Mee-ní sá váha cada-ndo. Te coto-ndo mèe-ndo, te vá cáda-ndó ní ìp sá cuèhé sá dúhá, chí ìp nduu càhá<sup>n</sup> Yá Ndióxi ndédacáa ñáyiü váha iní-xi, te ndédacáa ñáyiü úhú iní-xi —càchí té Páblü xáha<sup>n</sup>-dè.

Te sá dúcá<sup>n</sup> ní xáha<sup>n</sup>-dè, te ní yúhú té Juéli, te ní xáha<sup>n</sup>-dè:

—Vá càhá<sup>n</sup>-gá-ó tnávü, cuahá<sup>n</sup>, te òré cüyächí-í, te cana ñaha-í xii-n —càchí-dé xáha<sup>n</sup>-dè.

<sup>26</sup> Te té Juéli ní quide-dé cuendá sá cuañaha té Páblü díhú<sup>n</sup> te vá ndíhu-gá-dé vecaá ní cùu, núu xiá<sup>n</sup> titní xito ní cana-dé té Páblü vechü<sup>n</sup> ní ndatnúhu ndíhi tnáha-güedé, dico ñà túú ní cháhu-dé. <sup>27</sup> Te úú cuíá duca<sup>n</sup> ní quide-güedé, te dätñüni ní xínu té Juéli chiü<sup>n</sup>-dè, te ní ngünütní té Pòrsiü Fèstü. Te òré ní xínu té Juéli chiü<sup>n</sup>-dè, te ní dándóo-dé té Páblü yíhí-ni-dé vecaá. Te duca<sup>n</sup> ní quide-dé cuendá ní cuini-dé cudiü-dé núu cuè tée isràèl.

## 25

### Té Páblü càhá<sup>n</sup> ndíhi-dé té Fèstü

<sup>1</sup> Te ní cuu úni nduu sá ní quexio té Fèstü ñuu Cèsaréá ní quehe<sup>n</sup>-dè chiü<sup>n</sup>, te ní quee-dé cuahá<sup>n</sup>-dè ñuu Jerusálén. <sup>2</sup> Te yacá<sup>n</sup> ní naníhí tnáhá-dé ndíhi nchaa dítü cùnùu ndíhi nchaa cue tée taxi tnüni ñáhá xii ñáyiü isràèl, te xáha<sup>n</sup>-güedé xii té Fèstü sá ndáa ndécuéchi té Páblü. <sup>3</sup> Te ní càhá<sup>n</sup> ndáhú-güedé núu-dé sá téndàha-dé sandádú-dé quíngueñuhu ñaha-güedé vecaá xii-dé ndéé ñuu Cèsaréa te candeca ñaha-güedé quíhí<sup>n</sup>. Te duca<sup>n</sup> ní càhá<sup>n</sup>-güedé, chí ní ndatnúhu-güedé sá càhni

ñaha-güedé xii té Páblú ichi ni cùu. <sup>4</sup> Te té Fèstú ní xáha<sup>n</sup>-dè:

—Vá cúu quixi-dé ndéé ndíha. Na cündetu-dé ñúú Cèsareá chí sacú-ni nduu cuyaa-í iha te dàtnùní nùhú-í yàcá<sup>n</sup>. <sup>5</sup> Te yáchí-gá quíhí<sup>n</sup> ndihí-í cue té cùnuu-gá, te yàcá<sup>n</sup> cuu cáhá<sup>n</sup>-ndó núu ndáá ndècuéchi-dé àdi cáhá<sup>n</sup> méé-dé núu ndáá ndècuéchi-dé àdi ñáhá, te cutnùní iní-ndó —càchí-dé xáha<sup>n</sup>-dè.

<sup>6</sup> Te ní xíndecu té Fèstú úná úxí nduu ñúú Jerusalén, te dàtnùní cuánuhú-dé ñúú Cèsareá. Te nduu tnèé cuáhá<sup>n</sup>-dé vechiù<sup>n</sup>, te òré ní quexio-dé, te ní xáha<sup>n</sup>-dè xii cue sandadú xínú cuèchi sá quíhí<sup>n</sup>-güedé queñuhu-güedé té Páblú vecaá te candeca ñaha-güedé quíhí<sup>n</sup> vechiù<sup>n</sup>. <sup>7</sup> Te òré ní quexio té Páblú vechiù<sup>n</sup>, te sa ndècu cue téé isráél cue téé ní quee ñúú Jerusalén, te cuánguihu-güedé ndéé díñi té Páblú ní ngúnutnii-güedé, te xáha<sup>n</sup>-güedé xii cue téé cùchiu<sup>n</sup> sá ndècuéchi vñi-dé, dico ñá túú ní cündee tnúhu-güedé. <sup>8</sup> Te té Páblú ní xáha<sup>n</sup>-dè xii té Fèstú:

—Ñá túú ndècuéchi-í, ñá túú nã ní quide-í, chí ñá túú tnàhá iní-í cada-í ñ<sup>n</sup> sá càchí lèi sá vã cúu càda-o. Te ní xití veñúhu càhnu sá ïo cùnuu ñá túú nã quidè-í, te ní té Cèsár téé yíndaha cuéhé nació<sup>n</sup> ñá túú cáhá<sup>n</sup> cuéhé-í cuendá-dé —càchí té Páblú xáha<sup>n</sup>-dè xii-dé.

<sup>9</sup> Te té Fèstú ní cuini-dé cada-dé nàcuáa cudíu-dé núú cuè téé isráél ní cùu, núu xíã<sup>n</sup> ní xáha<sup>n</sup>-dè xii té Páblú:

—¿Cundee iní-n quíhí<sup>n</sup>-n ñúú Jerusalén-ã<sup>n</sup>? Te yàcá<sup>n</sup> cundáá cuèchi sá sáá díquí-n —càchí té Fèstú xáha<sup>n</sup>-dè xii té Páblú.

<sup>10</sup> Te xáha<sup>n</sup> té Páblú:

—Diu-ni ñ<sup>n</sup> vechiù<sup>n</sup> téé cùchiu<sup>n</sup> Cesár ndècù-í iha, te diu-ni iha cada ndáá-n núu cùni-n ní cùu. ¿Te ná cuendá candeca ñaha-n quíhí<sup>n</sup> ingá xichi? Yòhó tnàhá-n xini-n sá ñá túú nã quidè-í ñáyi isráél. <sup>11</sup> Chí núu dicó yúhú ní quide-í ñ<sup>n</sup> cuèchi càhnu, te ñá túú nã cada-xi cuèi na càhni ñaha-ndo xii-í ní cùu. Te sa ní cutnùní iní-n sá ñá ndáá, chí mee-ni tnúhu ndehnde xicáhá<sup>n</sup>-güedé, te ñá túú nduu váha-xi duca<sup>n</sup> càda-n cùñaha-n sá quíhí<sup>n</sup>-í ndihí-güedé ingá xichi. Te xíã<sup>n</sup> cùni-í quíhí<sup>n</sup>-í núú té Cèsár téé yíndaha cuéhé nació<sup>n</sup>, te yàcá<sup>n</sup> cáhá<sup>n</sup> méé-dé núu ndáá ndècuéchi-í —càchí té Páblú xáha<sup>n</sup>-dè xii té Fèstú.

<sup>12</sup> Te ní ndatnúhu té Fèstú ndihí cue téé chindee tnúhu ñaha xii-dé, te dàtnùní ní xáha<sup>n</sup>-dè xii té Páblú:

—Te sa ní cáhá<sup>n</sup>-n sá quíhí<sup>n</sup>-n quítnahá-n té Cèsár te diu-ni quíhí<sup>n</sup>-n, te quini-n nãsa cáhá<sup>n</sup> téé-ã<sup>n</sup> yàcá<sup>n</sup> —càchí-dé xáha<sup>n</sup>-dè xii té Páblú.

*Té Páblú cáhá<sup>n</sup> ndihí-dé té Àgripá téé yíndaha nació<sup>n</sup> Isráél*

<sup>13</sup> Te sáta ní cuu cuéhé nduu, te ní quee té Àgripá téé yíndaha nació<sup>n</sup> Isráél cuáhá<sup>n</sup>-dé ñúú Cèsareá ndihí ñadíhí-dé, te ñaha-á<sup>n</sup> nání-á<sup>n</sup> Berènicé te òré ní quexió-yu, te ní cáhá<sup>n</sup> ndihí-yu té Fèstú. <sup>14</sup> Te sáta ní cuu titní nduu, te ní cáhá<sup>n</sup> té Fèstú cuendá té Páblú ní xii-dé té Àgripá:

—Ndècu ñ<sup>n</sup> téé ní dándó té Juéllí vecaá nání-dé Páblú. <sup>15</sup> Te cùtnàhá ní sáhá<sup>n</sup>-í ñúú Jerusalén ní nanitnàhá-í ndihí cue dútú cùnuu ndihí cue téé cùu sacuéhé núú ñáyi isráél. Te ní dácáá díquí-güedé té Páblú cuèchi, te ní cachí-güedé sá táuchiu<sup>n</sup>-í cahni ñaha-güedé xii-dé ní cùu. <sup>16</sup> Te ní xáha<sup>n</sup>-í xii-güedé sá vã cúu, chí ñá túú dúcá<sup>n</sup> quide nchúhu cue téé romá cùtexínu cada castiù-ndí ñáyi, chí díhna-gá ndúcú tnúhu-ndí núú ñáyi sáa cuèchi díquí-xi cuendá quini-ndí núu nãsa cáhá<sup>n</sup> méé-yu ndihí ñáyi sácá<sup>n</sup> cuèchi cuendá-yu, te òré-ã<sup>n</sup> cùtnùní iní-ndí núu ndáá ndècuéchi-yu àdi ñáhá, te duca<sup>n</sup> te nihí-ndí nàcuáa quide ndáá-ndí cuendá-yu, duha ní xáha<sup>n</sup>-í xii-güedé —càchí té Fèstú xáha<sup>n</sup>-dè xii té Àgripá.

<sup>17</sup> Te ní xáha<sup>n</sup> túcu té Fèstú:

—Te sáta ní quexio-güedé ndéé ndíha, te nduu tnèé ní sáhá<sup>n</sup>-ni-ndí vechiù<sup>n</sup>. Te ní xáha<sup>n</sup>-í sá quíngueñuhu-güedé té Páblú candeca ñaha-güedé quixi, te òré ní quexio-dé, <sup>18</sup> te ní ngúita-güedé xáha<sup>n</sup>-güedé sá ndècuéchi-dé. Te ní sani iní-í sá ñ<sup>n</sup> cuèchi càhnu tee ñaha-güedé dico ñáhá, chí dicó-ni sá ñ<sup>n</sup> tnúhu ní cáhá<sup>n</sup>-dé, xíã<sup>n</sup> duca<sup>n</sup> ní quide-güedé. <sup>19</sup> Te ní tenáá ñáhá-güedé xii-dé, chí cachí-güedé sá ñá túú cáhá<sup>n</sup> váha-dé cuendá ndiöxí-güedé. Te tnàhá-ni cuendá ñ<sup>n</sup> téé nàni Jesús cáhá<sup>n</sup>-dé, chí càchí-dé sá ní xihí téé-ã<sup>n</sup> te ní ndoto-dé càchí-dé xáha<sup>n</sup>-dè xii-güedé, cáchí-güedé.

<sup>20</sup> Te ñá ní cutnùní iní-í nãsa cùñaha-í xii-güedé cuendá téhndé cuèchi-dé. Te xíã<sup>n</sup> ní xicá<sup>n</sup> tnúhu-í núú té Páblú núu cundee iní-dé quíhí<sup>n</sup>-dè ñúú Jerusalén, te ndéé ndíácá<sup>n</sup> cada ndáá-ndí cuendá-dé, te núu ndáá ndècuéchi-dé nàcuáa cáhá<sup>n</sup>-güedé àdi ñáhá ní cùu. <sup>21</sup> Te dàtnùní té Páblú ní cachí-dé sá cündecu tnaa-dé vecaá te dàtnùní quíhí<sup>n</sup>-dè núú té Cèsár, te téé-ã<sup>n</sup> cada ndáá-dé cuendá-dé. Te cuendá sá dúcá<sup>n</sup> ní cáhá<sup>n</sup> té Páblú, xíã<sup>n</sup> núu ní xáha<sup>n</sup>-í sá cündéé ñáhá cuè sandadú xii-dé, nini na còto-í nãsa cada-í quíhí<sup>n</sup>-dè núú té Cèsár, duha ní xáha<sup>n</sup>-í xii-güedé —càchí té Fèstú xáha<sup>n</sup>-dè xii té Àgripá.

<sup>22</sup> Te té Àgripá ní xáha<sup>n</sup>-dè xii té Fèstú:

—Te tnàhá yúhú ïo cudíi iní-í cundedóho-í tnúhu cáhá<sup>n</sup>-dè —càchí-dé xáha<sup>n</sup>-dè.

Te ní xáha<sup>n</sup> té Fèstú:

—Tnee cana-í-dé te cundedóho-n nása cáhá<sup>n</sup>-dé —cáchi-dé xáha<sup>n</sup>-dé.

<sup>23</sup> Te nduu tnée ní quexio té Àgripá ndihi ñadihi-dé tá Berenicé vechi<sup>u</sup>, te ío ní quide cáhnu ñaha-güedé xii-yu. Te cuánguihú-yu vechi<sup>u</sup> ndihi cue tée cùu capitá<sup>n</sup> cùnùu-gá ndihi cue tée cùnnu ñuú Cèsaréa. Te té Fèstú ní xáha<sup>n</sup>-dè sá quingueñuhu-güedé té Páblú vecaá, te òré ní quexio-dé, <sup>24</sup> te ní xáha<sup>n</sup> tē Fèstú xii té Àgripá ndihi nchaa ñáiyu xindecu-á<sup>n</sup>:

—Chí cündèhe tée iha chi tée-a cáchi cue tée isràél sá ndècuéchi-dé, te cùtnáhá ní xindecu-í ñuú Jerusalén ní cachí-güedé sá ndáá ndècuéchi-dé, te diu-ni duca<sup>n</sup> cáhá<sup>n</sup>-güedé iha. Te nchaa-güedé ní cuáá-güedé te cáchi-güedé sá táuchiu<sup>n</sup>-í cahni ñaha-güedé xii-dé ní cùu. <sup>25</sup> Te sátá ní ndihi cuèndú ní cáhá<sup>n</sup>-güedé, te ní cutnùni iní-í sá ñà túú ní ñ<sup>n</sup> cuéchi cáhnu ní quide-dé, núu ñá túú ní tàuchiu<sup>n</sup>-í cahni ñaha-güedé xii-dé. Te mee-dé ní cachí-dé sá quihí<sup>n</sup>-dé núu tē Cèsár tée yindaha cuéhe nació<sup>n</sup>, te ní xáha<sup>n</sup>-í sá cùu quihí<sup>n</sup>-dé. <sup>26</sup> Te ñá túú ní xini váha-í nása ní quide-dé, núu xiá<sup>n</sup> ñá ní ñhi-í nácuáa cadúha-í tutú quihí<sup>n</sup> ndaha té Cèsár, te xiá<sup>n</sup> ní cana-í-dé véxi-dé iha cuèndá nchaa-ndo cáhá<sup>n</sup> ndihi-ndo-dé. Te duca<sup>n</sup> cànuu cadíhna-gá yohó tātá Àgripá cáca<sup>n</sup> tnúhú-n núu-dé núu nása cáhá<sup>n</sup>-dé, te òré-á<sup>n</sup> cutnùni iní-í nása cada-í cadúha-í tutú quihí<sup>n</sup> ndaha té Cèsár. <sup>27</sup> Chi sàni iní-í sá ñà túú nduu váha-xi sá quihí<sup>n</sup> ñ<sup>n</sup> tée táu cuéchi te núu vá códo tnùni núu ñ<sup>n</sup> tutú nácuáa cãa cuéchi táu-dé —cáchi té Fèstú xáha<sup>n</sup>-dè xii-güedé.

## 26

*Te Páblú cáhá<sup>n</sup> ndihi-dé té Àgripá*

<sup>1</sup> Te dàtnùni ní xáha<sup>n</sup> tē Àgripá tée yindaha nació<sup>n</sup> Isràél xii té Páblú:

—Te vitna cáhá<sup>n</sup>-n núu nása ní cuu cuèndá-n —cáchi-dé xáha<sup>n</sup>-dè.

Te té Páblú ní ndacani-dé ndaha-dé sá cündedóho-güedé, te ní xáha<sup>n</sup>-dè xii té Àgripá tée yindaha nació<sup>n</sup> Isràél:

<sup>2-3</sup> —Tātá Àgripá, ío cùdí iní-í sá ní naníhi tnáhá-ó vitna, chí yohó ío váha xini-n nchaa nacuaa quide ñáiyu isràél quidé cáhnu-yu Yá Ndióxi, te ío váha xini-n nchaa tnúhu xitnáhá-yu. Te vitna cundee iní-n cündedóho-n ñ<sup>n</sup> úú tnúhu na cáhá<sup>n</sup>-í. Na cáchi tnúhu-í sá ñà ndáá ní quide-í nchaa sá cáhá<sup>n</sup> cue tée isràél.

*Te Páblú cáhá<sup>n</sup>-dè nácuáa ní quide-dé cùtnáhá vátá túhá-gá-dé ichi Yá Ndióxi*

<sup>4</sup> Te sa ñaha nchaa cue tée cùnnu núu ñáiyu isràél nácuáa ní quide-í ñuú-í ndihi ñuú Jerusalén cùtnáhá ní cuu landú-í. <sup>5</sup> Te

mee-güedé náhá-güedé sá ndèé líhli-í ní chitnahá-í cue tée cùu fariséú. Te núu cuini-güedé cáhá<sup>n</sup>-güedé sá tē fariséú cùu-í àdi ñáhá dico nchaa-güedé sa ñaha-güedé sá cuè tē-á<sup>n</sup> ní chitnahá-í. Te cue tē cùu fariséú-á<sup>n</sup> ío cuini-güedé cada-güedé nchaa nácuáa nchicú<sup>n</sup> nihnu ñáiyu quidé-yu. Te yúhu nchaa sá nchicú<sup>n</sup> nihnú-yu quidé-yu-á<sup>n</sup> ní quide-í. <sup>6</sup> Te vitna ndècu-í iha, te cáhá<sup>n</sup>-n núu váha-ni quide-í àdi ñáhá, chí cue tē-á<sup>n</sup> tēé ñaha-güedé cuéchi xii-í cuèndá sá sàndáá iní-í sá ndóto nchaa ñáiyu ní xihí. Te diu-ni duca<sup>n</sup> ní xáha<sup>n</sup> Yá Ndióxi xii nchaa ñani tnáhá-ó ní xindecu ndéé sanaha. <sup>7</sup> Te nchaa ñáiyu-á<sup>n</sup> xindetú-yu nduu ndòto ñáiyu ní xihí ní cùu. Te diu-ni duca<sup>n</sup> ndètu nchaa ñani tnáhá-ó ndècu ñuyú-a ndéé vitna, te xiá<sup>n</sup> núu cuéi nduu cuéi niú cáhá<sup>n</sup> ndihí-yu Yá Ndióxi. Te sá sàndáá iní-í núu xiá<sup>n</sup> ní cáhá<sup>n</sup>-í, te tē ñaha cue tē isràél cuéchi xii-í. <sup>8</sup> Te ná cuèndá nchòhó cue tē isràél ñá túú cuini-ndó quindáá iní-ndó sá dándòto Yá Ndióxi nchaa ñáiyu ní xihí? —cáchi té Páblú xáha<sup>n</sup>-dè.

*Té Páblú caní-dé cuèndá sá ní xóo chihi-dé ñáiyu sàndáá iní tnúhu Jèsús vecaá*

<sup>9</sup> Te ní xáha<sup>n</sup> tucu té Páblú:

—Ndéé dàv-á<sup>n</sup> ní quide úhú-í ñáiyu sàndáá iní-xi tnúhu Jèsús Yaá ní quee ñuú Nazarét, te ní cáhá<sup>n</sup>-í sá váha-ni ní quide-í sá dúcá<sup>n</sup> ní quide-í. <sup>10</sup> Te diu-ni duca<sup>n</sup> ní quide-í ñuú Jerusalén. Te cue dútú cùnùu ní taxi-güedé ñ<sup>n</sup> tutú cuèndá tñi-í ñáiyu ní sàndáá iní tnúhu Jèsús, te vai-yu ní chihi-í vecaá. Te òré ní cáhá<sup>n</sup>-güedé sá cáhni-güedé ñáiyu-á<sup>n</sup>, te tnáhá-í ní cáhá<sup>n</sup>-í sá cùu cáhni ñaha-güedé xii-yu. <sup>11</sup> Te titni xito ní sáhá<sup>n</sup>-í nchaa veñúhu ñáiyu isràél, te ní cani-í-yu te ní xáha<sup>n</sup>-í sá dáñá-yu ichi Jèsús. Te cuèndá ío ní cudèè<sup>n</sup>-í núu-yu, xiá<sup>n</sup> ní sáhá<sup>n</sup>-í nchaa ñuú xicá ní sánúnducù-í daga-gá ñáiyu sàndáá iní tnúhu-gá cuèndá dandòho ñaha-güedé xii-yu.

*Té Páblú cáhá<sup>n</sup> tucu-dé nása ní cuu ní tuha-dé ichi Yá Ndióxi*

*(Hch. 9:1-19; 22:6-16)*

<sup>12</sup> Te cuèndá xiá<sup>n</sup> ní xica tucu-í cuáhá<sup>n</sup>-í ñuú Dámascú, néhè-í tutú ní taxi cue dútú cùnùu cuáhá<sup>n</sup>, cuèndá sá ndácù-í tñi-í nchaa ñáiyu sàndáá iní tnúhu Jèsús ní cùu. <sup>13</sup> Te òré cauxúú nduu ñuhu-í ichi cuáhá<sup>n</sup>-í, te uu<sup>n</sup> ní quee ñuhú andiu ní dáyéhé-xi ndéé núu nùtni-í ndihi cue tē ndèca tñaha ndihi-í, te níhi-gá ní dáyéhé-xi dàcúúxi nchicanhii.

<sup>14</sup> Te nchaa-ndí ní nduá-ndí ndéé ñuhu, te ní tecú dóho-í cáhá<sup>n</sup> ñ<sup>n</sup> sá cáhá<sup>n</sup> tnúhu ñáiyu isràél, te cáchi-xi: “Yohó Sautú, ¿Ná cuèndá cùú ùhú iní ñáhá-n xii-í dándòho ñaha-n? Te ío dándòho-n mee-n, chí dàtná cuini-n quide ndicutu quide-n chí quití-á<sup>n</sup> òré cùxi-güedé-di puyá te sãha-di patadá

núu-xi, te sá dúcá<sup>n</sup> quide-di te quide úhú-di mee-di. Te duca<sup>n</sup> sátnahá-xi cùu yohó chi ñá túu sàndáá iní ñáhá-n xii-í", cächí sá ñí cáhá<sup>n</sup>-á<sup>n</sup>. <sup>15</sup> Te ní xáhá<sup>n</sup>-í: "¿Ná cùu yohó sá ñí cáhá<sup>n</sup>-ái<sup>n</sup>?", xáhá<sup>n</sup>-í. Te cächí sá cáhá<sup>n</sup>-á<sup>n</sup>: "Yúhú cùu-í Jesús Yáá cùu úhú iní-n", duha ní cächí sá cáhá<sup>n</sup>-á<sup>n</sup>. Te xiá<sup>n</sup> ní cutnùní iní-í sá Jesús cáhá<sup>n</sup>. <sup>16</sup> Te ní cächí-gá: "Ndacuíñi-n chi yúhú cáhá<sup>n</sup>-í chi cuiní-í quíhí<sup>n</sup>-n càda-n chiu-í, chi quíhí<sup>n</sup>-n cáhá<sup>n</sup>-n núu ñáyiú nàcuáa ní cuu ní xiní ñáhá-n xii-í vitna, te quixi tucu-í cáhá<sup>n</sup> ndihi ñaha-í xii-n, te cüñaha-n xii-yu nàcuáa cáhá<sup>n</sup>-í. <sup>17</sup> Chi cuiní-í quíhí<sup>n</sup>-n cáhá<sup>n</sup>-n tnúhu-í núu ñáyiú isráel ndihi núu ñáyiú ñá túu cùu ñáyiú isráel, te coto ñaha-í xii-n cuendá vá cáhni ñáhá-yu xii-n. <sup>18</sup> Te cuiní-í quíhí<sup>n</sup>-n cüñaha-n xii-yu sá dáñá-yu nchaa ichi cuèhé ichi duha ndécú-yu, te tuhá-yu ichi váha cuendá vá quindáá iní-yu cadá-yu sá cáhá<sup>n</sup> yucu ñávaha, te quindáá iní-yu cadá-yu nchaa nàcuáa cáhá<sup>n</sup> Yá Ndióxi. Te núu na quindáá iní-yu tnúhu cáhá<sup>n</sup>-í, te cada càhnu iní-í nchaa cuèchi-yu, te nanihí tàhú-yu ndihi dava-gá ñáyiú sa ní xócuñi nchaa sá cuèhé sá dúhá ñí xindecu iní-yu", duha ní cächí-gá xii-í —cächí té Páblú xáhá<sup>n</sup>-dè xii té Àgripá té yindaha nació<sup>n</sup> Isráel.

*Té Páblú quidé-dè nchaa nàcuáa ní xáhá<sup>n</sup> Jesús cada-dè*

<sup>19</sup> Te ní xáhá<sup>n</sup> tucu té Páblú xii té Àgripá:

—Ñá túu dáña ndeé-í quide-í nchaa nàcuáa ní cáhá<sup>n</sup> Jesús òré ní cáhá<sup>n</sup>-gá andiu. <sup>20</sup> Te díhna-gá ñáyiú ñuú Dámascú ní cáhá<sup>n</sup>-í tnúhu-gá núu-yu, te ní xáhá<sup>n</sup>-í xii-yu sá dáñá-yu nchaa sá cuèhé sá dúhá quide-yu, te cáhá<sup>n</sup> ndihi-yu Yá Ndióxi, te cadá-yu mee-ni sá váha cuendá cutnùní iní dava-gá-yu sá ñí dáñá-yu nchaa sá ñá túu váha ní xóo cadá-yu. Te duca<sup>n</sup>-ni ní xáhá<sup>n</sup>-í xii ñáyiú ñuú Jerusalén ndihi ñáyiú nihí nació<sup>n</sup> Isráel ndihi nchaa ñáyiú ñá túu cùu ñáyiú isráel. <sup>21</sup> Te cuendá sá dúcá<sup>n</sup> ní cáhá<sup>n</sup>-í núu ní tnú ñaha cuè té isráel xii-í cütñahá ní sáhá<sup>n</sup>-í veñúhu càhnu sá ío cùnuu cahni ñaha-güedé ní cùu. <sup>22</sup> Te diu-ni mee Yá Ndióxi ní chindee ñaha-gá xii-í núu ndécú-í iha tnàvì cáhá<sup>n</sup>-í tnúhu-gá, te mee-ni tnúhu-gá cáhá<sup>n</sup> ndihi-í nchaa-yu, cuèí ñáyiú cuica, te cuèí ñáyiú ndáhú. Te ndí Moisés ndihi dava-gá cue té ní xóo cáhá<sup>n</sup> tnúhu Yá Ndióxi ndeé sanaha ní cáhá<sup>n</sup>-güedé nàcuáa cada-xi vitna, te diu-ni duca<sup>n</sup> cáhá<sup>n</sup>-í nchaa-ni nduu. <sup>23</sup> Te cue té-á<sup>n</sup> ní cächí-güedé sá Cristú Yáá tendaha Yá Ndióxi quixi ñuyú-a ndoho tnahá-gá, te cuú-gá, te dátñuní ndoto-gá. Te duca<sup>n</sup> càda-xi nchaa ñáyiú ní xihí ndotó-yu núu na sáá nduu chi duca<sup>n</sup> càda-xi ní cächí méé Yá Ndióxi. Te cuendá sá dúcá<sup>n</sup> ní ndoto-gá, xiá<sup>n</sup> cütñuní sá cùu nanihí tàhú ñáyiú, cuèí

ñáyiú isráel, te cuèí ñáyiú ñá túu cùu ñáyiú isráel. Te dátñá-ni nduu tnúhu ní cáhá<sup>n</sup> cue té ní xóo cáhá<sup>n</sup> tnúhu-gá ndeé sanaha-á<sup>n</sup>, te diu-ni duca<sup>n</sup> cáhá<sup>n</sup> yúhú tucu —cächí té Páblú xáhá<sup>n</sup>-dè.

*Té Páblú xáhá<sup>n</sup>-dè xii té Àgripá sá quindáá iní-dè tnúhu Jesús*

<sup>24</sup> Te sá dúcá<sup>n</sup> ní cáhá<sup>n</sup> té Páblú, te ní cáhá<sup>n</sup> nihí té Fèstú, te xáhá<sup>n</sup>-dè:

—Páblú, ío lùcú cáhá<sup>n</sup>-n! Cuendá ío vai ní dácuhá<sup>n</sup>-n, núu xiá<sup>n</sup> ndadá lùcú ñáhá-xi xii-n —cächí-dè xáhá<sup>n</sup>-dè.

<sup>25</sup> Te ní xáhá<sup>n</sup> té Páblú:

—Ñáhá, vá dúcá<sup>n</sup> cáhá<sup>n</sup>-n chi ñá díú sá lùcú-í duha cáhá<sup>n</sup>-í, chi tnúhu ndáá cáhá<sup>n</sup>-í.

<sup>26</sup> Te té Àgripá-a sa náha-dé ndihi nchaa ñáyiú isráel nàcuáa ní cuu, chi sa ní nihí-dè tnúhu ndihi dava-gá-yu nàcuáa ní cáhá<sup>n</sup>-í, núu xiá<sup>n</sup> cüyí-í cáhá<sup>n</sup> ndihi-í-dé —cächí-dè xáhá<sup>n</sup>-dè xii té Fèstú.

<sup>27</sup> Te ní xáhá<sup>n</sup>-dè xii té Àgripá:

—Yúhú sa xiní-í sá sàndáá iní-n tnúhu ní chidóo tnúni cue té ní xóo cáhá<sup>n</sup> tnúhu Yá Ndióxi ndeé sanaha —cächí-dé xáhá<sup>n</sup>-dè.

<sup>28</sup> Te ní xáhá<sup>n</sup> té Àgripá:

—¿Quide-n cuendá sá íñ úú tnúhu ní cáhá<sup>n</sup>-n te quindáá iní-í tnúhu Jesús cáhá<sup>n</sup>-n-á<sup>n</sup>? —cächí-dé xáhá<sup>n</sup>-dè.

<sup>29</sup> Te ní xáhá<sup>n</sup> tucu té Páblú:

—Cuèí vitna te cuèí ndeé cuèé-gá dico cuiní-í sá dácuití sá quindáá iní-n tnúhu Jesús. Te diu-ni duca<sup>n</sup> xicá<sup>n</sup> tàhú-í núu Yá Ndióxi sá ncháá ñáyiú ndécú ndihi-o iha quindáá iní-yu tnúhu-gá dátñá cuiní-n ní quide yúhú, duca<sup>n</sup> cadá-yu. Dicó-ni sá núu vá quíhí<sup>n</sup>-ni-yu vecaá dátñá cuiní-n ndòho yúhú —cächí-dè xáhá<sup>n</sup>-dè xii té Àgripá.

<sup>30</sup> Te sáta dúcá<sup>n</sup> ní cáhá<sup>n</sup>-dè, te ní ngúnutñi té Àgripá té yindaha nació<sup>n</sup> Isráel, ndihi té Fèstú té cùu gobiernú, ndihi tá Berènicé ndihi dava-gá ñáyiú xinucóo yatni. <sup>31</sup> Te ní tnahá-yu ndéca tnahá-yu cuáhá<sup>n</sup> íñ xio. Te ní xitñahá-yu:

—Tée-á<sup>n</sup> ñá túu ná cuèchi ni quide-dé núu chihí ñaha-güedé vecaá àdi cahni ñaha-güedé —cächí-yu xitñahá-yu.

<sup>32</sup> Te té Àgripá ní xáhá<sup>n</sup>-dè xii té Fèstú:

—Cuèchi mee-dè chi ní cächí-dé sá quitnahá-dé té Cèsár, xiá<sup>n</sup> núu ndihu tucu-dé vecaá, te núu ñá túu dúcá<sup>n</sup> ní cáhá<sup>n</sup>-dè, te cacú-dé ní cùu —cächí-dé xáhá<sup>n</sup>-dè xii té Fèstú.

## 27

*Té Páblú cuáhá<sup>n</sup>-dé ñuú Rómá*

<sup>1-2</sup> Te ní ndatnúhu-güedé sá quíhí<sup>n</sup> té Páblú ndihi bàrcú nació<sup>n</sup> Italiá, te tnahá yúhú quíhí<sup>n</sup>-í ndihi-dé. Te tnahá íñ té nani Aristarcú cuiní-dé quíhí<sup>n</sup> ndihi-ndí-dé, te cùu-dé téé ñuú Tesalónica, te ñuú-á<sup>n</sup>

yíndèhu-xi distritú Macedóniá. Te ní sáha cuèndá-güedé té Páblú ndihi ìḡ úú-gá cue téé xixíhi vecaá ní quehe<sup>n</sup> cuèndá ñáhá tē Jülüú téé cùu capitá<sup>n</sup>, téé yíndaha nchaa sandadú nání Augustú, te ní queé-ndí nchaa-ndí bàrcú ñuú Adràmitiú. Te ní xica bàrcú-á<sup>n</sup> cuáhá<sup>n</sup>-ndí ndihi-xi te cuita yáha-ndí ìḡ úú ñuú yíndèhu distritú Asiá quíhí<sup>n</sup>. <sup>3</sup> Te nduu tnéé ní quexio-ndí ñuú Sidón. Te ío váha ní quide té Jülüú, chí ní dáñá-dè ní quene té Páblú ní sáhá<sup>n</sup>-dé ní cáhá<sup>n</sup> ndihi-dé cue téé ío váha tñáhá tñúhu ndihi-dé núu cudana cundàhú iní ñáhá-güedé cuáñaha-güedé nchaa sá xíní ñúhu-dé. <sup>4</sup> Te dátnúni ní ndéé tucu-dé bàrcú cuáhá<sup>n</sup>-ndí. Te ío níhi táchí te ñá ní dáña-xi caca ndáá bàrcú, te ní sáhá<sup>n</sup> bàrcú ndéé yatni yuhu distritú Chìpré, te distritú-á<sup>n</sup> cáá cuádava xití lámár, te xíá<sup>n</sup> ñá túú cuéhé táchí ní yáha-ndí. <sup>5</sup> Te ta yáha-ndí cuáhá<sup>n</sup>, te ní yáha-ndí ìḡ xio yuhu distritú Ciliciá ndihi yuhu distritú Pánfilíá, te ní sáá-ndí ndéé ñuú Mírá ìḡ ñuú yíndèhu distritú Liciá.

<sup>6</sup> Te ní quene téé cùu capitá<sup>n</sup> cuándúcú-dé ingá bàrcú, te ní níhi-dé ìḡ bàrcú téé ñuú Alejándriá, ñúhú ichi-xi quíhí<sup>n</sup>-xi nació<sup>n</sup> Italiá. Te ní ndicuaca ñaha-dé xii-ndí cuáhá<sup>n</sup>-ndí ní queé-ndí bàrcú-á<sup>n</sup>, te ní xica-xi cuáhá<sup>n</sup>-xi. <sup>7</sup> Te ío cuèé cuáhá<sup>n</sup> bàrcú-á<sup>n</sup>, cuéhé nduu ní xúhu<sup>n</sup>-xi ichi, te yica-ni ní quexio-ndí yuhu ñuú Nidú, te ñá ní dáña-gá táchí quíhí<sup>n</sup> ndáá bàrcú núu ní xicó ndúú-xi. Te ní yáha-ndí ìḡ xio yuhu distritú Crètá núú ñá túú quène vihi táchí, te diu-ni cuádava tucu lámár cáá distritú-á<sup>n</sup>. Te ní yáha-ndí yuhu ñuú Salmón, te diu-ni Crètá yíndàha-xi ñuú-á<sup>n</sup>. <sup>8</sup> Te ní yáha-ndí cuáhá<sup>n</sup>-ndí mee-ná núú ràyá distritú Crètá, te ío ní ndoho-ndí ní sáá-ndí ìḡ xichi núú nání Puèrtú Váha, yatni víi-ni-gá ñuú Làseá.

<sup>9</sup> Te ní cuyaa vihi-ndí ichi, duca<sup>n</sup>-ni cùu-ndí ní tñahá yóó cúú<sup>n</sup> dàú táchí, te ío úhú yáha bàrcú núu na quíhí<sup>n</sup>-ni-xi. <sup>10</sup> Te ní xáha<sup>n</sup> té Páblú xii-güedé:

—Nchaa-ndo cündedóho-ndo tñúhu na cáhá<sup>n</sup>-í-a. Ío úhú núu na càda yica-o quíhí<sup>n</sup>-ó ndihi bàrcú chí cuita càrgá te cuita bàrcú, te cuu-ni iní-xi tñahá-ni mee-o cùú-ó chí cáhá-ó núu na ngàunihnu-o xití ndute — càchí-dé xáha<sup>n</sup>-dè xii-güedé.

<sup>11</sup> Te téé cùu capitá<sup>n</sup> ñá ní sàndáá iní-dé tñúhu ní cáhá<sup>n</sup> té Páblú. Dico tñúhu ní cáhá<sup>n</sup> téé dàcaca bàrcú ndihi xitohó-xi chí ní sàndáá iní-dé. <sup>12</sup> Te ñá ní tñahá iní-güedé Puèrtú Váha cuèndá sá ní tñahá yóó cúú<sup>n</sup> dàú táchí, te ñá túú dàhu váha táchí xíá<sup>n</sup>, núu vai-güedé ní cuiní-güedé yáha-güedé quíhí<sup>n</sup>-güedé sáá-güedé ndéé ñuú Fènicé ní

cùu. Te yàcá<sup>n</sup> cundecu-güedé yóó cúú<sup>n</sup> dàú táchí cuèí ñá túú càváha vihi, chí nchí ñàcuáa yáha bàrcú, te yàcá<sup>n</sup> quíhu táchí, dico dàhu-gá. Núu xíá<sup>n</sup> ndéé ndíacá<sup>n</sup> nátàcá bàrcú yóó cúú<sup>n</sup> dàú táchí, te diu-ni Crètá yíndàha-xi ñuú-á<sup>n</sup>.

*Nitùhú lámár cúú<sup>n</sup> dàú táchí*

<sup>13</sup> Te duha ní quene nuu luha táchí, xíá<sup>n</sup> ní sani iní-güedé sá ndácú-güedé quíhí<sup>n</sup>-güedé, núu ní natava-güedé caá ndètní<sup>n</sup> ndéé bàrcú, te ní xica-xi cuáhá<sup>n</sup>-xi ní yáha-ndí yatni víi yuhu distritú Crètá. <sup>14</sup> Te tnaa-ni ní cuu sá ní xica bàrcú, te duha ní cuu nuu dàú táchí ìḡ xio yuhu ñuú-á<sup>n</sup> <sup>15</sup> te nchita ichi cuáhá<sup>n</sup> bàrcú. Te ñá ní ndàcu-gá-xi quíhí<sup>n</sup> ndáá-xi ñàcuáa cuáhá<sup>n</sup>-xi ní cùu, núu ní dáñá-ndí cuáhá<sup>n</sup> mée-ná bàrcú. <sup>16</sup> Te ní yáha-ndí ìḡ ñuú nání Clàudá, te ñuú-á<sup>n</sup> cáá cuádava xití lámár. Te ñá xio yuhu ñuú núú ñá túú quène vihi táchí ní yáha-ndí, te bàrcú líhli sá nchícú<sup>n</sup> sáta bàrcú cáhnú, chí ní ndacu-ndí ní taxúha-ndí xití bàrcú cáhnú. <sup>17</sup> Te sáta ní ndacu-ndí ní taxúha-ndí bàrcú líhli, te ní ducu<sup>n</sup> nuu-güedé yoho bàrcú cáhnú. Te ío ní yùhú-güedé sá yáha bàrcú ndéé núú ñúhú cùchí yuhu ñuú Sírté, núu xíá<sup>n</sup> ní ndihi dóo nchítá díquí bàrcú ní nuu nehe-güedé, chí dóo-á<sup>n</sup> ío níhi chìndaha táchí, núu xíá<sup>n</sup> cuáhá<sup>n</sup> bàrcú ìḡ xio. Te ní dáñá-güedé ñá túú-gá ní dàcaca-güedé, núu cuáhá<sup>n</sup> mée-ná-xi ta chìndaha táchí cuáhá<sup>n</sup>. <sup>18</sup> Te ío níhi dàú táchí, te ñá ní cuiní tñahí-xi yáha. Te nduu úú sá dúcá<sup>n</sup> ñá túú-gá ní dàcaca-güedé bàrcú te ní ngúita-güedé ní dāngöyo-güedé sá nchídó-xi cuèndá cuiní-güedé nduu ñamá-xi. <sup>19</sup> Te nduu úní ní dāngöyo-güedé nchaa ndachiu<sup>n</sup> cánehe chiu<sup>n</sup>-güedé xití bàrcú. <sup>20</sup> Te cuéhé nduu ñá túú ní xíní-ndí ní chòdíni ní nchicanhii, chí ío níhi ní cuu<sup>n</sup> dàú táchí, núu ní cáhá<sup>n</sup>-ndí sá vā càcu-ndí, chí ndihi-ndí cáhá ní cáhá<sup>n</sup>-ndí.

<sup>21</sup> Te ní cuu titní nduu ñá túú-gá xéxi-ndí, núu xíá<sup>n</sup> ní ngúnutnii té Páblú núu-güedé, te xáha<sup>n</sup>-dè:

—Quindáá iní-ndó tñúhu ní cáhá<sup>n</sup>-í, te cundecu nahi-o Crètá ní cùu. Te núu ní tñè-ndo tñúhu-í, te vā dācuíta-o càrgá ndihi dava-gá ndachiu<sup>n</sup> ní cuu. <sup>22</sup> Te vā yùhú-ndó chí vā cùú ní ìḡ-ndo dico bàrcú chí cuita. <sup>23</sup> Te ñaha-ndo sá yùhú cáhá<sup>n</sup> ndihi-í Yá Ndióxi te quide-í ñàcuáa cáhá<sup>n</sup>-gá. Te diu-ni mee-gá ní techiu<sup>n</sup>-gá ìḡ espíritú xínú cuèchi núú-gá ní quixi, <sup>24</sup> te ní cachí-xi xii-í: “Vā yùhú-n chí vā cùú-n, dico dacuítii quíhí<sup>n</sup>-n cáhá<sup>n</sup> ndihi-n té Césár. Te ní ìḡ téé ndihi-n vā cùú, chí ío cùdíí iní ñáhá Yá Ndióxi xii-n”, duha ní cáhá<sup>n</sup> espíritú xínú cuèchi núú-gá ní cachí tñúhu-xi xii-í. <sup>25</sup> Núu xíá<sup>n</sup> càchí tñúhu-í sá vā yùhú-ndó, chí sa cùtnuní iní-í

sá cáda Yá Ndióxi nácuáa ní cáhá<sup>n</sup> espíritu xínú cuèchi núú-gá. <sup>26</sup> Te mee táchí chindaha-xi bàrcú daquihí<sup>n</sup>-xi ndéé yuhu ndute —cachí té Páblú xáha<sup>n</sup>-dè xii-güedé.

<sup>27</sup> Te sa ní cuu sáhú<sup>n</sup> nduu sáhú<sup>n</sup> niú sá ní nguíta-xi cùu<sup>n</sup> dáú táchí, te ñá túú-gá dácaca-güedé bàrcú, chi mee-ná táchí tá chindaha-xi barcú cuáhá<sup>n</sup> núú ndute lámár Adriá. Te sáta ní cuu dava niú, te ní quide cuendá cue tée dácaca barcú sá tá cuyatni-güedé ñuhu yichí. <sup>28</sup> Te ní chicuáhá-güedé ná daha-gá mètrú néhé-xí sá cùnú xití ndute cuendá cutnùní iní-güedé sá tá cuyatni-xi ndéé yuhu lámár, te nèhe-xi ócò sáhú<sup>n</sup> ñ<sup>n</sup>-ni-gá mètrú. Te ní xica tucu bàrcú luha-gá, te dàtnùní ní chicuáhá tucu-güedé, te xiá<sup>n</sup> néhé-xí ócò úsá-ni-gá mètrú. <sup>29</sup> Te ní yuhú-güedé sá candaandeé-xi cava, te ní quehe<sup>n</sup>-güedé cümü caá náhnú sá nchicú<sup>n</sup> yoho, te ní dáquée-güedé xití ndute ndàa sáta bàrcú, te dàtnùní ní nguíñí-xi ñá ní xica-gá-xi, te ní cuini-güedé sá òré-ni túndaá ní cùu. <sup>30</sup> Te cue tée dácaca barcú ní natava-güedé bàrcú líhli dándée-güedé núú ndute ní cùu, te ní cachí-güedé sá quihí<sup>n</sup>-güedé ndàa núú bàrcú dàquée-güedé úú-gá caá cuendá cuita candeé-xi bàrcú cáhnú cuendá sá vā cáca-xí. Te cuini-güedé dandáhú-güedé dava-gá nchúhú cue tée ñuhu ndihi-güedé bàrcú, chi ní ndatnúhu-güedé sá cùnú-güedé ní cùu. <sup>31</sup> Te té Páblú ní xáha<sup>n</sup>-dè xii tée cùu capitá<sup>n</sup> ndihi dava-gá sandádú:

—Te núu na dándóo ñaha cuè tée dácaca barcú cunu-güedé, te vā cácu-o —cachí-dé xáha<sup>n</sup>-dè.

<sup>32</sup> Te sá dúcá<sup>n</sup> ní xáha<sup>n</sup>-dè núu ní sáhá<sup>n</sup> sandádú ní xehndé-güedé yoho nchicú<sup>n</sup> bàrcú líhli dángáunihnu-güedé xití ndute cuáhá<sup>n</sup>-xi.

<sup>33</sup> Te váha váha-ni ta túndaá cuáhá<sup>n</sup>, te ní xáha<sup>n</sup> té Páblú:

—Sa ní cuu sáhú<sup>n</sup> nduu ñá túú tnàhí xèxi-ndo sá ndihú iní-ndó. <sup>34</sup> Te vitna yáchí-ndó, chi caxi-ndo cuendá nanihí ndéé-ndó, te vā yuhú-ndó chi ñá túú ná tnahá ní ñ<sup>n</sup>-ndo —cachí-dé xáha<sup>n</sup>-dè xii-güedé.

<sup>35</sup> Te sáta dúcá<sup>n</sup> ní cáhá<sup>n</sup>-dè, te ní quehe<sup>n</sup>-dè ñ<sup>n</sup> pàa, te ní ndacá<sup>n</sup> táhú-dè núú Yá Ndióxi, te núú-güedé nchaa-güedé duca<sup>n</sup> ní quide-dé, te dàtnùní ní táhú-dè luha ní xexi-dé. <sup>36</sup> Te duca<sup>n</sup> te dàtnùní ní cuyíi-güedé ní xexi-güedé nchaa-güedé. <sup>37</sup> Te úú cièndú únidico sáhú<sup>n</sup> ñ<sup>n</sup>-ndí ñuhú bàrcú núú tnahá té Páblú, te nchaa-ndí ní xexi ndihi-ndí-dé. <sup>38</sup> Te ní xexi-ndí ní ndahá xití-ndí. Te dàtnùní ní nguíta-güedé ní tava-güedé nchaa ngohnchi triú ní dāngoyo-güedé xití ndute cuendá nduu ñamá-gá bàrcú.

### Ní dáhu bàrcú xití lámár

<sup>39</sup> Te sáta ní túndaá, te ñá ní cùtnuní-gá iní-güedé ndéé cùú-xi núú ní sáa-güedé, te ní xini-güedé ñ<sup>n</sup> xichi núú ní xícó ndúú luha yuhu lámár, te vā víhi cúchí dándáá-xí yuhu ndute, te xiá<sup>n</sup> ñá túú dácandá víhí táchí ndute. Te ní ndatnúhu-güedé sá ndacú-güedé dácaca-güedé bàrcú quihí<sup>n</sup>-xi ndéé núú ñuhú cúchí. <sup>40</sup> Te xiá<sup>n</sup> núu ní sáhá<sup>n</sup>-güedé ní xehndé-güedé nchaa yoho nchicú<sup>n</sup> caá tácandéè bàrcú ní ndóo xití lámár, te ní nadatáyá-güedé vítú sá dácuico-xi barcú, te ní nacata caa-güedé ñ<sup>n</sup> dóo diquí bàrcú, te ta chindaha táchí cuáhá<sup>n</sup> yuhu lámár tá cuyatni-xi ñuhu yichí cuáhá<sup>n</sup>. <sup>41</sup> Te ndécu ñ<sup>n</sup> xichi ní nataká víhí cúchí xití ndute, te xiá<sup>n</sup> ní nguindúxi nihnu bàrcú-güedé, te ní cutiñi-xi xití cúchí, te ñá ní níhi-gá-güedé nácuáa cada-güedé nene-xi. Te ío níhi ní dácandá táchí ndute, te ní chúcú ndéé-xi ndàa sáta bàrcú, te ní ndihi ní táhú-xí. <sup>42</sup> Te cue sandádú ní xitnáha-güedé sá cáhní-güedé nchaa cue tée ní xíhi vecaá cuendá sá vā quihí<sup>n</sup>-güedé núú ndute te cunu-güedé. <sup>43</sup> Te tée cùu capitá<sup>n</sup> ñá ní dàña-dé cahni-güedé cue tée ní xíhi vecaá, chi ñá ní cùndee iní-dé cahni-güedé tnàhā té Páblú. Te ní xáha<sup>n</sup>-dè xii-güedé sá cuè tée xícuu cada quihí<sup>n</sup> núú ndute te na yáha-güedé ndute quene-güedé yuhu lámár. <sup>44</sup> Te dava cue tée ñá cùú càda, ní xáha<sup>n</sup>-dè nanducu-güedé vítú ní àdi vítú ní táhú sá ní xíhi bàrcú, te núú xiá<sup>n</sup> caundodo-güedé yáha-güedé ndute quene-güedé ndéé yuhu lámár. Núu duha ní cuu ní cácu-ndí nchaa-ndí.

## 28

*Té Páblú ndécu-dé ñuú Máltá caá cuádava lámár*

<sup>1</sup> Te sáta ní cácu-ndí ní nene-ndí ñuhu yichí, te ní níhi-ndí tnúhu nácuáa nàni ñuú núú ní sáa-ndí, te ñuú-á<sup>n</sup> nání-xí Máltá, te caa-xi cuádava lámár. <sup>2</sup> Te ío quide víxi<sup>n</sup>-xi cuendá ío cùu<sup>n</sup> dáú. Te ñáyíu ñuú-á<sup>n</sup> ní cundáhú iní ñáhá-yu xii-ndí, ní dátñahá-yu ñuhú te ní cana ñáhá-yu ní sáhá<sup>n</sup>-ndí ní nacuídí-ndí. <sup>3</sup> Te té Páblú dátacá-dé nducú, te tnàhā-ní ñ<sup>n</sup> cóo dèé<sup>n</sup> ní tñiñ nihnu-dé-di, te òré cuáhá<sup>n</sup> ndaha-dé chucu-dé núú ñuhú, te ní ñáni-di cahni, te ní ndee-di xití nducú ní sánduu-di ndaha-dé, te ní xexiha<sup>n</sup>-di xii-dé. <sup>4</sup> Te nchaa ñáyíu ndèhé-yu sá tácandéè-di ndaha-dé, te ní nguíta-yu ní xitnáhā-yu:

—Váa ndíyi ní sahni tée-a, te ñá ní xíhí-dé lámár, te dacuití sá cùú-dé vitna, chi sa náha Yá Ndióxi ná ní quide-dé ñuyú-a —cachí-yu xitnáhā-yu.

<sup>5</sup> Te té Páblu ní quidi-dé ndaha-dé ní ngau-nihnu-di núú ñùhú, te ñá túú tñahí ná ní cùu núú ní xexi-di. <sup>6</sup> Te ñáyiu ñúú-án xíndéhè-yu núu daquihí-xi chùhú ñi ndua-dé cuú-dé. Te naha ní xíndéhé ñáhá-yu núu nása cada ñaha-xi xii-dé, te ñá túú tñahí ná ní quide ñaha-xi, te ní xitnàhá-yu:

—Váa ndiöxí cúú tée-a núu dàcá ñá túú tñahí ná ní quide-xi ndaha-dé núú ní xexi cóo —càchí-yu xitnàhá-yu.

<sup>7</sup> Te yatni núu dúcá ní xexiha cóo-án cáá ñùhu xitu tée ñani Publiú, te tée-án táxi tñuní-dé ñihí ñúú cáá cuàdava xití lámár núú ndécú-ndí nduu-án. Te ío váha iní-dé chi ní cana ñaha-dé ní sáhá-ndí ní xíndecu-ndí úní nduu vehe-dé. <sup>8</sup> Te tátá tē Pùbliú-án cáá-dé cùhú-dé ñùhú-dé cahni, te tñahá-dé daxi. Te té Páblu ní sáhá-dé núú cáá-dé, te ní cáhá ndihí-dé Yá Ndiöxí, te ní sacá ñdodo-dé ndaha-dé díquí tée cùhú-án, te duca-ní ní quide-dé, te ní ndúha tée cùhú-án. <sup>9</sup> Te sátá dúcá ní quide té Páblu, te ní quixi nchaa ñáyiu cùhú núu ndécú-ndí, te ní quide tátna ñaha té Páblu xii-yu te ní ndúha-yu. <sup>10</sup> Te òré ndécú-ndí xíá, te vai sá ní taxi táhú-güedé, te òré ní xica-ndí ní taxi tucu-güedé nchaa sá xíní ñùhu-ndí ichi.

### *Té Páblu ní quexio-dé ñúú Rómá*

<sup>11</sup> Te yacá ní xíndecu-ndí úní yóó, te sa ndécú ñi barcú tée ñúú Alejandriá òré ní quexio-ndí, te ní xíndecu-xi ñihí yóó cúú ñáú táchí. Te ní-xi càndodo sandú sá dánani-güedé Cástór ndihí sandú sá dánani-güedé Pólux, te xití bārcú-án ní quée-ndí cuáhá-ndí. <sup>12</sup> Te ní quexio-ndí ñúú Siracusá, te yacá ní xíndecu-ndí úní nduu. <sup>13</sup> Te ní xica tucu bārcú cuáhá-xi, te ní quexio-ndí ñúú Règiú. Te nduu tñéé duha ní quene nuu táchí. Te ní xica bārcú cuáhá-xi, te ndéé nduu úú ní quexio-ndí ñúú Pùteolí. <sup>14</sup> Te yacá ní nanihí tñahá-ndí ndihí ñáyiu sándáá iní tñuhu Jesús, te ní cachí-yu sá cùndecu-ndí úná nduu, núu xíá ní xíndecu-ndí úná nduu ndihí-yu. Te ní xica tucu bārcú cuáhá-xi, te ní quexio-ndí ñúú Rómá. <sup>15</sup> Te ñáyiu rómá ñáyiu sándáá iní tñuhu Jesús, ní ñihí-yu tñuhu sá cuáhá-ndí, te ní quixi-yu ní quixi tñahá ñáhá-yu ichi. Te davá-yu ní nanihí-ndí ñúú Fòrú Apiú, te davá-yu ní nanihí-ndí ñúú Úní Tàbernás. Te òré ní xíní té Páblu nchaa ñáyiu véxi tñahá ñáhá xii-ndí, te ndee ndèe ní cuu iní-dé, te ní ndacá táhú-dé núú Yá Ndiöxí sá dúcá ní quide-yu. <sup>16</sup> Te sátá ní quexio-ndí ñúú Rómá, te cue tée cùchiu ní xáha-güedé xii té Páblu sá cùndecu ñi-dé, te ní xíndéé ñáhá cuàa sandadú xii-dé.

### *Té Páblu càhá-dé tñuhu Yá Ndiöxí ñúú Rómá*

<sup>17</sup> Nduu úní sá ní quexio té Páblu, te ní cana-dé cue tée cùnuu núú ñáyiu israhél ndécú ñúú Rómá, te ní sáhá-güedé núú ndécú-dé, te ní xáha-dé:

—Nchóhó cue tée israhél, càchí tñuhu-í sá ñá túú ná ní quide-í ní ñi ñáyiu cùtñahá ní xíndecu-í ñúú Jerusalén. Te ñá túú ní cáhá cuèhé-í sá quidè-yu nchaa nàcuáa ní xóo cada cue ñani tñahá-ó ní xíndecu ndéé sanaha, te ñá túú ná ní quide-í te ní tñi ñaha-güedé ní sáha cuèndá ñáhá-güedé xii-í núú cue tée rómá, cue tée ndécú yacá. <sup>18</sup> Te cue tée-án ní ndúcú tñuhu-güedé núu ndáá ndécúechi-í, te ní cutnùní iní-güedé sá ñá túú ná ní quide-í, te xíá cuini-güedé queñuhu ñaha-güedé xii-í veccá ní cùu. <sup>19</sup> Te ñi-ni cue tée israhél ñá ní dàña-güedé cácu-í, chi cuini-güedé sá cáhni ñaha cue tée rómá, cue tée xíndecu yacá xii-í ní cùu, te xíá núu ní xáha-í sá quixi-í cáhá ndihí-í té Cèsár cuèndá iha cada ndáá mée-dé cuèndá-í, te vá yóo ñi tee-í cuèchi. <sup>20</sup> Núu xíá ní cana ñaha-í xii-ndo cuèndá cunaha-ndo nàcuáa ní cuu. Te ní xáha-í sá sándáá iní-í sá ndótó ñáyiu ní xihí, te ñi-ni duca càhá dava-gá ñáyiu israhél, te sá dúcá ní cáhá-í, te ní chíhí ñaha-güedé veccá, te xíndéé ñáhá-güedé ndéé vitna —càchí té Páblu xáha-dé xii-güedé.

<sup>21</sup> Te ní xáha-güedé xii-dé:

—Ñá túú tñahí tutú ní tëndaha cue tée distritú Jüdeá quixi cuèndá-n. Te ní cue tée israhél ñá túú ní quixi-güedé cáhá cuèhé-güedé cuèndá-n. <sup>22</sup> Te cuini-ndí cundedóho-ndí nása cunduu tñuhu cáhá-n, chi sa ní ñihí-ndí tñuhu sá ncháá xichi ío xicáhá cuèhé-yu cuèndá nchaa ñáyiu sándáá iní tñuhu Jèsús —càchí-güedé xáha-güedé xii té Páblu.

<sup>23</sup> Te ní xáha-güedé nduu cùyachí-güedé te quixi-güedé cundedóho-güedé dava-gá cuèndú cáhá té Páblu. Te ní tñahá nduu ní ndatnúhu-güedé quihí-güedé núú quidé vehe-dé, te vai-yu ní sáhá-yu ní xíndedóho-yu tñuhu ní cáhá-dé, te ncháa nchaa ní cáhá ndihí-dé-yu. Te ní xáha-dé xii-yu sá ndii Moisés ndihí dava-gá cue tée ní xóo cáhá tñuhu Yá Ndiöxí ndéé sanaha ní chído tñuní-güedé núú tutú-güedé sá díú-gá tendaha-gá Cristú quixi-gá ñuyú-a. Te ní chído tñuní-güedé nchaa nàcuáa cada-gá, te ñi-ni nàcuáa cáhá tutú-güedé cada Cristú, te duca ní quide-gá cùtñahá ní xica cuu-gá ñuyú-a, núu xíá ní cutnùní sá díú Jèsús cúu-gá Cristú Yá ní tendaha Yá Ndiöxí ní quixi ñuyú-a. Te núu quindáá iní-yu, te ndíhu ndaha ñaha Yá Ndiöxí xii-yu. <sup>24</sup> Te davá-yu ní sándáá iní-yu tñuhu ní cáhá-dé, te davá-yu ñá túú ní sándáá iní-yu. <sup>25</sup> Te

cuendá sá ñǎ ĩ<sup>n</sup>-ní tnũhu ni cǎhá<sup>n</sup>-yu, núu xǎǎ<sup>n</sup> cuini-yu núhú-yu ni cùu. Te ní xǎhá<sup>n</sup> tẽ Pǎblú sá cùndetu tnaá-yu cáhá<sup>n</sup>-dé ingá tnũhu, te xǎhá<sup>n</sup>-dẽ:

—Ní xǎhá<sup>n</sup> Espíritú Yǎ Ndiõxí xii ndíi Chàíá nàcuáa cáhá<sup>n</sup> ndíi núú nchàa ñani tnáhá-ó nĩ xindecu ndéé sanaha. Te ní cáhá<sup>n</sup> Espíritú-gá ĩ<sup>n</sup> sá ndáá ní xǎhá<sup>n</sup>-xi xii ndíi, te duha ní xǎhá<sup>n</sup>-xi:

<sup>26</sup> Quihí<sup>n</sup>-n te cúñaha-n xii ñáiyu: Nchòhó mee-ni cùndedóho-ndo tnũhu cǎhá<sup>n</sup> Yǎ Ndiõxí, dico ni vǎ tẽcú tnùni-ndó.

Te cada-gá titní núú sǎ vǎ yõo tnàhí ndàcu cada, dico ni vǎ cùtnùni iní-ndó nàcuáa ndùu sá cǎdá-gǎ,

<sup>27</sup> chi cuendá sá io sǎá iní-ndó, xǎǎ<sup>n</sup> duca<sup>n</sup> ñà túú sǎha-ndo cuendá nása cuáhá<sup>n</sup> tnúhu cǎhá<sup>n</sup>-gá, chi ñǎ cuini-ndó cùndedóho-ndo, te ni ñǎ sǎndáá iní-ndó.

Te ni ñǎ cuini-ndó dáña-ndo nchaa sá cuèhé sǎ dúhá quide-ndo cuendá xocàni-gá nchaa xǎǎ<sup>n</sup> iní-ndó, duha cúñaha-n xii-yu.

Càchí Espíritú-gá xǎhá<sup>n</sup>-xi xii ndíi. <sup>28</sup> Te na càchí tnúhu-í sǎ quihí<sup>n</sup> cue téé cǎhá<sup>n</sup> tnúhu Yǎ Ndiõxí cáhá<sup>n</sup>-güedé tnúhu-gá núú ñáiyu ñǎ túú cùu ñáiyu isràél, chi ñáiyu isràél ñǎ túú cuini-yu cùndedóho-yu. Dico ñáiyu ñǎ túú cùu ñáiyu isràél chi cùdíi iní-yu cùndedóho-yu, núu xǎǎ<sup>n</sup> naníhí tǎhú-yu —càchí té Pǎblú xǎhá<sup>n</sup>-dẽ xii-yu.

<sup>29</sup> Te sǎtá ní ndíhi cuèndú ní xǎhá<sup>n</sup>-dẽ, te ní ndeé-yu cuánuhú-yu ta ndàtnúhu-yu cuáhá<sup>n</sup>.

<sup>30</sup> Te úú cuíá ní xínu ní xindecu té Pǎblú ĩ<sup>n</sup> vehe ní cháhu-dé. Te ní xóo cáhá<sup>n</sup> váha-dé ndíhi nchaa ñáiyu ní xóo quihí<sup>n</sup> vehe-dé.

<sup>31</sup> Te ní xǎhá<sup>n</sup>-dẽ sǎ ndíhu ndaha ñàha Yǎ Ndiõxí xii-yu núu quindáá iní-yu tnúhu-gá, te vǎ yõo ĩ<sup>n</sup> ni sǎdí yuhu-dé. Te mee-ni tnũhu Xítóhó Jesucristú ní cáhá<sup>n</sup>-dé núú-yu.



# TUTÚ NÍ CADÚHA TĒ PĀBLÚ QUIHI<sup>n</sup> NDAHA ÑÁYIU ÑUÚ RÒMÁ

*TĒ Pāblú cadúha-dé tutú quihi<sup>n</sup> ndaha ñáyiu xĩndecu ichi Xítohó Jesucristú ndécú ñúú Rómá*

<sup>1</sup> Yúhú té Pāblú xínú cuéchi-í núú Xítohó Jesucristú, chi mee Yá Ndióxi ní cachí-gá sá cùú-í ì<sup>n</sup> tée cāhá<sup>n</sup> tnúhu-gá núú ñáyiu, te tnúhu-gá cùú-xí tnúhu sá cāhá<sup>n</sup> nācuáa naníhí tǎhú-ó, núu diu-gá ní tendaha ñaha-gá xii-í xícá cùú-í cāhá<sup>n</sup>-í tnúhu-gá.

<sup>2</sup> Te ndéé sanaha ní cachí Yá Ndióxi sá dācutíí sáá nduu ngũndecu ndíhi ñáyiu tnúhu-gá. Te duca<sup>n</sup> ní xáha<sup>n</sup>-gá xii cue tée ní cāhá<sup>n</sup> tnúhu-gá dāvá-á<sup>n</sup> ní chídó tnùn-í-güedé núú tutú-gá. <sup>3</sup> Te tnúhu-gá sá cāhá<sup>n</sup>-í-a cāhá<sup>n</sup>-xi diu-ni cuendá Xítohó Jesucristú Yáá cùú Déhe-gá. Te Déhe-gá-á<sup>n</sup> cùú-gá ì<sup>n</sup> ñáyiu, te cùu-gá ñani tnáhá ndí Dávíí. <sup>4</sup> Te cùu-gá Yáá ñá túú tnáhí cuéchi-xi. Te ní xihí-gá te ní ndoto-gá, te xiá<sup>n</sup> cútñuní iní-ó sá cùú-gá Déhe Yá Ndióxi, te ío cǎhnu cuu-gá. <sup>5</sup> Te diu-ni Xítohó Jesucristú ní quide-gá ní nduu tǎhú-í núú Yá Ndióxi sá cāhá<sup>n</sup>-í tnúhu-gá núú cué ñáyiu ñuyúú-a cuendá quindáá iní-yu tnúhu-gá te canchicú<sup>n</sup> nihnú-yu cadá-yu nchaa nācuáa cāhá<sup>n</sup>-xi, te duca<sup>n</sup> ío cuu cǎhnu-gá. <sup>6</sup> Te tnáhá nchóhó cùú-ndó ñáyiu sa nchicú<sup>n</sup> nihnu quide-ndo nchaa nācuáa cāhá<sup>n</sup> tnúhu-á<sup>n</sup>, chí ní cachí Yá Ndióxi sá nchóhó tnáhá tnúhu-ndo ndíhi Xítohó Jesucristú. <sup>7</sup> Te nchóhó ñáyiu xĩndecu ñúú Rómá, ñáyiu ío cùu iní ñáhá Yá Ndióxi, cadúha-í tutú-a daquixi-í ndaha-ndo. Te diu-ni nchóhó cùú-ndó cué ñáyiu ní cachí Yá Ndióxi cada ndáá cundecu-ndo núú-gá. Te xicá<sup>n</sup> tǎhú-í núú Tátá-ó Dütú Ndióxi ndíhi núú Xítohó Jesucristú sá ío na chĩndee chitúu ñaha-gá xii-ndo, te duca<sup>n</sup> ndí nduu-gá ná cǎda te ío váha cuu iní-ndó cundecu-ndo.

*TĒ Pāblú cuini-dé quihi<sup>n</sup> ngoto-dé cue ñáyiu xĩndecu ichi Xítohó Jesucristú ndécú ñúú Rómá*

<sup>8</sup> Te díhna nuu-gá cǎchí tnúhu-í xii-ndo sá ío ndácá<sup>n</sup> tǎhú-í núú Yá Ndióxi cuendá sá ío sǎndáá iní-ndó-gá, te nchaa ñáyiu níhi-yu tnúhu sá dúcá<sup>n</sup> quide-ndo. Te Xítohó Jesucristú dáyáha-gá nchaa tnúhu cāhá<sup>n</sup>-í núú Yá Ndióxi. <sup>9</sup> Te ndí tnáhá òré cāhá<sup>n</sup> ndíhi-í Yá Ndióxi duca<sup>n</sup>-ni xicá<sup>n</sup> tǎhú-í núú-gá cuendá-ndó, te mee-gá náhá-gá sá cāhá<sup>n</sup> ndáá-í, te diu-ni núú-gá xínú cuéchi-í ní yúhu ní iní-í, chí cāhá<sup>n</sup>-í nācuáa ní quide Déhe-gá Xítohó Jesucristú cuendá naníhí tǎhú-ó. <sup>10</sup> Te xicá<sup>n</sup> tǎhú-í núú Yá Ndióxi sá núu mee-gá ná cǎchí te sáá ì<sup>n</sup> nduu quixi

coto ñaha-í xii-ndo. <sup>11</sup> Chí ío cuini-í cundecu ndíhi ñaha-í xii-ndo dānehé ñáhà-í ì<sup>n</sup> úú tnúhu nācuáa ío-gá chĩndee ñaha Espiritú Yá Ndióxi xii-ndo, te duca<sup>n</sup> ío-gá cuita nducu ndèe-ndo cada-ndo nchaa nācuáa cuini-gá. <sup>12</sup> Te ío chí ná cuáha tnàha-o tnúhu ndee iní cundecu-o ichi-gá, chí nchóhó ndíhi yúhú ío sǎndáá iní-ó-gá.

<sup>13</sup> Te nchóhó ñáyiu ndecu ndíhi-í ichi Xítohó Jesucristú na cǎchí tnúhu-í xii-ndo sá dúcá<sup>n</sup>-ní ío sǎni iní-í quixi coto ñaha-í xii-ndo. Te cuini-í sá òré quixi coto ñaha-í xii-ndo, te vá cuita chiú<sup>n</sup> quixi-í dǎtná quidè-í òré sǎngoto-í nchaa ñáyiu dāvá-gá ñúú ñá túú xita chiú<sup>n</sup>-í chí ío váha sǎhúu<sup>n</sup>-yu tnúhu cāhá<sup>n</sup>-í, dico ñá ndácú-í quixi-í quixi coto ñaha-í xii-ndo. <sup>14</sup> Te yúhú yidiquí-í cāhá<sup>n</sup>-í tnúhu Xítohó Jesucristú núú nchaa ñáyiu cāhá<sup>n</sup> tnúhu grlégu, ndíhi núú nchaa ñáyiu cāhá<sup>n</sup> dāvá-gá núú tnúhu, ndíhi núú nchaa ñáyiu túha, ndíhi núú nchaa ñáyiu ñá túú túha. <sup>15</sup> Te cuendá sá dúhá yidiquí-í cāhá<sup>n</sup>-í tnúhu-gá, xiá<sup>n</sup> ío cuini-í danèhé ñáhà-í xii nchaa nchóhó ñáyiu ñúú Rómá nācuáa ndúu tnúhu sá cāhá<sup>n</sup> nācuáa naníhí tǎhú-ó.

## Ío cūnuu tnúhu Xítohó Jesucristú

<sup>16</sup> Te yúhú ñá túú tnáhí cūcaha<sup>n</sup> núú-í cāhá<sup>n</sup>-í tnúhu Xítohó Jesucristú, chí cùu-xi tnúhu ío cūnuu, chí Yá Ndióxi ní cachí-gá sá nchaa ñáyiu na quindáá iní-xi tnúhu-á<sup>n</sup> te naníhí tǎhú-yu. Te ní cachí-gá sá díhnanuu-gá ñáyiu isrǎél ngũndecu ndíhi-yu tnúhu-á<sup>n</sup> te dǎtnuní ngũndecu ndíhi ñáyiu ñá túú cùu ñáyiu isrǎél. <sup>17</sup> Te tnúhu-á<sup>n</sup> dānehé ñáhá-xí xii-o sá cùúu-o núú Yá Ndióxi te núu mee-ni sá quindáá iní-ó-gá dǎtná cāhá<sup>n</sup>-xi núú tutú-gá núú cǎchí-xi: “Nchaa ñáyiu sǎndáá iní ñáhá xii Yá Ndióxi cùúú-yu núú-gá, te ndecu ndíhi ñáhá-yu xii-gá”, duha cǎchí-xi núú tutú-gá.

## Nchaa ñáyiu ndecu ñuyúú ndécuechi-yu

<sup>18</sup> Te ndéé andiu tēndaha Yá Ndióxi sá úhú quixi sá cùú-xí nchaa ñáyiu ñá túú quide ndáá núú-gá, ñáyiu quide nchaa sá cuéhé sá dúhá. Te cuendá nchaa sá quidè-yu-á<sup>n</sup> xiá<sup>n</sup> ñá túú cuini-yu tñí-yu tnúhu ndáá tnúhu Yá Ndióxi cuendá cuu-xi ì<sup>n</sup> sá váha sá cùú-xi-yu. <sup>19</sup> Te cuéi duca<sup>n</sup> quidè-yu dico cútñuní ndáá iní-yu nācuáa ndúu sá sǎni iní Yá Ndióxi ndíhi nācuáa ndúu sá quidè-gá dǎtná cútñuní iní nchaa dāvá-gá-yu, chí diu-gá dānehé ñáhá-gá xii-yu. <sup>20</sup> Te ní vá ndácú-ó quini núú-ó nása cǎa-gá, te ní vá ndácú-ó quini-ó nása cǎa iní-gá, te ní vá ndácú-ó quini-ó nása quidè-gá táxi tñuní-gá nchaa ndúu nchaa quíú. Te cuéi duca<sup>n</sup> dico ndéé cútñáhá ní ngáva ñuyúú ní ngúita nchaa ñáyiu tēcú tnùn-í váha-yu nācuáa ndúu sá sǎni iní-gá ndíhi nācuáa ndúu sá quidè-gá te duca<sup>n</sup>

técú tñuní-yu cuendá nchaa sá ní cadúha-gá ndéhé-yu ío ñuyíú-a, núu xiá<sup>n</sup> vá cächí-yu sá ñá túú cuéchi-yu. <sup>21</sup> Te cuéi duca<sup>n</sup> ní cutnñuní iní-yu cuendá Yá Ndióxi dico ñá túú cuiní-yu canehé-yu sá yíñuhu núú-gá nacuáa táu-xi cunduu. Te ní ñá túú cuiní-yu ndacá<sup>n</sup> táhü-yu núú-gá cuendá nchaa sá vaha quide ñaha-gá xií-yu, chi mee-ni nchaa sá ñá túú védana nándíhi ñuhu iní-yu. Te quidé-yu datná quidé í<sup>n</sup> ñáiyu ñá túú ndècu ndíhi nchaa sá xini tñuní-xi. Te uu<sup>n</sup>-gá uu<sup>n</sup>-gá tá quidé-yu cuáhá<sup>n</sup>. <sup>22</sup> Te cächí-yu sá cúu-yu ñáiyu ío váha sáa sá xini tñuní-xi dico ñá ndáá, chi cúu-yu ñáiyu ío ní díquí-xi. <sup>23</sup> Te ñá túú cuiní-yu cáhá<sup>n</sup>-yu sá ío cahnú cuu Yá Ndióxi Yáá ndècu nchaa nduu nchaa quíú, chi da nchaa sá ní cadúha mée-yu quide cahnú-yu. Te ní cadúha-yu nchaa sá nahá ñáiyu ñá túú cudi ndècu ñuyíú-a. Te ní cadúha-yu sá nahá quiti ndava, ndíhi sá nahá quiti sácuita ñuhu mee-xi, ndíhi sá nahá nchaa dava-gá quiti, nchaa xiá<sup>n</sup> quidé cahnú-yu.

<sup>24</sup> Te xiá<sup>n</sup> núu ní dáñá Yá Ndióxi quidé-yu nchaa sá cuéhé sá dúhá sáni iní-yu. Te xiá<sup>n</sup> ío quide ndíhi tnahá-yu sá cuéhé sá dúhá sácúú-xi yiqui cuñú-yu. <sup>25</sup> Te duca<sup>n</sup> quidé-yu chi ñá túú sándáá iní-yu tñuhu ndáá tñuhu Yá Ndióxi. Te mee-ni tñuhu ndehnde sándáá iní-yu, te nèhé-yu sá yíñuhu núú dáva sá ní cadúha-gá ío ñuyíú-a ndíhi dava sá ndéé andiu te quide cahnú-yu, te ñá túú cächí-yu sá mée-gá ío cahnú cuu-gá, dico mee-gá xini ñuhu-xi cáhá<sup>n</sup>-yu sá ío cahnú cuu-gá ní caa ní quíhí<sup>n</sup>. Te ndáá ndisa sá ío cahnú cuu-gá.

<sup>26</sup> Te ná dúcá<sup>n</sup> ñá túú quide váha-yu núu xiá<sup>n</sup> ní dáñá-ná Yá Ndióxi quidé-yu nchaa sá cuéhé sá dúhá sáni iní mée-yu. Te dava ñáiyu díhi cáhá<sup>n</sup> ndíhi tnahá-yu ndi mée díhi-yu te ñá túú quidé-yu nacuáa ní nduu táhü-yu cadá-yu. <sup>27</sup> Te díu-ni duca<sup>n</sup> xiquide dava cue téé chi sáni cuéhé sáni dùha iní-güedé sá cúú-xi yiqui cuñú-güedé ndi mée tnahá téé-güedé, chi cáhá<sup>n</sup> ndíhi tñaha ndi mee-güedé te ñá túú quide-güedé nacuáa ní nduu táhü-güedé cada-güedé, te sá dúcá<sup>n</sup> quide-güedé te ñá túú tñahí cúu váha iní-güedé ndécú-güedé, te duca<sup>n</sup> tñahí táu-xi ndoho-güedé cundecu-güedé.

<sup>28</sup> Te ñá túú tñahí ñuhu iní-yu Yá Ndióxi núu xiá<sup>n</sup> duu<sup>n</sup> duu<sup>n</sup> ní dáñá ñihnu ñaha-gá xií-yu sáni cuéhé sáni dùha iní-yu, te quidé-yu nchaa sá ñá túú táu-yu cadá-yu. <sup>29</sup> Te nchaa núú sá cuéhé sá dúhá cunuu quidé-yu. Te cue téé cáhá<sup>n</sup> ndíhi-güedé ñáiyu díhi te ñá díú ñándíhi-güedé cúu-yu. Te díu-ni duca<sup>n</sup> xiquide cue ñáiyu díhi chi cáhá<sup>n</sup> ndíhi-yu cue téé te ñá díú yí-yu cúu-güedé. Te mee-ni sá ñá túú váha quidé-yu sá cúú-xi tñaha ñáiyú-yu, te xihó-yu cundecu

ndíhi-yu sá ndécú ndíhi dava-gá tñaha ñáiyú-yu, te ío sáni cuéhé sáni dùha iní-yu sá cúú-xi tñaha ñáiyú-yu, te ío cuédú iní-yu, te sàhni tnahá-yu, te ío plétú-yu, te dándahú tñahá-yu, te cúu úhú iní-yu cue tñaha ñáiyú-yu, te ío yiti yühü-yu. <sup>30</sup> Te cáhá<sup>n</sup> cuéhé-yu cuendá nchaa dava-gá tñaha ñáiyú-yu, te cúu úhú iní-yu Yá Ndióxi, te xio xio cuiní-yu cunuu tñuhu-yu, te mee-ni sáni iní-yu sá ío váha cunduu-yu, te ío quide cahnú-yu mée-yu, te ío sáni iní-yu sá cádá úhü-yu tñaha ñáiyú-yu, te ñá túú sándáá iní-yu ní tātá-yu ní nāñá-yu. <sup>31</sup> Te ñá túú təcú tñuní-yu sá váha, te ñá túú quidé-yu í<sup>n</sup> sá cáhá<sup>n</sup>-yu, te ñá túú cúu iní-yu ní ñáiyu cúu ndi mee-yu, te ní dáva-gá tñaha ñáiyú-yu, te ñá túú quide cahnú iní-yu í<sup>n</sup> sá cúmāñi núú tñahá-yu, te ní ñá túú cundahú iní-yu tñaha ñáiyú-yu. <sup>32</sup> Te Yá Ndióxi ní cächí-gá sá ncháá ñáiyu duca<sup>n</sup> xiquide quíhí<sup>n</sup>-yu núú úhú núú ndáhú. Te xini-yu sá Yá Ndióxi daquíhí<sup>n</sup> ñahá-gá xií-yu núú úhú núú ndáhú sá dúcá<sup>n</sup> quidé-yu, dico uu<sup>n</sup>-gá quidé-yu chi váha-gá cúú iní-yu cue ñáiyu quide datná quidé mée-yu.

## 2

*Yá Ndióxi cada ndáá-gá cuéchi nchaa ñáiyu ndècu ñuyíú*

<sup>1</sup> Te nchòhó ñáiyu cächí sá ío ndècu cuéchi dava-gá ñáiyu tñahá-ndó ío ndècu cuéchi-ndo cuéi nágá ñáiyu cúu-ndo, chi tñahá-ndó quide-ni-ndo nchaa nacuáa quide dava-gá ñáiyu cächí-ndó ndècu cuéchi-xi, te sá dúcá<sup>n</sup> cáhá<sup>n</sup>-ndó sá ndécú cuéchi ñáiyu-á<sup>n</sup> te dáca-ndo cuéchi díquí-ndó chi tñahá-ndó quide-ndo datná quidé-yu. <sup>2</sup> Te nchoo xini-ó sá Yá Ndióxi ío váha cutnumí iní-gá nacuáa cada ndáá-gá cuéchi í<sup>n</sup> í<sup>n</sup> nchoo ñáiyu ndècu ñuyíú-a, chi daquíhí<sup>n</sup>-gá nchaa ñáiyu quide nacuáa ní cáhá<sup>n</sup>-í núú úhú núú ndáhú.

<sup>3</sup> Te nchòhó ñáiyu í<sup>n</sup>-ni quide ndíhi ñáiyu cächí mée-ndó sá ndécú cuéchi-xi dacuitíí sá ná chāhu-ndo núú Yá Ndióxi sá dúcá<sup>n</sup> quide-ndo. <sup>4</sup> Te ñá túú cúu váha iní-ndó sá Yá Ndióxi cundahú iní ñahá-gá xii-ndo, te ní ñá túú cúu váha iní-ndó sá ío cuiní-gá cada cahnú iní-gá nchaa sá ñá túú váha quide-ndo, te ní ñá túú quide cuendá-ndó sá Yá Ndióxi quidé váha ñaha-gá xii-ndo cuendá cuiní-gá sá nchòhó ndixi túu iní-ndó sá ñá túú quide váha-ndo ndècu-ndo. <sup>5</sup> Te nchòhó cúú-ndó ñáiyu ío sáa iní-xi, chi ñá túú cuiní-ndó ndixi túu iní-ndó sá ñá túú quide váha-ndo ndècu-ndo, te xiá<sup>n</sup> núu ío-gá tá cúu vai tñundòho sá cúú-xi-ndó. Te na sáa nduu tñuhu ndòho tñuhu ndáhú te ío ndoho-ndo, chi Yá Ndióxi cada ndáá-gá nacuáa nduu cuéchi-ndo. <sup>6</sup> Te dává-á<sup>n</sup> cada ndáá Yá Ndióxi nchaa nacuáa nduu nchaa sá ní quide í<sup>n</sup> í<sup>n</sup> ñáiyu ndècu ñuyíú-a. <sup>7</sup> Te

nchaa ñáiyu nchicú<sup>n</sup> nihnu-ni quide mee-ni sá váha, ñáiyu-á<sup>n</sup> nduu táhü-yu cundecú-yu ndihi Yá Ndióxi ní caa ní quíhí<sup>n</sup>, te duca<sup>n</sup> quide váha-yu chí cuini-yu sá Yá Ndióxi cuu váha iní ñáhá-gá xii-yu, te cuini tucú-yu nduu táhü-yu núú ío váha caa ndecu Yá Ndióxi cundecú-yu ní caa ní quíhí<sup>n</sup>. <sup>8</sup> Te ío cùdée<sup>n</sup>-gá núú nchaa ñáiyu ñuhu iní mee-ni sá cúú-xí mée-xi, te ñá túú sàndáá iní-yu tnúhu ndáá chí mee-ni sá cuèhé sá dúhá quidé-yu. <sup>9</sup> Te nchaa ñáiyu duca<sup>n</sup> xiquide ío ndihú iní-yu. Te díhna-gá ñáiyu isràél ngüita-xi ndohó-yu, te dátñuní ngüita-xi ndoho nchaa ñáiyu ñá túú cuu ñáiyu isràél. <sup>10</sup> Te nchaa ñáiyu ní quide váha, te Yá Ndióxi cada-gá te ngündecú-yu núú ío váha caa ndecu-gá, te cachí-gá sá ní quide váha-yu, te ío váha cuu iní-yu cundecú-yu. Te díhna-gá ñáiyu isràél ñáiyu ní quide váha duca<sup>n</sup> cada ñaha-gá xii-yu, te dátñuní duca<sup>n</sup> cada ñaha-gá xii ñáiyu ñá túú cuu ñáiyu isràél ñáiyu ní quide váha.

<sup>11</sup> Te ñá túú quide cuendá-gá cuèí náí ñáiyu cúú-yu. <sup>12</sup> Te nchaa ñáiyu ndècu ndihi nchaa tnúhu ní chidó tnùní ndíí Moisés, Yá Ndióxi cada ndáá-gá cuèchi-yu nàcuáa càhá<sup>n</sup> nchaa tnúhu-á<sup>n</sup>. Te nchaa ñáiyu ñá túú ndècu ndihi tnúhu ní chidó tnùní ndíí-á<sup>n</sup>, Yá Ndióxi vá cáda ndáá-gá cuèchi-yu nàcuáa càhá<sup>n</sup> nchaa tnúhu-á<sup>n</sup>. Dico nchaa ñáiyu quide nándi sá cuèhé sá dúhá dàcutíí cuíta nihnú-yu cuèí ndècu ndihi-yu tnúhu ní chidó tnùní ndíí Moisés àdi ñá túú ndècu ndihi-yu. <sup>13</sup> Te nchaa ñáiyu dicó-ni sàcündedóho nchaa tnúhu ní càhá<sup>n</sup> ndíí Moisés te ñá túú tñí-yu, ñáiyu-á<sup>n</sup> ñá túú cùdiú-yu núú Yá Ndióxi, dico nchaa ñáiyu tñí nchaa tnúhu ní càhá<sup>n</sup> ndíí, ñáiyu-á<sup>n</sup> càchí Yá Ndióxi sá cùdiú-yu núú-gá, chí ñá túú-gá cuèchi-yu ndècu núú-gá. <sup>14</sup> Te nchaa ñáiyu ñá túú ndècu ndihi tnúhu ní chidó tnùní ndíí Moisés, te núu quidé-yu nchaa nàcuáa ní càhá<sup>n</sup> ndíí te cùu-xi ñ<sup>n</sup> sá sání tñàhí iní mée-yu cáda-yu, te sá sání iní-yu-á<sup>n</sup> cúú-xí ñ<sup>n</sup> tnúhu váha sá sánú ichi ñaha xii-yu nàcuáa cada váha-yu cundecú-yu. <sup>15</sup> Te sá dúcá<sup>n</sup> quidé-yu xiá<sup>n</sup> cùtnùní sá sání iní-yu dátñá càhá<sup>n</sup> tnúhu ní chidó tnùní ndíí Moisés cada ñáiyu isràél, te ío váha cùtnuní iní-yu nchaa nàcuáa quidé-yu chí ndixi túu iní-yu òré ñá túú quide váha-yu. <sup>16</sup> Te sáá nduu te Yá Ndióxi cùñaha-gá xii Xitohó Jesucristú cada ndáá-gá nchaa cuèchi ñáiyu, nchaa sá sání iní mée-yu ndùu yuhu, te cada-gá dátñá càhá<sup>n</sup> tnúhu sá sánú ichi ñaha xii-o nàcuáa naníhí tàhú-ó, tnúhu sá dánèhé ñáhà-í xii-ndo.

*Cuendá ñáiyu isràél ndihi cuendá nchaa tnúhu ní chidó tnùní ndíí Moisés*

<sup>17</sup> Te nchòhó ñáiyu isràél nchaa-ndo cùu-ndo ndi mee-í, te càchí-ndó sá nchicú<sup>n</sup>

nihnu-ndo quide-ndo nchaa tnúhu ní càhá<sup>n</sup> ndíí Moisés núu xiá<sup>n</sup> ndécú váha-ndo, te càchí-ndó sá ío càhnu cuu-ndo sá ndécú ndihi-ndo Yá Ndióxi. <sup>18</sup> Te cùtnuní iní-ndó nchaa nàcuáa cuini Yá Ndióxi cada-ndo, te sá dúcá<sup>n</sup> nchicú<sup>n</sup> nihnu-ndo quide-ndo nàcuáa càhá<sup>n</sup> tnúhu-á<sup>n</sup> xiá<sup>n</sup> cùtnuní iní-ndó nchaa sá ío-gá váha xini ñuhu-xi cada-ndo. <sup>19</sup> Te càchí-ndó sá ío váha xini-ndó cànuichi-ndo nchaa ñáiyu ñá túú cùtnuní iní-xi, te càchí tucu-ndo sá ío váha xini-ndó nà canu ichi-ndo nchaa ñáiyu ndècu ichi cuèhé ichi duha. <sup>20</sup> Te sànu ichi-ndo nchaa ñáiyu ío nùú díquí-xi, ndihi nchaa ñáiyu vitna ta təcú tnùní nchaa sá váha, te duca<sup>n</sup> quide-ndo chí ndècu ndihi-ndo nchaa tnúhu ní chidó tnùní ndíí Moisés, te tnúhu-á<sup>n</sup> cúú-xi tnúhu ndáá, chí sànu ichi ñaha-xi xii-ndo nàcuáa cada-ndo. <sup>21</sup> Te nchòhó dàcuaha-ndo ñáiyu nàcuáa cadá-yu, te mee-ndo ñá túú dàcuaha-ndo cada-ndo nchaa nàcuáa tñú-xi cunduu, te xàha<sup>n</sup>-ndo xii-yu sá vá cúú dùhü-yu te mee-ndo dùhu-ndo. <sup>22</sup> Te dàcuaha-ndó-yu sá cuè téé vá cúú càhá<sup>n</sup> ndihi-güedé ñáiyu díhí te núu ñá díú ñàdihí-güedé cúú-yu, te duca<sup>n</sup>-ni cuè ñáiyu díhí, vá cúú càhá<sup>n</sup> ndihi-yu téé te núu ñá díú yí-yu cùu-güedé. Te nchaa sá xàha<sup>n</sup>-ndo vá cúú càda ñáiyu te mee-ndo quide-ni-ndo, te xàha<sup>n</sup>-ndo xii-yu sá vá cànéhé-yu sá yíñuhu núu nchaa sá càchí-yu cùu ndiòxi-yu, te mee-ndo nhéé-gá quidé-ndó, chí dùhu-ndo nchaa sá ndécú vèñúhu. <sup>23</sup> Te càchí-ndó sá ío cùnnu nchaa tnúhu ní chidó tnùní ndíí Moisés, te ñá túú quide-ndo nchaa nàcuáa ní càhá<sup>n</sup> ndíí, te sá dúcá<sup>n</sup> quide-ndo-á<sup>n</sup> te dàquee tihú-ndó Yá Ndióxi. <sup>24</sup> Te quèe ndáá-xi nàcuáa càhá<sup>n</sup>-xi núú tútu Yá Ndióxi nàcuáa quide-ndo-á<sup>n</sup> núú càchí-xi sá nchaa ñáiyu ñá túú cùu ñáiyu isràél càhá<sup>n</sup> cuèhé-yu cuendá Yá Ndióxi sá cuendá-ndó.

<sup>25</sup> Te nchòhó ñáiyu isràél nchaa-ndo cùu-ndo ndi mee-í, te tñàhá-ndó ndècu ndihi-ndo seña ñii-ndo, te váha-ni sá dúcá<sup>n</sup> te núu quide-ndo nchaa nàcuáa ní càhá<sup>n</sup> ndíí Moisés. Dico núu ñá túú quide-ndo nchaa nàcuáa ní càhá<sup>n</sup> ndíí ña, te ñá túú nàndihí-xi sá cúú-ndó ñáiyu isràél cuèí ndècu seña ñii-ndo. <sup>26</sup> Te nchaa ñáiyu ñá túú ndècu ndihi seña ñii-xi, te núu quidé-yu nchaa nàcuáa ní càhá<sup>n</sup> ndíí Moisés, te cùu-yu dátñá cue ñáiyu ndècu ndihi seña ñii-xi, chí quidé-yu nchaa nàcuáa ní càhá<sup>n</sup> ndíí. <sup>27</sup> Te ñáiyu ñá túú ndècu ndihi seña ñii-xi, te núu na càda-yu nchaa nàcuáa ní càhá<sup>n</sup> ndíí Moisés, te ñáiyu-á<sup>n</sup> cachí-yu sá ñá túú quide ndáá nchaa nchòhó ñáiyu ndècu ndihi seña ñii-xi, chí ndècu ndihi-ndo nchaa tnúhu ní chidó tnùní ndíí te ñá túú quide-ndo nàcuáa càhá<sup>n</sup> tnúhu-á<sup>n</sup>. <sup>28</sup> Te nchòhó ñáiyu isràél, ñáiyu

nchìcú<sup>n</sup> nihnu-ni quide nchaa nacuaá ta quide tnahi-ndo véxi, ñá túú quide-ndo sá cúú-ndó ñáiyu isràél, te mee-ndo ndècu seña ñii-ndo dico ñá túú quide-ndo nacuaá tàú-xi cada nchaa ñáiyu ndècu seña ñii-xi, te mee-ni seña-án sàha-ndo ñii-ndo te ñá túú quide-ndo nacuaá cuini Yá Ndióxi cada-ndo. <sup>29</sup> Te nchaa ñáiyu sàndáá ndisa iní-xi Yá Ndióxi, ñáiyu-án cúú ndisá-yu ñáiyu isràél, te sa ní nduu ndoo ní nduu nine iní-yu chi Espiritú Yá Ndióxi duca<sup>n</sup> ní quide-xi, dico ñá díú sá sàha-yu seña ñii-yu dàtná ní cachí ndíi Moisés. Te ñáiyu-án cúú váha iní ñáhá Yá Ndióxi xií-yu cuéi ñá túú càhá<sup>n</sup> váha tnàha ñáiyú-yu cuendá-yu.

### 3

<sup>1</sup> Te sá dúhá càhá<sup>n</sup>-í te ió dawa ñáiyu quesàhá-yu sá ñii-ní cùu ñáiyu ñá túú cùu ñáiyu isràél ndíi nchoo ñáiyu isràél, te quesaha tucú-yu sá ñii-ní quide tucu-xi cuéi na cuàha àdi vá cuàha seña ñii-yu. <sup>2</sup> Dico yúhú càchí-í sá ncháá ñáiyu isràél ío-gá cùnùú-yu, chí ío titní núú sá váha ní quide ñaha Yá Ndióxi xií-yu, chí ní sàñaha-gá tnúhu-gá ndécú ndíhí-yu. <sup>3</sup> Te davá-yu ñá túú cuini-yu cada ndáá-yu, dico ñá díú sá xiá<sup>n</sup> te cùyica iní Yá Ndióxi ñá túú quide ndáá-gá. <sup>4</sup> Dico ñáhá chí xini ñuhu-xi sá ncháá ñáiyu cada cuendá-yu sá Yá Ndióxi cúú-gá Yaa quidé ndáá cuiti, te cuéi ncháa-yu na càchí-yu sá ñá túú quide ndáá-gá, dico mee-gá chí quide ndáá-ní-gá. Te núú tütú-gá càhá<sup>n</sup>-xi nàcuáa ní xáha<sup>n</sup> ñii téé ní xíndecu ndéé sanaha xii-gá, te duha ní xáha<sup>n</sup>-dè:

Yòhó Dútú Ndióxi, cùtnuní iní ñáiyu sá ío ndáá càhá<sup>n</sup>-n,

te cùnuu nahi-ní tnúhu-n cuéi òré càchí ñáiyu sá ñá túú càhá<sup>n</sup> ndáá-n.

Duha ní xáha<sup>n</sup> téé ndéé sanaha-án xii-gá càchí-xi núú tütú-gá.

<sup>5</sup> Te cuendá nchaa sá cuéhé sá dúhá quide ñáiyu, xiá<sup>n</sup> cùtnuní iní-yu sá Yá Ndióxi cúú-gá Yaa ío váha quide ndáá, chí mee-gá ñá túú dùca<sup>n</sup> quide-gá. Te cuéi duca<sup>n</sup> dico vá caní iní-yu sá Yá Ndióxi ñá túú quide ndáá-gá sá dándòho ñaha-gá xií-yu na sàá nduu, te núú duca<sup>n</sup> na caní iní-yu, te sàni iní-yu dàtná sání iní cue ñáiyu ñá túú ndècu ichi-gá. <sup>6</sup> Te vá dùcá<sup>n</sup> caní iní-yu, chí núú Yá Ndióxi ñá túú quide ndáá-ga ñá, te vá cúú càda ndáá-gá nchaa cuéchi cue ñáiyu ñáiyú-a te núú duca<sup>n</sup>.

<sup>7</sup> Te núú yúhú ná caní iní-í càhá<sup>n</sup>-í ñii tnúhu ndehnde, te sá tnúhu-án te caní tucu iní-í sá quidé càhnu-gá-í tnúhu ndáá tnúhu Yá Ndióxi, te sá dùcá<sup>n</sup> ná càhá<sup>n</sup>-í te caní tucu iní-í sá vá cúú càhá<sup>n</sup> Yá Ndióxi sá ndécú cuéchi-í. <sup>8</sup> Te núú na caní tucu iní-í sá váha-gá cada-í nchaa sá cuéhé sá dúhá cuendá Yá

Ndióxi cada-gá sá váha, dico ñá ndáá. Te ió ñáiyu càhá<sup>n</sup> cuéhé cuendá-í te càchí-yu sá díú-ní dùca<sup>n</sup> dacuaha-í ñáiyu dico ñá ndáá sá dùcá<sup>n</sup> dànehé-í-yu, te ñáiyu-án nacháhu-yu tnúhu càhá<sup>n</sup>-yu, chí duca<sup>n</sup> tàú-xi cunduu.

#### *Nchaa ñáiyu ñáiyú-a ndècuéchi-yu*

<sup>9</sup> Te vitna càchí dawa ñáiyu sá ío-gá cùnùu nchoo cue ñáiyu isràél dàcúúxi dawa-gá ñáiyu, dico yúhú càchí-í sá ñáhá, te sa ní cachí tnúhu ndáá-í xii-ndo sá ncháa ñáiyu ndècuéchi-yu cuéi ñáiyu isràél te cuéi ñáiyu ñá túú cùu ñáiyu isràél. <sup>10</sup> Te núú tütú Yá Ndióxi càchí-xi:

Vá yóo ñii quide ndáá,

<sup>11</sup> te ní vá yóo ñii təcú tnuní tnúhu váha, te ní vá yóo ñii nànducu nihnu Yá Ndióxi.

<sup>12</sup> Chí ncháa-yu ñá túú nchìcú<sup>n</sup> nihnú-yu ichi váha, te ncháa-yu cùu-yu ñáiyu xíndecu neñùú sá cúú-xi Yá Ndióxi.

Te ní ñii-yu ñá túú quidé-yu ñii sá váha.

<sup>13</sup> Te cada iní-ndó sá yúhú-yu cùu-xi datná cúú ñii yáú núú yíndüxi ndíyi núú ío ndehe sàhá<sup>n</sup>,

te duca<sup>n</sup> sàtnahá-xi cùu yuhú-yu, chí ío càhá<sup>n</sup> cuéhé-yu, te mee-ní dándahú-yu nchaa tnàha ñáiyú-yu.

Te cada iní-ndó sá vènenú cóo yíhi yúhú-yu chí mee-ní càhá<sup>n</sup> úhú-yu cuendá tnàha ñáiyú-yu.

<sup>14</sup> Te ió iní-yu càhá<sup>n</sup> úhú tnáhá-yu.

<sup>15</sup> Te àú<sup>n</sup> ná cuu àú<sup>n</sup> ná xiá<sup>n</sup> xisahní tnáhá-yu.

<sup>16</sup> Te nchaa núú xicá cùu-yu quide úhú iní-yu nchaa tnàha ñáiyú-yu nàcuáa ndíhú iní ñáiyu-án.

<sup>17</sup> Te ñá túú cuini-yu cundecu ndíhi tnàha váha-yu.

<sup>18</sup> Te ñá túú sàni iní-yu canehé-yu sá yíñùhu núú Yá Ndióxi.

Duha quidé-yu càchí-xi núú tütú-gá.

<sup>19</sup> Te cùtnuní iní-ó sá ncháa tnúhu ní chídó tnuní ndíi Moisés cúú-xi cuendá nchaa ñáiyu nchìcú<sup>n</sup> nihnu nchaa tnúhu-án. Te tnúhu-án cúú-xi cuendá sá vá yóo tnàhi cachí sá ñá túú cuéchi-xi, te duca<sup>n</sup> te nchaandi tühú ñáiyu cùtnuní iní-yu sá ná chàhu-yu nchaa sá quidé-yu núú Yá Ndióxi. <sup>20</sup> Te duca<sup>n</sup> càda-xi chí ní ñii ñáiyu vá càchí-ó sá vá cùndecu cuéchi-yu núú Yá Ndióxi cuendá-ní sá nchìcú<sup>n</sup> nihnú-yu nchaa tnúhu sá ní chídó tnuní ndíi Moisés, te tnúhu-án càchí tnúhu-xi cuendá-ní sá cùtnuní iní-ó sá ndécú-ó ichi cuéhé ichi duha.

#### *Te núu na quèndáá iní-ó Xitohó Jesucristú te nanhí tàhú-ó*

<sup>21</sup> Te vitna ní cùtnuní iní-ó sá ñá díú sá càdá-ó ncháa nacuaá ní càhá<sup>n</sup> ndíi Moisés cudíu-o núú Yá Ndióxi, chí mee-gá quidé cudíu-o núú-gá. Te núú tütú ndíi Moisés ndíhi núú tütú cue téé ní xóo càhá<sup>n</sup> tnúhu Yá Ndióxi ndéé sanaha càhá<sup>n</sup>-xi nàcuáa cada

ñaha-gã xii-o vitna. <sup>22</sup> Te duca<sup>n</sup> cùdiu-o núú Yá Ndióxi te núu na quindáá iní-ó Xítohó Jesucristú. Te diu-ni duca<sup>n</sup> cùdiu nchaa ñáiyu ñuyú te núu na quindáá iní ñáhã-yu xii-gã, chí ì<sup>n</sup>-ni cùu-o nchaa-o sá cùú-xí Yá Ndióxi. <sup>23</sup> Chi nchaá-yu ndècu cuéchi-yu, chí ñá ì<sup>n</sup>-yu quidè-yu nàcuáa cáhá<sup>n</sup> Yá Ndióxi sá cùú-yu ñáiyu quide váha. <sup>24</sup> Dico Yá Ndióxi ío váha iní-gã chí ní quide ñaha-gã xii-o ì<sup>n</sup> sá váha, chí dicó-ni duca<sup>n</sup> ní quide-gã nàcuáa vá cùndècu-gã cuéchi-o núú-gã, chí Xítohó Jesucristú ní sati ñíí-gã te ní xihí-gã, te duca<sup>n</sup> ní yáha-gã cuendá sá vá cùndècu-gã cuéchi-o. <sup>25</sup> Te Yá Ndióxi ní taxi ndècu-gã Xítohó Jesucristú núú ñáiyu ñuyú-u, te ní xihí-gã sá cuendá nchaa yícã cuéchi-yu, te duca<sup>n</sup> ní cuu cuendá sá ncháá ñáiyu na quindáá iní ñáhã xii-gã te vá náchãhu-yu cuéchi-yu núú Yá Ndióxi. Te Yá Ndióxi ní quide ndee iní-gã nchaa sá cuèhé sá dúhá ní quide cue ñáiyu ní xíndecu ndéé sanaha. Te xiá<sup>n</sup> ní xihí Xítohó Jesucristú cuendá cutnùni iní-ó sá Yá Ndióxi cùú-gã Yá ío váha quide ndáá cuéi duca<sup>n</sup> ní quide ndee iní-gã nchaa sá ní quide cue ñáiyu-á<sup>n</sup>. <sup>26</sup> Núu xiá<sup>n</sup> vitna ní cutnùni ndisa iní-ó sá quidè ndáá-gã, te quide-gã sá cuè ñáiyu vá cùndècu-gã cuéchi-yu núú-gã, te núu na quindáá iní-yu Xítohó Jesucristú.

<sup>27</sup> Te vitna vá càchí-ó sá ío càhu cuu-o cuendá sá ñá túú-gã cuéchi-o ndècu núú Yá Ndióxi, te duca<sup>n</sup> ñá túú-gã cuéchi-o ndècu núú-gã cuendá sá sàndáá iní-ó Xítohó Jesucristú, te ñá díú sá cuendá nchaa tnúhu ní cáhá<sup>n</sup> ndíi Moisés. <sup>28</sup> Te cùtnuní iní-ó sá ndéda-ni càa ñáiyu vá cùndècu-gã cuéchi-yu núú Yá Ndióxi te núu na quindáá iní-yu Xítohó Jesucristú cuéi ní quidè-yu nchaa nàcuáa ní cáhá<sup>n</sup> ndíi Moisés àdi ñá túú ní quidè-yu.

<sup>29</sup> Te cùtnuní iní-ó sá Yá Ndióxi cùú-gã Ndióxi nchaandi túhú ñáiyu, te ñá díú mèe-ni Ndióxi ñáiyu isràél cùú-gã. <sup>30</sup> Te ì<sup>n</sup>-dií díí-gã cùú-gã Ndióxi, te nchaa ñáiyu sàndáá iní ñáhã xii Xítohó Jesucristú te vá cùndècu-gã cuéchi-yu núú Yá Ndióxi cuéi cùú-yu ñáiyu isràél àdi ñá túú cùú-yu. <sup>31</sup> Te ñá díú sá sàndáá iní-ó Xítohó Jesucristú te cachí-ó sá ñá túú nàndíhi nchaa tnúhu sá sánú ichi ñaha xii-o nacuáa cada-o, te ñáhã chí sá dúhá sàndáá iní-ó-gã te xiá<sup>n</sup> nchicú<sup>n</sup> nihnu-o quidè-o nacuáa cáhá<sup>n</sup> tnúhu-á<sup>n</sup>.

**4**

*Cuendá ndíi Àbrahám*

<sup>1</sup> Te vitna na càchí tnúhu-í xii-ndo cuendá ndíi Àbrahám téé ní cuu ñani tnáhã-ó ní xíndecu ndéé sanaha. <sup>2</sup> Te ndíi-á<sup>n</sup> ñá túú ní xíndecu cuéchi ndíi núú Yá Ndióxi, dico ñá díú cuendá ì<sup>n</sup> chiú<sup>n</sup> ní quide ndíi duca<sup>n</sup>

ñá túú ní xíndecu cuéchi ndíi núú-gã. Chi núu cuendá ì<sup>n</sup> chiú<sup>n</sup> ní quide ndíi duca<sup>n</sup> ñá túú ní xíndecu cuéchi ndíi núú Yá Ndióxi ñá, te cada càhu ndíi mee ndíi ní cuu, dico ñá díú núú Yá Ndióxi cada càhu ndíi mee ndíi te núu duca<sup>n</sup> ní quide ndíi. <sup>3</sup> Te chí dándacu iní nàcuáa cáhá<sup>n</sup>-xi núú tútú Yá Ndióxi núú càchí-xi: “Té Àbrahám ní sàndáá iní-dé Yá Ndióxi, te xiá<sup>n</sup> ní cachí-gã sá cùdiu-dé núú-gã”, duha càchí-xi núú tútú-gã. <sup>4</sup> Te sá cùhú<sup>n</sup> yáhu ì<sup>n</sup> téé quide chiú<sup>n</sup>, te vá càchí-ó sá xiá<sup>n</sup> cùú-xí ì<sup>n</sup> táhú sá cùú-xí-dé chí yáhu tnáhí-dé cùú-xí. <sup>5</sup> Te vá yóo ì<sup>n</sup> ndacu cada ì<sup>n</sup> chiú<sup>n</sup> nacuáa cùdiu-xi núú Yá Ndióxi. Te ñá túú ná chiú<sup>n</sup> xini ñuhu-xi cada ñáiyu te cùdiu-yu núú-gã, chí xini ñuhu-ni-xi sá quindáá-ni iní-yu-gã. Te diu-gã càchí-gã sá ñáiyu ndècu ichi cuèhé ichi duha vá cùndècu-gã cuéchi-yu núú-gã, te núu na quindáá iní ñáhã-yu xii-gã. <sup>6</sup> Te diu-ni duca<sup>n</sup> ní cáhá<sup>n</sup> ndíi Dàvíi, chí ní cachí ndíi sá ío váha táhú nchaa ñáiyu ní cachí Yá Ndióxi cùdiu núú-gã, dico ñá díú cuendá ì<sup>n</sup> chiú<sup>n</sup> quidè-yu cùdiu-yu núú-gã. <sup>7</sup> Te duha ní cachí ndíi:

Váha táhú nchaa ñáiyu quide cahnu iní Yá Ndióxi nchaa cuéchi-xi, te ñá túú-gã quidè cuendá-gã nchaa sá cuèhé sá dúhá ní quidè-yu.

<sup>8</sup> Váha táhú-yu chí Yá Ndióxi càchí-gã sá ñá túú-gã cuéchi-yu.

Duha ní cachí ndíi Dàvíi.

<sup>9</sup> Te ñá díú mèe-ni ñáiyu ngúndecu sèñá ñi-xi duca<sup>n</sup> váha táhú-yu, chí tnáhã ñáiyu ñá túú ngúndecu sèñá ñi-xi duca<sup>n</sup> váha táhú-yu. Te sa náha-o sá Yá Ndióxi ní cachí-gã sá cùdiu ndíi Àbrahám núú-gã cuendá sá ní sàndáá iní ñáhã ndíi xii-gã. <sup>10</sup> Te canaha-ndo sá díhna-gã ní cachí Yá Ndióxi sá cùdiu ndíi Àbrahám núú-gã te dàtnuní ngúndecu sèñá ñi-xi ndíi. <sup>11</sup> Te ní ngúndecu sèñá ñi-xi ndíi cuendá xiá<sup>n</sup> cuu-xi ì<sup>n</sup> sèñá sá cùdiu ndíi núú Yá Ndióxi. Te ndéé cùtnáhã vátã ngúndecu-gã sèñá ñi-xi ndíi, te sa cùdiu ndíi núú-gã chí ní sàndáá iní ñáhã ndíi xii-gã. Te sá dúcã<sup>n</sup> ñá túú ndècu sèñá ñi-xi ndíi cùtnáhã ní sàndáá iní ndíi Yá Ndióxi xiá<sup>n</sup> ní cuu ndíi dàtnã ì<sup>n</sup> díhí dütú nchaa ñáiyu sàndáá iní ñáhã xii-gã, ñáiyu ñá túú ní ngúndecu sèñá ñi-xi, te cùdiu-yu núú-gã. <sup>12</sup> Te ndíi Àbrahám ní cuu tucu ndíi dàtnã ì<sup>n</sup> díhí dütú nchaa ñáiyu ní ngúndecu sèñá ñi-xi, dico ñá díú cuendá-ni sá ní ngúndecu sèñá ñi-xi-yu cùu ndíi díhí dütú-yu, chí cuendá sá sàndáá iní-yu Yá Ndióxi nchicú<sup>n</sup> nihnú-yu nacuáa ní quide ndíi ní sàndáá iní ñáhã ndíi xii-gã ndéé cùtnáhã vátã ngúndecu-gã sèñá ñi-xi ndíi.

*Yá Ndióxi cada-gã nchaa nàcuáa ní cachí-gã te núu na quindáá iní-ó-gã*

<sup>13</sup> Te Yá Ndióxi ní xáha<sup>n</sup>-gã xii ndíi Àbráhám sá ndúú tãhú ndíi cunuu ndíi ñuyú, ndíi cue déhe ndíi, ndíi nchaa dava-gá cue ñaní tnáhá ndíi vitna cacu túu. Te duca<sup>n</sup> ní xáha<sup>n</sup> Yá Ndióxi xii ndíi ndíi cue ñaní tnáhá ndíi, chí ní sándáá iní ñáhá ndíi xii-gá núu xiá<sup>n</sup> ní cudú ndíi núú-gã. Te duca<sup>n</sup> ní xáha<sup>n</sup>-gã xii ndíi dico ñá díú cuendá sá ní quide ndíi nacuáa ní xáha<sup>n</sup> Yá Ndióxi xii ndíi Moisés cada ñáyi ndéé cuèé-gá. <sup>14</sup> Te núu mee-ni ñáyi nchicú<sup>n</sup> nihnu quide nacuáa ní cáhá<sup>n</sup> ndíi Moisés ní ndúu tãhú-yu cunúú-yu ñuyú-a ní cùu ña, te ñá túú xini ñuhu-xi quindáá iní-ó Yá Ndióxi, te ñá túú nándíi tnúhu ní xáha<sup>n</sup> Yá Ndióxi xii ndíi Àbráhám ní cùu te núu duca<sup>n</sup>. <sup>15</sup> Te núu ñá ñáyi ñá túú quide nacuáa cáhá<sup>n</sup> tnúhu sá sánú ichi ñaha xii-o nacuáa cada-o te nacháhu-yu sá dúcá<sup>n</sup> quidé-yu. Te núu ñá túú tnúhu sá sánú ichi ñaha-xi xii-o nacuáa cada-o ní cùu ña, te ñá túú cuèchi-o ní cùu.

<sup>16</sup> Te duca<sup>n</sup> ní xáha<sup>n</sup> Yá Ndióxi xii ndíi Àbráhám nacuáa cada-gá, chí cuendá sá ní sándáá iní ñáhá ndíi xii-gá. Te duca<sup>n</sup> ní quide-gá chí ío váha iní-gá, dico ñá díú sá ñá chiu<sup>n</sup> ní quide ndíi duca<sup>n</sup> ní xáha<sup>n</sup>-gã. Te sá dúcá<sup>n</sup> ní cuu te cùu-xi ñá tnúhu ndáá sá cúu-xi nchaa ñaní tnáhá ndíi, ñáyi sándáá iní ñáhá xii-gá dàtná ní sándáá iní ñáhá mée ndíi xii-gá, te ñá díú mée-ni cuendá nchaa ñaní tnáhá ndíi nchicú<sup>n</sup> nihnu nchaa nacuáa ní cáhá<sup>n</sup> ndíi Moisés, chí ndíi Àbráhám-á ní cuu ndíi dàtná ñá díú dütü cue ñáyi sándáá iní ñáhá xii Yá Ndióxi. <sup>17</sup> Te núu túú Yá Ndióxi cáhá<sup>n</sup>-xi nacuáa ní xáha<sup>n</sup>-gã xii ndíi, te duha ní xáha<sup>n</sup>-gã: “Yòhó té Àbráhám ní quide ñaha-í xii-n dàtná ñá díú dütü cue ñáyi xindecu nihí ñuyú.” Duha ní xáha<sup>n</sup> Yá Ndióxi xii ndíi, càchí-xi núú tütü-gá. Te Yá Ndióxi náhá ndáá-gá sá cádá-xi nacuáa ní xáha<sup>n</sup>-gã xii ndíi Àbráhám, te diu-ni-gá cúú Yá ní sándáá iní ndíi, te diu-ni-gá dándòto-gá ñáyi ní xihí, te diu-ni-gá quidé tá ngúndecu nchaa sá vátá cùndècu-gá ñuyú-a.

<sup>18</sup> Te Yá Ndióxi ní xáha<sup>n</sup>-gã xii ndíi Àbráhám sá ío cuèhé déhe ndíi coo, te ío ní sándáá iní ndíi nacuáa ní xáha<sup>n</sup>-gã dico ñá túú ní cùtnuní iní ndíi nása cada-gá, chí ío ní sahnú ndíi. Te cuendá sá dúcá<sup>n</sup> ío ní sándáá iní ndíi tnúhu ní xáha<sup>n</sup>-gã núu xiá<sup>n</sup> ní cuu ndíi díhí dütü vai ñáyi xindecu nihí ñuyú. <sup>19</sup> Te ndíi Àbráhám ñúhu ndíi ñá cièndú cuá cùtnáhá duca<sup>n</sup> ní xáha<sup>n</sup> Yá Ndióxi xii ndíi, te ní cutnùní iní ndíi sá ñá túú tãhú ndíi sá cóó déhe ndíi ndíi ñá ndíi ndíi Sárá, chí ndíi ndúú-yu sá ní sahnú vihí-yu, te cuèi duca<sup>n</sup> dico ní sándáá-ni iní ndíi nacuáa ní xáha<sup>n</sup> Yá Ndióxi. <sup>20</sup> Te ñá túú ní sàni ñá sàni úú iní ndíi nacuáa ní xáha<sup>n</sup> Yá Ndióxi cada-gá sá cúu-xi ndíi, chí da uu<sup>n</sup>-gá váha ní sándáá iní

ndíi nacuáa ní xáha<sup>n</sup>-gã, te ní cachí ndíi sá ío càhnú cuu-gá. <sup>21</sup> Te ní cutnùní ndáá iní ndíi sá Yá Ndióxi ndácú-gã quidé-gã nchaa sá cáhá<sup>n</sup>-gã. <sup>22</sup> Te sá ní sándáá iní ndíi nacuáa ní cáhá<sup>n</sup> Yá Ndióxi, núu xiá<sup>n</sup> ní cachí-gá sá cúu ndíi ñá téé ñá túú cuèchi-xi núú-gã.

<sup>23</sup> Te ní ngódó tnùní núú tütü Yá Ndióxi cuendá ndíi Àbráhám sá ní cachí-gá sá ñá túú cuèchi ndíi núú-gã, te ñá díú-ni cuendá mée ndíi ní ngódó tnùní núú tütü-gá. <sup>24</sup> Chí tnáhá cuendá-ó nchaa-o ní ngódó tnùní núú tütü-gá. Te càchí-gá sá ñá túú cuèchi-o núú-gá chí sándáá iní-ó-gã, te diu-gá cúú-gá Yá ní dándòtó ñaha xii Xitohó Jesucristú Yá cúú Xitohó-ó. <sup>25</sup> Te Yá Ndióxi ní cachí-gá sá díú Xitohó Jesucristú cuú-gá cuendá nacháhu-gá nchaa cuèchi-o. Te ní xihí-gá te ní ndoto-gá cuendá nchaa-o vã cùndècu-gá cuèchi-o núú Yá Ndióxi te núu na quindáá iní-ó-gã.

## 5

*Ío váha tnáhá ñáyi càchí Yá Ndióxi sá ñá túú cuèchi-xi*

<sup>1</sup> Te vitna, ñá túú-gá cuèchi-o ndècu núú Yá Ndióxi chí sándáá iní-ó Xitohó Jesucristú, te ío váha ndècu ndíi-o Yá Ndióxi vitna sá cuendá Xitohó Jesucristú. <sup>2</sup> Te cuendá sá ní sándáá iní-ó Xitohó Jesucristú xiá<sup>n</sup> diu-gá ní quide ní ngúndecu váha-o núú Yá Ndióxi, te duca<sup>n</sup>-ni ngúndecu-o, te ío cudú iní-ó chí ndècu ndíi-o tnúhu ndee iní sá sáá nduu ngúndecu-o núú ío váha càa ndecu Yá Ndióxi.

<sup>3</sup> Te ñá díú-ni sá cuendá sá ndúú tãhú-ó cùndecu núú ndécú-gã cudú iní-ó, chí cudú iní-ó ndòho-o cuendá-gá, chí cùtnuní iní-ó sá núu na ndòho-o cuendá-gá te cunduu càhnú-gá iní-ó, <sup>4</sup> te núu cùu-o ñáyi ta quide càhnú-gá iní-xi te cùtnuní sá cúú-ó ñáyi quide váha, te núu cùu-o ñáyi quide váha te uu<sup>n</sup>-gá tá ngúndecu ndíi-o tnúhu ndee iní cuhá<sup>n</sup> sá cádá váha ñaha Yá Ndióxi xii-o. <sup>5</sup> Te núu duca<sup>n</sup> te vã ñá ndúu ndixi cuèchi iní-ó sá ndécú ndíi-o tnúhu ndee iní ngúndecu váha-o. Te Espiritú sá ní taxi Yá Ndióxi ndécú ndíi-o xiá<sup>n</sup> quidé-xi cùtnuní iní-ó sá ío cùu iní ñáhá Yá Ndióxi xii-o.

<sup>6</sup> Te nchoo ñá túú vèdana ná ní ndàcu-o cada-o cuendá dàcácu nihnu-o mée-o, dico Xitohó Jesucristú ní xihí-gá cuendá-ó, ndíi cuendá nchaa dava-gá ñáyi ñá túú tnáhá tnúhu ndíi Yá Ndióxi, te ní xihí-gá mei ndúu taú-xi cuú-gá. <sup>7</sup> Te cudana-ni núu xihí ñá ñáyi sá cuendá ñá ñáyi quide ndáá, te áma xihí tucu ñá-yu sá cuendá ñáyi quide váha tnáhá ñáyi-xi. <sup>8</sup> Te Yá Ndióxi ní quide-gá sá nchoó cùtnuní iní-ó sá ío cùu iní ñáhá-gã xii-o, chí cùtnáhá ndécú-ó ichi cuèhé ichi duha te ní tendaha-gá Xitohó Jesucristú ní quixi-gá ñuyú-a ní xihí-gá cuendá-ó. <sup>9</sup> Te

sá cuèndá sá ní xíhí Xítóhó Jesucristú xíá<sup>n</sup> ñá túú-gá cuéchi-o ndècu núú Yá Ndióxi, te vitna ní cutnùni ndáá iní-ó sá vâ dáquihí<sup>n</sup> ñáhá-gá Yá Ndióxi xii-o núú ùhú núú ndàhú sá cuèndá Xítóhó Jesucristú. <sup>10</sup> Te cutnàhá ñá túú tnàhá tnùhu-o ndìhi Yá Ndióxi ní cùu ní xíhí Xítóhó Jesucristú Yaá cùú Dèhe-gá cuèndá cuu váha iní ñáhá-gá xii-o, te duca<sup>n</sup> te nduu táhú-ó cùndecu-o ndìhi-gá ni caa ni quíhí<sup>n</sup> cuèndá sá ní ndoto Xítóhó Jesucristú. <sup>11</sup> Te ndètu-o sáá nduu ngùndecu-o ndìhi-gá ni caa ni quíhí<sup>n</sup>, te ñá díú-ní xíá<sup>n</sup> quidè-ó chi tnàhá cùdí iní-ó Yá Ndióxi, chi Xítóhó Jesucristú ní quide-gá duca<sup>n</sup> cùdí iní-ó-gá, te diu-ni Xítóhó Jesucristú ní quide-gá ní nucùndecu váha-o ndìhi Yá Ndióxi.

*Nàcuáa ní quide ndíi Àdán ndìhi nàcuáa ní quide Xítóhó Jesucristú*

<sup>12</sup> Te ndíi Àdán ñá túú ní quide ndáá ndíi núú Yá Ndióxi núu xíá<sup>n</sup> ní ngùndecu nchaa sá cuèhé sá dúhá ñuyúú-a, te sá cuèndá nchaa sá cuèhé sá dúhá quide ñáyuu xíá<sup>n</sup> xihí-yu, te nchaa-yu xihí-yu chi nchaa-yu quidè-yu nchaa sá cuèhé sá dúhá. <sup>13</sup> Te sa quide-gá-yu nchaa sá cuèhé sá dúhá te dátunúni ní ngùndecu nchaa tnùhu sá ní chídó tnùni ndíi Moisés nàcuáa ní xáha<sup>n</sup> Yá Ndióxi cada ñáyuu, te nchoo cutnùni iní-ó sá núu ñá túú tnùhu sá sànuú ìchi ñaha xii-o nacuáa cada-o, te ñá túú cuéchi-o sànuu. <sup>14</sup> Te ndéé cutnàhá ní xíndecu ndíi Àdán ní quesaha-xi xihí ñáyuu, te duca<sup>n</sup> ní xihí-yu ndéé ní sáá nduu ní xíndecu ndíi Moisés. Te duca<sup>n</sup> ní xihí-yu chi ní quidè-yu nchaa sá cuèhé sá dúhá cuéi ñá túú ní quidè-yu nàcuáa ní quide ndíi Àdán, chi ndíi-án ñá túú ní sàndáá iní ndíi nàcuáa ní xáha<sup>n</sup> Yá Ndióxi cada ndíi. Te ndíi Àdán ní cuu ndíi ì<sup>n</sup> téé cùu cahnu ní xíndecu ñuyúú-a, te sáta dúcá<sup>n</sup> te ní quixi Xítóhó Jesucristú te Yaá-án ìo-gá cahnu cuu-gá.

<sup>15</sup> Te sá ní quide ndíi Àdán te vâ cächí-ó sá ì<sup>n</sup>-ní cùu-xi ndìhi sá ní cachí Yá Ndióxi nduu táhú-ó vitna. Te sá ñá túú ní quide ndáá ndíi xíá<sup>n</sup> nchaa ñáyuu xihí-yu, dico Yá Ndióxi ìo váha iní-gá chí ìo váha ní quide-gá sá cùú-xi nchaa nchoo ñáyuu ndècu ñuyúú-a, chi dicó duca<sup>n</sup> ní cachí-gá sá nánihí tàhú-ó, te ì<sup>n</sup>-ndíi-ni téé tnàhá-dé ìo váha ní quide-dé sá cùú-xí-ó, te téé-án cùú-dé Xítóhó Jesucristú. <sup>16</sup> Te sá ní quide ì<sup>n</sup>-ndíi-ni ndíi Àdán ñá túú ì<sup>n</sup>-ni cuu-xi ndìhi sá ní quide Yá Ndióxi sá cùú-xí-ó, chi ndíi-án ñá túú ní quide ndáá ndíi núú-gá. Te sá dúcá<sup>n</sup> ní quide ndíi te xíá<sup>n</sup> ní cuu-xi cuéchi dhna nuu ní quide ndíi, núu xíá<sup>n</sup> ní cachí Yá Ndióxi sá cuè ñáyuu quíhí<sup>n</sup>-yu núú ùhú núú ndàhú nacháhu-yu nchaa sá cuèhé sá dúhá quidè-yu. Dico mee-gá ní quide sá cuè ñáyuu naníhí tàhú-yu dicó-ni duca<sup>n</sup>,

te duca<sup>n</sup> te vâ cùndècu-gá cuéchi-yu núú-gá cuéi ìo vâi cuéchi-yu. <sup>17</sup> Te sá dúcá<sup>n</sup> ñá túú ní quide ndáá ì<sup>n</sup>-ndíi-ni ndíi Àdán-án núú Yá Ndióxi, xíá<sup>n</sup> ní quide-xi xihí nchaa ñáyuu. Te sá cuèndá sá ní quide ì<sup>n</sup>-ndíi-ni Xítóhó Jesucristú xíá<sup>n</sup> ìo váha ní quide ñaha Yá Ndióxi xii ñáyuu, chi dicó-ni duca<sup>n</sup> ní nduu táhú-yu cùdiú-yu núú-gá. Te nchaa ñáyuu duca<sup>n</sup> cùdiú núú-gá nduu táhú-yu cunúú-yu ndìhi Xítóhó Jesucristú cuèndá sá ní quide-gá sá váha sá cùú-xi-yu.

<sup>18</sup> Te sá dúcá<sup>n</sup> ní quide ndíi Àdán ñá túú ní quide ndíi nàcuáa ní xáha<sup>n</sup> Yá Ndióxi xii ndíi ì<sup>n</sup> xito, núu xíá<sup>n</sup> ní cachí-gá sá ncháá ñáyuu tàú-yu nacháhu-yu nchaa cuéchi-yu, dico Xítóhó Jesucristú ní quide-gá ì<sup>n</sup> sá váha cuèndá nchaa ñáyuu vâ cùndècu-gá cuéchi-yu núú Yá Ndióxi te núu na quindáá iní ñáhá-yu xii-gá, te duca<sup>n</sup> te cundecú-yu ndìhi-gá ni caa ni quíhí<sup>n</sup>. <sup>19</sup> Te sá ñá túú ní sàndáá iní ì<sup>n</sup>-ndíi-ni ndíi Àdán nàcuáa ní xáha<sup>n</sup> Yá Ndióxi xii ndíi, xíá<sup>n</sup> ní nguinchicú<sup>n</sup> nihnu nchaa ñáyuu quidè-yu nchaa sá cuèhé sá dúhá. Te duca<sup>n</sup> ì<sup>n</sup>-ndíi-ni Xítóhó Jesucristú ní quide-gá nàcuáa ní xáha<sup>n</sup> Yá Ndióxi cuèndá sá Yá Ndióxi cachí-gá sá cùdiú-yu núú-gá.

<sup>20</sup> Te Yá Ndióxi ní xáha<sup>n</sup>-gá xii ndíi Moisés nàcuáa cada ñáyuu, te sá cuèndá tnùhu-án uu<sup>n</sup>-gá ní nguíta nchaa ñáyuu quidè-yu nchaa sá cuèhé sá dúhá, te Yá Ndióxi uu<sup>n</sup>-gá cùndàhú iní ñáhá-gá xii-yu tucu. <sup>21</sup> Te sá cuèndá nchaa cuéchi ñáyuu xíá<sup>n</sup> xihí-yu, dico Yá Ndióxi ìo váha iní-gá chí diu-gá ní cachí-gá sá ncháá ñáyuu na tnàhá tnùhu ndìhi ñaha xii-gá cùdiú-yu núú-gá, te cundecú-yu ndìhi-gá ni caa ni quíhí<sup>n</sup>, te duca<sup>n</sup> chi Xítóhó Jesucristú ní quide-gá sá váha sá cùú-xi-yu.

## 6

*Ñáyuu ñá túú-gá ndécú ìchi cuèhé ìchi duha ndécú-yu cuèndá Xítóhó Jesucristú*

<sup>1</sup> Te sá dúcá<sup>n</sup> quide Yá Ndióxi, te vâ cání iní-ó cànchicú<sup>n</sup> nihnu-ni-o ìchi cuèhé ìchi duha, chi ñá díú sá cànchicú<sup>n</sup> nihnu-o ìchi-án te ngóo cání iní-ó sá ìo-gá cundàhú iní ñáhá-gá xii-o. <sup>2</sup> Te vâ cùú cànchicú<sup>n</sup> nihnu-o ìchi cuèhé ìchi duha, chi nchoo cùu-o datná cue ñáyuu sa ní xihí, núu xíá<sup>n</sup> vâ cùú-gá cànchicú<sup>n</sup> nihnu-o ìchi-án. <sup>3</sup> Te sa nàha-o sá cuèndá sá ní sandute-o quèe-xi sá tnàhá tnùhu-o ndìhi Xítóhó Jesucristú. Te sá ní sandute-o quèe tucu-xi sá cùú-ó datná ñáyuu ní xihí ndìhi-gá. <sup>4</sup> Te ñá díú-ní sá ní xihí-ó ndìhi-gá chí quèe tucu-xi sá ní nguindúxi-o ndìhi-gá te ní ndoto-o datná ní ndoto mee-gá ní dándótó ñaha Dútú Ndióxi Yaá ìo cahnu cuu, te duca<sup>n</sup> ní cuu cuèndá sá vâ cùndècu-gá-ó datná ní xíndecu-o.

<sup>5</sup> Te núu ìí<sup>n</sup>-ni cùu-o ndìhi Xítóhó Jesucristú cuendá sá cùú-ó dàtná ñáiyu ní xihí ndìhi-gá, te ndáá sá cùú-ó dàtná ñáiyu ní ndoto mee-gá ní ngúndecu váha dàtná ní ndoto mee-gá ní nucúndecu váha-gá. <sup>6</sup> Te nchoo náha-o sá cùú-ó ñáiyu ío ndècu cuechí-xí ní cùu, dico sáta ní cuu-o dàtná ñáiyu ní xihí dàtná ní xihí Xítóhó Jesucristú núu cùrúxí, te ndéé dàv-á<sup>n</sup> ní dàñá-ó ncháa ichi cuehé ichi duha ndècu-o ní cuu, te ñá túú-gá cúnúu sá cuehé sá dúhá iní-ó. <sup>7</sup> Chi ncháa ñáiyu ní xihí ñá túú-gá ndècú-yu ichi cuehé ichi duha. <sup>8</sup> Te núu cùu-o dàtná ñáiyu ní xihí dàtná ní xihí Xítóhó Jesucristú ñá, te cùtnuní ndáá iní-ó sá cùndècu-o ndìhi-gá ní caa ní quíhí<sup>n</sup>. <sup>9</sup> Te sa náha-o sá Xítóhó Jesucristú ní xihí-gá te ní ndoto-gá te vá ìí<sup>n</sup> ndúu ìí<sup>n</sup> quíú-gá te cuú-gá, chi ñá túú nágá sá cáda cùú-gá. <sup>10</sup> Te Xítóhó Jesucristú ní xihí-gá ìí<sup>n</sup> xito-ni sá cuendá ncháa cuechí nchoo ñáiyu ñuyúú, te vá ìí<sup>n</sup> ndúu-gá cuú-gá, te ndècu-ni-gá sá cùú-xí Yá Ndióxi. <sup>11</sup> Núu xiá<sup>n</sup> nchóhó cada iní-ndó sá dàtná sá ní xihí-ndó vá cùndècu-gá-ndó sá cùú-xí ichi cuehé ichi duha, chi ndècu-ná-ndó sá cùú-xí Yá Ndióxi, chi ní tnahá tnúhu-ndo ndìhi Xítóhó Jesucristú Yá cùú Xítóhó-ó.

<sup>12</sup> Te núu xiá<sup>n</sup> vá dàñá-gá-ndó cúnúu ní ìí<sup>n</sup> sá cuehé sá dúhá iní-ndó cuendá sá vá cáda-gá-ndó ní ìí<sup>n</sup> sá cuehé sá dúhá sàni iní-ndó. <sup>13</sup> Te vá dàñá-ndó tàxi tnuní ñáhá ní ìí<sup>n</sup> sá cuehé sá dúhá-á<sup>n</sup> xii-ndo cuendá sá vá cáda-gá-ndó, te chí dàñá ná tàxi tnuní ñáhá Yá Ndióxi xii-ndo, te chí dàñá ná chindee ñaha-gá cada-ndo mée-ni sá váha, te duca<sup>n</sup> te cada iní-ndó sá cùú-ndó dàtná ñáiyu ní xihí te ní ndoto ndècu. <sup>14</sup> Te duca<sup>n</sup> cada-ndo chí vá ndacú-gá ní ìí<sup>n</sup> sá cuehé sá dúhá tàxi tnuní ñáhá-xí xii-ndo, chí Yá Ndióxi cùndàhú iní ñáhá-gá chindee ñaha-gá xii-ndo. Te duca<sup>n</sup> chí ñá túú-gá cúnúu ncháa tnúhu sá ní chídó tnuní ndúu Moisés cada ñáiyu.

#### *Ñáiyu nchicú<sup>n</sup> nihnu sá váha*

<sup>15</sup> Te ñá díú sá cùndàhú iní ñáhá Yá Ndióxi xii-o chindee ñaha-gá ndìhi sá ñá túú-gá cúnúu ncháa tnúhu ní chídó tnuní ndúu Moisés, te cachí-ó sá cùú-ní cùndècu-o ichi cuehé ichi duha. <sup>16</sup> Te nchoo xini-ó sá núu na cuáha-o tnúhu cunu cuechí-o núú ìí<sup>n</sup> ñáiyu cuíní cunu cuechí-o núú-xi, te cùu-ná-ó ñáiyu xinu cuechí núú-yu te quide-o ncháa chiú<sup>n</sup> tahú-yu. Te duca<sup>n</sup> sátnahá-xi cùu ncháa ñáiyu quide ncháa sá cuehé sá dúhá chí tàxi tnuní ñáhá-ná-xi xii-yu, te diu ncháa xiá<sup>n</sup> dácuíta nihnu ñaha-xi xii-yu, te diu ní duca<sup>n</sup> sátnahá-xi cùu ncháa ñáiyu sàndáá iní ñáhá xii Yá Ndióxi chí tàxi tnuní ñáhá-gá xii-yu, te quidé-yu ncháa sá váha nacuáa cuíní mée-gá cáda-yu. <sup>17</sup> Te nchóhó duca<sup>n</sup> ní xóo cada-ndo ncháa sá cuehé sá dúhá ní cùu,

dico táxähu xii Yá Ndióxi chí vitna ní yùhu ní iní-ndó quide-ndo ncháa nacuáa càhá<sup>n</sup> tnúhu-gá sá ní ngúndecu ndìhi-ndo. <sup>18</sup> Te vitna ñá túú-gá táxi tnuní ñáhá ní ìí<sup>n</sup> sá cuehé sá dúhá xii-ndo, te quide-ná-ndó ncháa sá váha tàchiu<sup>n</sup> Yá Ndióxi cada-ndo. <sup>19</sup> Te duha càhá<sup>n</sup>-í cuendá cue ñáiyu xinu cuechí cuendá sá nchóhó tecú tnuní-ndó nacuáa ndúu tnúhu càhá<sup>n</sup>-í. Te nchóhó ní dàñá-ndó ní taxi tnuní ñáhá ncháa sá cuehé sá dúhá xii-ndo, te ñá túú ní quide-ndo nacuáa ní càhá<sup>n</sup> Yá Ndióxi cada-ndo chí dá vihi-gá ní quide-ndo, te diu-ni duca<sup>n</sup> chí dàñá ná tàxi tnuní ñáhá Yá Ndióxi xii-ndo vitna cuendá cada-ndo mée-ni sá váha nacuáa cuíní mée-gá cada-ndo, te duca<sup>n</sup> te cuu-ndo ñáiyu quide ndáá cundecu núú-gá.

<sup>20</sup> Te nchoo cùtnàhá ní xóo cada-o ncháa sá cuehé sá dúhá ñá túú ní xóo cada-o ní ìí<sup>n</sup> sá váha cuíní Yá Ndióxi cada-o. <sup>21</sup> Te dícó sácá<sup>n</sup>núú sáñaha ncháa sá cuehé sá dúhá-á<sup>n</sup> te núu na cáda-o, te ní ìí<sup>n</sup> sá váha vá nihí-ó te núu na cáda-o ncháa xiá<sup>n</sup>, te diu ncháa xiá<sup>n</sup> dácuíta nihnu ñaha-xi xii-o. <sup>22</sup> Te vitna ñá túú-gá cùú-ó ñáiyu ndècu ichi cuehé ichi duha, chí cùu-ná-ó ñáiyu quide ncháa nacuáa càhá<sup>n</sup> Yá Ndióxi. Te sá dúhá quide-o cuu ndisa-xi ìí<sup>n</sup> sá váha sá cùú-xí-ó, te cùu-o ñáiyu quide ndáá ndècú-ó núú-gá vitna, te sáá nduu cùndecu-o ndìhi-gá ní caa ní quíhí<sup>n</sup>. <sup>23</sup> Te ncháa sá cuehé sá dúhá dícó dácuíta nihnu ñaha-xi xii-o, dico Yá Ndióxi ní quide-gá sá dícó-ni duca<sup>n</sup> ndúu táhú-ó cùndecu-o ndìhi-gá ní caa ní quíhí<sup>n</sup>, chí ní tnahá tnúhu-o ndìhi Xítóhó Jesucristú Yá cùú Xítóhó-ó.

## 7

### *Cuendá ñáiyu tnàndaha*

<sup>1</sup> Te ncháa nchóhó ñáiyu ndècu ndìhi-í ichi Xítóhó Jesucristú sa náha-ndo nacuáa càhá<sup>n</sup> tnúhu sá dánèhé ñáhá xii-o nacuáa cada-o cùndecu-o, chí tnúhu-á<sup>n</sup> càhá<sup>n</sup>-xi dóho ncháa ñáiyu xindecu vívú ñuyúú-a. <sup>2</sup> Te ncháa ñáiyu dñí sa ndècu yí-xi, te diu tnúhu-á<sup>n</sup> dánèhé ñáhá-xí xii-yu sá vá dàñá-yu yí-yu, dico núu na cùú yí-yu te ñá túú-gá ná càhá<sup>n</sup> tnúhu-á<sup>n</sup> cuendá-yu. <sup>3</sup> Dico núu vátá cùú-gá yí-yu te ñá túú ndúu váha-xi naquehé<sup>n</sup>-yu ingá téé, dico núu na cùú yí-yu te quendó mée-yu, te ñá túú nágá càhá<sup>n</sup> tnúhu sá dánèhé ñáhá xii-yu nacuáa cáda-yu te duca<sup>n</sup> te cuu naquehé<sup>n</sup>-yu ingá téé, te ñá túú cùu-xi ìí<sup>n</sup> cuechí.

<sup>4</sup> Te nchóhó cue ñáiyu ndècu ndìhi-í ichi Xítóhó Jesucristú cùú-ndó dàtná ñáiyu ní xihí dàtná ní xihí-gá. Te xiá<sup>n</sup> ñá túú-gá táxi tnuní ñáhá ncháa tnúhu ní chídó tnuní ndúu Moisés xii-ndo. Te duca<sup>n</sup> ní cuu cuendá nchóhó ngúndecu-ndo ndìhi Xítóhó Jesucristú Yá ní



xihí ní cùu te ní ndoto-gá. Te duca<sup>n</sup> ní cuu cuendá nchaa nchoo ñáyiiu ndècu ichi-gá cada-o nchaa nacuaá càhá<sup>n</sup> Yá Ndióxi. <sup>5</sup> Te nchoo ní xindecu-o ichi cuehé ichi duha, te tnúhu sá sánú ichi ñaha xii-o nacuaá cada-o cùndecu-o cachí-xi sá ñà túú váha cùndecu-o ichi-án, te nchoo dà uu<sup>n</sup>-gá ní quide-o nchaa sá cuèhé sá dúhá sá dúcá<sup>n</sup> càhá<sup>n</sup> tnúhu-án, te sá dúcá<sup>n</sup> ní quide-o te ta xíta nihnu-o cuáhá<sup>n</sup> ní cùu. <sup>6</sup> Te vitna cada iní-ó sá cúú-ó datná ñáyiiu ní xihí sá cúú-xi tnúhu sá dánèhé ñáhá xii-o nacuaá cada-o cùndecu-o, chi ñà túú-gá cúnú-xi, te vitna mee-ná Espiritú Yá Ndióxi chindèe ñaha-xi xii-o xinu cuechi-o ndúú-gá, te ñà díú cuendá nchaa tnúhu sá ní ngúndéé ndéé díhna cada ñáyiiu xinu cuechi-o núú-gá vitna.

*Nchaa sá cuèhé sá dúhá ñuhu iní-í*

<sup>7</sup> Te cuéi duha càhá<sup>n</sup>-í dico vá cúú tnàhi càhá<sup>n</sup>-ó sá tnúhu sá sánú ichi ñaha xii-o nacuaá cada-o cùndecu-o ñà díú tnúhu váha cùu-xi. Te yúhú ñà túú cùtnuní iní-í ná cúú nchaa sá cuèhé sá dúhá ní cùu te núu ñà túú tnúhu-án ní cachi tnúhu-xi xii-í, te ní ñà túú cùtnuní tucu iní-í núu váha ádi ñà túú váha sá nchídó iní-í sá ndécú ndíhi taha ñáyiiu-o ní cùu te núu ñà túú tnúhu-án ní cachi-xi sá vá cúú cùu iní-í sá ndécú ndíhi-yu. <sup>8</sup> Te tnúhu-án ní dánèhé ñáhá-xi xii-í sá vá cúú càda-í ní ñ<sup>n</sup> sá cuèhé sá dúhá, dico sá cuendá tnúhu-án uu<sup>n</sup>-gá duca<sup>n</sup> ní sání iní-í ní quide-í. Te núu ñà túú tnúhu sá sánú ichi ñaha xii-o nacuaá cada-o cùndecu-o ña, te ñà túú cùtnuní iní-í sá quidè-í nándi sá cuèhé sá dúhá ní cùu. <sup>9</sup> Te cùtnáhá vátá ñihí-gá-í tnúhu-án te ñà túú tnàhi ná sání iní-í ndécú-í ní cùu, dico sá tá ní ñihí-í tnúhu-án te ñà túú cùtnuní iní-í sá ndécú cuèchi-í, te ta xíta nihnu-í cuáhá<sup>n</sup> ní cùu. <sup>10</sup> Te núu ní quide-í nchaa nacuaá càhá<sup>n</sup> tnúhu-án te sa ndéé ama-gá naníhí tàhú-í ní cùu, dico ñà túú ní quide-í núu ní cùtnuní iní-í sá tá xíta nihnu-í cuáhá<sup>n</sup> ní cùu. <sup>11</sup> Te sá xíi tnúhu-án xiá<sup>n</sup> uu<sup>n</sup>-gá ní cunuu nchaa sá cuèhé sá dúhá ní dándáhú ñáhá-xi xii-í te ní quide-í, te ta dàcuíta nihnu ñaha-xi xii-í cuáhá<sup>n</sup> ní cùu.

<sup>12</sup> Te tnúhu sá sánú ichi ñaha xii-o nacuaá cada-o cùndecu-o cuu-xi tnúhu ío yíñuhu ní taxi Yá Ndióxi, te ñ<sup>n</sup> ñ<sup>n</sup> tnúhu-án cúú-xi mèn-ni tnúhu váha, te ní ñ<sup>n</sup> tnúhu cuèhé tnúhu duha ñà túú ñuhu tnahá. <sup>13</sup> Te vá cúú cachi-í sá tnúhu váha-án ní quide-xi ta xíta nihnu-í cuáhá<sup>n</sup> ní cùu, chi nchaa sá cuèhé sá dúhá ní quide-í, xiá<sup>n</sup> tá dàcuíta nihnu ñaha-xi xii-í cuáhá<sup>n</sup> ní cùu, te sá cuendá tnúhu váha-án ní cùtnuní iní-í sá quidè-í nchaa sá cuèhé sá dúhá, te xiá<sup>n</sup> tá xíta nihnu-í cuáhá<sup>n</sup> ní cùu. Te sá cuendá nchaa nacuaá càhá<sup>n</sup> tnúhu sá sánú ichi ñaha xii-o nacuaá cada-o cùndecu-o ní cùtnuní iní-í sá xidó ndécú cuèchi-í ní cùu.

<sup>14</sup> Te tnúhu-án ní taxi Espiritú Yá Ndióxi ndécú ndíhi-o cachí tnúhu-xi nacuaá cada váha-o. Te nchoo cùu-o mee-ni ñáyiiu yicá cuèchi, te táxi tnuní ñáhá nchaa sá cuèhé sá dúhá xii-o ní cuu. <sup>15</sup> Dico nchoo tnàhá iní-ó càda-o nchaa sá váha dico ñà túú quide-o, te da nchaa sá ñà túú tnàhá iní-ó càda-o quide-o, te ñà túú cùtnuní iní-ó ná cuendá duca<sup>n</sup> quide-o. <sup>16</sup> Te sá dúcá<sup>n</sup> quide-o nchaa sá ñà túú tnàhá iní-ó, te xiá<sup>n</sup> ndíxi túu iní-ó sá tnúhu sá dúcá<sup>n</sup> sánu ichi ñaha xii-o nacuaá cada-o cùndecu-o cuu-xi tnúhu ío váha. <sup>17</sup> Te cùtnuní iní-ó sá nchaa sá cuèhé sá dúhá ñuhu iní-ó, xiá<sup>n</sup> quidè-xi dúcá<sup>n</sup> quide-o sá ñà túú váha, te ñà díú sá cáhú iní mée-ó dúcá<sup>n</sup> quide-o. <sup>18</sup> Te cùu-o cue ñáyiiu sání cuehé sání dùha iní-xi, te cuiní-ó càda-o nchaa sá váha dico ñà túú ñihí ndéé-ó càda-o. <sup>19</sup> Te cuiní-ó càda-o nchaa sá váha dico ñà ndácú-ó, te ñà túú cuiní-ó càda-o datná quidè nchaa ñáyiiu ndècu ichi cuehé ichi duha, chi ñáyiiu-án mee-ni nchaa sá cuèhé sá dúhá quidè-yu, dico ñi-ni nchaa xiá<sup>n</sup> quidè-ó tnàhá-ó. <sup>20</sup> Te sá dúcá<sup>n</sup> quide-o nchaa sá ñà túú tnàhá iní-ó càda-o te ñà díú mèn-o duca<sup>n</sup> cahu iní-ó quide-o, chi nchaa sá cuèhé sá dúhá ñuhu iní-ó xiá<sup>n</sup> quidè-xi dúcá<sup>n</sup> quide-o.

<sup>21</sup> Te duca<sup>n</sup> tnàhi yáha-o òré cuiní-ó càda-o sá váha, chi da mee-ni nchaa sá cuèhé sá dúhá quide-o. <sup>22</sup> Te ío cùdíí iní-ó càda-o nchaa nacuaá càhá<sup>n</sup> Yá Ndióxi, <sup>23</sup> te dic-ó-ni sá ncháá sá cuèhé sá dúhá ñuhu iní-ó, xiá<sup>n</sup> quidè-xi ngàni ñaha-xi xii-o ñà túú quide-o sá váha sání iní-ó càda-o, te duca<sup>n</sup> yáha-o chi nchaa sá cuèhé sá dúhá-án cúnú-xi taxi tnuní ñáhá-xi xii-o.

<sup>24</sup> ¡Te ndáhú ní cuu nchoo! Chi vá yòo ñ<sup>n</sup> ní ndàcu cada nacuaá vá táxi tnuní ñáhá-gá nchaa sá cuèhé sá dúhá xii-o sá tá dàcuíta nihnu ñaha xii-o cuáhá<sup>n</sup> ní cùu. <sup>25</sup> Te táxáhu xii Yá Ndióxi sá Xitohó Jesucristú ní quide-gá cuendá sá vá táxi tnuní ñáhá-gá ní ñ<sup>n</sup> sá cuèhé sá dúhá xii-o, sá tá dàcuíta nihnu ñaha xii-o cuáhá<sup>n</sup> ní cùu. Te mee-o sání iní-ó càda-o nchaa nacuaá càhá<sup>n</sup> Yá Ndióxi, dico núu nchaa sá cuèhé sá dúhá ná cunuu-xi taxi tnuní ñáhá-xi xii-o, te ñi-ni nchaa xiá<sup>n</sup> cada-o.

## 8

*Ñáyiiu quide nchaa nacuaá càhá<sup>n</sup> Espiritú Yá Ndióxi*

<sup>1</sup> Te vitna nchaa nchoo ñáyiiu tnàhá tnúhu ndíhi Xitohó Jesucristú vá cuíta nihnu-gá-ó, chi ñà túú-gá ndécú-ó ichi cuehé ichi duha, chi mee-ná nchaa nacuaá càhá<sup>n</sup> Espiritú Yá Ndióxi quidè-ó. <sup>2</sup> Te Espiritú Yá Ndióxi-án táxi tnuní ñáhá-xi xii-o, te duca<sup>n</sup> chi ndècu ndíhi-o Xitohó Jesucristú, te sá dúcá<sup>n</sup> táxi tnuní ñáhá Espiritú-gá xii-o núu xiá<sup>n</sup> ñà

túu-gá táxi tnúni ñáhá ní ñ<sup>n</sup>-gá sá cuèhé sá dúhá xii-o, te duca<sup>n</sup> quide Espiritú-gá cuèndá sá vǎ cuíta nihnu-o, te ñiu-ni Espiritú-gá quidé-xí cuèndá sá nchóó ndúu táhú-ó cùndecu-o ndihí-gá ni caa ni quíhí<sup>n</sup>. <sup>3</sup> Te nchoo ñǎ ní ndácu-o cada-o nchaa nacuaá cǎhá<sup>n</sup> tnúhu sá sánú ichi ñaha xii-o nacuaá cada-o cùndecu-o, núu xǎá<sup>n</sup> tnúhu-á<sup>n</sup> ñǎ túú ní ñihí ndéé-xí càda-xi cuèndá sá nchóó vǎ cuíta nihnu-o. Dico Yá Ndióxi ní tendaha-gǎ Déhe mee-gǎ ní quixi ñuyúu-a, te Yaá-á<sup>n</sup> cúu-gǎ ñ<sup>n</sup> ñǎyiu, te càa-gǎ dàtnǎ cáá ñǎyiu ndècu cuèchi-xi xǎndecu ñuyúu-a, te sá cuèndá nchaa cuèchi nchaa nchoo ñǎyiu xǎndecu ñuyúu-a ní quixi-gǎ, te ndéé dàvǎ-á<sup>n</sup> ní quide-gǎ cuèndá sá vǎ táxi tnúni ñáhá-gǎ ní ñ<sup>n</sup> sá cuèhé sá dúhá xii-o. <sup>4</sup> Te duca<sup>n</sup> ní quide-gǎ cuèndá nchoo nchicú<sup>n</sup> nihnu-o quide-o nacuaá cǎhá<sup>n</sup> tnúhu sá sánú ichi ñaha xii-o nacuaá cada-o, chi ñǎ túú-gǎ cùnùu ní ñ<sup>n</sup> sá cuèhé sá dúhá iní-ó, chi Espiritú Yá Ndióxi-nǎ táxi tnúni ñáhá-xí xii-o.

<sup>5</sup> Te nchaa ñǎyiu cùnùu nchaa sá cuèhé sá dúhá iní-xi mee-ni xǎá<sup>n</sup> ñúhú iní-yu te quidé-yu. Dico nchoo ñǎyiu quide nchaa nacuaá cuini Espiritú Yá Ndióxi ñúhú iní-ó mée-ni nacuaá cǎhá<sup>n</sup> Espiritú-gǎ-á<sup>n</sup> te quide-o. <sup>6</sup> Te núu mee-ni nchǎa sá cuèhé sá dúhá cùnùu iní-ó, te cuíta nihnu-o, dico núu mee-ni nchǎa tnúhu cǎhá<sup>n</sup> Espiritú Yá Ndióxi cùnùu iní-ó, te ío váha cuu iní-ó cùndecu-o ndihí-gǎ ní caa ni quíhí<sup>n</sup>. <sup>7</sup> Te nchaa ñǎyiu ñúhu iní mee-ni sá cuèhé sá dúhá cùu úhú iní-yu Yá Ndióxi, te ñǎ túú cuini-yu cadá-yu nacuaá cǎhá<sup>n</sup>-gǎ, te ní ñǎ ndácú-yu cadá-yu. <sup>8</sup> Te nchaa ñǎyiu duca<sup>n</sup> cùnùu nchaa sá cuèhé sá dúhá iní-xi-á<sup>n</sup> ñǎ túú cùdiú-yu núu Yá Ndióxi.

<sup>9</sup> Te nchóó chi ñǎ túú-gǎ cùnùu sá cuèhé sá dúhá iní-ndó, chi mee-nǎ nacuaá cǎhá<sup>n</sup> Espiritú Yá Ndióxi quidé-ndó, te duca<sup>n</sup> quide-ndo chi ndècu ndihí-ndo Espiritú-gǎ, te ñiu-ni Espiritú-gǎ-á<sup>n</sup> ní tendaha Xitohó Jesucristú véxi ndècu ndihí-o ñǎ túú ndècu ndihí ñáhá-yu xii-gǎ. <sup>10</sup> Te núu ndècu ndihí-ndo Xitohó Jesucristú, te cuèi na cùu yiqui cùñú-ndó sá cuèndá nchaa sá cuèhé sá dúhá ío ñuyúu-a, dico iní-ndó chi cundecu ndihí-xi Yá Ndióxi chi ñǎ túú-gǎ cuèchi-ndo ndècu núu-gǎ. <sup>11</sup> Te núu ndècu ndihí-ndo Espiritú Yá Ndióxi Yaá ní dándótó ñaha xii Xitohó Jesucristú, te ñiu-ni-gǎ cada te ndoto yiqui cùñú-ndó sá tá xǎta nihnu cuáhá<sup>n</sup> núu na cùu-xi, te duca<sup>n</sup> chi ndècu ndihí-ndo Espiritú-gǎ.

<sup>12</sup> Te nchóó ñǎyiu ndècu ndihí-í ichi Xitohó Jesucristú, ñǎ túú-gǎ táu-ndó cùnùu ní ñ<sup>n</sup> sá cuèhé sá dúhá iní-ndó nacuaá vǎ cùndècu-gǎ-ndó ichi cuèhé ichi duha. <sup>13</sup> Chi

núu na cùnùu sá cuèhé sá dúhá iní-ndó te cuíta nihnu-ndo, chi quíhí<sup>n</sup>-ndó núu úhú núu ndáhú. Dico núu dañá-ndo mée-ndo chindee ñaha Espiritú Yá Ndióxi xii-ndo cuèndá sá vǎ cùnùu-gǎ sá cuèhé sá dúhá iní-ndó ñǎ, te nduu táhú-ndó cùndecu-ndo ndihí-gǎ ní caa ni quíhí<sup>n</sup> te núu duca<sup>n</sup> na càda-ndo.

<sup>14</sup> Chi nchaa ñǎyiu quide nchaa nacuaá sǎnu ichi ñaha Espiritú Yá Ndióxi cúu-yu déhe-gǎ. <sup>15</sup> Te Espiritú sá ní taxi Yá Ndióxi ndécú ndihí-o ñǎ túú quide-xi sá nchóó yùhú-ó cùnùu cuèchi-o núu-gǎ, chi Espiritú-á<sup>n</sup> quidé-xí sá nchóó cùu-o déhe-gǎ, te ñiu-ni Espiritú-á<sup>n</sup> quidé xǎhá<sup>n</sup>-o xii Yá Ndióxi: “¡Yohó Dúru Ndióxi cúu-n Tǎtǎ mée-ndí!”, duha xǎhá<sup>n</sup>-o xii-gǎ. <sup>16</sup> Te ñiu-ni Espiritú-gǎ-á<sup>n</sup> tnáhá-ó ndúu táhú-ó sá ní nduu táhú Xitohó Jesucristú, te duca<sup>n</sup> ndúu táhú-ó te núu na càda ndee iní-ó ndòho-o dàtnǎ ní ndoho Xitohó Jesucristú, te núu duca<sup>n</sup> te ío cuu càhnu-o ndihí-gǎ ní caa ni quíhí<sup>n</sup>.

<sup>18</sup> Te yùhú càchi-í sá ñǎ túú nǎ cada-xi cuèi ndòho-o cuèndá-gǎ ndécú-ó ñuyúu-a, chi ío váha càa núu ndúu táhú-ó cùndecu-o na saá nduu. <sup>19</sup> Te nchaandi túhú sá ní cadúha Yá Ndióxi ní taxi ndecu-gǎ ñuyúu-a ndètu cahnu-ná-xi saá nduu càchi-gǎ sá ío càhnu cuu nchaa déhe-gǎ. <sup>20</sup> Te nchaa sá ní cadúha Yá Ndióxi ní taxi ndecu-gǎ ñuyúu-a ní saá nduu ñǎ túú-gǎ cúu-xí sá váha sá cúu-xí-gǎ. Te ñǎ díu mée sá ní taxi ndecu Yá Ndióxi ñuyúu-a duca<sup>n</sup> ní sǎni iní-xi cunduu, chi mee-gǎ duca<sup>n</sup> tnáhí ní cachí-gǎ cunduu sá saá nduu vǎ cúu-xí sá váha sá cúu-xí-gǎ, dico saá tucu nduu te nchaa xǎá<sup>n</sup> cuu tucu-xi sá váha sá cúu-xí-gǎ. <sup>21</sup> Te nchaa sá ní taxi ndecu-gǎ ñuyúu-a vǎ cùndùu-gǎ-xi dàtnǎ cáá-xí vitna te ní vǎ dánàa-gǎ, chi nduu saa-xi te ngúndecu váha-xi dàtnǎ ngúndecu váha nchaa cue déhe-gǎ. <sup>22</sup> Te ñaha-o sá ncháandi túhú sá nchító ní cadúha Yá Ndióxi ndécú ñuyúu-a ndòho-xi vitna dàtnǎ ndóhó ñ<sup>n</sup> ñadihí sa ní tnáhá òrè cacu déhe-xi. <sup>23</sup> Te ñǎ díu-ni nchǎa sá dúcá<sup>n</sup> ní cadúha-gǎ-á<sup>n</sup> duca<sup>n</sup> ndòho-xi, chi tnáhá nchoo dūca<sup>n</sup> ndoho-o ndecu-o ñuyúu-a tucu, te nchoo sá ní nduu táhú-ó Espiritú Yá Ndióxi Espiritú sá ní cachí mée-gǎ nduu táhú-ó ñǎnnauu. Te ío ndòho tnáhá-ó ndecu-o ñuyúu-a te ndètu cahnu-ná-ó saá nduu ndáda saa-gǎ yiqui cùñú-ó, te cǎhá<sup>n</sup>-gǎ sá cúu-ó déhe-gǎ. <sup>24</sup> Te Yá Ndióxi ní quide-gǎ ní nanihí táhú-ó núu xǎá<sup>n</sup> ní ngúndecu ndihí-o tnúhu ndee iní ndétú-ó saá nduu càda-gǎ nacuaá ní cachí-gǎ, te núu sa ndècu ndihí-o sá ndúu táhú-ó te vǎ cúu cǎhá<sup>n</sup>-ó sá cùndètu-o sá ndúu táhú-ó chi sa ndècu ndihí-o. <sup>25</sup> Dico sá ndétú-ó ndúu

táhu-ó cùu-xi sá vátá cùndècu ndihí-gá-ó, te xini ñuhu-ni-xi cada ndee-ni iní-ó cùndetu-o ndéé sáá nduu nduu táhu-ó sá dúcá<sup>n</sup> ní cachí Yá Ndióxi nduu táhu-ó.

<sup>26</sup> Te Espiritú-gá chindee ñaha-xi xii-o nacúaa níhi ndéé-ó cùndecu-o, te nchoo ña túu xini-ó cáhá<sup>n</sup> ndihí-o Yá Ndióxi nacúaa tàu-xi cunduu dico Espiritú-gá cáhá<sup>n</sup> ndáhú-xi núu-gá cuendá-ó cuéi òré ña níhi-ó tnúhu cáhá<sup>n</sup>-ó cuendá nchaa sá io cuini-ó cáca<sup>n</sup>-ó núu-gá. <sup>27</sup> Te Yá Ndióxi sa ñaha ndáá-gá nchaa nacúaa sàni iní-ó, te duca<sup>n</sup> sá naha ndáá-gá nchaa nacúaa sàni iní Espiritú-gá. Te Espiritú-gá cáhá<sup>n</sup> ndáhú-xi núu-gá cuendá nchoo ñayiu yindaha-gá, te cáhá<sup>n</sup> ndáhú-xi núu-gá nacúaa cuini méé-gá cunduu.

*Nchaa sá ná càda ñaha ñayiu te vá ndácú-yu nadatùhú-yu iní-ó chí ndacu nahí-ni-o yáha-o nchaa sá ná càdá ñáhá-yu*

<sup>28</sup> Te sa ñaha-o sá Yá Ndióxi quidé-gá sá ncháá sá yáha-o ndècu-o ñuyúu-a cùu-xi sá vaha sá cùu-xi nchòo cue ñayiu cùu iní ñáhá xii-gá, chí cùu-o ñayiu ní cáhá<sup>n</sup>-gá cundecu ndihí-gá dàtná ní cachí iní méé-gá. <sup>29</sup> Te ndéé cùtnhá vátá ngáva-gá ñuyúu, te Yá Ndióxi sa ñaha-gá nándi cùu ñayiu cundecu ndihí-gá, te ñu-ni ndéé dàvá-á<sup>n</sup> ní cachí-gá sá ñayiu-á<sup>n</sup> cunduu váha iní-yu dàtná váha iní Déhe mee-gá, te duca<sup>n</sup> ní cachí-gá cuendá sá Déhe mee-gá-á<sup>n</sup> cunuu-gá núu ncháa ñayiu cundecu ndihí-gá. <sup>30</sup> Te nchaa ñayiu duca<sup>n</sup> ní cachí-gá cundecu ndihí-gá ndéé cùtnhá vátá ngáva-gá ñuyúu cáhá<sup>n</sup> ñáhá-gá xii-yu vitna, te nchaa ñayiu duca<sup>n</sup> cáhá<sup>n</sup>-gá cachí-gá sá ña túu-gá cuéchi-yu ndècu núu-gá, te ñu-ni ñayiu-á<sup>n</sup> cachí-gá sá io càhnu cuú-yu.

<sup>31</sup> Te vitna ní cùtnúni iní-ó, te ña túu nágá cani iní-ó, chí Yá Ndióxi ndécú ndihí ñaha-gá xii-o, te vá yóo ñ<sup>n</sup>-gá ndacu quehndé nihnu cuendá sá vá chindée ñaha-gá xii-o. <sup>32</sup> Te Yá Ndióxi ña túu ní cùdí iní-gá Déhe-gá sá cùu-gá cuendá nchaa nchoo ñayiu xíndecu ñuyúu-a, te sá dúcá<sup>n</sup> ndéé Déhe-gá ña túu ní cùdí iní-gá xiá<sup>n</sup> cùtnúni iní-ó sá táxi-gá nchaandi túhú sá xini ñuhu-o. <sup>33</sup> Te vá yóo ñ<sup>n</sup> ndacu cacá<sup>n</sup> cuéchi núu Yá Ndióxi cuendá nchaa ñayiu ní cachí-gá cundecu ndihí-gá te núu ná cùu cuéchi-yu ndècu. Chí mee-gá cachí-gá sá ña túu ndècu cuéchi-yu núu-gá. <sup>34</sup> Te vá yóo ñ<sup>n</sup> ndacu daquihí<sup>n</sup> ñáhá xii-o núu úhú núu ndáhú, chí Xitohó Jesucristú ní xihí-gá te ní ndoto-gá, te cuánda-gá núu ndécú Dútú Ndióxi núcòo-gá xio cùha-gá, te duca<sup>n</sup> io cùnuu-gá, te yàcá<sup>n</sup> cáhá<sup>n</sup> ndáhú-gá núu Dútú Ndióxi cuendá-ó. <sup>35</sup> Te vá yóo ñ<sup>n</sup> ndacu cada ñaha xii-o ñ<sup>n</sup> sá ña túu váha cuendá sá vá cùu iní ñáhá-gá Xitohó Jesucristú xii-o, te ni tnúndòho tnúhu ndáhú, te ní sá ndihú iní-ó ña cùtnúni iní-ó ñasa cada-o

cácu nihnu-o ñ<sup>n</sup> sá ná yáha-o, te ni nchaa sá càdá ñaha ñayiu sá cuendá-gá, te cuéi-ni sá vá níhi-ó sá cóhó sá cáxi-ó, te cuéi-ni sá vá níhi-ó dóo cuihnu-o, te cuéi ndècu-ná-ó sá yáha-o ñ<sup>n</sup> sá yáha-o, te cuéi sa ndècu-ná-ó sá cahní ñáhá-yu, dico Xitohó Jesucristú vá dáñá ndéé-gá sá cùu iní ñáhá-gá xii-o. <sup>36</sup> Te quee ndáá-xi nacúaa ní cáhá<sup>n</sup> ñ<sup>n</sup> téé ní xóo cáhá<sup>n</sup> tnúhu Yá Ndióxi ndéé sanaha ní ngódo tnúni núu tútu-gá núu cáchi-xi:

Yóhó Dútú Ndióxi nchaa-ni nduu nchaa-ni òré cuini ñayiu cahni ñáhá-yu xii-ndí sá cuendá-n,

te cáchi-yu sá cùu-ndí dàtná cue mbéé cue quíti sa ndècu túha-ná cahni-yu.

Duha ní cachí téé ní xóo cáhá<sup>n</sup> tnúhu-gá-á<sup>n</sup>, te duca<sup>n</sup> ní ngódo tnúni núu tútu-gá. <sup>37</sup> Te cuéi duca<sup>n</sup> nándi sá ná càda ñáhá-yu xii-o, dico vá ndácú-yu nadatùhú-yu iní-ó chí ndacu nahí-ni-o yáha-o nchaa sá dúcá<sup>n</sup> ná càda ñáhá-yu xii-o, te duca<sup>n</sup> chí Xitohó Jesucristú Yáa io cùu iní ñáhá xii-o ndecu ndihí ñaha-gá chindée ñaha-gá. <sup>38-39</sup> Te yúhú cùtnúni ndáá iní-í sá ní ñ<sup>n</sup> sá io ñuyúu-a vá ndácú-xi càda-xi cuendá sá vá cùu iní ñáhá-gá Yá Ndióxi xii-o, te ni sá cùu-ó, te ni sá cùndècu-o ñuyúu-a, te ni ñ<sup>n</sup> espiritú sá io cùnuu cundihí yucu ñávaha te ni ñ<sup>n</sup> dava-gá cue espiritú cùndihí-xi vá ndácú-xi càda-xi cuendá sá vá cùu iní ñáhá Yá Ndióxi xii-o. Te ni sá cùu ñuyúu-a vitna, te ni sá cùu ndéé cuéé-gá, te ni ñ<sup>n</sup> sá ndécú àndiu, te ni ñ<sup>n</sup> sá ndécú ñuyúu-a, te ni ñ<sup>n</sup> sá ní cadúha mee Yá Ndióxi, ni ñ<sup>n</sup> xiá<sup>n</sup> vá ndácú-xi càda-xi cuendá sá vá cùu iní ñáhá-gá xii-o chí ndècu ndihí-o Xitohó Jesucristú Yáa cùu Xitohó-ó.

## 9

*Yá Ndióxi ní cachí-gá sá ñayiu israhél cuú-yu ñayiu canchicú<sup>n</sup> nihnu ñaha xii-gá*

<sup>1</sup> Te yúhú cáhá<sup>n</sup> ndáá-í chí cùu-í ñ<sup>n</sup> téé ndècu ndihí Xitohó Jesucristú, te ndècu ndihí-í Espiritú Yá Ndióxi núu xiá<sup>n</sup> cùtnúni iní-í sá cáhá<sup>n</sup> ndáá-í. <sup>2</sup> Te nchaa-ni nduu nchaa-ni òré io ndihú iní-í, te duca<sup>n</sup>-ni io quide úhú-xi iní-í <sup>3</sup> sá cuendá nchaa ñayiu cùu ndi mee-í. Te núu dico cùu-xi ñ<sup>n</sup> sá chindée ñaha xii-yu nucúndecu váha-yu núu Yá Ndióxi ña, te dàña-í méé-í dàcuíta nihnu ñaha Xitohó Jesucristú núu dico sá cùu. <sup>4</sup> Te nchaa ñayiu cùu ndi mee-í-á<sup>n</sup> cùu-yu ñayiu israhél, te Yá Ndióxi ní cachí-gá sá cùu-yu déhe-gá, te ní quide-gá nacúaa ní cùtnúni iní-yu sá io càhnu cuu-gá, te ní cáhá<sup>n</sup> ndáá-gá núu-yu nacúaa cada ñaha-gá xii-yu, te ní xáha<sup>n</sup>-gá xii ndíi Moisés ní chidó tnúni ndíi nacúaa cada-yu cundécú-yu. Te ní xáha<sup>n</sup>-gá xii-yu nacúaa cada-yu cada càhnu ñáhá-yu xii-gá, te ní xáha<sup>n</sup> tucu-gá xii-yu nchaa nacúaa cada-gá ndéé cuéé-gá. <sup>5</sup> Te nchaa

ñáiyu-án cùu-yu ñaní tnáhá ncháa cue téé ní cunuú ní xindecu ndéé sanaha, te diu-ni ñaní tnáhá-yu cùu Xítotoh Jesucristú Yaá ní tendaha Dútú Ndióxi ní quixi ñuyiú-a, te tnáhá-gá cùu-gá Ndióxi te io cunuú-gá, te ncháa nduu ncháa quíú io càhnu cuu-gá. Te duca<sup>n</sup> na cunduú.

<sup>6</sup> Te vá cächí-ó sá Yá Ndióxi ñá túú ní quide-gá ncháa nàcuáa ní cachí-gá cada-gá cuendá sá ñá túú sàndáa iní ñáhá dáva ñáiyu isráél xii-gá. Te sá dúcá<sup>n</sup> xiquide davá-yu te ñá túú quide-yu nàcuáa tàù-xi cada-yu sá cùu-yu ñáiyu isráél. Te ñáiyu duca<sup>n</sup> xiquide-án cùu-yu ñáiyu ñá túú cùu cuendá ñáhá Yá Ndióxi. <sup>7</sup> Te cuéinchaá-yu cùu-yu ñaní tnáhá ndíi Àbrahám dico ñá túú quide-yu ncháa nàcuáa tàù-xi cunduú cada-yu sá cùu-yu ñaní tnáhá ndíi. Te Yá Ndióxi ní xáha<sup>n</sup>-gá xii ndíi Àbrahám: “Ncháa cue ñaní tnáhá tē Isáac téé cùu déhe ducu<sup>n</sup>-n, mee-ni cué ñáiyu-án cuu ñaní tnáhá-n”, duha ní xáha<sup>n</sup>-gá xii ndíi Àbrahám. <sup>8</sup> Te xiá<sup>n</sup> cùtnùni iní-ó sá ñá ncháa ñáiyu cùu ñaní tnáhá ndíi Àbrahám cùu-yu ñáiyu cùu cuendá Yá Ndióxi, chí mee-ni ñáiyu sàndáa iní nàcuáa ní cáhá<sup>n</sup>-gá cada-gá, ñáiyu-án cùu cuendá-gá. <sup>9</sup> Te duha nduu tnúhu ní xáha<sup>n</sup> Yá Ndióxi xii ndíi Àbrahám: “Sáa nduu te yúhú cada-í te coo ñ<sup>n</sup> déhe-n ndíi ñadihí-n tá Sárá”, duha ní xáha<sup>n</sup>-gá xii ndíi.

<sup>10</sup> Te ñá díú-ní xiá<sup>n</sup> ní quide Yá Ndióxi, chí tnáhá ní ndatnúhu-gá ndíi ndíi Rèbecá cùtnáhá vitna ñúhu úú déhe ndíi ndíi ndíi Isáac téé ní cuu ñaní tnáhá-ó ní xindecu ndéé sanaha. <sup>11-13</sup> Te cùtnáhá vitna ñúhu-gá déhe ndíi Rèbecá, cùtnáhá vátá cada-gá-güexi ni ñ<sup>n</sup> sá cuéhé sá dúhá, te ní ñ<sup>n</sup> sá váha, ní xáha<sup>n</sup> Yá Ndióxi xii ndíi: “Déhe-n tée díhna na càcu te téé-án tñii-dé ncháa tnúhu cáhá<sup>n</sup> déhe-n téé cùu uú ná càcu”, duha ní xáha<sup>n</sup>-gá xii ndíi Rèbecá. Te ní quee ndáá-xi nàcuáa ní cáhá<sup>n</sup> Yá Ndióxi núú tütú-gá núú cächí-xi: “Té Jácób ní cuu váha iní-í núú-dé, te té Esáu ñá túú ní cùu váha iní-í núú-dé”, duha cachí-gá núú tütú-gá. Te duca<sup>n</sup> ní cuu chí duca<sup>n</sup> ní cachí mee-gá cunduú sá cáhá<sup>n</sup>-gá ncháa ñáiyu cuini mee-gá, te ñá díú cuendá ñ<sup>n</sup> chiú<sup>n</sup> quide-yu cáhá<sup>n</sup> ñáhá-gá xií-yu.

<sup>14</sup> Te vá cùu tnáhi cáhá<sup>n</sup>-ó sá Yá Ndióxi ñá túú quide váha-gá sá dúcá<sup>n</sup> quide-gá chí mee-gá io ndáá quide-gá! <sup>15</sup> Te mee-gá ní xáha<sup>n</sup>-gá xii ndíi Moisés: “Cundáhú iní-í chindee-í mee-ni cué ñáiyu cächí iní-í”, duha ní xáha<sup>n</sup>-gá xii ndíi. <sup>16</sup> Te xiá<sup>n</sup> cùtnùni iní-ó sá cundáhú iní-gá ñáiyu chí duca<sup>n</sup> cuini mee-gá cunduú, dico ñá túú cundáhú iní ñáhá-gá xií-yu cuendá sá dúcá<sup>n</sup> cuini-yu cada-gá, te ní ñá túú cundáhú iní ñáhá-gá xií-yu cuendá sá io ndúcu ndéé-yu quide-yu ñ<sup>n</sup> sá quide-yu. <sup>17</sup> Te núú tütú Yá Ndióxi cáhá<sup>n</sup>-xi nàcuáa ní

xáha<sup>n</sup>-gá xii téé ní cuu Faràón téé ní xindaha nàció<sup>n</sup> Ègíptú, te duha ní xáha<sup>n</sup>-gá: “Yúhú ní quide-í yindàha-n ñáiyu cuendá cada-í titni núú sá cada-í núú-n cuendá cutnùni iní-n sá io càhnu cuu-í, te duca<sup>n</sup> ncháa ñáiyu ñuyiú cutnùni iní-yu sá yúhú cùu-í Ndióxi”, duha ní xáha<sup>n</sup>-gá xii téé ní cuu Faràón. <sup>18</sup> Te xiá<sup>n</sup> cùtnùni iní-ó sá Yá Ndióxi cundáhú iní-gá mee-ni cué ñáiyu cächí iní mee-gá, te duca<sup>n</sup> ndàda dí-gá iní ncháa ñáiyu cächí iní mee-gá duca<sup>n</sup> cáda-gá.

<sup>19</sup> Te sá dúhá cáhá<sup>n</sup>-í te dava-ndo quésaha-ndo: “Ná cuendá Yá Ndióxi dáca-gá cuéchi díquí ñáiyu núu ni ñ<sup>n</sup>-yu ñá ndácú-yu quehndé nihnú-yu cuendá sá vá cáda Yá Ndióxi nàcuáa cuini-gá”, quesaha-ndo. <sup>20</sup> Te chí cuáha cuendá sá díco ñáiyu ñuyiú-a cùu-ndo te ñá túú nduu váha-xi sá nchóho cáhá<sup>n</sup>-ndó ñ<sup>n</sup> tnúhu sá ñá túú nduu váha sá cùu-xi Yá Ndióxi. Te duha na cáhá<sup>n</sup>-í núú-ndó nàcuáa tecú tnùni-gá-ndó nàcuáa nduu tnúhu cáhá<sup>n</sup>-í. Te ñá túú xini-ó sá ñ<sup>n</sup> quídi ñúhu cúnaha-xi xii ñáiyu ní cadúha ñaha xii-xi: “Ná cuendá duha ní cadúha ñaha-n xii-í”, cúnaha-xi. <sup>21</sup> Chí ñáiyu cadúha ncháa quídi-án cuu-ni cadúha-yu ndíi ñúhu cuéi nása na cunduú quídi cadúha-yu canehe chiú<sup>n</sup>-yu, chí ñ<sup>n</sup>-ni ñúhu cadúha-yu quídi cánehe chiú<sup>n</sup>-yu ndi tnáhá nduu sácóo-yu vico ndíi quídi sá cánehe chiú<sup>n</sup>-yu nduu cùtexínu.

<sup>22</sup> Te diu-ni duca<sup>n</sup> quide Yá Ndióxi, chí cuini-gá dandóho-gá ñáiyu ñá túú quide ncháa nàcuáa nduu vétú iní-gá, te cada-gá nàcuáa cutnùni iní-yu sá io càhnu cuu-gá. Te sa ndècu túha-ná-yu sá quíh<sup>n</sup>-yu núú úhú núú ndáhú, te cuéi duca<sup>n</sup> dico io ta quide cahnu iní-gá cuáhá<sup>n</sup>. <sup>23</sup> Te duca<sup>n</sup> quide-gá cuendá cutnùni iní ncháa ñáiyu ñuyiú sá io váha quide-gá sá cùu-xi ncháa nchoo ñáiyu cundáhú iní-gá, chí ní cachí-gá sá nchóo cué ñáiyu cundáhú iní-gá nduu táhú-ó cùndecu-ó ndíi-gá núú io váha cáa ndecu-gá. <sup>24</sup> Te dava nchoo ñáiyu ní cáhá<sup>n</sup> Yá Ndióxi cùu-ó ñáiyu isráél, te dava-o cùu-o ñáiyu ñá túú cùu ñáiyu isráél. <sup>25</sup> Te ní quee ndáá-xi nàcuáa ní xáha<sup>n</sup> Yá Ndióxi xii ndíi Òseás téé ní xóo cáhá<sup>n</sup> tnúhu-gá ndéé sanaha ní chídó tnùni ndíi núú tütú-gá núú cächí-xi:

Ñáiyu ñá túú cùu cuendá-í ní cùu te nduu cuendá-í-yu,

te diu-ni ñáiyu-án ñá túú cùu váha iní-í núú-yu ni cùu, dico vitna cùu váha iní-í núú-yu.

<sup>26</sup> Te diu-ni ñúu núú dúcá<sup>n</sup> ní cachí-í sá ñá túú ñáiyu cùu cuendá-í diu-ni ñúu-án coo ñáiyu cuu déhe yúhú Dútú Ndióxi Yaá ndécú tūu andíu.

Duha ní xáha<sup>n</sup> Yá Ndióxi xii ndíi Òseás ní chídó tnùni ndíi núú tütú-gá. <sup>27</sup> Te ndíi

Chàia téé ní xóo cáhá<sup>n</sup> tucu tnúhu Yá Ndióxi ndéé sanaha ní cáhá<sup>n</sup> ndíi cuendá ñáyiú isrâél, te duha ní cachí ndíi: “Cuéí cuéhé víhí ñáyiú isrâél dátá cuéhé ñuhu cúchí lámár dico sacú-ni-yu vá quini-yu tnúndóho tnúhu ndáhu. <sup>28</sup> Te Yá Ndióxi ío ndíhi cada-gá nchaa nácuáa cáhá<sup>n</sup>-gá ñuyú”, duha ní cachí ndíi. <sup>29</sup> Te ní cáhá<sup>n</sup> tucu ndíi nácuáa cada-xi ndéé cuéé-gá, te ní cachí ndíi:

Yá Ndióxi Yá táxi tnúni nchaandi túhú sá ío andíu ndíhi ñuyú ñá túú ní dánaa-gá nchaa ñáyiú isrâél, chi núu ní ndíhi-yu danàa ñaha-gá,

te nchoo cùu-o datná ní cuu nchaa ñáyiú ní xindecu ñuú Sòdomá ndíhi nchaa ñáyiú ní xindecu ñuú Gómorrá, te ndíhi-o náa datná ní naa nchaa ñáyiú-á<sup>n</sup> ní cùu.

Duha ní cachí ndíi.

*Ñáyiú isrâél ñá túú sàndáa iní-yu tnúhu Xítoho Jesucristú*

<sup>30</sup> Te sá cuendá xiá<sup>n</sup> núu vitna càchí tnúhu-í xii-ndo sá cué ñáyiú ñá túú cùu ñáyiú isrâél ñá túú ní nànducu nihnú-yu nácuáa cada-yu cudíu-yu núu Yá Ndióxi, dico vitna cudíu-yu núu-gá chí ñá sàndáa iní-yu Xítoho Jesucristú. <sup>31</sup> Te ñáyiú isrâél nchicú<sup>n</sup> nihnú-yu tnúhu sá dánéhé ñáhá xii-yu nácuáa cada-yu cudíu-yu núu Yá Ndióxi dico ñá túú cudíu-yu núu-gá chí ñá ndácú-yu cada-yu nchaa nácuáa cáhá<sup>n</sup>-xi. <sup>32</sup> Te duca<sup>n</sup> ñá túú cudíu-yu núu Yá Ndióxi chí ñá túú sàndáa iní-yu Xítoho Jesucristú, te sàni iní-yu sá sá cuendá mee-ni ncháa sá quidé mée-yu cudíu-yu núu-gá, te sá dúcá<sup>n</sup> quidé-yu te cùu-yu dátá ñá ñáyiú nguñenu ñá yúú te ndúa-yu. Te duca<sup>n</sup> sàtnahá-xi cùu-yu chí ñá túú cùu váha iní-yu núu Xítoho Jesucristú. <sup>33</sup> Te quée ndáá-xi nácuáa ní cáhá<sup>n</sup> Yá Ndióxi ñá xichi núu tútú-gá núu càchí-xi:

Yúhú táxi ndécú-í ñá téé ñuú Sióon, te cuu-dé dátá ñá yúú, te yúú-á<sup>n</sup> nguñenu ñáyiú te ndúa-yu,

te nchaa ñáyiú na quindáa iní ñáhá xii-dé, te vá ndíxi cuéchi iní-yu sá dúcá<sup>n</sup> ní sàndáa iní ñáhá-yu xii-dé.

Duha càchí-gá núu tútú-gá.

## 10

<sup>1</sup> Te nchóho ñáyiú ndécú ndíhi-í ichi Xítoho Jesucristú càchí tnúhu-í xii-ndo sá cáhá<sup>n</sup> ndíhi-í Yá Ndióxi cuendá ñáyiú isrâél, chí ío cuini-í sá nánihí tãhú-yu. <sup>2</sup> Te na cáhá<sup>n</sup> ndáá-í cuendá-yu sá ío ndécú ndéé-yu xinu cuechí-yu núu Yá Ndióxi, te dicó-ní sá ñá túú quidé-yu nácuáa cuini mée-gá cada-yu. <sup>3</sup> Chí ñá túú quidé cuendá-yu nácuáa cuini Yá Ndióxi cada ñaha-gá xii-yu nácuáa cudíu-yu núu-gá, te quidé-ní-yu nácuáa sàni iní mée-yu cudíu-yu núu-gá te ñá túú cuini-yu tnií-yu tnúhu cáhá<sup>n</sup>-gá nácuáa cudíu-yu

núu-gá. <sup>4</sup> Te Xítoho Jesucristú ní quidé-gá cuendá sá vá cùnùu-gá nchaa tnúhu ní chídó tnúni ndíi Moisés, te nchaa ñáyiú na quindáa iní ñáhá xii-gá te diu-gá cada te cudíu-yu núu Yá Ndióxi.

<sup>5</sup> Te ndíi Moisés cáhá<sup>n</sup> ndíi núu tútú ndíi cuendá ñáyiú cuini cudíu núu Yá Ndióxi cuendá sá nchicú<sup>n</sup> nihnú-yu nchaa nácuáa ní cáhá<sup>n</sup> ndíi. Te ní cachí ndíi sá ncháa ñáyiú na cada nchaa nácuáa ní xáha<sup>n</sup> Yá Ndióxi xii ndíi ní chídó tnúni ndíi te nanihí tãhú-yu, te núu dico ndácú-yu cada-yu nchaa nácuáa ní cáhá<sup>n</sup> ndíi. <sup>6</sup> Dico vitna núu na quindáa iní-ó Xítoho Jesucristú, te cudíu-o núu Yá Ndióxi. Te duha càchí tnúhu ní chídó tnúni ndíi núu tútú-gá: “Vá cáni iní-ndó sá xini ñuhu-xi cada-ndo ñá sá vá yóo ñáhá ndácu cada sá cáa túu-ndo andíu te cùñaha-ndo xii Cristú cuu<sup>n</sup>-ndo ndíhi-gá núu ñuyú-a. <sup>7</sup> Te ní vá cáni túcu iní-ndó sá quihí<sup>n</sup> túu-ndo núu xindecu nchaa ñáyiú ní xihí te cada-ndo sá Cristú ndoto-gá”, duha càchí tnúhu-á<sup>n</sup> sá vá dúcá<sup>n</sup> càni iní-ó. <sup>8</sup> Te càchí tucu tnúhu-á<sup>n</sup>: “Tnúhu Yá Ndióxi sá ndécú ndíhi ñaha-xi xii-ndo chí sàni iní-ndó cuendá tnúhu-á<sup>n</sup> te cáhá<sup>n</sup>-ndó”, duha càchí tnúhu-á<sup>n</sup>. Te tnúhu sá ndécú ndíhi-ndo-á<sup>n</sup> cúu-xi tnúhu cáhá<sup>n</sup>-ndí núu ñáyiú, te xini ñuhu-xi sá quindáa iní-yu tnúhu-á<sup>n</sup>. <sup>9</sup> Te núu na ñunuu-ndo cáhá<sup>n</sup>-ndó sá Xítoho Jesucristú cúu-gá Xítoho-ndó, te quindáa iní-ndó ní yuhu ní iní-ndó sá Yá Ndióxi ní dándótó-gá Xítoho Jesucristú, te nanihí tãhú-ndó te núu duca<sup>n</sup> na cada-ndo. <sup>10</sup> Te nchaa ñáyiú duca<sup>n</sup> sàndáa iní te cáhá<sup>n</sup>-yu sá Xítoho Jesucristú cúu-gá Xítoho-yu, ñáyiú-á<sup>n</sup> cudíu-yu núu Yá Ndióxi te nanihí tãhú-yu.

<sup>11</sup> Te núu tútú Yá Ndióxi càchí-xi sá ní ñáyiú sàndáa iní ñáhá xii Xítoho Jesucristú vá ndíxi cuéchi iní-yu sá dúcá<sup>n</sup> sàndáa iní ñáhá-yu xii-gá. <sup>12</sup> Te sá cúu-xi Xítoho Jesucristú chí ñá-ni cùu ñáyiú isrâél ndíhi ñáyiú ñá túú cùu ñáyiú isrâél, chí diu-gá cúu-gá Yáa cùnùu taxi tnúni-gá nchaa ñáyiú, te ío váha quidé-gá sá cúu-xi ncháa ñáyiú cáhá<sup>n</sup> ndíhi ñaha xii-gá. <sup>13</sup> Te quée ndáá-xi nácuáa cáhá<sup>n</sup>-xi núu tútú Yá Ndióxi núu càchí-xi: “Nchaa ñáyiú na cáhá<sup>n</sup> ndáhú núu Xítoho Jesucristú sá dáccu nihnú ñaha-gá xii-yu, te ñáyiú-á<sup>n</sup> nanihí tãhú-yu”, duha càchí-xi núu tútú-gá. <sup>14</sup> Te ñáyiú-á<sup>n</sup> vá nihí-yu nácuáa cáhá<sup>n</sup> ndáhú-yu núu-gá te núu ñá túú sàndáa iní ñáhá-yu xii-gá, te ní vá nihí-yu nácuáa cada-yu quindáa iní ñáhá-yu xii-gá te núu vátá cùndédóho-gá-yu tnúhu-gá, te ní vá nihí-yu tnúhu-gá te núu vá yóo quihí<sup>n</sup> cùtmuhu ñaha xii-yu. <sup>15</sup> Te ní vá yóo quihí<sup>n</sup> duca<sup>n</sup> cùtmuhu ñaha xii-yu tnúhu-gá te núu Yá Ndióxi vá tэндàha-gá ñáyiú quihí<sup>n</sup> cùtmuhu ñaha xii-yu. Te núu tútú Yá Ndióxi

càchí-xi: “Ío vii ío váha cùu iní-ó vèxi ñáyiú dànehé ñáhá xii-o nacuáa ndùu tnúhu sá càhá<sup>n</sup> nacuáa naníhí tãhú-ó”, duha càhá<sup>n</sup>-xi núú tütú-gã.

<sup>16</sup> Te ñã ncháa-yu cuiñi-yu quindáa iní-yu tnúhu-án. Te ní quee ndáa-xi nacuáa ní xáha<sup>n</sup> ndíi Chaiá xii Yá Ndióxi te duha ní xáha<sup>n</sup> ndíi xii-gã: “Yòhó Dútú Ndióxi na nàcani tnúhu-í núú-n sã ïo sacú-ni ñáyiú sãndáa iní-yu tnúhu càhá<sup>n</sup>-ndí”, duha ní xáha<sup>n</sup> ndíi xii-gã. <sup>17</sup> Te xini ñuhu-xi sã ðihna-gã cundedóho-yu tnúhu-án cuendá duca<sup>n</sup> te quindáa iní-yu, te tnúhu-án cúú-xi tnúhu Xitohó Jesucristú.

<sup>18</sup> Te vá cúú càhá<sup>n</sup>-ó sã ñã túú ní ñíhí ñáyiú israél tnúhu-gã, chi ncháa-yu ní ñíhí-yu tnúhu-gã, chi núú tütú Yá Ndióxi càchí-xi: Cue tee ní càhá<sup>n</sup> tnúhu Yá Ndióxi ní càhá<sup>n</sup>-güedé tnúhu-gã núú ñáyiú,

te tnúhu-án ní xité nuu-xi ñíhí ñuyú. Duha càchí-xi núú tütú-gã. <sup>19</sup> Te ní vã càhá<sup>n</sup>-ó sã ñáyiú israél ñã túú ní cùu tnuní iní-yu nacuáa ndùu tnúhu-gã chi ní tecú tnuní-yu. Te ndéé sanaha ní chídó tnuní ndíi Moisés nacuáa ní xáha<sup>n</sup> Yá Ndióxi xii ñáyiú israél, te duha ní xáha<sup>n</sup>-gã xii-yu:

Yúhú cada váha-í ncháa ñáyiú ñã túú cùu ñáyiú israél, ñáyiú ñã túú cùtnuní iní-xi nacuáa cada váha cundecu núú-í,

te nchóhó cudé<sup>n</sup>-ndó nüü-yu te cuu cuédú iní-ndó-yu.

Duha ní xáha<sup>n</sup> Yá Ndióxi xii-yu te duca<sup>n</sup> ní chídó tnuní ndíi Moisés. <sup>20</sup> Te ndíi Chaiá ñã túú tnãhí ní yúhú ndíi ní quide ndíi núú Yá Ndióxi ní càhá<sup>n</sup> ndíi tnúhu-gã, te ní cachí ndíi:

Ñáyiú ñã túú nãnducu ñaha xii-í ní cùu ní naníhí ñãhá-yu xii-í,

te ní ñã túú ndùcu tnúhu ñãhá-yu xii-í ní cùu te ní xini ñãhá-yu.

Duha ní cachí ndíi Chaiá ní càhá<sup>n</sup> ndíi tnúhu Yá Ndióxi. <sup>21</sup> Te ní quide tucu ndíi núú Yá Ndióxi ní càhá<sup>n</sup> ndíi tnúhu-gã cuendá ñáyiú israél, te ní cachí ndíi: “Ncháa-ni nduu yihi-í càhá<sup>n</sup>-í ñáyiú israél te ñã túú cuiñi-yu quindáa iní-yu chi ío sãá iní-yu”, duha ní cachí ndíi Chaiá ní càhá<sup>n</sup> ndíi tnúhu Yá Ndióxi.

**11**

*Cuendá ñáyiú israél ñáyiú naníhí tãhú*

<sup>1</sup> Te cuéi duca<sup>n</sup> dico vá càhá<sup>n</sup>-ó sã Yá Ndióxi dáquée tãhú-gã ñáyiú israél chi ðiu-ni ñáyiú-án cúú cuendá-gã, chi yúhú tnãhá-í cúú-í mei tãe israél, te ñani tnãhá-í ní cuu ndíi Àbrahãm tãe ní xindecu ndéé sanaha vihi-gã, te ðiu-ni ñani tnãhá-í ní cuu tucu ndíi Benjámin. <sup>2</sup> Te ndéé sanaha ðuca<sup>n</sup> ní cachí Yá Ndióxi sã nchúhú ñáyiú israél cúú-ndí ñáyiú cùu cuendá-gã, te ñã túú

dáquée tãhú ñáhã-gã xii-ndí, te nchóhó sa xini-ndó nacuáa càhá<sup>n</sup>-xi núú tütú Yá Ndióxi núú càchí-xi nacuáa ní quide té Èliás ní ndacá<sup>n</sup> cuéchi-dé núú-gã cuendá ñáyiú israél. <sup>3</sup> Te duha ní xáha<sup>n</sup>-dã xii-gã: “Yòhó Dútú Ndióxi, ná nàcani tnúhu-í núú-n sã ní sahní-yu cue tãe càhá<sup>n</sup> tnúhu-n, te ní dátanàn-yu núú xihí quiti ndùu tãhú-n, te yúhú-nã ní cácu-í ndécú-í dico nãnducu ñãhá-yu chi tnãhá-í cuiñi-yu cahni ñãhá-yu xii-í”, duha ní xáha<sup>n</sup>-dã xii Yá Ndióxi. <sup>4</sup> Te Yá Ndióxi ní xáha<sup>n</sup>-gã xii-dé: “Sa ní dáquée ðii<sup>n</sup>-í úsã míl cue tãe cùu cuendá-í, te ñã túú nèhe-güedé sã yñúhu núú Bàal sã càchí-yu cùu ndiòxi-yu te ñã ndáa sã ndiòxi cúú-xi”, duha ní xáha<sup>n</sup>-gã xii té Èliás. <sup>5</sup> Te duca<sup>n</sup> sãtnahã-xi cùu vitna chi xindecu ñáyiú ní càhá<sup>n</sup>-gã ní chitnahã ñãhá xii-gã, te duca<sup>n</sup> ní quide-gã chi ní cundãhú iní ñãhá-gã xii-yu. <sup>6</sup> Te duca<sup>n</sup> ní càhá<sup>n</sup> ñãhá-gã xii-yu sã cundãhú iní ñãhá-gã, te ñã díú cuendá ði<sup>n</sup> chi<sup>n</sup> quide-yu duca<sup>n</sup> ní càhá<sup>n</sup> ñãhá-gã xii-yu, chi núú díco cuendá ði<sup>n</sup> chi<sup>n</sup> quide-yu duca<sup>n</sup> ní càhá<sup>n</sup> ñãhá-gã xii-yu ñã, te ñã díú-gã sã cúú iní meé-gã duca<sup>n</sup> ní càhá<sup>n</sup> ñãhá-gã xii-yu te núu duca<sup>n</sup>.

<sup>7</sup> Te na càchí tnúhu-í xii-ndo nacuáa cùu vitna sã ñáyiú israél cuiñi-yu cudú-yu núú Yá Ndióxi dico ñã ndácú-yu, dico dava ñáyiú ní càhá<sup>n</sup>-gã ñáyiú-án cudú-yu núú-gã, te ñáyiú duca<sup>n</sup> ñã túú cùu núú-gã-án ío ní cuu sãá iní-yu núú-gã. <sup>8</sup> Te ní quee ndáa-xi nacuáa càhá<sup>n</sup>-xi núú tütú Yá Ndióxi núú càchí-xi: “Yá Ndióxi ní cachí-gã sã cúú-yu ñáyiú ío ní ðiquí-xi, chi cuéi ndéhé-yu nacuáa càhá<sup>n</sup> tnúhu-gã dico ñã cùtnuní iní-yu nacuáa càhá<sup>n</sup>-xi, te cuéi ndedóho-yu dico ñã túú quée ðiquí-yu, te duca<sup>n</sup>-ni quide-yu ndéé vitna”, duha càchí-xi núú tütú-gã. <sup>9</sup> Te ndíi Dávíi ní cachí ndíi:

Ñáyiú ío váha ndècu te cudú iní-yu quide-yu víco,

dico yãha-yu dátã yãha ði<sup>n</sup> quiti ngava trampã àdi ði<sup>n</sup> quiti ñã cùtnuní iní-xi quée xití ñunu,

chi cuíta niñnú-yu te nachãhu-yu ncháa sã quidè-yu.

<sup>10</sup> Te cúú-yu ñáyiú ñã túú vèdana təcú tnuní, te cùu tucú-yu dátã ði<sup>n</sup> ñáyiú ío ndòho nchido ði<sup>n</sup> sã vèe.

Duha ní cachí ndíi Dávíi.

*Ñáyiú ñã túú cùu ñáyiú israél naníhí tãhú-yu*

<sup>11</sup> Te cuéi duca<sup>n</sup> dico vá càchí-ó sã sã dúcã<sup>n</sup> ñã túú ní quide ndáa ñáyiú israél te ní xita niñnu duú<sup>n</sup>-yu, te ñãhá chi sã dúcã<sup>n</sup> ní quide-yu te ní ngúndecu ndíhi dava-gã ñáyiú tnúhu sã càhá<sup>n</sup> nacuáa naníhí tãhú-yu, te ñáyiú israél quini-yu nacuáa naníhí tãhú ñáyiú ñã túú cùu ñáyiú israél, te tnãhá-yu

cudíí iní-yu naníhí tǎhú-yu. <sup>12</sup> Te sá dúcá<sup>n</sup> ní quide sáá iní-yu ñá túú ní quide ndáá-yu núú Yá Ndióxi, te xiǎ<sup>n</sup> ní cuu-xi íi<sup>n</sup> sá váha sá cúú-xí ñáiyu nihíi ñuyúú, dico sáá nduu te cada ñáiyu isráél nchaa nàcuáa càhá<sup>n</sup> Yá Ndióxi, te dǎvá-á<sup>n</sup> ío-gá váha cuu xii nchaa ñáiyu nihíi ñuyúú.

<sup>13</sup> Te nchòhó ñáiyu ñá túú cùu ñáiyu isráél càchí tñúhu-í xii-ndo sá Yá Ndióxi ní cachí-gá sá càhá-í tñúhu-gá núú-ndó, te yúhú càchí-í sá ío càhnu cuu chiu<sup>n</sup> quide-í. <sup>14</sup> Te duha càhá-í cuendá sá núu cudana ío dava ñáiyu cùu ndi mee-í cudíí iní-yu cada váha ñaha Yá Ndióxi xii-yu dátá quidé váha ñaha-gá xii-ndo, te naníhí tǎhú-yu. <sup>15</sup> Te sá cuendá sá ní quee tǎhú ñáiyu isráél ní nacáhá<sup>n</sup> càhnú iní tñáhá ñáiyu nihíi ñuyúú ndihí Yá Ndióxi, dico na sáá nduu núcúndecu váha ñáiyu isráél ndihí Yá Ndióxi, te ío-gá váha tñáhá ñáiyu nihíi ñuyúú, te ñáiyu-á<sup>n</sup> cada iní-ó sá cúú-yu dátá ñáiyu ní xihí, dico dǎvá-á<sup>n</sup> cada tucu iní-ó sá cúú-yu dátá ñáiyu ní ndoto chi núcúndecu váha-yu ndihí-gá. <sup>16</sup> Te núu sá lúhá-ní íi<sup>n</sup> tǐlúú yusa<sup>n</sup> cǎváha te diu-ni duca<sup>n</sup> cǎváha nihíi. Te núu cǎváha yóho íi<sup>n</sup> yutnu te diu-ni duca<sup>n</sup> cǎváha-xi nihíi-xi. Te diu-ni duca<sup>n</sup> sǎtnáhá-xi cùu ñáiyu isráél, chi ñani tñáhá-yu ní xíndecu ndéé sanaha ní cuú-yu ñáiyu ní cuu cuendá ñáhá Yá Ndióxi, te diu-ni duca<sup>n</sup> cùu cuendá ñáhá-gá xii mée-yu ndéé vitna.

<sup>17</sup> Te ío íi<sup>n</sup> yutnu váha nàni olívú, te dava dité yutnu-á<sup>n</sup> ní téhndé te ní núcódó dité yutnu olívú cùtèxínu, te mee-ná yutnu olívú váha-á<sup>n</sup> ío váha quide-xi nchito dité yutnu olívú cùtèxínu-á<sup>n</sup>. Te dité nchaa yutnu olívú váha-á<sup>n</sup> cúú-xí dátá ñáiyu isráél, te nchaa dité-xi sá ní téhndé-á<sup>n</sup> cúú-xí diu-ni ñáiyu isráél ñáiyu ñá túú tñáhá tñúhu ndihí Yá Ndióxi. Te dité yutnu olívú cùtèxínu sá ní núcódó tñáhá-á<sup>n</sup> cúú-xí dátá ñáiyu ñá túú cùu ñáiyu isráél tñáhá tñúhu ndihí Yá Ndióxi. <sup>18</sup> Te vá cǎní iní-ndó sá sá dúcá<sup>n</sup> ndècu váha-ndo ndihí Yá Ndióxi te ío cùnuu-ndo dacúúxi ñáiyu isráél, te vá dúcá<sup>n</sup> cǎni iní-ndó chí sá cuendá nchaa ñani tñáhá ñáiyu isráél ní xíndecu ndéé sanaha duca<sup>n</sup> ndècu váha-ndo ndihí Yá Ndióxi vitna, te ñá díú sá cuendá nchòhó ndécú ndihí váha ñáiyu-á<sup>n</sup> Yá Ndióxi vitna.

<sup>19</sup> Te cudana sàni iní-ndó te càchí-ndó sá ñáiyu isráél ní quee tǎhú-yu cuendá sá nchòhó nucuíí-ndó núú-yu núcúndecu váha-ndo ndihí Yá Ndióxi. <sup>20</sup> Te ndáá sá ní quee tǎhú-yu chí ñá túú ní sàndáá iní ñáhá-yu xii-gá, te nchòhó ío váha cùu ndecu-ndo ndihí-gá chí ní sàndáá iní-ndó-gá, dico vá càchí-ndó sá ío càhnu cuu-ndo, te ío váha chí cuáha cuendá nàcuáa cundecu-ndo. <sup>21</sup> Te cue ñáiyu isráél cúú-yu ñáiyu cùu cuendá-gá ní cùu te ní dáqueé tǎhú

ñáhá-gá xii-yu cuendá sá ñá túú ní sàndáá iní ñáhá-yu xii-gá, te tñáhá nchòhó daqueé tǎhú ñáhá-gá xii-ndo te núu na cada-ndo dátá ní quide ñáiyu-á<sup>n</sup>. <sup>22</sup> Te chí cadá cuendá sá Yá Ndióxi ío váha iní-gá, dico cudéé<sup>n</sup>-gá núú nchàa ñáiyu ñá túú sàndáá iní ñáhá xii-gá, dico sá cúú-xí nchòhó cue ñáiyu sàndáá iní ñáhá xii-gá chí ío váha iní-gá. Te duca<sup>n</sup>-ni cùnduu váha iní-gá sá cúú-xi-ndó te núu vá dáña ndéé-ndó cada-ndo nàcuáa càhá<sup>n</sup>-gá cuendá sá ío váha iní-gá, te núu ñáhá te tñáhá nchòhó quee tǎhú-ndó dátá ní quee tǎhú ñáiyu isráél, ñáiyu ñá túú ní sàndáá iní ñáhá xii-gá. <sup>23</sup> Dico núu ñáiyu isráél ñáiyu ní dáqueé tǎhú ñáhá Yá Ndióxi quíndáá iní ñáhá-yu xii-gá te nduu cuendá ñáhá tucu-gá xii-yu, te ñáiyu-á<sup>n</sup> cúú-yu dátá dava dité yutnu olívú sá ní téhndé te ní núcódó tñáhá tucu. Te duca<sup>n</sup> sǎtnáhá-xi cúú-yu te núu na quíndáá iní ñáhá-yu xii-gá. <sup>24</sup> Te nchòhó cúú-ndó dátá nchaa dité yutnu olívú cùtèxínu, chí ñá díú ñáiyu isráél cúú-ndó, te dité nchaa yutnu olívú cùtèxínu-á<sup>n</sup> ní núcódó-xi núú dité yutnu olívú váha-á<sup>n</sup>. Te yáchí-gá núcúndecu váha ñáiyu isráél ndihí Yá Ndióxi, chí cúú-yu dátá nchaa dité yutnu olívú váha sá ní téhndé te ní núcódó tñáhá tucu. Te duca<sup>n</sup> sǎtnáhá-xi cúú-yu te núu na quíndáá iní ñáhá-yu xii-gá.

*Sáá nduu te naníhí tǎhú ñáiyu isráél*

<sup>25</sup> Te nchòhó ñáiyu ndècu ndihí-í ichi Xitohó Jesucristú, na càchí tñúhu-í xii-ndo íi<sup>n</sup> tñúhu nduu yuhu ní cuu, cuendá sá vá cǎní iní-ndó sá ío-gá váha sáá díquí-ndó dacúúxi ñáiyu isráél, chí dava ñáiyu isráél cúú sáá iní-yu núú Yá Ndióxi nini na ndihí ñáiyu ní cachí Yá Ndióxi ngúndecu váha ndihí ñáhá-yu xii-gá, ñáiyu ñá túú cùu ñáiyu isráél. <sup>26</sup> Te nduu na ndihí ñáiyu-á<sup>n</sup> ngúndecu váha-yu ndihí Yá Ndióxi, te dǎvá-á<sup>n</sup> naníhí tǎhú ñáiyu isráél chí quee ndáá-xi nàcuáa càhá<sup>n</sup> Yá Ndióxi núú tǐtúú-gá núú càchí-xi: Ndàa ñuú Sión quixi Yaá cada naníhí tǎhú nchaa ñáiyu,

te diu-ni Yaá-á<sup>n</sup> cada-gá cuendá sá dáña nchàa ñáiyu isráél ichi cuéhé ichi duha.

<sup>27</sup> Te yúhú cada càhnu iní-í nchaa cuéchi ñáiyu isráél, chí cada-í dátá ní cachí-í ndéé sanaha.

Duha càchí Yá Ndióxi núú tǐtúú-gá.

<sup>28</sup> Te sá cuendá tñúhu sá càhá<sup>n</sup> nàcuáa naníhí tǎhú-ó xiǎ<sup>n</sup> cúú ùhú iní ñáiyu isráél Yá Ndióxi, te sá dúcá<sup>n</sup> quidé-yu xiǎ<sup>n</sup> nchòhó ní nihí-ndó tñúhu sá càhá<sup>n</sup> nàcuáa naníhí tǎhú-ndó. Te ní cachí Yá Ndióxi sá ñáiyu isráél cuu cuendá-gá, te cùu iní ñáhá-ní-gá xii-yu, te duca<sup>n</sup> quidé-gá chí duca<sup>n</sup> ní xáha<sup>n</sup>-gá xii cue ñani tñáhá-yu ní xíndecu ndéé sanaha. <sup>29</sup> Te Yá Ndióxi ñá túú

ndùu ùhú iní-gá ìᵃ sá táxí-gá, te ní ñà túú ndìxi cuéchi iní-gá sá càháᵃ ñàhá-gá xii-o. <sup>30</sup> Te nchòhó chí ñá túú sàndáá iní-ndó Yá Ndiòxí ní cùu, dico vitna nìni ñà túú sàndáá iní ñàhá ñáyiú isràél xii-gá, te ní cundàhú iní ñàhá-gá ní dácácu nihnu ñaha-gá xii-ndo núú ùhú núú ndàhú. <sup>31</sup> Te vitna quidé-yu dàtná ní xóo cada nchòhó cùtnàhá ñá túú ní xóo quindáá iní-ndó-gá. Dico sáá nduu te natuha ñàhá-yu xii-gá te dácácu nihnu ñaha-gá xii-yu sá cundàhú iní ñàhá-gá dàtná ní quide ñaha-gá xii nchòhó. <sup>32</sup> Te Yá Ndiòxí ní dáñá-gá sá dúcáᵃ cùnduu saá iní nchaa ñáyiú cuèndá cuíní-gá cundàhú iní ñàhá-gá xii-yu.

<sup>33</sup> Te súuní vâha quide ñaha Yá Ndiòxí xii-o, te ío vâha xíní-gá nchaa cuèí sá ío andiú te cuèí sá ío ñuyú-a, te ducaᵃ ní vâha saá nchaa sá xíní tñuní-gá. Te ñá ndácú-ó cùtnuní iní-ó nâ cúú nchaa sá sání iní-gá cada-gá, te ní ñá ndácú-ó cùtnuní iní-ó nâcuáa nduu cuèndá nchaa sá quidé-gá. <sup>34</sup> Te núú tútú-gá càchí-xi: “Vá yóo ìᵃ cùtnuní iní-xi nâcuáa sání iní Yá Ndiòxí, te ní vâ yóo ìᵃ ndàcu dacahu iní ñàhá xii-gá nâcuáa càháᵃ-gá. <sup>35</sup> Te Yá Ndiòxí ñá túú quide yica iní-gá cada-gá sá vâha sá cúú-xí ñáyiú cuèndá ìᵃ sá sãñàhá-yu xii-gá chí ñá túú dùcaᵃ quide-gá”, duha càchí-xi núú tútú-gá. <sup>36</sup> Te ducaᵃ chí mee Yá Ndiòxí ní taxi ndecu-gá nchaandi túhú sá ío ñuyú, te diu-ni mee-gá táxí tñuní-gá nchaa sá ní taxi ndecu-gá, te nchaa cùu-xi cuèndá-gá. Te vitna chí ná càchí-ó sá ío càhnu cuu-gá ní caa ní quíhíᵃ. Te ducaᵃ na cùnduu.

## 12

### *Cada-o nâcuáa nduu vétú iní Yá Ndiòxí*

<sup>1</sup> Te vitna nchòhó ñáyiú ndècu ndihi-í ichi Xítóhó Jesucristú càchí tñuhu-í xii-ndo sá Yá Ndiòxí cùndàhú iní ñàhá-gá xii-o chindee ñaha-gá, núú xiáᵃ càháᵃ ndàhú-í núú-ndó sá dáñá-ndó mée-ndo núú ndàhá-gá, te cada iní-ndó sá cúú-ndó dàtná ìᵃ táhú sá nchító-ó ní nduu táhú-gá. Te cuu-ndo ñáyiú vâha ñáyiú cada nchaa nâcuáa nduu vétú iní Yá Ndiòxí chí ducaᵃ tâu-ndó càda-ndo sá cúú-xi-gá. <sup>2</sup> Te vâ cãchicúᵃ nihnu-gá-ndó càda-ndo datná xiquide nchaa ñáyiú ndècu ichi cuèhé ichi duha ndècu ñuyú-a, te vâ cúhúᵃ-gá iní-ndó ichi cuèhé ichi duha-áᵃ, chí mee-nâ sá vâha cuhuᵃ iní-ndó, te ducaᵃ te cutnùní iní-ndó nchaa nâcuáa cuíní Yá Ndiòxí cada-ndo, te nchaa sá cuíní-gá cada-ndo cùu-xi mee-ní sá vâha, sá ío vâha nduu vétú iní-gá, te cùu-xi nchaa sá xíní ñuhu-xi cada-ndo núú-gá.

<sup>3</sup> Te sá cuèndá chiúᵃ ní cundàhú iní ñàhá Yá Ndiòxí ní taxi-gá xii-í xiáᵃ núu na càháᵃ-í dóho-ndo vitna: Vá cání iní-ndó ìᵃ sá ñá túú tâu-ndó cání iní-ndó te cuahaᵃ-ndo sá ío

càhnu cuu-ndo. Te nchòhó ní sàndáá iní-ndó Yá Ndiòxí núu chindee ñaha-gá xii-ndo, te vitna chí cuáha cuèndá núu ná daha núú chiúᵃ-gá ndacu-ndo càda-ndo. <sup>4</sup> Te nchoo titní xichi cùu yiqui cuñú-ó, te ndi díᵃᵃ ndí díᵃᵃ chiúᵃ quide-xi ìᵃ-xi. <sup>5</sup> Te ducaᵃ sãtnahá tucu-xi cùu nchoo ñáyiú ndècu ndihi Xítóhó Jesucristú chí cuèí ná daha tñàhá-ó dico ìᵃ-ni cùu-o ndihi-gá, te ducaᵃ mée-o tucu ìᵃ-ni cùu-o.

<sup>6</sup> Te mee Yá Ndiòxí ní cundàhú iní ñàhá-gá xii-o ní taxi-gá chiúᵃ tâu-ó càda-o ìᵃ ìᵃ-ni-o te chindee ñaha-gá xii-o, te xíní ñuhu-xi cada-o nâcuáa nduu chiúᵃ ní taxi-gá cada-o. Te núu ní nduu táhú-ó núú-gá sá càháᵃ-ó tñuhu sá dácàhu iní ñàhá mée-gá xii-o te càháᵃ-ó nâcuáa sàndáá iní-ó chindee ñaha-gá xii-o, <sup>7</sup> àdi ní nduu táhú-ó núú-gá sá ío vâha chindee-o tñaha ñáyiú-o te diu-ni ducaᵃ càda-o, àdi ní nduu táhú-ó dānehé-ó ñáyiú tñuhu-gá te diu-ni ducaᵃ càda-o, <sup>8</sup> àdi ní nduu táhú-ó núú-gá sá dácàháᵃ-ó ñáyiú cãchicúᵃ nihnú-yu ichi-gá te diu-ni ducaᵃ càda-o, àdi ní nduu táhú-ó núú-gá sá cuãñaha-o xii tñaha ñáyiú-o sá nihí-ó ndècu ndihi-o te diu-ni ducaᵃ càda-o, dico ní yùhu ní iní-ó cuãñaha-o xii-yu, àdi ní nduu táhú-ó núú-gá taxi tñuní-ó te diu-ni ducaᵃ càda-o, te ní yùhu ní iní-ó càda-o, àdi ní nduu táhú-ó núú-gá chindee-o cuè ñáyiú ndècu ndihi tñundóho tñuhu ndàhú te diu-ni ducaᵃ càda-o, te ío cudíᵃ iní-ó càda-o chiúᵃ-áᵃ.

### *Nchaa nâcuáa tâu-xi cada nchaa ñáyiú ndècu ichi Xítóhó Jesucristú*

<sup>9</sup> Te cuu iní tñáhá ndisa-ndo ìᵃ ìᵃ-ndo, te daña-ndo nchaa sá cuèhé sá dúhá te cada-ndo mée-ní sá vâha. <sup>10</sup> Te ío cuu iní tñáhá-ndó, te cada-ndo cuèndá sá ìᵃ-ní ñáyiú cùu-ndo, te ìᵃ ìᵃ-ndo cání-gá iní-ndó cànehe yiñuhu núú tñáhá-ndó.

<sup>11</sup> Te nducu ndèe-ndo cada-ndo nchaa chiúᵃ tahu Xítóhó Jesucristú vâ tñhío-ndo, te cada-ndo ní yuhu ní iní-ndó sá cúú-xi-gá.

<sup>12</sup> Te ío cudíᵃ iní-ndó cùndecu-ndo chí ní ngùndecu ndihi-ndo tñuhu ndee iní sá cùndècu ndihi-ndo Xítóhó Jesucristú, te cada càhnu iní-ndó cuèí nándi na càda ñaha ñáyiú xii-ndo sá cuèndá-gá, te vâ dáñá ndèe-ndó càháᵃ ndihi-ndo Yá Ndiòxí.

<sup>13</sup> Te chindee tñaha-ndo te núu ío dava nchòhó ñáyiú ndècu ichi-gá ío ìᵃ sá cùmání xii-ndo, te ío vâha cuu iní-ndó còto-ndo ñáyiú véxi vehe-ndo.

<sup>14</sup> Te cãcáᵃ táhú-ndó núú Yá Ndiòxí cuèndá nchaa ñáyiú nándi quide ñaha xii-ndo, te cãcáᵃ táhú-ndó núú-gá sá ná chindee ñaha-gá xii-yu te ñá díú dà cãcáᵃ táhú-ndó núú-gá sá ná dàcuíta nihnu ñaha-gá xii-yu.



<sup>15</sup> Te núu ío ñáiyu cùdíí íní-xi te cudíí íní-ndó ndíhí-yu, te núu ío ñáiyu ndíhú íní-xi te ndíhú íní-ndó ndíhí-yu.

<sup>16</sup> Te cuu ñáiyu-ndo cùndecu-ndo, te vá cádá càhnu-ndo mee-ndo, te tnáhá tnúhu-ndo ndíhí nchaa ñáiyu ndáhú íní-xi, te vá cání íní-ndó sá ío-gá túha-ndo.

<sup>17</sup> Te vá nánchòcáva-ndo nàchinaa-ndo ñáiyu sá quidé ñáha ñáiyu xii-ndo, te ío nducu ndèe-ndo cada-ndo mee-ní sá váha nàcuáa cuu váha íní ñáiyu. <sup>18</sup> Te ío nducu ndèe-ndo cada-ndo sá ndácú-ndo cùndecu váha-ndo ndíhí nchaa ñáiyu. <sup>19</sup> Te nchòhó ñáiyu ío cùu íní-í, vá cání íní-ndó nàchinaa-ndo ñáiyu sá cádá ñáha ñáiyu xii-ndo, chí cundetu-ndo sá méé Yá Ndióxi ná nàchinaa-gá sá quidé ñáhá-yu xii-ndo, chí quee ndáá-xi nàcuáa càhá<sup>a</sup> Yá Ndióxi núu tútú-gá núu càchí-xi: “Yúhú dandòho-í-yu chí nàchinaa-í nchaa sá quidé-yu”, duha càchí-gá núu tútú-gá. <sup>20</sup> Te xini ñuhu tucu-xi cada-ndo nàcuáa càhá<sup>a</sup> tucu-xi ingá xichi núu tútú-gá núu càchí-xi: “Te núu ñáiyu cùu úhú íní ñáhá xii-ndo ñá tútú sá còhó sá cáxi-yu te cuañaha-ndo xii-yu, te núu duca<sup>a</sup> na càda-ndo te ío cucaha<sup>a</sup> núu-yu”, duha càchí-xi núu tútú-gá. <sup>21</sup> Te núu ío ñáiyu sá quidé ñáha tnaha ñáiyu-ndo xii-ndo te vá nánchòcáva-ndo nàchinaa-ndo sá quidé ñáhá-yu xii-ndo, chí cada-ndo sá váha sá cúu-xi-yu, te duca<sup>a</sup> te vá cádá-ndo sá ñá tútú táu-ndó càda-ndo núu Yá Ndióxi dàtná quidé-yu.

### 13

<sup>1</sup> Te nchaa ñáiyu táu-yu quindáá íní-yu nchaa cue téé cùchiu<sup>a</sup>, chí Yá Ndióxi ní cachí-gá sá cùndecu téé cùchiu<sup>a</sup> ñuyíu<sup>a</sup>, núu xiá<sup>a</sup> xindecu-güedé vitna. <sup>2</sup> Te nchaa ñáiyu ñá tútú sàndáá íní ñáhá xii cue téé cùchiu<sup>a</sup> ñá tútú tnàhá íní Yá Ndióxi sá dúcá<sup>a</sup> quidé-yu, chí mee-gá ní cachí-gá sá cùndecu-güedé. Te nchaa ñáiyu duca<sup>a</sup> ñá tútú sàndáá íní ñáhá xii cue téé cùchiu<sup>a</sup> nacháhu-yu sá dúcá<sup>a</sup> quidé-yu. <sup>3</sup> Te nchaa ñáiyu quide váha ñá tútú yúhú-yu cue téé cùchiu<sup>a</sup> chí quide váha-yu, dico nchaa ñáiyu ñá tútú quide váha chí xiyúhú-yu cue téé cùchiu<sup>a</sup>. Te vitna núu nchòhó cùiní-ndó sá vá yúhú-ndó cuè téé cùchiu<sup>a</sup> te chí cádá váha, te duca<sup>a</sup> te cáhá<sup>a</sup> váha-güedé cuendá-ndó. <sup>4</sup> Te Yá Ndióxi duca<sup>a</sup> ní cachí-gá cundecu-güedé cuendá cada-güedé sá ñá tútú ná cuu cundecu-ndo, te núu ñá tútú quide váha-ndo ndecu-ndo te quiyúhú íní-ndó núu-güedé, chí ñá tútú áú<sup>a</sup> ná cuu ndecu ndíhí-güedé tnúhu ndee íní dandòho-güedé nchaa ñáiyu ñá tútú quide váha, chí Yá Ndióxi duca<sup>a</sup> ní cachí-gá cundecu-güedé sá dúcá<sup>a</sup> càda-güedé dandòho-güedé nchaa ñáiyu ñá tútú quide váha. <sup>5</sup> Núu xiá<sup>a</sup> ío xini ñuhu-xi sá quindáá íní-ndó nchàa cue téé cùchiu<sup>a</sup>, te ñá díú sá

yúhú-ndó dandòho ñaha-güedé xii-ndo, chí cada-ndo sá cùtnúni íní-ndó sá cúu-xi ñá sá váha. <sup>6</sup> Chí díu cuendá xiá<sup>a</sup> sàcá<sup>a</sup>-ndó díhú<sup>a</sup> núu cuè téé cùchiu<sup>a</sup>, te duca<sup>a</sup> chí Yá Ndióxi duca<sup>a</sup> ní cachí-gá cundecu-güedé te díu-ná chíu<sup>a</sup> ndeé-güedé ñúhú íní-güedé.

<sup>7</sup> Te nacháhu-ndo nchàa sá táu-ndó núu nchàa ñáiyu táu-ndó núu-xi, te cuéi díhú<sup>a</sup> táu-ndó cuendá ñuhu-ndo núu cuè téé cùchiu<sup>a</sup> àdi nágá díhú<sup>a</sup> táu-ndó núu-güedé te nacháhu-ndo núu-güedé. Te ío-gá canehe-ndo sá yíñuhu núu nchàa ñáiyu cùnuu, te cáhá<sup>a</sup> váha-ndo ndíhí-yu. <sup>8</sup> Te vá dácuídó-ndó ndúu nacháhu-ndo sá táu-ndó núu tnàha ñáiyu-ndo, te cuu íní tnàhá-ndó ñá ñá-ndo. Te núu duca<sup>a</sup> quide-ndo ndecu-ndo ña, te quide-ndo nchaa nacuaá càhá<sup>a</sup> tnúhu sá sánú ìchi ñaha xii-o nacuaá cada-o cùndecu-o. <sup>9</sup> Te duha ndúu tnúhu càhá<sup>a</sup> Yá Ndióxi cuendá nchaa sá vá cúu càda-o: “Nchaa nchòhó cue téé vá càhá<sup>a</sup> ndíhí-ndo ñáiyu díhí te núu ñá díú ñàdíhí-ndó cúu-yu, te duca<sup>a</sup>-ní nchàa nchòhó cue ñáiyu díhí tucu vá càhá<sup>a</sup> ndíhí-ndo téte te núu ñá díú yí-ndo cuu-güedé, te vá cáhni-ndó tnàha ñáiyu-ndo, te vá díhú-ndó sá ndécú ndíhí-yu, te vá dácu-ndo cuéchi neñùu, te vá xíhó-ndó sá ndécú ndíhí tnaha ñáiyu-ndo”, nchaa xéhé càchí Yá Ndióxi sá vá cúu càda-o. Te tnúhu-a quide-o ndíhí nchaa dava-gá tnúhu sá sánú ìchi ñaha xii-o nacuaá cada-o cùndecu-o, te núu quide-o ingá tnúhu sá càchí-xi: “Cuu íní-ndó nchàa tnaha ñáiyu-ndo dàtná cúu íní-ndó mèe-ndo”, duha càhá<sup>a</sup> tnúhu-á. Te nchaa dava-gá quidé-ó te núu quide-o nacuaá càhá<sup>a</sup> tnúhu-a. <sup>10</sup> Te nchaa ñáiyu cùu íní tnàha ñáiyu-xi te ñá tútú quide úhú íní-yu tnàha ñáiyú-yu, te núu duca<sup>a</sup> cùu íní-yu tnàha ñáiyú-yu te quidé-yu nacuaá càhá<sup>a</sup> tnúhu sá sánú ìchi ñaha xii-o nacuaá cada-o cùndecu-o.

<sup>11</sup> Te duca<sup>a</sup> xini ñuhu-xi cada-ndo chí sa ní cutnúni íní-ndó nacuaá ta xica nduu cuáhá<sup>a</sup> ñuyíu<sup>a</sup>, te ní sáá nduu sá ío xini ñuhu-xi ndíxi túu íní-ó càda-o nchaa nacuaá càhá<sup>a</sup> Yá Ndióxi, chí vitna sa ní cuyatni-gá nduu nacuaa ñaha Xitohó Jesucristú xii-o dácúúxi ndéé cùtnàhá ní sàndáá íní-ó tnúhu-gá. <sup>12</sup> Te cada íní-ndó sá dàtná ñá tútú ná cuu cuyatni túndaá, duca<sup>a</sup> sàtnahá-xi cùu ñuyíu yíca cuéchi-a chí sa ta cuyatni nduu quidi tucu Xitohó Jesucristú, te núu xiá<sup>a</sup> xini ñuhu-xi dáña-o nchaa sá cuèhé sá dúhá te cada-o mèe-ní sá váha, te duca<sup>a</sup> te ní ñá sá cuèhé sá dúhá vá cùnúu-xi taxi tnuni ñáhá-xi xii-o, te duca<sup>a</sup> te vá cúu-gá-ó dàtná ñáiyu ndecu núu nées chí cuu-ná-ó dàtná ñáiyu ndecu núu díú. <sup>13</sup> Te cada-o nchàa nacuaá táu-xi cunduu cundecu-o dàtná táu-xi cada ñáiyu

ndècu ichi Xítoho Jesucristú, te vá quihí<sup>n</sup>-ó vico cuehé vico duha, te vá cúú-ó ñáyiú quihu, te ni vá càhá<sup>n</sup> ndihi-o ñáyiú ñíhi te núú ñá díú ñàdihí-ó cùú-yu, te duca<sup>n</sup>-ni cuè ñáyiú ñíhi tucu vá càhá<sup>n</sup> ndihí-yu téte te núú ñá díú yí<sup>n</sup>-yu cùu-güedé, te ni vá cùndècu-o ichi díú íní, te ni vá nàá-ó ndihi tnaha ñáyiú-o, te ni vá cúú-ó ñáyiú cuédú íní. <sup>14</sup> Te vitna nchòhó dañá-ndo mèe-ndo sá Xítoho Jesucristú ná chindee ñaha-gá xii-ndo càda váha-ndo cùndècu-ndo datná quidé mèe-gá ndécú-gá, te vá caní-gá íní-ndó càda-ndo datná ní xóo cada-ndo cùtnàhá ní cunuu nchàa sá cuèhé sá dúhá íní-ndó.

## 14

*Vá cuátñuhu tnaha-o nacúa ndècu-o ichi Xítoho Jesucristú*

<sup>1</sup> Te núú ñ<sup>n</sup> ñáyiú ndècu ichi Xítoho Jesucristú ñá túú təcú tnùní váha-yu nàcuáa cuini Yá Ndióxi cada-yu, te quehe<sup>n</sup> cuendá-ni-ndó-yu te vá ténáa tnàhá-ndó ndihí-yu. <sup>2</sup> Chi íó ñáyiú sàni íní sá cúú váha íní Yá Ndióxi sá cúú càxi-yu nàni ñihí-yu, te dava ñáyiú ñá túú cùtnuní váha íní-yu nàcuáa càhá<sup>n</sup> Yá Ndióxi te mee-ni yücú xéxi-yu. <sup>3</sup> Te ñáyiú xèxi nchaa núú sá ñihí-yu te vá dáquèe tíhú-yu ñáyiú ñá túú xèxi, te duca<sup>n</sup>-ni ñáyiú duca<sup>n</sup> ñá túú xéxi-á<sup>n</sup> vá cuátñuhú-yu nchaa ñáyiú duca<sup>n</sup> xèxi nchaa núú sá ñihí-xi-á<sup>n</sup>, chí tnàhá ñáyiú duca<sup>n</sup> xèxi nchaa núú sá ñihí-xi-á<sup>n</sup> quèhé<sup>n</sup> cuendá ñàhá Yá Ndióxi xii-yu. <sup>4</sup> Te ñá túú ndècu ndihi-o tnúhu ndee íní cuatñuhu-o ñáyiú xínu cuechi, chí mee ñáyiú cùu patròñ<sup>n</sup>-yu tàú-yu càhá<sup>n</sup>-yu te núú cùndáá ñáyiú xínu cuechi núú-yu àdi ñá túú cùndáá-yu. Te duca<sup>n</sup> sàtnahá-xi cùu ñáyiú xínu cuechi núú Yá Ndióxi, chí mee-gá càhá<sup>n</sup>-gá te núú nása quidé-yu, te ñi-ni mee-gá cada te cundáá-yu cundecú-yu núú-gá.

<sup>5</sup> Te na càchí tnúhu tucu-í xii-ndo sá íó ñáyiú càchí sá íó dava nduu ío càhnu cuu-xi, te íó tucu dava ñáyiú càchí-yu sá ñ<sup>n</sup>-ni cuu-xi nchaa-ni nduu, te xini ñuhu-xi sá cùtnuní ndáá íní-yu sá ndáá cúú-xi nàcuáa càhá<sup>n</sup>-yu ñ<sup>n</sup> íí<sup>n</sup>-yu. <sup>6</sup> Te ñáyiú cànehe íí dava nduu quidé-yu sá nêhé-yu sá yíññuhu núú Yá Ndióxi, te ñáyiú càchí sá ñ<sup>n</sup>-ní cùu-xi nchaa-ni nduu quidé-yu sá nêhé-yu sá yíññuhu núú Yá Ndióxi tnàhá-yu. Te ñi-ni duca<sup>n</sup> sàtnahá-xi cùu nchaa ñáyiú xèxi nchaa nàni ñihí-yu, chí quidé-yu sá nêhé-yu sá yíññuhu núú Yá Ndióxi, chí ndacá<sup>n</sup> tãhú-yu núú-gá cuendá nchaa sá ñihí-yu. Te ñi-ni duca<sup>n</sup> sàtnahá-xi cùu nchaa ñáyiú ñá túú xèxi nchaa núú sá nchító-ó chí quidé-yu sá nêhé-yu sá yíññuhu núú Yá Ndióxi, te ndacá<sup>n</sup> tãhú-yu núú-gá cuendá nchaa sá ñihí-yu.

<sup>7</sup> Te nchoo cuèi vitna ndècu vívú-ó àdi cuèi na cúú-ó dico ñá díú cuendá mèe-ó cúú-ó. <sup>8</sup> Chi vitna ndècu vívú-ó te ndècu-o sá cúú-xi Xítoho Jesucristú àdi cuèi na cúú-ó dico cuú-ó ñi-ni sá cúú-xi-gá, núú xiá<sup>n</sup> cuèi vitna ndècu vívú-ó àdi cuèi na cúú-ó dico ñi-ni Xítoho Jesucristú cúú cuendá ñàhá-gá xii-o. <sup>9</sup> Chi Xítoho Jesucristú ní xihí-gá te ní ndoto-gá, te vitna cùu-gá Xítoho nchaa ñáyiú, cuèi ñáyiú xindecu vívú te cuèi ñáyiú ní xihí.

<sup>10</sup> Te nchòhó, ñá túú nduu váha-xi cuatñuhu tnàha-ndo nacúa ndècu-ndo ichi Xítoho Jesucristú, te ni ñá túú nduu váha-xi daquèe tíhú tnàhá-ndó, chí nchaa-o sáa nduu cùndècu-o núú Xítoho Jesucristú, te mee-gá càchí-gá te núú ní quide ndáá-ó àdi ñá túú ní quide ndáá-ó. <sup>11</sup> Te Yá Ndióxi càchí-gá núú tütú-gá:

Yúhú Yá Ndióxi ndécú-í càchí tnúhu ndáá-í xii-ndo sá nchaa ñáyiú ngüñí xití-yu núú-í,

te nchá-yu càhá<sup>n</sup>-yu sá yùhú cúú-í Ndióxi. Duha càchí Yá Ndióxi núú tütú-gá. <sup>12</sup> Núú xiá<sup>n</sup> nchaa-o ndí díí<sup>n</sup> nàcani tnúhu-o núú Yá Ndióxi nchaa sá ní quide-o.

*Vá dácuíta ñihnu tnàha-o*

<sup>13</sup> Núú xiá<sup>n</sup> vá cuátñuhu tnaha-gá-ndó, te cada yica-ndo càda-ndo mee-ni sá váha, te vá cadá-ndó ñ<sup>n</sup> sá ñá túú tàú-ndó càda-ndo cuendá sá vá cuíta ñihnu dava ñáyiú ndècu ndihi-ndo ichi Xítoho Jesucristú. <sup>14</sup> Te yúhú ndécú ndihi-í Xítoho Jesucristú te cùtnuní ndáá íní-í sá ncháá núú sá cúú càxi-o cuu-ni caxi-o te vá cúú cuechi. Te ñáyiú sàni íní sá vá cúú càxi-yu te núú na càxi-yu te cuu cuechi xii-yu. <sup>15</sup> Te nchòhó, te núú cuendá sá xéxi-ndó nchaa núú sá cúú càxi-ndo, cuendá xiá<sup>n</sup> ñá túú-gá cúú váha íní nchaa ñáyiú ndècu ndihi-ndo ichi Xítoho Jesucristú, te ñá túú-gá quidé-ndó sá cúú íní ndisa-ndó-yu te núú duca<sup>n</sup> na càda-ndo, te núú ñ<sup>n</sup> sá sàni íní-ndó càxi-ndo te cùtnuní íní-ndó sá xiá<sup>n</sup> cada-xi cuíta ñihnu ñáyiú ndècu ndihi-ndo ichi Xítoho Jesucristú te vá càxi-ndó xiá<sup>n</sup> te núú duca<sup>n</sup>, chí Xítoho Jesucristú ní xihí-gá cuendá-yu. <sup>16</sup> Te núú ñ<sup>n</sup> sá quidé-ndó sàni íní-ndó sá cúú-xi ñ<sup>n</sup> sá váha, te ñáyiú càchí-yu sá ñá túú váha te vá cadá-ndó cuendá sá vá càhá<sup>n</sup> cuèhé-yu cuendá-ndó. <sup>17</sup> Te sá yíndàha ñaha Yá Ndióxi xii-o xiá<sup>n</sup> ío xini ñuhu-xi cada ndáá-ó cùndècu-o, te cundecu váha ndihi tnàha-o, te cudíí íní-ó cùndècu-o chí Espiritú-gá ndécú ndihi ñaha-xi xii-o, te nchaa xéhé ío-gá cùnunu dacúúxi sá cóhó sá càxi-ó. <sup>18</sup> Te nchaa ñáyiú duca<sup>n</sup> quide nchaa sá ío-gá xini ñuhu-xi, xínu cuechí-yu núú Xítoho Jesucristú, te sá dúcá<sup>n</sup> quidé-yu te nduu vétú íní Yá Ndióxi, te cùdíú-yu núú ñáyiú.

19 Te nchoo chí ná ndùcu-o nacuaá cada-o cùndecu ndihi váha tnàha-o, te nducu tùcu-o nacuaá cada-o chindee tnùhu tnàha-o nacuaá cuita cundáá-gá-ó núú Xítóhó Jesucristú quíhí<sup>n</sup>. 20 Te ñá díú sá cuèndá ì<sup>n</sup> núú sá xéxí-ó, te dàquee tìhù-ó sá váha ní quide ñaha Yá Ndióxi xii tnàha ñáyiu-o. Te na càchi tnùhu ndáá-í xii-ndo sá ncháá-ní núú sá cúú càxi-o, te dicó-ni sá ñà túú ndùu váha-xi núú sá cuèndá-ni sá càxi-ó ì<sup>n</sup> núú sá cúú càxi-o cúta nihnu ì<sup>n</sup> tnàha ñáyiu-o. 21 Te váha-gá sá vâ càxi-ó cùñú te vâ cóhó ndidí, te ni ñà túú ngá cada-o te núu xito-o sá xiá<sup>n</sup> cada te ngúita tnàha ñáyiu-o cada-yu sá ñà túú váha, àdi xito-o sá xiá<sup>n</sup> cada te ngúita-yu cani ì<sup>n</sup> cani úú iní-yu cundecú-yu ichi Xítóhó Jesucristú, te vâ cundáá-gá-yu núú-gá te núu duca<sup>n</sup> na càda-o. 22 Te núu ì<sup>n</sup> sá váha sàni iní-ó càda-o, te vâ dátúu-o núú ñáyiu chí mee-ni núú Yá Ndióxi dátúu-o. Te nchoo cùu-o ñáyiu ío váha táhù-xi te núu cùtnuní ndáá iní-ó sá quidé ndáá-ó núu nándi cùu sá quidé-ó, te cùtnuní iní-ó sá ñà díú ì<sup>n</sup> cuéchi cùu-xi sá quidé-ó. 23 Te núu nchoo sàni iní-ó sá quidé váha-o àdi ñà túú quide váha-o òré xéxí-ó ì<sup>n</sup> núú sá xéxí-ó, te cuu cuéchi xii-o te núu duca<sup>n</sup> na càda-o. Te duca<sup>n</sup> cùu cuéchi xii-o chí ñà túú ì<sup>n</sup>-ni sá sàni iní-ó, chí nchaa núú sá quidé-ó sàni ì<sup>n</sup> sàni úú iní-ó núu váha-ni àdi ñà túú váha-ni, te cuu cuéchi xii-o sá dúcá<sup>n</sup> quide-o.

**15**

*Cada-o sá váha sá cúú-xi tnàha ñáyiu-o*

1 Te nchoo ñáyiu ío váha sàndáá iní ñáhá xii Xítóhó Jesucristú, xini ñuhu-xi cuáñaha-o tnùhu ndee iní xii ñáyiu ñà túú nihí ndéé cùndecu ichi-gá, te vâ cáda-ó mée-ni sá cúú-xi mée-o. 2 Te cada-o sá váha nàcuáa cuu váha iní tnàha ñáyiu-o cuèndá cuu-xi sá váha sá cúú-xi-yu, te duca<sup>n</sup> cuita nihí ndéé-gá-yu quindáá iní-yu Xítóhó Jesucristú. 3 Te Xítóhó Jesucristú ñà túú ní quide-gá mee-ni sá cúú váha iní mée-gá, te ní quee ndáá-xi nàcuáa càhá<sup>n</sup>-xi núú tütú Yá Ndióxi nàcuáa ní xáha<sup>n</sup> Xítóhó Jesucristú xii-gá, te càchi-xi: “Nchaa ñáyiu cùu úhú iní ñáhá xii-n ní xicuéhé ní xíduha ñáhá-yu xii-í”, duha càhá<sup>n</sup>-xi núú tütú Yá Ndióxi nàcuáa ní xáha<sup>n</sup> Xítóhó Jesucristú xii-gá. 4 Te ndéé sanaha ní ngúndéé nchaa tnùhu Yá Ndióxi núú tütú-gá, te duca<sup>n</sup> ní ngúndéé cuèndá dacuáha-o, te tnùhu-á<sup>n</sup> dánéhé ñáhá-xi cùnduu cahnu iní-ó cuéi nándi nà váha-o cùndecu-o ichi-gá, te sá xii tnùhu-á<sup>n</sup> te vâ ndihú-gá iní-ó cùndecu-o, te diu-ni sá xii tnùhu-á<sup>n</sup> cundecu ndihi-o tnùhu ndee iní. 5 Te Yá Ndióxi quidé-gá ndécú ndihi-o tnùhu càhnu iní, te diu-ni-gá quidé-gá ñà túú ndihú iní-ó ndécú-o. Te xicá<sup>n</sup> táhù-í núú-gá sá díú-gá ná

cáda te cuu ì<sup>n</sup>nuu-ndo cùndecu-ndo datná ní quide mee Xítóhó Jesucristú cùtnáhá ní xíndecu-gá ñuyúú-a. 6 Te duca<sup>n</sup> ncháa-ndo cuu ì<sup>n</sup>nuu-ndo, te danihí tnáhá-ndó yócó tächí-ndó te cachí-ndó sá ío càhnu cuu Yá Ndióxi Yáa cúú Tátá Xítóhó Jesucristú.

*Ñáyiu ñà túú cùu ñáyiu isràél ní nñi-yu tnùhu Xítóhó Jesucristú*

7 Te núu xiá<sup>n</sup> chí quéhé<sup>n</sup> cuèndá tnáhá dàtná ní quide Xítóhó Jesucristú ní quehe<sup>n</sup> cuèndá ñáhá-gá xii-o, te núu duca<sup>n</sup> na càda-ndo te ío cuu càhnu Yá Ndióxi. 8 Te na càchi tnùhu-í xii-ndo sá Xítóhó Jesucristú ní quixi-gá ní quide-gá sá váha sá cúú-xi ñáyiu isràél, te sá dúcá<sup>n</sup> ní quide-gá xiá<sup>n</sup> cùtnuní ndáá iní-ó sá Yá Ndióxi quidé-gá ì<sup>n</sup> sá càhá<sup>n</sup>-gá, chí Xítóhó Jesucristú ní quide-gá nchaa nàcuáa ní xáha<sup>n</sup> Yá Ndióxi xii cue ñani tnáhá-ó ní xíndecu ndéé sanaha. 9 Te duca<sup>n</sup> ní quide Xítóhó Jesucristú sá váha sá cúú-xi ñáyiu isràél cuèndá nchaa ñáyiu ñà túú cùu ñáyiu isràél cachí-yu sá ío càhnu cuu Yá Ndióxi, te duca<sup>n</sup> quésahá-yu chí ío cùndahú iní ñáhá-gá chindéé ñaha-gá xii-yu, te quee ndáá-xi nàcuáa càhá<sup>n</sup>-xi núú tütú Yá Ndióxi núú cachí-xi:

Yúhú cachí-í sá ío càhnu cuu-n núú ncháa ñáyiu ñà túú cùu ñáyiu isràél, te cata-í ndudú chiñuhu ñaha-í xii-n. Duha càchi-xi núú tütú-gá 10 Te càchi tucu-xi núú tütú-gá:

Te nchòhó ñáyiu ñà túú cùu ñáyiu isràél ío chí cùdí iní ndihi ñáyiu isràél ñáyiu ndécú ndihi-í.

Duha càchi-xi núú tütú-gá. 11 Te càchi tucu-xi ingá xichi núú tütú-gá: Nchaa nchòhó ñáyiu ñà túú cùu ñáyiu isràél chí càhá<sup>n</sup> sá ío càhnu cuu Yá Ndióxi, te nchaa ñáyiu na càhá<sup>n</sup>-yu sá ío càhnu cuu-gá.

Duha càchi-xi núú tütú-gá. 12 Te ndíi Chàia càchi tucu ndíi núú tütú Yá Ndióxi: Coo ì<sup>n</sup> ñani tnáhá ndíi Isàí téé ní xíndecu ndéé sanaha, te téé-á<sup>n</sup> taxi tnùnì-dé cue ñáyiu ñà túú cùu ñáyiu isràél,

te ñáyiu-á<sup>n</sup> cundee cùu cahnu iní ñáhá-yu xii-dé. Duha ní càhá<sup>n</sup> ndíi Chàia càchi-xi núú tütú-gá.

13 Te xicá<sup>n</sup> táhù-í núú Yá Ndióxi Yáa ní taxi tnùhu ndee iní ndécú ndihi-o sá mée-gá ná càda ío cudí iní-ndó cùndecu-ndo, te duca<sup>n</sup> ío váha cundecu iní-ndó núú-gá chí sàndáá iní-ndó-gá, te duca<sup>n</sup> Espiritú-gá ná càda te uu<sup>n</sup>-gá uu<sup>n</sup>-gá cuita ngúndecu ndihi-ndo tnùhu ndee iní quíhí<sup>n</sup> sá cáda váha ñaha-gá xii-ndo.

14 Te nchòhó ñáyiu ndécú ndihi-í ichi Xítóhó Jesucristú cùtnuní ndáá iní-í sá nchòhó ío váha iní-ndó, te duca<sup>n</sup> ío váha

cùtnuní iní-ndó nchàa tnúhu váha, te duca<sup>n</sup> ío dásahú tnáhá-ndó nàcuáa cundecu-ndo. <sup>15</sup> Te dava tnúhu ní chídó tnùn-í núú tütú-a cùu-xí tnúhu sá ío cáhá<sup>n</sup>-í dóho-ndo, te duca<sup>n</sup> ní tee-í cuendá sá nchòhò dandàcu iní-ndó tnúhu-á<sup>n</sup>, te ní tee-í chí Yá Ndióxi ní cundàhú iní ñáhá-gá xii-í ní taxi-gá chiú<sup>n</sup> quide-í <sup>16</sup> xínú cuèchi-í núú Xítohó Jesucristú cáhá<sup>n</sup>-í tnúhu-gá núú ñáiyu ñá túú cùu ñáiyu isràél. Te tnúhu-á<sup>n</sup> cúu-xí tnúhu sá sánú ichi ñaha xii-o nacuáa naníhí táhú-ó, te duca<sup>n</sup> dānehé-í ñáiyu ñá túú cùu ñáiyu isràél tnúhu Yá Ndióxi cuendá cuú-yu dátá ñ<sup>n</sup> sá ndúú táhú-gá, te Espíritú-gá quide-xí cúu-yu ñáiyu cùdiu núú-gá, te cùu váha iní ñáhá-gá xii-yu.

<sup>17</sup> Te ío váha cùu iní-í cuendá nchaa chiú<sup>n</sup> quide-í sá cúu-xí Yá Ndióxi, chí Xítohó Jesucristú ndécú ndíhí ñaha-gá xii-í. <sup>18</sup> Te mee-ní nacuáa quide Xítohó Jesucristú chindée ñaha-gá xii-í xiá<sup>n</sup>-ní cáhá<sup>n</sup>-í, te sá dúcá<sup>n</sup> quide-gá xiá<sup>n</sup> ní sándáá iní cue ñáiyu ñá túú cùu ñáiyu isràél tnúhu-gá. Te duca<sup>n</sup> chí ní chindee ñaha-gá xii-í ní cáhá<sup>n</sup>-í tnúhu-gá te duca<sup>n</sup>-ní ní chindee ñaha-gá xii-í ní quide-í titní núú sá ní quide-í núú-yu ní xiní-yu. <sup>19</sup> Te Espíritú Yá Ndióxi ní quide-xí ní quide-í titní núú sá vā yòo tnàhí ndacu cada ní xiní-yu te ío ní cuñúhu-yu. Te nchaa ñuú ní sáhá<sup>n</sup>-í ní cáhá<sup>n</sup>-í tnúhu Xítohó Jesucristú núú ñáiyu cuéí ndéé ñuú Jerusalén, te cuéí ndéé distritú Ilíricú, núu nchaa ñuú-á<sup>n</sup> ní sáhá<sup>n</sup>-í ní cáhá<sup>n</sup>-í núú-yu tnúhu sá cáhá<sup>n</sup> nacuáa naníhí táhú-ó. <sup>20</sup> Te duca<sup>n</sup> ío nducu ndee-í cáhá<sup>n</sup>-í tnúhu sá cáhá<sup>n</sup> nacuáa naníhí táhú-ó núú vátá ñihí-gá-yu tnúhu cuendá Xítohó Jesucristú, te duca<sup>n</sup> quide-í chí ñá túú cuiní-í quíhí<sup>n</sup>-í cáhá<sup>n</sup>-í tnúhu-gá núú sá xíndecu ñáiyu cáhá<sup>n</sup> tnúhu-gá. <sup>21</sup> Te quide-í nacuáa cáhá<sup>n</sup>-xí núú tütú Yá Ndióxi núú cächí-xi: Ñáiyu vátá ñihí-gá tnúhu cuendá Yá quixi ñuyú te ñihí-yu,

te duca<sup>n</sup> tēcú tnùn-í-yu tnúhu-gá.  
Duha cächí-xi núú tütú-gá.

#### *Té Páblú cuiní-dé quíhí<sup>n</sup>-dé ñuú Rómá*

<sup>22</sup> Te sá dúcá<sup>n</sup> cáhá<sup>n</sup>-í tnúhu-gá nūu xiá<sup>n</sup> ñá túú ní ndacu-í quixi-í quixi coto ñaha-í xii-ndo cuéí duca<sup>n</sup>-ní sàni iní-í quixi coto ñaha-í. <sup>23</sup> Te ní cuu titní cuíá duca<sup>n</sup>-ní sàni iní-í quixi coto ñaha-í xii-ndo, te vitna ní ndíhí-í nchaa íha ní cáhá<sup>n</sup>-í tnúhu Xítohó Jesucristú núú nchaa ñáiyu. <sup>24</sup> Núu xiá<sup>n</sup> sání iní-í sá ndúu na quíhí<sup>n</sup>-í nàció<sup>n</sup> Èspañá te yáha cáhá<sup>n</sup>-í quini-í nása ndecu-ndo, te dāvá-á<sup>n</sup> ío cudíí iní-ó cundecu tnaa-o, te duca<sup>n</sup> te órè nucúhu<sup>n</sup> tucu-í ichi te cada ndee iní-ndó chindee ñaha-ndo xii-í. <sup>25</sup> Te vitna quíhí<sup>n</sup>-í ñuú Jerusalén quínehe-í sá ndúú táhú ñáiyu ndecu ichi Xítohó Jesucristú xíndecu yacá<sup>n</sup>. <sup>26</sup> Te ñáiyu xíndecu ichi Xítohó

Jesucristú ndécú distritú Macèdoniá, ndíhí distritú Acáyá ní cuu ñ<sup>n</sup>núu-yu ní sacá<sup>n</sup> tnáhá-yu sá ndúú táhú ñáiyu ndàhú xíndecu ichi-gá ndécú ñuú Jerusalén. <sup>27</sup> Te duca<sup>n</sup> tnàhí ní cudíí iní-yu cadá-yu, te duca<sup>n</sup> tnàhí táu-yu cadá-yu chindéé-yu ñáiyu xíndecu ñuú Jerusalén. Te ñáiyu Macèdoniá ndíhí ñáiyu Acáyá-á<sup>n</sup> ñá túú cuú-yu ñáiyu isràél. Te ñáiyu xíndecu ñuú Jerusalén cúu-yu mee-ní ñáiyu isràél, te duca<sup>n</sup> táu-yu cadá-yu chí sá cuendá ñáiyu isràél-á<sup>n</sup> ní ñihí-yu tnúhu sá cáhá<sup>n</sup> nacuáa naníhí táhú-yu, nūu xiá<sup>n</sup> táu-yu chindee ñáhá-yu ndíhí nchaa sá ñihí-yu. <sup>28</sup> Te sátá ná yáha quínguáha cuendá-í-yu sá ndúú táhú-yu, te duca<sup>n</sup> te dátunúí quee-í quíhí<sup>n</sup>-í nàció<sup>n</sup> Èspañá, te ichi yáha-í yáha cáhá<sup>n</sup>-í núú ndécú-ndó. <sup>29</sup> Te cùtnuní ndáá iní-í sá órè ná quexio-í núú ndécú-ndó, te Xítohó Jesucristú ío chindee ñaha-gá xii-í cáhá<sup>n</sup>-í tnúhu-gá núú-ndó nacuáa ío váha cundecu-ndo ichi-gá.

<sup>30</sup> Te nchòhó ñáiyu ndecu ndíhí-í ichi Xítohó Jesucristú cáhá<sup>n</sup> ndàhú-í núú-ndó sá ío chindee ñaha-ndo xii-í cáhá<sup>n</sup> ndíhí-o Yá Ndióxi cuendá-í, te duca<sup>n</sup> càda-ndo chí ndecu ndíhí-ndo Xítohó Jesucristú. Te Espíritú Yá Ndióxi quide-xí cùu iní tnáhá-ó ñ<sup>n</sup> ñ<sup>n</sup>-o. <sup>31</sup> Te ío chí cacá<sup>n</sup> táhú núú Yá Ndióxi sá ná còto ñaha-gá xii-í, te ñá túú ná cada ñaha nchaa ñáiyu ñá túú sándáá iní ñáhá xii-gá xíndecu distritú Júdeá. Te cacá<sup>n</sup> táhú tucu-ndo núú-gá sá ncháá sá cānehé-í quíhí<sup>n</sup> nduu táhú ñáiyu ndecu ichi-gá ndécú ñuú Jerusalén ío váha cuu iní-yu quehe<sup>n</sup> cuendá-yu. <sup>32</sup> Te duca<sup>n</sup> càda-ndo cuendá sá nūu Yá Ndióxi ná cächí-gá te ío cudíí iní-í órè quexio-í núú ndécú-ndó, te ío váha cuu iní-í cundecu ndíhí ñaha tnàí xii-ndo. <sup>33</sup> Te vitna xicá<sup>n</sup> táhú-í núú Yá Ndióxi Yáá quidé ío váha cùu iní-ó ndecu-o sá ná chindee chítú ñaha-gá xii-ndo nchaa-ndo. Te duca<sup>n</sup> na cùnduu.

## 16

#### *Té Páblú quidé ndèe iní-dé ñáiyu ndecu ñuú Rómá*

<sup>1</sup> Te yúhú tendaha-í tá Fèbè quixi-xi núú ndécú-ndó, te tnáhá-xi ndecu-xi ichi Xítohó Jesucristú, te quide-xi chiú<sup>n</sup> Yá Ndióxi sá cúu-xí ñáiyu ndecu ichi Xítohó Jesucristú xíndecu ñuú Cèncreá. <sup>2</sup> Te cuiní-í sá ío váha cuu iní-ndó quehe<sup>n</sup> cuendá-ndó-xí, chí ndecu ndíhí-xi Xítohó Jesucristú, te cada-ndo nacuáa táu-xi cunduu dátá táu-xi cada ñáiyu ndecu ichi-gá, te ío chindee-ndo-xi te nūu ná cúú sá xíní ñuhu-xi, chí tnáhá-xi ío chindee-xi cue ñáiyu ndecu ichi Xítohó Jesucristú, te tnáhá yúhú duca<sup>n</sup> ío chindee-xi.

<sup>3</sup> Te cuñaha-ndo ío na càda ndee iní té Àquilú ndíhí ñadhí-dé tá Priscilá, chí ñáiyu-á<sup>n</sup> ní quide chiú<sup>n</sup>-í ndíhí-yu ní quide-ndí chiú<sup>n</sup>

Xítohó Jesucristú. <sup>4</sup> Chi mèe-yu ní cácu cuú-yu sá cuendá sá ní dácácu ñàhá-yu xii-í sá ní yáha-í, núu xiá<sup>n</sup> ío ndácá<sup>n</sup> táhú-í núu-yu, te ñá díu-ní yúhú duca<sup>n</sup> ío ndácá<sup>n</sup> táhú-í núu-yu chi tnáhá nchaa ñáyiu ñá túú cùu ñáyiu isráel xindecu ichi-gá xindecu nchaa xichí duca<sup>n</sup> ío ndácá<sup>n</sup> táhú-yu núú té Àquilú ndihi núú ñadhí-dé tá Priscilá. <sup>5</sup> Te cúñaha tucu-ndo sá ío na càda ndee iní nchaa ñáyiu xindecu ichi Xítohó Jesucristú tàcá vehe té Àquilú ndihi tá Priscilá dácúahá-yu tnúhu-gá, te cúñaha tucu-ndo sá ío na càda ndee iní té Epènetú chi tnáhá-dé ío ñúhu iní-í-dé, chi té-á<sup>n</sup> cúú-dé téé díhna nuu ní sándáá iní tnúhu Xítohó Jesucristú distritú Acáyá. <sup>6</sup> Te cúñaha tucu-ndo sá ío na càda ndee iní tá Màriá xichí ndécú ndihi-ndo, xichí ío ndúcu ndee xinu cuechi núú Xítohó Jesucristú. <sup>7</sup> Te cúñaha tucu-ndo sá ío na càda ndee iní cue téé cuu ndi mee-í té Andrónicú ndihi té Júnias, chi tnáhá-güedé ní xíhi ndihi ñaha-güedé xii-í vecaá, te ío cùdiu-güedé núú ncháa cue téé ní táuchíú<sup>n</sup> Jesús cáhá<sup>n</sup> tnúhu-gá. Te díhna-gá-güedé ní sándáá iní-güedé tnúhu Xítohó Jesucristú dácúúxí yúhú.

<sup>8</sup> Te cúñaha-ndo sá ná càda ndee iní té Àmpliás chi tnáhá-dé ío ñúhu iní-í-dé, te ndécu-dé tnáhá-dé ichi Xítohó Jesucristú. <sup>9</sup> Te cúñaha tucu-ndo xii té Bánú téé cùndihi ñaha xii-o quide-o chiú<sup>n</sup> Xítohó Jesucristú sá ná càda ndee iní-dé, te cúñaha tucu-ndo xii té Éstaquis sá ná càda ndee iní-dé chi tnáhá-dé ío ñúhu iní-í-dé. <sup>10</sup> Te cúñaha tucu-ndo xii té Àpelés sá ío na càda ndee iní-dé, chi té-á<sup>n</sup> ío váha cùndáá-dé núú Xítohó Jesucristú, te cúñaha tucu-ndo xii ñáyiu xindecu vehe té Aristóbulú sá ío na càda ndee iní-yu. <sup>11</sup> Te cúñaha-ndo xii té Herodión téé cùu ndi mee-í sá ío na càda ndee iní-dé, te cúñaha-ndo xii ñáyiu ndécu ichi Xítohó Jesucristú xindecu vehe té Nàrcisú sá ío na càda ndee iní-yu. <sup>12</sup> Te cúñaha-ndo xii tnáhá tá Trifená ndihi tá Trifós sá ío na càda ndee iní-yu, chi tnáhá-yu quidé-yu chiú<sup>n</sup> Xítohó Jesucristú. Te tnáhá tá Pèrsidá xichí ndécú ndihi-o ichi Xítohó Jesucristú cúñaha-ndo xii-xi sá ío na càda ndee iní-xi, chi tnáhá-xi ío ndúcu ndee-xi quide-xi chiú<sup>n</sup> Xítohó Jesucristú. <sup>13</sup> Te cúñaha-ndo tnáhá té Rúfú téé ío váha sándáá iní tnúhu Xítohó Jesucristú sá ío na càda ndee iní-dé ndihi náná-dé, chi ñaha-á<sup>n</sup> quidé iní-í sá cúú-á<sup>n</sup> dátá náná-í. <sup>14</sup> Te cúñaha-ndo sá ío na càda ndee iní té Àsincritú, ndihi té Flègonté, ndihi té Hèrmás, ndihi té Pátrobás, ndihi té Hèrmés, ndihi nchaa dava-gá cue ñáyiu ndécu ndihi-o ichi Xítohó Jesucristú xindecu ndihi-güedé. <sup>15</sup> Te cúñaha tucu-ndo sá ío na càda ndee iní té Filólogó, ndihi tá Juliá, ndihi té Nèreú, ndihi cúha té Nèreú, ndihi tá Òлимпás, ndihi nchaa dava-gá ñáyiu sándáá iní tnúhu Xítohó

Jesucristú xindecu ndihí-yu.

<sup>16</sup> Te ío yíñúhu cada ndee iní tnáhá-ndó ñ<sup>n</sup> ñ<sup>n</sup>-ndo. Te nchaa ñáyiu tàcá nchaa íha dácuaaha tnúhu Xítohó Jesucristú quidé ndée iní ñàhá-yu xii-ndo.

<sup>17</sup> Te nchòhó ñáyiu ndécu ndihi-í ichi Xítohó Jesucristú cáhá<sup>n</sup>-í dóho-ndo sá càdá cuendá-ndó núu ío ñáyiu quide nacuaáa vá cúú ñ<sup>n</sup>nuu-ndo cundecu-ndo, chi ñáyiu-á<sup>n</sup> sánú ichi ñàhá-yu ñ<sup>n</sup> ichi ñá túú váha, chi ñá túú ñ<sup>n</sup>-ní cuu-xi tnúhu cáhá<sup>n</sup>-yu ndihi tnúhu sá ní níhí-ndó ndécu ndihi-ndo, te ñáyiu duca<sup>n</sup> xiquide vá níhí tnáhá-gá-ndó ndihí-yu. <sup>18</sup> Chi ñáyiu-á<sup>n</sup> ñá túú quidé-yu chiú<sup>n</sup> sá cúú-xí Xítohó Jesucristú, chi mee-ni sá cúú-xí mèe-yu quidé-yu, te mee-ni ncháa tnúhu sá ío víi ío váha cuáhá<sup>n</sup> cáhá<sup>n</sup>-yu òré cuáhá<sup>n</sup>-yu dándahú-yu nchaa ñáyiu ío yáchí sándáá iní-xi ñ<sup>n</sup> tnúhu. <sup>19</sup> Te nchaa ñáyiu níhí-yu tnúhu sá nchòhó sándáá iní-ndó tnúhu Xítohó Jesucristú, núu xiá<sup>n</sup> ío cùdíí iní-í. Te cuíní-í sá nchòhó ío váha cutnúmí iní-ndó nácuaáa cada-ndo mèe-ni sá váha, te vá cání iní-ndó càda-ndo datná xiquide nchaa ñáyiu ndécu ichi cuehé ichi duha. <sup>20</sup> Te Yá Ndióxi Yáá quidé ío váha cùu iní-ó ndécu-o ío ndihi cada-gá cuendá sá saculhná ñá túú-gá ná cada ñaha-xi xii-ndo, te xicá<sup>n</sup> táhú-í núú Xítohó Jesucristú sá ío na chindee chítúu ñaha-gá xii-ndo.

<sup>21</sup> Te té Timúteú téé quide ndihi-í chiú<sup>n</sup> Xítohó Jesucristú íha quide ndee iní ñàhá-dé xii-ndo, te tnáhá té Lúciú, ndihi té Jásón, ndihi té Sosipátér cue téé cùu ndi mee-í quidé ndée iní ñàhá-güedé xii-ndo.

<sup>22</sup> Te tnáhá yúhú té Tèrciú téé càdúha tutú-a cuendá té Páblú quidé ndee iní ñàhá-í xii-ndo, chi ñ<sup>n</sup>-ní cùu-o ndihi Xítohó Jesucristú.

<sup>23</sup> Te tnáhá té Gáyú téé dii vèhe-xi ndecu-í quidé ndée iní ñàhá-dé xii-ndo, te diu-dé ní taxi núu-dé vehe tàcá ñáyiu dácuahá-yu tnúhu Xítohó Jesucristú. Te tnáhá té Èrastú téé yíndaha díhú<sup>n</sup> ñúú quidé ndée iní ñàhá-dé xii-ndo, te tnáhá té Cuártú téé ndécu ndihi-o ichi Xítohó Jesucristú quidé ndée iní ñàhá-dé xii-ndo.

<sup>24</sup> Te xicá<sup>n</sup> táhú-í núú Xítohó Jesucristú sá ío na chindee chítúu ñaha-gá xii-ndo ncháa-ndo. Te duca<sup>n</sup> na cùnduu.

#### *Cáhá-ó sá ío càhnu cuu Yá Ndióxi*

<sup>25</sup> Te vitna chí ná cächí-ó sá ío càhnu cuu Yá Ndióxi, chi mee-gá cada te ío-gá cuíta níhí ndéé-gá-ndó cundecu-ndo ichi Xítohó Jesucristú dátá cáchi tnúhu sá cáhá<sup>n</sup> nácuaáa naníhí táhú-ó, tnúhu sá dánèhé-í ñáyiu cuendá Xítohó Jesucristú, te nchaa tnúhu-a ñ<sup>n</sup>-ní cùu-xi ndihi nchaa tnúhu sá ní cächí Yá Ndióxi cuu yuhu ndéé cùtnáhá ní ngáva ñuyiú, te vitna ní quee túu-xi, <sup>26</sup> chi

mee Yă Ndiõxí ní dátũ-gá núú-ó vitna, te cãhá<sup>n</sup>-ndí nãcuáa ní chídó tnùní cue téé ní xóo cãhá<sup>n</sup> tnũhu Yá Ndiõxí ndéé sanaha. Te duca<sup>n</sup> tnũhu sá ndúú yũhu ni cuu ta xité nuu-xi ñhíí ñuyíú cuãhá<sup>n</sup>, chi duca<sup>n</sup> ní cachí Yă Ndiõxí Yá ndécú nchàa nduu nchaa quíú cunduu cuëndá sá quindáá iní ñáhá ñăyiu xii-gá, te tñí-yu nchaa tnũhu cãhá<sup>n</sup>-gá.

<sup>27</sup> ¶Te ñ<sup>n</sup>dì-ni Yá Ndiõxí cúú-gă Yáá ío sàá sá xini tnùní-xi! ¶Te nchaa-o chí ná cãchí-ó sá ío cãhnu cuu-gá, chi ndècu ndíhi-o Xítóhó Jesucristú, te duca<sup>n</sup>-ni cãda-o ni caa ni quíí<sup>n</sup>! Te duca<sup>n</sup> na cunduu. Te ío chí cãdá ndèe iní-nă vitna.

## TUTÚ DÍHNA NUU NÍ CADÚHA TÉ PÁBLÚ QUIHI<sup>n</sup> NDAHÁ ÑÁYIU ÑÚÚ CÒRINTÚ

*Té Páblú cadúha-dé tutú quíhí<sup>n</sup> ndaha ñáyiú xĩndecu ichi Xítóhó Jesucristú ndécú ñúú Còrintú*

<sup>1</sup> Yúhú té Páblú ní cáhá<sup>n</sup> ñáhá Yá Ndióxi xii-í cuendá sá cáhá<sup>n</sup>-í tnúhu Xítóhó Jesucristú núú ñáyiú, chi duca<sup>n</sup> ní cachí Yá Ndióxi cunduu. Te cadúha-í tutú-a ndihi té Sostenés té ndecu ndihi-o ichi Xítóhó Jesucristú <sup>2</sup> cuendá daquixi-í ndaha nchóhó ñáyiú xĩndecu ichi Yá Ndióxi ndécú ñúú Còrintú, chi nchóhó cúu-ndó ñáyiú cúu cuendá Yá Ndióxi cuendá sá ndécú ndihi-ndo Xítóhó Jesucristú. Te diu-ni-ndo cúu-ndo ñáyiú ní cáhá<sup>n</sup> ñáhá Yá Ndióxi cuendá cundecu yĩñúhu-ndo núú-gá, ndihi nchaa dava-gá ñáyiú ndecu nchaa xichi, ñáyiú cachí sá ío cáhuu cuu Xítóhó Jesucristú. Te Yaá-á<sup>n</sup> cúu-gá Xítóhó-yu, te diu-ni-gá cúu-gá Xítóhó nchoo tucu. <sup>3</sup> Te xicá<sup>n</sup> tãhú-í núú Tãtã-ó Dütú Ndióxi ndihi núú Xítóhó Jesucristú sá ndi nduú-gá ío na chĩndee chitúu ñaha-gá xii-ndo, te ío váha cuu iní-ndó cundecu-ndo.

*Yá Ndióxi ío chĩndee ñaha-gá xii-o cuendá sá ndécú-o ndihi Xítóhó Jesucristú*

<sup>4</sup> Te duca<sup>n</sup>-ni ío ndácá<sup>n</sup> tãhú-í núú Yá Ndióxi cuendá-ndó, chi mee-gá ío chĩndee chitúu ñaha-gá xii-ndo sá cuendá Xítóhó Jesucristú. <sup>5</sup> Te cuendá sá ndécú-ndó ndihi Xítóhó Jesucristú, núú xĩá<sup>n</sup> Yá Ndióxi ío chĩndee ñaha-gá xii-ndo sáa díquí-ndó nãcuáa cáhá<sup>n</sup>-ndó, ndihi nãcuáa cùtnuní iní-ndó, <sup>6</sup> chi tnúhu sá ni ñihí-ndó cuendá Xítóhó Jesucristú ní quée-xi iní-ndó. <sup>7</sup> Te xĩá<sup>n</sup> núu nchaa sá váha ñá túú tñahí cùmání xii-ndo chi Yá Ndióxi ío chĩndee ñaha-gá. Te duca<sup>n</sup> quide-gá nini nchóhó ni yúhu ni iní-ndó ndètu-ndo sáa nduu quixi tucu Xítóhó Jesucristú. <sup>8</sup> Te Yá Ndióxi duca<sup>n</sup>-ni ío chĩndee ñaha-gá xii-ndo cuendá sá vá yó teñaha cuéchi nduu na quixi tucu Xítóhó Jesucristú. <sup>9</sup> Te nchaa sá cáhá<sup>n</sup> Yá Ndióxi dacuití quide-gá, te diu-gá cúu-gá Yaá ní cáhá<sup>n</sup> ñáhá xii-ndo cuendá cuu ñnuu-ndo ndihi Déhe-gá Xítóhó Jesucristú Yaá cúu Xítóhó-ó.

*Ñá túú cúu ñnuu ñáyiú ndecu ichi Xítóhó Jesucristú*

<sup>10</sup> Te nchóhó ñáyiú ndecu ndihi-í ichi Xítóhó Jesucristú cáhá<sup>n</sup>-í dóho-ndo sá vá ndi díí<sup>n</sup> càni iní-ndó, te ío cuu ñnuu-ndo

cundecu-ndo, te ñ<sup>n</sup>-ni càni iní-ndó, te ñ<sup>n</sup>-ni càda-ndo chi duca<sup>n</sup> cuiní-gá cunduu. <sup>11</sup> Te duha cáhá<sup>n</sup>-í dóho nchóhó ñáyiú ndecu ndihi-í ichi Xítóhó Jesucristú, chi cue ñáyiú vehe té Clòe ní cachí tnúhu-yu xii-í sá ñá túú cúu ñnuu-ndo ndecu-ndo. <sup>12</sup> Te duha nduu tnúhu ní ñihí-í nãcuáa cúu ndecu-ndo, chi dava-ndo cachí-ndó: “Yúhú cúu-í cuendá té Páblú.” Te dava-ndo cachí-ndó: “Yúhú cúu-í cuendá té Ápolós.” Te dava-ndo cachí-ndó: “Yúhú cúu-í cuendá té Pèlú.” Te dava tucu-ndo cachí-ndó: “Yúhú cúu-í cuendá Xítóhó Jesucristú”, duha cachí-ndó. <sup>13</sup> Te vá dúcá<sup>n</sup> cáhá<sup>n</sup>-ndó chi ñá túú ná daha Xítóhó Jesucristú ndécú chi ñ<sup>n</sup>di-ni-gá. Te ñá díú yúhú té Páblú ní xihí-í núú cùrúxi sá cuendá-ndó, te ni ñá túú ní sãndute-ndo cuendá sá yúhú cuu cuendá ñáhá-í xii-ndo. <sup>14</sup> Te táxãhu xii Yá Ndióxi chi ñá díú nchãa-ndo ni dacuandute-í, chi té Crispú-ni ndihi té Gãyú-ni ní dacuandute-í-güedé. <sup>15</sup> Te xĩá<sup>n</sup> núu vá cúu tñahí cáhá<sup>n</sup>-ndó sá ní sandute-ndo sá cúu cuendá ñáhá-í xii-ndo. <sup>16</sup> Te ní ndacu tucu iní-í sá tñahá tucu ñáyiú cúu ndi mee té Èstéfanás ní dacuandute-í, te diu-ná ñáyiú-án te sãnuu sá ñá túú-gá nágá ñáyiú ní dacuandute-í. <sup>17</sup> Te Xítóhó Jesucristú ñá túú ní tendaha ñaha-gá xii-í sá dacuandute-í ñáyiú, chi ní tendaha ñaha-gá xii-í sá cáhá<sup>n</sup>-í tnúhu-gá núu-yu, tnúhu sá cáhá<sup>n</sup> nãcuáa naníhí tãhú-ó. Te ñá túú cáhá<sup>n</sup>-í dàtná cáhá<sup>n</sup> ñáyiú túha. Te duca<sup>n</sup> quide-í cuendá sá nchóhó quindáa váha iní-ndó tnúhu sá cáhá<sup>n</sup> nãcuáa ní xihí Xítóhó Jesucristú núú cùrúxi. Chi núu na cáhá<sup>n</sup>-í dàtná cáhá<sup>n</sup> ñáyiú túha te nchóhó vá quindáa iní-ndó tnúhu-án nãcuáa tãu-xi cunduu.

*Sá cuendá Xítóhó Jesucristú cùtnuní iní-ó sá ío cáhuu cuu Yá Ndióxi*

<sup>18</sup> Te nchaa ñáyiú ta xĩta nihnu cuáhã<sup>n</sup> cachí-yu sá ñá túú nãndíhi tnúhu sá cáhá<sup>n</sup> nãcuáa ní xihí Xítóhó Jesucristú núú cùrúxi, dico sá cúu-xi nchóhó ñáyiú sa ní naníhí tãhú, chi tnúhu-án cúu-xi ñ<sup>n</sup> tnúhu sá ní taxi Yá Ndióxi ndécú ndihi-o cuendá ndacu-gá cada-gá nchaa nãcuáa cuiní-gá iní-ó, <sup>19</sup> te quée ndáa-xi nãcuáa cáhá<sup>n</sup>-gá núú tütú-gá núú cachí-xi:

Yúhú cada-í te nchaa ñáyiú túha vá nãndíhi-gá nchaa sá xini tñuní-yu,

te nchaa ñáyiú ío váha sáa díquí-xi vá nãndíhi-gá nchaa nãcuáa sãni iní-yu.

Duha cachí Yá Ndióxi núú tütú-gá.

<sup>20</sup> Te xĩá<sup>n</sup> cùtnuní iní-ó sá nchãá ñáyiú sãni iní-xi sá ío túha ndecu ñuyú-a, ndihi nchaa cue tée dacuaha ñaha xii-yu nchaa tnúhu ní chídó tñuní ndíi Moisés, ndihi nchaa ñáyiú ío váha sáa díquí-xi cáhá<sup>n</sup> cuendá nchaa sá ío ñuyú-a, te nchaa ñáyiú-án cachí Yá

Ndiöxí sá ñà túú nàndíhi nchaa sá xini tñuní-yu sá cúú-xí-gá. <sup>21</sup> Te Yá Ndiöxí ío váha cùtnuní iní-gá nàcuáa quide-gá, chí ñá túú dāña-gá cundecu ndihi ñáhá-yu xii-gá sá cuendá nchaa sá ní sáá díquí mée-yu, te duca<sup>n</sup> quide-gá chí cuini-gá sá cündedóho-yu tñuhu sá sání iní-yu ñá túú nàndíhi. Te sá cuendá tñuhu-á<sup>n</sup> te naníhi tǎhú-yu te núu na quindáá iní ñáhá-yu xii-gá.

<sup>22</sup> Te cue ñáiyu isráel cuini-yu quini-yu sá vǎ yóo tñahí ndácu cada, te cue ñáiyu griégú nchicú<sup>n</sup> nihnú-yu nchaa sá dācuáha ñáiyu ío túha. <sup>23</sup> Dico nchoo yíhi-o cáhá<sup>n</sup>-ó núú ñáiyu sá Xitohó Jesucristú ní xihí-gá núú cùrúxí. Te cue ñáiyu isráel ñá túú tñahí tñahá iní-yu cündedóho-yu tñuhu-á<sup>n</sup>. Te cue ñáiyu ñá túú cùu ñáiyu isráel cǎchí-yu sá ñà túú védana nàndíhi tñuhu-á<sup>n</sup>. <sup>24</sup> Dico sá cúú-xí nchaa ñáiyu ní cáhá<sup>n</sup> ñáhá Yá Ndiöxí chí cuéi cùú-yu ñáiyu isráel ádi ñá túú cùú-yu, dico ñáiyu-á<sup>n</sup> cǎchí-yu sá sá cuendá Xitohó Jesucristú cùtnuní iní-yu sá ío cǎhnu cuu Yá Ndiöxí te ndécu ndihi-gá nchaa sá xini tñuní-gá. <sup>25</sup> Te sá quide Yá Ndiöxí cǎchí ñáiyu ñuyúú-a sá ñà túú nàndíhi, dico xiá<sup>n</sup> ío-gá nàndíhi dācúúxí sá sání iní mée-yu. Te sá ní xihí Xitohó Jesucristú núú cùrúxí, xiá<sup>n</sup> cǎchí ñáiyu sá ñá túú ní nihí ndéé Yá Ndiöxí cada-gá sá ní sani iní-gá cada-gá. Dico sá dúcá<sup>n</sup> ní quide Yá Ndiöxí, xiá<sup>n</sup> cúú-xí sá ío-gá ní nihí ndéé-gá ní quide-gá í<sup>n</sup> sá ní sani iní-gá dācúúxí sá sání iní mée ñáiyu ñuyúú-a. <sup>26</sup> Te nchóhó ñáiyu ndécu ndihi-í ichi Xitohó Jesucristú, chí dāndácu iní nācuáa ndécu-ndo cùtnáhá ní cáhá<sup>n</sup> ñáhá Yá Ndiöxí xii-ndo, chí sacú-ni-ndo túha dācúúxí ñáiyu ñá túú ndécu ichi-gá. Te duca<sup>n</sup> sǎctú-ni-ndo tǎxi tñuní-ndó, te diu-ni duca<sup>n</sup> sǎcú-ndó nēhe ñáiyu sá yíñuhu núú-ndó. <sup>27</sup> Te ñáiyu ñá túú ndécu ichi Yá Ndiöxí cǎchí-yu sá ñà túú tñahí túha dāva-gá tñaha ñáiyú-yu, dico dāva ñáiyu ñá túú túha-á<sup>n</sup> cáhá<sup>n</sup> ñáhá Yá Ndiöxí xii-yu cundecú-yu ichi-gá, te cundecu ndihi ñaha-gá xii-yu, te duca<sup>n</sup> dāndóo canúú-yu nchaa ñáiyu cǎchí sá ío túha. Te cáhá<sup>n</sup> tucu-gá ñáiyu cǎchí dāva-gá ñáiyu sá ñà túú tñahí táu cunuú cündecú-yu ichi-gá, te duca<sup>n</sup> cündecu ndihi ñaha-gá xii-yu, te dāndóo canúú-yu nchaa ñáiyu cǎchí sá tǎxí tñuní. <sup>28</sup> Te duca<sup>n</sup> Yá Ndiöxí cáhá<sup>n</sup>-gá ñáiyu ñá túú tñahí cūnuu cundecu ndihi-gá, ndihi ñáiyu quée tǎhú núú dāva-gá tñaha ñáiyu-xi, ndihi ñáiyu cǎchí-yu sá ñà túú védana nàndíhi, nchaa ñáiyu-á<sup>n</sup> cáhá<sup>n</sup>-gá cundecu ndihi-gá, te duca<sup>n</sup> quide-gá cuendá dāndóo canúú-yu nchaa ñáiyu cǎchí sá ío cūnuu. <sup>29</sup> Te núu xiá<sup>n</sup> ní í<sup>n</sup> ñáiyu vá cúú cǎchí-yu sá ío cǎhnu cuú-yu núú Yá Ndiöxí. <sup>30</sup> Dico nchóhó chí mee Yá Ndiöxí ní quide-gá ndécú-ndó ndihi Xitohó Jesucristú, te Xitohó Jesucristú ní quide-gá

ní cùtnuní iní-ó sá Yá Ndiöxí cúú-gá Yáa ndécú ndihi nchaa sá xini tñuní-gá. Te diu-ni Xitohó Jesucristú ní quide-gá cuendá sá nchóo vǎ cündecu-gá cuéchi-o núú Yá Ndiöxí, te duca<sup>n</sup> cündecu yíñuhu-o núú-gá, te nduu tǎhú-ó cündecu-o ndihi-gá ní caa ní quihí<sup>n</sup>. <sup>31</sup> Te sá dúcá<sup>n</sup> quide-gá núu xiá<sup>n</sup> xini ññuhu-xi cada-o nācuáa cáhá<sup>n</sup>-xi núú tǎtú Yá Ndiöxí núú cǎchí-xi: “Vǎ cǎchí-ndó sá mée-ndó ío cǎhnu cuu-ndo, chí cǎchí-ndó sá Yáa cúú Xitohó-ndó ío cǎhnu cuu-gá”, duha cǎchí-xi núú tǎtú-gá.

## 2

*Tñuhu sá cáhá<sup>n</sup> nācuáa ní cuu ní xihí Xitohó Jesucristú núú cùrúxí*

<sup>1</sup> Te nchóhó ñáiyu ndécu ndihi-í ichi Xitohó Jesucristú sa ñaha-ndo sá cùtnáhá ní quixi-í ní cáhá<sup>n</sup>-í tñuhu Yá Ndiöxí núú-ndó, te ñá túú ní cáhá<sup>n</sup>-í dǎtná cáhá<sup>n</sup> í<sup>n</sup> ñáiyu ío váha sáá díquí-xi, ádi dǎtná cáhá<sup>n</sup> í<sup>n</sup> ñáiyu ío túha. <sup>2</sup> Chí cùtnáhá ní xindecu ndihi ñaha-í xii-ndo chí ní sani iní-í sá mée-ní cuendá Xitohó Jesucristú cáhá<sup>n</sup>-í núú-ndó ndihi nācuáa ní cuu ní xihí-gá, te diu duca<sup>n</sup> ní quide-í. <sup>3</sup> Te cùtnáhá ní quexio-í núú ndécú-ndó te ní ñá cùtnuní iní-í nása cada-í ní cùu, te ío ní quiyúhú iní-í ní cáhá<sup>n</sup>-í tñuhu-gá núú-ndó. <sup>4</sup> Te cùtnáhá ní cáhá<sup>n</sup>-í nācuáa nduu tñuhu Xitohó Jesucristú núú-ndó, te ñaha-ndo sá Espiritú Yá Ndiöxí ní chindee ñaha-xi xii-í ní cáhá<sup>n</sup>-í tñuhu-gá núú-ndó, te tñuhu-á<sup>n</sup> ní quée-xi iní-ndó. Te ñá túú ní cáhá<sup>n</sup>-í í<sup>n</sup> tñuhu cǎhnu núú-ndó tñuhu sá cáhá<sup>n</sup> cue ñáiyu ío váha sáá díquí-xi. <sup>5</sup> Te duca<sup>n</sup> ní cuu cuendá sá nchóhó quindáá iní-ndó tñuhu Yá Ndiöxí chí ní quide-gá sá váha sá cúú-xí iní-ndó, te ñá díú sá cuendá tñuhu sá cáhá<sup>n</sup> ñáiyu cǎchí sá ío túha duca<sup>n</sup> ní sándáá iní-ndó tñuhu-gá.

*Espiritú Yá Ndiöxí quide-xí cùtnuní iní-ó nācuáa sání iní-gá*

<sup>6</sup> Te nchoo cáhá<sup>n</sup>-ó tñuhu cǎhnu núú ñáiyu sa ní nihí ndéé ndécu ichi Xitohó Jesucristú. Te tñuhu-á<sup>n</sup> ñá túú cáhá<sup>n</sup> ñáiyu ñá túú ndécu ichi-gá, te ní cué téé yíndaha ñaha xii-yu ñá túú cáhá<sup>n</sup>-güedé tñuhu-á<sup>n</sup> chí cue téé-á<sup>n</sup> naa-güedé. <sup>7</sup> Te tñuhu cǎhnu-á<sup>n</sup> cúú-xí tñuhu Yá Ndiöxí, te mee-gá ní cǎchí-gá ndéé cùtnáhá vátá ngáva-gá ñuyúú sá nchǎá ñáiyu na quindáá iní tñuhu-á<sup>n</sup> te nduu tǎhú-yu cundecú-yu ndihi-gá núú ío váha caa ndecu-gá ní caa ní quihí<sup>n</sup>. Te tñuhu-á<sup>n</sup> ndúú yúhu-xi ní cuu. <sup>8</sup> Te ní í<sup>n</sup> cue téé yíndaha cue ñáiyu ñuyúú-a ñá túú tēcú tñuní-güedé tñuhu-á<sup>n</sup>, chí núú dicó tēcú tñuní-güedé tñuhu-á<sup>n</sup> te vá cǎtá caa-güedé Xitohó Jesucristú núú cùrúxí cǎhni ñaha-güedé xii-gá ní cùu. Te diu-ni Yáa-á<sup>n</sup> ío cǎhnu cuu-gá. <sup>9</sup> Dico duca<sup>n</sup> ní cuu



chi ní quee ndáá-xi nàcuáa càhá<sup>n</sup>-xi núú tütü Yá Ndiöxi núú càchi-xi:

Yá Ndiöxi sa ní sani iní-gá nchaa nàcuáa cada-gá sá cúú-xí cuendá nchaa ñáiyu cùu iní ñáhá xii-gá.

Te sá ní sani iní-gá cada-gá cúú-xí sá vátá quini-gá ñáiyu te ni vátá cündedóho-gá-yu,

te ni ñá túú tnàhí cùtnuní iní-yu nása cada-gá.

Duha càchi-xi núú tütü-gá. <sup>10</sup> Te mee Yá Ndiöxi ní cachí-gá sá Espiritú-gá cada-xi te nchoo cùtnuní iní-ó nchaa nàcuáa sàni iní-gá cada-gá, núu xiá<sup>n</sup> duca<sup>n</sup> təcú tnùní-ó vitna, chi Espiritú-gá xiní-xi nchaa təcú tnùní-ó vitna sàni iní-gá cada-gá.

<sup>11</sup> Te ñá ñá ñáiyu xiní ndáá-yu nàcuáa sàni iní ingá ñáiyu, chi mee ñáiyu-án xiní ndáá-yu nchaa nàcuáa sàni iní-yu. Te duca<sup>n</sup> sàtnahá-xi cùu Yá Ndiöxi chi medii-ni Espiritú-gá xiní-xi nchaa nàcuáa sàni iní-gá.

<sup>12</sup> Te nchoo chi Yá Ndiöxi ní taxi-gá Espiritú-gá ndécú ndihi-o, te ñá díú ñúyíú-a duca<sup>n</sup> ní quèe espíritú ní ngúndecu ndihi-o.

Te duca<sup>n</sup> ní taxi-gá Espiritú-gá ndécú ndihi-o cuendá duca<sup>n</sup> cùtnuní iní-ó nàcuáa ndùu nchaa sá vaha sá dícó duca<sup>n</sup> ní taxi-gá ndécú ndihi-o.

<sup>13</sup> Te cuendá nchaa sá vaha-án càhá<sup>n</sup>-ndí, te càhá<sup>n</sup>-ndí nàcuáa dàcahu iní ñáhá Espiritú Yá Ndiöxi xii-ndí, te ñá túú càhá<sup>n</sup>-ndí nàcuáa càhu iní ñáiyu ñuyíú-a càhá<sup>n</sup>-yu, te diu-ni nchaa tnúhu dàcahu iní ñáhá Espiritú-gá xii-ndí càhá<sup>n</sup>-ndí, diu-ni nchaa xiá<sup>n</sup> dánhèhé-ndí nchaa ñáiyu ndècu ndihi tucu Espiritú-gá.

<sup>14</sup> Te ñáiyu ñá túú ndècu ndihi Espiritú Yá Ndiöxi ñá túú tnàhí iní-yu nàcuáa ndùu tnúhu dātécú tnúhu ñaha Espiritú-gá xii-yu, te ni ñá túú təcú tnùní-yu, te càchi-yu sá ñá túú nàndihi-xi. Te duca<sup>n</sup> chi mee-ni nchaa ñáiyu ndècu ndihi Espiritú-gá təcú tnùní-yu nàcuáa ndùu tnúhu-án. <sup>15</sup> Te cue ñáiyu duca<sup>n</sup> ndècu ndihi Espiritú Yá Ndiöxi cùtnuní ndáá iní-yu ná cúú nchaa sá vaha, te vá yóo ñá<sup>n</sup> xiní nchaa nàcuáa sàni iní-yu. <sup>16</sup> Te núú tütü Yá Ndiöxi càchi-xi: “Vá yóo ñá<sup>n</sup> xiní nàcuáa sàni iní Yá Ndiöxi, núu xiá<sup>n</sup> vá yóo ñá<sup>n</sup> ndacu ná danèhé ñáhá xii-gá”, duha càchi-xi núú tütü-gá. Te nchoo chi ñá<sup>n</sup>-ni sàni iní-ó ndihi Xitohó Jesucristú.

### 3

#### *Cue tée xíquide chiú<sup>n</sup> Yá Ndiöxi*

<sup>1</sup> Te nchòhó ñáiyu ndècu ndihi-í ichi Xitohó Jesucristú càchi tnúhu-í xii-ndo sá ñá ní ñhi-í nàcuáa cada-í càhá<sup>n</sup>-í tnúhu-gá núú-ndó dàtná càhá<sup>n</sup>-í núú nchaa ñáiyu quide nchaa nàcuáa càhá<sup>n</sup> Espiritú Yá Ndiöxi, chi ní càhá<sup>n</sup>-í núú-ndó dàtná càhá<sup>n</sup>-í núú nchaa ñáiyu cùnno nchaa sá cuèhé

sá dúhá iní-xi, te ní quide ñaha-í xii-ndo dàtná cue ñáiyu íchi ní sándáá iní tnúhu Xitohó Jesucristú, núu xiá<sup>n</sup> duca<sup>n</sup> ní càhá<sup>n</sup>-í núú-ndó. <sup>2</sup> Te ní quide ñaha-í xii-ndo dàtná ñá<sup>n</sup> déhe yiqui<sup>n</sup> vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní danèhé ñáhà-í xii-ndo ñá<sup>n</sup> sá ñá túú tnàhí úhú tecú tnùní-ndó, te ñá túú ní danèhé ñáhà-í xii-ndo ñá<sup>n</sup> sá xitò-í sá vá təcú tnùní-ndó. Te quide cuendá-í sá díú-ní dūca<sup>n</sup> vá təcú tnùní-ndó ndéé vitna te núu na danèhé ñáhà-í xii-ndo nchaa dava-gá tnúhu. <sup>3</sup> Te duca<sup>n</sup> chi quide-ni-ndo nàcuáa sàni iní méé-ndó, chi ndècu-ni-ndo ichi cuédú iní, te ná ndihi tnàha-ni-ndo, te ñá túú tnàhí cùu ñá<sup>n</sup>nuu-ndo ndecu-ndo. Te xiá<sup>n</sup> cùtnuní sá méé-ni nchaa nàcuáa sàni iní méé-ndó quide-ndo, te xíquide-ndo dàtná quidé nchaa ñáiyu ñá túú ndècu ichi Xitohó Jesucristú. <sup>4</sup> Te dava-ndo càchi-ndó: “Yúhú cùu-í cuendá té Páblú.” Te dava-ndo càchi-ndó: “Yúhú cùu-í cuendá té Apólós”, duha càchi-ndó. Te sá dūcá<sup>n</sup> càhá<sup>n</sup>-ndó xiá<sup>n</sup> cùtnuní sá quidé-ni-ndó mèe-ni nchaa nàcuáa sàni iní méé-ndó.

<sup>5</sup> Te yúhú té Páblú càchi tnúhu-í xii-ndo sá ñá túú cùnno-í, te ni té Apólós ñá túú cùnno-dé chi dícó cue tée xínu cuechi núú Yá Ndiöxi cúú-ndí, te ní càhá<sup>n</sup>-ndí tnúhu-gá núú-ndó, núu xiá<sup>n</sup> ní sándáá iní-ndó. Te ndí díú<sup>n</sup> ndí díú<sup>n</sup> ndùu chiú<sup>n</sup> ní táhú Yá Ndiöxi cada-ndí. <sup>6</sup> Te yúhú cùu-í dàtná ñá<sup>n</sup> tée chihí tatá chi dàcahá<sup>n</sup> ñáhà-í xii-ndo túha-ndo ichi Yá Ndiöxi. Te té Apólós cúú-dé dàtná ñá<sup>n</sup> tée nàcuhú chi tée-án ndécú-dé danèhé ñáhà-dé xii-ndo tnúhu-gá. Te Yá Ndiöxi cúú-gá Yaá quidé sàhnu tatá ní chihí-í-án, te duha càhá<sup>n</sup>-í chi diu-gá quidé-gá tá ñhi ndéé-ndó ndècu-ndo ichi-gá. <sup>7</sup> Te núu xiá<sup>n</sup> ní tée chihí tatá te ní tée nàcuhú ñá túú cùnno-güedé, dico Yá Ndiöxi ío cùnno-gá chi diu-gá quidé-gá xínu tatá-án te sàhnu-xi. <sup>8</sup> Te ñá<sup>n</sup>-ni cùu tée chihí tatá ndihi tée nàcuhú. Te duca<sup>n</sup> sàtnahá-xi cùu nchúhú cue tée xíquide chiú<sup>n</sup> Yá Ndiöxi, te nàcuáa ndùu chiú<sup>n</sup> ní quide-ndí te duca<sup>n</sup> cùndu táhú taxi Yá Ndiöxi nduú táhú-ndí. <sup>9</sup> Te nchòhó cúú-ndó dàtná ñá<sup>n</sup> xichi núú ní quée tatá, te nchúhú cúú ñá<sup>n</sup>nuu-ndí quidé chiú<sup>n</sup>-ndí xiá<sup>n</sup>. Te duca<sup>n</sup> sàtnahá-xi cùu-ndo chi cùu cuendá ñáhá Yá Ndiöxi xii-ndo, te nchúhú cúú ñá<sup>n</sup>nuu-ndí quidé-ndí chiú<sup>n</sup>-gá.

Te cùu tucu-ndo datná ñá<sup>n</sup> vehe sá vítná sáá, te duca<sup>n</sup> sàtnahá-xi cùu-ndo chi Yá Ndiöxi quidé-gá tá sàhnu ñihnu-ndo ichi-gá cuáhá. <sup>10</sup> Te yúhú cùu-í dàtná ñá<sup>n</sup> tée cùnno daciaa vehe te ní tava-í cimientú-xi, te díú<sup>n</sup> cue tée véxi dácaa-güedé ndóho, te ñá<sup>n</sup> ñá<sup>n</sup> cue tée-án ío xiní ñuhu-xi cada cuendá-güedé nàcuáa dácaa-güedé. Núu duca<sup>n</sup> sàtnahá-xi cùu yúhú chi Yá Ndiöxi ní taxi-gá chiú<sup>n</sup>

guide-í te chindee ñaha-gá, chi díhna-gá-í ní quixi-í ní cáhá-í tnúhu Xítoho Jesucristú núnú-ndo, te ñá-í cue téé véxi dàcuaha ñaha-ná xii-ndo tnúhu-gá, te ñá-í cue téé-á-í ño xini ñuhu-xi cada cuendá-güedé nàcuáa dācuáha ñaha-güedé xii-ndo tnúhu-gá. <sup>11</sup> Te cimièntú vehe-á-í cada iní-ó sá cúú-xí mèe Xítoho Jesucristú, te duca<sup>n</sup> chí yúhú ní dānehé ñáhà-í xii-ndo ní ngūndecu ndihi-ndo Xítoho Jesucristú, te vá yō-gá cundecu ndihi-ndo chí ñá-í dū-ñi-gá ndécú. <sup>12</sup> Te dava cue téé dāca-güedé vehe váha te chíhi-güedé díhú<sup>n</sup> cuáá<sup>n</sup>, ndihi díhú<sup>n</sup> cuixi<sup>n</sup>, ndihi yúú sá ño vii cāa. Te dava-güedé dācā-güedé vehe vítú, te dava-güedé dācā-güedé vehe ité, te dava-güedé dācā-güedé vehe tnuvixi<sup>n</sup>. <sup>13</sup> Te sáá nduu te nchaa vehe-á<sup>n</sup> cāyú-xi, te vehe vítú-á<sup>n</sup> ndihi vehe ité-á<sup>n</sup> ndihi vehe tnuvixi<sup>n</sup>-á<sup>n</sup> ndoo ndoo cāyú, te nchaa vehe váha-á<sup>n</sup> vá cāyú-xi cuèi na yāha ñuhú. Te nchaa cue téé ní dācāá vèhe váha-á<sup>n</sup> cada iní-ó sá cúú-güedé ñāyiu ío váha quide chiú<sup>n</sup> Yá Ndióxi. Te nchaa cue téé ní dācāá vèhe vítú, ndihi cue téé ní dācāá vèhe ité, ndihi cue téé ní dācāá vèhe tnuvixi<sup>n</sup> cada iní-ó sá cúú-güedé ñāyiu ñā túú cuini cada chiú<sup>n</sup> Yá Ndióxi nācuáa tàú-xi cunduu. Te sáá nduu te cutnūni nācuáa nduu chiú<sup>n</sup> ní quide ñá-í ñāyiu, chí Yá Ndióxi cáhá<sup>n</sup>-gá nācuáa nduu chiú<sup>n</sup> ní quide ñá-í ñāyiu ní quide chiú<sup>n</sup>-gá. <sup>14</sup> Te cue ñāyiu ío váha xiquide chiú<sup>n</sup> Yá Ndióxi te cūdí chiú<sup>n</sup> quidé-yu, te ñāyiu-á<sup>n</sup> ñāhi-yu sá ndúú tǎhú-yu. <sup>15</sup> Te cue ñāyiu ñā túú quide chiú<sup>n</sup> Yá Ndióxi nācuáa tàú-xi cunduu, te vá cūdí chiú<sup>n</sup> ní quidé-yu chí cuíta te ndoo-ná-yu duha, dico mēe-yu chí naníhi tǎhú-yu.

<sup>16</sup> Te yúhú cáhá-í dóho-ndo dāndacu-í iní-ndo sá cúú-ndo dátá vehe Yá Ndióxi, chí Espiritú-gá ndécú ndihi ñaha-xi xii-ndo. <sup>17</sup> Te núu yoo na dānaa ñaha xii nchóhó ñāyiu cūu veñúhu-gá, te Yá Ndióxi danāa ñaha-gá xii ñāyiu-á<sup>n</sup>, te duca<sup>n</sup> cāda-gá chí nchóhó cúú-ndo ñāyiu cūu cuendá-gá.

<sup>18</sup> Te vá dāndáhú-ndo mèe-ndo sá ño túha-ndo. Te núu ío dava-ndo sàni iní-ndo sá túha-ndo dátá sání ñi cue ñāyiu ñā túú ndecu ichi Yá Ndióxi, te cada-ndo sá cúú-ndo dátá ñāyiu ñā túú tñáhi túha, te duca<sup>n</sup> te cuu ndisa-ndo ñāyiu túha sá cúú-xí Yá Ndióxi. <sup>19</sup> Te nchaa sá xini tñuni nchaa ñāyiu cáhí sá ño túha ñā túú ndecu ichi Yá Ndióxi ñā túú nāndihi-xi sá cúú-xí-gá. Te cáhí-xi núú tūtú-gá: “Nchaa ñāyiu cáhí sá ño túha te Yá Ndióxi dāndoo canúú ñáhà-gá xii-yu núú nchaa sá quidé-yu, duha cáhí-xi núú tūtú-gá. <sup>20</sup> Te cáhí tucu-xi ingá xichi: “Yá Ndióxi cutnūni iní-gá nchaa nācuáa sàni iní ñāyiu cáhí sá ño túha. Te nchaa nācuáa sàni iní-yu-á<sup>n</sup> cáhí-gá sá ñā túú vèdana nāndihi-xi”, duha cáhí-xi núú tūtú-gá.

<sup>21</sup> Núu xiá<sup>n</sup> cáhá-í dóho-ndo sá vá cáhí-ndo sá nchúhu cue téé dānehé ñáhà xii-ndo tnúhu-gá ío cāhnu cuu-ndí. Te nchaa sá ío ñuyúú-a cūu-xi sá váha sá cúú-xí-ndo.

<sup>22</sup> Te cuèi yúhú ndihi té Ápolós ndihi té Pèlú ndécú-ndí sá cúú-xí-ndo, te cuèi nchaa sá ío ñuyúú-a te cuèi nchaa nduu ndecu-ndo te cuèi sá cúú-ndo dico nchaa cūu-xi sá váha sá cúú-xí-ndo. Te cuèi nchaa sá ndécú tñaví, te cuèi nchaa sá cóo ndéé cuèé-gá nchaa cūu-xi sá váha sá cúú-xí-ndo. <sup>23</sup> Te mee-ndo ndecu-ndo sá cúú-xí Xítoho Jesucristú, te mee Xítoho Jesucristú ndécú-gá sá cúú-xí Yá Ndióxi.

## 4

*Nācuáa nduu chiú<sup>n</sup> quide cue téé ní táuchúú Xítoho Jesucristú cáhá<sup>n</sup> tnúhu-gá*

<sup>1</sup> Te cada cuendá-ndo sá nchúhú dicó-ni cue téé xinu cuechi núú Xítoho Jesucristú cúú-ndí, te chiú<sup>n</sup>-á<sup>n</sup> ní taxi Yá Ndióxi quidé-ndí cáhá<sup>n</sup>-ndí tnúhu sá ní cachí-gá yíyúhu ni cuu. <sup>2</sup> Te xini ñuhu-xi sá ncháá ñāyiu duca<sup>n</sup> ní sáñaha Yá Ndióxi chíú<sup>n</sup> quidé-yu cada ndáá-yu cadá-yu chíú<sup>n</sup>-á<sup>n</sup>. <sup>3</sup> Te yúhú ñā túú quide cuendá-í núu nása nduu tnúhu cáhá<sup>n</sup>-ndo cuendá-í núu cūu-í téé váha àdi ñā túú cūu-í. Te díu-ni duca<sup>n</sup> ñā túú quide cuendá-í núu nása-gá cáhá<sup>n</sup> nchaa dava-gá ñāyiu cuendá-í. Te ni mèe-í ñā túú cáhá<sup>n</sup>-í núu cūu-í téé váha àdi ñā túú cūu-í. <sup>4</sup> Te sànuu iní-í sá ñā túú nā cūmāni-í núú Yá Ndióxi, dico ñā díú sá xiá<sup>n</sup> te cáhí-í sá ñā túú cuèchi-í ndécú núú-gá, chí mee-gá náhá ndáá-gá te núu nása quide-í ndécú-í. <sup>5</sup> Te nchóhó vá cáhá<sup>n</sup>-gá-ndo sá ñā túú cundáá ñāyiu núú Yá Ndióxi, chí vátá sáá-gá nduu cundáá cuèchi-yu. Te na sáá nduu quixi tucu Xítoho Jesucristú te dává-á<sup>n</sup> dátúu-gá nchaa sá quidé-yu, nchaa sá ñā túú xini-ó quidé-yu vitna, te duca<sup>n</sup> dátúu-gá nchaa nācuáa sàni iní-yu. Te Yá Ndióxi cáhá<sup>n</sup> váha-gá cuendá nchaa ñāyiu ní quide váha.

<sup>6</sup> Te nchóhó ñāyiu ndecu ndihi-í ichi Xítoho Jesucristú, cācumehe-í té Ápolós ndihi yúhú núú-ndo dānehé ñáhà-í xii-ndo nācuáa cada-ndo cuendá duca<sup>n</sup> cūu-xi ñá sá váha sá cúú-xí-ndo, ndihi cuendá sá nchóhó canchicú<sup>n</sup> nihnu-ndo cāda-ndo mee-ni nchaa nācuáa yòdo tñuni núú tūtú Yá Ndióxi. Te duca<sup>n</sup> te vá cáhí-ndo sá ñá téé cáhá<sup>n</sup> tnúhu Yá Ndióxi ío-gá cāhnu cuu-dé dācúúxi ingá-dé. <sup>7</sup> Te nchóhó vá cáhí-ndo sá ío-gá cūmū-ndo dācúúxi dáva-gá ñāyiu chí Yá Ndióxi ní quide-gá ní ngūndecu ndihi-ndo nchaa sá xini tñuni-ndo. Te mee-gá duca<sup>n</sup> ní quide-gá ¿Te ná cuendá nchóhó duca<sup>n</sup> quide cāhnu-ndo mee-ndo? Te quide-ndo dátá tnúhu sá mēe-ndo ní quide-ndo duca<sup>n</sup> ní ngūndecu ndihi-ndo nchaa sá xini tñuni-ndo.

<sup>8</sup> Te nchòhò quidé-ndó sã ñà túú tnahí-gá ná cúmãní-ndó núú Yã Ndiòxí, te quide-ndo sã ní nihí-ndó nchaa sã cuíní-ndó núú-gã ndécú ndìhi-ndo, te sãnuu sã cúú-nã-ndó dàtná cue tée yindaha ñáiyu, te nchùhú ñá túú cùu ñnuu ndìhi ñaha-ndí xii-ndo quindaha ndìhi ñaha-ndí xii-ndo ñáiyu, jte váha-ni te núu dicó ndisa sã yindaha-ndo ñáiyu chi tnahá nchùhú ní tnahá ndìhi ñaha-ndí xii-ndo quindaha-ó-yu te núu dicó cúú-xí ñnu sã ndáá dico ñáhá! <sup>9</sup> Te yúhú quidé cuendá-í sã nchùhú cue tée ní táuchíú<sup>n</sup> Xítohó Jesucristú cáhá<sup>n</sup> tnúhu-gá núú ñáiyu ní cachí Yã Ndiòxí sã cúú-ndí cue tée ñá túú nãndìhi sã cúú-xí dáva-gá ñáiyu. Te ní cachí tucu-gá sã cúú-ndí dàtná cue ñáiyu sa ní tnahá òrè cuú-xi quíhí<sup>n</sup> nacháhu cuéchi-xi, te nchaa ñáiyu cùñúhu ñáhá-yu xii-ndí sã dúcá<sup>n</sup> ndòho-ndí, te tnahá nchaa espíritú cùñúhu ñaha-xi xii-ndí. <sup>10</sup> Te cuendá sã xínú cuéchi-ndí núú Xítohó Jesucristú, xíã<sup>n</sup> cúú-ndí dàtná cue tée ñá túú védana nãndìhi sã cúú-xí ñáiyu. Te nchòhò quidé-ndó sã cúú-ndó ñáiyu ío túha ndècu ndìhi Xítohó Jesucristú. Te ñáiyu càchí-yu sã nchùhú cúú-ndí cue tée ñá túú ndàcu cada ñnu sã cadá sã cúú-xí Yã Ndiòxí. Te nchòhò quidé-ndó sã cúú-ndó ñáiyu ío váha ndàcu quide ñnu sã sání iní-ndó sã cúú-xi-gã. Te cue ñáiyu dàquee tìhú ñáhá-yu xii-ndí, te nchòhò nehè-yu sã yíñúhu núú-ndó. <sup>11</sup> Te nchùhú chi nchaa-ni nduu ío ndòho-ndí, chi xihí-ndí docó, yichí-ndí ndute, te ñá túú dòo-ndí, te nchaa ñáiyu quide úhú ñáhá-yu xii-ndí, te ní vèhe-ndí ñá túú ndèé cáá cùndecu-ndí. <sup>12</sup> Te ío ndòho-ndí quidé chiú<sup>n</sup>-ndí nihí-ndí sã xéxi-ndí. Te cue ñáiyu xícuéhé ñáhá-yu xii-ndí dico xicá<sup>n</sup> táhu-ndí núú Yã Ndiòxí cuendá-yu, te ñá túú tnahí quini ndéé ñáhá-yu xii-ndí dico quide cahnu iní-ndí nchaa sã quidé ñáhá-yu. <sup>13</sup> Te mee-ni tnúhu cuéhé tnúhu duha cáhá<sup>n</sup>-yu cuendá-ndí dico sàcahnu iní-ndí te dásahú-ndí-yu mee-ni tnúhu váha. Te càchí-yu sã cúú-ndí dàtná ñnu sã ñá túú-gã védana nãndìhi, te nchaa-ni nduu duca<sup>n</sup> cáhá<sup>n</sup>-yu xáhá<sup>n</sup>-yu xii-ndí.

<sup>14</sup> Te yúhú duha cáhá<sup>n</sup>-í núú tütú-a dásahú ñáhá-í xii-ndo, dico ñá díú tnúhu sã cúú cáhá<sup>n</sup> núú-ndó cáhá<sup>n</sup>-í. Te duha cáhá<sup>n</sup>-í dóho-ndo chi quide iní-í sã sùúni dàtná déhe mee-í cúú-ndó chi ío cùu iní ñáhá-í xii-ndo. <sup>15</sup> Te nchaa-ó ndècu-o ichi Xítohó Jesucristú vítna, dico yúhú cúú-í tée díhna nuu ní dánèhé ñáhá xii-ndo nacuaá nduu tnúhu sã cáhá<sup>n</sup> nacuaá naníhí táhú-ó, núu xíã<sup>n</sup> cúú-í dàtná tátá-ndó. Te cuéi vai vihi cue tée na quixí-güedé danèhé ñáhá-güedé xii-ndo

tnúhu-gá dico ñnu dì-ni yúhú cúú-í tée díhna nuu-gá ní dánèhé ñáhá xii-ndo tnúhu-gá. <sup>16</sup> Núu xíã<sup>n</sup> cáhá<sup>n</sup>-í dóho-ndo sã cãncícu<sup>n</sup> nihnu-ndo càda-ndo nchaa nacuaá quide-í.

<sup>17</sup> Te xíã<sup>n</sup> núu sa ní tendaha-í té Timùteú véxi coto ñaha-dè xii-ndo, te tée-á<sup>n</sup> ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítohó Jesucristú, te tée-á<sup>n</sup> cachí tnúhu-dé xii-ndo nchaa nacuaá quide-í ndécú-í ichi-gá. Te díu-ni nacuaá na càchí tnúhu-dé-á<sup>n</sup> díu-ni duca<sup>n</sup> quide-í nchaa xichí núú tàcá ñáiyu dàcuaha tnúhu Xítohó Jesucristú. <sup>18</sup> Te dava nchòhò ío quide cahnu-ndo mee-ndo chi sãni iní-ndó sã vã quixí-gã-í quixi coto ñaha-í xii-ndo. <sup>19</sup> Dico núu mee Yã Ndiòxí ná càchí-gá te ío ndìhi quixi coto ñaha-í xii-ndo, te dàvá-á<sup>n</sup> quini-í te núu nása quide nchaa ñáiyu duca<sup>n</sup> ío xíquide càhnu mee-xi-á<sup>n</sup> ndécú-yu ichi Xítohó Jesucristú. Te vã cadá cuendá-í tnúhu cáhá<sup>n</sup>-yu chi chiú<sup>n</sup> quidé-yu cada cuendá-í. <sup>20</sup> Te vítna yindaha ñaha Yã Ndiòxí xii-o, te chindee ñaha-gá xii-o quide-o nchaa sã váha sãni iní-ó quide-o te ñá díú mèe-ni sã cáhá<sup>n</sup>-ó. <sup>21</sup> Te ío chí cání iní núu ndédacáa sã váha-gá cada-í òrè ná quexíó-í núú ndécú-ndo, núu sã ténáá ñáhá-í xii-ndo àdi sã cáhá<sup>n</sup> ndìhi ñaha-í xii-ndo ndìhi tnúhu víi tnúhu váha nacuaá cutnùni iní-ndó sã cúú iní ñáhá-í xii-ndo.

## 5

### *Ñnu cuéchi càhnu vihi*

<sup>1</sup> Te yúhú sa ní nihí ndáá-í tnúhu nacuaá cùu ndecu-ndo, chi ñnu tée ndècu ndìhi-ndo ndeca-dé nãná chàhá-dé. Te xíã<sup>n</sup> cúú-xí ñnu cuéchi càhnu vihi, chi ndéé nchaa ñáiyu ñá túú ndècu ichi Yã Ndiòxí càchí-yu sã vã cúú tnahí duca<sup>n</sup> càda-o. <sup>2</sup> jTe nchòhò ío quide cahnu-ni-ndo mee-ndo xíndecu-ndo! jTe tàú-ndó sã cundiyí-ndó ndixi cuéchi iní-ndó sã dúcá<sup>n</sup> cùu ndecu-ndo ni cuu! Te tée duca<sup>n</sup> quide-á<sup>n</sup> xíní ñúhu-xi sã vã dáñá-gã-ndó nihí tnahá ndìhi ñaha-dé xii-ndo ni cùu dico ñá túú dùca<sup>n</sup> quide-ndo. <sup>3</sup> Te yúhú ñá túú ndècu ndìhi ñaha-í xii-ndo dico dàtná tnúhu sã ndécú ndìhi ñaha-í xii-ndo chi duca<sup>n</sup>-ni ío ñúhu iní ñáhá-í xii-ndo. Te yúhú càchí-í sã nácháhu tée-á<sup>n</sup> cuéchi-dé sã dúcá<sup>n</sup> quide-dé, te díu-ni duca<sup>n</sup> cáhá<sup>n</sup>-í núú-ndó te núu dicó ndécú ndìhi ñaha-í xii-ndo. <sup>4</sup> Te òrè nãtácá-ndó cáhá<sup>n</sup> ndìhi-ndo Yã Ndiòxí te díu-ni Xítohó Jesucristú ñá túú dáña ndéé-gá chíndèe ñaha-gá xii-ndo, te òrè-á<sup>n</sup> cada-ndo nacuaá cuíni Xítohó Jesucristú cada-ndo, te cada iní-ndó sã tnahá-í ndécú ndìhi ñaha-í xii-ndo. <sup>5</sup> Chi tàú-xi sã tée duca<sup>n</sup> quide-á<sup>n</sup> daquèe tìhú-ndó-dé, te duca<sup>n</sup> te sácúíhná dandòho ñaha-xi xii-dé cuéi na cùú-dé, dico na sáá nduu te nduu táhú-dé cundecu-dé ndìhi Xítohó Jesucristú.

<sup>6</sup> Te nchòhò ñá túú ndùu váha-xi sá cächí-ndó sá ío càhnu cuu-ndo. Te xini-ndó sá cuéi luha-ni levadùrà ná quíhu yuchi cuáha pàá dándàa-xi cuéi luha-ni ná quíhu te nihíi-ni yuchi sàhá<sup>n</sup> ndoho-xi. Te duca<sup>n</sup> sàtnahá-xi cùu nchohó chi núu ndècu ndihi-ndo ì<sup>n</sup> ñáiyu quide sá ñá túú váha te nchaa-ndo ñá túú-gá cúú váha iní-ndó ndècu-ndo. <sup>7</sup> Te xini ñuhu-xi sá cádá-ndó dátáná quidé cuè ñáiyu quide vico pascuá, chi ñá túú chíhi-yu levadùrà yuchi cuáha pàá xéxi-yu nduu quidé-yu vico-án. Te sá quíhu pàá-án cada iní-ó sá cúú-xi nchaa sá cuèhé sá dúhá ní xóo cada-ndo. Te vā cádá-gá-ndó ní ì<sup>n</sup> sá cuèhé sá dúhá, te duca<sup>n</sup> te cuu-ndo ñáiyu váha chi sa ní nduu ndoo ní nduu nine iní-ndó. Te cue mbéé cue quití ní xóo cahni-güedé nduu pascuá cue quití-án cada iní-ó sá cúú-güedé dátáná Xítohó Jesucristú nàcuáa ní xihí-gá núú cùrúxí. <sup>8</sup> Te núu xiá<sup>n</sup> xini ñuhu-xi sá vā cádá-gá-ndó ní ì<sup>n</sup> sá cuèhé sá dúhá sá ní xóo cada-ndo, te ni vā cùhú-gá iní-ndó te ni vā cádá-gá-ndó, te ni yùhu ni iní-ná-ndó càda-ndo mee-ni sá váha.

<sup>9</sup> Te tutú sá sá ní dáquixí-í ndaha-ndo ní cachí-í sá vā nihí tnáhá-ndó ndihi cue ñáiyu ndècu ichi díí iní. <sup>10</sup> Te sá dúcán cáhán-í núú tutú ní dáquixí-í ndaha-ndo te vā cání iní-ndó sá yùhú cächí-í sá vā cúú-gá tnahá tnùhu-ndo ndihi cue ñáiyu ndècu ichi cuehé ichi duha, ndihi ñáiyu ndècu ichi díí iní, ndihi ñáiyu xihó nchaa sá ío ñuyúy, ndihi ñáiyu dùhu sá ndécú ndihi tnaha ñáiyu-xi, ndihi ñáiyu quide cahnu sá cächí-yu cùu ndiòxí te ñá ndáá sá ndiòxí cúú-xí chi dicó cue téé ñuyúy-a ní cadúha nchaa xiá<sup>n</sup>, chi núu duca<sup>n</sup> na càda-ndo vā tnahá tnùhu-gá-ndó ndihi-yu te xini ñuhu-xi sá vā cùndècu-gá-ndó núú ndécú-yu. <sup>11</sup> Te ñá túú dùca<sup>n</sup> queue-xi nacuáa cáhán-í núú tutú-í, chi yùhú cächí-í sá vā cúú tnahá tnùhu-ndo ndihi ñáiyu cächí sá ndécú ichi Xítohó Jesucristú te ñá ndáá sá ndécú-yu ichi-gá. Te núu cùu-yu ñáiyu ndècu ichi díí iní, àdi cuú-yu ñáiyu xihó nchaa sá ío ñuyúy-a, àdi cuú-yu ñáiyu quide cahnu nchaa sá cächí-yu cùu ndiòxí te ñá ndáá chi dicó cue téé ñuyúy-a ní cadúha nchaa xiá<sup>n</sup>, àdi cuú-yu ñáiyu yiti yùhu-xi, àdi cuú-yu ñáiyu quíhu, àdi cuú-yu ñáiyu dùhu sá ndécú ndihi tnaha ñáiyu-xi, te nchaa ñáiyu duca<sup>n</sup> cächí sá ndécú ichi-gá te ñá ndáá te duca<sup>n</sup> xiquidé-yu, te ni vā cúú nihí tnáhá-ndó ndihi-yu caxi-ndo ndihi-yu. <sup>12-13</sup> Te ñá díú yùhú cùu-í téé cáhán cuendá nchaa ñáiyu ñá túú ndècu ichi Xítohó Jesucristú núu quide ndáá-yu àdi ñá túú quide ndáá-yu ndécú-yu, chi mee Yá Ndiòxí cáhán-gá te núu nása quidé-yu ndécú-yu. Dico nchòhó chi tàú-ndó càda cuendá-ndó núu nása quide cue ñáiyu ndècu ndihi-ndo ichi Xítohó Jesucristú. Núu xiá<sup>n</sup> xini ñuhu-xi

daquee tíhú-ndó téé duca<sup>n</sup> ñá túú quide váha ndècu ndihi-ndo-án, te vā dāñá-gá-ndó nihí tnáhá ndihi ñaha-dé xii-ndo.

## 6

*Nàcuáa tàú-xi cada ñáiyu ndècu ichi Xítohó Jesucristú te núu ñá túú ndècu ndihi váha tnáhá-yu*

<sup>1</sup> Te dava nchòhó òré ñá túú ndècu ndihi váha tnàha-ndo te cüyü-ndo cuáhán-ndó núú cue téé cùchiu<sup>n</sup> ñá túú ndècu ichi Xítohó Jesucristú sàcán cuéchi-ndo, te ñá túú dùca<sup>n</sup> tàú-xi cada-ndo chi núú cue téé ndècu ichi-gá duca<sup>n</sup> tàú-ndó quíhí-ndó càcá<sup>n</sup> cuéchi-ndo. <sup>2</sup> Te nchòhó sa náha-ndo sá ncháá ñáiyu cùu cuendá Yá Ndiòxí sáá nduu cáhán-yu te núu ní quide ndáá nchaa dava-gá ñáiyu àdi ñá túú ní quide ndáá-yu, te nchòhó tnáhá-ndó cùu-ndo ñáiyu duca<sup>n</sup> cáhán, te núu duca<sup>n</sup> te cutnùn iní-ndó sá ndácú-ndó càda ndáá-ndó nchaa cuéchi sá ñá túú úhú cundáá vitna ndècu-ndo ñuyúy-a. <sup>3</sup> Te nchòhó sa náha-ndo sá ncháá ndéé cue espirítu xínú cuéchi núú Yá Ndiòxí sáá nduu cáhán-ó te núu nása quide-xi ndecu-xi. ¡Núu xiá<sup>n</sup> cutnùn iní-ó sá úú-gá ndacu-ó càda ndáá-ó ncháa cuéchi sá ío ñuyúy-a! <sup>4</sup> Te núu ío dava-ndo ío nása cùu ndecu-ndo te xináa-ndó, te vā quíhí-ndó càcá<sup>n</sup> cuéchi-ndo núú cue téé ndèhe-ndo sá ñá túú ndècu-güedé ichi Yá Ndiòxí, dico nchòhó chi da núú cue téé-án cuáhán-ndó sàcán cuéchi-ndo. <sup>5</sup> Te duha cáhán-í cuendá cucaha<sup>n</sup> núú-ndó chi ñá túú quide váha-ndo sá dúcán quide-ndo. ¿Te náa dicó-ná ñá túú tnahí ì<sup>n</sup> téé cutnùn iní-xi nàcuáa cada ndáá cuéchi-ndo ndècu ndihi-ndo ichi Xítohó Jesucristú-án? <sup>6</sup> Te nchòhó, ñá túú quide váha-ndo, chi dava-ndo cuáhán-ndó núú cue téé ñá túú ndècu ichi Xítohó Jesucristú sàcán cuéchi-ndo cuendá dava-gá cue ñáiyu ndècu ndihi-ndo ichi-gá.

<sup>7</sup> Te ñá túú quide váha-ndo sá dúcán náa ndihi tnàha-ndo te cuáhán-ndó sàcán cuéchi-ndo, te váha-gá sá cádá càhnu iní-ndó cuéi nándi na càda ñaha tnaha ñáiyu-ndo xii-ndo cuéi dùhú-yu sá ndécú ndihi-ndo dico cada càhnu-ni iní-ndó. <sup>8</sup> Dico nchòhó chi ñá túú quide cahnu iní-ndó chi da uu<sup>n</sup>-gá ñá túú quide váha-ndo sàcúú-xi tnàha ñáiyu-ndo, chi cùu úhú iní-ndó-yu, te dùhu-ndó-yu, te ndéé meé-ndó nàcuáa ndècu-ndo ichi Xítohó Jesucristú duca<sup>n</sup> quide tnaha-ndo.

<sup>9</sup> Te nchòhó sa náha-ndo sá ncháá ñáiyu ndècu ichi cuehé ichi duha vā ndúú tãhü-yu cundecu-yu núú ndécú Yá Ndiòxí táxí tnùn-í-gá, núu xiá<sup>n</sup> vā cání iní-ndó sá ñáiyu-án nduu tãhü-yu cundecu-yu ndihi-gá. Te ni cue ñáiyu ndècu ichi díí iní, te ni cue ñáiyu quide cahnu nchaa sá cächí-yu cùu ndiòxí te

ñã ndää chi dicó cue tée ñyíyú-a ní cadúha nchaa xíã<sup>n</sup>, te ni cuè tée càhá<sup>n</sup> ndihí ñadhí te ñã díú ñadhí-güedé cùu-yu, te ni cuè ñáyiu dihí càhá<sup>n</sup> ndihí tée te ñã díú yí-yu cùu-güedé, te ni cuè tée càhá<sup>n</sup> ndihí tnàha tée-xi,<sup>10</sup> te ni cuè ñáyiu dùhu, te ni cuè ñáyiu xihu sá ndécú ndihí tnàha ñáyiu-xi, te ni cuè ñáyiu quihu, te ni cuè ñáyiu càhá<sup>n</sup> úhu, te ni cuè ñáyiu dancüehé tnàha ñáyiu-xi te dùhu ñaha-yu, te ni ñã cue ñáyiu duha xiquide vá ndúú tãhú-yu cundecú-yu núú ndécú Yã Ndiöxi táxi tnúni-gã.<sup>11</sup> Te dava nchòhó duca<sup>n</sup> ní xóo cada-ndo ni cùu, te vitna ní cuu-ndo ñáyiu sa ní nduu ndoo ní nduu nine iní-xi, te ní cuu-ndo ñáyiu cùu cuendá Yã Ndiöxi, te ní cuu tucu-ndo ñáyiu ñã túú-gã cuèchi-xi ndècu núú-gã. Te duca<sup>n</sup> ní quide ñaha Yã Ndiöxi xii-ndo sã vãha sã cuendá Xitohó Jesucristú, te ní ngündecu ndihí-ndo Espiritú Yã Ndiöxi.

### *Nàcuáa ndüu cuendá yiqui cùu-ó*

<sup>12</sup> Te càchí ñáyiu sã ncháá sã sání iní-ó cuu cada-o, te ndää càhá<sup>n</sup>-yu dicó-ni sã ñã ncháá cùu-xi sã vãha sã cùu-xi-ó. Te núu cuíni nchaa sã váha sã cùu-xi-ó ã taxi tnúni ñãhá-xí te vá cádá-ó.<sup>13</sup> Te nchòhó sa xini-ndó sã ncháá sã xéxi-ó cuãnguee-xi xiti-ó, te xiti-ó ní cuãha tnàhí-xi sã cùhú<sup>n</sup> ncháa sã cáxi-ó, dico xiti-ó ndihí nchaa sã xéxi-ó chi naa-xi. Te Xitohó Jesucristú néhé cuendá-gã yiqui cùu-ó, te duca<sup>n</sup> yiqui cùu-ó cùu-xi cuendá-gã, te ñã túú ní cuãha yiqui cùu-ó sã cündecu-xi ichi díí iní.<sup>14</sup> Te dátaná ní quide Yã Ndiöxi ní dándótó-gã Xitohó Jesucristú duca<sup>n</sup> càda ñaha-gã xii nchoo tucu chi dandótó ñaha-gã xii-ó núu na cùu-ó, chi ndàcu-gã quidé-gã nchaa sã vãha.

<sup>15</sup> Te nchòhó sa nàha-ndo sã yiqui cùu-ó cùu-xi cuendá Xitohó Jesucristú chi ñã-ni cùu-o ndihí-gã, núu xíã<sup>n</sup> ñã túú tnàhí ndüu váha-xi càhá<sup>n</sup> ndihí-o ñáyiu ndècu ichi díí iní, chi yiqui cùu-ó cùu-xi cuendá Xitohó Jesucristú, te núu duca<sup>n</sup> na càda-o te cada iní-ó sã cuendá-nã ñáyiu-ã<sup>n</sup> cùu yiqui cùu-ó, núu xíã<sup>n</sup> ñã túú tnàhí ndüu váha-xi duca<sup>n</sup> càda-o.<sup>16</sup> Te sa xini-ndó sã núu ñã tée na càhá<sup>n</sup> ndihí-dé ñã ñadhí ndécú ichi díí iní te cada iní-ó sã ñã-nã yiqui cùu-ó cùu-yu. Te duca<sup>n</sup> càhá<sup>n</sup>-xi núú tütú Yã Ndiöxi núú càchí-xi: "Ñã tée na càhá<sup>n</sup> ndihí-dé ñã ñadhí te ñã-nã yiqui cùu-ó cùu-yu", duha càchí-xi.<sup>17</sup> Te duca<sup>n</sup> sãtnahá-xi cùu nchaa ñáyiu tnàhá tnúhu ndihí Xitohó Jesucristú, chi ñã-nã cùu-yu ndihí-gã.

<sup>18</sup> Te núu xíã<sup>n</sup> càhá<sup>n</sup>-í dóho-ndo sã vá cündecu-ndo ichi díí iní, chi núu duca<sup>n</sup> na càda-ndo te ñã túú tnàhí sã vãha cùu-xi sã cùu-xi yiqui cùu-ndó chi ío dàcuíta ñãhnu-xi yiqui cùu-ndó. Te nchaa dava-gã sã cuèhé sã dúhá ñã túú quide-xi yiqui

cùu-ndó dátaná quidé xíã<sup>n</sup>.<sup>19</sup> Te nchòhó sa cùtnuni iní-ndó sã yiqui cùu-ndó cùu-xi dátaná ñã vehe núú ndécú Espiritú Yã Ndiöxi. Te duca<sup>n</sup> sãtnahá-xi cùu yiqui cùu-ndó chi ndècu-ndo ndihí Espiritú-gã. Te mee-gã ní taxi-gã Espiritú-gã ndécú ndihí-ndo, te ñã díú mée-ndo cuu cuendá-ndó mée-ndo chi Yã Ndiöxi cùu cuendá ñãhá-gã xii-ndo.<sup>20</sup> Te duca<sup>n</sup> cùu-ndo ñáyiu cùu cuendá Yã Ndiöxi chi Xitohó Jesucristú ní nacháhu-gã nchaa yicá cuèchi-ndo. Te núu xíã<sup>n</sup> xini ñùhu-xi sã ñihí ní ndúu-ndó càda-ndo nacúaa cuu càhnu Yã Ndiöxi, te duca<sup>n</sup> tàú-xi cada-ndo chi espíritú-ndó ndihí yiqui cùu-ndó cùu-xi cuendá-gã.

## 7

### *Sáhu sã cùu-xi ñáyiu ní tnándaha*

<sup>1</sup> Te ní quexio tutú sã ní dáquixi-ndó ndàha-í, te vitna na càchí tnúhu-í xii-ndo cuendá tnúhu càhá<sup>n</sup>-ndó núú tütú-ndó. Te vãha cada-xi te núu vá cándèca tée ñadhí, te duca<sup>n</sup>-ni vãha cada-xi te núu ñáyiu dihí vá cándèca-yu tée.<sup>2</sup> Te dicó-ni sã núu duca<sup>n</sup> na càda-ndo te dava-ndo càni iní-ndó cündecu-ndo ichi díí iní. Núu xíã<sup>n</sup> xini ñùhu-xi sã ncháá cuè tée ndi díí cündecu ñadhí-güedé, te duca<sup>n</sup>-ni tucu nchaa cue ñáyiu dihí ndi díí cündecu yí-yu.<sup>3</sup> Te càchí tnúhu-í xii-ndo sã ncháá cuè tée vá cùú càchí-güedé sã vá cùú càhá<sup>n</sup> ndihí-güedé ñadhí-güedé, te diu-ni duca<sup>n</sup> cuè ñáyiu dihí tucu, vá cùú càchí-yu sã vá cùú càhá<sup>n</sup> ndihí-yu yí-yu.<sup>4</sup> Te nchaa cue ñáyiu dihí chi ñã díú mée-ní-yu cùu cuendá-yu yiqui cùu-ndó chi tnàhá cùu cuendá yí-yu, te duca<sup>n</sup>-ni ncháa cue tée tucu chi ñã díú-ní mée-güedé cùú cuendá-güedé yiqui cùu-ndó güedé chi tnàhá cùu cuendá cue ñadhí-güedé.<sup>5</sup> Te cue tée vá cùú càchí-güedé sã vá cùú càhá<sup>n</sup> ndihí-güedé ñadhí-güedé. Te ni cuè ñáyiu dihí vá cùú càchí-yu sã vá cùú càhá<sup>n</sup> ndihí-yu yí-yu. Àdi te núu ní ndatnúhu-yu sã vá dúcá<sup>n</sup> càdá-yu ñã úú nduu cuendá sã cuíni-yu ío càhá<sup>n</sup> ndihí-yu Yã Ndiöxi, dico ná yãha núu ná daha nduu duca<sup>n</sup> ní ndatnúhu-yu sã vá dúcá<sup>n</sup> càdá-yu te nanihí tnàhá tucu-yu, chi núu ñãhá te cudana te vá cuacãhnu iní-yu te sácuihná dacàhá<sup>n</sup> ñãhá-xi xii-yu cadá-yu sã ñã túú tàú-yu cadá-yu.

<sup>6</sup> Te tnúhu càhá<sup>n</sup>-í-a quèe-xi sã tée ndihí ñadhí cuu candeca tnàhá-yu dico ñã túú quide yica-í sã dúcá<sup>n</sup> càdá-yu.<sup>7</sup> Te yúhu sání iní-í sã núu dicó sã cùu te nchaa-ndo cündecu-ndo dátaná ndécú-í, dico ñãhá chi mee Yã Ndiöxi ní càchí-gã nàcuáa nduu táhú-ó ñã ñã-o cundecu-o, chi dava-o ní cutáhú-ó núú-gã sã cündecu ñadhí-ó te

dava-o ñáhá. <sup>8</sup> Te càchí tnúhu-í xii nchòhó cue tée vátá nihí-gá ñàdihí-xi sá vâha-gá sá nûu vá cûndècu ñàdihí-ndó dàtná yúhú. Te duca<sup>n</sup>-ni nchòhó cue ñâyiu dihí ñâyiu vátá nihí-gá yî-xi sá vâha-gá sá nûu vá cûndècu yî-ndo. Te ðiu-ni duha càhá<sup>n</sup>-í sá cúu-xí nchàa nchòhó ñâyiu dihí ní quendó quèé sá vâha-gá sá nûu vá càndèca-gá-ndó tée. <sup>9</sup> Te càchí tnúhu-í xii nchaa-ndo sá nûu xito-ndo sá vá cûndèe iní-ndó cûndècu mee-ndo te vâha-gá sá nûu tnândaha-ndo, te ñá díú sá mée-ní càni cuehé cani duha iní-ndó cûndècu-ndo.

<sup>10</sup> Te nchaa nchòhó ñâyiu sa ní tnândaha càhá<sup>n</sup>-í dóho-ndo, te ñá díú mée-í duha càhu iní-í càhá<sup>n</sup>-í dóho-ndo chi Xítohó Jesucristú duca<sup>n</sup> dàcahu iní ñáhá-gá xii-í, chi mee-gá cûnî-gá cada-ndo nàcuáa na càhá<sup>n</sup>-í-a. Te nchaa nchòhó cue ñâyiu dihí càhá<sup>n</sup>-í dóho-ndo sá vá dàñá-ndó yî-ndo. <sup>11</sup> Te nûu ío dava-ndo sá ní dàñá-ndó yî-ndo, te xini ñuhu-xi sá vá càndèca-gá-ndó tée, chi cûndècu mee-nâ-ndó àdi nûu ñáhá te naquehe<sup>n</sup> tucu-ndo tée ní cuu yî-ndo. Te nchaa nchòhó cue tée ndècu ñàdihí-xi càhá<sup>n</sup>-í dóho-ndo sá vá dàñá-ndó ñâyiu cûu ñàdihí-ndó.

<sup>12</sup> Te tnúhu na càhá<sup>n</sup>-í-a cûu-xi sá ní sani iní mée-í te ñá díú tnúhu sá ní cachí Xítohó Jesucristú càhá<sup>n</sup>-í cúu-xí. Te nûu dava nchòhó cue tée ndècu ichi Xítohó Jesucristú ndécá-ndó ñâyiu dihí ñâyiu ñá túú ndècu ichi-gá, te vá dàñá-ndó-yu te nûu cûu váha iní-yu ndèca ñahá-yu xii-ndo. <sup>13</sup> Te nûu dava nchòhó cue ñâyiu dihí ñâyiu ndècu ichi Xítohó Jesucristú ndécá-ndó cuè tée ñá túú ndècu ichi-gá te vá dàñá-ndó-güedé te nûu cûu váha iní-güedé ndécá ñaha-güedé xii-ndo. <sup>14</sup> Te nûu ñ<sup>n</sup> tée ñá túú sàndáá iní-dé Xítohó Jesucristú te ñàdihí-dé sàndáá iní ñáhá-á<sup>n</sup> xii-gá, te tée-á<sup>n</sup> ní cuu-dé ñ<sup>n</sup> tée sa ní cuyatni tnahá tnúhu ndihí ñaha xii-gá sá cuèndá ñàdihí-dé. Te duca<sup>n</sup> sàtnahá-xi cûu tucu ñàdihí ñá túú sàndáá iní ñáhá xii Xítohó Jesucristú te yî-a sàndáá iní ñáhá-dé xii-gá, te ñaha-á<sup>n</sup> sa ní cuyatni tnahá tnúhu-a<sup>n</sup> ndihí-gá sá cuèndá yî-a<sup>n</sup>, te ðiu-ni duca<sup>n</sup> sàtnahá-xi cûu cue landú-yu chi sa ní cuyatni tnahá tnúhu-güexi ndihí-gá. Te nûu vá dúcá<sup>n</sup> cûu te cue landú-yu-á<sup>n</sup> ío xica cûndècu-güexi nûú-gá. <sup>15</sup> Te nûu ñ<sup>n</sup> tée ñá túú sàndáá iní ñáhá xii Xítohó Jesucristú cûnî-dé dañá tnàha-dé ndihí ñàdihí-dé ñaha sàndáá iní ñáhá xii Xítohó Jesucristú, te ðiu-ni na càda-dé nàcuáa sàni iní-dé. Te ðiu-ni duca<sup>n</sup> tucu te nûu ñàdihí ñaha ñá túú sàndáá iní ñáhá xii Xítohó Jesucristú cûnî-a<sup>n</sup> dañá-a<sup>n</sup> tée sàndáá iní ñáhá xii-gá, tée cûu yî-a<sup>n</sup> te ðiu-ni na càda-a<sup>n</sup> nàcuáa sàni iní-a<sup>n</sup>. Chi tée sàndáá iní ñáhá xii Xítohó Jesucristú ñá

túú tàú-dé cada yica-dé ñàdihí-dé cûndècu ndihí ñaha-a<sup>n</sup> xii-dé te nûu ñá túú cûnî-a<sup>n</sup>. Te ðiu-ni duca<sup>n</sup> ñàdihí ñaha sàndáá iní ñáhá xii-gá ñá túú tàú-a<sup>n</sup> cada yica-a<sup>n</sup> cûndècu ndihí ñaha yî-a<sup>n</sup> xii-a<sup>n</sup> te nûu ñá túú cûnî-dé cûndècu ndihí ñaha-dé xii-a<sup>n</sup>, chi Yá Ndióxi cûnî-gá sá ncháá nchòo ñâyiu ndècu ichi-gá cûndècu váha-o vá nàá-ó. <sup>16</sup> Chi cue tée sàndáá iní tnúhu Xítohó Jesucristú ñá túú cûtnunî iní-güedé te nûu ndacu-güedé canu ichi-güedé ñàdihí-güedé ichi-gá àdi ñáhá te nûu ñá túú sàndáá iní ñáhá-yu xii-gá, te duca<sup>n</sup>-ni cuè ñâyiu dihí sàndáá iní tnúhu Xítohó Jesucristú ñá túú cûtnunî iní-yu te nûu ndacu-yu canu ichi-yu yî-yu ichi-gá àdi ñáhá te nûu ñá túú sàndáá iní ñáhá-güedé xii-gá.

<sup>17</sup> Te duha na càchí tnúhu-í xii-ndo, nchaa chiú<sup>n</sup> ní nduu táhú-ndó nûú Yá Ndióxi quidè-ndó ndèe cûtnàhá ní càhá<sup>n</sup> ñáhá-gá xii-ndo ní natuha-ndo ichi-gá te ðiu-ni chiú<sup>n</sup>-á<sup>n</sup> cada-ndo cûndècu-ndo. Te nchaa xichi nûú tàcá ñâyiu dàcuaha tnúhu-gá ðiu-ni duha càhá<sup>n</sup>-í dóho-yu. <sup>18</sup> Te nchaa cue tée ndècu señá ñî-xi dàtná ní cachí ndí Moisés, cue tée ní càhá<sup>n</sup> Yá Ndióxi ndécú ichi-gá, te ðiu-ni duca<sup>n</sup> cûnduu-güedé cûndècu-güedé, te nchaa cue tée ñá túú ndècu señá ñî-xi ní càhá<sup>n</sup>-gá cûndècu ichi-gá, ðiu-ni duca<sup>n</sup> cûnduu-güedé cûndècu-güedé vá cuàha-güedé señá ñî-güedé. <sup>19</sup> Te ñ<sup>n</sup>-ni cûu-xi cuèi na cuàha-o señá ñî-o àdi vá cuàha-o. Te sá ío-gá xini ñuhu-xi cada-o xiá<sup>n</sup> cúu-xí sá càdá-ó nchàa nàcuáa cûnî Yá Ndióxi. <sup>20</sup> Chi xini ñuhu-xi sá cûndècu-ni-o datná ndécú-ó cûtnàhá ní càhá<sup>n</sup> ñáhá Yá Ndióxi xii-o ní ngûndècu-ó ichi-gá. <sup>21</sup> Te nûu cûu-ndo ñâyiu ñá túú tnàhí dàñá quee nûú chiú<sup>n</sup> patróo<sup>n</sup>-xi cûtnàhá ní càhá<sup>n</sup> ñáhá Yá Ndióxi xii-ndo, te ñá túú nà cani iní-ndó, dico nûu dàñá ñaha patróo<sup>n</sup>-ndó quèe-ndo nûú chiú<sup>n</sup>-ndó te váha-ni quee-ndo nûú chiú<sup>n</sup>-ndó. <sup>22</sup> Te sátá ní càhá<sup>n</sup> ñáhá Xítohó Jesucristú xii nchòhó ñâyiu duca<sup>n</sup> ñá túú tnàhí dàñá quee nûú chiú<sup>n</sup> patróo<sup>n</sup>-xi-á<sup>n</sup>, te ní cuu-ndo dàtná ñâyiu dàñá quèé nûú chiú<sup>n</sup> patróo<sup>n</sup>-xi sá cúu-xí-gá, te duca<sup>n</sup> chi ñá túú-gá ndécú-ndó ichi cuehé ichi duha. Te nchòhó ñâyiu dàñá quèé nûú chiú<sup>n</sup> patróo<sup>n</sup>-xi cûu-ndo datná ñâyiu ñá túú tnàhí dàñá quee nûú chiú<sup>n</sup> patróo<sup>n</sup>-xi sá cúu-xí Xítohó Jesucristú, te duca<sup>n</sup> chi xinu cuechi-ná-ndó nûú-gá. <sup>23</sup> Te Yá Ndióxi ní nduu cuèndá ñáhá-gá xii-o chi Xítohó Jesucristú ní nacháhu-gá nchaa yíca cuèchi-o sá ndécú nûú Yá Ndióxi ní cûu, te vá dàñá-ndó sá tnàha ñâyiu-ndo nàdatuhú iní ñáhá-yu xii-ndo vá cúnú cuèchi-ndo nûú Xítohó Jesucristú nàcuáa tàú-xi cûnduu. <sup>24</sup> Te nûu xiá<sup>n</sup> càchí tnúhu-í xii nchaa nchòhó ñâyiu ndècu ndihí-í ichi Xítohó Jesucristú sá

cúndecu-ni-ndo datná-ni ndècu-ndo ndéé cútñahá ní cáhá<sup>n</sup> ñáhá-gá xii-ndo, te ñi-ndi-ndi duca<sup>n</sup> cùndecu-ndo ichi-gá.

<sup>25</sup> Te càchí tnúhu tucu-í xii-ndo sá Xítoho Jesucristú ñá túú càchí tnúhu-gá xii-í nùu nása cáhá<sup>n</sup>-í cuendá nchaa ñáiyu vátá tnándaha-gá. Te duha sàni iní-í cáhá<sup>n</sup>-í cuendá-yu, te nchòhò cuu quíndáá iní-ndó tnúhu cáhá<sup>n</sup>-í chi Xítoho Jesucristú chindèe chitúu ñaha-gá xii-í. <sup>26</sup> Te yúhú càchí-í sá sá cuendá nchaa tnúndòho tnúhu ndàhú ío ñuyú-a vitna, te váha-gá sá ncháá ñáiyu te nùu nása xíndecú-yu te duca<sup>n</sup>-ni na cùndecú-yu. <sup>27</sup> Te nchaa cue téé ndècu ñadihí-xi te duca<sup>n</sup>-ni na cùndecu-güedé ndihí-yu, te nchaa cue téé ñá túú ñadihí-xi te duca<sup>n</sup>-ni na cùnduu-güedé vá ndúcú-güedé ñadihí-güedé. <sup>28</sup> Dico nchaa cue téé na ndècu ñadihí-xi te ñá díú ñi<sup>n</sup> cuéchi cùu-xi sá dúcá<sup>n</sup> ná ndècu-güedé ñadihí-güedé, te ñi-ndi-ndi duca<sup>n</sup> cùu tucu cue ñáiyu ñi<sup>n</sup> te nùu na ñihí-yu yí-yu chi ñá díú ñi<sup>n</sup> cuéchi cùu-xi sá dúcá<sup>n</sup> ñihí-yu yí-yu. Te nùu cue téé na ñihí-güedé ñadihí-güedé te nándi ndohó-yu cùndecú-yu ñuyú-a, te nùu xíá<sup>n</sup> duha cáhá<sup>n</sup>-í cuendá sá vá ndúcú-güedé ñadihí-güedé cuendá sá vá ndòhò-yu.

<sup>29</sup> Te nchaa nchòhò ñáiyu ndècu ndihí-í ichi Xítoho Jesucristú na càchí tnúhu-í xii-ndo sá ñá túú-gá vai nduu cumání te quixi tucu Xítoho Jesucristú, nùu xíá<sup>n</sup> xíní ñuhu-xi sá ndéé vitna ngütá nchaa cue téé ndècu ñadihí-xi cada-güedé chiú<sup>n</sup> Xítoho Jesucristú, te cada-güedé dátá sá ñá túú ñadihí-güedé. <sup>30</sup> Te nchaa ñáiyu ndihú iní-xi te na càda-ní-yu sá ñá túú ndihú iní-yu cadá-yu chiú<sup>n</sup> Yá Ndióxi. Te nchaa ñáiyu cùdíí iní-xi te na càda-ní-yu sá ñá túú cùdíí iní-yu cadá-yu chiú<sup>n</sup>-gá, te nchaa ñáiyu ndècu ndihí nándi sá ndécú ndihí te na càda-ní-yu sá ñá túú ná ndécú ndihí-yu cadá-yu chiú<sup>n</sup>-gá. <sup>31</sup> Te nchaa ñáiyu nèhe chiú<sup>n</sup> nchaa sá ío ñuyú-a te na càda-ní-yu cuendá sá ñá túú ná nèhé chiú<sup>n</sup>-yu cadá-yu chiú<sup>n</sup> Yá Ndióxi, chi nchaa sá ío ñuyú-a sa ñuhu-xi ichi cuáhá<sup>n</sup>-xi nùu ndíhí ñihnu-xi.

<sup>32</sup> Te cuiní-í sá vá cùhú<sup>n</sup> iní-ndó nándi sá ío ñuyú-a, te ni ñá túú tnáhi ná caní iní-ndó cùndecu-ndo, chi nchaa cue téé ndècu ichi Xítoho Jesucristú xíndecu mee ío ñuhu iní-güedé cada-güedé chiú<sup>n</sup>-gá nàcuáa cudiú-güedé nùu-gá. <sup>33</sup> Te nchaa cue téé sa ndècu ñadihí-xi cue téé ndècu ichi-gá ñuhu iní-güedé nàcuáa cada-güedé cùndecu-güedé ñuyú-a cuendá duca<sup>n</sup> cudiú-güedé nùu ñadihí-güedé. <sup>34</sup> Te ñi-ndi-ndi duca<sup>n</sup> cùu tucu cue ñáiyu ñi<sup>n</sup> chi ñá túú ñi<sup>n</sup>-ni cuu ñáiyu sa ndècu yí-xi ndihí ñáiyu vátá cùndecu-gá yí-xi, chi

ñáiyu ndècu ichi Xítoho Jesucristú ñá túú ndéca téé ío ñuhu iní-yu cadá-yu chiú<sup>n</sup>-gá nàcuáa ñihí ní ndúú-yu cùndecu yíñuhú-yu nùu Yá Ndióxi, dico cue ñáiyu ñi<sup>n</sup> ndéca téé ndècu ichi-gá ío ñuhu iní-yu nàcuáa cùndecú-yu ñuyú-a cuendá cudiú-yu nùu yí-yu.

<sup>35</sup> Te duha cáhá<sup>n</sup>-í cuendá cùu-xi ñi<sup>n</sup> sá váha xii-ndo, te cudiú nùu tnáhá-ndó, te cuu-ndo ñáiyu cada ndáá nùu Xítoho Jesucristú, te mee-ni-gá cuhu<sup>n</sup> iní-ndó. Te ñá díú sá dúhá cáhá<sup>n</sup>-í te quide yica-í sá cadá-ndó nàcuáa cáhá<sup>n</sup>-í.

<sup>36</sup> Te nùu ío dava-ndo sàni iní-ndó sá ñá túú ndúu váha-xi sá ío cuu sacuéhé déhe yoco-ndo cùndecú-yu ña, te nùu sàni iní-ndó sá váha-gá candecá-yu téé te cada-ndo nàcuáa sàni iní-ndó, chi ñá díú ñi<sup>n</sup> cuéchi cùu-xi. <sup>37</sup> Te nùu dava-ndo ndècu déhe yoco-ndo, te vá yò ñi<sup>n</sup> cada yica ñaha xii-ndo sá cándecá-yu téé. Te nùu mee-ndo sàni váha iní-ndó nàcuáa cada-ndo, te nùu vá dásá<sup>n</sup>-ndó déhe yoco-ndo càndeca ñaha téé te quide váha-ndo sá dúcá<sup>n</sup> quide-ndo. <sup>38</sup> Te nchaa ñáiyu dása<sup>n</sup> déhe yoco-xi càndeca ñaha téé te váha-ni quide-yu, te nchaa ñáiyu ñá túú dása<sup>n</sup> déhe yoco-xi càndeca ñaha téé te váha-gá tucu quide-yu sá dúcá<sup>n</sup> quide-yu.

<sup>39</sup> Te nchaa ñáiyu ñi<sup>n</sup> ndécú yí-xi xini ñuhu-xi sá cùndecu-ní-yu ndihí yí-yu nini ndècu vívú-güedé chi duca<sup>n</sup> cáhá<sup>n</sup> tnúhu sá dánèhé ñáhá xii-o nàcuáa cada-o cùndecu-o, dico nùu na cùú-güedé te cuu naquehé<sup>n</sup>-yu ingá téé candecá-yu dicó-ni sá ñi-ndi-ndi téé ndècu ichi Xítoho Jesucristú. <sup>40</sup> Te yúhú sàni iní-í sá ío-gá váha cùndecú-yu te nùu vá nánducú-yu ingá téé candecá-yu, te duha cáhá<sup>n</sup>-í chi Espiritú Yá Ndióxi duca<sup>n</sup> dàcahu iní ñáhá-xi xii-í cáhá<sup>n</sup>-í.

## 8

*Cuendá nchaa sá nchító-ó sáñaha ñáiyu ndúu táhú nchaa sá càchí-yu cùu ndióxi*

<sup>1</sup> Te vitna na cáhá<sup>n</sup>-í cuendá nchaa sá nchító-ó sáñaha ñáiyu ndúu táhú nchaa sá càchí-yu cùu ndióxi te ñá ndáa chí dicó ndaha cue tee ñuyú-a ní cuáha nchaa xíá<sup>n</sup>. Te nchoo sa cùtnuní váha iní-ó cuendá nchaa xíá<sup>n</sup>, dicó-ni sá cuendá nchaa sá cùtnuní váha iní-ó xíá<sup>n</sup> quide càhnu-o mee-o, dico nùu cùu iní-ó tnàha ñáiyu-o te canu ichi-ò-yu ichi váha. <sup>2</sup> Te nùu dava-ndo sàni iní-ndó sá tũha-ndo dico cùu-ndo ñáiyu vátá cùtũha-gá nàcuáa taú-xi cunduu. <sup>3</sup> Te nùu nchòhò cùú iní-ndó Yá Ndióxi te mee-gá cáhá<sup>n</sup>-gá sá cùú-ndó ñáiyu cùu cuendá-gá.

<sup>4</sup> Te vitna na càchí tnúhu-í xii-ndo nàcuáa ndúu cuendá nchaa sá nchító-ó sáñaha ñáiyu ndúu táhú nchaa sá càchí-yu cùu ndióxi te ñá ndáa chí dicó ndaha cue téé ñuyú-a ní

cuáha nchaa xiá<sup>n</sup>. Te nchoo cùtnuni iní-ó sá ncháá sá cächí ñáiyu cùu ndiòxí cadúha-yu ñuyú-a ñá túú cùu-xi ndiòxí, chi ñ<sup>n</sup>dii díí-ni Yá Ndiòxí ndécú. <sup>5</sup> Te cue ñáiyu ñuyú-a cächí-yu sá cuéi andü te cuéi ñuyú-a ndècu titní ndiòxí. Te ndáá sá ndèni ní cuu ndècu espíritu sá cächí ñáiyu cùu ndiòxí te ñá ndáá sá ndiòxí cúú-xí, te nchaa xiá<sup>n</sup> táxi tnùní ñáhá-xí xii-yu. <sup>6</sup> Te nchoo cùtnuni ndáá iní-ó sá ñ<sup>n</sup>dii díí-ni Yá Ndiòxí ndécú te ñ<sup>n</sup>du-gá cúú-gá Tátá-ó, te nchoo cùu-o ñáiyu cùu cuendá-gá. Te ñ<sup>n</sup>du-ni mee-gá ní táuchíú<sup>n</sup>-gá ní cuáha nchaa sá ió ñuyúú-a, te cùtnuni tucu iní-ó sá ñ<sup>n</sup>dii díí-ni Xitohó Jesucristú ndécú, te Yaa-án ní quide-gá nchaa chiú<sup>n</sup> ní táhú Dütú Ndiòxí ní cadúha-gá nchaandi túhú sá ió ñuyúú. Te ñ<sup>n</sup>du-ni mee Xitohó Jesucristú quidé ndècu-o ichi-gá vitna.

<sup>7</sup> Te ñá ncháá nchòhò ñáiyu ndècu ichi Xitohó Jesucristú cùtnuni iní-ndó nàcuáa ndùu tnúhu cáhá<sup>n</sup>-í. Chi sa ní cáa<sup>n</sup>-ndo quide cahnu-ndo nchaa sá cächí-yu cùu ndiòxí ní cùu. Te cuendá xiá<sup>n</sup> núu nàquehe<sup>n</sup>-ni-ndo nchaa sá nchító-ó ndùu táhú nchaa sá cächí-yu cùu ndiòxí-án xéxi-ndo, te sàni-ni iní-ndó sá quidé cahnu-ndo nchaa sá cächí-yu cùu ndiòxí-án te ñá ndáá sá ndiòxí cúú-xí. Te núu sàni iní-ndó sá ñá túú vaha caxi-ndo sá dúcá<sup>n</sup> ndùu táhú-xi-án te xéxi-ndo te xiá<sup>n</sup> ñá túú cùu vaha iní-ndó cuendá sá dúcá<sup>n</sup> quide-ndo. <sup>8</sup> Te ñá díú ncháa sá xéxi-ó quide-xi cudiu-o núú Yá Ndiòxí, chi ñ<sup>n</sup>-ni quide-xi cuéi na caxi-o àdi vá caxí-ó chi ni ñ<sup>n</sup> sá caxí-ó vá chindèe ñaha-xi cudiu-o núú Yá Ndiòxí. Te cuéi vá caxí-ó dico ñá díú xiá<sup>n</sup> cada sá vá cùúú-o núú-gá. <sup>9</sup> Te cuu-ni caxi-ndo ncháa nàni ñihí-ndó. Te dicó-ni sá càda cuendá-ndó sá ñá díú cuendá sá xéxi-ndó-án cuíta nihnu dava ñáiyu ndècu ndihi-ndo ichi Xitohó Jesucristú cadá-yu nándi sá cadá-yu nàcuáa vá cúú vaha iní Yá Ndiòxí chi ñáiyu-án ñá túú cùtnuni iní-yu. <sup>10</sup> Te nchòhò ñáiyu xini vaha cuendá nchaa sá cächí-yu cùu ndiòxí, te núu na quihí<sup>n</sup>-ndó núú ndécú ncháa xiá<sup>n</sup> te ngóo-ndo caxi-ndo nchaa sá ní cutáhú-xi, te quini ñáiyu ndècu ndihi-ndo ichi Xitohó Jesucristú, ñáiyu vátá cùtnuni-gá iní-xi nàcuáa ndùu cuendá nchaa sá dúcá<sup>n</sup> cächí-yu cùu ndiòxí-án, te cuéi sàni iní-yu sá ñá túú quide váha-ndo sá dúcá<sup>n</sup> quide-ndo te cudana te cada yicá-yu caxi-yu tnàhá-yu nchaa sá dúcá<sup>n</sup> ní nduu táhú nchaa sá cächí-yu cùu ndiòxí-án te ñá ndáá sá ndiòxí cúú-xí. <sup>11</sup> Te núu duca<sup>n</sup> cùtnuni iní-ndó nàcuáa ndùu cuendá nchaa xiá<sup>n</sup> te duca<sup>n</sup> quide-ndo, te sá dúcá<sup>n</sup> quide-ndo-án te dácuita nihnu-ndo dáva-gá ñáiyu ndècu ndihi-ndo ichi Xitohó Jesucristú, ñáiyu vátá cùtnuni-gá iní-xi nàcuáa ndùu cuendá nchaa xiá<sup>n</sup>, te ñ<sup>n</sup>du cuendá tnàhá ñáiyu-án ní xihí Xitohó Jesucristú. <sup>12</sup> Te sá dúcá<sup>n</sup>

quide-ndo-án cúú-xí ñ<sup>n</sup> cuéchi núú Xitohó Jesucristú, chi quide-ndo nàcuáa xinu iní-yu cadá-yu ñ<sup>n</sup> sá sáni iní-yu ñá túú vaha, núu xiá<sup>n</sup> ñá túú quide váha-ndo sá cúú-xí-yu. <sup>13</sup> Te núu yúhú cùtnuni iní-í sá sá cuendá ñ<sup>n</sup> sá caxí-í te ngóo ñ<sup>n</sup> ñáiyu ndècu ndihi-í ichi Xitohó Jesucristú cadá-yu ñ<sup>n</sup> sá vá cúú vaha iní Yá Ndiòxí, te váha-gá sá vá caxí-gá-í xiá<sup>n</sup> cuendá sá vá cadá-yu ñ<sup>n</sup> sá vá cúú vaha iní-gá.

## 9

*Nchaa sá cúú càda cue téé ní táuchíú<sup>n</sup> Xitohó Jesucristú cáhá<sup>n</sup> tnúhu-gá*

<sup>1</sup> Te yúhú chi cuu cada-í nchaa sá sáni iní-í, chi tnàhá-í ní táuchíú<sup>n</sup> Xitohó Jesucristú cáhá<sup>n</sup>-í tnúhu-gá núú ñáiyu. Te yúhú ní xini núú-í Xitohó Jesucristú Yaa cúú Xitohó-ó te nchòhò cúú-ndó ñáiyu ní sándáa iní tnúhu-gá sá cáhá<sup>n</sup>-í te duca<sup>n</sup> chi ndècu ndihi-í-gá. <sup>2</sup> Te ió dava ñáiyu ñá túú sándáa iní-yu sá Xitohó Jesucristú ní táuchíú<sup>n</sup>-gá cáhá<sup>n</sup>-í tnúhu-gá, dico nchòhò chi cùtnuni ndáa iní-ndó sá díú-gá ní tendaha ñaha-gá xii-í xicá cùu-í cáhá<sup>n</sup>-í tnúhu-gá, te duca<sup>n</sup> chi yúhú ní cáhá<sup>n</sup>-í tnúhu-gá núú-ndó te ní sándáa iní-ndó-gá te xiá<sup>n</sup> cùtnuni sá díú-gá ní tendaha ñaha-gá xii-í xicá cùu-í cáhá<sup>n</sup>-í tnúhu-gá núú ñáiyu.

<sup>3</sup> Te duha ndùu tnúhu cáhá<sup>n</sup>-í cuendá cund-edóho nchaa ñáiyu sàtnuhu ñaha xii-í. <sup>4</sup> Chi yúhú cuu-ni caxi-í nchaa núú sá cúú caxi-o na taxi ñáiyu. <sup>5</sup> Te cuu-ni cundecu ñadhi-í te caca ndeca-í-yu nchaa núú xicá cùu-í cáhá<sup>n</sup>-í tnúhu Yá Ndiòxí dàtná quidé dáva-gá cue téé cáhá<sup>n</sup> tnúhu-gá, ndihi cue téé cùu ñani Xitohó Jesucristú, ndihi te Bèe cuu daña-ndí chiú<sup>n</sup> quide-ndí te cada-ndí dàtná xiquide dáva-gá-güedé cáhá<sup>n</sup>-güedé tnúhu Xitohó Jesucristú. <sup>7</sup> Te nchoo xini-ó sá ncháá cué sandadú dacuití sá ñúhú yáhu-güedé xinu cuéchi-güedé, te ñá túú dicó duca<sup>n</sup> xinu cuechi-güedé. Te duca<sup>n</sup> sàtnahá-xi cùu tucu ñáiyu xitu ñ<sup>n</sup> sá xítú chi dacuití ñihí-yu ñ<sup>n</sup> sá xítú-yu xéxi-yu, te ñá díú dicó duca<sup>n</sup> xitú-yu. Te duca<sup>n</sup> cùu tucu cue téé cuu toli chi quihí-güedé dícu quiti xito-güedé xihí-güedé te ñá túú dicó duca<sup>n</sup> xito-güedé-dí. <sup>8</sup> Te vá cání iní-ndó sá sá dühá cáhá<sup>n</sup>-í te càhu iní mee-í duha cáhá<sup>n</sup>-í, chi tnúhu cáhá<sup>n</sup>-í-a ñ<sup>n</sup>-ni quèe-xi ndihi tnúhu ní cáhá<sup>n</sup> ndí Moisés. <sup>9</sup> Chi ndí-án ní chidó tnùní ndí núú tütú ndí nàcuáa ní xáha Yá Ndiòxí xii ndí, te cächí-xi: “Vá chíhí-ndó ñunu yuhu ndicutu oré danchihí-dí triú”, duha cächí-xi núú tütú ndí. Te ñá díú sá dúcá<sup>n</sup> ní cáhá<sup>n</sup> Yá Ndiòxí te cáhá<sup>n</sup>-gá mee-ni cuendá ndicutu-án. <sup>10</sup> Chi ní cáhá<sup>n</sup>-gá cuendá nchoo cué ñáiyu ndècu ichi-gá, te ndáá sá díú cuendá-ó duca<sup>n</sup> ní cáhá<sup>n</sup>-gá. Te nchaa cue téé xitu chíhí tatá sàni iní-güedé sá



diú tàtá chíhí-güedé-án cuu sá caxí-güedé, te diu-ni duca<sup>n</sup> cùu tucu cue tée xicani triú chi càni-güedé cuendá quee caxi-güedé. <sup>11</sup> Te duca<sup>n</sup> sátnahá-xi cùu nchúhú cue tée caha<sup>n</sup> tnúhu Xitohó Jesucristú, chi dānehé ñáhá-ndí xii-ndo cuendá nchaa sá váha quide ñaha Yá Ndióxi xii-o, núu xiá<sup>n</sup> dai tàú-xi sá nchòhó chindee ñaha-ndo xii-ndí núu ná cúú sá xíní ñuhu-ndí. <sup>12</sup> Te núu dava cue tée caha<sup>n</sup> tnúhu Yá Ndióxi chindee-ndo-güedé, te uu-gá duca<sup>n</sup> tàú-ndó chindee-ndo nchúhú cue tée ní sanu ichi ñaha xii-ndo ichi-gá.

Te cuèi tàú ndisa-ndo sá chindee ñaha-ndo xii-ndí dico ñá túú duca<sup>n</sup> caha<sup>n</sup>-ndí núú-ndó càda-ndo, te quide cahnu iní-ndí cuèi nāndi sá tá yāha-ndí véxi. Te duca<sup>n</sup> quide-ndí cuendá sá ñá túú nā cani iní ñāyiu cuendá-ndí te duca<sup>n</sup> cuíta cuténuu-gá tnúhu sá caha<sup>n</sup> nācuáa naníhí tǎhú-ó quíhí<sup>n</sup>. <sup>13</sup> Te nchòhó xini-ndó sá ncháá cuè tée xinu cuechi veñúhu diu-ni xiá<sup>n</sup> nihí-güedé xéxi-güedé, te diu-ni cue tée-án xínú cuechi-güedé núú xihí quiti ndúu tǎhú Yá Ndióxi, te diu-ni xiá<sup>n</sup> nihí tucu-güedé sá xéxi-güedé. <sup>14</sup> Te diu-ni duca<sup>n</sup> sátnahá-xi cùu nchúhú cue tée caha<sup>n</sup> tnúhu sá caha<sup>n</sup> nācuáa naníhí tǎhú-ó, chi Xitohó Jesucristú ní cachí-gá sá diú-ni cuendá chiú<sup>n</sup> quide-ndí nihí-ndí caxi-ndí. <sup>15</sup> Te ñá ñ<sup>n</sup> ndúu caha<sup>n</sup>-í núú-ndó càda-ndo nācuáa tàú-xi cunduu sá cúú-xi-í, te vā cāni iní-ndó sá sá dúhá caha<sup>n</sup>-í te ñ<sup>n</sup> sá xicá<sup>n</sup>-í núú-ndó. ¡chi cuèi na cùú-í sá ndòhò-í te ñá diú sá caha<sup>n</sup> ñāyiu sá sá cuendá sá caha<sup>n</sup>-í tnúhu Xitohó Jesucristú nihí-í xéxi-í!

<sup>16</sup> Te yúhú ñá túú quide cahnú-í mée-í sá caha<sup>n</sup>-í tnúhu sá caha<sup>n</sup> nācuáa naníhí tǎhú-ó, chi tàú tnàhá-í sá càdá-í chi duca<sup>n</sup> ní cachí Yá Ndióxi cada-í. ¡Te ndáhú ní cuu yúhú te núu vā caha<sup>n</sup>-í tnúhu-á!<sup>1</sup> <sup>17</sup> Te ñá túú caha<sup>n</sup>-í tnúhu-gá sá cúú iní mée-í chi mee-gá ní táuchíú<sup>n</sup>-gá caha<sup>n</sup>-í tnúhu-gá. Te núu caha<sup>n</sup>-í tnúhu-gá sá cúú iní mée-í te tàú-í nihí-í sá ndúú tǎhú-í ní cùu. <sup>18</sup> Dico sá sá ní nduu tǎhú-í cúú-xi sá io cudiú iní-í sá dícò duca<sup>n</sup> caha<sup>n</sup>-í tnúhu sá caha<sup>n</sup> nācuáa naníhí tǎhú-ó. Te cuèi tàú-í quehe<sup>n</sup>-í sá táxi-ndó ndúu tǎhú-í sá cuendá sá caha<sup>n</sup>-í tnúhu Xitohó Jesucristú, dico ñá túú duca<sup>n</sup> quide-í. <sup>19</sup> Te sá dúcā<sup>n</sup> dícò duca<sup>n</sup> caha<sup>n</sup>-í tnúhu sá caha<sup>n</sup> nācuáa naníhí tǎhú-ó, xiá<sup>n</sup> ní ñ<sup>n</sup> ñāyiu ñuyúú-a vā cúú càchí-yu sá táxi tnùní ñáhá-yu xii-í, te cuèi duca<sup>n</sup> dico mee-í ní sani iní-í sá cùú-í dàtná ñ<sup>n</sup> tée xinu cuechi núu nchaa ñāyiu cuendá duca<sup>n</sup> cuíta cuu vai-yu tuhá-yu ichi Xitohó Jesucristú quíhí<sup>n</sup>. <sup>20</sup> Te òré ñúhú tnáhí tnuú cue ñāyiu isràél te quide-í sá ñ<sup>n</sup>-ní cùu-í ndihí-yu cuèi ñá túú nchicú<sup>n</sup> nihnu-í tnúhu ní caha<sup>n</sup> ndí Moisés, te duca<sup>n</sup> quide-í cuendá sá ñāyiu-á<sup>n</sup>

quindáá iní-yu tnúhu caha<sup>n</sup>-í te tuhá-yu ichi Xitohó Jesucristú. <sup>21</sup> Te òré ñúhú tnáhí tnuú nchaa ñāyiu ñá túú nchicú<sup>n</sup> nihnu tnúhu ní caha<sup>n</sup> ndí Moisés, te quide-ni-í sá quide-í dàtná quide mée-yu cuendá quindáá iní-yu tnúhu caha<sup>n</sup>-í, te tuhá-yu ichi Xitohó Jesucristú. Te cuèi duca<sup>n</sup> quide-í dico ñá túú dàña ndeé-í quide-í nchaa nācuáa cuíni Yá Ndióxi cada-o, te duca<sup>n</sup> chi nchicú<sup>n</sup> nihnu-í quide-í nchaa nācuáa caha<sup>n</sup> Xitohó Jesucristú. <sup>22</sup> Te òré ndécú-í ndihí nchaa ñāyiu ñá túú cùtnuní váha iní-xi nācuáa cundecu ichi Xitohó Jesucristú, te tnàhá-í quide-í dàtná quide-yu cuendá sá ná tédóho-yu nchaa tnúhu caha<sup>n</sup>-í te duca<sup>n</sup> cùtnuní-gá iní-yu nācuáa cundecu-yu ichi-gá. Te nchaandi túhú ñāyiu quide-í sá ñ<sup>n</sup>-ni cuu-í ndihí-yu cuendá duca<sup>n</sup> nihí-í nācuáa cada-í te cundédóho-yu tnúhu caha<sup>n</sup>-í te tñi-yu ichi Xitohó Jesucristú te naníhí tǎhú-yu. <sup>23</sup> Te duha quide-í cuendá sá cuíta quindáá iní-yu tnúhu sá caha<sup>n</sup> nācuáa naníhí tǎhú-ó quíhí<sup>n</sup>, te duca<sup>n</sup> te tnàhá yúhú ío váha cundecu-í dàtná caha<sup>n</sup> tnúhu-á<sup>n</sup>.

<sup>24</sup> Te nchòhó sa xini-ndó sá ncháá cuè tée xinu quíhu mǎrcúhyú nchaa-güedé xínú-güedé, dico ñ<sup>n</sup>-ni-dé cúú tée ndācu ngodó núú te tée-án cúú tée nihí sá ndúú tǎhú-xi, te duca<sup>n</sup> xini ñuhu-xi cada nchòhó tucu chi cada-ndo nchaa nācuáa cuíni Yá Ndióxi cada-ndo cuendá duca<sup>n</sup> nihí-ndó sá ndúú tǎhú-ndó. <sup>25</sup> Te nchaa cue tée xini dadiqui te váha váha quide cuendá-güedé núu ná cúú sá càdá tñèñu te xòcani-güedé cuendá sá ñá diú xiá<sup>n</sup> cada te cuíta-güedé òré dadiqui-güedé. Te duca<sup>n</sup> quide-güedé cuendá cuíni-güedé nihí-güedé sá ndúú tǎhú-güedé, te sá ndúú tǎhú-güedé-án cúú-xi ñ<sup>n</sup> sá ndihí nihnu ñuyúú-a. Dico nchoo ndūcu ndee-o quide-o nācuáa nihí-ó sá ndúú tǎhú-ó, te xiá<sup>n</sup> cudí-xi cundecu ndihí-o ní caa ní quíhí<sup>n</sup>. <sup>26</sup> Te yúhú quide-í dàtná quide cue tée xinu, chi cue tée-án xini-güedé núú quéxió-güedé, te quide tucu-í dàtná xiquide cue tée sa ní cutúha nāa, te ñá túú quide-í dàtná quide cuè tée vitna dàcuaha nāa. Te duca<sup>n</sup> chi yúhú quide-í nchaa nācuáa cuíni Yá Ndióxi cunduu. <sup>27</sup> Te yúhú ñá túú dàña-í taxi tnùní ñáhá ní ñ<sup>n</sup> sá cuèhé sá dúhá xii-í chi yòtnii-í mée-í. Te duca<sup>n</sup> quide-í chi yúhú caha<sup>n</sup>-í tnúhu Xitohó Jesucristú núú ñāyiu, te cuíni-í sá vā cuíta sá ní cachí Yá Ndióxi nduu tǎhú-í.

## 10

*Cuendá nchaa sá ní cadúha cue tée ñuyúú-a quide cahnu ñāyiu*

<sup>1</sup> Te nchòhó ñāyiu ndécu ndihí-í ichi Xitohó Jesucristú na càchí tnúhu-í xii-ndo cuendá nchaa ñani tnàhá-ndí ñāyiu isràél ní xindecu ndeé sanaha, chi vitna tnàhá

nchòhó cùú-ndó dàtná cue ñaní tnáhá nchaa ñâyü-á<sup>n</sup> chi ndècu-ndo ichi-gá. Te nchaa ñâyü-á<sup>n</sup> ñi taxi ndecu Yá Ndióxi ñi vícò ñi dánèhé ñáhá-xí xii-yu ichi qihí<sup>n</sup>-yu, te ní quée dava ndute lámár nání Mår Tìcuèhé te nchaa-yu ní yáha-yu. <sup>2</sup> Te sá dúcá<sup>n</sup> ñi cuu te nchaa-yu ñi<sup>n</sup>-ná ní cuú-yu ndihi ndii Moisés, te ní xihí ndaha ñaha ndii xii-yu. <sup>3</sup> Te nchaa-yu ní xexi-yu sá ñi sáñaha Yá Ndióxi xii-yu. <sup>4</sup> Te duca<sup>n</sup> nchaa tucú-yu ní xihí-yu ndute sá ñi sáñaha-gá xii-yu, ndute sá ñi quée yiqui ñaha cava. Te cava-á<sup>n</sup> cada iní-ó sá cuú-xí dàtná Xitohó Jesucristú te duca<sup>n</sup> chi ndihi ñaha-gá xii-yu ichi cuáhá<sup>n</sup>-yu dàvá-á<sup>n</sup>. <sup>5</sup> Dico ío vái-yu ñá túú ní quidé-yu ñacuáa càhá<sup>n</sup> Yá Ndióxi, te xiá<sup>n</sup> ñá túú ní cuu váha iní ñáhá-gá xii-yu. Te sá dúcá<sup>n</sup> ñi quidé-yu núu xiá<sup>n</sup> òré ñúhú-yu ichi cuáhá<sup>n</sup>-yu xití yucu ío vái-yu ní xihí.

<sup>6</sup> Te duca<sup>n</sup> ñi cuu cuèndá nchoo vá cánchezú<sup>n</sup> ñihnu-o càda-o nacuaá ní quidé-yu, chi ñâyü-á<sup>n</sup> mee-ni nchaa sá cuèhé sá dúhá ní sani iní-yu ní quidé-yu. Te nchoo xini ñuhu-xi sá vá dúcá<sup>n</sup> càda-o. <sup>7</sup> Te yúhú càhá<sup>n</sup>-í dóho-ndo sá vá quíndáá iní-ndó te ní vá cáda càhnu-ndo ñi ñi<sup>n</sup> sá càchí-yu cùu ndiòxi ní cadúha cue téé ñuyü-á dàtná ní quide cue ñaní tnáhá-ndí ní xindecu ndéé sanaha. Chi ñâyü-á<sup>n</sup> ñi quidé-yu dàtná càhá<sup>n</sup>-xi núu tútú Yá Ndióxi núu càchí-xi: “Nchaa ñâyü ní xexi-yu ní xihí-yu ní quidé-yu vico, ní quide càhnú-yu sá càchí-yu cùu ndiòxi ní cadúha-yu te ñá ndáá sá ndiòxi cúu-xí”, duha càchí-xi núu tútú-gá. <sup>8</sup> Te ní vá cùndècu-ndo ichi díí iní dàtná ní quide dava ñâyü-á<sup>n</sup>, chi sá dúcá<sup>n</sup> ñi quidé-yu te ní xihí ócò úní ml-yu ñi<sup>n</sup>-ni ndüu. <sup>9</sup> Te vá cáni iní-ndó sá sá càhnú iní Yá Ndióxi te nándi sá cuèhé sá dúhá càda-ndo cuèndá cuini-ndó quini-ndó núu nása cada ñaha-gá xii-ndo, chi ñâyü ní xindecu ndéé sanaha-á<sup>n</sup> duca<sup>n</sup> ñi xóo cada-yu, te ní xihí-yu ní xexiha<sup>n</sup> cóo. <sup>10</sup> Te ní vá càhá<sup>n</sup> cuèhé-ndó cuèndá Yá Ndióxi, chi dava ñâyü ní xindecu ndéé sanaha-á<sup>n</sup> duca<sup>n</sup> ñi quidé-yu ní càhá<sup>n</sup> cuèhé-yu cuèndá-gá te ní quixi espíritu xínú cuèchi núu-gá ní sahni ñaha-xi xii-yu.

<sup>11</sup> Te duca<sup>n</sup> ñi cuu te duca<sup>n</sup> ñi ngúndéé núu tútú Yá Ndióxi cuèndá dacuáha-o vitna ta cuyatni nduu naa ñuyü-á. Te nchaa tnúhu sá ñi ngódo tnùn-á<sup>n</sup> càhá<sup>n</sup> dóho ñaha-xi xii-o cuèndá sá vá cáda-ó dàtná ní quide ñâyü-á<sup>n</sup>. <sup>12</sup> Te xiá<sup>n</sup> núu nchaa nchòhó ñâyü sáni iní sá ío váha cùndáá ndécú ichi Xitohó Jesucristú cada cuèndá-ndó sá dúcá<sup>n</sup>-ni cùndáá-ndó núu-gá, te vá dáná cuèndá-ndó càda-ndo sá ñá túú cùu váha iní Yá Ndióxi. <sup>13</sup> Te ñi<sup>n</sup> dàtná quidé sàcuíhná dácáhá<sup>n</sup>-xi iní nchaa dava-gá ñâyü nándi quidé-yu, te ñi<sup>n</sup> duca<sup>n</sup> quide ñaha-xi xii-ndo. Dico mee Yá Ndióxi cúú-gá Yaá quidé ndáá chi quide-gá

nchaa sá càhá<sup>n</sup>-gá, te ñá dáñá-gá sá sùúni cuídó sàcuíhná coto ndéé ñáhá-xi xii-ndo, chi neni-ni ñacuáa cùndee iní-ndó dáña-gá duca<sup>n</sup> quide ñaha-xi xii-ndo. Te ñi<sup>n</sup> ní-gá chindee ñaha-gá xii-ndo cùndee iní-ndó vá cáda-ndó cuéi nándi sá ná dàcahu iní ñáhá-xi xii-ndo.

<sup>14</sup> Te xiá<sup>n</sup> núu càhá<sup>n</sup>-í dóho nchòhó ñâyü ío cùu iní-í sá vá quíndáá iní-ndó ñi ñi<sup>n</sup> sá càchí-yu cùu ndiòxi te ñá ndáá chi dícò ndaha cue téé ñuyü-á ní cuáha nchaa xiá<sup>n</sup>, te ní vá cáda càhnu-ndo. <sup>15</sup> Te duha càhá<sup>n</sup>-í chi cùu-ndo ñâyü təcú tnùní, te mee-ndo ío váha cuáha-ndo cuèndá te núu váha-ni càhá<sup>n</sup>-í àdi ñá túú váha-ni. <sup>16</sup> Te nchoo ndácá<sup>n</sup> táhú-ó núu Yá Ndióxi cuèndá ndudí ndéhé yoho yáha stilé sá xihí-ó, te sá dúcá<sup>n</sup> xihí-ó ndudí ndéhé yoho yáha stilé-á<sup>n</sup>, te xiá<sup>n</sup> ndácú iní-ó sá ñi<sup>n</sup>-ni cùu-o ndihi Xitohó Jesucristú cuèndá sá ñi sati ñiñi-gá ní xihí-gá núu cùrúxi, te ñi<sup>n</sup> duca<sup>n</sup> sátnahá tucu-xi cùu paá sá xexi-ó òré xihí-ó ndudí ndéhé yoho yáha stilé-á<sup>n</sup>, chi sá dúcá<sup>n</sup> xexi-o paá-á<sup>n</sup> xiá<sup>n</sup> ndácú iní-ó sá ñi<sup>n</sup>-ni cùu-o ndihi Xitohó Jesucristú sá cuèndá yiqui cùñú-gá. <sup>17</sup> Te cuéi vái vihi-o dico ñi<sup>n</sup> dii-ni paá xexi-ó, te sá dúcá<sup>n</sup> ñi<sup>n</sup> dii-ni paá xexi-ó xiá<sup>n</sup> ndácú iní-ó sá ñi<sup>n</sup>-ni cùu-o ndihi Xitohó Jesucristú.

<sup>18</sup> Te cada cuèndá-ndó ñacuáa quide ñâyü israél, chi ñâyü-á<sup>n</sup> xexi-yu sá ndúu táhú Yá Ndióxi. Te sá dúcá<sup>n</sup> quidé-yu-á<sup>n</sup> cùtnùní iní-ó sá tnáhá tnúhu-yu ndihi-gá. <sup>19</sup> Te vá cáni iní-ndó sá sá dúhá càhá<sup>n</sup>-í te cachi-ndó sá cùnnoo nchaa sá càchí-yu cùu ndiòxi ní cadúha cue téé ñuyü-á chi ñá túú ná cúú ñi ñi<sup>n</sup> nchaa xiá<sup>n</sup>. Te ñi<sup>n</sup> duca<sup>n</sup> cùu tucu nchaa sá sáñaha ñâyü ndüu táhú-xi chi ñá túú cùnnoo-xi, chi ñi<sup>n</sup>-ni cùu-xi ndihi nchaa dava-gá sá xexi-ó. <sup>20</sup> Te yúhú càchí-í sá sá dúcá<sup>n</sup> quide nchaa ñâyü ñá túú tnáhá tnúhu ndihi Yá Ndióxi, te dícò nchaa espíritu cùndíhi yucu ñávaha sáñahá-yu sá ndúu táhú-xi sá dúcá<sup>n</sup> quidé-yu. Te ñá díú Yá Ndióxi sáñahá-yu sá ndúu táhú-gá. Te yúhú cuini-í sá vá tnáhá tnúhu-ndo ndihi cue espíritu cùndíhi yucu ñávaha. <sup>21</sup> Te duca<sup>n</sup> chi vá cúú tnáhá tnúhu-o ndihi cue espíritu cùndíhi yucu ñávaha te tnáhá tnúhu-o ndihi Xitohó Jesucristú, te ñá túú ndüu váha-xi ngóo càxi-o coho-o sá ndúu táhú cue espíritu cùndíhi yucu ñávaha-á<sup>n</sup>, te ngóo càda-o nacuaá ní dándóo tnúhu Xitohó Jesucristú coho-o ndudí ndéhé yoho yáha stilé, te caxi-o paá cada-o sá ndácú iní-ó sá ñi xihí-gá núu cùrúxi. <sup>22</sup> Te vá cáni iní-ó duca<sup>n</sup> cada-o cuèndá sá vá cúdeé<sup>n</sup> Yá Ndióxi, chi ñá túú ná càhnu cuu-o núu cada-o náni véxi iní mée-ó, chi mee-gá ío càhnu cuu-gá.

*Cada-o nchaa nacuaá cuu càhnu Yá Ndióxi*

<sup>23</sup> Te ndáá sá ncháá sã cuiní-ó càda-o te cuu cada-o dico ñá ncháá cùu-xi sã váha sã cúu-xí-ó, te ni ñã ncháá-xi chindee ñaha-xi nacuáa níhi ndéé-gã-ó cùndecu-o ichi Xitohó Jesucristú. <sup>24</sup> Te xini ñuhu-xi sã cáda-ó sã váha sã cúu-xí tñaha ñáiyu-o te ñá díu mée-ni sã cúu-xí mée-o cada-o.

<sup>25</sup> Te nchòhó cuu caxi-ndo nchaa cuñú sã cùyáhu cuñú sã xiní caxi-ndo, te vã ndúcú tñuhu-ndo te núu cùu-xi cuñú sã ní nduu táhú sã cächí-yu cùu ndiöxi. Te ñá túu ná cani iní-ndó càxi-ndo, <sup>26</sup> chi ñuyú-a ndihi nchaa sã ió cúu-xi cuendá Yã Ndiöxi.

<sup>27</sup> Te núu ñã ñáiyu ñá túu ndècu ichi Xitohó Jesucristú cãhá ñáhã-yu xii-ndo quihí-ndó càxi-ndo dítã vehé-yu, te núu sãni iní-ndó sã quihí-ndó te cuu quihí-ndó te caxi-ndo cuèi nái cùu sã táxi-yu dico vã càcã-ñ tñuhú-ndó núu-yu núu ndéé ní níhi-yu, te duca<sup>n</sup> te cuu váha iní-ndó càxi-ndo. <sup>28</sup> Te núu ñã ñáiyu cächí-yu sã xiã<sup>n</sup> cúu-xí sã ní nduu táhú sã cächí-yu cùu ndiöxi te vã cáxi-ndó cuendá sã ñáiyu duca<sup>n</sup> cãhá-ã<sup>n</sup> cuu váha iní-yu te ñá túu tñahi ná cani iní-yu. <sup>29</sup> Te yúhú cãhá-í cuendá nacuáa sãni iní mée ñáiyu duca<sup>n</sup> cãhá-ã<sup>n</sup> te ñá díu sã nacuáa sãni iní mée-ndó quide-ndo.

Te dava-ndo cächí-ndó: "Cuu-ni cada-o nchaa nacuáa sãni iní mée-ó cuèi dava-gã ñáiyu sãni iní-yu sã ñá túu ndùu váha-xi sã dúcã<sup>n</sup> càda-o", duha cächí-ndó. <sup>30</sup> Te cächí tucu-ndo: "Ñá túu tãu-xi cãhá<sup>n</sup> cuèhe ñáiyu cuendá-ó sã cuendá nchaa sã xéxi-ó chi ndacã<sup>n</sup> táhú-ó núu Yã Ndiöxi òré xéxi-ó", duha cächí-ndó. <sup>31</sup> Te cuèi nãndi sã xiní caxi-ndo níhi-ndó xèxi-ndo àdi quide-ndo, te cada-ndo nacuáa cãhá<sup>n</sup> váha ñáiyu cuendá Yã Ndiöxi. <sup>32</sup> Te vã cáda-ndó sã ñá túu tãu-ndó càda-ndo cuendá sã vã cáda ñáiyu ñã sã ñá túu cùu váha iní Yã Ndiöxi. Te ni sã cúu-xí cuè ñáiyu israhél, te ni sã cúu-xí cuè ñáiyu ñá túu cùu ñáiyu israhél, te ni sã cúu-xí cuè ñáiyu ndècu ichi-gã vã dúcã<sup>n</sup> càda-ndo sã cúu-xí-yu. <sup>33</sup> Te yúhú ió ndùcu ndee-í quidè-í nacuáa cudùu-í núu nchaa ñáiyu, te quide-í sã váha sã cúu-xí-yu, te ñá túu quide-í mee-ni sã cúu-xí mée-í. Te duca<sup>n</sup> quide-í cuendá quindáá iní-yu tñuhu Xitohó Jesucristú te naníhi táhú-yu.

## 11

<sup>1</sup> Te chí cãnchicú<sup>n</sup> nihnu cada-ndo nchaa nacuáa quide-í nchicú<sup>n</sup> nihnu-í nchaa nacuáa quide Xitohó Jesucristú.

*Nacuáa tãu-xi cada nchaa ñáiyu dihi núu tàcã-yu dàcuahã-yu tñuhu Yã Ndiöxi*

<sup>2</sup> Te nchòhó ñáiyu ndècu ndihi-í ichi Xitohó Jesucristú cächí tñuhu-í xii-ndo sã ió cudú<sup>n</sup> iní-í, chi ndacu iní ñáhã-ndó xii-í, te quide-ndo nchaa nacuáa ní dãnèhè ñáhã-í

xii-ndo. <sup>3</sup> Te cuiní-í sã nchòhó cutnuni iní-ndó sã ñãdii-ni Yã Ndiöxi cúu-gã Yá cùnùu taxi tñuni ñáhã xii Xitohó Jesucristú, te duca<sup>n</sup> Xitohó Jesucristú ñãdii-ni-gã cùnùu taxi tñuni-gã nchaa cue téé, te nchaa cue téé diu-ni mee-güedé cùnùu-güedé táxi tñuni-güedé ñãdihí-güedé. <sup>4</sup> Te núu nchoo cuè téé na dàdãhu-o díqui-ó òré cãhá<sup>n</sup>-ó núu ñáiyu tñuhu sã dácãhu iní ñáhã Yã Ndiöxi xii-o àdi òré cãhá<sup>n</sup> ndihí-o-gã, te ñã sácã<sup>n</sup> núu cúu-xí te núu duca<sup>n</sup> na càda-o dadãhu-o díqui-ó. <sup>5</sup> Dico núu ñáiyu dihi vá dàdãhu-yu díqui-yu òré cãhá<sup>n</sup> ndihí-yu Yã Ndiöxi, àdi òré cãhá<sup>n</sup>-yu tñuhu sã dácãhu iní ñáhã-gã xii-yu núu tñahã ñáiyu-yu, te sácã<sup>n</sup> núu cúu-xí te núu vã dàdãhu-yu díqui-yu, chi ñã-ni cùu-xi te núu na deté ndii-yu díqui-yu. <sup>6</sup> Te núu ñá túu cuiní cue ñáiyu dihi dàdãhu-yu díqui-yu te váha-gã sã ná deté ndii-yu díqui-yu. Te núu cùcaha<sup>n</sup> núu-yu sã deté díqui-yu te váha-gã sã ná dàdãhu-yu díqui-yu. <sup>7</sup> Te nchoo cuè téé vã cúu dàdãhu-o díqui-ó òré cãhá<sup>n</sup> ndihí-o Yã Ndiöxi ní òré cãhá<sup>n</sup>-ó tñuhu sã dácãhu iní ñáhã-gã xii-o núu ñáiyu chi díhna-gã-ó ní cadúha ñaha Yã Ndiöxi xii-o, te ní taxi ndecu-gã nchaa sã xiní tñuni-ó dàtnã ndécú nchaa sã xiní tñuni mée-gã. Te duca<sup>n</sup> ní quide-gã chi cuiní-gã sã nchòhó càda-o nacuáa cãhá<sup>n</sup> nchaa dava-gã ñáiyu sã ió cãhnu cuu-gã, te cue ñáiyu dihi quidè-yu nacuáa cunuu nchòo cue téé. <sup>8</sup> Te Yã Ndiöxi ní cadúha-gã téé, dico ñá díu yiqui naha ñãdihí ní quenehe-gã ní cadúha-gã téé chi yiqui naha téé ní quenehe-gã ní cadúha-gã ñãdihí. <sup>9</sup> Te sã cuendá téé duca<sup>n</sup> ní cadúha-gã ñãdihí-ã<sup>n</sup> te ñá díu sã cuendá ñãdihí ní cadúha-gã téé. <sup>10</sup> Núu xiã<sup>n</sup> tãu-xi sã ncháá ñáiyu dihi dàdãhu-yu díqui-yu cuendá duca<sup>n</sup> cutnuni sã ñá túu cùnùu-yu dàtnã cùnùu nchoo cue téé. Te duca<sup>n</sup> xini ñuhu-xi cáda-yu sã cuendá nchaa espíritú xinú cuèchi núu Yã Ndiöxi. <sup>11</sup> Te vitna nchoo ñáiyu ndècu ichi Xitohó Jesucristú, vã cächí-ó sã cuè téé ñá túu xini ñuhu-güedé cue ñáiyu dihi chindee ñáhã-yu, te ni vã cächí-ó sã cuè ñáiyu dihi ñá túu xini ñuhú-yu cue téé chindee ñaha-güedé xii-yu. <sup>12</sup> Te ñã yiqui naha téé ní queñuhu Yã Ndiöxi ní cadúha-gã ñãdihí, dico vitna chi ñáiyu dihi dácãcú-yu téé. Te téé, ñãdihí ní cadúha Yã Ndiöxi, te diu-ni duca<sup>n</sup> ní cadúha-gã nchaa dava-gã sã ió.

<sup>13</sup> Te mee-ndo càda cuendá-ndó te núu ndùu váha-xi sã vã dàdãhu cue ñáiyu dihi díqui-yu òré cãhá<sup>n</sup> ndihí-yu Yã Ndiöxi àdi ñáhã. <sup>14</sup> Te nchaa ñáiyu cãhá<sup>n</sup>-yu sã ñá túu ndùu váha-xi sã cuè téé cunduu nãni idi díqui-güedé, chi ñã sácã<sup>n</sup> núu cúu-xí cächí-yu.



tnàha-ndo nduu nchaa-ndo te dātnūnī duca<sup>n</sup> càda-ndo. <sup>34</sup> Te nūu dava-ndo xihí-ndó dòcò te caxi duu<sup>n</sup>-ndo vèhe-ndo te dātnūnī natacá-ndó, cuendá òré natacá-ndó te vá cādá-ndó ì<sup>n</sup> sá ñà túú tǎú-ndó càda-ndo cuendá sá vǎ dándòho ñaha Yá Ndiòxí xii-ndo. Te òré quixi coto ñaha-í xii-ndo te dāvá-á<sup>n</sup> cachí tñúhu-í xii-ndo nchàa dava-gá sá cūmǎní.

## 12

*Nàcuáa chindee ñaha Espiritú Yá Ndiòxí cada-o ì<sup>n</sup> ì<sup>n</sup>-o*

<sup>1</sup> Te nchòhò ñáiyu ndècu ndihí-í ichi Xítohó Jesucristú cuiní-í cachí tñúhu-í xii-ndo nàcuáa chindee ñaha Espiritú Yá Ndiòxí xii-o ì<sup>n</sup> ì<sup>n</sup>-o cuendá cutnūnī iní-ndó.

<sup>2</sup> Te nchòhò sa ñaha-ndo sá cūtnáhá vátá cūndècu-gá-ndó ichi Xítohó Jesucristú ní xóo dandàhú ñáhá yūcu ñáváha xii-ndo, te ní xóo quíndáá iní-ndó sá Espiritú Yá Ndiòxí ñá túú chindee-xi ní ì<sup>n</sup> ñáiyu cuendá sá cǎhá<sup>n</sup> úhú-yu Xítohó Jesucristú. Te ní ì<sup>n</sup> ñáiyu ñá túú càhu iní-yu cǎhá<sup>n</sup>-yu sá Xítohó Jesucristú cúu-gá Xítohó-yu te nūu ñá túú Espiritú Yá Ndiòxí dácàhu iní ñáhá-xí xii-yu.

<sup>4</sup> Te ndi dí<sup>n</sup> ndi dí<sup>n</sup> ndūu chiū<sup>n</sup> ní cachí Espiritú Yá Ndiòxí cada-o, te ñi-ñi ì<sup>n</sup>di-ñi Espiritú-gá ndécú. <sup>5</sup> Te ndi dí<sup>n</sup> ndūu chiū<sup>n</sup> quide-o xinu cuechi-o nūú ì<sup>n</sup>di-ñi Xítohó Jesucristú. <sup>6</sup> Te ndi dí<sup>n</sup> ndi dí<sup>n</sup> chindee ñaha Yá Ndiòxí xii-o nàcuáa cada-o chiū<sup>n</sup>-gá, te ñi-ñi ì<sup>n</sup> di-gá ndécú chindee-gá nchaa ñáiyu. <sup>7</sup> Te Espiritú Yá Ndiòxí quide-xí sá nchóo càda-o sá vǎha, te duca<sup>n</sup> chindee-o cue ñáiyu ndècu ndihí-o ichi Xítohó Jesucristú. <sup>8</sup> Te dava-o ní nduu tǎhú-ó nūú Yá Ndiòxí sá Espiritú-gá cada te ndacu-o cǎhá<sup>n</sup>-ó tñúhu sá ìo càhu cuu ñi-ñi tñúhu mee Yá Ndiòxí, te dava tucu-o ní nduu tǎhú-ó cutnūnī iní-ó nàcuáa cǎhá<sup>n</sup> tñúhu-gá te cǎhá<sup>n</sup>-ó nàcuáa cuiní Espiritú-gá. <sup>9</sup> Te dava tucu-o ní nduu tǎhú-ó sá ìo quíndáá iní-ó Xítohó Jesucristú cuendá cada-gá ì<sup>n</sup> sá cuiní-ó, te duca<sup>n</sup> chi Espiritú Yá Ndiòxí chindee ñaha-xi xii-o. Te dava tucu-o ní nduu tǎhú-ó sá cǎcǎ<sup>n</sup> tǎhú-ní-ó nūú Xítohó Jesucristú cuendá ñáiyu cūhú te ndúha-yu. <sup>10</sup> Te dava tucu-o ní nduu tǎhú-ó sá ndácú-ó càda-o nchaa sá vǎ yóo tñáhi ndàcu cada, te dava tucu-o ní nduu tǎhú-ó nūú Yá Ndiòxí sá cǎhá<sup>n</sup>-ó tñúhu sá dácàhu iní ñáhá-gá xii-o, te dava tucu-o ní nduu tǎhú-ó sá cūtnūnī iní-ó nūu ñi Espiritú Yá Ndiòxí chindee ñaha-xi xii ñáiyu òré cǎhá<sup>n</sup>-yu tñúhu-gá àdi cue espíritú cūndihí yucu ñáváha. Te dava

tucu-o ní nduu tǎhú-ó cǎhá<sup>n</sup>-ó tñúhu sá dácàhu iní ñáhá Espiritú Yá Ndiòxí xii-o tñúhu sá ñà túú xiní-ó, te dava tucu-o ní nduu tǎhú-ó cǎhá<sup>n</sup>-ó nàcuáa quèe-xi nchaa tñúhu-á<sup>n</sup>. <sup>11</sup> Te ì<sup>n</sup>di dí<sup>n</sup>-ni Espiritú Yá Ndiòxí duca<sup>n</sup> chindee ñaha-xi, te ñi-ñi Espiritú-gá dácàhūu ñaha-xi xii-o ndi dí<sup>n</sup> nūú chiū<sup>n</sup> sá cuiní meé-xí càda-o.

*Nchaa-o ì<sup>n</sup>-ni cuu-o ndihí Xítohó Jesucristú*

<sup>12</sup> Te nchoo ñáiyu ndècu ñuyúyú-a titní xichi cūu yiqui cuñú-ó dico ì<sup>n</sup>-ni cūu-xi, te ñi-ñi duca<sup>n</sup> sǎtnahá-xi cūu-o vitna ndecu-o ichi Xítohó Jesucristú chi ì<sup>n</sup>-ni cūu-o ndihí-gá. <sup>13</sup> Te dava-o cūu-o ñáiyu israhél, te dava-o ñà túú cūu-o ñáiyu israhél, te dava-o cūu-o ñáiyu ñá túú tñáhi dǎhá quèe nūú chíú<sup>n</sup> pǎtróó<sup>n</sup>-xi, te dava-o cūu-o ñáiyu dǎhá quèe nūú chíú<sup>n</sup> pǎtróó<sup>n</sup>-xi. Te mee Espiritú Yá Ndiòxí ní quide-xi sá ncháá-ó ì<sup>n</sup>-ná cúu-ó ndecu-o ndihí Xítohó Jesucristú. Te Yá Ndiòxí ní cachí-gá sá ncháá-ó cūndecu ndihí-o Espiritú-gá.

<sup>14</sup> Te nchòhò xiní-ndó sá titní xichi cūu yiqui cuñú-ó te ñá díú ì<sup>n</sup>-ni xichi cuu-xi. <sup>15</sup> Te cuèi sǎhá-ó ndihí ndaha-o ñá túú ì<sup>n</sup>-ni cuu-xi dico vá cúu cǎchí-ó sá sǎhá-ó ñà túú cūu-xi yiqui cuñú-ó. <sup>16</sup> Te cuèi lóho-o ndihí tinuu-o ñá túú ì<sup>n</sup>-ni cuu-xi dico vá cǎchí-ó sá lóho-o ñà túú cūu-xi yiqui cuñú-ó. <sup>17</sup> Te nūu nihí ní ndúú yiqui cuñú-ó ní xindee mee-ni tinuu-o, te ñá túú ndèe cūndèe lóho-o cūndedóho ní cūu te nūu duca<sup>n</sup>, àdi nūu nihí yiqui cuñú-ó ní xindee mee-ni lóho-o te ñá túú ndèe cūndèe dítní-ó ní cūu te nūu duca<sup>n</sup>. <sup>18</sup> Dico mee Yá Ndiòxí ní taxi ndecu-gá ì<sup>n</sup> ì<sup>n</sup> xichi yiqui cuñú-ó nàcuáa ní cachí iní meé-gá. <sup>19</sup> Te nūu ì<sup>n</sup>-ni sá ní xindee nihí yiqui cuñú-ó, te vá cūndūu-xi nàcuáa tǎú-xi cūndūu ní cūu te nūu duca<sup>n</sup>. <sup>20</sup> Dico titní xichi cūu yiqui cuñú-ó, te ì<sup>n</sup>-ni cūu-xi nihí-xi.

<sup>21</sup> Te sa ñaha-o sá vǎ cúu cǎchí-ó sá tinuu-o ñá túú xiní ñuhu-xi ndaha-o, àdi díquí-ó ñà túú xiní ñuhu-xi sǎhá-ó. <sup>22</sup> Te nchoo sá ñaha-o sá dává xichi yiqui cuñú-ó sá cǎchí-ó sá ñà túú cūnuu ìo-gá xiní ñuhu-xi. <sup>23</sup> Te dava xichi yiqui cuñú-ó sá ñà túú quide cuendá cǎvihí-ó nchaa xiǎ<sup>n</sup> sá quidáhu dóo sácūhūu-o, te dava xichi yiqui cuñú-ó ñà cúu cūtuú chi dacuítí sá quidáhu. <sup>24</sup> Te nchaa xichi yiqui cuñú-ó sá cúu cūtuú ñá túú xiní ñuhu-xi quidáhu. Te Yá Ndiòxí ní taxi ndecu-gá nchaa xichi yiqui cuñú-ó nàcuáa tǎú-xi cūndūu. Te ní cachí-gá sá dává-gá xichi yiqui cuñú-ó nūú vá cúu cūtuú quidáhu. <sup>25</sup> Te duca<sup>n</sup> ní quide-gá cuendá sá ì<sup>n</sup>-ni cūu yiqui cuñú-ó. Te duca<sup>n</sup> ndi tnahá ì<sup>n</sup> ì<sup>n</sup> xichi yiqui cuñú-ó chindee tñaha-xi. Te duca<sup>n</sup> sǎtnahá-xi cūu nchoo vitna ndecu-o

ichi Xítóhó Jesucristú chi chindee tnaa-o.  
 26 Te núu ìᵐ xichi yiqui cùñú-ó ná tñàhúhú te ñihí-ó quide úhú-xi, te núu ìᵐ xichi yiqui cùñú-ó ìo váha ndècu-xi te ducaᵐ ñihí yiqui cùñú-ó cúú váha-xi. Te ducaᵐ sàtnahá-xi cùu-o vitna ndecu-o ichi Xítóhó Jesucristú.

27 Te nchoo ndècu ndihi-o Xítóhó Jesucristú, te cùu-o datná yiqui cùñú-gá te ìᵐ ìᵐ-o cùu-o datná ìᵐ ìᵐ xichi yiqui cùñú-gá.  
 28 Te ducaᵐ sàtnahá-xi cùu-o chi Yá Ndióxi ní taxi-gá ndí díᵐ ndí díᵐ chiuᵐ quide-o sá cúú-xí nchàa ñáyiú ndècu ichi-gá. Te díhna-gá cue tée caca cuu cáháᵐ tñúhu-gá núú ñáyiú ní taxi ndecu-gá, te dàtnúni ní taxi ndecu-gá cue tée cáháᵐ tñúhu-gá nàcuáa dàcahu iní ñáhá mèe-gá, te dàtnúni ní taxi ndecu-gá cue tée dànehé ñáhá xii ñáyiú tñúhu-gá núú tàcá-yu, te dàtnúni ní taxi ndecu-tucu-gá cue tée ndàcu quide sá vā yōo tñàhí ndàcu cada. Te ní taxi ndecu tucu-gá cue tée xicáᵐ táhú-ní núú Xítóhó Jesucristú cuendá ñáyiú cùhú te ndúha-yu. Te ní taxi ndecu tucu-gá cue tée chindee cue ñáyiú ndècu ichi-gá. Te ní taxi ndecu tucu-gá cue tée yindaha ñaha xii ñáyiú ndècu ichi-gá, te ní taxi ndecu tucu-gá cue tée cáháᵐ tñúhu sá dácàhu iní ñáhá Espiritú-gá tñúhu sá ñà túú xini-güedé. 29 Te ñà nchàá-ó cùu-o cue tée ní táuchúᵐ Xítóhó Jesucristú cáháᵐ tñúhu-gá núú ñáyiú, te ñà nchàá-ó cùu-o cue tée cáháᵐ tñúhu sá dácàhu iní ñáhá Yá Ndióxi xii-o. Te ñà nchàá-ó cùu-o cue tée dàcuaha ñaha xii-yu. Te ñà nchàá-ó cùu-o cue tée quide sá vā yōo tñàhí ndàcu cada. 30 Te ñà nchàá-ó cùu-o cue tée dicó-ní cácáᵐ táhú núú Xítóhó Jesucristú cuendá ñáyiú cùhú te ndúha-yu. Te ñà nchàá-ó cùu-o cue tée cáháᵐ tñúhu sá dácàhu iní ñaha Espiritú Yá Ndióxi tñúhu sá ñà túú xini-ó, te ñà nchàá-ó cùu-o cue tée cùtnuní iní-xi cáháᵐ nàcuáa ndúu tñúhu-áᵐ. 31 Te ìo nducu ndèe-ndo cada-ndo nàcuáa nduu táhú-ndó núú Yá Ndióxi nchaa sá ìo-gá cùnùu cada-ndo. Te vitna na dànehé ñáhá tucu-í xii-ndo nàcuáa cada-ndo, dico sá dānehé ñàhà-í-a ìo-gá cùnùu-xi.

### 13

#### *Cuu iní-ó tñaha ñáyiú-o*

1 Te núu nchoo xini-ó cáháᵐ-ó tñúhu sá ìo vii ìo váha cuaháᵐ cáháᵐ ñáyiú ñuyúú-a, àdi xini-ó cáháᵐ-ó tñúhu sá ìo vii ìo váha cuaháᵐ cáháᵐ cue espíritú xínú cuèchi núú Yá Ndióxi, te núu xini-ó cáháᵐ-ó nchàa tñúhu-áᵐ te ñà túú cùu iní-ó cuè tñaha ñáyiú-o ña, te ñà túú nāndíhi-xi sá xini-ó cáháᵐ-ó tñúhu-áᵐ te cùu-o datná dava caá sá ìo dusaᵐ quide.  
 2 Te núu cùu-o ñáyiú cáháᵐ tñúhu sá dácàhu iní ñáhá Yá Ndióxi, àdi cuu-o ñáyiú cùtnuní iní-xi nàcuáa cuaháᵐ nchaa tñúhu ndúu yuhu ni cuu, àdi cuu-o ñáyiú ìo váha cùtnuní iní-xi nchaa nàcuáa quide Yá Ndióxi, àdi cuu-o

ñáyiú ìo váha sàndáá iní ñáhá xii Yá Ndióxi nàcuáa ndacu-o cùu-o ìᵐ yucu xocuiñí-xi núú ndécú-xi, te núu nchaa xíᵐ xini-ó cáda-o te ñà túú cùu iní-ó cuè tñaha ñáyiú-o ña, te ñà túú vèdana nāndíhi-xi te núu vā cúú ìni-ó tñaha ñáyiú-o cuèi na càda-o nchaa xíᵐ. 3 Te cuèi nchaa sá ndécú ndíhi-o na dacáhñu-o, te cuèi na cuàha cuendá-ó mèe-o cáyú-ó sá cúú-xí Yá Ndióxi, dico ñà túú vèdana chindee ñaha-xi xii-o sá dúcáᵐ càda-o te núu ñà túú cùu iní-ó cuè tñaha ñáyiú-o.

4 Dico núu cùu iní-ó cuè tñaha ñáyiú-o, te càhnu iní-ó, te quide váha-o, te ñà túú cùu-o ñáyiú cuèdú iní, te ni ñà túú cáháᵐ-ó núu cùu cahnu-o, te ni ñà túú sàni iní-ó càda cahnu-o mee-o, 5 te ni ñà túú ñùhu cuèhé iní-ó, te ni ñà túú ndùcu-o mee-ní sá cúú-xi mèe-o, te ni ñà túú-gá cùdèéᵐ-ó cuendá ìᵐ sá cúú, te ni ñà túú-gá sá cùhuᵐ iní-ó sá quidé ñaha tñaha ñáyiú-o xii-o. 6 Te ni ñà túú-gá cùdí ìni-ó nchàa sá ñà túú váha quide ñáyiú, chi mee-nà cuendá nchaa sá váha cùdí ìni-ó. 7 Te nchaa sá yàha-o sàcahnu iní-ó, te sàni váha iní-ó cuendá nchaa ñáyiú, te sàni iní-ó sá díú-ní nchàa sá váha cuu xii nchaa tñaha ñáyiú-o ndéé cuèé-gá, te ìo quide cahnu iní-ó cuèi nāndí sá yàha-o, te nchaa xíᵐ quidé-ó te núu cùu iní-ó cuè tñaha ñáyiú-o.

8 Te ni caa ni quíhᵐ duha-ni cuu iní-ó cuè tñaha ñáyiú-o. Dico sáá nduu te vā cóo-gá ñáyiú cáháᵐ tñúhu sá dácàhu iní ñáhá Yá Ndióxi, te ni vā cóo-gá ñáyiú cáháᵐ tñúhu sá dácàhu iní ñáhá Espiritú Yá Ndióxi tñúhu sá ñà túú xini-yu, te ni vā cóo-gá ñáyiú túha dàtná túha ñáyiú vitna. 9 Te vitna ñà túú cùtnuní iní-ó nchàa nàcuáa sàni iní Yá Ndióxi chi sacú-ni cùtnuní iní-ó, te ducaᵐ sàcú-ni cáháᵐ-ó nàcuáa ndúu tñúhu-gá, dico cáháᵐ-ó tñúhu-gá nàcuáa dàcahu iní ñáhá-gá xii-o. 10 Te na sáá nduu càda Yá Ndióxi nchaa nàcuáa tàù-xi cunduu, te dàvā-áᵐ te nchaa sá càchí-gá ñà túú ndècu-xi nàcuáa tàù-xi cunduu vā dúcáᵐ-gá cundecu-xi.

11 Te yúhú cùtnàhá ní cuu landú-í ní xóo cada-í sá cùu-í landú, ní xóo cáháᵐ-í, ní xóo caní iní-í, te ní xóo tecú tñuní-í dàtná quidé cuè landú xīndecu vitna, dico sáta ní cuu-í ìᵐ tée cùu sacuéhé te ñà túú-gá quidé-í dàtná ní xóo cada-í cùtnàhá ní cuu landú-í. 12 Te ducaᵐ sàtnahá-xi cùu-o vitna ndecu-o ichi Xítóhó Jesucristú, chi ñà túú cùtnuní váha iní-ó nàcuáa cùu cuendá Yá Ndióxi, te cùu-o datná ñáyiú ndèhe ìᵐ núú yutátá sá ñà túú tñú váha núú-xi, te ducaᵐ sàtnahá-xi cùu-o chi ñà túú cùtnuní váha iní-ó nàsa cuu cuendá-gó, dico sáá nduu quini núú-ó-gá. Te nchoo sàcú-ni cùtnuní iní-ó nàcuáa ndúu-gá vitna dico na sáá nduu te quini ndáá-ó nàcuáa càa nàcuáa ndúu-gá dàtná xini ñáhá mèe-gá xii-o. 13 Te ni caa ni

quihí<sup>n</sup> duca<sup>n</sup>-ni quindáá iní-ó Yá Ndiöxi, te duca<sup>n</sup>-ni cundecu ndihi-o tnúhu ndee iní cundecu-o ndihi-gá, te duca<sup>n</sup>-ni ío cuu iní-ó-gá ndihi tnàha ñáyiu-o. Te sá cúú iní-ó Yá Ndiöxi ndihi sá cúú iní-ó tnàha ñáyiu-o xiá<sup>n</sup> ío-gá cúnúu-xi dacúúxi dáva-gá.

## 14

*Ñáyiu càhá<sup>n</sup> tnúhu sá dácàhu iní ñáhá Espíritú Yá Ndiöxi*

<sup>1</sup> Te vá dáná ndèe-ndó cùu iní-ndó tnàha ñáyiu-ndo, te cuhu<sup>n</sup> iní-ndó sá ndúu táhú-ndó núú Yá Ndiöxi titní núú chiú<sup>n</sup> cada-ndo nacúaa chindee ñàha Espíritú-gá xii-ndo, te ío cuhu<sup>n</sup> iní-ndó sá ndúú táhú-ndó càhá<sup>n</sup>-ndó tnúhu sá dácàhu iní ñáhá Yá Ndiöxi xii-ndo. <sup>2</sup> Te cue ñáyiu càhá<sup>n</sup> tnúhu sá dácàhu iní ñáhá Espíritú Yá Ndiöxi tnúhu sá ñà túú xini-yu, te tnúhu càhá<sup>n</sup>-yu-án cúú-xí sá cúú-xí Yá Ndiöxi te ñà díú sá cúú-xí ñáyiu chi ñà túú təcú tnúni-yu, te mee Espíritú Yá Ndiöxi quidé-xí dùca<sup>n</sup> cahá<sup>n</sup>-yu tnúhu yiyuhu. <sup>3</sup> Te cue ñáyiu ní nduu táhú núú Yá Ndiöxi càhá<sup>n</sup> tnúhu sá dácàhu iní ñáhá-gá xii-yu, te ñáyiu-án dácàhá<sup>n</sup>-yu ñáyiu nacúaa cuita níhí ndéé-gá-yu cundecú-yu ichi-gá, te duca<sup>n</sup> cuañahá-yu tnúhu ndee iní xii-yu òrè ndihú iní-yu. <sup>4</sup> Te ñáyiu càhá<sup>n</sup> tnúhu sá dácàhu iní ñáhá Espíritú Yá Ndiöxi xii-yu tnúhu sá ñà túú xini-yu-án, ñáyiu-án mee-ní-yu níhí ndéé-yu ndecú-yu ichi-gá. Dico ñáyiu càhá<sup>n</sup> tnúhu sá dácàhu iní ñáhá-gá xii-yu, càhá<sup>n</sup>-yu tnúhu-án nacúaa níhí ndéé dáva-gá ñáyiu nchicú<sup>n</sup> nihnu ichi-gá.

<sup>5</sup> Te yúhú ío cudíí iní-í te núu nchaa-ndo càhá<sup>n</sup>-ndó tnúhu sá dácàhu iní ñáhá Espíritú Yá Ndiöxi xii-ndo tnúhu sá ñà túú xini-ndó. Dico ío-gá cudíí iní-í te núu nchaa-ndo càhá<sup>n</sup>-ndó tnúhu sá dácàhu iní ñáhá-gá, chi ío-gá xini ñúhu-xi sá càhá<sup>n</sup>-ndó tnúhu-án dacúúxi sá càhá<sup>n</sup>-ndó tnúhu sá dácàhu iní ñáhá Espíritú-gá càhá<sup>n</sup>-ndó tnúhu sá ñà túú xini-ndó. Dico í<sup>n</sup>-ni nùtnahá-xi quide-ndo te núu nchòhó ñáyiu càhá<sup>n</sup> tnúhu sá dácàhu iní ñáhá Espíritú-gá càhá<sup>n</sup>-ndó nacúaa quèe-xi tnúhu-án. Te duca<sup>n</sup> te nchaa ñáyiu ndècu ichi Yá Ndiöxi cuita níhí ndéé-gá-yu quihí<sup>n</sup> cundecú-yu ichi-gá. <sup>6</sup> Te núu yúhú quexio-í núú ndecú nchòhó ñáyiu ndècu ndihi-í ichi Xitohó Jesucrístú, te ngúita-í càhá<sup>n</sup>-í mee-ni tnúhu sá dácàhu iní ñáhá Espíritú Yá Ndiöxi xii-í tnúhu sá ñà túú xini-í, te ñà túú nã sá vaha cuu-xi sá cúú-xi-ndó. Dico cuu-xi sá vaha xii-ndo te núu na càhá<sup>n</sup>-í núú-ndó nchaa tnúhu sá dánèhé ñáhá Yá Ndiöxi xii-í tnúhu sá vátá dacúaha-gá-í, ndihi nchaa tnúhu sá sá xini-í, ndihi nchaa tnúhu sá dácàhu iní ñáhá-gá xii-í càhá<sup>n</sup>-í, ndihi nchaa dáva-gá tnúhu-gá.

<sup>7</sup> Te na càda-o cuendá sá núu í<sup>n</sup> tée tíú-dé vílu àdi cani-dé arpá te núu ñà túú sàhnú-dé ndihi-xi í<sup>n</sup> yaá, te ñà cùtnúni iní-ó nã yaá caní-dé àdi ná yaá tíú-dé te núu duca<sup>n</sup> na càda-dé. <sup>8</sup> Te díu-ni duca<sup>n</sup> sàtnahá-xi cùu tucu tée cùu sandadú tíú cútú, chi núu vá tíú váha-dé nacúaa tàú-xi cunduu òrè quihí<sup>n</sup>-güedé nàa-güedé, te vá ngündecu túha dáva-gá cue sandadú te núu duca<sup>n</sup> na càda-dé vá tíú váha-dé. <sup>9</sup> Te duca<sup>n</sup> sàtnahá-xi cùu nchohó te núu vá càhá<sup>n</sup>-ndó í<sup>n</sup> tnúhu nacúaa tàú-xi cunduu núú ñáyiu te vá təcú tnúni-yu tnúhu càhá<sup>n</sup>-ndó. ¡Chi àú<sup>n</sup> nã cuu càhá<sup>n</sup>-ndó te núu duca<sup>n</sup> na càda-ndo! <sup>10</sup> Te ío titní núú tnúhu ío fuyúyú, te í<sup>n</sup> í<sup>n</sup> núú tnúhu-án cùtnúni iní ñáyiu nacúaa quèe-xi. <sup>11</sup> Te núu nchoo ñà təcú tnúni-ó í<sup>n</sup> tnúhu càhá<sup>n</sup> í<sup>n</sup> ñáyiu, te quide-ó-yu ñáyiu ñúú xicá chi ñà túú càhá<sup>n</sup>-yu tnúhu càhá<sup>n</sup>-ó, te díu-ni duca<sup>n</sup> quide ñahá-yu xii nchoo túcu. <sup>12</sup> Te xiá<sup>n</sup> núu càchi tnúhu-í xii nchaa nchòhó ñáyiu ío cuíni nduu táhú núú Yá Ndiöxi sá Espíritú-gá chindee ñàha-xi xii-ndo cada-ndo ná daha núú chiú<sup>n</sup>, te ío nducu ndèe-ndo cada-ndo chiú<sup>n</sup> sá ní nduu táhú-ndó nacúaa cuita níhí ndéé-gá ñáyiu ndècu ichi-gá quihí<sup>n</sup>.

<sup>13</sup> Te núu càhá<sup>n</sup>-ndó tnúhu sá ñà túú xini-ndó, tnúhu sá dácàhu iní ñáhá Espíritú Yá Ndiöxi xii-ndo, te xini ñúhu-xi sá càcá<sup>n</sup> táhú-ndó núú Yá Ndiöxi cuendá sá ná chindee ñàha-gá xii-ndo càhá<sup>n</sup>-ndó núú ñáyiu núu nása quèe-xi tnúhu-án. <sup>14</sup> Chi núu nchoo na càhá<sup>n</sup> ndihi-ó Yá Ndiöxi ndihi tnúhu sá ñà túú xini-ó, te ní yúhu ní iní-ó càhá<sup>n</sup> ndihi-o-gá dicó-ni sá ñà təcú tnúni-ó nacúaa ndúu tnúhu càhá<sup>n</sup>-ó. <sup>15</sup> Te xiá<sup>n</sup> núu xini ñúhu-xi càhá<sup>n</sup> ndihi-ó Yá Ndiöxi ní yúhu ní iní-ó nacúaa chindee ñàha Espíritú-gá xii-o te càhá<sup>n</sup>-ó nacúaa tecú tnúni-ó, te díu-ni duca<sup>n</sup> càda-o òrè xitá yúhu-o chifúhu-o Yá Ndiöxi, chi ní yúhu ní iní-ó dùca<sup>n</sup> cada-o nacúaa chindee ñàha Espíritú-gá xii-o, te cùtnúni iní-ó nacúaa cuahá<sup>n</sup> nchaa tnúhu càhá<sup>n</sup>-ó xita-o. <sup>16</sup> Chi núu nchoo na ndacá<sup>n</sup> táhú-ó núú Yá Ndiöxi ndihi mee-ni tnúhu sá ñà túú xini-ó tnúhu sá dácàhu iní ñáhá Espíritú-gá xii-o, te ñáyiu ñà túú ní ndúu táhú càhá<sup>n</sup> tnúhu càhá<sup>n</sup>-ó ndèdóho ñàhá-yu xii-o, te ñáyiu-án vá ndacú-yu càhá<sup>n</sup>-yu tnúhu càhá<sup>n</sup>-ó ndacá<sup>n</sup> táhú-ó ndihi-yu núú Yá Ndiöxi chi ñà túú təcú tnúni-yu tnúhu càhá<sup>n</sup>-ó. <sup>17</sup> Te váha-ni quide-o sá dúcá<sup>n</sup> càhá<sup>n</sup>-ó ndacá<sup>n</sup> táhú-ó núú Yá Ndiöxi, te dicó-ni sá tnúhu-án ñà túú chindee-xi ñáyiu nacúaa cuita níhí ndéé-gá-yu cundecú-yu ichi-gá. <sup>18</sup> Te yúhú ío ndacá<sup>n</sup> táhú-í núú Yá Ndiöxi chi càhá<sup>n</sup>-í tnúhu sá ñà túú xini-í tnúhu sá dácàhu iní ñáhá Espíritú-gá xii-í, te càhá<sup>n</sup>-gá-í dacúúxi nchaa nchohó. <sup>19</sup> Te òrè tàcá ñáyiu ndècu ichi Yá Ndiöxi dacúahá-yu tnúhu-gá, te càhá<sup>n</sup>-í tnúhu-gá

nũ-yu sá sà ní cutnũní iní mée-í nàcuáa duca<sup>n</sup> cùtnũní iní-yu nàcuáa ndũu tũhu cãhá<sup>n</sup>-í. Te tñhá-gá iní-í cãhá<sup>n</sup>-í úhũ<sup>n</sup>-ni tũhu-á<sup>n</sup> nũ-yu dácúxí sã cãhá<sup>n</sup>-í úxí mĩ tũhu sã ñà túú xĩní-í, tũhu sã dácãhu iní ñáhã Espiritú Yã Ndiõxí xii-í cãhá<sup>n</sup>-í.

<sup>20</sup> Te nchòhò ñãyiu ndècu ndihí-í ichi Xítohó Jesucristú, vã caní iní-ndó dãtnã sání iní cue landú, chi caní iní-ndó dãtnã tàú-xi cunduu chi sa sacuéhé-ndó. Dico cuu-ndo dãtnã cue landú lĩhli vã cundècu-ndo ichi cuehé ichi duha, chi cue landú-á<sup>n</sup> ñà túú ndècu-güexi ichi-á<sup>n</sup>. <sup>21</sup> Te núú túú Yã Ndiõxí cãhá<sup>n</sup>-xí nàcuáa ní cãhá<sup>n</sup>-gã, te cãchí-xi: “Cue tée ñuú xicã cãhá<sup>n</sup> ndi díí<sup>n</sup> nũ tũhu quihí<sup>n</sup>-güedé cãhá<sup>n</sup>-güedé tũhu-í núú ñãyiu isráel cada-güedé núú-í, te cuèi duca<sup>n</sup> dico vã quindáá iní-yu tũhu-í<sup>n</sup>, duha ní cachí Yã Ndiõxí te duca<sup>n</sup> ní ngúndéé núú túú-gã. <sup>22</sup> Te tũhu sã dácãhu iní ñáhã Espiritú Yã Ndiõxí xii-o tũhu sã ñà túú xĩní-ó, xiã<sup>n</sup> cúú-xi cuendá sã cùtnũní iní cue ñãyiu ñà túú sãndáá iní tũhu Yã Ndiõxí sã ñà túú cùu váha iní ñáhã-gã xii-yu. Dico sã cúú-xi cuè ñãyiu sãndáá iní tũhu-gã ñà túú nã quidé-xi sã cúú-xi-yu. Te tũhu sã dácãhu iní ñáhã Yã Ndiõxí xii-o, xiã<sup>n</sup> cúú-xi cuendá sã cùtnũní iní cue ñãyiu sãndáá iní tũhu-gã sã ndécú ndihí ñaha-gã xii-yu, dico ñà túú dùca<sup>n</sup> sani iní cue ñãyiu ñà túú sãndáá iní tũhu-gã. <sup>23</sup> Te núú ní tacã nchaa nchòhò ñãyiu ndècu ichi Yã Ndiõxí, te nchaa-ndo ní ngüita-ndo cãhá<sup>n</sup>-ndó tũhu sã dácãhu iní ñáhã Espiritú Yã Ndiõxí xii-ndo tũhu sã ñà túú xĩní-ndó, te mei òré-á<sup>n</sup> quexio cue ñãyiu ñà túú sãndáá iní tũhu-gã, ndihí cue ñãyiu vátã quini dana-gã tũhu-gã núú ndécú-ndó, te ñãyiu-á<sup>n</sup> quesãhá-yu sã lùcú-ndó te núú duca<sup>n</sup> cãhá<sup>n</sup>-ndó tũhu sã dácãhu iní ñáhã Espiritú-gã xii-ndo òré quexio-yu. <sup>24</sup> Dico núú nchaa-ndo cãhá<sup>n</sup>-ndó tũhu sã dácãhu iní ñáhã Yã Ndiõxí xii-ndo, te mei òré-á<sup>n</sup> quexio cue ñãyiu duca<sup>n</sup> ñà túú sãndáá iní-xi tũhu-gã, ndihí cue ñãyiu duca<sup>n</sup> ñà túú xĩní dana tũhu-gã-á<sup>n</sup>, te ñãyiu-á<sup>n</sup> cutnũní iní-yu sã ndécú cuèchi-yu núú-gã, te ngüita-yu cuáha-yu cuendá sã ñà túú quide váha-yu ndécú-yu cuendá sã cãhá<sup>n</sup>-ndó tũhu-gã ndedóho-yu. <sup>25</sup> Te nchaa sã cuèhé sã dúhá ní quidé-yu sání iní-yu yiyuhu ndacu iní-yu, te ngüita-yu náhmã-yu nchaa sã ñà túú váha ní quidé-yu núú Yã Ndiõxí, te cãchí-yu sã ïo cãhnu cuu-gã, te cachí tucú-yu sã ndãã ndécú ndihí-ndo-gã.

#### *Cada-o nàcuáa tàú-xi cunduu*

<sup>26</sup> Te vitna nchòhò ñãyiu ndècu ndihí-í ichi Xítohó Jesucristú xĩni ñuhu-xi duha cada-ndo. Òré tàcã-ndó te dava-ndo càta yuhu-ndo chiñuhu-ndo Yã Ndiõxí, te dava-ndo dãsahú-ndó ñãyiu tũhu-gã, te

dava-ndo cãhá<sup>n</sup>-ndó nàcuáa dàquixi túu Yã Ndiõxí iní-ndó, te dava-ndo cãhá<sup>n</sup>-ndó tũhu sã dácãhu iní ñáhã Espiritú Yã Ndiõxí xii-ndo tũhu sã ñà túú xĩní-ndó, te dava-ndo cãhá<sup>n</sup>-ndó nàcuáa quèe-xi tũhu-á<sup>n</sup>. Te nchaa sã quidé-ndó ná cùu-xi nàcuáa chindee-xi ñãyiu nàcuáa cuitã níhí ndéé-gã-yu cundecú-yu ichi-gã. <sup>27</sup> Te òré cãhá<sup>n</sup>-ndó tũhu sã dácãhu iní ñáhã Espiritú Yã Ndiõxí xii-ndo tũhu sã ñà túú xĩní-ndó, te úú-ni-ndo àdi úní-ni tñhá-ndó cãhá<sup>n</sup>-ndó tũhu-á<sup>n</sup> te vã úú<sup>n</sup>ni cãhá<sup>n</sup>-ndó chi ndéé ndihí ñ<sup>n</sup>-ndo te dãtnũní ngüita ingã-ndó cãhá<sup>n</sup>-ndó. Te xĩni ñuhu-xi sã ñ<sup>n</sup> ñãyiu cãhá<sup>n</sup>-yu nàcuáa quèe-xi tũhu cãhá<sup>n</sup>-ndó-á<sup>n</sup>. <sup>28</sup> Te núú ñà túú ñãyiu tècú tũni nàcuáa quèe-xi tũhu cãhá<sup>n</sup>-ndó-á<sup>n</sup>, te núú mée núú ñ<sup>n</sup>-ní-ndó cãhá<sup>n</sup>-ndó tũhu-á<sup>n</sup> cãhá<sup>n</sup> ndihí-ndo Yã Ndiõxí te vã cãhá<sup>n</sup>-ndó núú ñãyiu. <sup>29</sup> Te òré cãhá<sup>n</sup>-ndó tũhu sã dácãhu iní ñáhã Yã Ndiõxí xii-ndo te úú-ni-ndo àdi úní-ni tucu-ndo cãhá<sup>n</sup>, te dava-gã-ndó cundedóho-ndo tũhu-á<sup>n</sup> te cãhá<sup>n</sup>-ndó núú váha-ni cãhá<sup>n</sup>-güedé àdi ñà túú váha-ni. <sup>30</sup> Te núú ñ<sup>n</sup>-ndo ní dácãhú iní ñáhã Yã Ndiõxí xii-ndo ñ<sup>n</sup> tũhu cãhá<sup>n</sup>-ndó, te núú ñ<sup>n</sup>-ndo sã cãhá<sup>n</sup>-ndó te ngüiti-ndó te quihu tucu ingã-ndó cãhá<sup>n</sup>-ndó nàcuáa ní dácãhú iní ñáhã Yã Ndiõxí xii-ndo. <sup>31</sup> Te nchaa nchòhò ñãyiu ní nduu táhú cãhá<sup>n</sup> tũhu sã dácãhu iní ñáhã Yã Ndiõxí, te vã úú<sup>n</sup>-ní cãhá<sup>n</sup>-ndó chi díhna-gã ñ<sup>n</sup>-ndo cãhá<sup>n</sup> te dãtnũní cãhá<sup>n</sup> tucu ingã-ndó. Te duca<sup>n</sup> càda-ndo cuendã nchaa-ndo tècú tũni-ndó nàcuáa ndũu tũhu cãhá<sup>n</sup> ñ<sup>n</sup> ñ<sup>n</sup>-ndo, te duca<sup>n</sup> te cudãí-gã iní-ndó cãchicú<sup>n</sup> nihnu-ndo ichi-gã. <sup>32</sup> Te nchaa ñãyiu cãhá<sup>n</sup> tũhu Yã Ndiõxí sa ñaha-nã mée-yu nàcuáa quidé-yu cãhá<sup>n</sup>-yu tũhu-gã nàcuáa ñà túú quide cutexinu-yu. <sup>33</sup> Te Yã Ndiõxí cúú-gã Yaá quidé ïo váha cùu ñ<sup>n</sup>-nuu-ndo ndecu-ndo, te ñà túú daticã nuu ñaha-gã xii-ndo.

Te na cãchí tũhu-í xii-ndo nàcuáa cãhá<sup>n</sup>-í nchaa núú tàcã cue ñãyiu ndècu ndihí-o ichi Xítohó Jesucristú. <sup>34</sup> Te yúhú cãchí-í sã vã cúú cãhá<sup>n</sup> cue ñãyiu díhí òré tàcã-ndó dàcuaha-ndo tũhu-gã, chi ñà túú dùca<sup>n</sup> cuini-gã cadã-yu, te quindáá-ni iní-yu cadã-yu nàcuáa tàú-xi cunduu. <sup>35</sup> Te núú ñ<sup>n</sup> sã cuini-yu nducu tũhu-yu te ndéé òré nasáá-yu vehé-yu te nducu tũhu-yu núú yí-yu, chi ñà túú ndũu váha-xi sã cãhá<sup>n</sup>-yu núú tàcã nchaa ñãyiu dàcuáha ndihí-yu tũhu-gã.

<sup>36</sup> Te chí dándacu iní sã ñà díú nchòhò cúú-ndó ñãyiu ní ngúndecu ndihí tũhu Yã Ndiõxí díhna nuu nàcuáa datècú tũhu-ndo dáva-gã ñãyiu, te ní ñà díú mée-ni nchòhò sa ní ngúndecu ndihí-ndo tũhu Yã Ndiõxí vitna, núú xiã<sup>n</sup> vã cãchí-ndó sã ïo cùnuu-ndo.



37 Te núu dava nchòhò sání iní-ndó sǎ cǎhá<sup>n</sup>-ndó nǎcuáa dàcahu iní ñáhá Yá Ndiòxí xii-ndo àdi sani iní-ndó sǎ quidé-ndó nǎcuáa chindee ñaha Espiritú-gǎ xii-ndo, te cuáha váha-ndo cuendá sǎ ncháá tñuhu cǎhá<sup>n</sup>-í-a cùu-xi tñuhu sǎ ní cachí tñuhu mee Xitohó Jesucristú cada-o. 38 Te ndéda-ni cǎa ñáiyu ndècu ndíhi-ndo te núu ñá túú sǎndáá iní-yu tñuhu cǎhá<sup>n</sup>-í, te vá cáda cuendá-ndó tñuhu cǎhá<sup>n</sup>-yu.

39 Te vitna nchòhò ñáiyu ndècu ndíhi-í ichi Xitohó Jesucristú, ío cani iní-ndó cǎhá<sup>n</sup>-ndó tñuhu sǎ dǎcǎhu iní ñáhá Yá Ndiòxí núú ñáiyu, te dañá-ndo na cǎhá<sup>n</sup> cue ñáiyu ní nduu táhu núú Yá Ndiòxí sǎ cǎhá<sup>n</sup>-yu tñuhu sǎ dǎcǎhu iní ñáhá Espiritú-gǎ xii-yu tñuhu sǎ ñá túú xini-yu. 40 Te cada-ndo ncháa nacuáa táu-xi cunduu nǎcuáa ñá túú ná cuu cundecu-ndo.

## 15

### *Ní ndoto Xitohó Jesucristú*

1 Te vitna nchòhò ñáiyu ndècu ndíhi-í ichi Xitohó Jesucristú cuní-í sǎ dǎndacu iní-ndó nǎcuáa ní dǎnehé ñáhá-í xii-ndo tñuhu sǎ cǎhá<sup>n</sup> nǎcuáa naníhi táhú-ó, chí diu tñuhu-á<sup>n</sup> ní sǎndáá iní-ndó te nchicú<sup>n</sup> nihnu-ndo. 2 Te sǎ xii tñuhu-á<sup>n</sup> nihnú-ndó ichi cuáhá<sup>n</sup>-ndó núú ndúú táhú-ndó cundecu-ndo ndíhi Yá Ndiòxí ní caa ní quíhi<sup>n</sup>, te duca<sup>n</sup> ndúu táhú-ndó núú cundècu-ndo ní caa ní quíhi<sup>n</sup> ndíhi Yá Ndiòxí te núu nchicú<sup>n</sup> nihnu-ndo nǎcuáa ní dǎnehé ñáhá-í xii-ndo, te núu ñá túú nchicú<sup>n</sup> nihnu-ndo te ñá túú ní sǎndáá iní-ndó nǎcuáa táu-xi cunduu.

3 Te yúhu sa ní cachí tñuhu-í xii-ndo ñ<sup>n</sup> tñuhu sǎ ío cunuú ní níhi-í, chí ní cachí tñuhu-í xii-ndo sǎ Xitohó Jesucristú ní xihí-gǎ cuendá nchaa yíca cuéchi-o, te duca<sup>n</sup> ní cuu chí duca<sup>n</sup> cǎhá<sup>n</sup>-xi núú tütü Yá Ndiòxí sǎ dúcá<sup>n</sup> yáha-gǎ. 4 Te ní chindúxi ñaha-güedé xii-gǎ te nduu úní ní dǎndótó ñaha Yá Ndiòxí xii-gǎ, te duca<sup>n</sup> ní cuu chí duca<sup>n</sup> cǎhá<sup>n</sup>-xi núú tütü Yá Ndiòxí. 5 Te sǎtá ní ndoto-gǎ te ní quee túu-gǎ núú tǎ Pèlú, te dǎtnúni ní quee túu-gǎ núú dáva-gǎ cue téé ní táuchíú<sup>n</sup>-gǎ cǎhá<sup>n</sup> tñuhu-gǎ. 6 Te sǎtá dúcá<sup>n</sup> te dǎtnúni ní quee túu-gǎ núú úhú<sup>n</sup> ciendú cue ñáiyu ndècu ichi-gǎ, te vái-yu xindecu-ni-yu vitna chí sacú-ni-yu ní xihí. 7 Te dǎtnúni ní quee túu-gǎ núú tǎ Jacobó, te sǎtá dúcá<sup>n</sup> te dǎtnúni ní quee túu-gǎ núú nchaa cue téé ní táuchíú<sup>n</sup>-gǎ cǎhá<sup>n</sup> tñuhu-gǎ.

8 Te ndéé núú ní ndíhi-ná te ní quee túu-gǎ núú mée-í, te òré ní quee túu-gǎ núú-í te cùu-í dǎtná ñ<sup>n</sup> déhe yiqui<sup>n</sup> vátá sǎá-gǎ nduu càcu chí cùu-í ñ<sup>n</sup> téé ñá túú sǎni váha iní-xi cuendá-gǎ ní cùu. 9 Te yúhú ñá túú cunuú-í dǎtná cunuú cue téé ní táuchíú<sup>n</sup> Xitohó Jesucristú cǎhá<sup>n</sup> tñuhu-gǎ. Te cùu-í ñ<sup>n</sup> téé ní táuchíú<sup>n</sup>-gǎ cǎhá<sup>n</sup> tñuhu-gǎ,

cuéi ñá túú táu-í sǎ cǎhá<sup>n</sup>-í tñuhu-gǎ, chí ní xóo cuu úhú iní-í cue ñáiyu ndècu ichi Yá Ndiòxí. 10 Dico Yá Ndiòxí ío váha iní-gǎ chí ní quide ñaha-gǎ xii-í ñ<sup>n</sup> téé váha, chí ñá túú-gǎ quidé-í dǎtná ní xóo cada-í. Te ío cundahú iní ñáhá-gǎ chindee ñaha-gǎ xii-í dico ñá túú àú<sup>n</sup> ná cuu chindee ñaha-gǎ, chí ío-gǎ vai chiú<sup>n</sup>-gǎ ní cuu sa ta quide-í cuáhá<sup>n</sup> dǎcúúxi dáva-gǎ cue téé ní táuchíú<sup>n</sup>-gǎ cǎhá<sup>n</sup> tñuhu-gǎ te ñá diú mée-í duca<sup>n</sup> quide-í chí mee Yá Ndiòxí ío cundahú iní ñáhá-gǎ chindee ñaha-gǎ xii-í quide-í chiú<sup>n</sup>-gǎ. 11 Te ñá túú ná cada-xi cuéi dáva-gǎ-güedé sa ní cuu vai-gǎ chiú<sup>n</sup>-gǎ quide-güedé àdi yúhú, chí ñ<sup>n</sup>-ni tñuhu cǎhá<sup>n</sup>-ndí te tñuhu-á<sup>n</sup> cùú tñuhu ní sǎndáá iní-ndó.

### *Cue ñáiyu ní xihí ndotó-yu*

12 Te nchúhú cue téé cǎhá<sup>n</sup> tñuhu Xitohó Jesucristú cǎhá<sup>n</sup>-ndí sǎ ní xihí-gǎ te ní ndoto-gǎ, ¿te ná cuendá dáva nchòhò cǎchí-ndó sǎ vá ndótó cué ñáiyu ní xihí? 13 Te núu duca<sup>n</sup> sǎni iní-ndó sǎ vá ndótó cué ñáiyu ní xihí te ní Xitohó Jesucristú ñá túú ní ndòto-gǎ te núu duca<sup>n</sup>. 14 Te núu dicó Xitohó Jesucristú ñá túú ní ndòto-gǎ ñá, te nchaa tñuhu sǎ dǎnehé ñáhá-ndí xii-ndo ñá túú nǎndíhi-xi te núu duca<sup>n</sup>, te àú<sup>n</sup> ná cuu sǎndáá iní-ndó-gǎ te núu duca<sup>n</sup>. 15 Te núu dicó cùú-xi ñ<sup>n</sup> sǎ ndáá tñuhu sǎni iní dáva-ndo ña, te dǎcuandehnde-ndí sǎ cǎhá<sup>n</sup>-ndí tñuhu Yá Ndiòxí núú-ndó te núu duca<sup>n</sup>, te ñá túú cǎhá<sup>n</sup> ndáá-ndí núú-ndó sǎ Yá Ndiòxí ní dǎndótó-gǎ Xitohó Jesucristú, te núu ndáá nǎcuáa sǎni iní dáva-ndo sǎ vá ndótó cué ñáiyu ní xihí, dico ñá ndáá nǎcuáa sǎni iní-ndó. 16 Te núu vá ndótó cué ñáiyu ní xihí te ní Xitohó Jesucristú ñá túú ní ndòto-gǎ. 17 Te núu Xitohó Jesucristú ñá túú ní ndòto-gǎ ñá, te àú<sup>n</sup> ná cuu sǎndáá iní-ndó-gǎ te núu duca<sup>n</sup>, te ndècu-ni cuéchi-ndo núú Yá Ndiòxí te núu duca<sup>n</sup>. 18 Te núu ndáá nǎcuáa sǎni iní-ndó ñá te cue ñáiyu ní sǎndáá iní ñáhá xii Xitohó Jesucristú ñáiyu ní xihí ní xita nihnú-yu te núu duca<sup>n</sup>. 19 Te núu nchoo ndècu ndíhi-o tñuhu ndee iní núú Xitohó Jesucristú cuendá-ni sǎ cundècu-o ñuyú-a ña, te cùu-o ñáiyu ío-gǎ duu<sup>n</sup> duu<sup>n</sup> ndáhú sǎ cùú-xi dáva-gǎ ñáiyu te núu duca<sup>n</sup>.

20 Dico ndáá sǎ Xitohó Jesucristú ní xihí-gǎ te ní ndoto-gǎ núú xiǎ<sup>n</sup> cùtnúni iní dáva-o sǎ ndótó cué ñáiyu ní xihí ñáiyu ní sǎndáá iní tñuhu-gǎ. 21 Te sǎ cuéchi ñ<sup>n</sup>di-ni téé ní xindecu ñuyú-a xiǎ<sup>n</sup> xihí ñáiyu, te sǎ cuendá ñ<sup>n</sup>di-ni tucu ingá téé te ndoto cue ñáiyu ní xihí. 22 Te nchaa ñáiyu xihí-yu sǎ cuéchi ñ<sup>n</sup> téé, te téé-á<sup>n</sup> cùú-dé ndí Adán téé díhna nuu ní cuu ñani tnáhá cué ñáiyu ñuyú. Te diu-ni duca<sup>n</sup> sǎ cuendá ñ<sup>n</sup>di-ni téé te ndoto cue ñáiyu ní xihí, te téé-á<sup>n</sup> cùú-dé Xitohó Jesucristú chí nchaa ñáiyu ndècu

ndihi-gá ndotó-yu. <sup>23</sup> Te díhna-gá Xítóhó Jesucristú ní ndoto-gá xiá<sup>n</sup> cùtnúni iní dava-o sá nduu na quixi tucu-gá ñuyú-a te dàvá-á<sup>n</sup> ndoto nchaa ñáiyu ní xihí ñáiyu ní sándáá iní tnúhu-gá. <sup>24</sup> Te dátñúni duca<sup>n</sup> te sáá nduu nàa nchaa sá ío ñuyú, te Xítóhó Jesucristú danàa-gá nchaa ndi túhú sá cùnùu ío ñuyú-a, chi danàa-gá nchaa ñáiyu ío cùnùu, ndihi yucu ñávàha, ndihi nchaa espíritú xínú cuèchi núú-xi. Te duca<sup>n</sup> te cùñaha-gá xii Tátá-ó Dùtú Ndióxi taxi tnúni-gá. <sup>25</sup> Chi Xítóhó Jesucristú dacuití taxi tnúni-gá ndéé ná sáá nduu dànaa-gá nchaa sá cúú uhú iní ñáhá xii-gá. <sup>26</sup> Te ndéé núú ní ndihi-ná te danàa-gá sá quidé xihí ñáiyu. <sup>27</sup> Te duca<sup>n</sup> chi càhá<sup>n</sup>-xi núú tütú Yá Ndióxi sá mée-gá ní nachihí-gá nchaa sá ío ndaha Xítóhó Jesucristú cuendá sá mée Xítóhó Jesucristú taxi tnúni-gá, te vá yóo ñ<sup>n</sup> taxi tnúni ñáhá xii Yá Ndióxi, chi mee Yá Ndióxi cúú-gá Yaá ní nachihí-gá nchaa sá ío ndaha Xítóhó Jesucristú. <sup>28</sup> Te díhna-gá ní xáha<sup>n</sup> Yá Ndióxi xii Xítóhó Jesucristú Yaá cúú Dèhe-gá sá quíndàha-gá nchaa sá ío, te óré ná quíndaha Xítóhó Jesucristú nchaa sá ío, te cùñaha-gá xii Yá Ndióxi taxi tnúni ñáhá-gá xii-gá, te duca<sup>n</sup> te mee-ná Yá Ndióxi taxi tnúni-gá nchaandi túhú sá ío.

<sup>29</sup> Te núu ñá tütú ndáá càhá<sup>n</sup>-í, ¿te ná cuendá dava ñáiyu sànduté-yu cuendá ñáiyu ní xihí núu ñá tütú ndáá sá ndótó ñáiyu ní xihí?

<sup>30</sup> Te nchúhú duca<sup>n</sup>-ni sàni iní ñáiyu cahni ñáhá-yu xii-ndí, te núu vá ndótó ñáiyu ní xihí te àú<sup>n</sup> ná cuu duca<sup>n</sup> quide cahnu iní-ndí duca<sup>n</sup> cuini-yu cahni ñáhá-yu xii-ndí te núu duca<sup>n</sup>. <sup>31</sup> Te nchòhò ñáiyu ndècu ndihi-í ichi Xítóhó Jesucristú ío váha sàni iní-í cuendá-ndó, chi ndècu-o ichi-gá. Te na càchi tnúhu ndáá-í xii-ndo sá ñ<sup>n</sup> nduu ñ<sup>n</sup> nduu ndéé iní ñáhá ñáiyu cahni ñáhá-yu xii-í. <sup>32</sup> Te núu dicó ndáá sá vá ndótó ñáiyu ní xihí dátñá càchi dava ñáiyu, te àú<sup>n</sup> ná cuu ní xíndecu-í ñúú Èfesú ní cuu uhú iní ñáhá ñáiyu xii-í te núu duca<sup>n</sup>, chi ñáiyu-á<sup>n</sup> ní quidé-yu dátñá quidé ñ<sup>n</sup> quiti déé<sup>n</sup> sá cúú-xi-í. Te núu ndáá sá vá ndótó ñáiyu ní xihí ñá, te váha-gá núu càchí-o dátñá càchí ñáiyu: “Vitna na còho-o te na càxi-o chi tneé idá cúú-ó”, duha càchí-yu.

<sup>33</sup> Te vá dáñá-ndó mée-ndo dandahú ñáhá ñáiyu ndècu ichi cuhé ichi duha xii-ndo, te ngüita-ndo càni iní-ndó dátñá sàni iní-yu. Chi quèe ndáá-xi nàcuáa càhá<sup>n</sup> tucu dava-gá ñáiyu, chi càchí-yu sá núu ñáiyu quide váha na nihí tnáhá-yu ndihi ñáiyu ndècu ichi cuhé ichi duha, te ngüita ñáiyu quide váha-á<sup>n</sup> cadá-yu tnáhá-yu nchaa sá cuhé sá dúhá dátñá quidé ñáiyu-á<sup>n</sup>. <sup>34</sup> Te ío váha cuáha-ndo cuendá nàcuáa cundecu-ndo, te vá cadá-gá-ndó dátñá quidé

cué ñáiyu ndècu ichi cuhé ichi duha. Te dava-ndo quide-ndo dátñá quidé cué ñáiyu ndècu ichi cuhé ichi duha chi ñá tütú sándáá iní-ndó Yá Ndióxi. Te duha càhá<sup>n</sup>-í cuendá sá cúúcuáha<sup>n</sup> núú-ndó cuendá nchaa sá ñá tütú váha quide-ndo.

#### *Nàcuáa ndoto ñáiyu ní xihí*

<sup>35</sup> Te cudana dava-ndo ndècu tnúhu-ndo núu nása ndoto ñáiyu ní xihí, te nása cunduu yiqui cùñú-yu òré ndotó-yu. <sup>36</sup> Te nchòhò ñáiyu duca<sup>n</sup> càhá<sup>n</sup> cúú-ndó ñáiyu ñá tütú tnàhí cùtnúni iní-xi, te duha na càhá<sup>n</sup>-í nàcuáa tecu tnúni-ndó. Te núu ñ<sup>n</sup> tátá ná chíhí-ó te tèhýu mée-xi te xínu dèhe-xi.

<sup>37</sup> Dico ñá díú sá sá ní xínu ta sàhnu cuáhá<sup>n</sup> ní cùxi-o, te díu-ni duca<sup>n</sup> quide-o cuéi triú ndihi nchaa dava-gá tátá xitú-ó. <sup>38</sup> Te Yá Ndióxi quidé-gá sácúnduu tátá xínu-á<sup>n</sup> dátñá cuini mée-gá cunduu. Te ndèda-ni càa tátá te díu-ni-gá quidé-gá sácúnduu-xi nàcuáa tào-xi cunduu. <sup>39</sup> Te ndi díñ<sup>n</sup> ndáa nchaa yiqui cùñú, chi tucu càa yiqui cùñú nchoo cué ñáiyu, te tucu càa yiqui cùñú nchaa quiti xica núú ñúhú, te tucu càa yiqui cùñú nchaa quiti ndáva, te tucu càa yiqui cùñú nchaa chácá. <sup>40</sup> Te duca<sup>n</sup> ñá tütú ñ<sup>n</sup>-ni caa nchaa yiqui cùñú sá ío andiu ndihi nchaa yiqui cùñú ñáiyu ío ñuyú-a, te duca<sup>n</sup> ñá tütú ñ<sup>n</sup>-ni ndáa vii nchaa sá ío andiu ndihi ñuyú-a. <sup>41</sup> Te duca<sup>n</sup> cùu tucu-xi nchíanchii chi tucu dayehé-xi, te tucu dayehé yóó, te tucu dayehé nchaa chódíni, te duca<sup>n</sup> ñá tütú ñ<sup>n</sup>-ni dayehé nchaa chódíni. <sup>42</sup> Te duca<sup>n</sup> sàtnahá-xi cùu ñáiyu ní xihí te ndoto, chi tucu càa yiqui cùñú-yu sá nguñdúxi te tucu cunduu yiqui cùñú-yu òré ndotó-yu, te yiqui cùñú sá ndótó ndihi-yu-á<sup>n</sup> vá ndihi nihnu-gá-xi. <sup>43</sup> Te yiqui cùñú ñáiyu xihí ñá tütú nandíhi-xi, dico yiqui cùñú sá ndótó ndihi-yu te ío váha cunduu. Te nchaa yiqui cùñú ñáiyu xihí ñá tütú tnàhí-gá ndee-xi, dico yiqui cùñú ndoto ndihi-yu xiá<sup>n</sup> ío cunduu ndee-xi. <sup>44</sup> Te yiqui cùñú nchaa ñáiyu xihí cúú-xi cuendá ñuyú-a, dico yiqui cùñú sá ndótó ndihi-yu xiá<sup>n</sup> cundecu-ná-xi cuendá Espíritú Yá Ndióxi. Te dátñá ío yiqui cùñú sá cúú-xi cuendá ñuyú-a, te duca<sup>n</sup> ío yiqui cùñú sá cúú-xi cuendá mee-ná Espíritú Yá Ndióxi.

<sup>45</sup> Te núu tütú Yá Ndióxi càchí-xi: “Ndí Ádán ndí ní xíndecu ndéé díhna ní chíhi Yá Ndióxi iní ndí”, duha càchí-xi núu tütú-gá. Te ingá tucu téé cùu-dé dátñá ndí Ádán te téé-á<sup>n</sup> cúú-dé Xítóhó Jesucristú, te Yaá-á<sup>n</sup> quidé-gá sá mée-ná Espíritú Yá Ndióxi quidé-xi ndècu-o ichi-gá vitna. <sup>46</sup> Te díhna-gá yiqui cùñú cuendá ñuyú-a ní nguñdecu, te dátñúni nguñdecu yiqui cùñú cundecu ndihi mee-ná Espíritú Yá Ndióxi. <sup>47</sup> Te téé díhna

nuu ní xindecu ñuyú-a chí ñuhu ní cadúha ñaha Yá Ndióxi xii-dé, te téé-án cúú-dé ndí Adán, te ingá tucu téé ní cuu<sup>n</sup>-dé andiu te téé-án cúú-dé Xítoho Jesucristú. <sup>48</sup> Te nchaa ñáyiú cãa yiqui cuñú-yu dàtná cáá yiqui cuñú téé Adán téé duca<sup>n</sup> ní cuáha ñuhu-án, te nchaa ñáyiú ní nduu táhú cundecu ndihi téé duca<sup>n</sup> véxi cuu<sup>n</sup> andiu-án, ñáyiú-án nduu yiqui cuñú-yu dàtná cáá yiqui cuñú ní nduu táhú-dé ndécú ndihi-dé vitna, te téé-án cúú-dé Xítoho Jesucristú. <sup>49</sup> Te nchaa ñáyiú ñuyú-a cáá-yu dàtná-ni cãa datná-ni ndúu téé duca<sup>n</sup> ní cuáha ñuhu-án. Te nchaa nchoo ñáyiú ní nduu táhú cundecu ndihi téé duca<sup>n</sup> véxi cuu<sup>n</sup> andiu-án nduu-o dàtná-ni cãa datná-ni ndúu téé-án tucu.

<sup>50</sup> Te nchóhó ñáyiú ndècu ndihi-í ichi Xítoho Jesucristú cãchí tnúhu-í xii-ndo sã ncháá nãcuáa cãa yiqui cuñú ñáyiú xindecu vitna vá sãá-xi cundecu-xi núú ndécú Yá Ndióxi táxi tnúni-gá, chí ñuyú-a ndihi ni-hnu-xi. Dico sã táu-xi sáá núú ndécú-gã táxi tnúni-gã xini ñuhu-xi cuu-xi sã cudíi cundecu. <sup>51</sup> Te na cãchí tnúhu-í xii-ndo ñi<sup>n</sup> tnúhu sã yiyúhu ní cuu: Dava-o cúú-ó te dava-o cundecu-ni-o, dico nchaa-o nãdáma yiqui cuñú-ó. <sup>52</sup> Te uu<sup>n</sup>ni duca<sup>n</sup> nãdáma yiqui cuñú-ó òré cãhá<sup>n</sup> ñi<sup>n</sup> cútú, te cútú-án cãhá<sup>n</sup>-xi òré sa ta cüyatni naa ñuyú. Te òré cãhá<sup>n</sup> cútú-án te ndoto nchaa ñáyiú ní xihí ñáyiú ní xindecu ichi Xítoho Jesucristú, te duca<sup>n</sup> te vá ñi<sup>n</sup> ndúu ñi<sup>n</sup> quíú-gã cuú-yu. Te nchaa ñáyiú ndècu vívú te nãdáma yiqui cuñú-yu tnáhá-yu. <sup>53</sup> Te nchaa yiqui cuñú ndécú ndihi nchaa ñáyiú ndècu ñuyú-a vitna ñá túú cudi-xi chí xihí-xi, dico yiqui cuñú nduu táhú nchoo ñáyiú ndècu ichi Xítoho Jesucristú chí cudíi-xi ní caa ni quihí<sup>n</sup> chí vá cúú-gã-xi. <sup>54</sup> Te òré ná ndúu táhú-ó yiqui cuñú sã dúcá<sup>n</sup> cudíi ní caa ni quihí<sup>n</sup>-án, te vá cundècu ndihi-gã-ó yiqui cuñú sã ñá túú cudíi. Te dàvá-án te quee ndáá-xi nãcuáa cãhá<sup>n</sup>-xi núú tütú Yá Ndióxi núú cãchí-xi: “Vitna ñá túú-gã xihí ñáyiú chí mee-nã Yá Ndióxi cúnú-gã táxi tnúni ñáhá-gã xii-yu. <sup>55</sup> Te ñá túú tnáhí-gã ná ndoho ñáyiú sã cuendá tnúhu xihí, chí vá cóó-gã tnúhu xihí”, duha cãchí-xi núú tütú Yá Ndióxi. <sup>56</sup> Te cue ñáyiú ndècu ndihi-yu tnúhu sã sanú ichi ñaha xii-yu nãcuáa cadá-yu cundecu-yu dico uu<sup>n</sup>-gã quidé-yu nchaa sã cuèhé sã dúhá. Te sã cuendá nchaa sã cuèhé sã dúhá quidé-yu-án, te xiã<sup>n</sup> ní ngúndecu tnúhu xihí dándòho ñaha-xi xii-yu. <sup>57</sup> Dico táxáhu xii Yá Ndióxi chí ní taxi-gã tnúhu ndee ini ndécú ndihi-o sã sãá nduu te vá quini-gã-ó tnúhu xihí, te duca<sup>n</sup> chí ndècu ndihi-o Xítoho Jesucristú.

<sup>58</sup> Te xiã<sup>n</sup> núu cãhá<sup>n</sup>-í dóho nchóhó cue ñáyiú ndècu ndihi-í ichi Xítoho Jesucristú

chí ío cùu ini ñáhá-í xii-ndo, te cãhá<sup>n</sup>-í dóho-ndo sã cãchicú<sup>n</sup> nihnu-ni-ndo ichi Xítoho Jesucristú cuèi nãndi na cãda ñaha ñáyiú xii-ndo sã cuendá-gã, te ío nducu ndèe-ni-ndo cada-ndo chiu<sup>n</sup>-gã, chí sa nãha-ndo sã ncháá chiu<sup>n</sup> quide-o cuendá-gã ñá túú àú<sup>n</sup> nã cuu quide-o.

## 16

*Nãcuáa sãcá<sup>n</sup> tnáhá ñáyiú díhú<sup>n</sup>*

<sup>1</sup> Te na cãchí tnúhu-í xii-ndo cuendá díhú<sup>n</sup> sã sãcá<sup>n</sup> tnáhá-ndó sã cúú-xi ñáyiú ñuú Jerusalén, chí diu-ni duha ní danèhé-í cue ñáyiú xindecu ichi Xítoho Jesucristú ndécú ñi<sup>n</sup> ñi<sup>n</sup> xichi distritú Galáciá. <sup>2</sup> Te duha cada-ndo ndi tnáhá nduu ndumíngú, te ñi<sup>n</sup> ñi<sup>n</sup>-ndo dàquee díhú<sup>n</sup>-ndo sacú díhú<sup>n</sup> nãcuáa chindee ñaha Yá Ndióxi xii-ndo nihí-ndo cuendá òré quexio-í te sa cundecu túha díhú<sup>n</sup>-ã. <sup>3</sup> Te òré quexio-í te mee-ndo cãxi-ndó-yu núu ndèdacãa-yu sãni ini-ndó cãda ndáá canehe díhú<sup>n</sup>-ã quihí<sup>n</sup> ndaha ñáyiú xindecu ichi Xítoho Jesucristú ndécú ñuú Jerusalén. Te cadúha-í ñi<sup>n</sup> úú tutú canehé-yu quihí<sup>n</sup> cuendá cutnúní ini ñáyiú ñuú Jerusalén nãcuáa ndúu chiu<sup>n</sup> cuáhá<sup>n</sup>-yu. <sup>4</sup> Te núu xini ñuhu-xi sã quihí<sup>n</sup>-í te candeca-í-yu quihí<sup>n</sup>.

*Té Pãblú sãni ini-dé quíngoto-dé cue ñáyiú ndècu ichi Xítoho Jesucristú*

<sup>5</sup> Te yúhú sãni ini-í yãha-í ñi<sup>n</sup> úú ñuú cáá distritú Macèdoniá, te dàtnúni duca<sup>n</sup> te sãá-í núú ndécú-ndó. <sup>6</sup> Te òré quexio-í te cudana cundecu ndihi ñaha-í xii-ndo vai nduu, àdi cudana te cundecu ndihi ñaha-í xii-ndo ndèé yãha nchaa yóó quidé víxi<sup>n</sup>-xi. Te sátá dúcá<sup>n</sup> te cada ndee ini-ndó chindee ñaha-ndo xii-í òré nucúhu<sup>n</sup> ichi-í te núu ndèé ichi na quihí<sup>n</sup>-í. <sup>7</sup> Te duha cãhá<sup>n</sup>-í chí núu Yá Ndióxi ná cãchí-gã te cundecu ndihi ñaha tnãa-í xii-ndo òré quexio-í te ñá díú dicó-ni ichi yãha-í. <sup>8</sup> Te cundecu-ni-í ñuú Éfesú-a ndéé tnáhá vico Pentecóstés. <sup>9</sup> Te duca<sup>n</sup> chí iha ío tédóho ñáyiú tnúhu Xítoho Jesucristú sã cãhá<sup>n</sup>-í núu-yu. Núu xiã<sup>n</sup> ío váha quèe cuendá cada-í chiu<sup>n</sup>-gã cuèi ío vai ñáyiú ñá túú tnáhá ini-yu sã cãhá<sup>n</sup>-í tnúhu-gã.

<sup>10</sup> Te núu na quixi coto ñaha té Timitéu xii-ndo, te ío váha cuu ini-ndó cãhá<sup>n</sup> ndihi-ndo-dé cuendá duca<sup>n</sup> ñá túú nã cani ini-dé cundecu ndihi ñaha-dé xii-ndo, chí tnáhá-dé cúú-dé téé quide chiu<sup>n</sup> Xítoho Jesucristú dàtná quidé-í. <sup>11</sup> Te cuini-í sã ní ñi<sup>n</sup>-ndo vá caní cuèhé ini-ndó cuendá-dé, te chindee-ndo-dé nãcuáa cuu váha ini-dé òré quixi-dé quixi coto ñaha-dé xii-í, chí yúhú ndihi dava-gã ñáyiú ndècu ichi Xítoho Jesucristú ndétú-ndí-dé quexio-dé.

<sup>12</sup> Te ío ní cãhá<sup>n</sup> ndáhú-í núú té Apolós téé ndècu ndihi-o ichi Xítoho Jesucristú cuendá quixi-dé ndihi dava-gã cue téé ndècu ndihi-o

ichi-gá quixi coto ñaha-güedé xii-ndo dico ñá túú ní cùiní-dé quixi-dé vitna, dico quixi-dé ndéé cuèé-gá.

*Tnúhu ndéé núú ní ndihí-ná*

<sup>13</sup> Te ío quihi iní-ndó cùndecu-ndo ichi Xítoho Jesucristú, te vá dáña ndèé-ndó quíndáá iní-ndó-gá, te ío yí cùnduu iní-ndó cùndecu-ndo ichi-gá, te ío nducu ndèe-ndo canchicú<sup>n</sup> nihnu-ndo ichi-gá. <sup>14</sup> Te ío váha cuu iní tnáhá-ndó, te duca<sup>n</sup> ío váha cada tnàha-ndo te núu nándi cùu sá váha sàni iní-ndó cada-ndo.

<sup>15</sup> Te nchòhó ñáyiú ndècu ndihí-í ichi Xítoho Jesucristú sa ñaha-ndo sá ñhnanuu cuè ñáyiú cùu ndi mee té Èstéfanás ndécú ñhndí Acáyá ní sándáá iní-yu tnúhu Xítoho Jesucristú. Te vitna ñá túú dáña ndeé-yu quidé-yu sá váha sá cùú-xí dàva-gá ñáyiú sándáá iní tnúhu-gá. <sup>16</sup> Te càhán ndàhú-í núú-ndó sá quíndáá iní-ndó nchàa ñáyiú duca<sup>n</sup> xíquide, ndihí nchaa dava-gá ñáyiú ío ndùcu ndee quide chiu<sup>n</sup> ndihí-ndo cuendá Xítoho Jesucristú. <sup>17</sup> Te ío cùdí iní-í sá ní quexìo té Èstéfanás, ndihí té Fortunátú, ndihí té Acàicú, chí cue téé-á<sup>n</sup> ní quide-güedé núú-ndó ní quide-güedé nchaa sá ñá túú ndàcu-ndo cada-ndo cuendá-í ní cùu. <sup>18</sup> Te ío tàxi-güedé tnúhu ndee iní xii-í, te ñu-ni duca<sup>n</sup> tàxi-güedé tnúhu ndee iní xii nchòhó tucu, te núu xíá<sup>n</sup> xíní ñùhu-xi sá cànèhe-ndo sá yíñùhu núú nchàa cue téé duha xíquide váha.

<sup>19</sup> Te nchaa ñáyiú xíndecu ichi Xítoho Jesucristú ndécú ñhndí Asiá quide ndee iní ñáhá-yu xii-ndo, te ío cada ndee iní-ndó càchí té Àquilú ndihí ñadihí-dé tá Priscilá, te duca<sup>n</sup> quide ndee iní ñáhá tucu nchaa ñáyiú tàcá dácuàha tnúhu Yá Ndiòxí vehé-yu xii nchaa nchòhó ñáyiú ndècu ichi-gá. <sup>20</sup> Te cada ndee iní tucu-ndo càchí cue dava-gá ñáyiú ndècu ndihí-o ichi Xítoho Jesucristú. Te ní yùhu ní iní-ndó cada ndee iní tnáhá-ndó ñh<sup>n</sup> ñh<sup>n</sup>-ndo.

<sup>21</sup> Te vitna ndaha mee yùhú té Páblú tée-í tnúhu-a quide ndee iní ñáhá-í xii-ndo.

<sup>22</sup> Te ñáyiú ñá túú cùu váha iní-xi núú Xítoho Jesucristú te na cuíta nihnú-yu. Te vitna nchaa-o chí ná càchí-ó sá Xítoho Jesucristú quixi tucu-gá.

<sup>23</sup> Te xicá<sup>n</sup> táhú-í núú Xítoho Jesucristú sá ná chñndee chítúu ñaha-gá xii-ndo. <sup>24</sup> Te ío cùu iní ñáhà-í xii-ndo nàcuáa ndècu-o ichi Xítoho Jesucristú, te duca<sup>n</sup> na cùnduu, te ío chí cadá ndèe iní-ná vitna.

## TUTÚ CÚÚ ÒÚ NÍ CADÚHA TÉ PÁBLÚ QUIHÍ<sup>n</sup> NDAHA ÑÁYIU ÑUÚ CÒRINTÚ

*Té Páblú cádúha-dé tutú quihí<sup>n</sup> ndaha ñáyiu xĩndecu ichi Xítóhó Jesucristú ndécú ñúú Còrintú*

<sup>1</sup> Yúhú té Páblú cáhá<sup>n</sup>-í tnúhu Xítóhó Jesucristú chi duca<sup>n</sup> ní cachí Yá Ndióxi cunduu. Te cádúha-í tutú-a ndihi té Timúteú tée ndécú ndihi-o ichi-gá cuendá daquixi-í ndaha nchóhó ñáyiu xĩndecu ichi Yá Ndióxi ndécú ñúú Còrintú, te tutú-a cuu-xi tnáhá cuendá nchaa ñáyiu cùu cuendá Yá Ndióxi xĩndecu nchaa ñúú yĩndèhu distritú Acáyá. <sup>2</sup> Te xicá<sup>n</sup> táhú-í núú Tátá-ó Dútú Ndióxi ndihi núú Xítóhó Jesucristú sá io na chĩndee chitúu ñaha-gá xii-ndo, te ñu-ni ndi ndiúú-gá ná càda te io váha cuu iní-ndó cùndecu-ndo.

*Té Páblú cáhá<sup>n</sup>-dé nchaa nàcuáa ndòho-dé*

<sup>3</sup> Te chí ná cachi-ó sá io váha iní Dútú Ndióxi Yá cùú Tátá Xítóhó Jesucristú, te ñu-ni Dútú Ndióxi cùú-gá Yáa ío cùndahú iní ñáhá xii-o, te ñu-ni-gá cùú-gá Yáa táxi tnúhu ndee iní. <sup>4</sup> Te cuéi nándi ndòho-o ndecu-o dico ñu-ni Dútú Ndióxi táxi-gá tnúhu ndee iní xii-o, te duca<sup>n</sup> quide-gá cuendá sá nchóhó cuáñaha-o tnúhu ndee iní xii nchaa ñáyiu nándi ndòho ndecu, te ñu-ni nchaa tnúhu ndee iní táxi-gá xii-o ñu-ni nchaa tnúhu ndee iní-á<sup>n</sup> cuáñaha-o xii-yu. <sup>5</sup> Te Xítóhó Jesucristú ío ní ndohó-gá, te duca<sup>n</sup> nchòho tucu ío ndòho-o, te duca<sup>n</sup> ío vai tnúhu ndee iní níhí-ó ndécú ndihi-o chi ndécú-o ndihi Xítóhó Jesucristú. <sup>6</sup> Te nchúhú nándi ndòho-ndí ndécú-ndí cuendá sá nchóhó níhí-ndó tnúhu ndee iní cundecu ndihi-ndo te naníhí táhú-ndó. Te Yá Ndióxi táxi-gá tnúhu ndee iní xii-ndí, te duca<sup>n</sup> quide-gá cuendá sá nchóhó tnáhá-ndó níhí-ndó tnúhu ndee iní-á<sup>n</sup> te naníhí táhú-ndó, te duca<sup>n</sup> càda ndee cada cahnu iní-ndó ndòho-ndo datná ndòhó nchúhú. <sup>7</sup> Te nchúhú ío váha sáni ndáá iní-ndí cuendá-ndó chi ndòho-ndo datná ndòhó-ndí, te duca<sup>n</sup> táxi Yá Ndióxi tnúhu ndee iní xii-ndo datná táxi-gá xii-ndí.

<sup>8</sup> Te nchòhó ñáyiu ndécú ndihi-ndí ichi Xítóhó Jesucristú cuini-ndí cachí tnúhu-ndí xii-ndo nàcuáa ní yáha-ndí cùtnáhá ní xĩndecu-ndí distritú Asíá chí dává-á<sup>n</sup> ío ní ndohó-ndí, te luha-ná te vá cùndee iní-ndí yáha-ndí nchaa tnúndòho-á<sup>n</sup> ní cùu chí ní xehndé iní-ndí sá vá càcu-ndí. <sup>9</sup> Chí ní sani iní-ndí sá ndíyi-ná cuu-ndí ní cùu, te duca<sup>n</sup> ní yáha-ndí cuendá sá ío-gá quĩndáá iní-ndí Yá Ndióxi sá díú-gá taunihnu ñaha-gá xii-ndí,

te ñá díú mèe-ndí taunihnu-ndí mèe-ndí, te ñu-ni-gá cùú-gá Yáa dándoto cuéi ñáyiu sa ní xihí. <sup>10</sup> Te ñu-ni-gá ní taunihnu ñaha-gá ñá túú ní sáhni ñaha ñáyiu xii-ndí, te ñu-ni-gá táunihnu ñaha-gá xii-ndí cuéi vitna, te cùtnuní ndáá iní-ndí sá díú-ni-gá taunihnu ñaha-gá xii-ndí núú cuahá<sup>n</sup> núú vèxi te vá cahní ñaha ñáyiu. <sup>11</sup> Te nchòhó tnáhá-ndó chĩndee ñaha-ndo xii-ndí chi cáhá<sup>n</sup> ndihi-ndo Yá Ndióxi cuendá-ndí, te ío vai ñáyiu cáhá<sup>n</sup> ndihi ñáhá-yu xii-gá cuendá-ndí, te duca<sup>n</sup> ío vai ñáyiu ndácá<sup>n</sup> táhú-yu núú-gá cuendá nchaa sá váha quide ñaha-gá xii-ndí.

*Té Páblú cáhá<sup>n</sup>-dé ná cuendá ñá túú ní náyáha-dé ñúú Còrintú*

<sup>12</sup> Te ío váha cùu iní-ndí chi cùtnuní iní-ndí sá cùú-ndí cue tée cùu ndáá datná cuini Yá Ndióxi cunduu ndécú-ndí ñuyú-a, te ñu-ni duca<sup>n</sup> quide-ndí sá cùú-xi-ndó chí mee-gá cùndahú iní ñáhá-gá xii-ndí chĩndee ñaha-gá, te ñá túú quide-ndí datná sání iní cue ñáyiu ñuyú-a. <sup>13-14</sup> Nchaa nàcuáa ndúu tnúhu chíto tnuní-ndí daquixi-ndí ndaha-ndo cùu-xi mee-ni tnúhu sá ñá túú úhú tecú tnúni-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuini-ndí sá ío-gá váha tecú tnúni-ndó cuendá sá òré ná quixi tucu Xítóhó Jesucristú, te dává-á<sup>n</sup> ío cada nínu ñaha-ndo xii-ndí datná cada nínu ñaha-ndí xii-ndo. <sup>15</sup> Te cuendá xiá<sup>n</sup> núu ní sani iní-í yáha cáhá<sup>n</sup>-í úú xito núú ndécú-ndó cuendá ío cudí iní-ndó. <sup>16</sup> Chí ní sani iní-í sá òré quihí<sup>n</sup>-í distritú Macèdoniá te yáha cáhá<sup>n</sup>-í núú ndécú-ndó, te òré ndixi tucu-í te nayáha cáhá<sup>n</sup> tucu-í, te òré nayáha cáhá<sup>n</sup>-í te taxi-ndo sá cùu ichi-í cuendá quihí<sup>n</sup>-í distritú Jùdeá, duha ní sani iní-í ní cùu. <sup>17</sup> Te sá dúcá<sup>n</sup> ñá túú ní quixi coto ñaha-í xii-ndo te cudana sání iní-ndó sá yúhú ñá túú ní sáha váha-í cuendá nàcuáa ní sani iní-í cada-í, ádi cudana ñáyiu ndécú ichi cuehé ichi duha, chí cue ñáyiu-á<sup>n</sup> tnaa cachi-yu sá cùú càdà-yu ñ<sup>n</sup> sá sání iní-yu càdà-yu te tnaa cachi-yu sá ñáhá. <sup>18</sup> Dico Yá Ndióxi Yáa ío váha quide ndáá ñaha ndáá náhá càxi-gá sá nchúhú ñá túú dàma-ndí sá cáhá<sup>n</sup>-ndí. <sup>19</sup> Te yúhú ndihi té Silvanú ndihi té Timúteú dánèhè ñáhá-ndí xii-ndo cuendá Xítóhó Jesucristú Yáa cùú Déhe Yá Ndióxi, te Xítóhó Jesucristú cùú-gá Yáa ñá túú dàma-gá tnúhu cáhá<sup>n</sup>-gá, chí cùu-gá Yáa cáhá<sup>n</sup> mee-ni tnúhu ndáá tnúhu cui<sup>n</sup>. <sup>20</sup> Te ñu-ni Xítóhó Jesucristú cùú-gá Yáa quide nchaa nàcuáa ní cachí Yá Ndióxi. Te sá cuendá sá dúcá<sup>n</sup> quide Xítóhó Jesucristú xiá<sup>n</sup> cachi-ó sá ío cahnu cuu Yá Ndióxi. Te nchaa-o na cachi-ó sá díú-ni dúca<sup>n</sup> na cada-gá. <sup>21</sup> Te mee Yá Ndióxi

quidé-gã ndécú-ní-ó ichi Xítohó Jesucristú. Te diu-ni mee-gã ní cáhá<sup>n</sup> ñáhá-gã xii-o cuendá cunu cuechi-o núú-gã. <sup>22</sup> Te Yá Ndióxi ní quide-gã sá nchòhò cùu-o ñáyiu cùu cuendá-gã, te ní taxi-gã Espiritú-gã ní ngúndecu ndìhi-o cuendá cutnùnì iní-ó sã ndáà cada ñaha-gã xii-o ñacuáa ní cachí-gã cada-gã.

<sup>23</sup> Te Yá Ndióxi náhá-gã sá yùhú cáhá<sup>n</sup> ndáá-í ná cuendá vátá quixí-gã-í quixi coto ñaha-í xii-ndo, te vátá quixí-gã-í chí ñá túú cuiní-í dandihú-í iní-ndó. <sup>24</sup> Te nchúhú ñá túú tàú-ndí cada yica ñaha-ndí xii-ndo ñacuáa quindáá iní-ndó Yá Ndióxi, chí sa sàndáá vaha iní-ndó-gã, chí nchúhú cuiní-ndí chindee tnúhu ñaha-ndí xii-ndo ñacuáa io-gã cudíí iní-ndó cùndecu-ndo.

## 2

<sup>1</sup> Te ní sani ndáá iní-í sã vã quixí ndìhi-ni-í quixi coto ñaha-í xii-ndo cuendá sã vã dándihú-í iní-ndó. <sup>2</sup> Te nchòhò cúú-ndó ñáyiu taxi tnúhu ndee iní xii-í cudíí iní-í ndécú-í, te xiã<sup>n</sup> núu ñá túú cuiní-í dandihú-í iní-ndó, chí núu duca<sup>n</sup> na cada-í te vã cùndecu váha-gã iní-ndó ñacuáa taxi-ndo tnúhu ndee iní xii-í. <sup>3</sup> Te xiã<sup>n</sup> núu ní tendaha-í tutú véxi ndaha-ndo cuendá sã òré quixi coto ñaha-í xii-ndo, te òré-á<sup>n</sup> quini-í sã quidé-ndó ñacuáa cudíí iní-í te ñá díú dà dandihú-ndó iní-í òré quexio-í, chí nchòhò tàú-ndó cada-ndo sã yùhú cudíí iní-í. Te cutnùnì ndáá iní-í sã núu yùhú cudíí iní-í te tnàhá nchòhò cudíí iní-ndó cuendá sã dúcá<sup>n</sup> cudíí iní-í. <sup>4</sup> Te ndáhyú-í sã ndáá iní-í òré ní cadúha-í tutú ní dáquixí-í ndaha-ndo, chí io cuéhé sã sání iní-í, te ñá túú ní dàquixi-í tutú-á<sup>n</sup> ndaha-ndo cuendá sã dándihú iní ñáhá-í xii-ndo, chí ní dáquixí-í cuendá sã nchòhò cutnùnì iní-ndó sã io cùu iní ñàhá-í xii-ndo.

*Ñacuáa tàú ñáyiu ñúú Còrintú cada-yu cuendá ñá ñáyiu ñá túú quide ndáá*

<sup>5</sup> Te na cãchí tnúhu-í xii-ndo cuendá ñá<sup>n</sup> téé ní quide ñá<sup>n</sup> sã ñá túú tàú-dé cada-dé ndécú ndìhi-ndo, te ní quide ndáhú-xi luha iní-í cuendá sã ní quide-dé-á<sup>n</sup> dico nchòhò tnàhá-ndó ní dándihú-dé luha iní-ndó, te duha cãchí-í sã lúhá-ní ní dándihú-dé iní-ndó cuendá sã vã cuidó-gã-í ná tnúhu cáhá<sup>n</sup>-í. <sup>6</sup> Te ñacuáa ní ndatnúhu-ndo ní quide ndáá-ndó cuéchi téé-á<sup>n</sup> te sa ndói-gã cuu ñacuáa ní quide-ndo-dé. <sup>7</sup> Te vitna tàú-ndó cada cahnu iní-ndó sã ní quide-dé, te cuáñaha-ndo tnúhu ndee iní xii-dé chí núu ñáhá te vã ñihí ndéé-gã-dé cada-dé sã vaha cuendá sã ndihú iní-dé. <sup>8</sup> Te xiã<sup>n</sup> núu cáhá<sup>n</sup> ndáhú-í núú-ndó sã cádá tùcu-ndo sã cúú iní-ndó-dé. <sup>9</sup> Te diu-ni cuendá iha cáhá<sup>n</sup>-í

ñá<sup>n</sup> núú tùtú sã sã ní dáquixí-í ndaha-ndo, te duca<sup>n</sup> ní quide-í xító ndéé ñàhá-í xii-ndo núu ndisa cuiní-ndó càda-ndo nchaa nacuáa cáhá<sup>n</sup>-í. <sup>10</sup> Te ndéda-ni càa ñáyiu na càda cahnu iní-ndó ñá<sup>n</sup> sã quidé-yu, te tnàhá yùhú cada cahnu iní-í sã quidé-yu tucu. Te núu ió ñá<sup>n</sup> sã xini ñúhu-xi cada cahnu iní-í te quide cahnu iní-í, te mee Xítohó Jesucristú náhá-gã sã dúcá<sup>n</sup> quide-í, te duca<sup>n</sup> quide-í cuendá sã nchòhò cuu-xi sã vaha xii-ndo. <sup>11</sup> Te duca<sup>n</sup> te sácúfná vã ñihí-xi ná cada ñaha-xi xii-o, chí nchoo sã xini-ó ñacuáa quide-xi.

*Té Páblú ndihú iní-dé ndécú-dé ñúú Tróás*

<sup>12</sup> Te ní xica-í cuáhá<sup>n</sup>-í ñúú Tróás cuendá yacá<sup>n</sup> cáhá<sup>n</sup>-í tnúhu sã cáhá<sup>n</sup> ñacuáa naníhí tãhú-ó tnúhu Xítohó Jesucristú, te òré ní quexio-í te ní ñihí-í ñá<sup>n</sup> ichi cànu cáhá<sup>n</sup>-í tnúhu-gã. <sup>13</sup> Dico ñá túú ní cùu váha iní-í chí ñá túú ní naníhí-í té Titú téé ndècu ndìhi-o ichi Xítohó Jesucristú, núu xiã<sup>n</sup> ní quide ndee ñá<sup>n</sup> tnàhá-í ndìhi cue ñáyiu ñúú-á<sup>n</sup>, te ní xica-í cuáhá<sup>n</sup>-í distritú Macèdoniá.

*Dàquetihú-ó yùcu ñávãha chí ndècu ndìhi-o Xítohó Jesucristú*

<sup>14</sup> Te táxãhu xii Yá Ndióxi chí duca<sup>n</sup>-ni sãnu ichi ñaha-gã xii-ndí ñacuáa cunuu-ndí núú yucu ñávãha chí ndècu ndìhi-ndí Xítohó Jesucristú, te mee Yá Ndióxi sáchiu<sup>n</sup> ñaha-gã xii-ndí cáhá<sup>n</sup>-ndí tnúhu-gã. Te cada iní-ó sã tnúhu-gã-á<sup>n</sup> cúú-xí dàtná ñá<sup>n</sup> yúcu sã io váha sãhá<sup>n</sup> te ta xitènuu dicó-xi ndèni ní cuu cuáhá<sup>n</sup>. Te duca<sup>n</sup> sãtnahá-xi cùu tnúhu-gã chí nchúhú quidé-ndí ñacuáa ta xitènuu ndèni ní cuu cuáhá<sup>n</sup>. <sup>15</sup> Te cùu-ndí dàtná dicó ñá<sup>n</sup> yúcu sã io váha sãhá<sup>n</sup>, te ñàcani cuendá Xítohó Jesucristú núú Yá Ndióxi, te dicó yúcu-á<sup>n</sup> nchítá cuéi núú xíndecu cue ñáyiu sa ní naníhí tãhú, te cuéi núú xíndecu cue ñáyiu ta xita ñihnu cuáhá<sup>n</sup>. <sup>16</sup> Te sã cúú-xí cué ñáyiu ta xita ñihnu cuáhá<sup>n</sup>-á<sup>n</sup>, dicó yúcu-á<sup>n</sup> cúú-xí dàtná ñá<sup>n</sup> sã sáhní ñaha xii-yu, dico sã cúú-xí cué ñáyiu sa ní naníhí tãhú, dicó yúcu-á<sup>n</sup> cúú-xí dàtná ñá<sup>n</sup> sã ndécá iní-yu, duca<sup>n</sup> sãtnahá-xi cùu nchúhú. Te vitna chí cuãha cuendá núu ná cúú ñáyiu sãni iní-ndó ndàcu cada nacuáa ndùu tnúhu cáhá<sup>n</sup>-í-a. <sup>17</sup> Chí nchúhú cáhá<sup>n</sup>-ndí tnúhu Yá Ndióxi dico ñá túú ndáhú quidé-ndí ndìhi tnúhu-gã dàtná xiquide dava-gã-güedé, chí quide ndáá-ndí cáhá<sup>n</sup>-ndí tnúhu-gã, te mee-gã ní cachí-gã sã dúcá<sup>n</sup> càda-ndí te ndèhe-gã sã nchúhú quidé-ndí ñacuáa ní cachí-gã, chí ndècu ndìhi-ndí Xítohó Jesucristú.

## 3

*Cuendá ingá núú sã vaha ní cachí Yá Ndióxi cada-gã ñáyiu*

<sup>1</sup> Te cuéi duha cáhá<sup>n</sup>-ndí núú-ndó dico ñá túú xini ñúhu-xi sã cùñaha-ndí xii-ndo sã

cúu-ndí cue tée quide váha, te ni ña túu xini ñuhu-xi cacanehe-ndí ñi tutú núu cáhá-xi sá cúu-ndí cue téé váha danéhé ñáhá xii-ndo datná xiquide dava-gá-güedé, te ni ña túu xini ñuhu-xi sá nchòhó taxi-ndo ñi tutú núu cáhá-ndo sá nchùhú cúu-ndí cue téé quide váha. <sup>2</sup> Te ña túu xini ñuhu-xi duca<sup>n</sup> cada-ndí. Te cùtnuni ndáá ini-ndí sá nchòhó cúu-ndo datná ñi tutú sá io váha cáhá<sup>n</sup> cuendá-ndí. Te duca<sup>n</sup> sàtnahá-xi cùu-ndo chi nchaa ñáiyu nihí-yu tnúhu nàcuáa quide-ndo ndecu-ndo, te xiá<sup>n</sup> cùtnuni ini-yu sá nchùhú cúu-ndí cue téé quide váha. <sup>3</sup> Te nchòhó cúu-ndo cuendá Xitohó Jesucristú, te cùu-ndo datná tutú-gá te tutú-á<sup>n</sup> ñi táuchíu<sup>n</sup>-gá xii-ndí ní cadúha-ndí, te mee-ni ndíhi Espiritú Yá Ndióxi ní ngundeé tnúhu-á<sup>n</sup> te ña díu ndíhi tindá ní ngundeé. Te ña díu ñi núu yúu ní ngundeé chi ini-ndo cùu-xi núu dúcá<sup>n</sup> ní ngundeé tnúhu-á<sup>n</sup> te duca<sup>n</sup> sàtnahá-xi cùu-ndo.

<sup>4</sup> Te duha cáhá-ndí chi cùtnuni ndáá ini-ndí sá Yá Ndióxi quidé váha ñaha-gá xii-ndí, chi ndècu ndíhi-ndí Xitohó Jesucristú. <sup>5</sup> Te nchùhú chi ndàcu-ndí quidé-ndí sá váha dico ña díu mèe-ndí duca<sup>n</sup> ndàcu-ndí quidé-ndí, chi mee Yá Ndióxi chindèe ñaha-gá xii-ndí núu ndàcu-ndí quidé-ndí sá váha. <sup>6</sup> Te mee Yá Ndióxi ní quide-gá sá nchùhú ndacu-ndí cunu cuechi-ndí núu-gá cáhá-ndí núu ñáiyu cuendá ingá núu sá váha ní cachí-gá cada ñaha-gá xii-yu. Te sá váha ní cachí-gá cada ñaha-gá xii-yu-á<sup>n</sup> ña túu ñi-ñi cuu-xi ndíhi nchaa tnúhu sá ñi xáha-gá xii ndí Moisés ní chídó tnúni ndí, te duca<sup>n</sup> chi espíritú Yá Ndióxi nehé chiú<sup>n</sup>-xi nchaa tnúhu sá cáhá<sup>n</sup> cuendá nchaa sá váha-á<sup>n</sup>. Te nchaa tnúhu ní chídó tnúni ndí Moisés, dándxi túu-xi ini nchaa ñáiyu ndècu ndíhi tnúhu-á<sup>n</sup> sá cuíta nihnú-yu cuendá nchaa cuéchi-yu, dico cue ñáiyu ndècu ndíhi Espiritú Yá Ndióxi ñáiyu-á<sup>n</sup> ndécú ndíhi-yu tnúhu ndee ini sá cãcu nihnú-yu.

<sup>7</sup> Te tnúhu sá ñi cáhá<sup>n</sup> Yá Ndióxi ndéé díhna nàcuáa cada ñáiyu ní ngundeé-xi ñi núu yúu quèhé<sup>n</sup>. Te òre ní dátúu ndí Moisés nàcuáa cáhá<sup>n</sup> tnúhu sá ñi cáhá<sup>n</sup> Yá Ndióxi ndéé núu yúu-á<sup>n</sup> núu cué ñáiyu israhél, te súuni ní tása<sup>n</sup> núu ndí te ña túu-gá ní cùu cundehé-yu núu ndí, te duca<sup>n</sup>-gá duca<sup>n</sup>-gá quidé-xi dátása<sup>n</sup>-xi núu ndí ni cùu ña túu-gá duca<sup>n</sup> ni quide-xi. Te tnúhu ndéé núu yúu-á<sup>n</sup> dándxi túu-xi ini cue ñáiyu sá cuíta nihnú-yu sá cuendá nchaa cuéchi-yu, te io váha ní quide-xi cùtnáhá ní ngundeecu ndíhi cue ñáiyu israhél tnúhu-á<sup>n</sup>. <sup>8</sup> Te sá dúcá<sup>n</sup> ní quide-xi xiá<sup>n</sup> cùtnuni sá tnúhu cáhá<sup>n</sup> Espiritú Yá Ndióxi vitna uu<sup>n</sup>-gá duca<sup>n</sup> io-gá váha quide-xi. <sup>9</sup> Te núu duca<sup>n</sup>

io váha ní quide-xi cùtnáhá ní ngundeecu ndíhi cue ñáiyu israhél tnúhu sá dándxi túu ini-yu sá cuíta nihnú-yu sá cuendá nchaa cuéchi-yu, te uu<sup>n</sup>-gá duca<sup>n</sup> váha quide-xi vitna ní ngundeecu ndíhi-o tnúhu sá cáhá<sup>n</sup> nàcuáa quide Yá Ndióxi cuendá sá vá cùndècu-gá cuéchi ñáiyu núu-gá. <sup>10</sup> Te vá càchí-ó sá cùtnáhá ní ngundeecu ndíhi cue ñáiyu israhél tnúhu ndéé núu yúu-á<sup>n</sup> io-gá váha ní quide-xi, te ñáhá chi uu<sup>n</sup>-gá váha quide-xi vitna cuendá tnúhu sá cáhá<sup>n</sup> nàcuáa quide Yá Ndióxi. <sup>11</sup> Te núu duca<sup>n</sup> io váha ní quide-xi cùtnáhá ní ngundeecu ndíhi ñáiyu israhél tnúhu sá ña túu ní cudí, te uu<sup>n</sup>-gá duca<sup>n</sup> io váha quide-xi vitna ní ngundeecu ndíhi-o tnúhu sá vá ndíhi nihnu tnahí-gá.

<sup>12</sup> Te cùtnuni ini-ndí sá vá ndíhi nihnu sá dúcá<sup>n</sup> io váha quide-xi, núu xiá<sup>n</sup> io vii io váha cùu ini-ndí cáhá-ndí tnúhu sá ní ngundeecu ndíhi-o. <sup>13</sup> Te ña túu quide-ndí dátná ní xóo cada ndí Moisés, chi ndí-á<sup>n</sup> ñi xóo dádáhu ndí núu ndí òre dátása<sup>n</sup>-xi núu ndí cuendá sá vá quini cue ñáiyu israhél òre ña túu-gá dátása<sup>n</sup>-xi núu ndí. <sup>14</sup> Te cue ñáiyu israhél ña túu ní təcú tnúni váha-yu nàcuáa ní xóo danéhé ñáhá ndí Moisés xii-yu, te cuéi ndéé vitna ña túu təcú tnúni-yu òre dácuahá-yu tnúhu sá ñi cáhá<sup>n</sup> Yá Ndióxi ndéé díhna nàcuáa cada-gá, te cada ini-ó sá dátná sá ñi xidáhu núu ndí Moisés yidáhu núu-yu cuendá sá vá cùtnuni núu-yu cundehé-yu te təcú tnúni-yu, dico núu tnahá tnúhu-yu ndíhi Xitohó Jesucristú te təcú tnúni-yu. <sup>15</sup> Te cuéi ndéé vitna òre dácuahá-yu nchaa tnúhu sá ñi chídó tnúni ndí Moisés nchaa núu tütú ndí, te cada ini-ó sá dátná sá ñi xidáhu núu ndí yidáhu núu-yu chi ña túu təcú tnúni-yu. <sup>16</sup> Dico cue ñáiyu na tùha ñaha xii Xitohó Jesucristú te təcú tnúni-yu tnúhu-gá. <sup>17</sup> Te Xitohó Jesucristú ñi-ñi cùu-gá ndíhi Espiritú Yá Ndióxi, te nchaa ñáiyu ndècu ndíhi Espiritú-gá ña túu-gá táxi tnúni ñáhá ñi ñi sá ña túu váha xii-yu. <sup>18</sup> Te dátná cúu ñi yutatá sá dánèhé núu ñáhá-xi xii ñáiyu ñi sá váha, duca<sup>n</sup> sàtnahá-xi cùu-o chi quide-o nacuáa cáhá<sup>n</sup> ñáiyu sá io càhnu cuu Xitohó Jesucristú, te duca<sup>n</sup> uu<sup>n</sup>-gá uu<sup>n</sup>-gá tá cùndáá-ó ndècu-o ichi-gá dátná quidé mèe-gá quidé ndáá-gá. Te Espiritú-gá quidé-xi dúcá<sup>n</sup> ta cundáá-ó núu-gá cuáhá<sup>n</sup>.

## 4

<sup>1</sup> Te mee Yá Ndióxi ní cundàhu ini ñáhá-gá xii-ndí ní taxi-gá chiú<sup>n</sup> quide-ndí cáhá-ndí tnúhu-gá, núu xiá<sup>n</sup> ña túu tnahí nàtùhú ini-ndí cáhá-ndí tnúhu-gá. <sup>2</sup> Te nchùhú dàquee tihú-ndí nchaandi tùhú sá ña túu váha quide dayuhu ñáiyu, chi nchaa xiá<sup>n</sup> cúu-xi ñi sácá<sup>n</sup>-núu sá cúu-xi-yu, te nchùhú ña túu sàni ini-ndí dandàhu-ndí ñáiyu te ni

ñã túú sãni iní-ndí dama-ndí nãcuáa càhá<sup>n</sup> tnúhu Yá Ndióxi, chi càhá<sup>n</sup> ndáá-ndí nãcuáa tàú-xi càhá<sup>n</sup>-ndí, te mee Yá Ndióxi nãhá-gã nãcuáa ndúu tnúhu càhá<sup>n</sup>-ndí núú ñãyiú, te ñãyiú-á<sup>n</sup> cútñuní iní-yu sã nchúhú càhá<sup>n</sup> váha-ndí. <sup>3</sup> Te cue ñãyiú ñã túú tẽcú tnùní nãcuáa ndúu tnúhu sã càhá<sup>n</sup> nãcuáa naníhí tãhú-ó càhá<sup>n</sup>-ndí núú-yu, ñãyiú-á<sup>n</sup> cúu-yu ñãyiú ta xíta nihnu cuáhã<sup>n</sup>. <sup>4</sup> Te cue ñãyiú-á<sup>n</sup> cúu-yu ñãyiú ío sãá iní-xi chi ñã túú cuíní-yu quíndáá iní-yu tnúhu Xítóhó Jesucristú, te xiã<sup>n</sup> núu sãcuíhnã cútñuú-xi núú-yu te nihí-xi nãcuáa quide-xi dadáhu ndodo iní ñãhá-xí xii-yu cuendá sã vá tẽcú tnùní-yu tnúhu sã càhá<sup>n</sup> nãcuáa naníhí tãhú-yu, te tnúhu-á<sup>n</sup> cúu-xí tnúhu sã ío váha chi càhá<sup>n</sup>-xí sã ío càhnu cuu Xítóhó Jesucristú, te cúu-gã dátã méé Tãtã-gã Dútú Ndióxi. <sup>5</sup> Te nchúhú ñã túú càhá<sup>n</sup>-ndí cuendá sã cúu-xí mée-ndí núú-ndó chí càhá<sup>n</sup>-ndí cuendá Xítóhó Jesucristú, te càchí-ndí xii-ndo sã díú-gã cúu-gã Yáá ío cùnunu, te càchí-ndí xii-ndo sã méé-ndí cúu-ndí dícú-ni cue tẽe xinu cuechi sã cúu-xí-ndó, te duca<sup>n</sup> quide-ndí nãcuáa cuu víu cuu váha iní Xítóhó Jesucristú. <sup>6</sup> Te Yá Ndióxi Yáá ní dáyehé ndéé cútñãhá nee ñuyú ní cùu, Yáá-á<sup>n</sup> ní cachí-gã sã Xítóhó Jesucristú cada-gã nãcuáa tẽcú tnùní-ó sã ío càhnu cuu mee Yá Ndióxi. Te sã dúcã<sup>n</sup> ní quide-gã te cada iní-ó sã dátã tnúhu sã ní dáyehé-gã iní-ó.

### *Ío quíndáá iní-ó Yá Ndióxi*

<sup>7</sup> Te nchúhú ndécú ndíhí-ndí tnúhu Xítóhó Jesucristú, te tnúhu-gã cúu-xí dátã ñ<sup>n</sup> sã ío váha ñúhu ñ<sup>n</sup> xití quídí ñúhu, te nchúhú cúu-ndí dátã quídí-á<sup>n</sup>. Te duca<sup>n</sup> sãtnahá-xi cùu-ndí chí tnúhu-gã ío càhnu cuu-xi te mee-ndí ñãhá, te duca<sup>n</sup> cùu nãcuáa cútñuní sã méé Yá Ndióxi quídé-gã nchaa sã váha te ñã díú mée-ndí. <sup>8</sup> Te cuéi ío ndòho-ndí ndécú-ndí dico nihí-ndí nãcuáa quide-ndí tá yãha-ndí nchaa tnúndòho-á<sup>n</sup> cuáhã<sup>n</sup>, cuéi áma sa ndetu ví-ñã quehndé iní-ndí sã vá ndácú-ndí yãha-ndí nchaa tnúndòho-á<sup>n</sup>, dico ndacu-ndí yãha-ndí. <sup>9</sup> Te cuéi nãnducu ñãha ñãyiú cuíní-yu ná cada ñãhá-yu xii-ndí dico ñã túú dàña ñãha Yá Ndióxi xii-ndí, te cuéi cànihá-yu xii-ndí dico càcu-ndí ñã túú sãhni ñãhá-yu. <sup>10</sup> Te ndéni ní cuu cuáhã<sup>n</sup>-ndí xicá cùu-ndí, te càcu càcu cahni ñãhá-yu xii-ndí dátã ní quidé-yu Xítóhó Jesucristú, te duca<sup>n</sup> yãha-ndí cuendá cútñuní sã ndécú túu Xítóhó Jesucristú andíu te chindee ñãha-gã xii-ndí. <sup>11</sup> Te nchúhú nini ndecu-ndí ñuyú-a te nchaa-ni nduu càcu càcu cahni ñãha ñãyiú xii-ndí sã cuendá Xítóhó Jesucristú, te duca<sup>n</sup> yãha-ndí ndécú-ndí cuendá cútñuní sã

Xítóhó Jesucristú ndécú ndíhí ñãha-gã xii-ndí cuéi vá cúdí yiqui cùñú-ndí cundecu-xi. <sup>12</sup> Te sã dúcã<sup>n</sup> càcu càcu cahni ñãha ñãyiú xii-ndí xiã<sup>n</sup> nchòhó uu<sup>n</sup>-gã tá nihí ndéé-ndó cuáhã<sup>n</sup> ndécú-ndó ichi Xítóhó Jesucristú.

<sup>13</sup> Te ñ<sup>n</sup> tée ní xíndecu ndéé sanaha ní chídó tnùní-ndé núú tútú Yá Ndióxi núú càchí-xi: “Yúhú ní sãndáá iní-í Yá Ndióxi núú xiã<sup>n</sup> ní càhá<sup>n</sup>-í”, duha ní cachí tée-á<sup>n</sup>. Te dátã-ni ní sani iní tée-á<sup>n</sup> ní càhá<sup>n</sup>-dé te diu-ni duca<sup>n</sup> sãni iní nchúhú tucu núu xiã<sup>n</sup> càchí-ndí: “Sãndáá iní-ndí Yá Ndióxi núu xiã<sup>n</sup> càhá<sup>n</sup>-ndí”, duha càchí-ndí. <sup>14</sup> Te cútñuní iní-ndí sã núu na cùu-ndí te Yá Ndióxi dandòto ñãha-gã xii-ndí dátã ní dándótó-gã Xítóhó Jesucristú, te tnãhá nchòhó duca<sup>n</sup> càda ñãha-gã xii-ndo, te dàvã-á<sup>n</sup> candeca ñãha-gã xii-o quíhí<sup>n</sup> nucúndecu-o núú-gã. <sup>15</sup> Te nchúhú nãndí cùu sã tá yãha-ndí véxi cuendá nchòhó ngúndecu váha-ndú, te duca<sup>n</sup> cuíta cáyá-gã ñãyiú ngúndecu váha sã xíí Yá Ndióxi, te diu-ni duca<sup>n</sup> cuíta cuu vai-gã ñãyiú ndacá<sup>n</sup> tãhú-yu núú-gã te cachí-yu sã ío càhnu cuu-gã.

<sup>16</sup> Te xiã<sup>n</sup> núu nchúhú ñã túú tnãhí nãtúhú iní-ndí ndécú-ndí ichi Xítóhó Jesucristú, te cuéi yiqui cùñú-ndí tá xàú-xi cuáhã<sup>n</sup> dico iní-ndí chí uu<sup>n</sup>-gã uu<sup>n</sup>-gã tá nihí ndéé-xi cuáhã<sup>n</sup>. <sup>17</sup> Te nchaa sã ndòhó-ndí ñuyú-a ñã túú càchí-ndí sã cúu-xí ñ<sup>n</sup> tnúndòho cahnu vihi, chí tnaa-ni duha ndòho-ndí, te sã dúhá ndòho-ndí nãndí ndòho-ndí ndécú-ndí ñuyú-a te Yá Ndióxi ío váha cada ñãha-gã xii-ndí nduu na sãá-ndí núú ndécú-gã, te diu-ni duca<sup>n</sup> càda ñãha-gã xii-ndí ní caa ni quíhí<sup>n</sup>. <sup>18</sup> Te nchúhú ñã túú nchicú<sup>n</sup> nihnu-ndí sã túu ndèhe-ndí ío ñuyú-a, chí nchicú<sup>n</sup> nihnu-ndí sã vãtã quíni-gã-ndí ndécú andíu, te duca<sup>n</sup> quide-ndí chí nchaa sã túu ndèhe-ndí ío ñuyú-a vá cúdí-xi cundecu-xi, te nchaa sã ñã túú túu ndecu andíu xiã<sup>n</sup> cudí-xi cundecu-xi ní caa ni quíhí<sup>n</sup>.

## 5

<sup>1</sup> Te yiqui cùñú-ó cùu-xi dátã ñ<sup>n</sup> vehe, te vehe-á<sup>n</sup> ñã túú cùdí-xi, te duca<sup>n</sup> sãtnahá-xi cùu yiqui cùñú-ó chí vá cúdí-xi, te na sãá nduu vá cúndecu-gã-ó ndíhí yiqui cùñú-ó, te Yá Ndióxi taxi-gã ñ<sup>n</sup> yiqui cùñú sãá sã cúu-xí-ó, te xiã<sup>n</sup> cúu-xí dátã ñ<sup>n</sup> vehe sã ñã túú ní càdúha cue ñãyiú ñuyú-a, chí mee Yá Ndióxi ní cadúha-gã vehe-á<sup>n</sup> te vehe-á<sup>n</sup> cudí-xi cundecu-xi ní caa ni quíhí<sup>n</sup> andíu. Te duca<sup>n</sup> sãtnahá-xi cùu yiqui cùñú sã táxi Yá Ndióxi xii-o chí cudí-xi cundecu-xi ní caa ni quíhí<sup>n</sup>. <sup>2</sup> Te nchúhú ndecu ndíhí-gã-ndí yiqui cùñú-ndí sã ndécú ndíhí-ndí vitna te sama cuíní-ndí sã ío ndíhí taxi Yá Ndióxi



yiqui cùñú sáá cùndecu ndihi-ndí. <sup>3</sup> Chi mee-gá vá dáñá-gá sá dúcá-ní cùnduu-ndí cundecu-ndí, chi dai taxi-gá yiqui cùñú sáá-á<sup>n</sup> xii-ndí. <sup>4</sup> Te nini ndecu-ndí ndihi yiqui cùñú-ndí vitna ío sàni iní-ndí te ndihú iní-ndí, dico ñá díú sá dúhá quide-ndí te ñá túú-gá tnàhá iní-ndí cundecu-ndí ndihi yiqui cùñú-ndí, chi cùini-ndí sá Yá Ndióxi ío ndihi taxi-gá yiqui cùñú sáá ndùu táhú-ndí, chi xiá<sup>n</sup> cudíi-xi ní caa ní quíhí<sup>n</sup> te yiqui cùñú-ndí sá tá ndihi nihnu cuáhá<sup>n</sup>-a vá cudíi-xi cundecu-xi. <sup>5</sup> Te duca<sup>n</sup> tnàhí ní cachí Yá Ndióxi cunduu sá dúcá<sup>n</sup> ndùu táhú-ó yiqui cùñú sáá-á<sup>n</sup>, te ní taxi-gá Espiritú-gá ní ngúndecu ndihi-o cuendá cutnùni iní-ó sá ndáá taxi-gá yiqui cùñú sáá-á<sup>n</sup> nduu táhú-ó. <sup>6</sup> Te xiá<sup>n</sup> núu nchúhú nihí ndéé-ndí ndécú-ndí, te cùtnuní iní-ndí sá nìni ndecu-ndí ndihi yiqui cùñú-ndí sá ndécú ndihi-ndí vitna te vátá sáá-gá-ndí cundecu-ndí mei núu ndécú Xitohó Jesucristú. <sup>7</sup> Te duca<sup>n</sup> cùtnuní iní-ndí chi sàndáá iní-ndí Yá Ndióxi ndécú-ndí ñuyíú-a cuéi ñá túú xini-ndí-gá. <sup>8</sup> Te ío váha cùu iní-ndí ndécú-ndí, te sàni iní-ndí sá váha-gá sá núu vá cùndècu-gá-ndí ndihi yiqui cùñú-ndí sá ndécú ndihi-ndí vitna. Te duca<sup>n</sup> sàni iní-ndí chi váha-gá cundecu-ndí mei núu ndécú Xitohó Jesucristú. <sup>9</sup> Te ío ndùcu ndee-ndí quidé-ndí nàcuáa cuu vii cuu váha iní Xitohó Jesucristú vitna ndecu-ndí ñuyíú-a, te diu-ni duca<sup>n</sup> càda-ndí cuéi òrè vá cùndècu-gá-ndí. <sup>10</sup> Te dacuití sá ncháá-ó cùndecu-o núu Xitohó Jesucristú ì<sup>n</sup> nduu, te dàv-á<sup>n</sup> mee-gá càhá<sup>n</sup>-gá te núu nása ndùu chiu<sup>n</sup> ní quide-o ì<sup>n</sup> ì<sup>n</sup>-o, núu ní quide váha-o àdi ñá túú ní quide váha-o, te nàcuáa nduu chiu<sup>n</sup> ní quide-o ì<sup>n</sup> ì<sup>n</sup>-o te duca<sup>n</sup> ndùu sá táxi-gá nduu táhú-ó.

*Nàcuáa ní cuu ní ngúndecu váha-o ndihi Yá Ndióxi*

<sup>11</sup> Te nchúhú quíyùhú iní-ndí nàcuáa cada Xitohó Jesucristú, núu xiá<sup>n</sup> càhá<sup>n</sup>-ndí tnúhu-gá núu ñáyiú cuendá xínu iní-yu tuha ñàhá-yu xii-gá. Te mee Yá Ndióxi sa ñaha-gá nàcuáa quide-ndí ndécú-ndí, te sàni iní-ndí sá nchòhò cutnùni iní-ndó nàcuáa quide-ndí ndécú-ndí. <sup>12</sup> Te sá dúhá càhá<sup>n</sup>-ndí te vá cáni iní-ndó sá nchúhú càhá<sup>n</sup> váha-ndí cuendá-ndí nàcuáa nchòhò cuu váha iní ñàhá-gá-ndó xii-ndí te ñàhá, chi duha càhá<sup>n</sup>-ndí cuendá sá nchòhò nihí-ndó tnúhu càhá<sup>n</sup> váha-gá-ndó cuendá-ndí núu ñáyiú. Te duca<sup>n</sup> nihí-ndó tnúhu cùñaha-ndo xii cue ñáyiú quide nínu mee-xi, chi cue ñáyiú-á<sup>n</sup> ñá túú quide cuendá-yu nása ndècu iní-yu. <sup>13</sup> Te núu nchòhò sání iní-ndó sá

lúcú-ndí cuendá nàcuáa quide-ndí ndécú-ndí te cùu-xi cuendá Yá Ndióxi, àdi núu sàni iní-ndó sá ñá túú lúcú-ndí cuendá nàcuáa quide-ndí ndécú-ndí te cùu-xi sá váha sá cúu-xi-ndó. <sup>14</sup> Te quide-ndí nàcuáa cùini Xitohó Jesucristú chi cùtnuní iní-ndí sá ío cùu iní-gá nchaa ñáyiú, te duca<sup>n</sup> xini ndáá-ndí sá ní xihí-gá cuendá nchaa-yu, te xiá<sup>n</sup> núu cada iní-ó sá dàtná tnúhu sá ncháá ñáyiú ní xihí-yu ndihi-gá. <sup>15</sup> Te duca<sup>n</sup> ní xihí Xitohó Jesucristú cuendá nchaa ñáyiú chi cùini-gá sá ncháa-yu cundecu-yu cada-yu nàcuáa cùini méé-gá te vá càdà-yu nàcuáa cùini méé-yu, chi mee-gá ní xihí-gá te ní ndoto-gá cuendá cuu-xi sá váha sá cúu-xi-yu. <sup>16</sup> Te xiá<sup>n</sup> núu nchúhú ñá túú-gá ná sání iní-ndí cuendá tnàha ñáyiú-ndí núu nandíhi-yu àdi ñá túú nandíhi-yu dàtná ní xóo cani iní-ndí cùtnàhá ní xindecu-ndí ichi cuèhé ichi duha, te dàv-á<sup>n</sup> ní xóo cani iní-ndí cuendá Xitohó Jesucristú dàtná sání iní cue ñáyiú ndècu ichi cuèhé ichi duha vitna. <sup>17</sup> Te nchaa nchoo ñáyiú ní tnàhá tnúhu ndihi Xitohó Jesucristú ní nduu-o dàtná ì<sup>n</sup> ñáyiú saa, te duca<sup>n</sup> chi ñá túú-gá quidé-ó dàtná ní xóo cada-o cùtnàhá ní xindecu-o ichi cuèhé ichi duha, chi ní ngúita-o quide-o mee-ná sá váha te nchaa xiá<sup>n</sup> cúu-xi sá sáá sá cúu-xi-ó chi vátá quini-gá-ó càda-o.

<sup>18</sup> Te duca<sup>n</sup> quide-o ndecu-o chi mee Yá Ndióxi quidé-gá sá dúcá<sup>n</sup> càda-o cundecu-o. Te Xitohó Jesucristú ní quide-gá ní ngúndecu váha-o ndihi Yá Ndióxi vitna, te duca<sup>n</sup> chi mee Yá Ndióxi duca<sup>n</sup> tnàhí ní cachí-gá cunduu, te diu-ni mee Yá Ndióxi ní taxi-gá chiú<sup>n</sup> quide-ndí càhá<sup>n</sup>-ndí tnúhu-gá nàcuáa ngúndecu váha cue ñáyiú ndihi-gá. <sup>19</sup> Te duca<sup>n</sup> chi mee-gá ní cachí-gá sá Xitohó Jesucristú cada-gá nàcuáa nucúndecu váha nchaa nchoo cué ñáyiú ndècu ñuyíú-a ndihi Yá Ndióxi. Te nchaa ñáyiú ní tuha ñaha xii-gá ñá túú-gá sání iní-gá sá ñáyiú-á<sup>n</sup> nacháhu-yu cuéchi-yu núu-gá. Te mee Yá Ndióxi ní taxi-gá chiú<sup>n</sup> quide-ndí càhá<sup>n</sup>-ndí tnúhu-gá núu ñáyiú nàcuáa ngúndecu ndihi ñaha váha-yu xii-gá. <sup>20</sup> Te Xitohó Jesucristú ní cachí-gá sá nchúhú càhá<sup>n</sup>-ndí tnúhu-gá núu ncháa ñáyiú, te sá dúhá quide-ndí càhá<sup>n</sup>-ndí tnúhu-gá te quide-ndí Yá Ndióxi càhá<sup>n</sup>-ndí yuhu-gá, te xiá<sup>n</sup> núu càhá<sup>n</sup> ndàhú-ndí núu-ndó sá tnàhá tnúhu-ndo ndihi Yá Ndióxi cuendá cundecu váha-ndo ndihi-gá, te duha càhá<sup>n</sup>-ndí chi duca<sup>n</sup> càchi Xitohó Jesucristú cada-ndí. <sup>21</sup> Te Xitohó Jesucristú cúu-gá Yáá ñá túú tnàhí cuéchi-xi, dico Yá Ndióxi ní quide ñaha-gá xii-gá dàtná ì<sup>n</sup> ñáyiú ndècu cuéchi-xi, te duca<sup>n</sup> chi Xitohó Jesucristú ní xido-gá cuéchi nchaa nchoo ñáyiú ñuyíú-a, te duca<sup>n</sup> ní xido Xitohó

Jesucristú nchaa cuéchi-o cuendá sá núu na tnàhà tnúhu-o ndìhi-gá te cudüi-o núú Yá Ndiöxí, te duca<sup>n</sup> ní cuu chi mee Yá Ndiöxí duca<sup>n</sup> ní cachí-gá cunduu.

**6**

<sup>1</sup> Te nchoo ì<sup>n</sup>-ni cùu-o quide chiu<sup>n</sup>-o cuendá Yá Ndiöxí núu xiá<sup>n</sup> càhá<sup>n</sup> ndàhú-ndí núú-ndó sá vâ dicó-ni duca<sup>n</sup> cündedóho-ndo tnúhu Yá Ndiöxí, chi cada-ndo nâcuáa na chindee ñaha-ni-gá. <sup>2</sup> Chi mee-gâ cächí-gá ì<sup>n</sup> xichi núú tùtú-gá núú cächí-xi:

Sáá nduu te cundàhú iní ñáhà-í xii-ndo chindee ñaha-í cuendá naníhí tãhú-ndó,

te ní sáá nduu tàú-xi sá cündàhú iní ñáhà-í xii-ndo chindee ñaha-í cuendá naníhí tãhú-ndó, núu xiá<sup>n</sup> ní xindedóho-í tnúhu ní càhá<sup>n</sup>-ndó te ní chindee ñaha-í xii-ndo nâcuáa naníhí tãhú-ndó.

Duha cächí-gá núú tùtú-gá. Te vitna cùu-xi nduu cundahú iní ñáhà Yá Ndiöxí chindèe ñaha-gá, te cùu-xi nduu naníhí tãhú-ó.

<sup>3</sup> Te nchúhú ñá túú quide-ndí ì<sup>n</sup> sá ñà túú tàú-ndí cada-ndí sá cúú-xí ñâyüu, chi cuiní-ndí sá vâ càhá<sup>n</sup> cuèhé-yu cuendá chiu<sup>n</sup> quide-ndí. <sup>4</sup> Te nchaa sá quidé-ndí cúú-xí nâcuáa cutnüní iní cue ñâyüu sá nchúhú xínú cuèchi-ndí núú Yá Ndiöxí, te ío quide cahnu iní-ndí cuendá nchaa sá ndóhó-ndí, chi náandi quide ñaha ñâyüu xii-ndí, te duca<sup>n</sup>-ni ta quide cahnu iní-ndí cuèi náandi-gá nchaa sá tá yãha-ndí véxi.

<sup>5</sup> Te duha ta yãha-ndí véxi, núú cániha ñâyüu xii-ndí, núú chíhí ñáhà-yu vecea, núú cuáa ndeé ñáhà ñâyüu xii-ndí xicuehé ñáhà-yu, te ío ndòho-ndí quidé-ndí chiu<sup>n</sup> Yá Ndiöxí, te áma xidi-ndí te áma ñá túú xidi-ndí, te áma nihí-ndí sá xéxi-ndí te áma ñá túú nihí-ndí. <sup>6</sup> Te quide ndáá-ndí ndécú-ndí, te cutnuni váha iní-ndí nâcuáa càhá<sup>n</sup> tnúhu Yá Ndiöxí, te quide cahnu iní-ndí cuèi náandi quide ñaha ñâyüu xii-ndí, te cündahú iní-ndí tnàha ñâyüu-ndí, te quide-ndí nchaa sá váha nâcuáa chindee ñaha Espiritú Yá Ndiöxí xii-ndí, te ío ndisa iní-ndí cúú ìní-ndí cue tnàha ñâyüu-ndí. <sup>7</sup> Te dànehé-ndí ñâyüu mee-ni tnúhu ndáá, te nchaa chiu<sup>n</sup> quide-ndí te quide-ndí nâcuáa chindee ñaha Yá Ndiöxí xii-ndí, te cuendá sá quidé ndáá-ndí ndécú-ndí núu xiá<sup>n</sup> nihí ndéé-ndí dáquèe tihú-ndí nchaa sá cuèhé sá dúhá. <sup>8</sup> Te dava ñâyüu quide nínu ñáhà-yu xii-ndí, te davá-yu tnúhu cuèhé tnúhu duha càhá<sup>n</sup>-yu xãhá<sup>n</sup>-yu xii-ndí, te davá-yu xicáhá<sup>n</sup> váha-yu cuendá-ndí te davá-yu xicáhá<sup>n</sup> cuèhé-yu, te davá-yu cächí-yu sá dándàhú-ndí ñâyüu dico ñá ndáá chi càhá<sup>n</sup> ndáá-ndí. <sup>9</sup> Te davá-yu

cächí-yu sá ñà túú xini-yu ná ñâyüu cùu-ndí, te davá-yu cächí-yu sá xini-yu yoo cùu-ndí, te davá-yu cuiní-yu cahni ñáhà-yu xii-ndí dico vátá càhni ñaha-gá-yu chi ndécú-ni-ndí.

Te ío ndòho-ndí ndécú-ndí ichi Yá Ndiöxí, te cuèi ndòho-ndí dico ñá túú cùu-xi sá cúú-ndí. <sup>10</sup> Te cuèi ndihú iní-ndí dico ñá túú dàna ndeé-ndí sá cúú-ndí iní-ndí, te cùu-ndí cue téé ndàhú dico sànu ichi-ndí vai ñâyüu ichi Yá Ndiöxí cuendá ngündecu váha-yu sá cuendá-gá, te cuèi ñá túú ñá ndécú ndìhi-ndí dico ñá túú ñá cúmãni xii-ndí.

<sup>11</sup> Te nchòhó ñâyüu ndécú ndìhi-í ichi Xitohó Jesucristú ndécú ñùú Còrintú ío cùu iní ñáhà-ndí xii-ndo, te ní yùhu ní iní-ndí càhá<sup>n</sup>-ndí nchaa tnúhu càhá<sup>n</sup>-ndí sá cúú-xí-ndó. <sup>12</sup> Te nchúhú chi ní yùhu ní iní-ndí cúú iní ñáhà-ndí xii-ndo, dico nchòhó chi ñá túú dúca<sup>n</sup> quide-ndo sá cúú-xí-ndí. <sup>13</sup> Te yùhú càhá<sup>n</sup> ndàhú-í núú-ndó dàtná quidé ì<sup>n</sup> téé cùu tátá órè càhá<sup>n</sup> ndìhi-dé cue déhe-dé sá ní yuhu ní iní-ndó cùu iní ñáhà-ndó xii-ndí dàtná quidé mèe-ndí cúú iní ñáhà-ndí xii-ndo.

*Nchoo cùu-o datná ì<sup>n</sup> vehe Yá Ndiöxí*

<sup>14</sup> Te cue ñâyüu ñá túú sàndáá iní tnúhu Xitohó Jesucristú, te vâ cúú ì<sup>n</sup>-nuu-ndo ndìhi-yu cada-ndo dàtná xiquidé-yu, chi ñi<sup>n</sup> cuu nchaa sá váha te ñi<sup>n</sup> cuu nchaa sá cuèhé sá dúhá, te ñúmí nchìcanchii ndìhi niú chi ñá túú ì<sup>n</sup>-ni cuu-xi. Te duca<sup>n</sup> sãtnahá-xi cùu nchaa sá váha ndìhi nchaa sá cuèhé sá dúhá chi ñá túú ì<sup>n</sup>-ni cuu-xi. <sup>15</sup> Te ñi<sup>n</sup>-ni duca<sup>n</sup> ñá túú ì<sup>n</sup>-ni cuu Xitohó Jesucristú ndìhi sãculhá, te ñi<sup>n</sup>-ni duca<sup>n</sup> ñá túú ì<sup>n</sup>-ni cuu ñâyüu sàndáá iní ñáhà xii Xitohó Jesucristú ndìhi ñâyüu ñá túú sàndáá iní ñáhà xii-gá. <sup>16</sup> Te ñi<sup>n</sup>-ni duca<sup>n</sup> sãtnahá tucu-xi cùu vehe Yá Ndiöxí ndìhi nchaa sá cächí ñâyüu cùu ndiöxí ní cadúha cue téé ñuyúú-a, chi vâ cúú quihí ni ì<sup>n</sup> xiá<sup>n</sup> xití vehe-gá. Te nchoo cùu-o datná vehe Yá Ndiöxí Yáa ndécú tũu andiü, chi mee-gâ cächí-gá núú tùtú-gá núú cächí-xi:

Yùhú vâ cúmãni cundecu-í ndìhi-yu ndèni ní cuu na cündecú-yu,

te ñi<sup>n</sup>-ni yùhú cuu-í Ndiöxí-yu, te mèe-yu cuú-yu ñâyüu cùu cuendá-í.

Duha cächí-gá núú tùtú-gá. <sup>17</sup> Te xiá<sup>n</sup> núu cächí tucu-gá ingá xichi núú tùtú-gá núú cächí-xi:

Chí tá quèe tnuú nchaa ñâyüu ñá túú sàndáá iní ñáhà xii-í,

te vâ cáni ìní-ndó càda-ndo ni ì<sup>n</sup> sá cuèhé sá dúhá,

te duca<sup>n</sup> te quehe<sup>n</sup> cuendá ñáhà-í xii-ndo, <sup>18</sup> te yùhú cuu-í Tãtã-ndó,

te nchòhó cuu-ndo cuè déhe ducu<sup>n</sup>-í, ndihi  
 cue déhe yoco-í,  
 duha càhá<sup>n</sup> yúhú Yaá ío càhnu cuu.  
 Duha càchí-gá núú tútú-gá.

## 7

<sup>1</sup> Te sá dúcá<sup>n</sup> ío vâha càhá<sup>n</sup> Yâ Ndiôxí  
 sá cúú-xí-ó núu xiã<sup>n</sup> càhá<sup>n</sup>-í dóho nchòhó  
 ñâyíu ío cùu iní-í sá dùu<sup>n</sup> duu<sup>n</sup> daña-o nchaa  
 sá cuèhé sá dúhá, chí nchaa xiã<sup>n</sup> ñâ túú  
 cùu-xí sá vâha sá cúú-xí iní-ó ndihi yiqui  
 cuñú-ó, te cada-o nâcuáa tàù-xi cunduu  
 nâcuáa cundáá-ó núú Yâ Ndiôxí, te cada-o sá  
 nehé-ó sá yíñuhu núú-gá.

*Cue ñâyíu ñúú Còrintú quidé vâha-yu*

<sup>2</sup> Te ní yùhu ní iní-ndó chí cúú iní ñáhá  
 xii-ndí, chí nchúhú vá yõ ñ<sup>n</sup> quide úhú  
 iní-ndí, te ní vá yõ ñ<sup>n</sup> dàcuíta nihnu-ndí,  
 te ní vá yõ ñ<sup>n</sup> dândahú-ndí. <sup>3</sup> Te sá dúhá  
 càhá<sup>n</sup>-í te vá cání iní-ndó sá ñ<sup>n</sup> cuéchi dàcaa-í  
 díquí-ndó, chí dàtná sa ní cachí-í xii-ndo  
 sá yúhú ío cùu iní ñáhá-í xii-ndo, te cuèi  
 vitna ndècu-gá-ó ñùyíú-a àdi cuèi na cùú-ó  
 dico ñi-ni duca<sup>n</sup> cùu iní ñáhá-í xii-ndo.  
<sup>4</sup> Te yúhú ío vâha sâni iní-í cuendá-ndó, te  
 duca<sup>n</sup> ío vâha càhá<sup>n</sup>-í cuendá-ndó, te ío ndècu  
 ndihi-í tnúhu ndee iní cuendá-ndó, te ío cudíí  
 iní-í sá cuendá-ndó cuèi nândi ndòho-í ndihi  
 dava-gá-güedé ndécú-ndí.

<sup>5</sup> Te nchúhú cútñahá ní sáhá<sup>n</sup>-ndí distritú  
 Macèdonia, te ñâ túú tnàhí ní ndètatú-ndí  
 cuendá nchaa sá ní yâhandi chí ío ní  
 ndòho-ndí cuendá nchaa sá ní quidé-yu, chí  
 ío ní cuandé ñáhá-yu xii-ndí, te ío ní sani  
 iní-ndí núu nása-gá yâha-ndí ní cùu. <sup>6</sup> Dico Yâ  
 Ndiôxí ní taxi-gá tnúhu ndee iní xii-ndí òré  
 ní quexìo té Titú núú ndécú-ndí, te ñi-ni  
 Yaá-á<sup>n</sup> cúú-gá Yaá sãñaha-gã tnúhu ndee  
 iní xii cue ñâyíu ndihú iní-xi. <sup>7</sup> Te duca<sup>n</sup> ní  
 taxi Yâ Ndiôxí tnúhu ndee iní xii-ndí cuendá  
 sá ní quexio té Titú núú ndécú-ndí, te ñâ  
 díú-ní sá cuendá ní quexio-dé chí ní níhí  
 tucu-ndí tnúhu ndee iní cuendá ní caní-dé  
 cuendú núú-ndí sá nchòhó ní sãñaha-ndo  
 tnúhu ndee iní xii-dé, te ní cachí tnúhu-dé  
 xii-ndí sá nchòhó ío cuiní-ndó càhá<sup>n</sup> ndihi  
 ñaha-ndo xii-ndí, te ní cachí tnúhu tucu-dé  
 xii-ndí sá nchòhó ío ndihú iní-ndó cuendá  
 nâcuáa cùu ndecu-ndo ní cuu, ndihi cuendá  
 sá ío sâni iní-ndó cuendá-í, te sá dúcá<sup>n</sup> ndúu  
 cuendú ní caní-dé núú-ndí núu xiã<sup>n</sup> ío ní  
 cudíí iní-í.

<sup>8</sup> Te nchòhó ní ndihú iní-ndó cuendá tnúhu  
 càhá<sup>n</sup>-í núú tútú sá ní dáquixí-í ndaha-ndo,  
 te òré ní níhí-í tnúhu sá ndihú iní-ndó te  
 tnaa-ní ní ndixi cuéchi iní-í sá dúcá<sup>n</sup> ní  
 quide-í te dàtnúni ñâ túú-gá ní ndixi cuéchi  
 iní-í. <sup>9</sup> Te vitna ní ndihú iní-ndó, te xiã<sup>n</sup> ní  
 quide-xi ní ndixi cuéchi iní-ndó sá ñâ túú

quide vâha-ndo ndècu-ndo ní cuu, te ní cudíí  
 iní-í dico ñâ díú cuendá sá ní ndihú iní-ndó  
 ní cudíí iní-í chí cuendá sá ní ndixi cuéchi  
 iní-ndó, te ní ndihú iní-ndó nâcuáa ní cuu  
 vâha iní Yâ Ndiôxí, te xiã<sup>n</sup> núu ní cuu-xi ñ<sup>n</sup> sá  
 vâha sá cúú-xí-ndó cuendá tnúhu ní càhá<sup>n</sup>-í  
 te ñâ túú ní cùu-xi ñ<sup>n</sup> sá cuèhé sá cúú-xí-ndó.

<sup>10</sup> Te nchoo núu na ndihú iní-ó nâcuáa cuu  
 vâha iní Yâ Ndiôxí, te ndixi cuéchi iní-ó te  
 núu ñâ túú quide vâha-o ndècu-o, te sá dúcá<sup>n</sup>  
 quide-o te nânihí tàhú-ó, te vá ndihú iní-ó  
 sá dúcá<sup>n</sup> ní quide-o, te dava ñâyíu xíndecu  
 ichi cuèhé ichi duha ndihú iní-yu dico ñâ  
 túú ndixi cuéchi iní-yu cuendá nchaa sá ñâ  
 túú vâha quidé-yu, te sá dúcá<sup>n</sup> quidé-yu te  
 cuíta nihnú-yu. <sup>11</sup> Te sá dúcá<sup>n</sup> ní ndihú  
 iní-ndó nâcuáa ní cuu vâha iní Yâ Ndiôxí, te  
 xiã<sup>n</sup> núu ndècu ndee-ndo quide-ndo nchaa  
 nâcuáa tàù-xi cunduu, te vitna ní yùhu ní  
 iní-ndó càhá<sup>n</sup>-ndó sá quidé vâha-ndo, te ío  
 cudéé<sup>n</sup>-ndó núú mée-ndó sá ñâ túú quide  
 vâha-ndo ndècu-ndo ní cuu, te yùhú-ndó  
 ndècu-ndo cuendá sá ñâ túú quide vâha-ndo  
 ní cùu, te ío ní xúhu<sup>n</sup> iní ñáhá-ndó xii-í, te ní  
 ndúcú ndéé-ndó ní quide ndáá-ndó cuendá  
 téé ndècuéchi ndècu ndihi-ndo, te sá dúcá<sup>n</sup>  
 ní quide-ndo te xiã<sup>n</sup> ní cutnúni sá mée-ndó  
 ñâ túú cuéchi-ndo. <sup>12</sup> Te ní cadúha-í tutú ní  
 dáquixí-í ndaha-ndo, te ní quide-ndo nâcuáa  
 ní càhá<sup>n</sup>-í, te sá dúcá<sup>n</sup> ní quide-ndo xiã<sup>n</sup>  
 ní cutnúni iní-ndó sá ío cùu iní ñáhá-ndó  
 xii-í. Te Yâ Ndiôxí náhá-gã sá díú cuendá  
 xiã<sup>n</sup> ní dáquixí-í tutú ndaha-ndo, te ñâ díú-ní  
 cuendá sá sâni iní-í cuendá téé ndècuéchi  
 ndècu ndihi-ndo, te ní ñâ díú-ní cuendá  
 ñâyíu ní dândihú téé ndècuéchi-á<sup>n</sup> iní-xi ní  
 càdúha-í tutú ní dáquixí-í ndaha-ndo. <sup>13</sup> Te  
 cuendá sá quidé vâha-ndo ndècu-ndo xiã<sup>n</sup>  
 cúú-xí tnúhu ndee iní ndécú ndihi-ndí.

Dico ñâ díú-ní xiã<sup>n</sup> chí tnàhá ío cudíí  
 iní-ndí cuendá sá ío cudíí iní té Titú, te  
 duca<sup>n</sup> cudíí iní-dé chí nchòhó ní sãñaha-ndo  
 tnúhu ndee iní xii-dé. <sup>14</sup> Te yúhú ñâ túú  
 cùcaha<sup>n</sup> núu-í sá ní càhá<sup>n</sup> vâha-í cuendá-ndó  
 núú té Titú cútñahá vátá quixí-gá-dé núú  
 ndécú-ndó, chí ní cutnúni iní-dé sá ndáá  
 càhá<sup>n</sup> vâha-í nâcuáa quide-ndo datná cúú-xí  
 sá ndáá nchaa tnúhu dàcuaha ñaha-í xii-ndo.  
<sup>15</sup> Te vitna ío-gá vâha cùu iní té Titú  
 cuendá-ndó, chí ndàcu iní-dé sá ncháá-ndó  
 ío vâha ní tñi-ndo ncháa tnúhu ní càhá<sup>n</sup>-dé  
 núú-ndó, te ndàcu tucu iní-dé sá ní quehe<sup>n</sup>  
 cuendá vâha-ndo-dé, te ní dátúu-ndo núú-dé  
 sá ío ní quiyùhú iní-ndó sá vá ndácú-ndó  
 càda-ndo nchaa nâcuáa tàù-xi cunduu. <sup>16</sup> Te  
 ío cudíí iní-í cuendá-ndó chí cutnúni ndáá  
 iní-í sá ñâ túú dàña ndéé-ndó quide-ndo  
 nchaa nâcuáa tàù-xi cunduu.

## 8

*Ío vâha cuu iní-ó chindee tnaha-o*

<sup>1</sup> Te nchòhò ñáiyu ndècu ndihi-ndí ichi Xítohó Jesucristú cächí tnúhu-ndí xii-ndo nàcuáa quide ñaha Yá Ndiòxí xii cue ñáiyu xíndecu ichi-gá ndécú dístiritú Macèdoniá, chí ío chindee ñaha-gá xii-yu cuendá sá quidé vâha-yu ndécú-yu. <sup>2</sup> Te cuèi ndòho vihi-yu ndécú-yu dico ío-ní cudíi íni-yu, te cuendá xiã<sup>n</sup> núu ni yùhu ni íni-yu ní sacá<sup>n</sup> tnáhâ-yu díhú<sup>n</sup> sá cúú-xí tnàha ñáiyú-yu, te ñá túú tnàhí ni xínduu díi-yu cuèi ío ndàhú-yu. <sup>3</sup> Te ñá díú-ní nàcuáa ní sani íni-yu ndacú-yu cacá<sup>n</sup> tnáhâ-yu, chí ní quide yica íni-yu ní sacá<sup>n</sup> tnáhâ-gâ-yu, te yúhú cächí tnúhu ndáá-í xii-ndo sá ni yuhu ni íni-yu duca<sup>n</sup> ní quidé-yu. <sup>4</sup> Te ío ní cáhá<sup>n</sup> ndàhú-yu núú-ndí cuendá sá cuàha-ndí tnúhu sá tnáhâ-yu chindèe-yu dava-gá cue ñáiyu cùu cuendá Yá Ndiòxí. <sup>5</sup> Te ñá díú-ní nàcuáa ní sani íni-ndí ní quidé-yu, chí ní xidó-gâ-yu ní quide vâha-yu, te duca<sup>n</sup> chí mèe-yu ní sani íni-yu sá cãdâ-yu nchaa nàcuáa cuini Yá Ndiòxí, te dàtnúni duca<sup>n</sup> te ní cachí-yu sá cúú cãdâ-yu nchaa nàcuáa na cñaha-ndí xii-yu. Te duca<sup>n</sup> ní quidé-yu chí duca<sup>n</sup> ní cuini mèe Yá Ndiòxí cunduu. <sup>6</sup> Te sá dúcá<sup>n</sup> ní quide ñáiyu-án<sup>n</sup> núu xiã<sup>n</sup> cãhá<sup>n</sup> ndàhú-ndí núú tẽ Titú sá quixí tucu-dé núú ndécú-ndó cuendá dàxínu cava-dé chiú<sup>n</sup> sá sá ní nguíta-dé quidé-dé dátacá-dé díhú<sup>n</sup> sá sá ní nguíta-ndo sãcá<sup>n</sup> tnáhâ-ndó, te duca<sup>n</sup> quide-ndo chí cundahú íni-ndó tnàha ñáiyu-ndo. <sup>7</sup> Te nchòhó cúú-ndó ñáiyu ío ngòdónúú quide nchaa sá vâha, te ío vâha sãndáá íni-ndó Xítohó Jesucristú, te ío vâha cutnuni íni-ndó nàcuáa cãhá<sup>n</sup> tnúhu-gá, te ío vâha dàcuaha-ndo ñáiyu tnúhu-gá, te ío ndúcu ndee-ndo quide-ndo mee-ní sá vâha, te duca<sup>n</sup> ío cùu íni ñáhâ-ndó xii-ndí, te sá dúcá<sup>n</sup> quide-ndo núu xiã<sup>n</sup> cãhá<sup>n</sup> ndàhú-í núú-ndó sá ngòdó núú-gã-ndó càda-ndo sá cúú-xí tnàha ñáiyu-ndo.

<sup>8</sup> Dico yúhú ñá túú tàuchiú-í sá dúcá<sup>n</sup> càda-ndo, chí cuendá-ní sá cächí tnúhu-í xii-ndo nàcuáa quide dava-gá cue ñáiyu ndècu ichi Xítohó Jesucristú, chí cue ñáiyu-án<sup>n</sup> ni yùhu ni íni-yu quidé-yu sá vâha sá cúú-xí tnàha ñáiyú-yu, te cächí tnúhu-í xii-ndo nàcuáa quidé-yu cuendá cutnuni núu nása cada-ndo núu ndisa sá cúú íni-ndó cuè tnaha ñáiyu-ndo. <sup>9</sup> Te nchòhó sa xini-ndó sá Xítohó Jesucristú ío cundahú íni ñáhâ-gã xii-o, te ío vâha ndècu-gá ní cùu te ní quixi-gá ñuyú-a ní quide vâha ñaha-gã xii-o, te ñuyú-a ñá túú ní xíndecu vâha-gã, te duca<sup>n</sup> ní quixi-gã ñuyú-a cuèi ñá túú ní xíndecu vâha-gã cuendá sá nchóó ngündecu vâha-o núú ndécú-gã.

<sup>10</sup> Te na cächí tnúhu-í xii-ndo nàcuáa sãni íni-í. Chiú<sup>n</sup> sá ni yuhu ni íni-ndó ní nguíta-ndo quide-ndo cuiá ní yâha chí

cùu-xi sá vâha sá cúú-xí-ndó núu na dàxínu cava-ndo. <sup>11</sup> Te dàtná-ni ni yùhu ni íni-ndó ní tausaha-ndo chiú<sup>n</sup>-án<sup>n</sup> te duca<sup>n</sup>-ni ni yuhu ni íni-ndó dàxínu cava-ndo, te cacá<sup>n</sup> tnáhâ-ndó sá ndécú ndihi-ndo nàcuáa xito mee-ndo ndacu-ndo. <sup>12</sup> Te núu nchòhó ni yùhu ni íni-ndó cacá<sup>n</sup> tnáhâ-ndó sá xitó mèe-ndo ndacu-ndo ña, te cùu vâha íni Yá Ndiòxí, chí mee-gã sa ñaha-gã nása ndècu-o te ndúu vétú-ni íni-gã.

<sup>13</sup> Te sá dúhá ndúu tnúhu cãhá<sup>n</sup>-í te vá cãní íni-ndó sá yúhú cuini-í sá nchòhó ndoho-ndo cündecu-ndo te dava-gá-yu ngündecu vâha-yu sá cuendá-ndó. <sup>14</sup> Te vitna ndècu ndee íni-ndó nàcuáa ndacu-ndo chindee-ndo cue ñáiyu xini ñuhu, te nduu ñá túú ndècu ndee íni-ndó te cue ñáiyu-án<sup>n</sup> chindee ñáhâ-yu xii-ndo te núu ndècu ndee íni-yu, te duca<sup>n</sup> te ní nchòhó ñá túú ná cumáni xii-ndo te ní cuè ñáiyu-án<sup>n</sup> ñá túú ná cumáni xii-yu. <sup>15</sup> Te duca<sup>n</sup> te quee ndáá-xi nàcuáa cãhá<sup>n</sup>-xi núú tütú Yá Ndiòxí núú cächí-xi: “Cue ñáiyu ío vai sá ni ñihí ñá túú ní cùu sobrã xii-yu, te cue ñáiyu sacú ní ñihí ñá túú ní cumáni xii-yu”, duha cächí-xi núú tütú-gã.

#### *Tẽ Titú ndihi cue tée cundahi-dé*

<sup>16</sup> Te ndacá<sup>n</sup> tãhú-í núú Yá Ndiòxí chí mee-gã ní quide sá tẽ Titú ío ñuhu íni ñáhâ-dé xii-ndo dàtná ñúhú íni ñáhâ-í xii-ndo. <sup>17</sup> Te yúhú ní xáha<sup>n</sup>-í xii-dé sá quixí coto ñaha-dé xii-ndo te ní sãha-dé tnúhu, te ñá díú mèe-ni sá dúcá<sup>n</sup> ní xáha<sup>n</sup>-í xii-dé quixi coto ñaha-dé xii-ndo, chí mee-dé cudíi tnàhí íni-dé quixi coto ñaha-dé xii-ndo.

<sup>18</sup> Te tendaha-ndí ñ<sup>n</sup> tée ndècu ndihi-o ichi Xítohó Jesucristú quixi-dé ndihi tẽ Titú, te tée quixi ndihi tẽ Titú-án<sup>n</sup> cúú-dé ñ<sup>n</sup> tée ío vâha cãhá<sup>n</sup> cue ñáiyu xíndecu ichi Xítohó Jesucristú cuendá-dé cuendá sá ío vâha quide-dé chiú<sup>n</sup> Xítohó Jesucristú cãhá<sup>n</sup>-dé tnúhu-gã tnúhu sá cãhá<sup>n</sup> nàcuáa naníhí tãhú-ó. <sup>19</sup> Te cue ñáiyu xíndecu ichi Xítohó Jesucristú ñá díú-ní sá cãhá<sup>n</sup> vâha-yu cuendá-dé, chí tnáhâ ní cãxi ñáhâ-yu xii-dé cuendá sá cãcã cùu ndihi ñaha-dé xii-ndí chindee ñaha-dé tacá sá cúú-xí ñáiyu ndàhú, te quide-ndí chiú<sup>n</sup>-a cuendá ío cuu cãhnu Yá Ndiòxí, te cue ñáiyu cutnuni íni-yu sá nchòhó ni yùhu ni íni-ndó quide-ndo nchaa sá vâha sá cúú-xí cuè tnaha ñáiyu-ndo. <sup>20</sup> Te cuini-ndí sá vã cãhá<sup>n</sup> cuèhè ñáiyu cuendá nàcuáa quide-ndí ndihi sá ngãutnàha sá cúú-xí cuè tnaha ñáiyu-o, te ío vai cuu-xi. <sup>21</sup> Chi ndúcu ndee-ndí quidé-ndí nàcuáa cãhá<sup>n</sup> vâha Xítohó Jesucristú cuendá-ndí, te quide tucu-ndí nàcuáa cãhá<sup>n</sup> vâha ñáiyu sá quidé vâha-ndí.

<sup>22</sup> Te tendaha tucu-ndí ingá tucu tée ndècu ndihi-o ichi Xítohó Jesucristú quixi-dé ndihi cue tée úú quixi coto ñaha xii-ndo, te

tée quixi ndihí-güedé-án nĩ cuu vai xito quide-dé nàcuáa cutnuni iní-ndí sá ïo ndücu ndee-dé quidé-dé sá váha, te vitna ïo-gá cuini-dé cada-dé sá váha vitna quixi-dé núú ndécú-ndó, chí cutnuni ndáá iní-dé sá cúú-ndó cué ñáyiú quide váha. <sup>23</sup> Te cächí tnúhu-í xii-ndo sã tè Titú cúú-dé ïi<sup>n</sup> tée cündihí-í quidé-ndí chiu<sup>n</sup> Xítóhó Jesucristú, te tnáhá-dé cúú-dé ïi<sup>n</sup> tée xinu cuechi núú-ndó cãhá<sup>n</sup>-dé tnúhu-gá. Te cächí tnúhu tucu-í xii-ndo cuendá cue tée úú quixi ndihí-dé, chí cue tée-á<sup>n</sup> cúú-güedé cue tée tendaha cué ñáyiú xĩndecu ichi Xítóhó Jesucristú quixi coto ñaha xii-ndo. Te cue tée-á<sup>n</sup> quidé-güedé nàcuáa cächí ñáyiú sá ïo cãhnu cuu Xítóhó Jesucristú. <sup>24</sup> Te chí cáda sá cúú iní ndisa-ndo-güedé cuendá duca<sup>n</sup> na cutnuni iní nchaa dava-gá ñáyiú xĩndecu ichi Xítóhó Jesucristú sã ndáa ndisa duca<sup>n</sup> quide-ndo, te duca<sup>n</sup> cutnuni iní-yu sã ndáa ndisa quide váha-ndo dátã cãhá<sup>n</sup>-ndí cuendá-ndó sã quidé váha-ndo.

## 9

*Cuendá sã ngãutnaha sã cúú-xí cué ñáyiú xĩndecu ichi Xítóhó Jesucristú*

<sup>1</sup> Te cuendá sã ngãutnaha sã cúú-xí cué ñáyiú ndëcu ichi Xítóhó Jesucristú ñã túú-gã xini ñúhu-xi cächí tnúhu-í xii-ndo núú tütú-a nàcuáa cada-ndo, <sup>2</sup> chí sã cutnuni iní-í sá ïo cuini-ndó chindee-ndó-yu. Te duca<sup>n</sup>-ni ïo váha cãhá<sup>n</sup>-í cuendá-ndó núú ñáyiú xĩndecu ichi Xítóhó Jesucristú ndécú distritú Macèdoniá, te xãha<sup>n</sup>-í xii-yu sã nchòhó ñáyiú xĩndecu ichi Xítóhó Jesucristú ndécú distritú Acáyá sa ní cuu ïi<sup>n</sup> cuá duca<sup>n</sup> cuini-ndó cãcá<sup>n</sup> tnáhá-ndó sã cúú-xí cué ñáyiú ndáhú ndécú ichi-gá. Te vai cue ñáyiú distritú Macèdoniá cuini-yu cãcá<sup>n</sup> tnáhá-yu sã cúú-xí cué ñáyiú ndáhú ndécú ichi Xítóhó Jesucristú cuendá sã ní níhi-yu tnúhu sã nchòhó ïo cuini-ndó dùca<sup>n</sup> cada-ndo. <sup>3</sup> Te cuendá sã sání iní-ndó càda-ndo xiã<sup>n</sup> tendaha-í cue tée ndëcu ndihí-o ichi Xítóhó Jesucristú quixi-güedé núú ndécú-ndó cuendá dátúha ñaha-güedé xii-ndo, cuendá sã vã queé ndèhnde-í núú ñáyiú sã ní cãhá<sup>n</sup> váha-í cuendá-ndó, te duca<sup>n</sup> cündecu túha ndisa-ndo dátã sa ní cãhá<sup>n</sup>-í núú-yu. <sup>4</sup> Chí na cuáhã<sup>n</sup> ndéé quixi-í ndihí ïi<sup>n</sup> úú cue ñáyiú distritú Macèdoniá núú ndécú-ndó te quini-yu sã ñã túú ndëcu túha-ndo, te cucaha<sup>n</sup> núú-í núú-yu sã ní cãhá<sup>n</sup> váha-í cuendá-ndó te núú ñã túú ndëcu túha-ndo, te tnáhá-ndó cùcaha<sup>n</sup> núú-ndó. <sup>5</sup> Te xiã<sup>n</sup> núú nisani iní-í sã váha-gá codonú cue tée ndëcu ndihí-o ichi Xítóhó Jesucristú quixi coto ñaha-güedé xii-ndo cuendá chindee ñaha-güedé tacá sã ní sani iní-ndó cãcá<sup>n</sup> tnáhá-ndó cuendá sã cündëcu túha-xi, te cuu-xi dátã ïi<sup>n</sup> táhú sã ní quene cuu iní méé-ndó cãcá<sup>n</sup> tnáhá-ndó sã cúú-xí

cué tnaha ñáyiú-ndo. Te duca<sup>n</sup> te vá yoo cani iní-xi quesáhã-yu sã nchúhú ní quide yica-ndí duca<sup>n</sup> ní sacá<sup>n</sup> tnáhá-ndó.

<sup>6</sup> Te nchòhó sa xini-ndó sã ñáyiú na chihí vai tatá te vai niñi-yu cùu, te cue ñáyiú na chihí sacú tatá te sacú niñi-yu cùu. Duca<sup>n</sup> sãtnahã-xi cùu ñáyiú sacá<sup>n</sup> tnáhã sã cúú-xí tnaha ñáyiú-yu. <sup>7</sup> Te ïi<sup>n</sup> ïi<sup>n</sup>-ndo cãcá<sup>n</sup> tnáhã-ndó nàcuáa quene cuu iní méé-ndó, te ïo váha cuu iní-ndó dùca<sup>n</sup> cada-ndo te vã cáda-ndó cuendá-ni sã quidé yica ñaha ñáyiú xii-ndo, chí Yá Ndióxi cúú váha iní-gá núú nchãa ñáyiú cüdí iní sacá<sup>n</sup> tnáhã sã cúú-xí cué tnaha ñáyiú-xi. <sup>8</sup> Te Yá Ndióxi ndacu-gá chindee ñaha-gá xii-ndo nàcuáa cundecu váha-ndo, chí ñiu-gá cada te níhi-ndó nchãa núú sã xini ñúhu-ndo cundecu ndihí-ndo, te ñã túú tnáhí-gá ná cumáni xii-ndo, te mee-gá chindee ñaha-gá xii-ndo níhi-ndó ïo vai cundecu ndihí-ndo cuendá duca<sup>n</sup> chindee-ndo cue tnaha ñáyiú-ndo. <sup>9</sup> Te núú tütú Yá Ndióxi cächí-xi ïi<sup>n</sup> xichi:

Ïi<sup>n</sup> ñáyiú ïo vai sã ní sãñahã-yu xii ñáyiú ndáhú,

te sã ní quide ñáyiú-á<sup>n</sup> ní cuu-xi sã váha sã vã yoo cùnaa.

Duha cächí-xi núú tütú-gá. <sup>10</sup> Te mee Yá Ndióxi taxi-gã nchaa sã cúú tátã nchaa nchòhó ñáyiú xitu nándi sã xitú cuendá cuu sã cúú nchito-ndo, te ñiu-gá cada te ïo vai sã níhi-ndó cündecu ndihí-ndo, te duca<sup>n</sup> ïo-gá vai sã váha cada-ndo sã cúú-xí cué tnaha ñáyiú-ndo. <sup>11</sup> Te Yá Ndióxi taxi-gã vai núú sã cündecu ndihí-ndo cuendá duca<sup>n</sup> ní yuhu ní iní-ndó vai cuãñaha-ndo sã cúú-xí tnaha ñáyiú-ndo. Te cuendá nchaa sã sacá<sup>n</sup> tnáhã-ndó quèhe<sup>n</sup> cuendá-ndí cuu xii tnaha ñáyiú-ndo, te cue ñáyiú-á<sup>n</sup> ïo ndacá<sup>n</sup> táhú-yu núú Yá Ndióxi cuendá sã dúcã<sup>n</sup> sacá<sup>n</sup> tnáhã-ndó sã cúú-xí-yu. <sup>12</sup> Te sã dúcã<sup>n</sup> quide-ndo sacá<sup>n</sup> tnáhã-ndó sã cúú-xí cué ñáyiú cùu cuendá Yá Ndióxi, te ñáyiú-á<sup>n</sup> ñã túú-gã ná cumáni xii-yu, te ïo ndacá<sup>n</sup> táhú-yu núú Yá Ndióxi sã dúcã<sup>n</sup> quide-ndo. <sup>13</sup> Te ñáyiú-á<sup>n</sup> cutnuni iní-yu sã nchòhó quidé-ndó sã sãndãa ndisa iní-ndó tnúhu Xítóhó Jesucristú, te cuendá xiã<sup>n</sup> te ñáyiú-á<sup>n</sup> chihúhú-yu Yá Ndióxi, te cuendá sã dúcã<sup>n</sup> ní yuhu ní iní-ndó sacá<sup>n</sup> tnáhã-ndó sã cúú-xí-yu ndihí sã cúú-xi nchãa dava-gá ñáyiú, te cächí-yu sã ïo cãhnu cuu Yá Ndióxi. <sup>14</sup> Te ñáyiú-á<sup>n</sup> cãhá<sup>n</sup> ndihí-yu Yá Ndióxi cuendá-ndó, te ïo cuu váha iní ñahã-yu xii-ndo cuendá sã Yá Ndióxi chindee ñaha-gá xii-ndo quide-ndo sã váha sã cúú-xí-yu ndihí dava-gá ñáyiú. <sup>15</sup> Te ïo ndacá<sup>n</sup> táhú-ó núú Yá Ndióxi cuendá sã ní taxi-gã sã ïo váha ndëcu ndihí-o, te ní ñã cutnuni iní-ó nãsa cundecu tnúhu cãhá<sup>n</sup>-ó cuendá sã váha ní taxi-gã.

## 10

*Té Páblú ndécú ndíhi-dé tnúhu ndee iní sá cáhá-dé tnúhu Xítóhó Jesucristú*

<sup>1</sup> Te Xítóhó Jesucristú ío cànnu iní-gá, te cùndahú iní ñáhá-gá xii-o chindee ñaha-gá, núu xiá<sup>n</sup> yúhú té Páblú duca<sup>n</sup> quide-í cáhá<sup>n</sup> ndáhú-í núú-ndó ñàcuáa cada-ndo. Te dava-ndo cächí-ndó sá yúhú ío ndáhú iní-í òré ndécú ndíhi ñaha-í xii-ndo, te òré ñá túú ndécú ndíhi ñaha-í xii-ndo te ío ñíi cáà-í. <sup>2</sup> Te cáhá<sup>n</sup> ndáhú-í núú-ndó sá cádá-ndó ñàcuáa vá cáhá<sup>n</sup> ñíi-í núú-ndó òré quixi-í quixi coto ñaha-í xii-ndo. Te cuini-í sá ndíhi tnúhu ñíi iní-xi cáhá<sup>n</sup> ndíhi-í cue ñáyíu cächí sá ì<sup>n</sup>-ni cuu-í ndíhi cue ñáyíu ñá túú sàndáá iní tnúhu Xítóhó Jesucristú. <sup>3</sup> Te nchúhú cùu-ndí cue téé ñuyú-á, dico ndücu ndee-ndí quidé-ndí ñàcuáa ndàcu-ndí dáquèe tíhú-ndí nchaa sá cuèhé sá dúhá, dico ñá díú mèe-ndí duca<sup>n</sup> ndàcu-ndí quidé-ndí, <sup>4</sup> te ní ì<sup>n</sup> sá ló ñuyú-á ñá túú chindee ñaha-xi, chi mee Yá Ndióxi chindee ñaha-gá xii-ndí dáquèe tíhú duu<sup>n</sup>-ndí nchaa núú sá cuèhé sá dúhá. <sup>5</sup> Te xiá<sup>n</sup> núu ñíhi-ndí tnúhu cáhá<sup>n</sup>-ndí sàdí-ndí yuhu cue ñáyíu cáhá<sup>n</sup> tnúhu sá ñá túú cùu váha iní Yá Ndióxi, ñáyíu xiquide ñínu mee-xi cächí sá ñá túú nàndíhi tnúhu-gá. Te quide-ndí sá ñáyíu-án quindáá iní-yu tnúhu Xítóhó Jesucristú. <sup>6</sup> Te nchúhú sa ndécú túha-ndí sá dáquèetíhú-ndí cue ñáyíu ñá túú cuini cada ñàcuáa cuini Xítóhó Jesucristú, dico díhna-gá xini ñúhu-xi sá ncháá nchòhó ñáyíu cuini cada ñàcuáa cuini-gá cundáá-ndó.

<sup>7</sup> Te nchòhó ñàcuáa ndüu sá ndéhé-ndó te duca<sup>n</sup> sàni iní-ndó, dico vá dúcá<sup>n</sup> càni iní-ndó cuendá-ndí. Chi núu cùtnuní ndáá iní-ndó sá cùú-ndó cuendá Xítóhó Jesucristú, te ñíu-ni duca<sup>n</sup> tàù-ndó càni iní-ndó cuendá-ndí tucu. <sup>8</sup> Te Xítóhó Jesucristú ní taxi-gá tnúhu ndee iní ndécú ndíhi-ndí sá dánèhé ñáhá-ndí xii-ndo ñàcuáa cuita cuehnu nihnu-ndo ìchi-gá quíh<sup>n</sup>, te ñá díú sá dánèhé ñáhá-ndí xii-ndo ñàcuáa cuíta ni-hnu-ndo, te cuèi na chido-gá-í cáhá<sup>n</sup>-í cada ñínu-í mèe-í cuendá tnúhu ndee iní ní taxi Xítóhó Jesucristú ndécú ndíhi-ndí, dico vá cúcàhà<sup>n</sup> núú-í chi cáhá<sup>n</sup> ndáá-í. <sup>9</sup> Te ñá túú cuini-í sá nchòhó caní iní-ndó sá yúhú dáyúhú ñáhà-í xii-ndo ñàcuáa ndüu tnúhu cáhá<sup>n</sup>-í núú tütú-í. <sup>10</sup> Te dava-ndo cächí-ndó sá ténàá ñáhà-í xii-ndo núú tütú-í, te mee-ni tnúhu càhnu sá ío cùnnu cuu-xí, te cächí tucu-ndo sá òré ndécú ndíhi ñaha-í xii-ndo te ñá túú cáa-í sá cùu-í ì<sup>n</sup> téé cùu váha cùu dico iní-ndó, te cächí tucu-ndo sá ñá túú tnàhá iní-ndó ñàcuáa quide-í òré dácuàhà ñaha-í xii-ndo. <sup>11</sup> Te nchòhó ñáyíu duca<sup>n</sup> cáhá<sup>n</sup> cada cuendá váha-ndo sá dátá-ni cáhá<sup>n</sup>-ndí núú

tütú-ndí ñíu-ni duca<sup>n</sup> quide-ndí òré ndécú ndíhi ñaha-ndí xii-ndo.

<sup>12</sup> Te nchúhú, vá cùu tnàhi cáhá<sup>n</sup>-ndí sá ì<sup>n</sup>-ni cuu-ndí ndíhi cue ñáyíu cáhá<sup>n</sup> váha cuendá mèe-xí, chi ñáyíu-án sàni iní-yu ná cùú sá váha te quide-yu te xiá<sup>n</sup> cächí-yu sá ío váha quide-yu, te cächí-yu sá quide váha-gá-yu dàcúúxi tnàha ñáyíu-yu, te sá dúcá<sup>n</sup> cáhá<sup>n</sup>-yu te quide-yu dátá quide cue ñáyíu ñá túú tnàhi cùtnuní iní-xi. <sup>13</sup> Te dico nchúhú ñá túú xidó-ndí cáhá<sup>n</sup> váha-ndí cuendá-ndí, chi cáhá<sup>n</sup> váha-ndí cuendá-ndí dico ñàcuáa ndüu chi<sup>n</sup> ní taxi Yá Ndióxi cáhá<sup>n</sup>-ndí, chi mee-gá ní cachí-gá ndéé není sáá-ndí cáhá<sup>n</sup>-ndí tnúhu-gá, te ní sáá-ndí ndéé ñúu-ndó cáhá<sup>n</sup>-ndí tnúhu-gá. <sup>14</sup> Te vitna ndécú ndíhi-ndí tnúhu ndee iní sá tnàhá nchòhó cuu cáhá<sup>n</sup> ndíhi ñaha-ndí xii-ndo, chi díhna-gá nchúhú ní quixi-ndí ní cáhá<sup>n</sup>-ndí tnúhu Xítóhó Jesucristú ñúu-ndó, tnúhu sá cáhá<sup>n</sup> ñàcuáa naníhi tãhú-ó. <sup>15</sup> Te nchúhú ñá túú quide cahnu-ndí mèe-ndí cuendá chi<sup>n</sup> quide dava-gá-güedé quesaha-ndí sá chiú<sup>n</sup> mèe-ndí cùú-xí. Te cuini-ndí sá nchòhó cuita quindáá-gá iní-ndó Xítóhó Jesucristú, te duca<sup>n</sup> te níhi-gá-ndí ñàcuáa cada-ndí chiú<sup>n</sup>-gá nchaa dava-gá xichi núú ní cachí-gá cada-ndí chiú<sup>n</sup>-gá. <sup>16</sup> Chi cáhá<sup>n</sup>-ndí tnúhu-gá tnúhu sá cáhá<sup>n</sup> ñàcuáa naníhi tãhú-ó, te yáha-gá-ndí ñúu-ndó quíh<sup>n</sup>-ndí nchaa dava-gá xichi cáhá<sup>n</sup>-ndí, te vá cádá càhnu-ndí mèe-ndí cuendá chiú<sup>n</sup> sá sá ní quide dava-gá-güedé.

<sup>17</sup> Te cue ñáyíu cuini cada càhnu mee-xi te vá dúcá<sup>n</sup> cádá-yu, chi mee Xítóhó Jesucristú ná cada cahnu-yu-gá. <sup>18</sup> Te nchaa ñáyíu na cáhá<sup>n</sup> váha Xítóhó Jesucristú cuendá-yu, ñáyíu-án cùdíu-yu núú-gá, te ñá túú cùdíu-yu núú-gá cuendá sá cáhá<sup>n</sup> váha-yu cuendá mèe-yu.

## 11

*Cuendá té Páblú ndíhi cuendá cue téé cächí sá cáhá<sup>n</sup> tnúhu Yá Ndióxi te ñá ndàá*

<sup>1</sup> Te cuini-í sá nchòhó cada ndee iní-ndó cùndedóhó-ndo tnúhu na cáhá<sup>n</sup>-í, chi cáhá<sup>n</sup>-í dátá cáhá<sup>n</sup> cue ñáyíu ñá túú cùtnuní iní-xi, te cuèi nása-gá ná cùndüu tnúhu cáhá<sup>n</sup>-í dico chí cádá ndéé iní cùndedóhó-ndo. <sup>2</sup> Chi yúhú ío ñúhu iní ñáhà-í xii-ndo dátá ñúhú iní ñáhà mèe Yá Ndióxi xii-o, te ní cáhá<sup>n</sup>-í tnúhu Xítóhó Jesucristú núú-ndó núu xiá<sup>n</sup> ní tnàhá tnúhu-ndo ndíhi-gá vitna, te sá dúcá<sup>n</sup> ní quide-í te cada iní-ndó sá yúhú cùu-í dátá ì<sup>n</sup> téé xica ndáhú te nchòhó cùu-ndó dátá ì<sup>n</sup> xíchi cuéchi, te Xítóhó Jesucristú cùu-gá dátá ì<sup>n</sup> téé tnándaha ndíhi xíchi cuéchi-án. Te duca<sup>n</sup> cada iní-ndó chí na sáá ndüu te yúhú na

càni cuendá ñàhá-í xii-ndo núú Xítohó Jesucristú, te cuu-ndo ñáiyu vá cündècu tnahí-gá cuéchi-xi. <sup>3</sup> Te yùhú-í sá sàcúíhná dandàhú ñàhá-xí xii-ndo vá càní-gá iní-ndó càncicú<sup>n</sup> nihnu-ndo ní yuhu ni iní-ndó ichi Xítohó Jesucristú dàtná nchicú<sup>n</sup> nihnu-ndo vitna. Te yùhú-í ná yáha-ndo dàtná ní yáha tá Èvá, chi sàcúíhná ní nduu-xi cóo ní dándàhú ñàhá-xí xii-xi, chi sàcúíhná-án<sup>n</sup> ío váha ní xito-xi nàcuáa ní quide-xi ní dándàhú-xi tá Èvá-án. <sup>4</sup> Te nchòhó, quidé ndèe iní-ndó sàcúndedóho-ndo nchàa tñúhu càhá<sup>n</sup> cue tée càhá<sup>n</sup> ingá núú tñúhu cuendá Jèsús tñúhu sá ñà túú dànehé ñàhá-ndí xii-ndo, te quide ndee tucu iní-ndó ndèdóho-ndo dànehé ñàhá-güedé xii-ndo cuendá ingá espíritú, te ñà díú cuendá Espíritú Yá Ndiòxí sá ní ngúndecu ndíhi-ndo dànehé ñàhá-güedé xii-ndo, te quide ndee tucu iní-ndó ndèdóho-ndo dànehé ñàhá-güedé xii-ndo ingá núú tñúhu sá càchí-güedé càhá<sup>n</sup> nàcuáa naníhí tàhú-ndó, te ñà díú nàcuáa ndùu tñúhu sá ní sàndáá iní-ndó cuendá naníhí tàhú-ndó càhá<sup>n</sup>-güedé. <sup>5</sup> Te cue tée duca<sup>n</sup> càhá<sup>n</sup>-án<sup>n</sup> càchí-güedé sá Yá Ndiòxí ní tendaha ñàha-gá xii-güedé xícá cùu-güedé càhá<sup>n</sup>-güedé tñúhu-gá te ío cùnūu-güedé, dico ñà ndàá sá càhá<sup>n</sup>-güedé tñúhu-gá. Te yùhú cùtnuní iní-í sá cuè tée-án<sup>n</sup> ñà túú cùnūu-güedé dàtná cùnūu yùhú. <sup>6</sup> Te cuéi ñà túú càhá<sup>n</sup>-í dàtná càhá<sup>n</sup> cue tée ío váha sàá díquí-xi dico ío váha cùtnuní iní-í cuendá nchaa sá dàcuàha-í, te yùhú sá quide-í nàcuáa cùtnuní iní-ndó sá ío váha cùtnuní iní-í nàcuáa ndùu nchaa tñúhu càhá<sup>n</sup>-í.

<sup>7</sup> Te cudana te sàni iní-ndó sá yùhú ñà túú ní quide váha-í sá ní quide-í mèe-í dàtná ì<sup>n</sup> tée ío ndàhú iní-xi, chi ñà túú ní xicá<sup>n</sup>-í yáhu-í núú-ndó cuendá sá ní càhá<sup>n</sup>-í tñúhu Yá Ndiòxí tñúhu sá càhá<sup>n</sup> nàcuáa naníhí tàhú-ó núú-ndó. <sup>8</sup> Te ní quehe<sup>n</sup>-í díhú<sup>n</sup> ní taxi dava-gá cue ñáiyu ndècu ichi Xítohó Jesucristú, te díhú<sup>n</sup>-án<sup>n</sup> ní dándóñūhu-í ní saa<sup>n</sup>-í nchaa sá ní xini ñūhu-í cùtnàhá ní càhá<sup>n</sup>-í tñúhu Xítohó Jesucristú núú-ndó. <sup>9</sup> Te cùtnàhá ní xíndecu ndíhi ñàha-í xii-ndo te áma ní xóo cumáni sá xini ñūhu-í, te ñà túú ná ní xicá<sup>n</sup>-í núú ní ì<sup>n</sup>-ndo. Chi cue ñáiyu xíndecu ichi Xítohó Jesucristú ndécú distritú Macèdoniá ní quixí-yu ní taxi-yu sá cumáni xii-í, te ñà túú tñàhí ní dasatu iní ñàhá-í xii-ndo càcá<sup>n</sup>-í núú-ndó núu ná cúú sá xini ñūhu-í, te diu-ni duca<sup>n</sup> càda-í. <sup>10</sup> Te diu-ni duha càhá<sup>n</sup> váha-í cuendá-í te ní ì<sup>n</sup> cue ñáiyu distritú Acáya vá nihí-yu tñúhu cùñàhá-yu xii-í cuendá cadí-yu yuhu-í. Te mee Xítohó Jesucristú nàhá-gá sá ndàá càhá<sup>n</sup>-í dàtná càhá<sup>n</sup> ndàá mèe-gá. <sup>11</sup> Te cudana te sàni iní-ndó sá sá dúhá càhá<sup>n</sup>-í te ñà túú cùu iní ñàhá-í xii-ndo, dico ñàhá chi mee Yá Ndiòxí

nàhá-gá sá yùhú ío cùu iní ñàhá-í xii-ndo.

<sup>12</sup> Te nàcuáa-ni ta quide-í véxi tēc diu-ni duca<sup>n</sup> càda-í cuendá sá cuè tēc cùini cada nínu mee-xi càchí sá ì<sup>n</sup>-ni cuu ndíhi ñàha-güedé xii-í vá nihí-güedé tñúhu càhá<sup>n</sup>-güedé cachi-güedé sá ì<sup>n</sup>-ni chiu<sup>n</sup> quide ndíhi ñàha-güedé xii-í. <sup>13</sup> Te cue tēc-án<sup>n</sup> càchí-güedé sá Yá Ndiòxí ní tendaha ñàha-gá xii-güedé xícá cùu-güedé càhá<sup>n</sup>-güedé tñúhu-gá dico ñà ndàá, chi mee-ni dándahú-güedé ñáiyu ndíhi tñúhu càhá<sup>n</sup>-güedé, te quide-güedé dàtná quidé cuè tēc càhá<sup>n</sup> tñúhu Xítohó Jesucristú dico ñà ndàá sá cúu-güedé cue tēc càhá<sup>n</sup> tñúhu-gá. <sup>14</sup> Te vá cùñūhu-o sá dúcá<sup>n</sup> quide cue tēc-án<sup>n</sup>, chi mee sàcúíhná quidé-xí sá cúu-xí dàtná ì<sup>n</sup> espíritú xínú cuéchi núú ío váha càa ndecu Yá Ndiòxí dico ñà ndàá sá xínú cuéchi-xi xía<sup>n</sup>. <sup>15</sup> Te xía<sup>n</sup> vá cùñūhu-o sá cuè tēc xinu cuechi núú-xi quide-güedé sá cúu-güedé cue tēc quide váha chi ñà ndàá sá quidé váha-güedé chi dándahú-güedé ñáiyu. Te nàcuáa ndùu nchaa sá quidé-güedé te duca<sup>n</sup> nàchàhu-güedé núú Yá Ndiòxí.

*Té Pàblú ío ndòho-dé cuendá sá cúu-dé tēc càhá<sup>n</sup> tñúhu Xítohó Jesucristú*

<sup>16</sup> Te yùhú càhá<sup>n</sup> tucu-í dóho-ndo sá vá càní iní-ndó sá yùhú cùu-í ì<sup>n</sup> tēc càhá<sup>n</sup> lùcú càhá<sup>n</sup> duha, te núu dava-ndo dùca<sup>n</sup> sani iní-ndó dico chí càda ndèe iní cundèdóho-ndo tñúhu na càhá<sup>n</sup>-í cuendá duca<sup>n</sup> tñàhá-í cada nínu-í mèe-í. <sup>17</sup> Te vitna na càhá<sup>n</sup>-í dàtná càhá<sup>n</sup> ì<sup>n</sup> tēc ñà túú cùtnuní iní-xi, chi tñúhu càhá<sup>n</sup>-í ñà túú ì<sup>n</sup>-ni cuu-xi ndíhi tñúhu Xítohó Jesucristú, chi vitna càhá<sup>n</sup>-í nàcuáa cada nínu-í mèe-í. <sup>18</sup> Te ío cuéhé ñáiyu quide nínu mee-xi cuendá nchaa sá ío ñuyú-a te xía<sup>n</sup> núu tñàhá-í cùini-í cada nínu-í mèe-í. <sup>19</sup> Chi cùtnuní sá nchòhó quidé ndèe iní-ndó sàcúndedóho-ndo nchàa tñúhu càhá<sup>n</sup> cue tēc càhá<sup>n</sup> lùcú càhá<sup>n</sup> duha, te duca<sup>n</sup> quide ndee iní-ndó sàcúndedóho-ndo tñúhu càhá<sup>n</sup>-güedé chí càchí-ndó sá ío tñúha-ndo. <sup>20</sup> Te nchòhó, quide ndee iní-ndó tñúu-ndo nchaa tñúhu càhá<sup>n</sup> cue tēc quide yica ñàha xii-ndo sá cùnú cuéchi-ndo núú-güedé, te xicá<sup>n</sup>-güedé nándi sá xicá<sup>n</sup>-güedé núú-ndó, te tàxi tñuní ñàhá-güedé xii-ndo, te quide-güedé sá ío cùnūu-güedé ndécú ndíhi ñàha-güedé xii-ndo, te càniha-güedé xii-ndo, te cuéi nchaa xía<sup>n</sup> quidé ñàha-güedé xii-ndo dico quide ndee-ni iní-ndó. <sup>21</sup> Te nchòhó càchí-ndó sá cúu-ndí cue tēc ñà túú ní cùy<sup>n</sup> cada nándi sá càda, te ndàá chí ñà túú ì<sup>n</sup>-ni cuu-ndí ndíhi cue tēc duca<sup>n</sup> xíquide.

Dico núu cue tēc-án<sup>n</sup> cùy<sup>n</sup>-güedé quidé nínu-güedé mèe-güedé, te tñàhá-í cùy<sup>n</sup>-í duca<sup>n</sup> càda-í. Te sá dúhá càhá<sup>n</sup>-í te càhá<sup>n</sup>-í dàtná ì<sup>n</sup> tēc ñà túú cùtnuní iní-xi. <sup>22</sup> Te núu quide cahnu-güedé mèe-güedé

cuendá sá cãhá<sup>n</sup>-güedé tnúhu hëbreú, te yúhú tucu ñiu-ni téé cãhá<sup>n</sup> tnúhu hëbreú cùú-í, àdi quide cahnu-güedé mée-güedé cuendá sá cùú-güedé cue téé isrâél, te yúhú tucu tnãhá-í cùú-í téé isrâél, àdi quide cahnu-güedé mée-güedé cuendá sá cùú-güedé ñani tnãhá ndii Abrahám, te tnãhá yúhú cùú-í ñani tnãhá ndii Abrahám tucu. <sup>23</sup> Àdi quide cahnu-güedé mée-güedé cuendá sá sání iní-güedé sá díu núú Xitohó Jesucristú xínú cuèchi-güedé, dico yúhú ío-gá xínú cuèchi ndisa-í núú-gá. Te sá dúhá quide cahnu-í mée-í te cãhá<sup>n</sup>-í dàtná ñ<sup>n</sup> téé ñá túú cùtnuní iní-xi, te yúhú cùú-í ñ<sup>n</sup> téé ío-gá quidé chiú<sup>n</sup>-gá dàcúúxí cuè téé-án, te vai xito ní cuu cãniha ñáyiu xii-í, te vai xito ní cuu chihí ñãhá-yu vecaá xii-í, te vai xito ní cuu cãcu cãcu cãni ñãhá ñáyiu xii-í. <sup>24</sup> Te cue ñáyiu isrâél ní canihã-yu xii-í úhú<sup>n</sup> xito, te ndi tnãhá ñ<sup>n</sup> xito ní canihã-yu ní dàquée-yu ócó sáhú<sup>n</sup> cùmi ñ<sup>n</sup> sãtã-í. <sup>25</sup> Te úní xito ní caniha tucu ñáyiu xii-í ndihí carrútí, te ñ<sup>n</sup> xito ní sãhá yúú ñãhá-yu xii-í, te ní cuu úní xito quée naa bãrcú xití ndute òré sãcúhu<sup>n</sup>-í, te ñ<sup>n</sup> xito ío ní ndoho-í ní xíndecu-í ñ<sup>n</sup> nduu ñ<sup>n</sup> niú núú ndute lámár. <sup>26</sup> Te ío titní xichi ní cuu xica cuu-í, te dava xichi ní cãcu cuido ñãha ndute ñuhu xii-í, te dava xichi ní cãcu duhu ñãdúhú nchaa ndachiu<sup>n</sup>-í, te dava xichi ní cãcu cada ñãha cuè ñáyiu cùu ndi mee-í ñ<sup>n</sup> sá cádá ñãhá-yu xii-í, te ñiu-ni duca<sup>n</sup> ní cãcu cada ñãha tucu cue ñáyiu ñá túú cùu ndi mee-í ñ<sup>n</sup> sá cádá ñãhá-yu xii-í ní cùu, te cuèí xití ñuu te cuèí xití yucu cãcu cãcu cada ñãha ñáyiu xii-í ñ<sup>n</sup> sá cádá ñãhá-yu, te ñiu-ni duca<sup>n</sup> cãcu cãcu quini-í tnúndòho òré ñúhú-í bãrcú cãhá<sup>n</sup> núú ndute lámár. Te cue ñáyiu cãchí sá ndécú ichi Xitohó Jesucristú te ñã ndãá cãcu cãcu cada ñãhá-yu xii-í ñ<sup>n</sup> sá cádá ñãhá-yu. <sup>27</sup> Te ío ndòho-í cuendá chiú<sup>n</sup> quide-í chí ío xàú-í, te ní cuu vai xito ñá túú xidí-í, te titní xito ní cuu xihí víhí-í docó, te titní xito ní cuu yichí-í ndute, te titní xito ní cuu ñá túú tnãhá ná xéxi-í cuendá chiú<sup>n</sup> quide-í, te titní xito ní cuu ndòho-í sá víxi<sup>n</sup>, te titní xito ní cuu ñá túú nihí-í dóó cuihnu-í.

<sup>28</sup> Te ñá díú-ní xã<sup>n</sup> chí ñ<sup>n</sup> nduu ñ<sup>n</sup> nduu ío sãni iní-í cuendá nchaa ñáyiu ndècu ichi Xitohó Jesucristú xíndecu nchaa xichi. <sup>29</sup> Te ndèda-ní cãa ñáyiu ñá túú nihí ndéé cùndecu ichi Xitohó Jesucristú, te ío cundahú iní-í chí sãnuu sá tnãhá-í ñá túú nihí ndéé-í cundecu-í ichi-gá sá dúcã<sup>n</sup> quidé-yu. Te núu ñ<sup>n</sup> ñáyiu quidé-yu sá ñ<sup>n</sup> nchòhò ñáyiu ndècu ichi Xitohó Jesucristú quidé-ndó ñ<sup>n</sup> sá ñá túú tãu-ndó cãda-ndo te vá cùú váha iní-í chí cudéè<sup>n</sup>-í. <sup>30</sup> Te núu xini ñuhu-xi sá cádá cãhnu-í mée-í, te cuu duca<sup>n</sup> cãda-í te cãhá<sup>n</sup>-í mee-ni cuendá nchaa sá quidé nãcuãa ñá túú nihí ndéé yiqui cuñú-í. <sup>31</sup> Te Dútú Ndiõxi

Yá cùú Tãtã Xitohó Jesucristú ñãhá-gã sá yúhú cãhá<sup>n</sup> ndãá-í núú-ndó, te ñiu-gá tãu-gá cachí-ó sã ío cãhnu cuu-gá ní caa ní quíhí<sup>n</sup>. <sup>32</sup> Te cùtnãhá ní xíndecu-í ñuu Dãmascú te téé cùu gobiernú téé cùndihí téé yindaha ñáyiu nãni Aretás ní taxi ndecu-dé cue téé ní xíndecú yuyèhe sá ñúhú dòco ñuu cuendá òré quee-í te tnã ñãha-güedé xii-í ní cùu. <sup>33</sup> Dico yúhú ní queé-í ñ<sup>n</sup> xití tídihi, te cue ñáyiu cùndihí ñãha xii-í ní queñuhu ñãhá-yu ndãa ventanã nchii yiqui ñãhá sá ñúhú dòco ñuu-án, te duca<sup>n</sup> te ní cãcu-í ñá túú ní ndàcu-güedé tnã ñãha-güedé xii-í.

## 12

*Té Pãblú cãhá<sup>n</sup>-dé sá ío vai cãa sá ní dãnèhé núú ñãhá Xitohó Jesucristú xii-dé*

<sup>1</sup> Te ñá túú ndéé nãndihí-xi sá cãhá<sup>n</sup> váha-o cuendá mée-ó, dico vitna xini ñuhu-xi duca<sup>n</sup> cada-í chí cãhá<sup>n</sup>-í nãcuãa ní quide ñãha Xitohó Jesucristú xii-í, chí ní quide-gá sá ní cùtnuní iní-í nãcuãa nduu tnúhu-gá, te vai núú sá ní dãnèhé núú ñãhá-gã xii-í. <sup>2</sup> Te yúhú xini-í ñ<sup>n</sup> téé sãndãá iní ñãhá xii Xitohó Jesucristú, te sa ní cuu úxícúmi cuãá sá téé-án ní sãá-dé ndéé andiu cùu úní, te ñá túú xini-í te núu ndihí yiqui cùñú-dé ní sãá-dé àdi ñãhá, chí ñ<sup>n</sup> dii díú-ni Yá Ndiõxi ñãhá-gã te núu nãsa cãa-dé ní sãá-dé. <sup>3</sup> Te yúhú cãhá<sup>n</sup> ndãá-í cuendá téé-án, dico dàtná ní cachí-í sá ñá túú xini-í te núu ndihí yiqui cùñú-dé ní sãá-dé andiu àdi ñãhá, chí mee Yá Ndiõxi ñãhá-gã te núu nãsa cãa-dé ní sãá-dé. <sup>4</sup> Te téé-án ní sãá-dé ñ<sup>n</sup> xichi núú ío váha cãa andiu, te yacã<sup>n</sup> ní xíndecòho-dé tnúhu mee-ní sá cùú-xí cuendá mée-dé, te tnúhu-án vá cùú tnãhí cãhá<sup>n</sup>-dé núú ní ñ<sup>n</sup> ñáyiu. <sup>5</sup> Te yúhú quidé ñnu-í téé-án, dico mee-í ñá túú cãhá<sup>n</sup> váha-í cuendá-í cuendá cada ñnu-í mée-í, chí cãhá<sup>n</sup> ní mee-ni cuendá nchaa sá quidé nãcuãa ñá túú nihí ndéé yiqui cuñú-í. <sup>6</sup> Te núu dicó yúhú cuini-í te cuu cãhá<sup>n</sup> váha-í cuendá-í cuendá cada ñnu-í mée-í, te núu duca<sup>n</sup> na cãhá<sup>n</sup>-í te ñá túú cùu-xi ñ<sup>n</sup> tnúhu neñúú cãhá<sup>n</sup>-í, chí cùu-xi ñ<sup>n</sup> sá cãhá<sup>n</sup> ndãá-í te núu na cãhá<sup>n</sup>-í. Dico vá dúcã<sup>n</sup> cãda-í chí cuini-í sá nchòhò cada cuendá-ndó nãcuãa nduu tnúhu cãhá<sup>n</sup>-í ndihí nãcuãa quide-í, te duca<sup>n</sup> mée-ndo cãhá<sup>n</sup>-ndó te núu ná téé cùu-í, te ñá díú sá yúhú cãhá<sup>n</sup> váha-í cuendá mée-í cuendá nchòhò cachí-ndó sá ío cùnuu-í.

<sup>7</sup> Te sá ní dãnèhé núú ñãhá Xitohó Jesucristú xii-í cùú-xí sá xidó ío váha, te cuendá sá vá cádá cãhnu-í mée-í núu xã<sup>n</sup> Xitohó Jesucristú ní quide-gá duha ndòho yiqui cuñú-í vitna. Te sá dúcã<sup>n</sup> quide ñãha-gã xii-í te xã<sup>n</sup> sãcúihná ní nihí-xi ichi cãhnu dandòho ñãha-xi xii-í. <sup>8</sup> Te ní cuu úní xito cãhá<sup>n</sup> ndãhú-í núú Xitohó Jesucristú sá ná cádá-gã nãcuãa vá ndòhò-gá yiqui cuñú-í. <sup>9</sup> Dico



mee-gã cãchí-gã xii-í: “Yúhú ío cùndahú iní ñáhà-í xii-n chindee ñaha-í, te ñá túú ná cùmání xii-n, te cùtnuní sá ío-gá chíndèe-í cue ñáiyu ñá túú nihí ndéé cùndecu”, duha ní cachi-gã xii-í. Te xiá<sup>n</sup> núu yúhú ío cùdíí iní-í sá ñá túú nihí ndéé-í ndécù-í, chí díu cuendá xiá<sup>n</sup> Xítóhó Jesucristú ñá túú ðaña nihnu ñaha-gã xii-í chíndèe ñaha-gã. <sup>10</sup> Te xiá<sup>n</sup> núu cùdíí iní-í sá dúhá ñá túú nihí ndéé-í ndécù-í, te cùdíí tucu iní-í cuendá nchaa tnúhu cuèhé tnúhu duha cãhá<sup>n</sup> ñáiyu cuendá-í, te cùdíí iní-í cuendá nchaa sá ndòhò-í, te cùdíí tucu iní-í cuendá sá quidé ñaha ñáiyu xii-í, te cùdíí tucu iní-í cuendá nchaa dava-gã sá ndòhò-í cuendá Xítóhó Jesucristú. Te òré ñá túú nihí ndéé-í te Xítóhó Jesucristú chíndèe ñaha-gã xii-í nihí ndéé-í.

*Té Pãblú ío sàni iní-dé cuendá cue ñáiyu xíndecu ichi Xítóhó Jesucristú ndécú ñúú Còrintú*

<sup>11</sup> Te cùu-í dàtná ì<sup>n</sup> téé ñá túú cùtnuní iní-xi sá dúhá cãhá<sup>n</sup> váha-í cuendá-í, te duca<sup>n</sup> quide-í chí mee-ndo quide-ndo sá dúcá<sup>n</sup> cãhá<sup>n</sup>-í, dico mee-ndo tàù-ndó cãhá<sup>n</sup> váha-ndo cuendá-í ní cùu. Te dava cue téé ío quide cahnu-güedé mée-güedé, te cãchí-güedé sá Xítóhó Jesucristú ní táuchíú<sup>n</sup>-gã sá cãhá<sup>n</sup>-güedé tnúhu-gã, dico yúhú cùnùu-gã-í dàcúxí cuè téé-á<sup>n</sup> cuèi ñá túú védana ná cùu-í ndécù-í ñuyúú-a. <sup>12</sup> Te cùtnàhá ní xíndecu ndihí ñaha-í xii-ndo ío ní quide cãhu iní-í nándi sá ní yáha-í ní quide-í chiú<sup>n</sup> Xítóhó Jesucristú sá cùu-xi-ndó. Te ní chindee ñaha-gã xii-í ní quide-í titní núú sá vã yò tnàhí ndàcu cada te ní cuñúhu-ndo, te sá dúcá<sup>n</sup> ní chindee ñaha-gã xii-í ní cutnùní iní-ndó sá yúhú cùu ndísa-í ì<sup>n</sup> téé ní cachi Xítóhó Jesucristú sá cãhá<sup>n</sup>-í tnúhu-gã. <sup>13</sup> Te yúhú ì<sup>n</sup>-ni quide ndihí ñaha-í xii-ndo ndihí nchaa dava-gã cue ñáiyu ndècu ichi Xítóhó Jesucristú, te dicó-ni sá yúhú ñá túú ní cuiní-í taxi-ndo sá xíní ñùhu-í dàtná ní quide-í dava-gã-yu. Te núú ñá túú ní quide váha-í sá dúcá<sup>n</sup> ní quide-í ñá túú ní cuiní-í chindee ñaha-ndo te chí cádá cãhu iní ñáhá xii-í.

<sup>14</sup> Te vitna sa ndècu túha-í sá quixi-í núú ndécú-ndó, te sá quixí còto ñaha tucu-í xii-ndo cùu-xi xito cuu úní sá quixi-í, te cuiní-í sá vã dándihú-ndó iní-ndó ndècu-ndo sá táxi-ndó cùu xii-í, chí ñá díú xiá<sup>n</sup> ndéé iní-í chí mee-ndo ndéé iní-í quixi-í. Te duha cãhá<sup>n</sup>-í chí nchòhó xini-ndó sá cuè téé cùu tátá sãñaha-güedé sá cùu-xi cue déhe-güedé te ñá díú cue déhe-güedé sãñaha-güedé sá cùu-xi mée-güedé. <sup>15</sup> Te yúhú ío váha cùu iní-í dandòñuhu-í sá ndécú ndihí-í nàcuáa ndacu-í chindee ñaha-í xii-ndo cùndecu váha-ndo sá cùu-xi Yá Ndióxi chí ío cùdíí iní-í, te cuèi na cùu-í sá cuendá-ndó, chí ío

cùu iní ñáhà-í xii-ndo, te sá dúcá<sup>n</sup> cùu iní ñáhà-í xii-ndo, te sànuu sá nchòhó ñá túú cùu iní ñáhá cãvihi-ndo xii-í.

<sup>16</sup> Te ñaha-ndo sá ñá túú ní dándihú-í iní-ndó ná taxi-ndo cùu xii-í, dico dava-ndo cãchí-ndó sá ío váha ní xito-í nàcuáa ní quide-í nàcuáa ní dándahú ñáhà-í xii-ndo. <sup>17</sup> Te chí cãhá<sup>n</sup> te núu yúhú ní dándahú ñáhà-í xii-ndo ndihí cue téé ní tendaha-í ní quixi coto ñaha xii-ndo. <sup>18</sup> Te ní cãhá<sup>n</sup> ndáhú-í núú tè Titú ndihí núú íngá tucu téé ndècu ndihí-o ichi Xítóhó Jesucristú ní quixi coto ñaha-güedé xii-ndo. Te nchòhó cùtnùní iní-ndó sá tè Titú ñá túú ní dándahú ñáhá-dé xii-ndo, te duca<sup>n</sup> chí ì<sup>n</sup>-ni sàni iní-ndí te ì<sup>n</sup>-ni quide-ndí.

<sup>19</sup> Te cudana te sàni iní-ndó sá sá dúhá cãhá<sup>n</sup>-ndí te tàunihnu-ndí mée-ndí, dico ñá díú dùca<sup>n</sup> quee-xi tnúhu cãhá<sup>n</sup>-ndí, chí cãhá<sup>n</sup>-ndí nàcuáa tàù-xi cãhá<sup>n</sup>-ndí chí ndècu ndihí-ndí Xítóhó Jesucristú, te mee Yá Ndióxi nàhá ndáá-gã nàcuáa ndècu tnúhu cãhá<sup>n</sup>-ndí, te nchaa sá cãhá<sup>n</sup>-ndí cùu-xi cuendá nchòhó cue ñáiyu ío cùu iní-ndí, te cãhá<sup>n</sup>-ndí nàcuáa cundecu váha-ndo ichi Xítóhó Jesucristú. <sup>20</sup> Te ío sàni iní-í cuendá-ndó chí na cuáhá<sup>n</sup> te òré quixi-í quixi coto ñaha-í xii-ndo, te ñá túú quide-ndo nàcuáa cuu váha iní-í, te sá dúcá<sup>n</sup> te yúhú cãhá<sup>n</sup>-í nàcuáa vã cùu váha iní-ndó, te duca<sup>n</sup> ío sàni iní-í cuendá-ndó chí na cuáhá<sup>n</sup> òré quexio-í te nàá-ndó, àdi ndecu-ndo ichi cuédú íní, àdi cudé<sup>n</sup> núú tnàhá-ndó, àdi ñá túú cùu ì<sup>n</sup>-nuu-ndo ndecu-ndo, àdi cãhá<sup>n</sup> cuèhé-ndó cuendá tnàha ñáiyu-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusa<sup>n</sup> dóho tnàha-ndo. <sup>21</sup> Te ío sàni iní-í cuendá-ndó chí na cuáhá<sup>n</sup> òré quixi-í, te Yá Ndióxi cada-gã te cucaha<sup>n</sup> núu-í sá cuendá-ndó, te ío ndíhú iní-í cuendá-ndó te núu vátá dáñá-gã-ndó nchàa sá cuèhé sá dúhá ní nguíta-ndo quide-ndo ndéé sanduu, te vài-ndo ní nguíta-ndo dùca<sup>n</sup> quide-ndo, chí ndècu-ndo ichi díí iní te nándi-gã nchaa sá cuèhé sá dúhá quide-ndo, te duca<sup>n</sup> ío ndíhú iní-í te núu vátá dáñá-gã-ndó nchàa xiá<sup>n</sup>.

## 13

### *Tnúhu ndéé núú ní ndihí-ná*

<sup>1</sup> Te sá quixi-í vitna núú ndécú-ndó cùu-xi xito cuu úní sá quixí còto ñaha-í xii-ndo. Te cãchí tnúhu-í xii-ndo sá òré cundáa cuéchi-ndo te canehe núú úú àdi úní ñáiyu cãhá<sup>n</sup> ndáá nàcuáa ndècu cuéchi-ndo. <sup>2</sup> Te yúhú sa ní cãhá<sup>n</sup>-í dóho-ndo cùtnàhá ní quixi-í ní quixi coto ñaha-í xii-ndo xito cuu úú, te díu-ni duca<sup>n</sup> cãhá<sup>n</sup> tucu-í dóho-ndo vitna vátá quixí tucu-gã-í quixi coto ñaha-í xii-ndo. Te nchòhó ñáiyu ní cunduu ní

ngüita quide nchaa sá cuèhé sá dúhá, tenàá ñáhà-í xii-ndo òré quexio-í te núu vátá dáñá-gã-ndó nchaa sá cuèhé sá dúhá quide-ndo te ñnhá nchaa dava-gã-ndó tēnàá ñáhà-í xii-ndo. <sup>3</sup> Te nchòhó cuìní-ndó quini-ndó núu ndáá sá quidé-í núú Xítohó Jesucristú càhá<sup>n</sup>-í yuhu-gá, dico dàvá-á<sup>n</sup> cutnùní ndáá iní-ndó. Te Xítohó Jesucristú quidé-gã nàcuáa cutnùní iní-ndó sã ïo càhnu cuu-gá te ñá túú quide-gã dàtná quidé ì<sup>n</sup> ñáyiú ñá túú ñihí ndéé cùndecu. <sup>4</sup> Te Xítohó Jesucristú ní ndoho-gá dàtná ì<sup>n</sup> ñáyiú ñá túú ñihí ndéé cùndecu, chí ní sahní ñaha-güedé xii-gá núú cùrúxí dico mee Yá Ndiòxí ní quide-gã ní ñihí ndéé Xítohó Jesucristú ní ndoto-gá ndécú-gã vitna, te ñnhá nchúhú tucu duca<sup>n</sup> yãha-ndí ñá túú ñihí ndéé-ndí cundecu-ndí, dico mee Yá Ndiòxí chindèe ñaha-gã xii-ndí ñihí ndéé-ndí ndécú-ndí cuendá sá ndécú ndìhi-ndí Xítohó Jesucristú, te xíá<sup>n</sup> núu ndàcu-ndí quidé-ndí nàcuáa tàú-xi cunduu sá cúú-xí-ndó.

<sup>5</sup> Te chí cádá cuendá váha te núu ndisa sá sàndáá iní-ndó tnúhu Xítohó Jesucristú, te núu ndáá sá ndécú-ndó ichi-gá te cùtnuní iní-ndó sá ndécú-ndó ndìhi-gã. <sup>6</sup> Te cuìní-ndí sá nchòhó cutnùní ndáá iní-ndó sá nchúhú ndécú ndìhi ndisa-ndí Xítohó Jesucristú. <sup>7</sup> Te nchúhú càhá<sup>n</sup> ndìhi-ndí Yá Ndiòxí cuendá-ndó cuendá sá vã cádá-ndó ní ì<sup>n</sup> sá cuèhé sá dúhá, te vã cáni iní-ndó sã sã dúcá<sup>n</sup> càhá<sup>n</sup> ndìhi-ndí-gã cuendá-ndó, te cuìní-ndí sá nchòhó cutnùní iní-ndó sã nchúhú ïo ndècu yiñuhu-ndí núú-gã, te ñnhá chí càhá<sup>n</sup> ndìhi-ndí-gã cuendá-ndó chí cuìní-ndí sá nchòhó cada váha-ndo cùndecu-ndo cuéi sàni iní-ndó sã nchúhú cúú-ndí cue téé ñá túú ndècu yiñuhu núú-gã. <sup>8</sup> Te nchúhú mee-ni càhá<sup>n</sup> váha-ndí cuendá tnúhu ndáá tnúhu Yá Ndiòxí, te ñá túú càhá<sup>n</sup>-ndí ì<sup>n</sup> tnúhu sã ñá túú tàú-xi càhá<sup>n</sup>-ndí cuendá tnúhu-á<sup>n</sup>. <sup>9</sup> Te cùdíí iní-ndí sã ñá túú-gã xíní ñùhu-xi cada-ndí nàcuáa ñihí ndéé-ndí tenàá ñáhá-ndí xii-ndo càhá<sup>n</sup>-ndí dóho-ndo, chí nchòhó sa ní ñihí ndéé-ndó ndècu-ndo ichi-gã. Te nchúhú càhá<sup>n</sup> ndìhi-ndí Yá Ndiòxí cuendá-ndó cuendá sá nchòhó cundáá-ndó cùndecu-ndo ñá túú-gã ná cumání-ndó núú-gã. <sup>10</sup> Te xíá<sup>n</sup> núu duha ndúu nchaa tnúhu tēe-í núú tütú-a daquixí-í ndaha-ndo vitna ñá túú ndècu ndìhi ñaha-í xii-ndo, cuendá sá òré ná cùndecu ndìhi ñaha-í xii-ndo te vã ïo ñihí càhá<sup>n</sup>-í dóho-ndo nàcuáa ndúu tnúhu ndee iní ní taxi Xítohó Jesucristú ndécú ndìhi-í, chí ní taxi-gã tnúhu ndee iní xii-í nàcuáa canu ichi ñaha-í xii-ndo cuíta cuehnu ñihnu-ndo ichi-gã quihí<sup>n</sup>, te ñá díú cuendá sá cánúichi ñaha-í xii-ndo cuíta ñihnu-ndo.

<sup>11</sup> Te vitna nchaa nchòhó ñáyiú ndècu

ndìhi-ndí ichi Xítohó Jesucristú ïo quide ndee iní ñáhá-ndí xii-ndo, te ïo chí ndúcú nàcuáa cada-ndo cundáá-ndó núú Yá Ndiòxí cuendá sã ñá túú ñnhá-gã ná cùmání-ndó núú-gã, te ndee ndèe cada iní-ndó cùndecu-ndo, te chí cúú ì<sup>n</sup>nuu cundecu ndìhi tnaha, te duca<sup>n</sup> te Yá Ndiòxí cundecu ndìhi ñaha-gã xii-ndo chí ïo cùu iní ñáhá-gã xii-o, te ñu-gã quidé-gã ïo váha cùu iní-ó ndècu-o. <sup>12</sup> Te ndìhi tnúhu yiñuhu chí cádá ndèe iní ñnhá. <sup>13</sup> Te nchaa ñáyiú cùu cuendá Yá Ndiòxí ndécú ìha quide ndee iní ñáhá-yu xii-ndo.

<sup>14</sup> Te xicá<sup>n</sup> táhú-ndí núú Xítohó Jesucristú sã ïo na chindèe chítúu ñaha-gã xii-ndo. Te mee Yá Ndiòxí ná cádá-gã nàcuáa cutnùní iní-ndó sã ïo cùu iní ñáhá-gã xii-ndo, te Espiritú-gã cundee cùu cahnu iní-ndó cùndecu-ndo. Te duca<sup>n</sup> na cùnduu. Te ïo chí cádá ndèe iní-ndó vitna.

## TUTÚ NÍ CADÚHA TĒ PĀBLÚ QUIHÍ<sup>n</sup> NDAHA ÑÁYIU DISTRITÚ GÁLACÍA

*Té Pāblú cadúha-dé tutú quihí<sup>n</sup> ndaha nchaa ñáyiú sándáá iní ñáhá xii Xítóhó Jesucristú ndécú distritú Gálacía*

<sup>1</sup> Te yúhú té Pāblú ní tendaha ñaha Xítóhó Jesucristú, ndihi Dútú Ndióxi véxi-í cāhá<sup>n</sup>-í tnúhu-gá. Te diu Yá Ndióxi ní dándótó-gā Xítóhó Jesucristú Yáá ní xihí ní cūu. Te cāchí tnúhu-í xii-ndo sá ña díú ñáyiú ñuyúú-a ní tendaha ñaha xii-í véxi-í, te ní Yá Ndióxi te ní Xítóhó Jesucristú ñá túú ní xāha<sup>n</sup>-gā xii ñ<sup>n</sup> ñáyiú quixí-yu cachí tnúhu-yu ñacuáa cada-í. <sup>2</sup> Te yúhú té Pāblú cadúha-í tutú-a ndihi nchaa dava-gā ñáyiú ndécú ichi Yá Ndióxi ndécú ndihi-í iha cuendá daquixi-í ndaha nchóhó ñáyiú sándáá iní ñáhá xii Xítóhó Jesucristú ndécú distritú Gálacía. <sup>3</sup> Te xicá<sup>n</sup> táhú-í núú Dútú Ndióxi, ndihi núú Xítóhó Jesucristú sá io na chindee chítúu ñaha-gā xii-ndo, te duca<sup>n</sup> ndi nduú-gá ná cáda te io váha cuu iní-ndó cūndecu-ndo. <sup>4</sup> Te Xítóhó Jesucristú ní xihí-gā sá cuendá nchaa cuéchi nchoo cué ñáyiú ndécú ñuyúú-a. Te duca<sup>n</sup> ní quide-gā, chí cuiní-gā sá vā cūndecu-o ichi cuehé ichi duha. Te duca<sup>n</sup> ní cuu, chí Dútú Ndióxi duca<sup>n</sup> ní cuiní-gā cunduu. <sup>5</sup> Te io chí ná ndacá<sup>n</sup> táhú-ó núú Yá Ndióxi cuendá sá io cāhnu cuu-gā, te diu-ni duca<sup>n</sup> cáda-o ní caa ní quihí<sup>n</sup>! Te duca<sup>n</sup> na cūnduu.

*Mee-ni tnúhu Xítóhó Jesucristú cúu-xi tnúhu sá cāhá<sup>n</sup> ñacuáa naníhí táhú-ó*

<sup>6</sup> Te io cūnúhu-í cúu chí io ndihi ní dáñá-ndó ichi Yá Ndióxi. Te Yáá-á<sup>n</sup> ní cāhá<sup>n</sup> ñáhá-gā xii-ndo, chí Xítóhó Jesucristú io ní cundáhú iní ñáhá-gā ní quide váha ñaha-gā xii-ndo, te vitna dácuaha tucu-ndo ingá tnúhu, te cāchí-ndó sá xiá<sup>n</sup> dácuu niñhu ñaha-xi xii-ndo núú úhú núú ndáhú. <sup>7</sup> Dico ñáhá, chí ñá túú-gā tnúhu sá dácācu niñhu ñaha xii-o núú úhú núú ndáhú. Te dicó-ni sá io ñáyiú véxi dáticá nuu ñahá-yu xii-ndo dānehé ñáhá-yu tnúhu sá dácuíta niñhu ñaha xii-ndo, chí tnúhu-á<sup>n</sup> ña túú cūu-xi tnúhu Xítóhó Jesucristú. <sup>8</sup> Te yúhú cāhá<sup>n</sup>-í tnúhu Xítóhó Jesucristú, dico nuu io ñáyiú véxi dānehé ñáhá xii-ndo ingá tnúhu sá ña túú ní dānehé ñáhá-í xii-ndo, te nchóhó cachí-ndó sá ñáyiú-á<sup>n</sup> nacháhu-yu núú Yá Ndióxi sá dúcá<sup>n</sup> quidé-yu. Te cuéi yúhú, te núu na dáma-í tnúhu danèhé ñáhá-í xii-ndo, te diu-ni duca<sup>n</sup> cāhá<sup>n</sup>-ndó sá náchāhu-í núú-gā te núu duca<sup>n</sup> na cáda-í. Ádi te núu ñ<sup>n</sup> espíritú xínú cuéchi núú-gā véxi-xi cāhá<sup>n</sup>-xi ingá tnúhu sá ña túú ní dānehé ñáhá-í xii-ndo

ñacuáa naníhí táhú-ndó ñá, te diu-ni duca<sup>n</sup> cāhá<sup>n</sup>-ndó sá náchāhu-xi núú Yá Ndióxi te núu duca<sup>n</sup> na cáda-xi. <sup>9</sup> Te diu-ni duha sa ní dānehé ñáhá-í xii-ndo sá núu véxi ñáyiú dānehé ñáhá ingá tnúhu sá ña túú ní dānehé ñáhá-í xii-ndo ñacuáa naníhí táhú-ndó ñá, te cachí-ndó sá ñáyiú-á<sup>n</sup> nacháhu-yu núú Yá Ndióxi sá dúcá<sup>n</sup> quidé-yu, duha ní cachí-í xii-ndo.

<sup>10</sup> Te duha nduu tnúhu cāhá<sup>n</sup>-í chí nchóhó sa xini-ndó sá yúhú cuiní-í sá Yá Ndióxi cāhá<sup>n</sup>-gā sá quidé váha-í ndécú-í, te ña díú sá ñáyiú ñuyúú-a cachí-yu sá quidé váha-í, ádi sá io cūdí iní-yu nchaa ñacuáa quide-í ndécú-í. Te núu na cāni iní-í cudúu-í núú ñáyiú ñuyúú-a, te ñá túú cūu-í tée xinu cuechi núú Xítóhó Jesucristú te núu duca<sup>n</sup> na cáda-í.

*Ñacuáa ní cuu ní ngúita té Pāblú cāhá<sup>n</sup>-dé tnúhu Yá Ndióxi*

<sup>11-12</sup> Te nchóhó ñáyiú ndécú ndihi-í ichi Xítóhó Jesucristú cāchí tnúhu-í xii-ndo sá tnúhu sá dānehé ñáhá-í xii-ndo ñacuáa naníhí táhú-ndó cūu-xi tnúhu sá ní cachí tnúhu mee Xítóhó Jesucristú xii-í, te ña díú ñ<sup>n</sup> ñáyiú ñuyúú-a ní cāhu iní-yu tnúhu-á<sup>n</sup>, ádi dānehé ñáhá-yu xii-í, chí mee Xítóhó Jesucristú ní dānehé ñáhá-gā.

<sup>13</sup> Te nchóhó sa nihí-ndó tnúhu ñacuáa ní xóo cada-í cūtnáhá nchicú<sup>n</sup> niñhu-í nchaa ñacuáa dácuaha ñáyiú cuu ndi mee-í ñáyiú isráel ní cūu. Te dáva-á<sup>n</sup> io ní xóo cuu úhú iní-í nchaa ñáyiú ndécú ichi Yá Ndióxi, te nándi sá ní xóo cada-í-yu, te ní cuiní-í danáa-í-yu ní cūu. <sup>14</sup> Te yúhú io-gā ní xóo quene cáva-í ní xóo dácuáha-í nchaa sá dácuáha ñáyiú cūu ndi mee-í dácúúxi ñáyiú ñ<sup>n</sup>-ni cuíá-í ndihí-yu ní cūu, te io-gā ní xóo cuiní-í cada ndáá-í canchicú<sup>n</sup> niñhu-í nchaa ñacuáa ní dānehé ñáhá cué ñaní tnáhá-í ní xindecu ndéé sanaha ní cūu. <sup>15</sup> Te ndéé cūtnáhá vátá cacú-gā-í Yá Ndióxi sa nèhe váha ñaha-gā xii-í cuendá sá cāhá<sup>n</sup>-í tnúhu-gā, núu xiá<sup>n</sup> ní cāhá<sup>n</sup> ñáhá-gā xii-í quidé-í chíu<sup>n</sup>-gā vitna, te sá dúcá<sup>n</sup> ní quide-gā te io váha ní quide ñaha-gā xii-í. <sup>16</sup> Te òre ní cāhá<sup>n</sup> ñáhá Yá Ndióxi xii-í te ní cachí tnúhu-gā cuendá Déhe-gā Xítóhó Jesucristú. Te duca<sup>n</sup> ní quide Yá Ndióxi cuendá sá cuiní-gā sá cūñaha-í xii ñáyiú ñá túú cūu ñáyiú isráel cuendá Yáá cúu Déhe-gā. Te cūtnáhá ní cāhá<sup>n</sup> ñáhá Yá Ndióxi xii-í, te vá yóo ñ<sup>n</sup> díi núú-xi ní ndécú tnúhu-í ñacuáa cada-í. <sup>17</sup> Te ní ña túú ní sáhá<sup>n</sup>-í ñúú Jerusálén nducu tnúhu-í núú cué téé díhna nuu ní tendaha Xítóhó Jesucristú cāhá<sup>n</sup> tnúhu-gā núu nása cada-í, chí ndihi-ni ní sáhá<sup>n</sup>-í distritú Arabía ní xindecu ntaa-í te dátñni cuánuhú tucu-í ñúú Dámascú.

<sup>18</sup> Te núú úní cuíá sá ní cāhá<sup>n</sup> ñáhá Yá Ndióxi xii-í, te ní sáhá<sup>n</sup> tucu-í ñúú Jerusálén ní cāhá<sup>n</sup> ndihi-í té Pèlú, te ní xindecu-í

ndihi-dé sáhú<sup>n</sup> nduu. <sup>19</sup> Te tnáhá té Jàcobó ñaní Xítóhó Jesucristú ní cáhá<sup>n</sup> ndihi-í. Te ñá túú ní xini-í dava-gá cue téé ní tendaha Xítóhó Jesucristú cáhá<sup>n</sup> tnúhu-gá. <sup>20</sup> Te Yá Ndióxi ndéhé ndií ndehe caxi-gá sá ncháá tnúhu tée-í núú tütü-a sá cúú-xi-ndo cùu-xi ì<sup>n</sup> sá ndáá.

<sup>21</sup> Te sátá ní sáhá<sup>n</sup>-í ñúú Jerusalén, te dátñúni ní sáhá<sup>n</sup>-í distritú Siríá, ndihi distritú Ciliciá. <sup>22</sup> Te nchaa ñáyiú xindecu ichi Xítóhó Jesucristú ndécú distritú Júdeá ñá túú xini ñáhá-yu xii-í ní cùu. <sup>23</sup> Dico ní xóo nihi-yu tnúhu nchaa nàcuáa ní xóo cada-í, te ní cachí-yu: “Tée cùu úhú iní ñáhá xii nchaa nchoo ñáyiú ndècu ichi Xítóhó Jesucristú cáhá<sup>n</sup>-dé tnúhu-gá núú ñáyiú cuendá quindáá iní ñáhá-yu xii-gá, te diu-dé nándi sá quidé ñaha-dé, te cuini-dé danàa ñaha-dé cuendá sá vâ cóo-gá ñáyiú quindáá iní ñáhá xii-gá ní cùu”, duha ní cachí-yu cuendá-í. <sup>24</sup> Te ní ngúita-yu ní cachí-yu sá lo cáhuu cuu Yá Ndióxi cuendá sá ñá túú-gá quidé-í dátñá ní xóo cada-í.

## 2

*Té Páblú ní nihi tnáhá-dé ndihi dava-gá cue téé cáhá<sup>n</sup> tnúhu Yá Ndióxi*

<sup>1</sup> Te ní nútñahá úxícúmi cuíá sá ní sáhá<sup>n</sup>-í ñúú Jerusalén ní cáhá<sup>n</sup> ndihi-í té Pèlú, te dátñúni ndécá-í té Bèé ní sáhá<sup>n</sup>, te tnáhá té Titú ní sáhá<sup>n</sup> ndihi-ndí-dé. <sup>2</sup> Te ní sáhá<sup>n</sup>-í chi mee Yá Ndióxi ní cachí-gá sá quihí<sup>n</sup>-í. Te yacá<sup>n</sup> ní tacá mee-ni cuè téé cùnuu. Te ní xáha<sup>n</sup>-í xii-güedé nàcuáa ndúu tnúhu dānehé-í ñáyiú ñá túú cùu ñáyiú isràél cuendá naníhí tǎhú-yu. Te duca<sup>n</sup> ní quide-í cuendá cuini-í quini-güedé nàcuáa ndúu chiú<sup>n</sup> quide-í, chí nacuahá<sup>n</sup> cachí-güedé sá ñá túú nāndihi-xi. <sup>3</sup> Te té Titú téé ndècu ndihi-í chí ñá díú téé isràél cúú-dé, dico ñá túú ní quide yica-güedé cuaha-güedé seña ñi-dé. <sup>4</sup> Te ñáyiú cachí sá ndécú ichi Xítóhó Jesucristú te ñá ndáá sá ndécú-yu ichi-gá, ñáyiú-á<sup>n</sup> ní chitnahá ñáhá-yu xii-ndí cuendá cuini-yu quini-yu nása quide-ndí ndécú-ndí ichi Xítóhó Jesucristú. Te duca<sup>n</sup> ní quide-yu cuendá sá nchúhú sa ní cácu nihnu-ndí ñá túú-gá quidé-ndí nchaa nàcuáa ní cáhá<sup>n</sup> ndíi Moisés. Te cuini-yu sá núcuíta saa tucu-ndí cada-ndí nchaa nàcuáa ní cáhá<sup>n</sup> ndíi nucúndecú-ndí dátñá ní xindecu-ndí cútñahá vátá cácu nihnu-gá-ndí núú tnúhu-á<sup>n</sup> ní cùu. <sup>5</sup> Te nchúhú ñá túú tnáhi ní dàña-ndí méé-ndí dandáhú ñáhá-yu xii-ndí. Te duca<sup>n</sup> ní quide-ndí, chí cuini-ndí sá ñá túú nǎgá tnúhu dácánuu ndihi tnúhu sá cáhá<sup>n</sup> nàcuáa naníhí tǎhú-ó ndècu ndihi-ndo.

<sup>6</sup> Te ní ì<sup>n</sup> tnúhu sá vátá quini-gá-í ñá túú ní cachí tnúhu cue téé cùnuu núú ñáyiú cada-í. Dico yúhú chí ñá túú ní quide cuendá-í

núu cùnuu-güedé àdi ñá túú cùnuu-güedé, chí núú Yá Ndióxi ì<sup>n</sup>-ni cùu-o nchaa-o. <sup>7</sup> Te ní cutñúni iní-güedé sá Yá Ndióxi ní cachí-gá xii-í sá cáhá<sup>n</sup>-í tnúhu-gá núú ñáyiú ñá túú cùu ñáyiú isràél dátñá ní quide-gá té Pèlú ní xáha<sup>n</sup>-gá cáhá<sup>n</sup>-dé tnúhu-gá núú ñáyiú isràél. <sup>8</sup> Te duca<sup>n</sup> ní cutñúni iní-güedé, chí diu-ni Yá Ndióxi Yáá chindèe ñaha xii té Pèlú cáhá<sup>n</sup>-dé tnúhu-gá núú ñáyiú isràél, diu-ni Yáá-á<sup>n</sup> chindèe ñaha-gá xii-í cáhá<sup>n</sup>-í tnúhu-gá núú ñáyiú ñá túú cùu ñáyiú isràél.

<sup>9</sup> Te té Jàcobó, ndihi té Pèlú, ndihi té Juáá, cue téé io cùnuu-gá ní cutñúni iní-güedé sá Yá Ndióxi io chindèe ñaha-gá xii-í quide-í chiú<sup>n</sup>-gá. Te io váha ní cáhá<sup>n</sup> ndihi ñaha-güedé xii-í, ndihi té Bèé, te ní cuu ì<sup>n</sup>-nuu-ndí sá nchúhú quihí<sup>n</sup>-ndí cáhá<sup>n</sup>-ndí tnúhu Yá Ndióxi núú nchaa ñáyiú ñá túú cùu ñáyiú isràél, te mee-güedé cáhá<sup>n</sup>-güedé tnúhu-gá núú ñáyiú isràél. <sup>10</sup> Te ì<sup>n</sup>-ni tnúhu ní cáhá<sup>n</sup>-güedé dóho-ndí te ní cachí-güedé xii-ndí sá chindèe-ndí cue ñáyiú ndáhú, te sa duca<sup>n</sup> tnáhi sàni iní-ndí cada-ndí.

*Té Páblú cáhá<sup>n</sup>-dé dóho té Pèlú ñúú Antiòquia*

<sup>11</sup> Te cútñahá ní sáhá<sup>n</sup> té Pèlú ñúú Antiòquia yacá<sup>n</sup> ní cáhá<sup>n</sup>-í dóho-dé, chí quide-dé ì<sup>n</sup> sá ñá túú tǎú-dé cada-dé ní cùu. <sup>12</sup> Te quide váha-dé ní cùu chí xèxi-dé ndihi ñáyiú ñá túú cùu ñáyiú isràél, dico òré ní sáá ì<sup>n</sup> úú ñáyiú cùndihi té Jàcobó, te òré-á<sup>n</sup> ñá túú-gá ní cuini-dé caxi-dé ndihi ñáyiú-á<sup>n</sup>. Te duca<sup>n</sup> ní quide-dé chí ní yúhú-dé cue ñáyiú nchícú<sup>n</sup> nihnu quide nchaa nàcuáa ní cáhá<sup>n</sup> ndíi Moisés sá vâ cáhá<sup>n</sup> váha-yu cuendá-dé. <sup>13</sup> Te tnáhá dava-gá ñáyiú isràél xindecu ichi Yá Ndióxi ñá túú quide váha-yu, chí quide-yu dátñá quidé té Pèlú ní cùu, te ndéé tnáhá té Bèé ní ngúita-dé duca<sup>n</sup> quide-dé ní cùu. <sup>14</sup> Te òré ní xini-í sá ñá túú quide-güedé ndihi-yu nàcuáa cáhá<sup>n</sup> tnúhu Yá Ndióxi, te núú nchaa ñáyiú ndècu ichi Yá Ndióxi ní xáha<sup>n</sup>-í xii té Pèlú: “Yòhó cúú-n tée isràél, te ñá túú quide-n nchaa nàcuáa quide ñáyiú isràél, chí quide-ni-n dátñá quidé nchaa ñáyiú ñá túú cùu ñáyiú isràél. Te núu duca<sup>n</sup> quide-n, ¿te ná cuendá dānehé-n ñáyiú ñá túú cùu ñáyiú isràél sá cádá-yu nchaa nàcuáa quide ñáyiú isràél?”, duha ní xáha<sup>n</sup>-í xii té Pèlú.

*Ì<sup>n</sup>-ni naníhí tǎhú-ó ndihi ñáyiú isràél núu na quindáá iní-ó Xítóhó Jesucristú ndihi-yu*

<sup>15</sup> Te yúhú ndihi té Pèlú cúú-ndí ñaní tnáhá ñáyiú isràél, te ñá túú ndècu-ndí ichi cuèhé ichi duha dátñá ndécú nchaa ñáyiú ñá túú cùu ñáyiú isràél. <sup>16</sup> Te xini-ó sá vâ cùndècu-gá cuéchi-o núú Yá Ndióxi te núu na quindáá iní-ó Xítóhó Jesucristú, te ñá díú sá cáncicú<sup>n</sup> nihnu-o cáda-o nchaa nàcuáa ní cáhá<sup>n</sup> ndíi

Moisés. Te tnàhá dava nchúhú ñáyiú is-ràèl sàndáá iní-ndí Xítohó Jesucristú, te xiá<sup>n</sup> cútñuní iní-ndí sá ñà túú-gá cuéchi-ndí ndécú núú-gã, dico ñá díú sá ní cànchicú<sup>n</sup> nihnu-ndí ní quide-ndí nàcuáa ní cáhá<sup>n</sup> ndí Moisés, chi cuendá sá sàndáá iní-ndí Xítohó Jesucristú. Te vá yôo ñ<sup>n</sup> cachí-ó sá ñà túú ndècu cuéchi-xi núú Yá Ndióxi cuendá sá nchicú<sup>n</sup> nihnú-yu nchaa nàcuáa ní cáhá<sup>n</sup> ndí Moisés.

<sup>17</sup> Te núu cuini-ó sá vã cündècu cuéchi-o núú Yá Ndióxi cuendá sá sàndáá iní-ó Xítohó Jesucristú, te xiá<sup>n</sup> cútñuní iní-ó sá ñà túú quide váha-o. ¡Te vá cúú tnàhí caní iní-ó sá Xítohó Jesucristú dánèhé ñàhá-gã xii-o sá vã cáda váha-o cündècu-o! <sup>18</sup> Te yúhú cãchí-í sá vã cànchicú<sup>n</sup> nihnu-gá-ó nchaa nacuáa ní cáhá<sup>n</sup> ndí Moisés, dico núu vitna cãchí-í sá xini ñuhu-xi cada-o nchaa nacuáa ní cáhá<sup>n</sup> ndí ña, te ñá túú quide váha-í núú Yá Ndióxi te núu duca<sup>n</sup> na cada-í. <sup>19</sup> Te yúhú duu<sup>n</sup> duu<sup>n</sup> ní cutñuní iní-í sá vã ndácú-í cada-í nchaa nacuáa ní cáhá<sup>n</sup> ndí Moisés núu xiá<sup>n</sup> ní dáñá-í ñá túú-gã nchicú<sup>n</sup> nihnu-í nchaa nacuáa ní cáhá<sup>n</sup> ndí cuendá sá cuini-í cündècu-í sá cúú-xí Yá Ndióxi. <sup>20</sup> Te Xítohó Jesucristú ní xihí-gá cuendá-í, dico dàtná tnúhu sá tnàhá-í ní xihí ndihí-gã, chi ñá cúú-gã cada-í nchaa nacuáa sàni iní mèe-í, chi Xítohó Jesucristú-nã ndécú ndihí ñaha-gã xii-í táxi tnùní ñàhá-gã. Te vitna ndècu-í ñuyú-a, te io sàndáá iní-í Xítohó Jesucristú Déhe Yá Ndióxi, te chindee ñaha-gã xii-í. Te diu-ni Xítohó Jesucristú io cùu iní ñàhá-gã xii-í núu ní xihí-gá núú cùruxí sá cuendá-í. <sup>21</sup> Te vitna ñá túú dàquee tihú-í sá váha ní quide ñaha Yá Ndióxi xii-í, chi núu ní ndàcu-o vá cündècu cuéchi-o núú Yá Ndióxi cuendá sá nchicú<sup>n</sup> nihnu-o quide-o nchaa nacuáa ní cáhá<sup>n</sup> ndí Moisés ní cùu ña, te áu<sup>n</sup> ná cuu ní xihí Xítohó Jesucristú ní cùu te núu duca<sup>n</sup>.

### 3

*Vá dàñá ndèe-ó quindáá iní-ó tnúhu Xítohó Jesucristú*

<sup>1</sup> Te nchòhó ñáyiú distritú Gàlaciá, ñáyiú sa xindecu ichi Xítohó Jesucristú, ¿ná cuendá io ñí iní-ndó ñà cuini-ndó tnù-ndo nchaa tnúhu cáhá<sup>n</sup>-gã?, ¿te yoo ní dádáhu ndodo iní ñàhá xii-ndo núu duca<sup>n</sup> quide-ndo? Te nàha-ndo sá io váha ní dánèhé ñàhá-ndí xii-ndo nacuáa ní cuu ní xihí Xítohó Jesucristú. <sup>2</sup> Te vitna cáhá<sup>n</sup>-ndó núu sá nchicú<sup>n</sup> nihnu-ndo nchaa nacuáa ní cáhá<sup>n</sup> ndí Moisés ní níhí-ndó Espiritú Yá Ndióxi ndécú ndihí-ndo, àdi sá ní sàndáá iní-ndó tnúhu Xítohó Jesucristú sá ní dánèhé ñàhá-ndí xii-ndo ní níhí-ndó Espiritú-gá ndécú ndihí-ndo. <sup>3</sup> Te nchòhó

io ní díquí-ndó chi Espiritú Yá Ndióxi tá quide váha ñaha-xi xii-ndo cuáhá<sup>n</sup> ní cùu. ¿Te náa vitna mee-ñã-ndó cuini-ndó càda-ndo nacuáa ta quide ñaha Espiritú-gá cuáhá<sup>n</sup> xii-ndo ní cùu-án? <sup>4</sup> Te sàni ñ<sup>n</sup> sàni úú iní-í cuendá-ndó sá áu<sup>n</sup> ná cuu nándi váha-ndo ndècu-ndo ichi Yá Ndióxi. <sup>5</sup> Te xini-ndó sá Yá Ndióxi ní taxi-gá Espiritú-gá ní ngündècu ndihí-ndo, te ní quide-gá sá vã yôo tnàhí ndàcu cada núu-ndó ní xini-ndó. Te duca<sup>n</sup> ní quide-gá, chi ní sàndáá iní-ndó-gã, dico ñá díú cuendá nchaa nacuáa ní cachí ndí Moisés cada ñáyiú duca<sup>n</sup> ní quide-gã.

<sup>6</sup> Te ndí Ábrahám duca<sup>n</sup> io ní sàndáá iní ndí Yá Ndióxi, núu xiá<sup>n</sup> ní cachí-gã sá ní cudíu ndí núú-gã sá dúcá<sup>n</sup> ní quide ndí. <sup>7</sup> Te cãchí tnúhu ndáá-í xii-ndo sá ncháá ñáyiú sàndáá iní ñàhá xii Yá Ndióxi dàtná ní sàndáá iní ñàhá ndí Ábrahám xii-gã, ñáyiú-án ñ<sup>n</sup>-ni cúú-yu ndihí ndí núú-gã. <sup>8</sup> Te núu tútú Yá Ndióxi ní ngódó tnùní tnúhu váha, tnúhu sá ní xáha<sup>n</sup> Yá Ndióxi xii ndí Ábrahám, te duha ní xáha<sup>n</sup>-gã xii ndí: “Nchaa ñáyiú nihí ñuyú cada váha-í-yu sá cuendá-n”, duha ní xáha<sup>n</sup>-gã xii ndí. Te sá dúcá<sup>n</sup> ní ngódó tnùní núú tútú Yá Ndióxi ndéé dàvã-án, te xiá<sup>n</sup> cútñuní sá sàa nduu, te cue ñáyiú ñá túú cùu ñáyiú isràèl vã cündècu-gã cuéchi-yu núú-gã te núu na quindáá iní ñàhá-yu xii-gã. <sup>9</sup> Te xiá<sup>n</sup> núu nchaa ñáyiú sàndáá iní ñàhá xii Yá Ndióxi cada váha ñaha-gã xii-yu dàtná ní quide váha-gã ndí Ábrahám, chi ndí-án duca<sup>n</sup> ní sàndáá iní ñàhá ndí xii-gã.

<sup>10</sup> Te nchaa ñáyiú cuini cada nchaa nacuáa ní cáhá<sup>n</sup> ndí Moisés cuendá sá cuini-yu sá vã cündècu-gã cuéchi-yu núú Yá Ndióxi, ñáyiú-án dàña nihnu ñaha-gã xii-yu, chi vã ndácú-yu cada-yu nacuáa sàni iní-yu, te duca<sup>n</sup> càda-gã chi quèe ndáá-xi nacuáa cáhá<sup>n</sup>-xi núú tútú-gã núú cãchí-xi sá ncháá ñáyiú ñá túú quide nchaandi túhú nacuáa ní cáhá<sup>n</sup> ndí Moisés te dàña nihnu ñaha-gã xii-yu. <sup>11</sup> Te núu na cànchicú<sup>n</sup> nihnu-ni-o càda-o nacuáa ní cáhá<sup>n</sup> ndí Moisés, te ñá túú vèdana chindee ñaha-xi xii-o nacuáa vã cündècu-gã cuéchi-o núú Yá Ndióxi. Te ndáá chi núú tútú-gã cãchí-xi sá ncháá ñáyiú sàndáá iní ñàhá xii-gã, ñáyiú ñá túú-gã cuéchi-xi ndècu io váha ndècu-yu núú-gã. <sup>12</sup> Te núu dicó io ñáyiú quide nchaandi túhú nacuáa ní cáhá<sup>n</sup> ndí Moisés ñá, te ñá túú xini ñuhu-xi quindáá iní-yu tnúhu Xítohó Jesucristú, chi núú tútú Yá Ndióxi cãchí-xi sá núu dicó io ñáyiú ndacu cada nchaa nacuáa ní cáhá<sup>n</sup> ndí Moisés ñá, te cündècu váha-yu núú Yá Ndióxi.

<sup>13</sup> Te tnúhu ní chidó tnùní ndí Moisés cãchí-xi sá io ndècu cuéchi-o núú Yá Ndióxi cuendá sá ñá ndácú-ó càda-o nchaa nacuáa ní cáhá<sup>n</sup> ndí, te cuendá xiá<sup>n</sup> tá dàña nihnu ñaha-gã xii-o cuáhá<sup>n</sup>. Dico Xítohó Jesucristú

ní xido-gá nchaa cuéchi-o cuèndá sá vǎ dǎñá nihnu ñaha-gá Yá Ndióxi xii-o. Te cǎchí-xi núú tǔtú Yá Ndióxi: “Íi<sup>n</sup> téé na cǎta caa-güedé ïi<sup>n</sup> yutnu, te téé-á<sup>n</sup> cúú-dě téé dǎña nihnu ñaha Yá Ndióxi”, duha cǎchí-xi núú tǔtú-gǎ. <sup>14</sup> Te duca<sup>n</sup> ní yáha Xítohó Jesucristú, chí cuíní Yá Ndióxi sá ndúu táhú nchaa ñáyiu ñá túú cùu ñáyiu isrǎel cundecu váha-yu dǎtná ní nduu táhú ndíi Ábrahám ndécú váha ndíi. Te duca<sup>n</sup> ní yáha-gǎ cuèndá nchaa nchoo ñáyiu sǎndáá iní ñáhá xii-gǎ ngúndecu ndíhi-o Espíritú Yá Ndióxi sá ní cǎchí méé-gǎ taxi-gǎ.

#### *Nàcuáa ní cǎchí Yá Ndióxi cada-gǎ*

<sup>15</sup> Te nchòhó cue ñáyiu ndècu ndíhi-í ichi Yá Ndióxi na cǎchí tnúhu-í xii-ndo nàcuáa quide cue ñáyiu ñuyúú-a cuèndá tecú tnùnì-gǎ-ndó nàcuáa quide Yá Ndióxi. Chí ñáyiu-á<sup>n</sup> òré cuíní-yu cadá-yu ïi<sup>n</sup> sá cadá-yu, te díhna-gǎ ndátnúhu-yu te òré cúú ïi<sup>n</sup>nuú-yu, te sáha firmá-yu ïi<sup>n</sup> tǔtú te tǔtú-á<sup>n</sup> vǎ yòo ïi<sup>n</sup> ndacu cǎhá<sup>n</sup> sǎ vǎ nándíhi-gǎ-xi, te ní vǎ yòo-gǎ ndacu nágá tnúhu chido tnùnì núú-xi. <sup>16</sup> Te duca<sup>n</sup> ní quide Yá Ndióxi ndíhi ndíi Ábrahám, chí ní xáha<sup>n</sup>-gǎ xii ndíi nàcuáa cada-gǎ, te tnúhu-á<sup>n</sup> cúú-xi cuèndá méé ndíi ndíhi cuèndá ïi<sup>n</sup> ñaní tnáhá ndíi cundecu ñuyúú-a ndéé cuèé-gǎ. Te núú tǔtú-gǎ cǎchí-xi sǎ tnúhu-á<sup>n</sup> cúú-xi cuèndá ïi<sup>n</sup>-ní ñaní tnáhá ndíi te ñá díú cuèndá nchaá-yu. Te ñaní tnáhá ndíi téé cùu cuendá tnúhu-á<sup>n</sup> cúú Xítohó Jesucristú. <sup>17</sup> Te na cǎchí tnúhu-í xii-ndo sǎ Yá Ndióxi ní quide ndáá duu<sup>n</sup>-gǎ ndíhi ndíi Ábrahám nàcuáa cada-gǎ. Te sa ní cuu cúmí cièndú ócú úxí cuá sǎ dúcá<sup>n</sup> ní xáha<sup>n</sup> Yá Ndióxi xii ndíi Ábrahám, te dǎtnúnì ní xáha<sup>n</sup>-gǎ xii ndíi Moisés chido tnùnì ndíi nàcuáa cada ñáyiu, te nchaa tnúhu ní chídó tnùnì ndíi Moisés ñá túú dàquee tǐhú-xi tnúhu sǎ ní xáha<sup>n</sup> Yá Ndióxi xii ndíi Ábrahám nàcuáa cada-gǎ. <sup>18</sup> Te núu dícú cuèndá nchaa tnúhu sǎ ní chídó tnùnì ndíi Moisés ní nàníhí tǎhú-ó ñá, te ñá túú-gǎ xíní ñúhu-xi cada cuendá-ó tnúhu ní xáha<sup>n</sup> Yá Ndióxi xii ndíi Ábrahám cada-gǎ ní cùu te núu duca<sup>n</sup>. Te ndíi-á<sup>n</sup> ní nàníhí tǎhú ndíi chí duca<sup>n</sup> ní cǎchí Yá Ndióxi cada ñaha-gǎ xii ndíi.

<sup>19</sup> Te nchaa tnúhu ní cǎhá<sup>n</sup> ndíi Moisés ní ngódó núú-xi nchícú<sup>n</sup> nihnu ñáyiu cuèndá duca<sup>n</sup> cǔtnunì iní-yu sǎ ndécú cuéchi-yu, te nchícú<sup>n</sup> nihnu-ní-yu ndéé ní sǎá nduu ní quexio Yáá cúú ñaní tnáhá ndíi Ábrahám, chí Yáá-á<sup>n</sup> duca<sup>n</sup> ní xáha<sup>n</sup> Yá Ndióxi quixi-gǎ cada váha-gǎ nchaa ñáyiu. Te nchaa tnúhu ní chídó tnùnì ndíi Moisés, chí Yá Ndióxi ní tendaha-gǎ cue espíritú xínú cuèchi núú-gǎ ní sáhá<sup>n</sup>-xi ní xítñúhu ñaha-xi xii ndíi nàcuáa danèhé ndíi ñáyiu. <sup>20</sup> Te Yá Ndióxi ñá túú ní cǎhá<sup>n</sup>-gǎ núú méé ñáyiu, chí ndíi Moisés ní cǎhá<sup>n</sup> ndíi yuhu-gǎ núú-yu, díco cǔtnáhá

ní cǎhá<sup>n</sup> ndíhi-gǎ ndíi Ábrahám chí núú méé núú ïi<sup>n</sup> ndíi ndíhi-gǎ ní xáha<sup>n</sup>-gǎ xii ndíi nàcuáa cada-gǎ.

#### *Nàcuáa ndúu nchaa tnúhu ní chídó tnùnì ndíi Moisés*

<sup>21</sup> Te nchaa nàcuáa ní chídó tnùnì ndíi Moisés, ndíhi nchaa nàcuáa ní xáha<sup>n</sup> Yá Ndióxi xii ndíi Ábrahám cada-gǎ, ñá túú dàquee tǐhú tnáhá-xi. Te núu dícú nàníhí tǎhú ñáyiu nchícú<sup>n</sup> nihnu nchaa nàcuáa ní cǎhá<sup>n</sup> ndíi Moisés ñá te cudíú-yu núú-gǎ cuèndá-ni sǎ nchícú<sup>n</sup> nihnú-yu nchaa nàcuáa ní cǎhá<sup>n</sup> ndíi ní cùu. <sup>22</sup> Te núú tǔtú Yá Ndióxi cǎchí-xi: “Nchaa nchòhó ñáyiu ndècu ñuyúú ndécú cuéchi-ndo”, duha cǎchí-xi. Te duca<sup>n</sup> cǎhá<sup>n</sup>-xi cuèndá quíndáá iní-ó Xítohó Jesucristú, te nàníhí tǎhú-ó chí duca<sup>n</sup> ní cǎchí Yá Ndióxi cada-gǎ.

<sup>23</sup> Te cǔtnáhá vátá cǔndècu ndíhi-gǎ-ó tnúhu Xítohó Jesucristú, te nchícú<sup>n</sup> nihnu-o nchàa nàcuáa ní cǎhá<sup>n</sup> ndíi Moisés, te ní cǔtnúnì iní-ó sǎ io ndècu cuéchi-o ní cùu. Te duca<sup>n</sup>-ni nchícú<sup>n</sup> nihnu-o ndéé ní sǎá nduu ní quexio Xítohó Jesucristú ñuyúú-a, te ní sǎndáá iní-ó-gǎ. <sup>24</sup> Te nchaa tnúhu sǎ ní chídó tnùnì ndíi Moisés ní sanu ichi ñaha-xi xii-o nàcuáa cada-o cundecu-o, te duca<sup>n</sup>-ní sanu ichi ñaha-xi xii-o ndéé ní sǎá nduu ní quexio Xítohó Jesucristú ñuyúú-a. Te duca<sup>n</sup> ní cuu cuèndá quíndáá iní-ó-gǎ, te vǎ cǔndècu-gǎ cuéchi-o núú Yá Ndióxi. <sup>25</sup> Te vitna ní ngúndecu ndíhi-o tnúhu Xítohó Jesucristú, te ñá túú-gǎ xíní ñúhu-xi canu ichi ñaha nchaa tnúhu ní chídó tnùnì ndíi Moisés.

<sup>26</sup> Te vitna tnáhá nchaa nchòhó cúú-ndó dèhe Yá Ndióxi, chí ní sǎndáá iní-ndó Xítohó Jesucristú. <sup>27</sup> Te nchòhó ní sandute-ndo dǎtná cǎchí-gǎ, te ndècu-ndo ndíhi-gǎ, te quide-ndo nchaa nàcuáa ní cǎhá<sup>n</sup>-gǎ ndécú-ndó, te ío ndècu yíñuhu-ndo núú Yá Ndióxi dǎtná ndécú yíñuhu mee Xítohó Jesucristú. <sup>28</sup> Te vitna ïi<sup>n</sup>-ní cùu-o nchaa-o ndècu-o ndíhi Xítohó Jesucristú cuèi cùu-o ñáyiu isrǎel ádi ñá túú cùu-o, te cuèi cùu-o ñáyiu ñá túú tnáhí dǎñá quee núú chíú<sup>n</sup> pàtróo<sup>n</sup>-xi ádi cùu-o ñáyiu dǎñá queé núú chíú<sup>n</sup> pàtróo<sup>n</sup>-xi, te cuèi téé te cuèi ñadíhí ïi<sup>n</sup>-ní cùu-o nchaa-o ndècu-o ndíhi Xítohó Jesucristú. <sup>29</sup> Te nchòhó ndécú ndíhi-ndo Xítohó Jesucristú, te cùu-ndo dǎtná cue ñaní tnáhá ndíi Ábrahám, chí ní nduu táhú-ndó cundecu váha-ndo núú Yá Ndióxi dǎtná ní nduu táhú ndíi-á<sup>n</sup> ndécú váha ndíi núú-gǎ, te duca<sup>n</sup> chí mee-gǎ duca<sup>n</sup> ní cǎchí-gǎ cunduu.

## 4

<sup>1</sup> Te nchòhó xíní-ndó sǎ ïi<sup>n</sup> té líhli chí vátá nágá cuáñaha tátá-dě cuu cuèndá-dé chí líhli-dé, te ïi<sup>n</sup>-ní cùu-dé ndíhi téé xínu

cuechi, dico na sàa nduu cuèhnu-dé, te nduu tãhú-dé nchaa sá ndécú ndíhi tátá-dé. <sup>2</sup> Te xitò-yu té líhi-áa sáhnú-dé ndéé sáa nduu ní cachí tátá-dé sá cuãñaha-dé sá ndúú tãhú-dé. <sup>3</sup> Te duca<sup>n</sup> sãtnahá-xi cùu nchoo, chi nchicú<sup>n</sup> nihnu-o nchãa nacuaá ní cáhá<sup>n</sup> cue téé ní xíndecu ndéé sanaha ní cùu. <sup>4</sup> Te ní sáa nduu ní quide Yá Ndióxi dàtná ní cachí-gá, te ní tendaha-gã Déhe-gã Xitohó Jesucristú ní quixi-gã ñuyú-a, ní dácacú ñaha ñ<sup>n</sup> ñadhí te ní cuu-gã ñáyiu, te ní quide-gã nchaa nacuaá ní cáhá<sup>n</sup> ndíi Moisés. <sup>5</sup> Te duca<sup>n</sup> ní tendaha Yá Ndióxi Déhe-gã cuendá sá vã cãchicú<sup>n</sup> nihnu-gã-ó nchãa nacuaá ní chídó tnúni ndíi Moisés cuendá duca<sup>n</sup> te cuu-o dèhe Yá Ndióxi.

<sup>6</sup> Te Yá Ndióxi ní taxi-gã Espiritú Déhe-gã Xitohó Jesucristú ndécú ndíhi-ndo chi cùu-ndo déhe-gã, te Espiritú-ã<sup>n</sup> chíndée ñaha-xi xii-ndo te càchí-ndó: “Yòhó Dútú Ndióxi cùu-n Tátá méé-ndí”, duha càchí-ndó. <sup>7</sup> Te xiã<sup>n</sup> cùtnúni iní-ndó sá cùu-ndó dèhe Yá Ndióxi vitna, te ñã túú-gã cùu-ndó dàtná cue ñáyiu ñã túú tñahí dàñã quee núú chíú<sup>n</sup> pãtróo<sup>n</sup>-xi. Te sá dúcá<sup>n</sup> cùu-ndo déhe-gã, te Xitohó Jesucristú taxi-gã nchaa sá vãha ní cachí Yá Ndióxi nduu tãhú-ndó.

*Te Pãblú ío sàni iní-dé cuendá nchaa ñáyiu ndécu ichi Xitohó Jesucristú*

<sup>8</sup> Te cùtnahá vátá quíndáa-gã iní-ndó tnúhu Yá Ndióxi ní xinu cuechi-ndo núú nchãa sá càchí-yu cùu ndiόxi te ñã ndãá sá ndiόxi cùu-xí. <sup>9</sup> Te vitna nchòhó càhá<sup>n</sup> ndíhi-ndo Yá Ndióxi, te mee-gã xini ñãhá-gã xii-ndo, te ñã túú ndúu vãha-xi nanchòcãva iní-ndó càda tucu-ndo nacuaá ní xóo cada-ndo díhna, chi nchaa xiã<sup>n</sup> ñã túú vèdana nãndíhi-xi. <sup>10</sup> Te nchòhó cànehe íi-ni-ndo ndúu cachí-ndó íi, te díu-ni duca<sup>n</sup> quide-ndo dava yoo ndíhi dava cuiá, te ndi tnahá nduu sãcáo vico díu-ni duca<sup>n</sup> quide-ndo cànehe íi-ndó ndúu-ã<sup>n</sup>. <sup>11</sup> Te ío sàni iní-í cuendá-ndó, chi na cuahá<sup>n</sup> àú<sup>n</sup> nã cuu ní dãnèhé ñãhá-í xii-ndo tnúhu Yá Ndióxi.

<sup>12</sup> Te càhá<sup>n</sup> ndàhú-í núú nchòhó ñáyiu ndécu ndíhi-í ichi Xitohó Jesucristú sá càdã-ndó dàtná quidé-í ñã túú nchicú<sup>n</sup> nihnu-í nchaa tnúhu ní cáhá<sup>n</sup> ndíi Moisés, chi yúhú quidé-í vitna dàtná ní quide nchòhó ñã túú ní cãchicú<sup>n</sup> nihnu-ndo nacuaá ní cáhá<sup>n</sup> ndíi. Te cùtnahá ní xíndecu ndíhi ñaha-í xii-ndo ní quide vãha ñaha-ndo xii-í. <sup>13</sup> Te sa ñaha-ndo sá cùtnahá ní cáhá<sup>n</sup>-í tnúhu Xitohó Jesucristú núú-ndó ndéé díhna ní cubú-í, núú xiã<sup>n</sup> ní xíndecu ndíhi ñaha-í xii-ndo ní cáhá<sup>n</sup>-í tnúhu-gã núú-ndó. <sup>14</sup> Te cuéhé sá ní tnahá-í-ã<sup>n</sup> cùu-xí ñ<sup>n</sup> cuéhé sá vã yoo tñahí cundee iní-xi cundecu ndíhi ñaha xii-í ní cùu, dico nchòhó chí ío vãha ní cáhá<sup>n</sup> ndíhi ñaha-ndo xii-í, te ñã túú ní sàni cuehé

ní sàni duha iní-ndó cuendá-í, te ní cáhá<sup>n</sup> ndíhi ñaha-ndo xii-í dàtná tnúhu sá yúhú cùu-í ñ<sup>n</sup> espíritú xínú cuechi núú Yá Ndióxi àdi datná méé Xitohó Jesucristú. <sup>15</sup> ¿Te ná ní tnahá-ndó núu ñã túú-gã sání vãha iní-ndó cuendá-í dàtná ní xóo cada-ndo ndéé díhna ío vãha ní xóo caní iní-ndó cuendá-í? Te na càchí tnúhu ndãá-í xii-ndo sá ío ní cuu iní ñãhá-ndó xii-í cùtnahá ní xíndecu ndíhi ñaha-í xii-ndo, te nãndi sá ndécú ndíhi-ndo taxi-ndo xii-í ní cùu, te núu dicó sá cùú te ndéé tinúu-ndo tava-ndo te taxi-ndo xii-í ní cùu. <sup>16</sup> ¿Te náa cùu úhú iní ñãhá-ndó xii-í vitna cuendá sá càhá<sup>n</sup>-í tnúhu ndãá tnúhu Yá Ndióxi núú-ndó-ã<sup>n</sup>?

<sup>17</sup> Te ío ñáyiu ío vãha càhá<sup>n</sup> ndíhi ñaha xii-ndo, dico ñáyiu-ã<sup>n</sup> ñúhú cuéhé iní-yu, chí cuiñí-yu sá vã cùu-gã càhá<sup>n</sup> ndíhi tñaha-o, chí mee-nã-yu cundecu ndíhi-ndo cuiñí-yu. <sup>18</sup> Te vãha quide ñáyiu càhá<sup>n</sup> ndíhi ñaha xii-ndo ndíhi tnúhu yíñúhu, te núu cuiñí-yu cadá-yu ñ<sup>n</sup> sá vãha sá cùu-xí-ndó. Te duca<sup>n</sup>-ni na càdã-yu cuéi òré ñã túú ndécu ndíhi ñaha-í xii-ndo. <sup>19</sup> Te nchòhó ñáyiu ní sanu ichi-í ichi Xitohó Jesucristú càchí tnúhu-í xii-ndo sá quidé-xí iní-í dàtná quidé-xí iní ñ<sup>n</sup> ñadhí ñaha sa ní tnahá òré cacu déhe-xi, te duca<sup>n</sup> quide-xi iní-í, chí ío vã sání iní-í cuendá-ndó dàtná ní xóo cada-í ndéé díhna, te duca<sup>n</sup>-ni càdã-í ndéé ná sáa nduu càda-ndo nchaa nacuaá càhá<sup>n</sup> Xitohó Jesucristú. <sup>20</sup> ¿Te ío vãha cada-xi te núu dicó tnavíi sa ndécu ndíhi ñaha-í xii-ndo cuendá càhá<sup>n</sup>-í núú-ndo nacuaá cada-ndo, te ñã cùtnúni iní-í nása cada-í cuendá-ndó!

*Cuendá ndíi Àgár ndíhi ndíi Sãrá*

<sup>21</sup> Te nchòhó ñáyiu cuiñí cãchicú<sup>n</sup> nihnu nchaa tnúhu ní cáhá<sup>n</sup> ndíi Moisés, ¿náa ñã túú tècú tnúni-ndó nacuaá càhá<sup>n</sup>-xi tnúhu ní chídó tnúni ndíi? <sup>22</sup> Chí càchí tnúhu ní chídó tnúni ndíi-ã<sup>n</sup> sá ndíi Abrahám ní xíndecu úú déhe ducu<sup>n</sup> ndíi, te ñ<sup>n</sup>-dé ní cuu déhe ndíi ndíhi ñadhí méé ndíi ndíi Sãrá, te ingá-dé ní cuu-dé déhe ndíi ndíhi ñ<sup>n</sup> ndíi ní xinu cuechi núú-yu ní xínani Àgár. <sup>23</sup> Te sá dúcá<sup>n</sup> ní cacu déhe ndíi Sãrá, chí mee Yá Ndióxi ní cundàhú iní ñãhá-gã xii-ã<sup>n</sup>, chí duca<sup>n</sup> ní cachí-gã cada-gã. Dico ndíi ní xinu cuechi-ã<sup>n</sup> chí duca<sup>n</sup> tñahí ní nduu tãhú ndíi-ã<sup>n</sup> sá cóo déhe ndíi. <sup>24</sup> Te na càchí tnúhu-í xii-ndo nã cùú sá nãnèhé ndíi ndúú cue ndíi díhí-ã<sup>n</sup>. Te úú xito ní cáhá<sup>n</sup> Yá Ndióxi nacuaá cada-gã, te ñ<sup>n</sup> ndíi-ã<sup>n</sup> nãnèhé ndíi nacuaá ní cáhá<sup>n</sup> Yá Ndióxi xito díhna nuu, te ingá tucu ndíi-ã<sup>n</sup> nãnèhé ndíi nacuaá ní cáhá<sup>n</sup> tucu-gã xito cùu úú. Te ndíi Àgár-ã<sup>n</sup> nãnèhé ndíi nacuaá ní xãhá<sup>n</sup> Yá Ndióxi xii ndíi Moisés yucu Sinái cada ñáyiu, te nchaa ñáyiu nchicú<sup>n</sup> nihnu nchaa tnúhu-ã<sup>n</sup> cùu-yu dàtná déhe ndíi Àgár téé ní xinu cuechi, chí téé-ã<sup>n</sup> ñã túú tñahí ní dàñã-dé quee-dé núú

chiú<sup>n</sup> patróo<sup>n</sup>-dê, te duca<sup>n</sup> sãtnahá-xi cùu-yu chi nchicú<sup>n</sup> nihnú-yu nchaa nacuaá ní cáhá<sup>n</sup> Yã Ndiöxi xii ndii Moisés. <sup>25</sup> Te tnúhu Àgár queé-xi: Yucu Sinãí, te yucu-án yíndêhu-xi nació<sup>n</sup> Arabiá. Te ndii Àgár-án nánêhé tucu ndii cue ñáyiú ndêcu ñuú Jerusálén, chi ñáyiú-án ndécú-ní-yu dàtná ní xíndecu ndii Àgár ndihi déhe ndii, chi cue ndii-án ní cuu cue ndii ñáyiú ñá túú tnàhí ní dàñá quee núú chiú<sup>n</sup> patróo<sup>n</sup>-xi, te duca<sup>n</sup> sãtnahá-xi cùu ñáyiú-án chi nchicú<sup>n</sup> nihnu-ní-yu nchaa nacuaá ní cáhá<sup>n</sup> ndii Moisés. <sup>26</sup> Dico nchoo ní nduu táhú-ó cùndecu-o ñuú Jerusálén sáá núú ndécú Yã Ndiöxi, te vitna chi ñá túú-gã nchicú<sup>n</sup> nihnu-o nchaa nacuaá ní cáhá<sup>n</sup> ndii Moisés. <sup>27</sup> Te duha càhá<sup>n</sup>-í, chi núú tütú Yã Ndiöxi càchí-xi:

Yòhó ñaha ní nduu táhú vã cóó dêhe-xi ní cùu, vitna cana saa-n sã cùdãí iní-n cuéi vátá quini-gã-n ñasa càcu ñ<sup>n</sup> landú.

Te cuéi ní cuu táhú-n sã vã cóó dêhe-n ní cùu dico ío-gã titní dêhe-n còo dacúúxi xichí ní cuu táhú tnàhí sã cóó dêhe-xi.

Duha càchí-xi núú tütú-gã. <sup>28</sup> Te nchoo cué ñáyiú ndêcu ichi Xitohó Jesucristú vitna cùu-o datná ndii Isàác, chi ndii-án ní cacu ndii, chi mee Yã Ndiöxi ní cachí-gã sã cacú ndii. Te duca<sup>n</sup> sãtnahá-xi cùu nchoo chi ní nduu-o dêhe-gã vitna chi duca<sup>n</sup> ní cachí tucu-gã cunduu. <sup>29</sup> Te dêhe ndii Àgár ní nduu táhú tnàhí ndii sã cacú ndii ñuyúú-a, te ndii-án ní cuu úhú iní ndii ndii Isàác, te ndii Isàác-án chi Espiritú Yã Ndiöxi ní quide ní cacu ndii. Te duca<sup>n</sup> sãtnahá-xi cùu vitna, chi nchaa nchoo ñáyiú ndêcu ndihi Espiritú Yã Ndiöxi cúú úhú iní ñáhá ñáyiú xii-o. <sup>30</sup> Te núú tütú Yã Ndiöxi càchí-xi: “Chí nãucú<sup>n</sup> xichí xínú cuèchi ndihi dêhe-xi na nùhú-yu, chi dêhe xichí xínú cuèchi-án ñá túú nã níhí-dê nduu táhú-dê, chi mee-ni dêhe ñaha ndêcu vehe-xi nduu táhú-dê sã cuãñaha tãtã-dê”, duha càchí-xi núú tütú-gã. <sup>31</sup> Te nchoo cué ñáyiú ndêcu ichi Xitohó Jesucristú ñá túú-gã cúú-ó datná cúú dêhe ndii ní xínú cuèchi-án, chi ní cuu-o vitna datná cúú ndii ní nduu táhú nchaa sã ní sãñaha tãtã-xi-án. Te duca<sup>n</sup> ní cuu, chi Yã Ndiöxi ní dácãcu ñaha-gã xii-o cuëndá sã vã cãncicú<sup>n</sup> nihnu-gã-ó nchaa nacuaá ní cáhá<sup>n</sup> ndii Moisés.

## 5

*Canchicú<sup>n</sup> nihnu-ni-o ichi Xitohó Jesucristú*

<sup>1</sup> Te Xitohó Jesucristú ní quide-gã nacuaá vã cãní iní-ó sã nãnihí tãhú-ó te núu na cãncicú<sup>n</sup> nihnu-o nacuaá ní cáhá<sup>n</sup> ndii Moisés, te diu-ni duca<sup>n</sup> cãni iní-ó cùndecu-o te vã ngõo cãni iní-ó sã nãnihí tãhú-ó te núu na cãncicú<sup>n</sup> nihnu-o càda-o nacuaá ní cáhá<sup>n</sup>

ndii, chi núu duca<sup>n</sup> na càda-o te ío dandòho-o mee-o datná ní xóo ndoho-o cùtnahá vátá cùndecu-gã-ó ìchi-a.

<sup>2</sup> Te yúhú té Pãblú cuini-í sã cùndedòho-ndo ñ<sup>n</sup> tnúhu na càhá<sup>n</sup>-í-a. Te núu nchòhó cuãha-ndo señá ñ<sup>n</sup>-ndo cuëndá sã sãndáá iní-ndo nacuaá ní cachí ndii Moisés cada-ndo, te núu duca<sup>n</sup> na càda-ndo ña, te áú<sup>n</sup> nã cuu ndêcu-ndo ichi Xitohó Jesucristú te núu duca<sup>n</sup>. <sup>3</sup> Te dàtná ní cachí-í xii-ndo, te diu-ni duca<sup>n</sup> càhá<sup>n</sup> tucu-í vitna sã núu ndêda-ni càa ñ<sup>n</sup> téa na cuãha-dé señá ñ<sup>n</sup>-dé, te xini ñuhu-xi sã dàcúití tãu-dé cada-dé nchaa nacuaá ní cáhá<sup>n</sup> ndii Moisés. <sup>4</sup> Te nchaa nchòhó ñáyiú sãni iní sã ñá túú-gã cuèchi-xi ndêcu núú Yã Ndiöxi cuëndá sã nchicú<sup>n</sup> nihnu-ndo nchaa nacuaá ní cáhá<sup>n</sup> ndii Moisés, ñá túú-gã ndécú-ndo ndihi Xitohó Jesucristú, te ni Yã Ndiöxi ñá túú-gã cùndahú iní ñáhá-gã xii-ndo càda váha ñaha-gã. <sup>5</sup> Dico nchaa nchoo ñáyiú sãndáá iní ñáhá xii-gã cùdiu-o núú-gã, chi chindee ñaha Espiritú-gã xii-o, te ndêtu cahnu-ná-ó sáá nduu cùñaha núú Yã Ndiöxi xii-o sã cùdiu-o núú-gã. <sup>6</sup> Te nchoo cué ñáyiú ndêcu ndihi Xitohó Jesucristú ñ<sup>n</sup>-ni quide-xi cuéi na cuãha-o señá ñ<sup>n</sup>-o àdi vá cuãha-o, chi ñá túú chindee ñaha-xi xii-o nacuaá cundecu váha-o ndihi-gã. Te ñ<sup>n</sup>-dii díí-ni sã xini ñuhu-xi quindáá iní-ó Xitohó Jesucristú, te núu duca<sup>n</sup> na càda-o te cuu iní-ó cué tñaha ñáyiú-o.

<sup>7</sup> Te nchòhó ío váha quide-ndo ndêcu-ndo ichi Yã Ndiöxi ní cùu, te vitna cùñúhu-í sã ñá túú-gã sãndáá váha iní-ndó tnúhu-gã, te duca<sup>n</sup> quide-ndo chi ndêcu ñáyiú sãnu ichi ñaha xii-ndo ingá ichi. <sup>8</sup> Te ñá díú Yã Ndiöxi Yaa ní cáhá<sup>n</sup> ñáhá xii-ndo duca<sup>n</sup> ní cachí-gã cada-ndo sã vã quindáá-gã iní-ndó tnúhu-gã. <sup>9</sup> Te nchòhó xini-ndó sã núu luha levadurã ná quíhu yuchi te dãndaa-xi. Duca<sup>n</sup> sãtnahá-xi cùu ñáyiú dãndahú ñáhá xii-ndo, chi cuini-yu dàcúita nihnu ñáhá-yu xii-ndo nchaa-ndo. <sup>10</sup> Te yúhú cùtnúni ndáá iní-í sã Xitohó Jesucristú chindee ñaha-gã xii-ndo cuëndá sã ñá túú nãgã tnúhu quindáá iní-ndó, dico nchaa ñáyiú duca<sup>n</sup> dãndahú ñáhá xii-ndo nacháhu-yu núú Yã Ndiöxi nchaa sã quide-yu cuéi náí-gã ñáyiú cùu-yu.

<sup>11</sup> Te càchí tnúhu-í xii nchòhó ñáyiú ndêcu ndihi-í ichi Yã Ndiöxi sã núu dicó dãnêhé-ni-í ñáyiú sã cuãha-yu señá ñ<sup>n</sup>-yú dàtná ní cachí ndii Moisés ñá, te vã yõo cuu úhú iní ñáhá xii-í ní cùu, te ni vã túu úhú iní-yu cuëndá sã ní xihí Xitohó Jesucristú núú cùrúxi ní cùu. <sup>12</sup> Te nchaa ñáyiú dãsatu iní ñáhá xii-ndo sã cuãha-ndo señá ñ<sup>n</sup>-ndo, te váha-gã sã ná càdã-yu mée-yu ñ<sup>n</sup> tnúndòho, te ñá díú sã dúcã<sup>n</sup> cãnuichi ñáhá-yu xii-ndo cùndecu-ndo.

<sup>13</sup> Te nchòhó ñáyiú ndêcu ndihi-í ichi Xitohó Jesucristú diu-gã ní taunihnu ñaha-gã xii-ndo cuëndá sã vã cãncicú<sup>n</sup>



nihnu-gá-ndó nchaa nacuaa ní cáhá<sup>n</sup> ndí Moisés, dico vá cání iní-ndó sá sá dúcá<sup>n</sup> ní taunihnu ñaha-gã xii-ndo, te cuu-ni cada-ndo nãndi sá cuèhé sá dúhá véxi iní-ndó, dico cuu iní tnáhá-ndó ñ<sup>n</sup> ñ<sup>n</sup>-ndo te chindee tnáha-ndo. <sup>14</sup> Chi duca<sup>n</sup> cáhá<sup>n</sup> Yá Ndióxi sá cúú iní-ó cuè tnaha ñáiyu dàtná cúú iní-ó mée-o. Te núu duca<sup>n</sup> na càda-o, te quide-o nchaa nacuaa tàú-xi cada-o dàtná cáhá<sup>n</sup> nchaa tnúhu ní chídó tnúni ndí Moisés. <sup>15</sup> Te núu nchòhó cúú úhú iní tnáhá-ndó ndècu-ndo, te ñá túú quide váha-ndo te núu duca<sup>n</sup> quide-ndo, dico yúhú cáchí-í sá vá dúcá<sup>n</sup>-gã cada-ndo cundecu-ndo cuendá sá vá dácuíta nihnu tnáha-ndo.

*Nacuáa sàni iní ñáiyu ndècu ichi cuèhé ichi duha ndíhi nacuaa sàni iní ñáiyu ndècu ndíhi Espiritú Yá Ndióxi*

<sup>16</sup> Te na càchí tnúhu-í xii-ndo sá cáda-ndó nchaa nacuaa cuini méé Espiritú Yá Ndióxi cada-ndo, te duca<sup>n</sup> te dúcá<sup>n</sup>-gã iní-ndó càda-ndo nãndi nchaa sá cuèhé sá dúhá sàni iní méé-ndó. <sup>17</sup> Chi nchaa xiá<sup>n</sup> ñá túú tnáhá tnúhu-xi ndíhi Espiritú Yá Ndióxi. Te ñá-ni duca<sup>n</sup> quide Espiritú Yá Ndióxi, chi ñá túú tnáhá iní-xi nchaa sá cuèhé sá dúhá sàni iní-ndó. Te sá dúcá<sup>n</sup> ñá túú tnáhá tnúhu tnáha-xi xiá<sup>n</sup> ñá túú nihí ndéé-ndó càda-ndo ñ<sup>n</sup> sá váha sàni iní-ndó càda-ndo. <sup>18</sup> Te núu quide-ndo nchaa nacuaa sànu ichi ñaha Espiritú Yá Ndióxi, te ñá túú-gã táxi tnúni ñáhá nchaa tnúhu ní chídó tnúni ndí Moisés xii-ndo.

<sup>19</sup> Te nchaa ñáiyu xiní-yu nchaa nacuaa quide ñáiyu quide cuèhé quidé òhha. Te òhha quidé-yu: Cue téé cáhá<sup>n</sup> ndíhi-güedé ñáiyu ñáiyu te ñá díú ñáidíhi-güedé cúú-yu, te ñá-ni duca<sup>n</sup> xiquide cue ñáiyu ñáiyu, te nãndi-gã nchaa sá cuèhé sá dúhá cuáhá<sup>n</sup> véxi-yu quidé-yu. <sup>20</sup> Te quide cahnú-yu nchaa sá càchí-yu cùu ndiòxi te ñá ndáá sá ndiòxi cúú-xí, te quide nduu tnáha-yu, te cùu úhú iní tnáhá-yu, te nàa-yu, te cùu cuiñú tnáhá-yu, te ío yáchí cudéé<sup>n</sup>-yu, te ndúcú-yu mee-ni sá cúú-xí mée-yu, te ñá túú cùu ñ<sup>n</sup>nuú-yu cundecu-yu, te quide ñ<sup>n</sup> tnáhá-yu. <sup>21</sup> Te cùu cuedú iní-yu nchaa sá ndécú ndíhi dava-gá-yu, te sàhni tnáhá-yu, te ío quihú-yu, te ndí cuu ndí cúú-yu quidé-yu nchaa sá cuèhé sá dúhá, te nãndi-gã nchaa sá cuèhé sá dúhá quidé-yu. Te sa càchí tnúhu-í xii-ndo sá ncháá ñáiyu duca<sup>n</sup> xiquide vá ndúú tãhú-yu cundecu-yu núu ndécú Yá Ndióxi táxi tnúni-gã.

<sup>22</sup> Dico Espiritú Yá Ndióxi chindée ñaha-xi xii-o cuu iní tnáhá-ó, te cudí iní-ó ndècu-o, te ío váha cùu iní-ó, te càhnu iní-ó, te váha iní-ó, te cundahú iní tnáhá-ó, te quide ndáá-ó ndècu-o. <sup>23</sup> Te ndáhú iní-ó, te quide-o nchaa nacuaa tàú-ó càda-o, te nchaa xiá<sup>n</sup> chindée

ñaha Espiritú Yá Ndióxi quidé-ó, te núu duca<sup>n</sup> quide-o, te vá yòo ñ<sup>n</sup>-gã cáhá<sup>n</sup> sá ñá túú quide váha-o ndècu-o. <sup>24</sup> Te nchoo cuè ñáiyu ndècu ndíhi Xitohó Jesucristú, sa ñaha-o sá ní xihí-gã núu cùrúxi sá cuendá-ó, núu xiá<sup>n</sup> duu<sup>n</sup> duu<sup>n</sup> ní dáñá-ó nchaa ichi cuèhé ichi duha, te ñá túú-gã táxi tnúni ñáhá ní ñ<sup>n</sup> sá cuèhé sá dúhá sá ní xòo cani iní-ó ní cùu. <sup>25</sup> Te vitna ní ngundecu ndíhi-o Espiritú Yá Ndióxi chindée ñaha-xi, te xiní ñuhu-xi sá cáda-ó nacuaa sànu ichi ñaha Espiritú-gã cada-o.

<sup>26</sup> Te vá cáda càhnu-o mee-o, te vá ndúcú-ó plètú, te ní vá cúú cuedú iní-ó sá ndécú ndíhi tnaha ñáiyu-o.

## 6

### *Chindee tnáha-o ñ<sup>n</sup> ñ<sup>n</sup>-o*

<sup>1</sup> Te nchòhó ñáiyu ndècu ndíhi-í ichi Xitohó Jesucristú càchí tnúhu-í xii-ndo sá núu ñ<sup>n</sup> ñáiyu ndècu ndíhi-ndo ichi-gã ní quidé-yu ñ<sup>n</sup> sá ñá túú tàú-yu cada-yu núu-gã, te nchòhó ñáiyu quide váha ndècu ndíhi Espiritú Yá Ndióxi cáhá<sup>n</sup>-ndó dòho cue ñáiyu duca<sup>n</sup> xiquide-á<sup>n</sup> cuendá nucúnu ichí-yu, te vii vii cáhá<sup>n</sup> ndíhi-ndó-yu, te ío coto-ndo mée-ndo cuendá sá vá cáda-ndó ñ<sup>n</sup> sá ñá túú tàú-ndó càda-ndo núu-gã. <sup>2</sup> Te ío chindee tnáha-ndo, te cuáha tnáha-ndo tnúhu ndee iní cundecu-ndo cuendá nchaa sá váha-ndo. Te núu duca<sup>n</sup> na càda-ndo, te quide-ndo nchaa nacuaa ní cáhá<sup>n</sup> Xitohó Jesucristú cada-o.

<sup>3</sup> Te núu ío ñ<sup>n</sup>-ndo càchí-ndó sá ío váha quide-ndo ndècu-ndo ichi Yá Ndióxi te ñá ndáá ñá, te dicó dándahú-ndó mée-ndo sá dúcá<sup>n</sup> quide-ndo. <sup>4</sup> Te ndí dñ<sup>n</sup> ndí dñ<sup>n</sup> càda cuendá-ndó núu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudí iní-ndó sá cúú-xí mée-ndo, te vá cání iní-ndó sá quidé váha-gá-ndó dàcúúxi dàva-gá-yu. <sup>5</sup> Chi tàú-ó sá ndí dñ<sup>n</sup> ndí dñ<sup>n</sup> càda cuendá-ó nacuaa ndècu-o.

<sup>6</sup> Te nchaa nchòhó ñáiyu dàcuaha tnúhu Yá Ndióxi chindee-ndo cuè téé dàcuaha ñaha xii-ndo tnúhu-gã cuañaha-ndo nãndi sá xiní ñuhu-güedé.

<sup>7</sup> Te vá dándahú-ndó mée-ndo cundecu-ndo, chi vá cúú cùdiquí ndéé-ó Yá Ndióxi, chi nchòhó xiní-ndó sá núu na càda váha-o cundecu-o, te cùu-xi ñ<sup>n</sup> sá váha sá cúú-xí-ó, dico núu vá cáda váha-o ña, te ío ndoho-o te núu duca<sup>n</sup> na càda-o. <sup>8</sup> Te núu quide-o nchaa sá cuèhé sá dúhá sàni iní-ó, te ñá-ni xiá<sup>n</sup> dácuíta nihnu ñaha-xi xii-o, dico núu quide-o nchaa nacuaa sànu ichi ñaha Espiritú Yá Ndióxi xii-o, te cundecu ndíhi-o Yá Ndióxi ní caa ní quihí<sup>n</sup>. <sup>9</sup> Te xiní ñuhu-xi vá dáñá ndéé-ó càda váha-o cundecu-o, te duca<sup>n</sup> te sáá nduu càda váha ñaha Yá Ndióxi xii-o, te núu vá ná túhú iní-ó càda váha-o cundecu-o.

<sup>10</sup> Te cada-o sã vãha sã cúú-xí nchãa tnaha ñáyiu-o vitna ndecu-o ñuyíú-a, te ío-gá tàú-ó chĩndee-o cue ñáyiu ndècu ndihí-o ichi Xítohó Jesucristú.

*Tnúhu ndéé núú nĩ ndihí-ná*

<sup>11</sup> Te cundehe-ndo sã ndãa ndãa lètrã tèè-í núú tütú-a sã cúú-xí-ndó. <sup>12</sup> Te nchaa ñáyiu quide yicã sã cuãha-ndo sèñã ñii-ndo dàtnã ní cachí ndíi Moisés, ñáyiu-á<sup>n</sup> cúú-yu ñáyiu cuiní cudíu núú tnãha ñáyiu-xi. Te duca<sup>n</sup> quidé-yu cuendã sã vã ndóhõ-yu cuendã nchaa tnúhu sã dánèhé ñáhã sã ní xihí Xítohó Jesucristú núú cùrúxí. <sup>13</sup> Te ni ñáyiu sa ní ngũndecu ndihí sèñã ñii-xi ñã túú quidé-yu nchaa nacuáa ní cáhá<sup>n</sup> ndíi Moisés, dico mèé-yu cuiní-yu sã cuãha-ndo sèñã ñii-ndo. Te duca<sup>n</sup> quidé-yu chi quide cahnú-yu mèé-yu núú nchãa dava-gã ñáyiu. <sup>14</sup> Te yúhú chi ñã túú quide cahnu-í mèé-í cuendã nchaa sã quidé-í, chi mee-ni sã ío cùu vãha iní-í sã Xítohó Jesucristú ní xihí-gã núú cùrúxí cuendã-ó. Te díu cuendã sã ní xihí-gã ñã túú-gã ndécù-í ichi cuèhé ichi duha, te ni ñã túú-gã táxí tnúni ñáhã ni ñii<sup>n</sup> sã cuèhé sã dúhá xii-í. <sup>15</sup> Te ñã túú nã chĩndèe ñaha-xi xii-o cuéi na cuãha-o sèñã ñii-o àdi vã cuãha-o, chi ndècu ndihí-o Xítohó Jesucristú, te ní nduu-o dàtnã ñii<sup>n</sup> ñáyiu saa, te xiã<sup>n</sup> cúú-xí sã ío-gá xíní ñùhu-xi. <sup>16</sup> Te xicã<sup>n</sup> táhù-í núú Yã Ndióxi sã ncháã nchòhó ñáyiu quide nchaa nacuáa cáhá<sup>n</sup>-í-a cundecu nahi-ndo, nchòhó ñáyiu cùu cuendã Yã Ndióxi dàtnã ñáyiu israhél chi ñáyiu-á<sup>n</sup> ní cachí-gã sã cúú cuendã-gã. Te mee-gã ío cundãhú iní ñáhã-gã xii-ndo chĩndee ñaha-gã.

<sup>17</sup> Te není vitna cuiní-í sã vã yõo ñii<sup>n</sup>-gã chidácã nihnu ñaha xii-í cuendã chiú<sup>n</sup> quide-í, chi yayacã<sup>n</sup> sa ní nduu tũlòhó ñii-í cuendã sã ndóhõ-í cuendã Xítohó Jesucristú.

<sup>18</sup> Te nchòhó ñáyiu ndècu ndihí-í ichi Xítohó Jesucristú xicã<sup>n</sup> táhù-í núú-gã sã ío na chĩndee ñaha-gã xii-ndo nchãa-ndo. Te duca<sup>n</sup> na cùnduu. Te ío chí cádá ndèe iní-nã vitna.

## TUTÚ NÍ CADÚHA TĒ PĀBLÚ QUIHI<sup>n</sup> NDAHA ÑÁYIU ÑÚÚ ÉFESÚ

*Té Pāblú cadúha-dé tutú quihi<sup>n</sup> ndaha ñáyiú xĩndecu ichi Xítohó Jesucristú ndécú ñúú Éfesú*

<sup>1</sup> Yúhú té Pāblú ní tendaha ñaha Yá Ndióxi cáhá-í tnúhu Xítohó Jesucristú núú ñáyiú, chi duca<sup>n</sup> ní cachí Yá Ndióxi cunduu, te vitna cadúha-í tutú-a cuendá daquixi-í ndaha nchaá nchòhó ñáyiú cùu cuendá Yá Ndióxi xĩndecu ñúú Éfesú, te ñu-ni nchòhó cùú-ndó ñáyiú sàndáá iní ñáhá xii Xítohó Jesucristú.

<sup>2</sup> Te xicá<sup>n</sup> táhú-í núú Dütú Ndióxi Yáá cùú Tátá-ó, ndihi núú Xítohó Jesucristú ná chĩndee chítuu ñaha-gá xii-ndo, te duca<sup>n</sup> ndi nduú-gá ná cádá te ío váha cuu iní-ndó cundecu-ndo.

*Espirítú Yá Ndióxi chĩndee ñaha-xi xii-o chi ndecu ndihi-o Xítohó Jesucristú*

<sup>3</sup> Te cachí-ó sá ño càhnu cuu Yá Ndióxi Yáá cùú Tátá Xítohó Jesucristú, te ndéé andiu quide Yá Ndióxi nchaá sá váha sá cùú-xi-ó cuendá sá ndécú ndihi-o Espiritú-gá, te duca<sup>n</sup> quide-gá chi ndecu ndihi-o Xítohó Jesucristú. <sup>4</sup> Te ndéé cùtnàhá vátá ngáva-gá ñáyiú ní cachí Yá Ndióxi sá nchóó cùu-o ñáyiú cùu cuendá-gá, te duca<sup>n</sup> ní cachí-gá sá cuendá Xítohó Jesucristú cuendá sá nchóó cùu-o ñáyiú ñá túú tnàhí ná cumání cundecu núú-gá, te duca<sup>n</sup> te vá cundecu cuéchi-o.

<sup>5</sup> Te Yá Ndióxi ío cùu iní ñáhá-gá xii-o núú xiá<sup>n</sup> duca<sup>n</sup> ní cachí-gá ndéé cùtnàhá vátá ngáva-gá ñáyiú sá nchóó ndùu-o déhe-gá. Te sá cuendá nchaá sá cádá Xítohó Jesucristú sá cùú-xi-ó, xiá<sup>n</sup> duca<sup>n</sup> ní cachí Yá Ndióxi, te duca<sup>n</sup> ní cachí-gá chi duca<sup>n</sup> tnàhí ní sani iní-gá cunduu. <sup>6</sup> Te xiá<sup>n</sup> núú xini ñuhu-xi sá nchóó càchí-ó sá ño càhnu cuu Yá Ndióxi, chi ío cundahú iní ñáhá-gá chĩndee ñaha-gá xii-o. Te duca<sup>n</sup> quide-gá chi ndecu ndihi-o Xítohó Jesucristú Yáá ío cùu iní-gá. <sup>7</sup> Te Yá Ndióxi ío cùu iní ñáhá-gá xii-o núú xiá<sup>n</sup> Xítohó Jesucristú ní satí ñíhí-gá te ní xihí-gá cuendá dacácu nihnu ñaha-gá xii-o núú úhú núú ndàhú, te duca<sup>n</sup> càda cahnu iní-gá nchaá yicá cuéchi-o. <sup>8</sup> Te Yá Ndióxi ío cundahú iní ñáhá-gá chĩndee ñaha-gá xii-o, nàcuáa ngũndecu ndihi-o nchaá sá xini tnúni-ó te duca<sup>n</sup> te cuu-o ñáyiú tēcú tnúni. <sup>9</sup> Te Yá Ndióxi ní dánèhè ñáhá-gá xii-o nchaá sá nduú yùhu, nchaá sá ní sani iní-gá cada-gá. Te duca<sup>n</sup> ní quide-gá chi duca<sup>n</sup> ní sani iní-gá cunduu. <sup>10</sup> Te sá ní sani iní-gá cada-gá te dacutíí sá cádá-gá ná sáá nduu, te na sáá

nduu-á<sup>n</sup> te mee-gá cada sá Xítohó Jesucristú quindaha-gá nchaá sá ío andiu, ndihi nchaá sá ío ñuyúú-a.

<sup>11</sup> Tenchoo ní nduu táhú-ó ní nduu-o ñáyiú cùu cuendá Yá Ndióxi chi ndecu ndihi-o Xítohó Jesucristú. Te duca<sup>n</sup> ní cuu chi duca<sup>n</sup> tnàhí ní sani iní Yá Ndióxi cunduu. Te nchaandi túhú sá quidé-gá, quide-gá nàcuáa sàni iní mée-gá cunduu. <sup>12</sup> Te duca<sup>n</sup> ní cuu cuendá sá nchùhú ñáyiú díhna nuu ní sàndáá iní tnúhu Xítohó Jesucristú cáhá<sup>n</sup>-ndí sá ío càhnu cuu mee Yá Ndióxi cuendá nchaá sá váha quide-gá. <sup>13</sup> Te nchòhó tucu cùtnàhá ní xĩndedòho-ndo tnúhu ndáá tnúhu sá cáhá<sup>n</sup> nàcuáa naníhí táhú-ó ní cuu ñ<sup>n</sup>nuu-ndo ndihi Xítohó Jesucristú chi ní sàndáá iní-ndó-gá. Te xiá<sup>n</sup> cùtnúni sá nchòhó ní nduu-ndo ñáyiú cùu cuendá Yá Ndióxi, chi ní ngũndecu ndihi-ndo Espiritú-gá sá ní cachí-gá taxi-gá. <sup>14</sup> Te sá ndécú ndihi-o Espiritú Yá Ndióxi xiá<sup>n</sup> cùtnúni sá ndáá nduu táhú-ó cundecu-o ndihi-gá ná sáá nduu nàcuaca ñaha-gá xii nchaá nchoo ñáyiú cùu cuendá-gá, te sá dúcá<sup>n</sup> càda-gá núu xiá<sup>n</sup> taù-ó càchí-ó sá ño càhnu cuu-gá.

*Té Pāblú xicá<sup>n</sup> táhú-dé núú Yá Ndióxi cuendá cue ñáyiú ndecu ichi-gá*

<sup>15</sup> Te yúhú nihí-í tnúhu sá nchòhó ío váha sàndáá iní-ndó Xítohó Jesucristú, te nchaá ñáyiú cùu cuendá Yá Ndióxi ío cùu iní-ndó-yu. <sup>16</sup> Te xiá<sup>n</sup> núú ñá túú dáña ndéé-í ndácá<sup>n</sup> táhú-í núú-gá cuendá-ndó, te ío xicá<sup>n</sup> táhú-í <sup>17</sup> núú Yá Ndióxi Yáá cùú Tátá Xítohó Jesucristú cuendá-ndó. Te ñu-ni Yá Ndióxi cùú-gá Yáá ío càhnu cuu. Te xicá<sup>n</sup> táhú-í núú Yá Ndióxi sá mée-gá ná cádá sá Espiritú-gá chĩndee ñaha-xi xii-ndo cuendá cuu-ndo ñáyiú tēcú tnúni, te na càda-xi sá cùtnúni iní-ndó nàcuáa sàni iní Yá Ndióxi. <sup>18</sup> Te duca<sup>n</sup> xicá<sup>n</sup> táhú-í núú Yá Ndióxi cuendá-ndó, cuendá sá nchòhó tecú tnúni-ndo nàcuáa nduu tnúhu ndee iní ní taxi-gá ní ngũndecu ndihi-ndo cùtnàhá ní cáhá<sup>n</sup> ñáhá-gá xii-ndo. Te duca<sup>n</sup> cùtnúni tucu iní-ndó sá ncháá sá ní cachí-gá taxi-gá nduu táhú nchoo cue ñáyiú cùu cuendá-gá cùú-xi mée cuí-ni sá ío-gá váha. <sup>19</sup> Te cùtnúni tucu iní-ndó sá Yá Ndióxi ío càhnu cuu-gá quidé-gá nchaá núú sá váha sá cùú-xi nchòo ñáyiú sàndáá iní ñáhá-xi-gá, chi quide-gá sá vā yòo tnàhí ndàcu cada sá cùú-xi-ó dátá ní quide-gá <sup>20</sup> ní dándótó-gá Xítohó Jesucristú cùtnàhá ní xihí-gá. Te ní taxinucóo-gá Xítohó Jesucristú xio cùha-gá táxi tnúni-gá. <sup>21</sup> Te Xítohó Jesucristú ío-gá cùnúu-gá dácúúxi nchaá núú cue espiritú, ndihi dácúúxi nchaá cue tée yĩndaha ñáyiú, ndihi dácúúxi nchaá dava-gá cue tée cùnuu. Te cuéi vitna te cuéi ndéé núú cuahá<sup>n</sup> núú vèxi duca<sup>n</sup>-ní ío cunuu-gá taxi tnúni-gá. <sup>22</sup> Te mee Yá Ndióxi ní quide-gá sá Xítohó Jesucristú taxi tnúni-gá nchaandi túhú sá ío, te

diu-ni mee Yá Ndiöxí ní cachí-gá sá ncháá ñáyiú cùu cuendá-gá quindaha ñaha Xítohó Jesucristú. <sup>23</sup> Te cada iní-ó sá ncháá ñáyiú cùu cuendá Yá Ndiöxí cùu-yu yiqui cùñú Xítohó Jesucristú, chi ññ-ni cùu-yu ndihí-gá, te mee-gá táxi tnúni-gá nchaandi tühú sá ío.

## 2

*Yá Ndiöxí ío cùndahú iní ñhá-gá xii-o núu xíá<sup>n</sup> ní dácácu nihnu ñaha-gá*

<sup>1</sup> Te nchòhó cùu-ndó dàtná ñáyiú ní xihí cuendá nchaa sá cuèhé sá dúhá quide-ndo ni cuu, dico vitna cada iní-ndó sá dàtná ní ndoto-ndo chi ní nduu táhú-ndó cùndecu-ndo ndihí Yá Ndiöxí ní caa ní quíhí<sup>n</sup>.

<sup>2</sup> Te duca<sup>n</sup> ní xíndecu-ndo ichi cuehé ichi duha, chi ní cáncicú<sup>n</sup> nihnu-ndo ncháa sá cuèhé sá dúhá ío ñuyú-a, te ní xóo cada-ndo ncháa nacuaá cáh<sup>n</sup> sácúíhná, te diu-ni sácúíhná-á<sup>n</sup> táxi tnúni-xi nchaa daga-gá espíritú cùndihí-xi, te diu-ni-xi ndècu ndihí-xi nchaa ñáyiú ñá túu cuñí tññi tnúhu cáh<sup>n</sup> Yá Ndiöxí, te dachá<sup>n</sup> ñhá-xí xii-yu cuendá cundecu-ni-yu ichi cuehé ichi duha.

<sup>3</sup> Te nchaa-o dùca<sup>n</sup> ní xóo cada-o dàtná quidé cue ñáyiú-á<sup>n</sup>, chi ní xóo cada-o ncháa sá cuèhé sá dúhá ní xóo caní iní-ó, te nándi-gá nchaa sá cuèhé sá dúhá ní xóo cahu iní-ó ní xóo cada-o, núu xíá<sup>n</sup> táu-ó sá dándòho ñaha Yá Ndiöxí xii-o ní cùu datná táu-xi dándòho-gá nchaa ñáyiú duca<sup>n</sup> ndècu ichi cuehé ichi duha-á<sup>n</sup>.

<sup>4</sup> Te Yá Ndiöxí ío cùu iní ñhá-gá xii-o núu xíá<sup>n</sup> ní cùndahú iní ñhá-gá xii-o <sup>5</sup> cuéi cùu-o datná ñáyiú ní xihí sá cuendá nchaa sá cuèhé sá dúhá quide-o ni cuu. Te duca<sup>n</sup> ní quide-gá ní cundahú iní ñhá-gá xii-o cuendá cundecu-o ndihí Xítohó Jesucristú vitna, te cuu ññ-nuu-o ndihí-gá. Te sá cuendá-ni sá cùndahú iní ñhá Yá Ndiöxí xii-o xíá<sup>n</sup> ní quide-gá nacuaá nchoo naníhí táhú-ó.

<sup>6</sup> Te cada iní-ó sá dàtná ní quide Yá Ndiöxí cùtnàh<sup>n</sup> ní dándòto-gá Xítohó Jesucristú cùtnàh<sup>n</sup> ní xihí-gá duca<sup>n</sup> ní quide ñaha-gá xii-o chi ndècu-o ndihí-gá vitna. Te Xítohó Jesucristú sa ndècu-gá andiu núu ndécú Yá Ndiöxí. Te cada iní-ó sá Yá Ndiöxí sa ní quide-gá sá nchóo ní ngúndecu túu-o ndihí Xítohó Jesucristú, chi ío váha ndècu-o vitna.

<sup>7</sup> Te Yá Ndiöxí quidé váha ñaha-gá xii-o vitna cuendá sá ná sàa nduu, te diu-ni mee-gá cada te cutnùni iní nchaa ñáyiú sá ío cùu iní ñhá-gá xii-o, te duca<sup>n</sup> ío chindee chítúu ñaha-gá xii-o cuendá sá ndécú ndihí-o Xítohó Jesucristú. <sup>8</sup> Te Yá Ndiöxí ío cùndahú iní ñhá-gá xii-ndo núu xíá<sup>n</sup> ní quide-gá sá nchóhó naníhí táhú-ndó. Te duca<sup>n</sup> ní quide-gá chi ní sándáá iní-ndó-gá. Te ñá díú sá cuendá ññ<sup>n</sup> chiú<sup>n</sup> ní quide-ndo duca<sup>n</sup> ní naníhí táhú-ndó, chi mee Yá Ndiöxí ní cuini-gá sá dicó-ni duca<sup>n</sup> naníhí táhú-ndó.

<sup>9</sup> Te mee Yá Ndiöxí ní cachí-gá sá ñá díú cuendá ññ<sup>n</sup> chiú<sup>n</sup> quide-o naníhí táhú-ó, te duca<sup>n</sup> ní cachí-gá cuendá sá vá cáda cáhnu-o mee-o. <sup>10</sup> Te Yá Ndiöxí ní quide ñaha-gá xii-o dàtná ññ<sup>n</sup> ñáyiú saa cuendá sá ní tnahá tnúhu-o ndihí Xítohó Jesucristú, te duca<sup>n</sup> ní quide-gá cuendá sá cáda-ó mée-ni sá váha. Te Yá Ndiöxí duca<sup>n</sup> tñhí ní saní iní-gá cunduu sá nchóo cùu-o ñáyiú cada mee-ni sá váha.

*Xítohó Jesucristú quidé-gá ío váha cùu iní-ó ndècu-o*

<sup>11</sup> Te nchòhó chí dándàcu iní nacuaá ní xíndecu-ndo ni cùu, chí ñá túú cùu-ndo ñáyiú isráél, te ní ñá túú quide-ndo datná quidé ñáyiú-á<sup>n</sup>, chí ñáyiú-á<sup>n</sup> sáha-yu sèñá ññ<sup>n</sup>-yu, te dáquee tihú-yu nchaa ñáyiú ñá túú ndècu seña ññ-xi. <sup>12</sup> Te chí dándàcu iní nacuaá ní xíndecu-ndo, chí dàv<sup>n</sup>-á<sup>n</sup> ñá túú ní xíndecu-ndo ndihí Xítohó Jesucristú, te ní ñá túú ní xóo cuu tnahá tnúhu-ndo ndihí ñáyiú isráél, te ní ñá túú ní xini tnúni-ndó nacuaá nduu tnúhu sá ní cáh<sup>n</sup> ndáá Yá Ndiöxí nacuaá cada váha-gá ñáyiú, te ní ñá túú ní cùu-ndo ñáyiú quindaha-gá, te ní ñá túú ní xóo níhí-ndó tnúhu ndee iní sá cùndecu-ndo ndihí-gá.

<sup>13</sup> Te cuéi ní cuu-ndo ñáyiú ñá túú tñh<sup>n</sup>á tnúhu ndihí Yá Ndiöxí ní cùu, dico vitna ní tñh<sup>n</sup>á tnúhu-ndo ndihí-gá chí cùu ññ-nuu-ndo ndihí Xítohó Jesucristú, cuendá sá ní sati níñí-gá te ní xihí-gá te xíá<sup>n</sup> duca<sup>n</sup> tñh<sup>n</sup>á tnúhu-ndo ndihí Yá Ndiöxí vitna.

<sup>14</sup> Te Xítohó Jesucristú ní quide-gá sá nchóo ío váha cuu iní-ó cùndecu-o, te diu-ni-gá ní quide cuendá sá vá dáquee tihú ñhá ñáyiú isráél xii ñáyiú ñá túú cùu ñáyiú isráél, te duca<sup>n</sup> ññ-ná cuú-yu cundecú-yu.

<sup>15</sup> Te sá ní xihí Xítohó Jesucristú, xíá<sup>n</sup> ñá túú-gá cùnùu nchaa tnúhu sá sánú ichi ñaha xii ñáyiú nacuaá cada-yu cundecú-yu ní cùu. Te duca<sup>n</sup> ní xihí Xítohó Jesucristú cuendá sá cue ñáyiú isráél ndihí cue ñáyiú ñá túú cùu ñáyiú isráél ññ-ná cuú-yu cundecú-yu ichi-gá, te duca<sup>n</sup> te vá dáquee tihú tñh<sup>n</sup>á-gá-yu, te ío váha cundecu ndihí tñh<sup>n</sup>á-gá-yu.

<sup>16</sup> Te duca<sup>n</sup> ní quide Xítohó Jesucristú ní xihí-gá núu cùrúxi cuendá sá cue ñáyiú cùu ñáyiú isráél ndihí cue ñáyiú ñá túú cùu ñáyiú isráél vá dáquee tihú tñh<sup>n</sup>á-gá-yu. Te duca<sup>n</sup> ní xihí-gá cuendá ññ-ná cuú-yu tñh<sup>n</sup>á tnúhu-yu ndihí Yá Ndiöxí nacuaá cuu váha iní ñhá-gá xii-yu.

<sup>17</sup> Te cuéi cùu-ndo ñáyiú ñá túú tñh<sup>n</sup>á xini ndáá cuendá Yá Ndiöxí ní cùu, dico Xítohó Jesucristú ní quixi-gá ñuyú-a ní cáh<sup>n</sup>-gá tnúhu váha nacuaá ío váha cuu iní-ndó cùndecu-ndo ndihí Yá Ndiöxí. Te diu-ni duca<sup>n</sup> ní quide-gá sá cùu-xi ncháa ñáyiú sa xini cuendá Yá Ndiöxí, diu-ni ñáyiú isráél. <sup>18</sup> Te cuéi cùu-o ñáyiú isráél ádi ñá túú cùu-o dico

diu-ni mee Xítóhó Jesucristú ní quide-gá sá ncháá-ó tñahá tnúhu-o ndíhi Dútú Ndióxi Yáa cúu Tátá-ó. Te duca<sup>n</sup> ní tñahá tnúhu-o ndíhi Yá Ndióxi chí ní ngúndecu ndíhi-o Espíritú-gá. <sup>19</sup> Te nchóhó ñáyiú ñá túú cùu ñáyiú isráel ní cuu-ndo ñáyiú ñá túú cùu tñahá tnúhu ndíhi Yá Ndióxi ní cùu, dico vitna chí ñ<sup>n</sup>-ná ní cuu-ndo ndíhi nchaa dava-gá ñáyiú cùu cuendá-gá chí cùu-ndo déhe-gá. <sup>20</sup> Te cada ini-ó sá cuè téé ní táuchíú<sup>n</sup> Xítóhó Jesucristú cáhá<sup>n</sup> tnúhu-gá, ndíhi cue téé ní xóo cáhá<sup>n</sup> tnúhu Yá Ndióxi ndéé sanaha cùu-güedé dátá ná cimientú ñ<sup>n</sup> vehe, te nchóhó cúú-ndó dátá ná ndóhó sá sáá vehe-á<sup>n</sup>, te cada tucu ini-ó sá Xítóhó Jesucristú cúú-gá ñ<sup>n</sup> yúú cúnúu cuu cimientú vehe-á<sup>n</sup>. <sup>21</sup> Te duca<sup>n</sup> ío váha cùu ñ<sup>n</sup>nuu nchaa ndóhó-á<sup>n</sup> ndíhi yúú cúnúu-á<sup>n</sup>, te duca<sup>n</sup> tucu ío váha ta queé tñahá nchaa ndóhó-á<sup>n</sup> cuúsaá. Te xiá<sup>n</sup> cada ini-ó sá cúú-xí vèhe Yá Ndióxi, vehe sá ío ní cuu íí. Te duca<sup>n</sup> sátnahá-xí cùu nchaa ñáyiú ndècu ichi Xítóhó Jesucristú chí ní tñahá tnúhu-yu ndíhi-gá, te ñ<sup>n</sup> nduu ñ<sup>n</sup> nduu ta cùu víi cuu váha-gá-yu núú Yá Ndióxi cuáhá<sup>n</sup>. <sup>22</sup> Te tñahá nchóhó duca<sup>n</sup> sátnahá-xí cùu-ndo chí ní ngúndecu ndíhi-ndo Xítóhó Jesucristú, te duca<sup>n</sup> ta cùu víi cuu váha tucu-ndo núú Yá Ndióxi cuáhá<sup>n</sup>, te cùu-ndo dátá vehe Yá Ndióxi chí ndècu ndíhi-ndo Espíritú-gá.

### 3

*Té Páblú yíhi díquí-dé cáhá<sup>n</sup>-dé tnúhu Xítóhó Jesucristú núú ñáyiú ñá túú cùu ñáyiú isráel*

<sup>1</sup> Te yúhú té Páblú yíhi-í vecaá sá cuendá sá cáhá<sup>n</sup>-í tnúhu Xítóhó Jesucristú núú nchóhó ñáyiú ñá túú cùu ñáyiú isráel, núu xiá<sup>n</sup> diu cuendá-gá duha yíhi-í vecaá vitna. <sup>2</sup> Te nchóhó sa náha-ndo sá Yá Ndióxi ní cundáhú ini ñáhá-gá xii-í, te ní cachí-gá sá yúhú quíhi díquí-í cáhá<sup>n</sup>-í tnúhu Xítóhó Jesucristú núú-ndó, te cuendá sá cáhá<sup>n</sup>-í tnúhu-gá núú-ndó te cuu-xi sá váha sá cúú-xí-ndó. <sup>3</sup> Te yúhú sa ní cachí tnúhu-í xii-ndo lùha nacuaá ndúu tnúhu ndúu yuhu ní cuu, sá ní cachí tnúhu Yá Ndióxi xii-í. <sup>4</sup> Te òré dàcaha-ndo tnúhu ndúu yuhu-á<sup>n</sup> ní cùu te quini-ndó sá yúhú tècú tnúú-í nacuaá ndúu tnúhu-á<sup>n</sup>, te tnúhu-á<sup>n</sup> cáhá<sup>n</sup>-xi cuendá Xítóhó Jesucristú. <sup>5</sup> Te tnúhu-á<sup>n</sup> cúú-xí tnúhu sá vā yóo tñahí xini ní cùu, dico cue téé ní táuchíú<sup>n</sup> Xítóhó Jesucristú cáhá<sup>n</sup> tnúhu-gá, ndíhi cue téé cáhá<sup>n</sup> nacuaá dàcaha ini ñáhá Yá Ndióxi ní níhi-güedé tnúhu ndúu yuhu-á<sup>n</sup>, chí Espíritú Yá Ndióxi ní xáha<sup>n</sup>-xi xii-güedé. <sup>6</sup> Te duha cáhá<sup>n</sup> tnúhu ndúu yuhu-á<sup>n</sup> ní cùu: “Cuéi ñáyiú ñá túú cùu ñáyiú isráel te cuéi ñáyiú cùu ñáyiú isráel dico ñ<sup>n</sup>-ní ndúu táhú-yu sá váha núú Yá Ndióxi, te núu na quindáá ini-yu tnúhu sá cáhá<sup>n</sup> nacuaá naníhi táhú-yu, te ñ<sup>n</sup>-ná cúú-yu cundecú-yu, te duca<sup>n</sup> ñ<sup>n</sup>-ní

cada váha ñaha Yá Ndióxi xii-yu te núu na cundecu ndíhi-yu Xítóhó Jesucristú”, duha ndúu tnúhu ndúu yuhu-á<sup>n</sup> ní cùu.

<sup>7</sup> Te Yá Ndióxi ní cundáhú ini ñáhá-gá xii-í ní taxi-gá chiu<sup>n</sup> quide-í cáhá<sup>n</sup>-í tnúhu-gá, te mee-gá quide-gá sá yúhú ndacu-í cáhá<sup>n</sup>-í tnúhu-gá. <sup>8</sup> Te nchaa ñáyiú cùu cuendá Yá Ndióxi cúú-yu ñáyiú ío-gá cúnúu cada-yu chiu<sup>n</sup>-gá dàcúúxí yúhú, te cuéi duca<sup>n</sup> dico Yá Ndióxi ní cundáhú ini ñáhá-gá xii-í ní taxi-gá chiu<sup>n</sup> quide-í cáhá<sup>n</sup>-í tnúhu-gá núu cuè ñáyiú ñá túú cùu ñáyiú isráel. Te tnúhu-gá-á<sup>n</sup> cáhá<sup>n</sup>-xi sá súúni ío váha cada ñaha Xítóhó Jesucristú xii-o. <sup>9</sup> Te duca<sup>n</sup> ní cachí Yá Ndióxi sá cáhá<sup>n</sup>-í tnúhu-gá cuendá danèhé-í nchaa ñáyiú. Te sá danèhé-í-yu-á<sup>n</sup> cúú-xí tnúhu ndúu yuhu sá ní sani ini-gá ndéé sanaha nacuaá cada váha-gá cue ñáyiú. Te ndéé dává-á<sup>n</sup> ní qesaha ndúu yuhu tnúhu-á<sup>n</sup> ní cùu. Te diu-ni-gá cúú-gá Yáa ní cadúha nchaandi túhú sá ío. <sup>10</sup> Te duca<sup>n</sup> ndúu yuhu tnúhu-á<sup>n</sup> ní cùu cuendá sá ncháá espíritú cúnúu ndecu andú quini-xí vitna nacuaá quide nchaa ñáyiú ní tuha ñaha xii Yá Ndióxi cuendá duca<sup>n</sup> cútñuni ini-xí sá ío váha cútñuni ini-gá nacuaá cada-gá. <sup>11</sup> Te Yá Ndióxi ní sani ini-gá ndéé sanaha nacuaá ní cuini-gá cada Xítóhó Jesucristú, te ní sáá nduu ní quide Xítóhó Jesucristú nacuaá ní cuini Yá Ndióxi cada-gá. <sup>12</sup> Te vitna cüyí-o cáhá<sup>n</sup> ndíhi-o Yá Ndióxi cuendá sá ndécú ndíhi-o Xítóhó Jesucristú, te sàndáá ini-ó-gá. <sup>13</sup> Te núu xiá<sup>n</sup> cáhá<sup>n</sup>-í dóhó-ndo sá cuéi duha ndóhó-í vitna dico vā ná túhú ini-ndó cànchicú<sup>n</sup> nihnu-ndo ichi Xítóhó Jesucristú. Te sá dúhá ndóhó-í te cùu-xi sá váha sá cúú-xí-ndó, chí cuu-ndo ñáyiú cùu cahnu núú Yá Ndióxi.

*Xítóhó Jesucristú ío cùu ini ñáhá-gá xii-o*

<sup>14</sup> Te sá cuendá nchaa sá ní sani ini Dútú Ndióxi quide-gá xiá<sup>n</sup> yúhú ngúñí xiti-í núú-gá cáhá<sup>n</sup> ndíhi-í-gá, te diu-ni-gá cúú Yáa cúú Tátá Xítóhó Jesucristú. <sup>15</sup> Te mee Yá Ndióxi ní cachí-gá sá ncháá espíritú ndécú andú cunduu-xi dátá ní cachí mee-gá cunduu-xi. Te ní cachí tucu-gá sá nchóo cùu-o ñáyiú, te cunduu-o dátá ná cuini mee-gá cunduu-o. <sup>16</sup> Te xicá<sup>n</sup> táhú-í núú Dútú Ndióxi sá Espíritú-gá ná cáhá<sup>n</sup> nacuaá cuita níhi ndéé-gá-ndó quíhi<sup>n</sup> cundecu-ndo ichi-gá, te duca<sup>n</sup> xicá<sup>n</sup> táhú-í núú-gá cada Espíritú-gá chí ío cahnu cuu-gá. <sup>17</sup> Te xicá<sup>n</sup> táhú tucu-í núú Yá Ndióxi sá Xítóhó Jesucristú ná cundecu ndíhi ñaha-ni-gá xii-ndo chí sàndáá ini-ndó-gá, te duca<sup>n</sup> te vā dáñá ndéé-ndó ío cuu ini tñahá-ndó. <sup>18</sup> Te xicá<sup>n</sup> táhú tucu-í núú Yá Ndióxi cuendá-ndó ndíhi cuendá dava-gá ñáyiú cùu cuendá-gá, cuendá sá cútñuni ini-ndó sá súúni cùu ini ñáhá Xítóhó Jesucristú xii-o. <sup>19</sup> Te duha xicá<sup>n</sup> táhú-í núú Yá Ndióxi chí cuini-í sá ncháá-ndó tècú

tnùnì-ndó sá ïo cùu iní ñáhá Xítohó Jesucristú xii-o cuèi vá ndácú cáva-o quini-ó nàcuáa cùu iní ñáhá-gã xii-o. Te xicá<sup>n</sup> táhú tùcu-í núú Yá Ndióxi sá ïo na cùndecu ndihi ñaha-gã xii-ndo, te duca<sup>n</sup> càncicú<sup>n</sup> nihnu-ndo càda-ndo nchaa nacúáa quide mee-gã.

<sup>20</sup> Te Yá Ndióxi ïo-gã vai sá ndácú-gã táxi-gã dàcúúxi sá xicá<sup>n</sup>-ó núú-gã, te cuèi ndéé nchaa sá ñá túú sàni iní-ó ñihí-ó te tàxi-gã, te duca<sup>n</sup> chi mee-gã ndécú ndihi ñaha-gã xii-o, te ndàcu-gã quidé-gã náandi sá váha sá cúu-xí-ó. <sup>21</sup> Te vitna nchaa nchoo ñáyiú ndècu ichi Xítohó Jesucristú chí ná càchí-ó sá ïo càhnu cuu Yá Ndióxi, te duca<sup>n</sup>-ni càhá<sup>n</sup>-ó sá ïo càhnu cuu-gã ni caa ni quíhí<sup>n</sup> chi ndècu ndihi-o Xítohó Jesucristú. Te duca<sup>n</sup> na cùnduu.

#### 4

*Espíritú Yá Ndióxi quidé-xí cùu ñ<sup>n</sup>nuu-o ndecu-o*

<sup>1</sup> Te yúhú té Páblú yíhí-í vecaá sá cuèndá Xítohó Jesucristú, te càhá<sup>n</sup> ndàhú-í núú-ndó sá cádá váha-ndo cùndecu-ndo datná tàù-xi cada cue ñáyiú ni càhá<sup>n</sup> Yá Ndióxi cundecu ndihi-gã. Te nchóhó tnáhá-ndó cùu-ndo ñáyiú ní càhá<sup>n</sup> ñáhá Yá Ndióxi cundecu ndihi-gã. <sup>2</sup> Te vá cádá càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó nàcuáa duca<sup>n</sup> cùndee iní-ndó núu ná cúu sá cùmáni núú tnáhá-ndó. <sup>3</sup> Te ïo nducu ndèe-ndo cuu ñ<sup>n</sup>nuu-ndo cundecu-ndo, chi Espíritú Yá Ndióxi chindee ñaha-xi xii-ndo, te duca<sup>n</sup> ïo váha cuu iní-ndó cùndecu-ndo chi cùu ñ<sup>n</sup>nuu-ndo. <sup>4</sup> Te nchoo ñáyiú ndècu ichi Xítohó Jesucristú ñ<sup>n</sup>-ni cùu-o, te duca<sup>n</sup> ñ<sup>n</sup>-ni Espíritú Yá Ndióxi ndécú, te ñ<sup>n</sup>-ni duca<sup>n</sup> ñ<sup>n</sup>-ni tnúhu ndee iní ní ngùndecu ndihi-o cùtnáhá ní càhá<sup>n</sup> ñáhá Yá Ndióxi xii-o. <sup>5</sup> Te ñ<sup>n</sup>-ni Xítohó Jesucristú ndécú tàxi tnuni ñáhá-gã xii-o, te ñ<sup>n</sup>-ni cùu-o sandáá iní-ó tnúhu-gã, te ñ<sup>n</sup>-ni ní sandute-o. <sup>6</sup> Te ñ<sup>n</sup>-ni Dùtú Ndióxi cúu Yáá cúu Tátá-ó nchàa-o, te ñ<sup>n</sup>-ni gá cùnùu-gã yíndàha ñaha-gã xii-o nchàa-o. Te Yá Ndióxi dácàhá<sup>n</sup>-gã iní-ó quide-o chiú<sup>n</sup>-gã, te duca<sup>n</sup> ndècu ndihi ñaha-gã xii-o nchàa-o.

<sup>7</sup> Te nchoo ndí dí<sup>n</sup> ndí dí<sup>n</sup> chindee ñaha Yá Ndióxi xii-o quide-o nacúáa nduu chiú<sup>n</sup> ní cachí Xítohó Jesucristú cada-o. <sup>8</sup> Te quèe ndáá-xi nàcuáa càhá<sup>n</sup>-xi núú tùtú Yá Ndióxi núú càchí-xi:

Xítohó Jesucristú cuánda-gã andiu te ïo cùnuu-gã,

chi nchaa cue espíritú cúu úhú iní ñáhá xii-gã ñá túú ní ndàcu-xi naá ndihi ñaha-xi xii-gã,

te mee-gã ní cachí-gã nàcuáa nduu chiú<sup>n</sup> nduu táhú ñ<sup>n</sup> ñáyiú cadá-yu.

Duha càchí-xi núú tùtú-gã.

<sup>9</sup> Te sá dúcá<sup>n</sup> càhá<sup>n</sup>-xi sá cuánda-gã andiu xiá<sup>n</sup> cùtnùnì iní-ó sá ní cuu<sup>n</sup>-gã ñuyúyú-a.

<sup>10</sup> Te Xítohó Jesucristú ní cuu<sup>n</sup>-gã ñuyúyú-a, te ñ<sup>n</sup>-ni gá cuánda-gã andiu cuèndá ïo cunuú-gã taxi tnùnì-gã nchaandi túhú sá ïo. <sup>11</sup> Te ní dácàhñu-gã cue téé xínu cuechi núú-gã ñ<sup>n</sup> ñ<sup>n</sup> núú chiú<sup>n</sup> cada-güedé.

Te ní cachí-gã sá dáva-güedé càhá<sup>n</sup>-güedé tnúhu-gã, te dáva-güedé ní cachí-gã sá càhá<sup>n</sup>-güedé nàcuáa dàcahu iní ñáhá Yá Ndióxi xii-güedé. Te dáva-güedé ní cachí-gã sá cúu-güedé cue téé datècú tnúhu cue ñáyiú nàcuáa cadá-yu nanihí táhú-yu.

Te dáva-güedé ní cachí-gã sá cúu-güedé cue téé quindaha ñaha xii ñáyiú dacúaha ñaha-güedé xii-yu tnúhu-gã. <sup>12</sup> Te duca<sup>n</sup> ní cachí-gã cada cue téé-á<sup>n</sup> cuèndá canu nichí-güedé cue ñáyiú cùu cuèndá Yá Ndióxi cuèndá duca<sup>n</sup> ñáyiú-á<sup>n</sup> ñihí-yu nàcuáa cadá-yu chiú<sup>n</sup>-gã,

te duca<sup>n</sup> cuita níhí ndéé-gã-yu cundecú-yu ichi Xítohó Jesucristú. <sup>13</sup> Te duca<sup>n</sup> ní cachí Xítohó Jesucristú cunduu ndéé sáá nduu cùu ñ<sup>n</sup>nuu-o quindáá iní-ó tnúhu-gã, te duca<sup>n</sup> cùu ñ<sup>n</sup>nuu-o tecú tnùnì-ó nàcuáa nduu cuèndá-gã chi ñ<sup>n</sup>-ni gá cúu-gã Déhe Yá Ndióxi,

te cuu-o ñáyiú ïo quide ndáá dàtná quidé mée Xítohó Jesucristú. Te duca<sup>n</sup> te ñá túú tnáhí-gã ná cùmáni-ó núú Yá Ndióxi. <sup>14</sup> Te duca<sup>n</sup> te vá cúu-gã-ó dàtná cue landú vatá cùtnùnì váha-gã iní-xi, te ní vá cádá-gã-ó dàtná quidé ndute lamár, chi ndute-á<sup>n</sup> òré quéné táchí te cuáhá<sup>n</sup>-xi duha cuáhá<sup>n</sup>-xi dàcá<sup>n</sup>, te duca<sup>n</sup> chí vá quindáá-gã iní-ó tnúhu càhá<sup>n</sup> nchaa ñáyiú dàndahú ñáhá xii-o, chí ñáyiú-á<sup>n</sup> ïo váha xitó-yu nàcuáa dàndahú ñáhá-yu xii-o chí càchí-yu sá càhá<sup>n</sup>-yu tnúhu Yá Ndióxi dico ñá ndáá.

<sup>15</sup> Te nchoo ïo cuu iní tnáhá-ó, te vá dàndahú tnáhá-ó, chí càhá<sup>n</sup>-ó mée-ní sá ndáá. Te xini ñuhu-xi sá ñ<sup>n</sup> nduu ñ<sup>n</sup> nduu cuita cada ndáá-gã-ó quíhí<sup>n</sup> dàtná quidé ndáá mée-gã, te ñ<sup>n</sup>-ni gá cúu-gã Yáá cùnùu cuu díhna tàxi tnuni ñáhá-gã xii-o. <sup>16</sup> Te ñ<sup>n</sup>-ni Xítohó Jesucristú quidé ñaha-gã xii nchaa nchoo ñáyiú ndècu ichi-gã dàtná yiqui cùñú mée-gã, chí ñ<sup>n</sup> yiqui cùñú ïo váhí ní quée tnàha ñ<sup>n</sup> ñ<sup>n</sup> xichí, te duca<sup>n</sup> yíhí túchi yiqui cùñú-á<sup>n</sup> yótní<sup>n</sup>-xi nchaa nacúáa ní quée tnàha. Te duca<sup>n</sup> sàtnahá-xi cùu nchoo chí ñ<sup>n</sup>-ni cùu-o ndecu-o ichi Xítohó Jesucristú táxi tnùnì ñáhá-gã xii-o.

Te núu nchoo quide-o nchaa nacúáa tàù-xi cunduu te cùu iní tnáhá-ó, te duca<sup>n</sup> ta níhí ndéé-gã-ó cuáhá<sup>n</sup> ndécú-ó ichi-gã.

*Vá cádá-gã-ó dàtná ní xóo cada-o cùtnáhá ní xíndecu-o ichi cuehé ichi duha*

<sup>17</sup> Te vitna yúhú càhá<sup>n</sup>-í dóho-ndo quide-í núú Xítohó Jesucristú sá vá cùndècu-gã-ndó dàtná xíndecu ñáyiú ñá túú sandáá iní ñáhá xii Yá Ndióxi, chí nchaa ñáyiú-á<sup>n</sup> ñá túú vèdana nàndíhi nchaa sá sání iní-yu. <sup>18</sup> Te

ni ñã tûú vëdana cùtnuní iní-yu nàcuáa ndùu tñúhu ndáá tñúhu Yá Ndiòxí. Te ñâyü-á<sup>n</sup> ñã tûú ndùu táhü-yu cundecú-yu nàcuáa cuiní Yá Ndiòxí, chi ñã tûú vëdana tècú tñuní-yu te duca<sup>n</sup> chi ío sáá iní-yu. <sup>19</sup> Te ñã tûú tñáhí-gá ná sání iní-yu ndecú-yu ichi cuèhé ichi duha, te ío cùdíí iní-yu ndecú-yu ichi díí iní, te ñã díú-ní xiá<sup>n</sup> chi nándi-gá nchaa sá cuèhé sá dúhá quidé-yu ndecú-yu. <sup>20</sup> Dico tñúhu Xítohó Jesucristú sá ní sándáá iní-ndó chí ñã tûú dùca<sup>n</sup> sanu ichi ñaha-xi xii-ndo cada-ndo. <sup>21</sup> Te nchòhó ní cutnùní iní-ndó nàcuáa ndùu cuendá Xítohó Jesucristú, te dácuaaha-ndo tñúhu ndáá ñu-ndó tñúhu-gá nàcuáa ndecú-ndo ichi-gá. <sup>22</sup> Te vitna vâ cáni-gá iní-ndó càda-ndo datná ní xóo cada-ndo cùtnàhá ní xíndecu-ndo ichi cuèhé ichi duha, chi núu nchaa-ni sá cuèhé sá dúhá-á<sup>n</sup> ná cùhu<sup>n</sup>-ni iní-ndó càda-ndo, te uu<sup>n</sup>-gá uu<sup>n</sup>-gá cuita dacuíta nihnu ñaha-xi xii-ndo quíhí<sup>n</sup>, chi núu nchaa-ni sá cuèhé sá dúhá-á<sup>n</sup> ná cùhu<sup>n</sup>-ni iní-ndó te dàticá nuu ñaha-xi xii-ndo. <sup>23</sup> Te nchòhó, xini ñuhu-xi sá vâ dúcá<sup>n</sup>-gá cani iní-ndó càda-ndo te tàú-ndó ndùu-ndo datná ñâyü ní cacu tûu saa. <sup>24</sup> Te nduu iní-ndó datná cuiní mée<sup>n</sup> Yá Ndiòxí cunduu, chi nduu-xi nàcuáa cãa iní mée-gá, te duca<sup>n</sup> te cuu-ndo ñâyü ío váha cada ndáá, te cuu ndisa-ndo ñâyü ñã tûú tñáhí ná cumání cundecu núu-gá.

<sup>25</sup> Te cuendá xiá<sup>n</sup> núu cãhá<sup>n</sup>-í dóho-ndo sã nchòhó vâ dácuaandehde-gá-ndó datná ní xóo cada-ndo, te mee-nã sá ndáá cãhá<sup>n</sup> ndíhi tñaha-ndo, chi ñ<sup>n</sup>-ni cùu-o ndecu-o ichi Xítohó Jesucristú.

<sup>26</sup> Te núu cùdée<sup>n</sup>-ndó te cada cuendá-ndó sã vâ cáda-ndó ñ<sup>n</sup> cuèchi sá dúcá<sup>n</sup> cùdée<sup>n</sup>-ndó, te vâ dúcá<sup>n</sup>-ní cùhu<sup>n</sup> iní-ndó tñúhu sätú iní-á<sup>n</sup>. <sup>27</sup> Te vâ dãná-ndó mèe-ndo dandahú ñáhã sàcuíhã xii-ndo.

<sup>28</sup> Te núu dava-ndo cùu-ndo ñadúhú te vâ dúcá<sup>n</sup>-gá cada-ndo, chi nducu-nã-ndó ñ<sup>n</sup> chiu<sup>n</sup> váha cada-ndo nàcuáa duca<sup>n</sup> ñíhí-ndó sã chíndee-ndo cue ñâyü ndáhú ñâyü ñã tûú ná ndecú ndíhi.

<sup>29</sup> Te vâ cãhá<sup>n</sup>-gá-ndó ní ñ<sup>n</sup> tñúhu cuèhé, chi mee-nã tñúhu vii tñúhu váha cãhá<sup>n</sup>-ndó nàcuáa duca<sup>n</sup> ngünu ichi cue ñâyü ndedóho ñaha xii-ndo, te núu duca<sup>n</sup> na càda-ndo te cuu-xi sá váha sá cùú-xi ñâyü duca<sup>n</sup> ndedóho ñaha xii-ndo-á<sup>n</sup>. <sup>30</sup> Te vâ cáda-gá-ndó ní ñ<sup>n</sup> sã ñã tûú tàú-ndó càda-ndo cuendá sã vâ dándíhú-ndó iní Espiritú Yá Ndiòxí, chi ñu Espiritú-gá ndecú ndíhi-ndo, te xiá<sup>n</sup> cùtnuní iní-ndó sã sãá nduu nàcuaca ñaha-gá xii-ndo cùndecu-ndo ndíhi-gá ní caa ní quíhí<sup>n</sup>.

<sup>31</sup> Te vâ dásatú-gá-ndó iní tñaha ñâyü-ndo, te ni vâ cùhú<sup>n</sup> iní-ndó tñúhu sätú iní, te ni vâ cùdée<sup>n</sup>-gá-ndó, te cuèi núú chítú núú tàcá vâ cãhá<sup>n</sup> cana-ndo cùcuèhé-ndó tñaha ñâyü-ndo, te ni vâ cuátnúhu-ndo

tñaha ñâyü-ndo, te ni vâ cáni cuèhé cani duha iní-ndó cuendá tñaha ñâyü-ndo. <sup>32</sup> Te cundahú iní tñáhá-ndó, te cada tñaha-ndo sá váha, te cada càhu iní tñáhá-ndó núu ná cùú sã cùmáni núú tñáhá-ndó datná ní quide Yá Ndiòxí ní quide càhu iní-gá nchaa yicá cuèchi-ndo sã cuendá Xítohó Jesucristú.

## 5

*Nàcuáa tàú-xi cundecu nchaa ñâyü cùu déhe Yá Ndiòxí*

<sup>1</sup> Te nchòhó cùú-ndó ñâyü ío cùu iní ñáhã Yá Ndiòxí, te ñu déhe-gá cùú-ndó núu xiá<sup>n</sup> xini ñuhu-xi canchicú<sup>n</sup> nihnu-ndo càda-ndo datná quidé mèe-gá. <sup>2</sup> Te ío cuu iní tñáhá-ndó cùndecu-ndo datná cùú iní ñáhã Xítohó Jesucristú xii-ndo, chi ñu-gá ní cachí-gá sá cùú-gá cuendá nchaa cuèchi-o te ní xíhí-gá, te sá dúcá<sup>n</sup> ní xíhí-gá te ní cuu-gá datná ñ<sup>n</sup> táhú sá cùú-xi Yá Ndiòxí, te ío váha ní cuu iní Yá Ndiòxí sá dúcá<sup>n</sup> ní quide-gá.

<sup>3</sup> Te sã cuendá sã nchòhó cùú-ndó ñâyü cùu cuendá Yá Ndiòxí núu xiá<sup>n</sup> nchaa nchòhó cue tée vâ cãhá<sup>n</sup> ndíhi-ndo ñâyü ñíhí te núu ñã díú ñadíhí-ndó cùu-yu, te duca<sup>n</sup>-ni nchaa nchòhó cue ñâyü ñíhí tucu vâ cãhá<sup>n</sup> ndíhi-ndo cue tée te núu ñã díú yí-ndo cuu-güedé, te ni vâ cáni tñáhí iní-ndó cùndecu-ndo ichi díí iní, te ni vâ xíhó-ndó ní ñ<sup>n</sup> sã ndecú ndíhi tñaha ñâyü-ndo, te ni ñ<sup>n</sup> nchaa xiá<sup>n</sup> vâ cáni iní-ndó càda-ndo, te ni vâ cácu nèhe-ndo. <sup>4</sup> Te ni vâ cãhá<sup>n</sup>-ndó ñ<sup>n</sup> tñúhu sá ni vâ cùú cùndedóho ñâyü, te ni vâ cãhá<sup>n</sup>-ndó ñ<sup>n</sup> tñúhu cùtxénu, te ni dãva-gá nchaa tñúhu sã ñã tûú vëdana nándíhi vâ cãhá<sup>n</sup>-ndó, chi nchaa tñúhu-á<sup>n</sup> ñã tûú tàú-xi cãhá<sup>n</sup>-ndó, te xini ñuhu-xi sã váha-gá sã ndácá<sup>n</sup> táhú-ndó núu Yá Ndiòxí cuendá nchaa sã váha quide-gá. <sup>5</sup> Te nchòhó sa xini ndáá-ndó sã ncháá cue tée cãhá<sup>n</sup> ndíhi ñâyü ñíhí te ñã díú ñadíhí-güedé cùu-yu, ndíhi cue ñâyü ñíhí cãhá<sup>n</sup> ndíhi cue tée te ñã díú yí-yu cùu-güedé, nchaa ñâyü-á<sup>n</sup> vâ ndúú táhü-yu cundecú-yu núu ndecú Yá Ndiòxí ndíhi Xítohó Jesucristú táxi tñuní-gá. Te ni cue ñâyü xíndecu ichi díí iní, te ni cue ñâyü xího nchaa sã ndecú ndíhi tñaha ñâyü-xi vâ ndúú táhü-yu cundecú-yu ndíhi-gá núu ndecú-gá táxi tñuní-gá. Te tñúhu sã cachí-ó xího-o nchaa sã ndecú ndíhi tñaha ñâyü-o, ñ<sup>n</sup>-ni cùu-xi ndíhi tñúhu sã cachí ñâyü quide cahnú-yu nchaa sã cachí-yu cùu ndiòxí te ñã ndáá sã ndiòxí cùú-xi. <sup>6</sup> Te vâ quíndáá iní-ndó ní ñ<sup>n</sup> tñúhu sã ñã tûú nándíhi cãhá<sup>n</sup> ñâyü, chi ñâyü-á<sup>n</sup> ío dandóho ñaha Yá Ndiòxí xií-yu cuendá nchaa sã cuèhé sá dúhá quidé-yu chi ñã tûú sándáá iní ñáhã-yu xii-gá. <sup>7</sup> Núu xiá<sup>n</sup> cãhá<sup>n</sup>-í dóho-ndo sã vâ níhí tñáhá-ndó ndíhi cue ñâyü-á<sup>n</sup>.

<sup>8</sup> Te nchòhò ní cuu-ndo dàtná cue ñáyiú ní xíndecu núú néé chí ní xíndecu-ndo ichi cuehé ichi duha, dico vitna ní ngúndecu-ndo ichi Xítóhó Jesucristú, te ñá túú-gá ndécú-ndó núú néé dàtná ní xíndecu-ndo ní cùu. Te vitna cada-ndo nchàa nacuaá tàù-xi cunduu chí ndècu-ndo ichi-gá. <sup>9</sup> Te sá cuendá sá ndécú-ndó ichi-gá núu xiá<sup>n</sup> cúú-ndó ñáyiú váha, te quide ndáá-ndó ndècu-ndo, te ñá túú dàcuandehnde-ndo chí càhá<sup>n</sup>-ndó mèe-ni sá ndáá. <sup>10</sup> Te ío váha cada cuendá-ndó nchàa sá cúú váha iní Xítóhó Jesucristú, te xiá<sup>n</sup> cada-ndo. <sup>11</sup> Te vá cáncícu<sup>n</sup> nihnu-ndo tnàhá-ndó càda-ndo datná quidé cue ñáyiú ndècu ichi cuehé ichi duha, chí nchòhò tàù-ndó càhá<sup>n</sup>-ndó dóho nchaa ñáyiú duca<sup>n</sup> ndècu ichi cuehé ichi duha-á<sup>n</sup> cuendá nchaa sá quidé-yu. <sup>12</sup> Te cucaha<sup>n</sup> núú-ndó vá càhá<sup>n</sup>-ndó cuendá ní ì<sup>n</sup> sá cuèhé sá dúhá quide dayuhu nchaa ñáyiú-á<sup>n</sup>. <sup>13</sup> Dico óré dándixi túu tnúhu Yá Ndióxi iní-yu nàcuáa quidé-yu te cùtnuní iní-yu sá ñá túú quide váha-yu, te duca<sup>n</sup> ndixi cuechi iní-yu cuendá nchaa sá cuèhé sá dúhá quidé-yu. <sup>14</sup> Te núú tütú Yá Ndióxi càchí-xi: Nchòhò cúú-ndó dàtná ñáyiú xidí, te vitna ndiquíú iní-ndó,

te cùu tucu-ndo datná ñáyiú ní xíhí, te vitna ndoto-ndo,

te Xítóhó Jesucristú chindee ñàha-gá xii-ndo nàcuáa vá cùndècu-gá-ndó ichi cuehé ichi duha.

Duha càhá<sup>n</sup>-xi núú tütú-gá.

<sup>15</sup> Te ío váha cada cuendá-ndó nàcuáa cada-ndo cùndecu-ndo, te vá cadá-ndó dàtná xíquide cue ñáyiú ñá túú təcú tnùnì, chí cada-ndo dàtná Xíquide ñáyiú ío váha sáá díquí-xi. <sup>16</sup> Te ì<sup>n</sup> nduu ì<sup>n</sup> nduu cani iní-ndó càda-ndo nchaa nacuaá tàù-xi cunduu, chí vitna ío cùnuu nchaa sá cuèhé sá dúhá. <sup>17</sup> Te cuu-ndo ñáyiú təcú tnùnì cuendá duca<sup>n</sup> cùtnuní iní-ndó nàcuáa cuiní Yá Ndióxi cada-ndo, te vá cadá-ndó dàtná xíquide cue ñáyiú ñá túú tnàhí cùtnuní iní-xi nàcuáa cuiní Yá Ndióxi cada-yu. <sup>18</sup> Te vá cúú-ndó ñáyiú quihu chí núu duca<sup>n</sup> na càda-ndo te dàcuíta nihnu-ndo mèe-ndo, te dañà-ndo mèe-ndo sá Espíritú Yá Ndióxi ná tàxi tnuní ñàhá-xi xii-ndo. <sup>19</sup> Te càhá<sup>n</sup>-ndó nàcuáa-ni cuhá<sup>n</sup> ndudú sá ní xóo cata nchaa cue ñáyiú ndéé sanaha ní xóo chíñuhú-yu Yá Ndióxi. Te càhá<sup>n</sup>-ndó nàcuáa cuhá<sup>n</sup> ndudú sá chíñuhú-ndo Yá Ndióxi, te cata-ndo. Te cuéi nchaa dava-gá ndudú ñi-ni duca<sup>n</sup> càhá<sup>n</sup>-ndó te cata-ndo. Te ní yùhu ní iní-ndó càda-ndo nchaa ndudú-á<sup>n</sup> chíñuhú-ndo Yá Ndióxi. <sup>20</sup> Te vá dáñá ndéè-ndó ndacá<sup>n</sup> táhú-ndó núú Tátá-ó Dütú Ndióxi cuéi ndècu váha-ndo àdi ñá túú ndècu váha-ndo. Te duca<sup>n</sup> càda-ndo chí ndècu ndihí-ndo Xítóhó Jesucristú.

*Tàù-xi sá quindáá iní tnàhá cue ñáyiú ndècu ichi Xítóhó Jesucristú*

<sup>21</sup> Te nchòhò ñáyiú ndècu ichi Xítóhó Jesucristú tàù-xi sá quindáá iní tnàhá-ndó, te duca<sup>n</sup> càda-ndo chí nèhe-ndo sá yíñùhu núú Yá Ndióxi.

<sup>22</sup> Te nchaa nchòhò ñáyiú ñihí ndécú yì-xi, xini ñuhu-xi sá quindáá iní-ndó yì-ndo datná sàndáá iní-ndó Xítóhó Jesucristú. <sup>23</sup> Chí yì-ndo tàxi tnuní ñàhá-güedé xii-ndo dàtná quidé Xítóhó Jesucristú tàxi tnùnì ñàhá-gá xii nchoo cue ñáyiú ndècu ichi-gá. Te ñi-gá cúú-gá Yáá ní dácacu nihnu ñàha xii-o núú ùhú núú ndàhú, te cùu-o datná yiqui cùñú-gá. <sup>24</sup> Te dàtná quidé nchòhò ñáyiú ndècu ichi Xítóhó Jesucristú sàndáá iní-ó tnì-o nchaa tnúhu càhá<sup>n</sup>-gá, duca<sup>n</sup> tàù-xi cada nchaa nchòhò ñáyiú ñihí quindáá iní-ndó tnì-ndo nchaa tnúhu càhá<sup>n</sup> yì-ndo.

<sup>25</sup> Te tnàhá nchaa nchòhò cue téu tucu tàù-xi sá ío cuu iní-ndó ñàdihí-ndó dàtná quidé Xítóhó Jesucristú cúú iní ñàhá-gá xii nchaa nchoo ñáyiú ndècu ichi-gá, chí mee-gá ní xihí-gá sá cuendá-ó sá cúú iní ñàhá-gá xii-o. <sup>26</sup> Te duca<sup>n</sup> ní quide-gá cuendá sá ncháá ñáyiú vitna ngúndecu ichi-gá cuu yíñùhú-yu núú Yá Ndióxi, te duca<sup>n</sup> ndàda ndoo ndada nine-gá iní-yu sá cuendá sá quindáá iní-yu tnúhu Yá Ndióxi, te cuanduté-yu. <sup>27</sup> Te duca<sup>n</sup> ní quide-gá cuendá sá ncháá ñáyiú na ngúndecu ichi-gá ío váha cundecú-yu núú-gá, te duca<sup>n</sup> vá cùndècu-gá ní ì<sup>n</sup> cuéchi-yu núú-gá, te ní ì<sup>n</sup>-gá sá ñà túú-gá ná cumání-yu núú-gá chí ío cundecu yíñùhú-yu. <sup>28</sup> Te sá dúcá<sup>n</sup> quide Xítóhó Jesucristú sá cúú-xi cue ñáyiú ndècu ichi-gá, xiá<sup>n</sup> tàù-xi sá nchòhò cue téu xíndecu ñàdihí-xi cuu iní-ndó ñàdihí-ndó, te coto-ndó-yu dàtná xító-ndó yiqui cùñú mée-ndó, te cada iní-ndó sá ncháá cue téu ío cùu iní ñàdihí-xi cùu iní-güedé mée-güedé chí ì<sup>n</sup>-ná cúú-yu. <sup>29</sup> Te nchoo sá naha-o sá ní ì<sup>n</sup> ñáyiú ñá túú dàquee tíhú-yu yiqui cùñú-yu, chí da uu<sup>n</sup>-gá chíndéè-yu te xító-yu. Te ñi-ni duca<sup>n</sup> quide Xítóhó Jesucristú ndihí nchaa ñáyiú ndècu ichi-gá, <sup>30</sup> chí cùu-o datná yiqui cùñú mée-gá, te duca<sup>n</sup> chí ì<sup>n</sup>-ni cùu-o ndihí-gá. <sup>31</sup> Te tnúhu Yá Ndióxi càchí-xi: “Sá cuendá xiá<sup>n</sup> núu nchaa cue téu na níhí ñàdihí-xi te ñi<sup>n</sup>-ná cada-güedé tátá-güedé ndihí náná-güedé, te ñàdihí-ná-güedé cuu cuu ndihí-güedé, te duca<sup>n</sup> ì<sup>n</sup>-ná cuu-güedé ndihí-yu”, duha càchí-xi. <sup>32</sup> Te tnúhu-a cùu-xi ì<sup>n</sup> tnúhu càhnu vñhí, te duca<sup>n</sup> sá tnàhá-xi cùu Xítóhó Jesucristú ndihí cue ñáyiú ndècu ichi-gá. <sup>33</sup> Te càhá<sup>n</sup>-ni tucu-í dóho nchaa nchòhò cue téu xíndecu ñàdihí-xi sá ío cuu iní-ndó ñàdihí-ndó te coto-ndó-yu dàtná xító-ndó



mèe-ndo, te duca<sup>n</sup>-ni nchàa nchòhò ñáiyu ðíhí tucu canehe-ndo sá yíñùhu núú yíi-ndo.

## 6

<sup>1</sup> Te nchaa nchòhò cue landú, quindáá iní-ndó tátá-ndó ndíhi náná-ndó chí duca<sup>n</sup> cuiní Yá Ndióxi cunduu, te ðiu duca<sup>n</sup> tñahí tàú-xi cada-ndo. <sup>2</sup> Te Yá Ndióxi ní cachí-gá sá cánèhe-ndo sá yíñùhu núú tátá-ndó ndíhi núú náná-ndó. Te tñúhu-án<sup>n</sup> cúú-xí tñúhu cùnuu ní cáhá<sup>n</sup>-gá cada cue ñáiyu cuendá cada váha ñaha-gá xii-yu. <sup>3</sup> Te ní cachí-gá sá nñu duca<sup>n</sup> na càda-ndo te ío váha cundecu-ndo, te duca<sup>n</sup> ío naha cùdíi-ndo cundecu-ndo ñuyíú-a.

<sup>4</sup> Te nchaa nchòhò cue téé cùu tátá, vá dásátú-ndó iní cue déhe-ndo chí canu ichi-ndo-güèxi nacuaá tàú-xi cunduu, te dacuaá-ndo-güèxi nchaa tñúhu váha nacuaá cuiní Yá Ndióxi cunduu.

<sup>5</sup> Te nchaa nchòhò cue ñáiyu xinu cuechi, quindáá iní-ndó cué ñáiyu ðii chiú<sup>n</sup>-xi quide-ndo, te canehe-ndo sá yíñùhu núú-yu, te ío váha cuu iní-ndó càda-ndo chiú<sup>n</sup>-yu, te duca<sup>n</sup> nì yuhu ní iní-ndó càda-ndo. Te cada iní-ndó sá ðàtná tñúhu sá chiú<sup>n</sup> Xitohó Jesucristú quidé-ndó. <sup>6</sup> Te dava ñáiyu xinu cuechi, mee-ni òré ndéhe ñáiyu ðii chiú<sup>n</sup>-xi quidé-yu ío ndücu ndee-yu quide chiú<sup>n</sup> váha-yu cuendá cuiní-yu cudiú-yu. Dico nchòhò vá dúcá<sup>n</sup> càda-ndo, chí cuéi ndècu ñáiyu ðii chiú<sup>n</sup>-xi quide-ndo àdi ñá túú-yu dico cada chiú<sup>n</sup> váha-ni-ndo, te cada iní-ndó sá ðàtná tñúhu sá chiú<sup>n</sup> Xitohó Jesucristú quidé-ndó, te cada-ndo nì yuhu ní iní-ndó nacuaá cuiní Yá Ndióxi cunduu. <sup>7</sup> Te ío váha cuu iní-ndó càda-ndo chiú<sup>n</sup>-án<sup>n</sup>, chí cada iní-ndó sá ðàtná tñúhu sá chiú<sup>n</sup> Xitohó Jesucristú quidé-ndó te ñá díú chiú<sup>n</sup> cue ñáiyu ñuyíú-a. <sup>8</sup> Te nchòhò sa cùtnuní iní-ndó sá nacuaá ndüu chiú<sup>n</sup> váha ní quide-ndo ñi<sup>n</sup> ñi<sup>n</sup>-ndo, te duca<sup>n</sup> cùnduu sá táxi Xitohó Jesucristú nduu táhú-ndó cuéi cùu-ndo ñáiyu ðañá queé núú chiú<sup>n</sup> patróó<sup>n</sup>-xi àdi cuu-ndo ñáiyu ñá túú tñahí ðañá quee núú chiú<sup>n</sup> patróó<sup>n</sup>-xi.

<sup>9</sup> Te nchaa nchòhò ñáiyu xindecu ndíhi ñáiyu xinu cuechi, tñahá-ndó tàú-ndó càda váha-ndo sá cúú-xí cué ñáiyu xinu cuechi núú-ndó, te vá cùndüu nñu iní-ndó núú-yu, te chí cuáha cuendá sá díú-ní Xitohó Jesucristú Yaá ndécú àndiu taxi tñuní ñahá-gá xii-ndo ndíhi-yu, te sá cúú-xí mèe-gá chí ñi<sup>n</sup>-ni cùu-ndo núú-gá, te ñi<sup>n</sup>-ni càda ñaha-gá xii-ndo.

*Yá Ndióxi chindèe-gá cue ñáiyu ndècu ichi-gá cuendá sá vá ndácú sàcùhná nàá ndíhi ñaha-xi xii-yu*

<sup>10</sup> Te vitna nchaa nchòhò ñáiyu ndècu ndíhi-í ichi Xitohó Jesucristú càchí tñúhu-í

xii-ndo sá ío nducu-ndo nacuaá cada-ndo níhi ndéé-ndó cùu ñi<sup>n</sup>-nuu-ndo ndíhi Xitohó Jesucristú, chí mee-gá ío càhnu cuu-gá, te chindee ñaha-gá xii-ndo. <sup>11</sup> Te ðiu-ni nchaa sá ní nduu táhú-ndó núú Yá Ndióxi ðiu-ni nchaa xiá<sup>n</sup> cuhu<sup>n</sup> iní-ndó, chí xiá<sup>n</sup> chindee ñaha-xi xii-ndo níhi ndéé-ndó cùndecu-ndo cuendá sá vá ðándáhú ñahá sàcùhná xii-ndo. <sup>12</sup> Chí nchoo ñá díú cué ñáiyu ñuyíú-a nàá ndíhi-o, chí ndíhi cue espíritú cùndíhi yucu ñávàha, te ðiu-ni nchaa espíritú-án<sup>n</sup> cùnuu-xi cuéi núú nñu quide-xi nchaa sá cuèhé sá dúhá, te ðiu-ni-xi cùnuu-xi ñuyíú-a sànu ichi-xi cue ñáiyu quidé-yu nchaa sá cuèhé sá dúhá. <sup>13</sup> Te ío cuhu<sup>n</sup> iní-ndó nchàa sá ní nduu táhú-ndó núú Yá Ndióxi cuendá duca<sup>n</sup> níhi ndéé-ndó cùndecu-ndo, te vá ndácú yücu ñávàha ná cada ñaha-xi xii-ndo òré cuiní-xi coto ndéé ñahá-xí. Te sátá ná ðàquee tñú-ndó yücu ñávàha te ñi<sup>n</sup>-ni cunduu-ndo cundecu-ndo ichi Yá Ndióxi. <sup>14</sup> Te duca<sup>n</sup> cùndecu-ni-ndo ichi Yá Ndióxi cada-ndo ðàtná Xiquide cue sandàdú, chí cue téé-án<sup>n</sup> ío ñi<sup>n</sup> xindáa-güedé. Te cáhá<sup>n</sup>-ndó mèe-ni tñúhu ndáá tñúhu Yá Ndióxi, te cuu-ndo ðàtná cue sandàdú cue téé ndàda tii xití-xi òré quíhí<sup>n</sup>-güedé nàa-güedé. Te duca<sup>n</sup> sàtnahá-xi cuu-ndo te núu na cáhá<sup>n</sup>-ndó mèe-ni tñúhu ndáá tñúhu Yá Ndióxi. Te cada ndáá-ndó cùndecu-ndo ichi-gá, te cuu-ndo ðàtná cue sandàdú cue téé xixíhnu sá yídàhu ñaha xii-güedé òré nàa-güedé cuendá sá vá nìcuèhé-güedé. Te duca<sup>n</sup> sàtnahá-xi cuu-ndo te núu na càda ndáá-ndó cùndecu-ndo ichi-gá. <sup>15</sup> Te cundecu túha-ndo cáhá<sup>n</sup>-ndó tñúhu Xitohó Jesucristú, tñúhu sá cáhá<sup>n</sup> nacuaá cuu váha iní ñáiyu cundecu-yu, te cuu-ndo ðàtná cue sandàdú cue téé ndíhu zapátú-xi quíhí<sup>n</sup>-güedé nàa-güedé. Te duca<sup>n</sup> sàtnahá-xi cuu-ndo te núu na cùndecu túha-ndo cáhá<sup>n</sup>-ndó tñúhu Xitohó Jesucristú núú ñáiyu. <sup>16</sup> Te càchí tñúhu tucu-í xii-ndo sá ío quindáá iní-ndó Yá Ndióxi cuendá sá vá ndácú sàcùhná ná cada ñaha-xi xii-ndo, te duca<sup>n</sup> te cuu-ndo ðàtná cue sandàdú cue téé xínehe vítú chínèe-güedé sàquidàhu ñaha-xi xii-güedé cuendá sá vá cuicú<sup>n</sup>-güedé sá nchicú<sup>n</sup> ñuhú téé ñaha cue téé nàá ndíhi-güedé. Te duca<sup>n</sup> sàtnahá-xi cuu-ndo te núu na quindáá iní-ndó Yá Ndióxi. <sup>17</sup> Te ío cuhu<sup>n</sup> iní-ndó sá ní naníhí tñú-ndó, te cuu-ndo ðàtná cue sandàdú cue téé ñúhu mbelú cáxí<sup>n</sup>. Te duca<sup>n</sup> sàtnahá-xi cuu-ndo te núu na cùhu<sup>n</sup> iní-ndó sá ní naníhí tñú-ndó. Te ío cuhu<sup>n</sup> iní-ndó tñúhu Yá Ndióxi, chí tñúhu-án<sup>n</sup> ní taxi Espíritú-gá ndécú ndíhi-ndo chindee ñaha-xi xii-ndo, te cuu-ndo ðàtná cue sandàdú cue téé xínehe machití cuáhá<sup>n</sup>-güedé nàa-güedé. Te duca<sup>n</sup> sàtnahá-xi cuu-ndo te núu na cùhu<sup>n</sup> iní-ndó

tnúhu Yá Ndiòxí. <sup>18</sup> Te vá dǎńǎ ndèé-ndó cǎhá<sup>n</sup> ndihí-ndo Yá Ndiòxí nǎcuáa chindee ñaha Espiritú-gá xii-ndo, te cǎcǎ<sup>n</sup> táhú-ndó nǔú-gǎ nǔu ná cuini-ndó, te ío cundecu túha-ndo cǎhá<sup>n</sup> ndihí-ndo-gǎ, te vá nátùhú iní-ndó cǎcǎ<sup>n</sup> táhú-ndó nǔú-gǎ cuendá nchaa dava-gá cue ñáyyiu cùu cuendá-gá. <sup>19</sup> Te tnàhá cuendá-í cǎcǎ<sup>n</sup> táhú-ndó nǔú Yá Ndiòxí cuendá sá ná chindee ñaha-gá xii-í níhí-í tnúhu cǎhá<sup>n</sup>-í òré cǎhá<sup>n</sup>-í tnúhu-gá, te duca<sup>n</sup> vǎ yùhú-í cǎhá<sup>n</sup>-í nǎcuáa nduu tnúhu sá cǎhá<sup>n</sup> nǎcuáa naníhí tǎhú-ó nǔú ñáyyiu tnúhu sá vǎtá cùndèdóho-gá-yu. <sup>20</sup> Te Yá Ndiòxí ní cachí-gá sá yùhú cuu-í ì<sup>n</sup> téé cada-í nǔú-gǎ cǎhá<sup>n</sup>-í tnúhu-gá nǔú ñáyyiu, te diu cuendá tnúhu-á<sup>n</sup> yìhí-í vecaá vitna. Te ío cǎcǎ<sup>n</sup> táhú-ndó nǔú Yá Ndiòxí cuendá-í cuendá sá yùhú cuyì-í ní yùhu ní iní-í cǎhá<sup>n</sup>-í tnúhu-gá nǔú ñáyyiu nǎcuáa tǎu-xi cunduu.

*Tnúhu ndéé núú ní ndihí-ná*

<sup>21</sup> Te té Tiquicú téé ío cùu iní-í ndécú ndihí-o ichi Xítóhó Jesucristú cúu-dě ì<sup>n</sup> téé ío váha quide ndáá xínú cuèchi-dé nǔú Xítóhó Jesucristú, téé-á<sup>n</sup> cachí tnúhu-dé xii-ndo nǎcuáa cùu ndecu-í ndihí nchaa nǎcuáa quide-í cuendá duca<sup>n</sup> cùtnuní iní-ndó. <sup>22</sup> Te cuendá xǎ<sup>n</sup> nǔu cuini-í tendaha-í-dé quixi-dé nǔú ndécú-ndó cuendá cachí tnúhu-dé xii-ndo nchàa nacuáa cùu ndecu-ndí iha, te duca<sup>n</sup> tǎxi-gá-dé tnúhu ndee ìní cundecu ndihí-ndo.

<sup>23</sup> Te xicǎ<sup>n</sup> táhú-í nǔú Tǎtá-ó Dútú Ndiòxí ndihí nǔú Xítóhó Jesucristú sá ncháá nchòhó ñáyyiu ndècu ndihí-í ichi-gá sá diu-gá ná cádá te ío váha cuu iní-ndó cùndecu-ndo, te duca<sup>n</sup> ío cuu iní tnàhá-ndó, te ío quindáá iní-ndó-gǎ. <sup>24</sup> Te nchòhó ío cùu iní-ndó Xítóhó Jesucristú, te ñá túú dǎńǎ ndéé-ndó cùu iní-ndó-gǎ. Te mee Yá Ndiòxí ío na chindee chítúu ñaha-gá xii-ndo. Te duca<sup>n</sup> na cùnduu. Te ío chí cádá ndèe iní-nǎ vitna.

# TUTÚ NÍ CADÚHA TĒ PÁBLÚ QUIHI<sup>n</sup> NDAHA ÑÁYIU ÑUÚ FÌLIPÚ

*Té Páblú cadúha-dé tutú quihi<sup>n</sup> ndaha ñáyiu quide ndáá xindecu ichi Xítoho Jesucristú ndécú ñúú Filipú*

<sup>1</sup> Yúhú té Páblú ndihi té Timùteú cúu-ndí cue téé xínu cuechi núú Xítoho Jesucristú, te tëndaha-ndé tutú-a véxi ndaha nchòhò cue téé yindaha nchaa ñáyiu ndècu ichi Xítoho Jesucristú, ndihi cue téé chindee ñaha xii-ndo, ndihi nchaa dava-gá ñáyiu xíquide ndáá ndécú ichi-gá ñúú Filipú. <sup>2</sup> Te xicá<sup>n</sup> táhù-í núú Tàtá-ó Dútú Ndiòxí ndihi núú Xítoho Jesucristú sá ná chindee chítúu ñaha-gá xii-ndo, te duca<sup>n</sup> ndi nduú-gá ná cáda te ío váha cuu iní-ndó cùndecu-ndo.

*Té Páblú càhá<sup>n</sup> ndihi-dé Yá Ndiòxí cuèndá nchaa ñáyiu ndècu ichi-gá*

<sup>3</sup> Te ndi tnahá òré ndácú iní ñáhà-í xii-ndo, te ndácá<sup>n</sup> táhù-í núú Tàtá-ó Dútú Ndiòxí sá ndécú-ndó ichi-gá. <sup>4</sup> Te ndi tnahá òré duca<sup>n</sup> quide-í te ío cùdíí iní-í càhá<sup>n</sup> ndihi-í-gá cuèndá-ndó. <sup>5</sup> Chi ndéé cùtnàhá ní sándáá iní-ndó-gá ní nguíta-ndo tnahá-ndó quide váha-ndo ndècu-ndo cuèndá sá quíndáá iní ñáyiu tnúhu Xítoho Jesucristú. <sup>6</sup> Te yúhú sàni ndáá iní-í sá Yá Ndiòxí Yáá ní que-saha chindee ñaha xii-ndo quide váha-ndo ndècu-ndo, te diu-ni-gá chindee ñaha-gá xii-ndo càda váha-ndo cùndecu-ndo ndéé ná sáá nduu quixi tucu Xítoho Jesucristú. <sup>7</sup> Te duca<sup>n</sup> tnahí tàu-xi cani iní-í sá cùú-xi-ndó, chí ío cùu iní ñáhà-í xii-ndo. Te tnahá-ndó ío chindee chítúu ñaha Yá Ndiòxí xii-ndo ndècu-ndo, te diu-ni duca<sup>n</sup> chindee ñaha-gá xii-ndo tnahá-ndó cuèi vitna yìhi-í vecaá, te diu-ni duca<sup>n</sup> chindee ñaha-gá xii-í cuèi òré cuáhà<sup>n</sup>-í núú cuè ñáyiu ñá túú tnahá iní tnúhu-gá, chí nihí-í tnúhu nàdanchocáva-í núú ná tnúhu càhá<sup>n</sup>-yu cuèndá-gá, te nchaa ñáyiu xàhá<sup>n</sup>-í xii-yu sá tnúhu-gá cùú-xi tnúhu ndáá cuíti. <sup>8</sup> Te mee Yá Ndiòxí nàhá ndáá-gá sá yúhú ío cùu iní ñáhà-í xii-ndo dàtná cùú iní ñáhà mèe Xítoho Jesucristú xii-o. <sup>9</sup> Te xicá<sup>n</sup> táhù-í núú Yá Ndiòxí sá díú-gá ná chindee ñaha-gá xii-ndo te uu<sup>n</sup>-gá cuíta cuu iní tnahá-gá-ndó quihi<sup>n</sup>, te duca<sup>n</sup> ío váha cuita cutnùnì iní-ndó nchaa nacuaá sàni iní-gá cada-ndo, te duca<sup>n</sup> ío váha cuita cutnùnì tucu iní-ndó nàcuáa cùndecu-ndo. <sup>10</sup> Te duca<sup>n</sup> cùtnunì tucu iní-ndó nchaa sá ío-gá váha xini ñuhu-xi cada-ndo, te duca<sup>n</sup> te cuu-ndo ñáyiu cada mee-ni sá váha, te duca<sup>n</sup> ñá túú tnahí ná cùmánì-ndó núú Yá Ndiòxí

ndéé ná sáá nduu quixi tucu Xítoho Jesucristú. <sup>11</sup> Te diu-ni Xítoho Jesucristú chindee ñaha-gá xii-ndo càda-ni-ndo nchaa núú sá váha nàcuáa cuinì Yá Ndiòxí. Te sá dúcá<sup>n</sup> ná càda-ndo te ío cada càhu-ndo-gá, te nchaa dava-gá ñáyiu càhá<sup>n</sup> váha-yu cuèndá-gá.

*Xítoho Jesucristú ío cùnuu-gá ndécú ndihi-gá té Páblú*

<sup>12</sup> Te nchaa nchòhò ñáyiu ndècu ndihi-í ichi Xítoho Jesucristú na càchi tnúhu-í xii-ndo sá úú<sup>n</sup>-gá tá xítè nuu tnúhu-gá vitna yìhi-í vecaá. <sup>13</sup> Te nchaa cue téé cùu sandadú xindecu vechiú<sup>n</sup> núú ndécú téé cùnuu xiní-güedé sá cuèndá sá càhá<sup>n</sup>-í tnúhu Xítoho Jesucristú duha yìhi-í vecaá, te diu-ni duca<sup>n</sup> sá xinì nchaa dava-gá ñáyiu sá sá càhá<sup>n</sup>-í tnúhu-gá duha yìhi-í vecaá. <sup>14</sup> Te cuèndá sá dúhá yìhi-í vecaá xiá<sup>n</sup> ío-gá vài ñáyiu ndècu ichi Yá Ndiòxí ta cùtnunì-gá iní-yu sá cùú-gá ñ<sup>n</sup> Yáá ío quide ndáá, te uu<sup>n</sup>-gá tá cùyí-yu càhá<sup>n</sup>-yu tnúhu-gá, te ñá túú tnahí-gá yúhú-yu càhá<sup>n</sup>-yu.

<sup>15</sup> Te na càchí-í tnúhu ndáá-í xii-ndo sá dáva ñáyiu càhá<sup>n</sup>-yu tnúhu Xítoho Jesucristú cuèndá-ni sá cùú cuèdú iní ñáhà-yu xii-í sá ío chindee ñaha-gá xii-í càhá<sup>n</sup>-í tnúhu-gá. Te duca<sup>n</sup> quidè-yu chí cuinì-yu nàá ndihi ñáhà-yu xii-í, dico davá-yu chí ío váha sàni iní-yu càhá<sup>n</sup>-yu tnúhu-gá. <sup>16-17</sup> Te ñáyiu-án càhá<sup>n</sup>-yu tnúhu-gá chí cùu iní ñáhà-yu xii-í, te sa nàhá-yu sá sá cuèndá sá càhá<sup>n</sup> váha-í cuèndá tnúhu-gá núú ñáyiu ñá túú tnahá iní tnúhu-gá, cuèndá xiá<sup>n</sup> yìhi-í vecaá. Te dava-gá-yu càhá<sup>n</sup>-yu tnúhu Xítoho Jesucristú cuèndá-ni sá cuinì-yu cuu sá váha xii mèe-yu, te ñá díú sá càhá<sup>n</sup>-yu cuèndá sá sání váha iní-yu. Te duca<sup>n</sup> quidè-yu chí cuèndá cuinì-yu sá nàndi-gá cada ñaha-güedé xii-í. <sup>18</sup> Dico ío cùdíí iní-í sá càhá<sup>n</sup>-yu tnúhu Xítoho Jesucristú cuèi cùu váha iní-yu àdi ñá túú cùu váha iní-yu càhá<sup>n</sup>-yu.

Te diu-ni duca<sup>n</sup> cùdíí iní-í núú cuáhà<sup>n</sup> núú véxi. <sup>19</sup> Te cùtnunì iní-í sá sá cuèndá nchaa sá quidè ñaha-güedé xii-í, cuèndá xiá<sup>n</sup> cada váha ñaha Yá Ndiòxí xii-í, chí nchòhò ío càhá<sup>n</sup> ndihi-ndo-gá cuèndá-í, te Espíritú nì taxi Xítoho Jesucristú ndécú ndihi-o ío chindee ñaha-xi xii-í. <sup>20</sup> Te cuinì-í sá ñá túú tnahí ná cùmánì-í núú Yá Ndiòxí cuèndá sá vá cùú càhá<sup>n</sup> núú-í, te cùtnunì iní-í sá díú-gá chindee ñaha-gá xii-í. Te cuinì tucu-í sá ío cuyí-í càhá<sup>n</sup>-í tnúhu-gá vitna dàtná tá quide-í véxi, te duca<sup>n</sup> ío cada nínú-í Xítoho Jesucristú cuèi vitna nini ndècu-í ñuyúú-a te cuèi na cùú-í duca<sup>n</sup>-ni càda nínú-í-gá. <sup>21</sup> Te nini ndècu-í ñuyúú-a te Xítoho Jesucristú ío cùnuu-gá ndécú ndihi ñaha-gá xii-í, te na sáá nduu cùú-í te ío-gá váha tnahá-í chí nucùndecu-í ndihi-gá. <sup>22</sup> Te núu na

cùndecu-gá-í ñuyú-a te cada-gá-í chiú" sá cúu-xí Yá Ndióxi, te ñá cùtnúni iní-í nása cada-í núu sá cùndecu-í àdi sá cúu-í. <sup>23</sup> Te ío vâi sani iní-í te cuiñ-í cuú-í chi ío-gá váha cundecu-í núú ndécú Xítohó Jesucristú. <sup>24</sup> Dico sá cúu-xí nchòhó chi ío xini ñuhu-xi cundecu-í. <sup>25</sup> Te cùtnuní ndáá iní-í sá ñ" tnúhu ndáá càhá"-í, te cùtnuní tucu iní-í sá cùndecu-ní-í cundecu ndihi ñaha-í xii-ndo nchaa-ndo cuendá chindee ñaha-í xii-ndo cuita quindáá-gá iní-ndó Xítohó Jesucristú quíhí", te duca" ío cudáí iní-ndó cùndecu-ndo. <sup>26</sup> Te duca" te uu"-gá cachí-ndó sá ío cahnú cuu Xítohó Jesucristú cuendá sá ní dácácu ñaha-gá xii-í ndécú ndihi ñaha-í xii-ndo.

<sup>27</sup> Te xini ñuhu-xi cada-ndo nchaa nacuaa càhá" tnúhu Xítohó Jesucristú. Te núu ní ndacu-í véxi coto ñaha-í xii-ndo, te dàvá-án quini ndáá-í sá ndécú-ní-ndó ichi Xítohó Jesucristú. Dico núu ñá túú ní ndacu-í quixi coto ñaha-í xii-ndo ña, te diu-ni nihí-í tnúhu sá ndécú-ní-ndó ichi-gá, te nihí tucu-í tnúhu sá ñ"-ní cùu-ndo ndecu-ndo, te nihí tucu-í tnúhu sá ñ"nuu nducu ndee-ndo cahá"-ndó tnúhu Yá Ndióxi núú ñáyiú, tnúhu sá sàndáá iní-ndó. <sup>28</sup> Te ñá túú yuhú-ndó nchaa sá quidé ñaha ñáyiú cùu úhú iní ñáhá xii-ndo, te sá dúcá" quide-ndo ñá túú yuhú-ndó nchaa sá quidé ñáhá-yu xii-ndo, te ndixi túu iní-yu sá nchòhó ndécú-ndó ñ" ichi núú nánihí tãhú-ndó, te ñáyiú-án cuita nihú-yu, chi duca" ní cachí Yá Ndióxi cunduu. <sup>29</sup> Te mee Yá Ndióxi ní taxi-gá tnúhu ndee iní sá quindáá iní-ó Xítohó Jesucristú, te ñá diú-ní sá quindáá iní-ó-gá chi tnàhá ndoho-o cuendá-gá. <sup>30</sup> Te tnàhá nchòhó ndòhó-ndó cuendá-gá vitna, te nchòhó ní xiní núú-ndó nacuaa ní ndoho-í, te vitna nihí-ndó tnúhu nchaa nacuaa ndòho tucu-í.

**2**

*Xítohó Jesucristú ñá túú ní quide nínu-gá méé-gá dico Yá Ndióxi ní quide nínu ñaha xii-gá*

<sup>1</sup> Te Xítohó Jesucristú dácáhu iní ñáhá-gá xii-ndo nacuaa cundecu-ndo, te cùu iní ñáhá-gá xii-ndo nacuaa cuu váha iní-ndó cùndecu-ndo, te ndécú ndihi-ndo Espiritú Yá Ndióxi, te ío cùndahú iní tnàhá-ndó. <sup>2</sup> Te xiá" núu càhá"-í dóho-ndo sá ío cuu ñ"nuu-ni-ndo cùndecu-ndo nacuaa ío-gá cudáí iní-í, te ñ"-ni cùu iní tnàhá-ndó, te ñ"-ni càni iní-ndó, te ñ"-ni càda-ndo. <sup>3</sup> Te vá cáda nínu-ndo mée-ndo nducu-ndo mee-ni sá cúu-xí mée-ndo, chi cunduu ndàhú iní-ndó, te caní iní-ndó sá tnàha ñáyiú-ndo ío-gá cùnúu-yu dácúúxí mée-ndo. <sup>4</sup> Te ní vâ cáni iní-ndó nducu-ndo mee-ni sá váha sá cúu-xí mée-ndo, chi nducu-ndo sá cúu-xí tnàhá cuendá tnàha ñáyiú-ndo.

<sup>5</sup> Te ío váha caní iní-ndó nàcuáa cundecu-ndo dàtná quidé mée Xítohó Jesucristú. <sup>6</sup> Te ñ"-ni cùu Xítohó Jesucristú ndihi Yá Ndióxi. Te cuéi duca" dico mee Xítohó Jesucristú ní sani iní-gá sá ñá túú cùyica cundecu-gá taxi tnúni-gá ndihi Yá Ndióxi. <sup>7</sup> Te ní dáñá-gá sá cùnùu-gá andiu te ní quixi-gá ñuyú-a ní cuu-gá ñ" ñáyiú, te ní quide-gá dàtná quidé ñ" téé xinu cuechi. <sup>8</sup> Te ní cuu-gá ñ" téé dàtná ndaa cue téé xíndecu ñuyú-a, te ní cuu-gá ñ" téé ío ndàhú iní-xi chi ñá túú ní quide nínu-gá mée-gá, te ní sàndáá iní-gá ní quide-gá nchaa nacuaa ní xáha" Yá Ndióxi xii-gá cùtnàhá ní quixi-gá ñuyú-a. Te sá dúcá" ní sàndáá iní-gá xiá" ní xihí-gá núú cùrúxí. <sup>9</sup> Te xiá" ío ní quide nínu ñaha Yá Ndióxi xii Xítohó Jesucristú cuendá ío cunuu-gá. Te ní xáha" Yá Ndióxi xii Xítohó Jesucristú sá cúu-gá Xítohó nchaa ñáyiú ndécú ñuyú-a. <sup>10</sup> Te duca" ní quide Yá Ndióxi cuendá nchaa Espiritú ndécú àndiu, ndihi nchaa ñáyiú ndecu ñuyú-a, ndihi nchaa ñáyiú ní xihí nguúñi xití-yu ndihi nchaa espíritú-án te cachí-yu ndihi-xi sá ío cahnú cuu Xítohó Jesucristú. <sup>11</sup> Te nchaa-yu cachí-yu sá Xítohó Jesucristú cúu-gá Yaá táxi tnúni. Te sá dúcá" càdá-yu, te quide cahnú-yu Dútú Ndióxi.

*Ñáyiú ndécú ichi Xítohó Jesucristú cúu-yu dàtná ñ" ñuhú*

<sup>12</sup> Te xiá" núu nchaa nchòhó ñáyiú ío cùu iní-í cuiñ-í sá quindáá iní ñáhá-ndó xii-í dàtná ní quide-ndo cùtnàhá ní xíndecu ndihi ñaha-í xii-ndo, chi dàvá-án ñá túú tnàhí ní dàña ndee-ndó ní sàndáá iní ñáhá-ndó xii-í. Te cuiñ-í sá úu"-gá quindáá iní ñáhá-ndó xii-í vitna ñá túú ndécú ndihi ñaha-í xii-ndo. Te ío nducu ndee-ndo cada-ndo nchaa nacuaa tãu-xi cunduu ndée ná sáá nduu ndùu tãhú-ndó cùndecu-ndo ndihi Xítohó Jesucristú, te ío canee-ndo sá yíñùhu núu-gá. <sup>13</sup> Te Yá Ndióxi ío váha dácáhu iní ñáhá-gá xii-ndo càda-ndo nchaa nacuaa cuiñi mée-gá, te diu-ni mee-gá chindèe ñaha-gá xii-ndo duca" quide-ndo.

<sup>14</sup> Te vá caní iní-ndó nã tnúhu càhá"-ndó cuendá ñáyiú, te ní ñá túú nãndi tnúhu cùtnàha-ndo ndihi-yu, <sup>15</sup> te duca" te cuu-ndo ñáyiú ñá túú cuéchi-xi núú Yá Ndióxi. Te nchòhó ñáyiú cùu déhe Yá Ndióxi, ñá túú tnàhí-gá ná cumání-ndó núú-gá ñini ndecu-ndo tnuu nchaa ñáyiú ndécú ichi cuehé ichi duha ñuyú-a, ñáyiú cuihna iní-xi. Te cuu-ndo dàtná chódíní sá dáyèhé níu nee, <sup>16</sup> te duca" chi dácuaaha-ndo ñáyiú tnúhu Yá Ndióxi tnúhu sá càhá" nacuaa naníhí tãhú-yu. Te núu duca"-ni na càda-ndo te òré ná sáá nduu càda ndáá Xítohó Jesucristú nchaa yíca cuéchi ñáyiú, te dàvá-án vá cúu càha" núu-í, chi ñá túú dió duca" ní sàhni

iní-í cada-í nchaa chiú<sup>n</sup> ní táhú-gã. <sup>17</sup> Te nchòhó ío váha quide-ndo ndecu-ndo ichi Yá Ndióxi chí sàndáá iní-ndó-gã, te yúhú cahni ñaha-güedê xii-í cuendá nchaa sá váha quide-ó. Te xiã<sup>n</sup> ío cudíí iní-í te cudíí tucu iní-í dàtná cudíí iní-ndó cuendá nchaa sá váha quide-ndo. <sup>18</sup> Te diu-ni duca<sup>n</sup> ío chí cudíí iní dàtná cudíí iní mèe-í cuendá nchaa sá yáha-í ndécù-í.

*Té Timùteú ndihi té Epafròditú*

<sup>19</sup> Te núu Xítohó Jesucristú ná càchí-gá te ndíhi-ni tendaha-í té Timùteú quixi-dé quixi coto ñaha-dê xii-ndo nacúáa cudíí iní-ndó. Te òrê ndixi-dé canaha-dê tnúhu ndixi núu nása cùu ndecu-ndo, te tnàhá yúhú ío cudíí iní-í tucu. <sup>20</sup> Te núu ncháá cuè té ndécù ndihi-í te ì<sup>n</sup> dii-ni té Timùteú-a cùu-dé tée ío váha sàni iní-xi dàtná sání iní-í, chí diu tnàhi-ni-dé ío sàni iní-dé núu nása ndécù-ndo. <sup>21</sup> Chí dava-gá-güedé mee-ni sá cùú-xí mèe-güedé ío sàni iní-güedé, te ñá túú sàni iní-güedé cada-güedé chiú<sup>n</sup> tahu Xítohó Jesucristú. <sup>22</sup> Te nchòhó sa xini-ndó sá té Timùteú-a cùu-dé ì<sup>n</sup> té quide váha chí nándi sá tá yáha-dé véxi te quide ndee iní-dé. Te cùu-dé dàtná ì<sup>n</sup> déhe-í ndécú ndíhi ñaha-dé xii-í xínú cuèchi-ndí núu Xítohó Jesucristú càhá<sup>n</sup>-ndí tnúhu-gá núu ñáyiú. <sup>23</sup> Te òrê ná cutnuni núu nása cada ñaha-güedê xii-í te ndíhi-ni tendaha-í-dé quixi coto ñaha-dê xii-ndo. <sup>24</sup> Te sàni iní-í sá Xítohó Jesucristú cada-gá te tnàhá mèe-í ío ndíhi quixi coto ñaha-í xii-ndo.

<sup>25</sup> Te tnàhá sání iní-í sá ío xini ñuhu-xi tendaha-í té Epafròditú té ndécù ndíhi-ò ichi Xítohó Jesucristú ndixi coto ñaha-dê xii-ndo, chí tnàhá-dé quidê-dé chiú<sup>n</sup>-gá te quide ndee iní-dé tnàhá-dé nándi yáha-dé sá cuendá-gá, te diu mee-ndo ní tendaha-ndo-dê véxi-dé cuendá coto ñaha-dê xii-í. <sup>26</sup> Te duca<sup>n</sup> cuini-í tendaha-í-dé ndixi-dé chí mee-dê ío sàni iní-dé ndixi càhá<sup>n</sup> ndíhi ñaha-dê xii-ndo, te ío ndíhú iní-dé sá ní níhi-ndó tnúhu sá cùhú-dé ní cùu. <sup>27</sup> Te ndáá sá ní cùhú-dé chí luha ndiqui<sup>n</sup>-ná cuú-dé ní cùu, dico Yá Ndióxi ní cundàhú iní ñáhá-gá xii-dé ní quide tátna ñaha-gá te ní ndúha-dé. Te ñá diú-ni mèe-dé duca<sup>n</sup> ní cundahú iní ñáhá-gá xii-dé chí tnàhá yúhú ío ní cundàhú iní ñáhá-gá xii-í, chí núu ní xíhi-dé te ío-gá ndíhú iní-í ní cùu. <sup>28</sup> Te xiã<sup>n</sup> ío ndíhi cuini-í tendaha-í-dé ndixi-dé cuendá òrê nasáá-dé núu-ndó te ío cudíí iní-ndó, te duca<sup>n</sup> yúhú ñá túú-gá ná cani iní-í. <sup>29</sup> Te òrê nasáá-dé te ío cudíí iní-ndó náquehe<sup>n</sup> cuendá-ndó-dê, te duca<sup>n</sup> ío ndacá<sup>n</sup> táhú-ndó núu Xítohó Jesucristú cuendá-dé. Te ío canehe-ndo sá yíñtùhu núu ncháa cue té quide datná quidê-dé. <sup>30</sup> Chí té-a sa luha ndiqui<sup>n</sup>-ná cuú-dé ní cùu sá

xínú cuèchi-dé núu Xítohó Jesucristú, te ní sani iní-dé sá ñá túú ná cada-xi cuèi na cùú-dé ní quide-dé nchaa chiú<sup>n</sup> sá cùmáni cada-ndo cuendá-í ní cùu.

**3**

*Ñáyiú cundáá núu Yá Ndióxi*

<sup>1</sup> Te vitna nchaa nchòhó ñáyiú ndécù ndíhi-í ichi Xítohó Jesucristú càhá<sup>n</sup> ndàhú-í núu-ndó sá ío cudíí iní-ndó sá yíndàha ñaha-gá xii-ndo. Te yúhú ñá túú cùu dusa<sup>n</sup>-í tee tucu-í nchaa tnúhu sá sá ní dánèhé ñáhà-í xii-ndo, chí cùu-xi tnúhu sá ío chindee ñaha-xi xii-ndo. <sup>2</sup> Te ío quíhi iní-ndó vá cáda cuendá-ndó ní ì<sup>n</sup> tnúhu càhá<sup>n</sup> cue tée ío cuihna iní-xi ñá túú tnàhi cuini cada sá váha, chí cue té-á<sup>n</sup> nêhé-güedé iní iná chí càchí-güedé sá ncháá cuè té xini ñuhu-xi cuáha-güedé sèñá ñi-güedé cuendá duca<sup>n</sup> cùdiu-güedé núu Yá Ndióxi. <sup>3</sup> Dico nchoo chí cùdiu-ò núu Yá Ndióxi cuèi dava-ò sá ní ngündecu sèñá ñi-ò te dava-ò ñáhá, chí Espiritú-gá chindee ñaha-xi xii-ò quide-ò nchaa nacúáa tàù-xi cunduu cuendá cuu càhnu-gá. Te ío cudíí iní-ò càchí-ó sá ío càhnu cuu Xítohó Jesucristú, te ñá túú sàni iní-ò sá sá cuendá nchaa sá váha quide-ò cùdiu-ò núu Yá Ndióxi. <sup>4</sup> Te núu dicó cuendá nchaa sá váha quide-ò cùdiu-ò núu Yá Ndióxi, te yúhú sa ama-gá cùdiu-í núu-gá cuendá nchaa sá ní quide-í ní cùu te núu dicó duca<sup>n</sup>. Te ío cue té càchí-güedé sá cùdiu-güedé núu Yá Ndióxi cuendá nchaa sá váha quide-güedé. Te yúhú uu<sup>n</sup>-gá duca<sup>n</sup> càhá<sup>n</sup>-í núu dicó sá cùú chí yúhú ní xidó-gá-í ní quide-í dàcúxí dáva-gá-güedé. <sup>5</sup> Te núu ùná-ni nduu sá ní cacu-í te ní sáha-güedé sèñá ñi-í, te yúhú cùu-í tée isràèl, te mei ñáni tnàhá ndíi Benjámín tée ní xindecu ndé sanaha cùu-í. Te càhá<sup>n</sup>-í tnúhu hèbreú tnúhu càhá<sup>n</sup> tátà-í ndíhi nàná-í, te ní cundíhi-í nchaa cue té cùu fariséú, te ní càncícú<sup>n</sup> níhnu-í nchaa nacúáa ní càhá<sup>n</sup> ndíi Moisés dàtná xíquide mee-güedé. <sup>6</sup> Te yúhú ní sani iní-í sá ì<sup>n</sup> ichi ndáá ndécù-í ní cùu, te ío ní cuini-í cunu cuèchi-í núu Yá Ndióxi, núu xiã<sup>n</sup> nándi sá ní quide-í nchaa ñáyiú ndécù ichi Xítohó Jesucristú, te vá yòo ì<sup>n</sup> ní xóo cùñaha ì<sup>n</sup> tnúhu xii-í cachí-yu sá ñá túú quide-í nacúáa ní càhá<sup>n</sup> ndíi Moisés ní cùu. <sup>7</sup> Te nchaa sá sání iní-í sá ío nàndíhi nchícú<sup>n</sup> níhnu-í ní cùu, ní cutnuni iní-í sá ñá túú tnàhi chindee ñaha-xi nacúáa cundáá-í núu Yá Ndióxi, núu xiã<sup>n</sup> duu<sup>n</sup> duu<sup>n</sup> ní xehndé iní-í sá vá chindee ñaha-xi cuendá sá ní cuini-í cundecu ndíhi-í Xítohó Jesucristú. <sup>8</sup> Te nchaa sá càchí ñáyiú chindee ñaha cundáá-ò núu Yá Ndióxi ní cutnuni iní-í sá ñá túú chindee ñaha-xi. Te yúhú ní cutnuni iní-í sá ío-gá váha tnàhá tnúhu-ò ndíhi Xítohó Jesucristú. Te nchaa sá sání iní-í chindee

ñaha xii-í ní cùu, ñá túú-gã sàndáá iní-í sá chindèe ñaha-xi vitna chi ní cutnùní iní-í sá ñá túú nàndíhi-xi. Te duca<sup>n</sup> quide-í ñá túú-gã sàndáá iní-í nchaa xiá<sup>n</sup> sá chindèe ñaha-xi, chi cuiní-í sá úú<sup>n</sup>-gã cuita tnahá tñuhu-í ndihi Xítohó Jesucristú quíhí<sup>n</sup>, <sup>9</sup> te cuu ì<sup>n</sup>nuu-í ndihi-gá, te duca<sup>n</sup> ní cundáá-í núú Yá Ndióxi dátá cundáá-í vitna, dico ñá díú cuendá sá nchicú<sup>n</sup> nihnu-í nàcuáa ní cáhá<sup>n</sup> ndíi Moisés ní cùu, chi cuendá sá sàndáá iní-í Xítohó Jesucristú. Te Yá Ndióxi ní quide-gá cundáá-í núú-gã, te duca<sup>n</sup> chi ní sàndáá iní-í Xítohó Jesucristú. <sup>10</sup> Te cuiní-í cutnùní iní-í nchaa nàcuáa sàni iní Xítohó Jesucristú, te cuiní-í sá ío chindèe ñaha-gá, te diu-ni-gá cúú-gã Yáa ní xíhí te ní ndoto-gá, te duca<sup>n</sup> cuiní-í cada-gá cuendá cada-í nchaa nàcuáa cuiní-gá. Te cuiní-í tnahá-í ndoho-í dátá ní ndoho-gá. Te yúhú cuiní-í sá vâ cáda-í ní ì<sup>n</sup> sá ñá túú tnahá iní Yá Ndióxi, chi diu cuendá-á<sup>n</sup> ní xíhí Xítohó Jesucristú. <sup>11</sup> Te cuiní-í sá Yá Ndióxi cachí-gá te tnahá-í ndoto na sáa nduu ndòto nchaa ñáyíu sa ní xíhí ní xíndecu ichi-gá.

*Cada-o nchaa nacuáa tâu-xi cunduu cuendá níhí-ó sá ndúú tãhú-ó*

<sup>12</sup> Te cumání-gã cada-í nchaa nàcuáa cáhá<sup>n</sup>-í-a, te cumání-gã cada-í nchaa nàcuáa cáhá<sup>n</sup> Yá Ndióxi cuendá sá ñá túú-gã ná cumání-í núú-gã. Te ío ndücu ndee-í nchicú<sup>n</sup> nihnu-í quide-í nàcuáa duca<sup>n</sup> ñá túú-gã ná cumání-í núú-gã, chi diu cuendá-á<sup>n</sup> ní cáhá<sup>n</sup> ñáhá Xítohó Jesucristú xii-í. <sup>13</sup> Te nchaa nchòhó ñáyíu ndècu ndihi-í ichi Xítohó Jesucristú cachí tñuhu-í xii-ndo sá cutnùní ndáá iní-í sá vitná cumání-gã cada-í nchaa nàcuáa ñá túú-gã ná cumání-í núú-gã. Te ní níhí-í ì<sup>n</sup> sá ío xini ñuhu-xi cada-í te xiá<sup>n</sup> quidè-í, te ñá túú-gã quidè cuendá-í nchaa sá ní xóo cada-í, te ío ndücu ndee-í quidè-í nchaa nàcuáa cáhá<sup>n</sup> Yá Ndióxi. <sup>14</sup> Te ndücu ndee vihi-í nchicú<sup>n</sup> nihnu-í quidè-í nchaa nàcuáa cáhá<sup>n</sup>-gá, te diu-ni duca<sup>n</sup> càda-í ndéé ná sáa nduu sáá-í núú ndécú-gã taxi-gá sá ndúú tãhú-í. Te duca<sup>n</sup> tnahá sa ní cáhá<sup>n</sup> ñáhá-gã xii-o cundecu-o ndihi-gá, te duca<sup>n</sup> ní cáhá<sup>n</sup> ñáhá-gã xii-o sá cuendá Xítohó Jesucristú chi tnahá tñuhu-o ndihi-gá.

<sup>15</sup> Te nchaa nchòhó ñáyíu quide vâha ndècu ichi Yá Ndióxi xini ñuhu-xi cani iní-ndó dátá sání iní-í-a, àdi núu dava-ndo ñá túú sání iní-ndó dátá sání iní-í-a, dico mee Yá Ndióxi dandixi túu-gá iní-ndó te cutnùní iní-ndó nàcuáa cada-ndo. <sup>16</sup> Te xini ñuhu-ni-xi cada-o nchaa nàcuáa ta quide-o véxi.

<sup>17</sup> Te nchaa nchòhó ñáyíu ndècu ndihi-í ichi Xítohó Jesucristú cáhá<sup>n</sup>-í dóho-ndo sá cànchicú<sup>n</sup> nihnu-ndo cada-ndo dátá quidè-í. Te cundehe-ndo nàcuáa quide nchaa ñáyíu sa nchicú<sup>n</sup> nihnu nchaa

nàcuáa dānehé ñáhà-í xii-ndo cuendá duca<sup>n</sup> càda-ndo tnahá-ndó. <sup>18</sup> Te sa ní cuu vâi xito cachí tñuhu-í xii-ndo sá ío ñáyíu ñá túú tnahá cuu váha iní-xi sá ní xíhí Xítohó Jesucristú núú cùrúxi cuendá sá náníhí tãhú-ó. Te ndihi ndute núu-í dándacu iní ñáhà-í xii-ndo cuendá-yu. <sup>19</sup> Te sáa nduu te nchaa ñáyíu duca<sup>n</sup> xiquide-á<sup>n</sup> cuita nihnú-yu, chi mee-ni nchaa sá cuèhé sá dúhá ñuhu iní-yu te diu-ni nchaa xiá<sup>n</sup> cùnùu quidè-yu, te cucaha<sup>n</sup> núu-yu cuendá nchaa sá quidè-yu núu dicó sá cúú, dico ñáhá chi da quide cahnú-yu mée-yu cuendá nchaa xiá<sup>n</sup>. Te mee-ni nchaa sá ío ñuyú-a ñuhu iní-yu. <sup>20</sup> Dico nchoo chi andíu ndècu núú cúú ñùú-ó, te ndètu cahnu-o sáa nduu quixi tucu Xítohó Jesucristú nacuaca ñaha-gã xii-o. Te diu-ni-gá cúú-gã Yáa ní dácacu nihnu ñaha xii-o núú ùhú núú ndáhú. <sup>21</sup> Te yiqui cùñú-ó chi vá cùdli-xi cundecu-xi dátá cáá-xí vitna, dico mee Xítohó Jesucristú nadama-gá yiqui cùñú-ó te ndada-gá dátá ní nduu yiqui cùñú mée-gã cùtnáhá ní ndoto-gá. Te duca<sup>n</sup> càda-gá chi ndacu-gá quidè-gá nchaa sá váha cachí iní-gá, te duca<sup>n</sup> tàxi tñuní-gá nchaandi tùhú sá ío.

## 4

*Ío cudíí iní-ó sá ndécú-ó ichi Xítohó Jesucristú*

<sup>1</sup> Te nchaa nchòhó ñáyíu ío cùu iní-í ndécú ndihi-í ichi Xítohó Jesucristú ío cuiní-í cáhá<sup>n</sup> ndihi ñaha-í xii-ndo. Te ío cudíí iní-í cuendá nchaa sá váha quide-ndo chi ñá túú ní xíta chiu<sup>n</sup> Yá Ndióxi ní quide-í sá cúú-xi-ndó, te diu-ni nchòhó ñáyíu ío cùu iní-í cáhá<sup>n</sup>-í dóho-ndo sá cànchicú<sup>n</sup> nihnu-ni-ndo ichi Xítohó Jesucristú.

<sup>2</sup> Te yòhó tá Vòdiá ndihi yòhó tá Síntiqué cáhá<sup>n</sup> ndáhú-í núú-ndó sá cúú ì<sup>n</sup>nuu-ndo cundecu-ndo ichi Xítohó Jesucristú. <sup>3</sup> Te yòhó té cùndihi-í quide ndáá quidè nchaa chiu<sup>n</sup> quide-í, cáhá<sup>n</sup> ndáhú-í núú-n sá chindèe tñuhu-n úú ñáyíu dìhí-á<sup>n</sup> cuendá sá ná cùu ì<sup>n</sup>nuu-yu cuendè-yu, chi cùtnáhá ní xíndecu ndihi ñáhá-yu xii-í ío ní chindèe ñáhá-yu xii-í, ndihi té Clémenté, ndihi nchaa dava-gá-yu ní quide-ndí chiu<sup>n</sup> Xítohó Jesucristú, te nchaa ñáyíu-á<sup>n</sup> sa yòdo tñuní-yu núú tütú Yá Ndióxi sá ndúú tãhú-yu cundecú-yu ndihi-gá ní caa ní quíhí<sup>n</sup>.

<sup>4</sup> Te nchaa-ni nduu ío cudíí iní-ndó sá ndécú-ndó ichi Xítohó Jesucristú. ¡Te cáhá<sup>n</sup>-ni tucu-í dóho-ndo sá cudíí ndisa iní-ndó! <sup>5</sup> Te ío váha cuu iní-ndó cáhá<sup>n</sup> ndihi-ndo ñáyíu cuendá ná cutnùní iní-yu sá cúú-ndó ñáyíu váha iní-xi, chi sa ta cüyatni nduu quixi tucu Xítohó Jesucristú.

6 Te ñá túú tñàhí ná cani iní-ndó te núu nása cùu ndecu-ndo, chi càhá<sup>n</sup> ndìhi-ndo Yá Ndiòxí cuèndá sá ná chindee ñaha-gá xii-ndo. Te ío ndacá<sup>n</sup> táhú-ndó núú-gá. 7 Te núu duca<sup>n</sup> na càda-ndo te Yá Ndiòxí cada-gá te ío váha cuu iní-ndó cùndecu-ndo. Te nchoo ñáyyi ñá túú cùtnuní iní-ó nása quide-gá ndéé duca<sup>n</sup> ío váha cùu iní-ó, te duca<sup>n</sup> ío váha cùu iní-ó chi cùu ì<sup>n</sup>nuu-o ndìhi Xítóhó Jesucristú.

*Mee-ni sã váha cuhu<sup>n</sup> iní-ó*

8 Te càhá<sup>n</sup> ndàhú tucu-í nùú nchaa nchohó ñáyyi ndècu ndìhi-í ichi Xítóhó Jesucristú sá méé-ní sã váha cuhu<sup>n</sup> iní-ndó. Te xini ñuhu-xi cuhu<sup>n</sup> iní-ndó mèe-ni nchaa tnúhu ndáá, ndìhi nchaa tnúhu yñùhu, ndìhi nchaa tnúhu sá ío cudíí iní-ó, ndìhi nchaa tnúhu sá ío víi ío váha cuáhá<sup>n</sup>, ndìhi nchaa tnúhu sá ñá túú ñùhu tnahá tnúhu cuèhé, ndìhi nchaa tnúhu sá càchí ñáyyi váha, ndìhi nchaa dava-gá tnúhu sá sání iní méé-ndó sá ío váha te ñu-ni nchaa xiá<sup>n</sup> cuhu<sup>n</sup> iní-ndó.

9 Te cùtnàhá ní xíndecu ndìhi ñaha-í xii-ndo ní dánèhé ñáhá-í nàcuáa cada-ndo te ní sándáá iní-ndó. Te xiá<sup>n</sup> càhá<sup>n</sup>-í dóho-ndo sá vã dáñá ndèé-ndó càda-ndo, te ñu-ni duca<sup>n</sup> vã dáñá ndèé-ndó càda-ndo nchaa nacuáa ní quide-í ní xini-ndó. Te núu duca<sup>n</sup> na càda-ndo te Yá Ndiòxí Yáá quidé ío váha cùu iní-ó ndècu-o cundecu ndìhi ñaha-gá xii-ndo.

*Ñáyyi ñuú Filipú ndécú ichi Xítóhó Jesucristú sãñahá-yu sá ndúú táhú tẽ Páblú*

10 Te cudíí víhí iní-í ndacá<sup>n</sup> táhú-í núú Xítóhó Jesucristú sá ní ndacu iní ñáhá-ndó xii-í, dico ñá díú sá ñá túú ñùhu iní ñáhá-ndó xii-í chi dicó sá ñá ñihí-ndó nàcuáa cada-ndo chindee ñaha-ndo xii-í ní cùu. 11 Te ñá díú sá dúhá càhá<sup>n</sup>-í te cani iní-ndó sá càchí tnúhu-í xii-ndo sá ló ì<sup>n</sup> sá cùmání xii-í, chi yúhú cùu váha-ni iní-í núu ló xii-í ádi ñá túú ío. 12 Te xini-í cunduu ndàhú-í, te xini-í cunduu cuica-í, te xini-í caxi-í ndahá xití-í, te xini-í cuú-í docó, te xini-í nàcuáa quide-xi oré ñá túú vèdana ná ndécú ndìhi-o, te xini-í nàcuáa quide-xi oré xidó ndécú ndìhi-o. Te duca<sup>n</sup> ní cutúha-í quidé-í cuèndá nchaa nàcuáa ta yáha-í véxi. 13 Te nchaa ndàcu-í quidé-í chi Xítóhó Jesucristú chindèe ñaha-gá xii-í. 14 Te nchóhó ío váha ní quide-ndo ní cundáhú iní ñáhá-ndó xii-í ní chindee ñaha-ndo vitna ndecu ndìhi-í tnúndòho.

15 Te nchóhó cue ñáyyi ñuú Filipú sa nàha-ndo nacuáa ní cuu cùtnàhá ní ngúita-í càhá<sup>n</sup>-í tnúhu Xítóhó Jesucristú distritú Macèdoniá, te cùtnàhá ní ndee-í distritú-á<sup>n</sup> te ñu tñahí-ni nchóhó ní taxi-ndo sá ndúú táhú-í, te nchaa ñáyyi ndècu ichi Xítóhó Jesucristú dava-gá xichi ñá túú tñahí ní chindee ñahá-yu xii-í. 16 Te cuèi cùtnàhá ní xíndecu-í ñuú Tesalónicá titní xito ní tendaha-ndo sá ndúú táhú-í sá ní cutnùní iní

méé-ndó ní xini ñùhu-í. 17 Te vã caní iní-ndó sá sá dúhá càhá<sup>n</sup>-í te cuini-í nándi-gá taxi táhú-ndó, te duha càhá<sup>n</sup>-í chi Yá Ndiòxí ío-gá vãi sá váha cada ñaha-gá xii-ndo sá dúcá<sup>n</sup> quide-ndo. 18 Te ní xidó vãi nchaa sá xini ñùhu-í ndécú ndìhi-í vitna, te duca<sup>n</sup> ío vãi sá ndécú ndìhi-í ní cuu chi ní tendaha tucu-ndo sá ndúú táhú-í véxi ndìhi té Epafròditú. Te táhú-a cùu-xi datná ì<sup>n</sup> táhú sá ní sáha-ndo mèe Yá Ndiòxí, te cùu víi cuu váha iní-gá sá dúcá<sup>n</sup> ní quide-ndo. 19 Te núu ná cùú sá xini ñùhu-ndo, te mee Yá Ndiòxí ío vãi taxi-gá chi ío vãi sá ndécú ndìhi-gá, te duca<sup>n</sup> càda-gá chi ndècu ndìhi-o Xítóhó Jesucristú. 20 Te vitna nchaa-o chí ná càchí-ó sá ío càhnuu cuu Tátá-ó Dütú Ndiòxí ní caa ní quihí. Te duca<sup>n</sup> na cùnduu.

*Tnúhu ndéé núú ní ndìhi-ná*

21 Te cùñaha-ndo sá ío na càda ndee iní nchaa ñáyyi ndècu ichi Xítóhó Jesucristú, ñáyyi cùu cuendá Yá Ndiòxí. Te tñahá nchaa ñáyyi xíndecu ichi Xítóhó Jesucristú ndécú ndìhi-í quidé ndèe iní ñáhá-yu xii-ndo. 22 Te nchaa ñáyyi cùu cuendá Yá Ndiòxí xínú cuèchi vehe té Cèsár tée yindaha cuèhé nàció<sup>n</sup> quidé ndèe iní ñáhá-yu xii-ndo, ndìhi nchaa dava-gá ñáyyi cùu cuendá-gá.

23 Te Xítóhó Jesucristú ío na chindee chitúu ñaha-gá xii-ndo nchaa-ndo. Te duca<sup>n</sup> na cùnduu. Te ío chí cadá ndèe iní-ná vitna.

## TUTÚ NÍ CADÚHA TÊ PÁBLÚ QUIHI<sup>n</sup> NDAHA ÑÁYIU ÑÚÚ CÒLOSÁ

*Tê Páblú cadúha-dé tutú quihi<sup>n</sup> ndaha ñáyiu xĩndecu ichi Xitohó Jesucristú ndécú ñúú Còlosá*

<sup>1</sup> Yúhú té Páblú ní tendaha ñaha Yá Ndióxi cáhá<sup>n</sup>-í tñuhu Xitohó Jesucristú núú ñáyiu chí duca<sup>n</sup> cuiñí meé Yá Ndióxi cunduu, te cadúha-í tutú-a ndihi té Timúteú <sup>2</sup> cuendá daquixi-í ndaha nchòhò ñáyiu ñúú Còlosá, ñáyiu cùu cuendá Yá Ndióxi, ñáyiu quide ndáá ndécú ichi Xitohó Jesucristú, te xicá<sup>n</sup> táhú-í núú Tátá-ó Dütú Ndióxi sá ío na chĩndee chitúu ñaha-gá xii-ndo, te duca<sup>n</sup> ndi nduú-gá ná cádá te ío váha cuu iní-ndó cundecu-ndo.

*Tê Páblú cáhá<sup>n</sup> ndihi-dé Yá Ndióxi cuendá ñáyiu sàndáá iní ñáhá xii Xitohó Jesucristú*

<sup>3</sup> Te duca<sup>n</sup>-ni cáhá<sup>n</sup> ndihi-ndí Yá Ndióxi Yáá cúú Tátá Xitohó Jesucristú ndacá<sup>n</sup> táhú-ndí núú-gá cuendá nchaa nacuáa quide-ndo ndecu-ndo, <sup>4</sup> chí nihí-ndí tñuhu sá ío sàndáá iní-ndó Xitohó Jesucristú, te duca<sup>n</sup> ío cùu iní-ndó nchaa ñáyiu cùu cuendá Yá Ndióxi. <sup>5</sup> Te duca<sup>n</sup> quide-ndo chí sàndáá iní-ndó sá ndúú táhú-ndó cundecu-ndo núú ndécú Xitohó Jesucristú, te tñuhu-á<sup>n</sup> ní nihí-ndó cùtnáhá ní xĩndedóho-ndo tñuhu ndáá tñuhu Xitohó Jesucristú. <sup>6</sup> Te tñuhu Xitohó Jesucristú tá xité nuu-xi nihí ñuyú cuáhá<sup>n</sup>. Te vai ñáyiu ta sàndáá iní-yu cuáhá<sup>n</sup>, te ta quidé-yu mee-ni sá váha cuáhá<sup>n</sup> ndécú-yu ichi-gá. Te nchòhò chí ndéé cùtnáhá ní tecú dóho-ndo tñuhu-gá ní quesaha-xi ta cùu vai ñáyiu ñúú-ndó tá quide ndáá-yu núú-gá cuáhá<sup>n</sup>. Te dává-á<sup>n</sup> ní cutnúni ndáá ndisa iní-ndó sá Yá Ndióxi ío chĩndee chitúu ñaha-gá xii-ndo. <sup>7</sup> Te duca<sup>n</sup> ní dánèhè ñáhá té Èpafrás téé ío cùu iní-ndí, chí tñáhá-dé ío quide ndáá-dé xínú cuèchi-dé núú Xitohó Jesucristú quidé-dé núú-ndí dácùaha ñaha-dé xii-ndo tñuhu-gá. <sup>8</sup> Te càchí tñuhu-dé xii-ndí sá ío cùu iní ñáhá-ndó xii-ndí, te duca<sup>n</sup> quide-ndo chí Espiritú Yá Ndióxi chĩndèe ñaha-xi xii-ndo.

<sup>9</sup> Te ndéé cùtnáhá ní nihí-ndí tñuhu nacuáa quide-ndo ndecu-ndo ndéé dává-á<sup>n</sup> ní nguíta-ndí ñá túú dàña ndee-ndí xicá<sup>n</sup> táhú-ndí núú Yá Ndióxi cuendá-ndó sá Espiritú-gá ná tàxi-xi nchaa-gá sá cùmáni quini tñúni-ndó, te duca<sup>n</sup> te cutnúni váha-gá iní-ndó nacuáa cuiñí Yá Ndióxi cada-ndo. <sup>10</sup> Te sá dúcá<sup>n</sup> te ndacu-ndo cáda-ndo mee-ni sá váha dàtná cuiñí Xitohó Jesucristú cada nchaa ñáyiu ndécú ichi-gá. Te duca<sup>n</sup> ío nduu

vétú iní-gá te núu na cáda-ndo nchaa núú sá váha. Te duca<sup>n</sup> ío-gá cuita cutnúni iní-ndó nchaa nacuáa cuiñí Yá Ndióxi cada-ndo. <sup>11</sup> Te mee-gá cúú-gá Yáá ío cùnuu, te diu-gá ío chĩndee ñaha-gá xii-ndo, te cudí iní-ndó cuéi nándi na cáda ñaha ñáyiu xii-ndo sá cuendá-gá, te duca<sup>n</sup> ío cunduu càhnu iní-ndó. <sup>12</sup> Te ndacá<sup>n</sup> táhú-ó núú Dütú Ndióxi chí ní quide túha ñaha-gá xii-o cuendá nduu táhú-ó cundecu-o ndihi nchaa dáva-gá ñáyiu yĩndaha-gá xĩndecu núú cándoo canine ñá túú tñáhí-gá ní ñúú cuèchi ío. <sup>13</sup> Te diu-gá ní quide ní dàñá-ó nchaa ichi cuèhé ichi duha núú tàxi tñúni yucu ñávaha, te ní nachihí ñaha-gá xii-o ndáha Déhe-gá Yáá ío cùu iní-gá. <sup>14</sup> Te Déhe-gá ní xihí-gá cuendá sá nchóó càcu nihnu-o núú úhú núú ndáhú, te ní quide càhnu iní-gá nchaa sá cuèhé sá dúhá ní quide-o.

*Ñáyiu cùu ñúú ndihi Yá Ndióxi cuendá sá ní xihí Xitohó Jesucristú*

<sup>15</sup> Te Yá Ndióxi cúú-gá Yáá vá cúú quini-ó dico Xitohó Jesucristú chí ní quixi túu-gá ñuyú-a, te ní quide-gá nchaa nacuáa sàni iní-gá. Te dàtná-ni sàni iní-gá te duca<sup>n</sup> sàni iní Yá Ndióxi, te Yáá-á<sup>n</sup> duca<sup>n</sup>-ni ndécú-gá ndéé cùtnáhá vátá ngáva-gá ñuyú. <sup>16</sup> Te Xitohó Jesucristú ní quide-gá núú Yá Ndióxi ní cadúha-gá nchaa sá ío andi ndihi nchaa sá ío ñuyú-a, te ní cadúha-gá nchaa sá cúú quini núú-ó cundèhe-o, ndihi nchaa sá vá quini tñáhí-o, ndihi nchaa espíritú cùnuu vihí xinu cuèchi núú Yá Ndióxi, ndihi nchaa dáva-gá espíritú xínú cuèchi. Te nchaa ní cadúha Xitohó Jesucristú chí duca<sup>n</sup> ní cachí Yá Ndióxi cunduu. Te duca<sup>n</sup> ní cachí Yá Ndióxi cunduu cuendá nchaa cuu-xi mee-ni sá váha sá cúú-xi Xitohó Jesucristú. <sup>17</sup> Te Xitohó Jesucristú duca<sup>n</sup>-ni ndécú-gá ndéé cùtnáhá vátá ngáva-gá ñuyú-a, te diu núú ndáhá-gá cándodo ñuyú-a, ndihi andi, ndihi nchaandi túhú sá ío. <sup>18</sup> Te diu Xitohó Jesucristú cùnuu-gá yĩndaha ñaha-gá xii nchaa nchoo ñáyiu ndécú ichi-gá, te diu-gá quidé-gá ndécú váha-o núú-gá. Te núú ncháá ñáyiu ndoto diu-gá cúú-gá Yáá ío càhnu cuu sa ní ndoto, te sá dúcá<sup>n</sup> ní ndoto-gá te xíá<sup>n</sup> cúú-gá Yáá ío tàxi tñúni nchaandi túhú sá ío ñuyú-a ndihi andi. <sup>19</sup> Te duca<sup>n</sup> ío cùnuu-gá tàxi tñúni-gá chí ndáá sá ñúú-ni cuu-gá ndihi Yá Ndióxi. <sup>20</sup> Te Xitohó Jesucristú ní xihí-gá núú cùrúxi, chí duca<sup>n</sup> ní cuiñí Yá Ndióxi cunduu cuendá sá vá yóo ñúú-gá cuu úhú iní ñáhá xii-gá cuéi ñáyiu xĩndecu ñuyú-a, te cuéi cu espíritú ndécú andi.

<sup>21</sup> Te nchòhò cùtnáhá vátá cùndècu-gá-ndó ichi Xitohó Jesucristú ñá túú tñáhí ní xóo cáhá<sup>n</sup> ndihi-ndo-gá, chí mee-ni ní xóo cuu úhú iní-ndó-gá, te mee-ni nchaa sá cuèhé



sá dúhá ní xóo cunuu ní xóo cada-ndo ní cuu, dico Xítoho Jesucristú ní quide-gá ní tnahá tnúhu-ndo ndíhi Yá Ndióxi vitna. <sup>22</sup> Chi diu cuendá-á ní xihí Xítoho Jesucristú núú cùrúxí cuendá sá nchóo ndúu ndoo nduu nine iní-ó ngúndecu-o núú Yá Ndióxi, te duca<sup>n</sup> te ñá túú tnahá-gá ná cumání-ó núú-gá, te vá yóo ñ<sup>n</sup>-gá cachí sá nchóo ndècu cuéchi-o. <sup>23</sup> Te núú vá ðáña ndéé-ndó quindáá iní-ndó Xítoho Jesucristú, te cundecu-ni-ndo ichi-gá, te vá cáni iní-ndó ðáña-ndo tnúhu ndee iní ní taxi-gá ndécú ndíhi-o. Te nchaa tnúhu-gá-á<sup>n</sup> tá xité nuu-xi nihíi ñuyúú cuáhá<sup>n</sup>, te diu-ni tnúhu-á<sup>n</sup> càhá<sup>n</sup> yúhú té Páblú ðánèhé-í ñáiyu.

*Te Páblú yíhi ðiquí-dé càhá<sup>n</sup>-dé tnúhu Xítoho Jesucristú núú ñáiyu ndècu ichi-gá*

<sup>24</sup> Te vitna ío cùdíí iní-í ndòhò-í cuendá-ndó, chi Xítoho Jesucristú ío ní ndoho-gá cuendá-ó, te tnahá yúhú ndòhò-í cuendá nchaa ñáiyu ndècu ichi-gá, dico vitna cùmání-gá ndoho-í cuendá-yu. <sup>25</sup> Te Yá Ndióxi ní cachí-gá sá yúhú quíhi ðiquí ñáhà-í xii nchaa nchòhó ñáiyu ndècu ichi-gá cuendá ðánèhé ñáhá váha-í xii-ndo tnúhu-gá cuendá cuu-xi sá váha sá cúú-xi-ndó. <sup>26</sup> Te nchaa tnúhu sá ðánèhé ñáhà-í xii-ndo ñá túú ní tècú dóho nchaa ñáiyu ní xíndecu ndéé sanaha, te mee-gá ní cuini-gá sá ncháá nchòo ñáiyu yíndaha-gá vitna cundecu ndíhi-o tnúhu-á<sup>n</sup>. <sup>27</sup> Te mee-gá ní cachí-gá sá dátúu-gá nchaa tnúhu sá ío vii ío váha cuáhá<sup>n</sup> núú ncháa ñáiyu yíndaha-gá. Te tnúhu-á<sup>n</sup> cúú-xi cuendá tnahá nchaa nchòhó ñáiyu ñá túú cùú ñáiyu israhél. Te tnúhu-á<sup>n</sup> ðánèhé ñáhà-xi xii-ndo sá Xítoho Jesucristú ndécú ndíhi ñaha-gá xii-ndo. Te cuendá xiá<sup>n</sup> ní ngúndecu ndíhi-ndo tnúhu ndee iní cundecu-ndo ndíhi-gá ní caa ní quíhí<sup>n</sup>.

<sup>28</sup> Te nchúhú mee-ni cuendá Xítoho Jesucristú càhá<sup>n</sup> váha-ndí, te ðásahú-ndí ñáiyu nácuáa cáda-yu. Te váha vii ðanéhé-ndí nchaa ñáiyu nácuáa tecú tnùní-yu tnúhu-gá, te duca<sup>n</sup> ðanéhé-ndí-yu nácuáa cundáá-yu núú Yá Ndióxi, te duca<sup>n</sup> chi tnahá tnúhu-yu ndíhi Xítoho Jesucristú. <sup>29</sup> Te cuendá xiá<sup>n</sup> ío nducu ndee-í quidè-í chiúú Xítoho Jesucristú, te mee-gá ío chíndee ñaha-gá xii-í núú xiá<sup>n</sup> ndácú-í quidè-í chiúú-gá.

## 2

<sup>1</sup> Te cuini-í sá nchòhó cutnùnì iní-ndó sá ío sàni iní-í cuendá-ndó, ndíhi cuendá nchaa ñáiyu ndècu ñuu Laodiceá, ñáiyu Xíndecu ichi Xítoho Jesucristú. Te duca<sup>n</sup>-ni ío sàni iní-í cuendá nchaa ñáiyu vátá quini ñáhá-gá xii-í. <sup>2</sup> Te cuini-í sá nchòhó ndíhi nchaa ñáiyu-á<sup>n</sup> ío nducu ndee-ndo canchicú<sup>n</sup> nihnu-ndo ichi Xítoho Jesucristú, te ío cuu iní tnahá-ndó,

te duca<sup>n</sup> cùú ñ<sup>n</sup>-nuu-ndo cundecu-ndo. Te cuini-í sá nchòhó ndíhi dava-gá ñáiyu-á<sup>n</sup> ío váha sáá sá xini tnùnì-ndó cuendá tecú tnùnì-ndó ncháa nacuaa ndúu cuendá Xítoho Jesucristú chi ío ndúu yuhu ní cuu, dico vitna ní dátúu-gá núú-ó. <sup>3</sup> Te Xítoho Jesucristú néhé váha-gá nchaa tnúhu sá ío xini ñuhu-xi tecú tnùnì-ó. <sup>4</sup> Te duha càhá<sup>n</sup>-í chi cuini-í sá vá quindáá iní-ndó ní ñ<sup>n</sup> tnúhu càhá<sup>n</sup> nchaa ñáiyu cuini dandàhú ñáhá xii-ndo cuéí ío váha càhá<sup>n</sup>-yu. <sup>5</sup> Te cuéí ñá túú ndècu ndíhi ñaha-í xii-ndo dico duca<sup>n</sup>-ni ío ñuhu iní ñáhà-í, te ío cùdíí iní-í chi nihí-í tnúhu sá ío cùú ñ<sup>n</sup>-nuu-ndo ndecu-ndo, te ñá túú ðáña ndéé-ndó sàndáá iní-ndó Xítoho Jesucristú.

<sup>6</sup> Te ðátná-ni ní sàndáá iní-ndó Xítoho Jesucristú, te duca<sup>n</sup>-ni quindáá iní-ndó-gá canchicú<sup>n</sup> nihnu-ndo ichi-gá. <sup>7</sup> Te ní yúhu ní iní-ndó canchicú<sup>n</sup> nihnu-ndo ichi-gá, te duca<sup>n</sup> cuíta cutnùnì-gá iní-ndó ncháa nacuaa càhá<sup>n</sup>-gá quíhí<sup>n</sup>. Te vá ðáña ndéé tnahá-ndo quindáá iní-ndó ncháa tnúhu sá ní ðánèhé ñáhá cuè téé càhá<sup>n</sup> tnúhu-gá xii-ndo. Te xini ñuhu-xi ndacá<sup>n</sup> táhú vihi-ndo núú Yá Ndióxi cuendá nchaa tnúhu-á<sup>n</sup>.

*Ñáiyu ío váha tnahá tnúhu ndíhi Xítoho Jesucristú*

<sup>8</sup> Te ío quíhi iní-ndó cundecu-ndo chi xica cuu ñáiyu cuini dandàhú ñáhá xii-ndo, te ñáiyu-á<sup>n</sup> càhá<sup>n</sup>-yu mee-ni ncháa tnúhu ní cahu iní nchaa cue téé ñuyúú-a, te nchaa tnúhu-á<sup>n</sup> ñá túú vèdana nàndíhi-xi. Te duca<sup>n</sup> quidè-yu chi nchicú<sup>n</sup> nihnu-ní-yu nchaa nácuáa ní xóo cada ñáiyu ní xíndecu ndéé sanaha. Te càhá<sup>n</sup>-yu nácuáa sàni iní yucu ñávàha, te ñá túú càhá<sup>n</sup>-yu nácuáa cuini méé Xítoho Jesucristú.

<sup>9</sup> Te Xítoho Jesucristú cúú-gá ñ<sup>n</sup> ñáiyu dico ñ<sup>n</sup>-ni cùu-gá ndíhi Dútú Ndióxi. <sup>10</sup> Te nchòhó chi ñá túú tnahá-gá ná cùmání-ndó núú-gá chi ndècu ndíhi-ndo Xítoho Jesucristú. Te ío cùnuu-gá te tàxi tnunì-gá nchaa núú cue espíritú cùnùu. <sup>11</sup> Te mee-gá ní ndada ndoo ní ndada nine-gá iní-ndó chi ní ngúndecu ndíhi-ndo-gá te duca<sup>n</sup> ñá túú-gá ndécú-ndó ichi cuehé ichi duha, te cada iní-ndó sá ní ngúndecu ndíhi-ndo ñ<sup>n</sup> señá, chi ní ndada ndoo ní ndada nine-gá iní-ndó, dico ñá ðúú ñ<sup>n</sup>-ni cuu-xi ndíhi señá sá sàha cue téé israhél ñíi-güedé. <sup>12</sup> Te nchòhó sá ní sandute-ndo te cada iní-ndó sá ðátná tnúhu sá ní xihí-ndó ndíhi Xítoho Jesucristú, te ní nguindúxi-ndo ndíhi-gá, te ní ndoto-ndo ndíhi-gá, te duca<sup>n</sup> cáda iní-ndó chi ñá túú-gá ndécú-ndó ichi cuehé ichi duha. Te duca<sup>n</sup> chi sàndáá iní-ndó ncháa nacuaa quide Yá Ndióxi, te diu-gá ní ðándótó-gá Xítoho Jesucristú. <sup>13</sup> Te nchòhó cutnàhá ndécú-ndó ichi cuehé ichi duha cùu-ndo ðátná ñáiyu

ní xihí, chi ñá túú tnahá tnúhu-ndo ndihi Yá Ndióxi ní cùu, te ni ñá díú ñáyiú israhél cúu-ndó. Te Yá Ndióxi ní cachí-gá sá nchóó ío váha tnahá tnúhu-o ndihi Xitohó Jesucristú vitna. Te duca<sup>n</sup> ní quide-gá chi sa ní quide cahnu iní-gá nchaa sá cuèhé sá dúhá ní xóo cada-o. <sup>14</sup> Te vitna duu<sup>n</sup> duu<sup>n</sup> ñá túú-gá cuèchi-o ndècu núú-gá. Te nchoo ñá túú cuini-ó cada-o nacuaa cahá<sup>n</sup>-gá, te cuendá xíá<sup>n</sup> ío ndècuèchi-o, te vai nacháhu-o núú-gá ní cùu. Te vitna ñá túú-gá ní ì<sup>n</sup> cuèchi-o ndècu núú-gá, chi diu cuendá-á<sup>n</sup> ní xihí Xitohó Jesucristú núú cùrúxi. <sup>15</sup> Te sá dúcá<sup>n</sup> ní xihí Xitohó Jesucristú núú cùrúxi, te duu<sup>n</sup> duu<sup>n</sup> ní dáqueé tihú-gá sáculhá<sup>n</sup> ndihi nchaa espíritú cùndihi-xi, te ní quendóo canúú-xi, te mee-gá ío cùnuu-gá táxi tnúni-gá.

*Nanducu nihnu-o mee-ni sá váha càchi Xitohó Jesucristú*

<sup>16</sup> Te núu dava ñáyiú xícuèhé ñáhá-yu xii-ndo cuendá sá ñá túú xèxi-ndo xihí-ndo datná quidé mèe-yu te vá cáda cuendá-ndó, te ni vá cáda cuendá-ndó te núu xícuèhé ñáhá-yu xii-ndo cuendá sá ñá túú cànehe íi-ndó víco quide mèe-yu núú cuiá núú cuiá, ndihi vico quidé-yu ndi tnahá yóó, ndihi cuendá sá ñá túú cànehe íi-ndó nduu nde-tatú-yu. <sup>17</sup> Te nacuaa quidé-yu ndi tnahá òrè quidé-yu nchaa vico-á<sup>n</sup>, ndihi nacuaa quidé-yu ndi tnahá nchaa nduu cànehe íi-yu-á<sup>n</sup>, te cada iní-ó sá sá quidé-yu-á<sup>n</sup> dánèhé núú ñáhá-xí nacuaa cada Xitohó Jesucristú núú cuahá<sup>n</sup> núú vèxi. <sup>18</sup> Te vá quindáá iní-ndó ní ì<sup>n</sup> tnúhu cahá<sup>n</sup> ñáyiú càchi sá cuiá nihnu-ndo cuendá sá ñá túú tñi-ndo tnúhu cahá<sup>n</sup>-yu, chi càchi-yu sá ío xini ñuhu-xi cada cahnu-o nchaa cue espíritú xínú cuèhi núú Yá Ndióxi, te ni yùhu ní iní-ó cànehe-o sá yíñuhu núú-xi. Te ñáyiú-á<sup>n</sup> càchi-yu sá ndáá cahá<sup>n</sup>-yu chi dàcoto ñaha saní-yu nacuaa cahá<sup>n</sup>-yu, te ío quide cahnú-yu mèe-yu cuendá nchaa sá sání iní mèe-yu quidé-yu, te ñá túú vèdana nándihi nchaa sá quidé-yu. <sup>19</sup> Te nchaa ñáyiú duca<sup>n</sup> xíquide-á<sup>n</sup> ñá túú tnahá tnúhu-yu ndihi Xitohó Jesucristú. Te mee-gá cúú-gá Yaá cúnúu taxi tnuní ñáhá-gá xii nchaa nchoo ñáyiú ndècu ichi-gá, te chindee ñaha-gá xii-o ndècu-o ichi-gá, te mee-gá quidé-gá cúú ì<sup>n</sup>nuu-o ndècu-o, te ta quide-o nchaa nacuaa cuiní Yá Ndióxi cuahá<sup>n</sup>.

<sup>20</sup> Te nchóhó cúú-ndó datná ñáyiú ní xihí ndihi Xitohó Jesucristú cuendá sá vá cànchicú<sup>n</sup> nihnu-gá-ndó nacuaa cahá<sup>n</sup> ñáyiú ñá túú ndècu ichi-gá. Te núu duca<sup>n</sup> ña, ¿te ná cuendá tñi-ní-ndó tnúhu cahá<sup>n</sup> ñáyiú-á<sup>n</sup> te quide-ni-ndo datná quidé-yu? <sup>21</sup> Chi ñáyiú-á<sup>n</sup> càchi-yu sá ío sá ní vá cúú tèe ndaha-o, te dava ní vá cúú càxi-o, te dava ní vá cúú tñi-o. <sup>22</sup> Te nchaa xíá<sup>n</sup>, núú

nèhé chiú<sup>n</sup>-ni-o ndihi nihnu-xi. Te nchaa sá dúcá<sup>n</sup> cahá<sup>n</sup>-yu-á<sup>n</sup> cúú-xí mèe-ni sá ní cahu iní mèe nchaa ñáyiú ñuyúú-a nacuaa cada-yu cundecú-yu. <sup>23</sup> Te nchaa tnúhu cahá<sup>n</sup>-yu-á<sup>n</sup> sánúu sá cúú-xí ì<sup>n</sup> tnúhu cahá<sup>n</sup> ì<sup>n</sup> téé ío váha sáá díquí-xi, chi càchi-yu sá cáda cahnu-o Yá Ndióxi nacuaa vèxi iní mèe-ó, te cunduu ndáhú iní-ó dico ñá túú dànehé ñáhá-yu nacuaa taú-xi cunduu. Te càchi tucú-yu sá cáda úhú-ó mèe-o, chi duca<sup>n</sup> cuiní Yá Ndióxi cada-o càchi-yu. Te nchaa xíá<sup>n</sup> ñá túú vèdana chindee ñaha-xi xii-o cuendá sá vá táxi tnúni ñáhá ní ì<sup>n</sup> sá cuèhé sá dúhá sání iní-ó.

### 3

<sup>1</sup> Te nchóhó cada iní-ndó sá ní xihí-ndó ndihi Xitohó Jesucristú te ní ndoto-ndo ndihi-gá, núu xíá<sup>n</sup> taú-ndó cada-ndo nchaa sá váha dàtná cuiní mèe-gá chi mee-gá núcõo-gá xio cùha Dútú Ndióxi chi tnahá-gá ío cùnuu-gá. <sup>2</sup> Te ío cuhu<sup>n</sup> iní-ndó nchaa sá váha càchi Xitohó Jesucristú nduu táhú-ndó cundecu ndihi-ndo, te vá cúhú<sup>n</sup> iní-ndó mèe-ni nchaa sá ío ñuyúú-a. <sup>3</sup> Te duca<sup>n</sup> càda-ndo chi cùu-ndo datná ñáyiú ní xihí ndihi Xitohó Jesucristú, chi ñá túú-gá ndécú-ndó ichi cuèhé ichi duha. Te Yá Ndióxi nèhé cuendá ñáhá-gá xii-ndo chi tnahá tnúhu-ndo ndihi Xitohó Jesucristú. <sup>4</sup> Te Xitohó Jesucristú cúú-gá Yaá ndécú ndihi ñaha xii-o vitna, te sáá nduu quèe túu ndihi ñaha-gá xii-o àndiu, te tnahá-ó ío cunuu-o ndihi-gá.

*Duu<sup>n</sup> duu<sup>n</sup> dañá-o nchaa sá cuèhé sá dúhá ñuhu iní-ó te cada-o mèe-ni sá váha*

<sup>5</sup> Te duu<sup>n</sup> duu<sup>n</sup> dañá-ndo nchaa sá cuèhé sá dúhá ñuhu iní-ndó. Te nchaa nchóhó cue téé vá cahá<sup>n</sup> ndihi-ndo ñáyiú ñií te núu ñá díú ñàdihí-ndó cúu-yu, te duca<sup>n</sup>-ni nchaa nchóhó cue ñáyiú ñií tucu vá cahá<sup>n</sup> ndihi-ndo cue tèe te núu ñá díú yíi-ndo cuu-güedé, te nchaa-ndo vá cání-gá iní-ndó cada-ndo ní ì<sup>n</sup> sá cuèhé sá dúhá ndihi tnahá ñáyiú-ndo. Te vá cání cuèhé caní duha-gá iní-ndó sá cúú-xí-ndó ndihi-yu, te vá cání-gá iní-ndó ní ì<sup>n</sup> sá cuèhé sá dúhá, te ní vá xihí-ndó ì<sup>n</sup> sá ndécú ndihi tnahá ñáyiú-ndo, chi núu duca<sup>n</sup> na càda-ndo xiho-ndo sá ndécú ndihi-yu te ì<sup>n</sup>-ni cùu-ndo ndihi ñáyiú chiñuhu nchaa sá càchi-yu cùu ndióxi te ñá ndáá sá ndióxi cúú nchaa xíá<sup>n</sup>. <sup>6</sup> Te nchaa ñáyiú duca<sup>n</sup> xíquide ío dandóhó ñaha Yá Ndióxi xii-yu na sáá nduu tnúndóhó tnúhu ndáhú, chi ñá túú sàndáá iní ñáhá-yu xii-gá. <sup>7</sup> Te nchóhó cùtnháá ní xindecu-ndo ichi cuèhé ichi duha, te tnahá-ndó ní xóo cada-ndo datná quidé nchaa ñáyiú-á<sup>n</sup>. <sup>8</sup> Te vitna duu<sup>n</sup> duu<sup>n</sup> dañá-ndo nchaa sá ná càchi tnúhu-í-a: Vá cúdeé<sup>n</sup>-gá-ndó, te ní vá cùnduu líhli-gá

iní-ndó, te ni vâ cúú úhú-gá iní-ndó tnàha ñâyiu-ndo, te ni vâ cùcùehé-gá-ndó-yu, te ni ìñ-gá tnúhu cuèhé vâ càhá<sup>n</sup>-ndó. <sup>9</sup> Te ni vâ dâcuàndehnde-gá-ndó, chi nchòhó sa ní dâñá-ndó nchàa ichi cuèhé ichi duha, te ñá túú-gá sání cuèhé sání dùha iní-ndó ná cada-ndo vitna datná ní xóo cada-ndo. <sup>10</sup> Te vitna nchòhó ní nduu-ndo ñâyiu vâha, te uu<sup>n</sup>-gá tá cùtunúí iní-ndó duca<sup>n</sup> ta ndücu ndee-ndo quide-ndo mee-ni sâ vâha datná quidé mèe-gá. <sup>11</sup> Te vitna ní ngúndecu ndíhi-ndo Xítóhó Jesucristú, te vâ cáda cuendá-gá-ndó núu cùu-ndo ñâyiu israhèl ádi ñá túú cùu-ndo, te ni vâ cáda cuendá-ndó núu cùu-ndo ñâyiu ní ngúndecu sèñá ñi-xi ádi ñáhá, te ni vâ cáda cuendá-ndó núu cùu-ndo ñâyiu véxi ñúú xícá, te ni vâ cáda cuendá-ndó núu cùu-ndo ñâyiu ndéu ñá túú tnáhi dâñá quee núú chíú<sup>n</sup> patróó<sup>n</sup>-xi, te ni vâ cáda cuendá-ndó núu cùu-ndo ñâyiu dâñá queé núú chíú<sup>n</sup> patróó<sup>n</sup>-xi, chi Xítóhó Jesucristú cúnúu-gá ndécú ndíhi ñaha-gá xii-o nchàa-o.

<sup>12</sup> Te Yá Ndióxi ní dáqueé diñ ñaha-gá xii-ndo cuendá cundecu-ndo ndíhi-gá, te vitna cùu-ndo ñâyiu quide ndíhi ndécú ichi-gá. Te mee-gá ío cùu iní ñáhá-gá xii-ndo núu xíá<sup>n</sup> tàú-ndó cundahú iní tnáhá-ndó, te ío vâha cuu iní-ndó chindee tnaha-ndo, te cuu-ndo ñâyiu ndáhú iní-xi, te ío vii ío vâha cuu iní-ndó cundecu ndíhi tnaha-ndo, te ío càhnu cunduu iní-ndó cuendá nchaa sâ quidé ñaha ñâyiu xii-ndo. <sup>13</sup> Te duca<sup>n</sup> cànehe-ndo tnúhu càhnu iní núú ndi mèe-ndo nacuaá ndècu-ndo ichi-gá, te cada càhnu tucu iní-ndó núu ná cúú sâ cùmání núú tnáhá-ndó. Te datná ní quide càhnu iní Xítóhó Jesucristú nchaa sâ ñá túú vâha ní xóo cada-ndo duca<sup>n</sup> càda-ndo cada càhnu iní-ndó nchàa sâ cùmání núú tnáhá-ndó ndècu-ndo. <sup>14</sup> Te xini ñuhu vihi-xi sâ ío cuu iní tnáhá-ndó cundecu-ndo, chi núu duca<sup>n</sup> na càda-ndo, te quide-ndo nchaa dava-gá sâ càhá<sup>n</sup>-í, te ñá túú tnáhi-gá ná cùmání-ndó. <sup>15</sup> Te daña-ndo sâ Yá Ndióxi ná chindee ñaha-gá nâcuáa ío vâha cuu iní-ndó cundecu-ndo, chi diu cuendá-á<sup>n</sup> ní càhá<sup>n</sup> ñáhá Yá Ndióxi xii-ndo cuendá cuu ìñ<sup>n</sup>uu-ndo ndíhi nchaa dava-gá ñâyiu ndècu ichi-gá, te duca<sup>n</sup>-ni ío ndacá<sup>n</sup> táhú-ndó núú-gá.

<sup>16</sup> Te ío cuhu<sup>n</sup> iní-ndó tnúhu Xítóhó Jesucristú, te ío vâha cuáha-ndo cuendá nâcuáa càhá<sup>n</sup> tnúhu-gá te duca<sup>n</sup> dânehé tnáhá-ndó. Te ío càhá<sup>n</sup> dóho tnàha-ndo nacuaá cada-ndo càncicú<sup>n</sup> nihnu-ndo càda-ndo nchaa nacuaá càhá<sup>n</sup> tnúhu-gá, te cata-ndo ndúdú ndéé núú tütú Yá Ndióxi, ndíhi nchaa dava-gá ndudú sâ xini mèe-ndó

xita-ndo te nchaa xíá<sup>n</sup> cata-ndo chiñuhu-ndo Yá Ndióxi. Te òré xítá-ndó te ni yùhu ni iní-ndó ndacá<sup>n</sup> táhú-ndó núú-gá. <sup>17</sup> Te cuhu<sup>n</sup> iní-ndó Xítóhó Jesucristú òré sání iní-ndó càda-ndo ìñ<sup>n</sup> chiu<sup>n</sup> ádi ná tnúhu cuini-ndó càhá<sup>n</sup>-ndó, te diu-ni-gá cuhu<sup>n</sup> iní-ndó. Te xini ñuhu-xi ndacá<sup>n</sup> táhú-ndó núú Yá Ndióxi, te diu-ni Xítóhó Jesucristú chindee ñaha-gá xii-ndo ndacá<sup>n</sup> táhú-ndó núú Tátá-ó Dùtú Ndióxi.

*Nâcuáa tàú ñâyiu ndècu ichi Xítóhó Jesucristú cada-yu sâ cúú-xi ndi mèe-yu*

<sup>18</sup> Te nchaa nchòhó ñâyiu diñ ñâyiu ndècu yì-xi quindáa iní-ndó yì-ndo, chi duca<sup>n</sup> tàú-xi cada nchaa ñâyiu diñ ndécú ichi Xítóhó Jesucristú. <sup>19</sup> Te nchaa nchòhó cue téé ndècu ñadihí-xi cuu iní-ndó ñadihí-ndó, te vâ cùcùehé-ndó-yu. <sup>20</sup> Te nchaa nchòhó ñâyiu ndècu tátá-xi ndíhi náná-xi quindáa iní-ndó-yu, chi núu duca<sup>n</sup> na càda-ndo te ndúu vétú iní Yá Ndióxi. <sup>21</sup> Te nchaa nchòhó ñâyiu cùu tátá ndíhi náná vâ dásátú-ndó iní cue déhe-ndo, chi núu duca<sup>n</sup> na càda-ndo te ni vâ quixí-gá iní-güexi cada-güexi sâ vâha. <sup>22</sup> Te nchaa nchòhó ñâyiu xinu cuechi quindáa iní-ndó nchàa ñâyiu cùu patróó<sup>n</sup>-ndó, te ni yùhu ni iní-ndó càda-ndo nchaa chiu<sup>n</sup> tahú-yu cuèi òré ndécú-yu ádi òré ñá túú-yu, te ñá diú òré-ni ndèhé-yu cada-ndo cuendá-ni sâ cuini-ndó cùdiu-ndo núú-yu, chi cada-ndo sâ néhé-ndó sâ yíñuhu núú Xítóhó Jesucristú. <sup>23</sup> Te nchaa chiñ<sup>n</sup> sani iní-ndó càda-ndo te cada-ndo ni yuhu ni iní-ndó, te sâ dúcá<sup>n</sup> càda-ndo-á<sup>n</sup> te cada-ndo cuendá sâ xínú cuèchi-ndo núú Xítóhó Jesucristú te ñá diú núú ñâyiu ñuyíú-a xinu cuechi-ndo. <sup>24</sup> Te nchòhó sa ñaha-ndo sâ Xítóhó Jesucristú taxi-gá sâ ndúú táhú-ndó te núu duca<sup>n</sup> na càda-ndo, chi cùu-ndo ñâyiu xinu cuechi núú-gá. <sup>25</sup> Te nchaa ñâyiu quide nchaa sâ cuèhé sâ dúhá nàcháhu-yu núú Yá Ndióxi cuendá nchaa sâ quidé-yu, te mee-gá vâ cáda cuendá-gá cuèi nái ñâyiu cùu-yu, chi nchaa-yu nacháhu-yu nchaa sâ ñá túú vâha quidé-yu núú-gá.

#### 4

<sup>1</sup> Te nchaa nchòhó ñâyiu cùu patróó<sup>n</sup> cuu-ndo ñâyiu vâha, te cada-ndo nchàa nacuaá tàú-xi cunduu ndíhi nchaa ñâyiu xinu cuechi núú-ndó, te cunaha-ndo sâ àndiu ndecu Yaá cúú Xítóhó-ndó tàxi tnuní ñáhá-gá xii-ndo.

<sup>2</sup> Te nchaa nchòhó ñâyiu ndècu ichi Xítóhó Jesucristú, vâ dâñá ndéé-ndó càhá<sup>n</sup> ndíhi-ndo Yá Ndióxi, te ío cuhu<sup>n</sup> iní-ndó-gá òré càhá<sup>n</sup> ndíhi-ndo-gá, te òré-á<sup>n</sup> ío ndacá<sup>n</sup> táhú-ndó núú-gá. <sup>3</sup> Te cécá<sup>n</sup> táhú-ndó tnáhá cuendá-ndí núú-gá cuendá sâ diú-gá ná cáda te ndacu-ndí càhá<sup>n</sup>-ndí tnúhu-gá núú nchàa

dava-gá ñáyiú, te duca<sup>n</sup> cáhá<sup>n</sup>-ndí tnúhu Xítóhó Jesucristú sá ñá túú ní xíndecu ndíhi nchaa ñáyiú ní xíndecu ndéé sanaha, te diu cuèndá tnúhu-án yíhí-í vecaá vitna. <sup>4</sup> Te cáhá<sup>n</sup> ndíhi-ndo Yá Ndióxi cuèndá cáhá<sup>n</sup>-í nàcuáa tàú-xi cunduu te tecú tnúni-yu.

<sup>5</sup> Te cada-ndo nchaa nacuáa tàú-xi cunduu sá cúu-xí nchaa ñáyiú ñá túú ndècu ichi-gá, te duca<sup>n</sup>-ni ío nducu ndèe-ndo cada-ndo nchaa nacuáa tàú-xi cunduu. <sup>6</sup> Te cada cuèndá-ndó sá ío víi ío váha cunduu tnúhu cáhá<sup>n</sup> ndíhi-ndó-yu, te cáhá<sup>n</sup>-ndó ì<sup>n</sup> tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cúñaha-ndo xii ì<sup>n</sup> ì<sup>n</sup>-yu.

*Tnúhu ndéé núú ní ndíhi-ndá*

<sup>7</sup> Te té Tiquicú téé ío cùu iní-ó ndècu ndíhi-o ichi Xítóhó Jesucristú, téé-án cachí tnúhu-dé nchaa nàcuáa cùu ndecu-í. Te tnàhá-dé xínú cuèchi-dé núú Xítóhó Jesucristú te ío váha quide ndáá-dé. <sup>8</sup> Te tendaha-í-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee iní cundecu ndíhi-ndo. <sup>9</sup> Te tnàhá tucu té Onésimú téé ío cùu iní-ó ndècu ndíhi-o ichi Xítóhó Jesucristú quixi ndíhi-dé, te diu-ni téé ñúú-ndó cùu-dé te tnàhá-dé ío váha quide ndáá-dé. Te ndí ndúú-güedé cachí tnúhu-güedé nchaa nàcuáa cùu iha.

<sup>10</sup> Te té Aristarcú téé yíhi ndíhi-í vecaá quidé ndèe iní ñáhá-dé xii-ndo ndíhi té Mácú ñani primú tè Bèé. Te sa nàha-ndo nchaa nacuáa ní cáhá<sup>n</sup>-í cada-ndo quèhe<sup>n</sup> cuèndá-ndó tè Mácú, te núu na quixi-dé quixi coto ñaha-dé xii-ndo, te ío váha cuu iní-ndó quèhe<sup>n</sup> cuèndá-ndó-dé. <sup>11</sup> Te tnàhá téé nani Jesús, àdi Bustú chí úú diu-dé, quidé ndèe iní ñáhá-dé xii-ndo. Te cue téé-a cùu-güedé cue téé isráél ní chitnahá ñáhá-güedé xii-í cáhá<sup>n</sup>-ndí núú ñáyiú nàcuáa ndíhu ndaha ñaha Yá Ndióxi xii-yu, te ni ì<sup>n</sup>-gá ñáyiú isráél ñá túú quide datná quidé-güedé. Te ío váha tàxi-güedé tnúhu ndee iní xii-í. <sup>12</sup> Te tnàhá téé ñúú-ndó tè Épafrás quidé ndèe iní ñáhá-dé xii-ndo, te cùu-dé tnàhá-dé téé xínu cuechi núú Xítóhó Jesucristú. Te duca<sup>n</sup>-ni ñi yuhu ni iní-dé xicá<sup>n</sup> táhú-dé núú Yá Ndióxi cuèndá-ndó cuèndá sá cànchicú<sup>n</sup> nihnu-ni-ndo ichi-gá, te duca<sup>n</sup> te ío váha tecú tnúni-ndó nchaa nacuáa cuini Yá Ndióxi cada-ndo, te diu-ni duca<sup>n</sup> cànchicú<sup>n</sup> nihnu-ndo cada-ndo. <sup>13</sup> Te yúhú càchí tnúhu ndáá-í xii-ndo sá súúni sàni iní-dé sá méé-ní sá váha cuu xii-ndo cundecu-ndo ndíhi nchaa ñáyiú xíndecu ichi Xítóhó Jesucristú ndécú ñúú Laodiceá, ndíhi nchaa ñáyiú xíndecu tucu ichi-gá ndécú ñúú Hièrápólís. <sup>14</sup> Te tnàhá té Lùcá téé xini nchaa núú yúcú sá quidé tátna quide ndee iní ñáhá-dé xii-ndo téé ío cùu iní-ó, te

tnàhá tucu té Dēmás quidé ndèe iní ñáhá-dé xii-ndo.

<sup>15</sup> Te cúñaha-ndo na càda ndee iní nchaa ñáyiú ndècu ndíhi-o ichi Xítóhó Jesucristú ndécú ñúú Laodiceá, ndíhi tá Míñfás, ndíhi nchaa ñáyiú ndècu ichi-gá tàcá vehe-xi dàcuahá-yu tnúhu-gá. <sup>16</sup> Te tutú càdúha-í-a tendaha-í quixi ndaha-ndo, te òrè ná ndíhí dàcuaha-ndo te tendaha-ndo quíhí<sup>n</sup> ndaha ñáyiú xíndecu ichi-gá ndécú ñúú Laodiceá cuèndá dacuáhá-yu tnàhá-yu. Te diu-ni duca<sup>n</sup> dàcuaha-ndo tutú tendaha-í quíhí<sup>n</sup> ndaha ñáyiú ñúú Laodiceá òrè ná dándixi-yu ndaha-ndo. <sup>17</sup> Te na càchí tnúhu-í xii-ndo nàcuáa cúñaha-ndo xii té Àrquipú, te duha cúñaha-ndo xii-dé: “Yá Ndióxi ní taxi-gá chíu<sup>n</sup> quide-n, te ío váha cada cuèndá-n càda-n nchaa nacuáa ní cachí-gá”, duha cúñaha-ndo xii-dé.

<sup>18</sup> Te yúhú té Páblú ndíhi ndaha mee-í téé-í ì<sup>n</sup> úú tnúhu-a quide ndee iní ñáhá-í xii-ndo, te cunaha-ndo sá yúhú yíhí-í vecaá. Te Yá Ndióxi ío na chindee chitúu ñaha-gá xii-ndo. Te duca<sup>n</sup> na cunduu. Te ío chí cáda ndèe iní-ná vitna.

## TUTÚ DÍHNA NUU NÍ CADÚHA TÉ PÁBLÚ QUIHI<sup>n</sup> NDAHA ÑÁYIU ÑUÚ TESALÓNICÁ

*Té Páblú ndihi cue tée cündihi-dé cadúha-güedé tutú quihi<sup>n</sup> ndaha ñáyiú xíndecu ichi Xítoho Jesucristú ndécú ñuú Tesalónicá*

<sup>1</sup> Yúhú té Páblú cadúha-í tutú-a ndihi té Silvanú, ndihi té Timüteú cuendá daquixi-í ndaha nchòhò ñáyiú ndécu ndihi-ndí ichi Xítoho Jesucristú ndécú ñuú Tesalónicá, chí cùu ñ<sup>n</sup>nuu-ndo ndihi Tátá-ó Dütú Ndiòxí, ndihi Xítoho Jesucristú. Te xicá<sup>n</sup> táhú-í núú Dütú Ndiòxí, ndihi núú Xítoho Jesucristú sá ño na chindee chítú ñaha-gá xii-ndo, te duca<sup>n</sup> ndí nduú-gá ná càda te ño váha cuu iní-ndó cündecu-ndo.

*Ñáyiú ñuú Tesalónicá ño váha sàndáá iní-yu Yá Ndiòxí*

<sup>2</sup> Te ndí tnahá òré càhá<sup>n</sup> ndihi-ndí Yá Ndiòxí ndácá<sup>n</sup> táhú-ndí núú-gá sá ño quide váha-ndo ndécu-ndo, te duca<sup>n</sup> xicá<sup>n</sup> táhú-ndí núú-gá sá ná còto ñaha-gá xii-ndo. <sup>3</sup> Te ño ndácá<sup>n</sup> táhú-ndí núú Tátá-ó Dütú Ndiòxí sá ní yuhu ní iní-ndó sàndáá iní-ndó-gá, te xínu cuechi-ndo núú-gá, te cùu iní tnahá-ndó nàcuáa ndécu-ndo ichi-gá ñuú xíá<sup>n</sup> ño xìto tnahando. Te cùtnuní ndáá iní-ndó sá quixí tucu Xítoho Jesucristú núú xíá<sup>n</sup> ñá túú dàña ndeé-ndó ndètu-ndo-gá. <sup>4</sup> Te nchòhò ñáyiú ndécu ndihi-ndí ichi Xítoho Jesucristú sa ñaha-ndí sá Yá Ndiòxí ño cùu iní ñáhá-gá xii-ndo, te ñuú-gá ní càhá<sup>n</sup> ñáhá-gá xii-ndo cuendá cundecu-ndo ichi-gá. <sup>5</sup> Te cùtnáhá ní dánhèhé ñáhá-ndí xii-ndo tñuhu-gá, chí ñá díú sá cùú iní mée-ndí duca<sup>n</sup> ní dánhèhé ñáhá-ndí xii-ndo, chí mee Espíritú Yá Ndiòxí ní chindee ñaha-xi ní càhá<sup>n</sup>-ndí ní yuhu ní iní-ndí tñuhu-gá núú-ndó. Te ñaha-ndo sá cùtnáhá ní xíndecu ndihi ñaha-ndí xii-ndo ní quide-ndí nàcuáa càhá<sup>n</sup> Yá Ndiòxí cuendá sá cùú-xí sá váha sá cùú-xí-ndó.

<sup>6</sup> Te nchòhò nchícú<sup>n</sup> nihnu-ndo quide-ndo vitna datná quide-ndí, chí quide váha-ndo dàtná quidé mée Xítoho Jesucristú, te díú iní ní tñi-ndo ichi-gá cuéi ní ndoho ní tnahá-ndó, chí mee Espíritú-gá ní chindee ñaha-xi xii-ndo. <sup>7</sup> Te sá dúcá<sup>n</sup> quide váha-ndo núú Yá Ndiòxí, xíá<sup>n</sup> yínchícú<sup>n</sup> nihnu ñáyiú distritú Macèdoniá, ndihi ñáyiú distritú Acáyá xíquide váha-yu tnahá-yu, ñáyiú xíndecu ichi-gá. <sup>8</sup> Te ñuú-ndo ní sanu ichi-ndo ñáyiú distritú Macèdoniá, ndihi ñáyiú distritú Acáyá, te ñá díú-ní ñáyiú

nchaa ñuú-á<sup>n</sup> chí nchaa ñáyiú dava-gá ñuú nihí-yu tñuhu sá ño sàndáá iní-ndó Yá Ndiòxí. Te ñá túú-gá ná tñuhu càhá<sup>n</sup>-ndí cuendá-ndó, chí nchaa-yu sa nihí-yu tñuhu sá ño váha quide-ndo ndecu-ndo. <sup>9</sup> Te mée-yu xicáhá<sup>n</sup> váha-yu cuendá-ndó sá ño váha ní quehe<sup>n</sup> cuendá ñáhá-ndó xii-ndí cùtnáhá ní quixi-ndí díhna nuu. Te ní dàñá-ndó nchaa sá càchí-ndó cùu ndiòxí-ndó chí ñá díú ndiòxí cùú-xí, te ní tñi-ndo ichi Yá Ndiòxí Yá ndécú tñu andiú chí ñuú-gá cùú-gá Ndiòxí ndisa, te xínu cuechi-ndo núú-gá vitna, <sup>10</sup> te ndètu-ndo quixí tucu Xítoho Jesucristú Déhe Yá Ndiòxí Yá ndécú àndiú, chí ñuú-ni-gá ní quixi-gá ñuyiú-a ní xihí-gá, te ní ndoto-gá ní dándótó ñaha Yá Ndiòxí xii-gá. Te ñuú-ni Xítoho Jesucristú dàcácu nihnu ñaha-gá xii-o núú ùhú núú ndàhú, chí sàndáá iní-ó-gá.

## 2

*Nàcuáa ndiú chiur<sup>n</sup> ní quide té Páblú ñuú Tesalónicá*

<sup>1</sup> Te nchòhò ñáyiú ndécu ndihi-ndí ichi Xítoho Jesucristú ñaha-ndo sá ñá díú àu<sup>n</sup> ná cuu ní quixi coto ñaha-ndí xii-ndo, chí ní sàndáá iní-ndó tñuhu Yá Ndiòxí. <sup>2</sup> Te ñaha-ndo sá cùtnáhá ní xíndecu-ndí ñuú Filipú ño ní xíhú<sup>n</sup> tñuhu cuèhé tñuhu duha núú-ndí, te ní caniha-güedé xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní càhá<sup>n</sup>-ndí tñuhu Yá Ndiòxí núú-ndó, chí mee-gá ní chindee ñaha-gá xii-ndí cuéi ño chitu ñáyiú ní cuu ùhú iní ñáhá xii-ndí. <sup>3</sup> Te ñá túú ní dándahú ñáhá-ndí xii-ndo chí mee-ni tñuhu ndáá ní càhá<sup>n</sup>-ndí núú-ndó, te ní ñá túú ní ñ<sup>n</sup> tñuhu cuèhé ñúhú iní-ndí ní càhá<sup>n</sup>-ndí tñuhu-gá núú-ndó chí sa ní nduu ndoo ní nduu nine iní-ndí. <sup>4</sup> Te mee Yá Ndiòxí ní càchí-gá sá càhá<sup>n</sup>-ndí tñuhu-gá, te càhá<sup>n</sup>-ndí nàcuáa cùu iní mée-gá, chí sa ñaha-gá nàcuáa càda iní-ndí, te ñá túú càhá<sup>n</sup>-ndí nàcuáa cùu iní ñáyiú. <sup>5</sup> Te ñaha-ndo sá ñá díú ñ<sup>n</sup> tñuhu cudíí iní-ndó cündecu-ndo ichi ñuyiú ní càhá<sup>n</sup>-ndí núú-ndó cuendá taxi-ndo díhú<sup>n</sup>. Te Yá Ndiòxí sa ñaha-gá sá càhá<sup>n</sup> ndáá-ndí. <sup>6</sup> Te ñá ñ<sup>n</sup> nduu ní quide-ndí ñ<sup>n</sup> sá càdá-ndí cuendá-ni sá càdá càhnu ñaha-ndo xii-ndí, àdi cada cahnu ñaha dava-gá ñáyiú, te cuéi tñu ndisa-ndí sá càdá càhnu ñaha-ndo xii-ndí ní cùu, chí chiur<sup>n</sup> Xítoho Jesucristú quidé-ndí, te dicó-ni sá nchúhú ñá túú ní cùini-ndí sá dúcá<sup>n</sup> càda-ndo. <sup>7</sup> Te ño vii ño váha ní càhá<sup>n</sup>-ndí núú-ndó, dàtná quidé ñ<sup>n</sup> ñaha cuu náná vii vii càhá<sup>n</sup> ndihi cue déhe-a<sup>n</sup> dàcuelnu ñaha-a<sup>n</sup> xii-güexi. <sup>8</sup> Te duca<sup>n</sup> ño cùu iní ñáhá-ndí xii-ndo, dico ñá díú-ní sá ní càhá<sup>n</sup>-ndí tñuhu Yá Ndiòxí núú-ndó, chí

ndéé iní-ndí taxi-ndí ní dácótó ñaha-xi, te núu dicó ní cùu-xi sá cùú, cuèndá sá io cùu iní ñáhá-ndí xii-ndo. <sup>9</sup> Te nchòhó ñáyiú ndècu ndihi-ndí ichi Xítóhó Jesucristú ñaha-ndo sá io ní quide chiú-ndí cuèndá ní níhí-ndí sá ní xexi-ndí. Te cuèi nduu cuèi núú ní quide chiú-ndí ní níhí-ndí sá ní xexi-ndí ní cáhá-ndí tnúhu Yá Ndióxi núú-ndó cuèndá sá ñà túú ní cuíni-ndí chichíu ñaha-ndí xii-ndo.

<sup>10</sup> Te nchòhó ñáyiú sàndáá iní tnúhu Yá Ndióxi xini ndáá-ndó sá cùú-ndí cue téé váha te duca<sup>n</sup> sá naha Yá Ndióxi tucu, te ní xica-ndí ichi ndáá òré ní cáhá-ndí tnúhu-gá núú-ndó te diu-ni duca<sup>n</sup> quide-ndí vitna. Te vá yòo ì<sup>n</sup> cáhá<sup>n</sup> sá ñà túú quide ndáá-ndí ndécú-ndí. <sup>11</sup> Te nàha tucu-ndo sá ní dácáhá<sup>n</sup> ñáhá-ndí xii-ndo, te ní taxi-ndí tnúhu ndee iní xii-ndo nchàa-ndo, te dàtná quidè ì<sup>n</sup> tátá ndihi cue déhe-dé ní quide-ndí. <sup>12</sup> Te ní cachí-ndí xii-ndo sá cádá ndáá-ndó cùndecu-ndo nacuáa tàù-xi cada nchaa ñáyiú tnàhá tnúhu ndihi Yá Ndióxi, chi mee-gá ní cáhá<sup>n</sup> ñáhá-gá xii-o cuèndá nduu táhú-ó cùndecu-o ndihi-gá núú io váha càa ndecu-gá táxi tnùni-gá.

<sup>13</sup> Te xiá<sup>n</sup> io ndácá<sup>n</sup> táhú-ndí núú Yá Ndióxi sá nchòhó òré ní tedóho-ndo tnúhu-gá ní cáhá-ndí, te ní sàndáá iní-ndó chi ní cutnùni iní-ndó sá díú tnúhu Yá Ndióxi cùú-xi, te ñá díú tnúhu ñáyiú ñuyúú-a cùu-xi. Te ndáá sá cùú-xi ì<sup>n</sup> sá io váha sá cùú-xi nchòo cue ñáyiú ní sàndáá iní tnúhu-gá. <sup>14</sup> Te nchòhó ñáyiú ndècu ndihi-í ichi Xítóhó Jesucristú, io ní ndoho ní tnàhá-ndó sá ní quide ñaha ñáyiú ñuu-ndó. Te nchòhó ní ndoho-ndo dàtná ní ndoho nchaa ñáyiú tàcá dácùaha tnúhu Xítóhó Jesucristú ndécú distritú Júdeá, chi tnàhá-yu io ní dándóhó ñaha ñáyiú ñuu-yu. <sup>15</sup> Te diu-ni ñáyiú distritú Júdeá-á<sup>n</sup> ní sahní-yu cue téé ní xóo cáhá<sup>n</sup> tnúhu Yá Ndióxi ndéé sanaha. Te diu-ni ñani tnàhá-yu cùu cue ñáyiú ní sahní ñaha xii Xítóhó Jesucristú, te sátá xiá<sup>n</sup> te ní ngúita-yu ní cuu úhú iní ñáhá-yu xii-ndí, núu xiá<sup>n</sup> ñá túú tnàhá iní Yá Ndióxi nchaa sá quidè-yu, te ndéé nchaa dava-gá ñani tnàhá-yu cùu úhú iní-yu. <sup>16</sup> Te io chidácá nihnu ñàhá-yu xii-ndí òré càhá-ndí tnúhu Yá Ndióxi núú ñáyiú ñá túú cùu ñáyiú isràél, te duca<sup>n</sup> quide ñáyiú-á<sup>n</sup> cuèndá cuíni-yu sá vá càhá-ndí tnúhu-gá, sá cádá cuèndá naníhí táhú ñáyiú ñá túú cùu ñáyiú isràél-á<sup>n</sup>, te sá dúcá<sup>n</sup> quidè-yu te io ta cùu vai-gá cuèchi-yu cuáhá<sup>n</sup>. Te Yá Ndióxi io cudéé<sup>n</sup>-gá núú-yu, te tendaha-gá ì<sup>n</sup> tnúndóho quixi sá cùú-xi-yu te io ndohó-yu.

*Té Páblú cuíni-dé quíngoto-dé ñáyiú xíndecu ichi Xítóhó Jesucristú ndécú ñuu Tesalónicá*

<sup>17</sup> Te nchòhó ñáyiú ndècu ndihi-ndí ichi Xítóhó Jesucristú ní quee-ndí núú-ndó, te cuèi ní cuxica-ndí dico duca<sup>n</sup>-ni ñuhu iní ñáhá-ndí xii-ndo, te io ñuhu iní-ndí sá quixi còto ñaha tucu-ndí xii-ndo. <sup>18</sup> Te yúhú té Páblú duca<sup>n</sup>-ni ñuhu iní-í sá cuèdicó mée-í quixi-í, quixi coto ñaha-í xii-ndo, dico yucu ñávàha chidácá nihnu ñaha-xi xii-í. <sup>19</sup> Te nchoo ñáyiú ndècu ichi Xítóhó Jesucristú ndètu-ni-gá-ó quèxio-gá candeca ñaha-gá xii-o ndàa andiu cundecu-o ndihi-gá. Te cudíí víhí iní-ndí sá cuèndá-gá chí ní chindee ñaha-gá ní sanu ichi ñaha-ndí xii-ndo ichi-gá, te io vai ñáyiú cáhá<sup>n</sup> váha-yu cuèndá-ndí ná sáá nduu quixi tucu-gá. <sup>20</sup> Te duca<sup>n</sup> io vai ñáyiú cáhá<sup>n</sup> váha-yu cuèndá-ndí cuèndá sá ní sanu ichi ñaha-ndí xii-ndo ichi-gá, te quide váha-ndo. Te xiá<sup>n</sup> io cudíí iní-ndí.

### 3

<sup>1-2</sup> Te sa ní cunduu ñá túú-gá cáhá<sup>n</sup> ndihi tnàha-o, núu xiá<sup>n</sup> ñá ní cùndee-gá iní-ndí ní tendaha-ndí té Timùteú ní quixi coto ñaha-dé xii-ndo, te nchúhú ní quendóo-ndí ñuu Átenás, chi tnàhá-dé xínú cuèchi-dé núú Yá Ndióxi, ndihi núú Xítóhó Jesucristú cáhá<sup>n</sup>-dé tnúhu-gá núú ñáyiú. Te ní quixi-dé ní taxi-dé tnúhu ndee iní xii-ndo cuèndá sá io quindáá-ni iní-ndó Xítóhó Jesucristú, te canchicú<sup>n</sup> nihnu-ni-ndo ní yuhu ní iní-ndó ichi-gá. <sup>3</sup> Te vá nátúhú iní-ndó cànchicú<sup>n</sup> nihnu-ndo ichi-gá sá dúhá cùu úhú iní ñáhá ñáyiú xii-o, te nchòhó sa ñaha-ndo sá dácùtíí sá ndóhó víhi-o cuèndá-gá. <sup>4</sup> Te ndéé cùtnàhá ndécú ndihi ñaha-gá-ndí xii-ndo ní cachí tnúhu ndáá-ndí sá io ndoho-o, te duca<sup>n</sup> ndisa quide-xi. <sup>5</sup> Te xiá<sup>n</sup> núu ñá ní cùu váha-gá iní-í chí cuèndá ñá túú-gá ní níhí-í tnúhu nacuáa cùu ndecu-ndo núu ní tendaha-í té Timùteú ní quixi-dé ní ndúcú tnúhu-dé núú-ndó núu ndècu-ni-ndo ichi Xítóhó Jesucristú, chí ní sani ì<sup>n</sup> ní sani úú iní-í sá cùú-xi-ndó, chí ná ndèé chidácá nihnu ñaha-yu ñávàha xii-ndo te cuíta chiú<sup>n</sup> ní quide-ndí sá cùú-xi-ndó ní cáhá<sup>n</sup>-í.

<sup>6</sup> Te ñáhá, chí ní ndexìo té Timùteú sá ní quixi-dé ñuu-ndó, te ñaha-dé tnúhu ní nasáá sá ní yuhu ní iní-ni-ndo sàndáá iní-ndó Yá Ndióxi, te cùu iní-ndó cue tnaha ñáyiú-ndo. Te càchí-dé sá io ñuhu iní ñáhá-ndó xii-ndí, te io cuíni-ndó cáhá<sup>n</sup> ndihi ñaha-ndo, te diu-ni duca<sup>n</sup> io cuíni nchúhú cáhá<sup>n</sup> ndihi ñaha-ndí xii-ndo tucu. <sup>7</sup> Te io ndòho-ndí chí io cùu úhú iní ñáhá ñáyiú xii-ndí, dico sá ní níhí-ndí tnúhu sá nchòhó ñáyiú ndècu ndihi-ndí ichi Xítóhó Jesucristú ñá túú dàña ndéé-ndó sàndáá iní-ndó Yá Ndióxi, te xiá<sup>n</sup> cùú-xi ì<sup>n</sup> tnúhu càhnu iní ní níhí-ndí chí ní naníhí ndéé-ndí. <sup>8</sup> Te ní nduu vétú iní-ndí sá

ní níhí-ndí tñuhu ndècu-ni-ndo ichi-gá. <sup>9</sup> Te òré càhá<sup>n</sup> ndihí-ndí Yá Ndiòxí, te ío ndácá<sup>n</sup> táhú-ndí núú-gá cuendá sá ñá túú dàña ni-hnu-ndo ichi-gá, núu xíá<sup>n</sup> ío cùdúú íní-ndí. <sup>10</sup> Te cuèi nduu cuèi níú xicá<sup>n</sup> táhú-ndí núú Yá Ndiòxí sá mée-gá ná càda te sáá íi<sup>n</sup> nduu naníhí tñahá-ó cuendá danèhé ñáhá vaha-gá-ndí tñuhu-gá sá cùmání-gá xii-ndo.

<sup>11</sup> Te mee Tàtá-ó Dütü Ndiòxí, ndihí Xítohó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo. <sup>12</sup> Te mee Xítohó Jesucristú ná chindee ñaha-gá xii-ndo, te ío-gá cuita cuu iní tñahá-gá-ndó nàcuáa ndècu-ndo ichi-gá ndihí nchaa dava-gá ñáyuu dàtná cúú iní ñáhá-ndí xii-ndo. <sup>13</sup> Te xicá<sup>n</sup> táhú-ndí núú Tàtá-ó Dütü Ndiòxí sá ní yuhu ní iní-ndó càncicú<sup>n</sup> ni-hnu-ni-ndo ichi-gá, te duca<sup>n</sup> te cundáá-ndó núú-gá, te ñá túú-gá ná cùmání-ndó òré ná sáá nduu quixi tucu Xítohó Jesucristú ndihí nchaa ñáyuu sa ndècu ndihí-gá.

#### 4

##### *Nàcuáa cuini Yá Ndiòxí cada-o*

<sup>1</sup> Te nchòhó ñáyuu ndècu ndihí-í ichi Xítohó Jesucristú càhá<sup>n</sup> ndáhú-í núú-ndó sá cùndèdòho-ndo na càhá<sup>n</sup>-í nàcuáa ndùu tñuhu càhá<sup>n</sup> Xítohó Jesucristú, chi mee-gá cuini-gá sá càdá-ndó nàcuáa ní danèhé ñáhá-ndí xii-ndo cuendá cuu váha iní Yá Ndiòxí núú-ndó, te duca<sup>n</sup>-ní càda-ndo ndéé núú cuahá<sup>n</sup> núú vèxi.

<sup>2</sup> Te nchòhó sa nàha-ndo nàcuáa ní càhá<sup>n</sup>-ndí núú-ndó, chi ní càhá<sup>n</sup>-ndí nàcuáa ní táuchíú<sup>n</sup> Xítohó Jesucristú te ní cachí-gá sá <sup>3</sup> Yá Ndiòxí cuini-gá sá càdá ndáá-ó cùndecu-o ichi-gá. Te nchoo cuè téé vá càhá<sup>n</sup> ndihí-o ñáyuu dñí te núú ñá díú ñàdihí-ó cùú-yu, te ní cuè ñáyuu dñí vá càhá<sup>n</sup> ndihí-yu téé núú ñá díú yí-yu cùu-güedé. <sup>4</sup> Te núú xíá<sup>n</sup> nchaa nchòhó tñaha téé-í ndí dñí<sup>n</sup> cùndecu ñadihí-ndó, te diu-ni duca<sup>n</sup> nchòhó cue ñáyuu dñí tucu ndí dñí<sup>n</sup> cùndecu yi-ndo, te mee-ni tñuhu yíñuhu càhá<sup>n</sup> ndihí tñaha-ndo. <sup>5</sup> Te vá cání cuèhé caní duha iní-ndó dàtná quidé cuè ñáyuu ñá túú sàndáá iní tñuhu Yá Ndiòxí. <sup>6</sup> Te ní ñi<sup>n</sup>-ndo vá cání iní-ndó dàndahú-ndó tñaha téé-ndo càhá<sup>n</sup> ndihí-ndo ñadihí-güedé. Te duca<sup>n</sup>-ní nchòhó cue ñáyuu dñí tucu vá cání iní-ndó dàndahú-ndó tñaha dñí-ndó càhá<sup>n</sup> ndihí-ndo yí-yu. Chi núú duca<sup>n</sup> na càda-ndo, te Yá Ndiòxí ío dàndòhó ñaha-gá xii-ndo dàtná ní cachí-ndí ndéé dñma. <sup>7</sup> Chi Yá Ndiòxí ní càhá<sup>n</sup> ñáhá-gá xii-o cuendá sá càdá-ó mée-ni sá váha, te ñá díú sá cuèhé sá dúhá. <sup>8</sup> Te nchaa ñáyuu na càda sáá iní-xi tñuhu càhá<sup>n</sup>-ndí, te quide sáá iní-yu núú Yá Ndiòxí, chi ñá díú tñuhu téé ñuyúú-a cùu-xi,

chi tñuhu Yá Ndiòxí, Yaá ní taxi Espiritú-gá ndécú ndihí-o cuu-xi.

<sup>9</sup> Te nchòhó ñáyuu ndècu ndihí-í ichi Xítohó Jesucristú, ñá túú-gá xíni ñuhu-xi cachí tñuhu-í xii-ndo sá cúú iní tñahá-ndó, chi Yá Ndiòxí sa ní danèhé ñáhá-gá xii-ndo nàcuáa cuu iní tñahá-ndó, ndihí nàcuáa cuu iní-ndó dàva-gá tñaha ñáyuu-ndo. <sup>10</sup> Te duca<sup>n</sup> xiquide-ndo ndihí nchaa ñáyuu ndècu ndihí-ndo ichi Xítohó Jesucristú ndécú distritú Macèdoniá. Te càhá<sup>n</sup> ndàhú-ndí núú-ndó sá càdá ndáá-gá-ndó, te cuita cuu iní-gá-ndó cuè tñaha ñáyuu-ndo quíhí<sup>n</sup>. <sup>11</sup> Te cada ndee iní-ndó cùndecu ñucaxi iní-ndó, te cuhu<sup>n</sup> iní-ndó chìu<sup>n</sup> mee-ndo, te xíá<sup>n</sup> cada-ndo dàtná ní danèhé ñáhá-ndí xii-ndo. <sup>12</sup> Te duca<sup>n</sup> te tñahá nchaa ñáyuu ñá túú sàndáá iní tñuhu Yá Ndiòxí càhá<sup>n</sup> váha-yu cuendá-ndó, te duca<sup>n</sup> te ñá túú tñahí-gá ná cùmání xii-ndo.

##### *Nàcuáa cada-xi òré quixi tucu Xítohó Jesucristú*

<sup>13</sup> Te vitna na càchí tñuhu-ndí xii nchòhó ñáyuu ndècu ndihí-ndí ichi Xítohó Jesucristú cuendá nchaa ñáyuu sa ní xíhí, ñáyuu ní sàndáá iní tñuhu Yá Ndiòxí cuendá sá vá ndihú iní-ndó cuendá-yu dàtná xiquide nchaa ñáyuu ñá túú yíhí iní-xi sá quixí tucu Xítohó Jesucristú ñuyúú-a. <sup>14</sup> Te nchoo sàndáá iní-ó sá ní xíhí Xítohó Jesucristú te ní ndoto-gá ní dándótó ñaha Yá Ndiòxí, te sàndáá tucu iní-ó sá dàtná ní dándótó Yá Ndiòxí Xítohó Jesucristú, duca<sup>n</sup> dàndoto-gá nchaa ñáyuu ní xíhí ñáyuu ní sàndáá iní ñáhá xii-gá.

<sup>15</sup> Te na càchí tñuhu tucu-ndí ingá tñuhu nàcuáa ní càhá<sup>n</sup> Xítohó Jesucristú, chi ní cachí-gá sá ná sáá nduu quixi tucu-gá te nchaa ñáyuu sàndáá iní tñuhu-gá ndécú vívú ñuyúú-a vá códó núú-yu núú ñáyuu ní xíhí ndaa andíu, chi jùndú candeca ñaha-gá xii-yu ndaa. <sup>16</sup> Chi Xítohó Jesucristú quee túu-gá andíu, te cana-gá nchaa ñáyuu ní sàndáá iní tñuhu-gá, te òré-á<sup>n</sup> Yá Ndiòxí cada-gá te òré-á<sup>n</sup>, càhá<sup>n</sup> ñi<sup>n</sup> cútú te òré-ni-á<sup>n</sup> ndoto nchaa ñáyuu ní xíhí, ñáyuu ní sàndáá iní tñuhu-gá. <sup>17</sup> Te dàtnúni nchaa nchoo ñáyuu xíndecu vívú ñuyúú-a naníhí tñahá-ó ndihí-yu, te ndanchita-o ndihu-o xití vícò naníhí tñahá-ó ndihí Xítohó Jesucristú, te candeca ñaha-gá xii-o ndaa andíu cùndecu ndihí-o-gá ní caa ní quíhí<sup>n</sup>. <sup>18</sup> Núu xíá<sup>n</sup> chí cuáha tñaha tñuhu ndee iní, te vá ndihú iní-ndó chí naníhí táhú-ndó núú-gá.

#### 5

<sup>1</sup> Te nchòhó ñáyuu ndècu ndihí-í ichi Xítohó Jesucristú ñá túú-gá xíni ñuhu-xi sá càchí tñuhu-í xii-ndo sá quixí tucu-gá, te ní ñá túú-gá xíni ñuhu-xi sá càchí tñuhu-í xii-ndo

nãsa cada-xi òré quixi-gá. <sup>2</sup> Chi nchòhó sa ñàha ndáá-ndó sá Xítóhó Jesucristú quixi-gá nduu ñà túú yíhi iní-ó, chi dàtná quidé ì<sup>n</sup> ñadúhú cada-gá òré quixi-gá, chi nduu ñà túú nã yíhi iní-ó quixi tucu-gá. <sup>3</sup> Te sáá nduu te cachí nchaa ñáyiu ndècu ichi cuehé ichi duha: “Vitna ío váha cùu iní-ó ndècu-o, te ñà túú-gá nã cúmání xii-o”, duha quesàhá-yu. Te ñáyiu-á<sup>n</sup> òré ñà túú nã yíhi iní-yu, te quèxio tnúndòho tnúhu ndáhú sá cúú-xi-yu. Chi cada-xi dàtná quidé-xí ì<sup>n</sup> ñáyiu dihí ní tnahá òré cacu déhe-xi, chi na iní-yu ní dàtnúhú ñáhá-xí te vá càcu-yu núú tnúndòhó-yu, te duca<sup>n</sup> sá tnahá-xi yáha nchaa ñáyiu ñà túú ndècu ichi-gá, chi na iní-yu quexio tnúndòho sá cúú-xi-yu te vá càcu-yu núú tnúndòho-á<sup>n</sup>. <sup>4</sup> Te nchòhó ñáyiu ndècu ndíhi-í ichi Xítóhó Jesucristú, ñà túú-gá ndécú-ndó ichi cuehé ichi duha, núu xiá<sup>n</sup> sa yíhi-ná iní-ndó nduu quixi-gá te vá yáha-ndo dàtná yáha nchaa ñáyiu ñà túú ndècu ichi-gá, chi ñáyiu-á<sup>n</sup> ñà túú nã yíhi iní-yu sá quixi-gá. Te na iní-yu quexio-gá dàtná quidé ñadúhú na iní-ó quíhu-güedé vehe-o dùhu-güedé duca<sup>n</sup> cada-gá òré quixi-gá. <sup>5</sup> Te nchoo ñà túú-gá ndécú-ó ichi cuehé ichi duha, te ichi-á<sup>n</sup> cúú-xí dàtná ì<sup>n</sup> ichi nee ndècu-o ní cuu, te vitna sa ní ngúndecu-o ichi váha, te duca<sup>n</sup> chí Yá Ndióxi ní dandixí túu-gá iní-ó cuèndá cutnùni iní-ó nàcuáa nduu cuèndá-gá. <sup>6</sup> Te xini ñuhu-xí dandixí túu-o iní-ó, te cada váha-o cùndecu-o ichi-gá, te vá cáda-ó dàtná quidé nchaa ñáyiu ñà túú sàndáá iní ñáhá xii-gá, chí ñáyiu-á<sup>n</sup> ñà túú-gá quidé cuèndá-yu te núu quide váha-yu ádi ñà túú quide váha-yu ndécú-yu. <sup>7</sup> Te nchaa ñáyiu quide cuehé quidé dùha cúú-yu dàtná ì<sup>n</sup> ñáyiu xidí ádi xini, chí ñà túú quide cuèndá-yu nàcuáa cada-yu ì<sup>n</sup> sá váha dàtná cùni Yá Ndióxi. <sup>8</sup> Te nchòhó ñáyiu sa ní cutnùni iní-xi nàcuáa nduu ichi váha, dandixí túu-ndo iní-ndó cùndecu-ndo, te quindáá ndisa iní-ndó Yá Ndióxi, te cuu iní-ndó cuè tnahá ñáyiu-ndo te duca<sup>n</sup> te vá táxi tnùni ñáhá ní ì<sup>n</sup> sá cuèhé sá dúhá xii-ndo. Te ío cuhu<sup>n</sup> iní-ndó sá cùndecu-ndo ndíhi-gá ní caa ní quíhi<sup>n</sup>. <sup>9</sup> Chí Yá Ndióxi ní cachí-gá sá vá quíhi<sup>n</sup>-ó núú ùhú núú ndáhú, chí mee-gá nacuaca ñaha-gá xii-o cùndecu-o ndíhi-gá, chí ní sàndáá iní-ó Xítóhó Jesucristú. <sup>10</sup> Te mee Xítóhó Jesucristú ní xihí-gá sá cuèndá nchaa yíca cuèchi-o, te ní ndoto-gá cuèndá nduu táhú-ó cùndecu-o ndíhi-gá andíu na sáá nduu cuèi sa ní xihí-ó, ádi vátá cùu-gá-ó. <sup>11</sup> Núu xiá<sup>n</sup> chí cuáha tñaha tnúhu ndee iní, te chindee tñaha-ndo cùndecu-ndo ichi-gá dàtná tá quide-ndo véxi.

*Té Páblú dáquini sàhú-dé ñáyiu ndècu ichi Xítóhó Jesucristú*

<sup>12</sup> Te nchòhó ñáyiu ndècu ndíhi-ndí ichi Xítóhó Jesucristú, cáhá<sup>n</sup> ndáhú-ndí núú-ndó sá cánèhe-ndo sá yíñùhu núú cuè téé cùnuu xinu cuechi núú Yá Ndióxi, cue téé dānehé ñáhá xii-ndo nacuáa cùndecu-ndo ichi-gá. <sup>13</sup> Te cáhá<sup>n</sup> váha-ndo ndíhi-güedé, te cuu iní-ndó-güedé, chí ñaha-ndo sá chíú<sup>n</sup> Yá Ndióxi yáá-ndó-güedé. Te cùndecu ndíhi váha tñaha-ndo nchaa-ndo.

<sup>14</sup> Te cáhá<sup>n</sup> ndáhú tucu-ndí núú-ndó sá cáhá<sup>n</sup>-ndó dòho nchaa ñáyiu ñà túú cuíni cada chíu<sup>n</sup>, te duca<sup>n</sup> cuáñaha-ndo tnúhu ndee iní xii nchaa ñáyiu quíyuhu iní-xi canchicu<sup>n</sup> nihnu ichi-gá, te chindee túcu-ndo nchaa ñáyiu vátá ngúnu ichi váha-gá, te cùnduu cáhuu iní-ndó núú-yu nchaa-yu.

<sup>15</sup> Te cada ndee iní-ndó te núu ndècu tñaha ñáyiu-ndo cùu ùhú iní ñáhá-yu xii-ndo, te vá tñahá-ni-ndo cùu ùhú iní-ndó-yu. Te mee-ní sá váha cada-ndo sá cúú-xí nchaa tñaha ñáyiu-ndo.

<sup>16</sup> Te nchaa nduu ío cudí iní-ndó cùndecu-ndo. <sup>17</sup> Te ì<sup>n</sup> nduu ì<sup>n</sup> nduu cáhá<sup>n</sup> ndíhi-ndo Yá Ndióxi. <sup>18</sup> Te ndacá<sup>n</sup> táhú-ndó núú-gá te núu nándi cùu sá yáha-ndo ndècu-ndo, chí duca<sup>n</sup> cuíni-gá cada-o, te díu duca<sup>n</sup> nduu tnúhu cáhá<sup>n</sup> Xítóhó Jesucristú.

<sup>19</sup> Te vá quèhndé nihnu-ndo chíu<sup>n</sup> quide Espíritú Yá Ndióxi iní-ndó. <sup>20</sup> Te vá cáda sáá iní-ndó núú cuè téé cáhá<sup>n</sup> tnúhu Yá Ndióxi nàcuáa dācahu iní ñáhá-gá xii-güedé. <sup>21</sup> Te cada cuèndá váha-ndo nàcuáa cáhá<sup>n</sup>-güedé, te tñii-ndo nchaa tnúhu váha cáhá<sup>n</sup>-güedé. <sup>22</sup> Te daña-ndo nchaa ichi cuehé ichi duha.

<sup>23</sup> Te mee Yá Ndióxi quidé-gá ío váha cùu iní-ó ndècu-o ichi-gá. Te xicá<sup>n</sup> táhú-í núú-gá sá ná cáda íí ñáhá-gá xii-ndo, te na còto ñaha-gá xii-ndo ndíhi iní-ndó cuèndá sá vá cáda-gá-ndó ní ì<sup>n</sup> sá cuèhé sá dúhá, te díu-ni duca<sup>n</sup> na cada-gá sá cúú-xí-ndó ndéé ná sáá nduu quixi tucu Xítóhó Jesucristú ñuyú-a. <sup>24</sup> Chí Yá Ndióxi Yáá ní cáhá<sup>n</sup> ñáhá xii-o cada-gá nàcuáa ní cáhá<sup>n</sup>-gá, te chindee ñaha-gá xii-ndo.

*Té Páblú quidé ndèe iní-dé ñáyiu xíndecu ichi Xítóhó Jesucristú ndécú núú Tesalómicá*

<sup>25</sup> Te nchòhó ñáyiu ndècu ndíhi-í ichi Xítóhó Jesucristú, cácá<sup>n</sup> táhú-ndó núú Yá Ndióxi sá ná chindee ñaha-gá xii-ndí.

<sup>26</sup> Te cúñaha-ndo xii nchaa ñáyiu ndècu ndíhi-o ichi Xítóhó Jesucristú sá ní yuhu ní iní-ndí quidé ndèe iní ñáhá-ndí xii-ndo ndíhi-yu.

<sup>27</sup> Te vitna mee Yá Ndióxi ndéhé-gá sá cáhá<sup>n</sup> ndáhú-í núú-ndó sá dācuáha-ndo tutú-a núú nchaa ñáyiu ndècu ndíhi-o ichi-gá.

<sup>28</sup> Te Xítóhó Jesucristú ío na chindee chitúu ñaha-gá xii-ndo núú cuáhá<sup>n</sup> núú véxi. Te



duca<sup>n</sup> na cùnduu. Te ío chí cádá ndèe iní-nă  
vítna.

## TUTÚ CÚÚ ÛÚ NÍ CADÚHA TÉ PÁBLÚ QUIHI<sup>n</sup> NDAHA ÑÁYIU ÑUÚ TESALÓNICÁ

*Té Páblú ndihi cue tée cùndihi-dé cádúha-güedé tutú quihi<sup>n</sup> ndaha ñáyiu xñdecu ichi Xítoho Jesucristú ndécú ñúú Tesalónicá*

<sup>1</sup> Yúhú té Páblú cádúha-í tutú-a ndihi té Silvanú, ndihi té Timùtèu cuendá daquixi-í ndaha nchòhó ñáyiu ndècu ndihi-ndí ichi Xítoho Jesucristú ndécú ñúú Tesalónicá, chí tnàhá tnúhu-ndo ndihi Tátá-ó Dütú Ndióxi, ndihi Xítoho Jesucristú. <sup>2</sup> Te xicá<sup>n</sup> táhú-ndí núú Dütú Ndióxi, ndihi núú Xítoho Jesucristú sá ná chindee chítúu ñaha-gá xii-ndo, te duca<sup>n</sup> ndí nduú-gá ná cádá te ío váha cuu iní-ndó cùndecu-ndo.

*Yá Ndióxi cada ndáá-gá cuéchi nchaa ñáyiu ndècu ichi cuéhé ichi duha na sáá nduu quixi tucu Xítoho Jesucristú*

<sup>3</sup> Te nchòhó ñáyiu ndècu ndihi-ndí ichi Xítoho Jesucristú, cächí tnúhu-í xii-ndo sá cúnaha-ndo sá ñá túú dáña ndee-ndí ndacá<sup>n</sup> táhú-ndí núú Yá Ndióxi cuendá-ndó, chí dacuítí dùca<sup>n</sup> taú-xi cunduu chí ío-gá tá sándáá iní-ndó-gá cuáhá<sup>n</sup>, te duca<sup>n</sup> ùu<sup>n</sup>-gá tá cùu iní tnáha-ndó nàcuáa ndècu-ndo ichi Yá Ndióxi. <sup>4</sup> Núu xiá<sup>n</sup> nchúhú ío váha cáhá<sup>n</sup>-ndí cuendá-ndó núú nchaa ñáyiu sándáá iní tnúhu Yá Ndióxi nchaa núú tãcá-yu dàcuahá-yu tnúhu-gá, chí ío sándáá iní-ndó-gá, te ñá túú dáña ndeé-ndó nchicú<sup>n</sup> nihnu-ndo ichi-gá, te quide cahnu-ni iní-ndó cuéi nándí sá yáha-ndo ndècu-ndo ichi-gá. <sup>5</sup> Te sá dúcá<sup>n</sup> quide váha-ndo ndècu-ndo xiá<sup>n</sup> cùtnúni nàcuáa cada ñaha Yá Ndióxi xii-ndo na sáá nduu, chí nduu táhú-ndó cùndecu-ndo núú táxi tnúni-gá, te duca<sup>n</sup> càda-gá chí cùu-gá Yáá quidé ndáá cuiti. Te vitna ndòho-ndo nàcuáa ndíhu ndaha-gá dava-gá ñáyiu.

<sup>6</sup> Te Yá Ndióxi ío váha ndáá quidé-gá, chí mee-gá nachinaa-gá nchaa sá quidé ñaha ñáyiu cùu úhú iní ñáhá xii-ndo, <sup>7</sup> te nchoo ñáyiu ndòho cuendá Xítoho Jesucristú nucùndecu váha-o na sáá nduu núu túu-gá andíu, te tnàhá cue espíritú xínú cuéchi núú Yá Ndióxi cuu<sup>n</sup> ndihi-gá, te cue espíritú-á<sup>n</sup> quidé-xí nchaa núú chiú<sup>n</sup> tahu-gá. Te òré nuu túu-gá andíu ndihi cue espíritú-á<sup>n</sup>, te ío dátása<sup>n</sup>-xi andíu. <sup>8</sup> Te dandòho-gá nchaa ñáyiu ñá túú tnàhá tnúhu ndihi Yá Ndióxi, ñáyiu ñá túú sándáá iní tnúhu Xítoho Jesucristú tnúhu sá cáhá<sup>n</sup> nàcuáa naníhí tãhú-yu. <sup>9</sup> Te nchaa ñáyiu-á<sup>n</sup> ío dandòho ñaha-gá xii-yu, chí ndohó-yu ni caa ni quíhí<sup>n</sup>, te vá cùndècu-yu núú ío váha caa ndecu-gá táxi

tnúni-gá. <sup>10</sup> Te duca<sup>n</sup> càda ñaha-gá xii-yu na sáá nduu, te dàvá-á<sup>n</sup> ío cada càhnu ñaha nchaa ñáyiu sándáá iní ñáhá xii-gá. Te tnàhá nchaa nchòhó ñáyiu ní sándáá iní tnúhu ní cáhá<sup>n</sup>-ndí duca<sup>n</sup> càda-ndo, te nchaa-o ío cuñúhu-o-gá dàvá-á<sup>n</sup>.

<sup>11</sup> Te cuendá xiá<sup>n</sup> núu ío xicá<sup>n</sup> táhú-ndí núú Dütú Ndióxi sá ná chindee ñaha-gá xii-ndo cùndecu váha-ndo ichi-gá dátáa cùni mée-gá cundecu nchaa ñáyiu ní cáhá<sup>n</sup>-gá cundecu ndihi-gá. Te xicá<sup>n</sup> táhú tucu-ndí núú-gá sá ío na chindee ñaha-gá xii-ndo càda-ndo nchaa sá váha sàni iní-ndó, ndihi cuendá chiú<sup>n</sup> quide-ndo cuendá-gá, te duca<sup>n</sup> chí sándáá iní-ndó-gá. <sup>12</sup> Te núu duca<sup>n</sup> na càda-ndo, te cáhá<sup>n</sup> váha ñáyiu cuendá Xítoho Jesucristú, te tnàhá-ni nchòhó cáhá<sup>n</sup> váha-yu cuendá-ndó, chí mee Yá Ndióxi ndihi Xítoho Jesucristú cùndàhú iní ñáhá-gá chindèe ñaha-gá xii-ndo.

## 2

*Té quixi dandàhú ñáyiu*

<sup>1</sup> Te nchòhó ñáyiu ndècu ndihi-ndí ichi Xítoho Jesucristú cächí tnúhu-ndí xii-ndo nàcuáa cada-xi nduu na quixi tucu-gá, chí quixi-gá nacuaca ñaha-gá xii-o, núu xiá<sup>n</sup> cáhá<sup>n</sup>-ndí dóho-ndo. <sup>2</sup> Te ñá díú sá ñúú tnúhu tecú dóho-ndo te ngúíta-ndo càni ñúú cani úú iní-ndó, te ni vá yúhú-ndó te núu véxi ñúú téé cächí-dé sá cáhá<sup>n</sup>-dé tnúhu Yá Ndióxi, te cächí-dé sá sá véxi Xítoho Jesucristú, te vá quindáá iní-ndó tnúhu cáhá<sup>n</sup>-dé chí ñá ndáá, àdi véxi ñúú téé nèhe ñúú tutú núu-ndó te cächí-dé sá yúhú ní tendaha-í véxi, te núú tütú-á<sup>n</sup> cáhá<sup>n</sup>-xi sá sá véxi Xítoho Jesucristú, te diu-ni vá quindáá iní-ndó nàcuáa cáhá<sup>n</sup>-xi, te ndèda-ni caa ñáyiu cáhá<sup>n</sup>-yu dàvá-á<sup>n</sup> sá sá véxi-gá dico vá quindáá tnàhí iní-ndó. <sup>3</sup> Núu xiá<sup>n</sup> dátúha ñaha-í xii-ndo cuendá sá vá dáña tnàhí-ndo mée-ndo dandàhú ñáhá ñáyiu. Chí cùmání-gá sáá nduu quixi tucu Xítoho Jesucristú, te ngúíta nchaa ñáyiu cuu úhú iní-yu Yá Ndióxi, te dàvá-á<sup>n</sup> quini-yu ñúú téé xidó quidé nchaa sá cuéhé sá túhá, te téé-á<sup>n</sup> quíhí<sup>n</sup>-dé núú úhú núú ndáhu ni caa ni quíhí<sup>n</sup>. <sup>4</sup> Te diu-ni téé-á<sup>n</sup> vá ndèe iní-dé nchaa sá cächí ñáyiu cùu ndiúxi-yu ndihi nchaa dava-gá sá quidé càhnú-yu, te cächí-dé sá ío cùnuu-dé, te quíhu-dé ndéé xití veñúhu núú ndécú cué ñáyiu chiñúhu ñaha xii Yá Ndióxi coo-dé, te cùñaha-dé xii-yu sá cùú-dé Yá Ndióxi.

<sup>5</sup> Te dandàcu iní-ndó chí nchaa tnúhu-a sa ní cächí tnúhu-í xii-ndo cùtnàhá ní xíndecu ndihi ñaha-í. <sup>6</sup> Te nchòhó sa cùtnúni iní-ndó ná cùú sá nganí ñaha xii téé-á<sup>n</sup> núu ñá túú-dé vitna, dico na sáá nduu taú-xi quee-dé caca cuu-dé te dàvá-á<sup>n</sup> quini ñáhá nchaa ñáyiu.

7 Te ío titní núú sá cuèhé sá dúhá quide yucu ñávaha dicó-ní sá vátá quini-gá ñáiyu, dico ndècu ì<sup>n</sup> sá ñá dáña càda-xi nchaandi túhú nàcuáa càchí iní-xi, dico sáá nduu xócuíñí sá ñá dáña-á<sup>n</sup> te dàvá-á<sup>n</sup> cada-xi nchaa nàcuáa càchí iní-xi. 8 Te sáá nduu quini-yu téé quide nchaa sá cuèhé sá dúhá-á<sup>n</sup> ñuyíu-a. Te òré ná quixi túu Xítohó Jesucristú, te mee-ní sá dátasa<sup>n</sup>-xi, ndihi yóco yuhu-gá cuú téé-á<sup>n</sup>. 9 Te sácúíhna tendaha-xi téé-á<sup>n</sup> quixi-dé, te cuáñaha-xi tnúhu ndee iní cada-dé nándi sá cáda-dé. Te cada-dé sá ñá túú tnàhí ndàcu ni ì<sup>n</sup> ñáiyu ñuyíu-a cada-yu, dico mee-ni dándahú ñáhá-dé xii-yu caca cuu-dé. 10 Te nchaa núú sá cuèhé sá dúhá càda-dé dandàhú-dé nchaa ñáiyu sa ñúhu ichi cuáhá<sup>n</sup> núú ùhú núú ndàhú, chi ñá túú ní cuini-yu quindáá iní-yu tnúhu ndáá tnúhu Yá Ndióxi cuendá naníhí tàhú-yu. 11 Te sá dúcá<sup>n</sup> ñá túú ní cuini-yu quindáá iní-yu tnúhu ndáá, núú xiá<sup>n</sup> daña Yá Ndióxi dacáhá<sup>n</sup> yucu ñávaha iní-yu quindáá iní-yu nchaa tnúhu ndehnde 12 cuendá cuíta nihnú-yu, te duca<sup>n</sup> yáha-yu chi ñá túú sàndáá iní-yu tnúhu ndáá càhá<sup>n</sup> Yá Ndióxi, chi mee-ni nchaa sá cuèhé sá dúhá cùdá iní-yu quidé-yu, te cuíta nihnú-yu chi duca<sup>n</sup> ní cachí Yá Ndióxi cunduu.

#### *Ñáiyu ní cachí Yá Ndióxi naníhí tàhú*

13 Te nchòhó ñáiyu ndècu ndihi-ndí ichi Xítohó Jesucristú, ñáiyu ío cùu iní-gá càchí tnúhu-ndí xii-ndo sá ñá túú dàña ndee-ndí ndàcá<sup>n</sup> tàhú-ndí núú Yá Ndióxi cuendá-ndó, chi duca<sup>n</sup> tàu-xi cunduu, chi Yá Ndióxi ní cachí-gá ndéé cùtnàhá vátá ngáva-gá ñuyíu sá naníhí tàhú-ndó, te ðiu Espiritú-gá dacháha-xi iní-ndó ndècu yíñuhu-ndo núú-gá, te sàndáá iní-ndó tnúhu ndáá càhá<sup>n</sup> gá núu xiá<sup>n</sup> ní naníhí tàhú-ndó. 14 Chi cuendá tnàhí-a ní càhá<sup>n</sup> ñáhá Yá Ndióxi xii-ndo, te duca<sup>n</sup> ní naníhí tàhú-ndó chi ní sàndáá iní-ndó tnúhu Xítohó Jesucristú ní càhá<sup>n</sup>-ndí núú-ndó, te sáá nduu te cundecu-ndo tnàhá-ndó núú ío váha càa ní nduu tàhú Xítohó Jesucristú ndécú-gá.

15 Núu xiá<sup>n</sup> nchòhó ñáiyu ndècu ndihi-ndí ichi Xítohó Jesucristú ío càhá<sup>n</sup>-ndí dóho-ndo sá vā dáña nihnu-ndo ichi-gá, te ní vā nàcuànaa-ndo nchaa tnúhu ní càhá<sup>n</sup>-ndí núú-ndó cùtnàhá ní xíndecu ndihi ñaha-ndí xii-ndo, te ðiu-ní duca<sup>n</sup> càda-ndo nchaa tnúhu tēndaha-ndí véxi. 16-17 Te xicá<sup>n</sup> tàhú-ndí núú-gá sá ná dacháha<sup>n</sup>-gá iní-ndó cūndecu-ni-ndo ichi-gá, te duca<sup>n</sup> ío na chindee ñaha-gá xii-ndo càhá<sup>n</sup>-ndó mēe-ni tnúhu váha, te cada váha-ndo cūndecu-ndo nacuáa cuu váha iní-gá, chi mee Dütú Ndióxi ío cùu iní ñáhá-gá xii-o, te ðiu-gá ní taxi-gá tnúhu ndee iní cundecu ndihi-o ní caa ní quíh<sup>n</sup>, te ní cachí tnúhu tucu-gá ingá tnúhu váha sá cūndētu-o Xítohó Jesucristú.

### 3

#### *Cáhá<sup>n</sup> ndihi-ndo Yá Ndióxi cuendá-ndí*

1 Te nchòhó ñáiyu ndècu ndihi-ndí ichi Xítohó Jesucristú, ndéé núu ndíhi-ná càchí tnúhu-í xii-ndo sá càhá<sup>n</sup> ndihi-ndo Yá Ndióxi cuendá-ndí cuendá sá ná chindee ñaha-gá xii-ndí, te duca<sup>n</sup> ndíhi-ni cuténuu tnúhu Xítohó Jesucristú nchaa xichi, te cuíí iní-yu tnúhu-gá dátáa quidé nchòhó. 2 Te càhá<sup>n</sup> ndihi tucu-ndo Yá Ndióxi cuendá sá ná còto ñaha-gá xii-ndí, te ñá túú ná cada ñaha ñáiyu cuihna iní-xi ndècu ichi cuèhé ichi duha xii-ndí, chi ñá ncháa-yu sàndáá iní-yu tnúhu-gá. 3 Dico Xítohó Jesucristú quidé-gá nchaa sá càhá<sup>n</sup>-gá, te ðiu-gá cada te nchòhó cundecu-ni-ndo ichi-gá, te coto ñaha-gá xii-ndo cuendá sá ñá túú ná cada ñaha yucu ñávaha. 4 Te Xítohó Jesucristú quidé-gá cùtnúni iní-ndí sá nchòhó quidé-ndó nchaa nacuáa ní dánèhé ñáhá-ndí xii-ndo, te ðiu-ni duca<sup>n</sup> càda-ndo cundecu-ndo. 5 Te xicá<sup>n</sup> tàhú-ndí núú Yá Ndióxi sá ná chindee ñaha-gá xii-ndo cùu iní-ndó-gá, te ðiu-ni-gá ná chindee ñaha-gá xii-ndo cūnduu cahnu iní-ndó, chi Xítohó Jesucristú duca<sup>n</sup> ío càhnu iní-gá.

#### *Tàú-ó càda chiú<sup>n</sup>-o*

6 Te nchòhó ñáiyu ndècu ndihi-í ichi Xítohó Jesucristú, càhá<sup>n</sup>-í dóho-ndo sá mēé-gá cuini-gá sá vā nihí tnàhá-gá-ndó ndíhi ndéda-ni càa ñáiyu càchí sá sàndáá iní tnúhu-gá, ñáiyu ñá túú cuini cada chiú<sup>n</sup>, chi ñáiyu duca<sup>n</sup> xíquide ñá túú cuini-yu tñii-yu tnúhu sá ní dánèhé ñáhá-ndí xii-ndo. 7 Te nchòhó sa xini-ndó nàcuáa cada-ndo cūndecu-ndo canchicú<sup>n</sup> nihnu-ndo nàcuáa quide-ndí. Te cùtnàhá ní xíndecu ndíhi ñaha-ndí xii-ndo chi ní ì<sup>n</sup> nduu ñá túú ní tūhío-ndí. 8 Te ní ñá túú dicó duca<sup>n</sup> ní quèhe<sup>n</sup>-ndí sá ndécú ndíhi ñáiyu caxi-ndí àdi canehe-ndí, chi cuéi nduu cuéi niú ío ní quide chiú<sup>n</sup>-ndí ní nihí-ndí díhú<sup>n</sup> ní saa<sup>n</sup>-ndí nchaa sá ní nàndíhi-ndí cuendá sá ñá túú ní cuini-ndí chichiu<sup>n</sup> ñaha-ndí xii-ndo. 9 Te cuéi tàú ndisa-ndí cachí tnúhu-ndí xii-ndo sá chindee ñaha-ndo xii-ndí ní cùu, dico ní quide chiú<sup>n</sup>-ndí cuendá ní cuini-ndí danèhé ñáhá-ndí xii-ndo nàcuáa cada-ndo cūndecu-ndo. 10 Te cùtnàhá ní xíndecu ndíhi ñaha-ndí xii-ndo ní cachí-ndí sá ncháá ñáiyu ñá túú cuini cada chiú<sup>n</sup> te vā cuáha-ndó-yu sá cáxi-yu. 11 Te vitna nihí-ndí tnúhu sá ío dāva nchòhó ñá túú tnàhí quide chiú<sup>n</sup>-ndo, chi áu<sup>n</sup> ná cuu ndí cuu ndí cuu-ni-ndo núú ndécú dàva-gá tnàha ñáiyu-ndo. 12 Te yúhú càhá<sup>n</sup>-í dóho nchaa nchòhó ñáiyu duca<sup>n</sup> ñá túú cuini cada chiú<sup>n</sup> sá cáda chiú<sup>n</sup>-ndo cuendá nihí-ndó nchaa sá cohó sá cáxi-ndó, te duha càhá<sup>n</sup>-í dóho-ndo, chi duca<sup>n</sup> cuini

Xítohó Jesucristú Yaá táxí tnùnì ñáhá xì-o cada-ndo, te òré cada chiun-ndo te vá ío cada dusa<sup>n</sup>-ndo.

<sup>13</sup> Te nchòhó ñáyiú ndècu ndihí-í ichi Xítohó Jesucristú, vá dáñá ndèé-ndó càda-ndo mee-ni sá vâha. <sup>14</sup> Te núú ìí<sup>n</sup> ñáyiú ndècu ndihí-ndo ñá túú cuiní-yu tní-yu tnúhu càhá<sup>n</sup>-ndí núú tütú-a, te cundehe-ni-ndo núú ndèda càá-yu, te vá ñihí tnáhá-gã-ndó ndihí-yu cuèndá sá ná cùcaha<sup>n</sup> núú-yu, <sup>15</sup> dico vá cúú ùhú iní-ndó-yu, chí càhá<sup>n</sup>-ndó dôho-yu cada-ndo sã ndécú-ndó ichi Xítohó Jesucristú ndihí-yu.

*Tnúhu ndéé núú ñí ndihí-ná*

<sup>16</sup> Te mee Xítohó Jesucristú ío váha cùu iní-gá ndécú-gã, te xicá<sup>n</sup> táhù-í núú-gã sá méé-gã ná cádá te ío váha cuu iní-ndó tnáhá-ndó cùndecu-ndo cuéi nása-gá ná cùndecu-ndo. Te mee-gã ná cùndecu ndihí ñaha-gá xii-ndo nchâa-ndo.

<sup>17</sup> Te vitna yúhú té Páblú tée-í tnúhu-a quide ndee iní ñáhà-í xii-ndo, te ñíu-ni ñuha càa nchaa letrá-í nchaa núú tütú cádüha-í. <sup>18</sup> Te xicá<sup>n</sup> táhù-í núú Xítohó Jesucristú sá ío na chùndee chitúu ñaha-gã xii-ndo nchâa-ndo. Te ñuca<sup>n</sup> na cùnduu. Te ío chí cádá ndèe iní-nã vitna.

## TUTÚ DÍHNA NUU NÍ CADÚHA TÉ PÁBLÚ QUIHI<sup>n</sup> NDAHA TÉ TIMÚTEÚ

*Té Páblú cadúha-dé tutú quíhí<sup>n</sup> ndaha té Timúteú*

<sup>1</sup>Yúhú té Páblú ní tendaha ñaha Yá Ndiöxí cáhá<sup>n</sup>-í tnúhu Xítóhó Jesucristú núú ñáiyu chí duca<sup>n</sup> ní cachí Yá Ndiöxí cunduu, te diu-gá cúu-gá Yaá ní dácácu nihnu ñaha xii-o núú ùhú núú ndàhú. Te tnàhá Xítóhó Jesucristú duca<sup>n</sup> ní cachí-gá sá cáhá<sup>n</sup>-í tnúhu-gá, te diu-gá ní taxi-gá tnúhu ndee iní xii-o sá cündècu-o ndihi-gá ní caa ní quíhí<sup>n</sup>. <sup>2</sup>Te yòhó té Timúteú cúu-n ñ<sup>n</sup> téé ní sanu ichi ndisa-í ichi Xítóhó Jesucristú chí ío váha ní sándáá iní-n-gá. Te cadúha-í<sup>n</sup> tutú daquixi-í ndaha-n. Te xicá<sup>n</sup> táhù-í núú Tátá-ó Dütú Ndiöxí ndihi núú Xítóhó Jesucristú sá ío na chindee chitúu ñaha-gá xii-n, te duca<sup>n</sup> ndí nduu-gá ná cadá te ío váha cuu iní-n cündecu-n.

*Cuendá nchaa ñáiyu dándahú tnàha ñáiyu-xi*

<sup>3</sup>Te nàha-n nacuaá ní cáhá<sup>n</sup>-í cúnàhá ní quee-í ñuú Éfesú véxi-í distritú Macèdoniá, chí ní cachí-í sá quéndoo-n ñuú-án cáhá<sup>n</sup>-n dóho nchaa ñáiyu dándahú ñáhá cáhí sá cáhá<sup>n</sup> tnúhu Yá Ndiöxí te ñá ndáá sá cáhá<sup>n</sup>-yu tnúhu-gá, te diu-ni duca<sup>n</sup> cáhá<sup>n</sup>-í vitna cada-n cündecu-n. <sup>4</sup>Te cúñaha-n xii-yu sá vâ cadá cuendá-yu nchaa cuendú níhí-yu nàcuáa ní xóo cada ñáiyu ní xindecu ndéé sanaha, te nchaa cuendú-án díco chínáá ñáhá-xí chí ñá túú vèdana nándihí-xi, te ní ñá túú chindee ñaha-xi cada-o nacuaá cuiní Yá Ndiöxí, chí mee-ni sá quindáá iní-ó-gá quidé-xí quide-o nchaa nacuaá cuiní-gá.

<sup>5</sup>Te duha cáhá<sup>n</sup>-í cúñaha-n xii-yu cuendá sá ná cùu iní-yu tnàha ñáiyú-yu, te xini ñuhu-xi nduu ndoo nduu nine iní-yu, te cunduu váha iní-yu, te quindáá iní-yu Yá Ndiöxí, te vá cání ñ<sup>n</sup> caní úú iní-yu, te núu duca<sup>n</sup> na cadá-yu te cuu iní ndisá-yu nchaa tnàha ñáiyú-yu. <sup>6</sup>Chí dava ñáiyu ñá túú-gá quidé-yu nchaa nàcuáa cáhá<sup>n</sup>-í-a, chí mee-nà nchaa cuendá sá ñá túú vèdana nándihí xicáhá<sup>n</sup>-yu. <sup>7</sup>Te cuiní-yu cáhá<sup>n</sup>-yu nchaa tnúhu ní cáhá<sup>n</sup> ndíi Moisés díco ñá ndácú-yu, chí cuéi ní yúhu ní iní-yu cáhá<sup>n</sup>-yu díco ñá təcú tnùní-yu nàcuáa ní cáhá<sup>n</sup> ndíi, te ní tnúhu cáhá<sup>n</sup> méz-yu ñá cùnùní iní-yu nàcuáa nduu-xi.

<sup>8</sup>Te sa nàha-o sá ncháá tnúhu ní cáhá<sup>n</sup> ndíi Moisés váha, te núu na təcú tnùní-ó ná cuendá duca<sup>n</sup> ní ngündecu nchaa tnúhu-án. <sup>9</sup>Te cùnùní iní-ó sá ñá díú sá cúu-xí nchaa

ñáiyu quide váha ndècu ñuyúú-a ní ngündecu nchaa tnúhu-án, chí ní ngündecu-xi sá cúu-xí nchaa ñáiyu ñá túú quide váha, ndihi cuendá nchaa ñáiyu ío sáá iní-xi, ndihi cuendá nchaa ñáiyu quide cuehé quidé dùha, ndihi cuendá nchaa ñáiyu ío ndècu cuéchi-xi, ndihi cuendá nchaa ñáiyu ñá túú nèhe vèdana sá yíñùhu núú Yá Ndiöxí, ndihi cuendá nchaa ñáiyu ñá túú cáhá<sup>n</sup> váha cuendá ichi Yá Ndiöxí, ndihi cuendá nchaa ñáiyu sàhni tátá-xi ndihi náná-xi, ndihi cuendá nchaa dava-gá ñáiyu sàhni tnaha, <sup>10</sup>ndihi cuendá nchaa cue téé cáhá<sup>n</sup> ndihi ñáiyu díhí te ñá díú ñándihí-güedé cúu-yu, ndihi cuendá tucu nchaa ñáiyu díhí cáhá<sup>n</sup> ndihi cue téé te ñá díú yíi-yu cùu-güedé, ndihi cuendá nchaa cue téé cáhá<sup>n</sup> ndihi tnàha ndi mee téé-xi, ndihi cuendá nchaa ñáiyu chiváha tnàha ñáiyu-xi cuendá sá cuiní-yu níhí-yu díhú<sup>n</sup>, ndihi cuendá nchaa ñáiyu ndehnde, ndihi cuendá nchaa ñáiyu càcunehé ndéé Yá Ndiöxí cuendá cuiní-yu cutnùní iní tnàha ñáiyú-yu sá cáhá<sup>n</sup> ndáá-yu, te ñá ndáá sá cáhá<sup>n</sup> ndáá-yu, ndihi cuendá nchaa ñáiyu quide nchaa dava-gá sá ñá túú tàuchiu<sup>n</sup> Yá Ndiöxí cadá-yu. Cuendá nchaa ñáiyu duca<sup>n</sup> xiquide ní ngündecu nchaa tnúhu-án. <sup>11</sup>Te nchaa tnúhu-án ñ<sup>n</sup> ní cùu-xi ndihi nchaa tnúhu sá ní cachí Yá Ndiöxí cáhá<sup>n</sup>-í, te tnúhu-án cúu-xí tnúhu váha víhí, chí mee-gá ío váha iní-gá.

*Té Páblú ndácá<sup>n</sup> táhù-dé núú Yá Ndiöxí sá ní cundáhú iní ñáhá-gá xii-dé*

<sup>12</sup>Te Xítóhó Jesucristú ní cutnùní iní-gá sá cadá ndáá-í cada-í nchaa chiú<sup>n</sup> tahu-gá. Te ndácá<sup>n</sup> táhù-í núú-gá sá ní taxi-gá chiú<sup>n</sup>-gá quidé-í, te ío chindee ñaha-gá xii-í. <sup>13</sup>Te ní taxi-gá chiú<sup>n</sup>-gá quidé-í cuéi ní xóo cáhá<sup>n</sup> cuèhé-í cuendá-gá, te cuéi ní xóo cúu cuèhé cúu duha-í nchaa ñáiyu ndècu ichi-gá, te cuéi nándi-gá sá ní xóo cada-í-yu díco ní cundáhú iní ñáhá Yá Ndiöxí xii-í, chí vátá quindáá-gá iní-í Xítóhó Jesucristú cúnàhá duca<sup>n</sup> ní xóo cada-í, te ní ñá cutnùní iní-í nchaa sá quidé-í ní cùu, te cuéi duca<sup>n</sup> ní xóo cada-í, <sup>14</sup>díco Yá Ndiöxí ío ní cundáhú iní ñáhá-gá xii-í te chindee ñaha-gá. Te mee Xítóhó Jesucristú chindee ñaha-gá xii-í sándáá iní-í-gá, te cùu iní-í nchaa tnàha ñáiyu-í.

<sup>15</sup>Te níhí-ó tnúhu sá Xítóhó Jesucristú ní quixi-gá ñuyúú-a cuendá sá dácácu nihnu-gá nchaa ñáiyu ndècu ichi cuehé ichi duha. Te tnúhu-án cúu-xí ñ<sup>n</sup> tnúhu ndáá, te xini ñuhu-xi quindáá iní nchaa nchoo ñáiyu ndècu ñuyúú-a. Te yúhú cúu-í téé ío-gá ndécú cuéchi-xi núú Yá Ndiöxí ní cùu. <sup>16</sup>Te Yá Ndiöxí ní cundáhú iní ñáhá-gá ní dácácu nihnu ñaha-gá xii yúhú téé xidó ndécú cuéchi-xi ní cùu, cuendá cutnùní iní nchaa ñáiyu sá Xítóhó Jesucristú ío càhnu

iní-gá. Te sá dúcá<sup>n</sup> ní quide ñaha-gã xii-í, te xiã<sup>n</sup> cutnùní iní-yu sá núu na quindáá iní ñáhã-yu xii-gá te cundecú-yu ndihí-gá ni caa ni quihí<sup>n</sup>. <sup>17</sup> Te nchaa-o chí ná càchí-ó sá ío càhmu cuu Yá Ndióxi, te canehe-o sá yiñùhu núu-gã ní caa ni quihí<sup>n</sup>, chí mee-gã cúu-gã Yáá táxi tñuní nchaa nduu nchaa quíú. Te cúu-gã ì<sup>n</sup> Yáá ñá túú xiní núu-ó, te ì<sup>n</sup> dúi díí-ni-gã ío ndècu ndihí-gá nchaa sá xiní tñuní-gá.

<sup>18</sup> Te yòhó té Timùteú téé cúu datná ì<sup>n</sup> déhe mee-í sa nàha-n nacuaá ní cáhá<sup>n</sup> dava-gá cue téé cáhá<sup>n</sup> tñúhu Yá Ndióxi cuendá-n, te ñu-ni duca<sup>n</sup> cáhá<sup>n</sup>-ú tucu, te cada-n ncháa nacuaá cáhá<sup>n</sup> tñúhu-á<sup>n</sup> chí ñu nchaa tñúhu-á<sup>n</sup> canu ichi ñaha-xi xii-n cada-n ncháa nacuaá cuiní Yá Ndióxi. <sup>19</sup> Te ío quindáá iní-n Xitohó Jesucristú, te cada váha-n cundecu-n nacuaá cundecu váha iní-n, chí dava ñáyiú ñá túú-gã duca<sup>n</sup> quidé-yu núu xiã<sup>n</sup> ñá túú-gã sándáá iní-yu nacuaá cáhá<sup>n</sup> tñúhu-gá. <sup>20</sup> Te ñu-ni duca<sup>n</sup> ní quide té Himèneu ndihí té Lijandru ní dáñá ndèé-güedé ñá túú-gã sándáá iní-güedé nacuaá cáhá<sup>n</sup> tñúhu Xitohó Jesucristú, te ní xáha<sup>n</sup>-í xii-güedé sá ná cundoho-ná-güedé núu nása cada ñaha sácuhlá xii-güedé, te duca<sup>n</sup> ní xáha<sup>n</sup>-í cuendá sá vã cáhá<sup>n</sup> cuèhé-gã-güedé cuendá Yá Ndióxi.

## 2

### *Nacuaá cáhá<sup>n</sup> ndihí-o Yá Ndióxi*

<sup>1</sup> Te na càchí tñúhu-í xii-n ncháa nacuaá cada-n. Te díhna-gá càchí tñúhu-í sá cáhá<sup>n</sup> ndihí-n Yá Ndióxi cuendá nchaa ñáyiú te núu nása cúu xindecu-yu, te cáca<sup>n</sup> táhú-n núú-gã cuendá-yu, te duca<sup>n</sup> ío ndaca<sup>n</sup> táhú-n núú-gã cuendá nchaa sá váha quide ñaha-gá xii-yu. <sup>2</sup> Te duca<sup>n</sup> cáhá<sup>n</sup> ndihí-n Yá Ndióxi cuendá nchaa cue téé cùnihu ndihí cuendá nchaa dava-gá cue téé cùchiu<sup>n</sup> cuendá cada váha-güedé, te duca<sup>n</sup> nchò ñá túú ná cuu cundecu-o, te ñá túú tñahí ná caní iní-ó cundecu-o, te ío cundecu yiñùhu-o núú Yá Ndióxi, te cada-o ncháa nacuaá tàú-xi cunduu. <sup>3</sup> Te núu duca<sup>n</sup> na càda-o cáhá<sup>n</sup> ndihí-o Yá Ndióxi cuendá nchaa ñáyiú te quide váha-o, te ndùu vétú iní Yá Ndióxi Yáá ní dácaçu nihnu ñaha xii-o núú ùhú núú ndahú. <sup>4</sup> Te mee-gã cuiní-gá sá ncháá ñáyiú tecú tñuní-yu nchaa tñúhu cáhá<sup>n</sup>-gá, chí cuiní-gá sá nánihí táhú-yu. <sup>5</sup> Te ì<sup>n</sup>-ni Dútú Ndióxi ndécú, te ì<sup>n</sup>-ni Xitohó Jesucristú, te medi-ni Xitohó Jesucristú quidé-gã tñahá tñúhu-o ndihí Yá Ndióxi. <sup>6</sup> Te Xitohó Jesucristú ní dáñá-gã mée-gã ní sahni ñaha-güedé xii-gá cuendá sá cuiní-gá sá cácu nihnu nchaa ñáyiú ndècu ñuyú núú ùhú núú ndahú. Te Yá Ndióxi cuiní-gá sá ncháá ñáyiú ñuyú ndécú vitna nihí-yu tñúhu nacuaá ní cuu ní xihí Xitohó Jesucristú. <sup>7</sup> Te Yá Ndióxi ní cachí-gá

sá cáhá<sup>n</sup>-í tñúhu-á<sup>n</sup> ndèní ní cuu núú xindecu ñáyiú ñá túú cúu ñáyiú isràèl, te mee-ni tñúhu ndáá dánèhè-í-yu nacuaá quindáá iní ñáhã-yu xii-gá, te yúhú cáhá<sup>n</sup> ndáá-í sá Yá Ndióxi ní cachí-gá sá cáhá<sup>n</sup>-í tñúhu-gá chí ndècu ndihí-í Xitohó Jesucristú, te ñá túú dándahú ñáhã-í xii-n.

<sup>8</sup> Te yúhú cuiní-í sá ncháá xichi cáhá<sup>n</sup> ndihí cue téé Yá Ndióxi, te na cunduu ndoo cunduu nine iní-güedé òré ndonehe-güedé ndaha-güedé cáhá<sup>n</sup> ndihí ñaha-güedé xii-gá, chí vã cúu cùdèé<sup>n</sup>-güedé cuendá nchaa sá quidé ñaha ñáyiú xii-güedé, te ni vã cání iní-güedé cùcùhé tñahá-güedé ndihí-yu. <sup>9</sup> Te càchí tñúhu-í xii-n sá ncháá ñáyiú ñihí ná cunduu dío-yu nacuaá tàú-xi cunduu, te vã cundúu cuehé cunduu duha dàtná cáá dío nchaa ñáyiú ndècu ichi cuehé ichi duha, te na ndadá-yu díquí-yu nacuaá tàú-xi cunduu, te vã ndadá cuehé ndada duhá-yu, te vã cání iní-yu cunduu vií-yu ndihí sá ío ndèyáhu, te ni vã cání iní-yu cuinhú-yu dóó sá ío ndèyáhu. <sup>10</sup> Te mee-ni sá váha cada-yu, chí duca<sup>n</sup> tàú-xi cada nchaa ñáyiú ñihí ndécú ichi Yá Ndióxi. <sup>11</sup> Te òré tàca-yu núú dácuahá-yu tñúhu Yá Ndióxi, te cue ñáyiú ñihí-á na ñahi dacuahá-yu tñúhu-gá, te cada-yu nchaa nacuaá cáhá<sup>n</sup> cue téé dacuaa ñaha xii-yu tñúhu-gá. <sup>12</sup> Te yúhú càchí-í sá vã cúu dacuaa ñáyiú ñihí cue téé, te ni vã cúu tàxi tñuní ñáhã-yu xii-güedé chí cunduu tñaví-ni yuhú-yu cundèhó-yu. <sup>13</sup> Te duca<sup>n</sup> xiní ñuhu-xi cada-yu, chí Yá Ndióxi ní cadúha-gá díhna-gá té Adán te dàtnùní ní cadúha-gá tá Évã. <sup>14</sup> Te ñá díú mée té Adán ní dándahú ñáhã sácuhlá xii-dé, chí tá Évã ní dándahú-xi, te ñá túú ní quide váha-xi núú Yá Ndióxi sá dúcá<sup>n</sup> ní sándáá iní-xi tñúhu ní cáhá<sup>n</sup> sácuhlá-á<sup>n</sup>. <sup>15</sup> Dico ñáyiú ñihí ní nduu táhú-yu sá cóó ðèhe-yu, te nanihí táhú-yu te núu vã dáñá ndèé-yu canchicú<sup>n</sup> nihnú-yu ichi Yá Ndióxi, te cundecu yiñùhú-yu núú-gã, te cuu iní-yu nchaa tñaha ñáyiú-yu, te cada-yu nchaa nacuaá tàú-xi cunduu cundecú-yu.

## 3

### *Nacuaá tàú cue téé yindaha ñaha xii ñáyiú ndècu ichi Yá Ndióxi cada-güedé*

<sup>1</sup> Te ío ì<sup>n</sup> tñúhu cáhá<sup>n</sup> ñáyiú sá núu ì<sup>n</sup> téé cuiní quindaha ñaha xii ñáyiú ndècu ichi Yá Ndióxi, te ì<sup>n</sup> sá váha cuiní-dé cada-dé càchí-yu, te ndáá queé-xi tñúhu cáhá<sup>n</sup>-yu. <sup>2</sup> Te yúhú càchí-í sá cuè téé duca<sup>n</sup> na quindaha ñaha xii ñáyiú te xiní ñuhu-xi cuu-güedé cue téé quide ndáá cuendá sá vã cáhá<sup>n</sup> ñáyiú cuendá-güedé sá ñá túú quide ndáá-güedé. Te na cúu-güedé cue téé ndèca ì<sup>n</sup> caa-ni ñadhí, te na cúu-güedé cue téé ñá túú quide cutexínu ndècu, te na

cùu-güedé cue tée quide nchaa nacuaá tàú-xi cunduu, te na cùu-güedé cue tée sãñaha nùu vehe ndetatú nchaa ñáyiu ñùhu ichi, te na cùu-güedé cue tée dãnehé ñáhá váha xii ñáyiu tnúhu Yá Ndióxi. <sup>3</sup> Te vá cúú-güedé cue tée quihu, te ni vá cúú-güedé cue tée ndècu pletú, te ni vá cúú-güedé cue tée dicó-ni duca<sup>n</sup> nihí díhú<sup>n</sup>, te ni vá cúú-güedé cue tée sãni iní nãá, te ni vá cúú-güedé cue tée ñùhu iní mee-ni díhú<sup>n</sup>. Chi na cùu-güedé cue tée váha iní-xi te cunduu càhnu iní-güedé. <sup>4</sup> Te na cùu-güedé cue tée ío váha sãnu ichi ñadihí-xi ndihi landú-xi, te na cùu-güedé cue tée quide nacuaá sãndáá iní ñáhá landú-xi cuendá canehé-güexi sã yíñùhu núu-güedé. <sup>5</sup> Chi núu cùu-güedé cue tée ñá ndácú cànuichi ñadihí-xi ndihi landú-xi, te vá ndácú-güedé quindaha-güedé cue ñáyiu ndècu ichi Yá Ndióxi. <sup>6</sup> Te vá cúú-güedé cue tée íchi ni sãndáá iní-xi tnúhu Yá Ndióxi, chi na cuáhá<sup>n</sup> te cada ñinu-güedé meé-güedé te cuíta nihnu-güedé dàtná ní xíta nihnu sácúñhá. <sup>7</sup> Te xini ñuhu-xi cuu-güedé cue tée càhá<sup>n</sup> váha ñáyiu cuendá-xi, cuéi ñá díú ñáyiu ndècu ichi Yá Ndióxi cuendá sá vá cuátnùhu ñaha ñáyiu xii-güedé, chi núu ñáhá te cudana te sácúñhá quesaha-xi tàxi tnuni ñáhá-xi xii-güedé.

*Cue tée chindee ñaha xii cue tée yindaha ñaha xii ñáyiu ndècu ichi Yá Ndióxi*

<sup>8</sup> Te tnàhá cue tée chindee ñaha xii cue tée yindaha ñaha xii ñáyiu ndècu ichi Yá Ndióxi xini ñùhu-xi cuu-güedé cue tée quide nchaa nacuaá tàú-xi cunduu, te vá cúú-güedé cue tée càchí sá càhá<sup>n</sup> ndáá te ñã ndáá, te ni vá cúú-güedé cue tée quihu, te ni vá cúú-güedé cue tée sãni iní-xi dicó-ni duca<sup>n</sup> nihí díhú<sup>n</sup>. <sup>9</sup> Te xini ñuhu-xi cuu-güedé cue tée ñá túú dàña ndeé sãndáá iní tnúhu Yá Ndióxi, te na cùu-güedé cue tée ío váha cùu iní-xi cuendá nchaa sá váha quide-güedé. <sup>10</sup> Te xini ñuhu-xi coto ndeé ñáhá xii-güedé te núu cùu-güedé cue tée quide váha, te núu cùu-güedé cue tée quide váha ña te cuu chindee-güedé cue tée yindaha ñaha xii ñáyiu ndècu ichi Yá Ndióxi. <sup>11</sup> Te tnàhá tucu nchaa ñáyiu díhí ná càdá-yu nchaa nãcuáa tàú-xi cunduu, te vá cundúu yiti yuhú-yu, te ni vá cúú-yu ñáyiu quide cutexínu ndècu, te na cùu-yu ñáyiu ío váha quide ndáá. <sup>12</sup> Te nchaa cue tée chindee ñaha xii cue tée yindaha ñaha xii ñáyiu ndècu ichi Yá Ndióxi, xini ñuhu-xi cuu-güedé cue tée ndècu ñ<sup>n</sup> caa-ni ñadihí-xi, te na cùu-güedé cue tée sãnu ichi váha ñadihí-xi ndihi landú-xi. <sup>13</sup> Te núu na càda ndáá-güedé chindee-güedé cue tée yindaha ñaha xii ñáyiu ndècu ichi Yá Ndióxi, te canehé-yu sá yíñùhu núu-güedé, te duca<sup>n</sup> te vá cúú càhá<sup>n</sup> núu-güedé càhá<sup>n</sup>-güedé núu

ñáyiu tnúhu Xitohó Jesucristú sá sãndáá iní-güedé.

*Ío càhnu cuu tnúhu càhá<sup>n</sup> Yá Ndióxi*

<sup>14</sup> Te cuini-í ndíhi-ni quixi coto ñaha-í xii-n dico díhna-gá càdúha-í tutú-a daquixi-í ndaha-n <sup>15</sup> chi na cuáhá<sup>n</sup> cuyaa-í. Te xía<sup>n</sup> núu càdúha-í tutú-a daquixi-í ndaha-n cuendá cutnùni iní-n nãsa cada-n cùndecu-n ndihi nchaa ñáyiu ndècu ichi Yá Ndióxi. Te ñáyiu-á<sup>n</sup> cúú-yu dàtná ñ<sup>n</sup> vehe cùu cuendá Yá Ndióxi Yáa ndécú nchãa nduu nchaa quíú, chi ndècu ndihi ñaha-gá xii-yu, te cúú-yu ñáyiu càhá<sup>n</sup> váha cuendá tnúhu-gá. <sup>16</sup> Te cùtnuni ndáá iní-ó sã ío càhnu cuu tnúhu càhá<sup>n</sup> Xitohó Jesucristú, tnúhu sá càhá<sup>n</sup> nãcuáa nduu ichi ndecu-o, te duha càhá<sup>n</sup> tnúhu-á<sup>n</sup>:

Te ní quixi Yá cúú Ndióxi ñuyúú-a ní cuu-gá ñ<sup>n</sup> ñáyiu,

te Espiritú Yá Ndióxi ní càhá<sup>n</sup> ndáá-xi sá cúú-gá ñ<sup>n</sup> Yáa ío váha quide ndáá,

te cue espíritú xínú cuèchi núú Yá Ndióxi ní xini ndáá-xi nchaa nãcuáa ní quide Yáa ní quixi ñuyúú-a.

Te ní xité nuu tnúhu-gá nihí ñuyúú-a,

te ndèni ní cuu ní nguíta-yu sãndáá iní ñáhã-yu xii-gá,

te mee-gá cuãndaa-gá andiu.

Duha càchí tnúhu-á<sup>n</sup>.

## 4

*Ñáyiu dàña nihnu vá quindáá-gá iní-yu Yá Ndióxi*

<sup>1</sup> Te Espiritú Yá Ndióxi càhá<sup>n</sup> ndáá-xi sá sãá nduu dàña nihnu dava ñáyiu ndècu ichi-gá vá quindáá iní ñáhã-gã-yu xii-gá, te duca<sup>n</sup> chi cue espíritú cundíhi yucu ñávãha dandáhú ñáhã-xí xii-yu, te mee-nã nchaa tnúhu càhá<sup>n</sup> nchaa ñáyiu cundíhi nchaa espíritú-á<sup>n</sup> cuhu<sup>n</sup> iní-yu. <sup>2</sup> Te nchaa ñáyiu duca<sup>n</sup> cundíhi cue espíritú cundíhi yucu ñávãha-á<sup>n</sup> cúú-yu ñáyiu ío dandáhú meé-xí chi càchí-yu sá càhá<sup>n</sup> ndáá-yu te ñã ndáá, te ñá túú tnáhí-gá ná quidé-xí iní-yu cuendá nchaa sá cuèhé sá dúhá quidé-yu. <sup>3</sup> Te ñáyiu-á<sup>n</sup> quesãhá-yu sá vá cúú càndeca tnaha ñáyiu, te ni vá cúú càxi-yu dava núú sã xini-yu caxi-yu, dico Yá Ndióxi ní cadúha-gá nchaa sã nchító-ó cuendá caxi-o, te cuini-gá sã nchãá nchò ñáyiu sãndáá iní tnúhu-gá ndacá<sup>n</sup> táhú-ó núú-gã òré caxi-o. <sup>4</sup> Te nchaa sã ní cadúha Yá Ndióxi cúú-xí sã váha te vá dàquèe tíhú-ó, te xini ñuhu-xi ndacá<sup>n</sup> táhú-ó núú-gã cuendá nchaa xíã<sup>n</sup>. <sup>5</sup> Te Yá Ndióxi càchí-gá sá meé-gá quidé-gá cúú-xí sã váha sá cúú-xí-ó te núu na ndacá<sup>n</sup> táhú-ó núú-gã.

*Tée quide ndáá xínú cuèchi núú Xitohó Jesucristú*

<sup>6</sup> Te núu na dàcuaha-n ñáyiu ndècu ndihi-o ichi Xitohó Jesucristú nchaa nãcuáa càhá<sup>n</sup>-í-a

ña, te cuu-n ñi<sup>n</sup> tée quide ndáá xínú cuèchi núú-gá, te nducu ndèe-ni-n dacuahá-n tnúhu Yá Ndióxi sá sàndáá iní-n, te canchicu<sup>n</sup> nihnu-ni-n càda-n nchaa nacuaá càhá<sup>n</sup>-gá, te núu duca<sup>n</sup> nà cada-n, te níhi ndéé-n cùndecu-n ichi-gá. <sup>7</sup> Te vá cáda cuendá-n nchàa cuendú cuèhé cuendú duha càhá<sup>n</sup> ñáiyu, ndihi nchaa dava-gá cuendú sá ñà túú nàndíhi cuendá sá ñà túú nà cumání-n cùndecu-n núú Yá Ndióxi. <sup>8</sup> Te núu ñi<sup>n</sup> chiú<sup>n</sup> cada-o te nàcaá luha yiqui-o te nàndíhi-xi luha, dico ío-gá nàndíhi-xi te núu cada-o sá cùndecu yíñuhu-o núú Yá Ndióxi. Te núu duca<sup>n</sup> na càda-o te cùu-xi ñi<sup>n</sup> sá vaha sá cùú-xí-ó vitna, te ni caa ni quíhi<sup>n</sup> duca<sup>n</sup> cùu-xi ñi<sup>n</sup> sá vaha sá cùú-xí-ó. <sup>9</sup> Te xini ñuhu-xi sá ncháá-ndó quindáá iní-ndó nchàa tnúhu càhá<sup>n</sup>-í-a chi cùu-xi tnúhu ndáá. <sup>10</sup> Te vitna ío ndùcu ndee-o quide-o chiú<sup>n</sup> Yá Ndióxi Yaa ndécú nchàa nduu nchaa quíu te quide ndee iní-ó cuendá nchaa sá quidé ñaha ñáiyu xii-o, chi sàndáá iní-ó sá díú-gá chindee ñaha-gá xii-o. Te nchaa ñáiyu cùndahú iní ñahá-gá te chindee ñaha-gá xii-yu, dico ñáiyu sàndáá iní ñahá xii-gá ío-gá cùnúu-yu chindee ñaha-gá xii-yu, chi dàcácu nihnu ñaha-gá núú ùhú núú ndàhú.

<sup>11</sup> Te nchaa tnúhu-á<sup>n</sup> cññaha-n xii-yu, te càhá<sup>n</sup>-n dõho-yu sá ná càdá-yu nchaa nàcuáa càhá<sup>n</sup>-xi. <sup>12</sup> Te ío cada váha-n cùndecu-n cuendá sá vā yõ daquèe tíhú ñahá xii-n cuendá sá cùú-n tée cuechi, te ío váha cada-n nchàa sá tàù-n càda-n cuendá duca<sup>n</sup> canchicu<sup>n</sup> nihnu nchaa ñáiyu ndècu ichi Yá Ndióxi, te vii vii càhá<sup>n</sup> ndíhi-n-yu, te cuu iní-n-yu, te ío quindáá iní-n Yá Ndióxi, te mee-ni sá vaha cani iní-n, te duca<sup>n</sup> càda-n cuendá canchicu<sup>n</sup> nihnú-yu. <sup>13</sup> Te nini cùyaa-í quixi-í, te ío nducu ndèe-n càhá<sup>n</sup> ndodo-n tnúhu Yá Ndióxi núu-yu, te dacuahá-n-yu nàcuáa càhá<sup>n</sup> tnúhu-gá, te càhá<sup>n</sup>-n dõho-yu nàcuáa cuu vii cuu váha iní-yu cundecú-yu ichi Yá Ndióxi. <sup>14</sup> Te vá dáñá ndéé-n càda-n nacuaá ndùu táhú ní taxi Yá Ndióxi ní ngùndecu ndíhi-n cññahá ní sacá<sup>n</sup> ndodo cue tée yindaha ñaha xii ñáiyu ndècu ichi Yá Ndióxi ndaha-güedé díquí-n, te ní cachí tnúhu-güedé sá dúcá<sup>n</sup> ní cuiní Yá Ndióxi cunduu.

<sup>15</sup> Te ni yùhu ni iní-n càda-n nchaa nacuaá càhá<sup>n</sup>-í-a cuendá sá ná quini ñáiyu sá ío-gá váha ta quide-n cuahá<sup>n</sup>. <sup>16</sup> Te ío váha cundehe-n nchàa nacuaá quide-n, ndíhi nchaa nàcuáa dānehé-n-yu, te vá dáñá ndéé-n dùca<sup>n</sup> cada-n. Te núu duca<sup>n</sup> na càda-n te nduu táhú-n cùndecu váha-n núú Yá Ndióxi ní caa ni quíhi<sup>n</sup> ndíhi nchaa ñáiyu na tédóho nchaa tnúhu càhá<sup>n</sup>-n.

## 5

*Nàcuáa tàù-xi cada-o cùndecu-o ndíhi*

*ñáiyu sàndáá iní tnúhu Yá Ndióxi*

<sup>1</sup> Te vá ténáá-n nchàa cue tée cùu sacuéhé chi vii vii càhá<sup>n</sup>-n dõho-güedé, te cada iní-n sá dátñá tátá-n cùu-güedé, te diu-ni duca<sup>n</sup> vii vii càhá<sup>n</sup>-n dõho nchaa cue tée cuechi, te cada iní-n sá dátñá cue ñani-n cùu-güedé. <sup>2</sup> Te diu-ni duca<sup>n</sup> vii vii càhá<sup>n</sup> tucu-n dõho nchaa ñáiyu díhi ñáiyu cùu sacuéhé, te cada iní-n sá dátñá náná-n cùu-yu, te diu-ni duca<sup>n</sup> vii vii càhá<sup>n</sup> tucu-n dõho nchaa ñáiyu díhi ñáiyu cuechi, te cada iní-n sá dátñá cue cùha-n cùu-yu, te ío cuu váha iní-n òrè duca<sup>n</sup> càhá<sup>n</sup>-n dõho nchaa ñáiyu cuechi-á<sup>n</sup>.

<sup>3</sup> Te canehe-n sá yíñuhu núú ñáiyu díhi ní quendóo quèé, te chindee-n-yu núu ndàhú-yu. <sup>4</sup> Te núu ñi<sup>n</sup> ñaha quèé ndécú cuè déhe-a<sup>n</sup> àdi cue déhe ñani-a<sup>n</sup>, te ío xini ñuhu-xi cada-güexi nchaa nacuaá tàù-xi cunduu núú-a<sup>n</sup> chi duca<sup>n</sup> cuini Yá Ndióxi cada-güexi. Te núu duca<sup>n</sup> na càda-güexi te nāñhocáva-güexi quide-güexi sá vaha sá cùú-xí ñáiyu ní dācuéhmú ñaha xii-güexi. Te núu duca<sup>n</sup> na càda-güexi te quide váha-güexi te ío nduu vétu iní Yá Ndióxi. <sup>5</sup> Te ñáiyu quèé ñáiyu ndàhú ndécú ichi Yá Ndióxi sàndáá iní-yu sá díú-gá chindee ñaha-gá xii-yu, te cuéi nduu cuéi níú ñà túú dáña ndéé-yu càhá<sup>n</sup> ndíhi ñahá-yu xii-gá. <sup>6</sup> Te nchaa ñáiyu quèé cùú<sup>n</sup> iní quidé nchàa sá cuèhé sá dúhá cùu-yu dátñá ñáiyu ní xilí cuéi ndècu vívü-yu. <sup>7</sup> Te cññaha-n xii nchaa ñáiyu sá ná càdá-yu nchaa tnúhu càhá<sup>n</sup>-í-a cuendá sá ñà túú nà cumání-yu cundecú-yu, te duca<sup>n</sup> vā yõ càhá<sup>n</sup> cuèhé cuendá-yu. <sup>8</sup> Te ío xini ñuhu-xi chindee-yu cue tnàha ñáiyu-yu, dico ío-gá xini ñuhu-xi chindee-yu cue ñáiyu cùu ndi meé-yu ndècu ndíhi-yu, te núu vá dúcá<sup>n</sup> càdá-yu te ñà túú-gá sàndáá iní-yu cadá-yu nàcuáa càhá<sup>n</sup> Yá Ndióxi. Te sá dúcá<sup>n</sup> ná càdá-yu te vihi-gá quidé-yu dācùxí ñáiyu ndècu ichi cuehé ichi duha.

<sup>9</sup> Te chido tnúni-n mēe-ni ñáiyu quèé ñáiyu sa ndècu únidico cuía-xi àdi vihi-gá cuendá ñáiyu-á<sup>n</sup> cadá-yu nchaa nàcuáa cuini Yá Ndióxi núu nchàa ñáiyu ndècu ichi-gá, te ñáiyu-á<sup>n</sup> xini ñuhu-xi cuú-yu mee-ni ñáiyu ní quide ndáá ní xindecu ndíhi yí-xi. <sup>10</sup> Te na cùu-yu ñáiyu quèé quidé váha cùdiu níú nchàa ñáiyu, te na cùu-yu ñáiyu quèé xini canu ichi váha cue landú-xi, te na cùu-yu ñáiyu sãñaha núu vehe ndetatú cue ñáiyu ñuhu ichi, te na cùu-yu ñáiyu ndècu túha quide nani chiú<sup>n</sup> cuendá cue ñáiyu ndècu ichi Yá Ndióxi, te na cùu-yu ñáiyu chindee nchaa ñáiyu ndècu ndíhi tnúndõho tnúhu ndàhú, te na cùu-yu ñáiyu ñà túú dáña ndéé quidé nchàa núú sá vaha.

<sup>11</sup> Te vá chidó tnúni-n ñáiyu quèé ñáiyu ñà túú ndècu únidico cuía-xi cada chiú<sup>n</sup> Yá Ndióxi, chi núu cuechi-gá-yu ña, te vá cùndáá-yu cadá-yu chiú<sup>n</sup>-gá, chi quesahá-yu



natnándaha tucú-yu. <sup>12</sup> Te sá cuendá xǎ<sup>n</sup> te nacháhu-yu núú Yá Ndióxi, chí vǎ cádá-gǎ-yu nǎcuáa ní cuu tnúhu cáda-yu ní cùu. <sup>13</sup> Te nguíta-yu cani iní-yu quíh<sup>n</sup>-yu ndi vehe ndi vehe caca nihní-yu, te nchaa ñáyiú duca<sup>n</sup> quide ío cùu chundú-yu, te cùyiti yuhú-yu, te ndéni ní cuu cuáhá<sup>n</sup>-yu chinee díquí-yu vehe tnáha ñáyiú-yu ndèhé-yu núu nása ndécú-yu, te ñá túú tàú-yu duca<sup>n</sup> cáda-yu, te cáhá<sup>n</sup>-yu mee-ni tnúhu sá ñá túú nándíhi. <sup>14</sup> Núu xǎ<sup>n</sup> cuini-í sá ncháá ñáyiú quèé ñáyiú cuechi na natnándaha tucú-yu cuendá cuú-yu náná, te duca<sup>n</sup> cáda-yu nchaa sá xini ñúhu-xi cáda-yu vehé-yu, te núu duca<sup>n</sup> na cáda-yu, te nchaa ñáyiú cùu úhu iní ñáhá xii-o vǎ nihí-gǎ-yu tnúhu cáhá<sup>n</sup> cuèhé-yu cuendá tnúhu Yá Ndióxi. <sup>15</sup> Te dava ñáyiú quèé ndécú ichi Yá Ndióxi ní cùu ní dáñá-yu te ní tnií-yu tnúhu cáhá<sup>n</sup> sácuihá.

<sup>16</sup> Te núu dava ñáyiú ndècu ichi Yá Ndióxi ndécú ndihí-yu ñ<sup>n</sup> ñaha quèé cúú ndí meé-yu ña, te tàú-yu chindee ñáhá-yu xii-á<sup>n</sup> cuendá sá vǎ ío chí chiú<sup>n</sup>-a<sup>n</sup> nchaa ñáyiú ndècu ichi Yá Ndióxi, te duca<sup>n</sup> te nchaa ñáyiú ndècu ichi-gǎ-á<sup>n</sup> nihí ndéé-gǎ-yu chindéé-yu dava-gǎ ñáyiú quèé ñá túú vèdana ndècu ndihí.

<sup>17</sup> Te nchaa cue téé ío váha quide yindaha ñaha xii ñáyiú ndècu ichi Yá Ndióxi ío xini ñúhu-xi canehe sá yíhi ñúhu núú-güedé, te chindee ñaha xii-güedé. Te uu<sup>n</sup>-gǎ túú ñáyiú duca<sup>n</sup> cáda-yu sá cúú-xí ncháa cue téé ni yúhu ni iní cáhá<sup>n</sup> tnúhu-gǎ. <sup>18</sup> Te núú tütú Yá Ndióxi cáchi-xi: “Vǎ chíhí-ndó ñunu yuhu ndicutu oré dánchezi-dí tríú”, duha cáchi-xi. Te cáchi tucu-xi ingǎ xichi: “Í<sup>n</sup> téé quide chiú<sup>n</sup> dacuitíí tàú-xi sá cúhú<sup>n</sup> yáhu-dé”, duha cáchi-xi núú tütú-gǎ.

<sup>19</sup> Te núu ío ñáyiú véxi sácá<sup>n</sup> cuéchi núú-n cuendá ñ<sup>n</sup> téé yindaha ñaha xii ñáyiú ndècu ichi Yá Ndióxi ñá, te cada cuendá-n tnúhu cáhá<sup>n</sup>-yu te núu véxi-yu ndihí úú ádi úní ñáyiú cáhá<sup>n</sup> ndáá nǎcuáa ní cuu, á<sup>n</sup> núu ñáhá te vǎ cáda cuendá-n tnúhu cáhá<sup>n</sup>-yu. <sup>20</sup> Te núu cue téé yindaha ñaha xii ñáyiú-á<sup>n</sup> ndécú cuéchi-güedé, te cáhá<sup>n</sup>-n dóho-güedé núu nchaa ñáyiú ndècu ichi-gǎ cuendá sá dáva-gǎ-yu vǎ cúyí<sup>n</sup>-yu duca<sup>n</sup> cáda-yu. <sup>21</sup> Te Yá Ndióxi ndihí Xítoho Jesucristú náhá-gǎ ndihí cue espíritu xínú cuéchi núú-gǎ sá yuhú cáhá<sup>n</sup>-í dóho-n sá cáda-n nchaa nǎcuáa cáhá<sup>n</sup>-í-a, te ñ<sup>n</sup>-ni cáhá<sup>n</sup> ndihí-n cuè téé xini tnáhá ndihí-n, ndihí cue téé ñá túú xini tnáhá ndihí-n. <sup>22</sup> Te vǎ ío cundihi iní-n tàxi ndecu-n ñ<sup>n</sup> téé quindaha ñaha xii ñáyiú, chí díhna-gǎ cada cuendá-n te núu cùu-dé ñ<sup>n</sup> téé quide ndáá, chí núu cuendá-ni na tàxi ndecu-n-dé te vǎ cáda ndáá-dé, te yohó ndaa díquí-n cuendá nchaa sá cuèhé sá dúhá cáda-dé, te

ío coto-n mèe-n vǎ cáda-n ni ñ<sup>n</sup> sá cuèhé sá dúhá.

<sup>23</sup> Te duca<sup>n</sup> ío mee-ni cùhú xití-n te vǎ cóhó-n mèe-ni ndute, chí tnáhá luha vinú ndéhé yoho yáha stilé coho-n cuendá cada tátna-xi.

<sup>24</sup> Te dava ñáyiú cùtnuní nchaa sá cuèhé sá dúhá quide-yu, te cùtnuní tucu sá nácháhu-yu na sáá nduu, te dava tucú-yu chí ñá túú cùtnuní nchaa sá cuèhé sá dúhá quide-yu, dico na sáá nduu cùndáá cuéchi-yu te dáva-á<sup>n</sup> cutnuni. <sup>25</sup> Te duca<sup>n</sup> sǎtnahá-xi cùu nchaa sá váha quide dáva-yu chí cùtnuní, te cuèí ñá túú cùtnuní òré-ni dico dacuitíí sá sáá nduu cùtnuní.

## 6

<sup>1</sup> Te nchaa ñáyiú ndècu tnuú quide chí<sup>n</sup> ndihí ñ<sup>n</sup> patróó<sup>n</sup> xini ñúhu-xi ío canehé-yu sá yíñúhu núú-dé cuendá sá vǎ cáhá<sup>n</sup> cuèhé ñáyiú cuendá Yá Ndióxi, te ni vǎ cáhá<sup>n</sup> cuèhé-yu cuendá tnúhu-gǎ. <sup>2</sup> Te núu patróó<sup>n</sup> cue ñáyiú xinu cuechi-á<sup>n</sup> sándáá iní-dé Yá Ndióxi, te ñá díú sá dúcá<sup>n</sup> sándáá iní-dé Yá Ndióxi te vǎ canehé-yu sá yíñúhu núú-dé, chí uu<sup>n</sup>-gǎ tàú-yu cada váha-yu cunu cuéchi-yu núú-dé, te duca<sup>n</sup> na cáda-yu chí xinu cuechi-yu núú téé sándáá iní ndihí-yu tnúhu Yá Ndióxi. Te vǎ dáñá ndèé-n dànehé-n-yu nchaa nǎcuáa cáhá<sup>n</sup>-í-a, te cúñaha-n xii-yu sá ná cáda-yu.

### *Nduu vétú iní-ó cùndecu-o*

<sup>3</sup> Te ío cue téé ñá túú tnií-güedé nǎcuáa cáhá<sup>n</sup> tnúhu Xítoho Jesucristú, te cue téé-á<sup>n</sup> cáchi-güedé sá cáhá<sup>n</sup> ndáá-güedé dico ñá ndáá, chí ñá túú cáhá<sup>n</sup>-güedé nǎcuáa cuáhá<sup>n</sup> tnúhu-gǎ. Te nchaa tnúhu Xítoho Jesucristú cúú-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gǎ. <sup>4</sup> Te nchaa cue téé duca<sup>n</sup> xiquide quide cahnu-güedé méé-güedé dico ñá túú vèdana xini-güedé, te cue téé-á<sup>n</sup> ñá túú ndècu váha iní-güedé chí nándi tnúhu sá ñá túú nándíhi cuini-güedé cùtnáha-güedé. Te nguíta-güedé cúú cùedú iní tnáhá-güedé, te nàá ndihí tnáhá-güedé, te xicuèhé tnáhá-güedé, te ñá túú-gǎ cúú váha iní núú tnáhá-güedé. <sup>5</sup> Te cue téé-á<sup>n</sup> mee-ni nàá-güedé chí ñá túú sàni váha iní-güedé, te ni ñá túú xini-güedé nǎcuáa cuáhá<sup>n</sup> tnúhu ndáá tnúhu Yá Ndióxi, te cáchi-güedé sá ío váha cùndecu-güedé ichi-gǎ chí sàni iní-güedé sá ío vǎi dihú<sup>n</sup> nihí-güedé cùndecu ndihí-güedé. Te yúhú cáhá<sup>n</sup>-í dóho-n sá vǎ nihí tnáhá-n ndihí nchaa cue téé duca<sup>n</sup> xiquide. <sup>6</sup> Te ndáá sá ichi Yá Ndióxi cúú-xi ñ<sup>n</sup> ichi sá ío váha cùndecu-o, dico xini ñúhu-xi nduu vétú iní-ó nǎcuáa ndècu-o ñuyíú-a. <sup>7</sup> Te nchoo cuè ñáyiú chí ñá túú vèdana nèhe-o ní quexiò ñuyíú-a, te díu-ni duca<sup>n</sup> ñá túú vèdana canehe-o quíhí<sup>n</sup> òré ná cúú-ó. <sup>8</sup> Te ío xini ñúhu-xi nduu vétú iní-ó te núu ndècu-ni

sá cúnchito-o ndíhi dóo cuihnu-o. <sup>9</sup> Te ió ñáyiú ío cuiñi-yu cuu cuicá-yu, te ñáyiú-á<sup>n</sup> dácahu iní ñáhá yúcu ñáváha xii-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá cahu iní-yu quidé-yu, te nchaa sá quidé-yu-á<sup>n</sup> ñá túú védana nándíhi-xi chi uu<sup>n</sup>-gá ndadá ndàhú ñáhá-xi xii-yu, te dàcuíta nihnu ñaha-xi. <sup>10</sup> Chi nchaa ñáyiú ñuhu iní mee-ni díhú<sup>n</sup>, te xíá<sup>n</sup> quidé-xi ngúita-yu sàni iní-yu cadá-yu nándi sá cuèhé sá dúhá. Te ió ñáyiú ndècu ichi Yá Ndióxi te sá tnúhu duca<sup>n</sup> ñuhu iní mee-ni díhú<sup>n</sup> ní dāñā-yu ñá túú-gá sàndáá iní ñáhā-yu xii-gá, te vitna ñá túú tnāhī-gá ndécú váha iní-yu.

*Cahni iní-ó càda-o nchaa nacuaá càhá<sup>n</sup> Yá Ndióxi chi sàndáá iní-ó-gá*

<sup>11</sup> Te yòhó téé quide chiu<sup>n</sup> Yá Ndióxi xini ñuhu-xi vá cadá-n dàtná quidé nchaa ñáyiú ní cachí-í sá ñá túú quide ndáá, te vá dáñā ndèe-n càda ndáá-n cùndecu-n, te cada-n nàcuáa nduu vétú iní Yá Ndióxi, te ío quindáá iní-n-gá, te cuu iní-n nchaa tnaha ñáyiú-n, te cada càhnu iní-n nchaa sá ná yáha-n cùndecu-n ichi-gá, te cunduu ndàhú iní-n. <sup>12</sup> Te cahni iní-n càda-n nchaa nacuaá cuiñi Yá Ndióxi chi sàndáá iní-n-gá, te ío cuhu<sup>n</sup> iní-n sá cùndècu-n ndíhi Yá Ndióxi ní caa ní quíhí<sup>n</sup>, chi diu cuèndá tnāhī-á<sup>n</sup> ní cáhá<sup>n</sup> ñáhā-gá xii-n, te ní cáhá<sup>n</sup> ndáá-n núú vai ñáyiú sá ío váha sàndáá iní-n-gá. <sup>13</sup> Te Yá Ndióxi Yáá quidé nchito nchaandi túhú sá ío ñuyú náha-gá sá càhá<sup>n</sup>-í dóho-n vitna, te diu-ni duca<sup>n</sup> náha tucu Xítohó Jesucristú Yáá ní cáhá<sup>n</sup> tnúhu ndáá núú tē Pilatú <sup>14</sup> sá quindáá iní-n càda-n nchaa nacuaá càhá<sup>n</sup> Yá Ndióxi, te nchaa tnúhu càhá<sup>n</sup>-gá cada-n nàcuáa vá dáquèe túhú ñáhá ñáyiú xii-n, te duca<sup>n</sup>-ni càda-n ndéé ná sáá nduu quixi tucu Xítohó Jesucristú. <sup>15</sup> Te quixi tucu-gá chi duca<sup>n</sup> ní cachí Yá Ndióxi cunduu, te mee Yá Ndióxi náhá-gá ná nduu quixi tucu Xítohó Jesucristú. Te Yá Ndióxi ío váha cùu iní-gá te ì<sup>n</sup>dì díí-ni-gá ío-gá cùnùu-gá dàcúxí cuè téé tàxi tnuní ì<sup>n</sup> ì<sup>n</sup> nàció<sup>n</sup> ndíhi nchaa dava-gá cue téé cùnùu, chi tàxi tnuní ñáhā-gá xii-güedé, te nchaa ñáyiú ndècu ñuyúú-a tàxi tnuní-gá. <sup>16</sup> Te diu-gá cúú-gá Yáá ndécú nchaa nduu nchaa quiú, te ío càhnu cuu-gá chi dàtná dàyèhé nchícanhii dàyèhé-xi núú ndécú-gá, te vá yóo ì<sup>n</sup> cùyii dayatni núú ndécú-gá, te ní ñá túú ní ì<sup>n</sup> ñáyiú xini ñáhā xii-gá te ní vá ndácù-yu quini ñáhā-yu xii-gá. Te ío na cànehe nchaa ñáyiú sá yíñuhu núú-gá ní caa ní quíhí<sup>n</sup>, te duca<sup>n</sup> ío na tàxi tnuní-gá ní caa ní quíhí<sup>n</sup>. Te duca<sup>n</sup> na cunduu.

<sup>17</sup> Te cáhá<sup>n</sup>-n dóho nchaa ñáyiú cuica ndècu ndíhi nchaa sá ío ñuyúú-a cuèndá sá vá cadá càhnú-yu mèe-yu, te duu<sup>n</sup> duu<sup>n</sup> vá cùndèé iní-yu ní ì<sup>n</sup> sá ndécú ndíhi-yu

chi vá cùdñi-xi, te cáhá<sup>n</sup>-n dóho-yu sá ná cùndèé iní-yu Yá Ndióxi chi diu-gá cúú-gá Yáá ndécú nchaa nduu nchaa quiú, te chitu núú ndáhá tàxi-gá nchaa sá xini ñuhu-o, chi cuiñi-gá sá ío cuu váha iní-ó cùndecu-o. <sup>18</sup> Te cáhá<sup>n</sup> tucu-n dóho-yu sá ná cadá-yu mee-ni sá váha, te cuèndá nchaa sá váha cadá-yu-á<sup>n</sup> te cuú-yu ì<sup>n</sup> ñáyiú cuica sá cúú-xí Yá Ndióxi, te na cùndecu túha-yu chindèe-yu cue ñáyiú ndàhú cuañàhā-yu sá xini ñuhu-yu. <sup>19</sup> Te núu duca<sup>n</sup> na cadá-yu te Yá Ndióxi cuañaha-gá sá ndúú tãhū-yu na sáá nduu, te ngùndecu váha-yu ndíhi-gá ní caa ní quíhí<sup>n</sup>.

*Tnúhu ndéé núú ní ndíhi-ná*

<sup>20</sup> Te yòhó té Timùteú càhá<sup>n</sup>-í dóho-n sá ío cada cuèndá-n vá dáma tnúhu ní taxi Yá Ndióxi danèhé-n ñáyiú, te vá cadá cuèndá-n nchaa cuendú cuèhé cuèndú duha ío ñuyúú-a chi ñá túú nándíhi-xi, te ní vá cadá cuèndá-n nchaa tnúhu xitnáha ñáyiú càchi sá xicá náha tnúhu cue téé túha chi ñá díú ì<sup>n</sup> tnúhu ndáá cúú-xí. <sup>21</sup> Te ío ñáyiú ñá túú-gá sàndáá iní-yu tnúhu Yá Ndióxi, chi ní quide cuèndá-yu nchaa tnúhu xica naha ñáyiú-á<sup>n</sup>.

Te Yá Ndióxi ná chindèe chitúu ñaha-gá xii-n. Te duca<sup>n</sup> na cunduu. Te ío cada ndee ìni-ná vitna.

## TUTÚ CÚÚ ÒÚ NÍ CADÚHA TÉ PÁBLÚ QUIHÍ<sup>n</sup> NDAHA TÉ TIMÙTEÚ

*Té Páblú cádúha-dé tutú quihí<sup>n</sup> ndaha té Timùteú*

<sup>1</sup> Yúhú té Páblú ní tendaha ñaha Yá Ndiòxí cáhá<sup>n</sup>-í tnúhu Xítóhó Jesucristú núú ñáyi, chí duca<sup>n</sup> ní cachí Yá Ndiòxí cunduu. <sup>2</sup> Té cáhá<sup>n</sup>-í dátá ní cachí Yá Ndiòxí sá ncháá nchòo ñáyi ndècu ndíhi Xítóhó Jesucristú naníhí táhù-ó. <sup>3</sup> Té yúhú té Páblú cádúha-í tutú-a daquixi-í ndaha yòhó té Timùteú chí ío cùu iní ñáhà-í xii-n, te diu-í ní sanu ichi ñaha-í xii-n ichi Xítóhó Jesucristú, te xicá<sup>n</sup> táhù-í núú Dütú Ndiòxí ndíhi núú Xítóhó Jesucristú sá ío na chindee chitúu ñaha-gá xii-n, te cundáhú iní ñáhà-gá, te duca<sup>n</sup> ndí nduu-gá ná cádá te ío váha cuu iní-n cùndecu-n.

*Cáhá<sup>n</sup> váha-o cuendá Xítóhó Jesucristú*

<sup>3</sup> Te cuéi nduu cuéi níu duca<sup>n</sup>-ní cáhá<sup>n</sup> ndíhi-í Yá Ndiòxí cuendá-n, te ndácá<sup>n</sup> táhù-í núú-gá, te xinu cuechi-í núú-gá dátá ní quide cue ñani tnáhà-í ní xíndecu ndéé sanduu, te cùtnuní iní-í sá quidé ndáá-í núú-gá dátá ní xóo cada-güedé. <sup>4</sup> Te ío sàni iní-í naníhí tnáhà-ó cuendá ío cudíí iní-í, chí ndacu iní-í sá ío ní ndáhyú-n sá ndíhú iní-n cùtnáhá ní quide ndee iní-í tnáhà-ó. <sup>5</sup> Te ñaha-í sá sàndáá ndisa iní-n Yá Ndiòxí dátá ní ngúita díhna-gá xítá-n tá Loidá ndíhi náná-n tá Eùnicé quidé-yu, te cùtnuní ndáá iní-í sá díú tnáhà-n ío váha sàndáá iní-n-gá.

<sup>6</sup> Te xiá<sup>n</sup> dándacu iní ñáhà-í xii-n cuendá sá ío-gá nducu ndèe-n cada-n chiu<sup>n</sup> ní nduu táhù-n núú Yá Ndiòxí cada-n, chí ní taxi-gá tnúhu ndee iní ní ngúndecu ndíhi-n cùtnáhá ní sacá<sup>n</sup> ndodo-í ndaha-í díquí-n sá díú chiu<sup>n</sup>-gá cada-n. <sup>7</sup> Te Espíritú sá ní taxi Yá Ndiòxí ndécú ndíhi-o ñá túú cùu-xi ñ<sup>n</sup> Espíritú sá cádá nàcuáa yúhù-ó, chí cùu-xi ñ<sup>n</sup> Espíritú sá táxi tnúhu ndee iní cada-o chiu<sup>n</sup>-gá, te diu-xi quide cuu iní tnáhà-ó ñ<sup>n</sup> ñ<sup>n</sup>-o, te diu-ni tucu-xi quide cùtnuní iní-ó nàcuáa cada-o cùndecu-o. <sup>8</sup> Te xiá<sup>n</sup> núú vá cùcàhà<sup>n</sup> núú-n cáhá<sup>n</sup> váha-n cuendá Xítóhó Jesucristú, te ní vá cùcàhà<sup>n</sup> núú-n sá dúhá yíhi-í vecaá sá cuendá-gá, te xini ñuhu-xi sá tnáhà-n ndòho-n sá cuendá tnúhu-gá, te cundee iní-n ndòho-n, chí Yá Ndiòxí chindee ñaha-gá xii-n. <sup>9</sup> Te Yá Ndiòxí ní dácácu nihnu ñaha-gá xii-o núú ùhú núú ndáhú, te ní cachí-gá sá cádá-ó ncháa nacuáa cuíni méé-gá cunduu, te duca<sup>n</sup> ní quide-gá chí duca<sup>n</sup> ní sani iní méé-gá cunduu sá cádá váha ñaha-gá xii-o, te ñá díú sá ío váha

quide-o ndecu-o duca<sup>n</sup> ní quide-gá. Te ndéé cùtnáhá vétá ngáva-gá ñuyúú ní cachí-gá sá cádá váha ñaha-gá xii ncháa nchoo ñáyi ní ngúndecu ndíhi Xítóhó Jesucristú vitna. <sup>10</sup> Te vitna cùtnuní iní-ó sá ío váha quide ñaha-gá xii-o, chí ní quixi Xítóhó Jesucristú ñuyúú-a ní dácácu nihnu ñaha-gá xii-o núú ùhú núú ndáhú, te Yaá-á<sup>n</sup> ní quide-gá cuendá sá vá cùú-gá-ó cùú dúcá<sup>n</sup>-ó, chí ní cachí-gá sá cùndecu-o ní caa ní quihí<sup>n</sup> te núu na quindáá iní-ó tnúhu-gá.

<sup>11</sup> Te ní cachí-gá sá cáhá<sup>n</sup>-í tnúhu-gá núú ñáyi ñá túú cùu ñáyi isráel te dacuáha váha-í-yu tnúhu-gá, te cuéi ndèni ní cuu ndécú-yu te quihí<sup>n</sup>-í cáhá<sup>n</sup>-í tnúhu-gá núú-yu chí duca<sup>n</sup> ní cachí-gá cunduu. <sup>12</sup> Te cuendá xiá<sup>n</sup> nándi sá ndóhó-í vitna cuendá-gá, dico ñá túú cùcàhà<sup>n</sup> núú-í chí cùtnuní váha iní-í nàcuáa sàni iní Xítóhó Jesucristú Yaá sàndáá iní-í, te yúhú ní dáñà-í méé-í núú ndáhà-gá, te cùtnuní ndáá iní-í sá cótó ñaha-gá xii-í ndéé ná sáa nduu nàcuaca ñaha-gá.

<sup>13</sup> Te vá dáñá ndéé-n cada-n ncháa nacuáa cáhá<sup>n</sup> tnúhu váha ní dánèhé ñáhà-í xii-n, te ío quindáá iní-n Yá Ndiòxí, te ncháa-o nàcuáa ndècu-o ndíhi Xítóhó Jesucristú ío cuu iní tnáhà-ó ñ<sup>n</sup> ñ<sup>n</sup>-o. <sup>14</sup> Te cada cuendá váha-n sá vá dáma tnúhu Yá Ndiòxí sá ní taxi-gá ndécú ndíhi-n, te Espíritú-gá sá ní taxi-gá ndécú ndíhi-o chindee ñaha-xi xii-n.

<sup>15</sup> Te yòhó sa xini-n sá ncháa ñáyi ndècu distritú Asiá, ñáyi ní sàndáá iní tnúhu Xítóhó Jesucristú ní dáñá ñáhà-yu xii-í, te tnáhà té Fígeló ndíhi té Hèrmógenés ní dáñá ñaha-güedé xii-í. <sup>16</sup> Te xicá<sup>n</sup> táhù-í núú Xítóhó Jesucristú sá ná chindee-gá cue ñáyi cùu ndi mee té Onésifóro, chí diu-ó ío vái xito ní quixi-dé ní quide cuendá ñáhà-dé xii-í, te ní taxi-dé tnúhu ndee iní, te ñá túú ní cùcàhà<sup>n</sup> núú-dé sá yíhi-í vecaá. <sup>17</sup> Te cùtnáhá ní xíndecu-dé ñáúú Rómá duca<sup>n</sup>-ní ní xóo nanducu ñaha-dé xii-í ndéé ndéé naníhí ñáhà-dé. <sup>18</sup> Te xicá<sup>n</sup> táhú tucu-í núú Xítóhó Jesucristú sá ná cundáhú iní ñáhà-gá xii-dé nduu na sáa cundáá cuéchi ncháa ñáyi. Te yòhó sa xini ndáá-n sá ío ní chindee ñaha-dé xii-o cùtnáhá ní xíndecu-o ñúú Èfesú.

## 2

*Té quide ndáá xinu cuéchi núú Xítóhó Jesucristú*

<sup>1</sup> Te yòhó té cùu datná ñ<sup>n</sup> déhe mee-í ío nducu ndèe-n cada-n nacuáa níhí ndéé-gá-n cùndecu-n ichi Xítóhó Jesucristú chí diu-gá chindee ñaha-gá xii-n. <sup>2</sup> Te ncháa tnúhu sá ní dánèhé ñáhà-í xii-n ndíhi ncháa dáva-gá ñáyi, xiá<sup>n</sup> danèhé-n dáva-gá cue té quide ndáá cuendá danèhé-güedé dáva-gá ñáyi.

<sup>3</sup> Te cahni iní-n ndòho-n cunu cuechi-n núú Xítóhó Jesucristú dátá cuíni-n ndòho ñ<sup>n</sup>

sandadú sàhni iní-dé xínú cuèchi-dé. <sup>4</sup> Chi ni ìn sandadú ñá túú nàgá sání iní-dé cada-dé òré xínú cuèchi-dé cuèndá cudü-dé núú téé tàxi tñuní ñáhá. <sup>5</sup> Te diu-ni duca<sup>n</sup> sátnahá-xi cùu tucu ìn téé dàdiqui, chi núu vá dàdiqui-dé nàcuáa tàu-xi cunduu te vá nihí-dé sá ndúú táhü-dé. <sup>6</sup> Te núu ìn téé xínú cuechi ío ndücu ndee-dé quidé chiü<sup>n</sup>-dé chíhi-dé tatá, te diu-dé tàü-dé díhna-gá-dé níhi-dé sá cùhü<sup>n</sup> yáhu-dé. <sup>7</sup> Te cani iní-n nchaa tnúhu cáhá<sup>n</sup>-í-a, te Xítohó Jesucristú chindee ñaha-gá xii-n te tecú tñuní-n nchaa.

<sup>8</sup> Te ndacu iní-n sá Xítohó Jesucristú ní cuu-gá ñani tnáhá ndü Dávüi, te ní xihí-gá te ní ndoto-gá, te diu duca<sup>n</sup> ndüu tnúhu dānehé-í ñáiyü. <sup>9</sup> Te ío dāndoho ñaha ñáiyü xii-í cuèndá sá cáhá<sup>n</sup>-í tnúhu-gá, te quide ñahá-yu xii-í dàtná quidè-yu ìn téé ní quide ìn cuèchi càhnu, chi ní chíhi ñahá-yu vecaá xii-í, dico tnúhu Yá Ndióxi chí vá ndácü-yu nganí-yu. <sup>10</sup> Te xiá<sup>n</sup> núu cuéi nāndi cùu nchaa sá quidé ñahá-yu xii-í, dico quide cahnu iní-í cuèndá sá nānhí tǎhü tnáhá nchaa dava-gá ñáiyü cuini Yá Ndióxi cundecu ndihi-gá, chi nchaa ñáiyü na tnáhá tnúhu ndihi Xítohó Jesucristú nduu táhü-yu cundecu-yu ndihi-gá núú ío váha càa ndecu-gá ní caa ní quihí<sup>n</sup>.

<sup>11</sup> Te xéhé cùú-xi ìn tnúhu ndáá cuiti: Nchoo cùu-o datná ñáiyü ní xihí ndihi Xítohó Jesucristú chí ñá túú-gá ndécú-ó ichi cuehé ichi duha, te xiá<sup>n</sup> núu cuéi na sáa nduu cùú-ó ñüyü-a, dico diu-ni cundecu-o ndihi-gá.

<sup>12</sup> Te núu na cūndee iní-ó ndòho-o nāndi sá ndóhó-ó sá cuèndá-gá, te sáa nduu te cunuu-o ndihi-gá.

Te núu na cáhá<sup>n</sup>-ó sá ñá túú xini-ó-gá, te diu-ni duca<sup>n</sup> cūñaha-gá xii-o sá ñá túú xini ñahá-gá ná sáa nduu càda ndáá-gá cuèchi nchaa ñáiyü.

<sup>13</sup> Te núu nchoo ñá túú quide ndáá-ó ndécü-o núú-gá ñá, dico mee-gá chí ío ndáá quidé-gá, chí Yá Ndióxi nchaa sá sání iní-gá quidé-gá.

*Téé quide nacúaa ndüu vétü iní Yá Ndióxi*

<sup>14</sup> Te dandacu iní-n nchaa ñáiyü ndécü ndihi-o ichi Xítohó Jesucristú nchaa tnúhu cáhá<sup>n</sup>-í-a, te cūñaha-n xii-yu sá Xítohó Jesucristú cuini-gá sá ñá túú-gá nāndi tnúhu cūtnáhá-yu, chí nchaa tnúhu cáhá<sup>n</sup>-yu-á<sup>n</sup> dácuíta nihnu-xi ñáiyü ndédóho ñaha xii-yu, chí ñá túú vèdana nāndihi nchaa tnúhu-á<sup>n</sup>. <sup>15</sup> Te ío nducu ndèe-n cada ndáá-n cūndecu-n núú Yá Ndióxi, te cada-n chiü<sup>n</sup>-gá nàcuáa nduu vétü iní-gá, te cáhá<sup>n</sup> ndáá-n tnúhu-gá, cuèndá sá vá cūcàha<sup>n</sup> núú-n núú-gá. <sup>16</sup> Te vá cādá cuèndá-n nchaa tnúhu sá ñá túú vèdana nāndihi cáhá<sup>n</sup> ñáiyü cuèndá Yá Ndióxi, chí nchaa ñáiyü cáhá<sup>n</sup> tnúhu-á<sup>n</sup> ndihi nchaa ñáiyü sácūndédóho ñaha xii-yu uu<sup>n</sup>-gá

quidè-yu nchaa sá cuèhé sá dúhá. <sup>17</sup> Te nchaa tnúhu-á<sup>n</sup> cūténuu-xi dàtná quidé ìn cuèhé sá ñani ñaha xii ñáiyü xitè nuu-xi nihí yiqui cūñü-yu. Te tnáhá té Himèneu ndihi té Filetú cáhá<sup>n</sup>-güedé tnúhu-á<sup>n</sup> quidé-güedé dàtná quidé ñáiyü-á<sup>n</sup>. <sup>18</sup> Te cue téé-á<sup>n</sup> ñá túú-gá cáhá<sup>n</sup> ndáá-güedé dàtná cáhá<sup>n</sup> tnúhu Yá Ndióxi, chí càchi-güedé sá nchaa nchò ñáiyü ndécü ichi Yá Ndióxi cùú-ó dàtná cue ñáiyü sa ní ndoto, dico na cùu ndisa-o te vá ndótó-gá-ó càchi-güedé. Te dava ñáiyü ní dàñá-yu sá sàndáá iní-yu tnúhu Yá Ndióxi sá dúcá<sup>n</sup> cáhá<sup>n</sup>-güedé. <sup>19</sup> Te cuéi duca<sup>n</sup> quide davá-yu, dico Yá Ndióxi ní taxi ndecu-gá cue ñáiyü ni yùhu ní iní ndécü ichi-gá, te cūtnuní sá ndécü ndihi ñaha-gá xii-yu, chí ìn xichi núú tütü-gá càchi-xi sá mée-gá xini-gá cue ñáiyü cùu cuèndá-gá. Te ingá tucu xichi núú tütü-gá càchi-xi sá nchaa ñáiyü sàndáá iní ñahá xii Xítohó Jesucristú xini ñühu-xi sá vá cūndecu-gá-yu ichi cuèhé ichi duha.

<sup>20</sup> Te ñáiyü cuica chí ndécü ndihi-yu vehé-yu cóhó sá ní cuáha mee-ni díhü<sup>n</sup> cuáá<sup>n</sup>, ndihi cóhó sá ní cuáha mee-ni díhü<sup>n</sup> cuixí<sup>n</sup>, te nchaa cóhó-á<sup>n</sup> cùú-xi dàtná cue ñáiyü ñá túú ná cūmāni núú Yá Ndióxi. Te ndécü ndihi tucü-yu cóhó sá ní cuáha mee-ni ñühu, ndihi cóhó sá ní cuáha mee-ni yütü, te nchaa cóhó-á<sup>n</sup> cùú-xi dàtná cue ñáiyü ñá túú quide ndáá núú Yá Ndióxi. <sup>21</sup> Te nchaa ñáiyü ío ndécü yiñuhu núú Yá Ndióxi cùú-yu ñáiyü ñá túú nihí tnáhá ndihi cue ñáiyü ñá túú quide ndáá núú-gá, te cue ñáiyü ndécü yiñuhu núú-gá-á<sup>n</sup> ñá túú tnáhí quée càva-yu quidé-yu nchaa chiü<sup>n</sup> tahu-gá.

<sup>22</sup> Te ío cada cuèndá-n vá cādá-n nàcuáa quide cue téé cuechi ndécü ichi cuehé ichi duha, te cada-n nàcuáa cundáá-n cūndecu-n ichi Yá Ndióxi, te quindáá iní-n-gá, te cuu iní-n nchaa tnaha ñáiyü-n, te cundecu nahí-n, chí duca<sup>n</sup> tàü-xi cada-n ndihi nchaa dava-gá ñáiyü sa ní nduu ndoo ní nduu nine iní-xi ñáiyü cáhá<sup>n</sup> ndihi ñaha xii Yá Ndióxi. <sup>23</sup> Te vá cādá cuèndá-n ìn ñá túú xitnaha ñáiyü chí ñá túú vèdana nāndihi-xi, chí núu na càda cuèndá-ó te dicó dānāá ñahá-xi. <sup>24</sup> Chi nchaa cue téé xínú cuechi núú Yá Ndióxi xini ñühu-xi cáhá<sup>n</sup> váha-güedé ndihi nchaa ñáiyü, te danèhé ñahá váha-güedé tnúhu-gá, te cunduu càhnu iní-güedé te vá nāá-güedé. <sup>25</sup> Te vii vii cáhá<sup>n</sup>-güedé dóho nchaa ñáiyü sáa iní-xi, ñáiyü ñá túú tnáhá iní tnúhu ndáá tnúhu Yá Ndióxi, te duca<sup>n</sup> te cudana Yá Ndióxi cada-gá te ndixi túu iní-yu sá ñá túú quide váha-yu ndécü-yu te quindáá iní-yu tnúhu-gá. <sup>26</sup> Te duca<sup>n</sup> te cutnūni iní-yu sá sácūlná cūñü-xi taxi tñuní ñahá-xi xii-yu, chí dàcahu iní ñahá-xi xii-yu quidé-yu nchaa nàcuáa cùu iní-xi ní cùu.

## 3

*Nàcuáa cada ñáiyu òrè sa ta cùyatni sáá nduu quixi tucu Xítohó Jesucristú*

<sup>1</sup> Te cächí tnúhu-í xii-n cuendá cunaha-n nàcuáa cada-xi òrè sa ta cùyatni sáá nduu quixi tucu Xítohó Jesucristú, chi ðává-án<sup>o</sup> io cada úhú-xi. <sup>2</sup> Chi nguíta ñáiyu cuhu<sup>n</sup> iní-yu mee-ni sá cúu-xí meé-yu, te cuhu<sup>n</sup> iní-yu mee-ni ðihú<sup>n</sup>, te io cada càhnú-yu meé-yu, te cunduu yichí iní-yu, te cáhá<sup>n</sup> cuèhé-yu cuendá Yá Ndióxi, te vá quindáá-gá iní-yu ni tátá-yu ni náná-yu, te ñi vá ndacá<sup>n</sup> táhú núu tnáhá-yu cuendá nchaa sá vaha cada tnáhá-yu, te cadá-yu mee-ni sá ñà túu tnáhá iní Yá Ndióxi. <sup>3</sup> Te vá cúu iní tnáhá ndi meé-yu, te nàa-yu te vá cuanáa-yu, te tee tnáhá-yu cuéchi neñúu, te vá cuanáa-yu cadá-yu nchaa sá cuèhé sá dúhá sàni iní-yu, te io cunduu cuihna iní-yu, te vá tnáhá iní-yu nchaa sá vaha. <sup>4</sup> Te dayuhu cuáha cuendá tnáhá-yu núu cuè té cùchiu<sup>n</sup>, te io cunduu y<sup>ni</sup> iní-yu cadá-yu nándi sá ñà túu vaha, te io cada nínu-yu meé-yu, te mee-ni ncháa sá cúdí iní-yu cadá-yu, te vá cúdí iní-yu nanducu nihnú-yu Yá Ndióxi. <sup>5</sup> Te queshá-yu sá tnáhá-yu ndécú-yu ichi Yá Ndióxi dico vá cadá-yu nchaa nàcuáa cáhá<sup>n</sup>-gá.

Te yúhu cächí tnúhu-í xii-n sá vá ñihí tnáhá-n ndihí nchaa ñáiyu duca<sup>n</sup> quide. <sup>6</sup> Te dava ñáiyu-án<sup>o</sup> quihí<sup>n</sup>-yu dava vehe núu xindecu ñáiyu, te nguíta-yu dandáhú-yu ñáiyu ðihí ñà túu xiní dana cuendá Yá Ndióxi, te ñáiyu ðihí-án<sup>o</sup> cúu-yu ñáiyu ndècu vihi cuéchi-xi, chi io cúdí iní-yu quidé-yu nchaa náni sá cuèhé sá dúhá sàni iní-yu. <sup>7</sup> Te cuéi io ðacuahá-yu, dico ñà túu cùtnuní iní-yu nása cuáhá<sup>n</sup> tnúhu ndáá tnúhu Yá Ndióxi. <sup>8</sup> Te ñáiyu duca<sup>n</sup> dandahú ñáhá xii cue ñáiyu ðihí-án<sup>o</sup> ñà túu cáhá<sup>n</sup> vaha-yu cuendá tnúhu Yá Ndióxi, chi quidé-yu ðátná ní quide ndí Jánés ndihí ndíi Jámbrés chi cue ndíi-án<sup>o</sup> ñà túu ní cùu vaha iní cue ndíi núu ndíi Moisés cuendá tnúhu ní cáhá<sup>n</sup> ndíi. Te ñáiyu-án<sup>o</sup> cúu-yu ñáiyu sàni iní mee ñine-ni nchaa sá cuèhé sá dúhá, te cuéi cächí-yu sá sàndáá iní-yu Yá Ndióxi dico ñà ndáá sá sàndáá iní ñáhá-yu xii-gá. <sup>9</sup> Dico vá ndacú-gá-yu dandáhú-yu vai ñáiyu, chi nchaa ñáiyu cutnùní iní-yu sá io ñi ðiquí-yu, te ñà túu cáhá<sup>n</sup> ndáá-yu ðátná ní quide cue téé úú ñà túu ní tnáhá iní tnúhu ní cáhá<sup>n</sup> ndíi Moisés.

*Té Páblu dásahú-dé té Timùteú*

<sup>10</sup> Te yòhó quidé-n ncháa nàcuáa ní ðanèhé ñáhá-í xii-n, te ní xiní-n ncháa nàcuáa quide-í ndécú-í, te cùtnuní iní-n nàcuáa sàni iní-í ndécú-í ñuyúú-a, te xiní-n sá io sàndáá iní-í Yá Ndióxi, te io càhnu iní-í, te cùu iní-í

nchaa ñáiyu, te xiní tucu-n sá io quide cahnu iní-í cuéi nándi sá yáha-í ndécú-í dico ñà túu ðáña ndeé-í ichi-gá. <sup>11</sup> Te io vai sá quidé ñàha ñáiyu xii-í ðándòho ñáhá-yu sá ndécú-í ichi Xítohó Jesucristú, te sa ñàha tucu-n ðátná ní quide ñáhá-yu xii-í cùtnáhá ní xindecu-í ñuu Antióquia, ndihí ñuu Iconiú, ndihí ñuu Lístá, chi io ní ðándóhó ñáhá-yu xii-í sá cuendá-gá. Dico Xítohó Jesucristú io ní xito ñàha-gá xii-í te ní chindee ñàha-gá cuéi nándi cùu sá ñi yáha-í. <sup>12</sup> Te na cächí tnúhu ndáá-í xii-n sá io vai sá ñà túu vaha cada ñàha ñáiyu xii nchaa ñáiyu cuiñi sá ñà túu ñà cumáni núu Yá Ndióxi cuendá sá ndécú ndihí-yu Xítohó Jesucristú. <sup>13</sup> Dico dava ñáiyu cächí-yu sá cáhá<sup>n</sup>-yu tnúhu Yá Ndióxi te ñà ndáá sá cáhá<sup>n</sup>-yu tnúhu-gá, ñáiyu-án<sup>o</sup> uu<sup>n</sup>-gá cuita cada-gá-yu nchaa sá cuèhé sá dúhá quihí<sup>n</sup>, te duca<sup>n</sup>-ni io dandahú tnáhá-yu.

<sup>14</sup> Te yòhó chi io vaha ní sàndáá iní-n tnúhu Yá Ndióxi sá ðacuàha-n, te vitna cáhá<sup>n</sup>-í ðòho-n sá vá ðáña ndeé-n quindáá iní-n tnúhu-án<sup>o</sup>, te yòhó sa ñàha-n ná cúu ñáiyu ní ðanèhé ñáhá xii-n tnúhu-gá. <sup>15</sup> Te yòhó chi ndeé cùtnáhá cúu ðandú-n ñi nguíta-n ðacuàha-n tnúhu ndeé núu tútu Yá Ndióxi, te ðiu-ni nchaa tnúhu-gá canu ichi ñàha-xi xii-n te nanihí táhú-n, chi sàndáá iní-n Xítohó Jesucristú. <sup>16</sup> Te nchaa cue téé ní tee tnúhu Yá Ndióxi, chi ðiu-ni mee-gá ní ðácáhú iní ñáhá-gá xii-güedé nàcuáa tee-güedé, te tnúhu-gá io vaha ðacuàha-o nchaa dava-gá ñáiyu, te cáhá<sup>n</sup>-xi ðòho-o sá vá cündecu-gá-ó ichi cuèhé ichi duha, te núu ñà túu quide ndáá-ó ndècu-o te nàcanu ichi ñàha-xi, te ðanèhé ñáhá-xi nàcuáa cada-o cündáá-ó núu Yá Ndióxi. <sup>17</sup> Te ðiu-ni tnúhu-gá ðátúha ñàha vaha-xi xii nchoo cuè ñáiyu ndeé ndihí-gá cuendá cada-o ncháa núu sá vaha.

## 4

<sup>1</sup> Te Xítohó Jesucristú quixi-gá taxi tnùní-gá ñuyúú-a, te cada ndáá-gá cuéchi nchaa ñáiyu sa ní xihí, ndihí cuéchi nchaa ñáiyu xindecu vivú. Te mee-gá ndihí Yá Ndióxi ñáhá-gá sá io cáhá<sup>n</sup>-í ðòho-n vitna <sup>2</sup> sá io ðacuàha-n ñáiyu tnúhu-gá, te vá ðáña ndeé-n ðacuàhá-n-yu ndèda-ni càa oré cuéi ñà túu cuiñi-yu cundedòho-yu, te nchaa ñáiyu ñà túu cuiñi cada ndáá cùñaha ndáá-n ncháa nàcuáa quidé-yu. Te cùñaha tùcu-n xii-yu sá vá ðúcá<sup>n</sup>-gá cadá-yu, te cáhá<sup>n</sup>-n ðòho-yu cuendá cada ndáá-yu cundecú-yu. Te io cunduu càhnu iní-n òrè cáhá<sup>n</sup>-n ðòho-yu, te io ðacuàhá-n-yu tnúhu-gá. <sup>3</sup> Chi sáá nduu te vá cächí-gá-yu cundedòho-yu nchaa tnúhu sá sánú ichi ñàha cundecu vaha-o núu Yá Ndióxi, chi mee-ná nchaa sá cúdí iní meé-yu cundedòho-yu, te ndécú-yu cue téé ðanèhé ñáhá xii-yu nchaa tnúhu cùu iní-yu-án<sup>o</sup>. <sup>4</sup> Te vá cadá cuendá tnáhí-gá-yu

tnúhu ndáá tnúhu Yá Ndiöxí, chi mee-nã tnúhu sã ñã túú nãndíhi cada cuëndá-yu. <sup>5</sup> Dico yòhó ío quíhi iní-n cùndecu-n, te cahni iní-n cuéi nãndi na ndòho-n, te dacuàha-ni-n ñáyiu tnúhu Yá Ndiöxí, ñáyiu vátá quëndáá iní ñáhá-gã xii-gá, te cada-ni-n ncháa chiu<sup>n</sup> ní táhú-gã cada-n.

<sup>6</sup> Te yúhú sa ñúhu ichi-ná-í quíhi<sup>n</sup>-í núú ndécú Yá Ndiöxí cundecu-í, chi sa ní cuyatni cahni ñaha-güedé xii-í cuëndá sá xínú cuèchi-í núú-gã. <sup>7</sup> Te ní quide-í ncháa chiu<sup>n</sup> ní táhú Yá Ndiöxí cada-í te vitna ní xínu cava ncháa chiu<sup>n</sup> ní táhú-gã-ã<sup>n</sup> ní quide-í, te ñã túú ní ðãña ndeé-í ní sãndáá iní-í-gã, te duca<sup>n</sup>-ni sãndáá iní-í-gã ndeé vitna. <sup>8</sup> Te vitna sa ndècu túha-ná sá ndúú táhú-í cuëndá sá quidé ndáá-í núú Yá Ndiöxí, te Xítohó Jesucristú taxi-gã táhú-ã<sup>n</sup> nduu táhú-í ná sáá nduu, chi cuu-gã ñi<sup>n</sup> Yáá quidé ndáá cuiti, te ñã díú-ní yúhú taxi-gã táhú-ã<sup>n</sup> cuu cuëndá-í, chi tnáhá ncháa ñáyiu ndètu cahnu-ná sáá nduu quixi tucu-gã ñuyú-a cuãñaha-gã táhú-ã<sup>n</sup> nduu táhú-yu.

#### *Chiu<sup>n</sup> tahu té Pãblú cada té Timùteú*

<sup>9</sup> Te cuini-í sá ío ndíhi quixi-n quixi coto ñaha-n xii-í. <sup>10</sup> Chi té Dëmás ñã túú-gã quidé cuëndá ñáhá-dé xii-í, chi mee-nã ncháa sá ío ñuyú-a ío cùdí iní-dé. Te ní dándõo ñaha-dé cuáhá<sup>n</sup>-dé ñuu Tesalónica, te té Crèscénté cuáhá<sup>n</sup>-dé cundecu-dé distrítu Gálaciá, te té Títu cuáhá<sup>n</sup>-dé cundecu-dé distrítu Dàlmaciá. <sup>11</sup> Te ñi<sup>n</sup> ddi-ná té Lùcá ndécú ndíhi ñaha-dé xii-í, te cùñaha-n xii té Mácú quixi-n ndíhi-dé, chi té-ã<sup>n</sup> ndacu-dé cada-dé ñi<sup>n</sup> chiu<sup>n</sup>-í. <sup>12</sup> Te té Tiquicú ní tendaha-í-dé cuáhá<sup>n</sup>-dé ñuu Éfesú. <sup>13</sup> Te òré quixi-n te yáha-n vèhe té Cãrpú cáá ñuu Tròás canehe-n ñi<sup>n</sup> dóó tícachi ní dándõo-í vehe-dé quixi, ndíhi ncháa librú-í, te tnáhá ncháa dava-gã tutú-í ndécú vèhe-dé canehe-n quixi chi xíã<sup>n</sup> ío-gã xíní ñúhu-í. <sup>14</sup> Te té Ljandrú té cuu rerú ío vai sã ñã túú vãha ní cuu quide ñaha-dé xii-í, dico mee Yá Ndiöxí náhá-gã nása cada ñaha-gã xii-dé cuëndá sá dúcá<sup>n</sup> quide-dé. <sup>15</sup> Te vá nihí tnáhá-n ndíhi-dé chi ío càhá<sup>n</sup> cuèhé-dé cuëndá ncháa tnúhu càhá<sup>n</sup>-ó.

<sup>16</sup> Te cúnàhá ndécá ñaha-güedé xii-í ní sáhá<sup>n</sup> núú cuè té-é cùchiu<sup>n</sup> xito díhna nuu, chi mee ði ní sáhá<sup>n</sup> te ñã túú ní sáhá<sup>n</sup> ni ñi<sup>n</sup> cue té-é cùndíhi-í, chi ncháa-güedé ní dándõo ñaha-güedé xii-í, te yúhú xicá<sup>n</sup> táhú-í núú Yá Ndiöxí sá vã cádá cuëndá-gã sá dúcá<sup>n</sup> ní quide-güedé. <sup>17</sup> Dico Xítohó Jesucristú ní chindee ñaha-gã xii-í, chi ní taxi-gã tnúhu ndee iní ní càhá<sup>n</sup>-í tnúhu-gã nàcuáa tàú-xi cunduu núú cuè té-ã<sup>n</sup> ndíhi núú ncháa ñáyiu, dico ñã díú ñáyiu isràél cúu-yu, te ðiu-gã ní dácacu nihnu ñaha-gã xii-í ñã túú ní sãhni ñaha-güedé. <sup>18</sup> Te mee

Xítohó Jesucristú coto ñaha-gã xii-í te ñã túú ná cuu cuéi nãndi sã ná cádá ñaha ñáyiu xii-í te ðiu-ni-gã coto ñaha-gã xii-í ndeé ná sáá nduu sáá-í andiu núú ndécú-gã táxi tnúni-gã. Te ncháa-o chí ná càchí-ó sã ío càhnu cuu-gã ni caa ni quíhi<sup>n</sup>. Te duca<sup>n</sup> na cunduu.

#### *Tnúhu ndeé núú ní ndíhi-ná*

<sup>19</sup> Te ío cùñaha-n na càda ndee iní tá Priscá, ndíhi té Àquilú, ndíhi cue ñáyiu cuu ndi mee té Onèsiforó. <sup>20</sup> Te té Èrastú ní quendõo-dé ñuu Còrintú, te té Trófimú ní dándõo-í-dé ñuu Miletú chi cùhú-dé. <sup>21</sup> Te ío cundíhi iní-n quixi-n oré vátá sáá-gã yóó quidé vixi<sup>n</sup>-xi. Te ío cada ndee iní-n càchí té Èbulú, ndíhi té Pudenté, ndíhi té Línú, ndíhi tá Claudiá, ndíhi ncháa dava-gã ñáyiu sãndáá iní tnúhu Xítohó Jesucristú.

<sup>22</sup> Te xicá<sup>n</sup> táhú-í núú Xítohó Jesucristú sá ná cundecu ndíhi ñaha-gã xii-n ndíhi ncháa dava-gã-yu. Te duca<sup>n</sup> ío na chindee chítú ñaha-gã xii-ndo ncháa-ndo. Te duca<sup>n</sup> na cunduu. Te ío chí cádá ndeé iní-nã vitna.

## TUTÚ NÍ CADÚHA TĒ PĀBLŪ QUIHI<sup>n</sup> NDAHA TĒ TĪTÚ

*Té Pāblū cādūha-dé tutú quihi<sup>n</sup> ndaha té Titú*

<sup>1</sup> Yúhú té Pāblū xínú cuèchi-í núú Yá Ndióxi, te diu-gá ní tendaha ñaha-gá xii-í cāhá<sup>n</sup>-í tnúhu Xítoho Jesucristú núú ñáyiú cuèndá quindáá iní nchaa ñáyiú ní cachí Yá Ndióxi naníhí tǎhú, ndihí cuèndá sá tēcú tnúni váha-yu tnúhu-gá, te ñáyiú na quindáá iní tnúhu-gá cada ndáá-yu cundecú-yu ichi-gá. <sup>2</sup> Te yúhú dácúaha-í-yu tnúhu-gá cuèndá cundecu ndihí-yu tnúhu ndee iní sá cündecu ndihí-yu Yá Ndióxi ní caa ní quihi<sup>n</sup>, chi ndéé cúnthá vátá ngǎva-gá ñuyíú-a ní cachí-gá sá cündecu ndihí ñaha-gá xii-yu, te ñá túú dándahú ñahá-gá, chí quide-gá <sup>ii</sup> sá cāhá<sup>n</sup>-gá. <sup>3</sup> Te ní sáá nduu ní cachí-gá sá níhí-yu tnúhu nácuáa cuáhá<sup>n</sup> tnúhu-gá, te diu-ní tnúhu-án ní cachí Yá Ndióxi Yáá dácácu nihnu ñaha xii-o núú ùhú núú ndáhú sá dácúaha-í ñáyiú. <sup>4</sup> Te tutú-a cādúha-í cuèndá daquixi-í ndaha yóhó té Titú, téé ní sanu ichi ndisa-í ichi Xítoho Jesucristú, chí <sup>iii</sup> ní tnúhu sándáá iní-ó. Te xicá<sup>n</sup> tǎhú-í núú Tátá-ó Dütú Ndióxi sá ío na chindee chitúu ñaha-gǎ xii-n, te diu-ní-gá ná cada te ío váha cuu iní-n cündecu-n. Te xicá<sup>n</sup> tǎhú tūcu-í núú Xítoho Jesucristú Yáá dácácu nihnu ñaha xii-o núú ùhú núú ndáhú sá díú-ní duca<sup>n</sup> na cada ñaha-gá xii-n.

*Chiu<sup>n</sup> quide té Titú distritú Crétá*

<sup>5</sup> Te yúhú ní dándóo ñaha-í xii-n distritú Crétá, chí cuini-í cada-n nchaa chiu<sup>n</sup> cumání, te cuini-í taxi ndecu-n cuè téé quindaha ñaha xii cue ñáyiú sándáá iní tnúhu Yá Ndióxi xíndecu <sup>iiii</sup> ní ñúú yíndéhu distritú-án, te cada-n nácuáa ní cachí-í cada-n. <sup>6</sup> Te cue téé cada chiu<sup>n</sup>-án xíní ñúhu-xi cuu-güedé mee-ni cuè téé ío váha quide ndáá nácuáa vá yóo cāhá<sup>n</sup> dóho-güedé, te na cū-güedé cue téé ndecu <sup>ii</sup> díi-ní ñadhí-xi. Te duca<sup>n</sup> nchaa landú-güedé ná cū-güexi landú sándáá iní ñahá xii Yá Ndióxi cuèndá sá vá yóo cu-atnuñaha xii-güexi queshá-yu sá ío sáá iní-güexi te quide-güexi nándu sá ñá túú tǎhú-güexi cada-güexi. <sup>7</sup> Chí xini ñúhu-xi sá ncháá cuè téé quindaha ñaha xii ñáyiú sándáá iní tnúhu Yá Ndióxi ío cundecu yíñúhu-güedé, chí duca<sup>n</sup> tǎhú-xi cada nchaa cue téé quide chiu<sup>n</sup> Yá Ndióxi, te xini ñúhu tucu-xi sá vá cúú-güedé cue téé ñí iní-xi, te ní vá cúú-güedé cue téé líhli iní-xi, te ní vá cúú-güedé cue téé quihu, te ní vá cúú-güedé cue téé plétú, te ní vá cúú-güedé

cue téé dicó-ni duca<sup>n</sup> níhí díhú<sup>n</sup>. <sup>8</sup> Te xini ñúhu-xi cuu-güedé cue téé sáñaha núu vehe ndetátú cue ñáyiú ñúhu ichi, cue téé quide váha sá cúú-xi tnàha ñáyiú-xi, cue téé ío váha cūtnuní iní-xi nácuáa cada cundecu ñuyíú-a, cue téé quide ndáá xíndecu, cue téé quide nchaa nácuáa ndúu vétú iní Yá Ndióxi, cue téé xito mee-xi ñá túú quide cutexínu. <sup>9</sup> Te na cū-güedé cue téé ío váha sándáá iní tnúhu váha tnúhu Yá Ndióxi sá ní dānehé ñahá-í xii-ndo cuèndá duca<sup>n</sup> te cue téé-án ndacu-güedé cāhá<sup>n</sup>-güedé dóho ñáyiú cuèndá cādá-yu nchaa nácuáa cāhá<sup>n</sup> Yá Ndióxi, te níhí-güedé tnúhu cāhá<sup>n</sup> váha-güedé núu nchaa ñáyiú dàquee tǎhú tnúhu Yá Ndióxi, te mee-ni cuè téé duca<sup>n</sup> quide váha taxi ndecu-n quindaha-güedé ñáyiú sándáá iní tnúhu-gá.

<sup>10</sup> Te na cāchí tnúhu-í xii-n sá vái ñáyiú sáá iní-xi ío, te cāhá<sup>n</sup>-yu mee-ni tnúhu sá ñá túú nándíhí, te dándahú-yu tnàhá ñáyiú-yu, te ñáyiú isráel ío-gá vái-yu duca<sup>n</sup> xíquide. <sup>11</sup> Te nchaa ñáyiú duca<sup>n</sup> xíquide xini ñúhu-xi nducu-o tnúhu cūñaha-o xii-yu cuèndá cadí-yu yuhú-yu, chí dānehé-yu dava-gá ñáyiú <sup>ii</sup> sá ñá túú tǎhú-yu dácúahá-yu, te duca<sup>n</sup> quide-yu cuèndá-ni sá níhí-yu díhú<sup>n</sup>, te ío titní xichi ní cuu dándahú-yu nchaa ñáyiú xíndecu <sup>iii</sup> ní vèhe.

<sup>12</sup> Te ní cachí <sup>ii</sup> téé ío váha sáá díquí-xi ndecu mei ñúú distritú Crétá sá ncháá ñáyiú ñúú-dé-án ío ndèhndé-yu, te ío cuinha iní-yu, te ío vái xexí-yu, te cūhndú-yu. <sup>13</sup> Te ndáá ní cāhá<sup>n</sup>-dé chí duca<sup>n</sup> quide-yu, te xiá<sup>n</sup> ío cāhá<sup>n</sup>-n dóho-yu cuèndá sá ná quindáá váha iní-yu tnúhu Yá Ndióxi. <sup>14</sup> Te cūñaha-n xii-yu sá vá cādá cuèndá-yu nchaa tnúhu ndehnde cāhá<sup>n</sup> ñáyiú isráel, te ní vá cādá cuèndá-yu nchaa tnúhu cāhá<sup>n</sup> ñáyiú ñá túú cuini quindáá iní tnúhu Yá Ndióxi.

<sup>15</sup> Te nchaa sá ní cadúha Yá Ndióxi ío ñuyíú-a cū-xi mee nine-ni sá váha sá cúú-xi nchaa ñáyiú sa ní nduu ndoo ní nduu nine iní-xi ndecu ichi Yá Ndióxi. Dico nchaa sá ní cadúha-gá ñá túú cū-xi sá váha sá cúú-xi nchaa ñáyiú ndecu ichi cuehé ichi duha, chí ñá túú sándáá iní-yu tnúhu-gá, chí mee-ni sá cuèhé sá dúhá ñúhu iní-yu, te ñá túú quide cuèndá-yu núu quide váha-yu ádi ñá túú quide váha-yu ndécú-yu. <sup>16</sup> Te cāchí-yu sá sándáá iní-yu Yá Ndióxi, dico nchaa sá quide-yu-án cāchí tnúni-xi sá ñá ndáá. Te Yá Ndióxi chí duu<sup>n</sup> duu<sup>n</sup> ñá túú tnàhá iní-gá nchaa nácuáa quide-yu, chí ío sáá iní-yu, te ñá túú quide-yu ní <sup>ii</sup> sá váha.

## 2

*Tnúhu váha tnúhu Yá Ndióxi*

<sup>1</sup> Te yóhó órè dānehé-n ñáyiú, te dānehé-n-yu mee-ni nácuáa cāhá<sup>n</sup> tnúhu

váha tnúhu Yá Ndióxi. <sup>2</sup> Te nchaa cue tée cùu sacuéhé ná càda cuendá-güedé vá cáda cùtexínu-güedé cundecu-güedé, te na cùndecu yiñuhu-güedé, te na cuáha váha-güedé cuendá nàcuáa cada-güedé cundecu-güedé, te na quindáa váha ini-güedé Yá Ndióxi, te na càda ini-güedé tnàha ñáyi-güedé, te na cùnduu cahnu ini-güedé cuéi nándi sá ná yáha-güedé. <sup>3</sup> Te vitna cáhá<sup>n</sup> tucu-í sá cúu-xí ncháa ñáyi dihi ñáyi cùu sacuéhé sá ná cùndecu yiñuhu-yu, te vá cúu-yu ñáyi yiti yùhu-xi, te ni vá cúu-yu ñáyi quihu, te na dànehé-yu nchaa dava-gá ñáyi cada váha-yu. <sup>4</sup> Te na dásahú-yu nchaa ñáyi dihi ñáyi cuechi cuendá ná cùu ini-yu yí-yu, ndihi cue landú-yu, <sup>5</sup> ndihi cuendá sá ná càni váha ini-yu nàcuáa cundecu-yu, ndihi cuendá sá vá càni ini-yu cada-yu ni ì<sup>n</sup> sá cuèhé sá dúhá, ndihi cuendá sá ná càda-yu nchaa chi<sup>n</sup> ñuhu vehé-yu, ndihi cuendá sá cáda váha-yu nchaa tnàha ñáyi-yu, ndihi cuendá sá ná càda-yu nchaa nàcuáa cáhá<sup>n</sup> yí-yu, te duca<sup>n</sup> xini ñuhu-xi cada-yu cuendá sá vá yóo cáhá<sup>n</sup> cuèhé cuendá tnúhu Yá Ndióxi. Duha cùñaha-n xii cue ñáyi dihi ñáyi cùu sacuéhé cuendá duca<sup>n</sup> dásahú-yu nchaa ñáyi dihi ñáyi cuechi.

<sup>6</sup> Te yóhó cáhá<sup>n</sup>-n dõho nchaa cue tée cuechi cuendá sá ná càni váha ini-güedé nàcuáa cundecu-güedé, <sup>7</sup> te cada-n mée-ni sá váha cuendá duca<sup>n</sup> càncicú<sup>n</sup> nihnu-güedé cada-güedé, te òré danèhé-n-güedé te ío váha cuu ini-n dànehé-n-güedé, te ndihi tnúhu yiñuhu cáhá<sup>n</sup> ndihi-n-güedé. <sup>8</sup> Te cáhá<sup>n</sup>-n mée-ni tnúhu váha, te duca<sup>n</sup> te vá yóo ì<sup>n</sup> cáhá<sup>n</sup> cuèhé cuendá tnúhu cáhá<sup>n</sup>-n, te nchaa ñáyi cùu úhú ini ñáhá-xi-o cucaha<sup>n</sup> núu-yu, te vá nihí-yu tnúhu cáhá<sup>n</sup> cuèhé-yu cuendá-ó.

<sup>9</sup> Te ío cáhá<sup>n</sup>-n dõho nchaa cue tée xinu cuechi sá ná quindáa ini-güedé cada-güedé nchaa chi<sup>n</sup> tahu patróo<sup>n</sup>-güedé nàcuáa cudü-güedé núu cuè tée-á<sup>n</sup>, te vá cáhá<sup>n</sup> sáa ini-güedé. <sup>10</sup> Te vá càni ini-güedé duhu-güedé, te cada ndáa-güedé cuendá sá ñá túu ná caní ini ñáhá cuè patróo<sup>n</sup>-güedé, te duca<sup>n</sup> te cutnùni ini ñáyi sá tnúhu Yá Ndióxi ío váha dànehé ñáhá-xi nàcuáa cada-o cùndecu-o, te diu-gá cúu-gá Yaa dácäcu nihnu ñaha xii-o núu ùhú núu ndàhú.

<sup>11</sup> Te nchoo ní cutnùni ini-ó sá Yá Ndióxi ío cundahú ini-gá nchaa nchoo ñáyi ndecu ñuyú-a, te ní taxi-gá tnúhu ndee ini sá nánihí tãhú nchaandi túhú ñáyi te núu na quindáa ini ñáhá-yu xii-gá. <sup>12</sup> Te ní cachí-gá sá dáñá-ó ncháa ichi cuèhé ichi duha chi ñá tnàhá ini-gá cundecu-o ichi-á<sup>n</sup>, te vá ío cuhu<sup>n</sup> ini-ó ncháa sá ío ñuyú-a, te ní cachí tucu-gá sá ío caní ini-ó nàcuáa cundecu-o vitna ndecu-o ñuyú-a te cada ndáa-ó cùndecu-o cuendá nduu vétú ini-gá. <sup>13</sup> Te

cundetu-o sáa nduu càhnu vihi, nduu quixi tucu Xitohó Jesucristú Yaa cúu Ndióxi-ó, te diu-gá ní dácäcu nihnu ñaha-gá xii-o núu ùhú núu ndàhú. Te nduu-á<sup>n</sup> ío cudí ini-ó. <sup>14</sup> Te mee-gá ní xihí-gá chi duca<sup>n</sup> ní cuini-gá cunduu, te duca<sup>n</sup> ní quide-gá cuendá nchoo vá cùndecu-gá-ó ichi cuèhé ichi duha, te nduu ndoo nduu nine ini-ó, te duca<sup>n</sup> te cuu-o cuè ñáyi quindaha-gá, te ní yùhu ni ini-ó cada-o mee-ni sá váha.

<sup>15</sup> Te nchaa tnúhu-á<sup>n</sup> danèhé-n-yu te cùñaha-n xii-yu nàcuáa cada-yu, te cáhá<sup>n</sup>-n dõho-yu te núu ñá túu quide ndáa-yu. Te cada-n sá cúu-n ì<sup>n</sup> tée xinu cuechi núu Yá Ndióxi, te vá dáñá-n mée-n daquee thú ñáhá ñáyi xii-n.

### 3

*Nchaa sá tàu ñáyi ndecu ichi Yá Ndióxi cada-yu*

<sup>1</sup> Te cùñaha-n xii-yu sá ná quindáa ini-yu cada-yu nchaa nàcuáa cáhá<sup>n</sup> nchaa cue tée cùchiu<sup>n</sup>, te tàu-yu chindee ñáhá-yu xii-güedé nchaa chi<sup>n</sup> váha quide-güedé. <sup>2</sup> Te vá cáhá<sup>n</sup> cuèhé-yu cuendá ñáyi, te vá cùnduu pletú-yu, te na cùu-yu ñáyi ndàhú ini-xi, te na cundahú ini-yu nchaa tnàha ñáyi-yu.

<sup>3</sup> Te tnàhá-ó ní xóo cada-o dàtná quidé ñáyi-á<sup>n</sup> vitna, chi ío ní dîquí-ó chi ñá teci tnùni-ó nàcuáa cáhá<sup>n</sup> tnúhu Yá Ndióxi ní cùu, te ío ní xinduu sáa ini-ó núu-gá, te ní xindecu-o ì<sup>n</sup> ichi sá ñá túu tàu-ó cundecu-o ní cuu, te nándi sá cuèhé sá dúhá ío ñuyú-a ní xóo cudí ini-ó ní xóo cada-o chi ní xóo taxi tnùni ñáhá-xi-xi-o, te ní xóo cada cuèhé ní xóo cada duha-o ní cùu, te ní xindecu-o ichi cuedú ini, te cuendá nchaa sá ní xóo cada-o-á<sup>n</sup> xiá<sup>n</sup> ío ní xóo cuu ùhú ini ñáhá ñáyi xii-o, te duca<sup>n</sup>-ni nchòo tucu ní xóo cuu ùhú ini-ó-yu. <sup>4</sup> Te Yá Ndióxi Yaa ní dácäcu nihnu ñaha xii-o núu ùhú núu ndàhú ní dándixí túu-gá ini-ó nàcuáa cutnùni ini-ó sá ío váha ini-gá, te cùu ini ñáhá-gá xii nchaa nchoo ñáyi ndecu ñuyú-a. <sup>5</sup> Te Yá Ndióxi ní dácäcu nihnu ñaha-gá xii-o núu ùhú núu ndàhú, dico ñá díu cuendá ì<sup>n</sup> sá váha quide-o ndecu-o ñuyú-a duca<sup>n</sup> ní quide-gá, chi mee-gá duca<sup>n</sup> tnàhí ní cundahú ini ñáhá-gá xii-o. Te ní nduu ndoo ní nduu nine ini-ó, te ní cuu-o dàtná ì<sup>n</sup> ñáyi saa, chi Espiritú Yá Ndióxi duca<sup>n</sup> ní quide ñaha-xi-xi-o. <sup>6</sup> Te Espiritú-gá ní taxi-gá ní yùhu ni ini-gá ndécú ndihi-o, te duca<sup>n</sup> ní quide-gá chi ní sándáa ini-ó Xitohó Jesucristú Yaa ní dácäcu nihnu ñaha xii-o núu ùhú núu ndàhú. <sup>7</sup> Te ío cundahú ini ñáhá-gá xii-o núu sa ní quide ndáa-gá cuèchi-o te ní cuu-o dèhe-gá, núu xiá<sup>n</sup> vitna ndetu-ná-ó sáa nduu nduu tãhú-ó cundecu-o ndihi-gá ní caa ní quihí<sup>n</sup>.



<sup>8</sup> Te tnúhu ní cáhá<sup>n</sup>-í-a cùu-xi tnúhu ndáá cuítì, te cuíní-í sá nì yuhu nì iní-n cáhá<sup>n</sup>-n tnúhu-gá núŷ-yu cuëndá sá ncháá ñáŷiu sàndáá iní ñáhá xii Yá Ndiòxí nducu ndéé-yu cadá-yu mee-ni sá vâha, te tnúhu-á<sup>n</sup> cúú-xí mèe-ni tnúhu vâha, te ío vâha sá cúú-xí-yu. <sup>9</sup> Te vá cadá cuëndá-n ncháa tnúhu sá ñà túú nândíhi xitnáha ñáŷiu, te vá cadá cuëndá-n ñáŷiu nándi cáhá<sup>n</sup> cuëndá nchaá sá nì xóo cada cue ñáŷiu ní xindecu ndéé sanaha, te vá cadá cuëndá-n ncháa tnúhu xitnáha ñáŷiu xicuéhé tnáhá cuëndá tnúhu ní chídó tnùní ndíi Moisés, chí nchaá tnúhu xitnáhá-yu-á<sup>n</sup> ñà túú tnàhí nandíhi-xi, te dàcuíta ñaha-xi xii-o.

<sup>10</sup> Te núu ío ñáŷiu ní ngúita-yu nándi tnúhu cáhá<sup>n</sup>-yu cuëndá sá vâ cúú ì<sup>n</sup>nuu cue ñáŷiu ndècu ichi Yá Ndiòxí ñá, te ñáŷiu-á<sup>n</sup> cáhá<sup>n</sup> sàhú-n dôho-yu ì<sup>n</sup> úú xito, te núu vá tníŷ-yu tnúhu cáhá<sup>n</sup>-n ñá, te vá ñihí tnáhá-gá-n ndíhí-yu. <sup>11</sup> Te duca<sup>n</sup> càda-n, chí ñáŷiu-á<sup>n</sup> duu<sup>n</sup> duu<sup>n</sup> ñá túú-gá cuíní-yu cadá-yu sá vâha, chí mee-ná sá cuéhé sá dúhá tnáhá iní-yu cadá-yu, te cùtmuní iní méé-yu sá ñà túú quide ndáá-yu, te sáá nduu te nacháhu-yu nchaá sá quidé-yu.

*Nàcuáa cada té Titú*

<sup>12</sup> Te cuíní-í tendaha-í té Àrtemás quixi-dé núu ndécú-n àdi té Tiquicú, te òré ná quèxio ndéda-ni càa ì<sup>n</sup> cue tée-a núu ndécú-n, te ío nducu ndèe-n quíhí<sup>n</sup>-n ñúú Nicópolis núu quíhí<sup>n</sup>-í cundecu-í, chí yàcá<sup>n</sup> cuíní-í quíhí<sup>n</sup>-í cundecu-í yóo quidé víxi<sup>n</sup>-xi. <sup>13</sup> Te ío cuáñaha-n ncháa sá xíní ñùhu té Zénás tée ío vâha xíní nchaá nàcuáa cáhá<sup>n</sup> lèi, ndíhi té Àpolós cuëndá sá ñà túú nà cumání xii-güedé ichi. <sup>14</sup> Te cuíní-í sá ncháá ñáŷiu ndècu ndíhi-o ichi Yá Ndiòxí cada vâha-yu, te cuáñahá-yu ì<sup>n</sup> sá xíní ñùhu ñáŷiu, te ío vâha chiú<sup>n</sup> cadá-yu te núu duca<sup>n</sup> na cadá-yu.

*Tnúhu ndéé núu ní ndíhi-ná*

<sup>15</sup> Te vitna ío cada ndee iní-n càchí nchaá ñáŷiu ndècu ndíhi-í iha, te cúñaha-n sá ío na càda ndee iní nchaá ñáŷiu cùu iní ñáhá xii-o, ñáŷiu sàndáá iní ñáhá xii Yá Ndiòxí. Te Yá Ndiòxí ío na chindee chitúu ñaha-gá xii-ndo ncháa-ndo. Te duca<sup>n</sup> na cùnduu. Te ío chí cadá ndèe iní-ná vitna.

## TUTÚ NÍ CADÚHA TÉ PĀBLÚ QUIHI<sup>n</sup> NDAHA TÉ FILEMÓN

*Té Pāblú cādúha-dé tutú quihi<sup>n</sup> ndaha té  
Filèmón*

<sup>1</sup> Te yúhú té Pāblú tée yihi vecaá sá cuendá Xítoho Jesucristú cādúha-í ì<sup>n</sup> tutú ndihi té Timutèu cuendá daquixi-í ndaha yòhó té Filèmón, te ío cùu iní ñàhà-í xii-n chí tñàhá-n quide-n chiú<sup>n</sup> Yá Ndióxi. Te tutú-a tëndaha-í quixi ndaha-n <sup>2</sup> ndihi ndaha ñaha nàni Apiá ñaha ndècu ndihi-o ichi Xítoho Jesucristú, ndihi ndaha té Àrquipú, chí tñàhá-dé quidé-dé chiú<sup>n</sup> Yá Ndióxi, ndihi ndaha nchaa ñāyiu tàcá vehe-n dācuahá-yu tñúhu-gá. <sup>3</sup> Te xicá<sup>n</sup> tǎhú-í núú Tǎtá-ó Dútú Ndióxi ndihi núú Xítoho Jesucristú sá ío na chindee chítúu ñaha-gǎ xii-ndo, te duca<sup>n</sup> ndí nduú-gá ná cádá te ío váha cuu iní-ndó cūndecu-ndo.

*Té Filèmón ío sándáá iní-dé Xítoho Jesucristú te cùu iní-dé tñaha ñāyiu-dé*

<sup>4</sup> Te ndi tñahá òré cǎhá<sup>n</sup> ndihi-í Yá Ndióxi cuendá-n ndacá<sup>n</sup> tǎhú-í núú-gǎ. <sup>5</sup> Chi ñihí-í tñúhu sá ío sándáá iní-n Xítoho Jesucristú, te cùu iní-n cuè ñāyiu ndècu ichi-gǎ. <sup>6</sup> Te xicá<sup>n</sup> tǎhú-í núú Yá Ndióxi sá dátǎná-ni sándáá iní-n-gǎ duca<sup>n</sup>-ni dānehé-n ñāyiu cuendá duca<sup>n</sup> ngūnu ichi-yu tñahá-yu, te cutnūní iní-yu nācuáa ndūu nchaa sá váha tàxi Xítoho Jesucristú xii-o, te tñahá-yu nduu tǎhú-yu nchaa sá váha-ǎn. <sup>7</sup> Te yòhó té Filèmón cùu-n tée ndècu ndihi-í ichi Xítoho Jesucristú cǎchí tñúhu-í xii-n sá ío cūdíí iní-í cuendá sá ío váha quide-n ndecu-n, chí cùu iní-n nchaa ñāyiu ndècu ichi Yá Ndióxi, te uu<sup>n</sup>-gǎ ñihí ndéé-í sá dúcá<sup>n</sup> quide-n, te diu-n ío sǎhǎ-n-yu tñúhu ndee iní ndécú ndihi-yu.

*Té Pāblú chindee tñúhu-dé té Onésimú*

<sup>8</sup> Te yúhú té Pāblú ní taxi Xítoho Jesucristú tñúhu ndee iní ndécú ndihi-í sá táxi tñuní ñàhà-í xii-n te tahu-í chiú<sup>n</sup> cada-n, dico vá táxi tñuní ñàhà-í xii-n, <sup>9</sup> chí váha-gǎ sá cǎhá<sup>n</sup> ndàhú-í núú-n sá cǎdá-n nchaa nacuáa cǎhá<sup>n</sup>-í chí ío cùu iní ñàhà-í xii-n. Chí yúhú sá ta yì-í cuáhá, te yihi-í vecaá cuendá sá cǎhá<sup>n</sup>-í tñúhu Xítoho Jesucristú. <sup>10</sup> Te cǎhá<sup>n</sup> ndàhú-í núú-n sá ñà túú ná caní iní-n cuendá té Onésimú, chí ní cuu-dé vitna dátǎná ì<sup>n</sup> déhe-í, chí ní sándáá iní-dé tñúhu Yá Ndióxi ní xǎhá<sup>n</sup>-í xii-dé vitna yihi-í vecaá.

<sup>11</sup> Te ñaha-n sá cūtnàhá ní xindecu ndihi-n-dé ñá túú ní quide ndáá-dé, dico vitna ío váha quide-dé ndécú ndihi-í-dé, te diu-ni duca<sup>n</sup> cǎda-dé òré cūndecu ndihi tucu-n-dé. <sup>12</sup> Te vitna tendaha-í-dé ndixi-dé

cūndecu tucu-n ndihi-dé, te òré quehe<sup>n</sup> cuendá-n-dé, te cada iní-n sá yúhú ní quehe<sup>n</sup> cuendá-n. <sup>13</sup> Te vitna yihi-í vecaá sá cuendá tñúhu Xítoho Jesucristú, te cuiní-í ngani-í-dé cunu cuechi-dé núu-í cuendá cada-dé núu-n ní cùu. <sup>14</sup> Dico ñá túú ní ngani-í-dé, chí vátá ndátnúhu ndihi ñaha-gǎ-í xii-n núu nása cachí-n cūnduu. Te ñá cūndée iní-í cada yica-í cada-n ì<sup>n</sup> sá váha sá cùu-xi-í, chí cuiní-í sá mée-n cǎni iní-n núu cuu àdi sá vá cùu. <sup>15</sup> Te ní cūnduu ní quee té Onésimú vehe-n, te cudana te mee Yá Ndióxi duca<sup>n</sup> ní cachí-gǎ cūnduu cuendá dacuàha-dé cada váha-dé. Te ndixi tucu-dé cūndecu ndihi duca<sup>n</sup>-nǎ-n-dé. <sup>16</sup> Te vá cùu-gǎ-dé dátǎná ì<sup>n</sup> tée xinu cuechi chí ní cuu-dé dátǎná ì<sup>n</sup> ñani-ó chí ní sándáá iní-dé Yá Ndióxi, te yúhú ío cùu iní-í-dé, dico yòhó uu<sup>n</sup>-gǎ cuu iní-n-dé, chí cùu-dé ì<sup>n</sup> tñaha ñāyiu-o, te ndècu-dé ichi Yá Ndióxi.

<sup>17</sup> Te ì<sup>n</sup>-ni cùu-o ndecu-o ichi Yá Ndióxi núu xǎ<sup>n</sup> cǎhá<sup>n</sup> ndàhú-í núu-n sá quéhé<sup>n</sup> cuendá-n-dé dátǎná quéhé<sup>n</sup> cuendá-n yúhú òré quéxio-í vehe-n. <sup>18</sup> Te núu ío ì<sup>n</sup> sá ní cumáni-dé núu-n ñà túú ní quide ndáá-dé cūtnàhá ní xindecu-n ndihi-dé, àdi ío ì<sup>n</sup> sá tǎu-dé te vá ndacá<sup>n</sup> cuendá-n núu-dé, chí yúhú ndacá<sup>n</sup> cuendá-n núu-í. <sup>19</sup> Te ndaha mee yúhú té Pāblú cādúha-í tutú-a cǎchí tñúhu-í xii-n sá ná chǎhu-í nchaa sá ní quide-dé. Dico dandacu saú iní-n sá yúhú ní sanu ichi ñaha-í xii-n ichi Xítoho Jesucristú. <sup>20</sup> Dico yòhó tée ndècu ndihi-í ichi Xítoho Jesucristú cada ndee iní-n cǎda-n tñúhu ndàhú cǎhá<sup>n</sup>-í núu-n chí ndècu-o ichi-gǎ. Te duca<sup>n</sup> cǎda-n nacuáa cuu-xi dátǎná ì<sup>n</sup> tñúhu ndee iní sá cùu-xi-í, chí ndi ndúu-ó ndècu-o ichi-gǎ.

<sup>21</sup> Te cūtnuní iní-í sá cǎdá-n nchaa nacuáa cǎhá<sup>n</sup>-í, te cūtnuní tucu iní-í sá ío-gǎ vǎi sá váha cada-n dācúúxi tñúhu ndàhú cǎhá<sup>n</sup>-í núu-n, núu xǎ<sup>n</sup> tëndaha-í tutú-a véxi ndaha-n. <sup>22</sup> Te vitna cuiní-í cada túha-n ì<sup>n</sup> vehe cūndecu-í, chí sǎni iní-í sá quíxi còto ñaha-í xii-ndo, te ndètu-í sáá nduu-ǎ<sup>n</sup> chí nchóhó xicá<sup>n</sup> tǎhú-ndó núú Yá Ndióxi cuendá-í.

*Tñúhu ndée núú ní ndihi-ná*

<sup>23</sup> Te ío cada ndee iní-n cǎchí té Ēpǎfrás tée yihi ndihi-í vecaá sá cuendá tñúhu Xítoho Jesucristú. <sup>24</sup> Te ío cada ndee iní tucu-n cǎchí té Mácú, ndihi té Arístarcú, ndihi té Dēmás, ndihi té Lúçá, chí tñahá cue tée-ǎ<sup>n</sup> quide-güedé chiú<sup>n</sup> Xítoho Jesucristú.

<sup>25</sup> Te Xítoho Jesucristú ío na chindee chítúu ñaha-gǎ xii-ndo nchaa-ndo. Te duca<sup>n</sup> na cūnduu. Te ío chí cǎdá ndée iní-ná vitna.

# TUTÚ QUIHI<sup>n</sup> NDAHA CUE ÑÁYIU HÈBREÚ

*Dútú Ndióxi ní cachí-gá sá Dêhe-gá cada núú-gá*

<sup>1</sup> Te ndéé sanaha, Yá Ndióxi ní xáha<sup>n</sup>-gá xii cue téé ní cachí iní mée-gá cada núú-gá cáhá<sup>n</sup>-güedé tnúhu-gá núú ncháa ñaní tnáhá-ó ní xindecu ndéé dàvã-án te ñiu duca<sup>n</sup> ní quide-güedé. Te titní xito duca<sup>n</sup> ní xáha<sup>n</sup>-gá xii-güedé ní cáhá<sup>n</sup>-güedé tnúhu-gá. Te ndi ñí<sup>n</sup> ndi ñí<sup>n</sup> ní xítñúhu ñaha-gá xii-güedé nãcuáa cáhá<sup>n</sup>-güedé tnúhu-gá núú-yu. <sup>2</sup> Te sátá ní cuu vai nduu ta yáha cuáhá<sup>n</sup>, te ní sáá nduu ní cachí Yá Ndióxi sá Dêhe-gá cada núú-gá cáhá<sup>n</sup> tnúhu-gá núú-ó. Te ñiu-ni mee-gá ní táuchúú<sup>n</sup> ní cadúha Dêhe-gá ñyúú ndihi nchaa sá ío, te ní cachí-gá sá ncháá cùu-xi cuendá Dêhe-gá. <sup>3</sup> Te Dêhe Yá Ndióxi ío càhnu cuu-gá dàtná càhnu cuu mee-gá, te dàtná-ni sàni iní mée-gá ñiu-ni duca<sup>n</sup> sàni iní Dêhe-gá chi tnáhá-gá cúú-gá Ndióxi, te sá cuendá tnúhu cáhá<sup>n</sup> Dêhe-gá xiã<sup>n</sup> ndécú-ní ncháa sá ío ñyúú, te duca<sup>n</sup> chi ío càhnu cuu Dêhe-gá, te ñiu-ni Dêhe-gá ní quide nãcuáa vá cündecu-gá cuéchi-o. Te sátá dúcã<sup>n</sup> te ní ngóo-gá xio cùha Tátã-gá Dútú Ndióxi Yáá ío cùnuu ndecu andü.

*Dêhe Dútú Ndióxi ío-gá cùnùu-gá dàcúúxi cué espíritu xínú cuèchi núú-gá*

<sup>4</sup> Te Dêhe Yá Ndióxi ío-gá cùnùu-gá dàcúúxi cué espíritu xínú cuèchi núú-gá, te duca<sup>n</sup> chi ní nduu táhú-gá núú Tátã-gá Dútú Ndióxi sá ío-gá cunuu-gá dàcúúxi cué espíritu-án. <sup>5</sup> Chi Yá Ndióxi ñá túú ní xáha<sup>n</sup>-gá xii ní ñí<sup>n</sup> cue espíritu xínú cuèchi núú-gá dàtná ní xáha<sup>n</sup>-gá xii Dêhe-gá, te duha ní xáha<sup>n</sup>-gá: Yòhó cúu-n Dêhe mee-í,

te duca<sup>n</sup>-ni cündecu-n núú ndécú-í. Duha ní xáha<sup>n</sup>-gá. Te ní cachí tucu Yá Ndióxi: Yúhú cúu-í Tátã Yáá-án, te mee-gá cúú-gá Dêhe-í.

Duha ní cachí-gá. <sup>6</sup> Te cútñháá ní tendaha-gá Dêhe-gá Yáá ío cùnuu ní quixi-gá ñyúú-a, te ní cachí-gá:

Táú-xi sá ncháá cué espíritu xínú cuèchi núú-í chiñuhu-xi Dêhe-í.

Duha ní cachí-gá. <sup>7</sup> Te Yá Ndióxi ní cáhá<sup>n</sup>-gá cuendá cue espíritu xínú cuèchi núú-gá, te ní cachí-gá:

Yúhú quidè-í sá ncháá cué espíritu xínú cuèchi núú-í cúú-xi dàtná táchi, te ñiu-ni cue espíritu-án quidè-í sá cúú-xi dàtná itá ñuhú.

Duha cáchi-gá. <sup>8</sup> Dico Dêhe-gá chi ñá túú túca<sup>n</sup> ní xáha<sup>n</sup>-gá, chi duha ní xáha<sup>n</sup>-gá:

Yòhó tnáhá-n cùu-n Ndióxi dàtná cúú yúhú Yáá cúú Tátã-n,

te duca<sup>n</sup>-ni tàxi tnuní-n ní caa ní quíhí<sup>n</sup>, te ío váha ndáá quidè-n tàxi tnuní-n.

<sup>9</sup> Te dàquee tíhú-n ncháa sá cuèhé sá dúhá, te cùu iní-n ncháa sá váha,

núu xiã<sup>n</sup> yúhú Yáá cúú Tátã-n ní quide-í sá ío-gá víi ío-gá váha cuu iní-n,

dàcúúxi ncháa dava-gá ñáyiu ndécu ndihi-n. Duha ní xáha<sup>n</sup>-gá xii Dêhe-gá. <sup>10</sup> Te ní xáha<sup>n</sup> tucu Yá Ndióxi xii Dêhe-gá:

Yòhó cúu-n Yáá ío cùnuu, chi ndéé cútñháá ñá túú vèdana ná ío te ní cadúha-n ñyúú ndihi andü.

<sup>11</sup> Te andü ndihi ñyúú chi naa-xi, dico yòhó chi cündecu-ni-n ní caa ní quíhí<sup>n</sup>.

Te andü ndihi ñyúú chi ndihi-xi dàtná ndíhí ñí<sup>n</sup> dóo,

<sup>12</sup> te dàtná cùní-n quide ñáyiu ndihi ñí<sup>n</sup> dóo òré ndacã<sup>n</sup> tnáhnú-yu tàxi ndecu-yu ñí<sup>n</sup> xio, duca<sup>n</sup> càda-n ñyúú ndihi andü, te dàtná nádãma dóo ñáyiu duca<sup>n</sup> càda tucu-n ñyúú ndihi andü.

Te yòhó dàtná-ni càa-n ndecu-n vitna duca<sup>n</sup>-ni cünduu-n cündecu-n ní caa ní quíhí<sup>n</sup>, chi vá yí<sup>n</sup> tnáhí-n.

Duha ní xáha<sup>n</sup> Yá Ndióxi xii Dêhe-gá. <sup>13</sup> Te Yá Ndióxi ñá túú ní xáha<sup>n</sup>-gá xii ní ñí<sup>n</sup> cue espíritu xínú cuèchi núú-gá dàtná ní xáha<sup>n</sup>-gá xii Dêhe-gá, te duha ní xáha<sup>n</sup> tucu-gá:

Ngóo xio cùha-í taxi tnuní-n, te yúhú cada-í te nchaa sá cúú úhú iní ñáhá xii-n canehe-xi sá yíñúhu núú-n.

Duha ní xáha<sup>n</sup>-gá xii Dêhe-gá. <sup>14</sup> Te nchaa espíritu xínú cuèchi núú Yá Ndióxi mee-ni chiñú-gá quidè-xí, chi tendaha-gá cue espíritu-án cuáhá<sup>n</sup>-xi nchaa núú ndécú cué ñáyiu ní nduu táhú cündecu ndihi-gá chindee ñaha-xi xií-yu.

## 2

*Vá dáñá ndéé-ó tnúhu sá cáhá<sup>n</sup> nãcuáa naníhí tàhú-ó*

<sup>1</sup> Te sá cuendá sá ío cùnuu Xítohó Jesucristú, núu xiã<sup>n</sup> ío xíni ñuhu-xi cada cuendá-ó ncháa tnúhu cáhá<sup>n</sup>-gá sá sá ní xindedóho-o cuendá sá vá dáñá ññhu-o. <sup>2</sup> Te cue espíritu xínú cuèchi núú Yá Ndióxi ní cáhá<sup>n</sup>-xi tnúhu-gá ndéé sanaha, te tnúhu ní cáhá<sup>n</sup> cue espíritu-án cúú-xí sá ndáá cuiti. Te nchaa ñáyiu ñá túú ní cùní<sup>n</sup> tñi nchaa tnúhu ní cáhá<sup>n</sup> cue espíritu-án, te ní ñá túú ní cùní<sup>n</sup>-yu cündedóho-yu, nchaa ñáyiu-án ní nacháhu-yu nãcuáa nduu nchaa cuèchi ní quidè-yu ñí<sup>n</sup> yúu. <sup>3</sup> Te sá dúcã<sup>n</sup> ní yáha cue ñáyiu-án, xiã<sup>n</sup> cútñuní ndáá iní-ó sá vá càcu ññhu-o te núu ná ñáña ññhu-o tnúhu sá cáhá<sup>n</sup> nãcuáa naníhí tàhú-ó, tnúhu sá ío cùnuu, chi nacháhu-o te núu duca<sup>n</sup>

na càda-o. Te díhna-gá Xítoho Jesucristú ní cáhá<sup>n</sup>-gá tnúhu-á<sup>n</sup> te nchaa ñáyiú ní xíndedóho nchaa nàcuáa ndúu tnúhu-á<sup>n</sup> ní cáhá<sup>n</sup> ndáá-yu tnúhu-á<sup>n</sup> núú-ó. <sup>4</sup>Te tnàhá Yá Ndióxi cundíhi-gá nchaa ñáyiú-á<sup>n</sup> quidé-gá nàcuáa cutnùni iní-ó sá tnúhu-á<sup>n</sup> cúu-xí tnúhu ndáá, chí quide-gá titni núú sá vâ yôo tnàhi ndàcu cada te ío cùnúhu-o. Te Espiritú Yá Ndióxi quidé-xí nàcuáa nduu táhú-ó ndí dâi<sup>n</sup> núú chiú<sup>n</sup> cada-o nacuáa cuini méé-gá. Te sá dúcá<sup>n</sup> quide Yá Ndióxi nchaa xiá<sup>n</sup>, xiá<sup>n</sup> cutnùni iní-ó sá tnàhá-gá cáhá<sup>n</sup>-gá sá tnúhu-á<sup>n</sup> cúu-xí tnúhu ndáá.

*Xítoho Jesucristú ní xínduu yiqui cùnú-gá dàtná cáá yiqui cuñú nchoo cuè ñáyiú ñuyú-a*

<sup>5</sup>Te Yá Ndióxi vá táxi ndècu-gá cue espiritú xínú cuèchi núú-gá taxi tnùni-xi ñuyúú sáá sá vátá quini-gá-ó, te diu cuendá xiá<sup>n</sup> cáhá<sup>n</sup>-í. <sup>6</sup>Te núú tütú Yá Ndióxi cächí-xi:

Yòhó Dútú Ndióxi ñá túú ná cúu cuè ñáyiú ñuyúú núu ndacu iní-n-yu, àdi chin-dee-n-yu.

<sup>7</sup>Te yòhó ní cachí-n sá nchaa ñáyiú ñuyúú-a vá cùnúu-yu dàtná cùnúu cue espiritú xínú cuèchi núú-n,

dico ní cachí-n sá sáá nduu te ío cùnúu-yu tnàhá-yu, te mee-n cáhá<sup>n</sup>-n sá ío càhnu cuú-yu,

te ní cachí tucu-n sá táxi tnùni-yu nchaa sá ní cadúha-n.

<sup>8</sup>Te duca<sup>n</sup> nchàandi túhú sá ío quindàhá-yu. Duha cächí-xi núú tütú-gá. Te sá dúcá<sup>n</sup> ní cachí Yá Ndióxi sá quindàha ñáyiú ñuyúú nchaa sá ío, xiá<sup>n</sup> cutnùni sá nchàandi túhú sá ío taxi tnùni-yu, dico vátá sáá-gá nduu dùca<sup>n</sup> quini-ó càda-xi. <sup>9</sup>Te nchoo sa náha-o sá tnáá-ní ní quide Yá Ndióxi cuendá sá vá cùnúu Xítoho Jesucristú dàtná cùnúu cue espiritú xínú cuèchi núú-gá. Te duca<sup>n</sup> ní quide Yá Ndióxi chí ní cundàhú iní-gá nchaa ñáyiú ñuyúú-a, chí ní cachí-gá sá Dèhe-gá cuú cuendá nchaa-yu, te Xítoho Jesucristú ío ní ndoho-gá òré ní xihí-gá, núú xiá<sup>n</sup> ní nduu táhú-gá cùnúu vihi-gá vitna. Te mee Yá Ndióxi cächí-gá sá ío càhnu cuu Dèhe-gá.

<sup>10</sup>Te Yá Ndióxi ní cadúha-gá nchaandi túhú sá ío nàcuáa ní cachí iní méé-gá, te sá dúcá<sup>n</sup> ní quide-gá núu xiá<sup>n</sup> váha-ní sá ní cachí-gá sá Xítoho Jesucristú nàndi ndoho-gá te cuú-gá cuendá duca<sup>n</sup> ñá túú tnàhi-gá ná cùmáni-gá núú Yá Ndióxi. Te sá dúcá<sup>n</sup> ní cuu núú xiá<sup>n</sup> ní níhi Yá Ndióxi nàcuáa cada-gá càndeca-gá nchaa ñáyiú cùu déhe-gá quihí<sup>n</sup> núú ío váha càa cundecú-yu ndíhi-gá ní caa ní quihí<sup>n</sup>. Te Xítoho Jesucristú cúu-gá Yáá ní quide nàcuáa nduu táhú cue ñáyiú cundecú-yu ndíhi Yá Ndióxi. <sup>11</sup>Te Xítoho Jesucristú cúu-gá Yáá quidé ndècu yíñuhu ñáyiú núú Yá Ndióxi ñáyiú sandáá iní ñàhá xii-gá, te Xítoho Jesucristú ndíhi cue ñáyiú-á<sup>n</sup> ìi<sup>n</sup>-ní

Yáá cúu Tātá-yu ndíhi-gá, núú xiá<sup>n</sup> Xítoho Jesucristú Yáá cúu Dèhe Dútú Ndióxi ñá túú cùcaha<sup>n</sup> núú-gá cáhá<sup>n</sup>-gá sá ñàni-gá ndíhi cùha-gá cúu nchaa ñáyiú-á<sup>n</sup>. <sup>12</sup>Te quèe ndáá-xi nàcuáa cáhá<sup>n</sup>-xi núú tütú Yá Ndióxi núú cächí-xi nàcuáa ní xáha<sup>n</sup> Xítoho Jesucristú xii Tātá-gá Dútú Ndióxi, te duha ní xáha<sup>n</sup>-gá:

Cáhá<sup>n</sup> váha-í cuendá-n núú nchaa cue tée cùu datná ñani-í ndíhi núú nchaa cue ñáyiú díhi cúu dàtná cùha-í,

te cata-í ndudú chiñuhu ñaha-í xii-n núú tàcá-yu.

Duha yòdo tnuní núú tütú-gá nàcuáa ní xáha<sup>n</sup> Dèhe-gá xii-gá. <sup>13</sup>Te ingá tucu xichi núú tütú Yá Ndióxi cáhá<sup>n</sup>-xi nàcuáa ní cáhá<sup>n</sup> Xítoho Jesucristú cuendá-gá, te duha ní cachí-gá:

Yúhú nchaa-ni nduu quindáá iní-í Tātá-í Dútú Ndióxi.

Duha cächí-xi núú tütú Yá Ndióxi nàcuáa ní cáhá<sup>n</sup> Xítoho Jesucristú. Te ingá tucu xichi núú tütú Yá Ndióxi cáhá<sup>n</sup>-xi nàcuáa ní cáhá<sup>n</sup> tucu Xítoho Jesucristú, te duha ní cachí-gá:

Iha ndècu ndíhi-í nchaa ñáyiú cùu déhe Tātá-í Dútú Ndióxi, te diu-ní ñáyiú-á<sup>n</sup> ní taxi cuendá Tātá-í cuu cuendá-í.

Duha cächí-xi núú tütú-gá nàcuáa ní cáhá<sup>n</sup> Xítoho Jesucristú.

<sup>14</sup>Te sá cuendá nchaa ñáyiú cùu déhe Yá Ndióxi cúu-yu yiqui cùnú, núú xiá<sup>n</sup> duca<sup>n</sup> tnàhá Xítoho Jesucristú ní cuu-gá yiqui cùnú, te duca<sup>n</sup> ní cuu-gá yiqui cùnú cuendá cuú-gá, te sá dúcá<sup>n</sup> cuú-gá te ndacu-gá daquèe tíhú-gá sácufhná, te diu sácufhná-á<sup>n</sup> quidé-xí xihí ñáyiú. <sup>15</sup>Te duca<sup>n</sup> ní quide-gá cuendá sá cuè ñáyiú ñuyúú-a vá yùhú-gá-yu sá cùu-yu, chí nchaa-ni nduu yùhú-yu sá cùu-yu. <sup>16</sup>Te na cächí tnúhu ndáá-í sá Xítoho Jesucristú ní quixi-gá cuendá chindee-gá cue ñáyiú cùu ñani tnàhá ndí Abrahám, te ñá díú cuendá sá chindèe-gá cue espiritú xínú cuèchi núú Yá Ndióxi. <sup>17</sup>Te cuendá xiá<sup>n</sup> núu dai ní xini ñuhu-xi sá cúu-gá ñáyiú cuendá yáha-gá nàndi sá yáha-gá dàtná yáha cue ñáyiú cùu ndi mee-gá cuendá duca<sup>n</sup> cùu-gá dútú ío cùnúu te cuu ndáá-gá núú Yá Ndióxi, te cundàhú iní-gá nchaa ñáyiú te cuú-gá cuendá sá vá cundècu-gá cuèchi-yu núú Yá Ndióxi. <sup>18</sup>Te mei òré ndóhó Xítoho Jesucristú ní xito ndéé ñàhá sácufhná xii-gá te núu ndisa sá vá cadá-gá ní ìi<sup>n</sup> sá ñá túú tàú-gá cada-gá, te sá dúcá<sup>n</sup> ní ndoho-gá xiá<sup>n</sup> núu ndácú-gá chindèe-gá nchaa ñáyiú duca<sup>n</sup> yáha.

### 3

*Xítoho Jesucristú ío-gá cùnúu-gá dàcúuxí ndí Moisés*

<sup>1</sup>Te nchòhó cúu-ndó ñáyiú ndècu ndíhi-í ichi Xítoho Jesucristú ñáyiú cùu cuendá Yá

Ndióxi, te tnáhá-ndó cùu-ndo ñáiyu ní cáhá<sup>n</sup> ñáhá-gá cuendá cundecu-ndo ndíhi-gá. Te yúhú cáchi tnúhu-í xii-ndo sá ío váha cada cuendá-ndó nàcuáa nduu cuendá Xítohó Jesucristú, chí diu-gá cúu-gá Yáa ní tendaha ñaha Dútú Ndióxi ní quixi-gá ñuyíu-a, te diu-gá cúu-gá Dútú ío cùnno chí quide-gá núú Yá Ndióxi. Te diu-ni cuendá Xítohó Jesucristú cáhá<sup>n</sup> tnúhu sá ní sàndáa íni-ó. <sup>2</sup> Te mee Yá Ndióxi ní sáha chiú<sup>n</sup>-gá Xítohó Jesucristú, te ío ndáá quide-gá chiú<sup>n</sup>-á<sup>n</sup> sá cúu-xí Yá Ndióxi, te diu-ni duca<sup>n</sup> ní quide ndíi Moisés ní quide ndíi chiú<sup>n</sup> ní táhú Yá Ndióxi, te ío ndáa ní quide ndíi chiú<sup>n</sup>-gá sá cúu-xí ncháa ñáiyu cùu cuendá-gá, te cue ñáiyu-á<sup>n</sup> cúu-yu dátá vehe mee-gá. <sup>3</sup> Te ñ<sup>n</sup> tée dácaa ñ<sup>n</sup> vehe váha ío cáhnu-gá cúu-dé dácúúxí vèhe dácaa-dé. Te duca<sup>n</sup> sátnahá-xí cùu Xítohó Jesucristú chí ío-gá cáhnu cuu-gá dácúúxí ndíi Moisés. <sup>4</sup> Te nchoo sá naha-o sá ncháa vèhe dacuítí ndècu cue tée ní dácáa, dico sá naha tucu-o sá Yá Ndióxi quide-gá ndécú ncháa sá ío ñuyíu-a. <sup>5</sup> Te ndíi Moisés-á<sup>n</sup> ío ndáa ní quide ndíi chiú<sup>n</sup> ní táhú Yá Ndióxi ní quide ndíi sá cúu-xí ncháa ñáiyu cùu cuendá-gá. Te sá dúcá<sup>n</sup> ní quide ndíi xiá<sup>n</sup> ní cuu ndíi ñ<sup>n</sup> tée ní xinu cuechi núú Yá Ndióxi. Te ní xáha<sup>n</sup> ndíi xii nchaa ñáiyu cùu cuendá-gá nàcuáa cáhá<sup>n</sup>-gá ndéé cuéé-gá. <sup>6</sup> Dico Xítohó Jesucristú cúu-gá Déhe mee Yá Ndióxi, te cùu-gá Yáa ío quide ndáa yíndaha-gá nchaa ñáiyu cùu cuendá Yá Ndióxi. Te tnáhá-ó cùu-o ñáiyu cùu cuendá-gá, te diu-ni duca<sup>n</sup> cùu cuendá ñáhá-gá xii-o te núu na càncicú<sup>n</sup> nihnu-ni-o càni ndáa íni-ó cuendá-gá ndéé ná sáa nduu ngúndecu-o ndíhi-gá.

*Cue ñáiyu cùu cuendá Yá Ndióxi ío váha cùu íni-yu ndécú-yu ndíhi-gá*

<sup>7</sup> Te núú tútú Yá Ndióxi yodó tnúni nàcuáa ní cáhá<sup>n</sup> Espiritú-gá, te duha ní cáchi-xi:

Te núu nchòhó ndèdóho-ndo ncháa tnúhu cáhá<sup>n</sup> Yá Ndióxi vitna,

<sup>8</sup> te vá cùnduu sáa íni-ndó dátá ní xínduu sáa íni ñáiyu ní dáquée tìhú tnúhu Yá Ndióxi, ñáiyu ní xíndecu xití yucu,

chí ñáiyu-á<sup>n</sup> ní xito ndéé-yu Yá Ndióxi núu nása cada ñaha-gá xii-yu.

Duha ní cachí Espiritú-gá. <sup>9</sup> Te càchí tucu Espiritú Yá Ndióxi nàcuáa ní cáhá<sup>n</sup> mée-gá, te duha ní cachí-gá:

Xití yucu ní xito ndéé ñáhá cuè ñani tnáhá-ndó ní xíndecu ndéé sanaha xii-í,

te duca<sup>n</sup> ní quide ñáhá-yu cuéi ní xini-yu nchaa sá ní quide-í ndí ùdico cuía ní xíndecu-yu xití yucu-á<sup>n</sup>.

<sup>10</sup> Te sá dúcá<sup>n</sup> ní quide-yu núu xiá<sup>n</sup> ní cudé<sup>n</sup>-í núu-yu,

núu xiá<sup>n</sup> ní cáhá<sup>n</sup>-í cuendá-yu, te ní cachí-í:

“Ñáiyu-a quide-ní-yu nchaa sá ñà túú tàú-yu cadá-yu te ní ñà túú cuini-yu cadá-yu nchaa nàcuáa sàni íni-í,

te ní ñà túú cuini-yu cadá-yu nàcuáa cáhá<sup>n</sup>-í”,

duha ní cáhá<sup>n</sup>-í cuendá-yu.

<sup>11</sup> Te xiá<sup>n</sup> núu ní cudé<sup>n</sup>-í núu-yu te ní xáha<sup>n</sup> ndáa-í xii-yu sá vá ndúú táhú-yu cundecu váha-yu núu ndécú-í.

Duha ní cachí Yá Ndióxi cáchi Espiritú-gá.

<sup>12</sup> Te nchòhó ñáiyu ndècu ndíhi-í ichi Xítohó Jesucristú, cáhá<sup>n</sup>-í dóho-ndo sá ío cada cuendá-ndó vá càni cuéhé íni-ndó te ngóo-ndo vá quíndáa-gá íni-ndó Yá Ndióxi te dáña-ndo ichi-gá, te diu-gá cúu-gá Yáa ndécú ncháa nduu nchaa quíú. <sup>13</sup> Te ñ<sup>n</sup> nduu ñ<sup>n</sup> nduu ío chí cuáha tnàha tnúhu ndee íni cundecu-ndo ñini ndecu-ndo ñuyíu-a cuendá sá vá xinu íni-ndó cada-ndo nándi sá cuéhé sá dúhá, te duca<sup>n</sup> te vá cúu sáa íni-ndó núú Yá Ndióxi. <sup>14</sup> Te vá dáña ndèé-ó càni ndáa íni-ó nàcuáa cada ñaha Yá Ndióxi xii-o, te dátá-í ní sàni íni-ó ndéé cùtnàh ní tuha-o ichi Yá Ndióxi, te diu-ni duca<sup>n</sup> càni íni-ó ndéé ná sáa nduu vá cùndecu-gá-ó ñuyíu-a, te núu duca<sup>n</sup> na càda-o te cùu ñ<sup>n</sup>nuu-o ndíhi Xítohó Jesucristú.

<sup>15</sup> Te duha cáhá<sup>n</sup>-xi ñ<sup>n</sup> xichi núú tútú Yá Ndióxi:

Te núu nchòhó ndèdóho-ndo nàcuáa cáhá<sup>n</sup> Yá Ndióxi vitna,

te vá cùnduu sáa íni-ndó dátá ní xínduu sáa íni cue ñáiyu ní dáquée tìhú tnúhu-gá ndéé sanaha.

Duha cáchi-xi núú tútú-gá. <sup>16</sup> Te cue ñáiyu duca<sup>n</sup> ní xínduu sáa íni-xi cùu-yu ñáiyu ní ndèñuhu ndíi Moisés nació<sup>n</sup> Ègíptú, te ñáiyu-á<sup>n</sup> ní xíndedóho-yu tnúhu ní cáhá<sup>n</sup> Yá Ndióxi te ní quide sáa íni-yu ní dáquée tìhú-yu tnúhu-gá. <sup>17</sup> Te ndí ùdico cuía ní xúhu<sup>n</sup>-yu ichi ío ní cudé<sup>n</sup> Yá Ndióxi núu-yu cuendá sá ní quide-yu nándi nchaa sá cuéhé sá dúhá, te ñáiyu-á<sup>n</sup> ní xíhi-yu xití yucu. <sup>18</sup> Te nchaa ñáiyu-á<sup>n</sup> ñà túú ní cuini-yu tñi<sup>n</sup>-yu tnúhu ní cáhá<sup>n</sup> Yá Ndióxi núu xiá<sup>n</sup> ní cáhá<sup>n</sup> ndáa-gá sá vá ndúú táhú-yu cundecu-yu núu ío váha caa ndecu-gá. <sup>19</sup> Te xiá<sup>n</sup> núu nchoo cùtnumí íni-ó sá ncháa ñáiyu-á<sup>n</sup> ñà túú ní nduu táhú-yu cundecu váha-yu núu ndécú-gá, chí ñà túú ní sàndáa íni-yu tnúhu ní cáhá<sup>n</sup>-gá.

#### 4

<sup>1</sup> Te vitna ndècu ndíhi-gá-ó tnúhu Yá Ndióxi tnúhu sá dánèhé ñáhá xii-o sá cúu cùndecu váha-o núu ndécú-gá, te tàú-xi quiyuhú íni-ó chí na cuáhá<sup>n</sup> te vá ndúú táhú-ó cùndecu váha-o núu ndécú-gá. <sup>2</sup> Te tnáhá nchoo ní ngúndecu ndíhi-o tnúhu sá cáhá<sup>n</sup> nàcuáa naníhí táhú-ó dátá ní xíndecu ndíhi cue ñáiyu ndéé sanaha, dico ñáiyu-á<sup>n</sup>

chi ñá túu vědana ni nàndíhì-xi cuèi ní xíndedóho-yu tnúhu-á<sup>n</sup> chi ñá túú ní sàndáá iní ñáhà-yu xii-gá. <sup>3</sup> Dico nchoo cùu-o ñáyiú ní sàndáá iní tnúhu Yá Ndiòxí, núu xiá<sup>n</sup> nduu táhú-ó cùndecu váha-o núú ndécú-gá, te ní quee ndáá-xi nàcuáa càhá<sup>n</sup>-gá núú tütú-gá núú càchí-xi:

Yúhú ní cudéè<sup>n</sup>-í núú-yu, te ní cáhá<sup>n</sup> ndáá-í sá vâ ndúú táhú-yu cundecu váha-yu núú ndécú-í.

Duha ní cachí-gá. Te cuu nduu táhú-yu cundecu váha-yu núú ndécú Yá Ndiòxí ní cùu, chí sa ní xínu cava nchaa chiú<sup>n</sup> ní quide-gá sá ní cadúha-gá ñuyú. <sup>4</sup> Te núú tütú Yá Ndiòxí càhá<sup>n</sup>-xi nàcuáa ní quide-gá nduu úsá, te duha càchí-xi:

Yá Ndiòxí ní quide chiú<sup>n</sup>-gá íñú nduu ní quide-gá nchaa chiú<sup>n</sup>-gá te ní ndetátú-gá nduu úsá.

Duha càchí-xi núú tütú-gá. <sup>5</sup> Te càchí tucu-xi núú tütú Yá Ndiòxí nàcuáa ní cáhá<sup>n</sup>-gá cuèndá cue ñáyiú ndéé sanaha, te duha ní cachí-gá:

Cue ñáyiú-a vá ndúú táhú-yu cundecu váha-yu núú ndécú-í ndetátú-í.

Duha ní cachí-gá. <sup>6</sup> Te ñáyiú ní xíndedóho tnúhu sá càhá<sup>n</sup> nàcuáa naníhí táhú-ó ndéé sanaha, ñá túú ní ndúú táhú-yu cundecu váha-yu núú ndécú Yá Ndiòxí ndetátú-gá, te duca<sup>n</sup> chí ñá túú ní sàndáá iní ñáhà-yu xii-gá, dico íó-gá ñáyiú nduu táhú cundecu váha núú ndécú-gá ndetátú-gá. <sup>7</sup> Te ní xica cuéhé nduu sá dúcá<sup>n</sup> ñá túú ní sàndáá iní ñáhà ñáyiú-á<sup>n</sup> xii-gá, te dàtnúni ní cáhá<sup>n</sup> ndíí Dávíi yuhu-gá nàcuáa cada-gá vitna, te diu-ni nàcuáa sa yòdo tnuní diu-ni duca<sup>n</sup> chido tnuní tucu-í nàcuáa ní cáhá<sup>n</sup> ndíi yuhu-gá, te duha ní cachí-gá:

Te núu nchóhó ndedóho-ndo tnúhu càhá<sup>n</sup>-í te vá cáda sáa iní-ndó.

Duha ní cachí-gá. <sup>8</sup> Te ndíi Jòsué ní sanu ichi ndíi ñáyiú núú quihí<sup>n</sup>-yu cundecu váha-yu, dico ñá díú cuèndá xiá<sup>n</sup> ní càhá<sup>n</sup> Yá Ndiòxí, chí cuèndá nàcuáa cada-gá vitna ní cáhá<sup>n</sup>-gá. <sup>9</sup> Núu xiá<sup>n</sup> sáa nduu ndúu táhú nchaa ñáyiú cùu cuèndá Yá Ndiòxí ngúndecu váha-yu núú ndécú-gá ndetátú-gá. <sup>10</sup> Te nchaa ñáyiú duca<sup>n</sup> na ndúu táhú cundecu váha núú ndécú Yá Ndiòxí ndetátú-gá, te tnàhá-yu ndetátú-yu cuèndá nchaa sá váha ní quidé-yu dàtná ndetátú méé-gá. <sup>11</sup> Te xini ñuhu-xi sá nchóó ío nducu ndéè-o nducu-o nàcuáa cada-o cuèndá nduu táhú-ó ngúndecu váha-o núú ndécú Yá Ndiòxí ndetátú-gá, chí na cuáhà<sup>n</sup> dava-ndo càda-ndo datná ní quide cue ñáyiú ñá túú ní sàndáá iní ñáhà xii-gá, te vá ndúú táhú-ndó cùndecu váha-ndo núú ndécú-gá te núu duca<sup>n</sup> na càda-ndo.

<sup>12</sup> Te tnúhu Yá Ndiòxí cúu-xí dàtná í<sup>n</sup> sá nchító-ó chí quide-xi nándi sá quidé-xi, te

cùu-xi datná í<sup>n</sup> sá déé<sup>n</sup> víhí-gá dàcúúxí í<sup>n</sup> yuchí sá ndéé úú xio núú-xi. Te duca<sup>n</sup> sàtnahá-xi cùu tnúhu-gá chí queé-xi iní-ó, te dàndixi túu-xi nchaandi tühú sá sání iní-ó te núu quide váha-o àdi ñá túú quide váha-o ndécú-o. <sup>13</sup> Te ni í<sup>n</sup> sá ní cadúha Yá Ndiòxí vá càni iní-ó sá ndácú-xi nguiváha-xi núú-gá, chí nchaandi tühú sá sání iní-ó ndécú túu-xi núú-gá, te diu núú Yáá-á<sup>n</sup> na càni cuèndá-ó nchàa sá quidé-ó.

#### *Xítóhó Jesucristú cúu-gá Dútú ío cùnnu*

<sup>14</sup> Te Xítóhó Jesucristú cúu-gá Dútú ío cùnnu ndecu ndíhi-o, te diu-gá cúu-gá Déhe Dútú Ndiòxí, te Yáá-á<sup>n</sup> cuàndaa-gá andiu ní nucúndecu-gá núú Yá Ndiòxí, núu xiá<sup>n</sup> tàú-xi sá cànchicú<sup>n</sup> nihnu-ni-o quíndáá iní-ó-gá. <sup>15</sup> Te mee Yáá-á<sup>n</sup> ío cùnnu-gá cúu-gá dútú-ó ndécú ndíhi-o, te ío na cùndahú iní ñáhà-gá xii-o cuèndá sá ñá nihí ndécú-ó cùndecu-o. Te duca<sup>n</sup> càda-gá chí ní yáha-gá dàtná yáha mee-o, chí nchaa sá ní yáha-gá-á<sup>n</sup> ní cuu-xi sá cáda-gá nándi nchaa sá cuéhé sá dúhá ní cùu dico ni í<sup>n</sup> ñá túú ní quide-gá. <sup>16</sup> Núu xiá<sup>n</sup> tàú-ó sá nchóó ní yuhu ní iní-ó càhá<sup>n</sup> ndíhi-o Yá Ndiòxí Yáá ío cùndahú iní ñáhà xii-o chindee ñaha-gá, te duca<sup>n</sup> càda-o te cùndahú iní ñáhà-gá chindee ñaha-gá xii-o ndéda-ni càa oré xini ñuhu-o-gá.

## 5

<sup>1</sup> Te nchaa cue dútú cùnnu núú ñáyiú isráel diu-ni ñáyiú cùu-güedé, te duca<sup>n</sup> ní ngúndecu-güedé cuèndá cada-güedé chiú<sup>n</sup> sá cúu-xí Yá Ndiòxí cuèndá-yu, chí diu cue téé-á<sup>n</sup> ní xóo nacani cuèndá-güedé núú-gá quiti ní xóo cahni-güedé ní xóo nduu táhú-gá, te duca<sup>n</sup> ní xóo cada-güedé cuèndá sá cáda càhnu iní Yá Ndiòxí güechi-yu, te duca<sup>n</sup> ní xóo nacani cuèndá tucu-güedé núú-gá nchaa dava-gá sá ní xóo nihí-güedé ní xóo nduu táhú-gá. <sup>2</sup> Te nchaa cue dútú-á<sup>n</sup> ní xóo cundee iní-güedé nchaa sá ní xóo cada nchaa ñáyiú ñá túú ní quide ndáá ñáyiú ñá túú cùtnuní iní-xi, te duca<sup>n</sup> ní xóo cada cue dútú-á<sup>n</sup> chí tnàhá-güedé ñá túú ní xóo nihí ndéé-güedé cundecu-güedé cuèndá nchaa sá ní xóo yáha-güedé. <sup>3</sup> Te sá cuèndá sá dúcá<sup>n</sup> ñá túú ní xóo nihí ndéé-güedé núu xiá<sup>n</sup> dai ní xini ñuhu-xi sá tnàhá-güedé cuáha-güedé Yá Ndiòxí sá ndúú táhú-gá cuèndá méé-güedé dàtná quidé-güedé cuèndá ñáyiú.

<sup>4</sup> Te ni í<sup>n</sup> téé vá ndácú-dé cuu-dé dútú cùnnu cuèndá-ni sá càchí iní méé-dé te núu ñá díú mee Yá Ndiòxí duca<sup>n</sup> cuiñí-gá sá cúu-dé dútú cùnnu datná ní quide-gá ndíi Àron. <sup>5</sup> Te cuèi Xítóhó Jesucristú chí ñá díú mee-gá ní quide-gá méé-gá í<sup>n</sup> dútú cùnnu nàcuáa cada nínu-gá méé-gá, chí mee Tàtá-gá Dútú Ndiòxí duca<sup>n</sup> ní cachí-gá sá

cúu-gã Dútú cúnúu, te duca<sup>n</sup> chi Yá Ndióxi ní xáha<sup>n</sup>-gã:

Yòhó cúu-n Dèhe-í,

te cuini-í sá dúhá-ní cùndecu-n núu ndécù-í. Duha ní xáha<sup>n</sup>-gã xii Xitohó Jesucristú. <sup>6</sup> Te núu tútú Yá Ndióxi yódó tnùnì nàcuáa ní xáha<sup>n</sup> tùcu-gã xii Xitohó Jesucristú, te duha ní xáha<sup>n</sup>-gã:

Yòhó cúu-n dütú cundecu ní caa ní quíhí<sup>n</sup>, te cùu-n datná ní cuu ndíi Melquisèdèc.

Duha ní xáha<sup>n</sup>-gã xii Xitohó Jesucristú. <sup>7</sup> Te cùtnàhá ní xindecu Xitohó Jesucristú ñuyíu-a te níhi ní xóo cáhá<sup>n</sup> ndihi-gã Yá Ndióxi te ní xóo cáhá<sup>n</sup> ndáhú-gã núu-gã, te ní xóo ndáhyú-gã òré duca<sup>n</sup> ní xóo cáhá<sup>n</sup> ndihi-gã Yá Ndióxi, te duca<sup>n</sup> ní quide-gã chi náha-gã sá Yá Ndióxi cúu-gã Yaá ndacu dácácu nihnu ñaha xii-gã cuendá sá vã cùu dúcá<sup>n</sup>-gã. Te Yá Ndióxi ní xindedóho-gã nchaa tnúhu ní cáhá<sup>n</sup> Xitohó Jesucristú cuendá sá ní quide-gã nchaa nàcuáa ní xáha<sup>n</sup> Yá Ndióxi cada-gã.

<sup>8</sup> Te sá cuendá nchaa sá ní ndoho Xitohó Jesucristú xiá<sup>n</sup> ní cutnúnì iní-gã cada-gã nchaa dava-gã sá vãha nàcuáa cuini méé Yá Ndióxi cada-gã. Te duca<sup>n</sup> ní cuu cuèi cùu-gã Déhe Yá Ndióxi. <sup>9</sup> Te sá dúcá<sup>n</sup> ní quide-gã nchaa nàcuáa cuini méé Yá Ndióxi, xiá<sup>n</sup> núu vitna cùu-gã Yaá dácácu nihnu nchaa ñáyuu sàndáá iní ñáhá xii-gã núu ùhú núu ndáhú. <sup>10</sup> Te mee Yá Ndióxi ní cachí-gã sá Xitohó Jesucristú cúu-gã dütú cúnúu datná ní cuunu ndíi Melquisèdèc cùtnàhá ní cuu ndíi dütú ñuyíu-a.

*Cuendá ñáyuu cuini dañu nihnu ichi Yá Ndióxi*

<sup>11</sup> Te vai-gã tnúhu ndècu cáhá<sup>n</sup>-í nàcuáa ndúu cuendá Xitohó Jesucristú, ndihi ndíi Melquisèdèc, te dicó-ni sá nchòhó ío cuèé tècú tnùnì-ndó, te yúhú ío ùhú níhí-í nàcuáa cáhá<sup>n</sup>-í nàcuáa tecú tnùnì-ndó.

<sup>12</sup> Te nchòhó sa ní cuu cuéhé nduu ndècu-ndo ichi Xitohó Jesucristú, te tàú-ndó dànehé-ndó cuè ñáyuu ndècu ichi-gã tnúhu-gã núu dicó sá cúu, dico xini ñuhu-ni-xi sá cùndècu ñáyuu danèhé ñáhá tnúhu-gã xii-ndo, tnúhu sá ní dácúháá-ndó ndéè díhna sá ñá tútú ùhú tecú tnùnì-ndó. Te sá dúcá<sup>n</sup> quide-ndo núu xiá<sup>n</sup> cúu-ndó datná cue landú vitna sàdi camá, landú vátá cúu-gã caxi ditá. <sup>13</sup> Chi nchaa ñáyuu cùu datná landú vitna sàdi, ñáyuu-á<sup>n</sup> cúu nēñuu-yu ñá tútú cùtnunì iní-yu nàcuáa cáhá<sup>n</sup> tnúhu sá cáhá<sup>n</sup> nàcuáa cada ndáá-yu cundecú-yu. <sup>14</sup> Te nchaa sá vátá cúu-gã caxi cue landú yíquí<sup>n</sup> xiá<sup>n</sup> cúu-xi cuendá cue ñáyuu sacuéhé, te xiá<sup>n</sup> cúu-xi datná tnúhu sá dácúháa ñáyuu sa ní níhí ndéè ndècu ichi-gã, ñáyuu sa ní cutnúnì váha iní-xi nándi cùu nchaa sá cuèhé sá dúhá, ndihi nándi cùu nchaa sá váha.

## 6

<sup>1</sup> Te xiá<sup>n</sup> núu vitna xini ñuhu-xi dacuaha-o dava-gã tnúhu Yá Ndióxi cuendá duca<sup>n</sup> te cuu-o ñáyuu tècú tnùnì nchaa tnúhu-gã. Te xini ñuhu-xi sá ncháá tnúhu Xitohó Jesucristú sá ní dácúháá-ó ndéè díhna vã dácúháa-gã-ó datná ní dácúháá-ó chi sa tècú tnùnì-ó. Te ñá tútú-gã xini ñuhu-xi dacuaha-o datná ní dácúháá-ó ndéè díhna nàcuáa cada-o ndixi cuèchi iní-ó cuendá nchaa sá cuèhé sá dúhá quide-o, sá tá dácúta nihnu ñaha xii-o cuáhá<sup>n</sup> ní cùu. Te duca<sup>n</sup> vã dácúháa-gã tucu-o datná ní dácúháá-ó ndéè díhna nàcuáa cada-o quindáá iní-ó Yá Ndióxi, <sup>2</sup> ndihi cuendá nàcuáa ní dácúháá-ó nàcuáa cuandute-o, ndihi cuendá nàcuáa cada-o càcá<sup>n</sup> ndodo-o ndàha-o díquí ñáyuu ní sàndáá iní ñáhá xii-gã. Te duca<sup>n</sup> ñá tútú-gã xini ñuhu tucu-xi dacuaha-o datná ní dácúháá-ó ndéè díhna cuendá nàcuáa ndoto cue ñáyuu ní xihí, ndihi cuendá nàcuáa ní dácúháá-ó sá Yá Ndióxi daquihí<sup>n</sup>-gã ñáyuu núu ùhú núu ndáhú ní caa ní quíhí<sup>n</sup>. <sup>3</sup> Te núu Yá Ndióxi ná càchí-gã, te cuita dacuáha-gã-ó nchaa dava-gã tnúhu sá cùmání quíhí<sup>n</sup>.

<sup>4</sup> Te cue ñáyuu sa tècú tnùnì tnúhu Yá Ndióxi, ñáyuu sa xini nchaa nàcuáa ndúu nchaa sá váha quide ñaha Yá Ndióxi xii-o ndihi-yu, ñáyuu sa chindee ñaha Espiritú Yá Ndióxi, <sup>5</sup> ñáyuu sa cùtnunì iní-xi sá ío váha tnúhu Yá Ndióxi, ñáyuu sa xini nàcuáa ta quide Yá Ndióxi véxi nchaa sá vã yóo tnàhí ndàcu cada, <sup>6</sup> te núu ñáyuu-á<sup>n</sup> ná ngúita tucú-yu daquèe tíhú duú<sup>n</sup>-yu tnúhu Yá Ndióxi, te vã ndácú-gã-ó ná canu ichi-ó-yu nàcuáa ndixi cuèchi iní-yu te núu duca<sup>n</sup> na càdá-yu, te sá dúcá<sup>n</sup> ná càdá-yu te tnàhá-yu cùu-yu datná cue téé ní sahni ñaha xii Xitohó Jesucristú Déhe Yá Ndióxi núu cùrúxí. Te sá dúcá<sup>n</sup> ná càdá-yu te ngóo dava-gã ñáyuu cáhá<sup>n</sup> cuèhé-yu cuendá Xitohó Jesucristú. <sup>7</sup> Te nchaa ñáyuu cùu-yu datná ñuhu, chi ñuhu-á<sup>n</sup> ndi tnàhá òré cúu<sup>n</sup> dàú te xihí-xi ndute, te dava ñuhu váha cùu sá xítú ñáyuu, te sá cúu núu ñuhu-á<sup>n</sup> ío nàndíhi-xi, te mee Yá Ndióxi quidé-gã cúu sá váha núu ñúhú-á<sup>n</sup>. <sup>8</sup> Dico núu da íñu na ndaa núu ñuhu-á<sup>n</sup> te ñá tútú vèdana nàndíhi-xi te núu duca<sup>n</sup>, te Yá Ndióxi vã cúu váha iní-gã cuendá ñuhu-á<sup>n</sup> sá dúcá<sup>n</sup> dà íñu ndaa núu-xi, te íñu-á<sup>n</sup> ndihi-xi cáyú. Te duca<sup>n</sup> sàtnahá-xi cùu ñáyuu dàquèe tíhú tnúhu Yá Ndióxi chi ñá tútú cùu váha iní-gã núu-yu.

*Níhí-ó sá ndéú-ó ndúu táhú-ó*

<sup>9</sup> Te cuèi duha cáhá<sup>n</sup>-í dico nchòhó cue ñáyuu ío cùu iní-í, chi cùtnunì ndáá iní-í sá vã càdá-ndó datná xiquide dava-gã ñáyuu, te mee-ni sá váha cuu xii-ndo chi cùu-ndo ñáyuu sa ní naníhí tàhú. <sup>10</sup> Te duca<sup>n</sup> chi Yá Ndióxi cúu-gã Yaá ío váha quide ndáá, te vã

dána ndòdo iní-gá nchaa sá v̄ha quide-ndo, te ni v̄a dána ndòdo iní-gá n̄acuáa quide-ndo cuu iní-ndó-ḡa, te sá dúcá<sup>n</sup> quide-ndo cuu iní-ndó-ḡa xiá<sup>n</sup> chindèe-ndo cue ñáyiū ndècu ndihí-ndo ichi Xitohó Jesucristú, te duca<sup>n</sup>-ni ta quide-ndo véxi ndée vitna. <sup>11</sup> Te cuiñí-í sá ñ<sup>n</sup> ndo nducu ndee-ndo cada-ndo n̄acuáa cuiñí Yá Ndióxi dátá tá quide-ndo véxi, te ñiū-ni duca<sup>n</sup> càda-ndo ndée ná sáa nduu t̄hú-ndó c̄ndecu-ndo ndihí-ḡa núū ndécú-ḡa, te duca<sup>n</sup> te níhí-ndo nch̄aandi t̄hú sá ndétú-ndó nduu t̄hú-ndó c̄ndecu ndihí-ndo ni caa ni quihí<sup>n</sup>. <sup>12</sup> Te ȳhú cuiñí-í sá nchòhó v̄a t̄húhó-ndo càda-ndo nchaa nacuaa cuiñí Yá Ndióxi, te cada-ndo dátá quide ñáyiū s̄andáa iní t̄nhu-ḡa, ñáyiū càhnu iní-xi. Te sá dúcá<sup>n</sup> quide-yu xiá<sup>n</sup> níhí-yu nchaa sá ní cachí Yá Ndióxi nduu t̄hú-yu.

<sup>13</sup> Te c̄tnháa ní xáha<sup>n</sup> Yá Ndióxi xii ndii Àbrahám n̄acuáa cada-ḡa, te ní cacunehe-ḡa méé-ḡa n̄acuáa cutn̄uní iní ndii sá ndáa cada-ḡa n̄acuáa ní xáha<sup>n</sup>-ḡa xii ndii, te v̄a ȳo ñ<sup>n</sup> ni c̄acunehe-ḡa cuendá sá quindáa iní ndii t̄nhu ní cáhã<sup>n</sup>-ḡa. Te duca<sup>n</sup> ní quide-ḡa chi ñ<sup>n</sup>di dí-ñi mee-ḡa te io c̄nūu-ḡa. <sup>14</sup> Te duha ní xáha<sup>n</sup>-ḡa xii ndii Àbrahám: “Yòhó té Àbrahám na c̄achí t̄nhu ndáa-í xii-n sá ño chindee ñaha-í xii-n, te c̄ayá cuéhé víhí ñani t̄nhá-n”, duha ní xáha<sup>n</sup>-ḡa xii ndii. <sup>15</sup> Te ndii Àbrahám io ní quide ndee iní ndii ní x̄ndetu ndii, te duca<sup>n</sup> te Yá Ndióxi ní quide-ḡa n̄acuáa ní xáha<sup>n</sup>-ḡa cada-ḡa sá cúu-xi ndii. <sup>16</sup> Te núu ñ<sup>n</sup> ñáyiū càhá<sup>n</sup> ñ<sup>n</sup> t̄nhu ndáa cuiñi te càcu nehé-yu Yá Ndióxi cuendá quindáa iní t̄nhá ñáyiū-yu t̄nhu càhá<sup>n</sup>-yu, te òré duca<sup>n</sup> na càhá<sup>n</sup>-yu te ñá t̄ú-ḡa sá d̄ac̄aa ñáyiū càhá<sup>n</sup> ndihí-yu cuendú. <sup>17</sup> Te duca<sup>n</sup> ní quide Yá Ndióxi ní cáhã<sup>n</sup> ndáa-ḡa sá c̄adã-ḡa n̄acuáa ní cachí-ḡa, te duca<sup>n</sup> ní cáhã<sup>n</sup>-ḡa cuendá nchaa ñáyiū ní cachí-ḡa nduu t̄hú sá c̄adã-ḡa n̄acuáa cutn̄uní iní-yu sá quide-ḡa ñ<sup>n</sup> sá càhá<sup>n</sup>-ḡa, te ni ñá t̄ú n̄adãma-ḡa ñ<sup>n</sup> sá càhá<sup>n</sup>-ḡa. <sup>18</sup> Te nchoo ní natuha-o Yá Ndióxi cuendá d̄ac̄acu nihnu ñaha-ḡa xii-o núu t̄hú núū ndàhú, te ní níhí-ó t̄nhu ndee iní ndécú ndihí-o cuendá sá v̄a d̄añã ndèe-ó c̄ndetu-o sáa nduu nduu t̄hú-ó c̄ndecu-o ndihí-ḡa. Te duca<sup>n</sup> ní níhí-ó t̄nhu ndee iní chi Yá Ndióxi ní cáhã<sup>n</sup> ndáa-ḡa sá c̄adã-ḡa n̄acuáa ní cachí-ḡa, te ñá t̄ú d̄andahú ñaha-ḡa, te ni ñá t̄ú n̄adãma-ḡa ñ<sup>n</sup> sá ní cachí-ḡa cada-ḡa. <sup>19</sup> Te t̄nhu ndee iní ndécú ndihí-o xiá<sup>n</sup> quide-xi c̄tnuní ndáa iní-ó sá ndúú t̄hú-ó c̄ndecu-o ndihí Yá Ndióxi núū ndécú-ḡa, te duca<sup>n</sup> c̄tnuní ndáa ndisa iní-ó sá cuendá Xitohó Jesucristú Yáa ndécú núū Yá Ndióxi. <sup>20</sup> Te duca<sup>n</sup> ní nuc̄ndecu Xitohó Jesucristú núū Yá Ndióxi cuendá duca<sup>n</sup> c̄anchicú<sup>n</sup> nihnu-o càda-o, te duca<sup>n</sup> ní nuc̄ndecu-ḡa núū Yá Ndióxi chi c̄u-ḡa d̄utú c̄nūu datná ní

cunuu ndii Melquisèdèc ñuyíú-a, te duca<sup>n</sup>-ni c̄u-ḡa d̄utú c̄nūu ni caa ni quihí<sup>n</sup>.

## 7

*Xitohó Jesucristú cúu-ḡa d̄utú dátá ní cuu ndii Melquisèdèc*

<sup>1</sup> Te ndii Melquisèdèc ní x̄ndaha ndii cue ñáyiū ñuú Sálém, te ní cuu ndii d̄utú ní xinu cuechi ndii núū D̄utú Ndióxi Yáa io c̄nūu. Te ndii Melquisèdèc-á<sup>n</sup> ní x̄icá<sup>n</sup> t̄hú ndii núū Yá Ndióxi cuendá ndii Àbrahám c̄tnháa ní s̄ahá<sup>n</sup> ndii Àbrahám-á<sup>n</sup> ní n̄aa ndii ndihí cue d̄ava-ḡa cue tée ȳndaha ñáyiū. Te cue tée-á<sup>n</sup> ñá t̄ú ní nd̄acu-ḡuedé n̄aa-ḡuedé ndihí ndii Àbrahám-á<sup>n</sup> chi ní x̄ita-ḡuedé. <sup>2</sup> Te nchaa sá ní níhí ndii Àbrahám-á<sup>n</sup> núū ní n̄aa ndii, te ní quide ndii úxi x̄ichi te ñ<sup>n</sup> x̄ichi núū úxi-á<sup>n</sup> ní s̄añaha ndii xii ndii Melquisèdèc. Te ñiū ndii Melquisèdèc-á<sup>n</sup> quée-xi: Tée io v̄aha quide ndáa ȳndaha ñaha xii ñáyiū, duha quèe-xi. Te ní x̄oo dan̄ani ñaha-yu xii ndii Tée ȳndaha ñuú Sálém, duha ní x̄oo dan̄ani ñaha-yu. Te t̄nhu Sálém-á<sup>n</sup> quée-xi: Ñuú ndécú ñahi, duha quèe-xi t̄nhu-á<sup>n</sup>. Núu xiá<sup>n</sup> quée t̄ucu-xi nacuaa n̄ani ndii Tée ȳndaha ñuú ndécú ñahi, duha quèe t̄ucu-xi ñiū ndii. <sup>3</sup> Te ñá t̄ú t̄nhu núu yoo c̄u t̄atá ndii ndihí n̄anã ndii, te ni ñá t̄ú t̄nhu núu yoo c̄u x̄i ndii ndihí x̄itná ndii, te ni ñá t̄ú t̄nhu núu n̄andi c̄u ñáyiū ní cuu ñani t̄nhá ndii ní x̄ndecu ndée sanaha-ḡa, te ni ñá t̄ú t̄nhu núu ná ama ní cacu ndii, te ni ñá t̄ú t̄nhu núu ná ama ní x̄ihí ndii. Te ndii-á<sup>n</sup> duca<sup>n</sup>-ni ní cuu ndii d̄utú ní x̄ndecu ndii, te duca<sup>n</sup> s̄atnahã-xi c̄u Xitohó Jesucristú d̄ehe Yá Ndióxi chi cuu-ḡa d̄utú ní caa ni quihí<sup>n</sup>.

<sup>4</sup> Te vitna chí cuáha v̄aha cuendá sá ndii Melquisèdèc ní cuu ndii ñ<sup>n</sup> tée io ní cuu càhnu ní x̄ndecu ñuyíú-a, chi ndii Àbrahám tée ní cuu ñani t̄nhá-ó ní x̄ndecu ndée sanaha ní quide ndii úxi x̄ichi nchaa sá ní níhí ndii núū ní n̄aa ndii. Te ñ<sup>n</sup> x̄ichi núū úxi-á<sup>n</sup> ní s̄añaha ndii xii ndii Melquisèdèc. <sup>5</sup> Te ndii Moisés ní chidó t̄n̄uní ndii n̄acuáa cada nchaa d̄utú, cue tée ní cuu ñani t̄nhá ndii Lévi sá cue tée-á<sup>n</sup> quehe<sup>n</sup>-ḡuedé ñ<sup>n</sup> x̄ichi núū úxi x̄ichi sá níhí cue ñáyiū is̄ràél ñáyiū c̄u ñani t̄nhá-ḡuedé cuu cuendá-ḡuedé. Te duca<sup>n</sup> quide-ḡuedé cuéi ñani t̄nhá-ḡuedé ndihí-yu ní cuu ndii Àbrahám. <sup>6</sup> Te cuéi ñá d̄iú ñani t̄nhá ndii Melquisèdèc cúu ndii Àbrahám dico ní quehe<sup>n</sup> ndii Melquisèdèc-á<sup>n</sup> ñ<sup>n</sup> x̄ichi núū úxi x̄ichi nchaa sá ní níhí ndii Àbrahám. Te ndii Melquisèdèc-á<sup>n</sup> ní x̄icá<sup>n</sup> t̄hú ndii núū Yá Ndióxi cuendá ndii Àbrahám. Te ñiū-ni ndii Àbrahám-á<sup>n</sup> ní xáha<sup>n</sup> Yá Ndióxi xii ndii sá c̄adã v̄aha ñaha-ḡa xii ndii. <sup>7</sup> Te sa c̄tnuní iní-ó sá núu ñ<sup>n</sup> tée na c̄acã t̄hú-dé núū Yá Ndióxi cuendá ñ<sup>n</sup>



ñáiyu, te té-á<sup>n</sup> cúnù-gá-dé. <sup>8</sup> Te cue dútú ñáiyu isráel quèhé<sup>n</sup>-güedé ì<sup>n</sup> xichi núú ùxí xichi nchaa sá ñihí-yu cùu cuendá-güedé, te cue té-á<sup>n</sup> cuú-güedé. Te núú tútú Yá Ndióxi cächí-xi sá ndii Melquisèdèc ndécú-ní ndii, te duca<sup>n</sup> càhá<sup>n</sup>-xi chí ñá túú tnúhu sá ní xihí ndii. <sup>9-10</sup> Te sá dúcá<sup>n</sup> ní sáñaha ndii Ábrahám sá ní nduu táhú ndii Melquisèdèc, te xiá<sup>n</sup> cada iní-ó sá sá ndecu ndihi ndii Ábrahám cue ñaní tnáhá ndii Lèví cue tée cùu dútú, cue tée quèhe<sup>n</sup> ì<sup>n</sup> xichi núú ùxí xichi nchaa sá ñihí ñáiyu isráel cuèi vátá cécú-gá-güedé. Te cada iní-ó sá tnáhá-güedé ní sáha-güedé ndii Melquisèdèc ì<sup>n</sup> xichi núú ùxí xichi nchaa sá ní ñihí ndii Ábrahám núú ní nàá ndii. Te duca<sup>n</sup> càda iní-ó chí cue té-á<sup>n</sup> cuú-güedé ñaní tnáhá ndii Ábrahám cuèi vátá cécú-gá-güedé dàv-á<sup>n</sup>.

<sup>11</sup> Te sá cuendá cue dútú cue tée cùu ñaní tnáhá ndii Lèví ní ngúndecu ndihi cue ñáiyu isráel tnúhu sá sánú ichi ñaha xii-yu nàcuáa cadá-yu cundecú-yu. Te ñaní tnáhá ndii Àrón cuú cue dútú-á<sup>n</sup>. Te núú dicó cue dútú-á<sup>n</sup> ní ndàcu-güedé cada-güedé nàcuáa cudùu ñáiyu isráel núú Yá Ndióxi, te ñá túú-gá xini ñuhu-xi ngúndecu ingá dútú dàtná ndii Melquisèdèc ní cuu. Te dútú-á<sup>n</sup> ñá túú ní cùu-dé dàtná ní cuu cue ñaní tnáhá ndii Àrón. <sup>12</sup> Te núú cuè dútú cue tée cùu ñaní tnáhá ndii Lèví-á<sup>n</sup> ní ngúndecu ingá dútú. Te sá dúcá<sup>n</sup> ní ngúndecu ingá dútú xiá<sup>n</sup> dacuitíí ní xini ñuhu-xi sá dàma nàcuáa ndùu tnúhu sá sánú ichi ñaha xii-yu nàcuáa cadá-yu cundecú-yu. <sup>13-14</sup> Te ñi-ni cuendá dútú-á<sup>n</sup> sa ñihí-ó tnúhu, te dútú-á<sup>n</sup> cuú Xitohó Jesucristú, te ñá díú ñaní tnáhá ndii Àrón cuú-gá chí ñaní tnáhá ndii Judá cuú-gá. Te nchaa-o tà xini ndáá-ó sá ñaní tnáhá ndii Judá cuú-gá, te ndii Moisés ñá túú tnáhá ná ní cächí ndii cuendá cue ñaní tnáhá ndii Judá sá cuú-güedé dútú, chí ní ì<sup>n</sup>-güedé ñá túú ní cùu-güedé dútú ní cuu.

<sup>15</sup> Te vitna cùtnuní ndáá iní-ó nàcuáa ní cuu, chí Xitohó Jesucristú cuú-gá ingá dútú dàtná ní cuu ndii Melquisèdèc. <sup>16</sup> Te ñá díú cuendá tnúhu sá sánú ichi ñaha xii ñáiyu nàcuáa cadá-yu cundecú-yu duca<sup>n</sup> ní cùu-gá dútú, chí ní cuu-gá dútú cuendá sá cuú-gá Yáá cundecu ní caa ní quíhí<sup>n</sup> chí vá ì<sup>n</sup> ndùu te ndihi nihnu-gá. <sup>17</sup> Te duha ní xáha<sup>n</sup> Yá Ndióxi xii-gá:

Yòhó cuú-n dütú dàtná ní cuu ndii Melquisèdèc,

te cundecu-n nchàa nduu nchaa quíu. Duha ní xáha<sup>n</sup> Yá Ndióxi xii-gá. <sup>18</sup> Te xiá<sup>n</sup> núu nchaa tnúhu ndéé díhna, tnúhu sá ní xíndecu ndihi cue dútú ñá túú-gá cúnù-xi vitna chí ñá túú-gá xini ñuhu-xi te ní ñá túú ná chíndée ñaha-xi. <sup>19</sup> Te ñi-ni tnúhu-á<sup>n</sup> cuú-xí tnúhu sá ní chídó tnùní ndii Moisés canu ichi

ñaha xii ñáiyu nàcuáa cadá-yu cundecú-yu. Te tnúhu-á<sup>n</sup> ñá túú vèdana ní quide-xi nàcuáa chindee-xi ñáiyu cudùu-yu núú Yá Ndióxi. Dico vitna ní ngúndecu ndihi-o tnúhu ndee iní sá io-gá váha dàcúxí tnúhu ndéé díhna, chí ndecu ndihi-o Xitohó Jesucristú Yáá cuú dütú-ó. Te Yáá-á<sup>n</sup> quidé-gá tnáhá tnúhu-o ndihi Yá Ndióxi vitna.

<sup>20</sup> Te Yá Ndióxi ní càhá<sup>n</sup> ndáá cuiti-gá sá Xitohó Jesucristú cuu-gá dütú. <sup>21</sup> Dico ñá túú dúcá<sup>n</sup> ní càhá<sup>n</sup>-gá cuendá cue ñaní tnáhá ndii Lèví cue tée ní cuu dútú, cuèi mei òré ní chisaha-güedé ní cuu-güedé dütú. Te cùtnáhá ní chisaha Xitohó Jesucristú cuú-gá dütú, te Yá Ndióxi ní xáha<sup>n</sup> ndáá cuiti-gá xii-gá, te duha ní xáha<sup>n</sup>-gá: Yúhú Dütú Ndióxi càhá<sup>n</sup> ndáá cuiti-í te vá dàmá-í tnúhu càhá<sup>n</sup>-í:

“Yòhó cuú-n dütú dàtná ndii Melquisèdèc, te cundecu-n ní caa ní quíhí<sup>n</sup>.”

Duha ní xáha<sup>n</sup> Yá Ndióxi xii Xitohó Jesucristú. <sup>22</sup> Te Xitohó Jesucristú quidé-gá nàcuáa cùtnuní ndáá iní-ó sá Yá Ndióxi cada-gá ingá núú sá váha sá cuú-xí-ó dàtná ní cächí-gá, te xiá<sup>n</sup> cuú-xí sá io-gá váha dàcúxí tnúhu ní càhá<sup>n</sup>-gá ndéé díhna. <sup>23</sup> Te io cuèhé cue ñaní tnáhá ndii Lèví ní cuu-güedé dütú, te duca<sup>n</sup> cuendá sá ñá túú ní cùdí-güedé cundecu-güedé chí ní ndihi-güedé ní xihí. <sup>24</sup> Dico Xitohó Jesucristú chí vá cuú-gá, chí cundecu-gá ní caa ní quíhí<sup>n</sup> núu xiá<sup>n</sup> ñi-ni-gá cuu-gá dütú, te vá yò ì<sup>n</sup>-gá cuu dütú cada núú-gá. <sup>25</sup> Te núu xiá<sup>n</sup> Xitohó Jesucristú dácacu nihnu ñaha-gá xii nchoo ñáiyu núú ùhú núú ndàhú, nchoo ñáiyu sàndáá iní ñáhá xii-gá, te ñi-ni nchoo cùu-o ñáiyu tnáhá tnúhu ndihi Yá Ndióxi, te vá ì<sup>n</sup> ndùu-gá te cùfta nihnu-o. Te duca<sup>n</sup> chí Xitohó Jesucristú ñá túú xòcuñí-gá núú Yá Ndióxi càhá<sup>n</sup> ndàhú-gá cuendá-ó.

<sup>26</sup> Te Xitohó Jesucristú cuú-gá Yáá cuú dütú cúnùu xini ñuhu-o cundecu ndihi-o, te ñi-ni-gá cuú-gá Yáá chíndee chítùu ñaha xii-o, te cùu-gá Yáá io quide ndáá núú Yá Ndióxi, te cùu-gá Yáá càndòo canine chí ñá túú tnàhí cuèchi-gá. Te ñá túú tnàhí quide-gá dàtná quidé nchaa cue ñáiyu ndecu ichi cuèhé ichi duha, te cùu-gá Yáá ní nucúndecu andiu núú ndécú Yá Ndióxi te yàcá<sup>n</sup> táxi tnùnì-gá. <sup>27</sup> Te ñá túú quide-gá dàtná ní quide cue dütú ní cunuu ní xíndecu, chí cue dütú-á<sup>n</sup> ì<sup>n</sup> nduu ì<sup>n</sup> nduu ní xóo cahni-güedé quiti ní xóo nduu táhú Yá Ndióxi, te díhna-gá cuendá nchaa cuèchi mee-güedé duca<sup>n</sup> ní xóo cada-güedé te dàtnuní duca<sup>n</sup> ní xóo cada tucu-güedé cuendá nchaa cuèchi ñáiyu. Dico Xitohó Jesucristú chí ì<sup>n</sup> xito-ni ní xihí-gá sá cuú-xí nchàa ñáiyu chí duca<sup>n</sup> ní sani iní-gá, te vá ì<sup>n</sup> ndùu-gá duca<sup>n</sup> càda tucu-gá. <sup>28</sup> Te sá cuendá nchaa tnúhu ní chídó tnùnì ndii Moisés xiá<sup>n</sup> ní xíndecu cue tée ní cuu dütú cúnùu, te cue

tée-án ní cuu-güedé cue tée yíca cuèchi-xi. Te sátá dúcá<sup>n</sup> ní chidó tnúni ndíi Moisés nàcuáa cada ñáiyu, te ní xica cuéhé víhí ndùu te dáttnúni ní cáhá<sup>n</sup> ndáá cuiti Yá Ndióxi sá Dêhe-gá cuu-gá dútú cúnúu. Te Yaa cúú Dêhe-gá-á<sup>n</sup> ní quide-gá nchaa nàcuáa tàú-xi cunduu, te ñiu-ni duca<sup>n</sup> càda-gá ni caa ni quíhí<sup>n</sup>.

## 8

### *Xitohó Jesucristú cúú-gã dútú cúnúu*

<sup>1</sup> Te Xitohó Jesucristú Yaa cúú dútú cúnúu ndecu ndíhi-o cuándaa-gá andúu, te ní ngó-gá xio cùha Dútú Ndióxi Yaa ío cúnúu, te tnáhá-gá cúnúu-gá. Te ñiu cuendá-a cùu-xi sá ío-gá cúnúu ta cáhá<sup>n</sup>-ndí véxi. <sup>2</sup> Te núú ndécú Yá Ndióxi cúú-xí núú lí víhí. Te cada iní-ó sá cúú-xí ñ<sup>n</sup> vehe te xíá<sup>n</sup> ndécú Xitohó Jesucristú cúú-gã dútú, te vehe-án ní dácáa mèe Yá Ndióxi te ñá díú cuè tée ñuyíú-a. <sup>3</sup> Te sá cuendá nchaa tnúhu ní chidó tnúni ndíi Moisés xíá<sup>n</sup> ní xíndecu cue dútú cúnúu cuendá sá cáhni-güedé quití nduu táhú Yá Ndióxi, te nacani cuendá-güedé núú-gã nchaa dava-gá sá níhi-güedé nduu táhú-gã. Te xíá<sup>n</sup> núu dai ní xini ñuhu-xi sá tnáhá Xitohó Jesucristú cuáñaha-gã ñ<sup>n</sup> sá ndúú táhú Yá Ndióxi, te táhú-án cúú-xí mèe-gá chi ní xíhi-gá ní cuu-gã dátna ñ<sup>n</sup> táhú sá cúú-xí Yá Ndióxi. <sup>4</sup> Te núu ní xíndecu-ni Xitohó Jesucristú ñuyíú-a te vá cúú-gã dútú ní cùu, chí sa ndècu cue dútú sãñaha nchaa sá ndúú táhú Yá Ndióxi dátna cáhá<sup>n</sup> nchaa tnúhu ní chidó tnúni ndíi Moisés. <sup>5</sup> Te nchaa sá quidé cue dútú ñáiyu isràél nñtnahá-xi luha nchaa sá quidé Xitohó Jesucristú Yaa cúú dútú cúnúu ndecu andúu. Te quèe ndáá-xi nàcuáa ní xáha<sup>n</sup> Yá Ndióxi xii ndíi Moisés cùtnahá tá cüyatni ngüíta ndíi dacaa ndíi vehe-gá, te duha ní xáha<sup>n</sup>-gã: “Ío váha cada cuendá-n nàcuáa dacàa-n vehe-í dátna cáá sá ní dánèhé ñàhá-í xii-n xití yucu”, duha ní xáha<sup>n</sup>-gã xii ndíi. <sup>6</sup> Dico vitna chí Xitohó Jesucristú cúú-gã dútú cúnúu, te ío-gá càhnu nduu chiú<sup>n</sup> quide-gã dàcúúxi cuè dútú cue ñáiyu isràél. Te ñiu Xitohó Jesucristú cúú-gã Yaa quidé tnáhá tnúhu-o ndíhi Yá Ndióxi, te duca<sup>n</sup> chí Yá Ndióxi ío-gá váha ndùu tnúhu ní cáhá<sup>n</sup>-gá xito cùu uú dàcúúxi tnúhu ní cáhá<sup>n</sup>-gá ndéé díhna, te duca<sup>n</sup> ío váha ndùu tnúhu ní cáhá<sup>n</sup>-gá xito cùu uú chí ní cachí-gá sá íngá núú sá ío-gá váha cada ñaha-gã xii-o vitna.

<sup>7</sup> Te núú nàcuáa ní cachí Yá Ndióxi cada ñaha-gã xii-o ndéé díhna ní quide-xi nchaa nacuáa tàú-xi cunduu nàcuáa nduu táhú-ó cùndecu váha-o núú-gã ñá, te ñá túú xini ñuhu-xi cáhá<sup>n</sup> tucu-gá sá cáda-gã íngá núú sá váha sá cúú-xí-ó vitna ní cuu. <sup>8</sup> Te Yá Ndióxi ñá túú ní cùu váha iní-gã núú ñáiyu isràél

núu xíá<sup>n</sup> ní cáhá<sup>n</sup>-gá cuendá-yu, te duha ní cachí-gã:

Yúhú cúú-í Dútú Ndióxi, te duha ndùu tnúhu na cáhá<sup>n</sup>-í: Sáá nduu te cada-í íngá núú sá váha sá cúú-xí cuè ñani tnáhá ñáiyu isràél, ndíhi cue ñani tnáhá ndíi Júdá ñiu-ni ñáiyu isràél.

<sup>9</sup> Te tnúhu sá cáhá<sup>n</sup>-í-a ñá túú ñ<sup>n</sup>-ni cuu-xi ndíhi tnúhu sá ní xáha<sup>n</sup>-í xii cue ñáiyu ní cuu ñani tnáhá-yu ní xíndecu ndéé sanaha càda-í-yu,

te ñiu-ni dàvá-á<sup>n</sup> ní quide yica-í ní ndeñuhu-í-yu nació<sup>n</sup> Egiptú,

te ñá túú ní cuini-yu tñí-yu tnúhu ní xáha<sup>n</sup>-í xii-yu cuendá duca<sup>n</sup> càda váha-í-yu,

te xíá<sup>n</sup> núu ní dáñá ñihnu-í-yu ñá túú-gã ní quide cuendá-í-yu.

<sup>10</sup> Te na sáá nduu te duha ndùu tucu íngá núú sá váha cada-í cue ñáiyu isràél.

Te yúhú cada-í nàcuáa cutnuni váha iní-yu nàcuáa cuini-í cadá-yu,

te duca<sup>n</sup> ní yuhu ni iní-yu cadá-yu.

Te yúhú Yá Ndióxi quindaha-í-yu, te mèe-yu cuú-yu ñáiyu cùu cuendá-í.

<sup>11</sup> Te dàvá-á<sup>n</sup> chí ní ñáiyu cùu ndí meé-yu,

te ní cuè dava-gã ñáiyu vá cùtnúhu tnáhá-yu sá nátúha ñahá-yu xii-í,

chí dàvá-á<sup>n</sup> nchaa ñáiyu cundecu ndíhi ñahá-yu xii-í,

cuèi ñáiyu cúnúu te cuèi ñáiyu ñá túú cúnúu.

<sup>12</sup> Te dàvá-á<sup>n</sup> cada càhnu iní-í nchaa sá cuéhé sá dúhá quidé-yu,

te vá ñ<sup>n</sup> ndùu-gã ndacu iní-í nchaa sá quidé-yu.

Duha ní cachí Yá Ndióxi cuendá ñáiyu isràél.

<sup>13</sup> Te sá dúcá<sup>n</sup> ní cáhá<sup>n</sup> Yá Ndióxi sá cáda-gã íngá núú sá váha sá cúú-xí ñáiyu xíá<sup>n</sup> cùtnúni sá tnúhu sá ní cáhá<sup>n</sup>-gá díhna ñá túú-gã xini ñuhu-xi. Te cada iní-ó sá tnúhu-á<sup>n</sup> cúú-xí ñ<sup>n</sup> sá ní cunaha ndècu te ñá túú-gã nándíhi-xi te cuíta-ná-xi, duca<sup>n</sup> sãtnahá-xi cùu tnúhu sá ní cáhá<sup>n</sup>-gã ndéé díhna.

## 9

### *Cuendá vehe Yá Ndióxi*

<sup>1</sup> Te tnúhu sá ní cáhá<sup>n</sup> Yá Ndióxi ndéé díhna cùu-xi cuendá nàcuáa cada ñáiyu isràél chíñuhu ñahá-yu xii-gã, ndíhi cuendá vehe-gã caa ñuyíú-a. <sup>2</sup> Te ñáiyu isràél ní dácáá-yu vehe Yá Ndióxi, te vehe-á<sup>n</sup> ní cuu-xi vehe dóo te ní xúhu<sup>n</sup> nehu xití-xi. Te cuártú díhna ní xínani-xi cuártú ní cuu íí, te xíá<sup>n</sup> ní xíndecu ñ<sup>n</sup> sá ndéé ditè-xi sá ní cándodó ñ<sup>n</sup> caa candil núú ditè-xi, te ní xínutñí ñ<sup>n</sup> mèsá ní xóo códó pàá ní xóo nduu táhú Yá Ndióxi. <sup>3</sup> Te cuártú cúú uú ní xínani-xi cuártú ní cuu íí víhí-gã. <sup>4</sup> Te xití cuártú-á<sup>n</sup> ní xínutñí ñ<sup>n</sup> sá ní cuáha mee-ni díhú<sup>n</sup> cuáa<sup>n</sup> te núú xíá<sup>n</sup> ní xóo cahmi-güedé dúsa sá sáhá<sup>n</sup> tnámí. Te ñiu-ni xíá<sup>n</sup> ní xíndecu

tucu ñ<sup>n</sup> cajú ní cuu mee-ni dñhú<sup>n</sup> cuàá<sup>n</sup> te xití cajú-á<sup>n</sup> ní xúhu<sup>n</sup> ñ<sup>n</sup> lítu ní cuáha mee-ni dñhú<sup>n</sup> cuàá<sup>n</sup>, te xití lítu-á<sup>n</sup> ní xúhu<sup>n</sup> mànáá sá ní xóo caxí-yu dàvá-á<sup>n</sup>. Te ñ<sup>n</sup> ñ<sup>n</sup> xití cajú-á<sup>n</sup> ní xúhu<sup>n</sup> tñudii ndíi Árón sá ní saa itá-xi, ndíhi yúú sá ní xindeé tñúhu ní cáhá<sup>n</sup> Yá Ndióxi nácuáa cada ñáiyu. Te duha ní xínani cajú-á<sup>n</sup>: Cajú sá ñúhu tñúhu ní cáhá<sup>n</sup> Yá Ndióxi sá cúu-xí ñáiyu, duha ní xínani-xi. <sup>5</sup> Te núu cajú-á<sup>n</sup> ní cándodó úú tñhá sá ní cadúha-yu, te xiá<sup>n</sup> cáá-xí dàtná cáá Espiritú xínú cuéchi núu Yá Ndióxi. Te cuendá úú xiá<sup>n</sup> ní cutnùni iní-yu sá ñ<sup>n</sup> cànhu cuu Yá Ndióxi, te sá ní cadúha-yu-á<sup>n</sup> ndéé ndíxi<sup>n</sup>-xi, te ndíxi<sup>n</sup>-xi-á<sup>n</sup> dñhu-xi xio xio núu quidé cànhu iní Yá Ndióxi nchaa yicá cuéchi ñáiyu, dico vá cúu-gá cáhá<sup>n</sup>-í cuendá nchaa dava-gá xiá<sup>n</sup> vitna.

<sup>6</sup> Te nchaa xiá<sup>n</sup> ní xindecu xití vehe Yá Ndióxi, te cue dútú ní xóo quíhu-güedé ñ<sup>n</sup> nduu ñ<sup>n</sup> nduu xití cuártú díhna ní xóo cada-güedé nácuáa tàü-güedé cada-güedé sá cúu-xí Yá Ndióxi. <sup>7</sup> Te cuártú cúu úú-á<sup>n</sup> chí mee-ni dütú cúnúu ní xóo quíhu-dé ñ<sup>n</sup> xití ndí tñhá cuíá. Te ndí tñhá óré duca<sup>n</sup> ní xóo quíhu dútú cúnúu-á<sup>n</sup> te ní xóo canehe-dé ñíñí ní xóo quíhu ní xóo nduu táhú Yá Ndióxi. Te duca<sup>n</sup> ní xóo cada dútú-á<sup>n</sup> cuendá sá Yá Ndióxi cada cànhu iní-gá nchaa yicá cuéchi mee-dé, ndíhi nchaa yicá cuéchi ñáiyu. <sup>8</sup> Te sá dúcá<sup>n</sup> mée-ni dútú cúnúu ní xóo quíhu-dé xití cuártú ní cuu í-gá-á<sup>n</sup>, xiá<sup>n</sup> Espiritú Yá Ndióxi quidé-xí cutnùni iní-ó sá ñíni duca<sup>n</sup> ní xindecu vehe-á<sup>n</sup> ní xóo cada-yu nácuáa ní xóo cññaha Yá Ndióxi cada-yu. Te xiá<sup>n</sup> cutnùni sá vátá sàá-gá nduu cáhá<sup>n</sup> ndíhi-yu Yá Ndióxi nácuáa tàü-xi cunduu. <sup>9</sup> Te sá dúcá<sup>n</sup> ní xindecu vehe-á<sup>n</sup>, ndíhi sá dúcá<sup>n</sup> ní xóo cada nchaa cue dútú-á<sup>n</sup>, xiá<sup>n</sup> cutnùni iní-ó nácuáa quide Yá Ndióxi vitna, chí nchaa quiti ní xóo cahní cue dútú-á<sup>n</sup> ní xóo nduu táhú Yá Ndióxi, ndíhi nchaa dava-gá sá ní xóo nduu táhú-gá ñá túú ní quide-xi nacúaa nduu ndoo nduu nine iní cue ñáiyu nácuáa cutnùni iní-yu sá ñá túú-gá cuéchi-yu ndéu núu Yá Ndióxi. <sup>10</sup> Te sá dúcá<sup>n</sup> ní xóo cada nchaa dútú-á<sup>n</sup> ní ñíñí tñhá-xi ndíhi nchaa tñúhu sá dánéhé ñháá xii ñáiyu ná cúu sá caxí-yu ndíhi ná cúu sá cúu còhó-yu ndíhi nácuáa ndáh-yu. Te tñúhu-á<sup>n</sup> ní cuu-xi mee-ni sá ní sanu ichi ñaha xii-yu nácuáa cundecú-yu ñuyú-a. Te tñúhu-á<sup>n</sup> ní nándíhi-xi ndéé ní sáá nduu ní nadama Yá Ndióxi tñúhu-á<sup>n</sup> cuendá sá vá dúcá<sup>n</sup>-gá cada-yu cundecú-yu.

<sup>11</sup> Te Xitohó Jesucristú ní quixi-gá ñuyú-a, te ñ<sup>n</sup> ñ<sup>n</sup> gá cúu-gá Yaá cúu dütú cúnúu, te xiá<sup>n</sup> núu quide-gá nchaa sá váha sá cúu-xí-ó. Te vitna ní nucúndecu-gá núu ñ<sup>n</sup> vii ñ<sup>n</sup> váha cáa, te núu ndécú-gá-á<sup>n</sup> ñá túú cùu-xi ñ<sup>n</sup> vehe

sá ní dácáa cué téé ñuyú-a. <sup>12</sup> Te cada iní-ó sá Xitohó Jesucristú cuánguihu-gá xití cuártú núu ní cuu í vihi dàtná ní xóo cada dútú cúnúu ní xindecu ndéé sanaha, chí ní nucúndecu-gá núu ndécú Yá Ndióxi. Dico ñá túú ní quide-gá dàtná ní xóo cada dútú cúnúu ní xindecu ndéé sanaha, chí dütú-á<sup>n</sup> óré ní xóo quíhu-dé xití cuártú ní cuu í-gá-á<sup>n</sup>, te ní xóo canehe-dé ñíñí chivá ndíhi ñíñí chéllu ní xóo quíhu. Dico Xitohó Jesucristú chí ñíñí mée-gá ní sati ní xihí-gá núu cùrúxi, te xiá<sup>n</sup> duu<sup>n</sup> duu<sup>n</sup> cuáhá<sup>n</sup>-gá ní nucúndecu-gá núu ndécú Yá Ndióxi. Te sá dúcá<sup>n</sup> ní quide-gá xiá<sup>n</sup> ní naníhi táhú-ó. <sup>13</sup> Te nchaa ñáiyu ní xóo cada nácuáa sá cúu-gá-yu ñáiyu ní cuu í, ñáiyu-á<sup>n</sup> ní xóo códo ñháá cué dútú ñíñí ndicutu, ndíhi ñíñí chivá, ndíhi yáa cùñú chéllu quiti sàhñi-güedé cuendá nduu íi tucú-yu. <sup>14</sup> ¡Dico ñíñí Xitohó Jesucristú chí ío-gá nándíhi-xi sá cúu-xi nchòo ñáiyu xindecu vitna! Te cuendá ñíñí-gá-á<sup>n</sup>, chí Espiritú Yá Ndióxi sá ndécú nchaa nduu nchaa quíú ní cuu ñ<sup>n</sup> nuu-xi ndíhi Xitohó Jesucristú sá cúu cúu-gá cuendá cuu-gá dàtná ñ<sup>n</sup> táhú sá cúu-xí Yá Ndióxi cuéi cùu-gá Yaá ñá túú tñhá cuéchi-xi, te ní sati ñíñí-gá te ní xihí-gá. Te cuendá xiá<sup>n</sup> ní cutnùni iní-ó sá Yá Ndióxi ní quide cànhu iní-gá nchaa sá ñá túú váha ní quide-o, te ní nduu ndoo ní nduu nine iní-ó. Te duca<sup>n</sup> ní nduu ndoo ní nduu nine iní-ó cuendá sá ndácú-ó cùnú cuéchi-o núu Yá Ndióxi Yaá ndécú nchaa nduu nchaa quíú.

<sup>15</sup> Te Xitohó Jesucristú ní quide ndáá-gá núu Yá Ndióxi cuendá cue ñáiyu ndéu ñuyú-a. Te cuendá xiá<sup>n</sup> Yá Ndióxi cada-gá ñngá núu sá váha sá cúu-xi-yu dàtná ní cachí-gá, te duca<sup>n</sup> cada-gá sá cuendá nchaa ñáiyu ní cáhá<sup>n</sup>-gá cundecu ndíhi-gá, chí ñáiyu-á<sup>n</sup> nduu táhú-yu cundecu ndíhi váha ñháá-yu xii-gá ní caa ní quíñí chí duca<sup>n</sup> ní cachí-gá, te duca<sup>n</sup> chí Xitohó Jesucristú ní xihí-gá núu cùrúxi cuendá sá Yá Ndióxi cada cànhu iní-gá nchaa yicá cuéchi-yu, nchaa cuéchi sá ní quide-yu cutnùni ní cunuu tñúhu sá ní cáhá<sup>n</sup>-gá díhna. <sup>16</sup> Te nchoo xini-ó sá núu ñ<sup>n</sup> téé na cadúha ñ<sup>n</sup> tutú nácuáa cada ñáiyu dácáhñu-yu nchaa sá ndécú ndíhi-dé, te tutú-á<sup>n</sup> xini ñúhu-xi ndéé ná váha nduu cùu-dé. <sup>17</sup> Te ñá túú tàü-xi cada ñáiyu nácuáa cáhá<sup>n</sup>-xi núu tutú-á<sup>n</sup> ñíni ndéu téé ní cadúha, dico sátá ná váha cuú-dé te cada-yu nácuáa cáhá<sup>n</sup>-xi. <sup>18</sup> Te cuéi cànhu ní cáhá<sup>n</sup> Yá Ndióxi ndéé díhna nácuáa cada váha-gá ñáiyu, te ñ<sup>n</sup> ñ<sup>n</sup> ndíhi ñíñí ní cundáá-xi chí ní sàhñi-güedé quiti te ní sati ñíñí-güedi. <sup>19</sup> Te ndíi Moisés ní cáhá<sup>n</sup> ndodo ndíi núu nchaa ñáiyu nácuáa ní cachí Yá Ndióxi cada-yu, te nácuáa-ni nduu tñúhu ní chidó tñúni ndíi núu tutú ndíi ní cáhá<sup>n</sup> ndíi, te ní dácá ndíi

ndute níñí chëhlu ndihi níñí chivá lìhli, te ní quehe<sup>n</sup> ndíi ì<sup>n</sup> dité yutnu nàni hisópó ndihi luha idi ticuèhé, te ní chindóyo ndíi níñí-á<sup>n</sup>. Te ní sódó ndíi núú tütú ndéé tnúhu Yá Ndióxi sá ní chidó tnúni ndíi-á<sup>n</sup>, te tnàhà cue ñáyiú xindecu-á<sup>n</sup> ní chúcú ndíi.<sup>20</sup> Te ní xáha<sup>n</sup> ndíi Moisés xii-yu: “Cuèndá níñí-a ní cundáá sá Yá Ndióxi cada ñaha-gá xii-ndo sá váha chi duca<sup>n</sup> ní cachí-gá cada-gá sá cúu-xí-ndó”, duha ní xáha<sup>n</sup> ndíi xii-yu.<sup>21</sup> Te ñu-ni duca<sup>n</sup> ní quide tucu ndíi ní chúcú ndíi níñí vehe-gá ndihi nchaa sá nándíhi-güedé òré chíñùhu-güedé Yá Ndióxi ndécú xití vehe-gá-á<sup>n</sup>.<sup>22</sup> Te tnúhu ní chidó tnúni ndíi Moisés cächí-xi sá méé-ní níñí chucu-güedé nchaa sá cãnehe chiú<sup>n</sup>-güedé òré chíñùhu-güedé Yá Ndióxi, te sacú-nà te ndihi ndoo nchaa xiá<sup>n</sup> chucu-güedé níñí ni cùu. Te dacuití ní xini ñuhu-xi sá cáti níñí cuèndá duca<sup>n</sup> càda cahnu iní Yá Ndióxi nchaa yíca cuèchi ñáyiú.

*Xítóh Jesucristú ní xihí-gá núú cùrúxi cuèndá sá vã cündècu-gá cuèchi-o núú Yá Ndióxi*

<sup>23</sup> Te sá cuèndá sá ní xihí Xítóh Jesucristú núú cùrúxi, xiá<sup>n</sup> ñá túú-gá cuèchi-o ndècu núú Yá Ndióxi. Te cuèndá nchaa sá ní xihí xití vehe-gá sá ní dácáá ñáyiú isràél xiá<sup>n</sup> cùtnúni iní-ó nàcuáa quide-xi núú ndécú-gá. Te dacuití ní xini ñuhu-xi sá cãhni-güedé cue quiti ní cachí Yá Ndióxi cuèndá nduu íi nchaa sá ní xihí xití vehe-gá-á<sup>n</sup>. Te cuèi duca<sup>n</sup> ní sahni-güedé cue quiti-á<sup>n</sup> dico ñá túú ní quide-xi nacuáa ngündecu váha-o núú Yá Ndióxi. Dico Xítóh Jesucristú ní xihí-gá, te sá ní xihí-gá xiá<sup>n</sup> ní quide-gá nàcuáa ngündecu váha-o núú Yá Ndióxi.<sup>24</sup> Te Xítóh Jesucristú cuánda-gá andíu núú ndécú Yá Ndióxi cãhá<sup>n</sup> ndàhu-gá cuèndá-ó, te Xítóh Jesucristú chi ñá díú ì<sup>n</sup> vehe ní dácáá cuè téé ñuyíú-a cuángiuhu-gá. Te vehe Yá Ndióxi sá ní dácáá cuè ñáyiú isràél ñuyíú-a ndéé sanaha, ndihi nchaa nàcuáa ní xóo cada-güedé xití vehe-gá-á<sup>n</sup> xiá<sup>n</sup> cùtnúni iní-ó nàcuáa quide-xi núú ndécú-gá.<sup>25</sup> Te dútú cúnúu núú ñáyiú isràél ní xóo quíhu-dé núú cuiá núú cuiá xití cuártú ní cuu íi víhi-gá-á<sup>n</sup>, te ní xóo canehe-dé níñí ní xóo quíhu xití cuártú-á<sup>n</sup> dico ñá díú níñí méé-dé. Dico Xítóh Jesucristú chi ñá túú duca<sup>n</sup> ní quide-gá chi ì<sup>n</sup> xito-ni ní sati níñí-gá te ní xihí-gá.<sup>26</sup> Chi núú ní xihí-gá nuu núú te ndéé cùtnàhà ní ngáva ñuyíú duca<sup>n</sup> ngüíta-gá cada-gá ní cùu, te vitna ta ndíhi nduu cuáhá<sup>n</sup> ní quixi-gá ñuyíú-a ní xihí-gá ì<sup>n</sup> xito-ni cuèndá cuu-gá dàtná ì<sup>n</sup> táhú sá cúu-xí Yá Ndióxi, te duca<sup>n</sup> ní quide-gá cuèndá sá vã cündècu-gá cuèchi ñáyiú núú Yá Ndióxi.<sup>27</sup> Te nchoo cuè ñáyiú ñuyíú-a chi ì<sup>n</sup> xito-ni cuú-ó

te dàtnúni duca<sup>n</sup> te cada ndáá Yá Ndióxi cuèchi-o.<sup>28</sup> Te duca<sup>n</sup> sãtnahá-xi cùu Xítóh Jesucristú chi ì<sup>n</sup> xito-ni ní xihí-gá cuèndá sá vã cündècu-gá cuèchi ñáyiú núú Yá Ndióxi, te duca<sup>n</sup> ní cuu ní xihí-gá chi mee-gá duca<sup>n</sup> ní cachí-gá cunduu. Te quixi tucu Xítóh Jesucristú ñuyíú-a dico ñá díú-gá sá cadá-gá cuèndá sá vã cündècu-gá cuèchi ñáyiú núú Yá Ndióxi, chi quixi-gá nacuaca-gá nchaa ñáyiú ndètu ñaha xii-gá cuèndá cundecú-yu ndíhi-gá ní caa ní quíhí<sup>n</sup>.

## 10

<sup>1</sup> Te nchaa tnúhu ní xáha<sup>n</sup> ndíi Moisés xii ñáyiú isràél cada-yu, nchaa tnúhu-á<sup>n</sup> ní quide-xi ní cutnùni luha iní-yu nàcuáa cada Yá Ndióxi cada váha ñaha-gá xii-o vitna. Dico ñá díú mèi nacuáa ní xáha<sup>n</sup> ndíi Moisés xii ñáyiú quide Yá Ndióxi vitna chi dáma quide-gá. Te nchaa tnúhu ní cáhá<sup>n</sup> ndíi Moisés ñá túú ní ndàcu-xi cada-xi nacuáa cundáa nchaa ñáyiú tũha ñaha xii Yá Ndióxi cuèi ní xóo cahni-güedé quiti ní xóo nduu táhú-gá núú cuiá núú cuiá.<sup>2</sup> Te núu dicó sá ní xóo cahni-güedé quiti ní xóo nduu táhú Yá Ndióxi ní quide-xi nacuáa nduu ndoo nduu nine iní cue ñáyiú, te vã cãhni-gá-güedé cue quiti-á<sup>n</sup> nduu táhú-gá ní cùu, te duca<sup>n</sup> te cutnùni iní-yu sá ñá túú-gá cuèchi-yu ndècu núú Yá Ndióxi ní cùu.<sup>3</sup> Te sá dúcá<sup>n</sup> ní xóo cahni-güedé quiti ní xóo nduu táhú Yá Ndióxi núú cuiá núú cuiá, xiá<sup>n</sup> ní xóo ndacu iní cue ñáyiú nchaa sá cuèhé sá dúhá ní xóo cada-yu.<sup>4</sup> Te duca<sup>n</sup> chi níñí ndicutu-á<sup>n</sup> ndíhi níñí chivá-á<sup>n</sup> ñá túú ní xóo ndacu-xi cada-xi nàcuáa vã cündècu cuèchi-yu núú Yá Ndióxi.

<sup>5</sup> Te xiá<sup>n</sup> núu cùtnàhà ní quexío Xítóh Jesucristú ñuyíú-a ní xáha<sup>n</sup>-gá xii Yá Ndióxi: Yòhó Tãtá-í, ñá túú nduu vétú váha iní-n sá sãhni-güedé quiti ndúu táhú-n,

te ni ñá túú nduu vétú váha tucu iní-n cuèndá nchaa dava-gá sá táxi-güedé ndúu táhú-n,

núu xiá<sup>n</sup> ní quide túha-n yiqui cuñú-í cuèndá yúhú cuú-í te nduu táhú ñáhá-n xi-í.

<sup>6</sup> Te ni ñá túú nduu vétú váha iní-n cuèndá quiti sãhni-güedé ndúu táhú-n te ni ñá túú nduu vétú váha iní-n cuèndá nchaa dava-gá sá táxi-güedé ndúu táhú-n cuèndá sá vã cündècu-gá cuèchi ñáyiú núú-n.

<sup>7</sup> Núu xiá<sup>n</sup> yúhú ní cachí-í xii yòhó Tãtá-í Dútú Ndióxi sá yúhú véxi-í ñuyíú-a cada-í nchaa sá cuini-n càda-í dàtná yódó tnúni cuèndá-í núú tütú-n.

Duha ní xáha<sup>n</sup> Xítóh Jesucristú xii Tãtá-gá Dútú Ndióxi.<sup>8</sup> Te Xítóh Jesucristú díhna-gá ní xii-gá Yá Ndióxi Yaá cúu Tãtá-gá: “Yòhó Tãtá-í ñá túú nduu vétú váha iní-n cuèndá quiti sãhni-güedé ndúu táhú-n, ndíhi cuèndá quiti sãhni-güedé ndúu táhú tucu-n cuèndá

sá vâ cündecu-gá cuéchi ñáyiú núú-n, ndihi cuendá nchaa dava-gá táhú sâ táxi-güedé xii-n ñâ túú ndùu vétú váha iní-n cuendá nchaa xiá", duha ní xáha" Xítohó Jesucristú xii Tâta-gá Dútú Ndióxi. Te duca" ní xáha"-gá cuéhi núú túú ndúú Moisés yódó tnùnî sâ dúcá" càda-güedé. <sup>9</sup> Te sáta dúcá" te ní xáha" tucu-gá xii Tâta-gá Dútú Ndióxi: "Yòhó Tâta-í Dútú Ndióxi, mee-í véxi-í ñuyúú-a cuendá cada-í nchaa nàcuáa cuiní-n", duha ní xáha"-gá xii Tâta-gá. Te sâ dúcá" ní cáhán Xítohó Jesucristú xiá" ní cutnùnî sâ ñâ túú-gá xínî ñùhu-xi duca" cada-güedé cahni-güedé nchaa quiti-á", te duca" chi mee Xítohó Jesucristú ní xihí-gá ní cuu-gá dàtná ñ" táhú sâ cúú-xí Yá Ndióxi, te duca" ní cuu chi duca" tnàhí ní cachí Yá Ndióxi cunduu. <sup>10</sup> Te Xítohó Jesucristú ní quide-gá nàcuáa ní cuiní Yá Ndióxi cada-gá, chi ní xihí-gá núú cùrúxi chi duca" ní cuiní méé-gá cunduu, te ñ" xito-ni ní xihí-gá sâ cuendá nchaa ñáyiú, te cuendá xiá" núú ndècu yíñuhu-o núú-gá vitna.

<sup>11</sup> Te cue dútú ñáyiú isráel chi ñ" nduu ñ" nduu ní xóo cahni-güedé quiti ní xóo nduu táhú-gá, te ñâ túú ní dâma-güedé nàcuáa ní xóo cada-güedé. Te nchaa sâ ní xóo cada-güedé-á" ñâ túú ní quide-xi nàcuáa vâ cündecu-gá cuéchi ñáyiú núú Yá Ndióxi. <sup>12</sup> Dico Xítohó Jesucristú ní cachí-gá sâ cúú cúú-gá, te ní xihí-gá núú cùrúxi cuendá nchaa yíca cuéchi nchaa nchoo ñáyiú ndècu ñuyúú-a. Te sáta dúcá" te dàtnùnî ní ngóo-gá xio cùha Dútú Ndióxi táxi tnùnî-gá, te vâ ñ" ndùu ñ" quíú-gá te cuú-gá. <sup>13</sup> Te diu-ni xiá" cundecu-gá cundetu-gá ndéé sáá nduu cànehe nchaa sâ cúú ùhú iní ñáhá xii-gá sâ yíñuhu núú-gá. <sup>14</sup> Te cuendá sâ ní xihí Xítohó Jesucristú ñ" xito-ni xiá" ní cuu-gá dàtná ñ" táhú sâ cúú-xí Yá Ndióxi, xiá" ní quide-xi sâ ncháá ñáyiú cùu cuendá-gá ñâ túú-gá ná cumánî-yu núú-gá ní caa ni quíhí". <sup>15</sup> Te mee Espiritú Yá Ndióxi càhá" ndáá-xi nàcuáa ní cáhán-gá cuendá-ó, te duha ní cáhán-gá:

<sup>16</sup> Sáá nduu te cada-í nchaa ñáyiú nàcuáa na càhá"-í-a,

te cada-í nàcuáa cutnùnî iní-yu tnùhu sâ dánèhé-í-yu tnùhu sâ canùichi ñaha xii-yu nàcuáa cada-yu cundecu-yu,

te cada tucu-í sâ tní-yu nchaa tnùhu-á".

Duha ní cachí-gá. <sup>17</sup> Te ní cachí tucu-gá:

Te vâ ñ" ndùu ñ" quíú-gá ndacu iní-í sâ quidé sáá iní-yu tnùhu-í,

te ní vâ ñ" ndùu ñ" quíú-gá te ndacu iní-í nchaa sâ cuèhé sâ dúhá quidé-yu.

Duha ní cáhán Yá Ndióxi càchí Espiritú-gá.

<sup>18</sup> Te sâ dúcá" quide cahnu iní Yá Ndióxi nchaa cuéchi-o, núú xiá" ñâ túú-gá xínî ñùhu-xi cuú quiti nduu táhú-gá cuendá nchaa sâ cuèhé sâ dúhá quide-o.

*Tàú-ó sâ tnàhá tnùhu-o ndihi Yá Ndióxi*

<sup>19</sup> Te cue dútú ní xóo cunuu núú ñáyiú isráel cue téé-á" ní xóo quíhu-güedé xiti cuàrtú ní cuu íí vihí-gá. Dico nchoo cue ñáyiú ndècu ichi Xítohó Jesucristú vitna tàú-ó sâ ní yuhu ní iní-ó tnàhá tnùhu-o ndihi Yá Ndióxi. Te cuu tnàhá tnùhu-o ndihi-gá chi Xítohó Jesucristú ní sati ñíñi-gá te ní xihí-gá núú cùrúxi. <sup>20</sup> Te cada iní-ó sâ dóó sâ ní xindedí nàcuáa ní xóo quíhu-güedé xiti cuàrtú ní cuu íí vihí-gá-á" ní xócuñí, te duca" càda iní-ó chi Xítohó Jesucristú ní xihí-gá cuendá nchoo ñíhí-ó nàcuáa cada-o ngündecu váha-o sâ cúú-xí-gá. <sup>21</sup> Te diu-gá cúú-gá Yáá cúú dútú-ó, te diu-gá cúú-gá Dútú cùnùu ndecu-gá núú ndécú Yá Ndióxi. <sup>22</sup> Núú xiá" xínî ñùhu-xi sâ ío tnàhá tnùhu-o ndihi Yá Ndióxi, te vâ caní ñ" caní úú iní-ó, te ío váha quindáá iní-ó-gá chi diu-gá ní ndada ndoo ní ndada nine-gá iní-ó cuendá nchoo cutnùnî iní-ó sâ ñâ túú-gá cuéchi-o ndècu núú-gá. Te ní sandute-o cuendá sâ dúcá" ní nduu ndoo ní nduu nine iní-ó. <sup>23</sup> Te nchoo càhá" ndáá-ó sâ ndécú ndihi-o tnùhu ndee iní sâ ndúú táhú-ó cundecu ndihi-o Yá Ndióxi, te xínî ñùhu-xi sâ vâ dáñá ndèé-ó càncicú" ñíhnu-o tnùhu ndee iní-á" chi Yá Ndióxi cada-gá nàcuáa ní cachí-gá sâ cúú-xí-ó. <sup>24</sup> Te xínî ñùhu-xi cuhu" iní tnàhá-ó te chindee tnàha-o nàcuáa duca" cùu iní tnàhá-gá-ó, te cada-o mèe-ni sâ váha. <sup>25</sup> Te nchoo vâ dáñá ndèé-ó natàcá-ó núú dácuaàha-o tnùhu Yá Ndióxi, te vâ càdá-ó dàtná xiquide davá-yu ñâ túú-gá cuiní-yu quixí-yu núú dácuaàha-o tnùhu-gá. Chi xínî ñùhu-xi sâ cuàha tnàha-o tnùhu ndee iní càncicú" ñíhnu-o ichi-gá, te uu"-gá duca" tàú-xi cada-o vitna ta cuyatni nduu quixi tucu Xítohó Jesucristú ñuyúú-a.

<sup>26</sup> Te cue ñáyiú sa ní tecú tnùnî nàcuáa càhá" tnùhu Yá Ndióxi te núu na nguíta-yu ñucúu" cada-yu nándi sâ cuèhé sâ dúhá, te áu" ná cuu ní xihí Xítohó Jesucristú cuendá-yu, te ní vâ yóo ñ"-gá cuú cuendá sâ vâ cündecu-gá cuéchi-yu núú Yá Ndióxi. <sup>27</sup> Te núu duca" na càdá-yu nándi sâ cuèhé sâ dúhá, te ío quiyùhú iní-yu nàcuáa cada ñaha Yá Ndióxi xii-yu. Chi nchaa ñáyiú cùu ùhú iní ñáhá xii-gá daquihí" ñáhá-gá xii-yu núú ñùhú núú cayú núú ío ndohó-yu.

<sup>28</sup> Te nchaa ñáyiú ní xóo daquèe tihú tnùhu ní cáhán ndí Moisés, te núu ndècu úú àdi únî ñáyiú càhá" ndáá sâ dúcá" ní dáquée tihú-yu tnùhu ní cáhán ndí, te vâ yóo ní xóo cundàhú iní ñáhá xii nchaa ñáyiú duca" ní xóo cada chi ní xóo cahni ñaha-güedé.

<sup>29</sup> Te núu duca" ní ndoho cue ñáyiú duca" ní dáquée tihú tnùhu ní cáhán ndí Moisés-án, te uu"-gá ndoho cue ñáyiú dàquèe tihú ñáhá xii Xítohó Jesucristú Yáá cúú Dèhe Yá Ndióxi diu-ni ñáyiú càchí sâ ñâ túú nándihi ñíñi-gá. Te ñíñi-gá-á" ní sati, te ní xihí-gá, te duca"

ní cuu cuendá cada Yá Ndióxi ingá núú sá vâha sá cúú-xí nchòo ñáyiú ndècu ñuyúú-a dàtná ní cachí-gá cada-gá. Te diu-ni cuendá níñí-gá-á<sup>n</sup> ní nduu ndoo ní nduu nine iní cuu ñáyiú-á<sup>n</sup> ní tûu, te diu-ni ñáyiú-á<sup>n</sup> càhá<sup>n</sup> úhú-yu Espíritú Yá Ndióxi sá chindèe chítúú ñaha xii-o. <sup>30</sup> Te nchoo sá naha-o sá Yá Ndióxi càchí-gá ì<sup>n</sup> xichi núú tûtú-gá: “Yúhú cada-í te nacháhu ñáyiú nchaa sá quidè-yu, te duha càhá<sup>n</sup>-í chi nachinaa-í cuendá nchaa sá quidè-yu-á<sup>n</sup>”, duha càchí-gá. Te sa nâha tucu-o nacuaá càhá<sup>n</sup>-xi núú tûtú-gá núú càchí-xi: “Yá Ndióxi cada ndáá-gá cuendá nchaa sá quidè ñáyiú cuu cuendá-gá”, duha càchí-xi núú tûtú-gá. <sup>31</sup> Te ío ndâhú ndoho cue ñáyiú na dàndoho ñaha Yá Ndióxi, te diu-gá cúú-gá Yáá cúnúu nchaa nduu nchaa quíú!

<sup>32</sup> Te chí dándacu iní nâcuáa ní quide-ndo cûtnâhá vitna cuu saa ní tecú tñuní-ndó tñúhu Yá Ndióxi, chí dàvá-á<sup>n</sup> ní quide càhnu iní-ndó cuèí nândi sá ní yâha-ndo cuendá-gá. <sup>33</sup> Te dava-ndo ní quide úhú ñáhá ñáyiú xii-ndo núú chítú núú tàcá, te nândi tñúhu cuèhé tñúhu duha ní xáhâ<sup>n</sup>-yu xii-ndo. Te dava-ndo ní cuyî-ni-ndo ní xindecu ndîhi tñaha-ndo cuèí nândi ní ndoho dava-gá-ndó. <sup>34</sup> Te ní cundâhú iní-ndó cuè ñáyiú yîhi vecaá, te cuèí ní quendeé ñáyiú sá ndécú ndîhi-ndo dico ñá túú ní ndîhú iní-ndó chí ní cudî-ni iní-ndó. Te duca<sup>n</sup> ní quide-ndo chí sa nâha-ndo sá ndúú tâhú-ndó sá ío-gá vâha, te xiâ<sup>n</sup> cundecu ndîhi-ndo ní caa ní quíhí<sup>n</sup>. <sup>35</sup> Te xiâ<sup>n</sup> vá dàñá ndèé-ndó quindáá iní-ndó nâcuáa ní cachí Yá Ndióxi cada ñaha-gá xii-ndo, chí sáa nduu te ío vâha cada ñaha-gá xii-ndo. <sup>36</sup> Te nchóhó xíní ñûhu-xi ío cada ndee iní-ndó càda-ndo nchaa nacuaá càhá<sup>n</sup> Yá Ndióxi, te duca<sup>n</sup> te nduu tâhú-ndó sá ní cachí-gá nduu tâhú-ndó cundecu ndîhi-ndo ní caa ní quíhí<sup>n</sup>. <sup>37</sup> Te Yá Ndióxi càchí-gá núú tûtú-gá:

Ta cûyatni víi-nâ nduu quixi Yáá quixi ñuyúú-a, te vá cûyâa-gá.

<sup>38</sup> Te nchaa ñáyiú cundáa núú-í ñá túú dàña ndéé-yu sândáá iní ñáhâ-yu xii-í, te cuendá xiâ<sup>n</sup> cundecu-ní-yu ichi-í, dico núu na dàñá-yu ichi-í te vá cúú vâha iní-í núú-yu.

Duha càchí Yá Ndióxi núú tûtú-gá.

<sup>39</sup> Dico nchoo chí ñá túú cûu-o ñáyiú duca<sup>n</sup> xiquide dàñá-ó ichi Yá Ndióxi, chí cûu-o ñáyiú nchicú<sup>n</sup> nihnu-ni sândáá iní-ó-gá, te sá dúcá<sup>n</sup> te nduu tâhú-ó cundecu-o ndîhi-gá ní caa ní quíhí<sup>n</sup>, te ñá túú cûu-o ñáyiú dàña nihnu ichi-gá te xita nihnú-yu.

## 11

*Ñáyiú sândáá iní ñáhâ xii Yá Ndióxi*

<sup>1</sup> Te núu sândáá ndisa iní-ó Yá Ndióxi te duca<sup>n</sup> cûtnuní ndáá iní-ó sá nihí-ó sá cûiní-ó núú-gá. Te núu sândáá iní-ó-gá te duca<sup>n</sup> cûtnuní ndáá tucu iní-ó sá càhá<sup>n</sup> ndáá-gá cuendá nchaa sá ñâ túú xini-ó. <sup>2</sup> Te duca<sup>n</sup> ní quide ñáyiú ní xindecu ndéé sanaha ío ní sândáá iní-yu Yá Ndióxi te xiâ<sup>n</sup> núu ío vâha ní cuu iní ñáhâ-gá xii-yu.

<sup>3</sup> Te núu nchoo sândáá ndisa iní-ó Yá Ndióxi te cûtnuní ndáá iní-ó sá sá cuendá tñúhu ní càhá<sup>n</sup>-gá ní cuâha andiu ndîhi ñuyúú-a. Te cûtnuní iní-ó sá ñâ díú sá cuendá ì<sup>n</sup> sá tûu ndèhe-o ío ñuyúú-a ní cuâha andiu ndîhi ñuyúú-a.

<sup>4</sup> Te ndîí Àbél ío ní sândáá iní ndîí Yá Ndióxi núu xiâ<sup>n</sup> ío-gá ní cuu iní-gá sá ní sâñaha ndîí ní nduu tâhú-gá dàcúúxi sá ní sâñaha ndîí Câm xii-gá ní nduu tâhú-gá. Te ndîí Àbél-á<sup>n</sup> ní cûtnuní iní ndîí sá ní cudîu ndîí núú Yá Ndióxi cuendá sá ní quehe<sup>n</sup> cuendá-gá sá ní sâñaha ndîí ní nduu tâhú-gá. Te cuèí ñâ tûtú-gá ndîí ndècu ñuyúú-a dico yòdo tñuní sá ní sândáá iní ndîí Yá Ndióxi cuendá duca<sup>n</sup> càda-o canchicú<sup>n</sup> nihnu-o.

<sup>5</sup> Te té Ènóc téé ní xindecu ndéé sanaha ñâ túú ní xihí-dé chí ní nacuaa ñaha túu Yá Ndióxi xii-dé cuendá sá ní sândáá iní ñáhâ-dé xii-gá. Te vá yòo ní nânihí ñáhâ xii-dé chí mee-gá ní nacuaa ñaha-gá xii-dé. Te núu tûtú Yá Ndióxi càchí-xi sá cûtnâhá vátá nâcuâca ñaha-gá xii té Ènóc, te ní quide-dé mee-ní nâcuâca ní cuu vâha iní ñáhâ-gá xii-dé. <sup>6</sup> Te nchaa ñáyiú ñâ túú sândáá iní ñáhâ xii Yá Ndióxi ñâ ndâcû-yu cadâ-yu nâcuâca cudîú-yu núú-gá, chí nchaa ñáyiú cûiní tuha ñaha xii-gá xíní ñûhu-xi sá quindáá iní-yu sá ndécú-gá, te quindáá iní-yu sá núu na nânducu nihnu ñáhâ-yu xii-gá te cuâñaha-gá xii-yu sá ndúú tâhú-yu.

<sup>7</sup> Te Yá Ndióxi ní dátûha-gá ndîí Nôé nchaa nâcuâca cada-gá. Te ní quide ndîí nchaa nâcuâca ní xâha<sup>n</sup> Yá Ndióxi cada ndîí, te ní cadûha ndîí ì<sup>n</sup> bàrcú cuendá xiti bàrcú-á<sup>n</sup> quée ndîí ndîhi nchaa ñáyiú vehe ndîí cuendá càcu nihnú-yu. Te duca<sup>n</sup> ní quide ndîí chí ní sândáá iní ndîí Yá Ndióxi. Te sá dúcá<sup>n</sup> ní sândáá iní ndîí-á<sup>n</sup> Yá Ndióxi xiâ<sup>n</sup> ní cûtnuní sá ncháá ñáyiú ío ndècu cuèchi-yu, chí ñâ túú ní cànchicú<sup>n</sup> nihnú-yu cadâ-yu nâcuâca ní quide ndîí. Te sá dúcá<sup>n</sup> ní quide ndîí ní sândáá iní ndîí Yá Ndióxi xiâ<sup>n</sup> ío ní cundáá ndîí núú-gá.

<sup>8</sup> Te Yá Ndióxi ní xâha<sup>n</sup>-gá xii ndîí Àbrahám sá quée ndîí ñúú núú ndécú ndîí quíhí<sup>n</sup> ndîí ingá xichi cundecu ndîí. Te ní quide ndîí nâcuâca ní xâha<sup>n</sup> Yá Ndióxi chí ní quee ndîí cuâhá<sup>n</sup> ndîí núú cuâñaha Yá Ndióxi cundecu ndîí. Te òré ní quee ndîí núú ndécú ndîí te ñâ túú ní cûtnuní iní ndîí ndéé cúú núú cuâhá<sup>n</sup> ndîí cundecu ndîí. Te duca<sup>n</sup> ní quide ndîí chí

ni sándáá iní ndíi Yá Ndiöxí. <sup>9</sup> Te sá dúcá<sup>n</sup> nĩ sándáá iní ndíi Yá Ndiöxí nũu xíã<sup>n</sup> nĩ xĩndecu ndíi núú nĩ sãñaha-gã cundecu ndíi, te cuèi duca<sup>n</sup> dico ñá túú nĩ quide ñuú ndíi xíã<sup>n</sup>. Te ní xóo cundecu ndíi vehe cùtèxĩnu vehe dóó. Te ñu-ni duca<sup>n</sup> nĩ quide ndíi Isàác ndíi ndíi Jácób chi tnàhá cue ndíi-án nĩ cachí Yá Ndiöxí sá ndúú tãhú cue ndíi xíã<sup>n</sup> cundecu cue ndíi. <sup>10</sup> Te duca<sup>n</sup> nĩ quide ndíi Àbrahám chi ní xĩndetu ndíi ndéé ní sáá nduu ndũu tãhú ndíi cundecu ndíi núú ndécú Yá Ndiöxí. Te núú ndécú-gã-á<sup>n</sup> cúú-xí ñũú ní cadúha mee-gã, te ñũú-á<sup>n</sup> cudíi-xi ni caa ni quíhĩ<sup>n</sup>.

<sup>11</sup> Te ndíi Sárá, sa ní xídó cuía ndíi sá cóó dèhe ndíi chi sa ní sahnũ vihi ndíi, dico Yá Ndiöxí ní quide-gã te ní xóo ñ<sup>n</sup> dèhe ndíi. Te duca<sup>n</sup> chi ní sándáá iní ndíi Yá Ndiöxí te ní cutnũni ndáá iní ndíi sá cáda-gã ñacuáa ní xáha<sup>n</sup>-gã xii ndíi. <sup>12</sup> Te cuèi ío ní sahnũ ndíi Àbrahám ndíi ñadihĩ ndíi, ndíi Sárá dico dacuitíi nĩ nduu tãhũ-yu ní xóo ñ<sup>n</sup> dèhe-yu. Te xíã<sup>n</sup> nũu ío cuèhé ndíquĩ<sup>n</sup> yávã ndíi Àbrahám ní cáyã dàtnã cuèhé chòdĩni ndéé andũ, ndíi dàtnã cuèhé ñũhu cùchĩ lámár, chi ní vã yóo ñ<sup>n</sup> ndacu cahu ñaha xíi-yu sá cuèhé-yu.

<sup>13</sup> Te cue ndíi-án duca<sup>n</sup>-nĩ ní sándáá iní cue ndíi Yá Ndiöxí ndéé ní sáá nduu nĩ xíhĩ cue ndíi. Te cue ndíi-án ñã túú ní ndũu tãhú cue ndíi quini cue ndíi nchaa ñacuáa ní cachí Yá Ndiöxí cada-gã, dico ní cutnũni ndáá iní cue ndíi-án ñacuáa cada-gã núú cuahã<sup>n</sup> núú vèxi. Te ío ní cudíi iní cue ndíi, te ní cachí cue ndíi sá dicó-nĩ ichi yãha cue ndíi ñuyúú-a, chi ñã díú ñuyúú-a cundecu duca<sup>n</sup> cuè ndíi. <sup>14</sup> Te sá dúcá<sup>n</sup> ndũu tnũhu ní cáhá<sup>n</sup> cue ndíi-án, xíã<sup>n</sup> ní cutnũni sá cuĩni cue ndíi ingã xichi núú cundecu cue ndíi. <sup>15</sup> Te ní ñã díú ñũú núú ní quee cue ndíi ní cuĩni cue ndíi núú cue ndíi. Chi núú duca<sup>n</sup> ní sãni iní cue ndíi te nũhú cue ndíi ní cùu. <sup>16</sup> Dico ñáhã chi cuĩni cue ndíi quíhĩ<sup>n</sup> cue ndíi ñ<sup>n</sup> xichi núú vãha-gã cáá cundecu cue ndíi. Te núú dúcá<sup>n</sup> ío-gã vãha càa-án cúú-xí ñũú núú ndécú Yá Ndiöxí, te sá dúcá<sup>n</sup> nĩ sani iní cue ndíi xíã<sup>n</sup> nũu ío vãha cùu iní Yá Ndiöxí cachí-gã sã ñã túú cùcaha<sup>n</sup> núú-gã cúú-gã Ndiöxí cue ndíi-án, te cùtnũni iní-ó sã ndáá sá dúcá<sup>n</sup> cáhá<sup>n</sup>-gã chi ní quide túha-gã ñ<sup>n</sup> xichi núú cundecu cue ndíi-án.

<sup>17</sup> Te ndíi Àbrahám ní xĩndecu ñ<sup>n</sup>ndi-ni dèhe ndíi ndíi ñadihĩ ndíi, te cùtnãhã ní xito ndéé ñáhã Yá Ndiöxí xii ndíi ní xícã<sup>n</sup>-gã dèhe ndíi, ndíi Isàác cuèndã nduu tãhú ñáhã-gã xii ndíi. Te ní xáha<sup>n</sup> ndíi sá cúú ndũu tãhũ-gã dèhe ndíi, te duca<sup>n</sup> nĩ quide ndíi chi ní sándáá iní ñáhã ndíi xii-gã. Te sa ndècu túha ndíi sá cuãñaha ndíi dèhe ndíi xii-gã cuèi mee Yá Ndiöxí ní xáha<sup>n</sup> ndáá-gã xii ndíi <sup>18</sup> sã sã cuèndã ndíi Isàác te ngũndecu cue ñani tnáhã ndíi. <sup>19</sup> Te duca<sup>n</sup> nĩ quide ndíi Àbrahám,

chi ní cutnũni ndáá iní ndíi sá Yá Ndiöxí ndácú-gã dándòto-gã cuèi ñáyũ sa ní xíhĩ. Te sá dúcá<sup>n</sup> nĩ xáha<sup>n</sup> ndíi xii Yá Ndiöxí sá cúú ndũu tãhũ-gã dèhe ndíi, te xíã<sup>n</sup> cada iní-ó sã sã ní xíhĩ ndíi Isàác te ní ndoto tucu ndíi ní nucúndecu ndíi ndíi tãtã ndíi ndíi Àbrahám.

<sup>20</sup> Te ndíi Isàác ní xícã<sup>n</sup> tãhú ndíi núú Yá Ndiöxí cuèndã sã cáda vãha-gã cue dèhe ndíi, ndíi Jácób ndíi ndíi Esàú núú cuahã<sup>n</sup> núú vèxi. Te duca<sup>n</sup> nĩ quide ndíi chi ní sándáá iní ndíi Yá Ndiöxí. <sup>21</sup> Te sa ta cùyatni-nã nduu cùú ndíi Jácób, te ní xícã<sup>n</sup> tãhú ndíi núú Yá Ndiöxí cuèndã cue dèhe ñani ndíi dèhe ndíi Chèé. Te yituu-nã ndíi tatnu ndíi ní chiñũhu ndíi Yá Ndiöxí. Te duca<sup>n</sup> nĩ quide ndíi chi ní sándáá iní ñáhã ndíi xii-gã. <sup>22</sup> Te cùtnãhã sa ta cùyatni vii-nã nduu cùú ndíi Chèé, te ní cachí ndíi sá cuè ñáyũ isràèl sáá nduu quèé-yu núú xĩndecú-yu-án. Te ní cáhá<sup>n</sup> tucu ndíi ñacuáa cadã-yu yiqui cùũú ndíi na sáá nduu quèé-yu núú ndécú-yu-án. Te duca<sup>n</sup> nĩ quide ndíi chi ní sándáá iní ndíi Yá Ndiöxí.

<sup>23</sup> Te cùtnãhã ní cacu ndíi Moisés te ní chivãha ñaha ñaná ndíi ndíi tãtã ndíi únĩ yóó. Te duca<sup>n</sup> nĩ quide cue ndíi-án chi ní sándáá iní cue ndíi Yá Ndiöxí. Te ní quide cuèndã cue ndíi-án sã ío vãha càa ndíi Moisés dèhe cue ndíi, te ñã túú ní yũhú cue ndíi ñacuáa ní cáhá<sup>n</sup> tée cùu Faraón sã cáhni-dè cue landú. <sup>24</sup> Te sãtã ní sahnũ ndíi Moisés te duu<sup>n</sup> duu<sup>n</sup> ní cachí ndíi sã vã càhá<sup>n</sup> ñáyũ sã dèhe yoco tée cùu Faraón cúú ñaná ndíi. Te duca<sup>n</sup> nĩ quide ndíi chi ní sándáá iní ndíi Yá Ndiöxí. <sup>25</sup> Te duca<sup>n</sup> nĩ quide tucu ndíi chi ní tnáhã-gã iní ndíi ndoho ndíi ndíi nchaa ñáyũ cùu cuèndã Yá Ndiöxí dàcúúxĩ sã cudíi iní ndíi cundecu tnaa ndíi ichi cuèhé ichi duha. <sup>26</sup> Chi ní sani iní ndíi sã vãha-gã ndoho ndíi cùcuèhé ñáhã cuè ñáyũ xii ndíi sã cuèndã Yá quixi ñuyúú-a dàcúúxĩ sã cundecu ndíi ndíi nchaa sã ío Ègĩptú. Te duca<sup>n</sup> nĩ quide ndíi chi ní xũhu<sup>n</sup> iní ndíi sã Yá Ndiöxí cuãñaha-gã sã ndúú tãhú ndíi. <sup>27</sup> Te ndíi Moisés ní quee ndíi nació<sup>n</sup> Ègĩptú te ñã túú ní quide cuèndã ndíi sã ío cudéé<sup>n</sup> tée cùu Faraón núú ndíi. Te duca<sup>n</sup> nĩ quide ndíi chi ní sándáá iní ndíi Yá Ndiöxí. Te ní quide càhmu iní ndíi cuèndã nchaa sã ní yãha ndíi, te ní quide iní ndíi sã Yá Ndiöxí ndécú ndíi ñaha túu-gã xii ndíi cuèi ñã túú ní xini núú ñáhã ndíi xii-gã. Te duca<sup>n</sup> nĩ sani iní ndíi chi Yá Ndiöxí ndécú ndíi ñaha-gã xii ndíi.

<sup>28</sup> Te ndíi Moisés cùu ndíi tée ní tausaha nĩ quide vico pãscuã ndíi cue ñáyũ isràèl, te dàvã-án ní táuchíu<sup>n</sup> ndíi ní sahnũ-yu mbéé te ñĩni quiti-án ní dàcanũu-yu yuyèhé-yu. Te duca<sup>n</sup> nĩ quide ndíi chi ní sándáá iní ndíi Yá Ndiöxí. Te duca<sup>n</sup> nĩ quide tucu ndíi cuèndã sã espĩritú sã ní tendaha Yá Ndiöxí cahni-xi mee-ni dèhe tée dèhe díha cue ñáyũ Ègĩptú, te vã cáhni-xi ní ñ<sup>n</sup> dèhe cue

ñáiyu isráel. <sup>29</sup> Te ndute lámár sá nání Mår Tícuèhé ní quée dava-xi ní natúu ñuhu yìchi ní níhi ní yáha cue ñáiyu isráel. Te duca<sup>n</sup> ní cuu chi ní sándáá iní-yu Yá Ndióxi. Te cue tée Ègiptú tnàhá-güedé nchicú<sup>n</sup>-güedé cuáhá<sup>n</sup> dico ñá túú ní ndacu-güedé yáha-güedé chi ní ndihí-güedé ní cáhá.

<sup>30</sup> Te cue ñáiyu isráel ní dúcú<sup>n</sup> ndèe-yu úsá nduu ñúú Jericó te ní ngoyo nchaa sá ñúðoco. Te duca<sup>n</sup> ní cuu chi ní sándáá iní-yu Yá Ndióxi. <sup>31</sup> Te ñ<sup>n</sup> ñaha ní xíndecu ichi ðí iní ní xínani-a<sup>n</sup> Ràhá, ñaha-á<sup>n</sup> ñà túú ní xíhí-a<sup>n</sup> dàtná ní xíhí nchaa ñáiyu ío ní cuu sàá iní-xi núú Yá Ndióxi, chi ní cuu váha iní-a<sup>n</sup> núú cuè tée ní tendaha cuè ñáiyu isráel ní sángoto dayuhu ñúú-a<sup>n</sup>. Te duca<sup>n</sup> ní quide-a<sup>n</sup> chi ní sándáá iní-a<sup>n</sup> Yá Ndióxi.

<sup>32</sup> Te núu dicó sá cúú te cáhá<sup>n</sup>-í cuendá ndí Gedéon, ndihí cuendá ndí Bàrác, ndihí cuendá ndí Sànsón, ndihí cuendá ndí Jéfté, ndihí cuendá ndí Dàvíí, ndihí cuendá ndí Sàmúél, ndihí cuendá nchaa cue tée ní xóo cáhá<sup>n</sup> tnúhu Yá Ndióxi ndéé sanaha, te nchaa cuendá cue tée-á<sup>n</sup> cáhá<sup>n</sup>-í te núu dicó cùyáchi-í dico ñá túú cùyáchi-í. <sup>33</sup> Te nchaa cue ndí-á<sup>n</sup> ní sándáá iní cue ndí Yá Ndióxi núu xíá<sup>n</sup> ní xóo ndacu cue ndí ní xóo nàa cue ndí ndihí nchaa ñáiyu dava-gá ñúú. Te nchaa ñáiyu-á<sup>n</sup> ñà túú ní xóo ndacu-yu nàa-yu ndihí cue ndí, te ní xóo cada cue ndí nchaa nàcuáa tàù-xi cunduu, te ní quide váha ñaha Yá Ndióxi xii cue ndí dàtná ní cachí-gá cada ñaha-gá xii cue ndí. Te cuèi nchaa cue quiti déé<sup>n</sup> ñà túú ní ndacu-güedé ná cada ñaha-güedé xii cue ndí. <sup>34</sup> Te ní xóo ndacu cue ndí ní xóo ndahvá cue ndí ñuhú sá vâ yóo tnàhí ndacu ndahvá, te ní cácu cue ndí vâ yóo ní ndacu cahni ñaha xii cue ndí. Te cue ndí-á<sup>n</sup> ñà túú níhi ndéé cuè ndí ní cuu, dico ní níhi ndéé cuè ndí chi Yá Ndióxi ní chindee ñaha-gá xii cue ndí, te nchaa ndí-á<sup>n</sup> ío ní níhi ndéé cuè ndí ní nàa cue ndí ndihí nchaa ñáiyu ní cuu úhú iní ñáhá xii cue ndí, te nchaa ñáiyu duca<sup>n</sup> ní xóo nàa ndihí cue ndí-á<sup>n</sup> ñà túú ní xóo ndacu-yu nàa ndihí ñáhá-yu xii cue ndí chi ní xóo cunú-yu. Te duca<sup>n</sup> ní cuu chi ní sándáá iní cue ndí Yá Ndióxi. <sup>35</sup> Te dava ñáiyu ðihí ní nduu táhù-yu ní ndoto cue ñáiyu ní xíndecu ndihí-yu ní nucúndecu ndihí ñaha tùcú-yu.

Te dava ñáiyu ío ní dándóhó ñaha tnaha ñáiyú-yu te ní xíhí-yu, dico ñà túú ní dàñá-yu ichi váha nàcuáa cácu nihnú-yu núu tnaha ñáiyú-yu, te duca<sup>n</sup> chi ní cuini-yu sá ndótó-yu ndéé cuèé-gá nàcuáa ngúndecu váha-yu núu ndécú Yá Ndióxi. <sup>36</sup> Te dava cue ndí ío ní ndoho cue ndí chi ío ní cudíquí ndéé ñáhá ñáiyu xii cue ndí, te ní canihá-yu xii cue ndí, te dava cue ndí ní dácútú ñáhá-yu, te ní chihí ñáhá-yu xii cue ndí vecaá. <sup>37</sup> Te dava cue ndí ní sahni

ñáhá-yu ndihí yúú. Te dava cue ndí ní chidava ndáá ñáhá-yu ní xehndé ñáhá-yu ndihí sierrá. Te dava cue ndí ní xito ndéé ñáhá-yu te núu ndísa sá sándáá iní cue ndí Yá Ndióxi, te dava cue ndí ní sahni ñáhá-yu ndihí machiti. Te mee-ni ñí mbéé ndihí ñí chivá, ní xóo cuu dóo cue ndí. Te mee-ni ñí cue quiti-á<sup>n</sup> ní xóo cuu dóo cue ndí cuèi ndèni ní cuu ní xóo caca cuu cue ndí. Te mee-ni cue tée ndáhú ní cuu cue ndí. Te ío ní xóo dandihú-yu iní cue ndí, te nándi sá ní xóo cada ñáhá-yu xii cue ndí ní xóo dandoho ñáhá-yu. <sup>38</sup> Te cue ndí-á<sup>n</sup> ío-gá ní xínduu váha iní cue ndí dácúúxi nchaa dava-gá ñáiyu. Te nchaa cue ndí-á<sup>n</sup> ní xica cuu cue ndí cuèi nchaa núú ñà túú vâ yóo tnàhí ndéu, te cuèi xití yucu ní xica cuu cue ndí. Te ní xóo cada vehe cue ndí nchaa yaú cava. Te ndèni ní cuu nchí yaú ní xóo cundecu cue ndí. <sup>39</sup> Te ío ní cuèi cue ndí núú Yá Ndióxi cuendá sá ní sándáá iní ñáhá cuè ndí xii-gá. Te cuèi duca<sup>n</sup> ní quide cue ndí dico ñà túú ní xini cue ndí nchaa sá ní cachí Yá Ndióxi cada-gá. <sup>40</sup> Te duca<sup>n</sup> ní cuu chi ñ<sup>n</sup> sá ío-gá váha ní cachí Yá Ndióxi cada-gá. Te sá dúcá<sup>n</sup> ío-gá váha ní cachí-gá cada-gá cúú-xi cuendá nchoo ndihí cuendá cue ndí-á<sup>n</sup> cuendá sá ñí díú mèe-ni cue ndí-á<sup>n</sup> cundáá cue ndí núú-gá, chi tnàhá nchoo cundáá-ó núú-gá.

## 12

### *Ío cuhu<sup>n</sup> iní-ó Xitohó Jesucristú*

<sup>1</sup> Te cue ñáiyu ní xíndecu ndéé sanaha ní quide-yu nàcuáa ní cutnúni sá ní sándáá iní-yu Yá Ndióxi. Te cada iní-ó sá ncháá ñáiyu-á<sup>n</sup> xíndéhé ñáhá-yu xii-o vitna. Núu xíá<sup>n</sup> xíni ñuhu-xi sá vâ cáda-ó ní ñ<sup>n</sup> sá cuèhé sá dúhá chi diu nchaa xíá<sup>n</sup> quide-xi ñà túú cundáá-ó núu Yá Ndióxi. Te vâ cáda cuendá-ó nchaa sá quidé tnèñu iní-ó nàcuáa ndacu-o càda-o nchaa nàcuáa càhá<sup>n</sup>-gá. Te ío cànhu cunduu iní-ó cànchicú<sup>n</sup> nihnu-o càda-o nchaa nàcuáa ní cachí-gá cada-o cundecu-o ñuyíú-a. <sup>2</sup> Te ío cuhu<sup>n</sup> iní-ó Xitohó Jesucristú, chi diu-gá ní quide ní sándáá iní-ó Yá Ndióxi, te diu-ni duca<sup>n</sup> quide-gá cuèi vitna te cuèi ndéé núu cuáhá<sup>n</sup> núu vèxi diu-ni duca<sup>n</sup> càda-gá sá quindáá iní-ó Yá Ndióxi. Te Xitohó Jesucristú ío ní quide ndee iní-gá ní ndoho-gá te ní xíhí-gá núu cùrúxi, te ñà túú ní quide cuendá-gá cuèi ñ<sup>n</sup> sácá<sup>n</sup> núu cúú-xi sá dúcá<sup>n</sup> ní ndoho-gá. Te duca<sup>n</sup> ní quide-gá chi sa nàha-gá sá ná yáha sá dúcá<sup>n</sup> ndoho-gá te ío cudíí iní-gá. Te vitna núcoco-gá xii cùha núu núcoco Yá Ndióxi te tàxi tnuni-gá.

<sup>3</sup> Te xini ñuhu-xi sá ío cada cuendá-ndó nàcuáa ní quide Xitohó Jesucristú chi Yáá-á<sup>n</sup> ío ní quide cànhu iní-gá nchaa sá ní



ndoho-gá ní quide ñaha nchaa ñáiyu ndècu ichi cuehé ichi duha xii-gá. Te duca<sup>n</sup> cada cuendá-ndó nàcuáa ní quide-gá cuendá sá vâ tûu dusa<sup>n</sup>-ndo, te ní vâ nátúhú iní-ndó càda-ndo nchaa nacuaa càhá<sup>n</sup>-gá. <sup>4</sup> Te nchòhó dáquèe tihú-ndó nchaa sá cuehé sá dúhá dico vátá càhní ñaha-gá-yu xii-ndo sá dúcá<sup>n</sup> quide-ndo. <sup>5</sup> Te ndacu iní-ndó nàcuáa càhá<sup>n</sup> Tàtá-ó Dütú Ndiòxi dásàhú ñahá-gá xii nchoo cuè ñáiyu cùu dèhe-gá. Te duha càchí-gá núu tûtú-gá:

Nchòhó cue dèhe mee-í, vâ cání iní-ndó sá áu<sup>n</sup> nã cuu dândoho ñaha-í xii-ndo, te ní vâ nátúhú iní-ndó òré càhá<sup>n</sup>-í dóho-ndo nàcuáa cada-ndo cùndecu-ndo.

<sup>6</sup> Chi mee-í dándoho-í nchaa ñáiyu cùu iní-í cuendá sá cùndáa-yu núu-í, te quide úhú-í-yu, te ñu-ní-yu cùu-yu ñáiyu càchí-í cùu dèhe-í.

Duha càchí-gá núu tûtú-gá. <sup>7</sup> Te ío cada ndee iní-ndó sá dúcá<sup>n</sup> dândoho ñaha Yá Ndiòxi xii-ndo, chi quide-gá sá cùu-gá Tàtá-ó. Te ñá túú ní ñ<sup>n</sup> tée cùu tátá te cachí-ó sá ñá túú sànu ichi-dé cue dèhe-dé nàcuáa tàù-xi cunduu.

<sup>8</sup> Te núu Yá Ndiòxi ñá túú dândoho ñaha-gá xii-ndo dátá dándoho-gá cue ñáiyu càchí-gá cùu dèhe-gá, te ñá díú dèhe mee-gá cùu-ndó te núu duca<sup>n</sup>, chi cùu-ndo datná cue ñáiyu ñá túú cùnuni yoo cùu tátá-xi. <sup>9</sup> Te nchoo sá naha-o sá cùtnàhá ní cuu landú-ó ní sanu ichi ñaha tátá-ó nàcuáa tàù-xi cunduu, te duca<sup>n</sup> ní xóo canehe-o sá yíñùhu núu-güedé te ñu-ni duca<sup>n</sup> nèhe-o sá yíñùhu núu-güedé vitna. Te núu duca<sup>n</sup> ní sándáa iní-ó tátá-ó, te ío-gá xíní ñùhu-xi quindáa iní-ó Tàtá-ó Dütú Ndiòxi cuendá duca<sup>n</sup> ndùu táhú-ó cùndecu-o ndihí-gá ní caa ní quihí<sup>n</sup>, chi ñu-gá cùu-gá Yáa ní chihí iní-ó. <sup>10</sup> Te cùtnàhá ní cuu landú-ó, ñá túú tíni nduu ní càniha tátá-ó ní sanu ichi ñaha-güedé xii-o nàcuáa ní cuu iní meé-güedé. Te Yá Ndiòxi duca<sup>n</sup> dândoho ñaha-gá xii-o sànu ichi ñaha-gá cuendá cùu-xí sá vâha sá cùu-xí-ó, te duca<sup>n</sup> quide-gá cuendá nchoo càda ndáá-ó dátá quidé mèe-gá. <sup>11</sup> Te òré véxi ñ<sup>n</sup> tnúndòho sá cùu-xí-ó te ñá túú cùdí iní-ó chí dándihú iní ñahá-xí xii-o. Te nchaa ñáiyu ngúnu ichi sá cuendá nchaa tnúndòho-án te ngüita-yu quide ndáá-yu, te ío vâha cùu iní-yu ndécú-yu.

#### *Vâ dáquèe tihú-ó tnùhu Yá Ndiòxi*

<sup>12</sup> Te núu xiá<sup>n</sup> ío chí ndúcú ndèe-gá canchicú<sup>n</sup> nihnu-ndo ichi Xítohó Jesucristú, te vâ dicó yica cùu iní-ndó canchicú<sup>n</sup> nihnu-ndo ichi-gá. <sup>13</sup> Te cada vâha-ndo cùndecu-ndo ichi-gá cuendá nchaa ñáiyu sàni ñ<sup>n</sup> sàni úú iní-xí níhí ndéé-yu cundécú-yu ichi-gá te vâ ná tûhú iní-yu canchicú<sup>n</sup> nihnú-yu.

<sup>14</sup> Te nducu-ndo nàcuáa cada-ndo cùndecu vâha-ndo ndihí cue tñaha ñáiyu-ndo, te ío cada vâha-ndo cùndecu-ndo nacuaa cundáa-ndó núu Yá Ndiòxi chí núu vâ dúcá<sup>n</sup>

càda-ndo te vâ ndúu táhú-ndó cùndecu-ndo ndihí-gá. <sup>15</sup> Te ío vâha cada cuendá-ndó nàcuáa cada-ndo cùndecu-ndo, chí núu ñahá te vâ chindèe ñaha-gá Yá Ndiòxi xii-ndo. Te ío vâha cada cuendá tucu-ndo nàcuáa cundecu-ndo vâ cání cuehé iní-ndó cuendá Yá Ndiòxi, chí núu duca<sup>n</sup> na càda-ndo te dâva-gá ñáiyu ndècu ndihí-ndo ichi-gá tñahá-yu ngüita-yu duca<sup>n</sup> càda-yu, te vâ cùndecu vâha-gá-ndó ndihí-yu ichi-gá. <sup>16</sup> Te cada cuendá tucu-ndo sá vâ cùndecu-ndo ichi díú iní, te ní vâ dáquèe tihú-ndó ní ñ<sup>n</sup> sá cùu cuendá Yá Ndiòxi dátá ní quide ndii Esàú, chí sá cuañaha tátá ndii-án nduu táhú ndii ní cùu ní dama ndii ñ<sup>n</sup> cóho comidá. <sup>17</sup> Te nchòhó sa nâha-ndo sá cùtnàhá ní cuini ndii Esàú cacá<sup>n</sup> táhú tátá ndii núu Yá Ndiòxi cuendá nchaa sá ndúu táhú ndii ní cùu, te ñá túú ní xicá<sup>n</sup> táhú tátá ndii núu Yá Ndiòxi nàcuáa cuini meé ndii ní cùu. Te ní ndáhyú víhí ndii, te cuèi duca<sup>n</sup> ní quide ndii dico ñá túú ní ndàcu-gá ndii nanihí ndii táhú sá ní dama ndii comidá.

<sup>18</sup> Te cue ñáiyu israél ní sáuhá-yu ñ<sup>n</sup> yucu núu càyú ñuhú, te nchòhó ñá túú ndéé duca<sup>n</sup> sàhá<sup>n</sup> tuha-ndo ñ<sup>n</sup> yucu núu càyú ñuhú dátá ní quide cue ñáiyu-án. Te cùtnàhá duca<sup>n</sup> ní sáuhá-yu yucu-án te ní cunee víhi nihii yucu-án, te ní quene táchí níhi. <sup>19</sup> Te ní tecú dóho-yu ní càhá<sup>n</sup> ñ<sup>n</sup> cútú, te ní tecú tucu dóho-yu ní càhá<sup>n</sup> Yá Ndiòxi ní càhá<sup>n</sup> ndihí ñaha-gá xií-yu. Te nchaa ñáiyu ní tecú dóho-xi ní càhá<sup>n</sup>-gá te ní cuini-yu sá vâ càhá<sup>n</sup>-gá. <sup>20</sup> Te duca<sup>n</sup> ní quidé-yu chí ñá túú ní cùndee iní-yu nàcuáa ní càhá<sup>n</sup>-gá, te duha ní cachí-gá: “Te cuèi ñ<sup>n</sup> quiti ná yáha xiti yucu-a, te cahni-ndo-di ndihí yúú àdi ndihí ñ<sup>n</sup> yutnu puyá”, duha ní cachí-gá. <sup>21</sup> Te sá dúcá<sup>n</sup> ní quide-xi ní xini-yu xiá<sup>n</sup> ío ní dáyùhú ñahá-xí xií-yu. Te tñahá té Moisés ní yùhú-dé, te ní cachí-dé: “Quidi ñaha-xi xii-í sá yùhú-í”, duha ní cachí-dé.

<sup>22</sup> Te nchòhó, ñá túú quide-ndo datná ní quide cue ñáiyu-án ní sàhá<sup>n</sup> tuhá-yu yucu-án, dico cada iní-ndó sá sá ní tuha-ndo yucu Sión sá ndécú núu ndécú Yá Ndiòxi, ndihí ñuú-gá ñuú Jerusalén sá ndúu àndiu te ñu-gá cùu-gá Yáa ndécú nchaa cùu nchaa quíu. Te ñu-ni xiá<sup>n</sup> xñdecu cuehé víhí cuè espíritú xínú cuèchi núu-gá <sup>23</sup> chíñùhu ñaha-xi xií-gá. Te nchòhó cùu-ndó cuè ñáiyu cùu cuendá Yá Ndiòxi, te ní tñahá tnùhu-ndo ndihí nchaa dâva-gá ñáiyu cùu cuendá-gá, ñáiyu yodo tnuni núu tûtú-gá ndécú àndiu, te ñu-ni ñáiyu-án cuañaha-gá xií-yu sá ndúu táhú-yu. Te nchòhó ní tuha-ndo Yá Ndiòxi Yáa cada ndáa yíca cuèchi nchaa ñáiyu. Te cada iní-ndó sá ní tñahá tnùhu-ndo ndihí cue ñáiyu ní quide ndáa ní xñdecu ichi Yá Ndiòxi ñuyúy-a. Te ñáiyu-án ñá túú tñahí-gá ná cùmání-yu vitna ndécú-yu núu-gá. <sup>24</sup> Te

ní tnahá tnúhu-ndo ndíhi Xítóhó Jesucristú Yaa ní quide nacúaa cada Yá Ndióxi ingá núú sá vâha sá cúú-xí nchâa nchoo ñáyiú ndècu ñuyúú-a, chi ní sati níñí-gã te ní xihí-gá núú cùrúxí. Te níñí Xítóhó Jesucristú ñá túú ñi-ni cuu-xi ndíhi níñí ndíi Abél, chi diu cuendá níñí-gã-án ní quide càhnu iní Yá Ndióxi nchaa cuéchi-o.

<sup>25</sup> Núú xiã<sup>a</sup> ío cada cuendá-ndó vâ dáquêe tihú-ndó tnúhu cãhá<sup>a</sup> Yá Ndióxi, chi nchaa ñáyiú ní xindecu ndéé sanaha dúca<sup>a</sup> ní quidé-yu ní dáquêé tihú-yu tnúhu ní cãhá<sup>a</sup>-gá ñuyúú-a sá cúú-xí-yu. Te ñá túú ní càcu-yu chi ní nacháhu-yu sá dúcá<sup>a</sup> ní quidé-yu. Te uu<sup>a</sup>-gá tucu nchoo chi vâ càcu-o te núú duca<sup>a</sup> na dàquee tihú-ó tnúhu cãhá<sup>a</sup> Yá Ndióxi ndéé andíu sá cúú-xí-ó. <sup>26</sup> Te cútñahá ní cãhá<sup>a</sup> Yá Ndióxi ndéé sanaha te ní quidi-xí ñuyúú. Te vitna cãchi-gá: “Yúhú quidi tucu-í ingá xito ñuyúú, te ñá díú mée-ni ñuyúú duca<sup>a</sup> quidi-í chi tnahá andu quidi-í”, cãchi-gá. <sup>27</sup> Te sá dúcá<sup>a</sup> cãhá<sup>a</sup>-gá sá ingá xito tucu duca<sup>a</sup> càda-gá xiã<sup>a</sup> cútñuní sá nchãándí tihú sá túu ndèhe-o danaa-gá. Te nchaa sá ñá túú ndéé túu quini-ó ñuyúú-a xiã<sup>a</sup> vâ quidi-xí te ní vâ náá-xí. <sup>28</sup> Te núú ní cachí Yá Ndióxi nduu táhú-ó cùndecu-o chi mee-gã táxi tnúni-gá xiã<sup>a</sup>, te ní vâ quidi-xí te ní vâ náá-xí. Te xiã<sup>a</sup> ío xini ñuhu-xí ndacá<sup>a</sup> táhú-ó núú-gã, te yíñuhu yíñuhu cuu cuéchi-o núú-gã nacúaa cuu vâha iní-gá, te duca<sup>a</sup> cùhu<sup>a</sup> iní-ó sá ío càhnu cuu-gá. <sup>29</sup> Te Tãtã-ó Dútú Ndióxi cúú-gã dátñá ñi<sup>a</sup> ñuhú chi danãa-gá nchaa sá ñá túú quide nacúaa cuu vâha iní-gá.

**13**

*Nacúaa tàú-xi cada-o cuendá cuu vâha iní Yá Ndióxi*

<sup>1</sup> Te nchaa nchòhó ñáyiú ndècu ichi Xítóhó Jesucristú, vâ dáñá ndéé-ndó cùu iní tnahá-ndó nacúaa ndècu-ndo ichi-gá. <sup>2</sup> Te cunaha-ndo sá núu ío ñáyiú ñuhu ichi ní quexió-yu vehe-ndo te cuãñaha-ndo vèhe ndetatú-yu, te cuãñaha-ndo sá cãxi-yu. Chi dáva-yu ndéé espíritú xínú cuèchi núú Yá Ndióxi ní sáhá<sup>a</sup> vehé-yu ní quehe<sup>a</sup> cuendá-yu te ñá túú ní cùtnuní iní-yu sá díú espíritú xínú cuèchi núú-gã cúú-xí.

<sup>3</sup> Te ndacu tucu iní-ndó cuè ñáyiú xixíhi vecaá, te cada iní-ndó sá tnahá-ndó yíhi-ndo vecaá ndíhi-yu. Te ndacu tucu iní-ndó nchãa ñáyiú ío ndòho, te cada iní-ndó sá tnahá-ndó ndòho-ndo ndíhi-yu.

<sup>4</sup> Te nchaa ñáyiú na cãchi-yu sá ñi<sup>a</sup> sá vâha cùu-xi sá ñi<sup>a</sup> tée ndíhi ñi<sup>a</sup> ñadhíí ná nihí tnahá-yu candeca tnahá-yu. Te nchòhó cue tée vâ cáni iní-ndó cãhá<sup>a</sup> ndíhi-ndo ñadhíí te núú ñá díú ñadhíí-ndó cúú-yu. Te duca<sup>a</sup>-ni

nchòhó cue ñáyiú díhí tucu vâ cáni iní-ndó cãhá<sup>a</sup> ndíhi-ndo tée te núú ñá díú yíi-ndo cuu-güedé, chi Yá Ndióxi dandòho-gá nchaa ñáyiú ndècu ichi díi iní.

<sup>5</sup> Te vâ cúhú<sup>a</sup> iní-ndó mée-ni díhú<sup>a</sup>. Te núu nándi cùu nchaa sá ndécú ndíhi-ndo te diu-ni nchaa xiã<sup>a</sup> sa nduu vetú iní-ndó, chi Yá Ndióxi ní cachí-gá: “Ní ñi<sup>a</sup> nduu vâ dáñá nihnu ñaha-í xii-ndo, chi nchaa-ni nduu chindee ñaha-í”, duha ní cachí-gá. <sup>6</sup> Te xiã<sup>a</sup> núu nchoo ní yuhu ní iní-ó cãhá<sup>a</sup>-ó ñi<sup>a</sup> ñi<sup>a</sup>-o, te cachí-ó:

Yá Ndióxi cúú-gá Yaa chíndèe ñaha xii-í, núu xiã<sup>a</sup> ñá túú yuhú-í cuèí nándi cãhá<sup>a</sup> ñáyiú cada ñahá-yu xii-í.

Duha cachí-ó.

<sup>7</sup> Chí ndácú iní cue tée ní sanu ichi ñaha xii-ndo ichi Xítóhó Jesucristú cue tée ní cãhá<sup>a</sup> tnúhu Yá Ndióxi núú-ndó, te ío vâha chí nacúaa cuendá nacúaa ní quide nchaa cue tée-á<sup>a</sup> ní xindecu-güedé ndéé ní sáá nduu ní xihí-güedé. Te ío quindáa iní-ndó Yá Ndióxi dátñá ní xóo cada cue tée-á<sup>a</sup>.

<sup>8</sup> Te dátñá ní ní quide Xítóhó Jesucristú ndéé sanaha diu-ni duca<sup>a</sup> quide-gá vitna, te diu-ni duca<sup>a</sup> càda-gá ndéé núú cuahá<sup>a</sup> núú vèxi. <sup>9</sup> Te vâ dáñá-ndó mée-ndo dandahú ñahá ñáyiú dacãhá<sup>a</sup> ñahá xii-ndo natuha-ndo ingá ichi, ñáyiú dànehé tñaha ñáyiú-xi nándi sá ní cutúha-yu, te nchaa xiã<sup>a</sup> ñá túú ñi<sup>a</sup>-ni cahá<sup>a</sup>-xi ndíhi tnúhu sá ndécú ndíhi-ndo. Te Yá Ndióxi chíndèe ñaha-gá xii-o nacúaa níhi ndéé-ó cùndecu-o ichi-gá, te duca<sup>a</sup> te cuu-xi sá vâha sá cúú-xí-ó, te ñá díú cuendá ñi<sup>a</sup> sá xéxi-ó nihí ndéé-ó ndècu-o ichi-gá. Te dava ñáyiú cachí-yu sá dáva núú comidá cuu caxi-o te dava ñahá nacúaa níhi ndéé-ó cùndecu-o ichi-gá, dico ñá ndáá sá sá dúcá<sup>a</sup> vâ cãxi-ó nchãa núú comidá níhi ndéé-ó cùndecu-o ichi-gá.

<sup>10</sup> Chí Xítóhó Jesucristú ní xihí-gá cuendá-ó núú cùrúxí, te nchaa ñáyiú nchicú<sup>a</sup> nihnu-ni quide nchaa nacúaa ní quide nchaa dútú ní xinu cuèchi núú Yá Ndióxi ndéé sanaha, ñáyiú-á<sup>a</sup> vâ cúú tnahá tnúhu-yu ndíhi Xítóhó Jesucristú Yaa ní xihí núú cùrúxí sá dúcá<sup>a</sup> quidé-yu. <sup>11</sup> Chí dútú cùnúu-gá ní xindecu ndíhi cue ñáyiú israhél, tée-á<sup>a</sup> ní xóo canehe-dé níñí nchaa quiti ní xóo cahni-dé ní xóo quíhu ndéé xití cuártú ní cuu íi-gá. Te duca<sup>a</sup> ní xóo cada dútú-á<sup>a</sup> cuendá cada càhnu iní Yá Ndióxi nchaa yícá cuèchi ñáyiú, te cuñú nchaa quiti-á<sup>a</sup> ní xóo cahmi-güedé ñi<sup>a</sup> xio yuhu ñúú. <sup>12</sup> Te duca<sup>a</sup> ní yáha Xítóhó Jesucristú chi ndéé ñi<sup>a</sup> xio yuhu ñúú ní sahni ñaha-güedé xii-gá. Te cuendá níñí-gá sá ní sati núú cùrúxí núú ní xihí-gá, ní nduu ndoo ní nduu nine iní cue ñáyiú sãndáa iní ñahá xii-gá. <sup>13</sup> Te vitna chí ná tñaha-o Xítóhó Jesucristú te cada ndee iní-ó ndòho-o dátñá ní ndoho-gá. <sup>14</sup> Te ñuyúú-a

ni ìn xichi ñá túú ndèé cáá ìn ñúú cudí ni caa ni quíhí<sup>n</sup> cuèndá cundecu-o, dico duca<sup>n</sup>-ni ñúhu iní-ó ìn xichi núú ndúú táhú-ó cundecu-o ni caa ni quíhí<sup>n</sup>.

<sup>15</sup> Te núú xiá<sup>n</sup> xíní ñúhu-xi sá vǎ dáñá ndèé-ó chñúhu-o Dútú Ndióxi chi Xítohó Jesucristú ní quide-gá nàcuáa ndacu-o tnàhá tnúhu-o ndíhi Yá Ndióxi, te òré càhá<sup>n</sup> ndíhi-o-gǎ te nuu núú ndacá<sup>n</sup> táhú-ó núú-gǎ. Te nchaa tnúhu càhá<sup>n</sup>-ó òré càhá<sup>n</sup> ndíhi-o-gǎ túú-xi dàtná ìn táhú sǎ cúú-xí-gǎ. <sup>16</sup> Te vǎ dáñá ndèé-ndó càda-ndo mee-ni sá vǎha cundecu-ndo, te duca<sup>n</sup> chindee tnaha-ndo ìn ìn-ndo ndíhi sǎ ndécú ndíhi-ndo. Te núú duca<sup>n</sup> na càda-ndo te caní iní-ndó sǎ cúú-xí dàtná ìn táhú sǎ ìo vǎha cùu iní Yá Ndióxi.

<sup>17</sup> Te quindáá iní-ndó càda-ndo nchaa nacuáa càhá<sup>n</sup> cue téé yindaha ñaha xii-ndo nacuáa ndècu-ndo ichi Xítohó Jesucristú, chi ñiu cue téé-á<sup>n</sup> quidé cuèndá ñáhá-güedé xii-ndo nàcuáa cundecu váha-ndo núú-gǎ. Te sáá nduu nàcani tnúhu-güedé núú-gǎ núu ní quide váha-güedé àdi ñá túú ní quide váha-güedé ní xíndecu ndíhi ñaha-güedé xii-ndo. Te núú duca<sup>n</sup> na càda-ndo quindáá iní-ndó-güedé te cudí iní-güedé cundecu ndíhi ñaha-güedé xii-ndo, te vǎ ndíhú iní-güedé. Te núú vǎ dúcá<sup>n</sup> càda-ndo te vǎ cúú-xí sǎ vǎha xii-ndo nchaa sǎ quidé-güedé sǎ cúú-xí-ndó.

<sup>18</sup> Te càhá<sup>n</sup> ndàhú-í núú-ndó sǎ càhá<sup>n</sup> ndíhi-ndo Yá Ndióxi cuèndá-ndí. Te nchúhú cúnùní ndáá iní-ndí sǎ ñá túú nǎ cùmǎní-ndí núú Yá Ndióxi, te duca<sup>n</sup> chi ndècu-ndí nàcuáa quide-ndí cundáá-ndí núú-gǎ. <sup>19</sup> Te càhá<sup>n</sup> ndàhú tucu-í núú-ndó sǎ ìo cǎcá<sup>n</sup> táhú-ndó núú Yá Ndióxi cuèndá sǎ méé-gǎ ná cǎdá te ìo ndíhi quixi coto ñaha tucu-í xii-ndo.

#### *Tnúhu ndéé núú nǐ ndíhi-ná*

<sup>20</sup> Te Yá Ndióxi Yaá quidé cùu váha iní-ó ndècu-o, Yaá-á<sup>n</sup> nǐ dándótó-gǎ Xítohó Jesucristú. Te Xítohó Jesucristú-á<sup>n</sup> cúú-gǎ dàtná ìn<sup>n</sup> toli ìo-gǎ quéné cǎva xito mbéé. Te duca<sup>n</sup> sǎtnahá-xi cùu-gǎ cuèndá sǎ nǐ sati níñí-gǎ te ní xíhí-gǎ, te duca<sup>n</sup> nǐ cuu cuèndá sǎ ní quide ndáá-gǎ ndíhi Yá Ndióxi sǎ cǎdá-gǎ ingá núú sǎ vǎha sǎ cúú-xí nchò cue ñáyiú ndècu ñuyíú-a. Te nàcuáa ní quide ndáá-gǎ ndíhi Yá Ndióxi te ñiu-ni duca<sup>n</sup> càda-xi núú cuahá<sup>n</sup> núú vèxi. <sup>21</sup> Te xicá<sup>n</sup> táhú-í núú Yá Ndióxi sǎ méé-gǎ ná chindee ñaha-gǎ xii-ndo cuèndá cada-ndo mèe-ni sǎ vǎha nàcuáa cuní méé-gǎ, te mee-gǎ ná cǎdá ñaha-gǎ xii-o nchaa sǎ vǎha sǎ sání iní-gǎ. Te ñiu-ni duca<sup>n</sup> na tàuchiú<sup>n</sup>-gǎ cada Xítohó Jesucristú sǎ cúú-xí-ó, duha xicá<sup>n</sup> táhú-í núú-gǎ. Te vitna nchaa-o chí ná càchí-ó sǎ ìo càhnu cuu Xítohó Jesucristú ni caa ni quíhí<sup>n</sup>. Te duca<sup>n</sup> na cunduu.

<sup>22</sup> Te càhá<sup>n</sup> ndàhú-í núú nchòhó ñáyiú ndècu ndíhi-í ichi Xítohó Jesucristú sǎ cǎdá càhnu iní-ndó nàcuáa nduu nchaa tnúhu càhá<sup>n</sup>-í dásahú ñáhà-í xii-ndo, chi ñá túú vǎi tnúhu chido tnuní-í núú tütú-a sǎ cúú-xí-ndó.

<sup>23</sup> Te càchí tnúhu-í xii-ndo sǎ tǎ Timùteú téé ndècu ndíhi-o ichi Xítohó Jesucristú ní cǎcu-dé ñá túú-gǎ yíhí-dě vecaá. Te núú na quèxio ndíhi-dé núú ndècú-í te quixi-í ndíhi-dé núú ndècú-ndó quixi coto ñaha-ndí.

<sup>24</sup> Te cúnaha-ndo sǎ ìo na càda ndee iní nchaa cue téé yindaha ñaha xii-ndo nacuáa ndècu-ndo ichi Yá Ndióxi. Te duca<sup>n</sup> cúnaha tucu-ndo xii nchaa dava-gǎ ñáyiú cùu cuèndá-gǎ sǎ ìo na càda ndee iní-yu. Te cue ñáyiú nàció<sup>n</sup> Itàliá ñáyiú ndècu ndíhi-o ichi-gǎ càchí-yu sǎ ìo cada ndee iní-ndó. <sup>25</sup> Te Yá Ndióxi ìo na chindee chítuu ñaha-gǎ xii-ndo nchaa-ndo. Te duca<sup>n</sup> na cunduu. Te ìo chí cǎdá ndèe iní-nǎ vitna.

## TUTÚ NÍ CADÚHA TÉ SÀNTIAÚ

*Té Sántiaú cadúha-dé tutú quíhí<sup>n</sup> ndaha ñáiyu isráel nchité nuu níhí ñuyú*

<sup>1</sup> Yúhú té Sántiaú xínú cuèchi-í núú Yá Ndióxi ndíhi núú Xítoho Jesucristú, te tèe-í tnúhu-a quide ndee iní ñáhà-í xii nchòhó ñáiyu isráel nchité nuu níhí ñuyú-a.

*Yá Ndióxi táxi-gá sá xini tnúni-ó*

<sup>2</sup> Te nchòhó ñáiyu ndécú ndíhi-í ichi Xítoho Jesucristú, ío cudíí iní-ndó cùndecu-ndo cuéi náí cùu sá ùhú véxi cuendá-ndó, <sup>3</sup> chi duca<sup>n</sup> te cutnùni iní-ndó sá sàndáá ndisa iní-ndó-gá, te cunduu càhnu iní-ndó cuéi náí ná yáha-ndo. <sup>4</sup> Te cunduu càhnu-ni iní-ndó te duca<sup>n</sup> te cuu-ndo ñáiyu váha, te cundáá-ndó núú Yá Ndióxi, te duca<sup>n</sup> te ñá túú-gá ná cumání-ndó núú-gá.

<sup>5</sup> Te núu cumání sá xini tnúni-ó, te cacadá-ó núú Yá Ndióxi te mee-gá taxi-gá, chi ío váha iní-gá, te ñá túú cùnini iní-gá núú-ó. <sup>6</sup> Te ní yúhu ní iní-ó cacadá-ó núú-gá, te quindáá ndisa iní-ó sá táxi-gá sá cumání quini tnúni-ó, te vá caní ñ<sup>n</sup> caní úú iní-ó. Chi nchaa ñáiyu sàni ñ<sup>n</sup> sàni úú iní-xi cùu-yu dàtná ndute lámár cuáhá<sup>n</sup>-xi duha cuáhá<sup>n</sup>-xi dàcá<sup>n</sup> nàa-xi òré quené táchi. <sup>7</sup> Te nchaa ñáiyu duca<sup>n</sup> sàni iní-xi, te vá caní iní-yu sá níhí-yu sá xicá<sup>n</sup>-yu núú-gá. <sup>8</sup> Chi nchaa ñáiyu sàni ñ<sup>n</sup> sàni úú iní-xi ñá cùnùni iní-yu ndédacáa sá sàni iní-yu cadá-yu.

<sup>9</sup> Te nchaa ñáiyu ndàhú ñáiyu ndécú ichi-gá, xini ñuhu-xi ñá túú-gá ñá caní iní-yu, mee-ná cudíí iní-yu, chi Yá Ndióxi chindèe ñaha-gá xii-yu. <sup>10</sup> Te nchaa ñáiyu cuica xini ñuhu-xi cundecu váha iní-yu núú Yá Ndióxi cuéi náí ná yáha-yu. Chi ñáiyu-á<sup>n</sup> cùu-yu dàtná itá nchaa cùhú sá ñá túú cudíí naha. <sup>11</sup> Chi òré ní cuu níhí cahni nchíanchii, te ní dádi-ni-xi nchaa cùhú cuíí-á<sup>n</sup> te ní cóyo-ni nchaa itá-xi, te ñá túú-gá cáá vìi. Te duca<sup>n</sup> sàtnahá-xi cùu ñáiyu cuica chi núú chíú<sup>n</sup>-ní-yu xihí-yu.

*Nchaa ñáiyu quide cahnu iní-xi nchaa sá yáha-yu*

<sup>12</sup> Te váha táhú nchaa ñáiyu quide cahnu-ni iní-xi cuéi nándi sá yáha-yu ndécú-yu ichi Yá Ndióxi, chi òré ná ndíhí ncháa xiá<sup>n</sup> yáha-yu, te cuáñaha Yá Ndióxi ñ<sup>n</sup> coróná váha vìhi cundecu ndíhí-yu, te ndáá chi duca<sup>n</sup> càhá<sup>n</sup> Yá Ndióxi sá táxi-gá xii nchaa nchoo ñáiyu ñuhu iní ñáhà xii-gá. <sup>13</sup> Te nchaa ñáiyu sàni iní-xi cada nándi sá cuèhé sá dúhá, te vá caní iní-yu sá Yá Ndióxi táuchiu<sup>n</sup>-gá duca<sup>n</sup> cadá-yu, chi Yá Ndióxi ñá quíú te caní iní-gá cada-gá ñ<sup>n</sup> sá cuèhé

sá dúhá, te ní ñá túú táuchiu<sup>n</sup>-gá sá dúcá<sup>n</sup> cadá-yu. <sup>14</sup> Te cuini-yu cadá-yu nchaa sá cuèhé sá dúhá chi duca<sup>n</sup> véxi iní-yu. <sup>15</sup> Te nchaa ñáiyu ío ñuhu iní nchaa sá cuèhé sá dúhá te quidé-yu, te núu na càda-ní-yu te cuíta nihnú-yu.

<sup>16</sup> Te nchòhó ñáiyu ío cùu iní-í ndécú ndíhi-í ichi Xítoho Jesucristú, vá dàñá-ndó mèe-ndo dandahú ñáhà ñáiyu xii-ndo. <sup>17</sup> Chi nchaa sá váha véxi-xi núú Yá Ndióxi Yáa ndécú àndiu, chi diu mee-gá ní cadúha-gá àndiu ndíhi nchaa chódini, ndíhi yóó, ndíhi nchíanchii. Te Yá Ndióxi ñá túú ndí quehe<sup>n</sup> ndi quehe<sup>n</sup>-gá sá caní iní-gá, te ní ñá túú cùu-gá dàtná ñ<sup>n</sup> cuándahú cuáhá<sup>n</sup>-xi duha cuáhá<sup>n</sup>-xi dàcá<sup>n</sup>, chi ñ<sup>n</sup>-ni sá sàni iní-gá. <sup>18</sup> Te Yá Ndióxi ní cuini-gá sá cùú-ó dèhe-gá, te ndáá sá cùú-ó dèhe-gá chi sàndáá iní-ó tnúhu-gá. Te nchoo ñáiyu sàndáá iní-xi tnúhu-gá cùnùu-gá-ó chi ní nduu-o dèhe-gá.

*Ichi ndáá cuíti*

<sup>19</sup> Te nchòhó ñáiyu ío cùu iní-í ndécú ndíhi-í ichi Xítoho Jesucristú, cund-edòho-ndo ñ<sup>n</sup> tnúhu na càhá<sup>n</sup>-í-a. Te cuini-í sá cundecu túha-ndo cùndedòho-ndo tnúhu Yá Ndióxi, te caní váha iní-ndó nàcuáa càhá<sup>n</sup>-ndó, te cunduu càhnu iní-ndó te vá cùdèé<sup>n</sup>-ndó. <sup>20</sup> Chi núu na cùdèé<sup>n</sup>-ó te ñá túú quide váha-o núú Yá Ndióxi. <sup>21</sup> Te daña-ndo ncháa sá cuèhé sá dúhá ío ñuyú-a. Te quindáá iní-ndó tnúhu Yá Ndióxi ndécú ndíhi-ndo, te vá cùndùu sáá iní-ndó, te duca<sup>n</sup> te naníhí tàhú-ndó.

<sup>22</sup> Te quindáá iní-ndó tnúhu-gá te vá cuendá-ni cundedòho-ndo, chi núu na cùndedòho-ndo te vá tnúú-ndó ñá, te dicó-ni dandahú-ndó mèe-ndo te vá naníhí tàhú-ndó. <sup>23</sup> Chi nchaa ñáiyu dicó-ni sàcùndedòho tnúhu-gá te ñá túú sàndáá iní-yu, ñáiyu-á<sup>n</sup> cùu-yu dàtná ñ<sup>n</sup> ñáiyu sàcùndèhé-ni núú-xi núú yútátá. <sup>24</sup> Chi nini ndèhé-yu ní xini-yu núú-yu, te ní xocání-yu te ní nacuaaa-ní-yu nàcuáa cáá núú-yu. Te duca<sup>n</sup> sàtnahá-xi cùu ñáiyu sàcùndedòho tnúhu Yá Ndióxi, te ñá túú tnúú-yu. <sup>25</sup> Te nchaa ñáiyu dàcuaha ndisa tnúhu ní dándò Yá Ndióxi nihnu-ní-yu ichi-gá, chi ñá díú ñ<sup>n</sup> sá vèe cùu-xi. Te ñáiyu-á<sup>n</sup> ñá túú dicó-ni sàcùndedòho-yu chi quide ndáá-yu núú-gá, te cudíí iní-yu xíndecú-yu.

<sup>26</sup> Te nchaa ñáiyu càchi sá ndécú ichi ndáá te cùtexinu-ni càhá<sup>n</sup>-yu, te xiá<sup>n</sup> dicó-ni dandahú-yu mèe-yu sá ndécú-yu ichi ndáá. <sup>27</sup> Te núu ndécú-o ichi ndáá cuíti ichi Dútú Ndióxi, te chindee-o ncháa ñáiyu ní ndóo ndàhú, ndíhi ñáiyu quèé ndécú ndíhi tnúndòho tnúhu ndàhú, te vá cadá-ó nándi sá cuèhé sá dúhá ío ñuyú-a.

## 2

*Ë<sup>n</sup>nuu-ni cùu iní-ó nchàa tnahà ñáyüu-o*

<sup>1</sup> Te nchòhó ñáyüu ndècu ndihí-í ichi Xítohó Jesucristú Yáa cùnùu, Ë<sup>n</sup>nuu-ni càhá<sup>n</sup> ndihí váha-ndo nchàa tnahà ñáyüu-ndo. <sup>2</sup> Te núu núu nátàcá-ndó chìñuhu-ndo Yá Ndiòxí ní sáá Ë<sup>n</sup> téé ío váha càa dóó ñihnú-dè, te ní sáá tucu Ë<sup>n</sup> téé ñihnu dóó ndàhú, <sup>3</sup> te núu téé ñihnu dóó váha-ni-á<sup>n</sup> néhé-ndó sá yíñùhu núu-dè, te taxinucóo-ndo-dè Ë<sup>n</sup> núu xilé váha, te téé ndàhú-á<sup>n</sup> daxócóo-ndo-dè Ë<sup>n</sup> xio àdi canucóo-ndo-dè núu ñíhú, <sup>4</sup> te núu duca<sup>n</sup> na càda-ndo te ñá túú quide váha-ndo. Chì Ë<sup>n</sup>-ni-dé cùú iní-ndó, te Ë<sup>n</sup>-dé ñá túú cùu iní-ndó.

<sup>5</sup> Te nchòhó ñáyüu ío cùu iní-í ndécú ndihí-í ichi Xítohó Jesucristú, chí cùndèdòho tucu tnúhu na càhá<sup>n</sup>-í-a. Yá Ndiòxí càhá<sup>n</sup>-gá vài ñáyüu ndàhú cuendá tnahá tnúhu ndihí ñàhá-yu xii-gá, te ndècu váha-gá-yu dàcúuxí ñáyüu cuica ñáyüu ñá túú sàndáá iní tnúhu-gá, chí ní cachí-gá sá ncháá ñáyüu na cùu iní ñàhá xii-gá nduu táhù-yu cundecú-yu ndihí-gá ní caa ní quíhí. <sup>6</sup> Te nchòhó, ñá túú ñèhe-ndo sá yíñùhu núu ñáyüu ndàhú, chí núu ñáyüu cuica-ní ñèhe-ndo sá yíñùhu. <sup>7</sup> Te náa ñá cùtnùní iní-ndó sá ñáyüu cuica dàndoho ñàha-gá-yu xii-ndo, te càndeca ñàhá-yu sàhá<sup>n</sup> núu cuè téé cùchiu-á<sup>n</sup>? <sup>7</sup> Te ñu-ní-yu ío càhá<sup>n</sup> cuèhé-yu cuendá Xítohó Jesucristú, te nchòhó sá ní nduu-ndo dèhe-gá.

<sup>8</sup> Te Ë<sup>n</sup> ndudú cùnùu-gá ní càhá<sup>n</sup> Yá Ndiòxí ní ngódó tnùnì núu tùtú-gá càchí-xi sá cùú iní-ó tnahà ñáyüu-ndo dàtná cùú iní-ó mèe-o. Te núu duca<sup>n</sup> na càda-o te quide váha-o. <sup>9</sup> Dico núu ñá túú cùu iní Ë<sup>n</sup>nuu-o cuè tnahà ñáyüu-o, te cuu cuèchi xii-o chí ñá túú quide-o nacuaá càhá<sup>n</sup> Yá Ndiòxí. <sup>10</sup> Te núu Ë<sup>n</sup> ñáyüu ndàunihnu Ë<sup>n</sup> sá càhá<sup>n</sup> Yá Ndiòxí, te dava-ní quidé-yu ña, te ñáyüu-á<sup>n</sup> ñá túú quidé-yu nacuaá càhá<sup>n</sup> ndudú Yá Ndiòxí. <sup>11</sup> Te Yá Ndiòxí ní cachí-gá sá téé ndècu ñadhí-xi vá càhá<sup>n</sup> ndihí-dé ingá ñadhí. Te ñu-ni-gá ní cachí-gá sá vá càhni-ó tnahà ñáyüu-o. Te cuèí ñá túú càhá<sup>n</sup> ndihí-o ingá ñadhí, te núu sàhni-o tnahà ñáyüu-o te ñá túú quide-o nacuaá càhá<sup>n</sup> ndudú Yá Ndiòxí. <sup>12</sup> Te nchoo xini ñuhu-xi càhá<sup>n</sup>-ó tnúhu váha te cada ndáá-ó, chí ñá díú Ë<sup>n</sup> sá vèe cùu-xi sá ní cachí Yá Ndiòxí cada-o. Te mee-gá ní cachí-gá sá càdà ndáá-gá cuèchi-o na sáa nduu. <sup>13</sup> Te nchaa ñáyüu ñá túú cundahú iní tnahà ñáyüu-xi, te vá cùndahú iní ñàhá-gá xii-yu na sáa nduu càda ndáá-gá cuèchi-yu. Te nchaa ñáyüu cundahú iní tnahà ñáyüu-xi te Yá Ndiòxí cundahú iní ñàhá-gá xii-yu na sáa nduu-á<sup>n</sup>.

*Quindáá iní-ó Yá Ndiòxí te cada váha-o*

<sup>14</sup> Te nchòhó ñáyüu ndècu ndihí-í ichi Xítohó Jesucristú, te núu càchí-ó sá sàndáá iní-ó Yá Ndiòxí te ñá túú quide-o sá váha, te ñá túú ndéé nándihí-xi, chí vá nánihí táhù-ó te núu duca<sup>n</sup> na càda-o. <sup>15</sup> Te núu ndèhe-o Ë<sup>n</sup> tnahà ñáyüu-o ñá túú dõ-yu àdi ñá túú sá cùunchitó-yu, <sup>16</sup> te xàha<sup>n</sup>-o: “Núhú-n te nducu-n dóó cuihnu-n te nducu-n sá càxi-n”, xàha<sup>n</sup>-o, te ñá túú nà sàñaha-o, te sá dúcá<sup>n</sup> quide-o te ñá túú quide váha-o. <sup>17</sup> Te núu càchí-ó sá sàndáá iní-ó Yá Ndiòxí te ñá túú quide váha-o ndècu-o, te vèdana nándihí-xi.

<sup>18</sup> Te ío ñáyüu càchí-yu sá sàndáá iní-yu Yá Ndiòxí, te ío ñáyüu càchí-yu sá mèe-ní sá váha quidé-yu. Te yuhú càchí-í sá núu ñá túú quide-o sá váha, te ñá túú sàndáá iní-ó Yá Ndiòxí. Te nchoo quide-o sá váha núu xiá<sup>n</sup> cùtnùní iní-ó sá sàndáá iní-ó-gá. <sup>19</sup> Te ío ñáyüu càchí sá Ë<sup>n</sup>dii-ni Yá Ndiòxí ndécú, te váha-ni càhá<sup>n</sup>-yu. Te tnahá yucu ñávàha ndihí nchaa espíritú cùndihí-xi xini-xi sá ndécú Ë<sup>n</sup>dii-ni Yá Ndiòxí, te yuhú-xi dico ñá túú tñi-xi tnúhu-gá. <sup>20</sup> Te ío ñi ñíquí-ó te núu na càchí-ó sá sàndáá iní-ó Yá Ndiòxí, te vá càdà-ó sá váha. <sup>21</sup> Te ñani tnahá-ó ndii Abrahám téé ní xíndecu ndéé sanaha ní ngúndecu váha ndii núu Yá Ndiòxí, chí ní xito ndéé ñàhá-gá xii ndii núu ndisa sá càhni ndii déhe ndii té Isàac nduu táhù-gá ní cùu, te dàv-á<sup>n</sup> ní cùtnùní iní-gá sá ío sàndáá iní ñàhá ndii xii-gá, núu ñá ní dàña-gá cahni ndii déhe ndii. <sup>22</sup> Te nàha-o sá ndii Abrahám ñá díú-ní sá mèe-ní sá ní sàndáá iní ñàhá ndii xii-gá, chí ní tñi ndii tnúhu-gá. <sup>23</sup> Te duca<sup>n</sup> ní quee ndáá-xi nacuaá càhá<sup>n</sup>-xi núu tùtú Yá Ndiòxí núu càchí-xi: “Ndii Abrahám ní sàndáá iní ndii ní quide ndii nchaa nacuaá ní xáha<sup>n</sup> Yá Ndiòxí, te ní ngúndecu váha ndii núu-gá, te ní cachí-gá sá cùu ndii Ë<sup>n</sup> téé ío váha tnahá tnúhu ndihí-gá”, duha càchí-xi núu tùtú-gá.

<sup>24</sup> Te xiá<sup>n</sup> cùtnùní iní-ó sá ñá díú mèe-ni sá quindáá iní-ó Yá Ndiòxí, chí núu na càda-o nacuaá cuu váha iní-gá te ngúndecu váha-o núu-gá <sup>25</sup> dàtná ní quide-gá tá Ràhàb Ë<sup>n</sup> ñadhí ní xíndecu ndéé sanaha, chí xichí-á<sup>n</sup> ní xíndecu-xi ichi ñí iní, dico ní tuha-xi ichi Yá Ndiòxí te ní ngúndecu váha-xi núu-gá, chí ní chindee-xi cuè téé isràel cuè téé ní xica chiu<sup>n</sup>-gá, te ní sanu ichi ñàha-xi xii-güedé Ë<sup>n</sup> ichi núu vá nánihí ñàhá cuè téé cùu úhú iní ñàhá xii-güedé. <sup>26</sup> Te nchaa ñáyüu càchí sá sàndáá iní Yá Ndiòxí, te ñá túú quidé-yu nacuaá càhá<sup>n</sup>-gá ñáyüu-á<sup>n</sup> cùu-yu dàtná Ë<sup>n</sup> ñáyüu ní xihí. Chí ñá túú-gá ndixí tñi iní-yu nchaa sá cuèhé sá dúhá quidé-yu. Duha sàtnahá-xi cùu nchaa ñáyüu ñá túú cuini tñi tnúhu càhá<sup>n</sup> Yá Ndiòxí.

## 3

*Nàcuáa quide yaa-o*

<sup>1</sup> Te nchòhò ñáiyu ndècu ndihí-í ichi Xitohó Jesucristú, vá ncháá-ndó càni iní-ndó cùu-ndo mestrú dacuàha-ndo ñáiyu tnúhu Yá Ndióxi chí íí cáá-xí. Chí na quítnahá nduu nàcuáha-o cuendá núú-gá, te núú ñá túú ní quide ndáá-ó ñá, te vá cúú váha iní-gá núú-ó. <sup>2</sup> Te nchaa-o ío cuèhé sá ñá túú váha quide-o. Te nchaa ñáiyu ñá túú càhá<sup>n</sup> tnúhu cuèhé tnúhu duha cúú-yu ñáiyu ñá túú ná cúmání chí ío ndáá quide-yu. Te xini-yu cotní-yu mée-yu, te quide váha-yu núú Yá Ndióxi. <sup>3</sup> Te dátaná cuini-ndó cùu ì<sup>n</sup> quiti te núu na chíhi-o frenú yuhu-di, te cotní-o-di te ngúnu ichi-di, te duca<sup>n</sup> sátnahá-xi cùu ñáiyu sácótní mee-xi, chí ñá túú càhá<sup>n</sup>-yu tnúhu cuèhé tnúhu duha. <sup>4</sup> Te dátaná cuini-ndó cùu barcú cuèí nàhnu vihi-xi, dico òré quéné níhi táchí te tündaha-xi ì<sup>n</sup> xio, dico téé dàcaca ndacu-dé dáquihí<sup>n</sup>-dé-xi ndihí ì<sup>n</sup> yutnu sá dánani-güedé tímú ndàa núú càchí iní-dé quihí<sup>n</sup>-xi. <sup>5</sup> Te duca<sup>n</sup> cùu tucu yaa-o chí ío líhi-xi dico ío cuèhé tnúhu càhá<sup>n</sup>-ó ndihí-xi. Te duca<sup>n</sup>-ni sátnahá-xi cùu tucu sá lúhá ñúhú chí sàhmi-xi ì<sup>n</sup> yucu. <sup>6</sup> Te diu-ni duca<sup>n</sup> sátnahá-xi cùu yaa-o chí ío cuèhé tnúhu cuèhé tnúhu duha càhá<sup>n</sup>-ó ndihí-xi, te dàcuíta nihnu ñaha-xi xii-o. Te ío cuéta cuéchi quide-o ndihí-xi cuendá sá ñùyú-a ñúhu tnahá ñúhú tní yucu ñávaha daticá nihnu ñaha-xi. <sup>7</sup> Te ndacu-o càda masú-ó ncháa núú quiti ío ñuyúu cuèí quiti déé<sup>n</sup> quiti xica núú ñúhú, te cuèí quiti ndàva, te cuèí cóo, te cuèí quiti ñúhu xití ndute lámár, chí duca<sup>n</sup> quide dava cue téé ñuyúú-a. <sup>8</sup> Dico yaa-o chí vá yóo ì<sup>n</sup> ndacu cada masú ñáhá xii-xi nacuáa càhá<sup>n</sup>-ó mée-ni tnúhu váha ndihí-xi, chí mee-ni tnúhu cuèhé tnúhu duha cùnuu-gá càhá<sup>n</sup>-ó ndihí-xi. Te cùu-xi datná ì<sup>n</sup> venènu chí ditiu-xi iní-ó. <sup>9</sup> Te diu-ni ndihí yaa-o quide cahnu-o Dútú Ndióxi Yáa cúú Tátá-ó, te diu-ni ndihí yaa-o cahá<sup>n</sup> úhú-ó cuè tnahá ñáiyu-o. Te xini ñuhu-xi vá dúcá<sup>n</sup> càda-o, chí mee-gá ní chíhi-gá sá xini tnúmi-ó ndihí iní-ó, dátaná cáá mée-gá ñúhú iní-gá. <sup>10</sup> Te diu-ni yuhu-o quèe tnúhu váha càhá<sup>n</sup>-ó, te diu-ni yuhu-o quèe tnúhu cuèhé tnúhu duha. Te nchòhò ñáiyu ndècu ndihí-í ichi Xitohó Jesucristú cunaha-ndo sá ñá túú nduu váha-xi duca<sup>n</sup> càda-o. <sup>11</sup> Te ñá túú xini-ndó sá ì<sup>n</sup> núú quèe nihni ndute, te quèe ndute váha te quèe ndute úá-án. <sup>12</sup> Te nchòhò ñáiyu ndècu ndihí-í ichi Xitohó Jesucristú, te ñá túú xini-ndó sá ì<sup>n</sup> yutnu ngúxí, te cùu<sup>n</sup> aceitúná, àdi xini-ndó sá ì<sup>n</sup> yoho yaha stilé te cùu<sup>n</sup> ngúxí. Te duca<sup>n</sup> cuèí ì<sup>n</sup> núú quèe nihni ndute, vá cúú quèe ndute váha te quèe ndute úhá. Te duca<sup>n</sup> sátnahá-xi cùu yuhu-o

chí vá cúú càhá<sup>n</sup>-ó tnúhu váha te càhá<sup>n</sup>-ó tnúhu cuèhé tnúhu duha.

*Nchaa sá váha xini tnúmi-ó tàxi Yá Ndióxi*

<sup>13</sup> Te núu ndècu ñáiyu túha tnúu-ndó ñáiyu cùtnuní iní-xi, te xini ñuhu-xi mee-ni sá váha cadá-yu, duca<sup>n</sup> te cùtnuní iní-ó sá túha ndisá-yu, te vá cadá càhnú-yu mée-yu. <sup>14</sup> Te núu nchoo cuèdú iní-ó te cuini-ó cùnuu-o núú tnahá ñáiyu-o, te vá càchí-ó sá túha-o, chí ñá túú quide ndáá-ó te núu duca<sup>n</sup> na càda-o. <sup>15</sup> Chí ñá díú xiá<sup>n</sup> ní dānehé ñáhá Yá Ndióxi, chí ñuyúu iha ní cacu nihnu-xi cuendá sá yucu ñávaha dàcahu iní ñáhá-xi. <sup>16</sup> Te núú ndécú ñáiyu cuèdú iní ñáiyu cuini cunuu, te yacá<sup>n</sup> mee-ni ndáhú nàá xindécú-yu, te ñá túú quide váha-yu, chí mee-ni ncháa sá cuèhé sá dúhá quide-yu. <sup>17</sup> Te núu ní taxi Yá Ndióxi sá xini tnúmi-ó, te cada váha-o, te càhá<sup>n</sup> ndihí váha-o ncháa tnahá ñáiyu-o, te tní-o tnúhu váha càhá<sup>n</sup>-yu, te cundáhú iní-ó-güè-yu te chindee-ó-yu, te vá cání ì<sup>n</sup> caní úú iní-ó, te ío cunduu ndáá iní-ó. <sup>18</sup> Te núu cuini-ó ñá túú ná cuu cundecu-o ñùyúú-a, te cada váha-o sá cúú-xi tnahá ñáiyu-o cuendá sá ñá túú ná cuu cundecu-o ndihí-yu. Te duca<sup>n</sup> te nguínchicú<sup>n</sup> dava-gá tnahá ñáiyu-o càda váha-yu.

## 4

*Vá cúú cundecu-o ichi Yá Ndióxi te cada-o nāndi sá cuèhé sá dúhá*

<sup>1</sup> ¿Te xini-ndó ná cuendá nàá ñáiyu te xisahní tnahá-yu-án? Te nàa-yu sá tnúhu cuèdú iní, chí diu-ni xiá<sup>n</sup> ñúhú iní-yu, te ñá túú ndècu váha iní-yu. <sup>2</sup> Chí cuini-yu cundecu ndihí-yu ì<sup>n</sup> sá ñá túú ndècu ndihí-yu, te ñá túú nihí-yu núu xiá<sup>n</sup> xicuu cuèdú iní tnahá-yu, te xicuehé tnahá-yu, te càni tnahá-yu, te xisahní tnahá-yu. Te ñá túú nihí-yu sá cuini-yu chí ñá túú xicá<sup>n</sup>-yu núú Yá Ndióxi. <sup>3</sup> Te cuèí xicá<sup>n</sup>-yu ì<sup>n</sup> sá cuini-yu núú-gá te ñá túú sáñaha-gá, chí ñá túú xicá<sup>n</sup>-yu ì<sup>n</sup> sá cúú xii-yu sá váha, chí ì<sup>n</sup> sá ná ndihí-yu núú cadá-yu nchaa sá cuèhé sá dúhá xicá<sup>n</sup>-yu, núu xiá<sup>n</sup> ñá nihí-yu. <sup>4</sup> Te nchaa ñáiyu duca<sup>n</sup> xiquide ío cùu sáá iní-yu núú Yá Ndióxi. Te nàha-ndo sá ncháá ñáiyu cùdú iní-xi cundecu ichi cuèhé ichi duha cùu úhú iní-yu Yá Ndióxi, chí vá cúú cundecu-o ichi cuèhé ichi duha, te cundecu-o ichi-gá. <sup>5</sup> Te ñá túú díó duca<sup>n</sup> càhá<sup>n</sup>-xi núú tütú Yá Ndióxi núú càchí-xi: “Yá Ndióxi ní taxi-gá Espiritú-gá ndécú ndihí-o. Te Espiritú-gá-án cuini-xi sá mée-ní-gá cuhu<sup>n</sup> iní-ó”, duha càchí-xi núú tütú-gá. <sup>6</sup> Te Yá Ndióxi ío chindee ñaha-gá cuendá cada ndáá-ó núú-gá dátaná càchí tucu-xi núú tütú-gá núú càchí-xi: “Yá Ndióxi ñá túú cùu váha iní-gá núú ncháa ñáiyu quide cahnu mee-xi, dico chindee-gá cue ñáiyu ndáhú

iní-xi", duha càhá<sup>n</sup>-xi núú tütú-gá. <sup>7</sup> Te cada-ndo nàcuáa càhá<sup>n</sup> Yá Ndióxi. Te vá cáda-ndo nàcuáa cuini yucu ñávaha, duca<sup>n</sup> te xóo cóo ndéé ñáhá-xí xii-ndo. <sup>8</sup> Te tñii-ndo tnúhu càhá<sup>n</sup> Yá Ndióxi te cundecu ndihi ñaha-gá xii-ndo. Te nchaa nchóhó ñáiyu ndècu ichi cuehé ichi duha dañá-ndo ichi-á<sup>n</sup> te cada váha-ndo. Te nchaa nchóhó ñáiyu sàni iní cunu cuechi núú Yá Ndióxi te quide-ni-ndo nchaa sá cuéhé sá dühá, te ñá túú quide váha-ndo núu duca<sup>n</sup>, chi xini ñuhu-xí sá càcá<sup>n</sup>-ndó núú Yá Ndióxi sá ná ndadá ndòo ndada nine-gá iní-ndo. <sup>9</sup> Te ndixi cuéchi iní-ndo nchaa sá quidé-ndó ndéé ndáhyú ndisa-ndo sá ndihú iní-ndó, te ñá díú dà cudíí iní-ndó. <sup>10</sup> Te náhmá-ndó núú Yá Ndióxi nchaa sá ní quide-ndo, te ngúndecu váha-ndo núú-gá.

*Vá càhá<sup>n</sup>-ó nchaa sá quidé tñaha ñáiyu-o*

<sup>11</sup> Te nchóhó ñáiyu ndècu ndihi-í ichi Xitohó Jesucristú, vá cuatnúhu tnaha-ndo, chi nchaa ñáiyu sàtnuhu tnaha dícó-ni ndaa nuú-yu ndèhe tnahá-yu, te ñá túú càhá<sup>n</sup> váha-yu cuendá tnúhu Yá Ndióxi sá sánú ichi ñaha xii-yu nàcuáa cundecú-yu, chi dáquee tihú-yu tnúhu-á<sup>n</sup>. Te núu càchí-ndó sá ñá túú càhá<sup>n</sup> váha tnúhu Yá Ndióxi, te xíá<sup>n</sup> queé-xí sá ñá túú sàndáá iní-ndó tnúhu càhá<sup>n</sup>-gá, te cuini-ndó cunu tnúhu-ndo núú tnúhu-gá. <sup>12</sup> Te mee Yá Ndióxi ní cachí-gá nàcuáa cada-o, te diu-ni mee-gá càhá<sup>n</sup>-gá te núu ní quide váha-o, ádi ñá túú ní quide váha-o. Te diu-ni mee-gá dácacu nihnu ñaha-gá xii-o núú ùhú núú ndáhú, te diu-ni-gá daquihí<sup>n</sup> ñáhá-gá xii-o núú ùhú núú ndáhú-á<sup>n</sup> te núu vá cáda váha-o. Te nchoo ñá túú ná cúú-ó, te núu mee-ni nchaa sá quidé tñaha ñáiyu-o cundehe-o.

*Ñá túú cùnuni iní-ó nãsa túndaá-ó ìngá nduu*

<sup>13</sup> Te dava nchóhó càchí-ndó sá vitná ádi tneé quihí<sup>n</sup>-ndó ñ<sup>n</sup> ñuu, te yáca<sup>n</sup> cundecu-ndo ñ<sup>n</sup> cuía cada-ndo ñ<sup>n</sup> ndáhú te níhi-ndó díhú<sup>n</sup>. <sup>14</sup> Te ní ñá xini-ndó ná cúú sá yáha-ndo vitna ádi tneé. Te nchoo cùu-o datná ñ<sup>n</sup> vícò núhú, chi vícò-á<sup>n</sup> tnávíí ndéhé-o te tna tnaa-gá sa ní ndóñhú-xí. Duca<sup>n</sup> sàtnahá-xi cùu nchoo chi ñ<sup>n</sup> túú nduu duha véxi-o ñuyúú-a te ndoñhu-o. <sup>15</sup> Te núu sàndáá iní-ó Yá Ndióxi te duha càhá<sup>n</sup>-ó: "Te núu Ndióxi ná càchí-gá sá cundecu tnaa-o ñuyúú-a te cada chlu<sup>n</sup>-o", duha cachí-ó. <sup>16</sup> Dico mee-ndo chi ío ñíí iní-ndó cuini-ndó cunu tnúhu-ndo núú Yá Ndióxi, te ñá túú nduu váha-xi sá dúcá<sup>n</sup> quide-ndo. <sup>17</sup> Te núu xini-ó càda-o sá váha te ñá túú quide-o, te cùu-xi ñ<sup>n</sup> cuéchi núú-gá.

**5**

*Tnúhu sá dátüha ñaha xii nchaa ñáiyu cuica ñá túú sàndáá iní tnúhu Yá Ndióxi*

<sup>1</sup> Te nchóhó ñáiyu cuica ñáiyu cuihna iní-xi cundédoho-ndo tnúhu na càhá<sup>n</sup>-í-a. Vitna ngúita-ndo ndihú iní-ndó, te ndáhyú víhi-ndó, chi quixi ñ<sup>n</sup> tnúndóho cuendá-ndó te ndoho víhi-ndo. <sup>2</sup> Te nchaa sá ndécú ndihi-ndo ndihi cuita tüu quihí<sup>n</sup>, te quee tíquidi dóo-ndó, <sup>3</sup> te díhú<sup>n</sup>-ndó caxi cudi ñúhu. Te xíá<sup>n</sup> cuita naquiní ndéé-ndó tnúndóho sá ñá túú quide váha-ndo. Te ndihi-ndo ndihi díhú<sup>n</sup>-ndó sá ní taxúhu-ndo, chi vitna sa ta cüyatni sáá nduu ndihi ñuyúú-a. <sup>4</sup> Te nchaa cue téé ní quide chlu<sup>n</sup> núú chíú<sup>n</sup>-ndó ní ndatnúhu-ndo ndihi-güedé nàcuáa chàhu-ndo-güedé ní cùu, te ñá túú ní chàhu-ndo-güedé nàcuáa ní xáha<sup>n</sup>-ndo xii-güedé, núu xíá<sup>n</sup> ío ndécucúchi-ndo. Te Yá Ndióxi Yáá ndécú àndiu ní tecú dóho-gá nàcuáa càhá<sup>n</sup>-güedé sá ní dándáhú-ndó-güedé. <sup>5</sup> Te nchóhó ñáiyu cuica, sá ndécú váha-ni-ndo cundee iní-ndó, núu quide-ni-ndo nchaa sá véxi iní-ndó. Te cùu-ndo datná ñ<sup>n</sup> quiti núcuñhu mee-ni xéxi-dí, te sáá nduu sàhni-güedé-dí. Te duca<sup>n</sup> sàtnahá-xi cùu nchóhó chi ndècu váha-ndo vitna, te sáá ñ<sup>n</sup> nduu nàcháhu-ndo nchaa sá quidé-ndó núú Yá Ndióxi te núu vá quindáá iní-ndó-gá. <sup>6</sup> Te quide úhú iní-ndó sàhni-ndo cue ñáiyu quide ndáá núú Yá Ndióxi, te ñá túú ná quidé-yu.

*Cunduu càhnu iní-ó te càhá<sup>n</sup> ndihi-o Yá Ndióxi*

<sup>7</sup> Te nchóhó ñáiyu ndècu ndihi-í ichi Xitohó Jesucristú, cada ndee-ni iní-ndó cündetu-ndo ndéé ná quixi tucu-gá ñuyúú-a, te cada-ndo datná quidé nchaa ñáiyu chihí tatá chi sácündetú-yu ndéé cúú<sup>n</sup> dáú te chihí-yu. Te cundee-ni iní-yu sácündetú-yu ndéé cúú<sup>n</sup>-gá dáú te cùu itú-yu, te ndúdíí iní-yu. <sup>8</sup> Te duca<sup>n</sup> càda nchóhó tucu cada ndee iní-ndó cündetu-ndo, chi sa ta cüyatni nduu quixi tucu Xitohó Jesucristú. <sup>9</sup> Te duha nduu tnúhu càhá<sup>n</sup>-í núú nchóhó ñáiyu ndècu ndihi-í ichi Xitohó Jesucristú, vá ndácá<sup>n</sup> cuéchi núú tnahá-ndó te núu nása cùu ndecu-ndo, chi ñá cuéhé-gá nduu cümání te quixi Cristú nacuaaca ñaha-gá xii-o cündecu-o núú Yá Ndióxi, te mee-gá cada ndáá-gá cuéchi-o. <sup>10</sup> Te nchóhó ñáiyu ndècu ndihi-í ichi Xitohó Jesucristú, ndacu iní-ndó nàcuáa ní quide nchaa cue téé ní xóo càhá<sup>n</sup> tnúhu Yá Ndióxi ndéé sanaha sá ío càhnu ní xinduu iní-güedé cuéi nándí ní ndoho-güedé. <sup>11</sup> Te cùnuni iní-ó sá cúú-ó ñáiyu ío váha táhú-xi te núu na càda càhnu iní-ó nchaa sá ná yáha-o cuendá Yá Ndióxi. Te ñaha-ndo sá ndíí jòb duca<sup>n</sup> ní quide ndíí, chi nándí sá ní yáha ndíí te ní quide càhnu iní ndíí. Te sátá ní yáha ní

ndoho ndí, te ío cuéhé sã ní sãñaha Yã Ndiõxí xii ndí. Chi ío váha iní-gá te ío cùndahú iní-gá nchaa ñáyiú ío càhnu iní-xi.

<sup>12</sup> Te nchòhó ñáyiú ndècu ndihí-í ichi Xítohó Jesucristú, chí cùndèdóho tucu tnúhu na càhá<sup>n</sup>-í-a, chí ío xini ñuhu-xi. Vá cáci nèhe-ndo Yá Ndiõxí òrè cuìní-ndó sã cútnùní iní ñáyiú sá ndàá cada-ndo ì<sup>n</sup> sá càhá<sup>n</sup>-ndó. Te nì vá cáci nèhe-ndo sá càchí-yu cù ndiõxí cádùha cue téé ñuyú-a. Te núu ì<sup>n</sup> sá xicá<sup>n</sup> tnàha ñáyiú-ndo núú-ndó te cúñaha-ni-ndo te núu cuu àdi sá vã cúú. Te vá cáci nèhe-ndo Yá Ndiõxí, duca<sup>n</sup> te vá dándòho ñaha-gã xii-ndo.

<sup>13</sup> Te núu ndòho-ndo te càhá<sup>n</sup> ndihí-ndo Yá Ndiõxí, àdi te núu ndècu váha-ndo te cudí iní-ndó te chiñuhu-ndo-gã, <sup>14</sup> àdi núu cùhú-ndó te cana-ndo cuè téé yindaha ñaha xii-ndo nacuaa ndècu-ndo ichi Yá Ndiõxí cuendá tee-güedé acití díquí-ndó, te cáci<sup>n</sup> táhú-güedé núú-gã cuendá-ndó dàtná ní cachí méé-gã cunduu. <sup>15</sup> Te núu quindáá ndisa iní-ndó sã ndùha-ndo, te ndùha-ndo chí Yá Ndiõxí cada tátna ñaha-gã xii-ndo, àdi núu ní quide-ndo ì<sup>n</sup> sá ñà túú tàú-ndó càda-ndo núú-gã te cada càhnu iní-gá cuéchi-ndo. <sup>16</sup> Te xini ñuhu-xi cútnùhu tnàha-ndo oré ñá túú cùndáá-ndó núú Yá Ndiõxí cuendá chindee tnúhu tnàha-ndo càhá<sup>n</sup> ndihí-ndo-gã te xocani-gã cuéhé-ndó, te cada càhnu iní-gá nchaa sá ñà túú váha ní quide-ndo te núu cundecu váha iní-ndó. Te nchaa ñáyiú ndècu váha iní-xi núú Yá Ndiõxí na càcá<sup>n</sup>-yu ì<sup>n</sup> sá cuìní-yu núú-gã te ñihí-yu, chí sáá tnúhu-yu núú-gã. <sup>17</sup> Te té Èliás, téé ní xindecu ndéé sanaha ñí cáa-dé dàtná cáá nchò. Te ní càhá<sup>n</sup> ndihí-dé Yá Ndiõxí ñí yùhu ñí iní-dé ní xáha<sup>n</sup>-dè xii-gã sá vã dácùu<sup>n</sup>-gã dáú, te ní tnií-gã tnúhu ní càhá<sup>n</sup>-dé, te ñá ní dácùu<sup>n</sup>-gã dáú ùní cuíá dava. <sup>18</sup> Te dàtnùní duca<sup>n</sup> te ní càhá<sup>n</sup> ndihí tucu té Èliás-á<sup>n</sup> Yá Ndiõxí sá dácùu<sup>n</sup>-gã dáú te ní cuu<sup>n</sup>, te ní cuu tucu nchaa sá ñí xitu-güedé.

<sup>19</sup> Te nchòhó ñáyiú ndècu ndihí-í ichi Xítohó Jesucristú, te núu dava-ndo sã ndècu-ndo ichi Yá Ndiõxí ní cùu te ní dáñá-ndó, te ndècu tucu dava-ndo nadaxínu iní tnáhá-ndó núcúndecu tucu-ndo ichi-gã, <sup>20</sup> te núu duca<sup>n</sup> na càda-ndo te dácácu nihnu tnàha-ndo núú ùhú núú ndàhú, te mee Yá Ndiõxí cada càhnu iní ñáhá-gã xii-ndo cuéi ío cuéhé cuéchi ní quide-ndo.



## TUTÚ DÍHNA NUU NÍ CADÚHA TÉ PÈLÚ

*Té Pèlú cadúha-dé tutú sá cùu-xí cuè ñáyii sàndáá iní ñáhá xii Yá Ndióxi*

<sup>1</sup> Yúhú té Pèlú ní tendaha ñaha Xitohó Jesucristú xicá cùu-í cáhá-ní tnúhu-gá, te cadúha-í tutú-a sá cùu-xí nchòhó ñáyii xínchíté nuu ndècu distritú Pòntó, ndíhi distritú Gàlaciá, ndíhi distritú Capadociá, ndíhi distritú Àsiá, ndíhi distritú Bitiniá. <sup>2</sup> Chi Dútú Ndióxi ní cachí-gá sá cùu-ndó dèhe-gá ndéé cùtnàhá vátá ngáva-gá ñuyú, te Espiritú-gá ní quide-xi ndècu yíñuhu-ndo núu-gá vitna. Te ní cachí-gá sá cùu-ndó dèhe-gá cuendá tñi-ndo nchàa tnúhu cáhá-ní Xitohó Jesucristú, ndíhi cuendá nduu ndoo nduu nine iní-ndó, chi diu cuendá-án ní xihí Xitohó Jesucristú. Te xicá-ní tànhú-í núú Yá Ndióxi sá io na chindee chitúu ñaha-gá xii-ndo cuèi vitna te cuèi núu cuahá-ní núu vèxi, te diu-ni-gá ná cadá te io váha cuu iní-ndó cùndecu-ndo.

*Tnúhu ndee iní sá ndécú ndíhi ñáyii sàndáá iní ñáhá xii Yá Ndióxi*

<sup>3</sup> Te vitna chí ná cächí-ó sá io cànhu cuu Yá Ndióxi Yáá cùu Tàtá Xitohó Jesucristú, chi diu-gá io ní cundàhú iní ñáhá-gá xii-o núu xiá-ní quide-gá sá nchóó ní nduu-o dàtná ñi ñáyii saa vitna. Te duca-ní quide ñaha-gá xii-o cuendá sá Xitohó Jesucristú ní xihí-gá te ní ndoto-gá. Te cuendá sá ní nduu-o dàtná ñi ñáyii saa, xiá-ní ngúndecu ndíhi-o tnúhu ndee iní <sup>4</sup> sá cùndecu ndíhi-o-gá ní caa ní quíhí, chi duca-ní cachí-gá cunduu. Te yàcá-ní vá quini-gá-ó ní ñi sá cuèhé sá dúhá, te io cùdíí iní-ó cùndecu-o ndíhi-gá ní caa ní quíhí. <sup>5</sup> Te sá sàndáá iní-ó Yá Ndióxi, núu xiá-ní coto ñaha-gá xii-o ndéé ná sáa nduu nàquehe-ní cuendá ñáhá-gá chi io cànhu cuu-gá.

<sup>6</sup> Te xiá-ní io cùdíí iní-ndó ndècu-ndo, te cuèi nándi ndòho-ndo ndecu-ndo dico sacú-ní nduu duca-ní ndòho-ndo. <sup>7</sup> Te òré ná cadá cànhu iní-ndó yàha-ndo nchàa sá ná cada ñaha ñáyii xii-ndo, te duca-ní te cutnùní sàndáá ndisa iní-ndó Yá Ndióxi, te sá dúcá-ní sàndáá iní-ndó Yá Ndióxi io-gá váha dàcúuxí díhú-ní cuàá-ní chi xiá-ní ñá túú cùdí-xi. Te cuèi duca-ní dico xito ndéé nánhí-ní-güedé núu ndisa cùu-xi díhú-ní cuàá-ní. Te duca-ní sàtnahá-xi cùu nchòhó cuendá nchaa sá ndòhó-ndó, te na sáa nduu quixi tucu Xitohó Jesucristú te cùñaha-gá xii-ndo: “Ío váha ní quide-ndo, te vitna io cànhu cuu-ndo, te tãu-ndó nùcúndecu váha-ndo”, duha cùñaha-gá xii-ndo.

<sup>8</sup> Te vitna io cùu iní-ndó Xitohó Jesucristú cuèi vátá quini-gá-ndó-gá, te duca-ní io sàndáá iní-ndó-gá, te io cùdíí iní-ndó te súúni ní ñá cùtnùní iní-ndó nãsa cunduu tnúhu cáhá-ní-ndó sá dúcá-ní io cùdíí iní-ndó <sup>9</sup> cuendá sá ní naníhí tànhú-ndó, chi ní sàndáá iní-ndó-gá.

<sup>10</sup> Te cue téé ní xóo cáhá-ní tnúhu Yá Ndióxi ndéé sanaha ní cachí-güedé nàcuáa cada-gá cundàhú iní ñáhá-gá xii-o vitna. Te cue téé-án io váha ní dàcuáhá-güedé nàcuáa cada Yá Ndióxi dàcácu nihnu ñaha-gá xii-o vitna. <sup>11</sup> Te Espiritú Xitohó Jesucristú ní ngúndecu ndíhi cue téé-án ní xáha-ní xii-güedé nàcuáa ndoho-gá, te ní xáha-ní tucu-xi xii-güedé sá sàtá ná yàha ndoho-gá te io cunuu-gá ndíhi Yá Ndióxi. Te io ní sani iní-güedé núu ná nduu sáa duca-ní cada-xi, ndíhi nchaa nándi-gá cùu sá cadá-xi. <sup>12</sup> Te Yá Ndióxi ní xáha-ní xii-güedé sá ncháá tnúhu váha cáhá-ní-güedé vá cùu-xi cuendá mée-güedé, chi cuendá nchoo cuè ñáyii ndècu ñuyú-a vitna cùu-xi. Te ní dáha-ní tnúhu-án cùu tnúhu cáhá-ní nchúhú cue téé cáhá-ní tnúhu Yá Ndióxi núu-ndó. Te Espiritú sá ní taxi Yá Ndióxi ndécú ndíhi-o chindee ñaha-xi xii-ndí cáhá-ní tnúhu-gá. Te cue espíritú xínú cuèchi núu Yá Ndióxi io cuini-xi quini ndáá-xi nchaa nàcuáa cuahá-ní tnúhu-án.

*Yá Ndióxi cächí-gá sá cadá-ó mèn-ni sá vãha*

<sup>13</sup> Te sá dúcá-ní io váha ní quide ñaha Yá Ndióxi xii-ndo xiá-ní xini ñuhu-xi io váha cuáha-ndo cuendá nàcuáa cundecu-ndo te vá cání iní-ndó cada-ndo ní ñi sá cuèhé sá dúhá, te io quindáá iní-ndó sá Yá Ndióxi cada váha ñaha-gá nduu na quixi tucu Xitohó Jesucristú. <sup>14</sup> Te io tñi-ndo nchàa tnúhu cáhá-ní Yá Ndióxi, te vá cùhú-ní-gá iní-ndó nándi sá cuèhé sá dúhá sá ní xúhu-ní iní-ndó cùtnàhá vátá cùndecu-gá-ndó ichi-gá te ní vá cadá-ndó. <sup>15</sup> Te cada-ndo mèn-ni sá váha cundecu-ndo dàtná quidé mée Yá Ndióxi Yáá ní cáhá-ní ñáhá xii-o cundecu-o ndíhi-gá. <sup>16</sup> Te cächí-gá núu tütú-gá: “Cada-ndo mèn-ni sá váha cundecu-ndo, chi duca-ní quide yúhú”, duha cächí-gá núu tütú-gá.

<sup>17</sup> Te Yá Ndióxi cada ndáá-gá cuèchi nchaa ñáyii, te vá cadá cuendá-gá cuèi náí ñáyii cùu-yu, te nchòhó cächí-ndó sá díú Tàtá-ndó cùu-gá te ndáá, núu xiá-ní xini ñuhu-xi canehe-ndo sá yíñuhu núu-gá ndí nchàa nduu cundecu-ndo ñuyú-a. <sup>18</sup> Te diu-gá ní dàcácu nihnu ñaha-gá xii-ndo ñi ichi sá ñá túú nándíhi ní sanu ichi ñaha cuè ñani tnáhá-ndó ní xindecu ndéé sanaha ní cùu, te nchòhó sa nàha-ndo sá sá dúcá-ní ní quide ñaha Yá Ndióxi ní dàcácu nihnu ñaha-gá xii-ndo ichi-án ñá túú ní chãhu-gá ní ñi díhú-ní cuàá-ní, te ní ñi díhú-ní cuixí-ní sá ndíhí

nihnu ñuyú-a cuendá-ndó. <sup>19</sup> Chi Xítoho Jesucristú ní quixi-gá ní sati ñíñi-gá, te ní xihí-gá núú cürúxi cuendá sá nchóó nánihí tãhú-ó, te cùu-gá dàtná ìª mbéé quiti ío váha iní-xi, quiti càndoo canine. <sup>20</sup> Te ducaª ní ndoho Xítoho Jesucristú, chi ducaª tnàhí ndéé tnuní ndoho-gá ndéé cùtnàhá vátá ngáva-gá ñuyú. Te ducaª ní yáha-gá cùtnàhá ní quixi-gá òré vitna cùmání sáa nduu náa ñuyú-a cuendá nchoo cùu-xi sá váha xii-o vitna. <sup>21</sup> Te nchóho sa nihí-ndó tñuhu nàcuáa ní yáha Xítoho Jesucristú cùtnàhá ní quixi-gá ñuyú-a, núú xiªª sàndáa iní-ndó Yá Ndióxi. Te Yá Ndióxi ní dándótó-gá Xítoho Jesucristú, te sátá ní dándótó ñaha-gá te ní cachí-gá sá ío càhnu cuu Xítoho Jesucristú. Te sá dúcªª ní cuu, xiªª ío sàndáa iní-ndó Yá Ndióxi, te ní taxi-gá tñuhu ndee iní ndécú ndihí-ndo sá sáa nduu cùndecu-ndo ndihí-gá ní caa ní quíhíª.

<sup>22</sup> Te Espiritú Yá Ndióxi ní quide-xi te ní sàndáa iní-ndó tñuhu-gá, te xiªª ní nduu ndoo ní nduu nine iní-ndó, te cùu iní tnáhá ndisa-ndo nacuáa ndècu-ndo ichi Yá Ndióxi, te xini ñuhu ndisa-xi sá ío ní yùhu ní iní-ndó cùu iní tnáhá-ndó ìªª ìªª-ndo. <sup>23</sup> Te nchóho ní nduu-ndo dàtná ìªª ñáyiu saa sá cuendá tñuhu Yá Ndióxi, te tñuhu-ªª candeca-xi iní-ndó nì caa ní quíhíª, te vá ìªª ndùu ndihí nihnu-xi, te ñá díú cuendá ñáyiu ñuyú-a ní ndùu-ndo ìªª ñáyiu saa chi cuendá tñuhu-gá. <sup>24</sup> Chi núú tütú Yá Ndióxi cachí-xi:

Nchaa ñáyiu ndècu ñuyú-a cùu-yu dàtná cùhú, chi cùhú-ªª tnaa-ni cùdí-xi te xihí-xi, ducaª sãtnahá-xi cùu-yu.

Te nchaa sá ndécú ndihí-yu cùu-xi datná ìªª itá cùhú-ªª, chi itá-ªª tnaa-ni tucu cùdí-xi te ndàhvá-xi, ducaª sãtnahá-xi cùu nchaa sá ndécú ndihí-yu.

<sup>25</sup> Dico tñuhu Yá Ndióxi chi vá náa tnàhí-xi, chi duha-ni ndècu-xi, te díu-ni duha cundecu-xi ní caa ní quíhíª.

Duha cachí-xi núú tütú-gá. Te díu tñuhu-ªª ní dánèhé ñáhá nchùhú cue téé càháª tñuhu Yá Ndióxi xii-ndo.

## 2

<sup>1</sup> Te xiªª xini ñuhu-xi dañá-ndo nchaa núú sá cuèhé sá dúhá, te dañá-ndo ichi tñuhu ndehnde, te dañá-ndo vã dándàhú-gá-ndó mèe-ndo sá quidé váha-ndo, te dañá-ndo ichi cuedú iní, te dañá-ndo nchàa tñuhu yiti.

<sup>2</sup> Te cada-ndo cuendá sá cùu-ndó dàtná cue landú yíquíª vitna sadi camá, chi landú-ªª mee-ni sãdi-güexi te sãhnu-güexi. Te cada iní-ndó sá dúcªª càda-ndo chi xini ñuhu-xi sá ío cuhuª iní-ndó dàcuaha-ndo tñuhu Yá Ndióxi, chi xiªª cùu-xi mèe-ni tñuhu váha, te ducaª te cuita cuehnu nihnu-ndo ichi-gá quíhíª ndéé ná sáa nduu cùndecu-ndo núú ndécú-gá. <sup>3</sup> Te ducaª xini ñuhu-xi cada-ndo,

chi nchóho sa ní cutnùni ndisa iní-ndó sã Yá Ndióxi ío váha iní-gá.

### *Xítoho Jesucristú cùu-gá dàtná ìªª yúú*

<sup>4</sup> Te ío nanducu nihnu-ni-ndo Xítoho Jesucristú Yáa quidé nàcuáa nánihí tãhú-ó. Te díu-gá ní cuu-gá dàtná ìªª yúú sá ñà túú nàndihí sá cùu-xi ñáyiu ñuyú-a, chi ní dáquéé tñù ñáhá-yu xii-gá. Dico Yá Ndióxi ní cachí-gá sá Xítoho Jesucristú cùu-gá dàtná ìªª yúú sá ío-gá váha, chi ío cùnuu-gá. <sup>5</sup> Te nchóho sa ní nánihí tãhú-ndó, te ío-gá chí nánducu nihnu Yá Ndióxi cuendá cuu ìªªnuu-ndo cùndecu-ndo ndihí Espiritú-gá. Te núu ducaªª na càda-ndo te cuu-ndo dàtná yúú váha dàcaa-güedé dava vehe, te cuu tucu-ndo dàtná cue dútú ní xinu cuechi núú Yá Ndióxi ndéé sanaha, nàcuáa ñá túú nã cùmání-ndó núú-gá, chi nchaa cue téé-ªª ní xóo cuáha ñaha-güedé sá ní xóo nduu tãhú-gá. Te nchóho vitna tãu-ndó càda nchaa nacuáa càháª-gá, te nduu vétú iní-gá. Te ducaª càda-ndo chi ndècu-ndo ndihí Xítoho Jesucristú. <sup>6</sup> Te Yá Ndióxi cachí-gá núú tütú-gá:

Yúhú taxi ndecu-ìªª Yáa ñuu Sìón, te cuu-gá dàtná ìªª yúú váha sá sánútni-güedé xiquí cimientú ìªª vehe, chi yúhú ní cachí-ìªª Yáa-ªª ío cunuu-gá.

Te nchaa ñáyiu quindáa iní ñáhá xii-gá vá ìªª ndùu ndixi cuechi iní-yu sá dúcªª sàndáa iní ñáhá-yu xii-gá.

Duha cachí-gá núú tütú-gá. <sup>7</sup> Te nchóho ñáyiu sàndáa iní ñáhá xii Xítoho Jesucristú ío cùu iní-ndó-gá, te nchaa ñáyiu ñá túú sàndáa iní ñáhá xii-gá quidé-yu dàtná càháª-xi núú tütú Yá Ndióxi núú cachí-xi:

Yúú sá ní dáquéé tñù cue téé dàcaa vehe, xiªª cùu-xi yúú sá ío-gá nàndihí vitna.

Duha cachí-xi núú tütú-gá. Te yúú-ªª cada iní-ó sá cùu-xi Xítoho Jesucristú, chi ní dáquéé tñù ñáhá-güedé xii-gá. <sup>8</sup> Te cachí tucu-xi ingá xichi núú tütú Yá Ndióxi:

Yúú-ªª nguñenu ñáyiu te ndúª-yu.

Duha cachí-xi núú tütú-gá. Te tñuhu-ªª quée-xi sá ío quide sáa iní ñáyiu núú-gá, chi ñá túú cuini-yu tñi-yu tñuhu càháª-gá, te ducaª tñàhí ndéé tnuní sá nchàa ñáyiu ñá túú cuini tñi tñuhu càháª-gá, te ío cùu sáa iní-yu núú-gá.

### *Ñáyiu ndècu ndihí Yá Ndióxi*

<sup>9</sup> Te nchoo cùu-o ñáyiu sa ní dáquéé ñiªª ñaha Yá Ndióxi xii-o cuendá cundecu-o ndihí-gá, te cùu-o dútú xinu cuechi-o núú-gá, te mee-gá cùu-gá Yáa ío cùnuu, te cùu-o ñáyiu quide ndáa xindecu ichi-gá te cùu tucu-o ñáyiu yindaha-gá. Te ducaªª ní quide ñaha-gá xii-o cuendá sá cùhaha-o xii nchaa ñáyiu sá ío càhnu cuu-gá, te ío vai núú sá váha

quide-gá, te ñi-gá ní quide ní dáñá-ó nchàa ichi cuehé ichi duha ndècu-o ní cuu, te ní sanu ichi ñaha-gã xii-o ñi ichi váha, te vitna cãtnuní iní-ó sã ío cãhnu cuu-gã. <sup>10</sup> Te nchoo cùu-o ñáyiu ñã túú ndècu ndihi Yá Ndiòxí ní cùu, dico vitna ní ngündecu ndihi-o-gã, te dàvã-á<sup>n</sup> vátã sãá-gã nduu càda váha ñaha-gã xii-o, dico vitna sa ní sãá nduu quide váha ñaha-gã xii-o, chi ío cùndahú iní ñáhã-gã.

*Cada váha-o cùndecu-o cunu cuechi-o núú Yá Ndiòxí*

<sup>11</sup> Te nchòhó ío cùu iní ñáhã-í xii-ndo, te cãchí tnúhu-í xii-ndo sã nchóó cùu-o datná cue ñáyiu ndècu tñaduha ñi ñuu, te duca<sup>n</sup> sãtnahã-xi cùu-o chi tnaa-ni ndècu-o ñuyú-a, te sãá nduu ndùu táhú-ó cùndecu-o núú ndécú Yá Ndiòxí táxí tnùnì-gã, te xiã<sup>n</sup> càhá<sup>n</sup> ndáhú-í núú-ndó sã vã càdá-ndó ñi ñi sã cuehé sã dúhá sãni iní-ndó, chi nchaa xiã<sup>n</sup> ñã túú cùu-xi sã váha sã cùú-xi-ndó. <sup>12</sup> Te cada váha-ndo cùndecu-ndo núú nchàa ñáyiu ñã túú ndècu ichi Yá Ndiòxí, te cuèi na càhá<sup>n</sup> ñáyiu sã nchòhó nchicú<sup>n</sup> ñihnu-ndo ichi cuehé ichi duha, dico quini-yu nchaa sã váha quide-ndo, dico na sãá nduu dândixi túú Yá Ndiòxí iní-yu sã ñã túú quide váha-yu ndécú-yu, te dàvã-á<sup>n</sup> cachí-yu sã quidé váha-ndo ndècu-ndo, te cada cãhnú-yu Yá Ndiòxí.

<sup>13</sup> Te Xítóhó Jesucristú cuini-gã sã nchòhó ío quindáá iní-ndó nchàa cue tée cùchiu<sup>n</sup> taxi tñuní ñáhã xii-ndo, te duca<sup>n</sup>-ni quindáá iní-ndó cuèi mee tée cùnuu vihi-gã yíndàha ñaha xii ñáyiu. <sup>14</sup> Te duca<sup>n</sup>-ni quindáá iní-ndó nchàa dava-gã cue tée cùnuu, chi Yá Ndiòxí duca<sup>n</sup> ñi cachí-gã cunduu sã cue tée-á<sup>n</sup> cada ndáá-güedé nchaa cuèchi ñáyiu quide cuehé quidé dùha ndècu, te càhá<sup>n</sup> váha-güedé cuendá nchaa ñáyiu xiquide váha ndècu. <sup>15</sup> Te Yá Ndiòxí cuini-gã sã càdá váha-ndo cùndecu-ndo cuendá nchaa ñáyiu ío ñi ñi quí-xi càhá<sup>n</sup> cuehé cuendá-ndó sã ndécú-ndó ichi Yá Ndiòxí vá ñihí-gã-yu tnúhu càhá<sup>n</sup>-yu.

<sup>16</sup> Te nchòhó, Yá Ndiòxí ní quide-gã sã cùú-ndó ñáyiu cuu cada nãcuáa véxi iní mée-xí, dico ñã díú sã dúcá<sup>n</sup> ñi quide ñaha-gã xii-ndo, te ngóo-ndo cãni iní-ndó càda-ndo nãndi sã cuehé sã dúhá, chi cada-ndo sã cùú-ndó ñáyiu xinu cuechi núú Yá Ndiòxí. <sup>17</sup> Te canehe-ndo sã yíñuhu núú nchàa ñáyiu, ndihi núú tée cùnuu vihi yíndaha ñaha xií-yu, te cuu iní tnáhã ndi mee-ndo nacúaa ndècu-ndo ichi Yá Ndiòxí, te ío canehe-ndo sã yíñuhu núú-gã.

*Nchaa nãcuáa ndoho-o cùndecu-o ichi Xítóhó Jesucristú*

<sup>18</sup> Te nchaa nchòhó ñáyiu xinu cuechi canehe-ndo sã yíñuhu núú cue patróo<sup>n</sup>-ndó, te quindáá iní-ndó càda-ndo nchaa chiu<sup>n</sup>

tahu-güedé. Te ñi-ni càda-ndo núú cue tée váha iní-xi, ndihi núú cue tée ío cuihna iní-xi. <sup>19</sup> Te núu nchòhó ná càda ndee iní-ndó ndòho-ndo nchaa sã ñã túú tàú-ndó ndòho-ndo cuendá sã cuini-ndó cùndáá-ndó núú Yá Ndiòxí ñã, te ío nduu véxi iní-gã.

<sup>20</sup> Te núu nchòhó ní quide-ndo ñi cuèchi, te sãhni iní-ndó dândoho ñaha ñáyiu xii-ndo, ¿te ná sã váha cùu xiã<sup>n</sup>-í? Dico núu nchòhó ná càdá ndèe iní-ndó ndòho-ndo nchaa sã càdá ñaha ñáyiu xii-ndo sã cuendá sã quidé-ndó sã váha ñã, te núu duca<sup>n</sup> na càda-ndo te cùu-xi ñi sã váha núú Yá Ndiòxí. <sup>21</sup> Te Yá Ndiòxí ñi cachí-gã sã càdá ndèe iní-ó ndòho-o nãndi ndoho-o sã cuendá sã quidé-ó sã váha, chi ío ní ndoho Xítóhó Jesucristú cuendá-ó, te duca<sup>n</sup> tàú-ó cãnchicú<sup>n</sup> ñihnu-o càda ndee iní-ó ndòho-o nãndi ndoho-o, chi duca<sup>n</sup> ñi quide-gã. <sup>22</sup> Te mee-gã ñã túú quide-gã ñi ñi sã cuehé sã dúhá, te ñi ñi tnúhu ndehnde ñã túú càhá<sup>n</sup>-gã. <sup>23</sup> Te órè ní xóo cùcuèhé ñáhã-güedé xii-gã, te ñã túú ní xóo danchòcãva-gã tnúhu cuehé, te órè ní xóo dândoho ñaha-güedé xii-gã, te ñã túú ní xãhá<sup>n</sup>-gã xii-güedé sã ío ná cada ñaha-gã, chi núú ndáhã Yá Ndiòxí ní xóo nachihí-gã mée-gã, ndihi nchaa sã sãni iní-güedé cada ñaha-güedé xii-gã. Te Yá Ndiòxí cùú-gã Yáá ío váha cada ndáá cuèchi nchaa ñáyiu na sãá nduu. <sup>24</sup> Te Xítóhó Jesucristú cùú-gã Yáá ní xihí núú cùruxí cuendá nchaa cuèchi nchoo ñáyiu ndècu ñuyú-a. Te duca<sup>n</sup> ñi xihí-gã cuendá nchoo ñi duca<sup>n</sup> daña-o nchaa ichi cuehé ichi duha, te cada ndáá-ó cùndecu-o ichi-gã. Te ní dãnícuehé ñáhã-güedé xii-gã, te sã dúcá<sup>n</sup> ñi ndoho-gã xiã<sup>n</sup> ní ngündecu váha nchoo vitna. <sup>25</sup> Te nchoo cùu-o datná cue mbéé cue quiti ní xita ni cùu, dico vitna ní tuha-o Xítóhó Jesucristú, te Yáá-á<sup>n</sup> cùú-gã dàtná ñi toli xito ñaha-gã xii-o vitna cuendá sã vã cuíta ñihnu-o.

### 3

*Nãcuáa tàú ñáyiu tnãndaha cadã-yu cundecú-yu*

<sup>1</sup> Te nchaa nchòhó ñáyiu ñihi ní tnandaha ío quindáá iní-ndó yí-ndo cuendá sã núu ñã túú sãndáá iní-güedé tnúhu Yá Ndiòxí te quindáá iní-güedé cuendá sã ndèhé-güedé quidé ndáá-ndó ndècu-ndo, te ñi ñã túú xini ñuhu-xi càhá<sup>n</sup>-ndó tnúhu-gã núú-güedé. <sup>2</sup> Chi ndèhe mee-güedé sã nchòhó quidé ndáá-ndó ndècu-ndo, te nèhe-ndo sã yíñuhu núú Yá Ndiòxí. <sup>3</sup> Te vá cãni iní-ndó mée-ni cunduu vii-ndo, te ndada-ndo ñi quí-ndó nãcuáa tàú-xi cunduu, te vá cãni iní-ndó nãndi canehe-ndo, te ñi vá cãni iní-ndó cuihnu-ndo mee-ni dóó váha sã ío vii ndáa. <sup>4</sup> Chi iní-ndó xini ñuhu-xi cunduu vii cunduu váha-xi núú Yá Ndiòxí cuèi vitna te cuèi núú cuáhã<sup>n</sup> núú véxi, te cuu-ndo ñáyiu ío cãhnu

iní-xi, te núu duca<sup>n</sup> na càda-ndo te ío cuu váha iní Yá Ndióxi. <sup>5</sup> Te duca<sup>n</sup> ío vii ío váha ní xínđuú iní nchaa ñáyiú ðíhí ní xínđuú ndéé sanaha, te ñáyiú-án ío ní sándáá iní-yu Yá Ndióxi te ní cudíu-yu núú-gá, te ní tñi-yu nchaa tnúhu ní cáhá<sup>n</sup> yíi-yu. <sup>6</sup> Te duca<sup>n</sup> ní xóo cada ndíi Sárá ní xóo quindáá iní ndíi yíi ndíi, ndíi Àbrahám, te ní cánehe ndíi ðíhí-án sá yíñuhu núú yíi ndíi. Te núu nchòhó quidé váha-ndo ndècu-ndo te ña túú yùhú-ndo nã cada ñaha tnàha ñáyiú-ndo xii-ndo, te núu duca<sup>n</sup> quidé váha-ndo ndècu-ndo te quide-ndo datná ní quide ndíi Sárá.

<sup>7</sup> Te nchòhó cue téé ndècu ñadihí-xi ío váha cuáha-ndo cuendá nacuáa cundecu váha-ndo ndíhí-yu, te ío vii cáhá<sup>n</sup> ndíhí-ndó-yu, chí ñáyiú-án íi-gá-yu dàcúúxí nchòo cue téé, te duca<sup>n</sup> càda-ndo chí ndi ndúú-ndó ndúu táhú-ndó cundecu-ndo ndíhí Yá Ndióxi, te núu duca<sup>n</sup> na càda-ndo te òré cáhá<sup>n</sup> ndíhí-ndo Yá Ndióxi te tedóho ñaha-gá xii-ndo.

#### *Ñáyiú quide sá váha ndòhó-yu*

<sup>8</sup> Te cächí tnúhu tucu-í xii-ndo sã ío cuu ñnuu-ndo cundecu-ndo, te cundàhú iní tnàhá-ndó ñi<sup>n</sup> ñ-ndo, te cuu iní tnàhá tucu-ndo nacuáa ndècu-ndo ichi Yá Ndióxi, te cuu-ndo ñáyiú ndàhú iní-xi. <sup>9</sup> Te núu ñi<sup>n</sup> sã ña túú váha quide ñaha ñáyiú xii-ndo, te ña díú-ní ðuca<sup>n</sup> nanchocáva-ndo càda-ndó-yu, àdi xícuehé ñáhá-yu xii-ndo, te vá ná danchocáva-ndo ðiu-ni tnúhu cuèhé, chí cãcã<sup>n</sup> táhú-ndó núú Yá Ndióxi cuendá sã ná cádá váha ñaha-gá xii-yu, te duca<sup>n</sup> càda-ndo chí Yá Ndióxi ní cáhá<sup>n</sup> ñáhá-gá xii-ndo cuendá sã cádá váha ñaha-gá xii-ndo tnàhá-ndó. <sup>10</sup> Te núú tütú Yá Ndióxi cächí-xi: Nchaa ñáyiú cuini cundecu váha ndi nchaa nduu nini cundecu-yu ñuyíú-a, xini ñuhu-xi sã vá cáhá<sup>n</sup>-yu tnúhu cùtexínu, te ní vá dácuañdehdé-yu.

<sup>11</sup> Te xini ñuhu-xi duu<sup>n</sup> duu<sup>n</sup> dañá-yu nchaa ichi cuèhé ichi duha, te cadá-yu mee-ni sã váha,

te ío ndúcú-yu nacuáa cadá-yu cundecu váha-yu ndíhí tnàha ñáyiú-yu te ðiu-ni duca<sup>n</sup> cãchicú<sup>n</sup> nihnú-yu cadá-yu.

<sup>12</sup> Te Yá Ndióxi xító-gá nchaa ñáyiú quide ndáá núú-gá

te tedóho-gá nchaa tnúhu cáhá<sup>n</sup>-yu, dico nchaa ñáyiú ña túú cuini cada ndáá, ñáyiú-án ña túú cùu váha iní-gá núú-yu.

Duha cächí-xi núú tütú-gá.

<sup>13</sup> Te vá yõo níhí ndéé càda ñaha xii-o ñi<sup>n</sup> sã ña túú váha te núu mee-ni sã váha na càda-o cundecu-o. <sup>14</sup> Àdi núu ná cúú sã ná cádá ñaha ñáyiú xii-o sã cuendá sã quidé váha-o ndècu-o ña, te sã dúcã<sup>n</sup> ná cádá ñáhá-yu xii-o cùu-xi ñi<sup>n</sup> sã váha

sã cúú-xi-ó núú Yá Ndióxi. Te na cächí tnúhu-í xii-ndo sã vá yùhú-ndó-yu, te ní vá cündiyí-ndó cuendá nchaa sã ná càda ñáhá-yu xii-ndo. <sup>15</sup> Te nèhe-ndo sã yíñuhu núú Xítóhó Jesucristú. Te ío cundecu túha-ndo dànehé-ndó ñáyiú véxi ndècu tnúhu núú-ndo nacuáa ndúu tnúhu ndee iní ní taxi Xítóhó Jesucristú ndécú ndíhí-ndo, te cuu vii cuu váha iní-ndó cáhá<sup>n</sup> ndíhí-ndó-yu, te cáhá<sup>n</sup>-ndó núú-yu mee-ni tnúhu yíñuhu nacuáa cùu váha iní Yá Ndióxi. <sup>16</sup> Te ío cada váha-ndo cundecu-ndo cuendá sã vá cündiyí-ndó, te núu duca<sup>n</sup> na càda-ndo, te nchaa ñáyiú xícuehé ñáhá xii-ndo cuendá sã quidé váha-ndo ndècu-ndo ichi Xítóhó Jesucristú quendóo canúú-yu ndíhí nchaa tnúhu cáhá<sup>n</sup>-yu, chí nchòhó quidé váha-ndo ndècu-ndo. <sup>17</sup> Te váha-gá sã ndòhó-ó cuendá sã quidé-ó sã váha te núu mee Yá Ndióxi duca<sup>n</sup> cuini-gá cunduu, te ña díú sã ndòhó-ó cuendá sã ña túú quide-o sã váha.

<sup>18</sup> Te Xítóhó Jesucristú ní xihí-gá sã cuendá nchaa cuèchi nchaa nchoo ñáyiú ndècu ñuyíú-a, te ñi<sup>n</sup> xito-ni duca<sup>n</sup> ní xihí-gá te duca<sup>n</sup> te vá cùú tnàhí-gá, te mee-gá cúú-gá Yá ña túú tnàhí cuèchi-xi, te duca<sup>n</sup> ní ndòho-gá cuendá nchaa cuèchi ñáyiú ndècu ñuyíú-a ñáyiú ña túú cuini cada ndáá núú Yá Ndióxi, te duca<sup>n</sup> ní cuu cuendá sã núcundecu váha-yu núú Yá Ndióxi te núu na quindáá iní ñáhá-yu xii-gá. Te mee-gá ní xihí-gá dico Espiritú-gá chí ní xínđuú-ni-xi, <sup>19</sup> te Espiritú-gá ní sáhá<sup>n</sup>-xi ní cáhá<sup>n</sup>-xi tnúhu Yá Ndióxi núú nchaa espíritú ñáyiú ndècu núú ðhú núú ndàhú. <sup>20</sup> Te ñáyiú-án cúú ñáyiú ní xínđuú ndéé sanaha cùtnàhá ní xínđuú ndíi Nòé, chí ñáyiú-án ío ní quide sãá iní-yu núú Yá Ndióxi. Te Yá Ndióxi ío váha iní-gá, chí ní dácãcã-gá nduu ní xínđuú ndíi Nòé ní cadúha ndíi bàrcú cuendá ndétú-gá ndixi cuèchi iní-yu sã ña túú quide váha-yu ndècu-yu ní cùu. Te dává-án ní ndaa ndute ñuyíú te ní cácu úná duha ná tnàhá ñáyiú, chí ní quee-yu xití bàrcú-án, te ña túú ní cáhá-yu. <sup>21</sup> Te sã dúcã<sup>n</sup> ní cácu ñáyiú úná-án ña túú ní cáhá-yu ndute ní ndaa ñuyíú dává-án. Te xia<sup>n</sup> queé-xi sã cuándute ñáyiú vitna, te naníhí tãhú-yu te núu na quindáá iní-yu tnúhu ndáá tnúhu Yá Ndióxi. Te ña díú sã cuándute-o te nduu ndoo nduu nine yiqui cùúú-ó te naníhí tãhú-ó, chí xini ñuhu-xi náhmá-ó núú Yá Ndióxi nchaa yicã cuèchi-o, te nduu ndoo nduu nine iní-ó, te duca<sup>n</sup> te naníhí tãhú-ó, chí Xítóhó Jesucristú ní xihí-gá cuendá-ó te ní ndoto-gá. <sup>22</sup> Te Yáá-án cuándaa-gá andiu, te ní ngóo-gá xio cùha Yá Ndióxi, te tàxi tñuni-gá nchaa espíritú cùnùu ndíhí nchaa dáva-gá cue espíritú xínú cuèchi.

*Cada-o nàcuáa cuini méé Yá Ndióxi*

<sup>1</sup> Te Xítohó Jesucristú ní ndoho-gá cùtnàhá ní xíndecu-gá ñuyú-a, te vitna nchòhó cundecu túha-ndo ndòho-ndo cuendá-gá, chi nchaa ñáiyu ndòho nándi sá ndòhó cuendá-gá dàñá-yu nchaa sá cuèhé sá dúhá. <sup>2</sup> Te duca<sup>n</sup> ñà túú-gá ndécú-yu ichi cuèhé ichi duha, chi mee-nà nàcuáa càhá<sup>n</sup> Yá Ndióxi quidè-yu ndécú-yu ñuyú-a. <sup>3</sup> Te nchòhó sa ñaha-ndo sá ïo cuèhé núú sá cuèhé sá dúhá ní xóo cada-o cùtnàhá vátá cùndecu-gá-ó ichi Yá Ndióxi, chi ní xóo cada-o nchàa sá cuèhé sá dúhá cudíí iní nchaa ñáiyu ñà túú sàndáá iní tnúhu-gá, te dàvá-án ní xóo cada-o nchàa núú sá cuèhé sá dúhá, te ní xóo cani cuèhé ní xóo cani duha iní-ó, te ní cuu-o cuè ñáiyu quíhu, te ní xóo cundecu-o vico núú ní xóo cada-o nchàa sá ñà túú vâha, te ní xóo níhi tnàhá-ó ndíhi nchaa tnaha quíhu-o, te ní xóo chíñuhu-o nchàa sá càchí-yu cùu ndiòxi te ñà ndàá sá ndiòxi cúú nchàa xiá<sup>n</sup>, te nándi-gá nchaa sá cuèhé sá dúhá ní xóo cada-o dàvá-án. <sup>4</sup> Te ñáiyu-án cùñuhu-yu vitna sá ñà túú-gá níhi tnàhá-ó ndíhi-yu cada-o nchàa sá cuèhé sá dúhá quidè-yu, te xiá<sup>n</sup> càhá<sup>n</sup> cuèhé-yu cuendá-ó vitna. <sup>5</sup> Dico sáá nduu te ñáiyu-án nãhmá-yu nchaa sá quidè-yu núú Xítohó Jesucristú, chi diu-gá sa ndècu túha-gá sá cáda ndáá-gá cuèchi nchaa ñáiyu sa ní xíhi, ndíhi cuèchi nchaa ñáiyu xíndecu vívú. <sup>6</sup> Te cue ñáiyu sa ní xíhi ní xíndedóho tnúhu Xítohó Jesucristú, te cuèi ní xíhi-yu dàtná xíhi dava-gá ñáiyu, dico espíritú-yu chi ní nduu táhú-xi ndècu váha-xi dàtná ndécú Yá Ndióxi.

<sup>7</sup> Te vitna ta cùyatni danaa Yá Ndióxi ñuyú-a núú xiá<sup>n</sup> ïo váha cuáha-ndo cuendá nàcuáa cundecu-ndo, te càhá<sup>n</sup> ndíhi-ndo-gá. <sup>8</sup> Te xini ñuhu-xi sá ïo cuu iní tnàhá-ndó ñ<sup>n</sup> ñ<sup>n</sup>-ndo, chi núú duca<sup>n</sup> na cùu iní tnàhá-ndó ñ<sup>n</sup> ñ<sup>n</sup>-ndo, te vá cání-gá iní-ndó cada cuendá-ndó nchàa sá ñà túú vâha quide ñaha ñáiyu xii-ndo, <sup>9</sup> te nchòhó ñáiyu xíndecu vehe-xi cuáha núu-ndo vehe xii cue ñáiyu ñuhu ichi na ndetatu-yu, te ïo váha cuu iní-ndó dùca<sup>n</sup> cada-ndo. <sup>10</sup> Te Yá Ndióxi ní taxi-gá ndí díñ<sup>n</sup> núú táhú ndécú ndíhi-ndo ñ<sup>n</sup> ñ<sup>n</sup>-ndo, te nàcuáa nduu táhú ní nduu táhú-ndó ñ<sup>n</sup> ñ<sup>n</sup>-ndo te duca<sup>n</sup> chindee tnaha-ndo, te vá dàñá ndèè-ndó cada-ndo nchaa nacuáa tàuchiu<sup>n</sup> Yá Ndióxi cada-ndo, te chindee ñaha-gá xii-ndo. <sup>11</sup> Te dava nchòhó ñáiyu càhá<sup>n</sup> tnúhu Yá Ndióxi núú ñáiyu, xini ñuhu-xi càhá<sup>n</sup>-ndó nàcuáa nduu tnúhu-gá núú-yu, te dava nchòhó ñáiyu quide nchaa núú chiu<sup>n</sup> chindee tnaha ñáiyu-xi, xini ñuhu-xi cada-ndo sá Yá Ndióxi chíndèe ñaha-gá xii-ndo, te duca<sup>n</sup> cada-ndo nchaa núú sá vâha, chi Xítohó Jesucristú tnàhá-gá chíndèe ñaha-gá xii-ndo, te duca<sup>n</sup> ïo cuu càhnu Yá Ndióxi. Te vitna tàú-ó càhá<sup>n</sup>-ó

sá ïo càhnu cuu Xítohó Jesucristú, chi diu-gá cùnùu-gá nchaa nduu nchaa quíu, te duca<sup>n</sup> na cùnduu.

*Ndoho tnàhá-ó cùndecu-o ichi Xítohó Jesucristú*

<sup>12</sup> Te nchòhó ñáiyu ïo cùu iní-í, vá cùñuhu-ndo sá ïo ndòho-ndo ndecu-ndo ichi Xítohó Jesucristú, chi sá dúcá<sup>n</sup> ndòho-ndo-án cùtnúni ndisa sá sàndáá iní-ndó-gá, te vá cání iní-ndó nã cuendá duca<sup>n</sup> ndòho-ndo. <sup>13</sup> Chi da cudíí iní-ndó te núu ndòho-ndo dàtná ní ndoho Xítohó Jesucristú, te duca<sup>n</sup> sùúni cudíí iní-ndó òrè ná quixi tucu-gá ñuyú-a te dàvá-án quini-ndó sá ïo càhnu cuu-gá. <sup>14</sup> Te núu xicuehé ñàhá ñáiyu ndècu ichi cuèhé ichi duha xii-ndo cuendá sá ndécú-ndó ichi Xítohó Jesucristú, te xiá<sup>n</sup> cúú-xi ñ<sup>n</sup> sá vâha sá cúú-xi-ndó núú-gá, te duca<sup>n</sup> chi Espíritú Yá Ndióxi sá ïo cùnuu ndecu ndíhi ñaha-xi xii-ndo, te nchaa ñáiyu ndècu ichi cuèhé ichi duha-án càhá<sup>n</sup> cuèhé-yu cuendá Xítohó Jesucristú, dico nchòhó càchí-ndó sá ïo càhnu cuu-gá. <sup>15-16</sup> Te núu nchòhó dándòho ñaha ñáiyu xii-ndo sá cuendá sá ndécú-ndó ichi Xítohó Jesucristú ñà, te vá cúú càhá<sup>n</sup> núú-ndó, chi ndacá<sup>n</sup> táhú-ndó núú Yá Ndióxi cuendá sá ndécú-ndó ichi-gá. Te cuèi ndòho-ndo ndecu-ndo, dico ñà túú cùu-ndo ñáiyu sàhni ndíyí te ní ñà túú cùu-ndo ñáiyu dùhu, te ní ñà túú cùu-ndo ñáiyu quide cuèhé quidè dùha, te ní ñà túú cùu-ndo ñáiyu chindee tnúhu tnàha ñáiyu-xi ñ<sup>n</sup> sá ñà túú tàú-ndó cada-ndo.

<sup>17</sup> Te vitna sa quèsaha Yá Ndióxi cada ndáá-gá nchaa sá quidè nchòo ñáiyu ndècu ndíhi-gá, te núu duca<sup>n</sup> te ndèè-gá cada-gá nchaa ñáiyu ñà túú sàndáá iní ñàhá xii-gá òrè ná sáá nduu dùca<sup>n</sup> cada ñaha-gá xií-yu. <sup>18</sup> Te nchòhó xini-ndó sá ñáiyu quide váha ndècu ichi Xítohó Jesucristú ndòho tnàhá-yu ndécú-yu, dico sáá nduu te nduu táhú-yu cundecu-yu ndíhi-gá. Te núu duca<sup>n</sup> ndòho nchaa ñáiyu quide váha ña, ¿te nása-gá yáha nchaa ñáiyu ndècu ichi cuèhé ichi duha na sáá nduu càda ndáá Yá Ndióxi cuèchi-yu-i? <sup>19</sup> Te nchaa nchòhó ñáiyu ndòho nàcuáa cuini Yá Ndióxi xini ñuhu-xi sá vá dàñá ndèè-ndó cada váha-ndo cùndecu-ndo, te ïo quindáá iní-ndó sá xító ñaha-gá xii-ndo. Te diu-gá cúú-gá Yaá ní cadúha ñaha xii-o, te quide-gá ñ<sup>n</sup> sá càhá<sup>n</sup>-gá.

## 5

*Nàcuáa tàú-xi cada ñáiyu ndècu ichi Xítohó Jesucristú*

<sup>1</sup> Te yúhú càhá<sup>n</sup>-í dóho nchaa nchòhó cue téé yíndaha nchaa dava-gá ñáiyu ndècu ichi Xítohó Jesucristú, chi tnàhá yúhú yíndàha-í ñáiyu ndècu ichi-gá, te sàndáá iní-í tnúhu-gá,

te ní xiní-í nchaa nàcuáa ní ndoho-gá, te sáá nduu te tnàhá-í cunuu-í ndihi-gá. <sup>2</sup> Te ío canehe cuèndá-ndó nchàa ñáiyu ndècu ichi Yá Ndiòxí yíndàha-ndo te cada-ndo dàtná quidè cuè toli, chi cue tée-á<sup>n</sup> ío váha xito-güedé mbéé-güedé. Te canehe cuèndá-ndó-yu sá cúú íní méé-ndó te ñá díú sá ío ñ<sup>n</sup> ñáiyu cada yica ñàha xii-ndo, te ni ñá díú sá cuiní-ndó cùhu<sup>n</sup> yáhu-ndo, chi ni yùhu ni iní-ndó còto-ndó-yu, chi duca<sup>n</sup> cuiní Yá Ndiòxí cunduu. <sup>3</sup> Te vá cádá-ndó sá ío cùnuu-ndo núú-yu, chi cada-ndo mèe-ni sá váha cuèndá duca<sup>n</sup> cànchicú<sup>n</sup> nihnú-yu cadá-yu tnàhá-yu. <sup>4</sup> Te òré ná quíxi túcu Xitohó Jesucristú Yáá néhé cuèndá ñàhá xii-o nchaa-o ñuyíú-a, te taxi-gá sá ío váha nduu táhú-ó, te cunuu-o ndihi-gá ni caa ni quíhí<sup>n</sup>.

<sup>5</sup> Te nchòhó ñáiyu ndècu ichi Xitohó Jesucristú càhá<sup>n</sup>-í dóho-ndo sá ío quindáá iní-ndó cuè tée yíndaha ñàha xii-ndo nacúáa ndècu-ndo ichi-gá, te nchaa-ndo tàú-ndó quindáá iní tnàhá-ndó ñ<sup>n</sup> ñ<sup>n</sup>-ndo, chi núú tütú Yá Ndiòxí càchí-xi ñ<sup>n</sup> xichi:

Nchaa ñáiyu quide cahnu mee-xi ñá túú cùu váha iní Yá Ndiòxí núú-yu,

dico nchaa ñáiyu ndàhú iní-xi te chindee ñàha-gá xii-yu.

Duha càchí-xi núú tütú-gá. <sup>6</sup> Te dañà-ndo mèe-ndo núú ndàhá Yá Ndiòxí, chi mee-gá ío cùnuu-gá. Te núú duca<sup>n</sup> na càda-ndo, te sáá nduu te cada nínu ñàha-gá xii-ndo.

<sup>7</sup> Te nchaa sá yàha-ndó ndècu-ndo te nachihi-ndo ndàha Yá Ndiòxí, chi mee-gá xitó ñàha-gá xii-ndo.

<sup>8</sup> Te ío váha cuáha-ndo cuèndá cundecu-ndo, te quíhi iní-ndó chi sácúhñá xicá cùu-xi cuiní-xi dacuíta nihnu ñàha-xi xii-o, chi ío cùu úhú iní ñàhá-xí, te cùu-xi datná ñ<sup>n</sup> quiti déé<sup>n</sup> xicá ndúcu sá cáxi-xí. <sup>9</sup> Te ío quindáá iní-ndó Xitohó Jesucristú, te vá dáñá-ndó mèe-ndo dandahú ñàhá sácúhñá xii-ndo càda-ndo nacúáa cuiní-xi, chi nàha-ndo sá ncháá ñáiyu ndècu ichi Xitohó Jesucristú xíndecu nihí ñuyíú ndóhó-yu dàtná ndóhó nchòo ndecu-o ichi-gá. <sup>10</sup> Dico sacú-ni nduu duha cundoho-o te dàtnúni ñá túú-gá ná cumání-ó cundecu-o núú Yá Ndiòxí, te dàvá-á<sup>n</sup> vǎ cáni ñ<sup>n</sup> cani úú iní-ó cundecu-o ichi-gá. Te ío-gá ngúndecu ndihi-o tnúhu ndee iní cada-o nchàa nacúáa càhá<sup>n</sup>-gá, te duca<sup>n</sup> càda-o chi mee Yá Ndiòxí ío chindee ñàha-gá xii-o, te ñu-ni Yáá-á<sup>n</sup> ío cùu iní ñàhá-gá xii-o, chi ní càhá<sup>n</sup> ñàhá-gá xii-o cundecu-o núú ío váha càa ndecu-gá cundecu-o ní caa ni quíhí<sup>n</sup>, te duca<sup>n</sup> ní quide-gá chi ní sándáá iní-ó Xitohó Jesucristú. <sup>11</sup> Te ío ndacá<sup>n</sup> táhú-ó núú Yá Ndiòxí chí ío càhnu cuu-gá, te cùnuu-gá nchaa nduu nchaa quíú. Te duca<sup>n</sup> na cunduu.

### *Tnúhu ndéé núú ní ndihi-ná*

<sup>12</sup> Te té Silvanú xiní-í sá cúú-dé ñ<sup>n</sup> tée quide ndáá ndécú ichi Xitohó Jesucristú, te ñu-dé ní càhá<sup>n</sup> ndàhú-í núú-dé ní tee-dé ñ<sup>n</sup> úú tnúhu sá ní xáha<sup>n</sup>-í xii-dé núú tütú-a cuèndá dacuíxi-í ndàha-ndo, te núú tütú-a càchí tnúhu ndáá-í xii-ndo sá Yá Ndiòxí ío cùu iní ñàhá-gá, te chindee ñàha-gá xii-ndo ndècu-ndo, te càchí tnúhu tucu-i xii-ndo sá ío quindáá iní-ndó sá ndáá duca<sup>n</sup> quide ñàha-gá xii-ndo.

<sup>13</sup> Te cue ñáiyu ndècu ñuú Babiloniá, ñáiyu ndècu ichi Yá Ndiòxí, ñu-ni ñáiyu ní cachí Yá Ndiòxí sá nánihí táhú dàtná cúú nchòhó, ío quide ndee iní ñàhá-yu xii-ndo, te tnàhá té Mácú tée cùu datná ñ<sup>n</sup> déhe-í quidè ndèe iní ñàhá-dé xii-ndo. <sup>14</sup> Te ndihi tnúhu yíñùhu cada ndee iní tnàhá-ndó ñ<sup>n</sup> ñ<sup>n</sup>-ndo, te xicá<sup>n</sup> táhú-í núú Yá Ndiòxí sá ío na cundecu nahi nchaa nchòhó ñáiyu ndècu ndihi Xitohó Jesucristú. Te duca<sup>n</sup> na cunduu. Te ío chí cádá ndèe iní-ná vitna.

## TUTÚ CÚÚ ÒÚ NÍ CADÚHA TÉ PÈLÚ

*Té Pèlú cadúha-dé tutú quíhí<sup>n</sup> ndaha ñáyiú sándáá iní tnúhu Yá Ndióxi*

<sup>1</sup> Yúhú té Xímú, àdi Pelú chi úú òú-í, xínú cuèchi núú Xitohó Jesucristú, chi mee-gá ní tendaha ñaha-gá xii-í xicá cùu-í cáhá<sup>n</sup>-í tnúhu-gá. Te cadúha-í tutú-a sá cúu-xí nchàa nchohó ñáyiú sándáá iní ñáhá xii-gá dátá sándáá iní-ndí-gá, te duca<sup>n</sup> chi Tátá-ó Dütú Ndióxi ní dácáhá<sup>n</sup>-gá iní-ó ní sándáá iní-ó-gá, chi cùu-gá Yáá ío váha quide ndáá ndíhi Xitohó Jesucristú Yáá dácácu nihnu ñaha xii-o núú ùhú núú ndáhú. <sup>2</sup> Te xicá<sup>n</sup> táhú-í núú Yá Ndióxi sá ùu<sup>n</sup>-gá uu<sup>n</sup>-gá ná cuita chindee chitúu ñaha-gá xii-ndo quíhí<sup>n</sup>, te duca<sup>n</sup> ío váha cuu iní-ndó cùndecu-ndo, te duca<sup>n</sup> cada-gá chi ta cùtnuní-gá iní-ndó nácúaa ndúu cuendá-gá, te duca<sup>n</sup> ta cùtnuní tucu iní-ndó nchàa nacúaa ndúu cuendá Xitohó Jesucristú Yáá cúú Xitohó-ó.

*Nácúaa quide ñáyiú ndècu ichi Xitohó Jesucristú*

<sup>3</sup> Te Yá Ndióxi ío càhnu cuu-gá chi chindee ñaha-gá xii-o quide ndáá-ó ndècu-o datná cuíni méé-gá, te duca<sup>n</sup> chi cùtnuní iní-ó nácúaa sàni iní Xitohó Jesucristú Yáá ní cáhá<sup>n</sup> ñáhá xii-o. Te òré ní cáhá<sup>n</sup> ñáhá-gá xii-o te ní cutnùní iní-ó sá ío càhnu cuu-gá te ío váha quide-gá. <sup>4</sup> Te duca<sup>n</sup> ní cutnùní tucu iní-ó nácúaa ní cáhá<sup>n</sup>-gá cada ñaha-gá xii-o, te tnúhu ní cáhá<sup>n</sup>-gá-á<sup>n</sup> ío càhnu cuu-xi te ío váha, te nchoo ní sándáá iní-ó tnúhu-á<sup>n</sup> núu xíá<sup>n</sup> ñá túú-gá ndécú-ó ichi cuehé ichi duha te ní ñá túú-gá sání iní-ó cada-o nándí sá cuèhé sá dúhá, te ní cuu vii ní cuu váha iní-ó vitna. <sup>5</sup> Te sá dúcá<sup>n</sup> quide-gá te xíá<sup>n</sup> ío nducu ndèe-ndo cada-ndo nchaa nacúaa cáhá<sup>n</sup>-í-a, te nchòhó sándáá iní-ndó-gá dico ñá díú mèe-ni xíá<sup>n</sup> chi tnáhá xíní ñúhu-xi cada ndáá-ndó cùndecu-ndo. Te núu quide ndáá-ndó ndècu-ndo te xíní ñúhu-xi tecú tnùní-ndó tnúhu-gá. <sup>6</sup> Te núu təcú tnùní-ndó te cùu-ndo ñáyiú xíní cotnii mee-xi, te núu cùu-ndo ñáyiú sácóo tñii mee-xi te xíní ñúhu-xi cunduu cahnu iní-ndó cuèí nándí sá ná yáha-ndo cùndecu-ndo, te núu càhnu iní-ndó te xíní ñúhu-xi cada ndáá-ndó cùndecu-ndo datná cuíni méé Yá Ndióxi cada-ndo. <sup>7</sup> Te núu quide ndáá-ndó ndècu-ndo, te xíní ñúhu-xi ío cuu iní tnáhá ndí mee-ndo nacúaa ndècu-ndo ichi-gá, te núu cùu iní tnáhá ndí mee-ndo te xíní ñúhu-xi cuu iní-ndó nchàa dava-gá tnàha ñáyiú-ndo.

<sup>8</sup> Te núu sa duca<sup>n</sup> quide-ndo ndecu-ndo te uu<sup>n</sup>-gá cuita duca<sup>n</sup> cada-ndo quíhí<sup>n</sup> núú

cuàhá<sup>n</sup> núú vèxi, te núu duca<sup>n</sup> quide-ndo te cùu-ndo cue ñáyiú ñá túú dàna iní-xi xíndecu, te cuita cutnùní-gá iní-ndó nchàa nacúaa sàni iní Xitohó Jesucristú quíhí<sup>n</sup>. <sup>9</sup> Te nchaa ñáyiú ñá túú cuíni duca<sup>n</sup> cada cuú-yu ñáyiú ñá túú tnàhí ndixi túu iní-xi sá Yá Ndióxi sa ní ndada ndoo ní ndada nine-gá iní-yu cuendá nchaa sá cuèhé sá dúhá ní xóo cada-yu, te ñáyiú-á<sup>n</sup> cúu-yu dátá ñá ñáyiú cuáá àdi datná ñá ñáyiú ñá túú cùtnuní váha núu-xi, te duca<sup>n</sup> sàtnahá-xi cùu-yu cuendá sá dúcá<sup>n</sup> quide-yu. <sup>10</sup> Te xíá<sup>n</sup> núu yúhú cáhá<sup>n</sup>-í dóho nchaa nchòhó ñáyiú ndècu ichi Xitohó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sá Yá Ndióxi ní cáhá<sup>n</sup> ñáhá-gá xii-ndo, te duca<sup>n</sup> ní quide-gá chi duca<sup>n</sup> ní cachí-gá cada-gá. Te vá ñá<sup>n</sup> ndúu caní iní-ndó dàna-ndo ichi-gá, te núu vá dáña ndèé-ndó cada-ndo nchaa nacúaa cáhá<sup>n</sup>-í-a. <sup>11</sup> Te núu duca<sup>n</sup> na cada-ndo cùndecu-ndo, te ío vii ío váha cada Yá Ndióxi quehe<sup>n</sup> cuendá ñáhá-gá xii-ndo òré ná sàá-ndó núú ndécú Xitohó Jesucristú táxi tnùní-gá nchaa nduu nchaa quíú, te diu-ni Yáá-á<sup>n</sup> cúú Xitohó-ó te ní dácácu nihnu ñaha-gá xii-o núú ùhú núú ndáhú.

<sup>12</sup> Te duca<sup>n</sup>-ni quíhí-í dandácu iní ñáhá-í xii-ndo nchàa tnúhu cáhá<sup>n</sup>-í-a cuèí sa xíní-ndó tnúhu-á<sup>n</sup>, te cuèí sándáá váha iní-ndó nchàa tnúhu ndáá dácúaa-ndo. <sup>13</sup> Te yúhú quide cuendá-í sá ío tàù-xi cáhá<sup>n</sup>-í dóho-ndo nini ndecu-í ñuyíú-a cuendá sá vá nácúanaa-ndo nacúaa cada-ndo cùndecu-ndo. <sup>14</sup> Chi Xitohó Jesucristú ní cachí-gá sá ñá túú-gá vai nduu cùndecu-í ñuyíú-a te cuú-í. <sup>15</sup> Te ío nducu ndèe-í nducu-í nácúaa cada-í cuendá quendóo ndíhi-ndo nchàa tnúhu cáhá<sup>n</sup>-í-a, te cuèí na yáha cuú-í dico vá nácúanaa-ndo cada-ndo nchaa nacúaa cáhá<sup>n</sup> tnúhu sá dánèhé ñáhá-í xii-ndo vitna.

*Cue téé ní xíní núú sá ío càhnu cuu Xitohó Jesucristú*

<sup>16</sup> Te sa ní dánèhé ñáhá-ndí xii-ndo sá ío càhnu cuu Xitohó Jesucristú. Te ní cachí tnúhu tucu-ndí nácúaa cada-gá òré quixi tucu-gá, te tnúhu-á<sup>n</sup> cúu-xí tnúhu ndáá cuiti te ñá díú tnúhu sá ní sani iní cue ñáyiú ñuyíú-a cùu-xi, chi nchúhú ní xíní núú-ndí nácúaa ní quide-xi cùtnáhá ní cutnùní iní-ndí sá ío càhnu cuu Xitohó Jesucristú. <sup>17</sup> Chi dává-á<sup>n</sup> ío váha ní quide Tátá-ó Dütú Ndióxi ní quide càhnu-gá Xitohó Jesucristú, te diu-ni dává-á<sup>n</sup> ní cáhá<sup>n</sup> Dütú Ndióxi ndéé andíu ní xáha<sup>n</sup>-gá xii Xitohó Jesucristú: “Yóhó cúu-n Dèhe-í téé ío cùu iní-í, te ío cùdíí iní ñáhá-í xii-n”, duha ní xáha<sup>n</sup> Yá Ndióxi xii Xitohó Jesucristú. <sup>18</sup> Te nchúhú ní tecú dóho-ndí ní cáhá<sup>n</sup> Yá Ndióxi

ndéé andïu cùtnàhá duca<sup>n</sup> ní xáha<sup>n</sup>-gã xii Xitohó Jesucristú, chi tnàhá-ndí ndécú-ndí ndíhí-gã yucu núú dúcá<sup>n</sup> ní quide cahnu ñaha Yá Ndióxi xii-gã.

<sup>19</sup> Te ndècu ndíhí-o nchaa tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndióxi ndéé sanaha te nchaa tnúhu-án cáhá<sup>n</sup>-xi nchaa nàcuáa cada-xi vitna, te cùtnuní iní-ó sã tnúhu ndáá cúú-xí, te xini ñuhu-xi cada cuendá váha-ndo ncháa nacuáa cáhá<sup>n</sup> tnúhu-án, chi tnúhu-án cúú-xí dàtná ñ<sup>n</sup> ñuhú dáyehé-xi ndéé òré véxi túndaá quéné chòdíní cáhnú dáyehé-di. Te duca<sup>n</sup> sãtnahá-xi cùu tnúhu-án chí quide-xi nacuáa cutnùní iní-ó cuendá Xitohó Jesucristú. <sup>20</sup> Te xini ñuhu-xi sã ïo-gã cada cuendá-ndó sã ñà túú ñáyüu tecú tnùní ní ñ<sup>n</sup> tnúhu sã ní chídó tnùní cue téé ní cáhá<sup>n</sup> tnúhu Yá Ndióxi ndéé sanaha, te núu Yá Ndióxi vá cádá-gã nàcuáa cutnùní iní-yu nàcuáa cáhá<sup>n</sup> nchaa tnúhu-án. <sup>21</sup> Te cue téé-án ïo ní xindecu yiñuhu-güedé núú Yá Ndióxi, te nchaa tnúhu sã ní cáhá<sup>n</sup>-güedé-án ñà túú cùu-xi tnúhu sã ní cahu iní méé-güedé, chí Espiritú Yá Ndióxi ní dácáhu iní ñáhá-xí xii-güedé nàcuáa cunduu tnúhu cáhá<sup>n</sup>-güedé.

## 2

*Cue téé cächí sã cáhá<sup>n</sup> tnúhu Yá Ndióxi te ñà ndáá*

<sup>1</sup> Te ndéé sanduu chí ní xindecu cue téé ní xóo dandàhú ñáhá xii ñáyüu isràél cächí sã cáhá<sup>n</sup> tnúhu Yá Ndióxi te ñà ndáá sã cáhá<sup>n</sup>-güedé tnúhu-gã, te ñ<sup>n</sup>-ni duca<sup>n</sup> tùcu cundecu cue téé dandàhú ñáhá xii-ndo vitna, chí cachí-güedé sã cáhá<sup>n</sup>-güedé tnúhu Yá Ndióxi te ñà ndáá. Te cue téé-án ïo yidáhu cáhá<sup>n</sup>-güedé, te nchaa tnúhu cáhá<sup>n</sup>-güedé-án dacuíta nihnu ñaha-xi xii-ndo te núu na tédóho-ndo, chí cue téé-án vã nñuu-güedé sã Xitohó Jesucristú ní xihí-gã cuendá-güedé. Te sã dúcá<sup>n</sup> càda-güedé ïo-gã ndíhí dacuíta nihnu-güedé méé-güedé. <sup>2</sup> Te vãi ñáyüu xínu iní-yu cadá-yu nándi sã cuèhé sã dúhá cuendá sã dúcá<sup>n</sup> càda cue téé-án, te cuendá xiã<sup>n</sup> ngóo ñáyüu cáhá<sup>n</sup> úhú-yu cuendá ichi Yá Ndióxi. <sup>3</sup> Te mee-ni tnúhu sã ní cahu iní cue ñáyüu ñuyúú-a danèhé ñáhá-güedé xii-ndo, te quesaha-güedé sã cúú-xí tnúhu ndáá te ñà ndáá cuendá-ni sã cuãñaha-ndo díhú<sup>n</sup> xii-güedé, chí ñ<sup>n</sup>-ni xiã<sup>n</sup> tnàhí cuhu<sup>n</sup> iní-güedé, dico Yá Ndióxi sa ní cunaha ndècu túha-gã cuendá cada ndáá-gã cuèchi-güedé, te na sáá nduu te cuíta nihnu duu<sup>n</sup>-güedé, chí Yá Ndióxi vá nàcuánaa-gã ñ<sup>n</sup> sã ní cachí-gã cada-gã.

<sup>4</sup> Te Yá Ndióxi ñà túú ní quide cahnu iní-gã sã ní quide cue espíritu ñà túú ní cuini cada ndáá xínú cuèchi núú-gã ní cùu, chí ní dáquihí<sup>n</sup> ñáhá-gã xii-xi ñ<sup>n</sup> xichi núú ïo

ndòho-xi ndecu-xi, te xiá<sup>n</sup> cundedí nihnu-xi ndéé sáá nduu cuíta nihnu duu<sup>n</sup>-ná-xi. <sup>5</sup> Te Yá Ndióxi ñà túú ní quide cahnu tucu iní-gã nchaa sã ní quide ñáyüu ñuyúú díhna, chí dàvá-án ní dándáá-gã ndute ñuyúú ní cáhá nchaa ñáyüu ndècu ichi cuèhé ichi duha te ñ<sup>n</sup> ñ<sup>n</sup>-ni té Nòé ndíhí úsá-gã tucu cue ñáyüu cùu ndi mee-dé ní dácácu nihnu-gã. Te té Nòé-án cúú-dé téé ní cáhá<sup>n</sup> dóho-yu nàcuáa cada váha-yu cundecú-yu ní cùu te ñà túú ní cuini-yu. <sup>6</sup> Te Yá Ndióxi ní dängává-gã ñuhú ní dánáá-gã ñáyüu ñuu Sòdomá ndíhí ñáyüu ñuu Gómorrá te mee-nã yáá ní nduu ñuu-án. Te sã dúcá<sup>n</sup> ní cuu xiã<sup>n</sup> cutnùní iní-ó nàcuáa cada ñaha Yá Ndióxi xii nchaa ñáyüu ñà túú quide váha. <sup>7</sup> Dico té Lót téé ní quide ndáá ní xindecu ñ<sup>n</sup> ñuu-án dàvá-án chí ní dácácu nihnu ñaha-gã xii-dé. Te nchaa ñáyüu ñuu núú ní xindecu-dé-án ïo ní xinduu cuihna iní-yu, te mee-ni ichi díí iní ní xindecú-yu, te sã dúcá<sup>n</sup> ní xóo cadá-yu xiã<sup>n</sup> ïo ní ndíhú iní té Lót. <sup>8</sup> Te ñ<sup>n</sup> nduu ñ<sup>n</sup> nduu ní xóo cada ndáhú-xi iní té Lót-án cundéu nchaa tnúhu cuèhé tnúhu duha ní xóo cáhá<sup>n</sup>-yu ní xóo cundedóho-dé, ndíhí cuendá nchaa sã cuèhé sã dúhá ní xóo cadá-yu ní xóo quini-dé, te mee-dé ní cuu-dé ñ<sup>n</sup> téé ní xinduu vii ní xinduu váha iní-xi núú Yá Ndióxi. <sup>9</sup> Te sã dúcá<sup>n</sup> ní yáha té Nòé ndíhí té Lót, xiã<sup>n</sup> cutnùní iní-ó sã Yá Ndióxi ïo chindee-gã cue ñáyüu quide ndáá ndécú ichi-gã cuendá sã vã cadá-yu nándi sã cuèhé sã dúhá cuèí nándi na ndòhó-yu cundecú-yu. Te Yá Ndióxi cächí-gã sã ncháá ñáyüu ndècu ichi cuèhé ichi duha sa ndècu túha-yu sã quihí<sup>n</sup>-yu núú úhú núú ndàhú nduu na yáha cundáá cuèchi-yu.

<sup>10</sup> Te uu<sup>n</sup>-gã cada ñaha Yá Ndióxi xii nchaa cue téé ndècu ichi díí iní, te dàquee tíhú-güedé nchaa tnúhu sã sánú ichi ñaha xii-o nacuáa cada-o cundecu-o, te cùu-güedé cue téé ñ<sup>n</sup> iní-xi, te yí iní-güedé, te ñà túú yùhú-güedé cáhá<sup>n</sup> úhú-güedé cuendá nchaa espíritu cùnùu. <sup>11</sup> Te cue espíritu xínú cuèchi núú Yá Ndióxi ïo cùnuu-xi dacuúxi cuè téé-án, dico ñà túú cùyü-xi cáhá<sup>n</sup>-xi dàtná cáhá<sup>n</sup> cue téé-án òré ndácá<sup>n</sup> cuèchi-xi núú Yá Ndióxi cuendá nchaa sã quidé cuè espíritu cundíhí yucu ñávaha.

<sup>12</sup> Te nchaa cue téé dandàhú ñáhá xii-ndo-án cúú-güedé dàtná cue quiti, chí cue quiti-án ñà túú ndècu sã xini tnùní-güedi, chí cue quiti-án ní cacu-güedi sã tníí-ó-güedi te cahni-o-güedi. Te duca<sup>n</sup> sãtnahá-xi cùu nchaa cue téé-án, chí cáhá<sup>n</sup> cuèhé-güedé cuendá ndédani càa espíritu cuèí ñà túú xini-güedé na espíritu cúú-xi, te ñ<sup>n</sup>-ni mee-güedé dacuíta nihnu-güedé méé-güedé sã dúcá<sup>n</sup> quide-güedé, <sup>13</sup> te sáá nduu te nacháhu-güedé nchaa sã quidé-güedé-án, te cuèí nduu cuèí niú cúdíí iní-güedé



quidé-güedë nchaa núú sã cuèhé sá dúhá sãni iní-güedé. Te òré nàtacá-ndó càda-ndo ì<sup>n</sup> vico chiñuhu-ndo Yá Ndióxi te chitnahá ñáhá-güedë xii-ndo, te cada dusa<sup>n</sup>-güedë sá cudií iní-güedé sá dándàhú ñáhá-güedë xii-ndo, te dicó sácá-núú cuáha ñaha-güedë xii-ndo dúca<sup>n</sup> na cada-güedé.

14 Te nchaa cue téé-á<sup>n</sup> òré xini-güedé ì<sup>n</sup> ñáiyu dihi te ndihi-ni sãni iní-güedé cáhá<sup>n</sup> ndihi ñaha-güedë xii-yu, te ñá túú ndúu vétú iní-güedé cuendá nchaa sá cuèhé sá dúhá quide-güedé chi uu<sup>n</sup>-gá uu<sup>n</sup>-gá sání iní-güedé cada-güedé. Te cuáhá<sup>n</sup>-güedé dándàhú-güedé nchaa ñáiyu ñá túú ñihí ndéé càda ndáá cuendá canchicú<sup>n</sup> nihnú-yu nchaa tnúhu cáhá<sup>n</sup>-güedé. Te mee-ni nchàa sá ndécú ndihi tnaha ñáiyu-güedé cúú iní-güedé, te cue téé-á<sup>n</sup> cúú-güedé cue téé duu<sup>n</sup> duu<sup>n</sup> sa ní xíta nihnu núú Yá Ndióxi. 15 Chi cúu-güedé cue téé vá cáni-gá iní-xi cada ndáá, te nchicú<sup>n</sup> nihnu-ná-güedé quidé-güedé nacuáa ní xóo cada ndíi Balaám déhe ndíi Bèór, chi ndíi Balaám-á<sup>n</sup> ní xóo tnahá iní ndíi cada ndíi chiú<sup>n</sup> cuèhé nacuáa ní xóo ñihí ndíi díhú<sup>n</sup>. 16 Te Yá Ndióxi ní quide-gá ní cáhá<sup>n</sup> búrru ndíi ní tenáá ñáhá-dí xii ndíi cuendá sá vá cáda ndíi ì<sup>n</sup> cuéchi sãni iní ndíi cada ndíi ní cùu. Te sá dúcá<sup>n</sup> ní cuu xiá<sup>n</sup> ní nguítuu ndíi ñá túú ní quide ndíi ì<sup>n</sup> sá ñá túú nándíhi sãni iní ndíi ní cùu.

17 Te nchaa cue téé duca<sup>n</sup> xiquide cúu-güedé dàtná ì<sup>n</sup> doco yichí, te cùu tucu-güedé dàtná ì<sup>n</sup> vícú sá xídó táchi te ñá túú dáú nchídó-xí, te sa ndècu túha ì<sup>n</sup> xichi núú ìo nee quíhi<sup>n</sup>-güedé cundecu-güedé ní caa ní quíhi<sup>n</sup>. 18 Te cue téé-á<sup>n</sup> cáhá<sup>n</sup>-güedé dàtná cáhá<sup>n</sup> ì<sup>n</sup> téé ìo cùu cahnu dico ñá túú vèdana nándíhi nchaa tnúhu cáhá<sup>n</sup>-güedé, te cue téé-á<sup>n</sup> dándàhú-güedé nchaa ñáiyu ichi ní dàñá ichi cuèhé ichi duha, te xáha<sup>n</sup>-güedé xii-yu sá cúu-ní càdá-yu nchaa sá cuèhé sá dúhá quide nchaa ñáiyu ndècu ichi díi iní, 19 te xáha<sup>n</sup> tucu-güedé sá cúu-ní càdá-yu nání véxi iní-yu cuéi sá vaha te cuéi sá cuèhé, dico mee-güedé chi mee-ni sá cuèhé sá dúhá cùnnu quide-güedé. Te nchaa ñáiyu ñá ndácú dàña nándi sá cuèhé sá dúhá cùu-yu dàtná ì<sup>n</sup> ñáiyu xinu cuéchi ñá túú tnahá dàña quee núú chíú<sup>n</sup> pàtróó<sup>n</sup>-xi. Te duca<sup>n</sup> sãtnahá-xi cúu-yu chi ñá ndácú-yu dàñá-yu nándi sá cuèhé sá dúhá quide-yu. 20 Te núu ñáiyu sa ní dàñá nchàa ichi cuèhé ichi duha cuendá sá ní cutnúni iní-yu nacuáa ndúu tnúhu Xitohó Jesucristú, Yaá ní dácácu nihnu ñaha xii-o núú ùhú núú ndàhú ná nànchocáva iní-yu cundecu tucú-yu ichi cuèhé ichi duha, te mee-ná sá cuèhé sá dúhá táxi tnuní ñáhá-xi xii-yu, te núu duca<sup>n</sup> te vaa-gá tucu cada-yu dàcúxí dàtná ní xóo cada-yu cútñàhà vátá cútñuní-gá iní-yu nacuáa ndúu tnúhu-gá. 21 Te vaha-gá sá vá ngúnu ichi-yu

ichi ndáá ní cùu te ñá díú sá sá ní ngúnu ichi-yu te ní dàñá-yu nchaa tnúhu-gá sá sá ní ñihí-yu ndècu ndíhi-yu sànu ichi ñaha-xi nacuáa cundecú-yu ní cùu. 22 Te ñáiyu duca<sup>n</sup> xiquide quèe ndáá-xi nacuáa cuáhá<sup>n</sup> ì<sup>n</sup> cuendú sá cáchi-xi: “Iná ní nacaxi-dí sá ní ndusa<sup>n</sup>-dí, te cuchi quiti ichi ní xichi ndute càndoo cuáhá<sup>n</sup>-ni tucu-dí cuchi ñuhu-dí núú ndèhyú”, duha cuáhá<sup>n</sup> cuendú-á<sup>n</sup>.

### 3

#### *Xitohó Jesucristú quixi tucu-gá*

1 Te nchaa nchòhó ñáiyu ìo cùu iní-í cútñuní iní-í sá ìo vaha sãni iní-ndó, te xèhé cúu-xí tütú cúu ùú cadúha-í sá cúu-xí-ndó, te ì<sup>n</sup>-ní cáhá<sup>n</sup>-í dándàcu iní ñáhá-í xii-ndo nchàa tnúhu sá sá ní xindedóho-ndo. 2 Chi cùnín-í sá vá nacuáana-ndo nchaa tnúhu ní cáhá<sup>n</sup> nchaa cue téé ní xóo cáhá<sup>n</sup> tnúhu Yá Ndióxi ndéé sanaha, te ní vá nacuáana-ndo nchaa tnúhu ní cáhá<sup>n</sup> cue téé ní cáhá<sup>n</sup> tnúhu Xitohó Jesucristú Yaá ní dácácu nihnu ñaha xii-o núú ùhú núú ndàhú, chi díu nchaa tnúhu-á<sup>n</sup> sánú ichi ñaha-xi xii-o nacuáa cada-o cundecu-o.

3 Te ìo-gá xini ñuhu-xi cutnúni iní-ndó nacuáa cada-xi òré vátá sáa-gá nduu quixi tucu Xitohó Jesucristú ñuyú<sup>n</sup>-a, te cáchi tnúhu-í xii-ndo sá cündècu ñáiyu cuhu<sup>n</sup> iní mee-ni nchàa sá cuèhé sá dúhá te mee-ni xiá<sup>n</sup> cada-yu, te cáhá<sup>n</sup> cuèhé cáhá<sup>n</sup> duhá-yu cuendá tnúhu Yá Ndióxi. 4 Te cachi-yu: “Ñá ndàá sá quixí Xitohó Jesucristú ñuyú<sup>n</sup>-a, chi núu quixi-gá te sá ndéé ama-gá sa ní quexio-gá ní cùu. Te dàtná-ni quide-xi vitna díu-ni duha ní quesaha-xi quide-xi ndéé cútñàhà ní ngáva ñuyú<sup>n</sup>, te díu-ni duha quide-xi ndéé cútñàhà ní xíndecu cue ñani tnáhá-ó ndéé sanaha, te díu-ni duha quide-xi ndéé ní sáá nduu ní xihí-güedé, te díu-ni duha quide-xi ndéé vitna”, duha cáhá<sup>n</sup>-yu. 5 Te ñucú<sup>n</sup> cada-yu vá cáda cuendá-yu sá Yá Ndióxi ní cáhá<sup>n</sup>-gá te ní ngúndecu andiu ndíhi ñuyú<sup>n</sup>-a, te díu-gá ní quide ní quene ñuhu yichí xiti ndute ní ngúndecu-xi ì<sup>n</sup> xio. 6 Te ì<sup>n</sup> xito ní dándáá Yá Ndióxi ndute ñuyú<sup>n</sup>-a ní dánaá-gá nchaa sá ìo. 7 Te Yá Ndióxi ní cachí-gá sá cündècu ní ñuyú<sup>n</sup>-a ndíhi andiu ndéé ná sáá nduu càda-gá nchaa nacuáa ní cáhá<sup>n</sup>-gá sá cúu-xí nchàa ñáiyu ndècu ichi cuèhé ichi duha, te dàvá-á<sup>n</sup> danáa-gá nchaa ñáiyu-á<sup>n</sup> chi cáyú andiu ndíhi ñuyú<sup>n</sup>-a.

8 Te nchaa nchòhó ñáiyu ìo cùu iní-í, ìo cuhu<sup>n</sup> iní-ndó tnúhu na cáhá<sup>n</sup>-í-a, chi Yá Ndióxi ñá túú sãni iní-gá dàtná sání ìmí méé-ó, te ì<sup>n</sup> nduu cùu-xi dàtná úxí ciendú cuíá, te úxí ciendú cuíá-á<sup>n</sup> cúu-xí dàtná ì<sup>n</sup> nduu sá cúu-xí-gá. 9 Te Yá Ndióxi ñá túú dàna ndodo iní-gá vá cáda-gá ì<sup>n</sup> sá cáhá<sup>n</sup>-gá dàtná cáchi cue ñáiyu sá dáná

ndòdo iní-gá cada-gá ìª sá càháª-gá, chi ñucùª tnahí dácaca-gá nduu cuendá sá ío cùndahú iní ñáhá-gá xii-o, te cuiní-gá sá ncháá ñáyiú ndixí túu iní-yu sá ñà túú quide váha-yu ndécú-yu te tuhá-yu ichi-gá, te ducaª quide-gá chi cuiní-gá sá vã cuita nihnu ni ìª-yu.

<sup>10</sup> Te dàtná quidé cuè ñadúhú quíhu-güedé ìª vehe dùhu-güedé òré ñá túú yíhi iní xítohó vehe-áª, te ducaª càda Xítohó Jesucristú chi nduu ñà túú yíhi iní ñáyiú ñuyú-a quixi tucu-gá, te dàvá-áª cada-xi andiu dàtná quidé-xí òré níhi víhi caháª ñúhu, te ñu-ni òré-áª ndoñuhu àndiu, te cáyú nchaá chódíní, te cáyú tucu ñàhá ñuyú-a ndíhi nchaá sá ío.

<sup>11</sup> Te vitna nchòhó sa xini-ndó sá náá ñùyú-a te xíª ío xini ñuhu-xi cada váha-ndo cùndecu-ndo, te cada-ndo nàcuáa cuiní mée Yã Ndióxí cunduu. <sup>12</sup> Te ío nducu ndèe-ndo ducaª cada-ndo cuendá ducaª ndíhi-ni sáá nduu càda-gá nchaá nàcuáa càháª-gá, te ducaª nchòhó cundecu túha-ndo sáá nduu-ãª. Te ñu-ni nduu-ãª ndoñuhu àndiu chi cáyú-xi, te ñu-ni ducaª ndòñuhu tucu nchaá chódíní chi ndíhi-di cáyú. <sup>13</sup> Te nchoo ndètu-o sáá nduu cùndecu-o ìª ñuyú sáá, te quini-ó ìª andiu saa datná ní cachí Yã Ndióxí, te yácaª chi mee-nã cue ñáyiú quide váha cundecu.

<sup>14</sup> Te nchòhó ñáyiú ío cùu iní-í, ñini ndètu-ndo sáá nduu dùcaª cada-xi ío nducu ndèe-ndo cada-ndo mee-ni sá vãha cundecu-ndo ichi Yã Ndióxí, te cundecu nahí-ndo, te cada-ndo nchàa nacuáa vá cùndecu cuéchi-ndo núú-gá. <sup>15</sup> Te ío cada cuendá-ndó sá dácaca-gá nduu dùcaª cada-gá chi cuiní-gá sá ncháá ñáyiú naníhi tàhú-yu. Te té Páblú téé ío cùu iní-ó ndècu ndíhi-o ichi Xítohó Jesucristú ñu-ni nàcuáa càháª-í-a ñu-ni ducaª ní tee-dé ìª núú tùtú ní dáquixí-dé ndaha-ndo, te ní tee-dé nàcuáa ní dácáhú iní ñáhá Yã Ndióxí xii-dé. <sup>16</sup> Te ñu-ni ducaª càháª-dé nchaá dava-gá núú tùtú cadúha-dé, te dava tnúhu càháª-dé ío úhú tecú tnúni-ó, núu xíª ñáyiú ñá túú cùtnuní váha iní-xi, ñáyiú ío yáchí sàndáá iní-xi ìª tnúhu, ñáyiú-áª tècú tnúni dátñi-yu nchaá tnúhu ní chídó tnúni-dé, ndíhi nchaá dava-gá tnúhu yòdo tnúni núú tùtú Yã Ndióxí, te sá dúcaª quidé-yu te dacuíta nihnú-yu mée-yu.

<sup>17</sup> Te nchòhó ñáyiú ío cùu iní-í, sa cùtnuní iní-ndó nàcuáa quide dava ñáyiú, núu xíª ío xini ñuhu-xi quíhi iní-ndó cùndecu-ndo cuendá ducaª cùndecu-ni-ndo ichi-gá, te vá dáñá-ndó mèe-ndo dandahú ñáhá nchàa cue téé ndècu ichi cuehé ichi duha, chi cue téé-áª ñà túú sàni váha iní-güedé cuendá tnúhu Yã Ndióxí. Te núu na dàña-ndo mee-ndo dandahú ñáhá-güedé xii-ndo te vá cùndecu váha-gá-ndó ichi-gá dàtná

ndécú-ndó vitna. <sup>18</sup> Te nchòhó uuª-gá uuª-gá cuita cutnuni-gá iní-ndó quíhiª nchaá nàcuáa ta chindee ñaha Xítohó Jesucristú xii-ndo cuáháª. Te ducaª ío-gá cuita cutnuni iní-ndó ncháa nacuáa sàni iní-gá, te ñu-gá cúú-gá Yáa ní dácácu nihnu ñaha xii-o núú úhú núú ndàhú. Te chí ná cachí-ó sá ío càhnu cuu-gá cuéi vitna té cuéi ndée núú cuáháª núú vèxi. Te ducaª na cùnduu. Te ío chí cáda ndèe iní-nã vitna.

## 2

## TUTÚ DÍHNA NÍ CADÚHA TÉ JUÁÁ

### *Tnúhu sá cáhá<sup>n</sup> nacuaa naníhi tãhú-ó*

<sup>1</sup> Te yúhú té Juáá cãchí tnúhu-í xii-ndo cuendá Cristú Yaá cãhá<sup>n</sup> nacuaa cundecu ndíhi-o Yã Ndióxi. Te Cristú-á<sup>n</sup> sa ndècu-gã ndéé cútñáhã ní ngáva ñuyúú. Te yúhú ní xini núú-í ndíhi cue téé ní xica cuu ndíhi-í nacuaa caa nacuaa ndúu-gã. Te ní xíndedóho-ndí tnúhu ní cáhá<sup>n</sup>-gã, te ní tendaha-ndí-gã te ní cutnùní ndáá iní-ndí sá ñ<sup>n</sup> yiqui cuñú cúú-gã. <sup>2</sup> Te ní quixi túu-gã ñuyúú-a, te ní xini-ndí-gã, te xiã<sup>n</sup> cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gã ndíhi Tãtã-gã Dútú Ndióxi ní cùu, te ní quixi-gã ñuyúú-a ní xíndecu-ndí ndíhi-gã. Te ní cachí tnúhu-gã xii-ndí sá ndúú tãhú-ó cundecu ndíhi-o Yã Ndióxi ní caa ní quíh<sup>n</sup> te núu na quíndáá iní-ó-gã. <sup>3</sup> Te xiã<sup>n</sup> dátúu-ndí núu-ndó nchãa sá ñí xini-ndí, ndíhi nchaa sá ñí xíndedóho-ndí cuendá cuu ñ<sup>n</sup>nuu-o nchãa-o datná nchúhú cúú ñ<sup>n</sup>nuu-ndí ndíhi Tãtã-ó Dútú Ndióxi, ndíhi Déhe-gã Xítohó Jesucristú. <sup>4</sup> Te xiã<sup>n</sup> núu tõe-í nchaa tnúhu-a cuendá cudíí iní-ó nchãa-o.

### *Yã Ndióxi cúú-gã datná ñ<sup>n</sup> ñuhu*

<sup>5</sup> Te nchaa tnúhu ní dánèhé ñáhã Xítohó Jesucristú xii-ndí, xiã<sup>n</sup> dánèhé ñáhã-í xii-ndo. Te ní cãchí-gã sá Yã Ndióxi cúú-gã datná ñ<sup>n</sup> ñuhú dáyèhé-gã iní-ó, te duca<sup>n</sup> sãtnahã-xi cùu-gã chi ío váha quide-gã, te ñã túú quide-gã ní ñ<sup>n</sup> sá cuèhé sá dúhá. <sup>6</sup> Te núu cãchí-ó sá ndécú-ó ichi Yã Ndióxi, te quide-ni-o nchaa sá cuèhé sá dúhá, te dâcuandehnde-o te ñã túú quide ndáá-ó núú-gã. <sup>7</sup> Te núu na càda váha-o datná quidé mée-gã, te cuu ñ<sup>n</sup>nuu-o nchãa-o. Te ndada ndoo ndada nine-gã iní-ó, chi cada cãhmu iní-gã nchaa sá cuèhé sá dúhá quide-o, chi diu cuendá-á<sup>n</sup> ní xihí Déhe-gã Xítohó Jesucristú núú cùrúxi.

<sup>8</sup> Te núu cãchí-ó sá ñã túú quide-o ní ñ<sup>n</sup> sá cuèhé sá dúhá, te dândahú-ó mée-o, te ñã túú quide ndáá-ó núú Yã Ndióxi. <sup>9</sup> Te núu na nãhmã-ó nchãa yíca cuèchi-o núú-gã, te mee-gã cada váhu iní-gã, te ndada ndoo-gã iní-ó, cuendá cada ndáá-ó cundecu-o ichi-gã, chi mee-gã ío váha quide-gã te ío ndáá quidé-gã, duca<sup>n</sup> ní cáhã<sup>n</sup>-gã te duca<sup>n</sup> quide-gã. <sup>10</sup> Te núu na cãchí-ó sá ñã túú quide-o ní ñ<sup>n</sup> sá cuèhé sá dúhá, te quide-o Yã Ndióxi ñ<sup>n</sup> ñándéhné, dico ñã túú ndèhnde-gã. Te ñã túú ndècu tnúhu-gã iní-ó te núu duca<sup>n</sup> na càda-o.

### *Xítohó Jesucristú cáhã<sup>n</sup> ndàhú-gã cuendá-ó*

<sup>1</sup> Te nchòhó ñáyiu cùu datná déhe-í, chido tnuní-í nchaa tnúhu-a cuendá sá vã cáda-ndó ní ñ<sup>n</sup> sá cuèhé sá dúhá. Dico núu ñ<sup>n</sup>-ndo quide-ni-ndo nãndí sá cuèhé sá dúhá, te ndècu ñ<sup>n</sup> Yaá cáhã<sup>n</sup> ndàhú cuendá-ó núú Yã Ndióxi. Te Yaá-á<sup>n</sup> cúú-gã Xítohó Jesucristú Yaá quidé ndáá. <sup>2</sup> Te ní xihí-gã sá cuendá nchaa yíca cuèchi-o cuendá ngúndecu váha-o núú-gã te núu na quíndáá iní-ó-gã. Te ñã díúú-ní sá cuendá yíca cuèchi nchoo ñí xihí-gã, chi tnàhá cuendá nchaa yíca cuèchi ñáyiu ní càa xico ñuyúú.

<sup>3</sup> Te núu cada-o nchãa nacuaa cáhã<sup>n</sup> Yã Ndióxi, te cutnùní iní-ó sá ndécú-ó ichi-gã. <sup>4</sup> Te núu cãchí-ó sá ndécú-ó ichi-gã te ñã túú quide-o nacuaa cáhã<sup>n</sup>-gã, te dâcuandehnde-o, te ñã túú quide ndáá-ó núú-gã. <sup>5</sup> Te núu sãndáá ndisa iní-ó tnúhu-gã, te quide-o nchaa nacuaa cáhã<sup>n</sup>-gã, te duca<sup>n</sup> te cùu iní ndisa-o-gã, te cùtnuní ndáá iní-ó sá ndécú-ó ichi-gã. <sup>6</sup> Te núu cãchí-ó sá ndécú-ó ichi Yã Ndióxi, te xini ñuhu-xi cada ndáá-ó cundecu-o ñuyúú-a datná ní quide ndáá Xítohó Jesucristú cútñáhã ní xíndecu-gã ñuyúú-a.

### *Nduú sáá*

<sup>7</sup> Te nchòhó ñáyiu ndècu ndíhi-í ichi Xítohó Jesucristú, ñã túú chido tnuní-í ñ<sup>n</sup> tnúhu saa sá cúú-xi-ndó, chi diu-ní tnúhu sá ñí ngúndecu ndíhi-ndo ndéé díhna, tnúhu ní xíndedóho-ndo ndéé cútñáhã ní sãndáá iní-ndó-gã, xiã<sup>n</sup> chidó tnuní-í. <sup>8</sup> Te tnúhu-a cùu-xi datná ñ<sup>n</sup> tnúhu saa tõe-í dândacu iní ñáhã-í xii-ndo nacuaa ní quide Xítohó Jesucristú cútñáhã ní quixi-gã ñuyúú-a ní quide váha-gã, te tnàhá nchòhó ní tnúu-ndo tnúhu-gã te quide váha-ndo tnàhá-ndó. Te vitna ñ<sup>n</sup> nduu ñ<sup>n</sup> nduu ta cùu vai ñáyiu ta dàña nchaa sá cuèhé sá dúhá cuáhã<sup>n</sup>, chi Xítohó Jesucristú tá dândixi túu-gã iní-yu cuendá cutnùní iní-yu nacuaa ndúu cuendá Yã Ndióxi.

<sup>9</sup> Te núu cãchí-ó sá quidé váha-o, te cùu úhú iní-ó tnàha ñáyiu-o, te xiã<sup>n</sup> ñã túú quide ndáá-ó, chi ndècu-ni-o ichi cuèhé ichi duha sá dúcã<sup>n</sup> quide-o. <sup>10</sup> Te núu na cùu iní-ó tnàha ñáyiu-o datná cúú iní ñáhã mée Yã Ndióxi xii-o ñã, te quide ndáá-ó núú-gã, te vá cãnúchi-o tnaha ñáyiu-o ñ<sup>n</sup> ichi cuèhé ichi duha. <sup>11</sup> Te núu cùu úhú iní-ó tnàha ñáyiu-o, te ñã túú quide váha-o núú Yã Ndióxi, chi ndècu-ni-o ichi cuèhé ichi duha, te ñã túú cùtnuní iní-ó sá quidé-ó. Chi cùu-o datná ñ<sup>n</sup> tõe ndècu núú née chi ñã cùtnuní núú-dé ndéé ichi quíh<sup>n</sup>-dé. Duca<sup>n</sup> sãtnahã-xi cùu nchoo chi ñã cùtnuní iní-ó ndéé ichi quíh<sup>n</sup>-ó

te núu duca<sup>n</sup> na càda-o cuu úhú iní-ó tnàha ñáyi-u-o.

<sup>12</sup> Te nchòhó ñáyi-u cùu datná déhe-í, yúhú chidó tnùn-í tnúhu-a ì<sup>n</sup> núú tütú càchí tnúhu-í xii-ndo sá ñí quide càhnu iní Yá Ndiòxí nchaa cuéchi-ndo, chi diu cuendá-án ní xihí Xitohó Jesucristú. <sup>13</sup> Te nchòhó ñáyi-u sacuéhé, yúhú tée-í tnúhu-a sá cúu-xí-ndó chí càhá<sup>n</sup> ndihí-ndo Jèsús, te Yaá-án sa ndècu-gá ndéé cútñàhá ní ngáva ñuyúú. Te nchòhó ñáyi-u nchicú<sup>n</sup>-gá téé tucu-í tnúhu-a sá cúu-xí-ndó chí ñá túú sàndáá iní-ndó tnúhu càhá<sup>n</sup> yucu ñávàha.

Te nchaa nchòhó ñáyi-u cùu datná déhe-í, téé tucu-í tnúhu-a sá cúu-xí-ndó, chí sa càhá<sup>n</sup> ndihí-ndo Tàtá-ó Dütú Ndiòxí. <sup>14</sup> Te nchòhó ñáyi-u ní sàhnu, yúhú chidó tnùn-í tnúhu-a ì<sup>n</sup> núú tütú chí càhá<sup>n</sup> ndihí-ndo Jèsús, te Yaá-án sa ndècu-gá ndéé cútñàhá ní ngáva ñuyúú. Te nchòhó ñáyi-u nchicú<sup>n</sup>-gá, yúhú chidó tnùn-í tnúhu-a chí ìo nihí ndéé-ndó ndècu-ndo, chí tnù-ndo tnúhu càhá<sup>n</sup> Yá Ndiòxí. Te ñá túú sàndáá iní-ndó tnúhu càhá<sup>n</sup> yucu ñávàha.

<sup>15</sup> Te vá cùhú<sup>n</sup> iní-ndó ní ì<sup>n</sup> sá cuèhé sá dúhá ìo ñuyúú-a, te ní vǎ cáni iní-ndó càda-ndo. Chí núu na cùhu<sup>n</sup> iní-ó nchàa sá cuèhé sá dúhá ìo ñuyúú-a ña, te ñá túú Tàtá-ó Dütú Ndiòxí ñúhú iní-ó te núu duca<sup>n</sup> na càni iní-ó. <sup>16</sup> Te nchaa ñáyi-u ñuyúú-a quidé-yu nchaa sá cuèhé sá dúhá, chí diu nchaa xiǎ<sup>n</sup> cúú<sup>ñ</sup> iní-yu cadá-yu. Te nchaa sá cuèhé sá dúhá sàni iní-yu, ndihí nchaa sá xini-yu quidé-yu. Te xiquide nínu-yu mèe-yu cuendá nchaa sá ndècú ndihí-yu. Te nchaa sá ñá túú vǎha ní cacu nihnu-xi ñuyúú-a. <sup>17</sup> Te nchaa sá ñá túú vǎha ìo ñuyúú-a, ndihí nchaa sá sání cuèhé sání dùha iní-yu cuita ndihí nihnu-xi quíhí<sup>n</sup>. Te nchaa ñáyi-u tnù ñá túú càhá<sup>n</sup> Yá Ndiòxí cundecú-yu ndihí-gá ní caa ní quíhí<sup>n</sup>.

*Tnúhu ndáá tnúhu Yá Ndiòxí ndihí tnúhu ndehnde*

<sup>18</sup> Te nchòhó ñáyi-u cùu datná déhe-í, sa nihí-ndó tnúhu sá quíxí ì<sup>n</sup> téé cunu-gǎ-dé cuu úhú iní-dé Cristú. Te sa xindecu-gǎ ñáyi-u cùu úhú iní ñáhá xii-gǎ, núu xiǎ<sup>n</sup> cútñúni iní-ó sǎ sǎ ta cuyatni nduu naa ñuyúú-a. <sup>19</sup> Te ñáyi-u-án ní xindecu ndihí ñáhá-yu xii-o, te ní queé-yu cuáhá<sup>n</sup>-yu chí ñá túú ní cùu ì<sup>n</sup>nuu-o ndihí-yu. Chí núu dicó ní cùu ì<sup>n</sup>nuu-o ndihí-yu te cundecu ndihí ñáhá-yu xii-o ní cùu. Te duha ní cuu cuendá cutñúni ndáá iní-ó nchàa-o sá ñá túú cùu ì<sup>n</sup>nuu-o ndihí-yu, chí ñá túú sàndáá iní-yu Yá Ndiòxí.

<sup>20</sup> Te Xitohó Jesucristú ní taxi-gǎ Espiritú Yá Ndiòxí ndècú ndihí-o, núu xiǎ<sup>n</sup> təcú tnùn-í-ó tnúhu-gǎ. <sup>21</sup> Te cuendá sá xini-ndó tnúhu ndáá tnúhu Yá Ndiòxí núu xiǎ<sup>n</sup> tée-í tnúhu-a, te ñá díú ì<sup>n</sup> sá ñá cútñúni iní-ndó cùu-xí. Te sa nàha-ndo sá ní ì<sup>n</sup> tnúhu

ndehnde ñá túú ñùtnahá-xi núú tnúhu Yá Ndiòxí, chí mee nine-ni tnúhu ndáá cúu-xí.

<sup>22</sup> Te nchaa ñáyi-u càchí sá ñá díú Jèsús cúu Cristú Yaá ní tendaha Yá Ndiòxí ní quixi ñuyúú-a dàcuandehndé-yu, te cùu úhú iní-yu Jèsús. Te diu-ní-yu càchí-yu sá ñá díú Déhe Yá Ndiòxí cúu Jèsús, te sá dúcá<sup>n</sup> quidé-yu te cùu úhú iní-yu Yá Ndiòxí ndihí Déhe-gǎ Jèsús. <sup>23</sup> Te nchaa ñáyi-u ñá túú sàndáá iní sá Déhe Yá Ndiòxí cúu Jèsús, ñáyi-u-án ñá túú ndècú-yu ichi Tàtá-ó Dütú Ndiòxí. Te nchaa ñáyi-u càhá<sup>n</sup> sá Déhe Yá Ndiòxí cúu Jèsús, ñáyi-u-án ndècú-yu ichi Tàtá-ó Dütú Ndiòxí.

<sup>24</sup> Te nchaa tnúhu Yá Ndiòxí ní tecú dóho-ndo ndéé dhna, tnúhu-án<sup>n</sup> cuhu<sup>n</sup> iní-ndó. Te núu nchaa tnúhu-án ná cùhu<sup>n</sup>-ni iní-ndó, te cundecu ndihí-ndo Yá Ndiòxí ndihí Déhe-gǎ cuéí vǎ cundècu túu-ndo ndihí-gǎ ñuyúú-a. <sup>25</sup> Te Jèsús ní cachí-gǎ sá ndúú tǎhú-ó cundecu ndihí-o-gǎ ní caa ní quíhí<sup>n</sup> andiu.

<sup>26</sup> Te cuendá nchaa ñáyi-u dándahú ñáhá xii-ndo ní chidó tnùn-í tnúhu-a, <sup>27</sup> dico nchòhó chí ndècu ndihí-ndo Espiritú Yá Ndiòxí sá ní taxi Xitohó Jesucristú. Núu xiǎ<sup>n</sup> ñá túú xini ñuhu-ndo ñáyi-u danèhé ñáhá xii-ndo, chí mee Espiritú-gǎ danèhé ñáhá-xi nchaa sá vǎha. Te nchaa sá danèhé ñáhá-xi xii-ndo cuu-xi sá ndáá, te ñá díú ì<sup>n</sup> tnúhu ndehnde. Te vitna chí cǎnchicú<sup>n</sup> nihnu-ni ichi Yá Ndiòxí datná ní sanu ichi ñaha mee Espiritú-gǎ xii-ndo.

<sup>28</sup> Te nchòhó ñáyi-u cùu datná déhe-í, chí cǎnchicú<sup>n</sup> nihnu-ni ichi Xitohó Jesucristú, chí cundécú óré ná quíxí tucu-gǎ ñuyúú-a te vá yùhú-ndó te ní vá cúu càhá<sup>n</sup> núu-ndó núu-gǎ. <sup>29</sup> Te nchòhó sa nàha-ndo sá mée-gǎ quidé ndáá-gǎ, te sa xini-ndó sá ncháá ñáyi-u quide ndáá cúu-yu déhe Yá Ndiòxí.

### 3

*Ñáyi-u cùu déhe Yá Ndiòxí*

<sup>1</sup> Te chí cuáha cuendá sá ìo cùu iní ñáhá Tàtá-ó Dütú Ndiòxí xii-o cuendá sá cúu-ó déhe-gǎ, chí duca<sup>n</sup> ní cachí-gǎ, te déhe ndisa-gǎ cúu-ó. Te núu xiǎ<sup>n</sup> ñáyi-u ndècu ichi cuèhé ichi duha ñá cúu quini ñáhá-yu xii-o, chí ñá túú xini-yu nàcuáa nduu cuendá Yá Ndiòxí. <sup>2</sup> Te nchòhó ñáyi-u ìo cùu iní-í, vitna cùu-o déhe Yá Ndiòxí, te vátá cútñúni vǎha-gǎ iní-ó nǎsa cunduu-o ndéé núu cuáhá<sup>n</sup> núú vèxi. Dico sa cútñúni iní-ó sǎ óré ná quíxí tucu Xitohó Jesucristú te nduu-o datná cáá mèe-gǎ, chí quini-ó-gǎ nàcuáa-ni cǎa nàcuáa-ni nduu-gǎ. <sup>3</sup> Te nchaa ñáyi-u sa ndètu ñaha xii-gǎ sa ta ngündecu túha-yu cuáhá<sup>n</sup>, chí ta nduu ndoo nduu nine iní-yu cuáhá<sup>n</sup> datná cáá ndòo caa nine mee-gǎ.

<sup>4</sup> Te nchaa ñáyi-u quide nándi sá cuèhé sá dúhá ñá túú quide vǎha-yu núú Yá Ndiòxí, chí ní cachí-gǎ sá vá dúcá<sup>n</sup> càda-o. <sup>5</sup> Te sa

nàha-ndo sá nǐ quixi túu Xítóhó Jesucristú ñuyúú-a cuendá cada càhnu iní-gá nchaa sá cuèhé sá dúhá quide-o, chí mee-gá ñá túú quide-gá nǐ ñá sá cuèhé sá dúhá. <sup>6</sup> Te nchaa ñáyuu ndècu ichi Yá Ndióxi ñá túú ñùhu-yu ichi cuèhé ichi duha. Te nchaa ñáyuu ñùhu ichi cuèhé ichi duha ñá túú xini-yu nàcuáa ndùu cuendá Xítóhó Jesucristú te nǐ ñá túú xini-yu nása càa-gá. <sup>7</sup> Te nchòhó ñáyuu cùu datná déhe-í, vá dáñá-ndó mée-ndo dandahú ñáhá ñáyuu ndècu ichi cuèhé ichi duha, chí càchí-yu sá cúu cùndecu-o ichi Yá Ndióxi te cada-o nándi sá cuèhé sá dúhá dico ñá ndáá. Te nchaa ñáyuu quide váha quide ndáá-yu datná quidé mée Jesús. <sup>8</sup> Te nchaa ñáyuu ndècu ichi cuèhé ichi duha ndècu ndihí-yu yucu ñávàha, chí duca<sup>n</sup> quide mee-xi ndéé cùtnàhá vátá ngávà-gá ñuyúú. Te xíá<sup>n</sup> nǐ quixi Jesús Déhe Yá Ndióxi ní dáquéé tǐhú-gá nchaa sá quidé yùcu ñávàha.

<sup>9</sup> Te nchaa ñáyuu ní natuha ichi Yá Ndióxi ní nduú-yu déhe-gá, te ñá túú-gá quidé-yu nándi sá cuèhé sá dúhá chí ní ndada ndoo ní ndada nine-gá iní-yu. Núu xíá<sup>n</sup> ñá túú-gá quidé-yu nándi sá cuèhé sá dúhá, chí ní ngùndecu ndihí ñaha-gá xii-yu. <sup>10</sup> Te cùtnuní iní-ó nándi cùu ñáyuu cùu déhe Yá Ndióxi, te cùtnuní iní-ó nándi cùu ñáyuu cùu déhe yucu ñávàha. Te nchaa ñáyuu ñá túú quide ndáá, te cùu úhú iní-yu tnàha ñáyúú-yu, te ñáyuu-á<sup>n</sup> ñá díú déhe Yá Ndióxi cúú-yu.

#### *Cuu iní tnàhá-ó ñá ñá-ó*

<sup>11</sup> Te ndéé dré ní natuha-o ichi Yá Ndióxi ní tecú dóho-o sá cúu iní-ó tnàha ñáyuu-o. <sup>12</sup> Te vá cùnduu úhú iní-ó datná ní quide ndíi Cáin, chí ndíi-á<sup>n</sup> ní xíndecu ndíi ndihí yucu ñávàha núu xíá<sup>n</sup> ní sahni ndíi ñani ndíi. Te duca<sup>n</sup> ní quide ndíi chí ní xíndecu ndíi ichi cuèhé ichi duha, te ñani ndíi ní xíndecu-dé ichi váha.

<sup>13</sup> Te nchòhó ñáyuu ndècu ndihí-í ichi Xítóhó Jesucristú, vá cadá cuendá-ndó sá cúu úhú iní ñáhá nchaa ñáyuu ndècu ichi cuèhé ichi duha xii-ndo. <sup>14</sup> Te cunaha-ndo na càchí tnúhu-í xii-ndo sá núu na cùu iní-ó tnàha ñáyuu-o, te cùtnuní iní-ó sá sá ní dáñá-ó ichi sá tá dàcuíta nihnu ñaha xii-o cuáhá<sup>n</sup> ní cùu, te vitna ní tñi-o ichi váha. Te nchaa ñáyuu ñá túú cùu iní tnàha ñáyuu-xi ñùhu-ní-yu ichi cuáhá<sup>n</sup>-yu núú úhú núú ndáhú. <sup>15</sup> Te nchaa ñáyuu ñá túú quini ndéé tnàha ñáyuu-xi cúú-yu datná ñá ñáyuu sàhni ndíyi. Te nchòhó sa nàha-ndo sá nǐ ñá ñáyuu sàhni ndíyi ñá túú ndècu ndihí-yu tnúhu ndee iní sá nànihí tǎhú-yu. <sup>16</sup> Te Xítóhó Jesucristú ní xihí-gá cuendá nchaa yícá cuèchi-o, núu xíá<sup>n</sup> cùtnuní iní-ó sá io cùu iní ñáhá-gá xii-o. Te xíá<sup>n</sup> cùtnuní iní-ó nàcuáa cada-o cùu iní-ó tnàha ñáyuu-o, te cuéi na cùú-ó cuendá sá cúu-xí ñá-yu, cuendá-ná sá ná dàcácu nihnu-ó-yu núú tñúndòho ndecúú-yu.

<sup>17</sup> Te núu ndècu ndihí-o sá cóho sá caxí-ó ndihí nchaa sá nándihí-o, te ndècu ñáyuu ndáhú ñá túú vèdana ná ndecú ndihí, te ñá túú chindee-ó-yu, te ñá túú cùu iní-ó Yá Ndióxi te núu duca<sup>n</sup> na càda-o. <sup>18</sup> Te nchòhó ñáyuu cùu datná déhe-í vá cuendá-ní cùnàha càhá<sup>n</sup>-ndó sá cúu iní tnàhá-ndó, chí cuu iní tnàhá ndisa-ndo te coto tnàha-ndo.

#### *Vá yùhú-ó núu Yá Ndióxi*

<sup>19</sup> Te núu duca<sup>n</sup> na càda-o, te cùtnuní iní-ó sá ndecú-ó ichi ndáá ichi Yá Ndióxi, te ñá túú-gá ná quíhi iní-ó núu-gá. <sup>20</sup> Te núu ndihí iní-ó cuendá ñá sá ní quide-o, te sa nàha Yá Ndióxi te núu ní quide váha-o àdi ní quide cuèhé-ó, chí sa nàha ndáá-gá nàcuáa càa iní-ó. <sup>21</sup> Te nchòhó ñáyuu io cùu iní-í, na càchí tnúhu-í xii-ndo, te núu ñá túú ná sání iní-ó te ñá túú ná quidé-ó, te vá yùhú-ó núu Yá Ndióxi. <sup>22</sup> Te nchaa sá váha na càcá<sup>n</sup>-ó núu Yá Ndióxi, te mee-gá taxi-gá chí tñi-o tnúhu càhá<sup>n</sup>-gá, te quide-o nchaa nàcuáa cùu iní-gá. <sup>23</sup> Te ní cachí Yá Ndióxi sá quindáá iní-ó Déhe-gá Xítóhó Jesucristú, te cuu iní-ó tnàha ñáyuu-o datná ní cachí-gá. <sup>24</sup> Te nchaa ñáyuu tñi tnúhu-gá ndecú-yu ichi-gá, te ndècu ndihí ñaha-gá xii-yu. Te cùtnuní iní-ó sá ndecú-ó ndihí-gá chí ní taxi-gá Espiritú-gá ndecú ndihí-o.

## 4

### *Ñáyuu ndècu ndihí Espiritú Yá Ndióxi ndihí ñáyuu cùu úhú iní ñáhá xii Xítóhó Jesucristú*

<sup>1</sup> Te nchòhó ñáyuu io cùu iní-í, vá cùtexínu quindáá iní-ndó tnúhu càhá<sup>n</sup> nchaa ñáyuu càchí sá ndecú ndihí Espiritú Yá Ndióxi. Chí díhna-gá cada cuendá váha-ndo te núu càhá<sup>n</sup> ndáá-yu nàcuáa càhá<sup>n</sup> tnúhu Yá Ndióxi, chí io vai ñáyuu ñuyúú-a cachí-yu sá càhá<sup>n</sup>-yu tnúhu-gá dico ñá ndáá. <sup>2</sup> Te duha cùtnuní iní-ó nándi cùu ñáyuu ndècu ndihí Espiritú Yá Ndióxi. Nchaa ñáyuu càhá<sup>n</sup> ndáá sá Xítóhó Jesucristú ní quixi-gá ñuyúú-a te ní cuu-gá ñá yiqui cùñú, ñáyuu-á<sup>n</sup> cúú-yu ñáyuu cùu cuendá Yá Ndióxi. <sup>3</sup> Te nchaa ñáyuu ñá túú càhá<sup>n</sup> nàcuáa càa Jesús cùtnàhá ní quixi-gá ñuyúú-a ñáyuu-á<sup>n</sup> dándahú ñáhà-yu, chí ñá túú cúú-yu ñáyuu cùu cuendá Yá Ndióxi. Te díu-ní-yu cùu úhú iní-yu Jesús. Te nchòhó sa nàha-ndo sá cùndècu ñáyuu cuu úhú iní ñáhá xii-gá, dico yùhú càchí tnúhu-í xii-ndo sá sá ndecú-yu.

<sup>4</sup> Te nchòhó ñáyuu cùu datná déhe-í, ndècu ndihí-ndo Yá Ndióxi, te ñá dáñá-ndó dándahú ñáhá nchaa ñáyuu càchí sá càhá<sup>n</sup> tnúhu-gá te ñá ndáá. Te ñá túú sàndáá iní-ndó chí Yá Ndióxi Yáá ndecú ndihí-ndo taxi tñuní víhí-gá dàcúúxí yùcu ñávàha ndècu ndihí nchaa ñáyuu ñùhu ichi cuèhé ichi duha. <sup>5</sup> Te nchaa ñáyuu dándahú ñáhá sá càhá<sup>n</sup> tnúhu Yá Ndióxi ndecú-yu ichi

cuèhé ichi duha, te mee-ni cuendá nchaa sá jó ñuyú-a càhá<sup>n</sup>-yu. Te tédóho ñaha nchaa dava-gá ñáyiu ndècu ñu-ni ichi cuèhé ichi duha. <sup>6</sup> Te nchoo cùu-o ñáyiu cùu cuendá Yá Ndiòxí. Te nchaa ñáyiu xindecu ichi-gá tñi-yu tnúhu càhá<sup>n</sup>-ó, te nchaa ñáyiu ñá túú ndècu ichi-gá ñá túú tñi-yu tnúhu càhá<sup>n</sup>-ó. Te duha te cùtnuní iní-ó nándi cùu ñáyiu càhá<sup>n</sup> ndáá, te cùtnuní tucu iní-ó nándi cùu ñáyiu dándahú ñáhá.

*Cuu iní-ó tnàha ñáyiu-o dàtná cúu iní ñáhá mèe Yá Ndiòxí xii-o*

<sup>7</sup> Te nchòhó ñáyiu ío cùu iní-í, xini ñuhu-xi cuu iní tnáhá-ó dàtná cúu iní ñáhá mèe Yá Ndiòxí xii-o, chi mee-gá táxi-gá sá xini tnùní-ó cuendá cuu iní-ó tnàha ñáyiu-o. Te nchaa ñáyiu cùu iní tnàha ñáyiu-xi cùu-yu déhe Yá Ndiòxí, te cùtnuní ndáá iní-yu sá ndécú ndihí ñaha-gá xií-yu. <sup>8</sup> Te nchaa ñáyiu ñá túú cùu iní tnàha ñáyiu-xi ñá túú ndècu ndihí-yu Yá Ndiòxí. Te nchaa ñáyiu ndècu ndihí Yá Ndiòxí, ñáyiu-án sãñaha-gá sá xini tnùní-yu cuendá cuu iní-yu tnàha ñáyiu-yu. <sup>9</sup> Te cùtnuní iní-ó sá cúu iní ñáhá Yá Ndiòxí xii-o nchaa-o, chi ní tendaha-gá ñ<sup>n</sup>dii díí-ní Déhe-gá Xítóhó Jesucristú ní quixi-gá ñuyú-a cuendá sá díú-gá cada te naníhí tàhú-ó, te núu na quindáá iní-ó tnúhu-gá. <sup>10</sup> Te ío cùu iní ñáhá Yá Ndiòxí xii-o nchaa-o. Te ñá díú sá meé-ó cùu iní-ó-gá, chi díhna-gá meé-gá sa cùu iní ñáhá tnàhí-gá xii-o, núu xiá<sup>n</sup> ní tendaha-gá Déhe-gá ní quixi-gá ñuyú-a ní xihí-gá sá cuendá nchaa yicá cuèchi-o.

<sup>11</sup> Te nchòhó ñáyiu ío cùu iní-í, xini ñuhu-xi cuu iní tnáhá-ó, chi mee Yá Ndiòxí ío cùu iní ñáhá-gá xii-o. <sup>12</sup> Te ní ñ<sup>n</sup> nchoo ñáyiu ndècu ñuyú-a ñá túú xini-ó nacuaá cãa Yá Ndiòxí, dico nchoo ñáyiu ní tuha ichi-gá chi cùtnuní iní-ó sá ndécú ndihí ñaha-gá xii-o. Núu xiá<sup>n</sup> cúu iní tnáhá-ó ñ<sup>n</sup> ñ<sup>n</sup>-o, te cùtnuní iní-ó sá cúu iní ndisa-o-gá. <sup>13</sup> Te cùtnuní iní-ó sá ndécú-ó ichi-gá, te ndècu ndihí ñaha-gá xii-o, chi ní taxi-gá Espiritú-gá ndécú ndihí-o. <sup>14</sup> Te yúhu ndihí dava-gá cue téé ní xica cuu ndihí-gá càhá<sup>n</sup>-ndí sá ní xini-ndí Jesús Déhe Yá Ndiòxí ní quixi-gá ñuyú-a, chi Tãtá-ó Dütú Ndiòxí ní tendaha ñaha xii-gá ní quixi-gá cuendá dàcãcu nihnu-gá nchaa nchoo ñáyiu ndècu ñuyú-a núu ùhú núu ndàhú. <sup>15</sup> Te nchaa ñáyiu càhá<sup>n</sup> ní yúhu ní iní-xi sá Déhe Yá Ndiòxí cúu Jesús, ñáyiu-án ndécú-yu ichi-gá te ndècu ndihí ñaha-gá xií-yu.

<sup>16</sup> Te sãndáá iní-ó ní yuhu ní iní-ó sá Yá Ndiòxí cúu iní ñáhá-gá xii-o, chi duca<sup>n</sup> iní-gá. Te nchaa ñáyiu cùu iní ñáhá xii Yá Ndiòxí ndécú ndihí ñaha-gá xií-yu. <sup>17</sup> Te núu ndisa cùu iní-ó Yá Ndiòxí te vá yúhú-ó òré ná sãá nduu tàudhí<sup>n</sup> ñaha-gá xii-o tnúú nchaa ñáyiu

ndècu ichi cuèhé ichi duha, chi quide ndáá-ó ndècu-o núú-gá ñuyú-a dàtná ní quide mee Jèsús. <sup>18</sup> Chi nchaa ñáyiu cùu iní ñáhá xii Yá Ndiòxí ñá túú-gá yúhú-yu, te núu cùu iní ndisa-yu-gá. Te núu yúhú-yu te xiá<sup>n</sup> sa ndòhó-yu, chi ñùhú-yu ichi cuahá<sup>n</sup>-yu núú ùhú núú ndàhú, chi nchaa ñáyiu yúhú ñá túú cùu iní ndisa-yu Yá Ndiòxí.

<sup>19</sup> Te cuu iní-ó Yá Ndiòxí, chi mee-gá ndéé cùtnáhá vátá quindáá-gá iní-ó tnúhu-gá sa cùu iní ñáhá-gá xii-o. <sup>20</sup> Te nchaa ñáyiu càchí sá cúu iní-yu Yá Ndiòxí, te cùu ùhú iní-yu tnàha ñáyiu-yu, ñáyiu-án dàcuandehndé-yu. Te núu ñá túú cùu iní-yu tnàha ñáyiu-yu ndècu ñuyú-a ña, te uu-gá quidè-yu Yá Ndiòxí Yáá ñá túú xini núu-yu. <sup>21</sup> Te càchí-gá núú tnúhu-gá sá ñáyiu na cùu iní ñáhá xii Yá Ndiòxí, te duca<sup>n</sup>-ni cùu iní-yu tnàha ñáyiu-yu.

## 5

*Nchaa ñáyiu ní ndacu ní dàñá ichi cuèhé ichi duha*

<sup>1</sup> Te nchaa ñáyiu sãndáá iní sá Jèsús cúu-gá Cristú Yáá ní quixi ñuyú-a, ñáyiu-án cúu-yu déhe Yá Ndiòxí. Te cùu iní-yu Tãtá-ó Dütú Ndiòxí, te cùu iní-yu Déhe-gá. <sup>2</sup> Te núu cùu iní-ó Yá Ndiòxí te quide-o nacuaá càhá<sup>n</sup>-gá, te cùtnuní iní-ó sá cúu iní tnáhá ndisa-o nacuaá ndècu-o ichi-gá. <sup>3</sup> Te núu cùu iní-ó Yá Ndiòxí te tñi-o tnúhu càhá<sup>n</sup>-gá, chi cùtnuní iní-ó sá ñá díú ñ<sup>n</sup> sá ùhú cúu-xí dàtná càchí ñáyiu. <sup>4</sup> Te nchaa nchoo ñáyiu cùu déhe-gá sa ní dàñá-ó ichi cuèhé ichi duha, chi ní sãndáá iní-ó Jèsús núu xiá<sup>n</sup> ní ndacu-o ní dàñá-ó ichi-án. <sup>5</sup> Te nchaa ñáyiu sãndáá iní sá Déhe Yá Ndiòxí cúu Jèsús ní ndacu-yu ní queé-yu ichi cuèhé ichi duha.

*Nacuáa ní càhá<sup>n</sup> Yá Ndiòxí cuendá Jèsús*

<sup>6</sup> Te Xítóhó Jesucristú ní quixi-gá ñuyú-a, te ní sandute-gá. Te ñá díú-ní xiá<sup>n</sup>, chi ní xihí-gá sá cuendá nchaa yicá cuèchi-o. Te Espiritú Yá Ndiòxí càhá<sup>n</sup>-xi mee-ni sã ndáá, chi càhá<sup>n</sup> Espiritú-gá-án sá Jèsús cúu-gá Cristú Yáá ní quixi ñuyú-a. <sup>7</sup> Te úní testíu ndécú àndiu, Tãtá-ó Dütú Ndiòxí, ndihí Déhe-gá Xítóhó Jesucristú, ndihí Espiritú-gá. Te ñ<sup>n</sup>-ni tnúhu càhá<sup>n</sup> ndi nùní testíu-án. <sup>8</sup> Te duca<sup>n</sup> cùu-xi ñuyú-a tucu, chi càhá<sup>n</sup> Espiritú Yá Ndiòxí sá Jèsús cúu-gá Cristú. Te ní sandute-gá, te ní xihí-gá sá cuendá nchaa yicá cuèchi-o. Te xiá<sup>n</sup> cùtnuní ndáá iní-ó sá díú Jèsús cúu-gá Cristú. <sup>9</sup> Te núu tñi-o tnúhu váha càhá<sup>n</sup> ñáyiu, te váha-gá tñi-o tnúhu càhá<sup>n</sup> Yá Ndiòxí, chi càhá<sup>n</sup> ndáá-gá sá Déhe-gá cúu Jèsús. <sup>10</sup> Te nchaa ñáyiu sãndáá iní sá Jèsús cúu-gá Déhe Yá Ndiòxí, ñáyiu-án cùtnuní iní-yu sá cúu-xí ñ<sup>n</sup> sã ndáá. Te nchaa ñáyiu ñá túú sãndáá iní tnúhu càhá<sup>n</sup> Yá Ndiòxí quidè-yu-gá ñ<sup>n</sup> ñãndéhdé,

dico ñá túú ndèhnde-gá, chi mèé-yu ñá túú sàndáá iní-yu sá Dèhe-gá cúú Jèsús dàtná càchí mée-gă. <sup>11</sup> Te Yá Ndiòxí càchí tnúhu ndáá-gá sá cùndècu-o ndihí-gá ni caa ni quíhí<sup>n</sup>. Te duha càhá<sup>n</sup>-gá chi sàndáá iní-ó Dèhe-gá. <sup>12</sup> Te nchaa ñáyiu na quindáá iní ñáhá xì Dèhe-gá cundecú-yu ndihí-gá ni caa ni quíhí<sup>n</sup>. Te nchaa ñáyiu ñá túú sàndáá iní ñáhá xì Dèhe-gá vá cùndècú-yu ndihí-gá.

*Sáhú ndèé núú nǐ ndihí-ná*

<sup>13</sup> Te cuendá sá sàndáá iní-ndó Dèhe Yá Ndiòxí núú xiá<sup>n</sup> chídó tnùní-í tnúhu-a cuendá cutnùní iní-ndó sá cùndècu ndihí-o-gá ni caa ni quíhí<sup>n</sup>.

<sup>14</sup> Te ñá túú tnúhu yùhú cáhá<sup>n</sup> ndihí-o Yá Ndiòxí, chi tedóho ñaha-gá xii-o núú ì<sup>n</sup>-ná sá ná càcá<sup>n</sup>-ó núú-gá dàtná cuíní mée-gă. <sup>15</sup> Te cutnùní iní-ó sá tàxí-gá sá xìcá<sup>n</sup>-ó núú-gă, chi ñaha-o sá tédóho ñaha-gá xii-o núú na càcá<sup>n</sup>-ó nàcuáa cùu iní-gă.

<sup>16</sup> Te núú xìní-ó ñáyiu ndècu ichi Yá Ndiòxí te quidè-yu sá ñà túú vâha núú-gă, te ndèhe-o sá ñà túú ní xíta nihnu duú<sup>n</sup>-yu, te càhá<sup>n</sup> ndihí-o Yá Ndiòxí cuendá-yu, te dácacu nihnu ñaha-gá xii-yu te núu na nùcunu ichi vâha-yu. Chi íó ñáyiu xidó quidè nândi sá ñà túú vâha te xíta nihnu duú<sup>n</sup>-yu, te vá càhá<sup>n</sup> ndihí-gá-ó Yá Ndiòxí cuendá-yu. <sup>17</sup> Te nchaa sá cuèhé sá dúhá cùu-xi yícá cuèchi, dico ñá ncháá-xí cùu-xi sá dácuíta nihnu ñaha dùu<sup>n</sup>.

<sup>18</sup> Te ñaha-o sá nchóó ñáyiu cùu déhe Yá Ndiòxí ñá túú-gă sání iní-ó càda-o nândi sá cuèhé sá dúhá. Te duca<sup>n</sup> chi mee Jèsús déhe Yá Ndiòxí xító ñaha-gá xii-o, núú xiá<sup>n</sup> ñá ndácú-gă yucu ñávâha dàxínu iní ñáhá-xí xii-o cada-o sá ñà túú vâha.

<sup>19</sup> Te nchoo ñaha-o sá ndécú ndihí-o Yá Ndiòxí. Te nchaa ñáyiu ndècu ichi cuèhé ichi duha tàxi tnùní ñáhá-ná yucu ñávâha xii-yu.

<sup>20</sup> Te ñaha tucu-o sá ñùyíú-a ní quixi Jèsús Déhe Yá Ndiòxí ní taxi-gá sá xìní tnùní-ó cuendá cutnùní iní-ó sá mée-gă cúú-gă Ndiòxí-ó. Te ndècu ndihí-o mee-gá ndihí Déhe-gá Jèsús, te ì<sup>n</sup>dùí díí-ni mee-gă cúú-gă Yá Ndiòxí, te ndècu dava-gá sá nácuáa ñaha-gá xii-o cùndècu-o ndihí-gá ni caa ni quíhí<sup>n</sup>. <sup>21</sup> Te nchóhó ñáyiu cùu datná déhe-í, vá quindáá iní-ndó ncháa sá càchí-yu cùu ndiòxí, chi dicó ndaha cue téé ñuyíú-a ní cuáha nchaa xiá<sup>n</sup>. Te duca<sup>n</sup> na cùnduu. Te ío chí cádá ndèe iní-ná vitna.

## TUTÚ CÚÚ ÒÚ NÍ CADÚHA TÉ JUÁÁ

*Tnúhu Yá Ndióxi ndihi nàcuáa cuu ini tnáhá-ó*

<sup>1</sup> Te yúhú té Juáá téé yindaha ñaha xii ñáyiú sándáá ini tnúhu Jèsús, tèe-í tnúhu-a ñ<sup>n</sup> núú tùtú daquixi-í ndaha yòhó ñaha ní cáhá<sup>n</sup> ñáhá Yá Ndióxi, te nchaa tnúhu-a cùu-xi tnahá cuendá cue déhe-n, chi ío cùu ini ñáhà-í xii-ndo, chi ndècu-ndo ichi Yá Ndióxi. Te ñá diú-ní mèe-í cùú ini ñáhà-í xii-ndo, chi nchaa-ndí nàcuáa sándáá ini-ndí tnúhu-gá cùú ini ñáhá-ndí xii-ndo. <sup>2</sup> Te cùu ini ñáhá-ndí xii-ndo chi ndècu ndihi-ndo tnúhu ndáá tnúhu Yá Ndióxi, te duca<sup>n</sup>-ni cùndecu-o ndihi tnúhu-á<sup>n</sup> ní caa ní quíhí<sup>n</sup>. <sup>3</sup> Te xicá<sup>n</sup> táhù-í núú Tátá-ó Dútú Ndióxi, ndihi núú Déhe-gá Xítohó Jesucristú sá ná chindèe ñaha-gá xii-ndo, te coto ñaha-gá te ío váha cuu ini-ndó cùndecu-ndo. Te duha xicá<sup>n</sup> táhù-í núú-gá chi ndècu ndihi-o tnúhu ndáá tnúhu Yá Ndióxi, te cùu ini-ó-gá.

<sup>4</sup> Te ío cùdíí ini-í, chi ní naníhì-í ñ<sup>n</sup> úú déhe-n, te quidé-yu nàcuáa sànu ichi ñaha tnúhu ndáá dàtná ní táuchíú<sup>n</sup> mèe Tátá-ó Dútú Ndióxi. <sup>5</sup> Te vitna yòhó ñaha ní cáhá<sup>n</sup> ñáhá Yá Ndióxi, cächí tnúhu-í xii-n sá xíní ñùhu-xi cuu ini-ó tnàha ñáyiú-o. Te ñá diú ñ<sup>n</sup> tnúhu saa cùu-xi, chi diu-ni tnúhu sá ní ngúndecu ndihi-o ndèe cùtnáhá ní tuha-o ichi Yá Ndióxi. <sup>6</sup> Te núu cùu ini-ó Yá Ndióxi, te cùu ini-ó tnàha ñáyiú-o dàtná ní cächí méé-gá, te tnè-o nchaa tnúhu càhá<sup>n</sup>-gá. Te ní cächí-gá sá cùú ini-ó-gá, te cuu ini-ó tnàha ñáyiú-o. Te tnúhu-a ní tecú dóho-o ndèe cùtnáhá ní tuha-o ichi-gá.

*Cue téé dàndahú tnàha ñáyiú-xi*

<sup>7</sup> Te ío vài ñáyiú dàndahú ñáhá xica cuú-yu ñuyíú-a, te cächí-yu sá ñá ndáá sá Xítohó Jesucristú ní cuu-gá ñ<sup>n</sup> ñáyiú ndisa. Te nchaa ñáyiú duha càhá<sup>n</sup> dácuañdehndé-yu, te cùu úhú ini-yu Jèsús. <sup>8</sup> Te quíhì ini-ndó sá vâ dándahú ñáhá ñáyiú-á<sup>n</sup> xii-ndo cuendá sá vâ cuíta chiú<sup>n</sup> Yá Ndióxi ní quide-o. Te òré ná quíxí tùcu Jèsús ñuyíú-a te taxi-gá nchaa sá váha cùu ini-ó méé-gá cundecu ndihi-o.

<sup>9</sup> Te nchaa ñáyiú dàña tnúhu Xítohó Jesucristú, te nàtní-yu ingá ichi, ñáyiú-á<sup>n</sup> ñà túú ndècu ndihí-yu Yá Ndióxi. Te nchaa ñáyiú ñá túú dàña tnúhu Xítohó Jesucristú ndècu ndihí-yu Yá Ndióxi ndihi Déhe-gá Xítohó Jesucristú. <sup>10</sup> Te núu véxi ñáyiú núú ndécú-ndó cächí-yu sá càhá<sup>n</sup>-yu tnúhu Yá Ndióxi te ñá ndáá, te vá cuáha-ndo tnúhu danèhé ñáhá-yu xii-ndo, te ní vâ cuáha-ndó-yu tnúhu ndee ini cuendá chiú<sup>n</sup> quidé-yu. <sup>11</sup> Chi

núu na càhá<sup>n</sup> ndihi váha-ndó-yu, te dàtná tnúhu sá chindèe-ndó-yu quidé-yu nchaa sá cuèhé sá dúhá.

*Tnúhu ndéé núú ní ndihi-ná*

<sup>12</sup> Te ío vài-gá tnúhu cuíní-í cachí tnúhu-í xii-ndo, dico vá téé-gá-í chi cuíní-í quixi-í núú ndécú-ndó ndàtnúhu-o cuendá cudíí víhí ini-ó nchàa-o.

<sup>13</sup> Te nchaa cue déhe cùhú-n, ñáyiú ní càhá<sup>n</sup> ñáhá Yá Ndióxi quidé ndèe ini ñáhá-yu xii-n.



## TUTÚ CÚÚ ÒNÍ NÍ CADÚHA TÉ JUÀÁ

*Càhá<sup>n</sup> váha-yu cuendá té Gǎyú*

<sup>1</sup> Te yúhú té Juàá téé yindaha ñaha xii ñáiyu sàndáá iní tnúhu Jèsús, chido tnuní-í tnúhu-a ì<sup>n</sup> núú tutú sá cúú-xí yòhó té Gǎyú téé ío cùu iní-í, chi ndècu ndihi-n tnúhu ndáá tnúhu Yá Ndiòxí.

<sup>2</sup> Te yòhó téé ío cùu iní-í, xicá<sup>n</sup> tǎhù-í núú Yá Ndiòxí sá cùndècu váha-n ñà túú nǎ cumání xii-n, te vá cùhù-n, chi sa nàha-í sá ndècú váha-n núú Yá Ndiòxí. <sup>3</sup> Te ío ní cudíí iní-í òré ní sáá ñáiyu ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá òu-ni tnúhu-gá te tñi-n nchaa nacúáa càhá<sup>n</sup> tnúhu-á<sup>n</sup>. <sup>4</sup> Te ío cùdíí iní-í ní nihi-í tnúhu sá ncháá-ní ñáiyu ní sanu ichi-í ichi Yá Ndiòxí ndècú-ní-yu ichi-gá, te quide-ní-yu nchaa nacúáa càhá<sup>n</sup>-gá.

<sup>5</sup> Te yòhó téé ío cùu iní-í, ío váha quide-n núú Yá Ndiòxí, chi chindee-n nchaa ñáiyu véxi dava-gá ñuú xicá, ñáiyu sàndáá iní tnúhu Yá Ndiòxí. <sup>6</sup> Te nchaa ñáiyu-á<sup>n</sup> càhá<sup>n</sup>-yu núú tàcá ñáiyu càhá<sup>n</sup> ndihi Yá Ndiòxí iha sá ío cùu iní-n nchàa tnaha ñáiyu-n dàtná càhá<sup>n</sup> Yá Ndiòxí. Te yúhú càhá<sup>n</sup> ndáhú-í núú-n sǎ cadá ndèe-ni iní-n chindee-n nchaa ñáiyu-á<sup>n</sup> nchaa sá xini ñùhù-yu ichi. Te núu duca<sup>n</sup> na càda-n te quide-n nacúáa cùu iní Yá Ndiòxí, te xinu cuechi-n tnahá-n nùú-gá. <sup>7</sup> Chi nchaa ñáiyu-á<sup>n</sup> ní tñí-yu ichi cuáhá<sup>n</sup>-yu càhá<sup>n</sup>-yu tnúhu Jèsús. Te ñá túú tñí-yu ní ì<sup>n</sup> sá sǎñaha ñáiyu ñá túú ndècu ichi Yá Ndiòxí. <sup>8</sup> Te núu xíá<sup>n</sup> nchoo xini ñuhu-xi chindee-o nchaa ñáiyu xinu cuechi núú-gá ñáiyu càhá<sup>n</sup> tnúhu-gá, te duca<sup>n</sup> te cutnùni iní-ó sǎ tnahá-ó xinu cuechi-o ndihi-yu núú-gá.

*Ñá túú quide váha té Diótrefés*

<sup>9</sup> Te yúhú ní tendaha-í tutú cuáhá<sup>n</sup> núú tàcá ñáiyu chihuhù-yu Yá Ndiòxí, dico ì<sup>n</sup> téé ndècu-á<sup>n</sup> nání-dé Diótrefés, te ñá sàndáá iní-dé nchaa tnúhu càhá<sup>n</sup>-í, chi cuini-dé cunuu-dé nùu-yu. <sup>10</sup> Te òré quixi-í te cada ndáá-ó nchàa tnúhu cuèhé tnúhu duha càhá<sup>n</sup>-dé cuendá-í. Te ñá díú-ní xíá<sup>n</sup> quidé-dé, chi nchaa ñáiyu véxi ingá ñuú càhá<sup>n</sup> tnúhu Yá Ndiòxí ñá túú càhá<sup>n</sup> ñáhá-dé vehe-dé, te ní ñá dáñá-dé càhá<sup>n</sup> ndihi ñaha dáva-gá ñáiyu xí-yu. Te nchaa ñáiyu cuini càhá<sup>n</sup> ndihi ñaha xii-yu, te quèñuhu ñaha duu-ni-dé ñá dáñá-gá-dé níhí tnahá-yu ndihi nchaa ñáiyu tàcá dácúàha tnúhu Yá Ndiòxí.

<sup>11</sup> Te yòhó téé ío cùu iní-í, vá cùndècu-n ichi cuehé ichi duha dàtná quidé nchàa dava-gá

ñáiyu, cada-n mèe-ni sá váha. Chi nchaa ñáiyu quide váha ndècú-yu ichi Yá Ndiòxí. Te nchaa ñáiyu quide nchaa sá cuèhé sá dúhá ñà túú ndècú-yu ichi Yá Ndiòxí.

*Nchaa ñáiyu càhá<sup>n</sup> váha-yu cuendá té Demètriú*

<sup>12</sup> Te nchaa ñáiyu càhá<sup>n</sup> váha-yu cuendá té Demètriú, chi quide ndáá-dé dàtná càhá<sup>n</sup> Yá Ndiòxí. Te tnahá yúhú càhá<sup>n</sup>-í cuendá-dé sá ío váha quide-dé, te nchòhó sa nàha-ndo sá yúhú càhá<sup>n</sup> ndáá-í.

*Tnúhu ndéé núú ní ndihi-ná*

<sup>13</sup> Te vai-gá tnúhu cuini-í cachí tnúhu-í xii-n ni cùu, dico ñá ní tèe-gá-í, <sup>14</sup> chi cuini-í quixi ndihi-í, te càhá<sup>n</sup>-ó nùú nùú-ó.

<sup>15</sup> Te ío cada ndee iní, te xicá<sup>n</sup> tǎhù-í núú Yá Ndiòxí sá ná cùndècu váha-n ñà túú nǎ cuu cundecu-n. Te nchaa cue ñáiyu xini tnahá ndihi-o ndècu iha quide ndee iní ñáhá-yu xii-n. Te yòhó cùñaha-n nchàa ñáiyu xini tnahá ndihi-í ndècú xíá<sup>n</sup> ná cada ndee iní-yu. Te ío cada ndee iní-ná vitna.

## TUTÚ NÍ CADÚHA TÉ JUDÁS

*Té Judás cadúha-dé tutú quíh<sup>n</sup> ndaha ñáyiu ní cachí Yá Ndióxi nduu cuendá-gá*

<sup>1</sup> Yúhú té Judás ñani té Jacobó xínú cuèchi-í núú Xitohó Jesucristú, te cadúha-í tutú-a sá cúú-xí nchòhó ñáyiu ní cachí Yá Ndióxi Yaá cúú Tátá-ó nduu cuendá-gá, ñáyiu ío cùu iní-gá. Te dàtná-ni xito ñaha-gá xii-ndo vitna diu-ni duca<sup>n</sup> còto ñaha-gá xii-ndo ndéé ná sàá nduu quixi tucu Xitohó Jesucristú ñuyúú-a. <sup>2</sup> Te xicá<sup>n</sup> táhù-í núú Yá Ndióxi sá ío-gá ná chindee chítúu ñaha-gá xii-ndo, te na cùtnuní-gá iní-ndó sá ío cùu iní ñáhá-gá xii-ndo, te duca<sup>n</sup> ío váha cuu iní-ndó cùndecu-ndo.

*Ñáyiu ñá túú càhá<sup>n</sup> tnúhu ndáá tnúhu Yá Ndióxi*

*(2 Pedro 2:1-17)*

<sup>3</sup> Te nchòhó ñáyiu ío cùu iní-í, duca<sup>n</sup>-ni ío sàni iní-í cadúha-í ì<sup>n</sup> tutú sá cúú-xí-ndó cuendá danéhé ñáhá-í xii-ndo nàcuáa ní cuu ní nanihí táhù-ó dico ñá túú cadúha-í, dico vitna quide cuendá-í sá xini ñuhu-gá-xi càhá<sup>n</sup>-í núú tütú-í sá nchòhó ío cundehe-ndo tnúhu càhá<sup>n</sup>-ndó ndíhi ñáyiu, te càhá<sup>n</sup>-ndó nàcuáa nduu tnúhu sàndáá iní méé-ndó, chi diu-ni tnúhu-á<sup>n</sup> ní càhá<sup>n</sup> Yá Ndióxi sá cúú-xí nchàa ñáyiu ndècu ichi-gá. Te vitna ñá túú-gá ná tnúhu càhá<sup>n</sup>-gá sá cúú-xí-yu, chi sa ní càhá<sup>n</sup> duu<sup>n</sup>-gá. <sup>4</sup> Te duha càhá<sup>n</sup>-í núú tütú-a sá cúú-xí-ndó, chi nihí-í tnúhu sá xicá cùu ñáyiu chítnahá ñáhá xii-ndo, te ní ñá túú xini-ndó ná ñáyiu cùú-yu, te ñáyiu-á<sup>n</sup> cùú-yu ñáyiu cùu úhú iní ñáhá xii Yá Ndióxi. Te ì<sup>n</sup> xichi núú tütú Yá Ndióxi càchi-xi sá ñáyiu-á<sup>n</sup> quíh<sup>n</sup>-yu núú ùhú núú ndàhú, te diu-ni ñáyiu-á<sup>n</sup> càchi-yu sá ío váha iní Yá Ndióxi núú xíá<sup>n</sup> cuu-ni cadá-yu nchaa sá cuèhé sá dúhá. Te dàquee tìhú-yu Yá Ndióxi Yaá ío cùnuu, ndíhi Xitohó Jesucristú.

<sup>5</sup> Te nchòhó sa xini váha-ndo nàcuáa ní quide Yá Ndióxi ndéé sanaaha dico dàndacu iní ñáhá-í xii-ndo, chi dàv-á<sup>n</sup> ní queñuhu-gá ñáyiu Israél nàció<sup>n</sup> Ègipítú, te dava ñáyiu-á<sup>n</sup> ñá túú ní sàndáá iní ñáhá-yu xii-gá te ní dánáá ñaha-gá xii-yu. <sup>6</sup> Te nchaa espíritu ñá túú ní cuini cada ndáá cuu cuèchi núú Yá Ndióxi ní quee-xi núú ndécú-xí, te mee-gá ní sadí nihnu ñaha-gá xii-xi ì<sup>n</sup> xichi núú néé te vá càcu-xi, chi sáá nduu te nayáha-xi cundecu-xi núú ùhú núú ndàhú ní caa ní quíh<sup>n</sup>. <sup>7</sup> Te dàndacu iní ñáhá tucu-í xii-ndo nàcuáa ní yáha ñáyiu ñuú Sodomá, ndíhi ñáyiu ñuú Gòmmorrá, ndíhi nchaa ñáyiu ñuú ní cáa yatni xíá<sup>n</sup>, chi tnàhà-yu ñá túú ní quide váha-yu dàtná ní quide nchaa cue espíritu-á<sup>n</sup>. Chi cue téé ní xóo càhá<sup>n</sup> ndíhi

tnàha ndi mee-güedé, te diu-ni duca<sup>n</sup> ní xóo cada cue ñáyiu díhí tucu. Te sá dúcá<sup>n</sup> ní quidé-yu núú ní dängóyó Yá Ndióxi ñuhú ñuú-yu ní dánáá ñaha-gá xii-yu. Te xíá<sup>n</sup> cùtnuní iní-ó sá nchàa ñáyiu ñá túú cuini cada váha núú-gá quíh<sup>n</sup>-yu núú ùhú núú ndàhú ní caa ní quíh<sup>n</sup>.

<sup>8</sup> Te diu-ni duca<sup>n</sup> quide ñáyiu chítnahá ñáhá xii-ndo cuini-yu dandáhú ñáhá-yu, chi càchi-yu sá dácòto ñaha saní-yu nàcuáa cadá-yu, núú xíá<sup>n</sup> nándi nchaa sá cuèhé sá dúhá quidé-yu sá cúú-xí yiqui cùú-yu, te dàquee tìhú-yu nchaa nàcuáa càhá<sup>n</sup> Yá Ndióxi cada-o, te càhá<sup>n</sup> úhú-yu cuendá nchaa espíritu cùnùu. <sup>9</sup> Te mee espíritu cùnùu-gá xínú cuèchi núú Yá Ndióxi nání Migué! ní nàá-xi ndíhi sácuíhná cuendá yiqui cùnù ndíi Moisés. Te espíritu-á<sup>n</sup> ñá túú ní cüyü-xi càhá<sup>n</sup> úhú-xi sácuíhná-á<sup>n</sup>, chi ní xáha<sup>n</sup>-ni-xi: “Mee Yá Ndióxi náhá-gá te núú nása cada ñaha-gá xii-n”, duha ní xáha<sup>n</sup>-xi. <sup>10</sup> Te nchaa ñáyiu duca<sup>n</sup> dàndahú ñáhá xii-ndo-á<sup>n</sup> càhá<sup>n</sup> cuèhé-yu cuendá nchaa sá vátá cùtnuní-gá iní-yu nása nduu, te quidé-yu dàtná quidé cue quiti chi cue quiti-á<sup>n</sup> quidé-güedi nání véxi iní-güedi, te ní ñá túú cùtnuní iní-güedi nchaa sá quidé-güedi. Te duca<sup>n</sup> sá tnahá-xi cùú-yu, chi nchaa sá cuèhé sá dúhá véxi iní-yu quidé-yu, te sá dúcá<sup>n</sup> quidé-yu xíá<sup>n</sup> tá xita nihnú-yu cuáhá<sup>n</sup>.

<sup>11</sup> Te ndàhú ní cuú-yu chi ío ndohó-yu!, chi quidé-yu dàtná ní quide ndíi Càin. Te nándi sá quidé-yu cuendá sá cuini-yu díhú<sup>n</sup> dàtná ní xóo cada ndíi Bàlaám. Te ío cùu sáá iní-yu núú Yá Ndióxi dàtná ní xóo cada ndíi Coré, núú xíá<sup>n</sup> tá xita nihnú-yu cuáhá<sup>n</sup>. <sup>12</sup> Te dícó sácá<sup>n</sup>núú sáha ñáhá-yu xii-ndo òré nàtácá-ndó quide-ndo vico chíñuhu-ndo Yá Ndióxi. Te òré xéxi ndíhi ñáhá-yu xii-ndo te mee-ni sá cúú-xí mée-yu quide cuendá-yu, te ñá túú nèhé-yu sá yíñuhu núú Yá Ndióxi. Te cùú-yu dàtná ì<sup>n</sup> vícò sá cuáhá<sup>n</sup>-xi duha cuáhá<sup>n</sup>-xi dácá<sup>n</sup> te ñá túú dàú nchídó-xí, duca<sup>n</sup> sá tnahá-xi cùú-yu. Te cùu tucú-yu dàtná ì<sup>n</sup> yutnu vídí sá ñá túú tnáhi cùu<sup>n</sup> sávidí-xi, te nchaa yutnu duca<sup>n</sup> ñá túú cùu<sup>n</sup> sávidí-xi te tnúhu-güedé ndéé yóho-xi te xihí duu<sup>n</sup>-xi. Te duca<sup>n</sup> sàtnahá-xi cùú-yu, chi ñá túú quide váha-yu. <sup>13</sup> Te cùu tucú-yu dàtná ndute làmár, chi ndute-á<sup>n</sup> òré càndá-xi te quecòo tìñú-xi ì<sup>n</sup> xio. Te cùu tucú-yu dàtná ì<sup>n</sup> chódini cuáhá<sup>n</sup>-di duha cuáhá<sup>n</sup>-di dácá<sup>n</sup>. Te duca<sup>n</sup> sàtnahá-xi cùú-yu, chi ñá túú cuini-yu cada váha-yu. Te ñáyiu-á<sup>n</sup> daquih<sup>n</sup> ñáhá Yá Ndióxi xii-yu ì<sup>n</sup> xichi núú néé núú sá ndecu túha cundecu-yu ní caa ní quíh<sup>n</sup>.

<sup>14</sup> Te ndíquí<sup>n</sup> yává ndíi Àdán téé cùu usá ní xínani Ènóc ní dácáhú iní ñáhá Yá

Ndiöxi xii-dé ní cáhá<sup>n</sup>-dé diu-ni cuendá nchaa ñáyi-u-á<sup>n</sup>. Te ní cachí-dé: “Na cachií tñúhu-í xii-ndo sá Yá Ndiöxi quixi-gá ndihí cuéhé víhi espíritu xínú cuèchi núú-gá. <sup>15</sup> Te dàv-á<sup>n</sup> cada ndáá-gá cuèchi nchaa ñáyi-u te daquihí<sup>n</sup>-gá nchaa ñáyi-u ndècu ichi cuéhé ichi duha núú ùhú núú ndàhú, te duca<sup>n</sup> càda ñaha-gá xií-yu, chi mee-ni sá cuéhé sá dühá quidé-yu, te cáhá<sup>n</sup> ùhú ñáhà-yu xii-gá”, duha ní cachí te Ènóc. <sup>16</sup> Te ñáyi-u-á<sup>n</sup> ò yica iní-yu chi ñá túú ndúu vétú iní-yu nàcuáa ndècú-yu ñuyíú-a, te sàtnuhú-yu tñàha ñáyiú-yu te mee-ni sá cuéhé sá dühá sàni iní-yu quidé-yu, te quide cahnú-yu mée-yu, te mee-ni cáhá<sup>n</sup> vaha-yu núú tñàha ñáyiú-yu cuendá cuiní-yu sá cáda vaha ñaha ñáyi-u-á<sup>n</sup> xií-yu.

*Té Judás cáhá<sup>n</sup>-dé dóho ñáyi-u ndècu ichi Yá Ndiöxi*

<sup>17</sup> Te nchòhó ñáyi-u ò cùu iní-í, cáhá<sup>n</sup> ndàhú-í núú-ndó sá ò cuhu<sup>n</sup> iní-ndó tñúhu sá sá ní dánèhé ñáhá cuè téé ní tendaha Xitohó Jesucristú cáhá<sup>n</sup> tñúhu-gá núú ñáyi-u. <sup>18</sup> Te sa nàha-ndo sá ní cachí-güedé sá cùmání-gá quixi tucu Xitohó Jesucristú ñuyíú-a, te coo ñáyi-u cáhá<sup>n</sup> cuéhé cáhá<sup>n</sup> duha cuendá tñúhu-gá. Te ñáyi-u-á<sup>n</sup> cadá-yu mee-ni sá cuéhé sá dühá vèxi iní mée-yu. <sup>19</sup> Te ñáyi-u-á<sup>n</sup> cúu-yu ñáyi-u cáhá<sup>n</sup> nándi tñúhu sá ñà túú nándihí cuendá sá vā cúú ì<sup>n</sup>nuu-ndo cundecu-ndo, te mee-ni sá cuéhé sá dühá ñùhu iní-yu, te ñá túú ndècu ndihí-yu Espiritú Yá Ndiöxi.

<sup>20</sup> Te nchòhó ñáyi-u ò cùu iní-í, ò dacuàha-ndo tñúhu Yá Ndiöxi sá ní sándáa iní-ndó cuendá duca<sup>n</sup> cuita cuehnu nihnu-ndo ichi-gá quihí<sup>n</sup>, te cáhá<sup>n</sup> ndihí-ndo Yá Ndiöxi nàcuáa dàcahu iní ñáhá Espiritú-gá xii-ndo. <sup>21</sup> Te ò coto-ndo mée-ndo cundecu-ndo cuendá cuu vaha iní ñáhá Yá Ndiöxi xii-ndo, te cundetu-ndo sàa nduu quixi Xitohó Jesucristú ñuyíú-a nacuaca ñaha-gá xii-ndo cundecu-ndo ndihí-gá ni caa ni quihí<sup>n</sup>, chi Yaá-á<sup>n</sup> ò cundahú iní ñáhá-gá xii-o.

<sup>22</sup> Te ñáyi-u sàni ì<sup>n</sup> sàni úú iní-xi cúñaha-ndo xií-yu nàcuáa cadá-yu cundecú-yu ichi Yá Ndiöxi. <sup>23</sup> Te nchaa ñáyi-u ta xíta nihnu ñùhu ichi cuáhá<sup>n</sup> núú ùhú núú ndàhú, ò cundihí iní-ndó cúñaha-ndo xií-yu tñúhu Yá Ndiöxi cuendá sá ná càcu nihnú-yu, te cundàhú iní-ndó-yu, te quihí iní-ndó vā cáda-ndó tñàhá-ndó nàcuáa quidé-yu, chi daquèe tñú-ndó nchàa sá cuéhé sá dühá quidé-yu-á<sup>n</sup>.

*Nàcuáa ndacá<sup>n</sup> tñú-ó núú Yá Ndiöxi*

<sup>24</sup> Te Yá Ndiöxi chindee ñaha-gá xii-ndo cuendá sá vā cundècu-ndo ichi cuehé ichi duha, te cunduu ndoo cunduu nine iní-ndó càndeca ñaha-gá xii-ndo quihí<sup>n</sup> cundecu-ndo

núú ò vaha càa ndecu-gá, te ò cudí<sup>n</sup> iní-ndó. <sup>25</sup> Te Yá Ndiöxi ò ndècu ndihí-gá nchaa sá xini tñúni-gá te diu-gá ní dácacu nihnu ñaha-gá xii-o núú ùhú núú ndàhú, te duca<sup>n</sup> ní quide ñaha-gá xii-o chi ndècu ndihí-o Xitohó Jesucristú. Te ò ndacá<sup>n</sup> tñú-ó núú Yá Ndiöxi, chi ò càhnu cuu-gá ndècú-gá táxi tñúni-gá, te súúni vaha iní-gá, te ndàcu-gá quidé-gá nchaa sá vaha, te duca<sup>n</sup>-ni ò càhnu cuu-gá ndéé cùtñàhá vátá ngáva-gá ñuyíú, te duca<sup>n</sup>-ni ò càhnu cuu-gá ndéé vitna, te diu-ni duca<sup>n</sup> ò càhnu cuu-gá ni caa ni quihí<sup>n</sup>, duha xini ñuhu-xi ndacá<sup>n</sup> tñú-ó núú-gá. Te duca<sup>n</sup> na cunduu. Te ò chí cáda ndèe iní-ñá vitna.

# NCHAA SÁ NĪ XINÍ TĒ JUÁÁ NDIHI NCHAA SÁ NĪ TECÚ DÓHO-DE

*Xítohó Jesucristú xáha<sup>n</sup>-gá xii té Juáá nchaa nácuáa cada-xi ñuyúú*

<sup>1</sup> Te Yá Ndióxi ní xáha<sup>n</sup>-gá xii Xítohó Jesucristú nchaa sá tá cüyatni vii-ná cada-xi ñuyúú-a cuendá sá cūñaha-gá xii cue tée xínu cuechi núú-gá, te Xítohó Jesucristú ní tendaha-gá <sup>ii</sup> espíritu xínú cuèchi núú-gá ní quixi-xi ní cachí tnúhu-xi nchaa tnúhu-á<sup>n</sup> xii yúhú té Juáá tée xínu cuechi núú-gá, te nchaa tnúhu-á<sup>n</sup> ndéé núú tütú-a. <sup>2</sup> Te yúhú cächí tnúhu ndáá-í xii-ndo nácuáa ní cáhá<sup>n</sup> Yá Ndióxi, te cáhá<sup>n</sup> ndáá tucu-í cuendá Xítohó Jesucristú, ndihi cuendá nchaa sá ní xiní-í.

<sup>3</sup> Te váha táhú ñáyiú dācuaha nchaa tnúhu ndéé núú tütú-a, te váha tucu táhú ñáyiú ndédóho, te váha tucu táhú nchaa ñáyiú tn̄h̄ nacuáa cáhá<sup>n</sup>-xi, chí sa ta cüyatni vii-ná nduu cáda-xi nchaa nacuáa cáhá<sup>n</sup>-xi.

*Té Juáá cáduha-dé tutú quíh̄<sup>n</sup> ndaha ndi úsá xichí cue ñáyiú ndécu ichi Yá Ndióxi*

<sup>4</sup> Te yúhú té Juáá cáduha-í tutú daquixi-í ndi úsá xichí núú ndécu nchóhó ñáyiú ndécu ichi Yá Ndióxi ndécu dístrítú Ásiá. Te mee-gá ná chindee chítúu ñaha-gá xii-ndo, te ío váha cuu iní-ndó cūndecu-ndo. Te cuèi ndéé sanaha diu-ni-gá ndécu, te diu-ni-gá ndécu cuèi vitna, te duca<sup>n</sup>-ni cūndecu-gá cuèi ndéé núú cuahá<sup>n</sup> núú vèxi, te diu-ni duca<sup>n</sup> ío na chindee chítúu ñaha ndi úsá cue espíritu ndécu núú-gá xii-ndo, te ío váha cuu iní-ndó cūndecu-ndo. <sup>5</sup> Te diu-ni duca<sup>n</sup> na cáda tucu Xítohó Jesucristú, te diu-gá cúú-gá Yáá cáhá<sup>n</sup> ndáá, te diu-ni-gá ní xihí-gá te díhna-gá ní ndoto, te dátñúni ndéé cuèé-gá te ndoto cue ñáyiú ní xihí, te diu-ni-gá táxi tn̄n̄i-gá nchaa cue tée yindaha ñaha xii ñáyiú ndécu ñuyúú-a. Te ío cūu iní ñáhá-gá xii-o, te mee-gá ní sati níñí-gá te ní xihí-gá núú cùruxí sá cuendá nchaa sá cuèhé sá dúhá quide-o, te ní ndada ndoo ní ndada nine-gá iní-ó, <sup>6</sup> te vitna ní quide ñaha-gá xii-o dátñá cue tée yindaha ñáyiú, te ní quide ñaha tūcu-gá xii-o dátñá cue dútú xínú cuèchi-o núú Tátá-gá Dútú Ndióxi. Te vitna nchaa-o chí ná cächí-ó sá ío cáhnu cuu Xítohó Jesucristú, te ío cūnuu-gá, te duca<sup>n</sup>-ni na cūnuu-gá ní caa ní quíh̄<sup>n</sup>. Te duca<sup>n</sup> na cūnduu.

<sup>7</sup> ¡Te cundehe-ndo ándiu! Chi ichi xití vícó quixi Xítohó Jesucristú, te nchaa ñáyiú ndécu ñuyúú-a quini ñáhá-yu xii-gá, te tnáhá nchaa ñáyiú <sup>ii</sup>-ni cūu ndihi ñáyiú ní dánicuèhé ñáhá xii-gá quini ñáhá-yu, te nchaa ñáyiú xindecu

ndihi ñuyúú, ñáyiú ñá túú cūu váha iní ñáhá xii-gá ndáhu iní-yu òré quini ñáhá-yu xii-gá, te ndáá sá dúcá<sup>n</sup> cáda-xi.

<sup>8</sup> Te Yá Ndióxi cächí-gá: “Yúhú ío cūnuu-í chí diu-í sa ndécu ndéé cūtnáhá ní ngáva ñuyúú, te diu-ni-í cūndecu ndéé ná sáá nduu náa-xi ndihi nchaa sá ío, chí yúhú cūndecu-í ní caa ní quíh̄<sup>n</sup>”, duha cächí Yá Ndióxi Yáá ndácú quide nchaandi tühú sá váha. Chí diu-ni-gá sa ndécu ndéé cūtnáhá ní ngáva ñuyúú, te diu-ni-gá ndécu-tú-gá vitna, te duca<sup>n</sup>-ni cūndecu-gá ní caa ní quíh̄<sup>n</sup>.

*Té Juáá ní xiní-dé Xítohó Jesucristú Yáá ío cūnuu*

<sup>9</sup> Te yúhú té Juáá tée ndécu ndihi-ndo ichi Xítohó Jesucristú, tnáhá-í ndóhò-í cuendá-gá dátñá ndóhò-ndó, te tnáhá-í nduu táhú-í cūndecu ndihi ñaha-í xii-ndo núú ndécu Yá Ndióxi táxi tn̄n̄i-gá. Te ío quide cahnu iní-ó cuèi nándi váha-o ndécu-o sá cuendá Xítohó Jesucristú. Te yúhú ní ngava-í vecaá <sup>ii</sup> núú nání Pátmós, te ñuu-á<sup>n</sup> cáá xití ndute lámár. Te duca<sup>n</sup> ní cuu cuendá sá cáhá<sup>n</sup>-í tnúhu Yá Ndióxi, te cáhá<sup>n</sup> váha-í cuendá Xítohó Jesucristú. <sup>10</sup> Te <sup>ii</sup> nduu ndumíngú nduu náatacá-ó chíñuhu-o Yá Ndióxi ní quide ñaha Espiritú-gá xii-í nacuáa cächí iní-xi, te ní tecú dóho-í ndihi ní cáhá<sup>n</sup> <sup>ii</sup> sá ní cáhá<sup>n</sup> ndaa sátá-í te dátñá ndihi cáhá<sup>n</sup> <sup>ii</sup> cútú duca<sup>n</sup> ndihi ní cáhá<sup>n</sup>-xi. <sup>11</sup> Te cächí sá cáhá<sup>n</sup>-á<sup>n</sup>:

–Yúhú sa ndécu-í ndéé cūtnáhá ní ngáva ñuyúú, te diu-ni-í cūndecu-í ndéé ná sáá nduu náa-xi ndihi nchaa sá ío, te chído tn̄n̄i-n <sup>ii</sup> núú tütú sá ná dānehé núú ñáhá-í xii-n, te daquih̄<sup>n</sup>-n tütú-á<sup>n</sup> ndi úsá xichí núú xindecu cue ñáyiú ndécu ichi Yá Ndióxi xindecu dístrítú Ásiá, ndaha ñáyiú ñuu Éfesú, ndaha ñáyiú ñuu Ésmirná, ndaha ñáyiú ñuu Pèrgamú, ndaha ñáyiú ñuu Tiátirá, ndaha ñáyiú ñuu Sárdís, ndaha ñáyiú ñuu Filadelfiá, ndaha ñáyiú ñuu Laodiceá, nchaa ñáyiú ñuu-á<sup>n</sup> daquih̄<sup>n</sup>-n tütú-á<sup>n</sup> ndahá-yu –cächí sá cáhá<sup>n</sup>-á<sup>n</sup>.

<sup>12</sup> Te ní nchócuñhu-í ndéhè-í ñuu ná cúú sá cáhá<sup>n</sup>-á<sup>n</sup>, te ní xiní-í xínutñ̄h̄ úsá tnáhá sá ní cuáha mee-ni díñú cuáá<sup>n</sup> sá ndéé díte-xi, te núú díte-xi-á<sup>n</sup> yíndódo <sup>ii</sup> caa candíl. <sup>13</sup> Te cuádava tnuú nchaa xiá<sup>n</sup> ní xiní-í nūtñ̄h̄ Yáá cáá dátñá cáá ncháa nchoo ñáyiú ndécu ñuyúú-a, te ñihmu-gá <sup>ii</sup> dóo cáni cáa-xi ndéé núú sáhá-gá, te yidúcú<sup>n</sup> nnuu <sup>ii</sup> sínchú ní cuáha mee-ni díhú<sup>n</sup> cuáá<sup>n</sup> pèchú-gá. <sup>14</sup> Te idi díquí-gá cuixi<sup>n</sup> quiyí dátñá cuixi<sup>n</sup> idi dava mbéé, ádi yúhá sá queé òré quidé víxi<sup>n</sup>-xi, te tinúu-gá quidé-xi dátñá quidé-xi òré sáá itá ñuhú. <sup>15</sup> Te sáhá-gá súmí dátása<sup>n</sup>-xi dátñá dátása<sup>n</sup> sá nání bróncé òré cāyú-xi duca<sup>n</sup> dátása<sup>n</sup>-xi sáhá-gá, te dónaha tnúhu cáhá<sup>n</sup>-gá quidé-xi dátñá quidé-xi dónaha titní víhí yúte. <sup>16</sup> Te xio ndaha

cùha-gá nùndàha-gá úsá tñahá chódíní, te mei yùhu-gá quéné ìñ yuchí cáhnú ndèé úú xio núú-xí, te núú-gá quidé-xí dàtná quidé-xí núú nchĩcanchii òré súúní ngòyo cahni.

<sup>17</sup> Te sá dúcáñ cãa Yaá-án nĩ xini-í núu xĩáñ ní yùhú-í ní nduá-í núú-gá, te ní cuu-í dàtná ìñ tée ní xihí sá dúcáñ ò ní yùhú-í, dico mee-gá ní sacáñ ndodo-gá ndaha cùha-gá núu yiqui cùñú-í, te ní cachí-gá:

—Vá yùhú-n, chi ñiu-ni yùhú sa ndècu-í ndéé cùtnàhá ní ngáva ñuyúú, te ñiu-ni yùhú cundecu-í ndéé ná sãa nduu nãa-xi ndihĩ nchaa sá ò. <sup>18</sup> Te yùhú cùu-í Yaá ní xihí te ní ndoto-í, te vitna ndècu vívú-í, te ducañ-ni cùndecu-í ní caa ni quihíñ. Te yùhú cùnùu-í núu nchãa ñãyiu ní xihí te ñiu-ni-í cùnùu-í núu ndécú-yu. <sup>19</sup> Te chido tñuní-n nchãa sá ní xini-ñ-án ìñ núu tütú, ndihĩ nchaa nãcuáa cùu vitna, ndihĩ nchaa sá cáda-xí ndéé núu cuaháñ núu véxi-gá. <sup>20</sup> Te na cãchí tñuhú-í xii-n nãcuáa quèe-xi ndi usá chódíní ní xini-í yòtñii-í xio ndaha cùha-í, ndihĩ nãcuáa quèe-xi ndi usá sá ní cuáha mee-ni dñhúñ cuááñ, sá ndéé dité-xi te yindodo ìñ caa candil núu dité-xi-án. Te ndi usá chódíní-án, xĩáñ cùu-xí sá cùtnuní iní-ó sá ndécú úsá cue tée xinu cuechi núu Yá Ndiòxí, te ndi usá cue tée-án ndécú-güedé ndi usá xichi núu ndécú ñãyiu ndècu ichi Yá Ndiòxí. Te cuendá ndi usá sá ndéé dité-xi-án, xĩáñ cùu-xí sá cùtnuní iní-ó sá ndécú úsá xichi ñãyiu ndècu ichi Yá Ndiòxí —duha cãchí Yaá cãháñ-án.

**2**

*Tnúhu sá cùu-xí ñãyiu xĩndecu ichi Yá Ndiòxí ndécú ñùú Éfesú*

<sup>1</sup> Te ní cachí tucu Yaá cãháñ-án xii-í sá chídó tñuní-í nchaa tñuhu sá vítñá cãháñ-gá ìñ núu tütú, te tendaha-í quihíñ ndaha tée xinu cuechi núu Yá Ndiòxí ndécú ñùú Éfesú sá cùu-xí cuè ñãyiu xĩndecu ichi-gá ndécú ñùú-án, te duha ní cachí-gá: “Yùhú cùu-í Yaá nùndàha usá chódíní xio ndaha cùha-í, te xica cuu-í núu ndécú ndi usá sá ní cuáha mee-ni dñhúñ cuááñ, sá ndéé dité-xi te yindodo ìñ caa candil núu dité-xi. <sup>2</sup> Te yùhú xini-í nchaa nãcuáa quide nchohó ñãyiu xĩndecu ichi Yá Ndiòxí ndécú ñùú Éfesú, te xini-í sá ò ndècu ndee-ndo quide chiuñ-ndo cuendá-gá, te ò quide cahnu iní-ndó ndècu-ndo quide-ndo chiuñ-gá. Te xini-í sá ñã tütú tñahí tñahá iní-ndó nãcuáa quide nchaa ñãyiu ndècu ichi cuehé ichi duha. Te xini tucu-í sá xító ndéé-ndó cuè tée cãchí sá ní tendaha-í véxi cãháñ tñuhu-í te ñã ndãá sá cãháñ-güedé tñuhu-í, te ducañ te cùtnuní iní-ndó sá ñã ndãá sá cãháñ-güedé tñuhu-í. <sup>3</sup> Te xini tucu-í sá ò ndòho-ndo quide-ndo chiuñ cuendá-í, te ducañ ò quide cahnu iní-ndó cuèí nãndí yãha-ndo, te ñã tütú cùu dusañ-ndo

quide-ndo chiuñ-án. <sup>4</sup> Dico ñã tütú cùu váha iní-í chi nchòhó ñã tütú-gá quidé-ndó dàtná ní xóo cada-ndo cùtnàhá vitna cùu víi-ni ní sãndáá iní ñãhá-ndó xii-í, chi vitna ñã tütú-gá cùu iní ñãhá víhi-ndo datná ní xóo cada-ndo dàvã-án. <sup>5</sup> Te chí dándacu iní nãcuáa ní xóo cada-ndo cùtnàhá vitna cùu saa ní sãndáá iní ñãhá-ndó xii-í, te ndixi cuèchi iní-ndó sá ñã tütú-gá quidé váha-ndo ndècu-ndo vitna, te nucuíta saa tùcu-ndo cada-ndo datná ní xóo cada-ndo ndéé díhna. Te nchòhó cada iní-ndó sá ndécú ndihĩ-ndo ìñ sá ní cuáha mee-ni dñhúñ cuááñ, sá ndéé dité-xi te yindodo ìñ caa candil núu dité-xi. Te núu vá ndixí cuèchi iní-ndó nãcuáa quide-ndo ndècu-ndo ñã, te quixi-í xocani-í xĩáñ, te ducañ sãtnahá-xi cada ñãha-í xii-ndo te núu vá ndixí cuèchi iní-ndó nãcuáa quide-ndo ndècu-ndo, te ducañ te vá yòo-gá nãtacá chiñuhu ñãha xii-í ñuú-ndó. <sup>6</sup> Dico quide váha-ndo ìñ xichi chi dàquee tñhú-ndó nchãa sá quidé cuè ñãyiu cuu nicolaitás, te yùhú tñahá-í dàquèe tñhú-í nchaa sá quidé ñãyiu-án. <sup>7</sup> Te nchòhó cada cuendá váha-ndo nãcuáa xãhañ-í xii Espiritú Yá Ndiòxí xãhañ-xi xii cue ñãyiu ndècu ichi-gá xĩndecu nchaa xichi. Te duha ndùu tñuhu xãhañ-í xii Espiritú-gá xãhañ-xi xii-yu: Cùñaha-n xii nchaa ñãyiu sá núu na càda ndee iní-yu yãha-yu nãndí sá ná yãha-yu sá cuendá-í, te yùhú cada-í te nduu tãhù-yu cundecu váha-yu núu ndécú Yá Ndiòxí, duha xãhañ-í xii Espiritú-gá cùu-xi ñãyiu”, duha cãchí Yaá cãháñ-án. Te nchaa tñuhu-án ní chídó tñuní-í sá cùu-xí ñãyiu xĩndecu ichi Yá Ndiòxí ndécú ñùú Éfesú.

*Tnúhu sá cùu-xí ñãyiu xĩndecu ichi Yá Ndiòxí ndécú ñùú Ésmirná*

<sup>8</sup> Te ní cachí tucu Yaá cãháñ-án xii-í sá chídó tñuní-í nchaa tñuhu sá vítñá cãháñ-gá ìñ núu tütú, te tendaha-í quihíñ ndaha tée xinu cuechi núu Yá Ndiòxí ndécú ñùú Ésmirná sá cùu-xí cuè ñãyiu xĩndecu ichi-gá ndécú ñùú-án, te duha cãchí-gá: “Yùhú ndécú-í ndéé cùtnàhá ní ngáva ñuyúú, te ñiu-ni-í cundecu-í ndéé ná sãa nduu nãa-xi ndihĩ nchaa sá ò, te ñiu-ni-í ní xihí te ní ndoto-í ndécú-í vitna. <sup>9</sup> Te yùhú xini-í nchaa nãcuáa quide nchohó ñãyiu ndècu ichi Yá Ndiòxí ndécú ñùú Ésmirná. Te xini-í sá ò ndòho-ndo ndècu-ndo sá cuendá-í, te xini tucu-í sá ò ndãhú-ndó dico cùu-ndo ñãyiu xĩndecu váha núu Yá Ndiòxí. Te xini tucu-í sá ò cãháñ cuèhé ñãyiu isrãel cuendá-ndó, dico ñã tütú quidé-yu nãcuáa tãu-yu cadã-yu sá cùu-yu ñãyiu isrãel, chi cùu-yu ñãyiu xinu cuechi mee-ni núu sãcuihná. <sup>10</sup> Dico nchòhó vá yùhú-ndó cuèí nãndí cùu nchaa sá ná ndòho-ndo cuendá-í, chi sãcuihná cada-xi te ngava dava-ndo vécaá, te ducañ càda-xi

chi cuini-xi coto ndee ñhá-xi xi-ndo núu ndisa sá vâ ná tûhú iní-ndó sâ nchicú<sup>n</sup> nihnu-ndo ichi Yá Ndióxi. Te ndoho-ndo úxi nduu dico vá dañá ndéé-ndó cànchicú<sup>n</sup> nihnu-ni-ndo ichi-gá cuéi na cúu-ndó sâ cuendá-gá, te yúhú cada-í te nduu táhú-ndó cùndecu-ndo ndihi-gá ni caa ni quíhí<sup>n</sup>. <sup>11</sup> Te nchaa nchòhó cada cuendá váha-ndo nàcuáa xáha<sup>n</sup>-í xii Espiritú Yá Ndióxi xáha<sup>n</sup>-xi xii cue ñáyi ndecu ichi-gá xindecu nchaa xichi, te duha ndúu tñúhu xáha<sup>n</sup>-í xii Espiritú-gá xáha<sup>n</sup>-xi xií-yu: Cúñaha-n xii nchaa ñáyi sá núu na cùndee iní-yu yáha-yu nándi sá ná yáha-yu sá cuendá-í te vá cuíta nihnú-yu na sáa nduu cuíta nihnu nchaa dava-gá ñáyi, duha xáha<sup>n</sup>-í xii Espiritú-gá cúu-xi ñáyi", duha ní cachí Yaá càhá<sup>n</sup>-án. Te nchaa tñúhu-án ní chídó tñuní-í sá cúu-xi ñáyi xindecu ichi Yá Ndióxi ndécú ñúu Èsmirná.

*Tñúhu sá cúu-xi ñáyi xindecu ichi Yá Ndióxi ndécú ñúu Pèrgamú*

<sup>12</sup> Te ní cachí tucu Yaá càhá<sup>n</sup>-án xii-í sá chídó tñuní-í nchaa tñúhu sá vítá càhá<sup>n</sup>-gá ì<sup>n</sup> núu tûtú, te tendaha-í quíhí<sup>n</sup> ndaha téé xínu cuechi núu Yá Ndióxi ndécú ñúu Pèrgamú sá cúu-xi cue ñáyi xindecu ichi-gá ndécú ñúu-án, te duha càchí-gá: "Yúhú cúu-í Yaá néhé ì<sup>n</sup> yuchí cáni te ndèè úú xio núu-xi. <sup>13</sup> Te yúhú xini-í nchaa nàcuáa quide nchohó cue ñáyi xindecu ichi Yá Ndióxi ndécú ñúu Pèrgamú, te xini tucu-í sá ndécú-ndó núu ío cùnuu yucu ñáváha, te ñá túú dañá ndéé-ndó nchicú<sup>n</sup> nihnu-ndo ichi-í, te duca<sup>n</sup> ío sándáá iní ñáhá-ní-ndó xi-í, te diu-ni duca<sup>n</sup> ní quide-ndo cùtnáhá ní sahní-güedé té Antipás núu ndécú-ndó diu-ni núu dúcá<sup>n</sup> ío cùnuu yucu ñáváha. Te ndii-án ní quide ndáá ndii ní xindecu ndii ichi-í chi ní cáhá<sup>n</sup> váha ndii cuendá-í. <sup>14</sup> Dico ñá túú cúu váha iní-í cuendá ì<sup>n</sup> úú sá quidé-ndó, chi ndecu ndihi-ndo ñáyi nchicú<sup>n</sup> nihnu-ni nchaa nàcuáa ní cáhá<sup>n</sup> ndii Balaám. Chi ndii-án ñá túú ní quide váha ndii chi ní dácáhu iní ndii ingá téé ní xínani Bálac nàcuáa cada-dé canu ichi-dé cue ñáyi isráel ingá ichi sá ñá túú váha, chi ní xáha<sup>n</sup> té Bálac-án xii-yu sá caxi-yu nchaa sá ndúu táhú nchaa sá ní cadúha cue téé ñuyú-a dānani ñáyi ndiōxi te ñá ndáá sá ndiōxi cúu-xí, te ní dácáhu iní ñáhá-dé xií-yu sá cùndecú-yu ichi díí iní. <sup>15</sup> Te ndecu ndihi tucu-ndo ñáyi nchicú<sup>n</sup> nihnu sá dácúaha cue ñáyi cúu nicolaitás. Te nchaa sá dácúaha ñáyi-án dáquèe tñù-í, <sup>16</sup> te nchòhó chí dándixi cuéchi iní sá ñá túú quide váha-ndo ndecu-ndo, chi núu ñáhá te quixi-í náá-í ndihi cue ñáyi-án ndihi yuchí cáni sá quéné yùhu-í. <sup>17</sup> Te nchaa nchòhó cada cuendá váha-ndo nàcuáa xáha<sup>n</sup>-í xii Espiritú Yá Ndióxi xáha<sup>n</sup>-xi xii cue ñáyi ndecu ichi-gá xindecu nchaa xichi. Te duha ndúu

tñúhu xáha<sup>n</sup>-í xii Espiritú-gá xáha<sup>n</sup>-xi xií-yu: Cúñaha-n xii nchaa ñáyi sá núu na cada ndee iní-yu yáha-yu nándi sá ná yáha-yu sá cuendá-í, te yúhú cuáñaha-í sá ndúu yúhu xií-yu caxi-yu ì<sup>n</sup> sá vátá quini-gá-yu caxi-yu. Te xiá<sup>n</sup> cúu-xi mánáá sá ní xóo caxi cue ñáyi ní xindecu ndéé sanaha, te cuáñaha tucu-í ì<sup>n</sup> caa yúu cuixi<sup>n</sup> xií-yu, te núu yúu-án cundee ì<sup>n</sup> diu saa. Te diu-án vâ yóo tñáhi xini chi ì<sup>n</sup> dii díí-ni ñáyi na quèhe<sup>n</sup> cuendá diu-án quini-yu, duha xáha<sup>n</sup>-í xii Espiritú-gá cúu-xi ñáyi", duha càchí Yaá càhá<sup>n</sup>-án. Te nchaa tñúhu-án ní chídó tñuní-í sá cúu-xi ñáyi xindecu ichi Yá Ndióxi ndécú ñúu Pèrgamú.

*Tñúhu sá cúu-xi cue ñáyi xindecu ichi Yá Ndióxi ndécú ñúu Tiàtirá*

<sup>18</sup> Te ní cachí tucu Yaá càhá<sup>n</sup>-án xii-í sá chídó tñuní-í nchaa tñúhu sá vítá càhá<sup>n</sup>-gá ì<sup>n</sup> núu tûtú, te tendaha-í quíhí<sup>n</sup> ndaha téé xínu cuechi núu Yá Ndióxi ndécú ñúu Tiàtirá sá cúu-xi cue ñáyi xindecu ichi-gá ndécú ñúu-án, te duha càchí-gá: "Yúhú cúu-í Déhe Yá Ndióxi, te caa tinuu-í dàtná cáá itá ñuhú, te sáhá-í cáá dàtná cáá sá nání bròncé oré ñúhú-xi núu ñúhú càyú-xi. <sup>19</sup> Te yúhú xini-í nchaa nàcuáa quide nchohó ñáyi xindecu ichi Yá Ndióxi ndécú ñúu Tiàtirá. Te xini tucu-í sá ío cúu iní-ndó Yá Ndióxi te sándáá iní-ndó-gá. Te xini tucu-í nàcuáa ndúu chiu<sup>n</sup> quide-ndo sá cúu-xi-gá. Te xini tucu-í sá ío quide cahnu iní-ndó cuéi nándi cúu sá yáha-ndo ndecu-ndo. Te xini tucu-í sá ío-gá ndúcú ndèe-ndo quide váha-ndo vítá dacúúxi cùtnáhá vitna cúu saa ní sándáá iní-ndó Yá Ndióxi. <sup>20</sup> Dico ñá túú cúu váha iní-í cuendá ì<sup>n</sup> sá quidé-ndó, chi ñá túú tñáhi ná sání iní-ndó ndecu ndihi-ni-ndo ñáyi nchicú<sup>n</sup> nihnu nchaa nàcuáa dānehé ñáhá ñáha nani Jezabél. Te ñáha-án càchí-a<sup>n</sup> sá càhá<sup>n</sup>-a<sup>n</sup> tñúhu Yá Ndióxi dico ñá ndáá sá càhá<sup>n</sup>-a<sup>n</sup> tñúhu-gá, te cuáhá<sup>n</sup>-a<sup>n</sup> dāndahú-a<sup>n</sup> nchaa ñáyi xínu cuechi núu-í ndihi nchaa sá dānehé ñáhá-án cuendá cundecú-yu ichi díí iní, te caxi-yu nchaa sá ndúu táhú nchaa sá ní cadúha cue téé ñuyú-a dānani ñáyi ndiōxi te ñá ndáá sá ndiōxi cúu nchaa xiá<sup>n</sup>. <sup>21</sup> Te ní cuu vâi nduu ta dacaca-í ndécú-án cuendá ndixi cuéchi iní-a<sup>n</sup> sá ñá túú quide váha-a<sup>n</sup> ndecu-a<sup>n</sup>, te cuéi duca<sup>n</sup> quide-í dico ñá túú cuini-a<sup>n</sup> dañá-a<sup>n</sup> ní ì<sup>n</sup> sá cuéhé sá dúhá quide-a<sup>n</sup>. <sup>22</sup> Te vitna yúhú ío dandòho-í-a<sup>n</sup> chi tñi ñáha cuéhé xii-a<sup>n</sup>, te diu-ni duca<sup>n</sup> ío dandòho-í nchaa ñáyi quide datná quidé-án te núu vá ndixi cuéchi iní-yu sá ñá túú quide váha-yu ndécú-yu, te dañá-yu nchaa sá cuéhé sá dúhá quidé-yu. <sup>23</sup> Te nchaa ñáyi cùndihí ñáha xii ñáha-án cahni-í-yu, te duca<sup>n</sup> te nchòhó ndihi dava-gá nchaa ñáyi xindecu ichi Yá Ndióxi ndécú nchaa xichi cutnuni iní-ndó ndihi-yu sá yúhú cúu-í Yaá xini

ndáá nchaa nàcuáa sàni iní ñáiyu, ndìhi nchaa nàcuáa quide-xi iní-yu. Te nchòhò nàcuáa ndùu sá quidé-ndó ìḡ ìḡ-ndo te duca<sup>n</sup> cùnduu sá táxi-í nduu táhú-ndó. <sup>24</sup> Te dava nchòhò ñáiyu ndècu ñuu Tiàtirá, ñáiyu ñá túú nchìcú<sup>n</sup> nihnu nàcuáa dànehé ñáhá ñàha nani Jezabél-á<sup>n</sup> ñà túú xini-ndó nà cúú sá càchí ñáiyu nduu yuhu dacahu iní ñáhá yùcu ñávàha. Te nchòhò, ñà túú nágá cachí tnúhu-í xii-ndo cada-ndo <sup>25</sup> diu-ná sá ìo nducu ndèe-ndo cada-ndo nchaa nàcuáa càhá<sup>n</sup> tnúhu sá ndécú ndìhi-ndo, te duca<sup>n</sup>-ni cada-ndo ndéé òré quixi tucu-í. <sup>26</sup> Te nchaa nchòhò ñáiyu na cada ndee iní yáha nándi sá nà yáha sá cuendá-í, te núu na cada-ni-ndo nchaa nàcuáa cuini-í cada-ndo ndéé nduu vâ cùndecu-gá-ndó ñuyiú-a, te yúhú taxi-í tnúhu ndee iní xii-ndo sá táxi tnùni-ndó nchaa ñáiyu ñuyiú <sup>27</sup> dàtná ní quide mee Tàtâ-í Dútú Ndiòxí ní taxi-gá tnúhu ndee iní ndécú ndìhi-í, te duca<sup>n</sup> cada ñaha-í xii-ndo táxi-í tnúhu ndee iní xii-ndo cuendá ìo taxi tnùni-ndó, te cada iní-ndó sá cáda-ndó cuè ñáiyu dàtná quidé-xí ìḡ quidi òré tàhú-xi càchí duu<sup>n</sup>-xi, te duca<sup>n</sup> chi nchòhò cada-ndo sá ncháá ñáiyu ñá túú quide váha cuíta nihnú-yu. <sup>28</sup> Te cada iní-ndó sá dàtná dáyhèhé chódiní quiti quène òré sa ta tũndaá-nâ cuáhá<sup>n</sup> duca<sup>n</sup> cada-xi òré nâ sàá nduu ngũta-xi cada váha-xi, te duca<sup>n</sup> chi yúhú cada-í nàcuáa nduu táhú-ndó cùndecu ndìhi ñaha-ndo xii-í núú ìo váha càa ndecu-í. <sup>29</sup> Te nchaa nchòhò cada cuendá váha-ndo nàcuáa xáha<sup>n</sup>-í xii Espiritú Yá Ndiòxí xáha<sup>n</sup>-xi xii cuè ñáiyu ndècu ichi-gá xĩndecu nchaa xichi<sup>n</sup>, duha càchí Yáá càhá<sup>n</sup>-á<sup>n</sup>. Te nchaa tnúhu-á<sup>n</sup> ní chídó tnùni-í sá cúú-xí ñáiyu xĩndecu ichi Yá Ndiòxí ndécú ñuu Tiàtirá.

**3**

*Tnúhu sá cúú-xí ñáiyu xĩndecu ichi Yá Ndiòxí ndécú ñuu Sárdís*

<sup>1</sup> Te ní cachí tucu Yáá càhá<sup>n</sup>-á<sup>n</sup> xii-í sá chídó tnùni-í nchaa tnúhu sá vítná càhá<sup>n</sup>-gá ìḡ núú tütú, te tendaha-í quihí<sup>n</sup> ndaha téé xinu cuechi núú Yá Ndiòxí ndécú ñuu Sárdís sá cúú-xí cuè ñáiyu xĩndecu ichi-gá ndécú ñuu-á<sup>n</sup> te duha càchí-gá: “Yúhú cúu-í Yáá ndécú ndìhi ndi usá espíritú cúú cuendá Yá Ndiòxí, te diu-ni-í cúu-í Yáá ndécú ndìhi ndi usá chódiní. Te yúhú xini-í nchaa nàcuáa quide nchòhò ñáiyu xĩndecu ichi Yá Ndiòxí ndécú ñuu Sárdís, te xini-í sá cúú-ndó dàtná ñáiyu ní xihí cuèi càchí ñáiyu sá ñáhá. <sup>2</sup> Te chí cuáha cuendá nàcuáa quide-ndo ndecu-ndo vitna, te nducu ndèe-ndo cada-ndo ìḡ úú-gá nchaa sá váha nchìcú<sup>n</sup> nihnu-ndo vitna, chí sa ndètu vií-nâ dañà-ndo nchaa-ndi túhú sá váha quide-ndo ni cuu, te quide cuendá-í sá ñà túú quide-ndo nchaa nàcuáa cuini

Yá Ndiòxí cada-ndo. <sup>3</sup> Te chí dándacu iní nàcuáa càhá<sup>n</sup> tnúhu sá ní xĩndedóho-ndo cùtnáhá ní tuha-ndo ichi Yá Ndiòxí, te canchicú<sup>n</sup> nihnu-ndo cada-ndo nàcuáa càhá<sup>n</sup> tnúhu-á<sup>n</sup>, te ndixi cuèchi iní-ndó sá ñà túú quide váha-ndo ndècu-ndo, te núu vâ nàcuáha-ndo cuendá nàcuáa quide-ndo ndecu-ndo ña, te cada-í dàtná quidé ñadúhú, chí òré ñà túú nâ yihí ìni-ndó quèxio-í núú ndécú-ndó. <sup>4</sup> Dico ndècu ndìhi-ndo ìḡ úú ñáiyu càndoo caa nine ini-xi, chí ñáiyu-á<sup>n</sup> ní nduu táhú-yu cuihnú-yu dóó cuixi<sup>n</sup> cuendá cùndecu ndìhi-í-yu, te duca<sup>n</sup> chí cùdú-yu núu-í. <sup>5</sup> Te nchaa ñáiyu na cada ndee ini-xi yáha nándi sá nâ yáha sá cuendá-í, te ñáiyu-á<sup>n</sup> nduu táhú-yu cuihnú-yu dóó cuixi<sup>n</sup>, te vâ náquète-í diú-yu núú tütú núú yódó tnùni cue ñáiyu ní nduu táhú cùndecu ndìhi-í ní caa ní quihí<sup>n</sup>, te cùñaha-í xii Tàtâ-í Dútú Ndiòxí ndìhi cue espíritú xinu cuèchi núu-í sá ñáiyu-á<sup>n</sup> cúu-yu ñáiyu cùu cuendá-í. <sup>6</sup> Te nchaa nchòhò cada cuendá váha-ndo nàcuáa xáha<sup>n</sup>-í xii Espiritú Yá Ndiòxí xáha<sup>n</sup>-xi xii cuè ñáiyu ndècu ichi-gá xĩndecu nchaa xichi<sup>n</sup>, duha càchí Yáá càhá<sup>n</sup>-á<sup>n</sup>. Te nchaa tnúhu-á<sup>n</sup> ní chídó tnùni-í sá cúú-xí ñáiyu xĩndecu ichi Yá Ndiòxí ndécú ñuu Sárdís.

*Tnúhu sá cúú-xí cuè ñáiyu xĩndecu ichi Yá Ndiòxí ndécú ñuu Filadelfía*

<sup>7</sup> Te ní cachí tucu Yáá càhá<sup>n</sup>-á<sup>n</sup> xii-í sá chídó tnùni-í nchaa tnúhu sá vítná càhá<sup>n</sup>-gá ìḡ núú tütú, te tendaha-í quihí<sup>n</sup> ndaha téé xinu cuechi núú Yá Ndiòxí ndécú ñuu Filadelfía sá cúú-xí cuè ñáiyu xĩndecu ichi-gá ndécú ñuu-á<sup>n</sup>, te duha càchí-gá: “Yúhú cúu-í Yáá ìo váha quide ndáá te ñà túú tnáhí cuèchi-í. Te díhna-gá ndí Dávíí ní taxi tnùni ndí ñáiyu, te vitna yúhú táxi tnùni-í-yu, te yúhú càhá<sup>n</sup>-í te núu ndèndida càa ñáiyu ndìhu ndaha-í te ndèndida càa ñáiyu vâ ndìhu ndaha-í. <sup>8</sup> Te yúhú xini-í nchaa nàcuáa quide nchòhò ñáiyu xĩndecu ichi Yá Ndiòxí ndécú ñuu Filadelfía, te yúhú ní quide-í nàcuáa ní nihí-ndó ìḡ ichi cahnu quide-ndo chiu<sup>n</sup>-í, te vâ yõ ìḡ cada nàcuáa vâ nihí-gá-ndó nàcuáa cada-ndo chiu<sup>n</sup>-í. Te cuèi ñà túú ìo nihí ndéé-ndó cùndecu-ndo ichi Yá Ndiòxí dico tnùni-ndo nchaa tnúhu càhá<sup>n</sup>-í, te ní ìḡ xito ñà túú càhá<sup>n</sup>-ndó sá ñà túú ndècu ndìhi ñaha-ndo xii-í. <sup>9</sup> Te nchaa ñáiyu quide nchaa nàcuáa cuini yucu ñávàha, ñáiyu-á<sup>n</sup> cúu-yu ñáiyu isràél, te cuèi cúu-yu ñáiyu isràél dico ñà túú quide-yu nàcuáa tãu-yu cada-yu, te yúhú cada-í sá ncháá ñáiyu-á<sup>n</sup> canehé-yu sá yifñu núu-ndó, te cutnùni iní-yu sá yúhú ìo cùu iní ñáhà-í xii-ndo. <sup>10</sup> Te ìo quide ndee-ni iní-ndó nchicú<sup>n</sup> nihnu-ndo quide-ndo nchaa nàcuáa ní càhá<sup>n</sup>-í, te xíá<sup>n</sup> coto ñaha-í xii-ndo ñà túú nâ tnahá-ndó

ndùu na quixi nchaa tnúndòho tnúhu ndàhú ñuyíú-a. Te òré quexio nchaa tnúndòho-án ñuyíú-a te dàvá-án cutnùní nàcuáa ndùu sá quidé ññ ñáyíu. <sup>11</sup> Te ío ndíhi quixi tucu-í. Te vá dáñá ndéé-ndó cada-ndo nchaa sá váha nchicú<sup>n</sup> nihnu-ndo quide-ndo cuendá sá vá cuita sá ní cachí Yá Ndióxi nduu táhú-ndó. <sup>12</sup> Te nchaa nchòhó ñáyíu na càda ndee iní yáha nándi sá ná yáha sá cuendá-í, te yúhú cada-í sá nchòhó ío cuu càhnu-ndo cundecu-ndo núu ndécú Tàtà-í Dútú Ndióxi, te vá ññ ndùu-gá xocuiñi-ndó núu ndécú-gá. Te cada iní-ndó sá dàtná sá chídó tnùní-í diu Tàtà-í Dútú Ndióxi ññ-ndo chi duca<sup>n</sup>-ni cundecu-ndo ndíhi-gá, te cada tucu iní-ndó sá dàtná sá chídó tnùní-í nàcuáa nàni ñuú-gá ññ-ndo, chi diu ñuú-gá-án cundecu-ndo, te ñuú-án nàní-xí Jèrusalén Sáá, duha nàni ñuú-gá. Te ñuú-án quee-xí andíu núu ndécú Yá Ndióxi Yáá cúú Tàtà-í queé-xí ñuyíú. Te cada tucu iní-ndó sá dàtná sá chídó tnùní-í diu mee-í ññ-ndo, te xíá<sup>n</sup> cúú-xí ññ diu saa, te duca<sup>n</sup> càda iní-ndó chi cundecu ndíhi ñaha-ndo xii-í. <sup>13</sup> Te nchaa nchòhó cada cuendá váha-ndo nàcuáa xáha<sup>n</sup>-í xii Espíritú Yá Ndióxi xáha<sup>n</sup>-í xii cue ñáyíu ndécú ichi-gá xíndecu nchaa xichi<sup>n</sup>, duha càchí Yáá càhá<sup>n</sup>-án. Te nchaa tnúhu-án ní chídó tnùní-í sá cúú-xí ñáyíu xíndecu ichi Yá Ndióxi ndécú ñùú Filadelfía.

*Tnúhu sá cúú-xí ñáyíu xíndecu ichi Yá Ndióxi ndécú ñùú Laodiceá*

<sup>14</sup> Te càchí tucu Yáá càhá<sup>n</sup>-án xii-í sá chídó tnùní-í nchaa tnúhu sá vitná càhá<sup>n</sup>-gá ññ núu tütú, te tendaha-í quíhi<sup>n</sup> ndaha téé xínu cuechi núu Yá Ndióxi ndécú ñùú Laodiceá sá cúú-xí cué ñáyíu xíndecu ichi-gá ndécú ñùú-án, te duha càchí-gá: “Yúhú cúú-í Yáá quidé núu Yá Ndióxi, te cúu-í Yáá quidé ndáá chi càhá<sup>n</sup> ndáá cuiti-í nàcuáa càhá<sup>n</sup> Yá Ndióxi. Te yúhú cúú-í Yáá ní quide ní ngúndecu nchaa sá ní cadúha Yá Ndióxi. <sup>15</sup> Te yúhú xini-í nchaa nàcuáa quide nchòhó ñáyíu xíndecu ichi Yá Ndióxi ndécú ñùú Laodiceá, te xini-í sá ñà túú cuini-ndó càchicú<sup>n</sup> nihnu-ndo nchaa nàcuáa càhá<sup>n</sup>-í, te ní ñà túú cuini-ndó dañá duu<sup>n</sup>-ndo. Te váha-gá sá dùu<sup>n</sup> dùu<sup>n</sup> cada-ndo nchaa nàcuáa càhá<sup>n</sup>-í àdi núu ñáhá te duu<sup>n</sup> duu<sup>n</sup> dañá-ndo. <sup>16</sup> Te sá dúcá<sup>n</sup> quide-ndo ñà túú cuini-ndó dùu<sup>n</sup> duu<sup>n</sup>-ni cada-ndo nàcuáa càhá<sup>n</sup>-í, te ní ñà túú cuini-ndó dùu<sup>n</sup> duu<sup>n</sup>-ni dañá-ndo te sáa nduu vá cúndee-gá iní-í cuendá nchaa sá quidé-ndó-án, te daquèe títú ñáhá-í xii-ndo. <sup>17</sup> Te càchí-ndó sá cuicá-ndó, te ío váha ta yáha-ndo nchaa nduu cuáhá<sup>n</sup>, te ñà túú tnàhí ná cúmáni xii-ndo, te ñà túú cùnuni iní-ndó sá cúú-ndó dàtná cue ñáyíu ío ndàhú yáha, te cúu-ndo datná ñáyíu ndàhú, ñáyíu ío cùndahú iní ñáhá tnàha ñáyíu-xi, te cúu-ndo datná cue ñáyíu cuáá, te

cúu tucu-ndo datná cue ñáyíu ndàhú ñà túú tnàhí dóó-xi. <sup>18</sup> Te na càchí tnúhu-í xii-ndo sá cáda-ndó dàtná xíquide cue ñáyíu sàa<sup>n</sup> ññ sá ní cuáha mee-ni díhú<sup>n</sup> cuáá<sup>n</sup> sá ío váha càa, te duca<sup>n</sup> quidé-yu te ío-gá cúú cuicá-yu. Te cada tucu-ndo dàtná xíquide cue ñáyíu sàa<sup>n</sup> dóó cuixí<sup>n</sup> sácuiñnu-yu cuendá sá vá cúú-yu dàtná ñáyíu ndàhú ñà túú dóó-xi, te cada tucu-ndo dàtná quidé cue ñáyíu sàa<sup>n</sup> yúcu queé núu-xi nàcuáa cutnùní váha núu-yu, te duha càhá<sup>n</sup>-í xáha<sup>n</sup>-í xii-ndo chi cuini-í sá nàtuha ñaha-ndo xii-í, te ío váha cundecu-ndo sá cúú-xí Yá Ndióxi. <sup>19</sup> Te càhá<sup>n</sup>-í dóho nchaa ñáyíu cuu iní-í òré ñà túú quide ndáá-yu, te dàndoho-í-yu, núu xíá<sup>n</sup> cuini-í sá nchòhó ndixi cuéchi iní-ndó sá ñà túú quide váha-ndo ndécú-ndo. <sup>20</sup> Te na càchí tnúhu-í xii-ndo sá yúhú cúú-í dàtná ññ téé nùtní yuyèhe ndaa quehé te càhá<sup>n</sup>-í ñáyíu yíhi xiti vehe, te núu na càda cuendá-yu sá càhá<sup>n</sup>-í te nacaá<sup>n</sup>-yu yuyèhe te quíhu-í xiti vehe cudini-í ndíhi-yu, te duha càhá<sup>n</sup>-í chi cuini-í cundecu ndíhi ñaha-í xii-ndo. <sup>21</sup> Te nchaa nchòhó ñáyíu na càda ndee iní-xi yáha nándi sá ná yáha sá cuendá-í, te yúhú taxi-í xii-ndo ññ xichi núu ndécú-í cundecu-ndo te cunu-ndo tnàhá-ndó dàtná cùnù-í, chi yúhú duca<sup>n</sup> ní quide ndee iní-í ní yáha-í nándi sá ní yáha-í te vitna ní nduu táhú-í ndécú-í núu ndécú Tàtà-í Dútú Ndióxi cùnù-í. <sup>22</sup> Te nchaa nchòhó cada cuendá váha-ndo nàcuáa càhá<sup>n</sup> Espíritú Yá Ndióxi xáha<sup>n</sup>-xi xii cue ñáyíu ndécú ichi-gá xíndecu nchaa xichi<sup>n</sup>, duha càchí Yáá càhá<sup>n</sup>-án. Te nchaa tnúhu-án ní chídó tnùní-í sá cúú-xí ñáyíu xíndecu ichi Yá Ndióxi ndécú ñùú Laodiceá.

## 4

*Nàcuáa chíñuhu ñáyíu Yá Ndióxi andíu*

<sup>1</sup> Te sàtá ní yáha duca<sup>n</sup> ní cuu te ní xini-í nchí andíu, te ní càhá<sup>n</sup> tucu Yáá ní càhá<sup>n</sup> ndíhi ñaha xii-í díhna, te Yáá-án ní càhá<sup>n</sup> níhi-gá dàtná càhá<sup>n</sup> níhi ññ cútú, te ní cachí-gá xii-í:

—Taquène iha te na dànehé ñáhá-í xii-n nchaa nàcuáa cada-xi ndéé núu cuáhá<sup>n</sup> núu véxi —càchí-gá.

<sup>2</sup> Te òré-ni-án ní quide ñaha tucu Espíritú Yá Ndióxi xii-í nàcuáa càchí iní-xi, te diu-ni òré-án ní xini-í nùtní ññ xilé váha andíu te càa datná cáa xilé sácco nchíhi cue ñáyíu ío cunu, te núu xilé váha-án núcco Yáá táxi tnùní. <sup>3</sup> Te Yáá-án cáa-gá dàtná cáa yúú chàhncí yúú váha sá nání jáspe, te càa tucu-gá dàtná cáa yúú váha sá nání còrnalíná, te ñùhu doco ñaha ññ cóo yáhnchí xii-gá, te tása<sup>n</sup>-di dàtná tása<sup>n</sup> ññ yúú váha sá nání èsméraldá. <sup>4</sup> Te ní xini tucu-í nùtní ócó cúmí xilé váha ní càndéé núu núcco-gá, te núu xilé-án xínucóo ócó cúmí cue téé cúu



sacuéhé te xixihnu-güedé mee-ni döó cuixín, te ìn caa coróná sá ni cuáha mee-ni dihún cuáán xixúhu díqui-güedé. <sup>5</sup> Te núú núcöo Yáá táxi tnúni-án sáá ndúté, te cáhán ñuhu te xica chíhi-xi dónaha, te càyú úsá iti núú núcöo-gá, te sá úsá iti-án xián cútñúni sá ndécú úsá espíritú cúu cuendá-gá. <sup>6</sup> Te ndécú ìn sá ndécú ndàa núú-gá te xián cáá dàtná cáá lámár, te dàtná cáá vidriú cáá ñihí.

Te ní candéé díñi Yáá núcöo-án xínutnii cúmí quiti te titní víhí tinuu-güedi ndeé ndàa sáta-güedi ndihi ndàa núú-güedi. <sup>7</sup> Te quiti dihna nuu càa-di datná cáá ndicaha, te quiti cùu uú cáá-dí dàtná cáá ndicutu, te quiti cùu uní néhé-dí núú tée, te quiti cùu cumí cáá-dí dàtná cáá yàcolo oré cuáhán-di núú tàchí. <sup>8</sup> Te ndi cùmí quiti-án ndeé íñú ndíxín-güedi ìn ìn-güedi, te ñihí xítí ndíxín-güedi ndihi ndàa sáta ndíxín-güedi ndeé tinuu-güedi, te nduu niú chíñuhu-güedi Yá Ndióxi, te xáha-güedi xii-gá:

Yòhó Dútú Ndióxi duca-ni ta quide ndáá-n vèxi, te duca-ni quide ndáá-n cuéi vitna, te diu-ni duca-ni càda ndáá-n núú cuáhán núú vèxi,

te cùu-n Yáá quidé nchàa-ndi túhú sá váha, te diu-ni-n sá ndecu-n ndeé cútñhá ní cuáha ñuyú,

te diu-ni-n ndecu-n cuéi vitna, te diu-ni-n cùndecu-n cuéi ndeé núú cuáhán núú vèxi.

Duha xáha-n cué quiti-án xii Yáá núcöo núú xilé váha-án chíñuhu ñaha-güedi.

<sup>9</sup> Te cue quiti-án ìo ndàcán táhú-güedi núú Yáá núcöo núú xilé váha-án cuendá nchaa sá quidé-gá. Te Yáá-án cúu-gá Yáá ndécú nchàa nduu nchaa quíú. Te cue quiti-án càchí-güedi sá ìo càhnu cuu-gá te nèhe-güedi sá yíñuhu núú-gá. Te ndi tnahá oré duca-ni cáhán-güedi, <sup>10</sup> te ndi òcò cúmí cue tée cùu sacuéhé xínucöo-án ngüíñi xítí-güedé núú Yáá núcöo-án, chí diu-gá cúu-gá Yáá ndécú nchàa nduu nchaa quíú te chíñuhu ñaha-güedé xii-gá, te tàva-güedé coróná ñuhú díqui-güedé te tàxi ndecu-güedé núú-gá, te xáha-güedé xii-gá:

<sup>11</sup> Yòhó cúu-n Dútú Ndióxi Yáá cúu cuendá ñhá xii-ndí,

te ìo càhnu cuu-n, te ìo váha quide-n, te nèhe-ndí sá yíñuhu núú-n, chí duca-ni táu-xi càda-ndí,

chí yòhó cúu-n Yáá ní cadúha nchaandi túhú sá ìo,

te duca-ni ngúndecu nchaa xián chí mee-ni dùca-ni sani iní-n càda-n.

**5**

*Cuendá Yáá cáá dàtná cáá ìn mbéé quiti ní dánícuèhé-güedé ndihi cuendá ìn tutú*

<sup>1</sup> Te ní xini tucu-í sá Yáá núcöo núú xilé váha-án nundàha-gá ìn tutú ní nacatuuu xio ndaha cùha-gá, te ndeé lètrá ndàa sáta-xi ndihi ndàa xítí-xi, te úsá tnàhá tutú líhli ñuhu seyú ndeé sáta tütú-án cuendá sá vâ dáñá-xi nàca. <sup>2</sup> Te ní xini-í ìn espíritú xínú cuèchi núú Yá Ndióxi, te ndeé víhi-xi te ñihí cáhán-xi, te càchí-xi:

—¿Yoo táu-xi xocàni nchaa tutú líhli ñuhu seyú ndeé sáta tütú-a te nadacáa-xi? —càchí espíritú-án.

<sup>3</sup> Dico ní àndiu, te ní núú ñuyú-a, te ní ndàa xítí ñuhu ñá túú ìn ñáyúu táu-xi nadacáa tütú-án te cundèhé-yu. <sup>4</sup> Te yúhú ní ngüita-í ndahyú víhi-í cuendá sá ña túú ní ìn ñáyúu táu-xi nadacáa tütú-án cundèhé-yu. <sup>5</sup> Te ìn cue tée cùu sacuéhé xínucöo xián ní càchí-güedé xii-í:

—Vá ndahyú-gá-n, te cada cuendá-n chí Yáá ìo cùnuu cuu ndi mee cue ñáyúu cùu ñani tnàhá ndii Júdá, diu-ni Yáá cúu ñani tnàhá ndii Dáví, Yáá-án cúu-gá Yáá ní ndacu ní yáha nchaa nándi sá ní yáha, núú xián diu-gá táu-gá xocàni-gá nchaa tutú líhli ñuhu seyú ndeé sáta tütú-án te nadacáa-gá —duha càchí tée cùu sacuéhé-án.

<sup>6</sup> Te tnuú ndi òcò cúmí cue tée cùu sacuéhé xínucöo-án, ndihi tnuú ndi cúmí quiti xínutnii-án, ndihi núú núcöo Yáá táxi tnúni-án ní xini-í núnii ìn Yáá cáá dàtná cáá ìn mbéé quiti ní dánícuèhé-güedé te ní xihí-di ní cùu te ní ndoto-di, te ndeé úsá ndiqui-di, te ndeé úsá tinuu-di, te sá úsá tinuu-di-án cútñúni sá ndécú úsá espíritú cúu cuendá Yá Ndióxi, duca-ni Yáá-án ní xini-í. Te cue espíritú-án ní tendaha-gá xicá cùu-xi ní caa xico ñuyú. <sup>7</sup> Te Yáá cáá dàtná cáá ìn mbéé quiti ní dánícuèhé-güedé-án ní sàhá-núú Yáá núcöo núú xilé váha-án.

<sup>8</sup> Te oré ní quehe-núú-gá tutú-án te ndi cúmí quiti xínutnii xián ní ngüíñi xítí-güedi núú-gá, te duca-ni ngüíñi xítí tucu ndi òcò cúmí cue tée cùu sacuéhé xínucöo-án, te ndi díñi núú-güedé xínehe-güedé yáá sá nání arpá, te xínehe tucu-güedé ndi díñi núú-güedé ìn caa tícúu ní cuáha mee-ni dihún cuáán, te chítu dusa sá sàhá-ní. Te ñúhna dusa sá sàhá-ní tmámí-án cúu-xi dàtná nchaa tnúhu càhá-n chaa ñáyúu ndécú ichi Yá Ndióxi oré càhá-n ndihi ñhá-yu xii-gá. <sup>9</sup> Te xita-güedé ìn ndudú sáa ndihi cue quiti-án chíñuhu ñaha-güedé xii-gá, te càchí-güedé ndihi cue quiti-án:

Yòhó táu-n quèhe-n tutú-a te xocàni-n nchaa tutú líhli ñuhu seyú ndeé sáta-xi,

chí yòhó ní sati ñihí-n te ní xihí-n, te cuendá xián ní nduu cuendá Yá Ndióxi cue ñáyúu ìn ìn nàció-n, ndihi ñáyúu xíndecu ìn ìn ñuu, ndihi ñáyúu càhá-n ndi díñi ndi

díi<sup>n</sup> núú tñuhu, ndihi ñáyiú xĩndecu i<sup>n</sup> xichi.

10 Te ní quidé-n-yu dàtná cue téé yĩndaha ñáyiú, te ní quide tũcú-n-yu dàtná cue dútú sá cúu-xí Yá Ndiõxi.

Te sáá nduu te taxi tñuní-yu ñuyíú-a. Duha cáhá<sup>n</sup> cue téé-á<sup>n</sup> ndihi cue quiti-á<sup>n</sup> chíññuhu-güedé ndihi-güedi Yáá-á<sup>n</sup>.

11 Te sáá dúcá<sup>n</sup> te ní tecú dóho-í ní cáhá<sup>n</sup> cuéhé víhi espíritú xínú cuéchi ní candéé núú núcõo Yáá táxí tñuní-á<sup>n</sup>, ndihi núú xĩnutnii ndi cùmí cue quiti-á<sup>n</sup>, ndihi núú xĩnucõo cue téé cùu sacuéhé-á<sup>n</sup>, te ní xiní-í sá sũni cuéhé víhi espíritú-á<sup>n</sup> xĩndecu xiá<sup>n</sup>, 12 te níhi ní cáhá<sup>n</sup> cue espíritú-á<sup>n</sup>, te cächí-xi:

Yòhó Yáá cáá dàtná cáá i<sup>n</sup> mbéé quiti ní dánícuéhé-güedé te ní xihí ní cùu te ní ndoto,

te yòhó ío càhnu cuu-n, te ndècu ndihi-n nchaandi túhú,

te ío ndècu ndihi-n sá xiní tñuní-n, te ndàcu-n quide-n nchaa sá cuini-n,

te nèhe-ndí sá yĩññuhu núu-n, te ío váha quide-n,

te chíññuhu ñaha-ndí xii-n, chí duca<sup>n</sup> tàú-ndí cada-ndí chí ío càhnu cuu-n.

Duha cächí nchaa cue espíritú-á<sup>n</sup> xáha<sup>n</sup>-xi xii-gá chíññuhu ñaha-xi.

13 Te ní tecú dóho-í ní cáhá<sup>n</sup> nchaandi túhú sá ní cadúha Yá Ndiõxi ndécú àndiú, ndihi nchaa sá ndécú ñuyíú, ndihi nchaa sá ndécú xití ñuhu, ndihi nchaa sá ñuhú xití ndute làmár, te xĩcachí-xi:

Yòhó Yáá núcõo núú xilé váha, ndihi yòhó Yáá cáá dàtná cáá i<sup>n</sup> mbéé quiti ní dánícuéhé-güedé táxí tñuní-ndó, te nèhe-ndí sá yĩññuhu núu-ndó,

te duca<sup>n</sup> ío ndàcá<sup>n</sup> táhú-ndí núu-ndó, chí ío váha quide-ndo te ío cùnnu-ndo,

te diu-ni duha cáhá<sup>n</sup> váha-ndí cuendá-ndó ní caa ní quihí<sup>n</sup>.

Duha cächí nchaa sá ní cadúha Yá Ndiõxi.

14 Te ndi cùmí cue quiti xĩnutnii-á<sup>n</sup> cächí-güedi:

—jDuca<sup>n</sup> na cùnduu! —cachí-güedi.

Te ndi ócõ cùmí cue téé cùu sacuéhé xĩndecu-á<sup>n</sup> ní ngüññi xití-güedé chíññuhu-güedé Yáá ndécú nchaa nduu nchaa quíú.

## 6

### *Cuendá úsá tutú lìhli ñuhu seyú*

1 Te sáá dúcá<sup>n</sup> te ní xiní-í sá Yáá cáá dàtná cáá i<sup>n</sup> mbéé quiti ní dánícuéhé-güedé-á<sup>n</sup> ní xócání-gá i<sup>n</sup> tutú lìhli ñuhu seyú ndéé sáá tütú sá ní nadúcú<sup>n</sup> nuu-á<sup>n</sup>, te ní tecú dóho-í ní cáhá<sup>n</sup> i<sup>n</sup> quiti cùmí xĩnutnii-á<sup>n</sup>, te níhi ní cáhá<sup>n</sup>-di dàtná cáhá<sup>n</sup> ñuhu, te cächí-di:

—jTaqui<sup>n</sup> cundehe-n! —cachí-di.

2 Te òré-ni-á<sup>n</sup> ní xiní-í i<sup>n</sup> cuayú cuixí<sup>n</sup> yódó ñaha i<sup>n</sup> sá yódó ñaha xii-di, te sá yódó ñaha xii-di-á<sup>n</sup> néhé-xí i<sup>n</sup> arcú sá cúu tñuxí-xi, te ní nduu táhú-xi i<sup>n</sup> coróná, te ní ndacu-xi ní cunu-xi te duca<sup>n</sup>-ni ta cùnnu-xi cuahá<sup>n</sup>.

3 Te òré ní xócání-gá tutú lìhli cùu uú ñuhú seyú ndéé sáá tütú sá ní nadúcú<sup>n</sup> nuu-á<sup>n</sup>, te ní tecú dóho-í ní cáhá<sup>n</sup> tucu ingá quiti cùu uú xĩnutnii-á<sup>n</sup>, te cächí-di:

—jTaqui<sup>n</sup> cundehe-n! —cachí-di.

4 Te òré-ni-á<sup>n</sup> ní xiní tucu-í i<sup>n</sup> cuayú tícuéhé ní quee-di cuahá<sup>n</sup>-di, te yòdo ñaha i<sup>n</sup> sá yódó ñaha xii-di, te sá yódó ñaha xii-di-á<sup>n</sup> ní níhi-xi tñuhu ndee íni sá daticánuu-xi ñáyiú vá cùndècu ndihi tñaha váha-gá-yu, te ngüita ñáyiú cahni tñahá-yu, te ní nduu táhú-xi i<sup>n</sup> yuchi cáhñú víhi.

5 Te òré ní xócání tucu Yáá-á<sup>n</sup> ingá tutú lìhli cùu uní ñuhú seyú ndéé sáá tütú sá ní nadúcú<sup>n</sup> nuu-á<sup>n</sup>, te ní tecú dóho-í ní cáhá<sup>n</sup> quiti cùu uní xĩnutnii xiá<sup>n</sup>, te cächí-di:

—jTaqui<sup>n</sup> cundehe-n! —cachí-di.

Te òré-ni-á<sup>n</sup> ní xiní tucu-í i<sup>n</sup> cuayú tñuu te yòdo ñaha tucu i<sup>n</sup> sá yódó ñaha xii-di, te sá yódó ñaha-á<sup>n</sup> nùndàha-xi úú yaxi<sup>n</sup> libré. 6 Te ní tecú dóho-í ní cáhá<sup>n</sup> i<sup>n</sup> sá ní cáhá<sup>n</sup> tnuu cue quiti xĩnutnii-á<sup>n</sup>, te cächí-xi:

—I<sup>n</sup> cuartú-ná triú níhi-ndó sá i<sup>n</sup> díhú<sup>n</sup> denariú, te uní cuartú-ná cebadá níhi-ndó sá i<sup>n</sup> tucu díhú<sup>n</sup> denariú, dico acití ndihi ndudí ndéhé yoho yáha stilé chí vá ndihí ñihnu — duha cächí sá cáhá<sup>n</sup>-á<sup>n</sup>.

7 Te òré ní xócání tucu Yáá-á<sup>n</sup> tutú lìhli cùu cumí ñuhú seyú ndéé sáá tütú sá ní nadúcú<sup>n</sup> nuu-á<sup>n</sup>, te ní tecú tucu dóho-í ní cáhá<sup>n</sup> tucu ingá quiti cùu cumí xĩnutnii-á<sup>n</sup>, te cächí-di:

—jTaqui<sup>n</sup> cundehe-n! —cachí-di.

8 Te òré-ni-á<sup>n</sup> ní xiní tucu-í i<sup>n</sup> cuayú yáhá, te yòdo ñaha tucu i<sup>n</sup> sá yódó ñaha xii-di, te sá yódó ñaha xii-di-á<sup>n</sup> nání-xi Sá xihí, te xiá<sup>n</sup> sáhní-xí ñáyiú, te sáá xiá<sup>n</sup> nchicú<sup>n</sup> sá nèhé núú ndécú ñáyiú ní xihí. Te cùmí xichi cùu ñuyíú, te sá sáhní ñaha xii ñáyiú-á<sup>n</sup> ní níhi-xi tñuhu ndee íni danáa-xi ñáyiú i<sup>n</sup> xichi ñuyíú, te davá-yu cahni ñaha-xi ndihi yuchi, te cada-xi sá cóo tñamá te cuú-yu, te cada tucu-xi sá cóo cuéhé cahni-xi ñáyiú, te diu-ni tucu-xi cada sá ncháá quiti déé<sup>n</sup> cahni-di ñáyiú.

9 Te òré ní xócání tucu Yáá-á<sup>n</sup> tutú lìhli cùu uhú<sup>n</sup> ñuhú seyú ndéé sáá tütú sá ní nadúcú<sup>n</sup> nuu-á<sup>n</sup>, te òré-á<sup>n</sup> ní xiní-í nùtnii i<sup>n</sup> núú sácõdó sá ndúú táhú Yá Ndiõxi, te ndaa caha xiá<sup>n</sup> ní xiní-í xĩndecu nchaa àlmá ñáyiú ní sahní-güedé núú ñuyíú sá cuendá tñuhu Yá Ndiõxi, ndihi sá cuendá sá ní cáhá<sup>n</sup> váha-yu cuendá-gá. 10 Te nchaa àlmá-á<sup>n</sup> níhi xicáhá<sup>n</sup>-xi, te xáha<sup>n</sup>-xi xii Yá Ndiõxi:

—Yòhó Dútú Ndiõxi cúu-n Yáá ñá tütú tñahí cuéchi-xi, te ñá tütú tñahí quée cáva-n

quide-n ñ<sup>n</sup> sá cáhá<sup>n</sup>. ¿Te ná ndéé ama dandòho-n ñáyiu ndècu ñuyú nachinaa-n cuendá sá ní quide ñàhá-yu xii-ndí-í? —càchi cue àlmá-á<sup>n</sup> xáha<sup>n</sup>-xi xii-gá.

<sup>11</sup> Te sáta dúcá<sup>n</sup> te nchaa cue àlmá ñáyiu-á<sup>n</sup> ní níhí-xi dóo cuixí<sup>n</sup> ní quee cuíhu-xi, te ní xitnúhu ñaha xii-xi sá ná ndetàtú-xi te cundetu tnaa-xi ndéé ná xínu cava cuú ñáyiu nàcuáa ndéé tnuni dàtná ní xíhí cue ñáyiu dii àlmá-xi cùu-xi. Te ñáyiu sa ní xíhí-á<sup>n</sup> ñ<sup>n</sup>-ní cùu-yu ndíhí ñáyiu vitna cuú-á<sup>n</sup> chí mee-ní chiú<sup>n</sup> Xítoho Jesucristú quidè-yu, te diu-ni ichi-gá ndécú-yu.

<sup>12</sup> Te òré ní xócání tucu Yaá-á<sup>n</sup> tutú líhli cùu íñú ñúhú sèyú ndéé sáta tutú sá ní nadúcú<sup>n</sup> nuu-á<sup>n</sup>, te ní xiní-í súuní ñíhí ní quidí-xi ñuyú, te ní cutnuu ñíhí núú nchíanchii dàtná ñ<sup>n</sup> dóo tnúú, te ní cuu ticuèhé ñíhí ñíhí núú yóo. <sup>13</sup> Te ní xiní-í ní ngoyo chódíní ñuyú-a dàtná ngóyó ngúxí yíhí òré quéné táchí ñíhí. <sup>14</sup> Te ní xiní-í ní nadúcú<sup>n</sup> nuu andiu dàtná nádúcú<sup>n</sup> nuu ñ<sup>n</sup> tutú te ní ndóñúhú-xí, te nchaa tindúú ní xica ndehe-xi núú ndécú-xí, te duca<sup>n</sup> ní xica ndehe tucu nchaa tindúú yíchí ndécú xítí ndute lámár. <sup>15</sup> Te nchaa cue téé yindaha ñáyiu ní nguiváha-güedé, ndíhí nchaa dava-gá cue téé io tàxi tnuní, ndíhí nchaa ñáyiu cuica, ndíhí nchaa cue téé tàxi tnuni sandádú, ndíhí cue sandádú cue téé io váha sáá díquí-xi nàcuáa cada-güedé nàá-güedé, ndíhí nchaa ñáyiu ñá túú tnáhi dàñá quee núú chiú<sup>n</sup> patróo<sup>n</sup>-xi, ndíhí nchaa ñáyiu dàñá queé núú chiú<sup>n</sup> patróo<sup>n</sup>-xi. Te dava ñáyiu-á<sup>n</sup> ní nguiváha-yu xítí yaú, te davá-yu ní nguiváha-yu nchaa tnuú cava. <sup>16</sup> Te xáhá<sup>n</sup>-yu nchaa tindúú ndíhí nchaa cava:

—Chí tàcuu<sup>n</sup> chiváha ñaha-ndo xii-ndí cuendá sá vâ quini ñáha Yáa ío tàxi tnuní núcóo núú xilé váha, ndíhí cuendá sá vâ dándòho ñaha Yáa cáá dàtná cáá ñ<sup>n</sup> mbéé quiti ní dánícuèhé-güedé, chí Yaá-á<sup>n</sup> ío cùdée<sup>n</sup>-gá núú-ndí —duha càchí nchaa ñáyiu-á<sup>n</sup> xáhá<sup>n</sup>-yu xii nchaa tindúú-á<sup>n</sup> ndíhí nchaa cava-á<sup>n</sup>.

<sup>17</sup> Te vitna ní sáá nduu ío cùu cahnu nduu tnúndòho tnúhu ndáhú, te vâ yóo ñ<sup>n</sup> cundee íni-xi yáha nchaa tnúndòho-a.

**7**

*Ñáyiu israhél ñáyiu nanhí tãhú*

<sup>1</sup> Te sáta xiã<sup>n</sup> te ní xiní-í cúmi tnáhá espíritú xínú cuèchi núú Yá Ndióxi xínutnii-xi ndí cúmi xio ñuyú, te cue espíritú-á<sup>n</sup> ní ngani-xi táchí cuendá sá vâ cuicó-gá-xi ní lámár, te ní díquí yutnu, te ní ñ<sup>n</sup> xichi ñuyú vâ cuicó-gá-xí. <sup>2</sup> Te cue espíritú-á<sup>n</sup> ndécú ndíhí-xi tnúhu ndee íni danáa-xi sá ío lámár ndíhí sá ío ñuhu yíchí, te ní xiní tucu-í ingá

espíritú xínú cuèchi núú Yá Ndióxi ní quee nchita-xi ndaa nacúaa quène nchíanchii, te nùndaha-xi seyú Yá Ndióxi Yáa ndécú nchàa nduu nchaa quíú, te ñíhí ní cáhá<sup>n</sup>-xi xáha<sup>n</sup>-xi xii ndí cúmi cue espíritú-á<sup>n</sup>:

<sup>3</sup> —Vâ dánàa-ndo sá ío lámár, te ní vâ dánàa-ndo yutnu, te ní ñ<sup>n</sup> sá ío ñuyú vâ dánàa-ndo, chí cundetu-ndo ndéé ná tàxi ndecu-ndí ñ<sup>n</sup> sèñá tneé nchaa ñáyiu xínu cuèchi núú Tãtá-ó Dütú Ndióxi —duha càchí espíritú-á<sup>n</sup> xáha<sup>n</sup>-xi xii ndí cúmi espíritú xínutnii ndí cúmi xichi ñuyú.

<sup>4</sup> Te ní tecú dòho-í ní cáhá<sup>n</sup> ñ<sup>n</sup> sá ní cáhá<sup>n</sup>, te ní cachí-xi sá núú ndí úxúú xichi cue ñáyiu israhél te ní xínu ñ<sup>n</sup> cièndú údico cúmi mìl-yu ní ngúndecu sèñá tneé-yu. <sup>5</sup> Te núú ñ<sup>n</sup> cièndú údico cúmi mìl ñáyiu-á<sup>n</sup>, te ní xínu úxúú mìl cue ñani tnáhá ndí Judá ní ngúndecu sèñá tneé-yu, te úxúú mìl cue ñani tnáhá ndí Rúbén, te úxúú mìl cue ñani tnáhá ndí Gàd, <sup>6</sup> te úxúú mìl cue ñani tnáhá ndí Àsér, te úxúú mìl cue ñani tnáhá ndí Neftálí, te úxúú mìl cue ñani tnáhá ndí Manásés, <sup>7</sup> te úxúú mìl cue ñani tnáhá ndí Mió, te úxúú mìl cue ñani tnáhá ndí Lèví, te úxúú mìl cue ñani tnáhá ndí Isàcár, <sup>8</sup> te úxúú mìl cue ñani tnáhá ndí Zabulón, te úxúú mìl cue ñani tnáhá ndí Chèb, te úxúú mìl cue ñani tnáhá ndí Benjamín, nchaandi túhú ñáyiu-á<sup>n</sup> ní ngúndecu sèñá tneé-yu.

*Cuèhé víhí ñáyiu ñihnu dóo cuixí<sup>n</sup>*

<sup>9</sup> Te sáta xiã<sup>n</sup> te ní xiní-í cuèhé víhí ñáyiu, ñáyiu ñ<sup>n</sup> ñàció<sup>n</sup>, ndíhí ñáyiu ñ<sup>n</sup> ñuú, ndíhí ñáyiu cáhá<sup>n</sup> ndí díí<sup>n</sup> ndí díí<sup>n</sup> núú tnúhu, ndíhí ñáyiu ní xíndecu ñ<sup>n</sup> ñ<sup>n</sup> xichi, te nchaa ñáyiu-á<sup>n</sup> xínutnii-yu ndaa núú Yáa tàxi tnuní núcóo núú xilé váha, ndíhí núú Yáa cáá dàtná cáá ñ<sup>n</sup> mbéé quiti ní dánícuèhé-güedé, te vâ yóo ñ<sup>n</sup> ndàcu cahu ñaha xii-yu chí cuèhé víhí-yu, te nchaá-yu xíxíhu-yu mee-ní dóo cuixí<sup>n</sup>, te nùndahá-yu nchaá-yu ñ<sup>n</sup> caa ndàha yutnu ñuú. <sup>10</sup> Te nchaá-yu ñíhí xicáhá<sup>n</sup>-yu, te càchí-yu:

Yáa tàxi tnuní núcóo núú xilé váha cùu-gá Ndióxi-ó,

te diu-gá ndíhí Yáa cáá dàtná cáá ñ<sup>n</sup> mbéé quiti ní dánícuèhé-güedé ní dácácu ñihnu ñaha-gá xii-o núú ùhú núú ndáhú.

Duha càchí nchaa ñáyiu-á<sup>n</sup>. <sup>11</sup> Te nchaa espíritú xínú cuèchi núú Yá Ndióxi ní nadúcú<sup>n</sup> ndéé-xi xínutnii-xi ní càndéé núú núcóo Yáa núcóo núú xilé váha, ndíhí núú xínucóo cue téé cùu sacuéhé, ndíhí cue ndí cúmi quiti xínutnii-á<sup>n</sup>, te nchaa-xi ní nguíñí xítí-xí te ní ngúnu ndeyí-xi núú Yáa núcóo núú xilé váha-á<sup>n</sup>, te nchaa-xi ní nguíta-xi chíñuhu ñaha-xi xii-gá, <sup>12</sup> te càchí-xi:

Na càhá<sup>n</sup> ndáá-ndí núú yóho Tãtá-ndí Dütú Ndióxi sá ío càhu cuu-n, te ndàcu-n

guide-n nchaa sá vâha cuini-n, te ío vâha guide-n, te ndêcu ndihi-n nchaa sá xini tnúni-n,  
 te chiñuhu ñaha-ndí xii-n, te duca<sup>n</sup> ndacá<sup>n</sup> táhú-ndí núu-n cuendá nchaa sá guide-n, te nehe-ndí sá yíñuhu núu-n,  
 te tnúhu càhá<sup>n</sup>-ndí-a cùu-xi tnúhu ndáá,  
 te diu-ni duha cáhá<sup>n</sup>-ndí ndéé núu cuahá<sup>n</sup> núu vèxi.  
 Duha cachi nchaa cue espíritu-án xâha<sup>n</sup>-xi xii Yaá núcôo núu xilé vâha-án.

13 Te ñi<sup>n</sup> cue tée cùu sacuéhé xindecu-án ní xicá<sup>n</sup> tnúhú-dé núu-í, te cachi-dé:

—¿Yónđi cùu ñáyiú dácá<sup>n</sup> xixíhnu dóo cuixi<sup>n</sup>-án, te ndéé véxi-yu núu dácá<sup>n</sup> xindáá-yu-i? —cachi-dé.

14 Te yúhú ní xâha<sup>n</sup>-í:

—Tátá, ñá túú xini-í, dico mee-n xini-n —duha ní xâha<sup>n</sup>-í xii-dé.

Te dátñuni ní cachi tnúhu-dé xii-í ná cúú ñáyiú-án, te cachi-dé:

—Nchaa ñáyiú-a cùu-yu ñáyiú ní quee núu ío víhi tnúhu ndôho tnúhu ndáhú sá vâ cundêe ini-ó te véxi-yu iha, te cùu-yu ñáyiú sa ní nduu ndoo ní nduu nine ini-xi cuendá sá ní sati ñíñi Yaá cáá dátñá cáá ñi<sup>n</sup> mbéé quití ní dánicuehé-güedé, cuendá xíá<sup>n</sup> vitna ní ndihí-yu ní nduu cuixi<sup>n</sup> dóo xixíhnu-yu. 15 Te núu xíá<sup>n</sup> vitna ní nduu táhú-yu ndécú-yu núu ndécú Yá Ndióxi Yaá táxi tnúni núcôo núu xilé vâha, te cuéi nduu cuéi núu xínú cuèchi-yu núu-gá vitna, te diu-gá xító ñaha-gá xii-yu. 16 Te vitna ní sáá-yu núu-gá cundecú-yu te vâ ndóhó-gá-yu docó, te ní vâ quini-gá-yu ndohó-yu yichi-yu ndute, te ní vâ quini-gá-yu ndohó-yu cahni nchíanchii, te ñá túú-gá ná cahni ndohó-yu. 17 Te duca<sup>n</sup> chi Yaá cáá dátñá cáá ñi<sup>n</sup> mbéé quití ní dánicuehé-güedé ndécú-gá núu núnñi xilé vâha núcôo Yá Ndióxi Yaá táxi tnúni, Yaá-án coto ñaha-gá xii-yu dátñá quidé ñi<sup>n</sup> toli oré xító-dé mbéé-dé, te candeca ñaha-gá xii-yu quíñi<sup>n</sup> núu tóo ndute, te ndute-án cúu-xi ndute candeca ini-yu, te Yá Ndióxi cada-gá sá vâ quini-gá-yu tnúhu ndáhyú —duha ní cachi tnúhu tée cùu sacuéhé-án xii-í.

**8**

*Cuendá tícúú sá ní cuáha mee-ni dñhú<sup>n</sup> cuáá<sup>n</sup>*

1 Te sáta dúcá<sup>n</sup> te Yaá cáá dátñá cáá ñi<sup>n</sup> mbéé quití ní dánicuehé-güedé ní xócáni-gá tutú líhli cùu usá ñúhú sèyú ndéé sáta tütú sá ní nadúcú<sup>n</sup>nuu-án, te órê-án ní cunahi súñi navií-ná ní cuu andñu dátñá cuádava órê. 2 Te ní xini-í usá ñháá espíritu xínú cuèchi núu Yá Ndióxi xínutñi-xi núu núcôo-gá, te ní níhi-xi ñi<sup>n</sup> caa cütú xínehe-xi. 3 Te dátñuni ní xini tucu-í ingá espíritu xínú cuèchi núu-gá ní quexio-xi nehe-xi ñi<sup>n</sup> tícúú ní cuáha mee-ni dñhú<sup>n</sup> cuáá<sup>n</sup> te ñúhu vai dusa sá sáhá<sup>n</sup> tnámí,

te ní ngúnutñi espíritu-án núu ndécú sá ní cuáha mee-ni dñhú<sup>n</sup> cuáá<sup>n</sup> núu sácódó sá ndúú táhú Yá Ndióxi, te xíá<sup>n</sup> núnñi-xi ndáa núu-gá, te dusa sá sáhá<sup>n</sup> tnámí-án cahmi espíritu-án núu sácódó sá ndúú táhú-gá-án cuendá ñúhmá dusa-án cundñi-xi nchaa tnúhu càhá<sup>n</sup> ñáyiú càhá<sup>n</sup> ndihi ñaha xii-gá, nchaa ñáyiú cùu cuendá-gá. 4 Te nundaha espíritu-án tícúú ñúhú dusa sá sáhá<sup>n</sup> tnámí cáyú, te quene ñúhmá núnñi-xi núu Yá Ndióxi, te ñúhmá-án cundñi-xi nchaa tnúhu càhá<sup>n</sup> ñáyiú càhá<sup>n</sup> ndihi ñaha xii-gá, nchaa ñáyiú cùu cuendá-gá. 5 Te ní quehe<sup>n</sup> espíritu-án tícúú te ní dáchítú-xi ñuhú yódó núu sácódó sá ndúú táhú Yá Ndióxi, te ní xítenuu-xi ñuyúú, te órê duca<sup>n</sup> ní quide-xi te ní cáhá<sup>n</sup> víhi ñúhu, te ío dusa<sup>n</sup> ní quide-xi ñuyúú, te ní sáá nduté, te níhi víhi ní tnáa.

*Ndi usá espíritu ní tiú-xi ñi<sup>n</sup> caa cütú xínehe-xi*

6 Te ndi usá cue espíritu xínehe ñi<sup>n</sup> caa cütú-án ní ngúndecu túha-xi cuendá tiú-xi.

7 Te espíritu díhna nuu ní tiú-xi cütú néhé-xí, te ñuyúú-a ní ngoyo ñíñi dácánuu-xi ndihi ñuhú ndihi ñíñi, te luha-ná te cuu dava ñuyúú ní cáyú, te luha-ná te cuu dava tucu nchaa yutnu ío ñuyúú ní cáyú, te luha-ná te cuu dava tucu nchaa cùhú ío ñuyúú ní cáyú.

8 Te espíritu cúú ùú ní tiú-xi cütú néhé-xí, te dátñá cáá ñi<sup>n</sup> tindúú cáá ñi<sup>n</sup> sá ní ngava xiti lámár te nchicú<sup>n</sup> ñuhú, te luha-ná te cuu dava ndute lámár-án ní nduu-xi ñíñi. 9 Te luha-ná te cuu dava nchaa quiti xixúhu<sup>n</sup> xiti lámár-án ní xihí-güedi, te luha-ná te cuu dava nchaa bárcú ní quee naa-xi xiti ndute.

10 Te espíritu cúú ùni ní tiú-xi cütú néhé-xí, te ní ngava ñi<sup>n</sup> chódini cáhnú ndéé andiu ñuyúú te nchicú<sup>n</sup> ñuhú-di, te ñuhú-án cáá dátñá cáá ñúhú iti. Te luha-ná te cuu dava nchaa yúte ní ngava chódini-án, te luha-ná te cuu dava tucu nchaa núu quénihni ndute ní ngava-di. 11 Te chódini-án nání-dí: Yúcú Úá. Te ndute xica nchaa yúte-án ndihi nchaa ndute quénihni-án ní cuu úá-xi dátñá yúcú úá, te ío cuéhé ñáyiú ní xihí sá dúcá<sup>n</sup> ní cuu úá ndute-án.

12 Te espíritu cúú cümü ní dácáhá<sup>n</sup>-xi cütú néhé-xí, te luha-ná te cuu dava nchíanchii ñá túú ní dáyehé-xi, te duca<sup>n</sup> lüha-ná tucu cuu dava yóó ñá túú ní dáyehé-di, te duca<sup>n</sup> lüha-ná te cuu dava tucu nchaa chódini ñá túú ní dáyehé-güedi, te luha-ná te cuu dava nduu ñá túú ní dáyehé nchíanchii, te duca<sup>n</sup> lüha-ná te cuu dava núu ñá túú ní dáyehé yóó ndihi nchaa chódini.

13 Te sáta dúcá<sup>n</sup> te ní xini-í xicó ñi<sup>n</sup> espíritu xínú cuèchi núu Yá Ndióxi núu tàchi, te ní tecú dóho-í níhi càhá<sup>n</sup>-xi, te cachi-xi:

—Ío ndáhú ndoho nchaa ñáyiú xindecu ñuyúú órê ná dácáhá<sup>n</sup> úní-gá cue espíritu

cúmání cútú xñehe-xi, chi sa xñdecu túha-ná-xi sá dácáhá<sup>n</sup>-xi!— duha cächí espíritú-á<sup>n</sup>.

**9**

<sup>1</sup> Te espíritú cúú ùhú<sup>n</sup> ní tíú-xi cútú néhé-xí, te òré-á<sup>n</sup> nǐ xini-í ní quee ì<sup>n</sup> espíritú andiú te càa-xi datná cáá ì<sup>n</sup> chódíní, te ní ngava-xi ñuyíú, te ní níhí-xi ì<sup>n</sup> ndacaá néhé-xi cuendá nacaá<sup>n</sup>-xi yuyèhe yaú cùnú víhí. <sup>2</sup> Te ní nacaá<sup>n</sup>-xi yaú-á<sup>n</sup> te ní ngúíta-xi ní quene ñúhmá datná quéné ñúhmá ì<sup>n</sup> xitnú cahnú víhi, te ní quene táchí nǐ xítenuu-xi ñúhmá-á<sup>n</sup> te ní sadí-xi núu nchíanchii, te ní cunee ñuyíú. <sup>3</sup> Te xití ñúhmá-á<sup>n</sup> nǐ quene tíca làngóstá, te ní xítenuu-di ñuyíú, te déé<sup>n</sup>-güedi datná déé<sup>n</sup> nchacua. <sup>4</sup> Te ní ngúndecu ndíhi-güedi tnúhu ndee iní cuendá sá dándòho-güedi mee-ni ñáyíu ñá túú ndèé seña Yá Ndióxi tneé-xi, te ñá túú ñá cada-di nchaa yutnu ndíhi nchaa cùhú. <sup>5</sup> Te ñá túú tnúhu ndee iní ndécú ndíhi-güedi sá cahní-güedi ñáyíu, chi mee-ni sá dándòho ñaha-güedi xii-yu úhú<sup>n</sup> yóó. Te òré ní ngúíta-güedi dándòho ñaha-güedi xii-yu te tàhú tnúhú núú dáquée-güedi iñu-güedi datná quidé-xí núú dáquée nchacua iñu-güedi. <sup>6</sup> Te ñáyíu-á<sup>n</sup> xicá<sup>n</sup> táhú-yu sá ndíhi cuú-yu cuendá sá ìo ndòhó-yu dáquée ñaha ncháa quití-á<sup>n</sup> iñu-di xii-yu te ñá cuini-xi cuú-yu, te ì<sup>n</sup> nduu ì<sup>n</sup> nduu sáni iní-yu cuú-yu te ñá túú cuini-xi cuú-yu chi ñá túú tnúhu xihí sá cuú-xí-yu.

<sup>7</sup> Te nchaa tíca làngóstá-á<sup>n</sup> xindáa-güedi datná ndáa nchaa cuáyú cue téé cuáhá<sup>n</sup> nàa, te díquí-güedi ñuhu ì<sup>n</sup> sá cáá datná cáá còroná ní cuáha mee-ni díhú<sup>n</sup> cuáá<sup>n</sup>, te núú-güedi càa datná cáá núú cuè téé. <sup>8</sup> Te idi díquí-güedi càa datná cáá ìdi díquí ñáyíu díhí, te núhu-güedi càa datná cáá núhu ndicaha. <sup>9</sup> Te yidúcú<sup>n</sup>nuu-güedi ì<sup>n</sup> sá cáá datná cáá cáá, te ndíxi<sup>n</sup>-güedi quide-xi datná quidé-xí núú vèxi cuèhé víhí càrretá sá tánùhu cuayú cuáhá<sup>n</sup>-güedé ndíhi-güedi núú nàa-güedé. <sup>10</sup> Te ndèé iñu núú lùhmá-güedi datná ndèé iñu núú lùhmá nchacua, te iñu núú lùhmá-güedi-á<sup>n</sup> dáquée-güedi ñáyíu dándòho ñaha-güedi xii-yu, te duca<sup>n</sup>-ní càda-güedi dándòho ñaha-güedi xii-yu ndéé xinu úhú<sup>n</sup> yóó. <sup>11</sup> Te nchaa tíca làngóstá-á<sup>n</sup> táxi tnùnì ñáhá espíritú sá táxi tnùnì yaú cùnú víhí, te espíritú-á<sup>n</sup> nání-xí Ábadón tnúhu hèbreú, te tnúhu griégú nání-xí Àpolión, te ndi ndúú tnúhu-á<sup>n</sup> quée-xí: Sá dánàa ñáyíu.

<sup>12</sup> Te tnúndòho-a cuu-xi tnúndòho díhna nuu, te vitna cùmání úú-gá.

<sup>13</sup> Te espíritú cúú iñú ní tíú-xi cútú néhé-xí. Te núú Yá Ndióxi nútñí ì<sup>n</sup> sá ní cuáha mee-ni díhú<sup>n</sup> cuáá<sup>n</sup> núú sácódó sá ndúú táhú-gá, te ndi cúmí xiquí-xi xñdecu ì<sup>n</sup> caa ndiqui, te

ní tecú dóho-í ní cáhá<sup>n</sup> ì<sup>n</sup> sá ní cáhá<sup>n</sup> nihnu ndi cúmí ndiqui-á<sup>n</sup>. <sup>14</sup> Te sá cáhá<sup>n</sup> nihnu ndiqui-á<sup>n</sup> xáha<sup>n</sup>-xi xii espíritú cúú iñú sá ní tíú cútú-á<sup>n</sup>:

—Cuáhá<sup>n</sup> nandaxi-n ndi cúmí espíritú ndútú ndècu yúte cahnú nani Eúfratés—cächí sá cáhá<sup>n</sup>-á<sup>n</sup> xáha<sup>n</sup>-xi xii espíritú-á<sup>n</sup>.

<sup>15</sup> Te sátá dúcá<sup>n</sup> te ní nandáxi ndi cúmí cue espíritú-á<sup>n</sup> cuendá cahni-xi cuèhé víhí ñáyíu, te sa yatni datná cuádava ñáyíu xñdecu ñuyíú cahni-xi, te duca<sup>n</sup> chi sa ndècu túha tnáhi cue espíritú-á<sup>n</sup> ndétú-xí sáá òré, àdi nduu, àdi yóó, àdi cuíá duca<sup>n</sup> càda-xi cahni-xi ñáyíu.

<sup>16</sup> Te ní xini-í nchaa cue sandádú cündíhi-xi xixódó-güedé cuáyú, te ní níhí-í tnúhu sá xñnu úú cièndú millón-güedé.

<sup>17</sup> Te duha xindáa cue cuáyú-á<sup>n</sup> ndíhi cue téé yòdo ñaha-á<sup>n</sup> nǐ xini-í: Te cue téé-á<sup>n</sup> yidúcú<sup>n</sup> nuu ì<sup>n</sup> sá yidúcú<sup>n</sup>nuu pèchú-güedé, te luha ticuèhé te luha cuí datná cuí andiú, te luha cuáá<sup>n</sup>, te nchaa cuáyú-á<sup>n</sup> cáá díquí-güedi datná cáá díquí ndicaha, te yuhu-güedi quèné ñuhú ndíhi ñúhmá, ndíhi ázufre nchícú<sup>n</sup> ñuhú. <sup>18</sup> Te ìo cuèhé ñáyíu ñuyíú nǐ xihí chí luha-ná te cudavá-yu ní xihí sá cuendá ñuhú-á<sup>n</sup> ndíhi ñúhmá-á<sup>n</sup> ndíhi ázufre-á<sup>n</sup>. <sup>19</sup> Te ndíhi núú lùhmá-güedi ndíhi yuhu-güedi dándòho-güedi ñáyíu, te núú lùhmá-güedi nèhe-xi díquí còó, te òru-ni datná cáá còó cáá níhí lùhmá-güedi.

<sup>20</sup> Te nchaa dava-gá ñáyíu ní cácu ñá túú ní xihí núú ncháa tnúndòho-á<sup>n</sup> ñá túú ní cuini-yu dàñá-yu ichi cuèhé ichi duha ndècú-yu, chí quide cahnú-ni-yu nchaa espíritú cündíhi yucu ñáváha, ndíhi nchaa sá cächí-yu cùu ndióxi ní cadúha cue téé ñuyíú-a, te dava xiá<sup>n</sup> ní cuáha mee-ni díhú<sup>n</sup> cuáá<sup>n</sup>, te dava ní cuáha mee-ni díhú<sup>n</sup> cuixí<sup>n</sup>, te dava ní cuáha sá nání bròncé, te dava ní cuáha mee-ni yúú, te dava ní cuáha mee-ni yútnu, te nchaa xiá<sup>n</sup> ñá túú cùtnuní núú-xi, te ní ñá túú tècú dóho-xi, te ní ñá ndácú-xí càca-xi. <sup>21</sup> Te ní sá sáhní tnáhá-yu, te ní sá sáhní ndúu tnahá-yu, te ní sá ndécú-yu ichi díí iní, te ní sá dúhú ndáchíu<sup>n</sup> tnahá-yu ñá túú ní cuini-yu dàñá-yu.

**10**

*È<sup>n</sup> espíritú xínú cuèchi núú Yá Ndióxi néhé-xí ì<sup>n</sup> libré*

<sup>1</sup> Te sátá dúcá<sup>n</sup> te ní xini tucu-í ì<sup>n</sup> espíritú cùnùu xinu cuechi núú Yá Ndióxi ní quee-xi andiú, te yíhi-xi xití vícò cuánguee-xi ñuyíú te ndáa díquí-xi ndècu ì<sup>n</sup> còó yáhnchí, te núú-xi súúni chàhnchí datná chàhnchí núú nchíanchii, te ndi ndúú díhi<sup>n</sup>-xi càa datná cáá itá ñuhú. <sup>2</sup> Te nùndaha-xi ì<sup>n</sup> libré líhli ní nandicá, te sáhá cùha-xi ní sani-xi núú ndute lámár, te sáhá dàtni-xi ní sani-xi núú ñuhu yíchi. <sup>3</sup> Te espíritú-á<sup>n</sup> níhi víhi

ní cáhá<sup>n</sup>-xi, te ní quide-xi dàtná quidé ì<sup>n</sup> ndicaha oré cànásàa-di, te òré duca<sup>n</sup> ñìhi vihi ní cáhá<sup>n</sup>-xi te úsá xito ní cáhá<sup>n</sup> ñùhu. <sup>4</sup>Te sàtá ñí yáha ní cáhá<sup>n</sup> ñùhu-án<sup>n</sup> úsá xito, te chido tñuní-í ì<sup>n</sup> núú tütü nàcuáa ní cáhá<sup>n</sup>-xi ní cùu, te mei òré-án<sup>n</sup> ñí tecú dóho-í ní cáhá<sup>n</sup> ì<sup>n</sup> sá ñí cáhá<sup>n</sup> andi<sup>n</sup>u te cächí-xi:

—Vá chidó tñuní-n nàcuáa ní cáhá<sup>n</sup> ñùhu-án<sup>n</sup>, ñí méé-ní-n ná cùhu<sup>n</sup> —duha cächí sá ñí cáhá<sup>n</sup>-án.

<sup>5</sup>Te espíritú sá nùtní<sup>n</sup> ì<sup>n</sup> xio sáhá-xi núú ndute lámár-án<sup>n</sup> ndi<sup>n</sup>hi ingá xio sáhá-xi núú ñùhu yìchí-án<sup>n</sup> ñí xini-í ní ndonehe-xi ndaha cùha-xi, <sup>6</sup>te cächí-xi:

—Yá Ndióxi Yáá ndécú nchaa nduu nchaa quíú Yáá ní cadúha ñuyíú, ndi<sup>n</sup>hi andi<sup>n</sup>u, ndi<sup>n</sup>hi lámár, ndi<sup>n</sup>hi nchaa sá íó, Yáá-án<sup>n</sup> náhá ndáá-gá sá yùhú cáhá<sup>n</sup> ndáá-í, te vá cùyàa vihi <sup>7</sup>te cada-xi nchaa nàcuáa nduu tñuhu nduu yuhu ní cáhá<sup>n</sup>-gá, tñuhu ní xáha<sup>n</sup>-gá xii cue téé ní xinu cuechi núú-gá, cue téé ní xóo cáhá<sup>n</sup> tñuhu-gá ndéé sanaha, chí òré ná tíú espíritú cùú úsá cütü néhé-xí, te òré-án<sup>n</sup> cada-xi nchaa nàcuáa nduu tñuhu nduu yuhu sá ñí xáha<sup>n</sup>-gá xii nchaa cue téé-án<sup>n</sup> —duha cächí espíritú-án.

<sup>8</sup>Te sàtá dúcá<sup>n</sup> te ní tecú tucu dóho-í ní cáhá<sup>n</sup> tucu sá ñí cáhá<sup>n</sup> andi<sup>n</sup>u-án<sup>n</sup>, te cächí-xi xii-í:

—Cuàhá<sup>n</sup> te quehe<sup>n</sup>-n libré líhli sá ñí nàndicá nùndàha espíritú-án<sup>n</sup>, espíritú sá nùtní<sup>n</sup> ì<sup>n</sup> xio sáhá-xi núú ndute lámár, te ì<sup>n</sup> xio sáhá-xi núú ñùhu yìchí —duha cächí sá ñí cáhá<sup>n</sup>-án.

<sup>9</sup>Te yùhú ní sáhá<sup>n</sup>-í núú ndécú espíritú-án<sup>n</sup> xicá<sup>n</sup>-í libré líhli néhe-xi-án<sup>n</sup>, te ní cächí-xi:

—Iha te taxi-n, te cuvídí yuhu-n dàtná cuvídí òré xíhí-n ndùdì ñùñú, dico xití-n chí cada úa-xi —cächí-xi.

<sup>10</sup>Te ní quehe<sup>n</sup>-í libré líhli nùndaha espíritú-án<sup>n</sup> ñí xexi-í, te yuhu-í ní quide vídì-xi dàtná vídì ndudì ñùñú, dico sàtá ñí ngava-xi xití-í te ní quide úa-xi. <sup>11</sup>Te ní cächí tucu espíritú-án<sup>n</sup> xii-í:

—Dacuití cáhá<sup>n</sup> tucu-n nàcuáa cächí Yá Ndióxi cuendá ñáyíu titní víhí nàció<sup>n</sup>, ndi<sup>n</sup>hi cuendá ñáyíu titní víhí ñúú, ndi<sup>n</sup>hi cuendá ñáyíu cáhá<sup>n</sup> ndí díí<sup>n</sup> ndí díí<sup>n</sup> núú tñuhu, ndi<sup>n</sup>hi cuendá cue téé yìndaha ñáyíu.

## 11

*Cuendá úú cue téé cáhá<sup>n</sup> nàcuáa cächí Yá Ndióxi*

<sup>1</sup>Te ní ñìhì-í ì<sup>n</sup> tñuyoo nàcuáa chicùhá-í ì<sup>n</sup> sá chicùhá-í, te ní cáhá<sup>n</sup> ì<sup>n</sup> sá ñí cáhá<sup>n</sup>, te cächí-xi:

—Ndacuíñí te chicùhá-n vèhe Yá Ndióxi, te chicùhá tucu-n núú sácódó sá ndúú tãhú-gá, te cahu-n ná daha tñahá ñáyíu chíñuhu ñaha xii-gá xìndecu. <sup>2</sup>Dico vá chicùhá-n ndàa

quehé vehe-gá, chí xiá<sup>n</sup> ñí nduu cuendá cue ñáyíu ñá túú cùu ñáyíu isràél, te ñáyíu-án<sup>n</sup> nduu nuu-ná-yu núú ñí cuu ñúú-gá, te cadá-yu dàtná cächí ñí méé-yu, te údico úú yóó duca<sup>n</sup> cadá-yu. <sup>3</sup>Te yùhú tendaha-í úú tñahá cue téé cáhá<sup>n</sup> yuhu-í nàcuáa cächí Yá Ndióxi, te úxúú ciendú únidico nduu duca<sup>n</sup> cáhá<sup>n</sup>-güedé yuhu-í cada-güedé núú-í, te cuihnu-güedé dóó tñúú sá sácúihnu cue ñáyíu ndihú ñí-xi —duha cächí sá cáhá<sup>n</sup>-án.

<sup>4</sup>Te ndi ndúú cue téé-án<sup>n</sup> cùú-güedé dàtná úú yutnu òlívú sá xìnutní<sup>n</sup> núú Yá Ndióxi, ndi<sup>n</sup>hi dàtná úú sá ndéé dité-xi, sá yìndódo ì<sup>n</sup> caa candil núú dité-xi ndècu tucu núú-gá, te diu-gá cùú-gá Yáá yìndaha ñuyíú. <sup>5</sup>Te ñáyíu na càni ñí-xi ná cada ñaha xii-güedé te yuhu-güedé quene ñuhú cahni ñaha-xi xii-yu, te duca<sup>n</sup> cada-güedé cahni-güedé nchaa ñáyíu na cùu úhú ñí ñahá xii-güedé. <sup>6</sup>Te ndi ndúú-güedé ndécú ndi<sup>n</sup>hi-güedé tñuhu ndee ñí cada-güedé sá vá cùú<sup>n</sup> dàú, te duca<sup>n</sup> cada-güedé ñí cáhá<sup>n</sup>-güedé nàcuáa cächí Yá Ndióxi, te ndacu-güedé nadati<sup>n</sup>u-güedé ndute nduu-xi ñíñí, te ndacu-güedé dandòho-güedé nchaa ñáyíu titní núú tñuhu ndòho, te duca<sup>n</sup> cada-güedé ná daha xito cächí ñí méé-güedé.

<sup>7</sup>Te ná yáha sá cáhá<sup>n</sup>-güedé nàcuáa ní cächí Yá Ndióxi, te dàvá-án<sup>n</sup> quene ì<sup>n</sup> quiti déé<sup>n</sup> yàú cùnú víhí sá ío néhé cáá, te quiti-án<sup>n</sup> ngúita-di nàá-di ndi<sup>n</sup>hi ndi ndúú cue téé-án<sup>n</sup> te cahni ñaha-di xii-güedé. <sup>8</sup>Te yiqui cùñú cue téé-án<sup>n</sup> cautuu-xi ì<sup>n</sup> tñuu ñúú cáhnú núu ní sahní-güedé Xitohó Jesucristú núú cùrúxí, te diu Yáá-án<sup>n</sup> cùú Xitohó-ó ndi<sup>n</sup>hi-güedé, te cächí ñáyíu sá ñúú-án<sup>n</sup> cùú-xí dàtná ñúú Sòdoma ndi<sup>n</sup>hi nàció<sup>n</sup> Ègíptú. <sup>9</sup>Te úní nduu dava cautuu yiqui cùñú-güedé xiá<sup>n</sup>, te ñáyíu nchaa nàció<sup>n</sup>, ndi<sup>n</sup>hi ñáyíu nchaa ñúú, ndi<sup>n</sup>hi ñáyíu cáhá<sup>n</sup> ndí díí<sup>n</sup> ndí díí<sup>n</sup> núú tñuhu, ndi<sup>n</sup>hi ñáyíu xìndecu nchaa xichi quini-yu yiqui cùñú-güedé, te vá dàñá-yu nguindúxi.

<sup>10</sup>Te nchaa ñáyíu-án<sup>n</sup> nduu vétú ñí-yu sá dúcá<sup>n</sup> cùú cue téé cáhá<sup>n</sup> nàcuáa cächí Yá Ndióxi-án<sup>n</sup>, te ío cudáí ñí-yu, te nándí sá cuàha tãhú tñahá-yu sá cùdí<sup>n</sup> ñí-yu sá dúcá<sup>n</sup> ñí xíhí-güedé, te duca<sup>n</sup> chí diu-güedé ñí quide ío ní ndohó-yu. <sup>11</sup>Te sàtá ná yáhá úní nduu dava sá dúcá<sup>n</sup> cùú-güedé te Yá Ndióxi dandòto ñaha-gá xii-güedé, te ndacóo-güedé, te nchaa ñáyíu na quini sá ndótó-güedé te yùhú víhí-yu. <sup>12</sup>Te ndi ndúú cue téé-án<sup>n</sup> tecú dóho-güedé cáhá<sup>n</sup> ì<sup>n</sup> sá cáhá<sup>n</sup> ndéé andi<sup>n</sup>u, te cùñaha-xi xii-güedé:

—Chí táquene iha —duha cùñaha sá cáhá<sup>n</sup>-án<sup>n</sup> xii-güedé.

Te cue téé-án<sup>n</sup> quíhu-güedé ì<sup>n</sup> xití vícío caa-güedé andi<sup>n</sup>u, te nchaa ñáyíu cùu úhú ñí ñahá xii-güedé quini ñahá-yu xii-güedé caa-güedé andi<sup>n</sup>u. <sup>13</sup>Te òré-án<sup>n</sup> ñíhi vihi

tnáa ñuyíú, te úxí xichi cùu-xi ñúu núu cùndècu-güedé-án te ññ xichi ñúu-án naa, te cuú úsá ml ñáyíu, te nchaa dava-gá ñáyíu cácu vá cuú yúhú víhí-yu, te cachí-yu sá ío cáhnu cuu Yá Ndióxí Yáá ndécú andíu.

<sup>14</sup> Te tnúndòho-a cuu-xi tnúndòho cuu úú yáha, te vitna sa ndètu víi-ná tucu sáá tnúndòho cuu uní.

*Espiritú cuú úsá tíu-xi cútú néhé-xí*

<sup>15</sup> Te espíritu cuú úsá ní tíu-xi cútú néhé-xí, te òré-án ní tecú níhi ní cáhá<sup>n</sup> títi sá ní cáhá<sup>n</sup> andíu, te cáchi-xi:

Nchaa sá cuú cuendá nchaa ñáyíu ñuyíú táxi tnúni-yu ní cùu ní nduu cuendá Tátá-ó Dütú Ndióxí táxi tnúni-gá, Te tnàhá Yáá ní tendaha-gá ní sáhá<sup>n</sup> ñuyíú táxi tnúni-gá nchaa xiá<sup>n</sup>,

te diu-gá taxi tnúni-gá ní caa ní quíhí<sup>n</sup>. Duha ní cáhá<sup>n</sup> nchaa sá ní cáhá<sup>n</sup>-án. <sup>16</sup> Te ndí òcò cúmi cue tée sacuéhé xínucóo núu xilé váha ní ngúñí xítí-güedé núu Yá Ndióxí, te ní nuu núu-güedé ndáa núu ñúhú te ní ngúíta-güedé chíñùhu ñaha-güedé xii-gá, <sup>17</sup> te cáchi-güedé:

Ío ndácá<sup>n</sup> táhú-ndí núu yòhó Dütú Ndióxí, Yáá ndácú quide nchaandi túhú sá váha, te diu-ni-n ndècu-n ndéé cútñahá ní ngáva ñuyíú, te diu-ni-n ndècu-n vitna, te diu-ni-n cùndècu-n ndéé núu cuáhá<sup>n</sup> núu véxi,

te ío cáhnu cuu-n te ní ngúíta-n ío-gá táxi tnúni-n.

<sup>18</sup> Te nchaa ñáyíu xíndècu ñuyíú xícudé<sup>n</sup>-yu núu-n,

te vitna ní sáá nduu dàndohó-n-yu chí ñá túú cùu váha íni-n núu-yu,

te cada ndáá-n cuèchi nchaa ñáyíu sa ní xíhí, te ní sáá tucu nduu cuáñaha-n sá ndúú táhú nchaa ñáyíu ní xinu cuechi núu-n ní cáhá<sup>n</sup>-yu tnúhu-n, ndíhi nchaa dava-gá ñáyíu cùu cuendá-n, chí ñáyíu-án néhé-yu sá yíñùhu núu-n,

te cuèi ñáyíu cùnno ndíhi ñáyíu ñá túú cùnno cuáñaha-n sá ndúú táhú-yu,

te ní sáá tucu nduu dànaa-n nchaa ñáyíu sáhni tnaha ñáyíu-xi.

Duha cáchi ndí òcò cúmi cue tée sacuéhé-án xáha-n-güedé xii Yá Ndióxí.

<sup>19</sup> Te ní xini-í ní nacaá<sup>n</sup> yuyèhe vehe Yá Ndióxí andíu, te xítí vehe-gá-án ní xini-í ndécú cájá ñúhú sá yódó tnúni nacúáá ní cundáá cada-gá sá cuú-xí ñáyíu, te òré-án ní xini-í ní sáá ndúté, te ní cáhá<sup>n</sup> ñúhu te ío dusa<sup>n</sup> ní quide-xi, te níhi víhi ní tnáa, te súúni cáhnu dáú ñíñí ní cuu<sup>n</sup>.

**12**

*Cuendá ññ ñadíhí ndíhi cuendá ññ quiti déé<sup>n</sup> nání drágón*

<sup>1</sup> Te ío víhi ní quide-xi ññ sá ní quide-xi andíu, te ní xini-í ññ ñadíhí te dóo níhú-án quide-xi datná quidé-xí núu nchíanchii, te ndáa núu sáhá-a<sup>n</sup> quide-xi datná quidé-xí núu yóó, te ñúhu ññ coroná díquí-a<sup>n</sup> te ndéé úxúú chódíní. <sup>2</sup> Te ñúhu déhe-a<sup>n</sup> te càna saa-a<sup>n</sup> sá quidé úhú ñáhá-xí xii-a<sup>n</sup> chí sa ndètu víi-ná cacu déhe-a<sup>n</sup>. <sup>3</sup> Te dátñuní ní quide tucu-xi sá ní quide-xi andíu, te ní xini-í ññ quiti cáhnu quiti ticuehé, quiti déé<sup>n</sup> nání drágón, te ndéé úsá díquí-di ndíhi úxí ndíquí-di, te ññ caa coroná ñúhú ññ caa díquí-di-án. <sup>4</sup> Te quiti-án luha-ná te cuu dava nchaa chódíní dāngòyo-di ñuyíú ndíhi lúhmá-di, te quiti-án ní ngúnu tnú-di núu ñaha ndètu víi-ná cacu déhe-xi-án cuendá caxi-di déhe-a<sup>n</sup> òré cacu ní cùu. <sup>5</sup> Te ñaha-án ní cacu déhe-a<sup>n</sup> te tée cùu-dé, te té líhli-án ío cunuu-dé taxi tnúni-dé nchaa ñáyíu ñuyíú, te mee Yá Ndióxí ní nacuaa ñaha-gá xii té líhli-án cuendá cundecu ndíhi ñaha-dé xii-gá núu ndécú-gá táxi tnúni-gá. <sup>6</sup> Te ñadíhí-án ní xinu-a<sup>n</sup> cuáhá-a<sup>n</sup> xítí yucu núu ní quide túha Yá Ndióxí cundecu-a<sup>n</sup> cuendá xiá<sup>n</sup> níhí-a<sup>n</sup> caxi-a<sup>n</sup>, te duca<sup>n</sup> níhí-a<sup>n</sup> sá cáxi-án úxúú cièndú únídico nduu chí duca<sup>n</sup> nduu cundecu-a<sup>n</sup> xiá<sup>n</sup>.

<sup>7</sup> Te sáá dúcá<sup>n</sup> te andíu ní xini-í espíritu cùnno xinu cuechi núu Yá Ndióxí nání Miguél, ndíhi nchaa dava-gá espíritu cùndíhi-xi, te nchaa espíritu-án nàa-xi ndíhi quiti déé<sup>n</sup> nání drágón ndíhi nchaa espíritu cùndíhi-di. <sup>8</sup> Te quiti-án ñá túú ní ndàcu-di ndíhi nchaa espíritu cùndíhi-di, te ñá túú ní níhí-gá-di núu cùndècu-di andíu ndíhi nchaa espíritu cùndíhi-di-án. <sup>9</sup> Te cue espíritu xínú cuèchi núu Yá Ndióxí-án ní dāngává-xí quiti déé<sup>n</sup> nání drágón-án ndíhi nchaa espíritu cùndíhi-di ñuyíú, te quiti-án cuú-dí mèi sácúíhná àdi sá cáchi-ò cùu yucu ñávaha, te diu xiá<sup>n</sup> ní dāndáhú-xi ñáyíu níhí ñuyíú, te diu-ni xiá<sup>n</sup> ní nduu-xi cóo ní dāndáhú-xi ñáyíu ndéé sanaha.

<sup>10</sup> Te ní tecú dóho-í níhi ní cáhá<sup>n</sup> tucu ññ sá ní cáhá<sup>n</sup> andíu, te cáchi-xi:

—Vitna te Yá Ndióxí ní quide-gá ní ngúndècu ñáyíu ndíhi-gá, te ío cáhnu cuu-gá, te ío táxi tnúni-gá, te tnàhá Cristú Yáá ní tendaha Yá Ndióxí ní quixi ñuyíú-a ío tàxi tnúni-gá, te duca<sup>n</sup> chí sa ní xócúñí sácúíhná sá súúni núnúu sacá<sup>n</sup> cuèchi núu Tátá-ó Dütú Ndióxí cuendá nchaa ñáyíu ndècu ndíhi-o ichi-gá, te nduu níu duca<sup>n</sup> sàcá<sup>n</sup> cuèchi-xi núu-gá cuendá-yu ní cùu. <sup>11</sup> Dico ní ndacú-yu ní cunúu-yu núu sácúíhná sá dúcá<sup>n</sup> sàcá<sup>n</sup> cuèchi cuendá-yu-án ní cùu, te duca<sup>n</sup> ní cunúu-yu sá cuendá Yáá cáá dátñá cáá ññ mbéé quiti ní dānicuèhé-güedé, chí Yáá-án ní sati níñí-gá te ní xíhí-gá sá

cuendá-yu, te duca<sup>n</sup> nĩ cunuu tucú-yu sá cuendá sá sàndáá iní ñáhà-yu xii Yaá-á<sup>n</sup>, te ñá túú ní yùhú-yu cuú-yu sá cuendá-gá. <sup>12</sup> Te vitna ío chí cùhí iní nchaa nchòhó espíritú xínú cuèchi núú Yá Ndiòxí, ndihi nchaa nchòhó ñáyi ndècu andiu, dico ñdàhú ní cuu nchaa ñáyi xindecu nihii ñuyú! Chí súúni cùdéé<sup>n</sup> sàcúhná nĩ ngava-xi te nándi cada ñaha-xi xii-yu, te duca<sup>n</sup> chí cùtnuní iní-xi sá sàcú duha-ná nduu cudí-xi cundecu-xi —duha càchí sá ní càhá<sup>n</sup> andiu.

<sup>13</sup> Te sàtá nĩ quee quiti déé<sup>n</sup> nání dràgón-á<sup>n</sup> andiu ní ngava-di ñuyú quiti cùu mei sàcúhná-á<sup>n</sup>, te quiti-á<sup>n</sup> nĩ chinchicú<sup>n</sup>-di ñadhi ñaha ní cacu déhe téé-xi-á<sup>n</sup>. <sup>14</sup> Te ñadhi-á<sup>n</sup> nĩ nduu táhú-a<sup>n</sup> ní quene úú ndixí-a<sup>n</sup>, te càa datná cáá ndixí<sup>n</sup> ñ<sup>n</sup> yacòlo cahnu vihi cuendá ndava-a<sup>n</sup> nùhú-a<sup>n</sup> yucu núú ní cachí Yá Ndiòxí cundecu-a<sup>n</sup>, te yàcá<sup>n</sup> cundecu-a<sup>n</sup> úní cuíá dava cuendá sá vā nihí ñáhà quiti déé<sup>n</sup> quiti nani dragón-á<sup>n</sup> te xiá<sup>n</sup> nihí-a<sup>n</sup> sá cáxi-á<sup>n</sup>, te quiti-á<sup>n</sup> cúú tucu-di datná ñ<sup>n</sup> cóo déé<sup>n</sup>. <sup>15</sup> Te quiti-á<sup>n</sup> ní quene cuhéhe ndute yuhu-di, te ndute ní quene yuhu-di-á<sup>n</sup> ní cuu-xi ñ<sup>n</sup> yúte, te duca<sup>n</sup> ní quide-di cuendá ndute-á<sup>n</sup> cuido-xi ñadhi-á<sup>n</sup> ní cùu. <sup>16</sup> Te ñuhu yichí ní chindee-xi ñadhi-á<sup>n</sup>, chí ní ndatá te ní quée naa-ni ndute ní quene yuhu quiti-á<sup>n</sup>. <sup>17</sup> Te sá dúcá<sup>n</sup> ní quide-xi xiá<sup>n</sup> ní cudéé<sup>n</sup> vihi quiti-á<sup>n</sup> núú ñadhi-á<sup>n</sup>, te ní xica-di cuáhà<sup>n</sup>-di núú xindecu nchaa dava-gá cue déhe ñadhi-á<sup>n</sup> cuendá náá ndihi ñaha-di, te ñáyi-á<sup>n</sup> cùu-yu ñáyi tñh nchaa tñuhu càhá<sup>n</sup> Yá Ndiòxí, te nchicú<sup>n</sup> nihnú-yu nchaa tñuhu sá càhá<sup>n</sup> vāha cuendá Xítóhó Jesucrístú.

**13**

*Cuendá úú quiti*

<sup>1</sup> Te yùhú ní ngúnu tñi-í yuhu làmár, te ní xiní-í ní quene ñ<sup>n</sup> quiti te ndèé úsá díquí-di te úxí ndiqui-di, te núú ñ<sup>n</sup> ñ<sup>n</sup> ndiqui-di-á<sup>n</sup> ndécú ñ<sup>n</sup> caa coroná. Te ñ<sup>n</sup> ñ<sup>n</sup> díquí-di-á<sup>n</sup> ndéé tñuhu sá càhá<sup>n</sup> úhú-xi cuendá Yá Ndiòxí. <sup>2</sup> Te quiti-á<sup>n</sup> cáá-dí datná cáá cuñí, te sáhá-di càa datná cáá sáhá óso, te yuhu-di càa datná cáá yùhu ndicaha. Te quiti déé<sup>n</sup> nání dràgón ní sáñaha-di tñuhu ndee iní xii quiti-á<sup>n</sup> cuendá taxi tñuní vihi-dí, te dràgón-á<sup>n</sup> ní sáñaha-di núú ndécú-dí tàxi tñuní-di xii quiti ní quene xití làmár-á<sup>n</sup>, te duca<sup>n</sup> ní quide-di cuendá sá nihí ndéé quiti-á<sup>n</sup> cunu-di. <sup>3</sup> Te ñ<sup>n</sup> díquí quiti ní quene xití làmár-á<sup>n</sup> càhú vihi càa ní nícuèhé, te sa ndètu vii-ná cuú-di sànuu dico ní ndúha-di, te nihí ñuyú ní nihí ñáyi tñuhu sá dúcá<sup>n</sup> ní cuu, te ío ní cuñúhu-yu te ní tuhá-yu quiti-á<sup>n</sup>. <sup>4</sup> Te nchaa ñáyi-á<sup>n</sup> ní cachí-yu sá ío càhnu cuu quiti déé<sup>n</sup> quiti nani dragón-á<sup>n</sup> cuendá sá ní sáñaha-di tñuhu ndee

iní sá taxi tñuní quiti ní quene xití làmár-á<sup>n</sup>, te ní ngúta-yu ní chiñuhú-yu quiti ní quene xití làmár-á<sup>n</sup>, te càchí-yu:

—Vá yòo ñ<sup>n</sup> nùtnahá ñáhà xii quiti-a, te ní vā yòo ñ<sup>n</sup> ndacu naá ndihi ñaha xii-di —cachí-yu.

<sup>5</sup> Te ní nihí-di tñuhu ndee iní sá càhá<sup>n</sup> úhú-di Yá Ndiòxí, te cada càhnu-di mee-di, te údico úú yóo duca<sup>n</sup> ní nihí-di tñuhu ndee iní-á<sup>n</sup> cunu-di. <sup>6</sup> Te duca<sup>n</sup> ní quide-di ní càhá<sup>n</sup> úhú-di Yá Ndiòxí ndihi cuendá nchaa sá quide-gá, te diu-ni duca<sup>n</sup> ní càhá<sup>n</sup> úhú-di núú ndécú-gá, te ní càhá<sup>n</sup> úhú tucu-di nchaa ñáyi ndècu ndihi-gá andiu. <sup>7</sup> Te duca<sup>n</sup> ní nihí-di tñuhu ndee iní sá nàá-di ndihi nchaa ñáyi cùu cuendá Yá Ndiòxí, te duca<sup>n</sup> naá ndihi ñaha-di xii-yu ndéé òré vā ndácú-gá-yu naá ndihi ñáhà-yu xii-di, te tñáhà ní ngúndecu ndihi-di tñuhu ndee iní sá taxi tñuní-di ñáyi nchaa nàció<sup>n</sup>, ndihi ñáyi nchaa ñuu, ndihi nchaa ñáyi càhá<sup>n</sup> ndí dí<sup>n</sup> ndí dí<sup>n</sup> núú tñuhu, ndihi ñáyi xindecu nchaa xichi. <sup>8</sup> Te cue ñáyi nihí ñuyú ní cachí-yu sá ío càhnu cuu quiti-á<sup>n</sup>, te ñáyi-á<sup>n</sup> cúu-yu ñáyi ñá túú yòdo tñuní núú tütú Yaá cáá datná cáá ñ<sup>n</sup> mbéé quiti ní dani cuhéhe-güedé Yaá ní xihí ní cùu te ní ndoto. Te ndéé cùtnáhà ní ngáva ñuyú sa yòdo tñuní ñáyi naníhí táhú, dico ñáyi càchí sá ío càhnu cuu quiti-á<sup>n</sup> ñá túú yòdo tñuní-yu núú tütú-gá.

<sup>9</sup> Te nchaa nchòhó ñáyi xindedóho chí cündedóho vāha nchaa nàcuáa cuáhà<sup>n</sup> tñuhu-á<sup>n</sup>. <sup>10</sup> Te nchaa ñáyi na chihí tñaha ñáyi-xi vecaá te sáá nduu te quihí<sup>n</sup>-yu tñáhà-yu vecaá, te nchaa ñáyi sàhni tñaha ñáyi-xi ndihi yuchí te diu-ni ndihi yuchí cuú-yu tñáhà-yu, te xiá<sup>n</sup> núu ío xini ñuhu-xi sá ncháá ñáyi cùu cuendá Yá Ndiòxí cunduu càhnu iní-yu, te quindáá iní ñáhà-yu xii-gá.

<sup>11</sup> Te ní xiní tucu-í ingá quiti ní quene-di núú ñuhu yichí, te ndéé úú ndiqui-di te càa datná cáá ndiqui canerú, te càhá<sup>n</sup>-di datná càhá<sup>n</sup> quiti déé<sup>n</sup> nání dràgón. <sup>12</sup> Te datná ndécú ndihi quiti ní quene xití làmár-á<sup>n</sup> tñuhu ndee iní sá taxi tñuní-di duca<sup>n</sup> ndècu ndihi quiti ní quene ñuhu yichí-á<sup>n</sup> tñuhu ndee iní taxi tñuní-di cada-di núú quiti ní quene xití làmár-á<sup>n</sup>, te quiti ní quene ñuhu yichí-á<sup>n</sup> ní quide yica-di sá ncháá ñáyi xindecu nihí ñuyú chiñuhú-yu quiti ní quene xití làmár-á<sup>n</sup>, quiti càhú vihi ní tñáhà ní nícuèhé te ní ndúha-di. <sup>13</sup> Te quiti ní quene xití ñuhu yichí-á<sup>n</sup> ní quide-di titní núú sá vā yòo tñáhí ndacu cada, te nchaa ñáyi ní xiní-yu sá ndéé andiu ní dángóyó-dí ñùhú ñuyú. <sup>14</sup> Te sá dúcá<sup>n</sup> ní ngúndecu ndihi-di tñuhu ndee iní ní quide-di nchaa xiá<sup>n</sup> ní quide-di núú quiti ní quene xití làmár-á<sup>n</sup>, te sá dúcá<sup>n</sup> ní quide-di te



xíá<sup>n</sup> ní dándàhú-di nchaa ñáyiú xíndecu nihí ñuyú, te ní xáhá<sup>n</sup>-di xíi-yu sá ndúcú-yu ñ<sup>n</sup> sá cádúha-yu nàcuáa-ni cãa nacuáa-ni ndúu quiti ní quene xítí lámár-á<sup>n</sup>, quiti cãhú víhí ní tnahá ní nícuèhé díquí-xi-á<sup>n</sup> ní quée machítí te ñá túú ní xíhí-di chí ní xíndecu-ni-di. <sup>15</sup> Te quiti ní quene xítí ñuhu yíhí ní ngúndecu ndihi tucu-di tnúhu ndee ìní sá chíhí-dí ìní sá ní cadúha-yu-á<sup>n</sup>, sá ní natavá-yu dàtná cáá quiti ní quene xítí lámár-á<sup>n</sup>, te duca<sup>n</sup> ní quide quiti-á<sup>n</sup> cuendá cáhá<sup>n</sup> sá ní cadúha-yu-á<sup>n</sup>, te xíá<sup>n</sup> cada-xi cuú nchaa ñáyiú ñá túú ní cuíni chíñuhu ñaha xii-di. <sup>16</sup> Te quiti ní quene xítí ñuhu-á<sup>n</sup> quidé-dí sã ncháá ñáyiú ngúndéé ñ<sup>n</sup> tnuní ndaha cùhá-yu àdi tneé-yu, te duca<sup>n</sup> ní quide-di cuèi ñáyiú cùnno te cuèi ñáyiú ñá túú cùnno, te cuèi ñáyiú cuica te cuèi ñáyiú ndàhú, te cuèi ñáyiú ñá túú dàña quee núú chíú<sup>n</sup> patróó<sup>n</sup>-xi, te cuèi nchaa ñáyiú dàña quée núú chíú<sup>n</sup> patróó<sup>n</sup>-xi nchaa-yu duca<sup>n</sup> ní ngúndéé tnuní ñii-yu. <sup>17</sup> Te ní quide-di sã ncháá ñáyiú ñá túú ndèè tnuní ñii-xi vã cuú cuáá<sup>n</sup>-yu sã cãchí ìní-yu te ní vã cuú dicó-yu ñ<sup>n</sup> sã cuíni-yu dicó-yu, te tnuní-á<sup>n</sup> cúú-xí ìni quiti ní quene xítí lámár-á<sup>n</sup> àdi númerú-di. <sup>18</sup> Te xíni ñuhu-xi sã ncháá ñáyiú ío váha cùtnuní ìní-xi ío váha cuáha-yu cuendá nàcuáa quèe-xi númerú quiti-á<sup>n</sup>, te númerú-á<sup>n</sup> cúú-xi ññú ciendú úndico ññú, te cùu-xi cuendá ñ<sup>n</sup> ñáyiú ñuyú.

**14**

*Cuendá ñ<sup>n</sup> ciendú údico cúmí mĩ ñáyiú*

<sup>1</sup> Te sáta dúcá<sup>n</sup> te ní xini-í Yáá cáá dàtná cáá ñ<sup>n</sup> mbéé quiti ní dãnícuehé-güedé nútñi-gá ñ<sup>n</sup> yucu ñuú nání Sìón ndécú andiú, te nutñi-gá ndihi ñ<sup>n</sup> ciendú údico cúmí mĩ ñáyiú, te tneé-yu ndèè ñuú-gá ndihi ñuú tátá-gã Dútú Ndióxi. <sup>2</sup> Te ní tecú dóho-í ní quide-xi andiú dàtná quidé-xi núú xicá cuèhé víhí ndùte, te quide tucu-xi datná quidé-xi òré níhi víhi cahá<sup>n</sup> ññuhu, te quide tucu-xi datná quidé-xi òré cuèhé víhí ñáyiú cãní-yu àrpá. <sup>3</sup> Te ní tecú dóho-í xixita yuhu sã xítá yùhu núú Yáá núcõo núú xilé váha, ndihi núú ndí cùmí cue quiti xínutñi-á<sup>n</sup>, ndihi núú nchaa cue tée cùu sacuehé xíncúo-á<sup>n</sup>, te xixita-xi ñ<sup>n</sup> ndudú sáá. Te mee-ni cuè ñáyiú ñ<sup>n</sup> ciendú údico cúmí mĩ-á<sup>n</sup> quée díquí-yu ndudú-á<sup>n</sup>, te ñáyiú-á<sup>n</sup> cúú-yu ñáyiú ní dácãcu nihnu ñaha Yáá cáá dàtná cáá ñ<sup>n</sup> mbéé quiti ní dãnícuehé-güedé núú ñáyiú ndècu ichi cuèhé ichi duha xíndecu ñuyú, te vã yõ ñ<sup>n</sup>-gã quée díquí-xi ndudú sáá-á<sup>n</sup> chí mee-ni ñáyiú ní cácu nihnu-á<sup>n</sup> quée díquí-yu. <sup>4</sup> Te ñáyiú ní cácu nihnu-á<sup>n</sup> cúú-yu ñáyiú ñá túú ní xíndecu ichi díí ìní, te cúú-yu ñáyiú cãndoo canine ìní-xi, te ndèni ní cuu cuáhá<sup>n</sup> Yáá cáá dàtná cáá ñ<sup>n</sup> mbéé

quiti ní nícuèhé-á<sup>n</sup>, te duca<sup>n</sup>-ni ndèndaha ñàhá-yu xii-gã cuáhá<sup>n</sup>, te ñáyiú-á<sup>n</sup> ní cácu nihnu-yu núú nchaa ñáyiú ñuyú, ñáyiú ndècu ichi cuèhé ichi duha, te ñáyiú ní cácu nihnu-á<sup>n</sup> cúú-yu ñáyiú díhna nuu ní nduu táhú Yá Ndióxi cuu cuendá-gã ndihi Yá cáá dàtná cáá ñ<sup>n</sup> mbéé quiti ní dãnícuehé-güedé. <sup>5</sup> Te cúú-yu ñáyiú ñá túú cãhá<sup>n</sup> ní ñ<sup>n</sup> tnúhu ndehnde, te cãndoo canine ìní-yu ndécú-yu núú núcõo Yá Ndióxi táxi tnuní-gã.

*Cuendá úní cue espíritu xínú cuèchi núú Yá Ndióxi*

<sup>6</sup> Te sáta dúcá<sup>n</sup> te ní xini-í ñ<sup>n</sup> espíritu xínú cuèchi núú Yá Ndióxi xicó-xí cuádava andiú, te ndècu ndihi-xi tnúhu sã cáhá<sup>n</sup> nàcuáa naníhí táhú-ó, tnúhu sã ñá túú tnahí ndihi nihnu te tnúhu-á<sup>n</sup> danèhé espíritu-á<sup>n</sup> nchaa ñáyiú ndècu ñuyú, ñáyiú nchaa nàció<sup>n</sup>, ndihi ñáyiú nchaa ñuú, ndihi nchaa ñáyiú cãhá<sup>n</sup> ndí díí<sup>n</sup> ndí díí<sup>n</sup> núú tnúhu, ndihi ñáyiú xíndecu nchaa xichi. <sup>7</sup> Te níhi ní cáhá<sup>n</sup>-xi te cãchí-xi:

–Nchaa nchòhó ñáyiú ndècu ñuyú canehe-ndo sã yíñuhu núú Yá Ndióxi, te cãchí-ndó sã ío cãhnu cuu-gã chí sã ní sáá nduu càda ndáá-gã nchaa cuèchi-ndo, te chíñuhu-ndo-gã chí ñuú-gã ní cadúha-gã andiú, ndihi ñuhu yíhí, ndihi lámár, ndihi nchaa ndóhoyo –duha cãchí espíritu-á<sup>n</sup>.

<sup>8</sup> Te nchicú<sup>n</sup> tucu ingá espíritu xínú cuèchi núú Yá Ndióxi, te cãchí-xi:

–Vitna ní naa ñuú Babilonía ñuú ío cùnno, te duca<sup>n</sup> ní naa chí cue ñáyiú ñuú-á<sup>n</sup> ní quidé-yu ní xíta nihnu nchaa ñáyiú nihí ñuyú, chí ní sanu ichi ñàhá-yu ichi cuèhé ichi duha –duha cãchí espíritu-á<sup>n</sup>.

<sup>9</sup> Te nchicú<sup>n</sup> tucu ingá espíritu xínú cuèchi núú Yá Ndióxi te níhi cáhá<sup>n</sup>-xi, te cãchí-xi:

–Nchaa ñáyiú chíñuhu ñaha xii quiti ní quene xítí lámár, ndihi sá ní natava ñàhá-yu nàcuáa cãa-di-á<sup>n</sup>, ñáyiú ní dàña mée-xi ní ngúndéé tnuní ndahá-yu àdi tneé-yu, <sup>10</sup> ñáyiú-á<sup>n</sup> sùúni dândoho ñaha Yá Ndióxi xii-yu chí ío cùdèé<sup>n</sup>-gã, te duca<sup>n</sup> ío dândoho ñaha-gã xii-yu chí daquihí<sup>n</sup> ñàhá-gã xii-yu núú ññuhú núú ññuhú àzufre càyú-xi, te núú cuè espíritu xínú cuèchi núú-gã duca<sup>n</sup> dândoho ñaha-gã xii-yu, ndihi núú Yáá cáá dàtná cáá ñ<sup>n</sup> mbéé quiti ní dãnícuehé-güedé.

<sup>11</sup> Te ní caa ní quihí<sup>n</sup> quene ññuhá núú dúcá<sup>n</sup> cùndecú-yu ndohó-yu-á<sup>n</sup>, te cuèi nduu cuèi niú duca<sup>n</sup> ndòhó-yu. Te duca<sup>n</sup> ndòho nchaa ñáyiú chíñuhu ñaha xii quiti ní quene xítí lámár, ndihi sã ní natava ñàhá-yu nàcuáa cãa-di-á<sup>n</sup>, te diu-ni ñáyiú-á<sup>n</sup> cúú-yu ñáyiú ní ngúndéé tnuní ndaha-xi àdi tneé-xi –duha cãchí espíritu-á<sup>n</sup>.

<sup>12</sup> Te xíá<sup>n</sup> xini ññuhu-xi sã ncháá ñáyiú cùu cuendá Yá Ndióxi cunduu cãhnu ìní-yu, chí diu-ni-yu cúú-yu ñáyiú tñi nchaa tnúhu

15

cáhá<sup>n</sup>-gá, te ní yùhu ní iní-yu sàndáá iní-yu Xítóhó Jesucristú.

<sup>13</sup> Te sáta dúcá<sup>n</sup> te ní tecú dóho-í ní cáhá<sup>n</sup> ì<sup>n</sup> sá ní cáhá<sup>n</sup> andiù, te càchí-xi:

—Chido tnùnì-n ì<sup>n</sup> núú tütú nàcuáa na cáhá<sup>n</sup>-í-a. “Není vitna ío váha táhú nchaa ñáyíu sàndáá iní tnúhu Xítóhó Jesucristú te xihí-yu” —duha càchí sá ní cáhá<sup>n</sup>-á<sup>n</sup>.

Te Espíritú Yá Ndiòxí ní cáhá<sup>n</sup>-xi, te càchí-xi:

—Ndáá, chi ndetatú-yu chi ñá túú-gá nága chiù<sup>n</sup> ndohó-yu cadá-yu, te Yá Ndiòxí sa nàha-gá nchaa nàcuáa ndùu chiu<sup>n</sup> ní quidé-yu —duha càchí Espíritú-gá.

*Nchaa sá cúú núú ñúhú*

<sup>14</sup> Te sáta dúcá<sup>n</sup> te dàtnùnì ní xiní-í ì<sup>n</sup> vícò cuixí<sup>n</sup>, te núú vícò-á<sup>n</sup> ní xiní-í núcòo ì<sup>n</sup> Yaá, te càa-gá dàtná cáá ì<sup>n</sup> tée ñuyíú, te díquí-gá ñúhú ì<sup>n</sup> coroná ní cuáha mee-ni díhú<sup>n</sup> cuàá<sup>n</sup>, te nùndaha-gá ì<sup>n</sup> yuchí ndíquí te súúnì dèé<sup>n</sup>. <sup>15</sup> Te ní xiní-í ì<sup>n</sup> espíritú xínú cuèchi núú Yá Ndiòxí ní quee-xi xití vehe-gá, te ñíhi ní cáhá<sup>n</sup>-xi xàha<sup>n</sup>-xi xii Yaá núcòo núú vícò-á<sup>n</sup>:

—Sa ní cuu nàquehndé-n nchàa sá ní cuu ñuyíú ndíhi yuchí ndíquí-n, chi sa ní cuu nucòo tnàha-xi —duha càchí espíritú-á<sup>n</sup> xàha<sup>n</sup>-xi xii Yaá-á<sup>n</sup>.

<sup>16</sup> Te Yaá núcòo núú vícò-á<sup>n</sup> ní dáyáha ndodo-gá yuchí ndíquí-gá núú ñuyíú ní naxati tnàha-gá nchaa sá ní cuu.

<sup>17</sup> Te ní xiní tucu-í ingá espíritú xínú cuèchi núú Yá Ndiòxí ní quee-xi xití vehe-gá sá cáá àndiù, te nùndaha-xi tnahá-xi ì<sup>n</sup> yuchí ndíquí dèé<sup>n</sup>. <sup>18</sup> Te ní xiní tucu-í ní quee tucu ingá espíritú xínú cuèchi núú Yá Ndiòxí núú nùtníi núú sácòdò sá ndúú táhú-gá, te ndècu ndíhi-xi tnúhu ndee iní táxi tnùnì-xi ñuhú, te espíritú-á<sup>n</sup> ñíhi ní cáhá<sup>n</sup>-xi xàha<sup>n</sup>-xi xii espíritú néhé yuchí ndíquí dèé<sup>n</sup>-á<sup>n</sup>:

—Ngúita naquehndé-n ndíhi yuchí ndíquí-n ndéhé yoho yàha stilé sá ío ñuyíú chi sa ní cuu nàtehndé —duha càchí espíritú-á<sup>n</sup> xàha<sup>n</sup>-xi xii espíritú néhé yuchí ndíquí-á<sup>n</sup>.

<sup>19</sup> Te espíritú néhé yuchí ndíquí-á<sup>n</sup> ní dáyáha ndodo-xi yuchí ndíquí-xi núú ñuyíú ní nàquehndé-xi nchaa ndéhé yoho yàha stilé, te ní chíhí-xi ì<sup>n</sup> xichí núú ní chíhí-xi cuèndá xía<sup>n</sup> quihni-xi quee ndudí-xi, te sá dúcá<sup>n</sup> ní quide-xi xiá<sup>n</sup> cútùnì iní-ó sá ío cudéé<sup>n</sup> Yá Ndiòxí núú ñáyíu ñuyíú. <sup>20</sup> Te ndéhé yoho yàha stilé-á<sup>n</sup> ní quihni-xi ì<sup>n</sup> xio yuhu ñùú, te ndudí ndéhé yoho yàha stilé-á<sup>n</sup> ní nduu-xi ñíhí te ní quee-xi núú quihní ñhnu espíritú-á<sup>n</sup>. Te únì cièndú mìl mètrú ní xica ñíhí-á<sup>n</sup>, te dàtná ì<sup>n</sup> mètrú dava ní sáá cuehnu ñíhí-á<sup>n</sup> ní xica-xi.

*Úsá tnúndòho*

<sup>1</sup> Te ío víhi ní quide-xi ì<sup>n</sup> sá ní quide-xi andiù te ní cuñúhu víhi-í, te ní xiní-í úsá tnàhá espíritú xínú cuèchi núú Yá Ndiòxí, te ì<sup>n</sup> ì<sup>n</sup> cue espíritú-á<sup>n</sup> ndécú ndíhi-xi tnúhu ndee iní dandòho-xi ñáyíu ñuyíú, te nà yàha nchaa tnúndòho-á<sup>n</sup>, te vá cudéé<sup>n</sup>-gá Yá Ndiòxí núú-yu dándoho ñaha-gá xii-yu.

<sup>2</sup> Te ní xiní-í ì<sup>n</sup> lámár te ndute lámár-á<sup>n</sup> cáá dàtná cáá vidriú, te dàcànúu-xi ndíhi ñuhú, te yuhu lámár-á<sup>n</sup> xínutnìi nchaa ñáyíu ní ndacu ní dáquée tíhú ñáhá xii quiti ní quene xití lámár-á<sup>n</sup>, te duca<sup>n</sup> ní ndacu-yu ní dáquée tíhú-yu sá ní natava ñáhá-yu nàcuáa càa-di-á<sup>n</sup>, te duca<sup>n</sup> ní ndacu tucú-yu ní dáquée tíhú tucú-yu númerú-di sá cúú dàtná diù-di, te nchaa ñáyíu-á<sup>n</sup> ní nduu táhú-yu núú Yá Ndiòxí árpá xinehé-yu cuèndá caní-yu. <sup>3</sup> Te xixítá-yu ndudú sá ní xita ndí Moisés ndí ní xinu cuechi núú Yá Ndiòxí ndéé sanaha, te xita tucú-yu ndudú Yaá cáá dàtná cáá ì<sup>n</sup> mbéé quiti ní dánícuèhé-güedé, te càchí-yu:

Yòhó Dútú Ndiòxí ío càhnu cuu-n, chí quide-n nchaa sá vá yòo tnàhì ndàcu cada, te cùu-n Yaá ndácú quide nchaandi túhú sá váha, te ío ndáá quide-n te ío ndáá cáhá<sup>n</sup>-n, te yìndaha-n nchaa ñáyíu ñíhì ñuyíú.

<sup>4</sup> Te nchaa ñáyíu nèhé-yu sá yíñùhu núú-n, te nchaa-yu càchí-yu sá ío càhnu cuu-n, chí ì<sup>n</sup> dli díí-nì yòhó cúú-n Yáá ío váha quide ndáá,

te nchaa ñáyíu ñíhì ñuyíú natacá-yu chíñuhu ñáhá-yu xii-n, te duca<sup>n</sup> cadá-yu chí ndèhé-yu nchaa sá váha quide-n.

Duha càchí ñáyíu-á<sup>n</sup> xixítá-yu.

<sup>5</sup> Te sáta dúcá<sup>n</sup> te ní xiní-í ní nacaá<sup>n</sup> yuyèhe vehe Yá Ndiòxí andiù, te xití vehe-gá-á<sup>n</sup> ndécú sá ndéé tnúhu-gá. <sup>6</sup> Te xití vehe-gá-á<sup>n</sup> ní quee úsá tnàhá espíritú xínú cuèchi núú-gá, te ì<sup>n</sup> ì<sup>n</sup> ndècu ndíhi-xi tnúhu ndee iní dandòho-xi ñáyíu, te xixíhnu-xi mee-ni dóó váha, te súúnì váha càndoo, te chàhnhí, te yidúcú<sup>n</sup>nuu cínchú ní cuáha mee-ni díhú<sup>n</sup> cuàá<sup>n</sup> pèchú ndi úsá cue espíritú-á<sup>n</sup>. <sup>7</sup> Te ì<sup>n</sup> quiti cúmì xínutnìi núú nùtníi xilé váha ní sáñaha-di ì<sup>n</sup> caa sá nàhá tícùú ní cuáha mee-ni díhú<sup>n</sup> cuàá<sup>n</sup> xii ì<sup>n</sup> ì<sup>n</sup> espíritú-á<sup>n</sup>, te xití nchaa tícùú-á<sup>n</sup> ñúhú ì<sup>n</sup> sá ñúhú te xiá<sup>n</sup> cútùnì sá Yá Ndiòxí dandòho-gá ñáyíu ñuyíú, te diu-gá cúú-gá Yaá ndécú nchaa nduu nchaa quíú. <sup>8</sup> Te xití vehe-gá-á<sup>n</sup> ní chítú ñúhú, te duca<sup>n</sup> ní quide-gá cuèndá cútùnì iní ñáyíu sá ío càhnu cuu-gá táxi tnùnì-gá, te vá yòo ì<sup>n</sup> cuu

quihu xití vehe-gá-án ndèè ndihi ndi usá tnúndòho cada ndi usá cue espíritu-án ñuyíú.

**16**

*Tnúndòho cada-xi ñuyíú*

<sup>1</sup> Te sátá dúcá<sup>n</sup> te ní tecú dóho-í níhi ní cáhá<sup>n</sup> ì<sup>n</sup> sá ní cáhá<sup>n</sup> xití vehe Yá Ndióxi, te xáha<sup>n</sup>-xi xii ndi usá cue espíritu-án:

—Chí cuàhá<sup>n</sup> coyo-ndo sá ñúhú xití nchaa tícúú néhé-ndó-án núú ñuyíú, chí sá ñúhú-án cúú-xí tnúndòho tendaha Yá Ndióxi sá cúú-xí nchaa ñáyíu ñuyíú —duha càchí sá cáhá<sup>n</sup>-án.

<sup>2</sup> Te espíritu díhna ní sáhá<sup>n</sup>-xi ní coyo-xi sá ñúhú xití tícúú néhé-xí-án ñuyíú, te nchaa ñáyíu ñúhu tnuní quiti ní quene xití lámár ñáyíu ní chíñuhu sá ní natava ñahá-yu xii-di, nchaa ñáyíu-án ní quené-yu ndíhyi tèhyú te sútúni dándòho ñaha-xi xii-yu.

<sup>3</sup> Te espíritu cúú úú ní coyo-xi sá ñúhú xití tícúú néhé-xí núú lámár, te ndute lámár-án ní nduu-xi níñi te càa-xi datná cáá níñi ñáyíu sa ní xihí, te nchaa quiti ñúhu xití lámár-án ní xihí-güedi.

<sup>4</sup> Te espíritu cúú ùní ní coyo-xi sá ñúhú xití tícúú néhé-xí nchaa yúte ndihi nchaa núú quèñihni ndute, te ndute nchaa yúte-án ndihi nchaa ndute quèñihni-án ní nduu-xi níñi.  
<sup>5</sup> Te sátá dúcá<sup>n</sup> te ní tecú dóho-í ní cáhá<sup>n</sup> ì<sup>n</sup> espíritu xínú cuèchi núú Yá Ndióxi, espíritu yíndàha ndute, te xáha<sup>n</sup>-xi xii Yá Ndióxi:

—Yòhó Dútú Ndióxi cúú-n Yáá quidé ndáá cuiti núú duha quide-n tendaha-n tnúndòho-a, te diu-ni-n cúu-n Yáá ndécú ndèè cútñahá ní ngáva ñuyíú, te diu-ni-n cúu-n Yáá ndécú vitna te ñá túú tñahí cuèchi-n. <sup>6</sup> Chí cue ñáyíu ñuyíú ní dácácá-yu níñi nchaa ñáyíu ní cáhá<sup>n</sup> tnúhu-n ndihi nchaa dava-gá ñáyíu cùu cuendá-n, te ní sahní-yu nchaa ñáyíu-án, te vitna ní dátúú-n ndüte ní nduu-xi níñi te duca<sup>n</sup>-ni càa ndute-án xihí-yu, te duca<sup>n</sup> tàu-xi ndohó-yu cuendá sá ní sahní-yu cue ñáyíu cùu cuendá-n —duha càchí espíritu-án xáha<sup>n</sup>-xi xii-gá.

<sup>7</sup> Te ní tecú tucu dóho-í ní cáhá<sup>n</sup> ì<sup>n</sup> sá ní cáhá<sup>n</sup> núú núnñi núú sácòdó sá ndúú tǎhú Yá Ndióxi, te xáha<sup>n</sup>-xi xii-gá:

—Ndáá sá yòhó Dútú Ndióxi Yáá ndácú quide nchaandi túhú sá váha dándòho-n ñáyíu nàcuáa tàú-xi cunduu —duha càchí sá cáhá<sup>n</sup>-án xáha<sup>n</sup>-xi xii-gá.

<sup>8</sup> Te espíritu cúú cùmí ní coyo-xi sá ñúhú xití tícúú néhé-xí núú nchícanchii cuendá nchícanchii-án cahmí-xi nchaa ñáyíu ñuyíú.

<sup>9</sup> Te nchaá-yu ní ndoho vihi-yu ní cáyú-yu, te cuèi duca<sup>n</sup> ní ndohó-yu dico ñá túú ní cuini-yu ndixi cuèchi ini-yu cuendá nchaa sá ñá túú váha quidé-yu, te ní ñá túú ní càchí-yu

sá ïo càhnu cuu Yá Ndióxi chí da ní cáhá<sup>n</sup> úhú-yu cuendá-gá, te diu-gá cúú-gá Yáá duca<sup>n</sup> ní tendaha tnúndòho-án sá cúú-xi-yu.

<sup>10</sup> Te espíritu cúú ùhú<sup>n</sup> ní coyo-xi sá ñúhú xití tícúú néhé-xí núú ndécú quiti ní quene xití lámár-án táxi tnuní-di, te nchaa núú táxi tnuní-di ní cuu nee, te nchaa ñáyíu ñuyíú ndèé yáá-ná-yu nàcaxi nihnú-yu sá ndóhó-yu. <sup>11</sup> Dico ní dùca<sup>n</sup> ñá túú ní cuini-yu dàñá-yu ní ì<sup>n</sup> sá cuèhé sá dúhá quidé-yu, chí da ní cáhá<sup>n</sup> úhú-yu cuendá Yá Ndióxi Yáá ndécú àndiu sá cuendá sá dándòho ñaha ndíhyi tèhyú ndèé-yu-án ndihi nchaa dava-gá sá yáha-yu.

<sup>12</sup> Te espíritu cúú ìñú ní coyo-xi sá ñúhú xití tícúú néhé-xí xití yúte càhnu nani Eúfratés, te ndute yúte-án ní yíchí cuendá yáha cue téé yíndaha ñáyíu xíndecu ndàa xio nacuaa quène nchícanchii.

<sup>13</sup> Te ní xiní-í ní quee ì<sup>n</sup> espíritu cùndíhi yucu ñávàha yuhu quiti déé<sup>n</sup> nání dragón, te ní xiní tucu-í ní quee tucu ingá espíritu cùndíhi yucu ñávàha yuhu quiti ní quee xití lámár, te ní xiní tucu-í ní quee tucu ingá espíritu cùndíhi yucu ñávàha yuhu téé dándahú ñáyíu càchí sá cáhá<sup>n</sup> tnúhu Yá Ndióxi te ñá ndáá, te ndi nùní espíritu-án xíndáa-xi datná cáá làhvá. <sup>14</sup> Te ndi nùní espíritu-án quidé-xí sá vǎ yòo tñahí ndàcu cada, te xica datacá-xi nchaa cue téé yíndaha ñaha xii ñáyíu xíndecu nihíi ñuyíú cuendá nàá-güedé mei nduu cachí Yá Ndióxi coo tnúndòho cahnu vihi-gá, te diu mee Yá Ndióxi cúú-gá Yáá ïo càhnu cuu. <sup>15</sup> Te Yáá cúú Xítohó-ó ní cachí-gá: “Cunaha-ndo chí nduu ñá túú yíhi ini-ndó quixi-í núú ndécú-ndó, te cada-í datná quidé ñadúhú. Te váha tǎhú nchaa nchòhó ñáyíu xíndecu túha, chí cùu-ndo datná cue ñáyíu xíndecu túha xíxihu-ni dóó-xi cuendá sá vǎ cùcàha<sup>n</sup> núú-yu datná cùcàha<sup>n</sup> núú cuè ñáyíu ñá túú nihnu dóó-xi, te duha cáhá<sup>n</sup>-í cuendá sá nchòhó cundecu túha-ndo òrè quexio-í”, duha càchí-gá. <sup>16</sup> Te ndi nùní cue espíritu cùndíhi yucu ñávàha-án ní datàcá-xi nchaa cue téé yíndaha ñaha xii ñáyíu, te ní taxi ndecu ñaha-xi ì<sup>n</sup> xichi núú nání Àrmagedón, duha nani xiá<sup>n</sup> tnúhu hèbreú.

<sup>17</sup> Te espíritu cúú usá ní coyo-xi sá ñúhú xití tícúú néhé-xí núú tàchí, te ní tecú dóho-í níhi ní cáhá<sup>n</sup> Yáá núcòo núú xilé váha xití vehe-gá, te càchí-gá:

—Xéhé-ñá cùmǎni te xínu cava nchaa tnúndòho tnúhu ndàhú —duha càchí-gá.

<sup>18</sup> Te sátá dúcá<sup>n</sup> te ní sáá nduté te ní cáhá<sup>n</sup> ñúhu, te sútúni dùsa<sup>n</sup> ní quide-xi, te níhi vihi ní tñáa ñuyíú, te ndèé cútñahá ní ngúndecu ñáyíu ñuyíú te vátá ì<sup>n</sup> xito-gá níhi tñáa datná ní quide-xi. <sup>19</sup> Te ñúu càhnú ïo cùnuu nani

Babiloniá ní quée dava-xi ní cuu-xi úní xí-chi, te nchaa ñuú cáá ñihí ñuyú ní ngoyo nchaa vehe, chí Yá Ndióxi ní ndacu iní-gá nchaa sá cuèhé sá dúhá quide nchaa ñáyiú ñuú Babiloniá-án, te duca<sup>n</sup> ní quide ñaha-gá xíi-yu chí ío cùdée<sup>n</sup>-gá núu-yu. <sup>20</sup> Te nchaa tindúú ní ndóníhú-xí cuéi nchaa tindúú ñuhu yíchi ndécú xítí lámár. <sup>21</sup> Te ní xíní-í ní cuu<sup>n</sup> ñíñi nàhnu vihi ní ngaundodo-xí cue ñáyiú ñuyú, te nchaa ñíñi-án vée-xi dàtná údico kílu, te cue ñáyiú ñuyú ní cáhá<sup>n</sup> úhú-yu cuèndá Yá Ndióxi sá dúcá<sup>n</sup> ní dácúú<sup>n</sup>-gá ñíñi nàhnu vihi-án, chí ní cuu-xi ñí<sup>n</sup> trúndóho cahnu vihi sá cúú-xí-yu.

**17**

*Ñadhí ndécú ichi díí iní*

<sup>1</sup> Te núú úsá espíritú néhé tícúú-án, te ñí<sup>n</sup>-xi ní quixi-xi núú ndécú-í, te càchí-xi xii-í:

—Néhe ná quíhí<sup>n</sup>-ó dānehé ñāhā-í xii-n nchāa trūndóho sá ndóhó ñādhí ñāha ndécú ichi díí iní, te ñāha-án cūnúu-a<sup>n</sup> nucóo-a<sup>n</sup> núú ñúhú vihi ndute. <sup>2</sup> Te ñāha-án ndécú díí iní-a<sup>n</sup> ndihí nchaa cue téé yindaha ñāha xii ñáyiú xindecu ñihí ñuyú, te nchaa dava-gá ñáyiú ñuyú ío iní-yu nchicú<sup>n</sup> nihnú-yu quidé-yu nchaa nācuāa quide ñāha-án —duha càchí espíritú-án.

<sup>3</sup> Te órē duca<sup>n</sup> quide ñaha Espíritú Yá Ndióxi xii-í nācuāa càchí iní-xi, te ñí<sup>n</sup> espíritú xínú cuèchi núú-gá ndécá ñāha-xi xii-í cuáhā<sup>n</sup> ñí<sup>n</sup> xítí yucu, te xítí yucu-án ní xíní-í ñí<sup>n</sup> ñādhí yódó-án ñí<sup>n</sup> quiti ticuehé, te ndéé úsá díquí-di te úxí ndiqui-di, te ñihí-di ndéé truní-di mee-ni tñúhu sá càhá<sup>n</sup> úhú cuèndá Yá Ndióxi. <sup>4</sup> Te ñādhí-án nihnú-án dóo muradá ndihí dóo tícuéhé, te mee-ni sá ní cuāha díhú<sup>n</sup> cuāá<sup>n</sup>, ndihí yúú vāha sá nání pērlá, ndihí nchaa dava-gá núú yúú vāha, mee-ni nchāa xíā<sup>n</sup> ní cuāha sá yíhí lōho-a<sup>n</sup>, ndihí sá ñúhú dúcú<sup>n</sup>-a<sup>n</sup>, ndihí sá ñúhú dúcú<sup>n</sup> ndāhá-án, te nūndaha-a<sup>n</sup> ñí<sup>n</sup> tícúú ní cuāha mee-ni díhú<sup>n</sup> cuāá<sup>n</sup> te ñúhu mee-ni sá cuèhé sá dúhá, te xíā<sup>n</sup> cūtnūni iní-ó sá cúú-án ñí<sup>n</sup> ñādhí ñāha ndécú ichi cuèhé ichi duha. <sup>5</sup> Te tneé-a<sup>n</sup> ndéé truní ñí<sup>n</sup> tñúhu, te càchí-xi: “Núú Babiloniá ñuú ío cūnuu, cada iní-ndó sá cúú-xí mèi ñādhí-a, te diu ñādhí-a cūu-a<sup>n</sup> ñāha sanu ichi ñāha xii nchaa ñáyiú díhí ñáyiú ndécú ichi díí iní, te nāndi-gá nchaa sá cuèhé sá dúhá sànu ichi-a<sup>n</sup> nchaa ñáyiú cadá-yu”, duha càhá<sup>n</sup> tñúhu ndéé truní tneé ñādhí-án. Te vā yōo tēcú truní ná cuèndá duca<sup>n</sup> càhá<sup>n</sup> tñúhu-án. <sup>6</sup> Te ní cūtnūni iní-í sá díú ñāha-án ní dácáá-án ñíñi ñáyiú cūu cuèndá Yá Ndióxi ní sahní ñāha-a<sup>n</sup> xii-yu, te ñáyiú ní xihí-án cúú-yu ñáyiú ní cáhá<sup>n</sup> vāha cuèndá Xitohó Jesucristú, te sá dúcá<sup>n</sup> ní quide-a<sup>n</sup> te ní nduu-a<sup>n</sup> dàtná ñí<sup>n</sup> ñáyiú quihu. Te ío ní cuñúhu-í sá dúcá<sup>n</sup> ní cuu ní xíní-í.

<sup>7</sup> Te sáta dúcá<sup>n</sup> te espíritú xínú cuèchi núú Yá Ndióxi-án càchí tucu-xi xii-í:

—Vá ndéé dúcá<sup>n</sup> cūñúhu-n, chí vitna na càchí tñúhu-í xii-n nācuāa quée-xi cuèndá quiti ndéé úsá díquí-xi ndihí úxí ndiqui-xi-án, ndihí nācuāa quée-xi cuèndá ñādhí ñāha yòdo ñāha xii-di-án. <sup>8</sup> Te quiti ní xíní-n-án cúú-dí ñí<sup>n</sup> quiti sa ní xindecu te vitna ñā túú-gá-di ndécú, te sáá nduu te quene-di yaú cūnú vihi sá ío néhé cáá, te dàtnūni sáá nduu te quíhí<sup>n</sup>-di núú úhú núú ndāhú ní caa ní quíhí<sup>n</sup>, te cue ñáyiú xindecu ñuyú cuñúhu vihi-yu quiti-án chí cūu-dí ñí<sup>n</sup> quiti sa ní xindecu ní cūu te sáá nduu cūndecu tucu-di, te ñáyiú duca<sup>n</sup> cūñúhu ñāha xii-di-án ñā tūú yòdo truní-yu núú tūtú núú yódó truní cue ñáyiú nanihí tāhú, chí ndéé cūtnāhā vátá ngáva-gá ñuyú duca<sup>n</sup> sa yòdo truní cue ñáyiú nanihí tāhú.

<sup>9</sup> Te nchaa ñáyiú tēcú truní xini ñúhu-xi caní vāha iní-yu cuèndá tñúhu-a. Te ndi úsá díquí quiti-án cada iní-ó sá cúú-xí úsá tindúú núú núcōo ñādhí-án. <sup>10</sup> Te ndi úsá díquí quiti-án cada iní-ó sá cúú-xí úsá tñāhá cue téé yindaha ñāha xii ñáyiú, te úhú<sup>n</sup> cue téé-án ñā tūú-gá cūnúu-güedé vitna, te ñí<sup>n</sup> téé-án cūnúu-dé vitna te ingá-dé vátá sàá-gá nduu cūnuu-dé, te na sáá nduu dùca<sup>n</sup> cūnuu-dé te sacú-ni nduu cūnuu-dé. <sup>11</sup> Te quiti ní xindecu ní cūu te ñā tūú-gá-di ndécú vitna, cūu-di dàtná téé cūu uná yindāha ñāha xii ñáyiú, te ñí<sup>n</sup>-ni cūu-di ndihí cue téé úsá yindāha ñáyiú-án, te quiti-án sáá nduu cuíta nihnu-di quíhí<sup>n</sup>-di núú úhú núú ndāhú ní caa ní quíhí<sup>n</sup>.

<sup>12</sup> Te ndi úxí ndiqui quiti-án cada iní-n sá cúú-xí úxí tñāhá cue téé quindaha ñāha xii ñáyiú, dico vátá sàá-gá nduu cūnuu-güedé quindaha ñāha-güedé xii-yu. Te cue téé-án ñihí-güedé tñúhu ndee iní taxi truní-güedé ndihí quiti-án, dico tnaa-ni taxi truní-güedé ndihí quiti-án. <sup>13</sup> Te ndi úxí cue téé-án cuu ñí<sup>n</sup>-nuu-güedé taxi truní-güedé, te chindee-güedé quiti-án cuèndá cuu ñí<sup>n</sup>-nuu-güedé ndihí-di cuèndá taxi truní-gá-di. <sup>14</sup> Te cue téé-án nāá-güedé ndihí Yaá cáá dàtná cáá ñí<sup>n</sup> mbéé quiti ní dānicuèhé-güedé dico vā ndácú-güedé nāá-güedé ndihí-gá chí cuíta-güedé. Te diu-gá cúú-gá Yaá ío cūnuu taxi truní cuéi nchaa téé yindaha ñāha xii ñáyiú, te duca<sup>n</sup>-ni taxi truní-gá cuéi nchaa dava-gá-yu. Te mee Yá Ndióxi ní cachí-gá nāndi cūu nchaa ñáyiú cūndecu ndihí Yaá cáá dàtná cáá ñí<sup>n</sup> mbéé quiti ní dānicuèhé-güedé-án, te diu-ni ñáyiú-án cúú-yu ñáyiú ní cáhá<sup>n</sup>-gá te cúú-yu ñáyiú quide ndāá ndécú ichi-gá —duha càchí espíritú xínú cuèchi núú-gá.

<sup>15</sup> Te ní cachí tucu espíritú-án xii-í:

—Ndute ñuhu núú núcõo ñadihí ñaha ndècu ichi díí ñí-án, ndute-án cada ñí-ñ sá cúú-xí ñáiyu nchaa ñació<sup>n</sup>, ndihí ñáiyu nchaa ñuú, ndihí ñáiyu xĩndecu nchaa xichí, ndihí ñáiyu càhá<sup>n</sup> ndí díí<sup>n</sup> ndí díí<sup>n</sup> núú tnúhu. <sup>16</sup> Te dàtná ní cachí-í sá ndí uxi ndiqui quiti ní xini-ñ cúú-xí úí tnàhá cue téé quindaha ñaha xii ñáiyu, te cue téé-án cuu úhú ñí-güedé ñadihí ñaha ndècu ichi díí ñí-án, te ni vâ cáda cuendá ñáhá-gá-güedé xii-án, te ndada ndàhu ñáhá-güedé, te dacàchi ñaha-güedé xii-án, te cahmí ñaha-güedé. <sup>17</sup> Te mee Yá Ndióxi duca<sup>n</sup> dàcahá<sup>n</sup>-gá ñí cue téé-án cuendá cada-güedé ñacuáa cuní méé-gá, te xiá<sup>n</sup> núu cuu ñí<sup>n</sup>nuu-güedé cuendá cúnaha-güedé xii quiti-án cada-di núú-güedé taxi tnúni-di ndéé ná sáá nduu càda Yá Ndióxi ñacuáa ní cachí-gá. <sup>18</sup> Te ñadihí ñaha ní xini-ñ cada ñí-ñ sá cúú-án ñuú cáhnú ñuú ío cúnuu, te ñuú-án ndécú téé ío-gá cúnúu taxi tnuní nchaa cue téé yindaha ñaha xii ñáiyu xĩndecu ñuyú —duha ní cachí espíritú xínú cuèchi núú Yá Ndióxi xii-í.

**18**

*Ní naa ñuú Babiloniá*

<sup>1</sup> Te duca<sup>n</sup> te dàtnúni ní xini tucu-í ingá espíritú xínú cuèchi núú Yá Ndióxi, te ndéé andiu ní dátasa<sup>n</sup>-xi te ní dayèhé-xi ñuyú, te espíritú-án ío cúnuu-xi. <sup>2</sup> Te ñíhi ní cáhá<sup>n</sup>-xi, te cachí-xi:

—Ní sáá nduu nàa ñuú cáhnú ñuú cúnúu nani Babiloniá, te xiá<sup>n</sup>-ná natacá nchaa núú espíritú cundihí yucu ñávaha cundecu-xi, te vâ queé-gá-xi xiá<sup>n</sup>, te diu-ni xiá<sup>n</sup> natacá nchaa quiti ndàva núú tàchi nchaa quiti ndehe quide, quiti ñá túú tnàhá ñí ñáiyu te xiá<sup>n</sup>-ná cundecu-güedé. <sup>3</sup> Te duca<sup>n</sup> chí ñáiyu ñuú-án sánú ichí-yu nchaa ñáiyu nihí ñuyú ichi cuèhé ichi duha, te duca<sup>n</sup>-ni xĩnchícú<sup>n</sup> nihnu nchaa ñáiyu ñuyú xiquidè-yu, te nchaa cue téé cúnuu yindaha ñaha xii ñáiyu, cue téé-án cúú ñí<sup>n</sup>nuu-güedé ndihí nchaa ñáiyu ñuú-án quidè-güedé ndihí-yu nándi sá cuèhé sá dúhá. Te nchaa ñáiyu dico nándi sá dicó quehe<sup>n</sup> ñáiyu ñuú-án ío cùu cuicá-yu, te duca<sup>n</sup> quèhe<sup>n</sup> nchaa ñáiyu ñuú Babiloniá-án nchaa sá dicó ñáiyu-án cuendá xiá<sup>n</sup> cànehé-yu ndécú-yu ichi cuèhé ichi duha —duha càchi espíritú-án.

<sup>4</sup> Te sátá dúcá<sup>n</sup> te ní tecú dóho-í ní cáhá<sup>n</sup> ñí sá ní cáhá<sup>n</sup> andiu, te càchi-xi:

—Nchaa nchòhó ñáiyu cùu cuendá-í quee-ndo ñuú Babiloniá cuendá sá vâ cundècu-ndo tnahá-ndó ichi cuèhé ichi duha dàtná ndécú ñáiyu ñuú-án, te duca<sup>n</sup> te vâ quini-ndó tnúndòho tnúhu ndàhú sá quixí cùu xii ñáiyu-án. <sup>5</sup> Chi ío cuèhé cuèchi-yu ní cuu ndècu núú Yá Ndióxi, te mee-gá ñáhá-gá ñacuáa nduu nchaa sá

quidè-yu. <sup>6</sup> Te nchòhó ñáiyu cùu cuendá-í, chí nanchòcáva dandòho-ndo ñáiyu-án dàtná quidè mèe-yu dandòhó-yu cue ñáiyu, te úú xito nanchòcáva-ndo dandòho-ndó-yu, te duca<sup>n</sup> càda-ndo cuendá ío-gá ndohó-yu. <sup>7</sup> Te ío quide cahnú-yu mèe-yu, te ío cùdíí ñí-yu quidè-yu nchaa núú sá cuèhé sá dúhá, te sá dúcá<sup>n</sup> xidó-yu quidè-yu nchaa sá cuèhé sá dúhá núu xiá<sup>n</sup> nchòhó ío dandòho-ndó-yu, te duca<sup>n</sup> chí ñáiyu ñuú-án sání ñí-yu, te càchi-yu: “Nchúhú cúú-ndí dàtná ñí ñadihí ñá túú quèé, ñaha ío cúnuu yindaha ñaha xii ñáiyu. Te duca<sup>n</sup> sátnahá-xi cùu-ndí chí nchaa-ni nduu ío váha cùu ñí-ndí ndécú-ndí, te ni vâ sáá ñí<sup>n</sup> nduu te ndihú ñí-ndí”, duha càchi ñáiyu ñuú-án. <sup>8</sup> Te sá cuendá nchaa sá quidè-yu-án núu xiá<sup>n</sup> ñí<sup>n</sup>-ni nduu sáá tnúndòho sá cúú-xi-yu, te ío ndohó-yu chí ñuú-yu coo tnamá, te coo cuèhé cahní ñaha-xi xií-yu, te ío ndihú ñí-yu, te cáyú ñuú-yu, te duca<sup>n</sup> ndòhó-yu chí Dútú Ndióxi ío cúnuu-gá, te diu-gá duca<sup>n</sup> dandòho ñaha-gá xií-yu —duha càchi sá ní cáhá<sup>n</sup> andiu-án.

<sup>9</sup> Te nchaa cue téé cúnuu yindaha ñaha xii ñáiyu ío ndáhyú-güedé sá ndihú ñí-güedé òré ná quini-güedé quene ñúhmá cáyú ñuú cue ñáiyu Babiloniá, chí diu cue téé-án cúú-güedé cue téé cùu ñí<sup>n</sup>nuu ndihí-yu quide-güedé nchaa núú sá cuèhé sá dúhá ndihí-yu, te duca<sup>n</sup> chí ío tnàhá ñí-güedé cundecu-güedé ndihí-yu ichi díí ñí. <sup>10</sup> Te cue téé-án xica-ná cundecu-güedé cundehe-güedé ñacuáa ndoho nchaa ñáiyu ñuú-án sá yùhú-güedé nchaa tnúndòho-án, te cachí-güedé:

—¡Ndàhú nchòhó ñáiyu ñuú cáhnú ñuú cúnúu nani Babiloniá! Chi uu<sup>n</sup> ní sáá nchaa tnúndòho tnúhu ndàhú sá cúú-xi-ndó —duha cachí-güedé.

<sup>11</sup> Te nchaa ñáiyu dico nchaa sá nándihí ñáiyu ñuú Babiloniá tnahá-yu ío ndáhyú-yu sá ndihú ñí-yu chí vâ yò-gá cuaa<sup>n</sup> nchaa sá dicó-yu. <sup>12</sup> Te dicó-yu nchaa sá ní cuáha mee-ni díhú<sup>n</sup> cuáa<sup>n</sup>, ndihí nchaa sá ní cuáha mee-ni díhú<sup>n</sup> cuixí<sup>n</sup>, te dico tucú-yu sá ní cuáha mee-ni yúú váha yúú nání pèrlá, ndihí nchaa dava-gá sá ní cuáha dava-gá yúú váha, te dicó-yu tnàhá dóó sedá, ndihí ingá núú dóó váha sá nání ñí<sup>n</sup>, ndihí dóó murádú, ndihí dóó tícuèhé te mee-ni dóó váha cùu-xi, te dico tucú-yu tnàhá yutnu sá sàhá<sup>n</sup> tnámí, te dico tucú-yu sá ní cuáha sá nání màrfil, te dico tucú-yu sá ní cuáha mee-ni yutnu váha sá ío ndèyáhu, te dico tucú-yu sá ní cuáha mee-ni cáá, ndihí sá ní cuáha mee-ni sá nání bròncé, ndihí sá ní cuáha mee-ni yúú váha yúú nání màrmól. <sup>13</sup> Te dico tucú-yu canelá, ndihí yúcú sá sàhá<sup>n</sup> tnámí, ndihí dúsa sá sàhá<sup>n</sup> tnámí, ndihí

yúcu sã nání mĩrà, te dico tucú-yu ingá núú dũsa sã sahá<sup>n</sup> tnámí nání olivánú, te dico tucú-yu ndudí ndéhé yoho yàha stilé, ndihí acití yutnu nání olivú, ndihí yuchi triú vaha, te dico tucú-yu nchaa dava-gá núú triú, te dico-yu tnàhá mbéé, ndihí cuàyú, ndihí nchaa dava-gá quití tatá, te dico tucú-yu tnàhá carrètá, te dico tucú-yu tnàhá ñáyíu xĩnu cuechi, ñáyíu ñá túú tnàhí dàñá quee núú chíú<sup>n</sup> pàtróó<sup>n</sup>-xi. <sup>14</sup> Te nchaa ñáyíu dı̀co-án cũñahá-yu xii ñáyíu ñúú Babiloniá:

—jNchaa sã ı̀o cùdíí ı̀nı̀-ndó cùndecu ndihı̀-ndo ni cuu vá ndácú-gã-ndó nihı̀-ndó vitna, te nchaa sã sání ı̀nı̀-ndó sã ı̀o vaha càa ndecu ndihı̀-ndo ndihı̀ nchaa dava-gá sã ndécú ndihı̀-ndo ní ndihı̀ nihnu-xi vitna, te ni ı̀nı̀ nduu-gá vá nihı̀-ndó ni ı̀nı̀ xiã<sup>n</sup> cundecu ndihı̀-ndo! —duha cũñaha ñáyı̀u-án xii-yu.

<sup>15</sup> Te nchaa ñáyı̀u ní cuu cuica nı̀ xóo dico nándı̀ nchaa sã nı̀ xóo dico ní quehe<sup>n</sup> cue ñáyı̀u ñúú Babiloniá, nchaa ñáyı̀u-án xica-nã cundecú-yu cundehé-yu sã yũhú-yu cuendá nchaa tnúndóho sã yaha cue ñáyı̀u ñúú-án, te ı̀o ndáhyú-yu sã ndihú ı̀nı̀-yu sã dúcá<sup>n</sup> ndòho ñáyı̀u-án. <sup>16</sup> Te cũñaha tucú-yu:

—jNdáhú nchòhó ñáyı̀u xĩndecu ñúú cáhnú ñúú nání Babiloniá! Chı̀ nchòhó cúú-ndó dàtná ı̀nı̀ ñadihı̀ ñaha nihnu dóó vaha dóó muradú, ndihı̀ dóó tícuéhé, te mee-ni sã nı̀ cuáha díhú<sup>n</sup> cuáá<sup>n</sup>, ndihı̀ mee-ni sã nı̀ cuáha yúú vaha yúú nání pèrlá, ndihı̀ sã nı̀ cuáha dava-gá yúú vaha sã ı̀o vii ndaa mee-ni nchaa xiã<sup>n</sup> nı̀ cuáha sã yíhı̀ lõho-án, ndihı̀ sã ñúhú dúcú<sup>n</sup>-án, ndihı̀ sã ñúhú dúcú<sup>n</sup> ndáhá-án. <sup>17</sup> jTe uu<sup>n</sup>ı̀ ní ndihı̀ nihnu nchaandi túhú sã ndécú ndihı̀ ñadihı̀-án, te duca<sup>n</sup> sãtnahá-xi cùu nchohó nı̀ cùu! —duha cũñahá-yu xii cue ñáyı̀u ñúú Babiloniá.

Te nchaa cue tée dàcaca barcú ndihı̀ nchaa cue tée tàxi tnunı̀ bãrcú-án, ndihı̀ nchaa ñáyı̀u ñúhu xitı̀ bãrcú-án, ndihı̀ nchaa dava-gá cue tée nándı̀ chiú<sup>n</sup> quide ndecu lamár, nchaa ñáyı̀u-án xica cùndecú-yu <sup>18</sup> te quinı̀-yu óre queene ñúhmá càyú ñúú cue ñáyı̀u Babiloniá, te nihı̀ cáhá<sup>n</sup>-yu, te cachı̀-yu:

—Ni ı̀nı̀ ñúú ñá túú nũtnahá-xi ñúú Babiloniá —duha cáhá<sup>n</sup>-yu.

<sup>19</sup> Te nchaa ñáyı̀u-án chidó-yu ñúhu díquı̀-yu, te ngúita-yu ndáhı̀-yu sã ndihı̀ ı̀nı̀-yu, te nihı̀ cáhá<sup>n</sup>-yu, te cachı̀ tucú-yu:

—jNdáhú nchòhó ñáyı̀u xĩndecu ñúú cáhnú ñúú nání Babiloniá! Chı̀ ı̀o cuica-ndo ni cùu, te diu-ndo ní quide ní cuu cuica nchaa ñáyı̀u ndecu ndihı̀ barcú, te vitna uu<sup>n</sup>ı̀ ní naa-ndo ndihı̀ ñúú-ndó —duha cachı̀-yu.

<sup>20</sup> Te nchaa nchòhó ñáyı̀u ndècu andı̀u ı̀o chí cùdíí ı̀nı̀ sã dúcá<sup>n</sup> dândoho Yá Ndióxi nchaa ñáyı̀u ñúú Babiloniá-án, te diu-ni duca<sup>n</sup> chí cùdíí ı̀nı̀ nchaa nchòhó cue tée ní cachı̀ Xitohó Jesucristú cáhá<sup>n</sup> tnúhu-gá, te

diu-ni duca<sup>n</sup> chí cùdíí ı̀nı̀ nchaa nchòhó cue tée cáhá<sup>n</sup> tnúhu Yá Ndióxi nácuáa dàcahu ı̀nı̀ ñáhá-gã xii-ndo, te diu-ni duca<sup>n</sup> chí cùdíí ı̀nı̀ nchaa dava-gá nchòhó ñáyı̀u cùu cuendá-gã cuendá sã dúcá<sup>n</sup> dândoho-gã nchaa ñáyı̀u ñúú-án. Te duca<sup>n</sup> càa ñaha-gã xii cue ñáyı̀u-án cuendá nchaa sã quidé ñáhá-yu xii-ndo.

<sup>21</sup> Te sátá dúcá<sup>n</sup> te ní xinı̀-ı̀ ı̀nı̀ espı̀ritú xinú cuèchi núú Yá Ndióxi, te espı̀ritú-án ı̀o ndee-xi te ní quehe<sup>n</sup>-xi ı̀nı̀ yúú cáhnú dàtná càhnu yódó te ní dàquèe-xi xitı̀ ndute lamár, te cãchı̀-xi:

—Dàtná ní quide-ı̀ ní dàquèe-ı̀ yúú xitı̀ ndute duca<sup>n</sup> càda-xi ñúú cáhnú ñúú Babiloniá, chi ñáyı̀u ñúú-án ı̀o ndihı̀ naá-yu ndihı̀ ñúú-yu, te vá ı̀nı̀ nduu ı̀nı̀ quı̀ú-gã quinı̀ ñáhá ñáyı̀u xii-yu. <sup>22</sup> Te ni ı̀nı̀-ğã ñáyı̀u càni arpá, te ni ı̀nı̀-ğã ñáyı̀u tı̀ú vı̀lu, te ni ı̀nı̀-ğã ñáyı̀u tı̀ú cútú, te ni ı̀nı̀-ğã yaá vá cóó ñúú-án, te ni ı̀nı̀-ğã cue ñáyı̀u xinı̀ cada ı̀nı̀ núú chiú<sup>n</sup> vá cóó-gã, te ni vã yóo-gã caneche chiú<sup>n</sup> yúú cúú yódó mulinú. <sup>23</sup> Te ni ı̀nı̀-ğã ñúhú vá cùndecu ñúú-án, te ni ı̀nı̀ nduu-gá vá cóó vı̀co tnándaha, te ñáyı̀u ñúú-án ñáyı̀u quide ndáhú cúú-yu ñáyı̀u ı̀o-gã cuicá-yu dàcúúxi ñáyı̀u quide ndáhú xĩndecu nihı̀ ñuyı̀ú, dico nchaa-yu naá-yu chí quide ndúú-yu te ı̀o dándahú-yu cue ñáyı̀u ñuyı̀ú sã dúcá<sup>n</sup> quidé-yu.

<sup>24</sup> Te diu-ni ñúú-án nı̀ dàcãcá-yu nı̀hı̀ cue tée ní cáhá<sup>n</sup> tnúhu Yá Ndióxi, te diu-ni duca<sup>n</sup> ní quidé-yu nchaa dava-gá cue ñáyı̀u cùu cuendá-gã, te diu-nı̀-yu quide xısahni tnàha ñáyı̀u ñuyı̀ú —duha cãchı̀ espı̀ritú-án.

**19**

<sup>1</sup> Te sátá dúcá<sup>n</sup> te ní tecú dóho-ı̀ nihı̀ ní cáhá<sup>n</sup> cuèhé vı̀hı̀ ñáyı̀u andı̀u, te cãchı̀-yu:

jı̀o càhnu cuu Yá Ndióxi!, chí diu-gã cúú-gã Yaá ní dàcãcu nihnu ñaha xii-o núú ùhú núú ndáhú, te ı̀o cùnuu-gã, te mee-ni sã vaha quide-gã,

<sup>2</sup> te mee-gã ı̀o vaha ndáá quidé-gã quidé ndáá-gã cuèchi nchaa ñáyı̀u,

chı̀ diu-gã ní dàquihı̀<sup>n</sup>-ğã ñadihı̀ ñaha ndècu ichı̀ díí ı̀nı̀ núú ùhú núú ndáhú,

chı̀ diu-a<sup>n</sup> ní sanu ichı̀-a<sup>n</sup> ñáyı̀u ñuyı̀ú ichı̀ cuèhé ichı̀ duha,

te duca<sup>n</sup> ní dàquihı̀<sup>n</sup> ñáhá-gã xii-a<sup>n</sup> núú ùhú núú ndáhú chí nãchinaa-gã sã nı̀ sahni-a<sup>n</sup> cue ñáyı̀u ní xinú cuechi núú-gã.

Duha cãchı̀-yu.

<sup>3</sup> Te cãchı̀ tucú-yu:

—jı̀o càhnu cuu Yá Ndióxi!, chí nchaa nduu nchaa quı̀ú duca<sup>n</sup>-ni quène ñúhmá núú ñúhú ñàha-án càyú-a<sup>n</sup> —duha cãchı̀-yu.

<sup>4</sup> Te ndı̀ ócò cùmı̀ cue tée cùu sacuéhé xĩndecu-án nı̀ ngúı̀ñı̀ xitı̀-ğüedé núú Yá Ndióxi núú núcòo-gã tàxi tnunı̀-gã, te tnàhá cue

quiti cúmi x̄nutn̄í-á<sup>n</sup> ní ngüíñi x̄iti-güedé ndihi cue quiti-á<sup>n</sup>;

–Sá ndáá sá ío càhnu cuu Yá Ndióxi –duha càchí-güedé ndihi cue quiti-á<sup>n</sup>.

<sup>5</sup> Te sáta dúcá<sup>n</sup> te ní tecú dóho-í ní cáhá<sup>n</sup> ñ<sup>n</sup> sá ní cáhá<sup>n</sup> mei núú n̄tñí x̄ilé váha núcòo Yá Ndióxi, te càchí sá cáhá<sup>n</sup>-á<sup>n</sup>;

Nchaa nchòhó ñáyiú x̄inu cuechi núú Yá Ndióxi, ñiú-ni nchòhó ñáyiú nèhe sá ȳññuhu núú-gá,

cáhá<sup>n</sup>-ndo sá ío càhnu cuu-gá cuèi cùnunu-ndo àdi ñá túú cùnunu-ndo.

Duha càchí sá cáhá<sup>n</sup>-á<sup>n</sup>.

*Ñi vico cùu datná vico tnãndaha*

<sup>6</sup> Te sáta dúcá<sup>n</sup> te ní tecú dóho-í ní cáhá<sup>n</sup> cuèhé víhi ñáyiú andiú, te òré duca<sup>n</sup> ní cáhá<sup>n</sup>-yu te ní quide-xi datná quidé-xi núú x̄icá cuèhé víhi ndüte, te ní quide tucu-xi datná quidé-xi òré cáhá<sup>n</sup> níhi víhi ññuhu, te càchí-yu:

Ío càhnu cuu Dútú Ndióxi Yáa cúú Tãtá-ó! Te ío cùnunu-gá táxi tn̄n̄i-gá, te quide-gá nchaandi túhú sá váha.

<sup>7</sup> Te ío chí ná cùd̄íí iní-ó, te chí ná càchí-ó sá ío càhnu cuu Yá Ndióxi,

chi vitna ní sáá nduu càda Yáa cáá datná cáá ñ<sup>n</sup> mbéé quiti ní d̄añicuehé-güedé ñ<sup>n</sup> vico, te cùu-xi datná vico tnãndaha.

Te nchaa ñáyiú cùu cuendá-gá sa ní ndihí-yu sa ndécu túha-yu cundecú-yu vico-á<sup>n</sup>, te cada iní-ó sá ñáyiú-á<sup>n</sup> cùu-yu datná ñ<sup>n</sup> ñad̄ihí x̄ichí tnãndaha ndihi-gá,

<sup>8</sup> te ñáyiú-á<sup>n</sup> ní nduu táhū-yu cuihnū-yu dóó váha dóó chàhñchí sá ío váha càndoo.

Duha càchí-yu.

Te sá dúcá<sup>n</sup> ní nduu táhū ñáyiú cùu cuendá Yá Ndióxi dóó váha ñihñu-yu, x̄iá<sup>n</sup> cùtn̄n̄i iní-ó sá cùu-yu ñáyiú quide ndáá núú-gá.

<sup>9</sup> Te ñ<sup>n</sup> esp̄iritú x̄ínú cuèchi núú Yá Ndióxi ní cachí tn̄hu-xi x̄ii-í, te càchí-xi:

–Chido tn̄n̄i-n ñ<sup>n</sup> núú tútú n̄acuáa na cáhá<sup>n</sup>-í-a: “Váha táhū nchaa ñáyiú ní cáhá<sup>n</sup> ñáhá Yáa cáá datná cáá ñ<sup>n</sup> mbéé quiti ní d̄añicuehé-güedé cundecú-yu vico, te vico-á<sup>n</sup> cúú-xi datná vico tnãndaha cada-gá”, te duha chido tn̄n̄i-n chí tn̄hu-a cùu-xi tn̄hu ndáá tn̄hu Yá Ndióxi –duha càchí esp̄iritú-á<sup>n</sup>.

<sup>10</sup> Te ní ngüíñi x̄iti-í núú esp̄iritú-á<sup>n</sup> cuendá chíñuhu-í-xi ní cùu, te ní cachí-xi:

–Vá dúcá<sup>n</sup> càda-n, chí tnãhá-í d̄icò x̄ínú cuèchi-í núú Yá Ndióxi datná quidé-n x̄inu cuechi-n núú-gá ndihi nchaa dava-gá ñáyiú ndécu ndihí-n ichi-gá, ñáyiú nchicú<sup>n</sup> ñihnu quide ní yuhu ní iní nchaa n̄acuáa cáhá<sup>n</sup> X̄itohó Jesucristú, te núu x̄iá<sup>n</sup> càchí-í sá vá dúcá<sup>n</sup> càda-n, chí mee Yá Ndióxi chíñuhu-n –duha càchí esp̄iritú-á<sup>n</sup>.

Te nchaa cue tée cáhá<sup>n</sup> tn̄hu Yá Ndióxi cáhá<sup>n</sup>-güedé n̄acuáa ndùu tn̄hu cáhá<sup>n</sup> X̄itohó Jesucristú.

*Cuendá Yáa yódó ñ<sup>n</sup> cuayú cuixí<sup>n</sup>*

<sup>11</sup> Te ní x̄ini-í nchii andiú, te ní x̄ini-í ní quee ñ<sup>n</sup> Yáa yódó-gá ñ<sup>n</sup> cuayú cuixí<sup>n</sup>. Te Yáa-á<sup>n</sup> n̄ani-gá Yáa quidé ndáá quiti, duha n̄ani-gá. Te quide-gá nchaa sá cáhá<sup>n</sup>-gá, te ío váha quide ndáá-gá cuèchi nchaa ñáyiú, te nchaa ñáyiú nàá ndihi ñaha x̄ii-gá ío váha x̄ini-gá n̄acuáa cada ñaha-gá x̄ii-yu chí ío ndáá quidé-gá. <sup>12</sup> Te tn̄nu-gá d̄ayéhé-xi datná d̄ayéhé ññuhu, te titní coroná ññuhú d̄iquí-gá, te nèhe-gá ñ<sup>n</sup> sá ndèé ññu-gá, te vá yóo ñ<sup>n</sup> cùtn̄n̄i iní-xi n̄asa cuáhá<sup>n</sup> tn̄hu-á<sup>n</sup>, chí ñ<sup>n</sup> d̄ii díí-ni mee-gá ñáhá-gá n̄acuáa cáhá<sup>n</sup>-xi. <sup>13</sup> Te Yáa-á<sup>n</sup> ñihñu-gá ñ<sup>n</sup> dóó ní cuu mee-ni ññí, te Yáa-á<sup>n</sup> càchí tn̄hu-gá nchaa n̄acuáa s̄ani iní Yá Ndióxi, núu x̄iá<sup>n</sup> n̄ani-gá Tnúhu Yá Ndióxi. <sup>14</sup> Te sáta-gá nchicú<sup>n</sup> nchaa esp̄iritú x̄ínú cuèchi núú Yá Ndióxi, te cue esp̄iritú-á<sup>n</sup> cúú-xi datná sandadú, te x̄ix̄ihnu-xi dóó cuixí<sup>n</sup> dóó váha sá càndoo, te x̄ix̄odó-xi cuayú cuixí<sup>n</sup>.

<sup>15</sup> Te yuhu Yáa yódónu-á<sup>n</sup> quené ñ<sup>n</sup> yuchi cáhnú, te ndihi yuchi-á<sup>n</sup> d̄añicuehé-gá nchaa ñáyiú x̄iñdecu ñuyíú, te ío dandòho ñaha-gá x̄ii-yu, te datná quidé tée quihni ndéhé yoho yáha stilé duca<sup>n</sup> s̄atnahá-xi cada ñaha-gá x̄ii-yu, chí ío dandòho ñaha-gá x̄ii-yu cuendá sá ío cùd̄éé<sup>n</sup>-gá. Te mee-gá ío cùnunu-gá táxi tn̄n̄i-gá, te quide-gá nchaandi túhú sá váha. <sup>16</sup> Te sáta dóó ñihñu Yáa-á<sup>n</sup> ndihi núú ticacá<sup>n</sup>-gá yódó tn̄n̄i n̄acuáa n̄ani-gá, te duha cáhá<sup>n</sup>-xi: “Tée ío cùnunu taxi tn̄n̄i ñáhá x̄ii nchaa cue tée yindaha ñaha x̄ii ñáyiú ndihi nchaa dava-gá ñáyiú”, duha ndèé tn̄n̄i sáta dóó-gá-á<sup>n</sup> ndihi ticacá<sup>n</sup>-gá-á<sup>n</sup>.

<sup>17</sup> Te d̄atn̄n̄i ní x̄ini-í ñ<sup>n</sup> esp̄iritú x̄ínú cuèchi núú Yá Ndióxi n̄tñí-xi núú nchicanchii, te níhi ní cáhá<sup>n</sup>-xi, te x̄aha<sup>n</sup>-xi x̄ii nchaa quiti ndava núú tàchí:

–Nchaa nchòhó quiti ndava, chí táquixi chí caxi-ndo nchaa sá ní quide túha Yá Ndióxi, <sup>18</sup> chí caxi-ndo cuñú nchaa cue tée yindaha ñaha x̄ii ñáyiú, ndihi cuñú nchaa cue tée tàxi tn̄n̄i ñáhá x̄ii cue sandadú, ndihi cuñú nchaa cue tée ío ññí x̄indáa, ndihi cuñú nchaa cuayú, ndihi cuñú nchaa cue tée ní xódó ñaha x̄ii-güedí, ndihi cuñú nchaa dava-gá ñáyiú, ñáyiú ñá túú tn̄hí ní d̄añá quee núú chíú<sup>n</sup> p̄atróo<sup>n</sup>-xi, ndihi cuñú nchaa ñáyiú ní d̄añá ní quee núú chíú<sup>n</sup> p̄atróo<sup>n</sup>-xi, ndihi cuñú nchaa ñáyiú cùnunu, ndihi cuñú nchaa ñáyiú ñá túú cùnunu, te nchaa cuñú-á<sup>n</sup> caxi-ndo –càchí esp̄iritú-á<sup>n</sup> x̄aha<sup>n</sup>-xi x̄ii nchaa quiti-á<sup>n</sup>.

<sup>19</sup> Te sáta dúcá<sup>n</sup> te ní x̄ini túcu-í quiti ní quee x̄iti lámár, ndihi nchaa cue tée yindaha ñaha x̄ii ñáyiú, ndihi nchaa cue tée

cùu sandadú-güedé ní naníhí tñahá-güedé ndihí quiti-án cuendá cuu ì<sup>n</sup>nuu-güedé ndihí-dí nàà-güedé ndihí Yaa yódó cuáyú-án, ndihí nchaa cue espíritu cùú sandadú ndihí-gá. <sup>20</sup> Te cue espíritu cùú sandadú ndihí Yaa-án ní tñi-xi quiti-án, ndihí téé ío dándahú ñáhá xii ñáyíu càchí sá càhá<sup>n</sup> tñúhu Yá Ndióxi te ñá ndáá sá càhá<sup>n</sup>-dé tñúhu-gá, te ñi-ni téé-án ní quide-dé titní núú sá và yóo tñáhí ndàcu cada núú quiti-án. Te sá dúcá<sup>n</sup> ní quide téé-án xiá<sup>n</sup> ní dándahú-dé ñáyíu ní sándáá iní-yu ní quée-yu tñuní quiti-án, te ní chíñuhú-yu sá ní dándácú ñáhá-yu xii-dí, te cue espíritu-án ní dáquee-xi quiti-án núú ñúhú núú ñúhú ázufe càyú-xi, ndihí téé duca<sup>n</sup> dándahú ñáhá xii ñáyíu-án, te xiá<sup>n</sup> cuhu<sup>n</sup> téé-án ndihí quiti-án, te ío ndoho-dé ndihí-dí. <sup>21</sup> Te ndihí yuchí cáhnú sá quéné yùhu Yaa yódó cuáyú-án ní sahní-gá nchaa dava-gá cue téé cündihí quiti-án, te nchaa cue quiti ndáva ní chítú xiti-güedi ní xexi-güedi cuñú nchaa cue téé-án.

**20**

*Úxí cièndú cuía*

<sup>1</sup> Te sátá dúcá<sup>n</sup> te ní xiní-í ì<sup>n</sup> espíritu xínú cuéchi núú Yá Ndióxi ní quee-xi andiu, te nùndaha-xi ndacaá nacaá<sup>n</sup>-xi yèhe ì<sup>n</sup> yaú cùnú víhí núú cündecu sácúhñá, te nùndaha tucu-xi ì<sup>n</sup> cadená cáhnú. <sup>2</sup> Te espíritu-án ní tñi-xi quiti déé<sup>n</sup> nání dragón, te ñi-ni quiti-án cúú-dí mèi yucu ñávàha sá nání sácúhñá, te ñi xiá<sup>n</sup> ní nduu-xi cóo ndéé sanaha. Te espíritu-án ní dácútú ñàha-xi xii-dí, te duca<sup>n</sup>-ni cündutu-dí ndéé xínu úxí cièndú cuía. <sup>3</sup> Te sátá ní dácútú ñàha espíritu-án xii-dí te ní dáquee ñàha-xi xii-dí yaú-án chí ñi yaú-án tàù-dí quée-dí cundecu-dí. Te ní nacadí-xi yuyèhe yaú-án, te ní tee-xi sèyú yuyèhe-án cuendá sá và quéné-gá-dí dándahú-dí cue ñáyíu ñuyíú, te xiá<sup>n</sup> cundedí nihnu-dí ndéé xínu úxí cièndú cuía. Te sátá ná yàha úxí cièndú cuía-án te nandáxi-dí te quene-dí yaú núú ñúhú-dí-án caca cuu tnaa-dí ì<sup>n</sup> úú nduu.

<sup>4</sup> Te dàtnùní ní xiní-í xínutñi titní xilé váha, te xiá<sup>n</sup> xínucóo nchaa ñáyíu ní ngündecu ndihí tñúhu ndee iní cada ndáá cuéchi nchaa ñáyíu, te ní xiní-í xíndecu tñahá cue ñáyíu ní xehndé-güedé dúcú<sup>n</sup>-xi cuendá sá ní càhá<sup>n</sup>-yu tñúhu Yá Ndióxi, ndihí cuendá sá ní càhá<sup>n</sup> váha-yu cuendá Xítóhó Jesucristú. Te ñi-ni ñáyíu-án cúú-yu ñáyíu ñá túú ní chíñuhú-yu quiti ní quene xiti lámár-án, te ní ñá túú ní chíñuhú-yu sá ní dándácú ñáyíu ní natava ñáhá-yu xii-dí, te ní ñá túú ní dañá-yu mèé-yu quée-yu tñuní quiti-án chí ní tñéé-yu te ní ndáhá-yu ñá túú ní dañá-yu quée tñuní-dí. Te ní xiní-í ní ndoto cue ñáyíu-án cuendá tñahá-yu cunúu-yu taxi tñuní-yu ndihí Xítóhó Jesucristú úxí cièndú

cuía. <sup>5</sup> Te dava ñáyíu ní xihí ñá túú ní ndótó-yu, chí ndéé yàha úxí cièndú cuía te dàtnùní ndótó-yu. Te ñáyíu ní xiní-í ní ndoto-án cúú-yu ñáyíu ní ndoto díhna nuu. <sup>6</sup> Te ío váha ní tñahá nchaa ñáyíu ní nduu táhú ní ndoto díhna nuu!, chí cue ñáyíu-án ío cùdiú-yu núú Yá Ndióxi, te nchaa ñáyíu-án và quíhí<sup>n</sup>-yu núú ùhú núú ndàhú, te ñáyíu-án cúú-yu dútú ndécú-yu núú Yá Ndióxi ndihí núú Xítóhó Jesucristú, te ñáyíu-án cunúu-yu dàtná cùnùu Xítóhó Jesucristú, te cunuu ndihí ñahá-yu xii-gá úxí cièndú cuía.

<sup>7</sup> Te sátá ná yàha úxí cièndú cuía-án te sácúhñá quee-xi núú yíndedí nihnu-xi-án, <sup>8</sup> te ngúita tucu-xi dándahú-xi nchaa ñáyíu xíndecu níhí ñuyíú, te cuéi ñáyíu ñuú Góg, te cuéi ñáyíu ñuú Mägóg duca<sup>n</sup> quíhí<sup>n</sup>-xi dándahú ñáhá-xi xii-yu, te datácá-xi nchaa ñáyíu cuendá nàa-yu, te cuéhe víhí-yu dàtná cuéhe ñuhu cùchí lámár. <sup>9</sup> Te nchaa ñáyíu-án tñi-yu ichi quíhí<sup>n</sup>-yu ì<sup>n</sup> ichi sá cuahá<sup>n</sup> núú cáá ì<sup>n</sup> yodo cahnu vihi, te sáa-yu núú xíndecu ñáyíu cùu cuendá Yá Ndióxi, te ñáyíu-án chidócó-yu cue ñáyíu cùu cuendá-gá-án ndihí ñuú-yu, te ñuú-án ío cùu iní-gá, dico mee Yá Ndióxi dangòyo-gá ñuhú cahmí-gá nchaa ñáyíu duca<sup>n</sup> chidoco ñàha xii ñáyíu cùu cuendá-gá-án, te nchaa ñáyíu-án cuú. <sup>10</sup> Te sácúhñá sá dúcá<sup>n</sup> dándahú ñáhá xii ñáyíu chidoco ñàha xii ñáyíu cùu cuendá Yá Ndióxi-án dáquee ñàha-gá xii-xi núú ñúhú núú ñúhú ázufe càyú-xi, te ñi-ni xiá<sup>n</sup> sa ñúhu quiti ní quene xiti lámár, ndihí téé ní dándahú ñáyíu ní xàhá<sup>n</sup>-dè xii-yu sá càhá<sup>n</sup>-dé tñúhu Yá Ndióxi te ñá ndáá sá càhá<sup>n</sup>-dé tñúhu-gá, te xiá<sup>n</sup> cuhu<sup>n</sup>-xi ndoho-xi ní caa ní quíhí<sup>n</sup> ndihí quiti ní quene xiti lámár, ndihí téé càchí sá càhá<sup>n</sup> tñúhu Yá Ndióxi te ñá ndáá sá càhá<sup>n</sup>-dé tñúhu-gá.

*Cündáá cuéchi ñáyíu*

<sup>11</sup> Te ní xiní-í nùtñi ì<sup>n</sup> xilé váha xilé cuixí<sup>n</sup>, te núú xilé-án núcòo ì<sup>n</sup> Yaa. Te ndèhe Yaa-án ní ndóñuhú andiu ndihí ñuyíú-a, te duca<sup>n</sup> ní ndóñuhú-xi chí và cündecu-gá-xi. <sup>12</sup> Te sátá dúcá<sup>n</sup> te ní xiní-í nchaa ñáyíu ní xihí ní cùu, ñáyíu cùnuu ndihí ñáyíu ñá túú cùnuu xínutñi-yu núú Yaa núcòo núú xilé váha-án, te Yaa-án cúú-gá Yá Ndióxi, te óré-án ní nandacá nchaa tutú núú yódó tñuní nchaa nàcuáa nduu sá ní quide ì<sup>n</sup> ñáyíu-án, te ní nandacá tucu ingá tutú núú yódó tñuní nchaa ñáyíu ní naníhí táhú, te nchaa ñáyíu ní xihí ní cùu xínutñi-yu núú Yá Ndióxi cundáá cuéchi-yu, te nchaa nàcuáa nduu nchaa cuéchi-yu yódo tñuní núú nchaa tutú-án duca<sup>n</sup> cündáá. <sup>13</sup> Te nchaa ñáyíu ní xihí xiti ndute lámár, ndihí nchaa ñáyíu ní xihí núú ñuhu yichí nchaa ñáyíu-án cundáá cuéchi-yu nàcuáa ní quide-yu ì<sup>n</sup> ñáyíu-yu. <sup>14</sup> Te



vitna te vá cùú-gá ñáiyu chi ñá túú-gá tnúhu xihí, te nchaa ñáiyu ñúhu núú ñúhú núú càyú ñáiyu-án cùú-yu ñáiyu ní xíta nihnu ní caa ní quíhí. <sup>15</sup> Te duca<sup>n</sup> chi nchaa ñáiyu ñá túú yòdo tnuní núú tütú núú yódo tnuní nchaa ñáiyu naníhí tànhú ní dáquee ñaha Yá Ndióxi xii-yu núú ñúhú núú càyú.

**21**

*Andiu sàa ndihi ñuyúú sáa*

<sup>1</sup> Te sáta dúcá<sup>n</sup> te ní xiní-í andiu sàa ndihi ñuyúú sáa, te andiu sá ndécú díhna ndihi ñuyúú sà ndécú díhna ní ndóñhú-xí, te tnàhá lámár ní ndóñhú-xí. <sup>2</sup> Te yúhú té Juáa ní xiní-í ñúú Jerusalén sáa ní quee-xi núú ndécú Yá Ndióxi, te ñúú-án cùú-xí ñúú méé-gá, te ío vii càa chi càa datná cáá ñúú ñadihí xíchí tnándaha. <sup>3</sup> Te ní tecú dóho-í níhi ní cáhá<sup>n</sup> ñúú sá ní cáhá<sup>n</sup> andiu, te cächí-xi:

—Chí cündédóho ñúú tnúhu na càhá<sup>n</sup>-í-a: Yá Ndióxi ndécú ndihi-gá cue ñáiyu vitna, te duca<sup>n</sup>-ná cundecu ndihi ñaha-gá xii-yu, te diú-yu cùú-yu ñáiyu cùu cuendá-gá, te vá ñúú ndúú ñúú quíú-gá te daña ñaha-gá xii-yu. <sup>4</sup> Te mee Yá Ndióxi cada-gá sá ñá túú tnàhí-gá ná caní iní-yu cundecú-yu, te ní vá quini-gá-yu tnúhu xihí, te ní vá quini-gá-yu tnúhu ndáhyú, te ní vá quini-gá-yu tnúhu ndihú iní-xi, te ní vá quini-gá-yu tnúhu cùhú, chi nchaa sá ní xiní-yu ñuyúú díhna vá quini-gá-yu vitna —duha cächí sá ní cáhá<sup>n</sup>-án.

<sup>5</sup> Te Yaá núcòo núú xilé váha-án ní cachí tnúhu-gá xii-í, te cächí-gá:

—Yúhú quidè-í nàcuáa nduu saa nchaa sá cündècu vitna. Te vitna chido tnùn-n ñúú núú tütú nchaa tnúhu sá ní cáhá<sup>n</sup>-í-a, chi nchaa tnúhu-a cùu-xi tnúhu ndáa cuiti —duha cächí-gá.

<sup>6</sup> Te dátñuní ní cachí tnúhu tucu-gá xii-í:

—Sa ní xínu cava nchaa chù<sup>n</sup> ní sani iní-í cada-í, te diu-ni yúhú cùú-í Yaá sa ndècu ndéé cútñahá ní ngáva ñuyúú, te diu-ni-í cundecu-í ní caa ní quíhí. Te nchaa ñáiyu cuní tuha ñaha xii-í te cada iní-yu sá datná ndute cùu-xi sá cuáñaha tànhú-í xii-yu candeca-xi iní-yu ní caa ní quíhí. <sup>7</sup> Te nchaa ñáiyu na cùndee iní yáha nándi sá ná yáha-yu sá cuendá-í, te ñáiyu-án nduu tànhú-yu cundecu váha-yu, te yúhú cuu-í Ndióxi-yu, te duca<sup>n</sup> méé-yu cuú-yu dehe-í. <sup>8</sup> Te nchaa ñáiyu na yúhú ndoho cuendá-í quíhí-yu núú ñúhú núú càyú ndihi ñáiyu ñá túú sàndáá iní ñáhá xii-í, ndihi ñáiyu quide nándi nchaa sá cuèhé sá dáhá, ndihi ñáiyu sàhni tñaha, ndihi ñáiyu ndècu ichi díí iní, ndihi ñáiyu quide nduu, ndihi ñáiyu chifúhu nchaa sá cächí-yu cùu ndióxi ní cadúha cue téé ñuyúú-a, ndihi ñáiyu dàcuandehnde, nchaa ñáiyu duca<sup>n</sup> xiquide-án cuíta nihnú-yu chí quíhí-yu núú ñúhú núú

ñúhú àzufré càyú-xi —duha ní cáhá<sup>n</sup> Yá Ndióxi ní cachí tnúhu-gá xii-í.

*Ñúú Jerusalén sáa*

<sup>9</sup> Te núú úsá espíritú xínehe tícùú ñúhú tnúhu ndòho, te ñúú-xi ní quixi-xi te cächí-xi:

—Taqúixi, te na dànehé ñáhà-í xii-n nchaa ñáiyu cùu cuendá Yaá cáá datná cáá ñúú mbéé quiti ní dánicuehé-güedé, ñáiyu-án cada iní-n sá cùú-yu datná ñúú xíchí cuéchí vitna tnándaha, te duca<sup>n</sup> càda iní-n sá cùú-yu chí cundecú-yu ndihi-gá —duha ní cachí tnúhu espíritú-án xii-í.

<sup>10</sup> Te òré quidè ñaha espíritú Yá Ndióxi xii-í nàcuáa cächí iní-xi, te espíritú néhé tícùú-án ndécá ñaha-xi xii-í cuáasá ñúú tìndúú dúcú<sup>n</sup>, te xíá<sup>n</sup> ní dánèhé núú ñáhá-xi xii-í ñúú Jerusalén te ñúú-án ní quee-xi núú ndécú Yá Ndióxi, te ñúú-án cùú-xí ñúú méé-gá. <sup>11</sup> Te ñúú-án ío càhnu cuu-xi chí duca<sup>n</sup> ío càhnu cuu mee-gá, te dátása<sup>n</sup>-xi datná dátása<sup>n</sup> yúú váha sá nání jáspe yúú cáá datná cáá vidiúú sá tùu ingá xio ndàa sáta-xi. <sup>12</sup> Te ní càndéé yuhu ñúú-án súúni dúcú<sup>n</sup> nchaa sá ñúhú dòco, te nchií úxúú yuyèhe-xi, te ndi tñahá ñúú ñúú yuyèhe-án xíndecu ñúú caa espíritú xínu cuèhí núú Yá Ndióxi. Te ndi tñahá ñúú ñúú yuyèhe-án yódo tnùn-í diu ñúú caa xichí cue ñáiyu israhél. <sup>13</sup> Te úní yuyèhe-xi nchií ndàa xio nacúaa quène nchíanchii, te úní tucu yuyèhe-xi nchií ndàa nacúaa quèe nchíanchii, te úní tucu yuyèhe-xi nchií ndàa xio cuha nacúaa quène nchíanchii, te úní tucu yuyèhe-xi nchií ndàa xio datní nacúaa quène tucu nchíanchii. <sup>14</sup> Te sá ñúhú dòco-án chí úxúú tnàhá yúú cùú cìmientú-xi, te ndi tñahá ñúú ñúú yúú-án ndéé ñúú caa diu cue téé ní cáhá<sup>n</sup> tnúhu Yaá cáá datná cáá ñúú mbéé quiti ní dánicuehé-güedé, te diu mee-gá ní táuchúú-gá ní cáhá<sup>n</sup>-güedé tnúhu-gá.

<sup>15</sup> Te espíritú sá càhá<sup>n</sup> ndihi ñaha xii-í-án néhé-xi ñúú sá caní ní cuáha mee-ni díhú<sup>n</sup> cuáa<sup>n</sup>, te ndihi xíá<sup>n</sup> chicùhá-xi ñúú-án, ndihi sá ñúhú dòco ñúú-án, ndihi nchaa yuyèhe-xi. <sup>16</sup> Te ñúú-án ñúú-ñi nèhe-xi cuendá quèhé<sup>n</sup>-xi ndihi cuendá caní-xi, te espíritú-án ní chicùhá-xi ndihi sá néhé-xi-án ñúú-án, te nèhe-xi ócò úú cièndú mìl mètrú sá caní te diu-ni duca<sup>n</sup> nèhe-xi cuendá quèhé<sup>n</sup>-xi, te diu-ni duca<sup>n</sup> nèhe-xi sá dúcú<sup>n</sup> nchaa vehe càa ñúú-án. <sup>17</sup> Te dátñuní ní chicùhá-xi sá ñúhú dòco ñúú-án, te xíá<sup>n</sup> néhé-xi únidico cùmí mètrú sá dúcú<sup>n</sup>, te ní chicùhá-xi datná chicùhá cue ñáiyu ñuyúú-a.

<sup>18</sup> Te sá ñúhú dòco-án ní cuáha mee-ni yúú váha yúú sá nání jáspe, te nihíí ñúú-án cùú-xi mée-ni díhú<sup>n</sup> cuáa<sup>n</sup>, te càa datná cáá vidiúú sá ío váha càndoo te tùu ndàa ingá xio. <sup>19</sup> Te ndi úxúú yúú cùú cìmientú sá ñúhú dòco-án ndéé ndí díí<sup>n</sup> núú yúú vii càa sáta-xi, te yúú díhna ndéé mee-ni yúú váha sá nání jáspe

sátá-xi, te yúú cóú úú ndéé tucu ingá núú yúú váha sá nání zafirú sátá-xi, te yúú cóú ùní ndéé tucu ingá núú yúú váha sá nání ágatá sátá-xi, te yúú cóú cùmi ndéé ingá núú yúú váha sá nání èsmeraldá sátá-xi. <sup>20</sup> Te yúú cóú ùhú<sup>n</sup> ndéé tucu ingá núú yúú váha sá nání ònicé sátá-xi, te yúú cóú ìñú ndéé tucu ingá núú yúú váha sá nání còrnaliná sátá-xi, te yúú cóú ùsá ndéé tucu ingá núú yúú váha sá nání crisólítú sátá-xi, te yúú cóú ùná ndéé tucu ingá núú yúú váha sá nání bèrilú sátá-xi, te yúú cóú ìñú ndéé tucu ingá núú yúú váha sá nání tòpacíú sátá-xi, te yúú cóú ùxí ndéé tucu ingá núú yúú váha sá nání crisòpásá sátá-xi, te yúú cóú ùxí ìñú ndéé tucu ingá núú yúú váha sá nání jàcintú sátá-xi, te yúú cóú ùxúú ndéé tucu ingá núú yúú váha sá nání àmatístá sátá-xi. <sup>21</sup> Te ndi ùxúú yuyèhe sá ñúhú dòco-án cóú-xí mèe-ni yúú váha sá nání pèrlá, te ndùu ni yúú cóú ìñú ìñú yuyèhe-án. Te tnuú cáhnú ndècu xítí ñúú-án cóú-xí mèe-ni díhú<sup>n</sup> cuàán, te càa-xi datná cáá vidiúú sá tùu ndàa ingá xio.

<sup>22</sup> Te ní xini-í sá ñà túú vèhe núú chíñúhu ñáyúu Dútú Ndióxi cáá ñúú-án, chí mee-ná Dútú Ndióxi Yaá quidé ncháa-ndi túhú sá váha ndècu ñúú-án, ndihí Yaá cáá datná cáá ìñú mbéé quiti ní dánícuèhé-güedé. <sup>23</sup> Te ñúú-án ñà túú-gá xini ñúhu-xi nchícanhii dayèhé-xi, te ní yóo ñà túú-gá xini ñúhu-xi, chí mee-ná Yá Ndióxi dayèhé-gá ñúú-án ndihí Yaá cáá datná cáá ìñú mbéé quiti ní dánícuèhé-güedé. <sup>24</sup> Te cue ñáyúu nchaa ñúú cáá ñúyíú, ñáyúu ní naníhí táhú xíndecu ñúú-án dayèhé-gá núú-yu, te nchaa cue téé yíndaha ñaha xii-yu nèhe-güedé sá yíñúhu sá cóú-xí ñúú-án, te quide cahnu ñaha-güedé xii-gá. <sup>25</sup> Te yuyèhe ñúú-án ñà túú tñahí nàndedí, te ñúú-án ñà túú tñahí cundiquí<sup>n</sup>. <sup>26</sup> Te nchaa ñáyúu nèhé-yu sá yíñúhu sá cóú-xí ñúú-án te quide cahnu-yu Yá Ndióxi. <sup>27</sup> Te ñúú-án vâ cóú cùndecu ni ìñú ñáyúu ndècu ichi cuehé ichi duha, te ni ìñú ñáyúu ndehnde, te ni ìñú ñáyúu quide sá ñà túú cóú váha iní Yá Ndióxi vâ cóú cùndecu-yu ñúú-án, chí mee-ni ñáyúu naníhí táhú ñáyúu yòdo tñuní núú tútú Yaá cáá datná cáá ìñú mbéé quiti ní dánícuèhé-güedé, mee-ni ñáyúu-án cundecu-yu ñúú-án.

## 22

<sup>1</sup> Te sátá dúcá<sup>n</sup> te diu-ni espíritú-án ní dánèhé núú ñáhá-xí xii-í yúte núú ñúhú ndùte candoo canine, te ndute-án candeca-xi iní ñáyúu ni caa ni quíhí<sup>n</sup>, te ndute-án queé-xí mèi núú núcòo Yá Ndióxi ndihí Yaá cáá datná cáá ìñú mbéé quiti ní dánícuèhé-güedé. <sup>2</sup> Te cuádava tnuú cáhnú yáha xítí ñúú-án cáá yúte-án, te xio xio yuhu yúte-án ñíhnú yútnu cuu<sup>n</sup> sávidí-xi, te sávidí

nchaa yutnu-án cóú tucu-xi sá cándèca iní ñáyúu ni caa ni quíhí<sup>n</sup>, te nchaa yutnu-án cóú<sup>n</sup> sávidí-xi ùxúú xito ìñú cuía chí ndi tñahá yóo cóú<sup>n</sup> sávidí-xi, te nchaa ndaha-xi cóu-xi tátna sá cóú-xí ncháa ñáyúu. <sup>3</sup> Te vâ yóo ìñú-gá cada ìñú sá ñà túú cóú váha iní Yá Ndióxi ñúú-án. Chí ñúú-án núcòo mee Yá Ndióxi ndihí Yaá cáá datná cáá ìñú mbéé quiti ní dánícuèhé-güedé xítaxi tñuní-gá, te nchaa ñáyúu xínu cuechi núú-gá cada cahnu ñahá-yu xii-gá. <sup>4</sup> Te nchaa ñáyúu-án cundehe núú-yu Dútú Ndióxi, te tneé-yu cundéé diu-gá. <sup>5</sup> Te ñúú-án vâ quini-gá-yu niú, te ní vâ cánèhe chiu<sup>n</sup>-gá-yu ñúhú cutnùní núú-yu, te ní nchícanhii ñà túú-gá xini ñúhu-xi dayèhé ñúú-án chí mee Dútú Ndióxi dayèhé-gá, te ní caa ni quíhí<sup>n</sup> cunúú-yu cundecu-yu ñúú-án.

*Sa ta cüyatni nduu quixi tucu Xitohó Jesucristú*

<sup>6</sup> Te sátá dúcá<sup>n</sup> te ní cachí tñúhu espíritú xínú cuèchi núú Yá Ndióxi-án xii-í:

—Nchaandi túhú tñúhu-a cóu-xi mee-ni tñúhu ndáa cuiti. Te Yá Ndióxi Yaá dácáhu iní nchaa cue téé cáhá<sup>n</sup> tñúhú-gá nácúaa cáhá<sup>n</sup>-güedé ní tendaha-gá ìñú espíritú xínú cuèchi núú-gá ní quixi-xi ní dánèhé-xi nchaa ñáyúu xínu cuechi núú-gá nchaa nácúaa cada-gá, te vâ cüyaa-gá duca<sup>n</sup> cada-gá—duha cáchi espíritú-án.

<sup>7</sup> Te ní cáhá<sup>n</sup> Xitohó Jesucristú, te cáchi-gá: —¡Ío ndihí quixi tucu-í!

¡Te ío váha tñahá nchaa ñáyúu tñè nchaa tñúhu cáhá<sup>n</sup> Yá Ndióxi yódó tñuní núú tútú-a!—duha cáchi-gá.

<sup>8</sup> Te yúhú té Juáá ní tecú dóho-í nchaa nácúaa ní ngódó tñuní núú tútú-a, te ní xini núú-í nchaa nácúaa cada-xi ndéé cuèé-gá. Te sátá dúcá<sup>n</sup> ní cuu te ní ngúñí xítí-í núú espíritú sá ní dánèhé núú ñahá ncháa xiá<sup>n</sup> cuèndá chíñúhu-í-xi ní cuu. <sup>9</sup> Te ní cachí-xi:

—Vâ dúcá<sup>n</sup> càda-n, chí yúhú dicó xínú cuèchi-í núú Yá Ndióxi datná cóú yòhó ndihí nchaa dava-gá ñáyúu ndècu ndihí-n ichi-gá cáhá<sup>n</sup>-ndó tñúhu-gá, ndihí nchaa ñáyúu tñè nchaa tñúhu ndéé núú tútú-a, te xiá<sup>n</sup> cáchi-í sá vâ dúcá<sup>n</sup> càda-n, chí mee Yá Ndióxi duca<sup>n</sup> chíñúhu-n-gá—cáchi espíritú-án xii-í.

<sup>10</sup> Te ní cachí tñúhu tucu-xi xii-í, te cáchi-xi:

—Vâ chídáhu-n ni ìñú tñúhu Yá Ndióxi ndéé núú tútú-a, chí sa ní cüyatni cada-xi nchaa nácúaa ndéé tñuní. <sup>11</sup> Te daña sá ncháá ñáyúu ndècu ichi cuehé ichi duha na cùndecu-ní-yu ichi-án, te duca<sup>n</sup>-ni dáña-n nchaa ñáyúu quide nándi-gá nchaa sá cuèhé sá dúhá ná caa nahi-ni-yu nchaa sá cuèhé sá dúhá sàni iní-yu, te nchaa ñáyúu quide váha te duca<sup>n</sup>-ni na càda váha-yu cundecu-yu, te nchaa ñáyúu quide nchaa nácúaa cóu váha iní Yá Ndióxi te

diu-ni duca<sup>n</sup> na càdà-yu cundecú-yu –duha cächí espíritú-á<sup>n</sup>.

<sup>12</sup> Te ní cachí Xítoho Jesucristú:

–Cundedóho-n tnũhu na cãhá<sup>n</sup>-í-a. Ío ndĩhi quixi tucu-í, te canehé-í nchaa sã ndúú tãhú ñáyi quixi, te nãcuáa nduu chiú<sup>n</sup> ní quidé-yu ñ<sup>n</sup> ñ<sup>n</sup>-yu te duca<sup>n</sup> cunduú sã cuãñaha-ĩ nduu tãhũ-yu. <sup>13</sup> Te yúhú cùú-í Yaá sa ndècu ndéé cútñhá ní ngáva ñuyúú, te diu-ni-í cundecu-í ní caa ní quíhí<sup>n</sup> –duha cächí-gá.

<sup>14</sup> Te váha tãhú nchaa ñáyi sa ní nduu ndoo ní nduu nine iní-xi, chí ñáyi-á<sup>n</sup> ní nduu tãhũ-yu quíhu-yu xití ñuú-á<sup>n</sup>, te caxí-yu sãvidí yutnu nùtní-á<sup>n</sup> te xíã<sup>n</sup> candeca-xi iní-yu ní caa ní quíhí<sup>n</sup>. <sup>15</sup> Te ñuú-á<sup>n</sup> vã cúú quíhu ní ñ<sup>n</sup> ñáyi ndècu ichi cuehé ichi duha, ní cuè ñáyi quide nduu, te ní cuè ñáyi ndècu ichi díí iní, te ní cuè ñáyi sãhni tñaha ñáyi-xi, te ní cuè ñáyi chíñuhu nchaa sã ní cadúha cue téé ñuyúú-a cächí-yu cùu ndióxí, te ní cuè ñáyi tñhá iní dacuàndehnde, te ní ñ<sup>n</sup> ñáyi duca<sup>n</sup> xiquide vá ndúú tãhũ-yu quíhu-yu xití ñuú-á<sup>n</sup>.

<sup>16</sup> Te ní cãhá<sup>n</sup> tucu Xítoho Jesucristú, te cächí-gá:

–Yúhú Xítoho Jesucristú ní tendaha-ĩ espíritú xínú cuèchi núú-í cuendá cachí tnúhu-xi xii-n nãcuáa ndúu tnúhu cũñaha-n xii nchaa ñáyi ndècu ndihí-n ichí-í dacuáha tnúhu-í ñ<sup>n</sup> ñ<sup>n</sup> ñuú. Te yúhú cùú-í mei ñani tñhá ndĩ Daví, te cada iní-n sã cùú-í dàtná ñ<sup>n</sup> chodíní quiti quène datneé –duha cächí-gá.

<sup>17</sup> Te nchaa ñáyi cùu cuendá Xítoho Jesucristú Yaá cáá dàtná cáá ñ<sup>n</sup> mbéé quiti

ní dánícuèhé-güedé, diu-ni ñáyi-á<sup>n</sup> cúú-yu ñáyi cada iní-ó sã cúú-yu ñ<sup>n</sup> ñadĩhí xíchí tñandaha ndihí ñaha xii-gá, te ñáyi-á<sup>n</sup> ñ<sup>n</sup>-ni cãhá<sup>n</sup>-yu ndihí Espíritú Yá Ndióxí, te xãhá<sup>n</sup>-yu ndihí Espíritú-gá xii nchaa dava-gá ñáyi:

–Chí táquixi –cachí-yu xãhá<sup>n</sup>-yu ndihí Espíritú Yá Ndióxí.

Te nchaa ñáyi duca<sup>n</sup> ndèdóho tnúhu-á<sup>n</sup> vitna, te xini ñuhu-xi duca<sup>n</sup> cãhá<sup>n</sup>-yu tñhá-yu cũñhá-yu xii nchaa dava-gá ñáyi-á<sup>n</sup>, te nchaa ñáyi cuini tuha ichi-gá te na quixí-yu, te dicó duca<sup>n</sup> cùu tãhũ-yu sã cándèca iní-yu ní caa ní quíhí<sup>n</sup>.

<sup>18</sup> Te nchaa nchòho ñáyi ndèdóho nchaa nãcuáa cãhá<sup>n</sup> tnúhu Yá Ndióxí ndèé núú tütú-a cãhá<sup>n</sup>-í dóho-ndo. Te núu ñáyi na còdo-gá tnúhu chido tñuní-yu núú tütú-a, te Yá Ndióxí ío dandòho ñaha-gá xii-yu chí yáha-yu nchaa tñundòho yodo tñuní núú tütú-a te núu duca<sup>n</sup> na càdà-yu. <sup>19</sup> Te núu ñáyi na chidáhu dava tnúhu Yá Ndióxí ndèé núú tütú-a te ñáyi-á<sup>n</sup> vã ndúú tãhũ-yu cundecú-yu ñuú-gá, te ní vã ndúú tãhũ-yu sã cándèca iní-yu ní caa ní quíhí<sup>n</sup> dàtná yódó tñuní núú tütú-a.

<sup>20</sup> Te Xítoho Jesucristú Yaá cãhá<sup>n</sup> sã ncháá tnũhu-a cùu-xi tnúhu ndáá ní cãhá<sup>n</sup>-gá ní tecú dóho-í, te cächí-gá:

–Ndáá sã ío ndihí quixi tucu-í –duha cächí-gá.

Te yúhú ní xãhá<sup>n</sup>-í xii-gá:

–Duca<sup>n</sup> na cunduú, taquixi yohó Xítoho Jesucristú –duha ní xãhá<sup>n</sup>-í xii-gá.

<sup>21</sup> Te Xítoho Jesucristú ío na chindee chitúu ñaha-gá xii-ndo nchaa-ndo. Te duca<sup>n</sup> na cunduú. Te ío chí cádá ndèe iní-nã vitna.